

णमोऽस्तु णं समणस्स भगवओ जायपुत्तमहावीरस्स

# सुत्तागमे

तत्थ णं

पिहप्पिहायरियविरडयवारसुवंगच्चउल्लेखउमूलावस्सयसंजुओ

वीओ अंसो

टिप्पणपरिसिद्धाईहिं समलंकिओ



5361

JP 2  
Phu

सुट्ठुवेण

पुष्पभिक्षुणा संपादिओ

जइणथाणग 'रेल्वे रोड' गुरुगामछावणीपुव्वपंचालत्थ-

सिरिसुत्तागमपगासगसमिडमंतिणा 'बाबू रामलाल जैन'

इच्चणेण समिडअट्ठा पगासमाणीओ य ।

वीरसंबच्छरं २४८० ]

विक्रमवरिसं २०११

[ काइट्टई १९५४ ]

पढमा आविती ]

पईणं सहस्सं

[ मुल्लं २५ ]

**MUNSHI RAM MANOHAR LAL**

SANSKRIT & HINDI BOOKSELLERS

NAI SARAK, DELHI-8



प्रकाशक—बाबू रामलाल जैन तहसीलदार

मंत्री-श्रीसृजागमप्रकाशकसमिति

जैनस्थानक, रेल्वे रोड, मुड़गांव-ठावनी

(पूर्व-पंजाब)

CENTRAL JAIN MUSEUM LIBRARY, NEW DELHI.

Acc. No..... 5361.....

Date..... 31/12/56.....

Call No..... JPs 2/1 Phu.....

सर्वाधिकार समितिद्वारा सुरक्षित

मुद्रक—

लक्ष्मीबाई नारायण चौधरी, निर्णयसागर प्रेस,

२६।२८ कोलभाट स्ट्रीट, मुंबई नं. २

जमोऽस्तु णं समणस्स भगवओ णायपुत्तमहावीरस्स

## SUTTĀGĀME VOLUME II

( Containing next 21 Sūtras )

Critically edited by

Muni ŚRĪ PHŪLCHANDJĪ MAHĀRĀJ

Published by

BABŪ RAMLĀL JAIN, TAHSILDĀR

Secretary of

ŚRĪ SŪTRĀGĀMA PRAKĀŚAKA SAMITI

GURGAON CANTT ( E. P. )

V. E. 2011

1954 A. D.

FIRST EDITION ]

1000 COPIES

[ PRICE 25 Rs.

M/S. Munshi Ram Manohar P.O. Delli on 22/10/80 p. 25/-

*Published by:-*  
Babu Ramlal Jain, Tahsildar

*Secretary of*  
Śrī Sūtrāgama Prakāśaka Samiti  
Gurgaon cantt (E. P.)

---

---

ALL RIGHTS RESERVED BY THE SAMITI.

---

---

*Printed by:-*  
Laxmibai Narayan Chaudhari  
at the Nirnaya Sagar Press,  
26-28, Kolbhat Street, BOMBAY 2.

## समप्पणं

जाण किवाए मम मणस्स चवल्या नट्ठा, जेसिसुवएसेण मज्झंतकरणे संतिसंचारो  
हूओ, जाणमब्भुअचरित्तजोगेण संपदाइगयाबंधणुम्मूलणनिच्छयं पत्तो, जेसिं  
बोहवयणेहिं अखंडअत्तसुहमगो लद्धो, जेसिमपारअणुगगहवच्छल्लुच्छाह-  
दाणेण मह लेहणकलाए पउत्ती जाया, जेसि णं धारणाववहाराणुसारं  
पयासणमिणं वट्टए, तेसिमज्झप्पसत्थाणुराइअप्पडिबद्धविहारिक्कवइ-  
निक्कामपरोवयारिसंतमुदभब्बुद्धारगमहारिसिपवरथविरेपयविभूति-  
यणायपुत्तमहावीरजइणसंघाणुयाइगयसग्गपरमपुज्ज १०८

सिरिजइणमुणिफक्कीरचंदमहारायाणं पुणीयसमरणे  
हिययविसुद्धभत्तिपुब्बगं बारसुवंगचउछेयचउमू-  
लावस्सयसंजुयमेयं सुत्तागमबीयमंसं  
समप्पिणोमि ।

पुप्फभिकवू

जमोऽत्थु णं समणस्स भगवओ णायपुत्तमहावीरस्स

## श्रीसूत्रागमप्रकाशकसमिति

के

### स्थापन करने का कारण

श्रीज्ञातपुत्र महावीर जैनसंघीय मुनिश्री फूलचंद्रजी महाराज जैनधर्मोपदेष्टाकी सेवामें एक किसानने वैदिक प्रेस अजमेर द्वारा प्रकाशित चारों वेदोंकी एक पुस्तक पेश की तथा विनयपूर्वक निवेदन किया कि क्या जैन शास्त्र भी एक पुस्तकाकारके रूप में कहीं मिलते हैं ? श्रीमहाराजने फर्माया कि नहीं । इस घटना के समय वहां की जैन सभा और विशेषतया जैनधर्मोपदेष्टाजी को यह त्रुटि बहुत ही अखरी और बड़ा ही खेद हुआ । जैनसाधु सैकड़ों की संख्यामें होते हुए और लाखों धनिक श्रावक होनेपर भी वे जैन सिद्धान्तका अणुमात्र भी प्रचार न करें ! कितना खेद है, सच तो यह है कि अपनी पवित्र समाजके पास प्रेस और प्लेटफॉर्म जैसी आधुनिक प्रचारकी सामग्री न होनेके कारण इतर लोकसमाज का बहुभाग जैन-सिद्धान्तों से विल्कुल अपरिचित है । ईसाइयोंने एक अरबसे अधिक रुपया व्यय करके जगत् भरकी ५६६ भाषाओंमें बाईबिलका प्रचार किया है इसी भाँति गीता और कुरान आदि का प्रचार भी करोड़ों प्रतियोंमें पाया जाता है परन्तु अपने सूत्रसिद्धान्तों का प्रचार लोकभाषामें कितना है ? इसका उत्तर हम सगर्व मस्तक उठाकर नहीं दे सकते ।

इस भारी कमीको पूरा करनेके लिए श्रीमहाराजने हमें यह प्रेरणा दी कि कमसे कम १०० लोकभाषाओंमें ३२ सूत्रोंकी १०००००० एक लाख प्रतिओंका प्रकाशन करके भारत के कोने २ में जैनसिद्धान्तोंका विस्तार किया जाय । अतः सूत्रागम, अर्थागम और उभयागमकी प्रकर्ष एवं आर्ष पद्धतिसे “श्रीसूत्रागमप्रकाशकसमिति” ने इस भगीरथ कार्य को अपने हाथमें लिया है और कार्य आरंभ कर दिया है अतः जिनशासनके प्रेमियोंको उचित है कि समितिके प्रकाशनों का स्वाध्याय आप स्वयं करें और अपने घरमें भी समस्त कुटुंबमें स्वाध्याय तपका उत्साह पैदा करें ।

“न स्वाध्यायसमं तपः ।”

निवेदक

मंत्री-रामलाल जैन

श्रीसूत्रागमप्रकाशकसमिति

गुड़गाँव-छावनी ( पूर्व पंजाब )

जमोऽन्धु णं समणस्स भगवओ णायपुत्तमहावीरस्स

## श्रीसूत्रागमप्रकाशकसमिति

( गुड़गाँव पूर्व पंजाब )

हवाई तूफानकी अंधड़ प्रगतिके समान चलनेवाले इस युगमें प्रचार के कार्यका महत्व समझाने की आवश्यकता नहीं रह जाती। क्यों कि “मूली गाजर और साग भी बोलनेवाले के ही विकते हैं।” इसे कौन नहीं जानता। तदनुसार हमारी संस्थाने भी जिस कामका भार उठाया है, जैन जगत्को इस विषय में कुछ समझानेकी आवश्यकता है यदि आप ध्यान देकर पढ़ जायँ तो परिस्थिति समझनेमें तनिक भी विलंब न होगा।

इस संस्थाको साधन-सामग्री मिलनेपर पाँच कार्य अपनी समाज के हितार्थ करने हैं, जैसे कि—

- ( १ ) आगम-सूत्र तथा भगवान् के सिद्धान्तोंको लोकभाषाओंमें प्रगट करना।
- ( २ ) अपने मुनिराजोंको प्रखर एवं प्रकांड विद्वान बनाना।
- ( ३ ) दुनियाभरके पुस्तकालयोंमें आगमसूत्रों के पहुँचानेकी व्यवस्था करना।
- ( ४ ) जैन धर्मके तत्वोंका प्रचार करनेके लिए उच्चकोटीके योग्य लेखक और प्रचारक तैयार करना तथा भारत के मुख्य २ केंद्रोंमें चर्चासंघ स्थापन करना, जिनमें अनेकांतीय चर्चाकार भगवान्के स्याद्वाद को विश्वव्यापी बनानेमें तारतम्य चर्चा कर सकें।

( ५ ) जैन-विचारोंकी अपेक्षा रखकर जैन-यूनीवरसिटी स्थापन करना।

इनमें सबसे पहले १-२-३ नं० के कार्योंको सफल बनानेका निश्चय किया है।

**पहला कार्य—**सूत्रागम, अर्थागम और उभयागमकी सौत्रिक रीतिके अनुसार ३२ आगमोंका मूल तथा उनके हिन्दी आदि अनुवाद प्रकाशित किए जायँगे। तदनन्तर ३२ आगमोंकी प्राकृतटीका और संस्कृतटीका आधुनिक युगकी पद्धतिसे रची जायँगी। जो कि अपने समयकी अभूतपूर्व और अश्रुतपूर्व वस्तु होगी। साथ ही समाजमें प्राकृत भाषाके प्रचारार्थ ‘प्राकृतं’ या ‘पाइयं’ जैसे पत्र भी निकाले जायँगे जिसमें मात्र प्राकृत और अर्धमागधीके लेखकों ही स्थान मिलेगा। सूत्रागमप्रकाशनके साथ २ एक ‘प्राकृतकोष’ प्राकृतगाथाबद्ध तैयार किया जा रहा है। जिसकी १११८ गाथाओंकी रचना भी हो चुकी है। यह सागरके समान बड़ा और रचनामें अद्वितीय विलक्षण और सुगमतामें इतना उत्तम होगा कि फिर किसी भी प्राकृतकोषका आश्रय लेनेकी तनिक भी आवश्यकता न पड़ेगी।

इसके अतिरिक्त स्थानकवासी धारणा के अनुसार त्रिशष्टिशलाकापुरुषचरित्र और एक हजार कथाओंका एक बड़ा कथाकोष भी तैयार किया जायगा। ये दोनों ग्रन्थ भी प्राकृत में ही रचे जायेंगे।

आपको यह भी स्मरण रहे कि 'सुत्तागमे' नामक पहला ग्रंथ १३५० पेजका महान् पुस्तकाल प्रकाशित हो चुका है जिसमें ११ अंग सूत्र समाविष्ट हैं दूसरा भाग आपके करकमलोंमें है ही, जिसमें शेष २१ सूत्रोंका समावेश है जो कि प्रत्येक जैन के 'गृहपुस्तकालय' की अमूल्य विभूति है और साधु मुनिराजोंके हृदयकी तो आदर्श वस्तु है। अधिक क्या लिखा जाय! हाथ कंगनको आरसी क्या? वस्तुका तथ्य सामने प्रस्तुत है इसे देखकर आपका अंतरात्मा एकदम यही कह उठेगा कि यह तो बौद्धोंके "ए-र-रि-य-ङ्, क्यू-अर-रि-य-ङ्" के समान् महाकाय विभूति हमारी समाजमें भी है! इसका अर्थागम और उभयागम लोकभाषाभाषियों के लिए तो मानो सम्यग्ज्ञानका महाभंडार ही होगा। इसका देहसूत्र इतना विशालतम होगा जैसा कि एनसाईक्लोपीडिया-ब्रिटानिका का महाग्रंथ होता है। इस ग्रंथमहोदधिमें जिस जटिल विषयको ढूँढोगे उसका उत्तर तुरन्त आपको उसीमें मिलेगा! मिलेगा! मिलेगा! और फिर मिलेगा! यह छाती ठोक कर दावेसे कहा जा सकता है, जिनवाणी के द्वारसे भला कोई मुमुक्षु या जिज्ञासु कभी निराश लौटा है? कभी नहीं। तब फिर रेडियोपर यद्वा तद्वा बोलनेवालोंकी तृती बंद हो जायगी।

ये प्रकाशन इतने शुद्धतम और पवित्र होंगे कि धर्मानंदकौशांबी जैसे धर्मोपहासकोंके पैरके तले से धरती खिसकती प्रतीत होगी। आगमके तीनों भागोंका स्वाध्याय आपको बता देगा कि सचमुच जैन धर्म कितना विश्वव्याप्य धर्म है।

अभी २ हाल ही में विश्वशांतिके इच्छुक (लगभग ४० देशके) विद्वानोंकी एक सभा शांतिनिकेतनमें हुई थी। उन्होंने वहां जैनधर्मसंबंधी चर्चा खूब जी भर कर की थी। जिसका सार कलकत्ता यूनीवरसिटीके अंतर्राष्ट्रीय ख्यातिप्राप्त डॉ. कालीदास नागने स्पष्टशब्दोंमें बिना किसी लागलपेट के यह प्रकट किया है कि "जैन धर्म सार्वभौमिक धर्म है।" परन्तु खेदका विषय है कि जैनोंने जैनसिद्धान्तोंका विश्वव्यापी प्रचार ही नहीं किया, वरन् यह अखिलविश्वका लोकप्रिय धर्म बनता। सच कहा जाय तो जैन साहित्यका प्रचार दुनियामें सौवें भागमें भी

१ लंदनमें "ब्रिटिश एण्ड फॉरेन बाइबिल सोसायटी" नामकी एक संस्था बहुत पुरानी है। इसका उद्देश्य बाइबिलका प्रचार करना है। इसके १२० वें नियमसे बहुत कुछ ज्ञातव्य सामग्री मिलती है इसका कुछ सारभाग इस प्रकार है।

लोकभाषाओंमें दृष्टिगत नहीं है । फिर भी जैन धर्मने भारतीयसंस्कृतिके नाते बहुत कुछ अर्पण किया है । सचमुच मानवजीवनकी सार्थकता भी इसीमें समाई हुई है । जोकि प्रत्येक मानव के लिए उपादेय और आवश्यक है । विश्वसिद्धान्तके समान इसका प्रचार करनेकी भी पूरी ज़रूरत है । जब अखिल विश्व के विद्वान् इतने ऊँचे स्पष्ट अभिप्राय दे रहे हैं तब हमारे पास विशेष समझाने के लिए क्या कुछ शेष रह गया है ?

विश्वजगतमें एनसाईक्लोपीडिया ब्रिटानिका नामक प्रसिद्ध ग्रंथ है । हमारे प्रिय आगमत्रय भी उसी पद्धतिके अनुसार महनीयता और महानता प्राप्त होंगे । एनसाईक्लोपीडिया ब्रिटानिका ग्रंथ १२० वर्ष पहिले बना है । अबतक कई परिवर्तनोंके साथ २ उसकी १४ आवृत्तिएँ निकली हैं । प्रकाशनकी दृष्टिसे यह ३५ बार प्रकाशित हुआ है । प्रत्येक संस्करण के प्रकाशन के समय कमसे कम १० लाखसे ५० लाख तक प्रतिएँ प्रकाशित हुई हैं । कुछ दानियोंके प्रोत्साहन मिलनेसे हम भी इसी परिपाटी के अनुसार आगमत्रयको सारे संसारके योग्य और सुकोमल हाथोंमें पहुँचाना चाहते हैं । जिससे दो अरब मानवप्रजा लाभ उठा सके । ऐसी आशा ही नहीं बल्कि हमारा पूर्ण दृढ़ विश्वास है । मात्र आप तो प्रस्तुत आगम पाकर उनका स्वाध्याय करके हमारे हौसले को बढ़ाएँ ।

इस संस्थाकी स्थापना सन् १८०४ ई. में होनेके पश्चात् इसने बाईबिलकी ३४५०००,००० प्रतियाँ प्रसिद्ध करके वितरण की हैं और अब तक ५६६ भाषाओं में बाईबिल प्रसिद्ध किया है ।

बाईबिलका अनुवाद अंग्रेजीसाम्राज्यकी ३६६ भाषाओंमें हो चुका है । भारत-वर्ष में १०२ भाषाओंमें वह अब तक छप चुकी है । इस संस्थाके पुस्तकोंका मूल्य लागत पर न लिया जाकर लोगोंकी शक्तिके अनुसार लिया जाता है । गोस्पेलकी प्रकाशित बाईबिल आपको भारतवर्षमें आधे पैसेमें मिलेगी और चीनमें एक पेनीकी ६ प्रति मिलेगी । तथा जहाँ पैसेकी व्यवस्था न हो वहाँ यथासमय जो वस्तु मिल सकती हो उसी वस्तुको लेकर पुस्तक दिया जाता है । कोरियामें पुस्तकके भारसे दुगना अनाज लेकर बाईबिल दिया जाता है । तथा किसीको अधिक आवश्यकता बतानेपर एक आल्ह लेकर बाईबिलकी एक प्रति दी जाती है । भारत-वर्षमें तो लाखों प्रतिएँ मुफ्त भी दी जाती हैं ।

नोट—जैनधर्मके स्तंभ दानवीर उदार लखपति करोड़पतियोंने भी क्या कभी इस प्रचार की ओर ध्यान दिया है ? भगवान् महावीर की प्रत्येक जैनको देन है और उसे भगवान् की वाणीकी उन्नतिसे ही पूरा किया जा सकता है ।



एनसाईक्लोपीडिया ब्रिटानिका हजार पेजका बोल्युम है इसी भांति तीस बोल्युमका वह एक सेट है अर्थात् वह महान ग्रंथ तीस हजार पेजोंमें पूरा हुआ है। इसी प्रकार हम आगमत्रयको इससे भी बड़ा बनानेके इच्छुक हैं। यद्यपि इस भगीरथ-कार्यको पूरा करनेमें कई वर्ष लग सकते हैं फिर भी कागजके मिलनेमें सुगमता और प्रेसका सुभीता मिल सके तो हम इस भीष्मकार्यको १० वर्षमें पूर्ण करनेका दावा कर सकते हैं। परन्तु हमारी समाजके ऐसे सद्भाग्य कहां? फिर भी जगतके मानव आशाकी दीवार पर खड़े हैं। पुरुषार्थ करना ही तो मात्र अपना काम है।

रामको सुग्रीवका साथ मिला तो लंकापर रामको विजय प्राप्त हुई। बुद्धको तो मात्र पंचवर्गीयभिक्षुओंने अपने जीवनका योग दिया तो आज ८० करोड़से अधिक बौद्ध दुनियापर छाए हुए हैं। इसी प्रकार प्रत्येक कार्यमें पुष्टसहयोगकी आवश्यकता हुआ ही करती है। इसी दृष्टिसे आपको ज्ञातपुत्र महावीर भगवानके शासनका सम्मानध्वज ऊंचा उठाने के लिए इस संस्थाके सहायक बनकर सब्बे साथियोंकी भाँति सेवाकी आवश्यकता है और इसे जातीयता एवं साम्प्रदायिकताके मोह और भेदभावको छोड़कर साथ दें तो अतिउत्तम हो। इसकी उन्नति कामना और सेवाकी अभिलाषा की साथ पूर्ण करने के लिए सहयोगियोंके नाते आप भी स्तंभ, संरक्षक, सहायक और सदस्य बनकर २०००/१०००/५००/ और २००/ की आर्थिक सेवा द्वारा जिनशासनके उत्थानका बीजारोपण करें। ऊपर लिखित चारों वर्गोंके आजीवन सदस्योंको एक एक प्रतिके रूपमें समिति के प्रकाशन अमूल्य भेंट दिए जायँगे। समितिकी नीतिका निर्धारण करते समय उनसे सब प्रकारका परामर्श किया जायगा। अब तक जिन साथियोंकी सेवासे यह भीष्म कार्य हो रहा है उनका विवरण इस प्रकार है।

### अबतकके साथी—

स्तंभ—श्रीमान् शेठ शंभुलाल कल्याणजी (कराचीके भूतपूर्व S. S. जैन संघके प्रमुख) बंबई।

” ” लाला प्यारेलाल जैन दूगड़ अंबरनाथ C. R.।

” श्रीमान् शेठ रतनचंद भीखमदास बांठिया मु० पो० पनवेल जि० कोलाबा।

” मास्टर दुर्गाप्रसाद जैन B. A. B. T. मु० गुडगाँव—छावनी B. P.।

जैन संघ **दौंडायचा** पश्चिम खानदेश ४१००/ प्रेसमें भेजा छपाई खाते।

माटुंगाके कई सद्गृहस्थोंकी ओरसे २७००/ छपाई खाते, हस्ते शेठ रामजी अंदरजी माटुंगा (हैपीहोम—तैलिंग क्रॉस रोड)।

श्रीमान् शेठ विजयकुमार चुनीलाल फूलपगर C/o चुनीलाल वृद्धिचंद फूल-  
पगर १३६० भवानीपेठ पूना ।

**संरक्षक**-श्रीमान् शेठ मोहनलाल धनराज कर्णावट (कोयालीकर) C/o रूप-  
चंद चुनीलाल कोयालीकर १३५८ भवानीपेठ, पूना ।

- „ श्रीमान् शेठ धूलचंद सहता, ब्यावर ।
- „ श्रीमान् शेठ नाथालाल पारख-माटुंगा, मुंबई १९ 'कागज़की सेवा' ।
- „ श्रीमान् शेठ चुनीलाल जसराज मुणोत मु० पनवेल (कोलावा) ।
- „ श्रीमान् शेठ लवीलदास त्रिभुवनदास लींबडी वाले हाल रंगून ।
- „ श्रीमान् लाला ओंप्रकाश जैन दूगड़ अंबरनाथ ।
- „ श्रीमान् लाला दर्शनप्रकाश जैन दूगड़ अंबरनाथ ।
- „ श्रीमती शांतिदेवी प्यारेलाल जैन दूगड़ अंबरनाथ ।
- „ श्रीमान् शेठ जुगराजजी श्रीश्रीमाल C/o शेठ नवलमल पूनमचंद  
मु० पो० येवला, जि० नासिक ।

**सहायक**-श्रीमती लीलादेवी चुनीलाल फूलपगर १३६० भवानीपेठ पूना ।

- „ श्रीमती पतासीबाई धनराज कर्णावट (कोयालीकर)  
C/o रूपचंद चुनीलाल १३५८ भवानीपेठ पूना ।
- „ D. हिम्मतलाल एण्ड कं० १२-१४ काजी सम्यद स्ट्रीट  
मुंबई नं० ९ ।
- „ श्रीमान् वीरचंद हरखचंद मंडलेचा धामोरीकर मु० येवला  
(नासिक) ।
- „ „ चाँदमल माणकलाल मंडलेचा धामोरीकर, कपडा  
बाजार मु० पो० येवला (नासिक) ।

श्री० व० स्था० जैन संघ धरणगाँव और हिंगोना १०००) प्रेसमें ।

श्रीमान् शेठ धनजी भाई मूलचंद दफ्तरी निवास तैलंग क्रॉस रोड N. १  
माटुंगा मुंबई १९ ।

लाला सुमेरचंद लक्ष्मीचंद-चंद्रमान जैन आर्थन मचेंट बंबई-देहली ।

श्रीमान् शेठ शिवलाल गुलाबचंद मेवावाले ६२५) 'कागज़०' माटुंगा मुंबई १९ ।


वोरा मणीलाल लक्ष्मीचंद ५००) 'कागज़ खाते' ठि. रानडे रोड, B. लेन,  
ज्ञानमंदिरनी बाजुमां, प्रीमियर हाईस्कूलना ऊपर, त्रीजे माले हम नं० १७ दादर ।

श्रीमान् चीमनलाल सुखलाल गांधी हस्ते ३५०) 'कागज़ खाते' (शिव-साइन) ।

सदस्य-श्रीमान् शेठ धनराज दगडूराम संचेती भवानीपेठ पूना ।

- „ श्रीमान् फूलचंद उत्तमचंद कर्णावट ( कोयालीकर )  
C/o रूपचंद उत्तमचंद २३ भवानीपेठ पूना ।
- „ श्रीमती शांतादेवी फूलचंद कर्णावट ( कोयालीकर )  
२३ भवानीपेठ पूना ।
- „ श्रीमान् रूपचंद दगडूराम मुथा, १३४ नानापेठ पूना ।
- „ श्रीमान् शेठ चंद्रमान रूपचंद कर्णावट इचलकरंजीवाले २६१।२  
बुधवारपेठ पूना ।
- „ श्रीमान् शेठ कालीदास भाईचंद शाह पोवइनाका सेल पेट्रोल पंप  
२५१) कागज़की सेवा नॉर्थ सतारा ।
- „ श्रीमान् शेठ माणकचंद राजमल बाफणा वडगाँव ता० मावल पूना ।
- „ श्रीमान् शेठ मणीलाल केशवजी खेताणी घाटकोपर मुंबई ।
- „ श्रीमान् बाबू रामलाल जैन तहसीलदार गुडगाँव छा. B. P. ।
- „ श्रीमान् शेठ पानाचंद डाह्याभाई महता २५१) 'छपाई खाते'  
माटुंगा, मुंबई १९ ।
- „ श्रीमान् शेठ अमृतलाल अविचल महता २५१) 'छपाई खाते'  
माटुंगा, मुंबई १९ ।
- „ डॉ. चुनीलाल दामजी वैद्य ४१२ पायधुनी मुंबई नं. ३ ।
- „ श्रीमान् शेठ वेलजी कर्मचंद कोठारी C/o मणिलाल एण्ड कम्पनी  
५३ चकला स्ट्रीट, मुंबई नं० ३ ।
- „ श्रीमान् शेठ कांतिलाल J. गांधी माटुंगा, मुंबई १९ ।
- „ श्रीमान् शेठ सुखराज धनराज तालेडा ( तीन रिम कागज़की सेवा )  
१५ ससून रोड पूना स्टेशन ।
- „ श्रीमान् नरभेराम मोरारजी महता C/o विमको अंबरनाथ C. R. ।
- „ श्रीमान् शेठ भाईचंद लाखाणी माटुंगा मुंबई १९ ।
- „ श्रीमान् केसरमल हजारीमल धाडीवाल मु० पो० कोपरगांव,  
जि० अहमदनगर C. R. ।
- „ श्रीसमस्त जैनसंघ सोनई, ता० नेवासा, जि० अहमदनगर  
C/o केसरचंद कुंदनमल, चंगेडिया ।
- „ श्रीमान् मणीलाल रूपचंद गांधी, भांडुप, मुंबई ।

- „ श्रीमान् त्रिकमजी लाधाजी मु० पो० जुन्नरदेव (M. P.) ।  
 „ श्रीवर्धमान स्था. जैन संघ शाहादा प. खा. ३००) ।  
 „ श्रीमान् बख्तावरमल चांदमल भंसाली खेतिया (M. B.) ।  
 „ श्रीमान् शेठ धनराज पगारिया मु० हिंगोना पू. खा. ।  
 „ श्रीमान् क्रीमतराय जैन B. A. दादर मुंबई ।  
 „ श्रीमान् खींवरज आनंदराम बांठिया पनवेल (कोलाबा) ।  
 „ श्रीमान् लाला कुलवंतराय जैन नारायण ध्रुव स्ट्रीट मुंबई ।  
 „ श्रीमान् केसरचंद आनंदराम बांठिया मु० पनवेल (कोलाबा) ।  
 „ श्रीरावसाहेब किशनलाल नंदलाल पारख येवला ( जि० नासिक ) ।  
 „ श्रीमान् शेठ वेरसी नरसी भाई मु० त्रंबोळ ( रापर ) कच्छवाला,  
 वसनजी वीरजी, जोशी बाग पारसी चाल, मु० कल्याण ( जि०  
 थाणा ) ।  
 „ श्रीमान् शेठ शोभाचंद घूमरमल बाफणा घोडनदी पो० सिरूर  
 ( पूना ) ।  
 „ श्रीमान् शेठ रविचंद सुखलाल शाह, संघवी सदन, दादर ।



## प्रकाशकीय

आजके इस वैज्ञानिक युगमें जहां मनुष्यने विज्ञानके द्वारा नई २ व्यवहारोपयोगी वस्तुओंका आविष्कार किया है वहां महान् से महान् संहारक उद्‌जनकम जैसे शस्त्रोंका भी । यह सब किसलिए ? मेरी सत्ता समस्त संसारपर छा जाए, मैं ही सबका प्रभु हो जाऊँ । एक ओर तो शस्त्रोंकी होड़में एक देश दूसरे देशसे आगे निकल जाना चाहता है तब दूसरी ओर आधुनिक जनता का अधिक भाग युद्धको न चाहकर शांतिकी संखना करता है । परन्तु शांति शस्त्रोंके बलबूते किए गए युद्धोंसे नहीं मिल सकती । शांतिका वास तो आध्यात्मिकतामें है भौतिकतामें नहीं, और ज्ञातपुत्र महावीर भगवान्‌के द्वारा प्रतिपादित आगम आध्यात्मिकतासे भरपूर हैं, उस आध्यात्मिकताके प्रसारके लिए ज्ञातपुत्र महावीर जैनसंघानुयायी उग्रविहारी जैन मुनि १०८ श्रीफूलचंद्रजी महाराजकी विशुद्ध प्रेरणासे समितिने आगमोंके प्रकाशनका कार्य अपने हाथमें लिया है जिसका प्रथम फल ११ अंग सूत्रों से युक्त 'सुत्तागम' के प्रथम भाग के रूपमें आपके सन्मुख आ चुका है । ३२ सूत्रोंको 'सुत्तागम' के रूपमें एक ही जिल्दमें देनेकी उत्कट इच्छा होते हुए भी ग्रंथराजका देह-सूत्र बढ़ जानेसे ११ अंगोंका प्रथम अंश अलग बनाना पड़ा और यह दूसरा अंश आपके समक्ष है जिसमें १२ उपांग, ४ छेद, ४ मूल और आवश्यक इस प्रकार २१ सूत्रोंका समावेश है । परिशिष्टमें कल्पसूत्र सामायिक तथा प्रतिकमण सूत्र भी हैं । इसका सारा श्रेय जैनधर्मोपदेष्टा उग्रविहारी बंग-सिंधु-उत्तरप्रदेश-बिहार-पांचाल-हिमाचल-महाराष्ट्र-गुजरात-मध्यभारत-मरुस्थलादि-देश-भावनकर्त्ता परम पूज्य १०८ श्रीफूलचंद्रजी महाराज को है जिन्होंने अपना अमूल्य समय देकर इस महान् ग्रंथ का संपादन किया है । आपकी विद्वत्ता, वक्तृत्व और प्रभाव सर्वविदित है । आपने 'नवपदार्थज्ञानसार' 'परदेशी की प्यारी बातें' 'गल्पकुसुमाकर' 'गल्पकुसुमकोरक' 'सम्यक्त्वछप्पनी' 'आगम शब्द प्रवेशिका' आदि कई ग्रंथों की रचना की है । 'वीरस्तुति' की विस्तृत टीका, शांतिप्रकाशसारमंजरी, आदि संस्कृत रचनाएँ भी की हैं । आपके द्वारा लिखा गया मेरी 'अजमेरमुनि-सम्मेलन यात्रा' के रूपमें अजमेर साधु-सम्मेलन का इतिहास इतिहासविशेषज्ञों एवं अन्वेषकों के लिए अत्यंत उपयोगी है । आपने कई एक ग्रंथोंका सुन्दर संपादन भी किया है । इस 'सुत्तागम' का संपादन करके आपने जो उपकार किया है वह वर्णनातीत है । इसके अतिरिक्त इस प्रकाशनमें जिन २ महातुभावोंने प्रत्यक्ष या परोक्ष रूपमें किसी भी प्रकारकी जिनवाणीकी सेवा की है उनका हम हार्दिक

આભાર માનતે હૈં, સાથ હી સૂત્રોંકે નિકલે હુએ અલગ ૨ પ્રકાશનોંપર અથવા પ્રથમ અંશપર જિન ૨ મુનિવરોને અપની ૨ શુભ સમ્મતિએં મિજવાઈ હૈં હમ અનેકે અનુગ્રહીત હૈં । સહધર્મિ મહાનુભાવોસે નિવેદન હૈં કિ વે ઇસ પવિત્ર કાર્યમેં સહયોગ દેકર હમારે ઉત્સાહકો બઢાએં ।

**હમ હૈં જિનવાળીકે સેવાકાંક્ષી,**

**પ્રધાન-માસ્ટર દુર્ગાપ્રસાદ જૈન B. A. B. T.**

**મંત્રી-બાબૂ રામલાલ જૈન તહસીલદાર**

**‘સુત્તાગમે’ પર લોકમત**

**( ૨૫ ) કવિ મુનિ શ્રી નાનચંદ્રજી મં સાયલા ૫૧/૫૪**

સેહી ભાઈ શ્રીશંભુલાલ કલ્યાણજી ! તમારા તરફથી પોષ્ટકાર્ડ અને બીજે કે ત્રીજે દિવસે ‘સુત્તાગમે’નું દઢદાર વોલ્યુમ પોષ્ટપાર્સલથી મલ્યું. પુસ્તક આવી રીતે સુંદર આકારમાં ( અગિયાર અંગ મેળા ) વંધાણ હશે એની કલ્પના પણ ન હતી. હું એમ માનતો હતો કે વધા પુસ્તકો છૂટા છૂટા હશે...પણ આ તો ઘણું સુંદર કામ થયેલ છે. આમાંના કાગલો પણ સારા છે. આ ઉપર થી એમ ચોક્કસ થાય છે કે શાસ્ત્રોદ્ધારનું કાર્ય ગૃહસ્થિઓ કરતાં કોઈ સુવિહિત અને કર્મનિષ્ઠ સાધુ કરે તો તે કેતું સર્વોત્તમ નિપજી શકે છે ! આવા કાર્યોમાં સાધુને જરૂર અપવાદ સહન કરવા પડે છે પણ હિમ્મત હોય તો પરિણામે એની યોગ્ય કદર જરૂર થાય છે. અસ્તુ ! શ્રીફૂલચંદ્રજી મં ને અમારા અભિનંદન પહોંચાડશો.

x                      x                      x

આ પદ્ધતિ અમોને ગમી છે. એકંદર સૂત્રોના મૂળપાઠોનું પ્રકાશન જરૂરી હતું. શ્રીફૂલચંદ્રજી મહારાજે આ છોટ પૂરી કરી છે. જા. ૧૯-૧-૫૪ સાયલા

**( ૨૬ ) શ્રીશામજી સ્વામી                      જેતપુર ૨૪-૧૧-૫૨**

...સુત્તાગમે એ નામનું ૧૧ અંગોના મૂળપાઠવાલું મજબૂત બાઈડિંગ સાથે મંગલ પુસ્તક બુક-પોષ્ટ થી મોકલેલ તે મલ્યું છે, અને તે પવિત્ર પુસ્તક મહારાજશ્રીનાં કરકમઝમાં બહુમાનપૂર્વક સ્થાપિત કર્યું છે. તે મંગલ પુસ્તકનું દર્શન કરી મહારાજશ્રી ઘણાજ હર્ષિત થયા છે. શાસનપતિ મહાવીર પ્રમુખના પંચમ ગણધરે ૧૧ અંગોની ગૂંથણી કરી ત્યાર થી અત્યારસુધીમાં ૧૧ અંગોનું એકજ પુસ્તક બહાર પડેલ હોય તે માં આ પહેલો જ શુભ પ્રસંગ બન્યો છે, અને તે શાસન સેવા રસિક મુનિ શ્રી ફૂલચંદ્રજી સ્વામીની પુનીત ભાવનાને જ આભારી છે. x                      x                      x

**( ૨૭ ) ચરિત્રરૂપી સુગંધી વડે વાસિત પુષ્પ અને ચંદ્ર સમાન શીતલ સ્વભાવ-**

વાલા એવા હે પુષ્પચંદ્રજિત્ સ્વામિન્ ! આપશ્રી વીતરાગપ્રણીત જિનાગમોની ભાષાના અને તેમાં દર્શાવેલા ભાવોના ઘણાજ નિષ્ણાત હોઈ આપશ્રીએ જિનાગમોદ્ધારનું જે મંગલ કાર્ય હાથ ધર્યું છે તે મંગલકાર્ય આપશ્રીના હાથથી નિર્વિઘ્નપણે ચાલુ રહ્યો, અને આપના સત્પુરુષાર્થથી જેમ બને તેમ વેળાસર આપશ્રીએ ધારેલ શુભકાર્ય પૂર્ણ થાઓ એવી મારી આપના પ્રત્યે હાર્દિક શુભ ભાવના છે. સુત્તાગમે= સૂત્રાગમોના મૂળપાઠ રૂપે ૧૧ અગિયાર અંગો પ્રગટ થયા છે તેનું કામ ઘણું સુંદર થયું છે. કારણ કે આપ તે ભાષાના નિષ્ણાત હોઈ આપનાજ હાથ થી મૂળપાઠ લખાઈ પ્રેસકોપી તૈયાર થયેલ, અને તે પવિત્ર આગમો મુંબઈ નિર્ણયસાગર પ્રેસમાં છપાયા, જેથી સુવર્ણ અને સુગંધ વજ્રોનો સુમેળાપ થયો છે, તે જોઈ હૃદયમાં પ્રમોદ ભાવ ઉદ્ભવે છે. હવે પછીનું આગમોદ્ધાર અંગેનું દરેક કાર્ય તેનું જ સુંદર બનો તેમ હું ઇચ્છું છું. લિખી—**લીંબડી સંપ્રદાયના મંગલસ્વરૂપ સ્વર્ગસ્થ ગુરુદેવ મંગલજી સ્વામીના શિષ્ય મુનિ શામજી.**

( ૨૮ ) આર્યમુનિ હીરાલાલજી મ. ઝરિયા ૨૮-૮-૫૪

‘સુત્તાગમે તત્થ ણં એકારસંગસંજુઓ પદમો અંસો’ દેખકર પ્રસન્નતા હુઈ । સારી પ્રતિ શુદ્ધ હૈ । સ્વ તરહ ઉપાંગ, હેદ, મૂલ, આવશ્યક જલ્દી બાહર પડેંગે । સ્વાધ્યાયવાલોં કે લિપે ‘સુત્તાગમે’ બહુત હી ઉપયોગી હૈ ।

આર્ય જૈન મુનિ શ્રીહીરાલાલજી મ૦

( ૨૯ ) આપશ્રી તરફથી સંશોધિત ‘સુત્તાગમે’ ( મૂળસૂત્રો ) પ્રગટ થયા છે. જેની કેટલીક નકલો અમને આવેલી, જે જોતાં સંતોષ થયો. આમ શાસ્ત્રીય સાહિત્ય અને અન્ય ધાર્મિક સાહિત્ય આપશ્રી તરફથી સંશોધિત થઈ પ્રચાર પામે છે જેથી સમાજને અલભ્ય લાભ મળે છે. સમાજ આપશ્રીજીનો ઋણી છે. મુનિ રત્નચંદ્રના વંદન **કચ્છ-માંડવી**

( ૩૦ ) ભવયા સંપાદિઓ ઇકારસંગસંજુત્તો પદમો અંસો સુત્તાગમસ્સ સુચારુલેખ મુદ્ધિઓ તદ્યા ભોમવાસરે સંપત્તો, સો સામારસીકઓ મણે । દિટ્ઠિપહં ણીઓ સો મહાગંથો, તમ્મિ સંસ્થિતપાગયવાગરણવિસઓ વિ સુદ્ધ ઉવદંસિઓઽત્થિ । તસ્સ સંસો-હરં સમીચીણં કયમત્થિ ભવયા । એસો ગંથો સજ્ઞાયકરણે અજ્ઞાયણે અજ્ઞાવણે વા બહુવઓગી અત્થિ સાહ્યાગમમિતિ । અસ્સ પત્તાણિ સુહુમાણિ સંતિ, જદ્ધે ચેવ થૂલ-ગાણિ પત્તાણિ હવિજ્ઞા તો વીહાડગો હવિજ્ઞ એસો મહાગંથો ।

**રયણચંદો મુળી-મંડણડરં ( માંડવી કચ્છ )**

( ૩૧ ) મુનિ શ્રી ફૂલચંદ્રજી મહારાજ ! આપકી ઓરસે ‘સુત્તાગમે તત્થ ણં એકા-

रसंगसंजुओ पढमो अंसो' देख कर अत्यन्त प्रसन्नता प्राप्त हुई। इसी तरह उपांग, छेद, मूल और आवश्यक भी शीघ्र ही बाहर पड़ें तो बहुत अच्छा हो। अगर कुछ टाइप बड़ा होता तो कमनजरवालोंको भी पढ़नेमें सुविधा होती। साथमें अर्ज है कि शांतिनिकेतन, नालंदामें विदेशसे आए अनेक विद्यार्थी जैनधर्मविषयक सिद्धान्तको जाननेकी बड़ी उत्कण्ठा रखते हैं। 'सुत्तागमे' के साथ 'अत्थागमे' भी होना आवश्यक है।

अब तक जो २ जैनागम जैनसमाजकी ओरसे बाहर पड़े हैं उनमें कुछ न कुछ त्रुटियां अवश्य रही हैं और किसी २ जगह अन्यके ऊपर छींटाकशी भी की गई है। इन बातों की आवश्यकता नहीं। मूल पर मूलका जो आशय है वही रहना ठीक है। 'सुत्तागमे' की यह प्रति बहुत ही शुद्ध है।

### मुनि श्री हीरालालजी म० झरिया

( ३२ ) गत वर्ष श्रीसूत्रागमप्रकाशकसमिति गुड़गाँवसे प्रकाशित सूत्रोंमें द्वितीय आचारांग सूत्रादिकी पुस्तक एवं इस वर्ष भी श्रीभगवती सूत्रादि प्राप्त हुए। आपके स्तुत्य प्रयत्नके लिए कोटिशः धन्यवाद है। आगमोंका प्रकाशन इस प्रकार किया जावे तो अत्युत्तम रहेगा—

( १ ) मूल एवं भावार्थ टिप्पणी युक्त परिशिष्टमें पारिभाषिक शब्दकोष एवं जैनधर्मके विशेष सिद्धान्त और मान्यताओं पर प्रकाश।

( २ ) मूल एवं हिंदी टीका न अति विस्तृत और न अत्यन्त संक्षिप्त।

( ३ ) मूल संस्कृत छाया एवं संस्कृत टीका।

( ४ ) मूल संस्कृत छाया संस्कृत टीका एवं हिंदी अनुवाद।

इन चार प्रकारके प्रकाशनोंके बाद या साथ २ अन्यान्य भाषाओंमें अत्युत्तम अनुवाद भी निकाले जायें।

एक विशेष निवेदन यह भी है कि अनुवाद या टीकाएँ अपने सिद्धान्त परक श्रद्धासय होनी चाहिएँ। आजके प्रभाव वाले की छाया पढ़नेसे वह आजकी वस्तु होगी, त्रिकालकी वस्तु नहीं।

इसके साथ ही अभिधान-राजेन्द्र कोषकी भांति मूल प्राकृत-संस्कृत-टीका और हिंदीटीका वाला 'पुष्पकोस' भी निकलवाना चाहिए। उसकी अत्यन्त आवश्यकता है। एक ही स्थान पर जिज्ञासुको आगमोंके एक विषय पर सारे पाठ मिल सकें और अमृतपान करनेके समान पाठक प्रसन्नताका अनुभव करने लगे...

कवि-श्रीकेवलमुनि-साहित्यरत्न      उज्जैन



( ३३ ) आपकी ओरसे बुकपोष्ट द्वारा भेजा हुआ 'सुत्तागमे' का आठवाँ पुष्प प्राप्त हुआ । अत्र विराजित श्री मेवाड़भूषणजीके सुशिष्य कवि श्रीशांतिलालजी म. ठा. ४ की सेवामें प्रस्तुत किया । मुनिश्रीने आद्यन्त अवलोकन करके ये उद्गार प्रगट किए हैं—“पुस्तकराज शुद्ध एवं सुंदर है, यह वीरवाणीका अमूल्य रत्न है । सम्पादक मुनिश्री शास्त्रज्ञानका सम्पादन करके साधुताकी घड़ियोंको सफल कर रहे हैं । महाराज श्रीफूलचंद्रजी स्वामी दिग्गज विद्वान् हैं, ऐसे मुनिपुंगव द्वारा संपादित साहित्य जगतके कोने २ में प्रसरित हो इसी शुभेच्छाके साथ चरणकमलमें शत शत वंदन हो ।”

### मंत्री-व० स्था० श्रा० संघ रामा ( मेवाड़ )

( ३४ ) श्रीमान् शेट रतनचंदजी भीखमदासजी बांठिया ! जयजिनेंद्र ! आपका भेजा हुआ 'सुत्तागमे' श्रीमेवाड़भूषण १००८ मंत्री श्रीमोतीलालजी म० सा० की सेवामें पेश किया, उनके पट्टशिष्य पं० शास्त्रज्ञ मुनि श्री अंबालालजी म० ने अवलोकन कर यह सम्मति प्रदान की है कि—“यह आगम-रत्नाकर महाग्रंथ स्वाध्याय-अनुरागियों तथा शास्त्रज्ञोंके लिए अत्यन्त उपयोगी है । इस प्रकार जैनागमोंका सुंदर संकलन देखनेका सुअवसर प्रथम बार ही प्राप्त हुआ है । सम्पादक मुनिश्री जैनधर्मोपदेष्टा महामान्य श्रीफूलचंद्रजी म० की यह देन तब ही पूरी हो सकती है कि जब इस अनोखे ग्रंथका प्रचार सब देशांतरोंमें हो, साथ ही प्रत्येक संग्रहालय और गृहपुस्तकालय में रक्खा जाय और इसका स्वाध्याय किया जाय । ग्रंथराजका संकलन आदरणीय तथा प्रशंसनीय है ।”

### मंत्री व० स्था० जैन श्रा० संघ देलवाड़ा ( मेवाड़ )

( ३५ ) श्रीप्यारेलाल जैन( अंबरनाथ )के द्वारा ११ अंगोंका एक सेट 'सुत्तागमे' का मिला उसे श्रीमुनि मांगीलालजी म० ने अथसे इति तक अवलोकन किया, बड़ा सन्तोष हुआ और उन्होंने खूब सराहना करते हुए यह सम्मति पेश की—“सुत्तागमे” का संकलन अनोखे ढंगसे किया है, इसके गूढ़ रहस्यको पूर्णशास्त्रज्ञ ही समझ सकते हैं अज्ञ या दुर्विदग्ध नहीं । आपके अथक परिश्रमसे ही यह कार्य पूर्ण हो पाया है अस्तु बधाई ! इसमें शुद्धिपर अच्छे प्रकारसे ध्यान रक्खा गया है । वर्तमान ढंगसे यह आयोजन आदरणीय है, इसी ढंगके सौत्रिक प्रकाशनकी आज आवश्यकता है । मैं चाहता हूं कि आपश्री अन्य सूत्रोंका भी इसी प्रकार पुनरुद्धार करें ताकि ये शुद्ध प्रतियां जगतीतलमें भ्रामक तमस्तोमको दूर कर सही मार्गको प्रकाशित कर सकें । श्रीमुनि-मांगीलालजी म० चींचपोकली-मुंबई १२

(नोट) आपने इन पृष्ठपटोंपर अंकित सम्मतियोंसे यह तो जान ही लिया होगा कि ये प्रकाशन कैसे हैं। वैसे तो सब संप्रदायोंके मुनियों और महासतियों एवं जिज्ञासुओंकी ओरसे सूत्रोंकी मांगें धड़ाधड़ आती रहती हैं, अर्थात् सूत्रोंका प्रचार आशासे अधिक हो रहा है। ११ अंगों से युक्त 'सुत्तागमे' महान् ग्रंथकी प्रशंसा बड़े २ महाविद्वानोंने मुक्तकंठसे की है। यह अपूर्व ग्रंथराज केंब्रिज, वाशिंगटन, चेले, फिलाडेल्फिया, कैलीफोर्निया, क्लीवीलैंड, न्यूयार्क, प्रिस्टन, चिकागो (अमेरिका), जर्मन, जापान, चीन, पेरिस, सिंगापुर, मुंबई, कलकत्ता, बनारस, मद्रास, आगरा, पंजाब, देहली, भांडारकर ओरेंटियल इंस्टीट्यूट पूना आदिके महापुस्तकालयों एवं यूनिवर्सिटियोंमें भी शोभा प्राप्त कर चुका है। तथा वहांसे पर्याप्त संख्यामें प्रमाणपत्र और प्रशंसा पत्र आए हैं जिन्हें ग्रंथराज के देहसूत्रके अत्यधिक बढ़ जाने के कारण नहीं दिया गया। अधिक क्या कहें इसकी ज्यादा प्रशंसा करना मानों सूर्यको दीपक दिखाना है। इसी प्रकार अर्थागम और उभयागमों को भी यथासमय मुनियों महासतियों एवं जिज्ञासुओंके करकमलोंमें पहुँचाकर समिति अपना ध्येय पूरा करनेका प्रयत्न करेगी। समिति यही चाहती है कि हमारे मुनिगण प्रकाण्ड विद्वान् बनकर जिन-शासनका उत्थान करें एवं आगमों का सर्वत्र प्रचार हो। **मंत्री**

Letter No. I

True copy of the letter received from Prof. Daniel H. H. Ingals, Cambridge.

Cambridge Mass,

June 5, 1954.

I have received the beautiful *Nirnaya Sagar* edition of the *Suttāgame*. I express my deep thanks to Muni Shri Fulchandji Maharaj for generosity. It would be merit enough to print so large a portion of the religious writings of the Jains in one convenient volume. It really deserves the thanks of all scholars.

The volume is not only an ornament of my library but is frequently put to use.

## Letter No. 2

I have continued to read in the first volume which I find excellently edited and Singularly free of misprint. I should certainly be thankful to receive a second Volume.

Prof. Danial H. H. Ingals.

## Letter No. 3

## HARDING MUNICIPAL LIBRARY

Suttāgame is a good addition to books of the library.

I hope you will also kindly present the next Volume which is under preparation.


Thanking you.

KRISHNA GOPAL M. A.

LIBRARIAN.

Note:—These are not only the 3 letters. Besides there are number of other receipts of letters received from Various Universities & libraries all over the world which could not be published since their addition would increase the size of the Volume.

*Secretary.*




## णमोऽथु णं समणस्स भगवओ णायपुत्तमहावीरस्स

### जैन धर्मके दस नियम

- ( १ ) जगत्में दो द्रव्य Substances मुख्य हैं, एक जीव Soul दूसरा अजीव Nonsoul । अजीवके पुद्गल Matter, धर्म Medium of Motion to Soul and Matter जीव और पुद्गलके चलनेमें सहकारी, अधर्म Medium of Rest to Soul and Matter जीव और पुद्गलके ठहरनेमें सहकारी, काल Time वर्तना लक्षणवान् और आकाश Space स्थान देने वाला, इस प्रकार ५ भेद हैं ।
- ( २ ) स्वभावकी अपेक्षा सब जीव समान और शुद्धस्वरूप हैं । परन्तु अनादि-कालसे कर्मरूप पुद्गलोंके संबंधसे वे अशुद्ध हैं । जिस प्रकार सोना खानसे मिट्टीमें मिला हुआ अशुद्ध निकलता है ।
- ( ३ ) उक्त कर्ममलके कारण इस जीवको नाना योनियोंमें अनेक संकट भोगने पड़ते हैं और उसीके नष्ट होनेपर यह जीव अनन्तज्ञान-अनन्तदर्शन-अनन्तसुख और अनन्तशक्ति आदि को जो कि इसकी निजी सम्पत्ति है और जिसे मुक्ति कहते हैं प्राप्त करता है ।
- ( ४ ) निराकुलता लक्षणयुक्त मोक्षसुखकी प्राप्ति इस जीवके अपने निजी पुरुषार्थके अधिकारमें है किसीके पास मांगनेसे नहीं मिलती ।
- ( ५ ) पदार्थोंके स्वरूपका यह सत्यश्रद्धान Right belief सत्यज्ञान Right Knowledge और सत्य आचरण Right Conduct ही यथार्थमें मोक्षका साधन है ।
- ( ६ ) वस्तुएँ अनन्त धर्मात्मक हैं, स्याद्वाद ही उनके प्रत्येक धर्मका सत्यतासे प्रतिपादन करता है ।
- ( ७ ) सत्य-आचरणमें निम्न-लिखित बातें गर्भित हैं, यथा-
  - ( क ) जीव मात्र पर दया करना, कभी किसीको शरीरसे कष्ट न देना, वचनसे बुरा न कहना और मनसे बुरा न विचारना ।
  - ( ख ) क्रोध-मान-माया-लोभ और मत्सर आदि कषायभावसे आत्माको मलिन न होने देना, उसे इनके प्रतिपक्षी गुणोंसे सदा पवित्र रखना ।
  - ( ग ) इंद्रियों और मनकी वश करना एवं बहिरंग अर्थात् संसारभावमें लिप्त न होना ।

- ( घ ) उत्तम क्षमा-निर्लोभता-सरलता-मृदुता-लाघवता-शौच-संयम-तप-  
त्याग-ज्ञान-ब्रह्मचर्यात्मक धर्मको धारण करना ।
- ( ङ ) झूठ-चोरी-कुशील-मानवद्रोह-विश्वासघात-द्रोह-रिश्तत देना लेना-  
दुर्व्यसन आदि निन्द्यकार्योंसे ग्लानि करना अर्थात् उन्हें त्यागना ।
- ( ८ ) यह संसार स्वयं सिद्ध अर्थात् अनादि अनंत है इसका कर्ता हर्ता कोई  
नहीं है ।
- ( ९ ) आत्मा Soul और परमात्मा God में केवल विभाव और स्वभावका  
अंतर है । जो आत्मा रागद्वेषरूप विभावको छोड़कर निजस्वभावरूप  
हो जाता है उसे ही परमात्मा कहते हैं ।
- ( १० ) ऊंच-नीच-छूत-अछूतका विकार मनुष्यका निजका किया हुआ विकार  
है, वैसे मनुष्यमात्रमें प्राकृतिक भेद कुछ भी नहीं है ।

संजी



## सूयणा

पयासणमिणमम्ह धम्मगुरुण गरिमजियमेरुण साहुकुलचूलामणीण अहिलससु-  
 णखणीण चत्तअदत्तकलत्तपुत्तमित्ताण पसंतचित्ताण अग्गिक्क उग्गतवतेयदिताण पोम्मं  
 व अलित्ताण पागयजणमुच्छाविहाणनियाणविसयगामविरयाण पंचविहायारनिरइयार-  
 चरणनिरयाण भवोयहितारणतरंडाण अण्णाणतमोहपयंडमायंडाण मोहेभनिवारणवरं-  
 डाण पासंडिमाणसेलमहणवज्जदंडाण वाउरिव अपडिबद्धाण तवसिरिसमिद्धाण सम्म-  
 अवगयजिणमयसम्मयसुहुमयरविधारसयलभवसिद्धियलोयहिययंगमाणा सुसंजयपंच-  
 पमियतरलयरकरणतुरंगमाणा दुज्जयअणंगमायंगभंगसारंगपुंगवसरिच्छाण अक्कुव्व  
 सुयणंबुरुहवोहणअण्णाणमोहतिमिरभरहरणधम्मज्जोयकरणिकत्तच्छिच्छाण दुहतुरुडम्मू-  
 लणेक्कखरपवणाण चरित्ताणादंसणफललुद्धमुणिदसउणमेरुवणाण सारयसल्लिलं व  
 सुद्धमणाण पारिविधोहहुयासणाण संसारणवमज्जंतजीवगणतारणसमत्थवोहित्थाण  
 अट्ठिव धीरिमापडिहत्थाण जिणपवयणगयणनिसायराण मेराणाणचरणाइनिम्मल-  
 गुणरयणरयणायराण नियसुद्धुवएसदेसणाणिण्णासियभव्वजंतुजायजीवियभूयसम्म-  
 दंसणासाणपच्चलमिच्छादंसणुग्गरलाण दुज्जणदुव्वयणपवणवाए वि अतरलाण  
 विसयसुहनिप्पिवासाण मुक्कगिहवासपासाण दूरपरिचत्तविडिगिच्छाअरइरइभीइहासाण  
 मित्तसत्तुज्जणुम्मसमाणमणोविलासाण नवविहवंभचेरुत्तिसम्मसंरक्खणेक्कपरायणाण  
 दुक्कम्मदइच्चनिवहविदंसणनारायणाण **सुत्तत्थविसारयाण** जिणधम्मपसारयाण  
 मरालुव्व परगुणखीरगहणदोसंबुविवज्जणवियक्खणाण कयलक्कायरक्खणाण खं व  
 अणप्पकुवियप्पसंक्कप्पुण्णाण खंतिमुत्तिअज्जवमह्वलाघवाइपुण्णाण धरामंडलव्व  
 सव्वसहाण भवदुक्खायवसंतत्तपंथिसंतिदायगदहाण चंदणवणं व सुसीयलाण जस-  
 छाइयधरणीयलाण कंदप्पदप्पदलणिक्कमल्लाण नीसल्लाण नियनिरुवमवयणकलारंजि-  
 यसयल्लोणाण सव्वहा निम्ममयाए निरासीकयसोगाण आइसुव्व तेयसा फुरंताण  
 धम्मूव्व मुत्तिमंताण जियतिजयदप्पकंदप्पमत्तगयवियडकुंमयडदलणसीहाण निरीहाण  
 जिणगणहरसमणुच्चिणसम्ममग्गाणुयाईण निहिलागमपारयाईण परजियपियहिय-  
 मियफुडभासीण सयलगुणरासीण माणावमाणपसंसणिदणलाहालाहसुहदुहसमाणम-  
 णसाण अंसुमालिक्क फेडियदुम्मइतमसाण संतिमुत्तीण सियकितीण जीवुव्व अप्पडि-  
 हयगईण जिणपवयणाणसारमईण अमयनिग्गमुव्व सोमसहावाण महापहावाण पंचा-  
 णुव्व दुप्पधंसणिज्जाण सयलजणाभिगमणिज्जाण सासणपभावाण जीवे सम्मग्गे  
 ठावगाण जम्मजरमरणक्कल्लोललोलजलपडलपुण्णविविहमहायंकसमुल्लसंतल्लक्कणक्कवक्क-

अणवरयविसप्पिरोगसोगमयराइभीमभवणवाउ भव्वे धम्मदोणीतारणसमहु-  
कुसलकण्णधाराण धीरधुरधवलुव्व उव्वहियदुव्वहपंचमहव्वयगुरुभाराण उदहिवि  
गहीराण मोहमल्लिकवीराण पावदावग्गिनीराण दुरियरयसमीराण जिणधम्मरहसु-  
सारहीण धम्मकहीण तिगुत्तिवग्गावसीकयदुट्टमणस्साण अवगयदुग्गमसिद्धंतरहस्साण  
अपसत्थासवदारनिरोहगाण बहुभव्वजणसमाजबोहगाण जिईदियाण धम्मपियाण  
पंचविहसज्झायविहिविहाणविहावणसावहाणाण अहिलजगज्जंतुजायवियरंतअभयदा-  
णाण भवजलहिबुद्धंतंतुसंतरणअणहवरजाणाण भवभयचारयबंधणविच्छेयनिमि-  
त्तसत्ताणाण समतिणमणिल्लेद्धुकंचणाण छड्डियमयतण्हावंचणाण अण्णाणतिमिरावरि-  
यअंतरणयणजणताविइणतदुग्वाडणारिहतव्विमलयाहेउपरमणांजजणाण संखुव्व  
निरंजणाण कम्ममहीरुहकुमइलउप्पाडणगइंदाण परतिथियमियमइंदाण कासकुसु-  
मालिनिम्मलजसभरपरिभरियभुवणयलाण दारिदुमदवानलाण सोमुव्व सोम्मयागु-  
णगरिट्ठाण सव्वसाहुजणपगिट्ठाण सीहुव्व असंखोहाण आहिवाहिउवाहिकसायग्गिउ-  
ल्लहवणमेहसंदोहाण वज्जियलोहनियडिमयकोहाण पणट्टसंपदायपक्खवायमोहाण  
अण्णाणंधयारावडियदवियमुत्तिमग्गाण गयसग्गाण किं बहुणा सव्वसाहुगुणोव्व  
माजुताण ससहरुव्व विबुहजणमणचओरामंदानंददायगभव्वहिययकेरववियासगनिय-  
सियसुजसजुण्हाधवलियदियंतरअण्णउत्थियचक्कविहडणपयडमाहप्पपावकलंकवंकत्तण-  
मुत्ताण अज्जपरमपुज्जाण वंदणिज्जाण ४ सिरि १०८ सिरिफकीरचंदमहारायाण  
धारणाववहाराणुसारं वट्टइ जइ मे पयासेण कस्स वि किंचि वि लाहो होहिइ  
तो सपयत्तसाहलं मणिणस्सं, दिट्ठिमुद्दणक्खरजो जगदोसा कहिंपि कावि असुद्धी होउ  
सोहिजउ, पेसिजउ ससम्मई, इमस्स सज्झायं कट्ठु बुहा निराबाहं सुहं पाउणंतुति ।

**गुरुपयंबुरुहदुरेहो-पुष्पभिकवू**

### सूचना

यह प्रकाशन मेरे धर्मगुरु धर्माचार्य साधुकुलशिरोमणि १०८ श्रीफकीरचंद्रजी  
महाराज(स्वर्गीय)के धारणाव्यवहारानुसार है । यदि कोई दृष्टि-सुदृष्टादि  
दोष हो तो स्वाध्यायप्रेमी सज्जन सुधारकर पढ़ें । यदि इस प्रयत्न से मुसुक्ष्मों को  
ज्ञानसाधनाका लाभ मिला तो परिश्रम सफल समझकर सन्तोष होगा । इसका  
अहर्निश स्वाध्याय करते हुए वे निराबाध सुख प्राप्त करें । मुनिगण अपनी सम्मति  
समितिको भेजें ।

गुरुचरणचंचरीक  
पुष्पभिकवू

## षड्भाषामयं वीरस्तोत्रम्

विद्यानां जन्मकन्दस्त्रिभुवनभवनालोकनप्रत्यलोऽपि,  
 प्राप्नो दाक्षिण्यसिन्धुः पितृवचनवशात्सोत्सवं लेखशालाम् ।  
 जैनेन्द्री शब्दविद्यां पुरत उपदिशन् स्वामिनो देवतानां,  
 शब्दब्रह्मण्यमोघं स दिशतु भगवान् कौशलं त्रैशलेयः ॥ १ ॥ ( संस्कृतम् )

जो जोईसरपुंगवेहि हियए निचंषि झाइजए,  
 जो सव्वेसु पुराणवेयपभिइग्गंथेसु गीइजए ।  
 जो हत्थट्ठियआमलं व सयलं लोगत्तयं जाणए,  
 तं वंदे तिजयग्गुरं जिणवरं सिद्धत्थरायंगयं ॥ २ ॥ ( प्राकृतम् )

देविंदाणवि वंदणिजचलणा सव्वेवि सव्वण्णुणो,  
 संजादा किर गोतमा अवि तथा जस्सप्पसादा दुत्ते ।  
 सो सिद्धत्थभिहाणभूवदिसदो जोगिंदचूडामणी,  
 भव्वाणं भवदुक्खलक्खदलणो दिज्जा सुहं सासदं ॥ ३ ॥ ( शौरसेनी )

दुस्ते संगमके शुले भयकले घोलोवसग्गावलं,  
 कुब्बंतेवि न लोशपोशकल्लुशं येणं कदं माणशं ।  
 इंदे भत्तिपले ण गेहबहुलं योगीशलग्गामणी,  
 शे वीले पलमेशले दिशतु मे नेडन्तपुञ्जत्तणं ॥ ४ ॥ ( मागधी )

कंपंतक्खितिमंडलं खडहडप्फुट्ठंतबंभंडयं,  
 उच्छल्लंतमहन्नवं कडयडतुट्ठंतसेलग्गयं ।  
 पातग्गेन सुमेरुकंपनकरं बालत्तलीलावलं,  
 वीरस्स पहुणो जिमान जयतु क्खोनीतले पायडं ॥ ५ ॥ ( पैशाची )

इंदो वेदणरेसि जासु महया हल्लोहलेणागओ,  
 जज्झाई सुणिहंसओ हियडए अक्खे निरुंभेविणु ।  
 साहु ब्रोप्पिणु जासु कोइ महिमा नो तीरए माणवो,  
 पाए वीरजिणेसरस्सु नमहुं सीसल्लडे अम्हहे ॥ ६ ॥ ( अपभ्रंशः )





## गुरुस्तुतिः

### श्लोकाः

ध्यानाद्यस्यार्थसिद्धिः प्रभवति निखिलज्ञानरूपोऽमरो यो,  
ध्येयः सच्चित्स्वरूपो विमलगुणयुतो रागबन्धादिशून्यः ।  
सर्वज्ञोऽनन्तशक्तिर्विविधशिवकरो योगिभिर्ध्यानगम्यः,  
सोऽयं कल्याणमूर्तिः परमकरुणया रक्षताद्रो जिनेशः ॥ १ ॥

### शिखरिणी

स जीवः पुण्यादिप्रकृतिगुणतोऽनन्तविभवः,  
स्वयं कर्ता भोक्ताऽऽगमगिरिजिनेन्द्रः कथितवान् ।  
कदाचिन्नो वृद्धिः क्षतिरपि न चास्यास्ति शुभदः,  
स नः कुर्याच्छान्तिं जिनसुरवरोऽनाद्यनिधनः ॥ २ ॥  
सूर्यश्चन्द्रो ग्रहादिर्गगनतलगतस्तारकादिर्भवेऽस्मिन्,  
जीवो देहानुकूलः क्षतिरनलजलं वायुरग्निर्मेनोऽपि ।  
चैतन्यं पुद्गलोऽपि प्रथितगुणयुतः सिद्धभावानुकूलं,  
एतत्सर्वं मिलित्वा प्रभवति भुवनं पातु श्री वीरदेवः ॥ ३ ॥

धर्म्मव्यत्ययकरे, मलीमसाचारे, पञ्चमारककलौ सर्वदुःखाकरे, विविधवेदना-  
मये, केषामपि प्रवृत्तिर्मा भूयादिति स्याद्वादांगयोगान्तर्गतदयासत्याचौर्य्यब्रह्मचर्य्या-  
परिग्रहादिपञ्चविधयम( महाव्रत )परिपालनासक्तचित्ता जिनेन्द्रैर्मुनिपदे नियुक्तास्तथा-  
ऽऽगमनिगमोक्तधर्म्मप्रचारपरायणाश्च ॥

जिनधर्म्मानुगा, देवगुरुभक्तिप्रवणमानसाः, श्रमणवचनश्रद्धावन्तो, नान्यथा-  
वादिनो, जैनागतनवतत्त्वावगन्तारो, द्वितीयाश्रमस्थाः श्रावक(गृहस्थ)पदे शोभिता  
भगवद्भिः ॥

सच्चिदानन्दरूपेण, वीतरागेण, जिनेन, कर्म्मबन्धादबन्धो भूत्वा सर्वानन्दा-  
नन्दितेन, व्यापकस्वभावेन, सर्वविदा अपुनरावृत्तिरूपा मुक्तिर्निरूपिता ॥

चतुर्थकालान्ते च त्रिविधतापसन्तप्तमानजनतर्पणाय कृतगणधरावतारेण,  
जिनोक्तद्वादशांगविशिष्टशिष्टशास्त्राध्ययनाध्यापनादिधर्म्मवृद्धिप्रवृत्तिकृते परोपकारव-  
त्वेन स्थितो धर्मादिरूपोऽनाद्यनिधनाचारः श्रीमता सुधर्माचार्यैणोदाहृतः ॥

तेन चतुर्विधसंघसंगिसाधुसाध्वीनां श्रावकश्राविकाणामन्योन्यमधर्म्मनिवृत्ति-  
पूर्वकधर्म्मविचारणाय यात्राऽऽविर्भावो मन्यते स्म ॥

सुधर्माचार्यत एकसप्ततितमे पट्टे निरवयवविद्योतमानमहाकविपरिकरकुमुदाकर-  
राकानिशाकरश्रीजैनगणालिसमाखादितचरणारविन्दमकरन्दश्रीनाथुरामजैनाचार्येण  
श्रुतचारित्रप्रचारयोजिनधर्मयोः प्रचारेण खान्तेवासिभ्यो मुनिनेत्र ( २७ ) मितेभ्यः  
जिनोदितसिद्धान्तं प्रतिपाद्यादिजिनोक्ताऽनादिजिनधर्मप्रचारोभिहितः ॥

ततः क्रमशः पंचसप्ततितमपट्टस्थितेन सर्वषड्जीवनिकायाभ्युदयप्रवृत्तये उत्तम-  
चंद्राचार्येणाचार्यपदं सुशोभनं कृतम् । तत्समकालीनश्च जैनाचार्यो भज्जुलालो जातः ।  
यश्च निगमागमतर्कज्योतिषशास्त्रजन्यरहस्यादिपारंगमः ॥

श्रीमदुत्तमचंद्रजैनाचार्यानुसरणशीलब्रह्मचर्याश्रमसम्पन्नसुसंयमीभूतभव्यप्रबो-  
धकतपस्विप्रवरो रामलालजैनमुनिर्जातः ॥

यदन्ते निवासार्हस्य श्रीमच्छ्रीमालवंशसमुत्पन्नस्य वार्द्धक्य (स्थविर) पदविभूषि-  
तस्य सुदुल्लभभावस्य पूर्वजन्मजन्मान्तरकर्मक्षयार्थं श्रीमान् जैनमुनिवर्यश्रीफकीर-  
चन्द्रसाधुः समभिजातः ॥

यतः-

नमाम्यहं श्रीशफकीरचन्द्रं, गुणाकरं किन्नरपूज्यपादम् ।

योगीश्वरं तोषकरं स्वरूपं, लावण्यगात्रं बहुसौख्यकारम् ॥ १ ॥

भवन्तमीशं भजतोऽनुजातु, दुःखान्यलं कानि च नापि तापैः ।

पाणिस्थचिन्तामणिमंगभार्ज, का निर्ऋतिः पीडयितुं शशाक ॥ २ ॥

भक्त्या जना ये तव पादसेवां, कुर्वन्ति सन्ते तु लभन्ति चैव ।

न दुःखदौर्भाग्यभयं न मारिः, स्मरन्ति ये श्रीशफकीरचन्द्रम् ॥ ३ ॥

भव्या जना ये सुनमन्ति नित्यं, तेषां मनीषां सफलीकरोति ।

लक्ष्मीं यशोराज्यरतिं प्रभूतिं, विद्यावरश्रीललनासुखानि ॥ ४ ॥

कविः सुबुद्ध्या गुरुसन्निधौऽपि, कस्ते गुणान् वर्णयितुं समर्थः ।

तथाऽपि त्वद्भक्तिरतश्च पुष्पः, करोति नित्यं गुणवर्णनां ते ॥ ५ ॥

महार्णवे भूधरमस्तकेऽपि, स्मरन्ति ये स्वामिफकीरचन्द्रम् ।

सुखैः सहायान्ति नराः स्वधाम्नि, ततो भवन्ति प्रणमामि कामम् ॥ ६ ॥

न रोगशोका रिपुभूतयक्षा, न वग्रहा राक्षसदस्युचोराः ।

न पीडयन्ति गुरुनाममंत्रैः, स्तस्मान्नराणां शिवदायकोऽस्ति ॥ ७ ॥

जैनाब्दसम्बोधनपूर्णचन्द्रः, सत्सेवकेच्छामितदेववृक्षः ।

शमप्रधानस्तु सुसाधुमूर्तिः, जीवेश्वरः स्वामिफकीरचन्द्रः ॥ ८ ॥

इत्थं गुरोरष्टकमुत्तमं यः, प्रभातकाले पठते सदैव ।

किं दुर्लभं तस्य जगत्त्रयेऽपि, सिध्यन्ति सर्वाणि समीहितानि ॥ ९ ॥

## अथ श्रीपुष्पाष्टकम्

वीराय ज्ञातपुत्राय, महावीराय तायिने ।  
 जिनाय वर्धमानाय, श्रमणाय नमो नमः ॥ १ ॥  
 यस्य दुर्वासना शान्ता, शान्तेच्छो यो मुनीश्वरः ।  
 तस्मै फकीरचन्द्राय, नमोऽस्तु शिवमूर्तये ॥ २ ॥  
 यस्य शिष्यस्सदाचारी, पुष्पेन्दुमुनिसंज्ञकः ।  
 शास्त्रतत्त्वविशेषज्ञ-, तस्मै ज्ञानात्मने नमः ॥ ३ ॥  
 दुःखभाजां नितान्तं यो, दुःखान्धतरणिर्मुदा ।  
 तस्मै नमोऽस्तु शान्ताय, जिनेशपदसेविने ॥ ४ ॥

## शार्दूलविक्रीडितवृत्तम्

श्रीमद्देवजिनेन्द्रपादयुगलाऽम्भोजाऽर्चनाऽऽसक्तधीः,  
 संसाराम्बुनिधौ निमग्नजनतोद्धाराय पोतोऽस्ति यः ।  
 जैनाचारवतामबोधहरणे भास्वत्समो ज्ञानविद्-,  
 भक्ताऽज्ञानविनाशकृद्विजयतां श्रीपुष्पचन्द्रो मुनिः ॥ १ ॥  
 यस्यान्तःकरणे दयोन्नतिकरी विज्ञानमात्मन्यदः,  
 संसारोरगभीतिहृज्जनपदाऽशेषार्तिहो योऽनिशम् ।  
 शान्तो यो निजधर्मरक्षणपरो स्वाध्यायध्याने रतः,  
 सोऽयं साधुशिरोमणिर्विजयते पुष्पेन्दुसंज्ञो मुनिः ॥ २ ॥  
 भिक्षायाचनहेतवे गृहवतां येषां गृहे प्रैति य-,  
 स्तेषां पापचयं प्रयाति रविणा नैशं यथा ध्वान्तकम् ।  
 सारासारविचारणे च नितरां लग्नं मनो यस्य हि,  
 श्रीमान्पुष्पशशी मुनिर्विजयतां सः श्रीगुरोस्सेवकः ॥ ३ ॥  
 मुक्त्यर्थं यतते च यो जितरिपुः श्राद्धार्चिताब्जाङ्घ्रिको,  
 ज्ञानाचाररतो विशुद्धमनसां पादाम्बुजालिः सदा ।  
 जीवापदविनिवारणेऽतिकुशलस्स्वीयाऽमरेशे मतिः,  
 सोऽयं कौ जयतान्मुदा मुनिवरः पुष्पेन्दुसंज्ञो मुनिः ॥ ४ ॥  
 दूरं दुःखचयं व्रजेच्च सुतरां यद्दर्शनात्कर्मजं,  
 यद्वाचा जनतामनः कलुषतां त्यक्त्वा विशुद्धं भवेत् ।  
 यस्यास्ति भ्रमणं हिताय च सतां नाशाय दुःखाम्बुधेः,  
 स श्रीपुष्पमुनिस्सदा विजयतां कल्याणमूर्तिर्भृशम् ॥ ५ ॥

नानादेशगतैर्जनैर्जिनकथापीयूषपानेप्सुभि-  
 जैनाऽजैनगतस्य यस्य मुखतो नित्यं कथा श्रूयते ।  
 यस्यास्ते नितरां विहारकरणं लोकोपकाराय च,  
 तं पायादृषमो जिनो विषयतः पुष्पेन्दुसंज्ञं मुनिम् ॥ ६ ॥  
 यद्वाणी च सदा सुधारससमाऽविद्यान्धकारापहा,  
 यच्छीलेन जना मुदं च मनसा संलब्धवन्तः पराम् ।  
 यत्कीर्तिर्विशदा दिगन्तवितता राराज्यमाना सदा,  
 अव्यातं जिनराजभक्तिनिरतं श्रीपुष्पचंद्रं जिनः ॥ ७ ॥  
 शास्त्रोद्यानसुतत्त्वविघ्नरवरैर्वन्द्यो भृशं योऽनिशं,  
 साधूनां प्रवरो निरस्तविषयो यस्यानुरागो गुरौ ।  
 गंगानीरसमस्समुज्ज्वलतरो यस्यास्ति नीतिर्मतौ ,  
 सः श्रीपुष्पविधुर्मुदा विजयतां सर्वार्थसिद्धिप्रदः ॥ ८ ॥  
 साधुसेवानुरक्तेन, चन्द्रशेखरशम्भेणा ।  
 कृतं पुष्पाष्टकञ्चैतत्, पुष्पेन्दुभक्तिहेतवे ॥ ९ ॥

इति श्रीकाशीस्थपण्डितचन्द्रशेखरशर्मा  
 व्याकरणन्यायाचार्यविरचितं  
 पुष्पाष्टकं सम्पूर्णम्

॥ श्रीः ॥

दिनाङ्कः १२-११-१९५४

श्रीमतां श्रद्धेयानां पुष्पभिक्षुवर्याणां

— स्तवः —

यदीयवचनावलिर्विकृतभावनानाशिनी ।  
 कुबुद्धिकुमुदावलीरविरजसमुद्यत्प्रभा ॥  
 सुधारसमयी परा सुजनमानसोल्लासिनी ।  
 सदा मुनिवराग्रणीं जगति पुष्पभिष्टुं स्तुमः ॥ १ ॥  
 करालकलिकालजाविरलमोहवात्योच्चयै-  
 रुपस्ततनुरप्यसौ सुजनभक्तसार्थो ह्ययम् ॥  
 स्वकोपदिशनेन वै य अनिशं निरस्यद् व्यथां ।  
 सदा मुनिवराग्रणीं जगति पुष्पभिष्टुं स्तुमः ॥ २ ॥

वितानिततपोबलोऽतनुमङ्गलापादको ।  
 जिनप्रवचनानुगो दमितसर्वसङ्गात्मको ॥  
 महागुणगणावहो सकलमोहविध्वंसको ।  
 जयत्वविरतं सुधीन्द्रवरपुष्पभिष्ठुः स्वयम् ॥ ३ ॥

### रचयिता

ग. भि. जोशी.

काव्य-वेदान्त-पुराण-तीर्थः, साहित्यप्राज्ञः,  
 रा. भा. कोविद. हिंदी सनद. पनवेल ( कोलाबा ) ।

### बत्तीससुत्तणामट्टगं

गीइवित्तं—आयारंगं पढमं, बीयं सूयगडंगं अक्खायं ।

ठाणंगं च तइयं, समवायंगं हवइ खलु चउत्थं ॥ १ ॥  
 पंचमं च खु भगवई, णायाधम्मकहा य भवे छट्ठं ।  
 उवासगदसंगं स-त्तमं अट्ठमं अंतगडदसंगं ॥ २ ॥  
 अणुत्तरोववाइयं, नवमं दसमं पण्हावागरणं ।  
 इक्कदसमं विवागसुयं इइ इक्कारसंगाई भणियाई ॥ ३ ॥  
 उववाइयं तह राय-पसेणियं जीवाभिगमो य पुणो ।  
 पण्णवणा तह जंबुद्दीवपण्णत्ती चंदपण्णत्ती ॥ ४ ॥  
 सूरपण्णत्ती तहा, णिरयावलिया कप्पिया पुप्फिया ।  
 पुप्फचूलिया य वण्हि-दसाओ बारसाई उवंगाई ॥ ५ ॥  
 ववहार-बिहक्कप्प-णिसीह-दसासुयक्खंधेहिं च ।  
 चत्तारि उ सुत्ताई, छेयाई सव्वाई सत्तवीसं ॥ ६ ॥  
 दसवेयालियं तहा, उत्तरज्झयणं णंदिसुयं च ।  
 अणुओगद्वारं तह, चत्तारि इमाई मूलसुत्ताई ॥ ७ ॥  
 आवस्सयसुत्तं तह, बत्तीसमं भणियं जिणवरेहिं ।  
 विविहत्थबोहयाई, भव्वजीवहेउओ दंसियाई ॥ ८ ॥

कत्ता—कच्छी मुणिरयणचंदो

## पट्टावली

### मंगलायरणं

**दुयविलंबियवित्तं**—भवियणंबुयभासणभक्खरो, भुवणबंधवईहियदायगो ।

पणयवासवच्चक्खणिवावली, विजयउ उसहोऽस्थ जिणाहिवो ॥ १ ॥

**वेयालीयं**—सुमई बहवेऽभिहाणओ, गुणजुत्ता पुण इत्थ दुल्लहा ।

सुमई गुणओऽभिहाणओ, पणमासीसमणंतसग्गुणं ॥ २ ॥

**पंचचामरं**—जगप्पमोयदायगं पणट्टमोहसायगं ।

समीसच्चित्तवासिणं परप्पसंपयणिणयं ॥

विसिट्ठदेसणाअणाइसिद्धिमग्गदंसगं ।

णमो अणंतसम्ममग्गविस्ससेणणंदणं ॥ ३ ॥

**दोहयं**—घाइच्चउक्कयकम्मविणासा, लद्धमहोदयकेवलबोहं ।

जोगनिरोहसमस्सियकार्यं, झामि सया मुणिसुव्वयणाहं ॥ ४ ॥

**मंदकंता**—भव्वागारं पसमजलहिं सक्कपूर्यंघिपोम्मं,

मेहस्सामं विमलमइदं भिण्णसंसारचक्कं ।

संसारद्धिप्पवह्णणिहं मेहगंभीररावं,

तं संखंक्कं पवरविहिणा णेमिणाहं थुणेहं ॥ ५ ॥

**सिहरिणी**—समं चेओ जरूस्स प्पणइधरणिंदे य कमढे,

महावेसत्तोमग्गिविसरविदट्ठेऽहमतमे ।

मणोऽभिट्ठच्चायाऽमरविडवितुल्लो जगइ जो,

थुणे तं वामेयं जियसुरतरं भव्वचरणं ॥ ६ ॥

**सदूलविक्रीडियं-वीरो** विस्सविजेउकामविजई वीरं न को जाणए,

वीरेणेव विबोहियं जगमिणं वीराय सव्वं मम ।

वीरा निस्सियवं सुइक्कजलही वीरस्स णाणं महं,

वीरे सव्वगुणा वसंति दिस मे वीरा! सिरिं सासई ॥ ७ ॥

### अह पट्टावली पारब्भिज्जइ

चरिमत्तिथयरो णायपुत्तमहावीरो दुरियरयसमीरो पावदावग्गिनीरो मेरु-

गिरिधीरो जाओ ॥ तप्पट्ठे पंचमगणहरो सुहम्मो णिदलियकलुसकम्मो खलीकय-

अहम्मो कयसहलजम्भो हूओ ॥ १ ॥ तप्पट्ठे अज्जजंबू बालबंभयारी सत्तावीस-

हियपंचसयसहदिकखधारी चरियसुत्ताणुसारी आगमविहारी हूओ ॥ २ ॥ तप्पट्ठे

पमवणामधारओ गहियसंघभारओ सयलजियहियकारओ अणगारओ सुत्तत्थ-  
धारओ पारओ भूओ ॥ ३ ॥ तओ दसवेयालियपणेया संघणेया सयलवाइजेया  
सिज्जंभवणामायरिओ ॥ ४ ॥ तयणंतरं जसोभइनामो विजियकामो विहरि-  
यगामाणुगामो सुवरियसंजमगुणधामो ॥ ५ ॥ तप्पच्छा अइणाणवंतो पसंतो  
खंतो दंतो धम्मारामे विहरंतो संभूइआयरिओ ॥ ६ ॥ तयाणंतरं अज्जमह-  
बाहू चउणाणचउदहपुव्वधारगो दसाकप्पववहारकारगो सुयसमुदपारगो ॥ ७ ॥  
तप्पट्टे उक्किट्ठवंभयारी थूलमहमुणी गुणी गणी सव्वसाहुसिरोमणी सयलगुण-  
गणखणी ॥ ८ ॥

अज्जावित्तं-अज्जमहागिरिवल्लिस्सहं संतीयरिओ कमेण पुणो ।

पणवणाकत्तारो सामीयरिओ गुणी जाओ ॥ १ ॥

संडिल्लो जिणधम्मो समुदओ णंदिल्लो तहा गुणवं ।

सिरिणागंहत्थिरेव्वयखंदिल्लुणाम आयरिया ॥ २ ॥

सीहगिरी सिरिमंतो णागज्जुणओ पुणो य गोविंदो ।

भूयदिण्णंआयरिओ लोहोयरिओ गुणद्धी उ ॥ ३ ॥

दुप्पसंदेवद्धिगणी वीरंभदो तहेव सिवमंदो ।

जंसवीरसेणणिज्जामयो य गुणिओ जंसस्सेणो ॥ ४ ॥

हरिससेणंजयसेणो जयपालगणी तहेव देवरिसी ।

भीमसेणंआयरिओ तप्पट्टे कम्मसीहो य ॥ ५ ॥

रायरिसीसंरदेवसेणंसंकरसेणो य लच्छिल्लोहो उ ।

रामरिसी तह पउमो आयरिओ पुज्जहरिस्सम्मो ॥ ६ ॥

कुसलपहो य उमणायिरिओ जयसेणंपुज्जंवीयरिसी ।

गणी सिरिदेवचंदो सूरस्सेणो महांसीहो ॥ ७ ॥

महसेणो जयरंओ गयसेणो तह उ मित्तंसेणो य ।

विजयसीहसिवरायां लालायिरिओ तहा कमसो ॥ ८ ॥

गाहा-णाणायरियंभूणामो, रूवआयरिओ तहा ।

जीवस्सी तेयरंओ य, हरजीणाम बुद्धिम ॥ ९ ॥

जीवरंओ उ धर्णजी, विस्सणायिरिओ तहा ।

मणंजीणामधेज्जो उ, मणोणिग्गहकारगो ॥ १० ॥

नार्थुरामायरिओ य, तप्पट्टे णाणसागरो ।

लच्छीचंदआयरिओ, तप्पट्टे छीतरमंलो ॥ ११ ॥

रायारामो गुणवंतो, उत्तमचंदो कित्तिमं ।

समणो रामलालो य, तवस्सी अइउक्कसो ॥ १२ ॥

फँकीरचंदो तस्सीसो, थेरप्पयविभूसिओ ।

पुप्फभिक्खू तच्चलणं-, तेवासी य महागुणी ॥ १३ ॥

जेण संपाइओ एसो, भव्वाणं उवकारओ ।

‘सुत्तागमे’ महागंथो, सिधुवंगविहारिणा ॥ १४ ॥

अज्जावित्तं-तस्स य अंतेवासी सेवामावी अणेगगुणजुत्तो ।

अत्थि सव्वजियमित्तो अभिहाणेणं सुमित्तो य ॥ १५ ॥

उवजाई-तस्सत्थि सीसो जिणं चंदभिक्खू,


पट्ठावली जेणेसा विरइया ।

संतीभवणअंबरनाहगामे,

संघस्स अट्ठा सुगुरुकिवाए ॥ १६ ॥

अज्जा-इक्कोरसुण्णणेतैप्पमिए वरिसे य मग्गसिरमासे ।

सुक्कस्स पंचमीए रयणा एसा समत्त त्ति ॥ १७ ॥





णमोऽस्थु णं समणस्स भगवओ णायपुत्तमहावीरस्स

## पासंगियं किंचि

सयलजगजीवाणमप्पभुट्ठाणाभिलासा वट्टए, एयं चावस्सयं पि । जेण लद्ध-  
मणुयजम्मेण ण कयमत्तहियं तज्जम्ममफलं । अप्पहियट्ठा चेव जणो पवयणसवण-  
सज्झायकरणतवजवसंजमाइकज्जेसु पवट्ठइ । धम्मकरणं पि णाणेण विणा ण संभवइ  
त्ति णाणमाहप्पं । वुत्तं च-

णाणं मोहमहंधयारलहरीसंहारसूखगमो,

णाणं दिट्ठअदिट्ठइट्ठघडणे संकप्पकप्पहुमो ।


णाणं दुज्जयकम्मकुंजरघडापंचत्तपंचाणणो,

णाणं जीवअजीववत्थुविसरस्सालोयणे लोयणं ॥ १ ॥

तण्णाणं च पंचविहं, तम्मि वि सुयणाणं विसिस्सइ नेगाण भव्वजीवाणमुव-  
यारत्तणओ । सुए ति वा सिद्धंते ति वा सुत्ते ति वा सत्थे ति वा आगमे ति वा  
एगट्ठा । आगमे तिविहे प०, तंजहा-सुत्तागमे, अत्थागमे, तदुभयागमे । एसो जो  
महागंधो तुम्ह करकमले विज्जइ तब्बारसुवंगचउछेयचउमूलावस्सयसंजुओ टिप्पण-  
परिसिट्ठाईहिं समलंकिओ सुत्तागमस्स बीओ अंसो । पढमो अंसो ताव इक्कारसंग-  
संगओ इओ पुर्वि मम धम्मायरिण्हिं परमपुज्जसिरिपुप्फभिक्षुहिं संपादियो सिरि-  
सुत्तागमपगासगसमिइए पगासिओ वट्टए त्ति सुविइयमेव सव्वेसिं । सुत्तागमणिच्च-  
सज्झायमणणचित्तणणिदिट्ठासणेणमत्तपरव्वणाणं होहिइ । कि कायव्वं मए किं करेमि  
केण पहेण गंतव्वं केण जामि किं हेयं किं नेयं किमुवादेयं ति जाणितु सुत्तागम-  
सज्झायकारगो अत्ताणं धम्मे ठाविस्सइ परं धम्मे ठाविस्सइ । केण कम्मेण जीवो  
णेइओ वा तिरिओ वा मणुओ वा देवो वा सिद्धो वा जायइ तव्वण्णमस्सिमत्थि ।  
णत्थि कोवि विसओ जो सुत्तागमे णत्थि । दव्वाणुओगो भगवईपण्णवणाइसु । धम्म-  
कहाणुओगो ( चरियाइ ) ताव आयारे महावीरचरियं, सूयगडे उसमज्जिणअट्ठाण-  
उइपुत्तअद्दाईणं, ठाणे महापउमचरियं, समवाए महापुरिसाणं माउपिउपुव्वभ-  
वणामाई, भगवईए रोहाऽणगारखंधयतामलिसिवरायरिसिमहाबलउसहदत्तदेवाणंदा-  
जमालिगंगेयअइमुत्तगोसालयोदायणमिगावईजयंतीसोमिलाईणं चरियाइ संति । छट्ठ-  
सत्तमट्ठमणवमेक्कारसमंगाई सव्वहा कहामया चेव । ओववाइए अंबडचरियं, रायपसे-  
णइए सूरियाभदेवचरियं पएसिकहाणयं च, जीवाजीवाभिगमे विजयदेवचरियं, जंबुद्दी-  
वपण्णतीए उसहज्जिणचरियं भरहचक्किचरियं च, णिरियावलियाइपंचुवंगाई सव्वहा

चरियमयाई, उत्तरज्झयणे कविलणमिहरिएसिचित्तसंभूयइसुयारगगायरियसंजइराय-  
मियापुत्तअणाहिमुणिसमुद्पालरहणेमिकेसिगोयमजयघोसविजयघोसाईणं, पढमे परि-  
सिट्ठे कप्पसुत्ते वीरचरियं पासचरियं अरिट्ठणेमिचरियं रिसभजिणचरियं च । ससमय-  
परसमयवत्तव्वया ससमयठावणा परसमयणिराकरणाइदंसणविसओ सूयगडे समत्थि ।  
गणियाणुओगो चंदसूरपण्णत्तीआईसु । चरणकरणाणुओगो ( आचारवण्णणं ) ताव  
आयारे दसवेयालि एवमाईसु । पायच्छित्तविहाणाइयं चउसु छेयसुत्तेसु । पमाण-  
यणिकखेववागरणसत्तसरणवकव्वरसाइयं अणुओगहारे । आवस्सयकिच्चं साहुसावयाणं  
साहुसावयावस्सए । अलमइवित्थरेण चत्तारि वि अणुओगा सुट्ठुव्वेणमस्सि संति ।  
एसुत्तमजिण्णासुण सुमुक्खण गुणगाहगाण सज्जणाण अणुवमणाणसाहणं । चित्तचव-  
लयादूरीकरणसव्वुत्तमोवाओ सुत्तागमसज्झाओ । अओ चेव समणेणं भगवया णाय-  
पुत्तमहावीरेणं चाउक्कालसज्झायकरणमुवदिट्ठं भासियं च-‘सज्झाएणं जीवो णाणावर-  
णिज्जं कम्मं खवेइ’ । अज्जावहि जेतियाई सुत्ताई पगासियाइमण्णेहिं ताई अइभारजुताई  
दुव्वहाई च । गामे गामे ण होति पुत्थयालयत्ति मुणिणो जया जं सुत्तमिच्छंति  
तया तं ण लहंति । इमं लक्खीकिच्चा दोसु पुत्थएसु वत्तीसं पि सुत्ताई मम धम्म-  
गुरुहिं परमपुज्जसिरिपुप्फभिक्खहिं संपादियाई । एयमब्भुयमबिइयमभूयपुव्वमस्सुय-  
पुव्वमत्थि जं एकै पुत्थए इक्कारसंगाई वीए वारसुवंगाई चउछेयाई चउमूलाई सावस्स-  
याई । अओ जिण्णासुणो मुणिणो सज्झायमिमस्स कट्ठु णाणवुद्धिं कुणंतु ति विण्णवेइ

**गुरुकमकमलभसलो-सुमित्तभिकखू**



णमोऽत्थु णं समणस्स भगवओ णायपुत्तमहावीरस्स

## सिरिसुत्तागमगंथस्स साररूवभूमिया

सिरितित्थयेहिं जगज्जीवुद्धरणं विविहोवएसो दिण्णो, जं महासत्तिधरेहिं गण-  
हरेहिं मणसीकाऊणं दुवालसंगीरूवेणं (दुवालसंगसुत्तरूवेणं) गुंफिऊणं तप्पयारो  
कओ ।

इक्किङ्कगसुत्तोवरि तेसिं पुट्ठीकराईं पुढो पुढो आयरिएहिं कमेणं दुवालसुवंगाईं  
णिम्मियाईं संति । साहूणमायारवियारसुद्धीकराईं च चत्तारि छेयसुत्ताईं णिम्मियाईं ।  
सव्वेहिंतो अंगुवंगसुत्तेहिंतो पमाणणयणिकखेववागरणप्पमुहविसयजुत्ताईं चत्तारि मूल-  
सुत्ताईं साररूवाईं णिम्मियाईं । तओ पच्छा अंतिममावस्सगसुत्तं (उभओ-कालं  
वयधराणं मूलुत्तराङ्गणेहिंतो अत्तसुद्धीकारयं) णिम्मियं ति ।

वारसमस्स दिट्ठिवायंगस्स विच्छेए इक्कारसंगाईं, दुवालसुवंगाईं, चत्तारि छेय-  
सुत्ताईं, चत्तारि मूलाईं, बत्तीसमं चावस्सगसुत्तं एयाईं बत्तीससुत्ताईं सिरिथाणगवासि-  
जइणसमाजेण मण्णिजंति ।

एसु बत्तीसागमेसु साहुसावगाईणं णायव्वोवादेयल्लङ्घणीयविसयाणं वण्णओ  
समत्थि । अत्तकम्मधम्ममाणदंसणचरित्तसम्मत्ततववीरियप्पमाणणयणिकखेवविच्छ-  
यववहारमिच्छत्तकसायप्पमायापमायावयजोगलोगालोगलदव्वजीवाइणव्रततलेसासंसा-  
रकम्मबंधोदयउदीरणावेयणाणिज्जरासुक्खणिरयतिरिक्खमणुयदेवप्पमुहाणं विविहवि-  
सयाणं इमेसु सुत्तेसु जहट्टियं सरूवमणंतणाणीहिमुवदंसियमत्थि ।


विस्सेऽण्णेगे धम्मा, अणेगाईं सत्थाईं, अणेगा य मयपहा विज्जमाणा संति ।  
तेसिं धम्मसत्थमयपहाणं पवत्तगा वि णेगे संजाया । उवस्तपत्तेयविसयाणं वत्तव्वया  
जारिसा जइणागमेसु पुढोकरणपुव्वया गूढरहस्सजुत्ता य पच्चक्खणाणीहिं दंसिया  
अत्थि तारिसा इयरधम्मसत्थेसु ण लब्भइ । केवलणाणीहिं लोए थावरजंगमा अरू-  
विरूविणो पयत्था जारिसा केवलदंसणेण दिट्ठा तारिसा जणहियट्ठयाए आधविया,  
पण्णविया, परूविया, दंसिया, णिंदंसिया । जया अण्णसत्थप्पवत्तगेहिं जं किंचि कहियं  
वा दंसियं वा पवत्तियं वा तं सव्वं केवलं पण्णाबलेण वा जहाणुहवेण वा, जं हि  
सव्वेसिं मण्णणिजं णो होइ ति ।

एएसिं बत्तीसमूलसुत्ताणमत्था भासंतराईं णेगेहिं कयाईं पगासियाईं संति । किंतु  
सज्झायकरणट्ठाए कमवि विसयं तेसु मूलसुत्तेसु णिरिक्खणट्ठाए केवलं मूलसुत्ताईं चेव  
कज्जसाहगाईं भवंति । तेसिं पुढो पुढो बत्तीसं पइकइओ-पुत्थयाईं एगीकरणेहिंतो

एणे वा दोसु वा विभाएसु जइ चेव सव्वसुत्तसंगहो हविज्जा ता अईव सुगमया होउ  
 त्ति सत्थविसारएहिं महप्पेहिं अप्पमाईहिं जइणसाहिच्चप्पयारगेहिं जइणेयरज्जाणं  
 जइणधम्मरसियकुव्वंतेहिं जइणधम्मप्पयारकए विविहपरिसहसहिज्जमाणेहिं उग्ग-  
 विहारीहिं सुत्तागमपारीहिं इच्चाइणेगोवमारिहेहिं मुणिवरेहिं सिरिपुप्फभिक्षूहिं  
 महाकट्ठं सहित्ता बत्तीसमूलसुत्तजुयस्स सुत्तागमंसदुयस्स संपादणं कयं । एसिं पयासो  
 पसंसणिज्जो अत्थि । सिरिसुत्तागमपगासगसमिईए पगासं णीयाइं संति पिहप्पिहाइं  
 दोसु पुत्थएसु य बत्तीसं सुत्ताइं ।

तेहिं चेव महापुरिसेहिं दोविभायगुंफियसुत्तागमगंथस्स ( बत्तीससुत्ताणं ) सार-  
 रूवभूमियं संलिहिउं पेरेओम्हि त्ति । अणंतणाणिप्परूवियअमुल्लाणमणंतणाणिहाण-  
 रूवाणमेसिं सुत्तागमाणं सारं महासमत्थणाणिणे चेव समवबोहिऊणमक्खाइउं वा  
 लिहिउं वा समत्था संति । अहं तु अप्पण्णू एसिं सारमवबोहिउं वा कहिउं वा  
 लिहिउं वा णेव समत्थो भवामि । तहवि महप्पाणं किवाए पेरेणाइ य अप्पमईए जं  
 किंचि अप्पमवि सुत्तागमाणं साररूवं लिहियमत्थि मए तं सुसंतेहिं सुत्तागमविण्णूहिं  
 सीकरणीयमिति, इच्चेव अब्भत्थणा । सुण्णूसु किं बहुणा ? ॥

विक्रमीयसंवच्छरं २०११ } संतचलणसेवगो कच्छी मुणी-  
 कत्तियकिण्हणवमी गुरुवासरो } रयणेंदू भुयपुरं



## णिदंसणं

इह अणाइअणंतदुक्खप्पउरसंसारम्मि जम्मजराइदुक्खसंतत्ताणं जणाणं ण धम्मं विणा चिरंतणसोक्खं ति । णाणाभावे ण धम्मसंभवो ति परमोवयारीहिं गणहरेहिं दुवाल्संगं गणिपिडगं गुंफियं । तमणुसरित्तु पिहप्पिहायरिएहिं उवंगाइयाइं सुत्ताइं विरइयाइं । एसो सव्वो अक्खयकोससमाणो ‘सुत्तागमे’ ति बुच्चइ । इमो गंधो अद्धमागहीए जहा—“भगवं च णं अद्धमागहाए भासाए धम्ममाइक्खइ । सा वि य णं अद्धमागहा भासा तेसिं सव्वेसिं आरियमणारियाणं अप्पणो सभासाए परिणामेण परिणमइ” ।

सयलाओ इमं वाया विसंति एत्तो य णेति वायाओ ।

एति समुदं चिय णेति सायराओ चिय जलाइं ॥

ति वयणाणुसारं सव्वभासामूलत्तणेण सुलहा खु पाइयभासा । तासु विविहासु य सउरसेणीमागहीमरहट्टिच्चाइपागयभासासु अद्धमागहा भासा विसिस्सइ अप्पणो उक्करिसाहिकेण । अओ चेव “देवा णं भंते ! कयराए भासाए भासंति ? कयरा भासा भासिज्जमाणी विसिस्सइ ? गोयमा ! देवा णं अद्धमागहाए भासाए भासंति, सा वि य णं अद्धमागहा भासा भासिज्जमाणी विसिस्सइ” ति वुत्तं ।

अद्धमागहीसदस्स वुप्पत्तिं कुव्वाणा केइ जणा ‘अर्द्ध मागध्याः’ ति वुप्पत्तिबलेण इमीए भासाए मागहीभासाजणियत्तं पडिपाएति । परं ‘अर्द्धमगधस्येयं’ ति वत्थुभूय-वुप्पत्तिमणुसरिय मगहविसएक्कदेसस्स चेवेयं मूलभूया भासत्ति णिच्छियं । अओ अद्धमागहीसओऽयं गंधो णिच्छएण सयलजणाणं सम्मणाणसम्मदंसणसम्मचारित्त-संपत्तिपुव्वयं सुगइसाहगमत्थि ति ण संसयलेसो वि ।

एयस्स सुत्तागमस्स इक्कारसंगसुत्तसंजुओ पढमो अंसो पगासिओ वट्टए । तस्स चेव अवरोऽवसिट्ठो एगवीसइसुत्तसंजुत्तो बीओ अंसो इयाणि पगासिज्जइ । दिट्ठि-वायाभिहाणं बारसममंगं ताव वोच्छिण्णं । एएसिं बारसण्हमंगाणमुवंगभूयाणि बारससुत्ताणि कहियाणि ।

तेसु य आयारंगसुत्तस्स उवंगभूए पढमे कमेण य बारसमे ओववाइयसुत्ते णयरिउज्जाणाइवण्णणं वीरसमोसरणं तवोभेया कोणियणिग्गमणं धम्मकहा सिद्धसुह-वण्णणाइयमत्थि । तेरसमे सूयगडंगसुत्तस्स उवंगभूए रायपसेणइज्जे सूराभदेवपए-सीरायकहाणयं वण्णियसुवल्बभइ वित्थरेण । चउइसमे ठाणंगस्स उवंगभूए जीवा-जीवाभिगमसुत्ते जीवाजीवभेयछप्पण्णंतरदीवविजयदेवजंबुदीवाइणं वण्णणं समुव-

लब्धम् । पण्णरसमे समवायस्स उवंगभूए **पण्णवणासुत्ते** जीवसिद्धमेयवित्थरो ठाण-  
अप्पवहुत्तठिइ विसेसवक्कंतिउरसाससण्णाजोणिचरमाचरमभासासरपरिणामकसायइ-  
दियपओगळेसाकायट्ठिइस्सम्मत्तअंतकिरियाओगाहणाकिरियाकम्मपयडीबंधवेयबंधवेय-  
वेयाहारोवओगदंसणयापरिणामजोगणाणपरिणामपवियारणावेयणासमुग्घायवणओ  
लब्धम् । सोलसमे विवाहपण्णत्तीए उवंगभूए **जंबुदीवपण्णत्तिसुत्ते** जंबुदीववण्णणं  
रिसहदेवचरितं भरहचक्कवट्टिकहाणयं जिणजम्माभिसेयाइयं समुववणिणयं । सत्तार-  
समट्टारसमेसु णायाधम्मकहाउवंगभूएसु **चंदपण्णत्तिसूरपण्णत्तिसुत्तेसु** चंद-  
मंडलपमाणं सूरगहणक्खत्ततारगाइमंडलणं जुत्तिजुत्तं वण्णणं । तिहिणक्खत्तअहोरत्त-  
कालमाणमाइयं च फुडं कहियं । एगूणवीसइमे उवासगदसाउवंगभूए **गिरया-**  
**वलियासुत्ते** सेणियरायदसपुत्ताणं कहाणयं, तहेव कोणियचरितं चेडएण संगामो  
समरंगणे मयाणं तेसिं तत्तग्गइलाहो उववणिणओ । वीसइमे अंतगडदसाउवंगभूए  
**कप्पवाडिसियासुत्ते** पउमकुमाराइदसकुमाराणं परिचत्तरायविभवाणं णायपुत्तमहा-  
वीरसामिणो पासे पव्वयणं देवलोगसंपत्ती य वणिणया । इक्कीसइमे अणुत्तरोववाइय-  
दसाउवंगभूए **पुप्फियासुत्ते** चंदसूरसुक्कदेवाइणं पुव्वकयकम्माइवियारो वणिणओ ।  
बावीसइमे पण्हावागरणुवंगभूए **पुप्फचूलियासुत्ते** सिरिदेवीपमिइदसण्हं देवीणं  
पुव्वभवो साहिओ । तेवीसइमे विवागसुयस्सुवंगे **वण्हदसासुत्ते** बलभइस्स  
णिसहाइबारससुयाणं पुव्वभवकहाणयं सवित्थरं संजमवसेण देवगइसंपत्ती य साहिया ।


तयाणंतरं संजमाइसु दोसपरिहारोवायपडिवायगाणं चउण्हं छेयसुत्ताणं उव-  
ण्णासो कीरइ । तेसु पढमे अणुक्कमेण य चउवीसइमे **ववहारे** पायच्छित्तविहीवव-  
हाराइयं वित्थरेण साहियं वट्टए । पणवीसइमे **बिहक्कप्पसुत्ते** साहुसाहुणीणं कप्पा-  
कपो सुट्ठुरूवेण उवदंसिओ । छव्वीसइमे **णिसीहसुत्ते** पायच्छित्ताणि तद्दाणविहाणाणि  
य फुडं वणिणयाणि । सत्तावीसइमे **दसासुयक्खंधे** असमाहिठाणसबलदोसतेती-  
सासायणाऽऽयरियट्ठसंपयान्वित्तसमाहिठाणइक्कारसुवासगपडिमाबारसभिकखुपडिमाप-  
ज्जोसणाकप्पमहामोहणीयठाणणवणिणयाणवण्णणं ।

एएसिं चउण्हं छेयसुत्ताणमणंतरं अईवउवजुत्ताणि चत्तारि मूलसुत्ताणि पारब्भि-  
जंति । जेसु कमेण अट्ठावीसइमे **दसवेयालियसुत्ते** धम्ममाहणं सामणपुव्वयं  
अणाचिण्णछक्कायमेयपिंडेसणामहायारवयणविसुद्धिआयारपणिहिविणयभिकखुसंजम-  
थिरकारगट्टारसठाणविवित्तचरियासरूवं णिरुवियं । एगूणतीसइमे **उत्तरज्झयणे**  
विणयपरिसहदुल्लहचउरंगपमायापमायअकाममरणखुट्ठागणियंठिज्जएलइज्जदुमपत्तभि-  
क्खुबंभचेरगुत्तिपावसमणअट्ठपवयणमायासामायारीमोक्खमग्गस्सम्मत्तपरक्कमतवोम-

गगचरणविहिपमायठाणकम्मपयडीलेसाअणगारमग्गजीवाजीवविभत्ती कविलाईणं  
महापुरिसाणं चरियाईं च । तीसइमे **गंदीसुत्ते** थेरावली सोयाभेया पंचविहणाणसरूवं  
तदंतग्गयबुद्धिभेया सुत्तसरूवं च वित्थरेणववणिणयं । एकतीसइमे **अणुओगदार-**  
**सुत्ते** सुयावस्सयाणुपुव्वीणामपमाणयणिकखेवाईणं सवित्थरं वण्णणं । बत्तीसइमे  
**आवस्सयसुत्ते** आवस्सयवत्तव्वया । **पढमे परिसिट्ठे कप्पसुत्ते** वीराइ-  
चउजिणचरियाईं सुत्तलिहणकालो जिणंतराईं गणहरवण्णणं थेरावली सामायारी य ।  
**वीए परिसिट्ठे** सामाइयपाढा गहणपारणविही । **तइए परिसिट्ठे** सावयावस्सय-  
( पडिक्कमण ) सुत्तं मूलपाढजुत्तं भासापाढठाणेसु कोट्टगदिण्णपाढं ।

एवरूवेण अणोरपारसिंधुसरिसे एयम्मि **‘सुत्तागमे’** विविहविसयाणमपुव्वो  
संगहो । अओ जिणधम्मसरूवं जिण्णासूहिं जणेहिं एस गंथो अवस्सं पढेयव्वो ।  
सज्झाएण णाणावरणीयकम्मखओ सुयणाणत्तणाणस्स य संलद्धी भवइ । णियय-  
सज्झायणिसेवणेण तवकम्मसहकडेण णाणस्स चरमावत्थारूवं परमणाणं पि सुलहं ।  
अओ चेव वुत्तं ‘णं सज्झायसमं तवो’ त्ति णिवेएइ-

**गजाणणभि. जोसीतिणामधिज्जो, कव्ववेदंतपुराणत्तिथो, साहि-**  
**च्चपण्णो, रट्टभासाकोविओ ( हिंदी सनद ), पणवेलत्थ ‘हाईस्कूल’**  
**सकयपाइयअज्झावगो ।**



## तुलनात्मक अध्ययन

### सौत्रिक—

१ औपपातिकसूत्रमें तपके १२ भेदोंका वर्णन एवं ठाणांगसूत्रके छठे ठाणे और भगवतीगत तप-वर्णन । 'वण्णओ जहा उववाइए' कई सूत्रोंमें मिलता है ।

२ रायपसेणइयमें सूर्याभ एवं जीवाजीवाभिगममें विजयदेवका वर्णन ।

३ पणवणाके बहुतसे पाठ भगवतीसूत्रानुगत हैं । सिद्धसंबंधी औपपातिकसूत्रकी बहुतसी गाथाएँ पणवणामें दृष्टिगत होती हैं ।

४ जंबूद्वीपप्रज्ञप्ति एवं स्थानांगसूत्रके नवमस्थानगत पर्वत-द्रह-नदी-नामादि ।

५ चंद्रप्रज्ञप्ति एवं सूर्यप्रज्ञप्तिके आरंभक्रममें थोड़ा सा भेद है शेष पाठ अक्षरशः मिलता है ।

६ बृहत्कल्पमें स्थानांग व्यवहार तथा निशीथके पाठ मिलते हैं ।

७ दशाश्रुतस्कंधमें १-२-३-९ दशा समवायके अनुसार आचार-सम्पत् आदि स्थानांगके अनुसार हैं । विशेषके लिए देखो टिप्पण ।

८ दशवैकालिक एवं आचारांगका पिंडेषणा-अध्ययन भाषा-अध्ययन ( पणवणासूत्रका भाषापद ) पांच महाव्रतोंका वर्णन मिलता जुलता है, एवं आचारांग अ० २४ गाथा ८ तथा दश० अ० ८ गा० ६३ समान हैं ।

९ उत्तराध्ययनके २२ वें अध्ययनकी और दशवैकालिकके दूसरे अध्ययनकी कुछ गाथाएँ ।

१० नंदीसूत्र तथा समवायगत अंगसूत्रोंका वर्णन ।

११ अनुयोगद्वार-सात खर आठ विभक्ति स्थानांगके अनुसार हैं ।

१२ श्रावकावश्यकमें बारह व्रतोंके अतिचारादि उपासकदशाके प्रथम अध्ययनके अनुसार हैं ।

१३ कल्पसूत्र-महावीरचरित्र आचारांगके अनुसार, ऋषभचरित्र जंबूद्वीपप्रज्ञप्तिके अनुसार । दशाश्रुतस्कंधके ८ वें अध्ययनका परिशिष्ट तो है ही ।

( नोट ) स्थानांग एवं समवायांगके आधारसे कई सूत्र रचे गए हैं अतः उनके पाठ कई सूत्रोंमें पाए जाते हैं । अन्तर्दृष्टांगगत अतिमुक्तकुमारका शेष वर्णन भगवतीसूत्रमें है । और भी कई सूत्रोंके पाठोंमें साम्यता है । यहां तो मात्र कुछ थोड़ा सा दिग्दर्शन कराया गया है ।

### दैगंबरीय—

१ अंगोंकी पदसंख्या आदिमें बहुत कुछ समानता है ।

१ देखो षट्खंडागम प्रथम भाग ।



२ प्रतिक्रमणमें नवकार मंत्र वैसा ही है केवल 'आयरियाणं' के बदले 'आइरियाणं' बोलते हैं। 'इरियावहिया' 'तस्स उत्तरी' के पाठ भी कुछ अन्तरके साथ उसी प्रकार हैं। 'लोगस्स' का पाठ इस तरह है—

‘लोगस्सुजोययरे, धम्मतिथंकरे जिणे वंदे ।

अरिहंते कित्तिस्से, चउवीसं चव केवल्लिणो ॥’

‘उसहमजियं०’ शेष उसी प्रकार। ‘सुविहिं०’ वाली गाथामें ‘सिज्जंस्’ के स्थानपर ‘सेयंस्’ है। ‘च जिणं’ के स्थानपर ‘भयवं’ है। ‘कुंथुं च जिणवरिंदं, अरं च मल्लिं च सुव्वयं च नमिं ।’ शेष तद्वत् है। ‘लोगस्स उत्तमा’ की जगह ‘लोगुत्तमा जिणा सिद्धा’ है। ‘आरोगणाणलाहं, दिंतु समाहिं च मे बोहिं । चंदेहिं निम्मलयर्रा, आइ-चेहिं अहियं पयासंता । सायरमिव गंभीरा, सिद्धा सिद्धिं मम दिसंतु ॥’ आदिमें थोड़ा सा अंतर है। ‘चत्तारि मंगलं’ का पाठ उसी भांति है। १२ व्रतोंके अतिचार भी मिलते जुलते हैं। ‘खामेमि सव्वे जीवा०’ के स्थानपर ‘खम्मामि सव्वजीवाणं, सव्वे जीवा खमंतु मे । मेत्ती मे सव्वभूदेसु, वेरं मज्झं न केणवि ॥’

३ ‘धम्मो मंगलमुक्खिदं०’ की जगह ‘धम्मो मंगलमुद्धिदं, अहिंसा संजमो तवो । देवा वि तस्स पणमंति, जरस्स धम्मो सया मणो ॥’

४ ‘जयं चरे जयं चिट्ठे, जयमासे जयं सए । जयं भुंजंतो भासंतो, पावकम्मं न बंधइ ॥ ८ ॥’ की जगह ‘जदं चरे जदं चिट्ठे, जदमासे जदं सये । जदं भुंजेज्ज भासेज्ज, एवं पावं न बज्झइ ॥’ (मूलाचार)

(नोट) और भी बहुतसे पाठोंमें साम्यता है। विशेषके लिए दैगंबरीय श्रावक-प्रतिक्रमण देखें। इसके अतिरिक्त दिगंबरोंके कई ग्रंथोंमें ‘सुत्तागमे’ के पाठोंका अनुकरण है।

### वैदिक—

१ ‘एगं जाणइ से सव्वं जाणइ’—‘आत्मनि विज्ञाते सर्वमिदं विज्ञातं भवति’ ।

२ ‘अप्पा सो परमप्पा’—‘अयमात्मा ब्रह्म’ ‘अहं ब्रह्माऽस्मि’ ‘तत्त्वमसि’ ।

३ ‘णाणे पुण णियमा आया’—‘प्रज्ञानं ब्रह्म’ ।

४ ‘अपुणरावित्ति’—‘न पुनरावर्तते’ (यद्वत्त्वा न निवर्तते…………) ।

५ ‘एगे आया’—‘एकोऽहं’ ‘एको ब्रह्म०’ ।

६ ‘तक्का जत्थ ण विज्जई, मई तत्थ ण गाहिया’—‘यतो वाचो निवर्तते, अप्राप्य मनसा सह ।’

७ 'मिक्ती मे सव्वभूएसु'—'मित्रस्याहं चक्षुषा सर्वाणि भूतानि समीक्ष्ये' ।

८ 'अप्पा कत्ता विकत्ता य, दुहाण य सुहाण य ।'—'उद्धरेदात्मनाऽऽत्मानं, नात्मानमवसादयेत् ।'

९ 'अप्पा मिक्कमिक्कं च, दुपट्ठियसुपट्ठिओ ।'—'आत्मैवात्मनो बंधुरात्मैव रिपु-  
रात्मनः ।'

१० 'परिणामे बंधो, परिणामे मोक्खो'—'मन एव मनुष्याणां, कारणं बंधमो-  
क्षयोः ।' अथवा—'वायुनाऽऽनीयते मेघः, पुनस्तेनैव नीयते । मनसाऽऽनीयते कर्म,  
पुनस्तेनैव नीयते ॥''

११ 'सासए लोए दव्वट्ठयाए'—'प्रकृतिः पुरुषश्चैव, उभयैते शाश्वते मते ।'

१२ 'सएहिं परियाएहिं, लोगं बूया कडेत्ति य । तत्तं ते न विद्याणंति, न विणासी  
कयाइ वि ॥'—'न कर्तृत्वं न कर्माणि, लोकस्य सृजति विभुः । न कर्मफलसंयोगः,  
स्वभावस्तु प्रवर्तते ॥'

१३ 'एवं खु णाणिणो सारं, जं न हिंसइ किंचणं ।'—'मा हिंस्या सर्वा भूतानि'  
'मा हिंसी पुरुषं जगत् ।'

१४ 'धम्मो मंगलमुक्किट्ठं अहिंसा०'—'अहिंसा परमो धर्मः' ।

### पौराणिक-

( १ ) सुत्तेसु यावि पडिबुद्धजीवी, नो वीससे पंडिय आसुपण्णे ।

घोरा मुहुत्ता अबलं सरीरं, भारं डपक्खीव चरेऽप्पमत्तो ॥ ६ ॥ उत्तराध्ययन०  
अ० ४ ॥

या निशा सर्वभूतानां, तस्यां जागर्ति संयमी ।

यस्यां जाग्रति भूतानि, सा निशा पश्यतो मुनेः ॥ ६९ ॥ महाभारत भी०  
अ० २६ ॥

( २ ) सुहं वसामो जीवामो, जेसिं मो णत्थि किंचणं ।

मिहिलाए डज्झमाणीए, न मे डज्झइ किंचणं ॥ १४ ॥ उ० अ० ९ ॥

ससुखं बत जीवामि, यस्य मे नास्ति किंचन ।

मिथिलायां प्रदीप्तायां, न मे दह्यति किंचन ॥ ४ ॥ म० शां० अ० २६ ॥

( ३ ) पुढवी साली जवा चेव, हिरण्णं पसुभिस्सह ।

पडिपुण्णं णालमेगस्स, इइ विज्जा तवं चरे ॥ ४९ ॥ उ० अ० ९ ॥

यत्पृथिव्यां त्रीहिर्यवं, हिरण्यं पशवः स्त्रियः ।

सर्वं तं नालमेकस्य, तस्माद्विद्वाञ्छमं चरेत् ॥ ४४ ॥ म० अनु० अ० ९३ ॥

( ४ ) जहेह सीहो व मियं गहाय, मच्चू नरं नेइ हु अंतकाले ।  
न तस्स माया व पिया व भाया, कालम्मि तम्मंसहरा भवंति ॥ २२ ॥ उ०  
अ० १३ ॥

तं पुत्रपशुसंपन्नं, व्यासक्तमनसं नरं ।

सुप्तं व्याघ्रो मृगमिव, मृत्युरादाय गच्छति ॥ १८ ॥ म० शां० अ० १७५ ॥

( ५ ) तं इक्कगं तुच्छसरीरं से, चिईगयं दहिउं पावगेणं ।

भज्जा य पुत्ता वि य णायओ य, दायारमणं अणुसंकमंति ॥ २५ ॥ उ०  
अ० १३ ॥

उत्सृज्य विनिवर्तते, ज्ञातयः सुहृदः सुताः ।

अपुष्पानफलान् वृक्षान्, यथा तात ! पतत्रिणः ॥ १७ ॥ म० उ० अ० ४० ॥

( ६ ) अब्भाहयम्मि लोगम्मि, सव्वओ परिवारिए ।

अमोहाहिं पढंतीहिं, गिहंसि न रई लमे ॥ २१ ॥ उ० अ० १४ ॥

एवमभ्याहते लोके, समंतात्परिवारिते ।

अमोघासु पतंतीसु, किं धीर इव भाषसे ॥ ७ ॥ म० शां० अ० १७५ ॥

( ७ ) अलोलुयं मुहाजीविं, अणगारं अकिंचणं ।

असंसत्थं गिहत्थेसु, तं वयं बूम माहणं ॥ २८ ॥ उ० अ० २५ ॥

निराशिषमनारंभं, निर्नमस्कारमस्तुतिम् ।

अक्षीणं क्षीणकर्माणं, तं देवा ब्राह्मणं विदुः ॥ ३४ ॥ म० शां० अ० २६३ ॥

( ८ ) किण्हा णीला य काऊ य, तेऊ पम्हा तहेव य ।

सुक्कलेसा य छट्ठा य, णामाई तु जहक्कमं ॥ ३ ॥ उ० अ० ३४ ॥

षड्जीववर्णाः परमं प्रमाणं, कृष्णो धूम्रो नीलमथास्य मध्यम् ।

रक्तं पुनः सद्यतरं सुखं तु, हारिद्रवर्णं सुसुखं च शुक्लम् ॥ ३३ ॥ म०  
शां० अ० २८० ॥

### बौद्धिक—

१ रायसेणइय-सुत्तके समान दीघनिकायमें पायासी-सुत्त मिलता है । मात्र थोड़ा सा अंतर इस प्रकार है । यथा-पएसी-पायासी, केसीकुमार-कुमारकाइयप, चित्त प्रधान-खत्त । पृच्छाएँ और उनके उत्तर युक्ति प्रयुक्तिओं सहित बराबर से हैं । कंबोज देशके घोड़ोंकी बात जो 'रायपसेणइय' में है वह 'पायासी-सुत्त' में नहीं है । इसी प्रकार सूर्याभदेवकृत नाट्यरचनाएँ भी नहीं है । भावी वर्णनमें भी

मेद है। बौद्धोंने 'रायपसेणइय' का कितना अनुसरण किया है इसका पूरा हाल दोनों सूत्रोंका अध्ययन करने से ही ज्ञात हो सकता है।

२ उत्तराध्ययनसूत्रकी बहुतसी गाथाएँ शाब्दिक परिवर्तनके साथ धम्मपदमें पाई जाती हैं। जहाँ कुछ परिवर्तन भी है वह केवल नाम मात्र है, परन्तु विषय चर्चामें कोई अन्तर नहीं है।

### उदाहरणार्थ—

( १-४ ) अक्कोसिज्जा परे भिक्खुं, न तेसिं पडिसंजले ।

सरिसो होइ बालाणं, तम्हा भिक्खू न संजले ॥ २४ ॥ उ० अ० २ ॥

एवं २५-२६-२७ वीं गाथाओंके स्थानपर धम्मपद में निम्नलिखित गाथाएँ पाई जाती हैं—पठवी समो नो विरुज्झति, इन्दखीलूपमो तादि सुव्वतो । रहदोऽव अपेतकहमो, संसारो न भवन्ति तादिनो ॥ ६ ॥ ध० अरिहंतवग्ग ॥ खंती परमं तपो तितिक्खा, निब्बाणं परमं वदन्ति बुद्धा । न हि पब्बजितो परुपघाती, समणो होति परं विहेठयन्तो ॥ ६ ॥ ध० बुद्धवग्ग ॥ सुत्वा रुसितो वहुं, वाचं समणाणं पुथुवचनानं । फरुसेन ने न परिवज्जा, नहि संतो परिसेनि करोति ॥ ९३२ ॥ ॥ सुत्तनिपात ॥ न ब्राह्मणस्स पहरेय्य, नास्स मुञ्चेथ ब्राह्मणो । धी ब्राह्मणस्स हन्तारं, ततो धि यस्स मुञ्चति ॥ ७ ॥ ध० व० २६ ॥

( ५ ) जो सहस्सं सहस्साणं, संगामे दुज्जए जिणे ।

एगं जिणेज्ज अप्पाणं, एस से परमो जओ ॥ ३४ ॥ उ० अ० ९ ॥

यो सहस्सं सहस्सेन, संगामे मानुसे जिने ।

एकं च जेय्यमत्तानं, स वे संगामजुत्तमो ॥ ४ ॥ ध० सहस्सवग्ग ॥

( ६ ) मासे मासे उ जो वालो, कुसग्गेणं तु भुंजए ।

न सो सुयक्खायधम्मस्स, कलं अग्घइ सोलसिं ॥ ४४ ॥ उ० अ० ९ ॥

मासे मासे कुसग्गेनं, वालो भुज्जेथ भोजनं ।

न सो संखतधम्मानं, कलं अग्घतिं सोलसिं ॥ ११ ॥ ध० बालवग्ग ॥

( ७ ) जहा पउर्म जले जायं, नोवलिप्पइ वारिणा ।

एवं अलितं कामेहिं, तं वयं बूम माहणं ॥ २७ ॥ उ० अ० २५ ॥

१ देखो दीघनिकाय M. T. W. राइस डेविड द्वारा सम्पादित पाली टेक्स्ट सोसाइटी द्वारा प्रकाशित पृ० ३१६ से ३५८ पायासी-सुत्तं । हिंदीभाषाभाषी राहुल सांकृत्यायन द्वारा अनुवादित महाबोधि ग्रंथमालाकी ओर से प्रकाशित दीघनिकाय पृ० १९९ से २११ तक पायासी-राजञ्जसुत्त देखें ।

वारि पोक्खरपत्तेव, आरग्गेरिव सासपो ।

यो न लिम्पति कामेसु, तमहं ब्रूमि ब्राह्मणं ॥ १९ ॥ ध० ब्राह्मणवग्ग ॥

( ८ ) जहिता पुव्वसंजोगं, नाइसंगे य बंधवे ।

जो न सज्जइ भोगेसु, तं वयं बूम माहणं ॥ २९ ॥ उ० अ० २५ ॥

सव्वसञ्जोजनं छेत्वा, यो वे न परितस्सति ।

संगातिगं विसञ्चुत्तं तमहं ब्रूमि ब्राह्मणं ॥ १५ ॥ ध० व० २६ ॥

( ९ ) एए पाउकरे बुद्धे, जेहि होइ सिणायओ ।

सव्वकम्मविणिम्मुक्कं, तं वयं बूम माहणं ॥ ३४ ॥ उ० अ० २५ ॥

उसभं पवरं वीरं, महेसिं विजिताविनं ।

अनेजं नहातकं बुद्धं, तमहं ब्रूमि ब्राह्मणं ॥ ४० ॥ ध० व० २६ ॥

( १० ) अप्पा मित्तममित्तं च० ॥ ३७ ॥ उ० अ० २० ॥

अत्तना' व कतं पापं, अत्तना संकिलिस्सति ।

अत्तना अकतं पापं, अत्तना' व विसुज्झति ॥

सुद्धिअसुद्धिपच्चत्तं, नञ्जो अञ्जं विसोधये ॥ ९ ॥ ध० अत्तवग्ग ॥

३ चित्तसंभूतिजातक उत्तराध्ययनसूत्रके १३ वें अध्ययनके अनुसार है ।

४ अंगुत्तरनिकायमें उत्तराध्ययनसूत्रके १६ वें अध्ययनके 'नो निग्गंथे इत्थीणं कुइंतरेसि वा०' के समान पाठ मिलता है जैसे कि—'अपि च खो मातुगामस्स सइं सुणाति तिरो कुइा वा तिरो परकारा वा हसंतिया वा भणंतिया वा गायंतिया वा रोदंतिया वा सो तदस्साहेति तन्निकामेति तेन च वित्तिं आपज्जति इदंपि खो ब्रह्मचारियस्स खण्डंपि छिइंपि वा सबलंपि वा कम्मासंपि अयं वुच्चति...न परिमुच्चति दुक्खस्माति वदामि । अंगु० ७ वग्ग ५ ।

५ उत्तराध्ययनसूत्रके १८ वें अध्ययनमें वर्णित चार प्रत्येकबुद्धोंकी कथाओंके समान कुंभारजातकमें भी कुछ रूपान्तरके साथ चारों कथाएँ मिलती हैं ।

### मूल गाथाओंकी तुलना—

करकण्डू कलिंगेसु, पंचालेसु य दुम्मुहो ।

नमी राया विदेहेसु, गंधारेसु य णग्गई ॥ ४६ ॥ उ० अ० १८ ॥

करकण्डू नाम कलिंगानां, गन्धारानञ्च नग्गजी ।

नमिराजा विदेहानां, पंचालानाञ्च दुम्मुखो ॥

एए नरिंदवसभा, निक्खंता जिणसासणे ।

१ निशीथगत माउग्गाम शब्दका अनुकरण है ।

पुत्ते रजे ठवित्ताणं, सामण्णे पज्जुवट्ठिया ॥ ४७ ॥ उ० अ० १८ ॥

एते रट्ठा निहित्वान, पव्वज्जिस्स अकिञ्चना ॥ ५ ॥ कुंभारजातक ॥

मालूम होता है एक पद जानकर छोड़ दिया गया है ।

( नोट ) इसके अतिरिक्त बौद्धग्रंथोंमें और भी जैनसाहित्यका बहुतसा अनु-  
करण है ।

## भाषात्मक-साम्य

### वैदिक-

१ अर्धमागधीमें 'ऋ' के स्थानमें 'उ' होता है, जैसे-स्पृष्ट=पुष्ट, उसी प्रकार  
वेद में भी, जैसे-कृत=कुठ ( ऋग्वेद १, ४६, ४ ) ।

२ अर्धमागधीमें कितनेक स्थानोंपर एक व्यंजनका लोप होकर पूर्वका ह्रस्वस्वर  
दीर्घ होता है, जैसे-पश्यति=पासइ, उसी प्रकार वेदमें भी, जैसे-दुर्लभ=दूलभ  
( ऋ० ४, ९, ८ ), दुर्णाश=दूणाश ( शुक्लयजुःप्रातिशाख्य ३, ४३ ) ।

३ अर्धमागधीमें शब्दके अन्य व्यंजनका लोप होता है, जैसे-तावत्=ताव,  
उसी प्रकार वेदमें भी, जैसे-पश्चात्=पश्चा, ( अथर्वसंहिता १०, ४, ११ ), उच्चात्=  
उच्चा ( तैत्तिरीयसंहिता २, ३, १४ ), नीचात्=नीचा, ( तै० १, २, १४ ) ।

### साम्य

### अर्धमागधी

### वैदिक

४ संयुक्त य-र-का लोप श्याम=साम व्यच=त्रिच ( शत० १, ३, ३, ३३ )

प्रगल्भ=पगल्भ अप्रगल्भ=अपगल्भ ( तै० ४, ५, ६१ )

५ संयुक्त वर्णका पूर्व आम्र=अंब अमात्र=अमत्र ( ऋ० ३, ३६, ४ )

स्वर ह्रस्व

रोदसीप्रा=रोदसिप्रा ( ऋ० १०, ८८, १० )

६ 'द' को 'ड' दण्ड=डंड दुर्दभ=दूडभ ( वाजसनेयिसं० ३, ३६ )

पुरोदाश=पुरोडाश ( शु० ३, ४४ )

७ 'ध' को 'ह' बाधा=बाहा प्रतिसंधाय=प्रतिसंधाय ( गोपथ २, ४ )

८ संयुक्त व्यंजनोंमें क्लिष्ट=किलिष्ट स्वर्गः=सुवर्गः ( तै० ४, २, ३ )

स्वरका आगम

तन्वः=तनुवः ( तै० आ० ७, २२, १; ६, २, ७ )

९ प्रथमाके एकवचनमें जिणो संवत्सरो अजायत ( ऋ० सं० १०, १९०, २ )

'ओ'

सो चित् ( ऋ० सं० १, १९१, १०-११ )

१० तृतीयाके बहुवचनमें देवेहि देवेभिः  
'हि' के अनुरूप 'भि'

११ चतुर्थीके स्थानमें जिनाय=जिणस्स चतुर्थ्यर्थे बहुलं छंदसि (पाणिनि-  
षष्ठी २, ३, ६२)

१२ पंचमीके एकवचनमें 'त्' का लोप जिणा उच्चा

१३ द्विवचनके स्थानमें देवौ=देवा इन्द्रावरुणौ=इन्द्रावरुणा  
बहुवचन

(नोट) इसके अतिरिक्त ऋग्वेद आदिमें प्रयुक्त वंक, वहू, मेह, पुराण इत्यादि  
शब्द समान हैं।

### संस्कृत—

बहुतसे शब्द अर्धमागधी और संस्कृतमें समान पाए जाते हैं। जैसे—'आगम'  
'ऊढा' 'डिम्भ' 'ढक्का' इत्यादि।

### पालि—

१ 'कम्म' 'धम्म' शब्दके तृतीयाके एकवचनमें 'कम्मुणा' 'धम्मुणा' दोनोंमें  
होता है।

२ अर्धमागधीकी तरह पालिमें भी भूतकालके बहुवचनमें 'इंसु' प्रत्यय लगता  
है, जैसे—गच्छिंसु इत्यादि।

३ षष्ठीके स्थानमें 'स्य' के स्थानमें दोनोंमें 'स्स' होता है।

(नोट) इसके अतिरिक्त बहुतसी बातोंमें समानता पाई जाती है।

### शौरसेनी—

अर्धमागधी और शौरसेनीमें भी बहुतसी समानता है, केवल अर्धमागधीमें जहां  
'त' और 'द' का लोप होता है वहां शौरसेनीमें 'द' होता है, जैसे—गच्छइ=गच्छदि,  
जया=जदा। 'ह' के स्थानमें 'ध' जैसे—नाह=नाध।

### महाराष्ट्री—

अर्धमागधीमें तथा महाराष्ट्रीमें बहुतसा साम्य है, चिक्खल आदि बहुतसे  
शब्द तथा 'ऊण' प्रत्यय दोनोंमें पाए जाते हैं। विशेषताके लिए देखो 'उत्तागमे'  
प्रथमभागकी प्रस्तावना।

# देशीय-भाषा हिंदी—

## अर्धमागधी

अज  
कोइ  
गुलिया  
घर  
जोव्वण  
रस्सी  
सोरठ

## हिंदी

आज ( गुजराती 'आजे' )  
कोई ,,  
गोली ,,  
घर ( ,, 'घेर' )  
जोवन ,,  
रस्सी  
सोरठ ,,

( नोट ) इसके अतिरिक्त और भी बहुत से अर्धमागधी के शब्द हिंदीमें प्रचलित हैं ।

## गुजराती—

## अर्धमागधी

अगगला  
आहीरी  
उगघाड  
उत्तरंग  
एकल  
कवेलु  
जाणिल्लण  
णत्थि  
तुज्झ  
पडइ  
बद्धावेइ  
वहू  
संकल  
संभर  
ससुरो  
सियाळ

हेट्टा

## गुजराती

आगलियो  
आहीरण  
उघाडवुं  
ओतरंग  
एकलो  
कवलुं ( नलियुं )  
जाणीने  
नथी  
तुज  
पडे छे  
वधावे छे  
वहु  
सांकळ ( हिंदी )  
संभारवुं  
ससरो  
सियाळ ( हिंदी  
'सियार' )

हेठ

( नोट ) ये तो आधुनिक गुजराती के उदाहरण हैं । प्राचीन गुजराती तो अर्धमागधीसे मिलते जुलते शब्दोंसे भरी पड़ी है ।



## पंजाबी—

## अर्धमागधी

## पंजाबी

कम्म

कम्म

अज्ज

अज्ज

चम्म

चम्म

हड्ड

हड्ड

नस्स

नस्स

कक्ख

कक्ख (इत्यादि)

(नोट) इसी प्रकार और भी बहुतसी भाषाओंने अर्धमागधीका अनुकरण किया है, जैसे-मायर-पियर=मादर-पिदर (फारसी)। इंग्लिशमें ज़रा और बदल-कर मदर-फादर हो गया है।

## ऐतिहासिक—

हिंदुओंमें सबसे प्राचीन वेद माने जाते हैं उनमें भी तीर्थकरोंका उल्लेख पाया जाता है। जैसे कि 'ॐ त्रैलोक्यप्रतिष्ठितानां चतुर्विंशतितीर्थकराणां ऋषभादि-वर्धमानान्तानां सिद्धानां' शरणं प्रपद्ये। ऋग्वेद अ० २५। इसके अतिरिक्त २-२, २-३-१, २-३-३, ७-१८, १०-२२, १०-९९-७, देखें।

ॐ रक्ष रक्ष अरिष्टनेमिः स्वाहाः, .....सोऽस्माकं अरिष्टनेमिः। यजुर्वेद अ० २५।

ॐ नमोऽर्हन्तो ऋषभो वा ॐ ऋषभं पवित्रम्। यजु० अ० २५ मंत्र १९।

ॐ स्वस्ति न इन्द्रो वृद्धश्रवाः स्वस्ति नः पूषा विश्ववेदाः। स्वस्ति नस्तार्क्ष्यो अरिष्टनेमिः स्वस्ति नो बृहस्पतिर्दधातु। ऋ० अ० १ अ० ६।

## पौराणिक—

नाऽहं रामो न मे वाञ्छा, न च भोगेषु मे मनः।

केवलं शांतिमिच्छामि, स्वात्मनीव जिनो यथा ॥ योग० मुमुक्षु० अ० अ० ॥

‘जैना एकस्मिन्नेव वस्तुनि उभये निरूपयंति’। प्रभासपुराण।

दर्शनवर्त्मवीराणां, सुरासुरनमस्कृतः।

नीतित्रितयकर्ता यो, युगादौ प्रथमो जिनः ॥ मनु० ॥

नाभिस्तु जनयेत् पुत्रं, मरुदेव्यां महाद्युति।

ऋषभं क्षत्रियं ज्येष्ठं, सर्वक्षत्रियपूर्वजम् ॥ ब्रह्मपु० ॥

.....नीरागीषु जिनो विमुक्तललासंगो न यस्मात्परः ॥ ब्रह्मपु० ॥

प्रथमं ऋषभो देवो, जैनधर्मप्रवर्तकः।

जैनधर्मस्य विस्तारं, कृतवान् जगतीतले ॥ श्रीमालपुराण ॥

हस्ते पात्रं दधानाश्च, तुंडे वस्त्रस्य धारकाः ।

मलिनान्येव वासांसि, धारयन्तोऽल्पभाषिणः ॥ २५ ॥ शिवपु० अ० २१ ॥

श्रीमालपुराणके ७३ वें अध्यायका ३३ वां श्लोक भी इससे मिलता जुलता है ।

बुद्धके कई ग्रंथोंमें ना(थ-ट)तपुत्त-महावीरका नाम आता है परन्तु सूत्रोंमें बुद्धका नाम नहीं है । कारण जैनधर्म बुद्ध धर्मसे प्राचीन है ।

### न्यायदर्शनमें—

१ आगमोंके अनुसार न्यायसूत्र, विग्रहव्यावर्तनी, उपायहृदय ( बौद्ध ) भी चार प्रमाण मानते हैं ।

२ पूर्ववत्के उदाहरणमें 'माया पुत्तं जहा णट्ठं, जुवाणं पुणरागयं । काइ पच्चभिजाणेजा, पुव्वलिगेण केणइ ॥ तंजहा-खत्तेण वा वण्णेण वा लंछणेण वा मसेण वा तिलेण वा' ( अनुयोगद्वार ) जैसा ही उदाहरण उपायहृदय में भी मिलता है । यथा-षडंगुलिं सपिडगमूर्धानं बालं दृष्ट्वा पश्चाद्बद्धं बहुश्रुतं देवदत्तं दृष्ट्वा षडंगुलिसरणात् सोऽयमिति पूर्ववत् ।

३ 'जहा एगो पुरिसो तहा बहवे पुरिसा' ( अनुयोग० ) ऐसा ही उदाहरण माठर और गौडपादने भी दिया है, यथा-पुष्पिताम्रदर्शनात्, अन्यत्र पुष्पिता आम्रा इति । इत्यादि ।

### वैज्ञानिक—

#### विज्ञान द्वारा स्वीकृत आगमिक सिद्धान्त

१ आगमोंमें कहा है कि शब्द ( sound ) जड़ मूर्तिमान् और लोकके अन्त तक प्रवाहित होने वाला है, आजके विज्ञानने भी ग्रामोफोन और रेडियो का आविष्कार करके यह सिद्ध कर दिया है ।

२ आचारांगसूत्रमें वनस्पतिमें जीवोंका अस्तित्व बताने के लिए निम्न लक्षण दिए हैं 'जाइधम्मयं' उत्पन्न होनेवाला है, 'बुद्धिधम्मयं' इसके शरीरमें वृद्धि होती है, 'चित्तमंतयं' चैतन्य है, 'छिन्नं मिलाइ' काटने पर सूख जाता है, 'आहारं' आहार भी ग्रहण करता है, 'अणिच्चयं' 'असासयं' इसका शरीर भी अनित्य और अशाश्वत है, 'चओवचइयं' इसके शरीरमें भी घट बढ़ होती रहती है । सुप्रसिद्ध वैज्ञानिक जगदीशचंद्र बसु ने अपने परीक्षणों द्वारा उपरोक्त सब लक्षण सिद्ध किए हैं जिसे समस्त वैज्ञानिक लोग मान चुके हैं ।

३ आगमोंने समस्त द्रव्योंको अनादि माना है । इसी बातको प्रसिद्ध प्राणीशास्त्र-

वेत्ता J. B. S. हॉलडनने भी माना है, वे कहते हैं कि मेरे विचारमें जगत्की कोई आदि नहीं है ।

४ जैनधर्म किसीको सृष्टिका कर्ता हर्ता नहीं मानता, इसे आजका विज्ञान भी स्वीकार करता है ।

५ शब्द-ज्योति-ताप और आतपको आगमने पुद्गल कहा है जिसे विज्ञानने भी मैटर Matter के रूपमें मान लिया है । और इसे भी स्वीकार किया है कि ये सब पुद्गल-द्रव्यके पर्यायविशेष हैं ।

६ प्रसिद्ध भूगर्भ-वैज्ञानिक फ्रांसिस अपनी सुप्रसिद्ध पुस्तक Ten years under earth में लिखते हैं कि मैंने पृथिवीके ऐसे ऐसे रूप देखे हैं जिनसे पृथिवीमें जीवत्वशक्ति प्रतीत होती है । अभी तक वे निश्चय पर नहीं पहुँच सके परन्तु आगमोंने तो स्पष्ट कहा है कि पृथ्वीकायमें जीव है ।

७ स्थानांग सूत्र ५-२-३ में आता है कि स्त्री बिना संयोगके भी शुक्र पुद्गल ग्रहण कर गर्भवती हो सकती है । आधुनिक विज्ञानवेत्ताओंने भी कृत्रिम गर्भाधान द्वारा इसे सिद्ध कर दिया है ।

८ आगम पदार्थकी अनीश्वरता और आत्माकी अजर-अमरता बताते हैं, जिसे सुविख्यात वैज्ञानिक डाल्टन (Dalton) ने Law of conservation द्वारा सिद्ध कर दिखाया है । परन्तु आत्माकी तह तक विज्ञान अब तक नहीं पहुँच सका ।

९ भगवान् महावीरके गर्भस्थानान्तरण को कई लोग असंभव मानते हैं जिसे प्राणीशास्त्रवेत्ता डॉ. चांग ने बोस्टन विश्वविद्यालयकी जैव रसायनशालामें गर्भ-स्थानान्तरण-परीक्षणों द्वारा सिद्ध किया है । अमेरिकन हिरनीके गर्भबीजको एक अंग्रेजी हिरनीके गर्भाशयमें स्थानान्तरित करनेमें उन्हें सफलता भी मिली है ।

१० आगम कहते हैं कि द्रव्यार्थिकनय की अपेक्षा न कोई द्रव्य घटता है न बढ़ता है जो रूपान्तर होता है वह उसका पर्याय है । वैज्ञानिक भी मानते हैं कि कोई पुद्गल (Matter) नष्ट नहीं होता, केवल दूसरे रूप (Form) में बदल जाता है । वे लोग इसे Principle of Conservation of Mass and Energy कहते हैं ।

११ आगम मानते हैं कि पानीकी एक बूंदमें असंख्य जीव होते हैं । वैज्ञानिकोंने भी सूक्ष्मवीक्षण यंत्र द्वारा पानीकी एक बूंदमें ३६००० से भी अधिक जीव देखे हैं और यह भी मानते हैं कि बहुतसे जीव ऐसे हैं जो सूक्ष्मवीक्षणयंत्र

द्वारा भी नहीं देखे जा सकते । देखो 'हाई निकोलकी मिक्रोप्स बाई द मिलियन पेनगिन द्वारा १९४५ में प्रकाशित' ।

१२ भगवान् महावीरने पुद्गलकी अपरिमेय शक्ति बताई है, जिसे आजके विज्ञानने 'एटमबम' 'अणुबम' 'उद्जनबम' आदिसे सिद्ध कर दिखाया है ।

१३ जैनशास्त्रानुसार लोहेका सोनेमें परिवर्तन करना संभव है जिसे विज्ञानने भी स्वीकार किया है कि सोनेके एक परमाणुमें ७९ प्रोट्रॉन्स (Protons) और लोहेके परमाणुमें ३६ प्रोट्रॉन्स होते हैं, यदि दोनोंकी संख्या किसी प्रकार सम कर दी जाय तो वह सोनेका परमाणु हो सकता है ।

१४ ध्यान और योगसंबंधी सिद्धान्त के लिए डा. ग्रे वाल्टरकी The living brain नामक पुस्तक देखें ।

१५ प्रसिद्ध वैज्ञानिक आस्टाइनका 'थ्योरी ऑफ रिलेटिविटी' स्याद्वादसे बहुतसा साम्य रखता है ।

१६ विज्ञानने जीव, पुद्गल, आकाश (Space), काल (Time) और धर्मास्तिकायको भी 'ईथर' के रूपमें माना है ।

१७ आगम कहते हैं कि परमाणु पुद्गल कभी स्थिर और कभी चल रहता है । वैज्ञानिकोंने भी 'हाइड्रोजन' के एलेक्ट्रॉनको बाहिर और भीतरके वृत्तमें अनिश्चित काल तक चल विचल होते देखा है ।


१८ आगमों में परमाणु अनन्त प्रकारके और अत्यन्त सूक्ष्म कहे हैं, वैज्ञानिक अनन्तता तक तो नहीं पहुंच सके फिर भी उन्होंने १४ प्राइमरी पारटीकलस् माने हैं । और वे यह स्वीकार करते हैं कि Primary Particles इतने सूक्ष्म हैं कि उनमेंसे कइयोंको वे महाशक्तिशाली यंत्रों द्वारा भी नहीं देख सके ।

१९ जीवोंका उत्पत्ति स्थान मृत शरीर (अन्तरमुहूर्तके बाद) जीवित प्राणीका अंग और पुद्गल भी हो सकता है ऐसा जैन शास्त्र मानते हैं । जिसे किसी अपेक्षासे चौथी हाइपोथिसिस (Hypothesis IV) द्वारा वैज्ञानिकोंने भी स्वीकार किया है ।

२० शास्त्रोंमें वर्णित अवगाहना आदि को कई लोग असंभव मानते हैं, उन्हें १० जनवरी १९५४ के संडे स्टेण्डर्ड्समें रेडिएशनके बारेमें फ्रैंक चेलेजर द्वारा लिखित लेख देखना चाहिए । रेडिएशनसे प्रतिवर्ष सवा इंचके हिसाबसे उंचाई में वृद्धि बताई है । यदि अवसर्पिणीके छठे आरेका मनुष्य उत्सर्पिणीके सुषमा काल तक जिसका अंतर १० कोडाकोड़ी सागरोपम होता है तीन गाऊकी

अवगाहना वाला हो तो कोई आश्चर्य नहीं। आगम मानते हैं कि मनुष्यके संस्थान, संहनन, आयुष्य, अवगाहना, भूमिके वर्ण, गंध, रस, स्पर्श आदिमें अवसर्पिणी कालमें हास और उत्सर्पिणीकालमें क्रमशः वृद्धि होती है। इसके लिए मार्टिनिज़ द्वारा लिखित 'विचित्र रेडिएशन एवं उनका आश्चर्यकारक प्रभाव' नामक लेख देखें।

(नोट) ऐसे अनेक तथ्य हैं जिनको विज्ञानने स्वीकार किया है। और कई तथ्यों तक तो वह अभी पहुंच भी नहीं सका है। सच है कहां जड़वादी विज्ञान और कहां अध्यात्मवादी आगम! दोनोंमें ज़मीन आस्मानका अंतर है।



णमोऽस्तु णं समणस्स भगवओ णायपुत्तमहावीरस्स

## संपादकीय

**जैनधर्म क्या है ?**—‘जि’ जये धातुसे ‘इणसिञ्जिदीडुस्यविभ्यो नक्’ नक् प्रत्ययान्त होकर ‘जिन’ शब्दसे ‘जैन’ बना है अर्थात् ‘रागादिशत्रून् जयतीति जिनः’ आन्तरिक रागद्वेष और कर्मादि शत्रुओंका विजेता ‘जिन’ कहलाता है और उसके अनुगामी जैन हैं। जिनके ‘जगत्प्रभु’ जगत्के प्रभु, ‘सर्वज्ञ’ सर्व पदार्थोंके ज्ञाता, ‘त्रिकालविद्’ तीनों कालकी अवस्थाओंके जानने वाले, ‘देवाधिदेव’ देवोंके सर्वोपरि देव आदि गुणवाचक बहुतसे विशेषण हैं। इसके अतिरिक्त ‘साधु साध्वी श्रावक श्राविका’ इन चारों तीर्थोंके संस्थापक होने से ‘तीर्थंकर’ या ‘तीर्थंकर’ कहलाते हैं। केवलज्ञान होनेसे ‘केवली’ और ‘अर्हन्’ भी हैं। इनका प्रतिपादन किया हुआ धर्म जैनधर्म कहलाता है।

जैनधर्म अनादि है, इसकी प्राचीनताके प्रमाण ‘तुलनात्मक अध्ययन’ के ऐतिहासिक प्रकरणमें देखें।

**जैनधर्मकी मान्यता**—इस दृश्यमान सृष्टिमें जो भी वस्तु आदि इन्द्रियों द्वारा अथवा अतीन्द्रिय ज्ञानसे जानी जाती हैं या दृष्टिगोचर होती हैं, उनके दो विभाग हैं जड़ और चेतन; जड़में जीव नहीं है और चेतन जीव है। जीवोंकी गणना संख्यात और असंख्यात से नहीं बल्के अनन्तसे है। जीव भी दो प्रकारके हैं—एक कर्मसे मुक्त अर्थात् सिद्ध, दूसरे संसारी। इन संसारी जीवोंके अनेक रीतिसे अनेक भेद हैं। सबमें समान जीवत्व होने पर भी जड़ पदार्थके साथ उनका किसी अंशमें संबंध होनेके कारण वे नए २ रूपमें दिखते हैं। उन संसारी जीवोंके चार भाग हैं—नारक, तीर्थंकर, मनुष्य और देव। नारकीय जीव अपने पापोंका फल अधोलोकमें और देव अपने पुण्यका फल स्वर्गलोकमें भोगते हैं। इस मर्त्यलोकमें मनुष्य पर्याय सबसे श्रेष्ठ है। तीर्थंकर पंचेन्द्रियके पांच भेद हैं—जलचर (पानी में रहने वाले मच्छ कच्छादि), स्थलचर (भूमिपर चलने वाले गाय भैंस बकरी आदि), खेचर (आकाशमें उड़ने वाले पक्षी कबूतर आदि), उरपुर (छातीसे रेंग कर चलने वाले सर्पादि), भुजपुर (भुजासे चलने वाले नेवला ऊंदर आदि)। ये सब चलने फिरने वाले त्रस जीव (जंगम) कहलाते हैं। इनके अतिरिक्त पृथ्वी पानी अग्नि वायु और वनस्पतिके जीव स्थावर हैं। ये इतने सूक्ष्म हैं

१ जीवपज्जवा णं भंते ! किं संखिज्जा असंखिज्जा अणंता ? गोयमा ! नो संखिज्जा, नो असंखिज्जा, अणंता । ‘पण्णवणा’ पांचवां पद, ३०९ पृष्ठ।

कि इन्द्रियोंके भी अगोचर हैं। वनस्पतिका 'निगोद' नामक एक विभाग है, जिसमें सूर्यके अग्रभाग जितने बारीक स्थानमें भी अनन्त जीव हैं। कर्मोंका आवरण होनेके कारण ये जीव संसारी कहलाते हैं। भव्यजीव योग्य सामग्री और संयोग मिलनेपर मनुष्यगतिको पाकर फिर कर्मोंका सर्वथा निकंदन करके मोक्षको प्राप्त होता है। मोक्ष होने पर आत्मा अपुनरावृत्ति अवस्थाको पाता है।

जैनोंकी दृष्टिमें जगत् अनादि अनंत है, इसकी रचना करनेवाला कोई नहीं है \*। और अन्यमतावलंबी भी यही मानते हैं कि "नासतो जायते भावो, नाभावो जायते सतः।" अर्थात् "असत्की उत्पत्ति नहीं होती और सत्का सर्वथा अभाव नहीं होता।"

जैनधर्म ईश्वरको कर्ता हर्ता नहीं मानता। वास्तवमें 'परिक्षीणसकलकर्मा ईश्वरः' अर्थात् समस्त कर्म क्षय होने पर आत्मा ही ईश्वर अवस्थाको प्राप्त होता है। अथवा यों कहिए कि आत्माका शुद्ध स्वरूप ही परमात्मा है।

जैनधर्म जीवके द्वारा किए गए कर्मोंका फल 'किसी अन्य शक्ति द्वारा मिलता है' ऐसा नहीं मानता। जो जैसा कर्म करता है उसे कर्म द्वारा वैसा ही फल मिलता है। जैसे मकान बनाने वाला मनुष्य अपने मकान बनानेके कर्मसे अपने आप समतल भूमिसे ऊँचा उठता जाता है, कुतुबमीनार पर चढ़ने वाला व्यक्ति चढ़ता हुआ अपने आप ऊँचा चला जाता है, इसी प्रकार उत्तम क्षमा दया सत्यादि उत्तम साधनका कर्ता अपने आप स्वर्गादि उत्तम गतिको पाता है। ऐसे ही जो ज़मीन खोदनेवाला मनुष्य जितनी ज़मीन खोदता है वह उतना ही समतल भूमिसे नीचा होता चला जाता है, इसी तरह पापकर्म करने वाला जीव अपने आप हिंसा असत्य द्रोह दगा आदि अशुभकर्मके निमित्तसे अधम गतिको प्राप्त होता है। यदि मनुष्य दुग्धादि पौष्टिक पदार्थोंका सेवन करता है तो उन पदार्थोंके द्वारा अपने आप शरीर सुंदर और सुदृढ़ हो जाता है, इसी विधिसे शुभ प्रकृतियोंका सृजन करने वाला अनेक शुभसंयोगोंको प्राप्त करता है। विष भक्षण करनेवाला प्राणी उस विषके प्रयोगसे अपने आप मर जाता है, धतूरा खानेवाला मूर्छित हो जाता है, कारण वस्तुका स्वभाव अपना काम करता है। जैसे पानी अपने स्वाभाविक गुणसे स्वयं नीचेका मार्ग पकड़ता है तब धुआँ या आगकी ज्वालाओंको अपने आप ऊर्ध्वगामी होते देखा जाता है। आत्मा और पुद्गल

\* "अनाद्यनिधने द्रव्ये, स्वपर्यायाः प्रतिक्षणम्।

उन्मज्जन्ति निमज्जन्ति, जलकल्लोलवज्जले ॥ आ० प० ॥

अनंतकालसे एक दूसरेके साथ संयुक्त रहते हुए भी आत्मा पुद्गलरूप और पुद्गल आत्मारूप नहीं हुआ, न होता है और न होगा। कारण वस्तु अपने स्वभावमें सदैव स्थिर है।

**स्याद्वाद**—जैन धर्मकी सबसे बड़ी विशेषता स्याद्वाद है। पदार्थमें रहे हुए विभिन्न गुणोंको सापेक्षतया स्वीकार करना 'स्याद्वाद' है। जैसे कोई व्यक्ति अपने पुत्रकी अपेक्षासे पिता है एवं पिता की अपेक्षासे पुत्र है, और भी कई अपेक्षाओंसे उसकी कई संज्ञाएँ हैं। इसी प्रकार स्याद्वादकी दृष्टिसे द्रव्यार्थिक नयकी अपेक्षा लोक नित्य है और पर्यायार्थिक नयकी दृष्टिसे लोक अनित्य है। अथवा यों कहिए कि 'षड्दर्शन जिन अंग भणीजे' अर्थात् स्याद्वादरूपी समुद्रमें अलग २ मतरूप नदिएँ आकर अभेदरूप होकर मिलती हैं।

**अहिंसा**—अहिंसाका सूक्ष्म विवेचन जितना जैनधर्ममें है उतना अन्यत्र कहीं नहीं मिलता। अहिंसाकी साधनासे ही भारतवर्षको स्वतंत्रता प्राप्त हुई है, जिसे देखकर शनैः २ आजकी दुनिया उसकी ओर आकर्षित होकर प्रगतिशील हो रही है। जैनधर्म मानता है कि "सव्वे जीवा पियाउया०" "सव्वे जीवा वि इच्छंति, जीविउं न मरिज्जिउं ॥" Live and let live. Not Killing is Living. इसके अतिरिक्त जैनधर्म सत्य, अचौर्य, ब्रह्मचर्य, अपरिग्रह, संयम, तप और त्याग पर भी पूरा २ भार देता है।

जैनधर्म सैद्धान्तिक दृष्टिसे जातिवाद और छूतछातको नहीं मानता "कम्मुणा बंभणो होइ, कम्मुणा होइ खत्तिओ० ॥" अर्थात् ब्राह्मण, क्षत्रिय आदि सब कर्मा-नुसार हैं जन्मसे नहीं। हरिकेशमुनि जैसे शूद्रजातीय भी देवोंके पूजनीय थे।

**स्त्रीके समानाधिकार**—चतुर्विध संघमें जहां साधु और श्रावकका स्थान है वहां साध्वी और श्राविकाका भी। चंदनवाला आदि कई महासतियोंने मुक्ति प्राप्त की है।

**जैनागमोंमें वर्णित गणतंत्रके आधार पर ही आजके गणतंत्रकी उत्पत्ति हुई है।**

**ज्ञान और क्रिया**—जैनधर्म 'ज्ञानक्रियाभ्यां मोक्षः' अर्थात् ज्ञान के द्वारा वस्तुका तथ्य जानकर उसी भाँति आचरण (क्रिया) द्वारा मोक्ष मानता है।

**आगम कहते हैं कि 'जे कम्मे सूरु ते धम्मे सूरु'**—जो कर्म-शूर होते हैं वे ही धर्मशूर होते हैं।

**बाह्य युद्धका निषेध**—अप्पणामेव जुज्झाहि, किं ते जुज्जेण



**बज्झओ । अप्पाणमेव अप्पाणं, जइत्ता सुहमेहए ॥'** बाहरी युद्धोंसे कुछ न होगा आंतरिक युद्ध करके आंतरिक शत्रुओंपर विजय पाओ तब ही सच्चे सुखकी प्राप्ति होगी । इसी प्रकार जैन धर्म आत्म-दमन पर ही जोर देता है—**‘अप्पा चेव दमेयव्वो, अप्पा हु खलु दुहमो । अप्पा दंतो सुही होइ, अस्सि लोए परत्थ य ॥'**

**कर्मसिद्धान्त**—जैनधर्ममें आठ कर्म माने हैं । **ज्ञानावरणीय** (यह जीवके ज्ञान पर आवरणरूप है जैसे बादल सूर्यको ढँक लेता है), **दर्शनावरणीय** (जो जीवकी दर्शनशक्तिको ढँकता है जैसे दर्बान किसीको राजासे मिलनेमें विघ्न करता है), **वेदनीय** (जो सुख दुःखका अनुभव कराता है, सातावेदनीय शहदलित तलवारके समान और असातावेदनीय विषलित खड्गके समान है), **मोहनीय** (यह आत्माके स्वरूपको भुलाता है जैसे दारु पीने वाला अपना भान भूल जाता है), **आयुर्कर्म** (बंदीगृहमें बंदीके समान यह जीवको नाना गतियोंमें रोके रखता है), **नामकर्म** (भिन्न २ गतियोंमें उत्पन्न करता है चित्रकार और चित्रके सदृश), **गोत्रकर्म** (यह ऊँच और नीच अवस्थाका भेद करता है कुम्हार और उसके बर्तन की तरह), **अन्तरायकर्म** (यह कर्म जीवको दान, लाभ, भोग, उपभोग और शक्तिसे बंचित रखता है) ।

**दो प्रकारका धर्म**—जैनधर्ममें धर्मके दो साधक बताए हैं, साधु और श्रावक । साधु अहिंसा, सत्य, अचौर्य, ब्रह्मचर्य और अपरिग्रहका सांगोपांग पूर्णतया पालन करता है तब श्रावक इनकी मर्यादा करता है । इसके अतिरिक्त तीन गुणव्रत और चार शिक्षाव्रतोंका भी पालन करता है ।

**नवतत्त्व**—जीव, अजीव, पुण्य, पाप, आस्रव (कर्मप्रकृतिके आनेका मार्ग), संवर (कर्मप्रकृतिको आत्मामें आनेसे रोकना), निर्जरा (बारह प्रकारके तपसे कर्मरूप रजको आत्मासे पृथक् करना), बंध (कर्मप्रकृतिका आत्मामें दूध और पानीकी तरह मिलना), मोक्ष (कर्मप्रकृतिसे तीनों उपायोंसे आत्माका मोक्ष होना) ये नव तत्त्व हैं । यदि इस संबधमें कुछ विशेष जानना हो तो जिज्ञासु **‘नवपदार्थज्ञानसार’**का अवलोकन करें ।

**जैनसाहित्य**—जैनोंकी संख्या कम होते हुए भी उनका साहित्य विशालतम है । अर्धमागधी संस्कृत प्राकृत अपभ्रंश हिंदी गुजराती राजस्थानी आदि भाषाओंमें उनके अनेक ग्रंथ पाए जाते हैं, इसके अतिरिक्त व्याकरण न्याय काव्य कोष छंद ज्योतिष सामुद्रिक योग खरशास्त्र वैद्यक आदिके ग्रंथ भी पुष्कल प्रमाणमें उपलब्ध हैं ।

जैनसाहित्यमें आगमोंका स्थान सर्वोच्च है। आगम सिद्धान्त शास्त्र और सूत्र एक ही बात है। सूत्र की पद्धति कुछ बौद्धोंमें भी है जैसे सुत्तनिपात, पायासीसुत्त आदि। हिंदुओंमें व्याकरण और न्याय आदि ग्रंथ सूत्रबद्ध ही हैं। जैनागम तो सबके सब सूत्ररूप हैं ही।

**सूत्रकी व्युत्पत्ति**—‘अल्पाक्षरविशिष्टत्वे सति बह्वर्थबोधकत्वं सूत्र-त्वम्’ अर्थात् जिसमें अक्षर थोड़े हों और अर्थबोध अधिक हो उसे सूत्र कहते हैं, अथवा ‘सूत्रमिव सूत्रम्’ सूत के ढोरेमें जिस प्रकार अनेक रत्नोंके मणके पिरोए जाते हैं इसी तरह जिसमें बहुतसे अर्थोंका संग्रह हो वह सूत्र होता है। पुनश्च—

अपगन्धमहत्थं, वत्तीसा दोसविरहियं जं च ।

लक्खणजुत्तं सुत्तं, अट्ठहि य गुणेहि उववेयं ॥ १ ॥

**सूत्रोंके भेदोपभेद—**

**उत्सर्गसूत्र**—जिसमें किसी वस्तुका सामान्य विधान हो, जैसे—‘नो कप्पइ णिग्गंथाण वा णिग्गंथीण वा आमे तालपलंवे पडिगाहित्तए ।’

**अपवादसूत्र**—जो उत्सर्गका बाधक हो, यथा—‘कप्पइ णिग्गंथाण वा णिग्गंथीण वा पके तालपलंवे भिण्णे अभिण्णे वा पडिगाहित्तए ।’

**उत्सर्गापवाद**—जिसमें दोनों हों, जैसे—‘नो कप्पइ णिग्गंथाण वा णिग्गंथीण वा पारियासियस्स...णण्णत्थ आगाहेहिं रोगायंकेहिं’ ॥ १८६ ॥ बृहत्कल्प ॥

**प्रकरणसूत्र**—जिसका प्रकरणानुसार नाम हो, जैसे—‘काविलीयं’ ‘केसि-गोयमिज्जं’ इत्यादि ।

**संज्ञासूत्र**—जिसमें सामान्यतया किसी विषयका वर्णन हो, जैसे ‘दशवैकालिक’ आदि, जिनमें आचारादि का सामान्य निरूपण है ।

**कारकसूत्र**—जिसमें प्रश्नोत्तरके साथ २ शंकाका समाधान भी हो । जिन प्रश्नोत्तरोंके साथ ‘से केणट्ठेणं...से एणट्ठेणं...’ लगे हैं वे सब कारकसूत्र हैं ।

**सूत्रके आठ गुण—**

णिहोसं सारवंतं च, हेउजुत्तमलंक्रियं ।

उवणीयं सोवयारं च, मियं महुर्मेव य ॥ १ ॥

१ निर्दोष—सब प्रकारके दोषोंसे रहित ।

२ सारवान्—जिसमें सारगर्भित विषय हों ।

३ हेतुयुक्त—जिसमें वर्णित विषयको हेतु आदिसे स्पष्ट किया गया हो ।

४ अलंकृत-जो उपमा उत्प्रेक्षा आदि अलंकारोंसे अलंकृत हो ।

५ उपनीत-जिसमें उपनय हों ।

६ सोपचार-जिसकी भाषा शुद्ध और मार्जित हो ।

७ मित-जिसमें अक्षर थोड़े हों और भाव अधिक हो ।

८ मधुर-जो सुननेमें अत्यन्त मधुर हो ।

कोई २ छ गुण भी मानते हैं-‘अप्यक्खरमसंदिद्धं, सारवं विस्सओ-  
मुहं । अत्थोभमणवज्जं च, सुत्तं सव्वण्णुभासियं ॥’ १ अल्पाक्षर-  
जैसे सामायिकसूत्र, २ असंदिग्ध-जिसमें शंका के लिए स्थान न हो, ३ सार-  
वान्-पूर्ववत्, ४ विश्वतोमुख-जिसमें चारों अनुयोगोंका समावेश हो, जैसे-  
‘धम्मो मंगलमुक्किट्ठं’ ५ अस्तोभक-जिसमें च वा आदि निपातोंका निर-  
र्थक प्रयोग न हो, ६ अनवद्य-जिसमें सावद्य व्यापारका उपदेश न हो ।

सूत्रके ३२ दोष-अलियमुवघायजणयं, निरत्थयमवत्थयं छलं  
दुहिलं । निस्सारमहियमूणं, पुणरुत्तं वाहयमजुत्तं ॥ १ ॥ कमभिण्ण-  
वयणभिण्णं, विभत्तिभिण्णं च लिंगभिण्णं च । अणभिहियमपयमेव  
य, सहावहीणं ववहियं च ॥ २ ॥ कालजतिच्छविदोसो, समय-  
विरुद्धं च वयणमित्तं च । अत्थावत्तीदोसो, नेओ असमासदोसो  
य ॥ ३ ॥ उवमारुवगदोसो, णिहेसपयत्थसंधिदोसो य । एए य  
सुत्तदोसा, बत्तीसा हुंति णायव्वा ॥ ४ ॥

१ अलीकदोष-जो सत्को असत् कहे, जैसे-आत्मा नहीं है ।

२ उपघातदोष-जो प्राणियोंकी घातका कारण हो, जैसे-‘वैदिकी हिंसा  
हिंसा न भवति’ ।

३ निरर्थकदोष-जिसका कोई अर्थ न हो ।

४ अपार्थकदोष-असंबद्ध अर्थवाला ।

५ छलदोष-विपरीत अर्थवाला ।

६ दुहिलदोष-पापव्यापारपोषक ।

७ निस्सारदोष-साररहित ।

८ अधिकदोष-अधिक पद अक्षर मात्रा वाला ।

९ हीनदोष-अक्षर पद मात्रा आदि से हीन ।

१० पुनरुक्तदोष-जिसमें एक ही विषयको बारंबार दुहराया गया हो ।

११ व्याहतदोष-जो पूर्वापर विरोधी हो ।

- १२ अयुक्तदोष-जिसमें युक्तिशून्यता हो ।  
 १३ क्रमभिन्नदोष-अनुक्रमरहित ।  
 १४ वचनभिन्नदोष-जिसमें वचनकी गड़बड़ हो ।  
 १५ विभक्तिभिन्नदोष-विभक्तिका वैपरीत्य ।  
 १६ लिंगभिन्नदोष-तीनों लिंगोंमें फेरफार हो ।  
 १७ अनभिहितदोष-अपने सिद्धान्तके विरुद्ध हो ।  
 १८ अपददोष-जिसमें छांदिक त्रुटियाँ हों ।  
 १९ स्वभावहीनदोष-जिसमें वस्तुस्वभावके विरुद्ध कथन हो । जैसे-‘आग शीतल होती है ।’  
 २० व्यवहितदोष-जो अप्रासंगिक हो ।  
 २१ कालदोष-जिसमें भूतकालके स्थानमें वर्तमान तथा वर्तमानके स्थानमें भूतकालका प्रयोग हो अर्थात् कालसंबन्धी अशुद्धिहों हों ।  
 २२ यतिदोष-जिसमें विश्राम चिन्हों की अशुद्धियाँ हों ।  
 २३ छविदोष-अलंकारशून्य ।  
 २४ समयविरुद्धदोष-अपने मत से विरुद्धता ।  
 २५ वचनमात्रदोष-निर्हेतुकता ।  
 २६ अर्थापत्तिदोष-जिसके अर्थमें आपत्ति हो सके ।  
 २७ असमासदोष-जिसमें समासकी प्राप्ति होने पर भी समास न किया गया हो ।  
 २८ उपमादोष-जिसमें हीन अथवा अधिक या निरुपम उपमाएँ दी गई हों ।  
 २९ रूपकदोष-अधूरा वर्णन ।  
 ३० निर्देशदोष-जिसमें निर्दिष्ट पदोंकी एकवाक्यता न हो ।  
 ३१ पदार्थदोष-जो पर्यायको पदार्थ और पदार्थको पर्याय कहे ।  
 ३२ संधिदोष-जिसमें जहाँ संधिकी प्राप्ति हो वहाँ न की हो, अथवा अयुक्त रीतिसे की गई हो ।  
 ३३ अस्वाध्याय-चार संध्या( प्रातःकाल १, मध्याह्नकाल २, संध्याकाल ३, मध्यरात्रि ४ ) ओंके समय, चार पूर्णिमा एवं महाप्रतिपदाएँ ( चैत्रशुक्ला १५, वदी १, आषाढशुक्ला १५, वदी १, आश्विनशुक्ला १५, वदी १, कार्तिकशुक्ला १५, वदी १ ) १२ ।  
 औदारिकशरीर-संबन्धी १० अस्वाध्याय-अस्थि १३, मांस १४

रुधिर १५, पड़ी हुई अशुचि १६, समीपमें जलने वाला श्मशान १७, चंद्रग्रहण १८, सूर्यग्रहण १९, मुखिया-राजा-सेनापति-देश-नायक-नगरशेठ का मरण २०, राज्यसंग्राम २१, धर्मस्थानमें मनुष्य और तिर्यच पंचेंद्रियका कलेवर २२ ।

**आकाश-संबंधी १० अस्वाध्याय**-उल्कापात २३, दिशाओंके लाल होनेका समय २४, अकालगर्जना २५, बिजली चमकते समय २६, निर्घात २७, यूपक-शुक्लपक्षकी एकम-दोष और तीजकी संध्या २८, यथालिप्त-अमुक २ दिशाओंमें थोड़े थोड़े अन्तरमें बिजलीके समान प्रकाश होते समय २९, धूमिका-धुंवर ३०, महिका-कोहरा (धुंध) पड़ते समय ३१, रजोवृष्टि ३२ ।

इन ३२ अस्वाध्यायोंको टालकर दिन और रातके पहले और चौथे प्रहरमें कालिक सूत्रोंका स्वाध्याय करना चाहिए । स्वाध्याय संबंधी नियमके भंग करने-वाले के लिए प्रायश्चित्त निशीथसूत्रके १९ वें उद्देशकमें देखें ।

यह भी ज्ञात रहे कि अस्वाध्यायकाल को हिंदुओंके ग्रंथोंमें भी वर्जित किया है । अनाध्यायकालमें उनके यहां भी अमुक २ ग्रंथ न पढ़ना कहा है । जिस प्रकार प्रभात विहाग भैरवी देश श्यामकल्याण आदि रागोंका समय निश्चित है, असमयमें वे अच्छे नहीं लगते, इसी प्रकार सूत्रोंका स्वाध्यायकाल निर्धारित है, अर्थात् 'काले कालं समायरे ।'

**सूत्रोच्चारविधि**-सूत्रोंका उच्चारण करते समय स्खलना न हो, ज़बान न लड़खड़ा जाय । अलग २ पदोंको मिलाकर और मिले हुए पदोंको तोड़कर न पढ़े । अपनी ओरसे क्षेपक न करे । सांगोपांग परिपूर्ण पढ़े । घोषके नियमानुसार पढ़े । यथास्थान उच्चारण करे । गुरुसे वाचना लेकर पढ़े । जैसा कि अनुयोगद्वारसूत्रमें कहा है कि "सुत्तं उच्चारयेय्व्वं-अक्खलियं, अमिलियं, अवच्चाभेलियं, पडिपुण्णं, पडिपुण्णघोसं, कंठोद्वविप्पमुक्कं, गुरुवायणोवगयं ।"

**सूत्रव्याख्याके ६ भेद-**

"संहिया य पयं चेव, पयत्थो पयविग्गहो ।

चालणा य पसिद्धी य, छव्विहं विद्धि लक्खणं ॥"

१ संहिता-पदका अस्खलित उच्चारण, जैसे-'करेमि भंते ! सामाइयं०'

२ पद-उपरोक्त वाक्यमें 'करेमि' एक पद है, 'भंते !' दूसरा पद है, 'सामाइयं' तीसरा पद है ।

३ पदार्थ-उपरोक्त पदोंके अर्थ ।

४ पदविग्रह-पदच्छेद करना ।

५ चालना-‘ननु’ ‘न च’ आदिसे शंका उत्पन्न करना ।

६ प्रसिद्धि-उठाई गई शंकाओंका समुचित समाधान ।

उपक्रम, निक्षेप, अनुगम और नय द्वारा भी सूत्रोंकी व्याख्या की जाती है । इनका विवरण अनुयोगद्वारा सूत्रमें विस्तारपूर्वक पाया जाता है ।

### वर्तमानकालमें उपलब्ध सूत्र-

११ अंग, ( १२ वें अंग दृष्टिवादका विच्छेद हो चुका है ) १२ उपांग, चार छेद, चार मूल और आवश्यक इस प्रकार ३२ सूत्र वर्तमानमें प्रामाणिक माने जाते हैं । अंगोंका वर्णन समवायांगसूत्र एवं नंदीसूत्रमें पाया जाता है । शेष सूत्रोंके नाम नंदीसूत्रमें हैं । उपांग संज्ञा केवल निरियावल्किादिमें पाई जाती है । फिर भी १२ अंगोंके १२ उपांग माने जाते हैं । अंगसूत्रोंसे अतिरिक्त आगमोंकी अंगवाह्य संज्ञा भी है, जिसके दो भेद हैं-आवश्यक और आवश्यक-व्यतिरिक्त । आ० व्य०के भी दो भेद हैं-कालिक और उत्कालिक । कालिकमें उत्तराध्ययन, दशा-कल्प-व्यवहार, निशीथ, जंबूद्वीपप्रज्ञप्ति, चंद्रप्रज्ञप्ति और निरियावल्किादि पांच उपांग परिगणित हैं । उत्कालिकमें दशवैकालिक, औपपातिक, राजप्रश्नीय, जीवाजीवाभिगम, प्रज्ञापना, नंदी, अनुयोगद्वार, सूर्यप्रज्ञप्ति सन्निहित हैं । कालिकसूत्रका स्वाध्याय नियत समयपर ही किया जाता है । उत्कालिकसूत्रोंका स्वाध्याय यथोचित समयमें भी किया जा सकता है । नंदीसूत्रनिर्दिष्ट शेष सूत्र वर्तमानमें नहीं हैं । अंगसूत्रोंका महत्त्व और उनका विषयादि ‘सुत्तागमे’के प्रथम अंशमें दिया जा चुका है । द्वितीय अंशमें समाविष्ट सूत्रोंका विषय-विवरण इस प्रकार है ।

### बारह उपांग-

**प्रथम उपांग-औपपातिकसूत्रमें** चंपानगरी, पूर्णभद्र उद्यान, अशोक वृक्ष, पृथ्वीशिला-पट्टक, कोणिक राजा, धारिणी रानी, ज्ञातपुत्र महावीर भगवान्का समवसरण, तपके १२ भेद, साधुगण, कोणिकका महावीर प्रभुकी वंदना के लिए आगमन, असुरादि देवोंका आना, भगवान्की देशना, अंबड परिव्राजक श्रावकका चरित्र, केवलिमुद्घात और अन्तमें सिद्धोंका वर्णन है ।

**द्वितीय उपांग-राजप्रश्नीयमें** सूर्याभदेवका भगवान् महावीर स्वामीकी वंदना के लिए आना, गौतमस्वामी द्वारा उसके पूर्वभवकी पृच्छा, भगवान् द्वार सूर्याभदेवका पूर्वभव कथन, प्रदेशी राजाका केशीमुनिसे प्रश्नोत्तर, अंतमें प्रदेशी द्वारा

आत्मश्रद्धा पाकर व्रतग्रहणादि विषय वर्णित हैं। यह सूत्र साहित्यका रसप्रद ग्रंथ है ऐसा **विंटरनिद्रज्ञ** का कहना है।

**तृतीय उपांग-जीवाजीवाभिगममें** जीव अजीवका विस्तृत स्वरूप, विजयदेवका वर्णन, छप्पन अन्तरद्वीपादिका उल्लेख है।

**चतुर्थ उपांग-प्रज्ञापनासूत्रमें** जीव, अजीव, आस्रव, बंध, संवर, निर्जरा और मोक्षका सम्यक् निरूपण है। इसके अतिरिक्त लेश्या, समाधि, लोकस्वरूप आदिका वर्णन भी है, इसमें ३६ पद ( प्रकरण ) हैं। इसके संकलनकर्ता श्रीसुधर्माचार्यसे २३ वें पट्टस्थित **आर्य श्यामाचार्य** थे। प्र=प्रकर्षतया, ज्ञापना=अवबोध करना प्रज्ञापना, अर्थात् जिसमें पदार्थका परिपूर्णरूपसे स्वरूप जाना जा सके।

**पंचम उपांग-जंबूद्वीपप्रज्ञप्तिमें** जंबूद्वीपका सविस्तर वर्णन है। कालचक्र, ऋषभदेव भगवान् और भरत चक्रवर्तीका जीवनचरित्र भी वर्णित है। वास्तवमें यह भूगोलविषयक ग्रंथ है ऐसा **विंटरनिद्रज्ञ** का कहना है।

**छठे एवं सातवें उपांग-चंद्रप्रज्ञप्ति और सूर्यप्रज्ञप्तिमें** चंद्र तथा सूर्यादि ज्योतिषचक्रका वर्णन है। दोनोंके आरंभ-क्रमके थोड़ेसे भेदके अतिरिक्त शेष सब पाठ समान हैं। इनके २० प्राश्नत हैं। जिनमें मण्डलगति संख्या, सूर्यका तिर्थक् परिभ्रमण, प्राकाश्य क्षेत्र परिमाण, प्रकाश संस्थान, लेश्या प्रतिघात, ओजःसंस्थिति, सूर्यावारक, उदयसंस्थिति, पौरुषी छाया प्रमाण, योगस्वरूप, संवत्सरोका आदि अन्त, संवत्सरोके भेद, चंद्रमाकी वृद्धि अपवृद्धि, ज्योत्स्ना प्रमाण, शीघ्रगति निर्णय, ज्योत्स्ना लक्षण, च्यवन तथा उपपात, चन्द्रसूर्यादिकी उंचाई, उनका परिमाण, चन्द्रादिका अनुभाव वर्णित है। ये दोनों उपांग खगोल विषयक हैं। ५-६-७ वें उपांगको **विंटरनिद्रज्ञने** वैज्ञानिक ग्रंथ (Scientific Works) माना है।

**आठवें उपांग-निरियावलिकामें** मगध-नरेश श्रेणिक ( भंभसार-बौद्ध-साहित्यमें बिंबिसार ) का कोणिक ( अजातशत्रु ) के द्वारा मरण ( जिसका उल्लेख बौद्ध ग्रंथोंमें भी पाया जाता है ) आदिका कथन है। इसके अतिरिक्त कालकुमारादिका अपने नाना वैशालिनरेश चेटकके साथ युद्धमें लड़ते हुए मारा जाना, उनकी नारक गति और भविष्यमें मोक्ष होनेका वर्णन है।

**नवम उपांग-कल्पावतंसिकामें** श्रेणिक राजाके १० पौत्र पद्मकुमारादिका भगवान् महावीर प्रभुकी सेवामें वीक्षाग्रहण, देवगतिगमन और भविष्यमें मोक्ष होनेका कथन है। इसके १० अध्ययन हैं।

**दसवें उपांग-पुष्पिकामें** १० देव देवियोंका भगवान् महावीर स्वामीकी वंदना के लिए आना, गौतमस्वामीकी उनके पूर्वभवकी पृच्छा, भगवान् द्वारा पूर्वभव-कथन, चन्द्र, सूर्य, महाशुक ( पूर्वभवमें सोमिल ब्राह्मण ), बहुपुत्तिया ( पूर्व-भवमें सुभद्रा साध्वी ), पूर्णभद्र, माणिभद्र, बल, शिव और अनादित देवके पूर्व-जन्मका वर्णन है ।

**ग्यारहवें उपांग-पुष्पचूलिकामें** श्री ही आदि १० देवियोंकी पूर्वजन्मकी करणीका कथन है । इसमें १० अध्ययन हैं ।

**बारहवें उपांग-वृष्णिदशामें** वृष्णिवंशके बलभद्रजीके १२ पुत्र निषठ-कुमारादिका भगवान् अरिष्टनेमिके पास दीक्षाग्रहण, सर्वार्थसिद्धगमन, भविष्यमें मोक्ष पानेका अधिकार है<sup>१</sup> ।

### चार छेदसूत्र—

**प्रथम छेद-व्यवहारसूत्रमें** दश उद्देशक हैं । **प्रथम उद्देशकमें** आलोचना ( Confession ) विधि । **द्वितीय उद्देशकमें** सहधार्मिकके दोषित होने पर साधुका कर्तव्य । **तीसरे उद्देशकमें** आचार्य उपाध्याय आदि ७ पदवियाँ किसे दी जायँ और किसे नहीं, साथ ही उनके गुणोंका विवरण । **चौथे उद्देशकमें** आचार्यादिको चतुर्मास और विहारकालमें कितने साधुओंके साथ रहना । **पांचवेंमें** प्रवर्तनी के लिए विधान चौथेके अनुसार । **छठेमें** भिक्षा स्थंडिल ( शौचभूमि ) वसति कहां और किसप्रकार निश्चित करना तथा अमुक २ स्थलना-ओंके लिए प्रायश्चित्त । **सातवेंमें** दूसरे संघाड़े में से आई हुई साध्वीके साथ कैसा व्यवहार रखना और साध्वियों के लिए नियम, स्वाध्याय और पदवीदान, अमुक संयोगोंमें गृहस्थकी आज्ञा लेकर प्रवर्तन करना । **आठवेंमें** गृहस्थके मकानका कितने भाग तक उपयोग करना, पीठ फलक ( पाट पाटलादि ) की ग्रहण विधि, पात्र आदि उपकरण और भोजनका परिमाण । **नववेंमें** शय्यातर ( स्थान देनेवाले ) का कथन, उसके मकानादिको उपयोगमें लेने न लेनेका स्पष्टीकरण, भिक्षुप्रतिमाका आराधन कैसे होना चाहिए । **दशम उद्देशकमें** दो प्रकारकी प्रतिमा ( अभिग्रह ) तथा दो प्रकारका परिषह, पांच व्यवहार, चार जातिके पुरुष ( साधु ), चार जातिके आचार्य और शिष्य, स्थविर एवं शिष्य की तीन भूमिकाएँ, अमुक सूत्रका अभ्यास कब आरंभ करना आदिका कथन है ।

**द्वितीय छेद-बृहत्कल्पमें** छ उद्देशक हैं, इसमें मुख्यतया साधु साध्वियोंका

१ उपांगोंके संबंधमें वेबर महाशयके लेख द्रष्टव्य हैं ।



आचारकल्प वर्णित है। जो पदार्थादि कर्मबंधके हेतु और संयमके बाधक हैं उनके लिए 'न कप्पइ' शब्दका उपयोग किया है अर्थात् 'नहीं कल्पता है,' तथा जो संयमकी साधनामें सहायक, स्थान, वस्त्र, पात्र आदि हैं उनके संबंधमें 'कप्पइ' कल्पनीय कहा है। अमुक अकार्य (दोष) के लिए १० प्रायश्चित्तमें साधक किस प्रायश्चित्तका अधिकारी है। साथ ही कल्पके छ प्रकार आदिका कथन है।

**तृतीय छेद-निशीथसूत्रमें** प्रायश्चित्ताधिकार है, इसमें २० उद्देशक हैं, १९ उद्देशकोंमें गुरुमासिक लघुमासिक लघुचातुर्मासिक और गुरुचातुर्मासिक प्रायश्चित्तका वर्णन है, २० वें उद्देशकमें इनकी विधि बताई गई है। स्वल्पना करनेवाले साधुओं के लिए शिक्षारूप निशीथसूत्र है। दूसरे शब्दोंमें इसे धर्म-नियमोंका कोष या दंडसंग्रह (पेनल कोड) कहा जाय तो युक्तियुक्त ही है। प्रायश्चित्तका अर्थ है कि भूलकर एक बार जिस अकृत्यका सेवन किया हो उसकी आलोचना करके शुद्ध होना और पुनः त्याज्य कर्मका आचरण न करना।

**चतुर्थ छेद-दशाश्रुतस्कंधमें** दश अध्ययन हैं, जिनमें कमशः असमाधिके २० स्थान, २१ सबलदोष, ३३ अशातना, आचार्यकी आठ सम्पदाएँ और उनके भेद, शिष्यके लिए चारप्रकारकी विनय प्रवृत्ति भेद सहित, चित्तसमाधिके १० स्थान, श्रावक की ११ प्रतिमाएँ तथा साधुकी १२ प्रतिमाएँ, पर्यूषणाकर्प्य, महामोहनीयकर्मबंधके ३० स्थान तथा नव निदानों (नियानों) का वर्णन है।

इनमें व्यवहार, बृहत्कल्प और दशाश्रुतस्कंधकी रचना आर्य भद्र-बाहु आचार्य ने की है।

### चार मूलसूत्र-

**प्रथम मूलसूत्र-दशवैकालिकमें** १० अध्ययन और दो चूल्काएँ हैं। इसकी रचना १४ पूर्वधर श्रीशय्यंभवाचार्यने अपने शिष्य (पुत्र) मनाकूप्रिय के लिए पूर्वोंमेंसे उद्धृत करके की है। इसके दश अध्ययन हैं और इसे विकालमें भी पढ़ा जा सकता है अतः इसका नाम दशवैकालिक है। इसके प्रथम अध्ययनमें धर्मकी प्रशंसा और साधुकी भ्रमर-जीवनके साथ तुलना; द्वितीय अध्ययनमें चित्त-स्थिरीकरणके उपाय, रथनेमि और राजीमतीका उदाहरण; तृतीय अध्ययनमें साधुके ५२ अनाचीर्ण; चतुर्थ अध्ययनमें षड्जीवनिकायका स्वरूप; पाँचवें अध्ययनके प्रथमोद्देशकमें भिक्षा (गोचरी) विधि, द्वितीय उद्देशकमें

१ इसका विशेष कथन कल्पसूत्रसे ज्ञातव्य है।

भिक्षाकालादि; छठे अध्ययनमें साधुके १८ कल्प; सातवें अध्ययनमें वचनशुद्धि, साधुके बोलने न बोलने योग्य भाषाका वर्णन; आठवें अध्ययनमें साधुके आचार; नववें अध्ययनके प्रथमोद्देशकमें विनयका स्वरूप, गुरुकी आशातनाका दुष्परिणाम, द्वितीय उद्देशकमें विनय तथा अविनयका फल, तृतीय उद्देशकमें किन २ गुणोंके समाचरणसे पूजनीय होता है, चतुर्थ उद्देशकमें विनय, श्रुत, तप और आचार समाधिका वर्णन है। दशवें अध्ययनमें भिक्षुके गुण वर्णित हैं अर्थात् किन २ गुणोंसे भिक्षु होता है। पहली चूलिकामें संयममें स्थिर करनेवाली १८ बातें; द्वितीय चूलिकामें साधुका आचार विचार, वासकल्प, विहार मोक्षप्राप्ति आदिका कथन है। कई इन चूलिकाओंको महाविदेह क्षेत्रसे लाई हुई मानते हैं परन्तु कई कारणोंसे इसे युक्ति-युक्त नहीं माना जा सकता। ये श्रीशय्यंभवाचार्य की रचनाएँ न होने पर भी प्रामाणिक मानी गई हैं।

द्वितीय मूल-उत्तराध्ययनमें ३६ अध्ययन हैं, यह सारा सूत्र ही अत्यन्त-ददायक ज्ञानकी निधिसे समान है। इसके प्रथम अध्ययनमें विनयका विस्तार-पूर्वक कथन है। द्वितीय अध्ययनमें परिषद्वाक्योंके नाम और साधुको उनके सहन करनेका उपदेश है। तृतीय अध्ययनमें मनुष्यत्व-धर्मश्रवण-श्रद्धा और संयममें स्फुरणा, इन चार अंगोंकी दुर्लभताका वर्णन है। चतुर्थ अध्ययनमें दूरीकी बूटी नहीं है अर्थात् जीवनकी क्षणभंगुरता और प्रमाद-अप्रमादका स्वरूप समझाया गया है। पांचवें अध्ययनमें अकाम (बाल-अज्ञान) मरण सकाम (पंडित) -मरण का विस्तारपूर्वक वर्णन है। छठे अध्ययनमें साध्वाचारका संक्षिप्त वर्णन है। सातवें कामी पुरुषकी बकरेके जीवनके साथ तुलना, काकिणी, आम्रफल, तीन व्यापारियोंके उदाहरण हैं। आठवें कपिल केवलीका चरित्र, लोभ तृष्णा आदि दुर्गुणोंके त्यागका उपदेश है। नववें अध्ययनमें नमिराजका वीक्षा के लिए उद्यत होना, इन्द्रके साथ प्रश्नोत्तर आदि। दशवें वृक्षके सूखे पत्तेके समान मानव जीवनकी नश्वरता तथा समयमात्र का भी प्रमाद न करनेकी शिक्षा। ग्यारहवें शिक्षा न मिलनेके ५ और शिक्षा प्राप्त करनेके ८ कारण, विनीतके १५ और अविनीतके १४ लक्षण, बहुश्रुतकी १६ उपमाएँ। बारहवें हरिकेशीबल मुनिका चरित्र, तपकी महत्ता, जातिवादका खंडन, भावयज्ञ तथा आध्यात्मिक ज्ञानका स्वरूप। तेरहवें चित्त संभूतिका पूर्वभाव, दोनोंका मिलना, चित्तमुनिका ब्रह्मदत्तको उपदेश, पूर्वकृत निदानके कारण ब्रह्मदत्तकी व्रतादिकी प्रवृत्तिमें असम-

श्रुता, दुर्गतिगमन, चित्तका मोक्ष होना । १४ **वैमें** छ जीवोंका पूर्वभव, इषुकार नगरमें जन्म और फिर पारस्परिक मिलाप, अन्तमें मृगपुरोहितकी पत्नी यशा और उनके दो पुत्र, इषुकार राजा और कमलावती रानीका एक दूसरेके कारण वैराग्यलाभ, दीक्षाग्रहण एवं मोक्षप्राप्ति । १५ **वैमें** भिक्षुके लक्षण और गुण । १६ **वैमें** ब्रह्मचर्यके १० असमाधिस्थान । १७ **वैमें** पापश्रमणका स्वरूप । १८ **वैमें** संयति राजाका मृगयाके लिए जाना, उद्यानमें गर्दभालि मुनिका उपदेश, राजाका दीक्षाग्रहण और मुक्ति-प्राप्ति । १९ **वैमें** राजकुमार मृगापुत्र का साधुको देखकर जातिस्मरण, माता पितासे संवाद, नरकादि गतियोंके दुःखोंका वर्णन, संयमग्रहण, मोक्षप्राप्ति । २० **वैमें** श्रेणिक नरेशका अनाथीमुनिका दर्शन प्राप्त करना, सनाथता अनाथताका स्वरूप, राजाकी धर्ममें दृढ़ श्रद्धा होना । २१ **वैमें** समुद्रपालका वध्य चोरको देखना, संवेदप्राप्ति, दीक्षाग्रहण तथा मोक्ष । २२ **वैमें** भगवान् अरिष्टनेमिका विवाह के लिए जाना, पशु पक्षियों पर करुणा ला कर उन्हें बंधनमुक्त कराना, दीक्षाग्रहण, सती राजीमतीको गुफामें देखकर रथनेमिका संयमसे विचलित होना, सतीके उपदेश द्वारा उसका पुनः संयममें स्थिर होना, अन्तमें मोक्षप्राप्ति । २३ **वैमें** मुनि केशीकुमार और गौतमस्वामीका संवाद, अन्तमें केशीश्रमण द्वारा भगवान् महावीर कथित पांच महाव्रतोंका स्वीकार । २४ **वैमें** पांच समिति और तीन गुप्ति, इन आठ प्रवचन-माताओंका वर्णन । २५ **वैमें** जयघोष विजयघोषका चरित्र, ब्राह्मणके यथार्थ लक्षण । २६ **वैमें** १० सामाचारी और साधुकी दिनरात्रिचर्या का कथन । २७ **वैमें** गर्गाचार्य द्वारा अविनीत शिष्योंका त्याग । २८ **वैमें** मोक्षमार्गमें गतिमान होनेके उपाय । २९ **वैमें** सम्यक्त्व पराक्रमके ७३ बोल, उनका फल । ३० **वैमें** बाह्य और अभ्यन्तर तपका विवरण । ३१ **वैमें** चरणविधि । ३२ **वैमें** प्रमादस्थान और उनसे बचे रहनेके उपाय । ३३ **वैमें** आठों कर्मोंका विस्तारपूर्वक वर्णन । ३४ **वैमें** छहों लेश्याओंके नाम, वर्ण, रस, गंध, स्पर्श, परिणाम, लक्षण, स्थिति आदिका विस्तृत वर्णन । ३५ **वैमें** साधुके गुण और ३६ **वै** अध्ययनमें जीव तथा अजीवके भेद विस्तारसे बताए हैं । ज्ञातपुत्र महावीर भगवान् ने मोक्ष पानेके समय यह सूत्र फर्माया था, जैसा कि कथित सूत्रकी अन्तिम गाथासे स्पष्ट है ।

**इइ पाउकरे बुद्धे, णायए परिणिवुए ।**

**छत्तीसं उत्तरज्झाए, भवसिद्धीयसंमए ॥ २७१ ॥**

इसी स्मृतिको बनाए रखने के लिए दिवालीसे अगले दिन अर्थात् कार्तिक शुक्ला

प्रतिपदाको सबेरे ही उत्तराध्ययनसूत्रका संपूर्ण स्वाध्याय ( पाठ ) किया जाता है ।

**तृतीय मूल-नन्दीसूत्रमें** संघ स्तुति, तीर्थकर गणधरादि स्थविरावली, परिषद्, पांचों ज्ञानोंका स्वरूप विस्तारपूर्वक वर्णित है ।

**चतुर्थ मूल-अनुयोगद्वारमें** आवश्यक, श्रुतस्कंधके निक्षेप, उपक्रम, आनुपूर्वी, दश नाम, प्रमाण, निक्षेप, अनुगम और नयका पूर्ण विस्तारसे उल्लेख है । इसमें ७ स्वर, ८ विभक्ति, ९ रस आदि विषय विशेष उल्लेखनीय हैं । यह **आर्य रक्षिताचार्य** कृत है । जिसके ये दो प्रमाण हैं—

**प्रथम**—संस्कृतका प्रयोग किसी सूत्रमें नहीं है परंतु इसमें पाया जाता है ।

**दूसरा**—उदाहरणोंमें 'तरंगवङ्कारे, मलयवङ्कारे' आदि भी इसकी पश्चाद्वर्तिताको सूचित करते हैं ।

**बत्तीसवां आवश्यकसूत्र**—इसमें सामायिक, चतुर्विंशतिस्त्व, वंदनक, प्रतिक्रमण, कायोत्सर्ग और प्रत्याख्यान इन छहों आवश्यकोंका वर्णन है ।

**परिशिष्ट परिचय**—प्रथम **परिशिष्टमें कल्पसूत्र** सन्निहित है जो कि चतुर्थ छेद दशाश्रुतस्कंधका आठवाँ अध्ययन है । इसमें ज्ञातपुत्र महावीर भगवान्, पार्श्वनाथ, अरिष्टनेमि और ऋषभदेव इन चारों तीर्थंकरोंका चरित्र है । इसके अतिरिक्त इसमें गणधरादि स्थविरावली और सामाचारी भी वर्णित हैं ।

**द्वितीय परिशिष्टमें** सामायिकसूत्र विधिसहित दिया गया है ।

**तृतीय परिशिष्टमें** श्रावकावश्यक ( प्रतिक्रमण ) सूत्र विधिसहित है । भाषा-पाठोंके स्थानपर कोष्ठकमें मूलपाठ दिए हैं ताकि समझने में सुगमता हो ।

**सूत्रोंमें प्रयुक्त छंद**—आगमों में गाथाओंका प्रयोग अधिक है, इसके अतिरिक्त वैतालीय, उपजाति, आर्या का प्रयोग भी पाया जाता है ।

**प्रस्तुत प्रकाशनकी विशेषता—**

१-पाठशुद्धिका पूरा २ लक्ष्य रक्खा गया है ।

२-इसका संपादन शुद्ध प्रतियोंके आधारपर किया गया है ।

३-पाठान्तर नवीन पद्धतिसे दिए हैं ।

४-टिप्पण भी यथास्थान प्रयुक्त किए गए हैं ।

५-अंतमें परिशिष्ट भी दिए गए हैं ।

६-तुलनात्मक अध्ययन भी इससे पूर्व दिया गया है ।

७-व्याकरण-शेष भी दे दिया गया है ।

**कार्यविवरण**—प्रथम अंशका कार्य पूरा होनेके लगभग ८ महीने बाद माडुंगा

चतुर्मासमें द्वितीय अंशका कार्य प्रारंभ होकर शनैः २ चलता रहा और पनवेल चतुर्मासमें सम्पन्न हुआ ।

**सहयोगी**—मेरे अंतेवासी शिष्य **सुमित्तभिक्षू** ने 'पासंगियं किंचि' नामक लेख लिखकर 'सुत्तागमे' के सौंदर्यमें जो अभिवृद्धि की है और वर्णित विषयोंको स्पष्ट करके बताया है वह उल्लेखनीय है ।

मेरे अंतेवासी प्रशिष्य **जिनचंदभिक्षू** ने अप्रमत्त एवं जागरूक अवस्थामें संशोधनका कार्य अपने हाथमें लेकर जो सहयोग दिया है उसे तो कभी भुलाया ही नहीं जा सकता । इन दोनोंकी सेवा जीवनके अंत तक स्मृतिपथमें रहेगी ।

**मुनिश्री रतनचंदजी महाराज (कच्छी)** ने 'सुत्तागमे' की जो साररूप भूमिका प्राकृतमें लिखी है उनका आभार माने बिना कैसे रहा जा सकता है । आपने तो मानों सागर को गागरमें बंद कर दिया है ।

**पंडितवर्य श्री गजानन जोशी शास्त्री (पनवेल)** ने जो प्राकृतमें 'निदंसणं' लिखा है वह उनकी योग्यताका परिचायक एवं अभिनंदनीय है, और प्राकृतके अभ्यास के लिए प्रेरणा देता है ।

इनके अतिरिक्त प्रगट या अप्रगट रूपमें जिन २ महानुभावोंने सहयोग दिया है उनका आभार मानता हूँ ।

**स्पष्टीकरण**—(१) कल्पसूत्रमें २४ तीर्थकरों के आंतरोंमें महावीर—निर्वाण के ९८० वर्ष पीछे सूत्रोंके लिखे जानेकी जो घटना है वह देवर्द्धिगणी क्षमाश्रमणकी है, क्योंकि इतिहासकार अपने समय तकका विवरण दिया ही करते हैं ।

(२) **शब्दकोश** गाथाबद्ध सानुवाद तैयार हो रहा है, १११८ गाथाओंकी रचना भी हो चुकी है, अतः शब्दकोश नहीं दिया गया ।

(३) अन्य उपयुक्त विषय जो कि ग्रंथके बढ़ जानेके कारण रह गए हैं वे अन्यत्र दिए जायेंगे ।

**अन्तिम**—इस प्रकाशनमें यदि कहीं कोई भूल रह गई हो या सिद्धान्तके विरुद्ध हुआ हो तो उसका खालिस हृदयसे अनन्त सिद्धों की साक्षीसे 'मिच्छामि दुक्कडं' ।

**गच्छतः स्वलनं कापि, भवत्येव प्रमादतः ।**

**हसन्ति दुर्जनास्तत्र, समादधति सज्जनाः ॥**

शांतिभवन अंबरनाथ C. R.

दिनांक २१-१२-१९५४

} श्रीगुरुवरणचचरीक-  
पुष्पभिक्षू

## व्याकरण-शेष

### उपसर्ग

उपसर्ग धातुके पूर्वमें लगाए जाते हैं, वे धातुके मूल अर्थमें परिवर्तन करके कहीं विशेष अर्थ और कहीं विपरीत अर्थ तथा कहीं भिन्न अर्थके द्योतक होते हैं।

अइ } सीमा से बाहर, अतिशय; अइ+कमइ=अइकमइ—वह सीमासे बाहर  
अति } जाता है, अथवा उल्लंघन करता है।

अहि } ऊपर, अधिक, प्राप्त करना;  
अधि } अहि+चिट्ठइ=अहिचिट्ठइ—वह ऊपर बठता है।

अहि+गच्छइ=अहिगच्छइ—वह प्राप्त करता है।

अणु (अनु) ] पीछे, समान, समीप;

अणु+गच्छइ=अणुगच्छइ—वह पीछे जाता है।

अणु+करइ=अणुकरइ—वह अनुकरण करता है।

अभि } सन्मुख, पास; अभि+गच्छइ=अभिगच्छइ—वह सन्मुख जाता है,  
अहि } अथवा पासमें जाता है।

अव } नीचे, तिरस्कार; अव+यरइ=अवयरइ—ओ+यरइ=ओयरइ—वह  
ओ } नीचे उतरता है। अव+गणइ=अवगणइ—वह तिरस्कार करता है।

आ ] उलटा, विपर्यय, मर्यादा; आ+गच्छइ=आगच्छइ—वह आता है।

अव } विपरीत, पीछे, उलटा; अव+कमइ=अवकमइ—वह पीछे फिरता है  
अप } (लौटता है)। अप+सरइ=अपसरइ—ओ+सरइ=ओसरइ—वह  
ओ } पीछे हटता है।

उ } ऊँचा, ऊपर; उगच्छइ=वह ऊपर जाता है।

(उत्) } उठेइ—वह उठता है।

उव } पासमें; उवागच्छइ=वह समीपमें जाता है।

(उप) }

नि } अंदर, नीचे; नि+मज्जइ=निमज्जइ—नु+मज्जइ=नुमज्जइ—वह डूबता  
नु } है। निवडइ—वह नीचे गिरता है।

परा } उलटा, पीछे; परा+जिणइ=पराजिणइ—वह हारता है।

पला } पलायइ—वह भागता है।

परि } विशेष, परिवर्तन होना, चारों ओर; परि+तू सइ=परितू सइ—वह  
पलि } विशेष प्रसन्न होता है । परि+वट्टइ=परिवट्टइ—वह बदलता है ।

परियडइ—वह चारों ओर घूमता है ।

पडि-पति } सामने, उलटा; पडि+भासइ=पडिभासइ—वह सामने बोलता  
परि-पइ } है । पइ+जाणइ=पइजाणइ—वह प्रतिज्ञा करता है ।  
(प्रति)

प (प्र) } आगे, प्रकर्ष; पयाइ—वह आगे जाता है ।

पप } पयासेइ—वह विशेष प्रकाश करता है ।

वि } विशेष, निषेध, विरोधार्थ; वियाणेइ—वह विशेष रूपसे जानता है ।

विस्सरइ—वीसरइ—वह भूलता है ।

सं (सम्) } भली भाँति; सं+गच्छइ=संगच्छइ—वह भली भाँति मिलता है ।

निर् } निश्चय, आधिक्य, निषेध; निज्जिणेइ—वह निश्चयसे विजय पाता है ।

नि } निरिक्खइ—वह निरीक्षण करता है ।

नी } नीसरइ—वह बाहर निकलता है ।

दुर् } दुःखपूर्वक, दुष्टार्थ; दुल्लंघेइ—कठिनाईसे उलंघन करता है । दुस्स-  
दु } हेइ—दूसहेइ—वह दुःख सहन करता है । दुरायार-दुष्ट आचरण ।  
दु

(नोट) निर दुर् इन उपसर्गोंके रेफका विकल्पसे लोप होता है, परन्तु रेफसे परे स्वर होनेपर लोप नहीं होता, जब रेफका लोप नहीं होता तो पश्चात्पूर्वी व्यंजनमें रेफ मिल जाता है और उस व्यंजनको द्वित्व होता है । जैसे—निर+सहो=निस्सहो, नीसहो, निसहो; निर+अंतरं=निरंतरं; दुर्+सहो=दुस्सहो, दूसहो, दुसहो; दुर्+उत्तरं=दुस्तरं ।

## अव्यय

सदृशं त्रिषु लिङ्गेषु, सर्वासु च विभक्तिषु ।

वचनेषु च सर्वेषु, यन्न व्येति तदव्ययम् ॥

(१) अ अण=निषेधार्थ, अह=इसके बाद, अइरा=तत्काल, अईव=अधिक, अंग=आमंत्रण, अन्तर अन्तरेण=अभावयुक्त, अंते अंतो=बीचमें, अकम्हा=अकस्मात्, अचिरं=जल्दी, अजस्सं=निरन्तर, अज्ज=आज, अणिसं=सतत, अति=

१ आविर व्यक्ते, तु पृथग्भावे, पाउ पाउर् प्राकाश्ये, सद् श्रद्धायामित्यधिकं प्रत्यन्तरे ।

अतिशय, अत्थि=है, अदु अदुत्तरं=इसके पीछे, अदुवा=अथवा, अहो=नीचे, अभि=सन्मुख, अभिक्खणं २=बार बार, अलं=पर्याप्त, अवि=भी, असइं=बार २, अहा-वरं=इसके पश्चात्, आ=मर्यादा-अभिविधि, इइ इति इय=इस प्रकार-समाप्त, इव=समान, ईसि ईसिं=थोड़ा, उदाहु=पक्षान्तर, उपरि उप्पि उवरि=ऊपर, उस्सण्णं=प्रायः, एव=ही, एवं=इस प्रकार, एवमाइ=इत्यादि, एवामेव=इसी प्रकार, किं=क्या, किण्णं=जिज्ञासार्थ, किर किल=निश्चयार्थ, कीस=किस लिए, कु=खराब, खलु=निश्चय, खिप्पं=शीघ्र, च च=समुच्चयार्थक, चे(चेत्)=संभावनार्थ, जइ=यदि, जाव=जब तक, ताव=तब तक, जुगवं=एकदम, झत्ति=झटपट, ण=नहीं, णं=वाक्यालंकार, णवरं णवरि=केवल, णहु=निषेधार्थ, णाणा=अनेक, णु=प्रश्नवाचक, णूणं=निश्चयपूर्वक, णो=नहीं, ति ति=इस प्रकार और समाप्ति अर्थ, तु=समुच्चयार्थ, थ=वाक्यालंकार, दिया=दिन, दुहु=खराब, दूरा=दूर, धणियं=अतिशय, धिद्धि धिर=धिकारार्थ, नणु=शंकार्थ, नमो=नमस्कार, पच्छा=पीछे, पमिइ=प्रभृति, पाओ=प्रातः, पायं=प्रायः, पि=भी, पिव=इव, पुढो=पृथक्, पुण पुणो=पुनः, पुरा=पहले और आगे, पुरत्था पुरच्छा पुरे=आगे, वहिं बाहिं=बाहर, भंते ! =पूज्यसंबोधन, भिसं=अतिशय, भुजो २=बार २, भे भो !=संबोधन, भिव=इव, भिहो=परस्पर, मुसा=असत्य, मुहा=व्यर्थ, मुहुं २=बार २, य=च, रह रहो=एकान्त, राओ=रातमें, वि=भी, विव व्व=इव, सइं=एक बार, संपइ संपयं=अब, सक्खं=साक्षात्, समंता=चारों ओर, सणियं २=धीरे २, सद्धि समं=साथ, सयं=स्वयं, सययं=निरंतर, सार्यं=संध्या, सुइरं=चिरकाल, सुए=आनेवाली कल, सुहुं=अच्छा, सेवं=ऐसा ही है, हंता=स्वीकार, हंदि हं भो=आमंत्रण, हणि २=प्रतिदिन, हद्धि=खेदार्यक, हव्वं=शीघ्र, हिज्जो=बीता हुआ कल, हुरत्था=वहिर्देश, हे=संबोधन, हेट्ठा=नीचे, हे हो=आमंत्रणार्थ ।

( २ ) उपसर्गोंकी गणना भी अव्ययमें ही है ।

( ३ ) तद्धितान्त अव्यय-

सव्वावर्त्ति=सब, केइ=कोई, केणइ=किसीके द्वारा, कोइ=कोई, इह=यहां, कयाइं कयाइं=कभी, कस्सइं=किसीका, दुक्खुत्तो=दो बार, तिक्खुत्तो=तीन बार, कहिं चि=कहीं, इण्हि इदाणि इयाणि=अब, कया=कब, सया=सदा, जओ=जिससे, एत्थ इत्थ=यहां, कत्थ=कहां, जत्थ=जहां, तत्थ=वहां, इत्थं=इस प्रकार, जया=जब, तया=तब, एकसि=एक बार, कमसो=कमशः, बहुसो=बहुशः, दवदवस्स=जेल्दी ३, तहा=तथा, कहिं=कहां, जहिं=जहां, तहिं=वहां, अहुणा=अब ।



- ( ४ ) हेत्वर्थ कृदन्त-संबंधक भूतकृदन्त भी अव्ययमें ही सम्मिलित हैं ।  
 ( ५ ) अम् प्रत्ययान्त समास भी अव्ययमें ही परिगणित हैं । जैसे-अहोनिंस ।  
 ( ६ ) इकारान्त 'दिसि' आदि शब्दोंकी भी समासमें अव्यय संज्ञा होती है ।  
 यथा-दिसोदिसि, गुम्मागुम्मि, घराघरि इत्यादि ।

### प्रेरक रूप-

- ( १ ) धातुके मूलरूपको 'अ' 'ए' 'आव' 'आवे' प्रत्यय लगाकर तत्कालके पुरुषबोधक प्रत्यय लगानेसे प्रेरक रूप सिद्ध होता है ।  
 ( २ ) धातुमें उपान्त्य 'अ' हो तो 'अ' अथवा 'ए' प्रत्यय लगाते समय 'अ' को 'आ' होता है, जैसे-हसइ-हासइ, हासेइ, हसावइ, हसावेइ ।  
 ( ३ ) उपान्त्य 'इ' 'उ' होनेपर दोनोंको गुण होता है, यथा-बुह-बोहइ, तुड-तोडइ इत्यादि ।  
 ( ४ ) 'आवे' प्रत्यय परे होनेपर 'अ' को कहीं २ 'आ' होता है, जैसे-कारावेइ ।  
 ( ५ ) 'भम्' धातुका प्रेरक रूप 'भमाडेइ' भी बनता है ।  
 उपरोक्त चारों प्रत्यय लगाकर सब प्रेरक रूप सिद्ध किए जाते हैं ।

### इच्छादर्शक आदि अन्य प्रक्रियाएँ

**सनन्त-जुगुप्सते=जुगुच्छइ (दुगुंछइ)**-वह निंदा अथवा घृणा करता है ।

**पिपासति=पिवासइ**-वह पीनेकी इच्छा करता है । **शुश्रूषते=सुस्सुसइ**-वह सेवा करता है अथवा सुननेकी इच्छा करता है । **सुस्सुसमाण व० कृ० ।**

**थङ्गन्त-लालप्यते=लालप्पइ**-लपलप करता है । **लालप्पमाण व० कृ० । चङ्क्रम्यते=चङ्कम्मइ**-बहुत चलता है ।

**यङ्लुगन्त-चङ्क्रमीति=चङ्कमइ**-बार २ चलता है ।

**नामधातु-दमदमायते=दमदमाइ-दमदमायइ**-आडंबर करता है ।  
**गुरुकायते=गुरुआइ-गुरुआयइ**-गुरुके समान आचरण करता है ।

### स्त्री-प्रत्यय

( १ ) अकारांत शब्दके पीछे 'डा' प्रत्यय लगानेसे स्त्रीलिंग आकारान्त शब्द बन जाता है, जैसे-बाल-बाला, अम्मा आदि ।

( २ ) 'डी' प्रत्ययसे होने वाले रूप-सत्थवाह-सत्थवाही आदि ।

( ३ ) भाव भिन्नार्थक प्रत्ययांत से 'णी' प्रत्यय होता है, जैसे-आसाविणी आदि ।

- ( ४ ) 'आणी' प्रत्ययसे निष्पन्न होनेवाले स्त्रीरूप-इंद-इंदाणी ।  
 ( ५ ) 'डि' 'डा' प्रत्यय लगने से दिसा-दिसि आदि सिद्ध होते हैं ।  
 ( ६ ) 'ती' प्रत्यय लगने पर स्त्रीलिंगमें 'मह' शब्दसे 'महती' होता है ।  
 ( ७ ) भिक्खू आदि शब्दोंको स्त्रीलिंगमें 'णी' प्रत्यय होता है, जैसे-भिक्खुणी,

साहुणी आदि ।

( ८ ) 'णी' प्रत्यय परे होनेपर 'सिस्स' और 'मास' शब्दके अकारको इकार होता है, जैसे-सीसिणी, पुण्णमासिणी ।

( नोट ) इनके अतिरिक्त महल्लिया-महाल्लिया-महाल्लयादि भी स्त्रीप्रत्यय-निष्पन्न जानने चाहिएँ ।



## सुत्ताणुक्रमणिया

सुत्तणामं	पिट्ठसंख्या
ओववाइयसुत्तं	१
रायपसेणइयं	४१
जीवाजीवाभिगमे	१०५
पण्णवणसुत्तं	२६५
जंबुद्दीवपण्णत्ती	५३५
चंदपण्णत्ती	६७३
सूरियपण्णत्ती	७५३
णिरियावलिया ( कप्पिया ) ओ	७५५
कप्पवड्डिसियाओ	७७१
पुप्फियाओ	७७३
पुप्फचूलियाओ	७८९
वण्हिदसाओ	७९२
ववहारो	७९७
विहक्कप्पसुत्तं	८३१
णिसीहसुत्तं	८४९
दसासुयक्खंधो	९१९
दसवेयालियसुत्तं	९४७
उत्तरज्झयणसुत्तं	९७७
णंदीसुत्तं	१०६१
अणुओगदारसुत्तं	१०८५
आवस्सयसुत्तं	११६५

## परिसिद्धाणुक्रमणिया

पढमं परिसिद्धं ( कप्पसुत्तं )	१
बीयं परिसिद्धं ( सामाइयसुत्तं )	४३
तइयं परिसिद्धं ( सावयावस्सय ( पडिक्कमण ) सुत्तं )	४५



गमोऽत्यु णं समणस्स भगवओ णायपुत्तमहावीरस्स

# सुत्तागमे

वारस उवंगाई

तत्थ णं

## ओववाइयसुत्तं

तेणं कालेणं तेणं समएणं चंपा नाम नयरी होत्था, रिद्धत्थिमियसमिद्धा पसुइय-  
जणजाणवया आइण्णजणमणुस्सं हलसयसहस्ससं किट्ठविकिट्ठलट्ठपण्णत्तसेउसीमा  
कुक्कुडसंडेयगामपउरा उच्छुजवसालिकलिया गोमहिसगवेलगप्पभूया उक्कोडियगाय-  
गंठिमेयगभडतक्करखंडरक्खरहिया खेमा णिरुवद्वा सुभिक्षा वीसत्थसुहावासा  
अणेगकोडिकुडुंबियाइण्णिव्वुयसुहा णडणट्टगजल्लमल्लसु द्वियवेलंबयकहगपवगलासग-  
आइक्खगलंखमंखत्तुणइल्लतुंबवीणियअणेगतालायराणुचरिया आरामुज्जाणअगडतला-  
गदीहियवप्पिणिगुणोववेया नंदणवणसत्तिभप्पगासा उव्विद्धविउलंगंसीरखायफलिहा  
चक्कगयमुसुंढिओरोहसयधिजमलकवाडघणहुप्पवेसा धणुकुडिलवंकपागारपरिक्खत्ता  
कविसीसयवट्टरइयसंठियविरायसाणा अट्टालयचरियदारगोपुरतोरणउण्णयसुविभत्तरा-  
यमंगगा छेयायरियरइयदढफलिहइंदकीला विवणिवणिच्छेत्तसिप्पियाइण्णिव्वुयसुहा  
सिंघाडगतिगचउक्कचच्चरपणियावणविविहवत्थुपरिमंडिया सुरम्मा नरवइपविइण्णमहि-  
वइपहा अणेगवरतुरगमतकुंजररहपहकरसीयसंदमाणीयाइण्णजाणजुग्गा विमउलण-  
वणलिणिसोभियजला पंडुरवरभवणसण्णिमहिया उताणणयणपेच्छणिज्जा पासादीया  
दरिसणिज्जा अभिरुवा पडिहवा ॥ १ ॥ तीसे णं चंपाए णयरीए बहिया उत्तरपुरत्थिमे  
दिसीभाए पुण्णभदे णामं उज्जाणे होत्था रम्मे० ॥ २ ॥ तस्स णं उज्जाणस्स बहुमज्झ-  
देसभाए एत्थ णं महं एक्के असोगवरपायवे प० कुसविकुसविसुद्धस्वखमूले मूलमंते कंदमंते  
खंधमंते तयामंते सालमंते पवालमंते पत्तमंते पुप्फमंते फलमंते वीयमंते अणुपुव्वसु-  
जायसुहलवट्टभावपरिणए एकखंधे अणेगसाले अणेगसाहप्पसाहविडिमे अणेगनरवास-  
सुप्पसारियअगेज्झघणविउलबद्धखंधे अच्छिइपत्ते अविरलपत्ते अवाईणपत्ते अणइयपत्ते  
निदूयजरढपंडुपत्ते णवहरियभिसंतपत्तभारंधकारगंभीरदरिसणिज्जे उवणिग्गयणवतरुण-  
पत्तपल्लवकोमलउज्जलचलंतकिसलयसुकुमालपवालसोहियवरंकुरग्गसिहरे णिच्चं कुसुमिए  
णिच्चं माइए णिच्चं लवइए णिच्चं थवइए णिच्चं गुलइए णिच्चं गोच्छिए णिच्चं जमल्लिए णिच्चं

जुवलिए णिच्चं विणमिए णिच्चं पणमिए णिच्चं कुसुमियमाइयलवइयथवइयगुलइय-  
गोच्छियजमलियजुवलियविणमियपणमियसुविभत्तपिंडमंजरिवडिंसयधरे सुयबरहिण-  
मयणसालकोइलकोहंगकर्मिगारककोडलकजीवंजीवगणंदीमुहकविलपिंगलकखगकारं-  
डचक्कायकलहंससारसअणेगसउणगणमिहुणविरइयसहुण्णइयमहुरसरणाइए सुरम्मे  
संपिडियदरियभमरमहुयरिपहकरपरिलिन्तमत्तच्छप्पयकुसुमासवलोलमहुरगुमगुमंतगुं-  
जंतदेसभागे अब्भंतरेपुप्फफले बाहिरपत्तोच्छण्णे, पत्तेहि य पुप्फेहि य उच्छण्ण-  
पडिवल्लिच्छण्णे साउफले निरोयए अकंटए णाणाविहगुच्छगुम्ममंडवगरम्मसोहिए  
विचित्तसुहकेउभूए वावीपुक्खरिणीदीहियासु य सुनिवेसियरम्मजालहरए पिंडिमणी-  
हारिमसुगंधिसुहसुरभिमणहरं च महया गंधद्वारिणं मुयंतरे णाणाविहगुच्छगुम्ममंडवक-  
घरकसुहसेउकेउवहुले अणेगरहजाणजुगसिवियपविमोयणे सुरम्मे पासादीए दरिस-  
णिजे अभिरूवे पडिरूवे । ते णं असोगवरपायवे अण्णेहिं बहूहिं तिलएहिं लउएहिं  
छत्तोवेहिं सिरीसेहिं सत्तवण्णेहिं दहिवण्णेहिं लोद्धेहिं धवेहिं चंदणेहिं अज्जुणेहिं  
णीवेहिं कुडएहिं सव्वेहिं फणसेहिं दाडिमेहिं सालेहिं तालेहिं तमालेहिं पियएहिं  
पियंगूहिं पुरोवगेहिं रायरूक्खेहिं णंदिरूक्खेहिं सव्वओ समंता संपरिक्खित्ते । ते णं  
तिलया लउया जाव णंदिरूक्खा कुसविकुसविसुद्धरूक्खमूला मूलमंतो कंदमंतो,  
एएसिं वण्णओ भाणियव्वो जाव सिवियपविमोयणा सुरम्मा पासादीया दरिसणिजा  
अभिरूवा पडिरूवा । ते णं तिलया जाव णंदिरूक्खा अण्णेहिं बहूहिं पउमलयाहिं  
णागलयाहिं असोगलयाहिं चंपगलयाहिं चूयलयाहिं वणलयाहिं वासंतियलयाहिं  
अइमुत्तयलयाहिं कुंदलयाहिं सामलयाहिं सव्वओ समंता संपरिक्खित्ता । ताओ णं  
पउमलयाओ णिच्चं कुसुमियाओ जाव वडिंसयधरीओ पासादीयाओ दरिसणिजाओ  
अभिरूवाओ पडिरूवाओ ॥ ३ ॥ तस्स णं असोगवरपायवस्स हेट्ठा ईसिं खंधसमल्लीणे  
एत्थ णं महं एक्के पुढविसिलापट्टए पण्णत्ते, विक्खंभायामउस्सेहसुप्पमाणे किण्हे  
अंजणघणकिवाणकुवलयहलधरकोसेजागासकेसकज्जलंगीखंजणसिंगभेदरिट्ठयजंबूफल-  
असणकसणबंधणणीलुप्पलपत्तनिकरअयसिकुसुमप्पगासे मरगयमसारकलित्तणयणकीय-  
रासिवण्णे णिद्धघणे अट्टसिरे आयंसयतलोवमे सुरम्मे ईहामियउसभतुरगनरमगर-  
विहगवालगकिण्णररूसरभचमरकुंजरवणलयपउमलयभत्तिचित्ते आईणगहूयवूरणव-  
णीयतूलफरिसे सीहासणसंठिए पासादीए दरिसणिजे अभिरूवे पडिरूवे ॥ ४ ॥  
तत्थ णं चंपाए णयरीए कूणिए णामं राया परिवसइ, महयाहिमवंतमहंतमलय-  
मंदरमहिंदसारे अच्चंतविसुद्धदीहरायकुलवंससुप्पसूए गिरंतंरं रायलक्खणविराइयंगमंगे  
बहुजणबहुमाणपूइए सव्वगुणसमिद्धे खत्तिए मुइए मुद्धाहिसित्ते माउपिउजुआ दयपत्ते

सीमंकरे सीमंधरे खेमंकरे खेमंधरे मणुस्सिंदे जणवयपिया जणवयपाले जणवयपुरोहिण्ण  
 सेउकरे केउकरे णरपवरे पुरिसवरे पुरिससीहे पुरिसवग्घे पुरिसासीवसे पुरिसपुंडरीए  
 पुरिसवरगंधहत्थी अट्ठे दित्ते वित्ते विच्छिण्णविउलभवणसयणासणजाणवाहणाइण्णे  
 बहुधणबहुजायरूवरयए आओगपओगसंपउत्ते विच्छड्डियपउरभत्तपाणे बहुदासीदास-  
 गोमहिसगवेलगप्पभूए पडिपुण्णजंतकोसकोट्टागाराउहागारे वलवं दुव्वलपच्चामित्ते  
 ओहयकंटयं निहयकंटयं मलियकंटयं उद्धियकंटयं अकंटयं ओहयसत्तुं निहयसत्तुं  
 मलियसत्तुं उद्धियसत्तुं निज्जियसत्तुं पराडयसत्तुं ववगयदुव्विमक्खं मारिभयविप्पमुक्कं  
 खेमं सिवं सुभिमक्खं पसंतडिबडमरं रज्जं पसासेमाणे विहरइ ॥ ५ ॥ तस्स णं कोणि-  
 यस्स रण्णो धारिणी नामं देवी होत्था, सुकुमालपाणिपाया अहीणपडिपुण्णपंचिदिय-  
 सरीरा लक्खणवंजणगुणोववेया माणुस्माणप्पमाणपडिपुण्णसुजायसव्वंगसुंदरंगी ससि-  
 सोमाकारकंतपियदंसणा सुरूवा करयलपरिमियपसत्थतिवलयिवलयिमज्झा कुंडलुद्धि-  
 हियगंडलेहा कोमुडरयणियरविमलपडिपुण्णसोमवयणा सिंगारागारचारुवेसा संगय-  
 गयहसियभणियविहियविलाससललियसंलावणिउणजुत्तोवयारकुसला पासादीया दरि-  
 सणिज्जा अभिरूवा पडिरूवा, कोणिएणं रण्णा भंभसारपुत्तेणं सद्धिं अणुरत्ता अविरत्ता  
 इट्ठे सहफरिसरसूवग्घे पंचविहे माणुस्सए कामभोए पच्चणुभवमाणी विहरइ ॥ ६ ॥  
 तस्स णं कोणियस्स रण्णो एक्के पुरिसे विउलकयवित्तिए भगवओ पवित्तिवाउए  
 भगवओ तदेवसियं पवित्तिं णिवेएइ, तस्स णं पुरिसस्स बहवे अण्णे पुरिसा दिण्ण-  
 भइभत्तवेयणा भगवओ पवित्तिवाउया भगवओ तदेवसियं पवित्तिं णिवेदंति ॥ ७ ॥  
 तेणं कालेणं तेणं समएणं कोणिए राया भंभसारपुत्ते बाहिरियाए उवट्ठाणसालाए  
 अणेगगणनायगदंडनाथगराईसरतलवरमाडंबियकोडंबियमंतिमहामंतिगणगदोवारिय  
 अमच्चचेडपीढमहनगरनिगमसेट्ठिसेणावइसत्थवाहदूयसंधिवालसद्धिं संपरिवुडे विह-  
 रइ ॥ ८ ॥ तेणं कालेणं तेणं समएणं समणे भगवं महावीरे आइगरे तित्थगरे सहसंबुडे  
 पुरिसुत्तमे पुरिससीहे पुरिसवरपुंडरीए पुरिसवरगंधहत्थी अभयदए चक्खुदए मग्ग-  
 दए सरणदए जीवदए दीवो ताणं सरणं गई पइट्ठा धम्मवरचाउरंतचक्कवट्ठी अप्पडि-  
 हयवरनाणदंसणधरे वियट्ठच्छउमे जिणे जाणए तिण्णे तारए सुत्ते मोयए बुद्धे बोहए  
 सव्वण्णू सव्वदरिसी सिवमयलमरुयमणंतमक्खयमव्वाबाहमपुणरावतियं सिद्धिगइ-  
 णामधेयं ठाणं संपाविउकामे अरहा जिणे केवली सत्तहत्थुस्सेहे समचउरंसंठाण-  
 संठिए वज्जरिसहनारायसंधयणे अणुलोमवाउवेगे कंकगहणी क्वोयपरिणामे सउणि-  
 पोसपिट्ठंतरोरुपरिणए पउमुप्पलगंधसरिसनिस्साससुरभिवयणे छवी निरायंकउत्तम-  
 पसत्थअइसेयनिरुवमपले जल्लमल्लकलंकसेयरयदोसवज्जियसरीरनिरुवलेवे छायाउज्जोइयं

गमंगे घणनिचियसुबद्धलक्खणुण्णयकूडागारनिभपिंडियग्गसिरए सामलिबोंडघणनि-  
 चियच्छोडियमिउविसयपसत्थसहुमलक्खणसुगंधसुंदरभुयमोयगभिंनलकज्जलपहिट्ठ-  
 भमरगणणिद्धनिकुंरंबनिचियकुं चियपयाहिणावत्तमुद्धसिरए दालिमपुप्फप्पगासतव-  
 णिज्जसरिसनिम्मलसुणिद्धकेसंतकेसभूमी घण(निचिय)छत्तागारुत्तमंगदेसे णिव्वणस-  
 मलद्धमद्धचंददसमणिडाले उडुवइपडिपुण्णसोमवयणे अट्ठीणपमाणजुत्तसवणे सुस्सवणे  
 पीणमंसलकवोलदेसभाए आणामियचावरुइलकिण्हम्भराइतणुकसिणणिद्धभमुहे अव-  
 दालियपुंडरीयणयणे कोयासियधवलपत्तलच्छे गरुलाययउज्जुतुंगणासे उवचियसि-  
 लप्पवालविबकलसणिभाहरोट्ठे पंडुरससिसयलविमलणिम्मलसंखगोक्खीरफेणकुंद-  
 दगरयमुणालियाधवलदंतसेढी अखंडदंते अप्पुडियदंते अविरलदंते सुणिद्धदंते  
 सुजायदंते एगदंतसेढीविव अणेगदंते हुयवहणिद्धंतधोयतत्ततवणिज्जरत्तलतलाजुही  
 अवट्ठियसुविभत्तचित्तमंसू मंसलसंठियपसत्थसदूलविउलहणुए चउरंगुलसुप्पमाण-  
 कंबुवरसरिसग्गीवे वरमहिसवराहसीहसदूलउसमनागवरपडिपुण्णविउलक्खंधे जुग-  
 सन्निभपीणरइयपीवरपउट्ठसुसंठियसुसिलिट्ठिविसिट्ठघणधिरसुबद्धसंधिपुरवरफलिहवट्ठि-  
 यमुए भुयईसरविउलभोगआयाणपलिहउच्छूढदीहबाहू रत्ततलोवइयमउयमंसल-  
 सुजायलक्खणपसत्थअच्छिह्जालपाणी पीवरकोमलवरंगुली आर्यवंततलिणसुइरु-  
 इलणिद्धणक्खे चंदपाणिलेहे सूरपाणिलेहे संखपाणिलेहे चक्कपाणिलेहे दिसासोत्थिय-  
 पाणिलेहे चंदसूरसंखचक्कदिसासोत्थियपाणिलेहे कणगसिलायलुज्जलपसत्थसमतल-  
 उवचियविच्छिण्णपिहुलवच्छे सिरिवच्छंकियवच्छे अकरंडुयकणगरुययनिम्मलसुजाय-  
 निरुवहयदेहधारी अट्ठसहस्सपडिपुण्णवरपुरिसलक्खणधरे सण्णयपासे संगयपासे  
 सुंदरपासे सुजायपासे मियमाइयपीणरइयपासे उज्जुयसमसहियजच्चतणुकसिणणिद्धआइ-  
 ज्जलडहरमणिज्जरोमराई झसविहगसुजायपीणकुल्ली झसोयरे सुइकरणे पउमविय-  
 डणाभे गंगावत्तगपयाहिणावत्ततरंगमंगुररविकिरणतरुणवोहियअकोसायंतपउमंगंसीर-  
 वियडणाभे साहयसोणंदमुसलदप्पणणिकरियवरकणगच्छरुसरिसवरवइरवलियमज्जे  
 पमुइयवरतुरगसीहवरवट्ठियकडी वरतुरगसुजायसुगुज्झदेसे आइण्हउवव णिरुवलेवे  
 वरवारणतुल्लविक्रमविलसियगई गयससणसुजायसन्निभोहू समुग्गणिमगगूडजाणू  
 एणीकुसुर्विदवत्तवट्ठणपुव्वजंघे संठियसुसिलिट्ठगूडगुप्फे सुप्पइट्ठियकुम्भचारुचलणे  
 अणपुव्वसुसंहयंगुलीए उण्णयतणुत्तवणिज्जणक्खे रत्तुप्पलपत्तमउयसुकुमालकोमलतले  
 अट्ठसहस्सवरपुरिसलक्खणधरे नगनगरमगरसागरचक्कंकरवंकमंगलंकियचलणे विसि-  
 ट्ठरुवे हुयवहनिद्धमज्जलियतडितडियतरुणरविकिरणसरिसतेए अणासवे अममे अकिं-  
 चणे छिन्नसोए निरुवलेवे ववगयपेमरागदोसमोहे निग्गंथस्स पवयणस्स देसए

सत्थनायगे पइट्ठावए समणगपई समणगविंदपरिअट्टए चउत्तीसाजिणवयणाइसेसपत्ते  
 पणतीससच्चवयणाइसेसपत्ते आगासएणं चक्केणं आगासएणं छत्तेणं आगासि-  
 याहिं चामराहिं आगासफलिआमएणं सपायवीडेणं सीहासणेणं भम्मज्झएणं पुरओ  
 पकहिज्जमाणेणं चउइसहिं समणसाहस्सीहिं छत्तीसाए अज्जियासाहस्सीहिं सद्धिं  
 संपरिवुडे पुव्वाणुपुव्विं चरमाणे गामाणुग्गामं दूइज्जमाणे सुहंसुहेणं विहरमाणे चंपाए  
 णयरीए बहिया उवणगरग्गामं उवागए चंपं नगरिं पुण्णभइं उज्जाणं समोसरिउकामे  
 ॥ ९ ॥ तए णं से पवित्तिवाउए इमीसे कहाए लद्धे समणे हट्ठतुट्ठचित्तमाणंदिए  
 पीइमणे परमसोमणस्सिए हरिसवसविसप्पमाणहियए ण्हाए सुद्धप्पवेसाइं मंगलाइं  
 वत्थाइं पवरपरिहिए अप्पमहप्पघाभरणालंक्रियसरीरे सयाओ गिहाओ पडिणिक्खमइ  
 सयाओ गिहाओ पडिणिक्खमिता चंपाए णयरीए मज्झमज्झेणं जेणेव कोणियस्स  
 रण्णे गिहे जेणेव बाहिरिया उवट्ठाणसाला जेणेव कूणिए राया भंभसारपुत्ते तेणेव  
 उवागच्छइ २ ता करयलपरिग्गहियं सिरसावत्तं मत्थए अंजलिं कट्ठु जएणं विजएणं  
 वद्धावेइ २ ता एवं वयासी—जस्स णं देवाणुप्पिया दंसणं कंखंति जस्स णं देवाणुप्पिया  
 दंसणं पीहंति जस्स णं देवाणुप्पिया दंसणं पत्थंति जस्स णं देवाणुप्पिया दंसणं  
 अभिलसंति जस्स णं देवाणुप्पिया णामगोयस्सवि सवणयाए हट्ठतुट्ठ जाव हियया  
 भवंति, से णं समणे भगवं महावीरे पुव्वाणुपुव्विं चरमाणे गामाणुग्गामं दूइज्जमाणे  
 चंपाए णयरीए उवणगरग्गामं उवागए चंपं नगरिं पुण्णभइं उज्जाणं समोसरिउकामे,  
 तं एयं णं देवाणुप्पियाणं पियट्ठयाए पियं णिवेदेमि, पियं ते भवउ ॥ १० ॥  
 तए णं से कूणिए राया भंभसारपुत्ते तस्स पवित्तिवाउयस्स अंतिए एयमट्ठं सोच्चा  
 णिसम्म हट्ठतुट्ठ जाव हियए वियसियवरकमलणयणवयणे पयलियवरकडगतुडियकेयूर-  
 मउडकुंडलहारविरायंतरइयवच्छे पालंबपलंबमाणघोलंतभूसणधरे ससंभमं तुरियं चवलं  
 नरिंदे सीहासणाओ अब्भट्ठेइ २ ता पायपीढाओ पच्चोरुहइ २ ता पाउयाओ  
 ओमुयइ २ ता अवहट्ठु पंच रायककुहाइं तंजहा—खग्गं १ छत्तं २ उप्पेसं ३  
 वाहणाओ ४ वालवीयणं ५ एगसाडियं उत्तरासंगं करेइ २ ता आयंते चोक्खे  
 परमसुइभूए अंजलिमउलियग्गहत्थे तित्थगराभिमुहे सत्तट्ठ पयाइं अणुगच्छइ सत्तट्ठ  
 पयाइं अणुगच्छिता वामं जाणुं अंचेइ वामं जाणुं अंचेत्ता दाहिणं जाणुं धरणितलंसि  
 साहट्ठु तिक्खुत्तो मुद्धाणं धरणितलंसि निवेसेइ २ ता ईसिं पच्चुण्णमइ पच्चुण्णमिता  
 कडगतुडियथंभियाओ भुयाओ पडिसाहरइ २ ता करयल जाव कट्ठु एवं वयासी-  
 णमोऽत्थु णं अरिहंताणं भगवंताणं आइगराणं तित्थगराणं सयंसंबुद्धाणं पुरिसुत्तमाणं  
 पुरिससीहाणं पुरिसवरपुंडरीयाणं पुरिसवरगंधहत्थीणं लोणुत्तमाणं लोगनाहाणं



लोगहियाणं लोगपईवाणं लोगपज्जोयगराणं अभयदयाणं चक्खुदयाणं मग्गदयाणं  
 सरणदयाणं जीवदयाणं बोहिदयाणं धम्मदयाणं धम्मदेसयाणं धम्मनायगाणं  
 धम्मसारहीणं धम्मवरचाउरंतचक्कवट्ठीणं दीवो ताणं सरणं गई पइट्ठा अप्पडिहय-  
 वरनाणदंसणधराणं वियट्छउमाणं जिणाणं जावयाणं तिण्णाणं तारयाणं बुद्धाणं  
 बोहयाणं सुत्ताणं मोयगाणं सव्वन्नूणं सव्वदरिसीणं सिवमयलमस्यमणंतमक्खय-  
 मव्वावाहमपुणरावत्तिसिद्धिगइनामधेयं ठाणं संपत्ताणं, नमोऽत्थु णं समणस्स भग-  
 वओ महावीरस्स आइगरस्स तित्थगरस्स जाव संपाविउकामस्स मम धम्मायरियस्स  
 धम्मोवएसगस्स, वंदामि णं भगवंतं तत्थ गयं इह गए, पासउ मे (मे से) भगवं  
 तत्थ गए इह गयंति कहु वंदइ णमंसइ वंदित्ता णमंसित्ता सीहासणवरगए पुरत्थाभिमुहे  
 निसीयइ निसीइत्ता तस्स पवित्तिवाउयस्स अट्ठुत्तरसयसहस्सं पीइदाणं दलयइ दलइत्ता  
 सक्कारेइ सम्माणेइ सक्कारित्ता सम्माणित्ता एवं वयासी—जया णं देवाणुप्पिया !  
 समणे भगवं महावीरे इहमागच्छेज्जा इह समोसरिज्जा इहेव चंपाए णयरीए बहिया  
 पुण्णभेइ उज्जाणे अहापडिरूवं उग्गहं उग्गिणिहत्ता संजमेणं तवसा अप्पाणं भावे-  
 माणे विहरेज्जा तया णं मम एयमट्ठं निवेदिज्जासित्तिक्कहु विसज्जिए ॥ ११ ॥  
 तए णं समणे भगवं महावीरे कळं पाउप्पभायाए रयणीए फुल्लुप्पलकमलकोमल-  
 म्मिलियंमि अहा(अह)पंडुरे पहाए रत्तासोगप्पगासकिंसुयसुयमुहुगुंजद्धरागसरिसे  
 कमलागरसंडवोहए उट्ठियम्मि सूरे सहस्सरस्सिमि दिणयरे तेथसा जलंते जेणेव  
 चंपा णयरी जेणेव पुण्णभेइ उज्जाणे तेणेव उवागच्छइ २ ता अहापडिरूवं उग्गहं  
 उग्गिणिहत्ता संजमेणं तवसा अप्पाणं भावेमाणे विहरइ ॥ १२ ॥ तेणं कालेणं  
 तेणं समएणं समणस्स भगवओ महावीरस्स अंतवासी बहवे समणा भगवंतो  
 अप्पेगइया उग्गपव्वइया भोगपव्वइया राइण्ण० णाय० कोरव्व० खत्तियपव्वइया भडा  
 जोहा सेणावई पसत्थारो सेट्ठी इब्भा अण्णे य बहवे एवमाइणो उत्तमजाइकुलरूव-  
 विणयविण्णाणवण्णलावण्णविक्रमपहाणसोभग्गकंतिजुत्ता बहुधणधण्णिचयपरियाल-  
 फिडिया णरवइगुणाइरेगा इच्छियभोगा सुहसंपललिया किंपागफलोवमं च  
 मुणिय विसयसोक्खं जलबुब्बुयसमाणं कुसग्गजलविंदुचंचलं जीवियं च णाऊण  
 अट्ठुवमिणं रयमिव पडगलग्गं संविधुणित्ता णं चइत्ता हिरण्णं जाव पव्वइया,  
 अप्पेगइया अद्धमासपरिआया अप्पेगइया मासपरिआया एवं दुमास तिमास जाव  
 एकारस० अप्पेगइया वासपरिआया दुवास० तिवास० अप्पेगइया अणेगवासपरि-  
 आया संजमेणं तवसा अप्पाणं भावेमाणा विहरंति ॥ १३ ॥ तेणं कालेणं तेणं  
 समएणं समणस्स भगवओ महावीरस्स अंतवासी बहवे निग्गंथा भगवंतो अप्पेगइया

आभिणिबोहियणाणी जाव केवलणाणी अप्पेगइया मणवलिया वयवलिया काय-  
 बलिया अप्पेगइया मणेणं सावाणुग्गहसमत्था ३ अप्पेगइया खेलोसहिप्ता एवं  
 जल्लोसहि० विप्पोसहि० आसोसहि० सव्वोसहि० अप्पेगइया कोट्टुबुद्धी एवं वीय-  
 बुद्धी पडुबुद्धी अप्पेगइया पयाणुसारी अप्पेगइया संभिन्नसोया अप्पेगइया खीरासवा  
 अप्पेगइया महुआसवा अप्पेगइया सप्पिआसवा अप्पेगइया अक्खीणमहाणसिया  
 एवं उज्जुमई अप्पेगइया विउलमई विउव्वणिट्ठिप्ता चारणा विजाहुरा आगासाइ-  
 वाहणो ॥ अप्पेगइया कणगावलं तवोकम्मं पडिवण्णा एवं एगावलं खुड्ढागसीहनि-  
 कीलियं तवोकम्मं पडिवण्णा अप्पेगइया महालयं सीहनिक्कीलियं तवोकम्मं पडिवण्णा  
 भट्ठपडिमं महाभट्ठपडिमं सव्वओभट्ठपडिमं आयं विलवद्धमाणं तवोकम्मं पडिवण्णा  
 मासियं भिक्खुपडिमं एवं दोमासियं पडिमं तिमासियं पडिमं जाव सत्तमासियं  
 भिक्खुपडिमं पडिवण्णा अप्पेगइया पढमं सत्तराईदियं भिक्खुपडिमं पडिवण्णा जाव  
 तच्चं सत्तराईदियं भिक्खुपडिमं पडिवण्णा अहोराईदियं भिक्खुपडिमं पडिवण्णा  
 एक्कराईदियं भिक्खुपडिमं पडिवण्णा सत्तसत्तमियं भिक्खुपडिमं अट्ठट्ठमियं भिक्खु-  
 पडिमं णवणवमियं भिक्खुपडिमं दसदसमियं भिक्खुपडिमं खुट्ठियं मोयपडिमं  
 पडिवण्णा महत्थियं मोयपडिमं पडिवण्णा जवमज्झं चंदपडिमं पडिवण्णा वइर(वज्ज)-  
 मज्झं चंदपडिमं पडिवण्णा संजमेणं तवसा अप्पाणं भावेमाणा विहरंति ॥ १४ ॥  
 तेणं कालेणं तेणं समएणं समणस्स भगवओ महावीरस्स अंतवासी वहवे थेरा भगवंतो  
 जाइसंपण्णा कुल० बल० रुव० विणय० णाण० दंसण० चरित्त० लज्जा० लाघव०  
 ओयंसी तेयंसी वच्चंसी जसंसी जियकोहा जियमाणा जियमाया जियलोभा जिय-  
 इंदिया जियणिहा जियपरीसहा जीवियासमरणभयविप्पमुक्का वयप्पहाणा गुणप्पहाणा  
 करणप्पहाणा चरणप्पहाणा णिग्गहप्पहाणा निच्छयप्पहाणा अजवप्पहाणा मद्दव-  
 प्पहाणा लाघवप्पहाणा खंतिप्पहाणा मुत्तिप्पहाणा विजापहाणा मंतप्पहाणा  
 वेयप्पहाणा बंभप्पहाणा नयप्पहाणा नियमप्पहाणा सच्चप्पहाणा सोयप्पहाणा चारु-  
 वण्णा लज्जातवस्सीजिइंदिया सोही अणियाणा अप्पुस्सुया अबहिंल्लेसा अप्पडिल्लेस्सा  
 सुसामण्णरया दंता इणमेव णिग्गंथं पावयणं पुरओकाउं विहरंति । तेसि णं भगवं-  
 ताणं आयावायावि विदिता भवंति परवाया विदिता भवंति आयावायं जमइत्ता नल-  
 वणमिव मत्तमातंगा अच्छिइप्पसिणवागरणा रयणकरंडगसमाणा कुत्तियावणभूया पर-  
 वादियपमद्दणा दुबालसंणिणो समत्तगणिपिडगधरा सव्वक्खरसणिवाइणो सव्वभा-  
 साणुगामिणो अजिणा जिणसंकासा जिणा इव अवितहं वागरमाणा संजमेणं तवसा  
 अप्पाणं भावेमाणा विहरंति ॥ १५ ॥ तेणं कालेणं तेणं समएणं समणस्स भगवओ

महावीरस्स अंतेवासी बहवे अणगारा भगवंतो इरियासमिया भासासमिया एसणा-  
 समिया आयाणभंडमत्तनिकखेवणासमिया उच्चारपासवणखेलसिंघाणजल्लपारिट्ठावणि-  
 यासमिया मणगुत्ता वयगुत्ता कायगुत्ता गुत्ता गुत्तिंदिया गुत्तंबंभयारी अममा अकिंचणा  
 छिण्णगंथा छिण्णसोया निरुवलेवा कंसपाईव मुक्कतोया संख इव निरंगणा जीवो विव  
 अप्पडिहयगई जच्चकणगंपिव जायरूवा आदरिसफलगाविव पागडभावा कुम्भो इव  
 गुत्तिंदिया पुक्खरपत्तं व निरुवलेवा गगणमिव निरालंबणा अणिलो इव निरालया  
 चंदो इव सोमलेसा सूरु इव दित्तेया सागरो इव गंभीरा विहगो इव सव्वओ  
 विप्पमुक्का मंदरो इव अप्पकंपा सारयसलिलं व सुद्धहियया खग्गिविसाणं व एग-  
 जाया भारंडपक्खी व अप्पमत्ता कुंजरो इव सोंडीरा वसभो इव जायत्थामा सीहो  
 इव दुद्धरिसा वसुंधरा इव सव्वकासविसहा सुहुयहुयासणे इव तेयसा जलंता नत्थि  
 णं तेसि णं भगवंताणं कत्थइ पडिबंधे भवइ, से य पडिबंधे चउव्विहे पण्णत्ते,  
 तंजहा—दव्वओ खित्तओ कालओ भावओ, दव्वओ णं सचित्तचित्तमीसिएसु दव्वेसु,  
 खेत्तओ गामे वा णयरे वा रण्णे वा खेत्ते वा खले वा घरे वा अंगणे वा, कालओ  
 समए वा आवलियाए वा जाव अयणे वा अण्णयरे वा दीहकालसंजोगे, भावओ  
 कोहे वा माणे वा मायाए वा लोहे वा भए वा हासे वा एवं तेसिं ण भवइ । ते  
 णं भगवंतो वासावासवज्जं अट्ठ गिम्हहेमंति याणि मासाणि गामे एगराइया णयरे  
 पंचराइया वासीचंदणसमाणकप्पा समलेट्ठुकंचणा समसुहदुक्खा इहलोगपरलोग-  
 अप्पडिबद्धा संसारपारगामी कम्मणिग्घायणट्ठाए अब्भुट्ठिया विहरंति ॥ १६ ॥  
 तेसि णं भगवंताणं एएणं विहारेणं विहरमाणं इमे एयारूवे अब्भितरबाहिरए  
 तवोवहाणे होत्था, तंजहा—अब्भितरए छव्विहे बाहिरएवि छव्विहे ॥ १७ ॥ से किं  
 तं बाहिरए ? २ छव्विहे प०, तंजहा—अणसणे ऊणो(अवमो)यरिया भिक्खायरिया  
 रसपरिच्चाए कायकिलेसे पडिसंलीणया । से किं तं अणसणे ? २ दुविहे पण्णत्ते,  
 तंजहा—इत्तरिए य आवकहिए य । से किं तं इत्तरिए ? २ अणेगविहे पण्णत्ते,  
 तंजहा—चउत्थभत्ते छट्ठभत्ते अट्ठभत्ते दसमभत्ते बारसभत्ते चउट्ठसभत्ते सोलसभत्ते  
 अद्धमासिए भत्ते मासिए भत्ते दोमासिए भत्ते तेमासिए भत्ते चउमासिए भत्ते पंचमा-  
 सिए भत्ते छम्मासिए भत्ते, से तं इत्तरिए । से किं तं आवकहिए ? २ दुविहे पण्णत्ते,  
 तंजहा—पाओवगमणे य भत्तपच्चक्खाणे य । से किं तं पाओवगमणे ? २ दुविहे  
 पण्णत्ते, तंजहा—वाघाइमे य निव्वाघाइमे य नियमा अप्पडिक्कमे, से तं पाओव-  
 गमणे । से किं तं भत्तपच्चक्खाणे ? २ दुविहे पण्णत्ते, तंजहा—वाघाइमे य निव्वा-  
 घाइमे य नियमा सप्पडिक्कमे, से तं भत्तपच्चक्खाणे, से तं अणसणे । से किं तं

ओमोयरिया ? २ दुविहा पण्णत्ता, तंजहा-दव्वोमोयरिया य भावोमोयरिया य, से किं तं दव्वोमोयरिया ? २ दुविहा पण्णत्ता, तंजहा-उवगरणदव्वोमोयरिया य भत्तपाणदव्वोमोयरिया य । से किं तं उवगरणदव्वोमोयरिया ? २ तिविहा पण्णत्ता, तंजहा-एगे वत्थे एगे पाए चियत्तोवगरणसाइज्जणया, से तं उवगरणदव्वोमोयरिया । से किं तं भत्तपाणदव्वोमोयरिया ? २ अणेगविहा पण्णत्ता, तंजहा-अट्ठपमाणमेत्ते कवले आहारमाणे अप्पाहारे, दुवालसपमाणमेत्ते कवले आहारमाणे अवङ्गोमोयरिया, सोलसपमाणमेत्ते कवले आहारमाणे दुभागपत्तोमोयरिया, चउव्वीसपमाणमेत्ते कवले आहारमाणे पत्तोमोयरिया, एकतीसपमाणमेत्ते कवले आहारमाणे किंचूणोमोयरिया बत्तीसपमाणमेत्ते कवले आहारमाणे पमाणपत्ता एत्तो एगेणवि घासेणं ऊणयं आहारमाहारेमाणे समणे णिगंथे णो पक्कमरसमोइति वत्तव्वं सिया, से तं भत्तपाणदव्वोमोयरिया, से तं दव्वोमोयरिया । से किं तं भावोमोयरिया ? २ अणेगविहा पण्णत्ता, तंजहा-अप्पकोहे अप्पमाणे अप्पमाए अप्पलोहे अप्पसदे अप्पझंझे, से तं भावोमोयरिया, से तं ओमोयरिया । से किं तं भिक्खायरिया ? २ अणेगविहा पण्णत्ता, तंजहा-दव्वाभिग्गहचरए खेत्ताभिग्गहचरए कालाभिग्गहचरए भावाभिग्गहचरए उक्खित्तचरए णिक्खित्तचरए उक्खित्तणिक्खित्तचरए णिक्खित्तउक्खित्तचरए वट्ठिज्जमाणचरए साहरिज्जमाणचरए उवणीयचरए अवणीयचरए उवणीयअवणीयचरए अवणीयउवणीयचरए संसट्ठचरए असंसट्ठचरए तज्जायसंसट्ठचरए अण्णायचरए मोणचरए दिट्ठलाभिए अदिट्ठलाभिए पुट्ठलाभिए अपुट्ठलाभिए भिक्खलाभिए अभिक्खलाभिए अण्णगिलायए ओवणिहिए परिमियपिंडवाइए सुद्धेसणिए संखायत्तिए, से तं भिक्खायरिया । से किं तं रसपरिच्चाए ? २ अणेगविहे पण्णत्ते, तंजहा-णिव्वि(य)तिए पणीयरसपरिच्चाए आयंभिलए आयामसित्थमोइ अरसाहारे विरसाहारे अंताहारे पंताहारे ल्हाहारे, से तं रसपरिच्चाए । से किं तं कायकिल्लेसे ? २ अणेगविहे पण्णत्ते, तंजहा-ठाणट्ठिइए ठाणाइए उक्कुड्ढासणिए पडिमट्ठाइ वीरासणिए नेसज्जिए दंडायए लउडसाइ आयावए अवाउडए अकंडुयए अणिट्ठुहए सव्वगायपरिकम्मविभूसविप्पमुक्के से तं कायकिल्लेसे । से किं तं पडिसंलीणया ? २ चउव्विहा पण्णत्ता, तंजहा-इंदियपडिसंलीणया कसायपडिसंलीणया जोगपडिसंलीणया विवित्तसयणासणसेवणया, से किं तं इंदियपडिसंलीणया ? २ पंचविहा पण्णत्ता, तंजहा-सोइंदियविसयप्पयारनिरोहो वा सोइंदियविसयपत्तेसु अत्थेसु रागदोसनिग्गहो वा चक्खिंदियविसयपयारनिरोहो वा चक्खिंदियविसयपत्तेसु अत्थेसु रागदोसनिग्गहो वा घाणिंदियविसयपयारनिरोहो वा घाणिंदियविसयपत्तेसु अत्थेसु रोगदोसनिग्गहो वा जिद्धिंदियविसयप्प-

यारनिर्रोहो वा जिड्ढिदियविसयपत्तेसु अत्थेसु रागदोसनिग्गहो वा फासिंदियविसय-  
 प्पयारनिर्रोहो वा फासिंदियविसयपत्तेसु अत्थेसु रागदोसनिग्गहो वा, से तं इंदियप-  
 डिंसलीणया । से किं तं कसायपडिंसलीणया ? २ चउव्विहा पण्णत्ता, तंजहा—कोह-  
 स्सुदयनिर्रोहो वा उदयपत्तस्स वा कोहस्स विफलीकरणं माणस्सुदयनिर्रोहो वा उद-  
 यपत्तस्स वा माणस्स विफलीकरणं मायाउदयणिर्रोहो वा उदयपत्ताए वा मायाए  
 विफलीकरणं लोहस्सुदयणिर्रोहो वा उदयपत्तस्स वा लोहस्स विफलीकरणं, से तं  
 कसायपडिंसलीणया ? से किं तं जोगपडिंसलीणया ? २ तिक्खिहा पण्णत्ता, तंजहा—  
 मणजोगपडिंसलीणया वयजोगपडिंसलीणया कायजोगपडिंसलीणया । से किं तं मण-  
 जोगपडिंसलीणया ? २ अकुसलमणणिर्रोहो वा कुसलमणउदीरणं वा, से तं मण-  
 जोगपडिंसलीणया । से किं तं वयजोगपडिंसलीणया ? २ अकुसलवयणिर्रोहो वा  
 कुसलवयउदीरणं वा, से तं वयजोगपडिंसलीणया । से किं तं कायजोगपडिंसलीणया ?  
 २ जण्णं सुसमाहियपाणिपाए कुम्मो इव गुत्तिदिए सव्वगायपडिंसलीणे चिद्धइ, से तं  
 कायजोगपडिंसलीणया । से किं तं विवित्तसयणासणसेवणया ? २ जं णं आरामेसु  
 उज्जाणेसु देवकुलेसु सभासु पवासु पणियगिहेसु पणियसालासु इत्थीपसुपंडगसंसत्ता  
 विरहियासु वसहीसु फासुएसणिज्जपीढफलगसेज्जासंथारं उवसंपज्जिता णं विहरइ, से  
 तं पडिंसलीणया, से तं बाहिरए तवे ॥ १८ ॥ से किं तं अड्ढिभतरए तवे ? २ छव्विहे  
 पण्णत्ते, तंजहा—पायच्छित्तं विणओ वेयावच्चं सज्झाओ ज्ञाणं विउस्सग्गो । से किं तं  
 पायच्छित्ते ? २ दसविहे पण्णत्ते, तंजहा—आलोयणारिहे पडिक्कमणारिहे तदुभयारिहे  
 विवेगारिहे विउस्सग्गारिहे तवारिहे छेयारिहे मूलारिहे अणवट्ठप्पारिहे पारंचिया-  
 रिहे, से तं पायच्छित्ते । से किं तं विणए ? २ सत्तविहे पण्णत्ते, तंजहा—णाणविणए  
 दंसणविणए चरित्तविणए मणविणए वइविणए कायविणए लोकोवयारविणए । से किं  
 तं णाणविणए ? २ पंचविहे पण्णत्ते, तंजहा—आभिणिबोहियणाणविणए सुयणाणविणए  
 ओहिणाणविणए मणपज्जवणाणविणए केवलणाणविणए से तं णाणविणए । से किं तं  
 दंसणविणए ? २ दुविहे पण्णत्ते, तंजहा—सुस्सूसणाविणए अणच्चासायणाविणए । से  
 किं तं सुस्सूसणाविणए ? २ अणेगविहे पण्णत्ते, तंजहा—अब्भुट्ठाणे इ वा आसणा-  
 भिग्गहे इ वा आसणप्पयाणे इ वा सक्कारे इ वा सम्माणे इ वा किइक्कमे इ वा  
 अंजलिपग्गहे इ वा एंतस्स अणुगच्छणया ठियस्स पज्जुवासणया गच्छंतस्स पडिंस-  
 साहणया, से तं सुस्सूसणाविणए ॥ से किं तं अणच्चासायणाविणए ? २ पणयालीसविहे  
 पण्णत्ते, तंजहा—अरहंतारं अणच्चासायणया अरहंतपण्णत्तस्स धम्मस्स अणच्चासाय-  
 णया आयरियाणं अणच्चासायणया एवं उवज्झायाणं थेराणं कुलस्स गणस्स संघस्स

किरियाणं संभोगियस्स आभिणिबोहियणाणस्स सुयणाणस्स ओहिणाणस्स मण-  
पज्जवणाणस्स केवलणाणस्स एएसिं चैव भत्तिबहुमाणे एएसिं चैव वण्णसंजलण्या,  
से तं अणच्चासायणाविणए से तं दंसणविणए । से किं तं चरित्तविणए ? २ पंचविहे  
पण्णत्ते, तंजहा-सामाइयचरित्तविणए छेदोवट्ठावणियचरित्तविणए परिहारविसुद्धि-  
चरित्तविणए सुहुमसंपरायचरित्तविणए अहक्खायचरित्तविणए, से तं चरित्तविणए ।  
से किं तं मणविणए ? २ दुविहे पण्णत्ते, तंजहा-पसत्थमणविणए अपसत्थमणविणए ।  
से किं तं अपसत्थमणविणए ? २ जे य मणे सावज्जे सकिरिए सक्कसे कडुए  
णिट्ठुरे फरुसे अण्हयकरे छेयकरे भेयकरे परितावणकरे उड्वणकरे भूओवघाइए  
तहप्पगारं मणो णो पहारेज्जा, से तं अपसत्थमणोविणए । से किं तं पसत्थमणो-  
विणए ? २ तं चैव पसत्थं णेयव्वं, एवं चैव वइविणओऽवि एएहिं पएहिं चैव  
णेयव्वो, से तं वइविणए । से किं तं कायविणए ? २ दुविहे पण्णत्ते, तंजहा-  
पसत्थकायविणए अपसत्थकायविणए । से किं तं अपसत्थकायविणए ? २ सत्तविहे  
पण्णत्ते, तंजहा-अणाउत्तं गमणे अणाउत्तं ठाणे अणाउत्तं निसीयणे अणाउत्तं तुय-  
ट्ठणे अणाउत्तं उल्लंघणे अणाउत्तं पल्लंघणे अणाउत्तं सत्विदियकायजोगजुंजण्या, से  
तं अपसत्थकायविणए । से किं तं पसत्थकायविणए ? २ एवं चैव पसत्थं भाणियव्वं,  
से तं पसत्थकायविणए, से तं कायविणए । से किं तं लोगोवयारविणए ? २ सत्तविहे  
पण्णत्ते, तंजहा-अब्भासवत्तिं परच्छंदाणुवत्तिं कज्जेउं कयपडिकिरिया अत्तग-  
वैसण्या देसकालण्णया सव्वट्ठेसु अप्पडिलोमया, से तं लोगोवयारविणए, से तं  
विणए । से किं तं वेयावच्चे ? २ दसविहे पण्णत्ते, तंजहा-आयरियवेयावच्चे उव-  
ज्झायवेयावच्चे सेहवेयावच्चे गिलाणवेयावच्चे तवस्सिवेयावच्चे थेरवेयावच्चे साहम्मिय-  
वेयावच्चे कुलवेयावच्चे गणवेयावच्चे संघवेयावच्चे, से तं वेयावच्चे । से किं तं सज्झाए ?  
२ पंचविहे पण्णत्ते, तंजहा-चायणा पडिपुच्छणा परियट्ठणा अणुप्पेहा धम्मकहा,  
से तं सज्झाए । से किं तं ज्ञाणे ? २ चउव्विहे पण्णत्ते, तंजहा-अट्ठज्झाणे रुद्रज्झाणे  
धम्मज्झाणे सुक्कज्झाणे, अट्ठज्झाणे चउव्विहे पण्णत्ते, तंजहा-अमणुणसंपओगसंपउत्ते  
तस्स विप्पओगस्सतिसमण्णागए यावि भवइ, मणुणसंपओगसंपउत्ते तस्स अविप्प-  
ओगस्सतिसमण्णागए यावि भवइ, आर्यकसंपओगसंपउत्ते तस्स विप्पओगस्सतिस-  
मण्णागए यावि भवइ, परिजूसियकामभोगसंपओगसंपउत्ते तस्स अविप्पओगस्स-  
तिसमण्णागए यावि भवइ । अट्ठस्स णं ज्ञाणस्स चत्तारि लक्खणा पण्णत्ता, तंजहा-  
कंदण्या सोयण्या तिप्पण्या विलवण्या । रुद्रज्झाणे चउव्विहे पण्णत्ते, तंजहा-  
हिंसाणुबंधी मोसाणुबंधी तेणाणुबंधी सारक्खणाणुबंधी, रुद्रस्स णं ज्ञाणस्स चत्तारि

लक्खणा पणत्ता, तंजहा-उसण्णदोसे बहुदोसे अण्णानदोसे आमरणंतदोसे । धम्मज्झाणे चउव्विहे चउप्पडोयारे पणत्ते, तंजहा-आणाविजए अवायविजए विवागविजए संठाणविजए । धम्मस्स णं ज्ञाणस्स चत्तारि लक्खणा पणत्ता, तंजहा-आणारुई णिसग्गरुई उवएसरुई सुत्तरुई, धम्मस्स णं ज्ञाणस्स चत्तारि आलंबणा पणत्ता, तंजहा-वायणा पुच्छणा परियट्ठणा धम्मकहा, धम्मस्स णं ज्ञाणस्स चत्तारि अणुप्पेहाओ पणत्ताओ, तंजहा-अणिच्चाणुप्पेहा असरणाणुप्पेहा एगत्ताणुप्पेहा संसारानुप्पेहा । सुक्कज्झाणे चउव्विहे चउप्पडोयारे पणत्ते, तंजहा-पुहुत्तवियक्के सवियारी १ एगत्तवियक्के अवियारी २ सुहुमकिरिए अप्पडिवाई ३ समुच्छिन्नकिरिए अणियट्ठी ४, सुक्कस्स णं ज्ञाणस्स चत्तारि लक्खणा पणत्ता, तंजहा-विवेगे विउसग्गे अव्वहे असम्मोहे, सुक्कस्स णं ज्ञाणस्स चत्तारि आलंबणा पणत्ता, तंजहा-खंती सुत्ती अज्जवे मद्दे, सुक्कस्स णं ज्ञाणस्स चत्तारि अणुप्पेहाओ पणत्ताओ, तंजहा-अवायणुप्पेहा असुभाणुप्पेहा अणंतवित्तियाणुप्पेहा विप्परिणामाणुप्पेहा, से तं ज्ञाणे ॥ से किं तं विउस्सग्गे ? २ दुविहे पणत्ते, तंजहा-द्व्वविउस्सग्गे भावविउस्सग्गे य । से किं तं द्व्वविउस्सग्गे ? २ चउव्विहे पणत्ते, तंजहा-सरीरविउस्सग्गे गणविउस्सग्गे उव्हिविउस्सग्गे भत्तपाणविउस्सग्गे, से तं द्व्वविउस्सग्गे, से किं तं भावविउस्सग्गे ? २ तिविहे पणत्ते, तंजहा-कसायविउस्सग्गे संसारविउस्सग्गे कम्मविउस्सग्गे, से किं तं कसायविउस्सग्गे ? २ चउव्विहे पणत्ते, तंजहा-कोहकसायविउस्सग्गे माणकसायविउस्सग्गे मायाकसायविउस्सग्गे लोहकसायविउस्सग्गे, से तं कसायविउस्सग्गे, से किं तं संसारविउस्सग्गे ? २ चउव्विहे पणत्ते, तंजहा-णेरइय-संसारविउस्सग्गे तिरियसंसारविउस्सग्गे मणुयसंसारविउस्सग्गे देवसंसारविउस्सग्गे, से तं संसारविउस्सग्गे, से किं तं कम्मविउस्सग्गे ? २ अट्ठविहे पणत्ते, तंजहा-णाणावरणिज्जकम्मविउस्सग्गे दरिसणावरणिज्जकम्मविउस्सग्गे वेयणीयकम्मविउस्सग्गे मोहणीयकम्मविउस्सग्गे आउयकम्मविउस्सग्गे णामकम्मविउस्सग्गे गोयकम्मविउस्सग्गे अंतरायकम्मविउस्सग्गे, से तं कम्मविउस्सग्गे, से तं भावविउस्सग्गे, से तं विउस्सग्गे ॥ १९ ॥ तेणं कालेणं तेणं समएणं समणस्स भगवओ महावीरस्स बहवे अणगारा भगवंतो अप्पेगइया आयारधरा जाव विवागसुयधरा तत्थ तत्थ ताहिं ताहिं देसे देसे गच्छागच्छि गुम्मागुम्मि फट्ठाफट्ठिं अप्पेगइया वायंति अप्पेगइया पडिपुच्छंति अप्पेगइया परियट्ठंति अप्पेगइया अणुप्पेहंति अप्पेगइया अक्खेवणीओ विक्खेवणीओ संवेयणीओ णिवेयणीओ चउव्विहाओ कहाओ कहंति, अप्पेगइया उट्ठंजाणू अहोसिरा ज्ञाणकोट्टोवगया संजमेणं तवसा अप्पाणं भावेमाणा विहरंति ।

संसारमउव्विग्गा भीया जम्मणजरमरणकरणगंभीरदुक्खपक्खुद्विभयपउरसलिलं  
 संजोगविओगवीडिचिंतापसंगपसरियवहवंधमहल्लविउलकल्लोलकलुणविलवियलोभकल-  
 कलंतबोलबहुलं अवमाणणफेणतिव्वखिसणपुलंपुलप्पभूरोगवेयणपरिभवविणिवाय-  
 फरुसधरिसणासमावडियकल्लिणकम्मपत्थरतरंगरंगंतनिच्चमञ्जुभयतोयपट्ठं कसायपाया-  
 लसंकुलं भवसयसहस्सकलुसजलसंचयं पइभयं अपरिमियमहिच्छकलुसमइवाउवेग-  
 उद्धुम्ममाणदगरयरयंधयारवरफेणपउरआसापिवासधवलं मोहमहावत्तभोगभममाण-  
 गुप्पमाणच्छलंतपच्चोणियत्तपाणियपमायचंडवहुदुद्धसावयसमाहुउद्धायमाणपवमारघोर-  
 कंदियमहारवरवंतभेरवरवं अण्णाणभमंतमच्छपरिहत्थअणिहुइंदियमहामगरतुरिय-  
 चरियखोखुब्भमाणनच्चंतचवलचंचलचलंतधुम्मंतजलसमूहं अरइभयविसायसोगमि-  
 च्छत्तसेलसंकडं अणाइसंताणकम्मबंधणकिलेसच्चिक्खिल्लसुदुत्तारं अमरनरतिरियनिर-  
 यगइगमणकुडिलपरिवत्तविउलवेलं चउरंतमहंतमणवदग्गं रुदं संसारसागरं भीमदरि-  
 सणिज्जं तरंति धिइधणियनिप्पकपेण तुरियचवलं संवरवेरगगुत्तंगकूवयसुसंपउत्तेणं  
 गाणसियविमलमूसिएणं सम्मत्तविसुद्धलद्धणिज्जासएणं धीरा संजमपोएण सीलकलिया  
 पसत्थज्झाणतववायपणोल्लियपहाविएणं उज्जमववसायग्गहियणिजरणजयणउवओग-  
 गाणदंसणविसुद्धवयभंडभरियसारा जिणवरवयणोवदिट्ठमग्गेणं अकुडिलेण सिद्धि-  
 महापट्ठणाभिमुहा समणवरसत्थवाहा सुसुइसुसंभाससुपण्हसासा गामे गामे एगरायं  
 णगरे णगरे पंचरायं दूहज्जन्ता जिइंदिया णिब्भया गयभया सच्चित्ताचित्तमीसिएसु  
 दव्वेसु विरागयं गया संजया विरया मुत्ता लहुया णिरवकंखा साहू णिहुया चरंति धम्मं  
 ॥ २० ॥ तेणं कालेणं तेणं समएणं समणस्स भगवओ महावीरस्स ववहे असुरकुमारा  
 देवा अंतियं पाउब्भवित्था कालमहाणीलसरिसणीलगुलियगवलअयसिकुसुमप्पगासा  
 वियसियसयवत्तमिव पत्तलनिम्मलईसिंसियरत्ततंबणयणा गरुलाययउज्जुंगणासा  
 उवचियसिलप्पवालबिंबफलसण्णिमाहरोट्ठा पंडुरससिसयलविमलणिम्मलसंखगो-  
 वखीरफेणदगरयमुणालियाधवलदंतसेडी हुयवहणिदंतधोयतत्ततवणिजरत्ततलतालु-  
 जीहा अंजणघणकसिणरुयगरमणिज्जणिद्वकेसा वामेगकुंडलधरा अद्वचंदणाणलित्त-  
 गत्ता । ईसिंसिलिंधपुप्फप्पगासाइं सुहुमाइं असंकिलिद्धाइं वत्थाइं पवरपरिहिया वयं  
 च पढमं समइकंता बिइयं च वयं असंपत्ता भेइ जोव्वणे वट्टमाणा तलभंगयतुडिय-  
 पवरभूसणनिम्मलमणिरयणमंडियमुया दससुहामंडियगहत्था चूलामणिचिधगया  
 सुरुवा महिद्धिया महज्जुइया महव्वला महायसा महासोक्खा महाणुभागा हारविरा-  
 इयवच्छा कडगतुडियथंभियमुया अंगयकुंडलमट्ठगंडतलकण्णपीढधारी विचित्तवत्था-  
 भरणा विचित्तमालामउल्लिमउडा कल्लाणकयपवरवत्थपरिहिया कल्लाणकयपवरमल्लानु-



लेवणा भासुरबोदी पलंबवणमालधरा । दिव्वेणं वण्णेणं दिव्वेणं गंधेणं दिव्वेणं  
 रूवेणं दिव्वेणं फासेणं दिव्वेणं संघाए(घयणे)णं दिव्वेणं संठाणेणं दिव्वाए इट्ठीए  
 दिव्वाए जुत्तीए दिव्वाए पभाए दिव्वाए छायाए दिव्वाए अच्चीए दिव्वेणं तेएणं  
 दिव्वाए लेसाए दस दिसाओ उज्जोवेमाणा पभासेमाणा समणस्स भगवओ महावीरस्स  
 अंतियं आगम्ममागम्म रत्ता समणं भगवं महावीरं तिकखुत्तो आयाहिणं पयाहिणं  
 करेंति २ ता वंदंति णमंसंति वंदित्ता णमंसित्ता णच्चासण्णे णाइदूरे सुस्सूसमाणा  
 णमंसमाणा अभिमुहा विणएणं पंजलिउडा पज्जुवासंति ॥ २१ ॥ तेणं कालेणं तेणं  
 समएणं समणस्स भगवओ महावीरस्स बहवे असुरिंदवज्जिया भवणवासी देवा अंतियं  
 पाउब्भवित्था णागपइणो सुवण्णा विज्जू अग्गीया दीवा उदही दिसाकुमारा य पवण-  
 थणिया य भवणवासी णागफडागरुलवयरपुण्णकलससीहहयगयमगरमउडवद्धमाणि-  
 जुत्तविचित्तविंधगया सुरूवा महिद्धिया सेसं तं चेव जाव पज्जुवासंति ॥ २२ ॥  
 तेणं कालेणं तेणं समएणं समणस्स भगवओ महावीरस्स बहवे वाणमंतरा देवा  
 अंतियं पाउब्भवित्था पिसाया भूया य जक्खरक्खसकिंनरकिंपुरिसभुयगवइणो य  
 महाकाया गंधव्वणिक्कायगणा णिउणगंधव्वगीयरइणो अणपणियपणपणियइसि-  
 वादियभूयवादियकंदियमहाकंदिया य कुहंडपयए य देवा चंचलचवलचित्तकीलण-  
 दवप्पिया गंभीरहसियभणियपीयगीयणक्खणरई वणमालामेलमउडकुंडलसच्छंदविउ-  
 व्वियाहरणचारुविभूषणधरा सव्वोउयसुरभिकुसुमसुरइयपलंबसोमंतकंतवियसंतचित्त-  
 वणमालरइयवच्छा कामगमी कामरूवधारी णाणाविहवण्णरागवरवत्थचित्तचिल्लिय-  
 णियंसणा विविहदेसीणेवत्थग्गहियवेसा पमुइयकंदप्पकलहकेलिकोलाहलप्पिया हास-  
 बोलबहुला अणेगमणिरयणविविहणिजुत्तविचित्तविंधगया सुरूवा महिद्धिया जाव पज्जु-  
 वासंति ॥ २३ ॥ तेणं कालेणं तेणं समएणं समणस्स भगवओ महावीरस्स बहवे जोइ-  
 सिया देवा अंतियं पाउब्भवित्था विहस्सई चंदसूरसुक्कसणिच्चरा राहू धूमकेऊ बुहा य  
 अंगारका य तत्तवणिज्जकणगवण्णा जे य गहा जोइसंमि चारं चरंति केऊ य गहर-  
 इया अट्ठावीसविहा य णक्खत्तदेवगणा णाणासंठाणसंठियाओ य पंचवण्णाओ ताराओ  
 ठियलेस्सा चारिणो य अविस्साममंडलगई पत्तेयं णामंकपागडियविंधमउडा महिद्धिया  
 जाव पज्जुवासंति ॥ २४ ॥ तेणं कालेणं तेणं समएणं समणस्स भगवओ महावीरस्स  
 वेमाणिया देवा अंतियं पाउब्भवित्था सोहम्मीसाणसणंकुमारमाहिंदबंभलंतगमहासुक्क-  
 सहस्साराणयपाणयारणअच्चुयवई पहिट्ठा देवा जिणदंसणुसुयागमणजणियहासा पाल-  
 गपुप्फगसोमणससिरिवच्छणंदियावत्तकामगमपीइगममणोगमविमलसव्वओभट्ठणामधि-  
 जेहिं विमाणेहिं ओइण्णा वंदगा जिणिंदं । मिगमहिसवराहल्लालदहुरहयगयवइभुयगख-

गउसभंकविडिमपागडियचिंधमउडा पसिहिलवरमउडतिरीडधारी कुंडलउज्जोविया-  
 णणा मउडदित्सिरया रत्ताभा पउमपम्हगोरा सेया सुभवण्णगंधफासा उत्तमविउव्विणो  
 विविहवत्थगंधमल्लधरा महिद्धिया महज्जुइया जाव पंजलिउडा पज्जुवासंति ॥ २५ ॥  
 तए णं चंपाए नयरीए सिंघाडगतिगचउक्कचच्चरचउम्मुहमहापहपहेसु महया जणसेइ  
 इ वा जणवूहे इ वा जणबोले इ वा जणकलकले इ वा जणुम्मी ति वा जणुकलिया  
 इ वा जणसन्निवाए इ वा बहुजणो अण्णमण्णस्स एवमाइक्खइ एवं भासइ एवं  
 पण्णवेइ एवं परूवेइ-एवं खलु देवाणुप्पिया ! समणे भगवं महावीरे आइगरे तित्थगरे  
 सयंसंखुडे पुरिसुत्तमे जाव संपाविउकामे पुव्वाणुपुव्वि चरमाणे गामाणुगामं दूइज्जमाणे  
 इहमागए इह संपत्ते इह समोसठे इहेव चंपाए णयरीए वाहिं पुण्णभेइ उज्जाणे  
 अहापडिरूवं उग्गहं उग्गिण्हिता संजमेणं तवसा अप्पाणं भावेमाणे विहरइ । तं  
 महप्फलं खलु भो देवाणुप्पिया ! तहारूवाणं अरहंताणं भगवंताणं णामगोयस्सवि  
 सवणयाए, किमंगपुण अभिगमणवंदण्णमंसणपडिपुच्छणपज्जुवासणयाए ?, एकस्स वि  
 आयरियस्स धम्मियस्स सुवयणस्स सवणयाए ?, किमंगपुण विउलस्स अत्थस्स  
 गहणयाए ?, तं गच्छामो णं देवाणुप्पिया ! समणं भगवं महावीरं वंदामो णमंसामो  
 सक्कारेमो सम्माणेमो कल्लणं मंगलं देवयं चेइयं [ विणएणं ] पज्जुवासामो एयं णे  
 पेच्चभवे इहभवे य हियाए सुहाए खमाए निस्सेयसाए आणुगामियत्ताए भविस्स-  
 इतिकट्ठु बहवे उग्गा उग्गपुत्ता भोगा भोगपुत्ता एवं दुपडोयारेणं राइण्णा खत्तिया  
 माहणा भडा जोहा पसत्थारो मल्लइ लेच्छइ लेच्छइपुत्ता अण्णे य बह्वे राइसरतल-  
 वरमाडंविथकोडुंविथइन्भसेट्ठिसेणावइसत्थवाहपभिइओ अप्पेगइया वंदणवत्तिं अप्पे-  
 गइया नमंसणवत्तिं एवं सक्कारवत्तिं सम्माणवत्तिं दंसणवत्तिं कोऊहलवत्तिं  
 अप्पेगइया अट्ठविणिच्छयहेउं अस्सुयाइं सुणेस्सामो सुयाइं निस्संक्रियाइं करिस्सामो  
 अप्पेगइया अट्ठइं हेऊइं कारणाइं वागरणाइं पुच्छिस्सामो । अप्पेगइया सव्वओ  
 समंता मुण्डे भवित्ता अगाराओ अणगारियं पव्वइस्सामो, पंचाणुव्वइयं सत्तसिक्खा-  
 वइयं दुवालसविहं गिहिधम्मं पडिवज्जिस्सामो, अप्पेगइया जिणभत्तिरागेणं अप्पेगइया  
 जीयमेयंतिकट्ठु ण्हाया सिरसाकंठेमालकडा आविद्धमणिसुवण्णा कप्पियहारइहहारति-  
 सरयपालंबपलंबमाणकडिसुत्तयसुकयसोहाभरणा पवरवत्थपरिहिया चंदणोलित्ताय-  
 सरीरा । अप्पेगइया ह्यगया एवं गयगया रहगया सिवियागया संदमाणिगयागया  
 अप्पेगइया पायविहारचारिणो पुरिसवग्गुरापरिक्खत्ता महया उक्किट्ठिसीहणायबोल-  
 कलकलरत्तेणं पक्खुब्भिममहासमुद्भवभूयंपिव करेमाणा चंपाए णयरीए मज्झमज्झेणं  
 गिगच्छंति २ ता जेणेव पुण्णभेइ उज्जाणे तेणेव उवागच्छंति २ ता समणस्स

भगवओ महावीरस्स अदूरसामंते छत्ताईए तित्थयराइसेसे पासंति पासित्ता जाण-  
वाहणाइं ठावइंति २ त्ता जाणवाहणेहिंतो पच्चोरुहंति पच्चोरुहिन्ता जेणेव समणे  
भगवं महावीरे तेणेव उवागच्छंति उवागच्छित्ता समणं भगवं महावीरं तिकखुत्तो  
आयाहिणं पयाहिणं करेंति करित्ता वंदंति णमंसंति वंदित्ता णमंसित्ता णच्चासण्णे  
णाइदूरे सुस्ससमाणा णमंसमाणा अभिमुहा विणएणं पंजलिउडा पज्जुवासंति ॥ २६ ॥  
तए णं से पवित्तिवाउए इमीसे कहाए लद्धे समणे हट्ठतुट्ठ जाव हियए प्हाए  
अप्पमहग्घाभरणाळंकियसरीरे सयाओ गिहाओ पडिणिक्खमइ सयाओ गिहाओ  
पडिणिक्खमित्ता चंपाणयरिं मज्झमज्झेणं जेणेव बाहिरिया सव्वेव हेड्डिल्ला वत्तव्वया  
जाव णिसीयइ णिसीइत्ता तस्स पवित्तिवाउयस्स अद्धत्तेरससयसहस्साइं पीइदाणं  
दलयइ २ त्ता सक्कारेइ सम्माणेइ सक्कारेत्ता सम्माणेत्ता पडिविसजेइ ॥ २७ ॥  
तए णं से कूणिए राया भंभसारपुत्ते बलवाउयं आमंतेइ आमंतेत्ता एवं वयासी-  
खिप्पामेव भो देवाणुप्पिया ! आभिसेक्कं हत्थिरयणं पडिकप्पेहि, हयगयरहपवर-  
जोहकलियं च चाउरंणिणिं सेणं सण्णाहेहि, सुभद्दापमुहाण य देवीणं बाहिरियाए  
उवट्ठाणसालाए पाडिएक्कपाडिएक्काइं जत्ताभिमुहाइं जुत्ताइं जाणाइं उवट्ठवेह, चंपं  
णयरिं सद्धिभतरबाहिरियं आसित्तसित्तसुइसम्मट्ठरत्थंतरावणवीहियं मंचाइमंचकलियं  
णाणाविहरागउच्छियज्झयपडागाइपडागमंडियं लाउल्लोइयमहियं गोसीससरसरत्त-  
चंदण जाव गंधवट्ठिभूयं करेह कारवेह करित्ता कारवेत्ता एयमाणत्तियं पच्चप्पिणाहि,  
निज्जाइस्सामि समणं भगवं महावीरं अभिवंदए ॥ २८ ॥ तए णं से बलवाउए  
कूणिएणं रण्णा एवं वुत्ते समणे हट्ठतुट्ठ जाव हियए करयलपरिग्गहियं सिरसावत्तं  
मत्थए अंजलिं कट्ठु एवं वयासी-सामित्ति आणाए विणएणं वयणं पडिसुणेइ २ त्ता  
हत्थिवाउयं आमंतेइ आमंतेत्ता एवं वयासी-खिप्पामेव भो देवाणुप्पिया ! कूणियस्स  
रण्णो भंभसारपुत्तस्स आभिसेक्कं हत्थिरयणं पडिकप्पेहि, हयगयरहपवरजोहकलियं  
चाउरंणिणिं सेणं सण्णाहेहि सण्णाहिन्ता एयमाणत्तियं पच्चप्पिणाहि । तए णं से  
हत्थिवाउए बलवाउयस्स एयमट्ठं सोच्चा आणाए विणएणं वयणं पडिसुणेइ पडि-  
सुणित्ता छेयायरियउवएसमइविकप्पणाविकप्पेहिं सुणिउणेहिं उज्जलणेवत्थहत्थपरि-  
वत्थियं सुसज्जं धम्मियसण्णद्धबद्धकवइयउप्पीलियकच्छवच्छगेवयवद्गलवरभूसण-  
विरायंतं अहियतेयजुत्तं सललियवरकण्णपूरविराइयं पलंबउच्चूलमहुयरकयंधयारं चित्त-  
परिच्छेयपच्छयं पहरणावरणभरियजुद्धसज्जं सच्छत्तं सज्झयं सघटं सपडागं पंचामेलय-  
परिमंडियाभिरामं ओसारियजमलजुयलघटं विज्जुपणद्धं व कालमेहं उप्पाइयपव्वयं व  
चंक्रमंतं मत्तं गुलगुलंतं मणपवणजइणवेगं भीमं संगामियाओगं आभिसेक्कं हत्थिरयणं

पडिकप्पइ पडिकप्पेत्ता हयगयरहपवरजोहकलियं चाउरंगिणि सेणं सण्णाहइ सण्णा-  
 हिता जेणेव बलवाउए तेणेव उवागच्छइ उवागच्छिता एयमाणत्तियं पच्चप्पिणइ ।  
 तए णं से बलवाउए जाणसालियं सदावेइ २ ता एवं वयासी-खिप्पामेव भो देवाणु-  
 प्पिया ! सुभद्दपमुहाणं देवीणं बाहिरियाए उवट्ठाणसालाए पाडिएक्कपाडिएक्काइं  
 जत्ताभिमुहाइं जुताइं जाणाइं उवट्ठवेहि २ ता एयमाणत्तियं पच्चप्पिणाहि । तए णं  
 से जाणसालिए बलवाउयस्स एयमट्ठं आणाए विणएणं वयणं पडिसुणेइ पडिसुणित्ता  
 जेणेव जाणसाला तेणेव उवागच्छइ तेणेव उवागच्छिता जाणाइं पच्चवेक्खेइ २ ता  
 जाणाइं संपमज्जेइ २ ता जाणाइं संवेट्ठेइ जाणाइं संवेट्ठेत्ता जाणाइं णीणेइ जाणाइं  
 णीणेत्ता जाणाणं दूसे पवीणेइ २ ता जाणाइं समलंकरेइ २ ता जाणाइं वरभंडग-  
 मंडियाइं करेइ २ ता जेणेव वाहणसाला तेणेव उवागच्छइ तेणेव उवागच्छिता  
 वाहणाइं पच्चवेक्खेइ २ ता वाहणाइं संपमज्जेइ २ ता वाहणाइं णीणेइ २ ता  
 वाहणाइं अफालेइ २ ता दूसे पवीणेइ २ ता वाहणाइं समलंकरेइ २ ता वाहणाइं  
 वरभंडगमंडियाइं करेइ २ ता वाहणाइं जाणाइं जोएइ २ ता पओयलट्ठिं पओयधरे य  
 समं आडहइ आडहिता वट्ठमगं गाहेइ २ ता जेणेव बलवाउए तेणेव उवागच्छइ २ ता  
 बलवाउयस्स एयमाणत्तियं पच्चप्पिणइ । तए णं से बलवाउए णयरगुत्तियं  
 आमंतेइ २ ता एवं वयासी-खिप्पामेव भो देवाणुप्पिया ! चंपं णयरिं सद्धिभतर-  
 बाहिरियं आसित्त जाव कारवेत्ता एयमाणत्तियं पच्चप्पिणाहि । तए णं से णयरगुत्तिए  
 बलवाउयस्स एयमट्ठं आणाए विणएणं (वयणं) पडिसुणेइ २ ता चंपं णयरिं  
 सद्धिभतरबाहिरियं आसित्त जाव कारवेत्ता जेणेव बलवाउए तेणेव उवागच्छइ २ ता  
 एयमाणत्तियं पच्चप्पिणइ । तए णं से बलवाउए कोणियस्स रण्णे भंभसारपुत्तस्स  
 आभिसेकं हत्थिरयणं पडिकप्पियं पासइ हयगय जाव सण्णाहियं पासइ, सुभद्दपमु-  
 हाणं देवीणं पडिजाणाइं उवट्ठवियाइं पासइ, चंपं णयरिं सद्धिभतर जाव गंधवट्ठिभूयं  
 कयं पासइ, पासित्ता हट्ठुट्ठचित्तमाणंदिए पीयमणे जाव हियए जेणेव कूणिए राया  
 भंभसारपुत्ते तेणेव उवागच्छइ २ ता करयल जाव एवं वयासी-कप्पिए णं देवाणु-  
 प्पियाणं आभिसेके हत्थिरयणे हयगयरहपवरजोहकलिया य चाउरंगिणी सेणा सण्णा-  
 हिया सुभद्दपमुहाणं च देवीणं बाहिरियाए य उवट्ठाणसालाए पाडिएक्कपाडिएक्काइं  
 जत्ताभिमुहाइं जुताइं जाणाइं उवट्ठावियाइं चंपा णयरी सद्धिभतरबाहिरिया आसित्त  
 जाव गंधवट्ठिभूया कया, तं निज्जंतु णं देवाणुप्पिया ! समणं भगवं महावीरं  
 अभिवंदया ॥ २९ ॥ तए णं से कूणिए राया भंभसारपुत्ते बलवाउयस्स अंतिए एयमट्ठं  
 सोच्चा णिसम्म हट्ठुट्ठ जाव हियए जेणेव अट्टणसाला तेणेव उवागच्छइ २ ता अट्टणसालं  
 २ सुत्ता०

अणुपविसइ २ त्ता अणेगवायामजोगवगणवामदणमल्लजुद्धकरणेहिं संते परिस्संते  
 सयपागसहस्सपागेहिं सुगंधतेल्लमाइएहिं पीणणिज्जेहिं दप्पणिज्जेहिं मयणिज्जेहिं विहणि-  
 ज्जेहिं सविंदियगायपल्हायणिज्जेहिं अब्भिगेहिं अब्भिगिए समाणे तेल्लचम्मंसि पडि-  
 पुण्णपाणिपायसुकुमालकमलतलेहिं पुरिसेहिं छेएहिं दक्खेहिं पत्तट्ठेहिं कुसलेहिं मेहावीहिं  
 निउणसिप्पोवगएहिं अब्भिगणपरिमहणुव्वलणकरणगुणणिम्माएहिं अट्ठिसुहाए मंससुहाए  
 तयासुहाए रोमसुहाए चउव्विहाए संवाहणाए संवाहिए समाणे अवगयखेयपरिस्समे  
 अट्ठणसालाओ पडिणिक्खमइ पडिणिक्खमिता जेणेव मज्जणघरे तेणेव उवागच्छइ  
 तेणेव उवागच्छित्ता मज्जणघरं अणुपविसइ २ त्ता समुत्तजालाउलाभिरामे विचित्त-  
 मणिरयणकुट्टिमतले रमणिज्जे ण्हाणमंडवंसि णाणामणिरयणभत्तिचित्तंसि ण्हाणपीढंसि  
 सुहणिसण्णे सुद्धोदएहिं गंधोदएहिं पुप्फोदएहिं सुहोदएहिं पुणो २ कल्लाणगपवरमज्जण-  
 विहीए मज्जिए तत्थ कोउयसएहिं बहुविहेहिं कल्लाणगपवरमज्जणावसाणे पम्हल-  
 सुकुमालगंधकासाइयद्धहिंयंगे सरससरहिगोसीसचंदणाणुलित्तगते । अहयसुमहगघदू-  
 सरयणसुसंवुए सुइमालावण्णगविलेवणे आविद्धमणिसुवण्णे कप्पियहारद्धहारतिसरय-  
 पालंबपलंबमाणकडिसुत्तसुकयसोभे पिणद्वगेविज्जअंगुलिज्जगललियंगयललियकयाभरणे  
 वरकडगतुडियथंभियमुए अहियरूवसस्सिराए मुहियापिंगलंगुलिए कुंडलउज्जोविआणणे  
 मउडदित्तसिरए हारोत्थयसुकयरइयवच्छे पालंबपलंबमाणपडसुकयउत्तरिज्जे णाणामणि-  
 कणगरयणविमलमहरिहणित्तोवियमिसिमिसंतविरइयसुसिलिट्ठविसिट्ठलट्ठआविद्धवीरव-  
 लए । किं बहुणा ? कप्पस्सकए चेव अलंकियविभूसिए णरवई सकोरंटमल्लदामेणं  
 छत्तेणं धरिज्जमाणेणं चउचामरवालवीइयंगे मंगलजयसदकयालोए मज्जणघराओ  
 पडिनिक्खमइ मज्जणघराउ पडिणिक्खमिता अणेगगणनायगादंडनायगराईसरतलव-  
 रमाडंभियकोडुंभियइब्भसेट्ठिसेणावइसत्थवाहदूयसंधिवालसद्धिं संपरिवुडे धवल-  
 महमेहणिग्गए इव गहगणदिपंतरीक्खतारागणाण मज्जे ससिक्ख पियदंसणे  
 णरवई जेणेव बाहिरिया उवट्ठाणसाला जेणेव आभिसेक्के हत्थिरयणे तेणेव  
 उवागच्छइ उवागच्छित्ता अंजणगिरिकूडसणिमं गयवई णरवई दुरुढे ।  
 तए णं तस्स कूणियस्स रण्णे भंभसारपुत्तस्स आभिसेक्कं हत्थिरयणं दुरुढस्स  
 समाणस्स तप्पढमयाए इमे अट्ठट्ठमंगलया पुरओ अहाणपुव्वीए संपट्ठिया, तंजहा-  
 सोवत्थिय सिरिवच्छ णंदियावत्त वद्धमाणग भद्दासण कलस मच्छ दप्पण, तयाऽणंतरे  
 च णं पुण्णकलसभिगारं दिव्वा य छत्तपडागा सचामरा दंसणरइयआलोयदरिसणिजा  
 वाउद्धूयविजयवेजयंती य ऊसिया गगणतलमणुलिहंती पुरओ अहाणपुव्वीए संपट्ठिया,  
 तयाऽणंतरे च णं वेरुलियभिसंतविमलदंडं पलंबकोरंटमल्लदामोवसोभियं चंदमंडल-

णिमं समूसियं विमलं आयवत्तं पवरं सीहासणं वरमणिरयणपायपीढं सपाउयाजोयस-  
माउत्तं बहुक्किंकरकम्मकरपुरिसपायत्तपरिक्खित्तं पुरओ अहाणुपुव्वीए संपट्ठियं ।  
तयाऽणंतरे बहवे लट्ठिग्गाहा कुंतग्गाहा चावग्गाहा चामरग्गाहा पासग्गाहा पोत्थ-  
यग्गाहा फलगग्गाहा पीढग्गाहा वीणग्गाहा कुतुवग्गाहा हडप्फग्गाहा पुरओ अहाणु-  
पुव्वीए संपट्ठिया । तयाऽणंतरे बहवे डंडिणो मुंडिणो सिंहंडिणो जडिणो पिंछिणो  
हासकरा डमरकरा चाडुकरा वादकरा कंदप्पकरा दवकरा कोकुइया किट्टिकरा वार्यता  
गार्यता हसंता णच्चंता भासंता सावेत्ता रक्खंता आलोयं च करेमाणा जयरसदं  
पउंजमाणा पुरओ अहाणुपुव्वीए संपट्ठिया । तयाऽणंतरे जच्चाणं तरमल्लिहायणाणं  
हरिमेलासउलमल्लियच्छाणं चुंचुच्चियललियपुलियचलचवलचंचलगईणं लघणवग्गणधा-  
वणधोरणतिवईजणसिक्खियगईणं ललंतलामगललायवरभूसणाणं मुहभंडगओचूलग-  
थासगअहिलाणचामरगण्डपरिमंडियकडीणं किकरवरतरुणपरिग्गहियाणं अट्ठसयं वर-  
तुरगाणं पुरओ अहाणुपुव्वीए संपट्ठियं । तयाऽणंतरे च णं ईसीदंताणं ईसीमत्ताणं  
ईसीतुंगाणं ईसीउच्छंगविसालधवलदंताणं कंचणकोसीपविट्ठदंताणं कंचणमणिरयणभू-  
सियाणं वरपुरिसारोहगसंपउत्ताणं अट्ठसयं गयाणं पुरओ अहाणुपुव्वीए संपट्ठियं ।  
तयाऽणंतरे सच्छत्ताणं सज्झयाणं सघंटाणं सपडागाणं सतोरणवराणं सणंदिघोसाणं  
सखिंखिणीजालपरिक्खित्ताणं हेमवयचित्तिणिंसकणगणिजुत्तदास्याणं कालायससुकय-  
णेमिजंतकम्माणं मुसिलिट्ठवत्तमंडलधुराणं आइण्णवरतुरगसुसंपउत्ताणं कुसलनरच्छेय-  
सारहिंसुसंपग्गहियाणं बत्तीसतोणपरिमंडियाणं सकंकडवडेंसगाणं सचावसरपहरणाव-  
रणभरियजुद्धसज्जाणं अट्ठसयं रहाणं पुरओ अहाणुपुव्वीए संपट्ठियं । तयाऽणंतरे च  
णं असिसत्तिकोततोमरसूलउडभिंडिमालधणुपाणिसज्जं पायत्ताणीयं पुरओ अहाणुपु-  
व्वीए संपट्ठियं । तए णं से कूणिए राया हारोत्थयसुकयरइयवच्छे कुंडलउज्जोवियाणणे  
मउडदित्तिसिए णरसीहे णरवई णरिंदे णरवसहे मणयरायवसभकपे अब्भहियराय-  
तेयलच्छीए दिप्पमाणे हत्थिक्खंधवरगए सकोरंटमल्लदमेणं छत्तेणं धरिज्जमाणेणं  
सेयवरचामराहिं उद्धुव्वमाणीहिं २ वेसमणो चेव णरवई अमरवईसणिभाइ इड्डीए  
पहियक्किती हयगयरहपवरजोहकलियाए चाउरंणिणीए सेणाए समणुगम्ममाणमग्गे  
जेणेव पुण्णभेइ उज्जाणे तेणेव पहारेत्थ गमणाए, तए णं तस्स कूणियस्स रण्णो  
भंससारपुत्तस्स पुरओ महंआसा आसधरा उभओ पासिं गागा णागधरा पिट्ठओ  
रहसंगेळि । तए णं से कूणिए राया भंससारपुत्ते अब्भुग्गयभिंगारे पग्गहियतालियंटे  
उच्छियसेयच्छत्ते पवीइयवालीवयीणीए सव्विड्डीए सव्वजुत्तीए सव्ववलेणं सव्वसमुदएणं  
सव्वादरेणं सव्वविभूईए सव्वविभूसाए सव्वसंभमेणं सव्वपुप्फगंधमल्लालंकारेणं सव्व-

तुडियसहसणिणाएणं महया इड्डीए महया जुत्तीए महया बलेणं महया समुदएणं  
 महया वरतुडियजमगसमगप्पवाइएणं संखपणवपडहमेरिस्सल्लखिरखरमुहिहुडुकमुखमुरव-  
 मुयंगदुंदुभिणिघोसणाइयरवेणं चंपाए णयरीए मज्झमज्झेणं णिग्गच्छइ ॥ ३० ॥  
 तए णं तस्स कूणियस्स रण्णो चंपानगरिं मज्झमज्झेणं णिग्गच्छमाणस्स बहवे  
 अत्थऽत्थिया कामत्थिया भोगत्थिया किब्बिसिया करोडिया लाभत्थिया कारवाहिया  
 संख्या चक्किया णंगलिया मुहमंगलिया वद्धमाणा पुस्समाणवा खंडियगणा ताहिं  
 इट्ठाहिं कंताहिं पियाहिं मणुण्णाहिं मणामाहिं मणोभिरामाहिं हिययगमणिजाहिं  
 वग्गूहिं जयविजयमंगलसएहिं अणवरयं अभिणंदंता य अभियुणंता य एवं वयासी-  
 जय २ णंदा ! जय २ भद्दा ! भदं ते अजियं जिणाहिं जियं (च) पालेहिं जियमज्झे  
 वसाहिं । इंदो इव देवाणं चमरो इव असुराणं धरणो इव नागाणं चंदो इव ताराणं  
 भरहो इव मणुयाणं बहूइं वासाइं बहूइं वाससयाइं बहूइं वाससहस्साइं बहूइं वासस-  
 यसहस्साइं अणहसमग्गो हट्ठुट्ठो परमाउं पालयाहिं इट्ठजणसंपरिवुडो चंपाए णयरीए  
 अण्णेसिं च बहूणं गामागरणयरखेडकब्बडमडंबदोणमुहपट्ठणआसमनिगमसंवाहसंनि-  
 वेसाणं आहेवच्चं पोरेवच्चं सामित्तं भट्ठित्तं महत्तरगतं आणाईसरसेणावच्चं कारेमाणे  
 पालेमाणे महयाऽऽहयणट्ठणीयवाइयतंतीतलतालतुडियघणमुयंगपडुप्पवाइयरवेणं विउ-  
 लाइं भोगभोगाइं भुंजमाणे विहराहित्तिकट्टु जय २ सदं पउंजंति । तए णं से कूणिए  
 राया भंभसारपुत्ते णयणमालासहस्सेहिं पेच्छिजमाणे २ हिययमालासहस्सेहिं अभि-  
 णंदिजमाणे २ मणोरहमालासहस्सेहिं विच्छिप्पमाणे २ वयणमालासहस्सेहिं अभिथु-  
 व्वमाणे २ कंतिसोहग्गुणेहिं पत्थिजमाणे २ बहूणं णरणासिहस्साणं दाहिणहत्येणं  
 अंजलिमालासहस्साइं पडिच्छमाणे २ मंजुमंजुणा घोसेणं पडिबुज्झमाणे २ भवणपं-  
 तिसहस्साइं समइच्छमाणे २ चंपाए णयरीए मज्झमज्झेणं णिग्गच्छइ २ ता जेणेव  
 पुण्णभेदे उज्जाणे तेणेव उवागच्छइ २ ता समणस्स भगवओ महावीरस्स अदूरसामंते  
 छत्ताईए तित्थयराइसेसे पासइ पासित्ता आभिसेक्कं हत्थिरयणं ठवेइ ठवित्ता आभिसे-  
 क्काओ हत्थिरयणाओ पच्चोसहइ २ ता अवहट्ठु पंच रायककुहाइं, तंजहा-खग्गं छतं  
 उप्पेसं वाहणाओ वालवीयणं, जेणेव समणे भगवं महावीरे तेणेव उवागच्छइ उवा-  
 गच्छित्ता समणं भगवं महावीरं पंचविहेणं अभिगमेणं अभिगच्छइ, तंजहा-सचित्ताणं  
 दव्वाणं विउसरणयाए १ अचित्ताणं दव्वाणं अविउसरणयाए २ एगसाडियं उत्तरा-  
 संगकरणेणं ३ चक्खुकासे अंजलिपग्गहेणं ४ मणसो एगत्तभावकरणेणं ५ समणं  
 भगवं महावीरं तिक्खुतो आयाहिणं पयाहिणं करेइ २ ता वंदइ णमंसइ वंदित्ता  
 णमंसित्ता तिबिहाए पज्जुवासणाए पज्जुवासइ, तंजहा-काइयाए वाइयाए माणसियाए,

काइयाए ताव संकुइयगहत्थपाए सुस्समाणे णमंसमाणे अभिमुहे विणएणं पंजलि-  
उडे पज्जुवासइ, वाइयाए जं जं भगवं वागरेइ एवमेयं भंते ! तहमेयं भंते ! अवि-  
तहमेयं भंते ! असंदिद्धमेयं भंते ! इच्छियमेयं भंते ! पडिच्छियमेयं भंते ! इच्छियप-  
डिच्छियमेयं भंते ! से जहेयं तुब्भे वदह अपडिक्कलमाणे पज्जुवासइ, माणसियाए  
महया संवेगं जणइत्ता तिक्खधम्ममाणुरागरत्तो पज्जुवासइ ॥ ३१ ॥ तए णं ताओ  
सुभद्दपमुहाओ देवीओ अंतो अंतेउरंसि ण्हायाओ सच्चाळंकारविभूसियाओ बहूहिं  
खुज्जाहिं चेलाहिं वामणीहिं वडभीहिं वच्चरीहिं पओसियाहिं जोणियाहिं पण्हवियाहिं  
इसिणिणियाहिं वासिइणिणियाहिं लासियाहिं लउसियाहिं सिंहलीहिं दमिलीहिं आरबीहिं  
पुलंदीहिं पक्कणीहिं वहलीहिं मुरुंडीहिं सबरियाहिं पारसीहिं णाणादेसीविदेसपरिमंडि-  
याहिं ईगियंथितियपत्थियविजाणिआहिं सदेसणेवत्थग्गहियवेसाहिं चेडियाच्चक्वालव-  
रिसधरकंचुइज्जमहततरगवंदपरिक्खिताओ अंतेउराओ णिग्गच्छंति २ ता जेणेव पाडि-  
एक्काजाणइं तेणेव उवागच्छन्ति उवागच्छिता पाडिएक्कापाडिएक्काइं जत्ताभिमुहाइं  
जुत्ताइं जाणाइं दुरुहंति दुरुहित्ता णियगपरियालसद्धिं संपरिवुडाओ चंपाए णयरीए  
मज्झंमज्झेणं णिग्गच्छंति णिग्गच्छिता जेणेव पुण्णभेइ उज्जाणे तेणेव उवागच्छंति  
उवागच्छिता समणस्स भगवओ महावीरस्स अदूरसामंते छत्ताइंए तिक्खयाइस्सेसे  
पासंति पासित्ता पाडिएक्कापाडिएक्काइं जाणाइं ठवंति ठवित्ता जाणेहिंतो पच्चोरुहंति  
पच्चोरुहित्ता बहूहिं खुज्जाहिं जाव परिक्खित्ताओ जेणेव समणे भगवं महावीरे तेणेव  
उवागच्छंति २ ता समणं भगवं महावीरं पंचविहेणं अभिगमेणं अभिगच्छंति,  
तंजहा-सच्चित्ताणं दव्वाणं विउसरणयाए अच्चित्ताणं दव्वाणं अविउसरणयाए विण-  
ओणयाए गायल्लडीए चक्खुप्फासे अंजलिप्पग्गहेणं मणसो एगत्तकरणेणं समणं भगवं  
महावीरं तिक्खुत्तो आयाहिणं पयाहिणं करेन्ति वंदंति णमंसंति वंदित्ता णमंसित्ता  
कूणियरायं पुरओ कट्टु ठिइयाओ चेव सपरिवाराओ अभिमुहाओ विणएणं पंजलि-  
उडाओ पज्जुवासंति ॥ ३२ ॥ तए णं समणे भगवं महावीरे कूणियस्स भंभसार-  
पुत्तस्स सुभद्दपमुहाणं देवीणं तीसे य सहइमहालियाए परिसाए इसिपरिसाए मुणि-  
परिसाए जइपरिसाए देवपरिसाए अणेगसयाए अणेगसयवंदाए अणेगसयवंदपरिवा-  
राए ओहवले अइवले महव्वले अपरिमियबलवीरियतेयमाहाप्पकंतिजुत्ते सारयनवत्थ-  
णियमहुरंगंभीरकौंचणिग्गोसतुंदुभिस्सरे उरेवित्थडाए कंठेऽवट्ठियाए सिरे समाइण्णाए  
अगरलाए अमम्मणाए सव्वक्खरसण्णिवाइयाए पुण्णरत्ताए सव्वभासाणुगामिणीए  
सरस्सइए जोयणणीहारिणा सरेणं अद्धमागहाए भासाए भासइ अरिहा धम्मं परिक-  
हेइ । तेसिं सव्वेसिं आरियमणारियाणं अगिलाए धम्ममाइक्खइ, साऽविय णं अद्ध-



मागहा भासा तेसिं सव्वेसिं आरियमणारियाणं अप्पणो सभासाए परिणामेणं मरि-  
णमइ, तंजहा-अत्थि लोए अत्थि अलोए एवं जीवा अजीवा बंधे मोक्खे पुण्णे पावे  
आसवे संवरे वेयणा णिजरा अरिहंता चक्कवट्ठी बलदेवा वासुदेवा नरगा णेरइया  
तिरिक्खजोणिया तिरिक्खजोणिणीओ माया पिया रिसओ देवा देवलोया सिद्धी  
सिद्धा परिणिव्वाणं परिणिव्वुया अत्थि पाणाइवाए मुसावाए अदिण्णादाणे  
मेहुणे परिग्गहे अत्थि कोहे माणे माया लोमे जाव सिच्छादंसणसल्ले । अत्थि  
पाणाइवायवेरमणे मुसावायवेरमणे अदिण्णादाणवेरमणे मेहुणवेरमणे परिग्गह-  
वेरमणे जाव सिच्छादंसणसल्लविवेगे सव्वं अत्थिभावं अत्थित्ति वयइ, सव्वं  
णत्थिभावं णत्थित्ति वयइ, सुचिण्णा कम्मा सुचिण्णफला भवंति, दुचिण्णा कम्मा  
दुचिण्णफला भवंति, फुसइ पुण्णपावे, पच्चायंति जीवा, सफले कल्लाणपावए ।  
धम्ममाइक्खइ-इणमेव णिग्गंथे पावयणे सच्चे अणुत्तरे केवलए संसुद्धे पडिपुण्णे  
णेयाउए सल्लकत्ते सिद्धिमग्गे मुत्तिमग्गे णिव्वाणमग्गे णिज्जाणमग्गे अवितहमविसंथि  
सव्वदुक्खप्पहीणमग्गे इहट्ठिया जीवा सिज्झंति बुज्झंति मुच्चंति परिणिव्वायंति  
सव्वदुक्खाणमंतं करंति । एगच्चा पुण एगे भयंतारो पुव्वकम्मावसेसेणं अण्णयरेसु  
देवलोएसु देवताए उववत्तारो भवंति, महद्धिएसु जाव महासुक्खेसु दूरंगइएसु  
चिरट्ठिएसु, ते णं तत्थ देवा भवंति महद्धिया जाव चिरट्ठिएसु हारविराइयवच्छा  
जाव पभासमाणा कप्पोवगा गइक्कळाणा ठिइक्कळाणा आगमेसिभदा जाव पडिह्वा,  
तमाइक्खइ एवं खलु चउहिं ठाणेहिं जीवा णेरइयत्ताए कम्मं पकरंति णेरइयत्ताए  
कम्मं पकरेत्ता णेरइएसु उववज्जंति, तंजहा-महारंभयाए महापरिग्गहयाए पंचिंदिय-  
वहेणं कुणिमाहारेणं, एवं एएणं अभिलावेणं तिरिक्खजोणिएसु माइल्लयाए णियडिडि-  
याए अलियवयणेणं उक्कंचणयाए वंचणयाए, मणुस्सेसु पगइभइयाए पगइविणीययाए  
साणुक्कोसयाए अमच्छरिययाए, देवेषु सरागसंजमेणं संजमासंजमेणं अकामणिजराए  
बालतवोकम्मेणं तमाइक्खइ-जह णरगा गम्मंति जे णरगा जा य वेयणा णरए ।  
सारीरमाणसाइं दुक्खाइं तिरिक्खजोणीए ॥ १ ॥ माणुस्सं च अणिष्णं वाहिजरा-  
मरणवेयणापउरं । देवे य देवलोए देविट्ठिं देवसोक्खाइं ॥ २ ॥ णरगं तिरिक्ख-  
जोणिं माणुसभावं च देवलोयं च । सिद्धे य सिद्धवसहिं छज्जीवणियं परिकहेइ ॥ ३ ॥  
जह जीवा बज्झंति मुच्चंति जह य परिकिलिस्संति । जह दुक्खाणं अंतं करंति केइ  
अपडिबद्धा ॥ ४ ॥ अट्ठदुहट्ठियचित्ता जह जीवा दुक्खसागरमुविति । जह वेरग्ग-  
मुवगया कम्मसमुग्गं विहाडंति ॥ ५ ॥ जह रागेण कडाणं कम्माणं पावगो फल-  
विवागो, जह य परिहीणकम्मा सिद्धा सिद्धालयमुविति ॥ ६ ॥ तमेव धम्मं दुविहं

आइक्खइ, तंजहा-अगारधम्मं अणगारधम्मं च, अणगारधम्मो ताव इह खलु  
 सव्वओ सव्वत्ताए मुंडे भवित्ता अगाराओ अणगारियं पव्वइय सव्वाओ पाणाइ-  
 वायाओ वेरमणं सुसावाय० अदिण्णादाण० मेहुण० परिग्गह० राईभोगणाओ वेर-  
 मणं अयमाउसो ! अणगारसामइए धम्मे पण्णत्ते, एयस्स धम्मस्स सिक्खाए उवट्टिए  
 निग्गंथे वा निग्गंथी वा विहरमाणे आणाए आराहए भवइ । अगारधम्मं दुवाल्-  
 सविहं आइक्खइ, तंजहा-पंच अणुव्वयाइं तिण्णि गुणव्वयाइं चत्तारि सिक्खावयाइं,  
 पंच अणुव्वयाइं, तंजहा-थूलाओ पाणाइवायाओ वेरमणं थूलाओ सुसावायाओ  
 वेरमणं थूलाओ अदिज्ञादाणाओ वेरमणं सदारसंतोसे इच्छापरिमाणे, तिण्णि गुणव्व-  
 याइं तंजहा-अणत्थदंडवेरमणं दिसिक्खयं उवमोगपरिमोगपरिमाणं, चत्तारि सिक्खाव-  
 याइं, तंजहा-सामाइयं देसावगासियं पोसहोववासे अतिहिंसंविभागे, अपच्छिमा  
 मारणंतिया संलेहणाजूसणाराहणा अयमाउसो ! अगारसामइए धम्मे पण्णत्ते, अगार-  
 धम्मस्स सिक्खाए उवट्टिए समणोवासए समणोवासिया वा विहरमाणे आणाए  
 आराहए भवइ ॥ ३३ ॥ तए णं सा महइमहालिया मणूसपरिसा समणस्स भगवओ  
 महावीरस्स अंतिए धम्मं सोच्चा णिसम्म हट्ठतुट्ठ जाव हियया उट्ठाए उट्ठेइ उट्ठाए  
 उट्ठित्ता समणं भगवं महावीरं तिक्खुत्तो आयाहिणं पयाहिणं करेइ २ ता वंदए  
 णमंसइ वंदित्ता णमंसित्ता अत्थेगइया मुंडे भवित्ता अगाराओ अणगारियं पव्वइया,  
 अत्थेगइया पंचाणुव्वइयं सत्तसिक्खावइयं दुवाल्सविहं गिहिधम्मं पडिवण्णा, अव-  
 सेसा णं परिसा समणं भगवं महावीरं वंदइ णमंसइ वंदित्ता णमंसित्ता एवं वयासी-  
 सुअक्खाए ते भंते ! णिग्गंथे पावयणे एवं सुपण्णत्ते सुभासिए सुविणीए सुभाविइ  
 अणुत्तरे ते भंते ! णिग्गंथे पावयणे, धम्मं णं आइक्खमाणा तुब्भे उवसमं आइ-  
 क्खह, उवसमं आइक्खमाणा विवेगं आइक्खह, विवेगं आइक्खमाणा वेरमणं  
 आइक्खह, वेरमणं आइक्खमाणा अकरणं पावाणं कम्माणं आइक्खह, णत्थि णं  
 अण्णे केइ समणे वा माहणे वा जे एरिसं धम्ममाइक्खत्तए, किमंग पुण इत्तो  
 उत्तरतरं ?, एवं वदित्ता जामेव दिसं पाउब्भूया तामेव दिसं पडिगया ॥ ३४ ॥  
 तए णं कूणिए राया भंभसारपुत्ते समणस्स भगवओ महावीरस्स अंतिए धम्मं सोच्चा  
 णिसम्म हट्ठतुट्ठ जाव हियए उट्ठाए उट्ठेइ उट्ठाए उट्ठित्ता समणं भगवं महावीरं  
 तिक्खुत्तो आयाहिणं पयाहिणं करेइ २ ता वंदइ णमंसइ वंदित्ता णमंसित्ता एवं  
 वयासी-सुअक्खाए ते भंते ! णिग्गंथे पावयणे जाव किमंग पुण एत्तो उत्तरतरं ?,  
 एवं वदित्ता जामेव दिसं पाउब्भूए तामेव दिसं पडिगए ॥ ३५ ॥ तए णं ताओ  
 सुभद्रापमुहाओ देवीओ समणस्स भगवओ महावीरस्स अंतिए धम्मं सोच्चा णिसम्म

हट्टवुट्ट जाव हिययाओ उट्ठाए उट्ठित्ता समणं भगवं महावीरं तिक्खुत्तो आयाहिणं पयाहिणं करेन्ति २ ता वंदंति णमंसंति वंदित्ता णमंसित्ता एवं वयासी-सुअक्खाए ते भंते ! णिग्गंथे पावयणे जाव किमंग पुण इत्तो उत्तरतरं ?, एवं वदित्ता जामेव दिस्सि पाउब्भूयाओ तामेव दिस्सि पडिगयाओ ॥ **समोसरणं समत्तं ॥ ३६ ॥**

तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदभूर्इ नामं अणगारे गोयमसगोत्तेणं सत्तुस्सेहे समचउरंसंठाणसंठिए वइरोसहनारायसंघयणे कणगपुल्लगनिघसपम्हगोरे उग्गतवे दित्ततवे तत्ततवे महातवे घोरतवे उराले घोरे घोरगुणे घोरतवस्सी घोरवंभचेरवासी उच्छृढसरीरे संखितविउल्लतेयलेस्से समणस्स भगवओ महावीरस्स अदूरसामंते उड्डंजाणू अहोसिरे ज्ञाणकोट्टोवगए संजमेणं तवसा अप्पाणं भावेमाणे विहरइ । तए णं से भगवं गोयमे जायसद्धे जायसंसए जाय-कोऊहल्ले उप्पण्णसद्धे उप्पण्णसंसए उप्पण्णकोऊहल्ले संजायसद्धे संजायसंसए संजाय-कोऊहल्ले समुप्पण्णसद्धे समुप्पण्णसंसए समुप्पण्णकोऊहल्ले उट्ठाए उट्ठेइ उट्ठाए उट्ठित्ता जेणेव समणे भगवं महावीरे तेणेव उवागच्छइ तेणेव उवागच्छित्ता समणं भगवं महावीरं तिक्खुत्तो आयाहिणं पयाहिणं करेइ २ ता वंदइ णमंसइ वंदित्ता णमंसित्ता णच्चासण्णे णाइदूरे सुस्ससमाणे णमंसमाणे अभिमुहे विणएणं पंजलिउडे पज्जुवासमाणे एवं वयासी-जीवे णं भंते ! असंजए अविरए अप्पडिहयपच्चक्खायपावकम्मे सकिरिए असंवुडे एगंतदंडे एगंतबाले एगंतसुत्ते पावकम्मं अण्हाइ ? हंता अण्हाइ १ । जीवे णं भंते ! असंजयअविरयअप्पडिहयपच्चक्खायपावकम्मे सकिरिए असंवुडे एगंतदंडे एगंतबाले एगंतसुत्ते मोहणिज्जं पावकम्मं अण्हाइ ? हंता अण्हाइ २ । जीवे णं भंते ! मोहणिज्जं कम्मं वेदेमाणे किं मोहणिज्जं कम्मं बंधइ ? वेयणिज्जं कम्मं बंधइ ?, गोयसा ! मोहणिज्जंपि कम्मं बंधइ वेयणिज्जंपि कम्मं बंधइ, णणत्थ चरिममोहणिज्जं कम्मं वेदेमाणे वेयणिज्जं कम्मं बंधइ णो मोहणिज्जं कम्मं बंधइ ३ । जीवे णं भंते ! असंजए अविरए अप्पडिहयपच्चक्खायपावकम्मे सकिरिए असंवुडे एगंतदंडे एगंतबाले एगंतसुत्ते ओसण्णतसपाणघाई कालमासे कालं किच्चा णेरइएसु उववज्जइ ? हंता उववज्जइ ४ । जीवे णं भंते ! असंजए अविरए अप्पडिहयपच्चक्खाय-पावकम्मे इओ चुए पेच्चा देवे सिया ? गोयसा ! अत्थेगइया देवे सिया अत्थेगइया णो देवे सिया, से केणट्ठेणं भंते ! एवं वुच्चइ-अत्थेगइया देवे सिया अत्थेगइया णो देवे सिया ? गोयसा ! जे इमे जीवा गामागरणयरणिगमरायहाणिखेडकब्बडमंडंब-दोणमुहपट्ठणासमसंबाहसणिवेसेसु अकामतण्हाए अकामल्लुहाए अकामवंभचेरवासेणं अकामअण्हाणगसीयायवदंसमसगसेयजल्लमल्लपंपकपरितावेणं अप्पतरो वा भुज्जतरो वा

कालं अप्पाणं परिकिलेसंति अप्पतरो वा भुज्जतरो वा कालं अप्पाणं परिकिलेसित्ता कालमासे कालं किच्चा अण्णयरेसु वाणमंतरेसु देवलोएसु देवत्ताए उववत्तारो भवंति, तहिं तेसिं गइं तहिं तेसिं ठिइं तहिं तेसिं उववाए पण्णत्ते । तेसिं णं भंते ! देवाणं केवइयं कालं ठिइं पणत्ता ? गोयमा ! दसवाससहस्साइं ठिइं पण्णत्ता, अत्थि णं भंते ! तेसिं देवाणं इड्ढी वा जुइं वा जसे इ वा वले इ वा वीरिए इ वा पुरिसक्कारपरक्कमे इ वा ? हंता अत्थि, ते णं भंते ! देवा परलोगस्साराहगा ? णो इणट्ठे समट्ठे ५ । से जे इमे गामागरणयरणिगमरायहाणिखेडकब्बडमडंबदोणमुहपट्ठणासमसंवाहसण्णि-वेसेसु मण्णया भवंति, तंजहा-अंडुबद्धगा गियलबद्धगा हडिबद्धगा चारगबद्धगा हत्थ-च्छिन्नगा पायच्छिन्नगा कण्णच्छिन्नगा णक्कच्छिन्नगा उट्ठच्छिन्नगा जिब्भच्छिन्नगा सीसच्छिन्नगा मुहच्छिन्नगा मज्झच्छिन्नगा वेक्कच्छिन्नगा हियउप्पाडियगा णयणु-प्पाडियगा दसणुप्पाडियगा वसणुप्पाडियगा गेवच्छिन्नगा तंडुलच्छिन्नगा कागणिमं-सक्खाइयया ओलंबियगा लंबियया धंसियया घोलियया फाडियया पीलियया सूलाइ-यया सूलभेण्णगा खारवत्तिया वज्झवत्तिया सीहपुच्छियया दवग्गिदड्ढगा पंकोसण्णगा पंके खुत्ता वलयमयगा वसट्ठमयगा गियाणमयगा अंतोसल्लमयगा गिरिपडियगा तरु-पडियगा मरुपडियगा गिरिपक्खंदोलिया तरुपक्खंदोलिया मरुपक्खंदोलिया जलपवे-सिगा जलणपवेसिगा विसमक्खियगा सत्थोवाडियगा वेहाणसिया गिद्धपिट्ठगा कंतार-मयगा दुब्भिवक्खमयगा असंकिलिट्ठपरिणामा ते कालमासे कालं किच्चा अण्णयरेसु वाण-मंतरेसु देवलोएसु देवत्ताए उववत्तारो भवंति, तहिं तेसिं गइं तहिं तेसिं ठिइं तहिं तेसिं उववाए पण्णत्ते, तेसिं णं भंते ! देवाणं केवइयं कालं ठिइं पण्णत्ता ? गोयमा ! वारसवाससहस्साइं ठिइं पण्णत्ता । अत्थि णं भंते ! तेसिं देवाणं इड्ढी वा जुइं वा जसे इ वा वले इ वा वीरिए इ वा पुरिसक्कारपरक्कमे इ वा ? हंता अत्थि, ते णं भंते ! देवा परलोगस्साराहगा ? णो इणट्ठे समट्ठे ६ । से जे इमे गामागरणयरणिगमरायहाणिखेड-कब्बडमडंबदोणमुहपट्ठणासमसंवाहसंनिवेसेसु मण्णया भवंति, तंजहा-पगइभद्दगा पगइ-उवसंता पगइपतणुकोहमाणमायालोहा मिउमहवसंपण्णा अल्लीणा विणीया अम्मापिउसु-स्सूसगा अम्मापिईणं अणइक्कमणिज्वयणा अप्पिच्छा अप्पारंभा अप्पपरिग्गहा अप्पेणं आरंभेणं अप्पेणं समारंभेणं अप्पेणं आरंभसमारंभेणं वित्तिं कप्पेमाणा बहूइं वासाइं आउयं पालंति पालित्ता कालमासे कालं किच्चा अण्णयरेसु वाणमंतरेसु देवलोएसु देव-त्ताए उववत्तारो भवंति, तहिं तेसिं गइं तहिं तेसिं ठिइं तहिं तेसिं उववाए पण्णत्ते, तेसिं णं भंते ! देवाणं केवइयं कालं ठिइं पण्णत्ता ? गोयमा ! चउइसवाससहस्सा ७ । से जाओ इमाओ गामागरणयरणिगमरायहाणिखेडकब्बडमडंबदोणमुहपट्ठणासमसंवा-

हसंनिवेसेसु इत्थियाओ भवंति, तंजहा-अंतो अंतोरियाओ गयपइयाओ मयपइयाओ बालविहवाओ छड्डियल्लियाओ माइरक्खियाओ पियरक्खियाओ भायरक्खियाओ कुल-घररक्खियाओ ससुरकुलरक्खियाओ परूढणहमंसुकेसक्खरोमाओ ववगयपुप्फांधम-ल्लालंकाराओ अण्हाणगसेयजल्लमलपंकपरितावियाओ ववगयखीरदहिणवणीयसप्पिते-ल्लगुल्लोणमहुमज्जमंसपरिचत्तकयाहाराओ अप्पिच्छाओ अप्पारंभाओ अप्पपरिगहाओ अप्पेणं आरंभेणं अप्पेणं समारंभेणं अप्पेणं आरंभसमारंभेणं वित्तिं कप्पेमाणीओ अक्कामवंभचेरवासेणं तमेव पइसेजं णाइक्कमन्ति, ताओ णं इत्थियाओ एयारूवेणं विहारेणं विहरमाणीओ बहूइं वासाइं सेसं तं चेव जाव चउसट्ठि वाससहस्साइं ठिई पण्णत्ता ८ । से जे इमे गामागरणयरणिगमरायहाणिखेडक्कब्बडमडंबदोणमुहपट्टणा-समसंबाहसन्निवेसेसु मणुया भवंति, तंजहा-दगविइया दगतइया दगसत्तमा दगएक्का-रसमा गोयमा गोवइया गिहिधम्मा धम्मचिंतगा अविस्सद्विरुद्धवुद्धसावगप्पभियओ तेसिं मणुयाणं णो कप्पइ इमाओ नव रसविगईओ आहारित्तए, तंजहा-खीरं दहिं णवणीयं सप्पि तेहं फाणियं महुं मज्जं मंसं, णण्णत्थ एक्काए सरिसवविगईए, ते णं मणुया अप्पिच्छा तं चेव सव्वं णवरं चउरासीइवाससहस्साइं ठिई पण्णत्ता ९ । से जे इमे गंगाकूलगा वाणपत्था तावसा भवंति, तंजहा-होत्तिया पोत्तिया कोत्तिया जण्णइं सड्डई थालई हुंपउट्ठा दंतुक्खलिया उम्मज्जगा सम्मज्जगा निम्मज्जगा संपक्खाला दक्खिणकूलगा उत्तरकूलगा संखधमगा कूलधमगा मिगलुद्धगा हत्थितावसा उडंडगा दिसापोक्खिणो वाक्कासिणो अंबुवासिणो बिलवासिणो जलवासिणो वेलवासिणो स्वक्खमूलिया अंबुभक्खिणो वाउभक्खिणो सेवालभक्खिणो मूलाहारा कंदाहारा तया-हारा पत्ताहारा पुप्फाहारा बीयाहारा परिसडियकंदमूलतयपत्तपुप्फफलाहारा जलाभि-सेयकठिणगायभूया आयावणाहिं पंचग्गितावेहिं ईंगालसोल्लियं कंडुसोल्लियं कट्टुसोल्लियं-पिव अप्पाणं करेमाणा बहूइं वासाइं परियागं पाउणंति बहूइं वासाइं परियागं पाउणित्ता कालमासे कालं किच्चा उक्कोसेणं जोइसिएसु देवेसु देवत्ताए उववत्तारो भवंति, पलिओवमं वाससयसहस्समम्भहियं ठिई, सेसं तं चेव आराहगा ? णो इणट्ठे समट्ठे १० । से जे इमे जाव सन्निवेसेसु पवइया समणा भवंति, तंजहा-कंदप्पिया कुकुइया मोहरिया गीयरइप्पिया नच्चणसीला ते णं एएणं विहारेणं विहरमाणा बहूइं वासाइं सामण्णपरि-यायं पाउणंति २ त्ता तस्स ठाणस्स अणालोइयअप्पडिक्कंता कालमासे कालं किच्चा उक्कोसेणं सोहम्मे कप्पे कंदप्पिएसु देवेसु देवत्ताए उववत्तारो भवंति, तहिं तेसिं गई तहिं तेसिं ठिई, सेसं तं चेव, णवरं पलिओवमं वाससहस्समम्भहियं ठिई ११ । से जे इमे जाव सन्निवेसेसु परिव्वायगा भवंति, तंजहा-संखा जोई कविला भिउच्चा हंसा

परमहंसा बहुउदया कुडिव्वया कण्हपरिव्वायगा, तत्थ खलु इमे अट्ठ माहणपरिव्वायगा भवंति, तंजहा-कण्हे य करकंडे य, अंबडे य परासरे । कण्हे वीवायणे चेव, देवगुत्ते य नारए ॥ १ ॥ तत्थ खलु इमे अट्ठ खत्तिपरिव्वायया भवंति, तंजहा-सीलई ससिहारे य, णग्गई भग्गई इ य । विदेहे रायाराया रायारामे बल्लेइ य ॥ १ ॥ ते णं परिव्वायगा रिउव्वेयजजुव्वेयसामवेयअहव्वणवेयइतिहासपंचमाणं णिग्घंछट्ठ्ठाणं संगोवंगणं सर-हस्साणं चउण्हं वेयाणं सारगा पारगा धारगा वारगा सडंगवी सट्ठितंतविसारया संखाणे सिक्खाकप्पे वागरणे छंदे णिस्ते जोइसामयणे अण्णेसु य वंमण्णएसु य सत्थेसु सुपरिणिट्ठिया यावि हुत्था । ते णं परिव्वायगा दाणधम्मं च सोयधम्मं च तित्था-मिसेयं च आघवेमाणा पण्णवेमाणा परूवेमाणा विहरंति, जणं अम्हे किंचि असुई भवइ तण्णं उदएण य मट्ठियाए य पक्खालियं सुई भवइ, एवं खलु अम्हे चोक्खा चोक्खायारा सुई सुइसमायारा भवेत्ता अभिसेयजलपूयप्पाणो अविग्घेण सग्गं गमि-स्सामो, तेसि णं परिव्वायगाणं णो कप्पइ अगडं वा तलायं वा णइं वा वाविं वा पुक्खरिणिं वा दीहियं वा गुंजालियं वा सरं वा सागरं वा ओगाहित्तए, णणत्थ अट्ठणगमणे, णो कप्पइ सगडं वा जाव संदमाणियं वा दुरुहिता णं गच्छित्तए, तेसि णं परिव्वायगाणं णो कप्पइ आसं वा हत्थि वा उट्ठं वा गोणं वा महिसं वा खरं वा दुरुहिता णं गमित्तए, तेसि णं परिव्वायगाणं णो कप्पइ नडपेच्छा इ वा जाव मागहपेच्छा इ वा पेच्छित्तए, तेसि परिव्वायगाणं णो कप्पइ हरियाणं लेसणया वा घट्टणया वा थंभणया वा लूसणया वा उप्पाडणया वा करित्तए, तेसि परिव्वायगाणं णो कप्पइ इत्थिकहा इ वा भत्तकहा इ वा देसकहा इ वा रायकहा इ वा चोरकहा इ वा जणवयकहा इ वा अणत्थदंडं करित्तए, तेसि णं णो कप्पइ अयपायाणि वा तउयपाणि वा तंवपायाणि वा जसदपायाणि वा सीसगपायाणि वा रूपपायाणि वा सुवण्णपायाणि वा अण्णयराणि वा बहुमुल्लाणि धारित्तए, णणत्थ लाउपाएण वा दारुपाएण वा मट्ठियापाएण वा, तेसि णं परिव्वायगाणं णो कप्पइ अयबंधणाणि वा तउयबंधणाणि वा तंबबंधणाणि जाव बहुमुल्लाणि धारित्तए, तेसि णं परिव्वायगाणं णो कप्पइ णाणाविहवण्णरागरत्ताइं वत्थाइं धारित्तए, णणत्थ एक्काए धाउरत्ताए तेसि णं परिव्वायगाणं णो कप्पइ हारं वा अट्ठहारं वा एगावलिं वा मुत्तावलिं वा कणगावलिं वा रयणावलिं वा मुरविं वा कंठमुरविं वा पालंबं वा तिसरयं वा कडिसुत्तं वा दसमुहियाणंतगं वा कडयाणि वा तुडियाणि वा अंगयाणि वा केउराणि वा कुंडलाणि वा मउडं वा चूलामणिं वा पिणद्धित्तए, णणत्थ एगेणं तंविएणं पवित्तएणं, तेसि णं परिव्वायगाणं णो कप्पइ गंथिमवेढिमपूरिमसंघाइमे चउव्विहे मल्ले

धारित्तए, णणत्थ एगेणं कण्णपूरेणं, तेसि णं परिव्वायगाणं णो कप्पइ अगल्लएण वा चंदणेण वा कुंकुमेण वा गायं अणुलिंपित्तए, णणत्थ एक्काए गंगामट्ठियाए, तेसि णं कप्पइ मागहए पत्थए जलस्स पडिगाहित्तए, सेऽविय वहमाणे णो चेव णं अवहमाणे, सेऽविय थिमिओदए णो चेव णं कइमोदए, सेऽविय बहुपसण्णे णो चेव णं अबहु-  
 पसण्णे, सेऽविय परिपूए णो चेव णं अपरिपूए, सेऽविय णं दिण्णे नो चेव णं अदिण्णे, सेऽविय पिबित्तए णो चेव णं हत्थपायचरुचमसपक्खालणट्ठाए सिणाइत्तए वा, तेसि णं परिव्वायगाणं कप्पइ मागहए अद्दाडए जलस्स पडिगाहित्तए, सेऽविय वहमाणे णो चेव णं अवहमाणे जाव णो चेव णं अदिण्णे, सेऽविय हत्थपायचरु-  
 चमसपक्खालणट्ठयाए णो चेव णं पिबित्तए सिणाइत्तए वा ते णं परिव्वायगा एयाह्वेणं विहारेणं विहरमाणा बहूई वासाईं परियायं पाउणंति २ ता कालमासे कालं किच्चा उक्कोसेणं बंमलोए कप्पे देवताए उववतारो भवंति, तहिं तेसिं गई तहिं तेसिं ठिई दस सागरोवमाईं ठिई पणत्ता, सेसं तं चेव १२ ॥ ३७ ॥ तेणं कालेणं तेणं समएणं अम्मडस्स परिव्वायगस्स सत्त अंतेवासिसयाईं गिम्हकालसमयंसि जेट्ठामूलमासंसि गंगाए महानईए उभओकूलेणं कं पिळपुराओ णयराओ पुरिमतालं णयरं संपट्ठिया विहाराए, तए णं तेसिं परिव्वायगाणं तीसे अगामियाए छिण्णोवायाए दीहमद्दाए अडवीए कंचि देसंतरमणुपत्ताणं से पुव्वग्गहिए उदए अणुपुव्वेणं परिभुंजमाणे झीणे, तए णं ते परिव्वाया झीणोदगा समाणा तण्हाए पारब्भमाणा २ उदगदा-  
 तारमपस्समाणा अण्णमण्णं सद्दावेति सद्दावित्ता एवं वयासी-एवं खलुदे वाणुप्पिया ! अम्ह इमीसे अगामियाए जाव अडवीए कंचि देसंतरमणुपत्ताणं से उदए जाव झीणे तं सेयं खलु देवाणुप्पिया ! अम्ह इमीसे अगामियाए जाव अडवीए उदगदातारस्स सव्वओ समंता मग्गणगवेसणं करित्तएत्तिकट्ठु अण्णमण्णस्स अंतिए एयमट्ठं पडिसुणंति २ ता तीसे अगामियाए जाव अडवीए उदगदातारस्स सव्वओ समंता मग्गणग-  
 वेसणं करेन्ति करित्ता उदगदातारमलभमाणा दोच्चं पि अण्णमण्णं सद्दावेति सद्दावेत्ता एवं वयासी-इह णं देवाणुप्पिया ! उदगदातारो णत्थि तं णो खलु कप्पइ अम्ह अदिण्णं गिण्हित्तए अदिण्णं साइजित्तए, तं मा णं अम्हे इयाणि आवइकालंमि अदिण्णं गिण्हामो अदिण्णं साइज्जामो मा णं अम्हं तवलोवे भविस्सइ, तं सेयं खलु अम्हं देवाणुप्पिया ! तिदंडयं कुंडियाओ य कंचणियाओ य करोडियाओ य भिसियाओ य छण्णालए य अंकुसए य केसरियाओ य पवित्तए य गणेत्तियाओ य छत्तए य वाहणाओ य पाउयाओ य धाउरत्ताओ य एगंते एडित्ता गंगं महानईं ओगाहिता वालुयासंथारए संथरित्ता संलेहणाञ्जोसियाणं भत्तपाणपडियाइक्खियाणं पाओवगयाणं

कालं अणवकंखमाणाणं विहरित्तएत्तिकद्धु अण्णमण्णस्स अंतिए एयमट्ठं पडिसुणंति  
 अण्णमण्णस्स अंतिए० पडिसुणित्ता तिदंडए य जाव एगंते एडेंति २ ता गंगं  
 महाणइं ओगाहेति २ ता वालुयासंधारयं संथरंति २ ता वालुयासंधारयं डुरुहंति २ ता  
 पुरत्थाभिसुहा संपलियं कनिसच्चा करयल जाव कद्धु एवं वयासी-णमोऽत्थु णं अरहंताणं  
 जाव संपत्ताणं, नमोऽत्थु णं समणस्स भगवओ महावीरस्स जाव संपाविउकामस्स,  
 नमोऽत्थु णं अम्मडस्स परिव्वायगस्स अम्हं धम्मायरियस्स धम्मोवएसगस्स, पुब्बिं णं  
 अम्हे अम्मडस्स परिव्वायगस्स अंतिए थूलगपाणाइवाए पच्चक्खाए जावजीवाए थूलए  
 मुसावाए थूलए अदिण्णादाणे पच्चक्खाए जावजीवाए सव्वे मेहुणे पच्चक्खाए  
 जावजीवाए थूलए परिग्गहे पच्चक्खाए जावजीवाए इयाणिं अम्हे समणस्स भगवओ  
 महावीरस्स अंतिए सव्वं पाणाइवायं पच्चक्खामो जावजीवाए एवं जाव सव्वं  
 परिग्गहं पच्चक्खामो जावजीवाए सव्वं कोहं माणं मायं लोहं पेजं दोसं कलहं  
 अच्चक्खाणं पेसुणं परपरिवायं अरइरइं मायामोसं सिच्छादंसणसल्लं अकरणिज्जं जोगं  
 पच्चक्खामो जावजीवाए सव्वं असणं पाणं खाइमं साइमं चउव्विहंपि आहारं  
 पच्चक्खामो जावजीवाए जंपि य इमं सरीरं इट्ठं कंतं पियं मणुणं मणामं थेज्जं  
 वेसासियं संमयं बहुमयं अणुमयं भंडकरंडगसमाणं मा णं सीयं मा णं उण्हं मा णं  
 खुहा मा णं पिवासा मा णं वाला मा णं चोरा मा णं दंसा मा णं मसगा मा णं  
 वाइयपित्तियसंनिवाइयविविहा रोगायंका परीसहोवसग्गा फुसंतुत्तिकद्धु एयंपि णं  
 चरमेहिं ऊसासणीसासेहिं वोसिरामोत्तिकद्धु संलेहणाइसणाइसिया भत्तपाणपडिया-  
 इक्खिया पाओवगया कालं अणवकंखमाणा विहरंति, तए णं ते परिव्वाया वहुइं  
 भत्ताइं अणसणाए छेदेन्ति छेदिता आलोइयपडिकंता समाहिपत्ता कालमासे कालं  
 किच्चा बंभलोए कपे देवत्ताए उववण्णा, तहिं तेसिं गइं दससागरोवमाइं ठिइं  
 पण्णत्ता, परलोगस्स आराहगा, सेसं तं चेव १३ ॥ ३८ ॥ बहुजणे णं भंते !  
 अण्णमण्णस्स एवमाइक्खइ एवं भासइ एवं पल्लवेइ एवं खलु अंबडे परिव्वायए  
 कंपिळ्ळपुरे णयरे घरसए आहारमाहरेइ, घरसए वसहिं उवेइ, से कहमेयं भंते !  
 एवं ? गोयमा ! जण्णं से बहुजणो अण्णमण्णस्स एवमाइक्खइ जाव एवं  
 पल्लवेइ-एवं खलु अम्मडे परिव्वायए कंपिळ्ळपुरे जाव घरसए वसहिं उवेइ, सच्चे णं  
 एसमट्ठे, अहंपि णं गोयमा ! एवमाइक्खामि जाव एवं पल्लवेमि-एवं खलु अम्मडे  
 परिव्वायए जाव वसहिं उवेइ । से केणट्ठेणं भंते ! एवं वुच्चइ-अम्मडे परिव्वायए  
 जाव वसहिं उवेइ ? गोयमा ! अम्मडस्स णं परिव्वाययस्स पगइभइयाए जाव  
 विणीययाए छट्ठंछट्ठेणं अनिक्खित्तेणं तवोक्कमेणं उट्ठं बाहाओ पगिज्झिय २



सूराभिमुहस्स आयावणभूमीए आयावेमाणस्स सुभेणं परिणामेणं पसत्थाहिं लेसाहिं  
 विसुज्झमाणीहिं अन्नया कयाइ तयावरणिज्जाणं कम्माणं खओवसमेणं ईहावूह-  
 मगगणवेसणं करेमाणस्स वीरियलद्धी वेउव्वियलद्धी ओहिणाणलद्धी समुप्पण्णा,  
 तए णं से अम्मडे परिव्वायए ताए वीरियलद्धीए वेउव्वियलद्धीए ओहिणाणलद्धीए  
 समुप्पण्णाए जणविम्हावणहेउं कं पिळ्ळपुरे नयरे घरसए जाव वसहिं उवेइ, से  
 तेणट्ठेणं गोयमा ! एवं वुच्चइ-अम्मडे परिव्वायए कं पिळ्ळपुरे नयरे घरसए जाव  
 वसहिं उवेइ । पट्ठू णं भंते ! अम्मडे परिव्वायए देवाणुप्पियाणं अंतिए मुंडे भवित्ता  
 अगाराओ अणगरियं पव्वइत्तए ? णो इणट्ठे समट्ठे, गोयमा ! अम्मडे णं परिव्वायए  
 समणोवासए अभिगयजीवाजीवे जाव अप्पाणं भावेमाणे विहरइ, णवरं ऊसियफलिहे  
 अवंगुयदुवारे चियतंतैउरघरदारपवेसी ण वुच्चइ अम्मडस्स णं परिव्वायगस्स थूलए  
 पाणाइवाए पच्चक्खाए जावजीवाए जाव परिग्गहे णवरं सव्वे मेहुणे पच्चक्खाए  
 जावजीवाए, अम्मडस्स णं णो कप्पइ अक्खसोयप्पमाणमेत्तं पि जलं सयराहं उत्तरित्तए  
 णणत्थ अद्धाणगमणेणं, अम्मडस्स णं णो कप्पइ सगडं वा एवं तं चेव भाणियव्वं  
 जाव णणत्थ एगाए गंगामट्ठियाए, अम्मडस्स णं परिव्वायगस्स णो कप्पइ आहा-  
 कम्मिए वा उदेसिए वा मीसजाए इ वा अज्झोयरए इ वा पूइकम्मे इ वा कीयगडे  
 इ वा पामिच्चे इ वा अणिसिट्ठे इ वा अभिहडे इ वा ठइत्तए वा रइत्तए वा कंतारभत्ते  
 इ वा दुब्भिकखभत्ते इ वा पाहुणगभत्ते इ वा गिलाणभत्ते इ वा वड्डिलियाभत्ते इ वा  
 भोत्तए वा पाइत्तए वा, अम्मडस्स णं परिव्वायगस्स णो कप्पइ मूलभोयणे वा जाव  
 वीयभोयणे वा भोत्तए वा पाइत्तए वा, अम्मडस्स णं परिव्वायगस्स चउव्विहे  
 अणत्थदंडे पच्चक्खाए जावजीवाए, तंजहा-अवज्झाणायरिए पमायायरिए हिंसप्पयाणे  
 पावकम्मोवएसे, अम्मडस्स कप्पइ मागहए अद्धाढए जलस्स पडिग्गाहित्तए सेऽविय  
 वहमाणए नो चेव णं अवहमाणए जाव सेऽविय परिपूए नो चेव णं अपरिपूए  
 सेऽविय सावज्जेत्तिकाउं णो चेव णं अणवज्जे सेऽविय जीवा इतिकट्ठु णो चेव णं  
 अजीवा सेऽविय दिण्णे णो चेव णं अदिण्णे सेऽविय दंतहत्थपायचरुचमसपक्खाल-  
 णट्ठयाए पिबित्तए वा णो चेव णं सिणाइत्तए, अम्मडस्स कप्पइ मागहए य आढए  
 जलस्स पडिग्गाहित्तए, सेऽविय वहमाणे जाव दिन्ने नो चेव णं अदिण्णे सेऽविय  
 सिणाइत्तए णो चेव णं हत्थपायचरुचमसपक्खालणट्ठयाए पिबित्तए वा, अम्मडस्स  
 णो कप्पइ अन्नउत्थिया वा अण्णउत्थियदेवयाणि वा वंदित्तए वा णमंसित्तए वा जाव  
 पज्जुवासित्तए वा णणत्थ अरिहंतं वा अरिहंतसाहुणो वा । अम्मडे णं भंते !  
 परिव्वायए कालमासे कालं किच्चा कहिं गच्छिहिइ ? कहिं उववज्जिहिइ ?, गोयमा !

अम्मडे णं परिव्वायए उच्चावएहिं सीलव्वयगुणवेरमणपच्चक्खणापोसहोववासेहिं  
अप्पाणं भावेमाणे बहूइं वासाइं समणोवासयपरियायं पाउणिहिइ २ ता मासियाए  
संलेहणाए अप्पाणं झसित्ता सट्ठिं भत्ताइं अणसणाए छेदित्ता आलोइयपडिक्कंते  
समाहिपत्ते कालमासे कालं किच्चा बंभलोए कप्पे देवत्ताए उववज्जिहिइ, तत्थ णं  
अत्थेगइयाणं देवाणं दस सागरोवमाइं ठिईं पण्णात्ता, तत्थ णं अम्मडस्सवि देवस्स  
दस सागरोवमाइं ठिई । से णं भंते ! अम्मडे देवे ताओ देवलोगाओ आउक्खएणं  
भवक्खएणं ठिइक्खएणं अणंतरं चयं चइत्ता कहिं गच्छिहिइ कहिं उववज्जिहिइ ?  
गोयमा ! महाविदेहे वासे जाइं कुलाइं भवंति अट्ठाइं दित्ताइं वित्ताइं विच्छिण्णविउल-  
भवणसयणासणजाणवाहणाइं बहुधणजायरुवरययाइं आओगपओगसंपउत्ताइं विच्छ-  
डियपउरभत्तपाणाइं बहुदासीदासगोमहिसगवेलगप्पभूयाइं बहुजणस्स अपरिभूयाइं  
तहप्पगारेसु कुलेसु पुमत्ताए पच्चायाहिइ । तए णं तस्स दारगस्स गब्भत्थस्स चैव  
समाणस्स अम्मापिइणं धम्मे दढा पइण्णा भविस्सइ, से णं तत्थ गणव्हं मासाणं  
बहुपडिपुण्णाणं अट्ठट्ठमाणराइंदियाणं वीइक्कंताणं सुकुमालपाणिपाए जाव ससिसोमा-  
कारे कंते पियदंसणे सुरूवे दारए पयाहिइ, तए णं तस्स दारगस्स अम्मापियरो  
पढमे दिवसे ठिइवडियं काहिंति, बिइयदिवसे चंदसरुंदंसणियं काहिंति, छट्ठे दिवसे  
जागरियं काहिंति, एकारसमे दिवसे वीइक्कंते णिव्वित्ते असुइजायकम्मकरणे संपत्ते  
वारसाहे दिवसे अम्मापियरो इमं एयारुवं गोणं गुणणिप्फणं णामधेजं काहिंति-  
जम्हा णं अम्हं इमंसि दारगंसि गब्भत्थंसि चैव समाणंसि धम्मे दढपइण्णा तं होउ  
णं अम्हं दारए दढपइण्णे णामेणं, तए णं तस्स दारगस्स अम्मापियरो णामधेजं  
करेहिंति दढपइण्णेत्ति । तं दढपइण्णं दारगं अम्मापियरो साइरेगऽट्ठवासजायगं  
जाणित्ता सोमणंसि तिहिकरणणक्खत्तमुहुत्तंसि कलायरियस्स उवणेहिंति । तए णं से  
कलायरिए तं दढपइण्णं दारगं लेहाइयाओ गणियप्पहाणाओ सउणरुयपजवसाणाओ  
बावत्तरिकलाओ सुत्ताओ य अत्थओ य करणओ य सेहाविहिइ सिक्खाविहिइ,  
तंजहा-लेहं गणियं रुवं णट्ठे गीयं वाइयं सरगयं पुक्खरगयं समतालं जुयं जगवायं  
पासगं अट्ठावयं पोरेकच्चं दग्गट्ठियं अण्णविहिं [ पाणविहिं वत्थविहिं विलेवणविहिं ]  
सयणविहिं अज्जं पहेलियं मागहियं गाहं गीइयं सिलोयं हिरण्णजुत्तिं सुवण्णजुत्तिं  
गंधजुत्तिं चुण्णजुत्तिं आभरणविहिं तरुणीपडिक्कम्मं इत्थिलक्खणं पुरिसलक्खणं हयल-  
क्खणं गयलक्खणं गोणलक्खणं लुकुडलक्खणं चक्कलक्खणं छत्तलक्खणं चम्मल-  
क्खणं दंडलक्खणं असिलक्खणं मणिलक्खणं काकणिलक्खणं वत्थुविज्जं खंधारमाणं  
नगरमाणं वत्थुत्तिवेसणं वूहं पडिवूहं चारं पडिचारं चक्कवूहं गरुलवूहं सगडवूहं जुद्धं

निजुद्धं जुद्धाइजुद्धं मुट्टिजुद्धं बाहुजुद्धं लयाजुद्धं ईसत्थं छरुप्पवाहं धणुव्वेयं हिरण्ण-  
पागं सुवण्णपागं वट्ठवेडुं सुत्तखेडुं णालियाखेडुं पत्तच्छेज्जं कडगच्छेज्जं सज्जीवं निज्जीवं  
सउण्णयमिति बावत्तरिकलाओ सेहावित्ता सिक्खावेत्ता अम्मापिईणं उवणेहिइ । तए णं  
तस्स दढपइण्णस्स दारगस्स अम्मापियरो तं कलायरियं विउलेणं असणपाणखाइम-  
साइमेणं वत्थगंधमल्लालंकारेण य सक्कारेहिंति सम्माणेहिंति स० २ ता विउलं जीविया-  
रिहं पीइदाणं दलइस्संति २ ता पडिविसज्जेहिंति । तए णं से दढपइण्णे दारए बावत्त-  
रिकलापंडिए नवंगसुत्तपडिबोहिए अट्टारसदेसीभासाविसारए गीयरई गंधव्वणट्टकुसले  
हयजोही गयजोही रहजोही बाहुजोही बाहुप्पमदी वियालचारी साहसिए अलं  
भोगसमत्थे यावि भविस्सइ । तए णं दढपइण्णं दारगं अम्मापियरो बावत्तरिकलापंडियं  
जाव अलं भोगसमत्थं वियाणित्ता विउलेहिं अण्णभोगेहिं पाणभोगेहिं लेणभोगेहिं  
वत्थभोगेहिं सयणभोगेहिं कामभोगेहिं उवणिमंतेहिंति, तए णं से दढपइण्णे दारए  
तेहिं विउलेहिं अण्णभोगेहिं जाव सयणभोगेहिं णो सज्जिहिइ णो रज्जिहिइ णो  
गिज्झिहिइ णो मुज्झिहिइ णो अज्झोववज्जिहिइ, से जहाणामए उप्पले इ वा पउमे  
इ वा कुसुमे इ वा नल्लिणे इ वा सुभगे इ वा सुगंधे इ वा पोंडरीए इ वा महापोंडरीए  
इ वा सयपत्ते इ वा सहस्सपत्ते इ वा सयसहस्सपत्ते इ वा पंके जाए जले संवुड्ढे  
णोवल्लिप्पइ पंकरएणं णोवल्लिप्पइ जलरएणं, एवामेव दढपइण्णेवि दारए कामेहिं जाए  
भोगेहिं संवुड्ढे णोवल्लिप्पिहिइ कामरएणं णोवल्लिप्पिहिइ भोगरएणं णोवल्लिप्पिहिइ  
मित्तणाइणियगसयणसंबंधिपरिजणेणं, से णं तहास्खाणं थेराणं अंतिए केवलं वोहिं  
बुज्झिहिइ केवलबोहिं बुज्झित्ता अगाराओ अणगारियं पव्वइहिइ । से णं भविस्सइ  
अणगारे भगवंते ईरियासमिए जाव गुत्तबंभयारी । तस्स णं भगवंतस्स एएणं विहा-  
रेणं विहरमाणस्स अणंते अणुत्तरे णिव्वाघाए निरावरणे कसिणे पडिपुण्णे केवल-  
वरणाणदंसणे समुप्पज्जिहिइ । तए णं से दढपइण्णे केवली बहूइं वासाइं केवल्लिपरि-  
यागं पाउणिहिइ २ ता मासियाए संलेहणाए अप्पाणं झूसित्ता सट्ठिं भत्ताइं अणसणाए  
छेएत्ता जस्सट्ठाए कीरइ थेरकप्पभावे जिणकप्पभावे मुंडभावे अण्हाणए अदंतवणए  
केसलोए बंभचेरवासे अच्छत्तगं अणोवाहणगं भूमिसेज्जा फलहसेज्जा कट्ठसेज्जा  
परघरपवेसो लद्धावलद्धं परेहिं हीलणाओ खिसणाओ णिंदणाओ गरहणाओ  
तालणाओ तज्जणाओ परिभवणाओ पव्वहणाओ उच्चावया गामकंटगा बावीसं  
परीसहोवसग्गा अहियासिज्जंति तमट्ठनाराहिता चरिमेहिं उस्सासणिस्सासेहिं सिज्झि-  
हिइ बुज्झिहिइ मुच्चिहिइ परिणिव्वाहिइ सव्वदुक्खाणमंतं करेहिइ १४ ॥ ३९ ॥  
से जे इमे गामागर जाव सण्णिवेसेसु पव्वइया समणा भवंति, तंजहा-आयरिय-

पडिणीया उवज्झायपडिणीया कुलपडिणीया गणपडिणीया आयरियउवज्झायाणं  
 अयसकारगा अवणकारगा अकित्तिकारगा बहूहिं असब्भावुब्भावणाहिं मिच्छताभि-  
 णिवेसेहि य अप्पाणं च परं च तदुभयं च युग्गाहेमाणा वुप्पाएमाणा विहरिता  
 बहूइं वासाइं सामण्णपरियागं पाउणंति २ ता तस्स ठाणस्स अणालोइयअपडिक्कंता  
 कालमासे कालं किच्चा उक्कोसेणं लंतए कप्पे देवकिव्विसियेसु देवकिव्विसियताए  
 उववत्तारो भवंति, तहिं तेसिं गइं तेरससागरोवमाइं ठिई अणाराहगा सेसं तं  
 चेव १५ । से जे इमे सण्णिपंचदियतिरिक्खजोणिया पज्जत्तया भवंति, तंजहा-  
 जलयरा खहयरा थलयरा, तेसिं णं अत्थेगइयाणं सुभेणं परिणामेणं पसत्थेहिं  
 अज्झवसाणेहिं लेसाहिं विसुज्झमाणाहिं तयावरणिज्जाणं कम्माणं खओवसमेणं  
 ईहावहमग्गणवेसणं करेमाणाणं सण्णीपुव्वजाइसरणे समुप्पज्जइ । तए णं ते  
 समुप्पणजाइसरा समाणा सयमेव पंचाणुव्वयाइं पडिवज्जंति पडिवज्जिता बहूहिं  
 सीलव्वयगुणवेरमणपच्चक्खाणपोसहोववासेहिं अप्पाणं भावेमाणा बहूइं वासाइं आउयं  
 पालेंति पालिता भत्तं पच्चक्खंति बहूइं भत्ताइं अणसणाए छेयंति २ ता आलोइय-  
 पडिक्कंता समाहिपत्ता कालमासे कालं किच्चा उक्कोसेणं सहस्सारे कप्पे देवताए  
 उववत्तारो भवंति, तहिं तेसिं गइं अट्ठारस सागरोवमाइं ठिई पण्णत्ता, परलोगस्स  
 आराहगा, सेसं तं चेव १६ । से जे इमे गामागर जाव संनिवेसेसु आजीविका  
 भवंति, तंजहा-दुधरंतरिया तिघरंतरिया सत्तघरंतरिया उप्पलबेंटिया घरसमुदाणिया  
 विज्जुअंतरिया उट्ठियासमणा, तेणं एयारूवेणं विहारेणं विहरमाणा बहूइं वासाइं  
 परियायं पाउणित्ता कालमासे कालं किच्चा उक्कोसेणं अच्चुए कप्पे देवताए उववत्तारो  
 भवंति, तहिं तेसिं गइं वावीसं सागरोवमाइं ठिई, अणाराहगा, सेसं तं चेव १७ ।  
 से जे इमे गामागर जाव सण्णिवेसेसु पव्वइया समणा भवंति, तंजहा-अतुक्कोसिया  
 परपरिवाइया भूइकम्मिया भुज्जो २ कोउयकारगा, ते णं एयारूवेणं विहारेणं विहर-  
 माणा बहूइं वासाइं सामण्णपरियागं पाउणंति पाउणित्ता तस्स ठाणस्स अणालोइय-  
 अपडिक्कंता कालमासे कालं किच्चा उक्कोसेणं अच्चुए कप्पे आभिओगियेसु देवेसु देवताए  
 उववत्तारो भवंति, तहिं तेसिं गइं वावीसं सागरोवमाइं ठिई परलोगस्स अणाराहगा,  
 सेसं तं चेव १८ । से जे इमे गामागर जाव सण्णिवेसेसु निण्हगा भवंति, तंजहा-  
 बहुरया १ जीवपएतिया २ अव्वत्तिया ३ सामुच्छेइया ४ दोकिरिया ५ तेरासिया  
 ६ अवद्धिया ७ इच्चेते सत्त पवयणणिण्हगा केवल(लं)चरियालिंगसामण्णा मिच्छदिट्ठी  
 बहूहिं असब्भावुब्भावणाहिं मिच्छताभिणिवेसेहिं य अप्पाणं च परं च तदुभयं च  
 युग्गाहेमाणा वुप्पाएमाणा विहरिता बहूइं वासाइं सामण्णपरियागं पाउणंति २ ता

कालमासे कालं किच्चा उक्कोसेणं उवरिमेसु गेवेजेसु देवत्ताए उववत्तारो भवंति, तहिं तेसिं गई एकत्तीसं सागरोवमाई ठिई, परलोगस्स अणाराहगा, सेसं तं चेव १९ । से जे इमे गामागर जाव सण्णिवेसेसु मणुया भवंति, तंजहा—अप्पारंभा अप्पपरिग्गहा धम्मिया धम्माणुया धम्मिद्धा धम्मक्खाई धम्मप्पलोइया धम्मपलज्जणा धम्मसमुदायारा धम्मेणं चेव वित्तिं कप्पेमाणा सुसीला सुव्वया सुप्पडियाणंदा साहूहिं एगच्चाओ पाणाइ-वायाओ पडिविरया जावजीवाए एगच्चाओ अपडिविरया एवं जाव परिग्गहाओ एग-च्चाओ कोहाओ माणाओ मायाओ लोहाओ पेज्जाओ दोसाओ कलहाओ अब्भक्खा-णाओ पेसुण्णाओ परपरिवायाओ अरइरईओ मायामोसाओ मिच्छादंसणसल्लाओ पडि-विरया जावजीवाए एगच्चाओ अपडिविरया, एगच्चाओ आरंभसमारंभाओ पडिविरया जावजीवाए एगच्चाओ अपडिविरया, एगच्चाओ करणकारावणाओ पडिविरया जावजीवाए एगच्चाओ अपडिविरया, एगच्चाओ पयणपयावणाओ पडिविरया जाव-ज्जीवाए एगच्चाओ पयणपयावणाओ अपडिविरया, एगच्चाओ कोट्टणपिट्टणतज्जण-तालणवहवंधपरिकिलेसाओ पडिविरया जावजीवाए एगच्चाओ अपडिविरया, एगच्चाओ ण्हाणमहणवण्णगविलेवणसद्धरिसरसरुवगंधमल्लालंकाराओ पडिविरया जावजीवाए एगच्चाओ अपडिविरया, जेयावण्णे तहप्पगारा सावज्जजोगोवहिया कम्मंता परपाण-परियावणकरा कजंति तओ जाव एगच्चाओ अपडिविरया तंजहा—समणोवासगा भवंति, अभिगयजीवाजीवा उवलद्धपुण्णपावा आसवसंवरनिज्जरकिरियाअहिगरण-बंधमोक्खकुसला असहेजाओ देवासुरणागजक्खरक्खसकिन्नरकिंपुरिसगरुलंगंधव्व-महोरगाइएहिं देवगणेहिं निगंथाओ पावयणाओ अणइक्कमणिज्जा णिग्गंथे पावयणे णिस्संकिया णिक्कंखिया निव्वितिगिच्छा लद्धट्ठा गहियट्ठा पुच्छियट्ठा अभिगयट्ठा विणिच्छियट्ठा अट्ठिमिजपेम्माणुरागरत्ता अयमाउसो ! णिग्गंथे पावयणे अट्ठे अयं परमट्ठे सेसे अणट्ठे ऊसियफलिहा अवंगुयदुवारा चियत्तंतेउरपरघरदारप्पवेसा चउइसट्ठमुद्धिपुण्णमासिणीसु पडिपुण्णं पोसहं सम्मं अणुपालेमाणा समणे णिग्गंथे फासुएसणिज्जेणं असणपाणखाइमसाइमेणं वत्थपडिग्गहकंबलपायपुंछणेणं ओसह-भेसज्जेणं पडिहारएण य पीडफलगसेज्जासंधारएणं पडिलभेमाणा विहरंति २ ता भत्तं पच्चक्खंति ते बहूइं भत्ताई अणसणाए छेदंति छेदिता आलोइयपडिक्कंता समाहिपत्ता कालमासे कालं किच्चा उक्कोसेणं अच्चुए कप्पे देवत्ताए उववत्तारो भवंति, तहिं तेसिं गई बावीसं सागरोवमाई ठिई आराहया सेसं तहेव २० । से जे इमे गामागर जाव सण्णिवेसेसु मणुया भवंति, तंजहा—अणारंभा अपरिग्गहा धम्मिया जाव कप्पेमाणा सुसीला सुव्वया सुप्पडियाणंदा साहू सव्वाओ पाणाइवायाओ

पडिविरया जाव सव्वाओ परिग्गहाओ पडिविरया सव्वाओ कोहाओ माणाओ  
 मायाओ लोभाओ जाव मिच्छादंसणसल्लाओ पडिविरया सव्वाओ आरंभसमारंभाओ  
 पडिविरया सव्वाओ करणकारावणाओ पडिविरया सव्वाओ पयणपयावणाओ  
 पडिविरया सव्वाओ कुट्टणपिट्ठणतज्जणतालणवहवंधपरिकिलेसाओ पडिविरया सव्वाओ  
 ण्हाणमहणवण्णगविलेवणसद्धरिसरसत्त्वगंधसल्लालंकाराओ पडिविरया जेयावण्णे तह-  
 प्पगारा सावज्जजोगोवहिया कम्मंता परपाणपरियावणकरा कज्जंति तओवि पडि-  
 विरया जावजीवाए से जहाणामए अणगारा भवंति-इरियासमिया भासासमिया  
 जाव इणमेव णिगंथं पावयणं पुरओकाउं विहरंति तेसि णं भगवंताणं एएणं  
 विहारेणं विहरमाणं अत्थेगइयाणं अणंते जाव केवलवरणाणदंसणे समुप्पज्जइ,  
 ते बहूइं वासाइं केवलिपरियाणं पाउणंति २ ता भत्तं पच्चक्खंति २ ता बहूइं  
 भत्ताइं अणसणाए छेदेन्ति २ ता जस्सट्ठाए कीरइ थेरकप्पभावे जिणकप्पभावे०  
 अंतं करंति, जेसिंपि य णं एगइयाणं णो केवलवरणाणदंसणे समुप्पज्जइ ते बहूइं  
 वासाइं छउमत्थपरियाणं पाउणन्ति २ ता आवाहे उप्पण्णे वा अणुप्पण्णे वा भत्तं  
 पच्चक्खंति, ते बहूइं भत्ताइं अणसणाए छेदेन्ति २ ता जस्सट्ठाए कीरइ थेरकप्पभावे  
 जिणकप्पभावे जाव तमट्ठमाराहिता चरिमेहिं ऊसासणीसासेहिं अणंतं अणुत्तरं  
 निव्वाघायं निरावरणं कसिणं पडिपुणं केवलवरणाणदंसणं उप्पाडित्ति, तओ पच्छा  
 सिज्झन्ति जाव अंतं करेन्ति । एगच्चा पुण एगे भयंतारो पुव्वकम्मावसेसेणं  
 कालमासे कालं किच्चा उक्कोसेणं सव्वट्ठसिद्धे महाविमाणे देवत्ताए उववत्तारो भवंति,  
 तहिं तेसिं गइं तेत्तीसं सागरोवमाइं ठिई, आराहगा, सेसं तं चेव २१ । से जे  
 इमे गामागर जाव सण्णिवेसेसु मणुया भवंति, तंजहा-सव्वकामविरया सव्वराग-  
 विरया सव्वसंगातीता सव्वसिणेहाइक्कंता अक्कोहा णिकोहा खीणक्कोहा एवं माणमाया-  
 लोहा अणुपुव्वेणं अट्ठ कम्मपयडीओ खवेत्ता उप्पि लोयग्गपइट्ठणा हव्वंति २२ ॥४०॥  
 अणगारे णं भंते ! भावियप्पा केवलिसमुग्घाएणं समोहणित्ता केवलकप्पं लोयं  
 फुसित्ता णं चिट्ठइ ? हंता चिट्ठइ, से णूणं भंते ! केवलकप्पे लोए तेहिं णिजरा-  
 पोग्गलेहिं फुडे ? हंता फुडे, छउमत्थे णं भंते ! मणुस्से तेसिं णिजरापोग्गलानं किंचि  
 वण्णेणं वण्णं गंधेणं गंधं रसेणं रसं फासेणं फासं जाणइ पासइ ? गोयमा ! णो  
 इणट्ठे समट्ठे, से केणट्ठेणं भंते ! एवं वुच्चइ-छउमत्थे णं मणुस्से तेसिं णिजरापो-  
 ग्गलानं णो किंचि वण्णेणं वण्णं जाव जाणइ पासइ ? गोयमा ! अयं णं जंबुदीवे २  
 सव्वदीवसमुद्धानं सव्वब्भंतरए सव्वखुड्ढाए वट्ठे तेल्लपूयसंठाणसंठिए वट्ठे रहचक्कवाल-  
 संठाणसंठिए वट्ठे पुक्खरकण्णियासंठाणसंठिए वट्ठे पडिपुणचंदसंठाणसंठिए एकं

जोयणसयसहस्सं आयामविक्खंभेणं तिण्णि जोयणसयसहस्साइं सोलससहस्साइं दोण्णि य सत्तावीसे जोयणसए तिण्णि य कोसे अट्ठावीसं च धणुसयं तेरस य अंगुलाइं अदंगुलियं च किंचि विसेसाहिए परिक्खेवेणं पणत्ते, देवे णं महिद्धिए महज्जुइए मह-  
 व्वले महाजसे महासुक्खे महाणुभावे सविलेवणं गंधसमुग्गयं णिण्हइ २ ता तं अवदा-  
 लेइ २ ता जाव इणामेवत्तिकट्ठु केवलकप्पं जंबुदीवं दीवं तिहिं अच्छराणिवाएहिं तिस-  
 तखुत्तो अणुपरियट्ठिता णं हव्वमागच्छेज्जा, से णूणं गोयमा ! से केवलकप्पे जंबुदीवे २  
 तेहिं घाणपोग्गलेहिं फुडे ? हंता फुडे, छउमत्थे णं गोयमा ! मणुस्से तेसिं घाणपोग्ग-  
 लाणं किंचि वण्णेणं वण्णं जाव जाणइ पासइ ? भगवं ! णो इणट्ठे समट्ठे, से तेणट्ठेणं  
 गोयमा ! एवं वुच्चइ-छउमत्थे णं मणुस्से तेसिं णिजरापोग्गलाणं नो किंचि वण्णेणं  
 वण्णं जाव जाणइ पासइ, ए सुहुमा णं ते पोग्गला पणत्ता, समणाउसो ! सव्वलोक्यंपि  
 य णं ते फुसित्ता णं चिट्ठंति । कम्हा णं भंते ! केवली समोहणंति ? कम्हा णं केवली  
 समुग्घायं गच्छंति ?, गोयमा ! केवलीणं चत्तारि कम्मंसा अपलिक्खीणा भवंति,  
 तंजहा-वेयणिज्जं आउयं णामं गुत्तं, सव्ववहुए से वेयणिज्जे कम्मे भवइ, सव्वत्थोवे  
 से आउए कम्मे भवइ, विसमं समं करेइ बंधणेहिं ठिईहि य, विसमसमकरणयाए  
 बंधणेहिं ठिईहि य एवं खलु केवली समोहणंति एवं खलु केवली समुग्घायं गच्छंति ।  
 सव्वेवि णं भंते ! केवली समुग्घायं गच्छंति ? णो इणट्ठे समट्ठे, 'अकित्ता णं  
 समुग्घायं, अणंता केवली जिणा । जरामरणविप्पमुक्का, सिद्धिं वरगइ गया ॥ १ ॥'  
 कइसमए णं भंते ! आउज्जीकरणे पणत्ते ? गोयमा ! असंखेज्जसमइए अंतोमुहुत्तिए  
 पणत्ते । केवलिसमुग्घाए णं भंते ! कइसमइए पणत्ते ? गोयमा ! अट्ठसमइए पणत्ते,  
 तंजहा-पढमे समए दंडं करेइ बिइए समए कवाडं करेइ तईए समए मंथं करेइ  
 चउत्थे समए लोयं पूरेइ पंचमे समए लोयं पडिसाहरइ छट्ठे समए मंथं पडिसाहरइ  
 सत्तमे समए कवाडं पडिसाहरइ अट्ठमे समए दंडं पडिसाहरइ तओ पच्छा सरीरत्थे  
 भवइ । सेणं भंते ! तहा समुग्घायं गए किं मणजोगं जुंजइ ? वयजोगं जुंजइ ?  
 कायजोगं जुंजइ ?, गोयमा ! णो मणजोगं जुंजइ णो वयजोगं जुंजइ कायजोगं जुंजइ,  
 कायजोगं जुंजमाणे किं ओरालियसरीरकायजोगं जुंजइ ? ओरालियमिस्ससरीरकायजोगं  
 जुंजइ ? वेउव्वियसरीरकायजोगं जुंजइ ? वेउव्वियमिस्ससरीरकायजोगं जुंजइ ?  
 आहारगसरीरकायजोगं जुंजइ ? आहारगमिस्ससरीरकायजोगं जुंजइ ? कम्मासरीर-  
 कायजोगं जुंजइ ?, गोयमा ! ओरालियसरीरकायजोगं जुंजइ, ओरालियमिस्ससरीर-  
 कायजोगंपि जुंजइ, णो वेउव्वियसरीरकायजोगं जुंजइ णो वेउव्वियमिस्स-  
 सरीरकायजोगं जुंजइ णो आहारगसरीरकायजोगं जुंजइ णो आहारगमिस्ससरीर-


कायजोगं जुंजइ कम्मासरीरकायजोगंपि जुंजइ पढमट्टमेसु समएसु ओरालियसरीर-  
 कायजोगं जुंजइ विइयइल्लट्टसत्तमेसु समएसु ओरालियमित्ससरीरकायजोगं जुंजइ  
 तइयचउत्थपंचमेहिं कम्मासरीरकायजोगं जुंजइ । से णं भंते ! तहा ससुग्घायगए  
 सिज्झइ वुज्झइ मुच्चइ परिनिव्वाइ सव्वदुक्खाणमंतं करेइ ? णो इणट्ठे समट्ठे,  
 से णं तओ पडिनियत्तइ तओ पडिनियत्तिता इहमागच्छइ २ ता तओ पच्छा  
 मणजोगंपि जुंजइ वयजोगंपि जुंजइ कायजोगंपि जुंजइ, मणजोगं जुंजमाणे  
 किं सच्चमणजोगं जुंजइ भोसमणजोगं जुंजइ सच्चाभोसमणजोगं जुंजइ असच्चाभो-  
 समणजोगं जुंजइ ? गोयमा ! सच्चमणजोगं जुंजइ णो भोसमणजोगं जुंजइ णो सच्चा-  
 भोसमणजोगं जुंजइ असच्चाभोसमणजोगंपि जुंजइ, वयजोगं जुंजमाणे किं सच्चवइ-  
 जोगं जुंजइ भोसवइजोगं जुंजइ [किं] सच्चाभोसवइजोगं जुंजइ असच्चाभोसवइजोगं  
 जुंजइ ? गोयमा ! सच्चवइजोगं जुंजइ णो भोसवइजोगं जुंजइ णो सच्चाभोसवइजोगं  
 जुंजइ असच्चाभोसवइजोगंपि जुंजइ, कायजोगं जुंजमाणे आगच्छेज वा चिट्ठेज वा  
 णिसीएज वा तुयट्ठेज वा उल्लंघेज वा पल्लंघेज वा उक्खेवणं वा अवक्खेवणं वा  
 तिरियक्खेवणं वा करेज्जा पाडिहारियं वा पीढफल्लगसेजासंधारणं पच्चप्पिणेज्जा  
 ॥ ४१ ॥ से णं भंते ! तहा सजोगी सिज्झइ जाव अंतं करेइ ? णो इणट्ठे समट्ठे, सेणं  
 पुव्वामेव सण्णस्स पंचिदियस्स पज्जत्तगस्स जहण्णजोगस्स हेट्ठा असंखेज्जगुणपरिहीणं  
 पढमं मणजोगं निरुंभइ, तयाणंतरे च णं बिदियस्स पज्जत्तगस्स जहण्णजोगस्स हेट्ठा  
 असंखेज्जगुणपरिहीणं बिइयं वइजोगं निरुंभइ, तयाणंतरे च णं सुहुमस्स पणगजीवस्स  
 अपज्जत्तगस्स जहण्णजोगस्स हेट्ठा असंखेज्जगुणपरिहीणं तइयं कायजोगं णिरुंभइ, से णं  
 एएणं उवाएणं पढमं मणजोगं णिरुंभइ २ ता वयजोगं णिरुंभइ २ ता कायजोगं  
 णिरुंभइ २ ता जोगनिरोहं करेइ २ ता अजोगत्तं पाउणइ २ ता ईसिंहस्सपंच-  
 क्खरउच्चारणद्वाए असंखेज्जसमइयं अंतोमुहुत्तियं सेलेसिं पडिवज्जइ, पुव्वरइयगुण-  
 सेदीयं च णं कम्मं तीसे सेलेसिमद्वाए असंखेज्जाहिं गुणसेदीहिं अणंतं कम्मंसे खवेइ  
 वेयणिजाउयणामगोए, इच्चेए चत्तारि कम्मंसे जुगवं खवेइ २ ता ओरालियतेया-  
 कम्माइं सव्वाहिं विप्पजहणाहिं विप्पजहइ २ ता उज्जुसेदीपडिवज्जे अफुसमाणगई  
 उड्ढं एकसमएणं अविग्गहेणं गंता सागारोवउत्ते सिज्झइ । ते णं तत्थ सिद्धा हवंति  
 सादीया अपज्जवसिया असरीरा जीवघणा दंसणनाणोवउत्ता निट्ठियट्ठा निरेयणा  
 नीरया णिम्मला वितिमिरा विसुद्धा सासयमणागयद्धं कालं चिट्ठंति । से केणट्ठेणं  
 भंते ! एवं वुच्चइ-ते णं तत्थ सिद्धा भवंति सादीया अपज्जवसिया जाव चिट्ठंति ?  
 गोयमा ! से जहाणामए बीयाणं अग्गिदट्ठाणं पुणरवि अंकुरप्पत्ती ण भवइ, एवामेव



सिद्धाणं कम्मवीए दद्धे पुणरवि जम्मुप्पत्ती न भवइ, से तेणट्ठेणं गोयमा ! एवं वुच्चइ-  
 ते णं तत्थ सिद्धा भवंति सादीया अपज्जवसिया जाव चिट्ठंति । जीवा णं भंते !  
 सिज्झमाणा कयरंमि संघयणे सिज्झंति ? गोयमा ! वइरोसभणारायसंघयणे सिज्झंति,  
 जीवा णं भंते ! सिज्झमाणा कयरंमि संठाणे सिज्झंति ? गोयमा ! छण्हं संठाणाणं  
 अण्णयरे संठाणे सिज्झंति, जीवा णं भंते ! सिज्झमाणा कयरम्मि उच्चते सिज्झंति ?  
 गोयमा ! जहण्णेणं सत्तरयणीओ उक्कोसेणं पंचधणुस्सइए सिज्झंति, जीवा णं भंते !  
 सिज्झमाणा कयरम्मि आउए सिज्झंति ? गोयमा ! जहण्णेणं साइरेगट्ठवासाउए  
 उक्कोसेणं पुव्वकोडियाउए सिज्झंति । अत्थि णं भंते ! इमीसे रयणप्पहाए पुढवीए  
 अहे सिद्धा परिवसंति ? णो इणट्ठे समट्ठे, एवं जाव अहे सत्तमाए, अत्थि णं भंते !  
 सोहम्मस्स कप्पस्स अहे सिद्धा परिवसंति ? णो इणट्ठे समट्ठे, एवं सव्वेसिं पुच्छा,  
 ईसाणस्स सणंकुमारस्स जाव अच्चुयस्स गेविज्जविमाणानं अणुत्तरविमाणानं, अत्थि णं  
 भंते ! ईसीपब्भाराए पुढवीए अहे सिद्धा परिवसंति ? णो इणट्ठे समट्ठे, से कहिं  
 खाइ णं भंते ! सिद्धा परिवसंति ? गोयमा ! इमीसे रयणप्पहाए पुढवीए बहुसमर-  
 मणिजाओ भूमिभागाओ उट्ठं चंदिमसूरियग्गहगणणक्खत्तताराभवणाओ बहूइं  
 जोयणसयाइं बहूइं जोयणसहस्साइं बहूइं जोयणसयसहस्साइं बहूओ जोयणकोडीओ  
 बहूओ जोयणकोडाकोडीओ उट्ठतरं उप्पइत्ता सोहम्मीसाणसणंकुमारमाहिंदवंभलंतग-  
 महासुक्कसहस्सारआणयपाणयआरणच्चुय तिण्णि य अट्टारे गेविज्जविमाणावासए  
 वीइवइत्ता विजयवेजयंतजयंतअपराजियसव्वट्ठसिद्धस्स य महाविमाणस्स सव्वउवरि-  
 न्नाओ थूमियग्गाओ दुवालसजोयणाइं अवाहाए एत्थ णं ईसीपब्भारा णाम पुढवी  
 पण्णत्ता पणयालीसं जोयणसयसहस्साइं आयामविक्खंभेणं एगा जोयणकोडी बाया-  
 लीसं सयसहस्साइं तीसं च सहस्साइं दोण्णि य अउणापणे जोयणसए किंचि  
 विसेसाहिए परिरएणं, ईसिपब्भाराए णं पुढवीए बहुमज्झदेसभाए अट्ठजोयणिए  
 खेत्ते अट्ठजोयणाइं बाहल्लेणं, तयाऽणंतरे च णं मायाए २ परिहायमाणी २ सव्वेसु  
 चरिमपेरंतेसु मच्छियपत्ताओ तणुयतरा अंगुलस्स असंखेज्जइभाणं बाहल्लेणं पण्णत्ता ।  
 ईसीपब्भाराए णं पुढवीए दुवालस णामधेजा पण्णत्ता, तंजहा-ईसी इ वा ईसीपब्भारा  
 इ वा तणू इ वा तणुतणू इ वा सिद्धी इ वा सिद्धालए इ वा मुत्ती इ वा मुत्तालए  
 इ वा लोयग्गे इ वा लोयग्गथूमिया इ वा लोयग्गपडिबुज्झणा इ वा सव्वपाणभूय-  
 जीवसत्तसुहावहा इ वा । ईसीपब्भारा णं पुढवी सेया संखतलविमलसोल्लियमुणालद-  
 गरयतुसारगोक्खीरहारवण्णा उत्ताणयल्लत्तसंठाणसंठिया सव्वज्जुणसुवण्णयमई अच्छा  
 सण्हा लण्हा घट्ठा मट्ठा णीरया णिम्मला णिप्पंका णिक्कंठच्छाया समरीचिया सुप्पभा

पासादीया दरिसणिजा अभिरूवा पडिरूवा, ईसीपव्वमाराए णं पुढवीए सीयाए जोयणंमि लोगंते, तस्स जोयणस्स जे से उवरिळे गाउए तस्स णं गाउयस्स जे से उवरिळे छव्भागे तत्थ णं सिद्धा भगवंतो सादीया अपजवसिया अणेगजाइजारामरण-जोणिवेयणसंसारकलंकलीभावपुणवभवगव्वमासवसहीपवंचसमइकंता सासयमणागय-मद्धं चिट्ठंति ॥ ४२ ॥ गाहा-कहिं पडिहया सिद्धा ?, कहिं सिद्धा पडिट्ठिया ? । कहिं बोंदिं चइत्ता णं, कत्थ गंतूण सिज्झइ ? ॥ १ ॥ अलोगे पडिहया सिद्धा, लोयग्गे य पडिट्ठिया । इह बोंदिं चइत्ता णं, तत्थ गंतूण सिज्झइ ॥ २ ॥ जं संठाणं तु इहं भवं चयं तस्स चरिमसमयंमि । आसी य पएसवणं तं संठाणं तहिं तस्स ॥ ३ ॥ दीहं वा हस्सं वा, जं चरिमभवे हवेज्ज संठाणं । ततो तिभागहीणं, सिद्धाणोगाहणा भणिया ॥ ४ ॥ तिण्णि सया तेत्तीसा धणुत्तिभागो य होइ वोद्धव्वा । एसा खलु सिद्धाणं, उक्कोसोगाहणा भणिया ॥ ५ ॥ चत्तारि य रयणीओ रयणित्ति-भागूणिया य वोद्धव्वा । एसा खलु सिद्धाणं मज्झिमओगाहणा भणिया ॥ ६ ॥ एका य होइ रयणी साहीया अंगुलाई अट्ठ भवे । एसा खलु सिद्धाणं जहण्णओगा-हणा भणिया ॥ ७ ॥ ओगाहणाए सिद्धा भवत्तिभागेण होइ परिहीणा । संठाण-मणित्थंथं जरामरणविप्पमुक्काणं ॥ ८ ॥ जत्थ य एगो सिद्धो तत्थ अणंता भव-क्खयविमुक्का । अण्णोण्णसमोगाढा पुट्ठा सव्वे य लोगंते ॥ ९ ॥ फुसइ अणंते सिद्धे सव्वपएसेहिं णियमसो सिद्धा । तेवि असंखेज्जगुणा देसपएसेहिं जे पुट्ठा ॥ १० ॥ असरीरा जीवघणा उवउत्ता दंसणे य णाणे य । सागारमणागारं लक्खणमेयं तु सिद्धाणं ॥ ११ ॥ केवलणानुवउत्ता जाणंति सव्वभावगुणभावे । पासंति सव्वओ खलु केवलदिट्ठीअणंताहिं ॥ १२ ॥ णवि अत्थि माणुसाणं तं सोक्खं णविय सव्वदेवाणं । जं सिद्धाणं सोक्खं अवावाहं उवगयाणं ॥ १३ ॥ जं देवाणं सोक्खं सव्वद्धापिंडियं अणंतगुणं । ण य पावइ मुत्तिसुहं णंताहिं वग्गवग्गूहिं ॥ १४ ॥ सिद्धस्स सुहो रासी सव्वद्धापिंडिओ जइ हवेज्जा । सोऽणंतवग्गभइओ सव्वगासे ण माएज्जा ॥ १५ ॥ जह णाम कोइ मिच्छो नगरगुणे बहुविहे वियाणंतो । न चएइ परिकहेउं उवमाए तहिं असंतीए ॥ १६ ॥ इय सिद्धाणं सोक्खं अणोवमं णत्थि तस्स ओवम्मं । किंचि विसेसेणेतो ओवम्मसिणं सुणह वोच्छं ॥ १७ ॥ जह सव्वकामगुणियं पुरिसो भोत्तूण भोयणं कोइ । तण्हाछुहाविमुक्को अच्छेज्ज जहा अभियतित्तो ॥ १८ ॥ इय सव्वकालतित्ता अतुलं निव्वाणमुवगया सिद्धा । सासय-मवावाहं चिट्ठंति सुही सुहं पत्ता ॥ १९ ॥ सिद्धत्ति य बुद्धत्ति य पारगयत्ति य परंपरगयत्ति । उम्मक्कम्मकवया अजरा अमरा असंगा य ॥ २० ॥ णिच्छिण्ण-

सव्वदुक्खा जाइजरामरणबंधणविमुक्का । अव्वावाहं सुक्खं अण्होति सासयं सिद्धा  
 ॥ २१ ॥ अतुलसुहसागरगया अव्वावाहं अणोवमं पत्ता । सव्वसणागयमद्धं चिट्ठंति  
 सुही सुहं पत्ता ॥ २२ ॥ ओववाइयउवंगं समत्तं ॥



नमोऽत्यु णं समणस्स भगवओ णायपुत्तमहावीरस्स

# सुत्तागमे

तत्थ णं

## रायपसेणइयं

तेणं कालेणं तेणं समएणं आमलकप्पा नामं नयरी होत्था, रिद्धत्थिमियसमिद्धा जाव पासादीया दरिसणिज्जा अभिह्वा पडिह्वा ॥ १ ॥ तीसे णं आमलकप्पाए नयरीए वहिया उत्तरपुरत्थिमे दिसीभाए अंवसालवणे नामं उज्जाणे होत्था, रम्मे जाव पडिह्वे ॥ २ ॥ असोयवरपायवपुढविसिलावट्टयवत्तव्वया उववाइयगमेणं नेया ॥ ३ ॥ सेओ राया धारिणी देवी, सामी समोसढे, परिसा निग्गया जाव राया पज्जुवासइ ॥ ४ ॥ तेणं कालेणं तेणं समएणं सूरियाभे देवे सोहम्मे कप्पे सूरियाभे विमाणे सभाए सुहम्माए सूरियाभंसि सिंहासणंसि चउहिं सामाणियसाहस्सीहिं चउहिं अग्गमहिसीहिं सपरिवाराहिं तिहिं परिसाहिं सत्तहिं अणिएहिं सत्तहिं अणियाहिंवईहिं सोलसहिं आयरक्खदेवसाहस्सीहिं अच्चेहिं बहूहिं सूरियाभविमाणवासीहिं वेमाणिएहिं देवेहिं देवीहि य सद्धिं संपरिवुडे महयाऽऽहयनट्टगीयवाइयतंतीतलताल-तुडियघणमुइंगपडुप्पवाइयरवेणं दिव्वाइं भोगभोगाइं भुंजमाणे विहरइ, इमं च णं केवलकप्पं जंबुदीवं दीवं विउलेणं ओहिणा आभोएमाणे २ पासइ । तत्थ समणं भगवं महावीरं जंबुदीवे दीवे भारहे वासे आमलकप्पाए नयरीए वहिया अंवसालवणे उज्जाणे अहापडिह्वं उग्गहं उग्गिण्हिता संजमेणं तवसा अप्पाणं भावेमाणं पासइ पासित्ता हट्टुतट्टचित्तमाणंदिए पीइमणे परमसोमणस्सिए हरिसवसविसप्पमाणहियए वियसियवरकमलणयणे पयलियवरकडगतुडियकेउरमउडकुंडलहारविरायंतरइयवच्छे पालंबपलंबमाणघोलंतभूसणधरे ससंभमं तुरियचवलं सुरवरे सीहासणाओ अब्भुट्ठेइ २ ता पायपीढाओ पच्चोरुहइ २ ता पाउयाओ ओमुयइ २ ता एगसाडियं उत्तरासंगं करेइ २ ता तित्थयराभिमुहे सत्तट्टपयाइं अणुगच्छइ २ ता वामं जाणुं अंचेइ २ ता दाहिणं जाणुं धरणितलंसि णिहट्ठु तिक्खुत्तो मुद्धाणं धरणितलंसि णिवेसेइ णिवेसित्ता ईसिं पच्चुन्नमइ २ ता करयलपरिग्गहियं दसणहं सिरसावत्तं मत्थए अंजलिं कट्ठु एवं वयासी-णमोऽत्यु णं अरिहंताणं भगवंताणं आइगराणं तित्थगराणं सयंसंबुद्धाणं पुरिसुत्तमाणं पुरिससीहाणं पुरिसवरपुंडरीयाणं पुरिसवरगंधहत्थीणं

लोगुत्तमाणं लोगनाहाणं लोगहियाणं लोगपईवाणं लोगपज्जोयगराणं अभयदयाणं चक्खुदयाणं मग्गदयाणं जीवदयाणं सरणदयाणं बोहिदयाणं धम्मदयाणं धम्मदेस-  
याणं धम्मनायगाणं धम्मसारहीणं धम्मवरचाउरंतचक्कवट्ठीणं अप्पडिहयवरत्ताणंदसन-  
धराणं वियट्ठलउमाणं जिणाणं जावयाणं तिण्णाणं तारयाणं बुद्धाणं बोहयाणं सुत्ताणं  
मोयगाणं सव्वन्नूणं सव्वदरिसीणं सिवमयलमस्यमणंतमक्खयमव्वावाहमपुणरावत्तियं  
सिद्धिगइनामधेयं ठाणं संपत्ताणं, नमोऽत्थु णं समणस्स भगवओ महावीरस्स जाव  
संपाविउकामस्स, वंदामि णं भगवन्तं तत्थगयं इह गए पासउ मे भगवं तत्थ गए  
इहगयंतिकइ वंदइ णमंसइ वंदित्ता णमंसित्ता सीहासणवरगए पुव्वाभिमुहं सण्णि-  
सण्णे ॥ ५ ॥ तए णं तस्स सूरियाभस्स इमे एयारूवे अब्भत्थिए चित्तिए पत्थिए  
मणोगए संकप्पे समुप्पज्जित्था-एवं खलु समणे भगवं महावीरे जंबुद्वीवे दीवे  
भारहे वासे आमलकप्पाणयरीए वहिया अंवसालवणे उज्जाणे अहापडिह्वं उग्गहं  
उग्गिण्हित्ता संजमेणं तवसा अप्पाणं भावेमाणे विहरइ तं महाफलं खलु तहारूवाणं  
भगवंताणं णामगोयस्सवि सवणयाए किमंग पुण अभिगमणवंदणणमंसणपडिपुच्छण-  
पज्जुवासणयाए ?, एगस्सवि आयरियस्स धम्मियस्स सुवयणस्स सवणयाए ?, किमंग  
पुण विउलस्स अट्ठस्स गहणयाए ?, तं गच्छामि णं समणं भगवं महावीरं वंदामि  
णमंसामि सक्कारेमि सम्माणेमि कळाणं मंगलं देवयं चेइयं पज्जुवासामि, एयं मे पेच्चा  
हियाए सुहाए खमाए णिस्सेयसाए आणुगामियत्ताए भविस्सइत्तिकइ एवं संपेहेइ एवं  
संपेहिता आभिओगे देवे सहावेइ २ त्ता एवं वयासी-एवं खलु देवाणुप्पिया !  
समणे भगवं महावीरे जंबुद्वीवे दीवे भारहे वासे आमलकप्पाए नयरीए वहिया  
अंवसालवणे उज्जाणे अहापडिह्वं उग्गहं उग्गिण्हित्ता संजमेणं तवसा अप्पाणं  
भावेमाणे विहरइ तं गच्छह णं तुमे देवाणुप्पिया ! जंबुद्वीवं दीवं भारहं वासं  
आमलकपं णयरिं अंवसालवणं उज्जाणं समणं भगवं महावीरं तिक्खुत्तो आयाहिण-  
पयाहिणं करेह करेत्ता वंदह णमंसह वंदित्ता णमंसित्ता साइं साइं नामगोयाइं साहेह  
साहिता समणस्स भगवओ महावीरस्स सव्वओ समंता जोयणपरिमंडलं जं किंचि  
तणं वा पत्तं वा कट्ठं वा सक्करं वा असुइं अचोक्खं वा पूइअं दुब्भिगंधं तं सव्वं  
आहुणिय आहुणिय एगंते एडेह एडेत्ता णच्चोदगं णाइमट्ठियं पविरलपप्फुसियं रय-  
रेणुविणासणं दिव्वं सुरभिगंधोदयवासं वासह वासित्ता णिहयरयं णट्ठरयं भट्ठरयं  
उवसंतरयं पसंतरयं करेह करित्ता जलथल्लयभासुरप्पभूयस्स बिंदट्ठाइस्स दसद्धवणस्स  
कुसुमस्स जाणुस्सेहपमाणमित्तं ओहिं वासं वासह वासित्ता कालागुह्यवरकुंदुस्कुत्तुस्स-  
धूवमघमघंतगंधुद्धयाभिरामं सुगंधवरगंधियं गंधवट्ठिभूयं दिव्वं सुरवराभिगमणजोगं

करेह कारवेह करित्ता य कारवेत्ता य खिप्पामेव सम एयमाणत्तियं पच्चप्पिणह  
॥ ६-७ ॥ तए णं ते आभिओगिया देवा सूरियाभेणं देवेणं एवं वुत्ता समाणा हट्ठ  
जाव हियया करयलपरिग्गहिंयं दसनहं सिरसावत्तं मत्थए अंजलिं कट्ठु एवं देवो  
तहत्ति आणाए विणएणं वयणं पड्डिमुणंति एवं देवो तहत्ति आणाए विणएणं वयणं  
पड्डिमुणत्ता उत्तरपुरच्छिमं दिसिभागं अवक्कमंति उत्तरपुरच्छिमं दिसिभागं अवक्कमित्ता  
वेउव्वियसमुग्घाएणं समोहणंति २ ता संखेज्जाइं जोयणाइं दंडं निस्सरन्ति, तंजहा-  
रयणाणं वयरणं वेरुलियाणं लोहियक्खवाणं मसारगल्लाणं हंसगव्भाणं पुलगाणं  
सोगंधियाणं जोइरसाणं अंजणाणं अंजणपुलगाणं रयणाणं जायस्वाणं अंकाणं  
फलिहाणं रिट्ठाणं अहावायरे पुग्गले परिसाडंति २ ता अहासुहुमे पुग्गले परियायंति २ ता  
दोच्चंपि वेउव्वियसमुग्घाएणं समोहणंति २ ता उत्तरवेउव्वियाइं स्वाइं विउव्वंति २ ता  
ताए उक्किट्ठाए पसत्थाए तुरियाए चवलाए चंडाए जयणाए सिग्घाए उड्डुयाए  
दिव्वाए देवगईए तिरियमसंखेज्जाणं दीवसमुद्दाणं मज्झमज्झेणं वीइवयमाणा २  
जेणेव जंबुदीवे दीवे जेणेव भारहे वासे जेणेव आमलकप्पा णयरी जेणेव  
अंबसालवणे उज्जाणे जेणेव समणे भगवं महावीरे तेणेव उवागच्छंति तेणेव  
उवागच्छित्ता समणं भगवं महावीरं तिव्खुत्तो आयाहिणपयाहिणं करंति २ ता  
वंदंति नमंसंति वंदित्ता नमंसित्ता एवं वयासी-अम्हे णं भंते ! सूरियाभस्स देवस्स  
आभिओगा देवा देवाणुप्पियाणं वंदामो णमंसामो सक्कारेमो सम्माणेमो कल्लाणं  
मंगलं देवयं चेइयं पज्जुवासामो ॥ ८ ॥ देवाइ समणे भगवं महावीरे ते देवे एवं  
वयासी-पोराणमेयं देवा ! जीयमेयं देवा ! किच्चमेयं देवा ! करणज्जमेयं देवा !  
आइच्चमेयं देवा ! अब्भणुणायमेयं देवा ! जणं भवणवइवाणमंतरजोइसियवेमाणिया  
देवा अरहंते भगवंते वंदंति नमंसंति वंदित्ता नमंसित्ता तओ साइं साइं णामगोयाइं  
साधंति तं पोराणमेयं देवा ! जाव अब्भणुणायमेयं देवा ! ॥ ९ ॥ तए णं ते  
आभिओगिया देवा समणेणं भगवया महावीरेणं एवं वुत्ता समाणा हट्ठ जाव हियया  
समणं भगवं महावीरं वंदंति णमंसंति वंदित्ता णमंसित्ता उत्तरपुरत्थिमं दिसीभागं  
अवक्कमंति अवक्कमित्ता वेउव्वियसमुग्घाएणं समोहणंति २ ता संखेज्जाइं जोयणाइं  
दंडं निस्सरंति, तंजहा-रयणाणं जाव रिट्ठाणं अहावायरे पुग्गले परिसाडंति २ ता  
दोच्चंपि वेउव्वियसमुग्घाएणं समोहणंति २ ता संवट्टयवाए विउव्वंति, से जहा-  
नामए भइयदारए सिया तरुणे बलवं जुगवं अप्पायंके [थिरसंघयणे] थिरग्गहत्थे  
दट्ठपाणिपायपिड्ढंतरोरु[संघाय]परिणए घणनिचियवलियवट्ठेखे चम्ममेट्ठगदुघण-  
मुट्ठियसमाहयगत्ते उरस्सबलसमन्नागए तलजमलजुयल[फलिहनिभ]बाहू लंघण-

पवणजइणपमद्दणसमत्थे छेए दक्खे पट्ठे कुसले मेहावी णिउणसिप्पोवगए एगं महं सलागाहत्थगं वा दंडसंपुच्छणिं वा वेणुसलाइयं वा गहाय रायंगणं वा रायंतेउरं वा देवकुलं वा सभं वा पवं वा आरामं वा उज्जाणं वा अतुरियमचवलमसंभंते निरंतरं सुनिउणं सव्वओ समंता संपमज्जेजा, एवामेव तेऽवि सूरियाभस्स देवस्स आभिओगिया देवा संवट्ठयवाए विउव्वंति २ ता समणस्स भगवओ महावीरस्स सव्वओ समंता जोयणपरिमण्डलं जं किंचि तणं वा पत्तं वा तहेव सव्वं आहुणिय २ एगंते एडेंति २ ता खिप्पामेव उवसमंति २ ता दोच्चंपि वेउव्वियसमुग्घाएणं समोहणंति २ ता अब्भवद्दलए विउव्वंति २ ता से जहाणामए भइगदारए सिया तरुणे जाव सिप्पोवगए एगं महं दगवारगं वा दगकुंभगं वा दगथालगं वा दगकलसगं वा गहाय आरामं वा जाव पवं वा अतुरिय जाव सव्वओ समंता आवरिसेज्जा, एवामेव तेऽवि सूरियाभस्स देवस्स आभिओगिया देवा अब्भवद्दलए विउव्वंति २ ता खिप्पामेव पतणतणायन्ति २ ता खिप्पामेव विज्जुयायंति २ ता समणस्स भगवओ महावीरस्स सव्वओ समंता जोयणपरिमंडलं णच्चोदगं णाइमट्ठियं तं पविरलपप्फुसियं रयरेणुविणासणं दिव्वं सुरभिगंधोदगं वासं वासंति वासेत्ता णिहयरयं णट्ठरयं भट्ठरयं उवसंतरयं पसंतरयं करेंति २ ता खिप्पामेव उवसामंति २ ता तच्चंपि वेउव्वियसमुग्घाएणं समोहणंति २ ता पुप्फवद्दलए विउव्वंति, से जहाणामए मालागारदारए सिया तरुणे जाव सिप्पोवगए एगं महं पुप्फळजियं वा पुप्फपडलं वा पुप्फचंगेरियं वा गहाय रायंगणं वा जाव सव्वओ समंता कयग्गहगहियकरयलपब्भट्ठविप्पमुक्केणं दसद्धव्वेणं कुसुमेणं मुक्कपुप्फपुंजोवयारकलियं करेज्जा, एवामेव ते सूरियाभस्स देवस्स आभिओगिया देवा पुप्फवद्दलए विउव्वंति २ ता खिप्पामेव पतणतणायन्ति जाव जोयणपरिमण्डलं जलथलयभासुरप्पभूयस्स बिटट्ठाइस्स दसद्धव्वन्नकुसुमस्स जाणुस्सेहपमाणमेत्ति ओहिवासं वासंति वासित्ता कालागुरुपवरकुंदुरुक्कतुरुक्कधूवमघमवतंगंधुदुयाभिरामं सुगंधवरगंधियं गंधवट्ठिभूयं दिव्वं सुरवराभिगमणजोगं करंति कारयंति करेत्ता य कारवेत्ता य खिप्पामेव उवसामंति २ ता जेणेव समणे भगवं महावीरे तेणेव उवागच्छंति तेणेव उवागच्छित्ता समणं भगवं महावीरं तिकखुत्तो जाव वंदित्ता नमंसित्ता समणस्स भगवओ महावीरस्स अंतियाओ अंबसालवणाओ उज्जाणाओ पडिनिक्खमंति पडिनिक्खमिन्ता ताए उक्किट्ठाए जाव वीइवयमाणा २ जेणेव सोहम्मे कप्पे जेणेव सूरियाभे विमाणे जेणेव सभा सुहम्मा जेणेव सूरियाभे देवे तेणेव उवागच्छंति २ ता सूरियाभं देवं करयलपरिग्गहियं सिरसावत्तं मत्थए अंजलिं कट्ठु जएणं विजएणं वद्धावेंति २ ता तमाणत्तियं पच्चप्पिणंति ॥ १० ॥

तए णं से सूरियाभे देवे तेसिं आभिओगियाणं देवाणं अंतिए एयमद्धं सोच्चा  
निसम्म हट्ठतुट्ठ जाव हियए पायत्ताणियाहिवई देवं सदावेइ सदावेत्ता एवं वयासी-  
खिप्पामेव भो देवाणुप्पिया ! सूरियाभे विमाणे सभाए सुहम्माए मेघोघरसियगंभीर-  
महुरसदं जोयणपरिमंडलं सुसरघंटं तिक्खुत्तो उल्लालेमाणे २ महया २ सहेणं  
उग्घोसेमाणे २ एवं वयाहि-आणवेइ णं भो सूरियाभे देवे गच्छइ णं भो सूरियाभे  
देवे जंबुद्वीवे कीवे भारहे वासे आमलकप्पाए नयरीए अंबसालवणे उज्जाणे समणं  
भगवं महावीरं अभिवंदए, तुब्भेऽवि णं भो देवाणुप्पिया ! सत्विद्धीए जाव  
णाइयरवेणं णियगपरिवालसद्धिं संपरिवुडा साइं २ जाणविमाणाइं दुरुडा समाणा  
अकालपरिहीणं चेव सूरियाभस्स देवस्स अंतियं पाउब्भवह ॥ ११ ॥ तए णं से  
पायत्ताणियाहिवई देवे सूरियाभेणं देवेणं एवं बुत्ते समाणे हट्ठतुट्ठ जाव हियए एवं  
देवा ! तहत्ति आणाए विणएणं वयणं पडिखुणेइ २ ता जेणेव सूरियाभे विमाणे  
जेणेव सभा सुहम्मा जेणेव मेघोघरसियगंभीरमहुरसदा जोयणपरिमंडला सुस्सरा  
घंटा तेणेव उवागच्छइ २ ता तं मेघोघरसियगंभीरमहुरसदं जोयणपरिमंडलं सुसरं  
घंटं तिखुत्तो उल्लालेइ । तए णं तीसे मेघोघरसियगंभीरमहुरसदाए जोयणपरिमंडलाए  
सुसराए घंटाए तिक्खुत्तो उल्लालियाए समाणीए से सूरियाभे विमाणे पासायविमाण-  
णिक्खुडावडियसद्धंघंटापडिमुयासयसहस्ससंकुले जाए यावि होत्था । तए णं तेसिं  
सूरियाभविमाणवासीणं बहूणं वेमाणियाणं देवाण य देवीण य एगंतरइपसत्तनिच्चप्प-  
मतविसयसुहमुच्छियाणं सुसरघंटारवविउलवोलतुरियचवलपडिवोहणे कए समाणे  
घोसणकोउहलदिन्नकन्नएगगचित्तउवउत्तमाणसाणं से पायत्ताणीयाहिवई देवे तंसि  
घंटारवंसि णिसंतपसंतंसि महया महया सहेणं उग्घोसेमाणे उग्घोसेमाणे एवं  
वयासी-हंत सुणंतु भवंतो सूरियाभविमाणवासिणो बहवे वेमाणिया देवा य देवीओ  
य सूरियाभविमाणवइणो वयणं हियसुहत्थं आणवेइ णं भो ! सूरियाभे देवे गच्छइ  
णं भो सूरियाभे देवे जंबुद्वीवं २ भारहं वासं आमलकप्पं नयरीं अंबसालवणं  
उज्जाणं समणं भगवं महावीरं अभिवंदए, तं तुब्भेऽवि णं देवाणुप्पिया ! सत्विद्धीए  
अकालपरिहीणा चेव सूरियाभस्स देवस्स अंतियं पाउब्भवह ॥ १२ ॥ तए णं ते  
सूरियाभविमाणवासिणो बहवे वेमाणिया देवा देवीओ य पायत्ताणियाहिवइस्स देवस्स  
अंतिए एयमद्धं सोच्चा णिसम्म हट्ठतुट्ठ जाव हियया अप्पेगइया वंदणवत्तियाए अप्पे-  
गइया नमंसणवत्तियाए अप्पेगइया सक्कारवत्तियाए एवं संमाणवत्तियाए कोउहल-  
वत्तियाए अप्पे० असुयाइं सुणिस्सामो सुयाइं अट्ठाइं हेऊइं पसिणाइं कारणाइं वाग-  
रणाइं पुच्छिस्सामो, अप्पेगइया सूरियाभस्स देवस्स वयणमणुयत्तमाणा अप्पेगइया



अन्नमन्नमणुयत्तमाणा अप्पेगइया जिणभत्तिराणेणं अप्पेगइया धम्मोत्ति अप्पेगइया  
जीयमेयंतिकट्ठु सव्विद्धीए जाव अकालपरिहीणा चेव सूरियाभस्स देवस्स अंतियं  
पाउब्भवंति ॥ १३ ॥ तए णं से सूरियाभे देवे ते सूरियाभविमाणवासिणो बहवे  
वेमाणिया देवा य देवीओ य अकालपरिहीणा चेव अंतियं पाउब्भवमाणे पासइ  
पासित्ता हट्ठुत्तु जाव हियए आभिओगियं देवं सद्दावेइ २ ता एवं वयासी-  
खिप्पामेव भो देवाणुप्पिया ! अणेगखंभसयसंनिविट्ठं लीलद्वियसालभंजियाणं  
ईहामियउसभतुरगनरमगरविहगवालगकिंनररुसरमचमरकुंजरवणलयपउमलयमत्ति-  
चित्तं खंभुगयवरवइरवेइयापरिगयाभिरामं विजाहरजमलजुयलजंतजुत्तपिव  
अच्चीसहस्समालिणीयं रुवगसहस्सकलियं भिसमाणं भिब्भिसमाणं चक्खुल्लोयणलेसं  
सुहफासं सस्सिरीयरुवं घंटावलिलियमहुरमणहरसरं सुहं कंतं दरिसणिज्जं णिउणो-  
चियमिसिमिसित्तमणिरयणघंटियाजालपरिक्खित्तं जोयणसयसहस्सवित्थिण्णं दिव्वं  
गमणसज्जं सिग्घगमणं णाम दिव्वं जाणविमाणं विउव्वाहि विउव्वित्ता खिप्पामेव  
एयमाणत्तियं पच्चप्पिणाहि ॥ १४ ॥ तए णं से आभिओगिए देवे सूरियाभेणं देवेणं  
एवं वुत्ते समाणे हट्ठ जाव हियए करयलपरिग्गहियं जाव पडिसुणेइ पडि-  
सुणेत्ता उत्तरपुरच्छिमं दिसीभागं अवक्कमइ अवक्कमिता वेउव्वियसमुग्घाएणं समो-  
हणइ २ ता संखेज्जाइं जोयणाइं जाव अहावायरे पोग्गले परिसाडेइ २ ता  
अहासुहुमे पोग्गले परियाएइ २ ता दोच्चंपि वेउव्वियसमुग्घाएणं समोहणित्ता  
अणेगखंभसयसन्निविट्ठं जाव दिव्वं जाणविमाणं विउव्विउं पवत्ते यावि होत्था ।  
तए णं से आभिओगिए देवे तस्स दिव्वस्स जाणविमाणस्स तिविदिं तिसोवाणपडि-  
रुवए विउव्वइ, तंजहा-पुरच्छिमेणं दाहिणेणं उत्तरेणं, तेसिं तिसोवाणपडिरुवगाणं  
इमे एयारुवे वण्णावासे पण्णत्ते, तंजहा-वइरामया णिम्मा रिट्ठामया पइट्ठाना  
वेरुलियामया खंभा सुवण्णरुप्पमया फलगा लोहियक्खमईओ सईओ वयरामया  
संधी णाणामणिमया अवलंबणा अवलंबणवाहाओ य पासादीया जाव पडिरुवा ।  
तेसिं णं तिसोवाणपडिरुवगाणं पुरओ पत्तेयं पत्तेयं तोरणं पण्णत्तं, तेसिं णं तोरणानं  
इमे एयारुवे वण्णावासे प० तं०-तोरणा णाणामणिमया णाणामणिमएसु थंमेसु  
उवनिविट्ठसंनिविट्ठविविहमुत्तंतरारुवोववचिया विविहतारारुवोवचिया जाव पडिरुवा ।  
तेसिं णं तोरणानं उप्पिं अट्ठमंगलगा पण्णत्ता, तंजहा-सोत्थियसिरिवच्छणंदिद्या-  
वत्तवद्धमाणगभद्दासणकलसमच्छदप्पणा जाव पडिरुवा । तेसिं च णं तोरणानं उप्पिं  
बहवे किण्हचामरज्झए जाव सुक्किण्णचामरज्झए अच्छे सण्हे रुपपट्ठे वइरामयदंडे  
जलयामलगंधिए सुरम्मे पासादीए दरिसणिज्जे अभिरुवे पडिरुवे विउव्वइ ।

तेसि णं तोरणाणं उप्पि बहवे छत्ताइच्छत्ते पडागाइपडागे घंटाजुयले उप्पलहत्थए कुसुयणलिणसुभगतोगंधियपोंडरीयमहापोंडरीयसयपत्तसहस्सपत्तहत्थए सव्वरयणामए अच्छे जाव पडिरूवे विउव्वइ । तए णं से आभिओगिए देवे तस्स दिव्वस्स जाणविमाणस्स अंतो बहुसमरमणिज्जं भूमिभागं विउव्वइ । से जहाणामए आलिङ्ग-पुक्खरे इ वा मुइंगपुक्खरे इ वा सरतले इ वा करतले इ वा चंदमंडले इ वा सूरमंडले इ वा आयंसमंडले इ वा उरब्भचम्मे इ वा वसहचम्मे इ वा वराहचम्मे इ वा सीहचम्मे इ वा वग्घचम्मे इ वा छगलचम्मे इ वा दीवियचम्मे इ वा अणेगसंकुलीगसहस्सवियए णाणाविहपंचवत्तेहिं मणीहिं उवसोभिए आवडपच्चाव-डसेडिपसेडिसोत्थियसोवत्थियपूसमाणगवद्धमाणगमच्छंडगमगरंडगजारमारफुल्लवलिप-उमपत्तसागरतरंगवसंतलयपउमलयभत्तिचित्तेहिं सच्छाएहिं सप्पमेहिं समरीइएहिं सउज्जोएहिं णाणाविहपंचवत्तेहिं मणीहिं उवसोभिए तंजहा-किण्हेहिं णीलेहिं लोहि-एहिं हाल्लिदेहिं सुक्किळेहिं, तत्थ णं जे ते किण्हा मणी तेसि णं मणीणं इमे एयारूवे वण्णावासे पण्णत्ते, से जहानामए जीमूतए इ वा अंजणे इ वा खंजणे इ वा कज्जले इ वा गवले इ वा गवल्लुलिया इ वा भमरे इ वा भमरावल्लिया इ वा भमरपतंगसारे इ वा जंबूफले इ वा अहारिड्ढे इ वा परहुए इ वा गए इ वा गयकल्ले इ वा किण्हसापे इ वा किण्हकेसरे इ वा आगासथिग्गले इ वा किण्हासोए इ वा किण्हक-णवीरे इ वा किण्हबंधुजीवे इ वा, भवे एयारूवे सिया?, णो इण्ढे सम्ढे, ओवम्मं समणाउसो! ते णं किण्हा मणी इत्तो इट्ठतराए चेव कंततराए चेव मणुणतराए चेव मणामतराए चेव वण्णेणं पण्णत्ता । तत्थ णं जे ते नीला मणी तेसि णं मणीणं इमे एयारूवे वण्णावासे पण्णत्ते, से जहानामए भिंगे इ वा भिंगपत्ते इ वा सुए इ वा सुयपिच्छे इ वा चासे इ वा चासपिच्छे इ वा णीली इ वा णीलीमेए इ वा णीलीगुलिया इ वा सामा इ वा उच्चन्तगे इ वा वणराई इ वा हलधरवसणे इ वा मोरग्गीवा इ वा अयसिकुसुमे इ वा बाणकुसुमे इ वा अंजणकेसियाकुसुमे इ वा नीलुप्पले इ वा णीलासोणे इ वा णीलबंधुजीवे इ वा णीलकणवीरे इ वा, भवेयारूवे सिया?, णो इण्ढे सम्ढे, ते णं णीला मणी एत्तो इट्ठतराए चेव जाव वण्णेणं पण्णत्ता । तत्थ णं जे ते लोहियगा मणी तेसि णं मणीणं इमेयारूवे वण्णावासे पण्णत्ते, से जहाणामए उरब्भरुहिरे इ वा ससरुहिरे इ वा नररुहिरे इ वा वराहरुहिरे इ वा महिसरुहिरे इ वा बालिंदगोवे इ वा बालदिवायरे इ वा संझम्भरागे इ वा गुंजद्धरागे इ वा जासुअणकुसुमे इ वा किंसुयकुसुमे इ वा पालियायकुसुमे इ वा जाइहिंगुलए इ वा सिलप्पवाले इ वा प्वालअंकुरे इ वा लोहियक्खमणी इ वा

लक्खारसगे इ वा किमिरागकंबले इ वा चीणपिट्ठरासी इ वा रत्तुप्पले इ वा रत्ता-  
 सोगे इ वा रत्तकणवीरे इ वा रत्तबंधुजीवे इ वा, भवेयारूवे सिया?, णो इण्ठे  
 समट्ठे, ते णं लोहिया मणी एत्तो इट्ठतराए चेव जाव वण्णेणं प० । तत्थ णं जे ते  
 हालिद्दा मणी तेसि णं मणीणं इमेयारूवे वण्णावासे पण्णत्ते-से जहानामए चंपए इ  
 वा चंपछल्ली इ वा चंपगमेए इ वा हलिद्दा इ वा हलिद्दामेए इ वा हलिद्दगुलिया  
 इ वा हरियालिया इ वा हरियालमेए इ वा हरियालगुलिया इ वा चिउरे इ वा  
 चिउरंगराए इ वा वरकणगे इ वा वरकणगनिघसे इ वा [सुवण्णसिप्पाए इ वा]  
 वरपुरिसवसणे इ वा अल्लइकुसुमे इ वा चंपाकुसुमे इ वा कुहंडियाकुसुमे इ वा  
 तडवडाकुसुमे इ वा घोसेडियाकुसुमे इ वा सुवण्णजूहियाकुसुमे इ वा सुहिरण्णकुसुमे  
 इ वा कोरंटगवरमल्लदामे इ वा वीययकुसुमे इ वा पीयासोगे इ वा पीयकणवीरे  
 इ वा पीयबंधुजीवे इ वा, भवेयारूवे सिया?, णो इण्ठे समट्ठे, ते णं हालिद्दा मणी  
 एत्तो इट्ठतराए चेव जाव वण्णेणं पण्णत्ता । तत्थ णं जे ते सुक्किळा मणी तेसि णं  
 मणीणं इमेयारूवे वण्णावासे पण्णत्ते । से जहानामए अंके इ वा संखे इ वा चंदे इ  
 वा कुमुदोदकदगरयदहियणक्खीरक्खीरपूरे इ वा कोंचावली इ वा हारावली इ वा  
 हंसावली इ वा बलागावली इ वा चंदावली इ वा सारइयबलाहए इ वा धंतधोय-  
 रुप्पट्ठे इ वा सालिपिट्ठरासी इ वा कुंदप्पुप्फरासी इ वा कुमुयरासी इ वा सुक्कच्छि-  
 वाडी इ वा पिहुणमिंजिया इ वा भिसे इ वा मुणालिया इ वा गयदंते इ वा लवंग-  
 दलए इ वा पोंडरियदलए इ वा सेयासोगे इ वा सेयकणवीरे इ वा सेयबन्धुजीवे इ  
 वा, भवेयारूवे सिया?, णो इण्ठे समट्ठे, ते णं सुक्किळा मणी एत्तो इट्ठतराए चेव  
 जाव वज्जेणं पण्णत्ता । तेसि णं मणीणं इमेयारूवे गंधे पण्णत्ते, से जहानामए कोट्ट-  
 पुडाण वा तगरपुडाण वा एलापुडाण वा चोयपुडाण वा चंपापुडाण वा दमणापुडाण  
 वा कुंकुमपुडाण वा चंदणपुडाण वा उसीरपुडाण वा मरुआपुडाण वा जातिपुडाण  
 वा जूहियापुडाण वा मल्लियापुडाण वा प्हाणमल्लियापुडाण वा केयइपुडाण वा  
 पाडलिपुडाण वा णोमालियापुडाण वा अगुरुपुडाण वा लवंगपुडाण वा वासपुडाण  
 वा कम्पूरपुडाण वा अणुवायंसि वा ओमिज्जमाणण वा कुट्ठिजमाणण वा भंजि-  
 जमाणण वा उक्किरिजमाणण वा विक्किरिजमाणण वा परिभुजमाणण वा परिभा-  
 इजमाणण वा भंडाओ भंडं साहरिजमाणण वा ओराला मणुण्णा मणहरा  
 घाणमणनिवुइकरा सव्वओ समंता गंधा अभिनिस्सवंति, भवेयारूवे सिया?,  
 णो इण्ठे समट्ठे, ते णं मणी एत्तो इट्ठतराए चेव गंधेणं पण्णत्ता । तेसि णं  
 मणीणं इमेयारूवे फासे पण्णत्ते, से जहानामए आइणेइ वा रूपे इ वा बूरे

इ वा णवणीए इ वा हंसगब्भत्तुलिया इ वा सिरीसकुसुमनिचए इ वा बालकुसुय-  
पत्तरासी इ वा, भवेयारुवे सिया ?, णो इण्ठे समट्ठे, ते णं मणी एत्तो इट्ठतराए  
चेव जाव फासेणं पज्जता । तए णं से आभिओणिए देवे तस्स दिव्वस्स  
जाणविमाणस्स बहुमज्झदेसभागे एत्थ णं महं पिच्छाघरमंडवं विउव्वइ अणेगखंभ-  
सयसंनिविट्ठं अब्भुग्गयसुकयवरवेइयातोरणवरइयसालभंजियागं सुसिलिट्ठविसिट्ठलट्ठ-  
संठियपसत्थवेरुलियविमलखंभं णाणामणि[कणगरयण]खचियउज्जलवहुसमसुविभत्त-  
भूमिभागं ईहामियउसभतुरगनरमगरविहगवालगकिन्नररुसरभचमरकुंजरवणलय-  
पउमलयभत्तिचित्तं खं० कंचणमणिरयणथूभियागं णाणाविहपंचवण्णघंटापडागपरि-  
मंडियग्गसिहरं चवलं मरीइकवयं विणिम्मुयंतं लाउल्लोइयमहिंयं गोसीससरस-  
रत्तचंदणददूरदिशपंचंगुलितलं उवचियचंदणकलसं चंदणघडसुकयतोरणपडिडुवारदेस-  
भागं आसत्तोसत्तविउलवट्ठवघारियमल्लदामकलावं पंचवण्णसरससुरभिमकुपुप्फपुंजो-  
वयारकलियं कालागुरुपवरकुंदरुक्कतुरुक्कधूवमवमधंतगंधुद्धयाभिरामं सुगंधवरगंधियं  
गंधवट्ठिभूयं अच्छरगणसंघसंविक्किणं दिव्वं तुडियसइसंपणाइयं अच्छं जाव पडिह्वं ।  
तस्स णं पिच्छाघरमंडवस्स अंतो बहुसमरमणिज्जभूमिभागं विउव्वइ जाव मणीणं  
फासो । तस्स णं पेच्छाघरमंडवस्स उल्लोयं विउव्वइ पउमलयभत्तिचित्तं जाव पडि-  
ह्वं । तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगं महं  
वहरामयं अक्खाडगं विउव्वइ । तस्स णं अक्खाडयस्स बहुमज्झदेसभागे एत्थ णं  
महेगं मणिपेडियं विउव्वइ अट्ठ जोयणाइं आयामविकखंमेणं चत्तारि जोयणाइं बाहल्लेणं  
सव्वमणिमयं अच्छं सण्हं जाव पडिह्वं । तीसे णं मणिपेडियाए उवरि एत्थ णं  
महेगं सिंहासणं विउव्वइ, तस्स णं सीहासणस्स इमेयारुवे वण्णावासे पण्णत्ते-  
तवणिज्जमया चक्कला रययामया सीहा सोवणिगया पाया णाणामणिमयाइं पाय-  
सीसगाइं जंबूणयमयाइं गत्ताइं वहरामया संधी णाणामणिमए वेच्चै, से णं  
सीहासणे ईहामियउसभतुरगनरमगरविहगवालगकिन्नररुसरभचमरकुंजरवणलय-  
पउमलयभत्तिचित्तं [सं]सारसारोवचियमणिरयणपायवीढे अच्छरगसिउमसरगणवतय-  
कुसंतलिम्बकेसरपच्चत्थुयाभिरामे आईणगह्वयवूरणवणीयतूलकासमउए सुविरइयरय-  
त्ताणे उवचियखोमडुगुल्लपट्ठपडिच्छायणे रत्तंसुयसंवुए सुरम्मे पासाईए ४ । तस्स णं  
सिंहासणस्स उवरि एत्थ णं महेगं विजयदूसं विउव्वइ, संखंक(संख)कुंददगरय-  
अमयमहियफेणपुंजसंनिगासं सव्वरयणामयं अच्छं सण्हं पासादीयं दरिसणिज्जं  
अभिह्वं पडिह्वं । तस्स णं सीहासणस्स उवरिं विजयदूसस्स य बहुमज्झदेसभागे  
एत्थ णं महं एगं वयरामयं अंकुसं विउव्वइ, तस्सि च णं वयरामयंसि अंकुसंसि

कुंभिकं सुत्तादामं विउव्वइ । से णं कुंभिके सुत्तादामे अब्बेहिं चउहिं अद्धकुंभिकेहिं  
 सुत्तादामेहिं तदद्धुच्चतपमाणेहिं सव्वओ समंता संपरिखिते । ते णं दामा तवणिज्ज-  
 लंबूसगा सुवण्णपयरगमंडियग्गा णाणामणिरयणविविहहारद्धहारउवसोभियसमुदया  
 ईसिं अण्णमण्णमसंपत्ता वाएहिं पुव्वावरदाहिणुत्तरागएहिं मंदायं मंदायं एइजमाणाणि २  
 पलंबमाणाणि २ वदमाणाणि २ उरालेणं मणुत्तेणं मणहरेणं कण्णमणणिव्वुइकरेणं  
 सदेणं ते पएसे सव्वओ समंता आपूरेमाणा २ सिरीए अईव २ उवसोभेमाणा  
 चिट्ठंति । तए णं से आभिओगिए देवे तस्स सिंहासणस्स अवस्तरें उत्तरेणं  
 उत्तरपुरच्छिमेणं एत्थ णं सूरियाभस्स देवस्स चउण्हं सामाणियसाहस्सीणं चत्तारि  
 भद्दासणसाहस्सीओ विउव्वइ, तस्स णं सीहासणस्स पुरच्छिमेणं एत्थ णं सूरियाभस्स  
 देवस्स चउण्हं अग्गमहिंसीणं सपरिवाराणं चत्तारि भद्दासणसाहस्सीओ विउव्वइ,  
 तस्स णं सीहासणस्स दाहिणपुरच्छिमेणं एत्थ णं सूरियाभस्स देवस्स अब्भितर-  
 परिसाए अट्ठण्हं देवसाहस्सीणं अट्ठ भद्दासणसाहस्सीओ विउव्वइ, एवं दाहिणेणं  
 मज्झिमपरिसाए दसण्हं देवसाहस्सीणं दस भद्दासणसाहस्सीओ विउव्वइ दाहिण-  
 पच्चत्थिमेणं बाहिरपरिसाए वारसण्हं देवसाहस्सीणं वारस भद्दासणसाहस्सीओ  
 विउव्वइ पच्चत्थिमेणं सत्तण्हं अणियाहिंवईणं सत्त भद्दासणे विउव्वइ, तस्स णं  
 सीहासणस्स चउदिसिं एत्थ णं सूरियाभस्स देवस्स सोलसण्हं आयरक्खदेवसाह-  
 स्सीणं सोलस भद्दासणसाहस्सीओ विउव्वइ, तंजहा-पुरच्छिमेणं चत्तारि साहस्सीओ  
 दाहिणेणं चत्तारि साहस्सीओ पच्चत्थिमेणं चत्तारि साहस्सीओ उत्तरेणं चत्तारि  
 साहस्सीओ । तस्स दिव्वस्स जाणविमाणस्स इमेयारूवे वण्णावासे पण्णत्ते, से  
 जहानामए अइरुग्गयस्स वा हेमंतियवालियसूरियस्स वा खयरिंगालाण वा रत्तिं  
 पज्जलियाण वा जवाकुसुमवणस्स वा किंसुयवणस्स वा पारियायवणस्स वा सव्वओ  
 समंता संकुसुमियस्स, भवेयारूवे सिया ?, णो इणट्ठे समट्ठे, तस्स णं दिव्वस्स जाण-  
 विमाणस्स एत्तो इट्ठतराए चेव जाव वण्णेणं पण्णत्ते, गंधो य फासो य जहा मणीणं ।  
 तए णं से आभिओगिए देवे दिव्वं जाणविमाणं विउव्वइ २ ता जेणेव सूरियामे देवे  
 तेणेव उवागच्छइ २ ता सूरियामं देवं करयलपरिग्गहियं जाव पच्चप्पिणइ ॥ १५ ॥  
 तए णं से सूरियामे देवे आभिओगस्स देवस्स अंतिए एयमट्ठं सोच्चा निसम्म हट्ठ  
 जाव हियए दिव्वं जिणिंदाभिगमणजोगं उत्तरवेउव्वियरूवं विउव्वइ विउव्वित्ता  
 चउहिं अग्गमहिंसीहिं सपरिवाराहिं दोहिं अणीएहिं, तंजहा-गंधवाणीएण य  
 णट्ठाणीएण य सद्धिं संपरिवुडे तं दिव्वं जाणविमाणं अणुपयाहिणीकरेमाणे पुरत्थि-  
 मिद्धेणं तिसोमाणपडिस्सएणं दुरुहइ दुरुहिता जेणेव सीहासणे तेणेव उवागच्छइ

उवागच्छता सीहासणवरगए पुरत्थाभिमुहे सणिसण्णे । तए णं तस्स सूरियाभस्स देवस्स चत्तारि सामाणियसाहस्सीओ तं दिव्वं जाणविमाणं अणुपयाहिणीकरेमाणा उत्तरिल्लेणं तिसोवाणपडिस्वएणं दुरूहंति दुरूहिता पत्तेयं पत्तेयं पुव्वणत्थेहिं भद्दासणेहिं णिसीयंति, अवसेसा देवा य देवीओ य तं दिव्वं जाणविमाणं जाव दाहिल्लेणं तिसोवाणपडिस्वएणं दुरूहंति दुरूहिता पत्तेयं पत्तेयं पुव्वणत्थेहिं भद्दासणेहिं निसीयंति । तए णं तस्स सूरियाभस्स देवस्स तं दिव्वं जाणविमाणं दुरूहस्स समाणस्स अट्ठ मङ्गलगा पुरओ अहाणुपुव्वीए संपत्थिया, तंजहा—सोत्थियसिरिवच्छ जाव दप्पणा । तयणंतरं च णं पुण्णकलसभिगार दिव्वा य छत्तपडागा सचामरा दंसणरइया आलोयदरिसणिज्जा वाउद्धुयविजयवेजयंतीपडागा ऊसिया गगणतलमणुलिहन्ती पुरओ अहाणुपुव्वीए संपत्थिया । तयणंतरं च णं वैरुलियमिसंतविमलदण्डं पलम्बकोरंटमल्लदामोवसोभियं चंदमंडलनिभं समुस्सियं विमलमायवत्तं पवरसीहासणं च मणिरयणभत्तिचित्तं सपायपीढं सपाउयाजोयसमाउत्तं बहुक्किंकरामरपरिगगहियं पुरओ अहाणुपुव्वीए संपत्थियं । तयणंतरं च णं वइरामयवट्टलट्टसंठियसुसिलिट्ट-परिघट्टमट्टसुपइट्टिए विसिट्टे अणेगवरपंचवण्णकुडभीसहस्सुस्सिए परिमंडियाभिरामे वाउद्धुयविजयवेजयंतीपडागच्छताइच्छत्तकलिए तुंगे गगणतलमणुलिहंतसिहरे जोयणसहस्समूसिए महइमहालए महिंदज्जए पुरओ अहाणुपुव्वीए संपत्थिए । तयणंतरं च णं सुव्वणेवत्थपरिकच्छिया सुसज्जा सव्वालंकारभूसिया महया भडचडगर-पहगरेणं पंच अणीयाहिवड्ढो पुरओ अहाणुपुव्वीए संपत्थिया । [तयणंतरं च णं बहवे आभिसोणिया देवा देवीओ य सएहिं सएहिं रूवेहिं, सएहिं सएहिं विसेसेहिं, सएहिं सएहिं विंदेहिं, सएहिं सएहिं णेज्जाएहिं, सएहिं सएहिं णेवत्थेहिं पुरओ अहाणुपुव्वीए संपत्थिया] तयणंतरं च णं सूरियाभविमाणवासिणो बहवे वेमाणिथा देवा य देवीओ य सव्विड्ढीए जाव रवेणं सूरियाभं देवं पुरओ पासओ य मग्गओ य समणुगच्छंति ॥ १६ ॥ तए णं से सूरियाभे देवे तेणं पञ्चाणीयपरिखित्तेणं वइरामयवट्टलट्टसंठिएणं जाव जोयणसहस्समूसिएणं महइमहालएणं महिंदज्जएणं पुरओ कड्डिज्जमाणेणं चउहिं सामाणियसहस्सेहिं जाव सोलसहिं आयरक्खदेव-साहस्सीहिं अवेहि य बहूहिं सूरियाभविमाणवासीहिं वेमाणिएहिं देवेहिं देवीहि य सद्धिं संपरिवुडे सव्विड्ढीए जाव रवेणं सोहम्मस्स कप्पस्स मज्झमज्जेणं तं दिव्वं देविद्धिं दिव्वं देवजुइं दिव्वं देवाणुभावं उवललेमाणे उवललेमाणे उवदंसेमाणे उवदंसेमाणे पडिजागरेमाणे पडिजागरेमाणे जेणेव सोहम्मस्स कप्पस्स उत्तरिल्ले णिज्जाण-मग्गे तेणेव उवागच्छइ, जोयणसयसाहस्सिएहिं विग्गहेहिं ओवयमाणे बीईवयमाणे

ताए उक्किट्ठाए जाव तिरियं असंखिज्जाणं दीवसमुद्धानं मज्झमज्झेणं वीइवयमाणे वीइवयमाणे जेणेव नंदीसरवरे दीवे जेणेव दाहिणपुरत्थिमिल्ले रतिकरपव्वए तेणेव उवागच्छइ उवागच्छिता तं दिव्वं देविद्धिं जाव दिव्वं देवाणुभावं पडिसाहरेमाणे २ पडिसंखेवेमाणे २ जेणेव जम्बुदीवे दीवे जेणेव भारहे वासे जेणेव आमलकप्पा नयरी जेणेव अम्बसालवणे उज्जाणे जेणेव समणे भगवं महावीरे तेणेव उवागच्छइ उवागच्छिता समणं भगवन्तं महावीरं तेणं दिव्वेणं जाणविमाणेणं तिक्खुत्तो आयाहिणं पयाहिणं करेइ करित्ता समणस्स भगवओ महावीरस्स उत्तरपुरत्थिमे दिसिभाए तं दिव्वं जाणविमाणं ईसिं चउरंगुलमसंपत्तं धरणितलंसि ठवेइ ठवित्ता चउहिं अगमहिंसीहिं सपरिवाराहिं दोहिं अणीयाहिं—तंजहा गंधव्वाणिएण य णट्ठाणिएण य—सद्धिं संपरिवुडे ताओ दिव्वाओ जाणविमाणाओ पुरत्थिमिल्लेणं तिसोवाणपडिस्सवएणं पच्चोरुहइ । तए णं तरस्स सूरियाभस्स देवस्स चत्तारि सामाणियसाहस्सीओ ताओ दिव्वाओ जाणविमाणाओ उत्तरिल्लेणं तिसोवाणपडिस्सवएणं पच्चोरुहंति, अवसेसा देवा य देवीओ य ताओ दिव्वाओ जाणविमाणाओ दाहिणि-ल्लेणं तिसोवाणपडिस्सवएणं पच्चोरुहन्ति । तए णं से सूरियाभे देवे चउहिं अगम-हिंसीहिं जाव सोलसहिं आयरक्खदेवसाहस्सीहिं अण्णेहि य बहूहिं सूरियाभविमाण-वासीहिं वेमाणिएहिं देवेहिं देवीहि य सद्धिं संपरिवुडे सव्विद्धीए जाव णाइयरवेणं जेणेव समणे भगवं महावीरे तेणेव उवागच्छइ उवागच्छिता समणं भगवं महावीरं तिक्खुत्तो आयाहिणपयाहिणं करेइ करित्ता वंदइ नमंसइ वंदित्ता नमंसित्ता एवं वयासी—‘अहं णं भंते ! सूरियाभे देवे देवाणुप्पियाणं वन्दामि नमंसामि जाव पज्जु-वासामि’ ॥ १७ ॥ सूरियाभाइ समणे भगवं महावीरे सूरियाभं देवं एवं वयासी—‘पोराणमेयं सूरियाभा ! जीयमेयं सूरियाभा ! किच्चमेयं सूरियाभा ! करणिज्जमेयं सूरियाभा ! आइण्णमेयं सूरियाभा ! अब्भणुण्णायमेयं सूरियाभा ! जं णं भवणवइ-वाणमंतरजोइसवेमाणिया देवा अरहंते भगवंते वंदंति नमंसंति वंदित्ता नमंसित्ता तओ पच्छा साइं साइं नामगोत्ताइं साहिति तं पोराणमेयं सूरियाभा ! जाव अब्भणुण्णायमेयं सूरियाभा !’ । तए णं से सूरियाभे देवे समणेणं भगवया महावीरेणं एवं वुत्ते समाणे हट्ठ जाव समणं भगवं महावीरं वंदइ नमंसइ वंदित्ता नमंसित्ता नच्चासणे नाइदूरे सुस्सूसमाणे णमंसमाणे अभिमुहे विणएणं पंजलिउडे पज्जुवासइ ॥ १८-१९ ॥ तए णं समणे भगवं महावीरे सूरियाभस्स देवस्स तीसे य महइमहालियाए परिसाए जाव परिसा जामेव दिसिं पाउब्भूया तामेव दिसिं पडि-गया ॥ २० ॥ तए णं से सूरियाभे देवे समणस्स भगवओ महावीरस्स अंतिए

धम्मं सोच्चा निसम्म हट्टुट्ट जाव हयहियए उट्टाए उट्टेइ उट्टित्ता समणं भगवं महावीरं वंदइ नमंसइ वंदित्ता नमंसित्ता एवं वयासी—अहं णं भंते ! सूरियाभे देवे किं भवत्तिदिए अभवत्तिदिए ? सम्मदिट्ठी मिच्छादिट्ठी ? परित्तंससारिए अणंतससारिए ? सुलभवोहिए दुल्लभवोहिए ? आराहए विराहए ? चरिमे अचरिमे ? ॥२१॥ सूरियाभाह समणे भगवं महावीरे सूरियाभं देवं एवं वयासी—सूरियाभा ! तुमं णं भवत्तिदिए नो अभवत्तिदिए जाव चरिमे णो अचरिमे । तए णं से सूरियाभे देवे समणेणं भगवया महावीरेणं एवं वुत्ते समाणे हट्टुट्टचित्तमाणंदिए परमसोमणस्सिए समणं भगवं महावीरं वंदइ नमंसइ वंदित्ता नमंसित्ता एवं वयासी—तुव्वे णं भंते ! सव्वं जाणह सव्वं पासह, सव्वओ जाणह सव्वओ पासह, सव्वं कालं जाणह सव्वं कालं पासह, सव्वे भावे जाणह सव्वे भावे पासह । जाणंति णं देवाणुप्पिया ! मम पुव्वं वा पच्छा वा मम एयाह्वं दिव्वं देविह्वं दिव्वं देवजुइं दिव्वं देवाणुभावं लद्धं पत्तं अभिसमण्णागयंति, तं इच्छामि णं देवाणुप्पियाणं भत्तिपुव्वगं गोयमाइयाणं समणाणं निगंगथाणं दिव्वं देविह्वं दिव्वं देवजुइं दिव्वं देवाणुभावं दिव्वं बत्तीसइवद्धं नट्टविहिं उवदंसित्ताए ॥ २२ ॥ तए णं समणे भगवं महावीरे सूरियाभेणं देवेणं एवं वुत्ते समाणे सूरियाभस्स देवस्स एयमट्ठं णो आढाइ णो परियाणइ तुत्तिणीए संचिट्ठइ । तए णं से सूरियाभे देवे समणं भगवन्तं महावीरं दोच्चं पि तच्चं पि एवं वयासी—तुव्वे णं भंते ! सव्वं जाणह जाव उवदंसित्ताएत्तिकट्ठु समणं भगवं महावीरं तिकवुत्तो आयाहिणपयाहिणं करेइ करित्ता वंदइ नमंसइ वंदित्ता नमंसित्ता उत्तरपुरत्थिमं दीसीभागं अवक्कमइ अवक्कसित्ता वेउव्वियसमुग्घाएणं समोहणइ समोहणित्ता संखिजाइं जोयणाइं दण्डं निसिरइ २ ता अहावायरे० अहासुहुमे० । दोच्चं पि वेउव्वियसमुग्घाएणं जाव बहुसमरमणिज्जं भूमिभागं विउव्वइ । से जहा नामए आलिंगपुक्खरे इ वा जाव मणीणं फासो तस्स णं बहुसमरमणिज्जस्स भूमिभागस्स बहुमज्झदेसभागे पिच्छाघरमण्डवं विउव्वइ अणेगखेमसयसंनिविट्ठं वण्णओ अन्तो बहुसमरमणिज्जं भूमिभागं उल्लोयं अक्खाडगं च मणिपेडियं च विउव्वइ । तीसे णं मणिपेडियाए उवरि सीहासणं सपरिवारं जाव दामा चिट्ठन्ति । तए णं से सूरियाभे देवे समणस्स भगवओ महावीरस्स आलोए पणामं करेइ करित्ता ‘अणुजाणउ मे भगवंतिकट्ठु सीहासणवरगए तित्थयराभिसुहे संणिसण्णे । तए णं से सूरियाभे देवे तप्पढमयाए नानामणिक्कणगरयणविमलमहरिहनिउणोवियमिसिमिसित्तविरइयमहाभरणकडगतुडियवरभूसणुज्जलं पीवरं पलम्बं दाहिणं भुयं पसारैइ तओ णं सरिसयाणं सरित्तायाणं सरिव्वयाणं सरिसलावणस्वरुजोव्वणगुणोव्वेयाणं एगाभरणवसणगहियणिज्जोयाणं दुहओ संवेलि-



यग्गणियत्थाणं आविद्धतिलयामेलाणं पिण्डिगेविज्जकंचुयाणं उप्पीलियचित्तपट्ट-  
परियरसफेणगावत्तरइयसंगयपलंबवत्थंतचित्तच्छिलगनियंसणाणं एगावलिकण्ठरइय-  
सोभंतवच्छपरिहत्थभूसणाणं अट्टसयं णट्टसज्जाणं देवकुमाराणं णिग्गच्छइ । तयणंतरं  
च णं नानामणि० जाव पीवरं पलंबं वामं भुयं पसारेइ तओ णं सरिसयाणं  
सरित्थयाणं सरिव्वयाणं सरिसलावण्णरूवजोव्वणगुणोववेयाणं एगाभरण० दुहओ  
संवेळ्ळियग्ग० आविद्धतिलयामेलाणं पिण्डिगेवेज्जकंचुईणं नानामणिरयणभूस-  
णविराइयंगमंगाणं चंदाणणाणं चंदद्धसमनिलाडाणं चंदाहियसोमदंसणाणं उक्का इव  
उज्जोवेमाणीणं सिंगारा० हसियभणिय० गहियाउज्जाणं अट्टसयं णट्टसज्जाणं देवकुमा-  
रियाणं णिग्गच्छइ । तए णं से सूरियाभे देवे अट्टसयं संखाणं विउव्वइ अट्टसयं संखवा-  
याणं विउव्वइ, अ० सिंगाणं वि० अ० सिंगवायाणं वि०, अ० संखियाणं वि० अ०  
संखियावायाणं वि०, अ० खरमुहीणं वि० अ० खरमुहियायाणं वि०, अ० पेयाणं वि०  
अ० पेयावायगाणं वि०, अ० पिरिपिरियाणं वि० अ० पिरिपिरियावायगाणं वि०  
एवमाइयाई एगूणपणं आउज्जविहाणाई विउव्वइ । तए णं ते बहवे देवकुमारा य  
देवकुमारियाओ य सदावेइ । तए णं ते बहवे देवकुमारा य देवकुमारीओ य सूरिया-  
भेणं देवेणं सदाविद्या समाणा हट्ट जाव जेणेव सूरियाभे देवे तेणेव उवागच्छंति तेणेव  
उवागच्छित्ता सूरियाभं देवं करयलपरिग्गहियं जाव वद्धावित्ता एवं वयासी-‘संदिसंतु  
णं देवाणुप्पिया ! जं अम्हेहिं कायव्वं’ । तए णं से सूरियाभे देवे ते बहवे देवकुमारे य  
देवकुमारीओ य एवं वयासी-‘गच्छह णं तुब्भे देवाणुप्पिया ! समणं भगवंतं महावीरं  
तिक्खुत्तो आयाहिणपयाहिणं करेह करित्ता वंदह नमंसह वंदित्ता नमंसित्ता गोयमा-  
इयाणं समणाणं निग्गंथाणं तं दिव्वं देविद्धि दिव्वं देवजुइ दिव्वं देवाणुभावं दिव्वं  
वत्तीसइबद्धं णट्टविहिं उवदंसेह उवदंसित्ता खिप्पामेव एयमाणत्तिंयं पच्चप्पिणह । तए  
णं ते बहवे देवकुमारा देवकुमारीओ य सूरियाभेणं देवेणं एवं वुत्ता समाणा हट्ट जाव  
करयल० जाव पडिसुणंति पडिसुणित्ता जेणेव समणे भगवं महावीरे तेणेव  
उवागच्छंति उवागच्छित्ता समणं भगवं महावीरं जाव नमंसित्ता जेणेव गोयमाइया  
समणा निग्गंथा तेणेव उवागच्छंति । तए णं ते बहवे देवकुमारा देवकुमारीओ य  
समामेव समोसरणं करंति करित्ता समामेव अवणमंति अवणमित्ता समामेव उन्नमंति  
एवं सहियामेव ओनमंति एवं सहियामेव उन्नमंति सहियामेव उण्णमित्ता संगयामेव  
ओनमंति संगयामेव उन्नमंति उन्नमित्ता थिमियामेव ओणमंति थिमियामेव उन्नमंति  
समामेव पसरंति पसरित्ता समामेव आउज्जविहाणाई गेण्हंति समामेव पवाएंसु  
पगाइंसु पणच्चिंसु । किं ते ? उरेणं मंदं सिरेण तारं कंठेण वित्तरं तिविहं तिसमयरे-

यगरइयं गुंजाऽवंककुहरोवगूढं रत्तं तिठाणकरणसुद्धं सकुहरगुंजंतवंसतंतीतलताललय-  
गहसुसंपउत्तं महुंरं समं सललियं मणोहरं मिउरिमियपयसंचारं सुरइसुणइवरचाह  
रुवं दिव्वं णट्टसज्जं गेयं पगीया वि होत्था किं ते ? उद्धुमंताणं संखाणं सिंगाणं  
संखियाणं खरमुहीणं पेयाणं पिरिपिरियाणं, आहम्मंताणं पणवाणं पडहाणं, अप्फा-  
लिज्जमाणाणं भंभाणं होरंभाणं, तालिज्जंताणं मेरीणं झङ्गरीणं दुंदुहीणं, आलवंताणं  
सुरयाणं मुइंगाणं नंदीमुइंगाणं, उत्तालिज्जंताणं आलिगाणं कुंतुवाणं गोमुहीणं  
महलाणं, मुच्छिज्जंताणं वीणाणं विपंचीणं वल्लइणं, कुट्टिज्जंताणं महंतीणं कच्छभीणं  
चित्तवीणाणं, सारिज्जंताणं बद्धीसाणं सुघोसाणं नंदिघोसाणं, फुट्टिज्जंतीणं भामरीणं  
छब्भामरीणं परिवायणीणं, छिप्पंतीणं तूणाणं तुंबवीणाणं, आमोडिज्जंताणं आमो-  
याणं झंझाणं नउलाणं, अच्छिज्जंतीणं मुगुंदाणं हुडुक्कीणं विचिक्कीणं, वाइज्जंताणं  
करडाणं डिंडिमाणं किणियाणं कडम्भाणं, ताडिज्जंताणं दहरिगाणं दहरगाणं कुंतुवाणं  
कलसियाणं मड्डयाणं, आताडिज्जंताणं तलाणं तालाणं कंसतालाणं, चट्टिज्जंताणं रिंमि-  
रित्तियाणं लत्तियाणं मगरियाणं सुंसुमारियाणं, कूमिज्जंताणं वंसाणं वेदूणं बालीणं  
परिल्लीणं वद्धगाणं । तए णं से दिव्वे गीए दिव्वे वाइए दिव्वे नेट्टे एवं अब्भुए सिंगारे  
उराले मणुजे मणहरे गीए मणहरे नेट्टे मणहरे वाइए उप्पिजलभूए कहकहभूए  
दिव्वे देवरमणे पवत्ते यावि होत्था । तए णं ते बहवे देवकुमारा य देवकुमारीओ  
य समणस्स भगवओ महावीरस्स सोत्थियसिरेविच्छनंदियावत्तवद्धमाणगभदासणकल-  
समच्छदप्पणमंगल्लभत्तिचित्तं णामं दिव्वं णट्टविहिं उवदंसंति १ ॥ २३ ॥ तए णं ते  
बहवे देवकुमारा य देवकुमारीओ य सममेव समोसरणं करंति करित्ता तं चेव भाणि-  
यव्वं जाव दिव्वे देवरमणे पवत्ते यावि होत्था । तए णं ते बहवे देवकुमारा य देव-  
कुमारीओ य समणस्स भगवओ महावीरस्स आवडपच्चावडसेट्ठिपसेट्ठिसोत्थियसोवत्थि-  
यपूसमाणववद्धमाणगमच्छण्डमगरंउजारमारफुल्लावलिपउमपत्तसागरतरंगवसंतल्याप-  
उमलयभत्तिचित्तं णाम दिव्वं णट्टविहिं उवदंसंति २, एवं च एकिक्रियाए णट्टविहीए  
समोसरणाइया एसा वत्तव्वया जाव दिव्वे देवरमणे पवत्ते यावि होत्था । तए णं ते  
बहवे देवकुमारा देवकुमारियाओ य समणस्स भगवओ महावीरस्स ईहामियउसभनु-  
रगनरमगरविहगवालगकिन्नररुसरभचमरकुंजरवणलयपउमलयभत्तिचित्तं णामं दिव्वं  
णट्टविहिं उवदंसंति ३, एगओ वंकं दुहओ वंकं एगओ खुहं दुहओ खुहं एगओ चक्क-  
वालं दुहओ चक्कवालं चक्कच्चक्कवालं णामं दिव्वं णट्टविहिं उवदंसंति ४, चंदावलि-  
पविभत्तिं च स्रावलिपविभत्तिं च वल्लियावलिपविभत्तिं च हंसावलिप० च एगावलिप०  
च तारावलिप० च मुत्तावलिप० च कणगावलिप० च रयणावलिप० णामं दिव्वं

णट्टविहिं उवदंसेति ५, चंदुगमणप० च सूरुगमणप० च उरगमणुगमणप० णांमं दिव्वं णट्टविहिं उवदंसेति ६, चंदागमणप० च सूरुगमणप० च आगमणागमणप० णांमं...उवदंसेति ७, चंदावरणप० सूरुवरणप० च आवरणपवरणप० णांमं...उवदंसेति ८, चंदत्थमणप० च सूरत्थमणप० अत्थमणत्थमणप० णांमं...उवदंसेति ९, चंदमंडलपविमत्तिं च सूरमंडलप० च नागमंडलप० च जक्खमंडलप० च भूयमंडलप० च [ रक्खसमहोरगगन्धव्वमंडलप० च ] मंडलमंडलप० णांमं...उवदंसेति १०, उसभमंडलप० च सीहमंडलप० च ह्यविलंबियं गयवि० ह्यविलसियं गयविलसियं मत्तह्यविलसियं मत्तगयविलसियं मत्तह्यविलंबियं मत्तगयवि० दुयविलम्बियं णांमं...णट्टविहिं उवदंसेति ११, सागरपविमत्तिं च नागरप० च सागरनागरप० णांमं...उवदंसेति १२, णंदप० च चंपाप० च नन्दाचंपाप० णांमं...उवदंसेति १३, मच्छंडाप० च मयरंडाप० च जारप० च मारप० च मच्छंडमयरंडजारमारप० णांमं...उवदंसेति १४, 'क'त्ति ककारप० च 'ख'त्ति खकारप० च 'ग'त्ति गकारप० च 'घ'त्ति घकारप० च 'ङ'त्ति ङकारप० च ककारखकारगकारघकारङकारप० णांमं...उवदंसेति १५, एवं चकारवग्गो वि १६, टकारवग्गो वि १७, तकारवग्गो वि १८, पकारवग्गो वि १९, असोयपल्लवप० च अंबपल्लवप० च जंबूपल्लवप० च कोसंबपल्लवप० च पल्लवप० णांमं...उवदंसेति २०, पउमलयाप० जाव सामलयाप० च लयाप० णांमं...उवदंसेति २१, दुयणांमं...उवदंसेति २२, विलंबियं णांमं...उव० २३, दुयविलंबियं णांमं...उव० २४, अंचियं २५, रिभियं २६, अंचियरिभियं २७, आरमडं २८, भसोलं २९, आरमडभसोलं ३०, उप्पयनिवयपवत्तं संकुचियं पसारियं रयारइयं भंतं संभंतं णांमं दिव्वं णट्टविहिं उवदंसेति ३१ । तए णं ते बहवे देवकुमारा य देवकुमारीओ य समामेव समोसरणं करेति जाव दिव्वे देवरमणे पवत्ते यावि होत्था । तए णं ते बहवे देवकुमारा य देवकुमारीओ य समणस्स भगवओ महावीरस्स पुव्वभवचरियणिबद्धं च चवणचरियणिबद्धं च संहरणचरियनिबद्धं च जम्मणचरियनिबद्धं च अभिसेयचरियनिबद्धं च बालभावचरियनिबद्धं च जोव्वणचरियनिबद्धं च कामभोगचरियनिबद्धं च निक्खमणचरियनिबद्धं च तवचरणचरियनिबद्धं च णाणुप्पायचरियनिबद्धं च तित्थपवत्तणचरियपरिनिव्वाणचरियनिबद्धं च चरिमचरियनिबद्धं णांमं दिव्वं णट्टविहिं उवदंसेति ३२ । तए णं ते बहवे देवकुमारा य देवकुमारीओ य चउव्विहं वाइत्तं वाएत्ति-तं जहा-तत्तं वितत्तं घणं झुसिरं । तए णं ते बहवे देवकुमारा य देवकुमारियाओ य चउव्विहं गेयं गायंति तंजहा-उक्खित्तं पायत्तं मंदायं रोइयावसाणं च । तए णं ते बहवे देवकुमारा य देवकुमारियाओ य

चउव्विहं णट्ठविहं उवदंसंति तंजहा-अंचियं रिभियं आरभडं भसोलं च । तए णं ते बहवे देवकुमारा य देवकुमारियाओ य चउव्विहं अभिणयं अभिणएति तंजहा-दिट्ठितियं पाडितियं सामन्नोविणिवाइयं अंतोमज्जावसाणियं च । तए णं ते बहवे देवकुमारा य देवकुमारियाओ य गोयमाइयाणं समणाणं निगंथाणं दिव्वं देविट्ठिं दिव्वं देवजुइं दिव्वं देवाणुभावं दिव्वं बत्तीसइवद्धं नाडयं उवदंसित्ता समणं भगवंतं महावीरं तिकखुत्तो आयाहिणपयाहिणं करेति करित्ता वंदंति नमंसंति वंदित्ता नमंसित्ता जेणेव सूरियाभे देवे तेणेव उवागच्छंति उवागच्छित्ता सूरियाभं देवं करयलपरिगहियं सिरसावतं मत्थए अंजलिं कट्ठु जएणं विजएणं वद्धावेति वद्धावित्ता एवं आणत्तियं पच्चप्पिणंति ॥ २४ ॥ तए णं से सूरियाभे देवे तं दिव्वं देविट्ठिं दिव्वं देवजुइं दिव्वं देवाणुभावं पडिसाहरइ पडिसाहरेत्ता खणेणं जाए एगे एगभूए । तए णं से सूरियाभे देवे समणं भगवंतं महावीरं तिकखुत्तो आयाहिणपयाहिणं करेइ २ ता वंदइ नमंसइ वंदित्ता नमंसित्ता नियगपरिवालसद्धिं संपरियुडे तमेव दिव्वं जाणविमाणं दुरुहइ दुरुहित्ता जामेव दिसिं पाउब्भूए तामेव दिसिं पडिगए ॥ २५ ॥ भंते ! ति भयवं गोयमे समणं भगवंतं महावीरं वंदइ नमंसइ वंदित्ता नमंसित्ता एवं वयासी-सूरियाभस्स णं भंते ! देवस्स एसा दिव्वा देविट्ठी दिव्वा देवजुइं दिव्वे देवाणुभावे कहिं गए कहिं अणुप्पविट्ठे ? गोयमा ! सरीरं गए सरीरं अणुप्पविट्ठे । से केणट्ठेणं भंते ! एवं वुच्चइ सरीरं गए सरीरं अणुप्पविट्ठे ? गोयमा ! से जहा नामए कूडागारसाला सिया दुहओ लिता गुत्ता गुत्तदुवारा णिवाया णिवायगंभीरा, तीसे णं कूडागारसालाए अदूरसमंते एत्थ णं महेगे जणसमूहे चिट्ठइ, तए णं से जणसमूहे एगं महं अब्भवद्दलं वा वासवद्दलं वा महावायं वा एज्जमाणं पासइ पासित्ता तं कूडागारसालं अंतो अणुप्पविसित्ता णं चिट्ठइ, से तेणट्ठेणं गोयमा ! एवं वुच्चइ-‘सरीरं अणुप्पविट्ठे’ ॥ २६ ॥ कहिं णं भंते ! सूरियाभस्स देवस्स सूरियाभे नामं विमाणे पन्नते ? गोयमा ! जंबुदीवे दीवे मंदरस्स पव्वयस्स दाहिणेणं इमीसे रयणप्पमाए पुढवीए बहुसमरमणिज्जाओ भूमि-भागाओ उट्ठं चंदिमसूरियगहगणनक्खत्ततारारूवाणं बहूइं जोज्यणाइं बहूइं जोज्यणस-याइं एवं सहस्ससाइं सयसहस्ससाइं बहुइंओ जोज्यणकोडीओ जोज्यणसयकोडीओ जोज्यण-सहस्सकोडीओ बहुइंओ जोज्यणसयसहस्सकोडीओ बहुइंओ जोज्यणकोडाकोडीओ उट्ठं दूरं वीईवइत्ता एत्थ णं सोहम्मे नामं कप्पे पन्नते पाईणपडीणायए उदीणदाहिणवि-त्थिणे अद्धचंदसंठाणसंठिए अच्चिमालिभासरासिवण्णाभे असंखेज्जाओ जोज्यणकोडा-कोडीओ आयामविकखंमेणं असंखेज्जाओ जोज्यणकोडाकोडीओ परिकखेवेणं एत्थ णं सोहम्माणं देवाणं बत्तीसं विमाणावाससयसहस्ससाइं भवंतीति मक्खत्थायं । ते णं

विमाणा सव्वरयणामया अच्छा जाव पडिह्वा । तेसि णं विमाणाणं बहुमज्झदेस-  
भाए पंच वडिसया पत्ता तंजहा-असोगवडिसए सत्तवण्णवडिसए चंपगवडिसए  
चूयवडिसए मज्झे सोहम्मवडिसए ते णं वडिसगा सव्वरयणामया अच्छा जाव  
पडिह्वा । तस्स णं सोहम्मवडिसगस्स महाविमाणस्स पुरथिमेणं तिरियं असंखे-  
ज्जाइं जोयणसयसहस्साइं वीइवइत्ता एत्थ णं सूरियाभस्स देवस्स सूरियाभे णामं  
विमाणे पण्णत्ते अद्धतेरसजोयणसयसहस्साइं आयासविकखंभेणं अउणयालीसं च  
सयसहस्साइं बावघं च सहस्साइं अट्ट य अडयालजोयणसए परिकखेवेणं । से णं  
एगेणं पागारेणं सव्वओ समंता संपरिक्खित्ते से णं पागारे तिणिण जोयणसयाइं  
उड्ढं उच्चत्तेणं, मूले एगं जोयणसयं विक्खंभेणं, मज्झे पन्नासं जोयणाइं विक्खंभेणं  
उप्पि पणवीसं जोयणाइं विक्खंभेणं । मूले वित्थिण्णे मज्झे संखित्ते उप्पि तणुए  
गोपुच्छसंठाणसंठिए सव्वरयणामए अच्छे जाव पडिह्वे से णं पागारे णाणाविहप-  
चवण्णेहिं कविसीसएहिं उवसोमिए तं जहा-कण्हेहि य नीलेहि य लोहिएहिं हालि-  
हेहिं सुक्किहेहिं कविसीसएहिं । ते णं कविसीसगा एगं जोयणं आयामेणं अद्धजोयणं  
विक्खंभेणं देसूणं जोयणं उड्ढं उच्चत्तेणं सव्वरयणामया अच्छा जाव पडिह्वा ।  
सूरियाभस्स णं विमाणस्स एगमेगाए बाहाए दारसहस्सं दारसहस्सं भवतीति  
मक्खायं, ते णं दारा पंच जोयणसयाइं उड्ढं उच्चत्तेणं अड्ढाज्जाइं जोयणसयाइं  
विक्खंभेणं तावइयं चेव पवेसेणं सेया वरकणगथूभियागा ईहामियउसभतुरगणरमगर-  
विहगवालगकिन्नररुसरभचमरकुंजरवणलयपडमलयमत्तिवित्ता खंमुग्गयवरवयवेइ-  
यापरिगयाभिरामा विजाहरजमलजुयलजंतजुत्ता विव अचीसहस्समालणीया ह्वगस-  
हस्सकलिया भिसमाणा भिब्भिसमाणा चक्खुल्लोयणलेसा सुहफासा सस्सिरीयरूवा ।  
वच्चो दाराणं तेसि होइ तंजहा-वइरामया णिम्मा रिद्धामया पइट्ठाणा वेरुलियमया  
खंभा जायह्वोवचियपवरपंचवन्नमणिरयणकोट्टिमत्तला हंसगब्भमया एलुया गोमेज्ज-  
मया इंदकीला लोहियक्खमईओ चेडाओ जोईरसमया उत्तरंगा लोहियक्खमईओ  
सूईओ वयरामया संघी नाणामणिमया समुग्गया वयरामया अग्गला अग्गलपा-  
साया रययामयाओ आवत्तणपेडियाओ अंकुत्तरपासगा निरंतरियघणकवाडा भित्तीसु  
चेव भित्तिगुलिया छप्पन्ना तिणिण होंति गोमाणसिया तत्तिया णाणामणिरयणवाल-  
ह्वगलीलट्टियसालभंजियागा वयरामया कूडा रययामया उस्सेहा सव्वतवणिज्जमया  
उल्लोया णाणामणिरयणजालपंजरमणिवंसगलोहियक्खपडिवंसगरययभोमा अंकांमया  
पक्खा पक्खवाहाओ जोईरसमया वंसा वंसकवेल्लुयाओ रययामईओ पडियाओ  
जायह्वमईओ ओहाडणीओ वइरामईओ उवरिपुच्छणीओ सव्वसेयरययामए छायेणे

अंकमयकणगकूडतवणिज्जथूभियागा सेया संखतलविमलनिम्मलदहिधणगोखीरफेण-  
रययणिगरप्पगासा तिलगरयणद्धचंदचित्ता नाणामणिदामालंकिया अंतो वहिं च  
सण्हा तवणिजवाल्यापत्थडा सुहकासा सस्सिरीयह्वा पासाईया दरिसणिजा  
अभिल्हा पडिल्हा ॥ २७ ॥ तेसि णं दारारणं उभओ पासे दुहओ गिनीहियाए  
सोलस सोलस चंदणकलसपरिवाडीओ पन्नताओ, ते णं चंदणकलसा वरकमलपड-  
ट्टाणा सुरभिवरवारिपडिपुण्णा चंदणकयचच्चागा आविद्धकंटेगुणा पउमुप्पलपिहाणा  
सव्वरयणामया अच्छा जाव पडिल्हा महया महया ईदकुंभसमाणा पन्नता समणा-  
उसो ! । तेसि णं दारारणं उभओ पासे दुहओ गिनीहियाए सोलस सोलस णाग-  
दन्तपरिवाडीओ पन्नताओ, ते णं णागदंता मुत्ताजालंतरुसियहेमजालगवक्खजा-  
लखिखिणीघंटाजालपरिक्खत्ता अब्भुग्गया अभिणिसिट्ठा तिरियसुसंपरिग्गहिया  
अहेपन्नगद्धल्हा पन्नगद्धसंठाणसंठिया सव्ववयरामया अच्छा जाव पडिल्हा महया  
महया गयदंतसमाणा पन्नता समणाउसो ! । तेसु णं णागदंतएसु बहवे किण्हसुतवद्धा  
वग्घारियमल्लदामकलावा णील० लोहिय० हालिद्० सुक्खिसुतवद्धा वग्घारियमल्लदाम-  
कलावा, ते णं दामा तवणिज्जलंवूसगा सुवन्नपयरगमंडिया नाणाविहमणिरयणविवि-  
हहारउवसोभियसमुदया जाव सिरीए अईव अईव उवसोभेमाणा चिट्ठंति । तेसि  
णं णागदंताणं उवरिं अजाओ सोलस सोलस नागदंतपरिवाडीओ पन्नता ते णं  
णागदंता तं चेव जाव गयदंतसमाणा पन्नता समणाउसो ! । तेसु णं णागदंतएसु  
बहवे रययामया सिक्का पन्नता, तेसु णं रययामएसु सिक्काएसु बहवे वैरुलियामईओ  
धूवघडीओ प० ताओ णं धूवघडीओ कालागुरुपवरकुंदुरुक्खधूवमधमधंतगंधुदु-  
याभिरामाओ सुगंधवरगंधियाओ गंधवट्ठिभूयाओ ओरालेणं मणुण्णं मणहरेणं  
घाणमणिव्वुइकरेणं गंधेणं ते एसे सव्वओ समंता आपूरेमाणा आपूरेमाणा  
जाव चिट्ठंति । तेसि णं दारारणं उभओ पासे दुहओ गिनीहियाए सोलस सोलस  
सालभंजियापरिवाडीओ पन्नताओ, ताओ णं सालभंजियाओ लीलट्टियाओ सुपड-  
ट्टियाओ सुअलंकियाओ णाणाविहरागवसणाओ णाणामल्लपिणद्धाओ मुट्ठिगिज्जसुम-  
ज्जाओ आमेलाजमलजुयलवट्टियअब्भुज्जयपीणरइयसंठियपीवरपओहराओ रत्तावं-  
गाओ असियकेसीओ मिउविसयपसत्थलक्खणसंवेल्लियग्गसिरयाओ ईसिं असोगवर-  
पायवसमुट्टियाओ वामहत्थग्गहियग्गसालाओ ईसिं अद्धच्छिक्कडक्खचिट्ठिएणं लस-  
माणीओ विव चक्खुल्लेयणलेसेहि य अन्नमन्नं खिज्जमाणीओ विव पुडविपरिणामाओ  
सासयभावमुवगयाओ चन्दाणणाओ चंदविलासिणीओ चंदद्धसमणिडालाओ चंदाहि-  
यसोमदंसणाओ उक्का विव उज्जोवेमाणाओ विज्जुघणमिरियसूरदिप्पंततेयअहिययरस-

निगासाओ सिंगारागारचारुवेसाओ पासाइयाओ जाव चिट्ठंति । तेसि णं दाराणं  
 उभओ पासे दुहओ णिसीहियाए सोलस सोलस जालकडगपरिवाडीओ पन्नत्ता, ते  
 णं जालकडगा सव्वरयणामया अच्छा जाव पडिह्वा । तेसि णं दाराणं उभओ  
 पासे दुहओ निसीहियाए सोलस सोलस घंटापरिवाडीओ पन्नत्ता, तासि णं घंटाणं  
 इमेयारुवे वन्नावासे पन्नत्ते, तंजहा-जंवूणयामईओ घंटाओ वयरामयाओ लालाओ  
 णाणामणिमया घंटापासा तवणिज्जमइयाओ संखलाओ रययामयाओ रज्जूओ ।  
 ताओ णं घंटाओ ओहस्सराओ मेहस्सराओ हंसस्सराओ कुंचस्सराओ सीहस्सराओ  
 दुंदुहिस्सराओ णंदिस्सराओ णंदिघोसाओ मंजुस्सराओ मंजुघोसाओ सुस्सराओ  
 सुस्सरघोसाओ उरालेणं मणुत्तेणं मणहरेणं कन्नमणनिव्वुइकरेणं सहेणं ते पएसे  
 सव्वओ समंता आपूरेमाणाओ आपूरेमाणाओ जाव चिट्ठंति । तेसि णं दाराणं  
 उभओ पासे दुहओ णिसीहियाए सोलस सोलस वणमालापरिवाडीओ पन्नत्ताओ,  
 ताओ णं वणमालाओ णाणामणिमयदुमलयकिसलयपल्लवसमाउलाओ छप्पयपरिभुज-  
 माणसोहंतसरिसरीयाओ पासाइयाओ... । तेसि णं दाराणं उभओ पासे दुहओ  
 णिसीहियाए सोलस सोलस पगंठगा पन्नत्ता, ते णं पगंठगा अड्ढाइजाइं जोयणसयाइं  
 आयामविक्खंभेणं पणवीसं जोयणसयं बाह्लेणं सव्ववयरामया अच्छा जाव पडि-  
 ह्वा । तेसि णं पगंठगाणं उवरिं पत्तेयं पत्तेयं पासायवडेंसगा पन्नत्ता, तेणं पासाय-  
 वडेंसगा अड्ढाइजाइं जोयणसयाइं उड्डं उच्चत्तेणं पणवीसं जोयणसयं विक्खंभेणं  
 अब्भुग्गयमूसियपहसिया विव विविहमणिरयणभत्तिचित्ता वाउद्धयविजयवेजयंतपडा-  
 गच्छत्ताइच्छत्तकलिया तुंगा गगणतलमणुलिहंतसिहरा जालंतररयणपंजरुम्मिलिय व्व  
 मणिक्रणगथूभियागा वियसियसयवत्तपौडरीयतिलगरयणद्धचंदचित्ता णाणामणिदामा-  
 लंकिया अंतो बहिं च सण्हा तवणिज्जवालुयापत्थडा सुहफासा सस्सिसरीयरुवा पासा-  
 इया दरिसणिज्जा जाव दामा । तेसि णं दाराणं उभओ पासे सोलस सोलस तोरण  
 पन्नत्ता, णाणामणिमया णाणामणिमएसु खंभेसु उवणिविट्ठसन्निविट्ठा जाव पउमह-  
 त्थगा । तेसि णं तोरणानं पत्तेयं पुरओ दो दो सालभंजियाओ पन्नत्ताओ, जहा हेट्ठा  
 तहेव । तेसि णं तोरणानं पुरओ नागदंता पन्नत्ता जहा हेट्ठा जाव दामा । तेसि  
 णं तोरणानं पुरओ दो दो ह्यसंघाडा गयसंघाडा नरसंघाडा किन्नरसंघाडा किंपुरि-  
 ससंघाडा महोरगसंघाडा गंधव्वसंघाडा उसभसंघाडा सव्वरयणामया अच्छा जाव  
 पडिह्वा, एवं पंतीओ वीही मिहुणाइं । तेसि णं तोरणानं पुरओ दो दो पउमलयाओ  
 जाव सामलयाओ णिच्चं कुसुमियाओ सव्वरयणामया अच्छा जाव पडिह्वा । तेसि णं  
 तोरणानं पुरओ दो दो दिसासोवत्थिया पन्नत्ता सव्वरयणामया अच्छा जाव पडि-

रूवा । तेसि णं तोरणणं पुरओ दो दो चंदणकलसा पञ्चत्ता, ते णं चंदणकलसा  
वरकमलपड्डाणा तहेव । तेसि णं तोरणणं पुरओ दो दो भिंगारा पञ्चत्ता, ते णं  
भिंगारा वरकमलपड्डाणा जाव महया मत्तगयमुहागिइसमाणा पञ्चत्ता समणाउसो ! ।  
तेसि णं तोरणणं पुरओ दो दो आयंसा पञ्चत्ता, तेसि णं आयंसाणं इमेयाह्वे वच्चा-  
वासे पञ्चत्ते, तंजहा-तवणिज्जमया पगंठगा अंकमया मंडला अणुघसिथनिम्मलाए  
छायाए समणुवद्धा चंदमंडलपडिणिकासा महया महया अद्धकायसमाणा पञ्चत्ता सम-  
णाउसो ! । तेसि णं तोरणणं पुरओ दो दो वइरनाभथाला पञ्चत्ता अच्छतिच्छडिय-  
सालितंदुल्लणहसंदिद्धपडिपुच्चा इव चिट्ठंति सव्वजंबूणयमया जाव पडिरूवा महया  
महया रहचक्कवालसमाणा पञ्चत्ता समणाउसो ! । तेसि णं तोरणणं पुरओ दो दो  
पाईओ, ताओ णं पाईओ सच्छेदगपरिहत्थाओ णाणाविहस्स फलहरियगस्स बहु-  
पडिपुच्चाओ विध चिट्ठंति सव्वरयणामईओ अच्छाओ जाव पडिरूवाओ महया महया  
गोकल्लिजरचक्कसमाणीओ पञ्चत्ताओ समणाउसो ! । तेसि णं तोरणणं पुरओ दो दो  
सुपड्डा पञ्चत्ता णाणाविहमंडविरइया इव चिट्ठंति सव्वरयणामया अच्छा जाव पडि-  
रूवा । तेसि णं तोरणणं पुरओ दो दो मणोगुलियाओ पञ्चत्ताओ, तासु णं मणो-  
गुलियासु बहवे सुवन्नरुप्पमया फलगा पञ्चत्ता, तेसु णं सुवन्नरुप्पमएसु फलगेसु  
बहवे वयरामया नागदंतया पञ्चत्ता, तेसु णं वयरामएसु नागदंतएसु बहवे वय-  
रामया सिक्कगा पञ्चत्ता, तेसु णं वयरामएसु सिक्कगेसु किण्हसुत्तसिक्कगवच्छिया  
णीलसुत्तसिक्कगवच्छिया लोहियसुत्तसिक्कगवच्छिया हालिहसुत्तसिक्कगवच्छिया सुक्किह-  
सुत्तसिक्कगवच्छिया बहवे वायकरगा पञ्चत्ता सव्ववेरुलियमया अच्छा जाव पडिरूवा ।  
तेसि णं तोरणणं पुरओ दो दो चित्ता रयणकरंडगा पञ्चत्ता, से जहा णामए रज्जो  
चाउरंतचक्कवट्टिस्स चित्ते रयणकरंडए वेरुलियमणिफलिहपडलपच्चोयडे साए पहाए  
ते पएसे सव्वओ समंता ओभासइ उज्जोवेइ तवइ पभासइ एवामेव ते वि चित्ता  
रयणकरंडगा साए पभाए ते पएसे सव्वओ समंता ओभासंति उज्जोवेति तव्वंति  
पभासंति । तेसि णं तोरणणं पुरओ दो दो हयकंठा गयकंठा नरकंठा किन्नरकंठा  
किंपुरिसकंठा महोरगकंठा गंधव्वकंठा उसभकंठा सव्वरयणामया अच्छा जाव पडि-  
रूवा । तेसि णं तोरणणं पुरओ दो दो पुप्फचंगेरीओ मल्लचंगेरीओ चुन्नचंगेरीओ  
गंधचंगेरीओ वत्थचंगेरीओ आभरणचंगेरीओ सिद्धत्थचंगेरीओ पञ्चत्ताओ सव्वरयणा-  
मयाओ अच्छाओ जाव पडिरूवाओ । तासु णं पुप्फचंगेरियासु जाव सिद्धत्थचंगेरीसु  
दो दो पुप्फपडलगाइ जाव सिद्धत्थपडलगाइ सव्वरयणामयाइ अच्छाइ जाव पडि-  
रूवाइ । तेसि णं तोरणणं पुरओ दो दो सीहासणा पण्णत्ता । तेसि णं सीहासणाणं



वण्णओ जाव दामा । तेसि णं तोरणानं पुरओ दो दो रूपमया छत्ता पन्नत्ता, ते णं छत्ता वेरुलियविमलदंडा जंबूणयकन्निया वहरसंधी सुत्ताजालपरिगया अट्टसहस्स-वरकंचणसलागा दहरमलयसुगंधिसव्वोउयसुरभिसीयलच्छाया मंगलमत्तिचित्ता चंदागारोवमा । तेसि णं तोरणानं पुरओ दो दो चामराओ पन्नत्ताओ, ताओ णं चामराओ चंदप्पमवेरुलियवयरनानामणिरयणखचियचित्तदण्डाओ सुहुमरययदी-हवालाओ संखंककुंददगरयअमयमहियफेणपुंजसन्निगासाओ सव्वरयणामयाओ अच्छाओ जाव पडिह्वाओ । तेसि णं तोरणानं पुरओ दो दो तेह्लसमुग्गा कोट्ट-समुग्गा पत्तसमुग्गा चोयगसमुग्गा तगरसमुग्गा एलासमुग्गा हरियालसमुग्गा हिंगुलयसमुग्गा मणोसिलासमुग्गा अंजणसमुग्गा सव्वरयणामया अच्छा जाव पडिह्वा ॥ २८ ॥ सूरियाभे णं विमाणे एगमेगे दारे अट्टसयं चक्कज्झयाणं अट्ट-सयं मिगज्झयाणं गरुडज्झयाणं छत्तज्झयाणं पिच्छज्झयाणं सउणिज्झयाणं सीह-ज्झयाणं उसभज्झयाणं अट्टसयं सेयाणं चउविसाणाणं नागवरकेऊणं एवामेव सपुव्वावरेणं सूरियाभे विमाणे एगमेगे दारे असीयं असीयं केउसहस्सं भव-तीति मक्खायं । तेसि णं दाराणं एगमेगे दारे पण्णट्ठिं पण्णट्ठिं भोमा पन्नत्ता, तेसि णं भोमाणं भूमिभागा उल्लोया य भाणियव्वा, तेसि णं भोमाणं बहुमज्झ-देसभागे पत्तेयं पत्तेयं सीहासणे, सीहासणवन्नओ सपरिवारो, अवसेसेसु भोमेसु पत्तेयं पत्तेयं भ्दासणा पन्नत्ता । तेसि णं दाराणं उत्तमागारा सोलसविहेहिं रयणेहिं उवसोहिया, तंजहा-रयणेहिं जाव रिट्ठेहिं, तेसि णं दाराणं उप्पिं अट्टट्ट मंगलगा सज्झया जाव छत्ताइछत्ता एवामेव सपुव्वावरेणं सूरियाभे विमाणे चत्तारि दारस-हस्सा भवंतीति मक्खायं । सूरियाभस्स विमाणस्स चउडिंसि पंच जोयणसयाइं अवाहाए चत्तारि वणसंडा पन्नत्ता, तंजहा-असोगवणे, सत्तिवणे, चंपगवणे, चूयगवणे पुरत्थिमेणं असोगवणे दाहिणेणं सत्तवन्नवणे पच्चत्थिमेणं चंपगवणे उत्तरेणं चूयग-वणे । ते णं वणखंडा साइरेगाइं अद्धतेरसजोयणसयसहस्साइं आयमेणं पंच जोयणसयाइं विक्खंभेणं पत्तेयं पत्तेयं पागारपरिखित्ता किण्हा किण्होभासा नीला नीलोभासा हरिया हरिओ० सीया सीओ० निद्धा निद्धो० तिक्वा तिक्वो० किण्हा किण्हच्छाया नीला नी० हरिया ह० सीया सी० निद्धा नि० घणकडितडियच्छाया रम्मा सहमेहनिउरंभवूया ते णं पायवा मूलमंतो वन्नओ ॥ २९ ॥ तेसि णं वणसं-डाणं अंतो बहुसमरमणिज्जा भूमिभागा पण्णत्ता से जहा नामए आलिगपुक्खरे इ वा जाव पाणाविहपंचवण्णेहिं मणीहि य तणेहि य उवसोहिया, तेसि णं गंधो फासो णेयव्वो जहकमं । तेसि णं भंते ! तणाण य मणीण य पुव्वावरदाहिणुत्तरा-

गएहिं वाएहिं मंदायं मंदायं एइयाणं वेइयाणं कंपियाणं चालियाणं फंदियाणं  
घट्टियाणं खोभियाणं उदीरियाणं केरिए सहे भवइ ? गोयमा ! से जहानामए  
सीयाए वा संदमाणीए वा रहस्स वा सच्छत्तस्स सज्जयस्स सघट्टस्स सपडागस्स  
सतोरणवरस्स सनंदिघोसस्स सखिंखिणिहेमजालपरिखित्तस्स हेमवयचित्तिणिस्क-  
णगणिज्जुत्तदाहयायस्स सुसंपिणद्धचक्रमंडलधुरागस्स कालायससुकयणेमिजंतकम्मस्स  
आइण्णवरतुरगसुसंपत्तस्स कुसलणरच्छेयसारहिसुसंपरिग्गहियस्स सरसयवत्तीसतो-  
णपरिमंडियस्स सकंकडावयंसगस्स सचावसरपहरणआवरणभरियजोहजुज्जसज्जस्स  
रायंगंणंसि वा रायंतैउरंसि वा रम्मंसि वा मणिकुट्टिमत्तलंसि अभिक्खणं अभिक्खणं  
अभिघट्टिज्जमाणस्स वा नियट्टिज्जमाणस्स वा ओराला मणोण्णा मणोहरा कण्णमण-  
निवुइकरा सद्दा सव्वओ समंता अभिणिससवंति, भवेयाह्वे सिया ? णो इण्ठे समट्ठे ।  
से जहा णामए वेयालियवीणाए उत्तरमंदासुच्छियाए अंके सुपइट्टियाए कुसलनर-  
नारिसुसंपरिग्गहियाए चंदणसारनिम्मियकोणपरिघट्टियाए पुव्वरत्तावरत्तकालसमयंसि  
मंदायं मंदायं वेइयाए पवेइयाए चालियाए घट्टियाए खोभियाए उदीरियाए ओराला  
मणुण्णा मणहरा कण्णमणनिवुइकरा सद्दा सव्वओ समंता अभिणिससवंति,  
भवेयाह्वे सिया ? णो इण्ठे समट्ठे । से जहा नामए किच्चराण वा किंपुरिसाण  
वा महोरगाण वा गंधव्वाण वा भइसालवणगयाणं वा नंदणवणगयाणं वा सोमण-  
सवणगयाणं वा पंडगवणगयाणं वा हिमवंतमलयमंदरगिरिगुहासमन्नागयाणं वा  
एगओ सन्नहियाणं समागयाणं सन्निसन्नाणं समुवविट्ठाणं पसुइयपक्कूलियाणं गीय-  
रइगंधव्वहसियमणाणं गज्जं पज्जं कत्थं गेयं पयबद्धं पायबद्धं उक्खित्तं पायंतं मंदायं  
रोइयावसाणं सत्तसरसमन्नागयं छद्दोसविप्पमुक्कं एक्कारसालंकारं अट्ठगुणोववेयं,  
गुंजाऽव्वंक्खुहरोवगूढं रत्तं तिट्ठाणकरणसुद्धं पगीयाणं, भवेयाह्वे ? हंता सिया ॥ ३० ॥  
तेसि णं वणसंडाणं तत्थ तत्थ देसे देसे तहिं तहिं बहुइओ खुड्डाखुड्डियाओ  
वावियाओ पुक्खरिणीओ दीहियाओ गुंजालियाओ सरपंतियाओ सरसरपंतियाओ  
बिलपंतियाओ अच्छाओ सण्हाओ रययामयकूलाओ समतीराओ वयरामयपासाणाओ  
तवणिज्जतलाओ सुवण्णसुज्जरययवाल्याओ वेरुलियमणिफालियपडलपच्चोयडाओ  
सुहोयारसुउत्ताराओ णाणामणितित्थसुबद्धाओ चउक्कोणाओ आणुपुव्वसुजायवप्प-  
गंभीरसीयलजलाओ संछन्नपत्तभिसमुणालाओ बहुउप्पलकुमुयनल्लिणसुभगसोगंधिय-  
पोंडरीयसयवत्तसहस्सपत्तकेसरफुल्लोवचियाओ छप्पयपरिभुजमाणकमलाओ अच्छवि-  
मलसलिलपुण्णाओ पडिहत्थभमंतमच्छक्कभअणेगसउणमिहुणगपविचरियाओ पत्तेयं  
पत्तेयं पउमवरवेइयापरिक्खित्ताओ पत्तेयं पत्तेयं वणसंडपरिक्खित्ताओ अप्पेगइयाओ

आसवोयगाओ अप्पेगइयाओ वारुणोयगाओ अप्पेगइयाओ खीरोयगाओ अप्पेग-  
इयाओ घओयगाओ अप्पेगइयाओ खोदोयगाओ अप्पेगइयाओ पगईए उयगरसेणं  
पण्णत्ताओ पासाइयाओ दरिसणिज्जाओ अभिरूवाओ पडिरूवाओ । तासि णं वावीणं  
जाव बिलपंतीणं पत्तेयं पत्तेयं चउद्दिसिं चत्तारि तिसोवाणपडिरूवगा पण्णत्ता, तेसि णं  
तिसोवाणपडिरूवगाणं अयमेयारूवे वण्णावासे पण्णत्ते तंजहा-वइरामया नेमा...  
तोरणाणं झया छत्ताइछत्ता यं णेयव्वा । तासि णं खुड्डाखुड्डियाणं वावीणं जाव  
बिलपंतियाणं तत्थ तत्थ देसे देसे तहिं तहिं बहवे उप्पायपव्वयगा नियइपव्वयगा  
जगईपव्वयगा दारुइज्जपव्वयगा दगमंडवा दगमंचगा दगमालगा दगपासायगा उसड्डा  
खुड्डुखुड्डुगा अंदोलगा पक्खंदोलगा सव्वरयणामया अच्छा जाव पडिरूवा । तेसु णं  
उप्पायपव्वएसु जाव पक्खंदोलएसु बहूइं हंसासणाइं कौंचासणाइं गरुलासणाइं उण्ण-  
यासणाइं पणयासणाइं वीहासणाइं भद्दासणाइं पक्खासणाइं मगरासणाइं उसभासणाइं  
सीहासणाइं पउमासणाइं दिसासोवत्थियाइं सव्वरयणामयाइं अच्छाइं जाव पडिरूवाइं ।  
तेसु णं वणसंडेसु तत्थ तत्थ देसे देसे तहिं तहिं बहवे आलियघरगा मालियघरगा  
कयलिघरगा लयाघरगा अच्छणघरगा पिच्छणघरगा मज्जणघरगा पसाहणघरगा  
गब्भघरगा मोहणघरगा सालघरगा जालघरगा कुसुमघरगा चित्तघरगा गंधव्वघरगा  
आयंसघरगा सव्वरयणामया अच्छा जाव पडिरूवा । तेसु णं आलियघरगेसु जाव  
आयंसघरगेसु तहिं तहिं घरएसु बहूइं हंसासणाइं जाव दिसासोवत्थिआसणाइं  
सव्वरयणामयाइं जाव पडिरूवाइं । तेसु णं वणसंडेसु तत्थ तत्थ देसे २ तहिं तहिं  
बहवे जाइमंडवगा जूहियामंडवगा मल्लियामंडवगा णवमालियामंडवगा वासंति-  
मंडवगा दहिवासुयमंडवगा सूरिल्लियमंडवगा तंवोलिमंडवगा मुद्धियामंडवगा णाग-  
लियामंडवगा अइमुत्तयलयामंडवगा अप्फोयामंडवगा मालुयामंडवगा अच्छा सव्वर-  
यणामया जाव पडिरूवा । तेसु णं जाइमण्डवएसु जाव मालुयामंडवएसु बहवे  
पुढविसिलापट्टगा हंसासणसंठिया जाव दिसासोवत्थियासणसंठिया अणे य बहवे  
वरसयणासणविसिट्ठसंठाणसंठिया पुढविसिलापट्टगा पण्णत्ता समणाउसो ! आईणग-  
रूयबूरणवणीयतूलफासा सव्वरयणामया अच्छा जाव पडिरूवा । तत्थ णं बहवे  
वेमाणिया देवा य देवीओ य आसयंति सयंति चिट्ठंति निसीयंति तुयट्ठंति रमंति  
रलंति कीलंति किट्ठंति मोहंति पुरा पोरणाणं सुचिण्णाण सुपरिकंताण सुभाण  
कडाण कम्माण कल्लाण कल्लाणं फलविवागं पच्चणुभवमाणा विहरंति ॥ ३१ ॥  
तेसि णं वणसंडाणं बहुमज्जदेसभाए पत्तेयं पत्तेयं पासायवडेंसगा पण्णत्ता, ते णं  
पासायवडेंसगा पंच जोयणसयाइं उड्डं उच्चत्तेणं अड्ढाइजाइं जोयणसयाइं विक्खभेणं

अब्भुग्गयमूसियपहसिया इव तद्देव बहुसमरमणिज्जभूमिभागो उल्लोओ सीहासणं  
 सपरिवारं तत्थ णं चत्तारि देवा महिद्धिया जाव पल्लिओवमद्धिया परिवसंति,  
 तंजहा-असोए सत्तपणे चंपए चूए । सूरियाभस्स णं देवविमाणस्स अंतो बहुसमर-  
 मणिजे भूमिभागे पणत्ते, तंजहा-वणसंडविहूणे जाव वहवे वेमाणिया देवा देवीओ  
 य आसयंति जाव विहरंति, तस्स णं बहुसमरमणिज्जस्स भूमिभागस्स बहुमज्जदेसे  
 एत्थ णं महेगे उवगारियालयणे पणत्ते, एगं जोयणसयसहस्सं आयामविकखंभेणं  
 तिणिण जोयणसयसहस्साईं सोलस सहस्साईं दोणिण य सत्तावीसं जोयणसए तिन्नि  
 य कोसे अट्ठावीसं च धणुसयं तेरस य अंगुलाई अदंगुलं च किंकिविसेसूणं  
 परिकखेवेणं, जोयणं बाहल्लेणं, सव्वजंवूणयामए अच्छे जाव पडिरूवे ॥ ३२ ॥ से  
 णं एगाए पउमवरवेइयाए एगेण य वणसंडेण सव्वओ समंता संपरिखित्ते, सा  
 णं पउमवरवेइया अद्धजोयणं उद्धं उच्चत्तेणं पंच धणुसयाईं विकखंभेणं उवयारियले-  
 णसमा परिकखेवेणं, तीसे णं पउमवरवेइयाए इमेयारूवे वण्णावासे पणत्ते, तंजहा-  
 वयरामया० सुवणरुप्पमया फलया नाणामणिमया कलेवरा नाणामणिमया कलेवर-  
 संघाडगा नाणामणिमया रूवा नाणामणिमया रुवसंघाडगा अंक्रामया० उवरिपुच्छणी  
 सव्वरयणामए अच्छायणे, सा णं पउमवरवेइया एगमेगेणं हेमजालेणं ए० गवक्ख-  
 जालेणं ए० खिंखिणीजालेणं ए० घंटाजालेणं ए० मुत्ताजालेणं ए० मणिजालेणं  
 ए० कणगजालेणं ए० रयणजालेणं ए० पउमजालेणं सव्वओ समंता संपरिखित्ता,  
 ते णं जाला तवणिजलंबूसगा जाव चिट्ठति । तीसे णं पउमवरवेइयाए तत्थ तत्थ  
 देसे २ तहिं तहिं वहवे हयसंघाडा जाव उसभसंघाडा सव्वरयणामया अच्छा जाव  
 पडिरूवा पासईया जाव वीहीओ पंतीओ मिहुणाणि लयाओ से केणट्ठेणं भंते !  
 एवं वुच्चइ-पउमवरवेइया पउमवरवेइया ? गोयमा ! पउमवरवेइयाए णं तत्थ  
 तत्थ देसे २ तहिं तहिं वेइयासु वेइयाबाहासु य वेइयफलएसु य वेइयपुडंतरेसु य  
 खंभेसु खंभबाहासु खंभसीसेसु खंभपुडंतरेसु सईसु सईमुहेसु सईफलएसु सईपुडं-  
 तरेसु पक्खेसु पक्खबाहासु पक्खपेरंतरेसु पक्खपुडंतरेसु बहुयाईं उप्पलाई पउमाईं  
 कुमुयाईं णल्लिगाईं सुभगाईं सोगंधियाईं पुंडरीयाईं महापुंडरीयाईं सयवत्ताईं सहस्स-  
 वत्ताईं सव्वरयणामयाईं अच्छाईं० पडिरूवाईं महया वासिकल्लतसमाणाईं पणत्त ईं  
 समणाउसो ! से एएणं अट्ठेणं गोयमा ! एवं वुच्चइ-पउमवरवेइया पउमवरवेइया ।  
 पउमवरवेइया णं भंते ! किं सासया असासया ? गोयमा ! सिय सासया सिय  
 असासया । से केणट्ठेणं भंते ! एवं वुच्चइ-सिय सासया सिय असासया ? गोयमा !  
 दव्वट्ठयाए सासया, वज्रपज्जवेहिं गंधपज्जवेहिं रसपज्जवेहिं फासपज्जवेहिं असासया,

से एएणट्ठेणं गोयमा ! एवं वुच्चइ सिय सासया सिय असासया । पउमवरवेइया  
 णं भंते ! कालओ केवच्चिरं होइ ? गोयमा ! ण कयावि णासि ण कयावि णत्थि ण  
 कयावि न भविस्सइ, भुवि च भवइ य भविस्सइ य, धुवा णियया सासया अक्खया  
 अव्वया अवट्ठिया णिच्चा पउमवरवेइया । सा णं पउमवरवेइया एगेणं वणसंडेणं  
 सव्वओ समंता संपरिक्खित्ता । से णं वणसंडे देसूणाइं दो जोयणाइं चक्कवालवि-  
 क्खंभेणं उवयारियालेणसमे परिक्खेवेणं वणसंडवण्णओ भाणियव्वो जाव विहरंति ।  
 तस्स णं उवयारियालेणस्स चउहिसिं चत्तारि तिसोवाणपडिह्वगा पण्णत्ता वण्णओ  
 तोरणा झया छत्ताइच्छत्ता । तस्स णं उवयारियालयणस्स उवरिं बहुसमरमणिज्जे  
 भूमिभागे पण्णत्ते जाव मणीणं फासो ॥ ३३ ॥ तस्स णं बहुसमरमणिज्जस्स भूमि-  
 भागस्स बहुमज्झदेसभाए एत्थ णं महेगे मूलपासायवडेंसए पण्णत्ते, से णं मूलपा-  
 सायवडेंसए पंच जोयणसयाइं उड्डं उच्चत्तेणं अट्ठइज्जाइं जोयणसयाइं विक्खंभेणं  
 अब्भुग्गयमूसिय वण्णओ भूमिभागो उल्लोओ सीहासणं सपरिवारं भाणियव्वं अट्ठट्ठ  
 मंगलगा झया छत्ताइच्छत्ता । से णं मूलपासायवडेंसगे अण्णेहिं चउहिं पासायवडें-  
 सएहिं तयद्धुच्चत्तप्पमाणमेत्तेहिं सव्वओ समंता संपरिक्खित्ते, ते णं पासायवडेंसगा  
 अट्ठइज्जाइं जोयणसयाइं उड्डं उच्चत्तेणं पणवीसं जोयणसयं विक्खंभेणं जाव वण्णओ  
 ते णं पासायवडेंसया अण्णेहिं चउहिं पासायवडेंसएहिं तयद्धुच्चत्तप्पमाणमेत्तेहिं  
 सव्वओ समंता संपरिक्खित्ता, ते णं पासायवडेंसया पणवीसं जोयणसयं उड्डं  
 उच्चत्तेणं बासट्ठिं जोयणाइं अद्धजोयणं च विक्खंभेणं अब्भुग्गयमूसिय वण्णओ  
 भूमिभागो उल्लोओ सीहासणं सपरिवारं भाणियव्वं अट्ठट्ठ मंगलगा झया छत्ता-  
 इच्छत्ता ते णं पासायवडेंसगा अण्णेहिं चउहिं पासायवडेंसएहिं तयद्धुच्चत्तप्पमाण-  
 मेत्तेहिं सव्वओ समंता संपरिक्खित्ता, ते णं पासायवडेंसगा बासट्ठिं जोयणाइं  
 अद्धजोयणं च उड्डं उच्चत्तेणं एकतीसं जोयणाइं कोसं च विक्खंभेणं वण्णओ  
 उल्लोओ सीहासणं सपरिवारं पासाय० उवरिं अट्ठट्ठ मंगलगा झया छत्ताइच्छत्ता ॥ ३४ ॥  
 तस्स णं मूलपासायवडेंसयस्स उत्तरपुरत्थिमेणं एत्थ णं सभा सुहम्मा पण्णत्ता, एणं  
 जोयणसयं आयामेणं पण्णासं जोयणाइं विक्खंभेणं वावत्तरिं जोयणाइं उड्डं उच्चत्तेणं  
 अणेगखम्म... जाव अच्छरगण... पासाईया० । सभाए णं सुहम्माए तिदिसिं तओ  
 दारा पण्णत्ता, तंजहा-पुरत्थिमेणं दाहिणेणं उत्तरेणं ते णं दारा सोलस जोयणाइं  
 उड्डं उच्चत्तेणं अट्ठ जोयणाइं विक्खंभेणं तावइयं चैव पवेसेणं सेया वरकणगथूभियागा  
 जाव वणमालाओ, [तेसि णं दाराणं उवरिं अट्ठट्ठ मङ्गलगा झया छत्ताइच्छत्ता] तेसि  
 णं दाराणं पुरओ पत्तेयं पत्तेयं मुहमण्डवे पण्णत्ते, ते णं मुहमण्डवा एणं जोयणसयं

आयामेणं पण्णासं जोयणाइं विक्खंमेणं साइरेगाइं सोलस जोयणाइं उड्डं उच्चतेणं वण्णओ सभाए सरिसो, [तेसि णं सुहमण्डवाणं तिदिसिं तओ दारा पण्णत्ता, तंजहा-पुरत्थिमेणं दाहिणेणं उत्तरेणं, ते णं दारा सोलस जोयणाइं उड्डं उच्चतेणं अट्ठ जोयणाइं विक्खंमेणं तावइयं चेव पवेसेणं सेया वरकणगथूमियागा जाव वणमालाओ । तेसि णं सुहमंडवाणं भूमिभागा उल्लोया, तेसि णं सुहमंडवाणं उवरिं अट्ठ मङ्गलगा झया छत्ताइछत्ता ।] तेसि णं सुहमंडवाणं पुरओ पत्तेयं पत्तेयं पेच्छाघरमंडवे पण्णत्ते, सुहमंडववत्तव्वया जाव दारा भूमिभागा उल्लोया । तेसि णं बहुसमरमणिजाणं भूमिभागाणं बहुमज्झदेसभाए पत्तेयं पत्तेयं वइरामए अक्खाडए पण्णत्ते, तेसि णं वयरामयाणं अक्खाडगाणं बहुमज्झदेसभाए पत्तेयं पत्तेयं मणिपेडिया पण्णत्ता, ताओ णं मणिपेडियाओ अट्ठ जोयणाइं आयामविक्खंमेणं चत्तारि जोयणाइं बाह्वेणं सव्वमणिमईओ अच्छाओ जाव पडिरूवाओ, तासि णं मणिपेडियाणं उवरिं पत्तेयं पत्तेयं सीहासणे पण्णत्ते, सीहासणवण्णओ सपरिवारो, तेसि णं पेच्छाघरमंडवाणं उवरिं अट्ठ मंगलगा झया छत्ताइछत्ता, तेसि णं पेच्छाघरमंडवाणं पुरओ पत्तेयं पत्तेयं मणिपेडियाओ पण्णत्ताओ, ताओ णं मणिपेडियाओ अट्ठ जोयणाइं आयामविक्खंमेणं चत्तारि जोयणाइं बाह्वेणं सव्वमणिमईओ अच्छाओ जाव पडिरूवाओ, तासि णं मणिपेडियाणं उवरिं पत्तेयं पत्तेयं महिंदज्झया पण्णत्ता ते णं महिंदज्झया सट्ठिं जोयणाइं उड्डं उच्चतेणं अद्धकोसं उव्वेहेणं अद्धकोसं विक्खंमेणं वइरामय...सिहरा पासादीया ४ । तेसि णं महिंदज्झयाणं उवरिं अट्ठ मंगलगा झया छत्ताइछत्ता तेसि णं महिंदज्झयाणं पुरओ पत्तेयं पत्तेयं नंदा पुक्खरिणीओ पण्णत्ताओ, ताओ णं पुक्खरिणीओ एगं जोयणसयं आयामेणं पण्णासं जोयणाइं विक्खंमेणं दस जोयणाइं उव्वेहेणं अच्छाओ जाव वण्णओ-एगइयाओ उदगरसेणं पण्णत्ताओ, पत्तेयं पत्तेयं पडमवरवेइयापरिखित्ताओ पत्तेयं पत्तेयं वणसंडपरिखित्ताओ तासि णं णंदानं पुक्खरिणीणं तिदिसिं तिसोवाणपडिरूवगा पण्णत्ता, तिसोवाणपडिरूवगाणं वण्णओ, तोरणा झया छत्ताइछत्ता । सभाए णं सुहम्माए अडयालीसं मणोगुलिया-साहस्सीओ पण्णत्ताओ, तंजहा-पुरत्थिमेणं सोलससाहस्सीओ पच्चत्थिमेणं सोलस-साहस्सीओ दाहिणेणं अट्ठसाहस्सीओ उत्तरेणं अट्ठसाहस्सीओ, तासु णं मणोगुलियासु बहवे सुवण्णरूपमया फलगा पण्णत्ता, तेसु णं सुवन्नरूपमएसु फलगेसु बहवे वइरामया णागदंतता पण्णत्ता, तेसु णं वइरामएसु णागदंतएसु किण्हसुतवट्ठवग्धारिय-मल्लदामकल्लावा चिट्ठंति, सभाए णं सुहम्माए अडयालीसं गोमाणसियासाहस्सीओ पण्णत्ताओ, जह मणोगुलिया जाव णागदंतगा, तेसु णं णागदंतएसु बहवे रययामया

सिक्कगा पणत्ता तेसु णं रययामएसु सिक्कगेसु बहवे वेरुलियामइयाओ धूवघडियाओ पणत्ताओ, ताओ णं धूवघडियाओ कालगुरुपवर जाव चिट्ठंति । सभाए णं सुहम्माए अंतो बहुसमरमणिज्जे भूमिभागे पणत्ते जाव मणीहिं उवसोभिए मणिफासो य उल्लोओ य, तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं महेगा मणिपेढिया पणत्ता अट्ठ जोयणाइं आयामविक्खंमेणं चत्तारि जोयणाइं बाहल्लेणं सव्वमणिमई अच्छा जाव पडिरूवा, तीसे णं मणिपेढियाए उवरिं एत्थ णं महेगे सीहासणे पणत्ते सीहासणवण्णओ सपरिवारो । तीसे णं विदिसाए एत्थ णं महेगा मणिपेढिया पणत्ता अट्ठ जोयणाइं आयामविक्खंमेणं चत्तारि जोयणाइं बाहल्लेणं सव्वमणिमया अच्छा जाव पडिरूवा, तीसे णं मणिपेढियाए उवरिं एत्थ णं महेगे देवसयणिज्जे पणत्ते, तस्स णं देवसयणिज्जस्स इमेयारूवे वण्णावासे पणत्ते, तंजहा-णाणामणिमया पडिपाया सोवज्जिया पाया णाणामणिमयाइं पायसी-सगाइं जंबूणयामयाइं गत्तागाइं वइरामया संधी णाणामणिमए विच्चे रययामई तूळी लोहियक्खमया विब्बोयणा तवणिज्जमया गंडोवहाणया से णं सयणिज्जे सालिंगण-वट्ठिए उभओ विब्बोयणे दुहओउण्णए मज्झे णयगंमीरे गंगापुल्लिणवाळुयाउडाल-सालिसए सुविरइयरयत्ताणे उवचियखोमदुगुल्लपट्टपडिच्छायणे आईणगहूयवूरणवणीय-तूलफासमउए रत्तंसुयसंवुए सुरम्मे पासादीए...पडिरूवे ॥ ३५ ॥ तस्स णं देवस-यणिज्जस्स उत्तरपुरत्थिमेणं महेगा मणिपेढिया पणत्ता, अट्ठ जोयणाइं आयामवि-क्खंमेणं चत्तारि जोयणाइं बाहल्लेणं सव्वमणिमई जाव पडिरूवा, तीसे णं मणि-पेढियाए उवरिं एत्थ णं महेगे खुडुए महिंदज्झए पणत्ते सट्ठिं जोयणाइं उड्डं उच्चत्तेणं जोयणं विक्खंमेणं वइरामए वट्ठलट्ठसंठियसुसिलिट्ठ जाव पडिरूवे, उवरिं अट्ठट्ठ मंगलगा झया छत्ताइच्छत्ता, तस्स णं खुड्ढागमहिंदज्झयस्स पच्चत्थिमेणं एत्थ णं सूरियाभस्स देवस्स चोप्पाले नाम पहरणकोसे पच्चत्ते सव्ववइरामए अच्छे जाव पडिरूवे तत्थ णं सूरियाभस्स देवस्स फलिहरयणखगगयाधणुप्पमुहा बहवे पहरणरयणा संनिखित्ता चिट्ठंति, उज्जला निसिया सुतिक्खधारा पासादीया... । सभाए णं सुहम्माए उवरिं अट्ठट्ठ मंगलगा झया छत्ताइच्छत्ता ॥ ३६ ॥ सभाए णं सुहम्माए उत्तरपुरत्थिमेणं एत्थ णं महेगा उववायसभा पणत्ता, जहा सभाए सुहम्माए तहेव जाव मणिपेढिया अट्ठ जोयणाइं देवसयणिज्जं तहेव सयणि-ज्जवण्णओ अट्ठट्ठ मंगलगा झया छत्ताइच्छत्ता । तीसे णं उववायसभाए उत्तरपुरत्थि-मेणं एत्थ णं महेगे हरए पणत्ते एगं जोयणसयं आयामेणं पण्णासं जोयणाइं विक्खंमेणं दस जोयणाइं उव्वेहेणं तहेव से णं हरए एगाए पडमवरवेइयाए एगेण

वणसंडेण सव्वओ समंता संपरिक्खिते । तस्स णं हरयस्स तिदिसं तिसोवाणपडि-  
रूवगा पन्नत्ता । तस्स णं हरयस्स उत्तरपुरत्थिमेणं एत्थ णं महेगा अभिसेगसभा  
पण्णत्ता, सुहम्मागमएणं जाव गोमाणसियाओ मणिपेढिया सीहासणं सपरिवारं जाव  
दामा चिद्धंति, तत्थ णं सूरियाभस्स देवस्स सुवहु अभिसेयभंडे संनिखिते चिद्धइ,  
अट्ठड्ड मंगलगा तहेव । तीसे णं अभिसेगसभाए उत्तरपुरत्थिमेणं एत्थ णं अलंकारि-  
यसभा पण्णत्ता जहा सभा सुहम्मा, मणिपेढिया अट्ठ जोयणाइं सीहासणं सपरिवारं,  
तत्थ णं सूरियाभस्स देवस्स सुवहु अलंकारियभंडे संनिखिते चिद्धइ, सेसं तहेव,  
तीसे णं अलंकारियसभाए उत्तरपुरत्थिमेणं एत्थ णं महेगा ववसायसभा पण्णत्ता,  
जहा उववायसभा जाव सीहासणं सपरिवारं मणिपेढिया अट्ठड्ड मंगलगा, तत्थ णं  
सूरियाभस्स देवस्स एत्थ महेगे पोत्थयरयणे सन्निक्खिते चिद्धइ, तस्स णं पोत्थयर-  
यणस्स इमेयारूवे वण्णावासे पण्णत्ते, तंजहा-रिट्ठामईओ कंबियाओ तवणिज्जमए  
दोरे नाणामणिमए गंठी रयणामयाइं पत्तगाइं वेरुलियमए लिप्पासणे रिट्ठामए छादणे  
तवणिज्जमई संकला रिट्ठामई मसी वइरामई लेहणी रिट्ठामयाइं अक्खराइं धम्मिए  
लेक्खे । ववसायसभाए णं उवरिं अट्ठड्ड मंगलगा, तीसे णं ववसायसभाए उत्तर-  
पुरत्थिमेणं एत्थ णं नंदा पुक्खरिणी पण्णत्ता हरयसरिसा ॥ ३७ ॥ तेणं कालेणं  
तेणं समएणं सूरियाभे देवे अहुणोववण्णमित्तए चेव समाणे पंचविहाए पज्जतीए  
पज्जतीभावं गच्छइ, तंजहा—आहारपज्जतीए सरीरपज्जतीए इंदियपज्जतीए आण-  
पाणपज्जतीए भासामणपज्जतीए, तए णं से सूरियाभे देवे सयणिजाओ अब्भुट्ठेइ २ ता  
उववायसभाओ पुरत्थिमिल्लेणं दारेणं निग्गच्छइ, जेणेव हरए तेणेव उवागच्छइ २ ता  
हरयं अणुपयाहिणीकरेमाणे २ पुरत्थिमिल्लेणं तोरणेणं अणुपविसइ २ ता पुरत्थिमिल्लेणं  
तिसोवाणपडिरूवएणं पच्चोरुहइ २ ता जलावगाहं जलमज्जणं करेइ २ ता जलकिट्ठं  
करेइ २ ता जलामिसेयं करेइ २ ता आयंते चोक्खे परमसुईभूए हरयाओ पच्चोतरइ २ ता  
जेणेव अभिसेयसभा तेणेव उवागच्छइ तेणेव उवागच्छित्ता अभिसेयसभं अणु-  
पयाहिणीकरेमाणे अणुपयाहिणीकरेमाणे पुरत्थिमिल्लेणं दारेणं अणुपविसइ अणु-  
पविसित्ता जेणेव सीहासणे तेणेव उवागच्छइ उवागच्छित्ता सीहासणवरगए पुरत्थाभि-  
सुहे सन्निसजे । तए णं सूरियाभस्स देवस्स सामाणियपरिसोववन्नगा देवा आभिओ-  
गिए देवे सदावेति सदावित्ता एवं वयासी-खिप्पामेव भो ! देवाणुप्पिया ! सूरियाभस्स  
देवस्स महत्थं महगं महरिहं विउलं इंदामिसेयं उवट्ठवेह । तए णं ते आभिओगिया  
देवा सामाणियपरिसोववन्नोहिं देवेहिं एवं वुत्ता समाणा हट्ठ जाव हियया करयलपरिग्ग-  
हियं सिरसावत्तं मत्थए अंजलिं कट्ठु 'एवं देवो ! तह' ति आणाए विणएणं वयणं



पडिसुणंति पडिसुणिता उत्तरपुरत्थिमं दिसीभागं अवक्कमंति उत्तरपुरत्थिमं दिसी-  
 भागं अवक्कमिता वेउव्वियसमुग्घाएणं समोहणंति समोहणिता संखेजाइं जोयणाइं  
 जाव दोब्बं पि वेउव्वियसमुग्घाएणं समोहणिता अट्टसहस्सं सोवन्नियाणं कलसाणं  
 अट्टसहस्सं रुप्पमयाणं कलसाणं अट्टसहस्सं मणिमयाणं कलसाणं अट्टसहस्सं सुवण्ण-  
 रुप्पमयाणं कलसाणं अट्टसहस्सं सुवन्नमणिमयाणं कलसाणं अट्टसहस्सं रुप्पमणिमयाणं  
 कलसाणं अट्टसहस्सं सुवण्णरुप्पमणिमयाणं कलसाणं अट्टसहस्सं भोमिजाणं कलसाणं  
 एवं भिगाराणं आयंसाणं थालाणं पाईणं सुपइट्ठाणं वायकरगाणं रयणकरंडगाणं  
 सीहासणाणं छत्ताणं चामराणं तेळसमुग्गाणं जाव अंजणसमुग्गाणं झयाणं विउ-  
 व्वंति विउव्वित्ता ते साभाविए य वेउव्विए य कलसे य जाव झए य गिण्हंति  
 गिण्हित्ता सूरियाभाओ विमाणाओ पडिनिक्खमंति पडिनिक्खमिक्खिता ताए उक्किट्ठाए  
 चवलाए जाव तिरियमसंखेजाणं जाव वीइव्वयमाणा वीइव्वयमाणा जेणेव खीरोदयसमुद्दे  
 तेणेव उवागच्छंति उवागच्छित्ता खीरोयगं गिण्हंति० जाइं तत्थुप्पलाइं जाव  
 सयसहस्सपत्ताइं ताइं गिण्हंति गिण्हित्ता जेणेव पुक्खरोदए समुद्दे तेणेव उवागच्छंति  
 उवागच्छित्ता पुक्खरोदयं गेण्हंति गिण्हित्ता जाइं तत्थुप्पलाइं जाव सयसहस्सपत्ताइं  
 ताइं गिण्हंति गिण्हित्ता जेणेव समयखेत्ते जेणेव भरहेरवयाइं वासाइं जेणेव  
 मागहवरदामपभासाइं तित्थाइं तेणेव उवागच्छंति तेणेव उवागच्छित्ता तित्थोदगं  
 गेण्हंति गेण्हित्ता तित्थमट्ठियं गेण्हंति गेण्हित्ता जेणेव गंगासिंधुरत्तारत्तवईओ महानईओ  
 तेणेव उवागच्छंति उवागच्छित्ता सलिलोदगं गेण्हंति सलिलोदगं गेण्हित्ता उभओ-  
 कूलमट्ठियं गेण्हंति मट्ठियं गेण्हित्ता जेणेव चुल्लहिमवंतसिहरीवासहरपव्वया तेणेव  
 उवागच्छंति तेणेव उवागच्छित्ता दगं गेण्हंति० सव्वतूयरे सव्वपुप्फे सव्वगंधे सव्वमल्ले  
 सव्वोसहिसिद्धत्थए गिण्हंति गिण्हित्ता जेणेव पउमपुंडरीयदहे तेणेव उवागच्छंति  
 उवागच्छित्ता दहोदगं गेण्हंति गेण्हित्ता जाइं तत्थ उप्पलाइं जाव सयसहस्सपत्ताइं  
 ताइं गेण्हंति गेण्हित्ता जेणेव हेमवयएरवयाइं वासाइं जेणेव रोहियरोहियंसासुवण्ण-  
 कूलरुप्पकूलाओ महाणईओ तेणेव उवागच्छंति, सलिलोदगं गेण्हंति गेण्हित्ता उभओ-  
 कूलमट्ठियं गिण्हंति गिण्हित्ता जेणेव सद्दावइवियडावइपरियागा वट्ठवेयड्ढपव्वया तेणेव  
 उवागच्छन्ति उवागच्छित्ता सव्वतूयरे तहेव जेणेव महाहिमवंतरुप्पवासहरपव्वया  
 तेणेव उवागच्छन्ति तहेव जेणेव महापउममहापुंडरीयइहा तेणेव उवागच्छंति  
 उवागच्छित्ता दहोदगं गिण्हन्ति तहेव जेणेव हरिवासरम्मगवासाइं जेणेव हरिकंत-  
 नारिकंताओ महाणईओ तेणेव उवागच्छंति तहेव जेणेव गंधावइमालवंतपरियाया  
 वट्ठवेयड्ढपव्वया तेणेव तहेव जेणेव णिसडणीलवंतवासधरपव्वया तहेव जेणेव

तिणिच्छिकेसरिहहाओ तेणेव उवागच्छंति उवागच्छिता तहेव जेणेव महाविदेहे  
 वासे जेणेव सीयासीओयाओ महाणईओ तेणेव तहेव जेणेव सव्वचक्कवट्टिविजया  
 जेणेव सव्वमागहवरदामपभासाई तित्थाई तेणेव उवागच्छंति तेणेव उवागच्छिता  
 तित्थोदगं गेण्हंति गेण्हिता सव्वंतरणईओ जेणेव सव्ववक्खारपव्वया तेणेव  
 उवागच्छंति सव्वतूररे तहेव जेणेव मंदरे पव्वए जेणेव भइसालवणे तेणेव  
 उवागच्छंति सव्वतूररे सव्वपुप्फे सव्वमल्ले सव्वोसहिसिद्धत्थए य गेण्हंति गेण्हिता  
 जेणेव णंदणवणे तेणेव उवागच्छंति उवागच्छिता सव्वतूररे जाव सव्वोसहि-  
 सिद्धत्थए य सरसगोसीसचंदणं गिण्हंति गिण्हिता जेणेव सोमणसवणे तेणेव  
 उवागच्छंति सव्वतूररे जाव सव्वोसहिसिद्धत्थए य सरसगोसीसचंदणं च दिव्वं च  
 सुमणदामं गिण्हंति गिण्हिता जेणेव पंडगवणे तेणेव उवागच्छंति उवागच्छिता  
 सव्वतूररे जाव सव्वोसहिसिद्धत्थए य सरसं च गोसीसचंदणं दिव्वं च सुमण-  
 दामं दइरमलयसुगंधियगन्धे गिण्हन्ति गिण्हिता एगओ मिलायंति मिलाइता ताए  
 उक्किट्ठाए जाव जेणेव सोहम्मे कप्पे जेणेव सूरियाभे विमाणे जेणेव अभिसेयसभा  
 जेणेव सूरियाभे देवे तेणेव उवागच्छंति उवागच्छिता सूरियाभं देवं करयलपरिग्गहियं  
 सिरसावत्तं मत्थए अंजलिं कट्ठु जएणं विजएणं वद्धाविति वद्धावित्ता तं महत्थं  
 महग्घं महरिहं विउलं इंदामिसेयं उवट्ठवेंति । तए णं तं सूरियाभं देवं चत्तारि  
 सामाणियसाहस्सीओ चत्तारि अग्गमहिस्सीओ सपरिवाराओ तिन्नि परिसाओ सत्त  
 अणियाहिबइणो जाव अन्नैवि वहवे सूरियाभविमाणवासिणो देवा य देवीओ य तेहिं  
 साभाविएहि य वेउव्विएहि य वरकमलपइट्ठाणेहि य सुरभिवरवारिपडिपुत्तेहिं चंदण-  
 कयचच्चिएहिं आविद्धकंटेरुणेहिं पउमुप्पलपिहाणेहिं सुकुमालकोमलकरयलपरिग्गहिएहिं  
 अट्ठसहस्सेणं सोवन्नियाणं कलसाणं जाव अट्ठसहस्सेणं भोमिज्जाणं कलसाणं सव्वोद-  
 एहिं सव्वमट्ठियाहिं सव्वतूररेहिं जाव सव्वोसहिसिद्धत्थएहि य सव्विक्खीए जाव  
 वाइएणं महया महया इंदामिसेएणं अभिसिंचंति । तए णं तस्स सूरियाभस्स देवस्स  
 महया महया इंदामिसेए वट्ठमाणे अप्पेगइया देवा सूरियाभं विमाणं नच्चोययं  
 नाइमट्ठियं पविरलफुसियेणुविणासणं दिव्वं सुरभिगन्धोदगं वासं वासंति, अप्पेगइया  
 देवा हयरयं नट्ठुरयं भट्ठुरयं उवसंतरयं पसंतरयं करेंति, अप्पेगइया देवा सूरियाभं  
 विमाणं आसियसंमज्जिओवलित्तं सुइसंमट्ठरत्थंतरावणवीहियं करेंति, अप्पेगइया देवा  
 सूरियाभं विमाणं मंचाइमंचकलियं करेंति, अप्पेगइया देवा सूरियाभं विमाणं णाणा-  
 विहरागोसियं झयपडागाइपडगमंडियं करेंति, अप्पेगइया देवा सूरियाभं विमाणं  
 लाउल्लोइयमहियं गोसीससरसरत्तचंदणदइरदिण्णपंचगुलितलं करेंति, अप्पेगइया देवा

सूरियाभं विमाणं उवचियचंदणकलसं चंदणघडसुकयतोरणपडिडुवारदेसभागं करेति,  
 अप्पेगइया देवा सूरियाभं विमाणं आसत्तोसत्तविउल्लवट्टवगधारियमल्लदामकलावं करेति,  
 अप्पेगइया देवा सूरियाभं विमाणं पंचवण्णसुरभिमुक्कपुप्फपुंजोवयारकलियं करेति,  
 अप्पेगइया देवा सूरियाभं विमाणं कालागुरुपवरकुंदुरुक्कतुरुक्कधूवमघमघंतगंधुडुयाभि-  
 रामं करेति, अप्पेगइया देवा सूरियाभं विमाणं सुगंधवरगंधियं गंधवट्ठिभूयं करेति,  
 अप्पेगइया देवा हिरण्णवासं वासंति, सुवण्णवासं वासंति, रययवासं वासंति, वइर-  
 वासं० पुप्फवासं० फलवासं० मल्लवासं० गंधवासं० चुण्णवासं० आभरणवासं  
 वासंति, अप्पेगइया देवा हिरण्णविहिं भाएंति, एवं सुवन्नविहिं भाएंति, रयणविहिं  
 पुप्फविहिं फलविहिं मल्लविहिं चुण्णविहिं वत्थविहिं गंधविहिं०, तत्थ अप्पेगइया  
 देवा आभरणविहिं भाएंति, अप्पेगइया चउव्विहं वाइत्तं वाइंति-तत्तं वितत्तं घणं  
 झुसिरं, अप्पेगइया देवा चउव्विहं गेयं गायंति, तं०-उक्खित्तायं पायत्तायं मंदायं  
 रोइयावसाणं, अप्पेगइया देवा दुयं नट्टविहिं उवदंसंति अप्पेगइया विलंबियणट्टविहिं  
 उवदंसंति अप्पेगइया देवा दुयविलंबियं णट्टविहिं उवदंसंति, एवं अप्पेगइया अंचियं  
 नट्टविहिं उवदंसंति, अप्पेगइया देवा आरभडं भसोलं आरभडभसोलं उप्पायनिवाय-  
 पवत्तं संकुचियपसारियं रियारियं भंतसंभंतणामं दिव्वं णट्टविहिं उवदंसंति, अप्पेगइया  
 देवा चउव्विहं अभिणयं अभिणयंति, तंजहा-दिट्ठितियं पाडंतियं सामंतोवणिवाइयं  
 लोगअंतोमज्जावसाणियं, अप्पेगइया देवा वुक्कारेति, अप्पेगइया देवा पीणेति,  
 अप्पेगइया लासेति, अप्पेगइया हक्कारेति, अप्पेगइया विणंति, तंडवेंति, अप्पेगइया  
 वग्गंति अप्फोडेंति, अप्पेगइया अप्फोडेंति वग्गंति, अप्पे० तिवइं छिंदंति, अप्पे-  
 गइया हयहेसियं करेति, अप्पेगइया हत्थिगुल्लगुलाइयं करेति, अप्पेगइया रहघण-  
 घणाइयं करेति, अप्पेगइया हयहेसियहत्थिगुल्लगुलाइयरहघणघणाइयं करेति,  
 अप्पेगइया उच्छलेंति, अप्पेगइया पोच्छलेंति, अप्पेगइया उक्किट्टियं करेति, अ०  
 उच्छलेंति पोच्छलेंति, अप्पेगइया तिन्नि वि, अप्पेगइया उवयंति, अप्पेगइया  
 उप्पयंति, अप्पेगइया परिवयंति, अप्पेगइया तिन्निवि, अप्पेगइया सीहनायंति,  
 अप्पेगइया दहरयं करेति, अप्पेगइया भूमिचवेडं दलयंति, अप्पे० तिन्नि वि,  
 अप्पेगइया गज्जंति, अप्पेगइया विज्जुयायंति, अप्पेगइया वासं वासंति, अप्पेगइया  
 तिन्निवि करेति, अप्पेगइया जलंति, अप्पेगइया तवंति, अप्पेगइया पतवेंति,  
 अप्पेगइया तिन्नि वि, अप्पेगइया हक्कारेति, अप्पेगइया थुक्कारेति, अप्पेगइया  
 धक्कारेति, अप्पेगइया साइं साइं नामाइं साहेंति, अप्पेगइया चत्तारि वि, अप्पेगइया  
 देवा देवसन्निवायं करेति, अप्पेगइया देवुज्जोयं करेति, अप्पेगइया देवुक्कलियं

करेति, अप्पेगइया देवा कहुकहगं करेति, अप्पेगइया देवा दुहुदुहुगं करेति, अप्पे-  
 गइया चेलुक्खेवं करेति, अप्पेगइया देवसन्निवायं देवुज्जोयं देवुकलियं देवकहुकहगं  
 देवदुहुदुहुगं चेलुक्खेवं करेति, अप्पेगइया उप्पलहत्थगया जाव सयसहस्सपत्तहत्थ-  
 गया, अप्पेगइया कलसहत्थगया जाव झयहत्थगया हट्टुट्टु जाव हियया सव्वओ  
 समंता आहावंति परिधावंति । तए णं तं सूरियाभं देवं चत्तारि सामाणियसाहस्सीओ  
 जाव सोलस आयरक्खदेवसाहस्सीओ अण्णे य वहवे सूरियाभरायहाणिवत्थव्वा देवा  
 य देवीओ य महया महया इंदामिसेगेणं अभिसिंचंति अभिसिंचित्ता पत्तेयं पत्तेयं  
 करयलपरिग्गहियं सिरसावत्तं मत्थए अंजलिं कट्ठु एवं वयासी-जय जय नंदा ! जय  
 जय भद्दा ! जय जय नंदा ! भद्दे ते, अजियं जिणाहि, जियं च पालेहि, जियमज्जे  
 वसाहि इंदो इव देवाणं चंदो इव ताराणं चमरो इव असुराणं धरणो इव नागाणं  
 भरहो इव मणुयाणं बहूइं पलिओवमाइं बहूइं सागरोवमाइं बहूइं पलिओवमसागरो-  
 वमाइं चउण्हं सामाणियसाहस्सीणं जाव आयरक्खदेवसाहस्सीणं सूरियाभस्स  
 विमाणस्स अत्रेसिं च बहूणं सूरियाभविमाणवासीणं देवाणं य देवीणं य आहेवच्चं  
 जाव महया महया कारेमाणे पालेमाणे विहराहितिकट्ठु जय जय सइं पउंजंति ।  
 तए णं से सूरियाभे देवे महया महया इंदामिसेगेणं अभिसित्ते समाणे अभिसेयसमाओ  
 पुरत्थिमिद्वेणं दारेणं निग्गच्छइ निग्गच्छित्ता जेणेव अलंकारियसमा तेणेव उवागच्छइ  
 उवागच्छित्ता अलंकारियसभं अणुप्पयाहिणीकरेमाणे २ अलंकारियसभं पुरत्थिमिद्वेणं  
 दारेणं अणुपविसइ अणुपविसित्ता जेणेव सीहासणे तेणेव उवागच्छइ सीहासणवरगए  
 पुरत्थाभिमुहे सन्निसन्ने । तए णं तस्स सूरियाभस्स देवस्स सामाणियपरिसोववन्नगा  
 अलंकारियभंडं उवट्टवेत्ति, तए णं से सूरियाभे देवे तप्पढमयाए पम्हलसूमालाए  
 सुरभीए गंधकासाइए गायार्इं ल्हेइं ल्हित्ता सरसेणं गोसीसचंदणेणं गायार्इं अणुलिंपइ  
 अणुलिंपित्ता नासानासासवायवोज्झं चक्खुहरं वन्नफरिसजुत्तं हयलालापेलवाइरेणं  
 धवलं कणगखचियन्तकम्मं आगासफालियसमप्पभं दिव्वं देवदूसजुयलं नियंसेइ  
 नियंसेत्ता हारं पिण्ढेइ पिण्ढेत्ता अद्धहारं पिण्ढेइ २ ता एगावलं पिण्ढेइ पिण्ढित्ता  
 मुत्तावलं पिण्ढेइ पिण्ढित्ता रयणावलं पिण्ढेइ पिण्ढित्ता एवं अंगयाइं  
 केऊराइं कडगाइं तुडियाइं कडिसुत्तगं दसमुद्दाणंतगं वच्छसुत्तगं मुरविं कंठमुरविं  
 पालवं कुंडलाइं चूडामणिं मउडं पिण्ढेइ गंथिमवेडिमपूरिमसंघाइमेणं चउव्विहेणं  
 मट्ठेणं कप्पसक्खगं पिव अप्पाणं अलंकियविभूसियं करेइ करित्ता दहरमलयसुगंध-  
 गंधिएहिं गायार्इं भुखंडेइ दिव्वं च सुमणदामं पिण्ढेइ ॥ ३८ ॥ तए णं से सूरियाभे  
 देवे केसालंकारेणं मल्लालंकारेणं आभरणालंकारेणं वत्थालंकारेणं चउव्विहेणं

अलंकारेण अलंक्रियविभूतिए समाणे पडिपुण्णलंकारे सीहासणाओ अब्भुट्ठेइ अब्भु-  
 ट्ठित्ता अलंक्रियसभाओ पुरत्थिमिल्लेणं दारेणं पडिणिक्खमइ पडिणिक्खमिता जेणेव  
 ववसायसभा तेणेव उवागच्छइ ववसायसभं अनुपयाहिणीकरेमाणे अनुपयाहिणी-  
 करेमाणे पुरत्थिमिल्लेणं दारेणं अनुपविसइ, जेणेव० सीहासणवरगए जाव सन्निससे ।  
 तए णं तस्स सूरियाभस्स देवस्स सामाणियपरिसोववज्जगा देवा पोत्थयरयणं उवणेति,  
 तए णं से सूरियाभे देवे पोत्थयरयणं गिण्हइ गिण्हित्ता पोत्थयरयणं मुयइ सुइत्ता  
 पोत्थयरयणं विहाडेइ विहाडित्ता पोत्थयरयणं वाएइ पोत्थयरयणं वाएत्ता धम्मियं  
 ववसायं ववसइ ववसइत्ता पोत्थयरयणं पडिनिक्खवइ सीहासणाओ अब्भुट्ठेइ  
 अब्भुट्ठित्ता ववसायसभाओ पुरत्थिमिल्लेणं दारेणं पडिनिक्खमिता जेणेव सभा  
 सुहम्मा तेणेव प्हारेत्थ गमणाए । तए णं से सूरियाभे देवे चउहिं सामाणिय-  
 साहस्सीहिं जाव सोलसहिं आयरक्खदेवसाहस्सीहिं अजेहि य बहूहिं सूरियाभवि-  
 माणवासीहिं वेमाणिएहिं देवेहिं देवीहि य सद्धिं संपरिवुडे सच्चिद्वीए जाव नाइयरवेणं  
 जेणेव सभा सुहम्मा तेणेव उवागच्छइ सभं सुहम्मं पुरत्थिमिल्लेणं दारेणं अनुपविसइ  
 अनुपविसित्ता जेणेव सीहासणे तेणेव उवागच्छइ सीहासणवरगए पुरत्थाभिमुहे  
 सणिसण्णे ॥ ३९ ॥ तए णं तस्स सूरियाभस्स देवस्स अवस्तरेणं उत्तरपुरत्थिमेणं  
 दिसिभाएणं चत्तारि सामाणियसाहस्सीओ चउसु भद्दासणसाहस्सीसु निसीयंति,  
 तए णं तस्स सूरियाभस्स देवस्स पुरत्थिमिल्लेणं चत्तारि अगमहिसीओ चउसु  
 भद्दासणेसु निसीयंति, तए णं तस्स सूरियाभस्स देवस्स दाहिणपुरत्थिमेणं अद्धि-  
 तरियपरिसाए अट्ठ देवसाहस्सीओ अट्ठसु भद्दासणसाहस्सीसु निसीयंति, तए णं  
 तस्स सूरियाभस्स देवस्स दाहिणेणं मज्झिमाए परिसाए दस देवसाहस्सीओ दससु  
 भद्दासणसाहस्सीसु निसीयंति, तए णं तस्स सूरियाभस्स देवस्स दाहिणपच्चत्थिमेणं  
 बाहिरियाए परिसाए बारस देवसाहस्सीओ बारससु भद्दासणसाहस्सीसु निसीयंति,  
 तए णं तस्स सूरियाभस्स देवस्स पच्चत्थिमेणं सत्त अणियाहिंवणो सत्ताहिं भद्दासणेहिं  
 णिसीयंति, तए णं तस्स सूरियाभस्स देवस्स चउद्विसिं सोलस आयरक्खदेवसाहस्सीओ  
 सोलसहिं भद्दासणसाहस्सीहिं णिसीयंति, तंजहा-पुरत्थिमिल्लेणं चत्तारि साहस्सीओ०,  
 ते णं आयरक्खा सन्नद्धबद्धवम्मियकवया उप्पीलियसरासणपट्टिया पिणद्धगेविज्जा  
 आविद्धविमलवरचिंधपट्टा गहियाउहप्पहरणां तिणयाणि तिसंधियाइं वयरामयकोडीणि  
 धणूइं पगिज्झ पडियाइयकंडकलावा णीलपाणिणो पीयपाणिणो रत्तपाणिणो चाव-  
 पाणिणो चारुपाणिणो चम्मपाणिणो दंडपाणिणो खग्गपाणिणो पासपाणिणो नीलपीय-  
 रत्तचावचारुवम्मदंडखग्गपासधरा आयरक्खा रक्खोवगा गुत्ता गुत्तपालिया जुत्ता

जुतपालिया पत्तेयं पत्तेयं समयओ विणयओ किंकरभूया चिट्ठन्ति ॥ ४० ॥ सूरिया-  
भस्स णं भंते ! देवस्स केवइयं कालं ठिई पण्णत्ता ? गोयमा चत्तारि पलिओवमाई  
ठिई पण्णत्ता । सूरियाभस्स णं भंते ! देवस्स सामाणियपरिसोववण्णगाणं देवाणं  
केवइयं कालं ठिई पण्णत्ता ? गोयमा ! चत्तारि पलिओवमाई ठिई पण्णत्ता, महिड्डिए  
महज्जुइए महब्बले महायसे महासोकखे महाणुभागे सूरियाभे देवे, अहो णं भंते !  
सूरियाभे देवे महिड्डिए जाव महाणुभागे ॥ ४१ ॥ “सूरियाभेणं भन्ते ! देवेणं सा  
दिव्वा देविड्डी सा दिव्वा देवजुई से दिव्वे देवाणुभावे किन्ना लद्धे किन्ना पत्ते किन्ना  
अभिसमन्नागए ? पुव्वभवे के आसी ? किन्नामए वा, को वा गोत्तेणं ? कयरंसि वा  
गामंसि वा जाव संनिवेसंसि वा ? किं वा दच्चा किं वा मोच्चा किं वा किच्चा किं वा  
समायरित्ता, कस्स वा तहारूवस्स समणस्स वा माहणस्स वा अन्तिए एगमवि  
आरियं धम्मियं सुवयणं सोच्चा निसम्म जं णं सूरियाभेणं देवेणं सा दिव्वा देविड्डी  
जाव देवाणुभावे लद्धे पत्ते अभिसमन्नागए ?” ॥ ४२ ॥ “गोयमा” इ समणे भगवं  
महावीरे भगवं गोयमं आमन्तेत्ता एवं वयासी—“एवं खलु गोयमा ! तेणं कालेणं  
तेणं समएणं इहेव जम्बुद्वीवे दीवे भारहे वासे केइयअद्धे नामं जणवए होत्था  
रिद्धत्थिमियसमिद्धे ० । तत्थ णं केइयअद्धे जणवए सेयविया नामं नयरी होत्था  
रिद्धत्थिमियसमिद्धा जाव पडिरूवा । तीसे णं सेयवियाए नयरीए बहिया उत्तरपुरत्थिमे  
दीसीमाए एत्थ णं सिगवणे नामं उज्जाणे होत्था रम्मे नन्दणवणप्पगासे सव्वोउयपुप्फ-  
फलसमिद्धे सुमसुरभिसीयलाए छायाए सव्वओ चेव समणुबद्धे पासादीए जाव  
पडिरूवे । तत्थ णं सेयवियाए नयरीए पएसी नामं राया होत्था, महया हिमवन्त  
जाव विहरइ, अधम्मिए अधम्मिण्डे अधम्मकखाई अधम्माणुए अधम्मपलोई अधम्म-  
पजणणे अधम्मसीलसमुदायारे अधम्मणे चेव वित्तिं कप्पेमाणे हणछिन्दमिन्दपवत्तए  
पावे चण्डे रुद्धे खुद्धे लोहियपाणी साहसिए उक्कञ्चणवच्चणमायानियडिक्कडकवडसाई-  
संपओगवहुले निस्सीले निव्वए निग्गुणे निम्मेरे निप्पच्चक्खाणपोसहोववासे बहूणं  
दुपयचउप्पयमियपसुपक्खिसिरीसिवाणं घायाए बहाए उच्छेयणाए अधम्मकेळु समु-  
ट्टिए, गुरुणं नो अब्भुट्ठेइ, नो विणयं पडञ्जइ, समणमाहणाणं... नो विणयं पडञ्जइ,  
सयस्स वि य णं जणवयस्स नो सम्मं करभरवित्तिं पवत्तेइ ॥ ४३ ॥ तस्स णं  
पएसिस्स रच्चो सूरियकन्ता नामं देवी होत्था सुकुमालपाणिपाया (धारिणीवणओ)  
पएसिणा रच्चा सद्धिं अणुरत्ता अविरत्ता इट्ठे सद्धे रूवे जाव विहरइ । तस्स णं पएसिस्स  
रच्चो जेट्ठे पुत्ते सूरियकन्ताए देवीए अत्तए सूरियकन्ते नामं कुमारे होत्था सुकुमाल-  
पाणिपाए जाव पडिरूवे । से णं सूरियकन्ते कुमारे जुवराया वि होत्था, पएसिस्स

रञ्जो रज्जं च रुद्धं च बलं च बाहुणं च कोसं च कोट्टागारं च अन्तेउरं च जणवयं  
 च सयमेव पच्चुवेक्खमाणे २ विहरइ ॥ ४४ ॥ तस्स णं पएसिस्स रञ्जो जेट्ठे  
 भाउयवयंसए चित्ते नामं सारही होत्था अट्ठे जाव बहुजणस्स अपरिभूए सामदण्ड-  
 भेयउवप्पयाणअत्थसत्थइहामइविसारए, उप्पत्तियाए वेणइयाए कम्मियाए पारिणामि-  
 याए चउव्विहाए बुद्धीए उववेए, पएसिस्स रञ्जो बहूसु कज्जेसु य कारणेसु य कुडुम्बेसु  
 य मन्तेसु य गुज्जेसु य रहस्सेसु य निच्छएसु य ववहारेसु य आपुच्छणिज्जे मेढी  
 पमाणं आहारे आलम्बणं चक्खु मेढिभूए पमाणभूए आहारभूए आलम्बणभूए  
 चक्खुभूए सव्वट्ठाणसव्वभूमियासु लद्धपक्वए विइणविचारे रजधुराचिन्तए यावि  
 होत्था ॥ ४५ ॥ तेणं कालेणं तेणं समएणं कुणाला नामं जणवए होत्था, रिद्धत्थि-  
 मियसमिद्धे ० । तत्थ णं कुणालाए जणवए सावत्थी नामं नयरी होत्था रिद्धत्थिमिय-  
 समिद्धा जाव पडिह्वा । तीसे णं सावत्थीए नयरीए बहिया उत्तरपुरत्थिमे दिसीभाए  
 कोट्टए नामं उज्जाणे होत्था, रम्मे जाव पासादीए ४ । तत्थ णं सावत्थीए नयरीए  
 पएसिस्स रञ्जो अन्तेवासी जियसत्तू नामं राया होत्था, महया हिमवन्त जाव विहरइ ।  
 तए णं से पएसी राया अन्नया कयाइ महत्थं महघं महरिहं विउलं रायारिहं पाहुडं  
 सजावेइ २ ता चित्तं सारहिं सहावेइ २ ता एवं वयासी—“गच्छ णं चित्ता ! तुमं  
 सावत्थिं नयरिं । जियसत्तुस्स रञ्जो इमं महत्थं जाव पाहुडं उवणेहि । जाइं तत्थ  
 रायकज्जाणि य रायकिच्चाणि य रायनीईओ य रायववहारा य ताइं जियसत्तुणा सद्धिं  
 सयमेव पच्चुवेक्खमाणे विहराहि”त्तिकट्टु विसजिए ॥ ४६ ॥ तए णं से चित्ते  
 सारही पएसिणा रञ्जा एवं वुत्ते समाणे हट्ठ जाव पडिसुणेत्ता तं महत्थं जाव पाहुडं  
 गेण्हइ २ ता पएसिस्स रञ्जो जाव पडिनिक्खमइ २ ता सेयवियं नयरिं मज्झंमज्जेणं जेणेव  
 सए गिहे तेणेव उवागच्छइ २ ता तं महत्थं जाव पाहुडं ठवेइ २ ता कोडुम्बियपुरिसे  
 सहावेइ २ ता एवं वयासी—“खिप्पामेव भो देवाणुप्पिया ! सच्छतं जाव चाउगघण्टं  
 आसरहं जुत्तामेव उवट्टवेह जाव पच्चप्पिणह” । तए णं ते कोडुम्बियपुरिसा तहेव  
 पडिसुणिता खिप्पामेव सच्छतं जाव जुद्धसज्जं चाउगघण्टं आसरहं जुत्तामेव उवट्ट-  
 वेन्ति, तमाणत्तियं पच्चप्पिणन्ति । तए णं से चित्ते सारही कोडुम्बियपुरिसाणं  
 अन्तिए एयमट्ठं जाव हियए ण्हाए संनद्धबद्धवम्मियक्वए उप्पीलियसरासणपट्टिए  
 पिणद्धगेवेजे बद्धआविद्धविमलवरचिंधपट्टे गहियाउहपहरणे तं महत्थं जाव पाहुडं  
 गेण्हइ २ ता जेणेव चाउगघण्टे आसरहे तेणेव उवागच्छइ २ ता चाउगघण्टं आसरहं  
 दुस्सइ २ ता बहूहिं पुरिसेहिं संनद्ध जाव गहियाउहपहरणेहिं सद्धिं संपरिवुडे  
 सकोरिण्टमल्लदामेणं छत्तेणं धरिज्जमाणेणं २ महया भडचडगररहपहकरविन्दपरिक्खित्ते

साओ गिहाओ निगगच्छइ २ ता सेयवियं नयरिं मज्झंमज्जेणं निगगच्छइ २ ता सुहेहिं वासेहिं पायरासेहिं नाइविकिट्ठेहिं अन्तरावासेहिं वसमाणे २ केइयअद्वस्स जणवयस्स मज्झंमज्जेणं जेणेव कुणाला जणवए जेणेव सावत्थी नयरी तेणेव उवागच्छइ २ ता सावत्थीए नयरीए मज्झंमज्जेणं अणुपविसइ २ ता जेणेव जियसत्तुस्स रत्तो गिहे, जेणेव बाहिरिया उवट्ठाणसाला, तेणेव उवागच्छइ २ ता तुरए निगिण्हइ २ ता रहं ठवेइ २ ता रहाओ पच्चोसहइ २ ता तं महत्थं जाव पाहुडं गिण्हइ २ ता जेणेव अब्भन्तरिया उवट्ठाणसाला जेणेव जियसत्तू राया तेणेव उवागच्छइ २ ता जियसत्तुं रायं करयल-परिगहियं जाव कट्ठु जएणं विजएणं वद्धावेइ २ ता तं महत्थं जाव पाहुडं उवणेइ । तए णं से जियसत्तू राया चित्तस्स सारहिस्स तं महत्थं जाव पाहुडं पडिच्छइ २ ता चित्तं सारहिं सक्कारेइ संमाणेइ स० २ ता पडिविसजेइ, रायमग्गमोगाढं च से आवासं दलयइ । तए णं से चित्ते सारही विसजिए समाणे जियसत्तुस्स रत्तो अन्तियाओ पडिनिक्खमइ २ ता जेणेव बाहिरिया उवट्ठाणसाला जेणेव चाउग्घण्टे आसरहे तेणेव उवागच्छइ २ ता चाउग्घण्टं आसरहं दुरुहइ २ ता सावत्थि नयरिं मज्झंमज्जेणं जेणेव रायमग्गमोगाढे आवासे तेणेव उवागच्छइ २ ता तुरए निगिण्हइ २ ता रहं ठवेइ २ ता रहाओ पच्चोसहइ, ण्हाए सुद्धप्पावेसाइं मंगल्लाइं वत्थाइं पवरपरिहिए, अप्पमहग्घा-भरणालंकियसरीरे, जिमियभुत्तुत्तरागए वि य णं समाणे पुव्वावरण्हकालसमयंसि गन्धव्वेहि य नाडगेहि य उवनच्चिजमाणे २ उवगाइजमाणे २ उवलालिजमाणे २ इट्ठे सद्धफरिसरसरूवगन्धे पञ्चविहे माणुस्सए कामभोए पच्चणुभवमाणे विहरइ ॥ ४७ ॥ तेणं कालेणं तेणं समएणं पासावच्चिजे केसी नामं कुमारसमणे जाइसंपन्ने कुलसंपन्ने बलसंपन्ने रुवसंपन्ने विणयसंपन्ने नाणसंपन्ने दंसणसंपन्ने चरित्तसंपन्ने लज्जासंपन्ने लाघवसंपन्ने लज्जालाघवसंपन्ने ओयंसी तेयंसी वच्चंसी जसंसी जियकोहे जियमाणे जियमाए जियलोहे जियनिदे जिइन्दिए जियपरीसहे जीवियासमरणभयविप्पमुक्के तवप्पहाणे गुणप्पहाणे करणप्पहाणे चरणप्पहाणे निग्गहप्पहाणे निच्छयप्पहाणे अजवप्पहाणे मद्दवप्पहाणे लाघवप्पहाणे खन्तिप्पहाणे मुत्तिप्पहाणे विजप्पहाणे मन्तप्पहाणे बम्मप्पहाणे नयप्पहाणे नियमप्पहाणे सब्बप्पहाणे सोयप्पहाणे नाणप्पहाणे दंसणप्पहाणे चरित्तप्पहाणे चउदसपुव्वी, चउनाणोवगए पञ्चहिं अणगारसएहिं सद्धिं संपरिखुडे पुव्वाणुपुव्विं चरमाणे गामाणुगामं दूइजमाणे सुहंसुहेणं विहरमाणे जेणेव सावत्थी नयरी जेणेव कोट्टए उज्जाणे तेणेव उवागच्छइ २ ता सावत्थीए नयरीए बहिया कोट्टए उज्जाणे अहापडिरूवं उग्गहं उग्गिण्हइ २ ता संजमेणं तवसा अप्पाणं भावेमाणे विहरइ ॥ ४८ ॥ तए णं सावत्थीए नयरीए सिंघाउगतिगचउक्क-



चच्चरचउमुहमहापहपहेसु महया जणसहे इ वा जणवूहे इ वा जणकलकले इ वा जणबोले इ वा जणउम्मी इ वा जणउकलिया इ वा जणसंनिवाए इ वा जाव पज्जुवासइ । तए णं तस्स सारहिस्स तं महाजणसहे च जणकलकलं च सुणेत्ता य पासित्ता य इमेयारूवे अज्झत्थिए जाव समुप्पज्जित्था—“किं णं अज्ज सावत्थीए नयरीए इन्दमहे इ वा खन्दमहे इ वा रुदमहे इ वा मउन्दमहे इ वा नागमहे इ वा भूयमहे इ वा जक्खमहे इ वा रुक्खमहे इ वा गिरिमहे इ वा दरिमहे इ वा अगडमहे इ वा नईमहे इ वा सरमहे इ वा सागरमहे इ वा जं णं इमे बहवे उग्गा भोगा राइच्चा इक्खागा खत्थिया नाया कोरव्वा जाव इब्भा इब्भपुत्ता ण्हाया (जहोववाइए जाव) अप्पेगइया हयगया अप्पेगइया गय० पायचारविहारेणं महया २ वन्दावन्दएहिं निग्गच्छन्ति” एवं संपेहेइ २ ता कञ्जुइज्जपुरिसं सदावेइ २ ता एवं वयासी—“किं णं देवाणुप्पिया ! अज्ज सावत्थीए नयरीए इन्दमहे इ वा जाव सागरमहे इ वा जेणं इमे बहवे उग्गा भोगा...निग्गच्छन्ति?” । तए णं से कञ्जुइज्जपुरिसं केसिस्स कुमारसमणस्स आगमणगहियविणिच्छए चित्तं सारहिं करयल-परिग्गहियं जाव वद्धावेत्ता एवं वयासी—“नो खलु देवाणुप्पिया ! अज्ज सावत्थीए नयरीए इन्दमहे इ वा जाव सागरमहे इ वा जेणं इमे बहवे जाव विन्दाविन्दएहिं निग्गच्छन्ति । एवं खलु भो देवाणुप्पिया ! पासावच्चिजे केसी नामं कुमारसमणे जाइसंपन्ने जाव दूइज्जमाणे इहमागए जाव विहरइ तेणं अज्ज सावत्थीए नयरीए बहवे उग्गा जाव इब्भा इब्भपुत्ता अप्पेगइया वन्दणवत्तियाए जाव महया वन्दा-वन्दएहिं निग्गच्छन्ति” ॥ ४९ ॥ तए णं से चित्ते सारही कञ्जुइज्जपुरिसस्स अन्तिए एयमट्ठं सोच्चा निसम्म हट्ठतुट्ठ जाव हियए कोडुम्बियपुरिसं सदावेइ २ ता एवं वयासी—“खिप्पामेव भो देवाणुप्पिया ! चाउग्घणं आसरहं जुत्तामेव उवट्ठवेह” जाव सच्छत्तं उवट्ठवेन्ति । तए णं से चित्ते सारही ण्हाए सुद्धप्पावेसाइं मज्झाईं वत्थाइं पवरपरिहिए अप्पमहग्घाभरणालंक्रियसरिरे जेणेव चाउग्घण्टे आसरहे तेणेव उवागच्छइ २ ता चाउग्घण्टं आसरहं दुरुहइ २ ता सकोरिण्टमल्लदामेणं छत्तेणं धरिज्जमाणेणं महया भडचडगा...विन्दपरिक्खित्ते सावत्थीनयरीए मज्झंमज्झेणं निग्गच्छइ २ ता जेणेव कोट्टए उज्जाणे जेणेव केसी कुमारसमणे तेणेव उवागच्छइ २ ता केसिकुमारसमणस्स अदूरसामन्ते तुरए निगिण्हइ २ ता रहं ठवेइ २ ता रहाओ पचोख्हइ २ ता जेणेव केसी कुमारसमणे तेणेव उवागच्छइ २ ता केसिं कुमारसमणं तिक्खुत्तो आयाहिणं पयाहिणं करेइ २ ता वन्दइ नमंसइ वं० २ ता नच्चासच्चे नाइदूरे सुस्ससमाणे नमंसमाणे अभिमुहे पज्जलिउडे विणएणं पज्जुवासइ । तए णं से केसी कुमारसमणे चित्तस्स सारहिस्स

तीसे महइमहालियाए महच्चपरिसाए चाउज्जामं धम्मं परिकहेइ । तं जहा-सव्वाओ पाणाइवायाओ वेरमणं, सव्वाओ सुसावायाओ वेरमणं, सव्वाओ अदिज्ञादाणाओ वेरमणं, सव्वाओ बहिद्धादाणाओ वेरमणं । तए णं सा महइमहालिया महच्चपरिसा केसिस्स कुमारसमणस्स अन्तिए धम्मं सोच्चा निसम्म जामेव दिसिं पाउब्भूया तामेव दिसिं पडिगया । तए णं से चित्ते सारही केसिस्स कुमारसमणस्स अन्तिए धम्मं सोच्चा निसम्म हट्ठ जाव हियए उट्ठाए उट्ठेइ २ ता केसिं कुमारसमणं तिक्खुत्तो आया-हिणं पयाहिणं करेइ २ ता वन्दइ नमंसइ वं० २ ता एवं वयासी-“सद्दहामि णं भन्ते ! निग्गन्थं पावयणं । पत्तिायमि णं भन्ते ! निग्गन्थं पावयणं । रोएमि णं भन्ते ! निग्गन्थं पावयणं । अब्भुट्ठेमि णं भन्ते ! निग्गन्थं पावयणं । एवमेयं भन्ते ! निग्गन्थं पावयणं । तहमेयं भन्ते ! निग्गन्थं पावयणं । अविहमेयं भन्ते ! निग्गन्थं पावयणं । असंदिद्धमेयं भन्ते ! निग्गन्थं पावयणं । सच्चे णं एसमट्ठे जं णं तुब्भे वयह” त्तिकट्ठु वन्दइ नमंसइ वं० २ ता एवं वयासी-“जहा णं देवाणुप्पियाणं अन्तिए बहवे उग्गा भोगा जाव इब्भा इब्भपुत्ता चिच्चा हिरणं चिच्चा सुवणं, एवं धन्नं धणं बलं बाहणं कोसं कोट्टागारं पुरं अन्तेउरं, चिच्चा विउलं धणकणगरयणमणिमोत्तियसंख-सिलप्पवालसन्तसारसावएज्जं विच्छड्ढइता विगोवइता दाणं दाइयाणं परिभाइता मुण्डा भविता अगाराओ अणगारियं पव्वयन्ति, नो खलु अहं ता संचाएमि चिच्चा हिरणं तं चेव जाव पव्वइत्तए । अहं णं देवाणुप्पियाणं अन्तिए पच्चाणुव्वइयं सत्तसिक्खा-वइयं दुवाल्सविहं गिहिधम्मं...पडिवज्जित्तए” । “अहासुहं देवाणुप्पिया ! मा पडिवन्धं करेहि” । तए णं से चित्ते सारही केसिस्स कुमारसमणस्स अन्तिए पच्चाणुव्वइयं जाव गिहिधम्मं उवसंपज्जिताणं विहरइ । तए णं से चित्ते सारही केसिं कुमारसमणं वन्दइ नमंसइ वं० २ ता जेणेव चाउग्घण्टे आसरहे तेणेव पहारेत्थ गमणाए । चाउग्घण्टं आसरहं दुरुहइ २ ता जामेव दिसिं पाउब्भूए तामेव दिसिं पडिगए ॥ ५० ॥ तए णं से चित्ते सारही समणोवासए जाए अहिगयजीवाजीवे उवलद्धपुण्णपावे आसवसंवरनिजरकिरियाहिगरणबन्धमोक्खकुसले असहिजे देवासु-रनागसुवणजकखरक्खसकिंनरकिंपुरिसगरुल्लगन्धव्वमहोरगाईहिं देवगणेहिं निग्ग-न्थाओ पावयणाओ अणइक्कमणिजे, निग्गन्थे पावयणे निस्संकिए निक्कंखिए निव्वि-तिनिच्छे लद्धे गहियट्ठे पुच्छियट्ठे अहिगयट्ठे विणिच्छियट्ठे अट्ठिमिज्जपेम्माणुरागरते अयमाउसो निग्गन्थे पावयणे अट्ठे अयं परमट्ठे सेसे अणट्ठे, ऊसियफलिहे अवंगुय-दुवारे चियत्तन्तेउरघरप्पवेसे चाउइसट्ठमुद्धिपुण्णमासिणीसु पडिपुण्णं पोसहं सम्मं अणुपालेमाणे समणे निग्गन्थे फासुएसणिज्जेणं असणपाणखाइमसाइमेणं पीढफला-

सेज्जासंधारेणं वत्थपडिग्गहकम्बलपायपुच्छणेणं ओसहभेसज्जेणं पडिलाभेमाणे २  
 बहुहिं सीलव्वयगुणवेरमणपच्चक्खाणपोसहोववासेहि य अप्पाणं भावेमाणे जाई तत्थ  
 रायकज्जाणि य जाव रायववहाराणि य ताई जियसत्तुणा रत्ता सद्धिं सयमेव पच्चुवे-  
 क्खमाणे २ विहरइ ॥ ५१ ॥ तए णं से जियसत्तुराया अन्नया कयाइ महत्थं  
 जाव पाहुडं सज्जेइ २ ता चित्तं सारहिं सदावेइ २ ता एवं वयासी—“गच्छाहि णं तुमं  
 चित्ता ! सेयवियं नयरिं । पएसिस्स रत्तो इमं महत्थं जाव पाहुडं उवणेहि । मम  
 पाउग्गं च णं जहाभणियं अवितहमसंदिद्धं वयणं विन्नवेहि” तिकट्ठु विसज्जिए ॥  
 तए णं से चित्ते सारही जियसत्तुणा रत्ता विसज्जिए समाणे तं महत्थं जाव गिण्हइ  
 जाव जियसत्तुस्स रत्तो अन्तियाओ पडित्तिक्खमइ २ ता सावत्थीनयरीए मज्झं-  
 मज्जेणं निग्गच्छइ २ ता जेणेव रायमग्गमोगाढे आवासे तेणेव उवागच्छइ २ ता तं  
 महत्थं जाव ठवेइ । प्हाए ०सरीरे सकोरेण्ट...महया...पायचारविहारेणं महया  
 पुरिसवग्गुरापरिक्खित्ते रायमग्गमोगाढाओ आवासाओ निग्गच्छइ २ ता सावत्थीनय-  
 रीए मज्झंमज्जेणं निग्गच्छइ २ ता जेणेव कोट्टए उज्जाणे जेणेव केसीकुमारसमणे  
 तेणेव उवागच्छइ २ ता केसिकुमारसमणस्स अन्तिए धम्मं सोच्चा जाव हट्ठ...जाव  
 एवं वयासी—“एवं खलु अहं भन्ते ! जियसत्तुणा रत्ता पएसिस्स रत्तो इमं महत्थं  
 जाव उवणेहित्तिकट्ठु विसज्जिए । तं गच्छामि णं अहं भन्ते ! सेयवियं नयरिं । पासा-  
 दीया णं भन्ते ! सेयविया नयरी । दरिसणिज्जा णं भन्ते ! सेयविया नयरी । अभि-  
 ह्वा णं भन्ते ! सेयविया नयरी । पडिह्वा णं भन्ते ! सेयविया नयरी । समोसरह  
 णं भन्ते ! सेयवियं नयरिं” । तए णं से केसी कुमारसमणे चित्तेणं सारहिणा एवं  
 वुत्ते समाणे चित्तस्स सारहिस्स एयमट्ठं नो आढाइ नो परिजाणाइ, तुसिणीए सन्धि-  
 ट्ठइ । तए णं से चित्ते सारही केसि कुमारसमणं दोच्चं पि तच्चं पि एवं वयासी—  
 “एवं खलु अहं भन्ते ! जियसत्तुणा रत्ता पएसिस्स रत्तो इमं महत्थं जाव विसज्जिए  
 तं चेव जाव समोसरह णं भन्ते ! तुब्भे सेयवियं नयरिं” । तए णं केसी कुमार-  
 समणे चित्तेणं सारहिणा दोच्चं पि तच्चं पि एवं वुत्ते समाणे चित्तं सारहिं एवं  
 वयासी—“चित्ता ! से जहानामए वणसण्डे सिया किण्हे किण्होभासे जाव पडिह्वे ।  
 से नूणं चित्ता ! से वणसण्डे बहूणं दुपयचउप्पयमियपसुपक्खिसरीसिवाणं अभिग-  
 मणिज्जे ?” “हन्ता अभिगमणिज्जे” । तंसि च णं चित्ता ! वणसण्डंसे बहुवे भिलुंगा  
 नाम पावसउणा परिवसन्ति जे णं तेसिं बहूणं दुपयचउप्पयमियपसुपक्खिसरीसिवाणं  
 ठियाणं चेव मंससोणियं आहारन्ति । से नूणं चित्ता ! से वणसण्डे तेसिं णं बहूणं  
 दुपय जाव सिरीसिवाणं अभिगमणिज्जे ?” “नो” ति । “कम्हा णं ?” “भन्ते ।

सोवसग्गे” । “एवामेव चित्ता ! तुब्भं पि सेयवियाए नयरीए पएसी नामं राया परिवसइ अहम्मिए जाव नो सम्मं करभरवित्तिं पवत्तेइ । तं क्हं णं अहं चित्ता ! सेयवियाए नयरीए समोसरिस्सामि ?” । तए णं से चित्ते सारही केसिं कुमारसमणं एवं वयासी—“किं णं भन्ते ! तुब्भं पएत्तिणा रत्ता कायव्वं ? अत्थि णं भन्ते ! सेयवियाए नयरीए अत्ते वहवे ईसरतलवर जाव सत्थवाहप्पभिइओ जे णं देवाणु-  
प्पियं वन्दिस्सन्ति जाव पज्जुवासिस्सन्ति, विउलं असणं पाणं खाइमं साइमं पडिलभेस्सन्ति, पाडिहारिएण पीढफलगसेज्जासंधारेणं उवनिमन्तिस्सन्ति” । तए णं से केसी कुमारसमणे चित्तं सारहिं एवं वयासी—“अवि याइ चित्ता ! समोसरि-  
स्सामो” ॥ ५२ ॥ तए णं से चित्ते सारही केसिं कुमारसमणं वन्दइ नमंसइ वं० २ ता केसिस्स कुमारसमणस्स अन्तियाओ कोट्टयाओ उज्जाणाओ पडिनिक्खमइ २ ता जेणेव रायमग्गमोगाढे आवासे तेणेव उवागच्छइ २ ता कोट्टुम्बियपुरिसे सद्दावेइ २ ता एवं वयासी—“खिप्पामेव भो देवाणुप्पिया ! चाउग्गण्टं आसरहं जुत्तामेव उवट्टवेह” ।  
जहा सेयवियाए नयरीए निग्गच्छइ तहेव जाव वसमाणे २ कुणालाजणवयस्स मज्झमउज्जेणं जेणेव केइयअडे जणवए जेणेव सेयविया नयरी जेणेव मियवणे उज्जाणे तेणेव उवागच्छइ २ ता उज्जाणपालए सद्दावेइ २ ता एवं वयासी—“जया णं देवाणु-  
प्पिया ! पासावच्चिजे केसी नाम कुमारसमणे पुव्वाणुपुर्वि चरमाणे गामाणुगामं दूइ-  
जमाणे इहमागच्छिज्जा, तया णं तुब्भे देवाणुप्पिया ! केसिं कुमारसमणं वन्दिज्जाह नमंसिज्जाह वं० २ ता अहापडिस्सं उग्गहं अणुजाणेज्जाह । पाडिहारिएणं पीढफलग जाव उवनिमन्तेज्जाह । एयमाणत्तियं खिप्पामेव पच्चप्पिणेज्जाह” । तए णं ते उज्जाणपालगा चित्तेण सारहिणा एवं वुत्ता समाणा हट्टुट्ट जाव हियया करयल-  
परिग्गहियं जाव एवं वयासी—“तह” ति । आणाए विणएणं वयणं पडिमुणन्ति ॥ ५३ ॥ तए णं से चित्ते सारही जेणेव सेयविया नयरी तेणेव उवागच्छइ २ ता सेयवियं नयरिं मज्झमउज्जेणं अणुपविसइ २ ता जेणेव पएसिस्स रत्तो गिहे जेणेव बाहिरिया उवट्टाणसाला तेणेव उवागच्छइ २ ता तुरए निगिण्हइ २ ता रहं ठवेइ २ ता रहाओ पच्चोहइ २ ता तं महत्थं जाव गेण्हइ २ ता जेणेव पएसी राया तेणेव उवा-  
गच्छइ २ ता पएसिं रायं करयल जाव वद्दावेत्ता तं महत्थं जाव उवणेइ । तए णं से पएसी राया चित्तस्स सारहिस्स तं महत्थं जाव पडिच्छइ २ ता चित्तं सारहिं सक्कारेइ संमाणेइ स० २ ता पडिविसजेइ । तए णं से चित्ते सारही पएसिणा रत्ता विसज्जिए समाणेहट्ट जाव हियए पएसिस्स रत्तो अन्तियाओ पडिनिक्खमइ २ ता जेणेव चाउग्गण्टे आसरहे तेणेव उवागच्छइ २ ता चाउग्गण्टं आसरहं दुएहइ २ ता तुरए निगिण्हइ २ ता

रहं ठवेइ २ ता रहाओ पचोरुहइ २ ता ण्हाए अप्प० उप्पि पासायवरगए फुट्मा-  
 नेहिं मुइज्जमत्थएहिं वतीसइवद्धएहिं नाडएहिं वरतरुणीसंपउत्तेहिं उवनच्चिज्जमाणे २  
 उवगाइज्जमाणे २ उवललिज्जमाणे २ इट्ठे सट्ठकरिस जाव विहरइ ॥ ५४ ॥ तए णं  
 केसीकुमारसमणे अन्नया कयाइ पाडिहारियं पीढफलगसेजासंथारगं पच्चपिणइ २ ता  
 सावत्थीओ नयरीओ कोट्टगाओ उज्जाणाओ पडिनिक्खमइ २ ता पच्चहिं अणगारसएहिं  
 जाव विहरमाणे जेणेव केइयअद्धे जणवए जेणेव सेयविया नयरी जेणेव मियवणे  
 उज्जाणे तेणेव उवागच्छइ २ ता अहापडिरुवं उग्गहं उग्गिण्हिता संजमेणं तवसा  
 अप्पाणं भावेमाणे विहरइ ॥ ५५ ॥ तए णं सेयवियाए नयरीए सिंवाडगं...महया  
 जणसदे इ वा...परिसा निग्गच्छइ । तए णं ते उज्जाणपालगा इमीसे कहाए लद्धट्ठा  
 समाणा हट्ठुट्ठ जाव हियया जेणेव केसी कुमारसमणे तेणेव उवागच्छन्ति २ ता  
 केसिं कुमारसमणं वन्दन्ति नमंसन्ति वं० २ ता अहापडिरुवं उग्गहं अणुज्जाणन्ति०  
 पाडिहारिएणं जाव संथारएणं उवनिमन्तेन्ति० नामं गोयं पुच्छन्ति० ओधारेन्ति०  
 एगन्तं अवक्कमन्ति २ ता अन्नमन्नं एवं वयासी-“जस्स णं देवाणुप्पिया ! चित्ते  
 सारही दंसणं कंखइ० जस्स णं नामगोयस्स वि सवणयाए हट्ठुट्ठ जाव हियए भवइ  
 से णं एस केसी कुमारसमणे पुव्वाणुपुत्थि चरमाणे गामाणुगामं दूइज्जमाणे इहमाणए  
 इह संपत्ते इह समोसढे इहेव सेयवियाए नयरीए बहिया मियवणे उज्जाणे अहापडि-  
 रुवं जाव विहरइ । तं गच्छामो णं देवाणुप्पिया ! चित्तस्स सारहिस्स एयमट्ठं पियं  
 निवेएमो, पियं से भवउ” । अन्नमन्नस्स अन्तिए एयमट्ठं पडिसुणन्ति । जेणेव  
 सेयविया नयरी जेणेव चित्तस्स सारहिस्स गिहे जेणेव चित्ते सारही तेणेव उवाग-  
 च्छन्ति २ ता चित्तं सारहिं करयल जाव वद्धावेन्ति २ ता एवं वयासी-“जस्स णं देवा-  
 णुप्पिया ! दंसणं कंखन्ति जाव अभिलसन्ति, जस्स णं नामगोयस्स वि सवणयाए हट्ठ  
 जाव भवह, से णं अयं केसी कुमारसमणे पुव्वाणुपुत्थि चरमाणे...समोसढे जाव  
 विहरइ ॥ ५६ ॥ तए णं से चित्ते सारही तेसिं उज्जाणपालगाणं अन्तिए एयमट्ठं सोच्चा  
 निसम्म हट्ठुट्ठ जाव आसणाओ अब्भुट्ठेइ, पायपीढाओ पचोरुहइ २ ता पाउयाओ  
 ओमुयइ २ ता एगसाडियं उत्तरासङ्गं करेइ । अज्जलिमउल्लियग्गहत्थे केसिकुमारसम-  
 णाभिमुहे सत्तट्ठ पयाइ अणुगच्छइ २ ता करयलपरिग्गहियं० सिरसावत्तं मत्थए अज्जलिं  
 कट्ठु एवं वयासी-“नमोत्थु णं अरहन्ताणं जाव संपत्ताणं । नमोत्थु णं केसिस्स कुमार-  
 समणस्स मम धम्मायिरियस्स धम्मोवएसगस्स । वन्दामि णं भगवन्तं तत्थगयं इह-  
 गए । पासउ मे” त्तिक्कट्ठु वन्दइ नमंसइ । ते उज्जाणपालए विउलेणं वत्थगन्धमल्लालं-  
 कारेणं सक्कारेइ संमाणेइ विउलं जीवियारिहं पीइदाणं दलयइ २ ता पडिविसजेइ २ ता

कोडुम्बियपुरिसे सहावेह २ ता एवं वयासी—“खिप्पामेव भो देवाणुप्पिया ! चाउ-  
गघण्टं आसरहं जुतामेव उवट्टवेह जाव पच्चप्पिणह” । तए णं ते कोडुम्बियपुरिसा  
जाव खिप्पामेव सच्छतं सज्झयं जाव उवट्टवित्ता तमाणत्तियं पच्चप्पिणन्ति । तए णं  
से चित्ते सारही कोडुम्बियपुरिसाणं अन्तिए एयमट्ठं सोच्चा निसम्म हट्टुट्ठ जाव हियए  
ण्हाए ० सरीरे जेणेव चाउगघण्टे जाव दुरुहिता सकोरण्ट...महया भडचड० तं  
चेव जाव पज्जुवासइ धम्मक० जाव तए णं से चित्ते सारही केसिस्स कुमारसम-  
णस्स अन्तिए धम्मं सोच्चा निसम्म हट्टुट्ठ० उट्ठाए तहेव एवं वयासी—“एवं खलु  
भन्ते ! अहं पएसी राया अधम्मिए जाव सयस्स वि णं जणवयस्स नो सम्मं  
करभरवित्तिं पवत्तेइ । तं जइ णं देवाणुप्पिया ! पएसिस्स रत्तो धम्ममाइक्खेज्जा  
बहुगुणतरं खलु होज्जा पएसिस्स रत्तो तेसिं च बहूणं दुपयचउप्पयमियपसुपक्खि-  
सिरीसिवाणं तेसिं च बहूणं समणमाहणभिक्खुयाणं । तं जइ णं देवाणुप्पिया !  
...पएसिस्स बहुगुणतरं होज्जा सयस्स वि य णं जणवयस्स” ॥ ५७ ॥ तए  
णं केसी कुमारसमणे चित्तं सारहिं एवं वयासी—“एवं खलु चउहिं ठाणेहिं  
चित्ता ! जीवे केवलपन्नत्तं धम्मं नो लभेज्जा सवणयाए । तं जहा—आरामगयं वा  
उज्जाणगयं वा समणं वा माहणं वा नो अभिगच्छइ नो वन्दइ नो नमंसइ नो  
सक्कारेइ नो संमाणेइ नो कल्लाणं मज्जलं देवयं चेइयं पज्जुवासइ, नो अट्ठाइं हेऊइं  
पसिणाइं कारणाइं वागरणाइं पुच्छइ, एएणं ठाणेणं चित्ता ! जीवे केवलपन्नत्तं  
धम्मं नो लभइ सवणयाए १ । उवस्सयगयं समणं वा तं चेव जाव एएण वि  
ठाणेणं चित्ता ! जीवे केवलपन्नत्तं धम्मं नो लभइ सवणयाए २ । गोयरग्गगयं  
समणं वा माहणं वा जाव नो पज्जुवासइ, नो विउलेणं असणपाणखाइमसाइमेणं  
पडिलाभेइ, नो अट्ठाइं जाव पुच्छइ, एएणं ठाणेणं चित्ता ! जीवे केवलपन्नत्तं धम्मं  
नो लभइ सवणयाए ३ । जत्थ वि य णं समणेण वा माहणेण वा सद्धिं अभि-  
समागच्छइ, तत्थ वि य णं हत्थेण वा वत्थेण वा छत्तेण वा अप्पाणं आवरित्ता  
चिट्ठइ, नो अट्ठाइं जाव पुच्छइ, एएण वि ठाणेणं चित्ता ! जीवे केवलपन्नत्तं धम्मं  
नो लभइ सवणयाए ४ । एएहिं च णं चित्ता ! चउहिं ठाणेहिं जीवे केवलि-  
पन्नत्तं धम्मं नो लभइ सवणयाए ॥ चउहिं ठाणेहिं चित्ता ! जीवे केवलीपन्नत्तं  
धम्मं लभइ सवणयाए । तं जहा—आरामगयं वा उज्जाणगयं वा समणं वा माहणं  
वा वन्दइ नमंसइ जाव पज्जुवासइ अट्ठाइं जाव पुच्छइ, एएण जाव लभइ  
सवणयाए । एवं उवस्सयगयं गोयरग्गगयं समणं वा जाव पज्जुवासइ विउलेणं जाव  
पडिलाभेइ अट्ठाइं जाव पुच्छइ, एएण वि... जत्थ वि य णं समणेण वा...अभि-

समागच्छइ तत्थ वि य णं नो हत्थेण वा जाव आवरेत्ताणं चिट्ठइ, एएण वि ठाणेणं चित्ता ! जीवे केवलपन्नंतं धम्मं लभइ सवणयाए । तुज्झं च णं चित्ता ! पएसी राया आरामगयं वा तं चेव सव्वं भाणियव्वं आइल्लएणं गमएणं जाव अप्पाणं आवरेत्ता चिट्ठइ । तं कहं णं चित्ता ! पएसिस्स रत्तो धम्ममाइक्खिस्सामो ?” । तए णं से चित्ते सारही केसिं कुमारसमणं एवं वयासी—“एवं खलु भन्ते ! अन्नया कयाइ कम्बोएहिं चत्तारि आसा उवणयं उवणीया । ते मए पएसिस्स रत्तो अन्नया चेव उवणेया । तं एएणं खलु भन्ते ! कारणेणं अहं पएसिं रायं देवाणुप्पियाणं अन्तिए हव्वमाणेस्सामि । तं मा णं देवाणुप्पिया । तुब्भे पएसिस्स रत्तो धम्ममाइक्खमाणा गिलाएज्जाह । अगिलाए णं भंते ! तुब्भे पएसिस्स रत्तो धम्ममाइक्खेज्जाह छंदेणं०” । तए णं से केसी कुमारसमणे चित्तं सारहिं एवं वयासी—“अवि याइ चित्ता ! जाणिस्सामो” ॥ तए णं से चित्ते सारही केसिं कुमारसमणं वन्दइ नमंसइ वं० २ ता जेणेव चाउग्घण्टे आसरहे तेणेव उवागच्छइ २ ता चाउग्घण्टं आसरहं दुरुहइ, जामेव दिसिं पाउब्भूए तामेव दिसिं पडिगए ॥ ५८ ॥ तए णं से चित्ते सारही कहं पाउप्पभायाए रयणीए फुल्लुप्पलकमलकोमलुम्मिलियम्मि अहा-पण्डुरे पभाए कयनियमावस्सए सहस्सरस्सिसि दिणयरे तेयसा जलन्ते साओ गिहाओ निग्गच्छइ २ ता जेणेव पएसिस्स रत्तो गिहे जेणेव पएसी राया तेणेव उवागच्छइ २ ता पएसिं रायं करयल जाव कट्ठु जएणं विजएणं वद्धावेइ २ ता एवं वयासी—“एवं खलु देवाणुप्पियाणं कम्बोएहिं चत्तारि आसा उवणयं उवणीया । ते य मए देवाणुप्पियाणं अन्नया चेव विणइया । तं एह णं सामी ! ते आसे चिट्ठं पासह” । तए णं से पएसी राया चित्तं सारहिं एवं वयासी—“गच्छाहिं णं तुमं चित्ता ! तेहिं चेव चउहिं आसेहिं आसरहं जुत्तामेव उवट्ठवेहिं जाव पच्चप्पिणाहि” । तए णं से चित्ते सारही पएसिणा रण्णा एवं वुत्ते समाणे हट्ठतुट्ठ जाव हियए० उवट्ठवेइ २ ता एयमाणत्तियं पच्चप्पिणइ । तए णं से पएसी राया चित्तस्स सारहिस्स अन्तिए एयमट्ठं सोच्चा निसम्म हट्ठतुट्ठ जाव अप्पमहग्घाभरणाळंकियसरीरे साओ गिहाओ निग्गच्छइ २ ता जेणामेव चाउग्घण्टे आसरहे तेणामेव उवागच्छइ २ ता चाउग्घण्टं आसरहं दुरुहइ० सेयवियाए नयरीए मज्झमज्जेणं निग्गच्छइ । तए णं से चित्ते सारही तं रहं णेगाइं जोयणाइं उब्भामेइ । तए णं से पएसी राया उण्हेण य तण्हाए य रहवाएणं परिकिलन्ते समाणे चित्तं सारहिं एवं वयासी—“चित्ता ! परिकिलन्ते मे सरीरे, परावत्तेहिं रहं” । तए णं से चित्ते सारही रहं परावत्तेइ २ ता जेणेव मियवणे उज्जाणे तेणेव उवागच्छइ २ ता पएसिं रायं एवं वयासी—

“एस णं सामी ! मियवणे उज्जाणे, एत्थ णं आसाणं समं किलामं सम्मं पवीणेमो” । तए णं से पएसी राया चित्तं सारहिं एवं वयासी—“एवं होउ चित्ता !” । तए णं से चित्ते सारही जेणेव मियवणे उज्जाणे जेणेव केसिस्स कुमारसमणस्स अदूरसामन्ते तेणेव उवागच्छइ २ ता तुरए निगिण्हेइ २ ता रहं ठवेइ २ ता रहाओ पच्चोरुहइ २ ता तुरए मोएइ २ ता पएसिं रायं एवं वयासी—“एह णं सामी ! आसाणं समं किलामं सम्मं पवीणेमो” । तए णं से पएसी राया रहाओ पच्चोरुहइ । चित्तेण सारहिणा सद्धिं आसाणं समं किलामं सम्मं पवीणेमाणे पासइ जत्थ केसी कुमारसमणे महइ-महालियाए महच्चपरिसाए मज्झगए महया २ सहेणं धम्ममाइक्खमाणं । पासित्ता इमेयारूवे अज्झत्थिए जाव समुप्पजित्था—“जड्ढा खलु भो जड्ढं पज्जुवासन्ति, मुण्डा खलु भो मुण्डं पज्जुवासन्ति, मूढा खलु भो मूढं पज्जुवासन्ति, अपण्डिया खलु भो अपण्डियं पज्जुवासन्ति, निव्विच्चाणा खलु भो निव्विच्चाणं पज्जुवासन्ति । से कीम णं एस पुरिसे जेड्ढे मुण्डे मूढे अपण्डिए निव्विच्चाणे सिरीए हिरीए उवगए उत्तप्पसरीरे । एस णं पुरिसे किमाहारमाहारेइ किं परिणामेइ किं खाइ किं पियइ किं दलइ किं पयच्छइ, जे णं एमहालियाए मणुस्सपरिसाए मज्झगए महया २ सहेणं बुयाए ?” एवं संपेहेइ २ ता चित्तं सारहिं एवं वयासी—“चित्ता ! जड्ढा खलु भो जड्ढं पज्जुवासन्ति जाव बुयाए । साए वि य णं उज्जाणभूमीए नो संचापमि सम्मं पकामं पवियरित्तए” । तए णं से चित्ते सारही पएसीरायं एवं वयासी—“एस णं सामी ! पासावच्चिजे केसी नामं कुमारसमणे जाइसंपेजे जाव चउनाणोवगए आहो-हिए अन्नजीवी” । तए णं से पएसी राया चित्तं सारहिं एवं वयासी—“आहोहियं णं वयासि चित्ता ! अन्नजीवियं च णं वयासि चित्ता ?” “हन्ता सामी आहोहियं णं वयामि अन्नजीवियं च णं वयामि” । “अभिगमणिजे णं चित्ता ! अहं एस पुरिसे ?” “हन्ता सामी ! अभिगमणिजे” । “अभिगच्छामो णं चित्ता ! अम्हे एयं पुरिसं ?” “हन्ता सामी ! अभिगच्छामो” ॥ ५९ ॥ तए णं से पएसी राया चित्तेण सार-हिणा सद्धिं जेणेव केसी कुमारसमणे तेणेव उवागच्छइ २ ता केसिस्स कुमारसमणस्स अदूरसामन्ते ठिच्चा एवं वयासी—“तुब्बे णं भन्ते ! आहोहिया अन्नजीविया ?” । तए णं केसी कुमारसमणे पएसिं रायं एवं वयासी—“पएसी ! से जहानामए अङ्कवा-णिया इ वा संखवाणिया इ वा दन्तवाणिया इ वा सुंके भंसिउकामा नो सम्मं पन्थं पुच्छ०, एवामेव पएसी ! तु० विणयं भंसेउकामो नो सम्मं पुच्छसि । से नूणं तव पएसी ! ममं पासित्ता अयमेयारूवे अज्झत्थिए जाव समुप्पजित्था—“जड्ढा खलु भो जड्ढं पज्जुवासन्ति जाव पवियरित्तए” । से नूणं पएसी ! अट्ठे समट्ठे ?”



“हन्ता अत्थि” ॥ तए णं से पएसी राया केसिं कुमारसमणं एवं वयासी—“से के णं भन्ते ! तुज्झं नाणे वा दंसणे वा जेणं तुज्झे मम एयाख्वं अज्झत्थियं जाव संकप्पं समुप्पन्नं जाणह पासह ?” । तए णं से केसी कुमारसमणे पएसिं रायं एवं वयासी—“एवं खलु पएसी ! अम्हं समणाणं निग्गन्थाणं पञ्चविहे नाणे प० तं जहा—आभिणिबोहियनाणे सुयनाणे ओहिनाणे मणपज्जवनाणे केवलनाणे । से किं तं आभिणिबोहियनाणे ? आभिणिबोहियनाणे चउव्विहे पन्नत्ते, तं जहा—उग्गहो ईहा अवाए धारणा । से किं तं उग्गहे ? उग्गहे दुविहे पन्नत्ते जहा नन्दीए जाव से तं आभिणिबोहियनाणे । से किं तं सुयनाणे ? सुयनाणे दुविहे प० तं जहा—अज्झ-पविट्ठं च अज्झवाहिरं च, सव्वं भाणियव्वं जाव दिट्ठिवाओ । ओहिनाणं भवपच्चइयं खओवसमियं जहा नन्दीए । मणपज्जवनाणे दुविहे प० तं जहा—उज्जुमई य विउलमई य । तहेव केवलनाणं सव्वं भाणियव्वं । तत्थ णं जे से आभिणिबोहिय-नाणे से णं ममं अत्थि । तत्थ णं जे से सुयनाणे से वि य ममं अत्थि । तत्थ णं जे से ओहिनाणे से वि य ममं अत्थि । तत्थ णं जे से मणपज्जवनाणे से वि य ममं अत्थि । तत्थ णं जे से केवलनाणे से णं ममं नत्थि, से णं अरिहन्ताणं भगव-न्ताणं । इच्चेएणं पएसी ! अहं तव चउविहेणं छउमत्थेणं णाणेणं इमेयाख्वं अज्झ-त्थियं जाव समुप्पन्नं जाणामि पासामि” ॥ ६० ॥ तए णं से पएसी राया केसिं कुमारसमणं एवं वयासी—“अहं णं भन्ते ! इहं उवविसामि ?” “पएसी ! एयाए उज्जाणभूमीए तुमं सि चेव जाणए” । तए णं से पएसी राया चित्तेणं सारहिणा सद्धिं केसिस्स कुमारसमणस्स अदूरसामन्ते उवविसइ २ ता केसिं कुमारसमणं एवं वयासी—“तुब्भं णं भन्ते ! समणाणं निग्गन्थाणं एसा सन्ना एसा पइन्ना एसा विट्ठी एसा खई एस हेऊ एस उवएसे एस संकप्पे एसा तुला एस माणे एस पमाणे एस समोसरणे जहा अन्नो जीवो अन्नं सरीरं नो तं जीवो तं सरीरं ?” । तए णं केसी कुमारसमणे पएसिं रायं एवं वयासी—“पएसी ! अम्हं समणाणं निग्गन्थाणं एसा सन्ना जाव एस समोसरणे जहा अन्नो जीवो अन्नं सरीरं नो तं जीवो तं सरीरं” । तए णं से पएसी राया केसिं कुमारसमणं एवं वयासी—“जइ णं भन्ते ! तुब्भं समणाणं निग्गन्थाणं एसा सन्ना जाव समोसरणे जहा अन्नो जीवो अन्नं सरीरं नो तं जीवो तं सरीरं । एवं खलु ममं अज्जए होत्था, इहेव जम्बुदीवे दीवे सेयवियाए नयरीए अधम्मिए जाव सयस्स वि य णं जणवयस्स नो सम्मं करभरवित्तिं पवत्तेइ । से णं तुब्भं वत्तव्वयाए सुबहुं पावं कम्मं कल्लिक्खुसं समज्जिणित्ता कालमासे कालं किच्चा अन्नयरेसु नरएसु नेरइयत्ताए उववन्ने । तस्स णं अज्जगस्स अहं नत्तुए होत्था

इद्धे कन्ते पिए मणुञ्जे थेज्जे वेसासिए संमए बहुमए अणुमए रयणकरण्डगसमाणे जीविउस्सविए हिययनन्दिजणणे उम्बरपुप्फं पिव दुल्लभे सवणयाए, किमन्न पुण पासणयाए । तं जइ णं से अज्जए ममं आगन्तुं वएज्जा—“एवं खलु नत्तुया ! अहं तव अज्जए होत्था, इहेव सेयवियाए नयरीए अधम्मिए जाव नो सम्मं करभरवित्ति पवत्तेमि । तए णं अहं सुबहुं पावं कम्मं कलिकल्लसं समज्जिणित्ता नरएसु उववञ्जे । तं मा णं नत्तुया ! तुमं पि भवाहि अधम्मिए जाव नो सम्मं करभरवित्ति पवत्तेहि । मा णं तुमं पि एवं चेव सुबहुं पावकम्मं जाव उववज्जिहिसि” । तं जइ णं से अज्जए ममं आगन्तुं एवं वएज्जा तो णं अहं सद्वहेज्जा पत्तिएज्जा रोएज्जा जहा अन्नो जीवो अन्नं सरीरं नो तं जीवो तं सरीरं । जम्हा णं से अज्जए ममं आगन्तुं नो एवं वयासी तम्हा सुपइद्धिया मम पइच्चा समणाउसो ! जहा तं जीवो तं सरीरं” ॥ तए णं केसी कुमारसमणे पएसिं रायं एवं वयासी—“अत्थि णं पएसी ! तव सूरियकन्ता नामं देवी ?” “हन्ता अत्थि” । “जइ णं तुमं पएसी ! तं सूरियकन्तं देविं ण्हायं सव्वालंकारविभूसियं केणइ पुरिसेणं सव्वालंकारविभूसिएणं सद्धिं इद्धे सदफरिसरसह्वगन्धे पञ्चविहे माणुस्सए कामभोगे पञ्चणुभवमाणिं पासिज्जसि, तस्स णं तुमं पएसी ! पुरिसस्स कं उण्ठं निव्वत्तेज्जासि ?” “अहं णं भन्ते ! तं पुरिसं हत्थच्छिन्नं वा पायच्छिन्नं वा सूलाइयं वा सूलभिन्नं वा एगाहच्चं कूडाहच्चं जीवियाओ ववरोवएज्जा” । “अहं णं पएसी ! से पुरिसे तुमं एवं वएज्जा—“मा ताव मे सामी ! सुहुत्तं हत्थच्छिन्नं जाव जीवियाओ ववरोवेहि जाव तावाहं भित्तनाइनियगसयणसंबन्धिपरिजणं एवं वयासि—“एवं खलु देवाणुप्पिया० पावाई कम्माइं समायरित्ता इमेयाह्वं आवइं पाविज्जामि, तं मा णं देवाणुप्पिया ! तुब्भे वि केइ पावाई कम्माइं समायरउ, मा णं से वि एवं चेव आवइं पाविज्जिहिइ जहा णं अहं” । तस्स णं तुमं पएसी ! पुरिसस्स खणमवि एयमद्धं पडिसुणेज्जासि ?” “नो इणद्धे समद्धे” । “कम्हा णं ?” “जम्हा णं भन्ते ! अवराही णं से पुरिसे” । “एवामेव पएसी ! तव वि अज्जए होत्था इहेव सेयवियाए नयरीए अधम्मिए जाव नो सम्मं करभरवित्ति पवत्तेइ । से णं अम्मं वत्तववयाए सुबहुं जाव उववञ्जो । तस्स णं अज्जगस्स तुमं नत्तुए होत्था इद्धे कन्ते जाव पासणयाए । से णं इच्छइ माणुसं लोगं हव्वमागच्छित्तए, नो चेव णं संचाएइ हव्वमागच्छित्तए । चउहिं ठाणेहिं पएसी ! अहुणोववन्नए नरएसु नेरइए इच्छइ माणुसं लोगं हव्वमागच्छित्तए, नो चेव णं संचाएइ अहुणोववन्नए नरएसु नेरइए० । से णं तत्थ महब्भूयं वेयणं वेएमाणे इच्छेज्जा माणुसं लोगं हव्व...नो चेव णं संचाएइ...१ । अहुणोववन्नए नरएसु नेरइए नरयपालेहिं भुज्जो २ समहिद्धिजमाणे इच्छइ माणुसं

लोगं हव्वमागच्छित्तए नो चेव णं संचाएइ...२ । अहुणोववन्नए नरएसु नेरइए निरय-  
 वेयणिजंसि कम्मंसि अक्खीणंसि अवेइयंसि अनिज्जिणंसि इच्छइ माणुसं लोगं...नो  
 चेव णं संचाएइ...३ । एवं नेरइए निरयाउयंसि कम्मंसि अक्खीणंसि अवेइयंसि  
 अनिज्जिणंसि इच्छइ माणुसं लोगं...नो चेव णं संचाएइ हव्वमागच्छित्तए ४ ।  
 इचेएहिं चउहिं ठाणेहिं पएसी ! अहुणोववन्ने नरएसु नेरइए इच्छइ माणुसं लोगं...नो  
 चेव णं संचाएइ हव्वमागच्छित्तए । तं सदहाहिं णं पएसी ! जहा अन्नो जीवो अन्नं  
 सरीरं नो तं जीवो तं सरीरं” ॥ १ ॥ ६१ ॥ तए णं से पएसी राया केसि कुमार-  
 समणं एवं वयासी—“अत्थि णं भन्ते ! एसा पत्ता उवमा, इमेण पुण कारणेणं नो  
 उवागच्छइ एवं खलु भन्ते ! मम अज्जिया होत्था इहेव सेयवियाए नयरीए धम्मिया  
 जाव वित्ति कप्पेमाणी समणोवासिया अभिगयजीवाजीवा सव्वो वण्णओ जाव अप्पाणं  
 भावेमाणी विहरइ । सा णं तुज्झं वत्तव्वयाए सुबहुं पुण्णोवचयं समज्जिणित्ता कालमासे  
 कालं किच्चा अन्नयरेसु देवलोएसु देवत्ताए उववन्ना । तीसे णं अज्जियाए अहं नत्तुए  
 होत्था इट्ठे कन्ते जाव पासणयाए । तं जइ णं सा अज्जिया ममं आगन्तुं एवं वएज्जा—  
 ‘एवं खलु नत्तुया ! अहं तव अज्जिया होत्था इहेव सेयवियाए नयरीए धम्मिया जाव  
 वित्ति कप्पेमाणी समणोवासिया जाव विहरामि । तए णं अहं सुबहुं पुण्णोवचयं समज्जि-  
 णित्ता जाव देवलोएसु उववन्ना । तं तुमं पि नत्तुया ! भवाहि धम्मिए जाव विहराहि । तए  
 णं तुमं पि एवं चेव सुबहुं पुण्णोवचयं सम...जाव उववज्जिहिंसि’ । तं जइ णं सा अज्जिया  
 मम आगन्तुं एवं वएज्जा, तो णं अहं सदहेज्जा पत्तिएज्जा रोएज्जा जहा अन्नो जीवो  
 अन्नं सरीरं नो तं जीवो तं सरीरं । जम्हा सा अज्जिया ममं आगन्तुं नो एवं वयासी  
 तम्हा सुपइट्ठिया मे पइन्ना जहा तं जीवो तं सरीरं नो अन्नो जीवो अन्नं सरीरं” ॥  
 तए णं केसी कुमारसमणे पएसीरायं एवं वयासी—“जइ णं तुमं पएसी ! ण्हायं  
 उल्लपडसाडणं भिज्जारकडुच्छुयहत्थगयं देवकुलमणुपविसमाणं केइ पुरिसे वच्चघरंसि  
 ठिच्चा एवं वएज्जा—‘एह ताव सामी ! इह मुहुत्तगं आसयह वा चिट्ठह वा निसीयह  
 वा तुयट्ठह वा’ तरस्स णं तुमं पएसी ! पुरिसस्स खणमवि एयमट्ठं पडिसुणिजासि ?”  
 “नो” ति० । “कम्हा णं ?” “भन्ते ! असुइ २ सामन्तो” । “एवामेव पएसी ! तव  
 वि अज्जिया होत्था इहेव सेयवियाए नयरीए धम्मिया जाव विहरइ । सा णं अम्हं  
 वत्तव्वयाए सुबहुं जाव उववन्ना, तीसे णं अज्जियाए तुमं नत्तुए होत्था इट्ठे जाव  
 किमज्ज पुण पासणयाए । सा णं इच्छइ माणुसं लोगं हव्वमागच्छित्तए, नो चेव णं  
 संचाएइ हव्वमागच्छित्तए । चउहिं ठाणेहिं पएसी ! अहुणोववन्ने देवे देवलोएसु  
 इच्छेज्जा माणुसं लोगं...नो चेव णं संचाएइ० । अहुणोववन्ने देवे देवलोएसु दिव्वेहिं

कामभोगेहिं मुच्छिण गिद्धे गढिए अज्झोववन्ने, से णं माणसे भोगे नो आढाइ नो परिजाणाइ, से णं इच्छिज्ज माणुसं... नो चेव णं संचाएइ... १ । अहुणोववन्ने देवे देवलोएसु दिव्वेहिं कामभोगेहिं मुच्छिण जाव अज्झोववन्ने, तस्स णं माणुस्से पेम्मे वोच्छिन्नए भवइ, दिव्वे पेम्मे संक्रन्ते भवइ, से णं इच्छेज्जा माणुसं... नो चेव णं संचाएइ... २ । अहुणोववन्ने देवे दिव्वेहिं कामभोगेहिं मुच्छिण जाव अज्झोववन्ने, तस्स णं एवं भवइ-इयाणिं गच्छं मुहुत्तं गच्छं जाव इह अप्पाउया नरा कालधम्मणा संजुत्ता भवन्ति, से णं इच्छेज्जा माणुसं... नो चेव णं संचाएइ... ३ । अहुणोववन्ने देवे दिव्वेहिं जाव अज्झोववन्ने तस्स माणुस्सए उराले दुग्गन्धे पडिक्खे पडिलोमे भवइ, उड्डं पि य णं चत्तारि पच्च जोयणसयाइं असुभे माणुस्सए गन्धे अभिसमा-गच्छइ, से णं इच्छेज्जा माणुसं... नो चेव णं संचाएइ... ४ । इच्चेएहिं चउहिं ठाणेहिं पएसी ! अहुणोववन्ने देवे देवलोएसु इच्छेज्जा माणुसं लोणं हव्वमागच्छित्तए, नो चेव णं संचाएइ हव्वमागच्छित्तए । तं सदहाहि णं तुमं पएसी ! जहा अन्नो जीवो अन्नं सरीरं नो तं जीवो तं सरीरं” ॥ २ ॥ ६२ ॥ तए णं से पएसी राया केसिं कुमार-समणं एवं वयासी-“अत्थि णं भन्ते ! एसा पन्ना उवमा । इमेणं पुण कारणेणं नो उवागच्छइ । एवं खलु भन्ते ! अहं अन्नया कयाइ बाहिरियाए उवट्ठणसालाए अणेगगणनायगण्डणायगराईसरतलवरमाडंभियकोडुम्बियइभसेट्टिसेणावइसत्थवाह-मन्तिमहामन्तिगणगदोवारियअमच्चचेडपीढमद्दनगरनिगमदूयसंधिवालेहिं सद्धिं संपरि-वुडे विहरामि । तए णं मम नगरगुत्तिया ससक्खं सलोइं सगेवेज्जं अवओडयवन्धण-वद्धं चोरं उवणेन्ति । तए णं अहं तं पुरिसं जीवन्तं चेव अउकुम्भीए पक्खिवावेमि, अउमएणं पिहाणएणं पिहावेमि, अएण य तउएण य आयावेमि, आयपच्चइयएहिं पुरिसेहिं रक्खावेमि । तए णं अहं अन्नया कयाइ जेणामेव सा अउकुम्भी तेणामेव उवागच्छामि २ ता तं अउकुम्भि उग्गलच्छावेमि २ ता तं पुरिसं सयमेव पासामि । नो चेव णं तीसे अउकुम्भीए केइ छिड्डे इ वा विवरे इ वा अन्तरे इ वा राई इ वा जओ णं से जीवे अन्तोहिंतो बहिया निग्गए । जइ णं भन्ते ! तीसे अउकुम्भीए होज्जा केइ छिड्डे वा जाव राई वा जओ णं से जीवे अन्तोहिंतो बहिया निग्गए तो णं अहं सदहेज्जा पत्तिएज्जा रोएज्जा जहा अन्नो जीवो अन्नं सरीरं नो तं जीवो तं सरीरं । जम्हा णं भन्ते ! तीसे अउकुम्भीए नत्थि केइ छिड्डे वा जाव निग्गए तम्हा सुपइट्टिया मे पडन्ना जहा तं जीवो तं सरीरं नो अन्नो जीवो अन्नं सरीरं” ॥ तए णं केसी कुमारसमणे पएसिं रायं एवं वयासी-“पएसी ! से जहानामए कूडा-गारसाला सिया दुहओलित्ता गुत्ता गुत्तदुवारा निवायगम्भीरा । अहं णं केइ पुरिसे

भेरिं च दण्डं च गहाय कूडागारसालाए अन्तो २ अणुपविसइ २ ता तीसे कूडागार-  
 सालाए सव्वओ समन्ता घणनिचियनिरन्तरनिच्छिडाइं दुवारवयणाइं पिहेइ । तीसे  
 कूडागारसालाए बहुमज्झदेसभाए ठिच्चा तं भेरिं दण्डएणं महया २ सहेणं तालेज्जा ।  
 से नूणं पएसी ! से णं सदे अन्तोहिंतो बहिया निग्गच्छइ ?” “हन्ता निग्गच्छइ” ।  
 “अत्थि णं पएसी ! तीसे कूडागारसालाए केइ छिडे वा जाव राई वा जओ णं से  
 सदे अन्तोहिंतो बहिया निग्गए ?” “नो इण्ठे समेट्ठे” । “एवामेव पएसी ! जीवे  
 वि अप्पडिहयगई पुढविं भिच्चा सिलं भिच्चा पव्वयं भिच्चा अन्तोहिंतो बहिया  
 निग्गच्छइ । तं सदहाहि णं तुमं पएसी ! अन्नो जीवो...तं चेव” ॥ ३ ॥ ६३ ॥  
 तए णं पएसी राया केसिं कुमारसमणं एवं वयासी-“अत्थि णं भन्ते ! एसा पन्ना  
 उवमा । इमेण पुण कारणेणं नो उवागच्छइ । एवं खलु भन्ते । अहं अन्नया कयाइ  
 बाहिरियाए उवट्ठाणसालाए जाव विहरामि । तए णं ममं नगरगुत्तिया ससक्खं जाव  
 उवणेन्ति । तए णं अहं तं पुरिसं जीवियाओ ववरोवेमि २ ता अओकुम्मीए पक्खि-  
 वामि २ ता अउमएणं पिहाणएणं पिहावेमि जाव पच्चइएहिं पुरिसेहिं रक्खावेमि ।  
 तए णं अहं अन्नया कयाइ जेणेव सा कुम्मी तेणेव उवागच्छामि २ ता तं अउकुम्भि  
 उगलच्छावेमि । तं अउकुम्भि किमिकुम्भि पिव पासामि । नो चेव णं तीसे अउकुम्मीए  
 केइ छिडे वा जाव राई वा जओ णं ते जीवा बहियाहिंतो अन्तो अणुपविट्ठा ।  
 जइ णं तीसे अउकुम्मीए होज्ज केइ छिडे जाव अणुपविट्ठा, तए णं अहं सदहेज्जा  
 जहा अन्नो जीवो तं चेव । जम्हा णं तीसे अउकुम्मीए नत्थि केइ छिडे वा जाव  
 अणुपविट्ठा तम्हा सुपइट्ठिया मे पइच्चा जहा तं जीवो तं सरीरं तं चेव” ॥ तए णं  
 केसी कुमारसमणे पएसिं रायं एवं वयासी-“अत्थि णं तुमे पएसी ! कयाइ अए  
 धन्तपुव्वे वा धमावियपुव्वे वा ?” “हन्ता अत्थि” । “से नूणं पएसी ! अए धन्ते  
 समाणे सव्वे अगणिपरिणए भवइ ?” “हन्ता भवइ” । “अत्थि णं पएसी ! तरस  
 अयस्स केइ छिडे वा० जेणं से जोई बहियाहिंतो अन्तो अणुपविट्ठे ?” “नो इण्ठे  
 समेट्ठे” । “एवामेव पएसी ! जीवो वि अप्पडिहयगई पुढविं भिच्चा सिलं भिच्चा  
 बहियाहिंतो अन्तो अणुपविसइ । तं सदहाहि णं तुमं पएसी !...तहेव” ॥ ४ ॥ ६४ ॥  
 तए णं पएसी राया केसिं कुमारसमणं एवं वयासी-“अत्थि णं भन्ते ! एसा पन्ना  
 उवमा । इमेण पुण मे कारणेणं नो उवागच्छइ । भन्ते ! से जहानामए  
 केइ पुरिसे तरुणे जाव ०सिप्पोवगए पभू पच्चकण्डगं निसिरित्तए ?” “हन्ता पभू” ।  
 “जइ णं भन्ते ! सो चेव पुरिसे बाले जाव मन्दविच्चाणे पभू होज्जा पच्चकण्डगं  
 निसिरित्तए, तो णं अहं सदहेज्जा जहा अन्नो जीवो तं चेव । जम्हा णं भन्ते ! स

चेव से पुरिसे जाव मन्दविज्ञाणे नो पभू पञ्चकण्डगं निसिरित्तए, तम्हा सुपइट्टिया मे पइच्चा जहा तं जीवो तं चेव” ॥ तए णं केसी कुमारसमणे पएसिं रायं एवं वयासी-“से जहानामए केइ पुरिसे तरुणे जाव ०सिप्पोवगए नवएणं धणुणा नवियाए जीवाए नवएणं उसुणा पभू पञ्चकण्डगं निसिरित्तए ?” “हन्ता पभू” । “सो चेव णं पुरिसे तरुणे जाव निउणासिप्पोवगए कोरिल्लिएणं धणुणा कोरिल्लियाए जीवाए कोरिल्लिएणं उसुणा पभू पञ्चकण्डगं निसिरित्तए ?” “नो इणट्ठे समट्ठे” । “कम्हा णं ?” “भन्ते ! तस्स पुरिसस्स अपज्जत्ताइं उवगरणाइं हवन्ति” । “एवामेव पएसी ! सो चेव पुरिसे बाले जाव मन्दविज्ञाणे अपज्जत्तोवगरणे, नो पभू पञ्चकण्डगं निसिरित्तए । तं सद्वहाहि णं तुमं पएसी ! जहा अन्नो जीवो तं चेव” ॥ ५ ॥ ६५ ॥ तए णं पएसी राया केसिं कुमारसमणं एवं वयासी-“अत्थि णं भन्ते ! एसा पन्ना उवमा, इमेण पुण कारणेणं नो उवागच्छइ । भन्ते ! से जहानामए केइ पुरिसे तरुणे जाव ०सिप्पोवगए पभू एणं महं अयभारं वा तउयभारं वा सीसगभारं वा परिवहित्तए ?” “हन्ता पभू” । “सो चेव णं भन्ते ! पुरिसे जुण्णे जराजजरिय-देहे सिहिलवलित्तयाविणट्ठगत्ते दण्डपरिगहियग्गहत्थे पविरलपरिसडियदन्तसेढी आउरे कित्तिए पिवासिए दुब्बले किलन्ते नो पभू एणं महं अयभारं वा जाव परिवहित्तए । जइ णं भन्ते ! स चेव पुरिसे जुण्णे जराजजरियदेहे जाव परिकिलन्ते पभू एणं महं अयभारं वा जाव परिवहित्तए, तो णं अहं सद्वहेजा...तहेव । जम्हा णं भन्ते ! से चेव पुरिसे जुण्णे जाव किलन्ते नो पभू एणं महं अयभारं वा जाव परिवहित्तए, तम्हा सुपइट्टिया मे पइच्चा...तहेव” ॥ तए णं केसी कुमारसमणे पएसिं रायं एवं वयासी-“से जहानामए केइ पुरिसे तरुणे जाव ०सिप्पोवगए नवियाए विहङ्गियाए नवएहिं सिक्कएहिं नवएहिं पत्थियपिडएहिं पट्टू एणं महं अयभारं जाव परिवहित्तए ?” “हन्ता पभू” । “पएसी ! से चेव णं पुरिसे तरुणे जाव ०सिप्पोवगए जुण्णियाए दुब्बलियाए धुण्णक्खइयाए विहङ्गियाए दुब्बलएहिं जुण्णएहिं धुण्णक्ख-इएहिं सिहिलत्तयापिण्डएहिं सिक्कएहिं जुण्णएहिं दुब्बलएहिं धुण्णक्खइएहिं पत्थियपि-डएहिं पभू एणं महं अयभारं वा जाव परिवहित्तए ?” “नो इणट्ठे समट्ठे” । “कम्हा णं ?” “भन्ते ! तस्स पुरिसस्स जुण्णाइं उवगरणाइं हवन्ति” । “पएसी ! से चेव से पुरिसे जुञ्जे जाव किलन्ते जुण्णोवगरणे नो पभू एणं महं अयभारं वा जाव परिवहित्तए । तं सद्वहाहि णं तुमं पएसी ! जहा अन्नो जीवो अन्नं सरीरं” ॥ ६ ॥ ६६ ॥ तए णं से पएसी केसिं कुमारसमणं एवं वयासी-“अत्थि णं भन्ते ! जाव नो उवागच्छइ । एवं खलु भन्ते ! जाव विहरामि । तए णं मम नगरगुत्तिया

चोरं उवणेन्ति । तए णं अहं तं पुरिसं जीवन्तगं चेव तुलेमि । तुलेता छविच्छेयं अकुव्वमाणे जीवियाओ ववरोवेमि २ ता मयं तुलेमि । नो चेव णं तस्स पुरिसस्स जीवन्तस्स वा तुलियस्स मुयस्स वा तुलियस्स केइ आणत्ते वा नाणत्ते वा ओमत्ते वा तुच्छत्ते वा गुरयत्ते वा लहुयत्ते वा । जइ णं भन्ते ! तस्स पुरिसस्स जीवन्तस्स वा तुलियस्स मुयस्स वा तुलियस्स केइ अन्नत्ते वा जाव लहुयत्ते वा तो णं अहं सइहेज्जा तं चेव । जम्हा णं भन्ते ! तस्स पुरिसस्स जीवन्तस्स वा तुलियस्स मुयस्स वा तुलियस्स नत्थि केइ आणत्ते वा...लहुयत्ते वा तम्हा सुपइट्ठिया मे पइच्चा जहा तं जीवो...तं चेव” । तए णं केसी कुमारसमणे पएसिं रायं एवं वयासी-“अत्थि णं पएसी ! तुमे कयाइ बत्थी धन्तपुव्वे वा धमावियपुव्वे वा ?” “हन्ता अत्थि” । “अत्थि णं पएसी ! तस्स बत्थिस्स पुण्णस्स वा तुलियस्स अपुण्णस्स वा तुलियस्स केइ अन्नत्ते वा जाव लहुयत्ते वा ?” “नो इण्ठे समट्ठे” । “एवामेव पएसी ! जीवस्स अगुरुल्लुयत्तं पडुच्च जीवन्तस्स वा तुलियस्स मुयस्स वा तुलियस्स नत्थि केइ आणत्ते वा जाव लहुयत्ते वा । तं सइहाहिं णं तुमं पएसी !...तं चेव” ॥ ७ ॥ ६७ ॥ तए णं पएसी राया केसिं कुमारसमणं एवं वयासी-“अत्थि णं भन्ते ! एसा जाव नो उवागच्छइ । एवं खलु भन्ते ! अहं अन्नया जाव चोरं उवणेन्ति । तए णं अहं तं पुरिसं सव्वओ समन्ता समभिलोएमि । नो चेव णं तत्थ जीवं पासामि । तए णं अहं तं पुरिसं दुहाफालियं करेमि २ ता सव्वओ समन्ता समभिलोएमि । नो चेव णं तत्थ जीवं पासामि । एवं तिहा चउहा संखेज्जफालियं करेमि, नो चेव णं तत्थ जीवं पासामि । जइ णं भन्ते ! अहं तं पुरिसं दुहा वा तिहा वा चउहा वा संखेज्जहा वा फालियंमि जीवं पासन्तो तो णं अहं सइहेज्जा नो...तं चेव । जम्हा णं भन्ते ! अहं तंसि दुहा वा तिहा वा चउहा वा संखेज्जहा वा फालियंमि जीवं न पासामि तम्हा सुपइट्ठिया मे पइच्चा जहा तं जीवो तं सरिरं...तं चेव” ॥ तए णं केसी कुमारसमणे पएसिं रायं एवं वयासी-“मूढतराए णं तुमं पएसी ! ताओ तुच्छतराओ” । “के णं भन्ते ! तुच्छतराए ?” “पएसी ! से जहानामए केइ पुरिसा वणत्थी वणोवजीवी वणगवेसणयाए जोइं च जोइभायणं च गहाय कट्ठाणं अडविं अणुपविट्ठा । तए णं ते पुरिसा तीसे अगामियाए जाव किंचि देसं अणुप्पत्ता समाणा एणं पुरिसं एवं वयासी-“अम्हे णं देवाणुप्पिया ! कट्ठाणं अडविं पविसामो । एत्तो णं तुमं जोइभायणाओ जोइं गहाय अम्हं असणं साहेज्जासि । अहं तुं जोइभायणे जोइं विज्जवेज्जा एत्तो णं तुमं कट्ठाओ जोइं गहाय अम्हं असणं साहेज्जासि” त्ति-कट्ठु कट्ठाणं अडविं अणुपविट्ठा । तए णं से पुरिसे तओ मुहुत्तन्तरस्स तेसिं पुरिसाणं

असणं साहेमित्तिकट्टु जेणेव जोइभायणे तेणेव उवागच्छइ, जोइभाइणे जोइं विज्झायमेव पासइ । तए णं से पुरिसे जेणेव से कट्ठे तेणेव उवागच्छइ २ ता तं कट्ठं सव्वओ समन्ता समभिलोएइ, नो चेव णं तत्थ जोइं पासइ । तए णं से पुरिसे परियरं बन्धइ, फरसुं गिण्हइ, तं कट्ठं दुहाफालियं करेइ, सव्वओ समन्ता समभिलोएइ, नो चेव णं तत्थ जोइं पासइ । एवं जाव संखेज्जफालियं करेइ, सव्वओ समन्ता समभिलोएइ, नो चेव णं तत्थ जोइं पासइ । तए णं से पुरिसे तंति कट्ठंति दुहाफालिए वा जाव संखेज्जफालिए वा जोइं अपासमाणे सन्ते तन्ते परितन्ते निव्विण्णे समाणे परसुं एगन्ते एडेइ २ ता परियरं मुयइ २ ता एवं वयासी—‘अहो मए तेसिं पुरिसाणं असणे नो साहिए’त्तिकट्टु ओहयमणसंकप्पे चिन्तासोगसागरसंपविट्ठे करयलपल्लहत्थमुहे अट्ठज्झाणोवगए भूमिगयदिट्ठिए झियाइ । तए णं ते पुरिसा कट्ठाइं छिन्दन्ति २ ता जेणेव से पुरिसे तेणेव उवागच्छन्ति २ ता तं पुरिसं ओहयमणसंकप्पं जाव झियायमाणं पासन्ति २ ता एवं वयासी—‘किं णं तुमं देवाणुप्पिया ! ओहयमणसंकप्पे जाव झियायसि ?’ । तए णं से पुरिसे एवं वयासी—‘तुज्झे णं देवाणुप्पिया ! कट्ठाणं अडविं अणुपविसमाणा ममं एवं वयासी—‘अम्हे णं देवाणुप्पिया ! कट्ठाणं अडविं जाव पविट्ठा । तए णं अहं ततो मुहुत्तन्तरस्स तुज्झं असणं साहेमित्तिकट्टु जेणेव जोइं जाव झियामि’ । तए णं तेसिं पुरिसाणं एगे पुरिसे छेए दक्खे पत्तडे जाव उवएसल्लदे, ते पुरिसे एवं वयासी—‘गच्छइ णं तुज्झे देवाणुप्पिया ! ण्हाया हव्वमागच्छेइ, जा णं अहं असणं साहेमि’ त्तिकट्टु परियरं बन्धइ २ ता परसुं गिण्हइ २ ता सरं करेइ, सरेण अरणिं महेइ, जोइं पाडेइ २ ता जोइं संयुक्खेइ, तेसिं पुरिसाणं असणं साहेइ । तए णं ते पुरिसा ण्हाया जेणेव से पुरिसे तेणेव उवागच्छन्ति । तए णं से पुरिसे तेसिं पुरिसाणं सुहासणवरगयाणं तं विउलं असणं पाणं खाइमं साइमं उवणेइ । तए णं ते पुरिसा तं विउलं असणं ४ आसाएमाणा वीसाएमाणा जाव विहरन्ति । जिमियभुत्ततरागया वि य णं समाणा आयन्ता चोक्खा परमसुइभूया तं पुरिसं एवं वयासी—‘अहो णं तुमं देवाणुप्पिया ! जेड्डु मूढे अपण्डिए निव्विज्जाणे अणुवएसल्लदे, जे णं तुमं इच्छसि कट्ठंति दुहाफालियंसि वा ० जोइं पासित्तए’ । से एएण्ठेणं पएसी ! एवं वुच्चइ मूढतराए णं तुमं पएसी ताओ तुच्छतराओ” ॥८॥६८॥ तए णं पएसी राया केसिं कुमारसमणं एवं वयासी—“उत्तए णं भन्ते ! तुबमं इय छेयाणं दक्खाणं बुद्धाणं कुसलाणं महामइंणं विणीयाणं विज्जाणपत्ताणं उवएसल्लद्धाणं अहं इमीसे महालियाए महच्चपरिसाए मज्जे उच्चावएहिं आउसेहिं आउसित्तए, उच्चावयाहिं उद्धंसणाहिं उद्धंसित्तए, एवं निब्भञ्छणाहिं ० निच्छोडणाहिं ० ?” । तए



णं केसी कुमारसमणे पएसिं रायं एवं वयासी—“जाणासि णं तुमं पएसी! कइ परिसाओ पन्नत्ताओ?” “भन्ते! जाणामि, चत्तारि परिसाओ पन्नत्ता। तं जहा-  
 खत्तियपरिसा गाहावइपरिसा माहणपरिसा इसिपरिसा”। “जाणासि णं तुमं पएसी  
 राया! एयासिं चउण्हं परिसाणं कस्स का दण्डनीई पन्नत्ता?” “हन्ता जाणामि। जे  
 णं खत्तियपरिसाए अवरज्झइ से णं हत्थच्छिन्नए वा पायच्छिन्नए वा सीसच्छिन्नए  
 वा सूलाइए वा एगाहचे कूडाहचे जीवियाओ ववरोविजइ। जे णं गाहावइपरिसाए  
 अवरज्झइ से णं तएण वा वेढेण वा फललेण वा वेढित्ता अगणिकाएणं झामिजइ।  
 जे णं माहणपरिसाए अवरज्झइ से णं अणिट्ठाहिं अकन्ताहिं जाव अमणामाहिं  
 वग्गूहिं उवालम्भित्ता कुण्डियालञ्छणए वा सुणगलञ्छणए वा कीरइ, निव्विसए वा  
 आणविजइ। जे णं इसिपरिसाए अवरज्झइ से णं नाइअणिट्ठाहिं जाव नाइ-  
 अमणामाहिं वग्गूहिं उवालम्भइ”। “एवं च ताव पएसी! तुमं जाणासि, तहा वि  
 णं तुमं ममं वामं वामेणं दण्डंदण्डेणं पडिकूलंपडिकूलेणं पडिलोमंपडिलोमेणं विवच्चा-  
 संविवच्चासेणं वट्ठिस्सि”। तए णं पएसी राया केसिं कुमारसमणं एवं वयासी—“एवं  
 खलु अहं देवाणुप्पिएहिं पढमिल्लएणं चेव वागरणेणं संलत्ते। तए णं मम इमेयारूवे  
 अब्भत्थिए जाव संकम्ये समुप्पजित्था—जहा जहा णं एयस्स पुरिसस्स वामं वामेणं  
 जाव विवच्चासंविवच्चासेणं वट्ठिस्सामि, तहा तहा णं अहं नाणं च नाणोवलम्भं च  
 करणं च करणोवलम्भं च दंसणं च दंसणोवलम्भं च जीवं च जीवोवलम्भं च  
 उवलमिस्सामि। तं एएणं कारणेणं अहं देवाणुप्पियाणं वामं वामेणं जाव विवच्चा-  
 संविवच्चासेणं वट्ठिए”। तए णं केसी कुमारसमणे पएसीरायं एवं वयासी—“जाणासि  
 णं तुमं पएसी! कइ ववहारगा पन्नत्ता?” “हन्ता जाणामि, चत्तारि ववहारगा  
 पन्नत्ता—देइ नामेणे नो सन्नवेइ, सन्नवेइ नामेणे नो देइ, एगे देइ वि सन्नवेइ वि,  
 एगे नो देइ नो सन्नवेइ”। “जाणासि णं तुमं पएसी! एएसिं चउण्हं पुरिसाणं के  
 ववहारी के अव्वहारी?” “हन्ता जाणामि, तत्थ णं जे से पुरिसे देइ नो सन्नवेइ  
 से णं पुरिसे ववहारी, तत्थ णं जे से पुरिसे नो देइ सन्नवेइ से णं पुरिसे ववहारी,  
 तत्थ णं जे से पुरिसे देइ वि सन्नवेइ वि से णं पुरिसे ववहारी, तत्थ णं जे से पुरिसे  
 नो देइ नो सन्नवेइ से णं अव्वहारी”। “एवामेव तुमं पि ववहारी, नो चेव णं  
 तुमं पएसी! अव्वहारी” ॥ ६९ ॥ तए णं पएसी राया केसिं कुमारसमणं एवं  
 वयासी—“तुज्जे णं भन्ते! इय छेया दक्खा जाव उवएसलद्धा। समत्था णं भन्ते!  
 ममं करयलंसि वा आमलयं जीवं सरीराओ अभिनिवट्ठित्ताणं उवदंसित्तए?”। तेणं  
 कालेणं तेणं समएणं पएसिस्स रत्तो अदूरसामन्ते वाउकाए संवुत्ते, तणवणस्सइकाए

एयइ वेयइ चलेइ फन्दइ घट्टइ उदीरइ तं तं भावं परिणमइ । तए णं केसी कुमारसमणे  
 पएसिं रायं एवं वयासी-“पाससि णं तुमं पएसी राया ! एयं तणवणस्सइ एयन्तं  
 जाव तं तं भावं परिणमन्तं ?” “हन्ता पासामि” । “जाणासि णं तुमं पएसी ! एयं  
 तणवणस्सइकायं किं देवो चालेइ असुरो वा चालेइ नागो वा किन्नरो वा चालेइ  
 किंपुरिसो वा चालेइ महोरगो वा चालेइ गन्धर्वो वा चालेइ ?” “हन्ता जाणामि,  
 नो देवो चालेइ जाव नो गन्धर्वो वा चालेइ, वाउकाए चालेइ” । “पाससि णं  
 तुमं पएसी ! एयस्स वाउकायस्स सहुविस्स सकामस्स सरागस्स समोहस्स सवेयस्स  
 सलेसस्स ससरीरस्स रुवं ?” “नो इणट्ठे समट्ठे” । “जइ णं तुमं पएसी राया !  
 एयस्स वाउकायस्स सहुविस्स जाव ससरीरस्स रुवं न पाससि, तं कहं णं पएसी ! तव  
 करयलंसि वा आमलगं जीवं उवदंसिस्सामि ? एवं खलु पएसी ! दसठाणाइ छउमत्थे  
 मणुस्से सव्वभावेणं न जाणइ न पासइ । तं जहा-धम्मत्थिकायं १ अधम्मत्थिकायं २  
 आगासत्थिकायं ३ जीवं असरीरवद्धं ४ परमाणुपोगलं ५ सइ ६ गन्धं ७ वायं ८  
 अयं जिणे भविस्सइ वा नो भविस्सइ ९ अयं सव्वदुक्खाणं अन्तं करिस्सइ वा  
 नो वा...१० । एयाणि चेव उप्पन्ननाणदंसणधरे अरहा जिणे केवली सव्वभावेणं  
 जाणइ पासइ । तं जहा-धम्मत्थिकायं जाव नो वा करिस्सइ । तं सइहाहिं णं तुमं  
 पएसी ! जहा अन्नो जीवो...तं चेव” ॥ ७० ॥ तए णं से पएसी राया केसिं कुमार-  
 समणं एवं वयासी-“से नूणं भन्ते ! हत्थिस्स कुन्थुस्स य समे चेव जीवे ?” “हन्ता  
 पएसी ! हत्थिस्स य कुन्थुस्स य समे चेव जीवे” । “से नूणं भन्ते ! हत्थीओ कुन्थू  
 अप्पकम्मतराए चेव अप्पकिरियतराए चेव अप्पासवतराए चेव, एवं आहारनीहार-  
 उस्सासनीसासइद्धीए अप्पतराए चेव, एवं च कुन्थुओ हत्थी महाकम्मतराए चेव  
 महाकिरिय० ?” “हन्ता पएसी ! हत्थीओ कुन्थू अप्पकम्मतराए चेव० कुन्थुओ  
 वा हत्थी महाकम्मतराए चेव...तं चेव” । “कम्हा णं भन्ते ! हत्थिस्स य कुन्थुस्स  
 य समे चेव जीवे ?” “पएसी से जहानामए कूडागारसाला सिया जाव गम्मीरा ।  
 अह णं केइ पुरिसे जोइं वा वीवं वा गहाय तं कूडागारसालं अन्तो २ अणुपविसइ ।  
 तीसे कूडागारसालाए सव्वओ समन्ता घणनिच्चियनिरन्तरनिच्छिड्डां दुवारवयणां  
 पिहेइ २ ता तीसे कूडागारसालाए बहुमज्झदेसभाए तं पईवं पळीवेज्जा । तए णं से  
 पईवे तं कूडागारसालं अन्तो २ ओभासइ उज्जोवेइ तवइ पभासेइ, नो चेव णं  
 बाहिं । अह णं से पुरिसे तं पईवं इड्डरणं पिहेज्जा, तए णं से पईवे तं इड्डरयं अन्तो २  
 ओभासेइ०, नो चेव णं इड्डरगस्स बाहिं नो चेव णं कूडागारसालाए बाहिं । एवं  
 किल्लिजेणं गण्डमाणिघाए पत्थियपिड्डएणं आढएणं अद्धाढएणं पत्थएणं अद्धपत्थएणं

कुलवेणं अद्धकुलवेणं चाउब्भाइयाए अट्टभाइयाए सोलसियाए बत्तीसियाए चउसट्टियाए दीवचम्पएणं । तए णं से पईवे दीवचम्पगस्स अन्तो २ ओभासइ ४ नो चेव णं दीवचम्पगस्स बाहिं नो चेव णं चउसट्टियाए बाहिं नो चेव णं कूडागारसालं नो चेव णं कूडागारसालाए बाहिं । एवामेव पएसी ! जीवे वि जं जारिसयं पुव्वकम्मनिबद्धं बोदिं निव्वत्तेइ, तं असंखेजेहिं जीवपएसेहिं सच्चित्तं करेइ खुड्डियं वा महालियं वा । तं सद्दाहिं णं तुमं पएसी ! जहा अन्नो जीवो...तं चेव” ॥ ७१ ॥

तए णं पएसी राया केसिं कुमारसमणं एवं वयासी—“एवं खलु भन्ते ! मम अज्जगस्स एसा सन्ना जाव समोसरणे जहा तं जीवो तं सरीरं नो अन्नो जीवो अन्नं सरीरं । तयाणन्तरं च णं ममं पिउणो वि एसा सन्ना० । तयाणन्तरं मम वि एसा सन्ना जाव समोसरणे । तं नो खलु अहं बहुपुरिसपरंपरागयं कुलनिसियं दिट्ठिं छण्डेस्सामि” । तए णं केसी कुमारसमणे पएसिं रायं एवं वयासी—“मा णं तुमं पएसी ! पच्छाणुताविए भवेज्जासि जहा व से पुरिसे अयहारए” । “के णं भन्ते ! से अयहारए ?” “पएसी ! से जहानामए केइ पुरिसा अत्थत्थी अत्थगवेसी अत्थ-  
लुद्धगा अत्थकंखिया अत्थपिवासिया अत्थगवेसणयाए विउलं पणियभण्डमायाए सुबहुं भत्तपाणपत्थयणं गहाय एगं महं अगामियं छिन्नावायं वीहमद्धं अडविं अणु-  
पविट्ठा । तए णं ते पुरिसा तीसे अगामियाए अडवीए कंचि देसं अणुप्पत्ता समाणा एगं महं अयागरं पासन्ति अएणं सव्वओ समन्ता आइणं वित्थिणं सच्छडं उव-  
च्छडं फुडं गाढं अवगाढं पासन्ति २ ता हट्ठतुट्ठ जाव हियया अन्नमन्नं सद्दावेन्ति २ ता एवं वयासी—“एस णं देवाणुप्पिया ! अयभण्डे इट्ठे कन्ते जाव मणामे । तं सेयं खलु देवाणुप्पिया ! अम्हं अयभारए बन्धित्तए” तिकट्ठु अन्नमन्नस्स एयमट्ठं पडिसु-  
णेन्ति २ ता अयभारं बन्धन्ति २ ता अहाणुपुव्वीए संपत्थिया । तए णं ते पुरिसा तीसे अगामियाए जाव अडवीए कंचि देसं अणुप्पत्ता समाणा एगं महं तउआगरं पासन्ति तउएणं आइणं तं चेव जाव सद्दावेत्ता एवं वयासी—“एस णं देवाणुप्पिया ! तउय-  
भण्डे जाव मणामे । अपेणं चेव तउएणं सुबहुं अए लब्भइ । तं सेयं खलु देवाणु-  
प्पिया ! अयभारए छट्ठेत्ता तउयभारए बन्धित्तए” तिकट्ठु अन्नमन्नस्स अन्तिए एयमट्ठं पडिसुणेन्ति २ ता अयभारं छट्ठेन्ति २ ता तउयभारं बन्धन्ति । तत्थ णं एगे पुरिसे नो संचाएइ अयभारं छडित्तए तउयभारं बन्धित्तए । तए णं ते पुरिसा तं पुरिसं एवं वयासी—“एस णं देवाणुप्पिया ! तउयभण्डे जाव सुबहुं अए लब्भइ । तं छट्ठेहिं णं देवाणुप्पिया ! अयभारं, तउयभारं बन्धाहि” । तए णं से पुरिसे एवं वयासी—  
“दूराहडे मे देवाणुप्पिया ! अए; चिराहडे मे देवाणुप्पिया ! अए; अइगाढबन्धणवद्धे

मे देवाणुप्पिया ! अए; असिलिडुबन्धणबद्धे मे देवाणुप्पिया ! अए; धणियबन्धणबद्धे मे देवाणुप्पिया ! अए; नो संचाएमि अयभारगं छट्ठेत्ता तउयभारगं बन्धित्तए' । तए णं ते पुरिसा तं पुरिसं जाहे नो संचाएन्ति बहूहिं आधवणाहि य पन्नवणाहि य आधवित्तए वा पन्नवित्तए वा, तथा अहाणुपुव्वीए संपत्थिया ॥ एवं तम्बागरं रुप्पागरं सुवण्णागरं रयणागरं वहरागरं ॥ तए णं ते पुरिसा जेणेव सया २ जणवया जेणेव साइं २ नयराइं तेणेव उवागच्छन्ति २ ता वहरविक्रयणं करेन्ति २ ता सुबहुदासीदासगोमहिसगवेलगं गिण्हन्ति २ ता अट्टतलमूसियवडिंसगे कारावेन्ति । ण्हाया अप्पं उप्पि पासाय-वरगया फुट्टमाणेहिं मुइङ्गमत्थएहिं वत्तीसइवद्धएहिं नाडएहिं वरतरुणीसंपउत्तेहिं उवनच्चिज्जमाणा उवलालिज्जमाणा इट्ठे सट्ठफरिस जाव विहरन्ति ॥ तए णं से पुरिसे अयभारेण जेणेव सए नयरे तेणेव उवागच्छइ । अथविक्रिणणं करेइ २ ता तंसि अप्पमोहंसि निहियंसि झीणपरिव्वए ते पुरिसे उप्पि पासायवरगए जाव विहरमाणे पासइ २ ता एवं वयासी-‘अहो णं अहं अधन्नो अपुण्णो अकयत्थो अकयलक्खणो हिरिसिरिवज्जिए हीणपुण्णचाउदसे दुरन्तपन्तलक्खणे । जइ णं अहं मित्ताण वा नाईण वा नियगाण वा सुणेन्तओ, तो णं अहं पि एवं चेव उप्पि पासायवरगए जाव विहरन्तो’ । से तेणट्ठेणं पएसी ! एवं वुच्चइ-मा णं तुमं पएसी ! पच्छाणुताविए भवेज्जासि जहा व से पुरिसे अयहारए’ ॥ ७२ ॥ एत्थ णं से पएसी राया संबुद्धे केसिं कुमारसमणं वन्दइ जाव एवं वयासी-‘‘नो खलु भन्ते ! अहं पच्छाणुताविए भविस्सामि जहा व से पुरिसे अयभारिए । तं इच्छामि णं देवाणुप्पियाणं अन्तिए केवलपन्नत्तं धम्मं निसामित्तए’ । ‘‘अहासुहं देवाणुप्पिया ! मा पडिवन्धं करेहि’ । धम्मकहा जहा चित्तस्स, तहेव गिहिधम्मं पडिवज्जइ २ ता जेणेव सेयविया नयरी तेणेव पहारेत्थ गमणाए ॥ तए णं केसी कुमारसमणे पएसिं रायं एवं वयासी-‘‘जाणासि तुमं पएसी ! कइ आयरिया पन्नता ?’ ’‘हन्ता जाणामि, तओ आयरिया पन्नता । तं जहा-कलायरिए सिप्पाय-रिए धम्मायरिए’ । ‘‘जाणासि णं तुमं पएसी ! तेसिं तिण्हं आयरियाणं कस्स का विणयपडिवत्ती पउज्जिव्वा ?’ ’‘हन्ता जाणामि, कलायरियस्स सिप्पायरियस्स उवलेवणं संमज्जणं वा करेज्जा पुरओ पुप्फाणि वा आणवेज्जा मज्जावेज्जा मण्डावेज्जा मोयावेज्जा वा, विउलं जीवियारिहं पीइदाणं दलएज्जा, पुत्ताणुपुत्तिं वित्तिं कप्पेज्जा । जत्थेव धम्मायरियं पासिज्जा तत्थेव वन्देज्जा नमंसेज्जा सक्कारेज्जा संमाणेज्जा कल्लाणं मङ्गलं देवयं चेइयं पज्जुवासेज्जा, फासुएसणिज्जेणं असणपाणखाइमसाइमेणं पडि-ल्लाभेज्जा, पाडिहारिएणं पीढफलगसेज्जासंथारएणं उवनिमन्तेज्जा’ । ‘‘एवं च ताव

तुमं पएसी ! एवं जाणासि, तहा वि णं तुमं ममं वामं वामेणं जाव वड्ढिता ममं एयमट्ठं अक्खामित्ता जेणेव सेयविया नयरी तेणेव पहारेत्थ गमणाए” । तए णं से पएसी राया केसिं कुमारसमणं एवं वयासी—“एवं खलु भन्ते ! मम एयारुवे अज्झत्थिए जाव समुप्पज्जित्था—“एवं खलु अहं देवाणुप्पियाणं वामं वामेणं जाव वट्ठिए, तं सेयं खलु मे कळं पाउप्पभायाए रयणीए जाव तेयसा जलन्ते अन्तेउर-परियालसद्धिं संपरिवुडस्स देवाणुप्पिए वन्दिताए नमंस्सिताए, एयमट्ठं भुज्जो २ सम्मं विणएणं खामित्ताए” तिकट्ठु जामेव दिसिं पाउब्भूए तामेव दिसिं पडिगाए ॥ ७३ ॥ तए णं से पएसी राया कळं पाउप्पभायाए रयणीए जाव तेयसा जलन्ते हट्ठुट्ठु जाव हियए जहेव कूणिए तहेव निग्गच्छइ, अन्तेउरपरियालसद्धिं संपरिवुडे पञ्चविट्ठेणं अभिगमेणं वन्दइ नमंसइ, एयमट्ठं भुज्जो २ सम्मं विणएणं खामेइ ॥ तए णं केसी कुमारसमणे पएसिस्स रत्तो सूरियकन्तप्पमुहाणं देवीणं तीसे य महइ-महालियाए महच्चपरिसाए जाव धम्मं परिकहेइ । तए णं पएसी राया धम्मं सोच्चा निसम्म उट्ठाए उट्ठेइ २ ता केसिं कुमारसमणं वन्दइ नमंसइ वं० २ ता जेणेव सेयविया नयरी तेणेव पहारेत्थ गमणाए ॥ तए णं केसी कुमारसमणे पएसिं रायं एवं वयासी—“मा णं तुमं पएसी ! पुर्व्वि रमणिज्जे भविता पच्छा अरमणिज्जे भवि-ज्जासि, जहा से वणसण्डे इ वा नट्ठसाला इ वा इक्खुवाडे इ वा खलवाडे इ वा” । “कहं णं भन्ते ?” “जया णं वणसण्डे पत्तिए पुप्फिए फलिए हरियगरेरिज्जमाणे सिरीए अईव २ उवसोभमाणे चिट्ठइ, तथा णं वणसण्डे रमणिज्जे भवइ । जया णं वणसण्डे नो पत्तिए नो पुप्फिए नो फलिए नो हरियगरेरिज्जमाणे नो सिरीए अईव २ उवसोभमाणे चिट्ठइ, तथा णं जुण्णे झडे परिसडियपण्डुपत्ते सुक्कस्सवे इव मिलायमाणे चिट्ठइ, तथा णं वणसण्डे नो रमणिज्जे भवइ । जया णं नट्ठसाला वि गिज्जइ वाइज्जइ नच्चिज्जइ हसिज्जइ रमिज्जइ, तथा णं नट्ठसाला रमणिज्जा भवइ । जया णं नट्ठसाला नो गिज्जइ जाव नो रमिज्जइ, तथा णं नट्ठसाला अरमणिज्जा भवइ । जया णं इक्खुवाडे छिज्जइ भिज्जइ सिज्जइ पिज्जइ दिज्जइ, तथा णं इक्खुवाडे रमणिज्जे भवइ । जया णं इक्खुवाडे नो छिज्जइ जाव तथा णं इक्खुवाडे अरमणिज्जे भवइ । जया णं खलवाडे उच्छुब्भइ उड्डइज्जइ मलइज्जइ मुणिज्जइ खज्जइ पिज्जइ दिज्जइ, तथा णं खलवाडे रमणिज्जे भवइ । जया णं खलवाडे नो उच्छुब्भइ जाव अरमणिज्जे भवइ । से तेणट्ठेणं पएसी ! एवं वुच्चइ, मा णं तुमं पएसी ! पुर्व्वि रमणिज्जे भविता पच्छा अरमणिज्जे भविज्जासि जहा से वणसण्डे इ वा०” । तए णं पएसी राया केसिं कुमारसमणं एवं वयासी—“नो खलु भन्ते ! अहं पुर्व्वि रमणिज्जे

भविता पच्छा अरमणिजे भविस्सामि, जहा से वणसण्डे इ वा जाव खलवाडे इ वा । अहं णं सेयवियानयरीपामोक्खाइं सत्त गामसहस्साइं चत्तारि भागे करिस्सामि । एगं भागं बलवाहणस्स दलइस्सामि, एगं भागं कौट्ठागारे छुभिस्सामि, एगं भागं अन्ते-उरस्स दलइस्सामि, एगेणं भागेणं महइमहालयं कूडागारसालं करिस्सामि । तत्थ णं बहूहिं पुरिसेहिं दिन्नभइमत्तवेयणेहिं विउलं असणं ४ उवक्खडावेत्ता बहूणं समण-साहणभिक्खुयाणं पन्थियपहियाणं परिभाएमाणे २ बहूहिं सीलव्वयगुणव्वयवेरमण-पच्चक्खाणपोसहोववासस्स जाव विहरिस्सामि”त्तिकट्ठु जामेव दिसिं पाउब्भूए तामेव दिसिं पडिगए ॥ तए णं से पएसी राया कलं जाव तेयसा जलन्ते सेयवि-यापामोक्खाइं सत्त गामसहस्साइं चत्तारि भाए करेइ । एगं भागं बलवाहणस्स दलइ जाव कूडागारसालं करेइ, तत्थ णं बहूहिं पुरिसेहिं जाव उवक्खडावेत्ता बहूणं समण जाव परिभाएमाणे विहरइ ॥ ७४ ॥ तए णं से पएसी राया समणोवासए जाए अभिगयजीवाजीवे...विहरइ । जप्पभिइं च णं पएसी राया समणोवासए जाए तप्पभिइं च णं रज्जं च रट्ठं च बलं च वाहणं च कोसं च कौट्ठागारं च पुरं च अन्तेउरं च जणवयं च अणाढायमाणे यावि विहरइ । तए णं तीसे सूरियकन्ताए देवीए इमेयारूवे अज्झत्थिए जाव समुप्पज्जित्था-“जप्पभिइं च णं पएसी राया समणोवासए जाए तप्पभिइं च णं रज्जं च रट्ठं च जाव अन्तेउरं च ममं च जणवयं च अणाढायमाणे विहरइ । तं सेयं खलु मे पएसिं रायं केण वि सत्थपओगेण वा अग्गिपओगेण वा मन्तप्पओगेण वा विसप्पओगेण वा उड्वेत्ता सूरियकन्तं कुमारं रजे ठविता सयमेव रज्जसिरिं कारेमाणीए पालेमाणीए विहरित्तए”त्तिकट्ठु एवं संपेहेइ २ ता सूरियकन्तं कुमारं सदावेइ २ ता एवं वयासी-“जप्पभिइं च णं पएसी राया समणोवासए जाए तप्पभिइं च णं रज्जं च जाव अन्तेउरं च ममं च जणवयं च माणस्सए य कामभोगे अणाढायमाणे विहरइ । तं सेयं खलु तव पुत्ता ! पएसिं रायं केणइ सत्थप्पओगेण वा जाव उड्वेत्ता सयमेव रज्जसिरिं कारेमाणे पालेमाणे विहरित्तए” । तए णं सूरियकन्ते कुमारे सूरियकन्ताए देवीए एवं वुत्ते समाणे सूरियकन्ताए देवीए एयमट्ठं नो आढाइ, नो परियाणाइ, तुसिणीए संचिट्ठइ । तए णं तीसे सूरियकन्ताए देवीए इमेयारूवे अज्झत्थिए जाव समुप्पज्जित्था-“मा णं सूरियकन्ते कुमारे पएसिस्स रत्तो इमं ममं रहस्समेयं करि-स्सइ”त्तिकट्ठु पएसिस्स रत्तो छिद्वाणि य मम्माणि य रहस्साणि य विवराणि य अन्तराणि य पडिजागरमाणी २ विहरइ । तए णं सूरियकन्ता देवी अन्नया कयाइ पएसिस्स रत्तो अन्तरं जाणइ २ ता असणं जाव साइमं सव्ववत्थगन्धमल्लालंकारं

विसप्पओगं पउज्झइ । पएसिस्स रत्तो ण्हायस्स सुहासणवरगयस्स तं विससंजुत्तं असणं ४ वत्थं जाव अलंकारं निसिरेइ, घायइ । तए णं तस्स पएसिस्स रत्तो तं विससंजुत्तं असणं ४ आहारेमाणस्स सरीरगंमि वेयणा पाउब्भूया उज्जला विउला पगाढा कक्कसा कडुया फरुसा णिट्ठुरा चण्डा तिक्वा दुक्खा दुग्गा दुरहियासा, पित्त-जरपरिगयसरीरे दाहवक्कन्तिए यावि विहरइ ॥ ७५ ॥ तए णं से पएसी राया सूरिय-कन्ताए देवीए अत्ताणं संपलद्धं जाणित्ता सूरियकन्ताए देवीए मणसा वि अप्पदु-स्समाणे जेणेव पोसहसाला तेणेव उवागच्छइ २ ता पोसहसालं पमज्जइ २ ता उच्चारपासवणभूमिं पडिलेहेइ २ ता दब्भसंधारगं संधरेइ २ ता दब्भसंधारगं दुरुहइ २ ता पुरत्थाभिमुहे संपलियङ्कनिसण्णे करयलपरिग्गहियं० सिरसावत्तं अञ्जलिं मत्थए कट्ठु एवं वयासी-“नमोत्थु णं अरहन्ताणं जाव संपत्ताणं । नमोत्थु णं केसिस्स कुमारसमणस्स मम धम्मोवएसगस्स धम्मायरियस्स । वन्दामि णं भगवन्तं तत्थगयं इहगए । पासउ मे भगवं तत्थगए इहगयं”तिकट्ठु वन्दइ नमंसइ । “पुर्विं पि णं मए केसिस्स कुमारसमणस्स अन्तिए थूलपाणाइवाए पच्चक्खाए जाव परिग्गहे । तं इयाणिं पि णं तस्सेव भगवओ अन्तिए सव्वं पाणाइवायं पच्चक्खामि जाव परिग्गहं, सव्वं कोहं जाव मिच्छादंसणसल्लं, अकरणिज्जं जोगं पच्चक्खामि, चउव्विहं पि आहारं जावजीवाए पच्चक्खामि, जं पि य मे सरीरं इट्ठं जाव फुसन्तुत्ति एयं पि य णं चरिमेहिं ऊसासनिस्सासेहिं वोसिरामि”तिकट्ठु आलोइय-पडिक्कन्ते समाहिपत्ते कालमासे कालं किच्चा सोहम्मे कप्पे सूरियामे विमाणे उववायसभाए जाव वण्णओ ॥ तए णं से सूरियामे देवे अहुणोववन्नए चेव समाणे पञ्चविहाए पज्जतीए पज्जत्तिभावं गच्छइ । तं जहा-आहारपज्जतीए सरीरपज्जतीए इन्दियपज्जतीए आणपाणपज्जतीए भासामणपज्जतीए । तं एवं खलु भो सूरियाभेणं देवेणं सा दिक्वा देविट्ठी दिक्वा देवजुई दिक्वे देवाणुभावे लद्धे पत्ते अभिसमन्नागए” ॥ ७६ ॥ “सूरियाभस्स णं भन्ते ! देवस्स केवइयं कालं ठिई पन्नता ?” “गोयमा ! चत्तारि पल्लिओवमाई ठिई पन्नता” । “से णं सूरियामे देवे ताओ देवलोगाओ आउक्खएणं भवक्खएणं ठिइक्खएणं अणन्तरं चयं चइत्ता कहिं गमिहिइ, कहिं उववज्जिहिइ ?” गोयमा ! महाविदेहे वासे जाणि इमाणि कुलाणि भवन्ति, तं जहा-अट्ठाईं दिताईं विउलाईं वित्थिण्णविपुलभवणसयणासणजाणवाहणाईं बहुधणबहुजाय-रुवरययाईं आओगपओगसंपउत्ताईं विच्छड्डियपउरभत्तपाणाईं बहुदासीदासगोमहि-सगवेलगप्पभूयाईं बहुजणस्स अपरिभूयाईं, तत्थ अन्नयरेसु कुलेसु पुत्तताए पच्चाया-इस्सइ । तए णं तंसि दारगंसि गब्भगयंसि चेव समाणंसि अम्मापिऊणं धम्मे दढा


पइच्चा भविस्सइ । तए णं तस्स दारगस्स नवण्हं मासाणं बहुपडिपुण्णाणं अद्धट्ठमाण राईदियाणं वीइक्कन्ताणं सुकुमालपाणिपायं अहीणपडिपुण्णपच्चिन्दियसरीरे लक्खण-  
वज्जणगुणोववेयं माणुम्माणपमाणपडिपुण्णसुजायसव्वङ्गसुन्दरङ्गं ससिसोमाकारं कन्तं  
पियदंसणं सुख्वं दारयं पयाहिइ । तए णं तस्स दारगस्स अम्मापियरो पढमे दिवसे  
ठिइवडियं करेहिन्ति । तइयदिवसे चन्दसूरदंसणं करिस्सन्ति । छट्ठे दिवसे जागरियं  
जागरिस्सन्ति । एक्कारसमे दिवसे वीइक्कन्ते संपत्ते बारसाहे दिवसे निव्वित्ते असुइ-  
जायकम्मकरणे चोक्खे संमज्जिओवलित्ते विउलं असणपाणखाइमसाइमं उवक्खडा-  
वेस्सन्ति २ ता मित्तनाइनियगसयणसबन्धिपरियणं आमन्तेत्ता तओ पच्छा ण्हाया  
अलंकिया भोगमण्डवंसि सुहासणवरगया तेण मित्तनाइ जाव परिजणेण सद्धिं विउलं  
असणं ४ आसाएमाणा विसाएमाणा परिभुज्जेमाणा परिभाएमाणा एवं चेव णं  
विहरिस्सन्ति । जिमियभुत्तरागया वि य णं समाणा आयन्ता चोक्खा परमसुइभूया  
तं मित्तनाइ जाव परियणं विउलेणं वत्थगन्धमल्लालंकारेणं सकारेस्सन्ति संमाणि-  
स्सन्ति स० २ ता तस्सेव मित्त जाव परियणस्स पुरओ एवं वइस्सन्ति-‘जम्हा णं  
देवाणुप्पिया ! इमंसि दारगंसि गब्भगयंसि चेव समाणंसि धम्मे दढा पइच्चा जाया,  
तं होउ णं अम्हं एयस्स दारयस्स दढपइच्चे नामेणं । तए णं तस्स दढपइच्चस्स  
दारगस्स अम्मापियरो नामधेज्जं करिस्सन्ति-दढपइच्चो य २ । तए णं तस्स  
अम्मापियरो अणुपुव्वेणं ठिइवडियं च चन्दसूरियदरिसणं च धम्मजागरियं च  
नामधेज्जकरणं च पजेमणं च पजम्पणं च पडिवद्दावणं च पचक्कमणं च  
कणवेहणं च संवच्छरपडिलेहणं च चूलोवणयं च अच्चाणि य बहूणि गब्भाहाण-  
जम्माणइयाइं महया इङ्गीसकारसमुदएणं करिस्सन्ति ॥ ७७ ॥ तए णं से दढ-  
पइच्चे दारए पच्चधाईपरिक्खित्ते खीरधाईए मज्जणधाईए मण्डणधाईए अक्कधाईए  
कीलावणधाईए, अच्चाहि य बहूहिं खुज्जाहिं चिलाइयाहिं वामणियाहिं वडमियाहिं  
बब्बरीहिं बडसियाहिं जोण्हियाहिं पण्णवियाहिं ईसिग्गियाहिं वारुणियाहिं लासियाहिं  
लउसियाहिं दमिलीहिं सिंहलीहिं आरवीहिं पुलिन्दीहिं पक्कणीहिं बहलीहिं मुरंडीहिं  
सबरीहिं पारसीहिं नाणादेसीविदेसपरिमण्डियाहिं सदेसनेवत्थगहियवेसाहिं इङ्गि-  
यच्चिन्तियपत्थियवियाणाहिं निउणकुसलाहिं विणीयाहिं चेडियाचक्कवालतरुणिवन्द-  
परियालपरिवुडे वरिसधरकञ्जुइमहयरवन्दपरिक्खित्ते हत्थाओ हत्थं साहरिजमाणे २  
उवनच्चिजमाणे २ अंकाओ अंकं परिभुज्जमाणे २ उवगिज्जेमाणे २ उवललिजमाणे २  
उवगूहिज्जमाणे २ अवयासिजमाणे २ परियंदिजमाणे २ परिचुम्बिजमाणे २ रम्मेसु  
मणिकोटिमतेसु परंगमाणे २ गिरिकन्दरमल्लीणे विव चम्पगवरपायवे निवाय-



निव्वाघायंसि सुहंसुहेणं परिवड्डिस्सइ ॥ ७८ ॥ तए णं तं दढपइञ्चं दारगं अम्मापियरो  
 साइरेगअट्ठवासजायगं जाणित्ता सोभणंसि तिहिकरणनक्खत्तमुट्ठत्तंसि ण्हायं सव्वा-  
 लंकारविभूसियं करेत्ता महया इट्ठीसक्कारसमुदएणं कलायरियस्स उवणेहिन्ति । तए  
 णं से कलायरिए तं दढपइञ्चं दारगं लेहाइयाओ गणियप्पहाणाओ सउणरुयपज्ज-  
 वसाणाओ बावत्तरिं कलाओ सुत्तओ य अत्थओ य गन्धओ य करणओ य पसिक्खा-  
 वेहिइ य सेहावेहिइ य । तं जहा-लेहं गणियं रूवं नट्टं गीयं वाइयं सरगयं पोक्खरगयं  
 समतालं जूयं जणवायं पासगं अट्ठावयं पोरेकच्चं दगमट्ठियं अन्नविहिं पाणविहिं वत्थ-  
 विहिं विलेवणविहिं सयणविहिं अज्जं पहेलियं मागहियं [निद्दाइयं] गाहं गीइयं सिलोणं  
 हिरण्णजुत्तिं सुवण्णजुत्तिं चुण्णजुत्तिं आमरणविहिं तरुणीपडिकम्मं इत्थिलक्खणं पुरिस-  
 लक्खणं हयलक्खणं गयलक्खणं गोणलक्खणं कुकुडलक्खणं छत्तलक्खणं दण्डल-  
 क्खणं असिलक्खणं मणिलक्खणं कागणिलक्खणं वत्थुविज्जं नगरमाणं खन्धावारं चारं  
 पडिचारं वूहं पडिवूहं चक्कवूहं गरुलवूहं सगढवूहं जुद्धं निजुद्धं जुद्धाइजुद्धं लट्ठिजुद्धं  
 मुट्ठिजुद्धं बाहुजुद्धं लयाजुद्धं ईसत्थं छरुप्पवायं धणुन्वेयं हिरण्णपागं सुवण्णपागं  
 सुत्तखेडुं वट्ठखेडुं नालियाखेडुं पत्तच्छेज्जं कडगच्छेज्जं सज्जीवं निज्जीवं सउणरुयमिति ।  
 तए णं से कलायरिए तं दढपइञ्चं दारगं लेहाइयाओ गणियप्पहाणाओ सउणरुयप-  
 ज्जवसाणाओ बावत्तरिं कलाओ सुत्तओ य अत्थओ य गन्धओ य करणओ य  
 सिक्खावेत्ता सेहावेत्ता अम्मापिऊणं उवणेहिइ । तए णं तस्स दढपइञ्चस्स दारगस्स  
 अम्मापियरो तं कलायरियं विउलेणं असणपाणखाइमसाइमेणं वत्थगन्धमल्लालंकारेणं  
 सक्कारिस्सन्ति संमाणिस्सन्ति स०२ ता विउलं जीवियारिहं पीइदाणं दलइस्सन्ति २ ता  
 पडिविसजेहिन्ति ॥ ७९ ॥ तए णं से दढपइञ्चे दारए उम्मुक्कबालभावे विन्नयपरि-  
 णयमेत्ते जोव्वणगमणुप्पत्ते बावत्तरिकलापण्डिए अट्ठारसविहदेसिप्पगारभासाविसारए  
 नवक्कसुत्तपडिबोहए गीयरई गन्धव्वनट्ठकुसले सिङ्गारागारचारुवेसे संगयगयहसियभ-  
 णियविट्ठियविलाससंलावनिउणजुत्तौवयारकुसले हयजोही गयजोही रहजोही बाहुजोही  
 बाहुप्पमही अलंभोगसमत्थे साहसिए वियालचारी यावि भविस्सइ । तए णं तं दढ-  
 पइञ्चं दारगं अम्मापियरो उम्मुक्कबालभावं जाव वियालचारिं च वियाणित्ता विउलेहिं  
 अन्नभोगेहि य पाणभोगेहि य लेणभोगेहि य वत्थभोगेहि य सयणभोगेहि य उवनि-  
 मन्तेहिन्ति । तए णं से दढपइञ्चे दारए तेहिं विउलेहिं अन्नभोगेहिं जाव सयणभो-  
 गेहिं नो सज्जिहिइ नो गिज्जिहिइ नो मुच्छिहिइ नो अज्झोववज्जिहिइ । से  
 जहानामए पउमुप्पले इ वा पउमे इ वा जाव सयसहस्सपत्ते इ वा पक्के जाए जले  
 संउड्ढे नोवलिप्पइ पङ्करएणं नोवलिप्पइ जलरएणं, एवामेव दढपइञ्चे वि दारए

कामेहिं जाए भोगेहिं संवड्डिए नोवलिप्पिहिइ० मित्तनाइनियगसयणसंवन्धिपरिज-  
णेणं । से णं तहारूवाणं थेराणं अन्तिए केवलं बोहिं वुज्झिहिइ २ ता मुण्डे भवित्ता  
अगाराओ अणगारियं पवइस्सइ । से णं अणगारे भविस्सइ, इरियासमिए जाव  
सुहुयहुयासणे इव तेयसा जलन्ते । तस्स णं भगवओ अणुत्तरेणं नाणेणं एवं  
दंसणेणं चरित्तेणं आलएणं विहारेणं अज्जवेणं मद्दवेणं लाघवेणं खन्तीए गुत्तीए  
मुत्तीए अणुत्तरेणं सव्वसंजमतवसुचरियफलनिव्वाणमग्गेणं अप्पाणं भावेमाणस्स  
अणन्ते अणुत्तरे कसिणे पडिपुण्णे निरावरणे निव्वाघाए केवलवरणाणदंसणे समुप्प-  
ज्झिहिइ । तए णं से भगवं अरहा जिणे केवली भविस्सइ, सदेवमणुयासुरस्स लोगस्स  
परियागं जाणिहिइ । तं जहा-आगइं गइं ठिइं चवणं उववायं तक्कं कडं मणोमाण-  
सियं खइयं भुत्तं पडिसेवियं आवीकम्मं रहोकम्मं-अरहा अरहस्सभागी, तं तं मण-  
वयकायजोगे वट्ठमाणानं सव्वलोए सव्वजीवाणं सव्वभावे जाणमाणे पासमाणे  
विहरिस्सइ । तए णं दढपइन्ने केवली एयारूवेणं विहारेणं विहरमाणे बहूइं वासाइं  
केवलिपरियागं पाउणिता अप्पणो आउसेसं आभोएत्ता बहूइं भत्ताइं पच्चक्खाइ-  
स्सइ २ ता बहूइं भत्ताइं अणसणाए छेइस्सइ २ ता जस्सट्ठाए कीरइ जिणकप्पभावे  
थेरकप्पभावे मुण्डभावे केसलोए वम्मचेरवासे अण्हाणगं अदन्तवणं अणुवहाणगं  
भूमिसेज्जा फलहसेज्जा परघरपवेसो लद्धावलद्धाइं माणावमाणाइं परेसिं हीलणाओ  
निंदणाओ खिसणाओ तज्जणाओ ताडणाओ गरहणाओ उच्चावया विरूवरूवा बावीसं  
परीसहोवसग्गा गामकण्टगा अहियासिज्जन्ति तमट्ठं आराहेहिइ २ ता चरिमेहिं उस्सा-  
सनिस्सासेहिं सिज्झिहिइ वुज्झिहिइ मुच्चिहिइ परिनिव्वाहिइ सव्वदुक्खाणमन्तं  
करेहिइ” ॥ ८० ॥ “सेवं भन्ते ! सेवं भन्ते” त्ति भगवं गोयमे समणं भगवं महा-  
वीरं वन्दइ नमंसइ वं० २ ता संजमेणं तवसा अप्पाणं भावेमाणे विहरइ ॥ ८१ ॥  
॥ निक्खेवो ॥ रायपसेणइयं समत्तं ॥





नमोऽस्थु णं समणस्स भगवओ णायपुत्तमहावीरस्स

## सुत्तागमे

तत्थ णं

### जीवाजीवाभिगमे

णमो उसभाइयाणं चउवीसाए तित्थयराणं, इह खलु जिणमयं जिणाणुमयं जिणाणुल्लोमं जिणप्पणीयं जिणपरुवियं जिणक्खायं जिणाणुच्चिन्नं जिणपण्णत्तं जिण-  
देसियं जिणपसत्थं अणुव्वीइय तं सद्दहमाणा तं पत्तियमाणा तं रोएमाणा थेरा  
भगवंतो जीवाजीवाभिगमणाममज्झयणं पण्णवइंसु ॥ १ ॥ से किं तं जीवाजीवाभिगमे ?  
जीवाजीवाभिगमे दुविहे पन्नत्ते, तंजहा—जीवाभिगमे य अजीवाभिगमे य ॥ २ ॥  
से किं तं अजीवाभिगमे ? अजीवाभिगमे दुविहे पन्नत्ते, तंजहा—रुविअजीवाभिगमे  
य अरुविअजीवाभिगमे य ॥ ३ ॥ से किं तं अरुविअजीवाभिगमे ? अरुविअजी-  
वाभिगमे दसविहे प०, तंजहा—धम्मत्थिकाए एवं जहा पण्णवणाए जाव सेत्तं  
अरुविअजीवाभिगमे ॥ ४ ॥ से किं तं रुविअजीवाभिगमे ? रुविअजीवाभिगमे  
चउव्विहे पण्णत्ते, तंजहा—खंधा खंधदेसा खंधप्पएसा परमाणुपोग्गला, ते समासओ  
पंचविहा पण्णत्ता, तंजहा—वण्णपरिणया गंध० रस० फास० संठाणपरिणया, एवं ते  
५ जहा पण्णवणाए, सेत्तं रुविअजीवाभिगमे, सेत्तं अजीवाभिगमे ॥ ५ ॥ से किं तं  
जीवाभिगमे ? जीवाभिगमे दुविहे पण्णत्ते, तंजहा—संसारसमावण्णगजीवाभिगमे य  
असंसारसमावण्णगजीवाभिगमे य ॥ ६ ॥ से किं तं असंसारसमावण्णगजीवाभिगमे ?  
२ दुविहे पण्णत्ते, तंजहा—अणंतरसिद्धासंसारसमावण्णगजीवाभिगमे य परंपर-  
सिद्धासंसारसमावण्णगजीवाभिगमे य । से किं तं अणंतरसिद्धासंसारसमावण्णग-  
जीवाभिगमे ? २ पण्णरसविहे पण्णत्ते, तंजहा—तित्थसिद्धा जाव अणेगसिद्धा, सेत्तं  
अणंतरसिद्धा० । से किं तं परंपरसिद्धासंसारसमावण्णगजीवाभिगमे ? २ अणेगविहे  
पण्णत्ते, तंजहा—पढमसमयसिद्धा दुसमयसिद्धा जाव अणंतसमयसिद्धा, से तं परं-  
परसिद्धासंसारसमावण्णगजीवाभिगमे, सेत्तं असंसारसमावण्णगजीवाभिगमे ॥ ७ ॥  
से किं तं संसारसमावण्णगजीवाभिगमे ? संसारसमावण्णएसु णं जीवेसु इमाओ णव  
पडिवत्तीओ एवमाहिज्जंति, तं०—एगे एवमाहंसु—दुविहा संसारसमावण्णगा जीवा  
प०, एगे एवमाहंसु—तिविहा संसारसमावण्णगा जीवा प०, एगे एवमाहंसु—चउव्विहा.

संसारसमावण्णगा जीवा प०, एगे एवमाहंसु-पंचविहा संसारसमावण्णगा जीवा प०, एएणं अभिलावेणं जाव दसविहा संसारसमावण्णगा जीवा पण्णत्ता ॥ ८ ॥ तत्थ णं जे एवमाहंसु 'दुविहा संसारसमावण्णगा जीवा प०' ते एवमाहंसु-तं०-तसा चेव थावरा चेव ॥ ९ ॥ से किं तं थावरा ? २ तिविहा पन्नत्ता, तंजहा-पुढविकाइया १ आउकाइया २ वणस्सइकाइया ३ ॥ १० ॥ से किं तं पुढविकाइया ? २ दुविहा प०, तं०-सुहुमपुढविकाइया य वायरपुढविकाइया य ॥ ११ ॥ से किं तं सुहुमपुढविकाइया ? २ दुविहा प०, तं०-पज्जत्तगा य अपज्जत्तगा य । संगहण्णिगाहा-सरीरोगाहणसंघयणसंठाणकसाय तह य हुंति सण्णाओ । लेसिंदियसमुग्घाओ, सच्ची वेए य पज्जती ॥ १ ॥ दिट्ठी दंसणनाणे जोगुवओगे तहा किमाहारे । उववाय-ठिई समुग्घायचवण्णगइरागई चेव ॥ २ ॥ १२ ॥ तेसि णं भंते ! जीवाणं कइसरीरगा पण्णत्ता ? गोयमा ! तओ सरीरगा प०, तं०-ओरालिए तेयए कम्मए ॥ तेसि णं भंते ! जीवाणं केमहालिया सरीरोगाहणा प० ? गो० ! जह्वेणं अंगुला-संखेज्जइभागं उक्कोसेणवि अंगुलासंखेज्जइभागं ॥ तेसि णं भंते ! जीवाणं सरीरा किंसंघयणा पण्णत्ता ? गोयमा ! छेवट्ठसंघयणा पण्णत्ता ॥ तेसि णं भंते ! सरीरा किंसंठिया प० ? गोयमा ! मसूरचंदसंठिया पण्णत्ता ॥ तेसि णं भंते ! जीवाणं कइ कसाया पण्णत्ता ? गोयमा ! चत्तारि कसाया पण्णत्ता, तंजहा-कोहकसाए माणकसाए मायाकसाए लोहकसाए ॥ तेसि णं भंते ! जीवाणं कइ सण्णाओ पण्णत्ताओ ? गोयमा ! चत्तारि सच्चाओ पण्णत्ताओ, तंजहा-आहारसण्णा जाव परिगहसच्चा ॥ तेसि णं भंते ! जीवाणं कइ लेसाओ पण्णत्ताओ ? गोयमा ! तिन्नि लेस्ताओ पन्नत्ताओ तंजहा-किण्हलेस्ता नीललेस्ता काउलेस्ता ॥ तेसि णं भंते ! जीवाणं कइ इंदियाइ पण्णत्ताइ ? गोयमा ! एगे फासिंदिए पण्णत्ते ॥ तेसि णं भंते ! जीवाणं कइ समुग्घाया पण्णत्ता ? गोयमा ! तओ समुग्घाया पण्णत्ता, तंजहा-वेयणासमुग्घाए कसायसमुग्घाए मारणंतियसमुग्घाए ॥ ते णं भंते ! जीवा किं सच्ची असच्ची ? गोयमा ! नो सच्ची असच्ची ॥ ते णं भंते ! जीवा किं इत्थिवेया पुरिसवेया णपुंसगवेया ? गोयमा ! णो इत्थिवेया णो पुरिसवेया णपुंसगवेया ॥ तेसि णं भंते ! जीवाणं कइ पज्जतीओ पण्णत्ताओ ? गोयमा ! चत्तारि पज्जतीओ पण्णत्ताओ, तंजहा-आहारपज्जती सरीरपज्जती इंदियपज्जती आणपाणुपज्जती । तेसि णं भंते ! जीवाणं कइ अपज्जतीओ पण्णत्ताओ ? गोयमा ! चत्तारि अपज्जतीओ पण्णत्ताओ, तंजहा-आहारअपज्जती जाव आणापाणुअपज्जती ॥ ते णं भंते ! जीवा किं सम्मदिट्ठी मिच्छादिट्ठी सम्मामिच्छादिट्ठी ? गोयमा ! णो सम्मदिट्ठी मिच्छादिट्ठी नो सम्मा-

मिच्छादिट्ठी ॥ ते णं भंते ! जीवा किं चक्खुदंसणी अचक्खुदंसणी ओहिदंसणी केवलदंसणी ? गोयमा ! नो चक्खुदंसणी अचक्खुदंसणी नो ओहिदंसणी नो केवलदंसणी ॥ ते णं भंते ! जीवा किं नाणी अण्णाणी ? गोयमा ! नो नाणी अण्णाणी, नियमा दुअण्णाणी, तंजहा-मइअन्नाणी सुयअण्णाणी य ॥ ते णं भंते ! जीवा किं मणजोगी वयजोगी कायजोगी ? गोयमा ! नो मणजोगी नो वयजोगी कायजोगी ॥ ते णं भंते ! जीवा किं सागारोवउत्ता अणागारोवउत्ता ? गोयमा ! सागारोवउत्तावि अणागारोवउत्तावि ॥ ते णं भंते ! जीवा किमाहारसाहारैति ? गोयमा ! द्व्वओ अणंतपएसियाइं खेतओ असंखेज्जपएसोगाढाइं कालओ अन्नयरसमयट्ठिइयाइं भावओ वण्णमंताइं गंधमंताइं रसमंताइं फासमंताइं ॥ जाइं भावओ वण्णमंताइं आ० ताइं किं एगवण्णाइं आ० दुवण्णाइं आ० तिवण्णाइं आ० चउवण्णाइं आ० पंचवण्णाइं आ० ? गोयमा ! ठाणमग्गणं पडुच्च एगवण्णाइंपि दुवण्णाइंपि तिवण्णाइंपि चउवण्णाइंपि पंचवण्णाइंपि आ०, विहाणमग्गणं पडुच्च कालाइंपि आ० जाव सुक्किल्लाइंपि आ०, जाइं वण्णओ कालाइं आ० ताइं किं एगगुणकालाइं आ० जाव अणंतगुणकालाइं आ० ? गोयमा ! एगगुणकालाइंपि आ० जाव अणंतगुणकालाइंपि आ० एवं जाव सुक्किल्लाइं ॥ जाइं भावओ गंधमंताइं आ० ताइं किं एगगंधाइं आ० दुगंधाइं आ० ? गोयमा ! ठाणमग्गणं पडुच्च एगगंधाइंपि आ० दुगंधाइंपि आ०, विहाणमग्गणं पडुच्च सुब्भिगंधाइंपि आ० दुब्भिगंधाइंपि आ०, जाइं गंधओ सुब्भिगंधाइं आ० ताइं किं एगगुणसुब्भिगंधाइं आ० जाव अणंतगुणसुरभिगंधाइं आ० ? गोयमा ! एगगुणसुब्भिगंधाइंपि आ० जाव अणंतगुणसुब्भिगंधाइंपि आ०, एवं दुब्भिगंधाइंपि ॥ रसा जहा वण्णा ॥ जाइं भावओ फासमंताइं आ० ताइं किं एगफासाइं आ० जाव अट्ठफासाइं आ० ? गोयमा ! ठाणमग्गणं पडुच्च नो एगफासाइं आ० नो दुफासाइं आ० नो तिफासाइं आ० चउफासाइं आ० पंचफासाइंपि जाव अट्ठफासाइंपि आ०, विहाणमग्गणं पडुच्च कक्खडाइंपि आ० जाव लुक्खाइंपि आ०, जाइं फासओ कक्खडाइं आ० ताइं किं एगगुणकक्खडाइं आ० जाव अणंतगुणकक्खडाइं आ० ? गोयमा ! एगगुणकक्खडाइंपि आ० जाव अणंतगुणकक्खडाइंपि आ० एवं जाव लुक्खा गेयव्वा ॥ ताइं भंते ! किं पुट्ठाइं आ० अपुट्ठाइं आ० ? गोयमा ! पुट्ठाइं आ० नो अपुट्ठाइं आ०, ताइं भंते ! किं ओगाढाइं आ० अणोगाढाइं आ० ? गोयमा ! ओगाढाइं आ० नो अणोगाढाइं आ०, ताइं भंते ! किमणंतरोगाढाइं आ० परंपरोगाढाइं आ० ? गोयमा ! अणंतरोगाढाइं आ० नो परंपरोगाढाइं आ०, ताइं भंते ! किं अणूइं आ० बायरइं आ० ? गोयमा ! अणूइंपि

आ० बायराईपि आहारेंति, ताई भंते ! किं उड्ढं आ० अहे आ० तिरियं आहारेंति ? गोयमा ! उड्ढपि आ० अहेवि आ० तिरियंपि आ०, ताई भंते ! किं आई आ० मज्जे आ० पज्जवसाणे आहारेंति ? गोयमा ! आईपि आ० मज्जेवि आ० पज्जवसाणेवि आ०, ताई भंते ! किं सविसए आ० अविसए आ० ? गोयमा ! सविसए आ० नो अविसए आ०, ताई भंते ! किं आणुपुर्व्वि आ० अणाणुपुर्व्वि आहारेंति ? गोयमा ! आणुपुर्व्वि आहारेंति नो अणाणुपुर्व्वि आहारेंति, ताई भंते ! किं तिदिसिं आहारेंति चउदिसिं आहारेंति पंचदिसिं आहारेंति छदिसिं आहारेंति ? गोयमा ! निव्वाघाएणं छदिसिं, वाघायं पडुच्च सिय तिदिसिं सिय चउदिसिं सिय पंचदिसिं, उरस्सन्नकारणं पडुच्च वण्णओ काल नील जाव सुक्खिल्लाई, गंधओ सुब्भिगंधाई दुब्भिगंधाई, रसओ जाव तित्तमहुराई, फासओ कक्खडमउय जाव निद्धलुक्खाई, तेसिं पोरणे वण्णगुणे जाव फासगुणे विप्परिणामइत्ता परिपीलइत्ता परिसाडइत्ता परिविद्धंसइत्ता अण्णे अपुव्वे वण्णगुणे गंधगुणे जाव फासगुणे उप्पाइत्ता आयसरीरखेतोगाढे पोग्गले सव्वप्पणयाए आहारमाहारेंति ॥ ते णं भंते ! जीवा कओहिंतो उव्वज्जंति ? किं नेरइएहिंतो उव्वज्जंति तिरिक्खमणुस्सदेवेहिंतो उव्वज्जंति ? गोयमा ! नो नेरइएहिंतो उव्वज्जंति, तिरिक्खजोणिएहिंतो उव्वज्जंति मणुस्सेहिंतो उव्वज्जंति, नो देवेहिंतो उव्वज्जंति, तिरिक्खजोणियपज्जतापज्जेहिंतो असंखेज्जवासाउयवज्जेहिंतो उव्वज्जंति, मणुस्सेहिंतो अकम्मभूमिगअसंखेज्जवासाउयवज्जेहिंतो उव्वज्जंति, वक्कंतीउव्ववाओ भाणियव्वो ॥ तेसिं णं भंते ! जीवाणं केवइयं कालं ठिई पण्णत्ता ? गोयमा ! जहज्जेणं अंतोमुहुत्तं उक्कोसेणवि अंतोमुहुत्तं ॥ ते णं भंते ! जीवा मारणंतियसमुग्घाएणं किं समोहया मरंति असमोहया मरंति ? गोयमा ! समोहयावि मरंति असमोहयावि मरंति ॥ ते णं भंते ! जीवा अणंतं उव्वट्ठिता कहिं गच्छंति ? कहिं उव्वज्जंति ?—किं नेरइएसु उव्वज्जंति तिरिक्खजोणिएसु उ० मणुस्सेसु उ० देवेषु उव्व० ?, गोयमा ! नो नेरइएसु उव्वज्जंति तिरिक्खजोणिएसु उ० मणुस्सेसु उ० णो देवेषु उव्व० । जइ तिरिक्खजोणिएसु उव्वज्जंति किं एगिंदिएसु उव्वज्जंति जाव पंचिंदिएसु उ० ? गोयमा ! एगिंदिएसु उव्वज्जंति जाव पंचेदियतिरिक्खजोणिएसु उव्वज्जंति, असंखेज्जवासाउयवज्जेसु पज्जतापज्जतएसु उव्व०, मणुस्सेसु अकम्मभूमिगअंतरदीवगअसंखेज्जवासाउयवज्जेसु पज्जतापज्जतएसु उव्व० ॥ ते णं भंते ! जीवा कइगइया कइआगइया पण्णत्ता ? गोयमा ! दुगइया दुआगइया, परिता असंखेज्जा पण्णत्ता समणाउसो ! से तं सुहुमपुढविकाइया ॥ १३ ॥ से किं तं बायरपुढविकाइया ? २ दुविहा पण्णत्ता, तंजहा—सण्हबायरपुढविकाइया य खरबायरपुढविकाइया य ॥ १४ ॥ से किं तं सण्हबायरपुढविकाइया ? २ सत्तविहा

पण्णत्ता, तंजहा—कण्हमट्ठिया, मेओ जहा पण्णवणाए जाव ते समासओ दुविहा पण्णत्ता, तंजहा—पज्जत्ता य अपज्जत्ता य । तेसि णं भंते ! जीवाणं कइ सरीरगा पण्णत्ता ? गोयमा ! तओ सरीरगा प०, तंजहा—ओरालिए तेयए कम्मए, तं चैव सव्वं नवरं चत्तारि लेसाओ, अवसेसं जहा सुहुमपुढविकाइयाणं आहारो जाव णियमा छद्दिसि, उववाओ तिरिक्खजोणियमणुस्सदेवेहिंतो, देवेहिं जाव सोहम्मसा-णेहिंतो, ठिई जहन्नेणं अंतोमुहुत्तं उक्कोसेणं बावीसं वाससहस्साइं । ते णं भंते ! जीवा मारणंतियसमुग्घाएणं किं समोहया मरंति असमोहया मरंति ? गोयमा ! समोहयावि मरंति असमोहयावि मरंति । ते णं भंते ! जीवा अणंतरे उव्वट्ठिता कहिं गच्छंति ? कहिं उववज्जंति ?—किं नेरइएसु उववज्जंति ?०, पुच्छा, गो० नो नेरइएसु उववज्जंति तिरिक्खजोणिएसु उववज्जंति मणुस्सेसु उव० नो देवेषु उव० तं चैव जाव असंखेज्जासाउयवजेहिंतो उ० । ते णं भंते ! जीवा कइगइया कइ-आगइया पण्णत्ता ? गोयमा ! दुगइया तिआगइया परित्ता असंखेज्जा प० समणा-उसो !, से तं बायरपुढविकाइया । सेतं पुढविकाइया ॥ १५ ॥ से किं तं आउक्का-इया ? २ दुविहा पण्णत्ता, तंजहा—सुहुमआउक्काइया य बायरआउक्काइया य, सुहुमआउ० दुविहा पण्णत्ता, तंजहा—पज्जत्ता य अपज्जत्ता य । तेसि णं भंते ! जीवाणं कइ सरीरया पण्णत्ता ? गोयमा ! तओ सरीरया पण्णत्ता, तंजहा—ओरालिए तेयए कम्मए, जहेव सुहुमपुढविकाइयाणं, णवरं थिबुगसंठिया पण्णत्ता, सेसं तं चैव जाव दुगइया दुआगइया परित्ता असंखेज्जा पण्णत्ता । से तं सुहुमआउक्काइया ॥ १६ ॥ से किं तं बायरआउक्काइया ? २ अणेगविहा पण्णत्ता, तंजहा—ओसा हिमे जाव जे यावन्ने तहप्पगारा, ते समासओ दुविहा पण्णत्ता, तंजहा—पज्जत्ता य अपज्जत्ता य, तं चैव सव्वं णवरं थिबुगसंठिया, चत्तारि लेसाओ, आहारो नियमा छद्दिसि, उववाओ तिरिक्खजोणियमणुस्सदेवेहिंतो, ठिई जहन्नेणं अंतोमुहुत्तं उक्को-सेणं सत्तवाससहस्साइं, सेसं तं चैव जहा बायरपुढविकाइया जाव दुगइया तिआगइया परित्ता असंखेज्जा पण्णत्ता समणाउसो !, सेतं बायरआउ, सेतं आउक्काइया ॥ १७ ॥ से किं तं वणस्सइकाइया ? २ दुविहा पण्णत्ता, तंजहा—सुहुमवणस्सइकाइया य बायरवणस्सइकाइया य । से किं तं सुहुमवणस्सइकाइया ? २ दुविहा पण्णत्ता, तंजहा—पज्जत्ता य अपज्जत्ता य तहेव णवरं अणित्थं (संठाण) संठिया, दुगइया दुआगइया अपरित्ता अणंता, अवसेसं जहा पुढविकाइयाणं, से तं सुहुमव-णस्सइकाइया ॥ १८ ॥ से किं तं बायरवणस्सइकाइया ? २ दुविहा पण्णत्ता, तंजहा—पत्तैयसरीरबायरवणस्सइकाइया य साहारणसरीरबायरवणस्सइकाइया य



॥ १९ ॥ से किं तं पत्तेयसरीरबायरवणस्सइकाइया ? २ दुवालसविहा पण्णत्ता, तंजहा—स्वखा गुच्छा गुम्मा लया य वल्ली य पव्वगा चेव । तणवलयरियओस-  
हिजलरुहकुहणा य बोद्धवा ॥ १ ॥ से किं तं रुक्खा ? २ दुविहा पण्णत्ता, तंजहा—  
एगवीया य बहुवीया य । से किं तं एगवीया ? २ अणेगविहा पण्णत्ता, तंजहा—  
निंबंबजंजु जाव पुण्णागणागरुक्खे सीवणिण तहा असोगे य, जे यावण्णे तहप्पगारा,  
एएसि णं मूलावि असंखेज्जजीविया, एवं कंदा खंधा तथा साला पवाला पत्ता पत्तेय-  
जीवा पुप्फाई अणेगजीवाई फला एगवीया, सेत्तं एगवीया । से किं तं बहुवीया ?  
२ अणेगविहा पण्णत्ता, तंजहा—अत्थियत्तेदुयउंबरकविट्ठे आमलगफणसदाडिमण-  
ग्गोहकाउंबरीयतिलयलउयलोद्धे धवे, जे यावण्णे तहप्पगारा, एएसि णं मूलावि  
असंखेज्जजीविया जाव फला बहुवीयगा, सेत्तं बहुवीयगा, सेत्तं रुक्खा, एवं जहा  
पण्णवणाए तहा भाणियव्वं, जाव जे यावन्ने तहप्पगारा, सेत्तं कुहणा—नाणाविह-  
संठाणा रुक्खाणं एगजीविया पत्ता । खंधोवि एगजीवो तालसरलनालिणी ॥ १ ॥  
‘जह सगलसरिसवाणं पत्तेयसरीराणं’ गाहा ॥ २ ॥ ‘जह वा तिलसकुलिया’ गाहा  
॥ ३ ॥ सेत्तं पत्तेयसरीरबायरवणस्सइकाइया ॥ २० ॥ से किं तं साहारणसरीरबा-  
यरवणस्सइकाइया ? २ अणेगविहा पण्णत्ता, तंजहा—आलुए मूलए सिंगवेरहिरिलि-  
सिरिलिसिस्सरिलिकिट्टिया छिरिया छिरियविरालिया कण्हकंदे वज्जकंदे सूरणकंदे  
खल्लूडे किमिरासिभदे मोत्थापिडे हलिद्वा लोहारी णीहु[ठिहु]थिभुअस्सकण्णी  
सीहकन्नी सीउंडी मुसंडी जे यावण्णे तहप्पगारा ते समासओ दुविहा पण्णत्ता,  
तंजहा—पज्जत्ता य अपज्जत्ता य । तेसि णं भंते ! जीवाणं कइ सरीरगा पण्णत्ता ?  
गोयमा ! तओ सरीरगा पन्नत्ता, तंजहा—ओरालिए तेयए कम्मए, तहेव जहा  
बायरपुढविकाइयाणं, णवरं सरीरोगाहणा जहन्नेणं अंगुलस्स असंखेज्जइमाणं  
उक्कोसेणं साइरेगजोयणसहस्सं, सरीरगा अणित्थंथसंठिया, ठिई जहन्नेणं अंतोमुहुत्तं  
उक्कोसेणं दसवाससहस्साई, जाव दुगइया तिआगइया परित्ता अणंता पण्णत्ता, सेत्तं  
बायरवणस्सइकाइया सेत्तं वणस्सइकाइया सेत्तं थावरा ॥ २१ ॥ से किं तं तसा ?  
२ तिविहा पण्णत्ता, तंजहा—तेउक्काइया वाउक्काइया ओराला तसा पाणा ॥ २२ ॥  
से किं तं तेउक्काइया ? २ दुविहा पण्णत्ता, तंजहा—सुहुमतेउक्काइया य बायरते-  
उक्काइया य ॥ २३ ॥ से किं तं सुहुमतेउक्काइया ? २ जहा सुहुमपुढविकाइया नवरं  
सरीरगा सूइकलावसंठिया, एगगइया दुआगइया परित्ता असंखेजा पण्णत्ता, सेसं तं  
चेव, सेत्तं सुहुमतेउक्काइया ॥ २४ ॥ से किं तं बायरतेउक्काइया ? अणेगविहा  
पण्णत्ता, तंजहा—इंगाले जाले मुम्मुरे जाव सूरकंतमणिनिसिए, जे यावन्ने

तहप्पगारा, ते समासओ दुविहा पण्णत्ता, तंजहा—पज्जत्ता य अपज्जत्ता य । तेसि णं भंते ! जीवाणं कइ सरीरगा पण्णत्ता ? गोयमा ! तओ सरीरगा पण्णत्ता, तंजहा—ओरालिए तेयए कम्मए, सेसं तं चेव, सरीरगा सइकलावसंठिया तिञ्चि लेस्सा, ठिई जहन्नेणं अंतोसुहुत्तं उक्कोसेणं तिञ्चि राईदियाई तिरियमणुस्सेहिंतो उववाओ, सेसं तं चेव एगगइया दुआगइया, परित्ता असंखेज्जा पण्णत्ता सेत्तं तेउक्काइया ॥ २५ ॥ से किं तं वाउक्काइया ? २ दुविहा पण्णत्ता, तंजहा—सुहुमवाउक्काइया य बायरवाउक्काइया य, सुहुमवाउक्काइया जहा तेउक्काइया णवरं सरीरा पडागसंठिया एगगइया दुआगइया परित्ता असंखिज्जा, सेत्तं सुहुमवाउक्काइया । से किं तं बायरवाउक्काइया ? २ अणेगविहा पण्णत्ता, तंजहा—पाईणवाए पडीणवाए, एवं जे यावण्णे तहप्पगारा, ते समासओ दुविहा पण्णत्ता, तंजहा—पज्जत्ता य अपज्जत्ता य । तेसि णं भंते ! जीवाणं कइ सरीरगा पण्णत्ता ? गोयमा ! चत्तारि सरीरगा पण्णत्ता, तंजहा—ओरालिए वेउव्विए तेयए कम्मए, सरीरगा पडागसंठिया, चत्तारि समुग्घाया—वेयणासमुग्घाए कसायसमुग्घाए मारणंतियसमुग्घाए वेउव्वियसमुग्घाए, आहारो णिव्वाघाएणं छइसिं वाघायं पडुच्च सिय तिदिसिं सिय चउदिसिं सिय पंचदिसिं, उववाओ देवमणुयनेरइएसु णत्थि, ठिई जहन्नेणं अंतोसुहुत्तं उक्कोसेणं तिञ्चि वाससहस्साइं, सेसं तं चेव एगगइया दुआगइया परित्ता असंखेज्जा पण्णत्ता समणाउसो !, सेत्तं बायरवाउक्काइया, सेत्तं वाउक्काइया ॥ २६ ॥ से किं तं ओराला तसा पाणा ? २ चउव्विहा पण्णत्ता, तंजहा—बेईदिया तेईदिया चउरिंदिया पंचेदिया ॥ २७ ॥ से किं तं बेईदिया ? २ अणेगविहा पण्णत्ता, तंजहा—पुलाकिमिया जाव समुइल्लिक्खा, जे यावण्णे तहप्पगारा, ते समासओ दुविहा पण्णत्ता, तंजहा—पज्जत्ता य अपज्जत्ता य । तेसि णं भंते ! जीवाणं कइ सरीरगा पण्णत्ता ? गोयमा ! तओ सरीरगा पण्णत्ता, तंजहा—ओरालिए तेयए कम्मए । तेसि णं भंते ! जीवाणं केमहालिया सरीरओगाहणा पण्णत्ता ? गोयमा ! जहन्नेणं अंगुलासंखेज्जइमागं उक्कोसेणं बारसजोयणाइं छेवट्ठसंघयणा हुंडसंठिया, चत्तारि कसाया, चत्तारि सण्णाओ, तिण्णि लेसाओ, दो इंदिया, तओ समुग्घाया—वेयणा कसाया मारणंतिया, नोसच्ची असच्ची, णपुंसगवेयगा, पंच पज्जत्तीओ, पंच अपज्जत्तीओ, सम्महिट्ठीवि मिच्छादिट्ठीवि नो सम्मामिच्छादिट्ठी, णो चक्खुदंसणी अचक्खुदंसणी णो ओहिदंसणी णो केवलदंसणी । ते णं भंते ! जीवा किं णाणी अण्णाणी ? गोयमा ! णाणीवि अण्णाणीवि, जे णाणी ते नियमा दुण्णाणी, तंजहा—आमिणिबोहियणाणी सुयणाणी य, जे अन्नाणी ते नियमा दुअण्णाणी—मइअण्णाणी य सुयअण्णाणी

य, नो मणजोगी वइजोगी कायजोगी, सागारोवउत्तावि अणागारोवउत्तावि, आहारो नियमा छद्दिसिं, उववाओ तिरियमणस्सेसु नेरइयदेवअसंखेजवासाउयवज्जेसु, ठिई जहन्नेणं अंतोमुहुत्तं उक्कोसेणं बारस संवच्छराणि, समोहयावि मरंति असमोहयावि मरंति, कहिं गच्छंति ? नेरइयदेवअसंखेजवासाउयवज्जेसु गच्छंति, दुगइया दुआगइया, परित्ता असंखेज्जा, सेत्तं वेइंदिया ॥ २८ ॥ से किं तं तेइंदिया ? २ अणेगविहा पण्णत्ता, तंजहा—उवइया रोहिणिया जाव हत्थिसोंडा, जे यावण्णे तहप्पगारा, ते समासओ दुविहा पण्णत्ता, तंजहा—पज्जत्ता य अपज्जत्ता य, तहेव जहा वेइंदियाणं, नवरं सरीरोगाहणा उक्कोसेणं तिस्सि गाउयाइं, तिस्सि इंदिया, ठिई जहन्नेणं अंतो-मुहुत्तं उक्कोसेणं एगूणपण्णराइंदियाइं, सेसं तहेव, दुगइया दुआगइया, परित्ता असंखेज्जा पण्णत्ता, से तं तेइंदिया ॥ २९ ॥ से किं तं चउरिंदिया ? २ अणेगविहा पण्णत्ता, तंजहा—अंधिया पुत्तिया जाव गोमयकीडा, जे यावण्णे तहप्पगारा ते समासओ दुविहा पण्णत्ता, तंजहा—पज्जत्ता य अपज्जत्ता य, तेसि णं भंते ! जीवाणं कइ सरीरगा पण्णत्ता ? गोयमा ! तओ सरीरगा पण्णत्ता तं चेव, णवरं सरीरोगाहणा उक्कोसेणं चत्तारि गाउयाइं, इंदियाइं चत्तारि, चक्खुदंसणी अचक्खु-दंसणी, ठिई उक्कोसेणं छम्मासा, सेसं जहा तेइंदियाणं जाव असंखेज्जा पण्णत्ता, से तं चउरिंदिया ॥ ३० ॥ से किं तं पंचेंदिया ? २ चउव्विहा पण्णत्ता, तंजहा—णेरइया तिरिक्खजोणिया मणुस्सा देवा ॥ ३१ ॥ से किं तं नेरइया ? २ सत्तविहा पण्णत्ता, तंजहा—रयणप्पभापुढविनेरइया जाव अहेसत्तमपुढविनेरइया, ते समा-सओ दुविहा पण्णत्ता, तं—पज्जत्ता य अपज्जत्ता य । तेसि णं भंते ! जीवाणं कइ सरीरगा पण्णत्ता ? गोयमा ! तओ सरीरगा पण्णत्ता, तंजहा—वेउव्विए तेयए कम्मए । तेसि णं भंते ! जीवाणं केमहाल्लिया सरीरोगाहणा पण्णत्ता ? गोयमा ! दुविहा सरीरोगाहणा पण्णत्ता, तंजहा—भवधारणिज्जा य उत्तरवेउव्विया य, तत्थ णं जा सा भवधारणिज्जा सा जहण्णेणं अंगुलस्स असंखेज्जइभागं उक्कोसेणं पंचधणु-सयाइं, तत्थ णं जा सा उत्तरवेउव्विया सा जहण्णेणं अंगुलस्स संखेज्जइभागं उक्कोसेणं धणुसहस्सं । तेसि णं भंते ! जीवाणं सरीरा किंसंघयणी पण्णत्ता ? गोयमा ! छण्हं संघयणाणं असंघयणी, णेवट्ठी णेव छिरा णेव ण्हारू णेव संघयणमत्थि, जे पोग्गला अणिट्ठा अकंता अप्पिया असुभा अमण्णणा अमणामा ते तेसिं संघायत्ताए परिण-मंति । तेसि णं भंते ! जीवाणं सरीरा किंसंठिया पण्णत्ता ? गोयमा ! दुविहा पण्णत्ता, तंजहा—भवधारणिज्जा य उत्तरवेउव्विया य, तत्थ णं जे ते भवधारणिज्जा ते हुंडसंठिया, तत्थ णं जे ते उत्तरवेउव्विया तेवि हुंडसंठिया पण्णत्ता, चत्तारि

कसाया चत्तारि सण्णाओ तिण्णि लेसाओ पंचंदिया चत्तारि समुग्घाया आइल्ला, सन्नीवि असन्नीवि, नपुंसगवेया, छप्पज्जतीओ छ अपज्जतीओ, तिविहा दिट्ठी, तिञ्चि दंसणा, णाणीवि अण्णाणीवि, जे णाणी ते नियमा तिञ्चाणी, तंजहा—आभिणि-  
बोहियणाणी सुयणाणी ओह्मिणाणी, जे अण्णाणी ते अत्थेगइया दुअण्णाणी अत्थे-  
गइया तिअण्णाणी, जे य दुअण्णाणी ते णियमा मइअण्णाणी सुयअण्णाणी य, जे  
तिअण्णाणी ते नियमा मइअण्णाणी य सुयअण्णाणी य विभंगणाणी य, तिविहे  
जोगे, दुविहे उवओगे, छहिसिं आहारो, ओसणं कारणं पडुच्च वण्णओ कालाईं जाव  
आहारमाहारेंति, उववाओ तिरियमणस्सेसु, ठिई जह्जेणं दसवाससहस्साईं उक्कोसेणं  
तेत्तीसं सागरोवमाईं, दुविहा मरंति, उव्वट्ठणा भाणियव्वा जओ आगया, णवरि  
संमुच्छिमेसु पडिसिद्धो, दुगइया दुआगइया परिता असंखेज्जा पण्णत्ता समणाउसो !,  
से तं नेरइया ॥ ३२ ॥ से किं तं पंचंदियतिरिक्खजोणिया ? २ दुविहा पण्णत्ता,  
तंजहा—संमुच्छिमपंचंदियतिरिक्खजोणिया य गव्भवक्कंतियपंचंदियतिरिक्खजोणिया  
य ॥ ३३ ॥ से किं तं संमुच्छिमपंचंदियतिरिक्खजोणिया ? २ तिविहा पण्णत्ता,  
तंजहा—जलयरा थलयरा खहयरा ॥ ३४ ॥ से किं तं जलयरा ? २ पंचविहा  
पण्णत्ता, तंजहा—मच्छगा कच्छभा मगरा गाहा सुंसुमारा । से किं तं मच्छा ?  
एवं जहा पण्णवणाए जाव जे यावणे तहप्पगारा, ते समासओ दुविहा पण्णत्ता,  
तंजहा—पज्जता य अपज्जता य । तेसि णं भंते ! जीवाणं कइ सरीरगा पण्णत्ता ?  
गोयमा ! तओ सरीरगा पण्णत्ता तंजहा—ओरालिए तेयए कम्मए, सरीरोगाहणा  
जह्णेणं अंगुलस्स असंखेज्जभागं उक्कोसेणं जोयणसहस्सं, छेवट्ठसंघयणी, हुंडसंठिया,  
चत्तारि कसाया, सण्णाओवि ४, लेसाओ तिञ्चि, इंदिया पंच, समुग्घाया तिण्णि,  
णो सण्णी असण्णी, नपुंसगवेया, पज्जतीओ अपज्जतीओ य पंच, दो दिट्ठीओ, दो  
दंसणा, दो नाणा, दो अन्नाणा, दुविहे जोगे, दुविहे उवओगे, आहारो छहिसिं,  
उववाओ तिरियमणस्सेहिंतो नो देवेहिंतो नो नेरइएहिंतो, तिरिएहिंतो असंखेज्ज-  
वासाउयवजेहिंतो, अकम्मभूमगअंतरदीवगअसंखेज्जवासाउयवजेसु मणस्सेसु, ठिई  
जह्जेणं अंतोमुहुतं उक्कोसेणं पुव्वकोडी, मारणंतियसमुग्घाएणं दुविहावि मरंति,  
अणंतं उव्वट्ठिता कहिं ? नेरइएसुवि तिरिक्खजोणिएसुवि मणस्सेसुवि देवेसुवि,  
नेरइएसु रयणप्पहाए, सेसेसु पडिसेहो, तिरिएसु सव्वेसु उव्वजंति संखेज्जवासा-  
उएसुवि असंखेज्जवासाउएसुवि चउप्पएसु पक्खीसुवि मणस्सेसु सव्वेसु कम्मभूमिएसु  
नो अकम्मभूमिएसु अंतरदीवएसुवि संखिज्जवासाउएसुवि असंखिज्जवासाउएसुवि  
पज्जतएसुवि अपज्जतएसुवि देवेसु जाव वाणमंतरा, चउगइया दुआगइया, परिता  
८ सुत्ता०

असंखेज्जा पण्णत्ता । से तं संमुच्छिमजलयरपंचंदियतिरिक्खजोगिया ॥ ३५ ॥ से किं तं थलयरसंमुच्छिमपंचंदियतिरिक्खजोगिया ? २ दुविहा पण्णत्ता, तंजहा—चउप्पयथलयरसंमुच्छिमपंचंदियतिरिक्खजोगिया परिसप्पसंमु० ॥ से किं तं चउप्पयथलयरसंमुच्छिम० ? २ चउव्विहा पण्णत्ता, तंजहा—एगखुरा दुखुरा गंडीपया सणफ्फया जाव जे यावण्णे तहप्पगारा ते समासओ दुविहा पण्णत्ता, तंजहा—पज्जत्ता य अपज्जत्ता य, तओ सरीरगा ओगाहणा जहण्णेणं अंगुलस्स असंखेज्जभागं उक्कोसेणं गाउयपुहुत्तं ठिई जहण्णेणं अंतोमुहुत्तं उक्कोसेणं चउरासीइवाससहस्साइं, सेसं जहा जलयराणं जाव चउगइया दुआगइया परिता असंखेज्जा पण्णत्ता, सेतं चउप्पयथलयरसंमु० । से किं तं थलयरपरिसप्पसंमुच्छिमा ? २ दुविहा पण्णत्ता, तंजहा—उरपरिसप्पसंमुच्छिमा भुयपरिसप्पसंमुच्छिमा । से किं तं उरपरिसप्पसंमुच्छिमा ? २ चउव्विहा पण्णत्ता, तंजहा—अही अयगरा आसालिया महोरगा । से किं तं अही ? अही दुविहा पण्णत्ता, तंजहा—दव्वीकरा मउलिणो य । से किं तं दव्वीकरा ? २ अणेगविहा पण्णत्ता, तंजहा—आसीविसा जाव से तं दव्वीकरा । से किं तं मउलिणो ? २ अणेगविहा पण्णत्ता, तंजहा—दिव्वा गोणसा जाव से तं मउलिणो, सेतं अही । से किं तं अयगरा ? २ एगागारा पण्णत्ता, से तं अयगरा । से किं तं आसालिया ? २ जहा पण्णवणाए, से तं आसालिया । से किं तं महोरगा ? २ जहा पण्णवणाए, से तं महोरगा । जे यावण्णे तहप्पगारा ते समासओ दुविहा पण्णत्ता, तंजहा—पज्जत्ता य अपज्जत्ता य तं चेव, णवरि सरीरोगाहणा जह्जेणं अंगुलस्स असंखेज्जं उक्कोसेणं जोयणपुहुत्तं, ठिई जह्जेणं अंतोमुहुत्तं उक्कोसेणं तेवण्णं वाससहस्साइं, सेसं जहा जलयराणं जाव चउगइया दुआगइया परिता असंखेज्जा, से तं उरपरिसप्पा ॥ से किं तं भुयपरिसप्पसंमुच्छिमथलयरा ? २ अणेगविहा पण्णत्ता, तंजहा—गोहा णउला जाव जे यावणे तहप्पगारा ते समासओ दुविहा पण्णत्ता, तंजहा—पज्जत्ता य अपज्जत्ता य, सरीरोगाहणा जह्जेणं अंगुलासंखेज्जं उक्कोसेणं षण्णपुहुत्तं, ठिई उक्कोसेणं बायालीसं वाससहस्साइं सेसं जहा जलयराणं जाव चउगइया दुआगइया परिता असंखेज्जा पण्णत्ता, से तं भुयपरिसप्पसंमुच्छिमा, से तं थलयरा ॥ से किं तं खहयरा ? २ चउव्विहा पण्णत्ता, तंजहा—चम्मपक्खी लोमपक्खी समुग्गपक्खी विययपक्खी । से किं तं चम्मपक्खी ? २ अणेगविहा पण्णत्ता, तंजहा—वग्गुली जाव जे यावणे तहप्पगारा, से तं चम्मपक्खी । से किं तं लोमपक्खी ? २ अणेगविहा पण्णत्ता, तंजहा—डंका कंका जे यावणे तहप्पगारा, से तं लोमपक्खी । से किं तं समुग्गपक्खी ? २ एगागारा पण्णत्ता

जहा पणवणाए, एवं विययपक्खी जाव जे यावन्ने तहप्पगारा ते समासओ दुविहा पणत्ता, तंजहा—पज्जता य अपज्जता य, णाणत्तं सरीरोगाहणा जह० अंगु० असं० उक्कोसेणं धणुपुहुत्तं ठिई उक्कोसेणं वावत्तरिं वासमहस्साई, सेसं जहा जलयराणं जाव चउगइया दुआगइया परिता असंखेज्जा पणत्ता, से तं खहयरा-संमुच्छिमतिरिक्खजोणिया, से तं संमुच्छिमपंचंदियतिरिक्खजोणिया ॥ ३६ ॥ से किं तं गम्भवक्कंतियपंचंदियतिरिक्खजोणिया? २ तिविहा पणत्ता, तंजहा—जलयरा थलयरा खहयरा ॥ ३७ ॥ से किं तं जलयरा? जलयरा पंचविहा पणत्ता, तंजहा—मच्छा कच्छभा मगरा गाहा सुंसुमारा, सव्वेसिं भेदो भाणियव्वो तहेव जहा पणवणाए, जाव जे यावण्णे तहप्पगारा ते समासओ दुविहा पणत्ता, तंजहा—पज्जता य अपज्जता य, तेसि णं भंते! जीवाणं कइ सरीरगा पणत्ता? गोयमा! चत्तारि सरीरगा पज्जता, तंजहा—ओरालिए वेउव्विए तेयए० कम्मए, सरीरोगाहणा जहन्नेणं अंगुलस्स असंखेज्ज० उक्कोसेणं जोयणसहस्सं छव्विहसंघयणी पणत्ता, तंजहा—वइरोसभनारायसंघयणी उसभनारायसंघयणी नारायसंघयणी अद्धनारायसंघयणी कीलियासंघयणी सेवट्टसंघयणी, छव्विहा संठिया पणत्ता, तंजहा—समचउरंसंठिया णग्गोहपरिमंडल० साइ० खुज्ज० वामण० हुंड०, कसाया सव्वे सण्णाओ ४ लेसाओ ६ पंच इंदिया पंच समुग्घाया आइल्ला सण्णी नो असण्णी तिविहवेया छपज्जतीओ छअपज्जतीओ दिट्ठी तिविहावि तिण्णि दंसणा णाणीवि अण्णाणीवि जे णाणी ते अत्थेगइया दुणाणी अत्थेगइया तिन्नाणी, जे दुन्नाणी ते नियमा आभिणिबोहियणाणी य सुयणाणी य, जे तिन्नाणी ते नियमा आभिणिबोहियणाणी सुय० ओहिणाणी, एवं अण्णाणीवि, जोगे तिविहे उवओगे दुविहे आहारो छहिंसि उववाओ नेरइएहिं जाव अहेसत्तमा तिरिक्खजोणिएसु सव्वेसु असंखेज्जवासाउयवज्जेसु मणुस्सेसु अकम्मभूसगअंतरदीवगअसंखेज्जवासाउयवज्जेसु देवेसु जाव सहस्सारो, ठिई जहण्णेणं अंतोमुहुत्तं उक्कोसेणं पुव्वकोडी, दुविहावि मरंति, अणंतंरं उव्वट्ठिता नेरइएसु जाव अहेसत्तमा तिरिक्खजोणिएसु मणुस्सेसु सव्वेसु देवेसु जाव सहस्सारो, चउगइया चउआगइया परिता असंखेज्जा पणत्ता, से तं जलयरा ॥ ३८ ॥ से किं तं थलयरा? २ दुविहा पणत्ता, तंजहा—चउप्पया य परिसप्पा य । से किं तं चउप्पया? २ चउव्विहा पणत्ता, तंजहा—एगखुरा सो चैव भेदो जाव जे यावन्ने तहप्पगारा ते समासओ दुविहा पणत्ता, तंजहा—पज्जता य अपज्जता य, चत्तारि सरीरा ओगाहणा जहन्नेणं अंगुलस्स असंखेज्ज० उक्कोसेणं छ गाउयाई, ठिई ज० अं० उक्कोसेणं तिन्नि पलिओमाई नवरं उव्वट्ठिता

नेरइएसु चउत्थपुढविं ताव गच्छंति, सेसं जहा जलयराणं जाव चउगइया चउआ-  
 गइया परिता असंखिज्जा पण्णत्ता, से तं चउप्पया । से किं तं परिसप्पा ? २ दुविहा  
 पण्णत्ता, तंजहा—उरपरिसप्पा य भुयपरिसप्पा य, से किं तं उरपरिसप्पा ? २ तहेव  
 आसालियवज्जो भेदो भाणियव्वो, सरीरा चत्तारि, ओगाहणा जह्णेणं अंगुलस्स  
 असंखे० उक्कोसेणं जोयणसहस्सं, ठिई जह्णेणं अंतोमुहुत्तं उक्कोसेणं पुव्वकोडी  
 उव्वट्ठिता नेरइएसु जाव पंचमं पुढविं ताव गच्छंति, तिरिक्खमणुस्सेसु सव्वेसु,  
 देवेषु जाव सहस्सारा, सेसं जहा जलयराणं जाव चउगइया चउआगइया परिता  
 असंखेज्जा से तं उरपरिसप्पा । से किं तं भुयपरिसप्पा ? २ भेदो तहेव, चत्तारि  
 सरीरगा ओगाहणा जह्णेणं अंगुलसंखे० उक्कोसेणं गाउयपुहुत्तं ठिई जह्णेणं  
 अंतोमुहुत्तं उक्कोसेणं पुव्वकोडी, सेसेसु ठाणेषु जहा उरपरिसप्पा, णवरं दोच्चं पुढविं  
 गच्छंति, से तं भुयपरिसप्पा से तं थलयरा ॥ ३९ ॥ से किं तं खहयरा ? २ चउ-  
 व्विहा पण्णत्ता, तंजहा—चम्मपक्खी तहेव भेदो, ओगाहणा जह्णेणं अंगुलस्स  
 असंखे० उक्कोसेणं धणुपुहुत्तं, ठिई जह्णेणं अंतोमुहुत्तं उक्कोसेणं पल्लिओवमस्स  
 असंखेज्जभाणो, सेसं जहा जलयराणं, नवरं जाव तच्चं पुढविं गच्छंति जाव से तं  
 खहयरगब्भवक्कंतियपंचंदियतिरिक्खजोणिया, से तं तिरिक्खजोणिया ॥ ४० ॥  
 से किं तं मणुस्सा ? २ दुविहा पण्णत्ता, तंजहा—संमुच्छिममणुस्सा य गब्भवक्कंति-  
 यमणुस्सा य ॥ कहि णं भंते ! संमुच्छिममणुस्सा संमुच्छंति ? गोयमा ! अंतो मणु-  
 स्सखेत्ते जाव करेंति । तेसि णं भंते ! जीवाणं कइ सरीरगा पण्णत्ता ? गोयमा !  
 तिन्नि सरीरगा पण्णत्ता, तंजहा—ओरालिए तेयए कम्मए० से तं संमुच्छिममणुस्सा ।  
 से किं तं गब्भवक्कंतियमणुस्सा ? २ तिविहा पण्णत्ता, तंजहा—कम्मभूमगा अकम्म-  
 भूमगा अंतरदीवगा, एवं माणुस्सभेदो भाणियव्वो जहा पण्णवणाए तथा णिरवसेसं  
 भाणियव्वं जाव छउमत्था य केवली य, ते समासओ दुविहा पण्णत्ता, तंजहा—  
 पज्जता य अपज्जता य । तेसि णं भंते ! जीवाणं कइ सरीरा प० ? गोयमा ! पंच  
 सरीरया प० तंजहा—ओरालिए जाव कम्मए । सरीरोगाहणा जह्णेणं अंगुलस्स  
 असंखेज्ज० उक्कोसेणं तिण्णि गाउयाई छेव्व संघयणा छस्संठाणा । ते णं भंते !  
 जीवा किं कोहकसाई जाव लोभकसाई अकसाई ? गोयमा ! सव्वेवि । ते णं भंते !  
 जीवा किं आहारसन्नोवउत्ता जाव नोसन्नोवउत्ता ? गोयमा ! सव्वेवि । ते णं भंते !  
 जीवा किं कण्हलेसा जाव अलेसा ? गोयमा ! सव्वेवि । सोईदियोवउत्ता जाव  
 नोईदियोवउत्तावि, सव्वे समुग्घाया, तंजहा—वेयणासमुग्घाए जाव केवलिसमुग्घाए,  
 सन्नोवि नोसन्नो-असन्नोवि, इत्थिवेयावि जाव अवेयावि, पंच पज्जती, तिविहावि दिट्ठी,

चत्तारि दंसणा, णाणीवि अण्णाणीवि, जे णाणी ते अत्थेगइया दुणाणी अत्थेगइया तिणाणी अत्थेगइया चउणाणी अत्थेगइया एगणाणी, जे दुणाणी ते नियमा आभिणिबोहियणाणी सुयणाणी य, जे तिणाणी ते आभिणिबोहियणाणी सुयणाणी ओहिणाणी य, अहवा आभिणिबोहियणाणी सुयणाणी मणपज्जवणाणी य, जे चउणाणी ते नियमा आभिणिबोहियणाणी सुय० ओहि० मणपज्जवणाणी य, जे एगणाणी ते नियमा केवलनाणी, एवं अन्नाणीवि दुअन्नाणी तिअण्णाणी, मणजोगीवि वड्कायजोगीवि अजोगीवि, दुविहउवओगे आहारो छदिसिं उववाओ नेरइएहिं अहेसतमवज्जेहिं तिरिक्खजोणिएहिंतो, उववाओ असंखेज्जवासाउयवज्जेहिं मणुएहिं अकम्मभूमगअंतरदीवगअसंखेज्जवासाउयवज्जेहिं, देवेहिं सव्वेहिं, ठिई जह्जेणं अंतो-मुहुत्तं उक्कोसेणं तिणिण पल्लिओवमाइं, दुविहावि मरंति, उव्वट्ठिता नेरइयाइसु जाव अणुत्तरोववाइएसु, अत्थेगइया सिज्झंति जाव अंतं करंति । ते णं भंते ! जीवा कइगइया कइआगइया पण्णत्ता ? गोयमा ! पंचगइया चउआगइया परिता संखिज्जा पण्णत्ता, सेत्तं मणुस्सा ॥ ४१ ॥ से किं तं देवा ? देवा चउव्विहा पण्णत्ता, तंजहा—भवणवासी वाणमंतरा जोइसिया वेमाणिया । से किं तं भवणवासी ? २ दसविहा पण्णत्ता, तंजहा—असुरा जाव थणिया, से तं भवणवासी । से किं तं वाणमंतरा ? २ देवमेदो सव्वो भाणियव्वो जाव ते समासओ दुविहा पण्णत्ता, तंजहा—पज्जत्ता य अपज्जत्ता य, तेसि णं तओ सरीरगा—वेउव्विए तेथए कम्मए । ओगाहणा दुविहा—भवधारणिज्जा य उत्तरवेउव्विया य, तत्थ णं जा सा भवधारणिज्जा सा जह्जेणं अंगुलस्स असंखेज्जइ-भागं उक्कोसेणं सत्त रयणीओ, उत्तरवेउव्विया जह्जेणं अंगुलस्स संखेज्जइ० उक्कोसेणं जोयणसयसहस्सं, सरीरगा छण्हं संघयणाणं असंघयणी णेवट्ठी णेव छिरा णेव ण्हारु नेव संघयणमत्थि, जे पोगगला इट्ठा कंता जाव ते तेसिं संघायत्ताए परिणमंति, किंसंठिया ? गोयमा ! दुविहा पण्णत्ता, तंजहा—भवधारणिज्जा य उत्तरवेउव्विया य, तत्थ णं जे ते भवधारणिज्जा ते णं समचउरंससंठिया पण्णत्ता, तत्थ णं जे ते उत्तरवेउव्विया ते णं नाणासंठाणसंठिया पण्णत्ता, चत्तारि कसाया चत्तारि सण्णा छ लेस्साओ पंच ईदिया पंच समुग्घाया सन्नीवि असन्नीवि इत्थि-वेयावि पुरिसवेयावि नो नपुंसगवेया, पज्जत्ती अपज्जत्तीओ पंच, दिट्ठी तिन्नि, तिणिण दंसणा, णाणीवि अण्णाणीवि, जे नाणी ते नियमा तिण्णाणी अण्णाणी भयणाए, दुविहे उवओगे, तिविहे जोगे, आहारो नियमा छदिसिं, ओसन्नकारणं पडुच्च वण्णओ हालिइसुक्किळाइं जाव आहारमाहारंति, उववाओ तिरियमणुस्सेसु, ठिई जह्जेणं दस वाससहस्साइं उक्कोसेणं तेत्तीसं सागरोवमाइं, दुविहावि मरंति, उव्वट्ठिता नो



नेरइएसु गच्छंति तिरियमणस्सेसु जहासंभवं, नो देवेसु गच्छंति, दुगइया दुआगइया  
 परिता असंखेजा पणत्ता, से तं देवा, से तं पंचेदिया, सेतं ओराला तसा पाणा  
 ॥ ४२ ॥ थावरस्स णं भंते! केवइयं कालं ठिई पणत्ता? गोयमा! जहन्नेणं  
 अंतोमुहुत्तं उक्कोसेणं वावीसं वाससहस्साइं ठिई पणत्ता ॥ तसस्स णं भंते!  
 केवइयं कालं ठिई पणत्ता? गोयमा! जहण्णेणं अंतोमुहुत्तं उक्कोसेणं तेत्तीसं  
 सागरोवमाइं ठिई पणत्ता । थावरे णं भंते! थावरेत्ति कालओ केवच्चिरं होइ ?  
 गोयमा! जहन्नेणं अंतोमुहुत्तं उक्कोसेणं अणंतं कालं अणंताओ उस्सप्पिणीओ  
 अवसप्पिणीओ कालओ खेतओ अणंता लोया असंखेजा पुग्गलपरियट्ठा, ते णं  
 पुग्गलपरियट्ठा आवल्लियाए असंखेजइभागो ॥ तसे णं भंते! तसेत्ति कालओ केवच्चिरं  
 होइ ? गोयमा! जहन्नेणं अंतोमुहुत्तं उक्कोसेणं असंखेजं कालं असंखेजाओ उस्स-  
 प्पिणीओ अवसप्पिणीओ कालओ खेतओ असंखेजा लोगा ॥ थावरस्स णं भंते!  
 केवइकालं अंतरं होइ ? गोयमा! जहा तससंचिट्ठणाए ॥ तसस्स णं भंते! केवइ-  
 कालं अंतरं होइ ? गोयमा! जहण्णेणं अंतोमुहुत्तं उक्कोसेणं वणस्सइकालो ॥ एएसि णं  
 भंते! तसाणं थावराणं य कयरे कयरेहिंतो अप्पा वा बहुया वा तुल्ला वा विसेसाहिया  
 वा ? गोयमा! सच्चत्थोवा तसा थावरा अणंतगुणा, से तं दुविहा संसारसमावण्णगा  
 जीवा पणत्ता ॥ ४३ ॥ पढमा दुविहपडिवत्ती समत्ता ॥

तत्थ जे ते एवमाहंसु ति विहा संसारसमावण्णगा जीवा पणत्ता ते एवमाहंसु,  
 तंजहा—इत्थी पुरिसा णपुंसगा ॥ ४४ ॥ से किं तं इत्थीओ ? २ ति विहाओ पण-  
 ताओ, तंजहा—तिरिक्खजोणित्थीओ मणुस्सित्थीओ देवित्थीओ । से किं तं तिरि-  
 क्खजोणित्थीओ ? २ ति विहाओ पणत्ताओ तंजहा—जलयरीओ थलयरीओ खह-  
 यरीओ । से किं तं जलयरीओ ? २ पंचविहाओ पणत्ताओ, तंजहा—मच्छीओ जाव  
 सुंसुमारीओ से तं जलयरीओ । से किं तं थलयरीओ ? २ दुविहाओ पणत्ताओ  
 तंजहा—चउप्पईओ य परिसप्पीओ य । से किं तं चउप्पईओ ? २ चउव्विहाओ  
 पणत्ताओ तंजहा—एगखुरीओ जाव सणप्फईओ से तं चउप्पयथलयरतिरिक्खजो-  
 णित्थीओ । से किं तं परिसप्पीओ ? २ दुविहाओ पणत्ताओ, तंजहा—उरपरिस-  
 प्पीओ य भुयपरिसप्पीओ य । से किं तं उरपरिसप्पीओ ? २ ति विहाओ पणत्ताओ  
 तंजहा—अहीओ अहिगरीओ महोरगीओ य, सेतं उरपरिसप्पीओ । से किं तं भुय-  
 परिसप्पीओ ? २ अणेगविहाओ पणत्ताओ तंजहा—सेरडीओ सेरंधीओ गोहीओ  
 णउलीओ सेधाओ सरडीओ सिरसंधीओ भावीओ सोवीओ खारीओ पल्लावाइयाओ  
 चउप्पइयाओ मूसियाओ मुगुसियाओ घरोल्लियाओ गोहियाओ जोहियाओ चिरविरा-

लियाओ सेतं भुयपरिसप्पीओ । से किं तं खहयरीओ ? चउव्विहाओ पण्णत्ताओ तंजहा—चम्मपक्खीओ जाव वियय० सेतं खहयरीओ, सेतं तिरिक्खजोणित्थीओ ॥  
 से किं तं मणुस्सित्थीओ ? २ तिविहाओ पण्णत्ताओ तंजहा—कम्मभूमियाओ अकम्म-  
 भूमियाओ अंतरदीवियाओ । से किं तं अंतरदीवियाओ ? २ अट्ठावीसइविहाओ पण्ण-  
 ताओ, तंजहा—एगूरुइयाओ आभासियाओ जाव सुद्धदंतीओ, सेतं अंतरदी० ॥ से  
 किं तं अकम्मभूमियाओ ? २ तीसविहाओ पण्णत्ताओ तंजहा—पंचसु हेमवएसु पंचसु  
 एरण्वएसु पंचसु हरिवासेसु पंचसु रम्मगवासेसु पंचसु देवकुरासु पंचसु उत्तरकुरासु,  
 सेतं अकम्म० । से किं तं कम्मभूमियाओ ? २ पण्णरसविहाओ पण्णत्ताओ, तंजहा—  
 पंचसु भरहेसु पंचसु एरवएसु पंचसु महाविदेहेसु, सेतं कम्मभूमगमणुस्सित्थीओ,  
 सेतं मणुस्सित्थीओ ॥ से किं तं देवित्थियाओ ? २ चउव्विहाओ पण्णत्ताओ तंजहा—  
 भवणवासिदेवित्थियाओ वाणमंतरदेवित्थियाओ जोइसियदेवित्थियाओ वेमाणियदेवि-  
 त्थियाओ । से किं तं भवणवासिदेवित्थियाओ ? २ दसविहाओ पण्णत्ताओ तंजहा—  
 असुरकुमारभवणवासिदेवित्थियाओ जाव थणियकुमारभवणवासिदेवित्थियाओ, से तं  
 भवणवासिदेवित्थियाओ । से किं तं वाणमंतरदेवित्थियाओ ? २ अट्ठविहाओ पण्ण-  
 ताओ तंजहा—पिसायावाणमंतरदेवित्थियाओ जाव गंधव्व० से तं वाणमंतरदेवित्थि-  
 याओ । से किं तं जोइसियदेवित्थियाओ ? २ पंचविहाओ पण्णत्ताओ तंजहा—चंद-  
 विमाणजोइसियदेवित्थियाओ सूर० गह० नक्खत्त० ताराविमाणजोइसियदेवित्थि-  
 याओ, सेतं जोइसियाओ । से किं तं वेमाणियदेवित्थियाओ ? २ दुविहाओ प०  
 तंजहा—सोहम्मकप्पवेमाणियदेवित्थियाओ ईसाणकप्पवेमाणियदेवित्थियाओ, सेतं  
 वेमाणित्थीओ ॥ ४५ ॥ इत्थीणं भंते ! केवइयं कालं ठिई पण्णत्ता ? गोयमा एगेणं  
 आएसेणं जहन्नेणं अंतोमुहुत्तं उक्कोसेणं पणपन्नं पलिओवमाई एक्केणं आएसेणं जहन्नेणं  
 अंतोमुहुत्तं उक्कोसेणं नव पलिओवमाई एगेणं आएसेणं जहन्नेणं अंतोमुहुत्तं उक्कोसेणं  
 सत्त पलिओवमाई एगेणं आएसेणं जहन्नेणं अंतोमुहुत्तं उक्कोसेणं पन्नासं पलिओवमाई  
 ॥ ४६ ॥ तिरिक्खजोणित्थीणं भंते ! केवइयं कालं ठिई पण्णत्ता ? गो० जहन्नेणं  
 अंतोमुहुत्तं उक्कोसेणं तिण्णि पलिओवमाई । जलयरतिरिक्खजोणित्थीणं भंते ! केवइयं  
 कालं ठिई पण्णत्ता ? गोयमा ! जहन्नेणं अंतो० उक्को० पुव्वकोडी । चउप्पयथलयरति-  
 रिक्खजोणित्थीणं भंते ! केवइयं कालं ठिई पण्णत्ता ? गो० जहा तिरिक्खजोणित्थीओ ।  
 उरपरिसप्पथलयरतिरिक्खजोणित्थीणं भंते ! केवइयं कालं ठिई पण्णत्ता ? गोयमा !  
 जहन्नेणं अंतोमुहुत्तं उक्कोसेणं पुव्वकोडी । एवं भुयपरिसप्प० । एवं खहयरतिरिक्ख-  
 त्थीणं जहन्नेणं अंतोमुहुत्तं उक्को० पलिओवमस्स असंखेज्जभागो ॥ मणुस्सित्थीणं

भंते ! केवइयं कालं ठिई पणत्ता ? गोयमा ! खेतं पडुच्च जह० अंतो० उक्को० तिणिण पलिओवमाई, धम्मचरणं पडुच्च जह० अंतो० उक्कोसेणं देसूणा पुव्वकोडी । कम्मभूमयमणुस्सित्थीणं भंते ! केवइयं कालं ठिई पणत्ता ? गोयमा ! खेतं पडुच्च जहन्नेणं अंतोमुहुतं उक्कोसेणं तिञ्चि पलिओवमाई धम्मचरणं पडुच्च जहन्नेणं अंतो-मुहुतं उक्कोसेणं देसूणा पुव्वकोडी । भरहेरवयकम्मभूमगमणुस्सित्थीणं भंते ! केवइयं कालं ठिई पणत्ता ? गोयमा ! खेतं पडुच्च जहन्नेणं अंतोमुहुतं उक्कोसेणं तिञ्चि पलिओवमाई, धम्मचरणं पडुच्च जहन्नेणं अंतोमु० उक्कोसेणं देसूणा पुव्वकोडी । पुव्वविदेहअवरविदेहकम्मभूमगमणुस्सित्थीणं भंते ! केवइयं कालं ठिई पणत्ता ? गोयमा ! खेतं पडुच्च जहन्नेणं अंतो० उक्कोसेणं पुव्वकोडी, धम्मचरणं पडुच्च जहन्नेणं अंतोमुहुतं उक्कोसेणं देसूणा पुव्वकोडी । अकम्मभूमगमणुस्सित्थीणं भंते ! केवइयं कालं ठिई पणत्ता ? गोयमा ! जम्मणं पडुच्च जहन्नेणं देसूणं पलिओवमं पलिओवमस्स असंखेज्जभागऊणं उक्कोसेणं तिञ्चि पलिओवमाई, संहरणं पडुच्च जहन्नेणं अंतोमुहुतं उक्कोसेणं देसूणा पुव्वकोडी । हेमवएरणवए जम्मणं पडुच्च जहन्नेणं देसूणं पलिओवमं पलिओवमस्स असंखेज्जभागेण ऊणं उक्कोसेणं पलिओवमं संहरणं पडुच्च जहन्नेणं अंतोमुहुतं उक्कोसेणं देसूणा पुव्वकोडी । हरिवासरम्मयवासअकम्मभूमगमणुस्सित्थीणं भंते ! केवइयं कालं ठिई पणत्ता ? गोयमा ! जम्मणं पडुच्च जहन्नेणं देसूणाई दो पलिओवमाई पलिओवमस्स असंखेज्जभागेण ऊणयाई उक्को० दो पलिओवमाई, संहरणं पडुच्च जह० अंतो० उक्को० देसूणा पुव्वकोडी । देवकुत्तरकुत्तअकम्मभूमगमणुस्सित्थीणं भंते ! केवइयं कालं ठिई पणत्ता ? गोयमा ! जम्मणं पडुच्च जहन्नेणं देसूणाई तिणिण पलिओवमाई पलिओवमस्स असंखेज्जभागेण ऊणयाई उक्को० तिञ्चि पलिओवमाई, संहरणं पडुच्च जहन्नेणं अंतोमुहुतं उक्को० देसूणा पुव्वकोडी । अंतरदीवगअकम्मभूमगमणुस्सित्थीणं भंते ! केवइयं कालं ठिई पणत्ता ? गोयमा ! जम्मणं पडुच्च जहन्नेणं देसूणं पलिओवमस्स असंखेज्जभागं पलिओवमस्स असंखेज्जभागेण ऊणयं उक्को० पलिओवमस्स असंखेज्जभागं संहरणं पडुच्च जहन्नेणं अंतोमु० उक्को० देसूणा पुव्वकोडी ॥ देवित्थीणं भंते ! केवइयं कालं ठिई पत्ता ? गोयमा ! जहन्नेणं दसवाससहस्साई उक्कोसेणं पणपन्नं पलिओवमाई । भवणवासिदेवित्थीणं भंते ! केवइयं कालं ठिई पणत्ता ? गोयमा ! जहन्नेणं दसवाससहस्साई उक्कोसेणं अद्धपंचमाई पलिओवमाई । एवं असुरकुमारभवणवासिदेवित्थियाए, नागकुमारभवणवासिदेवित्थियाएवि जहन्नेणं दसवाससहस्साई उक्कोसेणं देसूणाई पलिओवमाई, एवं सेसाणवि जाव थणियकुमाराणं । वाणमंतरीणं जहन्नेणं दसवास-

सहस्साई उक्कोसेणं अद्वपलिओवमं । जोइसियदेवितीणं भंते ! केवइयं कालं  
 ठिई पण्णात्ता ? गोयमा ! जहण्णेणं पलिओवमस्स अट्टमं भागं उक्कोसेणं अद्व-  
 पलिओवमं पण्णासाए वाससहस्सेहिं अब्भहियं, चंदविमाणजोइसियदेवितीयाए  
 जहन्नेणं चउभागपलिओवमं उक्कोसेणं तं चेव, सूरविमाणजोइसियदेवितीयाए  
 जहन्नेणं चउभागपलिओवमं उक्कोसेणं अद्वपलिओवमं पंचहिं वाससएहिमब्भहियं,  
 गहविमाणजोइसियदेवितीणं जहण्णेणं चउभागपलिओवमं उक्कोसेणं अद्वपलिओवमं,  
 णक्खत्तविमाणजोइसियदेवितीणं जहण्णेणं चउभागपलिओवमं उक्कोसेणं चउभाग-  
 पलिओवमं साइरेणं, ताराविमाणजोइसियदेवितीयाए जहन्नेणं अट्टभागं पलिओवमं  
 उक्को० साइरेणं अट्टभागपलिओवमं । वेमाणियदेवितीयाए जहण्णेणं पलिओवमं  
 उक्कोसेणं पणपन्नं पलिओवमाई, सोहम्मकप्पवेमाणियदेवितीणं भंते ! केवइयं कालं  
 ठिई प० ? गोयमा ! जहण्णेणं पलिओवमं उक्कोसेणं सत्त पलिओवमाई, ईसाण-  
 देवितीणं जहण्णेणं साइरेणं पलिओवमं उक्कोसेणं णव पलिओवमाई ॥ ४७ ॥  
 इत्थी णं भंते ! इत्थित्ति कालओ केवच्चिरं होइ ? गोयमा ! एक्केणाएसेणं जहन्नेणं  
 एक्कं समयं उक्कोसेणं दसुत्तरं पलिओवमसयं पुव्वकोडिपुहुत्तमब्भहियं । एक्केणाएसेणं  
 जहन्नेणं एक्कं समयं उक्कोसेणं अट्ठारस पलिओवमाई पुव्वकोडीपुहुत्तमब्भहियाई ।  
 एक्केणाएसेणं जहण्णेणं एक्कं समयं उक्कोसेणं चउद्दस पलिओवमाई पुव्वकोडिपुहुत्तम-  
 ब्भहियाई । एक्केणाएसेणं जह० एक्कं समयं उक्को० पलिओवमसयं पुव्वकोडीपुहुत्तम-  
 ब्भहियं । एक्केणाएसेणं जह० एक्कं समयं उक्को० पलिओवमपुहुत्तं पुव्वकोडीपुहुत्तम-  
 ब्भहियं ॥ तिरिक्खजोणित्थी णं भंते ! तिरिक्खजोणित्थित्ति कालओ केवच्चिरं होइ ?  
 गोयमा ! जहन्नेणं अंतोमुहुत्तं उक्कोसेणं तिन्नि पलिओवमाई पुव्वकोडी पुहुत्तमब्भ-  
 हियाई, जलयरीए जहण्णेणं अंतोमुहुत्तं उक्कोसेणं पुव्वकोडिपुहुत्तं । चउप्पयथलय-  
 रतिरिक्खजो० जहा ओहिया तिरिक्ख०, उरपरिसप्पीमुयपरिसप्पित्थी णं जहा  
 जलयरीणं, खहयरी० जहण्णेणं अंतोमुहुत्तं उक्को० पलिओवमस्स असंखेजइभागं  
 पुव्वकोडिपुहुत्तमब्भहियं ॥ मणुस्सित्थी णं भंते ! कालओ केवच्चिरं होइ ? गोयमा !  
 खेतं पडुच्च जहण्णेणं अंतोमुहुत्तं उक्को० तिन्नि पलिओवमाई पुव्वकोडिपुहुत्तमब्भहि-  
 याई, धम्मचरणं पडुच्च जह० एक्कं समयं उक्कोसेणं देसूणा पुव्वकोडी, एवं कम्मभूमि-  
 यावि भरहेरवयावि, णवरं खेतं पडुच्च जह० अंतो० उक्को० तिन्नि पलिओवमाई  
 देसूणपुव्वकोडीअब्भहियाई, धम्मचरणं पडुच्च जह० एक्कं समयं उक्को० देसूणा  
 पुव्वकोडी । पुव्वविदेहअवरविदेहिती णं खेतं पडुच्च जह० अंतो० उक्को० पुव्व-  
 कोडीपुहुत्तं, धम्मचरणं पडुच्च जह० एक्कं समयं उक्कोसेणं देसूणा पुव्वकोडी ॥

अकम्मभूमियमणुस्सित्थी णं भंते ! अकम्मभूमिं कालओ केवच्चिरं होइ ? गोयमा ! जम्मणं पडुच्च जहं देसूणं पलिओवमं पलिओवमस्स असंखेज्जभागेणं ऊणं उक्को० तिणिण पलिओवमाइं । संहरणं पडुच्च जहं अंतो० उक्कोसेणं तिणि पलिओवमाइं देसूणाए पुव्वकोडीए अब्भहियाइं । हेमवएरणवए अकम्मभूमगमणुस्सित्थी णं भंते ! हेमं कालओ केवच्चिरं होइ ? गोयमा ! जम्मणं पडुच्च जहं देसूणं पलिओवमं पलिओवमस्स असंखेज्जभागेणं ऊणगं, उक्को० पलिओवमं । साहरणं पडुच्च जहं अंतोमु० उक्को० पलिओवमं देसूणाए पुव्वकोडीए अब्भहियं । हरिवासरम्म-यअकम्मभूमगमणुस्सित्थी णं भंते !, जम्मणं पडुच्च जहं देसूणाइं दो पलिओवमाइं पलिओवमस्स असंखेज्जभागेणं ऊणगाइं, उक्को० दो पलिओवमाइं । संहरणं पडुच्च जहं अंतोमु० उक्को० दो पलिओवमाइं देसूणपुव्वकोडिमब्भहियाइं । उत्तरकुरुदे-वकुरुणं, जम्मणं पडुच्च जहणेणं देसूणाइं तिणि पलिओवमाइं पलिओवमस्स असंखेज्जभागेणं ऊणगाइं उक्को० तिणि पलिओवमाइं । संहरणं पडुच्च जहं अंतोमु० उक्को० तिणि पलिओवमाइं देसूणाए पुव्वकोडीए अब्भहियाइं । अंतरदीवाकम्मभूम-गमणुस्सित्थी० ? गो० ! जम्मणं पडुच्च जहं देसूणं पलिओवमस्स असंखेज्जभागां पलिओवमस्स असंखेज्जभागेण ऊणं उक्को० पलिओवमस्स असंखेज्जभागां । साहरणं पडुच्च जहं अंतोमु० उक्को० पलिओवमस्स असंखेज्जभागां देसूणाए पुव्वकोडीए अब्भहियं ॥ देवित्थी णं भंते ! देवित्थित्ति कालं, जच्चेव संचिट्ठणा ॥ ४८ ॥ इत्थीणं भंते ! केवइयं कालं अंतरं होइ ? गोयमा ! जहं अंतोमु० उक्को० अणंतं कालं, वणस्सइकालो, एवं सव्वासिं तिरिक्खत्थीणं । मणुस्सित्थीए खेतं पडुच्च जहं अंतो० उक्को० वणस्सइकालो, धम्मचरणं पडुच्च जहं एकं समयं उक्को० अणंतं कालं जाव अवड्ढुपोगलपरियट्ठं देसूणं, एवं जाव पुव्वविदेहअवरविदेहियाओ, अकम्मभूमगमणुस्सित्थीणं भंते ! केवइयं कालं अंतरं होइ ? गोयमा ! जम्मणं पडुच्च जहणेणं दसवाससहस्साइं अंतोमुहुत्तमब्भहियाइं, उक्को० वणस्सइकालो, संहरणं पडुच्च जहं अंतोमु० उक्को० वणस्सइकालो, एवं जाव अंतरदीवियाओ । देवित्थियाणं सव्वासिं जहं अंतो० उक्को० वणस्सइकालो ॥ ४९ ॥ एयासि णं भंते ! तिरिक्ख-जोणित्थियाणं मणुस्सित्थियाणं देवित्थियाणं कयरा २ हिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवाओ मणुस्सित्थियाओ तिरिक्खजोणि-त्थियाओ असंखेज्जगुणाओ देवित्थियाओ असंखेज्जगुणाओ ॥ एयासि णं भंते ! तिरिक्खजोणित्थियाणं जलयरीणं थलयरीणं खहयरीणं य कयरा २ हिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवाओ खहयरतिरिक्खजो-

णित्थियाओ थलयरतिरिक्खजोणित्थियाओ संखेज्जगुणाओ जलयरतिरिक्ख० संखे-  
ज्जगुणाओ ॥ एयासि णं भंते ! मणुस्सित्थीणं कम्मभूमियाणं अकम्मभूमियाणं  
अंतरदीवियाणं य कयरा २ हितो अप्पा वा ४ ? गोयमा ! सव्वत्थोवाओ अंतरदीवग-  
अकम्मभूमगमणुस्सित्थियाओ देवकुरुत्तरकुरुअकम्मभूमगमणुस्सित्थियाओ दोवि तुल्लाओ  
संखेज्जगु०, हरिवासरम्मयवासअकम्मभूमगमणुस्सित्थियाओ दोवि तुल्लाओ संखेज्जगु०,  
हेमवएरण्वयअकम्मभूमगमणुस्सित्थियाओ दोवि तुल्लाओ संखेज्जगु०, भरहेरवय-  
कम्मभूमगमणुस्सि० दोवि तुल्लाओ संखेज्जगुणाओ, पुव्वविदेहअवरविदेहकम्म-  
भूमगमणुस्सित्थियाओ दोवि तुल्लाओ संखेज्जगुणाओ ॥ एयासि णं भंते ! देवित्थियाणं  
भवणवासीणं वाणमंतरीणं जोइसिणीणं वेमाणिणीणं य कयरा २ हितो अप्पा वा  
बहुया वा तुल्ला वा विसेसाहिया वा ? गोयमा ! सव्वत्थोवाओ वेमाणियदेवित्थियाओ  
भवणवासिदेवित्थियाओ असंखेज्जगुणाओ वाणमंतरदेवित्थियाओ असंखेज्जगुणाओ  
जोइसियदेवित्थियाओ संखेज्जगुणाओ ॥ एयासि णं भंते ! तिरिक्खजोणित्थियाणं  
जलयरीणं थलयरीणं खहयरीणं मणुस्सित्थियाणं कम्मभूमियाणं अकम्मभूमियाणं  
अंतरदीवियाणं देवित्थीणं भवणवासिणीणं वाणमंतरीणं जोइसिणीणं वेमाणिणीणं य  
कयरा २ हितो अप्पा वा बहुया वा तुल्ला वा विसे० ? गोयमा ! सव्वत्थोवाओ अंतर-  
दीवगअकम्मभूमगमणुस्सित्थियाओ देवकुरुत्तरकुरुअकम्मभूमगमणुस्सित्थियाओ  
दोवि तुल्लाओ संखेज्जगुणाओ, हरिवासरम्मगवासअकम्मभूमगमणुस्सित्थियाओ दोऽवि  
तुल्लाओ संखेज्जगु०, हेमवएरण्वयअकम्मभूमग० दोऽवि तुल्लाओ संखेज्जगु०,  
भरहेरवयकम्मभूमगमणुस्सित्थीओ दोऽवि तुल्लाओ संखेज्जगु०, पुव्वविदेहअवर-  
विदेसकम्मभूमगमणुस्सित्थि० दोऽवि संखेज्जगु०, वेमाणियदेवित्थियाओ असं-  
खेज्जगु०, भवणवासिदेवित्थियाओ असंखेज्जगु०, खहयरतिरिक्खजोणित्थियाओ असं-  
खेज्जगु०, थलयरतिरिक्खजोणित्थियाओ संखेज्जगु०, जलयरतिरिक्खजोणित्थियाओ  
संखेज्जगुणाओ, वाणमंतरदेवित्थियाओ संखेज्जगुणाओ, जोइसियदेवित्थियाओ संखेज्ज-  
गुणाओ ॥ ५० ॥ इत्थिवेयस्स णं भंते ! कम्मस्स केवइयं कालं बंधठिई पणत्ता ? गोयमा !  
जह्जेणं सागरोवमस्स दिव्हो सत्तभागो पलिओवमस्स असंखेज्जइभागेण ऊणो  
उल्लो० पण्णरस सागरोवमकोडाकोडीओ, पण्णरस वाससयाई अबाहा, अबाहूणिया  
कम्मठिई कम्मणिसेओ ॥ इत्थिवेए णं भंते ! किंपगारे पणत्ते ? गोयमा ! कुंफु-  
अग्निसमाणे पणत्ते, सेत्तं इत्थियाओ ॥ ५१ ॥ से किं तं पुरिसा ? पुरिसा तिविहा  
पणत्ता, तंजहा-तिरिक्खजोणियपुरिसा मणुस्सपुरिसा देवपुरिसा ॥ से किं तं  
तिरिक्खजोणियपुरिसा ? २ तिविहा पणत्ता, तंजहा-जलयरा थलयरा खहयरा

इत्थिमेदो भाणियव्वो जाव खहयरा, सेत्तं खहयरा सेत्तं तिरिक्खजोणियपुरिसा ॥  
 से किं तं मणुस्सपुरिसा ? २ तिविहा पणत्ता, तंजहा-कम्मभूमगा अकम्मभूमगा  
 अंतरदीवगा, सेत्तं मणुस्सपुरिसा ॥ से किं तं देवपुरिसा ? देवपुरिसा चउव्विहा  
 पणत्ता, इत्थीमेओ भाणियव्वो जाव सव्वट्ठसिद्धा ॥ ५२ ॥ पुरिसस्स णं भंते !  
 केवइयं कालं ठिई पणत्ता ? गोयमा ! जह० अंतोमु० उक्को० तेत्तीसं सागरोवमाई ।  
 तिरिक्खजोणियपुरिसाणं मणुस्साणं जा चेव इत्थीणं ठिई सा चेव भाणियव्वा ॥  
 देवपुरिसाणावि जाव सव्वट्ठसिद्धाणं ति ताव ठिई जहा पणवणाए तहा भाणियव्वा  
 ॥ ५३ ॥ पुरिसे णं भंते ! पुरिसेत्ति कालओ केवच्चिरं होइ ? गोयमा ! जह्वेणं  
 अंतो० उक्को० सागरोवमसयपुहुत्तं साइरेगं । तिरिक्खजोणियपुरिसे णं भंते !  
 कालओ केवच्चिरं होइ ? गोयमा ! जह्वेणं अंतो० उक्को० तिच्चि पलिओवमाई  
 पुव्वकोडिपुहुत्तमब्भहियाई, एवं तं चेव, संचिट्ठणा जहा इत्थीणं जाव खहयर-  
 तिरिक्खजोणियपुरिसस्स संचिट्ठणा । मणुस्सपुरिसाणं भंते ! कालओ केवच्चिरं होइ ?  
 गोयमा ! खेतं पडुच्च जह्वेणं अंतो० उक्को० तिच्चि पलिओवमाई पुव्वकोडिपुहुत्त-  
 मब्भहियाई, धम्मचरणं पडुच्च जह० अंतो० उक्कोसेणं देसूणा पुव्वकोडी एवं सव्वत्थ  
 जाव पुव्वविदेहअवरविदेह, अकम्मभूमगमणुस्सपुरिसाण जहा अकम्मभूमगमणुस्सि-  
 त्थीणं जाव अंतरदीवगाणं जच्चेव ठिई सच्चेव संचिट्ठणा जाव सव्वट्ठसिद्धाणं  
 ॥ ५४ ॥ पुरिसस्स णं भंते ! केवइयं कालं अंतरं होइ ? गोयमा ! जह० एकं समयं  
 उक्को० वणस्सइकालो तिरिक्खजोणियपुरिसाणं जह० अंतोमु० उक्को० वणस्सइकालो  
 एवं जाव खहयरतिरिक्खजोणियपुरिसाणं ॥ मणुस्सपुरिसाणं भंते ! केवइयं कालं  
 अंतरं होइ ? गोयमा ! खेतं पडुच्च जह० अंतोमु० उक्को० वणस्सइकालो, धम्मचरणं  
 पडुच्च जह० एकं समयं उक्को० अणंतं कालं अणंताओ उस्स० जाव अवड्ढुयोगल-  
 परियट्ठं देसूणं, कम्मभूमगाणं जाव विदेहो जाव धम्मचरणे एक्को समओ सेसं,  
 जहिइत्थीणं जाव अंतरदीवगाणं ॥ देवपुरिसाणं जह० अंतो० उक्को० वणस्सइकालो,  
 भवणवासिदेवपुरिसाणं ताव जाव सहस्सारो, जह० अंतो० उक्को० वणस्सइकालो ।  
 आणयदेवपुरिसाणं भंते ! केवइयं कालं अंतरं होइ ? गोयमा ! जह० वासपुहुत्तं उक्को०  
 वणस्सइकालो, एवं जाव रेवेजदेवपुरिसस्सवि । अणुत्तरोववाइयदेवपुरिसस्स जह०  
 वासपुहुत्तं उक्को० संखेजाई सागरोवमाई साइरेगाई अणुत्तराणं अंतरे एक्को आलावओ  
 ॥ ५५ ॥ अप्पाबहुयाणि जहेवित्थीणं जाव एएस्सि णं भंते ! देवपुरिसाणं भवणवासीणं  
 वाणमंतराणं जोइसियाणं वेमाणियाणं य कयरेरहिंतो अप्पा वा बहुया वा तुल्ला  
 वा विसेसाहिया वा ? गोयमा ! सव्वत्थोवा वेमाणियदेवपुरिसा भवणवइदेवपुरिसा

असंखे० वाणमंतरदेवपुरिसा असंखे० जोइसियदेवपुरिसा संखेज्जगुणा ॥ एसि णं भंते ! तिरिक्खजोणियपुरिसाणं जलयराणं थलयराणं खहयराणं मणुस्सपुरिसाणं कम्मभूमगाणं अकम्मभूमगाणं अंतरदीव० देवपुरिसाणं भवणवासीणं वाणमन्तराणं जोइसियाणं वेमाणियाणं सोहम्माणं जाव सव्वट्ठसिद्धगाणं य कयरेरहितो अप्पा वा बहुगा वा जाव विसेसाहिया वा ? गोयमा ! सव्वत्थोवा अंतरदीवगमणुस्सपुरिसा देवकुरुत्तरकुरुअकम्मभूमगमणुस्सपुरिसा दोवि संखेज्ज० हरिवासरम्मगवासअक० दोवि संखेज्जगुणा हेमवयहेरणवयअकम्म० दोवि संखे० भरहेरवयकम्मभूमगमणु० दोवि संखे० पुव्वविदेहअवरविदेहकम्मभू० दोवि संखे० अणुत्तरोववाइयदेवपुरिसा असंखे० उवरिमगेविज्जदेवपुरिसा संखेज्ज० मज्झिमगेविज्जदेवपुरिसा संखेज्ज० हेट्ठिमगेविज्जदेवपुरिसा संखेज्ज० अच्चुयकप्पे देवपुरिसा संखे० जाव आणयकप्पे देवपुरिसा संखेज्ज० सहस्सारे कप्पे देवपुरिसा असंखे० महासुक्के कप्पे देवपुरिसा असंखे० जाव माहिंदे कप्पे देवपुरिसा असंखे० सणंकुमारकप्पे देवपुरिसा असं० ईसाणकप्पे देवपुरिसा असंखे० सोहम्मे कप्पे देवपुरिसा संखे० भवणवासिदेवपुरिसा असंखे० खहयरतिरिक्खजोणियपुरिसा असंखे० थलयरतिरिक्खजोणियपुरिसा संखे० जलयरतिरिक्खजोणियपुरिसा असंखे० वाणमंतरदेवपुरिसा संखे० जोइसियदेवपुरिसा संखेज्जगुणा ॥ ५६ ॥ पुरिसवेयस्स णं भंते ! कम्मस्स केवइयं कालं बंधट्ठिई पण्णत्ता ? गोयमा ! जह० अट्ठ संवच्छराणि, उक्को० दस सागरोवमकोडाकोबीओ, दसवाससयाइं अवाहा, अवाहूणिया कम्मठिई कम्मणिसेओ ॥ पुरिसवेए णं भंते ! किंपगारे पण्णत्ते ? गोयमा ! वणदवग्गिजालसमाणे पण्णत्ते, सेत्तं पुरिसा ॥ ५७ ॥ से किं तं णपुंसगा ? णपुंसगा तिविहा पण्णत्ता, तंजहा-नेरइयनपुंसगा तिरिक्खजोणियनपुंसगा मणुस्सणपुंसगा ॥ से किं तं नेरइयनपुंसगा ? नेरइयनपुंसगा सत्तविहा पण्णत्ता, तंजहा-रयणप्पभापुढविनेरइयनपुंसगा सक्करप्पभापुढविनेरइयनपुंसगा जाव अहेसत्तमपुढविनेरइयनपुंसगा, से तं नेरइयनपुंसगा ॥ से किं तं तिरिक्खजोणियणपुंसगा ? २ पंचविहा ५० तं०-एग्गिदि० बेइदि० तेइदि० चउ० पंचंदियतिरिक्खजोणियणपुंसगा ॥ से किं तं एग्गिदियतिरिक्खजोणियणपुंसगा ? २ पञ्चविहा पण्णत्ता, तं० पु० आ० ते० वा० व० से तं एग्गिदियतिरिक्खजोणियणपुंसगा ॥ से किं तं बेइंदियतिरिक्खजोणियणपुंसगा ? २ अणेगविहा पण्णत्ता० से तं बेइंदियतिरिक्खजोणिय०, एवं तेइंदियावि, चउरिंदियावि ॥ से किं तं पंचंदियतिरिक्खजोणियणपुंसगा ? २ तिविहा पण्णत्ता, तंजहा-जल्यरा थलयरा खहयरा । से किं तं जलयरा ? २ सो चेव पुव्वित्थिमेदो आसालियसहिओ भाणियव्वो, से तं पंचंदियतिरिक्खजोणियणपुंसगा ॥ से किं तं मणुस्सणपुंसगा ? २



तिविहा पण्णत्ता, तंजहा-कम्मभूमगा अकम्मभूमगा अंतरदीवगा, भेदो जाव भा०  
 ॥ ५८ ॥ णपुंसगस्स णं भंते ! केवइयं कालं ठिई पण्णत्ता ? गोयमा ! जह० अंतो०  
 उक्को० तेत्तीसं सागरोवमाई ॥ नेरइयनपुंसगस्स णं भंते ! केवइयं कालं ठिई पण्णत्ता ?  
 गोयमा ! जह० दसवाससहस्साई उक्को० तेत्तीसं सागरोवमाई, सव्वेसिं ठिई  
 भाणियव्वा जाव अहेसत्तमापुठविनेरइया । तिरिक्खजोणियणपुंसगस्स णं भंते !  
 केवइयं कालं ठिई प० ? गोयमा ! जह० अंतो० उक्को० पुव्वकोडी । एगिंदिय-  
 तिरिक्खजोणियणपुंसग० जह० अंतो० उक्को० बावीसं वाससहस्साई, पुठविकाइय-  
 एगिंदियतिरिक्खजोणियणपुंसगस्स णं भंते ! केवइयं कालं ठिई पण्णत्ता ? गोयमा !  
 जह० अंतो० उक्को० बावीसं वाससहस्साई, सव्वेसिं एगिंदियणपुंसगाणं ठिई  
 भाणियव्वा, बेइंदियतेइंदियचउरिंदियणपुंसगाणं ठिई भाणियव्वा । पंचिंदियतिरिक्ख-  
 जोणियणपुंसगस्स णं भंते ! केवइयं कालं ठिई पण्णत्ता ? गोयमा ! जह० अंतो०  
 उक्को० पुव्वकोडी, एवं जलयरतिरिक्खचउप्पयथलयरउरपरिसप्पभुयपरिसप्पखहयर-  
 तिरिक्ख० सव्वेसिं जह० अंतो० उक्को० पुव्वकोडी । मणुस्सणपुंसगस्स णं भंते !  
 केवइयं कालं ठिई पण्णत्ता ? गोयमा ! खेतं पडुच्च जह० अंतो० उक्को० पुव्वकोडी,  
 धम्मचरणं पडुच्च जह० अंतो० उक्को० देसूणा पुव्वकोडी । कम्मभूमगभरहेरवय-  
 पुव्वविदेहअवरविदेहमणुस्सणपुंसगस्सवि तहेव, अकम्मभूमगमणुस्सणपुंसगस्स णं  
 भंते ! केवइयं कालं ठिई पण्णत्ता ? गोयमा ! जम्मणं पडुच्च जह० अंतो० उक्को०  
 अंतोमु० साहरणं पडुच्च जह० अंतो० उक्को० देसूणा पुव्वकोडी, एवं जाव अंतर-  
 दीवगाणं ॥ णपुंसएणं भंते ! णपुंसएत्ति कालओ केवच्चिरं होइ ? गोयमा ! जह० एणं एकं  
 समयं उक्को० तरुकालो । णेरइयणपुंसएणं भंते ! ० ? गोयमा ! जह० दस वाससहस्साई  
 उक्को० तेत्तीसं सागरोवमाई, एवं पुठवीए ठिई भाणियव्वा । तिरिक्खजोणियणपुंसए  
 णं भंते ! ति० ? गोयमा ! जह० अंतो० उक्को० वणसइकालो, एवं एगिंदियण-  
 पुंसगस्स णं, वणसइकाइयस्सवि एवमेव, सेसाणं जह० अंतो० उक्को० असंखेजं  
 कालं असंखेजाओ उस्सप्पिणिओसप्पिणीओ कालओ, खेतओ असंखेजा लोया ।  
 बेइंदियतेइंदियचउरिंदियनपुंसगाण य जह० अंतो० उक्को० संखेजं कालं । पंचिंदिय-  
 तिरिक्खजोणियणपुंसए णं भंते ! ० ? गोयमा ! जह० अंतो० उक्को० पुव्वकोडिपुहुत्तं ।  
 एवं जलयरतिरिक्खचउप्पयथलयरउरपरिसप्पभुयपरिसप्पमहोरगाणवि । मणुस्सण-  
 पुंसगस्स णं भंते ! ० ? खेतं पडुच्च जह० अंतो० उक्को० पुव्वकोडिपुहुत्तं, धम्मचरणं  
 पडुच्च जह० एकं समयं उक्को० देसूणा पुव्वकोडी । एवं कम्मभूमगभरहेरवय-  
 पुव्वविदेहअवरविदेहसुवि भाणियव्वं । अकम्मभूमगमणुस्सणपुंसए णं भंते ! ० ?

गोयमा ! जम्मणं पडुच्च जह० अंतो० उक्को० सुहुत्तपुहुत्तं, साहरणं पडुच्च जह० अंतो० उक्को० देसूणा पुव्वकोडी । एवं सव्वेसिं जाव अंतरदीवगाणं ॥ णपुंसगस्स णं भंते ! केवइयं कालं अंतरं होइ ? गोयमा ! जह० अंतो० उक्को० सागरोवमसयपुहुत्तं साइरेगं । णेरइयणपुंसगस्स णं भंते ! केवइयं कालं अंतरं होइ ? गोयमा ! जह० अंतो० उक्को० तरुकालो, रयणप्पभापुढवीनेरइयणपुंसगस्स जह० अंतो० उक्को० तरुकालो, एवं सव्वेसिं जाव अहेसत्तमा । तिरिक्खजोणियणपुंसगस्स जह० अंतो० उक्को० सागरोवमसयपुहुत्तं साइरेगं । एगिंदियतिरिक्खजोणियणपुंसगस्स जह० अंतो० उक्को० दो सागरोवमसहस्साइं संखेज्जवासमम्भहियाइं, पुढविआउतेउवाऊणं जह० अंतो० उक्को० वणस्सइकालो, वणस्सइकाइयाणं जह० अंतो० उक्को० असंखेज्जं कालं जाव असंखेज्जा लोया, सेसाणं वेइंदियाइणं जाव खहयराणं जह० अंतो० उक्को० वणस्सइकालो । मणुस्सणपुंसगस्स खेतं पडुच्च जह० अंतो० उक्को० सेणं वणस्सइकालो, धम्मचरणं पडुच्च जह० एगं समयं उक्को० अणंतं कालं जाव अवड्डुपोगलपरियट्ठं देसूणं, एवं कम्मभूमगस्सवि भरहेरवयस्स पुव्वविदेहअवरविदेहगस्सवि । अकम्मभूमगमणुस्सणपुंसगस्स णं भंते ! केवइयं कालं ? गो० ! जम्मणं पडुच्च जह० अंतो० उक्को० वणस्सइकालो, सहरणं पडुच्च जह० अंतो० उक्को० वणस्सइकालो एवं जाव अंतरदीवगति ॥ ५९ ॥ एएसि णं भंते ! णेरइयणपुंसगाणं तिरिक्खजोणियणपुंसगाणं मणुस्सणपुंसगाणं य कयरे कयरेहितो जाव विसेसाहिया वा ? गोयमा ! सव्वत्थोवा मणुस्सणपुंसगा णेरइयणपुंसगा असंखेज्जगुणा तिरिक्खजोणियणपुंसगा अणंतगुणा ॥ एएसि णं भंते ! रयणप्पभापुढविणेरइयणपुंसगाणं जाव अहेसत्तमपुढविणेरइयणपुंसगाणं य कयरे २ हितो जाव विसेसाहिया वा ? गोयमा ! सव्वत्थोवा अहेसत्तमपुढविनेरइयणपुंसगा छट्ठपुढविणेरइयणपुंसगा असंखेज्जगुणा जाव दोच्चपुढविणेरइयणपुंसगा असंखेज्जगुणा इमीसे रयणप्पभाए पुढवीए णेरइयणपुंसगा असंखेज्जगुणा ॥ एएसि णं भंते ! तिरिक्खजोणियणपुंसगाणं एगिंदियतिरिक्खजोणियणपुंसगाणं पुढविकाइय जाव वणस्सइकाइयएगिंदियतिरिक्खजोणियणपुंसगाणं वेइंदियतेइंदियचउरिंदियपंचेदियतिरिक्खजोणियणपुंसगाणं जलयराणं थलयराणं खहयराणं य कयरे २ हितो जाव विसेसाहिया वा ? गोयमा ! सव्वत्थोवा खहयरतिरिक्खजोणियणपुंसगा, थलयरतिरिक्खजोणियणपुंसगा संखेज्जं जलयरतिरिक्खजोणियणपुंसगा संखेज्जं चउरिंदियतिरिक्खजोणियणपुंसगा तेइंदियतिरिक्खजोणियणपुंसगा वेइंदियतिरिक्खजोणियणपुंसगा तेउकाइयएगिंदियतिरिक्खजोणियणपुंसगा पुढविकाइयएगिंदियतिरिक्खजोणियणपुंसगा विसेसाहिया, एवं आउवाउवणस्सइकाइयएगिंदियतिरिक्खजोणियणपुंसगा

अणंतगुणा ॥ एएसि णं भंते ! मणुस्सणपुंसगाणं कम्मभूमिणपुंसगाणं अकम्मभूमिण-  
 पुंसगाणं अंतरदीवगाणं य कयरे कयरेहिंतो अप्पा वा ४ ? गोयमा ! सव्वत्थोवा  
 अंतरदीवगअकम्मभूमगमणुस्सणपुंसगा देवकुरुत्तरकुरुअकम्मभूमगं दोवि संखेज्ज-  
 गुणा एवं जाव पुव्वविदेहअवरविदेहकम्मं दोवि संखेज्जगुणा ॥ एएसि णं भंते !  
 णेरइयणपुंसगाणं रयणप्पभापुढविनेरइयनपुंसगाणं जाव अहेसत्तमापुढविणेरइयण-  
 पुंसगाणं तिरिक्खजोणियणपुंसगाणं एगिंदियतिरिक्खजोणियनपुंसगाणं पुढविकाइय-  
 एगिंदियतिरिक्खजोणियणपुंसगाणं जाव वणस्सइकाइयं वेइंदियतेइंदियचउरिंदिय-  
 पंचिंदियतिरिक्खजोणियणपुंसगाणं जलयराणं थलयराणं खहयरणं मणुस्सणपुंसगाणं  
 कम्मभूमिगाणं अकम्मभूमिगाणं अंतरदीवगाणं य कयरे २ हिंतो अप्पा वा ४ ?  
 गोयमा ! सव्वत्थोवा अहेसत्तमापुढविणेरइयणपुंसगा छट्ठपुढविनेरइयनपुंसगा असंखेज्जं  
 जाव दोच्चपुढविणेरइयणपुंसगा असंखे० अंतरदीवगमणुस्सणपुंसगा असंखेज्जगुणा, देव-  
 कुरुत्तरकुरुअकम्मभूमगं दोवि संखेज्जगुणा जाव पुव्वविदेहअवरविदेहकम्मभूमग-  
 मणुस्सणपुंसगा दोवि संखेज्जगुणा, रयणप्पभापुढविणेरइयणपुंसगा असंखे० खहयर-  
 पंचिंदियतिरिक्खजोणियणपुंसगा असं० थलयरं० संखेज्जं० जलयरं० संखेज्जगुणा  
 चउरिंदियतिरिक्खजोणियं विसेसाहिया तेइंदियं विसे० वेइंदियं विसे० तेउक्का-  
 इयएगिंदियं असं० पुढविकाइयएगिंदियं विसेसाहिया आउक्काइयं विसे० वाउका-  
 इयं विसेसा० वणस्सइकाइयएगिंदियतिरिक्खजोणियणपुंसगा अणंतगुणा ॥ ६० ॥  
 णपुंसगवेयस्स णं भंते ! कम्मस्स केवइयं कालं बंधठिई पन्नता ? गोयमा ! जहं  
 सागरोवमस्स दोन्नि सत्तभागा पलिओवमस्स असंखेज्जइभागेण ऊणगा उक्को० वीसं  
 सागरोवनकोडाकोडीओ, दोण्णि य वाससहस्साइं अवाहा, अबाहूणिया कम्मठिई  
 कम्मणिसेगो । णपुंसगवेए णं भंते ! किंपगारे पण्णत्ते ? गोयमा ! महाणगरदाहस-  
 माणे पण्णत्ते समणाउसो !, से तं णपुंसगा ॥ ६१ ॥ एएसि णं भंते ! इत्थीणं  
 पुरिसाणं नपुंसगाणं य कयरे २ हिंतो अप्पा वा ४ ? गोयमा ! सव्वत्थोवा पुरिसा  
 इत्थीओ संखे० णपुंसगा अणंतं० । एएसि णं भंते ! तिरिक्खजोणित्थीणं तिरि-  
 क्खजोणियपुरिसाणं तिरिक्खजोणियणपुंसगाणं य कयरे २ हिंतो अप्पा वा ४ ?  
 गोयमा ! सव्वत्थोवा तिरिक्खजोणियपुरिसा तिरिक्खजोणित्थीओ असंखे० तिरि-  
 क्खजो० णपुंसगा अणंतगुणा ॥ एएसि णं भंते ! मणुस्सित्थीणं मणुस्सपुरिसाणं  
 मणुस्सणपुंसगाणं य कयरे २ हिन्तो अप्पा वा ४ ? गोयमा ! सव्वं मणुस्सपुरिसा  
 मणुस्सित्थीओ संखे० मणुस्सणपुंसगा असंखेज्जगुणा ॥ एएसि णं भंते ! देवित्थीणं  
 देवपुरिसाणं णेरइयणपुंसगाणं य कयरे २ हिंतो अप्पा वा ४ ? गोयमा ! सव्वत्थोवा

गेरइयणपुंसगा देवपुरिसा असं० देवित्थीओ संखेज्जगुणाओ ॥ एएसि णं भंते !  
तिरिक्खजोणित्थीणं तिरिक्खजोणियपुरिसाणं तिरिक्खजो०णपुंसगाणं मणुस्सित्थीणं  
मणुस्सपुरिसाणं मणुस्सनपुंसगाणं देवित्थीणं देवपुरिसाणं गेरइयणपुंसगाणं य कयरे  
२ हितो अप्पा वा ४ ? गोयमा ! सव्वत्थोवा मणुस्सपुरिसा मणुस्सित्थीओ संखे०  
मणुस्सणपुंसगा असं० गेरइयणपुंसगा असं० तिरिक्खजोणियपुरिसा असं० तिरि-  
क्खजोणित्थियाओ संखेज्ज० देवपुरिसा असं० देवित्थियाओ संखे० तिरिक्खजोणि-  
यणपुंसगा अणंतगुणा ॥ एएसि णं भंते ! तिरिक्खजोणित्थीणं जलयरीणं थलयरीणं  
खहयरीणं तिरिक्खजोणियपुरिसाणं जलयराणं थलयराणं खहयराणं तिरिक्खजो०-  
णपुंसगाणं एगिंदियतिरिक्खजोणियणपुंसगाणं पुढविकाइयएगिंदियतिरिक्खजो०-  
णपुंसगाणं जाव वणस्सइकाइय० वेइंदियतिरिक्खजोणियणपुंसगाणं तेइंदिय० चउरिं-  
दिय० पंचेदियतिरिक्खजोणियणपुंसगाणं जलयराणं थलयराणं खहयराणं कयरे २-  
हितो जाव विसेसाहिया वा ? गोयमा ! सव्वत्थोवा खहयरतिरिक्खजोणियपुरिसा  
खहयरतिरिक्खजोणित्थियाओ संखेज्ज० थलयरपंचिंदियतिरिक्खजोणियपुरिसा  
संखे० थलयरपंचिंदियतिरिक्खजोणित्थियाओ संखे० जलयरतिरिक्खजो०पुरिसा  
संखे० जलयरतिरिक्खजोणित्थियाओ संखेज्जगु० खहयरपंचिंदियतिरिक्खजो०-  
णपुंसगा असंखे० थलयरपंचिंदियतिरिक्खजोणियनपुंसगा संखे० जलयरपंचेदिय-  
तिरिक्खजोणियनपुंसगा संखे० चउरिंदियतिरि० विसेसाहिया तेइंदियणपुंसगा  
विसेसाहिया वेइंदियणपुंसगा विसेसा० तेउकाइयएगिंदियतिरिक्खजोणियणपुंसगा  
असं० पुढवि०णपुंसगा विसेसाहिया आउ० विसेसाहिया वाउ० विसेसा० वणप्फइ०-  
एगिन्दिणपुंसगा अणंतगुणा ॥ एएसि णं भंते ! मणुस्सित्थीणं कम्मभूमियाणं  
अकम्मभूमियाणं अंतरदीवियाणं मणुस्सपुरिसाणं कम्मभूमगाणं अकम्मभूमगाणं  
अंतरदीवगाणं मणुस्सणपुंसगाणं कम्मभूमगाणं अकम्म० अंतरदीवगाणं य कयरे  
२ हिन्तो अप्पा वा ४ ? गोयमा ! अंतरदीविया मणुस्सित्थियाओ मणुस्सपुरिसा य  
एए णं दोवि तुल्ला सव्वत्थोवा देवकुरुत्तरकुरुअकम्मभूमगमणुस्सित्थियाओ मणुस्स-  
पुरिसा एए णं दोन्निवि तुल्ला संखे० हरिवासरम्मगवासअकम्मभूमगमणुस्सित्थियाओ  
मणुस्सपुरिसा य एए णं दोन्निवि तुल्ला संखे० हेमवयहेरणवयअकम्मभूमगमणुस्सि-  
त्थियाओ मणुस्सपुरिसा य दोवि तुल्ला संखे० भरहेरवयकम्मभूमगमणुस्सपुरिसा  
दोवि संखे० भरहेरवयकम्मभूमगमणुस्सित्थियाओ दोवि संखे० पुव्वविदेहअवरविदेह-  
कम्मभूमगमणुस्सपुरिसा दोवि संखे० पुव्वविदेहअवरविदेहकम्मभूमगमणुस्सित्थि-  
याओ दोवि संखे० अंतरदीवगमणुस्सणपुंसगा असंखे० देवकुरुत्तरकुरुअकम्मभू-

मगमणुस्सणपुंसगा दोवि संखेज्जगुणा एवं चेव जाव पुव्वविदेहकम्मभूमगमणुस्सण-  
 पुंसगा दोवि संखेज्जगुणा ॥ एयासि णं भंते ! देवित्थीणं भवणवासिणीणं वाणमन्त-  
 रीणं जोइसिणीणं वेमाणिणीणं देवपुरिसाणं भवणवासीणं जाव वेमाणियाणं सोहम्म-  
 गाणं जाव गेवेज्जगाणं अणुत्तरोववाइयाणं णेरइयणपुंसगाणं रयणप्पभापुढविणेरइय-  
 णपुंसगाणं जाव अहेसत्तमपुढविनेरइय० कयरे २ हित्तो अप्पा वा ४ ? गोयमा !  
 सव्वत्थोवा अणुत्तरोववाइयदेवपुरिसा उवरिमगेवेज्जदेवपुरिसा संखेज्जगुणा तं चेव  
 जाव आणए कप्पे देवपुरिसा संखेज्जगुणा अहेसत्तमाए पुढवीए णेरइयणपुंसगा  
 असंखेज्जगुणा छट्ठीए पुढवीए नेरइय० असंखेज्जगुणा सहस्सारे कप्पे देवपुरिसा  
 असंखेज्जगुणा महासुक्के कप्पे देवपुरिसा असंखेज्जगुणा पंचमाए पुढवीए नेरइयणपुंसगा  
 असंखेज्जगुणा लतए कप्पे देवपुरिसा असंखेज्जगुणा चउत्थीए पुढवीए नेरइया असंखेज्ज-  
 गुणा बंमलोए कप्पे देवपुरिसा असंखेज्जगुणा तच्चाए पुढवीए नेरइय० असंखेज्जगुणा  
 माहिंदे कप्पे देवपुरिसा असंखेज्जगुणा सणंकुमारकप्पे देवपुरिसा असंखेज्जगुणा  
 दोच्चाए पुढवीए नेरइया असंखेज्जगुणा ईसाणे कप्पे देवपुरिसा असंखेज्जगुणा ईसाणे  
 कप्पे देवित्थियाओ संखेज्जगुणाओ सोहम्मे कप्पे देवपुरिसा संखेज्ज० सोहम्मे कप्पे  
 देवित्थियाओ संखे० भवणवासिदेवपुरिसा असंखेज्जगुणा भवणवासिदेवित्थियाओ  
 संखेज्जगुणाओ इमीसे रयणप्पभापुढवीए नेरइया असंखेज्जगुणा वाणमंतरदेवपुरिसा  
 असंखेज्जगुणा वाणमंतरदेवित्थियाओ संखेज्जगुणाओ जोइसियदेवपुरिसा संखेज्जगुणा  
 जोइसियदेवित्थियाओ संखेज्जगुणा ॥ एयासि णं भंते ! तिरिक्खजोणित्थीणं जल-  
 यरीणं थलयरीणं खहयरीणं तिरिक्खजोणियपुरिसाणं जलयराणं थलयराणं खहयराणं  
 तिरिक्खजोणियणपुंसगाणं एगिंदियतिरिक्खजोणियणपुंसगाणं पुढविक्काइयएगिंदि-  
 यति०जो०णपुंसगाणं आउक्काइयएगिंदियति०जो०णपुंसगाणं जाव वणस्सइकाइय-  
 एगिंदियति०जो०णपुंसगाणं वेइंदियति०जो०णपुंसगाणं तेइंदियति०जो०णपुंसगाणं  
 चउरिंदियति०जो०णपुंसगाणं पंचेंदियति०जो०णपुंसगाणं जलयराणं थलयराणं  
 खहयराणं मणुस्सित्थीणं कम्मभूमियाणं अकम्मभूमियाणं अंतरदीवियाणं मणुस्स-  
 पुरिसाणं कम्मभूमगाणं अकम्म० अंतरदीवयाणं मणुस्सणपुंसगाणं कम्मभूमगाणं  
 अकम्मभूमगाणं अंतरदीवगाणं देवित्थीणं भवणवासिणीणं वाणमंतरीणं जोइसिणीणं  
 वेमाणिणीणं देवपुरिसाणं भवणवासीणं वाणमंतराणं जोइसियाणं वेमाणियाणं  
 सोहम्मगाणं जाव गेवेज्जगाणं अणुत्तरोववाइयाणं नेरइयणपुंसगाणं रयणप्पभापुढ-  
 विनेरइयणपुंसगाणं जाव अहेसत्तमपुढविणेरइयणपुंसगाणं य कयरे २ हित्तो  
 अप्पा वा ४ ? गोयमा ! अंतरदीवअकम्मभूमगमणुस्सित्थीओ मणुस्सपुरिसा य

एए णं दोवि तुल्ला सव्वत्थोवा, देवकुरुउत्तरकुरुअकम्मभूमगमणुस्सइत्थीओ पुरिसा  
य एए णं दोवि तुल्ला संखे० एवं हरिवासरम्मगवास० एवं हेमवयएरणवय०  
भरहेरवयकम्मभूमगमणुस्सपुरिसा दोवि संखे० भरहेरवयकम्मभूमगमणुस्सत्थीओ  
संखे० पुव्वविदेहअवरविदेहकम्मभूमगमणुस्सपुरिसा दोवि संखे० पुव्वविदेहअवर-  
विदेहकम्म०मणुस्सत्थियाओ दोवि संखे० अणुत्तरोववाइयदेवपुरिसा असंखेज्जगुणा  
उवरिमगेवेज्जदेवपुरिसा संखे० जाव आणए कप्पे देवपुरिसा संखे० अहेसत्तमाए  
पुढवीए नेरइयणपुंसगा असंखे० छट्ठीए पुढवीए नेरइयनपुंसगा असं० सहस्सारे  
कप्पे देवपुरिसा असंखे० महासुक्के कप्पे देव० असं० पंचमाए पुढवीए नेरइयन-  
पुंसगा असं० लंतए कप्पे देवपु० असं० चउत्थीए पुढवीए नेरइयनपुंसगा असं०  
बंमलोए कप्पे देवपुरिसा असं० तच्चाए पुढवीए नेरइयण० असं० माहिंदे कप्पे  
देवपु० असंखे० सणकुमारे कप्पे देवपुरिसा असं० दोच्चाए पुढवीए नेरइयनपुंसगा  
असं० अंतरदीवगअकम्मभूमगमणुस्सणपुंसगा असंखे० देवकुरुउत्तरकुरुअकम्मभूमग-  
मणुस्सणपुंसगा दोवि संखे० एवं जाव विदेहत्ति, ईसाणे कप्पे देवपुरिसा असं०  
ईसाणकप्पे देवित्थियाओ संखे० सोहम्मे कप्पे देवपुरिसा संखे० सोहम्मे कप्पे  
देवित्थियाओ संखेज्ज० भवणवासिदेवपुरिसा असंखे० भवणवासिदेवित्थियाओ  
संखेज्जगुणाओ इमीसे रयणप्पमाए पुढवीए नेरइयणपुंसगा असं० खहयरतिरिक्ख-  
जोणियपुरिसा असंखेज्जगुणा खहयरतिरिक्खजोणित्थियाओ संखे० थलयरतिरिक्ख-  
जोणियपुरिसा संखे० थलयरतिरिक्खजोणित्थियाओ संखे० जलयरतिरिक्खपुरिसा  
संखे० जलयरतिरिक्खजोणित्थियाओ संखे० वाणमंतरदेवपुरिसा संखे० वाणमंतर-  
देवित्थियाओ संखे० जोइसियदेवपुरिसा संखे० जोइसियदेवित्थियाओ संखे० खह-  
यरपंचंदियतिरिक्खजोणियणपुंसगा संखे० थलयरणपुंसगा संखे० जलयरणपुंसगा  
संखे० चउरिंदियणपुंसगा विसेसाहिया तेइंदिय० विसेसा० बेइंदिय० विसेसा०  
तेउकाइयएगिंदियतिरिक्खजोणियणपुंसगा असं० पुढवी० विसेसा० आउ० विसेसा०  
वाउ० विसेसा० वणप्फइकाइयएगिंदियतिरिक्खजो०णपुंसगा अणंतगुणा ॥ ६२ ॥  
इत्थीणं भंते ! केवइयं कालं ठिई पण्णत्ता ? गोयसा ! एगेणं आएसेणं जहा पुव्वि  
भणियं, एवं पुरिसस्सवि नपुंसगस्सवि, संचिट्ठणा पुणारवि तिण्हंपि जहापुव्वि भणिया,  
अंतरं पि तिण्हंपि जहापुव्वि भणियं तथा नेयव्वं ॥ ६३ ॥ तिरिक्खजोणित्थियाओ  
तिरिक्खजोणियपुरिसेहिंतो तिगुणाओ तिरूवाहियाओ मणुस्सत्थियाओ मणुस्सपुरिसे-  
हिंतो सत्तावीसइगुणाओ सत्तावीसयरूवाहियाओ देवित्थियाओ देवपुरिसेहिंतो बत्ती-  
सइगुणाओ बत्तीसइरूवाहियाओ सेतं तिविहा संसारसमावण्णगा जीवा पण्णत्ता ॥

तिविहेसु होइ भेओ ठिई य संचिट्ठणंतरऽप्पबहुं । वेयाण य बंधठिई वेओ तह किंपगारो उ ॥ १ ॥ ६४ ॥ **दोच्चा तिविहा पडिवत्ती समत्ता ॥**

तत्थ जे ते एवमाहंसु चउव्विहा संसारसमावण्णगा जीवा पण्णत्ता ते एवमाहंसु, तंजहा—नेरइया तिरिक्खजोणिया मणुस्सा देवा ॥ ६५ ॥ से किं तं नेरइया? २ सत्तविहा पण्णत्ता, तंजहा—पढमापुढविनेरइया दोच्चापुढविनेरइया तच्चापुढविनेर० चउत्थापुढवीनेर० पंचमापु०नेरइया छट्ठापु०नेर० सत्तमापु०नेरइया ॥ ६६ ॥ पढमा णं भंते! पुढवी किनामा किंगोत्ता पण्णत्ता? गोयमा! णामेणं घम्मा गोत्तेणं रयणप्पभा । दोच्चा णं भंते! पुढवी किनामा किंगोत्ता पण्णत्ता? गोयमा! णामेणं वंसा गोत्तेणं सक्करप्पभा, एवं एएणं अभिलावेणं सव्वासिं पुच्छा, णामाणि इमाणि सेला तइया अंजणा चउत्थी रिट्ठा पंचमी मघा छट्ठी माघवई सत्तमा जाव तमतमागोत्तेणं पण्णत्ता ॥ ६७ ॥ इमा णं भंते! रयणप्पभापुढवी केवइया बाहल्लेणं पण्णत्ता? गोयमा! इमा णं रयणप्पभापुढवी असिउत्तरं जोयणसयसहस्सं बाहल्लेणं पण्णत्ता, एवं एएणं अभिलावेणं इमा गाहा अणुगंतव्वा—आसीयं बत्तीसं अट्ठावीसं तहेव वीसं च । अट्ठारस सोलसगं अट्ठुत्तरमेव हिट्ठिमिया ॥ १ ॥ ६८ ॥ इमा णं भंते! रयणप्पभापुढवी कइविहा पण्णत्ता? गोयमा! तिविहा पण्णत्ता, तंजहा—खरकंडे पंकबहुले कंडे आवबहुले कंडे ॥ इमीसे णं भंते! रय० पुढ० खरकंडे कइविहे पण्णत्ते? गोयमा! सोलसविहे पण्णत्ते, तंजहा—रयणकंडे १ वइरे २ वेरुल्लिए ३ लोहियक्खे ४ मसारगल्ले ५ हंसगब्भे ६ पुलए ७ सोगंधिए ८ जोइरसे ९ अंजणे १० अंजणपुलए ११ रथए १२ जायरूवे १३ अंके १४ फल्लिहे १५ रिट्ठे १६ कंडे ॥ इमीसे णं भंते! रयणप्पभापुढवीए रयणकंडे कइविहे पण्णत्ते? गोयमा! एगागारे पण्णत्ते, एवं जाव रिट्ठे । इमीसे णं भंते! रयणप्पभापुढवीए पंकबहुले कंडे कइविहे पण्णत्ते? गोयमा! एगागारे पण्णत्ते । एवं आवबहुले कंडे कइविहे पण्णत्ते? गोयमा! एगागारे पण्णत्ते । सक्करप्पभा णं भंते! पुढवी कइविहा पण्णत्ता? गोयमा! एगागारा पण्णत्ता, एवं जाव अहेसत्तमा ॥ ६९ ॥ इमीसे णं भंते! रयणप्पभाए पुढवीए केवइया निरयावाससयसहस्सा पण्णत्ता? गोयमा! तीसं गिरयावाससयसहस्सा पण्णत्ता, एवं एएणं अभिलावेणं सव्वासिं पुच्छा, इमा गाहा अणुगंतव्वा—तीसा य पण्णवीसा पण्णरस दसेव तिण्णि य हव्वंति । पंचूणसयसहस्सं पंचेव अणुत्तरा णरगा ॥ १ ॥ जाव अहेसत्तमाए पंच अणुत्तरा महइमहालया महाणरगा पण्णत्ता, तंजहा—काले महाकाले रोरुए महारोरुए अपइट्ठणे ॥ ७० ॥ अत्थि णं भंते! इमीसे रयणप्पभाए पुढवीए अहे घणोदहीइ वा घणवाएइ वा तणुवाएइ वा ओवासंतरेइ वा ?

हंता अत्थि, एवं जाव अहेसत्तमाए ॥ ७१ ॥ इमीसे णं भंते ! रयणप्पमाए पुढवीए खरकंडे केवइयं बाहल्लेणं पण्णत्ते ? गोयमा ! सोलस जोयणसहस्साइं बाहल्लेणं पण्णत्ते ॥ इमीसे णं भंते ! रयणप्पमाए पुढवीए रयणकंडे केवइयं बाहल्लेणं पण्णत्ते ? गोयमा ! एकं जोयणसहस्सं बाहल्लेणं पण्णत्ते, एवं जाव रिट्ठे । इमीसे णं भंते ! रय० पु० पंकबहुले कंडे केवइयं बाहल्लेणं पण्णत्ते ? गोयमा ! चउरसीइजोयणसहस्साइं बाहल्लेणं पण्णत्ते । इमीसे णं भंते ! रय० पु० आवबहुले कंडे केवइयं बाहल्लेणं पण्णत्ते ? गोयमा ! असीइ-जोयणसहस्साइं बाहल्लेणं पण्णत्ते । इमीसे णं भंते ! रयणप्पमाए पु० घणोदही केवइयं बाहल्लेणं पण्णत्ते ? गोयमा ! वीसं जोयणसहस्साइं बाहल्लेणं पण्णत्ते । इमीसे णं भंते ! रय० पु० घणवाए केवइयं बाहल्लेणं पण्णत्ते ? गोयमा ! असंखेजाइं जोयणसहस्साइं बाहल्लेणं पण्णत्ते, एवं तणुवाएऽवि ओवासंतरिऽवि । सक्करप्प० भंते ! पु० घणोदही केव-इयं बाहल्लेणं पण्णत्ते ? गोयमा ! वीसं जोयणसहस्साइं बाहल्लेणं पण्णत्ते । सक्करप्प० पु० घणवाए केवइयं बाहल्लेणं पण्णत्ते ? गोयमा ! असंखे० जोयणसहस्साइं बाहल्लेणं पण्णत्ते, एवं तणुवाएवि, ओवासंतरेवि जहा सक्करप्प० पु० एवं जाव अहेसत्तमा ॥ ७२ ॥ इमीसे णं भंते ! रयणप्प० पु० असीउत्तरजोयणसयसहस्सबाहल्लाए खेतच्छेएणं छिज्जमाणीए अत्थि दव्वाइं वण्णओ कालनीललोहियहालिइसुक्किळाइं गंधओ सुरभि-गंधाइं दुड्ढिगंधाइं रसओ तित्तकडुयकसायअंबिलमहुराइं फासओ कक्खडमउयगरु-यलहुसीयउत्तिणिण्डलुक्खाइं संठाणओ परिमंडलवट्ठंतसचउरंसआययसंठाणपरिणयाइं अन्नमन्नवद्धाइं अण्णमण्णपुट्ठाइं अण्णमण्णओगाढाइं अण्णमण्णसिणेहपडिबद्धाइं अण्ण-मण्णघडत्ताए चिट्ठंति ? हंता अत्थि । इमीसे णं भंते ! रयणप्पमाए पु० खरकंडस्स सोलसजोयणसहस्सबाहल्लस्स खेतच्छेएणं छिज्जमाणस्स अत्थि दव्वाइं वण्णओ काल जाव परिणयाइं ? हंता अत्थि । इमीसे णं भंते ! रयणप्प० पु० रयणनामगस्स कंडस्स जोयणसहस्सबाहल्लस्स खेतच्छेएणं छिज्ज० तं चेव जाव हंता अत्थि, एवं जाव रिट्ठस्स, इमीसे णं भंते ! रयणप्प० पु० पंकबहुलस्स कंडस्स चउरासीइ-जोयणसहस्सबाहल्लस्स खेतं तं चेव, एवं आवबहुलस्सवि असीइजोयणसहस्सबाहल्लस्स । इमीसे णं भंते ! रयणप्प० पु० घणोदहिस्स वीसं जोयणसहस्सबाहल्लस्स खेतच्छेएणं तहेव । एवं घणवायस्स असंखेजजोयणसहस्सबाहल्लस्स तहेव, ओवासंतरस्सवि तं चेव ॥ सक्करप्पमाए णं भंते ! पु० बत्तीउत्तरजोयणसयसहस्सबाहल्लस्स खेतच्छेएणं छिज्जमाणीए अत्थि दव्वाइं वण्णओ जाव घडत्ताए चिट्ठंति ? हंता अत्थि, एवं घणोदहिस्स वीसजोयणसहस्सबाहल्लस्स घणवायस्स असंखेजजोयणसहस्सबाहल्लस्स, एवं जाव ओवासंतरस्स, जहा सक्करप्पमाए एवं जाव अहेसत्तमाए ॥ ७३ ॥



इमा णं भंते ! रयणप्प० पु० किंसंठिया पण्णत्ता ? गोयमा ! झल्लरिसंठिया पण्णत्ता । इमीसे णं भंते ! रयणप्प० पु० खरकंडे किंसंठिए पण्णत्ते ? गोयमा ! झल्लरिसंठिए पण्णत्ते । इमीसे णं भंते ! रयणप्प० पु० रयणकंडे किंसंठिए पण्णत्ते ? गोयमा ! झल्लरि संठिए पण्णत्ते, एवं जाव रिट्ठे, एवं पंकवहुलेवि, एवं आवबहुलेवि घणोदहीवि घणवाएवि तणुवाएवि ओवासंतरेवि, सव्वे झल्लरिसंठिया पण्णत्ता । सक्करप्पभा णं भंते ! पुढवी किंसंठिया पण्णत्ता ? गोयमा ! झल्लरिसंठिया पण्णत्ता, सक्करप्पभापुढवीए घणोदही किंसंठिए पण्णत्ते ? गोयमा ! झल्लरिसंठिए पण्णत्ते, एवं जाव ओवासंतरे, जहा सक्करप्पभाए वत्तव्वया एवं जाव अहेसत्तमाए ॥ ७४ ॥ इमीसे णं भंते ! रयणप्प० पुढवीए पुरत्थिमिल्लाओ चरिमंताओ केवइयं अवाहाए लोयंते पण्णत्ते ? गोयमा ! दुवालसहिं जोयणेहिं अवाहाए लोयंते पण्णत्ते, एवं दाहिणिक्काओ पच्चत्थिमिल्लाओ उत्तरिल्लाओ । सक्करप्प० पु० पुरत्थिमिल्लाओ चरिमंताओ केवइयं अवाहाए लोयंते पण्णत्ते ? गोयमा ! तिभागूणेहिं तेरसहिं जोयणेहिं अवाहाए लोयंते पण्णत्ते, एवं चउद्दिसिंपि । वालुयप्प० पु० पुरत्थिमिल्लाओ पुच्छा, गोयमा ! सतिभागेहिं तेरसहिं जोयणेहिं अवाहाए लोयंते पण्णत्ते, एवं चउद्दिसिंपि, एवं सव्वासिं चउसुवि दिसासु पुच्छिच्चयव्वं । पंकप्प० चोइसहिं जोयणेहिं अवाहाए लोयंते पण्णत्ते । पंचमाए तिभागूणेहिं पन्नरसहिं जोयणेहिं अवाहाए लोयंते पण्णत्ते । छट्ठीए सतिभागेहिं पन्नरसहिं जोयणेहिं अवाहाए लोयंते पण्णत्ते । सत्तमीए सोलसहिं जोयणेहिं अवाहाए लोयंते पण्णत्ते, एवं जाव उत्तरिल्लाओ ॥ इमीसे णं भंते ! रयण० पु० पुरत्थिमिल्ले चरिमंते कइविहे पण्णत्ते ? गोयमा ! तिविहे पण्णत्ते, तंजहा—घणोदहिवलए घणवायवलए तणुवायवलए । इमीसे णं भंते ! रयणप्प० पु० दाहिणिक्के चरिमंते कइविहे पण्णत्ते ? गोयमा ! तिविहे पण्णत्ते, तंजहा—एवं जाव उत्तरिल्ले, एवं सव्वासिं जाव अहेसत्तमाए उत्तरिल्ले ॥ ७५ ॥ इमीसे णं भंते ! रयणप्प० पुढवीए घणोदहिवलए केवइयं बाहल्लेणं पण्णत्ते ? गोयमा ! छ जोयणाणि बाहल्लेणं पण्णत्ते । सक्करप्प० पु० घणोदहिवलए केवइयं बाहल्लेणं पण्णत्ते ? गोयमा ! सतिभागाइं छजोयणाइं बाहल्लेणं पण्णत्ते । वालुयप्पभाए पुच्छा, गोयमा ! तिभागूणाइं सत्त जोयणाइं बाहल्लेणं प० । एवं एएणं अभिलावेणं पंकप्पभाए सत्त जोयणाइं बाहल्लेणं पण्णत्ते । धूमप्पभाए सतिभागाइं सत्त जोयणाइं बा० पण्णत्ते । तमप्पभाए तिभागूणाइं अट्ठ जोयणाइं । तमतमप्पभाए अट्ठ जोयणाइं ॥ इमीसे णं भंते ! रयणप्प० पु० घणवायवलए केवइयं बाहल्लेणं पण्णत्ते ? गोयमा ! अट्ठपंचमाइं जोयणाइं बाहल्लेणं । सक्करप्पभाए पुच्छा, गोयमा ! कोसूणाइं पंच जोयणाइं बाहल्लेणं पण्णत्ते, एवं एएणं अभिलावेणं वालुयप्पभाए पंच जोयणाइं

बाहल्लेणं पण्णत्ते, पंकप्पभाए सक्कोसाइं पंच जोयणाइं बाहल्लेणं पण्णत्ते । धूमप्प-  
भाए अद्धल्लडाइं जोयणाइं बाहल्लेणं पचत्ते, तमप्पभाए कोसूणाइं छजोयणाइं  
बाहल्लेणं पण्णत्ते, अहेसत्तमाए छजोयणाइं बाहल्लेणं पण्णत्ते ॥ इमीसे णं भंते !  
रयणप्प० पु० तणुवायवलए केवइयं बाहल्लेणं पण्णत्ते ? गोयमा ! छक्कोसेणं बाहल्लेणं  
पण्णत्ते, एवं एएणं अभिलावेणं सक्करप्पभाए सतिभागे छक्कोसे बाहल्लेणं पण्णत्ते । बालु-  
यप्पभाए तिभागूणे सत्तकोसे बाहल्लेणं पण्णत्ते । पंकप्पभाए पुढवीए सत्तकोसे बाहल्लेणं  
पण्णत्ते । धूमप्पभाए सतिभागे सत्तकोसे । तमप्पभाए तिभागूणे अट्ठकोसे बाहल्लेणं  
पचत्ते । अहेसत्तमाए पुढवीए अट्ठकोसे बाहल्लेणं पण्णत्ते ॥ इमीसे णं भंते ! रयणप्प०  
पु० घणोदहिबलयस्स छजोयणवाहल्लस्स खेतच्छेएणं छिजमाणस्स अत्थि दब्बाइं  
वण्णओ काल जाव हंता अत्थि । सक्करप्पभाए णं भंते ! पु० घणोदहिबलयस्स  
सतिभागछजोयणवाहल्लस्स खेतच्छेएणं छिजमाणस्स जाव हंता अत्थि, एवं जाव  
अहेसत्तमाए जं जस्स बाहल्लं । इमीसे णं भंते ! रयणप्प० पु० घणवायवलयस्स  
अद्धपंचमजोयणवाहल्लस्स खेतच्छेएणं छि० जाव हंता अत्थि, एवं जाव अहेसत्तमाए जं  
जस्स बाहल्लं । एवं तणुवायवलयस्सवि जाव अहेसत्तमा जं जस्स बाहल्लं ॥ इमीसे णं  
भंते ! रयणप्पभाए पुढवीए घणोदहिबलए किंसंठिए पण्णत्ते ? गोयमा ! वट्ठे वलया-  
गारसंठाणसंठिए पण्णत्ते जे णं इमं रयणप्पमं पुढविं सव्वओ० संपरिक्खिवित्ताणं  
चिट्ठइ, एवं जाव अहेसत्तमाए पु० घणोदहिबलए, णवरं अप्पणप्पणं पुढविं संपरिक्खि-  
वित्ताणं चिट्ठइ । इमीसे णं रयणप्प० पु० घणवायवलए किंसंठिए पण्णत्ते ? गोयमा !  
वट्ठे वलयागारे तहेव जाव जे णं इमीसे रयणप्प० पु० घणोदहिबलयं सव्वओ  
समंता संपरिक्खिवित्ताणं चिट्ठइ एवं जाव अहेसत्तमाए घणवायवलए । इमीसे णं  
भंते ! रयणप्प० पु० तणुवायवलए किंसंठिए पण्णत्ते ? गोयमा ! वट्ठे वलयागार-  
संठाणसंठिए जाव जेणं इमीसे रयणप्प० पु० घणवायवलयं सव्वओ समंता  
संपरिक्खिवित्ताणं चिट्ठइ, एवं जाव अहेसत्तमाए तणुवायवलए ॥ इमा णं भंते !  
रयणप्प० पु० केवइयं आयामविकखंभेणं प० ? गोयमा ! असंखेजाइं जोयणसहस्साइं  
आयामविकखंभेणं असंखेजाइं जोयणसहस्साइं परिकखेवेणं पण्णत्ता, एवं जाव अहे-  
सत्तमा ॥ इमा णं भंते ! रयणप्प० पु० अंते य मज्झे य सव्वत्थ समा बाहल्लेणं  
पण्णत्ता ? हंता गोयमा ! इमा णं रयण० पु० अंते य मज्झे य सव्वत्थ समा  
बाहल्लेणं, एवं जाव अहेसत्तमा ॥ ७६ ॥ इमीसे णं भंते ! रयणप्प० पु० सव्वजीवा  
उववण्णपुव्वा ? सव्वजीवा उववण्णा ?, गोयमा ! इमीसे णं रय० पु० सव्वजीवा  
उववण्णपुव्वा नो चेव णं सव्वजीवा उववण्णा, एवं जाव अहेसत्तमाए पुढवीए ॥

इमा णं भंते ! रयण० पु० सव्वजीवेहिं विजडपुव्वा ? सव्वजीवेहिं विजडा ? , गोयमा !  
 इमा णं रयण० पु० सव्वजीवेहिं विजडपुव्वा नो चेव णं सव्वजीवविजडा, एवं  
 जाव अहेसत्तमा ॥ इमीसे णं भंते ! रयण० पु० सव्वपोग्गला पविट्ठपुव्वा ? सव्व-  
 पोग्गला पविट्ठा ? , गोयमा ! इमीसे णं रयण० पुढवीए सव्वपोग्गला पविट्ठपुव्वा नो  
 चेव णं सव्वपोग्गला पविट्ठा, एवं जाव अहेसत्तमाए पुढवीए ॥ इमा णं भंते !  
 रयणप्पमा पुढवी सव्वपोग्गलेहिं विजडपुव्वा ? सव्वपोग्ग० विजडा ? , गोयमा !  
 इमा णं रयणप्पमा पु० सव्वपोग्गलेहिं विजडपुव्वा नो चेव णं सव्वपोग्गलेहिं  
 विजडा, एवं जाव अहेसत्तमा ॥ ७७ ॥ इमा णं भंते ! रयणप्पमा पुढवी किं  
 सासया असासया ? गोयमा ! सिय सासया सिय असासया ॥ से केणट्ठेणं भंते !  
 एवं वुच्चइ-सिय सासया सिय असासया ? गोयमा ! दव्वट्ठयाए सासया, वण्ण-  
 पज्जवेहिं गंधपज्जवेहिं रसपज्जवेहिं फासपज्जवेहिं असासया, से तेणट्ठेणं गोयमा !  
 एवं वुच्चइ-तं चेव जाव सिय असासया, एवं जाव अहेसत्तमा ॥ इमा णं भंते !  
 रयणप्पमा पु० कालओ केवच्चिरं होइ ? गोयमा ! न कयाइ ण आसि ण कयाइ  
 णत्थि ण कयाइ ण भविस्सइ भुविं च भवइ य भविस्सइ य धुवा णियया सासया  
 अक्खया अव्वया अवट्ठिया णिच्चा एवं जाव अहेसत्तमा ॥ ७८ ॥ [इमीसे णं  
 भंते ! रयणप्पमाए पुढवीए उवरिल्लाओ चरिमंताओ हेट्ठिल्ले चरिमंते एस णं  
 केवइयं अबाहाए अंतरे पण्णत्ते ? गोयमा ! असिउत्तरं जोयणसयसहस्सं अबाहाए  
 अंतरे पण्णत्ते । इमीसे णं भंते ! रयण० पु० उवरिल्लाओ चरिमंताओ खरस्स  
 कंडस्स हेट्ठिल्ले चरिमंते एस णं केवइयं अबाहाए अंतरे पण्णत्ते ? गोयमा ! सोलस  
 जोयणसहस्साइं अबाहाए अंतरे पण्णत्ते] इमीसे णं भंते ! रयणप्पमाए पुढवीए उव-  
 रिल्लाओ चरिमंताओ रयणस्स कंडस्स हेट्ठिल्ले चरिमंते एस णं केवइयं अबाहाए अंतरे  
 पण्णत्ते ? गोयमा ! एक्कं जोयणसहस्सं अबाहाए अंतरे पण्णत्ते ॥ इमीसे णं भंते !  
 रयण० पु० उवरिल्लाओ चरिमंताओ वइरस्स कण्डस्स उवरिल्ले चरिमंते एस णं  
 केवइयं अबाहाए अंतरे पण्णत्ते ? गोयमा ! एक्कं जोयणसहस्सं अबाहाए अंतरे प० ॥  
 इमीसे णं भंते ! रयण० पु० उवरिल्लाओ चरिमंताओ वइरस्स कंडस्स हेट्ठिल्ले  
 चरिमंते एस णं केवइयं अबाहाए अंतरे प० ? गोयमा ! दो जोयणसहस्साइं इमीसे  
 णं० अबाहाए अंतरे पण्णत्ते, एवं जाव रिट्ठस्स उवरिल्ले पन्नरस्स जोयणसहस्साइं,  
 हेट्ठिल्ले चरिमंते सोलस जोयणसहस्साइं ॥ इमीसे णं भंते ! रयणप्प० पु० उवरि-  
 ल्लाओ चरिमंताओ पंकवहुलस्स कंडस्स उवरिल्ले चरिमंते एस णं अबाहाए केवइयं  
 अंतरे पण्णत्ते ? गोयमा ! सोलस जोयणसहस्साइं अबाहाए अंतरे पण्णत्ते । हेट्ठिल्ले

चरिमंते एकं जोयणसयसहस्सं आवबहुलस्स उवरि एकं जोयणसयसहस्सं हेड्डिल्ले चरिमंते असीउत्तरं जोयणसयसहस्सं । घणोदहिउवरिल्ले असिउत्तरजोयणसयसहस्सं हेड्डिल्ले चरिमंते दो जोयणसयसहस्साइं । इमीसे णं भंते ! रयण० पु० घणवायस्स उवरिल्ले चरिमंते दो जोयणसयसहस्साइं । हेड्डिल्ले चरिमंते असंखेजाइं जोयणसयसहस्साइं । इमीसे णं भंते ! रयण० पु० तणुवायस्स उवरिल्ले चरिमंते असंखेजाइं जोयणसयसहस्साइं अवाहाए अंतरे हेड्डिल्लेवि असंखेजाइं जोयणसयसहस्साइं, एवं ओवासंतरेवि ॥ दोच्चाए णं भंते ! पुढवीए उवरिल्लाओ चरिमंताओ हेड्डिल्ले चरिमंते एस णं केवइयं अवाहाए अंतरे पण्णत्ते ? गोयमा ! बत्तीसुत्तरं जोयणसयसहस्सं अवाहाए अंतरे पण्णत्ते । सक्करप्प० पु० उवरि घणोदहिस्स हेड्डिल्ले चरिमंते बावण्णुत्तरं जोयणसयसहस्सं अवाहाए० । घणवायस्स असंखेजाइं जोयणसयसहस्साइं पण्णत्ताइं । एवं जाव उवासंतरस्सवि जाव अहेसत्तमाए, णवरं जीसे जं बाहल्लं तेण घणोदही संबंधेयव्वो बुद्धीए । सक्करप्पमाए अणुसारेणं घणोदहिसहियाणं इमं पमाणं ॥ तच्चाए अडयालीसुत्तरं जोयणसयसहस्सं । पंकप्पमाए पुढवीए चत्तालीसुत्तरं जोयणसयसहस्सं । धूमप्पमाए पु० अट्ठतीसुत्तरं जोयणसयसहस्सं । तमाए पु० छत्तीसुत्तरं जोयणसयसहस्सं । अहेसत्तमाए पु० अट्ठावीसुत्तरं जोयणसयसहस्सं जाव अहेसत्तमाए णं भंते ! पुढवीए उवरिल्लाओ चरिमंताओ उवासंतरस्स हेड्डिल्ले चरिमंते केवइयं अवाहाए अंतरे पण्णत्ते ? गोयमा ! असंखेजाइं जोयणसयसहस्साइं अवाहाए अंतरे पण्णत्ते ॥ ७९ ॥ इमा णं भंते ! रयणप्पमा पुढवी दोच्चं पुढविं पणिहाय बाहल्लेणं किं तुल्ला विसेसाहिया संखेज्जगुणा ? वित्थरेणं किं तुल्ला विसेसहीणा संखेज्जगुणहीणा ?, गोयमा ! इमा णं रयण० पु० दोच्चं पुढविं पणिहाय बाहल्लेणं नो तुल्ला विसेसाहिया नो संखेज्जगुणा, वित्थारेणं नो तुल्ला विसेसहीणा णो संखेज्जगुणहीणा । दोच्चा णं भंते ! पुढवी तच्चं पुढविं पणिहाय बाहल्लेणं किं तुल्ला एवं चेव भाणियव्वं । एवं तच्चा चउत्थी पंचमी छट्ठी । छट्ठी णं भंते ! पुढवी सत्तमं पुढविं पणिहाय बाहल्लेणं किं तुल्ला विसेसाहिया संखेज्जगुणा ? एवं चेव भाणियव्वं । सेवं भंते ! २ ॥ ८० ॥

**पढमो नेरइयउदेसो समत्तो ॥**

कइ णं भंते ! पुढवीओ पण्णत्ताओ ? गोयमा ! सत्त पुढवीओ पण्णत्ताओ, तंजहा-रयणप्पमा जाव अहेसत्तमा ॥ इमीसे णं भंते ! रयणप्प० पु० असी-उत्तरजोयणसयसहस्सबाहल्लाए उवरिं केवइयं ओगाहिता हेट्ठा केवइयं वज्जिता मज्झे केवइए केवइया निरयावाससयसहस्सा पण्णत्ता ? गोयमा ! इमीसे णं रयण० पु० असीउत्तरजोयणसयसहस्सबाहल्लाए उवरि एणं जोयणसहस्सं ओगाहिता हेट्ठावि

एगं जोयणसहस्सं वज्जेता मज्झे अडसत्तरी जोयणसयसहस्सा, एत्थ णं रयणप्पभाए पु० नेरइयाणं तीसं निरयावाससयसहस्साइं भवंतित्तिमक्खाया ॥ ते णं णरगा अंतो वट्ठा बाहिं चउरंसा जाव असुभा णरएसु वेयणा, एवं एएणं अभिलवेणं उवजुंजिऊण भाणियव्वं ठाणप्पयाणुसारेणं, जत्थ जं बाहल्लं जत्थ जत्तिया वा नरयावाससयसहस्सा जाव अहेसत्तमाए पुढवीए, अहेसत्तमाए मज्झिमं केवइए कइ अणुत्तरा महइ-महालया महाणिरया पण्णत्ता एवं पुच्छियव्वं वागरेयव्वंपि तहेव छट्ठिसत्तमासु काऊ य अगणिवण्णाभा भाणियव्व ॥ ८१ ॥ इमीसे णं भंते ! रयणप्पभाए पुढवीए णरगा किंसंठिया पण्णत्ता ? गोयमा ! दुविहा पण्णत्ता, तंजहा—आवलियपविट्ठा य आवलियवाहिरा य, तत्थ णं जे ते आवलियपविट्ठा ते तिविहा पण्णत्ता, तंजहा—वट्ठा तंसा चउरंसा, तत्थ णं जे ते आवलियवाहिरा ते णाणासंठाणसंठिया पण्णत्ता, तंजहा—अयकोट्टसंठिया पिट्ठपयणगसंठिया कंइसंठिया लोहीसंठिया कडाहसंठिया थालीसंठिया पिहडगसंठिया किमियडसंठिया किन्नपुडगसंठिया उडवसंठिया मुरवसंठिया मुयंगसंठिया नंदिमुयंगसंठिया आलिंगयसंठिया सुघोससंठिया दइरयसंठिया पणवसंठिया पडहसंठिया मेरिसंठिया झल्लरीसंठिया कुतुंबगसंठिया नालिसंठिया, एवं जाव तमाए ॥ अहेसत्तमाए णं भंते ! पुढवीए णरगा किंसंठिया पण्णत्ता ? गोयमा ! दुविहा पण्णत्ता, तंजहा—वट्ठे य तंसा य ॥ इमीसे णं भंते ! रयणप्पभाए पुढवीए नरगा केवइयं बाहल्लेणं पण्णत्ता ? गोयमा ! तिण्णि जोयणसहस्साइं बाहल्लेणं पण्णत्ता, तंजहा—हेट्ठा घणा सहस्सं मज्झे झुसिरा सहस्सं उप्पि संकुइया सहस्सं, एवं जाव अहेसत्तमाए ॥ इमीसे णं भंते ! रयणप्प० पु० नरगा केवइयं आयामविकखंभेणं केवइयं परिकखेवेणं पण्णत्ता ? गोयमा ! दुविहा पण्णत्ता, तंजहा—संखेज्जवित्थडा य असंखेज्जवित्थडा य, तत्थ णं जे ते संखेज्जवित्थडा ते णं संखेज्जाइं जोयणसहस्साइं आयामविकखंभेणं संखेज्जाइं जोयणसहस्साइं परिकखेवेणं पण्णत्ता तत्थ णं जे ते असंखेज्जवित्थडा ते णं असंखेज्जाइं जोयणसहस्साइं आयामविकखंभेणं असंखेज्जाइं जोयणसहस्साइं परिकखेवेणं पण्णत्ता एवं जाव तमाए, अहेसत्तमाए णं भंते ! पुच्छा, गोयमा दुविहा पण्णत्ता, तंजहा—संखेज्जवित्थडे य असंखेज्जवित्थडा य, तत्थ णं जे ते संखेज्जवित्थडे से णं एक्कं जोयणसयसहस्सं आयामविकखंभेणं तिच्चि जोयणसयसहस्साइं सोलस सहस्साइं दोच्चि य सत्तावीसे जोयणसए तिच्चि कोसे य अट्ठावीसं च धणुसयं तेरस य अंगुलाइं अद्दंगुलयं च किंचिविसेसाहिए परिकखेवेणं पण्णत्ते, तत्थ णं जे ते असंखेज्जवित्थडा ते णं असंखेज्जाइं जोयणसयसहस्साइं आयामविकखंभेणं असंखेज्जाइं जाव परिकखेवेणं पण्णत्ता ॥ ८२ ॥ इमीसे णं भंते ! रयण-

प्पमाए पुढवीए नरया केरिसया वण्णेणं पण्णत्ता ? गोयमा ! काला कालोभासा  
 गंभीरलोमहरिसा भीमा उत्तासणया परमकिण्हा वण्णेणं पण्णत्ता, एवं जाव अहेसत्त-  
 माए ॥ इमीसे णं भंते ! रयणप्पमाए पुढवीए णरगा केरिसया गंधेणं पण्णत्ता ?  
 गोयमा ! से जहाणामए अहिमडेइ वा गोमडेइ वा सुणगमडेइ वा मज्जारमडेइ वा  
 मणुस्समडेइ वा महिसमडेइ वा मूसगमडेइ वा आसमडेइ वा हत्थिमडेइ वा सीहमडेइ  
 वा वग्घमडेइ वा विगमडेइ वा दीवियमडेइ वा मयकुहियच्चिरविणट्टकुणिमवावण्ण-  
 दुब्भिमंग्घे असुइविलीणविगयवीभत्थदरिसणिज्जे किमिजालाउल्लसंसत्ते, भवेयारूवे  
 सिया ?, णो इण्ठे समट्ठे, गोयमा ! इमीसे णं रयणप्पमाए पुढवीए णरगा एत्तो  
 अणिट्ठतरगा चेव अकंततरगा चेव जाव अमणामतरगा चेव गंधेणं पण्णत्ता, एवं  
 जाव अहेसत्तमाए पुढवीए ॥ इमीसे णं भंते ! रयणप्प० पु० णरया केरिसया  
 फासेणं पण्णत्ता ? गोयमा ! से जहानामए असिपत्तेइ वा खुरपत्तेइ वा कलंबचीरि-  
 यापत्तेइ वा सत्तिग्गेइ वा कुंतग्गेइ वा तोमरग्गेइ वा नारायग्गेइ वा सूळग्गेइ वा  
 लउल्लग्गेइ वा भिंडिमालग्गेइ वा सूइकलावेइ वा कवियच्चूइ वा विंचुयकंटएइ वा  
 इंगालेइ वा जालेइ वा मुम्मुरेइ वा अचीइ वा अलाएइ वा सुद्धगणीइ वा,  
 भवे एयारूवे सिया ?, णो इण्ठे समट्ठे, गोयमा ! इमीसे णं रयणप्पमाए पुढवीए  
 णरगा एत्तो अणिट्ठतरगा चेव जाव अमणामतरगा चेव फासेणं पण्णत्ता, एवं जाव  
 अहेसत्तमाए पुढवीए ॥ ८३ ॥ इमीसे णं भंते ! रयणप्पमाए पुढवीए नरगा  
 केमहालया पण्णत्ता ? गोयमा ! अयणं जंबुदीवे २ सव्वदीवसमुद्दाणं सव्वब्भंतरए  
 सव्वखुड्ढाए वट्ठे तेल्लापूवसंठाणसंठिए वट्ठे रहचक्कवाल्लसंठाणसंठिए वट्ठे पुक्खरकणि-  
 यासंठाणसंठिए वट्ठे पडिपुण्णचंदसंठाणसंठिए एक्कं जोयणसयसहस्सं आयामविकखं-  
 भेणं जाव किंचिविसेसाहिए परिकखेवेणं, देवे णं महिद्धिए जाव महाणुभागे जाव  
 इणामेव इणामेवत्तिकट्ठु इमं केवलकप्पं जंबुदीवं २ तिहिं अच्छरानिवाएहिं तिसत्त-  
 खुत्तो अणुपरियट्ठिताणं हव्वमागच्छेज्जा, से णं देवे ताए उक्किट्ठाए तुरियाए  
 चवलाए चंडाए सिग्घाए उड्डुयाए जयणाए छेयाए दिव्वाए दिव्वगईए वीइवयमाणे २  
 जहण्णेणं एगाहं वा दुयाहं वा तियाहं वा उक्कोसेणं छम्मासेणं वीइवएज्जा,  
 अत्थेगइए वीइवएज्जा अत्थेगइए नो वीइवएज्जा, एमहालया णं गोयमा ! इमीसे णं  
 रयणप्पमाए पुढवीए णरगा पण्णत्ता, एवं जाव अहेसत्तमाए, णवरं अहेसत्तमाए  
 अत्थेगइयं नरगं वीइवएज्जा, अत्थेगइए नरगे नो वीइवएज्जा ॥ ८४ ॥ इमीसे णं  
 भंते ! रयणप्पमाए पुढवीए णरगा किंमया पण्णत्ता ? गोयमा ! सव्ववइरामया  
 पण्णत्ता, तत्थ णं नरएसु बहवे जीवा य पोग्गला य अवक्कमंति विउक्कमंति चरंति

उववज्जंति, सासया णं ते णरगा दव्वदुयाए वण्णपज्जवेहिं गंधपज्जवेहिं रसपज्जवेहिं  
 फासपज्जवेहिं असासया, एवं जाव अहेसत्तमाए ॥ ८५ ॥ इमीसे णं भंते ! रयणप्प-  
 भाए पुढवीए नेरइया कओहिंतो उववज्जंति किं असण्णीहिंतो उववज्जंति सरीसिवेहिंतो  
 उववज्जंति पक्खीहिंतो उववज्जंति चउप्पएहिंतो उववज्जंति उरगेहिंतो उववज्जंति  
 इत्थियाहिंतो उववज्जंति मच्छमणुएहिंतो उववज्जंति ? गोयमा ! असण्णीहिंतो  
 उववज्जंति जाव मच्छमणुएहिंतोवि उववज्जंति, असण्णी खलु पढमं दोच्चं च सरीसिवा  
 तइय पक्खी । सीहा जंति चउत्थि उरगा पुण पंचमिं जंति ॥ १ ॥ छट्ठिं च  
 इत्थियाओ मच्छा मणुया य सत्तमिं जंति । जाव अहेसत्तमाए पुढवीए नेरइया णो  
 असण्णीहिंतो उववज्जंति जाव णो इत्थियाहिंतो उववज्जंति मच्छमणुस्सेहिंतो उवव-  
 ज्जंति ॥ इमीसे णं भंते ! रयणप्प० पु० णेरइया एकसमएणं केवइया उववज्जंति ?  
 गोयमा ! जहण्णेणं एको वा दो वा तिचि वा उक्कोसेणं संखेजा वा असंखेजा वा  
 उववज्जंति, एवं जाव अहेसत्तमाए ॥ इमीसे णं भंते ! रयणप्प० पुढवीए णेरइया  
 समए समए अवहीरमाणा अवहीरमाणा केवइकालेणं अवहिया सिया ? गोयमा ! ते  
 णं असंखेजा समए समए अवहीरमाणा अवहीरमाणा असंखेजाहिं उस्सप्पिणीओ-  
 सप्पिणीहिं अवहीरंति नो चेव णं अवहिया सिया जाव अहेसत्तमा ॥ इमीसे णं  
 भंते ! रयणप्प० पु० णेरइयाणं केमहालिया सरीरोगाहणा पण्णत्ता ? गोयमा !  
 दुविहा सरीरोगाहणा पण्णत्ता, तंजहा—भवधारणिज्जा य उत्तरवेउव्विया य, तत्थ  
 णं जा सा भवधारणिज्जा सा जहन्नेणं अंगुलस्स असंखेज्जइभागं उक्कोसेणं सत्त धणूई  
 तिणिण य रयणीओ छच्च अंगुलाई, तत्थ णं जे से उत्तरवेउव्विए से जह० अंगुलस्स  
 संखेज्जइभागं उक्को० पण्णरस धणूई अङ्गाइज्जाओ रयणीओ, दोच्चाए भवधारणिजे  
 जहण्णओ अंगुलासंखेज्जइभागं उक्को० पण्णरस धणूई अङ्गाइज्जाओ रयणीओ उत्तरवेउ-  
 व्विया जह० अंगुलस्स संखेज्जइभागं उक्को० एकतीसं धणूई एक्का रयणी, तच्चाए  
 भवधारणिजे एकतीसं धणूई एक्का रयणी, उत्तरवेउव्विया बासट्ठिं धणूई दोणिण  
 रयणीओ, चउत्थीए भवधारणिजे बासट्ठिं धणूई दोणिण य रयणीओ, उत्तरवेउव्विया  
 पणवीसं धणुसयं, पंचमीए भवधारणिजे पणवीसं धणुसयं, उत्तरवे० अङ्गाइज्जाई  
 धणुसयाई, छट्ठीए भवधारणिज्जा अङ्गाइज्जाई धणुसयाई, उत्तरवेउव्विया पंचधणुस-  
 याई, सत्तमाए भवधारणिज्जा पंचधणुसयाई उत्तरवेउव्विए धणुसहस्सं ॥ ८६ ॥  
 इमीसे णं भंते ! रयणप्प० पु० णेरइयाणं सरीरया किंसंघयणी पण्णत्ता ? गोयमा !  
 छहं संघयणाणं असंघयणी, णेवट्ठी णेव छिरा णवि ण्हारु णेव संघयणमत्थि, जे  
 पोग्गला अणिट्ठा जाव अमणामा ते तेसिं सरीरसंघायत्ताए परिणमंति, एवं जाव

अहेसत्तमाए ॥ इमीसे णं भंते ! रयण० पु० नेरइयाणं सरीरा किंसंठिया पण्णत्ता ? गोयमा ! दुविहा पण्णत्ता तंजहा—भवधारणिज्जा य उत्तरवेउव्विया य, तत्थ णं जे ते भवधारणिज्जा ते हुंडसंठिया पण्णत्ता, तत्थ णं जे ते उत्तरवेउव्विया तेवि हुंडसंठिया पण्णत्ता, एवं जाव अहेसत्तमाए ॥ इमीसे णं भंते ! रयण० पु० णेरइयाणं सरीरगा केरिसया वण्णेणं पण्णत्ता ? गोयमा ! काला कालोभासा जाव परमकिण्हा वण्णेणं पण्णत्ता, एवं जाव अहेसत्तमाए ॥ इमीसे णं भंते रयण० पु० नेरइयाणं सरीरया केरिसया गंधेणं पण्णत्ता ? गोयमा ! से जहानामए अहिमडेइ वा तं चेव जाव अहेसत्तमा ॥ इमीसे णं भंते ! रयण० पु० नेरइयाणं सरीरया केरिसया फासेणं पण्णत्ता ? गोयमा ! फुडियच्छविचिच्छविया खरफरुसझामझुसिरा फासेणं पण्णत्ता, एवं जाव अहेसत्तमा ॥ ८७ ॥ इमीसे णं भंते ! रयणप्पमाए पुढवीए णेरइयाणं केरिसया पोग्गला ऊसासत्ताए परिणमंति ? गोयमा ! जे पोग्गला अणिट्ठा जाव अमणामा ते तेसिं ऊसासत्ताए परिणमंति, एवं जाव अहेसत्तमाए, एवं आहारस्सवि सत्तसुवि ॥ इमीसे णं भंते ! रयण० पु० नेरइयाणं कइ लेसाओ पण्णत्ताओ ? गोयमा ! एक्का काउलेसा पण्णत्ता, एवं सक्करप्पमाएऽवि, वालुयप्पमाए पुच्छा, गोयमा ! दो लेसाओ पण्णत्ताओ तं—नीललेसा य काउलेसा य, तत्थ जे काउलेसा ते बहुतरा जे नीललेसा पण्णत्ता ते थोवा, पंकप्पमाए पुच्छा, एक्का नीललेसा पण्णत्ता, धूमप्पमाए पुच्छा, गोयमा ! दो लेसाओ पण्णत्ताओ, तंजहा—किण्हलेसा य नीललेसा य, ते बहुतरगा जे नीललेसा, ते थोवतरगा जे किण्हलेसा, तमाए पुच्छा, गोयमा ! एक्का किण्हलेसा, अहेसत्तमाए एक्का परमकिण्हलेसा ॥ इमीसे णं भंते ! रयण० पु० नेरइया किं सम्मदिट्ठी मिच्छादिट्ठी सम्मामिच्छादिट्ठी ? गोयमा ! सम्मदिट्ठीवि मिच्छादिट्ठीवि सम्मामिच्छादिट्ठीवि, एवं जाव अहेसत्तमाए ॥ इमीसे णं भंते ! रयण० पु० णेरइया किं नाणी अण्णाणी ? गोयमा ! णाणीवि अण्णाणीवि, जे णाणी ते णियमा तिणाणी, तंजहा—आभिणिबोहियणाणी सुयणाणी ओहिणाणी, जे अण्णाणी ते अत्थेगइया दुअण्णाणी अत्थेगइया तिअन्नाणी, जे दुअन्नाणी ते णियमा मइअन्नाणी य सुयअण्णाणी य, जे तिअन्नाणी ते नियमा मइअण्णाणी सुयअण्णाणी विभंगणाणीवि, सेसा णं णाणीवि अण्णाणीवि तिण्णि जाव अहेसत्तमाए ॥ इमीसे णं भंते ! रयण० पु० किं मणजोगी वइजोगी कायजोगी ? गो० ! तिण्णिवि, एवं जाव अहेसत्तमाए ॥ इमीसे णं भंते ! रयणप्पमापु० नेरइया किं सागारोवउत्ता अणागारोवउत्ता ? गोयमा ! सागारोवउत्तावि अणागारोवउत्तावि, एवं जाव अहेसत्तमाए पुढवीए ॥ [इमीसे णं भंते ! रयणप्प० पु० नेरइया ओहिणा



केवइयं खेतं जाणंति पासंति ? गोयमा ! जहण्णेणं अद्दुग्गाउयाइं उक्कोसेणं चत्तारि गाउयाइं । सक्करप्पभापु० जह० तिचि गाउयाइं उक्को० अद्दुग्गाइं, एवं अद्दुग्गाउयं परिहायइ जाव अहेसत्तमाए जह० अद्दुग्गाउयं उक्कोसेणं गाउयं । इमीसे णं भंते ! रयणप्पभाए पुढवीए नेरइयाणं कइ समुग्घाया पण्णत्ता ? गोयमा ! चत्तारि समुग्घाया पण्णत्ता, तंजहा—वेयणासमुग्घाए कसायसमुग्घाए मारणं-  
 तियसमुग्घाए वेउव्वियसमुग्घाए, एवं जाव अहेसत्तमाए ॥ ८८ ॥ इमीसे णं भंते ! रयणप्पभा० पु० नेरइया केरिसयं खुहप्पिवासं पच्चणुभवमाणा विहरंति ? गोयमा ! एगमेगस्स णं रयणप्पभापुढविनेरइयस्स असम्भावपट्टवणाए सव्वोदही वा सव्वपोग्गले वा आसगंसि पक्खिवेज्जा णो चेव णं से रयणप्प० पु० णेरइए तित्ते वा सिया वितण्हे वा सिया, एरिसया णं गोयमा ! रयणप्पभाए णेरइया खुहप्पिवासं पच्चणुभवमाणा विहरंति, एवं जाव अहेसत्तमाए ॥ इमीसे णं भंते ! रयणप्पभाए पु० नेरइया किं एगत्तं पभू विउव्वित्तए पुहुत्तं पि पभू विउव्वित्तए ? गोयमा ! एगत्तं पि पभू पुहुत्तं पि पभू विउव्वित्तए, एगत्तं विउव्वेमाणा एगं महं भोग्गरह्वं वा एवं सुसुंढिकरवत्तअसिसत्तीहलगयासुसलचक्कणारायकुंततोमर-  
 सूललउडभिडमाला य जाव भिडमालह्वं वा पुहुत्तं विउव्वेमाणा भोग्गरह्वाणि वा जाव भिडमालह्वाणि वा ताइं संखेजाइं णो असंखेजाइं संबद्धाइं नो असंबद्धाइं सरिसाइं नो असरिसाइं विउव्वंति विउव्वित्ता अण्णमण्णस्स कायं अभिहणमाणा अभिहणमाणा वेयणं उदीरंति उज्जलं विउलं पगाढं कक्कसं कडुयं फस्सं निट्ठुरं चंडं तिव्वं दुक्खं दुग्गं दुरहियासं, एवं जाव धूमप्पभाए पुढवीए । लट्ठसत्तमासु णं पुढवीसु नेरइया बहू महंताइं लोहियकुंथूह्वाइं वइरामइतुंडाइं गोमयक्रीडसमाणाइं विउव्वंति विउव्वित्ता अन्नमज्जस्स कायं समतुरंगेमाणा २ खायमाणा खायमाणा सयपोरागकिमिया विव चालेमाणा २ अंतो अंतो अण्णप्पविसमाणा २ वेयणं उदीरंति उज्जलं जाव दुरहियासं ॥ इमीसे णं भंते ! रयणप्प० पु० नेरइया किं सीयवेयणं वेदंति उसिणवेयणं वेदंति सीओसिणवेयणं वेदंति ? गोयमा ! णो सीयं वेयणं वेदंति उसिणं वेयणं वेदंति नो सीओसिणं, एवं जाव वालुयप्पभाए, पंकप्पभाए पुच्छा, गोयमा ! सीयं पि वेयणं वेयंति, उसिणं पि वेयणं वेयंति, नो सीओसिणवेयणं वेयंति, ते बहुतरगा जे उसिणं वेयणं वेदंति, ते थोवतरगा जे सीयं वेयणं वेदंति । धूमप्पभाए पुच्छा, गोयमा ! सीयं पि वेयणं वेदंति उसिणं पि वेयणं वेदंति णो सीओ०, ते बहुतरगा जे सीयवेयणं वेदंति ते थोवतरगा जे उसिणवेयणं वेदंति । तस्माए पुच्छा, गोयमा ! सीयं वेयणं वेदंति नो उसिणं वेयणं वेदंति नो सीओसिणं

वेयणं वेदेति, एवं अहेसत्तमाए णवरं परमसीयं ॥ इसीसे णं भंते ! रयणप्प० पु०  
 गेरइया केरिसयं णिरयभवं पच्चणुभवमाणा विहरंति ? गोयमा ! ते णं तत्थ णिच्चं सीया  
 णिच्चं तसिया णिच्चं छुहिया णिच्चं उच्चिग्गा णिच्चं उपप्पुया णिच्चं वहिया णिच्चं  
 परममसुभमउलमणुबद्धं निरयभवं पच्चणुभवमाणा विहरंति, एवं जाव अहेसत्तमाए  
 णं पुढवीए पंच अणुत्तरा महइमहालया महाणरगा पण्णता, तंजहा—काले महाकाले  
 रोसए महारोसए अप्पइट्ठाणे, तत्थ इमे पंच महापुरिसा अणुत्तरेहिं दंडसमादाणेहिं  
 कालमासे कालं किच्चा अप्पइट्ठाणे णरए गेरइयत्ताए उववण्णा, तंजहा—रामे  
 जमदग्गिपुत्ते, दढाऊ लच्छइपुत्ते, वसू उवरिचरे, सुभूमे कोरव्वे, वंभदत्ते चुल्लिणसुए,  
 ते णं तत्थ नेरइया जाया काला कालो० जाव परमकिष्हा वण्णेणं पण्णता, तंजहा—  
 ते णं तत्थ वेयणं वेदेति उज्जलं विउलं जाव दुरहियासं ॥ उत्तिणवेयणिज्जेसु णं  
 भंते ! णरइएसु गेरइया केरिसयं उत्तिणवेयणं पच्चणुभवमाणा विहरंति ? गोयमा !  
 से जहाणामए कम्मरदारए सिया तरुणे बलवं जुगवं अप्पायंके थिरग्गहत्थे दढ-  
 पाणिपायपासपिठ्ठं तरोरुसंघायपरिणए लंघणपवणजवणवग्गणपमहणसमत्थे तलजमल-  
 जुयलबहुफलिहणिमवाहू घणणिचियवलयिवट्ठखंभे चम्मेट्ठगदुहणमुट्ठियसमाहयणिचिय-  
 गत्ते उरस्सवलसमण्णागए छेए दक्खे पट्टे कुसले णिउणे मेहावी णिउणसिप्पोवगाए  
 एगं महं अयपिंडं उदगवारसमाणं गहाय तं ताविय ताविय कोट्टिय कोट्टिय उब्भि-  
 दिय उब्भिमिय चुण्णिअ चुण्णिअ जाव एगाहं वा दुयाहं वा तियाहं वा उक्कोसेणं  
 अद्धमासं संहणेज्जा, से णं तं सीयं सीईभूयं अओमएणं संदंसएणं गहाय असब्भाव-  
 पट्टवणाए उत्तिणवेयणिज्जेसु णरएसु पक्खिवेज्जा, से णं तं उम्भिसियणिमिसियंतरेणं  
 पुणरवि पच्चुद्धरिस्सामित्तिक्कु पविरायमेव पासेज्जा पविलीणमेव पासेज्जा पविद्धत्थमेव  
 पासेज्जा णो चेव णं संचाएइ अविरायं वा अविलीणं वा अविद्धत्थं वा पुणरवि  
 पच्चुद्धरित्तए ॥ से जहा नामए मत्तमातंगे दुपए कुंजरे सट्ठियायणे पढमसरयकाल-  
 समयंसि वा चरमनिदाघकालसमयंसि वा उण्हाभिहए तण्हाभिहए दवग्गिजालाभिहए  
 आउरे सुसिए पिवासिए दुब्बले किलंते एक्कं महं पुक्खरिणिं पासेज्जा चाउक्कोणं  
 समतीरं अणुपुव्वसुजायवप्पगंभीरसीयलजलं संछण्णपत्तमिसमुणालं बहुउप्पलकुमुय-  
 णल्लिणसुभगसोगंधियपुंडरीयमहापुंडरीयसयपत्तसहरसपत्तेकरफुल्लोवचियं छप्पयपरि-  
 भुजमाणकमलं अच्छविमलसलिलपुण्णं परिहत्थभमंतमच्छकच्छभं अणेगसउणगण-  
 सिहुणयविरइयसहुअयमहुरसरणाइयं तं पासइ तं पासित्ता तं ओगाहइ ओगाहित्ता  
 से णं तत्थ उण्हंमि पविणेज्जा तण्हंमि पविणेज्जा खुहंमि पविणेज्जा जरंमि पवि०  
 दाहंमि पवि० णिहाएज्जा वा पयलाएज्जा वा सइं वा रइं वा धिइं वा मइं वा उवलभेज्जा,

सीए सीयभूए संकसमाणे संकसमाणे सायासोक्खबहुले यावि विहरेज्जा, एवामेव गोयमा ! असब्भावपट्टवणाए उसिणवेयणिजेहिंतो णरएहिंतो णेरइए उव्वट्टिए समाणे जाइं इमाइं मणुस्सलोयंसि भवंति गोलियालिंमाणि वा सौंडियालिंमाणि वा भिंडियालिंमाणि वा अयागराणि वा तंवागराणि वा तउयागरा० सीसाग० रुप्यागरा० सुवन्नागराणि वा हिरण्णागरा० कुंभारागणीइ वा मुसागणीइ वा इट्ठयागणीइ वा कवेळुयागणीइ वा लोहारंबरिसेइ वा जंतवाडचुळीइ वा हंडियलिंथाणि वा गोलियलिंथाणि वा सौंडियलिं० णलागणीइ वा तिलागणीइ वा तुसागणीइ वा, तत्ताइं समजोइभूयाइं फुळकिंसुयसमाणाइं उक्कासहस्साइं विणिम्मुयमाणाइं जालासहस्साइं पमुच्चमाणाइं इंगालसहस्साइं पविक्खरमाणाइं अंतो २ हुहुयमाणाइं चिट्ठंति ताइं पासइ ताइं पासित्ता ताइं ओगाहइ ताइं ओगाहिता से णं तत्थ उण्हंपि पविणेज्जा तण्हंपि पविणेज्जा खुहंपि पविणेज्जा जरंपि पविणेज्जा दाहंपि पविणेज्जा णिद्दाएज्ज वा पयलाएज्ज वा सइं वा रइं वा धिइं वा मइं वा उवलभेज्जा, सीए सीयभूए संकसमाणे संकसमाणे सायासोक्खबहुले यावि विहरेज्जा, भवेयारुवे सिया?, णो इणट्ठे समट्ठे, गोयमा ! उसिणवेयणिजेसु णरएसु नेरइया एत्तो अणिट्ठतरियं चेव उसिणवेयणं पच्चणुभवमाणा विहरंति ॥ सीयवेयणिजेसु णं भंते णरएसु णेरइया केरिसयं सीयवेयणं पच्चणुभवमाणा विहरंति ? गोयमा ! से जहाणामए कम्मरदारए सिया तरुणे जुगवं वलवं जाव सिप्पोवगए एगं महं अयपिंडं दगवारसमाणं गहाय ताविय ताविय कोट्टिय कोट्टिय जह० एकाहं वा दुयाहं वा तियाहं वा उक्कोसेणं मासं हणेज्जा, से णं तं उसिणं उसिणभूयं अओमएणं संदंसएणं गहाय असब्भावपट्टवणाए सीयवेयणिजेसु णरएसु पविक्खवेज्जा, से तं उम्भिसियनिमिसियंतरेण पुणरवि पच्चुद्धरिस्सामीतिकट्ठु पविरायमेव पासेज्जा, तं चेव णं जाव णो चेव णं संचाएज्जा पुणरवि पच्चुद्धरितए, से णं से जहाणामए मत्तमार्यणे तहेव जाव सोक्खबहुले यावि विहरेज्जा एवामेव गोयमा ! असब्भावपट्टवणाए सीयवेयणेहिंतो णरएहिंतो नेरइए उव्वट्टिए समाणे जाइं इमाइं इहं माणुस्सलोए हवंति, तंजहा—हिमाणि वा हिमपुंजाणि वा हिमपडलाणि वा हिमपडलपुंजाणि वा तुसाराणि वा तुसारपुंजाणि वा हिमकुंडाणि वा हिमकुंडपुंजाणि वा सीयाणि वा ताइं पासइ पासित्ता ताइं ओगाहइ ओगाहिता से णं तत्थ सीयंपि पविणेज्जा तण्हंपि प० खुहंपि प० जरंपि प० दाहंपि प० निद्दाएज्ज वा पयलाएज्ज वा जाव उसिणे उसिणभूए संकसमाणे संकसमाणे सायासोक्खबहुले यावि विहरेज्जा, गोयमा ! सीयवेयणिजेसु नरएसु नेरइया एत्तो अणिट्ठतरियं चेव सीयवेयणं पच्चणुभवमाणा विहरंति ॥ ८९ ॥ इमीसे णं भंते ! रयणप्प० पु० णेरइयाणं केवइयं

कालं ठिई पण्णत्ता ? गोयमा ! जहण्णेणवि उक्कोसेणवि ठिई भाणियव्वा जाव अहेसत्तमाए ॥ ९० ॥ इमीसे णं भंते ! रयणप्पमाए पु० गेरइया अणंतंर उव्वट्ठिय कहिं गच्छंति ? कहिं उव्वज्जंति ? किं नेरइएसु उव्वज्जंति ? किं तिरिक्खजोणिएसु उव्वज्जंति ? एवं उव्वट्ठणा भाणियव्वा जहा वक्कंतीए तहा इहवि जाव अहेसत्तमाए ॥ ९१ ॥ इमीसे णं भंते ! रयण० पु० नेरइया केरिसयं पुढविफासं पच्चणुभवमाणा विहरंति ? गोयमा ! अणिट्ठं जाव अमणामं, एवं जाव अहेसत्तमाए, इमीसे णं भंते ! रयण० पु० नेरइया केरिसयं आउफासं पच्चणुभवमाणा विहरंति ? गोयमा ! अणिट्ठं जाव अमणामं, एवं जाव अहेसत्तमाए, एवं जाव वणप्फइफासं अहेसत्तमाए पुढवीए । इमा णं भंते ! रयणप्पमापुढवी दोच्चं पुढविं पणिहाय सव्वमहंति या वाहल्लेणं सव्वक्खुड्डिया सव्वंतेसु ? हंता गोयमा ! इमा णं रयणप्पमापुढवी दोच्चं पुढविं पणिहाय जाव सव्वक्खुड्डिया सव्वंतेसु, दोच्चा णं भंते ! पुढवी तच्चं पुढविं पणिहाय सव्वमहंति या वाहल्लेणं पुच्छा, हंता गोयमा ! दोच्चा णं पुढवी जाव सव्वक्खुड्डिया सव्वंतेसु, एवं एएणं अभिलावेणं जाव छट्ठिया पुढवी अहेसत्तमं पुढविं पणिहाय सव्वक्खुड्डिया सव्वंतेसु ॥ ९२ ॥ इमीसे णं भंते ! रयणप्प० पु० तीसाए नरयावाससयसहस्सेसु इक्कमिक्कंसि निरयावासंसि सव्वे पाणा सव्वे भूया सव्वे जीवा सव्वे सत्ता पुढवीकाइयत्ताए जाव वणस्सइकाइयत्ताए नेरइयत्ताए उव्ववन्नपुव्वा ? हंता गोयमा ! असइं अदुवा अणंतखुत्तो, एवं जाव अहेसत्तमाए पुढवीए णवरं जत्थ जत्तिया णरगा [ इमीसे णं भंते ! रयणप्पमाए पु० निरयपरिसामंतेसु जे पुढविक्काइया जाव वणप्फइकाइया ते णं भंते ! जीवा महाक्कम्मतरा चेव महाकिरियतरा चेव महाआसवतरा चेव महावेयणतरा चेव ? हंता गोयमा ! इमीसे णं रयणप्पमाए पुढवीए निरयपरिसामंतेसु तं चेव जाव महावेयणतरा चेव, एवं जाव अहेसत्तमा ] ॥ ९३ ॥ पुढविं ओगाहिता, नरगा संठाणमेव बाहल्लं । विक्खंभपरिक्खेवे वण्णो गंधो य फासो य ॥ १ ॥ तेसिं महालयाए उवमा देवेण होइ कायव्वा । जीवा य पोमगला वक्कमंति तह सासया निरया ॥ २ ॥ उववायपरीमाणं अवहारुच्चत्तमेव संघयणं । संठाणवण्णगंधा फासा ऊसासमाहारे ॥ ३ ॥ लेसा दिट्ठी नाणे जोगुवओगे तहा समुग्घाया । तत्तो खुहापिवासा विउव्वणा वेयणा य भए ॥ ४ ॥ उववाओ पुरिसाणं ओवम्मं वेयणाए दुविहाए । उव्वट्ठणपुढवी उ उववाओ सव्वजीवाणं ॥ ५ ॥ एयाओ संगहणिगाहाओ ॥ ६ ॥ बीओ गेरइयडइसो समत्तो ॥

इमीसे णं भंते ! रयणप्पमाए पुढवीए नेरइया केरिसयं पोमगलपरिणामं पच्चणुभवमाणा विहरंति ? गोयमा ! अणिट्ठं जाव अमणामं, एवं जाव अहेसत्तमाए एवं

नेयव्वं गाहा-पोग्गलपरिणामे वेयणा य लेसा य नामगोए य । अरई भए य सोणे  
 खुहापिवासा य वाही य ॥ १ ॥ उस्सासे अणुतावे कोहे माणे य मायलोभे य ।  
 चत्तारि य सण्णाओ नेरइयाणं तु परिणामे ॥ २ ॥ एत्थ किर अइवयंती नरवसभा  
 केसवा जलयरा य । मंडलिया रायाणो जे य महारंभकोडुंवी ॥ ३ ॥ भिन्नमुहुत्तो  
 नरएसु होइ तिरियमणुएसु चत्तारि । देवेषु अद्धमासो उक्कोसविउव्वणा भणिया  
 ॥ ४ ॥ जे पोग्गला अणिट्ठा नियमा सो तेसि होइ आहारो । संठाणं तु जहणं  
 नियमा हुंडं तु नायव्वं ॥ ५ ॥ असुभा विउव्वणा खलु नेरइयाणं तु होइ सव्वेसिं ।  
 वेउव्वियं सरीरं असंघयणहुंडसंठाणं ॥ ६ ॥ अस्साओ उववण्णो अस्साओ चेव  
 चयइ निरयमवं । सव्वपुडवीसु जीवो सव्वेषु ठिह्विसेसेसुं ॥ ७ ॥ उववाएण व सार्यं  
 नेरइओ देवकम्मणा वावि । अज्झवसाणनिमित्तं अहवा कम्माणुभावेणं ॥ ८ ॥ नेर-  
 इयाणुप्पाओ उक्कोसं पंचजोयणसयाइं । दुक्खेणभिहुयाणं वेयणसयसंपगाढाणं ॥ ९ ॥  
 अच्छिनिमीलियमेतं नत्थि सुहं दुक्खमेव पडिबद्धं । नरए नेरइयाणं अहोनिंसं  
 पच्चमाणाणं ॥ १० ॥ तेयाकम्मसरीरा सुहुमसरीरा य जे अपज्जता । जीवेण मुक्कमेत्ता  
 वच्चंति सहस्ससो भेयं ॥ ११ ॥ अइसीयं अइउण्हं अइतप्पा अइखुहा अइभयं वा ।  
 निरए नेरइयाणं दुक्खसयाइं अविस्तामं ॥ १२ ॥ एत्थ य भिन्नमुहुत्तो पोग्गल  
 असुहा य होइ अस्साओ । उववाओ उप्पाओ अच्छि सरीरा उ बोद्धवा ॥ १३ ॥  
 से तं नेरइया ॥ १५ ॥ **तइओ नेरइयउडेसो समत्तो ॥**

से किं तं तिरिक्खजोणिया ? तिरिक्खजोणिया पंचविहा पण्णत्ता, तंजहा—  
 एगिंदियतिरिक्खजोणिया बेईदियतिरिक्खजोणिया तेईदियतिरिक्खजोणिया चउरिं-  
 दियतिरिक्खजोणिया पंचिंदियतिरिक्खजोणिया य । से किं तं एगिंदियतिरिक्ख-  
 जोणिया ? २ पंचविहा पण्णत्ता, तंजहा—पुढविकाइयएगिंदियतिरिक्खजोणिया जाव  
 वणस्सइकाइयएगिंदियतिरिक्खजोणिया । से किं तं पुढविकाइयएगिंदियतिरिक्ख-  
 जोणिया ? २ दुविहा पण्णत्ता, तंजहा—सुहुमपुढविकाइयएगिंदियतिरिक्खजोणिया  
 बायरपुढविकाइयएगिंदियतिरिक्खजोणिया य । से किं तं सुहुमपुढविकाइयएगिंदिय-  
 तिरिं ? २ दुविहा पण्णत्ता, तंजहा—पज्जतसुहुम० अपज्जतसुहुम० से तं सुहुम० ।  
 से किं तं बायरपुढविकाइय० ? २ दुविहा पण्णत्ता, तंजहा—पज्जतबायरपु० अपज्ज-  
 तबायरपु०, से तं बायरपुढविकाइयएगिंदिय०, से तं पुढवीकाइयएगिंदिय० । से किं  
 तं आउक्काइयएगिंदिय० ? २ दुविहा पण्णत्ता, एवं जहेव पुढविकाइयाणं तहेव,  
 तेउकायमेदो एवं जाव वणस्सइकाइया से तं वणस्सइकाइयएगिंदियतिरिक्ख० । से किं  
 तं बेईदियतिरिक्ख० ? २ दुविहा पण्णत्ता, तंजहा—पज्जतगबेईदियति० अपज्जतग-

बेइंदियति०, से तं बेइंदियतिरि० एवं जाव चउरिंदिया । से किं तं पंचेंदियतिरि-  
 क्खजोणिया ? २ तिविहा पणत्ता, तंजहा—जलयरपंचेंदियतिरिक्खजोणिया थल-  
 यरपंचेंदियतिरिक्खजो० खहयरपंचेंदियतिरिक्खजोणिया । से किं तं जलयरपंचेंदि-  
 यतिरिक्खजोणिया ? २ दुविहा पणत्ता, तंजहा—संमुच्छिमजलयरपंचेंदियतिरिक्ख-  
 जोणिया य गब्भवक्कंतियजलयरपंचेंदियतिरिक्खजोणिया य । से किं तं संमुच्छिम-  
 जलयरपंचेंदियतिरिक्खजोणिया ? २ दुविहा पणत्ता, तंजहा—पज्जत्तगसंमुच्छिम०  
 अपज्जत्तगसंमुच्छिमजलयर०, से तं संमुच्छिम० पंचेंदियतिरिक्ख० । से किं तं  
 गब्भवक्कंतियजलयरपंचेंदियतिरिक्खजोणिया ? २ दुविहा पणत्ता, तंजहा—पज्जत्त-  
 गगब्भवक्कंतिय० अपज्जत्तगगब्भ० से तं गब्भवक्कंतियजलयर०, से तं जलयरपंचेंदि-  
 यतिरि० । से किं तं थलयरपंचेंदियतिरिक्खजोणिया ? २ दुविहा पणत्ता, तंजहा—  
 चउप्पयथलयरपंचेंदिय० परिसप्पथलयरपंचेंदियतिरिक्खजोणिया । से किं तं चउ-  
 प्पयथलयरपंचेंदिय० ? चउप्पय० दुविहा पणत्ता, तंजहा—संमुच्छिमचउप्पयथ-  
 लयरपंचेंदिय० गब्भवक्कंतियचउप्पयथलयरपंचेंदियतिरिक्खजोणिया य, जहेव जल-  
 यराणं तहेव चउक्कओ भेओ, सेतं चउप्पयथलयरपंचेंदिय० । से किं तं परिसप्प-  
 थलयरपंचेंदियतिरिक्ख० ? २ दुविहा पणत्ता, तंजहा—उरपरिसप्पथलयरपंचेंदि-  
 यतिरिक्खजोणिया भुयपरिसप्पथलयरपंचेंदियतिरिक्खजोणिया । से किं तं उरपरिस-  
 प्पथलयरपंचेंदियतिरिक्खजोणिया ? उरपरि० दुविहा पणत्ता, तंजहा—जहेव  
 जलयराणं तहेव चउक्कओ भेओ, एवं भुयपरिसप्पाणवि भाणियव्वं, से तं भुयपरि-  
 सप्पथलयरपंचेंदियतिरिक्खजोणिया, से तं थलयरपंचेंदियतिरिक्खजोणिया । से किं  
 तं खहयरपंचेंदियतिरिक्खजोणिया ? खहयर० दुविहा पणत्ता, तंजहा—संमुच्छि-  
 मखहयरपंचेंदियतिरिक्खजोणिया गब्भवक्कंतियखहयरपंचेंदियतिरिक्खजोणिया य ।  
 से किं तं संमुच्छिमखहयरपंचेंदियतिरिक्खजोणिया ? संमु० दुविहा पणत्ता,  
 तंजहा—पज्जत्तगसंमुच्छिमखहयरपंचेंदियतिरिक्खजोणिया अपज्जत्तगसंमुच्छिमखह-  
 यरपंचेंदियतिरिक्खजोणिया य, एवं गब्भवक्कंतियावि जाव पज्जत्तगगब्भवक्कंतियावि  
 जाव अपज्जत्तगगब्भवक्कंतियावि । खहयरपंचेंदियतिरिक्खजोणियाणं भंते ! कइविहे  
 जोणिसंगहे पणत्ते ? गोयमा ! तिविहे जोणिसंगहे पणत्ते, तंजहा—अंडया पोयया  
 संमुच्छिमा, अंडया तिविहा पणत्ता, तंजहा—इत्थी पुरिसा णपुंसगा, पोयया  
 तिविहा पणत्ता, तंजहा—इत्थी पुरिसा णपुंसया, तत्थ णं जे ते संमुच्छिमा ते  
 सव्वे णपुंसगा ॥ ९६ ॥ एएसि णं भंते ! जीवाणं कइ लेसाओ पणत्ताओ ?  
 गोयमा ! छेलेसाओ पणत्ताओ, तंजहा—कण्हलेसा जाव सुक्कलेसा ॥ ते णं भंते !

जीवा किं सम्मदिट्ठी सिच्छादिट्ठी सम्मसिच्छादिट्ठी ? गोयमा ! सम्मदिट्ठीवि सिच्छादि-  
ट्ठीवि सम्मसिच्छादिट्ठीवि ॥ ते णं भंते ! जीवा किं णाणी अण्णाणी ? गोयमा !  
णाणीवि अण्णाणीवि तिणि णाणां तिणि अण्णाणां भयणाए ॥ ते णं भंते ! जीवा  
किं मणजोगी वज्जोगी कायजोगी ? गोयमा ! तिविहावि ॥ ते णं भंते ! जीवा किं  
सागारोवउत्ता अणागारोवउत्ता ? गोयमा ! सागारोवउत्तावि अणागारोवउत्तावि ॥  
ते णं भंते ! जीवा कओ उव्वज्जंति किं नेरइएहिंतो उव्व० तिरिक्खजोणिएहिंतो  
उव्व० ? पुच्छा, गोयमा ! असंखेज्जासाउयअकम्मभूमगअंतरदीवगवजेहिंतो उव्व-  
वज्जंति ॥ तेसि णं भंते ! जीवाणं केवइयं कालं ठिई पण्णत्ता ? गोयमा ! जहणेणं  
अंतोमुहुत्तं उक्कोसेणं पलिओवमस्स असंखेज्जइभागं ॥ तेसि णं भंते ! जीवाणं कइ  
समुग्घाया पण्णत्ता ? गोयमा ! पंच समुग्घाया पण्णत्ता, तंजहा—वेयणासमुग्घाए  
जाव तेयासमुग्घाए ॥ ते णं भंते ! जीवा मारणंतियसमुग्घाएणं किं समोहया  
मरंति असमोहया मरंति ? गोयमा ! समोहयावि म० असमोहयावि मरंति ॥ ते  
णं भंते ! जीवा अणंतरं उव्वट्ठिता कहिं गच्छंति ? कहिं उव्वज्जंति ?—किं नेरइएउ  
उव्वज्जंति ? तिरिक्ख० पुच्छा, गोयमा ! एवं उव्वट्ठणा भाणियव्वा जहा वक्कीए  
तहेव ॥ तेसि णं भंते ! जीवाणं कइ जाइकुलकोडिजोणीपमुहसयसहस्सा पण्णत्ता ?  
गोयमा ! वारस जाइकुलकोडिजोणीपमुहसयसहस्सा प० ॥ भुयपरिसप्पथलयरपंचेंदिय-  
तिरिक्खजोणियाणं भंते ! कइविहे जोणीसंगहे पण्णत्ते ? गोयमा ! तिविहे जोणीसंगहे  
पण्णत्ते, तंजहा—अंडया पोयया संमुच्छिमा, एवं जहा खहराणं तहेव, णाणत्तं  
जहणेणं अंतोमुहुत्तं उक्कोसेणं पुव्वकोडी, उव्वट्ठिता दोच्चं पुढविं गच्छंति, णव जाइकुल-  
कोडीजोणीपमुहसयसहस्सा भवंतीति मक्खायं, सेसं तहेव ॥ उरपरिसप्पथलयरपंचें-  
दियतिरिक्खजोणियाणं भंते ! पुच्छा, जहेव भुयपरिसप्पाणं तहेव, णवरं ठिई जह-  
णेणं अंतोमुहुत्तं उक्कोसेणं पुव्वकोडी, उव्वट्ठिता जाव पंचमिं पुढविं गच्छंति, दस जाइ-  
कुलकोडी० ॥ चउप्पयथलयरपंचेंदियतिरिक्ख० पुच्छा, गोयमा ! दुविहे पण्णत्ते,  
तंजहा—जराउया (पोयया) य संमुच्छिमा य, से किं तं जराउया (पोयया) ? २  
तिविहा पण्णत्ता, तंजहा—इत्थी पुरिसा णपुंसगा, तत्थ णं जे ते संमुच्छिमा ते  
सव्वे णपुंसया ॥ तेसि णं भंते ! जीवाणं कइ लेस्साओ पण्णत्ताओ ? सेसं जहा  
पक्खीणं, णाणत्तं ठिई जहणेणं अंतोमुहुत्तं उक्कोसेणं तिन्नि पलिओवमाइं, उव्वट्ठिता  
चउत्थि पुढविं गच्छंति, दस जाइकुलकोडी० ॥ जलयरपंचेंदियतिरिक्खजोणियाणं  
पुच्छा, जहा भुयपरिसप्पाणं णवरं उव्वट्ठिता जाव अहेसतमं पुढविं अद्धतेरस  
जाइकुलकोडीजोणीपमुह० प० ॥ चउरिंदियाणं भंते ! कइ जाइकुलकोडीजोणीप-

मुहसयसहस्सा पणत्ता ? गोयमा ! नव जाईकुलकोडीजोणीपमुहसयसहस्सा सम-  
 क्खाया । तेईदियाणं पुच्छा, गोयमा ! अट्टजाईकुल जाव मक्खाया । वेईदियाणं  
 भंते ! कइ जाई० पुच्छा, गोयमा ! सत्त जाईकुलकोडीजोणीपमुह० ॥ ९७ ॥  
 कइ णं भंते ! गंधा पणत्ता ? कइ णं भंते ! गंधसया पणत्ता ? गोयमा ! सत्त गंधा  
 सत्त गंधसया पणत्ता ॥ कइ णं भंते ! पुप्फजाईकुलकोडीजोणीपमुहसयसहस्सा  
 पणत्ता ? गोयमा ! सोलसपुप्फजाईकुलकोडीजोणीपमुहसयसहस्सा पणत्ता, तंजहा—  
 चत्तारि जलयाणं चत्तारि थलयाणं चत्तारि महारुक्खियाणं चत्तारि महागुम्मियाणं ॥  
 कइ णं भंते ! वल्लीओ कइ वल्लिसया पणत्ता ? गोयमा ! चत्तारि वल्लीओ चत्तारि  
 वल्लीसया पणत्ता ॥ कइ णं भंते ! लयाओ कइ लयासया पणत्ता ? गोयमा ! अट्ट  
 लयाओ अट्ट लयासया पणत्ता ॥ कइ णं भंते ! हरियकाया हरियकायसया पणत्ता ?  
 गोयमा ! तओ हरियकाया तओ हरियकायसया पणत्ता, फलसहस्सं च बिट्ठवद्धाणं  
 फलसहस्सं च णालवद्धाणं, ते वि सव्वे हरियकायमेव समोयरंति, ते एवं समणुग्गम्म-  
 माणा २ एवं समणुगाहिज्जमाणा २ एवं समणुपेहिज्जमाणा २ एवं समणुचित्तिज्जमाणा २  
 एएसु चेव दोसु काएसु समोयरंति, तंजहा—तसकाए चेव थावरकाए चेव, एवा-  
 मेव सपुण्णावरेणं आजीवियदिट्ठंतेणं चउरासीइ जाइकुलकोडीजोणीपमुहसयसहस्सा  
 भवंतीति मक्खाया ॥ ९८ ॥ अत्थि णं भंते ! विमाणाइं सोत्थियाणि सोत्थियावत्ताइं  
 सोत्थियपमाइं सोत्थियकन्ताइं सोत्थियवन्नाइं सोत्थियल्लेसाइं सोत्थियज्झयाइं  
 सोत्थियसिगाराइं सोत्थियकूडाइं सोत्थियसिद्धाइं सोत्थुत्तरवडिसगाइं ? हंता अत्थि ।  
 ते णं भंते ! विमाणा केमहालया प० ? गोयमा ! जावइए णं सूरिए उदेइ जावइए णं  
 च सूरिए अत्थमइ एवइयाइं तिण्णोवासंतराइं अत्थेगइयस्स देवस्स एगे विक्रमे सिया,  
 से णं देवे ताए उक्किट्ठाए तुरियाए जाव दिव्वाए देवगइए वीईवयमाणे २ जाव  
 एगाहं वा दुयाहं वा उक्कोसेणं छम्मासा वीईवएज्जा, अत्थेगइया विमाणं वीईवएज्जा  
 अत्थेगइया विमाणं नो वीईवएज्जा, एमहालया णं गोयमा ! ते विमाणा पणत्ता,  
 अत्थि णं भंते ! विमाणाइं अच्चीणि अचिरावत्ताइं तहेव जाव अञ्जुत्तरवडिसगाइं ?  
 हंता अत्थि, ते णं भंते ! विमाणा केमहालया पणत्ता ? गोयमा ! एवं जहा सोत्थी-  
 (याई)णि णवरं एवइयाइं पंच उवासंतराइं अत्थेगइयस्स देवस्स एगे विक्रमे सिया  
 सेसं तं चेव ॥ अत्थि णं भंते ! विमाणाइं कामाई कामावत्ताइं जाव कामुत्तरवडिस-  
 याइं ? हंता अत्थि, ते णं भंते ! विमाणा केमहालया पणत्ता ? गोयमा ! जहा सोत्थीणि  
 णवरं सत्त उवासंतराइं विक्रमे सेसं तहेव ॥ अत्थि णं भंते ? विमाणाइं विजयाइं  
 वेज्यंताइं जयंताइं अपराजियाइं ? हंता अत्थि, ते णं भंते ! विमाणा के० ? गोयमा !



जावइए णं सूरिए उदेइ० एवइयाइं नव ओवासंतराई, सेसं तं चेव, नो चेव णं ते विमाणे वीईवएजा एमहालया णं ते विमाणा पण्णत्ता समणाउसो! ॥ ९९ ॥  
**पढमो तिरिक्खजोणियउदेसो समत्तो ॥**

कइविहा णं भंते ! संसारसमावण्णगा जीवा पण्णत्ता ? गोयमा ! छव्विहा पण्णत्ता, तंजहा—पुढविकाइया जाव तसकाइया । से किं तं पुढविकाइया ? पुढविकाइया दुविहा पण्णत्ता, तंजहा—सुहुमपुढविकाइया बायरपुढविकाइया य । से किं तं सुहुमपुढविकाइया ? २ दुविहा पण्णत्ता, तंजहा—पज्जत्ता य अपज्जत्ता य, सेतं सुहुमपुढविकाइया । से किं तं बायरपुढविकाइया ? २ दुविहा पण्णत्ता, तंजहा—पज्जत्ता य अपज्जत्ता य, एवं जहा पण्णवणापए, सण्हा सत्तविहा पण्णत्ता, खरा अणेगविहा पज्जत्ता जाव असंखेजा, सेतं बायरपुढविकाइया, सेतं पुढविकाइया, एवं चेव जहा पण्णवणापए तहेव निरवसेसं भाणियव्वं जाव वणप्फइकाइया, एवं जाव जत्थेगो तत्थ सिय संखेजा सिय असंखेजा सिय अणंता, सेतं बायरवणप्फइकाइया, से तं वणस्सइकाइया । से किं तं तसकाइया ? २ चउव्विहा पण्णत्ता, तंजहा—बेईदिया तेईदिया चउरिंदिया पंचंदिया । से किं तं बेईदिया ? २ अणेगविहा पण्णत्ता, एवं जं चेव पण्णवणापए तं चेव निरवसेसं भाणियव्वं जाव सव्वट्ठसिद्धदेवा, से तं अणुत्तरोववाइया, से तं देवा, से तं पंचंदिया, से तं तसकाइया ॥ १०० ॥ कइविहा णं भंते ! पुढवी पण्णत्ता ? गोयमा ! छव्विहा पुढवी पण्णत्ता, तंजहा—सण्हापुढवी सुद्धपुढवी वालुयापुढवी मणोसिलापु० सकरापु० खरपुढवी ॥ सण्हापुढवीणं भंते ! केवइयं कालं ठिई पण्णत्ता ? गोयमा ! जह० अंतोमु० उक्कोसेणं एगं वाससहस्सं । सुद्धपुढवीए पुच्छा, गोयमा ! जह० अंतोमु० उक्को० बारस वाससहस्साइं । वालुयापुढवीपुच्छा, गोयमा ! जह० अंतोमु० उक्को० चोइस वाससहस्साइं । मणोसिलापुढवीणं पुच्छा, गोयमा ! जह० अंतोमु० उक्को० सोलस वाससहस्साइं । सकरापुढवीए पुच्छा, गोयमा ! जह० अंतोमु० उक्को० अट्ठारस वाससहस्साइं । खरपुढविपुच्छा, गोयमा ! जह० अंतोमु० उक्को० बावीस वाससहस्साइं ॥ नेरइयाणं भंते ! केवइयं कालं ठिई पण्णत्ता ? गोयमा ! जह० दस वाससहस्साइं उक्को० तेत्तीसं सागरोवमाइं ठिई, एयं सव्वं भाणियव्वं जाव सव्वट्ठसिद्धदेवति ॥ जीवे णं भंते ! जीवेत्ति कालओ केवचिरं होइ ? गोयमा ! सव्वद्धं, पुढविकाइए णं भंते ! पुढविकाइएत्ति कालओ केवचिरं होइ ? गोयमा ! सव्वद्धं, एवं जाव तसकाइए ॥ १०१ ॥ पडुप्पन्नपुढविकाइया णं भंते ! केवइकालस्स णिल्लेवा सिया ? गोयमा ! जहण्णपए असंखेजाहिं उस्सप्पिणीओसप्पिणीहिं, उक्कोसपए असंखेजाहिं उस्सप्पिणीओसप्पि-

णीहिं, जहन्नपयाओ उक्कोसपए असंखेज्जगुणा, एवं जाव पडुप्पन्नवाउक्काइया ॥  
 पडुप्पन्नवणप्फइकाइया णं भंते ! केवहकालस्स निळ्ळेवा सिया ? गोयमा ! पडुप्पन्नवण०  
 जहण्णपए अपया उक्कोसपए अपया, पडुप्पन्नवणप्फइकाइयाणं णत्थि निळ्ळेवणा ॥  
 पडुप्पन्नतसकाइयाणं पुच्छा, जहण्णपए सागरोवमसयपुहुत्तस्स उक्कोसपए सागरोवम-  
 सयपुहुत्तस्स, जहण्णपया उक्कोसपए विसेसाहिया ॥ १०२ ॥ अविमुद्वलेस्से णं भंते !  
 अणगारे असमोहएणं अप्पाणेणं अविमुद्वलेस्सं देवं देविं अणगारं जाणइ पासइ ?  
 गोयमा ! नो इणट्ठे समट्ठे । अविमुद्वलेस्से णं भंते ! अणगारे असमोहएणं अप्पाणएणं  
 विसुद्वलेस्सं देवं देविं अणगारं जाणइ पासइ ? गोयमा ! नो इणट्ठे समट्ठे । अविमुद्वलेस्से  
 णं भंते ! अणगारे समोहएणं अप्पाणेणं अविमुद्वलेस्सं देवं देविं अणगारं जाणइ पासइ ?  
 गोयमा ! नो इणट्ठे समट्ठे । अविमुद्वलेस्से० अणगारे समोहएणं अप्पाणेणं विसुद्वलेस्सं  
 देवं देविं अणगारं जाणइ पासइ ? नो इणट्ठे समट्ठे । अविमुद्वलेस्से णं भंते ! अणगारे  
 समोहयासमोहएणं अप्पाणेणं अविमुद्वलेस्सं देवं देविं अणगारं जाणइ पासइ ? नो  
 इणट्ठे समट्ठे । अविमुद्वलेस्से० अणगारे समोहयासमोहएणं अप्पाणेणं विसुद्वलेस्सं देवं  
 देविं अणगारं जाणइ पासइ ? नो इणट्ठे समट्ठे । विसुद्वलेस्से णं भंते ! अणगारे  
 असमोहएणं अप्पाणेणं अविमुद्वलेस्सं देवं देविं अणगारं जाणइ पासइ ? हंता जाणइ  
 पासइ जहा अविमुद्वलेस्सेणं छ आलावगा एवं विसुद्वलेस्सेणवि छ आलावगा भाणि-  
 यव्वा जाव विसुद्वलेस्से णं भंते ! अणगारे समोहयासमोहएणं अप्पाणेणं विसुद्वलेस्सं  
 देवं देविं अणगारं जाणइ पासइ ? हंता जाणइ पासइ ॥ १०३ ॥ अण्णउत्थिया णं  
 भंते ! एवमाइक्खंति एवं भासेन्ति एवं पण्णवेंति एवं परूवेंति—एवं खलु एगे जीवे  
 एगेणं समएणं दो किरियाओ पकरेइ, तंजहा—सम्मत्तकिरियं च मिच्छत्तकिरियं च,  
 जं समयं सम्मत्तकिरियं पकरेइ तं समयं मिच्छत्तकिरियं पकरेइ, जं समयं मिच्छत्तकिरियं  
 पकरेइ तं समयं सम्मत्तकिरियं पकरेइ, सम्मत्तकिरियापकरणयाए मिच्छत्तकिरियं पकरेइ  
 मिच्छत्तकिरियापकरणयाए सम्मत्तकिरियं पकरेइ, एवं खलु एगे जीवे एगेणं समएणं  
 दो किरियाओ पकरेइ, तंजहा—सम्मत्तकिरियं च मिच्छत्तकिरियं च, से कहमेयं  
 भंते ! एवं ? गोयमा ! जन्नं ते अन्नउत्थिया एवमाइक्खंति एवं भासंति एवं पण्णवेंति  
 एवं परूवेंति एवं खलु एगे जीवे एगेणं समएणं दो किरियाओ पकरेइ, तहेव जाव  
 सम्मत्तकिरियं च मिच्छत्तकिरियं च, जे ते एवमाहंसु तं णं मिच्छा, अहं पुण  
 गोयमा ! एवमाइक्खामि जाव परूवेमि—एवं खलु एगे जीवे एगेणं समएणं एणं  
 किरियं पकरेइ, तंजहा—सम्मत्तकिरियं वा मिच्छत्तकिरियं वा, जं समयं सम्मत्तकिरियं  
 पकरेइ णो तं समयं मिच्छत्तकिरियं पकरेइ, तं चेव जं समयं मिच्छत्तकिरियं पकरेइ

नो तं समयं सम्मतकिरियं पकरेइ, सम्मतकिरियापकरणयाए नो मिच्छतकिरियं पकरेइ मिच्छतकिरियापकरणयाए णो सम्मतकिरियं पकरेइ, एवं खलु एगे जीवे एगेणं सम-  
एणं एगं किरियं पकरेइ, तंजहा—सम्मतकिरियं वा मिच्छतकिरियं वा ॥ १०४ ॥  
**वीओ तिरिक्खजोणियउद्देसो समत्तो ॥**

से किं तं मणुस्सा ? मणुस्सा दुविहा पण्णत्ता, तंजहा—संमुच्छिममणुस्सा य गम्भवक्कतियमणुस्सा य ॥ १०५ ॥ से किं तं संमुच्छिममणुस्सा ? २ एगागारा पण्णत्ता ॥ कहि णं भंते ! संमुच्छिममणुस्सा संमुच्छंति ? गोयमा ! अंतोमणुस्सखेतो जहा पण्णवणाए जाव सेतं संमुच्छिममणुस्सा ॥ १०६ ॥ से किं तं गम्भवक्कतिय-  
मणुस्सा ? २ तिविहा पण्णत्ता, तंजहा—कम्मभूमगा अकम्मभूमगा अंतरदीवगा ॥ १०७ ॥ से किं तं अंतरदीवगा ? २ अट्ठावीसइविहा पण्णत्ता, तंजहा—एगूरुया आमासिया वेसाणिया णंगोलिया ह्यकण्णा ४ आर्यसमुहा ४ आसमुहा ४ आसकण्णा ४ उक्कामुहा ४ घणदंता जाव सुद्धदंता ॥ १०८ ॥ कहि णं भंते ! दाहिणिज्झाणं एगोरुय-  
मणुस्साणं एगोरुयदीवे णासं दीवे पण्णत्ते ? गोयमा ! जंबुद्वीवे २ मंदरस्स पव्वयस्स दाहिणेणं चुल्लहिमवंतस्स वासहरपव्वयस्स उत्तरपुरच्छिमिज्झाओ चरिमंताओ लवण-  
समुदं तिज्झि जोयणसयाइं ओगाहिता एत्थ णं दाहिणिज्झाणं एगोरुयमणुस्साणं एगूरुयदीवे णासं दीवे पण्णत्ते तिज्झि जोयणसयाइं आयामविकखंभेणं णव एगूणपण्ण-  
जोयणसए किंचि विसेसेण परिकखेवेणं एगाए पउमवरवेइयाए एगेणं च वणसंडेणं सव्वओ समंता संपरिकिखत्ते । सा णं पउमवरवेइया अट्ठ जोयणाइं उट्ठं उच्चत्तेणं पंच  
धणुसयाइं विकखंभेणं एगूरुयदीवं सव्वओ समंता परिकखेवेणं पण्णत्ता । तीसे णं पउमवरवेइयाए अयमेयारुवे वण्णावासे पण्णत्ते, तंजहा—वइरामया निम्मा एवं  
वेइयावण्णओ जहा रायपसेणइए तहा भाणियव्वो ॥ १०९ ॥ सा णं पउमवरवेइया एगेणं वणसंडेणं सव्वओ समंता संपरिकिखत्ता । से णं वणसंडे देसूणाइं दो जोयणाइं चक्कवालविकखंभेणं वेइयासमेणं परिकखेवेणं पण्णत्ते, से णं वणसंडे किण्हे किण्हो-  
भासे, एवं जहा रायपसेणइयवणसंडवण्णओ तहेव निरवसेसं भाणियव्वं, तणाण य वण्णगंधफासो सहो तणाणं वावीओ उप्पायपव्वया पुढविसिलापट्ठाया य भाणियव्वा  
जाव तत्थ णं बहवे वाणमंतरा देवा य देवीओ य आसयंति जाव विहरंति ॥ ११० ॥ एगोरुयदीवस्स णं दीवस्स अंतो बहुसमरमणिजे भूमिभागे पण्णत्ते, से जहाणामए  
आलिगपुक्खरेइ वा एवं सयणिजे भाणियव्वे जाव पुढविसिलापट्ठांसि तत्थ णं बहवे एगूरुयदीवया मणुस्सा य मणुस्सीओ य आसयंति जाव विहरंति, एगूरुयदीवे  
णं दीवे तत्थ तत्थ देसे २ तहिं २ बहवे उहालया कोहालया कयमाला णयमाला

णट्टमाला सिंगमाला संखमाला दंतमाला सेलमाला णाम दुमगणा पणत्ता समणा-  
 उसो ! कुसविकुसविसुद्धस्वमूला मूलमंतो कंदमंतो जाव वीयमंतो पत्तेहि य पुप्फेहि  
 य अच्छणपडिच्छण्णा सिरीए अईव २ उवसोहेमाणा उवसोहेमाणा चिट्ठंति,  
 एगूस्यदीवे णं दीवे रुक्खा बहवे हेस्यालवणा भेरुस्यालवणा मेरुस्यालवणा सेरुस्यालवणा  
 सालवणा सरलवणा सत्तवण्णवणा पूयफलिवणा खजूरिवणा णालिएरिवणा कुसविकुसवि०  
 जाव चिट्ठंति, एगूस्यदीवे णं दीवे तत्थ २ देसे० बहवे तिलया लवया नग्गोहा जाव  
 रायरुक्खा णंदिरुक्खा कुसविकुसवि० जाव चिट्ठंति, एगूस्यदीवे णं दीवे तत्थ...बहूओ  
 पउमलयाओ जाव सामलयाओ निच्चं कुसुमियाओ एवं लयावणओ जहा उववाइए जाव  
 पडिह्वाओ, एगूस्यदीवे णं दीवे तत्थ २...बहवे सेरियागुम्मा जाव महाजाइगुम्मा  
 ते णं गुम्मा दसद्धवणं कुसुमं कुसुमंति विहूयग्गसाहा जेण वायविहूयग्गसाला  
 एगूस्यदीवस्स बहुसमरमणिज्जभूमिभागं मुक्कपुप्फपुंजोवयारकलियं करंति, एगूस्यदीवे  
 णं दीवे तत्थ २...बहूओ वणराईओ पणत्ताओ, ताओ णं वणराईओ किण्हाओ  
 किण्होभासाओ जाव रम्माओ महामेहणिउरुवभूयाओ जाव महइं गंधद्वणिं मुयंतीओ  
 पासाइयाओ ४। एगूस्यदीवे णं दीवे तत्थ २...बहवे मत्तंगा णाम दुमगणा  
 पणत्ता समणाउसो ! जहा से चंदप्पभमणिसिलागसीहुवारुणिफलपत्तपुप्फोयणिजा  
 ससारवहुद्वजुत्तसंभारकालसंधयासवा महुमेरगरिट्ठाभदुद्धजाईपसन्नमेलगसायाउ  
 खजूरमुदियासारकविसायाणसुपक्खोयरससुरावणरसगंधपरिसजुता मज्जविहित्थबहु-  
 प्पगारा तदेवं ते मत्तंगयावि दुमगणा अणेगबहुविविह्वीससापरिणयाए मज्जविहीए  
 उववेया फलेहिं पुण्णा वीसंदंति कुसविकुसविसुद्धस्वमूला जाव चिट्ठंति १।  
 एगूस्यदीवे० तत्थ २...बहवो भिंगंगया णाम दुमगणा पणत्ता समणाउसो !,  
 जहा से बारगघडकरगकलसककरिपायंकंचणिउदंक्कवद्धणिसुपविट्ठरपारीचसगमिंगर-  
 क्रोडिसरगथरगपतीथालणत्थगववलियअवपदगवारयविचित्तवद्गमणिवद्गमुत्तिचारु-  
 पिणयाकंचणमणिरयणभत्तिचित्ता भायणविहीए बहुप्पगारा तहेव ते भिंगंगयावि  
 दुमगणा अणेगबहुविविह्वीससाए परिणयाए भायणविहीए उववेया फलेहिं पुत्राविव  
 विसट्ठंति कुसविकुस० जाव चिट्ठंति २। एगूस्यदीवे णं दीवे तत्थ २...बहवे  
 तुडियंग णाम दुमगणा पणत्ता समणाउसो !, जहा से आलिंगमुयंगपणवपडह-  
 द्दरगकरडिडिडिमभंभाहोरंभकणिगयारखरमुहिमुगुंदसंखियपरिलीवव्वगपरिवाइणिवं-  
 सावेणुवीणासुघोसविवंचिमहइकच्छभिरगसगातलतालकंसतालसुसंपउत्ता आओज-  
 विहीणिउणगंधव्वसमयकुसलेहिं फंदिया तिट्ठाणकरणसुद्धा तहेव ते तुडियंगयावि  
 दुमगणा अणेगबहुविविह्वीससापरिणामाए ततविततघणञ्जुसिराए चउव्विहाए

अओज्जविहीए उववेया फलेहिं पुण्णा विसद्वन्ति कुसविकुसविसुद्धस्खमूला जाव चिट्ठंति ३। एगूस्यदी० तत्थ २...बहवे दीवसिहा णाम दुमगणा पणत्ता समणाउसो !, जहा से संज्ञाविरागसमए नवणिहिवइणो दीविया चक्कवालविंदे पभूय-  
वट्टिपलित्ताणेहिं धणिउज्जालियतिमिरमद्दए कणगणिगरकुसुमियपालियातयवणप्पगासो  
कंचणमणिरयणविमलमहरिहृतवणिज्जलविचित्तदंडाहिं दीवियाहिं सहसा पज्जलिऊ-  
सवियणिद्धतेयदिप्पंतविमलगहगणसमप्पहाहिं वितिमिरकरसूरपसरिउल्लोयन्त्रियाहिं  
जावुज्जलपहसियाभिरामाहिं सोहेमाणे तहेव ते दीवसिहावि दुमगणा अणेगबहु-  
विविहवीससापरिणामाए उज्जोयविहीए उववेया फलेहिं पुण्णा विसद्वन्ति कुसविकुसवि०  
जाव चिट्ठंति ४। एगूस्यदीवे० तत्थ २...बहवे जोइसिहा णाम दुमगणा पणत्ता  
समणाउसो !, जहा से अचिरुगयसरयसूरमंडलपडंतउक्कासहस्सदिप्पंतविज्जलहु-  
यवहनिद्रूमजलियनिद्धंतथोयतत्ततवणिज्जकिंसुयासोयजावासुयणकुसुमविमलियपुंजम-  
णिरयणकिरणजच्चहिंगुलुयणिगररूवाइरेगरूवा तहेव ते जोइसिहावि दुमगणा  
अणेगबहुविविहवीससापरिणयाए उज्जोयविहीए उववेया सुहलेस्सा मंदलेस्सा मंदाय-  
वलेस्सा कूडाय इव ठाणठिया अन्नमन्नसमोगाढाहिं लेस्साहिं साए पभाए  
सपएसे सव्वओ समंता ओभासंति उज्जोवेंति पमासंति कुसविकुसवि० जाव चिट्ठंति  
५। एगूस्यदीवे० तत्थ २...बहवे चित्तंगा णाम दुमगणा पणत्ता समणाउसो !,  
जहा से पेच्छाघरे विचित्ते रम्मे वरकुसुमदाममालुज्जले भासंतमुक्कपुप्फपुंजोवयारकलिए  
विरल्लिविचित्तमलसिरिदाममल्लसिरिसमुदयप्पगन्धे गंथिमवेढिमपूरिमसंघाइमेण मल्लेण  
छेयसिप्पिय विभागरइएण सव्वओ चेव समणुबद्धे विरल्लवंतविप्पइद्धेहिं पंचवण्णेहिं  
कुसुमदामेहिं सोहमाणेहिं सोहमाणे वणमालयग्गए चेव दिप्पमाणे तहेव ते चित्तंग-  
यावि दुमगणा अणेगबहुविविहवीससापरिणयाए मल्लविहीए उववेया कुसविकुसवि०  
जाव चिट्ठंति ६। एगूस्यदीवे० तत्थ २...बहवे चित्तरसा णाम दुमगणा पणत्ता सम-  
णाउसो !, जहा से सुगंधवरकलमसालितंदुलविसिद्धणिस्वहयइद्धरुद्धे सारयघयगुडखंड-  
महुमेलिए अइरसे परमण्णे होज्ज उत्तमवण्णगंधमंते रण्णो जहा वा चक्कवट्टिस्स होज्ज  
णिउणेहिं सूयपुरिसेहिं सज्जिएहिं चाउरकप्पसेयसित्ते इव ओयणे कलमसालिणिज्जति-  
एवि एक्के सव्वप्फमिउवसयसगसित्थे अणेगसालणगसंजुते अहवा पडिपुण्णदव्वुव-  
क्खड्डेसु सकए वण्णगंधरसफरिसज्जुतबलवीरियपरिणामे इंदियबलपुट्टिवद्धणे खुप्पिवा-  
समहणे पहाणे गुलकटियखंडमच्छंडियउवणीए पमोयगे सण्हसमियगन्धे हवेज्ज परम-  
इट्ठंगसंजुते तहेव ते चित्तरसावि दुमगणा अणेगबहुविविहवीससापरिणयाए भोयण-  
विहीए उववेया कुसविकुसवि० जाव चिट्ठंति ७। एगूस्यदीवे ० तत्थ २...बहवे

मणियंग्गा नाम दुमगणा पण्णत्ता समणाउसो !, जहा से हारद्धहारवट्ठणगमउडकुंडल-  
वासुत्तगहेमजालमणिजालकणगजालगमुत्तगउच्चिइयकडगाखुडियएगावलिकंठसुत्तमंग-  
रिमउरत्तथगेवेजसोणिस्तुत्तगचूलासमणिकणगतिलगफुल्लसिद्धत्थयकण्णवालिससिसुरउसभ-  
चक्कगतलमंगतुडियहत्थिमालगवलक्खदीणारमालिया चंदसूरमालिया हरिसयकेऊर-  
वलयपालंबंगुलेजगकंचीमेहलाकलावपयरगपायजालधंठियखिखिणिरयणोरुजालत्थि-  
गियवरणेउरचलणमालिया कणगणिगरमालिया कंचणमणिरयणभत्तिचित्ता भूसणविही  
बहुप्पगारा तहेव ते मणियंग्गावि दुमगणा अणेगबहुविविहवीससापरिणयाए भूसण-  
विहीए उववेया कुसवि० जाव चिट्ठंति ८ । एगूरुयदीवे० तत्थ २...बहवे गेहागारा  
नाम दुमगणा पण्णत्ता समणाउसो !, जहा से पागारट्टालगचरियदारगोपुरपासायागा-  
सतलमंडवएगसालबिसालगतिसालगचउरंसचउसालगब्भभरोमोहणघरवलभिघरचि-  
त्तसालमालयभत्तिघरवट्ठंतसचउरंसणंदियावत्तसंठियाययपंडुरतलमुंडमालहम्मियं अहव  
णं धवलहरअद्धमागहविब्भमसेलद्धसेलसंठियकूडागारट्टुसुविहिकोट्टगअणेगघरसरणले-  
णआवणविडंगजालचंदणिजूह्यपवरकवोयालिचंदसालियरुवविभत्तिकलिया भवणविही  
बहुविगप्पा तहेव ते गेहागारावि दुमगणा अणेगबहुविविहवीससापरिणयाए सुहार-  
हणे सुहोत्ताराए सुहनिक्खमणप्पवेसाए द्दरसोवाणपंतिकलियाए पडरिकाए सुहवि-  
हाराए मणोऽणुकूलाए भवणविहीए उववेया कुसवि० जाव चिट्ठंति ९ । एगूरुयदीवे०  
तत्थ २...बहवे अणिगणा णामं दुमगणा पण्णत्ता समणाउसो !, जहा से आईणग-  
खोमतणुयकंबलदुगुल्लकोसेज्जकालमिगपट्ठचीणंसुयअणहयनिउणनिप्पावियनिद्धगजिय-  
पंचवण्णा चरणातवारवणिगयथुणाभरणचित्तसहिणगकल्लणगभिणिमेहणीलकज्जलव-  
हुवण्णरत्तपीयनीलसुक्किल्लमक्खयमिगलोमहेमप्फरुण्णगअवसरत्तगसिंशुओसमदासिलवं-  
गकल्लिगनलणितंतुमयभत्तिचित्ता वत्थविही बहुप्पगारा हवेज वरपट्ठण्णया वण्णरा-  
गकलिया तहेव ते अणिगणावि दुमगणा अणेगबहुविविहवीससापरिणयाए वत्थवि-  
हीए उववेया कुसविकुसवि० जाव चिट्ठंति १० । एगूरुयदीवे णं भंते ! दीवे मणु-  
याणं केरिसए आगारभावपडोयारे पण्णत्ते ? गोयमा ! ते णं मणुया अणुवमतरसो-  
मचारुवा भोगुत्तमगयलक्खणा भोगसत्तिसरीया सुजायसव्वंगसुंदरंगा सुपइद्वियकु-  
म्मचारुचलणा रत्तुप्पलपत्तमउयसुकुमालकोमलतला नगनगरसागरमगरचक्कंकरंकर-  
क्खणंकियचलणा अणुपुव्वसुसाहयंगुलीया उण्णयत्तणुत्तंबणिद्धणहा संठियसुसिल्लिगू-  
लुगप्फा एणीकुरुविंदावत्तवट्ठणुपुव्वजंघा समुग्गणिमग्गगुडजाणू गयससणसुजायसणि-  
भोरु वरवारणमत्ततुल्लविक्रमविलसियगई सुजायवरसुरगगुज्जदेसा आइण्णहओव  
णिरुवलेवा पमुइयवरतुरियसीहअइरेगवट्ठियकडी साहयसोणिदमुसलदप्पणणिगरियवर-

कणगच्छरसरिसवरवदरपलियमज्झा उज्जुयसमसहियसुजायजच्चतणुकसिणणिद्धआदेज-  
लडहसुकुमालमउयरमणिज्जरुमराई गंगावत्तपयाहिणावत्ततरंगमंगुररविकिरणत्तखणो-  
हियअक्रोसायंतपउमंगंभीरवियडणाभी झसविहगसुजायपीणकुच्छी झसोयरा सुइक-  
रणा पम्हवियडणाभी सण्णयपासा संगयपासा सुंदरपासा सुजायपासा मियमाइय-  
पीणरइयपासा अकरुंडुयकणगरुयगनिम्मलसुजायनिरुवहयदेहधारी पसत्थवत्तीसल-  
क्खणधरा कणगसिलायलुज्जलपसत्थसमयलोवचियविच्छिन्नपिहुलवच्छा सिरिवच्छं-  
कियवच्छा पुरवरफलहवट्टियभुया भुयगीसरविउलभोगआयाणफलहउच्छूढरीहवाहू  
ज्जयसत्तिभीपीणरइयपीवरपउट्टसंठियसुसिलिद्धविसिद्धघणथिरसुबद्धसुनिगूढपव्वसंधी  
रत्ततलोवइयमउयमंसलपसत्थलक्खणसुजायअच्छिद्दजालपाणी पीवरवट्टियसुजायको-  
मलवरंगुलीया तंबतलिणसुइरुइरणिद्धणक्खा चंदपाणिलेहा सूरपाणिलेहा संखपाणि-  
लेहा चक्रपाणिलेहा दिसासोत्थियपाणिलेहा चंदसूरसंखचक्रदिसासोत्थियपाणिलेहा  
अणेगवरलक्खणुत्तमपसत्थसुइरइयपाणिलेहा वरमहिसवराहसीहसहूलउसभणागवर-  
पडिपुन्नविउलउन्नयमईदखंधा चउरंगुलसुप्पमाणकंबुवरसरिसगीवा अवट्टियसुविभत्त-  
सुजायचित्तमंसू मंसलसंठियपसत्थसहूलविपुलहणुया उवचियसिलप्पवालविंबफलसन्नि-  
भाहरोट्ठा पंडुरससितगलविमलनिम्मलसंखगोखीरफेणदगरयमुणालिया धवलदंतसेढी  
अखंडदंता अफुडियदंता अविरलदंता सुजायदंता एगदंतसेढिव्व अणेगदंता हुयव-  
हनिद्धंतधोयतत्ततवणिज्जरत्ततलतालुजीहा गरुलाययउज्जुंगणासा अवदालियपोंडरी-  
यणयणा कोयासियधवलपत्तलच्छा आणामियचावरुद्धलकिण्हपूराइयसंठियसंगयआयय-  
सुजायतणुकसिणनिद्धभुमया अल्लीणप्पमाणजुत्तसवणा सुस्सवणा पीणमंसलकवोलेदस-  
भागा अचिरुगयबालचंदसंठियपसत्थविच्छिन्नसमणिडाला उडुवइपडिपुण्णसोमवयणा  
छत्तागारुत्तमंगदेसा घणणिचियसुबद्धलक्खणुणयकूडागारणिभपिंडियसीसे दाडिमपु-  
प्फपागासतवणिज्जरसरिसनिम्मलसुजायकेसंतकेसभूमी सामलिबोंडघणणिचियछोडियमि-  
उविसयपसत्थसुहुमलक्खणसुगंधसुंदरभुयमोयगभिणिणीलकजलपहट्टभमरगणणिद्धणि-  
उरंबनिचियकुंचियचियपयाहिणावत्तसुद्धसरिया लक्खणवज्जणगुणोववेया सुजायसुवि-  
भत्तसुरूवगा पासाइया दरिसणिजा अभिरूवा पडिरूवा, ते णं मणुया ओहस्सरा  
हंसस्सरा कौवस्सरा० नंदिघोसा सीहस्सरा सीहघोसा मंजुस्सरा मंजुघोसा सुस्सरा  
सुस्सरणिगघोसा छायाउज्जोइयंगमंगा वज्जरिसहनारायसंघयणा समचउरंसंठाणसं-  
ठिया सिणिद्धव्वी गिरायंका उत्तमपसत्थअइसेसनिरुवमतणू जल्लमलकलंकेसेयरयो-  
सवज्जियसरीरा निरुवलेवा अणुलोमवाउवेगा कंकरुगहणी कवोयपरिणामा सउणिव्व  
पोसपिट्ठंतरोरुपरिणया विगगहियउन्नयकुच्छी पउमुप्पलसरिसगंधणिस्साससुरभिवयणा

अद्वयणसयं ऊसिया, तेसिं मणुयाणं चउसट्ठि पिट्ठिकरंडगा पण्णत्ता समणाउसो !, ते  
 णं मणुया पगइभद्दगा पगइविणीयगा पगइउवसंता पगइपयणुकोहमणमायालोभा  
 मिउमद्वसंपणा अल्लीणा भद्दगा विणीया अप्पिच्छा असंनिहिंसंचया अचंडा विडि-  
 मंतरपरिवसणा जहिच्छियकामगासिणो य ते मणुयगणा पण्णत्ता समणाउसो ! ।  
 तेसिं णं भंते ! मणुयाणं केवइकालस्स आहारट्ठे समुप्पज्जइ ? गोयमा ! चउत्थभत्तस्स  
 आहारट्ठे समुप्पज्जइ, एगोरुयमणुईणं भंते ! केरिसए आगारभावपडोयारे पण्णत्ते ?  
 गोयमा ! ताओ णं मणुईओ सुजायसव्वंगसुंदरीओ पहाणमहिलागुणेहिं जुता अच्चंत-  
 विसप्पमाणपउमसूमाळकुम्मसंठियविसिट्ठचलणा उज्जुमउयपीवरनिरंतरपुट्टसाहियंशु-  
 लीया उण्णयरइयनलिणंव सुइणिद्धणक्खा रोमरहियवट्टलट्टसंठियअजहणपसत्थलक्ख-  
 णअकोप्पज्जघुयला सुणिम्मियसुगूढजाणुमंडलसुवद्धसंधी कयलिवखंमाइरेगसंठिय-  
 णिव्वणसुकुमालमउयकोमलअविरलसमसहियसुजायवट्टपीवरणिरंतरोरु अट्टावयवीई-  
 पट्टसंठियपसत्थविच्छिन्नपिहुलसोणी वयणायामप्पमाणदुगुणियविसालमंसलसुवद्धज-  
 हणवरधारणीओ वज्जविराडयपसत्थलक्खणणिरोदरी तिवलिवलीयतणुणमियमज्झि-  
 याओ उज्जुयसमसहियजच्चतणुकसिणणिद्धआदेज्जलडइसुविभत्तसुजायकंतसोहंतइल-  
 रमणिज्जरोमराई गंगावत्तपयाहिणावत्ततरंगभंगुररविकिरणतरुणबोहियअकोसायंतप-  
 उमवणगंभीरवियडणाभी अणुब्भडपसत्थपीणकुच्छी सण्णयपासा संगयपासा सुजाय-  
 पासा मियसाइयपीणरइयपासा अकरंडुयकणगरुयगनिम्मलसुजायणिरुवहयगायलट्ठी  
 कंचणकलससमपमाणसमसहियसुजायलट्टचूचुयआमेलगजमलजुयलवट्टियअब्भुण्णयर-  
 इयसंठियपओहराओ भुयंगणुपुव्वतणुयगोपुच्छवट्टसमसहियणमियआएज्जललियवाहाओ  
 तंबणहा मंसलगहत्था पीवरकोमलवरंगुलीओ णिद्धपाणिलेहा रविसिसिंखक्क-  
 सोत्थियसुविभत्तसुविरइयपाणिलेहा पीणुण्णयक्कवत्थिदेसा पडिपुण्णगलकवोला  
 चउरंगुलसुप्पमाणकंबुवरसरिसगीवा मंसलसंठियपसत्थहणुया दाडिमपुप्फगास-  
 पीवरकुंचियवराधरा सुंदरोत्तरोट्ठा दहिदगरयचंदकुंदवासंतिमउलअच्छिद्विमिलदसणा  
 रत्तुप्पलपत्तमउयसुकुमालतालुजीहा कणयरमुउलअकुडिलअब्भुग्गयउज्जुतुंगणासा सार-  
 यणवकमलकुमुयकुवलयविमुक्कदलणिरसरिसलक्खणअंकियकंतणयणा पत्तलचवला-  
 यंततंबलोयणाओ आणामियचावरुइलकिण्हम्भराइसंठियसंगयआययसुजायतणुकसिण-  
 णिद्धभमुया अल्लीणपमाणजुत्तसवणा सुसवणा पीणमट्टरमणिज्जगंडलेहा चउरंसपसत्थ-  
 समणिडाला कोमुइरयणियरविमलपडिपुत्तसोमवयणा छत्तुन्नयउत्तिमंगा कुडिलसुसि-  
 णिद्धदीहसिरया छत्तज्जयजुगदामिणिकमंडलुक्कलसवाविसोत्थियपडागजवमच्छकुम्मर-  
 हवरमगरसुयथालअंकुसअट्टावयवीइसुपइट्टगमऊरसिरिदामाभिसेयतोरणमेइणिउदहि-



वरभवणगिरिवरआयंसललियगयउसभसीहचमरउत्तमपसत्थवत्तीसलक्खणधराओ  
 हंससरिसगईओ कोइलमहुरगिरिसुरसराओ कंता सव्वस्स अणुनयाओ ववगयवलि-  
 पलिया वंगदुव्वण्णवाहीदोहग्गसोगमुक्काओ उच्चतेण य नराण थोवूणमूसियाओ  
 सभावसिंगारागारचारुवेसा संगयगयहसियभणियचेद्वियविलाससंलावणिउणजुत्तोवथार-  
 कुसला सुंदरथणजहणवयणकरचलणगयणमाला वण्णलावण्णजोव्वणविलासकलिया  
 नंदणवणविवरचारिणीउव्व अच्छराओ अच्छेरगपेच्छणिजा पासाईयाओ दरिसणि-  
 जाओ अभिरूवाओ पडिरूवाओ । तासि णं भंते ! मणुईणं केवइकालस्स आहारद्वे  
 समुप्पज्जइ ? गोयमा ! चउत्थभत्तस्स आहारद्वे समुप्पज्जइ । ते णं भंते ! मणुया  
 किमाहारमाहारैति ? गोयमा ! पुढविपुप्फफलाहारा णं ते मणुयगणा पण्णत्ता समणा-  
 उसो ! । तीसे णं भंते ! पुढवीए केरिसए आसाए पण्णत्ते ? गोयमा ! से जहाणामए  
 गुलेइ वा खंडेइ वा सक्कराइ वा मच्छंडियाइ वा भिसकंदेइ वा पप्पडमोयएइ वा  
 पुप्फउत्तराइ वा पउमुत्तराइ वा अकोसियाइ वा विजयाइ वा महाविजयाइ वा  
 आयंसोवमाइ वा उवमाइ वा अणोवमाइ वा चाउरक्के गोखीरे चउठाणपरिणए  
 गुडखंडमच्छंडिउवणीए मंदग्गिकडीए वण्णेणं उववेए जाव फासेणं, भवेयारूवे  
 सिया ?, नो इणद्वे समद्वे, तीसे णं पुढवीए एत्तो इडुतराए चेव जाव मणामतराए चेव  
 आसाए पण्णत्ते, तेसि णं भंते ! पुप्फकलणं केरिसए आसाए पण्णत्ते ? गोयमा !  
 से जहानामए रत्तो चाउरंतचक्कवट्टिस्स कल्लाणे पवरभोयणे सयसहस्सनिप्फजे  
 वण्णेणं उववेए गंधेणं उववेए रसेणं उववेए फासेणं उववेए आसायणिजे वीसायणिजे  
 दीवणिजे बिहणिजे दप्पणिजे मयणिजे सत्थिविदियगयपल्लायणिजे, भवेयारूवे  
 सिया ?, नो इणद्वे समद्वे, तेसि णं पुप्फकलणं एत्तो इडुतराए चेव जाव आसाए  
 पण्णत्ते । ते णं भंते ! मणुया तमाहारमाहारिता कहिं वसहिं उव्वैति ? गोयमा !  
 रुक्खगेहालया णं ते मणुयगणा पण्णत्ता समणाउसो ! । ते णं भंते ! रुक्खा  
 किंसंठिया पण्णत्ता ? गोयमा ! कूडागारसंठिया पेच्छाघरसंठिया सत्तागारसंठिया  
 झयसंठिया तोरणसंठिया गोपुरवेइयचोपायालगसंठिया अट्टालगसंठिया पासायसंठिया  
 हम्मत्तलसंठिया गवक्खसंठिया वालग्गपोत्तियसंठिया वलमीसंठिया अण्णे तत्थ  
 बहवे वरभवणसयणासणविसिद्धसंठाणसंठिया सुहसीयलच्छाया णं ते दुमगणा पण्णत्ता  
 समणाउसो ! । अत्थि णं भंते ! एगोरुयदीवे दीवे गेहाणि वा गेहावणाणि वा ? नो  
 इणद्वे समद्वे, रुक्खगेहालया णं ते मणुयगणा पण्णत्ता समणाउसो ! । अत्थि णं भंते !  
 एगूरुयदीवे दीवे गामाइ वा नगराइ वा जाव सन्निवेसाइ वा ? नो इणद्वे समद्वे,  
 जहिच्छियकामगामिणो ते मणुयगणा पण्णत्ता समणाउसो ! । अत्थि णं भंते !

एगोरुयदीवे० असीइ वा मसीइ वा कसीइ वा पणीइ वा वणिज्जाइ वा ? नो इण्ठे समट्ठे, ववगयअसिमसिकिसिपणियवाणिज्जा णं ते मणुयगणा पण्णत्ता समणाउसो ! । अत्थि णं भंते ! एगोरुयदीवे० हिरण्णेइ वा सुवन्नेइ वा कंसेइ वा दूसेइ वा मणीइ वा मुत्तिण्णइ वा विउल्लवणकणगरयणमणिमोत्तियसंखसिलप्पवालसंतसारसावएजेइ वा ? हंता अत्थि, णो चेव णं तेसिं मणुयाणं तिक्वे ममत्तभावे समुप्पज्जइ । अत्थि णं भंते ! एगोरुयदीवे० रायाइ वा जुवरायाइ वा ईसरेइ वा तलवरेइ वा माडंबियाइ वा कोडुंबियाइ वा इब्भाइ वा सेट्ठीइ वा सेणावईइ वा सत्थवाहाइ वा ? णो इण्ठे समट्ठे, ववगयइट्ठीसक्कारा णं ते मणुयगणा पण्णत्ता समणाउसो ! । अत्थि णं भंते ! एगोरुयदीवे दीवे दासाइ वा पेसाइ वा सिस्साइ वा भयगाइ वा भाइल्लागाइ वा कम्मगरपुरिसाइ वा ? नो इण्ठे समट्ठे, ववगयआभिओगिया णं ते मणुयगणा पण्णत्ता समणाउसो ! । अत्थि णं भंते ! एगोरुयदीवे दीवे मायाइ वा पियाइ वा भायाइ वा भइणीइ वा भज्जाइ वा पुत्ताइ वा धूयाइ वा सुण्हाइ वा ? हंता अत्थि, नो चेव णं तेसिं णं मणुयाणं तिक्वे पेमबंधणे समुप्पज्जइ, पयणुपेज्जबंधणा णं ते मणुयगणा पण्णत्ता समणाउसो ! । अत्थि णं भंते ! एगोरुयदीवे दीवे अरीइ वा वेरिएइ वा घायगाइ वा वहगाइ वा पडिणीयाइ वा पच्चासित्ताइ वा ? णो इण्ठे समट्ठे, ववगयवेराणुबंधा णं ते मणुयगणा पण्णत्ता समणाउसो ! । अत्थि णं भंते ! एगोरुयदीवे० सित्ताइ वा वयंसाइ वा घडियाइ वा सहीइ वा सुहियाइ वा महाभागाइ वा संगइयाइ वा ? णो इण्ठे समट्ठे, ववगयपेम्मा णं ते मणुयगणा पण्णत्ता समणाउसो ! । अत्थि णं भंते ! एगोरुयदीवे० आवाहाइ वा वीवाहाइ वा जण्णाइ वा सद्धाइ वा थालिपागाइ वा चोलोवणयणाइ वा सीमंतोवणयणाइ वा पिइ(मय)पिंडनिवेयणाइ वा ? णो इण्ठे समट्ठे, ववगयआवाहविवाहजण्णसद्धथालिपागचोलोवणयणसीमंतोवणयणपिइपिंडनिवेयणा णं ते मणुयगणा पण्णत्ता समणाउसो ! । अत्थि णं भंते ! एगोरुयदीवे दीवे इंदमहाइ वा खंदमहाइ वा रुंदमहाइ वा सित्रमहाइ वा वेसमणमहाइ वा मुगुंदमहाइ वा णागमहाइ वा जक्खमहाइ वा भूयमहाइ वा कूवमहाइ वा तलायणइमहाइ वा दहमहाइ वा पव्वयमहाइ वा रुक्खरोवणमहाइ वा ? णो इण्ठे समट्ठे, ववगयमहमहिमा णं ते मणुयगणा पण्णत्ता समणाउसो ! । अत्थि णं भंते ! एगोरुयदीवे दीवे णडपेच्छाइ वा णट्टपेच्छाइ वा मल्लपेच्छाइ वा मुट्ठियपेच्छाइ वा विडंबगपेच्छाइ वा कहगपेच्छाइ वा पवगपेच्छाइ वा अक्खायगपेच्छाइ वा लासगपेच्छाइ वा लंखपे० मंखपे० तूणइल्लपे० तुंबवीणपे० कीवपे० मागहपे० जल्लपे० ? णो इण्ठे समट्ठे, ववगयकोउल्ला णं ते मणुयगणा पण्णत्ता समणाउसो ! । अत्थि णं भंते ! एगोरुयदीवे दीवे सगडाइ वा रहाइ

वा जाणाइ वा जुम्गाइ वा गिल्लीइ वा थिल्लीइ वा पिपिल्लीइ वा पवहणाणि वा सिवियाइ वा संदमाणियाइ वा ? णो इण्ठे समट्ठे, पायचारविहारिणो णं ते मणुस्सगणा पण्णत्ता समणाउसो ! अत्थि णं भंते ! एगूरुयदीवे० आसाइ वा हत्थीइ वा उट्ठाइ वा गोणाइ वा महिसाइ वा खराइ वा घोडाइ वा अयाइ वा एलाइ वा ? हंता अत्थि, नो चेव णं तेसिं मणुयाणं परिभोगत्ताए हव्वमागच्छंति । अत्थि णं भंते ! एगूरुयदीवे दीवे गावीइ वा महिसीइ वा उट्ठीइ वा अयाइ वा एलगाइ वा ? हंता अत्थि, णो चेव णं तेसिं मणुयाणं परिभोगत्ताए हव्वमागच्छंति । अत्थि णं भंते ! एगूरुयदीवे दीवे सीहाइ वा वग्घाइ वा विगाइ वा दीवियाइ वा अच्छाइ वा परच्छाइ वा परस्सराइ वा तरच्छाइ वा सियालाइ वा बिडालाइ वा सुणगाइ वा कोलसुणगाइ वा कोकंतियाइ वा ससगाइ वा चित्तलाइ वा चिल्ललाइ वा ? हंता अत्थि, नो चेव णं ते अण्णमण्णस्स तेसिं वा मणुयाणं किञ्चि आबाहं वा पवाहं वा उप्पायंति वा छविच्छेयं वा करेति, पगइभद्गा णं ते सावयगणा पण्णत्ता समणाउसो ! अत्थि णं भंते ! एगूरुयदीवे दीवे सालीइ वा वीहीइ वा गोधूमाइ वा जवाइ वा तिलाइ वा इक्खूइ वा ? हंता अत्थि, नो चेव णं तेसिं मणुयाणं परिभोगत्ताए हव्वमागच्छंति । अत्थि णं भंते ! एगूरुयदीवे दीवे गत्ताइ वा दरीइ वा घंसाइ वा भिगूइ वा उवाएइ वा विसमेइ वा विज्जलेइ वा धूलीइ वा रेणूइ वा पंकेइ वा चलणीइ वा ? णो इण्ठे समट्ठे, एगूरुयदीवे णं दीवे बहुसमरमणिज्जे भूमिभागे पण्णत्ते समणाउसो ! अत्थि णं भंते ! एगूरुयदीवे दीवे खाणूइ वा कंटएइ वा हीरएइ वा सक्कराइ वा तणकयवराइ वा पत्तकयवराइ वा असुइइ वा पइयाइ वा दुब्भिगंधाइ वा अचोक्खाइ वा ? णो इण्ठे समट्ठे, ववगयखाणुकंटगहीरसक्करतणकयवरपत्तकयवरअसुइपूइयदुब्भिगंधमचोक्खपरिवज्जिए णं एगूरुयदीवे पण्णत्ते समणाउसो ! अत्थि णं भंते ! एगूरुयदीवे दीवे दीवे दंसाइ वा मसगाइ वा पिष्ठयाइ वा जूयाइ वा लिक्खाइ वा ढंकुणाइ वा ? णो इण्ठे समट्ठे, ववगयदंसमसगपिष्ठयजूयलिक्खढंकुणपरिवज्जिए णं एगूरुयदीवे पण्णत्ते समणाउसो ! अत्थि णं भंते ! एगूरुयदीवे० अहीइ वा अयगराइ वा महोरगाइ वा ? हंता अत्थि, नो चेव णं ते अन्नमन्नस्स तेसिं वा मणुयाणं किञ्चि आबाहं वा पवाहं वा छविच्छेयं वा करेति, पगइभद्गा णं ते वालगगणा पण्णत्ता समणाउसो ! अत्थि णं भंते ! एगूरुयदीवे० गहदंडाइ वा गहमुसलाइ वा गहगज्जियाइ वा गहजुद्धाइ वा गहसंघाडगाइ वा गहअवसव्वाइ वा अच्चाइ वा अच्भस्वखाइ वा संज्ञाइ वा गंधव्वनगराइ वा गज्जियाइ वा विज्जुयाइ वा उक्कापायाइ वा दिसादाहाइ वा णिग्घायाइ वा पंसुवुट्ठीइ वा जुवगाइ वा जक्खालिताइ

वा धूमियाइ वा महियाइ वा रउग्वायाइ वा चंदोवरागाइ वा सूरुवरागाइ वा  
चंदपरिवेसाइ वा सूरपरिवेसाइ वा पडिचंदाइ वा पडिसूराइ वा इंदधणूइ वा उदग-  
मच्छाइ वा असोहाइ वा कविहसियाइ वा पाईणवायाइ वा पडीणवायाइ वा जाव  
सुद्धवायाइ वा गामदाहाइ वा नगरदाहाइ वा जाव सण्णिवेसदाहाइ वा पाणक्खय-  
जणक्खयकुलक्खयधणक्खयवसणभूयमणारियाइ वा ? णो इण्ठे समट्ठे । अत्थि णं  
भंते ! एगूसूयदीवे दीवे डिंवाइ वा डमराइ वा कलहाइ वा वोलाइ वा खाराइ वा  
वेराइ वा महावेराइ वा विरुद्धरज्जाइ वा ? णो इण्ठे समट्ठे, ववगयडिंवडमरकलह-  
वोलखारवेरिविरुद्धरज्जविवज्जिया णं ते मणुयगणा पण्णत्ता समणाउसो ! । अत्थि णं  
भंते ! एगूसूयदीवे दीवे महाजुद्धाइ वा महासंगामाइ वा महासत्थपडणाइ वा महा-  
पुरिसपडणाइ वा महारुहिरपडणाइ वा नागवाणाइ वा खेणवाणाइ वा तामसवाणाइ  
वा दुब्भूइयाइ वा कुलरोगाइ वा गामरोगाइ वा णगरोगाइ वा मंडलरोगाइ वा  
सिरोवेयणाइ वा अच्छिवेयणाइ वा कण्वेयणाइ वा णक्खवेयणाइ वा दंतवेयणाइ  
वा नह्वेयणाइ वा कासाइ वा सासाइ वा जराइ वा दाहाइ वा कच्छूइ वा खसराइ  
वा कुद्धाइ वा कुडाइ वा दगराइ वा अरिसाइ वा अजीरगाइ वा भगंदराइ वा  
इंदगहाइ वा खंदगहाइ वा कुमारगहाइ वा णागगहाइ वा जक्खगहाइ वा  
भूयगहाइ वा उव्वेयगहाइ वा धणुगहाइ वा एगाहियाइ वा वेयाहियाइ वा तेया-  
हियाइ वा चउत्थगाइ वा हिययसूलाइ वा मत्थगसूलाइ वा पाससूलाइ वा कुच्छि-  
सूलाइ वा जोणिंसूलाइ वा गाममारीइ वा जाव सज्जिवेसमारीइ वा पाणक्खय जाव  
वसणभूयमणारियाइ वा ? णो इण्ठे समट्ठे, ववगयरोगायंका णं ते मणुयगणा  
पण्णत्ता समणाउसो ! । अत्थि णं भंते ! एगूसूयदीवे दीवे अइवासाइ वा मंदवासाइ  
वा सुवुट्ठीइ वा मंदवुट्ठीइ वा उदगवाहाइ वा उदगपवाहाइ वा दशुभेयाइ वा दशु-  
प्पीलाइ वा गामवाहाइ वा जाव सज्जिवेसवाहाइ वा पाणक्खय जाव वसणभूयम-  
णारियाइ वा ? णो इण्ठे समट्ठे, ववगयदगोवहवा णं ते मणुयगणा पण्णत्ता समणा-  
उसो ! । अत्थि णं भंते ! एगूसूयदीवे दीवे अयागराइ वा तम्बागराइ वा सीसाग-  
राइ वा सुवण्णागराइ वा रयणागराइ वा वइरागराइ वा वसुहाराइ वा हिरण्णवासाइ  
वा सुवण्णवासाइ वा रयणवासाइ वा वइरवासाइ वा आभरणवासाइ वा पत्तवासाइ  
वा पुप्फवासाइ वा फलवासाइ वा बीयवासा० मल्लवासा० गंधवासा० वण्णवासा०  
चुण्णवासा० खीरवुट्ठीइ वा रयणवुट्ठीइ वा हिरण्वुट्ठीइ वा सुवण्ण० तहेव जाव  
चुण्णवुट्ठीइ वा सुकालाइ वा दुकालाइ वा सुभिक्षाइ वा दुभिक्षाइ वा अप्पघाइ वा  
महघाइ वा कयाइ वा महाविकयाइ वा अणिहाइ वा सण्णिहीइ वा संनिचयाइ वा

निहीइ वा निहाणाइ वा चिरपोराणाइ वा पहीणसामियाइ वा पहीणसेउयाइ वा पहीण-  
 गोतागाराइ वा जाइ इमाइ गामागरणगरखेडकब्बडमडंबदोणमुहुपट्टणासमसंवाहस-  
 न्निवेसेसु सिंघाडगतिगचउक्कचच्चरचउमुहमहापहपहेसु णगरणिद्धमणगामणिद्धमणसु-  
 साणगिरिकंदरसन्निसेलोवट्ठाणभवणगिहेसु सन्निक्खित्ताइ चिट्ठंति ? नो इण्ठे समट्ठे ।  
 एगूरुयदीवे णं भंते ! दीवे मणुयाणं केवइयं कालं ठिई पणत्ता ? गोयमा ! जह्वेणं  
 पलिओवमस्स असंखेज्जइभागं असंखेज्जइभागेण ऊणगं उक्कोसेणं पलिओवमस्स  
 असंखेज्जइभागं । ते णं भंते ! मणुया कालमासे कालं किच्चा कहिं गच्छंति कहिं  
 उव्वज्जंति ? गोयमा ! ते णं मणुया छम्मासावसेसाउया मिहुणयाइ पसवंति अउणा-  
 सीइ राइदियाइ मिहुणाइ सारक्खंति संगोविंति य, सारक्खित्ता संगोविता उस्ससित्ता  
 निस्ससित्ता कासित्ता छीइत्ता अक्किट्ठा अव्वहिया अपरियाविया [ पलिओवमस्स  
 असंखिज्जइभागं परियाविय ] सुहंसुहेणं कालमासे कालं किच्चा अन्नयरेसु देवलोएसु  
 देवत्ताए उव्वत्तारो भवन्ति, देवलोयपरिग्गहा णं ते मणुयगणा पणत्ता समणा-  
 उसो ! ॥ कहि णं भंते ! दाहिणिज्जाणं आभासियमणुस्साणं आभासियदीवे णामं  
 दीवे पणत्ते ? गोयमा ! जंबुदीवे दीवे चुल्लहिमवंतस्स वासहरपव्वयस्स दाहिणपुर-  
 च्छिमिज्जाओ चरिमंताओ लवणसमुदं तिन्नि जोयणं सेसं जहा एगूरुयाणं णिरवसेसं  
 भाणियव्वं ॥ कहि णं भंते ! दाहिणिज्जाणं णंगोलियमणुस्साणं पुच्छा, गोयमा !  
 जंबुदीवे दीवे मंदरस्स पव्वयस्स दाहिणेणं चुल्लहिमवंतस्स वासहरपव्वयस्स  
 उत्तरपच्चत्थिमिज्जाओ चरिमंताओ लवणसमुदं तिणिण जोयणसयाइ सेसं जहा  
 एगूरुयमणुस्साणं ॥ कहि णं भंते ! दाहिणिज्जाणं वेसाणियमणुस्साणं पुच्छा, गोयमा !  
 जंबुदीवे दीवे मंदरस्स पव्वयस्स दाहिणेणं चुल्लहिमवंतस्स वासहरपव्वयस्स दाहिण-  
 पच्चत्थिमिज्जाओ चरिमंताओ लवणसमुदं तिणिण जोयणं सेसं जहा एगूरुयाणं ॥ १११ ॥  
 कहि णं भंते ! दाहिणिज्जाणं हयकणमणुस्साणं हयकणदीवे णामं दीवे पणत्ते ?  
 गोयमा ! एगूरुयदीवस्स उत्तरपुरच्छिमिज्जाओ चरिमंताओ लवणसमुदं चत्तारि  
 जोयणसयाइ ओगाहिंत्ता एत्थ णं दाहिणिज्जाणं हयकणमणुस्साणं हयकणदीवे  
 णामं दीवे पणत्ते, चत्तारि जोयणसयाइ आयामविक्खंभेणं वारस जोयणसया  
 पन्नट्ठी किंचिविसेसूणा परिक्खेवेणं, से णं एगाए पउमवरवेइयाए अवसेसं जहा  
 एगूरुयाणं । कहि णं भंते ! दाहिणिज्जाणं गयकणमणुस्साणं पुच्छा, गोयमा !  
 आभासियदीवस्स दाहिणपुरच्छिमिज्जाओ चरिमंताओ लवणसमुदं चत्तारि जोयण-  
 सयाइ सेसं जहा हयकणाणं । एवं गोकणमणुस्साणं पुच्छा, वेसाणियदीवस्स  
 दाहिणपच्चत्थिमिज्जाओ चरिमंताओ लवणसमुदं चत्तारि जोयणसयाइ सेसं जहा

ह्यकण्णाणं । सङ्कुलिकण्णाणं पुच्छा, गोयमा ! णंगोलियदीवस्स उत्तरपच्चत्थिमिल्लाओ चरिमंताओ लवणसमुदं चत्तारि जोगयणसयाई सेसं जहा ह्यकण्णाणं ॥ आर्यंसमुहाणं पुच्छा, ह्यकण्णयदीवस्स उत्तरपुरच्छिमिल्लाओ चरिमंताओ पंच जोगयणसयाई ओगा-  
हिता एत्थ णं दाहिणिह्णानं आर्यंसमुहमणुस्साणं आर्यंसमुहदीवे णामं दीवे पण्णत्ते, पंच जोगयणसयाई आयामविकखंभेणं, आसमुहाईणं छ सया, आसकन्नाईणं सत्त, उक्कासु-  
हाईणं अट्ठ, घणदंताईणं जाव नव जोगयणसयाई, गाहा—एगूरुयपरिक्खेवो नव चेव सयाई अउणपन्नाई । बारसपन्नट्ठाई ह्यकण्णाईणं परिक्खेवो ॥ १ ॥ आर्यंसमुहाईणं पन्नरसेकासीए जोगयणसए किंचिविसेसाहिए परिक्खेवेणं, एवं एएणं कमेणं उवउञ्जिऊण  
णेयव्वा चत्तारि चत्तारि एगपमाणा, णाणत्तं ओगाहे, विकखंभे परिक्खेवे पढमवीय-  
तइयचउक्काणं उग्गहो विकखंभो परिक्खेवो भणिओ, चउत्थचउक्के छजोगयणसयाई आयामविकखंभेणं अट्ठारसत्ताणउए जोगयणसए विकखंभेणं । पंचमचउक्के सत्त जोगय-  
सयाई आयामविकखंभेणं वावीसं तेरसोत्तरे जोगयणसए परिक्खेवेणं । छट्ठचउक्के अट्ठजोगयणसयाई आयामविकखंभेणं पणवीसं गुणतीसजोगयणसए परिक्खेवेणं ।  
सत्तमचउक्के नवजोगयणसयाई आयामविकखंभेणं दो जोगयणसहस्साई अट्ठ पणयाळे जोगयणसए परिक्खेवेणं । जस्स य जो विकखंभो उग्गहो तस्स तत्तिओ चेव ।  
पढमवीयाण परिरओ ऊणो सेसाण अहिओ उ ॥ १ ॥ सेसा जहा एगूरुयदीवस्स जाव सुद्धदंतदीवे देवलोगपरिग्गहा णं ते मणुयगणा पण्णत्ता समणाउसो ! ॥ कहि  
णं भंते ! उत्तरिल्लाणं एगूरुयमणुस्साणं एगूरुयदीवे णामं दीवे पण्णत्ते ? गोयमा ! जंबुदीवे दीवे मंदरस्स पव्वयस्स उत्तरेणं सिहरिस्स वासहरपव्वयस्स उत्तरपुरच्छि-  
मिल्लाओ चरिमंताओ लवणसमुदं तिणिण जोगयणसयाई ओगाहिता एवं जहा दाहिणिह्णानं तथा उत्तरिल्लाणं भाणियव्वं, णवरं सिहरिस्स वासहरपव्वयस्स विदिसासु, एवं जाव सुद्धदंतदीवेत्ति जाव सेतं अंतरदीवगा ॥ ११२ ॥ से किं तं  
अकम्मभूमगमणुस्सा ? २ तीसविहा पण्णत्ता, तंजहा—पंचहिं हेमवएहिं, एवं जहा पण्णवणापए जाव पंचहिं उत्तरकुरूहिं, सेतं अकम्मभूमगा । से किं तं कम्म-  
भूमगा ? २ पण्णरसविहा पण्णत्ता, तंजहा—पंचहिं भरहेहिं पंचहिं एरवएहिं पंचहिं महाविदेहेहिं, ते समासओ दुविहा पण्णत्ता, तंजहा—आरिया मिलेच्छा, एवं जहा पण्णवणापए जाव सेतं आरिया, सेतं गम्भवक्कंतिया, सेतं मणुस्सा ॥ ११३ ॥  
**मणुस्सुहेसो समत्तो ॥**

से किं तं देवा ? देवा चउव्विहा पण्णत्ता, तंजहा—भवणवासी वाणमंतरा जोइसिया वेमाणिया ॥ ११४ ॥ से किं तं भवणवासी ? २ दसविहा पण्णत्ता, तंजहा—

असुरकुमारा जहा पण्णवणापए देवाणं भेओ तहा भाणियव्वो जाव अणुत्तरोववाइया पंचविहा पण्णत्ता, तंजहा-विजयवेजयंत जाव सव्वट्ठसिद्धगा, सेत्तं अणुत्तरोववाइया ॥ ११५ ॥ कहि णं भंते ! भवणवासिदेवाणं भवणा पत्ता ? कहि णं भंते ! भवणवासी देवा परिवसंति ?, गोयमा ! इमीसे रयणप्पभाए पुढवीए असीउत्तरजोय-णसयसहस्सबाहल्लाए, एवं जहा पण्णवणाए जाव भवणवासाइया, त(ए)त्थ णं भवणवासीणं देवाणं सत्त भवणकोडीओ बावत्तरि भवणावाससयसहस्सा भवंति-त्तिमक्खाया, तत्थ णं बहवे भवणवासी देवा परिवसंति-असुरा नाग सुवन्ना य जहा पण्णवणाए जाव विहरति ॥ ११६ ॥ कहि णं भंते ! असुरकुमाराणं देवाणं भवणा प० पुच्छा, एवं जहा पण्णवणाठाणपए जाव विहरंति ॥ कहि णं भंते ! दाहिणिन्नाणं असुरकुमारदेवाणं भवणा पुच्छा, एवं जहा ठाणपए जाव चमरे तत्थ असुरकुमारिंदे असुरकुमारराया परिवसइ जाव विहरइ ॥ ११७ ॥ चमरस्स णं भंते ! असुरिंदस्स असुररत्तो कइ परिसाओ प० ? गो० ! तओ परिसाओ प०, तं०—समिया चंडा जाया, अब्भितरिया समिया मज्जे चंडा बाहिं च जाया ॥ चमरस्स णं भंते ! असुरिंदस्स असुररत्तो अब्भितरपरिसाए कइ देवसाहस्सीओ पण्णत्ताओ ? मज्झिमपरिसाए कइ देवसाहस्सीओ पण्णत्ताओ ? बाहिरियाए परिसाए कइ देवसाहस्सीओ पण्णत्ताओ ?, गोयमा ! चमरस्स णं असुरिंदस्स २ अब्भितरपरिसाए चउवीसं देवसाहस्सीओ पण्णत्ताओ, मज्झिमियाए परिसाए अट्ठावीसं देव०, बाहिरियाए परिसाए बत्तीसं देवसा० ॥ चमरस्स णं भंते ! असुरिंदस्स असुररण्णो अब्भितरियाए प० कइ देविसया पण्णत्ता ? मज्झिमियाए परिसाए कइ देविसया पण्णत्ता ? बाहिरियाए परिसाए कइ देविसया पण्णत्ता ?, गोयमा ! चमरस्स णं असुरिंदस्स असुररण्णो अब्भितरियाए परिसाए अट्ठुट्ठा देविसया प० मज्झिमियाए परिसाए तिन्नि देवि० बाहिरियाए अट्ठाइजा देवि० । चमरस्स णं भंते ! असुरिंदस्स असुररण्णो अब्भितरियाए परिसाए देवाणं केवइयं कालं ठिई पण्णत्ता ? मज्झिमियाए परिसाए० बाहिरियाए परिसाए देवाणं केवइयं कालं ठिई पण्णत्ता ? अब्भितरियाए परि० देवीणं केवइयं कालं ठिई पण्णत्ता ? मज्झिमियाए परि० देवीणं केवइयं० बाहिरियाए परि० देवीणं के० ?, गोयमा ! चमरस्स णं असुरिंदस्स २ अब्भितरियाए परि० देवाणं अट्ठाइजाइं पलिओवमाइं ठिई प० मज्झिमाए परिसाए देवाणं दो पलिओवमाइं ठिई पण्णत्ता बाहिरियाए परिसाए देवाणं दिवहुं पलि० अब्भितरियाए परिसाए देवीणं दिवहुं पलिओवमं ठिई पण्णत्ता मज्झिमियाए परिसाए देवीणं पलि-ओवमं ठिई पण्णत्ता बाहिरियाए परि० देवीणं अट्ठपलिओवमं ठिई पण्णत्ता ॥ से

केणट्टेणं भंते ! एवं वुच्चइ—चमरस्स असुरिंदस्स तओ परिसाओ पण्णत्ताओ, तंजहा—समिया चंडा जाया, अब्भितरिया समिया मज्झिमिया चंडा बाहिरिया जाया ? गोयमा ! चमरस्स णं असुरिंदस्स असुररन्नो अब्भितरपरिसाए देवा बाहिया हव्वमागच्छंति णो अव्वाहिया, मज्झिमपरिसाए देवा बाहिया हव्वमागच्छंति अव्वाहियावि, बाहिरपरिसाए देवा अव्वाहिया हव्वमागच्छंति, अदुत्तरं च णं गोयमा ! चमरे असुरिंदे असुरराया अन्नयरेसु उच्चावएसु कज्जकोडुंबेसु समुप्पत्तेसु अब्भितरियाए परिसाए सद्धिं संमइसंपुच्छणावहुले विहरइ मज्झिमपरिसाए सद्धिं पयं एवं पयंचेसाणे २ विहरइ बाहिरियाए परिसाए सद्धिं पयंडेसाणे २ विहरइ, से तेणट्टेणं गोयमा ! एवं वुच्चइ—चमरस्स णं असुरिंदस्स असुरकुमाररणो तओ परिसाओ पण्णत्ताओ समिया चंडा जाया, अब्भितरिया समिया मज्झिमिया चंडा बाहिरिया जाया ॥ ११८ ॥ कहि णं भंते ! उत्तरिज्जाणं असुरकुमारारणं भवणा पण्णत्ता ? जहा ठाणपए जाव बली एत्थ वइरोयणिदे वइरोयणराया परिवसइ जाव विहरइ ॥ बलिस्स णं भंते ! वयरोयणिदस्स वइरोयणरन्नो कइ परिसाओ पण्णत्ताओ ? गोयमा ! तिणिण परिसाओ प०, तंजहा—समिया चंडा जाया, अब्भितरिया समिया मज्झिमिया चंडा बाहिरिया जाया । बलिस्स णं भंते ! वइरोयणिदस्स वइरोयणरन्नो अब्भितरियाए परिसाए कइ देवसहस्सा प० ? मज्झिमियाए परिसाए कइ देवसहस्सा जाव बाहिरियाए परिसाए कइ देविसया पण्णत्ता ?, गोयमा ! बलिस्स णं वइरोयणिदस्स २ अब्भितरियाए परिसाए वीसं देवसहस्सा पण्णत्ता, मज्झिमियाए परिसाए चउवीसं देवसहस्सा पण्णत्ता, बाहिरियाए परिसाए अट्ठावीसं देवसहस्सा पण्णत्ता, अब्भितरियाए परिसाए अद्धपंचमा देविसया पण्णत्ता, मज्झिमियाए परिसाए चत्तारि देविसया पण्णत्ता, बाहिरियाए परिसाए अट्ठट्ठा देविसया पण्णत्ता, बलिस्स... ठिईए पुच्छा जाव बाहिरियाए परिसाए देवीणं केवइयं कालं ठिई पण्णत्ता ?, गोयमा ! बलिस्स णं वइरोयणिदस्स २ अब्भितरियाए परिसाए देवाणं अट्ठट्ठपलिओवमा ठिई पण्णत्ता, मज्झिमियाए परिसाए तिचि पलिओवमाइं ठिई पण्णत्ता, बाहिरियाए परिसाए देवाणं अट्ठाइजाइं पलिओवमाइं ठिई पण्णत्ता, अब्भितरियाए परिसाए देवीणं अट्ठाइजाइं पलिओवमाइं ठिई पण्णत्ता, मज्झिमियाए परिसाए देवीणं दो पलिओवमाइं ठिई पण्णत्ता, बाहिरियाए परिसाए देवीणं दिवहुं पलिओवमं ठिई पण्णत्ता, सेसं जहा चमरस्स असुरिंदस्स असुरकुमाररणो ॥ ११९ ॥ कहि णं भंते ! नागकुमारारणं देवाणं भवणा पण्णत्ता ? जहा ठाणपए जाव दाहिणिज्जाणि पुच्छियव्वा जाव धरणे इत्थ नागकुमारिंदे नागकुमारराया परिवसइ जाव



विहरइ ॥ धरणस्स णं भंते ! नागकुमारिंदस्स नागकुमाररण्णो कइ परिसाओ प० ? गोयमा ! तिण्णि परिसाओ, ताओ चेव जहा चमरस्स । धरणस्स णं भंते ! नागकुमारिंदस्स नागकुमाररण्णो अब्भितरियाए परिसाए कइ देवसहस्सा पणत्ता जाव बाहिरियाए परिसाए कइ देविसया पणत्ता ? गोयमा ! धरणस्स णं नागकुमारिंदस्स नागकुमाररण्णो अब्भितरियाए परिसाए सट्ठि देवसहस्साइं मज्झिमियाए परिसाए सत्तरि देवसहस्साइं बाहिरियाए परिसाए असीइदेवसहस्साइं अब्भितरपरिसाए पणत्तरं देविसयं पणत्तं मज्झिमियाए परिसाए पण्णासं देविसयं पणत्तं बाहिरियाए परिसाए पणवीसं देविसयं पणत्तं । धरणस्स णं० रञ्जो अब्भितरियाए परिसाए देवाणं केवइयं कालं ठिई पणत्ता ? मज्झिमियाए परिसाए देवाणं केवइयं कालं ठिई पणत्ता ? बाहिरियाए परिसाए देवाणं केवइयं कालं ठिई पणत्ता ? अब्भितरियाए परिसाए देवीणं केवइयं कालं ठिई पणत्ता ? मज्झिमियाए परिसाए देवीणं केवइयं कालं ठिई पणत्ता ? बाहिरियाए परिसाए देवीणं केवइयं कालं ठिई पणत्ता ? गोयमा ! धरणस्स० रण्णो अब्भितरियाए परिसाए देवाणं साइरेणं अद्धपलिओवमं ठिई पणत्ता, मज्झिमियाए परिसाए देवाणं अद्धपलिओवमं ठिई पणत्ता, बाहिरियाए परिसाए देवाणं देसूणं अद्धपलिओवमं ठिई पणत्ता, अब्भितरियाए परिसाए देवीणं देसूणं अद्धपलिओवमं ठिई पणत्ता, मज्झिमियाए परिसाए देवीणं साइरेणं चउब्भागपलिओवमं ठिई पणत्ता, बाहिरियाए परिसाए देवाणं चउब्भागपलिओवमं ठिई पणत्ता, अट्ठो जहा चमरस्स ॥ कहि णं भंते ! उत्तरिळाणं नागकुमारारणं जहा ठाणपए जाव विहरइ ॥ भूयाणंदस्स णं भंते ! नागकुमारिंदस्स नागकुमाररण्णो अब्भितरियाए परिसाए कइ देवसाहस्सीओ पणत्ताओ ? मज्झिमियाए परिसाए कइ देवसाहस्सीओ पणत्ताओ ? बाहिरियाए परिसाए कइ देवसाहस्सीओ पणत्ताओ ? अब्भितरियाए परिसाए कइ देविसया पणत्ता ? मज्झिमियाए परिसाए कइ देविसया पणत्ता ? बाहिरियाए परिसाए कइ देविसया पणत्ता ? गोयमा ! भूयाणंदस्स णं नागकुमारिंदस्स नागकुमाररण्णो अब्भितरियाए परिसाए पण्णासं देवसहस्सा पणत्ता, मज्झिमियाए परिसाए सट्ठि देवसाहस्सीओ पणत्ताओ, बाहिरियाए परिसाए सत्तरि देवसाहस्सीओ पणत्ताओ, अब्भितरियाए परिसाए दो पणवीसं देविसयाणं पणत्ता, मज्झिमियाए परिसाए दो देवीसया पणत्ता, बाहिरियाए परिसाए पणत्तरं देविसयं पणत्तं । भूयाणंदस्स णं भंते ! नागकुमारिंदस्स नागकुमाररण्णो अब्भितरियाए परिसाए देवाणं केवइयं कालं ठिई पणत्ता जाव बाहिरियाए परिसाए देवीणं केवइयं कालं ठिई पणत्ता ? गोयमा ! भूयाणंदस्स णं० अब्भितरियाए परिसाए देवाणं

देसूणं पलिओवमं ठिई पण्णत्ता, मज्झिमियाए परिसाए देवाणं साइरेणं अद्धपलिओवमं  
 ठिई पण्णत्ता, बाहिरियाए परिसाए देवाणं अद्धपलिओवमं ठिई पण्णत्ता, अब्भिम-  
 तरियाए परिसाए देवीणं अद्धपलिओवमं ठिई पण्णत्ता, मज्झिमियाए परिसाए  
 देवीणं देसूणं अद्धपलिओवमं ठिई पण्णत्ता, बाहिरियाए परिसाए देवीणं साइरेणं  
 चउब्भागपलिओवमं ठिई पण्णत्ता, अट्ठो जहा चमरस्स, अवसेसाणं वेणुदेवाइणं  
 महाघोसपज्जवसाणाणं ठाणपयवत्तव्वया गिरवसेसा भाणियव्वा, परिसाओ जहा  
 धरणभूयाणंदाणं (सेसाणं भवणवईणं) दाहिणिच्छाणं जहा धरणस्स उत्तरिच्छाणं  
 जहा भूयाणंदस्स, परिमाणंपि ठिईवि ॥ १२० ॥ कहि णं भंते ! वाणमंतराणं  
 देवाणं भवणा (भोमेज्जा णगरा) पण्णत्ता ? जहा ठाणपए जाव विहरंति ॥  
 कहि णं भंते ! पिसायाणं देवाणं भवणा पण्णत्ता ? जहा ठाणपए जाव विहरंति  
 कालमहाकाला य तत्थ दुवे पिसायकुमाररायाणो परिवसंति जाव विहरंति, कहि णं  
 भंते ! दाहिणिच्छाणं पिसायकुमाराणं जाव विहरंति काले य एत्थ पिसाय-  
 कुमारिदे पिसायकुमारराया परिवसइ महद्धिए जाव विहरइ ॥ कालस्स णं  
 भंते ! पिसायकुमारिंदस्स पिसायकुमाररण्णो कइ परिसाओ पण्णत्ताओ ? गोयमा !  
 तिण्णि परिसाओ पण्णत्ताओ, तंजहा-ईसा तुडिया दढरहा, अब्भितरिया ईसा  
 मज्झिमिया तुडिया बाहिरिया दढरहा । कालस्स णं भंते ! पिसायकुमारिंदस्स  
 पिसायकुमाररण्णो अब्भितरपरिसाए कइ देवसाहस्सीओ पण्णत्ताओ जाव बाहि-  
 रियाए परिसाए कइ देविसया पण्णत्ता ?, गो० ! कालस्स णं पिसायकुमारिंदस्स  
 पिसायकुमाररायस्स अब्भितरियपरिसाए अद्ध देवसाहस्सीओ पण्णत्ताओ मज्झिम-  
 परिसाए दस देवसाहस्सीओ पण्णत्ताओ बाहिरियपरिसाए बारस देवसाहस्सीओ  
 पण्णत्ताओ अब्भितरियाए परिसाए एणं देविसयं पण्णत्तं मज्झिमियाए परिसाए एणं  
 देविसयं पण्णत्तं बाहिरियाए परिसाए एणं देविसयं पण्णत्तं । कालस्स णं भंते !  
 पिसायकुमारिंदस्स पिसायकुमाररण्णो अब्भितरियाए परिसाए देवाणं केवइयं कालं  
 ठिई पण्णत्ता ? मज्झिमियाए परिसाए देवाणं केवइयं कालं ठिई पण्णत्ता ? बाहि-  
 रियाए परिसाए देवाणं केवइयं कालं ठिई पण्णत्ता जाव बाहिरियाए० देवीणं  
 केवइयं कालं ठिई पण्णत्ता ?, गोयमा ! कालस्स णं पिसायकुमारिंदस्स पिसायकुमा-  
 ररण्णो अब्भितरपरिसाए देवाणं अद्धपलिओवमं ठिई पण्णत्ता, मज्झिमियाए परि०  
 देवाणं देसूणं अद्धपलिओवमं ठिई पण्णत्ता, बाहिरियाए परि० देवाणं साइरेणं  
 चउब्भागपलिओवमं ठिई पण्णत्ता, अब्भंतरपरि० देवीणं साइरेणं चउब्भागपलि-  
 ओवमं ठिई पण्णत्ता, मज्झिमपरि० देवीणं चउब्भागपलिओवमं ठिई पण्णत्ता,

बाहिरपरिसाए देवीणं देसूणं चउब्भागपलिओवमं ठिई पण्णत्ता, अट्ठो जो चेव चम-  
 रस्स, एवं उत्तरस्सवि, एवं णिरंतरं जाव गीयजस्स ॥ १२१ ॥ कहि णं भंते !  
 जोइसियाणं देवाणं विमाणा पण्णत्ता ? कहि णं भंते ! जोइसिया देवा परिवसंति ?,  
 गोयमा ! उप्पि दीवसमुद्दाणं इमीसे रयणप्पभाए पुढवीए बहुसमरमणिज्जाओ भूमि-  
 भागाओ सत्तणउए जोयणसए उड्डं उप्पइत्ता दसुत्तरसया जोयणबाहल्लेणं, तत्थ णं  
 जोइसियाणं देवाणं तिरियमसंखेज्जा जोइसियविमाणावाससयसहस्सा भवंतीतिम-  
 क्खायं, ते णं विमाणा अद्धकविट्ठगसंठाणसंठिया एवं जहा ठाणपए जाव चंदमसूरिया  
 य तत्थ णं जोइसिंदा जोइसरयाणो परिवसंति महिच्चिया जाव विहरंति ॥ सूरस्स णं  
 भंते ! जोइसिंदस्स जोइसरणो कइ परिसाओ पण्णत्ताओ ? गोयमा ! तिण्णि परिसाओ  
 पण्णत्ताओ, तंजहा—तुंवा तुडिया पव्वा अड्ढिभतरया तुंवा मज्झिमिया तुडिया बाहि-  
 रिया पव्वा, सेसं जहा कालस्स परिमाणं, ठिईवि । अट्ठो जहा चमरस्स । चंदस्सवि एवं  
 चेव ॥ १२२ ॥ कहि णं भंते ! दीवसमुद्दा ? केवइया णं भंते ! दीवसमुद्दा ? केमहालया  
 णं भंते ! दीवसमुद्दा ? किं संठिया णं भंते ! दीवसमुद्दा ? किमागारभावपडोयारा  
 णं भंते ! दीवसमुद्दा पत्तत्ता ?, गोयमा ! जंबुदीवाइया दीवा लवणाइया समुद्दा  
 संठाणओ एगविहविहाणा विथारओ अणेगविहविहाणा दुग्गुणादुग्गुणे पडुप्पाएमाणा २  
 पविथरमाणा २ ओभासमाणवीइया बहुउप्पलपउमकुमुयणलिणुभुमसोगंधियपो-  
 डरीयमहापोंडरीयसयपत्तसहस्सपत्तपप्फुल्लकेसरोवचिया पत्तेयं पत्तेयं पउमवरवेइया-  
 परिक्खत्ता पत्तेयं पत्तेयं वणसंडपरिक्खत्ता अस्सिं तिरियलोए असंखेज्जा दीवसमुद्दा  
 सयंभुरमणपज्जवसाणा पण्णत्ता समणाउसो ! ॥ १२३ ॥ तत्थ णं अयं जंबुदीवे  
 णामं दीवे दीवसमुद्दाणं अड्ढिभतरिए सव्वखुड्दाए वट्ठे तेल्लापूयसंठाणसंठिए वट्ठे  
 रहचक्कवालसंठाणसंठिए वट्ठे पुक्खरकण्णियासंठाणसंठिए वट्ठे पडिपुञ्चचंदसंठाण-  
 संठिए एक्कं जोयणसयसहस्सं आयामविकखंभेणं तिण्णि जोयणसयसहस्साइं सोलस  
 य सहस्साइं दोण्णि य सत्तावीसे जोयणसए तिण्णि य कोसे अट्ठावीसं च धणुसयं  
 तेरस अंगुलाई अड्डंगुलयं च किंचिविसेसाहियं परिकखेवेणं पण्णत्ते ॥ से णं एक्काए  
 जगईए सव्वओ समंता संपरिकिखत्ते ॥ सा णं जगई अट्ठ जोयणाइं उड्डं उच्चतेणं  
 मूले बारस जोयणाइं विकखंभेणं मज्झे अट्ठ जोयणाइं विकखंभेणं उप्पि चत्तारि  
 जोयणाइं विकखंभेणं मूले विच्छिण्णा मज्झे संखित्ता उप्पि तणुया गोपुच्छसंठाण-  
 संठिया सव्ववइरामई अच्छा सण्हा लण्हा घट्ठा मट्ठा णीरया णिम्मला णिप्पंका  
 णिक्कं कडच्छाया सप्पभा सस्सिरीया सउज्जोया पासाइया दरिसणिज्जा अभिह्वा  
 पडिह्वा ॥ सा णं जगई एक्केणं जालकडएणं सव्वओ समंता संपरिकिखत्ता ॥ से णं

जालकडए अद्धजोयणं उद्धं उच्चत्तेणं पंचधणुसयाई विक्खंमेणं सव्वरयणामए अच्छे सण्हे लण्हे घट्ठे मट्ठे णीरए णिम्मले णिप्पंके णिक्कंङच्छाए सप्पमे [सत्तिरीए] समरीए सउज्जोए पासाईए दरिसणिज्जे अभिरूवे पडिरूवे ॥ १२४ ॥ तीसे णं जगईए उप्पि बहुमज्झदेसभाए एत्थ णं एगा महई पउमवरवेइया प०, सा णं पउमवरवेइया अद्धजोयणं उद्धं उच्चत्तेणं पंच धणुसयाई विक्खंमेणं सव्वरयणामए जगईसमिया परिकखेवेणं सव्वरयणामई० ॥ तीसे णं पउमवरवेइयाए अयमेयारूवे वण्णावासे पण्णत्ते, तंजहा—वइरामया नेमा रिट्ठामया पइट्ठाणा वेरुलियामया खंभा सुवण्णरुप्पमया फलगा वइरामया संधी लोहियक्खमईओ सईओ णाणामणिमया कडेवरा कडेवरसंघाडा णाणामणिमया रूवा नाणामणिमया रूवसंघाडा अंक्रमया पक्खा पक्खवाहाओ जोइरसामया वंसा वंसकवेळुया य रययामईओ पट्टियाओ जायरूवमईओ ओहाडणीओ वइरामईओ उवरि पुञ्छणीओ सव्वसेए रययामए छाये ॥ सा णं पउमवरवेइया एगमेगेणं हेमजालेणं एगमेगेणं गवक्खजालेणं एगमेगेणं खिंखिणिजालेणं जाव मणिजालेणं (कणयजालेणं रयणजालेणं) एगमेगेणं पउमवरजालेणं सव्वरयणामएणं सव्वओ समंता संपरिक्खिता ॥ ते णं जाला तव-णिजलंबूसगा सुवण्णपथरगमंळिया णाणामणिरयणविविहहारुद्धहारउवसोभियसमुदया ईसिं अण्णमण्णमसंपत्ता पुव्वावरदाहिणउत्तरागएहिं वाएहिं मंदागं २ एज्जमाणा २ कंप्पिजमाणा २ लंबमाणा २ पझंझमाणा २ सहायमाणा २ तेणं ओरालेणं मणु-ण्णेणं कण्णमणणिव्वुइकरेणं सहेणं सव्वओ समंता आपूरेमाणा सिरीए अईव २ उवसोभेमाणा उव० चिद्धंति ॥ तीसे णं पउमवरवेइयाए तत्थ तत्थ देसे २ तहिं तहिं बहवे ह्यसंघाडा गयसंघाडा नरसंघाडा किण्णरसंघाडा किंपुरिससंघाडा महोरग-संघाडा गंधव्वसंघाडा वसहसंघाडा सव्वरयणामया अच्छा सण्हा लण्हा घट्ठा मट्ठा णीरया णिम्मला णिप्पंका णिक्कंङच्छाया सप्पमा समरीया सउज्जोया पासाइया दरिसणिज्जा अभिरूवा पडिरूवा । तीसे णं पउमवरवेइयाए तत्थ तत्थ देसे २ तहिं तहिं बहवे ह्यपतीओ तहेव जाव पडिरूवाओ । एवं ह्यवीहीओ जाव पडिरूवाओ । एवं ह्यमिहुणाई जाव पडिरूवाई ॥ तीसे णं पउमवरवेइयाए तत्थ तत्थ देसे २ तहिं तहिं बहवे पउमलयाओ नागलयाओ, एवं असोग० चंपग० चूयवण० वासंति० अइ-मुत्तग० कुंद० सामलयाओ णिच्चं कुसुमियाओ जाव सुविहत्तपिंडमंजरिवडिसगधरीओ सव्वरयणामईओ अच्छाओ सण्हाओ लण्हाओ घट्ठाओ मट्ठाओ णीरयाओ णिम्मलाओ णिप्पंकाओ णिक्कंङच्छायाओ सप्पमाओ समरीयाओ सउज्जोयाओ पासाइयाओ दरिसणिज्जाओ अभिरूवाओ पडिरूवाओ ॥ तीसे णं पउमवरवेइयाए तत्थ तत्थ

देसे २ तर्हि तर्हि बहवे अक्खयसोत्थिया पण्णत्ता सव्वरयणामया अच्छा ॥ से केणट्ठेणं भंते ! एवं वुच्चइ—पउमवरवेइया पउमवरवेइया ? गोयमा ! पउमवरवेइयाए तत्थ तत्थ देसे २ तर्हि तर्हि वेइयासु वेइयावाहासु वेइयासीसफलएसु वेइयापुउंतरेसु खंभेसु खंभवाहासु खंभसीसेसु खंभपुउंतरेसु सईसु सईमुहेसु सईफलएसु सईपुउंतरेसु पक्खेसु पक्खवाहासु पक्खपेरंतेसु बहूई उप्पलाई पउमाई जाव सयसहस्सपत्ताई सव्वरयणामयाई अच्छाई सण्हाई लण्हाई घट्ठाई मट्ठाई णीरयाई णिम्मलाई निप्पंकाई निक्कंढच्छायाई सप्पमाई समरीयाई सउज्जोयाई पासाइयाई दरिसणिज्जाई अभिह्वाई पडिह्वाई महया २ वासिक्कच्छत्तसमाणाई पण्णत्ताई समणाउसो !, से तेणट्ठेणं गोयमा ! एवं वुच्चइ—पउमवरवेइया २ ॥ पउमवरवेइया णं भंते ! किं सासया असासया ? गोयमा ! सिय सासया सिय असासया ॥ से केणट्ठेणं भंते ! एवं वुच्चइ—सिय सासया सिय असासया ? गोयमा ! दव्वट्ठयाए सासया वण्णपज्जवेहिं गंधपज्जवेहिं रसपज्जवेहिं फासपज्जवेहिं असासया, से तेणट्ठेणं गोयमा ! एवं वुच्चइ—सिय सासया सिय असासया ॥ पउमवरवेइया णं भंते ! कालओ केवच्चिरं होइ ? गोयमा ! ण कयावि णासि ण कयावि णत्थि ण कयावि ण भविस्सइ भुवि च भवइ य भविस्सइ य धुवा नियया सासया अक्खया अव्वया अवट्ठिया णिच्चा पउमवरवेइया ॥ १२५ ॥ तीसे णं जगईए उप्पिं बाहिं पउमवरवेइयाए एत्थ णं एगे महं वणसंडे पण्णत्ते देसूणाई दो जोयणाई चक्कवालविक्खंभेणं जगईसमए परिक्खेवेणं, किण्हं किण्होभासे जाव अणेगसगडरहजाणजुग्गपरिमोयणे सुरम्मे पासाईए सण्हे लण्हे घट्ठे मट्ठे नीरए निप्पंके निम्मले निक्कंढच्छाए सप्पमे समिरीए सउज्जोए पासाईए दरिसणिज्जे अभिह्वे पडिह्वे ॥ तस्स णं वणसंडस्स अंतो बहुसमरमणिज्जे भूमिभागे पण्णत्ते से जहानामए—आलिंगपुक्खरेइ वा सुइंगपुक्खरेइ वा सरतलेइ वा करयलेइ वा आर्यसमंडलेइ वा चंदमंडलेइ वा सूरमंडलेइ वा उरब्भचम्मेइ वा उसभचम्मेइ वा वराहचम्मेइ वा सीहचम्मेइ वा वग्गचम्मेइ वा विगचम्मेइ वा दीवियचम्मेइ वा अणेगसंकुकीलगसहस्सवियए आवडपच्चावडसेदीपसेदीसोत्थियसोवत्थियपूसमाणवद्धमाणमच्छंडगमगरंडगजारमारफुल्लावलिपउमपत्तसागरतरंगवांसंतिलयपउमलयभत्तिचित्तेहिं सच्छाएहिं समिरीएहिं सउज्जोएहिं नाणाविहपंचवण्णेहिं तणेहि य मणीहि य उवसोहिए तंजहा—किण्हंहिं जाव सुक्खिलेहिं ॥ तत्थ णं जे ते किण्हा तणा य मणी य तेसि णं अयमेयारुवे वण्णावासे पण्णत्ते, से जहानामए—जीमूएइ वा अंजणेइ वा खंजणेइ वा कज्जलेइ वा मसीइ वा गुलियाइ वा गवलेइ वा गवलगुलियाइ वा भमरेइ वा भमरावलियाइ वा भमरपत्तगयसारेइ वा जंबुफलेइ वा अहारिट्ठेइ वा

परपुट्टएइ वा गएइ वा गयकलमेइ वा कण्हसप्पेइ वा कण्हकेसरेइ वा आगासथि-  
ग्गलेइ वा कण्हसोएइ वा किण्हकणवीरेइ वा कण्हबंधुजीवएइ वा, भवे एयारूवे  
सिया ?, गोयमा ! णो इण्ठे समट्ठे, तेसि णं कण्हणं तणाणं मणीण य एतो इट्ठतराए  
चेव कंततराए चेव पियतराए चेव मणुण्णतराए चेव मणामतरेए चेव वण्णेणं  
पण्णत्ते ॥ तत्थ णं जे ते णीलगा तणा य मणी य तेसि णं इमेयारूवे वण्णावासे  
पण्णत्ते, से जहानामए—भिंगेइ वा भिंगपत्तेइ वा चासेइ वा चासपिच्छेइ वा सुएइ वा  
सुयपिच्छेइ वा णीलीइ वा णीलीमेएइ वा णीलीगुलियाइ वा सामाएइ वा उच्चंतएइ  
वा वणराईइ वा हलहरवसणेइ वा मोरग्गीवाइ वा पारेवयगीवाइ वा अयसिकुसुमेइ  
वा अंजणकेसिगाकुसुमेइ वा णीलुप्पलेइ वा णीलासोएइ वा णीलकणवीरेइ वा  
णीलबंधुजीवएइ वा, भवे एयारूवे सिया ?, णो इण्ठे समट्ठे, तेसि णं णीलगाणं  
तणाणं मणीण य एतो इट्ठतराए चेव कंततराए चेव जाव वण्णेणं पण्णत्ते ॥ तत्थ णं  
जे ते लोहियगा तणा य मणी य तेसि णं अयमेयारूवे वण्णावासे पण्णत्ते, से  
जहाणामए—ससगरुहरेइ वा उरब्भरुहरेइ वा णररुहरेइ वा वराहरुहरेइ वा  
महिसरुहरेइ वा बालिंदगोवएइ वा बालदिवागरेइ वा संझब्भरागेइ वा गुंजद्धराएइ  
वा जाइहिंणुएइ वा सिलप्पवालेइ वा पवालंकुरेइ वा लोहियक्खमणीइ वा लक्खा-  
रसएइ वा किमिरागेइ वा रत्तकंबलेइ वा चीणपिट्ठरासीइ वा जासुयणकुसुमेइ वा  
किंसुयकुसुमेइ वा पालियायकुसुमेइ वा रत्तुप्पलेइ वा रत्तासोगेइ वा रत्तकणयारेइ  
वा रत्तबंधुजीवेइ वा, भवे एयारूवे सिया ?, नो इण्ठे समट्ठे, तेसि णं लोहियगाणं  
तणाणं य मणीण य एतो इट्ठतराए चेव जाव वण्णेणं पण्णत्ते ॥ तत्थ णं जे ते  
हालिङ्गा तणा य मणी य तेसि णं अयमेयारूवे वण्णावासे पण्णत्ते, से जहाणामए—  
चंपएइ वा चंपगच्छल्लीइ वा चंपयमेएइ वा हालिङ्गाइ वा हालिङ्गेएइ वा हालिङ्गुलियाइ वा  
हरियालेइ वा हरियालमेएइ वा हरियालगुलियाइ वा चिउरेइ वा चिउरंगारागेइ वा वरक-  
णएइ वा वरकणगनिघसेइ वा सुवण्णसिप्पिणएइ वा वरपुरिसवसणेइ वा सल्लइकुसुमेइ  
वा चंपणकुसुमेइ वा कुहुंडियाकुसुमेइ वा ( कोरंटगदामेइ वा ) तडउडाकुसुमेइ वा  
घोसाडियाकुसुमेइ वा सुवण्णज्जहियाकुसुमेइ वा सुहरिञ्जयाकुसुमेइ वा [ कोरिंदवरमल्ल-  
दामेइ वा ] वीयगकुसुमेइ वा पीयासोएइ वा पीयकणवीरेइ वा पीयबंधुजीवएइ वा,  
भवे एयारूवे सिया ?, नो इण्ठे समट्ठे, ते णं हालिङ्गा तणा य मणी य एतो इट्ठतरा  
चेव जाव वण्णेणं पण्णत्ता ॥ तत्थ णं जे ते सुक्खिङ्गा तणा य मणी य तेसि णं  
अयमेयारूवे वण्णावासे पण्णत्ते, से जहानामए—अंकेइ वा संखेइ वा चंदेइ वा  
कुंदेइ वा कुसुमे(सुए)इ वा दयरएइ वा ( दहिघणेइ वा खीरेइ वा खीरपूरेइ वा )

हंसावलीइ वा कोंचावलीइ वा हारावलीइ वा बलायावलीइ वा चंदावलीइ वा सारइ-  
यबलाहएइ वा धंतधोरुपरपट्टेइ वा सालिपिट्टरासीइ वा कुंदपुफ्फरासीइ वा कुमुय-  
रासीइ वा सुक्खिवाडीइ वा पेहुणमिंजाइ वा बिसेइ वा मिणालियाइ वा गयदंतेइ  
वा लवंगदलेइ वा पोंडरीयदलेइ वा सिंदुवारमल्लदामेइ वा सेयासोएइ वा सेयकणवीरेइ  
वा सेयवंधुजीएइ वा, भवे एयारुवे सिया ?, णो इण्ठे समठ्ठे, तेसि णं सुक्खिणं  
तणाणं मणीण य एत्तो इट्ठतराए चेव जाव वण्णेणं पणन्ते ॥ तेसि णं भंते ! तणाण  
य मणीण य केरिसए गंधे पणन्ते ? से जहाणामए—कोट्टपुडाण वा पत्तपुडाण वा  
चोयपुडाण वा तगरपुडाण वा एलापुडाण वा [ किरिमेरिपुडाण वा ] चंदणपुडाण  
वा कुंकुमपुडाण वा उसीरपुडाण वा चंपगपुडाण वा मरुयगपुडाण वा दमणगपुडाण  
वा जाइपुडाण वा जूहियापुडाण वा मल्लियपुडाण वा गोमालियपुडाण वा वासंति-  
यपुडाण वा केयइपुडाण वा कप्पूरपुडाण वा पाडलपुडाण वा अणुवार्यंसि उब्भिज्ज-  
माणण वा णिब्भिज्जमाणण वा कुट्टिज्जमाणण वा रुक्खिज्जमाणण वा उक्किरिज्जमाणण  
वा विकिरिज्जमाणण वा परिभुज्जमाणण वा भंडाओ वा भंडं साहुरिज्जमाणणं  
ओराला मणुणा घाणमणिव्वुइकरा सव्वओ समंता गंधा अभिणिस्सवंति, भवे  
एयारुवे सिया ?, णो इण्ठे समठ्ठे, तेसि णं तणाणं मणीण य एत्तो उ इट्ठतराए  
चेव जाव मणामताराए चेव गंधे पणन्ते ॥ तेसि णं भंते ! तणाण य मणीण य  
केरिसए फासे पणन्ते ? से जहाणामए—आईणेइ वा रूएइ वा बूरेइ वा णवणीएइ  
वा हंसगव्वभत्तलीइ वा सिरीसकुसुमणिचएइ वा बालकुमुयपत्तरासीइ वा, भवे एयारुवे  
सिया ?, णो इण्ठे समठ्ठे, तेसि णं तणाण य मणीण य एत्तो इट्ठतराए चेव  
जाव फासेणं पणन्ते ॥ तेसि णं भंते ! तणाणं पुव्वावरदाहिणउत्तरागएहिं वाएहिं  
मंदायं मंदायं एइयाणं वेइयाणं कंपियाणं खोभियाणं चालियाणं फंदियाणं घट्टियाणं  
उदीरियाणं केरिसए सइ पणन्ते ? से जहाणामए—सिवियाए वा संदमाणियाए  
वा रहवरस्स वा सच्छत्तस्स सज्जयस्स सघंठयस्स सतोरणवरस्स सणंदिघोसस्स  
सखिंखणिहेमजालपेरंतपरिखित्तस्स हेमवयचित्तविचित्तितिणिसकणगनिजुत्तदास्या-  
गस्स सुपिणिद्धारयमंडलधुरागस्स कालायससुक्यणेमिजंतकम्मस्स आइणवरतुरग-  
सुसंपउत्तस्स कुसलणरुद्धेयसारहिसुसंपरिगहियस्स सरसयवत्तीसतोण(परि)मंडियस्स  
सकंकडवडिंसगस्स सचावसरपहरणावरणभरियस्स जोहजुद्धसज्जस्स रायंगणंसि वा  
अंतेउरंसि वा रम्मंसि वा मणिक्कोट्टिमतलंसि अभिक्खणं २ अभिघट्टिज्ज-  
माणस्स वा णियट्टिज्जमाणस्स वा [ परुडवरतुरंगस्स चंडवेगाइट्टस्स ] ओराला  
मणुणा कणमणिव्वुइकरा सव्वओ समंता सहा अभिणिस्सवंति, भवे एयारुवे

सिया?, णो इण्ठे समट्ठे, से जहाणामए—वेयालियाए वीणाए उत्तरमंदासुच्छियाए  
 अंके सुपइट्ठियाए चंदणसारकोणपडिघट्टियाए कुसलणरणारिसंपगहियाए पओसपञ्चस-  
 कालसमयंसि मंदं मंदं एइयाए वेइयाए खोभियाए उदीरियाए ओराला मणुणा  
 कणमणणिव्वुइकरा सव्वओ समंता सदा अभिणिस्सवंति भवे एयारूवे सिया?, णो  
 इण्ठे समट्ठे, से जहाणामए—किण्णराण वा किंपुरिसाण वा महोरगाण वा गंधव्वाण  
 वा भइसालवणगयाण वा नंदणवणगयाण वा सोमणसवणगयाण वा पंडगवणगयाण  
 वा हिमवंतमलयमंदरगिरिगुहसमण्णागयाण वा एगओ सहियाणं संसुहागयाणं ससु-  
 विट्ठाणं संनिविट्ठाणं पसुइयपक्कीलियाणं गीयरइगंधव्वहरिसियमणाणं गेजं पजं कत्थं  
 गेयं पयविद्धं पायविद्धं उक्खित्तयं पवत्तयं मंदायं रोइयावसाणं सत्तसरसमण्णागयं  
 अट्ठरससुसंपउत्तं छद्दोसविप्पमुक्कं एकारसगुणालंकारं अट्ठगुणोववेयं गुंजंतवंसकुहरोवगूढं  
 रत्तं तिट्ठाणकरणसुद्धं महुरं समं सुललियं सकुहरगुंजंतवंसतंतीतलताललयग्गहसु-  
 संपउत्तं मणोहरं मउयरिभियपयसंचारं सुरइं सुणइं वरचारूव दिव्वं नट्टं सज्जं  
 गेयं पगीयाणं, भवे एयारूवे सिया?, हंता गोयमा! एवंभूए सिया ॥१२६॥ तस्स णं  
 वणसंडस्स तत्थ तत्थ देसे २ तहिं तहिं बहवे खुट्ठा खुट्ठियाओ वावीओ पुक्खरिणीओ  
 गुंजालियाओ दीहियाओ (सरसीओ) सरपंतियाओ सरसरपंतीओ विलपंतीओ  
 अच्छाओ सण्हाओ रययामयकूलाओ वइरामयपासाणाओ तवणिज्जमयतलाओ  
 वेरुलियमणिफालियपडलपच्चोयडाओ सुवण्णसुब्भ(ज्झ)रययमणिवालयाओ सुहोया-  
 राखुउत्ताराओ णाणामणितित्थसुबद्धाओ चाउ(चउ)क्कोणाओ समतीराओ आणुपुव्व-  
 सुजायवप्पगंभीरसीयलजलाओ संछण्णपत्तभिसमुणालाओ बहुउप्पलकुमुयणलिणसुभ-  
 गसोगंधियपोंडरीयसयपत्तसहत्सपत्तफुल्लकेसरोवन्धियाओ छप्पयपरिभुज्जमाणकमलाओ  
 अच्छविमलसलिलपुण्णाओ परिहत्थभमंतमच्छकच्छभअणेगसउणमिहुणपविचरि-  
 याओ पत्तेयं पत्तेयं पउमवरवेइयापरिक्खित्ताओ पत्तेयं पत्तेयं वणसंडपरिक्खि-  
 त्ताओ अप्पेगइयाओ आसवोदाओ अप्पेगइयाओ वारुणोदाओ अप्पेगइयाओ  
 खीरोदाओ अप्पेगइयाओ घओदाओ अप्पेगइयाओ [इक्खु]खोदोदाओ (अमयरस-  
 समरसोदाओ) अप्पेगइयाओ पगईए उदग(अमय)रसेणं पण्णत्ताओ पासाइयाओ ४,  
 तासिं णं खुट्ठियाणं वावीणं जाव विलपंतियाणं तत्थ २ देसे २ तहिं २ जाव बहवे  
 तिसोवाणपडिरूवगा पण्णत्ता। तेसिं णं तिसोवाणपडिरूवगाणं अयमेयारूवे वण्णावासे  
 पण्णत्ते, तंजहा—वइरामया नेमा रिट्ठामया पइट्ठाणा वेरुलियामया खंभा सुवण्ण-  
 रूपामया फलगा वइरामया संधी लोहियक्खमईओ सूईओ णाणामणिमया अवलंबणा  
 अवलंबणवाहाओ पासाइयाओ ४ ॥ तेसिं णं तिसोवाणपडिरूवगाणं पुरओ पत्तेयं २



तोरणा प० ॥ ते णं तोरणा णाणामणिमयखंभेसु उवणिविट्ठसणिविट्ठा विविहमुत्तं-  
 तरोवच्चिया विविहताराह्वोवच्चिया ईहामियउसभतुरगणरगणरविहगवाल्लगकिण्णर-  
 रुत्तरभचमरकुंजरवणलयपउमलयभत्तिन्विता खंभुग्गयवइवेइयापरिगथाभिरामा  
 विज्जाहरजमलजुयलजंतजुत्ताविव अच्चिसहस्समालणीया ह्वगसहस्सकलिया भिस-  
 माणा भिब्भिसमाणा चक्खुल्लोयणलेसा मुहफासा सस्सिरीयह्वा पासाईया ४ ॥ तेसि  
 णं तोरणाणं उप्पि बहवे अट्ठट्ठमंगलगा पणत्ता तं०—सोत्थियसिरिवच्छणंदियावत्त-  
 वद्धमाणभद्दासणकलसमच्छदप्पणा सव्वरयणामया अच्छा सण्हा जाव पडिह्वा ॥  
 तेसि णं तोरणाणं उप्पि बहवे किण्हचामरज्झया नीलचामरज्झया लोहियचामरज्झया  
 हालिद्वचामरज्झया सुक्किल्लचामरज्झया अच्छा सण्हा रूपपट्ठा वइरंदडा जलयामल-  
 गंधिया मुरुवा पासाइया ४ ॥ तेसि णं तोरणाणं उप्पि बहवे छत्ताइलत्ता पडागाइ-  
 पडागा घंटाजुयला चामरजुयला उप्पलहत्थगा जाव सयसहस्सवत्तहत्थगा सव्वर-  
 यणामया अच्छा जाव पडिह्वा ॥ तासि णं खुट्ठियाणं वावीणं जाव बिलपंतियाणं  
 तत्थ तत्थ देसे २ तहिं तहिं बहवे उप्पायपव्वया णियइपव्वया जगइपव्वया दारु-  
 पव्वयगा दगमंडवगा दगमंचगा दगमालगा दगपासायगा ऊसडा खुल्ला खडहडगा  
 अंदोलगा पक्खंदोलगा सव्वरयणामया अच्छा जाव पडिह्वा ॥ तेसु णं उप्पाय-  
 पव्वएसु जाव पक्खंदोलएसु बहवे हंसासणाई कौंचासणाई गरुलासणाई उण्णया-  
 सणाई पणयासणाई दीहासणाई भद्दासणाई पक्खासणाई मगरासणाई उसभासणाई  
 सीहासणाई पउमासणाई दिसासोवत्थियासणाई सव्वरयणामयाई अच्छाई सण्हाई  
 लण्हाई घट्ठाई मट्ठाई णीरयाई णिम्मलाई निप्पंकाई निक्कंठच्छायाई सप्पभाई समि-  
 रीयाई सउज्जोयाई पासाइयाई दरिसणिजाई अभिह्वाई पडिह्वाई ॥ तस्स णं  
 वणसंडस्स तत्थ तत्थ देसे २ तहिं तहिं बहवे आलिघरा मालिघरा कयलिघरा  
 लयाघरा अच्छणघरा पेच्छणघरा मज्जणघरगा पसाहणघरगा गम्भघरगा मोहण-  
 घरगा सालघरगा जालघरगा कुसुमघरगा चित्तघरगा गंधव्वघरगा आर्यसघरगा  
 सव्वरयणामया अच्छा सण्हा लण्हा घट्ठा मट्ठा णीरया णिम्मला निप्पंका निक्कंठ-  
 छाया सप्पभा समिरीया सउज्जोया पासाइया दरिसणिजा अभिह्वा पडिह्वा ॥  
 तेसु णं आलिघरएसु जाव आर्यसघरएसु बहूई हंसासणाई जाव दिसासोवत्थिया-  
 सणाई सव्वरयणामयाई जाव पडिह्वाई ॥ तस्स णं वणसंडस्स तत्थ तत्थ देसे २  
 तहिं तहिं बहवे जाइमंडवगा जूहियामंडवगा मल्लियामंडवगा णवमालियामंडवगा  
 वासंतीमंडवगा दधिवासुयामंडवगा सूरिल्लिमंडवगा तंबोलीमंडवगा मुद्धियामंडवगा  
 प्रागलयामंडवगा अइमुत्तमंडवगा अप्फोयामंडवगा मालुयामंडवगा सामलियामंडवगा

सव्वरयणामया णिच्चं कुसुमिया णिच्चं जाव पडिह्वा ॥ तेसु णं जाइमंडवएसु जाव  
सामलयामंडवएसु बहवे पुढविसिलापट्टया पण्णत्ता, तंजहा—अप्पेगइया हंससण-  
संठिया अप्पे० कौवासणसंठिया अप्पे० गरुलासणसंठिया अप्पे० उण्णयासणसंठिया  
अप्पे० पणयासणसंठिया अप्पे० दीहासणसंठिया अप्पे० भद्दासणसंठिया अप्पे०  
पक्खासणसंठिया अप्पे० मगरासणसंठिया अप्पे० उसभासणसंठिया अप्पे०  
सीहासणसंठिया अप्पे० पडमासणसंठिया अप्पे० दिसासोत्थियासणसंठिया० प०,  
तत्थ बहवे वरसयणासणविसिद्धसंठाणसंठिया पण्णत्ता समणाउसो ! आइण्णगरूय-  
वूरणवणीयतूलकासा मउया सव्वरयणामया अच्छा जाव पडिह्वा । तत्थ णं बहवे  
वाणमंतरा देवा देवीओ य आसयंति सयंति चिट्ठंति णिसीयंति तुयट्ठंति रमंति  
ललंति कीलंति मोहंति पुरापोराणाणं सुचिण्णाणं सुपरिकंताणं सुभाणं कळाणाणं  
कडाणं कम्माणं कळाणं फलवित्तिविसेसं पच्चणुभवमाणा विहरंति ॥ तीसे णं जगईए  
उप्पि अंतो पडमवरवेइयाए एत्थ णं एगे महं वणसंडे पण्णत्ते देसूणाई दो जोयणाई  
विक्खंमेणं वेइयासमएणं परिकखेवेणं किण्हे किण्होभासे वणसंडवण्णओ मणि-  
तणसइविहूणो णेयव्वो, तत्थ णं बहवे वाणमंतरा देवा देवीओ य आसयंति सयंति  
चिट्ठंति णिसीयंति तुयट्ठंति रमंति ललंति कीडंति मोहंति पुरा पोराणाणं सुचिण्णाणं  
सुपरिकंताणं सुभाणं कळाणाणं कडाणं कम्माणं कळाणं फलवित्तिविसेसं पच्चणुभव-  
माणा विहरंति ॥ १२७ ॥ जंबुदीवस्स णं भंते ! दीवस्स कइ दारा पण्णत्ता ?  
गोयमा ! चत्तारि दारा पण्णत्ता, तंजहा—विजए वेजयंते जयंते अपराजिए ॥ १२८ ॥  
कहि णं भंते ! जंबुदीवस्स दीवस्स विजए नामं दारे पण्णत्ते ? गोयमा ! जंबुदीवे  
दीवे मंदरस्स पव्वयस्स पुरत्थिमेणं पणयालीसं जोयणसहस्साई अवाहाए जंबुदीवे  
दीवे पुरच्छिमपेरंते लवणसमुद्रपुरच्छिमदस्स पच्चत्थिमेणं सीयाए महाणईए उप्पि  
एत्थ णं जंबुदीवस्स दीवस्स विजए णामं दारे पण्णत्ते अट्ठ जोयणाई उड्डं उच्चत्तेणं  
चत्तारि जोयणाई विक्खंमेणं तावइयं चैव पवेसेणं सेए वरकणगथूभियागे ईहामि-  
यउसभतुरगनरमगरविहगवालगकिण्णररुसुरभचमरकुंजरवणलयपउमलयभत्तिचित्ते  
खंभुगयवरवइरवेइयापरिगयाभिरामे विज्जाहरजमलजुयलजंतजुत्ते इव अच्चीसहस्समा-  
लिणीए रूवगसहस्सकलिए भिसमाणे भिब्भिसमाणे चक्खुल्लोयणलेसे सुहकासे सरि-  
रीयह्वे वण्णो दारस्स तस्सिमो होइ तं०—वइरामया णिम्मा रिट्ठामया पडट्ठाना  
वेरुलियामया खंभा जायरूवोवचियपवरपंचवण्णमणिरयणकोट्टिमतले हंसगभमए  
एल्लए गोमेज्जमए इंदक्खीले लोहियक्खमईओ दारचेडीओ जोइरसामए उत्तरो  
वेरुलियामया कवाडा वइरामया संघी लोहियक्खमईओ सूईओ णाणामणिमया

समुग्गा वइरामई अगलाओ अगलपासाया वइरामई आवत्तणपेठिया अकुत्तर-  
पासए णिरंतरियवणकवाडे भित्तीसु चव भित्तीगुलिया छप्पण्णा तिण्णि होंति  
गोमाणसी तत्तिया णाणामणिरयणवालह्वगलीलट्टियसालिभंजियागे वइरामए कूडे  
रययामए उस्सेहे सव्वतवणिजमए उल्लोए णाणामणिरयणजालपंजरमणिवंसग-  
लोहियक्खपडिवंसगरययभोम्मे अंकमया पक्खवाहाओ जोइरसामया वंसा वंसक-  
वेळुगा य रययामई पट्टियाओ जायह्वमई ओहाडणी वइरामई उवरि पुच्छणी  
सव्वसेयरययामए छायेणे अंकमयकणगकूडतवणिजथूभियाए सेए संखतलविमल-  
णिम्मलदहिधणगोखीरफेणरययणिगरप्पगासे तिलगरयणद्वचंदचित्ते णाणामणिमय-  
दामालंकिए अंतो य वहिं च सण्हे तवणिजसइलवालयापथडे सुहप्फासे सस्सि-  
रीयरूवे पासाईए ४ ॥ विजयस्स णं दारस्स उभओ पासिं दुहओ णिसीहियाए  
दो दो चंदणकलसपरिवाडीओ पण्णत्ताओ, ते णं चंदणकलसा वरकमलपइट्ठाणा  
सुरभिवरवारिपडिपुण्णा चंदणकयचच्चागा आबद्धकंठेगुणा पउमुप्पलपिहाणा सव्वरय-  
णामया अच्छा सण्हा जाव पडिह्वा महया महया महिंदकुंभसमाणा पण्णत्ता  
समणाउसो ! ॥ विजयस्स णं दारस्स उभओ पासिं दुहओ णिसीहियाए दो दो णागदंत-  
परिवाडीओ, ते णं णागदंतगा मुत्ताजालंतरुसियहेमजालगवक्खजालखिखिणीघंटा-  
जालपरिक्खत्ता अब्भुगया अभिणिसिट्ठा तिरियं सुसंपगहिया अहेपण्णगद्धह्वा  
पण्णगद्धसंठाणसंठिया सव्वरयणामया अच्छा जाव पडिह्वा महया महया गयदंत-  
समाणा प० समणाउसो ! ॥ तेसु णं णागदंतएसु बहवे किण्हसुत्तबद्धवघारियमल्लदाम-  
कलावा जाव सुक्खिसुत्तबद्धवघारियमल्लदामकलावा ॥ ते णं दामा तवणिजलंबूसगा  
सुवण्णपयरगमंडिया णाणामणिरयणविविहहारद्धहार(उवसोभियसमुदया) जाव  
सिरीए अईव अईव उवसोभेमाणा उवसोभेमाणा चिट्ठंति ॥ तेसिं णं णागदंतगाणं  
उवरिं अण्णाओ दो दो णागदंतपरिवाडीओ पण्णत्ताओ, तेसिं णं णागदंतगाणं  
मुत्ताजालंतरुसिया तहेव जाव समणाउसो ! ॥ तेसु णं णागदंतएसु बहवे रययामया  
सिक्कया पण्णत्ता, तेसु णं रययामएसु सिक्कएसु ब० वेरुलियामईओ धूवघडीओ  
पण्णत्ताओ, तंजहा—ताओ णं धूवघडीओ कालागुरुपवरकुंदरुक्तुस्सुधूवमघमघंतगं-  
धुद्धयाभिरामाओ सुगंधवरगंधगंधियाओ गंधवट्ठिभूयाओ ओरालेणं मणुणेणं घाण-  
मणणिवुदुकरेणं गंधेणं तप्पएसे सव्वओ समंता आपूरेमाणीओ आपूरेमाणीओ  
अईव अईव सिरीए जाव चिट्ठंति ॥ विजयस्स णं दारस्स उभओ पासिं दुहओ  
णिसीहियाए दो दो सालिभंजियापरिवाडीओ पण्णत्ताओ, ताओ णं सालिभंजियाओ  
लीलट्टियाओ सुपयट्टियाओ सुअलंकियाओ णाणागारवसणाओ णाणामल्लपिण्णाओ

मुट्टीगेज्झमज्झाओ आमेलगजमलजुयलवट्टिअब्भुण्णयपीणरइयसंठियपओहराओ  
रत्तावंगाओ असियकेसीओ मिउविसयपसत्थलक्खणसंवेल्लियग्गसिरयाओ ईसिं असो-  
गवरपाथवसमुट्टियाओ वामहत्थगहियग्गसालाओ ईसिं अद्धच्छिककडक्खविद्धिएहिं  
ल्लेसेमाणीओ इव चक्खल्लोयणलेसाहिं अण्णमण्णं खिज्जमाणीओ इव पुढविपरिणामाओ  
सासयभावमुवगयाओ चंदाणणाओ चंदविलासिणीओ चंदद्वसमनिडालाओ चंदाहि-  
यसोमदंसणाओ उक्का इव उज्जोएमाणीओ विज्जुघणमरीइसूरदिप्पंततेयअहिययरसंनि-  
गासाओ सिंगारागारचारुवेसाओ पासाइयाओ ४ तेयसा अईव अईव सोमेमाणीओ  
सोमेमाणीओ चिट्ठंति ॥ विजयस्स णं दारस्स उभओ पासिं दुहुओ णिसीहियाए  
दो दो जालकडगा पण्णत्ता, ते णं जालकडगा सव्वरयणामया अच्छा जाव पडि-  
रुवा ॥ विजयस्स णं दारस्स उभओ पासिं दुहुओ णिसीहियाए दो दो घंटापरिवाडीओ  
पण्णत्ताओ, तासिं णं घंटाणं अयमेयारुवे वण्णावासे पण्णत्ते, तंजहा—जंवूणयमईओ  
घंटाओ वइरामईओ लालाओ णाणामणिमया घंटापासगा तवणिज्जमईओ संक्कलाओ  
रययामईओ रज्जुओ ॥ ताओ णं घंटाओ ओहस्सराओ मेहस्सराओ हंसस्सराओ  
कोंचस्सराओ णंदिस्सराओ णंदिघोसाओ सीहस्सराओ सीहघोसाओ मंजुस्सराओ  
मंजुघोसाओ सुस्सराओ सुस्सरणिघोसाओ ते पएसे ओरालेणं मण्णुणं  
कण्णमणनिव्वुइकरेणं सदेणं जाव चिट्ठंति ॥ विजयस्स णं दारस्स उभओ पासिं  
दुहुओ णिसीहियाए दो दो वणमालापरिवाडीओ पण्णत्ताओ, ताओ णं वणमालाओ  
णाणादुमलयाकिसलयपल्लवसमाउलाओ छप्पयपरिभुज्जमाणकमलसोमंतसस्सिरियाओ  
पासाइयाओ० ते पएसे उरालेणं जाव गंधेणं आपूरेमाणीओ जाव चिट्ठंति ॥ १२९ ॥  
विजयस्स णं दारस्स उभओ पासिं दुहुओ णिसीहियाए दो दो पगंठगा पण्णत्ता, ते  
णं पगंठगा चत्तारि जोयणाई आयामविकखंभेणं दो जोयणाई बाहल्लेणं सव्ववइरामया  
अच्छा जाव पडिरुवा ॥ तेसिं णं पगंठगाणं उवरिं पत्तेयं पत्तेयं पासायवर्डिसगा  
पण्णत्ता, ते णं पासायवर्डिसगा चत्तारि जोयणाई उद्धं उच्चत्तेणं दो जोयणाई आया-  
मविकखंभेणं अब्भुग्गयमूसियपहसियाविव विविहमणिरयणभत्तिचित्ता वाउद्धयविज-  
यवेजयंतीपडागच्छत्ताइच्छत्तकलिया तुंगा गयणयलमभिलंघमाण(णुलिहंत)सिहरा  
जालंतरयणपंजरुम्मिलियव्व मणिकणगथूभियागा वियसियसयवत्तपोंडरीयतिलयर-  
यणद्धचंदचित्ता णाणामणिमयदामालंकिया अंतो य बाहिं च सण्हा तवणिज्जरुहल-  
वाळुयापत्थडा सुहफासा सस्सिरियरुवा पासाइया ४ ॥ तेसिं णं पासायवर्डिसगाणं  
उल्लोया पउमलया जाव सामलयाभत्तिचित्ता सव्वतवणिज्जमया अच्छा जाव पडि-  
रुवा ॥ तेसिं णं पासायवर्डिसगाणं पत्तेयं पत्तेयं अंतो बहुसमरमणिजे भूमिभागे

पण्णत्ते, से जहाणामए आलिंगपुक्खरेइ वा जाव मणीहिं उवसोमिए, मणीण गंधो वण्णो फासो य नेयव्वो ॥ तेसि णं बहुसमरमणिजाणं भूमिभागाणं बहुमज्झदेसभाए पत्तेयं पत्तेयं मणिपेढियाओ पण्णत्ताओ, ताओ णं मणिपेढियाओ जोयणं आयामवि-  
क्खंमेणं अद्दजोयणं बाह्वेणं सव्वरयणामइओ जाव पडिह्वाओ, तासि णं मणिपेढि-  
याणं उवरिं पत्तेयं २ सीहासणे पण्णत्ते, तेसि णं सीहासणाणं अयमेयाह्वे वण्णावासे  
पण्णत्ते, तंजहा—तवणिज्जमया चक्खवाला रययामया सीहा सोवणिगया पाया णाणाम-  
णिमयाइं पायसीसगाइं जंबूणयमयाइं गत्ताइं वइरामया संधी नाणामणिमए वेव्हे, ते णं  
सीहासणा ईहामियउसम जाव पउमलयभत्तिचित्ता ससारसारोवइयविविहमणिरयण-  
पायपीढा अच्छरगमिउमसुरगनवतयकुसंतलिच्चसीहकेसरपच्चुत्थयाभिरामा उवचियखो-  
मदुगुल्लयपडिच्छायणा सुविरइयरयत्ताणा रत्तंसुयसंवुया सुरम्मा आईणगख्यबूरणवणी-  
यत्तुलमउयफासा मउया पासाइया ४ ॥ तेसि णं सीहासणाणं उप्पि पत्तेयं पत्तेयं विज-  
यदूसे पण्णत्ते, ते णं विजयदूसा सेया संखंककुंददगरयअमयमहियफेणपुंजसन्निगासा  
सव्वरयणामया अच्छा जाव पडिह्वा ॥ तेसि णं विजयदूसाणं बहुमज्झदेसभाए पत्तेयं  
पत्तेयं वइरामया अंकुसा पण्णत्ता, तेसु णं वइरामएसु अंकुसेसु पत्तेयं २ कुंभिका मुत्ता-  
दामा पण्णत्ता, ते णं कुंभिका मुत्तादामा अन्नोहिं चउहिं चउहिं तदद्भुच्चत्तप्पमाणमेत्तेहिं  
अद्भुत्तुंभिकेहिं मुत्तादामेहिं सव्वओ समंता संपरिक्खित्ता, ते णं दामा तवणिज्जलंबू-  
सगा सुवण्णपयरगमंडिया जाव चिट्ठंति, तेसि णं पासायवडिसगाणं उप्पि बह्वे अद्भु-  
त्तमंगलगा पण्णत्ता सोत्थिय तहेव जाव छत्ता ॥ १३० ॥ विजयस्स णं दारस्स उभओ  
पासिं दुहओ णिसीहियाए दो दो तोरणा पण्णत्ता, ते णं तोरणा णाणामणिमया तहेव  
जाव अद्भुत्तमंगलगा य छत्ताइछत्ता ॥ तेसि णं तोरणाणं पुरओ दो दो सालमंजि-  
याओ पण्णत्ताओ, जहेव णं हेट्ठा तहेव ॥ तेसि णं तोरणाणं पुरओ दो दो णागदं-  
तगा पण्णत्ता, ते णं णागदंतगा मुत्ताजालंतरुसिया तहेव, तेसु णं णागदंतएसु बह्वे  
किण्हा सुत्तवट्ठवघारियमल्लदामकलावा जाव चिट्ठंति ॥ तेसि णं तोरणाणं पुरओ  
दो दो ह्यसंघाडगा जाव उसभसंघाडगा पण्णत्ता सव्वरयणामया अच्छा जाव  
पडिह्वा, एवं पंतीओ वीहीओ सिहुणगा, दो दो पउमलयाओ जाव पडिह्वाओ,  
तेसि णं तोरणाणं पुरओ दो दो अक्खयसोवत्थिया पण्णत्ता ते णं अक्खयसोवत्थिया  
सव्वरयणामया अच्छा जाव पडिह्वा, तेसि णं तोरणाणं पुरओ दो दो चंदणकलसा  
पण्णत्ता, ते णं चंदणकलसा वरकमलपइट्ठाणा तहेव सव्वरयणामया जाव पडिह्वा  
समणाउसो ! ॥ तेसि णं तोरणाणं पुरओ दो दो भिंगारगा पण्णत्ता वरकमलपइ-  
ट्ठाणा जाव सव्वरयणामया अच्छा जाव पडिह्वा महया महया मत्तगयमुहाणिइस-

माणं पण्णत्ता समणाउसो ! ॥ तेसि णं तोरणणं पुरओ दो दो आयंसगा पण्णत्ता,  
 तेसि णं आयंसगाणं अयमेयारूवे वण्णावासे पण्णत्ते, तंजहा—तवणिज्जमया पंगंठा  
 वेरुलियमया छरुहा ( थंभया ) वइरामया वरंगा णाणामणिमया वलक्खा अंकमया  
 मंडला अणोवसियनिम्मलासाए छायाए सव्वओ चेव समणुवद्धा चंदमंडलपडिणि-  
 गासा महया महया अद्धकायसमाणा पण्णत्ता समणाउसो ! ॥ तेसि णं तोरणणं  
 पुरओ दो दो वइरणाभा थाला पण्णत्ता, ते णं थाला अच्छित्तिच्छडियसालितंदुलनह-  
 संदट्टवहुपडिपुण्णा चेव चिट्ठंति सव्वजंजूणयामया अच्छा जाव पडिह्वा महया महया  
 रहचक्कसमाणा प० समणाउसो ! ॥ तेसि णं तोरणणं पुरओ दो दो पाईओ पण्णत्ताओ,  
 ताओ णं पाईओ अच्छोदयपडिहत्थाओ णाणाविहपंचवण्णस्स फलहरियगस्स  
 बहुपडिपुण्णाओ विव चिट्ठंति सव्वरयणामईओ जाव पडिह्वाओ महया महया  
 गोकलिजगचक्कसमाणाओ पण्णत्ताओ समणाउसो ! ॥ तेसि णं तोरणणं पुरओ दो  
 दो सुपइट्ठगा पण्णत्ता, ते णं सुपइट्ठगा णाणाविहपंचवण्णपसाहणगभंडविरइया  
 सव्वोसहिपडिपुण्णा सव्वरयणामया अच्छा जाव पडिह्वा ॥ तेसि णं तोरणणं  
 पुरओ दो दो मणोगुलियाओ पण्णत्ताओ ॥ तासु णं मणोगुलियासु बहवे सुवण्ण-  
 रूपामया फलगा पण्णत्ता, तेसु णं सुवण्णरूपामएसु फलएसु बहवे वइरामया  
 णागदंतगा सुत्ताजालंतरुसिया हेम जाव गयदंतसमाणा पण्णत्ता, तेसु णं वइराम-  
 एसु णागदंतएसु बहवे रययामया सिक्कया पण्णत्ता, तेसु णं रययामएसु सिक्कएसु  
 बहवे वायकरगा पण्णत्ता ॥ ते णं वायकरगा किण्हसुत्तसिक्कगवत्थिया जाव सुक्कि-  
 ल्लसुत्तसिक्कगवत्थिया सव्वे वेरुलियामया अच्छा जाव पडिह्वा ॥ तेसि णं तोरणणं  
 पुरओ दो दो चित्ता रयणकरंडगा पण्णत्ता, से जहाणामए—रण्णो चाउरंतचक्क-  
 वट्ठिस्स चित्ते रयणकरंडे वेरुलियमणिफालियपडलपच्चोयडे साए पभाए ते पएसे  
 सव्वओ समंता ओभासइ उज्जोवेइ तावेइ पभासेइ, एवामेव ते चित्तरयणकरं-  
 डगा पण्णत्ता वेरुलियपडलपच्चोयडा साए पभाए ते पएसे सव्वओ समंता ओभा-  
 सेन्ति जाव पभासेन्ति ॥ तेसि णं तोरणणं पुरओ दो दो हयकंठा जाव दो  
 दो उसभकंठा पण्णत्ता सव्वरयणामया अच्छा जाव पडिह्वा ॥ तेसु णं हय-  
 कंठएसु जाव उसभकंठएसु दो दो पुप्फचंगेरीओ, एवं मल्लगंधवण्णनुण्वत्थाभरण-  
 चंगेरीओ सिद्धत्थचंगेरीओ सव्वरयणामईओ अच्छाओ जाव पडिह्वाओ ॥  
 तासु णं पुप्फचंगेरीसु जाव सिद्धत्थचंगेरीसु दो दो पुप्फपडलाइं जाव सिं सव्व-  
 रयणामयाइं जाव पडिह्वाइं ॥ तेसि णं तोरणणं पुरओ दो दो सीहासणाइं  
 पण्णत्ताइं, तेसि णं सीहासणाणं अयमेयारूवे वण्णावासे पण्णत्ते तहेव जाव पासाईया

४ ॥ तेसि णं तोरणानं पुरओ दो दो रूप्पछदाछत्ता पणत्ता, ते णं छत्ता वेरुलिय-  
 भिसंतविमलदंडा जंबूणयकन्नियावहरसंधी मुत्ताजालपरिगया अट्टसहस्सवरकंचण-  
 सलागा दहरमलयसुगंधी सव्वोउयसुरमिसीयलच्छाया मंगलभत्तिचित्ता चंदागारोवमा  
 वट्ठा ॥ तेसि णं तोरणानं पुरओ दो दो चामराओ पणत्ताओ, ताओ णं चामराओ  
 (चन्दप्पभवइरवेरुलियणाणामणिरयणखचियदंडा) णाणामणिकणगरयणविमलमहरि-  
 हतवणिजुज्जलविचित्तदंडाओ चिह्नियाओ संखंककुंददगरयअमयमहियफेणपुंजसणिण-  
 गासाओ सुहुमरययदीहवालाओ सव्वरयणामयाओ अच्छाओ जाव पडिह्वाओ ॥  
 तेसि णं तोरणानं पुरओ दो दो तिह्णसमुग्गा कोट्टसमुग्गा पत्तसमुग्गा चोयसमुग्गा  
 तगरसमुग्गा एलासमुग्गा हरियालसमुग्गा हिंशुल्लयसमुग्गा मणोसिलासमुग्गा  
 अंजणसमुग्गा सव्वरयणामया अच्छा जाव पडिह्वा ॥ १३१ ॥ विजए णं दारे  
 अट्टसयं चक्रज्झयाणं अट्टसयं सिगज्झयाणं अट्टसयं गरुडज्झयाणं अट्टसयं जुगज्झ-  
 याणं (अट्टसयं रुरुज्झयाणं) अट्टसयं छत्तज्झयाणं अट्टसयं पिच्छज्झयाणं अट्टसयं  
 सउण्णिज्झयाणं अट्टसयं सीहज्झयाणं अट्टसयं उसभज्झयाणं अट्टसयं सेयाणं  
 चउविसाणाणं णागवरकेऊणं एवामेव सपुव्वावरेणं विजयदारे आसीयं केउसहस्सं  
 भवइत्ति मक्खायं ॥ विजए णं दारे णव भोमा पणत्ता, तेसि णं भोमाणं अंतो  
 बहुसमरमणिजा भूमिभागा पणत्ता जाव मणीणं फासो, तेसि णं भोमाणं उप्पि  
 उल्लोया पउमलया जाव सामलयाभत्तिचित्ता जाव सव्वतवणिज्जमया अच्छा जाव  
 पडिह्वा, तेसि णं भोमाणं बहुमज्झदेसभाए जे से पंचमे भोम्मे तस्स णं भोमस्स  
 बहुमज्झदेसभाए एत्थ णं एगे महं सीहासणे पणत्ते, सीहासणवण्णओ विजयदूसे जाव  
 अंकुसे जाव दामा चिट्ठंति, तस्स णं सीहासणस्स अवरुत्तरेणं उत्तरेणं उत्तरपुरत्थिमेणं  
 एत्थ णं विजयस्स देवस्स चउण्हं सामाणियसहस्साणं चत्तारि भद्दासणसाहस्सीओ  
 पणत्ताओ, तस्स णं सीहासणस्स पुरच्छिमेणं एत्थ णं विजयस्स देवस्स चउण्हं  
 अग्गमहिसीणं सपरिवारानं चत्तारि भद्दासणा पणत्ता, तस्स णं सीहासणस्स  
 दाहिणपुरत्थिमेणं एत्थ णं विजयस्स देवस्स अब्भितरियाए परिसाए अट्टण्हं देव-  
 साहस्सीणं अट्ट भद्दासणसाहस्सीओ पणत्ताओ, तस्स णं सीहासणस्स दाहिणेणं  
 विजयस्स देवस्स मज्झिमियाए परिसाए दसण्हं देवसाहस्सीणं दस भद्दासणसाहस्सीओ  
 पणत्ताओ, तस्स णं सीहासणस्स दाहिणपच्चत्थिमेणं एत्थ णं विजयस्स देवस्स  
 बाहिरियाए परिसाए बारसण्हं देवसाहस्सीणं बारस भद्दासणसाहस्सीओ पणत्ताओ ॥  
 तस्स णं सीहासणस्स पच्चत्थिमेणं एत्थ णं विजयस्स देवस्स सत्तण्हं अणियाहिंवईणं  
 सत्त भद्दासणा पणत्ता, तस्स णं सीहासणस्स पुरत्थिमेणं दाहिणेणं पच्चत्थिमेणं

उत्तरेण एत्थ णं विजयस्स देवस्स सोलस आयरक्खदेवसाहस्सीणं सोलस भद्दासण-  
साहस्सीओ पण्णत्ताओ, तंजहा—पुरत्थिमेणं चत्तारि साहस्सीओ, एवं चउमुवि जाव  
उत्तरेणं चत्तारि साहस्सीओ, अवसेसेसु भोमेसु पत्तेयं पत्तेयं भद्दासणा पण्णत्ता ॥१३२॥  
विजयस्स णं दारस्स उवरिमागारा सोलसविहेहिं रयणेहिं उवसोभिया, तंजहा—  
रयणेहिं वयरेहिं वेरुलिएहिं जाव रिट्ठेहिं ॥ विजयस्स णं दारस्स उप्पि बहवे अट्ठट्ठ-  
मंगलगा पण्णत्ता, तंजहा—सोत्थियसिरिवच्छ जाव दप्पणा सव्वरयणामया अच्छा  
जाव पडिह्वा । विजयस्स णं दारस्स उप्पि बहवे कण्हचामरज्झया जाव सव्वरय-  
णामया अच्छा जाव पडिह्वा । विजयस्स णं दारस्स उप्पि बहवे छत्ताइच्छत्ता  
तहेव ॥ १३३ ॥ से केणट्ठेणं भंते ! एवं वुच्चइ—विजए दारे २ ? गोयमा !  
विजए णं दारे विजए णामं देवे महिद्धिए महज्जुइए जाव महाणुभावे पलिओवम-  
ट्ठिइए परिवसइ, से णं तत्थ चउण्हं सामाणियसाहस्सीणं चउण्हं अगमहिसीणं  
सपरिवारणं तिण्हं परिसाणं सत्तण्हं अणियाणं सत्तण्हं अणियाहिवईणं सोलसण्हं  
आयरक्खदेवसाहस्सीणं विजयस्स णं दारस्स विजयाए रायहाणीए अण्णेसिं च  
बहूणं विजयाए रायहाणीए वत्थव्वगाणं देवाणं देवीण य आहेवच्चं जाव दिव्वाइं  
भोगभोगाईं भुंजमाणे विहरइ, से तेणट्ठेणं गोयमा ! एवं वुच्चइ—विजए दारे विजए  
दारे, अदुत्तरे च णं गोयमा ! विजयस्स णं दारस्स सासए णामधेजे पण्णत्ते जण्ण  
कयाइ णासी ण कयाइ णत्थि ण कयाइ ण भविस्सइ जाव अवट्ठिए णिच्चे विजए  
दारे ॥ १३४ ॥ कहिं णं भंते ! विजयस्स देवस्स विजया णाम रायहाणी पण्णत्ता ?  
गोयमा ! विजयस्स णं दारस्स पुरत्थिमेणं तिरियमसंखेजे दीवसमुद्दे वीइवइत्ता  
अण्णमि जंवुद्दीवे दीवे बारस जोयणसहस्साइं ओगाहिता एत्थ णं विजयस्स देवस्स  
विजया णाम रायहाणी प० बारस जोयणसहस्साइं आयामविक्खंमेणं सत्ततीसजो-  
यणसहस्साइं नव य अडयाले जोयणसए किंचिविसेसाहिए परिकखेवेणं प० ॥ सा  
णं एगेणं पागारेणं सव्वओ समंता संपरिविखत्ता ॥ से णं पागारे सत्ततीसं जोय-  
णाइं अद्धजोयणं च उट्ठं उच्चत्तेणं मूले अद्धतेरसं जोयणाइं विक्खंमेणं मज्झेत्थ  
सक्कोसाइं छजोयणाइं विक्खंमेणं उप्पि तिण्णि सदक्कोसाइं जोयणाइं विक्खंमेणं मूले  
विच्छिण्णे मज्झे संखित्ते उप्पि तणुए बाहिं वट्ठे अंतो चउरंसे गोपुच्छसंठाणसंठिए  
सव्वकणगामए अच्छे जाव पडिह्वे ॥ से णं पागारे णाणाविहपंचवण्णेहिं कविसी-  
सएहिं उवसोभिए, तंजहा—किण्हेहिं जाव सुक्किळेहिं ॥ ते णं कविसीसगा अद्धकोसं  
आयामेणं पंचधणुसयाइं विक्खंमेणं देसूणमद्धकोसं उट्ठं उच्चत्तेणं सव्वमणिमया  
अच्छा जाव पडिह्वा ॥ विजयाए णं रायहाणीए एगमेगाए बाहाए पणवीसं पणवीसं



दारसयं भवतीति मक्खायं ॥ ते णं दारा बावट्ठिं जोयणाइं अद्धजोयणं च उद्धं उच्चतेणं एकतीसं जोयणाइं कोसं च विक्खंमेणं तावइयं चेव पवेसेणं सेया वरकण-  
 गथूभियागा ईहामियं० तहेव जहा विजए दारे जाव तवणिज्वालुयपत्थडा सुहफासा  
 सस्सि(म)रीया मुरूवा पासाईया ४ । तेसि णं दारारणं उभओ पासिं दुहओ णिसी-  
 हियाए दो दो चंदणकलसपरिवाडीओ पण्णत्ताओ तहेव भाणियव्वं जाव वणसा-  
 लाओ ॥ तेसि णं दारारणं उभओ पासिं दुहओ णिसीहियाए दो दो पंगंठा पण्णत्ता,  
 ते णं पंगंठा एकतीसं जोयणाइं कोसं च आयामविक्खंमेणं पन्नरस जोयणाइं  
 अद्धाइजे कोसे बाहूद्वेणं पण्णत्ता सव्ववइरामया अच्छा जाव पडिह्वा ॥ तेसि णं  
 पंगंठाणं उप्पि पत्तेयं २ पासायवडिंसगा पण्णत्ता ॥ ते णं पासायवडिंसगा एकतीसं  
 जोयणाइं कोसं च उद्धं उच्चतेणं पन्नरस जोयणाइं अद्धाइजे य कोसे आयामवि-  
 क्खंमेणं सेसं तं चेव जाव समुग्गया णवरं बहुवयणं भाणियव्वं । विजयाए णं  
 रायहाणीए एगमेगे दारे अट्टसयं चक्कज्झयाणं जाव अट्टसयं सेयाणं चउविसाणाणं  
 णागवरकेऊणं, एवामेव सपुव्वावरेणं विजयाए रायहाणीए एगमेगे दारे आसीयं २  
 केउसहस्सं भवतीति मक्खायं । विजयाए णं रायहाणीए एगमेगे दारे ( तेसि णं  
 दारारणं पुरओ ) सत्तरस भोमा पण्णत्ता, तेसि णं भोमाणं ( भूमिभागा ) उल्लोया  
 ( य ) पउमलया० भत्तिचित्ता ॥ तेसि णं भोमाणं बहुमज्झदेसभाए जे ते  
 नवमनवमा भोमा तेसि णं भोमाणं बहुमज्झदेसभाए पत्तेयं २ सीहासणा  
 पण्णत्ता, सीहासणवण्णओ जाव दामा जहा हेट्ठा, एत्थ णं अवसेसेसु  
 भोमेसु पत्तेयं पत्तेयं भहासणा पण्णत्ता । तेसि णं दारारणं उत्तिमंगा( उवरिमा )-  
 गारा सोलसविहेहिं रयणेहिं उवसोहिया तं चेव जाव छताइछता, एवामेव  
 पुव्वावरेणं विजयाए रायहाणीए पंच दारसया भवतीति मक्खाया ॥ १३५ ॥  
 विजयाए णं रायहाणीए चउद्विंसिं पंचजोयणसयाइं अवाहाए एत्थ णं चत्तारि  
 वणसंडा पण्णत्ता, तंजहा—असोगवणे सत्तवण्णवणे चंपगवणे चूयवणे, पुरत्थिमेणं  
 असोगवणे दाहिणेणं सत्तवण्णवणे पच्चत्थिमेणं चंपगवणे उत्तरेणं चूयवणे ॥ ते णं  
 वणसंडा साइरेगाइं दुवालस जोयणसहस्साइं आयामेणं पंच जोयणसयाइं विक्खंमेणं  
 पण्णत्ता पत्तेयं पत्तेयं पागारपरिक्खित्ता किण्हा किण्होभासा वणसंडवण्णओ भाणि-  
 यव्वो जाव बहवे वाणमंतरा देवा य देवीओ य आसयंति सयंति चिद्वंति णिसीयंति  
 तुयद्वंति रमंति ललंति कीलंति भोहंति पुरापोराणाणं सुचिण्णाणं सुपरिक्कंताणं सुभाणं  
 कम्माणं कडाणं कल्लाणं फलवित्तिविसेसं पच्चणुभवमाणा विहरंति ॥ तेसि णं वण-  
 संडाणं बहुमज्झदेसभाए पत्तेयं पत्तेयं पासायवडिंसगा पण्णत्ता, ते णं पासायवडिंसगा

बावट्टिं जोयणाइं अद्धजोयणं च उद्धं उच्चत्तेणं एकतीसं जोयणाइं कोसं च आयाम-  
 विक्खंभेणं अब्भुग्गयमूसिया तहेव जाव अंतो बहुसमरमणिज्जा भूमिभागे पणत्ता  
 उल्लोया पउम० भत्तिचित्ता भाणियव्वा, तेसि णं पासायवडिसगाणं बहुमज्झदेसभाए  
 पत्तेयं पत्तेयं सीहासणा पणत्ता वण्णावासो सपरिवारा, तेसि णं पासायवडिसगाणं  
 उप्पिं बहुवे अट्टट्ठमंगलगा झया छत्ताइछत्ता ॥ तत्थ णं चत्तारि देवा महिद्धिया जाव  
 पल्लिओवमट्टिइया परिवसंति, तंजहा—असोए सत्तवण्णे चंपए चूए ॥ तत्थ णं ते  
 साणं साणं वणसंडाणं साणं साणं पासायवडिसयाणं साणं साणं सामाणियाणं साणं  
 साणं अग्गमहिंसीणं साणं साणं परिसाणं साणं साणं आयरक्खदेवाणं आहेवक्खं  
 जाव विहरन्ति ॥ विजयाए णं रायहाणीए अंतो बहुसमरमणिजे भूमिभागे पणत्ते  
 जाव पंचवण्णेहिं मणीहिं उवसोहिए तणसद्दविहूणे जाव देवा य देवीओ य आसयंति  
 जाव विहरंति । तस्स णं बहुसमरमणिजस्स भूमिभागस्स बहुमज्झदेसभाए एत्थ णं  
 एगे महं उवयारियालयणे पणत्ते वारस जोयणसयाइं आयामविक्खंभेणं तिज्जि  
 जोयणसहस्साइं सत्त य पंचाणउए जोयणसए किंचिविसेसाहिए परिक्खेवेणं अद्धकोसं  
 बाहल्लेणं सव्वजं वूणयामएणं अच्छे जाव पडिरुवे ॥ से णं एगाए पउमवरवेइयाए  
 एगेणं वणसंडेणं सव्वओ समंता संपरिक्खित्ते पउमवरवेइयाए वण्णओ वणसंड-  
 वण्णओ जाव विहरंति, से णं वणसंडे देसूणाइं दो जोयणाइं चक्कवालविक्खंभेणं  
 उवयारियालयणसमपरिक्खेवेणं ॥ तस्स णं उवयारियालयणस्स चउद्विहिं चत्तारि  
 तिसोवाणपडिरुवगा पणत्ता, वण्णओ, तेसि णं तिसोवाणपडिरुवगाणं पुरओ पत्तेयं  
 पत्तेयं तोरणा पणत्ता छत्ताइछत्ता ॥ तस्स णं उवयारियालयणस्स उप्पिं बहुसमर-  
 मणिजे भूमिभागे पणत्ते जाव मणीहिं उवसोभिए मणिवण्णओ, गंधो, फासो, तस्स  
 णं बहुसमरमणिजस्स भूमिभागस्स बहुमज्झदेसभाए एत्थ णं एगे महं मूलपासाय-  
 वडिसए पणत्ते, से णं पासायवडिसए बावट्टिं जोयणाइं अद्धजोयणं च उद्धं उच्चत्तेणं  
 एकतीसं जोयणाइं कोसं च आयामविक्खंभेणं अब्भुग्गयमूसियप्पहसिए तहेव, तस्स  
 णं पासायवडिसगास्स अंतो बहुसमरमणिजे भूमिभागे पणत्ते जाव मणिफासे उल्लोए ॥  
 तस्स णं बहुसमरमणिजस्स भूमिभागस्स बहुमज्झदेसभागे एत्थ णं एगा महं मणि-  
 पेडिया पन्नत्ता, सा य एणं जोयणमायामविक्खंभेणं अद्धजोयणं बाहल्लेणं सव्वमणि-  
 मई अच्छा सण्हा जाव पडिरुवा ॥ तीसे णं मणिपेडियाए उवरिं एगे महं सीहासणे  
 पन्नत्ते, एवं सीहासणवण्णओ सपरिवारो, तस्स णं पासायवडिसगास्स उप्पिं बहुवे  
 अट्टट्ठमंगलगा झया छत्ताइछत्ता ॥ से णं पासायवडिसए अण्णेहिं चउहिं तदद्धुच्चत्तप्प-  
 माणमेत्तेहिं पासायवडिसएहिं सव्वओ समंता संपरिक्खित्ते, ते णं पासायवडिसगा

एकतीसं जौयणाई कोसं च उड्डं उच्चतेणं अद्धसोलसजौयणाई अद्धकोसं च आयाम-  
 विक्खंमेणं अब्भुग्गय० तहेव, तेसि णं पासायवडंसयाणं अंतो बहुसमरमणिज्जा  
 भूमिभागा उल्लोया ॥ तेसि णं बहुसमरमणिज्जाणं भूमिभागाणं बहुमज्झदेसभाए  
 पत्तेयं पत्तेयं सीहासणं पणत्तं, वण्णओ, तेसि परिवारभूया बहुमज्झदेसभाए पत्तेयं २  
 भद्दासणा पणत्ता, तेसि णं अट्ठमंगलगा झया छत्ताइछत्ता ॥ ते णं पासायवडंसगा  
 अण्णेहिं चउहिं चउहिं तदद्भुच्चत्तप्पमाणमेत्तेहिं पासायवडंसएहिं सव्वओ समंता  
 संपरिक्खत्ता ॥ ते णं पासायवडंसगा अद्धसोलसजौयणाई अद्धकोसं च उड्डं उच्च-  
 तेणं देसूणाई अट्ठ जौयणाई आयामविक्खंमेणं अब्भुग्गय० तहेव, तेसि णं पासाय-  
 वडंसगाणं अंतो बहुसमरमणिज्जा भूमिभागा उल्लोया, तेसि णं बहुसमरमणिज्जाणं  
 भूमिभागाणं बहुमज्झदेसभाए पत्तेयं पत्तेयं पडमासणा पज्जत्ता, तेसि णं पासायाणं  
 अट्ठमंगलगा झया छत्ताइछत्ता ॥ ते णं पासायवडंसगा अण्णेहिं चउहिं तदद्भु-  
 च्चत्तप्पमाणमेत्तेहिं पासायवडंसएहिं सव्वओ समंता संपरिक्खत्ता ॥ ते णं पासाय-  
 वडंसगा देसूणाई अट्ठ जौयणाई उड्डं उच्चतेणं देसूणाई चत्तारि जौयणाई आयाम-  
 विक्खंमेणं अब्भुग्गय० भूमिभागा उल्लोया भद्दासणाई उवरिं मंगलगा झया छत्ताइ-  
 छत्ता ॥ १३६ ॥ तस्स णं मूलपासायवडंसगस्स उत्तरपुरत्थिमेणं एत्थ णं विजयस्स  
 देवस्स सभा सुहम्मा पणत्ता अद्धतेरसजौयणाई आयामेणं छ सक्कोसाई जौयणाई  
 विक्खंमेणं णव जौयणाई उड्डं उच्चतेणं, अणेगखंभसयसंनिविट्ठा अब्भुग्गयसुकयवइर-  
 वेइया तोरणवरइयसालमंजिया सुसिलिद्धविसिद्धलट्ठसंठियपसत्थवेरुलियविमलखंभा  
 णाणामणिकणगरयणखइयउज्जलवहुसमसुविभत्तचित्त(णिचिय)रमणिज्जकुट्टिमत्ता ईहा-  
 मियउसमत्तुरगणरमगरविहगवालगकिण्णररुस्सरभंचमरकुंजरवणलयपडमलयभत्तिचि-  
 त्ता थंभुग्गयवइरवेइयापरिगयाभिरामा विज्जाहरजमलयलजंतजुत्ताविव अब्बिसहस्स-  
 मालणीया रुवगसहस्सकलिया भिसमाणी भिब्भिसमाणी चक्खुल्लोयणलेसा सुहकासा  
 सत्तिसीरियहवा कंचणमणिरयणथूमियागा नाणाविहपंचवण्णघंटापडागपरिमडियवग-  
 सिहरा धवला मिरीइकवयं विणिम्मयुंती लाउल्लोइयमहिंया गोसीसरसरत्तचंदण-  
 दइरदिजपंचंगुलितला उवचियचंदणकलसा चंदणघडसुकयतोरणपडिदुवारदेसभागा  
 आसत्तोसत्तविउलवट्टवग्घारियमल्लदामकलावा पंचवण्णसरसत्तुरभिमुक्कपुप्फुपुंजोवयार-  
 कलिया कालागुरुपवरकुंदुरुक्कतुरुक्कधुवमघमवेंतंगंधुद्धयाभिरामा सुगंधवरगंधिया गंध-  
 वट्ठिभूया अच्छरगणसंघसंविकिण्णा दिव्वतुडियमहुरसइसंपणाइया सुरम्मा सव्वरयणा-  
 मई अच्छा जाव पडिहूवा ॥ तीसे णं सुहम्माए सभाए तिमिंसी तओ दारा पणत्ता  
 तंजहा पुरत्थिमेणं दाहिणेणं उत्तरेणं ॥ ते णं दारा पत्तेयं पत्तेयं दो दो जौयणाई

उड्डं उच्चतेणं एगं जोयणं विक्खंभेणं तावइयं चेव पवेसेणं सेया वरकणगधूमियागा जाव वणमालादारवच्चओ ॥ तेसि णं दारारणं पुरओ सुहमंडवा पण्णत्ता, ते णं सुहमंडवा अद्धतेरसजोयणाइं आयामेणं छजोयणाइं सक्कोसाइं विक्खंभेणं साइरेगाइं दो जोयणाइं उड्डं उच्चतेणं सुहमंडवा अणेगखंभसयसंनिविट्ठा जाव उल्लोया भूमि-भागवण्णओ ॥ तेसि णं सुहमंडवाणं उवरिं पत्तेयं पत्तेयं अट्ठट्ठ मंगला पण्णत्ता सोत्थिय जाव मच्छ० ॥ तेसि णं सुहमंडवाणं पुरओ पत्तेयं पत्तेयं पेच्छाघरमंडवा पण्णत्ता, ते णं पेच्छाघरमंडवा अद्धतेरसजोयणाइं आयामेणं जाव दो जोयणाइं उड्डं उच्चतेणं जाव मणिफासो ॥ तेसि णं बहुमज्झदेसभाए पत्तेयं पत्तेयं वइरामय-अक्खाडगा पण्णत्ता, तेसि णं वइरामयाणं अक्खाडगाणं बहुमज्झदेसभाए पत्तेयं २ मणिपीढिया पण्णत्ता, ताओ णं मणिपीढियाओ जोयणमेणं आयामविक्खंभेणं अद्धजोयणं बाह्लेणं सव्वमणिमईओ अच्छाओ जाव पडिह्वाओ ॥ तासि णं मणि-पीढियाणं उप्पि पत्तेयं पत्तेयं सीहासणा पण्णत्ता, सीहासणवण्णओ जाव दामा परिवारो । तेसि णं पेच्छाघरमंडवाणं उप्पि अट्ठट्ठमंगलगा झया छत्ताइछत्ता ॥ तेसि णं पेच्छाघरमंडवाणं पुरओ तिदिसिं तओ मणिपेढियाओ पण्णत्ताओ, ताओ णं मणिपेढियाओ जोयणं आयामविक्खंभेणं अद्धजोयणं बाह्लेणं सव्वमणिमईओ अच्छाओ जाव पडिह्वाओ ॥ तासि णं मणिपेढियाणं उप्पि पत्तेयं पत्तेयं महिंदज्झया अट्ठट्ठ-माइं जोयणाइं उड्डं उच्चतेणं अद्धकोसं उव्वेहेणं अद्धकोसं विक्खंभेणं वइरामयवट्ठ-लट्ठसंठियसुसिलिट्ठपरिघट्ठमट्ठसुपइट्ठिया विसिट्ठा अणेगवरपंचवण्णकुडभीसहस्सपरि-मंडियाभिरामा वाउड्ढुयविजयवेजयंतीपडागा छत्ताइछत्तकलिया तुंगा गयणयलमभि-लंघमाणसिहरा पासाइया जाव पडिह्वा ॥ तेसि णं महिंदज्झयाणं उप्पि अट्ठट्ठमंग-लगा झया छत्ताइछत्ता ॥ तेसि णं महिंदज्झयाणं पुरओ तिदिसिं तओ णंदाओ पुक्खरिणीओ प० ताओ णं पुक्खरिणीओ अद्धतेरसजोयणाइं आयामेणं सक्कोसाइं छ जोयणाइं विक्खंभेणं दसजोयणाइं उव्वेहेणं अच्छाओ पुक्खरिणीवण्णओ पत्तेयं पत्तेयं पउमवरवेइयापरिक्खत्ताओ पत्तेयं पत्तेयं वणसंडपरिक्खत्ताओ वण्णओ जाव पडिह्वाओ ॥ तेसि णं पुक्खरिणीणं पत्तेयं २ तिदिसिं तिसोवाणपडिह्वागा प०, तेसि णं तिसोवाणपडिह्वागाणं वण्णओ, तोरणा भाणियव्वा जाव छत्ताइछत्ता । सभाए णं सुहम्माए छ मणोगुलियासाहस्सीओ पण्णत्ताओ, तंजहा—पुरत्थिमेणं दो साहस्सीओ पच्चत्थिमेणं दो साहस्सीओ दाहिणेणं एगसाहस्सी उत्तरेणं एगा साहस्सी, तासु णं मणोगुलियासु बहवे सुवण्णरुप्पामया फलगा पण्णत्ता, तेसु णं सुवण्णरुप्पा-मएसु फल्लेसु बहवे वइरामया णागदंतगा पण्णत्ता, तेसु णं वइरामएसु नागदंतएसु

बहवे किण्हसुत्तवट्ठवधारियमल्लदामकलावा जाव सुक्किल्लसुत्तवट्ठवधारियमल्लदामकलावा,  
 ते णं दामा तवणिज्जलंबूसगा जाव चिट्ठंति ॥ सभाए णं सुहम्माए छोगोमाणसी-  
 साहस्सीओ पण्णत्ताओ तंजहा—पुरत्थिमेणं दो साहस्सीओ, एवं पच्चत्थिमेणवि  
 दाहिणेणं सहस्सं एवं उत्तरेणवि, तासु णं गोमाणसीसु बहवे सुवण्णरुप्पमया फलगा  
 प० जाव तेसु णं वइरामएसु नागदंतएसु बहवे रययामया सिक्कया पण्णत्ता, तेसु णं  
 रययामएसु सिक्कएसु व० वेरुलियामईओ धूवघडियाओ पण्णत्ताओ, ताओ णं  
 धूवघडियाओ कालागुरुपवरकुंदुरुत्तुरुत्तु जाव घाणमणणिव्वुइकरेणं गंधेणं सव्वओ  
 समंता आपूरेमाणीओ चिट्ठंति । सभाए णं सुहम्माए अंतो बहुसमरमणिजे भूमिभारे  
 पण्णत्ते जाव मणीणं फासो उल्लोया पउमलयभत्तिचित्ता जाव सव्वतवणिजमए अच्छे  
 जाव पडिह्वे ॥ १३७ ॥ तस्स णं बहुसमरमणिजस्स भूमिभागस्स बहुमज्झदेसभाए  
 एत्थ णं एगा महामणिपेडिया प०, सा णं मणिपेडिया दो जोयणाइं आयामविक्खं-  
 भेणं जोयणं बाहल्लेणं सव्वमणिमई जाव पडिह्वे ॥ तीसे णं मणिपेडियाए उप्पि  
 एत्थ णं एगे महं सीहासणे पण्णत्ते, सीहासणवण्णओ ॥ तीसे णं विदिसाए एत्थ णं  
 एगा महं मणिपेडिया प० जोयणं आयामविक्खंभेणं अद्धजोयणं बाहल्लेणं सव्वमणि-  
 मई अच्छा जाव पडिह्वे ॥ तीसे णं मणिपेडियाए उप्पि एत्थ णं एगे महं देव-  
 सयणिजे पण्णत्ते, तस्स णं देवसयणिजस्स अयमेयारूवे वण्णावासे पण्णत्ते, तंजहा—  
 नाणामणिमया पडिपाया सोवणिणया पाया नाणामणिमया पायसीसा जंवूणयमयाइं  
 गत्ताइं वइरामया संघी नाणामणिमए चिच्चे रययामया तूली लोहियक्खमया  
 विव्वोयणा तवणिजमई गंडोवहाणिया, से णं देवसयणिजे उभओ विव्वोयणे  
 दुहओ उण्णए मज्झेणयगंभीरे साल्लिगणवट्ठिए गंगापुलिणवालुउद्दालसालिसए ओय-  
 वियक्खोमदुगुल्लपट्टपडिच्छायणे सुविरइयरयत्ताणे रत्तंसुयसंयुए सुरम्मे आईणगह-  
 यवूरणवणीयतूलफासमउए पासाईए ४ ॥ तस्स णं देवसयणिजस्स उत्तरपुरत्थिमेणं  
 एत्थ णं महई एगा मणिपीडिया पण्णत्ता जोयणमेणं आयामविक्खंभेणं अद्धजोयणं  
 बाहल्लेणं सव्वमणिमई अच्छा जाव पडिह्वे ॥ तीसे णं मणिपीडियाए उप्पि एगे  
 महं खुड्डए महिंदज्झए पण्णत्ते अद्धट्टमाइं जोयणाइं उड्डं उच्चतेणं अद्धकोसं उव्वे-  
 हेणं अद्धकोसं विक्खंभेणं वइरामयवट्टलट्टसंठिए तहेव जाव मंगलगा झया छत्ताइ-  
 छत्ता ॥ तस्स णं खुड्डमहिंदज्झयस्स पच्चत्थिमेणं एत्थ णं विजयस्स देवस्स चुप्पालए  
 नाम पहरणकोसे पण्णत्ते ॥ तत्थ णं विजयस्स देवस्स फलिहरयणपामोक्खा बहवे  
 पडरणरयणा संनिक्खत्ता चिट्ठंति, उज्जलसुणिसियसुतिक्खधारा पासाइया ४ ॥ तीसे  
 णं सभाए सुहम्माए उप्पि बहवे अद्धट्टमंगलगा झया छत्ताइछत्ता ॥ १३८ ॥

सभाए णं सुहम्माए उत्तरपुरत्थिमेणं एत्थ णं एगा महं उववायसभा पण्णत्ता जहा सुहम्मा तहेव जाव गोमाणसीओ उववायसभाएवि दारा सुहमंडवा सव्वं भूमिभागे तहेव जाव मणिफासो (सुहम्मासभावत्तव्वया भाणियव्वा जाव भूमीए फासो) ॥ तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगा महं मणिपेढिया पण्णत्ता जोयणं आयामविक्खंभेणं अद्धजोयणं बाह्हेणं सव्वमणिमई अच्छा जाव पडिह्वा, तीसे णं मणिपेढियाए उप्पि एत्थ णं एगे महं देवसयणिज्जे पण्णत्ते, तस्स णं देवसयणिज्जस्स वण्णओ, उववायसभाए णं उप्पि अट्ठमंगलगा झया छत्ताइछत्ता जाव उत्तिमागारा, तीसे णं उववायसभाए उत्तरपुरच्छिमेणं एत्थ णं एगे महं हरए पण्णत्ते, से णं हरए अद्धतेरसजोयणाइं आयामेणं छकोसाइं जोयणाइं विक्खंभेणं दस जोयणाइं उव्वेहेणं अच्छे सण्हे वण्णओ जहेव णंदाणं पुक्खरिणीणं जाव तोरणवण्णओ, तस्स णं हरयस्स उत्तरपुरत्थिमेणं एत्थ णं एगा महं अभिसेयसभा पण्णत्ता जहा सभासुहम्मा तं चेव निरवसेसं जाव गोमाणसीओ भूमिभाए उल्लोए तहेव ॥ तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगा महं मणिपेढिया पण्णत्ता जोयणं आयामविक्खंभेणं अद्धजोयणं बाह्हेणं सव्वमणिमया अच्छा० ॥ तीसे णं मणिपेढियाए उप्पि एत्थ णं महं एगे सीहासणे पण्णत्ते, सीहासणवण्णओ अपरिवारो ॥ तत्थ णं विजयस्स देवस्स सुबहु आभिसेक्के भंडे संणिक्खत्ते चिट्ठइ, अभिसेयसभाए उप्पि अट्ठमंगलगा जाव उत्तिमागारा सोलसविहेहिं रयणेहिं उवसोमिया, तीसे णं अभिसेयसभाए उत्तरपुरत्थिमेणं एत्थ णं एगा महं अलंकारियसभा पण्णत्ता अभिसेयसभावत्तव्वया भाणियव्वा जाव गोमाणसीओ मणिपेढियाओ जहा अभिसेयसभाए उप्पि सीहासणं (स)-अपरिवारं ॥ तत्थ णं विजयस्स देवस्स सुबहु अलंकारिए भंडे संणिक्खत्ते चिट्ठइ, अलंकारिय० उप्पि मंगलगा झया जाव (छत्ताइछत्ता) उत्तिमागारा ॥ तीसे णं अलंकारियसहाए उत्तरपुरत्थिमेणं एत्थ णं एगा महं ववसायसभा पण्णत्ता, अभिसेयसभावत्तव्वया जाव सीहासणं अपरिवारं ॥ त(ए)त्थ णं विजयस्स देवस्स एगे महं पोत्थयरयणे संणिक्खत्ते चिट्ठइ, तस्स णं पोत्थयरयणस्स अयमेयारुवे वण्णावासे पत्तत्ते, तंजहा—रिट्ठामईओ कंबियाओ [रययामयाइं पत्तागईं] तवणिजमए दोरे णाणामणिमए गंठी (अंकमयाइं पत्ताइं) वेरुलियमए लिप्पासणे तवणिजमई संकला रिट्ठामए छायणे रिट्ठामया मसी वइरामई लेहणी रिट्ठामयाइं अक्खराइं धम्मिणए सत्थे ववसायसभाए णं उप्पि अट्ठमंगलगा झया छत्ताइछत्ता उत्तिमागारेति । तीसे णं ववसायसभाए उत्तरपुरच्छिमेणं एत्थ णं एगा महं णंदापुक्खरिणी

पणत्ता जं चेव पमाणं हरयस्स तं चेव सर्व्वं ॥ १३९-१४० ॥ तेणं कालेणं  
 तेणं समएणं विजए देवे विजयाए रायहाणीए उववायसभाए देवसयणिजंसी देव-  
 दूसंतरिए अंगुलस्स असंखेजइभागमेत्तीए बोंदीए विजयदेवत्ताए उववण्णे ॥ तए णं  
 से विजए देवे अहुणोववण्णमेत्ताए चेव समाणे पंचविहाए पज्जतीए पज्जतीभावं  
 गच्छइ, तंजहा—आहारपज्जतीए सरीरपज्जतीए इंदियपज्जतीए आणापाणुपज्जतीए  
 भासामणपज्जतीए ॥ तए णं से विजए देवे देवसयणिज्जाओ अब्भुद्वेइ २ ता दिव्वं  
 देवदूसजुयलं परिहेइ २ ता देवसयणिज्जाओ पच्चोरुहइ २ ता उववायसभाओ  
 पुरत्थिमेणं दारेणं णिग्गच्छइ २ ता जेणेव हरए तेणेव उवागच्छइ उवागच्छित्ता  
 हरयं अणुपयाहिणं करेमाणे करेमाणे पुरत्थिमेणं तोरणेणं अणुपविस्इ २ ता पुर-  
 त्थिमिच्छेणं तिसोवाणपडिरुवएणं पच्चोरुहइ २ ता हरयं ओगाहइ २ ता जलावगाहणं  
 करेइ २ ता जलमज्जणं करेइ २ ता जलकिडुं करेइ २ ता आयंते चोक्खे परमसुइ-  
 भूए हरयाओ पच्चुत्तरइ २ ता जेणामेव अभिसेयसभा तेणामेव उवागच्छइ २ ता  
 अभिसेयसमं अणुपयाहिणं करेमाणे पुरत्थिमिच्छेणं दारेणं अणुपविस्इ २ ता जेणेव  
 सए सीहासणे तेणेव उवागच्छइ २ ता सीहासणवरगए पुरच्छाभिमुहे सण्णिसणे ॥  
 तए णं तस्स विजयस्स देवस्स सामाणियपरिसोववण्णगा देवा आभिओगिए देवे  
 सदावेति २ ता एवं वयासी—खिप्पामेव भो देवाणुप्पिया ! विजयस्स देवस्स  
 महत्थं महग्घं महरिहं विउलं इंदामिसेयं उवट्ठावेह ॥ तए णं ते आभिओगिया  
 देवा सामाणियपरिसोववण्णेहिं एवं वुत्ता समाणा हट्ठतुट्ठ जाव हियया करयलपरि-  
 ग्गहियं सिरसावत्तं मत्थए अंजलिं कट्ठु एवं देवा तहत्ति आणाए विणएणं वयणं  
 पडिबुणंति २ ता उत्तरपुरत्थिमं दिसीभागं अवक्कंति २ ता वेउव्वियसमुग्घाएणं  
 समोहणंति २ ता संखेज्जाइं जोयणाइं दंडं णिसरंति तं०—रयणाणं जाव रिट्ठाणं,  
 अट्ठावायरे पोगगले परिसाडंति २ ता अट्ठासुहुमे पोगगले परियायंति २ ता दोच्चपि  
 वेउव्वियसमुग्घाएणं समोहणंति २ ता अट्ठसहस्सं सोवण्णियाणं कल्लाणं अट्ठस-  
 हस्सं रुप्पामयाणं कल्लाणं अट्ठसहस्सं मणिमयाणं अट्ठसहस्सं सुवण्णरुप्पामयाणं  
 अट्ठसहस्सं सुवण्णमणिमयाणं अट्ठसहस्सं रुप्पामणिमयाणं अट्ठसहस्सं भोमेज्जाणं  
 अट्ठसहस्सं भिगारगाणं एवं आयंसगाणं थालाणं पाईणं सुपइट्ठागाणं चित्ताणं  
 रयणकरंडगाणं अट्ठसयं सीहासणाणं छत्ताणं चामराणं अवपडगाणं बट्ठागाणं तव-  
 सिप्पाणं खोरगाणं पीणगाणं तेह्लसमुग्गयाणं विउव्वंति ते साभाविए विउव्विए  
 य कल्ले य जाव तेह्लसमुग्गए य गेण्हंति गेण्हित्ता विजयाओ रायहाणीओ पडि-  
 निक्खमंति २ ता ताए उक्किट्ठाए जाव उड्डयाए दिव्वाए देवगईए तिरियमसंखे-

ज्जाणं दीवसमुद्वाणं मज्झमज्झेणं वीईवयमाणा २ जेणेव खीरोए समुदे तेणेव उवागच्छंति तेणेव उवागच्छिता खीरोदगं गिण्हंति गिण्हिता जाई तत्थ उप्पलाई जाव सयसहस्सपत्ताई ताई गिण्हंति २ ता जेणेव पुक्खरोदे समुदे तेणेव उवागच्छंति २ ता पुक्खरोदगं गेण्हंति पुक्खरोदगं गिण्हिता जाई तत्थ उप्पलाई जाव सयसहस्सपत्ताई ताई गिण्हंति २ ता जेणेव समयखेत्ते जेणेव भरहेरवयाई वासाई जेणेव मागहवरदामपभासाई तित्थाई तेणेव उवागच्छंति तेणेव उवागच्छिता तित्थोदगं गिण्हंति २ ता तित्थमट्ठियं गेण्हंति २ ता जेणेव गंगासिंधुरत्ता-रत्तवईसलिला तेणेव उवागच्छंति २ ता सरिओदगं गेण्हंति २ ता उभओ तडमट्ठियं गेण्हंति गेण्हिता जेणेव चुल्लहिमवंतसिहरिवासहरपव्वया तेणेव उवागच्छंति तेणेव उवागच्छिता सव्वतुवरे य सव्वपुप्फे य सव्वगंधे य सव्वमल्ले य सव्वोसहिंसिद्धत्थए य गिण्हंति सव्वोसहिंसिद्धत्थए गिण्हिता जेणेव पउमहहपुंडरीयद्दहा तेणेव उवागच्छंति तेणेव उवागच्छिता दहोदगं गेण्हंति २ ता जाई तत्थ उप्पलाई जाव सयसहस्सपत्ताई ताई गेण्हंति ताई गिण्हिता जेणेव हेमवयहेरणवयाई वासाई जेणेव रोहियरोहियंसमुवण्णकूलप्पकूलाओ तेणेव उवागच्छंति २ ता सलिलोदगं गेण्हंति २ ता उभओ तडमट्ठियं गिण्हंति गेण्हिता जेणेव सद्दावाइमालवंतपरियागा वट्ठेयड्डपव्वया तेणेव उवागच्छंति तेणेव उवागच्छिता सव्वतुवरे य जाव सव्वोसहिंसिद्धत्थए य गेण्हंति सव्वोसहिंसिद्धत्थए गेण्हिता जेणेव महाहिमवंतसप्पिवासहरपव्वया तेणेव उवागच्छंति तेणेव उवागच्छिता सव्वपुप्फे तं चेव जेणेव महापउमहहमहापुंडरीयद्दहा तेणेव उवागच्छंति तेणेव उवागच्छिता जाई तत्थ उप्पलाई तं चेव जेणेव हरिवासे रम्मावासेति जेणेव हरिकंतहरिसलिलाणरकंतणारिकंतओ सलिलाओ तेणेव उवागच्छंति तेणेव उवागच्छिता सलिलोदगं गेण्हंति सलिलोदगं गेण्हिता जेणेव वियडावइगंधावइवट्ठेयड्डपव्वया तेणेव उवागच्छंति २ ता सव्वपुप्फे य तं चेव जेणेव णिसहणीलवंतवासहरपव्वया तेणेव उवागच्छंति तेणेव उवागच्छिता सव्वतुवरे य तहेव जेणेव तिगिच्छिदहकेसरिदहा तेणेव उवागच्छंति २ ता जाई तत्थ उप्पलाई तं चेव जेणेव पुव्वविदेहावरविदेहवासाई जेणेव सीयासीओयाओ महाणईओ जहाणईओ जेणेव सव्वचक्खवट्ठिविजया जेणेव सव्वमागहवरदामपभासाई तित्थाई तहेव जहेव जेणेव सव्ववक्खारपव्वया सव्वतुवरे य जेणेव सव्वंतरणईओ सलिलोदगं गेण्हंति २ ता तं चेव जेणेव मंदरे पव्वए जेणेव भइसालवणे तेणेव उवागच्छंति सव्वतुवरे य जाव सव्वोसहिंसिद्धत्थए य गिण्हंति २ ता जेणेव पंदणवणे तेणेव उवागच्छंति २ ता सव्वतुवरे जाव सव्वोसहिंसिद्धत्थे य सरसं च गोसीसचंदणं



गिण्हंति २ ता जेणेव सोमणसवणे तेणेव उवागच्छंति तेणेव उवागच्छिता सव्वतुवरे  
य जाव सव्वोसहिसिद्धत्थए य सरसगोसीसचंदणं दिव्वं च सुमणदामं गेण्हंति  
गेणिहत्ता जेणेव पंडगवणे तेणामेव समुवागच्छंति तेणेव समुवागच्छिता सव्वतुवरे  
जाव सव्वोसहिसिद्धत्थए य सरसं च गोसीसचंदणं दिव्वं च सुमणोदामं द्दूरयमलय-  
सुगंधिए य गंधे गेण्हंति २ ता एगओ मिलंति २ ता जंबुद्वीवस्स पुरत्थिमिल्लेणं  
दारेणं णिगच्छंति पुरत्थिमिल्लेणं दारेणं निगच्छिता ताए उक्किट्ठाए जाव दिव्वाए  
देवगइए तिरियमसंखेजाणं वीवसमुद्दाणं मज्झमज्झेणं वीइवयमाणा २ जेणेव विजया  
रायहाणी तेणेव उवागच्छंति २ ता विजयं रायहाणि अणुप्पयाहिणं करेमाणा २  
जेणेव अभिसेयसभा जेणेव विजए देवे तेणेव उवागच्छंति २ ता करयलपरिग्गहियं  
सिरसावत्तं मत्थए अंजलिं कट्ठु जएणं विजएणं वद्धावेंति विजयस्स देवस्स तं महत्थं  
महग्घं महरिहं विउलं अभिसेयं उवट्ठवेंति ॥ तए णं तं विजयदेवं चत्तारि सामा-  
णियसाहस्सीओ चत्तारि अग्गमहिसीओ सपरिवाराओ तिण्णि परिसाओ सत्त अणिया  
सत्त अणियाहिवई सोलस आयरक्खदेवसाहस्सीओ अज्जे य बहवे विजयरायहाणि-  
वत्थव्वगा वाणमंतरा देवा य देवीओ य तेहिं साभाविएहिं उत्तरवेउव्विएहि य  
वरकमलपइट्ठणेहिं सुरभिवरवारिपडिपुण्णेहिं चंदणकयच्चच्चागेहिं आविद्धकंठेउणेहिं  
पउमुप्पलपिहाणेहिं करयलसुकुमालकोमलपरिग्गहिएहिं अट्ठसहस्साणं सोवणियाणं  
कलसाणं रुपमयाणं जाव अट्ठसहस्साणं भोमेजाणं कलसाणं सव्वोदएहिं सव्वमट्ठि-  
याहिं सव्वतुवरोहिं सव्वपुप्फेहिं जाव सव्वोसहिसिद्धत्थएहिं सव्विड्ढीए सव्वजुइए  
सव्वबलेणं सव्वसमुदएणं सव्वायरेणं सव्वविभूइए सव्वविभूसाए सव्वसंभमेणं  
सव्वोरोहेणं सव्वणाडएहिं सव्वपुप्फगंधमल्लालंकारविभूसाए सव्वदिव्वतुडियणिणाएणं  
महया इड्ढीए महया जुइए महया बलेणं महया समुदएणं महया तुरियजमगसमग-  
पडुप्पवाइयरवेणं संखपणवपडहमेरिद्धल्लरिखरमुहिमुरवमुयंगदुंदुहिहुडुक्कणिगघोससंणि-  
णाइयरवेणं महया महया इंदामिसेगेणं अभिसिंचंति ॥ तए णं तस्स विजयस्स  
देवस्स महया महया इंदामिसेगेसि वट्ठमाणंसि अप्पेगइया देवा णच्चोदणं णाइमट्ठियं  
पविरलपप्फुसियं दिव्वं सुरभिं रयरेणुविणासणं गंधोदगवासं वासंति, अप्पेगइया देवा  
णिहयरयं णट्ठरयं भट्ठरयं पसंतरयं उवसंतरयं करेंति, अप्पेगइया देवा विजयं  
रायहाणिं सर्ब्भितरवाहिरियं आसियसम्मज्जिओवलित्तं सित्तसुइसम्मट्ठरत्थंतरावण-  
वीहियं करेंति, अप्पेगइया देवा विजयं रायहाणिं मंचाइमंचकलियं करेंति, अप्पे-  
गइया देवा विजयं रायहाणिं णाणाविहरागरंजियऊसियजयविजयवेजयन्तीपडागा-  
इपडागमंडियं करेंति, अप्पेगइया देवा विजयं रायहाणिं लाउल्लोइयमहियं करेंति,

अप्पेगइया देवा विजयं रा० गोसीससरसरत्तचंदणदहरदिण्णपंचंगुलितलं करेति, अप्पे-  
 गइया देवा विजयं० उवचियचंदणकलसं चंदणघडसुकयतोरणपडिदुवारदेसभागं करेति,  
 अप्पेगइया देवा विजयं० आसत्तोसत्तविउलवट्ठवघारियमल्लदामकलावं करेति, अप्पे-  
 गइया देवा विजयं रायहाणिं पंचवण्णसरससुरभिमुक्कपुप्फपुंजोवयारकलियं करेति,  
 अप्पेगइया देवा विजयं० कालागुरुपवरकुंदुस्सकुत्तुक्कधूवडज्झंतमघमघेतंगंधुद्धयाभिरामं  
 सुगंधवरगंधियं गंधवट्ठिभूयं करेति, अप्पेगइया देवा हिरण्णवासं वासंति, अप्पेगइया  
 देवा सुवण्णवासं वासंति, अप्पेगइया देवा एवं रयणवासं वडरवासं पुप्फवासं मल्ल-  
 वासं गंधवासं चुण्णवासं वत्थवासं आहरणवासं, अप्पेगइया देवा हिरण्णविहिं  
 भाइंति, एवं सुवण्णविहिं रयणविहिं वडरविहिं पुप्फविहिं मल्लविहिं चुण्णविहिं गंधविहिं  
 वत्थविहिं आभरणविहिं भाइंति ॥ अप्पेगइया देवा दुयं णट्ठविहिं उवदंसेति अप्पेग-  
 इया देवा विलंबियं णट्ठविहिं उवदंसेति अप्पेगइया देवा दुयविलंबियं णाम णट्ठविहिं  
 उवदंसेति अप्पेगइया देवा अंचियं णट्ठविहिं उवदंसेति अप्पेगइया देवा रिभियं  
 णट्ठविहिं उवदंसेति अ० अंचियरिभियं णाम दिव्वं णट्ठविहिं उवदंसेति अप्पेगइया  
 देवा आरभडं णट्ठविहिं उवदंसेति अप्पेगइया देवा भसोलं णट्ठविहिं उवदंसेति  
 अप्पेगइया देवा आरभडभसोलं णाम दिव्वं णट्ठविहिं उवदंसेति अप्पेगइया देवा  
 उप्पायणिवायपवुत्तं संकुचियपसारियं रियारियं भंतसंभंतं णाम दिव्वं णट्ठविहिं  
 उवदंसेति, अप्पेगइया देवा चउव्विहं वाइयं वाएंति, तंजहा—ततं विततं घणं  
 छुसिरं, अप्पेगइया देवा चउव्विहं गेयं गायंति, तंजहा—उक्खित्तयं पवत्तयं मंदायं  
 रोइयावसाणं, अप्पेगइया देवा चउव्विहं अभिणयं अभिणयंति, तंजहा—दिट्ठवितियं  
 पाडंवितियं सामन्तोवणिवाइयं लोगमज्झावसाणियं, अप्पेगइया देवा पीणंति, अप्पेग-  
 इया देवा वुक्कारेति, अप्पेगइया देवा तंडवेति, अप्पे० लासेति, अप्पेगइया देवा  
 पीणंति वुक्कारेति तंडवेति लासेति, अप्पेगइया देवा वुक्कारेति, अप्पेगइया देवा  
 अप्फोडंति, अप्पेगइया देवा वग्गंति, अप्पेगइया देवा तिवइं छिंदंति, अप्पेगइया देवा  
 अप्फोडंति वग्गंति तिवइं छिंदंति, अप्पेगइया देवा हयहेसियं करेति, अप्पेगइया देवा  
 हत्थिगुल्लगुलाइयं करेति, अप्पेगइया देवा रहघणघणाइयं करेति, अप्पेगइया देवा  
 हयहेसियं करेति हत्थिगुल्लगुलाइयं करेति रहघणघणाइयं करेति, अप्पेगइया देवा  
 उच्छोलेंति, अप्पेगइया देवा पच्छोलेंति, [ अप्पेगइया देवा उक्किट्ठिं करेति ] अप्पे-  
 गइया देवा उक्किट्ठीओ करेति, अप्पेगइया देवा उच्छोलेंति पच्छोलेंति उक्किट्ठीओ  
 करेति, अप्पेगइया देवा सीह्णायं करेति, अप्पेगइया देवा पायदहरयं करेति, अप्पे-  
 गइया देवा भूमिचवेडं दलयंति, अप्पेगइया देवा सीह्णायं पायदहरयं भूमिचवेडं

दलयंति, अप्पेगइया देवा हक्कारेंति, अप्पेगइया देवा वुक्कारेंति, अप्पेगइया देवा थक्कारेंति, अप्पे० पुक्कारेंति, अप्पेगइया देवा नामाहं सावेंति, अप्पेगइया देवा हक्कारेंति वुक्कारेंति थक्कारेंति पुक्कारेंति णामाहं सावेंति, अप्पेगइया देवा उप्पयंति, अप्पेगइया देवा णिवयंति, अप्पेगइया देवा परिवयंति, अप्पेगइया देवा उप्पयंति णिवयंति परिवयंति, अप्पेगइया देवा जलेंति, अप्पेगइया देवा तवंति, अप्पेगइया देवा पतवंति, अप्पेगइया देवा जलंति तवंति पतवंति, अप्पेगइया देवा गज्जेंति, अप्पेगइया देवा विज्जुयार्यंति, अप्पेगइया देवा वासंति, अप्पेगइया देवा गज्जंति विज्जुयार्यंति वासंति, अप्पेगइया देवा देवसन्निवायं करेंति, अप्पेगइया देवा देवुक्कलियं करेंति, अप्पेगइया देवा देवकहकहं करेंति, अप्पेगइया देवा देवदुहदुहं करेंति, अप्पेगइया देवा देवसन्निवायं देवउक्कलियं देवकहकहं देवदुहदुहं करेंति, अप्पेगइया देवा देवुज्जोयं करेंति, अप्पेगइया देवा विज्जुयारं करेंति, अप्पेगइया देवा चेलुक्खेवं करेंति, अप्पेगइया देवा देवुज्जोयं विज्जुयारं चेलुक्खेवं करेंति, अप्पेगइया देवा उप्पलहत्थगया जाव सहस्सपत्त० घंटाहत्थगया कलसहत्थगया जाव तेळसमुग्गयहत्थगया हट्ठुट्ठ जाव हरिसवसविसप्पमाणहियया विजयाए रायहाणीए सव्वओ समंता आधावेंति परिधावेंति ॥ तए णं तं विजयं देवं चत्तारि सामाणियसाहस्सीओ चत्तारि अग्गमहिंसीओ सपरिवाराओ जाव सोलसआयरक्खदेवसाहस्सीओ अण्णे य बह्वे विजयरायहाणीवत्थवा वाणमंतरा देवा य देवीओ य तेहिं वरकमलपट्ठाणेहिं जाव अट्ठसएणं सोवणिगयाणं कलसाणं तं चेव जाव अट्ठसएणं भोमेज्जाणं कलसाणं सव्वोदगेहिं सव्वमट्ठियाहिं सव्वतुवरेहिं सव्वपुप्फेहिं जाव सव्वोसहिसिद्धत्थएहिं सव्विच्छीए जाव निम्बोसनाइयरवेणं महया २ इंदामिसेएणं अभिसिंचंति २ ता पत्तेयं २ सिरसावत्तं अंजलिं कट्ठु एवं वयासी—जय जय नंदा ! जय जय भद्दा ! जय जय नंद भद्दं ते अजियं जिणेहिं जियं पालयाहिं अजियं जिणेहिं सत्तुपक्खं जियं पालेहिं मित्तपक्खं जियमज्जे वसाहिं तं देव ! निस्वसग्गं इंदो इव देवाणं चंदो इव ताराणं चमरो इव असुराणं धरणो इव नागाणं भरहो इव मणुयाणं बहूणि पलिओवमाइं बहूणि सागरोवमाणि बहूणि पलिओवमसागरोवमाणि चउण्हं सामाणियसाहस्सीणं जाव आयरक्खदेवसाहस्सीणं विजयस्स देवस्स विजयाए रायहाणीए अण्णेसिं च बहूणं विजयरायहाणिवत्थवाणं वाणमंतराणं देवाणं देवीण य आहेवच्चं जाव आणाईसरसेणावच्चं कारेमाणे पालेमाणे विहाराहित्तिकट्ठु महया २ सदेणं जयजयसदं पउंजंति ॥ १४१ ॥ तए णं से विजए देवे महया २ इंदामिसेएणं अभिसित्ते समाणे सीहासणाओ अब्भुट्ठेइ सीहासणाओ अब्भुट्ठेता अभिसेयसभाओ पुरत्थिमेणं दारेणं पडिनिक्खमइ २ ता

जेणेव अलंकारियसभा तेणेव उवागच्छइ २ ता अलंकारियसभं अणुप्पया-  
हिणीकरेमाणे २ पुरत्थिमेणं दारेणं अणुपविसइ पुरत्थिमेणं दारेणं अणुपविसित्ता  
जेणेव सीहासणे तेणेव उवागच्छइ २ ता सीहासणवरगए पुरत्थाभिमुहे सण्णिसण्णे,  
तए णं तस्स विजयस्स देवस्स सामाणियपरिसोववण्णगा देवा आभिओगिए देवे  
सद्धान्वेति २ ता एवं वयासी-खिप्पामेव भो देवाणुप्पिया ! विजयस्स देवस्स आलंकारियं  
भंडं उवणेह, तए णं ते आलंकारियं भंडं जाव उवट्ठवेति ॥ तए णं से विजए देवे  
तप्पडमयाए पम्हलसूमालाए दिव्वाए सुरभीए गंधकासाईए गायार्इ लहेइ गायार्इ  
लहेत्ता सरसेणं गोसीसचंदणेणं गायार्इ अणुलिपइ सरसेणं गोसीसचंदणेणं गायार्इ  
अणुलिपेत्ता तओऽणंतरं च णं नासाणीसासवायवोज्झं चक्खुहरं वण्णफरिसजुत्तं  
हयलालापेलवाइरेणं धवलं कणगखइयंतकम्मं आगासफलिहसरिसप्पभं अहयं दिव्वं  
देवदूसजुयलं गियंसेइ गियंसेत्ता हारं पिणिद्धेइ हारं पिणिद्धेत्ता अद्धहारं पिणिद्धेइ अद्ध०  
एवं एगावलिं पिणिंघइ एगावलिं पिणिंघेत्ता एवं एएणं अभिलावेणं सुत्तावलिं  
कणगावलिं रयणावलिं कडगाइं तुडियाइं अंगयाइं केऊराइं दसमुद्धियाणंतगं कडिसुत्तगं  
वेयच्छिसुत्तगं मुरविं कंठमुरविं पालंबं कुंडलाइं चूडामणिं चित्तरयणसंकडं मउडं  
पिणिंघेइ पिणिंघित्ता गंठिमवेदिमपूरिमसंचाइमेणं चउव्विहेणं मल्लेणं कप्पस्सखयंपिव  
अप्पाणं अलंकियविभूसियं करेइ कप्पस्सखयंपिव अप्पाणं अलंकियविभूसियं करेत्ता  
ददरमलयसुगंधगंधिएहिं गंधेहिं गायार्इ सुक्किडइ २ ता दिव्वं सुमणदामं पिणिद्धइ ॥  
तए णं से विजए देवे केसालंकारेणं वत्थालंकारेणं मल्लालंकारेणं आभरणालं-  
कारेणं चउव्विहेणं अलंकारेणं अलंकियविभूसिए समाणे पडिपुण्णालंकारे सीहा-  
सणाओ अब्भुट्ठेइ २ ता अलंकारियसभाओ पुरच्छिमिल्लेणं दारेणं पडिनिक्खमइ २ ता  
जेणेव ववसायसभा तेणेव उवागच्छइ २ ता ववसायसभं अणुप्पयाहिणं करेमाणे २  
पुरत्थिमिल्लेणं दारेणं अणुपविसइ २ ता जेणेव सीहासणे तेणेव उवागच्छइ २ ता  
सीहासणवरगए पुरत्थाभिमुहे सण्णिसण्णे । तए णं तस्स विजयस्स देवस्स  
आभिओगिया देवा पोत्थयरयणं उवणेति ॥ तए णं से विजए देवे पोत्थयरयणं  
गेण्हइ २ ता पोत्थयरयणं मुयइ पोत्थयरयणं मुएत्ता पोत्थयरयणं विहाडेइ  
पोत्थयरयणं विहाडेत्ता पोत्थयरयणं वाएइ पोत्थयरयणं वाएत्ता धम्मियं ववसायं  
पगेण्हइ धम्मियं ववसायं पगेण्हित्ता पोत्थयरयणं पडिणिक्खवेइ २ ता सीहासणाओ  
अब्भुट्ठेइ २ ता ववसायसभाओ पुरत्थिमिल्लेणं दारेणं पडिणिक्खमइ २ ता जेणेव  
सभा सुहम्मा तेणेव पहारेत्थ गमणाए । तए णं से विजए देवे चउहिं सामाणिय-  
साहस्सीहिं जाव सोलसहिं आयरक्खदेवसाहस्सीहिं सव्विह्वीए जाव निग्घोसनाइय-

रवेणं जेणेव सभा सुहम्मा तेणेव उवागच्छइ २ ता सभं सुहम्मं पुरत्थिमिद्धेणं दारेणं  
अणुपविसइ २ ता जेणेव मणिपेडिया तेणेव उवागच्छइ २ ता सीहासणवरगए  
पुरच्छाभिमुहे सणिसण्णे ॥ १४२ ॥ तए णं तस्स विजयस्स देवस्स चत्तारि  
सामाणियसाहस्सीओ अवस्तरेणं उत्तरेणं उत्तरपुरच्छिमेणं पत्तेयं २ पुव्वणत्थेसु  
भद्दासणेसु णिसीयंति । तए णं तस्स विजयस्स देवस्स चत्तारि अग्गमहिस्सीओ  
पुरत्थिमेणं पत्तेयं २ पुव्वणत्थेसु भद्दासणेसु णिसीयंति । तए णं तस्स विजयस्स  
देवस्स दाहिणपुरत्थिमेणं अब्भितरियाए परिसाए अट्ठ देवसाहस्सीओ पत्तेयं २ जाव  
णिसीयंति । एवं दक्खिणेणं मज्झिमियाए परिसाए दस देवसाहस्सीओ जाव  
णिसीयंति । दाहिणपच्चत्थिमेणं बाहिरियाए परिसाए बारस देवसाहस्सीओ पत्तेयं २  
जाव णिसीयंति । तए णं तस्स विजयस्स देवस्स पच्चत्थिमेणं सत्त अणियाहिंवई  
पत्तेयं २ जाव णिसीयंति । तए णं तस्स विजयस्स देवस्स पुरत्थिमेणं दाहिणेणं  
पच्चत्थिमेणं उत्तरेणं सोलस आयरक्खदेवसाहस्सीओ पत्तेयं २ पुव्वणत्थेसु भद्दासणेसु  
णिसीयंति, तंजहा—पुरत्थिमेणं चत्तारि साहस्सीओ जाव उत्तरेणं च ॥ ते णं  
आयरक्खा सन्नद्धवद्धवम्मियकवया उप्पीलियसरासणपट्टिया पिणद्दगेवेज्जविमलवर-  
चिंधपट्टा गहियाउहप्पहरणा तिणयाई तिसंघीणि वइरामया कोडीणि धणूई अभिगिज्झ  
परियाइयकंडकलावा णीलपाणिणो पीयपाणिणो रत्तपाणिणो चावपाणिणो चारुपाणिणो  
चम्मपाणिणो खग्गपाणिणो दंडपाणिणो पासपाणिणो णीलपीयरत्तचावचारुचम्मख-  
ग्गदंडपासवरवरा आयरक्खा रक्खोवगा गुत्ता गुत्तपालिया जुत्ता जुत्तपालिया पत्तेयं २  
समयओ विणयओ किंकरभूयाविव चिट्ठंति ॥ विजयस्स णं भंते ! देवस्स केवइयं  
कालं ठिई पण्णत्ता ? गो० ! एणं पल्लोवमं ठिई पण्णत्ता, विजयस्स णं भंते !  
देवस्स सामाणियाणं देवाणं केवइयं कालं ठिई पण्णत्ता ? गोयमा ! एणं पल्लोवमं  
ठिई पण्णत्ता, एवमहिद्धिए एवमहज्जुइए एवमहब्बले एवमहायसे एवमहासुक्खे  
एवमहाणुभागे विजए देवे २ ॥ १४३ ॥ कहि णं भंते ! जंबुद्वीवस्स २ वेजयंते  
णामं दारे पण्णत्ते ? गोयमा ! जंबुद्वीवे २ मंदरस्स पव्वयस्स दक्खिणेणं पणयालीसं  
जोयणसहस्साइं अवाहाए जंबुद्वीवदीवदाहिणपेरंते लवणसमुद्दाहिणदस्स उत्तरेणं  
एत्थ णं जंबुद्वीवस्स २ वेजयंते णामं दारे पण्णत्ते अट्ठ जोयणाई उड्डं उच्चत्तेणं  
सच्चैव सव्वा वत्तव्वया जाव णिच्चे । कहि णं भंते ! ० रायहाणी ? दाहिणेणं जाव  
वेजयंते देवे २ ॥ कहि णं भंते ! जंबुद्वीवस्स २ जयंते णामं दारे पण्णत्ते ? गोयमा !  
जंबुद्वीवे २ मंदरस्स पव्वयस्स पच्चत्थिमेणं पणयालीसं जोयणसहस्साइं जंबुद्वीवप-  
च्चत्थिमपेरंते लवणसमुद्दपच्चत्थिमदस्स पुरच्छिमेणं सीओयाए महाणईए उप्पि एत्थ णं

जंबुद्दीवस्स दीवस्स जयंते णामं दारे पण्णत्ते, तं चेव से पमाणं जयंते देवे पच्चत्थिमेणं  
 से रायहाणी जाव महिद्धिण्णं ॥ कहि णं भंते ! जंबुद्दीवस्स २ अपराइए णामं दारे  
 पण्णत्ते ? गोयमा ! मंदरस्स पव्वयस्स उत्तरेणं पणयालीसं जोयणसहस्साइं अवाहाए  
 जंबुद्दीवे २ उत्तरपेरंते लवणसमुद्दस्स उत्तरद्धस्स दाहिणेणं एत्थ णं जंबुद्दीवे २  
 अपराइए णामं दारे पण्णत्ते तं चेव पमाणं, रायहाणी उत्तरेणं जाव अपराइए देवे,  
 चउण्हवि अण्णमि जंबुद्दीवे ॥ १४४ ॥ जंबुद्दीवस्स णं भंते ! दीवस्स दारस्स य  
 दारस्स य एस णं केवइयं अवाहाए अंतरे पण्णत्ते ? गोयमा ! अउणासीइं जोयण-  
 सहस्साइं बावण्णं च जोयणाइं देसूणं च अद्धजोयणं दारस्स य २ अवाहाए अंतरे  
 पण्णत्ते ॥ १४५ ॥ जंबुद्दीवस्स णं भंते ! दीवस्स पएसा लवणं समुद्दं पुट्ठा ? हंता  
 पुट्ठा ॥ ते णं भंते ! किं जंबुद्दीवे २ लवणसमुद्दं ? गोयमा ! जंबुद्दीवे दीवे नो खलु  
 ते लवणसमुद्दं ॥ लवणस्स णं भंते ! समुद्दस्स पएसा जंबुद्दीवं दीवं पुट्ठा ? हंता पुट्ठा । ते  
 णं भंते ! किं लवणसमुद्दं जंबुद्दीवे दीवे ? गोयमा ! लवणे णं ते समुद्दं नो खलु ते जंबु-  
 द्दीवे दीवे ॥ जंबुद्दीवे णं भंते ! दीवे जीवा उद्दाइत्ता २ लवणसमुद्दं पच्चायंति ? गोयमा !  
 अत्थेगइया पच्चायंति अत्थेगइया नो पच्चायंति ॥ लवणे णं भंते ! समुद्दं जीवा उद्दाइत्ता २  
 जंबुद्दीवे २ पच्चायंति ? गोयमा ! अत्थेगइया पच्चायंति अत्थेगइया नो पच्चायंति ॥ १४६ ॥  
 से केणट्ठेणं भंते ! एवं वुच्चइ-जंबुद्दीवे २ ? गोयमा ! जंबुद्दीवे २ मंदरस्स पव्वयस्स उत्तरेणं  
 णीलवंतस्स वासहरपव्वयस्स दाहिणेणं मालवंतस्स वक्खारपव्वयस्स पच्चत्थिमेणं गंध-  
 मायणस्स वक्खारपव्वयस्स पुरत्थिमेणं एत्थ णं उत्तरकुरा णाम कुरा पण्णत्ता, पाईणप-  
 ड्डीणायया उदीणदाहिणवित्थिण्णा अद्धचंदसंठाणसंठिया एक्कारस जोयणसहस्साइं अट्ठ  
 बायाले जोयणसए दोण्णि य एगूणवीसइभागे जोयणस्स विक्खंभेणं ॥ तीसे जीवा उत्त-  
 रओ पाईणपडीणायया दुहुओ वक्खारपव्वयं पुट्ठा, पुरत्थिमिळाए कोडीए पुरत्थिमिळं  
 वक्खारपव्वयं पुट्ठा, पच्चत्थिमिळाए कोडीए पच्चत्थिमिळं वक्खारपव्वयं पुट्ठा, तेवण्णं  
 जोयणसहस्साइं आयामेणं, तीसे धणुपट्ठं दाहिणेणं सट्ठिं जोयणसहस्साइं चत्तारि य  
 अट्ठारसुत्तरे जोयणसए दुवालस य एगूणवीसइभाए जोयणस्स परिक्खेवेणं पण्णत्ते ॥  
 उत्तरकुराए णं भंते ! कुराए केरिसए आगारभावपडोयारे पण्णत्ते ? गोयमा !  
 बहुसमरमणिजे भूमिभागे पण्णत्ते, से जहा णामए आलिगपुक्खरेइ वा जाव एवं  
 एगूरुयदीववत्तव्वया जाव देवलोगपरिगहा णं ते मणुयगणा पण्णत्ता समणाउसो !,  
 गवरि इमं णाणत्तं—छधणुसहस्समूसिया दोळप्पच्चा पिट्ठकरंडगसया अट्ठमभत्तस्स  
 आहारट्ठे समुप्पज्जइ तिण्णि पलिओवमाइं देसूणाइं पलिओवमस्सासंखिज्जइभागेण  
 ऊणगाइं जहत्तेणं, तिच्चि पलिओवमाइं उक्कोसेणं, एगूणपण्णराइंदियाइं अणुपालणा,

सेसं जहा एगूयणं ॥ उत्तरकुराए णं कुराए छव्विहा मणुस्सा अणुसज्जंति, तंजहा-  
 पम्हंथा १ मियंथा २ अममा ३ सहा ४ तेयालीसा ५ सणिचारी ६ ॥ १४७ ॥  
 कहि णं भंते ! उत्तरकुराए कुराए जमगा नामं दुवे पव्वया पन्नता ? गोयमा !  
 नीलवंतस्स वासहरपव्वयस्स दाहिणेणं अट्ठचोत्तीसे जोयणसए चत्तारि य सत्तभागे  
 जोयणस्स अवाहाए सीयाए महाणइए (पुव्वपच्छिमेणं) उभओ कूले इत्थ णं उत्तर-  
 कुराए २ जमगा णामं दुवे पव्वया पण्णत्ता एगमेगं जोयणसहस्सं उड्ढं उच्चत्तेणं  
 अड्ढाइज्जाइं जोयणसयाणि उव्वेहेणं मूले एगमेगं जोयणसहस्सं आयामविकखंमेणं  
 मज्झे अद्वट्ठमाइं जोयणसयाइं आयामविकखंमेणं उवरिं पंचजोयणसयाइं आयाम-  
 विकखंमेणं मूले तिण्णि जोयणसहस्साइं एगं च बावट्ठिं जोयणसयं किंचिविसेसाहियं  
 परिकखेवेणं मज्झे दो जोयणसहस्साइं तिच्चि य बावत्तरे जोयणसए किंचिविसेसाहिए  
 परिकखेवेणं पन्नत्ते उवरिं पन्नरस एक्कासीए जोयणसए किंचिविसेसाहिए परिकखेवेणं  
 पण्णत्ते, मूले विच्छिण्णा मज्झे संखित्ता उप्पि तणुया गोपुच्छसंठाणसंठिया सव्व-  
 कणगामया अच्छा सण्हा जाव पडिह्वा पत्तेयं २ पउमवरवेइयापरिक्खित्ता पत्तेयं २  
 वणसंडपरिक्खित्ता, वण्णओ दोण्हवि, तेसि णं जमगपव्वयाणं उप्पि बहुसमरमणिज्जे  
 भूमिभागे पण्णत्ते वण्णओ जाव आसयंति० ॥ तेसि णं बहुसमरमणिज्जाणं भूमि-  
 भागाणं बहुमज्झदेसभाए पत्तेयं २ पासायवडेंसगा पण्णत्ता, ते णं पासायवडेंसगा  
 बावट्ठिं जोयणाइं अद्वजोयणं च उड्ढं उच्चत्तेणं एकत्तीसं जोयणाइं कोसं च विकखंमेणं  
 अब्भुगयमूसिया वण्णओ भूमिभागा उल्लोया दो जोयणाइं मणिपेडियाओ वरसीहा-  
 सणा सपरिवारा जाव जमगा चिट्ठंति ॥ से केणट्ठेणं भंते ! एवं वुच्चइ-जमगा  
 पव्वया २ ? गोयमा ! जमगेसु णं पव्वएसु तत्थ तत्थ देसे २ तहिं तहिं बहुइओ  
 खुड्ढाखुड्ढियाओ वावीओ जाव बिलपंतिआओ, तासु णं खुड्ढाखुड्ढियासु जाव बिलपंति-  
 यासु बहूइं उप्पलाइं जाव सयसहस्सपत्ताइं जमगप्पमाइं जमगवण्णाइं, जमगा य  
 एत्थ दो देवा महिद्धिया जाव पलिओवमट्ठिइया परिवसंति, ते णं तत्थ पत्तेयं पत्तेयं  
 चउण्हं सामाणियसाहस्सीणं जाव जमगाणं पव्वयाणं जमगाण य रायहाणीणं  
 अण्णेसिं च बहूणं वाणमंतराणं देवाण य देवीण य आहेवच्चं जाव पालेमाणा विह-  
 रंति, से तेणट्ठेणं गोयमा ! एवं० जमगपव्वया २, अदुत्तरं च णं गोयमा ! जाव  
 णिच्चा ॥ कहि णं भंते ! जमगाणं देवाणं जमगाओ नाम रायहाणीओ पण्णत्ताओ ?  
 गोयमा ! जमगाणं पव्वयाणं उत्तरेणं तिरियमसंखेज्जे दीवसमुदे वीइवइत्ता अण्णंमि  
 जंबुदीवे २ बारस जोयणसहस्साइं ओगाहिता एत्थ णं जमगाणं देवाणं जमगाओ  
 णाम रायहाणीओ पण्णत्ताओ बारसजोयणसहस्स जहा विजयस्स जाव महिद्धिया०

जमगा देवा जमगा देवा ॥ १४८ ॥ कहि णं भंते ! उत्तरकुराए २ नीलवंतद्देहं णांमं दहे पण्णत्ते ? गोयमा ! जमगपव्वयाणं दाहिणेणं अट्ठचोत्तीसे जोयणसए चत्तारि सत्तभागा जोयणस्स अबाहाए सीयाए महाणइए बहुमज्झदेसभाए एत्थ णं उत्तर-  
 कुराए २ नीलवंतद्देहं नामं दहे पन्नत्ते, उत्तरदक्खिणायए पाईणपडीणविच्छिन्ने एणं जोयणसहस्सं आयामेणं पंच जोयणसयाइं विक्खंभेणं दस जोयणाइं उव्वेहेणं अच्छे सण्हे रययामयकूले चउक्कोणे समतीरे जाव पडिरूवे उभओ पासिं दोहिं पउम-  
 वरवेइयाहिं वणसंडेहि य सव्वओ समंता संपरिक्खित्ते दोण्हवि वण्णओ ॥ नीलवंत-  
 दहस्स णं दहस्स तत्थ २ जाव बहवे तिसोवाणपडिरूवगा पण्णत्ता, वण्णओ भाणि-  
 यव्वो जाव तोरणत्ति ॥ तस्स णं नीलवंतद्देहस्स णं दहस्सं बहुमज्झदेसभाए एत्थ णं एगे महं पउमे पण्णत्ते, जोयणं आयामविक्खंभेणं तं तिगुणं सविसेसं परिक्खेवेणं अद्धजोयणं बाहल्लेणं दस जोयणाइं उव्वेहेणं दो कोसे ऊसिए जलंताओ साइरेगाइं दसद्धजोयणाइं सव्वग्गेणं पण्णत्ते ॥ तस्स णं पउमस्स अयमेयारूवे वण्णावासे पण्णत्ते, तंजहा—वइरामया मूला रिद्धामए कंदे वेरुलियामए नाले वेरुलियामया बाहिरपत्ता जंबूणयमया अड्भितरपत्ता तवणिज्जमया केसरा कणगामइं कण्णिया नाणामणिमया पुक्खरत्थिमुगा ॥ सा णं कण्णिया अद्धजोयणं आयामविक्खंभेणं तं तिगुणं सविसेसं परिक्खेवेणं कोसं बाहल्लेणं सव्वप्पणा कणगामइं अच्छा सण्हा जाव पडिरूवा ॥ तीसे णं कण्णियाए उवरिं बहुसमरमणिजे देसभाए पण्णत्ते जाव मणीहिं० ॥ तस्स णं बहुसमरमणिजस्स भूमिभागस्स बहुमज्झदेसभाए एत्थ णं एगे महं भवणे पण्णत्ते, कोसं आयामेणं अद्धकोसं विक्खंभेणं देसूणं कोसं उड्ढं उच्चत्तेणं अणेगखंभसयसंनिविट्ठं जाव वण्णओ, तस्स णं भवणस्स तिदिसिं तओ दारा पण्णत्ता पुरत्थिमेणं दाहिणेणं उत्तरेणं, ते णं दारा पंचधणुसयाइं उड्ढं उच्चत्तेणं अट्ठाइजाइं धणुसयाइं विक्खंभेणं तावइयं चेव पवेसेणं सेया वरकणगथूभियागा जाव वणमालाउत्ति ॥ तस्स णं भवणस्स अंतो बहुसमरमणिजे भूमिभागे पण्णत्ते से जहा नामए—अल्लिगपुक्खरेइ वा जाव मणीणं वण्णओ ॥ तस्स णं बहुसमरमणि-  
 जस्स भूमिभागस्स बहुमज्झदेसभाए एत्थ णं मणिपेडिया पण्णत्ता, पंचधणुसयाइं आयामविक्खंभेणं अट्ठाइजाइं धणुसयाइं बाहल्लेणं सव्वमणिमइं० ॥ तीसे णं मणि-  
 पेडियाए उवरि एत्थ णं एगे महं देवसयणिजे पण्णत्ते, देवसयणिजस्स वण्णओ ॥ से णं पउमे अण्णेणं अट्ठसएणं तदद्धुच्चत्तप्पमाणमेत्ताणं पउमाणं सव्वओ समंता संपरिक्खित्ते ॥ ते णं पउमा अद्धजोयणं आयामविक्खंभेणं तं तिगुणं सविसेसं परिक्खेवेणं कोसं बाहल्लेणं दस जोयणाइं उव्वेहेणं कोसं ऊसिया जलंताओ साइरेगाइं



दस जोयणाईं सव्वग्गेणं पण्णत्ताईं ॥ तेसि णं पउमाणं अयमेयारूवे वण्णावासे  
 पण्णत्ते, तंजहा—वइरामया मूला जाव णाणामणिमया पुक्खरत्थिभुगा ॥ ताओ णं  
 कण्णियाओ कोसं आयामविक्खंभेणं तं तिरुणं स० परि० अद्धकोसं बाहिल्लेणं सव्व-  
 कणगामइओ अच्छाओ जाव पडिह्वाओ ॥ तासि णं कण्णियाणं उप्पि बहुसमर-  
 मणिज्जा भूमिभागा जाव मणीणं वण्णो गंधो फासो ॥ तस्स णं पउमस्स अवरु-  
 त्तरेणं उत्तरेणं उत्तरपुरच्छिमेणं नीलवंतहहकुमारस्स देवस्स चउण्हं सामाणियसा-  
 हस्सीणं चत्तारि पउमसाहस्सीओ पण्णत्ताओ, एवं सव्वो परिवारो नवरि पउमाणं  
 भाणियव्वो ॥ से णं पउमे अण्णेहिं तिहिं पउमवरपरिक्खेवेहिं सव्वओ समंता  
 संपरिक्खित्ते, तंजहा—अब्भित्तरेणं मज्झिमेणं बाहिरएणं, अब्भित्तरए णं पउमपरि-  
 क्खेवे बत्तीसं पउमसयसाहस्सीओ प०, मज्झिमए णं पउमपरिक्खेवे चत्तालीसं  
 पउमसयसाहस्सीओ प०, बाहिरए णं पउमपरिक्खेवे अडयालीसं पउमसयसाहस्सीओ  
 पण्णत्ताओ, एवामेव सपुव्वावरेणं एगा पउमकोडी वीसं च पउमसयसाहस्सा भवं-  
 तीति मक्खाया ॥ से केणट्टेणं भंते ! एवं वुच्चइ—णीलवंतदहे दहे ? गोयमा !  
 णीलवंतदहे णं दहे तत्थ तत्थ० जाईं उप्पलाईं जाव सयसाहस्सपत्ताईं नीलवंतप्पभाईं  
 नीलवंतवण्णाभाईं नीलवंतहहकुमारे य एत्थ देवे जमगदेवगमो से तेणट्टेणं गोयमा !  
 जाव नीलवंतदहे २, णीलवंतस्स णं रायहाणी पुव्वाभिलावेणं एत्थ सो चैव गमो जाव  
 णीलवंते देवे ॥ १४९ ॥ नीलवंतहहस्स णं० पुरत्थिमपच्चत्थिमेणं दस जोयणाईं  
 अवाहाए एत्थ णं दस दस कंचणगपव्वया पण्णत्ता, ते णं कंचणगपव्वया एगमेणं  
 जोयणसयं उद्धं उच्चत्तेणं पणवीसं २ जोयणाईं उव्वेहेणं मूले एगमेणं जोयणसयं  
 विक्खंभेणं मज्झे पण्णत्तरिं जोयणाईं [आयाम]विक्खंभेणं उवरिं पण्णासं जोयणाईं  
 विक्खंभेणं मूले तिणिण सोले जोयणसए किंचिविसेसाहिए परिक्खेवेणं मज्झे दोन्नि  
 सत्ततीसे जोयणसए किंचिविसेसाहिए परिक्खेवेणं उत्रिं एणं अट्ठावण्णं जोयणसयं  
 किंचिविसेसाहिए परिक्खेवेणं मूले विच्छिण्णा मज्झे संखित्ता उप्पि तण्णया गोपुच्छ-  
 संठाणसंठिया सव्वकंचणमया अच्छा जाव पडिह्वा पत्तेयं २ पउमवरवेइया० पत्तेयं २  
 वणसंडपरिक्खित्ता ॥ तेसि णं कंचणगपव्वयाणं उप्पि बहुसमरमणिज्जे भूमिभागे जाव  
 आसयंति०, तेसि णं० पत्तेयं पत्तेयं पासायवडेंसगा सद्धवावट्ठिं जोयणाईं उद्धं उच्च-  
 त्तेणं एकतीसं जोयणाईं कोसं च विक्खंभेणं मणिपेढिया दोजोयणिया सीहासणं सप-  
 रिवारं ॥ से केणट्टेणं भंते ! एवं वुच्चइ—कंचणगपव्वया कंचणगपव्वया ? गोयमा !  
 कंचणगेषु णं पव्वएसु तत्थ तत्थ० वावीसु० उप्पलाईं जाव कंचणगवण्णाभाईं कंच-  
 णगा देवा महिद्धिया जाव विहरंति, उत्तरेणं कंचणगाणं कंचणियाओ रायहा-

णीओ अण्णंमि जंबू० तहेव सव्वं भाणियव्वं ॥ कहि णं भंते ! जंबुदीवे दीवे उत्तरकुराए कुराए उत्तरकुरुद्दे णाभं दहे पण्णत्ते ? गोयमा ! नीलवंतद्दहस्स दाहिणेणं अद्धचोत्तीसे जोयणसए, एवं सो चैव गमो णेयव्वो जो णीलवंतद्दहस्स सव्वेसिं सरिसगो दहसरिनामा य देवा, सव्वेसिं पुरत्थिमपच्चत्थिमेणं कंचणगपव्वया दस २ एगप्पमाणा उत्तरेणं रायहाणीओ अण्णंमि जंबुदीवे २ । चंदद्दे एरावणद्दे माल-वंतद्दहे एवं एक्केको णेयव्वो ॥ १५० ॥ कहि णं भंते ! उत्तरकुराए २ जंबूसुदंसणाए जंबुपेढे नामं पेढे पण्णत्ते ? गोयमा ! जंबुदीवे २ मंदरस्स पव्वयस्स उत्तरपुरच्छिमेणं नीलवंतस्स वासहरपव्वयस्स दाहिणेणं मालवंतस्स वक्खारपव्वयस्स पच्चत्थिमेणं गंधमायणस्स वक्खारपव्वयस्स पुरत्थिमेणं सीयाए महाणईए पुरत्थिमिह्ले कूले एत्थ णं उत्तरकुराए कुराए जंबुपेढे नामं पेढे पण्णत्ते पंचजोयणसयाइं आयामविकखंभेणं पण्णरस एक्कासीए जोयणसए किंचिविसेसाहिए परिकखेवेणं बहुमज्झदेसभाए बारस जोयणाइं बाह्लेणं तयाणंतरं च णं मायाए २ पएसे परिहाणीए सव्वेसु चरमंतेसु दो कोसे बाह्लेणं पण्णत्ते सव्वजंबूणयामए अच्छे जाव पडिह्वे ॥ से णं एगाए पडमवरवेइयाए एगेण य वणसंडेणं सव्वओ समंता संपरिक्खिते वण्णओ दोण्हवि । तस्स णं जंबुपेढस्स चउडिहिं चत्तारि तिसोवाणपडिह्वगा पण्णत्ता तं चैव जाव तोरणा जाव छत्ता ॥ तस्स णं जंबुपेढस्स उट्ठिं बहुसमरमणिजे भूमिभागे पण्णत्ते से जहाणामए आलिंगपुक्खरेइ वा जाव मणि० ॥ तस्स णं बहुसमरमणिजस्स भूमि-भागस्स बहुमज्झदेसभाए एत्थ णं एगा महं मणिपेढिया पण्णत्ता अट्ठ जोयणाइं आयामविकखंभेणं चत्तारि जोयणाइं बाह्लेणं सव्वमणिमइं अच्छा सण्हा जाव पडिह्व ॥ तीसे णं मणिपेढियाए उवरि एत्थ णं महं जंबूसुदंसणा पण्णत्ता अट्ठ-जोयणाइं उट्ठं उच्चत्तेणं अद्धजोयणं उव्वेहेणं दो जोयणाइं खंभे अट्ठ जोयणाइं विकखंभेणं छ जोयणाइं विडिमा बहुमज्झदेसभाए अट्ठ जोयणाइं विकखंभेणं साइ-रेगाइं अट्ठ जोयणाइं सव्वग्गेणं पण्णत्ता, वइरामयमूला रययसुपइट्ठियविडिमा रिट्ठम-यविउलकंदा वेरुलियहइरक्खंधा सुजायवरजायरूवपडमगविसालसाला नाणामणिरय-णविविहसाहप्पसाहवेरुलियपत्तवणिज्जपत्तविंटा जंबूणयरत्तमउयसुकुमालपवालपल्लवंकु-रधरा विचित्तमणिरयणसुरहिक्कुसुमा फलभारनमियसाला सच्छाया सप्पमा सस्सिरिया सउज्जोया अहियं मणोनिव्वुइकरा पासाईया दरिसणिजा अभिरूवा पडिह्व ॥ १५१ ॥ जंबूए णं सुदंसणाए चउडिहिं चत्तारि साला पण्णत्ता, तंजहा—पुरत्थिमेणं दक्खि-णेणं पच्चत्थिमेणं उत्तरेणं, तत्थ णं जे से पुरत्थिमिह्ले साले एत्थ णं एगे महं भवणे पण्णत्ते एगं कोसं आयामेणं अद्धकोसं विकखंभेणं देसूणं कोसं उट्ठं उच्चत्तेणं अणेग-

खंभ० वण्णओ जाव भवणस्स दारं तं चेव पमाणं पंचधणुसयाइं उड्डं उच्चत्तेणं  
अङ्गाइजाइं धणुसयाइं विक्खंभेणं जाव वणमालाओ भूमिभागा उल्लोया मणिपेडिया  
पंचधणुसइया देवसयणिज्जं भाणियव्वं ॥ तत्थ णं जे से दाहिणिल्ले साले एत्थ णं  
एगे महं पासायवडेंसए पण्णत्ते, कोसं उड्डं उच्चत्तेणं अद्धकोसं आयामविक्खंभेणं  
अब्भुगयमूसिय० अंतो बहुसम० उल्लोया । तस्स णं बहुसमरमणिज्जस्स भूमिभागस्स  
बहुमज्झदेसभाए सीहासणं सपरिवारं भाणियव्वं । तत्थ णं जे से पच्चत्थिमिल्ले साले  
एत्थ णं पासायवडेंसए पण्णत्ते तं चेव पमाणं सीहासणं सपरिवारं भाणियव्वं,  
तत्थ णं जे से उत्तरिल्ले साले एत्थ णं एगे महं पासायवडेंसए पण्णत्ते तं चेव पमाणं  
सीहासणं सपरिवारं । जंबू णं सुदंसणा मूले बारसहिं पडमवरवेइयाहिं सव्वओ समंता  
संपरिक्खत्ता, ताओ णं पडमवरवेइयाओ अद्धजोयणं उड्डं उच्चत्तेणं पंचधणुसयाइं  
विक्खंभेणं वण्णओ ॥ जंबू णं सुदंसणा अण्णेणं अट्टसएणं जंबूणं तयद्धुच्चत्तपमाणमे-  
त्तेणं सव्वओ समंता संपरिक्खत्ता ॥ ताओ णं जंबूओ चत्तारि जोयणाइं उड्डं उच्चत्तेणं  
कोसं चोव्वेहेणं जोयणं खंधो कोसं विक्खंभेणं तिण्णि जोयणाइं विडिमा बहुमज्झ-  
देसभाए चत्तारि जोयणाइं विक्खंभेणं साइरेगाइं चत्तारि जोयणाइं सव्वग्गेणं वड-  
रामयमूला सो चेव जंबूसुदंसणावण्णओ ॥ जंबूए णं सुदंसणाए अवस्तरेणं उत्तरेणं  
उत्तरपुरत्थिमेणं एत्थ णं अणाडियस्स देवस्स चउण्हं सामाणियसाहस्सीणं चत्तारि  
जंबूसाहस्सीओ पण्णत्ताओ, जंबूए णं सुदंसणाए पुरत्थिमेणं एत्थ णं अणाडियस्स  
देवस्स चउण्हं अग्गमहिस्सीणं चत्तारि जंबूओ पण्णत्ताओ, एवं परिवारो सव्वो  
णायव्वो जंबूए जाव आयरक्खाणं ॥ जंबू णं सुदंसणा तिहिं जोयणसएहिं वणसंडेहिं  
सव्वओ समंता संपरिक्खत्ता, तंजहा—पढमेणं दोच्चेणं तच्चेणं । जंबूए णं सुदंसणाए  
पुरत्थिमेणं पढमं वणसंडं पण्णासं जोयणाइं ओगाहिता एत्थ णं एगे महं भवणे  
पण्णत्ते, पुरत्थिमिल्ले भवणसरिसे भाणियव्वे जाव सयणिज्जं, एवं दाहिणेणं पच्चत्थिमेणं  
उत्तरेणं ॥ जंबूए णं सुदंसणाए उत्तरपुरत्थिमेणं पढमं वणसंडं पण्णासं जोयणाइं  
ओगाहिता चत्तारि णंदापुक्खरिणीओ पण्णत्ताओ, तंजहा—पडमा पडमप्पभा चेव  
कुमुया कुमुयप्पभा । ताओ णं णंदाओ पुक्खरिणीओ कोसं आयामेणं अद्धकोसं  
विक्खंभेणं पंचधणुसयाइं उव्वेहेणं अच्छाओ सण्हाओ लण्हाओ घट्ठाओ मट्ठाओ  
णिप्पंकाओ णीरयाओ जाव पडिक्खाओ वण्णओ भाणियव्वो जाव तोरणत्ति छत्ताइ-  
छत्ता ॥ तासि णं णंदापुक्खरिणीणं बहुमज्झदेसभाए एत्थ णं पासायवडेंसए पण्णत्ते  
कोसप्पमाणे अद्धकोसं विक्खंभो सो चेव वण्णओ जाव सीहासणं सपरिवारं । एवं  
दक्खिणपुरत्थिमेणवि पण्णासं जोयणा० चत्तारि णंदापुक्खरिणीओ उपपल्लुम्मा

नलिणा उप्पला उप्पलुज्जला तं चेव पमाणं तहेव पासायवडेंसगो तप्पमाणो । एवं दक्खिणपच्चत्थिमेणवि पण्णासं जोयणाणं नवरं—भिगा भिगणिभा चेव अंजणा कज्जलप्पभा, सेसं तं चेव । जंबूए णं सुदंसणाए उत्तरपुरत्थिमेणं पढमं वणसंडं पण्णासं जोयणाइं ओगाहिता एत्थ णं चत्तारि णंदाओ पुक्खरिणीओ पण्णत्ताओ तं०—सिरिकंता सिरिमहिया सिरिचंदा चेव तह य सिरिणिलया । तं चेव पमाणं तहेव पासायवडिंसओ ॥ जंबूए णं सुदंसणाए पुरत्थिमिळस्स भवणस्स उत्तरेणं उत्तरपुरत्थिमेणं पासायवडेंसगस्स दाहिणेणं एत्थ णं एगे महं कूडे पण्णत्ते अट्ठ जोयणाइं उड्ढं उच्चत्तेणं मूले बारस जोयणाइं विक्खंभेणं मज्झे अट्ठ जोयणाइं आयामविक्खंभेणं उवरिं चत्तारि जोयणाइं आयामविक्खंभेणं मूले साइरेगाइं सत्ततीसं जोयणाइं परिक्खेवेणं मज्झे साइरेगाइं पणवीसं जोयणाइं परिक्खेवेणं उवरिं साइरेगाइं बारस जोयणाइं परिक्खेवेणं मूले विच्छिन्ने मज्झे संखिते उप्पि तणुए गोपुच्छसंठाणसंठिए सव्वजंबूणयामए अच्छे जाव पडिह्वे, से णं एगाए पउमवरवेइयाए एगेणं वणसंडेणं सव्वओ समंता संपरिकिखत्ते दोण्हवि वण्णओ ॥ तस्स णं कूडस्स उवरि बहुसमरमणिजे भूमिभागे पण्णत्ते जाव आसयंति० ॥ जंबूए णं सुदंसणाए पुरत्थिमस्स भवणस्स दाहिणेणं दाहिणपुरत्थिमिळस्स पासायवडेंसगस्स उत्तरेणं एत्थ णं एगे महं कूडे पण्णत्ते तं चेव पमाणं । जंबूए णं सुदंसणाए दाहिणिळस्स भवणस्स पुरत्थिमेणं दाहिणपुरत्थिमस्स पासायवडेंसगस्स पच्चत्थिमेणं एत्थ णं एगे महं कूडे पण्णत्ते तं चेव पमाणं, जंबूए णं सु० दाहिणस्स भवणस्स पच्चत्थिमेणं दाहिणपच्चत्थिमिळस्स पासायवडेंसगस्स पुरत्थिमेणं एत्थ णं एगे महं कूडे पण्णत्ते तं चेव पमाणं, जंबूओ पच्चत्थिमिळस्स भवणस्स दाहिणेणं दाहिणपच्चत्थिमिळस्स पासायवडेंसगस्स उत्तरेणं एत्थ णं एगे महं कूडे प० तं चेव पमाणं, जंबूए० पच्चत्थिमिळस्स भवणस्स उत्तरेणं उत्तरपच्चत्थिमिळस्स पासायवडेंसगस्स दाहिणेणं एत्थ णं एगे महं कूडे पण्णत्ते तं चेव पमाणं । जंबूए० उत्तरस्स भवणस्स पच्चत्थिमेणं उत्तरपच्चत्थिमस्स पासायवडेंसगस्स पुरत्थिमेणं एत्थ णं एगे महं कूडे पण्णत्ते, तं चेव पमाणं । जंबूए० उत्तरभवणस्स पुरत्थिमेणं उत्तरपुरत्थिमिळस्स पासायवडेंसगस्स पच्चत्थिमेणं एत्थ णं एगे महं कूडे पण्णत्ते, तं चेव पमाणं । जंबू णं सुदंसणा अण्णेहिं बहूहिं तिलएहिं लउएहिं जाव रायरुक्खेहिं हिंगुरुक्खेहिं जाव सव्वओ समंता संपरिकिखत्ता । जंबूए णं सुदंसणाए उवरिं बहवे अट्ठमंगलगा पण्णत्ता, तंजहा—सोत्थियसिरिवच्छ० किण्हा चामरज्झया जाव छत्ताइच्छत्ता ॥ जंबूए णं सुदंसणाए दुवालस णामधेज्जा पण्णत्ता, तंजहा—सुदंसणा असोहा य, सुप्पबुद्धा जसोधरा । विदेहजंबू सोमणसा,

णियया णिच्चमंडिया ॥ १ ॥ सुभद्दा य विसाला य, सुजाया सुमणीति या । सुदंसणाए  
 जंबूए, नामधेज्जा दुवाल्ल ॥ २ ॥ से केणट्ठेणं भंते ! एवं वुच्चइ—जंबूसुदंसणा २ ?  
 गोयमा ! जंबूए णं सुदंसणाए जंबूदीवाहि वई अणाटिए णामं देवे महिद्धिए जाव  
 पल्लिओवमट्टिए परिवसइ, से णं तत्थ चउण्हं सामाणियसाहस्सीणं जाव जंबूदीवस्स  
 जंबूए सुदंसणाए अणाटियाए य रायहाणीए जाव विहरइ । कहि णं भंते ! अणाटि-  
 यस्स जाव समत्ता वत्तव्वया रायहाणीए महिद्धिए । अदुत्तरं च णं गोयमा !  
 जंबुद्दीवे २ तत्थ तत्थ देसे २ तहिं २ बहवे जंबूसक्खा जंबूवणा जंबूवणसंडा णिच्चं  
 कुलमिया जाव सिरीए अईव २ उवसोभेमाणा २ चिट्ठंति, से तेणट्ठेणं गोयमा ! एवं  
 वुच्चइ—जंबुद्दीवे २, अदुत्तरं च णं गोयमा ! जंबुद्दीवस्स सासए णामधेजे पण्णत्ते,  
 जज्ञ कयावि णासि जाव णिच्चे ॥ १५२ ॥ जंबुद्दीवे णं भंते ! दीवे कइ चंदा पभा-  
 सिंसु वा पभासंति वा पभासिस्संति वा ? कइ सूरिया तविंसु वा तवंति वा तविस्संति  
 वा ? कइ नक्खत्ता जोयं जोईसु वा जोयंति वा जोएस्संति वा ? कइ महुग्गहा चारं  
 चरिंसु वा चरिंति वा चरिस्संति वा ? केवइयाओ तारागणकोडाकोडीओ सोहिंसु वा  
 सोहंति वा सोहेस्संति वा ?, गोयमा ! जंबुद्दीवे णं दीवे दो चंदा पभासिंसु वा ३ दो  
 सूरिया तविंसु वा ३ छप्पन्नं नक्खत्ता जोगं जोएंसु वा ३ छावत्तरं गहसयं चारं चरिंसु  
 वा ३—एणं च सयसहस्सं तेत्तीसं खलु भवे सहस्साइ । णव य सया पन्नासा  
 तारागणकोडिकोडीणं ॥ १ ॥ सोभिंसु वा सोभंति वा सोभिस्संति वा ॥ १५३ ॥  
 जंबुद्दीवं णाम दीवं लवणे णामं समुद्दे वट्टे वलयागारसंठाणसंठिए सव्वओ समंता  
 संपरिक्खित्ताणं चिट्ठइ ॥ लवणे णं भंते ! समुद्दे किं समचक्कवालसंठिए विसमचक्क-  
 वालसंठिए ? गोयमा ! समचक्कवालसंठिए नो विसमचक्कवालसंठिए ॥ लवणे णं  
 भंते ! समुद्दे केवइयं चक्कवालविकखंभेणं केवइयं परिकखेवेणं पण्णत्ते ? गोयमा !  
 लवणे णं समुद्दे दो जोयणसयसहस्साइ चक्कवालविकखंभेणं पन्नरस जोयणसयसहस्साइ  
 एगासीइसहस्साइ सयमेगूणचत्तालीसे किंत्तिविसेसूणं परिकखेवेणं पण्णत्ते । से णं  
 एक्काए पडमवरवेइयाए एगेण य वणसंडेणं सव्वओ समंता संपरिक्खित्ते चिट्ठइ,  
 दोण्हवि वण्णओ । सा णं पडमवर० अद्धजोयणं उद्धुं० पंचधणुसयविकखंभेणं  
 लवणसमुद्दसमियपरिकखेवेणं, सेसं तहेव । से णं वणसंडे देसूणाइ दो जोयणाइ  
 जाव विहरइ ॥ लवणस्स णं भंते ! समुद्दस्स कइ दारा पण्णत्ता ? गोयमा ! चत्तारि  
 दारा पण्णत्ता, तंजहा—विजए वेजयंते जयंते अपराजिए ॥ कहि णं भंते ! लवण-  
 समुद्दस्स विजए णामं दारे पण्णत्ते ? गोयमा ! लवणसमुद्दस्स पुरत्थिमपेरंते  
 धायइखंडस्स दीवस्स पुरत्थिमद्धस्स पच्चत्थिमेणं सीओयाए महानईए उप्पि एत्थ णं

लवणस्स समुद्स्स विजए णामं दारे पण्णत्ते अट्ठ जोयणाइं उड्ढं उच्चत्तेणं चत्तारि  
जोयणाइं विक्खंभेणं, एवं तं चेव सव्वं जहा जंबूदीवस्स विजयसरिसेवि (दारसरि-  
समेयंपि) रायहाणी पुरत्थिमेणं अण्णमि लवणसमुद्दे ॥ कहि णं भंते ! लवणसमुद्दे  
वेजयंते नामं दारे पण्णत्ते ? गोयमा ! लवणसमुद्दे दाहिणपेरंते धायइसंडदीवस्स  
दाहिणद्धस्स उत्तरेणं सेसं तं चेव सव्वं । एवं जयंतेवि, णवरि सीयाए महाणइंए  
उप्पि भाणियव्वे । एवं अपराजिएवि, णवरं दिसीभागो भाणियव्वो ॥ लवणस्स णं  
भंते ! समुद्स्स दारस्स य २ एस णं केवइयं अवाहाए अंतरे पण्णत्ते ? गोयमा !—  
'तिण्णेव सयसहस्सा पंचाणउइं भवे सहस्साइं । दो जोयणसय असिया कोसं  
दारंतरे लवणे ॥ १ ॥' जाव अवाहाए अंतरे पण्णत्ते । लवणस्स णं पएसा धायइसंडं  
दीवं पुट्ठा, तहेव जहा जंबूदीवे धायइसंडेवि सो चेव गमो । लवणे णं भंते ! समुद्दे  
जीवा उदाइत्ता सो चेव विही, एवं धायइसंडेवि ॥ से केणट्ठेणं भंते ! एवं वुच्चइ—  
लवणसमुद्दे २ ? गोयमा ! लवणे णं समुद्दे उदगे आविले रइले लोणे लिंदे खारए कड्डए  
अपेजे बहूणं दुपयचउप्पयमियपसुपक्खिसरीसिवाणं नण्णत्थ तज्जोणियाणं सत्ताणं,  
सुट्ठिए एत्थ लवणाहिवई देवे महिद्धिए पलिओवमट्ठिइए, से णं तत्थ सामाणिय जाव  
लवणसमुद्दस्स सुट्ठियाए रायहाणीए अण्णेसिं जाव विहरइ, से एएणट्ठेणं गो० । एवं  
वुच्चइ लवणे णं समुद्दे २, अदुत्तरं च णं गो० । लवणसमुद्दे सासए जाव णिच्चे ॥ १५४ ॥  
लवणे णं भंते ! समुद्दे कइ चंदा पभासिंसु वा पभासिति वा पभासिस्संति वा ?  
एवं पंचण्हवि पुच्छा, गोयमा ! लवणसमुद्दे चत्तारि चंदा पभासिंसु वा ३ चत्तारि  
सूरिया तविंसु वा ३ बारसुत्तरं नक्खत्तसयं जोगं जोएंसु वा ३ तिणिण बावण्णा  
महग्गहसया चारं चरिंसु वा ३ दुणिण सयसहस्सा सत्तट्ठिं च सहस्सा नव य सया  
तारागणकोडाकोडीणं सोमं सोमिंसु वा ३ ॥ १५५ ॥ कम्हा णं भंते ! लवणसमुद्दे  
चाउइसट्ठमुद्धिपुण्णिमासिणीसु अइरेणं २ वड्ढइ वा हायइ वा ? गोयमा ! जंबूदीवस्स  
णं दीवस्स चउदिसिं बाहिरिन्नाओ वेइयंताओ लवणसमुद्दे पंचाणउइ २ जोयणसह-  
स्साइं ओगाहिता एत्थ णं चत्तारि महालिंजरसंठाणसंठिया महइमहालया महापा-  
याला पण्णत्ता, तंजहा—बलयासुद्दे केऊए जूवे ईसरे, ते णं महापायाला एगमेणं  
जोयणसयसहस्सं उव्वेहेणं मूले दस जोयणसहस्साइं विक्खंभेणं मज्झे एगपएसियाए  
सेटीए एगमेणं जोयणसयसहस्सं विक्खंभेणं उवरिं मुहमूले दस जोयणसहस्साइं  
विक्खंभेणं ॥ तेसि णं महापायालाणं कुड्डा सव्वत्थ समा दसजोयणसयबाहल्ला  
पण्णत्ता सव्ववइरामया अच्छा जाव पडिह्वा ॥ तत्थ णं बहवे जीवा पोगगला य  
अवक्कमंति विउक्कमंति चयंति उवचयंति सासया णं ते कुड्डा दव्वट्ठयाए वण्णपज-

वेहिं० असासया ॥ तत्थ णं चत्तारि देवा महिद्धिया जाव पलिओवमट्टिइया परिव-  
संति, तंजहा—काले महाकाले वेलंबे पभंजणे ॥ तेसि णं महापायालाणं तओ  
तिभागा पण्णत्ता, तंजहा—हेट्ठिल्ले तिभागे मज्झिल्ले तिभागे उवरिमे तिभागे ॥ ते  
णं तिभागा तेत्तीसं जोयणसहस्सा तिण्णि य तेत्तीसं जोयणसयं जोयणतिभागं च  
बाहल्लेणं । तत्थ णं जे से हेट्ठिल्ले तिभागे एत्थ णं वाउकाओ संविट्ठइ, तत्थ णं जे  
से मज्झिल्ले तिभागे एत्थ णं वाउकाए य आउकाए य संविट्ठइ, तत्थ णं जे से  
उवरिल्ले तिभागे एत्थ णं आउकाए संविट्ठइ, अदुत्तरं च णं गोयमा ! लवणसमुदे  
तत्थ २ देसे...बहवे खुड्डालिंजरसंठाणसंठिया खुड्डपायालकलसा पण्णत्ता, ते णं खुड्डा  
पायाला एगमेगं जोयणसहस्सं उव्वेहेणं मूले एगमेगं जोयणसयं विक्खंभेणं मज्झे  
एगपएसियाए सेढीए एगमेगं जोयणसहस्सं विक्खंभेणं उप्पि मुहमूले एगमेगं जोय-  
णसयं विक्खंभेणं ॥ तेसि णं खुड्डागपायालाणं कुड्डा सव्वत्थ समा दस जोयणाइं  
बाहल्लेणं पण्णत्ता सव्ववइरामया अच्छा जाव पडिह्वा । तत्थ णं बहवे जीवा  
पोमगला य जाव असासयावि, पत्तेयं २ अद्वपलिओवमट्टिइयाहिं देवयाहिं परिग-  
हिया ॥ तेसि णं खुड्डागपायालाणं तओ तिभागा ५०, तंजहा—हेट्ठिल्ले तिभागे  
मज्झिल्ले तिभागे उवरिल्ले तिभागे, ते णं तिभागा तिण्णि तेत्तीसे जोयणसए जोय-  
णतिभागं च बाहल्लेणं पण्णत्ता । तत्थ णं जे से हेट्ठिल्ले तिभागे एत्थ णं वाउकाओ  
मज्झिल्ले तिभागे वाउकाए आउकाए य उवरिल्ले आउकाए, एवामेव सपुव्वावरेणं  
लवणसमुदे सत्त पायालसहस्सा अट्ठ य चुलसीया पायालसया भवंतीति मक्खाया ॥  
तेसि णं महापायालाणं खुड्डागपायालाणं य हेट्ठिममज्झिमिल्लेसु तिभागेसु बहवे  
ओराला वाया संसेयंति संमुच्छिमंति एयंति चलंति कंपंति खुब्भंति घटंति फंदंति  
तं तं भावं परिणमंति तथा णं से उदए उण्णामिज्जइ, जया णं तेसिं महापायालाणं  
खुड्डागपायालाणं य हेट्ठिल्लमज्झिल्लेसु तिभागेसु नो बहवे ओराला जाव तं तं भावं न  
परिणमंति तथा णं से उदए नो उन्नामिज्जइ अंतरावि य णं ते वायं उदीरंति  
अंतरावि य णं से उदगे उण्णामिज्जइ अंतरावि य ते वाया नो उदीरंति अंतरावि  
य णं से उदगे णो उण्णामिज्जइ, एवं खलु गोयमा ! लवणसमुदे चाउइसट्ठमुट्ठि-  
पुण्णमासिणीसु अइरेगं २ वड्ढइ वा हायइ वा ॥ १५६ ॥ लवणे णं भंते ! समुदे  
तीसाए मुहुत्ताणं कइखुत्तो अइरेगं २ वड्ढइ वा हायइ वा ? गोयमा ! लवणे णं समुदे  
तीसाए मुहुत्ताणं दुक्खुत्तो अइरेगं २ वड्ढइ वा हायइ वा ॥ से केणट्ठेणं भंते ! एवं  
वुच्चइ—लवणे णं समुदे तीसाए मुहुत्ताणं दुक्खुत्तो अइरेगं २ वड्ढइ वा हायइ वा ?  
गोयमा ! उड्ढमंतेसु पायालेसु वड्ढइ आपूरिणसु पायालेसु हायइ, से तेणट्ठेणं गोयमा !

लवणे णं समुदे तीसाए सुहुत्ताणं दुक्खुत्तो अइरेगं अइरेगं वड्डइ वा हायइ वा ॥ १५७ ॥ लवणसिहा णं भंते ! केवइयं चक्कवालविकखंभेणं केवइयं अइरेगं २ वड्डइ वा हायइ वा ? गोयमा ! लवणसिहा णं दस जोयणसहस्साइं चक्कवालविकखंभेणं देसूणं अद्धजोयणं अइरेगं २ वड्डइ वा हायइ वा ॥ लवणस्स णं भंते ! समुदस्स कइ णागसाहस्सीओ अब्भितरियं वेलं धारंति ? कइ नागसाहस्सीओ बाहिरियं वेलं धरंति ? कइ नागसाहस्सीओ अगोदयं धरंति ?, गोयमा ! लवणसमुदस्स बायालीसं णागसाहस्सीओ अब्भितरियं वेलं धारंति, बावत्तारिं णागसाहस्सीओ बाहिरियं वेलं धारंति, सट्ठिं णागसाहस्सीओ अगोदयं धारंति, एवामेव सपुव्वावरेणं एगा णागसयसाहस्सी चोवत्तारिं च णागसहस्सा भवंतीति मक्खाया ॥ १५८ ॥ कइ णं भंते ! वेलंधरा णागराया पण्णत्ता ? गोयमा ! चत्तारि वेलंधरा णागराया पण्णत्ता, तंजहा—गोथूमे सिवए संखे मणोसिलए ॥ एएसि णं भंते ! चउण्हं वेलंधरणागरायाणं कइ आवासपव्वया पण्णत्ता ? गोयमा ! चत्तारि आवासपव्वया पण्णत्ता, तंजहा—गोथूमे उदगभासे संखे दगसीमए ॥ कहि णं भंते ! गोथूमस्स वेलंधरणागरायस्स गोथूमे णामं आवासपव्वए पण्णत्ते ? गोयमा ! जंवूदीवे दीवे मंदरस्स प० पुरत्थिमेणं लवणं समुदं बायालीसं जोयणसहस्साइं ओगाहिता एत्थ णं गोथूमस्स वेलंधरणागरायस्स गोथूमे णामं आवासपव्वए पण्णत्ते सत्तरसएक्कवीसाइं जोयणसयाइं उट्ठं उच्चत्तेणं चत्तारि तीसे जोयणसए कोसं च उव्वेहेणं मूले दसबावीसे जोयणसए आयामविकखंभेणं मज्झे सत्ततेवीसे जोयणसए उवरिं चत्तारि चउवीसे जोयणसए आयामविकखंभेणं मूले तिण्णि जोयणसहस्साइं दोण्णि य बत्तीसुत्तरे जोयणसए किंचिविसेसूणे परिकखेवेणं मज्झे दो जोयणसहस्साइं दोण्णि य छलसीए जोयणसए किंचिविसेसाहिए परिकखेवेणं उवरि एणं जोयणसहस्सं तिण्णि य ईयाले जोयणसए किंचिविसेसूणे परिकखेवेणं मूले वित्थिण्णे मज्झे संखिते उप्पि तण्णए गोपुच्छसंठाणसंठिए सव्वक्कणगामए अच्छे जाव पडिहवे ॥ से णं एगाए पडमवर-वेइयाए एणेण य वणसंडेणं सव्वओ समंता संपरिकिखत्ते, दोण्हवि वण्णओ ॥ गोथूमस्स णं आवासपव्वयस्स उवरिं बहुसमरमणिज्जे भूमिभागे पण्णत्ते जाव आस-यंति० ॥ तस्स णं बहुसमरमणिज्जस्स भूमिभागस्स बहुमज्जदेसभाए एत्थ णं एगे महं पासायवडेंसए बावट्ठं जोयणद्धं च उट्ठं उच्चत्तेणं तं चेव पमाणं अद्ध आयाम-विकखंभेणं वण्णओ जाव सीहासणं सपरिवारं ॥ से केणट्ठेणं भंते ! एवं वुच्चइ—गोथूमे आवासपव्वए २ ? गोयमा ! गोथूमे णं आवासपव्वए तत्थ २ देसे २ तहिं २ बहूओ खुट्ठाखुट्ठियाओ जाव गोथूभवण्णाइं बहूइं उप्पलाइं तहेव जाव गोथूमे तत्थ देवे



महिङ्गिए जाव पळिओवमड्डिए परिवसइ, से णं तत्थ चउण्हं सामानियसाहस्सीणं जाव गोथूभयस्स आवासपव्वयस्स गोथूभाए रायहाणीए जाव विहरइ, से तेणट्ठेणं जाव णिच्चे ॥ रायहाणिपुच्छा, गोयमा ! गोथूभस्स आवासपव्वयस्स पुरत्थिमेणं तिरियमसंखेजे दीवसमुद्दे वीइवइत्ता अण्णंमि लवणसमुद्दे तं चेव पमाणं तहेव सव्वं ॥ कहि णं भंते ! सिवगस्स वेलंधरणागरायस्स दओभासणामे आवासपव्वए पण्णत्ते ? गोयमा ! जंबुद्दीवे णं दीवे मंदरस्स पव्वयस्स दक्खिणेणं लवणसमुद्दं बायालीसं जोयणसहस्साइं ओगाहिता एत्थ णं सिवगस्स वेलंधरणागरायस्स दओभासे णामं आवासपव्वए पण्णत्ते, तं चेव पमाणं जं गोथूभस्स, णवरि सव्वअंकामए अच्छे जाव पडिरूवे जाव अट्ठो भाणियव्वो, गोयमा ! दओभासे णं आवासपव्वए लवणसमुद्दे अट्ठजोयणियखेत्ते दगं सव्वओ समंता ओभासेइ उज्जोवेइ तवइ पभासेइ सिवए इत्थ देवे महिङ्गिए जाव रायहाणी से दक्खिणेणं सिविगा दओभासस्स सेसं तं चेव ॥ कहि णं भंते ! संखस्स वेलंधरणागरायस्स संखे णामं आवासपव्वए पण्णत्ते ? गोयमा ! जंबुद्दीवे णं दीवे मंदरस्स पव्वयस्स पच्चत्थिमेणं लवणसमुद्दं बायालीसं जोयणसहस्साइं ओगाहिता एत्थ णं संखस्स वेलंधर० संखे णामं आवासपव्वए प० तं चेव पमाणं णवरं सव्वरयणामए अच्छे जाव पडिरूवे । से णं एगाए पउमवरवेइयाए एगेण य वणसंडेणं जाव अट्ठो बहूओ खुट्ठाखुट्ठियाओ जाव बहूइं उप्पलाइं संखप्पभाइं संखवण्णाइं संखवण्णप्पभाइं संखे एत्थ देवे महिङ्गिए जाव रायहाणीए पच्चत्थिमेणं संखस्स आवासपव्वयस्स संखा नाम रायहाणी तं चेव पमाणं ॥ कहि णं भंते ! मणोसिलगस्स वेलंधरणागरायस्स उदगसीमए णामं आवासपव्वए पण्णत्ते ? गोयमा ! जंबुद्दीवे २ मंदरस्स प० उत्तरेणं लवणसमुद्दं बायालीसं जोयणसहस्साइं ओगाहिता एत्थ णं मणोसिलगस्स वेलंधरणागरायस्स उदगसीमए णामं आवासपव्वए पण्णत्ते तं चेव पमाणं णवरि सव्वफलहामए अच्छे जाव पडिरूवे अट्ठो, गोयमा ! दगसीमए णं आवासपव्वए सीयासीयोयगाणं महाणइणं तत्थ गओ सोए पडिहम्मइ से तेणट्ठेणं जाव णिच्चे, मणोसिलए एत्थ देवे महिङ्गिए जाव से णं तत्थ चउण्हं सामानिय० जाव विहरइ ॥ कहि णं भंते ! मणोसिलगस्स वेलंधरणागरायस्स मणोसिलं णाम रायहाणी पण्णत्ता ? गोयमा ! दगसीमस्स आवासपव्वयस्स उत्तरेणं तिरि० अण्णंमि लवणे एत्थ णं मणोसिलिया णाम रायहाणी पण्णत्ता तं चेव पमाणं जाव मणोसिलए देवे—कणगंकरा ययफालियमया य वेलंधराणमावासा । अणुवेलंधरराइण पव्वया होंति रयणमय- ॥१॥१५९॥ कइ णं भंते ! अणुवेलंधरनागरायाणो पण्णत्ता ? गोयमा ! चत्तारि अणुवेलंधरणागरायाणो पण्णत्ता, तंजहा—कक्कोडए कइमए केलासे अरुणप्पमे ॥ एएसि णं

भंते ! चउण्हं अणुवेलंधरणागरायणं कइ आवासपव्वया पन्नत्ता ? गोयमा ! चत्तारि  
 आवासपव्वया पण्णत्ता, तंजहा—कक्कोडए १ कद्दमए २ कइलासे ३ अरुणप्पमे  
 ४ ॥ कहि णं भंते ! कक्कोडगस्स अणुवेलंधरणागरायस्स कक्कोडए णामं आवास-  
 पव्वए पण्णत्ते ? गोयमा ! जंबुदीवे २ मंदरस्स पव्वयस्स उत्तरपुरच्छिमेणं लवणसमुद्दं  
 बायालीसं जोयणसहस्साइं ओगाहिता एत्थ णं कक्कोडगस्स नागरायस्स कक्कोडए  
 णामं आवासपव्वए पण्णत्ते सत्तरस एकवीसाइं जोयणसयाइं तं चेव पमाणं जं  
 गोत्थूभस्स णवरि सव्वरयणामए अच्छे जाव निरवसेसं जाव सिंहासणं सपरिवारं  
 अट्ठो से बहूइं उप्पलाइं० कक्कोडप्पमाइं सेसं तं चेव णवरि कक्कोडगपव्वयस्स उत्तर-  
 पुरच्छिमेणं, एवं तं चेव सव्वं, कद्दमस्सवि सो चेव गमओ अपरिसेसिओ, णवरि  
 दाहिणपुरच्छिमेणं आवासो विज्जुप्पमा रायहाणी दाहिणपुरत्थिमेणं, कइलासेवि एवं  
 चेव, णवरि दाहिणपच्चत्थिमेणं कइलासावि रायहाणी ताए चेव दिसाए, अरुणप्पमेवि  
 उत्तरपच्चत्थिमेणं रायहाणीवि ताए चेव दिसाए, चत्तारि विगप्पमाणा सव्वरयणामया  
 य ॥ १६० ॥ कहि णं भंते ! सुट्ठियस्स लवणाहिंवइस्स गोयमदीवे णामं दीवे  
 पण्णत्ते ? गोयमा ! जंबुदीवे दीवे मंदरस्स पव्वयस्स पच्चत्थिमेणं लवणसमुद्दं बारस-  
 जोयणसहस्साइं ओगाहिता एत्थ णं सुट्ठियस्स लवणाहिंवइस्स गोयमदीवे० पण्णत्ते,  
 बारसजोयणसहस्साइं आयामविक्खंभेणं सत्ततीसं जोयणसहस्साइं नव य अड्याले  
 जोयणसए किंचिविसेसूणे परिकखेवेणं जंबूदीवंतेणं अद्धेगूणणउए जोयणाइं चत्ता-  
 लीसं पंचणउइभागे जोयणस्स ऊसिए जलंताओ लवणसमुद्दंतेणं दो कोसे ऊसिए  
 जलंताओ ॥ से णं एगाए पउमवरवेइयाए एगेण य वणसंडेणं सव्वओ समंता तहेव  
 वण्णओ दोण्हवि । गोयमदीवस्स णं दीवस्स अंतो जाव बहुसमरमणिज्जे भूमिभागे  
 पण्णत्ते, से जहानामए—आलिं० जाव आसयंति० । तस्स णं बहुसमरमणिज्जस्स  
 भूमिभागस्स बहुमज्झदेसभागे एत्थ णं सुट्ठियस्स लवणाहिंवइस्स एगे महं अइक्कीला-  
 वासे नामं भोमेज्विहारो पण्णत्ते बावट्ठिं जोयणाइं अद्धजोयणं उट्ठं उच्चत्तेणं एकतीसं  
 जोयणाइं कोसं च विक्खंभेणं अणेगखंभसयसन्निविट्ठे सव्वो भवणवण्णओ भाणियव्वो ।  
 अइक्कीलावासस्स णं भोमेज्विहारस्स अंतो बहुसमरमणिज्जे भूमिभागे पण्णत्ते जाव  
 मणीणं फासो । तस्स णं बहुसमरमणिज्जस्स भूमिभागस्स बहुमज्झदेसभाए एत्थ एगा  
 मणिपेडिया पण्णत्ता । सा णं मणिपेडिया दो जोयणाइं आयामविक्खंभेणं जोयणवाहल्लेणं  
 सव्वमणिमया अच्छा जाव पडिरुवा ॥ तीसे णं मणिपेडियाए उवरि एत्थ णं देवसय-  
 णिज्जे पण्णत्ते वण्णओ ॥ से केणट्ठेणं भंते ! एवं वुच्चइ—गोयमदीवे दीवे २ ? गोयमा !  
 गोयमदीवे णं दीवे तत्थ २ देसे २ तहिं २ बहूइं उप्पलाइं जाव गोयमप्पमाइं से एएणट्ठेणं

गोयमा ! जाव णिच्चे । कहि णं भंते ! सुद्धियस्स लवणाहिक्खइस्स सुद्धिया णामं रायहाणी  
 पणत्ता ? गोयमा ! गोयमदीवस्स पच्चत्थिमेणं तिरियमसंखेजे जाव अण्णमि लवणसमुद्दे  
 बारस जोयणसहस्साइं ओगाहिता, एवं तहेव सव्वं णेयव्वं जाव सुद्धिए देवे ॥ १६१ ॥  
 कहि णं भंते ! जंबुदीवगाणं चंदाणं चंददीवा णामं दीवा पणत्ता ? गोयमा !  
 जंबुदीवे २ मंदरस्स पव्वयस्स पुरच्छिमेणं लवणसमुद्दं बारस जोयणसहस्साइं  
 ओगाहिता एत्थ णं जंबुदीवगाणं चंदाणं चंददीवा णामं दीवा पणत्ता, जंबुदीवतेणं  
 अद्धेगूणणउड्जोयणाइं चत्तालीसं पंचाणउडं भागे जोयणस्स ऊसिया जलंताओ  
 लवणसमुद्देतेणं दो कोसे ऊसिया जलंताओ बारस जोयणसहस्साइं आयामविकखं-  
 मेणं, सेसं तं चेव जहा गोयमदीवस्स परिकखेवो पउमवरवेइया पत्तेयं २ वणसंडपरि०  
 दोण्हवि वण्णओ बहुसमरमणिज्जा भूमिभागा जाव जोइसिया देवा आसयंति० । तेसि  
 णं बहुसमरमणिजे भूमिभागे पासायवडेंसगा बावट्ठि जोयणाइं० बहुमज्झ० मणिपेढि-  
 याओ दो जोयणाइं जाव सीहासणा सपरिवारा भाणियव्वा तहेव अट्ठो, गोयमा !  
 बहूसु खुट्ठासु खुट्ठियासु बहूइं उप्पलाइं० चंदवण्णाभाइं चंदा एत्थ देवा महिद्धिया जाव  
 पलिओवमट्ठिइया परिवसंति, ते णं तत्थ पत्तेयं पत्तेयं चउण्हं सामाणियसाहस्सीणं  
 जाव चंददीवाणं चंदाणं य रायहाणीणं अन्नेसिं च बहूणं जोइसियाणं देवाणं देवीण  
 य आहेवच्चं जाव विहरंति, से तेणट्ठेणं गोयमा ! चंददीवा जाव णिच्चा । कहि णं  
 भंते ! जंबुदीवगाणं चंदाणं चंदाओ नाम रायहाणीओ पणत्ताओ ? गोयमा !  
 चंददीवाणं पुरत्थिमेणं तिरियं जाव अण्णमि जंबुदीवे २ बारस जोयणसहस्साइं  
 ओगाहिता तं चेव पमाणं जाव एमहिद्धिया चंदा देवा २ ॥ कहि णं भंते ! जंबु-  
 दीवगाणं सूराणं सूरदीवा णामं दीवा पणत्ता ? गोयमा ! जंबुदीवे २ मंदरस्स  
 पव्वयस्स पच्चत्थिमेणं लवणसमुद्दं बारस जोयणसहस्साइं ओगाहिता तं चेव उच्चत्तं  
 आयामविकखंमेणं परिकखेवो वेइया वणसंडा भूमिभागा जाव आसयंति० पासायवडें-  
 सगाणं तं चेव पमाणं मणिपेढिया सीहासणा सपरिवारा अट्ठो उप्पलाइं० सूरप्पभाइं  
 सूरा एत्थ देवा जाव रायहाणीओ सगाणं दीवाणं पच्चत्थिमेणं अण्णमि जंबुदीवे  
 दीवे सेसं तं चेव जाव सूरा देवा २ ॥ १६२ ॥ कहि णं भंते ! अब्भितरलावण-  
 गाणं चंदाणं चंददीवा णामं दीवा पणत्ता ? गोयमा ! जंबुदीवे २ मंदरस्स पव्वयस्स  
 पुरत्थिमेणं लवणसमुद्दं बारस जोयणसहस्साइं ओगाहिता एत्थ णं अब्भितरलावण-  
 गाणं चंदाणं चंददीवा णामं दीवा पणत्ता, जहा जंबुदीवगा चंदा तहा भाणियव्वा  
 णवरि रायहाणीओ अण्णमि लवणे सेसं तं चेव । एवं अब्भितरलावणगाणं सूराणवि  
 लवणसमुद्दं बारस जोयणसहस्साइं तहेव सव्वं जाव रायहाणीओ ॥ कहि णं भंते !

वाहिरलावणगाणं चंदाणं चंददीवा० पणत्ता ? गोयमा ! लवणस्स समुद्स्स पुरत्थि-  
मिस्सिओ वेइयंताओ लवणसमुद्दं पच्चत्थिमेणं बारस जोयणसहस्साइं ओगाहिता एत्थ णं  
वाहिरलावणगाणं चंदाणं चंददीवा नामं दीवा पणत्ता धायइसंडदीवतेणं अद्देगूणणव-  
इजोयणाइं चत्तालीसं च पंचणउइभागे जोयणस्स ऊसिया जलंताओ लवणसमुद्दतेणं  
दो कोसे ऊसिया बारस जोयणसहस्साइं आयामविकखंभेणं पउमवरवेइया वणसंडा  
बहुसमरमणिज्जा भूमिभागा मणिपेढिया सीहासणा सपरिवारा सो चैव अट्ठो राय-  
हाणीओ सगाणं दीवाणं पुरत्थिमेणं तिरियमसं० अण्णंमि लवणसमुद्दे तहेव सव्वं ।  
कहि णं भंते ! वाहिरलावणगाणं सूरारणं सूरदीवा णामं दीवा पणत्ता ? गोयमा !  
लवणसमुद्दपच्चत्थिमिस्सिओ वेइयंताओ लवणसमुद्दं पुरत्थिमेणं बारस जोयणसहस्साइं  
धायइसंडदीवतेणं अद्देगूणणउइं जोयणाइं चत्तालीसं च पंचनउइभागे जोयणस्स दो  
कोसे ऊसिया सेसं तहेव जाव रायहाणीओ सगाणं दीवाणं पच्चत्थिमेणं तिरियमसं-  
खेजे लवणे चैव बारस जोयणा तहेव सव्वं भाणियव्वं ॥ १६३ ॥ कहि णं भंते !  
धायइसंडदीवगाणं चंदाणं चंददीवा० पणत्ता ? गोयमा ! धायइसंडस्स दीवस्स  
पुरत्थिमिस्सिओ वेइयंताओ कालोयं णं समुद्दं बारस जोयणसहस्साइं ओगाहिता एत्थ  
णं धायइसंडदीवाणं चंदाणं चंददीवा णामं दीवा पणत्ता, सव्वओ समंता दो कोसा  
ऊसिया जलंताओ बारस जोयणसहस्साइं तहेव विकखंभपरिक्खेवो भूमिभागो  
पासायवडिसिया मणिपेढिया सीहासणा सपरिवारा अट्ठो तहेव रायहाणीओ सगाणं  
दीवाणं पुरत्थिमेणं अण्णंमि धायइसंडे दीवे सेसं तं चैव, एवं सूरदीवावि, नवरं  
धायइसंडस्स दीवस्स पच्चत्थिमिस्सिओ वेइयंताओ कालोयं णं समुद्दं बारस जोयण०  
तहेव सव्वं जाव रायहाणीओ सूरारणं दीवाणं पच्चत्थिमेणं अण्णंमि धायइसंडे दीवे  
सव्वं तहेव ॥ १६४ ॥ कहि णं भंते ! कालोयगाणं चंदाणं चंददीवा णामं दीवा  
पणत्ता ? गोयमा ! कालोयसमुद्दस्स पुरच्छिमिस्सिओ वेइयंताओ कालोयणं समुद्दं पच्च-  
त्थिमेण बारस जोयणसहस्साइं ओगाहिता एत्थ णं कालोयगचंदाणं चंददीवा० सव्वओ  
समंता दो कोसा ऊसिया जलंताओ सेसं तहेव जाव रायहाणीओ सगाणं दीव० पुर-  
च्छिमेणं अण्णंमि कालोयगसमुद्दे बारस जोयणा तं चैव सव्वं जाव चंदा देवा २ । एवं  
सूरारणवि, नवरं कालोयगपच्चत्थिमिस्सिओ वेइयंताओ कालोयसमुद्दपुरच्छिमेणं बारस  
जोयणसहस्साइं ओगाहिता तहेव रायहाणीओ सगाणं दीवाणं पच्चत्थिमेणं अण्णंमि-  
कालोयगसमुद्दे तहेव सव्वं । एवं पुक्खवरगाणं चंदाणं पुक्खवरस्स दीवस्स पुरत्थि-  
मिस्सिओ वेइयंताओ पुक्खरसमुद्दं बारस जोयणसहस्साइं ओगाहिता चंददीवा अण्णंमि  
पुक्खवररे दीवे रायहाणीओ तहेव । एवं सूरारणवि दीवा पुक्खवरदीवस्स पच्चत्थि-

मिळाओ वेइयंताओ पुक्खरोदं समुदं बारस जोयणसहस्साइं ओगाहिता तहेव सव्वं जाव रायहाणीओ दीविळ्ळगाणं दीवे समुद्दगाणं समुदे चेव एगाणं अब्भितरपासे एगाणं बाहिरपासे रायहाणीओ दीविळ्ळगाणं दीवेसु समुद्दगाणं समुदेसु सरिसणामएसु ॥ १६५ ॥ इमे णामा अणुगंतव्वा-जंबुद्दीवे लवणे धायइ कालोद पुक्खरे वरुणे । खीर घय इक्खुं वरो यण्णंदी अरुणवरे कुंडले रुयगे ॥ १ ॥ आभरणवत्थगंधे उप्पल-तिलए य पुढवि णिहिरयणे । वासहरदहनईओ विजया वक्खारकप्पिदा ॥ २ ॥ पुर-मंदरमावासा कूडा णक्खत्तचंदसूरा य । एवं भाणियव्वं ॥ १६६ ॥ कहि णं भंते ! देवदीवगाणं चंदाणं चंददीवा णामं दीवा पण्णत्ता ? गोयमा ! देवदीवस्स देवोदं समुदं बारस जोयणसहस्साइं ओगाहिता तेणेव कमेण पुरत्थिमिळाओ वेइयंताओ जाव रायहाणीओ सगाणं दीवाणं पुरत्थिमेणं देवदीवं समुदं असंखेज्जाइं जोयण-सहस्साइं ओगाहिता एत्थ णं देवदीवयाणं चंदाणं चंदाओ णामं रायहाणीओ पण्ण-त्ताओ, सेसं तं चेव, देवदीवचंदा दीवा, एवं सूराणवि, णवरं पच्चत्थिमिळाओ वेइयं-ताओ पच्चत्थिमेणं च भाणियव्वा तंमि चेव समुदे ॥ कहि णं भंते ! देवसमुद्दगाणं चंदाणं चंददीवा णामं दीवा पण्णत्ता ? गोयमा ! देवोदगस्स समुद्दस्स पुरत्थिमिळाओ वेइयंताओ देवोदगं समुदं पच्चत्थिमेणं बारस जोयणसहस्साइं ओगाहिता तेणेव कमेण जाव रायहाणीओ सगाणं दीवाणं पच्चत्थिमेणं देवोदगं समुदं असंखेज्जाइं जोयणसहस्साइं ओगाहिता एत्थ णं देवोदगाणं चंदाणं चंदाओ णामं रायहाणीओ पण्णत्ताओ, तं चेव सव्वं, एवं सूराणवि, णवरं देवोदगस्स पच्चत्थिमिळाओ वेइयंताओ देवोदगसमुदं पुरत्थिमेणं बारस जोयणसहस्साइं ओगाहिता रायहाणीओ सगाणं २ दीवाणं पुरत्थिमेणं देवोदगं समुदं असंखेज्जाइं जोयणसहस्साइं ॥ एवं णागे जक्खे भूएवि चउण्हं दीवसमुद्दगाणं । कहि णं भंते ! सयंभूरमणदीवगाणं चंदाणं चंददीवा णामं दीवा पण्णत्ता ? गोयमा ! सयंभूरमणस्स दीवस्स पुरत्थिमिळाओ वेइयंताओ सयंभूरमणो-दगं समुदं बारस जोयणसहस्साइं तहेव रायहाणीओ सगाणं २ दीवाणं पुरत्थिमेणं सयंभूरमणोदगं समुदं पुरत्थिमेणं असंखेज्जाइं जोयणं ० तं चेव, एवं सूराणवि, सयंभूरमणस्स पच्चत्थिमिळाओ वेइयंताओ रायहाणीओ सगाणं २ दीवाणं पच्चत्थि-मिळाणं सयंभूरमणोदं समुदं असंखेज्जा ० सेसं तं चेव । कहि णं भंते ! सयंभूरमण-समुद्दगाणं चंदाणं ? गोयमा ! सयंभूरमणस्स समुद्दस्स पुरत्थिमिळाओ वेइयंताओ सयंभूरमणं समुदं पच्चत्थिमेणं बारस जोयणसहस्साइं ओगाहिता सेसं तं चेव । एवं सूराणवि, सयंभूरमणस्स पच्चत्थिमिळाओ सयंभूरमणोदं समुदं पुरत्थिमेणं बारस जोयणसहस्साइं ओगाहिता रायहाणीओ सगाणं दीवाणं पुरत्थिमेणं सयंभूरमणं समुदं

असंखेजाइं जोयणसहस्साइं ओगाहिता एत्थ णं सयंभुरमण जाव सूरा देवा २  
 ॥ १६७ ॥ अत्थि णं भंते ! लवणसमुद्दे वेलंधराइ वा णागरायाइ वा खजाइ वा अग्घाइ  
 वा सिंहाइ वा विजाईइ वा हासवट्ठीइ वा ? हंता अत्थि । जहा णं भंते ! लवणसमुद्दे  
 अत्थि वेलंधराइ वा णागराया० अग्घा० सिंहा० विजाईइ वा हासवट्ठीइ वा तथा णं  
 बाहिरएसुवि समुद्देसु अत्थि वेलंधराइ वा णागरायाइ वा० अग्घाइ वा सिंहाइ वा विजाईइ  
 वा हासवट्ठीइ वा ? णो इणट्ठे समट्ठे ॥ १६८ ॥ लवणे णं भंते ! समुद्दे किं ऊसिओ-  
 दगे किं पत्थडोदगे किं खुभियजले किं अखुभियजले ? गोयमा ! लवणे णं समुद्दे ऊसि-  
 ओदगे नो पत्थडोदगे खुभियजले नो अक्खुभियजले । जहा णं भंते ! लवणे समुद्दे  
 ऊसिओदगे नो पत्थडोदगे खुभियजले नो अक्खुभियजले तथा णं बाहिरगा समुद्दा किं  
 ऊसिओदगा पत्थडोदगा खुभियजला अक्खुभियजला ? गोयमा ! बाहिरगा समुद्दा नो  
 उस्सिओदगा पत्थडोदगा नो खुभियजला अक्खुभियजला पुण्णा पुण्णप्पमाणा वोल-  
 ट्ठमाणा वोसट्ठमाणा समभरघडत्ताए चिट्ठंति ॥ अत्थि णं भंते ! लवणसमुद्दे बहवे  
 ओराला बलाहगा संसेयंति संमुच्छंति वा वासं वासंति वा ? हंता अत्थि । जहा णं भंते !  
 लवणसमुद्दे बहवे ओराला बलाहगा संसेयंति संमुच्छंति वासं वासंति वा तथा णं  
 बाहिरएसुवि समुद्देसु बहवे ओराला बलाहगा संसेयंति संमुच्छंति वासं वासंति ? णो  
 इणट्ठे समट्ठे, से केणट्ठेणं भंते ! एवं वुच्चइ-बाहिरगा णं समुद्दा पुण्णा पुण्णप्पमाणा  
 वोलट्ठमाणा वोसट्ठमाणा समभरघडत्ताए चिट्ठंति ? गोयमा ! बाहिरएसु णं समुद्देसु  
 बहवे उदगजोणिया जीवा य पोग्गला य उदगत्ताए वक्कमंति विउक्कमंति चयंति  
 उवचयंति, से तेणट्ठेणं एवं वुच्चइ-बाहिरगा समुद्दा पुण्णा पुण्ण० जाव समभरघड-  
 त्ताए चिट्ठंति ॥ १६९ ॥ लवणे णं भंते ! समुद्दे केवइयं उव्वेहपरिवुट्ठीए पण्णत्ते ?  
 गोयमा ! लवणस्स णं समुद्दस्स उभओ पासिं पंचाणउइ २ पएसे गंता पएसं उव्वेह-  
 परिवुट्ठीए पण्णत्ते, पंचाणउइ २ वालग्गाइं गंता वालग्गं उव्वेहपरिवुट्ठीए पण्णत्ते, एवं  
 पं० २ लिक्खाओ गंता लिक्खं उव्वेहपरि० जूया० जवमज्जे० अंगुल० विहत्थि०  
 रयणी० कुच्छी० धणु० उव्वेहपरिवुट्ठीए प०, गाउय० जोयण० जोयणसय० जोय-  
 णसहस्साइं गंता जोयणसहस्सं उव्वेहपरिवुट्ठीए पण्णत्ते ॥ लवणे णं भंते ! समुद्दे  
 केवइयं उस्सेहपरिवुट्ठीए पण्णत्ते ? गोयमा ! लवणस्स णं समुद्दस्स उभओ पासिं पंचा-  
 णउइ पएसे गंता सोलसपएसे उस्सेहपरिवुट्ठीए पण्णत्ते, एएणेव कमेणं जाव पंचाणउइ २  
 जोयणसहस्साइं गंता सोलस जोयणसहस्साइं उस्सेहपरिवुट्ठीए पण्णत्ते ॥ १७० ॥  
 लवणस्स णं भंते ! समुद्दस्स केमहाए गोतित्थे पण्णत्ते ? गोयमा ! लवणस्स णं समु-  
 द्दस्स उभओ पासिं पंचाणउइ २ जोयणसहस्साइं गोतित्थं पण्णत्तं ॥ लवणस्स णं भंते !

समुद्रस केमहालए गोतित्थविरहिए खेत्ते पण्णत्ते ? गोयमा ! लवणस्स णं समुद्रस्स दस जोयणसहस्साइं गोतित्थविरहिए खेत्ते पण्णत्ते ॥ लवणस्स णं भंते ! समुद्रस्स केमहालए उदगमाले पण्णत्ते ? गोयमा ! दस जोयणसहस्साइं उदगमाले पण्णत्ते ॥ १७१ ॥ लवणे णं भंते ! समुदे किंसंठिए पण्णत्ते ? गोयमा ! गोतित्थसंठिए नावासंठाणसंठिए सिप्पिसंपुडसंठिए आसखंधसंठिए वलभिसंठिए वट्टे वलयागारसंठाणसंठिए पण्णत्ते ॥ लवणे णं भंते ! समुदे केवइयं चक्कवालविकखंभेणं ? केवइयं परिकखेवेणं ? केवइयं उव्वेहेणं ? केवइयं उस्सेहेणं ? केवइयं सव्वग्गेणं पण्णत्ते ? गोयमा ! लवणे णं समुदे दो जोयणसयसहस्साइं चक्कवालविकखंभेणं पण्णरस जोयणसयसहस्साइं एक्कासीइं च सहस्साइं सयं च इगुयालं किंचिविसेसूणे परिकखेवेणं एगं जोयणसहस्सं उव्वेहेणं सोलस जोयणसहस्साइं उस्सेहेणं सत्तरस जोयणसहस्साइं सव्वग्गेणं पण्णत्ते ॥ १७२ ॥ जइ णं भंते ! लवणसमुदे दो जोयणसयसहस्साइं चक्कवालविकखंभेणं पण्णरस जोयणसयसहस्साइं एक्कासीइं च सहस्साइं सयं इगुयालं किंचि विसेसूणे परिकखेवेणं एगं जोयणसहस्सं उव्वेहेणं सोलस जोयणसहस्साइं उस्सेहेणं सत्तरस जोयणसहस्साइं सव्वग्गेणं पण्णत्ते । कम्हा णं भंते ! लवणसमुदे जंबुदीवं २ नो उवीलेइं नो उप्पीलेइं नो चेव णं एगोदगं करेइं ? गोयमा ! जंबुदीवे णं दीवे भरहेरवएसु वासेसु अरहंतचक्कवट्ठिबलदेवा वासुदेवा चारणा विजाहरा समणा समणीओ सावया सावियाओ मणुया पगइभइया पगइविणीया पगइउवसंता पगइपयणकोहमाणमायालोभा सिउमहवसंपन्ना अल्लीणा भइगा विणीया, तेसि णं पणिहाए लवणे समुदे जंबुदीवं दीवं नो उवीलेइं नो उप्पीलेइं नो चेव णं एगोदगं करेइं, गंगासिंधुरत्तारत्तवइसु सलिलासु देवयाओ महिद्धियाओ जाव पलिओवमट्ठिइयाओ परिवसंति, तासि णं पणिहाए लवणसमुदे जाव नो चेव णं एगोदगं करेइं, चुल्लहिमवंतसिहरेसु वासहरपव्वएसु देवा महिद्धिया० तेसि णं पणिहाए०, हेमवएरण्वएसु वासेसु मणुया पगइभइगा०, रोहिण्यंसुवण्णकूलरूपकूलासु सलिलासु देवयाओ महिद्धियाओ० तासिं पणि०, सद्दावइवियडावइवइवेयड्वपव्वएसु देवा महिद्धिया जाव पलिओवमट्ठिइया परिव०, महाहिमवंतरुप्पीसु वासहरपव्वएसु देवा महिद्धिया जाव पलिओवमट्ठिइया०, हरिवासरम्मयवासेसु मणुया पगइभइगा०, गंधावइमालवंतरियाएसु वट्टवेयड्वपव्वएसु देवा महिद्धिया०, णिसडणीलवंतेसु वासहरपव्वएसु देवा महिद्धिया०, सव्वाओ दहदेवयाओ भाणियव्वाओ, पउमइहतिगिच्छिकेसरिदहावसाणेसु देवयाओ महिद्धियाओ० तासिं पणिहाए०, पुव्वविदेहावरविदेहेसु वासेसु अरहंतचक्कवट्ठिबलदेववासुदेवा चारणा विजाहरा समणा समणीओ सावया सावियाओ मणुया

पगइ० तेसिं पणिहाए लवण०, सीयासीओयगासु सलिलासु देवयाओ महिङ्गिया०, देवकुरुलउत्तरकुरुसु मणुया पगइभद्गा०, मंदरे पव्वए देवयाओ महिङ्गिया०, जंबूए य सुदंसणाए जंबूदीवाहिबई अणाडिए णामं देवे महिङ्गिए जाव पल्लिओवमट्टिइए परिवसइ तस्स पणिहाए लवणसमुद्दे० नो उवीलेइ नो उप्पीलेइ नो चेव णं एक्कोदगं करेइ, अदुत्तरं च णं गोयमा ! लोगट्टिई लोगणुभावे जण्णं लवणसमुद्दे जंबुदीवं दीवं नो उवीलेइ नो उप्पीलेइ नो चेव णमेगोदगं करेइ ॥ १७३ ॥ इइ मंदरोद्देसो समत्तो ॥

लवणसमुद्दं धायइसंडे नामं दीवे वट्ठे वल्लयागारसंठाणसंठिए सव्वओ समंता संपरिविक्खत्ताणं चिट्ठइ, धायइसंडे णं भंते ! दीवे किं समचक्कवालसंठिए विसमचक्कवालसंठिए ? गोयमा ! समचक्कवालसंठिए नो विसमचक्कवालसंठिए ॥ धायइसंडे णं भंते ! दीवे केवइयं चक्कवालविकखंभेणं केवइयं परिकखेवेणं पण्णत्ते ? गोयमा ! चत्तारि जोयणसयसहस्साइ चक्कवालविकखंभेणं एगयालीसं जोयणसयसहस्साइ दसजोयणसहस्साइ णवएगट्ठे जोयणसए किंचिविसेसुणे परिकखेवेणं पण्णत्ते ॥ से णं एगाए पउमवरवेइयाए एगेणं वणसंडेणं सव्वओ समंता संपरिविक्खत्ते दोण्हवि वण्णओ दीवसमिया परिकखेवेणं ॥ धायइसंडस्स णं भंते ! दीवस्स कइ दारा पण्णत्ता ? गोयमा ! चत्तारि दारा पण्णत्ता, तं०—विजए वेजयंते जयंते अपराजिए ॥ कहि णं भंते ! धायइसंडस्स दीवस्स विजए णामं दारे पण्णत्ते ? गोयमा ! धायइसंडपुरत्थिमपेरंते कालोयसमुद्दपुरत्थिमदस्स पच्चत्थिमेणं सीयाए महाणइए उप्पि एत्थ णं धायइ० विजए णामं दारे पण्णत्ते तं चेव पमाणं, रायहाणीओ अण्णंमि धायइसंडे दीवे, दीवस्स वत्तव्वया भाणियव्वा, एवं चत्तारिवि दारा भाणियव्वा ॥ धायइसंडस्स णं भंते ! दीवस्स दारस्स य २ एस णं केवइयं अबाहाए अंतरे पण्णत्ते ? गोयमा ! दस जोयणसयसहस्साइ सत्तावीसं च जोयणसहस्साइ सत्तपणतीसे जोयणसए तिञ्चि य कोसे दारस्स य २ अबाहाए अंतरे पण्णत्ते ॥ धायइसंडस्स णं भंते ! दीवस्स पएसा कालोयणं समुद्दं पुट्ठा ? हंता पुट्ठा ॥ ते णं भंते ! किं धायइसंडे दीवे कालोए समुद्दे ? ते धायइसंडे नो खलु ते कालोयसमुद्दे । एवं कालोयस्सवि । धायइसंडदीवे णं भंते ! जीवा उद्दाइत्ता २ कालोए समुद्दे पच्चायंति ? गोयमा ! अत्थेगइया पच्चायंति अत्थेगइया नो पच्चायंति । एवं कालोएवि अत्थे० प० अत्थेगइया णो पच्चायंति ॥ से केणट्ठेणं भंते ! एवं वुच्चइ—धायइसंडे दीवे २ ? गोयमा ! धायइसंडे णं दीवे तत्थ तत्थ देसे २ तहिं २ बहवे धायइरुक्खा धायइवण्णा धायइसंडा णिच्चं कुसुमिया जाव उवसोभेमाणा २ चिट्ठंति, धायइमहाधायइरुक्खेसु सुदंसण-



पियदंसणा दुवे देवा महिद्धिया जाव पलिओवमट्टिइया परिवसंति से एणट्ठेणं०, अदुत्तरं च णं गोयमा ! जाव णिच्चे ॥ धायइसंडे णं भंते ! दीवे कइ चंदा पभासिंसु वा ३ ? कइ सूरिया तविंसु वा ३ ? कइ महग्गहा चारं चरिंसु वा ३ ? कइ णक्खत्ता जोगं जोइंसु वा ३ ? कइ तारागणकोडाकोडीओ सोमैंसु वा ३ ?, गोयमा ! बारस चंदा पभासिंसु वा ३, एवं—चउवीसं ससिरविणो णक्खत्त सया य तिञ्जि छत्तीसा । एणं च गहसहस्सं छप्पन्नं धायइसंडे ॥ १ ॥ अट्ठेव सयसहस्सा तिण्णि सहस्साइं सत्त य सयाइं । धायइसंडे दीवे तारागणकोडिकोडीणं ॥ २ ॥ सोमैंसु वा ३ ॥ १७४ ॥ धायइसंडे णं दीवं कालोदे णामं समुद्दे वट्ठे वलयागारसंठाणसंठिए सव्वओ समंता संपरिक्खित्ताणं चिट्ठइ, कालोदे णं समुद्दे किं समच्चक्कवालसंठाणसंठिए विसमं ? गोयमा ! समच्चक्कवालं णो विसमच्चक्कवालसंठिए ॥ कालोदे णं भंते ! समुद्दे केवइयं चक्कवालविकखंभेणं केवइयं परिकखेवेणं पण्णत्ते ? गोयमा ! अट्ठ जोयणसयसहस्साइं चक्कवालविकखंभेणं एक्काणउइजोयणसयसहस्साइं सत्तारि सहस्साइं छच्च पंचुत्तरे जोयणसए किंचिविसेसाहिए परिकखेवेणं पण्णत्ते ॥ से णं एगाए पडमवरवेइयाए एणेणं वणसंडेणं० दोण्हवि वण्णओ ॥ कालोयस्स णं भंते ! समुद्दस्स कइ दारा पण्णत्ता ? गोयमा ! चत्तारि दारा पण्णत्ता, तंजहा—विजए वेजयंते जयंते अपराजिए ॥ कहि णं भंते ! कालोदस्स समुद्दस्स विजए णामं दारे पण्णत्ते ? गोयमा ! कालोदे समुद्दे पुरत्थिमपेरंते पुक्खरवरदीवपुरत्थिमदस्स पच्चत्थिमेणं सीओयाए महाणइए उप्पि एत्थ णं कालोदस्स समुद्दस्स विजए णामं दारे पण्णत्ते, अट्ठेव जोयणाइं तं चेव पमाणं जाव रायहाणीओ । कहि णं भंते ! कालोयस्स समुद्दस्स वेजयंते णामं दारे पण्णत्ते ? गोयमा ! कालोयसमुद्दस्स दक्खिणपेरंते पुक्खरवरदीवस्स दक्खिणदस्स उत्तरेणं एत्थ णं कालोयसमुद्दस्स वेजयंते नामं दारे पण्णत्ते । कहि णं भंते ! कालोयसमुद्दस्स जयंते नामं दारे पण्णत्ते ? गोयमा ! कालोयसमुद्दस्स पच्चत्थिमपेरंते पुक्खरवरदीवस्स पच्चत्थिमदस्स पुरत्थिमेणं सीयाए महाणइए उप्पि जयंते नामं दारे पण्णत्ते । कहि णं भंते ! कालोयसमुद्दस्स अपराजिए नामं दारे पण्णत्ते ? गोयमा ! कालोयसमुद्दस्स उत्तरद्वपेरंते पुक्खरवरदीवोत्तरदस्स दाहिणओ एत्थ णं कालोयसमुद्दस्स अपराजिए णामं दारे०, सेसं तं चेव ॥ कालोयस्स णं भंते ! समुद्दस्स दारस्स य २ एस णं केवइयं २ अबाहाए अंतरे पण्णत्ते ? गोयमा !—बावीस सयसहस्सा बाणउइ खलु भवे सहस्साइं । छच्च सया बायाला दारंतर तिञ्जि कोसा य ॥ १ ॥ दारस्स य २ अबाहाए अंतरे पण्णत्ते । कालोदस्स णं भंते ! समुद्दस्स पएसा पुक्खरवरदीव० तहेव, एवं पुक्खरवरदीवस्सवि जीवा उद्दाइत्ता २

तहेव भाणियव्वं ॥ से केणट्ठेणं भंते ! एवं वुच्चइ-कालोए समुद्दे २ ? गोयमा ! कालोयस्स णं समुद्दस्स उदए आसले मासले पेसले कालए भासरासिवण्णाभे पगईए उदगरसेणं पण्णत्ते, कालमहाकाला एत्थ दुवे देवा महिद्धिया जाव पलिओवमट्ठिइया परिवसंति, से तेणट्ठेणं गोयमा ! जाव णिच्चे ॥ कालोए णं भंते ! समुद्दे कइ चंदा पभासिंसु वा ३ ? पुच्छा, गोयमा ! कालोए णं समुद्दे बायालीसं चंदा पभासिंसु वा ३—बायालीसं चंदा बायालीसं च दिणयरा दिता ॥ कालोदहिम्मि एए चरंति संबद्धलेसागा ॥ १ ॥ णक्खत्ताण सहस्सं एगं छावत्तरं च सयमण्णं । छच्च सया छण्ण-उया महागहा तिण्णि य सहस्सा ॥ २ ॥ अट्ठावीसं कालोदहिम्मि बारस य सयसहस्साइं । नव य सया पचासा तारागणकोडिकोडीणं ॥ ३ ॥ सोभेसु वा ३ ॥ १७५ ॥ कालोयं णं समुद्दं पुक्खरवरे णामं दीवे वट्टे वलयागारसंठाणसंठिए सव्वओ समंता संपरि० तहेव जाव समचक्कवालसंठाणसंठिए नो विसमचक्कवालसंठाणसंठिए । पुक्खरवरे णं भंते ! दीवे केवइयं चक्कवालविकखंभेणं केवइयं परिकखेवेणं पण्णत्ते ? गोयमा ! सोलस जोयणसयसहस्साइं चक्कवालविकखंभेणं—एगा जोयणकोडी बाण-उइं खलु भवे सयसहस्सा । अउणाणउइं अट्ठ सया चउणउया य [ परिरओ ] पुक्खरवरस्स ॥ १ ॥ से णं एगाए पउमवरवेइयाए एगेण य वणसंडेणं० संपरि० दोण्हवि वण्णओ ॥ पुक्खरवरस्स णं भंते ! दीवस्स कइ दारा पण्णत्ता ? गोयमा ! चत्तारि दारा पण्णत्ता, तंजहा—विजए वेजयंते जयंते अपराजिए ॥ कहि णं भंते ! पुक्खरवरस्स दीवस्स विजए णामं दारे पण्णत्ते ? गोयमा ! पुक्खरवरदीवपुरच्छिम-पेरंते पुक्खरोदसमुद्दपुरच्छिमदस्स पच्चत्थिमेणं एत्थ णं पुक्खरवरदीवस्स विजए णामं दारे पण्णत्ते तं चेव सव्वं, एवं चत्तारिवि दारा, सीयासीओया णत्थि भाणियव्वाओ ॥ पुक्खरवरस्स णं भंते ! दीवस्स दारस्स य २ एस णं केवइयं अवाहाए अंतरे पण्णत्ते ? गोयमा !—अडयाल सयसहस्सा बावीसं खलु भवे सहस्साइं । अगुणुत्तरा य चउरो दारंतर पुक्खरवरस्स ॥ १ ॥ पएसा दोण्हवि पुट्ठा, जीवा दोसु भाणियव्वा ॥ से केणट्ठेणं भंते ! एवं वुच्चइ-पुक्खरवरदीवे २ ? गो० ! पुक्खरवरे णं दीवे तत्थ २ देसे २ ताहिं २ बहवे पउमरुक्खा पउमवणसंडा णिच्चं कुसुमिया जाव चिद्धंति, पउममहापउमरुक्खा एत्थ णं पउमपुंडरीया णामं दुवे देवा महिद्धिया जाव पलिओवमट्ठिइया परिवसंति, से तेणट्ठेणं गोयमा ! एवं वुच्चइ-पुक्खरवरदीवे २ जाव निच्चे ॥ पुक्खरवरे णं भंते ! दीवे केवइया चंदा पभासिंसु वा ३ ? एवं पुच्छा,—चोयालं चंदसयं चउयालं चेव सूरियाण सयं । पुक्खरवरदीवमि चरंति एए पभासंता ॥ १ ॥ चत्तारि सहस्साइं बत्तीसं चेव होंति णक्खत्ता । छच्च सया बावत्तर

महग्गहा बारह सहस्सा ॥ २ ॥ छण्णउइ सयसहस्सा चत्तालीसं भवे सहस्साइं ।  
 चत्तारि सया पुक्खर[वर]तारागणकोडिकोडीणं ॥ ३ ॥ सोमं सु वा ३ ॥ पुक्खर-  
 वरदीवस्स णं बहुमज्झदेसभाए एत्थ णं माणुसुत्तरे नामं पव्वए पण्णत्ते वट्टे वलया-  
 गारसंठाणसंठिए जे णं पुक्खरवरं दीवं दुहा विभयमाणे २ चिट्ठइ, तंजहा—  
 अर्द्धिभतरपुक्खरद्धं च बाहिरपुक्खरद्धं च ॥ अर्द्धिभतरपुक्खरद्धे णं भंते ! केवइयं  
 चक्कवाल्लेणं परिकखेवेणं पण्णत्ते ? गोयमा ! अट्ठ जोयणसयसहस्साइं चक्कवाल्लेणं  
 भेणं—कोडी बायालीसा तीसं दोणिय य सया अगुणवण्णा । पुक्खरअद्धपरिरओ  
 एवं च मणुस्सखेत्तस्स ॥ १ ॥ से केणट्ठेणं भंते ! एवं वुच्चइ—अर्द्धिभतरपुक्खरद्धे  
 २ ? गोयमा ! अर्द्धिभतरपुक्खरद्धे णं माणुसुत्तरेणं पव्वएणं सव्वओ समंता संपरि-  
 क्खित्ते, से एएणट्ठेणं गोयमा !० अर्द्धिभतरपुक्खरद्धे २, अट्ठत्तरं च णं जाव णिच्चे ॥  
 अर्द्धिभतरपुक्खरद्धे णं भंते ! केवइया चंदा पभासिंसु वा ३ सा चेव पुच्छा जाव  
 तारागणकोडिकोडीओ ? , गोयमा !—बावत्तरिं च चंदा बावत्तरिमेव दिणयरा दित्ता ।  
 पुक्खरवरदीवट्ठे चरंति एए पभासिंता ॥ १ ॥ तिण्णि सया छत्तीसा छच्च सहस्सा  
 महग्गहाणं तु । णक्खत्ताणं तु भवे सोलाइं दुवे सहस्साइं ॥ २ ॥ अडयाल सयस-  
 हस्सा बावीसं खलु भवे सहस्साइं । दोञ्चि सय पुक्खरद्धे तारागणकोडिकोडीणं  
 ॥ ३ ॥ सोमं सु वा ३ ॥ १७६ ॥ समयखेत्ते णं भंते ! केवइयं आयामविकखंभेणं  
 केवइयं परिकखेवेणं पण्णत्ते ? गोयमा ! पणयालीसं जोयणसयसहस्साइं आयामवि-  
 कखंभेणं एगा जोयणकोडी जावर्द्धिभतरपुक्खरद्धपरिरओ से भाणियव्वो जाव अउ-  
 णपण्णे ॥ से केणट्ठेणं भंते ! एवं वुच्चइ—माणुसखेत्ते २ ? गोयमा ! माणुसखेत्ते णं  
 तिविहा मणुस्सा परिवसंति, तंजहा—कम्मभूमगा अकम्मभूमगा अंतरदीवगा, से  
 तेणट्ठेणं गोयमा ! एवं वुच्चइ—माणुसखेत्ते माणुसखेत्ते ॥ माणुसखेत्ते णं भंते ! कइ  
 चंदा पभासिंसु वा ३ ? कइ सूरा तवइंसु वा ३ ? गोयमा !—बत्तीसं चंदसयं बत्तीसं  
 चेव सूरियाण सयं । सयलं मणुस्सलोयं चरंति एए पभासिंता ॥ १ ॥ एक्कारस य  
 सहस्सा छप्पिय सोला महग्गहाणं तु । छच्च सया छण्णउया णक्खत्ता तिण्णि य  
 सहस्सा ॥ २ ॥ अडसीइ सयसहस्सा चत्तालीस सहस्स मणुयलोगंमि । सत्त य सया  
 अण्णूपा तारागणकोडिकोडीणं ॥ ३ ॥ सोमं सोमं सु वा ३ ॥ एसो तारापिंडो  
 सव्वसमासेण मणुयलोगंमि । बहिया पुण ताराओ जिणेहिं भणिया असंखेजा ॥ १ ॥  
 एवइयं तारगं जं भणियं माणुसंमि लोणंमि । चारं कलं वुयापुप्फसंठियं जोइसं चरइ  
 ॥ २ ॥ रविससिगहनक्खत्ता एवइया आहिया मणुयलोए । जेसिं नामागोयं न  
 प्रागया पन्नवेहिंति ॥ ३ ॥ छावट्ठी पिडगाइं चंदाइच्चाण मणुयलोगंमि । दो चंदा दो

सूरा य होंति एकेकए पिडए ॥ ४ ॥ छावट्टी पिडगाई नक्खत्ताणं तु मणुयलोगंमि ।  
छप्पन्नं नक्खत्ता य होंति एकेकए पिडए ॥ ५ ॥ छावट्टी पिडगाई महागहाणं तु  
मणुयलोगंमि । छावत्तरं गहसयं च होइ एकेकए पिडए ॥ ६ ॥ चत्तारि य पंतीओ  
चंदाइच्चाण मणुयलोगंमि । छावट्टिय छावट्टिय होइ य एकेकया पंती ॥ ७ ॥ छप्पन्नं  
पंतीओ नक्खत्ताणं तु मणुयलोगंमि । छावट्टी छावट्टी हवइ य एकेकया पंती ॥ ८ ॥  
छावत्तरं गहाणं पंतिसयं होइ मणुयलोगंमि । छावट्टी छावट्टी य होइ एकेकया पंती ॥ ९ ॥  
ते मेर परियडन्ता पयाहिणावत्तमंडला सव्वे । अणवट्टियजोगेहिं चंदा सूरा गहगणा  
य ॥ १० ॥ नक्खत्तारगाणं अवट्टिया मंडला मुण्येव्वा । तेऽविय पयाहिणाव-  
त्तमेव मेरं अणुचरंति ॥ ११ ॥ रयणियरदिणयराणं उट्ठे व अहे व संक्रमो नत्थि ।  
मंडलसंक्रमणं पुण अब्भितरवाहिरं तिरिए ॥ १२ ॥ रयणियरदिणयराणं नक्ख-  
त्ताणं महग्गहाणं च । चारविसेसेण भवे सुहुक्खविही मणुस्साणं ॥ १३ ॥ तेसि  
पविसंताणं तावक्खेत्तं तु वड्ढए नियमा । तेणेव कमेण पुणो परिहायइ निक्ख-  
मंताणं ॥ १४ ॥ तेसि कलंबुयापुप्फसंठिया होइ तावक्खेत्तपहा । अंतो य संकुया  
वाहि वित्थडा चंदसूरगणा ॥ १५ ॥ केणं वड्ढइ चंदो परिहाणी केण होइ चंदस्स ।  
कालो वा जोण्हो वा केणऽणुभावेण चंदस्स ? ॥ १६ ॥ किण्हं राहुविमाणं  
निच्चं चंदेण होइ अविरहियं । चउरंगुलमप्पत्तं हिट्ठा चंदस्स तं चरइ ॥ १७ ॥  
बावट्टिं बावट्टिं दिवसे दिवसे उ सुक्कपक्खस्स । जं परिवड्ढइ चंदो खवेइ तं चेव  
कालेणं ॥ १८ ॥ पन्नरसइभागेण य चंदं पन्नरसमेव तं वरइ । पन्नरसइभागेण य  
पुणोवि तं चेव तिकमइ ॥ १९ ॥ एवं वड्ढइ चंदो परिहाणी एव होइ चंदस्स ।  
कालो वा जोण्हा वा तेणणुभावेण चंदस्स ॥ २० ॥ अंतो मणुस्सखेत्ते हवंति  
चारोवगा य उववण्णा । पन्नविहा जोइसिया चंदा सूरा गहगणा य ॥ २१ ॥ तेण  
परं जे सेसा चंदाइच्चगहतारनक्खत्ता । नत्थि गई नवि चारो अवट्टिया ते मुण्येव्वा  
॥ २२ ॥ दो चंदा इह दीवे चत्तारि य सागरे लवणतोए । धायइसंडे दीवे बारस  
चंदा य सूरा य ॥ २३ ॥ दो दो जंबुद्वीवे ससिसूरा दुग्गुणिया भवे लवणे । लावणिगा  
य तिग्गुणिया ससिसूरा धायइसंडे ॥ २४ ॥ धायइसंडप्पभिई उद्धित्तिग्गुणिया भवे  
चंदा । आइल्लचंदसहिया अणंतराणंतरे खेत्ते ॥ २५ ॥ रिक्खग्गहतारगं दीवसमुदे  
जहिच्छसे नाउं । तस्स ससीहिं गुणियं रिक्खग्गहतारगाणं तु ॥ २६ ॥ चंदाओ  
सूरस्स य सूरा चंदस्स अंतरं होइ । पन्नास सहस्साइं तु जोयणाणं अणूणाइं ॥ २७ ॥  
सूरस्स य सूरस्स य ससिणो ससिणो य अंतरं होइ । बहियाओ मणुस्सनगस्स  
जोयणाणं सयसहस्सं ॥ २८ ॥ सूरंतरिया चंदा चंदंतरिया य दिणयरा दित्ता ।

चित्तंतरलेसागा सुहलेसा मंदलेसा य ॥ २९ ॥ अट्टासीई च गहा अट्टावीसं च  
 होति नक्खत्ता । एगससीपरिवारो एत्तो ताराण वोच्छामि ॥ ३० ॥ छावट्टिसहस्साई  
 नव चेव सयाई पंचसयरई । एगससीपरिवारो तारागणकोडिकोडीणं ॥ ३१ ॥  
 बहियाओ माणुसनगस्स चंदसूराणऽवट्टिया जोगा । चंदा असीइजुत्ता सूरा पुण  
 होंति पुस्सेहिं ॥ ३२ ॥ १७७ ॥ माणुसुत्तरे णं भंते ! पव्वए केवइयं उट्ठं उच्च-  
 त्तेणं ? केवइयं उव्वेहेणं ? केवइयं मूले विक्खम्भेणं ? केवइयं मज्झे विक्खंभेणं ?  
 केवइयं सिहरे विक्खंभेणं ? केवइयं अंतो गिरिपरिरएणं ? केवइयं बाहिं गिरिपरि-  
 रएणं ? केवइयं मज्झे गिरिपरिरएणं ? केवइयं उवरि गिरिपरिरएणं ?, गोयमा !  
 माणुसुत्तरे णं पव्वए सत्तरस एकवीसाई जोयणसयाई उट्ठं उच्चत्तेणं चत्तारि तीसे  
 जोयणसए कोसं च उव्वेहेणं मूले दसबावीसे जोयणसए विक्खंभेणं मज्झे सत्ततेवीसे  
 जोयणसए विक्खंभेणं उवरि चत्तारिचउवीसे जोयणसए विक्खंभेणं अंतो गिरि-  
 परिरएणं—एगा जोयणकोडी बायालीसं च सयसहस्साई । तीसं च सहस्साई दोण्णि  
 य अउणापण्णे जोयणसए किंचिविसेसाहिए परिक्खेवेणं, बाहिरगिरिपरिरएणं एगा  
 जोयणकोडी बायालीसं च सयसहस्साई छत्तीसं च सहस्साई सत्तचोइसोत्तरे जोयण-  
 सए परिक्खेवेणं, मज्झे गिरिपरिरएणं एगा जोयणकोडी बायालीसं च सयसहस्साई  
 चोत्तीसं च सहस्सा अट्टतेवीसे जोयणसए परिक्खेवेणं, उवरि गिरिपरिरएणं एगा  
 जोयणकोडी बायालीसं च सयसहस्साई बत्तीसं च सहस्साई नव य बत्तीसे  
 जोयणसए परिक्खेवेणं, मूले विच्छिन्ने मज्झे संखिते उप्पि तणुए अंतो सण्हे मज्झे  
 उदग्गे बाहिं दरिसणिज्जे ईसिं सणिगण्णे सीहणिसाई अवद्धजवरासिसंठाणसंठिए  
 सव्वजंबूणयामए अच्छे सण्हे जाव पडिह्वे, उभओ पासिं दोहिं पउमवरवेइयाहिं  
 दोहि य वणसंडेहिं सव्वओ समंता संपरिक्खिते वण्णओ दोण्हवि ॥ से केणट्ठेणं  
 भंते ! एवं वुच्चइ—माणुसुत्तरे पव्वए २ ? गोयमा ! माणुसुत्तरस्स णं पव्वयस्स  
 अंतो मणुया उप्पि सुवण्णा बाहिं देवा अदुत्तरं च णं गोयमा ! माणुसुत्तरपव्वयं  
 मणुया ण कयाइ वीइवइसु वा वीइवयंति वा वीइवइस्संति वा णण्णत्थ चारणेहिं वा  
 विज्जाहरेहिं वा देवकम्मणा वावि, से तेणट्ठेणं गोयमा !० अदुत्तरं च णं जाव  
 णिच्चेत्ति ॥ जावं च णं माणुसुत्तरे पव्वए तावं च णं अस्सिं लोएत्ति पवुच्चइ, जावं  
 च णं वासाई वा वासहराई वा तावं च णं अस्सिं लोएत्ति पवुच्चइ, जावं च णं  
 गेहाइ वा गेहावणाइ वा तावं च णं अस्सिं लोएत्ति पवुच्चइ, जावं च णं गामाइ वा  
 जाव रायहाणीइ वा तावं च णं अस्सिं लोएत्ति पवुच्चइ, जावं च णं अरहंता चक्खवट्ठी  
 बलदेवा वासुदेवा पडिवासुदेवा चारणा विज्जाहरा समणा समणीओ सावया सावि-

याओ मणुया पगइभइगा विणीया तावं च णं अस्सि लोएत्ति पवुच्चइ, जावं च णं समयाइ वा आवलियाइ वा आणापाणूइ वा थोवाइ वा लवाइ वा मुहुत्ताइ वा दिवसाइ वा अहोरत्ताइ वा पक्खाइ वा मासाइ वा उदूइ वा अयणाइ वा संवच्छराइ वा जुगाइ वा वाससयाइ वा वाससहस्साइ वा वाससयसहस्साइ वा पुव्वंगाइ वा पुव्वाइ वा तुडियंगाइ वा, एवं तुडिए अडडे अववे हुहुए उप्पले पउमे णल्लिणे अच्छिणिउरे अउए णउए पउए चूलिया जाव सीसपहेलियंगेइ वा सीसपहेलियाइ वा पलिओवमेइ वा सागरोवमेइ वा उवसप्पिणीइ वा ओसप्पिणीइ वा तावं च णं अस्सि लोएत्ति पवुच्चइ, जावं च णं बायरे विज्जुयारे बायरे थणियसंइ तावं च णं अस्सि०, जावं च णं बहवे ओराला बलाहगा संसेयंति संमुच्छंति वासं वासंति तावं च णं अस्सि लोए०, जावं च णं बायरे तेउकाए तावं च णं अस्सि लोए०, जावं च णं आगराइ वा णिहीइ वा तावं च णं अस्सि लोएत्ति पवुच्चइ, जावं च णं अगडाइ वा णइइ वा तावं च णं अस्सि लोए०, जावं च णं चंदोवरागाइ वा सूरोवरागाइ वा चंदपरिवेसाइ वा सूरपरिवेसाइ वा पडिचंदाइ वा पडिसूराइ वा इंदधणूइ वा उदगमच्छेइ वा कविहसियाइ वा तावं च णं अस्सि लोएत्ति प०, जावं च णं चंदिमसूरियगहणकखत्ततारारूवाणं अभिगमणनिग्गमणवुद्धिणिवुद्धि-अणवद्वियसंठाणसंठिई आघविजइ तावं च णं अस्सि लोएत्ति पवुच्चइ ॥ १७८ ॥

अंतो णं भंते ! मणुस्सखेतस्स जे चंदिमसूरियगहणकखत्ततारारूवा ते णं भन्ते ! देवा किं उद्धोववण्णगा कप्पोववण्णगा विमाणोववण्णगा चारोववण्णगा चारद्विइया गइरइया गइसमावण्णगा ? गोयमा ! ते णं देवा णो उद्धोववण्णगा णो कप्पोववण्णगा विमाणोववण्णगा चारोववण्णगा नो चारद्विइया गइरइया गइसमाव-ण्णगा उद्धुमुहकलंबुयपुप्फसंठाणसंठिएहिं जोजणसाहस्सिएहिं तावखेतेहिं साहस्सि-याहिं बाहिरियाहिं वेउव्वियाहिं परिसाहिं महया हयनट्ठगीयवाइयतंतीतलतालतुडिय-घणमुइंगपडुप्पवाइयरवेणं दिव्वाइ भोगभोगां भुंजमाणा महया २ उक्कट्टिसीहणायबो-लकलकलसेहण विउलां भोगभोगां भुंजमाणा अच्छयपव्वयरायं पयाहिणावत्तमंड-लयारं मेरं अणुपरियडंति ॥ जया णं भंते ! तेसिं देवाणं इंदे चवइ से कहमिदाणि पकरेंति ? गोयमा ! ताहे चत्तारि पंच सामाणिया तं ठाणं उवसंपज्जिताणं विहरंति जाव तत्थ अन्ने इंदे उववण्णे भवइ ॥ इंदट्ठाणे णं भंते ! केवइयं कालं विरहिए उववाएणं पणत्ते ? गोयमा ! जहण्णेणं एक्कं समयं उक्कोसेणं छम्मासा ॥ बहिया णं भंते ! मणुस्सखेतस्स जे चंदिमसूरियगहणकखत्ततारारूवा ते णं भंते ! देवा किं उद्धोववण्णगा कप्पोववण्णगा विमाणोववण्णगा चारोववण्णगा चारद्विइया गइरइया

गइसमावण्णगा ? गोयमा ! ते णं देवा णो उद्धोववण्णगा नो कप्पोववण्णगा विमा-  
 णोववण्णगा नो चारोववण्णगा चारद्विइया नो गइरइया नो गइसमावण्णगा पक्किट्ठ-  
 गसंठाणसंठिएहिं जोयणसयसाहस्सिएहिं तावक्खेत्तेहिं साहस्सियाहिं य बाहिराहिं  
 वेउ व्वियाहिं परिसाहिं महया हयणट्ठगीयवाइय० रवेणं दिव्वाइं भोगभोगाईं भुंजमाणा  
 जाव सुहलेस्सा सीयलेस्सा मंदलेस्सा मंदायवलेस्सा चित्तंतरलेसागा कूडा इव ठाण-  
 द्विया अण्णोण्णसमोगाढाहिं लेसाहिं ते पएसे सव्वओ समंता ओभासेंति उज्जोवेत्ति  
 तवंति पभासेंति ॥ जया णं भंते ! तेसिं देवाणं इंदे चयइ से कहमिदाणिं पकरेंति ?  
 गोयमा ! जाव चत्तारि पंच सामाणिया तं ठाणं उवसंपज्जिताणं विहरंति जाव तत्थ  
 अण्णे इंदे उववण्णे भवइ । इंदट्ठाणे णं भंते ! केवइयं कालं विरहिए उववाएणं प० ?  
 गोयमा ! जहण्णेणं एकं समयं उक्कोसेणं छम्मासा ॥ १७९ ॥ पुक्खरवरण्णं दीवं  
 पुक्खरोदे णामं समुदे वट्ठे वलयागारसंठाणसंठिए जाव संपरिबिक्खताणं चिट्ठइ ॥  
 पुक्खरोदे णं भंते ! समुदे केवइयं चक्कवालविक्खंभेणं केवइयं परिवक्खेवेणं पण्णत्ते ?  
 गोयमा ! संखेज्जाइं जोयणसयसहस्साइं चक्कवालविक्खंभेणं संखेज्जाइं जोयणसयसह-  
 स्साइं परिक्खेवेणं पण्णत्ते ॥ पुक्खरोदस्स णं भंते ! समुदस्स कइ दारा पण्णत्ता ?  
 गोयमा ! चत्तारि दारा पण्णत्ता तहेव सव्वं पुक्खरोदसमुदपुरत्थिमपेरंते वरुणवर-  
 दीवपुरत्थिमदस्स पच्चत्थिमेणं एत्थ णं पुक्खरोदस्स विजए नामं दारे पण्णत्ते, एवं  
 सेसाणवि । दारंतरंमि संखेज्जाइं जोयणसयसहस्साइं अबाहाए अंतरे पण्णत्ते । पएसा  
 जीवा य तहेव । से केणट्ठेणं भंते ! एवं वुच्चइ—पुक्खरोदे समुदे २ ? गोयमा !  
 पुक्खरोदस्स णं समुदस्स उदगे अच्छे पत्थे जच्चे तणुए फलिहवण्णामे पगईए  
 उदगरसेणं सिरिधरसिरिप्पभा य० दो देवा महिद्धिया जाव पलिओवमद्विइया परिव-  
 संति, से एणट्ठेणं जाव णिच्चे । पुक्खरोदे णं भंते ! समुदे केवइया चंदा पभासिंसु  
 वा ३ ?० संखेज्जा चंदा पभासिंसु वा ३ जाव तारागणकोडिकोडीओ सोमैसु वा ३ ॥  
 पुक्खरोदणं समुदं वरुणवरे णामं दीवे वट्ठे वलयागार जाव चिट्ठइ, तहेव समचक्क-  
 वालसंठिए० केवइयं चक्कवालविक्खंभेणं केवइयं परिक्खेवेणं पण्णत्ते ? गोयमा ! संखे-  
 ज्जाइं जोयणसयसहस्साइं चक्कवालविक्खंभेणं संखेज्जाइं जोयणसयसहस्साइं परिक्खे-  
 वेणं पण्णत्ते, पउमवरवेइयावणसंडवण्णओ दारंतरं पएसा जीवा तहेव सव्वं ॥ से  
 केणट्ठेणं भंते ! एवं वुच्चइ—वरुणवरे दीवे २ ? गोयमा ! वरुणवरे णं दीवे तत्थ २  
 देसे २ तहिं २ बहूओ खुड्डाखुड्डियाओ जाव बिलपंतियाओ अच्छाओ० पत्तेयं २  
 पउमवरवेइयापरि० वण० वारुणोदगपडिहत्थाओ पासाइयाओ ४, तासु णं खुड्डाखु-  
 ड्डियासु जाव बिलपंतियासु बहवे उप्पायपव्वया जाव खड्डहणा सव्वफलिहामया

अच्छा तहेव वरुणवरुणप्पभा य एत्थ दो देवा महिद्धिया० परिवसंति, से तेणट्ठेणं जाव णिच्चे । जोइसं सव्वं संखेज्जेणं जाव तारागणकोडिकोवीओ । वरुणवरुणं दीवं वारुणोदे णामं समुदे वट्ठे वलया० जाव चिट्ठइ, समचक्क० विसमचक्कवालवि० तहेव सव्वं भाणियव्वं, विक्खंभपरिक्खेवो संखिजाइं जोयणसहस्साइं दारंतरं च पउमवर० वणसंडे पएसा जीवा अट्ठो-गोयमा ! वारुणोदस्स णं समुदस्स उदए से जहा नामए-चंदप्पभाइ वा मणिसिलागाइ वा सीहूइ वा वारुणीइ वा पत्तासवेइ वा पुप्फासवेइ वा चोयासवेइ वा फलासवेइ वा महुमेरएइ वा जंबूफलपुट्टवच्चाइ वा जाइप्पसच्चाइ वा खज्जूरसारैइ वा मुद्धियासारैइ वा कापिसायणाइ वा सुपक्कखोयरसेइ वा पभूयसंभार-संचिया पोसमाससयभिसयजोगवत्तिया निरुवहयविसिट्ठदिक्कालोवयारा उक्कोसम-यपत्ता अट्ठपिट्ठनिद्धिया वण्णेणं उववेया गंधेणं उववेया रसेणं उववेया फासेणं उववेया, भवे एयारूवे सिया ?, गोयमा ! नो इणट्ठे समट्ठे, वारुणस्स णं समुदस्स उदए एत्तो इट्ठतरे जाव आसाएणं पण्णत्ते तत्थ णं वारुणिवारुणकंता दो देवा महिद्धिया जाव परिवसंति, से एएणट्ठेणं जाव णिच्चे, सव्वं जोइसं संखिज्जेणं नायव्वं ॥ १८० ॥ वारुणोदणं समुदं खीरवरे णामं दीवे वट्ठे जाव चिट्ठइ सव्वं संखेज्जं विक्खंभे य परिक्खेवो य जाव अट्ठो० बहूओ खुड्डा० वावीओ जाव बिलपंतियाओ खीरोदगपडिहत्थाओ पासाइयाओ ४, तासु णं० खुड्डियासु जाव बिलपंतियासु बहवे उप्पायपव्वयगा सव्वरयणामया जाव पडिरूवा, पुंडरीगपुप्फदंता एत्थ दो देवा महिद्धिया जाव परिवसंति, से एएणट्ठेणं जाव निच्चे जोइसं सव्वं संखेज्जं ॥ खीरवरुणं दीवं खीरोए नामं समुदे वट्ठे वलयागारसंठाणसंठिए जाव परिक्खित्ताणं चिट्ठइ, समचक्कवालसंठिए नो विसमचक्कवालसंठिए, संखेजाइं जोयणस० विक्खंभपरिक्खेवो तहेव सव्वं जाव अट्ठो, गोयमा ! खीरोयस्स णं समुदस्स उदगं से जहा णामए—सुउसहीमारुपणअज्जुणतरुणसरसपत्तकोमलअत्थिग्गतणग्गपोंडगवरुच्छुचारिणीणं लवं-गपत्तपुप्फपल्लवक्ककोलगस फलरुक्खबहुगुच्छगुम्मकलियमलट्ठिमहुपउरपिप्पलीफलियव-ल्लिवरविवरचारिणीणं अप्पोदगपिइरइसरसभूमिभागणिभयसुहोसियाणं सुपोसियसुहा-याणं रोगपरिवज्जियाणं निरुवहयसरीराणं कालप्पसविणीणं बिइयतइयसामप्पसूयाणं अंजणवरगवलवलयजलधरजच्चंजणरिट्ठभमरपभूयसमप्पभाणं गावीणं कुंडदोहणाणं वद्धत्थीपत्थुयाणं रूढाणं मधुमासकाले संगहिए होज्जचाउरक्केव होज्ज तासिं खीरे महुसरसविवगच्छबहुदव्वसंपउत्ते पत्तेयं मंदग्गिसुकट्टिए आउत्ते खंडगुडमच्छंडि-ओववेए रण्णो चाउरंतचक्कवट्ठिस्स उवट्ठविए आसायणिज्जे विस्सायणिज्जे पीणणिज्जे जाव सत्विदियगायपल्हायणिज्जे वण्णेणं उववेए जाव फासेणं उववेए, भवे एयारूवे



सिया ?, णो इण्ठे समट्ठे, खीरोदस्स णं समुद्दस्स उदए एत्तो इट्ठयराए चेव जाव आसाएणं पण्णत्ते, विमलविमलप्पभा एत्थ दो देवा महिङ्गिया जाव परिवसंति, से तेणट्ठेणं संखेज्जा चंदा जाव तारा ॥ १८१ ॥ खीरोदणं समुद्दं घयवरे णांमं दीवे वट्ठे वलयागारसंठाणसंठिए जाव परि० चिट्ठइ, समचक्काल० नो विसम० संखेज्जविकखंभपरि० पएसा जाव अट्ठो, गोयमा ! घयवरे णं दीवे तत्थ २...बहूओ खुट्ठाखुट्ठीओ वावीओ जाव घयोदगपडिहत्थाओ उप्पायपव्वयगा जाव खडहड० सव्वकंचणमया अच्छा जाव पडिह्वा, कणयकणयप्पभा एत्थ दो देवा महिङ्गिया० चंदा संखेज्जा० ॥ घयवरणं दीवं घओदे णांमं समुद्दं वट्ठे वलयागारसंठाणसंठिए जाव चिट्ठइ, समचक्क० तहेव दारपएसा जीवा य अट्ठो, गोयमा ! घओदस्स णं समुद्दस्स उदए से जहा० सेजवगपप्फुल्लसल्लइविमुकुलकणियारसरसवसुविसुद्ध-कोरेंदमपिंडियतरस्स निद्धगुणतेयदीवियनिरुवहयविसिट्ठुंदरतरस्स सुजायदहिम-हियतद्विसगहियनवणीयपडुवणावियमुक्कड्वियउद्दावसज्जवीसंदियस्स अहियं पीवरसुर-हिंघमणहरमहुरपरिणामदरिसणिज्जस्स पत्थनिम्मलसुहोवभोगस्स सरयकालंमि होज्ज गोघयवरस्स मंडए, भवे एयारूवे सिया ?, णो इण्ठे समट्ठे, गोयमा ! घओदस्स णं समुद्दस्स एत्तो इट्ठयराए जाव आसाएणं प० कंतसुकंता एत्थ दो देवा महिङ्गिया जाव परिवसंति सेसं तं चेव जाव तारागणकोडिकोडीओ ॥ घओदणं समुद्दं खोयवरे णांमं दीवे वट्ठे वलयागार जाव चिट्ठइ तहेव जाव अट्ठो, खोयवरे णं दीवे तत्थ २ देसे २ तहिं २ खुट्ठा० वावीओ जाव खोदोदगपडिहत्थाओ० उप्पायपव्वयगा सव्ववे-रुलियामया जाव पडिह्वा, सुप्पभमहप्पभा य एत्थ दो देवा महिङ्गिया जाव परिव-संति, से एएण० सव्वं जोइसं तं चेव जाव तारा० ॥ खोयवरणं दीवं खोदोदे नामं समुद्दं वट्ठे वलया० जाव संखेज्जाइं जोयणसयसहस्साइं परिकखेवेणं जाव अट्ठो, गोयमा ! खोदोदस्स णं समुद्दस्स उदए से जहा० आसलमासलपसत्थवासंतनिद्ध-सुकुमालभूमिभागे सुच्छिन्ने सुकट्ठलट्ठविसिट्ठनिरुवहयाजीयवावीतसुकासजपयत्तनिउण-परिकम्मअणुपालियसुवुट्ठिवुट्ठाणं सुजायाणं लवणतणदोसवज्जियाणं गयायपरिवट्ठियाणं निम्मायसुंदराणं रसेणं परिणयमउपीणपोरभंगुरसुजायमहुररसपुप्फविरइयाणं उवद्द-विवज्जियाणं सीयपरिफासियाणं अभिणवभग्गाणं अपालियाणं तिभायणिच्छोडिय-वाडिगाणं अवणियमूलाणं गंठिपरिसोहियाणं कुसलणरकप्पियाणं उच्छूढाणं जाव पोंडियाणं बलवगणरजत्तजन्तपरिगालियमेत्ताणं खोयरसे होज्जा वत्थपरिपूए चाउ-ज्जायगसुवासिए अहियपत्थलहुए वण्णोववेए तहेव, भवे एयारूवे सिया ?, णो इण्ठे समट्ठे, खोदोदस्स णं समुद्दस्स उदए एत्तो इट्ठयराए चेव जाव आसाएणं प०

पुण्णभद्दमाणिभद्दा य (पुण्णपुण्णभद्दा) इत्थ दुवे देवा जाव परिवसंति, सेसं तहेव, जोइसं संखेज्जं चंदा० ॥ १८२ ॥ खोदोदण्णं समुदं णंदीसरवरं णामं दीवे वट्ठे वलयागारसंठिए तहेव जाव परिकखेवो । पउमवर० वणसंडपरि० दारा दारंतरप्पएसे जीवा तहेव ॥ से केणट्ठेणं भंते ! एवं वुच्चइ-नंदीसरवरदीवे २ ? गोयमा । नंदीसरवरदीवे २ तत्थ २ देसे २ तहिं २ बहूओ खुड्ढा० वावीओ जाव बिलपंतियाओ खोदोदगपडिहत्थाओ० उप्पायपव्वयगा सव्ववइरामया अच्छा जाव पडिह्वा ॥ अदुत्तरं च णं गोयमा । णंदीसरवरदीवच्छालविकखंभवहुमज्झदेसभागे एत्थ णं चउदिसिं चत्तारि अंजणगपव्वया पण्णत्ता, ते णं अंजणगपव्वया चउरासीइजोयणसहस्साइ उड्ढं उच्चत्तेणं एगमेगं जोयणसहस्सं उव्वेहेणं मूले साइरेगाइ दस जोयणसहस्साइ धरणियले दस जोयणसहस्साइ आयामविकखंभेणं तओऽर्णतरं च णं मायाए २ पएसपरिहाणीए परिहायमाणा २ उवरि एगमेगं जोयणसहस्सं आयामविकखंभेणं मूले एकतीसं जोयणसहस्साइ छच्च तेवीसे जोयणसए किंचिविसेसाहिया परिकखेवेणं धरणियले एकतीसं जोयणसहस्साइ छच्च तेवीसे जोयणसए देसूणे परिकखेवेणं सिहरतले तिण्णि जोयणसहस्साइ एगं च बावट्ठं जोयणसयं किंचिविसेसाहियं परिकखेवेणं पण्णत्ता मूले विच्छिण्णा मज्झे संखित्ता उप्पि तणुया गोपुच्छसंठाणसंठिया सव्वजणामया अच्छा जाव पत्तेयं २ पउमवरवेइयापरि० पत्तेयं २ वणसंडपरिक्खित्ता वण्णओ ॥ तेसि णं अंजणगपव्वयाणं उवरि पत्तेयं २ बहुसमरमणिज्जो भूमिभागो पण्णत्तो, से जहाणामए—आलिगपुक्खरेइ वा जाव विहरंति ॥ तत्थ णं जे से पुरच्छिमिल्ले अंजणगपव्वए तस्स णं चउदिसिं चत्तारि णंदाओ पुक्खरिणीओ पण्णत्ताओ, तंजहा—णंदुत्तरा य णंदा आणंदा णंदिवद्धणा । (नंदिसेणा अमोघा य गोथूमा य सुदंसणा) ताओ णं णंदापुक्खरिणीओ अच्छाओ सण्हाओ० पत्तेयं पत्तेयं पउमवरवेइया० पत्तेयं पत्तेयं वणसंडपरिक्खित्ता० तत्थ तत्थ जाव सोवाणपडिह्वगा तोरणा ॥ तासि णं पुक्खरिणीणं बहुमज्झदेसभाए पत्तेयं पत्तेयं दहिमुहपव्वया चउसट्ठि जोयणसहस्साइ उड्ढं उच्चत्तेणं एगं जोयणसहस्सं उव्वेहेणं सव्वत्थसमा पल्लगसंठाणसंठिया दस जोयणसहस्साइ विकखंभेणं एकतीसं जोयणसहस्साइ छच्च तेवीसे जोयणसए परिकखेवेणं पण्णत्ता सव्वरयणामया अच्छा जाव पडिह्वा, तहा पत्तेयं पत्तेयं पउमवरवेइया० वणसंडवण्णओ बहुसम० जाव आसयंति सयंति० । तत्थ णं जे से दक्खिणिं अंजणगपव्वए तस्स णं चउदिसिं चत्तारि णंदाओ पुक्खरिणीओ पण्णत्ताओ, तंजहा—भद्दा य विसाला य कुमुया पुंडरीगिणी, (नन्दुत्तरा य नंदा य आनन्दा नन्दिवद्धणा) तं चेव दहिमुहा पव्वया तं चेव पमाणं जाव

विहरंति ॥ तत्थ णं जे से पच्चत्थिमिह्ले अंजणगपव्वए तस्स णं चउदिसिं चत्तारि णंदा पुक्खरिणीओ पणत्ताओ, तंजहा—णंदिसेणा अमोहा य गोथूमा य सुदंसणा, (भद्दा य विसाला य कुमुया पुंडरीणिणी) तं चेव सव्वं भाणियव्वं ॥ तत्थ णं जे से उत्तरिह्ले अंजणगपव्वए तस्स णं चउदिसिं चत्तारि णंदापुक्खरिणीओ प०, तंजहा—विजया चेजयंती य जयंती अपराजिया, तहेव दहिमुहगपव्वया तहेव जाव वणखंडा बहु० जाव विहरंति । अदुत्तरं च णं गोयमा ! णंदीसरवरस्स णं दीवस्स चक्कवालविकखं-भस्स बहुमज्झदेसमाए चउसु विदिसासु चत्तारि रइकरगपव्वया प० तं०—उत्तरपुर-च्छिमिह्ले रइकरगपव्वए दाहिणपुरत्थिमिह्ले रइकरगपव्वए दाहिणपच्चत्थिमिह्ले रइकर-गपव्वए उत्तरपच्चत्थिमिह्ले रइकरगपव्वए, ते णं रइकरगपव्वया दसजोयणसयाइ उड्डं उच्चतेणं, दसगाउयसयाइ उव्वेहेणं, सव्वत्थसमा झल्लरिसंठाणसंठिया, दसजोयणस-हस्साइं विक्खंमेणं, एकतीसं जोयणसहस्साइं छच्चतेवीसे जोयणसए परिकखेवेणं, सव्वरयणामया अच्छा जाव पडिह्वा । तत्थ णं जे से उत्तरपुरच्छिमिह्ले रइकरगप-व्वए तस्स णं चउदिसिमीसाणस्स देविंदस्स देवरण्णो चउण्हमग्गमहिसीणं जंबुदीव-प्पमाणमेत्ताओ चत्तारि रायहाणीओ प० तं०—णंदोत्तरा णंदा उत्तरकुरा देवकुरा, कण्हाए कण्हराईए कामाए कामरक्खियाए । तत्थ णं जे से दाहिणपुरच्छिमिह्ले रइकर-गपव्वए तस्स णं चउदिसिं सक्कस्स देविंदस्स देवरण्णो चउण्हमग्गमहिसीणं जंबुदीव-प्पमाणाओ चत्तारि रायहाणीओ प० तं०—सुमणा सोमणसा अच्चिमाली मणोरमा, पउमाए सिवाए सईए अंजूए । तत्थ णं जे से दाहिणपच्चत्थिमिह्ले रइकरगपव्वए तस्स णं चउदिसिं सक्कस्स देविंदस्स देवरण्णो चउण्हमग्गमहिसीणं जंबुदीवप्पमाणमेत्ताओ चत्तारि रायहाणीओ प० तं०—भूया भूयवडिंसा गोथूमा सुदंसणा, अमलाए अच्छराए नवमियाए रोहिणीए । तत्थ णं जे से उत्तरपच्चत्थिमिह्ले रइकरगपव्वए तस्स णं चउदि-सिमीसाणस्स चउण्हमग्गमहिसीणं जंबुदीवप्पमाणमेत्ताओ चत्तारि रायहाणीओ प० तं०—रयणा रयणोच्चया सव्वरयणा रयणसंचया, वसूए वसुगुत्ताए वसुमिताए वसुंधराए । कइलासहरिवाहणा य तत्थ दुवे देवा महिद्धिया जाव पलिओवमट्ठिया परिवसंति, से एएणट्ठेणं गोयमा ! जाव णिच्चै जोइसं संखेजं ॥ १८३ ॥ णंदीसरवरणं दीवं णंदीसरोदे णामं समुदे वट्ठे वलयागारसंठाणसंठिए जाव सव्वं तहेव अट्ठो जो खोदोदगस्स जाव सुमणसोमणसभद्दा एत्थ दो देवा महिद्धिया जाव परिवसंति सेसं तहेव जाव तारगं ॥ १८४ ॥ णंदीसरोदं णं समुदं अरणे णामं दीवे वट्ठे वलयागार जाव संपरिक्खित्ताणं चिट्ठइ । अरणे णं भंते ! दीवे किं समचक्कवालसंठिए विस-मचक्कवालसंठिए ? गोयमा ! समचक्कवालसंठिए नो विसमचक्कवालसंठिए, केवइयं

चक्रवालवि० ? गोयमा ! संखेज्जाइं जोयणसयसहस्साइं चक्रवालविकखंमेणं संखेज्जाइं जोयणसयसहस्साइं परिकखेवेणं पण्णत्ते, पउमवर० वणसंडदारा दारंतरा य तहेव संखेज्जाइं जोयणसयसहस्साइं दारंतरं जाव अट्ठो, वावीओ० खोदोदगपडिहत्थाओ उप्पायपव्वयगा सव्ववइरामया अच्छा जाव पडिह्वा, असोगवीयसोगा य एत्थ दुवे देवा महिङ्गिया जाव परिवसंति, से तेण० जाव संखेज्जं सव्वं ॥ अरुणणं दीवं अरुणोदे णांमं समुद्दे तस्सवि तहेव परिकखेवो अट्ठो खोदोदगे णवरं सुभद्दसुमण-भद्दा एत्थ दो देवा महिङ्गिया सेसं तहेव ॥ अरुणोदगं णं समुद्दं अरुणवरे णांमं दीवे वट्ठे वलयागारसंठाण० तहेव संखेज्जगं सव्वं जाव अट्ठो० खोदोदगपडिहत्थाओ उप्पा-यपव्वयया सव्ववइरामया अच्छा जाव पडिह्वा, अरुणवरभद्दअरुणवरमहाभद्दा एत्थ दो देवा महिङ्गिया० । एवं अरुणवरोदेवि समुद्दे जाव अरुणवरअरुणमहावरा य एत्थ दो देवा सेसं तहेव ॥ अरुणवरोदणं समुद्दं अरुणवरावभासे णांमं दीवे वट्ठे जाव अरुणवरावभासभद्दारुणवरावभासमहाभद्दा एत्थ दो देवा महिङ्गिया० । एवं अरुणवरावभासे समुद्दे णवरि अरुणवरावभासवरारुणवरावभासमहावरा एत्थ दो देवा महिङ्गिया० ॥ कुंडले दीवे कुंडलभद्दकुंडलमहाभद्दा एत्थ दो देवा महिङ्गिया०, कुंडलोदे समुद्दे चक्खुसुभचक्खुकंता एत्थ दो देवा म० । कुंडलवरे दीवे कुंडलव-रभद्दकुंडलवरमहाभद्दा एत्थ दो देवा महिङ्गिया०, कुंडलवरोदे समुद्दे कुंडलवर- [वर]कुंडलवरमहावरा एत्थ दो देवा म० ॥ कुंडलवरावभासे दीवे कुंडलवराव-भासभद्दकुंडलवरावभासमहाभद्दा एत्थ दो देवा० ॥ कुंडलवरोभासोदे समुद्दे कुंडल-वरोभासवरकुंडलवरोभासमहावरा एत्थ दो देवा म० जाव पलिओवमट्ठिइया परि-वसंति० ॥ कुंडलवरोभासोदं णं समुद्दं रुयगे णांमं दीवे वट्ठे वलया० जाव चिट्ठइ, किं समचक्र० विसमचक्रवाल० ? गोयमा ! समचक्रवाल० नो विसमचक्रवालसंठिए, केवइयं चक्रवाल० पण्णत्ते ?० सव्वट्ठमणोरमा एत्थ दो देवा सेसं तहेव । रुयगोदे नामं समुद्दे जहा खोदोदे समुद्दे संखेज्जाइं जोयणसयसहस्साइं चक्रवालवि० संखेज्जाइं जोयणसयसहस्साइं परिकखेवेणं दारा दारंतरंपि संखेज्जाइं जोइसंपि सव्वं संखेज्जं भाणियव्वं, अट्ठोवि जहेव खोदोदस्स नवरि सुमणसोमणसा एत्थ दो देवा महिङ्गिया तहेव रुयगाओ आढत्तं असंखेज्जं विकखंभो परिकखेवो दारा दारंतरं च जोइसं च सव्वं असंखेज्जं भाणियव्वं । रुयगोदणं समुद्दं रुयगवरे णं दीवे वट्ठे० रुयगवरभद्दरुय-गवरमहाभद्दा एत्थ दो देवा० रुयगवरोदे स० रुयगवररुयगवरमहावरा एत्थ दो देवा महिङ्गिया० । रुयगवरावभासे दीवे रुयगवरावभासभद्दरुयगवरावभासमहाभद्दा एत्थ दो देवा महिङ्गिया० । रुयगवरावभासे समुद्दे रुयगवरावभासवररुयगवरावभासमहावरा

एत्थ० ॥ हारदीवे हारभद्धारमहाभद्दा एत्थ० । हारसमुद्दे हारवरहारवरमहावरा  
 एत्थ दो देवा महिद्धिया० । हारवरोदे दीवे हारवरभद्धारवरमहाभद्दा एत्थ दो देवा  
 महिद्धिया० । हारवरोदे समुद्दे हारवरहारवरमहावरा एत्थ० । हारवरावभासे दीवे हार-  
 वरावभासभद्धारवरावभासमहाभद्दा एत्थ० । हारवरावभासोदे समुद्दे हारवरावभास-  
 वरहारवरावभासमहावरा एत्थ० । एवं सव्वेवि तिपडोयारा णेयव्वा जाव सूरवरो-  
 भासोदे समुद्दे, दीवेसु भद्दनामा वरनामा होंति उदहीसु, जाव पच्छिमभावं  
 खोयवराईसु सयंभूरमणपज्जंतेसु वावीओ० खोदोदगपडिहत्थाओ पव्वयगा य सव्व-  
 वइरामया० । देवदीवे दीवे देवभद्देवमहाभद्दा एत्थ दो देवा महिद्धिया०, देवोदे  
 समुद्दे देववरदेवमहावरा एत्थ० जाव सयंभूरमणे दीवे सयंभूरमणभद्दसयंभूरमणमहा-  
 भद्दा एत्थ दो देवा महिद्धिया० । सयंभूरमणणं दीवं सयंभूरमणोदे नामं  
 समुद्दे वट्टे वलया० जाव असंखेज्जाइं जोयणसयसहस्साइं परिक्खेवेणं जाव अट्ठो,  
 गोयमा ! सयंभूरमणोदए उदए अच्छे पत्थे जच्चे तणुए फलिव्वण्णाभे पगईए  
 उदगरसेणं पण्णत्ते, सयंभूरमणवरसयंभूरमणमहावरा इत्थ दो देवा महिद्धिया सेसं  
 तहेव जाव असंखेज्जाओ तारागणकोडिकोडीओ सोमैसु वा ३ ॥ १८५ ॥  
 केवइया णं भंते ! जंबुदीवा दीवा णामधेजेहिं पण्णत्ता ? गोयमा ! असंखेज्जा जंबु-  
 दीवा २ नामधेजेहिं पण्णत्ता, केवइया णं भंते ! लवणसमुद्दा० पण्णत्ता ? गोयमा !  
 असंखेज्जा लवणसमुद्दा नामधेजेहिं पण्णत्ता, एवं धायइसंडावि, एवं जाव असंखेज्जा  
 सूरदीवा नामधेजेहिं० । एगे देवे दीवे पण्णत्ते एगे देवोदे समुद्दे पण्णत्ते, एवं णागे  
 जक्खे भूए जाव एगे सयंभूरमणे दीवे एगे सयंभूरमणसमुद्दे णामधेजेणं पण्णत्ते  
 ॥ १८६ ॥ लवणस्स णं भंते ! समुद्दस्स उदए केरिसए आसाएणं पण्णत्ते ? गोयमा !  
 लवणस्स० उदए आविले रइले लिंदे लवणे कडुए अपेजे बहूणं दुपयचउपयमिग-  
 पसुपक्खिसरीसिवाणं णण्णत्थ तज्जोणियाणं सत्ताणं ॥ कालोयस्स णं भंते ! समुद्दस्स  
 उदए केरिसए आसाएणं पण्णत्ते ? गोयमा ! आसले पेसले मासले कालए भासरा-  
 सिवण्णाभे पगईए उदगरसेणं पण्णत्ते ॥ पुक्खरोदस्स णं भंते ! समुद्दस्स उदए  
 केरिसए आ० पण्णत्ते ? गोयमा ! अच्छे जच्चे तणुए फालियवण्णाभे पगईए उदगरसेणं  
 पण्णत्ते ॥ वारुणोदस्स णं भंते ! ०? गोयमा ! से जहा णामए—पत्तासवेइ वा चोया-  
 सवेइ वा खजूरसारेइ वा मुदियासारेइ वा सुपक्खोयरसेइ वा मेरएइ वा काविसाय-  
 णेइ वा चंदप्पभाइ वा मणसिलाइ वा सीहूइ वा वारुणीइ वा अट्ठपिट्ठपरिणिट्ठियाइ  
 वा जंबूफलकालियाइ वा पसण्णा उक्कोसमयप्पत्ता वण्णेणं उववेया जाव भवे एयारुवे  
 सिया?, णो इण्ठे समट्ठे, गोयमा ! वारुणोदए० इत्तो इट्ठतराए चेव जाव आसाएणं

प० । खीरोदस्स णं भंते !० उदए केरिसए आसाएणं पण्णत्ते ? गोयमा ! से जहा णामए—रन्नो चाउरंतचक्कवट्टिस्स चाउरक्के गोखीरे पयत्तमंदग्गिसुकहिए आउत्तरखंडमच्छंडिओववेए वण्णेणं उववेए जाव फासेणं उववेए, भवे एयाह्वे सिया ?, णो इण्ठे समट्ठे, गोयमा ! खीरोयस्स० एत्तो इट्ठ जाव आसाएणं पण्णत्ते । घओदस्स णं० से जहा णामए-सारइयस्स गोघयवरस्स मंडे सल्लइकाणियारपुप्फ-वण्णाभे सुकद्धियउदारसज्जवीसंदिए वण्णेणं उववेए जाव फासेणं उववेए, भवे एयाह्वे सिया ?, णो इण्ठे समट्ठे, इत्तो इट्ठयरा०, खोदोदस्स० से जहा णामए-उच्छूणं जच्चपुंडगाणं हरियालपिंडराणं भेरुडछणाण वा कालपोराणं तिभागनिव्वा-डियवाडगाणं बलवगणरजंतपरिगालियमित्ताणं जे य रसे होज्जा वत्थपरिपूए चाउ-ज्जायगसुवासिए अहियपत्थे लहुए वण्णेणं उववेए जाव भवेयाह्वे सिया ?, नो इण्ठे समट्ठे, एत्तो इट्ठयरा०, एवं सेसगाणवि समुद्धानं भेदो जाव सयंभुरमणस्स, णवरि अच्छे जच्चे पत्थे जहा पुक्खरोदस्स ॥ कइ णं भंते ! समुद्दा पत्तेगरसा पण्णत्ता ? गोयमा ! चत्तारि समुद्दा पत्तेगरसा पण्णत्ता, तंजहा—लवणे वारुणोदे खीरोदे घओदे ॥ कइ णं भंते ! समुद्दा पगईए उदगरसेणं पण्णत्ता ? गोयमा ! तओ समुद्दा पगईए उदगरसेणं पण्णत्ता, तंजहा—कालोदे पुक्खरोदे सयंभुरमणे, अवसेसा समुद्दा उस्सण्णं खोयरसा प० समणाउसो ! ॥ १८७ ॥ कइ णं भंते ! समुद्दा बहुमच्छकच्छभाइण्णा पण्णत्ता ? गोयमा ! तओ समुद्दा बहुमच्छकच्छभाइण्णा पण्णत्ता, तंजहा—लवणे कालोदे सयंभुरमणे, अवसेसा समुद्दा अप्पमच्छकच्छभाइण्णा पण्णत्ता समणाउसो ! ॥ लवणे णं भंते ! समुद्दे कइ मच्छजाइकुलकोडीजोणीपमुह-सयसहस्सा पण्णत्ता ? गोयमा ! सत्त मच्छजाइकुलकोडीजोणीपमुहसयसहस्सा पण्णत्ता ॥ कालोदे णं भंते ! समुद्दे कइ मच्छजाइ० पण्णत्ता ? गोयमा ! नव मच्छ-जाइकुलकोडीजोणी० ॥ सयंभुरमणे णं भंते ! समुद्दे० ? गो० ! अद्धतेरस मच्छजाइकुल-कोडीजोणीपमुहसयसहस्सा पण्णत्ता ॥ लवणे णं भंते ! समुद्दे मच्छाणं केमहालिया सरीरोगाहणा पण्णत्ता ? गो० ! जहण्णेणं अंगुलस्स असंखेज्जभागं उक्कोसेणं पंच-जोयणसयाई ॥ एवं कालोदे उ० सत्त जोयणसयाई ॥ सयंभूरमणे जहण्णेणं अंगुलस्स असंखेज्ज० उक्कोसेणं दस जोयणसयाई ॥ १८८ ॥ केवइया णं भंते ! दीवसमुद्दा नामधेज्जेहिं पण्णत्ता ? गोयमा ! जावइया लोणे सुभा णामा सुभा वण्णा जाव सुभा फासा एवइया दीवसमुद्दा नामधेज्जेहिं पण्णत्ता ॥ केवइया णं भंते ! दीवसमुद्दा उद्दारसमएणं पण्णत्ता ? गोयमा ! जावइया अट्ठाइज्जाणं सागरोवमाणं उद्दारसमया एवइया दीवसमुद्दा उद्दारसमएणं पण्णत्ता ॥ १८९ ॥ दीवसमुद्दा णं भंते ! किं

पुढविपरिणामा आउपरिणामा जीवपरिणामा पुग्गलपरिणामा ? गोयमा ! पुढविपरिणामावि आउपरिणामावि जीवपरिणामावि पुग्गलपरिणामावि ॥ दीवसमुद्देसु णं भंते ! सव्वपाणा सव्वभूया सव्वजीवा सव्वसत्ता पुढविकाइयत्ताए जाव तसकाइयत्ताए उववण्णपुव्वा ? हंता गोयमा ! असइं अदुवा अणतद्धुतो ॥ १९० ॥ इइ दीवसमुद्दा समत्ता ॥

कइविहे णं भंते ! इंदियविसए पोग्गलपरिणामे पण्णत्ते ? गोयमा ! पंचविहे इंदियविसए पोग्गलपरिणामे पण्णत्ते, तंजहा—सोइंदियविसए जाव फासिंदियविसए । सोइंदियविसए णं भंते ! पोग्गलपरिणामे कइविहे पण्णत्ते ? गोयमा ! दुविहे पण्णत्ते, तंजहा—सुब्भिसद्दपरिणामे य दुब्भिसद्दपरिणामे य, एवं चक्खिदियविसयाइएहिवि सुरूवपरिणामे य दुरूवपरिणामे य, एवं सुरभिगंधपरिणामे य दुरभिगंधपरिणामे य, एवं सुरसपरिणामे य दुरसपरिणामे य, एवं सुफासपरिणामे य दुफासपरिणामे य ॥ से नूणं भंते ! उच्चावएसु सद्दपरिणामेसु उच्चावएसु रूवपरिणामेसु एवं गंधपरिणामेसु रसपरिणामेसु फासपरिणामेसु परिणममाणा पोग्गला परिणमंतीति वत्तव्वं सिया ? हंता गोयमा ! उच्चावएसु सद्दपरिणामेसु जाव परिणममाणा पोग्गला परिणमंतीति वत्तव्वं सिया, से णूणं भंते ! सुब्भिसद्दा पोग्गला दुब्भिसद्दाए परिणमंति दुब्भिसद्दा पोग्गला सुब्भिसद्दाए परिणमंति ? हंता गोयमा ! सुब्भिसद्दा पो० दुब्भिसद्दाए परिणमंति दुब्भिसद्दा पो० सुब्भिसद्दाए परिणमंति, से णूणं भंते ! सुरूवा पुग्गला दुरूवत्ताए परिणमंति दुरूवा पुग्गला सुरूवत्ताए० ? हंता गोयमा !०, एवं सुब्भिमंथा पोग्गला दुब्भिमंथाए परिणमंति दुब्भिमंथा पोग्गला सुब्भिमंथाए परिणमंति ? हंता गोयमा !०, एवं सुफासा दुफासत्ताए ? सुरसा दुरसत्ताए० ?, हंता गोयमा !० ॥ १९१ ॥ देवे णं भंते ! महिद्धिए जाव महाणुभागे पुव्वामेव पोग्गलं खिवित्ता पभू तमेव अणुपरियट्ठित्ताणं गिण्हित्तए ? हंता पभू, से केणट्ठेणं भंते ! एवं वुच्चइ—देवे णं महिद्धिए जाव गिण्हित्तए ? गोयमा ! पोग्गले खित्ते समाणे पुव्वामेव सिग्घगई भवित्ता तओ पच्छा मंदगई भवइ, देवे णं महिद्धिए जाव महाणुभागे पुव्वं पि पच्छावि सीहे सीहगई तुरिए तुरियगई चेव से तेणट्ठेणं गोयमा ! एवं वुच्चइ जाव अणुपरियट्ठित्ताणं गेण्हित्तए ॥ देवे णं भंते ! महिद्धिए० बाहिरए पोग्गले अपरियाइत्ता पुव्वामेव वालं अच्छित्ता अभेत्ता पभू गंठित्तए ? नो इणट्ठे समट्ठे १, देवे णं भंते ! महिद्धिए० बाहिरए पुग्गले अपरियाइत्ता पुव्वामेव वालं छित्ता भित्ता पभू गंठित्तए ? नो इणट्ठे समट्ठे २, देवे णं भंते ! महिद्धिए० बाहिरए पुग्गले परियाइत्ता पुव्वामेव वालं अच्छित्ता अभित्ता पभू गंठित्तए ? नो इणट्ठे समट्ठे ३, देवे णं भंते !

महिङ्गिए जाव महाणुभागे बाहिरे पोग्गले परियाइत्ता पुव्वामेव बालं छेत्ता भेत्ता पभू गंठित्तए? हंता पभू ४, तं चेव णं गंठिं छउमत्थे ण जाणइ ण पासइ एवंसुहुमं च णं गढिया ३, देवे णं भंते ! महिङ्गिए० पुव्वामेव बालं अच्छेत्ता अभेत्ता पभू दीहीकरित्तए वा हस्सीकरित्तए वा ? नो इणट्ठे समट्ठे ४, एवं चत्तारिवि गमा, पढमविइयभंगेसु अपरियाइत्ता एगंतरियगा अच्छेत्ता अभेत्ता, सेसं तद्देव, तं चेव सिद्धिं छउमत्थे ण जाणइ ण पासइ एसुहुमं च णं दीहीकरेज वा हस्सीकरेज वा ॥ १९२ ॥ अत्थि णं भंते ! चंदिमसूरियाणं हिंदिंपि ताराख्वा अणुपि तुल्लावि समंपि ताराख्वा अणुपि तुल्लावि उप्पिपि ताराख्वा अणुपि तुल्लावि ? हंता अत्थि, से केणट्ठेणं भंते ! एवं वुच्चइ—अत्थि णं चंदिमसूरियाणं जाव उप्पिपि ताराख्वा अणुपि तुल्लावि ? गोयमा ! जहा जहा णं तेसिं देवाणं तवनियमवंभचेरवासाइं [उक्कडाइं] उस्सियाइं भवंति तथा तथा णं तेसिं देवाणं एयं पण्णायइ अणुत्ते वा तुल्लते वा, से एणट्ठेणं गोयमा ! अत्थि णं चंदिमसूरियाणं० उप्पिपि ताराख्वा अणुपि तुल्लावि ॥ १९३ ॥ एगमेगस्स णं भंते ! चंदिमसूरियस्स केवइओ णक्खत्तपरिवारो पण्णत्तो केवइओ महग्गहपरिवारो पण्णत्तो केवइओ तारागणकोडाकोडीओ परिवारो प० ? गोयमा ! एगमेगस्स णं चंदिमसूरियस्स—अट्ठासीइं च गहा अट्ठावीसं च होइ नक्खत्ता । एगससीपरिवारो एत्तो ताराण वोच्छामि ॥ १ ॥ छावट्ठिसहस्साइं णव चेव सयाइं पंचसयराइं । एगससीपरिवारो तारागणकोडिकोडीणं ॥ २ ॥ १९४ ॥ जंबूदीवे णं भंते ! दीवे मंदरस्स पव्वयस्स पुरच्छिमिस्सओ चरिमंताओ केवइयं अबाहाए जोइसं चारं चरइ ? गोयमा ! एक्कारसहिं एक्कवीसेहिं जोयणसएहिं अबाहाए जोइसं चारं चरइ, एवं दक्खिणिस्सओ पच्चिणिस्सओ उत्तरिस्सओ एक्कारसहिं एक्कवीसेहिं जोयण० जाव चारं चरइ ॥ लोगंताओ भंते ! केवइयं अबाहाए जोइसे पण्णत्ते ? गोयमा ! एक्कारसहिं एक्कारेहिं जोयणसएहिं अबाहाए जोइसे पण्णत्ते ॥ इमीसे णं भंते ! रयणप्पभाए पुढवीए बहुसमरमणिजाओ भूमिभागाओ केवइयं अबाहाए सव्वहेट्ठिल्ले ताराख्वे चारं चरइ ? केवइयं अबाहाए सूरविमाणे चारं चरइ ? केवइयं अबाहाए चंदविमाणे चारं चरइ ? केवइयं अबाहाए सव्वउवरिल्ले ताराख्वे चारं चरइ ?, गोयमा ! इमीसे णं रयणप्पभाए पुढवीए बहुसमरमणि० सत्तिहिं णउ-एहिं जोयणसएहिं अबाहाए जोइसं सव्वहेट्ठिल्ले ताराख्वे चारं चरइ, अट्ठहिं जोयणसएहिं अबाहाए सूरविमाणे चारं चरइ, अट्ठहिं असीएहिं जोयणसएहिं अबाहाए चंदविमाणे चारं चरइ, नवहिं जोयणसएहिं अबाहाए सव्वउवरिल्ले ताराख्वे चारं चरइ ॥ सव्वहेट्ठिमिस्सओ णं भंते ! ताराख्वाओ केवइयं अबाहाए सूरविमाणे



चारं चरइ ? केवइयं अवाहाए चंदविमाणे चारं चरइ ? केवइयं अवाहाए सव्वउवरिल्ले तारारूवे चारं चरइ ?, गोयमा ! सव्वहेट्ठिळाओ णं० दसहिं जोयणेहिं सूरविमाणे चारं चरइ णउईए जोयणेहिं अवाहाए चंदविमाणे चारं चरइ दसुत्तरे जोयणसए अवाहाए सव्वोवरिल्ले तारारूवे चारं चरइ ॥ सूरविमाणाओ णं भंते ! केवइयं अवाहाए चंदविमाणे चारं चरइ ? केवइयं० सव्वउवरिल्ले तारारूवे चारं चरइ ?, गोयमा ! सूरविमाणाओ णं असीए जोयणेहिं चंदविमाणे चारं चरइ, जोयणसयअवाहाए सव्वोवरिल्ले तारारूवे चारं चरइ ॥ चंदविमाणाओ णं भंते ! केवइयं अवाहाए सव्वउवरिल्ले तारारूवे चारं चरइ ? गोयमा ! चंदविमाणाओ णं वीसाए जोयणेहिं अवाहाए सव्वउवरिल्ले तारारूवे चारं चरइ, एवामेव सपुव्वावरेणं दसुत्तरसयजोयण-बाह्ले तिरियमसंखेजे जोइसविसए पण्णत्ते ॥ १९५ ॥ जंबूदीवे णं भंते ! दीवे कयरे णक्खत्ते सव्वब्भितरिल्लं चारं चरइ ? कयरे नक्खत्ते सव्वबाहिरिल्लं चारं चरइ ? कयरे नक्खत्ते सव्वउवरिल्लं चारं चरइ ? कयरे नक्खत्ते सव्वहिट्ठिल्लं चारं चरइ ?, गोयमा ! जंबूदीवे णं दीवे अभीइनक्खत्ते सव्वब्भितरिल्लं चारं चरइ मूले णक्खत्ते सव्वबाहिरिल्लं चारं चरइ साई णक्खत्ते सव्वोवरिल्लं चारं चरइ भरणी णक्खत्ते सव्वहेट्ठिल्लं चारं चरइ ॥ १९६ ॥ चंदविमाणे णं भंते ! किंसंठिए पण्णत्ते ? गोयमा ! अद्धकविट्ठग-संठाणसंठिए सव्वफालियामए अब्भुग्गयमूसियपहसिए वण्णओ, एवं सूरविमाणेवि नक्खत्तविमाणेवि ताराविमाणेवि अद्धकविट्ठसंठाणसंठिए ॥ चंदविमाणे णं भंते ! केवइयं आयामविक्खंभेणं ? केवइयं परिक्खेवेणं ? केवइयं बाह्लेणं पण्णत्ते ?, गोयमा ! छप्पन्ने एगसट्ठिभागे जोयणस्स आयामविक्खंभेणं तं तिगुणं सविसेसं परिक्खेवेणं अट्ठावीसं एगसट्ठिभागे जोयणस्स बाह्लेणं पण्णत्ते ॥ सूरविमाणस्सवि सच्चैव पुच्छा, गोयमा ! अडयालीसं एगसट्ठिभागे जोयणस्स आयामविक्खंभेणं तं तिगुणं सविसेसं परिक्खेवेणं चउवीसं एगसट्ठिभागे जोयणस्स बाह्लेणं पण्णत्ते ॥ एवं गहविमाणेवि अद्धजोयणं आयामविक्खंभेणं सविसेसं परि० कोसं बाह्लेणं प० ॥ णक्खत्तविमाणे णं कोसं आयामविक्खंभेणं तं तिगुणं सविसेसं परि० अद्धकोसं बाह्लेणं प०, ताराविमाणे णं अद्धकोसं आयामविक्खंभेणं तं तिगुणं सविसेसं परि० पंचधणुसयाई बाह्लेणं पण्णत्ते ॥ १९७ ॥ चंदविमाणे णं भंते ! कइ देवसाहस्सीओ परिवहंति ? गोयमा ! चंदविमाणस्स णं पुरच्छिमेणं सेयाणं सुभगाणं सुप्पभाणं संखतलविमलनिम्मलदहिचण-गोखीरफेणरययणिगरप्पगासाणं (महुगुलियर्पिगलक्खाणं) थिरलट्ठ[पउट्ठ]वट्ठपी-वरसुसिलिट्ठविसिट्ठतिक्वदाढाविडंबियमुहाणं रत्तुप्पलपत्तमउयसुकुमालतालुजीहाणं [पसत्थलट्ठवेरुलियभिसंतककडनहाणं] विसालपीवरोरुपडिपुण्णविउलखंधाणं मिउवि-

सयपसत्थसुहुमलक्खणविच्छिण्णकेसरसडोवसोभियाणं चंकमियललियपुलियधवल-  
 ग्वियगईणं उरिसयसुणिम्मियसुजायअप्फोडियणंगूलाणं वहरामयणक्खाणं वहरामय-  
 दन्ताणं वयरामयदाढाणं तवणिज्जजीहाणं तवणिज्जतालुयाणं तवणिज्जजोत्तगसुजोइ-  
 याणं कामगमाणं पीइगमाणं मणोगमाणं मणोरमाणं मणोहराणं अमियगईणं अमिय-  
 बलवीरियपुरिसक्कारपरक्कमाणं महया अप्फोडियसीहनाइयबोलकलयलरवेणं महुरेणं  
 मणहरेण य पूरिंता अंवरं दिसाओ य सोभयंता चत्तारि देवसाहस्सीओ सीहरूवधा-  
 रीणं देवाणं पुरच्छिमिहं बाहं परिवहंति । चंदविमाणस्स णं दक्खिणेणं सेयाणं  
 सुभगाणं सुप्पभाणं संखतलविमलनिम्मलदहि घणगोखीरफेणरययणियरप्पगासाणं  
 वहरामयकुंभजुयलसुद्धियपीवरवरवइरसोंडवट्टियदित्तसुरत्तपउमप्पगासाणं अब्भुणय-  
 गुणा(सुहा)णं तवणिज्जविसालचंचलचलंतचवलकण्णविमलज्जलाणं मधुवण्णभिसंत-  
 णिद्धपिगलपत्तलतिवण्णमणिरयणलोयणाणं अब्भुग्गयमउलमल्लियाणं धवलसरिससंठि-  
 यणिव्वणदढकसिणफालियामयसुजायदंतमुसलोवसोभियाणं कंचणकोसीपविट्ठदंतग्ग-  
 विमलमणिरयणरुइलपेरंतचित्तस्वगविराइयाणं तवणिज्जविसालतिलगपमुहपरिमंडि-  
 याणं णाणामणिरयणगुलियगेवेज्जबद्धगलपवरभूसणाणं वेरुलियविचित्तदंडणिम्मल-  
 वालगंडाणं वहरामयतिक्खलट्ठअंकुसकुंभजुयलंतरोदियाणं तवणिज्जसुबद्धकच्छदप्पिय-  
 बलद्धराणं जंबूणयविमलघणमंडलवइरामयलीलाललियतालणाणामणिरयणघण्टपास-  
 गरययामयरज्जबद्धलंबियघंटाजुयलमहुरसरमणहराणं अल्लीणपमाणजुत्तवट्टियसुजाय-  
 लक्खणपसत्थतवणिज्जवालगतपरिपुच्छणाणं उवचियपडिपुण्णकुम्मचलणलहुविक्रमाणं  
 अंकामयणक्खाणं तवणिज्जतालुयाणं तवणिज्जजीहाणं तवणिज्जजोत्तगसुजोइयाणं  
 कामगमाणं पीइगमाणं मणोगमाणं मणोरमाणं मणोहराणं अमियगईणं अमियबल-  
 वीरियपुरिसक्कारपरक्कमाणं महया गंभीरगुलगुलाइयरवेणं महुरेणं मणहरेणं पूरेन्ता  
 अंवरं दिसाओ य सोभयंता चत्तारि देवसाहस्सीओ गयस्वधारीणं देवाणं दक्खिणिहं  
 बाहं परिवहंति । चंदविमाणस्स णं पच्चत्थिमेणं सेयाणं सुभगाणं सुप्पभाणं चंक-  
 मियललियपुलियचलचवलककुदसालीणं सण्णयपासाणं संगयपासाणं सुजायपासाणं  
 मियमाइयपीणरइयपासाणं झसविहगसुजायकुच्छीणं पसत्थणिद्धमधुगुलियभिसंतपिग-  
 लक्खाणं विसालपीवरोरुपडिपुण्णविउलखंधाणं वट्टपडिपुण्णविउलकण्णपासाणं घणाणि-  
 चियसुबद्धलक्खण्णयईसिआणयवसभोद्वाणं चंकमियललियपुलियचक्कवालचवलग्वि-  
 यगईणं पीवरोरुवट्टियसुसंठियकडीणं ओलंबपलंबलक्खणपमाणजुत्तपसत्थरमणिज्ज-  
 वालगंडाणं समखुरवालधाराणं समलिहियतिक्खग्गसिगाणं तणुसुहुमसुजायणिद्ध-  
 लोमच्छविधराणं उवचियमंसलविसालपडिपुण्णखुदपमुहसुंदराणं (खंधपएससुंदराणं)

वेरलियमिसंतकडक्खसुणिरिक्खणाणं जुत्तप्पमाणप्पहाणलक्खणपसत्थरमणिज्जगगर-  
 गलसोभियाणं घग्घरगसुवद्धकण्ठपरिमंडियाणं नाणामणिकणगरयणघण्टवेयच्छगसुक-  
 यरइयमालियाणं वरधंटागल्लगलियसोभंतसस्सिरीयाणं पउमुप्पलभसलसुरभिमाला-  
 विभूसियाणं वइरखुराणं विविहविकुराणं फालियामयदंताणं तवणिज्जजीहाणं तव-  
 णिज्जतालुयाणं तवणिज्जजोत्तगसुजोत्तियाणं कामगमाणं पीइगमाणं मणोगमाणं  
 मणोरमाणं मणोहराणं अमियगईणं अमियबलवीरियपुरिसक्कारपरक्कमाणं महया  
 गंभीरगज्जियरवेणं महुरेणं मणहरेण य पूरेंता अंबरं दिसाओ य सोभयंता चत्तारि  
 देवसाहस्सीओ वसभरूवधारीणं देवाणं पच्चत्थिमिळं बाहं परिवहंति । चंदविमाणस्स  
 णं उत्तरेणं सेयाणं सुभमाणं सुप्पभाणं जच्चाणं वरमल्लिहायणाणं हरिमेलामदुलमल्लिय-  
 च्छाणं घणणिचियसुवद्धलक्खणुणण्याचंक्रमि(चंचुच्चि)यल्लियपुल्लियचलचवलचंचल-  
 गईणं लंघणवग्गणधावणधारणतिवइजइणसिक्खियगईणं संगयपासाणं संगयपासाणं  
 सुजायपासाणं मियमाइयपीणरइयपासाणं झसविहगसुजायकुच्छीणं पीणपीवरवट्ठिय-  
 सुसंठियकडीणं ओलंबपलंबलक्खणपमाणजुत्तपसत्थरमणिज्जवालंगंडाणं तणसुहुमसु-  
 जायणिद्वलोमच्छविधराणं मिउविसयपसत्थसुहुमलक्खणविकिण्णकेसरवालिधराणं  
 लल्लियलासगगइ(ललंतथासगल)लाडवरभूसणाणं मुहमंडगोचूलवमरथासगपरिमंडिय-  
 कडीणं तवणिज्जखुराणं तवणिज्जजीहाणं तवणिज्जतालुयाणं तवणिज्जजोत्तगसुजोइयाणं  
 कामगमाणं पीइगमाणं मणोगमाणं मणोरमाणं मणोहराणं अमियगईणं अमिय-  
 बलवीरियपुरिसक्कारपरक्कमाणं महया हयहेसियकिलकिलाइयरवेणं महुरेणं मणहरेण  
 य पूरेंता अंबरं दिसाओ य सोभयंता चत्तारि देवसाहस्सीओ हयरूवधारीणं  
 उत्तरिळं बाहं परिवहंति ॥ एवं सूरविमाणस्सवि पुच्छा, गोयमा ! सोलस  
 देवसाहस्सीओ परिवहंति पुव्वक्रमेणं ॥ एवं गहविमाणस्सवि पुच्छा, गोयमा !  
 अट्ठ देवसाहस्सीओ परिवहंति पुव्वक्रमेणं, दो देवाणं साहस्सीओ पुरत्थिमिळं  
 बाहं परिवहंति दो देवाणं साहस्सीओ दक्खिणिळं दो देवाणं साहस्सीओ  
 पच्चत्थिमं दो देवसाहस्सीओ हयरूवधारीणं उत्तरिळं बाहं परिवहंति ॥ एवं णक्खत्ता-  
 विमाणस्सवि पुच्छा, गोयमा ! चत्तारि देवसाहस्सीओ परिवहंति, तंजहा-सीहरूव-  
 धारीणं देवाणं एगा देवसाहस्सी पुरत्थिमिळं बाहं परिवहइ, एवं चउहिसिपि, एवं  
 तारगणवि णवरं दो देवसाहस्सीओ परिवहंति, तंजहा-सीहरूवधारीणं देवाणं पंचदेव-  
 सया पुरत्थिमिळं बाहं परिवहंति, एवं चउहिसिपि ॥ १९८ ॥ एएसि णं भंते चंदिम-  
 सूरियगहगणणक्खत्ततारारूवाणं कयरे कयरेहिंतो सिग्घगई वा मंदगई वा ? गोयमा !  
 चंदेहिंतो सूर सिग्घगई सूरैहिंतो गहा सिग्घगई गहेहिंतो णक्खत्ता सिग्घगई णक्खत्ते-

हिंतो तारा सिग्घगई, सव्वप्पगई चंदा सव्वसिग्घगईओ ताराह्वा ॥ १९९ ॥ एएसि णं भंते ! चंदिम जाव ताराह्वाणं कयरे २ हिंतो अप्पिद्धिया वा महिद्धिया वा ? गोयमा ! ताराह्वेहिंतो णक्खत्ता महिद्धिया णक्खत्तेहिंतो गहा महिद्धिया गहेहिंतो स्रा महिद्धिया सूरेहिंतो चंदा महिद्धिया, सव्वप्पद्धिया ताराह्वा सव्वमहिद्धिया चंदा ॥ २०० ॥ जंबूदीवे णं भंते ! दीवे ताराह्वस्स २ य एस णं केवइयं अवाहाए अंतरे पण्णत्ते ? गोयमा ! दुविहे अंतरे पण्णत्ते, तंजहा—वाघाइमे य निव्वाघाइमे य, तत्थ णं जे से वाघाइमे से जह्णणेणं दोण्णि य छावट्ठे जोयणसए उक्कोसेणं बारस जोयणसहस्साइं दोण्णि य बायाले जोयणसए ताराह्वस्स २ य अवाहाए अंतरे पण्णत्ते । तत्थ णं जे से णिव्वाघाइमे से जह्णणेणं पंचघणुसयाइं उक्कोसेणं दो गाउयाइं ताराह्व जाव अंतरे पण्णत्ते ॥ २०१ ॥ चंदस्स णं भंते ! जोइसिंदस्स जोइसरन्नो कइ अग्गमहिंसीओ पण्णत्ताओ ? गोयमा ! चत्तारि अग्गमहिंसीओ पण्णत्ताओ, तंजहा—चंदप्पभा दोसिणाभा अच्चिमाली पभंकरा, तत्थ णं एगमेगाए देवीए चत्तारि चत्तारि देवसाहस्सीओ परिवारे य, पभू णं तओ एगमेगा देवी अण्णाइं चत्तारि २ देविसहस्साइं परिवारं विउव्वित्तए, एवामेव सपुव्वावरें सोलस देवसाहस्सीओ पण्णत्ताओ, से तं तुडिए ॥ २०२ ॥ पभू णं भंते ! चंदे जोइसिंदे जोइसराया चंदवडिसए विमाणे सभाए सुहम्माए चंदंसि सीहासणंसि तुडिएण सद्धि दिव्वाइं भोगभोगाइं भुंजमाणे विहरित्तए ? णो इणट्ठे समट्ठे । अदुत्तरं च णं गोयमा ! पभू चंदे जोइसिंदे जोइसराया चंदवडिसए विमाणे सभाए सुहम्माए चंदंसि सीहासणंसि चउहिं सामाणियसाहस्सीहिं जाव सोलसहिं आयरक्खदेवाणं साहरसीहिं अणेहिं बहूहिं जोइसिएहिं देवेहिं देवीहि य सद्धि संपरिवुडे महया हयणट्ठगीइघाइयतंतीतलतालतुडियघणमुङ्गपडुप्पवाइयरवेणं दिव्वाइं भोगभोगाइं भुंजमाणे विहरित्तए, केवलं परियारिद्धीए नो चेव णं मेहुणवत्तिं ॥ २०३ ॥ सूरस्स णं भंते ! जोइसिंदस्स जोइसरन्नो कइ अग्गमहिंसीओ पण्णत्ताओ ? गोयमा ! चत्तारि अग्गमहिंसीओ पण्णत्ताओ, तंजहा—सूरप्पभा आयवाभा अच्चिमाली पभंकरा, एवं अवसेसं जहा चंदस्स णवरं सूरवडिसए विमाणे सूरंसि सीहासणंसि, तहेव सव्वेसिं पि गहाइं णं चत्तारि अग्गमहिंसीओ० तंजहा—विजया वेजयंती जयंती अपराजिया, तेसिं पि तहेव ॥ २०४ ॥ चंदविमाणे णं भंते ! देवाणं केवइयं कालं ठिई पण्णत्ता ? एवं जहा ठिईपए तहा भाणियव्वा जाव ताराणं ॥ २०५ ॥ एएसि णं भंते ! चंदिमसूरियगहणक्खत्तताराह्वाणं कयरे २ हिंतो अप्पा वा बहुया वा तुल्ला वा विसेसाहिया वा ? गोयमा ! चंदिमसूरिया एए णं दोण्णिवि तुल्ला सव्वत्थोवा, संखेज्जुणा णक्खत्ता,

संखेज्जगुणा गहा, संखेज्जगुणाओ तारगाओ ॥ २०६ ॥ जोइसुदेसओ समत्तो ॥

कहि णं भंते ! वेमाणियाणं देवाणं विमाणा पण्णत्ता ? कहि णं भंते ! वेमाणिया देवा परिवसंति ?, जहा ठाणपए तहा सव्वं भाणियव्वं णवरं परिसाओ भाणिय-  
व्वाओ जाव सक्के० अर्हेसिं च बहूणं सोहम्मकप्पवासीणं देवाण य देवीण य जाव विहरइ ॥ २०७ ॥ सक्कस्स णं भंते ! देविंदस्स देवरत्तो कइ परिसाओ पन्नत्ताओ ?  
गोयमा ! तओ परिसाओ पण्णत्ताओ, तंजहा—समिया चंडा जाया, अब्भितरिया समिया मज्झिमिया चंडा बाहिरिया जाया ॥ सक्कस्स णं भंते ! देविंदस्स देवरत्तो अब्भितरियाए परिसाए कइ देवसाहस्सीओ पण्णत्ताओ ? मज्झिमियाए परि० तहेव बाहिरियाए पुच्छा, गोयमा ! सक्कस्स देविंदस्स देवरत्तो अब्भितरियाए परिसाए बारस देवसाहस्सीओ पण्णत्ताओ मज्झिमियाए परिसाए चउदस देवसाहस्सीओ पण्णत्ताओ बाहिरियाए परिसाए सोलस देवसाहस्सीओ पण्णत्ताओ, तहा अब्भित-  
रियाए परिसाए सत्त देवीसयाणि मज्झिमियाए० छ देवीसयाणि बाहिरियाए० पंच देवीसयाणि पन्नत्ताणि ॥ सक्कस्स णं भंते ! देविंदस्स देवरत्तो अब्भितरियाए परिसाए देवाणं केवइयं कालं ठिई पण्णत्ता ? एवं मज्झिमियाए बाहिरियाएवि, गोयमा ! सक्कस्स देविंदस्स देवरत्तो अब्भितरियाए परिसाए देवाणं पंच पल्लिओवमाइं ठिई पण्णत्ता, मज्झिमियाए परिसाए० चत्तारि पल्लिओवमाइं ठिई पण्णत्ता, बाहिरियाए परिसाए देवाणं तिन्नि पल्लिओवमाइं ठिई पण्णत्ता, देवीणं ठिई—अब्भितरियाए परिसाए देवीणं तिन्नि पल्लिओवमाइं ठिई पण्णत्ता, मज्झिमियाए० दुन्नि पल्लिओवमाइं ठिई पण्णत्ता, बाहिरियाए परिसाए० एगं पल्लिओवमं ठिई पण्णत्ता, अट्ठो सो चेव जहा भवणवासीणं ॥ कहि णं भंते ! ईसाणगाणं देवाणं विमाणा पण्णत्ता ? तहेव सव्वं जाव ईसाणे एत्थ देविंदे देव० जाव विहरइ । ईसाणस्स णं भंते ! देविंदस्स देवरत्तो कइ परिसाओ पण्णत्ताओ ? गोयमा ! तओ परिसाओ पण्णत्ताओ, तंजहा—समिया चंडा जाया, तहेव सव्वं णवरं अब्भितरियाए परिसाए दस देवसाहस्सीओ पण्णत्ताओ, मज्झिमियाए परिसाए बारस देवसाहस्सीओ, बाहिरियाए० चउदस देवसाहस्सीओ, देवीणं पुच्छा, अब्भितरियाए० णव देवीसया पण्णत्ता मज्झिमियाए परिसाए अट्ठ देवीसया पण्णत्ता बाहिरियाए परिसाए सत्त देवीसया पण्णत्ता, देवाणं ठिईपुच्छा, अब्भितरियाए परिसाए देवाणं सत्त पल्लिओवमाइं ठिई पण्णत्ता मज्झिमियाए० छ पल्लिओवमाइं० बाहिरियाए० पंच पल्लिओवमाइं ठिई पण्णत्ता । देवीणं पुच्छा, अब्भितरियाए० साइरेगाइं पंच पल्लिओवमाइं०, मज्झिमियाए परिसाए चत्तारि पल्लिओवमाइं ठिई पण्णत्ता, बाहिरियाए परिसाए तिण्णि पल्लिओवमाइं ठिई पण्णत्ता,

अट्टो तहेव भाणियव्वो ॥ सणकुमाराणं पुच्छा तहेव ठाणपयगमेणं जाव सणकुमा-  
रस्स तओ परिसाओ समियाई तहेव, णवरं अब्भितरियाए परिसाए अट्ट देवसा-  
हस्सीओ पण्णत्ताओ, मज्झिमियाए परिसाए दस देवसाहस्सीओ पण्णत्ताओ,  
बाहिरियाए परिसाए बारस देवसाहस्सीओ पण्णत्ताओ, अब्भितरियाए परिसाए  
देवाणं अद्धपंचमाई सागरोवमाई पंच पलिओवमाई ठिई पण्णत्ता, मज्झिमियाए  
परिसाए० अद्धपंचमाई सागरोवमाई चत्तारि पलिओवमाई ठिई पण्णत्ता, बाहिरियाए  
परिसाए० अद्धपंचमाई सागरोवमाई तिण्णि पलिओवमाई ठिई पण्णत्ता, अट्टो सो  
चेव ॥ एवं माहिंदस्सवि तहेव तओ परिसाओ णवरं अब्भितरियाए परिसाए  
छेदेवसाहस्सीओ पण्णत्ताओ, मज्झिमियाए परिसाए अट्ट देवसाहस्सीओ पण्णत्ताओ,  
बाहिरियाए० दस देवसाहस्सीओ पण्णत्ताओ, ठिई देवाणं-अब्भितरियाए परिसाए  
अद्धपंचमाई सागरोवमाई सत्त य पलिओ० ठिई पण्णत्ता, मज्झिमियाए परिसाए  
अद्धपंचमाई सागरोवमाई छच्च पलिओवमाई०, बाहिरियाए परिसाए अद्धपंचमाई  
सागरोवमाई पंच य पलिओवमाई ठिई प०, तहेव सव्वेसिं इंदारणं ठाणपयगमेणं  
विमाणा गेयव्वा तओ पच्छा परिसाओ पत्तेयं २ वुच्चंति ॥ बंभस्सवि तओ परिसाओ  
पण्णत्ताओ० अब्भितरियाए चत्तारि देवसाहस्सीओ मज्झिमियाए छ देवसाहस्सीओ  
बाहिरियाए अट्ट देवसाहस्सीओ, देवाणं ठिई-अब्भितरियाए परिसाए अद्धनवमाई  
सागरोवमाई पंच य पलिओवमाई, मज्झिमियाए परिसाए अद्धनवमाई चत्तारि पलि-  
ओवमाई, बाहिरियाए० अद्धनवमाई सागरोवमाई तिण्णि य पलिओवमाई अट्टो सो  
चेव ॥ लंतगस्सवि जाव तओ परिसाओ जाव अब्भितरियाए परिसाए दो देव  
साहस्सीओ० मज्झिमियाए० चत्तारि देवसाहस्सीओ पण्णत्ताओ बाहिरियाए० छेदेव-  
साहस्सीओ पण्णत्ताओ, ठिई भाणियव्वा—अब्भितरियाए परिसाए बारस सागरोवमाई  
सत्त पलिओवमाई ठिई पण्णत्ता, मज्झिमियाए परिसाए बारस सागरोवमाई छच्च  
पलिओवमाई ठिई पण्णत्ता, बाहिरियाए परिसाए बारस सागरोवमाई पंच पलिओव-  
माई ठिई पण्णत्ता अट्टो सो चेव ॥ महासुक्कस्सवि जाव तओ परिसाओ जाव  
अब्भितरियाए एगं देवसहस्सं मज्झिमियाए दो देवसाहस्सीओ पण्णत्ताओ बाहिरियाए  
चत्तारि देवसाहस्सीओ, अब्भितरियाए परिसाए अद्धसोलस सागरोवमाई पंच  
पलिओवमाई, मज्झिमियाए अद्धसोलस सागरोवमाई चत्तारि पलिओवमाई, बाहिरियाए  
अद्धसोलस सागरोवमाई तिण्णि पलिओवमाई, अट्टो सो चेव ॥ सहस्सारे पुच्छा  
जाव अब्भितरियाए परिसाए पंच देवसया, मज्झिमियाए परि० एगा देवसाहस्सी,  
बाहिरियाए० दो देवसाहस्सीओ पण्णत्ता, ठिई-अब्भितरियाए अद्धद्वारस सागरोवमाई

सत्त पलिओवमाईं ठिईं पण्णत्ता एवं मज्झिमियाए अद्धद्वारस छप्पलिओवमाईं बाहिरियाए अद्धद्वारस सागरोवमाईं पंच पलिओवमाईं अट्ठो सो चेव ॥ आणयपाणयस्सवि पुच्छा जाव तओ परिसाओ णवरि अब्भितरियाए अद्धाइज्जा देवसया मज्झिमियाए पंच देवसया बाहिरियाए एगा देवसाहस्सी, ठिईं-अब्भितरियाए० एगूणवीस सागरोवमाईं पंच य पलिओवमाईं एवं मज्झि० एगूणवीस सागरोवमाईं चत्तारि य पलिओवमाईं बाहिरियाए परिसाए एगूणवीस सागरोवमाईं तिण्णि य पलिओवमाईं ठिईं अट्ठो सो चेव ॥ कहि णं भंते ! आरणअञ्चुयाणं देवाणं तहेव अञ्चुए सपरिवारे जाव विहरइ, अञ्चुयस्स णं देविंदस्स तओ परिसाओ पण्णत्ताओ अब्भितरपरि० देवाणं पणवीसं सयं मज्झिम० अद्धाइज्जा सया बाहिरिय० पंचसया, अब्भितरियाए एक्कवीसं सागरोवमा सत्त य पलिओवमाईं मज्झि० एक्कवीससागरो० छप्पलि० बाहिरि० एगवीसं सागरो० पंच य पलिओवमाईं ठिईं पण्णत्ता ॥ कहि णं भंते ! हेट्ठिमगेवेज्जगाणं देवाणं विमाणा पण्णत्ता ? कहि णं भंते ! हेट्ठिमगेवेज्जगा देवा परिवसंति ?, जहेव ठाणपए तहेव, एवं मज्झिमगेवेज्जा उवरिमगेविज्जगा अणुत्तरा य जाव अहमिंदा नामं ते देवा पण्णत्ता समणाउसो ॥ २०८ ॥ **पढमो वेमाणियउदेसो समत्तो ॥**

सोहम्मीसाणेसु णं भंते ! कप्पेसु विमाणपुढवी किंपइट्ठिया पण्णत्ता ? गोयमा ! घणोदहिपइट्ठिया प० । सणकुमारमाहिंदेसु० कप्पेसु विमाणपुढवी किंपइट्ठिया पण्णत्ता ? गोयमा ! घणवायपइट्ठिया पण्णत्ता । बंभलोए णं भंते ! कप्पे विमाणपुढवी पुच्छा, गो० ! घणवायपइट्ठिया पण्णत्ता । लंतए णं भंते ! पुच्छा, गोयमा ! तदुभयपइट्ठिया० । महासुक्कसहस्सारेसुवि तदुभयपइट्ठिया । आणय जाव अएञ्चुसु णं भंते ! कप्पेसु पुच्छा, गो० ! ओवासंतरपइट्ठिया० । गेविज्जविमाणपुढवीणं पुच्छा, गोयमा ! ओवासंतरपइट्ठिया० । अणुत्तरोववाइयपुच्छा, ओवासंतरपइट्ठिया ॥ २०९ ॥ सोहम्मीसाणकप्पेसु० विमाणपुढवी केवइयं बाहल्लेणं पण्णत्ता ? गोयमा ! सत्तावीसं जोयणसयाईं बाहल्लेणं पण्णत्ता, एवं पुच्छा, सणकुमारमाहिंदेसु छवीसं जोयणसयाईं । बंभलंतए पंचवीसं । महासुक्कसहस्सारेसु चउवीसं । आणयपाणयारणाञ्चुएसु तेवीसं सयाईं । गेविज्जविमाणपुढवी बावीसं । अणुत्तरविमाणपुढवी एक्कवीसं जोयणसयाईं बाहल्लेणं प० ॥ २१० ॥ सोहम्मीसाणेसु णं भंते ! कप्पेसु विमाणा केवइयं उड्डं उच्चत्तेणं० ? गोयमा ! पंच जोयणसयाईं उड्डं उच्चत्तेणं प० । सणकुमारमाहिंदेसु छजोयणसयाईं, बंभलंतएसु सत्त, महासुक्कसहस्सारेसु अट्ठ, आणयपाणएसु ४, नव गेवेज्जविमाणा णं भंते ! केवइयं उड्डं उ० ? गो० ! दस जोयणसयाईं, अणुत्तरविमाणा णं० एक्कारस जोयणसयाईं उड्डं उच्चत्तेणं प० ॥ २११ ॥ सोहम्मीसाणेसु णं भंते ! कप्पेसु विमाणा किंसंठिया पण्णत्ता ? गोयमा !

दुविहा पण्णत्ता, तंजहा—आवलियपविट्ठा य आवलियबाहिरा य, तत्थ णं जे ते आवलियपविट्ठा ते ति विहा पण्णत्ता, तंजहा—वट्ठा तंसा चउरंसा, तत्थ णं जे ते आवलियबाहिरा ते णं णाणासंठाणसंठिया पण्णत्ता, एवं जाव गेविज्जविमाणा, अणुत्तरो-  
ववाइयविमाणा दुविहा पण्णत्ता, तंजहा—वेट्ठे य तंसा य ॥ २१२ ॥ सोहम्मीसाणेसु  
णं भंते ! कप्पेसु विमाणा केवइयं आयामविक्खंभेणं केवइयं परिक्खेवेणं पण्णत्ता ?  
गोयमा ! दुविहा पण्णत्ता, तंजहा—संखेज्जवित्थडा य असंखेज्जवित्थडा य, जहा  
गरगा तहा जाव अणुत्तरोववाइया संखेज्जवित्थडे य असंखेज्जवित्थडा य, तत्थ णं  
जे से संखेज्जवित्थडे से जंबुदीवप्पमाणे असंखेज्जवित्थडा असंखेजाइं जोयणसयाइं जाव  
परिक्खेवेणं पण्णत्ता ॥ सोहम्मीसाणेसु णं भंते ! कप्पेसु विमाणा कइवण्णा पत्ता ?  
गोयमा ! पंचवण्णा पण्णत्ता, तंजहा—किण्हा नीला लोहिया हालिहा सुक्किळा,  
सणंकुमारमाहिंदेसु चउवण्णा नीला जाव सुक्किळा, बंभलोगलंतएसु तिवण्णा  
लोहिया जाव सुक्किळा, महासुक्कसहस्सारेसु दुवण्णा—हालिहा य सुक्किळा य, आण-  
यपाणयारणञ्चुएसु सुक्किळा, गेविज्जविमाणा सुक्किळा, अणुत्तरोववाइयविमाणा परम-  
सुक्किळा वण्णेणं पण्णत्ता ॥ सोहम्मीसाणेसु णं भंते ! कप्पेसु विमाणा केरिसया  
पभाए पण्णत्ता ? गोयमा ! णिच्चालोया णिच्चुजोया सयं पभाए पण्णत्ता जाव अणु-  
त्तरोववाइयविमाणा णिच्चालोया णिच्चुजोया सयं पभाए पण्णत्ता ॥ सोहम्मीसाणेसु  
णं भंते ! कप्पेसु विमाणा केरिसया गंधेणं पण्णत्ता ? गोयमा ! से जहा नामए—  
कोट्ठपुडाण वा एवं जाव एत्तो इट्ठतरागा चेव जाव गंधेणं पण्णत्ता, जाव अणुत्तर-  
विमाणा ॥ सोहम्मीसाणेसु० विमाणा केरिसया फासेणं पण्णत्ता ? गोयमा ! से जहा  
णामए—आइणेइ वा रूएइ वा सव्वो फासो भाणियव्वो जाव अणुत्तरोववाइय-  
विमाणा ॥ सोहम्मीसाणेसु णं भंते ! कप्पेसु विमाणा केमहालया पण्णत्ता ?  
गोयमा ! अयणं जंबुदीवे २ सव्वदीवसमुद्धानं सो चेव गमो जाव छम्मासे वीइव-  
एज्जा जाव अत्थेगइया विमाणावासा वीइवएज्जा अत्थेगइया विमाणावासा नो वीइ-  
वएज्जा जाव अणुत्तरोववाइयविमाणा अत्थेगइयं विमाणं वीइवएज्जा अत्थेगइए० नो  
वीइवएज्जा ॥ सोहम्मीसाणेसु णं भंते !० विमाणा किंमया पण्णत्ता ? गोयमा !  
सव्वरयणामया पण्णत्ता, तत्थ णं बहवे जीवा य पोग्गला य वक्कमंति विउक्कमंति  
चयंति उवचयंति, सासया णं ते विमाणा दव्वट्ठयाए जाव फासपज्जवेहिं असासया  
जाव अणुत्तरोववाइया विमाणा ॥ सोहम्मीसाणेसु णं० देवा कओहिंत्तो उववज्जंति ?  
उववाओ नेयव्वो जहा वक्कंतीए तिरियमणुएसु पंचेंदिएसु संमुच्छिमवज्जिएसु, उव-  
वाओ वक्कंतीगमेणं जाव अणुत्तरो० ॥ सोहम्मीसाणेसु० देवा एगसमएणं केवइया



उववज्जंति ? गोयमा ! जह्वेणं एको वा दो वा तिण्णि वा उक्कोसेणं संखेज्जा वा असंखेज्जा वा उववज्जंति, एवं जाव सहस्सारे, आणयाई गेवेज्जा अणुत्तरा य एको वा दो वा तिण्णि वा उक्कोसेणं संखेज्जा वा उववज्जंति ॥ सोहम्मीसाणेसु णं भंते ! ० देवा समए २ अवहीरमाणा २ केवइएणं कालेणं अवहिया सिया ? गोयमा ! ते णं असंखेज्जा समए २ अवहीरमाणा २ असंखेज्जाहिं ओसप्पिणीहिं उस्सप्पिणीहिं अवहीरंति नो चेव णं अवहिया सिया जाव सहस्सारो, आणयाइएसु चउसुवि, गेवेजेसु अणुत्तरेसु य समए समए जाव केवइयकालेणं अवहिया सिया ? गोयमा ! ते णं असंखेज्जा समए २ अवहीरमाणा २ पल्लिओवमस्स असंखेज्जइभागमेत्तेणं अवहीरंति, नो चेव णं अवहिया सिया ॥ सोहम्मीसाणेसु णं भंते ! कप्पेसु देवाणं केमहालया सरीरोगाहणा पण्णत्ता ? गोयमा ! दुविहा सरीरा पण्णत्ता, तंजहा—भवधारणिज्जा य उत्तरवेउव्विया य, तत्थ णं जे से भवधारणिजे से जह्वेणं अंगुलस्स असंखेज्जइभागो उक्कोसेणं सत्त रयणीओ, तत्थ णं जे से उत्तरवेउव्विए से जह्वेणं अंगुलस्स संखेज्जइभागो उक्कोसेणं जोयणसयसहस्सं, एवं एकेक्का ओसारत्ताणं जाव अणुत्तराणं एक्का रयणी, गेविज्जणुत्तराणं एगे भवधारणिजे सरीरे उत्तरवेउव्विया नत्थि ॥ २१३ ॥ सोहम्मीसाणेसु णं ० देवाणं सरीरगा किंसंघयणी पण्णत्ता ? गोयमा ! छण्हं संघयणाणं असंघयणी पण्णत्ता, नेवट्ठी नेव छिरा नवि ण्हारू णेव संघयणमत्थि, जे पोगगला इट्ठा कंता जाव ते तेसिं संवायत्ताए परिणमंति जाव अणुत्तरोववाइया ॥ सोहम्मीसाणेसु ० देवाणं सरीरगा किंसंठिया पण्णत्ता ? गोयमा ! दुविहा सरीरा प० तं ०—भवधारणिज्जा य उत्तरवेउव्विया य, तत्थ णं जे ते भवधारणिज्जा ते समचउरंसंठाणसंठिया पण्णत्ता, तत्थ णं जे ते उत्तरवेउव्विया ते णाणासंठाणसंठिया पण्णत्ता जाव अञ्चुओ, अवेउव्विया गेविज्जणुत्तरा, भवधारणिज्जा समचउरंसंठाणसंठिया उत्तरवेउव्विया णत्थि ॥ २१४ ॥ सोहम्मीसाणेसु ० देवा केरिसया वण्णेणं पन्नत्ता ? गोयमा ! कणगत्तयरत्तामा वण्णेणं पण्णत्ता । सणंकुमारमाहिंदेसु णं ० पउमपम्हगोरा वण्णेणं पण्णत्ता । बंभलोगे णं भंते ! ० ? गोयमा ! अल्लमधुगवणाभा वण्णेणं पण्णत्ता, एवं जाव गेवेज्जा, अणुत्तरोववाइया परमसुक्किळा वण्णेणं पन्नत्ता ॥ सोहम्मीसाणेसु णं भंते ! कप्पेसु देवाणं सरीरगा केरिसया गंधेणं पण्णत्ता ? गोयमा ! से जहा णामए—कोट्टपुडाण वा तहेव सव्वं जाव मणासतरगा चेव गंधेणं पण्णत्ता जाव अणुत्तरोववाइया ॥ सोहम्मीसाणेसु ० देवाणं सरीरगा केरिसया फासेणं पण्णत्ता ? गोयमा ! थिरमउयणिइसुकुमालच्छविफासेणं पण्णत्ता, एवं जाव अणुत्तरोववाइया ॥ सोहम्मीसाणदेवाणं ० केरिसगा पुगगला उस्सासत्ताए परिणमंति ? गोयमा ! जे पोगगला

इद्धा कंता जाव ते तेसिं उस्सासत्ताए परिणमंति जाव अणुत्तरोववाइया, एवं आहारत्ताएवि जाव अणुत्तरोववाइया ॥ सोहम्मीसाणदेवाणं० कइ लेस्साओ पण्णत्ताओ ? गोयमा ! एगा तेउलेस्सा पण्णत्ता । सणकुमारमाहिंदेसु एगा पम्हलेस्सा, एवं बंभलोगेवि पम्हा, सेसेसु एक्का सुक्कलेस्सा, अणुत्तरोववाइयाणं० एक्का परमसुक्कलेस्सा ॥ सोहम्मीसाणदेवा० किं सम्मदिट्ठी मिच्छादिट्ठी सम्मामिच्छादिट्ठी ? गोयमा ! तिण्णिवि, जाव अंतिमगेवेज्जा देवा सम्मदिट्ठीवि मिच्छादिट्ठीवि सम्मामिच्छादिट्ठीवि, अणुत्तरोववाइया सम्मदिट्ठी णो मिच्छादिट्ठी णो सम्मामिच्छादिट्ठी ॥ सोहम्मीसाणा० किं णाणी अण्णाणी ? गोयमा ! दोवि, तिण्णि णाणा तिण्णि अण्णाणा णियमा जाव गेवेज्जा, अणुत्तरोववाइया नाणी नो अण्णाणी तिण्णि णाणा णियमा । तिविहे जोगे दुविहे उवओगे सव्वेसिं जाव अणुत्तरोववाइया ॥ २१५ ॥ सोहम्मीसाणदेवा० ओहिणा केवइयं खेत्तं जाणंति पासंति ? गोयमा ! जहण्णेणं अंगुल्लस असंखेज्जइभागं उक्कोसेणं ओही जाव रयणप्पभा पुढवी उड्डं जाव साइं विमाणाइं तिरियं जाव असंखेज्जा दीवसमुद्दा एवं—सक्कीसाणा पढमं दोच्चं च सणकुमारमाहिंदा । तच्चं च बंभलंतग सुक्कसहस्सारग चउत्थी ॥ १ ॥ आणयपाणयकप्पे देवा पासंति पंचमिं पुढविं । तं चेव आरणञ्चुय ओहीनाणेण पासंति ॥ २ ॥ छट्ठिं हेट्ठिममज्झिमगेवेज्जा सत्तमिं च उवरिल्ला । संभिण्णलोगणालिं पासंति अणुत्तरा देवा ॥ ३ ॥ २१६ ॥ सोहम्मीसाणेसु णं भंते ! देवाणं कइ समुग्घाया पण्णत्ता ? गोयमा ! पंच समुग्घाया पण्णत्ता, तंजहा—वेयणासमुग्घाए कसाय० मारणंतिय० वेउव्विय० तेयासमुग्घाए०, एवं जाव अञ्चुए । गेवेज्जअणुत्तराणं आइल्ला तिण्णि समुग्घाया पण्णत्ता ॥ सोहम्मीसाणदेवा० केरिसयं खुहप्पिवासं पच्चणुभवमाणा विहरंति ? गोयमा ! णत्थि खुहापिवासं पच्चणुभवमाणा विहरंति जाव अणुत्तरोववाइया ॥ सोहम्मीसाणेसु णं भंते ! कप्पेसु देवा एगत्तं पभू विउव्वित्तए पुहुत्तं पभू विउव्वित्तए ? हंता पभू, एगत्तं विउव्वेमाणा एगिंदियरूवं वा जाव पंचिंदियरूवं वा पुहुत्तं विउव्वेमाणा एगिंदियरूवाणि वा जाव पंचिंदियरूवाणि वा, ताइं संखेज्जाइंपि असंखेज्जाइंपि सरिसाइंपि असरिसाइंपि संबद्धाइंपि असंबद्धाइंपि रूवाइं विउव्वंति विउव्वित्ता अप्पणा जहिच्छियाइं कज्जाइं करेंति जाव अञ्चुओ, गेवेज्जअणुत्तरोववाइया० देवा किं एगत्तं पभू विउव्वित्तए पुहुत्तं पभू विउव्वित्तए ? गोयमा ! एगत्तंपि पुहुत्तंपि, नो चेव णं संपत्तीए विउव्विसु वा विउव्वंति वा विउव्विस्संति वा ॥ सोहम्मीसाणदेवा० केरिसयं सायासोक्खं पच्चणुभवमाणा विहरंति ? गोयमा ! मणुण्णा सद्दा जाव मणुण्णा फासा जाव गेविज्जा, अणुत्तरोववाइया अणुत्तरा सद्दा जाव फासा ॥ सोहम्मीसाणेसु०

देवाणं केरिसगा इह्वी पण्णत्ता ? गोयमा ! महिह्विया महज्जुइया जाव महाणुभागा इह्वीए प० जाव अच्चुओ, गेवेज्जणुत्तरा य सव्वे महिह्विया जाव सव्वे महाणुभागा अणिंदा जाव अहमिंदा णासं ते देवगणा पण्णत्ता समणाउसो ! ॥ २१७ ॥ सोहम्मीसाणा० देवा केरिसया विभूसाए पण्णत्ता ? गोयमा ! दुविहा पण्णत्ता, तंजहा—वेउव्वियसरीरा य अवेउव्वियसरीरा य, तत्थ णं जे ते वेउव्वियसरीरा ते हारविराइयवच्छा जाव दस दिसाओ उज्जोवेमाणा पभासेमाणा जाव पडिह्वा, तत्थ णं जे ते अवेउव्वियसरीरा ते णं आभरणवसणरहिया पगइत्था विभूसाए पण्णत्ता ॥ सोहम्मीसाणेसु णं भंते ! कप्पेसु देवीओ केरिसियाओ विभूसाए पण्णत्ताओ ? गोयमा ! दुविहाओ पण्णत्ताओ, तंजहा—वेउव्वियसरीराओ य अवेउव्वियसरीराओ य, तत्थ णं जाओ वेउव्वियसरीराओ ताओ सुवण्णसद्दालाओ सुवण्णसद्दालाई वत्थाई पवरपरिहियाओ चंदाणणाओ चंदविलासिणीओ चंदद्वसमणिडालाओ सिंगारागरचारुवेसाओ संगय जाव पासाइयाओ जाव पडिह्वाओ, तत्थ णं जाओ अवेउव्वियसरीराओ ताओ णं आभरणवसणरहियाओ पगइत्थाओ विभूसाए पण्णत्ताओ, सेसेसु देवा देवीओ णत्थि जाव अच्चुओ, गेवेज्जगदेवा० केरिसया विभूसाए० ? गोयमा ! आभरणवसणरहिया, एवं देवी णत्थि भाणियव्वं, पगइत्था विभूसाए पण्णत्ता, एवं अणुत्तरावि ॥ २१८ ॥ सोहम्मीसाणेसु० देवा केरिसए कामभोगे पच्चणुभवमाणा विहरंति ? गोयमा ! इट्ठा सद्दा इट्ठा ह्वा जाव फासा, एवं जाव गेवेजा, अणुत्तरोववाइयाणं अणुत्तरा सद्दा जाव अणुत्तरा फासा ॥ २१९ ॥ ठिई सव्वेसिं भाणियव्वा, देवित्ताएवि, अणंतरे चयंति चइत्ता जे जहिं गच्छंति तं भाणियव्वं ॥ २२० ॥ सोहम्मीसाणेसु णं भंते ! कप्पेसु सव्वपाणा सव्वभूया जाव सत्ता पुढविकाइयत्ताए जाव वणस्सइकाइयत्ताए देवत्ताए देवित्ताए आसणसयण जाव भंडोवगरणत्ताए उववण्णपुव्वा ? हुंता गोयमा ! असई अदुवा अणंतखुत्तो, सेसेसु कप्पेसु एवं चेव, णवरि नो चेव णं देवित्ताए जाव गेवेज्जगा, अणुत्तरोववाइएसुवि एवं, णो चेव णं देवित्ताए । सेतं देवा ॥ २२१ ॥ नेरइयाणं भंते ! केवइयं कालं ठिई पण्णत्ता ? गोयमा ! जह्जेणं दस वाससहस्साई उक्कोसेणं तेत्तीसं सागरोवमाई, एवं सव्वेसिं पुच्छा, तिरिक्खजोणियाणं जह्जेणं अंतोमु० उक्कोसेणं तिन्नि पलिओवमाई, एवं मणुस्साणवि, देवाणं जहा णेरइयाणं ॥ देवणेरइयाणं जा चेव ठिई सच्चैव संचिट्ठणा, तिरिक्खजोणियस्स जह्जेणं अंतोमुहुत्तं उक्कोसेणं वणस्सइकालो, मणुस्से णं भंते ! मणुस्सेत्ति कालओ केवच्चिरं होइ ? गोयमा ! जह्णेणं अंतोमुहुत्तं उक्कोसेणं तिन्नि पलिओवमाई पुव्वकोडिपुहुत्तमब्भहियाई ॥ णेरइयमणुस्स-

देवाणं अंतरं जहन्नेणं अंतोमु० उक्कोसेणं वणस्सइकालो । तिरिक्खजोणियस्स अंतरं जहन्नेणं अंतोमुहुत्तं उक्कोसेणं सागरोवमसयपुहुत्तं साइरेगं ॥ २२२ ॥ एएसि णं भंते ! गेरइयाणं जाव देवाणं य कयरे० ? गोयमा ! सव्वत्थोवा मणुस्सा गेरइया असं० देवा असं० तिरिया अणंतगुणा, सेतं चउव्विहा संसारसमावण्णगा जीवा पण्णत्ता ॥ २२३ ॥  
**वीओ वे० देवुद्देसो समत्तो ॥ तच्चा चउव्विहपडिवत्ती समत्ता ॥**

तत्थ णं जे ते एवमाहंसु—पंचविहा संसारसमावण्णगा जीवा पण्णत्ता ते एवमाहंसु, तं०—एगिंदिया बेइंदिया तेइंदिया चउरिंदिया पंचिंदिया । से किं तं एगिंदिया ? २ दुविहा पण्णत्ता, तंजहा—पज्जत्तगा य अपज्जत्तगा य, एवं जाव पंचिंदिया दुविहा प०, तं०—पज्जत्तगा य अपज्जत्तगा य । एगिंदियस्स णं भंते ! केवइयं कालं ठिई पण्णत्ता ? गोयमा ! जहन्नेणं अंतोमुहुत्तं उक्कोसेणं बावीसं वाससहस्साइं, बेइंदिय० जहन्नेणं अंतोमु० उक्कोसेणं वारस संवच्छराणि, एवं तेइंदियस्स एगूणपण्णं राइंदियाणं, चउरिंदियस्स छम्मासा, पंचंदियस्स जह० अंतोमु० उक्कोसेणं तेतीसं सागरोवमाइं, अपज्जत्तएगिंदियस्स णं० केवइयं कालं ठिई पण्णत्ता ? गोयमा ! जहन्नेणं अंतोमु० उक्कोसेणवि अंतो० एवं सव्वेसिंपि अपज्जत्तगाणं जाव पंचंदियाणं, पज्जत्तेगिंदियाणं जाव पंचिन्दियाणं पुच्छा, गो० ! जहन्नेणं अंतो० उक्को० बावीसं वाससहस्साइं अंतोमुहुत्तूणाइं, एवं उक्कोसियावि ठिई अंतोमुहुत्तूणा सव्वेसिं पज्जत्ताणं कायव्वा ॥ एगिंदिए णं भंते ! एगिंदिएत्ति कालओ केवच्चिरं होइ ? गोयमा ! जहन्नेणं अंतोमु० उक्को० वणस्सइकालो । बेइंदिए णं भंते ! बेइंदिएत्ति कालओ केवच्चिरं होइ ? गोयमा ! जह० अंतोमु० उक्कोसेणं संखेज्जं कालं जाव चउरिंदिए संखेज्जं कालं, पंचंदिए णं भंते ! पंचिंदिएत्ति कालओ केवच्चिरं होइ ? गोयमा ! जह० अंतोमु० उक्को० सागरोवमसहस्सं साइरेगं ॥ अपज्जत्तएगिंदिए णं भंते ! ० कालओ केवच्चिरं होइ ? गोयमा ! जहन्नेणं अंतोमु० उक्कोसेणवि अंतोमुहुत्तं जाव पंचिंदियअपज्जत्तए । पज्जत्तएगिंदिए णं भंते ! ० कालओ केवच्चिरं होइ ? गोयमा ! जहन्नेणं अंतोमुहुत्तं उक्कोसेणं संखिज्जाइं वाससहस्साइं । एवं बेइंदिएवि, णवरं संखेज्जाइं वासाइं । तेइंदिए णं भंते ! ० संखेज्जा राइंदिया । चउरिंदिए णं० संखेज्जा मासा । पज्जत्तपंचिंदिए० सागरोवमसयपुहुत्तं साइरेगं ॥ एगिंदियस्स णं भंते ! केवइयं कालं अंतरं होइ ? गोयमा ! जहन्नेणं अंतोमुहुत्तं उक्कोसेणं दो सागरोवमसहस्साइं संखेज्जावासमब्भहियाइं । बेइंदियस्स णं० अंतरं कालओ केवच्चिरं होइ ? गोयमा ! जहन्नेणं अंतोमुहुत्तं उक्कोसेणं वणस्सइकालो, एवं तेइंदियस्स चउरिंदियस्स पंचंदियस्स, अपज्जत्तगाणं एवं चेव, पज्जत्तगाणवि एवं चेव ॥ २२४ ॥ एएसि णं भंते ! एगिदि० बेइं० तेइं० चउ० पंचिं-

दियाणं कयरे २ हितो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा पंचेदिया चउरिंदिया विसेसाहिया तेइंदिया विसेसाहिया बेइंदिया विसेसाहिया एगिंदिया अणंतगुणा । एवं अपज्जत्तगाणं सव्वत्थोवा पंचेदिया अपज्जत्तगा चउरिंदिया अपज्जत्तगा विसेसाहिया तेइंदिया अपज्जत्तगा विसेसाहिया बेइंदिया अपज्जत्तगा विसेसाहिया एगिंदिया अपज्जत्तगा अणंतगुणा सइंदिया अप० वि० ॥ सव्वत्थोवा चउरिंदिया पज्जत्तगा पंचेदिया पज्जत्तगा विसेसाहिया बेइंदियपज्जत्तगा विसेसाहिया तेइंदियपज्जत्तगा विसेसाहिया एगिंदियपज्जत्तगा अणंतगुणा सइंदिया पज्जत्तगा विसेसाहिया ॥ एसि णं भंते ! सइंदियाणं पज्जत्तगापज्जत्तगाणं कयरे २ हितो० ? गोयमा ! सव्वत्थोवा सइंदिया अपज्जत्तगा सइंदिया पज्जत्तगा संखेज्जगुणा । एवं एगिंदियावि ॥ एसि णं भंते ! बेइंदियाणं पज्जत्तापज्जत्तगाणं कयरे २ हितो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा बेइंदिया पज्जत्तगा अपज्जत्तगा असंखेज्जगुणा, एवं तेंदियचउरिंदियपंचेदियावि ॥ एसि णं भंते ! एगिंदियाणं बेइंदि० तेइंदि० चउरिंदि० पंचेदियाणं पज्जत्तगाणं अपज्जत्तगाणं य कयरे २... ? गोयमा ! सव्वत्थोवा चउरिंदिया पज्जत्तगा पंचेदिया पज्जत्तगा विसेसाहिया बेइंदिया पज्जत्तगा विसेसाहिया तेइंदिया पज्जत्तगा विसेसाहिया पंचेदिया अपज्जत्तगा असंखेज्जगुणा चउरिंदिया अपज्जत्ता विसेसाहिया तेइंदियपज्जत्ता विसेसाहिया बेइंदिया अपज्जत्ता विसेसाहिया एगिंदियपज्जत्ता अणंतगुणा सइंदिया अपज्जत्ता विसेसाहिया एगिंदियपज्जत्ता संखेज्जगुणा सइंदियपज्जत्ता विसेसाहिया सइंदिया विसेसाहिया । सेतं पंचविहा संसारसमावण्णगा जीवा प० ॥ २२५ ॥ **चउत्था पंचविहा पडिवत्ती समत्ता ॥**

तत्थ णं जे ते एवमाहंसु-छव्विहा संसारसमावण्णगा जीवा प० ते एवमाहंसु, तंजहा—पुढविकाइया आउक्काइया तेउ० वाउ० वणस्सइकाइया तसकाइया ॥ से किं तं पुढवि० ? पुढवि० दुविहा पण्णत्ता, तं—सुहुमपुढविकाइया बायरपुढविकाइया, सुहुमपुढविकाइया दुविहा पण्णत्ता, तंजहा—पज्जत्तगा य अपज्जत्तगा य, एवं बायरपुढविकाइयावि, एवं चउक्कएणं मेएणं आउतेउवाउवणस्सइकाइया गेयव्वा । से किं तं तसकाइया ? २ दुविहा पण्णत्ता, तंजहा—पज्जत्तगा य अपज्जत्तगा य ॥ २२६ ॥ पुढविकाइयस्स णं भंते ! केवइयं कालं ठिई पण्णत्ता ? गोयमा ! जहण्णेणं अंतोमुहुत्तं उक्कोसेणं बावीसं वाससहस्साइं, एवं सव्वेसिं ठिई गेयव्वा, तसकाइयस्स जहणेणं अंतोमुहुत्तं उक्कोसेणं तेत्तीसं सागरोवमाइं, अपज्जत्तगाणं सव्वेसिं जहणेणवि उक्कोसेणवि अंतोमुहुत्तं, पज्जत्तगाणं सव्वेसिं उक्कोसिया ठिई

अंतोमुहुत्तूणा कायव्वा ॥ २२७ ॥ पुढविकाइए णं भंते ! पुढविकाइएत्ति कालओ केवच्चिरं होइ ? गोयमा ! जहन्नेणं अंतोमुहुत्तं उक्कोसेणं असंखेज्जं कालं जाव असंखेज्जा लोया । एवं आउ० तेउ० वाउक्काइयाणं वणस्सइकाइयाणं अणंतं कालं जाव आवलियाए असंखेज्जभागो ॥ तसकाइए णं भंते ! ० जहन्नेणं अंतोमु० उक्कोसेणं दो सागरोवमसहस्साइं संखेज्जवासमम्भहियाइं । अपज्जत्तगाणं छण्हवि जहण्णेणवि उक्कोसेणवि अंतोमुहुत्तं, पज्जत्तगाणं—‘वाससहस्सा संखा पुढविदगाणिलतरुण पज्जत्ता । तेऊ राईदिसंखा तससागरसयपुहुत्ताइं ॥ १ ॥’ पज्जत्तगाणवि सव्वेसिं एवं ॥ पुढविकाइयस्स णं भंते ! केवइयं कालं अंतरं होइ ? गोयमा ! जहन्नेणं अंतोमुहुत्तं उक्कोसेणं वणप्फइकालो, एवं आउतेउवाउकाइयाणं वणस्सइकालो, तसकाइयाणवि, वणस्सइकाइयस्स पुढविकालो, एवं अपज्जत्तगाणवि वणस्सइकालो, वणस्सईणं पुढविकालो, पज्जत्तगाणवि एवं चेव वणस्सइकालो, पज्जत्तवणस्सईणं पुढविकालो ॥ २२८ ॥ अप्पाबहुयं—सव्वत्थोवा तसकाइया तेउकाइया असंखेज्जगुणा पुढविकाइया विसेसाहिया आउकाइया विसेसाहिया वाउक्काइया विसेसाहिया वणस्सइकाइया अणंतगुणा एवं अपज्जत्तगावि पज्जत्तगावि ॥ एएसि णं भंते ! पुढविकाइयाणं पज्जत्तगाणं अपज्जत्तगाण य कयरे २ हितो अप्पा वा एवं जाव विसेसाहिया वा ? गोयमा ! सव्वत्थोवा पुढविकाइया अपज्जत्तगा पुढविकाइया पज्जत्तगा संखेज्जगुणा, एएसि णं भंते ! आ० सव्वत्थोवा आउक्काइया अपज्जत्तगा पज्जत्तगा संखेज्जगुणा जाव वणस्सइकाइया० सव्वत्थोवा तसकाइया पज्जत्तगा तसकाइया अपज्जत्तगा असंखेज्जगुणा ॥ एएसि णं भंते ! पुढविकाइयाणं जाव तसकाइयाणं पज्जत्तगपज्जत्तगाण य कयरे २ हितो अप्पा वा ४ ? गो० ! सव्वत्थोवा तसकाइया पज्जत्तगा, तसकाइया अपज्जत्तगा असंखेज्जगुणा, तेउक्काइया अपज्जत्ता असंखेज्जगुणा, पुढविकाइया आउक्काइया वाउक्काइया अपज्जत्तगा विसेसाहिया, तेउक्काइया पज्जत्तगा संखेज्जगुणा, पुढविआउवाउपज्जत्तगा विसेसाहिया, वणस्सइकाइया अपज्जत्तगा अणंतगुणा, सकाइया अपज्जत्तगा विसेसाहिया, वणस्सइकाइया पज्जत्तगा संखेज्जगुणा, सकाइया पज्जत्तगा विसेसाहिया ॥ २२९ ॥ सुहुमस्स णं भंते ! केवइयं कालं ठिई पण्णत्ता ? गोयमा ! जहन्नेणं अंतोमुहुत्तं उक्कोसेणवि अंतोमुहुत्तं एवं जाव सुहुमणिओयस्स, एवं अपज्जत्तगाणवि पज्जत्तगाणवि जहण्णेणवि उक्कोसेणवि अंतोमुहुत्तं ॥ २३० ॥ सुहुमे णं भंते ! सुहुमेत्ति कालओ केवच्चिरं होइ ? गोयमा ! जहण्णेणं अंतोमुहुत्तं उक्कोसेणं असंखेज्जकालं जाव असंखेज्जा लोया, सव्वेसिं पुढविकालो जाव सुहुमणिओयस्स पुढविकालो, अपज्जत्तगाणं सव्वेसिं जहण्णेणवि उक्कोसेणवि अंतोमुहुत्तं, एवं पज्जत्तगाणवि सव्वेसिं

जहण्णेणवि उक्कोसेणवि अंतोमुहुत्तं ॥ २३१ ॥ सुहुमस्स णं भंते ! केवइयं कालं अंतरं होइ ? गोयमा ! जहण्णेणं अंतोमु० उक्को० असंखेज्जं कालं कालओ असंखेज्जाओ उस्सपिणीओसपिणीओ खेत्तओ अंगुलस्स असंखेज्जइभागो, एवं सुहुमवणस्सइकाइयस्सवि सुहुमणिओयस्सवि जाव असंखेज्जा लोया असंखेज्जइभागो । पुढविकाइयाईणं वणस्सइकालो । एवं अपज्जत्तगाणं पज्जत्तगाणवि ॥ २३२ ॥ एवं अप्पावहुगं, सव्वत्थोवा सुहुमतेउकाइया सुहुमपुढविकाइया विसेसाहिया सुहुमआउवाऊ विसेसाहिया सुहुमणिओया असंखेज्जगुणा सुहुमवणस्सइकाइया अणंतगुणा सुहुमा विसेसाहिया, एवं अपज्जत्तगाणं, पज्जत्तगाणवि एवं चेव ॥ एएसि णं भंते ! सुहुमाणं पज्जत्तापज्जत्ताणं कयरे० ? गोयमा ! सव्वत्थोवा सुहुमा अपज्जत्तगा सुहुमा पज्जत्तगा संखेज्जगुणा, एवं जाव सुहुमणिगोया ॥ एएसि णं भंते ! सुहुमाणं सुहुमपुढविकाइयाणं जाव सुहुमणिओयाण य पज्जत्तापज्जत्ता० कयरे २ हिंतो० ? गोयमा ! सव्वत्थोवा सुहुमतेउकाइया अपज्जत्तगा सुहुमपुढविकाइया अपज्जत्तगा विसेसाहिया सुहुमआउअपज्जत्ता विसेसाहिया सुहुमवाउअपज्जत्ता विसेसाहिया सुहुमतेउकाइया पज्जत्तगा संखेज्जगुणा सुहुमपुढविआउवाउअपज्जत्तगा विसेसाहिया सुहुमणिओया अपज्जत्तगा असंखेज्जगुणा सुहुमणिओया पज्जत्तगा संखेज्जगुणा सुहुमवणस्सइकाइया अपज्जत्तगा अणंतगुणा सुहुमअपज्जत्ता विसेसाहिया सुहुमवणस्सइपज्जत्तगा संखेज्जगुणा सुहुमा पज्जत्ता विसेसाहिया ॥ २३३ ॥ बायरस्स णं भंते ! केवइयं कालं ठिई पण्णत्ता ? गोयमा ! जहन्नेणं अंतोमु० उक्को० तेत्तीसं सागरोवमाई ठिई पण्णत्ता, एवं बायरतसकाइयस्सवि, बायरपुढवीकाइयस्स बावीसवाससहस्साई, बायरआउस्स सत्तवाससहस्सं, बायरतेउस्स तिण्णि राईदिया, बायरवाउस्स तिण्णि वाससहस्साई, बायरवण० दसवाससहस्साई, एवं पत्तेयसरीरबायरस्सवि, णिओयस्स जहन्नेणवि उक्कोसेणवि अंतोमु०, एवं बायरणिओयस्सवि, अपज्जत्तगाणं सव्वेसिं अंतोमुहुत्तं, पज्जत्तगाणं उक्कोसिया ठिई अंतोमुहुत्तूणा कायव्वा सव्वेसिं ॥ २३४ ॥ बायरे णं भंते ! बायरेत्ति कालओ केवच्चिरं होइ ? गोयमा ! जह० अंतो० उक्कोसेणं असंखेज्जं कालं असंखेज्जाओ उस्सपिणीओसपिणीओ कालओ, खेत्तओ अंगुलस्स असंखेज्जइभागो; बायरपुढविकाइयाउतेउवाउ० पत्तेयसरीरबायरवणस्सइकाइयस्स बायरनिओयस्स एएसिं जहण्णेणं अंतोमु० उक्कोसेणं सत्तरि सागरोवमकोडाकोडीओ-संखाइयाओ समाओ अंगुलभागो तहा असंखेज्जा । ओहे य बायरतहअणुबंधो सेसओ वोच्छं ॥ १ ॥ उस्सपिणि २ स्स अङ्गाइयपोगगलाण परिइद्धा । बेउयहिंसहस्सा खलु साहिया होंति तसकाए ॥ २ ॥ अंतोमुहुत्तकालो होइ अपज्जत्तगाण सव्वेसिं ॥ पज्जत्तबायरस्स

य बायरतसकाइयस्सावि ॥ ३ ॥ एएसिं ठिई सागरोवमसयपुहुत्तं साइरेगं । तेउस्स  
संख राई[दिया] दुविहणिओए मुहुत्तमद्धं तु । सेसाणं संखेज्जा वाससहस्सा य सव्वेसिं  
॥ ४ ॥ २३५ ॥ अंतरं बायरस्स बायरवणस्सइस्स णिओयस्स बायरणिओयस्स  
एएसिं चउण्हवि पुढविकालो जाव असंखेज्जा लोया, सेसाणं वणस्सइकालो । एवं  
पज्जत्तगाणं अपज्जत्तगाणवि अंतरं, ओहे य बायरतरु ओचनिओए य बायरणिओए  
य । कालमसंखेज्जंतरं सेसाण वणस्सइकालो ॥ १ ॥ २३६ ॥ अप्पा० सव्वत्थोवा  
बायरतसकाइया बायरतेउकाइया असंखेज्जगुणा पत्तेयसरीरबायरवणस्सइ० असं-  
खेज्जगुणा बायरणिओया असंखे० बायरपुढवि० असंखे० आउवाउ० असंखेज्जगुणा  
बायरवणस्सइकाइया अणंतगुणा बायरा विसेसाहिया १ । एवं अपज्जत्तगाणवि  
२ । पज्जत्तगाणं सव्वत्थोवा बायरतेउकाइया बायरतसकाइया असंखेज्जगुणा  
पत्तेयसरीरबायरा असंखेज्जगुणा सेसा तहेव जाव बायरा विसेसाहिया ३ । एएसिं णं  
भंते ! बायराणं पज्जत्तापज्जत्ताणं कयरे २ हित्तो० ? गो० ! सव्वत्थोवा बायरा पज्जत्ता  
बायरा अपज्जत्तगा असंखेज्जगुणा, एवं सव्वे जहा बायरतसकाइया ४ । एएसिं णं  
भंते ! बायराणं बायरपुढविकाइयाणं जाव बायरतसकाइयाण य पज्जत्तापज्जत्ताणं  
कयरे २ हित्तो० ? गोयमा ! सव्वत्थोवा बायरतेउकाइया पज्जत्तगा बायरतसका-  
इया पज्जत्तगा असंखेज्जगुणा बायरतसकाइया अपज्जत्तगा असंखेज्जगुणा पत्तेयसरीरबा-  
यरवणस्सइकाइया पज्जत्तगा असंखेज्जगुणा बायरणिओया पज्जत्तगा असंखेज्ज-  
पुढविआउवाउपज्जत्तगा असंखेज्जगुणा बायरतेउअपज्जत्तगा असंखेज्जगुणा पत्तेयसरी-  
रबायरवणस्सइ० अप० असंखे० बायरणिओया अपज्जत्तगा असंखे० बायरपुढवि-  
आउवाउअपज्जत्तगा असंखेज्जगुणा बायरवणस्सइ० पज्जत्तगा अणंतगुणा बायर-  
पज्जत्तगा विसेसाहिया बायरवणस्सइ० अपज्जत्ता असंखेज्जगुणा बायरा अपज्जत्तगा  
विसेसाहिया बायरा विसेसाहिया ५ । एएसिं णं भंते ! सुहुमाणं सुहुमपुढविकाइयाणं  
जाव सुहुमनिगोदाणं बायराणं बायरपुढविकाइयाणं जाव बायरतसकाइयाण य  
कयरे २ हित्तो० ? गोयमा ! सव्वत्थोवा बायरतसकाइया बायरतेउकाइया असंखेज्ज-  
गुणा पत्तेयसरीरबायरवण० असंखे० तहेव जाव बायरवाउकाइया असंखेज्जगुणा  
सुहुमतेउकाइया असंखे० सुहुमपुढवि० विसेसाहिया सुहुमभाउ० वि० सुहुमवाउ०  
विसेसा० सुहुमनिओया असंखेज्जगुणा बायरवणस्सइकाइया अणंतगुणा बायरा विसे-  
साहिया सुहुमवणस्सइकाइया असंखे० सुहुमा विसेसा०, एवं अपज्जत्तगावि पज्जत्त-  
गावि, णवरि सव्वत्थोवा बायरतेउकाइया पज्जत्ता बायरतसकाइया पज्जत्ता असंखे-  
ज्जगुणा पत्तेयसरीर० सेसं तहेव जाव सुहुमपज्जत्ता विसेसाहिया । एएसिं णं भंते !



सुहुमाणं बायराण य पज्जत्ताणं अपज्जत्ताण य कयरे २...? गोयमा ! सव्वत्थोवा बायरा पज्जत्ता बायरा अपज्जत्ता असंखेज्जगुणा सुहुमा अपज्जत्ता असंखेज्जगुणा सुहुमपज्जत्ता संखेज्जगुणा, एवं सुहुमपुढविबायरपुढवि जाव सुहुमनिओया बायरनिओया नवरं पत्तैयसरीरबायरवणं सव्वत्थोवा पज्जत्ता अपज्जत्ता असंखेज्जगुणा, एवं बायरतसकाइयावि ॥ सव्वेसिं भंते ! पज्जत्तापज्जत्ताणं कयरे २ हितो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा बायरतेउकाइया पज्जत्ता बायरतसकाइया पज्जत्ता असंखेज्जगुणा ते चेव अपज्जत्ता असंखेज्जगुणा पत्तैयसरीरबायरवणस्सइअपज्जत्ता असंखे० बायरणिओया पज्जत्ता असंखेज्ज० बायरपुढवि० पज्जत्ता असं० आउवाउपज्जत्ता असंखे० बायरतेउकाइयअपज्जत्ता असंखे० पत्तैय० अपज्जत्ता असंखे० बायरनिओयअपज्जत्ता असं० बायरपुढवि० आउवाउकाइ० अपज्जत्ता असंखेज्जगुणा सुहुमतेउकाइया अपज्जत्ता असं० सुहुमपुढविआउवाउअपज्जत्ता विसेसा० सुहुमतेउकाइयपज्जत्ता संखेज्जगुणा सुहुमपुढविआउवाउपज्जत्ता विसेसाहिया सुहुमणिगोया अपज्जत्ता असंखेज्जगुणा सुहुमणिगोया पज्जत्ता संखेज्जगुणा बायरवणस्सइकाइया पज्जत्ता अणंतगुणा बायरा पज्जत्ता विसेसाहिया बायरवणस्सइ० अपज्जत्ता असंखेज्जगुणा बायरा अपज्जत्ता विसे० बायरा विसेसाहिया सुहुमवणस्सइकाइया अपज्जत्ता असंखेज्जगुणा सुहुमा अपज्जत्ता विसेसाहिया सुहुमवणस्सइकाइया पज्जत्ता संखेज्जगुणा सुहुमा पज्जत्ता विसेसाहिया सुहुमा विसेसाहिया ॥ २३७ ॥ कइविहा णं भंते ! णिओया पणत्ता ? गोयमा ! दुविहा णिओया पणत्ता, तंजहा—णिओया य णिगोदजीवा य ॥ णिओया णं भंते ! कइविहा पणत्ता ? गोयमा ! दुविहा प०, तंजहा—सुहुमणिओया य बायरणिओया य ॥ सुहुमणिओया णं भंते ! कइविहा पणत्ता ? गोयमा ! दुविहा पणत्ता, तंजहा—पज्जत्ता य अपज्जत्ता य ॥ बायरणिओयावि दुविहा पणत्ता, तंजहा—पज्जत्ता य अपज्जत्ता य ॥ णिओयजीवा णं भंते ! कइविहा पणत्ता ? गोयमा ! दुविहा पणत्ता, तंजहा—सुहुमणिओयजीवा य बायरणिओयजीवा य । सुहुमणिगोदजीवा दुविहा प०, तं०—पज्जत्ता य अपज्जत्ता य । बादरणिगोदजीवा दुविहा पज्जत्ता, तं०—पज्जत्ता य अपज्जत्ता य ॥ २३८ ॥ निगोदा णं भंते ! दव्वट्टयाए किं संखेज्जा असंखेज्जा अणंता ? गोयमा ! नो संखेज्जा असंखेज्जा नो अणंता, एवं पज्जत्तावि अपज्जत्तावि ॥ सुहुमनिगोदा णं भंते ! दव्वट्टयाए किं संखेज्जा असंखेज्जा अणंता ? गो० ! णो संखेज्जा असंखेज्जा णो अणंता, एवं पज्जत्तावि अपज्जत्तावि, एवं बायरावि पज्जत्तावि अपज्जत्तावि णो संखेज्जा

असंखेज्जा णो अणंता ॥ णिगोदजीवा णं भंते ! द्व्वट्ठयाए किं संखेज्जा असंखेज्जा अणंता ? गोयमा ! नो संखेज्जा नो असंखेज्जा अणंता, एवं पज्जतावि अपज्जतावि, एवं सुहुमणिओयजीवावि पज्जतगावि अपज्जतगावि, वादरणिगोदजीवावि पज्जतगावि अपज्जतगावि ॥ णिगोदा णं भंते ! पएसट्ठयाए किं संखेज्जा० पुच्छा, गोयमा ! नो संखेज्जा नो असंखेज्जा अणंता, एवं पज्जतगावि अपज्जतगावि । एवं सुहुमणिओयावि पज्जतगावि अपज्जतगावि, पएसट्ठयाए सव्वे अणंता, एवं बायरनिगोयावि पज्जतयावि अप्पज्जतयावि, पएसट्ठयाए सव्वे अणंता, एवं णिगोदजीवा नवविहावि पएसट्ठयाए सव्वे अणंता ॥ एएसि णं भंते ! णिओयाणं सुहुमाणं बायराणं पज्जतगाणं अपज्जतगाणं द्व्वट्ठयाए पएसट्ठयाए द्व्वट्ठपएसट्ठयाए कयरे २ हितो अप्पा वा बहुया वा० ? गोयमा ! सव्वत्थोवा बायरणिओयपज्जतगा द्व्वट्ठयाए वादरनिगोदा अपज्जतगा द्व्वट्ठयाए असंखेज्जगुणा सुहुमणिगोदा अपज्जतगा द्व्वट्ठयाए असंखेज्जगुणा सुहुमणिगोदा पज्जतगा द्व्वट्ठयाए संखेज्जगुणा, एवं पएसट्ठयाएवि ॥ द्व्वट्ठपएसट्ठयाए सव्वत्थोवा बायरणिओया पज्जता द्व्वट्ठयाए जाव सुहुमणिगोदा पज्जता द्व्वट्ठयाए संखेज्जगुणा, सुहुमणिओएहिंतो पज्जतएहिंतो द्व्वट्ठयाए वादरणिगोदा पज्जता पएसट्ठयाए अणंतगुणा, बायरणिओया अपज्जता पएसट्ठयाए असंखे० जाव सुहुमणिओया पज्जता पएसट्ठयाए संखेज्जगुणा । एवं णिओयजीवावि, णवरि संक्रमए जाव सुहुमणिओयजीवेहिंतो पज्जतएहिंतो द्व्वट्ठयाए बायरणिओयजीवा पज्ज० पएसट्ठयाए असंखेज्जगुणा, सेसं तहेव जाव सुहुमणिओयजीवा पज्जता पएसट्ठयाए संखेज्जगुणा ॥ एएसि णं भंते ! णिगोदाणं सुहुमाणं बायराणं पज्जताणं अपज्जताणं णिओयजीवाणं सुहुमाणं बायराणं पज्जतगाणं अपज्जतगाणं द्व्वट्ठयाए पएसट्ठयाए द्व्वट्ठपएसट्ठयाए कयरे २ हितो० ? गो० ! सव्वत्थोवा बायरणिओया पज्जता द्व्वट्ठयाए बायरणिओया अपज्जता द्व्वट्ठयाए असंखेज्जगुणा सुहुमणिगोदा अप० द्व्वट्ठयाए असंखेज्जगुणा सुहुमणिगोदा पज्ज० द्व्वट्ठयाए संखेज्जगुणा सुहुमणिओएहिंतो द्व्वट्ठयाए बायरणिओयजीवा पज्जता द्व्वट्ठयाए अणंतगुणा बायरणिओयजीवा अपज्जता द्व्वट्ठयाए असंखेज्जगुणा सुहुमणिओयजीवा अपज्जता द्व्वट्ठयाए असंखेज्जगुणा सुहुमणिओयजीवा पज्जता द्व्वट्ठयाए संखेज्जगुणा, पएसट्ठयाए सव्वत्थोवा बायरणिओयजीवा पज्जता पएसट्ठयाए बायरणिओया अपज्जता पएसट्ठयाए असंखे० सुहुमणिओयजीवा अपज्जतगा पएसट्ठयाए असंखेज्जगुणा सुहुमणिगोदजीवा पज्जता पएसट्ठयाए संखेज्जगुणा सुहुमणिगोदजीवेहिंतो पएसट्ठयाए वादरणिगोदा पज्जता पएसट्ठयाए अणंतगुणा बायरणिओया अपज्जतगा पएस० असंखेज्जगुणा जाव

सुहुमणिओया पज्जता पएसट्टयाए संखेज्जगुणा, दव्वट्टपएसट्टयाए सव्वत्थोवा बायर-  
णिओया पज्जता दव्वट्टयाए बायरणिओया अपज्जता दव्वट्टयाए असंखेज्जगुणा जाव  
सुहुमणिगोदा पज्जता दव्वट्टयाए संखेज्जगुणा सुहुमणिओयाहिंतो दव्वट्टयाए बायरणि-  
ओयजीवा पज्जता दव्वट्टयाए अणंतगुणा सेसा तहेव जाव सुहुमणिओयजीवा पज-  
त्तगा दव्वट्टयाए संखेज्जगुणा सुहुमणिओयजीवेहिंतो पज्जतएहिंतो दव्वट्टयाए बायरणि-  
ओयजीवा पज्जता पएसट्टयाए असंखेज्जगुणा सेसा तहेव जाव सुहुमणिओया पज्जता  
पएसट्टयाए संखेज्जगुणा ॥ सेत्तं छव्विहा संसारसमावण्णगा जीवा प० ॥ २३९ ॥  
**पंचमा छव्विहा पडिवत्ती समत्ता ॥**

तत्थ णं जे ते एवमाहंसु—सत्तविहा संसारसमावण्णगा जीवा प० ते एवमाहंसु,  
तंजहा—नेरइया तिरिक्खजोणिया तिरिक्खजोणिणीओ मणुस्सा मणुस्सीओ देवा  
देवीओ ॥ णेरइयस्स ठिई जहन्नेणं दसवाससहस्साइं उक्कोसेणं तेत्तीसं सागरोवमाइं,  
तिरिक्खजोणियस्स ठिई जहन्नेणं अंतोमुहुत्तं उक्कोसेणं तिन्नि पळिओवमाइं, एवं  
तिरिक्खजोणिणीएवि, मणुस्साणवि मणुस्सीणवि, देवाणं ठिई जहा णेरइयाणं, देवीणं०  
जहन्नेणं दसवाससहस्साइं उक्कोसेणं पणपणपळिओवमाइं ॥ नेरइयदेवदेवीणं जच्चेव  
ठिई सच्चेव संच्चिट्ठा ॥ तिरिक्खजोणिण ए णं भंते ! तिरिक्खजोणिणत्ति कालओ केवच्चिरं  
होइ ? गोयमा ! जहन्नेणं अंतोमुहुत्तं उक्कोसेणं वणस्सइकालो, तिरिक्खजोणिणीणं  
जहन्नेणं अंतोमु० उक्को० तिन्नि पळिओवमाइं पुव्वकोडिपुहुत्तमब्भहियाइं । एवं  
मणुस्सस्स मणुस्सीएवि ॥ णेरइयस्स अंतरं जह० अंतोमु० उक्कोसेणं वणस्सइकालो ।  
एवं सव्वाणं तिरिक्खजोणियवज्जाणं, तिरिक्खजोणियाणं जहन्नेणं अंतोमु० उक्को०  
सागरोवमसयपुहुत्तं साइरेणं ॥ अप्पावहुयं—सव्वत्थोवाओ मणुस्सीओ मणुस्सा असं-  
खेज्जगुणा नेरइया असंखेज्जगुणा तिरिक्खजोणिणीओ असंखेज्जगुणाओ देवा असंखे-  
ज्जगुणा देवीओ संखेज्जगुणाओ तिरिक्खजोणिया अणंतगुणा । सेत्तं सत्तविहा  
संसारसमावण्णगा जीवा प० ॥ २४० ॥ **छट्ठी सत्तविहा पडिवत्ती समत्ता ॥**

तत्थ णं जे ते एवमाहंसु—अट्ठविहा संसारसमावण्णगा जीवा प० ते एवमाहंसु,  
तं०—पढमसमयनेरइया अपढमसमयनेरइया पढमसमयतिरिक्खजोणिया अपढमसम-  
यतिरिक्खजोणिया पढमसमयमणुस्सा अपढमसमयमणुस्सा पढमसमयदेवा अपढमस-  
मयदेवा ॥ पढमसमयनेरइयस्स णं भंते ! केवइयं कालं ठिई पणत्ता ? गोयमा !  
पढमसमयनेरइयस्स जह० एक्कं समयं उक्को० एक्कं समयं, अपढमसमयनेरइयस्स  
जह० दसवाससहस्साइं समऊणाइं उक्कोसेणं तेत्तीसं सागरोवमाइं समऊणाइं ।  
पढमसमयतिरिक्खजोणियस्स जह० एक्कं समयं उक्को० एक्कं समयं, अपढमसमयति-

रिक्खजोणियस्स जह० खुड्ढागं भवग्गहणं समऊणं उक्को० तिन्नि पल्लिओवमाइं  
 समऊणाइं, एवं मणुस्साणवि जहा तिरिक्खजोणियाणं, देवाणं जहा णेरइयाणं ठिई ॥  
 णेरइयदेवाणं जच्चेव ठिई सच्चेव संचिट्ठणा दुविहाणवि । पढमसमयतिरिक्खजोणि  
 णं भंते ! पढ० कालओ केवच्चिरं होइ ? गोयमा ! जह० एकं समयं उक्को० एकं  
 समयं, अपढम० तिरिक्खजोणियस्स जह० खुड्ढागं भवग्गहणं समऊणं उक्कोसेणं  
 वणस्सइकालो । पढमसमयमणुस्साणं जह० उ० एकं समयं, अपढम० मणुस्साणं जह०  
 खुड्ढागं भवग्गहणं समऊणं उक्को० तिन्नि पल्लिओवमाइं पुव्वकोडिपुहुत्तमब्भहियाइं ॥  
 अंतंरं पढमसमयणेरइयस्स जह० दसवाससहस्साइं अंतोमुहुत्तमब्भहियाइं उक्को०  
 वणस्सइकालो, अपढमसमय० जह० अंतोमु० उक्को० वणस्सइकालो । पढमसमय-  
 तिरिक्खजोणियस्स जह० दो खुड्ढागभवग्गहणाइं समऊणाइं उक्को० वणस्सइकालो,  
 अपढमसमयतिरिक्खजोणियस्स जह० खुड्ढागं भवग्गहणं समयाहियं उक्को० सागरोव-  
 मसयपुहुत्तं साइरेणं । पढमसमयमणुस्सस्स जह० दो खुड्ढाइं भवग्गहणाइं समऊणाइं  
 उक्को० वणस्सइकालो, अपढमसमयमणुस्सस्स जह० खुड्ढागं भवग्गहणं समयाहियं  
 उक्को० वणस्सइकालो । देवाणं जहा नेरइयाणं जह० दसवाससहस्साइं अंतोमुहुत्त-  
 मब्भहियाइं उक्को० वणस्सइकालो, अपढमसमय० जह० अंतो० उक्को० वणस्सइ-  
 कालो ॥ अप्पाबहु० एएसि णं भंते ! पढमसमयनेरइयाणं जाव पढमसमयदेवाण य  
 कयरे २ हितो० ? गोयमा ! सव्वत्थोवा पढमसमयमणुस्सा पढमसमयणेरइया  
 असंखेज्जगुणा पढमसमयदेवा असंखेज्जगुणा पढमसमयतिरिक्खजोणिया असंखेज्ज-  
 गुणा ॥ अपढमसमयनेरइयाणं जाव अपढमसमयदेवाणं एवं चेव अप्पबहु० णवरि  
 अपढमसमयतिरिक्खजोणिया अणंतगुणा ॥ एएसि णं भंते ! पढमसमयनेरइयाणं  
 अपढम० णेरइयाणं कयरे २... ? गोयमा ! सव्वत्थोवा पढमसमयणेरइया अपढम-  
 समयनेरइया असंखेज्जगुणा, एवं सव्वे ॥ एएसि णं भंते ! पढमसमयणेरइयाणं जाव  
 अपढमसमयदेवाण य कयरे २... ? गोयमा ! सव्वत्थोवा पढमसमयमणुस्सा  
 अपढमसमयमणुस्सा असंखेज्जगुणा पढमसमयणेरइया असंखेज्जगुणा पढमसमयदेवा  
 असंखेज्जगुणा पढमसमयतिरिक्खजोणिया असंखेज्जगुणा अपढमसमयनेरइया असंखे-  
 ज्जगुणा अपढमसमयदेवा असंखेज्जगुणा अपढमसमयतिरिक्खजोणिया अणंतगुणा ।  
 सेतं अट्ठविहा संसारसमावण्णगा जीवा पण्णत्ता ॥ २४१ ॥ सत्तमा अट्ठविह-  
 पडिवत्ती समत्ता ॥

तत्थ णं जे ते एवमाहंसु-णवविहा संसारसमावण्णगा जीवा प० ते एवमाहंसु,  
 तं०-पुढविकाइया आउक्काइया तेउक्काइया वाउक्काइया वणस्सइकाइया वेइंदिया

तेइंदिया चउरिंदिया पंचेंदिया ॥ ठिई सव्वेसिं भाणियव्वा ॥ पुढविकाइयाणं संचिट्ठणा पुढविकालो जाव वाउक्काइयाणं, वणस्सइणं वणस्सइकालो, बेइंदिया तेइंदिया चउरिंदिया संखेज्जं कालं, पंचेंदियाणं सागरोवमसहस्सं साइरेगं ॥ अंतरं सव्वेसिं अणंतं कालं, वणस्सइकाइयाणं असंखेज्जं कालं ॥ अप्पावहुगं, सव्वत्थोवा पंचिंदिया चउरिंदिया विसेसाहिया तेइंदिया विसेसाहिया बेइंदिया विसेसाहिया तेउक्काइया असंखे० पुढविका० आउ० वाउ० विसेसाहिया वणस्सइकाइया अणंतगुणा । सेतं णवविहा संसारसमावण्णगा जीवा पण्णत्ता ॥ २४२ ॥ **अट्टमा णवविहपडिवत्ती समत्ता ॥**

तत्थ णं जे ते एवमाहंसु-दसविहा संसारसमावण्णगा जीवा प० ते एवमाहंसु, तंजहा—पढमसमयएगिंदिया अपढमसमयएगिंदिया पढमसमयबेइंदिया अपढमसमय-बेइंदिया जाव पढमसमयपंचिंदिया अपढमसमयपंचिंदिया, पढमसमयएगिंदियस्स णं भंते ! केवइयं कालं ठिई पण्णत्ता ? गोयमा ! जहण्णेणं एकं समयं उक्को० एकं०, अपढम-समयएगिंदियस्स जहण्णेणं खुट्ठागं भवग्गहणं समऊणं उक्को० बावीसं वाससहस्साइं समऊणाइं, एवं सव्वेसिं पढमसमयकालं जहण्णेणं एक्को समओ उक्कोसेणं एक्को समओ, अपढम० जहण्णेणं खुट्ठागं भवग्गहणं समऊणं उक्कोसेणं जा जस्स ठिई सा समऊणा जाव पंचिंदियाणं तेत्तीसं सागरोवमाइं समऊणाइं ॥ संचिट्ठणा पढमसमय-यस्स जहण्णेणं एकं समयं उक्कोसेणं एकं समयं, अपढमसमयगाणं जहण्णेणं खुट्ठागं भवग्गहणं समऊणं उक्कोसेणं एगिंदियाणं वणस्सइकालो, बेइंदियतेइंदियचउरिंदियाणं संखेज्जं कालं पंचेंदियाणं सागरोवमसहस्सं साइरेगं ॥ पढमसमयएगिंदियाणं भंते ! कालओ केवइयं अंतरं होइ ? गोयमा ! जह्जेणं दो खुट्ठागभवग्गहणाइं समऊणाइं उक्को० वणस्सइकालो, अपढम० एगिंदिय० अंतरं जहण्णेणं खुट्ठागं भवग्गहणं समया-हियं उक्को० दो सागरोवमसहस्साइं संखेज्जवासमब्भहियाइं, सेसाणं सव्वेसिं पढम-समइयाणं अंतरं जह्० दो खुट्ठाइं भवग्गहणाइं समऊणाइं उक्को० वणस्सइकालो, अपढमसमइयाणं सेसाणं जहण्णेणं खुट्ठागं भवग्गहणं समयाहियं उक्को० वणस्सइ-कालो ॥ पढमसमइयाणं सव्वेसिं सव्वत्थोवा पढमसमयपंचेंदिया पढम० चउरिंदिया विसेसाहिया पढम० तेइंदिया विसेसाहिया प० बेइंदिया विसेसाहिया प० एगिंदिया विसेसाहिया ॥ एवं अपढमसमइयावि णवरि अपढमसमयएगिंदिया अणंतगुणा । दोण्हं अप्पवट्ठू, सव्वत्थोवा पढमसमयएगिंदिया अपढमसमयएगिंदिया अणंतगुणा सेसाणं सव्वत्थोवा पढमसमइया अपढम० असंखेज्जगुणा ॥ एसि णं भंते ! पढमसमय-एगिंदियाणं अपढमसमयएगिंदियाणं जाव अपढमसमयपंचिंदियाणं य कयरे २...? गोयमा ! सव्वत्थोवा पढमसमयपंचेंदिया पढमसमयचउरिंदिया विसेसाहिया पढम-

समयतेइंदिया विसेसाहिया एवं हेट्ठामुहा जाव पढमसमयएगिंदिया विसेसाहिया अप-  
ढमसमयपंचेंदिया असंखेज्जगुणा अपढमसमयउरिंदिया विसेसाहिया जाव अपढम-  
समयएगिंदिया अणंतगुणा ॥ २४३ ॥ सेत्तं दसविहा संसारसमावण्णगा जीवा पण्णत्ता,  
सेत्तं संसारसमावण्णगजीवाभिगमे ॥ **नवमा दसविहा पडिवत्ती समत्ता ॥**

से किं तं सव्वजीवाभिगमे ? सव्वजीवेषु णं इमाओ णव पडिवत्तीओ एवमाहि-  
ज्जंति एगे एवमाहंसु—दुविहा सव्वजीवा पण्णत्ता जाव दसविहा सव्वजीवा पण्णत्ता ॥  
तत्थ णं जे ते एवमाहंसु—दुविहा सव्वजीवा पण्णत्ता ते एवमाहंसु, तंजहा—सिद्धा  
चेव असिद्धा चेव इति ॥ सिद्धे णं भंते ! सिद्धेत्ति कालओ केवच्चिरं होइ ? गोयमा !  
साइए अपज्जवसिए ॥ असिद्धे णं भंते ! असिद्धेत्ति० ? गोयमा ! असिद्धे दुविहे पण्णत्ते,  
तंजहा—अणाइए वा अपज्जवसिए अणाइए वा सपज्जवसिए ॥ सिद्धस्स णं भंते !  
केवइकालं अंतरं होइ ? गोयमा ! साइयस्स अपज्जवसियस्स णत्थि अंतरं ॥ अस्सि-  
द्धस्स णं भंते ! केवइयं अंतरं होइ ? गोयमा ! अणाइयस्स अपज्जवसियस्स णत्थि  
अंतरं, अणाइयस्स सपज्जवसियस्स णत्थि अंतरं ॥ एएसि णं भंते ! सिद्धाणं असि-  
द्धाणं य कयरे २... ? गोयमा ! सव्वत्थोवा सिद्धा असिद्धा अणंतगुणा ॥ २४४ ॥  
अहवा दुविहा सव्वजीवा पण्णत्ता, तंजहा—सइंदिया चेव अणिंदिया चेव । सइंदिए  
णं भंते ! ० कालओ केवच्चिरं होइ ? गोयमा ! सइंदिए दुविहे पण्णत्ते, तं०-अणाइए वा  
अपज्जवसिए अणाइए वा सपज्जवसिए, अणिंदिए साइए वा अपज्जवसिए, दोण्हवि  
अंतरं नत्थि । सव्वत्थोवा अणिंदिया सइंदिया अणंतगुणा । अहवा दुविहा सव्वजीवा  
पण्णत्ता, तंजहा—सकाइया चेव अकाइया चेव एवं चेव, एवं सजोगी चेव अजोगी  
चेव तहेव, [एवं सलेस्सा चेव अलेस्सा चेव ससरीरा चेव असरीरा चेव] संचिट्ठणं  
अंतरं अप्पावहुयं जहा सइन्दियाणं ॥ अहवा दुविहा सव्वजीवा पण्णत्ता, तंजहा—  
सवेदगा चेव अवेदगा चेव ॥ सवेदए णं भंते ! सवे० ? गोयमा ! सवेदए तिविहे  
पण्णत्ते, तंजहा—अणाइए अपज्जवसिए, अणाइए सपज्जवसिए, साइए सपज्जवसिए,  
तत्थ णं जे से साइए सपज्जवसिए से जह० अंतोमु० उक्को० अणंतं कालं जाव  
खेत्तओ अवहं पोग्गलपरियट्ठं देसूणं ॥ अवेदए णं भंते ! अवेदएत्ति कालओ केव-  
च्चिरं होइ ? गोयमा ! अवेदए दुविहे पण्णत्ते, तंजहा—साइए वा अपज्जवसिए साइए  
वा सपज्जवसिए, तत्थ णं जे से साइए सपज्जवसिए से जहण्णेणं एक्कं समयं उक्को०  
अंतोमुहुत्तं ॥ सवेयगस्स णं भंते ! केवइकालं अंतरं होइ ? गोयमा ! अणाइयस्स  
अपज्जवसियस्स णत्थि अंतरं, अणाइयस्स सपज्जवसियस्स नत्थि अंतरं, साइयस्स  
सपज्जवसियस्स जहण्णेणं एक्कं समयं उक्कोसेणं अंतोमुहुत्तं ॥ अवेयगस्स णं भंते !

केवइयं कालं अंतरं होइ ? गोयमा ! साइयस्स अपज्जवसियस्स णत्थि अंतरं, साइ-  
यस्स सपज्जवसियस्स जह० अंतोमु० उक्कोसेणं अणंतं कालं जाव अवहुं पोग्गलप-  
रियट्ठं देसूणं । अप्पाबहुगं, सव्वत्थोवा अवेयगा सवेयगा अणंतगुणा । एवं सकसाई  
चेव अकसाई चेव २ जहा सवेयगे तहेव भाणियव्वे ॥ अहवा दुविहा सव्वजीवा प०,  
तं०-सलेसा य अलेसा य जहा असिद्धा सिद्धा, सव्वत्थोवा अलेसा सलेसा अणंतगुणा  
॥ २४५ ॥ अहवा० णाणी चेव अण्णाणी चेव ॥ णाणी णं भंते ! णाणित्ति कालओ० ?  
गोयमा ! णाणी दुविहे पण्णत्ते, तं०-साइए वा अपज्जवसिए साइए वा सपज्जवसिए,  
तत्थ णं जे से साइए सपज्जवसिए से जहण्णेणं अंतोमुहुत्तं उक्कोसेणं छावट्ठिसागरो-  
वमाइं साइरेगाइं, अण्णाणी जहा सवेदगा ॥ णाणिस्स अंतरं जहण्णेणं अंतोमुहुत्तं  
उक्कोसेणं अणंतं कालं अवहुं पोग्गलपरियट्ठं देसूणं । अण्णाणिस्स दोण्हवि आइल्लणं  
णत्थि अंतरं, साइयस्स सपज्जवसियस्स जहण्णेणं अंतोमु० उक्कोसेणं छावट्ठिं साग-  
रोवमाइं साइरेगाइं । अप्पाबहुयं-सव्वत्थोवा णाणी अण्णाणी अणंतगुणा ॥ अहवा  
दुविहा सव्वजीवा पण्णत्ता, तं०-सागारोवउत्ता य अणागारोवउत्ता य, संचिट्ठणा अन्तरं  
च जहण्णेणं उक्कोसेणवि अन्तोमुहुत्तं, अप्पाबहु० सागारो० संखे० ॥ २४६ ॥  
अहवा दुविहा सव्वजीवा पण्णत्ता, तंजहा—आहारगा चेव अणाहारगा चेव ॥  
आहारए णं भंते ! जाव केवच्चिरं होइ ? गोयमा ! आहारए दुविहे पण्णत्ते, तंजहा—  
छउमत्थआहारए य केवलिआहारए य, छउमत्थआहारए णं जाव केवच्चिरं होइ ?  
गोयमा ! जहण्णेणं खुड्डगं भवग्गहणं दुसमऊणं उक्को० असंखेज्जं कालं जाव कालओ,  
खेतओ अंगुलस्स असंखेज्जइभागं । केवलिआहारए णं जाव केवच्चिरं होइ ? गोयमा !  
जह० अंतोमु० उक्को० देसूणा पुव्वकोडी ॥ अणाहारए णं भंते ! कइविहे० ? गोयमा !  
अणाहारए दुविहे पण्णत्ते, तंजहा—छउमत्थअणाहारए य केवलिअणाहारए य,  
छउमत्थअणाहारए णं जाव केवच्चिरं होइ ? गोयमा ! जहण्णेणं एक्कं समयं उक्कोसेणं  
दो समया । केवलिअणाहारए दुविहे पण्णत्ते, तंजहा—सिद्धकेवलिअणाहारए य  
भवत्थकेवलिअणाहारए य ॥ सिद्धकेवलिअणाहारए णं भंते ! कालओ केवच्चिरं  
होइ ? गो० ! साइए अपज्जवसिए ॥ भवत्थकेवलिअणाहारए णं भंते ! कइविहे पण्णत्ते ?  
गो० ! भवत्थकेवलि० दुविहे पण्णत्ते, तं०-सजोगिभवत्थकेवलिअणाहारए य अजोगि-  
भवत्थकेवलिअणाहारए य । सजोगिभवत्थकेवलिअणाहारए णं भंते ! कालओ  
केवच्चिरं० ? गो० ! अजहण्णमणुक्कोसेणं तिण्णि समया । अजोगिभवत्थकेवलि० जह०  
अंतो० उक्को० अंतोमुहुत्तं ॥ छउमत्थआहारगस्स० केवइयं कालं अंतरं० ? गोयमा !  
जहण्णेणं एक्कं समयं उक्को० दो समया । केवलिआहारगस्स अंतरं अजहण्णमणु-

क्कोसेणं तिणिण समया ॥ छउमत्थअणाहारगस्स अंतरं जहन्नेणं खुट्ठागभवग्गहणं  
 दुसमऊणं उक्को० असंखेज्जं कालं जाव अंगुलस्स असंखेज्जइभागं । सिद्धकेवलअणा-  
 हारगस्स साइयस्स अपज्जवसियस्स णत्थि अंतरं ॥ सजोगिभवत्थकेवलअणाहार-  
 गस्स जह० अंतो० उक्कोसेणवि, अजोगिभवत्थकेवलअणाहारगस्स णत्थि अंतरं ॥  
 एसि णं भंते ! आहारगणं अणाहारगण य क्यरे २ हितो अप्पा वा  
 बहु० ? गोयमा ! सव्वत्थोवा अणाहारगा आहारगा असंखेज्ज० ॥ २४७ ॥  
 अहवा दुविहा सव्वजीवा पणत्ता, तंजहा—सभासगा य अभासगा य ॥ सभासए णं  
 भंते ! सभासएत्ति कालओ केवच्चिरं होइ ? गोयमा ! जहण्णेणं एक्कं समयं उक्को०  
 अंतोमुहुत्तं ॥ अभासए णं भंते० ? गोयमा ! अभासए दुविहे पणत्ते, तं—साइए वा  
 अपज्जवसिए साइए वा सपज्जवसिए, तत्थ णं जे से साइए सपज्जवसिए से जह०  
 अंतो० उक्को० अणंतं कालं अणंताओ उस्सप्पिणीओसप्पिणीओ वणस्सइकालो ॥  
 भासगस्स णं भंते ! केवइकालं अंतरं होइ ? गोयमा ! जह० अंतो० उक्को० अणंतं  
 कालं वणस्सइकालो । अभासग० साइयस्स अपज्जवसियस्स णत्थि अंतरं, साइयस-  
 पज्जवसियस्स जहण्णेणं एक्कं समयं उक्को० अंतो० । अप्पाबहु० सव्वत्थोवा भासगा  
 अभासगा अणंतगुणा ॥ अहवा दुविहा सव्वजीवा प०, तं—ससरीरी य असरीरी य०  
 असरीरी जहा सिद्धा, सव्वत्थोवा असरीरी ससरीरी अणंतगुणा ॥ २४८ ॥ अहवा  
 दुविहा सव्वजीवा पणत्ता, तंजहा—चरिमा चेव अचरिमा चेव ॥ चरिमे णं भंते !  
 चरिमेत्ति कालओ केवच्चिरं होइ ? गोयमा ! चरिमे अणाइए सपज्जवसिए, अचरिमे  
 दुविहे प०, तं—अणाइए वा अपज्जवसिए साइए वा अपज्जवसिए, दोण्हंपि णत्थि  
 अंतरं, अप्पाबहुयं—सव्वत्थोवा अचरिमा चरिमा अणंतगुणा । [ अहवा दुविहा सव्व-  
 जीवा प०, तं—सागारोवउत्ता य अणागारोवउत्ता य, दोण्हंपि संचिट्ठणावि अंतरंपि  
 जह० अंतो० उ० अंतो०, अप्पाबहु० सव्वत्थोवा अणागारोवउत्ता सागारोवउत्ता  
 असंखेज्जगुणा ] सेत्तं दुविहा सव्वजीवा पन्नत्ता ॥ २४९ ॥ ० ॥ तत्थ णं जे ते एवमाहंसु-  
 तिविहा सव्वजीवा पणत्ता ते एवमाहंसु, तंजहा—सम्मदिट्ठी मिच्छादिट्ठी सम्मा-  
 मिच्छादिट्ठी ॥ सम्मदिट्ठी णं भंते ! ० कालओ केवच्चिरं होइ ? गोयमा ! सम्मदिट्ठी  
 दुविहे पणत्ते, तंजहा—साइए वा अपज्जवसिए साइए वा सपज्जवसिए, तत्थ  
 जे ते साइए सपज्जवसिए से जह० अंतो० उक्को० छावट्ठिं सागरोवमाई साइरे-  
 गाईं मिच्छादिट्ठी ति विहे अणाइए वा अपज्जवसिए अणाइए वा सपज्जवसिए साइए  
 वा सपज्जवसिए, तत्थ जे ते साइए सपज्जवसिए से जह० अंतो० उक्को० अणंतं  
 कालं जाव अवहुं पोगलपरियट्ठं देसूणं सम्मामिच्छादिट्ठी जह० अंतो० उक्को०



अंतोमुहुतं ॥ सम्मदिट्ठिस्स अंतरं साइयस्स अपज्जवसियस्स नत्थि अंतरं, साइ-  
यस्स सपज्जवसियस्स जह० अंतो० उक्को० अणंतं कालं जाव अवड्ढं पोमगलपरियट्ठं  
देसूणं, मिच्छादिट्ठिस्स अणाइयस्स अपज्जवसियस्स नत्थि अंतरं, अणाइयस्स सप-  
ज्जवसियस्स नत्थि अंतरं, साइयस्स सपज्जवसियस्स जह० अंतो० उक्को० छावट्ठि  
सागरोवमाई साइरेगाई, सम्मामिच्छादिट्ठिस्स जह० अंतो० उक्को० अणंतं कालं  
जाव अवड्ढं पोमगलपरियट्ठं देसूणं । अप्पाबहु० सव्वत्थोवा सम्मामिच्छादिट्ठि सम्म-  
दिट्ठि अणंतगुणा मिच्छादिट्ठि अणंतगुणा ॥ २५० ॥ अहवा तिविहा सव्वजीवा  
पण्णात्ता, तं०-परित्ता अपरित्ता नोपरित्तानोअपरित्ता । परित्ते णं भंते !० कालओ  
केवच्चिरं होइ ? गोयमा ! परित्ते दुविहे पण्णत्ते, तं०-कायपरित्ते य संसारपरित्ते य ।  
कायपरित्ते णं भंते !० गोयमा ! जह० अंतोमु० उक्को० असंखेज्जं कालं जाव असंखेज्जा  
लोगा । संसारपरित्ते णं भंते ! संसारपरित्तेति कालओ केवच्चिरं होइ ? गो० ! जह०  
अंतो० उक्को० अणंतं कालं जाव अवड्ढं पोमगलपरियट्ठं देसूणं । अपरित्ते णं भंते !०  
गो० ! अपरित्ते दुविहे पण्णत्ते, तं०-कायअपरित्ते य संसारअपरित्ते य, कायअपरित्ते णं०  
जह० अंतो० उक्को० अणंतं कालं, वणस्सइकालो, संसारापरित्ते दुविहे पण्णत्ते, तंजहा-  
अणाइए वा अपज्जवसिए अणाइए वा सपज्जवसिए, णोपरित्तेणोअपरित्ते साइए अप-  
ज्जवसिए । कायपरित्तस्स अंतरं जह० अंतो० उक्को० वणस्सइकालो, संसारपरित्तस्स  
नत्थि अंतरं, कायापरित्तस्स जह० अंतो० उक्को० असंखेज्जं कालं पुढविकालो ।  
संसारापरित्तस्स अणाइयस्स अपज्जवसियस्स नत्थि अंतरं, अणाइयस्स सपज्जव-  
सियस्स नत्थि अंतरं, णोपरित्तनोअपरित्तस्सवि नत्थि अंतरं । अप्पाबहु० सव्व-  
त्थोवा परित्ता णोपरित्तानोअपरित्ता अणंतगुणा अपरित्ता अणंतगुणा ॥ २५१ ॥  
अहवा तिविहा सव्वजीवा प०, तं०-पज्जत्तगा अपज्जत्तगा नोपज्जत्तगानोअपज्जत्तगा,  
पज्जत्तगे णं भंते !० गोयमा ! जह० अंतो० उक्को० सागरोवमसयपुहुतं साइरेगं ।  
अपज्जत्तगे णं भंते !० गोयमा ! जह० अंतो० उक्को० अंतो०, नोपज्जत्तणोअपज्जत्तए  
साइए अपज्जवसिए । पज्जत्तगस्स अंतरं जह० अंतो० उक्को० अंतो०, अपज्जत्तगस्स  
जह० अंतो० उक्को० सागरोवमसयपुहुतं साइरेगं, तइयस्स नत्थि अंतरं । अप्पा-  
बहु० सव्वत्थोवा नोपज्जत्तगोअपज्जत्तगा अपज्जत्तगा अणंतगुणा पज्जत्तगा संखेज्ज-  
गुणा ॥ २५२ ॥ अहवा तिविहा सव्वजीवा प०, तं०-सुहुमा बायरा नोसुहुम-  
नोबायरा, सुहुमे णं भंते ! सुहुमेति कालओ केवच्चिरं ? गो० ! जहण्णेणं अंतोमुहुतं  
उक्कोसेणं असंखेज्जं कालं पुढविकालो, बायरा जह० अंतो० उक्को० असंखेज्जं  
कालं असंखेज्जाओ उस्सप्पिणीओसप्पिणीओ कालओ, खेतओ अंगुलस्स असंखेज्ज-

भागो, नोसुहुमनोबायरे साइए अपज्वसिए, सुहुमस्स अंतरं बायरकालो, बायरस्स अंतरं सुहुमकालो, तइयस्स नोसुहुमणोबायरस्स अंतरं नत्थि । अप्पाबहु० सव्वत्थोवा नोसुहुमनोबायरा बायरा अणंतगुणा सुहुमा असंखेज्जगुणा ॥ २५३ ॥ अहवा तिविहा सव्वजीवा पण्णत्ता, तंजहा—सण्णी असण्णी नोसण्णीनोअसण्णी, सन्नी णं भंते !० कालओ० ? गो०! जह० अंतो० उक्को० सागरोवमसयपुहुत्तं साइरेगं, असण्णी जह० अंतो० उक्को० वणस्सइकालो, नोसण्णीनोअसण्णी साइए अपज्वसिए । सण्णिस्स अंतरं जह० अंतो० उक्को० वणस्सइकालो, असण्णिस्स अंतरं जह० अंतो० उक्को० सागरोवमसयपुहुत्तं साइरेगं, तइयस्स णत्थि अंतरं । अप्पाबहु० सव्वत्थोवा सण्णी नोसन्नीनोअसण्णी अणंतगुणा असण्णी अणंतगुणा ॥ २५४ ॥ अहवा तिविहा सव्वजीवा पण्णत्ता, तंजहा—भवसिद्धिया अभवसिद्धिया नोभवसिद्धियानोअभवसिद्धिया, अणाइया सपज्वसिया भवसिद्धिया, अणाइया अपज्वसिया अभवसिद्धिया, साइया अपज्वसिया नोभवसिद्धियानोअभवसिद्धिया । तिण्हंपि नत्थि अंतरं । अप्पाबहु० सव्वत्थोवा अभवसिद्धिया णोभवसिद्धियाणोअभवसिद्धिया अणंतगुणा भवसिद्धिया अणंतगुणा ॥ २५५ ॥ अहवा तिविहा सव्व० प०, तंजहा—तसा थावरा नोतसानोथावरा, तसस्स णं भंते !०? गोयमा ! जह० अंतो० उक्को० दो सागरोवमसहस्साई साइरेगाई, थावरस्स संचिट्ठणा वणस्सइकालो, णोतसानोथावरा साइया अपज्वसिया । तसस्स अंतरं वणस्सइकालो, थावरस्स अंतरं दो सागरोवमसहस्साई साइरेगाई, णोतसणोथावरस्स णत्थि अंतरं । अप्पाबहु० सव्वत्थोवा तसा नोतसानोथावरा अणंतगुणा थावरा अणंतगुणा । से तं तिविहा सव्वजीवा पण्णत्ता ॥ २५६ ॥ ०॥ तत्थ णं जे ते एवमाहंसु—चउव्विहा सव्वजीवा पण्णत्ता ते एवमाहंसु, तं०—मणजोगी वइजोगी कायजोगी अजोगी । मणजोगी णं भंते !०? गोयमा ! जह० एक्कं समयं उक्को० अंतो०, एवं वइजोगीवि, कायजोगी जह० अंतो० उक्को० वणस्सइकालो, अजोगी साइए अपज्वसिए । मणजोगिस्स अंतरं जहण्णेणं अंतोमुहुत्तं उक्को० वणस्सइकालो, एवं वइजोगिस्सवि, कायजोगिस्स जह० एक्कं समयं उक्को० अंतो०, अजोगिस्स णत्थि अंतरं । अप्पाबहु० सव्वत्थोवा मणजोगी वइजोगी असंखेज्जगुणा अजोगी अणंतगुणा कायजोगी अणंतगुणा ॥ २५७ ॥ अहवा चउव्विहा सव्वजीवा पण्णत्ता, तंजहा—इत्थिवेयगा पुरिसवेयगा नपुंसगवेयगा अवेयगा, इत्थिवेयए णं भंते ! इत्थिवेयएत्ति कालओ केवच्चिरं होइ ? गोयमा ! (एणेण आएसेण०) पलियसयं दसुत्तरं अद्वारस चोदस पलियपुहुत्तं, समओ जहण्णो, पुरिसवेयस्स जह० अंतो०

उक्को० सागरोवमसयपुहुतं साइरेगं, नपुंसगवेयस्स जह० एकं समयं उक्को० अणंतं कालं वणस्सइकालो । अवेयए दुविहे प०, तं०-साइए वा अपज्ववसिए साइए वा सपज्ववसिए से जह० एकं स० उक्को० अंतोमु० । इत्थिवेयस्स अंतरं जह० अंतो० उक्को० वणस्सइकालो, पुरिसवेयस्स० जह० एगं समयं उक्को० वणस्सइकालो, नपुंसगवेयस्स जह० अंतो० उक्को० सागरोवमसयपुहुतं साइरेगं, अवेयगो जहा हेट्ठा । अप्पाबहु० सव्वत्थोवा पुरिसवेयगा इत्थिवेयगा संखेज्जगुणा अवेयगा अणंतगुणा नपुंसगवेयगा अणंतगुणा ॥ २५८ ॥ अहवा चउव्विहा सव्वजीवा पण्णत्ता, तंजहा—चक्खुदंसणी अचक्खुदंसणी ओहिदंसणी केवलदंसणी ॥ चक्खुदंसणी णं भंते !०? गोयमा ! जह० अंतो० उक्को० सागरोवमसहस्सं साइरेगं, अचक्खुदंसणी दुविहे पण्णत्ते, तं०-अणाइए वा अपज्ववसिए अणाइए वा सपज्ववसिए । ओहिदंसणिस्स जह० इकं समयं उक्को० दो छावट्ठी सागरोवमाणं साइरेगाओ, केवलदंसणी साइए अपज्ववसिए ॥ चक्खुदंसणिस्स अंतरं जह० अंतोमु० उक्को० वणस्सइकालो । अचक्खुदंसणिस्स दुविहस्स नत्थि अंतरं । ओहिदंसणिस्स जह० अंतोमु० उक्कोसेणं वणस्सइकालो । केवलदंसणिस्स णत्थि अंतरं । अप्पाबहुयं-सव्वत्थोवा ओहिदंसणी चक्खुदंसणी असंखेज्जगुणा केवलदंसणी अणंतगुणा अचक्खुदंसणी अणंतगुणा ॥ २५९ ॥ अहवा चउव्विहा सव्वजीवा पण्णत्ता, तंजहा—संजया असंजया संजयासंजया नोसंजनानोअसंजनानोसंजयासंजया । संजए णं भंते !०? गोयमा ! जह० एकं समयं उक्को० देसूणा पुव्वकोडी, असंजया जहा अण्णाणी, संजयासंजए जह० अंतोमु० उक्को० देसूणा पुव्वकोडी, नोसंजनानोअसंजनानोसंजयासंजए साइए अपज्ववसिए, संजयस्स संजयासंजयस्स दोण्हवि अंतरं जह० अंतोमु० उक्को० अवह्वं पोमालपरियट्ठं देसूणं, असंजयस्स आइदुवे णत्थि अंतरं, साइयस्स सपज्ववसियस्स जह० एकं स० उक्को० देसूणा पुव्वकोडी, चउत्थगस्स णत्थि अंतरं ॥ अप्पाबहु० सव्वत्थोवा संजया संजयासंजया असंखेज्जगुणा णोसंजयणोअसंजयणोसंजयासंजया अणंतगुणा असंजया अणंतगुणा ॥ सेतं चउव्विहा सव्वजीवा पण्णत्ता ॥ २६० ॥

**तच्चा सव्वजीवच०पडिवत्ती समत्ता ॥**

तत्थ णं जे ते एवमाहंसु-पंचविहा सव्वजीवा पण्णत्ता ते एवमाहंसु, तंजहा—कोहकसाई माणकसाई मायाकसाई लोभकसाई अकसाई ॥ कोहकसाईमाणकसाई-मायाकसाईणं जह० अंतो० उक्को० अंतोमु०, लोभकसाइस्स जह० एकं स० उक्को० अंतो०, अकसाई दुविहे जहा हेट्ठा ॥ कोहकसाईमाणकसाईमायाकसाईणं अंतरं जह० एकं स० उक्को० अंतो०, लोहकसाइस्स अंतरं जह० अंतो० उक्को० अंतो०,

अकसाई तहा जहा हेट्टा ॥ अप्पाबहुयं—अकसाइणो सव्वत्थोवा माणकसाई तहा अणंतगुणा । कोहे मायालोमे विसेसमहिया मुण्येयवा ॥ १ ॥ २६१ ॥ अहवा पंचविहा सव्वजीवा पण्णत्ता, तंजहा—णेरइया तिरिक्खजोणिया मणुस्सा देवा सिद्धा । संचिट्ठणंतराणि जह हेट्टा भणियाणि । अप्पाबहु० सव्वत्थोवा मणुस्सा णेरइया असंखेज्जगुणा देवा असंखेज्जगुणा सिद्धा अणंतगुणा तिरिया अणंतगुणा । सेत्तं पंच-विहा सव्वजीवा पण्णत्ता ॥ २६२ ॥ **चउत्था स० प० समत्ता ॥**

तत्थ णं जे ते एवमाहंसु—छव्विहा सव्वजीवा पण्णत्ता ते एवमाहंसु, तंजहा—आभिणिबोहियणाणी सुयणाणी ओहिणाणी मणपज्जवणाणी केवलणाणी अण्णाणी, आभिणिबोहियणाणी णं भंते ! आभिणिबोहियणाणित्ति कालओ केवच्चिरं होइ ? गोयमा ! जह० अन्तोमुहुत्तं उक्को० छावट्ठिं सागरोवमाई साइरेगाई, एवं सुयणाणीवि, ओहिणाणी णं भंते !० ? गोयमा ! जह० एकं समयं उक्को० छावट्ठिं सागरोवमाई साइरेगाई, मणपज्जवणाणी णं भंते !० ? गो० ! जह० एकं समयं उक्को० देसूणा पुव्व-कोडी, केवलनाणी णं भंते !० ? गो० ! साइए अपज्जवसिए, अन्नाणिणो ति विहा प०, तं०—अणाइए वा अपज्जवसिए अणाइए वा सपज्जवसिए साइए वा सपज्जवसिए, तत्थ० साइए सपज्जवसिए से जह० अंतो० उक्को० अणंतं कालं अवट्ठं पुग्गलपरियट्ठं देसूणं । अंतरं आभिणिबोहियणाणित्थ जह० अंतो० उक्को० अणंतं कालं अवट्ठं पुग्ग-लपरियट्ठं देसूणं, एवं सुय० अंतरं० मणपज्जव०, केवलनाणिणो णत्थि अंतरं, अन्नाणि० साइयसपज्जवसियस्स जह० अंतो० उक्को० छावट्ठिं सागरोवमाई साइरेगाई । अप्पा० सव्वत्थोवा मण० ओहि० असंखे० आभि० सुय० विसेसा० सट्ठाणे दोवि तुल्ला केवल० अणंत० अण्णाणी अणंतगुणा ॥ अहवा छव्विहा सव्वजीवा पण्णत्ता, तंजहा—एगिंदिया बेंदिया तेंदिया चउरिंदिया पंचेंदिया अणिंदिया । संचिट्ठणंतरा जहा हेट्टा । अप्पाबहुयं—सव्वत्थोवा पंचेंदिया चउरिंदिया विसेसा० तेइंदिया विसेसा० बेंदिया विसेसा० अणिंदिया अणंतगुणा एगिंदिया अणंतगुणा ॥ २६३ ॥ अहवा छव्विहा सव्वजीवा पण्णत्ता, तंजहा—ओरालियसरीरी वेउव्वियसरीरी आहारगसरीरी तेयगसरीरी कम्मगसरीरी असरीरी ॥ ओरालियसरीरी णं भंते !० कालओ केवच्चिरं होइ ? गोयमा ! जहण्णेणं खुट्ठागं भवग्गहणं दुसमऊणं, उक्कोसेणं असंखेज्जं कालं जाव अंगुलस्स असंखेज्जभागं, वेउव्वियसरीरी जह० एकं समयं उक्कोसेणं तेत्तीसं सागरोवमाई अंतोमुहुत्तमम्महियाई, आहारगसरीरी जह० अंतो० उक्को० अंतो०, तेयगसरीरी दुविहे प०, तं०—अणाइए वा अपज्जवसिए अणाइए वा सपज्जवसिए, एवं कम्मगसरीरीवि, असरीरी साइए अपज्जवसिए ॥ अंतरं ओरालियसरीरस्स जह०

एकं समयं उक्को० तेत्तीसं सागरोवमाई अंतोमुहुत्तमम्भहियाई, वेउव्वियसरीरस्स जह० अंतो० उक्को० अणंतं कालं वणस्सइकालो, आहारगसरीरस्स जह० अंतो० उक्को० अणंतं कालं जाव अवद्धं पोगगलपरियट्ठं देसूणं, तेय० कम्मगसरीरस्स य दुण्हवि णत्थि अंतरं ॥ अप्पाबहु० सव्वत्थोवा आहारगसरीरी वेउव्वियसरीरी असंखेज्जगुणा ओरालियसरीरी असंखेज्जगुणा असरीरी अणंतगुणा तेयाकम्मगसरीरी दोवि तुल्ला अणंतगुणा ॥ सेतं छव्विहा सव्वजीवा पणत्ता ॥ २६४ ॥ ० ॥ तत्थ णं जे ते एवमाहंसु-सत्तविहा सव्वजीवा प० ते एवमाहंसु, तंजहा—पुढवि-काइया आउकाइया तेउकाइया वाउकाइया वणस्सइकाइया तसकाइया अकाइया । संचिट्ठणंतरा जहा हेट्ठा । अप्पाबहु० सव्वत्थोवा तसकाइया तेउकाइया असंखेज्जगुणा पुढविकाइया विसे० आउ० विसे० वाउ० विसेसा० सिद्धा अणंतगुणा वणस्सइकाइया अणंतगुणा ॥ २६५ ॥ अहवा सत्तविहा सव्वजीवा पणत्ता, तंजहा—कण्हलेस्सा नीललेस्सा काउलेस्सा तेउलेस्सा पम्हलेस्सा सुक्कलेस्सा अलेस्सा ॥ कण्हलेस्से णं भंते ! कण्हलेस्सेति कालओ केवच्चिरं होइ ? गोयमा ! ज० अंतो० उक्को० तेत्तीसं सागरोवमाई अंतोमुहुत्तमम्भहियाई, नीललेस्से णं० जह० अंतो० उक्को० दस सागरोवमाई पलिओवमस्स असंखेज्जइभागमम्भहियाई, काउलेस्से णं भंते !०? गो०! जह० अंतो० उक्को० तिन्नि सागरोवमाई पलिओवमस्स असंखेज्जइभागमम्भहियाई, तेउलेस्से णं भंते !०? गोयमा ! जह० अं० उक्को० दोणिण सागरोवमाई पलिओवमस्स असंखेज्जइभागमम्भहियाई, पम्हलेस्से णं भंते !०? गोयमा ! जह० अंतो० उक्को० दस सागरोवमाई अंतोमुहुत्तमम्भहियाई, सुक्कलेस्से णं भंते !०? गो०! जहन्नेणं अंतो० उक्कोसेणं तेत्तीसं सागरोवमाई अंतोमुहुत्तमम्भहियाई, अलेस्से णं भंते !० साइए अपजवसिए ॥ कण्हलेस्स णं भंते ! अंतरं कालओ केवच्चिरं होइ ? गोयमा ! जह० अंतो० उक्को० तेत्तीसं सागरोवमाई अंतोमुहुत्तम०, एवं नीललेस्सवि, काउलेस्सवि, तेउलेस्स णं भंते ! अंतरं का० ? गोयमा ! जह० अंतो० उक्को० वणस्सइकालो, एवं पम्हलेस्सवि सुक्कलेस्सवि दोण्हवि एवमंतरं, अलेस्स णं भंते ! अंतरं कालओ० ? गोयमा ! साइयस्स अपजवसियस्स णत्थि अंतरं ॥ एएसि णं भंते । जीवाणं कण्हलेसाणं नीललेसाणं काउले० तेउ० पम्ह० सुक्क० अलेसाणं य कयरे २....? गोयमा ! सव्वत्थोवा सुक्कलेस्सा पम्हलेस्सा संखेज्जगुणा तेउलेस्सा असंखेज्जगुणा अलेस्सा अणंतगुणा काउलेस्सा अणंतगुणा नीललेस्सा विसेसाहिया कण्हलेस्सा विसेसाहिया । सेतं सत्तविहा सव्वजीवा पणत्ता ॥ २६६ ॥ ० ॥ तत्थ णं जे ते एवमाहंसु-अट्ठविहा सव्वजीवा पणत्ता ते एवमाहंसु, तंजहा—आभिणिबोहिय-

नाणी सुय० ओहि० मण० केवल० मइअण्णाणी सुयअण्णाणी विभंगणाणी ॥  
 आभिणिबोहियणाणी णं भंते ! आभिणिबोहियणाणित्ति कालओ केवच्चिरं होइ ?  
 गोयमा ! जह० अंतो० उक्को० छावट्टिसागरोवमाइं साइरेगाइं, एवं सुयणाणीवि ।  
 ओहिणाणी णं भंते !०? गोयमा ! जह० एकं समयं उक्को० छावट्टिसागरोवमाइं  
 साइरेगाइं, मणपज्जवणाणी णं भंते !०? गोयमा ! जह० एकं स० उक्को० देसूणा  
 पुव्वकोडी, केवलणाणी णं भंते !०? गोयमा ! साइए अपज्जवसिए, मइअण्णाणी  
 णं भंते !०? गोयमा ! मइअण्णाणी तिविहे पण्णत्ते, तं—अणाइए वा अपज्जवसिए  
 अणाइए वा सपज्जवसिए साइए वा सपज्जवसिए, तत्थ णं जे से साइए सपज्जवसिए  
 से जह० अंतो० उक्को० अणंतं कालं जाव अवद्धं पोगलपरियट्ठं देसूणं, सुयअण्णाणी  
 एवं चेव, विभंगणाणी णं भंते ! विभंग०? गोयमा ! जह० एकं समयं उ० तेत्तीसं  
 सागरोवमाइं देसूणाए पुव्वकोडीए अब्भहियाइं ॥ आभिणिबोहियणाणित्त्स णं  
 भंते ! अंतरं कालओ०? गोयमा ! जह० अंतो० उक्को० अणंतं कालं जाव अवद्धं  
 पोगलपरियट्ठं देसूणं, एवं सुयणाणित्त्सवि, ओहिणाणित्त्सवि, मणपज्जवणाणित्त्सवि,  
 केवलणाणित्त्स णं भंते ! अंतरं०? गोयमा ! साइयस्स अपज्जवसियस्स णत्थि  
 अंतरं । मइअण्णाणित्त्स णं भंते ! अंतरं०? गोयमा ! अणाइयस्स अपज्जवसियस्स  
 णत्थि अंतरं, अणाइयस्स सपज्जवसियस्स णत्थि अंतरं, साइयस्स सपज्जवसियस्स  
 जह० अंतो० उक्को० छावट्टिं सागरोवमाइं साइरेगाइं, एवं सुयअण्णाणित्त्सवि,  
 विभंगणाणित्त्स णं भंते ! अंतरं०? गोयमा ! जह० अंतो० उक्को० वणस्सइकालो ॥  
 एएसि णं भंते ! आभिणिबोहियणाणीणं सुयणाणीणं ओहि० मण० केवल०  
 मइअण्णाणीणं सुयअण्णाणीणं विभंगणाणीणं य कयरे०? गोयमा ! सव्वत्थोवा  
 जीवा मणपज्जवणाणी, ओहिणाणी असंखेज्जगुणा, आभिणिबोहियणाणी सुयणाणी  
 एए दोवि तुल्ला विसेसाहिया, विभंगणाणी असंखेज्जगुणा, केवलणाणी अणंत-  
 गुणा, मइअण्णाणी सुयअण्णाणी य दोवि तुल्ला अणंतगुणा ॥ २६७ ॥ अहवा  
 अट्ठविहा सव्वजीवा पण्णत्ता, तंजहा—णेरइया तिरिक्खजोणिया तिरिक्खजोणि-  
 णीओ मणुस्सा मणुस्सीओ देवा देवीओ सिद्धा ॥ णेरइए णं भंते ! णेरइएत्ति  
 कालओ केवच्चिरं होइ ? गोयमा ! जहन्नेणं दस वाससहस्साइं उ० तेत्तीसं सागरो-  
 वमाइं, तिरिक्खजोणिए णं भंते !०? गोयमा ! जह० अंतोसु० उक्को० वणस्सइ-  
 कालो, तिरिक्खजोणिणी णं भंते !०? गोयमा ! जह० अंतो० उक्को० तिन्नि  
 पल्लिओवमाइं पुव्वकोडिपुहुत्तमब्भहियाइं, एवं मणूसे मणूसी, देवे जहा नेरइए,  
 देवी णं भंते !०? गो०! जह० दस वाससहस्साइं उ० पणपन्नं पल्लिओवमाइं, सिद्धे

णं भंते ! सिद्धेति० ? गोयमा ! साइए अपज्वसिए । गेरइयस्स णं भंते ! अंतरं कालओ केवच्चिरं होइ ? गोयमा ! जह० अंतो० उक्को० वणस्सइकालो, तिरिक्खजोणियस्स णं भंते ! अंतरं कालओ० ? गोयमा ! जह० अंतो० उक्को० सागरोवमसय-पुहुत्तं साइरेणं, तिरिक्खजोणिणी णं भंते ! अंतरं कालओ केवच्चिरं होइ ? गोयमा ! जह० अंतोमुहुत्तं उक्को० वणस्सइकालो, एवं मणुस्सस्सवि मणुस्सीएवि, देवस्सवि देवीएवि, सिद्धस्स णं भंते ! अंतरं० साइयस्स अपज्वसियस्स णत्थि अंतरं ॥ एएसि णं भंते ! गेरइयाणं तिरिक्खजोणियाणं तिरिक्खजोणिणीणं मणूसाणं मणूसीणं देवाणं देवीणं सिद्धाण य कयरे० ? गोयमा ! सव्वत्थोवा मणुस्सीओ मणुस्सा असंखेज्जगुणा नेरइया असंखेज्जगुणा तिरिक्खजोणिणीओ असंखेज्जगुणाओ देवा संखेज्जगुणा देवीओ संखेज्जगुणाओ सिद्धा अणंतगुणा तिरिक्खजोणिया अणंतगुणा । सेत्तं अट्ठविहा सव्वजीवा पण्णत्ता ॥ २६८ ॥०॥ तत्थ णं जे ते एवमाहंसु-णवविहा सव्वजीवा प० ते एवमाहंसु, तंजहा—एगिंदिया बेंदिया तेंदिया चउरिंदिया गेरइया पंचेंदियतिरिक्खजोणिया मणूसा देवा सिद्धा ॥ एगिंदिए णं भंते ! एगिंदिएति कालओ केवच्चिरं होइ ? गोयमा ! जह० अंतोमु० उक्को० वणस्स०, बेंदिए णं भंते !०? गोयमा ! जह० अंतो० उक्को० संखेज्जं कालं, एवं तेइंदिएवि, चउ०, गेरइया णं भंते !०? गो० ! जह० दस वाससहस्साइं उक्को० तेत्तीसं सागरोवमाइं, पंचेंदियतिरिक्खजोणि ए णं भंते !०? गोयमा ! जह० अंतो० उक्को० तिण्णि पलिओवमाइं पुव्वकोट्ठि-पुहुत्तमब्भहियाइं, एवं मणूसेवि, देवा जहा गेरइया, सिद्धे णं भंते !०? गो० ! साइए अपज्वसिए ॥ एगिंदियस्स णं भंते ! अंतरं कालओ केवच्चिरं होइ ? गोयमा ! जह० अंतो० उक्को० दो सागरोवमसहस्साइं संखेज्जवासमब्भहियाइं, बेंदियस्स णं भंते ! अंतरं कालओ केवच्चिरं होइ ? गोयमा ! जह० अंतो० उक्को० वणस्सइकालो, एवं तेंदियस्सवि चउरिंदियस्सवि गेरइयस्सवि पंचेंदियतिरिक्खजोणियस्सवि मणूस्सवि देवस्सवि सव्वेसिमेवं अंतरं भाणियव्वं, सिद्धस्स णं भंते ! अंतरं कालओ० ? गो० ! साइयस्स अपज्वसियस्स णत्थि अंतरं ॥ एएसि णं भंते ! एगिंदियाणं बेइंदि० तेइंदि० चउरिंदियाणं गेरइयाणं पंचेंदियतिरिक्खजोणियाणं मणूसाणं देवाणं सिद्धाण य कयरे २...? गोयमा ! सव्वत्थोवा मणुस्सा गेरइया असंखेज्जगुणा देवा असंखेज्जगुणा पंचेंदियतिरिक्खजोणिया असंखेज्जगुणा चउरिंदिया विसेसाहिया तेइंदिया विसेसाहिया बेइंदिया विसे० सिद्धा अणंतगुणा एगिंदिया अणंतगुणा ॥ २६९ ॥ अहवा णवविहा सव्वजीवा पण्णत्ता, तंजहा—पढमसमयनेरइया अपढमसमयगेरइया पढमसमयतिरिक्खजोणिया अपढमसमयतिरिक्खजोणिया पढमसमयमणूसा


अपढमसमयमणूसा पढमसमयदेवा अपढमसमयदेवा सिद्धा य ॥ पढमसमयणेरइया-  
णं भंते !० ? गोयमा ! एक्कं समयं, अपढमसमयणेरइयस्स णं भंते !० ? गो० !  
जहन्नेणं दस वाससइस्साइं समऊणाइं उक्को० तेत्तीसं सागरोवमाइं समऊणाइं, पढम-  
समयतिरिक्खजोणियस्स णं भंते !० ? गो० ! एक्कं समयं, अपढमसमयतिरिक्खजोणि-  
यस्स णं भंते !० ? गो० ! जह० खुड्डागं भवग्गहणं समऊणं उक्को० वणस्सइकालो,  
पढमसमयमणूसे णं भंते !० ? गो० ! एक्कं समयं, अपढमसमयमणूस्से णं भंते !० ? गो० !  
जह० खुड्डागं भवग्गहणं समऊणं उक्को० तिञ्चि पलिओवमाइं पुव्वकोडिपुटुत्तमब्भहि-  
याइं, देवे जहा णेरइए, सिद्धे णं भंते ! सिद्धेत्ति कालओ केवच्चिरं होइ ? गोयमा !  
साइए अपजवसिए ॥ पढमसमयणेरइयस्स णं भंते ! अंतरं कालओ० ? गोयमा ! जह०  
दस वाससइस्साइं अंतोमुटुत्तमब्भहियाइं उक्कोसेणं वणस्सइकालो, अपढमसमयणेरइ-  
यस्स णं भंते ! अंतरं० ? गोयमा ! जह० अंतो० उक्को० वणस्सइकालो, पढमसमय-  
तिरिक्खजोणियस्स णं भंते ! अंतरं कालओ० ? गोयमा ! जह० दो खुड्डागाइं भवग्ग-  
हणाइं समऊणाइं उक्को० वण०, अपढमसमयतिरिक्खजोणियस्स णं भंते ! अंतरं  
कालओ० ? गो० ! जह० खुड्डागं भवग्गहणं समयाहियं उ० सागरोवमसयपुटुत्तं  
साइरेणं, पढमसमयमणूस्स जहा पढमसमयतिरिक्खजोणियस्स, अपढमसमयमणू-  
स्स णं भंते ! अंतरं कालओ० ? गो० ! ज० खुड्डागं भवग्गहणं समयाहियं उ०  
वण०, पढमसमयदेवस्स जहा पढमसमयणेरइयस्स, अपढमसमयदेवस्स जहा अपढम-  
समयणेरइयस्स, सिद्धस्स णं भंते !० ? गो० ! साइयस्स अपजवसियस्स णत्थि अंतरं ॥  
एएसि णं भंते ! पढमसमयनेरइयाणं पढमसमयतिरिक्खजोणियाणं पढमसमयमणू-  
साणं पढमसमयदेवाणं य कयरे० ? गोयमा ! सव्वत्थोवा पढमसमयमणूसा पढम-  
समयणेरइया असंखेज्जगुणा पढमसमयदेवा असं० पढमसमयतिरिक्खजो० असं० ।  
एएसि णं भंते ! अपढमसमयनेरइयाणं अपढमसमयतिरिक्खजोणि० अपढमसमय-  
मणूसाणं अपढमसमयदेवाणं य कयरे० ? गोयमा ! सव्वत्थोवा अपढमसमयमणूसा  
अपढमसमयनेरइया असं० अपढमसमयदेवा असं० अपढमसमयतिरि० अणंतगुणा ।  
एएसि णं भंते ! पढमस० नेरइयाणं अपढमसमयणेरइयाणं य कयरे २... ? गोयमा !  
सव्वत्थोवा पढमसमयणेरइया अपढमसमयणेरइया असंखेज्जगुणा, एएसि णं भंते !  
पढमसमयतिरिक्खजो० अपढमसमयतिरिक्खजोणि० कयरे० ? गोयमा ! सव्व०  
पढमसमयतिरि० अपढमसमयतिरिक्खजोणिया अणंत०, मणुयदेवअप्पाबहुयं जहा  
णेरइयाणं । एएसि णं भंते ! पढमसमयणेरइ० पढमस० तिरिक्खजो० पढमस० मणूसाणं  
पढमसमयदेवाणं अपढमसमयनेरइ० अपढमसमयतिरिक्खजोणि० अपढमसमयम-



णूसाणं अपढमसमयदेवाणं सिद्धाणं य कयरे० ? गोयमा ! सव्व० पढमस०मणूसा  
 अपढमसमय०मणु० असं० पढमसमयनेरइया असं० पढमसमयदेवा असंखे० पढमस-  
 मयतिरिक्खजो० असं० अपढमसमयनेर० असं० अपढमस०देवा असंखे० सिद्धा  
 अणं० अपढमस०तिरि० अणंतगुणा । सेतं नवविहा सव्वजीवा पणत्ता ॥२७०॥०॥  
 तत्थ णं जे ते एवमाहंसु—दसविहा सव्वजीवा पणत्ता ते एवमाहंसु, तंजहा—पुढवि-  
 काइया आउकाइया तेउकाइया वाउकाइया वणस्सइकाइया बेइदिया तेइंदिया चउरिं०  
 पंचे० अणिदिया ॥ पुढविकाइए णं भंते ! पुढविकाइएत्ति कालओ केवच्चिरं होइ ?  
 गोयमा ! जह० अंतो० उक्को० असंखेज्जं कालं असंखेजाओ उस्सप्पिणीओसप्पिणीओ  
 कालओ, खेतओ असंखेजा लोया, एवं आउतेउवाउकाइए, वणस्सइकाइए णं भंते !० ?  
 गोयमा ! जह० अंतो० उक्को० वणस्सइकालो, बेइदि ए णं भंते !० ? गो० ! जह० अंतो०  
 उक्को० संखेज्जं कालं, एवं तेइंदिएवि चउरिंदिएवि, पंचिंदिए णं भंते !० ? गोयमा !  
 जह० अंतो० उक्को० सागरोवमसहस्सं साइरेणं, अणिदि ए णं भंते !० ? गो० ! साइए  
 अपज्जवसिए ॥ पुढविकाइयस्स णं भंते ! अंतरं कालओ केवच्चिरं होइ ? गोयमा !  
 जह० अंतो० उक्को० वणस्सइकालो, एवं आउकाइयस्स तेउ० वाउ०, वणस्सइका-  
 इयस्स णं भंते ! अंतरं कालओ० ? जा चेव पुढविकाइयस्स संचिट्ठणा, बियतिय-  
 चउरिंदियपंचेदियाणं एएसिं चउण्हंपि अंतरं जह० अंतो० उक्को० वणस्सइकालो,  
 अणिदियस्स णं भंते ! अंतरं कालओ केवच्चिरं होइ ? गोयमा ! साइयस्स अपज्जव-  
 सियस्स णत्थि अंतरं ॥ एएसिं णं भंते ! पुढविकाइयाणं आउ० तेउ० वाउ० वण०  
 बेइदियाणं तेइंदियाणं चउरिं० पंचेदियाणं अणिदियाणं य कयरे २... ? गोयमा !  
 सव्वत्थोवा पंचेदिया चउरिंदिया विसेसाहिया तेइंदिया विसे० बेइदिया विसे० तेउ-  
 काइया असंखेज्जगुणा पुढविकाइया वि० आउ० वि० वाउ० वि० अणिदिया अणंत-  
 गुणा वणस्सइकाइया अणंतगुणा ॥ २७१ ॥ अहवा दसविहा सव्वजीवा पणत्ता,  
 तंजहा—पढमसमयनेरइया अपढमसमयनेरइया पढमसमयतिरिक्खजोणिया अपढम-  
 समयतिरिक्खजोणिया पढमसमयमणूसा अपढमसमयमणूसा पढमसमयदेवा अपढम-  
 समयदेवा पढमसमयसिद्धा अपढमसमयसिद्धा ॥ पढमसमयनेरइए णं भंते ! पढम-  
 समयनेरइएत्ति कालओ केवच्चिरं होइ ? गोयमा ! एक्कं समयं, अपढमसमयनेरइए णं  
 भंते !० ? गोयमा ! जह्वेणं दस वाससहस्साइं समऊगाइं उक्कोसेणं तेत्तीसं सागरो-  
 वमाइं समऊगाइं, पढमसमयतिरिक्खजोणिए णं भंते !० ? गोयमा ! एक्कं समयं, अप-  
 ढमसमयतिरिक्ख० जह० खुड्ढाणं भवग्गहणं समऊणं उक्को० वणस्सइकालो, पढमस-  
 मयमणूसे णं भंते !० ? गोयमा ! एक्कं समयं, अपढमस०मणूसे णं भंते !० ? गोयमा !

जह० खुड्वागं भवग्गहणं समऊणं उक्को० तिणिण पल्लिओवमाइं पुव्वकोडिपुहुत्तमब्भ-  
हियाइं, देवे जहा गेरइए, पढमसमयसिद्धे णं भंते !० ? गोयमा ! एकं समयं, अपढ-  
मसमयसिद्धे णं भंते !० ? गोयमा ! साइए अपजवसिए । पढमसमयणेर० भंते !  
अंतरं कालओ० ? गोयमा ! ज० दस वाससहस्साइं अंतोमुहुत्तमब्भहियाइं उक्को०  
वण०, अपढमसमयणेर० अंतरं कालओ केव० ? गोयमा ! जह० अंतो० उ० वण०,  
पढमसमयतिरिक्खजोणियस्स० अंतरं० केवच्चिरं होइ ? गोयमा ! जह० दो खुड्वाग-  
भवग्गहणाइं समऊणाइं उक्को० वण०, अपढमसमयतिरिक्खजोणियस्स णं भंते !० ?  
गोयमा ! जह० खुड्वागभवग्गहणं समयाहियं उक्को० सागरोवमसयपुहुत्तं साइरेगं,  
पढमसमयमणूसस्स णं भंते ! अंतरं कालओ० ? गो० ! जह० दो खुड्वागभवग्गहणाइं  
समऊणाइं उक्को० वण०, अपढमसमयमणूसस्स णं भंते ! अंतरं० ? गो० ! जह०  
खुड्वागं भव० समयाहियं उक्को० वणस्सइ०, देवस्स अंतरं जहा गेरइयस्स, पढमस-  
मयसिद्धस्स णं भंते ! अंतरं० ? गो० ! णत्थि, अपढमसमयसिद्धस्स णं भंते ! अंतरं  
कालओ केवच्चिरं होइ ? गोयमा ! साइयस्स अपजवसियस्स णत्थि अंतरं ॥ एएसि  
णं भंते ! पढमस०णेर० पढमस०तिरिक्खजोणियाणं पढमसमयमणूसाणं पढमसमय-  
देवाणं पढमसमयसिद्धाण य कयरे २... ? गोयमा ! सव्वत्थोवा पढमसमयसिद्धा  
पढमसमयमणूसा असंखे० पढमस०णेरइया असंखेज्जगुणा पढमस०देवा असं० पढ-  
मस०तिरि० असं० । एएसि णं भंते ! अपढमसमयणेरइयाणं जाव अपढमसमयसि-  
द्धाण य कयरे० ? गोयमा ! सव्वत्थोवा अपढमस०मणूसा अपढमस०णेरइया असंखे०  
अपढमस०देवा असंखे० अपढमस०सिद्धा अणंतगुणा अपढमस०तिरिक्खजो० अणंत-  
गुणा । एएसि णं भंते ! पढमस०णेरइयाणं अपढमस०णेरइयाण य कयरे २... ?  
गोयमा ! सव्वत्थोवा पढमस०णेरइया अपढमस०णेरइया असंखे०, एएसि णं भंते !  
पढमस०तिरिक्खजोणियाणं अपढमस०तिरिक्खजोणियाण य कयरे २... ? गोयमा !  
सव्वत्थोवा पढमसमयतिरिक्खजो० अपढमस०तिरिक्खजोणिया अणंतगुणा, एएसि  
णं भंते ! पढमस०मणूसाणं अपढमसमयमणूसाण य कयरे २... ? गोयमा ! सव्व-  
त्थोवा पढमसमयमणूसा अपढमस०मणूसा असंखे०, जहा मणूसा तहा देवावि, एएसि  
णं भंते ! पढमसमयसिद्धाणं अपढमसमयसिद्धाण य कयरे २ हितो अप्पा वा बहुया  
वा तुल्ला वा विसेसाहिया वा ? गोयमा ! सव्वत्थोवा पढमसमयसिद्धा अपढमसमयसिद्धा  
अणंतगुणा । एएसि णं भंते ! पढमसमयणेरइयाणं अपढमसमयणेरइयाणं पढमस०-  
तिरिक्खजोणि० अपढमस०तिरिक्खजो० प०समयमणू० अपढमस०मणू० पढम-  
स०देवाणं अप०समयदेवाणं पढमसमयसिद्धाणं अपढमसमयसिद्धाण य कयरे २ हितो

अप्पा वा बहुया वा तुल्ला वा विसे० ? गोयमा ! सव्वत्थोवा पढमस० सिद्धा पढमस०-  
मणूसा असं० अप० समयमणूसा असंखे० पढमसमयणेरइया असं० पढमस० देवा असं०  
पढमस० तिरि० असं० अपढमस० णेर० असंखे० अपढमस० देवा असं० अपढमस०-  
सिद्धा अणंत० अपढमस० तिरि० अणंतगुणा । सेत्तं दसविहा सव्वजीवा पणत्ता ॥  
सेत्तं सव्वजीवाभिगमे ॥ २७२ ॥ नवमा सव्वजीवदसविहपडिचत्ती  
समत्ता ॥ जीवाजीवाभिगमसुत्तं समत्तं ॥



णमोऽतथ्य णं समणस्स भगवओ णायपुत्तमहावीरस्स

## सुत्तागमे

तत्थ णं

### पणवणासुत्तं

ववगयजरमरणभए सिद्धे अभिवंदिऊण तिविहेण । वंदामि जिणवरिंदं तेलोक्क-  
गुरं महावीरं ॥ १ ॥ सुयरयणनिहाणं जिणवरेण भवियज्जननिव्वुइकरेण । उवदंसिया  
भगवया पन्नवणा सव्वभावाणं ॥ २ ॥ वायगवरवंसाओ तेवीसइमेण धीरपुरिसेणं ।  
दुद्धरधरेण मुणिणा पुव्वसुयसमिद्धबुद्धीण ॥ ३ ॥ सुयसागरा विणेऊण जेण सुयर-  
यणमुत्तमं दिञ्चं । सीसगणस्स भगवओ तस्स नमो अज्जसामस्स ॥ ४ ॥ अज्जयण-  
मिणं चित्तं सुयरयणं दिट्ठिवायणीसन्दं । जह वन्नियं भगवया अहमवि तह वन्नइ-  
स्सामि ॥ ५ ॥ पन्नवणा ठाणाइं बहुवत्तव्वं ठिई विसेसा य । वक्कन्ती ऊसासो सन्ना  
जोणी य चरिमाइं ॥ ६ ॥ भासा सरीर परिणाम कसाय इन्दिए पओगे य । लेसा  
कायठिईया सम्मत्ते अन्तकिरिया य ॥ ७ ॥ ओगाहणसंठाणे किरिया कम्मे इयावरे ।  
[कम्मस्स] बन्धए [कम्मस्स] वेद[ए]वेदस्स बन्धए वेयवेयए ॥ ८ ॥ आहारे  
उवओगे पासणया सन्नि सज्जमे चेव । ओही पवियारण वेयणा य तत्तो समुग्घाए  
॥ ९ ॥ से किं तं पन्नवणा ? पन्नवणा दुविहा पन्नत्ता । तंजहा-जीवपन्नवणा  
य अजीवपन्नवणा य ॥ १ ॥ से किं तं अजीवपन्नवणा ? अजीवपन्नवणा दुविहा  
पन्नत्ता । तंजहा-रुविअजीवपन्नवणा य अरुविअजीवपन्नवणा य ॥ २ ॥ से किं तं  
अरुविअजीवपन्नवणा ? अरुविअजीवपन्नवणा दसविहा पन्नत्ता । तंजहा-धम्मत्थिकाए,  
धम्मत्थिकायस्स देसे, धम्मत्थिकायस्स पएसा, अधम्मत्थिकाए, अधम्मत्थिकायस्स  
देसे, अधम्मत्थिकायस्स पएसा, आगासत्थिकाए, आगासत्थिकायस्स देसे, आगा-  
सत्थिकायस्स पएसा, अद्वासमए । सेत्तं अरुविअजीवपन्नवणा ॥ ३ ॥ से किं  
तं रुविअजीवपन्नवणा ? रुविअजीवपन्नवणा चउव्विहा पन्नत्ता । तंजहा-१ खंधा,  
२ खंधदेसा, ३ खंधप्पएसा, ४ परमाणुपोगला । ते समासओ पंचविहा पन्नत्ता ।  
तंजहा-१ वन्नपरिणया, २ गंधपरिणया, ३ रसपरिणया, ४ फासपरिणया, ५  
संठाणपरिणया ॥ ४ ॥ जे वन्नपरिणया ते पंचविहा पन्नत्ता । तंजहा-१ काल-  
वन्नपरिणया, २ नीलवन्नपरिणया, ३ लोहियवन्नपरिणया, ४ हालिद्वन्नपरिणया,

५ सुक्खिन्नपण्णपरिणया । जे गंधपरिणया ते दुविहा पञ्चत्ता । तंजहा-सुब्भिगंध-  
 परिणया य दुब्भिगंधपरिणया य । जे रसपरिणया ते पंचविहा पञ्चत्ता । तंजहा-  
 १ तित्तरसपरिणया, २ कडुयरसपरिणया, ३ कसायरसपरिणया, ४ अंबिलरस-  
 परिणया, ५ महुररसपरिणया । जे फासपरिणया ते अट्ठविहा पञ्चत्ता । तंजहा-  
 १ कक्खडफासपरिणया, २ मउयफासपरिणया, ३ गुरुयफासपरिणया, ४ लहुय-  
 फासपरिणया, ५ सीयफासपरिणया, ६ उस्सिणफासपरिणया, ७ णिद्धफासपरिणया,  
 ८ लुक्खफासपरिणया । जे संठाणपरिणया ते पंचविहा पञ्चत्ता । तंजहा-१ परिमंडल-  
 संठाणपरिणया, २ वट्ठसंठाण०, ३ तंसंठाण०, ४ चउरंसंठाण०, ५ आयय-  
 संठाण० ॥ ५ ॥ जे वण्णओ कालवण्णपरिणया ते गन्धओ सुब्भिगन्धपरिणया वि,  
 दुब्भिगन्धपरिणया वि । रसओ तित्तरसपरिणया वि, कडुयरसपरिणया वि, कसाया  
 रसपरिणया वि, अम्बिलरसपरिणया वि, महुररसपरिणया वि । फासओ कक्खड-  
 फासपरिणया वि, मउयफासपरिणया वि, गुरुयफासपरिणया वि, लहुयफासपरिणय-  
 वि, सीयफासपरिणया वि, उस्सिणफासपरिणया वि, णिद्धफासपरिणया वि, लुक्खफा-  
 सपरिणया वि । सण्ठाणओ परिमण्डलसण्ठाणपरिणया वि, वट्ठसंठाणपरिणया वि,  
 तंसंठाणपरिणया वि, चउरंसंठाणपरिणया वि, आययसण्ठाणपरिणया वि २० ।  
 जे वण्णओ नीलवण्णपरिणया ते गन्धओ सुब्भिगन्धपरिणया वि, दुब्भिगन्धपरिणया  
 वि । रसओ तित्तरसपरिणया वि, कडुयरसपरिणया वि, कसायरसपरिणया वि,  
 अम्बिलरसपरिणया वि, महुररसपरिणया वि । फासओ कक्खडफासपरिणया वि,  
 मउयफासपरिणया वि, गुरुयफासपरिणया वि, लहुयफासपरिणया वि, सीयफासपरि-  
 णया वि, उस्सिणफासपरिणया वि, निद्धफासपरिणया वि, लुक्खफासपरिणया वि ।  
 संठाणओ परिमण्डलसंठाणपरिणया वि, वट्ठसंठाणपरिणया वि, तंसंठाणपरिणया  
 वि, चउरंसंठाणपरिणया वि, आययसंठाणपरिणया वि २० । जे वण्णओ लोहि-  
 यवण्णपरिणया ते गन्धओ सुब्भिगन्धपरिणया वि, दुब्भिगन्धपरिणया वि । रसओ  
 तित्तरसपरिणया वि, कडुयरसपरिणया वि, कसायरसपरिणया वि, अम्बिलरसपरि-  
 णया वि, महुररसपरिणया वि । फासओ कक्खडफासपरिणया वि, मउयफासपरि-  
 णया वि, गुरुयफासपरिणया वि, लहुयफासपरिणया वि, सीयफासपरिणया वि,  
 उस्सिणफासपरिणया वि, निद्धफासपरिणया वि, लुक्खफासपरिणया वि । संठाणओ  
 परिमण्डलसंठाणपरिणया वि, वट्ठसंठाणपरिणया वि, तंसंठाणपरिणया वि, चउरं-  
 ससंठाणपरिणया वि, आययसंठाणपरिणया वि २० । जे वण्णओ हालिद्धवण्णपरिणया  
 ते गन्धओ सुब्भिगन्धपरिणयावि, दुब्भिगन्धपरिणयावि । रसओ तित्तरसपरिणया

[illegible]

[illegible]





[illegible]

[illegible]

लहुयफासपरिणया वि, सीयफासपरिणया वि, उसिणफासपरिणया वि, निद्धफास-  
परिणया वि, लुक्खफासपरिणया वि २० । जे संठाणओ आययसंठाणपरिणया ते वण्णओ  
कालवण्णपरिणया वि, नीलवण्णपरिणया वि, लोहियवण्णपरिणया वि, हालिद्धवण्ण-  
परिणया वि, सुक्खिल्लवण्णपरिणया वि । गन्धओ सुब्भिगन्धपरिणया वि, दुब्भिग-  
न्धपरिणया वि । रसओ तित्तरसपरिणया वि, कडुयरसपरिणया वि, कसायरसपरिणया  
वि, अम्बिलरसपरिणया वि, महुररसपरिणया वि । फासओ कक्खडफासपरिणया  
वि, मउयफासपरिणया वि, गुरुयफासपरिणया वि, लहुयफासपरिणया वि, सीयफास-  
परिणया वि, उसिणफासपरिणया वि, णिद्धफासपरिणया वि, लुक्खफासपरिणया  
वि २०, १०० । **सेत्तं रूविअजीवपन्नवणा । सेत्तं अजीवपन्नवणा ॥ ६ ॥**

से किं तं जीवपन्नवणा ? जीवपन्नवणा दुविहा पन्नता । तंजहा—संसारसमावण्ण-  
जीवपण्णवणा य असंसारसमावण्णजीवपण्णवणा य ॥ ७ ॥ से किं तं असंसारसमाव-  
ण्णजीवपण्णवणा ? असंसारसमावण्णजीवपण्णवणा दुविहा पण्णता । तंजहा—अणन्त-  
रसिद्धअसंसारसमावण्णजीवपण्णवणा य परम्परसिद्धअसंसारसमावण्णजीवपण्णवणा य  
॥ ८ ॥ से किं तं अणन्तरसिद्धअसंसारसमावण्णजीवपण्णवणा ? अणन्तरसिद्धअसंसा-  
रसमावण्णजीवपण्णवणा पण्णरसविहा पण्णता । तंजहा—१ तित्थसिद्धा, २ अतित्थ-  
सिद्धा, ३ तित्थगरसिद्धा, ४ अतित्थगरसिद्धा, ५ सयंबुद्धसिद्धा, ६ पत्तेयबुद्धसिद्धा,  
७ बुद्धबोहियसिद्धा, ८ इत्थीलिंगसिद्धा, ९ पुरिसलिंगसिद्धा, १० नपुंसगलिंग-  
सिद्धा, ११ सलिंगसिद्धा, १२ अन्नलिंगसिद्धा, १३ गिहिल्लिंगसिद्धा, १४ एगसिद्धा,  
१५ अणेगसिद्धा । सेत्तं अणंतरसिद्ध ० ॥ ९ ॥ से किं तं परम्परसिद्धअसंसारसमाव-  
ण्णजीवपण्णवणा ? २ अणेगविहा पण्णता, तंजहा—अपढमसमयसिद्धा, दुसमयसिद्धा,  
तिसमयसिद्धा, चउसमयसिद्धा जाव सङ्खिज्जसमयसिद्धा, असङ्खिज्जसमयसिद्धा, अण-  
न्तसमयसिद्धा । सेत्तं परम्परसिद्धअसंसारसमावण्णजीवपण्णवणा । सेत्तं असंसारसमा-  
वण्णजीवपण्णवणा ॥ १० ॥ से किं तं संसारसमावण्णजीवपण्णवणा ? संसारसमाव-  
ण्णजीवपण्णवणा पञ्चविहा पण्णता । तंजहा—१ एगेदियसंसारसमावण्णजीवपण्ण-  
वणा, २ बेइन्दियसंसारसमावण्णजीवपण्णवणा, ३ तेइन्दियसंसारसमावण्णजीवप-  
ण्णवणा, ४ चउरिन्दियसंसारसमावण्णजीवपण्णवणा, ५ पञ्चिन्दियसंसारसमावण्ण-  
जीवपण्णवणा ॥ ११ ॥ से किं तं एगेन्दियसंसारसमावण्णजीवपण्णवणा ? एगेन्दिय-  
संसारसमावण्णजीवपण्णवणा पञ्चविहा पन्नता । तंजहा—पुढविकाइया, आउक्काइया,  
तेउक्काइया, वाउक्काइया, वणस्सइक्काइया ॥ १२ ॥ से किं तं पुढविकाइया ? पुढवि-  
क्काइया दुविहा पण्णता । तंजहा—सुहुमपुढविकाइया य बायरपुढविकाइया य ॥ १३ ॥

से किं तं सुहुमपुढविकाइया ? सुहुमपुढविकाइया दुविहा पण्णत्ता । तंजहा—पज्जत्त-  
सुहुमपुढविकाइया य अपज्जत्तसुहुमपुढविकाइया य । सेत्तं सुहुमपुढविकाइया ॥ १४ ॥  
से किं तं बायरपुढविकाइया ? बायरपुढविकाइया दुविहा पण्णत्ता । तंजहा—सण्हबायर-  
पुढविकाइया य खरबायरपुढविकाइया य ॥ १५ ॥ से किं तं सण्हबायरपुढविकाइया ?  
सण्हबायरपुढविकाइया सत्तविहा पण्णत्ता । तंजहा—१ किण्हमट्टिया, २ नीलमट्टिया,  
३ लोहियमट्टिया, ४ हालिइमट्टिया, ५ सुक्किल्लमट्टिया, ६ पाण्डुमट्टिया, ७ पण्ण-  
मट्टिया । सेत्तं सण्हबायरपुढविकाइया ॥ १६ ॥ से किं तं खरबायरपुढविकाइया ?  
खरबायरपुढविकाइया अणेगविहा पण्णत्ता । तंजहा—१ पुढवी य २ सक्करा ३ वालुया  
य ४ उवले ५ सिला य ६-७ लोणूसे । ८ अय ९ तंव १० तउय ११ सीसय  
१२ रूप १३ सुवन्ने य १४ वइरे य ॥ १५ ॥ १५ हरियाले १६ हिंशुलए १७ मणो-  
सिला १८-२० सासगंजणपवाले । २१-२२ अब्भपडलब्भवालुय बायरकाए मणि-  
विहाणा ॥ २१ ॥ २३ गोमेजए य २४ स्यए २५ अंके २६ फलिहे य २७ लोहियक्खे  
य । २८ मरगय २९ मसारगळे ३० भुयमोयग ३१ इन्दनीले य ॥ ३ ॥ ३२ चंदण  
३३ गेरुय ३४ हंसगब्भ ३५ पुलए ३६ सोगन्धिए य बोद्धवे । ३७ चन्दप्पभ  
३८ वेरुलिए ३९ जलकंते ४० सूरकंते य ॥ ४ ॥ जेयावन्ने तहप्पगारा । ते समासओ  
दुविहा पण्णत्ता । तंजहा—पज्जत्तगा य अपज्जत्तगा य । तत्थ णं जे ते अपज्जत्तगा ते णं  
असंपत्ता । तत्थ णं जे ते पज्जत्तगा एएसिं वन्नादेसेणं, रसादेसेणं, गंधादेसेणं, फासा-  
देसेणं सहस्सग्गसो विहाणाइं, सङ्खेज्जाइं जोणिप्पमुहसयसहस्साइं । पज्जत्तगणिस्साए  
अपज्जत्तगा वक्कमंति, जत्थ एगो तत्थ नियमा असंखेज्जा । सेत्तं खरबायरपुढविकाइया ।  
सेत्तं बायरपुढविकाइया । सेत्तं पुढविकाइया ॥ १७ ॥ से किं तं आउक्काइया ? आउ-  
क्काइया दुविहा पण्णत्ता । तंजहा—सुहुमआउक्काइया य बायरआउक्काइया य ॥ १८ ॥  
से किं तं सुहुमआउक्काइया ? सुहुमाउक्काइया दुविहा पण्णत्ता । तंजहा—पज्जत्तसुहुम-  
आउक्काइया य अपज्जत्तसुहुमआउक्काइया य । सेत्तं सुहुमआउक्काइया ॥ १९ ॥ से  
किं तं बायरआउक्काइया ? बायरआउक्काइया अणेगविहा पण्णत्ता । तंजहा—उस्सा,  
हिमए, महिया, करए, हरतणुए, सुद्धोदए, सीओदए, उसिणोदए, खारोदए, खट्ठो-  
दए, अम्बिलोदए, लवणोदए, वारुणोदए, खीरोदए, वओदए, खोओदए, रसोदए,  
जे यावन्ने तहप्पगारा । ते समासओ दुविहा पण्णत्ता । तंजहा—पज्जत्तगा य अपज्ज-  
त्तगा य । तत्थ णं जे ते अपज्जत्तगा ते णं असंपत्ता । तत्थ णं जे ते पज्जत्तगा  
एएसिं वण्णादेसेणं गन्धादेसेणं रसादेसेणं फासादेसेणं सहस्सग्गसो विहाणाइं, संखे-  
ज्जाइं जोणिप्पमुहसयसहस्साइं, पज्जत्तगनिस्साए अपज्जत्तगा वक्कमंति, जत्थ एगो

तत्थ नियमा असंखेज्जा । सेत्तं बायरआउकाइया । सेत्तं आउकाइया ॥ २० ॥ से किं तं तेऊकाइया ? तेऊकाइया दुविहा पन्नत्ता । तंजहा-सुहुमतेऊकाइया य बायरते-ऊकाइया य ॥ २१ ॥ से किं तं सुहुमतेऊकाइया ? सुहुमतेऊकाइया दुविहा पन्नत्ता । तंजहा-पज्जत्तगा य अपज्जत्तगा य । सेत्तं सुहुमतेऊकाइया ॥ २२ ॥ से किं तं बायरतेऊकाइया ? बायरतेऊकाइया अणेगविहा पण्णत्ता । तंजहा-इंगाले, जाला, मुम्मुरे, अच्ची, अलाए, सुद्धागणी, उक्का, विज्जू, असणी, णिग्वाए, संघरिससमुट्टिए, सूरक-न्तमणिणिसिए, जेयावन्ने तहप्पगारा । ते समासओ दुविहा पण्णत्ता । तंजहा-पज्ज-त्तगा य अपज्जत्तगा य । तत्थ णं जे ते अपज्जत्तगा ते णं असंपत्ता । तत्थ णं जे ते पज्जत्तगा एएसि णं वन्नादेसेणं, गन्धादेसेणं, रसादेसेणं, फासादेसेणं सहस्सग्गसो विहाणाइं, संखेज्जाइं जोणिप्पमुहसयसहस्साइं । पज्जत्तगणिसाए अपज्जत्तगा वक्कमंति, जत्थ एगो तत्थ नियमा असंखेज्जा, सेत्तं बायरतेऊकाइया । सेत्तं तेऊकाइया ॥ २३ ॥ से किं तं वाउकाइया ? वाउकाइया दुविहा पन्नत्ता । तंजहा-सुहुमवाउकाइया य बायरवाउकाइया य ॥ २४ ॥ से किं तं सुहुमवाउकाइया ? सुहुमवाउकाइया दुविहा पण्णत्ता । तंजहा-पज्जत्तगसुहुमवाउकाइया य अपज्जत्तगसुहुमवाउकाइया य । सेत्तं सुहुमवाउकाइया ॥ २५ ॥ से किं तं बायरवाउकाइया ? बायरवाउकाइया अणेगविहा पण्णत्ता । तंजहा-पाईणवाए, पडीणवाए, दाहिणवाए, उडीणवाए, उड्डवाए, अहो-वाए, तिरियवाए, विदिसिवाए, वाउब्भामे, वाउक्कलिया, वायमंडलिया, उक्कलिया-त्ताए, मंडलियावाए, गुंजावाए, झंझावाए, संवट्टवाए, घणवाए, तणुवाए, सुद्धवाए, जेयावण्णे तहप्पगारा । ते समासओ दुविहा पन्नत्ता । तंजहा-पज्जत्तगा य अपज्जत्तगा य । तत्थ णं जे ते अपज्जत्तगा ते णं असंपत्ता । तत्थ णं जे ते पज्जत्तगा एएसि णं वण्णादेसेणं, गन्धादेसेणं, रसादेसेणं, फासादेसेणं सहस्सग्गसो विहाणाइं, संखेज्जाइं जोणिप्पमुहसयसहस्साइं । पज्जत्तगणिसाए अपज्जत्तगा वक्कमंति, जत्थ एगो तत्थ नियमा असंखेज्जा । सेत्तं बायरवाउकाइया । सेत्तं वाउकाइया ॥ २६ ॥ से किं तं वणस्सइकाइया ? वणस्सइकाइया दुविहा पण्णत्ता । तंजहा-सुहुमवणस्सइकाइया य बायरवणस्सइकाइया य ॥ २७ ॥ से किं तं सुहुमवणस्सइकाइया ? सुहुमवणस्सइकाइया दुविहा पण्णत्ता । तंजहा-पज्जत्तगसुहुमवणस्सइकाइया य अपज्जत्तगसुहुमवणस्सइकाइया य । सेत्तं सुहुमवणस्सइकाइया ॥ २८ ॥ से किं तं बायरवणस्सइकाइया ? बायरवणस्सइकाइया दुविहा पन्नत्ता । तंजहा-पत्तेयसरीरबायरवणस्सइकाइया य साहारणसरीरबायरवणस्सइकाइया य ॥ २९ ॥ से किं तं पत्तेयसरीरबायरवणस्सइकाइया ? २ दुवालसविहा पन्नत्ता । तंजहा-१ रुक्खा २ गुच्छा ३ गुम्मा ४ लया

य ५ वल्ली य ६ पव्वगा चेव । ७ तण ८ वलय ९ हरिय १० ओसहिं ११ जलरुह  
 १२ कुहणा य बोद्धवा ॥ ३० ॥ से किं तं रुक्खा ? रुक्खा दुविहा पण्णत्ता ।  
 तंजहा—एगवीया य बहुवीयगा य ॥ ३१ ॥ से किं तं एगवीया ? एगवीया अणेग-  
 विहा पन्नत्ता । तंजहा—णिबंबजंबुकोसंबसालअंकुलपीलु सेल्ल य । सल्लइमोयइमालु-  
 यबउलपलासे करंजे य ॥ १ ॥ पुत्तंजीवयऽरिट्ठे बिहेलए हरिडए य भिल्लाए । उंबे-  
 भरियाखीरिणि बोद्धव्वे धायइपियाले ॥ २ ॥ पूइयनिंबकरंजे सण्हा तह सीसवा य  
 असणे य । पुत्रागनागरुक्खे सीवणि तहा असोगे य ॥ ३ ॥ जेयावणे तहप्पगारा ।  
 एएसि णं मूला वि असंखेज्जजीविया, कंदा वि, खंधा वि, तया वि, साला वि, पवाला  
 वि । पत्ता पत्तेयजीविया, पुप्फा अणेगजीविया, फला एगवीया । सेत्तं एगवीया  
 ॥ ३२ ॥ से किं तं बहुवीयगा ? बहुवीयगा अणेगविहा पन्नत्ता । तंजहा—अत्थियत्तेदु-  
 कविट्ठे अंबाडगमाउलिग बिळे य । आमलगफणिसदालिमआसोट्ठे उंबरवडे य ॥ १ ॥  
 गग्गोहणंदिरुक्खे पिप्परीं सयरी पिलुक्खरुक्खे य । काउंवरि कुत्थुंभरि बोद्धवा देव-  
 दाली य ॥ २ ॥ तिलए लउए छत्ताहसिरीसे सत्तवन्नदहिवन्ने । लोद्धवचंदणज्जुणणीमे  
 कुडए कयंबे य ॥ ३ ॥ जेयावन्ने तहप्पगारा । एएसि णं मूला वि असंखेज्जजीविया,  
 कंदा वि, खंधा वि, तया वि, साला वि, पवाला वि । पत्ता पत्तेयजीविया । पुप्फा  
 अणेगजीविया । फला बहुवीयगा । सेत्तं बहुवीयगा । सेत्तं रुक्खा ॥ ३३ ॥ से किं  
 तं गुच्छा ? गुच्छा अणेगविहा पन्नत्ता । तंजहा—वाइंगणिसल्लइथुण्डई य तह कच्छुरी  
 य जासुमणा । रुवी आढइ णीली तुलसी तह माउलिगी य ॥ १ ॥ कच्छुंभरि पिप्प-  
 लिया अयसी वल्ली य कायमाईया । वुच्चू पडोलकंदलि विउव्वा वत्थुले बयरे ॥ २ ॥  
 पत्तउर सीयउरए हवइ तहा जवसए य बोद्धव्वे । णिगुंडिय कत्तुंभरि अत्थई चेव  
 तालउडा ॥ ३ ॥ सणपाणकासमुद्गअग्घाडगसामसिंदुवारे य । कम्मइअहलसगकी-  
 रएरावणमहित्थे ॥ ४ ॥ जाउलगमालपरिलीगयमारिणिकुव्वकारिया भंडी । जावइ  
 केयइ तह गंज पाडला दासिअंकोळे ॥ ५ ॥ जेयावन्ने तहप्पगारा । सेत्तं गुच्छा  
 ॥ ३४ ॥ से किं तं गुम्मा ? गुम्मा अणेगविहा पन्नत्ता । तंजहा—सेरियए गोमालिय-  
 कोरंटयबंधुजीवगमणोजे । पिइयपाणकणयरकुज्जय तह सिंदुवारे य ॥ १ ॥ जाई  
 मोगगर तह जूहिया य तह मल्लिया य वासंती । वत्थुल कत्थुल सेवाल गंठि मगदं-  
 तिया चेव ॥ २ ॥ चंपगजाई गवणीइया य कुंदो तहा महाजाई । एवमणेगागारा  
 हवन्ति गुम्मा मुणेयव्वा ॥ ३ ॥ सेत्तं गुम्मा ॥ ३५ ॥ से किं तं लयाओ ? लयाओ  
 अणेगविहाओ पन्नत्ताओ । तंजहा—पउमलया णागलयअसोगचंपगलया य च्यलया ।  
 वणलयावासंतिलया अइमुत्तयकुंदसामलया ॥ जेयावन्ने तहप्पगारा । सेत्तं लयाओ ॥ ३६ ॥

से किं तं वल्लीओ ? वल्लीओ अणेगविहाओ पन्नत्ताओ । तंजहा—पूसफली कालिगी  
 तुंची तउसी य एलवालुंकी । घोसाडइ पंडोला पंचंगुलिया य णीली य ॥ १ ॥  
 कंड्या कड्डुइया कक्कोडई कारियल्लई सुभगा । कुयधाय वांगुलीया पा[व]वल्ली देव-  
 दाली य ॥ २ ॥ अप्फोया अइमुत्तगणागलया कण्हसूरवल्ली य । संघइसुमणसा वि  
 य जासुवणकुविंदवल्ली य ॥ ३ ॥ मुद्दिय अंबावल्ली छीरविराली जयंति गोवाली ।  
 पाणीमासावल्ली गुंजावल्ली य वच्छाणी ॥ ४ ॥ ससबिंदुगोत्तफुसिया गिरिकण्णइ मालुया  
 य अंजणई । दहिफोळइ कागणि मोगली य तह अक्कबोवी य ॥ ५ ॥ जेयावन्ने तह-  
 प्पगारा । सेत्तं वल्लीओ ॥ ३७ ॥ से किं तं पव्वगा ? पव्वगा अणेगविहा पन्नत्ता ।  
 तंजहा—इक्खू य इक्खुवाडी वीरण तह इक्कडे भमासे य । सुंटे सरे य वेत्ते तिमिरे  
 सयपोरणगले य ॥ १ ॥ वंसे वेल् कणए कंकावंसे य चाववंसे य । उदए कुडए विमए  
 कंडावेल् य कल्लाणे ॥ २ ॥ जेयावन्ने तहप्पगारा । सेत्तं पव्वगा ॥ ३८ ॥ से किं तं  
 तणा ? तणा अणेगविहा पन्नत्ता । तंजहा—सेडियभंतियहोंतियदब्भक्कुसे पव्वए य पोड-  
 इला । अज्जुण असाठए रोहियंसें सुयवेयखीरभुसे ॥ १ ॥ एरंडे कुरुविंदे करकर मुट्टे  
 तहा विभंगू य । महुरतणछुरयसिप्पिय बोद्धव्वे सुंकलितणे य ॥ २ ॥ जेयावन्ने  
 तहप्पगारा । सेत्तं तणा ॥ ३९ ॥ से किं तं वलया ? वलया अणेगविहा पन्नत्ता ।  
 तंजहा—तालतमाले तक्कलि तोयलि साली य सारकल्लाणे । सरले जावइ केयइ कयली  
 तह धम्मस्खे य ॥ १ ॥ भुयस्खवहिंगुस्खे लवंगस्खे य होइ बोद्धव्वे । पूयफली  
 खज्जूरी बोद्धव्वा णालिएरी य ॥ २ ॥ जेयावन्ने तहप्पगारा । सेत्तं वलया ॥ ४० ॥  
 से किं तं हरिया ? हरिया अणेगविहा पन्नत्ता । तंजहा—अजोख्हवोडाणे हरियग तह  
 तंदुलेज्जगतणे य । वत्थुलपोरग[अंजीर]पोइवल्ली य पालक्का ॥ १ ॥ दगपिप्पली य दव्वी  
 सोत्थियसाए तहेव बम्ही य । मूलगसरिसव अंबिलसाएय जियंतए चेव ॥ २ ॥  
 तुलसी कण्ह उराले फणिजए अज्जए य भूयणए । चोरगदमणगमसुयग सयपुप्फिदीवरे  
 य तहा ॥ ३ ॥ जेयावन्ने तहप्पगारा । सेत्तं हरिया ॥ ४१ ॥ से किं तं ओसहीओ ?  
 ओसहीओ अणेगविहाओ पण्णत्ताओ । तंजहा—सालीवीहीगोह्मजवजवजवकलमसूर-  
 तिलमुग्गमासणिप्फावकुलत्थआलिसंदसतीणपलिमंथगअयसीकुसुंभकोइवकंगूरालगव-  
 रा(रट्ट)सामकोदूससणसरिसवमूलगवीया । जेयावन्ने तहप्पगारा । सेत्तं ओसहीओ ॥ ४२ ॥  
 से किं तं जलरुहा ? जलरुहा अणेगविहा पन्नत्ता । तंजहा—उदए, अवए, पणए, सेवाले,  
 कलंबुया, हडे, कसेरुथा, कच्छ, भाणी, उप्पले, पउमे, कुमुए, णलिणे, सुभए,  
 सोगंधिए, पोण्डरीयए, महापोण्डरीयए, सयपत्ते, सहस्सपत्ते, कल्हारे, कीकणदे,  
 अरविंदे, तामरसे, भिसे, भिससुणाले, पोक्खले, पोक्खलत्थलए, जेयावन्ने तहप्प-

गारा । से तं जलरुहा ॥ ४३-१ ॥ से किं तं कुहणा ? कुहणा अणेगविहा पन्नत्ता । तंजहा-आए, काए, कुहणे, कुणक्के, दव्वहलिया, सप्फाए, सज्जाए, छतोए, वंसी, णहिया, कुरए । जेयावन्ने तहप्पगारा । सेतं कुहणा । णाणाविहसंठाणा खन्खाणं एगजीविया पत्ता । खंधा वि एगजीवा तालसरलणालिएरीणं ॥ १ ॥ जह सगलसरि-सवाणं सिलेसमिस्साण वट्टिया वट्ठी । पत्तेयसरीराणं तह होन्ति सरीरसंघाया ॥ २ ॥ जह वा तिलपप्पडिया बहुएहिं तिलेहिं संहया संती । पत्तेयसरीराणं तह होंति सरीरसंघाया ॥ ३ ॥ सेतं पत्तेयसरीरबायरवणस्सइकाइया ॥ ४३-२ ॥ से किं तं साहारणसरीरबायरवणस्सइकाइया ? साहारणसरीरबायरवणस्सइकाइया अणेगविहा पन्नत्ता । तंजहा-अवए पणए सेवालें लोहिणी[जाणिया] थिह् थिभगा । अस्सकन्नो सौहकन्नी सिउंदि तत्तो मुसुंढी य ॥ १ ॥ रुक्कुण्डरिया जीरु छीरविराली तहेव किट्ठी य । हालिद्दा सिंगवेरे य आलुगा मूलए इय ॥ २ ॥ कंबूया कल्लुकड महुपोवल्हं तहेव महुसिंगी । णीरुहो सप्पसुयंधा छिन्नरुहा चेव बीयरुहा ॥ ३ ॥ पाढा मियवालुंकी महुवरसा चेव रायवल्ली य । पडमा य माढरी दंती चंडी किट्ठित्ति यावरा ॥ ४ ॥ मासपण्णि मुग्गपण्णी जीवियरसहे य रेणुया चेव । काओली खीरकाओली तहा भंगी नही इय ॥ ५ ॥ किमिरासि भद्दमुत्था णंगलई पेलुगा इय । किण्हे पडले य हडे हर-तणुया चेव लोयाणी ॥ ६ ॥ कण्हकंदे वज्जे सूरणकंदे तहेव खल्लूडे । एए अणंतजीवा जेयावन्ने तहाविहा ॥ ७ ॥ तणमूलकंदमूले वंसीमूलेत्ति यावरे । संखिज्जमसंखिज्जा बोधव्वाऽणंतजीवा य ॥ ८ ॥ सिंघाडगस्स गुच्छो अणेगजीवो उ होइ नायव्वो । पत्ता पत्तेयजीया दोच्चि य जीवा फले भणिया ॥ ९ ॥ जस्स मूलस्स भग्गस्स समो भंगो पदीसइ । अणंतजीवे उ से मूले जेयावन्ने तहाविहा ॥ १० ॥ जस्स कंदस्स भग्गस्स समो भंगो पदीसइ । अणंतजीवे उ से कंदे जेयावन्ने तहाविहा ॥ ११ ॥ जस्स खंधस्स भग्गस्स समो भंगो पदीसइ । अणंतजीवे उ से खंधे जेयावन्ने तहाविहा ॥ १२ ॥ जीसे तयाए भग्गाए समो भंगो पदीसए । अणंतजीवा तया सा उ जेयावन्ना तहाविहा ॥ १३ ॥ जस्स सालस्स भग्गस्स समो भंगो पदीसए । अणंतजीवे य से साले जेयावन्ने तहाविहा ॥ १४ ॥ जस्स पवालस्स भग्गस्स समो भंगो पदीसए । अणंतजीवे पवाले से जेयावन्ने तहाविहा ॥ १५ ॥ जस्स पत्तस्स भग्गस्स समो भंगो पदीसए । अणंतजीवे उ से पत्ते जेयावन्ने तहाविहा ॥ १६ ॥ जस्स पुप्फस्स भग्गस्स समो भंगो पदीसए । अणंतजीवे उ से पुप्फे जेयावन्ने तहाविहा ॥ १७ ॥ जस्स फलस्स भग्गस्स समो भंगो पदीसए । अणंतजीवे फले से उ जेयावन्ने तहाविहा ॥ १८ ॥ जस्स बीयस्स भग्गस्स समो भंगो पदीसए । अणंतजीवे उ से बीए जेया-



वच्चे तहाविहा ॥ १९ ॥ जस्स मूलस्स भग्गस्स हीरो भंगो पदीसए । परित्तजीवे उ  
 से मूले जेयावच्चे तहाविहा ॥ २० ॥ जस्स कंदस्स भग्गस्स हीरो भंगो पदीसए ।  
 परित्तजीवे उ से कंदे जेयावच्चे तहाविहा ॥ २१ ॥ जस्स खंधस्स भग्गस्स हीरो  
 भंगो पदीसए । परित्तजीवे उ से खंधे जेयावच्चे तहाविहा ॥ २२ ॥ जीसे तयाए भग्गाए  
 हीरो भंगो पदीसए । परित्तजीवा तया सा उ जेयावच्चा तहाविहा ॥ २३ ॥ जस्स  
 सालस्स भग्गस्स हीरो भंगो पदीसए । परित्तजीवे उ से साले जेयावच्चे तहाविहा  
 ॥ २४ ॥ जस्स पवालस्स भग्गस्स हीरो भंगो पदीसए । परित्तजीवे पवाले उ जेयावच्चे  
 तहाविहा ॥ २५ ॥ जस्स पत्तस्स भग्गस्स हीरो भंगो पदीसए । परित्तजीवे उ से पत्ते  
 जेयावच्चे तहाविहा ॥ २६ ॥ जस्स पुप्फस्स भग्गस्स हीरो भंगो पदीसए । परित्तजीवे  
 उ से पुप्फे जेयावच्चे तहाविहा ॥ २७ ॥ जस्स फलस्स भग्गस्स हीरो भंगो पदीसए ।  
 परित्तजीवे फले से उ जेयावच्चे तहाविहा ॥ २८ ॥ जस्स बीयस्स भग्गस्स हीरो भंगो  
 पदीसए । परित्तजीवे उ से बीए जेयावच्चे तहाविहा ॥ २९ ॥ जस्स मूलस्स कट्ठाओ  
 छल्ली बहलयरी भवे । अणंतजीवा उ सा छल्ली जेयावच्चा तहाविहा ॥ ३० ॥ जस्स  
 कंदस्स कट्ठाओ छल्ली बहलयरी भवे । अणंतजीवा उ सा छल्ली जेयावच्चा तहाविहा  
 ॥ ३१ ॥ जस्स खंधस्स कट्ठाओ छल्ली बहलयरी भवे । अणंतजीवा उ सा छल्ली जे-  
 यावच्चा तहाविहा ॥ ३२ ॥ जीसे सालाए कट्ठाओ छल्ली बहलयरी भवे । अणंतजीवा  
 उ सा छल्ली जेयावच्चा तहाविहा ॥ ३३ ॥ जस्स मूलस्स कट्ठाओ छल्ली तणुयरी भवे ।  
 परित्तजीवा उ सा छल्ली जेयावच्चा तहाविहा ॥ ३४ ॥ जस्स कंदस्स कट्ठाओ छल्ली  
 तणुयरी भवे । परित्तजीवा उ सा छल्ली जेयावच्चा तहाविहा ॥ ३५ ॥ जस्स खंधस्स  
 कट्ठाओ छल्ली तणुयरी भवे । परित्तजीवा उ सा छल्ली जेयावच्चा तहाविहा ॥ ३६ ॥  
 जीसे सालाए कट्ठाओ छल्ली तणुयरी भवे । परित्तजीवा उ सा छल्ली जेयावच्चा तहा-  
 विहा ॥ ३७ ॥ चक्कागं भज्जमाणस्स गंठी चुण्णघणो भवे । पुद्विसरिसमेएण अणंत-  
 जीवं वियाणाहि ॥ ३८ ॥ गूढछिरागं पत्तं सच्छीरं जं च होइ निच्छीरं । जं पि य  
 पण्डुसंधिं अणंतजीवं वियाणाहि ॥ ३९ ॥ पुप्फा जलया थलया य बिटबद्धा य  
 नालबद्धा य । संखिज्जमसंखिज्जा बोद्धव्वाऽणंतजीवा य ॥ ४० ॥ जे केइ नालिया-  
 बद्धा पुप्फा संखिज्जजीविया भणिया । णिहुया अणंतजीवा जेयावच्चे तहाविहा ॥ ४१ ॥  
 पउमुप्पलिणीकंदे अंतरकंदे तहेव झिल्ली य । एए अणंतजीवा एगो जीवो बिसमुणाले  
 ॥ ४२ ॥ पलंडू ल्हसुणकंदे य कंदली य कुटुंबए । एए परित्तजीवा जेयावच्चे तहाविहा  
 ॥ ४३ ॥ पउमुप्पलनालिणं सुभगसोगंधियाण य । अरविंदकोकणाणं सयवत्तसह-  
 स्सपत्ताणं ॥ ४४ ॥ विटं बाहिरपत्ता य कच्चिया चेव एगजीवस्स । अब्भितरगा पत्ता

पत्तेयं केसरा मिंजा ॥ ४५ ॥ वेणुनलइक्खुवाडियसमासइक्खु य इक्कडे रंडे । करकर  
 सुंठि विहंगू तणाण तह पव्वगणं च ॥ ४६ ॥ अच्छि पव्वं पलिमोडओ य एगस्स  
 होति जीवस्स । पत्तेयं पत्ताइं पुप्फाईं अणेगजीवाइं ॥ ४७ ॥ पुस्सफलं कालिं तुवं  
 तउसेलवालुवालुं कं । घोसाडयं पंडालं तिंदूयं चैव तेंदूसं ॥ ४८ ॥ विट्ससारतया०  
 एयाइं हवति एगजीवस्स । पत्तेयं पत्ताइं सकेसरमकेसरं मिंजा ॥ ४९ ॥ सप्फाए  
 सज्जाए उव्वेहलिया य कुहणकुंदुक्के । एए अणंतजीवा कुंदुक्के होइ भयणा उ ॥ ५० ॥  
 वीए जोणिब्भूए जीवो वक्कमइ सो व अन्नो वा । जोऽवि य मूले जीवो सोऽवि य  
 पत्ते पढमयाए ॥ ५१ ॥ सव्वोऽवि किसलओ खलु उग्गममाणो अणंतओ भणिओ ।  
 सो चैव विवड्ढंतो होइ परित्तो अणंतो वा ॥ ५२ ॥ समयं वक्कंताणं समयं तेसिं  
 सरीरनिव्वत्ती । समयं आणुग्गहणं समयं ऊसासनीसासो ॥ ५३ ॥ इक्कस्स उ जं  
 गहणं बहूण साहारणाण तं चैव । जं बहुयाणं गहणं समासओ तं पि इक्कस्स ॥ ५४ ॥  
 साहारणमाहारो साहारणमाणुपाणगहणं च । साहारणजीवाणं साहारणलक्खणं  
 एयं ॥ ५५ ॥ जह अयगोलो धंतो जाओ तत्ततवणिज्जसंकासो । सव्वो अगणिपरि-  
 णओ निगोयजीवे तहा जाण ॥ ५६ ॥ एगस्स दोण्ह तिण्ह व संखिज्जाण व न  
 पासिउं सक्का । वीसंति सरीराइं निगोयजीवाणऽणंताणं ॥ ५७ ॥ लोगागासपएसे  
 निगोयजीवं ठवेहि इक्किक्कं । एवं मविज्जमाणा हवति लोगा अणंता उ ॥ ५८ ॥  
 लोगागासपएसे परित्तजीवं ठवेहि इक्किक्कं । एवं मविज्जमाणा हवति लोगा असंखिज्जा  
 ॥ ५९ ॥ पत्तेया पज्जत्ता पयरस्स असंखभागमिता उ । लोगाऽसंखा पज्जत्तयाण  
 साहारणमणंता ॥ ६० ॥ एएहिं सरीरेहिं पच्चक्खं ते पस्विया जीवा । सुहुमा  
 आणाणिज्जा चक्खुप्फासं न ते इति ॥ ६१ ॥ जेयावच्चे तहप्पगारा । ते समा-  
 सओ दुविहा पज्जत्ता । तंजहा-पज्जत्ता य अपज्जत्ता य । तत्थ णं जे ते अपज्ज-  
 त्ता ते णं असंपत्ता । तत्थ णं जे ते पज्जत्ता तेसिं णं वच्चादेसेणं गंधादेसेणं  
 रसादेसेणं फासादेसेणं सहस्सग्गसो विहाणाइं, संखिज्जाइं जोणिप्पमुहसयसहस्साइं ।  
 पज्जत्ताणिस्साए अपज्जत्ता वक्कमंति । जत्थ एगो तत्थ सिय संखिज्जा, सिय असं-  
 खिज्जा, सिय अणंता । एएसि णं इमाओ गाहाओ अणुगंतव्वाओ तंजहा-कंदा य  
 कंदमूला य, रुक्खमूला इयावरे । गुच्छा य गुम्मा वल्ली य, वेणुयाणि तणाणि य  
 ॥ १ ॥ पउमुप्पल संघाडे हडे य सेवाल किण्हए पणए । अवए य कच्छ भाणी  
 कंदुक्केगूणवीसइमे ॥ २ ॥ तयल्लीपवालेसु पत्तपुप्फफलेसु य । मूलगमज्जवीएसु  
 जोणी कस्सइ कित्तिया ॥ ३ ॥ सेत्तं साहारणसरीरबायरवणस्सइकाइया । सेत्तं बायर-  
 वणस्सइकाइया । सेत्तं वणस्सइकाइया । सेत्तं एगिदिया ॥ ४३-३ ॥ से किं तं वेईदिया ?

बेइंदिया अणेगविहा पन्नता । तंजहा-पुलाकिमिया, कुच्छिकिमिया, गंढूयलगा,  
 गोलोमा, णउरा, सोमंगलगा, वंसीमुहा, सूइमुहा, गोजलोया, जलोया, जालाउया,  
 संखा, संखणगा, धुळा, खुळा, गुलया, खंथा, वराडा, सोत्तिया, मुत्तिया, कलुया-  
 वासा, एगओवत्ता, दुहओवत्ता, नंदियावत्ता, संवुका, माइवाहा, सिप्पिसंपुडा,  
 चंदणा, समुदल्लिक्खा, जेयावन्ने तहप्पगारा । सव्वे ते संमुच्छिमा नपुंसगा । ते  
 समासओ दुविहा पन्नता । तंजहा-पज्जत्तगा य अपज्जत्तगा य । एसि णं एवमाइ-  
 याणं बेइंदियाणं पज्जत्तापज्जत्ताणं सत्त जाइकुलकोडिजोणीपमुहसयसहस्सा भवतीति  
 मक्खायं । सेत्तं बेइंदियसंसारसमावन्नजीवपन्नवणा ॥ ४४ ॥ से किं तं तेइंदियसं-  
 सारसमावन्नजीवपन्नवणा ? तेइंदियसंसारसमावन्नजीवपन्नवणा अणेगविहा पन्नता ।  
 तंजहा-ओवइया, रोहिणिया, कुंथू, पिपीलिया, उइंसगा, उइेहिया, उकलिया,  
 उप्पाया, उप्पाडा, तणाहारा, कट्टाहारा, मालुया, पत्ताहारा, तणबेंटिया, पत्तबें-  
 टिया, पुप्फबेंटिया, फलबेंटिया, बीयबेंटिया, तेबुरणमिंजिया, तओसिमिंजिया,  
 कप्पासत्थिमिंजिया, हिल्लिया, झिल्लिया, झिंगिरा, किंगिरिडा, बाहुया, लहुया,  
 सुभगा, सोवत्थिया, सुयवेंटा, इंदकाइया, इंदगोवया, तुरुंतुवगा, कुच्छलवाहगा,  
 जूया, हालाहला, पिसुया, सयवाइया, गोम्ही, हत्थिसोंडा, जेयावन्ने तहप्पगारा ।  
 सव्वे ते संमुच्छिमा नपुंसगा । ते समासओ दुविहा पन्नता । तंजहा-पज्जत्तगा य  
 अपज्जत्तगा य । एसि णं एवमाइयाणं तेइंदियाणं पज्जत्तापज्जत्ताणं अट्ठ जाइकुलको-  
 डिजोणिप्पमुहसयसहस्सा भवतीति मक्खायं । सेत्तं तेइंदियसंसारसमावन्नजीवपन्न-  
 वणा ॥ ४५ ॥ से किं तं चउरिंदियसंसारसमावन्नजीवपन्नवणा ? २ अणेगविहा  
 पन्नता । तंजहा-अंधियपत्तियमच्छियमसगा कीडे तहा पयंगे य । ढंकुणकुक्कडुकुह-  
 नंदावत्ते य सिंगिरडे ॥ किण्हपत्ता, नीलपत्ता, लोहियपत्ता, हालिहपत्ता, सुक्खिपत्ता,  
 चित्तपक्खा, विचित्तपक्खा, ओहंजलिया, जलचारिया, गंभीरा, णीणिया, तंतवा,  
 अच्छिरोडा, अच्छिवेहा, सारंग, नेउरा, दोला, भमरा, भरिली, जरुला, तोट्टा,  
 विंलुया, पत्तविच्छुया, छाणविच्छुया, जलविच्छुया, पियंगाला, कणगा, गोमयकीडा,  
 जेयावन्ने तहप्पगारा । सव्वे ते संमुच्छिमा नपुंसगा । ते समासओ दुविहा पन्नता ।  
 तंजहा-पज्जत्तगा य अपज्जत्तगा य । एसि णं एवमाइयाणं चउरिंदियाणं पज्जत्ताप-  
 ज्जत्ताणं नव जाइकुलकोडिजोणिप्पमुहसयसहस्साई भवतीति मक्खायं । सेत्तं चउरिं-  
 दियसंसारसमावन्नजीवपन्नवणा ॥ ४६ ॥ से किं तं पंचेन्द्रियसंसारसमावन्नजीवपन्न-  
 वणा ? २ चउरिविहा पन्नता । तंजहा-नेरइयपंचिंदियसंसारसमावन्नजीवपन्नवणा,  
 त्रिपिक्खजोर्णिगपंचिन्द्रियसंसारसमावन्नजीवपन्नवणा, मणुस्सपंचिन्द्रियसंसारसमावन्न-

जीवपन्नवणा, देवपंचिन्दियसंसारसमावन्नजीवपन्नवणा ॥ ४७ ॥ से किं तं नेरइया ? नेरइया सत्तविहा पन्नत्ता । तंजहा-१ रयणप्पभापुढविनेरइया, २ सक्करप्पभापुढविनेरइया, ३ वालुयप्पभापुढविनेरइया, ४ पंक्कप्पभापुढविनेरइया, ५ धूमप्पभापुढविनेरइया, ६ तमप्पभापुढविनेरइया, ७ तमतमप्पभापुढविनेरइया । ते समासओ दुविहा पन्नत्ता । तंजहा-पज्जत्तगा य अपज्जत्तगा य । सेत्तं नेरइया ॥ ४८ ॥ से किं तं पंचेदियतिरिक्खजोणिया ? पंचिदियतिरिक्खजोणिया ति विहा पन्नत्ता । तंजहा-१ जलयरपंचिदियतिरिक्खजोणिया य, २ थलयरपंचिन्दियतिरिक्खजोणिया य, ३ खह्यरपंचिन्दियतिरिक्खजोणिया य ॥ ४९ ॥ से किं तं जलयरपंचिन्दियतिरिक्खजोणिया ? जलयरपंचिन्दियतिरिक्खजोणिया पंचविहा पन्नत्ता । तंजहा-१ मच्छा, २ कच्छभा, ३ गाहा, ४ मगरा, ५ सुंसुमारा । से किं तं मच्छा ? मच्छा अपेगविहा पन्नत्ता । तंजहा-सण्हमच्छा, खवल्लमच्छा, जुंगमच्छा, विज्जडियमच्छा, हलिमच्छा, मगरिमच्छा, रोहियमच्छा, हलीसागरा, गागरा, वडा, वडगरा, गब्भया, उसगारा, तिमी, तिमिगिला, णक्का, तंदुलमच्छा, कणिकामच्छा, साली, सत्थियामच्छा, लंभणमच्छा, पडागा, पडागाइपडागा, जेयावन्ने तहप्पगारा । सेत्तं मच्छा । से किं तं कच्छभा ? कच्छभा दुविहा पन्नत्ता । तंजहा-अट्टिकच्छभा य मंसकच्छभा य । सेत्तं कच्छभा । से किं तं गाहा ? गाहा पंचविहा पन्नत्ता । तंजहा-१ दिली, २ वेडगा, ३ मुद्धया, ४ पुलया, ५ सीमागारा । सेत्तं गाहा । से किं तं मगरा ? मगरा दुविहा पन्नत्ता । तंजहा-१ सौंडमगरा य, २ मट्टमगरा य । सेत्तं मगरा । से किं तं सुंसुमारा ? सुंसुमारा एगागारा पन्नत्ता । सेत्तं सुंसुमारा । जेयावन्ने तहप्पगारा । ते समासओ दुविहा पन्नत्ता । तंजहा-संसुच्छिमा य गब्भवक्कंतिया य । तत्थ णं जे ते संसुच्छिमा ते सव्वे नपुंसगा । तत्थ णं जे ते गब्भवक्कंतिया ते तिविहा पन्नत्ता । तंजहा-इत्थी, पुरिसा, नपुंसगा । एसि णं एवमाइयाणं जलयरपंचिदियतिरिक्खजोणियाणं पज्जत्तापज्जत्ताणं अद्धतेरसजाइकुलकोडिजोणिप्पमुहसयसहस्सा भवन्तीति मक्खायं । सेत्तं जलयरपंचिदियतिरिक्खजोणिया ॥ ५० ॥ से किं तं थलयरपंचिदियतिरिक्खजोणिया ? थलयरपंचिन्दियतिरिक्खजोणिया दुविहा पन्नत्ता । तंजहा-चउप्पयथलयरपंचिन्दियतिरिक्खजोणिया य परिसप्पथलयरपंचिन्दियतिरिक्खजोणिया य । से किं तं चउप्पयथलयरपंचिन्दियतिरिक्खजोणिया ? चउप्पयथलयरपंचिन्दियतिरिक्खजोणिया चउव्विहा पन्नत्ता । तंजहा-एगखुरा, बिखुरा, गंडीपया, सणफया । से किं तं एगखुरा ? एगखुरा अपेगविहा पन्नत्ता । तंजहा-अस्सा, अस्सतरा, घोडगा, गद्भा, गोरक्खरा, कंदलगा, सिरिकंदलगा, आवत्तगा, जेयावन्ने तह-

प्पगारा । सेत्तं एगखुरा । से किं तं दुखुरा ? दुखुरा अणेगविहा पन्नता । तंजहा—उट्ठा, गोणा, गवया, रोज्जा, पसया, महिसा, मिया, संबरा, वराहा, अया, एलगरुसर-  
 भचमरकुरंगोक्कमाई, जेयावन्ने तहप्पगारा । सेत्तं दुखुरा । से किं तं गंडीपया ?  
 गंडीपया अणेगविहा पन्नता । तंजहा—हत्थी, हत्थीपूयणया, मंऊणहत्थी, खगा(ग्गा),  
 गंडा, जेयावन्ने तहप्पगारा । सेत्तं गंडीपया । से किं तं सणप्फया ? सणप्फया अणेगविहा  
 पन्नता । तंजहा—सीहा, वग्घा, दीविया, अच्छा, तरच्छा, परस्सरा, सियाला, विडाला,  
 सुणगा, कोलसुणगा, कोकंतिया, ससगा, चित्तगा, चिच्छलगा, जेयावन्ने तहप्पगारा ।  
 सेत्तं सणप्फया । ते समासओ दुविहा पन्नता । तंजहा—संमुच्छिमा य गम्भवक्कन्तिया  
 य । तत्थ णं जे ते संमुच्छिमा ते सव्वे नपुंसगा । तत्थ णं जे ते गम्भवक्कंतिया  
 ते तिविहा पन्नता । तंजहा—इत्थी, पुरिसा, नपुंसगा । एएसि णं एवमाइयाणं थलय-  
 रपंचिन्दियतिरिक्खजोणियाणं पज्जतापज्जताणं दस जाइकुलक्कोडिजोणिप्पमुहसयस-  
 हस्सा भवन्तीति मक्खायं । सेत्तं चउप्पयथलयरपंचिन्दियतिरिक्खजोणिया ॥ ५१ ॥  
 से किं तं परिसप्पथलयरपंचिन्दियतिरिक्खजोणिया ? परिसप्पथलयरपंचिन्दियतिरि-  
 क्खजोणिया दुविहा पन्नता । तंजहा—उरपरिसप्पथलयरपंचिन्दियतिरिक्खजोणिया य  
 भुयपरिसप्पथलयरपंचिन्दियतिरिक्खजोणिया य ॥ ५२ ॥ से किं तं उरपरिसप्पथल-  
 यरपंचिन्दियतिरिक्खजोणिया ? उरपरिसप्पथलयरपंचिन्दियतिरिक्खजोणिया चउ-  
 व्विहा पन्नता । तंजहा—अही, अयगरा, आसालिया, महोरगा । से किं तं अही ?  
 अही दुविहा पन्नता । तंजहा—दव्वीकरा य मउलिणो य । से किं तं दव्वीकरा ?  
 दव्वीकरा अणेगविहा पन्नता । तंजहा—आसीविसा, दिट्ठीविसा, उग्गविसा, भोग-  
 विसा, तयाविसा, लालाविसा, उस्सासविसा, नीसासविसा, कण्हसप्पा, सेयसप्पा,  
 काओदरा, दज्झपुप्फा, कोलाहा, मेलिमिंदा, सेसिंदा, जेयावन्ने तहप्पगारा । सेत्तं  
 दव्वीकरा । से किं तं मउलिणो ? मउलिणो अणेगविहा पन्नता । तंजहा—दिग्वागा,  
 गोणसा, कसाहीया, वइउला, चित्तलिणो, मंडलिणो, मालिणो, अही, अहिसलागा,  
 वासपडागा, जेयावन्ने तहप्पगारा । सेत्तं मउलिणो । सेत्तं अही । से किं तं अयगरा ?  
 अयगरा एगागारा पन्नता । सेत्तं अयगरा ॥ ५३ ॥ से किं तं आसालिया ? कहि णं  
 भंते ! आसालिया संमुच्छइ ?, गोयमा ! अंतो मणुस्सखेत्ते अट्ठाइजेसु दीवेसु, निव्वा-  
 घाएणं पन्नरससु कम्मभूमीसु, वाघायं पडुच्च पंचसु महाविदेहेसु, चक्कवट्ठिखंधावारेसु,  
 वासुदेवखंधावारेसु, बलदेवखंधावारेसु, मंडलियखंधावारेसु, महामंडलियखंधावारेसु,  
 गामनिवेसेसु, णगरनिवेसेसु, णिगमनिवेसेसु, खेडनिवेसेसु, कब्बडनिवेसेसु, मंडबनि-  
 वेसेसु, दोणमुहनिवेसेसु, पट्टणनिवेसेसु, आग्रनिवेसेसु, आसमनिवेसेसु, संबाहनिवे-

सेसु, रायहाणीनिवेसेसु, एसि णं चेव विणासेसु एत्थ णं आसालिया संमुच्छइ । जह्वेणं अंगुलस्स असंखेज्जभागमित्ताए ओगाहणाए, उक्कोसेणं बारसजोयणाई तय-  
णुह्वं च णं विक्खंभवाह्वेणं भूमिं दालित्ता णं समुट्ठेइ, असन्नी मिच्छादिट्ठी अण्णाणी  
अंतोमुहुत्तऽद्वाउया चेव कालं करेइ । सेत्तं आसालिया ॥ ५४ ॥ से किं तं महोरगा ?  
महोरगा अणेगविहा पन्नत्ता । तंजहा—अत्थेगइया अंगुलं पि, अंगुलपुहुत्तिया वि,  
वियत्थि पि, वियत्थिपुहुत्तिया वि, रयणिं पि, रयणिपुहुत्तिया वि, कुच्छि पि, कुच्छि-  
पुहुत्तिया वि, धणुं पि, धणुपुहुत्तिया वि, गाउयं पि, गाउयपुहुत्तिया वि, जोयणं  
पि, जोयणपुहुत्तिया वि, जोयणसयं पि, जोयणसयपुहुत्तिया वि, जोयणसहस्सं पि ।  
ते णं थले जाया, जलेऽवि चरंति थलेऽवि चरन्ति, ते णत्थि इहं, बाहिरएसु दीवेसु  
समुइएसु हवन्ति, जेयावन्ने तहप्पगारा । सेत्तं महोरगा । ते समासओ दुविहा पन्नत्ता ।  
तंजहा—संमुच्छिमा य गम्भवक्कंतिया य । तत्थ णं जे ते संमुच्छिमा ते सव्वे नपुं-  
सगा । तत्थ णं जे ते गम्भवक्कंतिया ते तिविहा पन्नत्ता । तंजहा—इत्थी, पुरिसा,  
नपुंसगा । एसि णं एवमाइयाणं पज्जत्तापज्जत्ताणं उरपरिसप्पाणं दसजाइकुलकोडि-  
जोणिप्पमुहसयसहस्सा भवन्तीति मक्खायं । सेत्तं उरपरिसप्पा ॥ ५५ ॥ से किं तं  
भुयपरिसप्पा ? भुयपरिसप्पा अणेगविहा पन्नत्ता । तंजहा—नउला, सेहा, सरडा, सल्ला,  
सरंठा, सारा, खोरा, घरोइला, विस्संभरा, मूसा, मंगुसा, पयलाइया, छीरविरालिया,  
जोहा, चउप्पाइया, जेयावन्ने तहप्पगारा । ते समासओ दुविहा पन्नत्ता । तंजहा—  
संमुच्छिमा य गम्भवक्कंतिया य । तत्थ णं जे ते संमुच्छिमा ते सव्वे नपुंसगा ।  
तत्थ णं जे ते गम्भवक्कंतिया ते तिविहा पन्नत्ता । तंजहा—इत्थी, पुरिसा, नपुंसगा ।  
एसि णं एवमाइयाणं पज्जत्तापज्जत्ताणं भुयपरिसप्पाणं नव जाइकुलकोडिजोणिप्पमुह-  
सयसहस्सा भवन्तीति मक्खायं । सेत्तं भुयपरिसप्पथलयरपंचिंदियतिरिक्खजोणिग्या ।  
सेत्तं परिसप्पथलयरपंचिंदियतिरिक्खजोणिग्या ॥ ५६ ॥ से किं तं खहयरपंचिन्दिय-  
तिरिक्खजोणिग्या ? खहयरपंचिन्दियतिरिक्खजोणिग्या चउव्विहा पन्नत्ता । तंजहा—  
चम्मपक्खी, लोमपक्खी, समुग्गपक्खी, विययपक्खी । से किं तं चम्मपक्खी ? चम्म-  
पक्खी अणेगविहा पन्नत्ता । तंजहा—वग्गुली, जलोया, अडिल्ला, भारंडपक्खी, जीवं-  
जीवा, समुइवायसा, कण्णत्तिया, पक्खिविरालिया, जेयावन्ने तहप्पगारा । सेत्तं चम्म-  
पक्खी । से किं तं लोमपक्खी ? लोमपक्खी अणेगविहा पन्नत्ता । तंजहा—ढंका, कंका,  
कुरला, वायसा, चक्कागा, हंसा, कलहंसा, रायहंसा, पायहंसा, आडा, सेडी, बगां,  
बलागा, पारिप्पवा, कोंचा, सारसा, मेसरा, मसूरा, मऊरा, सतहत्था, गहरा,  
पोंडरिया, कागा, कार्मिजुया, वंजुलया, तित्तिरा, वट्ठगा, लावगा, कवोया, कर्विजला,

पारेवया, चिडगा, चासा, कुक्कुडा, सुगा, बरहिणा, मयणसलगा, कोइला, सेहा, वरिद्धगमाई । सेत्तं लोमपक्खी । से किं तं समुग्गपक्खी ? समुग्गपक्खी एगागारा पन्नता । ते णं नत्थि इहं, बाहिरएसु दीवसमुद्देसु भवन्ति । सेत्तं समुग्गपक्खी । से किं तं विययपक्खी ? विययपक्खी एगागारा पन्नता । ते णं नत्थि इहं, बाहिरएसु दीवसमुद्देसु भवन्ति । सेत्तं विययपक्खी । ते समासओ दुविहा पन्नता । तंजहा—संमुच्छिमा य गब्भवक्कंतिया य । तत्थ णं जे ते संमुच्छिमा ते सव्वे नपुंसगा । तत्थ णं जे ते गब्भवक्कंतिया ते तिविहा पन्नता । तंजहा—इत्थी, पुरिसा, नपुंसगा । एएसि णं एवमाइयाणं खहयरपंचिन्दियतिरिक्खजोणियाणं पन्नतापन्नताणं बारस जाइकुलकोडिजोणिप्पमुहसयसहस्सा भवन्तीति मक्खायं । सत्तट्ठजाइकुलकोडिलक्ख नव अद्धतेरसाइं च । दस दस य होन्ति नवगा तह बारस चेव बोद्धव्वा । सेत्तं खहयरपंचिन्दियतिरिक्खजोणिया । सेत्तं पंचिन्दियतिरिक्खजोणिया ॥ ५७ ॥ से किं तं मणुस्सा ? मणुस्सा दुविहा पन्नता । तंजहा—संमुच्छिममणुस्सा य गब्भवक्कंतियमणुस्सा य ॥ ५८ ॥ से किं तं संमुच्छिममणुस्सा ? कहि णं मंते ! संमुच्छिममणुस्सा संमुच्छंति ?, गोयमा ! अंतो मणुस्सखेत्ते पणयालीसाए जोयणसयसहस्सेसु, अट्ठाइजेसु दीवसमुद्देसु, पन्नरससु कम्मभूमीसु, तीसाए अकम्मभूमीसु, छप्पन्नाए अंतरदीवएसु गब्भवक्कंतियमणुस्साणं चेव उच्चारएसु वा, पासवणेसु वा, खेलेसु वा, सिंघाणएसु वा, वंतेसु वा, पित्तएसु वा, पूएसु वा, सोणिएसु वा, सुक्केसु वा, सुक्कपुग्गलपरिसाडेसु वा, विगयजीवकलेवरेसु वा, थीपुरिससंजोएसु वा, णगरणिद्धमणेसु वा, सव्वेसु चेव असुइट्ठणेसु, एत्थ णं संमुच्छिममणुस्सा संमुच्छंति अंगुलस्स असंखेजइभागमेत्ताए ओगाहणाए । असक्खी सिच्छादिट्ठी अण्णाणी सव्वाहिं पज्जतीहिं अपज्जतगा अंतोमुहत्ताडया चेव कालं करंति । सेत्तं संमुच्छिममणुस्सा ॥ ५९ ॥ से किं तं गब्भवक्कंतियमणुस्सा ? गब्भवक्कंतियमणुस्सा तिविहा पन्नता । तंजहा—कम्मभूमगा, अकम्मभूमगा, अन्तरदीवगा ॥ ६० ॥ से किं तं अन्तरदीवगा ? अन्तरदीवगा अट्ठावीसविहा पन्नता । तंजहा—१ एगोस्स्या, २ आभासिया, ३ वेसाणिया, ४ णंगोलिया, ५ हयकन्ना, ६ गयकन्ना, ७ गोकन्ना, ८ सकुलिकन्ना, ९ आर्यसमुहा, १० सैंडमुहा, ११ अयोमुहा, १२ गोमुहा, १३ आसमुहा, १४ हत्थिमुहा, १५ सीहमुहा, १६ वग्गमुहा, १७ आसकन्ना, १८ हरिकन्ना, १९ अकन्ना, २० कण्णपाउरणा, २१ उक्कामुहा, २२ मेहमुहा, २३ विज्जुमुहा, २४ विज्जुदंता, २५ घणदंता, २६ लट्ठदंता, २७ गूढदंता, २८ सुद्धदंता । सेत्तं अन्तरदीवगा ॥ ६१ ॥ से किं तं अकम्मभूमगा ? अकम्मभूमगा तीसविहा पन्नता । तंजहा—पंचहिं हेमवएहिं, पंचहिं

हेरणवएहिं, पंचहिं हरिवासेहिं, पंचहिं रम्मगवासेहिं, पंचहिं देवकुरुहिं, पंचहिं उत्तर-  
कुरुहिं । सेतं अकम्मभूमगा ॥ ६२ ॥ से किं तं कम्मभूमगा ? कम्मभूमगा पन्नरसविहा  
पन्नता । तंजहा-पंचहिं भरहेहिं, पंचहिं एरवएहिं, पंचहिं महाविदेहेहिं । ते समासओ  
दुविहा पन्नता । तंजहा-आरिया य मिलक्खू य ॥ ६३ ॥ से किं तं मिलक्खू ?  
मिलक्खू अणेगविहा पन्नता । तंजहा-सगा जवणा चिलायसबरबब्बरकायसुरंडोडभ-  
डगनिण्णगपक्कणियाकुलक्खगोंडसिंहलपारसगोथाकोंचअंबडइदमिलचिल्लपुलिंदहारो-  
सदोववोक्काणगन्धाहारगपहलियअज्जलरोमपासपउसामलयायबंधुयायसुयलिकुंकुणग-  
मेयपलहवमालवमगरआमासियाणक्कचीणल्हसियखसाघासियणद्रमोंडडोंविलगलओ-  
सपओसकक्केयअक्खागट्ठणरोमगभरुमरुयचिलायविसयवासी य एवमाई । सेतं मिलक्खू  
॥ ६४ ॥ से किं तं आरिया ? आरिया दुविहा पन्नता । तंजहा-इड्ढिपत्तारिया य  
अणिड्ढिपत्तारिया य । से किं तं इड्ढिपत्तारिया ? इड्ढिपत्तारिया छव्विहा पन्नता ।  
तंजहा-१ अरहंता, २ चक्कवट्ठी, ३ बलदेवा, ४ वासुदेवा, ५ चारणा, ६ विजा-  
हरा । सेतं इड्ढिपत्तारिया । से किं तं अणिड्ढिपत्तारिया ? अणिड्ढिपत्तारिया नवविहा  
पन्नता । तंजहा-खेत्तारिया, जाइआरिया, कुलारिया, कम्मारिया, सिप्पारिया,  
भासारिया, नाणारिया, दंसणारिया, चरित्तारिया ॥ ६५ ॥ से किं तं खेत्तारिया ?  
खेत्तारिया अडल्लवीसइविहाणा पन्नता । तंजहा-रायगिह मगह चंपा, अंगा तह  
तामलित्ति वंगा य । कंचणपुरं कलिंगा, वाणारसी चेव कासी य ॥ १ ॥ साएय  
कोसला गयपुरं च कुरु सोरियं कुसट्टा य । कंपिल्लं पंचाला, अहिच्छता जंगला चेव  
॥ २ ॥ बारवई सोरट्टा, मिहिल विदेहा य वच्छ कोसंबी । नंदिपुरं संडिल्ला,  
भहिलपुरमेव मलया य ॥ ३ ॥ वइराड वच्छ वरणा, अच्छा तह मत्तियावइ दसण्णा ।  
सोत्तियवई य चेदी, वीयभयं सिंधुसोवीरा ॥ ४ ॥ महुरा य सूरसेणा, पावा भंगा य  
मास पुरिवट्टा । सावत्थी य कुणाला, कोडीवरिसं च लाठा य ॥ ५ ॥ सेयविया वि  
य णयरी, केकयअद्धं च आरियं भणियं । इत्थुप्पत्तीं जिणानं, चक्कीणं रामकण्हाणं  
॥ ६ ॥ सेतं खेत्तारिया ॥ ६६ ॥ से किं तं जाइआरिया ? जाइआरिया छव्विहा  
पन्नता । तंजहा-अंबट्टा य कलिंदा विदेहा वेदगा इ य । हरिया चुंचुणा चेव छ  
एया इब्भजाइओ ॥ सेतं जाइआरिया ॥ ६७ ॥ से किं तं कुलारिया ? कुलारिया  
छव्विहा पन्नता । तंजहा-उग्गा, भोगा, राइन्ना, इक्खाणा, णाया, कोरव्वा । सेतं  
कुलारिया ॥ ६८ ॥ से किं तं कम्मारिया ? कम्मारिया अणेगविहा पन्नता । तंजहा-  
दोसिया, सोत्तिया, कप्पासिया, सुत्तवेयालिया, भंडवेयालिया, कोलालिया, नरवाह-  
णिया, जेयावन्ने तहप्पगारा । सेतं कम्मारिया ॥ ६९ ॥ से किं तं सिप्पारिया ?



सिप्पारिया अणेगविहा पञ्चत्ता । तंजहा-तुण्णागा, तंतुवाया, पट्टागारा, देयडा, वस्त्रा, छवित्रया, कट्टपाउयारा, मुंजपाउयारा, छत्तारा, वज्झारा, पोत्थारा, लेप्पारा, चित्तारा, संखारा, दंतारा, भंडारा, जिज्झागारा, सेल्लारा, कोड्डिगारा, जेयावन्ने तहप्पगारा । सेत्तं सिप्पारिया ॥ ७० ॥ से किं तं भासारिया ? भासारिया जे णं अद्धमागहाए भासाए भासेंति, जत्थऽवि य णं बंभी लिवी पवत्तइ । बंभीए णं लिवीए अट्टारसविहे लेक्खविहाणे पञ्चत्ते । तंजहा-१ बंभी, २ जवणाणिया, ३ दोसापुरिया, ४ खरोट्ठी, ५ पुक्खरसारिया, ६ भोगवइया, ७ पहराइया, ८ अंतक्खरिया, ९ अक्खरपुट्टिया, १० वेणइया, ११ निण्हइया, १२ अंकलिबी, १३ गणियलिबी, १४ गंधव्वलिबी, १५ आयंसलिबी, १६ माहेसरी, १७ दोमिलिबी, १८ पोलिन्दी । सेत्तं भासारिया ॥ ७१ ॥ से किं तं नाणारिया ? नाणारिया पंचविहा पञ्चत्ता । तंजहा-आभिणिबोहि-यनाणारिया, सुयनाणारिया, ओहिनाणारिया, मणपज्जवनाणारिया, केवलनाणारिया । सेत्तं नाणारिया ॥ ७२ ॥ से किं तं दंसणारिया ? दंसणारिया दुविहा पञ्चत्ता । तंजहा-सरागदंसणारिया य वीयरगदंसणारिया य ॥ ७३ ॥ से किं तं सरागदंसणारिया ? सरागदंसणारिया दसविहा पञ्चत्ता । तंजहा-निसग्गुवएसरई आणारई सुत्तवीयरइमेव । अभिगमवित्थाररई किरियासंखेवधम्मरई ॥ १ ॥ भूयत्थेणाहिगया जीवाजीवे य पुण्णपावं च । सहसंमुइयाऽऽसवसंवरे य रोएइ उ निस्सग्गो ॥ २ ॥ जो जिणदिट्ठे भावे चउव्विहे सद्दहाइ सयमेव । एमेव नञ्जहति य निसग्गइति नायव्वो ॥ ३ ॥ एए चेव उ भावे उवदिट्ठे जो परेण सद्दहइ । छउमत्थेण जिणेण व उवएसइति नायव्वो ॥ ४ ॥ जो हेउमयान्तो आणाए रोयए पवयणं तु । एमेव नञ्जहति य एसो आणारई नाम ॥ ५ ॥ जो सुत्तमहिज्जन्तो सुएण ओगाहइ उ सम्मत्तं । अणेण बाहिरेण व सो सुत्तरइति नायव्वो ॥ ६ ॥ एणेण अणेगाइं पयाइं जो पसरई उ सम्मत्तं । उदए व्व तेल्लबिन्दू सो वीयरइति नायव्वो ॥ ७ ॥ सो होइ अभिगमरई सुयनाणं जस्स अत्थओ दिट्ठं । इक्कारस अंगाइं पडन्नगा दिट्ठिवाओ य ॥ ८ ॥ दव्वाण सव्वभावा सव्वपमाणेहिं जस्स उवलद्धा । सव्वाहिं नयविहीहिं वित्थारइति नायव्वो ॥ ९ ॥ दंसणनाणचरित्ते तवविणए सव्वसमिइगुत्तीसु । जो किरियाभावरई सो खलु किरियारई नाम ॥ १० ॥ अणभिग्गहियकुदिट्ठी संखेवइति होइ नायव्वो । अविसारओ पवयणे अणभिग्गहिओ य सेसेसु ॥ ११ ॥ जो अत्थिकायधम्मं सुयधम्मं खलु चरित्तधम्मं च । सद्दहइ जिणाभिहियं सो धम्मरइति नायव्वो ॥ १२ ॥ परमत्थसंथवो वा सुदिट्ठपरमत्थसेवणा वावि । वावन्नकुदंसणवज्जणा य सम्मत्तसद्दहणा ॥ १३ ॥ निस्संकिय निक्कंखिय निव्वितिगिच्छा अमूढदिट्ठी य ।

उववूहथिरीकरणे वच्छल्लपभावणे अट्ठ ॥ १४ ॥ सेत्तं सरागदंसणारिया ॥ ७४ ॥  
 से किं तं वीयरायदंसणारिया ? वीयरायदंसणारिया दुविहा पन्नत्ता । तंजहा—  
 उवसंतकसायवीयरायदंसणारिया य खीणकसायवीयरायदंसणारिया य । से किं तं  
 उवसंतकसायवीयरायदंसणारिया ? उवसंतकसायवीयरायदंसणारिया दुविहा पन्नत्ता ।  
 तंजहा—पढमसमयउवसंतकसायवीयरायदंसणारिया य अपढमसमयउवसंतकसाय-  
 वीयरायदंसणारिया य । अहवा चरिमसमयउवसंतकसायवीयरायदंसणारिया य  
 अचरिमसमयउवसंतकसायवीयरायदंसणारिया य । सेत्तं उवसंतकसायवीयरायदंसणा-  
 रिया । से किं तं खीणकसायवीयरायदंसणारिया ? खीणकसायवीयरायदंसणारिया  
 दुविहा पन्नत्ता । तंजहा—छउमत्थखीणकसायवीयरायदंसणारिया य केवल्लिखीणकसाय-  
 वीयरायदंसणारिया य । से किं तं छउमत्थखीणकसायवीयरायदंसणारिया ? छउ-  
 मत्थखीणकसायवीयरायदंसणारिया दुविहा पन्नत्ता । तंजहा—सयंबुद्धछउमत्थखीण-  
 कसायवीयरायदंसणारिया य बुद्धबोहियछउमत्थखीणकसायवीयरायदंसणारिया य ।  
 से किं तं सयंबुद्धछउमत्थखीणकसायवीयरायदंसणारिया ? सयंबुद्धछउमत्थखीण-  
 कसायवीयरायदंसणारिया दुविहा पन्नत्ता । तंजहा—पढमसमयसयंबुद्धछउमत्थखीण-  
 कसायवीयरायदंसणारिया य अपढमसमयसयंबुद्धछउमत्थखीणकसायवीयरायदंसणा-  
 रिया य । अहवा चरिमसमयसयंबुद्धछउमत्थखीणकसायवीयरायदंसणारिया य  
 अचरिमसमयसयंबुद्धछउमत्थखीणकसायवीयरायदंसणारिया य । सेत्तं सयंबुद्धछउमत्थ-  
 खीणकसायवीयरायदंसणारिया । से किं तं बुद्धबोहियछउमत्थखीणकसायवीयराय-  
 दंसणारिया ? बुद्धबोहियछउमत्थखीणकसायवीयरायदंसणारिया दुविहा पन्नत्ता ।  
 तंजहा—पढमसमयबुद्धबोहियखीणकसायवीयरायदंसणारिया य अपढमसमयबुद्धबोहि-  
 यछउमत्थखीणकसायवीयरायदंसणारिया य । अहवा चरिमसमयबुद्धबोहियछउमत्थ-  
 खीणकसायवीयरायदंसणारिया य अचरिमसमयबुद्धबोहियछउमत्थखीणकसायवीयरा-  
 यदंसणारिया य । सेत्तं बुद्धबोहियछउमत्थखीणकसायवीयरायदंसणारिया । सेत्तं  
 छउमत्थखीणकसायवीयरायदंसणारिया । से किं तं केवल्लिखीणकसायवीयरायदंसणा-  
 रिया ? केवल्लिखीणकसायवीयरायदंसणारिया दुविहा पन्नत्ता । तंजहा—सजोगि-  
 केवल्लिखीणकसायवीयरायदंसणारिया य अजोगिकेवल्लिखीणकसायवीयरायदंसणा-  
 रिया य । से किं तं सजोगिकेवल्लिखीणकसायवीयरायदंसणारिया ? सजोगिकेवल्लिखीण-  
 कसायवीयरायदंसणारिया दुविहा पन्नत्ता । तंजहा—पढमसमयसजोगिकेवल्लिखीणकसा-  
 यवीयरायदंसणारिया य अपढमसमयसजोगिकेवल्लिखीणकसायवीयरायदंसणारिया य ।  
 अहवा चरिमसमयसजोगिकेवल्लिखीणकसायवीयरायदंसणारिया य अचरिमसमय-

सजोगिकेवल्लिखीणकसायवीयरायदंसणारिया य । सेत्तं सजोगिकेवल्लिखीणकसायवीय-  
 रायदंसणारिया । से किं तं अजोगिकेवल्लिखीणकसायवीयरायदंसणारिया ? अजोगि-  
 केवल्लिखीणकसायवीयरायदंसणारिया दुविहा पन्नत्ता । तंजहा—पढमसमयअजोगि-  
 केवल्लिखीणकसायवीयरायदंसणारिया य अपढमसमयअजोगिकेवल्लिखीणकसायवीय-  
 रायदंसणारिया य । अहवा चरिमसमयअजोगिकेवल्लिखीणकसायवीयरायदंसणारिया  
 य अचरिमसमयअजोगिकेवल्लिखीणकसायवीयरायदंसणारिया य । सेत्तं अजोगि-  
 केवल्लिखीणकसायवीयरायदंसणारिया । सेत्तं केवल्लिखीणकसायवीयरायदंसणारिया ।  
 सेत्तं खीणकसायवीयरायदंसणारिया । सेत्तं दंसणारिया ॥ ७५ ॥ से किं तं  
 चरित्तारिया ? चरित्तारिया दुविहा पन्नत्ता । तंजहा—सरागचरित्तारिया य वीयराग-  
 चरित्तारिया य । से किं तं सरागचरित्तारिया ? सरागचरित्तारिया दुविहा पन्नत्ता ।  
 तंजहा—सुहुमसंपरायसरागचरित्तारिया य बायरसंपरायसरागचरित्तारिया य । से  
 किं तं सुहुमसंपरायसरागचरित्तारिया ? सुहुमसंपरायसरागचरित्तारिया दुविहा  
 पन्नत्ता । तंजहा—पढमसमयसुहुमसंपरायसरागचरित्तारिया य अपढमसमयसुहुम-  
 संपरायसरागचरित्तारिया य । अहवा चरिमसमयसुहुमसंपरायसरागचरित्तारिया य  
 अचरिमसमयसुहुमसंपरायसरागचरित्तारिया य । अहवा सुहुमसंपरायसरागचरित्ता-  
 रिया दुविहा पन्नत्ता । तंजहा—संकिलिस्समाणा य विसुज्झमाणा य । सेत्तं सुहुमसंप-  
 रायसरागचरित्तारिया । से किं तं बायरसंपरायसरागचरित्तारिया ? बायरसंपराय-  
 सरागचरित्तारिया दुविहा पन्नत्ता । तंजहा—पढमसमयबायरसंपरायसरागचरित्तारिया  
 य अपढमसमयबायरसंपरायसरागचरित्तारिया य । अहवा चरिमसमयबायरसंपराय-  
 सरागचरित्तारिया य अचरिमसमयबायरसंपरायसरागचरित्तारिया य । अहवा  
 बायरसंपरायसरागचरित्तारिया दुविहा पन्नत्ता । तंजहा—पडिवाई य अपडिवाई य ।  
 सेत्तं बायरसंपरायसरागचरित्तारिया ॥ ७६ ॥ से किं तं वीयरायचरित्तारिया ?  
 वीयरायचरित्तारिया दुविहा पन्नत्ता । तंजहा—उवसंतकसायवीयरायचरित्तारिया य  
 खीणकसायवीयरायचरित्तारिया य । से किं तं उवसंतकसायवीयरायचरित्तारिया ?  
 उवसंतकसायवीयरायचरित्तारिया दुविहा पन्नत्ता । तंजहा—पढमसमयउवसंतकसाय-  
 वीयरायचरित्तारिया य अपढमसमयउवसंतकसायवीयरायचरित्तारिया य । अहवा  
 चरिमसमयउवसंतकसायवीयरायचरित्तारिया य अचरिमसमयउवसंतकसायवीय-  
 रायचरित्तारिया य । सेत्तं उवसंतकसायवीयरायचरित्तारिया । से किं तं खीणकसाय-  
 वीयरायचरित्तारिया ? खीणकसायवीयरायचरित्तारिया दुविहा पन्नत्ता । तंजहा—  
 छउमत्थखीणकसायवीयरायचरित्तारिया य केवल्लिखीणकसायवीयरायचरित्तारिया य ।

से किं तं छउमत्थखीणकसायवीयरायचरित्तारिया ? छउमत्थखीणकसायवीयरायच-  
रित्तारिया दुविहा पन्नत्ता । तंजहा—सयंबुद्धछउमत्थखीणकसायवीयरायचरित्तारिया  
य बुद्धबोहियछउमत्थखीणकसायवीयरायचरित्तारिया य । से किं तं सयंबुद्धछउम-  
त्थखीणकसायवीयरायचरित्तारिया ? सयंबुद्धछउमत्थखीणकसायवीयरायचरित्तारिया  
दुविहा पन्नत्ता । तंजहा—पढमसमयसयंबुद्धछउमत्थखीणकसायवीयरायचरित्तारिया  
य अपढमसमयसयंबुद्धछउमत्थखीणकसायवीयरायचरित्तारिया य । अहवा चरिमस-  
मयसयंबुद्धछउमत्थखीणकसायवीयरायचरित्तारिया य अचरिमसमयसयंबुद्धछउमत्थ-  
खीणकसायवीयरायचरित्तारिया य । से किं तं बुद्धबोहियछउमत्थखीणकसायवीयरा-  
यचरित्तारिया ? बुद्धबोहियछउमत्थखीणकसायवीयरायचरित्तारिया दुविहा पन्नत्ता ।  
तंजहा—पढमसमयबुद्धबोहियछउमत्थखीणकसायवीयरायचरित्तारिया य अपढमसमय-  
बुद्धबोहियछउमत्थखीणकसायवीयरायचरित्तारिया य । अहवा चरिमसमयबुद्धबोहियछ-  
उमत्थखीणकसायवीयरायचरित्तारिया य अचरिमसमयबुद्धबोहियछउमत्थखीणकसा-  
यवीयरायचरित्तारिया य । सेतं बुद्धबोहियछउमत्थखीणकसायवीयरायचरित्तारिया ।  
सेतं छउमत्थखीणकसायवीयरायचरित्तारिया । से किं तं केवलखीणकसायवीयरा-  
यचरित्तारिया ? केवलखीणकसायवीयरायचरित्तारिया दुविहा पन्नत्ता । तंजहा—  
सजोगिकेवलखीणकसायवीयरायचरित्तारिया य अजोगिकेवलखीणकसायवीयरायच-  
रित्तारिया य । से किं तं सजोगिकेवलखीणकसायवीयरायचरित्तारिया ? सजोगिकेव-  
लखीणकसायवीयरायचरित्तारिया दुविहा पन्नत्ता । तंजहा—पढमसमयसजोगिकेव-  
लखीणकसायवीयरायचरित्तारिया य अपढमसमयसजोगिकेवलखीणकसायवीयराय-  
चरित्तारिया य । अहवा चरिमसमयसजोगिकेवलखीणकसायवीयरायचरित्तारिया य  
अचरिमसमयसजोगिकेवलखीणकसायवीयरायचरित्तारिया य । सेतं सजोगिकेवल-  
खीणकसायवीयरायचरित्तारिया । से किं तं अजोगिकेवलखीणकसायवीयरायचरि-  
त्तारिया ? अजोगिकेवलखीणकसायवीयरायचरित्तारिया दुविहा पन्नत्ता । तंजहा—  
पढमसमयअजोगिकेवलखीणकसायवीयरायचरित्तारिया य अपढमसमयअजोगिकेव-  
लखीणकसायवीयरायचरित्तारिया य । अहवा चरिमसमयअजोगिकेवलखीणकसाय-  
वीयरायचरित्तारिया य अचरिमसमयअजोगिकेवलखीणकसायवीयरायचरित्तारिया य ।  
सेतं अजोगिकेवलखीणकसायवीयरायचरित्तारिया । सेतं केवलखीणकसायवीयरायच-  
रित्तारिया । सेतं खीणकसायवीयरायचरित्तारिया । सेतं वीयरायचरित्तारिया । अहवा  
चरित्तारिया पंचविहा पन्नत्ता । तंजहा—सामाड्यचरित्तारिया, छेदोवद्वावणियचरित्ता-  
रिया, परिहारविबुद्धियचरित्तारिया, सुहुमसंपरायचरित्तारिया, अहक्खायचरित्तारिया

य । से किं तं सामाइयचरितारिया ? सामाइयचरितारिया दुविहा पन्नता । तंजहा—  
 इत्तरियसामाइयचरितारिया य आवकहियसामाइयचरितारिया य । सेत्तं सामाइयच-  
 रितारिया । से किं तं छेदोवट्ठावणियचरितारिया ? छेदोवट्ठावणियचरितारिया दुविहा  
 पन्नता । तंजहा—साइयारछेदोवट्ठावणियचरितारिया य निरइयारछेदोवट्ठावणियच-  
 रितारिया य । सेत्तं छेदोवट्ठावणियचरितारिया । से किं तं परिहारविसुद्धियचरिता-  
 रिया ? परिहारविसुद्धियचरितारिया दुविहा पन्नता । तंजहा—निविससमाणपरिहारवि-  
 सुद्धियचरितारिया य निविट्ठकाइयपरिहारविसुद्धियचरितारिया य । सेत्तं परिहारविसु-  
 द्धियचरितारिया । से किं तं सुहुमसंपरायचरितारिया ? सुहुमसंपरायचरितारिया  
 दुविहा पन्नता । तंजहा—संकिलिस्समाणसुहुमसंपरायचरितारिया य विसुज्झमाणसु-  
 हुमसंपरायचरितारिया य । से तं सुहुमसंपरायचरितारिया । से किं तं अहक्खायच-  
 रितारिया ? अहक्खायचरितारिया दुविहा पन्नता । तंजहा—छउमत्थअहक्खाय-  
 चरितारिया य केवल्लिअहक्खायचरितारिया य । सेत्तं अहक्खायचरितारिया । सेत्तं  
 चरितारिया । सेत्तं अणिट्ठिपत्तारिया । सेत्तं कम्मभूमगा । सेत्तं गम्भवक्कंतिया । सेत्तं  
 मणुस्सा ॥ ७७ ॥ से किं तं देवा ? देवा चउव्विहा पन्नता । तंजहा—भवणवासी,  
 वाणमंतरा, जोइसिया, वेमाणिया । से किं तं भवणवासी ? भवणवासी दसविहा  
 पन्नता । तंजहा—असुरकुमारा, नागकुमारा, सुवन्नकुमारा, विज्जुकुमारा, अग्गिकु-  
 मारा, दीवकुमारा, उदहिकुमारा, दिसाकुमारा, वाउकुमारा, थणियकुमारा । ते समा-  
 सओ दुविहा पन्नता । तंजहा—पज्जत्तगा य अपज्जत्तगा य । सेत्तं भवणवासी । से किं  
 तं वाणमंतरा ? वाणमंतरा अट्ठविहा पन्नता । तंजहा—किन्नरा, किंपुरिसा, महोरगा,  
 गंधव्वा, जक्खा, रक्खसा, भूया, पिसाया । ते समासओ दुविहा पन्नता ।  
 तंजहा—पज्जत्तगा य अपज्जत्तगा य । सेत्तं वाणमन्तरा । से किं तं जोइसिया ?  
 जोइसिया पंचविहा पन्नता । तंजहा—चंदा, स्र्रा, गहा, नक्खत्ता, तारा । ते  
 समासओ दुविहा पन्नता । तंजहा—पज्जत्तगा य अपज्जत्तगा य । सेत्तं जोइसिया ॥  
 से किं तं वेमाणिया ? वेमाणिया दुविहा पन्नता । तंजहा—कप्पोवगा य कप्पाइया  
 य । से किं तं कप्पोवगा ? कप्पोवगा बारसविहा पन्नता । तंजहा—सोहम्मा,  
 ईसाणा, सणकुमारा, माहिंदा, बंमलोया, लंतया, महासुक्का, सहस्सारा, आणया,  
 पाणया, आरणा, अञ्जुया । ते समासओ दुविहा पन्नता, तंजहा—पज्जत्तगा य  
 अपज्जत्तगा य । सेत्तं कप्पोवगा । से किं तं कप्पाइया ? कप्पाइया दुविहा पन्नता ।  
 तंजहा—गेविज्जगा य अणुत्तरोववाइया य । से किं तं गेविज्जगा ? गेविज्जगा नवविहा  
 पन्नता । तंजहा—हिट्ठिमहिट्ठिमगेविज्जगा, हिट्ठिममज्झिमगेविज्जगा, हेट्ठिमउवरि-

मगेविज्जगा, मज्झिमहेट्ठिमगेविज्जगा, मज्झिममज्झिमगेविज्जगा, मज्झिमउवरिमगेविज्जगा, उवरिमहेट्ठिमगेविज्जगा, उवरिममज्झिमगेविज्जगा, उवरिमउवरिमगेविज्जगा । ते समासओ दुविहा पन्नता । तंजहा—पज्जत्तगा य अपज्जत्तगा य । सेत्तं गेविज्जगा । से किं तं अणुत्तरोववाइया ? अणुत्तरोववाइया पंचविहा पन्नता । तंजहा—विजया, वेजयन्ता, जयन्ता, अपराजिया, सव्वट्ठसिद्धा । ते समासओ दुविहा पन्नता । तंजहा—पज्जत्तगा य अपज्जत्तगा य । सेत्तं अणुत्तरोववाइया । सेत्तं कप्पाइया । सेत्तं वेमाणिया । सेत्तं देश । सेत्तं पंविदिया । सेत्तं संसारसमावन्नजीवपन्नवणा । **सेत्तं जीवपन्नवणा । सेत्तं पन्नवणा ॥ ७८ ॥ पन्नवणाए भगवईए पढमं पन्नवणापयं समत्तं ।**

कहि णं भंते ! बायरपुढविकाइयाणं पज्जत्तगाणं ठाणा पन्नता ? गोयमा ! सट्ठाणेणं अट्ठसु पुढवीसु, तंजहा—रयणप्पभाए, सक्करप्पभाए, वालुयप्पभाए, पंकप्पभाए, धूमप्पभाए, तमप्पभाए, तमतमप्पभाए, ईसिप्पन्भाराए; अहोलोए पायालेसु, भवणेसु, भवणपत्थडेसु, निरएसु, निरयावलियासु, निरयपत्थडेसु; उट्ठलोए कप्पेसु, विमाणेसु, विमाणावलियासु, विमाणपत्थडेसु; तिरियलोए टंकेसु, कूडेसु, सेलेसु, सिहरीसु, पन्भारेसु, विजएसु, वक्खारेसु, वासेसु, वासहरपव्वएसु, वेलासु, वेइयासु, दारेसु, तोरणेसु, दीवेसु, समुदेसु, एत्थ णं बायरपुढविकाइयाणं पज्जत्तगाणं ठाणा पन्नता । उववाएणं लोयस्स असंखेज्जइभागे, समुग्घाएणं लोयस्स असंखेज्जइभागे, सट्ठाणेणं लोयस्स असंखेज्जइभागे ॥ ७९ ॥ कहि णं भंते ! बायरपुढविकाइयाणं अपज्जत्तगाणं ठाणा पन्नता ? गोयमा ! जत्थेव बायरपुढविकाइयाणं पज्जत्तगाणं ठाणा पन्नता तत्थेव बायरपुढविकाइयाणं अपज्जत्तगाणं ठाणा पन्नता । उववाएणं सव्वलोए, समुग्घाएणं सव्वलोए, सट्ठाणेणं लोयस्स असंखेज्जइभागे ॥ ८० ॥ कहि णं भंते ! सुहुमपुढविकाइयाणं पज्जत्तगाणं अपज्जत्तगाणं य ठाणा पन्नता ? गोयमा ! सुहुमपुढविकाइया जे पज्जत्तगा जे य अपज्जत्तगा ते सव्वे एगविहा अविसेसा अणाणत्ता सव्वलोयपरियावन्नगा पन्नता समणाउसो ! ॥ ८१ ॥ कहि णं भन्ते ! बायरआउकाइयाणं पज्जत्तगाणं ठाणा पन्नता ? गोयमा ! सट्ठाणेणं सत्तसु घणोदहीसु, सत्तसु घणोदहिवलएसु, अहोलोए पायालेसु, भवणेसु, भवणपत्थडेसु, उट्ठलोए कप्पेसु, विमाणेसु, विमाणावलियासु, विमाणपत्थडेसु, तिरियलोए अगडेसु, तलाएसु, नईसु, दहेसु, वावीसु, पुक्खरिणीसु, दीहियासु, गुंजालियासु, सरेसु, सरपंतियासु, सरसरपंतियासु, बिलेसु, बिलपंतियासु, उज्झरेसु, निज्झरेसु, चिल्ललएसु, पल्ललएसु, वप्पिणेसु, दीवेसु, समुदेसु, सव्वेसु चेवं जलासएसु जलट्ठाणेसु, एत्थ णं बायर-

आउकाइयाणं ठाणा पन्नत्ता । उववाएणं लोयस्स असंखेज्जइभागे, समुग्घाएणं लोयस्स असंखेज्जइभागे, सट्ठाणेणं लोयस्स असंखेज्जइभागे । कहि णं भंते ! बायर-  
आउकाइयाणं अपज्जत्तागाणं ठाणा पन्नत्ता ? गोयमा ! जत्थेव बायरआउकाइय-  
पज्जत्तागाणं ठाणा पन्नत्ता तत्थेव बायरआउकाइयाणं अपज्जत्तागाणं ठाणा पन्नत्ता ।  
उववाएणं सव्वलोए, समुग्घाएणं सव्वलोए, सट्ठाणेणं लोयस्स असंखे-  
ज्जइभागे । कहि णं भंते ! सुहुमआउकाइयाणं पज्जत्तागाणं अपज्जत्तागाणं य  
ठाणा पन्नत्ता ? गोयमा ! सुहुमआउकाइया जे पज्जत्तागा जे य अपज्जत्तागा ते सव्वे  
एगविहा अविसेसा अणाणत्ता सव्वलोयपरियावन्नगा पन्नत्ता समणाउसो ! ॥ ८२ ॥  
कहि णं भंते ! बायरतेउकाइयाणं पज्जत्तागाणं ठाणा पन्नत्ता ? गोयमा ! सट्ठाणेणं  
अंतोमणुस्सखेते अट्ठाइजेसु दीवसमुद्देसु, निव्वाधाएणं पन्नरससु कम्मभूमीसु, वाघायं  
पडुच्च पंचसु महाविदेहेसु, एत्थ णं बायरतेउकाइयाणं पज्जत्तागाणं ठाणा पन्नत्ता ।  
उववाएणं लोयस्स असंखेज्जइभागे, समुग्घाएणं लोयस्स असंखेज्जइभागे, सट्ठाणेणं  
लोयस्स असंखेज्जइभागे ॥ ८३ ॥ कहि णं भन्ते ! बायरतेउकाइयाणं अपज्जत्तागाणं  
ठाणा पन्नत्ता ? गोयमा ! जत्थेव बायरतेउकाइयाणं पज्जत्तागाणं ठाणा प० तत्थेव  
बायरतेउकाइयाणं अपज्जत्तागाणं ठाणा पन्नत्ता । उववाएणं लोयस्स दोसु उट्ठुक्काडेसु  
तिरियलोयतट्ठे य, समुग्घाएणं सव्वलोए, सट्ठाणेणं लोयस्स असंखेज्जइभागे ॥ ८४ ॥  
कहि णं भंते ! सुहुमतेउकाइयाणं पज्जत्तागाणं य अपज्जत्तागाणं य ठाणा पन्नत्ता ?  
गोयमा ! सुहुमतेउकाइया जे पज्जत्तागा जे य अपज्जत्तागा ते सव्वे एगविहा अविसेसा  
अणाणत्ता सव्वलोयपरियावन्नगा पन्नत्तास मणाउसो ! ॥ ८५ ॥ कहि णं भंते !  
बायरवाउकाइयाणं पज्जत्तागाणं ठाणा पन्नत्ता ? गोयमा ! सट्ठाणेणं सत्तसु घणवाएसु,  
सत्तसु घणवायवलएसु, सत्तसु तणुवाएसु, सत्तसु तणुवायवलएसु, अहोलोए पायालेसु,  
भवणेसु, भवणपत्थडेसु, भवणछिडेसु, भवणनिक्खुडेसु, निरएसु, निरयावलियासु,  
निरयपत्थडेसु, निरयछिडेसु, निरयनिक्खुडेसु, उट्ठुलोए कपेसु, विमाणेसु, विमाणा-  
वलियासु, विमाणपत्थडेसु, विमाणछिडेसु, विमाणनिक्खुडेसु, तिरियलोए पाईण-  
पडीणदाहिणउदीण-सव्वेसु चेव लोगागासछिडेसु, लोगनिक्खुडेसु य, एत्थ णं बायर-  
वाउकाइयाणं पज्जत्तागाणं ठाणा पन्नत्ता । उववाएणं लोयस्स असंखेजेसु भागेसु, समु-  
ग्घाएणं लोयस्स असंखेजेसु भागेसु, सट्ठाणेणं लोयस्स असंखेजेसु भागेसु ॥ ८६ ॥  
कहि णं भंते ! अपज्जत्ताबायरवाउकाइयाणं ठाणा पन्नत्ता ? गोयमा ! जत्थेव बायर-  
वाउकाइयाणं पज्जत्तागाणं ठाणा प० तत्थेव बायरवाउकाइयाणं अपज्जत्तागाणं ठाणा  
पन्नत्ता । उववाएणं सव्वलोए, समुग्घाएणं सव्वलोए, सट्ठाणेणं लोयस्स असंखेजेसु

भागेसु ॥ ८७ ॥ कहि णं भंते ! सुहुमवाउकाइयाणं पज्जत्तगाणं अपज्जत्तगाणं य  
 ठाणा पन्नत्ता ? गोयमा ! सुहुमवाउकाइया जे पज्जत्तगा जे य अपज्जत्तगा ते सव्वे  
 एगविहा अविसेसा अणाणत्ता सव्वलोयपरियावन्नगा पन्नत्ता समणाउसो ! ॥ ८८ ॥  
 कहि णं भंते ! बायरवणस्सइकाइयाणं पज्जत्तगाणं ठाणा पन्नत्ता ? गोयमा ! सट्ठाणेणं  
 सत्तसु घणोदहीसु, सत्तसु घणोदहिवलएसु, अहोलोए पायालेसु, भवणेसु, भवण-  
 पत्थडेसु; उड्डलोए कप्पेसु, विमाणेसु, विमाणावलियासु, विमाणपत्थडेसु; तिरियलोए  
 अगडेसु, तडागेसु, नईसु, दहेसु, वावीसु, पुक्खरिणीसु, दीहियासु, गुंजालियासु,  
 सरेसु, सरपंतियासु, सरसरपंतियासु, बिलेसु, बिलपंतियासु, उज्झरेसु, निज्झरेसु,  
 चिह्लेसु, पल्लेसु, वप्पिणेसु, दीवेसु, समुद्देसु, सव्वेसु चेव जलासएसु जलठाणेसु;  
 एत्थ णं बायरवणस्सइकाइयाणं पज्जत्तगाणं ठाणा पन्नत्ता । उववाएणं सव्वलोए, समु-  
 ग्घाएणं सव्वलोए, सट्ठाणेणं लोयस्स असंखेज्जइभागे ॥ ८९ ॥ कहि णं भंते ! बाय-  
 रवणस्सइकाइयाणं अपज्जत्तगाणं ठाणा पन्नत्ता ? गोयमा ! जत्थेव बायरवणस्सइकाइ-  
 याणं पज्जत्तगाणं ठाणा प० तत्थेव बायरवणस्सइकाइयाणं अपज्जत्तगाणं ठाणा पन्नत्ता ।  
 उववाएणं सव्वलोए, समुग्घाएणं सव्वलोए, सट्ठाणेणं लोयस्स असंखेज्जइभागे ॥ ९० ॥  
 कहि णं भंते ! सुहुमवणस्सइकाइयाणं पज्जत्तगाणं अपज्जत्तगाणं य ठाणा पन्नत्ता ?  
 गोयमा ! सुहुमवणस्सइकाइया जे पज्जत्तगा जे य अपज्जत्तगा ते सव्वे एगविहा  
 अविसेसा अणाणत्ता सव्वलोयपरियावन्नगा पन्नत्ता समणाउसो ! ॥ ९१ ॥ कहि णं  
 भंते ! बेईदियाणं पज्जत्तापज्जत्तगाणं ठाणा पन्नत्ता ? गोयमा ! उड्डलोए तदेक्कदेसभागे,  
 अहोलोए तदेक्कदेसभागे, तिरियलोए अगडेसु, तलाएसु, नईसु, दहेसु, वावीसु,  
 पुक्खरिणीसु, दीहियासु, गुंजालियासु, सरेसु, सरपंतियासु, सरसरपंतियासु, बिलेसु,  
 बिलपंतियासु, उज्झरेसु, निज्झरेसु, चिह्लेसु, पल्लेसु, वप्पिणेसु, दीवेसु, समुद्देसु,  
 सव्वेसु चेव जलासएसु जलठाणेसु, एत्थ णं बेईदियाणं पज्जत्तापज्जत्तगाणं ठाणा  
 पन्नत्ता । उववाएणं लोगस्स असंखेज्जइभागे, समुग्घाएणं लोगस्स असंखेज्जइभागे,  
 सट्ठाणेणं लोगस्स असंखेज्जइभागे ॥ ९२ ॥ कहि णं भंते ! तेईदियाणं पज्जत्ता-  
 पज्जत्तगाणं ठाणा पन्नत्ता ? गोयमा ! उड्डलोए तदेक्कदेसभाए, अहोलोए तदेक्कदेस-  
 भाए, तिरियलोए अगडेसु, तलाएसु, नईसु, दहेसु, वावीसु, पुक्खरिणीसु, दीहि-  
 यासु, गुंजालियासु, सरेसु, सरपंतियासु, सरसरपंतियासु, बिलेसु, बिलपंतियासु,  
 उज्झरेसु, निज्झरेसु, चिह्लेसु, पल्लेसु, वप्पिणेसु, दीवेसु, समुद्देसु, सव्वेसु चेव  
 जलासएसु जलठाणेसु, एत्थ णं तेईदियाणं पज्जत्तापज्जत्तगाणं ठाणा पन्नत्ता ।  
 उववाएणं लोयस्स असंखेज्जइभागे, समुग्घाएणं लोयस्स असंखेज्जइभागे, सट्ठाणेणं



लोयस्स असंखेज्जइभागे ॥ ९३ ॥ कहि णं भंते ! चउरिंदियाणं पज्जत्तापज्जत्ताणं  
 ठाणा पन्नत्ता ? गोयमा ! उड्डलोए तदेक्कदेसभागे, अहोलोए तदेक्कदेसभागे, तिरिय-  
 लोए अगडेसु, तलाएसु, नईसु, दहेसु, वावीसु, पुक्खरिणीसु, दीहियासु, गुंजा-  
 लियासु, सरेसु, सरपंतियासु, सरसरपंतियासु, बिलेसु, बिलपंतियासु, उज्झरेसु,  
 निज्झरेसु, चिळ्ळेसु, पळ्ळेसु, वप्पिणेसु, दीवेसु, समुद्देसु, सव्वेसु चेव जलासएसु  
 जलठाणेसु, एत्थ णं चउरिंदियाणं पज्जत्तापज्जत्ताणं ठाणा पन्नत्ता । उववाएणं  
 लोयस्स असंखेज्जइभागे, समुग्घाएणं लोयस्स असंखेज्जइभागे, सट्ठाणेणं लोयस्स  
 असंखेज्जइभागे ॥ ९४ ॥ कहि णं भंते ! पंचिंदियाणं पज्जत्तापज्जत्ताणं ठाणा  
 पन्नत्ता ? गोयमा ! उड्डलोए तदेक्कदेसभाए, अहोलोए तदेक्कदेसभाए, तिरियलोए  
 अगडेसु, तलाएसु, नईसु, दहेसु, वावीसु, पुक्खरिणीसु, दीहियासु, गुंजालियासु,  
 सरेसु, सरपंतियासु, सरसरपंतियासु, बिलेसु, बिलपंतियासु, उज्झरेसु, निज्झरेसु,  
 चिळ्ळेसु, पळ्ळेसु, वप्पिणेसु, दीवेसु, समुद्देसु, सव्वेसु चेव जलासएसु जलठाणेसु,  
 एत्थ णं पंचिंदियाणं पज्जत्तापज्जत्ताणं ठाणा पन्नत्ता । उववाएणं लोयस्स असंखे-  
 ज्जइभागे, समुग्घाएणं लोयस्स असंखेज्जइभागे, सट्ठाणेणं लोयस्स असंखेज्जइभागे  
 ॥ ९५ ॥ कहि णं भंते ! नेरइयाणं पज्जत्तापज्जत्ताणं ठाणा पन्नत्ता ? कहि णं भंते !  
 नेरइया परिवसन्ति ?, गोयमा ! सट्ठाणेणं सत्तसु पुढवीसु, तंजहा-रयणप्पभाए,  
 सक्करप्पभाए, वालुयप्पभाए, पंकप्पभाए, धूसप्पभाए, तमप्पभाए, तमतमप्पभाए,  
 एत्थ णं नेरइयाणं चउरासीइनिरयावाससयसहस्सा भवन्तीति मक्खायं । ते णं नरगा  
 अंतो वट्ठा, बाहिं चउरंसा, अहे खुरप्पसंठाणसंठिया, निच्चंय्यारतमसा, ववगयगहचंद-  
 सूरनक्खत्तजोइसियप्पहा, मेदवसापूयपडलरुहिरमंसच्चिक्खिल्लतिणुलेवणतला, असुई  
 [वीसा], परमदुब्बिगंधा, काउअगणिवण्णाभा, कक्खडफासा, दुरहियासा, असुभा  
 नरगा, असुभा नरगेसु वेयणाओ, एत्थ णं नेरइयाणं पज्जत्तापज्जत्ताणं ठाणा  
 पन्नत्ता । उववाएणं लोयस्स असंखेज्जइभागे, समुग्घाएणं लोयस्स असंखेज्जइभागे,  
 सट्ठाणेणं लोयस्स असंखेज्जइभागे, एत्थ णं बहवे नेरइया परिवसन्ति । काला, कालो-  
 भासा, गंभीरलोमहरिसा, भीमा, उत्तासणगा, परमकण्हा वज्जेणं पन्नत्ता समणा-  
 उसो ! । ते णं तत्थ निच्चं भीया, निच्चं तत्था, निच्चं तसिया, निच्चं उव्विगगा,  
 निच्चं परममसुहसंबद्धं णरगभयं पच्चणुभवमाणा विहरन्ति ॥ ९६ ॥ कहि णं  
 भंते ! रयणप्पभापुढवीनेरइयाणं पज्जत्तापज्जत्ताणं ठाणा पन्नत्ता ? कहि णं भंते !  
 रयणप्पभापुढवीनेरइया परिवसन्ति ?, गोयमा ! इमीसे रयणप्पभाए पु० असीउत्तर-  
 जोयणसयसहस्सबाहल्लाए उवरि एणं जोयणसहस्समोगाहिता हेट्ठा चेगं जोयण-

सहस्सं वज्जिता मज्झे अट्ठुत्तरे जोयणसयसहस्से एत्थ णं रयणप्पभापुढवी-  
 नेरइयाणं तीसं निरयावाससयसहस्सा भवन्तीति मक्खायं । ते णं णरगा अंतो  
 वट्ठा, बाहिं चउरंसा, अहे खुरप्पसंठाणसंठिया, निच्चंधयारतमसा, ववगयगहचंद-  
 सूरणक्खत्तजोइसप्पहा, मेदवसापूयपडलरुहिरमंसचिक्खिल्ललित्ताणुलेवणतला, असुई  
 [वीसा], परमदुब्बिगंधा, काउअगणिवण्णाभा, कक्खडफासा, दुरहियासा, असुभा  
 णरगा, असुभा णरगेसु वेयणाओ, एत्थ णं रयणप्पभापुढवीनेरइयाणं पज्जता-  
 पज्जताणं ठाणा पन्नत्ता, उववाएणं लोयस्स असंखेज्जभागे, समुग्घाएणं लोयस्स  
 असंखेज्जभागे, सट्ठाणेणं लोयस्स असंखेज्जभागे । तत्थ णं बहवे रयणप्पभापुढवी-  
 नेरइया परिवसन्ति । काला, कालोभासा, गंभीरलोमहरिसा, भीमा, उत्तासणगा,  
 परमकिण्हा वज्जेणं पन्नत्ता समणाउसो ! । ते णं तत्थ निच्चं मीया, निच्चं तत्था, निच्चं  
 तसिया, निच्चं उच्चिग्गा, निच्चं परममसुहसंबद्धं णरगभयं पच्चणुभवमाणा विहरन्ति  
 ॥ ९७ ॥ कहि णं भंते ! सक्करप्पभापुढवीनेरइयाणं पज्जतापज्जताणं ठाणा पन्नत्ता ?  
 कहि णं भंते ! सक्करप्पभापुढवीनेरइया परिवसन्ति ?, गोयमा ! सक्करप्पभापुढवीए  
 वतीसुत्तरजोयणसयसहस्सबाह्लाए उवरिं एगं जोयणसहस्सं ओगाहिता हेट्ठा चेगं  
 जोयणसहस्सं वज्जिता मज्झे तीसुत्तरे जोयणसयसहस्से एत्थ णं सक्करप्पभापुढवी-  
 नेरइयाणं पणवीसं निरयावाससयसहस्सा हवन्तीति मक्खायं । ते णं णरगा अंतो  
 वट्ठा, बाहिं चउरंसा, अहे खुरप्पसंठाणसंठिया, निच्चंधयारतमसा, ववगयगहचंद-  
 सूरनक्खत्तजोइसियप्पहा, मेदवसापूयपडलरुहिरमंसचिक्खिल्ललित्ताणुलेवणतला,  
 असुई[वीसा], परमदुब्बिगंधा, काउअगणिवण्णाभा, कक्खडफासा, दुरहियासा,  
 असुभा णरगा, असुभा णरगेसु वेयणाओ, एत्थ णं सक्करप्पभापुढवीनेरइयाणं  
 पज्जतापज्जताणं ठाणा पन्नत्ता । उववाएणं०, समुग्घाएणं०, सट्ठाणेणं लोयस्स  
 असंखेज्जभागे । तत्थ णं बहवे सक्करप्पभापुढवीनेरइया परिवसन्ति । काला,  
 कालोभासा, गंभीरलोमहरिसा, भीमा, उत्तासणगा, परमकिण्हा वज्जेणं पन्नत्ता सम-  
 णाउसो ! । ते णं तत्थ निच्चं मीया, निच्चं तत्था, निच्चं तसिया, निच्चं उच्चिग्गा,  
 निच्चं परममसुहसंबद्धं नरगभयं पच्चणुभवमाणा विहरन्ति ॥ ९८ ॥ कहि णं भंते !  
 वालुयप्पभापुढवीनेरइयाणं पज्जतापज्जताणं ठाणा पन्नत्ता ? कहि णं भंते ! वालुयप्प-  
 भापुढवीनेरइया परिवसन्ति ?, गोयमा ! वालुयप्पभापुढवीए अट्ठावीसुत्तरजोयणसय-  
 सहस्सबाह्लाए उवरिं एगं जोयणसहस्सं ओगाहिता हेट्ठा चेगं जोयणसहस्सं वज्जिता  
 मज्झे छव्वीसुत्तरजोयणसयसहस्से एत्थ णं वालुयप्पभापुढवीनेरइयाणं पन्नरसनर-  
 यावाससयसहस्सा भवन्तीति मक्खायं । ते णं णरगा अंतो वट्ठा, बाहिं चउरंसा,

अहे खुरप्पसंठाणसंठिया, निच्चंधयारतमसा, ववगयगहचंदसूरनक्खत्तजोइसियप्पहा,  
मेदवसापूयपडलरुहिरमंसचिक्खिखल्लित्ताणुलेवणतला, असुई[वीसा], परमदुब्धि-  
गंधा, काउअगणिवण्णाभा, कक्खडफासा, दुरहियासा, असुभा नरगा, असुभा नर-  
गेसु वेयणाओ । एत्थ णं वालुयप्पभापुढवीनेरइयाणं पज्जतापज्जताणं ठाणा पन्नत्ता ।  
उववाएणं लोयस्स असंखेज्जइभागे, समुग्घाएणं लोयस्स असंखेज्जइभागे, सट्ठाणेणं  
लोयस्स असंखेज्जइभागे । तत्थ णं बहवे वालुयप्पभापुढवीनेरइया परिवसंति ।  
काला, कालोभासा, गंभीरलोमहरिसा, भीमा, उत्तासणगा, परमकिण्हा वज्जेणं पन्नत्ता  
समणाउसो ! । ते णं तत्थ निच्चं भीया, निच्चं तत्था, निच्चं तसिया, निच्चं उव्विग्गा,  
निच्चं परममसुहसंबद्धं णरगभयं पच्चणुभवमाणा विहरन्ति ॥ ९९ ॥ कहि णं भन्ते !  
पंकप्पभापुढवीनेरइयाणं पज्जतापज्जताणं ठाणा पन्नत्ता ? कहि णं भन्ते ! पंकप्पभा-  
पुढवीनेरइया परिवसंति ? गोयसा ! पंकप्पभापुढवीए वीसुत्तरजोयणसयसहस्स-  
बाहल्लाए उवरिं एगं जोयणसहस्सं ओगाहिता हिट्ठा चेगं जोयणसहस्सं वज्जिता  
मज्झे अट्ठारसुत्तरे जोयणसयसहस्से एत्थ णं पंकप्पभापुढवीनेरइयाणं दस निरया-  
वाससयसहस्सा भवन्तीति मक्खायं । ते णं णरगा अंतो वट्ठा, बाहिं चउरंसा,  
अहे खुरप्पसंठाणसंठिया, निच्चंधयारतमसा, ववगयगहचंदसूरनक्खत्तजोइसियप्पहा,  
मेदवसापूयपडलरुहिरमंसचिक्खिखल्लित्ताणुलेवणतला, असुई[वीसा], परमदुब्धिगंधा,  
काउअगणिवण्णाभा, कक्खडफासा, दुरहियासा, असुभा नरगा, असुभा नरगेसु  
वेयणाओ, एत्थ णं पंकप्पभापुढवीनेरइयाणं पज्जतापज्जताणं ठाणा पन्नत्ता । उव-  
वाएणं लोयस्स असंखेज्जइभागे, समुग्घाएणं लोयस्स असंखेज्जइभागे, सट्ठाणेणं  
लोयस्स असंखेज्जइभागे । तत्थ णं बहवे पंकप्पभापुढवीनेरइया परिवसंति । काला  
कालोभासा गंभीरलोमहरिसा भीमा उत्तासणगा परमकिण्हा वज्जेणं पन्नत्ता समणा-  
उसो ! । ते णं तत्थ णिच्चं भीया, णिच्चं तत्था, णिच्चं तसिया, णिच्चं उव्विग्गा, णिच्चं  
परममसुहसंबद्धं णरगभयं पच्चणुभवमाणा विहरन्ति ॥ १०० ॥ कहि णं भन्ते !  
धूमप्पभापुढवीनेरइयाणं पज्जतापज्जताणं ठाणा पन्नत्ता ? कहि णं भन्ते ! धूमप्पभा-  
पुढवीनेरइया परिवसन्ति ? गोयसा ! धूमप्पभापुढवीए अट्ठारसुत्तरजोयणसयसहस्स-  
बाहल्लाए उवरिं एगं जोयणसहस्सं ओगाहिता हेट्ठा चेगं जोयणसहस्सं वज्जिता  
मज्झे सोलसुत्तरे जोयणसयसहस्से एत्थ णं धूमप्पभापुढवीनेरइयाणं तिप्पि निर-  
यावाससयसहस्सा भवन्तीति मक्खायं । ते णं णरगा अंतो वट्ठा, बाहिं चउरंसा,  
अहे खुरप्पसंठाणसंठिया, निच्चंधयारतमसा, ववगयगहचंदसूरनक्खत्तजोइसियप्पहा,  
मेदवसापूयपडलरुहिरमंसचिक्खिखल्लित्ताणुलेवणतला, असुई[वीसा], परमदुब्धिगंधा,

काउअगणिवण्णाभा, कक्खडफासा, दुरहियासा, असुभा नरगा, असुभा नरगेसु वेयणाओ, एत्थ णं धूमप्पभापुढवीनेरइयाणं पज्जत्तापज्जत्ताणं ठाणा पज्जत्ता । उववा-  
 एणं लोयस्स असंखेज्जइभागे, समुग्घाएणं लोयस्स असंखेज्जइभागे, सट्ठाणेणं लोयस्स  
 असंखेज्जइभागे । तत्थ णं बहवे धूमप्पभापुढवीनेरइया परिवसन्ति । काला कालो-  
 भासा गंभीरलोमहरिसा भीमा उत्तासणगा परमकिण्हा वज्जेणं पज्जत्ता समणाउसो ! ।  
 ते णं तत्थ निच्चं भीया, निच्चं तत्था, निच्चं तसिया, निच्चं उव्विग्गा, निच्चं परम-  
 मसुहसंबद्धं नरगभयं पच्चणुभवमाणा विहरन्ति ॥ १०१ ॥ कहि णं भंते ! तमा-  
 पुढवीनेरइयाणं पज्जत्तापज्जत्ताणं ठाणा पज्जत्ता ? कहि णं भंते ! तमापुढवीनेरइया  
 परिवसन्ति ?, गोयमा ! तमाए पुढवीए सोलसुत्तरजोयणसयसहस्सबाहल्लाए उवरिं  
 एणं जोयणसहस्सं ओगाहिता हिट्ठा चेगं जोयणसहस्सं वज्जित्ता मज्झे चउदसुत्तरे  
 जोयणसयसहस्से एत्थ णं तमप्पभापुढवीनेरइयाणं एगे पंचूणे णरगावासयसहस्से  
 भवतीति मक्खायं । ते णं णरगा अंतो वट्ठा, बाहिं चउरंसा, अहे खुरप्पसंठाण-  
 संठिया, निच्चंधयारतमसा, ववगयगहचंदसूरनक्खत्तजोइसियप्पहा, मेदवसापूयपडल-  
 रुहिरमंसच्चिक्खिल्लित्ताणुलेवणतला, असुई [वीसा], परमदुब्बिगंधा, कक्खडफासा,  
 दुरहियासा, असुभा नरगा, असुभा नरगेसु वेयणाओ, एत्थ णं तमापुढवीनेरइयाणं  
 पज्जत्तापज्जत्ताणं ठाणा पज्जत्ता । उववाएणं लोयस्स असंखेज्जइभागे, समुग्घाएणं  
 लोयस्स असंखेज्जइभागे, सट्ठाणेणं लोयस्स असंखेज्जइभागे । तत्थ णं बहवे तमप्पभा-  
 पुढवीनेरइया परिवसन्ति । काला कालोभासा गंभीरलोमहरिसा भीमा उत्तासणगा  
 परमकिण्हा वज्जेणं पज्जत्ता समणाउसो ! । ते णं तत्थ निच्चं भीया, निच्चं तत्था, निच्चं  
 तसिया, निच्चं उव्विग्गा, निच्चं परममसुहसंबद्धं नरगभयं पच्चणुभवमाणा विहरन्ति  
 ॥ १०२ ॥ कहि णं भंते ! तमतमापुढवीनेरइयाणं पज्जत्तापज्जत्ताणं ठाणा पज्जत्ता ? कहि  
 णं भंते ! तमतमापुढवीनेरइया परिवसन्ति ?, गोयमा ! तमतमाए पुढवीए अट्ठोत्तर-  
 जोयणसयसहस्सबाहल्लाए उवरिं अद्धतेवच्चं जोयणसहस्साइ ओगाहिता हिट्ठा वि  
 अद्धतेवच्चं जोयणसहस्साइ वज्जित्ता मज्झे तीसु जोयणसहस्सेसु एत्थ णं तमतमा-  
 पुढवीनेरइयाणं पज्जत्तापज्जत्ताणं पंचदिसि पंच अणुत्तरा महइमहाल्लया महानिरया  
 पज्जत्ता । तंजहा—काले महाकाले रोहए महारोहए अपडट्ठाणे । ते णं णरगा अंतो  
 वट्ठा, बाहिं चउरंसा, अहे खुरप्पसंठाणसंठिया, निच्चंधयारतमसा, ववगयगहचंद-  
 सूरनक्खत्तजोइसियप्पहा, मेदवसापूयपडलरुहिरमंसच्चिक्खिल्लित्ताणुलेवणतला, असुई  
 [वीसा], परमदुब्बिगंधा, कक्खडफासा, दुरहियासा, असुभा नरगा, असुभा  
 नरगेसु वेयणाओ, एत्थ णं तमतमापुढवीनेरइयाणं पज्जत्तापज्जत्ताणं ठाणा पज्जत्ता ।

उववाएणं लोयस्स असंखेज्जइभागे, समुग्घाएणं लोयस्स असंखेज्जइभागे, सट्ठाणेणं लोयस्स असंखेज्जइभागे । तत्थ णं बह्वे तमतमापुढवीनेरइया परिवसंति । काला कालोभासा गंभीरलोमहरिसा भीमा उत्तासणगा परमकिण्हा वञ्चेणं पञ्चत्ता समणा-उसो ! । ते णं तत्थ निच्चं भीया, निच्चं तत्था, निच्चं तसिया, निच्चं उव्विग्गा, निच्चं परममसुहसंबद्धं णरगभयं पच्चणुभवमाणा विहरन्ति । आसीयं बत्तीसं अट्ठावीसं च हुंति वीसं च । अट्ठारससोलसगं अट्ठुत्तरमेव हिट्ठिमिया ॥ १ ॥ अट्ठुत्तरं च तीसं छव्वीसं चेव सयसहस्सं तु । अट्ठारस सोलसगं चउइसमहियं तु छट्ठीए ॥ २ ॥ अद्धतिवन्नसहस्सा उवरिमहे वज्जिऊण तो भणियं । मज्झे तिसहस्सेसुं होन्ति उ नरगा तमतमाए ॥ ३ ॥ तीसा य पञ्चवीसा पन्नरस दसेव सयसहस्साइं । तिञ्जि य पंचूणेगं पंचेव अणुत्तरा नरगा ॥ ४ ॥ १०३ ॥ कहि णं भंते ! पंचिंदियतिरिक्ख-जोणियाणं पज्जत्तापज्जत्ताणं ठाणा पञ्चत्ता ? गोयमा ! उट्ठुलोए तदेक्कदेसभाए, अट्ठोलोए तदेक्कदेसभाए, तिरियलोए अगडेसु, तलाएसु, नईसु, दहेसु, वावीसु, पुक्खरिणीसु, दीहियासु, गुंजालियासु, सरेसु, सरपंतियासु, सरसरपंतियासु, बिल्लेसु, बिलपंतियासु, उज्जारेसु, निज्जारेसु, चिल्लेसु, पळ्ळेसु, वप्पिणेसु, दीवेसु, समुद्देसु, सव्वेसु चेव जलासएसु जलठाणेसु, एत्थ णं पंचिंदियतिरिक्खजोणियाणं पज्जत्तापज्जत्ताणं ठाणा पञ्चत्ता । उववाएणं लोयस्स असंखेज्जइभागे, समुग्घाएणं सव्वलोयस्स असंखेज्जइभागे, सट्ठाणेणं सव्वलोयस्स असंखेज्जइभागे ॥ १०४ ॥ कहि णं भंते ! मणुस्साणं पज्जत्तापज्जत्ताणं ठाणा पञ्चत्ता ? गोयमा ! अंतो मणुस्सखेत्ते पणयालीसाए जोयणसयसहस्सेसु, अट्ठाइजेसु दीवससुद्देसु, पन्नरससु कम्मभूमीसु, तीसाए अकम्मभूमीसु, छप्पन्नाए अंतरदीवेसु, एत्थ णं मणुस्साणं पज्जत्तापज्जत्ताणं ठाणा पञ्चत्ता । उववाएणं लोयस्स असंखेज्जइभागे, समुग्घाएणं सव्वलोए, सट्ठाणेणं लोयस्स असंखेज्जइभागे ॥ १०५ ॥ कहि णं भंते ! भवणवासीणं देवाणं पज्जत्ता-पज्जत्ताणं ठाणा पञ्चत्ता ? कहि णं भंते ! भवणवासी देवा परिवसंति ?, गोयमा ! इमीसे रयणप्पभाए पुढवीए असीउत्तरजोयणसयसहस्सबाहल्लाए उवरिं एगं जोयण-सहस्सं ओगाहिन्ता हेट्ठा चेगं जोयणसहस्सं वज्जिता मज्झे अट्ठुत्तरे जोयणसयसहस्से एत्थ णं भवणवासीणं देवाणं पज्जत्तापज्जत्ताणं सत्त भवणकोडीओ बावत्तरि भवणावा-ससयसहस्सा भवन्तीति मक्खायं । ते णं भवणा बाहिं वट्ठा, अन्तो चउरंसा, अहे पुक्खरकन्नियासंठाणसंठिया, उक्किन्नंतरविउल्लगंभीरखायफलिहा, पागारट्ठालयकवाड-तोरणपडिदुवारदेसभागा, जंतसयग्घिमुसलमुसंढिपरियारिया, अउज्झा, सयाजया, सयाणुत्ता, अडयालकोट्टुगरइया, अडयालकयवणमाला, खेमा, सिवा, किंकरामरदंडो-

वरक्खिया, लाउल्लोइयमहिया, गोसीससरसरत्तचंदणदहरदिन्नपंचंगुलितला, उवचिय-  
चंदणकलसा, चंदणघडसुकयतोरणपडिदुवारदेसभागा, आसत्तोसत्तविउलवट्टवग्घारि-  
यमल्लदामकलावा, पंचवन्नसरससुरभिमुक्कपुप्फपुंजोवयारकलिया, कालागुरुपवरकुंदुरु-  
क्कतुरुक्कधूवमघमघंतगंधुडुयाभिरामा, सुगंधवरगंधिया, गंधवट्टिभूया, अच्छरगणसंघ-  
संविकिन्ना, दिव्वतुडियसदसंपणइया, सव्वरयणामया, अच्छा, सण्हा, लण्हा, घट्ठा,  
मट्ठा, पीरया, निम्मला, निप्पका, निक्कंडच्छाया, सप्पहा, सस्सिरीया, समरीइया,  
सउज्जोया, पासादीया, दरिसणिज्जा, अभिरूवा, पडिरूवा । एत्थ णं भवणवासिदे-  
वाणं पज्जत्तापज्जत्ताणं ठाणा पन्नत्ता । उववाएणं लोयस्स असंखेज्जइभागे, समुग्घाएणं  
लोयस्स असंखेज्जइभागे, सट्ठाणेणं लोयस्स असंखेज्जइभागे । तत्थ णं बहवे भवण-  
वासी देवा परिवसंति । तंजहा-असुरा नाग सुवन्ना विज्जू अग्गी य दीव उदही य ।  
दिसिपवणथणियनामा दसहा एए भवणवासी ॥ चूडामणिमउडरयणाभूसणणागकड-  
गल्लवइरपुन्नकलसंकिउप्फेसा, सीहहयवरगयंकमगरवरवट्ठमाणनिज्जुत्तचित्तचिंघगया,  
सुरूवा, महिह्विया, महज्जुइया, महब्बला, महायसा, महाणुभावा, महासोक्खा,  
हारविराइयवच्छा, कडगतुडियथंभियभुया, अंगदकुंडलमट्ठगंडतलकन्नपीडधारी,  
विचित्तहत्थाभरणा, विचित्तमालामउलिमउडा, कल्लानगपवरवत्थपरिहिया, कल्लान-  
गपवरमल्लानुलेवणधरा, भासुरवोदी, पलंबवणमालधरा, दिव्वेणं वन्नेणं दिव्वेणं गंधेणं  
दिव्वेणं फासेणं दिव्वेणं संघयणेणं दिव्वेणं संठाणेणं दिव्वाए इह्वीए दिव्वाए जुईए  
दिव्वाए पभाए दिव्वाए छायाए दिव्वाए अच्छीए दिव्वेणं तेएणं दिव्वाए लेसाए दस  
दिसाओ उज्जोवेमाणा पभासेमाणा, ते णं तत्थ साणं साणं भवणावाससयसहस्साणं,  
साणं साणं सामाणियसाहस्सीणं, साणं साणं तायत्तीसाणं, साणं साणं लोगपालाणं,  
साणं साणं अग्गमहिसीणं, साणं साणं परिसाणं, साणं साणं अणियाणं, साणं साणं  
अणियाहिवईणं, साणं साणं आयरक्खदेवसाहस्सीणं, अन्नेसिं च बहूणं भवणवासीणं  
देवाणं य देवीणं य आहेवच्चं पोरेवच्चं सामित्तं भट्ठित्तं महत्तरगतं आपाईसरसेणावच्चं  
कारेमाणा, पालेमाणा, महया हयनट्ठगीयवाइयतंतितलतालुडियघणमुंगपडुप्पवाइ-  
यरवेणं दिव्वाइं भोगभोगाइं भुंजमाणा विहरंति ॥ १०६ ॥ कहि णं भंते !  
असुरकुमारारणं देवाणं पज्जत्तापज्जत्ताणं ठाणा पन्नत्ता ? कहि णं भंते ! असुरकुमारा  
देवा परिवसंति ?, गोयमा ! इमीसे रयणप्पभाए पुढवीए असीउत्तरजोयणसयसहस्स-  
बाहल्लाए उवरि एणं जोयणसहस्सं ओगाहिता हेट्ठा चेगं जोयणसहस्सं वज्जिता  
मज्झे अट्ठहुत्तरे जोयणसयसहस्से एत्थ णं असुरकुमारारणं देवाणं चउसट्ठिं भवणा-  
वाससयसहस्सा भवन्तीति मक्खायं । ते णं भवणा बाहिं वट्ठा, अंतो चउरंसा,

अहे पुक्खरक्खियासंठाणसंठिया, उक्किन्नंतरविउलगंभीरखायकलिहा, पागारट्टालय-  
 क्वाडतोरणपडिदुवारदेसभागा, जंतसयग्घिमुसलमुसंढिपरियारिया, अउज्झा, सया-  
 जया, सयागुत्ता, अडयालकोट्टगरइया, अडयालकयवणमाला, खेमा, सिवा, किंकरा-  
 मरदंडोवरक्खिया, लाउल्लोइयमहिया, गोसीससरसरत्तचंदणददूरदिनपंचंगुलितला,  
 उवच्चियचंदणकलसा, चंदणघडसुकयतोरणपडिदुवारदेसभागा, आसत्तोसत्तविउल-  
 वट्टवघारियमल्लदामकलावा, पंचवन्नसरसरसुरभिमुक्कपुप्फपुंजोवयारकलिया, काला-  
 गुरुपवरकुंदुरुक्कडुक्कडज्जंतधूवमधमघंतगंधुद्धयाभिरामा, सुगंधवरगंधिया, गंधवट्टि-  
 भूया, अच्छरगणसंधसंविक्किा, दिव्वतुडियसहसंपणइया, सव्वरयणामया, अच्छा,  
 सण्हा, लण्हा, घट्ठा, मट्ठा, णीरया, निम्मला, निप्पका, निक्कंडच्छाया, सप्पभा,  
 सस्सिरिया, समरीइया, सउज्जोया, पासावीया, दरिसणिज्जा, अभिरूवा, पडिरूवा;  
 एत्थ णं असुरकुमारणं देवाणं पज्जतापज्जताणं ठाणा पन्नता । उववाएणं लोयस्स  
 असंखेज्जभागे, समुग्घाएणं लोयस्स असंखेज्जभागे, सट्ठाणेणं लोयस्स असंखेज्ज-  
 भागे, तत्थ णं बहवे असुरकुमारा देवा परिवसंति । काला, लोहियक्खविंबोट्टा, धवल-  
 पुप्फदंता, असियकेसा, वामेगकुंडलधरा, अद्वचंदणाणुलितगता, ईसिसिलिंधपु-  
 प्फप्पगासाइं असंकिलिट्ठाइं सुहुमाइं वत्थाइं पवरपरिहिया, वयं च पढमं समइक्कंता-  
 विइयं च वयं असंपत्ता, भदे जोव्वणे वट्टमाणा, तलमंगयतुडियपवरभूसणणिम्मल,  
 मणिरयणमंडियभुया, दसमुद्दामंडियगहत्था, चूडामणिविचित्तविंधगया, सुरुवा,  
 महिद्धिया, महज्जुइया, महायसा, महव्वला, महाणुभागा, महासोक्खा, हारविराइ-  
 यवच्छा, कडयतुडियथंभियभुया, अंगयकुंडलमट्टगंडयलक्खपीठधारी, विचित्तहत्थाभ-  
 रणा, विचित्तमालामउल्लिमउडा, कल्लाणगपवरवत्थपरिहिया, कल्लाणगमल्लाणलेवणधरा,  
 भासुरबोंदी, पलंबवणमालधरा, दिव्वेणं वज्जेणं दिव्वेणं गंधेणं दिव्वेणं फासेणं दिव्वेणं  
 संघयणेणं दिव्वेणं संठाणेणं दिव्वाए इड्डीए दिव्वाए जुइए दिव्वाए पभाए दिव्वाए  
 छायाए दिव्वाए अच्चीए दिव्वेणं तेएणं दिव्वाए लेसाए दस दिसाओ उज्जोवेमाणा  
 पभासेसाणा, ते णं तत्थ साणं साणं भवणावाससयसहस्साणं साणं साणं सामाणि-  
 यसाहस्सीणं साणं साणं तायत्तीसाणं साणं साणं लोगपालाणं साणं साणं अगमहि-  
 सीणं साणं २ परिसाणं साणं साणं अणियाणं साणं साणं अणियाहिवईणं साणं साणं  
 आयरक्खदेवसाहस्सीणं अच्चेसिं च बहूणं भवणवासीणं देवाण य देवीण य  
 आहेवच्चं पोरेवच्चं सामितं भट्ठितं महत्तरगतं आणाईसरसेणावच्चं कारेमाणा, पाले-  
 माणा, महया हयनट्टगीयवाइयतंतीतलतालतुडियघणमुइंगपडुप्पवाइयरवेणं दिव्वाइं  
 भोगभोगाईं भुंजमाणा विहरंति । चमरबलिणो इत्थ दुवे असुरकुमारिदा असुरकुमार-

रायाणो परिवसन्ति । काला, महानीलसरिसा, नीलगुलियगवलअयसिकुसुमप्पगासा,  
वियसियसयवत्तणिम्मलईसिसियरत्ततंबणयणा, गरुलाययजुत्तुंगनासा, उवचियसिल-  
प्पवालविंबफलसंनिभाहरोद्धा, पंडुरससिसगलविमलनिम्मलदहिवणसंखगोक्खीरकुंदद-  
गरयमुणालियाधवलदंतसेढी, हुयवहनिद्धंतथोयतत्ततवणिजरत्ततलतालुजीहा, अंजण-  
घणकसिणगरुयगरमणिज्जणिद्धकेसा, वामेगकुंडलधरा, अहचंदणाणुलित्तगत्ता, ईसिसि-  
लिधपुप्फप्पगासाइं असंकिलिद्धाईं सुहुसाईं वत्थाईं पवरपरिहिया, वयं च पढमं  
समइक्कंता, विइयं च असंपत्ता, भदे जोव्वणे वट्टमाणा, तलभंगयतुडियपवरभूसण-  
णिम्मलमणिरयणमंडियभुया, दसमुहामंडियग्गहत्था, चूडामणिचित्तचिधगया,  
सुरूवा, महिद्धिया, महज्जुईया, महायसा, महाबला, महाणुभागा, महासोक्खा,  
हारविराइयवच्छा, कडयतुडियधंभियभुया, अंगदकुंडलमट्टंगंतलकन्नपीढधारी,  
विचित्तहत्थाभरणा, विचित्तमालामउलिमउडा, कल्लणगपवरवत्थपरिहिया, कल्लण-  
गपवरमल्लणुलेवणधरा, भासुरवोंदी, पलंबवणमालधरा, दिव्वेणं वज्जेणं, दिव्वेणं  
गंधेणं, दिव्वेणं फासेणं, दिव्वेणं संघयणेणं, दिव्वेणं संठाणेणं, दिव्वाए इट्ठीए,  
दिव्वाए जुईए, दिव्वाए पभाए, दिव्वाए छायाए, दिव्वाए अञ्चीए, दिव्वेणं तेएणं,  
दिव्वाए लेसाए दस दिसाओ उज्जोवेमाणा, पभासेमाणा, ते णं तत्थ साणं साणं  
भवणावाससयसहस्साणं, साणं साणं सामाणियसाहस्सीणं, साणं साणं तायत्तीसाणं,  
साणं साणं लोगपालाणं, साणं साणं अग्गमहिसीणं, साणं साणं परिसाणं, साणं साणं  
अणियाणं, साणं साणं अणियाहिर्वईणं, साणं साणं आयरक्खदेवसाहस्सीणं, अच्चेसिं  
च बहूणं भवणवासीणं देवाण य देवीण य आहेवच्चं पोरेवच्चं सामितं भट्ठितं महत्तर-  
गतं आणाईसरसेणावच्चं कारेमाणा, पालेमाणा, महया हयनट्टगीयवाइयतंतीतलताल-  
तुडियघणमुइंगपडुप्पवाइयरवेणं दिव्वाइं भोगभोगाईं भुंजमाणा विहरंति ॥ १०७ ॥  
कहि णं भंते ! दाहिणिज्जाणं असुरकुमारारणं देवाणं पज्जत्तापज्जत्ताणं ठाणा पज्जत्ता ?  
कहि णं भंते ! दाहिणिज्जा असुरकुमारा देवा परिवसन्ति ?, गोयमा ! जंबुद्वीवे दीवे  
मंदरस्स पव्वयस्स दाहिणेणं इमीसे रयणप्पभाए पुढवीए असीउत्तरजोयणसयसहस्स-  
बाहल्लाए उवरिं एणं जोयणसहस्सं ओगाहिता हिट्ठा चेणं जोयणसहस्सं वज्जित्ता मज्झे  
अट्ठहत्तरे जोयणसयसहस्से एत्थ णं दाहिणिज्जाणं असुरकुमारारणं देवाणं चउत्तीसं  
भवणावाससयसहस्सा भवन्तीति मक्खायं । ते णं भवणा बाहिं वट्ठा, अंतो चउरंसा  
सो चेव वण्णओ जाव पडिरूवा । एत्थ णं दाहिणिज्जाणं असुरकुमारारणं देवाणं पज-  
त्तापज्जत्ताणं ठाणा पज्जत्ता । तीसुवि लोगस्स असंखेज्जभागे । तत्थ णं बहवे दाहि-  
णिज्जा असुरकुमारा देवा देवीओ य परिवसन्ति । काला, लोहियक्खा तहेव जाव



भुंजमाणा विहरंति । एएसि णं तद्देव तायत्तीसगलोगपाला भवन्ति । एवं सव्वत्थ भाणियव्वं । भवणवासीणं चमरे इत्थ असुरकुमारिंदे असुरकुमारराया परिवसइ, काले महानीलसरिसे जाव पभासेमाणे । से णं तत्थ चउतीसाए भवणावाससयसहस्साणं, चउसट्ठीए सामाणियसाहस्सीणं, तायत्तीसाए तायत्तीसगाणं, चउण्हं लोगपालाणं, पंचण्हं अगमहिंसीणं सपरिवाराणं, तिण्हं परिसाणं, सत्तण्हं अणियाणं, सत्तण्हं अणियाहिवईणं, चउण्ह य चउसट्ठीणं आयरक्खदेवसाहस्सीणं, अन्नेसिं च बहूणं दाहिणिळाणं देवाणं देवीण य आहेवच्चं पोरेवच्चं जाव विहरइ ॥ १०८ ॥ कहि णं भंते ! उत्तरिळाणं असुरकुमाराणं देवाणं पज्जतापज्जताणं ठाणा पज्जता ? कहि णं भंते ! उत्तरिळा असुरकुमारा देवा परिवसंति ?, गोयमा ! जंबुद्वीवे द्वीवे मंदरस्स पव्वयस्स उत्तरेणं इमीसे रयणप्पभाए पुढवीए असीउत्तरजोयणसयसहस्सवाहळाए उवरिं एणं जोयणसहस्सं ओगाहिता हिट्ठा चेगं जोयणसहस्सं वज्जिता मज्झे अट्ठहुत्तरे जोयणसयसहस्से एत्थ णं उत्तरिळाणं असुरकुमाराणं देवाणं तीसं भवणावाससयसहस्सा भवन्तीति मक्खायं । ते णं भवणा बाहिं वट्ठा, अंतो चउरंसा, सेसं जहा दाहिणिळाणं जाव विहरंति । बली एत्थ वडरोयणिंदे वडरोयणराया परिवसइ, काले महानीलसरिसे जाव पभासेमाणे । से णं तत्थ तीसाए भवणावाससयसहस्साणं, सट्ठीए सामाणियसाहस्सीणं, तायत्तीसाए तायत्तीसगाणं, चउण्हं लोगपालाणं, पंचण्हं अगमहिंसीणं सपरिवाराणं, तिण्हं परिसाणं, सत्तण्हं अणियाणं, सत्तण्हं अणियाहिवईणं, चउण्ह य सट्ठीणं आयरक्खदेवसाहस्सीणं, अन्नेसिं च बहूणं उत्तरिळाणं असुरकुमाराणं देवाणं य देवीण य आहेवच्चं पोरेवच्चं कुव्वमाणे विहरइ ॥ १०९ ॥ कहि णं भंते ! नागकुमाराणं देवाणं पज्जतापज्जताणं ठाणा पज्जता ? कहि णं भंते ! नागकुमारा देवा परिवसंति ?, गोयमा ! इमीसे रयणप्पभाए पुढवीए असीउत्तरजोयणसयसहस्सवाहळाए उवरिं एणं जोयणसहस्सं ओगाहिता हिट्ठा चेगं जोयणसहस्सं वज्जिता मज्झे अट्ठहुत्तरे जोयणसयसहस्से एत्थ णं नागकुमाराणं देवाणं पज्जतापज्जताणं चुलसीइभवणावाससयसहस्सा भवन्तीति मक्खायं । ते णं भवणा बाहिं वट्ठा, अंतो चउरंसा जाव पडिस्सुवा । तत्थ णं नागकुमाराणं पज्जतापज्जताणं ठाणा पज्जता । तीसु वि लोगस्स असंखेज्जइमाणे । तत्थ णं बहवे नागकुमारा देवा परिवसंति, महिद्धिया, महज्जुइया, सेसं जहा ओहियाणं जाव विहरंति । धरणभूयाणंदा एत्थ णं दुवे नागकुमारिंदा नागकुमाररायाणो परिवसंति महिद्धिया सेसं जहा ओहियाणं जाव विहरंति ॥ ११० ॥ कहि णं भंते ! दाहिणिळाणं नागकुमाराणं देवाणं पज्जतापज्जताणं ठाणा पज्जता ? कहि

णं भंते ! दाहिणिन्ना नागकुमारा देवा परिवसंति ?, गोयमा ! जंबुद्वीवे दीवे मंदरस्स पव्वयस्स दाहिणेणं इमीसे रयणप्पभाए पुढवीए असीउत्तरजोयणसयसहस्सबाह्लाए उवरिं एगं जोयणसहस्सं ओगाहिता हिट्ठा चेगं जोयणसहस्सं वज्जिता मज्झे अट्टहुत्तरे जोयणसयसहस्से एत्थ णं दाहिणिन्नाणं नागकुमाराणं देवाणं चउयालीसं भवणावाससयसहस्सा भवन्तीति मक्खायं । ते णं भवणा बाहिं वट्ठा जाव पडिह्वा । एत्थ णं दाहिणिन्नाणं नागकुमाराणं पज्जतापज्जताणं ठाणा पन्नता, तीसु वि लोयस्स असंखेज्झभागे, एत्थ णं दाहिणिन्ना नागकुमारा देवा परिवसंति, महिद्धिया जाव विहरंति । धरणे इत्थ नागकुमारिंदे नागकुमारराया परिवसइ, महिद्धिए जाव पभासेमाणे । से णं तत्थ चउयालीसाए भवणावाससयसहस्साणं, छण्हं सामाणियसाहस्सीणं, तायत्तीसाए तायत्तीसगाणं, चउण्हं लोगपालाणं, छण्हं अग्गमहिहीसं सपरिवाराणं, तिण्हं परिमाणं, सत्तण्हं अणियाणं, सत्तण्हं अणियाहि-वईणं, चउव्वीसाए आयरक्खदेवसाहस्सीणं, अन्नेसिं च बट्ठणं दाहिणिन्नाणं नाग-कुमाराणं देवाणं य देवीणं य आहेवच्चं पोरेवच्चं कुव्वमाणे विहरइ ॥ १११ ॥

कहि णं भंते उत्तरिन्नाणं नागकुमाराणं देवाणं पज्जतापज्जताणं ठाणा पन्नता ? कहि णं भंते ! उत्तरिन्ना नागकुमारा देवा परिवसंति ?, गोयमा ! जम्बुद्वीवे दीवे मन्दरस्स पव्वयस्स उत्तरेणं इमीसे रयणप्पभाए पुढवीए असीउत्तरजोयणसयसहस्सबाह्लाए उवरिं एगं जोयणसहस्सं ओगाहिता हेट्ठा चेगं जोयणसहस्सं वज्जिता मज्झे अट्टहुत्तरे जोयणसयसहस्से एत्थ णं उत्तरिन्नाणं नागकुमाराणं देवाणं चत्तालीसं भवणावाससयसहस्सा भवन्तीति मक्खायं । ते णं भवणा बाहिं वट्ठा सेसं जहा दाहिणिन्नाणं जाव विहरंति । भूयाणंदे एत्थ नागकुमारिंदे नागकुमारराया परिवसइ, महिद्धिए जाव पभासेमाणे । से णं तत्थ चत्तालीसाए भवणावाससयसहस्साणं आहेवच्चं जाव विहरइ ॥ ११२ ॥

कहि णं भंते ! सुवन्नकुमाराणं देवाणं पज्जता-पज्जताणं ठाणा पन्नता ? कहि णं भंते ! सुवन्नकुमारा देवा परिवसंति ?, गोयमा ! इमीसे रयणप्पभाए पुढवीए जाव एत्थ णं सुवन्नकुमाराणं देवाणं बावत्तिरिं भवणा-वाससयसहस्सा भवन्तीति मक्खायं । ते णं भवणा बाहिं वट्ठा जाव पडिह्वा । तत्थ णं सुवन्नकुमाराणं देवाणं पज्जतापज्जताणं ठाणा पन्नता जाव तिसु वि लोयस्स असंखेज्झभागे । तत्थ णं बहवे सुवन्नकुमारा देवा परिवसंति महिद्धिया सेसं जहा ओहियाणं जाव विहरंति । वेणुदेवे वेणुदाली य इत्थ दुवे सुवर्णकुमारिंदा सुवर्ण-कुमाररायाणो परिवसंति, महिद्धिया जाव विहरंति ॥ ११३ ॥

कहि णं भंते ! दाहि-  
दाहिणिन्नाणं सुवर्णकुमाराणं पज्जतापज्जताणं ठाणा पन्नता ? कहि णं भंते ! दाहि-

णिळा सुवण्णकुमारा देवा परिवसंति ?, गोयमा ! इमीसे जाव मज्झे अट्टहुत्तरे जोयणसयसहस्से एत्थ णं दाहिणिळाणं सुवण्णकुमाराणं अट्टतीसं भवणावाससयसहस्सा भवन्तीति मक्खायं । ते णं भवणा बाहिं वट्ठा जाव पडिस्सवा । एत्थ णं दाहिणिळाणं सुवण्णकुमाराणं पज्जत्तापज्जत्ताणं ठाणा पन्नत्ता । तिसु वि लोगस्स असंखेज्जइभागे । एत्थ णं बहवे सुवण्णकुमारा देवा परिवसंति । वेणुदेवे य इत्थ सुवन्नकुमारिन्दे सुवन्नकुमारराया परिवसइ, सेसं जहा नागकुमाराणं ॥ ११४ ॥ कहि णं भन्ते ! उत्तरिळाणं सुवन्नकुमाराणं देवाणं पज्जत्तापज्जत्ताणं ठाणा पन्नत्ता ? कहि णं भन्ते ! उत्तरिळा सुवन्नकुमारा देवा परिवसंति ?, गोयमा ! इमीसे रयणप्पभाए जाव एत्थ णं उत्तरिळाणं सुवन्नकुमाराणं चउतीसं भवणावाससयसहस्सा भवन्तीति मक्खायं । ते णं भवणा जाव एत्थ णं बहवे उत्तरिळा सुवन्नकुमारा देवा परिवसंति, महिद्धिया जाव विहरंति । वेणुदाली इत्थ सुवन्नकुमारिंदे सुवन्नकुमारराया परिवसइ, महिद्धिए सेसं जहा नागकुमाराणं । एवं जहा सुवन्नकुमाराणं वत्तव्वया भणिया तहा सेसाण वि चउदसण्हं इंदानं भाणियव्वा । नवरं भवणणाणत्तं इंदणाणत्तं वण्णणाणत्तं परिहाणणाणत्तं च इमाहिं गाहाहिं अणुगंतव्वं-चउसट्ठिं असुराणं चुलसीयं चेव होंति नागाणं । वावत्तरिं सुवन्ने वाउकुमाराण छन्नउई ॥ १ ॥ दीवदिसाउदहीणं विज्जुकुमारिंदथणियमग्गीणं । छण्हंपि जुयलयाणं छावत्तरिमो सयसहस्सा ॥ २ ॥ चउतीसा चउयाला अट्टतीसं च सयसहस्साइ । पन्ना चत्तालीसा दाहिणओ हुंति भवणाइ ॥ ३ ॥ तीसा चत्तालीसा चउतीसं चेव सयसहस्साइ । छायाला छत्तीसा उत्तरओ हुंति भवणाइ ॥ ४ ॥ चउसट्ठी सट्ठी खलु छच्च सहस्साइ असुरवज्जाणं । सामाणिया उ एए चउग्गुणा आयरक्खा उ ॥ ५ ॥ चमरे धरणे तह वेणुदेवें हरिकंतअग्गिसीहे य । पुत्ते जलकंते य अमियविलम्बे य घोसे य ॥ ६ ॥ बलिभूयाणंदे वेणुदालिहरिस्सहे अग्गिमाणवविस्सिट्ठे । जलपह तहऽमियवाहणे पमंजणे य महाघोसे ॥ ७ ॥ उत्तरिळाणं जाव विहरंति । काला असुरकुमारा नागा उदही य पंडुरा दो वि । वरकणगनिघसगोरा हुंति सुवन्ना दिसा थणिया ॥ ८ ॥ उत्तत्तकणगवन्ना विज्जू अग्गी य होंति दीवा य । सामा पियंशुवन्ना वाउकुमारा सुणेयव्वा ॥ ९ ॥ असुरेस्स हुंति रत्ता सिल्लिधपुप्फप्पमा य नागुदही । आसासगवसणधरा होंति सुवन्ना दिसा थणिया ॥ १० ॥ नीलाणुरागवसणा विज्जू अग्गी य हुंति दीवा य । संझाणुरागवसणा वाउकुमारा सुणेयव्वा ॥ ११ ॥ ११५ ॥ कहि णं भन्ते ! वाणमंतराणं देवाणं पज्जत्तापज्जत्ताणं ठाणा पन्नत्ता ? कहि णं भन्ते ! वाणमंतरा देवा परिवसंति ?, गोयमा ! इमीसे रयणप्पभाए

पुढवीए रयणामयस्स कंडस्स जोयणसहस्सबाहल्लस्स उवरिं एगं जोयणसयं ओगा-  
हिता हिट्ठा वि एगं जोयणसयं वज्जित्ता मज्झे अट्ठसु जोयणसएसु एत्थ णं वाण-  
मंतराणं देवाणं तिरियमसंखेज्जा भोमेज्जनयरावाससयसहस्सा भवन्तीति मक्खायं ।  
ते णं भोमेज्जा णयरा बाहिं वट्ठा, अंतो चउरंसा, अहे पुक्खरकन्नियासंठाणसंठिया,  
उक्किन्नंतरविउल्लगंभीरखायफलिहा, पागारट्टालयकवाडतोरणपडिदुवारदेसभागा, जंत-  
सयग्घिमुसलमुसंढिपरिवारिया, अउज्झा, सयाजया, सयागुत्ता, अडयालकौट्टगरइया,  
अडयालकयवणमाला, खेमा, सिवा, किंकरामरदंडोवरक्खिया, लाउल्लोइयमहिया,  
गोसीससरसरत्तचंदणदहरदिन्नपंचंगुलितला, उवचियचंदणकलसा, चंदणघडसुकय-  
तोरणपडिदुवारदेसभागा, आसत्तोसत्तविउल्लवट्ठवगारियमल्लदामकल्ला, पंचवण्ण-  
सरससुरहिमुक्कपुप्फपुंजोवयारकलिया, कालागुरुपवरकुंदुरुक्कधूवमघमघंतगंधुद्ध-  
याभिरामा, सुगंधवरगंधिया, गंधवट्ठिभूया, अच्छरगणसंघसंविक्किन्ना, दिव्वतुडिय-  
सदंसपणइया, पडागमालाउलाभिरामा, सव्वरयणामया, अच्छा, सण्हा, लण्हा,  
घट्ठा, मट्ठा, नीरया, निम्मला, निप्पंका, निक्कंकडच्छाया, सप्पहा, सस्सिरीया,  
समरीइया, सउज्जोया, पासाइया, दरिसणिज्जा, अभिस्वा, पडिस्वा । एत्थ णं  
वाणमन्तराणं देवाणं पज्जत्तापज्जत्ताणं ठाणा पज्जत्ता । तिसु वि लोयस्स असंखेज्ज-  
भागे । तत्थ णं बहवे वाणमंतरा देवा परिवसंति । तंजहा—पिसाया, भूया,  
जक्खा, रक्खसा, किंनरा, किंपुरिसा, भुयगवइणो महाकाया, गन्धव्वगणा य  
निउणगंधव्वगीयरइणो, अणवन्नियपणवन्नियइसिवाइयभूयवाइयकंदियमहाकंदिया य  
कुहंडपयंगदेवा, चंचलचलचवलचित्तकीलणदवप्पिया, गहिरहसियगीयणच्चणरई,  
वणमालामेलमउडकुंडलसच्छंदविउव्वियाभरणचारुभूसणधरा, सव्वोउयसुरभिक्कुसुम-  
सुरइयपलंबसोहंतकंतविहसंतचित्तवणमालरइयवच्छा, कामगमा [कामकामा], काम-  
रूवदेहधारी, णाणाविहवण्णरागवरवत्थविचित्तचिल्लगनियंसणा, विविहदेसिनेवत्थ-  
गहियवेसा, पमुइयकंदप्पकलहकेलिक्कोलाहलप्पिया, हासबोल्बहुला, असिसुग्गरसत्ति-  
कुंतहत्था, अणेगमणिरयणविविहणिज्जुत्तविचित्तचिंधगया, महिद्धिया, महज्जुइया,  
महायसा, महाबला, महाणुभागा, महासुक्खा, हारविराइयवच्छा, कडयतुडिय-  
थंभियभुया, अंगयकुंडलमट्ठगंडयलकन्नपीठधारी, विचित्तहत्थाभरणा, विचित्तमाला-  
मउल्लिमउडा, कल्लाणगपवरवत्थपरिहिया, कल्लाणगपवरमल्लाणुलेवणधरा, भासुरबोवी,  
पलंबवणमालधरा, दिव्वेणं वज्जेणं, दिव्वेणं गंधेणं, दिव्वेणं फासेणं, दिव्वेणं संघय-  
णेणं, दिव्वेणं संठाणेणं, दिव्वाए इड्डीए, दिव्वाए जुईए, दिव्वाए पभाए, दिव्वाए  
छायाए, दिव्वाए अच्छीए, दिव्वेणं तेएणं, दिव्वाए लेस्साए दस दिसाओ उज्जोवे-

माणं, पभासेमाणं, ते णं तत्थ साणं साणं असंखेज्जभोमेज्जनयरावाससयसहस्साणं, साणं साणं सामाणियसाहस्सीणं, साणं साणं अगमहिंसीणं, साणं साणं परिसाणं, साणं साणं अणीयाणं, साणं साणं अणीयाहिंवईणं, साणं साणं आयरक्खदेवसाहस्सीणं, अन्नेसिं च बहूणं वाणमंतराणं देवाणं य देवीणं य आहेवच्चं पोरेवच्चं सामित्तं भट्ठित्तं महत्तरगतं आणाईसरसेणावच्चं कारेमाणा, पालेमाणा, महया हयनट्ठगीयवाइयतंतीतलतालुडियघणमुईगपडुप्पवाइयरवेणं दिव्वाइं भोगभोगाइं भुंजमाणा विहरंति ॥ ११६ ॥ कहि णं भंते ! पिसायाणं देवाणं पज्जत्तापज्जत्ताणं ठाणा पन्नत्ता ? कहि णं भंते ! पिसाया देवा परिवसंति ?, गोयमा ! इमीसे रयणप्पभाए पुठवीए रयणामयस्स कंडस्स जोयणसहस्सबाहल्लस्स उवरिं एणं जोयणसयं ओगाहिता हेट्ठा चेगं जोयणसयं वज्जित्ता मज्झे अट्ठसु जोयणसएसु एत्थ णं पिसायाणं देवाणं तिरियमसंखेज्जा भोमेज्जनयरावाससयसहस्सा भवन्तीति मक्खायं । ते णं भोमेज्जनयरा वाहिं वट्ठा जहा ओहिओ भवणवण्णओ तहा भाणियव्वो जाव पडिरूवा । एत्थ णं पिसायाणं देवाणं पज्जत्तापज्जत्ताणं ठाणा पन्नत्ता । तिसु वि लोगस्स असंखेज्जइभागे । तत्थ बहवे पिसाया देवा परिवसंति, महिड्डिया जहा ओहिया जाव विहरन्ति । कालमहाकाला इत्थ दुवे पिसाईदा पिसायरायाणो परिवसंति, महिड्डिया महज्जुइया जाव विहरंति ॥ ११७ ॥ कहि णं भंते ! दाहिणिज्जाणं पिसायाणं देवाणं ठाणा पन्नत्ता ? कहि णं भंते ! दाहिणिज्जा पिसाया देवा परिवसंति ?, गोयमा ! जंबुदीवे दीवे मन्दरस्स पव्वयस्स दाहिणेणं इमीसे रयणप्पभाए पुठवीए रयणामयस्स कंडस्स जोयणसहस्सबाहल्लस्स उवरिं एणं जोयणसयं ओगाहिता हेट्ठा चेगं जोयणसयं वज्जित्ता मज्झे अट्ठसु जोयणसएसु एत्थ णं दाहिणिज्जाणं पिसायाणं देवाणं तिरियमसंखेज्जा भोमेज्जनयरावाससयसहस्सा भवन्तीति मक्खायं । ते णं भवणा जहा ओहिओ भवणवण्णओ तहा भाणियव्वो जाव पडिरूवा । एत्थ णं दाहिणिज्जाणं पिसायाणं देवाणं पज्जत्तापज्जत्ताणं ठाणा पन्नत्ता । तिसु वि लोगस्स असंखेज्जइभागे । तत्थ णं बहवे दाहिणिज्जा पिसाया देवा परिवसंति, महिड्डिया जहा ओहिया जाव विहरंति । काले एत्थ पिसाईदे पिसायराया परिवसइ, महिड्डिए जाव पभासेमाणे । से णं तत्थ तिरियमसंखेज्जाणं भोमेज्जनयरावाससयसहस्साणं, चउण्हं सामाणियसाहस्सीणं, चउण्हं य अगमहिंसीणं सपरिवाराणं, तिण्हं परिसाणं, सत्तण्हं अणियाणं, सत्तण्हं अणियाहिंवईणं, सोलसण्हं आयरक्खदेवसाहस्सीणं, अन्नेसिं च बहूणं दाहिणिज्जाणं वाणमंतराणं देवाणं य देवीणं य आहेवच्चं जाव विहरइ । उत्तरिज्जाणं पुच्छा । गोयमा ! जहेव दाहिणिज्जाणं वत्तव्वया तहेव उत्तरि-

ल्लाणं पि । णवरं मन्दरस्स पव्वयस्स उत्तरेणं । महाकाले एत्थ पिसाईदे पिसाय-  
 राया परिवसइ जाव विहरइ । एवं जहा पिसायाणं तहा भूयाणं पि जाव गंधव्वाणं ।  
 नवरं ईदेसु णाणत्तं भाणियव्वं इमेण विहिणा—भूयाणं सुरूवपडिह्वा, जक्खाणं  
 पुण्णभइमाणिभइ, रक्खसाणं भीममहाभीमा, किन्नराणं किन्नरकिंपुरिसा, किंपुरि-  
 साणं सप्पुरिसमहापुरिसा, महोरगाणं अइकायमहाकाया, गंधव्वाणं गीयरइगीय-  
 जसा जाव विहरन्ति । काले य महाकाले सुरूवपडिह्वापुण्णभेइ य । तह चेव माणि-  
 भेइ भीमे य तहा महाभीमे ॥ १ ॥ किन्नरकिंपुरिसे खलु सप्पुरिसे खलु तहा महा-  
 पुरिसे । अइकायमहाकाए गीयरई चेव गीयजसे ॥ २ ॥ ११८ ॥ कहि णं भंते !  
 अणवन्नियाणं देवाणं ठाणा पन्नत्ता ? कहि णं भंते ! अणवन्निया देवा परिवसंति ?,  
 गोयमा ! इमीसे रयणप्पभाए पुढवीए रयणामयस्स कंडस्स जोयणसहस्सबाहल्लस्स  
 उवरिं हेट्ठा य एगं जोयणसयं सयं वजेत्ता मज्झे अट्ठसु जोयणसएसु एत्थ णं अण-  
 वन्नियाणं देवाणं तिरियमसंखेज्जा णयरवाससयसहस्सा भवन्तीति मक्खायं । ते णं  
 जाव पडिह्वा । एत्थ णं अणवन्नियाणं देवाणं ठाणा पन्नत्ता । उववाएणं लोयस्स  
 असंखेज्जइभागे, समुग्घाएणं लोयस्स असंखेज्जइभागे, सट्ठाणेणं लोयस्स असंखेज्जइ-  
 भागे । तत्थ णं बहवे अणवन्निया देवा परिवसंति । महिङ्गिया जहा पिसाया जाव  
 विहरंति । सण्णिहियसामाणा इत्थ दुवे अणवन्निदा अणवन्नियरायाणो परिवसंति ।  
 महिङ्गिया, एवं जहा कालमहाकालाणं दोण्हं पि दाहिणिल्लाणं उत्तरिळाणं य भणिया  
 तहा सण्णिहियसामाणाणं पि भाणियव्वा । संगहणीगाहा—अणवन्नियपणवन्नियइसि-  
 वाइयभूयवाइया चेव । कंदिय महाकंदिय कोहंड पयंगए चेव ॥ १ ॥ इमे ईदा—संनिहिया  
 सामाणा धायविधाए इसी य इसिवाले । इसरमहेसरे विय हवइ सुवच्छे विसाले य  
 ॥ २ ॥ हासे हासरई चेव सेए तहा भवे महासेए । पयए पयगवई विय नेयव्वा  
 आणपुढवीए ॥ ३ ॥ ११९ ॥ कहि णं भंते ! जोइसियाणं देवाणं पज्जत्तापज्जत्ताणं  
 ठाणा पन्नत्ता ? कहि णं भंते ! जोइसिया देवा परिवसंति ?, गोयमा ! इमीसे रयण-  
 प्पभाए पुढवीए बहुसमरमणिजाओ भूमिभागाओ सत्तणउए जोयणसए उड्ढं उप्पहत्ता  
 दसुत्तरजोयणसयबाहले तिरियमसंखेजे जोइसविसए । एत्थ णं जोइसियाणं देवाणं  
 तिरियमसंखेज्जा जोइसियविमाणावाससयसहस्सा भवन्तीति मक्खायं । ते णं  
 विमाणा अद्धकविट्ठगसंठाणसंठिया, सव्वफालिहमया, अब्भुग्गयमूसियपहसिया इव  
 विविहमणिकणगरयणभत्तिचित्ता, वाउड्डुयविजयवेजयंतीपडागाछत्ताइलत्तकलिया,  
 तुंगा, गगणतलमभिलंघमाणसिहरा, जालंतरयणपंजलुम्मिलियव्व मणिकणगथूमि-  
 यागा, वियसियसयवत्तपुंडरीया, तिलयरयणड्ढचंदचित्ता, नाणामणिमयदामालंक्रिया,

अंतो वहिं च सण्हा, तवणिज्जखइलवालुयापत्थडा, सुहफासा, सस्सिरीया, सुरूवा, पासाइया, दरिसणिज्जा, अभिरूवा, पडिरूवा । एत्थ णं जोइसियाणं देवाणं पज्जता-पज्जताणं ठाणा पज्जता । तिसु वि लोयस्स असंखेज्जभागे । तत्थ णं बहवे जोइसिया देवा परिवसंति । तंजहा—बहस्सई, चंदा, सूरा, सुका, सणिच्छरा, राहू, धूमकेऊ, खुहा, अंगारगा, तत्तवणिज्जकणगवण्णा जे य गहा जोइसम्मि चारं चरंति केऊ य गइरइया अट्ठावीसइविहा नक्खत्तदेवयगणा, णाणासंठाणसंठियाओ पंचवच्चाओ तार-याओ ठियलेसाचारिणो, अविस्साममंडलगइ, पत्तेयनामंक्कागडियविंघमउडा महि-ड्डिया जाव पभासेमाणा । ते णं तत्थ साणं साणं विमाणावाससयसहस्साणं, साणं साणं सामाणियसाहस्सीणं साणं साणं अग्गमहिसीणं सपरिवाराणं, साणं साणं परि-साणं, साणं साणं अणियाणं, साणं साणं अणियाहिवईणं, साणं साणं आयरक्खदेव-साहस्सीणं, अन्नेसिं च बहूणं जोइसियाणं देवाणं देवीण य आहेवच्चं जाव विहरंति । चंदिमसूरिया इत्थ दुवे जोइसिंदा जोइसियरायाणो परिवसंति, महिड्डिया जाव पभासे-माणा । ते णं तत्थ साणं साणं जोइसियविमाणावाससयसहस्साणं, चउण्हं सामाणि-यसाहस्सीणं, चउण्हं अग्गमहिसीणं सपरिवाराणं, तिण्हं परिसाणं, सत्तण्हं अणीयाणं, सत्तण्हं अणीयाहिवईणं, सोलसण्हं आयरक्खदेवसाहस्सीणं, अन्नेसिं च बहूणं जोइसियाणं देवाणं देवीण य आहेवच्चं जाव विहरंति ॥ १२० ॥ कहि णं भंते ! वेमाणियाणं देवाणं पज्जतापज्जताणं ठाणा पज्जता ? कहि णं भंते ! वेमाणिया देवा परिवसंति ?, गोयमा ! इमीसे रयणप्पभाए पुढवीए बहुसमरमणिज्जाओ भूमिभागाओ उड्डं चंदिमसूरियगहणक्खत्ततारावूवाणं बहूइं जोयणसयाइं बहूइं जोयणसहस्साइं बहूइं जोयणसयसहस्साइं बहुगाओ जोयणकोडीओ बहुगाओ जोयणकोडाकोडीओ उड्डं दूरं उप्पहत्ता एत्थ णं सोहम्मीसाणसणकुमारमाहिंदबंभलोयलंतगमहासुक्कसहस्सारआणय-पाणयआरणच्चुयगेवेज्जणुत्तरेसु एत्थ णं वेमाणियाणं देवाणं चउरासीइविमाणावाससय-सहस्सा सत्ताणउइं च सहस्सा तेवीसं च विमाणा भवन्तीति मक्खायं । ते णं विमाणा सव्वरयणामया, अच्छा, सण्हा, लण्हा, घट्ठा, मट्ठा, नीरया, निम्मला, निप्पंका, निक्कंइच्छाया, सप्पभा, सस्सिरीया, सउज्जोया, पासादीया, दरिसणिज्जा, अभिरूवा, पडिरूवा । एत्थ णं वेमाणियाणं देवाणं पज्जतापज्जताणं ठाणा पज्जता । तिसु वि लोयस्स असंखेज्जभागे । तत्थ णं बहवे वेमाणिया देवा परिवसंति । तंजहा—सोहम्मीसाणसणकुमारमाहिंदबंभलोगलंतगमहासुक्कसहस्सारआणयपाणय-आरणच्चुयगेवेज्जणुत्तरोववाइया देवा, ते णं मिगमहिसवराहसीहछगलददुहरहयगयवइ-भुयगखगउसभविडिमपागडियविंघमउडा, पसिढिलवरमउडकिरीडधारिणो, वरकुंड-

लुजोइयाणणा, मउडदित्तिसिरया, रत्ताभा, पउमपम्हगोरा, सेया, सुहवन्नगंधफासा,  
 उत्तमवेउव्विणो, पवरवत्थगंधमल्लणुलेवणधरा, महिङ्गिया, महज्जुइया, महायसा,  
 महाबला, महाणुभागा, महासोक्खा, हारविराइयवच्छा, कडयतुडियथंभियभुया,  
 अंगदकुंडलमट्टगंडतलकन्नपीढधारी, विचित्तहत्थाभरणा, विचित्तमालामउलिमउडा,  
 कल्लाणगपवरवत्थपरिहिया, कल्लाणगपवरमल्लणुलेवणा, भासुरवोंदी, पलंबवणमालधरा,  
 दिव्वेणं वज्जेणं, दिव्वेणं गंधेणं, दिव्वेणं फासेणं, दिव्वेणं संघयणेणं, दिव्वेणं संठा-  
 णेणं, दिव्वाए इङ्गीए, दिव्वाए जुईए, दिव्वाए पभाए, दिव्वाए छायाए, दिव्वाए  
 अच्चीए, दिव्वेणं तेएणं, दिव्वाए लेसाए दस दिसाओ उज्जोवेमाणा, पभासेमाणा,  
 ते णं तत्थ साणं साणं विमाणावाससयसहस्साणं, साणं साणं सामाणियसाहस्सीणं,  
 साणं साणं तायत्तीसगाणं, साणं साणं लोगपालाणं, साणं साणं अग्गमहिसीणं  
 सपरिवाराणं, साणं साणं परिसाणं, साणं साणं अणियाणं, साणं साणं अणियाहि-  
 वईणं, साणं साणं आयरक्खदेवसाहस्सीणं, अच्चेसिं च बहूणं वेमाणियाणं देवाण य  
 देवीण य आहेवच्चं पोरेवच्चं जाव दिव्वाइं भोगभोगाइं भुंजमाणा विहरंति ॥ १२१ ॥  
 कहि णं भंते ! सोहम्मगदेवाणं पज्जतापज्जताणं ठाणा पज्जता ? कहि णं भंते !  
 सोहम्मगदेवा परिवसंति ?, गोयमा ! जंबुद्दीवे दीवे मंदरस्स पव्वयस्स दाहिणेणं  
 इमीसे रयणप्पभाए पुढवीए बहुसमरमणिज्जाओ भूमिभागाओ जाव उट्ठं दूरं उप्प-  
 इत्ता एत्थ णं सोहम्ममे णांमं कप्पे पज्जते । पाईणपडीणायए, उदीणदाहिणवित्थिण्णे,  
 अद्वंदंसंठाणसंठिए, अच्चिमालिभासरासिवण्णाभे, असंखेज्जाओ जोयणकोडीओ  
 असंखेज्जाओ जोयणकोडाकोडीओ आयामविक्खंभेणं, असंखेज्जाओ जोयणकोडा-  
 कोडीओ परिक्खेवेणं, सव्वरयणामए, अच्छे जाव पडिरूवे । तत्थ णं सोहम्मग-  
 देवाणं वत्तीसविमाणावाससयसहस्सा भवन्तीति मक्खायं । ते णं विमाणा सव्वर-  
 यणामया अच्छा जाव पडिरूवा । तेसि णं विमाणाणं बहुमज्झदेसभागे पंच वडिं-  
 सया पज्जता, तंजहा—असोगवडिसए, सत्तवण्णवडिसए, चंपगवडिसए, चूयवडिसए,  
 मज्जे इत्थ सोहम्मवडिसए । ते णं वडिसया सव्वरयणामया अच्छा जाव पडिरूवा ।  
 एत्थ णं सोहम्मगदेवाणं पज्जतापज्जताणं ठाणा पज्जता । तिसु वि लोगस्स असंखे-  
 ज्जइभागे । तत्थ णं बहुवे सोहम्मगदेवा परिवसंति महिङ्गिया जाव पभासेमाणा ।  
 ते णं तत्थ साणं साणं विमाणावाससयसहस्साणं, साणं साणं सामाणियसाहस्सीणं,  
 एवं जहेव ओहियाणं तहेव एएसिं पि भाणियव्वं जाव आयरक्खदेवसाहस्सीणं,  
 अच्चेसिं च बहूणं सोहम्मगक्कप्पवासीणं वेमाणियाणं देवाण य देवीण य आहेवच्चं  
 जाव विहरंति । सक्के इत्थ देविंदे देवराया परिवसइ, वज्जपाणी, पुरंदरे, सयक्कळ,



सहस्सकखे, मघवं, पागसासणे, दाहिणद्धलोगाहिंवई, बत्तीसविमाणावाससयसहस्सा-  
हिंवई, एरावणवाहणे, सुरिंदे, अरयंबरवत्थधरे, आलइयमालमउडे, नवहेमचारु-  
चित्तचंचलकुंडलविलिहिज्जमाणंगंडे, महिद्धिए जाव पभासेमाणे । से णं तत्थ  
बत्तीसाए विमाणावाससयसहस्साणं, चउरासीए सामाणियसाहस्सीणं, तायत्तीसाए  
तायत्तीसगाणं, चउण्हं लोगपालाणं, अट्टण्हं अग्गमहिसीणं सपरिवाराणं, तिण्हं  
परिसाणं, सत्तण्हं अणीयाणं, सत्तण्हं अणीयाहिंवईणं, चउण्हं चउरासीणं आय-  
रक्खदेवसाहस्सीणं, अत्तेसिं च बहूणं सोहम्मकप्पवासीणं वेमाणियाणं देवाण य  
देवीण य आहेवच्चं पोरेवच्चं जाव कुव्वमाणे० विहरइ ॥ १२२ ॥ कहि णं भंते !  
ईसाणाणं देवाणं पज्जतापज्जताणं ठाणा पज्जता ? कहि णं भंते ! ईसाणगदेवा  
परिवसंति ?, गोयमा ! जंबुद्वीवे दीवे मंदरस्स पव्वयस्स उत्तरेणं इमीसे रयणप्पमाए  
पुठवीए बहुसमरमणिज्जाओ भूमिभागाओ उद्धं चंदिमसूरियगहणक्खत्तताराख्वाणं  
बहूइं जोयणसयाइं बहूइं जोयणसहस्साइं जाव उद्धं उप्पइत्ता एत्थ णं ईसाणे णामं  
कप्पे पज्जते । पाईणपडीणायए, उदीणदाहिणवित्थिण्णे, एवं जहा सोहम्मे जाव  
पडिह्वे । तत्थ णं ईसाणगदेवाणं अट्ठावीसं विमाणावाससयसहस्सा भवन्तीति  
मक्खायं । ते णं विमाणा सव्वरयणामया जाव पडिह्वे । तेसिं णं बहुमज्झदेस-  
भागे पंच वडिसया पज्जता । तंजहा—अंकवडिसए, फलिहवडिसए, रयणवडिसए,  
जायख्ववडिसए, मज्झे इत्थ ईसाणवडिसए । ते णं वडिसया सव्वरयणामया जाव  
पडिह्वे । एत्थ णं ईसाणगदेवाणं पज्जतापज्जताणं ठाणा पज्जता । तिसु वि लोगस्स  
असंखेज्जभागे । सेसं जहा सोहम्मगदेवाणं जाव विहरंति । ईसाणे इत्थ देविंदे  
देवराया परिवसइ, सुलपाणी, वसहवाहणे, उत्तरद्धलोगाहिंवई, अट्ठावीसविमाणा-  
वाससयसहस्साहिंवई, अरयंबरवत्थधरे, सेसं जहा सकस्स जाव पभासेमाणे । से णं  
तत्थ अट्ठावीसाए विमाणावाससयसहस्साणं, असीईए सामाणियसाहस्सीणं, ताय-  
त्तीसाए तायत्तीसगाणं, चउण्हं लोगपालाणं, अट्टण्हं अग्गमहिसीणं सपरिवाराणं,  
तिण्हं परिसाणं, सत्तण्हं अणियाणं, सत्तण्हं अणियाहिंवईणं, चउण्हं असीईणं आय-  
रक्खदेवसाहस्सीणं, अत्तेसिं च बहूणं ईसाणकप्पवासीणं वेमाणियाणं देवाण य  
देवीण य आहेवच्चं जाव विहरइ ॥ १२३ ॥ कहि णं भंते ! सणकुमारदेवाणं  
पज्जतापज्जताणं ठाणा पज्जता ? कहि णं भंते ! सणकुमारा देवा परिवसंति ?, गोयमा !  
सोहम्मस्स कप्पस्स उप्पि सपक्खि सपडिदिसिं बहूइं जोयणाइं बहूइं जोयणसयाइं  
बहूइं जोयणसहस्साइं बहूइं जोयणसयसहस्साइं बहुगाओ जोयणकोडीओ बहुगाओ  
जोयणकोडाकोडीओ उद्धं दूरं उप्पइत्ता एत्थ णं सणकुमारे णामं कप्पे पज्जते ।

पाईणपडीणायए, उदीणदाहिणवित्थिण्णे जहा सोहम्मे जाव पडिरूवे । तत्थ णं सणकुमारारणं देवाणं बारस विमाणावाससयसहस्सा भवन्तीति मक्खायं । ते णं विमाणा सव्वरयणामया जाव पडिरूवा । तेसि णं विमाणाणं बहुमज्झदेसभागे पंच वडिसगा पन्नता । तंजहा—असोगवडिसए, सत्तवन्नवडिसए, चंपगवडिसए, चूयवडिसए, मज्झे एत्थ सणकुमारवडिसए । ते णं वडिसया सव्वरयणामया अच्छा जाव पडिरूवा । एत्थ णं सणकुमारदेवाणं पज्जतापज्जताणं ठाणा पन्नता । तिसु वि लोगस्स असंखेज्झभागे । तत्थ णं बहवे सणकुमारदेवा परिवसंति, महिङ्गिया जाव पभासेमाणा विहरंति । नवरं अगमहिंसीओ णत्थि । सणकुमारे इत्थ देविदे देवराया परिवसइ । अरयंवरवत्थधरे, सेसं जहा सक्कस्स । से णं तत्थ बारसण्हं विमाणावाससयसहस्साणं, बावत्तरीए सामाणियसाहस्सीणं सेसं जहा सक्कस्स अगमहिंसीवज्जं । नवरं चउण्हं बावत्तरीणं आयरक्खदेवसाहस्सीणं जाव विहरइ ॥ १२४ ॥ कहि णं भंते ! माहिंददेवाणं पज्जतापज्जताणं ठाणा पन्नता ? कहि णं भंते ! माहिंददेवा परिवसंति ?, गोयमा ! ईसाणस्स कप्पस्स उप्पि सपक्खि सपडिदिसिं बहूइं जोयणाइं जाव बहुयाओ जोयणकोडाकोडीओ उट्ठुं दूरं उप्पइत्ता एत्थ णं माहिंदे नामं कप्पे पन्नते पाईणपडीणायए जाव एवं जहेव सणकुमारे । नवरं अट्ठ विमाणावाससयसहस्सा । वडिसया जहा ईसाणे । नवरं मज्झे इत्थ माहिंदवडिसए, एवं जहा सणकुमारारणं देवाणं जाव विहरंति । माहिंदे इत्थ देविदे देवराया परिवसइ, अरयंवरवत्थधरे, एवं जहा सणकुमारे जाव विहरइ । नवरं अट्ठण्हं विमाणावाससयसहस्साणं, सत्तरीए सामाणियसाहस्सीणं, चउण्हं सत्तरीणं आयरक्खदेवसाहस्सीणं जाव विहरइ ॥ १२५ ॥ कहि णं भंते ! बंभलोगदेवाणं पज्जतापज्जताणं ठाणा पन्नता ? कहि णं भंते ! बंभलोगदेवा परिवसंति ?, गोयमा ! सणकुमारमाहिंदाणं कप्पाणं उप्पि सपक्खि सपडिदिसिं बहूइं जोयणाइं जाव उप्पइत्ता एत्थ णं बंभलोए नामं कप्पे पन्नते, पाईणपडीणायए, उदीणदाहिणवित्थिण्णे, पडिपुण्णचंदसंठाणसंठिए, अच्चिमालीभासरासिप्पमे, अवसेसं जहा सणकुमारारणं । नवरं चत्तारि विमाणावाससयसहस्सा, वडिसया जहा सोहम्मवडिसया, नवरं मज्झे इत्थ बंभलोयवडिसए । एत्थ णं बंभलोगदेवाणं पज्जतापज्जताणं ठाणा पन्नता सेसं तहेव जाव विहरंति । बंभे इत्थ देविदे देवराया परिवसइ, अरयंवरवत्थधरे, एवं जहा सणकुमारे जाव विहरइ । नवरं चउण्हं विमाणावाससयसहस्साणं, सट्ठीए सामाणियसाहस्सीणं, चउण्हं सट्ठीए आयरक्खदेवसाहस्सीणं, अन्नोसिं च बहूणं जाव विहरइ ॥ १२६ ॥ कहि णं भंते ! लंतगदेवाणं पज्जतापज्जताणं ठाणा पन्नता ?

कहि णं भंते ! लंतगदेवा परिवसंति ?, गोयमा ! बंभलोगस्स कप्पस्स उप्पि सपक्खिं सपडिदिसिं बहूइं जोयणाइं जाव बहुगाओ जोयणकोडाकोडीओ उड्ढं दूरं उप्पइत्ता एत्थ णं लंतए नामं कप्पे पन्नते पाईणपडीणायए, जहा बंभलोए । नवरं पण्णासं विमाणावाससहस्सा भवन्तीति मक्खायं । वडिसगा जहा ईसाणवडिसगा, नवरं मज्झे इत्थ लंतगवडिसए, देवा तहेव जाव विहरंति । लंतए एत्थ देविंदे देवराया परिवसइ, जहा सणकुमारे । नवरं पण्णासाए विमाणावाससहस्साणं, पण्णासाए सामाणियसाहस्सीणं, चउण्ह य पण्णासाणं आयरक्खदेवसाहस्सीणं, अच्चेसिं च बहूणं जाव विहरइ ॥ १२७ ॥ कहि णं भंते ! महासुक्काणं देवाणं पज्जतापज्जताणं ठाणा पज्जता ? कहि णं भंते ! महासुक्का देवा परिवसंति ?, गोयमा ! लंतगस्स कप्पस्स उप्पि सपक्खिं सपडिदिसिं जाव उप्पइत्ता एत्थ णं महासुक्के नामं कप्पे पन्नते पाईणपडीणायए, उदीणदाहिणवित्थिण्णे, जहा बंभलोए । नवरं चत्तालीसं विमाणावाससहस्सा भवन्तीति मक्खायं । वडिसगा जहा सोहम्मवडिसए जाव विहरंति । महासुक्के इत्थ देविंदे देवराया जहा सणकुमारे । नवरं चत्तालीसाए विमाणावाससहस्साणं, चत्तालीसाए सामाणियसाहस्सीणं, चउण्ह य चत्तालीसाणं आयरक्खदेवसाहस्सीणं जाव विहरइ ॥ १२८ ॥ कहि णं भंते ! सहस्सारदेवाणं पज्जतापज्जताणं ठाणा पज्जता ? कहि णं भंते ! सहस्सारदेवा परिवसंति ?, गोयमा ! महासुक्कस्स कप्पस्स उप्पि सपक्खिं सपडिदिसिं जाव उप्पइत्ता एत्थ णं सहस्सारे नामं कप्पे पन्नते । पाईणपडीणायए, जहा बंभलोए, नवरं छविमाणावाससहस्सा भवन्तीति मक्खायं । देवा तहेव जाव वडिसगा जहा ईसाणस्स वडिसगा । नवरं मज्झे इत्थ सहस्सारवडिसए जाव विहरंति । सहस्सारे इत्थ देविंदे देवराया परिवसइ जहा सणकुमारे । नवरं छ्हं विमाणावाससहस्साणं, तीसाए सामाणियसाहस्सीणं, चउण्ह य तीसाए आयरक्खदेवसाहस्सीणं आहेवच्चं जाव कारेमाणे० विहरइ ॥ १२९ ॥ कहि णं भंते ! आणयपाणयाणं देवाणं पज्जतापज्जताणं ठाणा पज्जता ? कहि णं भंते ! आणयपाणया देवा परिवसंति ?, गोयमा ! सहस्सारस्स कप्पस्स उप्पि सपक्खिं सपडिदिसिं जाव उप्पइत्ता एत्थ णं आणयपाणयनामा दुवे कप्पा पज्जता । पाईणपडीणायया, उदीणदाहिणवित्थिण्णा, अद्धचंदसंठाणसंठिया, अच्चिमालीभासरासिप्पभा, सेसं जहा सणकुमारे जाव पडिह्वा । तत्थ णं आणयपाणयदेवाणं चत्तारि विमाणावाससया भवन्तीति मक्खायं जाव पडिह्वा । वडिसगा जहा सोहम्मे कप्पे । नवरं मज्झे इत्थ पाणयवडिसए । ते णं वडिसगा सव्वरयणामया अच्छा जाव पडिह्वा । एत्थ णं आणयपाणयदेवाणं पज्जतापज्जताणं ठाणा पज्जता । तिसु वि

लोगस्स असंखेज्झभागे । तत्थ णं बहवे आणयपाणयदेवा परिवसंति महिद्धिया जाव पभासेमाणा । ते णं तत्थ साणं साणं विमाणावाससयाणं जाव विहरंति । पाणए इत्थ देविंदे देवराया परिवसइ जहा सणकुमारे । नवरं चउण्हं विमाणावाससयाणं, वीसाए सामाणियसाहस्सीणं, असीईए आयरक्खदेवसाहस्सीणं, अन्नोसिं च बहूणं जाव विहरइ ॥ १३० ॥ कहि णं भंते ! आरणञ्जुयाणं देवाणं पज्जत्तापज्जत्ताणं ठाणा पज्जत्ता ? कहि णं भंते ! आरणञ्जुया देवा परिवसंति ?, गोयमा ! आणयपाणयाणं कप्पाणं उप्पि सपक्खि सपडिदिसि एत्थ णं आरणञ्जुया नामं दुवे कप्पा पज्जत्ता । पाईणपडीणायया, उदीणदाहिणवित्थिण्णा, अद्धचंदसंठाणसंठिया, अच्चिमालीभासरासिवण्णाभा, असंखेज्जाओ जोयणकोडाकोडीओ आयामविकखंभेणं, असंखेज्जाओ जोयणकोडाकोडीओ परिक्खेवेणं, सव्वरयणामया, अच्छा, सण्हा, लण्हा, घट्ठा, मट्ठा, नीरया, निम्मला, निप्पंका, निक्कंज्जच्छाया, सप्पभा, सस्सिरीया, सउज्जोया, पासादीया, दरिसणिज्जा, अभिरूवा, पडिरूवा । एत्थ णं आरणञ्जुयाणं देवाणं तिञ्चि विमाणावाससया भवन्तीति मक्खायं । ते णं विमाणा सव्वरयणामया, अच्छा, सण्हा, लण्हा, घट्ठा, मट्ठा, नीरया, निम्मला, निप्पंका, निक्कंज्जच्छाया, सप्पभा, सस्सिरीया, सउज्जोया, पासादीया, दरिसणिज्जा, अभिरूवा, पडिरूवा । तेसि णं विमाणाणं कप्पाणं बहुमज्झदेसभाए पंच वडिंसया पज्जत्ता । तंजहा—अंकवडिंसए, फल्लिवडिंसए, रयणवडिंसए, जायरूवडिंसए, मज्जे एत्थ अञ्जुयवडिंसए । ते णं वडिंसया सव्वरयणामया जाव पडिरूवा । एत्थ णं आरणञ्जुयाणं देवाणं पज्जत्तापज्जत्ताणं ठाणा पज्जत्ता । तिसु वि लोगस्स असंखेज्झभागे । तत्थ णं बहवे आरणञ्जुया देवा परिवसंति । अञ्जुए इत्थ देविंदे देवराया परिवसइ, जहा पाणए जाव विहरइ । नवरं तिण्हं विमाणावाससयाणं, दसण्हं सामाणियसाहस्सीणं, चत्तालीसाए आयरक्खदेवसाहस्सीणं आहेवच्चं जाव कुव्वमाणे० विहरइ । वत्तीस अट्ठवीसा बारस अट्ठ चउरो (य) सयसहस्सा । पन्ना चत्तालीसा छच्च सहस्सा सहस्सारे ॥ १ ॥ आणयपाणयकप्पे चत्तारि सयाऽऽरणञ्जुए तिञ्चि । सत्त विमाणसयाइं चउसु वि एएसु कप्पेसु ॥ २ ॥ सामाणियसंगहणीगाहा—चउरासीइ असीई बावत्तरीं सत्तरी य सट्ठी य । पन्ना चत्तालीसा तीसा वीसा दस सहस्सा ॥ १ ॥ एए चेव आयरक्खा चउग्गुणा ॥ १३१ ॥ कहि णं भंते ! हिट्टिमगेविज्जगाणं पज्जत्तापज्जत्ताणं ठाणा पज्जत्ता ? कहि णं भंते ! हिट्टिमगेविज्जगा देवा परिवसंति ?, गोयमा ! आरणञ्जुयाणं कप्पाणं उप्पि जाव उट्ठुं दूरं उप्पइत्ता एत्थ णं हिट्टिमगेविज्जगाणं देवाणं तओ गेविज्जगविमाणपत्थडा पज्जत्ता । पाईणपडीणायया, उदीणदाहिणवित्थिण्णा, पडिपुण्णचंदसंठाणसंठिया, अच्चिमा-

लीभासरासिक्खणाभा, सेसं जहा बंभलोगे जाव पडिह्वा । तत्थ णं हेट्ठिमगे-  
विज्जगाणं देवाणं एक्कारसुत्तरे विमाणावाससए भवतीति मक्खायं । ते णं विमाणा  
सव्वरयणाभया जाव पडिह्वा । एत्थ णं हेट्ठिमगेविज्जगाणं देवाणं पज्जतापज्जताणं  
ठाणा पन्नता । तिसु वि लोगस्स असंखेज्झभागे । तत्थ णं बहवे हेट्ठिमगेविज्जगा  
देवा परिवसंति । सव्वे समिद्धिया, सव्वे समज्जुइया, सव्वे समजसा, सव्वे सम-  
बला, सव्वे समाणुभावा, महासुक्खा, अणिदा, अपेस्सा, अपुरोहिया, अहमिंदा  
नामं ते देवगणा पन्नता समणाउसो । ॥ १३२ ॥ कहि णं भंते ! मज्झिमगाणं  
गेविज्जगाणं देवाणं पज्जतापज्जताणं ठाणा पन्नता ? कहि णं भंते ! मज्झिमगेविज्जगा  
देवा परिवसंति ?, गोयमा ! हेट्ठिमगेविज्जगाणं उप्पि सपक्खि सपडिदिसिं जाव  
उप्पइत्ता एत्थ णं मज्झिमगेविज्जगादेवाणं तओ गेविज्जगविमाणपत्थडा पन्नता ।  
पाईणपडीणायया जहा हेट्ठिमगेविज्जगाणं । नवरं सत्तुत्तरे विमाणावाससए भवतीति  
मक्खायं । ते णं विमाणा जाव पडिह्वा । एत्थ णं मज्झिमगेविज्जगाणं जाव  
तिसु वि लोगस्स असंखेज्झभागे । तत्थ णं बहवे मज्झिमगेविज्जगा देवा परिवसंति  
जाव अहमिंदा नामं ते देवगणा पन्नता समणाउसो । ॥ १३३ ॥ कहि णं भंते !  
उवरिमगेविज्जगाणं देवाणं पज्जतापज्जताणं ठाणा पन्नता ? कहि णं भंते ! उवरिम-  
गेविज्जगा देवा परिवसंति ?, गोयमा ! मज्झिमगेविज्जगाणं उप्पि जाव उप्पइत्ता  
एत्थ णं उवरिमगेविज्जगाणं तओ गेविज्जगविमाणपत्थडा पन्नता । पाईणपडीणायया,  
सेसं जहा हेट्ठिमगेविज्जगाणं । नवरं एगे विमाणावाससए भवतीति मक्खायं, सेसं  
तहेव भाणियव्वं जाव अहमिंदा नामं ते देवगणा पन्नता समणाउसो ! । एक्कार-  
सुत्तरे हेट्ठिमेसु सत्तुत्तरे च मज्झिमए । सयमेगं उवरिमए पंचेव अणुत्तरविमाणा  
॥ १३४ ॥ कहि णं भंते ! अणुत्तरोववाइयाणं देवाणं पज्जतापज्जताणं ठाणा  
पन्नता ? कहि णं भंते ! अणुत्तरोववाइया देवा परिवसंति ?, गोयमा ! इमीसे रयण-  
प्पभाए पुढवीए बहुसमरमणिजाओ भूमिभागाओ उड्डं चंदिमसूरियगहगणणक्खत्त-  
तारारूवाणं बहूइं जोयणसयाइं, बहूइं जोयणसहस्साइं, बहूइं जोयणसयसहस्साइं,  
बहुगाओ जोयणकोडीओ, बहुगाओ जोयणकोडाकोडीओ, उड्डं दूरं उप्पइत्ता  
सोहम्मीसाणसणकुमार जाव आरण्ण्यकप्पा तिग्गि अट्टारसुत्तरे गेविज्जगविमाणा-  
वाससए वीईवइत्ता तेण परं दूरं गया नीरया, निम्मला, वितिमिरा, विसुद्धा,  
पंचदिसिं पंच अणुत्तरा महइमहालया महाविमाणा पन्नता । तंजहा—विजए,  
वेजयंते, जयंते, अपराजिए, सव्वट्ठसिद्धे । ते णं विमाणा सव्वरयणाभया, अच्छा,  
सण्हा, लण्हा, घट्ठा, मट्ठा, नीरया, निम्मला, निप्पंका, निक्कंठच्छाया, सप्पभा,

सस्सिरीया, सउज्जोया, पासाइया, दरिसणिज्जा, अभिरूवा, पडिरूवा । एत्थ णं अणुत्तरोववाइयाणं देवाणं पज्जतापज्जत्ताणं ठाणा पन्नत्ता । तिसु वि लोगस्स असंखे-  
ज्जभागे । तत्थ णं बहवे अणुत्तरोववाइया देवा परिवसंति । सव्वे समिद्धिया...सव्वे  
समवला, सव्वे समाणुभावा, महासुक्खा, अणिदा, अपेस्सा, अपुरोहिया, अह-  
मिंदा नामं ते देवगणा पन्नत्ता समणाउसो ! ॥ १३५ ॥ कहि णं भंते ! सिद्धाणं  
ठाणा पन्नत्ता ? कहि णं भंते ! सिद्धा परिवसंति ? गोयमा ! सव्वट्ठसिद्धस्स महा-  
विमाणस्स उवरिद्धाओ थूभियग्गाओ दुवालस जोयणे उट्ठं अवाहाए एत्थ णं ईसि-  
प्पम्भारा णां पुढवी पन्नत्ता । पणयालीसं जोयणसयसहस्साइं आयामविकखंभेणं,  
एगा जोयणकोडी बायालीसं च सयसहस्साइं तीसं च सयसहस्साइं दोन्नि य  
अउणापण्णे जोयणसए किंचि विसेसाहिए परिकखेवेणं पन्नत्ता । ईसिप्पम्भाराए णं  
पुढवीए बहुमज्झदेसभाए अट्ठजोयणिए खेत्ते अट्ठ जोयणाइं बाहल्लेणं पन्नत्ते । तओ  
अणंतरे च णं मायाए माथाए पएसपरिहाणीए परिहायमाणी परिहायमाणी सव्वेसु  
चरमंतरेसु मच्छियपत्ताओ तणुययरी, अंगुलस्स असंखेज्जभागां बाहल्लेणं पन्नत्ता ।  
ईसिप्पम्भाराए णं पुढवीए दुवालस नामधिज्जा पन्नत्ता । तंजहा-ईसी इ वा, ईसि-  
प्पम्भारा इ वा, तणू इ वा, तणुत्तणू इ वा, सिद्धित्ति वा, सिद्धालए इ वा, मुत्तित्ति  
वा, मुत्तालए इ वा, लोयग्गेत्ति वा, लोयग्गथूभियत्ति वा, लोयग्गपडिवुज्झणा  
इ वा, सव्वपाणभूयजीवसत्तसुहावहा इ वा । ईसिप्पम्भारा णं पुढवी सेया संखदल-  
विमलसोत्थियमुणालदगरयतुसारगोक्खीरहारवण्णा, उत्ताणयल्लत्तसंठाणसंठिया, सव्व-  
ज्जुणसुवण्णमइ, अच्छा, सण्हा, लण्हा, घट्ठा, मट्ठा, नीरया, निम्मला, निप्पंका,  
निक्कं कडच्छाया, सप्पमा, सस्सिरीया, सउज्जोया, पासाइया, दरिसणिज्जा, अभिरूवा,  
पडिरूवा । ईसिप्पम्भाराए णं पुढवीए सीआए जोयणम्मि लोगंतो, तस्स जे से  
उवरिल्ले गाउए तस्स णं गाउयस्स जे से उवरिल्ले छम्भागे, एत्थ णं सिद्धा भगवंतो  
साइया अपज्जवसिया अणेगजाइजरामरणजोणिसंसारकलंकलीभावपुणब्भवगम्भवास-  
वसहीपवंचसमइकंता सासयमणागयदं कालं चिट्ठंति । तत्थ वि य ते अवेया अवे-  
यणा निम्ममा असंगा य । संसारविप्पमुक्का पएसनिव्वत्तसंठाणा ॥ १ ॥ कहिं  
पडिहया सिद्धा कहिं सिद्धा पइडिया । कहिं बोदिं चइत्ता णं कत्थ गंतूण सिज्झइ ?  
॥ २ ॥ अलोए पडिहया सिद्धा लोयग्गे य पइडिया । इहं बोदिं चइत्ता णं तत्थ  
गंतूण सिज्झइ ॥ ३ ॥ बीहं वा हस्सं वा जं चरिमभवे हविज्ज संठाणं । तत्तो  
तिभागहीणा सिद्धाणोगाहणा भणिया ॥ ४ ॥ जं संठाणं तु इहं भवं चयंतस्स  
चरिमसमयंसि । आसी य पएसघणं तं संठाणं तहिं तस्स ॥ ५ ॥ तिच्चि सया

तित्तीसा धणुत्तिभागे य होइ नायव्वो । एसा खलु सिद्धाणं उक्कोसोगाहणा भणिया ॥ ६ ॥ चत्तारि य रयणीओ रयणीं तिभागूणि या य बोद्धव्वा । एसा खलु सिद्धाणं मज्झिमओगाहणा भणिया ॥ ७ ॥ एगा य होइ रयणी अट्टेव य अंगुलाई साहि(य)या । एसा खलु सिद्धाणं जहन्नओगाहणा भणिया ॥ ८ ॥ ओगाहणाइ सिद्धा भवत्तिभागेण होंति परिहीणा । संठाणमणित्थं जरामरणविप्पमुक्काणं ॥ ९ ॥ जत्थ य एगो सिद्धो तत्थ अणंता भवक्खयविमुक्का । अब्बोऽन्नसमोगाडा पुट्ठा सव्वा वि लोगंते ॥ १० ॥ फुसइ अणंते सिद्धे सव्वपएसेहिं नियमसो सिद्धा । तेऽवि य असंखिज्जगुणा देसपए-सेहिं जे पुट्ठा ॥ ११ ॥ असरीरा जीवघणा उवउत्ता दंसणे य नाणे य । सागारमणा-गारं लक्खणमेयं तु सिद्धाणं ॥ १२ ॥ केवलणाणुवउत्ता जाणंता सव्वभावगुणभावे । पासंता सव्वओ खलु केवलदिट्ठीहिऽणंताहिं ॥ १३ ॥ नवि अत्थि माणुसाणं तं सुक्खं नवि य सव्वदेवाणं । जं सिद्धाणं सुक्खं अवावाहं उवगयाणं ॥ १४ ॥ सुरगणसुहं समतं सव्वद्धापिंडियं अणंतगुणं । नवि पावइ मुत्तिसुहं णंताहिं वग्ग-वग्गूहिं ॥ १५ ॥ सिद्धस्स सुहोरासी सव्वद्धापिंडिओ जइ हवेज्जा । सोऽणंतवग्ग-भइओ सव्वागासे न माइज्जा ॥ १६ ॥ जह णाम कोइ सिच्छो नगरगुणे बहुविहे वियाणंतो । न चएइ परिकहेउं उवमाए तहिं असंतीए ॥ १७ ॥ इय सिद्धाणं सोक्खं अणोवमं नत्थि तस्स ओवम्मं । किंचि विसेसेणित्तो सारिक्खमिणं सुणह वोच्छं ॥ १८ ॥ जह सव्वकामगुणियं पुरिसो भोत्तूण भोयणं कोइ । तण्हाल्लुहाविमुक्को अच्छिज्ज जहा अमियतित्तो ॥ १९ ॥ इय सव्वकालतित्ता अउलं निव्वाणमुवगया सिद्धा । सासयमव्वावाहं चिट्ठंति सुही सुहं पत्ता ॥ २० ॥ सिद्धति य बुद्धति य पारगयत्ति व परंपरगयत्ति । उम्मुक्ककम्मकवया अजरा अमरा असंगा य ॥ २१ ॥ नित्थिन्नसव्वदुक्खा जाइजरामरणबंधणविमुक्का । अवावाहं सोक्खं अण्होंती सासयं सिद्धा ॥ २२ ॥ १३६ ॥ पन्नवणाए भगवईए वीयं ठाणपयं समत्तं ॥

दिसिगइइंदियकाए जोए वेए कसायलेसा य । सम्मतनाणदंसणसंजयउवओग-आहारे ॥ १ ॥ भासगपरित्तपज्जत्तसुहुमसन्नी भवऽत्थिए चरिमे । जीवे य खित्तबन्धे पुगलमहदंडए चेव ॥ २ ॥ दिसाणुवाएणं सव्वत्थोवा जीवा पच्छिमेणं, पुरच्छिमेणं विसेसाहिया, दाहिणेणं विसेसाहिया, उत्तरेणं विसेसाहिया ॥ १३७ ॥ दिसाणुवाएणं सव्वत्थोवा पुढविकाइया दाहिणेणं, उत्तरेणं विसेसाहिया, पुरच्छिमेणं विसेसाहिया, पच्छिमेणं विसेसाहिया । दिसाणुवाएणं सव्वत्थोवा आउक्काइया पच्छिमेणं, पुरच्छिमेणं विसेसाहिया, दाहिणेणं विसेसाहिया, उत्तरेणं विसेसाहिया । दिसाणुवाएणं सव्वत्थोवा तेउक्काइया दाहिणुत्तरेणं, पुरच्छिमेणं संखेज्जगुणा, पच्छिमेणं विसेसाहिया । दिसाणु-

[illegible]



दिसाणुवाएणं सव्वत्थोवा मणुस्सा दाहिणउत्तरेणं, पुरच्छिमेणं संखेज्जगुणा, पच्चत्थिमेणं विसेसाहिया ॥ १४२ ॥ दिसाणुवाएणं सव्वत्थोवा भवणवासी देवा पुरच्छिमपच्चत्थिमेणं, उत्तरेणं असंखेज्जगुणा, दाहिणेणं असंखेज्जगुणा । दिसाणुवाएणं सव्वत्थोवा वाणमंतरा देवा पुरच्छिमेणं, पच्चत्थिमेणं विसेसाहिया, उत्तरेणं विसेसाहिया, दाहिणेणं विसेसाहिया । दिसाणुवाएणं सव्वत्थोवा जोइसिया देवा पुरच्छिमपच्चत्थिमेणं, दाहिणेणं विसेसाहिया, उत्तरेणं विसेसाहिया । दिसाणुवाएणं सव्वत्थोवा देवा सोहम्मे कप्पे पुरच्छिमपच्चत्थिमेणं, उत्तरेणं असंखेज्जगुणा, दाहिणेणं विसेसाहिया । दिसाणुवाएणं सव्वत्थोवा देवा ईसाणे कप्पे पुरच्छिमपच्चत्थिमेणं, उत्तरेणं असंखेज्जगुणा, दाहिणेणं विसेसाहिया । दिसाणुवाएणं सव्वत्थोवा देवा सणंकुमारे कप्पे पुरच्छिमपच्चत्थिमेणं, उत्तरेणं असंखेज्जगुणा, दाहिणेणं विसेसाहिया । दिसाणुवाएणं सव्वत्थोवा देवा माहिंदे कप्पे पुरच्छिमपच्चत्थिमेणं, उत्तरेणं असंखेज्जगुणा, दाहिणेणं विसेसाहिया । दिसाणुवाएणं सव्वत्थोवा देवा बंभलोए कप्पे पुरच्छिमपच्चत्थिमउत्तरेणं, दाहिणेणं असंखेज्जगुणा । दिसाणुवाएणं सव्वत्थोवा देवा लंतए कप्पे पुरच्छिमपच्चत्थिमउत्तरेणं, दाहिणेणं असंखेज्जगुणा । दिसाणुवाएणं सव्वत्थोवा देवा महासुक्के कप्पे पुरच्छिमपच्चत्थिमउत्तरेणं, दाहिणेणं असंखेज्जगुणा । दिसाणुवाएणं सव्वत्थोवा देवा सहस्सारे कप्पे पुरच्छिमपच्चत्थिमउत्तरेणं, दाहिणेणं असंखेज्जगुणा । तेण परं बहुसमोववन्नगा समणाउसो ! ॥ १४३ ॥ दिसाणुवाएणं सव्वत्थोवा सिद्धा दाहिणउत्तरेणं, पुरच्छिमेणं संखेज्जगुणा, पच्चत्थिमेणं विसेसाहिया ॥ १ दारं ॥ १४४ ॥ एएसि णं भंते ! नेरइयाणं तिरिक्खज्जोणियाणं मणुस्साणं देवाणं सिद्धाण य पंचगइसमासेणं कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा मणुस्सा, नेरइया असंखेज्जगुणा, देवा असंखेज्जगुणा, सिद्धा अणंतगुणा, तिरिक्खज्जोणिया अणंतगुणा ॥ १४५ ॥ एएसि णं भंते ! नेरइयाणं तिरिक्खज्जोणियाणं तिरिक्खज्जोणिणीणं मणुस्साणं मणुस्सीणं देवाणं देवीणं सिद्धाण य अट्ठगइसमासेणं कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवाओ मणुस्सीओ, मणुस्सा असंखेज्जगुणा, नेरइया असंखेज्जगुणा, तिरिक्खज्जोणिणीओ असंखेज्जगुणाओ, देवा असंखेज्जगुणा, देवीओ संखेज्जगुणाओ, सिद्धा अणंतगुणा, तिरिक्खज्जोणिया अणंतगुणा ॥ २ दारं ॥ १४६ ॥ एएसि णं भंते ! सइंदियाणं एगिंदियाणं बेइंदियाणं तेइंदियाणं चउरिंदियाणं पंचिंदियाणं अणिंदियाण य कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा पंचिंदिया, चउरिंदिया विसेसाहिया, तेइंदिया विसेसाहिया,

[illegible]

[illegible]

वा बहुया वा तुल्ला वा विसेसाहिया वा ? गोयमा ! सव्वत्थोवा वाउकाइया अपज-  
त्तगा, वाउकाइया पज्जत्तगा संखेज्जगुणा ॥ एसि णं भंते ! वणस्सइकाइयाणं पज्जत्ता-  
पज्जत्ताणं कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा !  
सव्वत्थोवा वणस्सइकाइया अपज्जत्तगा, वणस्सइकाइया पज्जत्तगा संखेज्जगुणा ॥ एसि  
णं भंते ! तसकाइयाणं पज्जत्तापज्जत्ताणं कयरे कयरेहिंतो अप्पा वा बहुया वा तुल्ला  
वा विसेसाहिया वा ? गो० ! सव्वत्थोवा तसकाइया पज्जत्तगा, तसकाइया अपज्जत्तगा  
असंखेज्जगुणा ॥ १५५ ॥ एसि णं भंते ! सकाइयाणं पुढविकाइयाणं आउकाइयाणं  
तेउकाइयाणं वाउकाइयाणं वणस्सइकाइयाणं तसकाइयाणं य पज्जत्तापज्जत्ताणं कयरे  
कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा  
तसकाइया पज्जत्तगा, तसकाइया अपज्जत्तगा संखेज्जगुणा, तेउकाइया अपज्जत्तगा  
असंखेज्जगुणा, पुढविकाइया अपज्जत्तगा विसेसाहिया, आउकाइया अपज्जत्तगा विसे-  
साहिया, वाउकाइया अपज्जत्तगा विसेसाहिया, तेउकाइया पज्जत्तगा संखेज्जगुणा,  
पुढविकाइया पज्जत्तगा विसेसाहिया, आउकाइया पज्जत्तगा विसेसाहिया, वाउकाइया  
पज्जत्तगा विसेसाहिया, वणस्सइकाइया अपज्जत्तगा अणंतगुणा, सकाइया अपज्जत्तगा  
विसेसाहिया, वणस्सइकाइया पज्जत्तगा संखेज्जगुणा, सकाइया पज्जत्तगा विसेसाहिया,  
सकाइया विसेसाहिया ॥ १५६ ॥ एसि णं भंते ! सुहुमाणं सुहुमपुढविकाइयाणं  
सुहुमआउकाइयाणं सुहुमतेउकाइयाणं सुहुमवाउकाइयाणं सुहुमवणस्सइकाइयाणं  
सुहुमनिओयाणं य कयरे कयरेहिंतो अप्पा वा बहुया वा तुल्ला वा विसेसाहिया वा ?  
गोयमा ! सव्वत्थोवा सुहुमतेउकाइया, सुहुमपुढविकाइया विसेसाहिया, सुहुमआउ-  
काइया विसेसाहिया, सुहुमवाउकाइया विसेसाहिया, सुहुमनिओया असंखेज्जगुणा,  
सुहुमवणस्सइकाइया अणंतगुणा, सुहुमा विसेसाहिया ॥ १५७ ॥ एसि णं भंते !  
सुहुमअपज्जत्तगाणं सुहुमपुढविकाइयअपज्जत्तगाणं सुहुमआउकाइयअपज्जत्तगाणं सुहुम-  
तेउकाइयअपज्जत्तगाणं सुहुमवाउकाइयअपज्जत्तगाणं सुहुमवणस्सइकाइयअपज्जत्तगाणं  
सुहुमनिओयअपज्जत्तगाणं य कयरे कयरेहिंतो अप्पा वा ४ ? गोयमा ! सव्वत्थोवा  
सुहुमतेउकाइया अपज्जत्तगा, सुहुमपुढविकाइया अपज्जत्तगा विसेसाहिया, सुहुमआउ-  
काइया अपज्जत्तगा विसेसाहिया, सुहुमवाउकाइया अपज्जत्तगा विसेसाहिया, सुहुमनि-  
ओया अपज्जत्तगा असंखेज्जगुणा, सुहुमवणस्सइकाइया अपज्जत्तगा अणंतगुणा, सुहुमा  
अपज्जत्तगा विसेसाहिया ॥ १५८ ॥ एसि णं भंते ! सुहुमपज्जत्तगाणं सुहुमपुढवि-  
काइयपज्जत्तगाणं सुहुमआउकाइयपज्जत्तगाणं सुहुमतेउकाइयपज्जत्तगाणं सुहुमवाउ-  
काइयपज्जत्तगाणं सुहुमवणस्सइकाइयपज्जत्तगाणं सुहुमनिओयपज्जत्तगाणं य कयरे



काइयाणं बायरवणस्सइकाइयाणं पत्तैयसरीरबायरवणस्सइकाइयाणं बायरनिओयाणं  
 बायरतसकाइयाणं कयरे कयरेहिंतो अप्पा वा ४ ? गोयमा ! सव्वत्थोवा बायर-  
 तसकाइया, बायरतेउकाइया असंखेज्जगुणा, पत्तैयसरीरबायरवणस्सइकाइया असं-  
 खेज्जगुणा, बायरनिओया असंखेज्जगुणा, बायरपुढविकाइया असंखेज्जगुणा, बायर-  
 आउकाइया असंखेज्जगुणा, बायरवाउकाइया असंखेज्जगुणा, बायरवणस्सइकाइया  
 अणंतगुणा, बायरा विसेसाहिया ॥ १६२ ॥ एएसि णं भंते ! बायरपुढविकाइय-  
 अपज्जत्तगाणं बायरआउकाइयअपज्जत्तगाणं बायरतेउकाइयअपज्जत्तगाणं बायरवाउ-  
 काइयअपज्जत्तगाणं बायरवणस्सइकाइयअपज्जत्तगाणं पत्तैयसरीरबायरवणस्सइकाइय-  
 अपज्जत्तगाणं बायरनिओयअपज्जत्तगाणं बायरतसकाइयअपज्जत्तगाणं य कयरे  
 कयरेहिंतो अप्पा वा ४ ? गोयमा ! सव्वत्थोवा बायरतसकाइया अपज्जत्तगा,  
 बायरतेउकाइया अपज्जत्तगा असंखेज्जगुणा, पत्तैयसरीरबायरवणस्सइकाइया अपज्ज-  
 त्ता असंखेज्जगुणा, बायरनिओया अपज्जत्तगा असंखेज्जगुणा, बायरपुढविकाइया  
 अपज्जत्तगा असंखेज्जगुणा, बायरआउकाइया अपज्जत्तगा असंखेज्जगुणा, बायरवाउ-  
 काइया अपज्जत्तगा असंखेज्जगुणा, बायरवणस्सइकाइया अपज्जत्तगा अणंतगुणा,  
 बायरअपज्जत्तगा विसेसाहिया ॥ १६३ ॥ एएसि णं भंते ! बायरपज्जत्तयाणं बायर-  
 पुढवीकाइयपज्जत्तयाणं बायरआउकाइयपज्जत्तयाणं बायरतेउकाइयपज्जत्तयाणं बायर-  
 वाउकाइयपज्जत्तयाणं पत्तैयसरीरबायरवणस्सइकाइयपज्जत्तयाणं बायरनिओयपज्जत्त-  
 याणं बायरतसकाइयपज्जत्तयाणं य कयरे कयरेहिंतो अप्पा वा ४ ? गोयमा ! सव्व-  
 त्थोवा बायरतेउकाइया पज्जत्तया, बायरतसकाइया पज्जत्तया असंखेज्जगुणा, पत्तैय-  
 सरीरबायरवणस्सइकाइया पज्जत्तया असंखेज्जगुणा, बायरनिओया पज्जत्तया असंखे-  
 ज्जगुणा, बायरपुढवीकाइया पज्जत्तया असंखेज्जगुणा, बायरआउकाइया पज्जत्तया  
 असंखेज्जगुणा, बायरवाउकाइया पज्जत्तया असंखेज्जगुणा, बायरवणस्सइकाइया पज्ज-  
 त्तया अणंतगुणा, बायरपज्जत्तया विसेसाहिया ॥ १६४ ॥ एएसि णं भंते ! बायराणं  
 पज्जत्तापज्जत्ताणं कयरे कयरेहिंतो अप्पा वा ४ ? गोयमा ! सव्वत्थोवा बायरपज्ज-  
 त्तया, बायरअपज्जत्तया असंखेज्जगुणा । एएसि णं भंते ! बायरपुढवीकाइयाणं  
 पज्जत्तापज्जत्ताणं कयरे कयरेहिंतो अप्पा वा ४ ? गोयमा ! सव्वत्थोवा बायरपुढवी-  
 काइया पज्जत्तया, बायरपुढवीकाइया अपज्जत्तया असंखेज्जगुणा । एएसि णं भंते !  
 बायरआउकाइयाणं पज्जत्तापज्जत्ताणं कयरे कयरेहिंतो अप्पा वा ४ ? गोयमा !  
 सव्वत्थोवा बायरआउकाइया पज्जत्तया, बायरआउकाइया अपज्जत्तया असंखेज्ज-  
 गुणा । एएसि णं भंते ! बायरतेउकाइयाणं पज्जत्तापज्जत्ताणं कयरे कयरेहिंतो

[illegible]

वायरतसकाइया, वायरतेउकाइया असंखेज्गुणा, पत्तेयसरिरवायरवणस्सइकाइया  
असंखेज्गुणा, वायरनिओया असंखेज्गुणा, वायरपुढवीकाइया असंखेज्गुणा,  
वायरआउकाइया असंखेज्गुणा, वायरवाउकाइया असंखेज्गुणा, सुहुमतेउकाइया  
असंखेज्गुणा, सुहुमपुढवीकाइया विसेसाहिया, सुहुमआउकाइया विसेसाहिया,  
सुहुमवाउकाइया विसेसाहिया, सुहुमनिओया असंखेज्गुणा, वायरवणस्सइकाइया  
अणंतगुणा, बायरा विसेसाहिया, सुहुमवणस्सइकाइया असंखेज्गुणा, सुहुमा विसेसा-  
हिया ॥ १६७ ॥ एएसि णं भंते ! सुहुमअपज्जत्याणं सुहुमपुढवीकाइयाणं अपज्जत्त-  
याणं सुहुमआउकाइयाणं अपज्जत्तयाणं सुहुमतेउकाइयाणं अपज्जत्तयाणं सुहुमवाउ-  
काइयाणं अपज्जत्तयाणं सुहुमवणस्सइकाइयाणं अपज्जत्तयाणं सुहुमनिओयाणं अप-  
ज्जत्तयाणं वायरअपज्जत्तयाणं वायरपुढवीकाइयाणं अपज्जत्तयाणं वायरआउकाइयाणं  
अपज्जत्तयाणं वायरतेउकाइयाणं अपज्जत्तयाणं वायरवाउकाइयाणं अपज्जत्तयाणं  
वायरवणस्सइकाइयाणं अपज्जत्तयाणं पत्तेयसरिरवायरवणस्सइकाइयाणं अपज्जत्तयाणं  
वायरनिओयाणं अपज्जत्तयाणं वायरतसकाइयाणं अपज्जत्तयाणं कयरे कयरेहिंतो  
अप्पा वा ४ ? गोयमा ! सव्वत्थोवा वायरतसकाइया अपज्जत्तया, वायरतेउकाइया  
अपज्जत्तया असंखेज्गुणा, पत्तेयसरिरवायरवणस्सइकाइया अपज्जत्तया असंखेज्गुणा,  
वायरनिओया अपज्जत्तया असंखेज्गुणा, वायरपुढवीकाइया अपज्जत्तया असंखेज्ज-  
गुणा, वायरआउकाइया अपज्जत्तया असंखेज्गुणा, वायरवाउकाइया अपज्जत्तया  
असंखेज्गुणा, सुहुमतेउकाइया अपज्जत्तया असंखेज्गुणा, सुहुमपुढवीकाइया अप-  
ज्जत्तया विसेसाहिया, सुहुमआउकाइया अपज्जत्तया विसेसाहिया, सुहुमवाउकाइया  
अपज्जत्तया विसेसाहिया, सुहुमनिओया अपज्जत्तया असंखेज्गुणा, वायरवणस्सइ-  
काइया अपज्जत्तया अणंतगुणा, बायरा अपज्जत्तया विसेसाहिया, सुहुमवणस्सइकाइया  
अपज्जत्तया असंखेज्गुणा, सुहुमा अपज्जत्तया विसेसाहिया ॥ १६८ ॥ एएसि णं  
भंते ! सुहुमपज्जत्तयाणं सुहुमपुढविकाइयपज्जत्तयाणं सुहुमआउकाइयपज्जत्तयाणं सुहु-  
मतेउकाइयपज्जत्तयाणं सुहुमवाउकाइयपज्जत्तयाणं सुहुमवणस्सइकाइयपज्जत्तयाणं सुहु-  
मनिओयपज्जत्तयाणं वायरपज्जत्तयाणं वायरपुढविकाइयपज्जत्तयाणं वायरआउकाइ-  
यपज्जत्तयाणं वायरतेउकाइयपज्जत्तयाणं वायरवाउकाइयपज्जत्तयाणं वायरवणस्सइ-  
काइयपज्जत्तयाणं पत्तेयसरिरवायरवणस्सइकाइयपज्जत्तयाणं वायरनिओयपज्जत्तयाणं  
वायरतसकाइयपज्जत्तयाणं य कयरे कयरेहिंतो अप्पा वा ४ ? गोयमा ! सव्वत्थोवा  
वायरतेउकाइया पज्जत्तया, वायरतसकाइया पज्जत्तया असंखेज्गुणा, पत्तेयसरिर-  
वायरवणस्सइकाइया पज्जत्तया असंखेज्गुणा, वायरनिओया पज्जत्तया असंखेज्गुणा,



[illegible]

असंखेजगुणा, सुहुमनिओया पज्जत्तया संखेजगुणा ॥ १७० ॥ एएसि णं भंते ! सुहुमाणं सुहुमपुढवीकाइयाणं सुहुमआउकाइयाणं सुहुमतेउकाइयाणं सुहुमवाउकाइयाणं सुहुमवणस्सइकाइयाणं सुहुमनिओयाणं बायरारणं बायरपुढविकाइयाणं बायरआउकाइयाणं बायरतेउकाइयाणं बायरवाउकाइयाणं बायरवणस्सइकाइयाणं पत्तैयसरीरबायरवणस्सइकाइयाणं बायरनिओयाणं बायरतसकाइयाणं य पज्जत्तापज्जत्ताणं कयरे कयरेहिंतो अप्पा वा ४ ? गोयमा ! सव्वत्थोवा बायरतेउकाइया पज्जत्तया, बायरतसकाइया पज्जत्तया असंखेजगुणा, बायरतसकाइया अपज्जत्तया असंखेजगुणा, पत्तैयसरीरबायरवणस्सइकाइया पज्जत्तया असंखेजगुणा, बायरनिओया पज्जत्तया असंखेजगुणा, बायरपुढविकाइया पज्जत्तया असंखेजगुणा, बायरआउकाइया पज्जत्तया असंखेजगुणा, बायरवाउकाइया पज्जत्तया असंखेजगुणा, बायरतेउकाइया अपज्जत्तया असंखेजगुणा, पत्तैयसरीरबायरवणस्सइकाइया अपज्जत्तया असंखेजगुणा, बायरनिओया अपज्जत्तया असंखेजगुणा, बायरपुढवीकाइया अपज्जत्तया असंखेजगुणा, बायरआउकाइया अपज्जत्तया असंखेजगुणा, बायरवाउकाइया अपज्जत्तया असंखेजगुणा, सुहुमतेउकाइया अपज्जत्तया असंखेजगुणा, सुहुमपुढवीकाइया अपज्जत्तया विसेसाहिया, सुहुमआउकाइया अपज्जत्तया विसेसाहिया, सुहुमवाउकाइया अपज्जत्तया विसेसाहिया, सुहुमतेउकाइया पज्जत्तया असंखेजगुणा, सुहुमपुढवीकाइया पज्जत्तया विसेसाहिया, सुहुमआउकाइया पज्जत्तया विसेसाहिया, सुहुमवाउकाइया पज्जत्तया विसेसाहिया, सुहुमनिओया अपज्जत्तया असंखेजगुणा, सुहुमनिओया पज्जत्तया संखेजगुणा, बायरवणस्सइकाइया पज्जत्तया अणंतगुणा, बायरपज्जत्तया विसेसाहिया, बायरवणस्सइकाइया अपज्जत्तया असंखेजगुणा, बायरअपज्जत्तया विसेसाहिया, बायरा विसेसाहिया, सुहुमवणस्सइकाइया अपज्जत्तया असंखेजगुणा, सुहुमअपज्जत्तया विसेसाहिया, सुहुमवणस्सइकाइया पज्जत्तया संखेजगुणा, सुहुमपज्जत्तया विसेसाहिया, सुहुमा विसेसाहिया ॥ ४ दारं ॥ १७१ ॥ एएसि णं भन्ते ! जीवाणं सजोगीणं मणजोगीणं वइजोगीणं कायजोगीणं अजोगीणं य कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा जीवा मणजोगी, वइजोगी असंखेजगुणा, अजोगी अणंतगुणा, कायजोगी अणंतगुणा, सजोगी विसेसाहिया ॥ ५ दारं ॥ १७२ ॥ एएसि णं भन्ते ! जीवाणं सवेयगाणं इत्थीवेयगाणं पुरिसवेयगाणं नपुंसगवेयगाणं अवेयगाणं य कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा जीवा पुरिसवेयगा, इत्थीवेयगा संखेजगुणा, अवेयगा अणंतगुणा, नपुंसगवेयगा अणंत-

गुणा, सवेयगा विसेसाहिया ॥ ६ दारं ॥ १७३ ॥ एसि णं भंते ! सकसाईणं कोहकसाईणं माणकसाईणं मायाकसाईणं लोहकसाईणं अकसाईणं य कयरे कयरे-  
 हितो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा जीवा  
 अकसाई, माणकसाई अणंतगुणा, कोहकसाई विसेसाहिया, मायाकसाई विसेसाहिया,  
 लोहकसाई विसेसाहिया, सकसाई विसेसाहिया ॥ ७ दारं ॥ १७४ ॥ एसि णं  
 भंते ! जीवाणं सलेस्साणं किण्हलेस्साणं नीललेस्साणं काउलेस्साणं तेउलेस्साणं पम्ह-  
 लेस्साणं सुक्कलेस्साणं अलेस्साणं य कयरे कयरेहितो अप्पा वा बहुया वा तुल्ला वा  
 विसेसाहिया वा ? गोयमा ! सव्वत्थोवा जीवा सुक्कलेस्सा, पम्हलेस्सा संखेज्जगुणा,  
 तेउलेस्सा संखेज्जगुणा, अलेस्सा अणंतगुणा, काउलेस्सा अणंतगुणा, नीललेस्सा  
 विसेसाहिया, कण्हलेस्सा विसेसाहिया, सलेस्सा विसेसाहिया ॥ ८ दारं ॥ १७५ ॥  
 एसि णं भंते ! जीवाणं सम्मदिट्ठीणं मिच्छादिट्ठीणं सम्मामिच्छादिट्ठीणं य कयरे  
 कयरेहितो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा जीवा  
 सम्मामिच्छादिट्ठी, सम्मदिट्ठी अणंतगुणा, मिच्छादिट्ठी अणंतगुणा ॥ ९ दारं ॥ १७६ ॥  
 एसि णं भंते ! जीवाणं आभिणिबोहियणाणीणं सुयणाणीणं ओहिणाणीणं मण-  
 पज्जवणाणीणं केवलणाणीणं य कयरे कयरेहितो अप्पा वा बहुया वा तुल्ला वा  
 विसेसाहिया वा ? गोयमा ! सव्वत्थोवा जीवा मणपज्जवणाणी, ओहिणाणी असं-  
 खेज्जगुणा, आभिणिबोहियणाणी सुयणाणी दोवि तुल्ला विसेसाहिया, केवलणाणी  
 अणंतगुणा ॥ १७७ ॥ एसि णं भंते ! जीवाणं मइअन्नाणीणं सुयअन्नाणीणं  
 विभंगणाणीणं य कयरे कयरेहितो अप्पा वा बहुया वा तुल्ला वा विसेसाहिया वा ?  
 गोयमा ! सव्वत्थोवा जीवा विभंगणाणी, मइअन्नाणी सुयअन्नाणी दोवि तुल्ला  
 अणंतगुणा ॥ १७८ ॥ एसि णं भंते ! जीवाणं आभिणिबोहियणाणीणं सुयनाणीणं  
 ओहिनाणीणं मणपज्जवनाणीणं केवलनाणीणं मइअन्नाणीणं सुयअन्नाणीणं विभंग-  
 नाणीणं य कयरे कयरेहितो अप्पा वा बहुया वा तुल्ला वा विसेसाहिया वा ? गोयमा !  
 सव्वत्थोवा जीवा मणपज्जवनाणी, ओहिनाणी असंखेज्जगुणा, आभिणिबोहियणाणी  
 सुयनाणी दोवि तुल्ला विसेसाहिया, विभंगनाणी असंखेज्जगुणा, केवलनाणी अणंत-  
 गुणा, मइअन्नाणी सुयअन्नाणी य दोवि तुल्ला अणंतगुणा ॥ १० दारं ॥ १७९ ॥  
 एसि णं भंते ! जीवाणं चक्खुदंसणीणं अचक्खुदंसणीणं ओहिदंसणीणं केवलदंस-  
 णीणं य कयरे कयरेहितो अप्पा वा बहुया वा तुल्ला वा विसेसाहिया वा ? गोयमा !  
 सव्वत्थोवा जीवा ओहिदंसणी, चक्खुदंसणी असंखेज्जगुणा, केवलदंसणी अणंतगुणा,  
 अचक्खुदंसणी अणंतगुणा ॥ ११ दारं ॥ १८० ॥ एसि णं भंते ! जीवाणं

संजयाणं असंजयाणं संजयासंजयाणं नोसंजयनोअसंजयनोसंजयासंजयाणं य कयरे  
 कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा  
 जीवा संजया, संजयासंजया असंखेज्जगुणा, नोसंजयनोअसंजयनोसंजयासंजया  
 अणंतगुणा, असंजया अणंतगुणा ॥ १२ दारं ॥ १८१ ॥ एएसि णं भंते !  
 जीवाणं सागारोवउत्ताणं अणागारोवउत्ताणं य कयरे कयरेहिंतो अप्पा वा बहुया  
 वा तुल्ला वा विसेसाहिया वा ? गोयमा ! सव्वत्थोवा जीवा अणागारोवउत्ता,  
 सागारोवउत्ता संखेज्जगुणा ॥ १३ दारं ॥ १८२ ॥ एएसि णं भंते ! जीवाणं  
 आहारगाणं अणाहारगाणं य कयरे कयरेहिंतो अप्पा वा बहुया वा तुल्ला वा विसे-  
 साहिया वा ? गोयमा ! सव्वत्थोवा जीवा अणाहारगा, आहारगा असंखेज्जगुणा  
 ॥ १४ दारं ॥ १८३ ॥ एएसि णं भंते ! जीवाणं भासगाणं अभासगाणं य कयरे  
 कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा  
 जीवा भासगा, अभासगा अणंतगुणा ॥ १५ दारं ॥ १८४ ॥ एएसि णं भंते !  
 जीवाणं परित्ताणं अपरित्ताणं नोपरित्तनोअपरित्ताणं य कयरे कयरेहिंतो अप्पा वा  
 बहुया वा तुल्ला वा विसेसाहिया वा ? गोयमा ! सव्वत्थोवा जीवा परित्ता, नोपरि-  
 त्तनोअपरित्ता अणंतगुणा, अपरित्ता अणंतगुणा ॥ १६ दारं ॥ १८५ ॥ एएसि णं  
 भंते ! जीवाणं पज्जत्ताणं अपज्जत्ताणं नोपज्जत्तानोअपज्जत्ताणं य कयरे कयरेहिंतो  
 अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा जीवा नोपज्ज-  
 त्तानोअपज्जत्ता, अपज्जत्ता अणंतगुणा, पज्जत्ता संखेज्जगुणा ॥ १७ दारं ॥  
 ॥ १८६ ॥ एएसि णं भंते ! जीवाणं सुहुमाणं बायराणं नोसुहुमनोबायराणं य कयरे  
 कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा  
 जीवा नोसुहुमनोबायरा, बायरा अणंतगुणा, सुहुमा असंखेज्जगुणा ॥ १८ दारं ॥  
 ॥ १८७ ॥ एएसि णं भंते ! जीवाणं सच्चीणं असच्चीणं नोसच्चीनोअसच्चीणं य कयरे  
 कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोव-  
 जीवा सच्ची, नोसच्चीनोअसच्ची अणंतगुणा, असच्ची अणंतगुणा ॥ १९ दारं ॥  
 ॥ १८८ ॥ एएसि णं भंते ! जीवाणं भवसिद्धियाणं अभवसिद्धियाणं नोभव-  
 सिद्धियानोअभवसिद्धियाणं य कयरे कयरेहिंतो अप्पा वा बहुया वा तुल्ला वा  
 विसेसाहिया वा ? गोयमा ! सव्वत्थोवा जीवा अभवसिद्धिया, नोभवसिद्धियाणो-  
 अभवसिद्धिया अणंतगुणा, भवसिद्धिया अणंतगुणा ॥ २० दारं ॥ १८९ ॥ एएसि  
 णं भंते ! धम्मत्थिकायअधम्मत्थिकायआगासत्थिकायजीवत्थिकायपोगलत्थिकाया  
 अद्धासमयाणं दव्वट्ठयाए कयरे कयरेहिंतो अप्पा वा बहुया वा तुल्ला वा विसेसा-

हिया वा ? गोयमा ! धम्मत्थिकाए अधम्मत्थिकाए आगासत्थिकाए एए णं तिन्निवि तुल्ला दव्वट्ठयाए सव्वत्थोवा, जीवत्थिकाए दव्वट्ठयाए अणंतगुणे, पोग्गलत्थिकाए दव्वट्ठयाए अणंतगुणे, अद्दासमए दव्वट्ठयाए अणंतगुणे ॥ १९० ॥ एएसि णं भंते ! धम्मत्थिकायअधम्मत्थिकायआगासत्थिकायजीवत्थिकायपोग्गलत्थिकायअद्दासमयाणं पएसट्ठयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! धम्मत्थिकाए अधम्मत्थिकाए एए णं दोवि तुल्ला पएसट्ठयाए सव्वत्थोवा, जीवत्थिकाए पएसट्ठयाए अणंतगुणे, पोग्गलत्थिकाए पएसट्ठयाए अणंतगुणे, अद्दासमए पएसट्ठयाए अणंतगुणे, आगासत्थिकाए पएसट्ठयाए अणंतगुणे ॥ १९१ ॥ एयस्स णं भंते ! धम्मत्थिकायस्स दव्वट्ठपएसट्ठयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवे एगे धम्मत्थिकाए दव्वट्ठयाए, से चेव पएसट्ठयाए असंखेज्जगुणे । एयस्स णं भंते ! अधम्मत्थिकायस्स दव्वट्ठपएसट्ठयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवे एगे अधम्मत्थिकाए दव्वट्ठयाए, से चेव पएसट्ठयाए असंखेज्जगुणे । एयस्स णं भंते ! आगासत्थिकायस्स दव्वट्ठपएसट्ठयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवे एगे आगासत्थिकाए दव्वट्ठयाए, से चेव पएसट्ठयाए अणंतगुणे । एयस्स णं भंते ! जीवत्थिकायस्स दव्वट्ठपएसट्ठयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवे जीवत्थिकाए दव्वट्ठयाए, से चेव पएसट्ठयाए असंखेज्जगुणे । एयस्स णं भंते ! पोग्गलत्थिकायस्स दव्वट्ठपएसट्ठयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवे पोग्गलत्थिकाए दव्वट्ठयाए, से चेव पएसट्ठयाए असंखेज्जगुणे । अद्दासमए न पुच्छिज्जइ, पएसभावा ॥ १९२ ॥ एएसि णं भंते ! धम्मत्थिकायअधम्मत्थिकायआगासत्थिकायजीवत्थिकायपोग्गलत्थिकायअद्दासमयाणं दव्वट्ठपएसट्ठयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! धम्मत्थिकाए अधम्मत्थिकाए आगासत्थिकाए एए तिन्नि वि तुल्ला दव्वट्ठयाए सव्वत्थोवा, धम्मत्थिकाए अधम्मत्थिकाए य एएसि णं दोन्नि वि तुल्ला पएसट्ठयाए असंखेज्जगुणा, जीवत्थिकाए दव्वट्ठयाए अणंतगुणे, से चेव पएसट्ठयाए असंखेज्जगुणे, पोग्गलत्थिकाए दव्वट्ठयाए अणंतगुणे, से चेव पएसट्ठयाए असंखेज्जगुणे, अद्दासमए दव्वट्ठपएसट्ठयाए अणंतगुणे, आगासत्थिकाए पएसट्ठयाए अणंतगुणे ॥ २१ दारं ॥ १९३ ॥ एएसि णं भंते ! जीवाणं चरिमाणं अचरिमाणं य कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा !

सव्वत्थोवा जीवा अचरिमा, चरिमा अणंतगुणा ॥ २२ दारं ॥ १९४ ॥ एसि णं भंते ! जीवाणं पोम्मलानं अद्धासमयाणं सव्वदव्वाणं सव्वपएसाणं सव्वपज्जवाणं य कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा जीवा, पोम्मला अणंतगुणा, अद्धासमया अणंतगुणा, सव्वदव्वा विसेसाहिया, सव्वपएसा अणंतगुणा, सव्वपज्जवा अणंतगुणा ॥ २३ दारं ॥ १९५ ॥ खेत्ताणुवाएणं सव्वत्थोवा जीवा उड्डल्लोयतिरियलोए, अहोल्लोयतिरियलोए विसेसाहिया, तिरियलोए असंखेज्जगुणा, तेलुक्के असंखेज्जगुणा, उड्डल्लोए असंखेज्जगुणा, अहोल्लोए विसेसाहिया ॥ १९६ ॥ खेत्ताणुवाएणं सव्वत्थोवा नेरइया तेलोक्के, अहोल्लोयतिरियलोए असंखेज्जगुणा, अहोल्लोए असंखेज्जगुणा ॥ १९७ ॥ खेत्ताणुवाएणं सव्वत्थोवा तिरिक्खज्जोणिया उड्डल्लोयतिरियलोए, अहोल्लोयतिरियलोए विसेसाहिया, तिरियलोए असंखेज्जगुणा, तेलोक्के असंखेज्जगुणा, उड्डल्लोए असंखेज्जगुणा, अहोल्लोए विसेसाहिया । खेत्ताणुवाएणं सव्वत्थोवाओ तिरिक्खज्जोणिणीओ उड्डल्लोए, उड्डल्लोयतिरियलोए असंखेज्जगुणाओ, तेलोक्के संखेज्जगुणाओ, अहोल्लोयतिरियलोए संखेज्जगुणाओ, अहोल्लोए संखेज्जगुणाओ, तिरियलोए संखेज्जगुणाओ ॥ १९८ ॥ खेत्ताणुवाएणं सव्वत्थोवा मणुस्सा तेलोक्के, उड्डल्लोयतिरियलोए असंखेज्जगुणा, अहोल्लोयतिरियलोए संखेज्जगुणा, उड्डल्लोए संखेज्जगुणा, अहोल्लोए संखेज्जगुणा, तिरियलोए संखेज्जगुणा । खेत्ताणुवाएणं सव्वत्थोवाओ मणुस्सीओ तेलोक्के, उड्डल्लोयतिरियलोए संखेज्जगुणाओ, अहोल्लोयतिरियलोए संखेज्जगुणाओ, उड्डल्लोए संखेज्जगुणाओ, अहोल्लोए संखेज्जगुणाओ, तिरियलोए संखेज्जगुणाओ ॥ १९९ ॥ खेत्ताणुवाएणं सव्वत्थोवा देवा उड्डल्लोए, उड्डल्लोयतिरियलोए असंखेज्जगुणा, तेलोक्के संखेज्जगुणा, अहोल्लोयतिरियलोए संखेज्जगुणा, अहोल्लोए संखेज्जगुणा, तिरियलोए संखेज्जगुणा । खेत्ताणुवाएणं सव्वत्थोवाओ देवीओ उड्डल्लोए, उड्डल्लोयतिरियलोए असंखेज्जगुणाओ, तेलोक्के संखेज्जगुणाओ, अहोल्लोयतिरियलोए संखेज्जगुणाओ, अहोल्लोए संखेज्जगुणाओ, तिरियलोए संखेज्जगुणाओ ॥ २०० ॥ खेत्ताणुवाएणं सव्वत्थोवा भवणवासी देवा उड्डल्लोए, उड्डल्लोयतिरियलोए असंखेज्जगुणा, तेलोक्के संखेज्जगुणा, अहोल्लोयतिरियलोए असंखेज्जगुणा, तिरियलोए असंखेज्जगुणा, अहोल्लोए असंखेज्जगुणा । खेत्ताणुवाएणं सव्वत्थोवाओ भवणवासिणीओ देवीओ उड्डल्लोए, उड्डल्लोयतिरियलोए असंखेज्जगुणाओ, तेलोक्के संखेज्जगुणाओ, अहोल्लोयतिरियलोए असंखेज्जगुणाओ, तिरियलोए असंखेज्जगुणाओ, अहोल्लोए असंखेज्जगुणाओ ॥ खेत्ताणुवाएणं सव्वत्थोवा वाणमंतरा देवा उड्डल्लोए, उड्डल्लोयतिरियलोए असंखेज्जगुणा, तेलोक्के संखेज्जगुणा, अहोल्लोयतिरियलोए असंखेज्जगुणा, अहोल्लोए

[illegible]





[illegible]

वाएणं सव्वत्थोवा तसकाइया अपज्जत्तया तेलोके, उड्डुल्लोयतिरियलोए असंखेज्जगुणा, अहोल्लोयतिरियलोए संखेज्जगुणा, उड्डुल्लोए संखेज्जगुणा, अहोल्लोए संखेज्जगुणा, तिरियलोए असंखेज्जगुणा । खेत्ताणुवाएणं सव्वत्थोवा तसकाइया पज्जत्तया तेलोके, उड्डुल्लोयतिरियलोए असंखेज्जगुणा, अहोल्लोयतिरियलोए संखेज्जगुणा, उड्डुल्लोए संखेज्जगुणा, अहोल्लोए संखेज्जगुणा, तिरियलोए असंखेज्जगुणा ॥ २४ दारं ॥ २१० ॥ एएसि णं भंते ! जीवाणं आउयस्स कम्मस्स बंधगाणं अवंधगाणं पज्जत्ताणं अपज्जत्ताणं सुत्ताणं जागराणं समोहयाणं असमोहयाणं सायावेयगाणं असायावेयगाणं इंदिओवउत्ताणं नोइंदिओवउत्ताणं सागारोवउत्ताणं अणागारोवउत्ताणं य कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा जीवा आउयस्स कम्मस्स बंधगा १, अपज्जत्तया संखेज्जगुणा २, सुत्ता संखेज्जगुणा ३, समोहया संखेज्जगुणा ४, सायावेयगा संखेज्जगुणा ५, इंदिओवउत्ता संखेज्जगुणा ६, अणागारोवउत्ता संखेज्जगुणा ७, सागारोवउत्ता संखेज्जगुणा ८, नोइंदिओवउत्ता विसेसाहिया ९, असायावेयगा विसेसाहिया १०, असमोहया विसेसाहिया ११, जागरा विसेसाहिया १२, पज्जत्तया विसेसाहिया १३, आउयस्स कम्मस्स अवंधगा विसेसाहिया १४ ॥ २५ दारं ॥ २११ ॥ खेत्ताणुवाएणं सव्वत्थोवा पुग्गला तेलोके, उड्डुल्लोयतिरियलोए अणंतगुणा, अहोल्लोयतिरियलोए विसेसाहिया, तिरियलोए असंखेज्जगुणा, उड्डुल्लोए असंखेज्जगुणा, अहोल्लोए विसेसाहिया । दिसाणुवाएणं सव्वत्थोवा पुग्गला उड्डुदिसाए, अहोदिसाए विसेसाहिया, उत्तरपुरच्छिमेणं दाहिणपच्चत्थिमेणं उ दोवि तुल्ला असंखेज्जगुणा, दाहिणपुरच्छिमेणं उत्तरपच्चत्थिमेणं य दोवि विसेसाहिया, पुरच्छिमेणं असंखेज्जगुणा, पच्चत्थिमेणं विसेसाहिया, दाहिणेणं विसेसाहिया, उत्तरेणं विसेसाहिया । खेत्ताणुवाएणं सव्वत्थोवाई दव्वाई तेलोके, उड्डुल्लोयतिरियलोए अणंतगुणाइं, अहोल्लोयतिरियलोए विसेसाहियाइं, उड्डुल्लोए असंखेज्जगुणाइं, अहोल्लोए अणंतगुणाइं, तिरियलोए संखेज्जगुणाइं । दिसाणुवाएणं सव्वत्थोवाई दव्वाई अहोदिसाए, उड्डुदिसाए अणंतगुणाइं, उत्तरपुरच्छिमेणं दाहिणपच्चत्थिमेणं य दोवि तुल्लाइं असंखेज्जगुणाइं, दाहिणपुरच्छिमेणं उत्तरपच्चत्थिमेणं य दोवि तुल्लाइं विसेसाहियाइं, पुरच्छिमेणं असंखेज्जगुणाइं, पच्चत्थिमेणं विसेसाहियाइं, दाहिणेणं विसेसाहियाइं, उत्तरेणं विसेसाहियाइं ॥ २१२ ॥ एएसि णं भंते ! परमाणुपोग्गलाणं संखेज्जपएसियाणं असंखेज्जपएसियाणं अणंतपएसियाणं य खंधाणं दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा अणंतपएसिया खंधा दव्वट्ठयाए, परमाणुपोग्गला दव्वट्ठयाए

अणंतगुणा, संखेजपएसिया खंधा दव्वट्टयाए संखेजगुणा, असंखपएसिया खंधा दव्वट्टयाए असंखेजगुणा । पएसट्टयाए-सव्वत्थोवा अणंतपएसिया खंधा पएसट्टयाए, परमाणुपोग्गला अपएसट्टयाए अणंतगुणा, संखेजपएसिया खंधा पएसट्टयाए संखेजगुणा, असंखपएसिया खंधा पएसट्टयाए असंखेजगुणा । दव्वट्टपएसट्टयाए-सव्वत्थोवा अणंतपएसिया खंधा दव्वट्टयाए, ते चेव पएसट्टयाए अणंतगुणा, परमाणुपोग्गला दव्वट्टापएसट्टयाए अणंतगुणा, संखेजपएसिया खंधा दव्वट्टयाए संखेजगुणा, ते चेव पएसट्टयाए संखेजगुणा, असंखपएसिया खंधा दव्वट्टयाए असंखेजगुणा, ते चेव पएसट्टयाए असंखेजगुणा ॥२१३॥ एएसि णं भंते ! एगपएसोगाढाणं संखेजपएसोगाढाणं असंखेजपएसोगाढाणं य पोग्गलाणं दव्वट्टयाए पएसट्टयाए दव्वट्टपएसट्टयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा एगपएसोगाढा पोग्गला दव्वट्टयाए, संखेजपएसोगाढा पोग्गला दव्वट्टयाए संखेजगुणा, असंखेजपएसोगाढा पोग्गला दव्वट्टयाए असंखेजगुणा, पएसट्टयाए-सव्वत्थोवा एगपएसोगाढा पोग्गला पएसट्टयाए, संखेजपएसोगाढा पोग्गला पएसट्टयाए संखेजगुणा, असंखेजपएसोगाढा पोग्गला पएसट्टयाए असंखेजगुणा । दव्वट्टपएसट्टयाए-सव्वत्थोवा एगपएसोगाढा पुग्गला दव्वट्टपएसट्टयाए, संखिजपएसोगाढा पुग्गला दव्वट्टयाए संखिजगुणा, ते चेव पएसट्टयाए संखिजगुणा, असंखिजपएसोगाढा पुग्गला दव्वट्टयाए असंखिजगुणा, ते चेव पएसट्टयाए असंखिजगुणा ॥२१४॥ एएसि णं भन्ते ! एगसमयठिइयाणं संखिजसमयठिइयाणं असंखिजसमयठिइयाणं पुग्गलाणं दव्वट्टयाए पएसट्टयाए दव्वट्टपएसट्टयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा एगसमयठिइया पुग्गला दव्वट्टयाए, संखिजसमयठिइया पुग्गला दव्वट्टयाए संखिजगुणा, असंखिजसमयठिइया पुग्गला दव्वट्टयाए असंखिजगुणा । पएसट्टयाए-सव्वत्थोवा एगसमयठिइया पुग्गला पएसट्टयाए, संखेजसमयठिइया पुग्गला पएसट्टयाए संखेजगुणा, असंखेजसमयठिइया पुग्गला पएसट्टयाए असंखेजगुणा । दव्वट्टपएसट्टयाए-सव्वत्थोवा एगसमयठिइया पुग्गला दव्वट्टपएसट्टयाए, संखिजसमयठिइया पुग्गला दव्वट्टयाए संखिजगुणा, ते चेव पएसट्टयाए संखिजगुणा । असंखिजसमयठिइया पुग्गला दव्वट्टयाए असंखिजगुणा, ते चेव पएसट्टयाए असंखिजगुणा ॥ २१५ ॥ एएसि णं भंते ! एगगुणकालगाणं संखिजगुणकालगाणं असंखिजगुणकालगाणं अणंतगुणकालगाणं य पुग्गलाणं दव्वट्टयाए पएसट्टयाए दव्वट्टपएसट्टयाए य कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! जहा पुग्गला तहा

भाणियव्वा, एवं संखिज्जगुणकालगाण वि । एवं सेसावि वर्णणा गंधा रसा फासा  
 भाणियव्वा । फासाणं कक्खडमउयगुरुयलहुयाणं जहा एगपएसोगाढाणं भणियं  
 तहा भाणियव्वं । अवसेसा फासा जहा वच्चा तहा भाणियव्वा ॥ २६ दारं ॥ २१६ ॥  
 अह भंते ! सव्वजीवप्पबहुं महादण्डयं वन्नइस्सामि-सव्वत्थोवा गब्भवक्कंतिया  
 मणुस्सा १, मणुस्सीओ संखिज्जगुणाओ २, वायरतेउकाइया पज्जत्तया असंखिज्ज-  
 गुणा ३, अणुत्तरोववाइया देवा असंखिज्जगुणा ४, उवरिमगेविज्जगा देवा संखिज्ज-  
 गुणा ५, मज्झिमगेविज्जगा देवा संखिज्जगुणा ६, हिट्ठिमगेविज्जगा देवा संखिज्ज-  
 गुणा ७, अञ्जुए कप्पे देवा संखिज्जगुणा ८, आरणे कप्पे देवा संखिज्जगुणा ९,  
 पाणए कप्पे देवा संखिज्जगुणा १०, आणए कप्पे देवा संखिज्जगुणा ११, अहे-  
 सत्तमाए पुढवीए नेरइया असंखिज्जगुणा १२, छट्ठीए तमाए पुढवीए नेरइया  
 असंखिज्जगुणा १३, सहस्सारे कप्पे देवा असंखिज्जगुणा १४, महासुक्के कप्पे देवा  
 असंखिज्जगुणा १५, पंचमाए धूमप्पमाए पुढवीए नेरइया असंखिज्जगुणा १६,  
 लंतए कप्पे देवा असंखिज्जगुणा १७, चउत्थीए पंकप्पमाए पुढवीए नेरइया  
 असंखिज्जगुणा १८, वंभलोए कप्पे देवा असंखिज्जगुणा १९, तच्चाए वालुयप्पमाए  
 पुढवीए नेरइया असंखिज्जगुणा २०, माहिंदे कप्पे देवा असंखिज्जगुणा २१,  
 सणकुमारे कप्पे देवा असंखिज्जगुणा २२, दोच्चाए सक्करप्पमाए पुढवीए नेरइया  
 असंखिज्जगुणा २३, संमुच्छिन्ना मणुस्सा असंखिज्जगुणा २४, ईसाणे कप्पे देवा  
 असंखिज्जगुणा २५, ईसाणे कप्पे देवीओ संखिज्जगुणाओ २६, सोहम्मए कप्पे देवा  
 संखिज्जगुणा २७, सोहम्मए कप्पे देवीओ संखिज्जगुणाओ २८, भवणवासी देवा  
 असंखिज्जगुणा २९, भवणवासिणीओ देवीओ संखिज्जगुणाओ ३०, इमीसे रयणप्प-  
 माए पुढवीए नेरइया असंखिज्जगुणा ३१, खहयरपंचिदियतिरिक्खजोणिया पुरिसा  
 असंखिज्जगुणा ३२, खहयरपंचिदियतिरिक्खजोणिणीओ संखिज्जगुणाओ ३३,  
 थलयरपंचिदियतिरिक्खजोणिया पुरिसा संखिज्जगुणा ३४, थलयरपंचिदियतिरि-  
 क्खजोणिणीओ संखिज्जगुणाओ ३५, जलयरपंचिदियतिरिक्खजोणिया पुरिसा  
 संखिज्जगुणा ३६, जलयरपंचिदियतिरिक्खजोणिणीओ संखिज्जगुणाओ ३७,  
 वाणमंतरा देवा संखिज्जगुणा ३८, वाणमंतरीओ देवीओ संखिज्जगुणाओ ३९,  
 जोइसिया देवा संखिज्जगुणा ४०, जोइसिणीओ देवीओ संखिज्जगुणाओ ४१,  
 खहयरपंचिदियतिरिक्खजोणिया नपुंसगा संखिज्जगुणा ४२, थलयरपंचिदियतिरि-  
 क्खजोणिया नपुंसगा संखिज्जगुणा ४३, जलयरपंचिदियतिरिक्खजोणिया नपुंसगा  
 संखिज्जगुणा ४४, चउरिंदिया पज्जत्तया संखिज्जगुणा ४५, पंचिदिया पज्जत्तया  
 २२ सुत्ता०

विसेसाहिया ४६, बेइंदिया पज्जत्तया विसेसाहिया ४७, तेइंदिया पज्जत्तया विसेसाहिया ४८, पंचिंदिया अपज्जत्तया असंखिज्जगुणा ४९, चउरिंदिया अपज्जत्तया विसेसाहिया ५०, तेइंदिया अपज्जत्तया विसेसाहिया ५१, बेइंदिया अपज्जत्तया विसेसाहिया ५२, पत्तेयसरीरबायरवणस्सइकाइया पज्जत्तया असंखिज्जगुणा ५३, बायरनिओया पज्जत्तया असंखिज्जगुणा ५४, बायरपुढवीकाइया पज्जत्तया असंखिज्जगुणा ५५, बायरआउकाइया पज्जत्तया असंखिज्जगुणा ५६, बायरवाउकाइया पज्जत्तया असंखिज्जगुणा ५७, बायरतेउकाइया अपज्जत्तया असंखिज्जगुणा ५८, पत्तेयसरीरबायरवणस्सइकाइया अपज्जत्तया असंखिज्जगुणा ५९, बायरनिओया अपज्जत्तया असंखिज्जगुणा ६०, बायरपुढवीकाइया अपज्जत्तया असंखिज्जगुणा ६१, बायरआउकाइया अपज्जत्तया असंखिज्जगुणा ६२, बायरवाउकाइया अपज्जत्तया असंखिज्जगुणा ६३, सुहुमतेउकाइया अपज्जत्तया असंखिज्जगुणा ६४, सुहुमपुढवीकाइया अपज्जत्तया विसेसाहिया ६५, सुहुमआउकाइया अपज्जत्तया विसेसाहिया ६६, सुहुमवाउकाइया अपज्जत्तया विसेसाहिया ६७, सुहुमतेउकाइया पज्जत्तया संखिज्जगुणा ६८, सुहुमपुढवीकाइया पज्जत्तया विसेसाहिया ६९, सुहुमआउकाइया पज्जत्तया विसेसाहिया ७०, सुहुमवाउकाइया पज्जत्तया विसेसाहिया ७१, सुहुमनिओया अपज्जत्तया असंखिज्जगुणा ७२, सुहुमनिओया पज्जत्तया संखिज्जगुणा ७३, अभवसिद्धिया अणंतगुणा ७४, परिवडियसम्महिद्धी अणंतगुणा ७५, सिद्धा अणंतगुणा ७६, बायरवणस्सइकाइया पज्जत्तया अणंतगुणा ७७, बायरपज्जत्तया विसेसाहिया ७८, बायरवणस्सइकाइया अपज्जत्तया असंखिज्जगुणा ७९, बायरअपज्जत्तया विसेसाहिया ८०, बायरा विसेसाहिया ८१, सुहुमवणस्सइकाइया अपज्जत्तया असंखिज्जगुणा ८२, सुहुमअपज्जत्तया विसेसाहिया ८३, सुहुमवणस्सइकाइया पज्जत्तया संखिज्जगुणा ८४, सुहुमपज्जत्तया विसेसाहिया ८५, सुहुमा विसेसाहिया ८६, भवसिद्धिया विसेसाहिया ८७, निओयजीवा विसेसाहिया ८८, वणस्सइजीवा विसेसाहिया ८९, एगिंदिया विसेसाहिया ९०, तिरिक्खजोणिया विसेसाहिया ९१, मिच्छादिद्वी विसेसाहिया ९२, अविरया विसेसाहिया ९३, सकसाई विसेसाहिया ९४, छउमत्था विसेसाहिया ९५, सजोगी विसेसाहिया ९६, संसारत्था विसेसाहिया ९७, सव्वजीवा विसेसाहिया ९८ ॥ २७ दारं ॥ २१७ ॥ **पन्नवणाए भगवईए तइयं अप्पाबहुयपयं समत्तं ॥**

नेरइयाणं भंते ! केवइयं कालं ठिई पन्नत्ता ? गोयमा ! जहन्नेणं दसवाससहस्साई, उक्कोसेणं तेत्तीसं सागरोवमाई । अपज्जत्तगनेरइयाणं भंते ! केवइयं कालं ठिई पन्नत्ता ?

[illegible]

[illegible]

रोवमं । अपज्जत्तयअसुरकुमाराणं भंते ! देवाणं केवइयं कालं ठिई पन्नत्ता ? गोयमा ! जहन्नेण वि अंतोमुहुत्तं उक्कोसेण वि अन्तोमुहुत्तं । पज्जत्तयअसुरकुमाराणं भंते ! देवाणं केवइयं कालं ठिई पन्नत्ता ? गोयमा ! जहन्नेणं दस वाससहस्साइं अन्तो-मुहुत्तूणाइं, उक्कोसेणं साइरेणं सागरोवमं अन्तोमुहुत्तूणं । असुरकुमारीणं भंते ! देवीणं केवइयं कालं ठिई पन्नत्ता ? गोयमा ! जहन्नेणं दस वाससहस्साइं, उक्कोसेणं अद्धपंचमाइं पलिओवमाइं । अपज्जत्तियाणं असुरकुमारीणं भंते ! देवीणं केवइयं कालं ठिई पन्नत्ता ? गोयमा ! जहन्नेण वि अन्तोमुहुत्तं उक्कोसेण वि अंतोमुहुत्तं । पज्जत्तियाणं असुरकुमारीणं देवीणं भंते ! केवइयं कालं ठिई पन्नत्ता ? गोयमा ! जहन्नेणं दस वाससहस्साइं अंतोमुहुत्तूणाइं उक्कोसेणं अद्धपंचमाइं पलिओवमाइं अंतो-मुहुत्तूणाइं ॥ २२२ ॥ नागकुमाराणं देवाणं भंते ! केवइयं कालं ठिई पन्नत्ता ? गोयमा ! जहन्नेणं दस वाससहस्साइं, उक्कोसेणं दो पलिओवमाइं देसूणाइं । अपज्ज-त्तयाणं भंते ! नागकुमाराणं० केवइयं कालं ठिई पन्नत्ता ? गोयमा ! जहन्नेण वि अंतोमुहुत्तं उक्कोसेण वि अंतोमुहुत्तं । पज्जत्तयाणं भंते ! नागकुमाराणं देवाणं केवइयं कालं ठिई पन्नत्ता ? गोयमा ! जहन्नेणं दस वाससहस्साइं अंतोमुहुत्तूणाइं, उक्कोसेणं दो पलिओवमाइं देसूणाइं अंतोमुहुत्तूणाइं । नागकुमारीणं भंते ! देवीणं केवइयं कालं ठिई पन्नत्ता ? गोयमा ! जहन्नेणं दस वाससहस्साइं, उक्कोसेणं देसूणं पलि-ओवमं । अपज्जत्तियाणं भंते ! नागकुमारीणं देवीणं केवइयं कालं ठिई पन्नत्ता ? गोयमा ! जहन्नेण वि अंतोमुहुत्तं उक्कोसेण वि अंतोमुहुत्तं । पज्जत्तियाणं भंते ! नागकुमारीणं देवीणं केवइयं कालं ठिई पन्नत्ता ? गोयमा ! जहन्नेणं दस वाससह-स्साइं अंतोमुहुत्तूणाइं, उक्कोसेणं देसूणं पलिओवमं अंतोमुहुत्तूणं ॥ २२३ ॥ सुवण्ण-कुमाराणं भंते ! देवाणं केवइयं कालं ठिई पन्नत्ता ? गोयमा ! जहन्नेणं दस वासस-हस्साइं उक्कोसेणं दो पलिओवमाइं देसूणाइं । अपज्जत्तयाणं पुच्छा । गोयमा ! जहन्नेण वि अंतोमुहुत्तं, उक्कोसेण वि अंतोमुहुत्तं । पज्जत्तयाणं पुच्छा । गोयमा ! जहन्नेणं दस वाससहस्साइं अंतोमुहुत्तूणाइं, उक्कोसेणं दो पलिओवमाइं देसूणाइं अंतोमुहुत्तूणाइं । सुवण्णकुमारीणं देवीणं पुच्छा । गोयमा ! जहन्नेणं दस वाससह-स्साइं, उक्कोसेणं देसूणं पलिओवमं । अपज्जत्तियाणं पुच्छा । गोयमा ! जहन्नेण वि अंतोमुहुत्तं उक्कोसेण वि अंतोमुहुत्तं । पज्जत्तियाणं पुच्छा । गोयमा ! जहन्नेणं दस वाससहस्साइं अंतोमुहुत्तूणाइं, उक्कोसेणं देसूणं पलिओवमं अंतोमुहुत्तूणं । एवं एएणं अभिलावेणं ओहियअपज्जत्तयपज्जत्तयसुत्तत्तयं देवाणं य देवीणं य नेयव्वं जाव थणियकुमाराणं जहा नागकुमाराणं ॥ २२४ ॥ पुढविकाइयाणं भंते ! केवइयं कालं



[illegible]

[illegible]



[illegible]

गोयमा ! जहन्नेणं अंतोमुहुत्तं, उक्कोसेणं तिञ्चि पलिओवमाइं अंतोमुहुत्तूणाइं ।  
 संमुच्छिममणुस्साणं पुच्छा । गोयमा ! जहन्नेण वि उक्कोसेण वि अंतोमुहुत्तं ।  
 गब्भक्कंतियमणुस्साणं पुच्छा । गोयमा ! जहन्नेणं अंतोमुहुत्तं, उक्कोसेणं तिञ्चि  
 पलिओवमाइं । अपज्जत्तयाणं पुच्छा । गोयमा ! जहन्नेण वि उक्कोसेण वि अंतो-  
 मुहुत्तं । पज्जत्तयाणं पुच्छा । गोयमा ! जहन्नेणं अंतोमुहुत्तं, उक्कोसेणं तिञ्चि  
 पलिओवमाइं अंतोमुहुत्तूणाइं ॥ २३७ ॥ वाणमंतराणं भंते ! देवाणं केवइयं कालं  
 ठिई पञ्चत्ता ? गोयमा ! जहन्नेणं दस वाससहस्साइं, उक्कोसेणं पलिओवमं । अपज्ज-  
 त्तयाणमंतराणं देवाणं पुच्छा । गोयमा ! जहन्नेण वि उक्कोसेण वि अंतोमुहुत्तं ।  
 पज्जत्तयाणं पुच्छा । गोयमा ! जहन्नेणं दस वाससहस्साइं अंतोमुहुत्तूणाइं, उक्कोसेणं  
 पलिओवमं अंतोमुहुत्तूणं । वाणमंतरीणं देवीणं पुच्छा । गोयमा ! जहन्नेणं दस  
 वाससहस्साइं, उक्कोसेणं अद्धपलिओवमं । अपज्जत्तियाणं देवीणं पुच्छा । गोयमा !  
 जहन्नेण वि उक्कोसेण वि अंतोमुहुत्तं । पज्जत्तियाणं वाणमंतरीणं पुच्छा । गोयमा !  
 जहन्नेणं दस वाससहस्साइं अंतोमुहुत्तूणाइं, उक्कोसेणं अद्धपलिओवमं अंतोमुहुत्तूणं  
 ॥ २३८ ॥ जोइसियाणं देवाणं पुच्छा । गोयमा ! जहन्नेणं पलिओवमट्ठभागो, उक्को-  
 सेणं पलिओवमं वाससयसहस्समब्भहियं । अपज्जत्तियजोइसियाणं पुच्छा । गोयमा !  
 जहन्नेण वि उक्कोसेण वि अंतोमुहुत्तं । पज्जत्तयाणं पुच्छा । गोयमा ! जहन्नेणं पलि-  
 ओवमट्ठभागो अंतोमुहुत्तूणो, उक्कोसेणं पलिओवमं वाससयसहस्समब्भहियं अंतोमुहु-  
 त्तूणं । जोइसिणीणं देवीणं पुच्छा । गोयमा ! जहन्नेणं पलिओवमट्ठभागो, उक्कोसेणं  
 अद्धपलिओवमं पण्णासवाससहस्समब्भहियं । अपज्जत्तियजोइसियदेवीणं पुच्छा ।  
 गोयमा ! जहन्नेण वि उक्कोसेण वि अंतोमुहुत्तं । पज्जत्तियजोइसियदेवीणं पुच्छा ।  
 गोयमा ! जहन्नेणं पलिओवमट्ठभागो अंतोमुहुत्तूणो, उक्कोसेणं अद्धपलिओवमं  
 पण्णासवाससहस्समब्भहियं अंतोमुहुत्तूणं । चंदविमाणे णं भंते ! देवाणं पुच्छा ।  
 गोयमा ! जहन्नेणं चउभागपलिओवमं, उक्कोसेणं पलिओवमं वाससयसहस्समब्भहियं ।  
 अपज्जत्तयाणं चंददेवाणं पुच्छा । गोयमा ! जहन्नेण वि उक्कोसेण वि अंतोमुहुत्तं ।  
 पज्जत्तयाणं पुच्छा । गोयमा ! जहन्नेणं चउभागपलिओवमं अंतोमुहुत्तूणं, उक्कोसेणं  
 पलिओवमं वाससयसहस्समब्भहियं अंतोमुहुत्तूणं । चंदविमाणे णं देवीणं पुच्छा ।  
 गोयमा ! जहन्नेणं चउभागपलिओवमं, उक्कोसेणं अद्धपलिओवमं पन्नासवाससहस्स-  
 मब्भहियं । अपज्जत्तियाणं पुच्छा । गोयमा ! जहन्नेण वि उक्कोसेण वि अंतोमुहुत्तं ।  
 पज्जत्तियाणं पुच्छा । गोयमा ! जहन्नेणं चउभागपलिओवमं अंतोमुहुत्तूणं, उक्कोसेणं  
 अद्धपलिओवमं पन्नासवाससहस्समब्भहियं अंतोमुहुत्तूणं । सूरविमाणे णं भंते !

[illegible]

[illegible]







जहन्नेणं छवीसं सागरोवमाइं, उक्कोसेणं सत्तावीसं सागरोवमाइं । अपज्जत्तयाणं पुच्छा । गोयमा ! जहन्नेण वि उक्कोसेण वि अंतोमुहुत्तं । पज्जत्तयाणं पुच्छा । गोयमा ! जहन्नेणं छवीसं सागरोवमाइं अंतोमुहुत्तूणाइं उक्कोसेणं सत्तावीसं सागरोवमाइं अंतोमुहुत्तूणाइं । मज्झिमउवरिमगेविज्जगदेवाणं पुच्छा । गोयमा ! जहन्नेणं सत्तावीसं सागरोवमाइं, उक्कोसेणं अट्ठावीसं सागरोवमाइं । अपज्जत्तयाणं पुच्छा । गोयमा ! जहन्नेण वि उक्कोसेण वि अंतोमुहुत्तं । पज्जत्तयाणं पुच्छा । गोयमा ! जहन्नेणं सत्तावीसं सागरोवमाइं अंतोमुहुत्तूणाइं, उक्कोसेणं अट्ठावीसं सागरोवमाइं अंतोमुहुत्तूणाइं । उवरिमहेट्ठिमगेविज्जगदेवाणं पुच्छा । गोयमा ! जहन्नेणं अट्ठावीसं सागरोवमाइं, उक्कोसेणं एगूणतीसं सागरोवमाइं । अपज्जत्तयाणं पुच्छा । गोयमा ! जहन्नेण वि उक्कोसेण वि अंतोमुहुत्तं । पज्जत्तयाणं पुच्छा । गोयमा ! जहन्नेणं अट्ठावीसं सागरोवमाइं अंतोमुहुत्तूणाइं, उक्कोसेणं एगूणतीसं सागरोवमाइं अंतोमुहुत्तूणाइं । उवरिममज्झिमगेविज्जगदेवाणं पुच्छा । गोयमा ! जहन्नेणं एगूणतीसं सागरोवमाइं उक्कोसेणं तीसं सागरोवमाइं । अपज्जत्तयाणं पुच्छा । गोयमा ! जहन्नेण वि उक्कोसेण वि अंतोमुहुत्तं । पज्जत्तयाणं पुच्छा । गोयमा ! जहन्नेणं एगूणतीसं सागरोवमाइं अंतोमुहुत्तूणाइं, उक्कोसेणं तीसं सागरोवमाइं अंतोमुहुत्तूणाइं । उवरिमउवरिमगेविज्जगदेवाणं पुच्छा । गोयमा ! जहन्नेणं तीसं सागरोवमाइं, उक्कोसेणं एकतीसं सागरोवमाइं । अपज्जत्तयाणं पुच्छा । गोयमा ! जहन्नेण वि उक्कोसेण वि अंतोमुहुत्तं । पज्जत्तयाणं पुच्छा । गोयमा ! जहन्नेणं तीसं सागरोवमाइं अंतोमुहुत्तूणाइं, उक्कोसेणं एकतीसं सागरोवमाइं अंतोमुहुत्तूणाइं ॥ २४४ ॥ विजयवेजयंतजयंतअपराजिएसु णं भंते ! देवाणं केवइयं कालं ठिई पन्नत्ता ? गोयमा ! जहन्नेणं एकतीसं सागरोवमाइं, उक्कोसेणं तेतीसं सागरोवमाइं । अपज्जत्तयाणं पुच्छा । गोयमा ! जहन्नेण वि उक्कोसेण वि अंतोमुहुत्तं । पज्जत्तयाणं पुच्छा । गोयमा ! जहन्नेणं एकतीसं सागरोवमाइं अंतोमुहुत्तूणाइं, उक्कोसेणं तेतीसं सागरोवमाइं अंतोमुहुत्तूणाइं ॥ सव्वट्ठसिद्धगदेवाणं भंते ! केवइयं कालं ठिई पन्नत्ता ? गोयमा ! अजहन्नमणुक्कोसं तेतीसं सागरोवमाइं ठिई पन्नत्ता । सव्वट्ठसिद्धगदेवाणं अपज्जत्तयाणं पुच्छा । गोयमा ! जहन्नेण वि उक्कोसेण वि अंतोमुहुत्तं । सव्वट्ठसिद्धगदेवाणं० पज्जत्तयाणं केवइयं कालं ठिई पन्नत्ता ? गोयमा ! अजहन्नमणुक्कोसं तेतीसं सागरोवमाइं अंतोमुहुत्तूणाइं ठिई पन्नत्ता ॥ २४५ ॥

**पन्नवणाए भगवईए चउत्थं ठिइपर्यं समत्तं ॥**

कइविहा णं भंते ! पज्जवा पन्नत्ता ? गोयमा ! दुविहा पज्जवा पन्नत्ता । तंजहा-जीवपज्जवा य अजीवपज्जवा य ॥ २४६ ॥ जीवपज्जवा णं भंते ! किं संखिज्जा,

असंखिजा, अणंता ? गोयमा ! नो संखिजा, नो असंखिजा, अणंता । से केणट्टेणं भंते ! एवं वुच्चइ—‘जीवपज्जवा नो संखिजा, नो असंखिजा, अणंता’ ? गोयमा ! असंखिजा नेरइया, असंखिजा असुरकुमारा, असंखिजा नागकुमारा, असंखिजा सुवण्णकुमारा, असंखिजा विज्जुकुमारा, असंखिजा अगणिकुमारा, असंखिजा दीवकुमारा, असंखिजा उदहिकुमारा, असंखिजा दिसीकुमारा, असंखिजा वाउकुमारा, असंखिजा थणियकुमारा, असंखिजा पुढविकाइया, असंखिजा आउकाइया, असंखिजा तेउकाइया, असंखिजा वाउकाइया, अणंता वण-  
प्फइकाइया, असंखिजा बेइंदिया, असंखिजा तेइंदिया, असंखिजा चउरिंदिया, असंखिजा पंचिदियतिरिक्खजोणिया, असंखिजा मणुस्सा, असंखिजा वाणमंतरा असंखिजा जोइसिया, असंखिजा वेमाणिया, अणंता सिद्धा, से एएणट्टेणं गोयमा ! एवं वुच्चइ—ते णं नो संखिजा, नो असंखिजा, अणंता ॥ २४७ ॥ नेरइयाणं भंते ! केवइया पज्जवा पज्जता ? गोयमा ! अणंता पज्जवा पज्जता । से केणट्टेणं भंते ! एवं वुच्चइ—‘नेरइयाणं अणंता पज्जवा पज्जता’ ? गोयमा ! नेरइए नेरइयस्स दव्वट्टयाए तुल्ले, पएसट्टयाए तुल्ले, ओगाहणट्टयाए सिय हीणे सिय तुल्ले सिय अब्भहिए । जइ हीणे असंखिजइभागहीणे वा संखिजइभागहीणे वा संखिज-  
गुणहीणे वा असंखिजगुणहीणे वा । अह अब्भहिए असंखिजइभागमब्भहिए वा संखिजइभागमब्भहिए वा संखिजगुणमब्भहिए वा असंखिजगुणमब्भहिए वा । ठिइए सिय हीणे सिय तुल्ले सिय अब्भहिए । जइ हीणे असंखिजइभागहीणे वा संखिजइभागहीणे वा संखिजगुणहीणे वा असंखिजगुणहीणे वा । अह अब्भहिए असंखिजभागमब्भहिए वा संखिजभागमब्भहिए वा संखिजगुणमब्भहिए वा असंखिजगुणमब्भहिए वा । कालवणपज्जवेहिं सिय हीणे सिय तुल्ले सिय अब्भहिए । जइ हीणे अणंतभागहीणे वा असंखेजभागहीणे वा संखेजभागहीणे वा संखेजगुण-  
हीणे वा असंखेजगुणहीणे वा अणंतगुणहीणे वा । अह अब्भहिए अणंतभागमब्भहिए वा असंखेजभागमब्भहिए वा संखेजभागमब्भहिए वा संखेजगुणमब्भहिए वा असंखेजगुणमब्भहिए वा अणंतगुणमब्भहिए वा । नीलवन्नपज्जवेहिं लोहियवन्नपज्ज-  
वेहिं हालिद्वन्नपज्जवेहिं सुक्किन्नवन्नपज्जवेहिं छट्ठाणवडिए । सुब्भिगंधपज्जवेहिं दुब्भि-  
गंधपज्जवेहिं य छट्ठाणवडिए । तित्तरंसपज्जवेहिं कडुयरसपज्जवेहिं कसायरसपज्जवेहिं  
अंबिलरसपज्जवेहिं मडुररसपज्जवेहिं छट्ठाणवडिए । कक्खडफासपज्जवेहिं मउयफास-  
पज्जवेहिं गरुयफासपज्जवेहिं लहुयफासपज्जवेहिं सीयफासपज्जवेहिं उसिणफासपज्जवेहिं  
निद्धफासपज्जवेहिं लुक्खफासपज्जवेहिं छट्ठाणवडिए । आभिणिबोहियनाणपज्जवेहिं

सुयनाणपज्जवेहिं ओहिनाणपज्जवेहिं मइअन्नाणपज्जवेहिं सुयअन्नाणपज्जवेहिं विभंग-  
नाणपज्जवेहिं चक्खुदंसणपज्जवेहिं अचक्खुदंसणपज्जवेहिं ओहिदंसणपज्जवेहिं छट्ठाण-  
वडिए, से तेणट्ठेणं गोयमा ! एवं वुच्चइ-‘नेरइयाणं नो संखेज्जा, नो असंखेज्जा,  
अणंता पज्जवा पन्नत्ता’ ॥ २४८ ॥ असुरकुमाराणं भंते ! केवइया पज्जवा पन्नत्ता ?  
गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ-‘असुरकुमाराणं  
अणंता पज्जवा पन्नत्ता’ ? गोयमा ! असुरकुमारे असुरकुमारस्स दव्वट्ठयाए तुल्ले,  
पएसट्ठयाए तुल्ले, ओगाहणट्ठयाए चउट्ठाणवडिए, ठिईए चउट्ठाणवडिए, कालवन्न-  
पज्जवेहिं छट्ठाणवडिए, एवं नीलवन्नपज्जवेहिं लोहियवन्नपज्जवेहिं हालिद्वन्नपज्जवेहिं  
सुक्खिलवन्नपज्जवेहिं, सुब्भिगंधपज्जवेहिं दुब्भिगंधपज्जवेहिं, तितरसपज्जवेहिं कडुयरस-  
पज्जवेहिं कसायरसपज्जवेहिं अंबिलरसपज्जवेहिं महुररसपज्जवेहिं, कक्खडफासपज्जवेहिं  
मउयफासपज्जवेहिं गरुयफासपज्जवेहिं लहुयफासपज्जवेहिं सीयफासपज्जवेहिं उसिण-  
फासपज्जवेहिं निद्धफासपज्जवेहिं लुक्खफासपज्जवेहिं आभिणिबोहियनाणपज्जवेहिं  
सुयनाणपज्जवेहिं ओहिनाणपज्जवेहिं मइअन्नाणपज्जवेहिं सुयअन्नाणपज्जवेहिं विभंग-  
नाणपज्जवेहिं चक्खुदंसणपज्जवेहिं अचक्खुदंसणपज्जवेहिं ओहिदंसणपज्जवेहिं छट्ठाण-  
वडिए, से एएणट्ठेणं गोयमा ! एवं वुच्चइ-‘असुरकुमाराणं अणंता पज्जवा पन्नत्ता’ । एवं  
जहा नेरइया, जहा असुरकुमारा तहा नागकुमारा वि जाव थणियकुमारा ॥ २४९ ॥  
पुढविकाइयाणं भंते ! केवइया पज्जवा पन्नत्ता ? गोयमा ! अणंता पज्जवा पन्नत्ता ।  
से केणट्ठेणं भंते ! एवं वुच्चइ-‘पुढविकाइयाणं अणंता पज्जवा पन्नत्ता’ ? गोयमा !  
पुढविकाइए पुढविकाइयस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए सिय  
हीणे सिय तुल्ले सिय अब्भहिए । जइ हीणे असंखिज्जइभागहीणे वा संखिज्जइभाग-  
हीणे वा संखिज्जइगुणहीणे वा असंखिज्जइगुणहीणे वा । अह अब्भहिए असंखिज्जइ-  
भागअब्भहिए वा संखिज्जइभागअब्भहिए वा संखिज्जगुणअब्भहिए वा असंखिज्ज-  
गुणअब्भहिए वा । ठिईए तिट्ठाणवडिए, सिय हीणे सिय तुल्ले सिय अब्भहिए । जइ  
हीणे असंखिज्जभागहीणे वा संखिज्जभागहीणे वा संखिज्जगुणहीणे वा । अह अब्भ-  
हिए असंखिज्जइभागअब्भहिए वा संखिज्जइभागअब्भहिए वा संखिज्जगुणअब्भहिए  
वा । वज्जेहिं गंधेहिं रसेहिं फासेहिं मइअन्नाणपज्जवेहिं सुयअन्नाणपज्जवेहिं अचक्खु-  
दंसणपज्जवेहिं छट्ठाणवडिए ॥ २५० ॥ आउकाइयाणं भंते ! केवइया पज्जवा  
पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ-‘आउ-  
काइयाणं अणंता पज्जवा पन्नत्ता’ ? गोयमा ! आउकाइए आउकाइयस्स दव्वट्ठयाए  
तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए तिट्ठाणवडिए, वन्न-

गंधरसफासमइअन्नाणसुयअन्नाणअचक्खुदंसणपज्जवेहिं छट्ठाणवडिए ॥ २५१ ॥ तेउ-  
काइयाणं पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ-  
'तेउकाइयाणं अणंता पज्जवा पन्नत्ता' ? गोयमा ! तेउकाइए तेउकाइयस्स दव्वट्ठयाए  
तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए तिट्ठाणवडिए, वन्नगंधरस-  
फासमइअन्नाणसुयअन्नाणअचक्खुदंसणपज्जवेहिं य छट्ठाणवडिए ॥ २५२ ॥ वाउकाइयाणं  
पुच्छा । गोयमा ! वाउकाइयाणं अणंता पज्जवा पन्नत्ता । से केणट्ठेणं भंते ! एवं वुच्चइ-  
'वाउकाइयाणं अणंता पज्जवा पन्नत्ता' ? गोयमा ! वाउकाइए वाउकाइयस्स दव्वट्ठ-  
याए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए तिट्ठाणवडिए, वन्न-  
गंधरसफासमइअन्नाणसुयअन्नाणअचक्खुदंसणपज्जवेहिं छट्ठाणवडिए ॥ २५३ ॥ वणस्सइ-  
काइयाणं पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ-  
'वणस्सइकाइयाणं अणंता पज्जवा पन्नत्ता' ? गोयमा ! वणस्सइकाइए वणस्सइकाइयस्स  
दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए तिट्ठाण-  
वडिए, वन्नगंधरसफासमइअन्नाणसुयअन्नाणअचक्खुदंसणपज्जवेहिं य छट्ठाणवडिए, से  
एणट्ठेणं गोयमा ! एवं वुच्चइ-'वणस्सइकाइयाणं अणंता पज्जवा पन्नत्ता' ॥ २५४ ॥  
वेइंदियाणं पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ-  
'वेइंदियाणं अणंता पज्जवा पन्नत्ता' ? गोयमा ! वेइंदिए वेइंदियस्स दव्वट्ठयाए तुल्ले,  
पएसट्ठयाए तुल्ले, ओगाहणट्ठयाए सिय हीणे सिय तुल्ले सिय अब्भहिए । जइ हीणे  
असंखिज्जइभागहीणे वा संखिज्जइभागहीणे वा संखिज्जइगुणहीणे वा असंखिज्जइगुण-  
हीणे वा । अह अब्भहिए असंखिज्जभागअब्भहिए वा संखिज्जइभागअब्भहिए वा  
संखिज्जगुणमब्भहिए वा असंखिज्जइगुणमब्भहिए वा । ठिईए तिट्ठाणवडिए, वन्न-  
गंधरसफासआभिणिबोहियनाणसुयनाणमइअन्नाणसुयअन्नाणअचक्खुदंसणपज्जवेहिं य  
छट्ठाणवडिए । एवं तेइंदिया वि । एवं चउरिंदिया वि, नवरं दो दंसणा, चक्खुदंसणं  
अचक्खुदंसणं । पंचिंदियतिरिक्खजोणियाणं पज्जवा जहा नेरइयाणं तथा भाणि-  
यव्वा ॥ २५५ ॥ मणुस्साणं भंते ! केवइया पज्जवा पन्नत्ता ? गोयमा ! अणंता  
पज्जवा पन्नत्ता । से केणट्ठेणं भंते ! एवं वुच्चइ-'मणुस्साणं अणंता पज्जवा पन्नत्ता' ?  
गोयमा ! मणूसे मणूस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठा-  
णवडिए, ठिईए चउट्ठाणवडिए, वन्नगंधरसफासआभिणिबोहियनाणसुयनाणओहिना-  
णमणपज्जवनाणपज्जवेहिं छट्ठाणवडिए, केवलनाणपज्जवेहिं तुल्ले, तिहिं अन्नाणेहिं तिहिं  
दंसणेहिं छट्ठाणवडिए, केवलदंसणपज्जवेहिं तुल्ले । वाणमंतरा ओगाहणट्ठयाए ठिईए  
चउट्ठाणवडिया, वण्णाईहिं छट्ठाणवडिया । जोइसिया वेमाणिया वि एवं चेव, नवरं

ठिईए तिट्ठाणवडिआ ॥ २५६ ॥ जहन्नोगाहणगाणं भंते ! नेरइयाणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा ! जहन्नोगाहणए नेरइए जहन्नोगाहणस्स नेरइयस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए तुल्ले, ठिईए चउट्ठाणवडिए, वन्नगंधरसफासपज्जवेहिं तिहिं नाणेहिं तिहिं अन्नाणेहिं तिहिं दंसणेहिं छट्ठाणवडिए । उक्कोसोगाहणगाणं भंते ! नेरइयाणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ-‘उक्कोसोगाहणगाणं नेरइयाणं अणंता पज्जवा पन्नत्ता’ ? गोयमा ! उक्कोसोगाहणए नेरइए उक्कोसोगाहणस्स नेरइयस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए तुल्ले । ठिईए सिय हीणे सिय तुल्ले सिय अब्भहिए । जइ हीणे असंखिज्जभागहीणे वा संखिज्जभागहीणे वा, अह अब्भहिए असंखिज्जभागअब्भहिए वा संखिज्जभागअब्भहिए वा । वन्नगंधरसफासपज्जवेहिं तिहिं नाणेहिं तिहिं अन्नाणेहिं तिहिं दंसणेहिं छट्ठाणवडिए । अजहन्नमणुक्कोसोगाहणगाणं भंते ! नेरइयाणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ-‘अजहन्नमणुक्कोसोगाहणगाणं अणंता पज्जवा पन्नत्ता’ ? गोयमा ! अजहन्नमणुक्कोसोगाहणए नेरइए अजहन्नमणुक्कोसोगाहणस्स नेरइयस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए सिय हीणे सिय तुल्ले सिय अब्भहिए । जइ हीणे असंखिज्जभागहीणे वा संखिज्जभागहीणे वा संखिज्जगुणहीणे वा असंखिज्जगुणहीणे वा । अह अब्भहिए असंखिज्जभागअब्भहिए वा संखिज्जभागअब्भहिए वा संखिज्जगुणअब्भहिए वा असंखिज्जगुणअब्भहिए वा । ठिईए सिय हीणे सिय तुल्ले सिय अब्भहिए । जइ हीणे असंखिज्जभागहीणे वा संखिज्जभागहीणे वा संखिज्जगुणहीणे वा असंखिज्जगुणहीणे वा । अह अब्भहिए असंखिज्जभागअब्भहिए वा संखिज्जभागअब्भहिए वा संखिज्जगुणअब्भहिए वा असंखिज्जगुणअब्भहिए वा । वन्नगंधरसफासपज्जवेहिं तिहिं नाणेहिं तिहिं अन्नाणेहिं तिहिं दंसणेहिं छट्ठाणवडिए, से एणट्ठेणं गोयमा ! एवं वुच्चइ-‘अजहन्नमणुक्कोसोगाहणगाणं नेरइयाणं अणंता पज्जवा पन्नत्ता’ ॥ २५७ ॥ जहन्न-ठिइयाणं भंते ! नेरइयाणं केवइया पज्जवा पन्नत्ता ? गोयमा ! अणंता जपवा पन्नत्ता । से केणट्ठेणं भंते ! एवं वुच्चइ-‘जहन्नठिइयाणं नेरइयाणं अणंता पज्जवा पन्नत्ता’ ? गोयमा ! जहन्नठिइए नेरइए जहन्नठिइयस्स नेरइयस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए तुल्ले, वन्नगंधरसफासपज्जवेहिं तिहिं नाणेहिं तिहिं अन्नाणेहिं तिहिं दंसणेहिं छट्ठाणवडिए । एवं उक्कोसठिइए वि । अजहन्नमणुक्कोसठिइए वि एवं चेव, नवरं सट्ठाणे चउट्ठाणवडिए ॥ २५८ ॥

जहन्नगुणकालगाणं भंते ! नेरइयाणं केवइया पज्जवा पन्नता ? गोयमा ! अणंता पज्जवा पन्नता । से केणट्ठेणं भंते ! एवं वुच्चइ-‘जहन्नगुणकालगाणं नेरइयाणं अणंता पज्जवा पन्नता’ ? गोयमा ! जहन्नगुणकालए नेरइए जहन्नगुणकालगस्स नेरइयस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए चउट्ठाणवडिए, कालवन्नपज्जवेहिं तुल्ले, अवसेसेहिं वन्नगंधरसफासपज्जवेहिं तिहिं नाणेहिं तिहिं अन्नाणेहिं तिहिं दंसणेहिं छट्ठाणवडिए, से एणट्ठेणं गोयमा ! एवं वुच्चइ-‘जहन्नगुणकालगाणं नेरइयाणं अणंता पज्जवा पन्नता’ । एवं उक्कोसगुणकालए वि । अजहन्नमण्कोसगुणकालए वि एवं चेव, नवरं कालवन्नपज्जवेहिं छट्ठाणवडिए । एवं अवसेसा चत्तारि वन्ना दो गंधा पंच रसा अट्ठ फासा भाणियव्वा ॥ २५९ ॥ जहन्नाभिणिबोहियनाणीणं भंते ! नेरइयाणं केवइया पज्जवा पन्नता ? गोयमा ! जहन्नाभिणिबोहियनाणीणं नेरइयाणं अणंता पज्जवा पन्नता । से केणट्ठेणं भंते ! एवं वुच्चइ-‘जहन्नाभिणिबोहियनाणीणं नेरइयाणं अणंता पज्जवा पन्नता’ ? गोयमा ! जहन्नाभिणिबोहियनाणी नेरइए जहन्नाभिणिबोहियनाणिस्स नेरइयस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए चउट्ठाणवडिए, वन्नगंधरसफासपज्जवेहिं छट्ठाणवडिए, आभिणिबोहियनाणपज्जवेहिं तुल्ले, सुयनाणपज्जवेहिं ओहिनाणपज्जवेहिं छट्ठाणवडिए, तिहिं दंसणेहिं छट्ठाणवडिए । एवं उक्कोसाभिणिबोहियनाणी वि । अजहन्नमण्कोसाभिणिबोहियनाणी वि एवं चेव, नवरं आभिणिबोहियनाणपज्जवेहिं सट्ठाणे छट्ठाणवडिए । एवं सुयनाणी ओहिनाणी वि, नवरं जस्स नाणा तस्स अन्नाणा नत्थि । जह्वा नाणा तह्वा अन्नाणा वि भाणियव्वा, नवरं जस्स अन्नाणा तस्स नाणा न भवंति । जहन्नचक्खुदंसणीणं भंते ! नेरइयाणं केवइया पज्जवा पन्नता ? गोयमा ! अणंता पज्जवा पन्नता । से केणट्ठेणं भंते ! एवं वुच्चइ-‘जहन्नचक्खुदंसणीणं नेरइयाणं अणंता पज्जवा पन्नता’ ? गोयमा ! जहन्नचक्खुदंसणी णं नेरइए जहन्नचक्खुदंसणिस्स नेरइयस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए चउट्ठाणवडिए, वन्नगंधरसफासपज्जवेहिं तिहिं नाणेहिं तिहिं अन्नाणेहिं छट्ठाणवडिए, चक्खुदंसणपज्जवेहिं तुल्ले, अचक्खुदंसणपज्जवेहिं ओहिदंसणपज्जवेहिं छट्ठाणवडिए । एवं उक्कोसचक्खुदंसणी वि । अजहन्नमण्कोसचक्खुदंसणी वि एवं चेव, नवरं सट्ठाणे छट्ठाणवडिए । एवं अचक्खुदंसणी वि, ओहिदंसणी वि ॥ २६० ॥ जहन्नोगाहणाणं भंते ! असुरकुमारानं केवइया पज्जवा पन्नता ? गोयमा ! अणंता पज्जवा पन्नता । से केणट्ठेणं भंते ! एवं वुच्चइ-‘जहन्नोगाहणाणं असुरकुमारानं अणंता पज्जवा पन्नता’ ? गोयमा ! जहन्नोगाहणाए

असुरकुमारे जहन्नोगाहणस्स असुरकुमारस्स दव्वट्टयाए तुल्ले, पएसट्टयाए तुल्ले, ओगाहणट्टयाए तुल्ले, ठिईए चउट्टाणवडिए, वन्नाईहिं छट्टाणवडिए, आभिणिबोहिय-  
नाणपज्जवेहिं सुयनाणपज्जवेहिं ओहिनाणपज्जवेहिं तिहिं अन्नाणेहिं तिहिं दंसणेहिं य  
छट्टाणवडिए । एवं उक्कोसोगाहणए वि । एवं अजहन्नमणुक्कोसोगाहणए वि, नवरं सट्टाणे  
चउट्टाणवडिए । एवं जाव थणियकुमारा ॥ २६१ ॥ जहन्नोगाहणाणं भंते ! पुढ-  
विकाइयाणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्टेणं  
भंते ! एवं वुच्चइ-‘जहन्नोगाहणाणं पुढविकाइयाणं अणंता पज्जवा पन्नत्ता’ ? गोयमा !  
जहन्नोगाहणए पुढविकाइए जहन्नोगाहणस्स पुढविकाइयस्स दव्वट्टयाए तुल्ले, पएसट्ट-  
याए तुल्ले, ओगाहणट्टयाए तुल्ले, ठिईए तिट्टाणवडिए, वन्नगंधरसफासपज्जवेहिं दोहिं  
अन्नाणेहिं अचक्खुदंसणपज्जवेहिं य छट्टाणवडिए । एवं उक्कोसोगाहणए वि । अजहन्न-  
मणुक्कोसोगाहणए वि एवं चेव, नवरं सट्टाणे चउट्टाणवडिए । जहन्नठिइयाणं पुढविका-  
इयाणं पुच्छ । गोयमा ! अणंता पज्जवा पन्नत्ता । से केणट्टेणं भंते ! एवं वुच्चइ-‘जह-  
न्नठिइयाणं पुढविकाइयाणं अणंता पज्जवा पन्नत्ता’ ? गोयमा ! जहन्नठिइए पुढविका-  
इए जहन्नठिइयस्स पुढविकाइयस्स दव्वट्टयाए तुल्ले, पएसट्टयाए तुल्ले, ओगाहणट्टयाए  
चउट्टाणवडिए, ठिईए तुल्ले, वन्नगंधरसफासपज्जवेहिं मइअन्नाणपज्जवेहिं सुयअन्नाणप-  
ज्जवेहिं अचक्खुदंसणपज्जवेहिं छट्टाणवडिए । एवं उक्कोसठिइए वि । अजहन्नमणुक्कोस-  
ठिइए वि एवं चेव, नवरं सट्टाणे तिट्टाणवडिए । जहन्नगुणकालयाणं भंते ! पुढविका-  
इयाणं पुच्छ । गोयमा ! अणंता पज्जवा पन्नत्ता । से केणट्टेणं भंते ! एवं वुच्चइ-  
‘जहन्नगुणकालयाणं पुढविकाइयाणं अणंता पज्जवा पन्नत्ता’ ? गोयमा ! जहन्नगुणकालए  
पुढविकाइए जहन्नगुणकालयस्स पुढविकाइयस्स दव्वट्टयाए तुल्ले, पएसट्टयाए तुल्ले,  
ओगाहणट्टयाए चउट्टाणवडिए, ठिईए तिट्टाणवडिए, कालवन्नपज्जवेहिं तुल्ले, अबसेसेहिं  
वन्नगंधरसफासपज्जवेहिं छट्टाणवडिए दोहिं अन्नाणेहिं अचक्खुदंसणपज्जवेहिं य  
छट्टाणवडिए । एवं उक्कोसगुणकालए वि । अजहन्नमणुक्कोसगुणकालए वि एवं चेव, नवरं  
सट्टाणे छट्टाणवडिए । एवं पंच वन्ना दो गंधा पंच रसा अट्ट फासा भाणियव्वा ।  
जहन्नमइअन्नाणीणं भंते ! पुढविकाइयाणं पुच्छ । गोयमा ! अणंता पज्जवा पन्नत्ता ।  
से केणट्टेणं भंते ! एवं वुच्चइ-‘जहन्नमइअन्नाणीणं पुढविकाइयाणं अणंता पज्जवा  
पन्नत्ता’ ? गोयमा ! जहन्नमइअन्नाणी पुढविकाइए जहन्नमइअन्नाणस्स पुढविकाइयस्स  
दव्वट्टयाए तुल्ले, पएसट्टयाए तुल्ले, ओगाहणट्टयाए चउट्टाणवडिए, ठिईए तिट्टाण-  
वडिए, वन्नगंधरसफासपज्जवेहिं छट्टाणवडिए, मइअन्नाणपज्जवेहिं तुल्ले, सुयअन्नाण-  
पज्जवेहिं अचक्खुदंसणपज्जवेहिं छट्टाणवडिए । एवं उक्कोसमइअन्नाणी वि । अजहन्न-



मणुक्कोसमइअन्नाणी वि एवं चेव, नवरं सट्ठाणे छट्ठाणवडिए । एवं सुयअन्नाणी वि अचक्खुदंसणी वि एवं चेव जाव वणप्फइकाइया ॥ २६२ ॥ जहन्नोगाहणगाणं भंते ! बेइंदियाणं पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ- 'जहन्नोगाहणगाणं बेइंदियाणं अणंता पज्जवा पन्नत्ता' ? गोयमा ! जहन्नोगाहणए बेइंदिए जहन्नोगाहणस्स बेइंदियस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए तुल्ले, ठिइए तिट्ठाणवडिए, वन्नगंधरसफासपज्जवेहिं दोहिं नाणेहिं दोहिं अन्नाणेहिं अचक्खुदंसणपज्जवेहिं य छट्ठाणवडिए । एवं उक्कोसोगाहणए वि, णवरं णाणा णत्थि । अजहन्नमणुक्कोसोगाहणए जहा जहन्नोगाहणए, णवरं सट्ठाणे ओगाहणए चउट्ठाणवडिए । जहन्नटिइयाणं भंते ! बेइंदियाणं पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ- 'जहन्नटिइयाणं बेइंदियाणं अणंता पज्जवा पन्नत्ता' ? गोयमा ! जहन्नटिइए बेइंदिए जहन्नटिइयस्स बेइंदियस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिइए तुल्ले, वन्नगंधरसफासपज्जवेहिं दोहिं अन्नाणेहिं अचक्खुदंसणपज्जवेहिं य छट्ठाणवडिए । एवं उक्कोसटिइए वि, णवरं दो णाणा अब्भहिया । अजहन्नमणुक्कोसटिइए जहा उक्कोसटिइए, णवरं ठिइए तिट्ठाणवडिए । जहन्नगुणकालगाणं बेइंदियाणं पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ- 'जहन्नगुणकालगाणं बेइंदियाणं अणंता पज्जवा पन्नत्ता' ? गोयमा ! जहन्नगुणकालए बेइंदिए जहन्नगुणकालास्स बेइंदियस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिइए तिट्ठाणवडिए, कालवन्नपज्जवेहिं तुल्ले, अवसेसेहिं वन्नगंधरसफासपज्जवेहिं दोहिं नाणेहिं दोहिं अन्नाणेहिं अचक्खुदंसणपज्जवेहिं य छट्ठाणवडिए । एवं उक्कोसगुणकालए वि । अजहन्नमणुक्कोसगुणकालए वि एवं चेव । णवरं सट्ठाणे छट्ठाणवडिए । एवं पंच वन्ना दो गंधं पंच रसा अट्ठ फासा भाणियव्वा । जहन्नाभिणिबोहियनाणीणं भंते ! बेइंदियाणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ- 'जहन्नाभिणिबोहियनाणीणं बेइंदियाणं अणंता पज्जवा पन्नत्ता' ? गोयमा ! जहन्नाभिणिबोहियनाणी बेइंदिए जहन्नाभिणिबोहियनाणिस्स बेइंदियस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिइए तिट्ठाणवडिए, वन्नगंधरसफासपज्जवेहिं छट्ठाणवडिए, आभिणिबोहियनाणपज्जवेहिं तुल्ले, सुयनाणपज्जवेहिं छट्ठाणवडिए, अचक्खुदंसणपज्जवेहिं छट्ठाणवडिए । एवं उक्कोसाभिणिबोहियनाणी वि । अजहन्नमणुक्कोसाभिणिबोहियनाणी वि एवं चेव, नवरं सट्ठाणे छट्ठाणवडिए । एवं सुयनाणी वि सुयअन्नाणी वि अचक्खुदंसणी वि, नवरं जत्थ नाणा तत्थ अन्नाणा नत्थि,

जत्थ अन्नाणा तत्थ नाणा नत्थि, जत्थ दंसणं तत्थ नाणा वि अन्नाणा वि । एवं तेइंदियाण वि । चउरिंदियाण वि एवं चेव, णवरं चक्खुदंसणं अब्भहिं ॥ २६३ ॥ जहन्नोगाहणगाणं भंते ! पंचिंदियतिरिक्खजोणियाणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ-‘जहन्नोगाहणगाणं पंचिंदियतिरिक्खजोणियाणं अणंता पज्जवा पन्नत्ता’ ? गोयमा ! जहन्नोगाहणए पंचिंदियतिरिक्खजोणिए जहन्नोगाहणयस्स पंचिंदियतिरिक्खजोणियस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए तुल्ले, ठिईए तिट्ठाणवडिए, वन्नगंधरसफासपज्जवेहिं दोहिं नाणेहिं दोहिं अन्नाणेहिं दोहिं दंसणेहिं छट्ठाणवडिए । उक्कोसोगाहणए वि एवं चेव, नवरं तिहिं नाणेहिं तिहिं दंसणेहिं छट्ठाणवडिए । जहा उक्कोसोगाहणए तहा अजहन्नमणुक्कोसोगाहणए वि, णवरं ओगाहणट्ठयाए चउट्ठाणवडिए, ठिईए चउट्ठाणवडिए । जहन्नट्ठियाणं भंते ! पंचिंदियतिरिक्खजोणियाणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ-‘जहन्नट्ठियाणं पंचिंदियतिरिक्खजोणियाणं अणंता पज्जवा पन्नत्ता’ ? गोयमा ! जहन्नट्ठिए पंचिंदियतिरिक्खजोणिए जहन्नट्ठियस्स पंचिंदियतिरिक्खजोणियस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए तुल्ले, वन्नगंधरसफासपज्जवेहिं दोहिं अन्नाणेहिं दोहिं दंसणेहिं छट्ठाणवडिए । उक्कोसट्ठिए वि एवं चेव, नवरं दो नाणा दो अन्नाणा दो दंसणा । अजहन्नमणुक्कोसट्ठिए वि एवं चेव, नवरं ठिईए चउट्ठाणवडिए । तिन्नि नाणा तिन्नि अन्नाणा तिन्नि दंसणा । जहन्नगुणकालगाणं भंते ! पंचिंदियतिरिक्खजोणियाणं पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा ! जहन्नगुणकालए पंचिंदियतिरिक्खजोणिए जहन्नगुणकालगस्स पंचिंदियतिरिक्खजोणियस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए चउट्ठाणवडिए, कालवन्नपज्जवेहिं तुल्ले, अवसेसेहिं वन्नगंधरसफासपज्जवेहिं तिहिं नाणेहिं तिहिं अन्नाणेहिं तिहिं दंसणेहिं छट्ठाणवडिए । एवं उक्कोसगुणकालए वि । अजहन्नमणुक्कोसगुणकालए वि एवं चेव, नवरं सट्ठाणे छट्ठाणवडिए । एवं पंच वन्ना दो गंधा पंच रसा अट्ठ फासा । जहन्नाभिणिबोहियणाणीणं भंते ! पंचिंदियतिरिक्खजोणियाणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा ! जहन्नाभिणिबोहियणाणी पंचिंदियतिरिक्खजोणिए जहन्नाभिणिबोहियणाणस्स पंचिंदियतिरिक्खजोणियस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए चउट्ठाणवडिए वन्नगंधरसफासपज्जवेहिं छट्ठाणवडिए, आभिणिबोहियणाणपज्जवेहिं तुल्ले, सुयणाण-

पज्जवेहिं छट्ठाणवडिए, चक्खुदंसणपज्जवेहिं छट्ठाणवडिए, अचक्खुदंसणपज्जवेहिं छट्ठाणवडिए । एवं उक्कोसाभिणिबोहियणाणी वि, णवरं ठिईए तिट्ठाणवडिए, तिन्नि नाणा तिन्नि दंसणा, सट्ठाणे तुल्ले, सेसेसु छट्ठाणवडिए । अजहन्नमणुक्कोसाभिणिबोहियणाणी जहा उक्कोसाभिणिबोहियणाणी, णवरं ठिईए चउट्ठाणवडिए । सट्ठाणे छट्ठाणवडिए । एवं सुयणाणी वि । जहन्नोहिनाणीणं भंते ! पंचिदियतिरिक्खजोणियाणं पुच्छा । गोयमा ! अणंता पज्जवा पन्नता । से केणट्ठेणं भंते ! एवं वुच्चइ० ? गोयमा ! जहन्नोहिनाणी पंचिदियतिरिक्खजोणिए जहन्नोहिनाणिस्स पंचिदियतिरिक्खजोणियस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए तिट्ठाणवडिए, वन्नगंधरसफासपज्जवेहिं आभिणिबोहियणाणसुयणाणपज्जवेहिं छट्ठाणवडिए, ओहिनाणपज्जवेहिं तुल्ले । अन्नाणा नत्थि । चक्खुदंसणपज्जवेहिं अचक्खुदंसणपज्जवेहिं ओहिदंसणपज्जवेहिं य छट्ठाणवडिए । एवं उक्कोसोहिनाणी वि । अजहन्नुक्कोसोहिनाणी वि एवं चेव, णवरं सट्ठाणे छट्ठाणवडिए । जहा आभिणिबोहियणाणी तहा मइअन्नाणी सुयअन्नाणी य, जहा ओहिनाणी तहा विभंगनाणी वि, चक्खुदंसणी अचक्खुदंसणी य जहा आभिणिबोहियणाणी, ओहिदंसणी जहा ओहिनाणी, जत्थ नाणा तत्थ अन्नाणा नत्थि, जत्थ अन्नाणा तत्थ नाणा नत्थि, जत्थ दंसणा तत्थ नाणा वि अन्नाणा वि अत्थित्ति भाणियव्वं ॥ २६४ ॥ जहन्नोगाहणगाणं भंते ! मणुस्साणं केवइया पज्जवा पन्नता ? गोयमा ! अणंता पज्जवा पन्नता । से केणट्ठेणं भंते ! एवं वुच्चइ—‘जहन्नोगाहणगाणं मणुस्साणं अणंता पज्जवा पन्नता’ ? गोयमा ! जहन्नोगाहणए मणुस्से जहन्नोगाहणगस्स मणुस्सस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए तुल्ले, ठिईए तिट्ठाणवडिए, वन्नगंधरसफासपज्जवेहिं तिहिं नाणेहिं दोहिं अन्नाणेहिं तिहिं दंसणेहिं छट्ठाणवडिए । उक्कोसोगाहणए वि एवं चेव, नवरं ठिईए सिय हीणे सिय तुल्ले सिय अब्भहिए । जइ हीणे असंखिज्जइभागहीणे, अह अब्भहिए असंखिज्जइभागअब्भहिए । दो नाणा दो अन्नाणा दो दंसणा । अजहन्नमणुक्कोसोगाहणए वि एवं चेव, णवरं ओगाहणट्ठयाए चउट्ठाणवडिए, ठिईए चउट्ठाणवडिए, आइल्लेहिं चउहिं नाणेहिं छट्ठाणवडिए, केवलनाणपज्जवेहिं तुल्ले, तिहिं अन्नाणेहिं तिहिं दंसणेहिं छट्ठाणवडिए, केवलदंसणपज्जवेहिं तुल्ले । जहन्नठिइयाणं भंते ! मणुस्साणं केवइया पज्जवा पन्नता ? गोयमा ! अणंता पज्जवा पन्नता । से केणट्ठेणं भंते ! एवं वुच्चइ० ? गोयमा ! जहन्नठिइए मणुस्से जहन्नठिइयस्स मणुस्सस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए तुल्ले, वन्नगंधरसफासपज्जवेहिं दोहिं अन्नाणेहिं दोहिं दंसणेहिं

छट्ठाणवडिए । एवं उक्कोसठिए वि, नवरं दो नाणा दो अन्नाणा दो दंसणा । अजहन्नमणुक्कोसठिए वि एवं चेव, नवरं ठिए चउट्ठाणवडिए, ओगाहणट्टयाए चउट्ठाणवडिए, आइल्लेहिं चउहिं नाणेहिं छट्ठाणवडिए, केवलनाणपज्जवेहिं तुल्ले, तिहिं अन्नाणेहिं तिहिं दंसणेहिं छट्ठाणवडिए, केवलदंसणपज्जवेहिं तुल्ले । जहन्नगुणकालयाणं भंते ! मणुस्साणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा ! जहन्नगुणकालए मणुसे जहन्नगुणकालयस्स मणुस्सस्स दव्वट्टयाए तुल्ले, पएसट्टयाए तुल्ले, ओगाहणट्टयाए चउट्ठाणवडिए, ठिए चउट्ठाणवडिए, कालवन्नपज्जवेहिं तुल्ले, अवसेसेहिं वन्नगंधरसफासपज्जवेहिं छट्ठाणवडिए, चउहिं नाणेहिं छट्ठाणवडिए, केवलनाणपज्जवेहिं तुल्ले, तिहिं अन्नाणेहिं तिहिं दंसणेहिं छट्ठाणवडिए, केवलदंसणपज्जवेहिं तुल्ले । एवं उक्कोसगुणकालए वि । अजहन्नमणुक्कोसगुणकालए वि एवं चेव, नवरं सट्ठाणे छट्ठाणवडिए । एवं पंच वन्ना दो गंधा पंच रसा अट्ठ फासा भाणियव्वा । जहन्नाभिणिबोहियनाणीणं भंते ! मणुस्साणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा ! जहन्नाभिणिबोहियनाणी मणुसे जहन्नाभिणिबोहियनाणस्स मणुस्सस्स दव्वट्टयाए तुल्ले, पएसट्टयाए तुल्ले, ओगाहणट्टयाए चउट्ठाणवडिए, ठिए चउट्ठाणवडिए, वन्नगंधरसफासपज्जवेहिं छट्ठाणवडिए, आभिणिबोहियनाणपज्जवेहिं तुल्ले, सुयनाणपज्जवेहिं दोहिं दंसणेहिं छट्ठाणवडिए, एवं उक्कोसाभिणिबोहियनाणी वि, नवरं आभिणिबोहियनाणपज्जवेहिं तुल्ले, ठिए तिट्ठाणवडिए, तिहिं नाणेहिं तिहिं दंसणेहिं छट्ठाणवडिए । अजहन्नमणुक्कोसाभिणिबोहियनाणी जहा उक्कोसाभिणिबोहियनाणी, नवरं ठिए चउट्ठाणवडिए, सट्ठाणे छट्ठाणवडिए । एवं सुयनाणी वि । जहन्नोहिनाणीणं भंते ! मणुस्साणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा ! जहन्नोहिनाणी मणुस्से जहन्नोहिनाणस्स मणुस्सस्स दव्वट्टयाए तुल्ले, पएसट्टयाए तुल्ले, ओगाहणट्टयाए तिट्ठाणवडिए, ठिए तिट्ठाणवडिए, वन्नगंधरसफासपज्जवेहिं दोहिं नाणेहिं छट्ठाणवडिए, ओहिनाणपज्जवेहिं तुल्ले, मणनाणपज्जवेहिं छट्ठाणवडिए, तिहिं दंसणेहिं छट्ठाणवडिए । एवं उक्कोसोहिनाणी वि । अजहन्नमणुक्कोसोहिनाणी वि एवं चेव, नवरं ओगाहणट्टयाए चउट्ठाणवडिए, सट्ठाणे छट्ठाणवडिए । जहा ओहिनाणी तहा मणपज्जवनाणी वि भाणियव्वे, नवरं ओगाहणट्टयाए तिट्ठाणवडिए । जहा आभिणिबोहियनाणी तहा मइअन्नाणी सुयअन्नाणी वि भाणियव्वे । जहा ओहिनाणी तहा विभंगनाणी वि भाणियव्वे, चक्खुदंसणी अचक्खुदंसणी य जहा आभिणिबोहियनाणी, ओहिदंसणी जहा

ओहिनाणी । जत्थ नाणा तत्थ अन्नाणा नत्थि, जत्थ अन्नाणा तत्थ नाणा नत्थि, जत्थ दंसणा तत्थ नाणा वि अन्नाणा वि । केवलनाणीणं भंते ! मणुस्साणं केवइया पज्जवा पन्नत्ता ? गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ- 'केवलनाणीणं मणुस्साणं अणंता पज्जवा पन्नत्ता' ? गोयमा ! केवलनाणी मणूसे केवलनाणिस्स मणूस्सस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाण-वडिए, ठिईए तिट्ठाणवडिए, वन्नगंधरसफासपज्जवेहिं छट्ठाणवडिए, केवलनाणपज्जवेहिं केवलदंसणपज्जवेहिं य तुल्ले । एवं केवलदंसणी वि मणूसे भाणियव्वे । वाणमंतरा जहा असुरकुमारा । एवं जोइसियवेमाणिया, नवरं सट्ठाणे ठिईए तिट्ठाणवडिए भाणियव्वे । सेतं जीवपज्जवा ॥ २६५ ॥ अजीवपज्जवा णं भंते ! कइविहा पन्नत्ता ? गोयमा ! दुविहा पन्नत्ता । तंजहा-रुविअजीवपज्जवा य अरुविअजीवपज्जवा य ॥ २६६ ॥ अरुविअजीवपज्जवा णं भंते ! कइविहा पन्नत्ता ? गोयमा ! दसविहा पन्नत्ता । तंजहा-धम्मत्थिकाए, धम्मत्थिकायस्स देसे, धम्मत्थिकायस्स पएस, अह-म्मत्थिकाए, अहम्मत्थिकायस्स देसे, अहम्मत्थिकायस्स पएस, आगासत्थिकाए, आगासत्थिकायस्स देसे, आगासत्थिकायस्स पएस, अट्ठासमए ॥ २६७ ॥ रुवि-अजीवपज्जवा णं भंते ! कइविहा पन्नत्ता ? गोयमा ! चउव्विहा पन्नत्ता । तंजहा-खंधा, खंधदेसा, खंधपएस, परमाणुपुग्गला । ते णं भंते ! किं संखेज्जा असंखेज्जा अणंता ? गोयमा ! नो संखेज्जा, नो असंखेज्जा, अणंता । से केणट्ठेणं भंते ! एवं वुच्चइ- 'नो संखेज्जा, नो असंखेज्जा, अणंता' ? गोयमा ! अणंता परमाणुपुग्गला, अणंता दुपएसिया खंधा जाव अणंता दसपएसिया खंधा, अणंता संखेज्जपएसिया खंधा, अणंता असंखेज्जपएसिया खंधा, अणंता अणंतपएसिया खंधा, से तेणट्ठेणं गोयमा ! एवं वुच्चइ- 'ते णं नो संखेज्जा, नो असंखेज्जा, अणंता' ॥ २६८ ॥ परमाणुपुग्गलानं भंते ! केवइया पज्जवा पन्नत्ता ? गोयमा ! परमाणुपुग्गलानं अणंता पज्जवा पन्नत्ता । से केणट्ठेणं भंते ! एवं वुच्चइ- 'परमाणुपुग्गलानं अणंता पज्जवा पन्नत्ता' ? गोयमा ! परमाणुपुग्गले परमाणुपुग्गलस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए तुल्ले, ठिईए सिय हीणे सिय तुल्ले सिय अब्भहिए । जइ हीणे असंखिज्जइभागहीणे वा संखिज्जइभागहीणे वा संखिज्जइगुणहीणे वा असंखिज्जइगुणहीणे वा । अह अब्भहिए असंखिज्जइभागअब्भहिए वा संखिज्जइभागअब्भहिए वा संखिज्जगुणअब्भहिए वा असंखिज्जगुणअब्भहिए वा । कालवन्नपज्जवेहिं सिय हीणे सिय तुल्ले सिय अब्भहिए । जइ हीणे अणंतभागहीणे वा असंखिज्जइभागहीणे वा संखिज्जइभागहीणे वा संखिज्जगुणहीणे वा असंखिज्जगुणहीणे वा

अणंतगुणहीणे वा । अह अब्भहिए अणंतभागअब्भहिए वा असंखिजइभागअब्भ-  
हिए वा संखिजभागअब्भहिए वा संखिजगुणअब्भहिए वा असंखिजगुणअब्भहिए  
वा अणंतगुणअब्भहिए वा । एवं अवसेसवन्नगंधरसफासपज्जवेहिं छट्ठाणवडिए ।  
फासाणं सीयउत्तिणनिद्वलक्खेहिं छट्ठाणवडिए, से तेणट्ठेणं गोयमा ! एवं वुच्चइ-  
‘परमाणुपोग्गलानं अणंता पज्जवा पन्नत्ता’ । दुपएसियाणं पुच्छा । गोयमा ! अणंता  
पज्जवा पन्नत्ता । से केणट्ठेणं भंते ! एवं वुच्चइ० ? गोयमा ! दुपएसिए दुपएसियस्स  
दव्वट्ठयाए तुल्ले, पएसट्ठयाए तुल्ले, ओगाहणट्ठयाए सिय हीणे सिय तुल्ले सिय अब्भ-  
हिए । जइ हीणे पएसहीणे, अह अब्भहिए पएसमब्भहिए । ठिईए चउट्ठाणवडिए,  
वन्नाइहिं उवरिल्लचउफासेहि य छट्ठाणवडिए । एवं तिपएसिए वि, नवरं ओगा-  
हणट्ठयाए सिय हीणे सिय तुल्ले सिय अब्भहिए । जइ हीणे पएसहीणे वा दुपए-  
सहीणे वा, अह अब्भहिए पएसमब्भहिए वा दुपएसमब्भहिए वा । एवं जाव  
दसपएसिए, नवरं ओगाहणाए पएसपरिवुद्धीं कायव्वा जाव दसपएसिए, नवरं  
नवपएसहीणत्ति । संखेजपएसियाणं पुच्छा । गोयमा ! अणंता पज्जवा पन्नत्ता । से  
केणट्ठेणं भंते ! एवं वुच्चइ० ? गोयमा ! संखेजपएसिए संखेजपएसियस्स दव्वट्ठयाए  
तुल्ले, पएसट्ठयाए सिय हीणे सिय तुल्ले सिय अब्भहिए । जइ हीणे संखेजभागहीणे  
वा संखेजगुणहीणे वा, अह अब्भहिए एवं चेव । ओगाहणट्ठयाए वि दुट्ठाणवडिए,  
ठिईए चउट्ठाणवडिए, वण्णाइउवरिल्लचउफासपज्जवेहि य छट्ठाणवडिए । असंखिज-  
पएसियाणं पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं  
वुच्चइ० ? गोयमा ! असंखिजपएसिए खंधे असंखिजपएसियस्स खंधस्स दव्वट्ठयाए  
तुल्ले, पएसट्ठयाए चउट्ठाणवडिए, ओगाहणट्ठयाए चउट्ठाणवडिए, ठिईए चउट्ठाण-  
वडिए, वण्णाइउवरिल्लचउफासेहि य छट्ठाणवडिए । अणंतपएसियाणं पुच्छा । गोयमा !  
अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा ! अणंतपएसिए खंधे  
अणंतपएसियस्स खंधस्स दव्वट्ठयाए तुल्ले, पएसट्ठयाए छट्ठाणवडिए, ओगाहणट्ठयाए  
चउट्ठाणवडिए, ठिईए चउट्ठाणवडिए, वन्नगंधरसफासपज्जवेहिं छट्ठाणवडिए ॥२६९॥  
एगपएसोगाढाणं पोग्गलानं पुच्छा । गोयमा ! अणंता पज्जवा पन्नत्ता । से केणट्ठेणं  
भंते ! एवं वुच्चइ० ? गोयमा ! एगपएसोगाढे पोग्गले एगपएसोगाढस्स पोग्गलस्स  
दव्वट्ठयाए तुल्ले, पएसट्ठयाए छट्ठाणवडिए, ओगाहणट्ठयाए तुल्ले, ठिईए चउट्ठाणवडिए,  
वण्णाइउवरिल्लचउफासेहिं छट्ठाणवडिए । एवं दुपएसोगाढे वि । संखिजपएसोगाढाणं  
पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा !  
संखिजपएसोगाढे पोग्गले संखिजपएसोगाढस्स पोग्गलस्स दव्वट्ठयाए तुल्ले, पएसट्ठयाए

छट्ठाणवडिए, ओगाहणट्टयाए दुट्ठाणवडिए, ठिईए चउट्ठाणवडिए, वण्णाइउवरिह्ल-  
चउफासेहि य छट्ठाणवडिए । असंखेज्जपएसोगाढाणं पुच्छा । गोयमा ! अणंता पज्जवा  
पन्नत्ता । से केणट्ठेणं भंते ! एवं वुच्चइ० ? गोयमा ! असंखेज्जपएसोगाढे पोग्गले असं-  
खेज्जपएसोगाढस्स पोग्गलस्स दव्वट्टयाए तुल्ले, पएसट्टयाए छट्ठाणवडिए, ओगाहणट्ट-  
याए चउट्ठाणवडिए, ठिईए चउट्ठाणवडिए, वण्णाइअट्टफासेहिं छट्ठाणवडिए ॥ २७० ॥  
एगसमयठिइयाणं पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं  
वुच्चइ० ? गोयमा ! एगसमयठिइए पोग्गले एगसमयठिइयस्स पोग्गलस्स दव्वट्टयाए  
तुल्ले, पएसट्टयाए छट्ठाणवडिए, ओगाहणट्टयाए चउट्ठाणवडिए, ठिईए तुल्ले, वण्णाइ-  
अट्टफासेहिं छट्ठाणवडिए । एवं जाव दससमयठिइए । संखेज्जसमयठिइयाणं एवं चेव,  
णवरं ठिईए दुट्ठाणवडिए । असंखेज्जसमयठिइयाणं एवं चेव, नवरं ठिईए चउट्ठाण-  
वडिए ॥ २७१ ॥ एकगुणकालगाणं पुच्छा । गोयमा ! अणंता पज्जवा पन्नत्ता । से  
केणट्ठेणं भंते ! एवं वुच्चइ० ? गोयमा ! एकगुणकालए पोग्गले एकगुणकालगस्स  
पोग्गलस्स दव्वट्टयाए तुल्ले, पएसट्टयाए छट्ठाणवडिए, ओगाहणट्टयाए चउट्ठाणवडिए,  
ठिईए चउट्ठाणवडिए, कालवन्नपज्जवेहिं तुल्ले, अवसेसेहिं वन्नगंधरसफासपज्जवेहिं  
छट्ठाणवडिए, अट्टहिं फासेहिं छट्ठाणवडिए । एवं जाव दसगुणकालए । संखेज्जगुण-  
कालए वि एवं चेव, नवरं सट्ठाणे दुट्ठाणवडिए । एवं असंखेज्जगुणकालए वि, नवरं  
सट्ठाणे चउट्ठाणवडिए । एवं अणंतगुणकालए वि, नवरं सट्ठाणे छट्ठाणवडिए । एवं  
जहा कालवन्नस्स वत्तव्वया भणिया तहा सेसाण वि वन्नगंधरसफासाणं वत्तव्वया  
भाणियव्वा जाव अणंतगुणलुक्खे ॥ २७२ ॥ जहन्नोगाहणगाणं भंते ! दुपएसियाणं  
पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा !  
जहन्नोगाहणए दुपएसिए खंधे जहन्नोगाहणस्स दुपएसियस्स खंधस्स दव्वट्टयाए तुल्ले,  
पएसट्टयाए तुल्ले, ओगाहणट्टयाए तुल्ले, ठिईए चउट्ठाणवडिए, कालवन्नपज्जवेहिं  
छट्ठाणवडिए, सेसवन्नगंधरसपज्जवेहिं छट्ठाणवडिए, सीयउसिणणिद्वलुक्खफासपज्जवेहिं  
छट्ठाणवडिए, से तेणट्ठेणं गोयमा ! एवं वुच्चइ०-‘जहन्नोगाहणगाणं दुपएसियाणं पोग्ग-  
लाणं अणंता पज्जवा पन्नत्ता’ । उक्कोसोगाहणए वि एवं चेव । अजहन्नमणुक्कोसोगाह-  
णओ नत्थि । जहन्नोगाहणयाणं भंते ! तिपएसियाणं पुच्छा । गोयमा ! अणंता पज्जवा  
पन्नत्ता । से केणट्ठेणं भंते ! एवं वुच्चइ० ? गोयमा ! जहा दुपएसिए जहन्नोगाहणए,  
उक्कोसोगाहणए वि एवं चेव, एवं अजहन्नमणुक्कोसोगाहणए वि । जहन्नोगाहणयाणं  
भंते ! चउपएसियाणं पुच्छा । गोयमा ! जहा जहन्नोगाहणए दुपएसिए तहा जहन्नो-  
गाहणए चउप्पएसिए, एवं जहा उक्कोसोगाहणए दुपएसिए तहा उक्कोसोगाहणए

चउप्पएसिए वि । एवं अजहन्नमणुक्कोसोगाहणए वि चउप्पएसिए, णवरं ओगाहणट्टयाए सिय हीणे सिय तुल्ले सिय अब्भहिए । जइ हीणे पएसहीणे, अह अब्भहिए पएस-  
 अब्भहिए । एवं जाव दसपएसिए णेयव्वं, णवरं अजहणुक्कोसोगाहणए पएसपरिवुद्धी  
 कायव्वा जाव दसपएसियस्स सत्त पएसो परिवव्विज्जंति । जहन्नोगाहणगाणं भंते !  
 संखेज्जपएसियाणं पुच्छ । गोयमा ! अणंता पज्जवा पन्नत्ता । से केणट्ठेणं भंते ! एवं  
 वुच्चइ० ? गोयमा ! जहन्नोगाहणए संखेज्जपएसिए जहन्नोगाहणगस्स संखेज्जपएसियस्स  
 दव्वट्टयाए तुल्ले, पएसट्टयाए दुट्ठाणवडिए, ओगाहणट्टयाए तुल्ले, ठिईए चउट्ठाणवडिए,  
 वण्णाइचउफासपज्जवेहि य छट्ठाणवडिए । एवं उक्कोसोगाहणए वि । अजहन्नमणुक्को-  
 सोगाहणए वि एवं चेव, णवरं सट्ठाणे दुट्ठाणवडिए । जहन्नोगाहणगाणं भंते !  
 असंखिज्जपएसियाणं पुच्छ । गोयमा ! अणंता पज्जवा पन्नत्ता । से केणट्ठेणं भंते ! एवं  
 वुच्चइ० ? गोयमा ! जहन्नोगाहणए असंखिज्जपएसिए खंधे जहन्नोगाहणगस्स असंखिज्ज-  
 पएसियस्स खंधस्स दव्वट्टयाए तुल्ले, पएसट्टयाए चउट्ठाणवडिए, ओगाहणट्टयाए तुल्ले,  
 ठिईए चउट्ठाणवडिए, वण्णाइउवरिल्लफासेहि य छट्ठाणवडिए । एवं उक्कोसोगाहणए वि ।  
 अजहन्नमणुक्कोसोगाहणए वि एवं चेव, नवरं सट्ठाणे चउट्ठाणवडिए । जहन्नोगाहणगाणं  
 भंते ! अणंतपएसियाणं पुच्छ । गोयमा ! अणंता पज्जवा पन्नत्ता । से केणट्ठेणं भंते !  
 एवं वुच्चइ० ? गोयमा ! जहन्नोगाहणए अणंतपएसिए खंधे जहन्नोगाहणगस्स अणंतप-  
 सियस्स खंधस्स दव्वट्टयाए तुल्ले, पएसट्टयाए छट्ठाणवडिए, ओगाहणट्टयाए तुल्ले, ठिईए  
 चउट्ठाणवडिए, वण्णाइउवरिल्लचउफासेहि छट्ठाणवडिए । उक्कोसोगाहणए वि एवं चेव,  
 नवरं ठिईए वि तुल्ले । अजहन्नमणुक्कोसोगाहणगाणं भंते ! अणंतपएसियाणं पुच्छ ।  
 गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा !  
 अजहन्नमणुक्कोसोगाहणए अणंतपएसिए खंधे अजहन्नमणुक्कोसोगाहणगस्स अणं-  
 तपएसियस्स खंधस्स दव्वट्टयाए तुल्ले, पएसट्टयाए छट्ठाणवडिए, ओगाहणट्टयाए  
 चउट्ठाणवडिए, ठिईए चउट्ठाणवडिए, वण्णाइअट्ठाफासेहि छट्ठाणवडिए ॥ २७३ ॥  
 जहन्नट्ठिइयाणं भंते ! परमाणुपुग्गलाणं पुच्छ । गोयमा ! अणंता पज्जवा पन्नत्ता ।  
 से केणट्ठेणं भंते ! एवं वुच्चइ० ? गोयमा ! जहन्नट्ठिइए परमाणुपुग्गले जहन्नट्ठिइयस्स  
 परमाणुपुग्गलस्स दव्वट्टयाए तुल्ले, पएसट्टयाए तुल्ले, ओगाहणट्टयाए तुल्ले, ठिईए तुल्ले,  
 वण्णाइउफासेहि य छट्ठाणवडिए । एवं उक्कोसट्ठिइए वि । अजहन्नमणुक्कोसट्ठिइए वि  
 एवं चेव, नवरं ठिईए चउट्ठाणवडिए । जहन्नट्ठिइयाणं दुपएसियाणं पुच्छ । गोयमा !  
 अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा ! जहन्नट्ठिइए  
 दुपएसिए जहन्नट्ठिइयस्स दुपएसियस्स दव्वट्टयाए तुल्ले, पएसट्टयाए तुल्ले, ओगाहणा



द्वयाए सिय हीणे सिय तुल्ले सिय अब्भहिए । जइ हीणे पएसहीणे, अह अब्भहिए पएसअब्भहिए । ठिईए तुल्ले, वण्णाइचउफासेहि य छट्ठाणवडिए । एवं उक्कोस-  
 ठिईए वि । अजहन्नमणुक्कोसठिईए वि एवं चेव, नवरं ठिईए चउट्ठाणवडिए । एवं  
 जाव दसपएसिए, नवरं पएसपरिवुद्धी कायव्वा । ओगाहणद्वयाए तिसु वि गमएसु  
 जाव दसपएसिए, एवं पएसो परिवव्हिज्जंति । जहन्नठिइयाणं भंते ! संखिजपए-  
 सियाणं पुच्छा । गोयमा ! अणंता पज्जवा पन्नता । से केणट्ठेणं भंते ! एवं वुच्चइ० ?  
 गोयमा ! जहन्नठिईए संखिजपएसिए खंधे जहन्नठिइयस्स संखिजपएसियस्स खंधस्स  
 दव्वद्वयाए तुल्ले, पएसद्वयाए दुट्ठाणवडिए, ओगाहणद्वयाए दुट्ठाणवडिए, ठिईए तुल्ले,  
 वण्णाइचउफासेहि य छट्ठाणवडिए । एवं उक्कोसठिईए वि । अजहन्नमणुक्कोसठिईए वि  
 एवं चेव, नवरं ठिईए चउट्ठाणवडिए । जहन्नठिइयाणं असंखिजपएसियाणं पुच्छा ।  
 गोयमा ! अणंता पज्जवा पन्नता । से केणट्ठेणं भंते ! एवं वुच्चइ० ? गोयमा ! जहन्न-  
 ठिईए असंखिजपएसिए जहन्नठिइयस्स असंखिजपएसियस्स दव्वद्वयाए तुल्ले, पएस-  
 द्वयाए चउट्ठाणवडिए, ओगाहणद्वयाए चउट्ठाणवडिए, ठिईए तुल्ले, वण्णाइउवरिल्लच-  
 उफासेहि य छट्ठाणवडिए । एवं उक्कोसठिईए वि । अजहन्नमणुक्कोसठिईए वि एवं चेव,  
 नवरं ठिईए चउट्ठाणवडिए । जहन्नठिइयाणं अणंतपएसियाणं पुच्छा । गोयमा !  
 अणंता पज्जवा पन्नता । से केणट्ठेणं भंते ! एवं वुच्चइ० ? गोयमा ! जहन्नठिईए  
 अणंतपएसिए जहन्नठिइयस्स अणंतपएसियस्स दव्वद्वयाए तुल्ले, पएसद्वयाए छट्ठाण-  
 वडिए, ओगाहणद्वयाए चउट्ठाणवडिए, ठिईए तुल्ले, वण्णाइअट्ठाफासेहि य छट्ठाण-  
 वडिए । एवं उक्कोसठिईए वि । अजहन्नमणुक्कोसठिईए वि एवं चेव, नवरं ठिईए  
 चउट्ठाणवडिए ॥ २७४ ॥ जहन्नगुणकालयाणं परमाणुपुग्गलाणं पुच्छा । गोयमा !  
 अणंता पज्जवा पन्नता । से केणट्ठेणं भंते ! एवं वुच्चइ० ? गोयमा ! जहन्नगुणकाले  
 परमाणुपुग्गले जहन्नगुणकालयस्स परमाणुपुग्गलस्स दव्वद्वयाए तुल्ले, पएसद्वयाए तुल्ले,  
 ओगाहणद्वयाए तुल्ले, ठिईए चउट्ठाणवडिए, कालवन्नपज्जवेहिं तुल्ले, अवसेसा वण्णा  
 णत्थि । गंधरसदुफासपज्जवेहिं य छट्ठाणवडिए । एवं उक्कोसगुणकाले वि । एवमज-  
 हन्नमणुक्कोसगुणकाले वि, नवरं सट्ठाणे छट्ठाणवडिए । जहन्नगुणकालयाणं भंते !  
 दुपएसियाणं पुच्छा । गोयमा ! अणंता पज्जवा पन्नता । से केणट्ठेणं भंते ! एवं  
 वुच्चइ० ? गोयमा ! जहन्नगुणकाले दुपएसिए जहन्नगुणकालयस्स दुपएसियस्स  
 दव्वद्वयाए तुल्ले, पएसद्वयाए तुल्ले, ओगाहणद्वयाए सिय हीणे सिय तुल्ले सिय अब्भहिए ।  
 जइ हीणे पएसहीणे, अह अब्भहिए पएसअब्भहिए । ठिईए चउट्ठाणवडिए, काल-  
 वन्नपज्जवेहिं तुल्ले, अवसेसवण्णाइउवरिल्लचउफासेहि य छट्ठाणवडिए । एवं उक्कोस-

गुणकालए वि । अजहन्नमणुक्कोसगुणकालए वि एवं चेव, नवरं सट्ठाणे छट्ठाणवडिए एवं जाव दसपएसिए, नवरं पएसपरिवुड्डी ओगाहणाए तहेव । जहन्नगुणकालया भंते ! संखिजपएसियाणं पुच्छा । गोयमा ! अणंता पज्जा पज्जा । से केणट्ठे भंते ! एवं वुच्चइ० ? गोयमा ! जहन्नगुणकालए संखिजपएसिए जहन्नगुणकालयस्स संखिजपएसियस्स दव्वट्ठयाए तुल्ले, पएसट्ठयाए दुट्ठाणवडिए, ओगाहणट्ठयाए दुट्ठा वडिए, ठिईए चउट्ठाणवडिए, कालवन्नपज्जवेहिं तुल्ले, अवसेसेहिं वण्णाइउवरिळ्ळ फासेहि य छट्ठाणवडिए । एवं अजहन्नमणुक्कोसगुणकालए वि, नवरं सट्ठाणे छट्ठा वडिए । जहन्नगुणकालयाणं भंते ! असंखिजपएसियाणं पुच्छा । गोयमा ! अणं पज्जा पज्जा । से केणट्ठेणं भंते ! एवं वुच्चइ० ? गोयमा ! जहन्नगुणकालए असंखिजपएसिए जहन्नगुणकालयस्स असंखिजपएसियस्स दव्वट्ठयाए तुल्ले, पएसट्ठयाए चट्ठाणवडिए, ठिईए चउट्ठाणवडिए, कालवन्नपज्जवेहिं तुल्ले, अवसेसेहिं वण्णाइउवरि चउफासेहि य छट्ठाणवडिए, ओगाहणट्ठयाए चउट्ठाणवडिए । एवं उक्कोसगुणकाल वि । अजहन्नमणुक्कोसगुणकालए वि एवं चेव, नवरं सट्ठाणे छट्ठाणवडिए । जह गुणकालयाणं भंते ! अणंतपएसियाणं पुच्छा । गोयमा ! अणंता पज्जा पज्जा । केणट्ठेणं भंते ! एवं वुच्चइ० ? गोयमा ! जहन्नगुणकालए अणंतपएसिए जहन्नगु कालयस्स अणंतपएसियस्स दव्वट्ठयाए तुल्ले, पएसट्ठयाए छट्ठाणवडिए, ओगाहणट्ठ चउट्ठाणवडिए, ठिईए चउट्ठाणवडिए, कालवन्नपज्जवेहिं तुल्ले, अवसेसेहिं वज्जाइउ फासेहि य छट्ठाणवडिए । एवं उक्कोसगुणकालए वि । अजहन्नमणुक्कोसगुणकालए एवं चेव, नवरं सट्ठाणे छट्ठाणवडिए । एवं नीललोहियहालिहसुक्किल्लसुब्भिगंधदुब्भिगं- तित्तकडुक्कायअंबिलमहुररसपज्जवेहि य वत्तव्वया भाणियव्वा, नवरं परमाणुपोगलत्त सुब्भिगंधस्स दुब्भिगंधो न भण्णइ, दुब्भिगंधस्स सुब्भिगंधो न भण्णइ, तित्त अवसेसे न भण्णइ, एवं कडुयाईण वि, अवसेसे तं चेव । जहन्नगुणकक्खडणं अण- पएसियाणं खंधाणं पुच्छा । गोयमा ! अणंता पज्जा पज्जा । से केणट्ठेणं भं ! एवं वुच्चइ० ? गोयमा ! जहन्नगुणकक्खडे अणंतपएसिए जहन्नगुणकक्खडस्स अण- पएसियस्स दव्वट्ठयाए तुल्ले, पएसट्ठयाए छट्ठाणवडिए, ओगाहणट्ठयाए चउट्ठाणवडिए, ठिईए चउट्ठाणवडिए, वज्जगंधरसेहिं छट्ठाणवडिए, कक्खडफासपज्जवेहिं तुल्ले, अक्से- सेहिं सत्तफासपज्जवेहिं छट्ठाणवडिए । एवं उक्कोसगुणकक्खडे वि । अजहन्नमणुक्को- सगुणकक्खडे वि एवं चेव, नवरं सट्ठाणे छट्ठाणवडिए । एवं मउयगुस्यलहुए वि भाणियव्वे । जहन्नगुणसीयाणं भंते ! परमाणुपोगलानं पुच्छा । गोयमा ! अणंता पज्जा पज्जा । से केणट्ठेणं भंते ! एवं वुच्चइ० ? गोयमा ! जहन्नगुणसीए परमाणु-

पोगले जहन्नगुणसीयस्स परमाणुपुरगलस्स दव्वट्टयाए तुल्ले, पएसट्टयाए तुल्ले, ओगाहणट्टयाए तुल्ले, ठिईए चउट्टाणवडिए, वन्नगंधरसेहिं छट्टाणवडिए, सीयफासपज्जवेहिं य तुल्ले, उसिणफासो न भण्णइ, निद्धलुक्खफासपज्जवेहिं य छट्टाणवडिए । एवं उक्कोसगुणसीए वि । अजहन्नमणुक्कोसगुणसीए वि एवं चेव, नवरं सट्टाणे छट्टाणवडिए । जहन्नगुणसीयाणं दुपएसियाणं पुच्छ । गोयमा ! अणंता पज्जवा पत्ता । से केणट्ठेणं भंते ! एवं वुच्चइ० ? गोयमा ! जहन्नगुणसीए दुपएसिए जहन्नगुणसीयस्स दुपएसियस्स दव्वट्टयाए तुल्ले, पएसट्टयाए तुल्ले, ओगाहणट्टयाए सिय हीणे सिय तुल्ले सिय अब्भहिए । जइ हीणे पएसहीणे, अह अब्भहिए पएसअब्भहिए । ठिईए चउट्टाणवडिए, वन्नगंधरसपज्जवेहिं छट्टाणवडिए, सीयफासपज्जवेहिं तुल्ले, उसिणनिद्धलुक्खफासपज्जवेहिं छट्टाणवडिए । एवं उक्कोसगुणसीए वि । अजहन्नमणुक्कोसगुणसीए वि एवं चेव, नवरं सट्टाणे छट्टाणवडिए । एवं जाव दसपएसिए, णवरं ओगाहणट्टयाए पएसपरिवुद्धी कायवा जाव दसपएसियस्स नव पएसो वुद्धिज्जंति । जहन्नगुणसीयाणं संखिजपएसियाणं पुच्छ । गोयमा ! अणंता पज्जवा पत्ता । से केणट्ठेणं भंते ! एवं वुच्चइ० ? गोयमा ! जहन्नगुणसीए संखिजपएसिए जहन्नगुणसीयस्स संखिजपएसियस्स दव्वट्टयाए तुल्ले, पएसट्टयाए दुट्टाणवडिए, ओगाहणट्टयाए दुट्टाणवडिए, ठिईए चउट्टाणवडिए, वण्णाईहिं छट्टाणवडिए, सीयफासपज्जवेहिं तुल्ले, उसिणनिद्धलुक्खेहिं छट्टाणवडिए । एवं उक्कोसगुणसीए वि । अजहन्नमणुक्कोसगुणसीए वि एवं चेव, नवरं सट्टाणे छट्टाणवडिए । जहन्नगुणसीयाणं असंखिजपएसियाणं पुच्छ । गोयमा ! अणंता पज्जवा पत्ता । से केणट्ठेणं भंते ! एवं वुच्चइ० ? गोयमा ! जहन्नगुणसीए असंखिजपएसिए जहन्नगुणसीयस्स असंखिजपएसियस्स दव्वट्टयाए तुल्ले, पएसट्टयाए चउट्टाणवडिए, ओगाहणट्टयाए चउट्टाणवडिए, ठिईए चउट्टाणवडिए, वण्णाइपज्जवेहिं छट्टाणवडिए, सीयफासपज्जवेहिं तुल्ले, उसिणनिद्धलुक्खफासपज्जवेहिं छट्टाणवडिए । एवं उक्कोसगुणसीए वि । अजहन्नमणुक्कोसगुणसीए वि एवं चेव, णवरं सट्टाणे छट्टाणवडिए । जहन्नगुणसीयाणं अणंतपएसियाणं पुच्छ । गोयमा ! अणंता पज्जवा पत्ता । से केणट्ठेणं भंते ! एवं वुच्चइ० ? गोयमा ! जहन्नगुणसीए अणंतपएसिए जहन्नगुणसीयस्स अणंतपएसियस्स दव्वट्टयाए तुल्ले, पएसट्टयाए छट्टाणवडिए, ओगाहणट्टयाए चउट्टाणवडिए, ठिईए चउट्टाणवडिए, वण्णाइपज्जवेहिं छट्टाणवडिए, सीयफासपज्जवेहिं तुल्ले, अवसेसेहिं सत्तफासपज्जवेहिं छट्टाणवडिए । एवं उक्कोसगुणसीए वि । अजहन्नमणुक्कोसगुणसीए वि एवं चेव, नवरं सट्टाणे छट्टाणवडिए । एवं उसिणनिद्धलुक्खे जहा सीए । परमाणुपोगलस्स तहेव पडिक्खो सव्वेसि न भण्णइ ति

भाणियव्वं ॥ २७५ ॥ जहन्नपएसियाणं भंते ! खंधाणं पुच्छा । गोयमा ! अणंता पज्जवा पन्नत्ता । से केणट्ठेणं भंते ! एवं वुच्चइ० ? गोयमा ! जहन्नपएसिए खंधे जहन्नपएसियस्स खंधस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए सिय हीणे सिय तुल्ले सिय अब्भहिए । जइ हीणे पएसहीणे, अह अब्भहिए पएसअब्भहिए । ठिईए चउट्ठाणवडिए । वन्नगंधरसउवरिळ्ळचउफासपज्जवेहिं छट्ठाणवडिए । उक्कोसपएसियाणं भंते ! खंधाणं पुच्छा । गोयमा ! अणंता० । से केणट्ठेणं भंते ! एवं वुच्चइ० ? गोयमा ! उक्कोसपएसिए खंधे उक्कोसपएसियस्स खंधस्स दव्वट्ठयाए तुल्ले, पएसट्ठयाए तुल्ले, ओगाहणट्ठयाए चउट्ठाणवडिए, ठिईए चउट्ठाणवडिए, वण्णाइअट्ठफासपज्जवेहि य छट्ठाणवडिए । अजहन्नमणुक्कोसपएसियाणं भंते ! खंधाणं केवइया पज्जवा पन्नत्ता ? गोयमा ! अणंता० । से केणट्ठेणं० ? गोयमा ! अजहन्नमणुक्कोसपएसिए खंधे अजहन्नमणुक्कोसपएसियस्स खंधस्स दव्वट्ठयाए तुल्ले, पएसट्ठयाए छट्ठाणवडिए, ओगाहणट्ठयाए चउट्ठाणवडिए, ठिईए चउट्ठाणवडिए, वण्णाइअट्ठफासपज्जवेहि य छट्ठाणवडिए ॥ २७६ ॥ जहन्नोगाहणगाणं भंते ! पोग्गलाणं पुच्छा । गोयमा ! अणंता० । से केणट्ठेणं० ? गोयमा ! जहन्नोगाहणए पोग्गले जहन्नोगाहणगस्स पोग्गलस्स दव्वट्ठयाए तुल्ले, पएसट्ठयाए छट्ठाणवडिए, ओगाहणट्ठयाए तुल्ले, ठिईए चउट्ठाणवडिए, वण्णाइउवरिळ्ळफासेहि य छट्ठाणवडिए । उक्कोसोगाहणए वि एवं चेव, नवरं ठिईए तुल्ले । अजहन्नमणुक्कोसोगाहणगाणं भंते ! पोग्गलाणं पुच्छा । गोयमा ! अणंता० । से केणट्ठेणं० ? गोयमा ! अजहन्नमणुक्कोसोगाहणए पोग्गले अजहन्नमणुक्कोसोगाहणगस्स पोग्गलस्स दव्वट्ठयाए तुल्ले, पएसट्ठयाए छट्ठाणवडिए, ओगाहणट्ठयाए चउट्ठाणवडिए, ठिईए चउट्ठाणवडिए, वण्णाइअट्ठफासपज्जवेहि य छट्ठाणवडिए ॥ २७७ ॥ जहन्नठिइयाणं भंते ! पोग्गलाणं पुच्छा । गोयमा ! अणंता० । से केणट्ठेणं० ? गोयमा ! जहन्नठिइए पोग्गले जहन्नठिइयस्स पोग्गलस्स दव्वट्ठयाए तुल्ले, पएसट्ठयाए छट्ठाणवडिए, ओगाहणट्ठयाए चउट्ठाणवडिए, ठिईए तुल्ले, वण्णाइअट्ठफासपज्जवेहि य छट्ठाणवडिए । एवं उक्कोसठिइए वि । अजहन्नमणुक्कोसठिइए वि एवं चेव, नवरं ठिईए वि चउट्ठाणवडिए ॥ २७८ ॥ जहन्नगुणकालयाणं भंते ! पोग्गलाणं केवइया पज्जवा पन्नत्ता ? गोयमा ! अणंता० । से केणट्ठेणं० ? गोयमा ! जहन्नगुणकालए पोग्गले जहन्नगुणकालयस्स पोग्गलस्स दव्वट्ठयाए तुल्ले, पएसट्ठयाए छट्ठाणवडिए, ओगाहणट्ठयाए चउट्ठाणवडिए, ठिईए चउट्ठाणवडिए, कालवन्नपज्जवेहिं तुल्ले, अवसेसेहिं वन्नगंधरसफासपज्जवेहि य छट्ठाणवडिए, से तेणट्ठेणं गोयमा ! एवं वुच्चइ—‘जहन्नगुणकालयाणं पोग्गलाणं अणंता पज्जवा पन्नत्ता’ । एवं २४ सुत्ता०

उक्कोसगुणकालए वि । अजहन्नमणुक्कोसगुणकालए वि एवं चेव, नवरं सट्ठाणे छट्ठाण-  
वडिए । एवं जहा कालवन्नपज्जवाणं वत्तव्वया भणिया तहा सेसाण वि वन्नगंधरस-  
फासाणं वत्तव्वया भाणियव्वा जाव अजहन्नमणुक्कोसलुक्खे सट्ठाणे छट्ठाणवडिए ।  
सेत्तं ह्विअजीवपज्जवा । सेत्तं अजीवपज्जवा ॥ २७९ ॥ पन्नवणाए भगवईए  
पंचमं विसेसपयं समत्तं ॥

वारस चउवीसाई सअंतरं एगसमय कत्तो य । उव्वट्ठण परभवियाउयं च अट्ठेव  
आगरिसा ॥ १ ॥ निरयगई णं भंते ! केवइयं कालं विरहिया उववाएणं पन्नत्ता ?  
गोयमा ! जहन्नेणं एकं समयं, उक्कोसेणं वारस मुहुत्ता । तिरियगई णं भंते ! केवइयं  
कालं विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं वारस  
मुहुत्ता । मणुयगई णं भंते ! केवइयं कालं विरहिया उववाएणं पन्नत्ता ? गोयमा !  
जहन्नेणं एगं समयं, उक्कोसेणं वारस मुहुत्ता । देवगई णं भंते ! केवइयं कालं  
विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं वारस मुहुत्ता ।  
सिद्धिगई णं भंते ! केवइयं कालं विरहिया सिज्झणाए पन्नत्ता ? गोयमा ! जहन्नेणं  
एगं समयं, उक्कोसेणं छम्मासा ॥ २८० ॥ निरयगई णं भंते ! केवइयं कालं विर-  
हिया उव्वट्ठणाए पन्नत्ता ? गोयमा ! जहन्नेणं एकं समयं, उक्कोसेणं वारस मुहुत्ता ।  
तिरियगई णं भंते ! केवइयं कालं विरहिया उव्वट्ठणाए पन्नत्ता ? गोयमा ! जहन्नेणं  
एगं समयं, उक्कोसेणं वारस मुहुत्ता । मणुयगई णं भंते ! केवइयं कालं विरहिया  
उव्वट्ठणाए पन्नत्ता ? गोयमा ! जहन्नेणं एगं समयं, उक्कोसेणं वारस मुहुत्ता । देवगई  
णं भंते ! केवइयं कालं विरहिया उव्वट्ठणाए पन्नत्ता ? गोयमा ! जहन्नेणं एगं समयं,  
उक्कोसेणं वारस मुहुत्ता ॥ १ दारं ॥ २८१ ॥ रयणप्पभापुढविनेरइया णं भंते !  
केवइयं कालं विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं  
चउव्वीसं मुहुत्ता । सक्करप्पभापुढविनेरइया णं भंते ! केवइयं कालं विरहिया उववा-  
एणं पन्नत्ता ? गोयमा ! जहन्नेणं एगं समयं, उक्कोसेणं सत्तराईदियाणि । वालुयप्प-  
भापुढविनेरइया णं भंते ! केवइयं कालं विरहिया उववाएणं पन्नत्ता ? गोयमा !  
जहन्नेणं एगं समयं, उक्कोसेणं अद्धमासं । पंकप्पभापुढविनेरइया णं भंते ! केवइयं  
कालं विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं मासं ।  
धूमप्पभापुढविनेरइया णं भंते ! केवइयं कालं विरहिया उववाएणं पन्नत्ता ? गोयमा !  
जहन्नेणं एगं समयं, उक्कोसेणं दो मासा । तमापुढविनेरइया णं भंते ! केवइयं कालं  
विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं चत्तारि मासा ।  
अहेसत्तमापुढविनेरइया णं भंते ! केवइयं कालं विरहिया उववाएणं पन्नत्ता ? गोयमा !

जहन्नेणं एगं समयं, उक्कोसेणं छम्मासा ॥ २८२ ॥ असुरकुमारा णं भंते ! केवइयं कालं विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं चउव्वीसं मुहुत्ता । नागकुमारा णं भंते ! केवइयं कालं विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं चउव्वीसं मुहुत्ता । एवं सुवन्नकुमाराणं विज्जुकुमाराणं अग्गिकुमाराणं दीवकुमाराणं दिसिकुमाराणं उदहिकुमाराणं वाउकुमाराणं थणिय-कुमाराणं य पत्तेयं जहन्नेणं एगं समयं, उक्कोसेणं चउव्वीसं मुहुत्ता ॥ २८३ ॥ पुढविकाइया णं भंते ! केवइयं कालं विरहिया उववाएणं पन्नत्ता ? गोयमा ! अणु-समयमविरहियं उववाएणं पन्नत्ता । एवं आउकाइया वि तेउकाइया वि वाउकाइया वि वणस्सइकाइया वि अणुसमयं अविरहिया उववाएणं पन्नत्ता ॥ २८४ ॥ वेइंदिया णं भंते ! केवइयं कालं विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं अंतोमुहुत्तं । एवं तेइंदियचउरिंदिया ॥ २८५ ॥ संमुच्छिमपंचिंदियतिरिक्ख-जोणिया णं भंते ! केवइयं कालं विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं अंतोमुहुत्तं । गब्भवक्कंतियपंचिंदियतिरिक्खजोणिया णं भंते ! केवइयं कालं विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं वारस मुहुत्ता ॥ २८६ ॥ संमुच्छिममणुस्सा णं भंते ! केवइयं कालं विरहिया उव-वाएणं पन्नत्ता ? गोयमा ! जहन्नेणं एगं समयं, उक्कोसेणं चउव्वीसं मुहुत्ता । गब्भ-वक्कंतियमणुस्सा णं भंते ! केवइयं कालं विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं वारस मुहुत्ता ॥ २८७ ॥ वाणमंतराणं पुच्छा । गोयमा ! जहन्नेणं एगं समयं, उक्कोसेणं चउव्वीसं मुहुत्ता । जोइसियाणं पुच्छा । गोयमा ! जहन्नेणं एगं समयं, उक्कोसेणं चउव्वीसं मुहुत्ता । सोहम्मे कप्पे देवा णं भंते ! केवइयं कालं विरहिया उववाएणं पन्नत्ता ? गोयमा ! जहन्नेणं एगं समयं, उक्कोसेणं चउव्वीसं मुहुत्ता । ईसाणे कप्पे देवाणं पुच्छा । गोयमा ! जहन्नेणं एगं समयं, उक्कोसेणं चउव्वीसं मुहुत्ता । सणकुमारे कप्पे देवाणं पुच्छा । गोयमा ! जहन्नेणं एगं समयं, उक्कोसेणं णव राइंदियाइं वीसाइं मुहुत्ताइं । माहिंदे कप्पे देवाणं पुच्छा । गोयमा ! जहन्नेणं एगं समयं, उक्कोसेणं वारस राइंदियाइं दस मुहुत्ताइं । वंमलोए देवाणं पुच्छा । गोयमा ! जहन्नेणं एगं समयं, उक्कोसेणं अद्धतेवीसं राइंदियाइं । लंतगदेवाणं पुच्छा । गोयमा ! जहन्नेणं एगं समयं, उक्कोसेणं पणयालीसं राइंदियाइं । महासुक्कदेवाणं पुच्छा । गोयमा ! जहन्नेणं एगं समयं, उक्कोसेणं असीइं राइंदियाइं । सहस्सारे देवाणं पुच्छा । गोयमा ! जहन्नेणं एगं समयं, उक्कोसेणं राइंदियसयं । आणयदेवाणं पुच्छा । गोयमा ! जहन्नेणं एगं समयं, उक्कोसेणं संखेज्जा मासा ।

पाणयदेवाणं पुच्छ । गोयमा ! जह्मेणं एगं समयं, उक्कोसेणं संखेज्जा मासा ।  
 आरणदेवाणं पुच्छ । गोयमा ! जह्मेणं एगं समयं, उक्कोसेणं संखिज्जा वासा ।  
 अञ्चुयदेवाणं पुच्छ । गोयमा ! जह्मेणं एगं समयं, उक्कोसेणं संखिज्जा वासा ।  
 हिद्धिमगेविज्जाणं पुच्छ । गोयमा ! जह्मेणं एगं समयं, उक्कोसेणं संखिज्जाइं वास-  
 सयाइं । मज्झिमगेविज्जाणं पुच्छ । गोयमा ! जह्मेणं एगं समयं, उक्कोसेणं संखि-  
 ज्जाइं वाससहस्साइं । उवरिमगेविज्जाणं पुच्छ । गोयमा ! जह्मेणं एगं समयं,  
 उक्कोसेणं संखिज्जाइं वाससयसहस्साइं । विजयवेजयंतजयंतअपराजियदेवाणं पुच्छ ।  
 गोयमा ! जह्मेणं एगं समयं, उक्कोसेणं असंखेज्जं कालं । सव्वट्ठसिद्धगदेवा णं भंते !  
 केवइयं कालं विरहिया उववाएणं पन्नत्ता ? गोयमा ! जह्मेणं एगं समयं, उक्कोसेणं  
 पल्लिओवमस्स संखिज्जभागं ॥ २८८ ॥ सिद्धा णं भंते ! केवइयं कालं विरहिया  
 सिज्झणाए पन्नत्ता ? गोयमा ! जह्मेणं एगं समयं, उक्कोसेणं छम्मासा ॥ २८९ ॥  
 रयणप्पभापुढविनेरइया णं भंते ! केवइयं कालं विरहिया उव्वट्ठणाए पन्नत्ता ?  
 गोयमा ! जह्मेणं एगं समयं, उक्कोसेणं-चउव्वीसं मुहुत्ता । एवं सिद्धवज्जा उव्वट्ठणा  
 वि भाणियव्वा जाव अणुत्तरोववाइयत्ति, नवरं जोइसियवेमाणिएसु 'बयणं'ति  
 अहिल्लोवो कायव्वो ॥ २ दारं ॥ २९० ॥ नेरइया णं भंते ! किं संतरं उव्वज्जंति,  
 निरंतरं उव्वज्जंति ? गोयमा ! संतरं पि उव्वज्जंति, निरंतरं पि उव्वज्जंति । तिरि-  
 क्खजोणिया णं भंते ! किं संतरं उव्वज्जंति, निरंतरं उव्वज्जंति ? गोयमा ! संतरं पि  
 उव्वज्जंति, निरंतरं पि उव्वज्जंति । मणुस्सा णं भंते ! किं संतरं उव्वज्जंति, निरंतरं  
 उव्वज्जंति ? गोयमा ! संतरं पि उव्वज्जंति, निरंतरं पि उव्वज्जंति । देवा णं भंते !  
 किं संतरं उव्वज्जंति, निरंतरं उव्वज्जंति ? गोयमा ! संतरं पि उव्वज्जंति, निरंतरं पि  
 उव्वज्जंति ॥ २९१ ॥ रयणप्पभापुढविनेरइया णं भंते ! किं संतरं उव्वज्जंति,  
 निरंतरं उव्वज्जंति ? गोयमा ! संतरं पि उव्वज्जंति, निरंतरं पि उव्वज्जंति । एवं जाव  
 अहेसत्तमाए संतरं पि उव्वज्जंति, निरंतरं पि उव्वज्जंति ॥ २९२ ॥ असुरकुमारा णं  
 देवा णं भंते ! किं संतरं उव्वज्जंति, निरंतरं उव्वज्जंति ? गोयमा ! संतरं पि  
 उव्वज्जंति, निरंतरं पि उव्वज्जंति । एवं जाव थणियकुमारा संतरं पि उव्वज्जंति,  
 निरंतरं पि उव्वज्जंति ॥ २९३ ॥ पुढविकाइया णं भंते ! किं संतरं उव्वज्जंति,  
 निरंतरं उव्वज्जंति ? गोयमा ! नो संतरं उव्वज्जंति, निरंतरं उव्वज्जंति । एवं जाव  
 वणस्सइकाइया नो संतरं उव्वज्जंति, निरंतरं उव्वज्जंति । बेइदिया णं भंते ! किं  
 संतरं उव्वज्जंति, निरंतरं उव्वज्जंति ? गोयमा ! संतरं पि उव्वज्जंति, निरंतरं पि  
 उव्वज्जंति । एवं जाव पंचिदियतिरिक्खजोणिया ॥ २९४ ॥ मणुस्सा णं भंते ! किं

संतरं उव्वज्जंति, निरंतरं उव्वज्जंति ? गोयमा ! संतरं पि उव्वज्जंति, निरंतरं पि उव्वज्जंति । एवं वाणमंतरा जोइसिया सोहम्मीसाणसणकुमारमाहिंदवंभलोयलंतगमहासुकसहस्सारआणयपाणयआरणञ्जुयहिट्टिमगेविजगमज्झिमगेविजगउवरिमगेविजगविजयवेजयंतजयंतअपराजियसव्वद्वसिद्धदेवा य संतरं पि उव्वज्जंति निरंतरं पि उव्वज्जंति ॥ २९५ ॥ सिद्धा णं भंते ! किं संतरं सिज्जंति, निरंतरं सिज्जंति ? गोयमा ! संतरं पि सिज्जंति, निरंतरं पि सिज्जंति ॥ २९६ ॥ नेरइया णं भंते ! किं संतरं उव्वट्ठंति, निरंतरं उव्वट्ठंति ? गोयमा ! संतरं पि उव्वट्ठंति, निरंतरं पि उव्वट्ठंति । एवं जहा उववाओ भणिओ तहा उव्वट्ठणा वि सिद्धवज्जा भाणियव्वा जाव वेमाणिया, नवरं जोइसियवेमाणिएसु 'चयणं'ति अहिलावो कायव्वो ॥ ३ दारं ॥ २९७ ॥ नेरइया णं भंते ! एगसमएणं केवइया उव्वज्जंति ? गोयमा ! जह्वेणं एक्को वा दो वा तिञ्चि वा, उक्कोसेणं संखेज्जा वा असंखेज्जा वा उव्वज्जंति, एवं जाव अहेसत्तमाए ॥ २९८ ॥ असुरकुमारा णं भंते ! एगसमएणं केवइया उव्वज्जंति ? गोयमा ! जह्वेणं एक्को वा दो वा तिञ्चि वा, उक्कोसेणं संखेज्जा वा असंखेज्जा वा । एवं नागकुमारा जाव थणियकुमारा वि भाणियव्वा ॥ २९९ ॥ पुढविकाइया णं भंते ! एगसमएणं केवइया उव्वज्जंति ? गोयमा ! अणुसमयं अविरहियं असंखेज्जा उव्वज्जंति, एवं जाव वाउकाइया । वणस्सइकाइया णं भंते ! एगसमएणं केवइया उव्वज्जंति ? गोयमा ! सट्ठाणुववायं पडुच्च अणुसमयं अविरहिया अणंता उव्वज्जंति, परट्ठाणुववायं पडुच्च अणुसमयं अविरहिया असंखेज्जा उव्वज्जंति । बेईंदिया णं भंते ! एगसमएणं केवइया उव्वज्जंति ? गोयमा ! जह्वेणं एगो वा दो वा तिञ्चि वा, उक्कोसेणं संखेज्जा वा असंखेज्जा वा । एवं तेईंदिया चउरिंदिया । संमुच्छिमपंचिंदियतिरिक्खजोणिया गब्भवक्कंतियपंचिंदियतिरिक्खजोणिया संमुच्छिममणुस्सा वाणमंतरजोइसियसोहम्मीसाणसणकुमारमाहिंदवंभलोयलंतगमहासुकसहस्सारकप्पदेवा एए जहा नेरइया । गब्भवक्कंतियमणूस्सआणयपाणयआरणञ्जुयगेवेज्जाअणुत्तरोववाइया य एए जह्वेणं इक्को वा दो वा तिञ्चि वा, उक्कोसेणं संखेज्जा उव्वज्जंति, न असंखेज्जा उव्वज्जंति ॥ ३०० ॥ सिद्धा णं भंते ! एगसमएणं केवइया सिज्जंति ? गोयमा ! जह्वेणं एक्को वा दो वा तिञ्चि वा, उक्कोसेणं अट्ठसयं ॥ ३०१ ॥ नेरइया णं भंते ! एगसमएणं केवइया उव्वट्ठंति ? गोयमा ! जह्वेणं एक्को वा दो वा तिञ्चि वा, उक्कोसेणं संखेज्जा वा असंखेज्जा वा उव्वट्ठंति, एवं जहा उववाओ भणिओ तहा उव्वट्ठणा वि सिद्धवज्जा भाणियव्वा जाव अणुत्तरोववाइया, नवरं जोइसियवेमाणियाणं चयणेणं अहिलावो कायव्वो ॥ ४ दारं ॥ ३०२ ॥ नेरइया णं भंते ! कथोहिंतो





[illegible]



जन्ति ? गोयमा ! पज्जत्तएहिन्तो उववज्जन्ति, नो अपज्जत्तएहिन्तो उववज्जन्ति । एवं जहा ओहिया उववाइया तथा रयणप्पभापुढविनेरइया वि उववाएयव्वा ॥ ३०७ ॥ सक्करप्पभापुढविनेरइयाणं पुच्छा । गोयमा ! एए वि जहा ओहिया तहेवोववाएयव्वा, नवरं संमुच्छिमेहिन्तो पडिसेहो कायव्वो । वालुयप्पभापुढविनेरइया णं भंते ! कओहिन्तो उववज्जन्ति० ? गोयमा ! जहा सक्करप्पभापुढविनेरइया, नवरं भुयपरिसप्पेहिन्तो पडिसेहो कायव्वो । पंक्कप्पभापुढविनेरइयाणं पुच्छा । गोयमा ! जहा वालुयप्पभापुढविनेरइया, नवरं खहयरेहिन्तो पडिसेहो कायव्वो । धूमप्पभापुढविनेरइयाणं पुच्छा । गोयमा ! जहा पंक्कप्पभापुढविनेरइया, नवरं चउप्पएहिन्तो वि पडिसेहो कायव्वो । तमापुढविनेरइया णं भंते ! कओहिन्तो उववज्जन्ति० ? गोयमा ! जहा धूमप्पभापुढविनेरइया, नवरं थलयरेहिन्तो वि पडिसेहो कायव्वो । इमेणं अभिलावेणं जइ पंचिन्दिदयतिरिक्खजोणिएहिन्तो उववज्जन्ति, किं जलयरपंचिन्दिएहिन्तो उववज्जन्ति, थलयरपंचिन्दिएहिन्तो उववज्जन्ति, खहयरपंचिन्दिएहिन्तो उववज्जन्ति ? गोयमा ! जलयरपंचिन्दिएहिन्तो उववज्जन्ति, नो थलयरेहिन्तो०, नो खहयरेहिन्तो उववज्जन्ति ॥ ३०८ ॥ जइ मणुस्सेहिन्तो उववज्जन्ति किं कम्मभूमिएहिन्तो उववज्जन्ति, अकम्मभूमिएहिन्तो उववज्जन्ति, अंतरदीवएहिन्तो उववज्जन्ति ? गोयमा ! कम्मभूमिएहिन्तो उववज्जन्ति, नो अकम्मभूमिएहिन्तो उववज्जन्ति, नो अंतरदीवएहिन्तो उववज्जन्ति ; जइ कम्मभूमिएहिन्तो उववज्जन्ति किं संखेज्जवासाउएहिन्तो उववज्जन्ति, असंखेज्जवासाउएहिन्तो उववज्जन्ति ? गोयमा ! संखेज्जवासाउएहिन्तो उववज्जन्ति, नो असंखेज्जवासाउएहिन्तो उववज्जन्ति । जइ संखेज्जवासाउएहिन्तो उववज्जन्ति किं पज्जत्तएहिन्तो उववज्जन्ति, अपज्जत्तएहिन्तो उववज्जन्ति ? गोयमा ! पज्जत्तएहिन्तो उववज्जन्ति, नो अपज्जत्तएहिन्तो उववज्जन्ति । जइ पज्जत्तयसंखेज्जवासाउयकम्मभूमिएहिन्तो उववज्जन्ति किं इत्थीहिन्तो उववज्जन्ति, पुरिसेहिन्तो उववज्जन्ति, नपुंसएहिन्तो उववज्जन्ति ? गोयमा ! इत्थीहिन्तो उववज्जन्ति, पुरिसेहिन्तो उववज्जन्ति, नपुंसएहिन्तो वि उववज्जन्ति । अहेसत्तमापुढविनेरइया णं भंते ! कओहिन्तो उववज्जन्ति० ? गोयमा ! एवं चेव, नवरं इत्थीहिन्तो पडिसेहो कायव्वो । “अस्सञ्ची खलु पढमं दोच्चं पि सिरीसवा तइय पक्खी । सीहा जन्ति चउत्थि उरगा पुण पंचमिं पुढविं । छट्ठिं च इत्थियाओ मच्छा मणुय य सत्तमिं पुढविं । एसो परमोवाओ बोद्धव्वो नरगपुढवीणं” ॥ ३०९ ॥ असुरकुमारा णं भंते ! कओहिन्तो उववज्जन्ति० ? गोयमा ! नो नेरइएहिन्तो उववज्जन्ति, तिरिक्खजोणिएहिन्तो

उववज्जन्ति, मणुस्सेहिंतो उववज्जन्ति, नो देवेहिंतो उववज्जन्ति । एवं जेहिंतो नेरइयाणं उववाओ तेहिंतो असुरकुमाराण वि भाणियव्वो, नवरं असंखेजवासाउय-  
 अकम्मभूमगअंतरदीवगमणुस्सतिरिक्खजोणिएहिंतो वि उववज्जन्ति, सेसं तं चेव ।  
 एवं जाव थणियकुमारा भाणियव्वा ॥ ३१० ॥ पुढविकाइया णं भंते । कओहिंतो  
 उववज्जन्ति किं नेरइएहिंतो उ० जाव देवेहिंतो उववज्जन्ति ? गोयमा ! नो नेरइए-  
 हिंतो उववज्जन्ति, तिरिक्खजोणिएहिंतो उववज्जन्ति, मणुस्सेहिंतो उववज्जन्ति,  
 देवेहिंतो वि उववज्जन्ति । जइ तिरिक्खजोणिएहिंतो उववज्जन्ति किं एणिन्दियति-  
 रिक्खजोणिएहिंतो उववज्जन्ति जाव पंचिन्दियतिरिक्खजोणिएहिंतो उववज्जन्ति ?  
 गोयमा ! एणिन्दियतिरिक्खजोणिएहिंतो वि उ० जाव पंचिन्दियतिरिक्खजोणिए-  
 हिंतो वि उववज्जन्ति । जइ एणिन्दियतिरिक्खजोणिएहिंतो उववज्जन्ति किं पुढवि-  
 काइएहिंतो उ० जाव वणस्सइकाइएहिंतो उववज्जन्ति ? गोयमा ! पुढविकाइएहिंतो  
 वि उ० जाव वणस्सइकाइएहिंतो वि उववज्जन्ति । जइ पुढविकाइएहिंतो उवव-  
 ज्जन्ति किं सुहुमपुढविकाइएहिंतो उववज्जन्ति, वायरपुढविकाइएहिंतो उववज्जन्ति ?  
 गोयमा ! दोहिंतो वि उववज्जन्ति । जइ सुहुमपुढविकाइएहिंतो उववज्जन्ति किं पज्ज-  
 त्सुहुमपुढविकाइएहिंतो उववज्जन्ति, अपज्जत्तसुहुमपुढविकाइएहिंतो उववज्जन्ति ?  
 गोयमा ! दोहिंतो वि उववज्जन्ति । जइ बायरपुढविकाइएहिंतो उववज्जन्ति किं  
 पज्जत्तएहिंतो उववज्जन्ति, अपज्जत्तएहिंतो उववज्जन्ति ? गोयमा ! दोहिंतो वि  
 उववज्जन्ति, एवं जाव वणस्सइकाइया चउक्कएणं भेएणं उववाएयव्वा ॥ ३११ ॥  
 जइ वेइंदियतिरिक्खजोणिएहिंतो उववज्जन्ति किं पज्जत्तवेइंदिएहिंतो उववज्जन्ति,  
 अपज्जत्तवेइंदिएहिंतो उववज्जन्ति ? गोयमा ! दोहिंतो वि उववज्जन्ति । एवं  
 तेइंदियचउरिन्दिएहिंतो वि उववज्जन्ति । जइ पंचिन्दियतिरिक्खजोणिएहिंतो  
 उववज्जन्ति किं जलयरपंचिन्दियतिरिक्खजोणिएहिंतो उववज्जन्ति, एवं जेहिंतो  
 नेरइयाणं उववाओ भणिओ तेहिंतो एएसिं पि भाणियव्वो, नवरं पज्जत्तगअपज्जत्त-  
 गेहिंतो वि उववज्जन्ति, सेसं तं चेव ॥ ३१२ ॥ जइ मणुस्सेहिंतो उववज्जन्ति किं  
 संमुच्छिममणुस्सेहिंतो उववज्जन्ति, गब्भवक्कंतियमणुस्सेहिंतो उववज्जन्ति ? गोयमा !  
 दोहिंतो वि उववज्जन्ति । जइ गब्भवक्कंतियमणुस्सेहिंतो उववज्जन्ति किं कम्मभूम-  
 गगब्भवक्कंतियमणुस्सेहिंतो उववज्जन्ति, अकम्मभूमगगब्भवक्कंतियमणुस्सेहिंतो  
 उववज्जन्ति ? सेसं जहा नेरइयाणं नवरं अपज्जत्तएहिंतो वि उववज्जन्ति ॥ ३१३ ॥  
 जइ देवेहिंतो उववज्जन्ति किं भवणवासि०वाणमंतर०जोइस०वेमाणिएहिंतो उवव-  
 ज्जन्ति ? गोयमा ! भवणवासिदेवेहिंतो वि उववज्जन्ति जाव वेमाणियदेवेहिंतो वि

उववज्जंति । जइ भवणवासिदेवेहिन्तो उववज्जंति किं असुरकुमारदेवेहिन्तो उ० जाव थणियकुमारदेवेहिन्तो उववज्जंति ? गोयमा ! असुरकुमारदेवेहिन्तो वि उववज्जंति जाव थणियकुमारदेवेहिन्तो वि उववज्जंति । जइ वाणमंतरदेवेहिन्तो उववज्जंति किं पिमा-एहिन्तो उ० जाव गंधव्वेहिन्तो उववज्जंति ? गोयमा ! पिमाएहिन्तो वि उ० जाव गंधव्वेहिन्तो वि उववज्जंति । जइ जोइसियदेवेहिन्तो उववज्जंति किं चंदविमाणेहिन्तो उववज्जंति जाव ताराविमाणेहिन्तो उववज्जंति ? गोयमा ! चंदविमाणजोइसियदेवेहिन्तो वि उ० जाव ताराविमाणजोइसियदेवेहिन्तो वि उववज्जंति । जइ वेमाणियदेवेहिन्तो उववज्जंति किं कप्पोवगवेमाणियदेवेहिन्तो उववज्जंति, कप्पातीतवेमाणियदेवेहिन्तो उववज्जंति ? गोयमा ! कप्पोवगवेमाणियदेवेहिन्तो उववज्जंति, नो कप्पातीतवेमाणि-यदेवेहिन्तो उववज्जंति । जइ कप्पोवगवेमाणियदेवेहिन्तो उववज्जंति किं सोहम्महिन्तो उ० जाव अञ्जुएहिन्तो उववज्जंति ? गोयमा ! सोहम्मसीसाणेहिन्तो उववज्जंति, नो सणकुमार जाव अञ्जुएहिन्तो उववज्जंति । एवं आउकाइया वि । एवं तेउवाउ-काइया वि, नवरं देवज्जेहिन्तो उववज्जंति । वणस्सइकाइया जहा पुढविकाइया । बेइंदिया तेइंदिया चउरिंदिया एए जहा तेउवाउ देवज्जेहिन्तो भाणियव्वा ॥३१४॥ पंचिंदियतिरिक्खजोणिया णं भंते ! कओहिन्तो उववज्जंति किं नेरइएहिन्तो उवव-ज्जंति जाव देवेहिन्तो उववज्जन्ति ? गोयमा ! नेरइएहिन्तो वि०, तिरिक्खजोणिएहिन्तो वि०, मणुस्सेहिन्तो वि०, देवेहिन्तो वि उववज्जन्ति । जइ नेरइएहिन्तो उववज्जंति किं रय-णप्पमापुढविनेरइएहिन्तो उ० जाव अहेसत्तमापुढविनेरइएहिन्तो उववज्जंति ? गोयमा ! रयणप्पमापुढविनेरएहिन्तो वि उववज्जंति जाव अहेसत्तमापुढविनेरइएहिन्तो वि उवव-ज्जंति । जइ तिरिक्खजोणिएहिन्तो उववज्जंति किं एगिंदिएहिन्तो उववज्जंति जाव पंचिंदिएहिन्तो उववज्जंति ? गोयमा ! एगिंदिएहिन्तो वि उववज्जंति जाव पंचिंदिए-हिन्तो वि उववज्जंति । जइ एगिंदिएहिन्तो उववज्जंति किं पुढविकाइएहिन्तो उववज्जन्ति-एवं जहा पुढविकाइयाणं उववाओ भणिओ तहेव एएसिं पि भाणियव्वो, नवरं देवेहिन्तो जाव सहस्सारकपोवगवेमाणियदेवेहिन्तो वि उववज्जंति, नो आणयकप्पो-वगवेमाणियदेवेहिन्तो जाव अञ्जुएहिन्तो उववज्जंति ॥ ३१५ ॥ मणुस्सा णं भंते ! कओहिन्तो उववज्जंति किं नेरइएहिन्तो उववज्जंति जाव देवेहिन्तो उववज्जंति ? गोयमा ! नेरइएहिन्तो वि उववज्जंति जाव देवेहिन्तो वि उववज्जंति । जइ नेरइएहिन्तो उववज्जंति किं रयणप्पमापुढविनेरइएहिन्तो उववज्जंति, सक्करप्पमापुढविनेरइएहिन्तो उववज्जंति, वालुयप्पमापुढविनेरइएहिन्तो०, पंकप्पमा० नेरइएहिन्तो०, धूमप्पमा०-नेरइएहिन्तो०, तमप्पमा०नेरइएहिन्तो०, अहेसत्तमापुढविनेरइएहिन्तो उववज्जंति ?

गोयमा ! रयणप्पभापुढविनेरइएहिंतो वि उ० जाव तमापुढविनेरइएहिंतो वि उवव-  
 ज्जंति, नो अहेसत्तमापुढविनेरइएहिंतो उववज्जंति । जइ तिरिक्खजोणिएहिंतो  
 उववज्जंति किं एगिंदियतिरिक्खजोणिएहिंतो उववज्जंति—एवं जेहिंतो पंचिंदियति-  
 रिक्खजोणियाणं उववाओ भणिओ तेहिंतो मणुस्साण वि निरवसेसो भाणियव्वो,  
 णवरं अहेसत्तमापुढविनेरइएहिंतो तेउवाउकाइएहिंतो ण उववज्जंति । सव्वदेवेहिंतो  
 य उववाओ कायव्वो जाव कप्पातीतवेमाणियसव्वट्टसिद्धदेवेहिंतो वि उववज्जावेयव्वा  
 ॥ ३१६ ॥ वाणमंतरदेवा णं भंते ! कओहिंतो उववज्जंति किं नेरइएहिंतो०,  
 तिरिक्खजोणिएहिंतो०, मणुस्सेहिंतो०, देवेहिंतो उववज्जंति ? गोयमा ! जेहिन्तो  
 असुरकुमारा उववज्जन्ति तेहिन्तो वाणमन्तरा उववज्जावेयव्वा ॥ ३१७ ॥ जोइसिया  
 देवा णं भंते ! कओहिंतो उववज्जन्ति० ? गोयमा ! एवं चेव, नवरं संमुच्छिमअसंखि-  
 ज्जवासाउयखहयूरपंचिंदियतिरिक्खजोणियवज्जेहिंतो अंतरदीवमणुस्सवज्जेहिंतो उवव-  
 ज्जावेयव्वा ॥ ३१८ ॥ वेमाणिया णं भंते ! कओहिंतो उववज्जंति किं णेरइएहिंतो०,  
 तिरिक्खजोणिएहिंतो०, मणुस्सेहिंतो०, देवेहिंतो उववज्जन्ति ? गोयमा ! णो णेर-  
 इएहिंतो उववज्जंति, पंचिंदियतिरिक्खजोणिएहिंतो उववज्जंति, मणुस्सेहिंतो उव-  
 वज्जंति, णो देवेहिंतो उववज्जंति । एवं सोहम्मसीसाणगदेवा वि भाणियव्वा । एवं  
 सणकुमारदेवा वि भाणियव्वा, नवरं असंखेज्जवासाउयअकम्मभूमगवज्जेहिंतो उवव-  
 ज्जंति । एवं जाव सहस्सारकपोवगवेमाणियदेवा भाणियव्वा । आणयदेवा णं भंते !  
 कओहिंतो उववज्जंति किं णेरइएहिंतो०, पंचिंदियतिरिक्खजोणिएहिंतो०, मणुस्से-  
 हिंतो०, देवेहिंतो उववज्जंति ? गोयमा ! णो णेरइएहिंतो उववज्जंति, णो तिरिक्खजो-  
 णिएहिंतो उववज्जंति, मणुस्सेहिंतो उववज्जंति, णो देवेहिंतो उववज्जंति । जइ मणुस्से-  
 हिंतो उववज्जंति किं संमुच्छिममणुस्सेहिंतो०, गब्भवक्कंतियमणुस्सेहिंतो उववज्जंति ?  
 गोयमा ! गब्भवक्कंतियमणुस्सेहिंतो०, नो संमुच्छिममणुस्सेहिंतो उववज्जंति । जइ  
 गब्भवक्कंतियमणुस्सेहिंतो उववज्जंति किं कम्मभूमिगेहिंतो०, अकम्मभूमिगेहिंतो०,  
 अंतरदीवगेहिंतो उववज्जंति ? गोयमा ! णो अकम्मभूमिगेहिंतो०, णो अंतरदीवगेहिंतो  
 उववज्जंति, कम्मभूमिगगब्भवक्कंतियमणुस्सेहिंतो उववज्जंति । जइ कम्मभूमगगब्भ-  
 वक्कंतियमणुस्सेहिंतो उववज्जंति किं संखेज्जवासाउएहिंतो०, असंखेज्जवासाउएहिंतो  
 उववज्जंति ? गोयमा ! संखेज्जवासाउएहिंतो०, नो असंखेज्जवासाउएहिंतो उववज्जंति ।  
 जइ संखेज्जवासाउयकम्मभूमगगब्भवक्कंतियमणुस्सेहिंतो उववज्जंति किं पज्जत्तएहिंतो  
 उववज्जंति, अपज्जत्तएहिंतो उववज्जंति ? गोयमा ! पज्जत्तएहिंतो उववज्जन्ति, नो  
 अपज्जत्तएहिन्तो उववज्जंति । जइ पज्जत्तसंखेज्जवासाउयकम्मभूमगगब्भवक्कंतिय-

मणुस्सेहिंतो उववज्जन्ति किं सम्महिट्ठीपज्जतगसंखेज्जवासाउयकम्मभूमगोहिन्तो उव-  
वज्जन्ति, मिच्छहिट्ठीपज्जतगेहिंतो उववज्जन्ति, सम्मामिच्छहिट्ठिपज्जतगेहिंतो उवव-  
ज्जन्ति ? गोयमा ! सम्महिट्ठीपज्जतगसंखेज्जवासाउयकम्मभूमगगब्भवक्कंतियमणुस्से-  
हिंतो उववज्जन्ति, मिच्छहिट्ठीपज्जतगेहिन्तो उववज्जन्ति, णो सम्मामिच्छहिट्ठिपज्ज-  
तएहिन्तो उववज्जन्ति । जइ सम्महिट्ठीपज्जतगसंखेज्जवासाउयकम्मभूमगगब्भवक्कंतिय-  
मणुस्सेहिन्तो उववज्जन्ति किं संजयसम्महिट्ठीहिन्तो०, असंजयसम्महिट्ठीपज्जतएहिन्तो०,  
संजयासंजयसम्महिट्ठीपज्जतसंखेज्जवासाउएहिन्तो उववज्जन्ति ? गोयमा ! तीहिंतो वि  
उववज्जन्ति । एवं जाव अञ्चुओ कप्पो । एवं चेव गेविज्जगदेवा वि, नवरं असंजय-  
संजयासंजया एए पडिसेहेयवा । एवं जहेव गेविज्जगदेवा तहेव अणुत्तरोववाइया  
वि, णवरं इमं णाणत्तं संजया चेव । जइ सम्महिट्ठीसंजयपज्जतसंखेज्जवासाउयकम्म-  
भूमगगब्भवक्कंतियमणुस्सेहिन्तो उववज्जन्ति किं पमत्तसंजयसम्महिट्ठीपज्जतएहिन्तो०,  
अपमत्तसंजयसम्महिट्ठीपज्जतएहिन्तो उववज्जन्ति ? गोयमा ! अपमत्तसंजयपज्जतए-  
हिन्तो उववज्जन्ति, नो पमत्तसंजयपज्जतएहिन्तो उववज्जन्ति । जइ अपमत्तसंजएहिन्तो  
उववज्जन्ति किं इट्ठिपत्तअपमत्तसंजएहिन्तो०, अणिट्ठिपत्तअपमत्तसंजएहिन्तो० ?  
गोयमा ! दोहिन्तो वि उववज्जन्ति ॥ ५ दारं ॥ ३१९ ॥ नेरइया णं भंते ! अणंतं  
उव्वट्ठिता कहिं गच्छन्ति, कहिं उववज्जन्ति ? किं नेरइएसु उववज्जन्ति, तिरिक्ख-  
जोणिएसु उववज्जन्ति, मणुस्सेसु उववज्जन्ति, देवेसु उववज्जन्ति ? गोयमा ! नो  
नेरइएसु उववज्जन्ति, तिरिक्खजोणिएसु उववज्जन्ति, मणुस्सेसु उववज्जन्ति, नो  
देवेसु उववज्जन्ति । जइ तिरिक्खजोणिएसु उववज्जन्ति किं एगिंदिएसु उववज्जन्ति  
जाव पंचेदियतिरिक्खजोणिएसु उववज्जन्ति ? गोयमा ! णो एगिंदिएसु उ० जाव नो  
चउरिंदिएसु उववज्जन्ति, एवं जेहिन्तो उववाओ भणिओ तेसु उव्वट्ठणा वि भाणि-  
यवा, नवरं संमुच्छिमेसु न उववज्जन्ति । एवं सव्वपुढवीसु भाणियव्वं, नवरं  
अहेसत्तमाओ मणुस्सेसु न उववज्जन्ति ॥ ३२० ॥ असुरकुमारा णं भंते ! अणंतं  
उव्वट्ठिता कहिं गच्छन्ति, कहिं उववज्जन्ति ? किं नेरइएसु उ० जाव देवेसु उवव-  
ज्जन्ति ? गोयमा ! नो नेरइएसु उववज्जन्ति, तिरिक्खजोणिएसु उववज्जन्ति,  
मणुस्सेसु उववज्जन्ति, नो देवेसु उववज्जन्ति । जइ तिरिक्खजोणिएसु उव-  
वज्जन्ति किं एगिन्दिएसु उववज्जन्ति जाव पंचिन्दिअतिरिक्खजोणिएसु उवव-  
ज्जन्ति ? गोयमा ! एगिन्दिअतिरिक्खजोणिएसु उववज्जन्ति, नो बेइंदिएसु उ० जाव  
नो चउरिंदिएसु उववज्जन्ति, पंचिंदियतिरिक्खजोणिएसु उववज्जन्ति । जइ एगिन्दि-  
एसु उववज्जन्ति किं पुढविकाइयएगिन्दिएसु उ० जाव वणस्सइकाइयएगिन्दिएसु उवव-



जन्ति ? गोयमा ! पुढविकाइयएगिन्दिएसु वि०, आउकाइयएगिन्दिएसु वि उववज्जन्ति, नो तेउकाइएसु०, नो वाउकाइएसु उववज्जन्ति, वणस्सइकाइएसु उववज्जन्ति । जइ पुढविकाइएसु उववज्जन्ति किं सुहुमपुढविकाइएसु उववज्जन्ति, बायरपुढविकाइएसु उववज्जन्ति ? गोयमा ! बायरपुढविकाइएसु उववज्जन्ति, नो सुहुमपुढविकाइएसु उववज्जन्ति । जइ बायरपुढविकाइएसु उववज्जन्ति किं पज्जत्तगबायरपुढविकाइएसु उववज्जन्ति, अपज्जत्तगबायरपुढविकाइएसु उववज्जन्ति ? गोयमा ! पज्जत्तएसु उववज्जन्ति, नो अपज्जत्तएसु उववज्जन्ति । एवं आउवणस्सइसु वि भाणियव्वं । पंचिन्दिद्यतिरिक्ख-जोणियमणूसेसु य जहा नेरइयाणं उव्वट्ठणा संमुच्छिमवज्जा तहा भाणियव्वा । एवं जाव थणियकुमारे ॥ ३२१ ॥ पुढविकाइया णं भंते ! अणंतरं उव्वट्ठिता कहिं गच्छंति, कहिं उववज्जन्ति ? किं नेरइएसु उ० जाव देवेसु० ? गोयमा ! नो नेरइ-एसु०, तिरिक्खजोणियमणूसेसु उववज्जन्ति, नो देवेसु उववज्जन्ति, एवं जहा एएसिं चेव उववाओ तहा उव्वट्ठणा वि देववज्जा भाणियव्वा । एवं आउवणस्सइवेइंदिय-तेइंदियचउरिन्दिया वि । एवं तेउ० वाउ०, नवरं मणूस्सवज्जेसु उववज्जन्ति । पंचि-न्दिद्यतिरिक्खजोणिया णं भंते ! अणंतरं उव्वट्ठिता कहिं गच्छंति, कहिं उववज्जन्ति ? गोयमा ! नेरइएसु उ० जाव देवेसु उववज्जन्ति । जइ नेरइएसु उववज्जन्ति किं रयणप्पभापुढविनेरइएसु उववज्जन्ति जाव अहेसत्तमापुढविनेरइएसु उववज्जन्ति ? गोयमा ! रयणप्पभापुढविनेरइएसु उववज्जन्ति जाव अहेसत्तमापुढविनेरइएसु उव-वज्जन्ति । जइ तिरिक्खजोणिएसु उववज्जन्ति किं एगिन्दिएसु उ० जाव पंचिन्दिएसु उववज्जन्ति ? गोयमा ! एगिन्दिएसु उ० जाव पंचिन्दिएसु उववज्जन्ति । एवं जहा एएसिं चेव उववाओ उव्वट्ठणा वि तहेव भाणियव्वा, नवरं असंखेज्जवासाउएसु वि एए उववज्जन्ति । जइ मणूस्सेसु उववज्जन्ति किं संमुच्छिममणूस्सेसु उववज्जन्ति, गब्भवक्कंतियमणूसेसु उववज्जन्ति ? गोयमा ! दोसु वि । एवं जहा उववाओ तहेव उव्वट्ठणा वि भाणियव्वा, नवरं अकम्मभूमगअंतरदीवगग्गभवक्कंतियमणूसेसु असं-खेज्जवासाउएसु वि एए उववज्जन्तीति भाणियव्वं । जइ देवेसु उववज्जन्ति किं भव-णवईसु उववज्जन्ति जाव वेमाणिएसु उववज्जन्ति ? गोयमा ! सव्वेसु चेव उव-वज्जन्ति । जइ भवणवईसु० किं असुरकुमारेसु उववज्जन्ति जाव थणियकुमारेसु उववज्जन्ति ? गोयमा ! सव्वेसु चेव उववज्जन्ति । एवं वाणमंतरजोइसियवेमा-णिएसु निरंतरं उववज्जन्ति जाव सहस्सारो कप्पोत्ति ॥ ३२२ ॥ मणूस्सा णं भंते ! अणंतरं उव्वट्ठिता कहिं गच्छंति, कहिं उववज्जन्ति ? किं नेरइएसु उव-वज्जन्ति जाव देवेसु उववज्जन्ति ? गोयमा ! नेरइएसु वि उववज्जन्ति जाव देवेसु वि

उववज्जंति । एवं निरंतरं सव्वेसु ठाणेषु पुच्छा । गोयमा ! सव्वेसु ठाणेषु उववज्जन्ति, न कहिं च पडिसेहो कायव्वो जाव सव्वद्वसिद्धदेवेषु वि उववज्जन्ति, अत्थेगइया सिज्जंति, बुज्जंति, मुच्चंति, परिनिव्वायंति, सव्वदुक्खाणं अंतं करेति । वाणमंतरजोइसियवेमाणियसोहम्मीसाणा य जहा असुरकुमारा, नवरं जोइसियाण य वेमाणियाण य चयंतीति अभिलावो कायव्वो । सणकुमारदेवाणं पुच्छा । गोयमा ! जहा असुरकुमारा, णयरं एगिंदिएसु ण उववज्जंति । एवं जाव सहस्सारगदेवा । आणय जाव अणुत्तरोववाइया देवा एवं चेव, नवरं नो तिरिक्खजोणिएसु उववज्जन्ति, मणूस्सेसु पज्जत्तसंखेज्जवासाउयकम्मभूमगगब्भवक्कंतियमणूस्सेसु उववज्जन्ति ॥ ६ दारं ॥ ॥ ३२३ ॥ नेरइया णं भंते ! कइभागावसेसाउया परभवियाउयं पकरेति ? गोयमा ! नियमा छम्मासावसेसाउया परभवियाउयं० । एवं असुरकुमारा वि, एवं जाव थणियकुमारा । पुढविकाइया णं भंते ! कइभागावसेसाउया परभवियाउयं पकरेति ? गोयमा ! पुढविकाइया दुविहा पन्नत्ता । तंजहा—सोवक्कमाउया य निस्वक्कमाउया य । तत्थ णं जे ते निस्वक्कमाउया ते नियमा तिभागावसेसाउया परभवियाउयं पकरेति । तत्थ णं जे ते सोवक्कमाउया ते सिय तिभागावसेसाउया परभवियाउयं पकरेति, सिय तिभागतिभागावसेसाउया परभवियाउयं पकरेति, सिय तिभागतिभागतिभागावसेसाउया परभवियाउयं पकरेति । आउतेउवाउवणप्फइकाइयाणं बेइंदियतेइंदियचउरिन्दियाण वि एवं चेव ॥ ३२४ ॥ पंचिन्दियतिरिक्खजोणिया णं भंते ! कइभागावसेसाउया परभवियाउयं पकरेति ? गोयमा ! पंचिन्दियतिरिक्खजोणिया दुविहा पन्नत्ता । तंजहा—संखेज्जवासाउया य असंखेज्जवासाउया य । तत्थ णं जे ते असंखेज्जवासाउया ते नियमा छम्मासावसेसाउया परभवियाउयं पकरेति । तत्थ णं जे ते संखेज्जवासाउया ते दुविहा पन्नत्ता । तंजहा—सोवक्कमाउया य निस्वक्कमाउया य । तत्थ णं जे ते निस्वक्कमाउया ते नियमा तिभागावसेसाउया परभवियाउयं पकरेति । तत्थ णं जे ते सोवक्कमाउया ते णं सिय तिभागे परभवियाउयं पकरेति, सिय तिभागतिभागे परभवियाउयं पकरेति, सिय तिभागतिभागतिभागावसेसाउया परभवियाउयं पकरेति । एवं मणूसा वि । वाणमंतरजोइसियवेमाणिया जहा नेरइया ॥ ७ दारं ॥ ॥ ३२५ ॥ कइविहे णं भंते ! आउयबंधे पन्नत्ते ? गोयमा ! छव्विहे आउयबंधे पन्नत्ते । तंजहा—१ जाइनामनिहत्ताउए, २ गइनामनिहत्ताउए, ३ ठिईनामनिहत्ताउए, ४ ओगाहणनामनिहत्ताउए, ५ पएसनामनिहत्ताउए, ६ अणुभावनामनिहत्ताउए । नेरइयाणं भंते ! कइविहे आउयबंधे पन्नत्ते ? गोयमा ! छव्विहे आउयबंधे पन्नत्ते । तंजहा—जाइनामनिहत्ताउए, गइनामनिहत्ताउए, ठिईनामनिहत्ताउए, ओगाहणनामनिहत्ता-

उए, पएसनामनिहत्ताउए, अणुभावनामनिहत्ताउए, एवं जाव वेमाणियाणं ॥ ३२६ ॥  
 जीवा णं भंते ! जाइनामनिहत्ताउयं कइहिं आगरिसेहिं पगरेंति ? गोयमा ! जहन्नेणं  
 एक्केण वा दोहिं वा तीहिं वा उक्कोसेणं अट्ठहिं । नेरइया णं भंते ! जाइनामनिहत्ता-  
 उयं कइहिं आगरिसेहिं पगरेंति ? गोयमा ! जहन्नेणं एक्केण वा दोहिं वा तीहिं वा,  
 उक्कोसेणं अट्ठहिं । एवं जाव वेमाणिया । एवं गइनामनिहत्ताउए वि, ठिईनामनिहत्ता-  
 उए वि, ओगाहणनामनिहत्ताउए वि, पएसनामनिहत्ताउए वि, अणुभावनामनिहत्ता-  
 उए वि ॥ ३२७ ॥ एएसि णं भंते ! जीवाणं जाइनामनिहत्ताउयं जहन्नेणं एक्केण  
 वा दोहिं वा तीहिं वा उक्कोसेणं अट्ठहिं आगरिसेहिं पकरेमाणाणं कयरे कयरेहिन्तो  
 अप्पा वा बहुया वा तुल्ला वा विसेसाहिया वा ? गोयमा ! सव्वथोवा जीवा जाइ-  
 नामनिहत्ताउयं अट्ठहिं आगरिसेहिं पकरेमाणा, सत्तहिं आगरिसेहिं पकरेमाणा  
 संखिज्जगुणा, छहिं आगरिसेहिं पकरेमाणा संखिज्जगुणा, एवं पंचहिं संखिज्जगुणा,  
 चउहिं संखिज्जगुणा, तीहिं संखिज्जगुणा, दोहिं संखिज्जगुणा, एणेण आगरिसेणं  
 पकरेमाणा संखिज्जगुणा । एवं एएणं अभिलावेणं जाव अणुभागनामनिहत्ताउयं, एवं  
 एए छप्पिय अप्पावहुदंडगा जीवाइया भाणियव्वा ॥ ८ दारं ॥ ३२८ ॥ **पन्नव-**  
**णाए भगवईए छट्ठं वक्कंतीपयं समत्तं ॥**

नेरइया णं भंते ! केवइकालस्स आणमंति वा पाणमंति वा ऊससंति वा नीस-  
 संति वा ? गोयमा ! सययं संतयामेव आणमंति वा पाणमंति वा ऊससंति वा  
 नीससंति वा ॥ ३२९ ॥ असुरकुमारा णं भंते ! केवइकालस्स आणमंति वा पाण-  
 मंति वा ऊससंति वा नीससंति वा ? गोयमा ! जहन्नेणं सत्तण्हं थोवाणं, उक्कोसेणं  
 साइरेगस्स पक्खस्स आणमंति वा जाव नीससंति वा ॥ नागकुमारा णं भंते !  
 केवइकालस्स आणमंति वा पाणमंति वा ऊससंति वा नीससंति वा ? गोयमा !  
 जहन्नेणं सत्तण्हं थोवाणं, उक्कोसेणं मुहुत्तपुहुत्तस्स, एवं जाव थणियकुमाराणं ॥ ३३० ॥  
 पुढविकाइया णं भंते ! केवइकालस्स आणमंति वा जाव नीससंति वा ? गोयमा !  
 वेमायाए आणमंति वा जाव नीससंति वा । एवं जाव मणस्सा । वाणमंतरा जहा  
 नागकुमारा ॥ ३३१ ॥ जोइसिया णं भंते ! केवइकालस्स आणमंति वा जाव नीससंति  
 वा ? गोयमा ! जहन्नेणं मुहुत्तपुहुत्तस्स, उक्कोसेणं वि मुहुत्तपुहुत्तस्स जाव नीससंति  
 वा ॥ ३३२ ॥ वेमाणिया णं भंते ! केवइकालस्स आणमंति वा जाव नीससंति  
 वा ? गोयमा ! जहन्नेणं मुहुत्तपुहुत्तस्स, उक्कोसेणं तेत्तीसाए पक्खाणं जाव नीससंति  
 वा ॥ ३३३ ॥ सोहम्मदेवा णं भंते ! केवइकालस्स आणमंति वा जाव नीससंति  
 वा ? गोयमा ! जहन्नेणं मुहुत्तपुहुत्तस्स, उक्कोसेणं दोण्हं पक्खाणं जाव नीससंति

वा । ईसाणगदेवा णं भंते ! केवइकालस्स आणमंति वा जाव नीससंति वा ? गोयमा ! जह्वेणं साइरेगस्स सुहुत्तपुहुत्तस्स, उक्कोसेणं साइरेगणं दोण्हं पक्खाणं जाव नीससंति वा । सणकुमारदेवा णं भंते ! केवइकालस्स आणमंति वा जाव नीससंति वा ? गोयमा ! जह्वेणं दोण्हं पक्खाणं, उक्कोसेणं सत्तण्हं पक्खाणं जाव नीससंति वा । माहिंदगदेवा णं भंते ! केवइकालस्स आणमंति वा जाव नीससंति वा ? गोयमा ! जह्वेणं साइरेगं दोण्हं पक्खाणं, उक्कोसेणं साइरेगं सत्तण्हं पक्खाणं जाव नीससंति वा । वंभलोगदेवा णं भंते ! केवइकालस्स आणमंति वा जाव नीससंति वा ? गोयमा ! जह्वेणं सत्तण्हं पक्खाणं, उक्कोसेणं दसण्हं पक्खाणं जाव नीससंति वा । लंतगदेवा णं भंते ! केवइकालस्स आणमंति वा जाव नीससंति वा ? गोयमा ! जह्वेणं दसण्हं पक्खाणं, उक्कोसेणं चउदसण्हं पक्खाणं जाव नीससंति वा । महासुकुदेवा णं भंते ! केवइकालस्स आणमंति वा जाव नीससंति वा ? गोयमा ! जह्वेणं चउदसण्हं पक्खाणं, उक्कोसेणं सत्तरसण्हं पक्खाणं जाव नीससंति वा । सहस्सारगदेवा णं भंते ! केवइकालस्स आणमंति वा जाव नीससंति वा ? गोयमा ! जह्वेणं सत्तरसण्हं पक्खाणं, उक्कोसेणं अट्टारसण्हं पक्खाणं जाव नीससंति वा । आणयदेवा णं भंते ! केवइकालस्स जाव नीससंति वा ? गोयमा ! जह्वेणं अट्टारसण्हं पक्खाणं, उक्कोसेणं एगूणवीसाए पक्खाणं जाव नीससंति वा । पाणयदेवा णं भंते ! केवइकालस्स जाव नीससंति वा ? गोयमा ! जह्वेणं एगूण-वीसाए पक्खाणं, उक्कोसेणं वीसाए पक्खाणं जाव नीससंति वा । आरणदेवा णं भंते ! केवइकालस्स जाव नीससंति वा ? गोयमा ! जह्वेणं वीसाए पक्खाणं, उक्कोसेणं एगवीसाए पक्खाणं जाव नीससंति वा । अञ्जुयदेवा णं भंते ! केवइ-कालस्स जाव नीससंति वा ? गोयमा ! जह्वेणं एगवीसाए पक्खाणं, उक्कोसेणं बावीसाए पक्खाणं जाव नीससंति वा ॥ ३३४ ॥ हिट्ठिमहिट्ठिमगेविज्जगदेवा णं भंते ! केवइकालस्स जाव नीससंति वा ? गोयमा ! जह्वेणं बावीसाए पक्खाणं, उक्कोसेणं तेवीसाए पक्खाणं जाव नीससंति वा । हिट्ठिममज्झिमगेविज्जगदेवा णं भंते ! केवइकालस्स जाव नीससंति वा ? गोयमा ! जह्वेणं तेवीसाए पक्खाणं, उक्कोसेणं चउवीसाए पक्खाणं जाव नीससंति वा । हिट्ठिमउवरिमगेविज्जगदेवा णं भंते ! केवइकालस्स जाव नीससंति वा ? गोयमा ! जह्वेणं चउवीसाए पक्खाणं, उक्कोसेणं पणवीसाए पक्खाणं जाव नीससंति वा । मज्झिमहिट्ठिमगेविज्जगदेवा णं भंते ! केवइकालस्स जाव नीससंति वा ? गोयमा ! जह्वेणं पणवीसाए पक्खाणं, उक्कोसेणं छव्वीसाए पक्खाणं जाव नीससंति वा । मज्झिममज्झिमगेविज्जगदेवा णं

भंते ! केवइकालस्स जाव नीससंति वा ? गोयमा ! जह्णेणं छवीसाए पक्खाणं, उक्कोसेणं सत्तावीसाए पक्खाणं जाव नीससंति वा । मज्झिमउवरिमगेविज्जगदेवा णं भंते ! केवइकालस्स जाव नीससंति वा ? गोयमा ! जह्णेणं सत्तावीसाए पक्खाणं, उक्कोसेणं अट्ठावीसाए पक्खाणं जाव नीससंति वा । उवरिमहेट्ठिमगेविज्जगदेवा णं भंते ! केवइकालस्स जाव नीससंति वा ? गोयमा ! जह्णेणं अट्ठावीसाए पक्खाणं, उक्कोसेणं एगूणतीसाए पक्खाणं जाव नीससंति वा । उवरिममज्झिमगेविज्जगदेवा णं भंते ! केवइकालस्स जाव नीससंति वा ? गोयमा ! जह्णेणं एगूणतीसाए पक्खाणं, उक्कोसेणं तीसाए पक्खाणं जाव नीससंति वा । उवरिमउवरिमगेविज्जगदेवा णं भंते ! केवइकालस्स जाव नीससंति वा ? गोयमा ! जह्णेणं तीसाए पक्खाणं, उक्कोसेणं एकतीसाए पक्खाणं जाव नीससंति वा ॥ ३३५ ॥ विजय-वेजयंतजयंतअपराजियविमाणेषु णं देवा णं भंते ! केवइकालस्स जाव नीससंति वा ? गोयमा ! जह्णेणं एकतीसाए पक्खाणं, उक्कोसेणं तेत्तीसाए पक्खाणं जाव नीससंति वा । सव्वट्ठसिद्धगदेवा णं भंते ! केवइकालस्स जाव नीससंति वा ? गोयमा ! अजहन्नमणुक्कोसेणं तेत्तीसाए पक्खाणं जाव नीससंति वा ॥ ३३६ ॥

**पन्नवणाए भगवईए सत्तमं ऊसासपयं समत्तं ॥**

कइ णं भंते ! सन्नाओ पन्नत्ताओ ? गोयमा ! दस सन्नाओ पन्नत्ताओ । तंजहा-आहारसन्ना, भयसन्ना, मेहुणसन्ना, परिग्गहसन्ना, कोहसन्ना, माणसन्ना, मायासन्ना, लोहसन्ना, लोयसन्ना, ओघसन्ना ॥ ३३७ ॥ नेरइयाणं भंते ! कइ सन्नाओ पन्नत्ताओ ? गोयमा ! दस सन्नाओ पन्नत्ताओ । तंजहा-आहारसन्ना जाव ओघसन्ना । असुरकुमारारणं भंते ! कइ सन्नाओ पन्नत्ताओ ? गोयमा ! दस सन्नाओ पन्नत्ताओ । तंजहा-आहारसन्ना जाव ओघसन्ना, एवं जाव थणियकुमारारणं । एवं पुढविकाइयाणं जाव वेमाणियावसाणाणं नेयव्वं ॥ ३३८ ॥ नेरइया णं भंते ! किं आहारसन्नोवत्ता, भयसन्नोवत्ता, मेहुणसन्नोवत्ता, परिग्गहसन्नोवत्ता ? गोयमा ! ओसन्नं कारणं पडुच्च भयसन्नोवत्ता, संतइभावं पडुच्च आहारसन्नोवत्ता वि जाव परिग्गहसन्नोवत्ता वि । एएसि णं भंते ! नेरइयाणं आहारसन्नोवत्ताणं भयसन्नोवत्ताणं मेहुणसन्नोवत्ताणं परिग्गहसन्नोवत्ताणं य कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा नेरइया मेहुणसन्नोवत्ता, आहारसन्नोवत्ता संखिज्जगुणा, परिग्गहसन्नोवत्ता संखिज्जगुणा, भयसन्नोवत्ता संखिज्जगुणा ॥ ३३९ ॥ तिरिक्खजोणिया णं भंते ! किं आहारसन्नोवत्ता जाव परिग्गहसन्नोवत्ता ? गोयमा ! ओसन्नं कारणं पडुच्च आहारसन्नोवत्ता, संतइभावं पडुच्च

आहारसन्नोवउत्ता वि जाव परिग्गहसन्नोवउत्ता वि । एएसि णं भंते ! तिरिक्खजो-  
णियाणं आहारसन्नोवउत्ताणं जाव परिग्गहसन्नोवउत्ताणं य कयरे कयरेहिंतो अप्पा  
वा बहुया वा तुल्ला वा विसेसाहिया वा ? गोयमा ! सब्बत्थोवा तिरिक्खजोणिया  
परिग्गहसन्नोवउत्ता, मेहुणसन्नोवउत्ता संखिज्जगुणा, भयसन्नोवउत्ता संखिज्जगुणा,  
आहारसन्नोवउत्ता संखिज्जगुणा ॥ ३४० ॥ मणुस्सा णं भंते ! किं आहारसन्नोवउत्ता  
जाव परिग्गहसन्नोवउत्ता ? गोयमा ! ओसन्नं कारणं पडुच्च मेहुणसन्नोवउत्ता,  
संतइभावं पडुच्च आहारसन्नोवउत्ता वि जाव परिग्गहसन्नोवउत्ता वि । एएसि णं  
भंते ! मणुस्साणं आहारसन्नोवउत्ताणं जाव परिग्गहसन्नोवउत्ताणं य कयरे कयरे-  
हिंतो अप्पा वा बहुया वा तुल्ला वा विसेसाहिया वा ? गोयमा ! सब्बत्थोवा मणुसा  
भयसन्नोवउत्ता, आहारसन्नोवउत्ता संखिज्जगुणा, परिग्गहसन्नोवउत्ता संखिज्जगुणा,  
मेहुणसन्नोवउत्ता संखिज्जगुणा ॥ ३४१ ॥ देवा णं भंते ! किं आहारसन्नोवउत्ता  
जाव परिग्गहसन्नोवउत्ता ? गोयमा ! ओसन्नं कारणं पडुच्च परिग्गहसन्नोवउत्ता,  
संतइभावं पडुच्च आहारसन्नोवउत्ता वि जाव परिग्गहसन्नोवउत्ता वि । एएसि णं  
भंते ! देवाणं आहारसन्नोवउत्ताणं जाव परिग्गहसन्नोवउत्ताणं य कयरे कयरेहिंतो  
अप्पा वा बहुया वा तुल्ला वा विसेसाहिया वा ? गोयमा ! सब्बत्थोवा देवा  
आहारसन्नोवउत्ता, भयसन्नोवउत्ता संखेज्जगुणा, मेहुणसन्नोवउत्ता संखेज्जगुणा,  
परिग्गहसन्नोवउत्ता संखेज्जगुणा ॥ ३४२ ॥ पन्नवणाए भगवईए अट्ठमं  
सच्चापर्यं समत्तं ॥

कइविहा णं भंते ! जोणी पन्नत्ता ? गोयमा ! तिविहा जोणी पन्नत्ता । तंजहा-  
सीया जोणी, उसिणा जोणी, सीओसिणा जोणी ॥ ३४३ ॥ नेरइयाणं भंते ! किं  
सीया जोणी, उसिणा जोणी, सीओसिणा जोणी ? गोयमा ! सीया वि जोणी, उसिणा  
वि जोणी, णो सीओसिणा जोणी । असुरकुमारारणं भंते ! किं सीया जोणी, उसिणा  
जोणी, सीओसिणा जोणी ? गोयमा ! नो सीया जोणी, नो उसिणा जोणी, सीओ-  
सिणा जोणी, एवं जाव थणियकुमारारणं । पुढविकाइयाणं भंते ! किं सीया जोणी,  
उसिणा जोणी, सीओसिणा जोणी ? गोयमा ! सीया वि जोणी, उसिणा वि जोणी,  
सीओसिणा वि जोणी । एवं आउवाउवणस्सइवेईदियतेईदियवउरिदियाण वि पत्तेयं  
भाणियव्वं । तेउक्काइयाणं णो सीया, उसिणा, णो सीओसिणा । पंचिंदियतिरिक्ख-  
जोणियाणं भंते ! किं सीया जोणी, उसिणा जोणी, सीओसिणा जोणी ? गोयमा !  
सीया वि जोणी, उसिणा वि जोणी, सीओसिणा वि जोणी । संसुच्छिमपंचिंदिय-  
तिरिक्खजोणियाणं वि एवं चेव । गब्भवक्कंतियपंचिंदियतिरिक्खजोणियाणं भंते !

किं सीया जोणी, उसिणा जोणी, सीओसिणा जोणी ? गोयमा ! णो सीया जोणी, णो उसिणा जोणी, सीओसिणा जोणी । मणुस्साणं भंते ! किं सीया जोणी, उसिणा जोणी, सीओसिणा जोणी ? गोयमा ! सीया वि जोणी, उसिणा वि जोणी, सीओसिणा वि जोणी । संमुच्छिममणुस्साणं भंते ! किं सीया जोणी, उसिणा जोणी, सीओसिणा जोणी ? गोयमा ! तिविहा जोणी । गम्भवक्कंतियमणुस्साणं भंते ! किं सीया जोणी, उसिणा जोणी, सीओसिणा जोणी ? गोयमा ! णो सीया, णो उसिणा, सीओसिणा जोणी । वाणमंतरदेवाणं भंते ! किं सीया जोणी, उसिणा जोणी, सीओसिणा जोणी ? गोयमा ! णो सीया, णो उसिणा, सीओसिणा जोणी । जोइसियवेमाणियाण वि एवं चेव ॥ ३४४ ॥ एसि णं भंते ! सीयजोणियाणं उसिणजोणियाणं सीओसिणजोणियाणं अजोणियाणं य कयरे कयरेहिंतो अप्पा वा, बहुया वा, तुल्ला वा, विसेसाहिया वा ? गोयमा ! सव्वत्थोवा जीवा सीओसिणजोणिया, उसिणजोणिया असंखेज्जगुणा, अजोणिया अणंतगुणा, सीयजोणिया अणंतगुणा ॥ ३४५ ॥ कइविहा णं भंते ! जोणी पन्नत्ता ? गोयमा ! तिविहा जोणी पन्नत्ता । तंजहा-सच्चित्ता, अच्चित्ता, मीसिया ॥ ३४६ ॥ नेरइयाणं भंते ! किं सच्चित्ता जोणी, अच्चित्ता जोणी, मीसिया जोणी ? गोयमा ! नो सच्चित्ता जोणी, अच्चित्ता जोणी, नो मीसिया जोणी । असुरकुमाराणं भंते ! किं सच्चित्ता जोणी, अच्चित्ता जोणी, मीसिया जोणी ? गोयमा ! नो सच्चित्ता जोणी, अच्चित्ता जोणी, नो मीसिया जोणी, एवं जाव थणियकुमाराणं । पुढवीकाइयाणं भंते ! किं सच्चित्ता जोणी, अच्चित्ता जोणी, मीसिया जोणी ? गोयमा ! सच्चित्ता जोणी, अच्चित्ता जोणी, मीसिया वि जोणी, एवं जाव चउरिंदियाणं । संमुच्छिमपंचिदियतिरिक्खजोणियाणं संमुच्छिममणुस्साणं य एवं चेव । गम्भवक्कंतियपंचिदियतिरिक्खजोणियाणं गम्भवक्कंतियमणुस्साणं य नो सच्चित्ता, नो अच्चित्ता, मीसिया जोणी । वाणमंतरजोइसियवेमाणियाणं जहा असुरकुमाराणं ॥ ३४७ ॥ एसि णं भंते ! जीवाणं सच्चित्तजोणीणं अच्चित्तजोणीणं मीसजोणीणं अजोणीणं य कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा जीवा मीसजोणिया, अच्चित्तजोणिया असंखेज्जगुणा, अजोणिया अणंतगुणा, सच्चित्तजोणिया अणंतगुणा ॥ ३४८ ॥ कइविहा णं भंते ! जोणी पन्नत्ता ? गोयमा ! तिविहा जोणी पन्नत्ता । तंजहा—संवुडा जोणी, वियडा जोणी, संवुडवियडा जोणी ॥ ३४९ ॥ नेरइयाणं भंते ! किं संवुडा जोणी, वियडा जोणी, संवुडवियडा जोणी ? गोयमा ! संवुडजोणी, नो वियडजोणी, नो संवुडवियडजोणी । एवं जाव वणस्सइकाइयाणं । वेइंदियाणं पुच्छा । गोयमा ! नो संवुडजोणी, वियडजोणी, नो संवुड-

वियडजोणी । एवं जाव चउरिंदियाणं । संमुच्छिमपंचिदियतिरिक्खजोणियाणं संमु-  
च्छिममणुस्साणं य एवं चेव । गब्भवक्कंतियपंचिदियतिरिक्खजोणियाणं गब्भवक्कंति-  
यमणुस्साणं य नो संवुडा जोणी, नो वियडा जोणी, संवुडवियडा जोणी । वाणमं-  
तरजोइसियवेमाणियाणं जहा नेरइयाणं ॥ ३५० ॥ एएसि णं भंते ! जीवाणं संवुड-  
जोणियाणं वियडजोणियाणं संवुडवियडजोणियाणं अजोणियाणं य कयरे कयरेहिंतो  
अप्पा वा बहुया वा तुल्ला वा विसेसाहिया वा ? गोयमा ! सब्बत्थोवा जीवा संवुड-  
वियडजोणिया, वियडजोणिया असंखिज्जगुणा, अजोणिया अणंतगुणा, संवुडजोणिया  
अणंतगुणा ॥ ३५१ ॥ कइविहा णं भंते ! जोणी पत्तता ? गोयमा ! तिविहा जोणी  
पत्तता । तंजहा—कुम्मुण्णया, संखावत्ता, वंसीपत्ता । कुम्मुण्णया णं जोणी उत्तम-  
पुरिसमाऊणं । कुम्मुण्णयाए णं जोणीए उत्तमपुरिसा गब्भे वक्कमंति, तंजहा—  
अरहंता, चक्कवट्ठी, वल्लदेवा, वासुदेवा । संखावत्ता णं जोणी इत्थीरयणस्स, संखा-  
वत्ताए जोणीए बहुवे जीवा य पोगगला य वक्कमंति विउक्कमंति चयंति उवचयंति, नो  
चेव णं णिप्फज्जंति । वंसीपत्ता णं जोणी पिहुज्जणस्स, वंसीपत्ताए णं जोणीए पिहुज्जणा  
गब्भे वक्कमंति ॥ ३५२ ॥ पच्चवणाए भगवईए नवमं जोणीपयं समत्तं ॥

कइ णं भंते ! पुढवीओ पत्तताओ ? गोयमा ! अट्ठ पुढवीओ पत्तताओ ।  
तंजहा—रयणप्पभा, सक्कप्पभा, वालुयप्पभा, पंकप्पभा, धूमप्पभा, तमप्पभा,  
तमतमप्पभा, ईसिप्पम्भारा ॥ ३५३ ॥ इमा णं भंते ! रयणप्पभा पुढवी किं  
चरमा, अचरमा, चरमाई, अचरमाई, चरमंतपएसा, अचरमंतपएसा ? गोयमा !  
इमा णं रयणप्पभा पुढवी नो चरमा, नो अचरमा, नो चरमाई, नो अचरमाई, नो  
चरमंतपएसा, नो अचरमंतपएसा, नियमाऽचरमं चरमाणि य, चरमंतपएसा य  
अचरमंतपएसा य, एवं जाव अहेसत्तमा पुढवी, सोहम्माई जाव अणुत्तरविमाणानं  
एवं चेव, ईसिप्पम्भारा वि एवं चेव, लोगे वि एवं चेव, एवं अलोगे वि ॥ ३५४ ॥  
इमीसे णं भंते ! रयणप्पभाए पुढवीए अचरमस्स य चरमाणं य चरमंतपएसाणं य  
अचरमंतपएसाणं य दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो  
अप्पा वा बहुया वा तुल्ला वा विसेसाहिया वा ? गोयमा ! सब्बत्थोवे इमीसे  
रयणप्पभाए पुढवीए दव्वट्ठयाए एगे अचरमे, चरमाई असंखेज्जगुणाई, अचरमं  
च चरमाणि य दो वि विसेसाहिया, पएसट्ठयाए सब्बत्थोवा इमीसे रयणप्पभाए  
पुढवीए चरमन्तपएसा, अचरमंतपएसा असंखेज्जगुणा, चरमंतपएसा य अचरमंत-  
पएसा य दो वि विसेसाहिया, दव्वट्ठपएसट्ठयाए सब्बत्थोवे इमीसे रयणप्पभाए  
पुढवीए दव्वट्ठयाए एगे अचरमे, चरमाई असंखेज्जगुणाई, अचरमं चरमाणि य



दो वि विसेसाहियाइं, पएसट्टयाए चरमंतपएसा असंखेज्जगुणा, अचरमंतपएसा असंखेज्जगुणा, चरमंतपएसा य अचरमंतपएसा य दो वि विसेसाहिया । एवं जाव अहेसत्तमाए, सोहम्मस्स जाव लोगस्स एवं चेव ॥ ३५५ ॥ अलोगस्स णं भंते ! अचरमस्स य चरमाण य चरमन्तपएसाण य अचरमन्तपएसाण य दव्वट्टयाए पएसट्टयाए दव्वट्टपएसट्टयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवे अलोगस्स दव्वट्टयाए एगे अचरमे, चरमाइं असंखेज्जगुणाइं, अचरमं चरमाणि य दो वि विसेसाहियाइं; पएसट्टयाए सव्वत्थोवा अलोगस्स चरमन्तपएसा, अचरमन्तपएसा अणन्तगुणा, चरमन्तपएसा य अचरमन्तपएसा य दो वि विसेसाहिया; दव्वट्टपएसट्टयाए सव्वत्थोवे अलोगस्स एगे अचरमे, चरमाइं असंखेज्जगुणाइं, अचरमं च चरमाणि य दो वि विसेसाहियाइं, चरमन्तपएसा असंखेज्जगुणा, अचरमन्तपएसा अणन्तगुणा, चरमन्तपएसा य अचरमन्तपएसा य दो वि विसेसाहिया ॥ ३५६ ॥ लोगलोगस्स णं भंते ! अचरमस्स य चरमाण य चरमन्तपएसाण य अचरमन्तपएसाण य दव्वट्टयाए पएसट्टयाए दव्वट्टपएसट्टयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवे लोगलोगस्स दव्वट्टयाए एगमेगे अचरमे, लोगस्स चरमाइं असंखेज्जगुणाइं, अलोगस्स चरमाइं विसेसाहियाइं, लोगस्स य अलोगस्स य अचरमं चरमाणि य दो वि विसेसाहियाइं, पएसट्टयाए सव्वत्थोवा लोगस्स चरमन्तपएसा, अलोगस्स चरमन्तपएसा विसेसाहिया, लोगस्स अचरमन्तपएसा असंखेज्जगुणा, अलोगस्स अचरमन्तपएसा अणन्तगुणा, लोगस्स य अलोगस्स य चरमन्तपएसा य अचरमन्तपएसा य दो वि विसेसाहिया । दव्वट्टपएसट्टयाए सव्वत्थोवे लोगलोगस्स दव्वट्टयाए एगमेगे अचरमे, लोगस्स चरमाइं असंखेज्जगुणाइं, अलोगस्स चरमाइं विसेसाहियाइं, लोगस्स य अलोगस्स य अचरमं चरमाणि य दो वि विसेसाहियाइं, लोगस्स चरमन्तपएसा असंखेज्जगुणा, अलोगस्स य चरमन्तपएसा विसेसाहिया, लोगस्स अचरमन्तपएसा असंखेज्जगुणा, अलोगस्स अचरमन्तपएसा अणंतगुणा, लोगस्स य अलोगस्स य चरमन्तपएसा य अचरमन्तपएसा य दो वि विसेसाहिया, सव्वदव्वा विसेसाहिया, सव्वपएसा अणंतगुणा, सव्वपज्जवा अणंतगुणा ॥ ३५७ ॥ परमाणुपोग्गले णं भंते ! किं चरमे १, अचरमे २, अवत्तव्वए ३, चरमाइं ४, अचरमाइं ५, अवत्तव्वयाइं ६, उदाहु चरमे य अचरमे य ७, उदाहु चरमे य अचरमाइं ८, उदाहु चरमाइं अचरमे य ९, उदाहु चरमाइं च अचरमाइं च १०, पढमा चउभंगी । उदाहु चरमे य अवत्तव्वए य ११, उदाहु

चरमे य अवत्तव्वयाई च १२, उदाहु चरमाई च अवत्तव्वए य १३, उदाहु चरमाई च अवत्तव्वयाई च १४, वीया चउमंगी । उदाहु अचरमे य अवत्तव्वए य १५, उदाहु अचरमे य अवत्तव्वयाई च १६, उदाहु अचरमाई च अवत्तव्वए य १७, उदाहु अचरमाई च अवत्तव्वयाई च १८, तइया चउमंगी । उदाहु चरमे य अचरमे य अवत्तव्वए य १९, उदाहु चरमे य अचरमे य अवत्तव्वयाई च २०, उदाहु चरमे य अचरमाई च अवत्तव्वए य २१, उदाहु चरमे य अचरमाई च अवत्तव्वयाई च २२, उदाहु चरमाई च अचरमे य अवत्तव्वए य २३, उदाहु चरमाई च अचरमे य अवत्तव्वयाई च २४, उदाहु चरमाई च अचरमाई च अवत्तव्वए य २५, उदाहु चरमाई च अचरमाई च अवत्तव्वयाई च २६ । एए छव्वीसं भंगा । गोयमा । परमाणुपोग्गले नो चरमे, नो अचरमे, नियमा अवत्तव्वए, सेसा भंगा पडिसेहेयव्वा ॥ ३५८ ॥ दुपएसिए णं भंते ! खंधे पुच्छा । गोयमा ! दुपएसिए खंधे सिय चरमे, नो अचरमे, सिय अवत्तव्वए । सेसा भंगा पडिसेहेयव्वा ॥ ३५९ ॥ तिपएसिए णं भंते ! खंधे पुच्छा । गोयमा ! तिपएसिए खंधे सिय चरमे १, नो अचरमे २, सिय अवत्तव्वए ३, नो चरमाई ४, नो अचरमाई ५, नो अवत्तव्वयाई ६, नो चरमे य अचरमे य ७, नो चरमे य अचरमाई ८, सिय चरमाई च अचरमे य ९, नो चरमाई च अचरमाई च १०, सिय चरमे य अवत्तव्वए य ११, सेसा भंगा पडिसेहेयव्वा ॥ ३६० ॥ चउपएसिए णं भंते ! खंधे पुच्छा । गोयमा ! चउपएसिए णं खंधे सिय चरमे १, नो अचरमे २, सिय अवत्तव्वए ३, नो चरमाई ४, नो अचरमाई ५, नो अवत्तव्वयाई ६, नो चरमे य अचरमे य ७, नो चरमे य अचरमाई च ८, सिय चरमाई अचरमे य ९, सिय चरमाई च अचरमाई च १०, सिय चरमे य अवत्तव्वए य ११, सिय चरमे य अवत्तव्वयाई च १२, नो चरमाई च अवत्तव्वए य १३, नो चरमाई च अवत्तव्वयाई च १४, नो अचरमे य अवत्तव्वए य १५, नो अचरमे य अवत्तव्वयाई च १६, नो अचरमाई च अवत्तव्वए य १७, नो अचरमाई च अवत्तव्वयाई च १८, नो चरमे य अचरमे य अवत्तव्वए य १९, नो चरमे य अचरमे य अवत्तव्वयाई च २०, नो चरमे य अचरमाई च अवत्तव्वए य २१, नो चरमे य अचरमाई च अवत्तव्वयाई च २२, सिय चरमाई च अचरमे य अवत्तव्वए य २३ । सेसा भंगा पडिसेहेयव्वा ॥ ३६१ ॥ पंचपएसिए णं भंते ! खंधे पुच्छा । गोयमा ! पंचपएसिए खंधे सिय चरमे १, नो अचरमे २, सिय अवत्तव्वए ३, नो चरमाई ४, नो अचरमाई ५, नो अवत्तव्वयाई ६, सिय चरमे य अचरमे य ७, नो चरमे य

[illegible]

य अवत्तव्वए य १९, सिय चरमे य अचरमे य अवत्तव्वयाई च २०, सिय चरमे य अचरमाई च अवत्तव्वए य २१, णो चरमे य अचरमाई च अवत्तव्वयाई च २२, सिय चरमाई च अचरमे य अवत्तव्वए य २३, सिय चरमाई च अचरमे य अवत्तव्वयाई च २४, सिय चरमाई च अचरमाई च अवत्तव्वए य २५, सिय चरमाई च अचरमाई च अवत्तव्वयाई च २६ ॥ ३६४ ॥ अट्ठपएसिए णं भंते ! खंधे पुच्छा । गोयमा ! अट्ठपएसिए खंधे सिय चरमे १, नो अचरमे २, सिय अवत्तव्वए ३, नो चरमाई ४, नो अचरमाई ५, नो अवत्तव्वयाई ६, सिय चरमे य अचरमे य ७, सिय चरमे य अचरमाई च ८, सिय चरमाई च अचरमे य ९, सिय चरमाई च अचरमाई च १०, सिय चरमे य अवत्तव्वए य ११, सिय चरमे य अवत्तव्वयाई च १२, सिय चरमाई च अवत्तव्वए य १३, सिय चरमाई च अवत्तव्वयाई च १४, णो अचरमे य अवत्तव्वए य १५, णो अचरमे य अवत्तव्वयाई च १६, णो अचरमाई च अवत्तव्वए य १७, णो अचरमाई च अवत्तव्वयाई च १८, सिय चरमे य अचरमे य अवत्तव्वए य १९, सिय चरमे य अचरमे य अवत्तव्वयाई च २०, सिय चरमे य अचरमाई च अवत्तव्वए य २१, सिय चरमे य अचरमाई च अवत्तव्वयाई च २२, सिय चरमाई च अचरमे य अवत्तव्वए य २३, सिय चरमाई च अचरमे य अवत्तव्वयाई च २४, सिय चरमाई च अचरमाई च अवत्तव्वए य २५, सिय चरमाई च अचरमाई च अवत्तव्वयाई च २६, संखेजपएसिए असंखेजपएसिए अणंतपएसिए खंधे जहेव अट्ठपएसिए तहेव पत्तेयं भाणियव्वं । परमाणुम्मि य तइओ पढमो तइओ य होंति दुपएसे । पढमो तइओ नवमो एक्कारसमो य तिपएसे ॥ १ ॥ पढमो तइओ नवमो दसमो एक्कारसो य बारसमो । भंगा चउप्पएसे तेवीसइमो य बोद्धव्वो ॥ २ ॥ पढमो तइओ सत्तमनवदसइक्कारबारतेरसमो । तेवीसचउव्वीसो पणवीसइमो य पंचमए ॥ ३ ॥ बिचउत्थपंचछट्ठं पनरस सोलं च सत्तरट्ठारं । वीसेक्कवीसबावीसगं च वजेज छट्ठंमि ॥ ४ ॥ बिचउत्थपंचछट्ठं पण्णर सोलं च सत्तरट्ठारं । बावीसइमविहूणा सत्तपएसंमि खंधम्मि ॥ ५ ॥ बिचउत्थपंचछट्ठं पण्णर सोलं च सत्तरट्ठारं । एए वज्जिय भंगा सेसा सेसेसु खंधेसु ॥ ६ ॥ ३६५ ॥ कइ णं भंते ! संठाणा पन्नता ? गोयमा ! पंच संठाणा पन्नता । तंजहा—परिमंडले, वट्ठे, तंसे, चउरंसे, आयए य ॥ ३६६ ॥ परिमंडला णं भंते ! संठाणा किं संखेज्जा, असंखेज्जा, अणंता ? गोयमा ! नो संखेज्जा, नो असंखेज्जा, अणंता । एवं जाव आयया । परिमंडले णं भंते ! संठाणे किं संखेजपएसिए, असंखेजपएसिए, अणंतपए-

सिए ? गोयमा ! सिय संखेजपएसिए, सिय असंखेजपएसिए, सिय अणंतपएसिए । एवं जाव आयए । परिमंडले णं भंते ! संठाणे संखेजपएसिए किं संखेजपएसोगाढे, असंखेजपएसोगाढे, अणंतपएसोगाढे ? गोयमा ! संखेजपएसोगाढे, नो असंखेजपएसोगाढे, नो अणंतपएसोगाढे । एवं जाव आयए । परिमंडले णं भंते ! संठाणे असंखेजपएसिए किं संखेजपएसोगाढे, असंखेजपएसोगाढे, अणंतपएसोगाढे ? गोयमा ! सिय संखेजपएसोगाढे, सिय असंखेजपएसोगाढे, नो अणंतपएसोगाढे । एवं जाव आयए । परिमंडले णं भंते ! संठाणे अणंतपएसिए किं संखेजपएसोगाढे, असंखेजपएसोगाढे, अणंतपएसोगाढे ? गोयमा ! सिय संखेजपएसोगाढे, सिय असंखेजपएसोगाढे, नो अणंतपएसोगाढे । एवं जाव आयए । परिमंडले णं भंते ! संठाणे संखेजपएसिए संखेजपएसोगाढे किं चरमे, अचरमे, चरमाइं, अचरमाइं, चरमंतपएसा, अचरमंतपएसा ? गोयमा ! परिमंडले णं संठाणे संखेजपएसिए संखेजपएसोगाढे नो चरमे, नो अचरमे, नो चरमाइं, नो अचरमाइं, नो चरमंतपएसा, नियमं अचरमं चरमाणि य चरमंतपएसा य अचरमंतपएसा य । एवं जाव आयए । परिमंडले णं भंते ! संठाणे असंखेजपएसिए संखेजपएसोगाढे किं चरमे० पुच्छा । गोयमा ! असंखेजपएसिए संखेजपएसोगाढे जहा संखेजपएसिए । एवं जाव आयए । परिमंडले णं भंते ! संठाणे असंखेजपएसिए असंखेजपएसोगाढे किं चरमे० पुच्छा । गोयमा ! असंखेजपएसिए असंखेजपएसोगाढे नो चरमे, जहा संखेजपएसोगाढे, एवं जाव आयए । परिमंडले णं भंते ! संठाणे अणंतपएसिए संखेजपएसोगाढे किं चरमे० पुच्छा । गोयमा ! तहेव जाव आयए । अणंतपएसिए असंखेजपएसोगाढे जहा संखेजपएसोगाढे, एवं जाव आयए ॥ ३६७ ॥ परिमंडलस्स णं भंते ! संठाणस्स संखेजपएसियस्स संखेजपएसोगाढस्स अचरमस्स य चरमाण य चरमंतपएसाण य अचरमंतपएसाण य दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवे परिमंडलस्स संठाणस्स संखेजपएसियस्स संखेजपएसोगाढस्स दव्वट्ठयाए एगे अचरमे, चरमाइं संखेजगुणाइं, अचरमं चरमाणि य दोऽवि विसेसाहियाइं, पएसट्ठयाए सव्वत्थोवा परिमंडलस्स संठाणस्स संखेजपएसियस्स संखेजपएसोगाढस्स चरमंतपएसा, अचरमन्तपएसा संखेजगुणा, चरमन्तपएसा य अचरमन्तपएसा य दोऽवि विसेसाहिया, दव्वट्ठपएसट्ठयाए सव्वत्थोवे परिमण्डलस्स संठाणस्स संखेजपएसियस्स संखेजपएसोगाढस्स दव्वट्ठयाए एगे अचरमे, चरमाइं संखेजगुणाइं, अचरमं च चरमाणि य दोऽवि विसेसाहियाइं, चरमन्तपएसा संखेजगुणा, अचरमन्तपएसा संखेजगुणा, चरमन्तपएसा य

अचरमन्तपएसा य दोऽवि विसेसाहिया । एवं वट्ठंतसचउरंसायएसु वि जोएयव्वं ॥ ३६८ ॥ परिमण्डलस्स णं भंते ! संठाणस्स असंखेज्जपएसियस्स संखेज्जपएसोगाढस्स अचरमस्स चरमाण य चरमन्तपएसाण य अचरमन्तपएसाण य दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो अप्पा वा ४ ? गोयमा ! सव्वत्थोवे परिमंडलस्स संठाणस्स असंखेज्जपएसियस्स संखेज्जपएसोगाढस्स दव्वट्ठयाए एगे अचरमे, चरमाइं संखेज्जगुणाइं, अचरमं च चरमाणि य दोऽवि विसेसाहियाइं, पएसट्ठयाए सव्वत्थोवा परिमंडलसंठाणस्स असंखेज्जपएसियस्स संखेज्जपएसोगाढस्स चरमंतपएसा, अचरमंतपएसा संखेज्जगुणा, चरमंतपएसा य अचरमंतपएसा य दोऽवि विसेसाहिया, दव्वट्ठपएसट्ठयाए-सव्वत्थोवे परिमंडलस्स संठाणस्स असंखेज्जपएसियस्स संखेज्जपएसोगाढस्स दव्वट्ठयाए एगे अचरमे, चरमाइं संखेज्जगुणाइं, अचरमं च चरमाणि य दोऽवि विसेसाहियाइं, चरमंतपएसा संखेज्जगुणा, अचरमंतपएसा संखेज्जगुणा, चरमंतपएसा य अचरमंतपएसा य दोऽवि विसेसाहिया । एवं जाव आयए । परिमंडलस्स णं भंते ! संठाणस्स असंखेज्जपएसियस्स असंखेज्जपएसोगाढस्स अचरमस्स य चरमाण य चरमंतपएसाण य अचरमंतपएसाण य दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो अप्पा वा ४ ? गोयमा ! जहा रयणप्पभाए अप्पावहुयं तहेव निरवसेसं भाणियव्वं, एवं जाव आयए ॥ ३६९ ॥ परिमंडलस्स णं भंते ! संठाणस्स अणंतपएसियस्स संखेज्जपएसोगाढस्स अचरमस्स य चरमाण य चरमंतपएसाण य अचरमंतपएसाण य दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो अप्पा वा ४ ? गोयमा ! जहा संखेज्जपएसियस्स संखेज्जपएसोगाढस्स, नवरं संक्रमेणं अणंतगुणा, एवं जाव आयए । परिमंडलस्स णं भंते ! संठाणस्स अणंतपएसियस्स असंखेज्जपएसोगाढस्स अचरमस्स य ४ जहा रयणप्पभाए, नवरं संक्रमे अणंतगुणा, एवं जाव आयए ॥ ३७० ॥ जीवे णं भंते ! गइचरमेणं किं चरमे अचरमे ? गोयमा ! सिय चरमे, सिय अचरमे । नेरइए णं भंते ! गइचरमेणं किं चरमे अचरमे ? गोयमा ! सिय चरमे, सिय अचरमे, एवं निरंतरं जाव वेमाणिए । नेरइया णं भंते ! गइचरमेणं किं चरमा अचरमा ? गोयमा ! चरमा वि अचरमा वि, एवं निरंतरं जाव वेमाणिया । नेरइए णं भंते ! ठिईचरमेणं किं चरमे अचरमे ? गोयमा ! सिय चरमे, सिय अचरमे, एवं निरंतरं जाव वेमाणिए । नेरइया णं भंते ! ठिईचरमेणं किं चरमा अचरमा ? गोयमा ! चरमा वि अचरमा वि, एवं निरंतरं जाव वेमाणिया । नेरइए णं भंते ! भवचरमेणं किं चरमे अचरमे ? गोयमा ! सिय चरमे, सिय अचरमे, एवं निरंतरं जाव वेमा-

णिण् । नेरइया णं भंते ! भवचरमेणं किं चरमा अचरमा ? गोयमा ! चरमा वि अचरमा वि, एवं निरंतरं जाव वेमाणिया । नेरइए णं भंते ! भासाचरमेणं किं चरमे अचरमे ? गोयमा ! सिय चरमे, सिय अचरमे, एवं निरंतरं जाव वेमाणिण् । नेरइया णं भंते ! भासाचरमेणं किं चरमा अचरमा ? गोयमा ! चरमा वि अचरमा वि, एवं जाव एण्णियवज्जा निरंतरं जाव वेमाणिया । नेरइए णं भंते ! आणापाणुचरमेणं किं चरमे अचरमे ? गोयमा ! सिय चरमे, सिय अचरमे । एवं निरंतरं जाव वेमाणिण् । नेरइया णं भंते ! आणापाणुचरमेणं किं चरमा अचरमा ? गोयमा ! चरमा वि अचरमा वि । एवं निरंतरं जाव वेमाणिया । नेरइए णं भंते ! आहारचरमेणं किं चरमे अचरमे ? गोयमा ! सिय चरमे, सिय अचरमे । एवं निरंतरं जाव वेमाणिण् । नेरइया णं भंते ! आहारचरमेणं किं चरमा अचरमा ? गोयमा ! चरमा वि अचरमा वि, एवं निरंतरं जाव वेमाणिया । नेरइए णं भंते ! भावचरमेणं किं चरमे अचरमे ? गोयमा ! सिय चरमे, सिय अचरमे । एवं निरंतरं जाव वेमाणिण् । नेरइया णं भंते ! भावचरमेणं किं चरमा अचरमा ? गोयमा ! चरमा वि अचरमा वि । एवं निरंतरं जाव वेमाणिया । नेरइए णं भंते ! वण्णचरमेणं किं चरमे अचरमे ? गोयमा ! सिय चरमे, सिय अचरमे । एवं निरंतरं जाव वेमाणिण् । नेरइया णं भंते ! वण्णचरमेणं किं चरमा अचरमा ? गोयमा ! चरमा वि अचरमा वि । एवं निरंतरं जाव वेमाणिया । नेरइए णं भंते ! गंधचरमेणं किं चरमे अचरमे ? गोयमा ! सिय चरमे, सिय अचरमे । एवं निरंतरं जाव वेमाणिण् । नेरइया णं भंते ! गंधचरमेणं किं चरमा अचरमा ? गोयमा ! चरमा वि अचरमा वि । एवं निरंतरं जाव वेमाणिया । नेरइए णं भंते ! रसचरमेणं किं चरमे अचरमे ? गोयमा ! सिय चरमे, सिय अचरमे । एवं निरंतरं जाव वेमाणिण् । नेरइया णं भंते ! रसचरमेणं किं चरमा अचरमा ? गोयमा ! चरमा वि अचरमा वि । एवं निरंतरं जाव वेमाणिया । नेरइए णं भंते ! फासचरमेणं किं चरमे अचरमे ? गोयमा ! सिय चरमे, सिय अचरमे । एवं निरंतरं जाव वेमाणिण् । नेरइया णं भंते ! फासचरमेणं किं चरमा अचरमा ? गोयमा ! चरमा वि अचरमा वि । एवं निरंतरं जाव वेमाणिया । संगहणीगाहा—“गइठिइभवे य भासा आणापाणुचरमे य बोद्धवा । आहारभावचरमे वण्णरसे गंधफासे य” ॥ ३७१ ॥ पच्चवणाए भगवईए दसमं चरमपयं समत्तं ॥

से णूणं भंते ! मण्णामीति ओहारिणी भासा, चित्तेमीति ओहारिणी भासा, अह मण्णामीति ओहारिणी भासा, अह चित्तेमीति ओहारिणी भासा, तह मण्णा-

मीति ओहारिणी भासा, तह चित्तेमीति ओहारिणी भासा ? हंता गोयमा ! मण्णामीति ओहारिणी भासा, चित्तेमीति ओहारिणी भासा, अह मण्णामीति ओहारिणी भासा, अह चित्तेमीति ओहारिणी भासा, तह मण्णामीति ओहारिणी भासा, तह चित्तेमीति ओहारिणी भासा ॥ ३७२ ॥ ओहारिणी णं भंते ! भासा किं सच्चा, मोसा, सच्चा मोसा, असच्चा मोसा ? गोयमा ! सिय सच्चा, सिय मोसा, सिय सच्चा मोसा, सिय असच्चा मोसा । से केणट्ठेणं भंते ! एवं वुच्चइ—‘ओहारिणी णं भासा सिय सच्चा, सिय मोसा, सिय सच्चा मोसा, सिय असच्चा मोसा’ ? गोयमा ! आराहिणी सच्चा, विराहिणी मोसा, आराहणविराहिणी सच्चा मोसा, जा णेव आराहणी णेव विराहिणी णेवाराहणविराहिणी सा असच्चा मोसा णामं चउत्थी भासा, से तेणट्ठेणं गोयमा ! एवं वुच्चइ—‘ओहारिणी णं भासा सिय सच्चा, सिय मोसा, सिय सच्चा मोसा, सिय असच्चा मोसा’ ॥ ३७३ ॥ अह भंते ! गाओ मिया पसू पक्खी पणवणी णं एसा भासा, ण एसा भासा मोसा ? हंता गोयमा ! जा य गाओ मिया पसू पक्खी पणवणी णं एसा भासा, ण एसा भासा मोसा ॥ ३७४ ॥ अह भंते ! जा य इत्थीवऊ, जा य पुमवऊ, जा य नपुंसगवऊ पणवणी णं एसा भासा, ण एसा भासा मोसा ? हंता गोयमा ! जा य इत्थीवऊ, जा य पुमवऊ, जा य नपुंसगवऊ पणवणी णं एसा भासा, ण एसा भासा मोसा ॥ ३७५ ॥ अह भंते ! जा य इत्थिआणवणी, जा य पुमआणवणी, जा य नपुंसगआणवणी पणवणी णं एसा भासा, ण एसा भासा मोसा ? हंता गोयमा ! जा य इत्थिआणवणी, जा य पुमआणवणी, जा य नपुंसगआणवणी पणवणी णं एसा भासा, ण एसा भासा मोसा ॥ ३७६ ॥ अह भंते ! जा य इत्थिपणवणी, जा य पुमपणवणी, जा य नपुंसगपणवणी पणवणी णं एसा भासा, ण एसा भासा मोसा ? हंता गोयमा ! जा य इत्थिपणवणी, जा य पुमपणवणी, जा य नपुंसगपणवणी पणवणी णं एसा भासा, ण एसा भासा मोसा ॥ ३७७ ॥ अह भंते ! जा जाईइ इत्थिवऊ, जाईइ पुमवऊ, जाईइ णपुंसगवऊ पणवणी णं एसा भासा, ण एसा भासा मोसा ? हंता ! गोयमा ! जाईइ इत्थिवऊ, जाईइ पुमवऊ, जाईइ णपुंसगवऊ पणवणी णं एसा भासा, ण एसा भासा मोसा ॥ ३७८ ॥ अह भंते ! जा जाईइ इत्थिआणवणी, जाईइ पुमआणवणी, जाईइ णपुंसगआणवणी पणवणी णं एसा भासा, ण एसा भासा मोसा ? हंता गोयमा ! जाईइ इत्थिआणवणी, जाईइ पुमआणवणी, जाईइ णपुंसगआणवणी पणवणी णं एसा भासा, ण एसा भासा मोसा ॥ ३७९ ॥ अह भंते ! जाईइ इत्थिपणवणी, जाईइ पुमपणवणी, जाईइ णपुंसगपणवणी



पण्णवणी णं एसा भासा, ण एसा भासा मोसा ? हंता गोयमा ! जाईइ इत्थि-  
 पण्णवणी, जाईइ पुसपण्णवणी, जाईइ णपुंसपण्णवणी पण्णवणी णं एसा भासा,  
 ण एसा भासा मोसा ॥ ३८० ॥ अह भंते ! मंदकुमारए वा मंदकुमारिया वा  
 जाणइ वुयमाणे-अहमेसे वुयामीति ? गोयमा ! णो इण्ठे समट्ठे, णण्णत्थ सण्णिणो ।  
 अह भंते ! मंदकुमारए वा मंदकुमारिया वा जाणइ आहारं आहारेमाणे-अहमेसे  
 आहारमाहारेमिति ? गोयमा ! णो इण्ठे समट्ठे, णण्णत्थ सण्णिणो । अह भंते !  
 मंदकुमारए वा मंदकुमारिया वा जाणइ-अयं मे अम्मापियरो ? गोयमा ! णो  
 इण्ठे समट्ठे, णण्णत्थ सण्णिणो । अह भंते ! मंदकुमारए वा मंदकुमारिया वा  
 जाणइ-अयं मे अइराउलो, अयं मे अइराउलेत्ति ? गोयमा ! णो इण्ठे समट्ठे,  
 णण्णत्थ सण्णिणो । अह भंते ! मंदकुमारए वा मंदकुमारिया वा जाणइ-अयं मे  
 भट्ठिदारए, अयं मे भट्ठिदारएत्ति ? गोयमा ! णो इण्ठे समट्ठे, णण्णत्थ सण्णिणो  
 ॥ ३८१ ॥ अह भंते ! उट्ठे गोणे खरे घोडए अए एलए जाणइ वुयमाणे-अहमेसे  
 वुयामि ? गोयमा ! णो इण्ठे समट्ठे, णण्णत्थ सण्णिणो । अह भंते ! उट्ठे जाव एलए  
 जाणइ आहारं आहारेमाणे-अहमेसे आहारेमि ? गोयमा ! णो इण्ठे समट्ठे,  
 णण्णत्थ सण्णिणो । अह भंते ! उट्ठे गोणे खरे घोडए अए एलए जाणइ-अयं मे  
 अम्मापियरो ? गोयमा ! णो इण्ठे समट्ठे, णण्णत्थ सण्णिणो । अह भंते !  
 उट्ठे जाव एलए जाणइ-अयं मे अइराउलेत्ति ? गोयमा ! णो इण्ठे समट्ठे,  
 णण्णत्थ सण्णिणो । अह भंते ! उट्ठे जाव एलए जाणइ-अयं मे भट्ठिदारए २ ?  
 गोयमा ! णो इण्ठे समट्ठे, णण्णत्थ सण्णिणो ॥ ३८२ ॥ अह भंते ! मणुस्से  
 महिसे आसे हत्थी सीहे वग्घे विगे दीविए अच्छे तरच्छे परस्सरे सियाले विराले  
 सुणए कोलसुणए कोकंतिए ससए चित्तए चिल्लए जेयावन्ने तहप्पगारा सव्वा सा  
 एगवऊ ? हंता गोयमा ! मणुस्से जाव चिल्लए जेयावन्ने तहप्पगारा सव्वा सा  
 एगवऊ । अह भंते ! मणुस्सा जाव चिल्लगा जेयावन्ने तहप्पगारा सव्वा सा  
 बहुवऊ ? हंता गोयमा ! मणुस्सा जाव चिल्लगा...सव्वा सा बहुवऊ ॥ ३८३ ॥  
 अह भंते ! मणुस्सी महिसी वलवा हत्थिणिया सीही वग्घी विगी दीविया अच्छी  
 तरच्छी परस्सरा रासभी सियाली विराली सुणिया कोलसुणिया कोकंतिया ससिया  
 चित्तिया चिल्लिया जेयावन्ने तहप्पगारा सव्वा सा इत्थिवऊ ? हंता गोयमा !  
 मणुस्सी जाव चिल्लिगा जेयावन्ने तहप्पगारा सव्वा सा इत्थिवऊ । अह भंते !  
 मणुस्से जाव चिल्लए जेयावन्ने तहप्पगारा सव्वा सा पुमवऊ ? हंता गोयमा !  
 मणुस्से महिसे जाव चिल्लए जेयावन्ने तहप्पगारा सव्वा सा पुमवऊ । अह भंते !

कंसं कंसोयं परिमंडलं सेलं जालं थालं तारं हवं अच्छिपव्वं कुंडं पडमं दुद्धं  
 दहिं णवणीयं असणं सयणं भवणं विमाणं छत्तं चामरं भिंगारं अंगणं गिरंगणं  
 आभरणं रयणं जेयावत्ते तहप्पगारा सव्वं तं णपुंसगवळ ? हंता गोयमा ! कंसं  
 जाव रयणं जेयावत्ते तहप्पगारा सव्वं तं णपुंसगवळ ॥ ३८४ ॥ अह भंते !  
 पुढवी इत्थिवळ आउत्ति पुमवळ धण्णेत्ति नपुंसगवळ पन्नवणी णं एसा भासा,  
 ण एसा भासा मोसा ? हंता गोयमा ! पुढवित्ति इत्थिवळ आउत्ति पुमवळ  
 धण्णेत्ति नपुंसगवळ पण्णवणी णं एसा भासा, ण एसा भासा मोसा । अह भंते !  
 पुढवित्ति इत्थिआणवणी, आउत्ति पुमआणवणी, धण्णेत्ति नपुंसगाणवणी पण्णवणी  
 णं एसा भासा, ण एसा भासा मोसा ? हंता गोयमा ! पुढवित्ति इत्थिआणवणी,  
 आउत्ति पुमआणवणी, धण्णेत्ति नपुंसगाणवणी पण्णवणी णं एसा भासा, ण एसा  
 भासा मोसा । अह भंते ! पुढवीत्ति इत्थिपण्णवणी, आउत्ति पुमपण्णवणी, धण्णेत्ति  
 णपुंसगपण्णवणी आराहणी णं एसा भासा, ण एसा भासा मोसा ? हंता गोयमा !  
 पुढवीत्ति इत्थिपण्णवणी, आउत्ति पुमपण्णवणी, धण्णेत्ति णपुंसगपण्णवणी आरा-  
 हणी णं एसा भासा, ण एसा भासा मोसा । इच्चैवं भंते ! इत्थिवयणं वा पुमवयणं  
 वा णपुंसगवयणं वा वयमाणे पण्णवणी णं एसा भासा, ण एसा भासा मोसा ? हंता  
 गोयमा ! इत्थिवयणं वा पुमवयणं वा णपुंसगवयणं वा वयमाणे पण्णवणी णं एसा  
 भासा, ण एसा भासा मोसा ॥ ३८५ ॥ भासा णं भंते ! किमाइया, किंपवहा,  
 किंसंठिया, किंपज्जवसिया ? गोयमा ! भासा णं जीवाइया, सरीरप्पभवा, वज्जसंठिया,  
 लोगतपज्जवसिया पण्णत्ता । भासा कओ य पभवइ ? कइहि व समएहि भासई  
 भासं ? । भासा कइप्पगारा ? कइ वा भासा अणुमया उ ? ॥ सरीरप्पभवा भासा,  
 दोहि य समएहिं भासई भासं । भासा चउप्पगारा, दोणि य भासा अणुमया उ  
 ॥ ३८६ ॥ कइविहा णं भंते ! भासा पन्नत्ता ? गोयमा ! दुविहा भासा पन्नत्ता ।  
 तंजहा—पज्जत्तिया य अपज्जत्तिया य । पज्जत्तिया णं भंते ! भासा कइविहा पन्नत्ता ?  
 गोयमा ! दुविहा पन्नत्ता । तंजहा—सच्चा मोसा य ॥ ३८७ ॥ सच्चा णं भंते !  
 भासा पज्जत्तिया कइविहा पन्नत्ता ? गोयमा ! दसविहा पन्नत्ता । तंजहा—जणवय-  
 सच्चा १, सम्मयसच्चा २, ठवणसच्चा ३, नामसच्चा ४, रूवसच्चा ५, पडुच्चसच्चा  
 ६, ववहारसच्चा ७, भावसच्चा ८, जोगसच्चा ९, ओवम्मसच्चा १० । “जणवय १  
 संमय २ ठवणा ३ नामे ४ रूवे ५ पडुच्चसच्चे ६ य । ववहार ७ भाव ८ जोगे ९  
 दसमे ओवम्मसच्चे य १०” ॥ ३८८ ॥ मोसा णं भंते ! भासा पज्जत्तिया कइविहा  
 पन्नत्ता ? गोयमा ! दसविहा पन्नत्ता । तंजहा—कोहणिससिया १, माणणिससिया २,

मायाणिससिया ३, लोहणिससिया ४, पेज्जणिससिया ५, दोसणिससिया ६, हासणि-  
 स्सिया ७, भयणिससिया ८, अक्खाइयाणिससिया ९, उववाइयणिससिया १० ।  
 “क्रोहे माणे माया लोभे पिज्जे तहेव दोसे य । हास भए अक्खाइयउववाइयणि-  
 स्सिया दसमा” ॥ ३८९ ॥ अपज्जत्तिया णं भंते ! कइविहा भासा पन्नत्ता ? गोयमा !  
 दुविहा पन्नत्ता । तंजहा-सच्चा मोसा असच्चा मोसा य । सच्चा मोसा णं भंते ! भासा  
 अपज्जत्तिया कइविहा पन्नत्ता ? गोयमा ! दसविहा पन्नत्ता । तंजहा-उप्पण्णमिससिया  
 १, विगयमिससिया २, उप्पण्णविगयमिससिया ३, जीवमिससिया ४, अजीवमिससिया  
 ५, जीवाजीवमिससिया ६, अणंतमिससिया ७, परित्तमिससिया ८, अद्धमिससिया ९,  
 अद्धमिससिया १० ॥ ३९० ॥ असच्चा मोसा णं भंते ! भासा अपज्जत्तिया कइविहा  
 पन्नत्ता ? गोयमा ! दुवालसविहा पन्नत्ता । तंजहा-आमंतणि १, आणमणी २,  
 जायणि ३, तह पुच्छणी य ४, पण्णवणी ५ । पच्चक्खाणी ६, भासा भासा इच्छा-  
 णुलोमा ७ य ॥ अणभिग्गहिया भासा ८, भासा य अभिग्गहंमि बोद्धवा ९ ।  
 संसयकरणी भासा १०, वोगड ११, अव्वोगडा चेव १२” ॥ ३९१ ॥ जीवा णं  
 भंते ! किं भासगा, अभासगा ? गोयमा ! जीवा भासगा वि, अभासगा वि । से  
 केणट्ठेणं भंते ! एवं वुच्चइ-“जीवा भासगा वि, अभासगा वि” ? गोयमा ! जीवा दुविहा  
 पन्नत्ता । तंजहा-संसारसमावण्णगा य असंसारसमावण्णगा य । तत्थ णं जे ते  
 असंसारसमावण्णगा ते णं सिद्धा, सिद्धा णं अभासगा । तत्थ णं जे ते संसारसमा-  
 वण्णगा ते दुविहा पन्नत्ता । तंजहा-सेलेसीपडिवण्णगा य असेलेसीपडिवण्णगा य ।  
 तत्थ णं जे ते सेलेसीपडिवण्णगा ते णं अभासगा । तत्थ णं जे ते असेलेसीपडि-  
 वण्णगा ते दुविहा पन्नत्ता । तंजहा-एगिंदिया य अणेगिंदिया य । तत्थ णं जे ते  
 एगिंदिया ते णं अभासगा । तत्थ णं जे ते अणेगिंदिया ते दुविहा पन्नत्ता । तंजहा-  
 पज्जत्तगा य अपज्जत्तगा य । तत्थ णं जे ते अपज्जत्तगा ते णं अभासगा, तत्थ णं  
 जे ते पज्जत्तगा ते णं भासगा, से एणट्ठेणं गोयमा ! एवं वुच्चइ-“जीवा भासगा वि,  
 अभासगा वि” ॥ ३९२ ॥ नेरइया णं भंते ! किं भासगा, अभासगा ? गोयमा ! नेरइया  
 भासगा वि, अभासगा वि । से केणट्ठेणं भंते ! एवं वुच्चइ-“नेरइया भासगा वि, अभा-  
 सगा वि” ? गोयमा ! नेरइया दुविहा पन्नत्ता । तंजहा-पज्जत्तगा य अपज्जत्तगा य ।  
 तत्थ णं जे ते अपज्जत्तगा ते णं अभासगा, तत्थ णं जे ते पज्जत्तगा ते णं भासगा,  
 से एणट्ठेणं गोयमा ! एवं वुच्चइ-“नेरइया भासगा वि, अभासगा वि” । एवं एगि-  
 दियवज्जाणं निरंतरं भाणियव्वं ॥ ३९३ ॥ कइ णं भंते ! भासज्जाया पन्नत्ता ?  
 गोयमा ! चत्तारि भासज्जाया पन्नत्ता । तंजहा-सच्चमेगं भासज्जायं, बिइयं मोसं, तइयं

सच्चा मोसं, चउत्थं असच्चा मोसं । जीवा णं भंते ! किं सच्चं भासं भासंति, मोसं भासं भासंति, सच्चा मोसं भासं भासंति, असच्चा मोसं भासं भासंति ? गोयमा ! जीवा सच्चं पि भासं भासंति, मोसं पि भासं भासंति, सच्चा मोसं पि भासं भासंति, असच्चा मोसं पि भासं भासंति । नेरइया णं भंते ! किं सच्चं भासं भासंति जाव असच्चा मोसं भासं भासंति ? गोयमा ! नेरइया णं सच्चं पि भासं भासंति जाव असच्चा मोसं पि भासं भासंति । एवं असुरकुमारा जाव थणियकुमारा । वेइंदियतेइंदियचउरिंदिया य नो सच्चं०, नो मोसं०, नो सच्चा मोसं भासं भासंति, असच्चा मोसं भासं भासंति । पंचि-दियतिरिक्खजोणिया णं भंते ! किं सच्चं भासं भासंति जाव असच्चा मोसं भासं भासंति ? गोयमा ! पंचिंदियतिरिक्खजोणिया णो सच्चं भासं भासंति, णो मोसं भासं भासंति, णो सच्चा मोसं भासं भासंति, एगं असच्चा मोसं भासं भासंति, णणत्थ सिक्खत्तापुव्वगं उत्तरगुणलद्धि वा पडुच्च सच्चं पि भासं भासंति, मोसं पि०, सच्चा मोसं पि०, असच्चा-मोसं पि भासं भासंति । मणुस्सा जाव वेमाणिया एए जहा जीवा तहा भाणियव्वा ॥ ३९४ ॥ जीवे णं भंते ! जाइं दब्बाईं भासत्ताए गिण्हइ ताईं किं ठियाइं गिण्हइ, अठियाइं गिण्हइ ? गोयमा ! ठियाइं गिण्हइ, नो अठियाइं गिण्हइ । जाइं भंते ! ठियाइं गिण्हइ ताईं किं दव्वओ गिण्हइ, खेत्तओ गिण्हइ, कालओ गिण्हइ, भावओ गिण्हइ ? गोयमा ! दव्वओ वि गिण्हइ, खेत्तओ वि०, कालओ वि०, भावओ वि गिण्हइ । जाइं भंते ! दव्वओ गिण्हइ ताईं किं एगपएसियाइं गिण्हइ, दुपएसियाइं जाव अणंतपएसियाइं गिण्हइ ? गोयमा ! नो एगपएसियाइं गिण्हइ जाव नो असंखेज्जपएसियाइं गिण्हइ, अणंतपएसियाइं गिण्हइ । जाइं खेत्तओ गेण्हइ ताईं किं एगपएसोगाढाईं गेण्हइ, दुपएसोगाढाईं गेण्हइ जाव असंखेज्जपएसोगाढाईं गेण्हइ ? गोयमा ! नो एगपएसोगा-ढाईं गेण्हइ जाव नो संखेज्जपएसोगाढाईं गेण्हइ, असंखेज्जपएसोगाढाईं गेण्हइ । जाइं कालओ गेण्हइ ताईं किं एगसमयठिइयाइं गेण्हइ, दुसमयठिइयाइं गेण्हइ जाव असंखेज्जसमयठिइयाइं गेण्हइ ? गोयमा ! एगसमयठिइयाइं पि गेण्हइ, दुसमयठिइ-याइं पि गेण्हइ जाव असंखेज्जसमयठिइयाइं पि गेण्हइ । जाइं भावओ गेण्हइ ताईं किं वण्णमंताईं गेण्हइ, गंधमंताईं०, रसमंताईं०, फासमंताईं गेण्हइ ? गोयमा ! वण्ण-मंताईं पि गे० जाव फासमंताईं पि गेण्हइ । जाइं भावओ वण्णमंताईं गेण्हइ ताईं किं एगवण्णाइं गेण्हइ जाव पंचवण्णाइं गेण्हइ ? गोयमा ! गहणदब्बाईं पडुच्च एगवण्णाइं पि गेण्हइ जाव पंचवण्णाइं पि गेण्हइ, सव्वग्गहणं पडुच्च णियमा पंचवण्णाइं गेण्हइ, तंजहा—कालाईं नीलाईं लोहियाईं हालिदाईं सुक्किलाईं । जाइं वण्णओ कालाईं गेण्हइ ताईं किं एगगुणकालाईं गेण्हइ जाव अणंतगुणकालाईं गेण्हइ ? गोयमा !

एगगुणकालाईं पि गेण्हइ जाव अणंतगुणकालाईं पि गेण्हइ । एवं जाव सुक्किलाईं पि । जाईं भावओ गंधमंताईं गिण्हइ ताईं किं एगगंधाईं गिण्हइ, दुगंधाईं गिण्हइ ? गोयमा ! गहणदव्वाईं पडुच्च एगगंधाईं पि० दुगंधाईं पि गिण्हइ, सव्वग्गहणं पडुच्च नियमा दुगंधाईं गिण्हइ । जाईं गंधओ सुब्भिगंधाईं गिण्हइ ताईं किं एगगुणसुब्भिगंधाईं गिण्हइ जाव अणंतगुणसुब्भिगंधाईं गिण्हइ ? गोयमा ! एगगुणसुब्भिगंधाईं पि गि० जाव अणंतगुणसुब्भिगंधाईं पि गिण्हइ । एवं दुब्भिगंधाईं पि गेण्हइ । जाईं भावओ रसमंताईं गेण्हइ ताईं किं एगरसाईं गेण्हइ जाव पंचरसाईं गेण्हइ ? गोयमा ! गहणदव्वाईं पडुच्च एगरसाईं पि गेण्हइ जाव पंचरसाईं पि गिण्हइ, सव्वग्गहणं पडुच्च नियमा पंचरसाईं गेण्हइ । जाईं रसओ तित्तरसाईं गेण्हइ ताईं किं एगगुणतित्तरसाईं गिण्हइ जाव अणंतगुणतित्तरसाईं गिण्हइ ? गोयमा ! एगगुणतित्ताईं पि गिण्हइ जाव अणंतगुणतित्ताईं पि गिण्हइ, एवं जाव महुररसो । जाईं भावओ फासमंताईं गेण्हइ ताईं किं एगफासाईं गेण्हइ जाव अट्ठफासाईं गेण्हइ ? गोयमा ! गहणदव्वाईं पडुच्च णो एगफासाईं गेण्हइ, दुफासाईं गेण्हइ जाव चउफासाईं गेण्हइ, णो पंचफासाईं गेण्हइ जाव णो अट्ठफासाईं गेण्हइ, सव्वग्गहणं पडुच्च नियमा चउफासाईं गेण्हइ, तंजहा-सीयफासाईं गेण्हइ, उस्सिणफासाईं०, निद्धफासाईं०, लुक्खफासाईं गेण्हइ । जाईं फासओ सीयाईं गेण्हइ ताईं किं एगगुणसीयाईं गेण्हइ जाव अणंतगुणसीयाईं गेण्हइ ? गोयमा ! एगगुणसीयाईं पि गेण्हइ जाव अणंतगुणसीयाईं पि गेण्हइ, एवं उस्सिणणिद्धलुक्खाईं जाव अणंतगुणाईं पि गेण्हइ ॥ ३९५ ॥ जाईं भंते ! जाव अणंतगुणलुक्खाईं गेण्हइ ताईं किं पुट्ठाईं गेण्हइ, अपुट्ठाईं गेण्हइ ? गोयमा ! पुट्ठाईं गेण्हइ, नो अपुट्ठाईं गेण्हइ । जाईं भंते ! पुट्ठाईं गेण्हइ ताईं किं ओगाढाईं गेण्हइ, अणोगाढाईं गेण्हइ ? गोयमा ! ओगाढाईं गेण्हइ, नो अणोगाढाईं गेण्हइ । जाईं भंते ! ओगाढाईं गेण्हइ ताईं किं अणंतरोगाढाईं गेण्हइ, परंपरोगाढाईं गेण्हइ ? गोयमा ! अणंतरोगाढाईं गेण्हइ, नो परंपरोगाढाईं गेण्हइ । जाईं भंते ! अणंतरोगाढाईं गेण्हइ ताईं किं अणूईं गेण्हइ, बायराईं गेण्हइ ? गोयमा ! अणूईं पि गेण्हइ बायराईं पि गेण्हइ । जाईं भंते ! अणूईं गेण्हइ ताईं किं उड्ढं गेण्हइ, अहे गेण्हइ, तिरियं गेण्हइ ? गोयमा ! उड्ढं पि गेण्हइ, अहे वि गेण्हइ, तिरियं पि गेण्हइ । जाईं भंते ! उड्ढं पि गेण्हइ अहे वि गेण्हइ तिरियं पि गेण्हइ ताईं किं आईं गेण्हइ, मज्झे गेण्हइ, पज्जवसाणे गेण्हइ ? गोयमा ! आईं पि गेण्हइ, मज्झे वि गेण्हइ, पज्जवसाणे वि गेण्हइ । जाईं भंते ! आईं पि गेण्हइ, मज्झे वि गेण्हइ, पज्जवसाणे वि गेण्हइ ताईं किं सविसए गेण्हइ, अविसए गेण्हइ ? गोयमा !

सविसए गेण्हइ, नो अविसए गेण्हइ । जाई भंते ! सविसए गेण्हइ ताई किं आणुपुर्वि गेण्हइ, अणाणुपुर्वि गेण्हइ ? गोयमा ! आणुपुर्वि गेण्हइ, नो अणाणुपुर्वि गेण्हइ । जाई भंते ! आणुपुर्वि गेण्हइ ताई किं तिदिसिं गेण्हइ जाव छदिसिं गेण्हइ ? गोयमा ! नियमा छदिसिं गेण्हइ । “पुट्टोगाढअणंतर अणू य तह वायरे य उट्टमहे । आइवि-सयाणुपुर्वि गियमा तह छदिसिं चेव” ॥ ३९६ ॥ जीवे णं भंते ! जाई दव्वाइ भास-त्ताए गेण्हइ ताई किं संतरं गेण्हइ, निरंतरं गेण्हइ ? गोयमा ! संतरं पि गेण्हइ, निरंतरं पि गेण्हइ । संतरं गेण्हमाणे जहण्णेणं एगं समयं, उक्कोसेणं असंखेज्जसमए अंतरं कट्ठु गेण्हइ, निरंतरं गेण्हमाणे जहण्णेणं दो समए, उक्कोसेणं असंखेज्जसमए अणुसमयं अविरहियं निरंतरं गेण्हइ । जीवे णं भंते ! जाई दव्वाइ भासत्ताए गहियाई निसिरइ ताई किं संतरं निसिरइ, निरंतरं निसिरइ ? गोयमा ! संतरं निसिरइ, नो निरंतरं निसिरइ । संतरं निसिरमाणे एगेणं समएणं गेण्हइ, एगेणं समएणं निसिरइ, एएणं गहणनिसिरणोवाएणं जहन्नेणं दुसमयं, उक्कोसेणं असंखेज्जसमयं अंतोमुहुत्तिगं गहणनिसिरणोवायं करेइ ॥ ३९७ ॥ जीवे णं भंते ! जाई दव्वाइ भासत्ताए गहियाई णिसिरइ ताई किं मिण्णाइं णिसिरइ, अभिण्णाइं णिसिरइ ? गोयमा ! भिन्नाइं पि णिसिरइ, अभिन्नाइं पि णिसिरइ । जाई भिन्नाइं णिसिरइ ताई अणंतगुणपरिवुट्ठीए णं परिवुट्ठुमाणाइं लोयंतं फुसन्ति, जाई अभिण्णाइं णिसिरइ ताई असंखेजाओ ओगाहणवग्गणाओ गंता भेयमावज्जंति, संखेजाइं जोयणाइं गंता विद्धंसमागच्छंति ॥ ३९८ ॥ तेसि णं भंते ! दव्वाणं कइविहे भेए पण्णत्ते ? गोयमा ! पञ्चविहे भेए पण्णत्ते । तंजहा-खंडाभेए, पयराभेए, चुण्णियाभेए, अणु-तडियाभेए, उक्करियाभेए । से किं तं खंडाभेए ? २ जण्णं अयखंडाण वा तउयखंडाण वा तंबखंडाण वा सीसगखंडाण वा रययखंडाण वा जायरूवखंडाण वा खंडएणं भेए भवइ, से तं खंडाभेए १ । से किं तं पयराभेए ? २ जण्णं वंसाण वा वेत्ताण वा नलाण वा कयलीयंभाण वा अब्भपडलाण वा पयरेणं भेए भवइ, से तं पयराभेए २ । से किं तं चुण्णियाभेए ? २ जण्णं तिलचुण्णाण वा मुग्गचुण्णाण वा मासचुण्णाण वा पिप्पलीचुण्णाण वा मिरीयचुण्णाण वा सिंगबेरचुण्णाण वा चुण्णियाए भेए भवइ, से तं चुण्णियाभेए ३ । से किं तं अणुतडियाभेए ? २ जण्णं अगडाण वा तडागाण वा दहाण वा नईण वा वावीण वा पुक्खरिणीण वा दीहियाण वा गुंजालियाण वा सराण वा सरसराण वा सरपंतियाण वा सरसरपंतियाण वा अणुतडियाभेए भवइ, से तं अणुतडियाभेए ४ । से किं तं उक्करियाभेए ? २ जण्णं मूसाण वा मंहुसाण वा तिलसिंगाण वा मुग्गसिंगाण वा माससिंगाण वा एरंडबीयाण वा फुट्टिया

उक्करियाए भेए भवइ, से तं उक्करियाभेए ५ ॥ ३९९ ॥ एएसि णं भंते !  
 दव्वाणं खंडाभेएणं पयराभेएणं चुण्णियाभेएणं अणुतडियाभेएणं उक्करियाभेएण  
 य भिज्जमाणाणं कयरे कयरेहितो अप्पा वा बहुया वा तुल्ला वा विसेसाहिया  
 वा ? गोयमा ! सव्वत्थोवाइं दव्वाइं उक्करियाभेएणं भिज्जमाणाइं, अणुतडि-  
 याभेएणं भिज्जमाणाइं अणंतगुणाइं, चुण्णियाभेएणं भिज्जमाणाइं अणंतगुणाइं,  
 पयराभेएणं भिज्जमाणाइं अणंतगुणाइं, खंडाभेएणं भिज्जमाणाइं अणंतगुणाइं  
 ॥ ४०० ॥ नेरइए णं भंते ! जाइं दव्वाइं भासत्ताए गेण्हइ ताइं किं ठियाइं गेण्हइ,  
 अठियाइं गेण्हइ ? गोयमा ! एवं चेव, जहा जीवे वत्तव्वया भणिया तहा नेरइयस्स वि  
 जाव अप्पावहुयं । एवं एगिंदियवज्जो दंडओ जाव वेमाणिया । जीवा णं भंते ! जाइं  
 दव्वाइं भासत्ताए गेण्हंति ताइं किं ठियाइं गेण्हंति, अठियाइं गेण्हंति ? गोयमा !  
 एवं चेव, पुहुत्तेण वि णेयव्वं जाव वेमाणिया । जीवे णं भंते ! जाइं दव्वाइं  
 सच्चभासत्ताए गेण्हइ ताइं किं ठियाइं गेण्हइ, अठियाइं गेण्हइ ? गोयमा ! जहा  
 ओहियदंडओ तहा एसोऽवि, णवरं विगल्लिंदिया ण पुच्छिज्जंति । एवं मोसाभासाए  
 वि, सच्चाभोसाभासाए वि, असच्चाभोसाभासाए वि एवं चेव, नवरं असच्चाभोसाभा-  
 साए विगल्लिंदिया पुच्छिज्जंति इमेणं अभिलावेणं-विगल्लिंदिए णं भंते ! जाइं दव्वाइं  
 असच्चाभोसाभासत्ताए गेण्हइ ताइं किं ठियाइं गेण्हइ, अठियाइं गेण्हइ ? गोयमा !  
 जहा ओहियदंडओ, एवं एए एगत्तपुहुत्तेणं दस दंडगा भाणियव्वा ॥ ४०१ ॥  
 जीवे णं भंते ! जाइं दव्वाइं सच्चभासत्ताए गिण्हइ ताइं किं सच्चभासत्ताए निसिरइ,  
 मोसभासत्ताए निसिरइ, सच्चाभोसभासत्ताए निसिरइ, असच्चाभोसभासत्ताए निसिरइ ?  
 गोयमा ! सच्चभासत्ताए निसिरइ, नो मोसभासत्ताए निसिरइ, नो सच्चाभोसभासत्ताए  
 निसिरइ, नो असच्चाभोसभासत्ताए निसिरइ । एवं एगिंदियविगल्लिंदियवज्जो दंडओ  
 जाव वेमाणिया । एवं पुहुत्तेण वि । जीवे णं भंते ! जाइं दव्वाइं मोसभासत्ताए गिण्हइ  
 ताइं किं सच्चभासत्ताए निसिरइ, मोसभासत्ताए०, सच्चाभोसभासत्ताए०, असच्चाभो-  
 सभासत्ताए निसिरइ ? गोयमा ! णो सच्चभासत्ताए निसिरइ, मोसभासत्ताए निसिरइ,  
 णो सच्चाभोसभासत्ताए०, णो असच्चाभोसभासत्ताए निसिरइ । एवं सच्चाभोसभासत्ताए  
 वि, असच्चाभोसभासत्ताए वि एवं चेव, नवरं असच्चाभोसभासत्ताए विगल्लिंदिया  
 तहेव पुच्छिज्जंति, जाए चेव गिण्हइ ताए चेव निसिरइ । एवं एए एगत्तपुहुत्तिया  
 अट्ठ दंडगा भाणियव्वा ॥ ४०२ ॥ कइविहे णं भंते ! वयणे पन्नत्ते ? गोयमा !  
 सोलसविहे वयणे पन्नत्ते । तंजहा—एगवयणे, दुवयणे, बहुवयणे, इत्थिवयणे,  
 पुमवयणे, णपुंसगवयणे, अज्झत्थवयणे, उवणीयवयणे, अवणीयवयणे, उवणीया-

वणीयवयणे, अवणीओवणीयवयणे, तीतवयणे, पडुप्पन्नवयणे, अणागयवयणे, पच्चक्खवयणे, परोक्खवयणे । इच्चेइयं भंते ! एगवयणं वा जाव परोक्खवयणं वा वयमाणे पण्णवणीं णं एसा भासा, ण एसा भासा मोसा ? हंता गोयमा ! इच्चेइयं एगवयणं वा जाव परोक्खवयणं वा वयमाणे पण्णवणीं णं एसा भासा, ण एसा भासा मोसा ॥ ४०३ ॥ एसि णं भंते ! जीवाणं सच्चभासगाणं मोसभासगाणं सच्चा मोसभासगाणं असच्चा मोसभासगाणं अभासगाणं य कयरे कयरेहिंते अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा जीवा सच्चभासगा, सच्चा-मोसभासगा असंखेज्जगुणा, मोसभासगा असंखेज्जगुणा, असच्चा मोसभासगा असंखेज्जगुणा, अभासगा अणंतगुणा ॥ ४०४ ॥ पन्नवणाए भगवईए एक्कारसमं भासापयं समत्तं ॥

कइ णं भंते ! सरीरा पन्नत्ता ? गोयमा ! पंच सरीरा पन्नत्ता । तंजहा—ओरा-लिए, वेडव्विए, आहारए, तेयए, कम्मए । नेरइयाणं भंते ! कइ सरीरया पन्नत्ता ? गोयमा ! तओ सरीरया पन्नत्ता । तंजहा—वेडव्विए, तेयए, कम्मए । एवं असुर-कुमाराणं वि जाव थणियकुमाराणं । पुढविकाइयाणं भंते ! कइ सरीरया पन्नत्ता ? गोयमा ! तओ सरीरया पन्नत्ता । तंजहा—ओरालिए, तेयए, कम्मए । एवं वाउ-काइयवज्जं जाव चउरिंदियाणं । वाउकाइयाणं भंते ! कइ सरीरया पन्नत्ता ? गोयमा ! चत्तारि सरीरया पन्नत्ता । तंजहा—ओरालिए, वेडव्विए, तेयए, कम्मए । एवं पंचिंदियतिरिक्खजोणियाणं वि । मणुस्साणं भंते ! कइ सरीरया पन्नत्ता ? गोयमा ! पंच सरीरया पन्नत्ता । तंजहा—ओरालिए, वेडव्विए, आहारए, तेयए, कम्मए । वाणमंतरजोइसियवेमाणियाणं जहा नारगाणं ॥ ४०५-६ ॥ केवइया णं भंते ! ओरालियसरीरया पन्नत्ता ? गोयमा ! दुविहा पन्नत्ता । तंजहा—वड्ढेल्ला य मुक्केल्ला य । तत्थ णं जे ते वड्ढेल्ला ते णं असंखेज्जा, असंखेज्जाहिं उस्सप्पिणिओसप्पिणीहिं अवहीरंति कालओ, खेतओ असंखेज्जा लोगा । तत्थ णं जे ते मुक्केल्ला ते णं अणंता, अणंताहिं उस्सप्पिणिओसप्पिणीहिं अवहीरंति कालओ, खेतओ अणंता लोगा, अभवसिद्धिएहिंते अणंतगुणा सिद्धाणंतभागो । केवइया णं भंते ! वेडव्वियसरीरया पन्नत्ता ? गोयमा ! दुविहा पन्नत्ता । तंजहा—वड्ढेल्ला य मुक्केल्ला य । तत्थ णं जे ते वड्ढेल्ला ते णं असंखेज्जा, असंखेज्जाहिं उस्सप्पिणि-ओसप्पिणीहिं अवहीरंति कालओ, खेतओ असंखेज्जाओ सेढीओ पयरस्स असंखेज्ज-भागो । तत्थ णं जे ते मुक्केल्ला ते णं अणंता, अणंताहिं उस्सप्पिणिओसप्पिणीहिं अवहीरंति कालओ, जहा ओरालियस्स मुक्केल्ला तहेव वेडव्वियस्स वि भाणियव्वा



केवइया णं भंते ! आहारगसरीरया पन्नत्ता ? गोयमा ! दुविहा पन्नत्ता । तंजहा-  
 बद्धेळ्ळया य मुक्केळ्ळया य । तत्थ णं जे ते बद्धेळ्ळया ते णं सिय अत्थि, सिय नत्थि ।  
 जइ अत्थि जहण्णेणं एक्को वा दो वा तिणिण वा, उक्कोसेणं सहस्सपुटुत्तं । तत्थ णं  
 जे ते मुक्केळ्ळया ते णं अणंता, जहा ओरालियस्स मुक्केळ्ळया तहेव भाणियव्वा ।  
 केवइया णं भंते ! तेयगसरीरया पण्णत्ता ? गोयमा ! दुविहा पण्णत्ता । तंजहा-बद्धे-  
 ळ्ळगा य मुक्केळ्ळगा य । तत्थ णं जे ते बद्धेळ्ळगा ते णं अणंता, अणंताहिं उस्सप्पिणि-  
 ओसप्पिणीहिं अवहीरंति कालओ, खेत्तओ अणंता लोगा, दव्वओ सिद्धेहिंतो अणंत-  
 गुणा सव्वजीवाणंतभागूणा । तत्थ णं जे ते मुक्केळ्ळगा ते णं अणंता, अणंताहिं  
 उस्सप्पिणिओसप्पिणीहिं अवहीरंति कालओ, खेत्तओ अणंता लोगा, दव्वओ सव्व-  
 जीवेहिंतो अणंतगुणा जीववग्गस्साणंतभागो । एवं कम्मगसरीराणि वि भाणियव्वाणि  
 ॥ ४०७ ॥ नेरइयाणं भंते ! केवइया ओरालियसरीरा पन्नत्ता ? गोयमा ! दुविहा  
 पन्नत्ता । तंजहा-बद्धेळ्ळगा य मुक्केळ्ळगा य । तत्थ णं जे ते बद्धेळ्ळगा ते णं णत्थि ।  
 तत्थ णं जे ते मुक्केळ्ळगा ते णं अणंता जहा ओरालियमुक्केळ्ळगा तहा भाणियव्वा ।  
 नेरइयाणं भंते ! केवइया वेउव्वियसरीरा पन्नत्ता ? गोयमा ! दुविहा पन्नत्ता । तंजहा-  
 बद्धेळ्ळगा य मुक्केळ्ळगा य । तत्थ णं जे ते बद्धेळ्ळगा ते णं असंखेज्जा, असंखेज्जाहिं  
 उस्सप्पिणिओसप्पिणीहिं अवहीरंति कालओ, खेत्तओ असंखेज्जाओ सेढीओ पयरस्स  
 असंखेज्जइभागो, तासि णं सेढीणं विक्खंभसूई अंगुलपढमवग्गमूलं बिइयवग्गमूल-  
 पुटुप्पणं, अहव णं अंगुलबिइयवग्गमूलघणप्पमाणमेत्ताओ सेढीओ । तत्थ णं जे ते  
 मुक्केळ्ळगा ते णं जहा ओरालियस्स मुक्केळ्ळगा तहा भाणियव्वा । नेरइयाणं भंते !  
 केवइया आहारगसरीरा पन्नत्ता ? गोयमा ! दुविहा पन्नत्ता । तंजहा-बद्धेळ्ळगा य  
 मुक्केळ्ळगा य, एवं जहा ओरालिए बद्धेळ्ळगा मुक्केळ्ळगा य भणिया तहेव आहारगा  
 वि भाणियव्वा । तेयाकम्मगाई जहा एएसिं चेव वेउव्वियाई ॥ ४०८ ॥  
 असुरकुमारारणं भंते ! केवइया ओरालियसरीरा पन्नत्ता ? गोयमा ! जहा नेरइयाणं  
 ओरालियसरीरा भणिया तहेव एएसिं भाणियव्वा । असुरकुमारारणं भंते ! केवइया  
 वेउव्वियसरीरा पन्नत्ता ? गोयमा ! दुविहा पन्नत्ता । तंजहा-बद्धेळ्ळगा य मुक्केळ्ळगा  
 य । तत्थ णं जे ते बद्धेळ्ळगा ते णं असंखेज्जा, असंखेज्जाहिं उस्सप्पिणीओसप्पिणीहिं  
 अवहीरंति कालओ, खेत्तओ असंखेज्जाओ सेढीओ पयरस्स असंखेज्जइभागो, तासि  
 णं सेढीणं विक्खंभसूई अंगुलपढमवग्गमूलस्स संखेज्जइभागो । तत्थ णं जे ते  
 मुक्केळ्ळगा ते णं जहा ओरालियस्स मुक्केळ्ळगा तहा भाणियव्वा । आहारगसरीरगा  
 जहा एएसिं चेव ओरालिया तहेव दुविहा भाणियव्वा, तेयाकम्मगसरीरा दुविहा वि

जहा एएसिं चेव वेडव्विया, एवं जाव थणियकुमारा ॥ ४०९ ॥ पुढविकाइयाणं भंते ! केवइया ओरालियसरीरगा पन्नत्ता ? गोयमा ! दुविहा पन्नत्ता । तंजहा-बद्धेळगा य मुक्केळगा य । तत्थ णं जे ते बद्धेळगा ते णं असंखेज्जा, असंखेज्जाहिं उस्सप्पिणि-ओसप्पिणीहिं अवहीरंति कालओ, खेत्तओ असंखेज्जा लोगा । तत्थ णं जे ते मुक्केळगा ते णं अणंता, अणंताहिं उस्सप्पिणिओसप्पिणीहिं अवहीरंति कालओ, खेत्तओ अणंता लोगा, अभवसिद्धिएहिंतो अणंतगुणा सिद्धाणं अणंतभागो । पुढवि-काइयाणं भंते ! केवइया वेडव्वियसरीरगा पन्नत्ता ? गोयमा ! दुविहा पन्नत्ता । तंजहा-बद्धेळगा य मुक्केळगा य । तत्थ णं जे ते बद्धेळगा ते णं णत्थि । तत्थ णं जे ते मुक्केळगा ते णं जहा एएसिं चेव ओरालिया तहेव भाणियव्वा । एवं आहार-गसरीरा वि । तेयाकम्मगा जहा एएसिं चेव ओरालिया । एवं आउकाइयतेउकाइया वि ॥ ४१० ॥ वाउकाइयाणं भंते ! केवइया ओरालियसरीरा पन्नत्ता ? गोयमा ! दुविहा पन्नत्ता । तंजहा-बद्धेळगा य मुक्केळगा य । दुविहा वि जहा पुढविकाइयाणं ओरालिया । वेडव्वियाणं पुच्छा । गोयमा ! दुविहा पन्नत्ता । तंजहा-बद्धेळगा य मुक्केळगा य । तत्थ णं जे ते बद्धेळगा ते णं असंखेज्जा, समए समए अवहीरमाणा २ पल्लिओवमस्स असंखेज्जइभागमेत्तेणं कालेणं अवहीरंति, नो चेव णं अवहिया सिया । मुक्केळगा जहा पुढविकाइयाणं । आहारयतेयाकम्मा जहा पुढविकाइयाणं, वणप्फइ-काइयाणं जहा पुढविकाइयाणं, णवरं तेयाकम्मगा जहा ओहिया तेयाकम्मगा ॥ ४११ ॥ वेइंदियाणं भंते ! केवइया ओरालिया सरीरगा पन्नत्ता ? गोयमा ! दुविहा पन्नत्ता । तंजहा-बद्धेळगा य मुक्केळगा य, तत्थ णं जे ते बद्धेळगा ते णं असंखेज्जा, असंखे-ज्जाहिं उस्सप्पिणिओसप्पिणीहिं अवहीरंति कालओ, खेत्तओ असंखेज्जाओ सेढीओ पयरस्स असंखेज्जइभागो, तासि णं सेढीणं विक्खंभसई असंखेज्जाओ जोयणकोडा-कोडीओ असंखेज्जाइं सेढिवग्गमूलाइं । वेइंदियाणं ओरालियसरीरेहिं बद्धेळगेहिं पयरो अवहीरइ, असंखेज्जाहिं उस्सप्पिणीओसप्पिणीहिं कालओ, खेत्तओ अंगुलपयरस्स आवलियाए य असंखेज्जइभागपल्लिभागेणं । तत्थ णं जे ते मुक्केळगा ते जहा ओहिया ओरालियमुक्केळगा । वेडव्विया आहारगा य बद्धेळगा णत्थि । मुक्केळगा जहा ओहिया ओरालियमुक्केळगा । तेयाकम्मगा जहा एएसिं चेव ओहिया ओरालिया, एवं जाव चउरिंदिया । पंचिंदियतिरिक्खजोणियाणं एवं चेव, नवरं वेडव्वियसरीरएसु इमो विसो-पंचिंदियतिरिक्खजोणियाणं भंते ! केवइया वेडव्विय-सरीरया पन्नत्ता ? गोयमा ! दुविहा पन्नत्ता । तं०-बद्धेळगा य मुक्केळगा य । तत्थ णं जे ते बद्धेळगा ते णं असंखेज्जा, जहा असुरकुमाराणं, णवरं तासि णं सेढीणं

विकखंभसूई अंगुलपढमवग्गमूलस्स असंखेज्जभागो । मुक्केल्ला तहेव ॥ ४१२ ॥  
मणुस्ताणं भंते ! केवइया ओरालियसरीरगा पन्नत्ता ? गोयमा ! दुविहा पन्नत्ता ।  
तंजहा-बद्धेल्ला य मुक्केल्ला य, तत्थ णं जे ते बद्धेल्ला ते णं सिय संखेज्जा, सिय  
असंखेज्जा, जहण्णपए संखेज्जा, संखेज्जाओ कोडाकोडीओ, तिजमलपयस्स उवरिं  
चउजमलपयस्स हिट्ठा, अहव णं पंचमवग्गपडुप्पन्नो छट्ठो वग्गो, अहव णं छण-  
उईल्लेयणगदाइरासी, उक्कोसपए असंखेज्जा, असंखेज्जाहिं उस्सप्पिणिओसप्पिणीहिं  
अवहीरंति कालओ, खेतओ ख्वपक्खित्तेहिं मणुस्सेहिं सेढी अवहीरइ, तीसे सेढीए  
आगासखेत्तेहिं अवहारो मग्गिज्जइ-असंखेज्जा, असंखेज्जाहिं उस्सप्पिणिओसप्पिणीहिं  
कालओ, खेतओ अंगुलपढमवग्गमूलं तइयवग्गमूलपडुप्पणं । तत्थ णं जे ते मुक्केल्ला  
ते जहा ओरालिया ओहिया मुक्केल्ला । वेउव्वियाणं भंते ! पुच्छा । गोयमा !  
दुविहा पन्नत्ता । तंजहा-बद्धेल्ला य मुक्केल्ला य, तत्थ णं जे ते बद्धेल्ला ते णं  
संखेज्जा, समए २ अवहीरमाणा २ संखेज्जेणं कालेणं अवहीरंति, नो चेव णं अव-  
हीरिया सिया । तत्थ णं जे ते मुक्केल्ला ते णं जहा ओरालिया ओहिया । आहार-  
गसरीरा जहा ओहिया । तेयाकम्मगा जहा एएसिं चेव ओरालिया वाणमंतराणं  
जहा नेरइयाणं ओरालिया आहारगा य । वेउव्वियसरीरगा जहा नेरइयाणं, नवरं  
तासि णं सेढीणं विकखंभसूई, संखेज्जजोयणसयवग्गपलिभागो पयरस्स । मुक्केल्लया  
जहा ओरालिया, आहारगसरीरा जहा असुरकुमारारणं, तेयाकम्मया जहा एएसिं णं  
चेव वेउव्विया । जोइसियाणं एवं चेव, नवरं तासि णं सेढीणं विकखंभसूई,  
विच्छप्पन्नंगुलसयवग्गपलिभागो पयरस्स । वेमाणियाणं एवं चेव, नवरं तासि णं  
सेढीणं विकखंभसूई, अंगुलविइयवग्गमूलं तइयवग्गमूलपडुप्पन्नं, अहव णं अंगुलतइय-  
वग्गमूलघणप्पमाणमेत्ताओ सेढीओ, सेसं तं चेव ॥ ४१३ ॥ **पन्नवणाए भगवईए**  
**वारसमं सरीरपयं समत्तं ॥**

कइविहे णं भंते ! परिणामे पन्नत्ते ? गोयमा ! दुविहे परिणामे पन्नत्ते । तंजहा-  
जीवपरिणामे य अजीवपरिणामे य । जीवपरिणामे णं भंते ! कइविहे पन्नत्ते ?  
गोयमा ! दसविहे पन्नत्ते । तंजहा-गइपरिणामे १, इंदियपरिणामे २, कसायपरिणामे  
३, लेसापरिणामे ४, जोगपरिणामे ५, उवओगपरिणामे ६, णाणपरिणामे ७,  
दंसणपरिणामे ८, चरित्तपरिणामे ९, वेयपरिणामे १० ॥ ४१४ ॥ गइपरिणामे णं  
भंते ! कइविहे पन्नत्ते ? गोयमा ! चउव्विहे पन्नत्ते । तंजहा-नरयगइपरिणामे, तिरिय-  
गइपरिणामे, मणुयगइपरिणामे, देवगइपरिणामे १ । इंदियपरिणामे णं भंते ! कइ-  
विहे पन्नत्ते ? गोयमा ! पंचविहे पन्नत्ते । तंजहा-सोइंदियपरिणामे, चर्खिखदियपरि-

णामे, वार्णिदियपरिणामे, जिब्भिदियपरिणामे, फासिदियपरिणामे २ । कसायपरिणामे णं भंते ! कइविहे पन्नते ? गोयमा ! चउव्विहे पन्नते । तंजहा-कोहकसायपरिणामे, माणकसायपरिणामे, मायाकसायपरिणामे, लोभकसायपरिणामे ३ । लेस्सापरिणामे णं भंते ! कइविहे पन्नते ? गोयमा ! छव्विहे पन्नते । तंजहा-कण्हलेसापरिणामे, नीललेसापरिणामे, काउलेसापरिणामे, तेउलेसापरिणामे, पम्हलेसापरिणामे, सुकलेसापरिणामे ४ । जोगपरिणामे णं भंते ! कइविहे पन्नते ? गोयमा ! तिविहे पन्नते । तंजहा-मणजोगपरिणामे, वइजोगपरिणामे, कायजोगपरिणामे ५ । उवओगपरिणामे णं भंते ! कइविहे पन्नते ? गोयमा ! दुविहे पन्नते । तंजहा-सागारोवओगपरिणामे, अणागारोवओगपरिणामे य ६ । णाणपरिणामे णं भंते ! कइविहे पन्नते ? गोयमा ! पंचविहे पन्नते । तंजहा-आभिणिबोहियणाणपरिणामे, सुयणाणपरिणामे, ओहिणाणपरिणामे, मणपजवणाणपरिणामे, केवलणाणपरिणामे । अण्णाणपरिणामे णं भंते ! कइविहे पन्नते ? गोयमा ! तिविहे पन्नते । तंजहा-मइअण्णाणपरिणामे, सुयअण्णाणपरिणामे, विभंगणाणपरिणामे ७ । दंसणपरिणामे णं भंते ! कइविहे पन्नते ? गोयमा ! तिविहे पन्नते । तंजहा-सम्मइंसणपरिणामे, मिच्छादंसणपरिणामे, सम्मामिच्छादंसणपरिणामे ८ । चरित्तपरिणामे णं भंते ! कइविहे पन्नते ? गोयमा ! पंचविहे पन्नते । तंजहा-सामाइयचरित्तपरिणामे, छेदोवट्ठावणियचरित्तपरिणामे, परिहारविसुद्धियचरित्तपरिणामे, सुहुमसंपरायचरित्तपरिणामे, अहक्खायचरित्तपरिणामे ९ । वेयपरिणामे णं भंते ! कइविहे पन्नते ? गोयमा ! तिविहे पन्नते । तंजहा-इत्थिवेयपरिणामे, पुरिसवेयपरिणामे, णपुंसगवेयपरिणामे १० ॥ ४१५ ॥ नेरइया गइपरिणामेणं निरयगइया, इंदियपरिणामेणं पंचिंदिया, कसायपरिणामेणं कोहकसाई वि जाव लोभकसाई वि, लेसापरिणामेणं कण्हलेसा वि नीललेसा वि काउलेसा वि, जोगपरिणामेणं मणजोगी वि वइजोगी वि कायजोगी वि, उवओगपरिणामेणं सागारोवउत्ता वि अणागारोवउत्ता वि, णाणपरिणामेणं आभिणिबोहियणाणी वि सुयणाणी वि ओहिणाणी वि, अण्णाणपरिणामेणं मइअण्णाणी वि सुयअण्णाणी वि विभंगणाणी वि, दंसणपरिणामेणं सम्मादिट्ठी वि मिच्छादिट्ठी वि सम्मामिच्छादिट्ठी वि, चरित्तपरिणामेणं नो चरिती, नो चरित्ताचरिती, अचरिती, वेयपरिणामेणं नो इत्थिवेयगा, नो पुरिसवेयगा, नपुंसगवेयगा । असुरकुमारा वि एवं चेव, नवरं देवगइया, कण्हलेसा वि जाव तेउलेसा वि, वेयपरिणामेणं इत्थिवेयगा वि, पुरिसवेयगा वि, नो नपुंसगवेयगा, सेसं तं चेव । एवं जाव थणियकुमारा । पुढविकाइया गइपरिणामेणं तिरियगइया, इंदियपरिणामेणं एगिंदिया, सेसं जहा नेरइयाणं, नवरं लेसापरिणामेणं तेउलेसा वि,

जोगपरिणामेण कायजोगी, णाणपरिणामो णत्थि, अण्णाणपरिणामेणं मइअण्णाणी, सुयअण्णाणी, दंसणपरिणामेणं मिच्छादिट्ठी, सेसं तं चेव । एवं आउवणस्सइकाइया वि । तेउवाऊ एवं चेव, नवरं लेसापरिणामेणं जहा नेरइया । बेइंदिया गइपरिणामेणं तिरियगइया, इंदियपरिणामेणं बेइंदिया, सेसं जहा नेरइयाणं । नवरं जोगपरिणामेणं वइजोगी, कायजोगी, णाणपरिणामेणं आभिणिबोहियणाणी वि, सुयणाणी वि, अण्णाणपरिणामेणं मइअण्णाणी वि, सुयअण्णाणी वि, नो विभंगणाणी, दंसणपरिणामेणं सम्मदिट्ठी वि, मिच्छादिट्ठी वि, नो सम्मामिच्छादिट्ठी, सेसं तं चेव । एवं जाव चउरिंदिया, नवरं इंदियपरिवुड्डी कायव्वा । पंचिंदियतिरिक्खजोणिया गइपरिणामेणं तिरियगइया, सेसं जहा नेरइयाणं, नवरं लेसापरिणामेणं जाव सुक्खेसा वि । चरित्तपरिणामेणं नो चरिती, अचरिती वि, चरित्ताचरिती वि, वेयपरिणामेणं इत्थि-वेयगा वि, पुरिसवेयगा वि, नपुंसगवेयगा वि । मणुस्सा गइपरिणामेणं मणुस्सगइया, इंदियपरिणामेणं पंचिंदिया, अणिंदिया वि, कसायपरिणामेणं कोहकसाई वि जाव अकसाई वि, लेसापरिणामेणं कण्हलेसा वि जाव अलेसा वि, जोगपरिणामेणं मणजोगी वि जाव अजोगी वि, उवओगपरिणामेणं जहा नेरइया, णाणपरिणामेणं आभिणिबोहियणाणी वि जाव केवलणाणी वि, अण्णाणपरिणामेणं तिण्णि वि अण्णाणा, दंसणपरिणामेणं तिण्णि वि दंसणा, चरित्तपरिणामेणं चरिती वि अचरिती वि चरित्ताचरिती वि, वेयपरिणामेणं इत्थिवेयगा वि पुरिसवेयगा वि नपुंसगवेयगा वि अवेयगा वि । वाणमंतरा गइपरिणामेणं देवगइया, जहा असुरकुमारा एवं जोइसिया वि, नवरं लेसापरिणामेणं तेउलेस्सा । वेमाणिया वि एवं चेव नवरं लेसापरिणामेणं तेउलेसा वि पम्हलेसा वि सुक्खेसा वि, सेतं जीवपरिणामे ॥ ४१६ ॥

अजीवपरिणामे णं भंते ! कइविहे पन्नते ? गोयमा ! दसविहे पन्नते । तंजहा-बंधणपरिणामे १, गइपरिणामे २, संठाणपरिणामे ३, भेयपरिणामे ४, वण्णपरिणामे ५, गंधपरिणामे ६, रसपरिणामे ७, फासपरिणामे ८, अगुल्लहुयपरिणामे ९, सइपरिणामे १० ॥ ४१७ ॥ बंधणपरिणामे णं भंते ! कइविहे पन्नते ? गोयमा ! दुविहे पन्नते । तंजहा-णिद्धबंधणपरिणामे, लुक्खबंधणपरिणामे य । समणिदयाए बंधो ण होइ समलुक्खयाए वि ण होइ । वेमायणिद्धलुक्खत्तणेण बंधो उ खंधाणं ॥ १ ॥ णिद्धस्स णिद्धेण दुयाहिए णं लुक्खस्स लुक्खेण दुयाहिए णं । निद्धस्स लुक्खेण उवेइ बंधो जहण्णवज्जो विसमो समो वा ॥ २ ॥ गइपरिणामे णं भंते ! कइविहे पन्नते ? गोयमा ! दुविहे पन्नते । तंजहा-फुसमाणगइपरिणामे य अफुसमाणगइपरिणामे य अहवा दीहगइपरिणामे य हसगइपरिणामे य २ । संठाणपरिणामे णं

भंते ! कइविहे पन्नत्ते ? गोयमा ! पंचविहे पन्नत्ते । तंजहा-परिमंडलसंठाणपरिणामे जाव आययसंठाणपरिणामे ३ । भेयपरिणामे णं भंते ! कइविहे पन्नत्ते ? गोयमा ! पंचविहे पन्नत्ते । तंजहा-खंडाभेयपरिणामे जाव उक्करियाभेयपरिणामे ४ । वण्ण-परिणामे णं भंते ! कइविहे पन्नत्ते ? गोयमा ! पंचविहे पन्नत्ते । तंजहा-कालवण्ण-परिणामे जाव सुक्किल्लवण्णपरिणामे ५ । गंधपरिणामे णं भंते ! कइविहे पन्नत्ते ? गोयमा ! दुविहे पन्नत्ते । तंजहा-सुब्भिमगंधपरिणामे य दुब्भिमगंधपरिणामे य ६ । रस-परिणामे णं भंते ! कइविहे पन्नत्ते ? गोयमा ! पंचविहे पन्नत्ते । तंजहा-तित्तरसपरिणामे जाव महुररसपरिणामे ७ । फासपरिणामे णं भंते ! कइविहे पन्नत्ते ? गोयमा ! अट्टविहे पन्नत्ते । तंजहा-कक्खडफासपरिणामे य जाव लुक्खफासपरिणामे य ८ । अगुरुलहुयपरिणामे णं भंते ! कइविहे पन्नत्ते ? गोयमा ! एगागारे पन्नत्ते ९ । सद्दपरिणामे णं भंते ! कइविहे पन्नत्ते ? गोयमा ! दुविहे पन्नत्ते । तंजहा-सुब्भिसद्दपरिणामे य दुब्भिसद्दपरिणामे य १० । सेत्तं अजीवपरिणामे ॥४१८॥ **पन्नवणाए भगवईए तेरसमं परिणामपयं समत्तं ॥**

कइ णं भंते ! कसाया पन्नत्ता ? गोयमा ! चत्तारि कसाया पन्नत्ता । तंजहा-कोहकसाए, माणकसाए, मायाकसाए, लोभकसाए । नेरइयाणं भंते ! कइ कसाया पन्नत्ता ? गोयमा ! चत्तारि कसाया पन्नत्ता । तंजहा-कोहकसाए जाव लोभकसाए । एवं जाव वेमाणियाणं ॥ ४१९ ॥ कइपइट्ठिए णं भंते ! कोहे पन्नत्ते ? गोयमा ! चउपइट्ठिए कोहे पन्नत्ते । तंजहा-आयपइट्ठिए, परपइट्ठिए, तदुभयपइट्ठिए, अप्पइट्ठिए । एवं नेरइयाणं जाव वेमाणियाणं दंडओ । एवं माणेणं दंडओ, मायाए दंडओ, लोभेणं दंडओ ॥ ४२० ॥ कइहिं णं भंते ! ठाणेहिं कोहुप्पत्ती भवइ ? गोयमा ! चउहिं ठाणेहिं कोहुप्पत्ती भवइ, तंजहा-खेत्तं पडुच्च, वत्थुं पडुच्च, सरीरं पडुच्च, उवहिं पडुच्च । एवं नेरइयाणं जाव वेमाणियाणं । एवं माणेण वि मायाए वि लोभेण वि, एवं एए वि चत्तारि दंडगा ॥ ४२१ ॥ कइविहे णं भंते ! कोहे पन्नत्ते ? गोयमा ! चउ-व्विहे कोहे पन्नत्ते । तंजहा-अणंताणुबंधी कोहे, अपच्चक्खाणे कोहे, पच्चक्खाणावरणे कोहे, संजलणे कोहे । एवं नेरइयाणं जाव वेमाणियाणं । एवं माणेणं मायाए लोभेणं, एए वि चत्तारि दंडगा ॥ ४२२ ॥ कइविहे णं भंते ! कोहे पन्नत्ते ? गोयमा ! चउव्विहे कोहे पन्नत्ते । तंजहा-आभोगनिव्वत्तिए, अणाभोगनिव्वत्तिए, उवसंते, अणुवसंते । एवं नेरइयाणं जाव वेमाणियाणं । एवं माणेण वि, मायाए वि, लोभेण वि चत्तारि दंडगा ॥ ४२३ ॥ जीवा णं भंते ! कइहिं ठाणेहिं अट्ट कम्मपगडीओ चिणिंसु ? गोयमा ! चउहिं ठाणेहिं अट्ट कम्मपगडीओ चिणिंसु, तंजहा-कोहेणं,

माणेणं, मायाए, लोभेणं । एवं नेरइयाणं जाव वेमाणियाणं । जीवा णं भंते ! कइहिं ठाणेहिं अट्ठ कम्मपगडीओ चिणंति ? गोयमा ! चउहिं ठाणेहिं०, तंजहा-कोहेणं, माणेणं, मायाए, लोभेणं । एवं नेरइया जाव वेमाणिया । जीवा णं भंते ! कइहिं ठाणेहिं अट्ठ कम्मपगडीओ चिणिस्संति ? गोयमा ! चउहिं ठाणेहिं अट्ठ कम्मपगडीओ चिणिस्संति, तंजहा-कोहेणं, माणेणं, मायाए, लोभेणं । एवं नेरइया जाव वेमाणिया । जीवा णं भंते ! कइहिं ठाणेहिं अट्ठ कम्मपगडीओ उवचिणिंसु ? गोयमा ! चउहिं ठाणेहिं अट्ठ कम्मपगडीओ उवचिणिंसु, तंजहा-कोहेणं, माणेणं, मायाए, लोभेणं । एवं नेरइया जाव वेमाणिया । जीवा णं भंते !० पुच्छा । गोयमा ! चउहिं ठाणेहिं उवचिणंति जाव लोभेणं, एवं नेरइया जाव वेमाणिया । एवं उवचिणिस्संति । जीवा णं भंते ! कइहिं ठाणेहिं अट्ठ कम्मपगडीओ बंधिंसु ? गोयमा ! चउहिं ठाणेहिं अट्ठ कम्मपगडीओ बंधिंसु, तंजहा-कोहेणं, माणेणं जाव लोभेणं, एवं नेरइया जाव वेमाणिया, बंधिंसु, बंधंति, बंधिस्संति, उदीरेंसु, उदीरेंति, उदीरिस्संति, वेदिंसु, वेदंति, वेदइस्संति, निज्जरिंसु, निज्जरेंति, निज्जरिस्संति, एवं एए जीवाइया वेमाणियपज्जवसाणा अट्ठारस दंडगा जाव वेमाणिया निज्जरिंसु निज्जरेंति निज्जरिस्संति । आयपइट्ठिय खेतं पडुच्च णंताणुबंधि आभोगे । चिण उवचिण बंध उदीर वेय तह निज्जरा चेव ॥ १ ॥ ४२४ ॥ **पन्नवणाए भगवईए चोदसमं कसायपयं समत्तं ॥**

संठाणं बाहल्लं पोहत्तं कइएएस ओगाढे । अप्पाबहु पुट्ट पविट्ठ विसय अणगार आहारे ॥ १ ॥ अदाय असी य मणी दुद्ध पाणिय तेल्ल फाणिय तहा य । कंबल थूणा थिमल दीवोदहि लोगडलोगे य ॥ २ ॥ कइ णं भंते ! इंदिया पन्नत्ता ? गोयमा ! पंच इंदिया पन्नत्ता । तंजहा-सोईदिए, चक्खिदिए, घाणिदिए, जिब्भिदिए, फासिदिए ॥ ४२५ ॥ सोईदिए णं भंते ! किंसंठिए पन्नत्ते ? गोयमा ! कलंबुया-पुप्फसंठाणसंठिए पन्नत्ते । चक्खिदिए णं भंते ! किंसंठिए पन्नत्ते ? गोयमा ! मसूर-चंदसंठाणसंठिए पन्नत्ते । घाणिदिए णं भंते ! पुच्छा । गोयमा ! अइमुत्तागचंद-संठाणसंठिए पन्नत्ते । जिब्भिदिए णं पुच्छा । गोयमा ! खुरप्पसंठाणसंठिए पन्नत्ते । फासिदिए णं पुच्छा । गोयमा ! णाणासंठाणसंठिए पन्नत्ते १ ॥ ४२६ ॥ सोईदिए णं भंते ! केवइयं बाहल्लेणं पन्नत्ते ? गोयमा ! अंगुलस्स असंखेज्जभागे बाहल्लेणं पन्नत्ते । एवं जाव फासिदिए २ । सोईदिए णं भंते ! केवइयं पोहत्तेणं पन्नत्ते ? गोयमा ! अंगुलस्स असंखेज्जभागां पोहत्तेणं पन्नत्ते । एवं चक्खिदिए वि घाणिदिए वि । जिब्भिदिए णं पुच्छा । गोयमा ! अंगुलपुहुत्तेणं पन्नत्ते । फासिदिए णं पुच्छा । गोयमा ! सरीरप्पमाणमेत्ते पोहत्तेणं पन्नत्ते ३ ॥ ४२७ ॥ सोईदिए णं भंते ! कइएएसि पन्नत्ते ?

गोयमा ! अणंतपएसिए पन्नत्ते । एवं जाव फासिंदिए ४ ॥ ४२८ ॥ सोइंदिए णं भंते ! कइपएसोगाढे पन्नत्ते ? गोयमा ! असंखेज्जपएसोगाढे पन्नत्ते । एवं जाव फासिंदिए ५ ॥ ४२९ ॥ एसि णं भंते ! सोइंदियचक्खिंदियघाणिंदियजिब्भिंदियफासिंदियाणं ओगाहणट्टयाए पएसट्टयाए ओगाहणपएसट्टयाए कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवे चक्खिंदिए ओगाहणट्टयाए, सोइंदिए ओगाहणट्टयाए संखेज्जगुणे, घाणिंदिए ओगाहणट्टयाए संखेज्जगुणे, जिब्भिंदिए ओगाहणट्टयाए असंखेज्जगुणे, फासिंदिए ओगाहणट्टयाए संखेज्जगुणे, पएसट्टयाए-सव्वत्थोवे चक्खिंदिए पएसट्टयाए, सोइंदिए पएसट्टयाए संखेज्जगुणे, घाणिंदिए पएसट्टयाए संखेज्जगुणे, जिब्भिंदिए पएसट्टयाए असंखेज्जगुणे, फासिंदिए पएसट्टयाए संखेज्जगुणे, ओगाहणपएसट्टयाए-सव्वत्थोवे चक्खिंदिए ओगाहणट्टयाए, सोइंदिए ओगाहणट्टयाए संखेज्जगुणे, घाणिंदिए ओगाहणट्टयाए संखेज्जगुणे, जिब्भिंदिए ओगाहणट्टयाए असंखेज्जगुणे, फासिंदिए ओगाहणट्टयाए संखेज्जगुणे, फासिंदियस्स ओगाहणट्टयाहिंतो चक्खिंदिए पएसट्टयाए अणंतगुणे, सोइंदिए पएसट्टयाए संखेज्जगुणे, घाणिंदिए पएसट्टयाए संखेज्जगुणे, जिब्भिंदिए पएसट्टयाए असंखेज्जगुणे, फासिंदिए पएसट्टयाए संखेज्जगुणे ॥ ४३० ॥ सोइंदियस्स णं भंते ! केवइया कक्खडगुरुयगुणा पन्नत्ता ? गोयमा ! अणंता कक्खडगुरुयगुणा पन्नत्ता, एवं जाव फासिंदियस्स । सोइंदियस्स णं भंते ! केवइया मउयलहुयगुणा पन्नत्ता ? गोयमा ! अणंता मउयलहुयगुणा पन्नत्ता, एवं जाव फासिंदियस्स ॥ ४३१ ॥ एसि णं भंते ! सोइंदियचक्खिंदियघाणिंदियजिब्भिंदियफासिंदियाणं कक्खडगुरुयगुणाणं मउयलहुयगुणाणं य कयरे कयरेहिंतो अप्पा वा ४ ? गोयमा ! सव्वत्थोवा चक्खिंदियस्स कक्खडगुरुयगुणा, सोइंदियस्स कक्खडगुरुयगुणा अणंतगुणा, घाणिंदियस्स कक्खडगुरुयगुणा अणंतगुणा, जिब्भिंदियस्स कक्खडगुरुयगुणा अणंतगुणा, फासिंदियस्स कक्खडगुरुयगुणा अणंतगुणा । मउयलहुयगुणाणं-सव्वत्थोवा फासिंदियस्स मउयलहुयगुणा, जिब्भिंदियस्स मउयलहुयगुणा अणंतगुणा, घाणिंदियस्स मउयलहुयगुणा अणंतगुणा, सोइंदियस्स मउयलहुयगुणा अणंतगुणा, चक्खिंदियस्स मउयलहुयगुणा अणंतगुणा । कक्खडगुरुयगुणाणं मउयलहुयगुणाणं य-सव्वत्थोवा चक्खिंदियस्स कक्खडगुरुयगुणा, सोइंदियस्स कक्खडगुरुयगुणा अणंतगुणा, घाणिंदियस्स कक्खडगुरुयगुणा अणंतगुणा, जिब्भिंदियस्स कक्खडगुरुयगुणा अणंतगुणा, फासिंदियस्स कक्खडगुरुयगुणा अणंतगुणा, फासिंदियस्स कक्खडगुरुयगुणेहिंतो तस्स चेव मउयलहुयगुणा अणंतगुणा, जिब्भिंदियस्स मउयलहुय-



गुणा अणंतगुणा, वाणिंदियस्स मउयलहुयगुणा अणंतगुणा, सोइंदियस्स मउयलहु-  
यगुणा अणंतगुणा, चक्खिंदियस्स मउयलहुयगुणा अणंतगुणा ॥ ४३२ ॥ नेरइयाणं  
भंते ! कइ इंदिया पन्नत्ता ? गोयमा ! पंच, तंजहा-सोइन्दिए जाव फासिन्दिए ।  
नेरइयाणं भंते ! सोइन्दिए किंसंठिए पन्नत्ते ? गोयमा ! कलंबुयासंठाणसंठिए पन्नत्ते ।  
एवं जहा ओहियाणं वत्तव्वया भणिग्या तहेव नेरइयाणं पि जाव अप्पाबहुयाणि  
दोणिण । नवरं नेरइयाणं भंते ! फासिन्दिए किंसंठिए पन्नत्ते ? गोयमा ! दुविहे  
पन्नत्ते । तंजहा-भवधारणिजे य उत्तरवेउव्विए य । तत्थ णं जे से भवधारणिजे से  
णं हुंडसंठाणसंठिए पन्नत्ते, तत्थ णं जे से उत्तरवेउव्विए से वि तहेव, सेसं तं चेव  
॥ ४३३ ॥ असुरकुमारणं भंते ! कइ इन्दिया पन्नत्ता ? गोयमा ! पंच, एवं जहा  
ओहियाणि जाव अप्पाबहुगाणि दोणिण वि । नवरं फासिन्दिए दुविहे पन्नत्ते । तंजहा-  
भवधारणिजे य उत्तरवेउव्विए य । तत्थ णं जे से भवधारणिजे से णं समच्चरं-  
ससंठाणसंठिए पन्नत्ते, तत्थ णं जे से उत्तरवेउव्विए से णं णाणासंठाणसंठिए, सेसं  
तं चेव । एवं जाव थणियकुमारणं ॥ ४३४ ॥ पुढविकाइयाणं भंते ! कइ इन्दिया  
पन्नत्ता ? गोयमा ! एगे फासिन्दिए पन्नत्ते । पुढविकाइयाणं भंते ! फासिन्दिए  
किंसंठाणसंठिए पन्नत्ते ? गोयमा ! मसूरचंदसंठाणसंठिए पन्नत्ते । पुढविकाइयाणं  
भंते ! फासिन्दिए केवइयं बाहल्लेणं पन्नत्ते ? गोयमा ! अंगुलस्स असंखेज्जभाणं  
बाहल्लेणं पन्नत्ते । पुढविकाइयाणं भंते ! फासिन्दिए केवइयं पोहत्तेणं पन्नत्ते ? गोयमा !  
सरीरप्पमाणमेत्ते पोहत्तेणं । पुढविकाइयाणं भंते ! फासिन्दिए कइएएसिए पन्नत्ते ?  
गोयमा ! अणंतएएसिए पन्नत्ते । पुढविकाइयाणं भंते ! फासिन्दिए कइएएसोगाढे  
पन्नत्ते ? गोयमा ! असंखेज्जएएसोगाढे पन्नत्ते । एएसि णं भंते ! पुढविकाइयाणं  
फासिन्दिस्स ओगाहणट्टयाए पएसट्टयाए ओगाहणपएसट्टयाए कयरे कयरेहिंतो  
अप्पा वा ४ ? गोयमा ! सव्वत्थोवे पुढविकाइयाणं फासिन्दिए ओगाहणट्टयाए, से  
चेव पएसट्टयाए अणंतगुणे । पुढविकाइयाणं भंते ! फासिन्दिस्स केवइया कक्खड-  
गरुयगुणा पन्नत्ता ? गोयमा ! अणंता, एवं मउयलहुयगुणा वि । एएसि णं भंते !  
पुढविकाइयाणं फासिन्दिस्स कक्खडगरुयगुणाणं मउयलहुयगुणाणं य कयरे  
कयरेहिंतो अप्पा वा ४ ? गोयमा ! सव्वत्थोवा पुढविकाइयाणं फासिंदियस्स कक्ख-  
डगरुयगुणा, तस्स चेव मउयलहुयगुणा अणंतगुणा । एवं आउकाइयाणं वि जाव  
वणप्फइकाइयाणं, णवरं संठाणे इमो विसेसो दट्ठव्वो-आउकाइयाणं थिबुगविंदुसंठा-  
णसंठिए पन्नत्ते । तेउकाइयाणं सूइकलावसंठाणसंठिए पन्नत्ते । वाउकाइयाणं पडा-  
गासंठाणसंठिए पन्नत्ते । वणप्फइकाइयाणं णाणासंठाणसंठिए पन्नत्ते ॥ ४३५ ॥

बेईदियाणं भंते ! कह इंदिया पन्नत्ता ? गोयमा ! दो इंदिया पन्नत्ता । तंजहा-  
जिब्बिदिए य फासिंदिए य । दोण्हं पि इंदियाणं संठाणं बाहल्लं पोहत्तं पएसा ओगा-  
हणा य जहा ओहियाणं भणिया तहा भाणियव्वा, णवरं फासिंदिए हुंडसंठाणसंठिए  
पण्णत्तेत्ति इमो विसेसो । एएसि णं भंते ! बेईदियाणं जिब्बिदियफासिंदियाणं  
ओगाहणट्टयाए पएसट्टयाए ओगाहणपएसट्टयाए कयरे कयरेहितो अप्पा वा ४ ?  
गोयमा ! सव्वत्थोवे बेईदियाणं जिब्बिदिए ओगाहणट्टयाए, फासिंदिए ओगाहणट्टयाए  
संखेज्जगुणे । पएसट्टयाए-सव्वत्थोवे बेईदियाणं जिब्बिदिए पएसट्टयाए, फासिंदिए  
संखेज्जगुणे । ओगाहणपएसट्टयाए-सव्वत्थोवे बेईदियस्स जिब्बिदिए ओगाहणट्टयाए,  
फासिंदिए ओगाहणट्टयाए संखेज्जगुणे, फासिंदियस्स ओगाहणट्टयाएहितो जिब्बिदिए  
पएसट्टयाए अणंतगुणे, फासिंदिए पएसट्टयाए संखेज्जगुणे । बेइन्दियाणं भंते !  
जिब्बिन्दियस्स केवइया कक्खडगरुयगुणा पन्नत्ता ? गोयमा ! अणंता । एवं फासि-  
न्दियस्स वि, एवं मउयलहुयगुणा वि । एएसि णं भंते ! बेइन्दियाणं जिब्बिदिय-  
फासिन्दियाणं कक्खडगरुयगुणाणं, मउयलहुयगुणाणं, कक्खडगरुयगुणाणं, मउयलहु-  
यगुणाणं य कयरे कयरेहितो अप्पा वा ४ ? गोयमा ! सव्वत्थोवा बेइन्दियाणं  
जिब्बिदियस्स कक्खडगरुयगुणा, फासिंदियस्स कक्खडगरुयगुणा अणंतगुणा,  
फासिंदियस्स कक्खडगरुयगुणेहितो तस्स चैव मउयलहुयगुणा अणंतगुणा, जिब्बि-  
दियस्स मउयलहुयगुणा अणंतगुणा । एवं जाव चउरिन्दियत्ति, नवरं इंदियपरिचुट्ठी  
कायव्वा । तेइंदियाणं घाणिन्दिए थोवे, चउरिन्दियाणं चक्खिदिए थोवे, सेसं तं  
चैव । पंविन्दियत्तिरिक्खजोणियाणं मणूसाणं य जहा नेरइयाणं, नवरं फासिंदिए  
छव्विहसंठाणसंठिए पन्नत्ते । तंजहा-समचउरंसे निग्गोहपरिमंडले साई खुजे वामणे  
हुंडे । वाणमंतरजोइसियवेमाणियाणं जहा असुरकुमारारणं ॥ ४३६ ॥ पुट्ठाई भंते !  
सद्दाई सुणेइ, अपुट्ठाई सद्दाई सुणेइ ? गोयमा ! पुट्ठाई सद्दाई सुणेइ, नो अपुट्ठाई  
सद्दाई सुणेइ । पुट्ठाई भंते ! रुवाई पासइ, अपुट्ठाई० पासइ ? गोयमा ! नो पुट्ठाई  
रुवाई पासइ, अपुट्ठाई रुवाई पासइ । पुट्ठाई भंते ! गंधाई अग्घाइ, अपुट्ठाई गंधाई  
अग्घाइ ? गोयमा ! पुट्ठाई गंधाई अग्घाइ, नो अपुट्ठाई० अग्घाइ । एवं रसाणं वि  
फासाणं वि, नवरं रसाई अस्साएइ, फासाई पडिसंवेदेइ ति अभिलावो कायव्वो ।  
पविट्ठाई भंते ! सद्दाई सुणेइ, अपविट्ठाई सद्दाई सुणेइ ? गोयमा ! पविट्ठाई सद्दाई सुणेइ,  
नो अपविट्ठाई सद्दाई सुणेइ, एवं जहा पुट्ठाणि तहा पविट्ठाणि वि ॥ ४३७ ॥  
सोइन्दियस्स णं भंते ! केवइए विसए पन्नत्ते ? गोयमा ! जहण्णेणं अंगुलस्स  
असंखेज्जइभागो, उक्कोसेणं बारसहिं जोयणेहिन्तो अच्छिण्णे पोग्गले पुट्ठे पविट्ठाई

सद्दाइं सुणेइ । चक्खिन्दियस्स णं भंते ! केवइए विसए पन्नते ? गोयमा ! जहण्णेणं अंगुलस्स संखेज्जइभागो, उक्कोसेणं साइरेगाओ जोयणसयसहस्साओ अच्छिण्णे पोगगले अपुट्ठे अपविट्ठाइं रुवाइं पासइ । घाणिन्दियस्स पुच्छा । गोयमा ! जहण्णेणं अंगुलअसंखेज्जइभागो, उक्कोसेणं नवहिं जोयणेहिन्तो अच्छिण्णे पोगगले पुट्ठे पविट्ठाइं गंधाइं अग्घाइ, एवं जिब्बिन्दियस्स वि फासिंदियस्स वि ॥ ४३८ ॥ अणगारस्स णं भंते ! भावियप्पणो मारणंतियसमुग्घाएणं समोहयस्स जे चरमा णिज्जरापोगगला, सुहुमा णं ते पोगगला पण्णत्ता समणाउसो !, सव्वं लोगं पि य णं ते ओगाहिता णं चिट्ठंति ? हंता गोयमा ! अणगारस्स भावियप्पणो मारणंतियसमुग्घाएणं समोहयस्स जे चरमा णिज्जरापोगगला, सुहुमा णं ते पोगगला पण्णत्ता समणाउसो !, सव्वं लोगं पि य णं ओगाहिता णं चिट्ठंति । छउमत्थे णं भंते ! मणूसे तेसिं णिज्जरापोगगलाणं किं आणत्तं वा णाणत्तं वा ओमत्तं वा तुच्छत्तं वा गरुयत्तं वा लहुयत्तं वा जाणइ पासइ ? गोयमा ! णो इणट्ठे समट्ठे । से केणट्ठेणं भंते ! एवं वुच्चइ-‘छउमत्थे णं मणूसे तेसिं णिज्जरापोगगलाणं णो किंवि आणत्तं वा णाणत्तं वा ओमत्तं वा तुच्छत्तं वा गरुयत्तं वा लहुयत्तं वा जाणइ पासइ’ ? गोयमा ! देवे वि य णं अत्थेगइए जे णं तेसिं णिज्जरापोगगलाणं णो किंवि आणत्तं वा णाणत्तं वा ओमत्तं वा तुच्छत्तं वा गरुयत्तं वा लहुयत्तं वा जाणइ पासइ, से तेणट्ठेणं गोयमा ! एवं वुच्चइ-‘छउमत्थे णं मणूसे तेसिं णिज्जरापोगगलाणं णो किंवि आणत्तं वा जाव जाणइ पासइ, एवंसुहुमा णं ते पोगगला पण्णत्ता समणाउसो !, सव्वलोगं पि य णं ते ओगाहिता णं चिट्ठंति ॥ ४३९ ॥ नेरइया णं भंते ! ते णिज्जरापोगगला किं जाणंति पासंति आहारेंति, उदाहु न जाणंति न पासंति आहारेंति ? गोयमा ! नेरइया णिज्जरापोगगले न जाणंति न पासंति आहारेंति, एवं जाव पंचिन्दियतिरिक्खजोणियाणं ॥ ४४० ॥ मणूसा णं भंते ! ते णिज्जरापोगगले किं जाणंति पासंति आहारेंति, उदाहु न जाणंति न पासंति आहारेंति ? गोयमा ! अत्थेगइया जाणंति पासंति आहारेंति, अत्थेगइया न जाणंति न पासंति आहारेंति । से केणट्ठेणं भंते ! एवं वुच्चइ-‘अत्थेगइया जाणंति पासंति आहारेंति, अत्थेगइया न जाणंति न पासंति आहारेंति’ ? गोयमा ! मणूसा दुविहा पन्नत्ता । तंजहा-सण्णिभूया य असण्णिभूया य । तत्थ णं जे ते असण्णिभूया ते णं न जाणंति न पासंति आहारेंति । तत्थ णं जे ते सण्णिभूया ते दुविहा पन्नत्ता । तंजहा-उवउत्ता य अणुवउत्ता य । तत्थ णं जे ते अणुवउत्ता ते णं न जाणंति न पासंति आहारेंति । तत्थ णं जे ते उवउत्ता ते णं जाणंति पासंति आहारेंति, से एएणट्ठेणं

गोयमा ! एवं वुच्चइ-‘अत्थेगइया न जाणंति न पासंति आहारेंति, अत्थेगइया जाणंति पासंति आहारेंति’ । वाणमंतरजोइसिया जहा नेरइया ॥ ४४१ ॥ वेमा-  
णिया णं भंते ! ते णिज्जरापोग्गले किं जाणंति पासंति आहारेंति ? जहा मणसा ।  
नवरं वेमाणिया दुविहा पज्जता । तंजहा-माइमिच्छदिट्ठीउववण्णगा य अमाइसम्म-  
दिट्ठीउववण्णगा य । तत्थ णं जे ते माइमिच्छदिट्ठीउववण्णगा ते णं न जाणंति न  
पासंति आहारेंति, तत्थ णं जे ते अमाइसम्मदिट्ठीउववण्णगा ते दुविहा पज्जता ।  
तंजहा-अणंतरोववण्णगा य परंपरोववण्णगा य । तत्थ णं जे ते अणंतरोववण्णगा  
ते णं न जाणंति न पासंति आहारेंति । तत्थ णं जे ते परंपरोववण्णगा ते दुविहा  
पज्जता । तंजहा-पज्जत्ता य अपज्जत्ता य । तत्थ णं जे ते अपज्जत्ता ते णं न  
जाणंति न पासंति आहारेंति । तत्थ णं जे ते पज्जत्ता ते दुविहा पज्जता । तंजहा-  
उवउत्ता य अणुवउत्ता य । तत्थ णं जे ते अणुवउत्ता ते णं न जाणंति न पासंति  
आहारेंति, तत्थ णं जे ते उवउत्ता ते णं जाणंति पासंति आहारेंति, से एएणट्ठेणं  
गोयमा ! एवं वुच्चइ-‘अत्थेगइया जाणंति जाव अत्थेगइया आहारेंति ॥ ४४२ ॥  
अद्दायं भंते ! पेहमाणे मणसे अद्दायं पेहइ, अत्ताणं पेहइ, पलिभागं पेहइ ? गोयमा !  
अद्दायं पेहइ, नो अप्पाणं पेहइ, पलिभागं पेहइ । एवं एएणं अभिलावेणं अंसिं  
मणिं दुद्धं पाणियं तेहं पाणियं ॥ ४४३ ॥ कंबलसाडए णं भंते ! आवेदियपरिवेदिए  
समाणे जावइयं उवासंतरं फुसित्ता णं चिट्ठइ विरल्लिए वि समाणे तावइयं चेव  
उवासंतरं फुसित्ता णं चिट्ठइ ? हंता गोयमा ! कंबलसाडए णं आवेदियपरिवेदिए  
समाणे जावइयं तं चेव । थूणा णं भंते ! उट्ठं ऊसिया समाणी जावइयं खेतं  
ओगाहइत्ता णं चिट्ठइ, तिरियं पि य णं आयया समाणी तावइयं चेव खेतं ओगाह-  
इत्ता णं चिट्ठइ ? हंता गोयमा ! थूणा णं उट्ठं ऊसिया तं चेव जाव चिट्ठइ ॥ ४४४ ॥  
आगासत्थिगले णं भंते ! किंणा फुडे, कइहिं वा काएहिं फुडे ? किं धम्मत्थिकाएणं  
फुडे, धम्मत्थिकायस्स देसेणं फुडे, धम्मत्थिकायस्स पएसेहिं फुडे ? एवं अधम्मत्थि-  
काएणं, आगासत्थिकाएणं एएणं भेएणं जाव पुढविकाएणं फुडे जाव तसकाएणं,  
अद्धासमएणं फुडे ?, गोयमा ! धम्मत्थिकाएणं फुडे, नो धम्मत्थिकायस्स देसेणं  
फुडे, धम्मत्थिकायस्स पएसेहिं फुडे, एवं अधम्मत्थिकाएणं वि, नो आगासत्थिकाएणं  
फुडे, आगासत्थिकायस्स देसेणं फुडे, आगासत्थिकायस्स पएसेहिं जाव वणस्सइ-  
काएणं फुडे, तसकाएणं सिय फुडे, सिय नो फुडे, अद्धासमएणं देसे फुडे, देसे नो  
फुडे । जंबुदीवे णं भंते ! दीवे किंणा फुडे ? कइहिं वा काएहिं फुडे ? किं धम्मत्थिका-  
एणं जाव आगासत्थिकाएणं फुडे ?, गोयमा ! णो धम्मत्थिकाएणं फुडे, धम्मत्थि-

कायस्स देसेणं फुडे, धम्मत्थिकायस्स पएसेहिं फुडे, एवं अधम्मत्थिकायस्स वि आगासत्थिकायस्स वि, पुढविकाएणं फुडे जाव वणस्सइकाएणं फुडे, तसकाएणं सिय फुडे सिय णो फुडे, अद्धासमएणं फुडे । एवं लवणसमुदे, धायइसंडे दीवे, कालोए समुदे, अट्ठिभतरपुक्खरुदे । बाहिरपुक्खरुदे एवं चेव, नवरं अद्धासमएणं णो फुडे । एवं जाव सयंभूरमणसमुदे । एसा परिवाडी इमाहिं गाहाहिं अणुगंतव्वा, तंजहा—“जंवुदीवे लवणे धायइ कालोय पुक्खरे वरुणे । खीरघयखोयणंदि य अरणवरे कुण्डले रुयए ॥ १ ॥ आभरणवत्थगंधे उप्पलतिलए य पउमनिहिरयणे । वासहरदहनईओ विजया वक्खारकप्पिदा ॥ २ ॥ कुरु मंदर आवासा कूडा नक्खत्त-चंदसूरा य । देवे णागे जक्खे भूए य सयंभुरमणे य ॥ ३ ॥ एवं जहा बाहिर-पुक्खरुदे भणिए तहा जाव सयंभूरमणसमुदे जाव अद्धासमएणं नो फुडे ॥ ४४५ ॥ लोणे णं भंते ! किंणा फुडे ? कइहिं वा काएहिं ? जहा आगासत्थिगले । अलोए णं भंते ! किंणा फुडे, कइहिं वा काएहिं पुच्छा । गोयमा ! नो धम्मत्थिकाएणं फुडे जाव नो आगासत्थिकाएणं फुडे, आगासत्थिकायस्स देसेणं फुडे, नो पुढवि-काएणं फुडे जाव नो अद्धासमएणं फुडे । एगे अजीवदव्वदेसे अगुल्लहुए अणंतेहिं अगुल्लहुयगुणेहिं संजुत्ते सव्वागासअणंतभागूणे ॥ ४४६ ॥ **पन्नवणाए भगवईए पन्नरसमस्स इंदियपयस्स पढमो उद्देसो समत्तो ॥**

इंदियउवचय १ निव्वत्तणा २ य समया भवे असंखेजा ३ । लद्धी ४ उवओ-गद्धं ५ अप्पावहुए विसेसोहिंया ६ ॥ ओगाहणा ७ अवाए ८ ईहा ९ तह वंजणो-ग्गहे १० चेव । दव्विदिय ११ भाविंदिय १२ तीया बद्धा पुरक्खडिया ॥ कइविहे णं भंते ! इंदियउवचए पन्नत्ते ? गोयमा ! पंचविहे इंदियउवचए पन्नत्ते । तंजहा-सोईंदियउवचए, चक्खिंदियउवचए, घाणिंदियउवचए, जिब्भिन्दियउवचए, फासि-न्दियउवचए । नेरइयाणं भंते ! कइविहे इन्दिओवचए पन्नत्ते ? गोयमा ! पंचविहे इन्दिओवचए पन्नत्ते । तंजहा-सोईंदियउवचए जाव फासिन्दियउवचए, एवं जाव वेमाणियाणं । जस्स जइ इन्दिया तस्स तइविहो चेव इन्दियउवचओ भाणियव्वो १ । कइविहा णं भंते ! इन्दियनिव्वत्तणा पन्नत्ता ? गोयमा ! पंचविहा इन्दियनिव्व-त्तणा पन्नत्ता । तंजहा-सोइन्दियनिव्वत्तणा जाव फासिन्दियनिव्वत्तणा । एवं नेरइ-याणं जाव वेमाणियाणं, नवरं जस्स जइ इन्दिया अत्थि० २ । सोइन्दियनिव्वत्तणा णं भंते कइसमइया पन्नत्ता ? गोयमा ! असंखिजइसमइया अंतोमुहुत्तिया पन्नत्ता, एवं जाव फासिन्दियनिव्वत्तणा । एवं नेरइयाणं जाव वेमाणियाणं ३ । कइविहा णं भंते ! इन्दियलद्धी पन्नत्ता ? गोयमा ! पंचविहा इन्दियलद्धी पन्नत्ता । तंजहा-सोइ-

न्दियलद्धी जाव फासिन्दियलद्धी । एवं नेरइयाणं जाव वेमाणियाणं, नवरं जस्स जइ इन्दिया अत्थि० तस्स तावइया भाणियव्वा ४ । कइविहा णं भंते ! इन्दियउव-  
ओगद्धा पन्नत्ता ? गोयमा ! पंचविहा इन्दियउवओगद्धा पन्नत्ता । तंजहा-सोइन्दिय-  
उवओगद्धा जाव फासिन्दियउवओगद्धा । एवं नेरइयाणं जाव वेमाणियाणं, नवरं  
जस्स जइ इन्दिया अत्थि० ५ ॥ ४४७ ॥ एएसि णं भंते ! सोइन्दियचक्खिन्दियघाणि-  
न्दियजिब्भदियफासिन्दियाणं जहण्णयाए उवओगद्धाए उक्कोसियाए उवओगद्धाए  
जहण्णक्कोसियाए उवओगद्धाए कयरे कयरेहिंतो अप्पा वा ४ ? गोयमा ! सव्वत्थोवा  
चक्खिन्दियस्स जहण्णिया उवओगद्धा, सोइन्दियस्स जहण्णिया उवओगद्धा विसे-  
साहिया, घाणिन्दियस्स जहण्णिया उवओगद्धा विसेसाहिया, जिब्भिन्दियस्स जह-  
ण्णिया उवओगद्धा विसेसाहिया, फासिन्दियस्स जहण्णिया उवओगद्धा विसेसाहिया,  
उक्कोसियाए उवओगद्धाए-सव्वत्थोवा चक्खिन्दियस्स उक्कोसिया उवओगद्धा, सोइ-  
न्दियस्स उक्कोसिया उवओगद्धा विसेसाहिया, घाणिन्दियस्स उक्कोसिया उवओगद्धा  
विसेसाहिया, जिब्भिन्दियस्स उक्कोसिया उवओगद्धा विसेसाहिया, फासिन्दियस्स  
उक्कोसिया उवओगद्धा विसेसाहिया, जहण्णउक्कोसियाए उवओगद्धाए-सव्वत्थोवा  
चक्खिन्दियस्स जहण्णिया उवओगद्धा, सोइन्दियस्स जहण्णिया उवओगद्धा विसेसा-  
हिया, घाणिन्दियस्स जहण्णिया उवओगद्धा विसेसाहिया, जिब्भिन्दियस्स जहण्णिया  
उवओगद्धा विसेसाहिया, फासिन्दियस्स जहण्णिया उवओगद्धा विसेसाहिया, फासिंदि-  
यस्स जहण्णियाहिंतो उवओगद्धाहिंतो चक्खिन्दियस्स उक्कोसिया उवओगद्धा विसे-  
साहिया, सोइन्दियस्स उक्कोसिया उवओगद्धा विसेसाहिया, घाणिन्दियस्स उक्कोसिया  
उवओगद्धा विसेसाहिया, जिब्भिन्दियस्स उक्कोसिया उवओगद्धा विसेसाहिया, फासि-  
न्दियस्स उक्कोसिया उवओगद्धा विसेसाहिया ॥ ४४८ ॥ कइविहा णं भंते ! इंदिय-  
ओगाहणा पन्नत्ता ? गोयमा ! पंचविहा इंदियओगाहणा पन्नत्ता । तंजहा-सोइंदिय-  
ओगाहणा जाव फासिंदियओगाहणा, एवं नेरइयाणं जाव वेमाणियाणं, नवरं जस्स  
जइ इंदिया अत्थि० ६ ॥ ४४९ ॥ कइविहे णं भंते ! इंदियअवाए पन्नत्ते ? गोयमा !  
पंचविहे इंदियअवाए पन्नत्ते । तंजहा-सोइंदियअवाए जाव फासिंदियअवाए । एवं  
नेरइयाणं जाव वेमाणियाणं, नवरं जस्स जइ इंदिया अत्थि० ७ । कइविहा णं भंते !  
इहा पन्नत्ता ? गोयमा ! पंचविहा इहा पन्नत्ता । तंजहा-सोइंदियइहा जाव फासि-  
दियइहा । एवं जाव वेमाणियाणं, नवरं जस्स जइ इंदिया० ८ । कइविहे णं भंते !  
उग्गहे पन्नत्ते ? गोयमा ! दुविहे उग्गहे पन्नत्ते । तंजहा-अत्थोग्गहे य वंजणोग्गहे  
य । वंजणोग्गहे णं भंते ! कइविहे पन्नत्ते ? गोयमा ! चउव्विहे पन्नत्ते । तंजहा-

सोईदियवंजणोग्गहे, घाणिंदियवंजणोग्गहे, जिब्भंदियवंजणोग्गहे, फासिंदियवंजणोग्गहे । अत्थोग्गहे णं भंते ! कइविहे पन्नत्ते ? गोयमा ! छव्विहे पन्नत्ते । तंजहा-सोईदियअत्थोग्गहे, चर्खिंदियअत्थोग्गहे, घाणिंदियअत्थोग्गहे, जिब्भंदियअत्थोग्गहे, फासिंदियअत्थोग्गहे, नोईदियअत्थोग्गहे ॥ ४५० ॥ नेरइयाणं भंते ! कइविहे उग्गहे पन्नत्ते ? गोयमा ! दुविहे उग्गहे पन्नत्ते । तंजहा-अत्थोग्गहे य वंजणोग्गहे य । एवं असुरकुमाराणं जाव थणियकुमाराणं । पुढविकाइयाणं भंते ! कइविहे उग्गहे पन्नत्ते ? गोयमा ! दुविहे उग्गहे पन्नत्ते । तं-अत्थोग्गहे य वंजणोग्गहे य । पुढविकाइयाणं भंते ! वंजणोग्गहे कइविहे पन्नत्ते ? गोयमा ! एगे फासिंदियवंजणोग्गहे पन्नत्ते । पुढविकाइयाणं भंते ! कइविहे अत्थोग्गहे पन्नत्ते ? गोयमा ! एगे फासिंदियअत्थोग्गहे पन्नत्ते । एवं जाव वणस्सइकाइयाणं । एवं बेईदियाणं वि, नवरं बेईदियाणं वंजणोग्गहे दुविहे पन्नत्ते, अत्थोग्गहे दुविहे पन्नत्ते, एवं तेईदियचउरिंदियाणं वि, नवरं इंदियपरियुद्धी कायव्वा । चउरिंदियाणं वंजणोग्गहे ति विहे पन्नत्ते, अत्थोग्गहे चउव्विहे पन्नत्ते, सेसाणं जहा नेरइयाणं जाव वेमाणियाणं ९-१० ॥ ४५१ ॥ कइविहा णं भंते ! इंदिया पन्नत्ता ? गोयमा ! दुविहा पन्नत्ता । तंजहा-दव्विंदिया य भाविंदिया य । कइ णं भंते ! दव्विंदिया पन्नत्ता ? गोयमा ! अट्ठ दव्विंदिया पन्नत्ता । तंजहा-दो सोत्ता, दो पेत्ता, दो घाणा, जीहा, फासे । नेरइयाणं भंते ! कइ दव्विंदिया पन्नत्ता ? गोयमा ! अट्ठ एए चेव, एवं असुरकुमाराणं जाव थणियकुमाराणं वि । पुढविकाइयाणं भंते ! कइ दव्विंदिया पन्नत्ता ? गोयमा ! एगे फासिंदिए पन्नत्ते । एवं जाव वणस्सइकाइयाणं । बेईदियाणं भंते ! कइ दव्विंदिया पन्नत्ता ? गोयमा ! दो दव्विंदिया पन्नत्ता । तंजहा-फासिंदिए य जिब्भिंदिए य । तेईदियाणं पुच्छा । गोयमा ! चत्तारि दव्विंदिया पन्नत्ता । तंजहा-दो घाणा, जीहा, फासे । चउरिंदियाणं पुच्छा । गोयमा ! छ दव्विंदिया पन्नत्ता । तंजहा-दो पेत्ता, दो घाणा, जीहा, फासे । सेसाणं जहा नेरइयाणं जाव वेमाणियाणं ॥ ४५२ ॥ एगमेगस्स णं भंते ! नेरइयस्स केवइया दव्विंदिया अतीता ? गोयमा ! अणंता । केवइया बद्धेळगा ? गोयमा ! अट्ठ । केवइया पुरेक्खडा ? गोयमा ! अट्ठ वा सोलस वा सत्तरस वा संखेज्जा वा असंखेज्जा वा अणंता वा । एगमेगस्स णं भंते ! असुरकुमारस्स केवइया दव्विंदिया अतीता ? गोयमा ! अणंता । केवइया बद्धेळगा ? गो० । अट्ठ । केवइया पुरेक्खडा ? गो० ! अट्ठ वा नव वा सत्तरस वा संखेज्जा वा असंखेज्जा वा अणंता वा । एवं जाव थणियकुमाराणं ताव भाणियव्वं । एवं पुढविकाइया आउकाइया वणस्सइकाइया वि, नवरं केवइया बद्धेळगत्ति पुच्छाए उत्तरं एक्के फासि-

दियद्विदिए । एवं तेउकाइयवाउकाइयस्स वि, नवरं पुरेक्खडा नव वा दस वा । एवं बेइंदियाण वि, नवरं बद्धेळ्ळगपुच्छाए दोण्णि । एवं तेइंदियस्स वि, नवरं बद्धे-  
 ळ्ळगा चत्तारि । एवं चउरिंदियस्स वि, नवरं बद्धेळ्ळगा छ । पंचिंदियतिरिक्खजोणिय-  
 मणूसवाणमंतरजोइसियसोहम्मीसाणगदेवस्स जहा असुरकुमारस्स, नवरं मणूसस्स  
 पुरेक्खडा कस्सइ अत्थि कस्सइ णत्थि, जस्सत्थि अट्ठ वा नव वा संखेज्जा वा असं-  
 खेज्जा वा अणंता वा । सणकुमारमाहिंदवंभलंतगलुक्कसहस्सारआणयपाणयआरणअ-  
 च्चुयगेवेज्जगदेवस्स य जहा नेरइयस्स । एगमेगस्स णं भंते ! विजयवेज्जयंतजयंतअप-  
 राजियदेवस्स केवइया दव्विदिया अतीता ? गोयमा ! अणंता, केवइया बद्धेळ्ळगा ?  
 गो० ! अट्ठ, केवइया पुरेक्खडा ? गो० ! अट्ठ वा सोलस वा चउवीसा वा संखेज्जा  
 वा, सव्वट्ठसिद्धगदेवस्स अतीता अणंता, बद्धेळ्ळगा अट्ठ, पुरेक्खडा अट्ठ । नेरइयाणं  
 भंते ! केवइया दव्विदिया अतीता ? गोयमा ! अणंता, केवइया बद्धेळ्ळगा ? गोयमा !  
 असंखेज्जा, केवइया पुरेक्खडा ? गोयमा ! अणंता । एवं जाव गेवेज्जगदेवाणं, नवरं  
 मणूसाणं बद्धेळ्ळगा सिय संखेज्जा, सिय असंखेज्जा । विजयवेज्जयंतजयंतअपराजियदे-  
 वाणं पुच्छा । गोयमा ! अतीता अणंता, बद्धेळ्ळगा असंखेज्जा, पुरेक्खडा असंखेज्जा ।  
 सव्वट्ठसिद्धगदेवाणं पुच्छा । गोयमा ! अतीता अणंता, बद्धेळ्ळगा संखेज्जा, पुरेक्खडा  
 संखेज्जा ॥ ४५३ ॥ एगमेगस्स णं भंते ! नेरइयस्स नेरइयत्ते केवइया दव्विदिया  
 अतीता ? गोयमा ! अणंता, केवइया बद्धेळ्ळगा ? गोयमा ! अट्ठ, केवइया पुरेक्खडा ?  
 गोयमा ! कस्सइ अत्थि कस्सइ नत्थि, जस्सत्थि अट्ठ वा सोलस वा चउवीसा  
 वा संखेज्जा वा असंखेज्जा वा अणंता वा । एगमेगस्स णं भंते ! नेरइयस्स  
 असुरकुमारत्ते केवइया दव्विदिया अतीता ? गोयमा ! अणंता, केवइया बद्धेळ्ळगा ?  
 गोयमा ! णत्थि, केवइया पुरेक्खडा ? गोयमा ! कस्सइ अत्थि कस्सइ नत्थि,  
 जस्सत्थि अट्ठ वा सोलस वा चउवीसा वा संखेज्जा वा असंखेज्जा वा अणंता वा ।  
 एवं जाव थणियकुमारत्ति । एगमेगस्स णं भंते ! नेरइयस्स पुढविकाइयत्ते केवइया  
 दव्विदिया अतीता ? गोयमा ! अणंता, केवइया बद्धेळ्ळगा ? गोयमा ! णत्थि,  
 केवइया पुरेक्खडा ? गोयमा ! कस्सइ अत्थि कस्सइ नत्थि, जस्सत्थि एक्को वा दो  
 वा तिण्णि वा संखेज्जा वा असंखेज्जा वा अणंता वा, एवं जाव वणस्सइकाइयत्ते ।  
 एगमेगस्स णं भंते ! नेरइयस्स बेइन्दियत्ते केवइया दव्विदिया अतीता ? गोयमा !  
 अणंता, केवइया बद्धेळ्ळगा ? गोयमा ! णत्थि, केवइया पुरेक्खडा ? गोयमा !  
 कस्सइ अत्थि कस्सइ नत्थि, जस्सत्थि दो वा चत्तारि वा संखेज्जा वा असंखेज्जा वा  
 अणंता वा । एवं तेइन्दियत्ते वि, नवरं पुरेक्खडा चत्तारि वा अट्ठ वा बारस वा



संखेज्जा वा असंखेज्जा वा अणंता वा । एवं चउरिंदियत्ते वि, नवरं पुरेक्खडा छ वा वारस वा अट्टारस वा संखेज्जा वा असंखेज्जा वा अणंता वा । पंचिंदियतिरिक्ख-जोणियत्ते जहा असुरकुमारत्ते । मणूसत्ते वि एवं चेव नवरं केवइया पुरेक्खडा ? गो० । अट्ट वा सोलस वा चउवीसा वा संखेज्जा वा असंखेज्जा वा अणंता वा । सव्वेसिं मणूसवज्जाणं पुरेक्खडा मणूसत्ते कस्सइ अत्थि कस्सइ नत्थि एवं न वुच्चइ । वाण-मंतरजोइसियसोहम्मग जाव गेवेज्जगदेवत्ते अतीता अणंता, बद्धेज्जगा नत्थि, पुरे-क्खडा कस्सइ अत्थि कस्सइ नत्थि, जस्स अत्थि अट्ट वा सोलस वा चउवीसा वा संखेज्जा वा असंखेज्जा वा अणंता वा । एगमेगस्स णं भंते ! नेरइयस्स विजयवेजयं-तजयंतअपराजियदेवत्ते केवइया दव्विंदिया अतीता ? गो० । णत्थि, केवइया पुरे-क्खडा ? गो० । कस्सइ अत्थि कस्सइ नत्थि, जस्स अत्थि अट्ट वा सोलस वा, सव्वट्ठसिद्धगदेवत्ते अतीता णत्थि, बद्धेज्जगा णत्थि, पुरेक्खडा कस्सइ अत्थि कस्सइ णत्थि, जस्स अत्थि अट्ट । एवं जहा नेरइयदंडओ नीओ तथा असुरकुमारेण वि नेयव्वो जाव पंचिंदियतिरिक्खजोणिएणं, नवरं जस्स सट्ठाणे जइ बद्धेज्जगा तस्स तइ भाणियव्वा ॥ ४५४ ॥ एगमेगस्स णं भंते ! मणूसस्स नेरइयत्ते केवइया दव्विंदिया अतीता ? गोयसा ! अणंता, केवइया बद्धेज्जगा ? गो० । णत्थि, केवइया पुरेक्खडा ? गो० । कस्सइ अत्थि कस्सइ नत्थि, जस्सत्थि अट्ट वा सोलस वा चउवीसा वा संखेज्जा वा असंखेज्जा वा अणंता वा । एवं जाव पंचिंदियतिरिक्खजोणियत्ते, नवरं एगिंदियविगल्लिंदिएसु जस्स जइ पुरेक्खडा तस्स तत्तिथा भाणियव्वा । एगमेगस्स णं भंते ! मणूसस्स मणूसत्ते केवइया दव्विंदिया अतीता ? गोयसा ! अणंता, केवइया बद्धेज्जगा ? गोयसा ! अट्ट, केवइया पुरेक्खडा ? गो० । कस्सइ अत्थि कस्सइ नत्थि, जस्सत्थि अट्ट वा सोलस वा चउवीसा वा संखेज्जा वा असंखेज्जा वा अणंता वा । वाणमंतरजोइसिय जाव गेवेज्जगदेवत्ते जहा नेरइयत्ते । एगमेगस्स णं भंते ! मणूसस्स विजयवेजयंतजयंतअपराजियदेवत्ते केवइया दव्विंदिया अतीता ? गोयसा ! कस्सइ अत्थि कस्सइ नत्थि, जस्स अत्थि अट्ट वा सोलस वा । केवइया बद्धेज्जगा ? गो० । नत्थि, केवइया पुरेक्खडा ? गो० । कस्सइ अत्थि कस्सइ नत्थि, जस्सत्थि अट्ट वा सोलस वा । एगमेगस्स णं भंते ! मणूसस्स सव्वट्ठसिद्धगदेवत्ते केवइया दव्विंदिया अतीता ? गोयसा ! कस्सइ अत्थि कस्सइ नत्थि, जस्सत्थि अट्ट, केवइया बद्धेज्जगा ? गो० । णत्थि, केवइया पुरेक्खडा ? गो० । कस्सइ अत्थि कस्सइ नत्थि, जस्स अत्थि अट्ट । वाणमंतरजोइसिए जहा नेरइए । सोहम्मगदेवे वि जहा नेरइए, नवरं सोहम्मगदेवस्स विजयवेजयंतजयंतअपराजियत्ते केवइया अतीता ?

गोयमा ! कस्सइ अत्थि कस्सइ नत्थि, जस्स अत्थि अट्ठ, केवइया बद्धेळ्ळा ? गो० !  
 णत्थि, केवइया पुरेक्खडा ? गोयमा ! कस्सइ अत्थि कस्सइ नत्थि, जस्स अत्थि अट्ठ  
 वा सोलस वा । सव्वट्ठसिद्धगदेवत्ते जहा नेरइयस्स, एवं जाव गेवेज्जगदेवस्स सव्वट्ठ-  
 सिद्धगदेवत्ते ताव णेयव्वं ॥ ४५५ ॥ एगमेगस्स णं भंते ! विजयवेजयंतजयंतापराजि-  
 यदेवस्स नेरइयत्ते केवइया दव्विदिया अतीता ? गोयमा ! अणंता, केवइया बद्धेळ्ळा ?  
 गो० ! णत्थि, केवइया पुरेक्खडा ? गो० ! णत्थि । एवं जाव पंचिंदियतिरिक्खजोणियत्ते ।  
 मणूसत्ते अतीता अणंता, बद्धेळ्ळा णत्थि, पुरेक्खडा अट्ठ वा सोलस वा चउवीसा  
 वा संखेज्जा वा । वाणमंतरजोइसियत्ते जहा नेरइयत्ते । सोहम्मगदेवत्तेऽतीता अणंता,  
 बद्धेळ्ळा णत्थि, पुरेक्खडा कस्सइ अत्थि कस्सइ नत्थि, जस्स अत्थि अट्ठ वा  
 सोलस वा चउवीसा वा संखेज्जा वा । एवं जाव गेवेज्जगदेवत्ते । विजयवेजयंतजयंत-  
 अपराजियदेवत्ते अतीता कस्सइ अत्थि कस्सइ नत्थि, जस्स अत्थि अट्ठ, केवइया बद्धे-  
 ळ्ळा ? गो० ! अट्ठ, केवइया पुरेक्खडा ? गो० ! कस्सइ अत्थि कस्सइ नत्थि, जस्स अत्थि  
 अट्ठ । एगमेगस्स णं भंते ! विजयवेजयंतजयंतअपराजियदेवस्स सव्वट्ठसिद्धगदेवत्ते  
 केवइया दव्विदिया अतीता ? गोयमा ! णत्थि, केवइया बद्धेळ्ळा ? गो० ! नत्थि, केवइया  
 पुरेक्खडा ? गो० ! कस्सइ अत्थि कस्सइ णत्थि, जस्स अत्थि अट्ठ । एगमेगस्स णं भंते !  
 सव्वट्ठसिद्धगदेवस्स नेरइयत्ते केवइया दव्विदिया अतीता ? गोयमा ! अणंता, केवइया  
 बद्धेळ्ळा ? गो० ! णत्थि, केवइया पुरेक्खडा ? गो० ! णत्थि । एवं मणूसवज्जं जाव  
 गेवेज्जगदेवत्ते, नवरं मणूसत्ते अतीता अणंता, केवइया बद्धेळ्ळा ? गो० ! णत्थि, केवइया  
 पुरेक्खडा ? ० अट्ठ । विजयवेजयंतजयंतअपराजियदेवत्ते अतीता कस्सइ अत्थि कस्सइ  
 नत्थि, जस्स अत्थि अट्ठ, केवइया बद्धेळ्ळा ? गो० ! णत्थि, केवइया पुरेक्खडा ? गो० !  
 णत्थि । एगमेगस्स णं भंते ! सव्वट्ठसिद्धगदेवस्स सव्वट्ठसिद्धगदेवत्ते केवइया दव्विदिया  
 अतीता ? गोयमा ! णत्थि, केवइया बद्धेळ्ळा ? गो० ! अट्ठ, केवइया पुरेक्खडा ? गो० !  
 णत्थि ॥ ४५६ ॥ नेरइयाणं भंते ! नेरइयत्ते केवइया दव्विदिया अतीता ? गोयमा !  
 अणंता, केवइया बद्धेळ्ळा ? गो० ! असंखेज्जा, केवइया पुरेक्खडा ? गो० ! अणंता । नेरइ-  
 याणं भंते ! असुरकुमारत्ते केवइया दव्विदिया अतीता ? गोयमा ! अणंता, केवइया बद्धे-  
 ळ्ळा ? गो० ! णत्थि, केवइया पुरेक्खडा ? गो० ! अणंता, एवं जाव गेवेज्जगदेवत्ते । नेर-  
 इयाणं भंते ! विजयवेजयंतजयंतअपराजियदेवत्ते केवइया दव्विदिया अतीता ? ० नत्थि,  
 केवइया बद्धेळ्ळा ? ० णत्थि, केवइया पुरेक्खडा ? ० असंखेज्जा, एवं सव्वट्ठसिद्धगदेवत्ते  
 वि, एवं जाव पंचिंदियतिरिक्खजोणिया सव्वट्ठसिद्धगदेवत्ते भाणियव्वं, नवरं वण-  
 स्सइकाइयाणं विजयवेजयंतजयंतअपराजियदेवत्ते सव्वट्ठसिद्धगदेवत्ते य पुरेक्खडा

अणंता, सव्वेसिं मणूससव्वट्टसिद्धगवज्जाणं सट्ठाणे बद्धेळ्ळा अंसंखेज्जा, परट्ठाणे बद्धेळ्ळा गत्थि । वणस्सइकाइयाणं बद्धेळ्ळा अणंता । मणूसाणं नेरइयत्ते अतीता अणंता, बद्धेळ्ळा गत्थि, पुरेक्खडा अणंता । एवं जाव गेवेज्जगदेवत्ते, नवरं सट्ठाणे अतीता अणंता, बद्धेळ्ळा सिय संखेज्जा सिय असंखेज्जा, पुरेक्खडा अणंता । मणूसाणं भंते ! विजयवेज्जयंतजयंतअपराजियदेवत्ते केवइया दव्विदिया अतीता ?० संखेज्जा, केवइया बद्धेळ्ळा ?० गत्थि, केवइया पुरेक्खडा ?० सिय संखेज्जा सिय असंखेज्जा । एवं सव्वट्टसिद्धगदेवत्ते अतीता गत्थि, बद्धेळ्ळा गत्थि, पुरेक्खडा असंखेज्जा, एवं जाव गेवेज्जगदेवाणं । विजयवेज्जयंतजयंतअपराजियदेवाणं भंते ! नेरइयत्ते केवइया दव्विदिया अतीता ? गोयमा ! अणंता, केवइया बद्धेळ्ळा ?० गत्थि, केवइया पुरेक्खडा ?० गत्थि । एवं जाव जोइसियत्ते वि, नवरं मणूसत्ते अतीता अणंता, केवइया बद्धेळ्ळा ?० गत्थि, पुरेक्खडा असंखेज्जा । एवं जाव गेवेज्जगदेवत्ते सट्ठाणे अतीता असंखेज्जा, केवइया बद्धेळ्ळा ?० असंखेज्जा, केवइया पुरेक्खडा ?० असंखेज्जा । सव्वट्टसिद्धगदेवत्ते अतीता नत्थि, बद्धेळ्ळा नत्थि, पुरेक्खडा असंखेज्जा । सव्वट्टसिद्धगदेवाणं भंते ! नेरइयत्ते केवइया दव्विदिया अतीता ? गोयमा ! अणंता, केवइया बद्धेळ्ळा ?० नत्थि, केवइया पुरेक्खडा ?० गत्थि । एवं मणूसवज्जं ताव गेवेज्जगदेवत्ते । मणूसत्ते अतीता अणंता, बद्धेळ्ळा नत्थि, पुरेक्खडा संखेज्जा । विजयवेज्जयंतजयंतअपराजियदेवत्ते केवइया दव्विदिया अतीता ?० संखेज्जा, केवइया बद्धेळ्ळा ?० गत्थि, केवइया पुरेक्खडा ?० गत्थि । सव्वट्टसिद्धगदेवाणं भंते ! सव्वट्टसिद्धगदेवत्ते केवइया दव्विदिया अतीता ?० गत्थि, केवइया बद्धेळ्ळा ?० संखेज्जा, केवइया पुरेक्खडा ? गो० ! गत्थि ११ ॥ ४५७ ॥ कइ णं भंते ! भाविंदिया पन्नत्ता ? गोयमा ! पंच भाविंदिया पन्नत्ता । तंजहा—सोईदिए जाव फासिंदिए । नेरइयाणं भंते ! कइ भाविंदिया पन्नत्ता ? गोयमा ! पंच भाविंदिया पन्नत्ता । तंजहा—सोईदिए जाव फासिंदिए । एवं जस्स जइ इंदिया तस्स तइ भाणियव्वा जाव वेमाणियाणं । एगमेगस्स णं भंते ! नेरइयस्स केवइया भाविंदिया अतीता ? गोयमा ! अणंता, केवइया बद्धेळ्ळा ?० पंच, केवइया पुरेक्खडा ?० पंच वा दस वा एक्कारस वा संखेज्जा वा असंखेज्जा वा अणंता वा । एवं असुरकुमारस्स वि, नवरं पुरेक्खडा पंच वा छ वा संखेज्जा वा असंखेज्जा वा अणंता वा । एवं जाव थणियकुमारस्स वि । एवं पुठविकाइयआउकाइयवणस्सइकाइयस्स वि, बेइंदियतेइंदियचउरिंदियस्स वि । तेउकाइयवाउकाइयस्स वि एवं चेव, नवरं पुरेक्खडा छ वा सत्त वा संखेज्जा वा असंखेज्जा वा अणंता वा । पंचिंदियतिरिक्ख-जोणियस्स जाव ईसाणस्स जहा असुरकुमारस्स, नवरं मणूसस्स पुरेक्खडा कस्सइ

अत्थि कस्सइ नत्थित्ति भाणियव्वं । सणकुमार जाव गेवेज्जगस्स जहा नेरइयस्स । विजयवेज्जयंतजयंतअपराजियदेवस्स अतीता अणंता, बद्धेळ्ळगा पंच, पुरेक्खडा पंच वा दस वा पण्णरस वा संखेज्जा वा । सव्वट्ठसिद्धगदेवस्स अतीता अणंता, बद्धेळ्ळगा पंच, केवइया पुरेक्खडा ?० पंच । नेरइयाणं भंते ! केवइया भाविंदिया अतीता ? गोयमा ! अणंता, केवइया बद्धेळ्ळगा ?० असंखेज्जा, केवइया पुरेक्खडा ?० अणंता । एवं जहा दव्विदिएसु पोहत्तेणं दंडओ भणिओ तहा भाविंदिएसु वि पोहत्तेणं दंडओ भाणियव्वो, नवरं वणस्सइकाइयाणं बद्धेळ्ळगा अणंता ॥ ४५८ ॥ एगमेगस्स णं भंते ! नेरइयस्स नेरइयत्ते केवइया भाविंदिया अतीता ? गोयमा ! अणंता, के० बद्धे-  
 ळ्ळगा ?० पंच, पुरेक्खडा कस्सइ अत्थि कस्सइ नत्थि, जस्स अत्थि पंच वा दस वा पण्णरस वा संखेज्जा वा असंखेज्जा वा अणंता वा । एवं असुरकुमाराणं जाव थणियकुमाराणं, नवरं बद्धेळ्ळगा नत्थि । पुढविकाइयत्ते जाव वेइंदियत्ते जहा दव्वि-  
 दिया । तेइंदियत्ते तहेव, णवरं पुरेक्खडा तिण्णि वा छ वा णव वा संखेज्जा वा असंखेज्जा वा अणंता वा । एवं चउरिंदियत्ते वि, नवरं पुरेक्खडा चत्तारि वा अट्ठ वा बारस वा संखेज्जा वा असंखेज्जा वा अणंता वा । एवं एए चेव गमा चत्तारि जाणे-  
 यव्वा जे चेव दव्विदिएसु, णवरं तइयगमे जाणियव्वा जस्स जइ इंदिया ते पुरेक्खडेसु मुण्येव्वा । चउत्थगमे जहेव दव्विदिया जाव सव्वट्ठसिद्धगदेवाणं सव्वट्ठसिद्धगदेवत्ते केवइया भाविंदिया अतीता ?० नत्थि, के० बद्धेळ्ळगा ?० संखेज्जा, के० पुरेक्खडा ?० णत्थि ॥ ४५९ ॥ **समत्तो बीओ उइसो ॥ पन्नवणाए भगवईए पन्नरसमं इन्दियपयं समत्तं ॥**

कइविहे णं भंते ! पओगे पन्नत्ते ? गोयमा ! पण्णरसविहे पओगे पन्नत्ते । तंजहा—  
 सच्चमणप्पओगे १, असच्चमणप्पओगे २, सच्चामोसमणप्पओगे ३, असच्चामोसमण-  
 प्पओगे ४, एवं वइप्पओगे वि चउहा ८, ओरालियसरीरकायप्पओगे ९, ओरालि-  
 यमीससरीरकायप्पओगे १०, वेउव्वियसरीरकायप्पओगे ११, वेउव्वियमीससरीर-  
 कायप्पओगे १२, आहारगसरीरकायप्पओगे १३, आहारगमीससरीरकायप्पओगे  
 १४, कम्मासरीरकायप्पओगे १५ ॥ ४६० ॥ जीवाणं भंते ! कइविहे पओगे  
 पण्णत्ते ? गोयमा ! पण्णरसविहे प० पण्णत्ते । तंजहा—सच्चमणप्पओगे जाव कम्मासरी-  
 रकायप्पओगे । नेरइयाणं भंते ! कइविहे पओगे पण्णत्ते ? गोयमा ! एकारसविहे  
 पओगे पण्णत्ते । तंजहा—सच्चमणप्पओगे जाव असच्चामोसवइप्पओगे, वेउव्वियसरी-  
 रकायप्पओगे, वेउव्वियमीससरीरकायप्पओगे, कम्मासरीरकायप्पओगे । एवं असुर-  
 कुमाराण वि जाव थणियकुमाराणं । पुढविकाइयाणं पुच्छा । गोयमा ! तिविहे पओगे

पन्नते । तंजहा—ओरालियसरीरकायप्पओगे, ओरालियमीससरीरकायप्पओगे, कम्मासरीरकायप्पओगे य । एवं जाव वणस्सइकाइयाणं, नवरं वाउकाइयाणं पञ्च-विहे पओगे पन्नते । तंजहा—ओरालिय० कायप्पओगे, ओरालियमीससरीरकायप्पओगे, वेउव्विए दुविहे, कम्मासरीरकायप्पओगे य । वेइंदियाणं पुच्छा । गोयमा ! चउव्विहे पओगे पन्नते । तंजहा—असच्चाभोसवइप्पओगे, ओरालियसरीरकायप्पओगे, ओरालियमिस्ससरीरकायप्पओगे, कम्मासरीरकायप्पओगे । एवं जाव चउरिंदियाणं । पंचिंदियतिरिक्खजोणियाणं पुच्छा । गोयमा ! तेरसविहे पओगे पन्नते । तंजहा—सच्चमणप्पओगे, मोसमणप्पओगे, सच्चाभोसमणप्पओगे, असच्चाभोसमणप्पओगे, एवं वइप्पओगे वि, ओरालियसरीरकायप्पओगे, ओरालियमीससरीरकायप्पओगे, वेउव्वियसरीरकायप्पओगे, वेउव्वियमीससरीरकायप्पओगे, कम्मासरीरकायप्पओगे । मणसाणं पुच्छा । गोयमा ! पणरसविहे पओगे पन्नते । तंजहा—सच्चमणप्पओगे जाव कम्मासरीरकायप्पओगे । वाणमंतरजोइसियवेमाणियाणं जहा नेरइयाणं ॥ ४६१ ॥ जीवा णं भंते ! किं सच्चमणप्पओगी जाव कम्मासरीरकायप्पओगी ? गोयमा ! जीवा सव्वे वि ताव होज्जा सच्चमणप्पओगी वि जाव वेउव्वियमीससरीरकायप्पओगी वि कम्मासरीरकायप्पओगी वि १३ । अहवेगे य आहारगसरीरकायप्पओगी य १, अहवेगे य आहारगसरीरकायप्पओगिणो य २, अहवेगे य आहारगमीससरीरकायप्पओगी य ३, अहवेगे य आहारगमीससरीरकायप्पओगिणो य ४ चउभज्जो । अहवेगे य आहारगसरीरकायप्पओगी य आहारगमीससरीरकायप्पओगी य १, अहवेगे य आहारगसरीरकायप्पओगी य आहारगमीससरीरकायप्पओगिणो य २, अहवेगे य आहारगसरीरकायप्पओगिणो य आहारगमीससरीरकायप्पओगी य ३, अहवेगे य आहारगसरीरकायप्पओगिणो य आहारगमीससरीरकायप्पओगिणो य ४, एए जीवाणं अट्ठ १ ॥ ४६२ ॥ नेरइया णं भंते ! किं सच्चमणप्पओगी जाव कम्मासरीरकायप्पओगी ११ ? गोयमा ! नेरइया सव्वे वि ताव होज्जा सच्चमणप्पओगी वि जाव वेउव्वियमीससरीरकायप्पओगी वि, अहवेगे य कम्मासरीरकायप्पओगी य १, अहवेगे य कम्मासरीरकायप्पओगिणो य २, एवं असुरकुमारा वि जाव थणियकुमाराणं । पुढविकाइया णं भंते ! किं ओरालियसरीरकायप्पओगी ओरालियमीससरीरकायप्पओगी कम्मासरीरकायप्पओगी ? गोयमा ! पुढविकाइया ओरालियसरीरकायप्पओगी वि ओरालियमीससरीरकायप्पओगी वि कम्मासरीरकायप्पओगी वि, एवं जाव वणप्फइकाइयाणं । णवरं वाउकाइया वेउव्वियसरीरकायप्पओगी वि वेउव्वियमीससरीरकायप्पओगी वि । वेइंदि-

या णं भंते ! किं ओरालियसरीरकायप्पओगी जाव कम्मासरीरकायप्पओगी ? गोयमा ! वेइन्दिया सव्वे वि ताव होज्जा असच्चासोसवइप्पओगी वि ओरालियसरीरकायप्पओगी वि ओरालियमीससरीरकायप्पओगी वि, अहवेगे य कम्मासरीरकायप्पओगी वि, अहवेगे य कम्मासरीरकायप्पओगिणो य, एवं जाव चउरिंदिया वि । पंचिंदियतिरिक्खजोणिया जहा नेरइया, नवरं ओरालियसरीरकायप्पओगी वि, ओरालियमीसासरीरकायप्पओगी वि, अहवेगे य कम्मासरीरकायप्पओगी य अहवेगे य कम्मासरीरकायप्पओगिणो य ॥ ४६३ ॥ मणूसा णं भंते ! किं सच्चमणप्पओगी जाव कम्मासरीरकायप्पओगी ? गोयमा ! मणूसा सव्वे वि ताव होज्जा सच्चमणप्पओगी वि जाव ओरालियसरीरकायप्पओगी वि, वेउव्वियसरीरकायप्पओगी वि, वेउव्वियमीससरीरकायप्पओगी वि, अहवेगे य ओरालियमीसासरीरकायप्पओगी य, अहवेगे य ओरालियमीसासरीरकायप्पओगिणो य २, अहवेगे य आहारगसरीरकायप्पओगी य, अहवेगे य आहारगसरीरकायप्पओगिणो य २, अहवेगे य आहारगमीसासरीरकायप्पओगी य, अहवेगे य आहारगमीसासरीरकायप्पओगिणो य २, अहवेगे य कम्मगसरीरकायप्पओगी य, अहवेगे य कम्मगसरीरकायप्पओगिणो य २, एए अट्ठ भंगा पत्तेयं । अहवेगे य ओरालियमीससरीरकायप्पओगी य आहारगसरीरकायप्पओगी य १, अहवेगे य ओरालियमीसासरीरकायप्पओगी य आहारगसरीरकायप्पओगिणो य २, अहवेगे य ओरालियमीसासरीरकायप्पओगिणो य आहारगमीसासरीरकायप्पओगी य ३, अहवेगे य ओरालियमीसासरीरकायप्पओगिणो य आहारगसरीरकायप्पओगिणो य ४ एवं एए चत्तारि भंगा, अहवेगे य ओरालियमीसासरीरकायप्पओगी य आहारगमीसासरीरकायप्पओगी य १, अहवेगे य ओरालियमीसासरीरकायप्पओगी य आहारगमीसासरीरकायप्पओगिणो य २, अहवेगे य ओरालियमीसासरीरकायप्पओगिणो य आहारगमीसासरीरकायप्पओगी य ३, अहवेगे य ओरालियमीसासरीरकायप्पओगिणो य आहारगमीसासरीरकायप्पओगिणो य ४ चत्तारि भंगा, अहवेगे य ओरालियमीसासरीरकायप्पओगी य कम्मासरीरकायप्पओगी य १, अहवेगे य ओरालियमीसासरीरकायप्पओगी य कम्मासरीरकायप्पओगिणो य २, अहवेगे ओरालियमीसासरीरकायप्पओगिणो य कम्मासरीरकायप्पओगी य ३, अहवेगे ओरालियमीसासरीरकायप्पओगिणो य कम्मासरीरकायप्पओगिणो य ४ एए चत्तारि भंगा, अहवेगे य आहारगसरीरकायप्पओगी य आहारगमीसासरीरकायप्पओगी य १, अहवेगे य आहारगसरीरकायप्पओगी य आहारगमीसासरीरकायप्पओगिणो य २, अहवेगे य आहारगमीसासरीरकायप्पओगी य ३, अहवेगे य



य ६, अहवेगे य ओरालियमीसासरीरकायप्पओणिणो य आहारगसरीरकायप्प-  
ओणिणो य कम्मगसरीरकायप्पओगी य ७, अहवेगे य ओरालियमीसासरीर-  
कायप्पओणिणो य आहारगसरीरकायप्पओणिणो य कम्मगसरीरकायप्पओणिणो य  
८, अहवेगे य ओरालियमीसासरीरकायप्पओगी य आहारगमीसासरीरकायप्प-  
ओगी य कम्मगसरीरकायप्पओगी य ९, अहवेगे य ओरालियमीसासरीरकाय-  
प्पओगी य आहारगमीसासरीरकायप्पओगी य कम्मगसरीरकायप्पओणिणो य  
२, अहवेगे य ओरालियमीसासरीरकायप्पओगी य आहारगमीसासरीरकायप्प-  
ओणिणो य कम्मगसरीरकायप्पओगी य ३, अहवेगे य ओरालियमीसासरीरकाय-  
प्पओगी य आहारगमीसासरीरकायप्पओणिणो य कम्मगसरीरकायप्पओणिणो य  
४, अहवेगे य ओरालियमीसासरीरकायप्पओणिणो य आहारगमीसासरीरकायप्प-  
ओगी य कम्मगसरीरकायप्पओणिणो य ५, अहवेगे य ओरालियमीसासरीरकायप्प-  
ओणिणो य आहारगमीसासरीरकायप्पओगी य कम्मगसरीरकायप्पओगी य ६,  
अहवेगे य ओरालियमीसासरीरकायप्पओणिणो य आहारगमीसासरीरकायप्पओणिणो  
य कम्मगसरीरकायप्पओगी य ७, अहवेगे य ओरालियमीसासरीरकायप्पओणिणो  
य आहारगमीसासरीरकायप्पओणिणो य कम्मगसरीरकायप्पओणिणो य ८, अहवेगे  
य आहारगसरीरकायप्पओगी य आहारगमीसासरीरकायप्पओगी य कम्मासरीर-  
कायप्पओगी य ९, अहवेगे य आहारगसरीरकायप्पओगी य आहारगमीसासरीर-  
कायप्पओगी य कम्मासरीरकायप्पओणिणो य २, अहवेगे य आहारगसरीरकायप्प-  
ओगी य आहारगमीसासरीरकायप्पओणिणो य कम्मगसरीरकायप्पओगी य ३,  
अहवेगे य आहारगसरीरकायप्पओगी य आहारगमीसासरीरकायप्पओणिणो य  
कम्मासरीरकायप्पओणिणो य ४, अहवेगे य आहारगसरीरकायप्पओणिणो य  
आहारगमीसासरीरकायप्पओगी य कम्मासरीरकायप्पओगी य ५, अहवेगे य  
आहारगसरीरकायप्पओणिणो य आहारगमीसासरीरकायप्पओगी य कम्मगसरीर-  
कायप्पओणिणो य ६, अहवेगे य आहारगसरीरकायप्पओणिणो य आहारगमीसा-  
सरीरकायप्पओणिणो य कम्मासरीरकायप्पओगी य ७, अहवेगे य आहारगसरीर-  
कायप्पओणिणो य आहारगमीसासरीरकायप्पओणिणो य कम्मासरीरकायप्पओणिणो  
य ८। एवं एए तियसंजोएणं चत्तारि अट्ठ भंगा, सव्वे वि मिलिया वत्तीसं भंगा  
जाणियव्वा ३२। अहवेगे य ओरालियमिस्सासरीरकायप्पओगी य आहारगसरीर-  
कायप्पओगी य आहारगमीसासरीरकायप्पओगी य कम्मासरीरकायप्पओगी य  
९, अहवेगे य ओरालियमीसासरीरकायप्पओगी य आहारगसरीरकायप्पओगी य



आहारगमीसासरीरकायप्पओगी य कम्मासरीरकायप्पओगिणो य २, अह्वेगे य ओरालियमीसासरीरकायप्पओगी य आहारगसीरकायप्पओगी य आहारगमीसा-  
सरीरकायप्पओगिणो य कम्मासरीरकायप्पओगी य ३, अह्वेगे य ओरालिय-  
मीसासरीरकायप्पओगी य आहारगसीरकायप्पओगी य आहारगमीसासरीरकाय-  
प्पओगिणो य कम्मासरीरकायप्पओगिणो य ४, अह्वेगे य ओरालियमीसास-  
रीरकायप्पओगी य आहारगसीरकायप्पओगिणो य आहारगमीसासरीरकायप्प-  
ओगी य कम्मासरीरकायप्पओगी य ५, अह्वेगे य ओरालियमीसासरीरकाय-  
प्पओगी य आहारगसीरकायप्पओगिणो य आहारगमीसासरीरकायप्पओगी य  
कम्मासरीरकायप्पओगिणो य ६, अह्वेगे य ओरालियमीसासरीरकायप्पओगी य  
आहारगसीरकायप्पओगिणो य आहारगमीसासरीरकायप्पओगिणो य कम्मास-  
रीरकायप्पओगी य ७, अह्वेगे य ओरालियमीसासरीरकायप्पओगी य आहारग-  
सरीरकायप्पओगिणो य आहारगमीसासरीरकायप्पओगिणो य कम्मासरीरकायप्प-  
ओगिणो य ८, अह्वेगे य ओरालियमीसासरीरकायप्पओगिणो य आहारगसीर-  
कायप्पओगी य आहारगमीसासरीरकायप्पओगी य कम्मासरीरकायप्पओगी य ९,  
अह्वेगे य ओरालियमीसासरीरकायप्पओगिणो य आहारगसीरकायप्पओगी य  
आहारगमीसासरीरकायप्पओगी य कम्मासरीरकायप्पओगिणो य १०, अह्वेगे य  
ओरालियमीसासरीरकायप्पओगिणो य आहारगसीरकायप्पओगी य आहारगमी-  
सासरीरकायप्पओगिणो य कम्मासरीरकायप्पओगी य ११, अह्वेगे य ओरालिय-  
मीसासरीरकायप्पओगिणो य आहारगसीरकायप्पओगी य आहारगमीसासरीरका-  
यप्पओगिणो य कम्मासरीरकायप्पओगिणो य १२, अह्वेगे य ओरालियमीसास-  
रीरकायप्पओगिणो य आहारगसीरकायप्पओगिणो य आहारगमीसासरीरकायप्प-  
ओगी य कम्मासरीरकायप्पओगी य १३, अह्वेगे य ओरालियमीसासरीरकायप्प-  
ओगिणो य आहारगसीरकायप्पओगिणो य आहारगमीसासरीरकायप्पओगी य  
कम्मासरीरकायप्पओगिणो य १४, अह्वेगे य ओरालियमीसासरीरकायप्पओगिणो  
य आहारगसीरकायप्पओगिणो य आहारगमीसासरीरकायप्पओगिणो य कम्मासरी-  
रकायप्पओगी य १५, अह्वेगे य ओरालियमीसासरीरकायप्पओगिणो य आहारग-  
सरीरकायप्पओगिणो य आहारगमीसासरीरकायप्पओगिणो य कम्मासरीरकायप्प-  
ओगिणो य १६ एवं एए चउसंजोएणं सोलस भंगा भवन्ति, सव्वेऽवि य णं संपि-  
डिया असीइ भंगा भवन्ति । वाणमंतरजोइसवेमाणिया जहा असुरकुमारा ॥ ४६४ ॥  
कइविहे णं भत्ते ! गइप्पवाए पन्नत्ते ? गोयमा ! पंचविहे गइप्पवाए पन्नत्ते । तंजहा-

पओगगई १, ततगई २, बंधणछेयणगई ३, उववायगई ४, विहायगई ५ । से किं तं पओगगई ? पओगगई पण्णरसविहा पञ्चत्ता । तंजहा—सच्चमणप्पओगगई, एवं जहा पओगो भणिओ तथा एसा वि भाणियव्वा जाव कम्मगसरीरकायप्पओगगई । जीवाणं भंते ! कइविहा पओगगई पञ्चत्ता ? गोयमा ! पण्णरसविहा पञ्चत्ता । तंजहा—सच्चमणप्पओगगई जाव कम्मगसरीरकायप्पओगगई । नेरइयाणं भंते ! कइविहा पओगगई पञ्चत्ता ? गोयमा ! एक्कारसविहा पञ्चत्ता । तंजहा—सच्चमणप्पओगगई, एवं उवउज्जिऊण जस्स जइविहा तस्स तइविहा भाणियव्वा जाव वेमाणियाणं । जीवाणं भंते ! सच्चमणप्पओगगई जाव कम्मगसरीरकायप्पओगगई ? गोयमा ! जीवा सव्वे वि ताव होज्ज सच्चमणप्पओगगई वि, एवं तं चैव पुव्ववणिणयं भाणियव्वं, भंगा तहेव जाव वेमाणियाणं, से तं पओगगई १ ॥ ४६५ ॥ से किं तं ततगई ? ततगई जे णं जं गामं वा जाव सण्णिवेसं वा संपट्टिए असंपत्ते अंतरापहे वट्ठइ, सेतं ततगई २ ॥ ४६६ ॥ से किं तं बंधणछेयणगई ? बंधणछेयणगई जीवो वा सरीराओ सरीरं वा जीवाओ, सेतं बंधणछेयणगई ३ ॥ ४६७ ॥ से किं तं उववायगई ? उववायगई तिविहा पञ्चत्ता । तंजहा—खेत्तोववायगई, भवोववायगई, नोभवोववायगई । से किं तं खेत्तोववायगई ? खेत्तोववायगई पंचविहा पञ्चत्ता । तंजहा—नेरइयखेत्तोववायगई १, तिरिक्खजोणियखेत्तोववायगई २, मणूसखेत्तोववायगई ३, देवखेत्तोववायगई ४, सिद्धखेत्तोववायगई ५ । से किं तं नेरइयखेत्तोववायगई ? नेरइयखेत्तोववायगई सत्तविहा पञ्चत्ता । तंजहा—रयणप्पभापुढविनेरइयखेत्तोववायगई जाव अहेसत्तमापुढविनेरइयखेत्तोववायगई । सेतं नेरइयखेत्तोववायगई १ । से किं तं तिरिक्खजोणियखेत्तोववायगई ? तिरिक्खजोणियखेत्तोववायगई पंचविहा पञ्चत्ता । तंजहा—एगिंदियतिरिक्खजोणियखेत्तोववायगई जाव पंचिंदियतिरिक्खजोणियखेत्तोववायगई । सेतं तिरिक्खजोणियखेत्तोववायगई २ । से किं तं मणूसखेत्तोववायगई ? मणूसखेत्तोववायगई दुविहा पञ्चत्ता । तंजहा—संमुच्छिममणूसखेत्तोववायगई, गम्भवक्कंतियमणूसखेत्तोववायगई । सेतं मणूसखेत्तोववायगई ३ । से किं तं देवखेत्तोववायगई ? देवखेत्तोववायगई चउव्विहा पञ्चत्ता । तंजहा—भवणवई० जाव वेमाणियदेवखेत्तोववायगई । सेतं देवखेत्तोववायगई ४ ॥ ४६८ ॥ से किं तं सिद्धखेत्तोववायगई ? सिद्धखेत्तोववायगई अणेगविहा पञ्चत्ता । तंजहा—जंबुदीवे दीवे भरहेरवयवासे सपक्खि सपडिदिसिं सिद्धखेत्तोववायगई, जंबुदीवे दीवे चुल्लहिमवंतसिहरिवासहरपव्वयसपक्खि सपडिदिसिं सिद्धखेत्तोववायगई, जंबुदीवे दीवे हेमवयहेरणवाससपक्खि सपडिदिसिं सिद्धखेत्तोववायगई, जंबुदीवे दीवे सहावइवियडावइवट्ठेयड्ढ-

सपक्खिं सपडिदिसिं सिद्धखेत्तोववायगई, जंबुद्दीवे दीवे महाहिमवंतरुप्पिवासहर-  
पव्वयसपक्खिं सपडिदिसिं सिद्धखेत्तोववायगई, जंबुद्दीवे दीवे हरिवासरम्मगवास-  
सपक्खिं सपडिदिसिं सिद्धखेत्तोववायगई, जंबुद्दीवे दीवे गंधावाइमालवंतपव्वय-  
वट्टवेयद्धुसपक्खिं सपडिदिसिं सिद्धखेत्तोववायगई, जंबुद्दीवे दीवे गिसहणीलवंतवासह-  
रपव्वयसपक्खिं सपडिदिसिं सिद्धखेत्तोववायगई, जंबुद्दीवे दीवे पुव्वविदेहावरविदेहस-  
पक्खिं सपडिदिसिं सिद्धखेत्तोववायगई, जंबुद्दीवे दीवे देवकुरुउत्तरकुरुसपक्खिं सपडि-  
दिसिं सिद्धखेत्तोववायगई, जंबुद्दीवे दीवे मंदरपव्वयस्स सपक्खिं सपडिदिसिं सिद्ध-  
खेत्तोववायगई, लवणे समुद्दे सपक्खिं सपडिदिसिं सिद्धखेत्तोववायगई, धायइसंडे  
दीवे पुरिमद्वपच्चत्थिमद्वमंदरपव्वयसपक्खिं सपडिदिसिं सिद्धखेत्तोववायगई, कालो-  
यसमुद्दसपक्खिं सपडिदिसिं सिद्धखेत्तोववायगई, पुक्खरवरदीवद्वपुरत्थिमद्वभरहेर-  
वयवाससपक्खिं सपडिदिसिं सिद्धखेत्तोववायगई, एवं जाव पुक्खरवरदीवद्वपच्छिमद्व-  
मंदरपव्वयसपक्खिं सपडिदिसिं सिद्धखेत्तोववायगई, से तं सिद्धखेत्तोववायगई ५...

॥ ४६५ ॥ से किं तं भवोववायगई ? भवोववायगई चउव्विहा पन्नत्ता । तंजहा-नेरइय-  
भवोववायगई जाव देवभवोववायगई । से किं तं नेरइयभवोववायगई ? नेरइयभवोववा-  
यगई सत्तविहा पन्नत्ता । तंजहा-एवं सिद्धवजो भेदो भाणियव्वो जो चेव खेत्तोववायगई ए  
सो चेव, से तं देवभवोववायगई । से तं भवोववायगई ॥ ४७० ॥ से किं तं नोभवोव-  
वायगई ? नोभवोववायगई दुविहा पन्नत्ता । तंजहा-पोगलनोभवोववायगई, सिद्धनो-  
भवोववायगई । से किं तं पोगलनोभवोववायगई ? पोगलनोभवोववायगई जणं  
परमाणुपोगल्ले लोगस्स पुरत्थिमिळ्ळाओ चरमंताओ पच्चत्थिमिळ्ळं चरमंतं एगसमएणं  
गच्छइ, पच्चत्थिमिळ्ळाओ वा चरमंताओ पुरत्थिमिळ्ळं चरमंतं एगसमएणं गच्छइ,  
दाहिणिळ्ळाओ वा चरमंताओ उत्तरिळ्ळं चरमंतं एगसमएणं गच्छइ, एवं उत्तरिळ्ळाओ  
दाहिणिळ्ळं, उवरिळ्ळाओ हेड्डिळ्ळं, हिड्डिळ्ळाओ उवरिळ्ळं, से तं पोगलनोभवोववायगई  
॥ ४७१ ॥ से किं तं सिद्धणोभवोववायगई ? सिद्धणोभवोववायगई दुविहा पन्नत्ता ।  
तंजहा-अणंतरसिद्धणोभवोववायगई परंपरसिद्धणोभवोववायगई य । से किं तं  
अणंतरसिद्धणोभवोववायगई ? २ पण्णरसविहा पन्नत्ता । तंजहा-तित्थसिद्धअणंतर-  
सिद्धणोभवोववायगई य जाव अणेगसिद्ध० णोभवोववायगई य । से किं तं परंपर-  
सिद्धणोभवोववायगई ? २ अणेगविहा पन्नत्ता । तंजहा-अपढमसमयसिद्धणोभवोववाय-  
गई, एवं दुसमयसिद्धणोभवोववायगई जाव अणंतसमयसिद्धणोभवोववायगई, सेतं  
सिद्धणोभवोववायगई, से तं णोभवोववायगई, से तं उववायगई ४ ॥ ४७२ ॥  
से किं तं विहायगई ? विहायगई सत्तरसविहा पन्नत्ता । तंजहा-फुसमाणगई १,

अफुसमाणगई २, उवसंपजमाणगई ३, अणुवसंपजमाणगई ४, पोगलगई ५, मंड्यगई ६, णावागई ७, नयगई ८, छायागई ९, छायाणुवायगई १०, लेसागई ११, लेसाणुवायगई १२, उद्दिस्सपविभत्तगई १३, चउपुरिसपविभत्तगई १४, वंकगई १५, पंकगई १६, बंधणविमोयणगई १७ ॥ ४७३ ॥ से किं तं फुसमाणगई ? फुसमाणगई जणं परमाणुपोगले(ल)दुपएसिय जाव अणंतपएसियाणं खंधाणं अण्णमण्णं फुसित्ता णं गई पवत्तइ, सेतं फुसमाणगई १ । से किं तं अफुसमाणगई ? अफुसमाणगई जणं एएसिं चेव अफुसित्ता णं गई पवत्तइ, से तं अफुसमाणगई २ । से किं तं उवसंपजमाणगई ? २ जणं रायं वा जुवरायं वा ईसरं वा तलवरं वा माडवियं वा कोडुंवियं वा इब्भं वा सेट्ठिं वा सेणावइं वा सत्थवाहं वा उवसंपजित्ता णं गच्छइ, से तं उवसंपजमाणगई ३ । से किं तं अणुवसंपजमाणगई ? २ जणं एएसिं चेव अण्णमण्णं अणुवसंपजित्ता णं गच्छइ, से तं अणुवसंपजमाणगई ४ । से किं तं पोगलगई ? २ जं णं परमाणु-पोगलगणं जाव अणंतपएसियाणं खंधाणं गई पवत्तइ, से तं पोगलगई ५ । से किं तं मंड्यगई ? २ जणं मंड्यओ फिडित्ता गच्छइ, से तं मंड्यगई ६ । से किं तं णावा-गई ? जणं णावा पुववेयालीओ दाहिणवेयालिं जलपहेणं गच्छइ, दाहिणवेयालीओ वा अवरवेयालिं जलपहेणं गच्छइ, से तं णावागई ७ । से किं तं नयगई ? २ जणं णेगमसंगहववहारउज्जुपुयसइसमभिरुएवंभूयाणं नयाणं जा गई, अहवा सव्वणया वि जं इच्छंति, से तं नयगई ८ । से किं तं छायागई ? २ जं णं हयछायं वा गयछायं वा नरछायं वा किण्णरछायं वा महोरगच्छायं वा गंधव्वच्छायं वा उसहछायं वा रहछायं वा छत्तछायं वा उवसंपजित्ताणं गच्छइ, से तं छायागई ९ । से किं तं छायाणुवायगई ? २ जेणं पुरिसं छाया अणुगच्छइ, नो पुरिसे छायां अणुगच्छइ, से तं छायाणुवायगई १० । से किं तं लेसागई ? २ जणं किण्हलेसा नील्लेसं पप्प तारूवत्ताए तावण्णत्ताए तागंधत्ताए तारसत्ताए ताफासत्ताए भुज्जो भुज्जो परिणमइ, एवं नील्लेसा काउलेसं पप्प तारूवत्ताए जाव ताफासत्ताए परिणमइ, एवं काउले-सा वि तेउलेसं तेउलेसा वि पम्हलेसं पम्हलेसा वि सुक्कलेसं पप्प तारूवत्ताए जाव परिणमइ, से तं लेसागई ११ । से किं तं लेसाणुवायगई ? २ जल्लेसाइं दव्वाइं परियाइत्ता कालं करेइ तल्लेसेसु उववज्जइ, तंजहा-किण्हलेसेसु वा जाव सुक्कलेसेसु वा, से तं लेसाणुवायगई १२ । से किं तं उद्दिस्सपविभत्तगई ? २ जणं आयरियं वा उवज्ज्जायं वा थेरं वा पवत्तिं वा गणिं वा गणहरं वा गणावच्छेयं वा उद्दिसिय २ गच्छइ, से तं उद्दिस्सपविभत्तगई १३ । से किं तं चउपुरिसपविभत्तगई ? से

जहानामए चत्तारि पुरिसा समगं पज्जवट्ठिया समगं पट्ठिया १, समगं पज्जवट्ठिया विसमगं पट्ठिया २, विसमं पज्जवट्ठिया विसमं पट्ठिया ३, विसमं पज्जवट्ठिया समगं पट्ठिया ४, से तं चउपुरिसपविभत्तगई १४ । से किं तं वंकगई ? २ चउव्विहा पन्नत्ता । तंजहा-घट्ठणया, थंभणया, लेसणया, पवडणया, से तं वंकगई १५ । से किं तं पंकगई ? २ से जहानामए केइ पुरिसे पंकसि वा उदयंसि वा कायं उव्विहिया २ गच्छइ, से तं पंकगई १६ । से किं तं बंधणविमोयणगई ? २ जण्णं अंबाण वा अंबाडगाण वा माउलुंगण वा बिळ्ळाण वा कविट्ठाण वा भच्चाण वा फणसाण वा दालिमाण वा अक्खोलाण वा चाराण वा बोराण वा तिंदुयाण वा पक्काणं परियाग-याणं बंधणाओ विप्पमुक्काणं निव्वाघाएणं अहे वीससाए गई पवत्तइ, से तं बंधण-विमोयणगई १७ । से तं विहायोगई ५ ॥ ४७४ ॥ **पन्नवणाए भगवईए सोलसमं पथोगपयं समत्तं ॥**

आहार समसरीरा उस्सासे कम्मवच्चलेसासु । समवेयण समकिरिया समाउया चेव वोद्धव्वा ॥ १ ॥ नेरइया णं भंते ! सव्वे समाहारा, सव्वे समसरीरा, सव्वे समुस्सासनिस्सासा ? गोयमा ! णो इणट्ठे समट्ठे । से केणट्ठेणं भंते ! एवं वुच्चइ-‘नेरइया णो सव्वे समाहारा जाव णो सव्वे समुस्सासनिस्सासा’ ? गोयमा ! नेरइया दुविहा पन्नत्ता । तंजहा-महासरीरा य अप्पसरीरा य । तत्थ णं जे ते महासरीरा ते णं बहुतराए पोग्गले आहारेंति, बहुतराए पोग्गले परिणामेंति, बहुतराए पोग्गले उस्ससंति, बहुतराए पोग्गले नीससंति, अभिक्खणं आहारेंति, अभिक्खणं परिणामेंति, अभिक्खणं ऊससंति, अभिक्खणं नीससंति । तत्थ णं जे ते अप्पसरीरा ते णं अप्पतराए पोग्गले आहारेंति, अप्पतराए पोग्गले परिणामेंति, अप्पतराए पोग्गले ऊससंति, अप्पतराए पोग्गले नीससंति, आहच्च आहारेंति, आहच्च परिणामेंति, आहच्च ऊससंति, आहच्च नीससंति, से एएणट्ठेणं गोयमा ! एवं वुच्चइ-‘नेरइया णो सव्वे समाहारा, णो सव्वे समसरीरा, णो सव्वे समुस्सासनिस्सासा’ ॥ ४७५ ॥ नेरइया णं भंते ! सव्वे समकम्मा ? गोयमा ! नो इणट्ठे समट्ठे । से केणट्ठेणं भंते ! एवं वुच्चइ-‘नेरइया नो सव्वे समकम्मा’ ? गोयमा ! नेरइया दुविहा पन्नत्ता । तंजहा-पुव्वोववन्नगा य पच्छोववन्नगा य । तत्थ णं जे ते पुव्वोववन्नगा ते णं अप्पकम्म-तरागा, तत्थ णं जे ते पच्छोववन्नगा ते णं महाकम्मतरागा, से तेणट्ठेणं गोयमा ! एवं वुच्चइ-‘नेरइया नो सव्वे समकम्मा’ ॥ ४७६ ॥ नेरइया णं भंते ! सव्वे समवन्ना ? गोयमा ! नो इणट्ठे समट्ठे । से केणट्ठेणं भंते ! एवं वुच्चइ-‘नेरइया नो सव्वे समवन्ना’ ? गोयमा ! नेरइया दुविहा पन्नत्ता । तंजहा-पुव्वोववन्नगा य पच्छो-

ववन्नगा य । तत्थ णं जे ते पुव्वोववन्नगा ते णं विसुद्धवन्नतरागा, तत्थ णं जे ते पच्छोववन्नगा ते णं अविमुद्धवन्नतरागा, से एणट्ठेणं गोयमा । एवं वुच्चइ-‘नेरइया नो सव्वे समवन्ना’ । एवं जहेव वन्नेण भणिया तहेव लेसासु विसुद्धलेसतरागा अविमुद्धलेसतरागा य भाणियव्वा ॥ ४७७ ॥ नेरइया णं भंते ! सव्वे समवेयणा ? गोयमा ! नो इणट्ठे समट्ठे । से केणट्ठेणं भंते ! एवं वुच्चइ-‘नेरइया नो सव्वे समवेयणा’ ? गोयमा ! नेरइया दुविहा पन्नता । तंजहा-सन्निभूया य असन्निभूया य । तत्थ णं जे ते सन्निभूया ते णं महावेयणतरागा, तत्थ णं जे ते असन्निभूया ते णं अप्पवेयणतरागा, से तेणट्ठेणं गोयमा ! एवं वुच्चइ-‘नेरइया नो सव्वे समवेयणा’ ॥ ४७८ ॥ नेरइया णं भंते ! सव्वे समकिरिया ? गोयमा ! नो इणट्ठे समट्ठे । से केणट्ठेणं भंते ! एवं वुच्चइ-‘नेरइया नो सव्वे समकिरिया’ ? गोयमा ! नेरइया तिविहा पन्नता । तंजहा-सम्महिट्ठी, मिच्छहिट्ठी, सम्मामिच्छहिट्ठी । तत्थ णं जे ते सम्महिट्ठी तेसि णं चत्तारि किरियाओ कज्जंति, तंजहा-आरंभिया, परिग्गहिया, मायावत्तिया, अपच्चक्खाणकिरिया । तत्थ णं जे ते मिच्छहिट्ठी जे सम्मामिच्छहिट्ठी तेसि णं निययाओ पच्च किरियाओ कज्जंति, तंजहा-आरंभिया, परिग्गहिया, मायावत्तिया, अपच्चक्खाणकिरिया, मिच्छादंसणवत्तिया, से तेणट्ठेणं गोयमा ! एवं वुच्चइ-‘नेरइया नो सव्वे समकिरिया’ ॥ ४७९ ॥ नेरइया णं भंते ! सव्वे समाउया, सव्वे समोववन्नगा ? गोयमा ! नो इणट्ठे समट्ठे । से केणट्ठेणं भंते ! एवं वुच्चइ० ? गोयमा ! नेरइया चउव्विहा पन्नता । तंजहा-अत्थेगइया समाउया समोववन्नगा, अत्थेगइया समाउया विसमोववन्नगा, अत्थेगइया विसमाउया समोववन्नगा, अत्थेगइया विसमाउया विसमोववन्नगा, से तेणट्ठेणं गोयमा ! एवं वुच्चइ-‘नेरइया नो सव्वे समाउया, नो सव्वे समोववन्नगा’ ॥ ४८० ॥ असुरकुमारा णं भंते ! सव्वे समाहारा ? एवं सव्वे वि पुच्छा । गोयमा ! नो इणट्ठे समट्ठे । से केणट्ठेणं भंते ! एवं वुच्चइ० ? जहा नेरइया । असुरकुमारा णं भंते ! सव्वे समक्कमा ? गोयमा ! णो इणट्ठे समट्ठे । से केणट्ठेणं भंते ! एवं वुच्चइ० ? गोयमा ! असुरकुमारा दुविहा पन्नता । तंजहा-पुव्वोववन्नगा य पच्छोववन्नगा य । तत्थ णं जे ते पुव्वोववन्नगा ते णं महाक्कमतारा, तत्थ णं जे ते पच्छोववन्नगा ते णं अप्पक्कमतारा, से तेणट्ठेणं गोयमा ! एवं वुच्चइ-‘असुरकुमारा णो सव्वे समक्कमा’ । एवं वन्नलेस्साए पुच्छा । तत्थ णं जे ते पुव्वोववन्नगा ते णं अविमुद्धवन्नतरागा, तत्थ णं जे ते पच्छोववन्नगा ते णं विसुद्धवन्नतरागा, से तेणट्ठेणं गोयमा ! एवं वुच्चइ-‘असुरकुमारा णं सव्वे णो समवन्ना’ । एवं लेस्साए वि, वेयणाए जहा नेरइया, अवसेसं जहा नेरइयाणं । एवं

जाव थणियकुम्भारा ॥ ४८१ ॥ पुढविकाइया आहारकम्मवन्नलेस्साहिं जहा नेरइया । पुढविकाइया णं भंते ! सव्वे समवेयणा पन्नता ? हंता गोयमा ! सव्वे समवेयणा । से केणट्ठेणं० ? गोयमा ! पुढविकाइया सव्वे असन्नी असन्निभूयं अणिययं वेयणं वेयन्ति, से तेणट्ठेणं गोयमा ! पुढविकाइया सव्वे समवेयणा । पुढविकाइया णं भंते ! सव्वे समकिरिया ? हंता गोयमा ! पुढविकाइया सव्वे समकिरिया । से केणट्ठेणं० ? गोयमा ! पुढविकाइया सव्वे माइमिच्छादिट्ठी, तेसिं णियइयाओ पंच किरियाओ कज्जन्ति, तंजहा-आरंभिया, परिग्गहिया, मायावत्तिया, अप्पच्चक्खाणकिरिया, मिच्छादंसणवत्तिया य, से तेणट्ठेणं गोयमा ! ० । एवं जाव चउरिंदिया । पंचेदियतिरिक्खजोणिया जहा नेरइया, नवरं किरियाहिं सम्मदिट्ठी मिच्छदिट्ठी सम्मामिच्छदिट्ठी । तत्थ णं जे ते सम्मदिट्ठी ते दुविहा पन्नता । तंजहा-असंजया य संजयासंजया य । तत्थ णं जे ते संजयासंजया तेसिं णं तिन्नि किरियाओ कज्जन्ति, तंजहा-आरंभिया, परिग्गहिया, मायावत्तिया । तत्थ णं जे असंजया तेसिं णं चत्तारि किरियाओ कज्जन्ति, तंजहा-आरंभिया, परिग्गहिया, मायावत्तिया, अप्पच्चक्खाणकिरिया । तत्थ णं जे ते मिच्छादिट्ठी जे य सम्मामिच्छदिट्ठी तेसिं णं णियइयाओ पंच किरियाओ कज्जन्ति, तंजहा-आरंभिया, परिग्गहिया, मायावत्तिया, अप्पच्चक्खाणकिरिया, मिच्छादंसणवत्तिया, सेसं तं चेव ॥ ४८२ ॥ मणुस्सा णं भंते ! सव्वे समाहारा ? गोयमा ! णो इणट्ठे समट्ठे । से केणट्ठेणं० ? गोयमा ! मणुस्सा दुविहा पन्नता । तंजहा-महासरीरा य अप्पसरीरा य । तत्थ णं जे ते महासरीरा ते णं बहुतराए पोग्गले आहारेंति जाव बहुतराए पोग्गले नीससंति, आहच्च आहारेंति, आहच्च नीससंति । तत्थ णं जे ते अप्पसरीरा ते णं अप्पतराए पोग्गले आहारेंति जाव अप्पतराए पोग्गले नीससंति, अभिक्खणं आहारेंति जाव अभिक्खणं नीससंति, से तेणट्ठेणं गोयमा ! एवं वुच्चइ-‘मणुस्सा सव्वे णो समाहारा’ । सेसं जहा नेरइयाणं, नवरं किरियाहिं मणुसा तिविहा पन्नता । तंजहा-सम्मदिट्ठी, मिच्छादिट्ठी, सम्मामिच्छादिट्ठी । तत्थ णं जे ते सम्मदिट्ठी ते तिविहा पन्नता । तंजहा-संजया, असंजया, संजयासंजया । तत्थ णं जे ते संजया ते दुविहा पन्नता । तंजहा-सरागसंजया य वीयरगसंजया य । तत्थ णं जे ते वीयरगसंजया ते णं अकिरिया, तत्थ णं जे ते सरागसंजया ते दुविहा पन्नता । तंजहा-पमत्तसंजया य अपमत्तसंजया य । तत्थ णं जे ते अपमत्तसंजया तेसिं एणा मायावत्तिया किरिया कज्जइ । तत्थ णं जे ते पमत्तसंजया तेसिं दो किरियाओ कज्जंति-आरंभिया मायावत्तिया य । तत्थ णं जे ते संजयासंजया तेसिं तिन्नि किरियाओ कज्जंति, तंजहा-आरंभिया परिग्गहिया मायावत्तिया । तत्थ णं जे ते

असंजया तेसिं चत्तारिं किरियाओ कज्जंति, तंजहा-आरंभिया परिग्गहिया माया-  
वत्तिया अपच्चक्खाणकिरिया । तत्थ णं जे ते मिच्छादिट्ठी जे सम्मामिच्छादिट्ठी तेसिं  
नियइयाओ पंच किरियाओ कज्जंति, तंजहा-आरंभिया परिग्गहिया मायावत्तिया  
अपच्चक्खाणकिरिया मिच्छादंसणवत्तिया, सेसं जहा नेरइयाणं ॥ ४८३ ॥ वाण-  
मंतराणं जहा असुरकुमारानं । एवं जोइसियवेमाणियाणं वि, नवरं ते वेयणाए दुविहा  
पन्नता । तंजहा-माइमिच्छदिट्ठीउववन्नगा य अमाइसम्मदिट्ठीउववन्नगा य । तत्थ णं  
जे ते माइमिच्छदिट्ठीउववन्नगा ते णं अप्पवेयणतरागा, तत्थ णं जे ते अमाइसम्म-  
दिट्ठीउववन्नगा ते णं महावेयणतरागा, से तेणट्ठेणं गोयमा ! एवं वुच्चइ० । सेसं  
तहेव ॥ ४८४ ॥ सलेसा णं भंते ! नेरइया सव्वे समाहारा, समसरीरा, समुस्सा-  
सनिस्सासा-सव्वे वि पुच्छा । गोयमा ! एवं जहा ओहिओ गमओ तहा सलेसाग-  
मओ वि निरवसेसो भाणियव्वो जाव वेमाणिया । कण्हलेसा णं भंते ! नेरइया सव्वे  
समाहारा-पुच्छा । गोयमा ! जहा ओहिया, नवरं नेरइया वेयणाए माइमिच्छदिट्ठी-  
उववन्नगा य अमाइसम्मदिट्ठीउववन्नगा य भाणियव्वो, सेसं तहेव जहा ओहियाणं ।  
असुरकुमारा जाव वाणमंतरा एए जहा ओहिया, नवरं मणुस्साणं किरियाहिं  
विसेसो-जाव तत्थ णं जे ते सम्मदिट्ठी ते ति विहा पन्नता । तंजहा-संजया असंजया  
संजयासंजया य, जहा ओहियाणं । जोइसियवेमाणिया आइल्लियासु तिसु लेसासु ण  
पुच्छिज्जंति । एवं जहा कण्हलेसा विचारिया तहा नीललेसा वि विचारेयव्वो ।  
काउलेसा नेरइएहिंतो आरब्भ जाव वाणमंतरा, नवरं काउलेसा नेरइया वेयणाए  
जहा ओहिया । तेउलेसाणं भंते ! असुरकुमारानं ताओ चेव पुच्छाओ । गोयमा !  
जहेव ओहिया तहेव, नवरं वेयणाए जहा जोइसिया । पुढविआउवणस्सइपंचंदिय-  
तिरिक्खमणुस्सा जहा ओहिया तहेव भाणियव्वो, नवरं मणुसा किरियाहिं जे संजया  
ते पमत्ता य अपमत्ता य भाणियव्वो, सरागा वीयरगा नत्थि । वाणमंतरा तेउले-  
साए जहा असुरकुमारा, एवं जोइसियवेमाणिया वि, सेसं तं चेव । एवं पम्हलेसा वि  
भाणियव्वो, नवरं जेसिं अत्थि । सुक्कलेसा वि तहेव जेसिं अत्थि, सव्वं तहेव जहा  
ओहियाणं गमओ, नवरं पम्हलेस्ससुक्कलेस्साओ पंचंदियतिरिक्खजोणियमणुसवेमा-  
णियाणं चेव, न सेसाणं ति ॥ ४८५ ॥ पन्नवणाए भगवईए सत्तरसमे  
लेस्सापए पढमो उदेसओ समत्तो ॥

कइ णं भंते ! लेसाओ पन्नताओ ? गोयमा ! छलेसाओ पन्नताओ । तंजहा-  
कण्हलेसा, नीललेसा, काउलेसा, तेउलेसा, पम्हलेसा, सुक्कलेसा ॥ ४८६ ॥  
नेरइयाणं भंते ! कइ लेसाओ पन्नताओ ? गोयमा ! तिस्सि० तंजहा-कण्हलेसा,



नीललेसा, काउलेसा । तिरिक्खजोणियाणं भंते ! कइ लेस्साओ पन्नत्ताओ ? गोयमा ! छल्लेस्साओ पन्नत्ताओ । तंजहा-कण्हलेस्सा जाव सुक्कलेस्सा । एगिदियाणं भंते ! कइ लेसाओ पन्नत्ताओ ? गोयमा ! चत्तारि लेसाओ पन्नत्ताओ । तंजहा-कण्हलेसा जाव तेउलेसा । पुढविकाइयाणं भंते ! कइ लेसाओ पन्नत्ताओ ? गोयमा ! एवं चेव । आउवणस्सइकाइयाण वि एवं चेव । तेउवाउवेइंदियतेइंदियचउरिंदियाणं जहा नेरइयाणं । पंचेंदियतिरिक्खजोणियाणं पुच्छा । गोयमा ! छल्लेसा-कण्हलेसा जाव सुक्कलेसा । संमुच्छिमपंचेंदियतिरिक्खजोणियाणं पुच्छा । गोयमा ! जहा नेरइयाणं । गम्भवक्कंतियपंचेंदियतिरिक्खजोणियाणं पुच्छा । गोयमा ! छल्लेसा-कण्हलेसा जाव सुक्कलेसा । तिरिक्खजोणिणीणं पुच्छा । गोयमा ! छल्लेसा एयाओ चेव । मणुसाणं पुच्छा । गोयमा ! छल्लेसा एयाओ चेव । संमुच्छिममणुस्साणं पुच्छा । गोयमा ! जहा नेरइयाणं । गम्भवक्कंतियमणुस्साणं पुच्छा । गोयमा ! छल्लेसाओ० तंजहा-कण्हलेसा जाव सुक्कलेसा । मणुस्सीणं पुच्छा । गोयमा ! एवं चेव । देवाणं पुच्छा । गोयमा ! छ एयाओ चेव । देवीणं पुच्छा । गोयमा ! चत्तारि-कण्हलेसा जाव तेउलेसा । भवणवासीणं भंते ! देवाणं पुच्छा । गोयमा ! एवं चेव, एवं भवणवासिणीण वि । वाणमंतरदेवाणं पुच्छा । गोयमा ! एवं चेव, एवं वाणमंतरीण वि । जोइसियाणं पुच्छा । गोयमा ! एगा तेउलेसा, एवं जोइसिणीण वि । वेमाणियाणं पुच्छा । गोयमा ! तिन्नि० तंजहा-तेउलेसा, पम्हलेसा, सुक्कलेसा । वेमाणिणीणं पुच्छा । गोयमा ! एगा तेउलेसा ॥ ४८७ ॥ एएसि णं भंते ! जीवाणं सलेस्साणं कण्हलेस्साणं जाव सुक्कलेस्साणं अलेस्साण य कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा जीवा सुक्कलेस्सा, पम्हलेस्सा संखेजगुणा, तेउलेस्सा संखेजगुणा, अलेस्सा अणंतगुणा, काउलेस्सा अणंतगुणा, नीललेस्सा विसेसाहिया, कण्हलेस्सा विसेसाहिया, सलेस्सा विसेसाहिया ॥ ४८८ ॥ एएसि णं भंते ! नेरइयाणं कण्हलेसाणं नीललेसाणं काउलेसाण य कयरे कयरेहिंतो अप्पा वा ४ ? गोयमा ! सव्वत्थोवा नेरइया कण्हलेसा, नीललेसा असंखेजगुणा, काउलेसा असंखेजगुणा । एएसि णं भंते ! तिरिक्खजोणियाणं कण्हलेसाणं जाव सुक्कलेसाण य कयरे कयरेहिंतो अप्पा वा ४ ? गोयमा ! सव्वत्थोवा तिरिक्खजोणिया सुक्कलेसा, एवं जहा ओहिया, नवरं अलेखवजा । एएसिं भंते ! एगिदियाणं कण्हलेस्साणं नीललेस्साणं काउलेस्साणं तेउलेस्साण य कयरे कयरेहिंतो अप्पा वा ४ ? गोयमा ! सव्वत्थोवा एगिदिया तेउलेस्सा, काउलेस्सा अणंतगुणा, नीललेस्सा विसेसाहिया, कण्हलेस्सा विसेसाहिया । एएसि णं भंते ! पुढविकाइयाणं कण्हलेस्साणं जाव तेउलेस्साण य

कयरे कयरेहिंतो अप्पा वा ४ ? गोयसा ! जहा ओहिया एगिदिया, नवरं काउलेस्सा असंखेज्जगुणा । एवं आउकाइयाण वि । एएसि णं भंते ! तेउकाइयाणं कण्हलेस्साणं नीललेस्साणं काउलेस्साणं य कयरे कयरेहिंतो अप्पा वा ४ ? गोयसा ! सब्वत्थोवा तेउकाइया काउलेस्सा, नीललेस्सा विसेसाहिया, कण्हलेस्सा विसेसाहिया, एवं वाउकाइयाण वि । एएसि णं भंते ! वणस्सइकाइयाणं कण्हलेस्साणं जाव तेउलेस्साणं य जहा एगिदियओहियाणं । वेइंदियाणं तेइंदियाणं चउरिंदियाणं जहा तेउकाइयाणं ॥ ४८९ ॥ एएसि णं भंते ! पंचिदियतिरिक्खजोणियाणं कण्हलेसाणं एवं जाव सुक्कलेसाणं य कयरे कयरेहिंतो अप्पा वा ४ ? गोयसा ! जहा ओहियाणं तिरिक्खजोणियाणं, नवरं काउलेसा असंखेज्जगुणा । संमुच्छिमपंचंदियतिरिक्खजोणियाणं जहा तेउकाइयाणं । गम्भवक्कंतियपंचंदियतिरिक्खजोणियाणं जहा ओहियाणं तिरिक्खजोणियाणं, नवरं काउलेसा संखेज्जगुणा, एवं तिरिक्खजोणियाणं वि । एएसि णं भंते ! संमुच्छिमपंचंदियतिरिक्खजोणियाणं गम्भवक्कंतियपंचंदियतिरिक्खजोणियाणं य कण्हलेस्साणं जाव सुक्कलेसाणं य कयरे कयरेहिंतो अप्पा वा ४ ? गोयसा ! सब्वत्थोवा गम्भवक्कंतियपंचंदियतिरिक्खजोणिया सुक्कलेस्सा, पम्हलेस्सा संखेज्जगुणा, तेउलेस्सा संखेज्जगुणा, काउलेस्सा संखेज्जगुणा, नीललेस्सा विसेसाहिया, कण्हलेस्सा विसेसाहिया, काउलेस्सा संमुच्छिमपंचंदियतिरिक्खजोणिया असंखेज्जगुणा, नीललेस्सा विसेसाहिया, कण्हलेस्सा विसेसाहिया । एएसि णं भंते ! संमुच्छिमपंचंदियतिरिक्खजोणियाणं तिरिक्खजोणियाणं य कण्हलेसाणं जाव सुक्कलेसाणं य कयरे कयरेहिंतो अप्पा वा ४ ? गोयसा ! जहेव पंचमं तहा इमं छट्ठं भाणियव्वं । एएसि णं भंते ! गम्भवक्कंतियपंचंदियतिरिक्खजोणियाणं तिरिक्खजोणियाणं य कण्हलेसाणं जाव सुक्कलेसाणं य कयरे कयरेहिंतो अप्पा वा ४ ? गोयसा ! सब्वत्थोवा गम्भवक्कंतियपंचंदियतिरिक्खजोणिया सुक्कलेसा, सुक्कलेसाओ तिरिक्खजोणियाओ संखेज्जगुणाओ, पम्हलेसा गम्भवक्कंतियपंचंदियतिरिक्खजोणिया संखेज्जगुणा, पम्हलेसाओ तिरिक्खजोणियाओ संखेज्जगुणाओ, तेउलेसा तिरिक्खजोणिया संखेज्जगुणा, तेउलेसाओ तिरिक्खजोणियाओ संखेज्जगुणाओ, काउलेसा संखेज्जगुणा, नीललेसा विसेसाहिया, कण्हलेसा विसेसाहिया, काउलेसाओ संखेज्जगुणाओ, नीललेसाओ विसेसाहियाओ, कण्हलेसाओ विसेसाहियाओ । एएसि णं भंते ! संमुच्छिमपंचंदियतिरिक्खजोणियाणं गम्भवक्कंतियपंचंदियतिरिक्खजोणियाणं य कण्हलेसाणं जाव सुक्कलेसाणं य कयरे कयरेहिंतो अप्पा वा ४ ? गोयसा ! सब्वत्थोवा गम्भवक्कंतिया तिरिक्खजोणिया सुक्कलेसा, सुक्कलेसाओ तिरिक्खजोणियाओ, पम्हलेसा गम्भवक्कंतिया तिरिक्ख-

जोणिया संखेज्जगुणा, पम्हलेसाओ तिरिक्खजोणिणीओ संखेज्जगुणाओ, तेउलेसा गम्भवक्कंतिया तिरिक्खजोणिया संखेज्जगुणा, तेउलेसाओ तिरिक्खजोणिणीओ संखेज्जगुणाओ, काउलेसाओ संखेज्जगुणाओ, नीललेसा विसेसाहिया, कण्हलेसा विसेसाहिया, काउलेसा संखेज्जगुणा, नीललेसा विसेसाहिया, कण्हलेसाओ विसेसाहियाओ, काउलेसा संमुच्छिमपंचेंदियतिरिक्खजोणिया असंखेज्जगुणा, नीललेसा विसेसाहिया, कण्हलेसा विसेसाहिया । एएसि णं भंते ! पंचेंदियतिरिक्खजोणियाणं तिरिक्खजोणिणी य कण्हलेसाणं जाव सुक्कलेसाणं कयरे कयरेहिंतो अप्पा वा ४ ? गोयमा ! सव्वत्थोवा पंचेंदियतिरिक्खजोणिया सुक्कलेसा, सुक्कलेसाओ संखेज्जगुणाओ, पम्हलेसा संखेज्जगुणा, पम्हलेसाओ संखेज्जगुणाओ, तेउलेसा संखेज्जगुणा, तेउलेसाओ संखेज्जगुणाओ, काउलेसा संखेज्जगुणा, नीललेसाओ विसेसाहियाओ, कण्हलेसा विसेसाहिया, काउलेसा असंखेज्जगुणा, नीललेसा विसेसाहिया, कण्हलेसाओ विसेसाहियाओ । एएसि णं भंते ! तिरिक्खजोणियाणं तिरिक्खजोणिणी य कण्हलेसाणं जाव सुक्कलेसाणं य कयरे कयरेहिंतो अप्पा वा ४ ? गोयमा ! जहेव नवमं अप्पावहुगं तहा इमं पि, नवरं काउलेसा तिरिक्खजोणिया अणंतगुणा । एवं एए दस अप्पावहुगा तिरिक्खजोणियाणं ॥ ४९० ॥ एएसि णं भंते ! देवाणं कण्हलेसाणं जाव सुक्कलेसाणं य कयरे कयरेहिंतो अप्पा वा ४ ? गोयमा ! सव्वत्थोवा देवा सुक्कलेसा, पम्हलेसा असंखेज्जगुणा, काउलेसा असंखेज्जगुणा, नीललेसा विसेसाहिया, कण्हलेसा विसेसाहिया, तेउलेसा संखेज्जगुणा । एएसि णं भंते ! देवीणं कण्हलेसाणं जाव तेउलेसाणं य कयरे कयरेहिंतो अप्पा वा ४ ? गोयमा ! सव्वत्थोवाओ देवीओ काउलेसाओ, नीललेसाओ विसेसाहियाओ, कण्हलेसाओ विसेसाहियाओ, तेउलेसाओ संखेज्जगुणाओ । एएसि णं भंते ! देवाणं देवीणं य कण्हलेसाणं जाव सुक्कलेसाणं य कयरे कयरेहिंतो अप्पा वा ४ ? गोयमा ! सव्वत्थोवा देवा सुक्कलेसा, पम्हलेसा असंखेज्जगुणा, काउलेसा असंखेज्जगुणा, नीललेसा विसेसाहिया, कण्हलेसा विसेसाहिया, काउलेसाओ देवीओ संखेज्जगुणाओ, नीललेसाओ विसेसाहियाओ, कण्हलेसाओ विसेसाहियाओ, तेउलेसा देवा संखेज्जगुणा, तेउलेसाओ देवीओ संखेज्जगुणाओ ॥ ४९१ ॥ एएसि णं भंते ! भवणवासीणं देवाणं कण्हलेसाणं जाव तेउलेसाणं य कयरे कयरेहिंतो अप्पा वा ४ ? गोयमा ! सव्वत्थोवा भवणवासी देवा तेउलेसा, काउलेसा असंखेज्जगुणा, नीललेसा विसेसाहिया, कण्हलेसा विसेसाहिया । एएसि णं भंते ! भवणवासिणीणं देवीणं कण्हलेसाणं जाव तेउलेसाणं य कयरे कयरेहिंतो अप्पा वा ४ ? गोयमा !

एवं चेव । एएसि णं भंते ! भवणवासीणं देवाणं देवीण य कण्हलेसाणं जाव तेउलेसाण य कयरे कयरेहिंतो अप्पा वा ४ ? गोयमा ! सव्वत्थोवा भवणवासी देवा तेउलेसा, भवणवासिणीओ० तेउलेसाओ संखेज्जगुणाओ, काउलेसा भवणवासी देवा असंखेज्जगुणा, नीललेसा विसेसाहिया, कण्हलेसा विसेसाहिया, काउलेसाओ भवणवासिणीओ देवीओ संखेज्जगुणाओ, नीललेसाओ विसेसाहियाओ, कण्हलेसाओ विसेसाहियाओ, एवं वाणमंतराणं, तिन्नेव अप्पाबहुया जहेव भवणवासीणं तहेव भाणियच्चा ॥ ४९२ ॥ एएसि णं भंते ! जोइसियाणं देवाणं देवीण य तेउलेसाणं कयरे कयरेहिंतो अप्पा वा ४ ? गोयमा ! सव्वत्थोवा जोइसिया देवा तेउलेसा, जोइसिणीओ देवीओ तेउलेसाओ संखेज्जगुणाओ ॥ ४९३ ॥ एएसि णं भंते ! वेमाणियाणं देवाणं तेउलेसाणं पम्हलेसाणं सुक्कलेसाण य कयरे कयरेहिंतो अप्पा वा ४ ? गोयमा ! सव्वत्थोवा वेमाणिया देवा सुक्कलेसा, पम्हलेसा असंखेज्जगुणा, तेउलेसा असंखेज्जगुणा । एएसि णं भंते ! वेमाणियाणं देवाणं देवीण य तेउलेसाणं पम्हलेसाणं सुक्कलेसाण य कयरे कयरेहिंतो अप्पा वा ४ ? गोयमा ! सव्वत्थोवा वेमाणिया देवा सुक्कलेसा, पम्हलेसा असंखेज्जगुणा, तेउलेसा असंखेज्जगुणा, तेउलेसाओ वेमाणिणीओ देवीओ संखेज्जगुणाओ ॥ ४९४ ॥ एएसि णं भंते ! भवणवासीदेवाणं वाणमंतराणं जोइसियाणं वेमाणियाणं य देवाणं य कण्हलेसाणं जाव सुक्कलेसाण य कयरे कयरेहिंतो अप्पा वा ४ ? गोयमा ! सव्वत्थोवा वेमाणिया देवा सुक्कलेसा, पम्हलेसा असंखेज्जगुणा, तेउलेसा असंखेज्जगुणा, तेउलेसा भवणवासी देवा असंखेज्जगुणा, काउलेसा असंखेज्जगुणा, नीललेसा विसेसाहिया, कण्हलेसा विसेसाहिया, तेउलेसा वाणमंतरा देवा असंखेज्जगुणा, काउलेसा असंखेज्जगुणा, नीललेसा विसेसाहिया, कण्हलेसा विसेसाहिया, तेउलेसा जोइसिया देवा संखेज्जगुणा । एएसि णं भंते ! भवणवासिणीणं वाणमंतरीणं जोइसिणीणं वेमाणिणीणं य कण्हलेसाणं जाव तेउलेसाणं य कयरे कयरेहिंतो अप्पा वा ४ ? गोयमा ! सव्वत्थोवाओ देवीओ वेमाणिणीओ तेउलेसाओ, भवणवासिणीओ० तेउलेसाओ असंखेज्जगुणाओ, काउलेसाओ असंखेज्जगुणाओ, नीललेसाओ विसेसाहियाओ, कण्हलेसाओ विसेसाहियाओ, तेउलेसाओ वाणमंतरीओ देवीओ असंखेज्जगुणाओ, काउलेसाओ असंखेज्जगुणाओ, नीललेसाओ विसेसाहियाओ, कण्हलेसाओ विसेसाहियाओ, तेउलेसाओ जोइसिणीओ देवीओ संखेज्जगुणाओ ॥ ४९५ ॥ एएसि णं भंते ! भवणवासीणं जाव वेमाणियाणं देवाणं य देवीण य कण्हलेसाणं जाव सुक्कलेसाण य कयरे कयरेहिंतो अप्पा वा ४ ? गोयमा ! सव्वत्थोवा वेमाणिया देवा

सुकलेसा, पम्हलेसा असंखेज्जगुणा, तेउलेसा असंखेज्जगुणा, तेउलेसाओ वेमाणिय-  
 देवीओ संखेज्जगुणाओ, तेउलेसा भवणवासी देवा असंखेज्जगुणा, तेउलेसाओ  
 भवणवासिणीओ देवीओ संखेज्जगुणाओ, काउलेसा भवणवासी० असंखेज्जगुणा,  
 नीललेसा विसेसाहिया, कण्हलेसा विसेसाहिया, काउलेसाओ भवणवासिणीओ०  
 संखेज्जगुणाओ, नीललेसाओ विसेसाहियाओ, कण्हलेसाओ विसेसाहियाओ, तेउलेसा  
 वाणमंतरा० संखेज्जगुणा, तेउलेसाओ वाणमंतरीओ० संखेज्जगुणाओ, काउलेसा वाण-  
 मंतरा० असंखेज्जगुणा, नीललेसा विसेसाहिया, कण्हलेसा विसेसाहिया, काउलेसाओ  
 वाणमंतरीओ० संखेज्जगुणाओ, नीललेसाओ विसेसाहियाओ, कण्हलेसाओ विसेसा-  
 हियाओ, तेउलेसा जोइसिया० संखेज्जगुणा, तेउलेसाओ जोइसिणीओ० संखेज्ज-  
 गुणाओ ॥ ४९६ ॥ एएसि णं भंते ! जीवाणं कण्हलेसाणं जाव सुक्कलेसाणं य  
 कयरे कयरेहिंतो अप्पड्डिया वा महड्डिया वा ? गोयमा ! कण्हलेसेहिंतो नीललेसा  
 महड्डिया, नीललेसेहिंतो काउलेसा महड्डिया, एवं काउलेसेहिंतो तेउलेसा महड्डिया,  
 तेउलेसेहिंतो पम्हलेसा महड्डिया, पम्हलेसेहिंतो सुक्कलेसा महड्डिया, सव्वप्पड्डिया  
 जीवा कण्हलेसा, सव्वमहड्डिया सुक्कलेसा ॥ ४९७ ॥ एएसि णं भंते ! नेरइयाणं  
 कण्हलेसाणं नीललेसाणं काउलेसाणं य कयरे कयरेहिंतो अप्पड्डिया वा महड्डिया  
 वा ? गोयमा ! कण्हलेसेहिंतो नीललेसा महड्डिया, नीललेसेहिंतो काउलेसा महड्डिया,  
 सव्वप्पड्डिया नेरइया कण्हलेसा, सव्वमहड्डिया नेरइया काउलेसा ॥ ४९८ ॥ एएसि  
 णं भंते ! तिरिक्खजोणियाणं कण्हलेसाणं जाव सुक्कलेसाणं य कयरे कयरेहिंतो  
 अप्पड्डिया वा महड्डिया वा ? गोयमा ! जहा जीवाणं । एएसि णं भंते ! एणंदिय-  
 तिरिक्खजोणियाणं कण्हलेसाणं जाव तेउलेसाणं य कयरे कयरेहिंतो अप्पड्डिया वा  
 महड्डिया वा ? गोयमा ! कण्हलेसेहिंतो एणंदियतिरिक्खजोणिहंतो नीललेसा  
 महड्डिया, नीललेसेहिंतो तिरिक्खजोणिहंतो काउलेसा महड्डिया, काउलेसेहिंतो  
 तेउलेसा महड्डिया, सव्वप्पड्डिया एणंदियतिरिक्खजोणिया कण्हलेसा, सव्वमहड्डिया  
 तेउलेसा । एवं पुढविकाइयाणं वि । एवं एएणं अभिलावेणं जहेव लेस्साओ भावि-  
 याओ तहेव नेयव्वं जाव चउरिंदिया । पंचेदियतिरिक्खजोणियाणं तिरिक्खजोणि-  
 णीणं संमुच्छिमाणं गव्वमवक्कंतियाणं य सव्वेसिं भाणियव्वं जाव अप्पड्डिया वेमा-  
 णिया देवा तेउलेसा, सव्वमहड्डिया वेमाणिया सुक्कलेसा । केइ भणंति-चउवीसं  
 दंडएणं इट्ठी भाणियव्वा ॥ ४९९ ॥ **पन्नवणाए भगवईए सत्तरसमे लेस्सा-**  
**पए वीओ उहेसओ समत्तो ॥**

नेरइए णं भंते ! नेरइएसु उववज्जइ, अनेरइए नेरइएसु उववज्जइ ? गोयमा !

नेरइए नेरइएसु उववजइ, नो अनेरइए नेरइएसु उववजइ, एवं जाव वेमाणियाणं ।  
नेरइए णं भंते ! नेरइएहिंतो उववटइ, अनेरइए नेरइएहिंतो उववटइ ? गोयमा !  
अनेरइए नेरइएहिंतो उववटइ, नो नेरइए नेरइएहिंतो उववटइ । एवं जाव वेमाणिए,  
नवरं जोइसियवेमाणिएसु 'चयणं'ति अभिलावो कायव्वो ॥ ५०० ॥ से नूणं भंते !  
कण्हलेसे नेरइए कण्हलेसेसु नेरइएसु उववजइ, कण्हलेसे उववटइ, जल्लेसे उववजइ  
तल्लेसे उववटइ ? हंता गोयमा ! कण्हलेसे नेरइए कण्हलेसेसु नेरइएसु उववजइ,  
कण्हलेसे उववटइ, जल्लेसे उववजइ तल्लेसे उववटइ, एवं नीललेसे वि, एवं काउले-  
से वि । एवं असुरकुमाराण वि जाव थणियकुमारा, नवरं लेसा अब्भहिया । से  
नूणं भंते ! कण्हलेसे पुढविकाइए कण्हलेसेसु पुढविकाइएसु उववजइ, कण्हलेसे  
उववटइ, जल्लेसे उववजइ तल्लेसे उववटइ ? हंता गोयमा ! कण्हलेसे पुढविकाइए  
कण्हलेसेसु पुढविकाइएसु उववजइ, सिय कण्हलेसे उववटइ, सिय नीललेसे उववटइ,  
सिय काउलेसे उववटइ, सिय जल्लेसे उववजइ तल्लेसे उववटइ । एवं नीलकाउ-  
लेसासु वि । से नूणं भंते ! तेउलेसेसु पुढविकाइएसु उववजइ पुच्छा । हंता गोयमा !  
तेउलेसे पुढविकाइए तेउलेसेसु पुढविकाइएसु उववजइ, सिय कण्हलेसे उववटइ,  
सिय नीललेसे उववटइ, सिय काउलेसे उववटइ, तेउलेसे उववजइ, नो चेव णं  
तेउलेसे उववटइ । एवं आउकाइया वणस्सइकाइया वि । तेउवाऊ एवं चेव, नवरं  
एएसिं तेउलेसा नत्थि । वितियचउरिंदिया एवं चेव तिसु लेसासु । पंचेदियतिरि-  
क्खजोणिया मणुस्सा य जहा पुढविकाइया आइल्लिया तिसु लेसासु भणिया तहा  
छसु वि लेसासु भाणियव्वा, नवरं छप्पि लेसाओ चारेयव्वाओ । वाणमंतरा जहा  
असुरकुमारा । से नूणं भंते ! तेउलेस्से जोइसिए तेउलेस्सेसु जोइसिएसु उववजइ ?  
जहेव असुरकुमारा । एवं वेमाणिया वि, नवरं दोहं पि चयंतीति अभिलावो ॥ ५०१ ॥  
से नूणं भंते ! कण्हलेसे नीललेसे काउलेसे नेरइए कण्हलेसेसु नीललेसेसु काउलेसेसु  
नेरइएसु उववजइ, कण्हलेसे नीललेसे काउलेसे उववटइ, जल्लेसे उववजइ तल्लेसे  
उववटइ ? हंता गोयमा ! कण्हनीलकाउलेसे उववजइ, जल्लेसे उववजइ तल्लेसे उव-  
वटइ । से नूणं भंते ! कण्हलेसे जाव तेउलेसे असुरकुमारे कण्हलेसेसु जाव तेउलेसेसु  
असुरकुमारेसु उववजइ ? एवं जहेव नेरइए तहा असुरकुमारा वि जाव थणियकुमारा  
वि । से नूणं भंते ! कण्हलेसे जाव तेउलेसे पुढविकाइए कण्हलेसेसु जाव तेउलेसेसु  
पुढविकाइएसु उववजइ ? एवं पुच्छा जहा असुरकुमाराणं । हंता गोयमा ! कण्हलेसे  
जाव तेउलेसे पुढविकाइए कण्हलेसेसु जाव तेउलेसेसु पुढविकाइएसु उववजइ, सिय  
कण्हलेसे उववटइ, सिय नीललेसे०, सिय काउलेसे उववटइ, सिय जल्लेसे उववजइ

तल्लेसे उववट्टइ, तेउलेसे उववजइ, नो चेव णं तेउलेसे उववट्टइ । एवं आउकाइया वणस्सइकाइया वि भाणियव्वा । से नूणं भंते ! कण्हलेसे नीललेसे काउलेसे तेउकाइए कण्हलेसे नीललेसे काउलेसे उववजइ, कण्हलेसे नीललेसे काउलेसे उववट्टइ, जल्लेसे उववजइ तल्लेसे उववट्टइ ? हंता गोयमा ! कण्हलेसे नीललेसे काउलेसे तेउकाइए कण्हलेसे नीललेसे काउलेसे तेउकाइए उववजइ, सिय कण्हलेसे उववट्टइ, सिय नीललेसे उववट्टइ, सिय काउलेसे उववट्टइ, सिय जल्लेसे उववजइ तल्लेसे उववट्टइ । एवं वाउकाइयवेइंदियतेइंदियचउरिंदिया वि भाणियव्वा । से नूणं भंते ! कण्हलेसे जाव सुक्कलेसे पंचेंदियतिरिक्खजोणिए कण्हलेसे जाव सुक्कलेसे पंचेंदियतिरिक्खजोणिए उववजइ पुच्छा । हंता गोयमा ! कण्हलेसे जाव सुक्कलेसे पंचेंदियतिरिक्खजोणिए कण्हलेसे जाव सुक्कलेसे पंचेंदियतिरिक्खजोणिए उववजइ, सिय कण्हलेसे उववट्टइ जाव सिय सुक्कलेसे उववट्टइ, सिय जल्लेसे उववजइ तल्लेसे उववट्टइ । एवं मणूसे वि । वाणमंतरा जहा असुरकुमारा । जोइसियवेमाणिया वि एवं चेव, नवरं जस्स जल्लेसा । दोण्ह वि 'चयणं'ति भाणियव्वं ॥ ५०२ ॥ कण्हलेसे णं भंते ! नेरइए कण्हलेसं नेरइयं पणिहाए ओहिणा सव्वओ समंता समभिलोएमाणे २ केवइयं खेतं जाणइ, केवइयं खेतं पासइ ? गोयमा ! णो बहुयं खेतं जाणइ, णो बहुयं खेतं पासइ, णो दूरं खेतं जाणइ, णो दूरं खेतं पासइ, इत्तरियमेव खेतं जाणइ, इत्तरियमेव खेतं पासइ । से केणट्ठेणं भंते ! एवं वुच्चइ-‘कण्हलेसे णं नेरइए तं चेव जाव इत्तरियमेव खेतं पासइ’ ? गोयमा ! से जहानामए केइ पुरिसे बहुसमरमणिज्जंसी भूमिभांगंसी ठिच्चा सव्वओ समंता समभिलोएजा, तए णं से पुरिसे धरणितलगयं पुरिसं पणिहाए सव्वओ समंता समभिलोएमाणे २ णो बहुयं खेतं जाव पासइ जाव इत्तरियमेव खेतं पासइ, से तेणट्ठेणं गोयमा ! एवं वुच्चइ-‘कण्हलेसे णं नेरइए जाव इत्तरियमेव खेतं पासइ’ । नीललेसे णं भंते ! नेरइए कण्हलेसं नेरइयं पणिहाय ओहिणा सव्वओ समंता समभिलोएमाणे २ केवइयं खेतं जाणइ, केवइयं खेतं पासइ ? गोयमा ! बहुतरागं खेतं जाणइ, बहुतरागं खेतं पासइ, दूरतरं खेतं जाणइ, दूरतरं खेतं पासइ, वित्तिमिरतरागं खेतं जाणइ, वित्तिमिरतरागं खेतं पासइ, विसुद्धतरागं खेतं जाणइ, विसुद्धतरागं खेतं पासइ । से केणट्ठेणं भंते ! एवं वुच्चइ-‘नीललेसे णं नेरइए कण्हलेसं नेरइयं पणिहाय जाव विसुद्धतरागं खेतं जाणइ, विसुद्धतरागं खेतं पासइ’ ? गोयमा ! से जहानामए केइ पुरिसे बहुसमरमणिजाओ भूमिभागाओ पव्वयं दुरुहिता सव्वओ समंता समभिलोएजा, तए णं से पुरिसे धरणितलगयं पुरिसं पणिहाय सव्वओ समंता समभिलोएमाणे २ बहुतरागं खेतं जाणइ जाव विसुद्धतरागं

खेत्तं पासइ, से तेणट्टेणं गोयमा ! एवं वुच्चइ—‘नीललेस्से नेरइए कण्हलेस्सं जाव विसुद्धतरागं खेत्तं पासइ’ । काउलेस्से णं भंते ! नेरइए नीललेस्सं नेरइयं पणिहाय ओहिणा सव्वओ समंता समभिलोएमाणे २ केवइयं खेत्तं जाणइ० पासइ ? गोयमा ! बहुतरागं खेत्तं जाणइ० पासइ जाव विसुद्धतरागं खेत्तं पासइ । से केणट्टेणं भंते ! एवं वुच्चइ—‘काउलेस्से णं नेरइए जाव विसुद्धतरागं खेत्तं पासइ’ ? गोयमा ! से जहानामए केइ पुरिसे बहुसमरमणिज्जाओ भूमिभागाओ पव्वयं दुस्सइ दुस्सहिता दो वि पाए उच्चाविया (वइत्ता) सव्वओ समंता समभिलोएज्जा, तए णं से पुरिसे पव्वयगयं धरणितालगयं च पुरिसं पणिहाय सव्वओ समंता समभिलोएमाणे २ बहुतरागं खेत्तं जाणइ, बहुतरागं खेत्तं पासइ जाव वितिमिरतरागं खेत्तं पासइ, से तेणट्टेणं गोयमा ! एवं वुच्चइ—‘काउलेस्से णं नेरइए नीललेस्सं नेरइयं पणिहाय तं चेव जाव वितिमिरतरागं खेत्तं पासइ’ ॥ ५०३ ॥ कण्हलेस्से णं भंते ! जीवे कइसु नाणेसु होज्जा ? गोयमा ! दोसु वा तिसु वा चउसु वा नाणेसु होज्जा, दोसु होमाणे आभिणिबोहियसुयनाणे होज्जा, तिसु होमाणे आभिणिबोहियसुयनाणओहि-नाणेसु होज्जा, अहवा तिसु होमाणे आभिणिबोहियसुयनाणमणपज्जवनाणेसु होज्जा, चउसु होमाणे आभिणिबोहियसुयओहिमणपज्जवनाणेसु होज्जा, एवं जाव पम्हलेस्से । सुक्कलेस्से णं भंते ! जीवे कइसु नाणेसु होज्जा ? गोयमा ! एगंसि वा दोसु वा तिसु वा चउसु वा होज्जा, दोसु होमाणे आभिणिबोहियनाण एवं जहेव कण्हलेसाणं तहेव भाणि-यव्वं जाव चउहिं । एगंसि नाणे होमाणे एगंसि केवलनाणे होज्जा ॥ ५०४ ॥ पच्चवणाए भगवईए सत्तरसमे लेस्सापए तइओ उद्देसओ समत्तो ॥

परिणामवन्नरसगंधसुद्धअपसत्थसंकिलिट्ठुण्हा । गइपरिणामपएसोगाढवग्गणठाणा-णमपबहुं ॥ १ ॥ कइ णं भंते ! लेसाओ पत्ताओ ? गोयमा ! छलेसाओ पत्ताओ । तंजहा—कण्हलेसा जाव सुक्कलेसा । से नूणं भंते ! कण्हलेस्सा नीललेस्सं पप्प तारु-वत्ताए तावण्णत्ताए तागंधत्ताए तारसत्ताए ताफासत्ताए भुज्जो २ परिणमइ ? हंता गोयमा ! कण्हलेस्सा नीललेस्सं पप्प तारुवत्ताए जाव भुज्जो २ परिणमइ । से केणट्टेणं भंते ! एवं वुच्चइ—‘कण्हलेस्सा नीललेस्सं पप्प तारुवत्ताए जाव भुज्जो २ परिणमइ’ ? गोयमा ! से जहा नामए खीरे दूसिं पप्प सुद्धे वा वत्थे रागं पप्प तारुवत्ताए जाव ताफासत्ताए भुज्जो २ परिणमइ, से तेणट्टेणं गोयमा ! एवं वुच्चइ—‘कण्हलेस्सा नीललेस्सं पप्प तारुवत्ताए जाव भुज्जो २ परिणमइ’ । एवं एएणं अभिलोवेणं नील-लेसा काउलेस्सं पप्प, काउलेसा तेउलेस्सं पप्प, तेउलेसा पम्हलेस्सं पप्प, पम्हलेसा सुक्कलेस्सं पप्प जाव भुज्जो २ परिणमइ ॥ ५०५ ॥ से नूणं भंते ! कण्हलेसा नीललेस्सं



काउलेसं तेउलेसं पम्हलेसं सुक्कलेसं पप्प तारुवत्ताए तावणत्ताए तागंधत्ताए तार-  
सत्ताए ताफासत्ताए भुज्जो २ परिणमइ ? हंता गोयमा ! कण्हलेसा नीललेसं पप्प  
जाव सुक्कलेसं पप्प तारुवत्ताए तागंधत्ताए ताफासत्ताए भुज्जो २ परिणमइ । से  
केणट्ठेणं भंते ! एवं वुच्चइ-‘कण्हलेसा नीललेसं जाव सुक्कलेसं पप्प तारुवत्ताए जाव  
भुज्जो २ परिणमइ’ ? गोयमा ! से जहानामए वेरुलियमणी सिया कण्हसुत्ताए वा  
नीलसुत्ताए वा लोहियसुत्ताए वा हाल्लिइसुत्ताए वा सुक्किळसुत्ताए वा आइए समाणे  
तारुवत्ताए जाव भुज्जो २ परिणमइ, से तेणट्ठेणं गो० ! एवं वुच्चइ-‘कण्हलेसा नीललेसं  
जाव सुक्कलेसं पप्प तारुवत्ताए जाव भुज्जो २ परिणमइ ॥ ५०६ ॥ से नूणं भंते !  
नीललेसा किण्हलेसं जाव सुक्कलेसं पप्प तारुवत्ताए जाव भुज्जो २ परिणमइ ?  
हंता गोयमा ! एवं चेव, काउलेसा किण्हलेसं नीललेसं तेउलेसं पम्हलेसं सुक्कलेसं,  
एवं तेउलेसा किण्हलेसं नीललेसं काउलेसं पम्हलेसं सुक्कलेसं, एवं पम्हलेसा किण्ह-  
लेसं नीललेसं काउलेसं तेउलेसं सुक्कलेसं पप्प जाव भुज्जो २ परिणमइ ? हन्ता  
गोयमा ! तं चेव । से नूणं भंते ! सुक्कलेसा किण्हलेसं नीललेसं काउलेसं तेउलेसं  
पम्हलेसं पप्प जाव भुज्जो २ परिणमइ ? हंता गोयमा ! तं चेव ॥ ५०७ ॥  
कण्हलेस्सा णं भंते ! व्वेणं केरिसिया पन्नत्ता ? गोयमा ! से जहानामए जीमूए इ वा  
अंजणे इ वा खंजणे इ वा कज्जले इ वा गवले इ वा गवलवलए इ वा जंबूफले इ वा  
अहारिड्डपुप्फे इ वा परपुट्टे इ वा भमरे इ वा भमरावली इ वा गयकलमे इ वा  
किण्हकेसरे इ वा आगासथिग्गले इ वा किण्हासोए इ वा कण्हकणवीरए इ वा  
कण्हवंधुजीवए इ वा, भवे एयाह्वे ? गोयमा ! णो इणट्ठे समट्ठे, कण्हलेस्सा णं इत्तो  
अणिट्ठतरिया चेव अकंततरिया चेव अप्पियतरिया चेव अमणुन्नतरिया चेव अम-  
णामतरिया चेव व्वेणं पन्नत्ता ॥ ५०८ ॥ नीललेस्सा णं भंते ! केरिसिया व्वेणं  
पन्नत्ता ? गोयमा ! से जहानामए भिंगए इ वा भिंगपत्ते इ वा चासे इ वा चास-  
पिच्छए इ वा सुए इ वा सुयपिच्छे इ वा सामा इ वा वणराई इ वा उच्चंतए इ वा  
पारेवयगीवा इ वा मोरगीवा इ वा हलहरवसणे इ वा अयसिकुसुमे इ वा वणकुसुमे  
इ वा अंजणकेसियाकुसुमे इ वा नीलुप्पले इ वा नीलासोए इ वा नीलकणवीरए इ  
वा नीलवंधुजीवे इ वा, भवेयारुवे ? गोयमा ! णो इणट्ठे समट्ठे० एत्तो जाव अम-  
णामयरिया चेव व्वेणं पन्नत्ता ॥ ५०९ ॥ काउलेस्सा णं भंते ! केरिसिया व्वेणं  
पन्नत्ता ? गोयमा ! से जहानामए खइरसारए इ वा कइरसारए इ वा धमाससारे इ  
वा तंबे इ वा तंबकरोडे इ वा तंबच्छिवाडियाए इ वा वाइंगणिकुसुमे इ वा कोइल-  
च्छदकुसुमे इ वा जवासाकुसुमे इ वा, भवेयारुवे ? गोयमा ! णो इणट्ठे समट्ठे ।

काउलेस्सा णं एत्तो अणिट्ठयरिया जाव अमणामयरिया चेव वन्नेणं पन्नत्ता ॥ ५१० ॥  
 तेउलेस्सा णं भंते ! केरिसिया वन्नेणं पन्नत्ता ? गोयमा ! से जहानामए ससरुहारे  
 इ वा उरब्भरुहारे इ वा वराहरुहारे इ वा संवररुहारे इ वा मणुस्सरुहारे इ वा  
 इंदगोवे इ वा बालेंदगोवे इ वा बालदिवायरे इ वा संझारागे इ वा गुंजद्वारागे इ वा  
 जाइहिंगुले इ वा पवालंकुरे इ वा लक्खारसे इ वा लोहियक्खमणी इ वा किमिरा-  
 गकंवले इ वा गयतालुए इ वा चीणपिट्ठरासी इ वा पारिजायकुसुमे इ वा जासुमण-  
 कुसुमे इ वा किंसुयपुप्फरासी इ वा रत्तुप्पले इ वा रत्तासोगे इ वा रत्तकणवीरए इ  
 वा रत्तबंधुजीवए इ वा, भवेयारुवे ? गोयमा ! णो इणट्ठे समट्ठे । तेउलेस्सा णं एत्तो  
 इट्ठतरिया चेव जाव मणामतरिया चेव वन्नेणं पन्नत्ता ॥ ५११ ॥ पम्हलेस्सा णं  
 भंते ! केरिसिया वन्नेणं पन्नत्ता ? गोयमा ! से जहानामए चंपे इ वा चंपयच्छली इ  
 वा चंपयभेए इ वा हालिहा इ वा हालिद्गुलिया इ वा हालिद्भेए इ वा हरियाले  
 इ वा हरियालगुलिया इ वा हरियालभेए इ वा चिउरे इ वा चिउररागे इ वा  
 सुवन्नसिप्पी इ वा वरकणगणिहसे इ वा वरपुरिसवसणे इ वा अल्लइकुसुमे इ वा  
 चंपयकुसुमे इ वा कण्णियारकुसुमे इ वा कुहंडयकुसुमे इ वा सुवण्णजुहिया इ वा  
 सुहिरन्धियाकुसुमे इ वा कोरेंटमल्लदामे इ वा पीयासोगे इ वा पीयकणवीरे इ वा  
 पीयबंधुजीवए इ वा, भवेयारुवे ? गोयमा ! णो इणट्ठे समट्ठे । पम्हलेस्सा णं एत्तो  
 इट्ठतरिया जाव मणामतरिया चेव वन्नेणं पन्नत्ता ॥ ५१२ ॥ सुक्कलेस्सा णं भंते !  
 केरिसिया वन्नेणं पन्नत्ता ? गोयमा ! से जहानामए अंके इ वा संखे इ वा चंदे  
 इ वा कुंदे इ वा दगे इ वा दगरए इ वा दही इ वा दहिघणे इ वा खीरे इ वा  
 खीरपूरए इ वा सुक्कच्छिवाडिया इ वा पेहुणभिंजिया इ वा भंतथोयरुप्पपेट्ठे इ वा  
 सारयबलाहए इ वा कुसुयदले इ वा पोंडरीयदले इ वा सालिपिट्ठरासी इ वा  
 कुडगपुप्फरासी इ वा सिंदुवारमल्लदामे इ वा सेयासोए इ वा सेयकणवीरे इ वा  
 सेयबंधुजीवए इ वा, भवेयारुवे ? गोयमा ! नो इणट्ठे समट्ठे । सुक्कलेस्सा णं एत्तो  
 इट्ठतरिया चेव जाव मणामतरिया चेव वन्नेणं पन्नत्ता ॥ ५१३ ॥ एयाओ णं भंते !  
 छलेस्साओ कइसु वन्नेसु साहिज्जंति ? गोयमा ! पंचसु वन्नेसु साहिज्जंति, तंजहा-  
 कण्हलेस्सा कालएणं वन्नेणं साहिज्जइ, नीललेस्सा नीलवन्नेणं साहिज्जइ, काउलेस्सा  
 काललोहिएणं वन्नेणं साहिज्जइ, तेउलेस्सा लोहिएणं वन्नेणं साहिज्जइ, पम्हलेस्सा  
 हालिद्एणं वन्नेणं साहिज्जइ, सुक्कलेस्सा सुक्किएणं वन्नेणं साहिज्जइ ॥ ५१४ ॥  
 कण्हलेस्सा णं भंते ! केरिसिया आसाएणं पन्नत्ता ? गोयमा ! से जहानामए निंबे इ  
 वा निंबसारे इ वा निंबछल्ली इ वा निंबफाणिए इ वा कुडए इ वा कुडगफलए इ वा

कुडगछली इ वा कुडगफाणिए इ वा कडुगतुंबीइ वा कडुगतुंबिफले इ वा खारतउसी  
 इ वा खारतउसीफले इ वा देवदाली इ वा देवदालीपुप्फे इ वा मियवालुंकी इ वा  
 मियवालुंकीफले इ वा घोसाडए इ वा घोसाडईफले इ वा कण्हकंदए इ वा वज्जकंदए  
 इ वा, भवेयारुवे ? गोयमा ! णो इणट्ठे समट्ठे, कण्हलेस्सा णं एत्तो अणिट्ठतरिया  
 चेव जाव अमणामतरिया चेव आसाएणं पन्नत्ता ॥ ५१५ ॥ नीललेस्साए पुच्छा ।  
 गोयमा ! से जहानामए भंगी इ वा भंगीरए इ वा पाढा इ वा चविया इ वा चित्ता-  
 मूलए इ वा पिप्पली इ वा पिप्पलीमूलए इ वा पिप्पलीचुण्णे इ वा मिरिए इ वा  
 मिरियचुण्णए इ वा सिंगवेरे इ वा सिंगवेरचुण्णे इ वा, भवेयारुवे ? गोयमा ! णो  
 इणट्ठे समट्ठे, नीललेस्सा णं एत्तो जाव अमणामतरिया चेव आसाएणं पन्नत्ता ॥ ५१६ ॥  
 काउलेस्साए पुच्छा । गोयमा ! से जहानामए अंबाण वा अंबाडगाण वा माउलुंगाण  
 वा विट्ठाण वा कविट्ठाण वा भच्चाण वा फणसाण वा दाडिमाण वा अक्खोडयाण  
 वा चाराण वा वोराण वा तिंदुयाण वा अपक्काणं अपरिवागाणं वज्जेणं अणुववेयाणं  
 गंधेणं अणुववेयाणं फासेणं अणुववेयाणं, भवेयारुवे ? गोयमा ! णो इणट्ठे समट्ठे  
 जाव एत्तो अमणामतरिया चेव अस्साएणं पन्नत्ता ॥ ५१७ ॥ तेउलेस्सा णं भंते !  
 पुच्छा । गोयमा ! से जहानामए अंबाण वा जाव पक्काणं परियावन्नाणं वज्जेणं  
 उववेयाणं पसत्थेणं जाव फासेणं जाव एत्तो मणामयरिया चेव तेउलेस्सा आसा-  
 एणं पन्नत्ता ॥ ५१८ ॥ पम्हलेस्साए पुच्छा । गोयमा ! से जहानामए चंदप्पभा  
 इ वा मणसिला इ वा सीहू इ वा वारुणी इ वा पत्तासवे इ वा पुप्फासवे इ वा  
 फलासवे इ वा चोयासवे इ वा आसवे इ वा महु इ वा मेरए इ वा काविसायणे इ  
 वा खजूरसारए इ वा मुद्दियासारए इ वा सुपक्खोयरसे इ वा अट्ठपिट्ठणिट्ठिया इ वा  
 जंबुफलकालिया इ वा पसन्ना इ वा उक्कोसमयपत्ता वज्जेणं उववेया जाव फासेणं उव-  
 वेया दप्पणिज्जा मयणिज्जा, भवेयारुवा ? गोयमा ! णो इणट्ठे समट्ठे, पम्हलेस्सा णं एत्तो  
 इट्ठतरिया चेव जाव मणामतरिया चेव आसाएणं पन्नत्ता ॥ ५१९ ॥ सुक्कलेस्सा णं  
 भंते ! केरिसिया अस्साएणं पन्नत्ता ? गोयमा ! से जहानामए गुले इ वा खंडे इ वा  
 सक्करा इ वा मच्छंडिया इ वा पप्पडमोयए इ वा भिसकंदए इ वा पुप्फुत्तरा इ वा पड-  
 मुत्तरा इ वा आदंसिया इ वा सिद्धत्थिया इ वा आगासफालिओवमा इ वा उवमा इ  
 वा अणोवमा इ वा, भवेयारुवे ? गोयमा ! णो इणट्ठे समट्ठे, सुक्कलेस्सा णं एत्तो इट्ठत-  
 रिया चेव० पियतरिया चेव० मणामतरिया चेव आसाएणं पन्नत्ता ॥ ५२० ॥ कइ णं  
 भंते ! लेस्साओ दुब्भिगंधाओ पन्नत्ताओ ? गोयमा ! तओ लेस्साओ दुब्भिगंधाओ  
 पन्नत्ताओ । तंजहा-कण्हलेस्सा, नीललेस्सा, काउलेस्सा । कइ णं भंते ! लेस्साओ

सुब्बिगंधाओ पन्नताओ ? गोयमा ! तओ लेस्साओ सुब्बिगंधाओ पन्नताओ । तंजहा—  
 तेउलेस्सा, पम्हलेस्सा, सुक्कलेस्सा, एवं तओ अविमुद्धाओ, तओ विमुद्धाओ, तओ  
 अप्पसत्थाओ, तओ पसत्थाओ, तओ संकिलिद्धाओ, तओ असंकिलिद्धाओ, तओ  
 सीयलुक्खाओ, तओ निद्धुण्हाओ, तओ दुग्गइगामियाओ, तओ सुग्गइगामियाओ  
 ॥ ५२१ ॥ कण्हलेस्सा णं भंते ! कइविहं परिणामं परिणमइ ? गोयमा ! तिविहं वा  
 नवविहं वा सत्तावीसविहं वा एकासीइविहं वा बेतेयालीसतविहं वा बहुयं वा बहुविहं  
 वा परिणामं परिणमइ, एवं जाव सुक्कलेस्सा ॥ ५२२ ॥ कण्हलेस्सा णं भंते ! कइ-  
 पएसिया पन्नता ? गोयमा ! अणंतपएसिया पन्नता, एवं जाव सुक्कलेस्सा । कण्हलेस्सा  
 णं भंते ! कइपएसोगाढा पन्नता ? गोयमा ! असंखेज्जपएसोगाढा पन्नता, एवं जाव  
 सुक्कलेस्सा । कण्हलेस्साए णं भंते ! केवइयाओ वग्गणाओ पन्नताओ ? गोयमा ! अणं-  
 ताओ वग्गणाओ, एवं जाव सुक्कलेस्साए ॥ ५२३ ॥ केवइया णं भंते ! कण्हलेस्साठाणा  
 पन्नता ? गोयमा ! असंखेज्जा कण्हलेस्साठाणा पन्नता । एवं जाव सुक्कलेस्सा ॥ ५२४ ॥  
 एसि णं भंते ! कण्हलेस्साठाणाणं जाव सुक्कलेस्साठाणाण य जहन्नगाणं दव्वट्ठयाए  
 पएसट्ठयाए दव्वट्ठपएसट्ठयाए कयरे कयरेहिंतो अप्पा वा ४ ? गोयमा ! सव्वत्थोवा  
 जहन्नगा काउलेस्साठाणा दव्वट्ठयाए, जहन्नगा नीललेस्साठाणा दव्वट्ठयाए असंखेज्ज-  
 गुणा, जहन्नगा कण्हलेस्साठाणा दव्वट्ठयाए असंखेज्जगुणा, जहन्नगा तेउलेस्साठाणा  
 दव्वट्ठयाए असंखेज्जगुणा, जहन्नगा पम्हलेस्साठाणा दव्वट्ठयाए असंखेज्जगुणा, जह-  
 न्नगा सुक्कलेस्साठाणा दव्वट्ठयाए असंखेज्जगुणा, पएसट्ठयाए—सव्वत्थोवा जहन्नगा  
 काउलेस्साठाणा पएसट्ठयाए, जहन्नगा नीललेस्साठाणा पएसट्ठयाए असंखेज्जगुणा,  
 जहन्नगा कण्हलेस्साठाणा पएसट्ठयाए असंखेज्जगुणा, जहन्नगा तेउलेस्साए ठाणा  
 पएसट्ठयाए असंखेज्जगुणा, जहन्नगा पम्हलेस्साठाणा पएसट्ठयाए असंखेज्जगुणा, जह-  
 न्नगा सुक्कलेस्साठाणा पएसट्ठयाए असंखेज्जगुणा, दव्वट्ठपएसट्ठयाए—सव्वत्थोवा जह-  
 न्नगा काउलेस्साठाणा दव्वट्ठयाए, जहन्नगा नीललेस्साठाणा दव्वट्ठयाए असंखेज्जगुणा,  
 एवं कण्हलेस्सा, तेउलेस्सा, पम्हलेस्सा, जहन्नगा सुक्कलेस्साठाणा दव्वट्ठयाए असंखेज्ज-  
 गुणा, जहन्नगाहिंतो सुक्कलेस्साठाणेहिंतो दव्वट्ठयाए जहन्नकाउलेस्साठाणा पएसट्ठयाए  
 असंखेज्जगुणा, जहन्नगा नीललेस्साठाणा पएसट्ठयाए असंखेज्जगुणा, एवं जाव सुक्कले-  
 स्साठाणा ॥ ५२५ ॥ एसि णं भंते ! कण्हलेस्साठाणाणं जाव सुक्कलेस्साठाणाण य  
 उक्कोसगाणं दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो अप्पा वा ४ ?  
 गोयमा ! सव्वत्थोवा उक्कोसगा काउलेस्साठाणा दव्वट्ठयाए, उक्कोसगा नीललेस्साठाणा  
 दव्वट्ठयाए असंखेज्जगुणा, एवं जहेव जहन्नगा तहेव उक्कोसगा वि, नवरं उक्कोसति

अभिलावो ॥ ५२६ ॥ एसि णं भंते ! कण्हलेसठाणाणं जाव सुक्कलेसठाणाणं य जहन्नउक्कोसगाणं दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो अप्पा वा ४ ? गोयमा ! सव्वत्थोवा जहन्नगा काउलेसठाणा दव्वट्ठयाए, जहन्नगा नीललेसठाणा दव्वट्ठयाए असंखेज्जगुणा, एवं कण्हतेउपम्हलेसठाणा, जहन्नगा सुक्कलेसठाणा दव्वट्ठयाए असंखेज्जगुणा, जहन्नएहिंतो सुक्कलेसठाणेहिंतो दव्वट्ठयाए उक्कोसा काउलेसठाणा दव्वट्ठयाए असंखेज्जगुणा, उक्कोसा नीललेसठाणा दव्वट्ठयाए असंखेज्जगुणा, एवं कण्हतेउपम्हलेसट्ठणा, उक्कोसा सुक्कलेसठाणा दव्वट्ठयाए असंखेज्जगुणा । पएसट्ठयाए-सव्वत्थोवा जहन्नगा काउलेसठाणा पएसट्ठयाए, जहन्नगा नीललेसठाणा पएसट्ठयाए असंखेज्जगुणा, एवं जहेव दव्वट्ठयाए तहेव पएसट्ठयाए वि भाणियव्वं, नवरं पएसट्ठयाएति अभिलावविसेसो । दव्वट्ठपएसट्ठयाए-सव्वत्थोवा जहन्नगा काउलेसठाणा दव्वट्ठयाए, जहन्नगा नीललेसठाणा दव्वट्ठयाए असंखेज्जगुणा, एवं कण्हतेउपम्हलेसट्ठणा, जहन्नया सुक्कलेसठाणा दव्वट्ठयाए असंखेज्जगुणा, जहन्नएहिंतो सुक्कलेसठाणेहिंतो दव्वट्ठयाए उक्कोसा काउलेसठाणा दव्वट्ठयाए असंखेज्जगुणा, उक्कोसा नीललेसठाणा दव्वट्ठयाए असंखेज्जगुणा, एवं कण्हतेउपम्हलेसट्ठणा, उक्कोसगा सुक्कलेसठाणा दव्वट्ठयाए असंखेज्जगुणा, उक्कोसएहिंतो सुक्कलेसठाणेहिंतो दव्वट्ठयाए जहन्नगा काउलेसठाणा पएसट्ठयाए अणंतगुणा, जहन्नगा नीललेसठाणा पएसट्ठयाए असंखेज्जगुणा, एवं कण्हतेउपम्हलेसट्ठणा, जहन्नगा सुक्कलेसठाणा पएसट्ठयाए असंखेज्जगुणा, जहन्नएहिंतो सुक्कलेसठाणेहिंतो पएसट्ठयाए उक्कोसा काउलेसठाणा पएसट्ठयाए असंखेज्जगुणा, उक्कोसया नीललेसठाणा पएसट्ठयाए असंखेज्जगुणा, एवं कण्हतेउपम्हलेसट्ठणा, उक्कोसया सुक्कलेसठाणा पएसट्ठयाए असंखेज्जगुणा ॥ ५२७ ॥ **पन्नवणाए भगवईए सत्तरसमस्स लेस्सापयस्स चउत्थो उदेसओ समत्तो ॥**

कइ णं भंते ! लेसाओ पन्नताओ ? गोयमा ! छल्लेसाओ पन्नताओ । तंजहा—कण्हलेसा जाव सुक्कलेसा । से नूणं भंते ! कण्हलेसा नीललेसं पप्प तारुवत्ताए तावन्नत्ताए तागंधत्ताए तारसत्ताए ताफासत्ताए भुज्जो भुज्जो परिणमइ ? इत्तो आढत्तं जहा चउत्थओ उदेसओ तहा भाणियव्वं जाव वेरुलियमणिदिट्ठोति ॥ ५२८ ॥ से नूणं भंते ! कण्हलेसा नीललेसं पप्प णो तारुवत्ताए जाव णो ताफासत्ताए भुज्जो भुज्जो परिणमइ ? हंता गोयमा ! कण्हलेसा नीललेसं पप्प णो तारुवत्ताए, णो तावन्नत्ताए, णो तागंधत्ताए, णो तारसत्ताए, णो ताफासत्ताए भुज्जो २ परिणमइ । से केणट्ठेणं भंते ! एवं बुच्चइ० ? गोयमा ! आगारभावमायाए वा से सिया, पल्लिभागभावमायाए वा से सिया । कण्हलेसा णं सा, णो खलु नीललेसा, तत्थ गया ओसक्कइ उस्सक्कइ

वा, से तेणट्ठेणं गोयमा ! एवं वुच्चइ—‘कण्हलेसा नीललेसं पप्प णो तारुवत्ताए जाव भुज्जो २ परिणमइ’ । से नूणं भंते ! नीललेसा काउलेसं पप्प णो तारुवत्ताए जाव भुज्जो २ परिणमइ ? हंता गोयमा ! नीललेसा काउलेसं पप्प णो तारुवत्ताए जाव भुज्जो २ परिणमइ । से केणट्ठेणं भंते ! एवं वुच्चइ—‘नीललेसा काउलेसं पप्प णो तारुवत्ताए जाव भुज्जो २ परिणमइ’ ? गोयमा ! आगारभावमायाए वा सिया, पळिभागभावमायाए वा सिया । नीललेसा णं सा, णो खलु सा काउलेसा, तत्थगया ओसकइ उस्सकइ वा, से एएणट्ठेणं गोयमा ! एवं वुच्चइ—‘नीललेसा काउलेसं पप्प णो तारुवत्ताए जाव भुज्जो २ परिणमइ’ । एवं काउलेसा तेउलेसं पप्प, तेउलेसा पम्हलेसं पप्प, पम्हलेसा सुक्कलेसं पप्प । से नूणं भंते ! सुक्कलेसा पम्हलेसं पप्प णो तारुवत्ताए जाव परिणमइ ? हंता गोयमा ! सुक्कलेसा तं चेव । से केणट्ठेणं भंते ! एवं वुच्चइ—‘सुक्कलेसा जाव णो परिणमइ’ ? गोयमा ! आगारभावमायाए वा जाव सुक्कलेसा णं सा, णो खलु सा पम्हलेसा, तत्थ गया ओसकइ, से तेणट्ठेणं गोयमा ! एवं वुच्चइ—‘जाव णो परिणमइ’ ॥ ५२९ ॥ **पन्नवणाए भगवईए सत्तर-समे लेस्सापए पंचमो उद्देसओ समत्तो ॥**

कइ णं भंते ! लेसा पन्नत्ता ? गोयमा ! छ लेसा पन्नत्ता । तंजहा—कण्हलेसा जाव सुक्कलेसा । मणुस्साणं भंते ! कइ लेसाओ पन्नत्ताओ ? गोयमा ! छ लेसाओ पन्नत्ताओ । तंजहा—कण्हलेसा जाव सुक्कलेसा । मणुस्सीणं भंते ! पुच्छा । गोयमा ! छलेसाओ पन्नत्ताओ । तंजहा—कण्हा जाव सुक्का । कम्मभूमयमणुस्साणं भंते ! कइ लेसाओ पन्नत्ताओ ? गोयमा ! छ लेसाओ पन्नत्ताओ । तंजहा—कण्हा जाव सुक्का । एवं कम्मभूमयमणुस्सीण वि । भरहेरवयमणुस्साणं भंते ! कइ लेसाओ पन्नत्ताओ ? गोयमा ! छलेसाओ पन्नत्ताओ । तंजहा—कण्हा जाव सुक्का । एवं मणुस्सीण वि । पुव्वविदेहे अवरविदेहे कम्मभूमयमणुस्साणं कइ लेस्साओ० ? गो० ! छलेस्साओ० । तंजहा—कण्हा जाव सुक्का । एवं मणुस्सीण वि । अकम्मभूमयमणुस्साणं पुच्छा । गोयमा ! चत्तारि लेसाओ पन्नत्ताओ । तंजहा—कण्ह० जाव तेउलेसा, एवं अकम्मभूमयमणुस्सीण वि, एवं अंतरदीवगमणुस्साणं, मणुस्सीण वि । एवं हेमवयरपन्नवय-अकम्मभूमयमणुस्साणं मणुस्सीण य कइ लेसाओ पन्नत्ताओ ? गोयमा ! चत्तारि, तंजहा—कण्हलेसा जाव तेउलेसा । हरिवासरम्मयअकम्मभूमयमणुस्साणं मणुस्सीण य पुच्छा । गोयमा ! चत्तारि, तंजहा—कण्ह० जाव तेउलेसा । देवकुरुउत्तरकुरु-अकम्मभूमयमणुस्सा एवं चेव, एएसिं चेव मणुस्सीणं एवं चेव, धायइसंडपुरिमइ वि एवं चेव, पच्छिमइ वि, एवं पुक्खरदीवे वि भाणियव्वं ॥ ५३० ॥

कण्हलेसे णं भंते ! मणुस्से कण्हलेसं गब्भं जणेज्जा ? हंता गोयमा ! जणेज्जा ।  
 कण्हलेसे० मणुस्से नीललेसं गब्भं जणेज्जा ? हंता गोयमा ! जणेज्जा जाव सुक्कलेसं  
 गब्भं जणेज्जा । नीललेसे० मणुस्से कण्हलेसं गब्भं जणेज्जा ? हंता गोयमा ! जणेज्जा,  
 एवं नीललेसे मणुस्से जाव सुक्कलेसं गब्भं जणेज्जा, एवं काउलेसेणं छप्पि आलावगा  
 भाणियव्वा । तेउलेसाण वि पम्हलेसाण वि सुक्कलेसाण वि, एवं छत्तीसं आलावगा  
 भाणियव्वा । कण्हलेसा० इत्थिया कण्हलेसं गब्भं जणेज्जा ? हंता गोयमा ! जणेज्जा ।  
 एवं एए वि छत्तीसं आलावगा भाणियव्वा । कण्हलेसे णं भंते ! मणुस्से कण्हलेसाए  
 इत्थियाए कण्हलेसं गब्भं जणेज्जा ? हंता गोयमा ! जणेज्जा, एवं एए छत्तीसं आला-  
 वगा । कम्मभूमगकण्हलेसे णं भंते ! मणुस्से कण्हलेसाए इत्थियाए कण्हलेसं गब्भं  
 जणेज्जा ? हंता गोयमा ! जणेज्जा, एवं एए छत्तीसं आलावगा । अकम्मभूमयकण्हलेसे०  
 मणुस्से अकम्मभूमयकण्हलेसाए इत्थियाए अकम्मभूमयकण्हलेसं गब्भं जणेज्जा ?  
 हंता गोयमा ! जणेज्जा, नवरं चउसु लेसासु सोलस आलावगा, एवं अंतरदीवगाण वि  
 ॥ ५३१ ॥ छट्ठो उद्देसओ समत्तो ॥ पन्नवणाए भगवईए सत्तरसमं  
 लेस्सापयं समत्तं ॥

जीव गइंदिय काए जोए वेए कसायलेसा य । सम्मत्तणाणदंसण संजय उवओग  
 आहारे ॥ १ ॥ भासगपरित्त पज्जत्त सुहुम सन्नी भवऽत्थि चरिमे य । एएसिं तु  
 पयाणं कायठिई होइ णायव्वा ॥ २ ॥ जीवे णं भंते ! जीवेत्ति कालओ केवच्चिरं  
 होइ ? गोयमा ! सव्वद्धं ॥ दारं १ ॥ ५३२ ॥ नेरइए णं भंते ! नेरइएत्ति कालओ  
 केवच्चिरं होइ ? गोयमा ! जह्वेणं दस वाससहस्साइं, उक्कोसेणं तेत्तीसं सागरोव-  
 माइं । तिरिक्खजोणिए णं भंते ! तिरिक्खजोणिएत्ति कालओ केवच्चिरं होइ ? गोयमा !  
 जह्वेणं अंतोमुहुत्तं, उक्कोसेणं अणंतं कालं, अणंताओ उस्सप्पिणिओसप्पिणीओ  
 कालओ, खेत्तओ अणंता लोगा, असंखेज्जा पोग्गलपरियट्ठा, ते णं पुग्गलपरियट्ठा  
 आवलियाए असंखेज्जभागे । तिरिक्खजोणिणी णं भंते ! तिरिक्खजोणिणित्ति कालओ  
 केवच्चिरं होइ ? गोयमा ! जह्वेणं अंतोमुहुत्तं, उक्कोसेणं तिप्पि पल्लिओवमाइं पुव्वको-  
 ङ्किपुहुत्तमब्भहियाइं । एवं मणुस्से वि, मणुस्सी वि एवं चेव । देवे णं भंते ! देवेत्ति  
 कालओ केवच्चिरं होइ ? गोयमा ! जह्वे नेरइए । देवी णं भंते ! देवित्ति कालओ  
 केवच्चिरं होइ ? गोयमा ! जह्वेणं दस वाससहस्साइं, उक्कोसेणं पणपन्नं पल्लिओ-  
 वमाइं । सिद्धे णं भंते ! सिद्धेत्ति कालओ केवच्चिरं होइ ? गोयमा ! साइए अपज्जव-  
 सिए । नेरइयअपज्जत्तए णं भंते ! नेरइयअपज्जत्तएत्ति कालओ केवच्चिरं होइ ? गोयमा !  
 जह्वेण वि उक्कोसेण वि अंतोमुहुत्तं, एवं जाव देवी अपज्जत्तिया । नेरइयपज्जत्तए णं

भंते ! नेरइयपज्जत्तएत्ति कालओ केवच्चिरं होइ ? गोयमा ! जहन्नेणं दस वाससहस्साइं अंतोमुहुत्तूणाइं, उक्कोसेणं तेत्तीसं सागरोवमाइं अंतोमुहुत्तूणाइं । तिरिक्खजोणियपज्जत्तए णं भंते ! तिरिक्खजोणियपज्जत्तएत्ति कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं तिञ्चि पलिओवमाइं अंतोमुहुत्तूणाइं । एवं तिरिक्खजोणियपज्जत्तिया वि, एवं मणस्से वि, मणस्सी वि एवं चेव । देवपज्जत्तए जहा नेरइयपज्जत्तए । देवीपज्जत्तिया णं भंते ! देवीपज्जत्तियत्ति कालओ केवच्चिरं होइ ? गोयमा ! जहन्नेणं दस वाससहस्साइं अंतोमुहुत्तूणाइं, उक्कोसेणं पणपच्चं पलिओवमाइं अंतोमुहुत्तूणाइं ॥ दारं २ ॥ ५३३ ॥ सइंदिए णं भंते ! सइंदिएत्ति कालओ केवच्चिरं होइ ? गोयमा ! सइंदिए दुविहे पन्नत्ते । तंजहा—अणाइए वा अपज्जवसिए, अणाइए वा सपज्जवसिए । एगिंदिए णं भंते ! एगिंदिएत्ति कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं अणंतं कालं वणस्सइक्कालो । वेइंदिए णं भंते ! वेइंदिएत्ति कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं संखेज्जं कालं । एवं तेइंदियचउरिंदिए वि । पंचिंदिए णं भंते ! पंचिंदिएत्ति कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं सागरोवमसहस्सं साइरेणं । अणिंदिए णं पुच्छा । गोयमा ! साइए अपज्जवसिए । सइंदियअपज्जत्तए णं पुच्छा । गोयमा ! जहन्नेण वि उक्कोसेण वि अंतोमुहुत्तं । एवं जाव पंचिंदियअपज्जत्तए । सइंदियपज्जत्तए णं भंते ! सइंदियपज्जत्तएत्ति कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं सागरोवमसयपुहुत्तं साइरेणं । एगिंदियपज्जत्तए णं भंते ! पुच्छा । गोयमा ! जहन्नेणं अंतोमुहुत्तं, उक्कोसेणं संखेजाइं वाससहस्साइं । वेइंदियपज्जत्तए णं पुच्छा । गोयमा ! जहन्नेणं अंतोमुहुत्तं, उक्कोसेणं संखेज्जवासाइं । तेइंदियपज्जत्तए णं पुच्छा । गोयमा ! जहन्नेणं अंतोमुहुत्तं, उक्कोसेणं संखेजाइं राइंदियाइं । चउरिंदियपज्जत्तए णं भंते ! पुच्छा । गोयमा ! जहन्नेणं अंतोमुहुत्तं, उक्कोसेणं संखेजा मासा । पंचिंदियपज्जत्तए णं भंते ! पंचिंदियपज्जत्तएत्ति कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं सागरोवमसयपुहुत्तं ॥ दारं ३ ॥ ५३४ ॥ सकाइए णं भंते ! सकाइएत्ति कालओ केवच्चिरं होइ ? गोयमा ! सकाइए दुविहे पन्नत्ते । तंजहा—अणाइए वा अपज्जवसिए, अणाइए वा सपज्जवसिए, तत्थ णं जे से अ० स० से जहन्नेणं अंतोमुहुत्तं, उक्कोसेणं दो सागरोवमसहस्साइं संखेज्जवासमब्भहियाइं । अकाइए णं भंते ! पुच्छा । गोयमा ! अकाइए साइए अपज्जवसिए । सकाइयअपज्जत्तए णं पुच्छा । गोयमा ! जहन्नेण वि उक्कोसेण वि अंतोमुहुत्तं, एवं जाव तसकाइयअपज्जत्तए पुच्छा । गोयमा ! जहन्नेणं अंतोमुहुत्तं, उक्कोसेणं सागरोवमसयपुहुत्तं साइरेणं । पुढविकाइए णं पुच्छा ।



गोयमा ! जहन्नेणं अंतोमुहुत्तं, उक्कोसेणं असंखेज्जं कालं, असंखेज्जाओ उस्सप्पिणिओ-  
 सप्पिणीओ कालओ, खेत्तओ असंखेज्जा लोगा । एवं आउतेउवाउकाइया वि । वण-  
 स्सइकाइयाणं पुच्छा । गोयमा ! जहन्नेणं अंतोमुहुत्तं, उक्कोसेणं अणंतं कालं, अणं-  
 ताओ उस्सप्पिणिओसप्पिणीओ कालओ, खेत्तओ अणंता लोगा, असंखेज्जा पुग्गल-  
 परियट्ठा, ते णं पुग्गलपरियट्ठा आवलियाए असंखेज्जइभागो । पुढविकाइए पज्जतए  
 पुच्छा । गोयमा ! जहन्नेणं अंतोमुहुत्तं, उक्कोसेणं संखेज्जाइं वाससहस्साइं, एवं आऊ  
 वि । तेउकाइए पज्जतए पुच्छा । गोयमा ! जहन्नेणं अंतोमुहुत्तं, उक्कोसेणं संखेज्जाइं  
 राइंदियाइं । वाउकाइयपज्जतए णं पुच्छा । गोयमा ! जहन्नेणं अंतोमुहुत्तं, उक्कोसेणं  
 संखेज्जाइं वाससहस्साइं । वणस्सइकाइयपज्जतए पुच्छा । गोयमा ! जहन्नेणं अंतोमु-  
 हुत्तं, उक्कोसेणं संखेज्जाइं वाससहस्साइं । तसकाइयपज्जतए पुच्छा । गोयमा ! जहन्नेणं  
 अंतोमुहुत्तं, उक्कोसेणं सागरोवमसयपुहुत्तं साइरेणं ॥ ५३५ ॥ सुहुमे णं भंते ! सुहुमेत्ति  
 कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं असंखेज्जं कालं,  
 असंखेज्जाओ उस्सप्पिणिओसप्पिणीओ कालओ, खेत्तओ असंखेज्जा लोगा । सुहुम-  
 पुढविकाइए, सुहुमआउकाइए, सुहुमतेउकाइए, सुहुमवाउकाइए, सुहुमवणप्फइकाइए  
 सुहुमनिगोदे वि जहन्नेणं अंतोमुहुत्तं, उक्कोसेणं असंखेज्जं कालं, असंखेज्जाओ उस्स-  
 प्पिणिओसप्पिणीओ कालओ, खेत्तओ असंखेज्जा लोगा । सुहुमे णं भंते ! अपज्जत-  
 एत्ति पुच्छा । गोयमा ! जहन्नेणं अंतोमुहुत्तं उक्कोसेण वि अंतोमुहुत्तं । पुढविकाइय-  
 आउकाइयतेउकाइयवाउकाइयवणप्फइकाइयाणं य एवं चेव, पज्जतयाणं वि एवं चेव ।  
 बायरे णं भंते ! बायरेत्ति कालओ केवच्चिरं होइ ? गोयमा ! जहन्नेणं अंतोमुहुत्तं,  
 उक्कोसेणं असंखेज्जं कालं, असंखेज्जाओ उस्सप्पिणिओसप्पिणीओ कालओ, खेत्तओ  
 अंगुलस्स असंखेज्जइभागं । बायरपुढविकाइए णं भंते ! पुच्छा । गोयमा ! जहन्नेणं  
 अंतोमुहुत्तं, उक्कोसेणं सत्तरि सागरोवमकोडाकोडीओ । एवं बायरआउकाइए वि  
 बायरतेउकाइए वि, बायरवाउकाइए वि । बायरवणप्फइकाइए णं ० बायर ० पुच्छा ।  
 गोयमा ! जहन्नेणं अंतोमुहुत्तं, उक्कोसेणं असंखेज्जं कालं जाव खेत्तओ अंगुलस्स  
 असंखेज्जइभागं । पत्तेयसरीरबायरवणप्फइकाइए णं भंते ! पुच्छा । गोयमा ! जह-  
 न्नेणं अंतोमुहुत्तं, उक्कोसेणं सत्तरि सागरोवमकोडाकोडीओ । निगोए णं भंते !  
 निगोएत्ति कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं अणंतं  
 कालं, अणंताओ उस्सप्पिणिओसप्पिणीओ कालओ, खेत्तओ अट्ठाइज्जा पोग्गल-  
 परियट्ठा । बादरनिगोदे णं भंते ! बादरनिगोदेत्ति पुच्छा । गोयमा ! जहन्नेणं  
 अंतोमुहुत्तं, उक्कोसेणं सत्तरि सागरोवमकोडाकोडीओ । बायरतसकाइए णं भंते !

वायरतसकाइएत्ति कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं दो सागरोवमसहस्साइं संखेज्जावसमब्भहियाइं । एएसिं चैव अपज्जत्ता सव्वे वि जहन्नेण वि उक्कोसेण वि अंतोमुहुत्तं । वायरपज्जत्ता णं भंते ! वायरपज्जत्ताएत्ति पुच्छा । गोयमा ! जहन्नेणं अंतोमुहुत्तं, उक्कोसेणं सागरोवमसयपुहुत्तं साइरेगं । वायरपुटविकाइयपज्जत्ताए णं भंते ! वायर० पुच्छा । गोयमा ! जहन्नेणं अंतोमुहुत्तं, उक्कोसेणं संखेज्जाइं वाससहस्साइं । एवं आउकाइए वि । तेउकाइयपज्जत्ताए णं भंते ! तेउकाइयपज्जत्ताएत्ति पुच्छा । गोयमा ! जहन्नेणं अंतोमुहुत्तं, उक्कोसेणं संखेज्जाइं राइंदियाइं । वाउकाइयवणस्सइकाइयपत्तेयसरीरवायरवणप्फइकाइए पुच्छा । गोयमा ! जहन्नेणं अंतोमुहुत्तं, उक्कोसेणं संखेज्जाइं वाससहस्साइं । निओयपज्जत्ता वायरनिओयपज्जत्ताए पुच्छा । गोयमा ! दोण्ह वि जहन्नेणं अन्तोमुहुत्तं, उक्कोसेणं अंतोमुहुत्तं । वायरतसकाइयपज्जत्ताए णं भंते ! वायरतसकाइयपज्जत्ताएत्ति कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं सागरोवमसयपुहुत्तं साइरेगं ॥ दारं ४ ॥ ५३६ ॥ सजोगी णं भंते ! सजोगिन्ति कालओ केवच्चिरं होइ ? गोयमा ! सजोगी दुविहे पन्नत्ते । तंजहा—अणाइए वा अपज्जवसिए, अणाइए वा सपज्जवसिए । मणजोगी णं भंते ! मणजोगिन्ति कालओ केवच्चिरं होइ ? गोयमा ! जहन्नेणं एकं समयं, उक्कोसेणं अंतोमुहुत्तं । एवं वइजोगी वि । कायजोगी णं भंते ! कायजोगि० ? गोयमा ! जहन्नेणं अंतोमुहुत्तं, उक्कोसेणं वणप्फइकालो । अजोगी णं भंते ! अजोगिन्ति कालओ केवच्चिरं होइ ? गोयमा ! साइए अपज्जवसिए ॥ दारं ५ ॥ ॥ ५३७ ॥ सवेदए णं भंते ! सवेदएत्ति कालओ केवच्चिरं होइ ? गोयमा ! सवेदएत्तिविहे पन्नत्ते । तंजहा—अणाइए वा अपज्जवसिए, अणाइए वा सपज्जवसिए, साइए वा सपज्जवसिए । तत्थ णं जे से साइए सपज्जवसिए से जहन्नेणं अंतोमुहुत्तं, उक्कोसेणं अणंतं कालं, अणंताओ उस्सप्पिणीओसप्पिणीओ कालओ, खेततो अवहुं पोगलपरियट्ठं देसूणं । इत्थिवेदए णं भंते ! इत्थिवेदएत्ति कालओ केवच्चिरं होइ ? गोयमा ! एगेणं आएसेणं जहन्नेणं एकं समयं, उक्कोसेणं दसुत्तरं पल्लोवमसयं पुव्वकोडिपुहुत्तमब्भहियं १, एगेणं आएसेणं जहन्नेणं एगं समयं, उक्कोसेणं अट्ठारसपल्लोवमाइं पुव्वकोडिपुहुत्तमब्भहियाइं २, एगेणं आएसेणं जहन्नेणं एगं समयं, उक्कोसेणं चउदस पल्लोवमाइं पुव्वकोडिपुहुत्तमब्भहियाइं ३, एगेणं आएसेणं जहन्नेणं एगं समयं, उक्कोसेणं पल्लोवमसयं पुव्वकोडिपुहुत्तमब्भहियं ४, एगेणं आएसेणं जहन्नेणं एगं समयं, उक्कोसेणं पल्लोवमपुहुत्तं पुव्वकोडिपुहुत्तमब्भहियं ५ । पुरिसवेदए णं भंते ! पुरिसवेदएत्ति० ? गोयमा ! जहन्नेणं अंतोमुहुत्तं, उक्कोसेणं सागरोवमसयपुहुत्तं साइ-

रेगं । नपुंसगवेदए णं भंते ! नपुंसगवेदएत्ति पुच्छा । गोयमा ! जहन्नेणं एगं समयं, उक्कोसेणं वणस्सइकालो । अवेयए णं भंते ! अवेयएत्ति पुच्छा । गोयमा ! अवेयए दुविहे पन्नते । तंजहा—साइए वा अपज्जवसिए, साइए वा सपज्जवसिए । तत्थ णं जे से साइए सपज्जवसिए से जहन्नेणं एगं समयं, उक्कोसेणं अंतोमुहुत्तं ॥ दारं ६ ॥ ५३८ ॥ सकसाई णं भंते ! सकसाइत्ति कालओ केवच्चिरं होइ ? गोयमा ! सकसाई तिविहे पन्नते । तंजहा—अणाइए वा अपज्जवसिए, अणाइए वा सपज्जवसिए, साइए वा सपज्जवसिए जाव अवञ्चं पोग्गलपरियट्ठं देसूणं । कोहकसाई णं भंते ! पुच्छा । गोयमा ! जहन्नेण वि उक्कोसेण वि अंतोमुहुत्तं, एवं जाव माणमायाकसाई । लोभकसाई णं भंते ! लोभकसाइत्ति पुच्छा । गोयमा ! जहन्नेणं एकं समयं, उक्कोसेणं अंतोमुहुत्तं । अकसाई णं भंते ! अकसाइत्ति कालओ केवच्चिरं होइ ? गोयमा ! अकसाई दुविहे पन्नते । तंजहा—साइए वा अपज्जवसिए साइए वा सपज्जवसिए । तत्थ णं जे से साइए सपज्जवसिए से जहन्नेणं एगं समयं, उक्कोसेणं अंतोमुहुत्तं ॥ दारं ७ ॥ ५३९ ॥ सल्लेसे णं भंते ! सल्लेसेत्ति पुच्छा । गोयमा ! सल्लेसे दुविहे पन्नते । तंजहा—अणाइए वा अपज्जवसिए, अणाइए वा सपज्जवसिए । कण्हल्लेसे णं भंते ! कण्हल्लेसेत्ति कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं तेत्तीसं सागरोवमाइं अंतोमुहुत्तमब्भहियाइं । नील्लेसे णं भंते ! नील्लेसेत्ति पुच्छा । गोयमा ! जहन्नेणं अंतोमुहुत्तं, उक्कोसेणं दस सागरोवमाइं पल्लोवमासंखिज्झभागमब्भहियाइं । काउल्लेसे णं पुच्छा । गोयमा ! जहन्नेणं अंतोमुहुत्तं, उक्कोसेणं तिण्णि सागरोवमाइं पल्लोवमासंखिज्झभागमब्भहियाइं । तेउल्लेसे णं पुच्छा । गोयमा ! जहन्नेणं अंतोमुहुत्तं, उक्कोसेणं दो सागरोवमाइं पल्लोवमासंखिज्झभागमब्भहियाइं । पम्हल्लेसे णं पुच्छा । गोयमा ! जहन्नेणं अंतोमुहुत्तं, उक्कोसेणं दस सागरोवमाइं अंतोमुहुत्तमब्भहियाइं । सुक्कल्लेसे णं पुच्छा । गोयमा ! जहन्नेणं अंतोमुहुत्तं, उक्कोसेणं तेत्तीसं सागरोवमाइं अंतोमुहुत्तमब्भहियाइं । अल्लेसे णं पुच्छा । गोयमा ! साइए अपज्जवसिए ॥ दारं ८ ॥ ५४० ॥ सम्मदिट्ठी णं भंते ! सम्मदिट्ठित्ति कालओ केवच्चिरं होइ ? गोयमा ! सम्मदिट्ठी दुविहे पन्नते । तंजहा—साइए वा अपज्जवसिए, साइए वा सपज्जवसिए । तत्थ णं जे से साइए सपज्जवसिए से जहन्नेणं अंतोमुहुत्तं, उक्कोसेणं छावट्ठिं सागरोवमाइं साइरेगाइं । मिच्छादिट्ठी णं भंते ! पुच्छा । गोयमा ! मिच्छादिट्ठी तिविहे पन्नते । तंजहा—अणाइए वा अपज्जवसिए, अणाइए वा सपज्जवसिए, साइए वा सपज्जवसिए । तत्थ णं जे से साइए सपज्जवसिए से जहन्नेणं अंतोमुहुत्तं, उक्कोसेणं अणंतं कालं, अणंताओ उस्सप्पिणिओसप्पि-

णीओ कालओ, खेतओ अवड्ढं पोगलपरियट्ठं देसूणं । सम्मासिच्छादिट्ठी णं पुच्छां ।  
 गोयमा ! जहन्नेणं अंतोमुहुत्तं, उक्कोसेणं अंतोमुहुत्तं ॥ दारं ९ ॥ ५४१ ॥ णाणी  
 णं भंते ! णाणित्ति कालओ केवच्चिरं होइ ? गोयमा ! णाणी दुविहे पन्नत्ते । तंजहा—  
 साइए वा अपज्जवसिए, साइए वा सपज्जवसिए । तत्थ णं जे से साइए सपज्ज-  
 वसिए से जहन्नेणं अंतोमुहुत्तं, उक्कोसेणं छावट्ठिं सागरोवमाई साइरेगाई । आभिणि-  
 बोहियणाणी णं पुच्छा । गोयमा ! एवं चेव, एवं सुयणाणी वि, ओहिणाणी वि एवं  
 चेव, णवरं जहन्नेणं एगं समयं । मणपज्जवणाणी णं भंते ! मणपज्जवणाणित्ति कालओ  
 केवच्चिरं होइ ? गोयमा ! जहन्नेणं एगं समयं, उक्कोसेणं देसूणा पुव्वकोडी ।  
 केवलणाणी णं पुच्छा । गोयमा ! साइए अपज्जवसिए । अण्णाणी मइअण्णाणी  
 सुयअण्णाणी पुच्छा । गोयमा ! अण्णाणी, मइअण्णाणी, सुयअण्णाणी तिविहे पन्नत्ते ।  
 तंजहा—अणाइए वा अपज्जवसिए, अणाइए वा सपज्जवसिए, साइए वा सपज्जवसिए ।  
 तत्थ णं जे से साइए सपज्जवसिए से जहन्नेणं अंतोमुहुत्तं, उक्कोसेणं अणंतं  
 कालं, अणंताओ उरसप्पिणिओसप्पिणीओ कालओ, खेतओ अवड्ढपोगलपरियट्ठं  
 देसूणं । विभंगणाणी णं भंते ! पुच्छा । गोयमा ! जहन्नेणं एगं समयं, उक्कोसेणं  
 तेत्तीसं सागरोवमाई देसूणाए पुव्वकोडीए अब्भहियाई ॥ दारं १० ॥ ५४२ ॥  
 चक्खुदंसणी णं भंते ! पुच्छा । गोयमा ! जहन्नेणं अंतोमुहुत्तं, उक्कोसेणं सागरोवम-  
 सहस्सं साइरेगं । अचक्खुदंसणी णं भंते ! अचक्खुदंसणित्ति कालओ ? गोयमा !  
 अचक्खुदंसणी दुविहे पन्नत्ते । तंजहा—अणाइए वा अपज्जवसिए, अणाइए वा सपज्ज-  
 वसिए । ओहिदंसणी णं पुच्छा । गोयमा ! जहन्नेणं एगं समयं, उक्कोसेणं दो छाव-  
 ट्ठीओ सागरोवमाणं साइरेगाओ । केवलदंसणी णं पुच्छा । गोयमा ! साइए अपज्ज-  
 वसिए ॥ दारं ११ ॥ ५४३ ॥ संजए णं भंते ! संजएत्ति पुच्छा । गोयमा ! जहन्नेणं  
 एगं समयं, उक्कोसेणं देसूणं पुव्वकोडिं । असंजए णं भंते ! असंजएत्ति पुच्छा ।  
 गोयमा ! असंजए तिविहे पन्नत्ते । तंजहा—अणाइए वा अपज्जवसिए, अणाइए वा  
 सपज्जवसिए, साइए वा सपज्जवसिए । तत्थ णं जे से साइए सपज्जवसिए से जहन्नेणं  
 अंतोमुहुत्तं, उक्कोसेणं अणंतं कालं, अणंताओ उरसप्पिणिओसप्पिणीओ कालओ,  
 खेतओ अवड्ढं पोगलपरियट्ठं देसूणं । संजयासंजए णं पुच्छा । गोयमा ! जहन्नेणं  
 अंतोमुहुत्तं, उक्कोसेणं देसूणं पुव्वकोडिं । नोसंजए—नोअसंजए—नोसंजयासंजए णं  
 पुच्छा । गोयमा ! साइए अपज्जवसिए ॥ दारं १२ ॥ ५४४ ॥ सागारोवओगोवउत्ते  
 णं भंते ! पुच्छा । गोयमा ! जहन्नेण वि उक्कोसेण वि अंतोमुहुत्तं । अणागारोवउत्ते वि  
 एवं चेव ॥ दारं १३ ॥ ५४५ ॥ आहारए णं भंते ! पुच्छा । गोयमा ! आहारए

दुविहे पन्नते । तंजहा—छउमत्थआहारए य केवलिआहारए य । छउमत्थाहारए णं भंते ! छउमत्थाहारएत्ति कालओ केवच्चिरं होइ ? गोयमा ! जहन्नेणं खुट्ठागभवग्गहणं दुसमयऊणं, उक्कोसेणं असंखेज्जं कालं, असंखेज्जाओ उस्सप्पिणिओसप्पिणीओ कालओ, खेत्तओ अंगुलस्स असंखेज्जइभागं । केवलिआहारए णं भंते ! केवलिआहारएत्ति कालओ केवच्चिरं होइ ? गोयमा ! जहन्नेणं अंतोमुहुत्तं, उक्कोसेणं देसूणं पुव्वकोडिं । अणाहारए णं भंते ! अणाहारएत्ति कालओ केवच्चिरं होइ ? गोयमा ! अणाहारए दुविहे पन्नते । तंजहा—छउमत्थअणाहारए य केवलिअणाहारए य । छउमत्थअणाहारए णं भंते ! पुच्छा । गोयमा ! जहन्नेणं एणं समयं, उक्कोसेणं दो समया । केवलिअणाहारए णं भंते ! केवलि० ? गोयमा ! केवलिअणाहारए दुविहे पन्नते । तंजहा—सिद्धकेवलिअणाहारए य भवत्थकेवलिअणाहारए य । सिद्धकेवलिअणाहारए णं पुच्छा । गोयमा ! साइए अपज्जवसिए । भवत्थकेवलिअणाहारए णं भंते ! पुच्छा । गोयमा ! भवत्थकेवलिअणाहारए दुविहे पन्नते । तंजहा—सजोगिभवत्थकेवलिअणाहारए य अजोगिभवत्थकेवलिअणाहारए य । सजोगिभवत्थकेवलिअणाहारए णं भंते ! पुच्छा । गोयमा ! अजहण्णमणुक्कोसेणं तिण्णि समया । अजोगिभवत्थकेवलिअणाहारए णं पुच्छा । गोयमा ! जहन्नेण वि उक्कोसेण वि अंतोमुहुत्तं ॥ दारं १४ ॥ ॥ ५४६ ॥ भासए णं पुच्छा । गोयमा ! जहन्नेणं एणं समयं, उक्कोसेणं अंतोमुहुत्तं । अभासए णं पुच्छा । गोयमा ! अभासए तिविहे पन्नते । तंजहा—अणाइए वा अपज्जवसिए, अणाइए वा सपज्जवसिए, साइए वा सपज्जवसिए । तत्थ णं जे से साइए वा सपज्जवसिए से जहण्णेणं अंतोमुहुत्तं, उक्कोसेणं वणप्फइकालो ॥ दारं १५ ॥ ५४७ ॥ परित्ते णं पुच्छा । गोयमा ! परित्ते दुविहे पन्नते । तंजहा—कायपरित्ते य संसारपरित्ते य । कायपरित्ते णं पुच्छा । गोयमा ! जहन्नेणं अंतोमुहुत्तं, उक्कोसेणं पुढवि-कालो, असंखेज्जाओ उस्सप्पिणिओसप्पिणीओ । संसारपरित्ते णं पुच्छा । गोयमा ! जहन्नेणं अंतोमुहुत्तं, उक्कोसेणं अणंतं कालं जाव अवहुं पोगलपरियट्ठं देसूणं । अपरित्ते णं पुच्छा । गोयमा ! अपरित्ते दुविहे पन्नते । तंजहा—कायअपरित्ते य संसारअपरित्ते य । कायअपरित्ते णं पुच्छा । गोयमा ! जहन्नेणं अंतोमुहुत्तं, उक्कोसेणं वणस्सइकालो । संसारअपरित्ते णं पुच्छा । गोयमा ! संसारअपरित्ते दुविहे पन्नते । तंजहा—अणाइए वा अपज्जवसिए, अणाइए वा सपज्जवसिए । नोपरित्ते—नोअपरित्ते णं पुच्छा । गोयमा ! साइए अपज्जवसिए ॥ दारं १६ ॥ ५४८ ॥ पज्जत्तए णं पुच्छा । गोयमा ! जहन्नेणं अंतोमुहुत्तं, उक्कोसेणं सागरोवमसयपुहुत्तं साइरेणं । अपज्जत्तए णं पुच्छा । गोयमा ! जहन्नेण वि उक्कोसेण वि अंतोमुहुत्तं । नोपज्जत्तए—नोअपज्जत्तए णं

पुच्छ । गोयमा ! साइए अपजवसिए ॥ दारं १७ ॥ ५४९ ॥ सुहुमे णं भंते ! सुहुमेत्ति  
पुच्छ । गोयमा ! जह्वेणं अंतोमुहुत्तं, उक्कोसेणं पुढविकालो । वायरे णं पुच्छ ।  
गोयमा ! जह्वेणं अंतोमुहुत्तं, उक्कोसेणं असंखेजं कालं जाव खेतओ अंगुलस्स  
असंखेजइभागं । नोसुहुमनोवायरे णं पुच्छ । गोयमा ! साइए अपजवसिए ॥  
दारं १८ ॥ ५५० ॥ सण्णी णं भंते ! पुच्छ । गोयमा ! जह्वेणं अंतोमुहुत्तं,  
उक्कोसेणं सागरोवमसयपुहुत्तं साइरेणं । असण्णी णं पुच्छ । गोयमा ! जह्वेणं  
अंतोमुहुत्तं, उक्कोसेणं वणस्सइकालो । नोसण्णीनोअसण्णी णं पुच्छ । गोयमा !  
साइए अपजवसिए ॥ दारं १९ ॥ ५५१ ॥ भवसिद्धिए णं पुच्छ । गोयमा !  
अणाइए सपजवसिए । अभवसिद्धिए णं पुच्छ । गोयमा ! अणाइए अपजवसिए ।  
नोभवसिद्धिए—नोअभवसिद्धिए णं पुच्छ । गोयमा ! साइए अपजवसिए ॥ दारं २० ॥  
॥ ५५२ ॥ धम्मत्थिकाए णं पुच्छ । गोयमा ! सव्वद्धं, एवं जाव अढासमए ॥  
दारं २१ ॥ ५५३ ॥ चरिमे णं पुच्छ । गोयमा ! अणाइए सपजवसिए । अचरिमे  
णं पुच्छ । गोयमा ! अचरिमे दुविहे पन्नत्ते, तंजहा—अणाइए वा अपजवसिए,  
साइए वा अपजवसिए ॥ दारं २२ ॥ ५५४ ॥ पन्नवणाए भगवईए अट्टार-  
समं कायट्ठिइनामपयं समत्तं ॥

जीवा णं भंते ! किं सम्मदिट्ठी, मिच्छादिट्ठी, सम्मामिच्छादिट्ठी ? गोयमा ! जीवा  
सम्मदिट्ठी वि, मिच्छादिट्ठी वि, सम्मामिच्छादिट्ठी वि । एवं नेरइया वि । असुरकु-  
मारा वि एवं चेव जाव थणियकुमारा । पुढवीकाइया णं पुच्छ । गोयमा ! पुढवीका-  
इया णो सम्मदिट्ठी, मिच्छादिट्ठी, णो सम्मामिच्छादिट्ठी, एवं जाव वणस्सइकाइया ।  
वेईदिया णं पुच्छ । गोयमा ! वेईदिया सम्मदिट्ठी, मिच्छादिट्ठी, णो सम्मामिच्छा-  
दिट्ठी । एवं जाव चउरिंदिया । पंचिंदियतिरिक्खजोणिया मणुस्सा वाणमंतरजोइसि-  
यवेमाणिया य सम्मदिट्ठी वि मिच्छादिट्ठी वि सम्मामिच्छादिट्ठी वि । सिद्धा णं  
पुच्छ । गोयमा ! सिद्धा सम्मदिट्ठी, णो मिच्छादिट्ठी, णो सम्मामिच्छादिट्ठी ॥ ५५५ ॥  
**पन्नवणाए भगवईए एगूणवीसइमं सम्मत्तपयं समत्तं ॥**

नेरइय अंतकिरिया अणन्तरं एगसमय उव्वट्ठा । तित्थगरचक्खिबलवासुदेव-  
संडलियरयणा य ॥ **दारगाहा ॥** जीवे णं भंते ! अंतकिरियं करेज्जा ? गोयमा !  
अत्येगइए करेज्जा, अत्येगइए णो करेज्जा । एवं नेरइए जाव वेमाणिए । नेरइए  
णं भंते ! नेरइए अंतकिरियं करेज्जा ? गोयमा ! णो इणट्ठे समट्ठे । नेरइया णं  
भंते ! असुरकुमारेसु अंतकिरियं करेज्जा ? गोयमा ! णो इणट्ठे समट्ठे । एवं जाव  
वेमाणिएसु । नवरं मणूसेसु अंतकिरियं करेज्जत्ति पुच्छ । गोयमा ! अत्येगइए

करेज्जा, अत्थेगइए णो करेज्जा । एवं असुरकुमारा जाव वेमाणिए । एवमेव चउ-  
 वीसं २ दण्डगा भवन्ति ॥ ५५६ ॥ नेरइया णं भंते ! किं अणंतरागया अंतकिरियं  
 पकरेंति, परंपरागया अंतकिरियं पकरेंति ? गोयमा ! अणंतरागया वि अंतकिरियं पकरेंति,  
 परंपरागया वि अंतकिरियं पकरेंति । एवं रयणप्पभापुढविनेरइया वि जाव पंकप्पभा-  
 पुढवीनेरइया । धूमप्पभापुढवीनेरइया णं पुच्छ । गोयमा ! णो अणंतरागया  
 अंतकिरियं पकरेंति, परंपरागया अंतकिरियं पकरेंति, एवं जाव अहेसत्तभापुढवी-  
 नेरइया । असुरकुमारा जाव थणियकुमारा पुढवीआउवणस्सइकाइया य अणन्तरा-  
 गया वि अंतकिरियं पकरेंति, परंपरागया वि अंतकिरियं पकरेंति । तेउवाउवेईदिय-  
 तेईदियचउरिंदिया णो अणंतरागया अंतकिरियं पकरेंति, परंपरागया अंतकिरियं  
 पकरेंति । सेसा अणंतरागया वि अंतकिरियं पकरेंति, परंपरागया वि अंतकिरियं  
 पकरेंति ॥ ५५७ ॥ अणंतरागया० नेरइया एगसमए केवइया अंतकिरियं पकरेंति ?  
 गोयमा ! जहन्नेणं एगो वा दो वा तिञ्चि वा, उक्कोसेणं दस । रयणप्पभापुढवीनेरइया  
 वि एवं चैव जाव वालुयप्पभापुढवीनेरइया । अणंतरागया णं भंते ! पंकप्पभापुढवी-  
 नेरइया एगसमएणं केवइया अंतकिरियं पकरेंति ? गोयमा ! जहन्नेणं एक्को वा दो  
 वा तिञ्चि वा, उक्कोसेणं चत्तारि । अणन्तरागया णं भंते ! असुरकुमारा एगसमए  
 केवइया अंतकिरियं पकरेंति ? गोयमा ! जहन्नेणं एक्को वा दो वा तिञ्चि वा, उक्को-  
 सेणं दस । अणंतरागयाओ णं भंते ! असुरकुमारीओ एगसमए केवइया अंतकिरियं  
 पकरेंति ? गोयमा ! जहन्नेणं एक्को वा दो वा तिञ्चि वा, उक्कोसेणं पंच । एवं जहा  
 असुरकुमारा सदेवीया तहा जाव थणियकुमारा । अणंतरागया णं भंते ! पुढविकाइया  
 एगसमए केवइया अंतकिरियं पकरेंति ? गोयमा ! जहन्नेणं एक्को वा दो वा तिञ्चि  
 वा, उक्कोसेणं चत्तारि । एवं आउकाइया वि चत्तारि, वणस्सइकाइया छच्च, पंचिंदिय-  
 तिक्खजोणिया दस, तिक्खजोणिणीओ दस, मणुस्सा दस, मणुस्सीओ वीसं,  
 वाणमंतरा दस, वाणमंतरीओ पंच, जोइसिया दस, जोइसिणीओ वीसं, वेमाणिया  
 अट्टसयं, वेमाणिणीओ वीसं ॥ ५५८ ॥ नेरइए णं भंते ! नेरइएहिंतो अणंतरं उव्वट्ठित्ता  
 नेरइएसु उव्वज्जेज्जा ? गोयमा ! नो इणट्ठे समट्ठे । नेरइए णं भंते ! नेरइएहिंतो अण-  
 तरं उव्वट्ठित्ता असुरकुमारेसु उव्वज्जेज्जा ? गोयमा ! नो इणट्ठे समट्ठे । एवं निरंतरं  
 जाव चउरिंदिएसु पुच्छ । गोयमा ! नो इणट्ठे समट्ठे । नेरइए णं भंते ! नेरइएहिंतो  
 अणंतरं उव्वट्ठित्ता पंचिंदियतिक्खजोणिएसु उव्वज्जेज्जा ? गोयमा ! अत्थेगइए  
 उव्वज्जेज्जा, अत्थेगइए णो उव्वज्जेज्जा । जे णं भंते ! नेरइएहिंतो अणंतरं उ० पंचि-  
 दियतिक्खजोणिएसु उव्वज्जेज्जा से णं भंते ! केवल्लिपन्नत्तं धम्मं लभेज्जा सवणयाए ?

गोयमा ! अत्थेगइए लमेज्जा, अत्थेगइए णो लमेज्जा । जे णं भंते ! केवल्लिपन्नं धम्मं लमेज्जा सवणयाए से णं केवल्लि बोहिं वुज्जेज्जा ? गोयमा ! अत्थेगइए वुज्जेज्जा, अत्थेगइए णो वुज्जेज्जा । जे णं भंते ! केवल्लि बोहिं वुज्जेज्जा से णं सद्देज्जा पत्तिएज्जा रोएज्जा ? गोयमा ! सद्देज्जा, पत्तिएज्जा, रोएज्जा । जे णं भंते ! सद्देज्जा पत्तिएज्जा रोएज्जा से णं आभिणिबोहियनाणसुयनाणाइं उप्पाडेज्जा ? हंता गोयमा ! उप्पाडेज्जा । जे णं भंते ! आभिणिबोहियनाणसुयनाणाइं उप्पाडेज्जा से णं संचाएज्जा सीलं वा वयं वा गुणं वा वेरमणं वा पच्चक्खाणं वा पोसहोववासं वा पडिवज्जित्तए ? गोयमा ! अत्थेगइए संचाएज्जा, अत्थेगइए णो संचाएज्जा । जे णं भंते ! संचाएज्जा सीलं वा जाव पोसहोववासं वा पडिवज्जित्तए से णं ओहिनाणं उप्पाडेज्जा ? गोयमा ! अत्थेगइए उप्पाडेज्जा, अत्थेगइए णो उप्पाडेज्जा । जे णं भंते ! ओहिनाणं उप्पाडेज्जा से णं संचाएज्जा मुण्डे भवित्ता आगाराओ अणगारियं पव्वइत्तए ? गोयमा ! नो इण्ठे समट्ठे ॥ ५५९ ॥ नेरइए णं भंते ! नेरइएहिंतो अणंतरं उव्वट्ठित्ता मणुस्सेसु उव्वज्जेज्जा ? गोयमा ! अत्थेगइए उव्वज्जेज्जा, अत्थेगइए णो उव्वज्जेज्जा । जे णं भंते ! उव्वज्जेज्जा से णं केवल्लिपन्नं धम्मं लमेज्जा सवणयाए ? गोयमा ! जहा पंचिदियतिरिक्खजोणिएसु जाव जे णं भंते ! ओहिनाणं उप्पाडेज्जा से णं संचाएज्जा मुण्डे भवित्ता आगाराओ अणगारियं पव्वइत्तए ? गोयमा ! अत्थेगइए संचाएज्जा, अत्थेगइए णो संचाएज्जा । जे णं भंते ! संचाएज्जा मुण्डे भवित्ता आगाराओ अणगारियं पव्वइत्तए से णं मणपज्जवनाणं उप्पाडेज्जा ? गोयमा अत्थेगइए उप्पाडेज्जा, अत्थेगइए णो उप्पाडेज्जा । जे णं भंते ! मणपज्जवनाणं उप्पाडेज्जा से णं केवल्लनाणं उप्पाडेज्जा ? गोयमा ! अत्थेगइए उप्पाडेज्जा, अत्थेगइए णो उप्पाडेज्जा । जे णं भंते ! केवल्लनाणं उप्पाडेज्जा से णं सिज्जेज्जा वुज्जेज्जा मुचेज्जा सव्वदुक्खाणं अंतं करेज्जा ? गोयमा ! सिज्जेज्जा जाव सव्वदुक्खाणमंतं करेज्जा । नेरइए णं भंते ! नेरइएहिंतो अणंतरं उव्वट्ठित्ता वाणमंतरजोइसियवेमाणिएसु उव्वज्जेज्जा ? गोयमा ! नो इण्ठे समट्ठे ॥ ५६० ॥ असुरकुमारे णं भंते ! असुरकुमारेहिंतो अणंतरं उव्वट्ठित्ता नेरइएसु उव्वज्जेज्जा ? गोयमा ! नो इण्ठे समट्ठे । असुरकुमारे णं भंते ! असुरकुमारेहिंतो अणंतरं उव्वट्ठित्ता पुढविकाइएसु उव्वज्जेज्जा ? हन्ता गोयमा ! अत्थेगइए उव्वज्जेज्जा, अत्थेगइए णो उव्वज्जेज्जा । जे णं भंते ! उव्वज्जेज्जा से णं केवल्लिपन्नं धम्मं लमेज्जा सवणयाए ? गोयमा ! नो इण्ठे समट्ठे । एवं आउवणस्सइसु वि । असुर-



कुमारे णं भंते ! असुरकुमारेहिंतो अणंतरं उव्वट्ठिता तेउवाउवेइंदियतेइंदियचउरिंदिएसु उववजेज्जा ? गोयमा ! नो इणट्ठे समट्ठे । अवसेसेसु पंचसु पंचिंदियतिरिक्खजोणियाइसु असुरकुमारेसु जहा नेरइओ, एवं जाव थणियकुमारा ॥ ५६१ ॥ पुढवीकाइए णं भंते ! पुढवीकाइएहिंतो अणंतरं उव्वट्ठिता नेरइएसु उववजेज्जा ? गोयमा ! नो इणट्ठे समट्ठे । एवं असुरकुमारेसु वि जाव थणियकुमारेसु वि । पुढवीकाइए णं भंते ! पुढवीकाइएहिंतो अणंतरं उव्वट्ठिता पुढवीकाइएसु उववजेज्जा ? गोयमा ! अत्थेगइए उववजेज्जा, अत्थेगइए णो उववजेज्जा । जे णं भंते ! उववजेज्जा से णं केवलपन्नत्तं धम्मं लभेज्जा सवणयाए ? गोयमा ! नो इणट्ठे समट्ठे । एवं आउक्काइयाइसु निरंतरं भाणियव्वं जाव चउरिंदिएसु । पंचिंदियतिरिक्खजोणियमणुस्सेसु जहा नेरइए । वाणमंतरजोइसियवेमाणिएसु पडिसेहो । एवं जहा पुढवीकाइओ भणिओ तहेव आउक्काइओ वि जाव वणस्सइकाइओ वि भाणियव्वो ॥ ५६२ ॥ तेउक्काइए णं भंते ! तेउक्काइएहिंतो अणंतरं उव्वट्ठिता नेरइएसु उववजेज्जा ? गोयमा ! नो इणट्ठे समट्ठे । एवं असुरकुमारेसु वि जाव थणियकुमारेसु । पुढवीकाइयाउतेउवाउवणवेइंदियतेइंदियचउरिंदिएसु अत्थेगइए उववजेज्जा, अत्थेगइए णो उववजेज्जा । जे णं भंते ! उववजेज्जा से णं केवलपन्नत्तं धम्मं लभेज्जा सवणयाए ? गोयमा ! नो इणट्ठे समट्ठे । तेउक्काइए णं भंते ! तेउक्काइएहिंतो अणंतरं उव्वट्ठिता पंचिंदियतिरिक्खजोणिएसु उववजेज्जा ? गोयमा ! अत्थेगइए उववजेज्जा, अत्थेगइए णो उववजेज्जा । जे...से णं केवलपन्नत्तं धम्मं लभेज्जा सवणयाए ? गोयमा ! अत्थेगइए लभेज्जा, अत्थेगइए णो लभेज्जा । जे णं भंते ! केवलपन्नत्तं धम्मं लभेज्जा सवणयाए से णं केवलं बोहिं बुज्जेज्जा ? गोयमा ! णो इणट्ठे समट्ठे । मणुस्सवाणमंतरजोइसियवेमाणिएसु पुच्छा । गोयमा ! णो इणट्ठे समट्ठे । एवं जहेव तेउक्काइए निरंतरं एवं वाउकाइए वि ॥ ५६३ ॥ बेइंदिए णं भंते ! बेइंदिएहिंतो अणंतरं उव्वट्ठिता नेरइएसु उववजेज्जा ? गोयमा ! जहा पुढवीकाइया नवरं मणुस्सेसु जाव मणपज्जवनाणं उप्पाडेज्जा । एवं तेइंदिया चउरिंदिया वि जाव मणपज्जवनाणं उप्पाडेज्जा । जे णं मणपज्जवनाणं उप्पाडेज्जा से णं केवलनाणं उप्पाडेज्जा ? गोयमा ! नो इणट्ठे समट्ठे । पंचिंदियतिरिक्खजोणिए णं भंते ! पंचिंदियतिरिक्खजोणिएहिंतो अणंतरं उव्वट्ठिता नेरइएसु उववजेज्जा ? गोयमा ! अत्थेगइए उववजेज्जा, अत्थेगइए णो उववजेज्जा । जे...से णं केवलपन्नत्तं धम्मं लभेज्जा सवणयाए ? गोयमा ! अत्थेगइए लभेज्जा, अत्थेगइए णो लभेज्जा । जे णं केवलपन्नत्तं धम्मं लभेज्जा सवणयाए से णं केवलं बोहिं बुज्जेज्जा ? गोयमा ! अत्थेगइए बुज्जेज्जा, अत्थेगइए णो बुज्जेज्जा ।

जे णं भंते ! केवलं बोहिं वुज्जेज्जा से णं सद्वहेज्जा पत्तिएज्जा रोएज्जा ? हंता गोयम्मा ! जाव रोएज्जा । जे णं भंते ! सद्वहेज्जा ३ से णं आभिणिबोहियानाणसुयानाणओहि-  
नाणाइं उप्पाडेज्जा ? हंता गोयमा ! जाव उप्पाडेज्जा । जे णं भंते ! आभिणिबोहिय-  
नाणसुयानाणओहिनाणाइं उप्पाडेज्जा से णं संचाएज्जा सीलं वा जाव पडिवज्जित्तए ?  
गोयमा ! नो इण्ठे समट्ठे । एवं असुरकुमारेसु वि जाव थणियकुमारेसु । एगिंदिय-  
विगलिंदिएसु जहा पुढवीकाइए । पंचिंदियतिरिक्खजोणिएसु मणुस्सेसु य जहा  
नेरइए । वाणमंतरजोइसियवेमाणिएसु जहा नेरइएसु उव्वज्जेज्जा पुच्छा भणिया एवं  
मणुस्से वि । वाणमंतरजोइसियवेमाणिए जहा असुरकुमारे ॥ ५,६,४ ॥ रयणप्पभा-  
पुढवीनेरइए णं भंते ! रयणप्पभापुढवीनेरइएहिंतो अणंतरं उव्वट्ठित्ता तित्थगरत्तं  
लभेज्जा ? गोयमा ! अत्थेगइए लभेज्जा, अत्थेगइए णो लभेज्जा । से केणट्ठेणं भंते !  
एवं वुच्चइ—‘अत्थेगइए लभेज्जा, अत्थेगइए णो लभेज्जा’ ? गोयमा ! जस्स णं  
रयणप्पभापुढवीनेरइयस्स तित्थगरनामगोयाइं कम्माइं वद्धाइं पुट्ठाइं निधत्ताइं कडाइं  
पट्ठवियाइं निविट्ठाइं अभिनिविट्ठाइं अभिसमन्नागयाइं उदिच्चाइं, णो उव्वसंताइं हवंति,  
से णं रयणप्पभापुढवीनेरइए रयणप्पभापुढवीनेरइएहिंतो अणंतरं उव्वट्ठित्ता तित्थ-  
गरत्तं लभेज्जा, जस्स णं रयणप्पभापुढवीनेरइयस्स तित्थगरनामगोयाइं० णो वद्धाइं  
जाव णो उदिच्चाइं, उव्वसंताइं हवंति, से णं रयणप्पभापुढवीनेरइए रयणप्पभापुढवी-  
नेरइएहिंतो अणंतरं उव्वट्ठित्ता तित्थगरत्तं णो लभेज्जा, से तेणट्ठेणं गोयमा ! एवं  
वुच्चइ—‘अत्थेगइए लभेज्जा, अत्थेगइए णो लभेज्जा’ । एवं सक्करप्पभा जाव वालयप्प-  
भापुढवीनेरइएहिंतो तित्थगरत्तं लभेज्जा । पंक्कप्पभापुढवीनेरइए णं भंते ! पंक्कप्पभा०-  
नेरइएहिंतो अणंतरं उव्वट्ठित्ता तित्थगरत्तं लभेज्जा ? गोयमा ! नो इण्ठे समट्ठे,  
अंतकिरियं पुण करेज्जा । धूमप्पभापुढवीनेरइए पुच्छा । गोयमा ! नो इण्ठे समट्ठे,  
सव्वविरइं पुण लभेज्जा । तमप्पभापुढवी—पुच्छा । नो...विरयाविरइं पुण लभेज्जा ।  
अहेसत्तमपुढवी—पुच्छा । गोयमा ! नो इण्ठे समट्ठे, सम्मत्तं पुण लभेज्जा । असुर-  
कुमारस्स पुच्छा । गोयमा ! नो इण्ठे समट्ठे, अंतकिरियं पुण करेज्जा । एवं निरं-  
तरं जाव आउकाइए । तेउकाइए णं भंते ! तेउकाइएहिंतो अणंतरं उव्वट्ठित्ता  
तित्थगरत्तं लभेज्जा ? गोयमा ! नो इण्ठे समट्ठे, केवलपिन्नत्तं धम्मं लभेज्जा सवण-  
याए । एवं वाउकाइए वि । वणस्सइकाइए णं पुच्छा । गोयमा ! नो इण्ठे समट्ठे,  
अंतकिरियं पुण करेज्जा । बेइंदियतेइंदियचउरिंदिए णं पुच्छा । गोयमा ! नो इण्ठे  
समट्ठे, मणपज्जवनार्णं उप्पाडेज्जा । पंचिंदियतिरिक्खजोणियमणूसवाणमंतरजोइसिए  
णं पुच्छा । गोयमा ! नो इण्ठे समट्ठे, अंतकिरियं पुण करेज्जा । सोहम्मगदेवे णं

भंते ! अणंतरं चयं चइत्ता तित्थगरत्तं लभेज्जा ? गोयमा ! अत्थेगइए लभेज्जा, अत्थेगइए णो लभेज्जा, एवं जहा रयणप्पभापुढविनेरइए, एवं जाव सव्वट्ठसिद्धदेवे ॥ ५६५ ॥ रयणप्पभापुढविनेरइए णं भंते ! अणंतरं उव्वट्ठित्ता चक्कवट्ठित्तं लभेज्जा ? गोयमा ! अत्थेगइए लभेज्जा, अत्थेगइए नो लभेज्जा । से केणट्ठेणं भंते ! एवं वुच्चइ० ? गोयमा ! जहा रयणप्पभापुढविनेरइयस्स तित्थगरत्तं । सक्करप्पभा० नेरइए० अणंतरं उव्वट्ठित्ता चक्कवट्ठित्तं लभेज्जा ? गोयमा ! नो इणट्ठे समट्ठे । एवं जाव अहेसत्तमापुढविनेरइए । तिरियमणुएहिंतो पुच्छा । गोयमा ! नो इणट्ठे समट्ठे । भवणवइवाणमंतरजोइसियवेमाणिएहिंतो पुच्छा । गोयमा ! अत्थेगइए लभेज्जा, अत्थेगइए णो लभेज्जा । एवं वलदेवत्तं पि, नवरं सक्करप्पभापुढविनेरइए वि लभेज्जा । एवं वासुदेवत्तं दोहिंतो पुढवीहिंतो वेमाणिएहिंतो य अणुत्तरोववाइयवज्जेहिंतो, सेसेसु नो इणट्ठे समट्ठे । मंडलियत्तं अहेसत्तमातेउवाउवज्जेहिंतो । सेणावइरयणत्तं गाहावइरयणत्तं वट्ठइरयणत्तं पुरोहियरयणत्तं इत्थिरयणत्तं च एवं चेव, णवरं अणुत्तरोववाइयवज्जेहिंतो । आसरयणत्तं हत्थिरयणत्तं रयणप्पभाओ णिरंतरं जाव सहस्सारे अत्थेगइए लभेज्जा, अत्थेगइए णो लभेज्जा । चक्ररयणत्तं छत्तरयणत्तं चम्मरयणत्तं दंडरयणत्तं असिरयणत्तं मणिरयणत्तं कागिणिरयणत्तं एएसि णं असुरकुमारेहिंतो आरद्ध निरंतरं जाव ईसाणाओ उववाओ, सेसेहिंतो नो इणट्ठे समट्ठे ॥ ५६६ ॥ अह भंते ! असंजयभवियदव्वदेवाणं, अविराहियसंजमाणं, विराहियसंजमाणं, अविराहियसंजमासंजमाणं, विराहियसंजमासंजमाणं, असण्णीणं, तावसाणं, कंदप्पियाणं, चरगपरिवायगाणं, किव्विसियाणं, तिरिच्छियाणं, आजीवियाणं, आभिओगियाणं, सल्लिगीणं दंसणवावणगाणं देवलोगेसु उववज्जमाणानं कस्स कहिं उववाओ पण्णतो ? गोयमा ! असंजयभवियदव्वदेवाणं जहण्णेणं भवणवासीसु, उक्कोसेणं उवरिमगेवेज्जएसु; अविराहियसंजमाणं जहण्णेणं सोहम्मं कप्पे, उक्कोसेणं सव्वट्ठसिद्धे; विराहियसंजमाणं जहण्णेणं भवणवासीसु, उक्कोसेणं सोहम्मं कप्पे; अविराहियसंजमासंजमाणं जहण्णेणं सोहम्मं कप्पे, उक्कोसेणं अच्चुए कप्पे; विराहियसंजमासंजमाणं जहण्णेणं भवणवासीसु, उक्कोसेणं जोइसिएसु; असक्कीणं जहण्णेणं भवणवासीसु, उक्कोसेणं वाणमंतरेसु; तावसाणं जहण्णेणं भवणवासीसु, उक्कोसेणं जोइसिएसु; कंदप्पियाणं जहण्णेणं भवणवासीसु, उक्कोसेणं सोहम्मं कप्पे; चरगपरिवायगाणं जहण्णेणं भवणवासीसु, उक्कोसेणं वंभलोए कप्पे; किव्विसियाणं जहण्णेणं सोहम्मं कप्पे, उक्कोसेणं लंतए कप्पे; तिरिच्छियाणं जहण्णेणं भवणवासीसु, उक्कोसेणं सहस्सारे कप्पे; आजीवियाणं जहण्णेणं भवणवासीसु, उक्कोसेणं अच्चुए कप्पे; एवं आभिओ-

गाण वि, सल्लिगीणं दंसणवावण्णगाणं जहन्नेणं भवणवासीसु, उक्कोसेणं उवरिमगेवेज्ज-  
एसु ॥ ५६७ ॥ कइविहे णं भंते ! असणियाउए पन्नत्ते ? गोयमा ! चउव्विहे  
असणियाउए पन्नत्ते । तंजहा—नेरइयअसणियाउए जाव देवअसणियाउए ।  
असण्णी णं भंते ! जीवे किं नेरइयाउयं पकरेइ जाव देवाउयं पकरेइ ? गोयमा !  
नेरइयाउयं पकरेइ जाव देवाउयं पकरेइ । नेरइयाउं पकरेमाणे जहन्नेणं दस वास-  
सहस्साइ, उक्कोसेणं पलिओवमस्स असंखेज्जइभागं पकरेइ । तिरिक्खजोणियाउयं  
पकरेमाणे जहन्नेणं अंतोसुहुत्तं, उक्कोसेणं पलिओवमस्स असंखेज्जइभागं पकरेइ ।  
एवं मणुस्साउयं पि । देवाउयं जहा नेरइयाउयं । एयस्स णं भंते ! नेरइयअसणि-  
आउयस्स जाव देवअसणिआउयस्स कयरे कयरेहिंतो अप्पा वा ४ ? गोयमा !  
सव्वत्थोवे देवअसणिआउए, मणुसअसणिआउए असंखेज्जगुणे, तिरिक्खजोणिय-  
असणिआउए असंखेज्जगुणे, नेरइयअसणिआउए असंखेज्जगुणे ॥ ५६८ ॥ पन्न-  
वणाए भगवईए वीसइमं अंतकिरियापयं समत्तं ॥

विहिंसठाणपमाणे पोभगलच्चिणणा सरीरसंजोगो । दव्वपएसडप्पवहुं सरीरोगा-  
हणडप्पवहुं ॥ कइ णं भंते ! सरीरया पन्नत्ता ? गोयमा ! पंच सरीरया पन्नत्ता ।  
तंजहा—ओरालिए १, वेउव्विए २, आहारए ३, तेयए ४, कम्मए ५ । ओरालिय-  
सरीरे णं भंते ! कइविहे पन्नत्ते ? गोयमा ! पंचविहे पन्नत्ते । तंजहा—एगिंदियओरा-  
लियसरीरे जाव पंचिंदियओरालियसरीरे । एगिंदियओरालियसरीरे णं भंते ! कइ-  
विहे पन्नत्ते ? गोयमा ! पंचविहे पन्नत्ते । तंजहा—पुढविकाइयएगिंदियओरालिय-  
सरीरे जाव वणप्फइकाइयएगिंदियओरालियसरीरे । पुढविकाइयएगिंदियओरालिय-  
सरीरे णं भंते ! कइविहे पन्नत्ते ? गोयमा ! दुविहे पन्नत्ते । तंजहा—सुहुमपुढविका-  
इयएगिंदियओरालियसरीरे य बायरपुढविकाइयएगिंदियओरालियसरीरे य । सुहुम-  
पुढविकाइयएगिंदियओरालियसरीरे णं भंते ! कइविहे पन्नत्ते ? गोयमा ! दुविहे  
पन्नत्ते । तंजहा—पज्जत्तगसुहुमपुढविकाइयएगिंदियओरालियसरीरे य अपज्जत्तगसुहुम-  
पुढविकाइयएगिंदियओरालियसरीरे य । बायरपुढविकाइया वि एवं चेव, एवं जाव  
वणस्सइकाइयएगिंदियओरालियसरीरेत्ति । बेइंदियओरालियसरीरे णं भंते ! कइविहे  
पन्नत्ते ? गोयमा ! दुविहे पन्नत्ते । तंजहा—पज्जत्तगबेइंदियओरालियसरीरे य अपज्ज-  
त्तगबेइंदियओरालियसरीरे य । एवं तेइंदिया चउरिंदिया वि । पंचिंदियओरालिय-  
सरीरे णं भंते ! कइविहे पन्नत्ते ? गोयमा ! दुविहे पन्नत्ते । तंजहा—तिरिक्ख-  
जोणियपंचिंदियओरालियसरीरे य मणुस्सपंचिंदियओरालियसरीरे य । तिरिक्ख-  
जोणियपंचिंदियओरालियसरीरे णं भंते ! कइविहे पन्नत्ते ? गोयमा ! तिविहे

पन्नते । तंजहा—जलयरतिरिक्खजोणियपंचिदियओरालियसरीरे य थलयरतिरिक्ख-  
जोणियपंचिदियओरालियसरीरे य खहयरतिरिक्खजोणियपंचिदियओरालियसरीरे  
य । जलयरतिरिक्खजोणियपंचिदियओरालियसरीरे णं भंते ! कइविहे पन्नते ?  
गोयमा ! दुविहे पन्नते । तंजहा—संमुच्छिमजलयरतिरिक्खजोणियपंचिदियओरालिय-  
सरीरे य गब्भवक्कंतियजलयरतिरिक्खजोणियपंचिदियओरालियसरीरे य । संमुच्छि-  
मजलयरतिरिक्खजोणियपंचिदियओरालियसरीरे णं भंते ! कइविहे पन्नते ? गोयमा !  
दुविहे पन्नते । तंजहा—पजत्तगसंमुच्छिमतिरिक्खजोणियपंचिदियओरालियसरीरे य  
अपजत्तगसंमुच्छिमतिरिक्खजोणियपंचिदियओरालियसरीरे य, एवं गब्भवक्कंतिए  
वि । थलयरतिरिक्खजोणियपंचिदियओरालियसरीरे णं भंते ! कइविहे पन्नते ?  
गोयमा ! दुविहे पन्नते । तंजहा—चउप्पयथलयरतिरिक्खजोणियपंचिदियओरालिय-  
सरीरे य परिसप्पथलयरतिरिक्खजोणियपंचेन्दियओरालियसरीरे य । चउप्पय-  
थलयरतिरिक्खजोणियपंचिदियओरालियसरीरे णं भंते ! कइविहे पन्नते ? गोयमा !  
दुविहे पन्नते । तंजहा—संमुच्छिमचउप्पयथलयरतिरिक्खजोणियपंचेदियओरालिय-  
सरीरे य गब्भवक्कंतियचउप्पयथलयरतिरिक्खजोणियपंचिदियओरालियसरीरे य ।  
संमुच्छिमचउप्पय०तिरिक्खजोणियपंचिदियओरालियसरीरे० कइविहे पन्नते ?  
गोयमा ! दुविहे पन्नते । तंजहा—पजत्तसंमुच्छिमचउप्पयथलयरतिरिक्खजोणिय-  
पंचिदियओरालियसरीरे य अपजत्तसंमुच्छिमचउप्पयथलयरतिरिक्खजोणियपंचिदिय-  
ओरालियसरीरे य । एवं गब्भवक्कंतिए वि । परिसप्पथलयरतिरिक्खजोणियपंचिदिय-  
ओरालियसरीरे णं भंते ! कइविहे पन्नते ? गोयमा ! दुविहे पन्नते । तंजहा—  
उरपरिसप्पथलयरतिरिक्खजोणियपंचिदियओरालियसरीरे य भुयपरिसप्पथलयर-  
तिरिक्खजोणियपंचिदियओरालियसरीरे य । उरपरिसप्पथलयरतिरिक्खजोणियपंचि-  
दियओरालियसरीरे णं भंते ! कइविहे पन्नते ? गोयमा ! दुविहे पन्नते । तंजहा—  
संमुच्छिमउरपरिसप्पथलयरतिरिक्खजोणियपंचिदियओरालियसरीरे य गब्भव-  
क्कंतियउरपरिसप्पथलयरतिरिक्खजोणियपंचिदियओरालियसरीरे य । संमुच्छिमे दुविहे  
पन्नते । तंजहा—अपजत्तसंमुच्छिमउरपरिसप्पथलयरतिरिक्खजोणियपंचिदियओरा-  
लियसरीरे य पजत्तसंमुच्छिमउरपरिसप्पथलयरतिरिक्खजोणियपंचिदियओरालिय-  
सरीरे य, एवं गब्भवक्कंतियउरपरिसप्पे चउक्कओ भेओ । एवं भुयपरिसप्पा वि  
संमुच्छिमगब्भवक्कंतिया पजत्ता अपजत्ता य । खहयरा दुविहा पन्नता । तंजहा—  
संमुच्छिमा य गब्भवक्कंतिया य । संमुच्छिमा दुविहा पन्नता—पजत्ता अपजत्ता य ।  
गब्भवक्कंतिया वि पजत्ता अपजत्ता य । मणूसपंचिदियओरालियसरीरे णं भंते !

कइविहे पन्नते ? गोयमा ! दुविहे पन्नते । तंजहा-संमुच्छिममणूसपंचिंदियओरा-  
लियसरीरे य गब्भवक्कंतियमणूसपंचिंदियओरालियसरीरे य । गब्भवक्कंतियमणूस-  
पंचिंदियओरालियसरीरे णं भंते ! कइविहे पन्नते ? गोयमा ! दुविहे पन्नते । तंजहा-  
पज्जत्तागगब्भवक्कंतियमणूसपंचिंदियओरालियसरीरे य अपज्जत्तागगब्भवक्कंतियमणूस-  
पंचिंदियओरालियसरीरे य ॥ ५६९ ॥ ओरालियसरीरे णं भंते ! किंसंठिए  
पन्नते ? गोयमा ! णाणासंठाणसंठिए पन्नते । एगिंदियओरालियसरीरे० किंसंठिए  
पन्नते ? गोयमा ! णाणासंठाणसंठिए पन्नते । पुढविकाइयएगिंदियओरालियसरीरे०  
किंसंठिए पन्नते ? गोयमा ! मसूरचंदसंठाणसंठिए पन्नते । एवं सुहुमपुढविका-  
इयाण वि बायराण वि एवं चेव, पज्जत्तापज्जत्ताण वि एवं चेव, आउक्काइयएगिंदिय-  
ओरालियसरीरे णं भंते ! किंसंठिए पन्नते ? गोयमा ! थिबुयविंदुसंठाणसंठिए  
पन्नते । एवं सुहुमबायरपज्जत्तापज्जत्ताण वि । तेउक्काइयएगिंदियओरालियसरीरे णं  
भंते ! किंसंठिए पन्नते ? गोयमा ! सूईकलावसंठाणसंठिए पन्नते । एवं सुहुमबायर-  
पज्जत्तापज्जत्ताण वि । वाउक्काइयाण वि पडागासंठाणसंठिए, एवं सुहुमबायरपज्जत्ता-  
पज्जत्ताण वि । वणप्फइकाइयाणं णाणासंठाणसंठिए पन्नते, एवं सुहुमबायरपज्जत्ता-  
पज्जत्ताण वि । बेइंदियओरालियसरीरे णं भंते ! किंसंठाणसंठिए पन्नते ? गोयमा !  
हुंडसंठाणसंठिए पन्नते, एवं पज्जत्तापज्जत्ताण वि, एवं तेइंदियचउरिंदियाण वि ।  
पंचिंदियतिरिक्खजोणियओरालियसरीरे णं भंते ! किंसंठाणसंठिए पन्नते ? गोयमा !  
छव्विहसंठाणसंठिए पन्नते । तंजहा-समचउरंसंठाणसंठिए वि जाव हुंडसंठाणसंठिए  
वि, एवं पज्जत्तापज्जत्ताण वि ३ । संमुच्छिमतिरिक्खजोणियपंचिंदियओरालियसरीरे  
णं भंते ! किंसंठाणसंठिए पन्नते ? गोयमा ! हुंडसंठाणसंठिए पन्नते, एवं पज्जत्ताप-  
ज्जत्ताण वि । गब्भवक्कंतियतिरिक्खजोणियपंचिंदियओरालियसरीरे णं भंते !  
किंसंठाणसंठिए पन्नते ? गोयमा ! छव्विहसंठाणसंठिए पन्नते । तंजहा-समचउरंसं०  
जाव हुंडसंठाणसंठिए । एवं पज्जत्तापज्जत्ताण वि ३ । एवमेए तिरिक्खजोणियाणं  
ओहियाणं णव आलावगा । जलयरतिरिक्खजोणियपंचिंदियओरालियसरीरे णं  
भंते ! किंसंठाणसंठिए पन्नते ? गोयमा ! छव्विहसंठाणसंठिए पन्नते । तंजहा-समच-  
उरंसे जाव हुंडे, एवं पज्जत्तापज्जत्ताण वि । संमुच्छिमजलयरा हुंडसंठाणसंठिया,  
एएसिं चेव पज्जत्ता अपज्जत्ता वि एवं चेव । गब्भवक्कंतियजलयरा छव्विहसंठाण-  
संठिया, एवं पज्जत्तापज्जत्ताण वि । एवं थलयराण वि णव सुत्ताणि, एवं चउप्पय-  
थलयराण वि उरपरिसप्पथलयराण वि भुयपरिसप्पथलयराण वि । एवं खहयराण  
वि णव सुत्ताणि, णवरं सव्वत्थ संमुच्छिमा हुंडसंठाणसंठिया भाणियव्वा, इयरे

छसु वि । मणूसपंचिदियओरालियसरीरे णं भंते ! किंसंठाणसंठिए पन्नत्ते ? गोयमा !  
 छव्विहंसंठाणसंठिए पन्नत्ते । तंजहा—समचउरंसे जाव हुंढे, पज्जत्तापज्जत्ताण वि एवं  
 चेव, गब्भवक्कंतियाण वि एवं चेव, पज्जत्तापज्जत्ताण वि एवं चेव । संमुच्छिमाणं  
 पुच्छा । गोयमा ! हुंढसंठाणसंठिया पण्णत्ता ॥ ५७० ॥ ओरालियसरीरस्स णं  
 भंते ! केमहालिया सरीरोगाहणा पन्नत्ता ? गोयमा ! जहण्णेणं अंगुलस्स असंखे-  
 ज्जइभागं, उक्कोसेणं साइरेणं जोयणसहस्सं । एगिंदियओरालियस्स वि एवं चेव जहा  
 ओहियस्स । पुढविकाइयएगिंदियओरालियसरीरस्स णं भंते ! केमहालिया सरीरो-  
 गाहणा पन्नत्ता ? गोयमा ! जहण्णेण वि उक्कोसेण वि अंगुलस्स असंखेज्जइभागं, एवं  
 अपज्जत्तयाण वि पज्जत्तयाण वि । एवं सुहुमाणं पज्जत्तापज्जत्ताणं, बायराणं पज्जत्ता-  
 पज्जत्ताण वि । एवं एसो णवओ भेओ जहा पुढविकाइयाणं तहा आउकाइयाण वि  
 तेउकाइयाण वि वाउकाइयाण वि । वणस्सइकाइयओरालियसरीरस्स णं भंते !  
 केमहालिया सरीरोगाहणा पन्नत्ता ? गोयमा ! जहण्णेणं अंगुलस्स असंखेज्जइभागं,  
 उक्कोसेणं साइरेणं जोयणसहस्सं । अपज्जत्तगाणं जहण्णेण वि उक्कोसेण वि अंगुलस्स  
 असंखेज्जइभागं, पज्जत्तगाणं जहण्णेणं अंगुलस्स असंखेज्जइभागं, उक्कोसेणं साइरेणं  
 जोयणसहस्सं । बायराणं जहण्णेणं अंगुलस्स असंखेज्जइभागं, उक्कोसेणं साइरेणं  
 जोयणसहस्सं, पज्जत्ताण वि एवं चेव । अपज्जत्ताणं जहण्णेण वि उक्कोसेण वि  
 अंगुलस्स असंखेज्जइभागं । सुहुमाणं पज्जत्तापज्जत्ताण य तिण्ह वि जहण्णेण वि उक्को-  
 सेण वि अंगुलस्स असंखेज्जइभागं । वेइंदियओरालियसरीरस्स णं भंते ! केमहालिया  
 सरीरोगाहणा पन्नत्ता ? गोयमा ! जहण्णेणं अंगुलस्स असंखेज्जइभागं, उक्कोसेणं  
 बारस जोयणाइं । एवं सव्वत्थ वि अपज्जत्तगाणं अंगुलस्स असंखेज्जइभागं जहण्णेण  
 वि उक्कोसेण वि । पज्जत्तगाणं जहेव ओरालियस्स ओहियस्स । एवं तेइंदियाणं  
 तिण्णि गाउयाइं, चउरिंदियाणं चत्तारि गाउयाइं, पंचिंदियतिरिक्खजोणियाणं उक्को-  
 सेणं जोयणसहस्सं ३, एवं संमुच्छिमाणं ३, गब्भवक्कंतियाण वि ३, एवं चेव  
 णवओ भेओ भाणियव्वो । एवं जलयराण वि जोयणसहस्सं णवओ भेओ, थलय-  
 राण वि णव मेया ९, उक्कोसेणं छ गाउयाइं, पज्जत्तगाण वि एवं चेव, संमुच्छि-  
 माणं पज्जत्तगाण य उक्कोसेणं गाउयपुहुत्तं ३, गब्भवक्कंतियाणं उक्कोसेणं छ  
 गाउयाइं पज्जत्ताण य २, ओहियचउप्पयपज्जत्तगगब्भवक्कंतियपज्जत्तयाण वि उक्कोसेणं  
 छ गाउयाइं । संमुच्छिमाणं पज्जत्ताण य गाउयपुहुत्तं उक्कोसेणं, एवं उरपरिसप्पाण  
 वि । ओहियगब्भवक्कंतियपज्जत्तगाणं जोयणसहस्सं, संमुच्छिमाणं पज्जत्ताण य  
 जोयणपुहुत्तं, भुयपरिसप्पाणं ओहियगब्भवक्कंतियाण य उक्कोसेणं गाउयपुहुत्तं,

संमुच्छिमाणं धणुपुहुत्तं, खहयराणं ओहियगम्भवक्कंतियाणं संमुच्छिमाणं य तिण्ह वि उक्कोसेणं धणुपुहुत्तं । इमाओ संगहणीगाहाओ—जोयणसहस्सं छग्गाउयाइं तत्तो य जोयणसहस्सं । गाउयपुहुत्तं भुयए धणुहपुहुत्तं च पक्खीसु ॥ १ ॥ जोयणसहस्सं गाउयपुहुत्तं तत्तो य जोयणपुहुत्तं । दोहं तु धणुपुहुत्तं समुच्छिमे होइ उच्चत्तं ॥ २ ॥ मणूसोराणियसरीरस्स णं भंते ! केमहालिया सरीरोगाहणा पञ्चत्ता ? गोयमा ! जह्जेणं अंगुलस्स असंखेज्जइभागं, उक्कोसेणं तिणिण गाउयाइं । एवं अपज्जत्ताणं जह्जेण वि उक्कोसेण वि अंगुलस्स असंखेज्जइभागं । संमुच्छिमाणं जह्जेण वि उक्कोसेण वि अंगुलस्स असंखेज्जइभागं, गम्भवक्कंतियाणं पज्जत्ताणं य जह्जेणं अंगुलस्स असंखेज्जइभागं, उक्कोसेणं तिणिण गाउयाइं ॥ ५,७१ ॥ वेउव्वियसरीरे णं भंते ! कइविहे पञ्चत्ते ? गोयमा ! दुविहे पञ्चत्ते । तंजहा—एगिंदियवेउव्वियसरीरे य पंचिंदियवेउव्वियसरीरे य । जइ एगिंदियवेउव्वियसरीरे किं वाउक्काइयएगिंदियवेउव्वियसरीरे, अवाउक्काइयएगिंदियवेउव्वियसरीरे ? गोयमा ! वाउक्काइयएगिंदियवेउव्वियसरीरे, नो अवाउक्काइयएगिंदियवेउव्वियसरीरे । जइ वाउक्काइयएगिंदियवेउव्वियसरीरे किं सुहुमवाउक्काइयएगिंदियवेउव्वियसरीरे, वायरवाउक्काइयएगिंदियवेउव्वियसरीरे ? गोयमा ! नो सुहुमवाउक्काइयएगिंदियवेउव्वियसरीरे, वायरवाउक्काइयएगिंदियवेउव्वियसरीरे । जइ वायरवाउक्काइयएगिंदियवेउव्वियसरीरे किं पज्जत्तवायरवाउक्काइयएगिंदियवेउव्वियसरीरे, अपज्जत्तवायरवाउक्काइयएगिंदियवेउव्वियसरीरे ? गोयमा ! पज्जत्तवायरवाउक्काइयएगिंदियवेउव्वियसरीरे, नो अपज्जत्तवायरवाउक्काइयएगिंदियवेउव्वियसरीरे । जइ पंचिंदियवेउव्वियसरीरे किं नेरइयपंचिंदियवेउव्वियसरीरे जाव देवपंचिंदियवेउव्वियसरीरे ? गोयमा ! नेरइयपंचिंदियवेउव्वियसरीरे वि जाव देवपंचिंदियवेउव्वियसरीरे वि । जइ नेरइयपंचिंदियवेउव्वियसरीरे किं रयणप्पभापुढविनेरइयपंचिंदियवेउव्वियसरीरे जाव अहेसत्तमापुढविनेरइयपंचिंदियवेउव्वियसरीरे ? गोयमा ! रयणप्पभापुढविनेरइयपंचिंदियवेउव्वियसरीरे वि जाव अहेसत्तमापुढविनेरइयपंचिंदियवेउव्वियसरीरे वि । जइ रयणप्पभापुढविनेरइयपंचिंदियवेउव्वियसरीरे किं पज्जत्तगरयणप्पभापुढविनेरइयपंचिंदियवेउव्वियसरीरे, अपज्जत्तगरयणप्पभापुढविनेरइयपंचिंदियवेउव्वियसरीरे ? गोयमा ! पज्जत्तगरयणप्पभापुढविनेरइयपंचिंदियवेउव्वियसरीरे, अपज्जत्तगरयणप्पभापुढविनेरइयपंचिंदियवेउव्वियसरीरे, एवं जाव अहेसत्तमाए दुगओ भेओ भाणियव्वो । जइ तिरिक्खजोणियपंचिंदियवेउव्वियसरीरे किं संमुच्छिमतिरिक्खजोणियपंचिंदियवेउव्वियसरीरे,





म्मभूमगगव्वभवक्कंतियमणूसपंचिदियवेउव्वियसरीरे, अंतरदीवगगव्वभवक्कंतियमणूस-  
 पंचिदियवेउव्वियसरीरे ? गोयमा ! कम्मभूमगगव्वभवक्कंतियमणूसपंचिदियवेउव्विय-  
 सरीरे, णो अकम्मभूमगगव्वभवक्कंतियमणूसपंचिदियवेउव्वियसरीरे, णो अंतरदीव-  
 गगव्वभवक्कंतियमणूसपंचिन्दियवेउव्वियसरीरे । जइ कम्मभूमगगव्वभवक्कंतियमणूस-  
 पंचिदियवेउव्वियसरीरे किं संखेज्जवासाउयकम्मभूमगगव्वभवक्कंतियमणूसपंचिदिय-  
 वेउव्वियसरीरे, असंखेज्जवासाउयकम्मभूमगगव्वभवक्कंतियमणूसपंचिदियवेउव्विय-  
 सरीरे ? गोयमा ! संखेज्जवासाउयकम्मभूमगगव्वभवक्कंतियमणूसपंचिदियवेउव्विय-  
 सरीरे, नो असंखेज्जवासाउयकम्मभूमगगव्वभवक्कंतियमणूसपंचिदियवेउव्वियसरीरे ।  
 जइ संखेज्जवासाउयकम्मभूमगगव्वभवक्कंतियमणूसपंचिदियवेउव्वियसरीरे किं पज्जत्त-  
 यसंखेज्जवासाउयकम्मभूमगगणूसपंचिदियवेउव्वियसरीरे, अपज्जत्तयसंखेज्जवासाउय-  
 कम्मभूमगगव्वभवक्कंतियमणूसपंचिदियवेउव्वियसरीरे ? गोयमा ! पज्जत्तयसंखेज्जवासा-  
 उयकम्मभूमगगव्वभवक्कंतियमणूसपंचिदियवेउव्वियसरीरे, नो अपज्जत्तयसंखेज्जवासा-  
 उयकम्मभूमगगव्वभवक्कंतियमणूसपंचिदियवेउव्वियसरीरे । जइ देवपंचिदियवेउव्वि-  
 यसरीरे किं भवणवासिदेवपंचिदियवेउव्वियसरीरे जाव वेमाणियदेवपंचिदियवेउव्वि-  
 यसरीरे ? गोयमा ! भवणवासिदेवपंचिदियवेउव्वियसरीरे वि जाव वेमाणियदेवपं-  
 चिदियवेउव्वियसरीरे वि । जइ भवणवासिदेवपंचिदियवेउव्वियसरीरे किं असुरकु-  
 मारभवणवासिदेवपंचिदियवेउव्वियसरीरे जाव थणियकुमारभवणवासिदेवपंचिदियवे-  
 उव्वियसरीरे ? गोयमा ! असुरकुमार० वि जाव थणियकुमारदेवपंचिन्दियवेउव्विय-  
 सरीरे वि । जइ असुरकुमारभवणवासिदेवपंचिदियवेउव्वियसरीरे किं पज्जत्तगअसु-  
 रकुमारभवणवासिदेवपंचिदियवेउव्वियसरीरे, अपज्जत्तगअसुरकुमारभवणवासिदेवपं-  
 चिदियवेउव्वियसरीरे ? गोयमा ! पज्जत्तगअसुरकुमारभवणवासिदेवपंचिदियवेउव्वि-  
 यसरीरे वि, अपज्जत्तगअसुरकुमारभवणवासिदेवपंचिदियवेउव्वियसरीरे वि, एवं  
 जाव थणियकुमाराणं दुगओ भेओ । एवं वाणमंतराणं अट्ठविहाणं, जोइसियाणं  
 पंचविहाणं । वेमाणिया दुविहा—कप्पोवगा कप्पातीता य । कप्पोवगा बारसविहा,  
 तेसिं पि एवं चेव दुहुओ भेओ । कप्पातीता दुविहाए-गेवेज्जगा य अणुत्तरोववाइया  
 य, गेवेज्जगा णवविहा, अणुत्तरोववाइया पंचविहा, एएसिं पज्जत्तापज्जत्ताभिलावेणं  
 दुगओ भेओ भाणियव्वो ॥ ५७२ ॥ वेउव्वियसरीरे णं भंते ! किंसंठिए पन्नते ?  
 गोयमा ! णाणासंठाणसंठिए पन्नते । वाउक्काइयएगिंदियवेउव्वियसरीरे णं भंते !  
 किंसंठिए पन्नते ? गोयमा ! पडागासंठाणसंठिए पन्नते । नेरइयपंचिदियवेउव्वियस-  
 रीरे णं भंते ! किंसंठाणसंठिए पन्नते ? गोयमा ! नेरइयपंचिदियवेउव्वियसरीरे

दुविहे पन्नत्ते । तंजहा-भवधारणिज्जे य उत्तरवेउव्विए य । तत्थ णं जे से भवधा-  
रणिज्जे से णं हुंडसंठाणसंठिए पन्नत्ते । तत्थ णं जे से उत्तरवेउव्विए से वि हुंडसंठा-  
णसंठिए पन्नत्ते । रयणप्पभापुढविनेरइयपंचिंदियवेउव्वियसरीरे णं भंते ! किंसंठाण-  
संठिए पन्नत्ते ? गोयमा ! रयणप्पभापुढविनेरइयाणं दुविहे सरीरे पन्नत्ते । तंजहा-  
भवधारणिज्जे य उत्तरवेउव्विए य । तत्थ णं जे से भवधारणिज्जे से णं हुंडे, ० जे से  
उत्तरवेउव्विए से वि हुंडे । एवं जाव अहेसत्तमापुढविनेरइयवेउव्वियसरीरे । तिरि-  
क्खजोणियपंचिंदियवेउव्वियसरीरे णं भंते ! किंसंठाणसंठिए पन्नत्ते ? गोयमा !  
णाणासंठाणसंठिए पन्नत्ते । एवं जाव जलयरथलयरखहयराण वि । थलयराण वि  
चउप्पयपरिसप्पाण वि, परिसप्पाण वि उरपरिसप्पभुयपरिसप्पाण वि । एवं मणुस्सपं-  
चिंदियवेउव्वियसरीरे वि । असुरकुमारभवणवासिदेवपंचिंदियवेउव्वियसरीरे णं  
भंते ! किंसंठाणसंठिए पन्नत्ते ? गोयमा ! असुरकुमारणं देवाणं दुविहे सरीरे पन्नत्ते ।  
तंजहा-भवधारणिज्जे य उत्तरवेउव्विए य । तत्थ णं जे से भवधारणिज्जे से णं  
समचउरंसंठाणसंठिए पन्नत्ते, तत्थ णं जे से उत्तरवेउव्विए से णं णाणासंठाण-  
संठिए पन्नत्ते, एवं जाव थणियकुमारदेवपंचिंदियवेउव्वियसरीरे, एवं वाणमंतराण  
वि, णवरं ओहिया वाणमंतरा पुच्छिज्जंति, एवं जोइसियाण वि ओहियाणं, एवं  
सोहम्मं जाव अक्खुयदेवसरीरे । गेवेज्जगक्कापातीतवेमाणियदेवपंचिंदियवेउव्वियसरीरे  
णं भंते ! किंसंठिए पन्नत्ते ? गोयमा ! गेवेज्जगदेवाणं एगे भवधारणिज्जे सरीरे,  
से णं समचउरंसंठाणसंठिए पन्नत्ते, एवं अणुत्तरोववाइयाण वि ॥ ५७३ ॥  
वेउव्वियसरीरस्स णं भंते ! केमहालिया सरीरोगाहणा पन्नत्ता ? गोयमा ! जहन्नेणं  
अंगुलस्स असंखेज्जइभागं, उक्कोसेणं साइरेणं जोयणसयसहस्सं । वाउक्काइयएणिंदि-  
यवेउव्वियसरीरस्स णं भंते ! केमहालिया सरीरोगाहणा पन्नत्ता ? गोयमा ! जहन्नेणं  
अंगुलस्स असंखेज्जइभागं, उक्कोसेण वि अंगुलस्स असंखेज्जइभागं । नेरइयपंचिंदिय-  
वेउव्वियसरीरस्स णं भंते ! केमहालिया सरीरोगाहणा पन्नत्ता ? गोयमा ! दुविहा  
पन्नत्ता । तंजहा-भवधारणिज्जा य उत्तरवेउव्विया य । तत्थ णं जा सा भवधारणिज्जा  
सा जहन्नेणं अंगुलस्स असंखेज्जइभागं, उक्कोसेणं पंचधणुसयाइं । तत्थ णं जा सा  
उत्तरवेउव्विया सा जहन्नेणं अंगुलस्स संखेज्जइभागं, उक्कोसेणं धणुसहस्सं । रयणप्प-  
भापुढविनेरइयाणं भंते ! केमहालिया सरीरोगाहणा पन्नत्ता ? गोयमा ! दुविहा  
पन्नत्ता । तंजहा-भवधारणिज्जा य उत्तरवेउव्विया य । तत्थ णं जा सा भवधारणिज्जा  
सा जहन्नेणं अंगुलस्स असंखेज्जइभागं, उक्कोसेणं सत्त धणूइं तिणिण रयणीओ छ्व  
अंगुलाइं । तत्थ णं जा सा उत्तरवेउव्विया सा जहन्नेणं अंगुलस्स संखेज्जइभागं,

उक्कोसेणं पण्णरस धणूइं अट्ठाइज्जाओ रयणीओ । सक्करप्पभाए पुच्छा । गोयमा ! जाव तत्थ णं जा सा भवधारणिज्जा सा जहन्नेणं अंगुलस्स असंखेज्जइभागं, उक्कोसेणं पण्णरस धणूइं अट्ठाइज्जाओ रयणीओ । तत्थ णं जा सा उत्तरवेउव्विया सा जहन्नेणं अंगुलस्स संखेज्जइभागं, उक्कोसेणं एकतीसं धणूइं एका य रयणी । बालुयप्पभाए भवधारणिज्जा एकतीसं धणूइं एका रयणी, उत्तरवेउव्विया बासट्ठिं धणूइं दो रयणीओ । पंकप्पभाए भवधारणिज्जा बासट्ठिं धणूइं दो रयणीओ, उत्तरवेउव्विया पणवीसं धणुसयं । धूमप्पभाए भवधारणिज्जा पणवीसं धणुसयं, उत्तरवेउव्विया अट्ठाइज्जाइं धणुसयाइं । तमाए भवधारणिज्जा अट्ठाइज्जाइं धणुसयाइं, उत्तरवेउव्विया पंच धणुसयाइं । अहेसत्तमाए भवधारणिज्जा पंच धणुसयाइं, उत्तरवेउव्विया धणुसहस्सं एवं उक्कोसेणं । जहन्नेणं भवधारणिज्जा अंगुलस्स असंखेज्जइभागं, उत्तरवेउव्विया अंगुलस्स संखेज्जइभागं । तिरिक्खजोणियपंचिंदियवेउव्वियसरीरस्स णं भंते ! केमहालिया सरीरोगाहणा पन्नत्ता ? गोयमा ! जहन्नेणं अंगुलस्स संखेज्जइभागं, उक्कोसेणं जोयणसयपुहुत्तं । मणुस्सपंचिंदियवेउव्वियसरीरस्स णं भंते ! केमहालिया सरीरोगाहणा पन्नत्ता ? गोयमा ! जहन्नेणं अंगुलस्स संखेज्जइभागं, उक्कोसेणं साइरेणं जोयणसयसहस्सं । असुरकुमारभवणवासिदेवपंचिंदियवेउव्वियसरीरस्स णं भंते ! केमहालिया सरीरोगाहणा पन्नत्ता ? गोयमा ! असुरकुमारणं देवाणं दुविहा सरीरोगाहणा पन्नत्ता । तंजहा-भवधारणिज्जा य उत्तरवेउव्विया य । तत्थ णं जा सा भवधारणिज्जा सा जहन्नेणं अंगुलस्स असंखेज्जइभागं, उक्कोसेणं सत्त रयणीओ । तत्थ णं जा सा उत्तरवेउव्विया सा जहन्नेणं अंगुलस्स संखेज्जइभागं, उक्कोसेणं जोयणसयसहस्सं । एवं जाव थणियकुमारारणं, एवं ओहियाणं वाणमंतराणं एवं जोइसियाण वि, सोहम्मसीसाणदेवाणं एवं चेव, उत्तरवेउव्विया जाव अञ्जुओ कप्पो, णवरं सणंकुमारं भवधारणिज्जा जहन्नेणं अंगुलस्स असंखेज्जइभागं, उक्कोसेणं छ रयणीओ । एवं माहिंदे वि, बंभलोयलंतगेसु पंच रयणीओ, महासुक्कसहस्सारेसु चत्तारि रयणीओ, आणयपाणय-आरणञ्जुएसु तिणिण रयणीओ । गेविज्जगक्कप्पातीतवेमाणियदेवपंचिंदियवेउव्वियसरीरस्स णं भंते ! केमहालिया सरीरोगाहणा पन्नत्ता ? गोयमा ! गेवेज्जगदेवाणं एगा भवधारणिज्जा सरीरोगाहणा पन्नत्ता । सा जहन्नेणं अंगुलस्स असंखेज्जइभागं, उक्कोसेणं दो रयणी । एवं अणुत्तरोववाइयदेवाण वि, णवरं एका रयणी ॥ ५७४ ॥ आहारगसरीरे णं भंते ! कइविहे पन्नत्ते ? गोयमा ! एगागारे पन्नत्ते । जइ एगागारे प० किं मणूसआहारगसरीरे, अमणूसआहारगसरीरे ? गोयमा ! मणूसआहारगसरीरे, नो अमणूसआहारगसरीरे । जइ मणूसआहारगसरीरे किं संमुच्छिममणूसआहारग-

[illegible]

भूमगगब्भवकंतियमणूसआहारगसरीरे, नो अपमत्तसंजयसम्महिट्ठी०कम्मभूमगगब्भवकंतियमणूसआहारगसरीरे । जइ पमत्तसंजयसम्महिट्ठी०संखेजवासाउयकम्मभूमग००मणूसआहारगसरीरे किं इड्ढिपत्तपमत्तसंजयसम्महिट्ठी०कम्मभूमगसंखेजवासाउयगब्भवकंतियमणूसआहारगसरीरे, अणिड्ढिपत्तपमत्तसंजय०कम्मभूमगसंखेजवासाउयगब्भवकंतिय०आहारगसरीरे ? गोयमा ! इड्ढिपत्तपमत्तसंजयसम्महिट्ठी०संखेजवासाउयकम्मभूमगगब्भवकंतियमणूसआहारगसरीरे नो अणिड्ढिपत्तपमत्तसंजयसम्महिट्ठी०संखेजवासाउयकम्मभूमगगब्भवकंतियमणूसआहारगसरीरे । आहारगसरीरे णं भंते ! किंसंठिए पन्नते ? गोयमा ! समच्चउरंसंठाणसंठिए पन्नते । आहारगसरीरस्स णं भंते ! केमहालिया सरीरोगाहणा पन्नता ? गोयमा ! जहन्नेणं देसूणा रयणी, उक्कोसेणं पडिपुण्णा रयणी ॥५७५॥ तेयगसरीरे णं भंते ! कइविहे पन्नते ? गोयमा ! पंचविहे पन्नते । तंजहा—एगिंदियतेयगसरीरे जाव पंचिंदियतेयगसरीरे । एगिंदियतेयगसरीरे णं भंते ! कइविहे पन्नते ? गोयमा ! पंचविहे पन्नते । तंजहा—पुढविंकाइय० जाव वणस्सइकाइयएगिंदियतेयगसरीरे । एवं जहा ओरालियसरीरस्स भेओ भणिओ तहा तेयगस्स वि जाव चउरिंदियाणं । पंचिंदियतेयगसरीरे णं भंते ! कइविहे पन्नते ? गोयमा ! चउविहे पन्नते । तंजहा—नेरइयतेयगसरीरे जाव देवतेयगसरीरे, नेरइयाणं दुगओ भेओ भाणियव्वो जहा वेउव्वियसरीरे । पंचिंदियतिरिक्खजोणियाणं मणूसाण य जहा ओरालियसरीरे भेओ भणिओ तहा भाणियव्वो । देवाणं जहा वेउव्वियसरीरभेओ भणिओ तहा भाणियव्वो जाव सव्वट्ठसिद्धदेवत्ति । तेयगसरीरे णं भंते ! किंसंठिए पन्नते ? गोयमा ! णाणासंठाणसंठिए पन्नते । एगिंदियतेयगसरीरे णं भंते ! किंसंठिए पन्नते ? गोयमा णाणासंठाणसंठिए पन्नते । पुढविकाइयएगिंदियतेयगसरीरे णं भंते ! किंसंठिए पन्नते ? गोयमा ! मसरचंदसंठाणसंठिए पन्नते, एवं ओरालियसंठाणाणुसारेण भाणियव्वं जाव चउरिंदियाण वि । नेरइयाणं भंते ! तेयगसरीरे किंसंठिए पन्नते ? गोयमा ! जहा वेउव्वियसरीरे । पंचिंदियतिरिक्खजोणियाणं मणूसाणं जहा एएसिं चैव ओरालियत्ति । देवाणं भंते ! तेयगसरीरे किंसंठिए पन्नते ? गोयमा ! जहा वेउव्वियस्स जाव अणुत्तरोववाइयत्ति ॥ ५७६ ॥ जीवस्स णं भंते ! मारणंतियसमुग्घाएणं समोहयस्स तेयासरीरस्स केमहालिया सरीरोगाहणा पन्नता ? गोयमा ! सरीरप्पमाणमेत्ता विक्खंभवाहल्लेणं, आयामेणं जहन्नेणं अंगुलस्स असंखेजइभागं, उक्कोसेणं लोगंताओ लोगंते । एगिंदियस्स णं भंते ! मारणंतियसमुग्घाएणं समोहयस्स तेयासरीरस्स केमहालिया सरीरोगाहणा पन्नता ? गोयमा ! एवं चैव जाव पुढवि० आउ० तेउ० वाउ० वणप्फइकाइयस्स । वेईदियस्स

णं भंते ! मारणंतियसमुग्घाएणं समोहयस्स तेयासरीरस्स केमहालिया सरीरोगाहणा पन्नता ? गोयमा ! सरीरप्पमाणमेत्ता विक्खंभवाहल्लेणं, आयामेणं जहन्नेणं अंगुलस्स असंखेज्झभागं, उक्कोसेणं तिरियलोगाओ लोगंतो । एवं जाव चउरिंदियस्स । नेरइयस्स णं भंते ! मारणंतियसमुग्घाएणं समोहयस्स तेयासरीरस्स केमहालिया सरीरोगाहणा प० ? गोयमा ! सरीरप्पमाणमेत्ता विक्खंभवाहल्लेणं, आयामेणं जहन्नेणं साइरेणं जोयणसहस्सं अहे, उक्कोसेणं जाव अहेसत्तमा पुठवी, तिरियं जाव सयंभुरमणे समुद्दे, उड्डं जाव पंडगवणे पुक्खरिणीओ । पंचिंदियतिरिक्खजोणियस्स णं भंते ! मारणंतियसमुग्घाएणं समोहयस्स तेयासरीरस्स केमहालिया सरीरोगाहणा० ? गोयमा ! जहा वेइंदियसरीरस्स । मणुस्सस्स णं भंते ! मारणंतियसमुग्घाएणं समोहयस्स तेयासरीरस्स केमहालिया सरीरोगाहणा० ? गोयमा ! समयखेत्ताओ लोगंतो । असुरकुमारस्स णं भंते ! मारणंतियसमुग्घाएणं समोहयस्स तेयासरीरस्स केमहालिया सरीरोगाहणा० ? गोयमा ! सरीरप्पमाणमेत्ता विक्खंभवाहल्लेणं, आयामेणं जहन्नेणं अंगुलस्स असंखेज्झभागं, उक्कोसेणं अहे जाव तच्चाइ पुठवीए हिद्विल्ले चरमंते, तिरियं जाव सयंभुरमणसमुद्दस्स बाहिरिल्ले वेइयंते, उड्डं जाव ईसिप्पम्भारा पुठवी, एवं जाव थणियकुमारतेयगसरीरस्स । वाणमंतरजोइसियसोहम्मीसाणगा य एवं चेव । सणकुमारदेवस्स णं भंते ! मारणंतियसमुग्घाएणं समोहयस्स तेयासरीरस्स केमहालिया सरीरोगाहणा० ? गोयमा ! सरीरप्पमाणमेत्ता विक्खंभवाहल्लेणं, आयामेणं जहन्नेणं अंगुलस्स असंखेज्झभागं, उक्कोसेणं अहे जाव महापायालाणं दोच्चे तिभागे, तिरियं जाव सयंभुरमणे समुद्दे, उड्डं जाव अञ्जुओ कप्पो । एवं जाव सहस्सारदेवस्स । आणयदेवस्स णं भंते ! मारणंतियसमुग्घाएणं समोहयस्स तेयासरीरस्स केमहालिया सरीरोगाहणा० ? गोयमा ! सरीरप्पमाणमेत्ता विक्खंभवाहल्लेणं, आयामेणं जहन्नेणं अंगुलस्स असंखेज्झभागं, उक्कोसेणं जाव अहोलोइयगामा, तिरियं जाव मणूसखेत्तं, उड्डं जाव अञ्जुओ कप्पो, एवं जाव आरणदेवस्स । अञ्जुयदेवस्स एवं चेव, णवरं उड्डं जाव सयाइं विमाणाइं । गेविज्जगदेवस्स णं भंते ! मारणंतियसमुग्घाएणं समोहयस्स तेयगसरीरस्स केमहालिया सरीरोगाहणा० ? गोयमा ! सरीरप्पमाणमेत्ता विक्खंभवाहल्लेणं, आयामेणं जहन्नेणं विजाहरसेढीओ, उक्कोसेणं जाव अहोलोइयगामा, तिरियं जाव मणूसखेत्ते, उड्डं जाव सगाइं विमाणाइं, अणुत्तरोववाइयस्स वि एवं चेव । कम्मगसरीरे णं भंते ! कइविहे पन्नते ? गोयमा ! पंचविहे पन्नते । तंजहा—एणिंदियकम्मगसरीरे जाव पंचिंदियकम्मगसरीरे य । एवं जहेव तेयगसरीरस्स भेओ संठाणं ओगाहणा य भणिया तहेव निरवसेसं भाणियव्वं जाव अणुत्तरोववाइयत्ति ॥ ५७७ ॥

ओरालियसरीरस्स णं भंते ! कइदिसिं पोग्गला चिज्जंति ? गोयमा ! निव्वाघाएणं छद्दिसिं, वाघायं पडुच्च सिय तिदिसिं, सिय चउद्दिसिं, सिय पंचदिसिं । वेउव्विय-सरीरस्स णं भंते ! कइदिसिं पोग्गला चिज्जंति ? गोयमा ! णियमा छद्दिसिं । एवं आहारगसरीरस्स वि, तेयाकम्मगाणं जहा ओरालियसरीरस्स । ओरालियसरीरस्स णं भंते ! कइदिसिं पोग्गला उवचिज्जंति ? गोयमा ! एवं चेव जाव कम्मगसरीरस्स एवं उवचिज्जंति, अवचिज्जंति ॥ ५७८ ॥ जस्स णं भंते ! ओरालियसरीरं तस्स वेउव्वियसरीरं, जस्स वेउव्वियसरीरं तस्स ओरालियसरीरं ? गोयमा ! जस्स ओरालियसरीरं तस्स वेउव्वियसरीरं सिय अत्थि सिय नत्थि, जस्स वेउव्वियसरीरं तस्स ओरालियसरीरं सिय अत्थि सिय नत्थि । जस्स णं भंते ! ओरालियसरीरं तस्स आहारगसरीरं, जस्स आहारगसरीरं तस्स ओरालियसरीरं ? गोयमा ! जस्स ओरालियसरीरं तस्स आहारगसरीरं सिय अत्थि सिय नत्थि, जस्स पुण आहारग-सरीरं तस्स ओरालियसरीरं णियमा अत्थि । जस्स णं भंते ! ओरालियसरीरं तस्स तेयगसरीरं, जस्स तेयगसरीरं तस्स ओरालियसरीरं ? गोयमा ! जस्स ओरालिय-सरीरं तस्स तेयगसरीरं णियमा अत्थि, जस्स पुण तेयगसरीरं तस्स ओरालिय-सरीरं सिय अत्थि सिय णत्थि, एवं कम्मगसरीरं पि । जस्स णं भंते ! वेउव्विय-सरीरं तस्स आहारगसरीरं, जस्स आहारगसरीरं तस्स वेउव्वियसरीरं ? गोयमा ! जस्स वेउव्वियसरीरं तस्स आहारगसरीरं णत्थि, जस्स वि आहारगसरीरं तस्स वि वेउव्वियसरीरं णत्थि । तेयाकम्माइं जहा ओरालिण समं तहेव आहारगसरीरेण वि समं तेयाकम्मगाइं चारेयव्वाणि । जस्स णं भंते ! तेयगसरीरं तस्स कम्मग-सरीरं, जस्स कम्मगसरीरं तस्स तेयगसरीरं ? गोयमा ! जस्स तेयगसरीरं तस्स कम्मगसरीरं णियमा अत्थि, जस्स वि कम्मगसरीरं तस्स वि तेयगसरीरं णियमा अत्थि ॥ ५७९ ॥ एएसि णं भंते ! ओरालियवेउव्वियआहारगतेयगकम्मगसरीराणं दव्वट्टयाए पएसट्टयाए दव्वट्टपएसट्टयाए कयरे कयरेहिंतो अप्पा वा ४ ? गोयमा ! सव्वत्थोवा आहारगसरीरा दव्वट्टयाए, वेउव्वियसरीरा दव्वट्टयाए असंखेज्जगुणा, ओरालियसरीरा दव्वट्टयाए असंखेज्जगुणा, तेयाकम्मगसरीरा दोवि तुल्ला दव्वट्टयाए अणंतगुणा । पएसट्टयाए-सव्वत्थोवा आहारगसरीरा पएसट्टयाए, वेउव्वियसरीरा पएसट्टयाए असंखेज्जगुणा, ओरालियसरीरा पएसट्टयाए असंखेज्जगुणा, तेयगसरीरा पएसट्टयाए अणंतगुणा, कम्मगसरीरा पएसट्टयाए अणंतगुणा । दव्वट्टपएसट्टयाए-सव्वत्थोवा आहारगसरीरा दव्वट्टयाए, वेउव्वियसरीरा दव्वट्टयाए असंखेज्जगुणा, ओरालियसरीरा दव्वट्टयाए असंखेज्जगुणा, ओरालियसरीरेहिंतो दव्वट्टयाएहिंतो आहा-



रगसरीरा पएसट्ठयाए अणंतगुणा, वेडव्वियसरीरा पएसट्ठयाए असंखेज्जगुणा, ओरा-  
 लियसरीरा पएसट्ठयाए असंखेज्जगुणा, तेयाकम्मा दोवि तुल्ला दव्वट्ठयाए अणंतगुणा,  
 तेयगसरीरा पएसट्ठयाए अणंतगुणा, कम्मगसरीरा पएसट्ठयाए अणंतगुणा ॥५८०॥  
 एएसि णं भंते ! ओरालियवेडव्वियआहारगतेयगकम्मगसरीराणं जहणियाए ओगा-  
 हणाए उक्कोसियाए ओगाहणाए जहण्णुक्कोसियाए ओगाहणाए कयरे कयरेहिंतो  
 अप्पा वा ४ ? गोयमा ! सव्वत्थोवा ओरालियसरीरस्स जहणिया ओगाहणा, तेया-  
 कम्मगाणं दोण्ह वि तुल्ला जहणिया ओगाहणा विसेसाहिया, वेडव्वियसरीरस्स जह-  
 णिया ओगाहणा असंखेज्जगुणा, आहारगसरीरस्स जहणिया ओगाहणा असंखेज्ज-  
 गुणा । उक्कोसियाए ओगाहणाए-सव्वत्थोवा आहारगसरीरस्स उक्कोसिया ओगाहणा,  
 ओरालियसरीरस्स उक्कोसिया ओगाहणा संखेज्जगुणा, वेडव्वियसरीरस्स उक्कोसिया  
 ओगाहणा संखेज्जगुणा, तेयाकम्मगाणं दोण्ह वि तुल्ला उक्कोसिया ओगाहणा असंखेज्ज-  
 गुणा । जहण्णुक्कोसियाए ओगाहणाए-सव्वत्थोवा ओरालियसरीरस्स जहणिया  
 ओगाहणा, तेयाकम्माणं दोण्ह वि तुल्ला जहणिया ओगाहणा विसेसाहिया, वेडव्विय-  
 सरीरस्स जहणिया ओगाहणा असंखेज्जगुणा, आहारगसरीरस्स जहणिया ओगा-  
 हणा असंखेज्जगुणा, आहारगसरीरस्स जहणियाहिंतो ओगाहणाहिंतो तस्स चेव  
 उक्कोसिया ओगाहणा विसेसाहिया, ओरालियसरीरस्स उक्कोसिया ओगाहणा संखेज्ज-  
 गुणा, वेडव्वियसरीरस्स उक्कोसिया ओगाहणा संखेज्जगुणा, तेयाकम्मगाणं दोण्ह  
 वि तुल्ला उक्कोसिया ओगाहणा असंखेज्जगुणा ॥ ५८१ ॥ **पन्नवणाए भगवईए  
 एगवीसइमं ओगाहणासंठाणपयं समत्तं ॥**

कह् णं भंते ! किरियाओ पण्णत्ताओ ? गोयमा ! पंच किरियाओ पण्णत्ताओ ।  
 तंजहा-काइया १, अहिगरणिया २, पाओसिया ३, पारियावणिया ४, पाणाइवाय-  
 किरिया ५ । काइया णं भंते ! किरिया कइविहा पन्नत्ता ? गोयमा ! दुविहा पन्नत्ता ।  
 तंजहा-अणुवरयकाइया य दुप्पउत्तकाइया य । अहिगरणिया णं भंते ! किरिया  
 कइविहा पन्नत्ता ? गोयमा ! दुविहा पन्नत्ता । तंजहा-संजोयणाहिगरणिया य निव्वत्त-  
 णाहिगरणिया य । पाओसिया णं भंते ! किरिया कइविहा पन्नत्ता ? गोयमा ! तिविहा  
 पन्नत्ता । तंजहा-जेणं अप्पणो वा परस्स वा तदुभयस्स वा अद्युमं मणं संपधारेइ,  
 सेतं पाओसिया किरिया । पारियावणिया णं भंते ! किरिया कइविहा पन्नत्ता ? गोयमा !  
 तिविहा पन्नत्ता । तंजहा-जेणं अप्पणो वा परस्स वा तदुभयस्स वा अस्सायं वेयणं  
 उदीरेइ, सेतं पारियावणिया किरिया । पाणाइवायकिरिया णं भंते ! कइविहा पन्नत्ता ?  
 गोयमा ! तिविहा पन्नत्ता । तंजहा-जेणं अप्पाणं वा परं वा तदुभयं वा जीवियाओ

ववरोवेइ, सेत्तं पाणाइवायकिरिया ॥ ५८२ ॥ जीवा णं भंते ! किं सकिरिया अकिरिया ? गोयमा ! जीवा सकिरिया वि अकिरिया वि । से केणट्ठेणं भंते ! एवं वुच्चइ- 'जीवा सकिरिया वि अकिरिया वि' ? गोयमा ! जीवा दुविहा पन्नत्ता । तंजहा-संसारसमावण्णगा य असंसारसमावण्णगा य । तत्थ णं जे ते संसारसमावण्णगा ते णं सिद्धा, सिद्धा णं अकिरिया । तत्थ णं जे ते संसारसमावण्णगा ते दुविहा पन्नत्ता । तंजहा-सेलेसिपडिवण्णगा य असेलेसिपडिवण्णगा य । तत्थ णं जे ते सेलेसिपडिवण्णगा ते णं अकिरिया, तत्थ णं जे ते असेलेसिपडिवण्णगा ते णं सकिरिया, से तेणट्ठेणं गोयमा ! एवं वुच्चइ- 'जीवा सकिरिया वि अकिरिया वि' ॥ ५८३ ॥ अत्थि णं भंते ! जीवाणं पाणाइवाएणं किरिया कज्जइ ? हंता गोयमा ! अत्थि । कम्हि णं भंते ! जीवाणं पाणाइवाएणं किरिया कज्जइ ? गोयमा ! छसु जीवनिक्काएसु । अत्थि णं भंते ! नेरइयाणं पाणाइवाएणं किरिया कज्जइ ? गोयमा ! एवं चेव । एवं निरंतरं जाव वेमाणियाणं । अत्थि णं भंते ! जीवाणं मुसावाएणं किरिया कज्जइ ? हंता ! अत्थि । कम्हि णं भंते ! जीवाणं मुसावाएणं किरिया कज्जइ ? गोयमा ! सव्वदव्वेसु, एवं निरंतरं नेरइयाणं जाव वेमाणियाणं । अत्थि णं भंते ! जीवाणं अदिन्नादाणेणं किरिया कज्जइ ? हंता ! अत्थि । कम्हि णं भंते ! जीवाणं अदिन्नादाणेणं किरिया कज्जइ ? गोयमा ! गहणधारणिज्जेसु दव्वेसु, एवं नेरइयाणं निरंतरं जाव वेमाणियाणं । अत्थि णं भंते ! जीवाणं मेहुणेणं किरिया कज्जइ ? हंता ! अत्थि । कम्हि णं भंते ! जीवाणं मेहुणेणं किरिया कज्जइ ? गोयमा ! हव्वेसु वा रुचसहगाएसु वा दव्वेसु, एवं नेरइयाणं निरंतरं जाव वेमाणियाणं । अत्थि णं भंते ! जीवाणं परिग्गहेणं किरिया कज्जइ ? हंता ! अत्थि । कम्हि णं भंते ! जीवाणं परिग्गहेणं किरिया कज्जइ ? गोयमा ! सव्वदव्वेसु एवं नेरइयाणं जाव वेमाणियाणं । एवं कोहेणं माणेणं मायाए लोभेणं पेजेणं दोसेणं कलहेणं अब्भक्खाणेणं पेसुजेणं परपरिवाएणं अरइरइए मायामोसेणं मिच्छादंसणसत्तेणं । सव्वेसु जीवनेरइयमेएणं भाणियव्वा निरंतरं जाव वेमाणियाणं ति, एवं अट्ठारस एए दंडगा १८ ॥ ५८४ ॥ जीवे णं भंते ! पाणाइवाएणं कइ कम्मपगडीओ बंधइ ? गोयमा ! सत्तविहबंधए वा अट्ठविहबंधए वा । एवं नेरइए जाव निरंतरं वेमाणिए । जीवा णं भंते ! पाणाइवाएणं कइ कम्मपगडीओ बंधंति ? गोयमा ! सत्तविहबंधगा वि अट्ठविहबंधगा वि । नेरइया णं भंते ! पाणाइवाएणं कइ कम्मपगडीओ बंधंति ? गोयमा ! सव्वे वि ताव होज्जा सत्तविहबंधगा, अहवा सत्तविहबंधगा य अट्ठविहबंधए य, अहवा सत्तविहबंधगा य अट्ठविहबंधगा य । एवं असुरकुमारा वि जाव थणियकुमारा पुढवि-

आउतेउवाउवणप्फइकाइया य एए सव्वे वि जहा ओहिया जीवा, अवसेसा जहा नेरइया । एवं ते जीवेगिदियवज्जा तिण्णि तिण्णि भंगा सव्वत्थ भाणियव्वत्ति जाव भिच्छादंसणसल्ले, एवं एगत्तपोहत्तिया छत्तीसं दंडगा होंति ॥ ५८५ ॥ जीवे णं भंते ! णाणावरणिज्जं कम्मं बंधमाणे कइकिरिया ? गोयमा ! सिय तिकिरिए, सिय चउकिरिए, सिय पंचकिरिए, एवं नेरइए जाव वेमाणिए । जीवा णं भंते ! णाणावरणिज्जं कम्मं बंधमाणा कइकिरिया ? गोयमा ! सिय तिकिरिया, सिय चउकिरिया, सिय पंचकिरिया वि, एवं नेरइया निरंतरं जाव वेमाणिया । एवं दरिसणावरणिज्जं वेयणिज्जं मोहणिज्जं आउयं नामं गोत्तं अंतराइयं च अट्ठविहकम्मपगडीओ भाणियव्वाओ, एगत्तपोहत्तिया सोलस दंडगा भवन्ति ॥ ५८६ ॥ जीवे णं भंते ! जीवाओ कइकिरिए ? गोयमा ! सिय तिकिरिए, सिय चउकिरिए, सिय पंचकिरिए, सिय अकिरिए । जीवे णं भंते ! नेरइयाओ कइकिरिए ? गोयमा ! सिय तिकिरिए, सिय चउकिरिए, सिय अकिरिए, एवं जाव थणियकुमाराओ । पुढविकाइयाओ आउक्काइयाओ तेउक्काइयाओ वाउक्काइयवणप्फइकाइयवेईदियतेईदियचउरिंदियपंचिदियतिरिक्खजोणियमणुस्साओ जहा जीवाओ, वाणमंतरजोइसियवेमाणियाओ जहा नेरइयाओ । जीवे णं भंते ! जीवेहिंतो कइकिरिए ? गोयमा ! सिय तिकिरिए, सिय चउकिरिए, सिय पंचकिरिए, सिय अकिरिए । जीवे णं भंते ! नेरइएहिंतो कइकिरिए ? गोयमा ! सिय तिकिरिए, सिय चउकिरिए, सिए अकिरिए, एवं जहेव पढमो दंडओ तहा एसो विइओ भाणियव्वो । जीवा णं भंते ! जीवाओ कइकिरिया ? गोयमा ! सिय तिकिरिया वि, सिय चउकिरिया वि, सिय पंचकिरिया वि, सिय अकिरिया वि । जीवा णं भंते ! नेरइयाओ कइकिरिया ? गोयमा ! जहेव आइल्लदंडओ तहेव भाणियव्वो जाव वेमाणियत्ति । जीवा णं भंते ! जीवेहिंतो कइकिरिया ? गोयमा ! तिकिरिया वि, चउकिरिया वि, पंचकिरिया वि, अकिरिया वि । जीवा णं भंते ! नेरइएहिंतो कइकिरिया ? गोयमा ! तिकिरिया वि, चउकिरिया वि, अकिरिया वि । असुरकुमारेहिंतो वि एवं चेव जाव वेमाणिएहिंतो, ओरालियसरीरेहिंतो जहा जीवेहिंतो । नेरइए णं भंते ! जीवाओ कइकिरिए ? गोयमा ! सिय तिकिरिए, सिय चउकिरिए, सिय पंचकिरिए । नेरइए णं भंते ! नेरइयाओ कइकिरिए ? गोयमा ! सिय तिकिरिए, सिय चउकिरिए । एवं जाव वेमाणिएहिंतो, नवरं नेरइयस्स नेरइएहिंतो देवेहिंतो य पंचमा किरिया नत्थि । नेरइया णं भंते ! जीवाओ कइकिरिया ? गोयमा ! सिय तिकिरिया, सिय चउकिरिया, सिय पंचकिरिया, एवं जाव वेमाणियाओ, नवरं नेरइयाओ देवाओ य पंचमा किरिया नत्थि । नेरइया णं भंते ! जीवेहिंतो कइकिरिया ?

गोयमा ! तिकिरिया वि, चउकिरिया वि, पंचकिरिया वि । नेरइया णं भंते ! नेरइएहिंतो कइकिरिया ? गोयमा ! तिकिरिया वि चउकिरिया वि । एवं जाव वेमाणिएहिंतो, नवरं ओरालियसरीरेहिंतो जहा जीवेहिंतो । असुरकुमारे णं भंते ! जीवाओ कइकिरिए ? गोयमा ! जहेव नेरइए चत्तारि दंडगा तहेव असुरकुमारे वि चत्तारि दंडगा भाणियव्वा, एवं च उवउज्जिऊणं भावेयव्वं ति । जीवे मणूसे य अकिरिए वुच्चइ, सेसा अकिरिया न वुच्चंति । सव्वजीवा ओरालियसरीरेहिंतो पंचकिरिया । नेरइयदेवेहिंतो पंचकिरिया ण वुच्चंति । एवं एकेकजीवपए चत्तारि चत्तारि दंडगा भाणियव्वा एवं एयं दंडगसयं सव्वे वि य जीवाइया दंडगा ॥ ५८७ ॥ कइ णं भंते ! किरियाओ पण्णत्ताओ ? गोयमा ! पंच किरियाओ पण्णत्ताओ । तंजहा—काइया जाव पाणाइवायकिरिया । नेरइयाणं भंते ! कइ किरियाओ पण्णत्ताओ ? गोयमा ! पंच किरियाओ पण्णत्ताओ । तंजहा—काइया जाव पाणाइवायकिरिया, एवं जाव वेमाणियाणं । जस्स णं भंते ! जीवस्स काइया किरिया कज्जइ तस्स अहिगरणिया किरिया कज्जइ, जस्स अहिगरणिया किरिया कज्जइ तस्स काइया किरिया कज्जइ ? गोयमा ! जस्स णं जीवस्स काइया किरिया कज्जइ तस्स अहिगरणिया किरिया नियमा कज्जइ, जस्स अहिगरणिया किरिया कज्जइ तस्स वि काइया किरिया नियमा कज्जइ । जस्स णं भंते ! जीवस्स काइया किरिया कज्जइ तस्स पाओसिया किरिया कज्जइ, जस्स पाओसिया किरिया कज्जइ तस्स काइया किरिया कज्जइ ? गोयमा ! एवं चेव । जस्स णं भंते ! जीवस्स काइया किरिया कज्जइ तस्स पारियावणिया किरिया कज्जइ, जस्स पारियावणिया किरिया कज्जइ तस्स काइया किरिया कज्जइ ? गोयमा ! जस्स णं जीवस्स काइया किरिया कज्जइ तस्स पारियावणिया० सिय कज्जइ, सिय नो कज्जइ, जस्स पुण पारियावणिया किरिया कज्जइ तस्स काइया० नियमा कज्जइ, एवं पाणाइवायकिरिया वि । एवं आइल्लाओ परोप्परं नियमा तिण्णि कज्जंति । जस्स आइल्लाओ तिण्णि कज्जंति तस्स उवरिल्लाओ दोन्नि सिय कज्जंति, सिय नो कज्जंति, जस्स उवरिल्लाओ दोण्णि कज्जंति तस्स आइल्लाओ नियमा तिण्णि कज्जंति । जस्स णं भंते ! जीवस्स पारियावणिया किरिया कज्जइ तस्स पाणाइवायकिरिया कज्जइ, जस्स पाणाइवायकिरिया कज्जइ तस्स पारियावणिया किरिया कज्जइ ? गोयमा ! जस्स णं जीवस्स पारियावणिया किरिया कज्जइ तस्स पाणाइवायकिरिया सिय कज्जइ, सिय नो कज्जइ, जस्स पुण पाणाइवायकिरिया कज्जइ तस्स पारियावणिया किरिया नियमा कज्जइ । जस्स णं भंते ! नेरइयस्स काइया किरिया कज्जइ तस्स अहिगरणिया किरिया कज्जइ ? गोयमा ! जहेव जीवस्स तहेव नेरइयस्स वि, एवं निरेतरं जाव

वेमाणियस्स ॥ ५८८ ॥ जं समयं णं भंते ! जीवस्स काइया किरिया कज्जइ तं समयं अहिगरणिया किरिया कज्जइ, जं समयं अहिगरणिया० कज्जइ तं समयं काइया किरिया कज्जइ ? एवं जहेव आइल्लओ दंडओ तहेव भाणियव्वो जाव वेमाणियस्स । जं देसं णं भंते ! जीवस्स काइया किरिया तं देसं णं अहिगरणिया किरिया तहेव जाव वेमाणियस्स । जं पएसं णं भंते ! जीवस्स काइया किरिया तं पएसं णं अहिगरणिया किरिया एवं तहेव जाव वेमाणियस्स । एवं एए जस्स जं समयं जं देसं जं पएसं णं चत्तारि दंडगा होंति ॥ ५८९ ॥ कइ णं भंते ! आओजियाओ किरियाओ पण्णत्ताओ ? गोयमा ! पंच आओजियाओ किरियाओ पण्णत्ताओ । तंजहा—काइया जाव पाणाइवायकिरिया, एवं नेरइयाणं जाव वेमाणियाणं । जस्स णं भंते ! जीवस्स काइया आओजिया किरिया अत्थि तस्स अहिगरणिया आओजिया किरिया अत्थि, जस्स अहिगरणिया आओजिया किरिया अत्थि तस्स काइया आओजिया किरिया अत्थि ? एवं एएणं अभिलावेणं ते चेव चत्तारि दंडगा भाणियव्वा, जस्स जं समयं जं देसं जं जाव वेमाणियाणं ॥ ५९० ॥ जीवे णं भंते ! जं समयं काइयाए अहिगरणियाए पाओसियाए किरियाए पुट्ठे तं समयं पारियावणियाए पुट्ठे, पाणाइवायकिरियाए पुट्ठे ? गोयमा ! अत्थेगइए जीवे एगइयाओ जीवाओ जं समयं काइयाए अहिगरणियाए पाओसियाए किरियाए पुट्ठे तं समयं पारियावणियाए किरियाए पुट्ठे, पाणाइवायकिरियाए पुट्ठे १, अत्थेगइए जीवे एगइयाओ जीवाओ जं समयं काइयाए अहिगरणियाए पाओसियाए किरियाए पुट्ठे तं समयं पारियावणियाए किरियाए पुट्ठे, पाणाइवायकिरियाए अपुट्ठे २, अत्थेगइए जीवे एगइयाओ जीवाओ जं समयं काइयाए अहिगरणियाए पाओसियाए० पुट्ठे तं समयं पारियावणियाए किरियाए अपुट्ठे, पाणाइवायकिरियाए अपुट्ठे ३ ॥ ५९१ ॥ कइ णं भंते ! किरियाओ पण्णत्ताओ ? गोयमा ! पंच किरियाओ पण्णत्ताओ । तंजहा—आरंभिया, परिग्गहिया, मायावत्तिया, अपच्चक्खाणकिरिया, मिच्छादंसणवत्तिया । आरंभिया णं भंते ! किरिया कस्स कज्जइ ? गोयमा ! अण्णयरस्स वि पमत्तसंजयस्स । परिग्गहिया णं भंते ! किरिया कस्स कज्जइ ? गोयमा ! अण्णयरस्स वि संजया-संजयस्स । मायावत्तिया णं भंते ! किरिया कस्स कज्जइ ? गोयमा ! अण्णयरस्स वि अपमत्तसंजयस्स । अपच्चक्खाणकिरिया णं भंते ! कस्स कज्जइ ? गोयमा ! अण्णयरस्स वि अपच्चक्खाणिस्स । मिच्छादंसणवत्तिया णं भंते ! किरिया कस्स कज्जइ ? गोयमा ! अण्णयरस्स वि मिच्छादंसणिस्स ॥ ५९२ ॥ नेरइयाणं भंते ! कइ किरियाओ पन्नत्ताओ ? गोयमा ! पंच किरियाओ पन्नत्ताओ ।

तंजहा-आरंभिया जाव मिच्छादंसणवत्तिया । एवं जाव वेमाणियाणं । जस्स णं भंते ! जीवस्स आरंभिया किरिया कज्जइ तस्स परिग्गहिया० कज्जइ जस्स परिग्गहिया किरिया कज्जइ तस्स आरंभिया किरिया कज्जइ ? गोयमा ! जस्स णं जीवस्स आरंभिया किरिया कज्जइ तस्स परिग्गहिया० सिय कज्जइ, सिय नो कज्जइ, जस्स पुण परिग्गहिया किरिया कज्जइ तस्स आरंभिया किरिया णियमा कज्जइ । जस्स णं भंते ! जीवस्स आरंभिया किरिया कज्जइ तस्स मायावत्तिया किरिया कज्जइ पुच्छा । गोयमा ! जस्स णं जीवस्स आरंभिया किरिया कज्जइ तस्स मायावत्तिया किरिया नियमा कज्जइ, जस्स पुण मायावत्तिया किरिया कज्जइ तस्स आरंभिया किरिया सिय कज्जइ, सिय नो कज्जइ । जस्स णं भंते ! जीवस्स आरंभिया किरिया कज्जइ तस्स अपच्चक्खाणकिरिया पुच्छा । गोयमा ! जस्स णं जीवस्स आरंभिया किरिया कज्जइ तस्स अपच्चक्खाणकिरिया सिय कज्जइ, सिय नो कज्जइ, जस्स पुण अपच्चक्खाणकिरिया कज्जइ तस्स आरंभिया किरिया णियमा कज्जइ । एवं मिच्छा-दंसणवत्तियाए वि समं । एवं परिग्गहिया वि तिहिं उवरिद्धाहिं समं संचारेयव्वा । जस्स मायावत्तिया किरिया कज्जइ तस्स उवरिद्धाओ दो वि सिय कज्जंति, सिय नो कज्जंति, जस्स उवरिद्धाओ दो कज्जंति तस्स मायावत्तिया० णियमा कज्जइ । जस्स अपच्चक्खाणकिरिया कज्जइ तस्स मिच्छादंसणवत्तिया किरिया सिय कज्जइ, सिय नो कज्जइ, जस्स पुण मिच्छादंसणवत्तिया किरिया० तस्स अपच्चक्खाणकिरिया णियमा कज्जइ । नेरइयस्स आइल्लियाओ चत्तारि परोप्परं नियमा कज्जन्ति, जस्स एयाओ चत्तारि कज्जंति तस्स मिच्छादंसणवत्तिया किरिया भइज्जइ, जस्स पुण मिच्छादंसणवत्तिया किरिया कज्जइ तस्स एयाओ चत्तारि नियमा कज्जंति, एवं जाव थणियकुमारस्स । पुढवीकाइयस्स जाव चउरिंदियस्स पंच वि परोप्परं नियमा कज्जंति । पंचिंदियतिरिक्खजोणियस्स आइल्लियाओ तिण्णि वि परोप्परं नियमा कज्जंति, जस्स एयाओ कज्जंति तस्स उवरिद्धिया दोण्णि भइज्जंति, जस्स उवरिद्धाओ दोण्णि कज्जंति तस्स एयाओ तिण्णि वि णियमा कज्जंति । जस्स अपच्चक्खाणकिरिया० तस्स मिच्छादंसणवत्तिया० सिय कज्जइ, सिय नो कज्जइ, जस्स पुण मिच्छादंसणवत्तिया किरिया कज्जइ तस्स अपच्चक्खाणकिरिया नियमा कज्जइ, मणूसस्स जहा जीवस्स, वाणमंतरजोइसियवेमाणियस्स जहा नेरइयस्स । जं समयणं भंते ! जीवस्स आरंभिया किरिया कज्जइ तं समयं परिग्गहिया किरिया कज्जइ ? एवं एए जस्स जं समयं जं देसं जं पएसेण य चत्तारि दंडगा णेयव्वा, जहा नेरइयाणं तहा सव्वदेवाणं नेयव्वं जाव वेमाणियाणं ॥ ५९३ ॥ अस्थि

णं भंते ! जीवाणं पाणाइवायवेरमणे कज्जइ ? हंता ! अत्थि । कम्हि णं भंते ! जीवाणं पाणाइवायवेरमणे कज्जइ ? गोयमा ! छसु जीवनिक्काएसु । अत्थि णं भंते ! नेरइयाणं पाणाइवायवेरमणे कज्जइ ? गोयमा ! नो इण्ठे समट्ठे । एवं जाव वेमाणियाणं, णवरं मणूसाणं जहा जीवाणं । एवं मुसावाएणं जाव मायासोसेणं जीवस्स य मणूस्सस्स य, सेसाणं नो इण्ठे समट्ठे । णवरं अदिन्नादाणे गहणधारणिज्जेसु दव्वेसु, मेहुणे रुव्वेसु वा रुव्वसहगएसु वा दव्वेसु, सेसाणं सव्वेसु दव्वेसु । अत्थि णं भंते ! जीवाणं सिच्छादंसणसल्लवेरमणे कज्जइ ? हंता ! अत्थि । कम्हि णं भंते ! जीवाणं सिच्छादंसणसल्लवेरमणे कज्जइ ? गोयमा ! सव्वदव्वेसु, एवं नेरइयाणं जाव वेमाणियाणं, णवरं एगिंदियविगलेंदियाणं नो इण्ठे समट्ठे ॥ ५९४ ॥ पाणाइवायविरए णं भंते ! जीवे कइ कम्मपगडीओ बंधइ ? गोयमा ! सत्तविहबंधए वा अट्ठविहबंधए वा छव्विहबंधए वा एगविहबंधए वा अबंधए वा । एवं मणूसे वि भाणियव्वे । पाणाइवायविरया णं भंते ! जीवा कइ कम्मपगडीओ बंधंति ? गोयमा ! सव्वे वि ताव होज्जा सत्तविहबंधगा य एगविहबंधगा य १, अहवा सत्तविहबंधगा य एगविहबंधगा य अट्ठविहबंधगे य २, अहवा सत्तविहबंधगा य एगविहबंधगा य अट्ठविहबंधगा य ३, अहवा सत्तविहबंधगा य एगविहबंधगा य छव्विहबंधगे य ४, अहवा सत्तविहबंधगा य एगविहबंधगा य छव्विहबंधगा य ५, अहवा सत्तविहबंधगा य एगविहबंधगा य अबंधए य ६, अहवा सत्तविहबंधगा य एगविहबंधगा य अबंधगा य ७, अहवा सत्तविहबंधगा य एगविहबंधगा य अट्ठविहबंधगे य छव्विहबंधए य १, अहवा सत्तविहबंधगा य एगविहबंधगा य अट्ठविहबंधए य छव्विहबंधगा य २, अहवा सत्तविहबंधगा य एगविहबंधगा य अट्ठविहबंधगा य छव्विहबंधए य ३, अहवा सत्तविहबंधगा य एगविहबंधगा य अट्ठविहबंधए य अबंधए य १, अहवा सत्तविहबंधगा य एगविहबंधगा य अट्ठविहबंधए य अबंधगा य २, अहवा सत्तविहबंधगा य एगविहबंधगा य अट्ठविहबंधगा य अबंधए य ३, अहवा सत्तविहबंधगा य एगविहबंधगा य अट्ठविहबंधगा य अबंधगा य ४ । अहवा सत्तविहबंधगा य एगविहबंधगा य छव्विहबंधगे य अबंधए य १, अहवा सत्तविहबंधगा य एगविहबंधगा य छव्विहबंधए य अबंधगा य २, अहवा सत्तविहबंधगा य एगविहबंधगा य छव्विहबंधगा य अबंधए य ३, अहवा सत्तविहबंधगा य एगविहबंधगा य छव्विहबंधगा य अबंधगा य ४ । अहवा सत्तविहबंधगा य एग-

विहवंधगा य अट्टविहवंधगे य छव्विहवंधए य अवंधए य १, अहवा सत्तविह-  
 वंधगा य एगविहवंधगा य अट्टविहवंधए य छव्विहवंधए य अवंधगा य २,  
 अहवा सत्तविहवन्धगा य एगविहवन्धगा य अट्टविहवन्धए य छव्विहवन्धगा य  
 अवन्धए य ३, अहवा सत्तविहवन्धगा य एगविहवन्धगा य अट्टविहवन्धए य  
 छव्विहवन्धगा य अवन्धगा य ४, अहवा सत्तविहवन्धगा य एगविहवन्धगा य  
 अट्टविहवन्धगा य छव्विहवन्धगे य अवन्धए य ५, अहवा सत्तविहवन्धगा य  
 एगविहवन्धगा य अट्टविहवन्धगा य छव्विहवन्धगे य अवन्धगा य ६, अहवा  
 सत्तविहवन्धगा य एगविहवन्धगा य अट्टविहवन्धगा य छव्विहवन्धगा य अवन्धए  
 य ७, अहवा सत्तविहवन्धगा य एगविहवन्धगा य अट्टविहवन्धगा य छव्विह-  
 वन्धगा य अवन्धगा य ८, एवं एए अट्ट भंगा, सव्वे वि मिल्लिया सत्तावीसं भंगा  
 भवंति । एवं मणूसाण वि एए चेव सत्तावीसं भंगा भाणियव्वा, एवं मुसावायविर-  
 यस्स जाव मायामोसविरयस्स जीवस्स य मणूस्स य । मिच्छादंसणसल्लविरए णं  
 भंते ! जीवे कइ कम्मपगडीओ बन्धइ ? गोयमा ! सत्तविहवन्धए वा अट्टविहवन्धए  
 वा छव्विहवन्धए वा एगविहवन्धए वा अवन्धए वा । मिच्छादंसणसल्लविरए णं  
 भंते ! नेरइए कइ कम्मपगडीओ बन्धइ ? गोयमा ! सत्तविहवन्धए वा अट्टविह-  
 वन्धए वा जाव पंचिदियतिरिक्खजोणिए । मणूसे जहा जीवे । वाणमंतरजोइसिय-  
 वेमाणिए जहा नेरइए । मिच्छादंसणसल्लविरया णं भंते ! जीवा कइ कम्मपगडीओ  
 बन्धन्ति ? गोयमा ! ते चेव सत्तावीसं भंगा भाणियव्वा । मिच्छादंसणसल्लविरया  
 णं भंते ! नेरइया कइ कम्मपगडीओ बन्धन्ति ? गोयमा ! सव्वे वि ताव होज्ज  
 सत्तविहवन्धगा, अहवा सत्तविहवन्धगा य अट्टविहवन्धगे य, अहवा सत्तविह-  
 वन्धगा य अट्टविहवन्धगा य एवं जाव वेमाणिया, णवरं मणूसाणं जहा जीवाणं  
 ॥ ५९५ ॥ पाणाइवायविरयस्स णं भंते ! जीवस्स किं आरंभिया किरिया कज्जइ  
 जाव मिच्छादंसणवत्तिया किरिया कज्जइ ? गोयमा ! पाणाइवायविरयस्स णं जीवस्स  
 आरंभिया किरिया सिय कज्जइ, सिय नो कज्जइ । पाणाइवायविरयस्स णं भंते !  
 जीवस्स परिग्गहिया किरिया कज्जइ ? गोयमा ! णो इणट्ठे समट्ठे । पाणाइवायवि-  
 रयस्स णं भंते ! जीवस्स मायावत्तिया किरिया कज्जइ ? गोयमा ! सिय कज्जइ,  
 सिय नो कज्जइ । पाणाइवायविरयस्स णं भंते ! जीवस्स अपच्चक्खाणवत्तिया  
 किरिया कज्जइ ? गोयमा ! णो इणट्ठे समट्ठे । मिच्छादंसणवत्तियाए पुच्छा ।  
 गोयमा ! णो इणट्ठे समट्ठे । एवं पाणाइवायविरयस्स मणूस्स वि, एवं जाव माया-  
 मोसविरयस्स जीवस्स मणूस्स य । मिच्छादंसणसल्लविरयस्स णं भंते ! जीवस्स किं



आरंभिया किरिया कज्जइ जाव मिच्छादंसणवत्तिया किरिया कज्जइ ? गोयमा ! मिच्छादंसणसल्लविरयस्स जीवस्स णं आरंभिया किरिया सिय कज्जइ, सिय नो कज्जइ, एवं जाव अपच्चक्खाणकिरिया । मिच्छादंसणवत्तिया किरिया न कज्जइ । मिच्छादंसणसल्लविरयस्स णं भंते ! नेरइयस्स किं आरंभिया किरिया कज्जइ जाव मिच्छादंसणवत्तिया किरिया कज्जइ ? गोयमा ! आरंभिया किरिया कज्जइ जाव अपच्चक्खाणकिरिया वि कज्जइ, मिच्छादंसणवत्तिया किरिया नो कज्जइ । एवं जाव थणियकुमारस्स । मिच्छादंसणसल्लविरयस्स णं भंते ! पंचिदियतिरिक्खजोणियस्स एवमेव पुच्छा । गोयमा ! आरंभिया किरिया कज्जइ जाव मायावत्तिया किरिया कज्जइ, अपच्चक्खाणकिरिया सिय कज्जइ, सिय नो कज्जइ, मिच्छादंसणवत्तिया किरिया नो कज्जइ । मणूस्स जहा जीवस्स । वाणमंतरजोइसियवेमाणियाणं जहा नेरइयस्स ॥ ५९६ ॥ एयासि णं भंते ! आरंभियाणं जाव मिच्छादंसणवत्तियाण य कयरा कयराहिंतो अप्पा वा ४ ? गोयमा ! सव्वत्थोवाओ मिच्छादंसणवत्तियाओ किरियाओ, अपच्चक्खाणकिरियाओ विसेसाहियाओ, परिग्गहियाओ० विसेसाहियाओ, आरंभियाओ किरियाओ विसेसाहियाओ, मायावत्तियाओ० विसेसाहियाओ ॥ ५९७ ॥ **पन्नवणाए भगवईए वावीसइमं किरियापयं समत्तं ॥**

कइ पगडी कह बन्धइ कइहि वि ठाणेहिं बन्धए जीवो । कइ वेएइ य पयडी अणभावो कइविहो कस्स ॥ कइ णं भंते ! कम्मपगडीओ पण्णत्ताओ ? गोयमा ! अट्ठ कम्मपगडीओ पण्णत्ताओ । तंजहा—णाणावरणिजं १, दंसणावरणिजं २, वेयणिजं ३, मोहणिजं ४, आउयं ५, नामं ६, गोयं ७, अंतराइयं ८ । नेरइयाणं भंते ! कइ कम्मपगडीओ पन्नत्ताओ ? गोयमा ! एवं चेव, एवं जाव वेमाणियाणं १ ॥ ५९८ ॥ कइ णं भंते ! जीवे अट्ठ कम्मपगडीओ बन्धइ ? गोयमा ! नाणावरणिजस्स कम्मस्स उदएणं दरिषणावरणिजं कम्मं णियच्छइ, दंसणावरणिजस्स कम्मस्स उदएणं दंसणमोहणिजं कम्मं णियच्छइ, दंसणमोहणिजस्स कम्मस्स उदएणं मिच्छत्तं णियच्छइ, मिच्छत्तेणं उदिएणं गोयमा ! एवं खलु जीवो अट्ठ कम्मपगडीओ बन्धइ । कइ णं भंते ! नेरइए अट्ठ कम्मपगडीओ बन्धइ ? गोयमा ! एवं चेव, एवं जाव वेमाणिए । कहणं भंते ! जीवा अट्ठ कम्मपगडीओ बन्धन्ति ? गोयमा ! एवं चेव, एवं जाव वेमाणिया ॥ ५९९ ॥ जीवे णं भंते ! णाणावरणिजं कम्मं कइहिं ठाणेहिं बंधइ ? गोयमा ! दोहिं ठाणेहिं, तंजहा—रागेण य दोसेण य । रागे दुविहे पन्नते । तंजहा—माया य लोभे य । दोसे दुविहे पन्नते । तंजहा—कोहे य माणे य, इच्चेएहिं चउहिं ठाणेहिं विरिओवग्गहिएहिं एवं खलु जीवे णाणावरणिजं कम्मं बन्धइ,

एवं नेरइए जाव वेमाणिए । जीवा णं भंते ! णाणावरणिज्जं कम्मं कइहिं ठाणेहिं बन्धन्ति ? गोयमा ! दोहिं ठाणेहिं एवं चेव, एवं नेरइया जाव वेमाणिया । एवं दंसणावरणिज्जं जाव अंतराइयं, एवं एए एगत्तपोहत्तिया सोलस दंडगा ॥ ६०० ॥ जीवे णं भंते ! णाणावरणिज्जं कम्मं वेएइ ? गोयमा ! अत्थेगइए वेएइ, अत्थेगइए नो वेएइ । नेरइए णं भंते ! णाणावरणिज्जं कम्मं वेएइ ? गोयमा ! नियमा वेएइ, एवं जाव वेमाणिए, णवरं मणूसे जहा जीवे । जीवा णं भंते ! णाणावरणिज्जं कम्मं वेदेति ? गोयमा ! एवं चेव, एवं जाव वेमाणिया । एवं जहा णाणावरणिज्जं तहा दंसणावरणिज्जं मोहणिज्जं अंतराइयं च, वेयणिज्जाउत्तामगोयाइं एवं चेव, नवरं मणूसे वि नियमा वेएइ, एवं एए एगत्तपोहत्तिया सोलस दंडगा ॥ ६०१ ॥ णाणावरणिज्जस्स णं भंते ! कम्मस्स जीवेणं बद्धस्स पुट्टस्स बद्धफासपुट्टस्स संचियस्स चियस्स उवचियस्स आवागपत्तस्स विवागपत्तस्स फलपत्तस्स उदयपत्तस्स जीवेणं कयस्स जीवेणं निव्वत्तियस्स जीवेणं परिणामियस्स सयं वा उदिण्णस्स परेण वा उदीरियस्स तदुभएण वा उदीरिज्जमाणस्स गइं पप्प ठिइं पप्प भवं पप्प पोग्गलपरिणामं पप्प कइविहे अणुभावे पन्नत्ते ? गोयमा ! णाणावरणिज्जस्स णं कम्मस्स जीवेणं बद्धस्स जाव पोग्गलपरिणामं पप्प दसविहे अणुभावे पन्नत्ते । तंजहा—सोयावरणे, सोयविण्णाणावरणे, गेत्तावरणे, गेत्तविण्णाणावरणे, घाणावरणे, घाणविण्णाणावरणे, रसावरणे, रसविण्णाणावरणे, फासावरणे, फासविण्णाणावरणे, जं वेएइ पोग्गलं वा पोग्गले वा पोग्गलपरिणामं वा वीससा वा पोग्गलाणं परिणामं तेसिं वा उदएणं जाणियव्वं ण जाणइ, जाणिउकामे वि ण जाणइ, जाणित्ता वि ण जाणइ, उच्छन्नणाणी यावि भवइ णाणावरणिज्जस्स कम्मस्स उदएणं, एस णं गोयमा ! णाणावरणिजे कम्मे, एस णं गोयमा ! णाणावरणिज्जस्स कम्मस्स जीवेणं बद्धस्स जाव पोग्गलपरिणामं पप्प दसविहे अणुभावे पन्नत्ते ॥ ६०२ ॥ दरिसणावरणिज्जस्स णं भंते ! कम्मस्स जीवेणं बद्धस्स जाव पोग्गलपरिणामं पप्प कइविहे अणुभावे पन्नत्ते ? गोयमा ! दरिसणावरणिज्जस्स णं कम्मस्स जीवेणं बद्धस्स जाव पोग्गलपरिणामं पप्प णवविहे अणुभावे पन्नत्ते । तंजहा—णिहा, णिहाणिहा, पयला, पयलापयला, थीणद्धी, चक्खुदंसणावरणे, अचक्खुदंसणावरणे, ओहिदंसणावरणे, केवलदंसणावरणे, जं वेएइ पोग्गलं वा पोग्गले वा पोग्गलपरिणामं वा वीससा वा पोग्गलाणं परिणामं तेसिं वा उदएणं पासियव्वं ण पासइ, पासिउकामे वि ण पासइ, पासित्ता वि ण पासइ, उच्छन्नदंसणी यावि भवइ दरिसणावरणिज्जस्स कम्मस्स उदएणं, एस णं गोयमा ! दरिसणावरणिजे कम्मे, एस णं गोयमा ! दरिसणावरणिज्जस्स कम्मस्स

जीवेणं बद्धस्स जाव पोग्गलपरिणामं पप्प णवविहे अणुभावे पन्नत्ते ॥ ६०३ ॥  
 सायावेयणिजस्स णं भंते ! कम्मस्स जीवेणं बद्धस्स जाव पोग्गलपरिणामं पप्प  
 कद्धविहे अणुभावे पन्नत्ते ? गोयमा ! सायावेयणिजस्स णं कम्मस्स जीवेणं बद्धस्स  
 जाव अट्ठविहे अणुभावे पन्नत्ते । तंजहा—मणुण्णा सद्दा १, मणुण्णा रूवा २, मणुण्णा  
 गंधा ३, मणुण्णा रसा ४, मणुण्णा फासा ५, मणोसुहया ६, वयसुहया ७, काय-  
 सुहया ८, जं वेएइ पोग्गलं वा पोग्गले वा पोग्गलपरिणामं वा वीससा वा पोग्ग-  
 लाणं परिणामं तेसिं वा उदएणं सायावेयणिज्जं कम्मं वेएइ, एस णं गोयमा !  
 सायावेयणिज्जे कम्मे, एस णं गोयमा ! सायावेयणिजस्स जाव अट्ठविहे अणुभावे  
 पन्नत्ते । असायावेयणिजस्स णं भंते ! कम्मस्स जीवेणं तहेव पुच्छा उत्तरं च, णवरं  
 अमणुण्णा सद्दा जाव कायदुहया, एस णं गोयमा ! असायावेयणिज्जे कम्मे, एस णं  
 गोयमा ! असायावेयणिजस्स जाव अट्ठविहे अणुभावे पन्नत्ते ॥ ६०४ ॥ मोहणिजस्स  
 णं भंते ! कम्मस्स जीवेणं बद्धस्स जाव कद्धविहे अणुभावे पन्नत्ते ? गोयमा ! मोह-  
 णिजस्स णं कम्मस्स जीवेणं बद्धस्स जाव पंचविहे अणुभावे पन्नत्ते । तंजहा—सम्मत्त-  
 वेयणिज्जे, मिच्छत्तवेयणिज्जे, सम्मासिच्छत्तवेयणिज्जे, कसायवेयणिज्जे, नोकसाय-  
 वेयणिज्जे । जं वेएइ पोग्गलं वा पोग्गले वा पोग्गलपरिणामं वा वीससा वा पोग्गलाणं  
 परिणामं तेसिं वा उदएणं मोहणिज्जं कम्मं वेएइ, एस णं गोयमा ! मोहणिजस्स  
 कम्मस्स जाव पंचविहे अणुभावे पन्नत्ते ॥ ६०५ ॥ आउयस्स णं भंते ! कम्मस्स  
 जीवेणं तहेव पुच्छा । गोयमा ! आउयस्स णं कम्मस्स जीवेणं बद्धस्स जाव चउव्विहे  
 अणुभावे पन्नत्ते । तंजहा—नेरइयाउए, तिरियाउए, मणयाउए, देवाउए, जं वेएइ  
 पोग्गलं वा पोग्गले वा पोग्गलपरिणामं वा वीससा वा पोग्गलाणं परिणामं तेसिं  
 वा उदएणं आउयं कम्मं वेएइ, एस णं गोयमा ! आउए कम्मे, एस णं गोयमा !  
 आउयकम्मस्स जाव चउव्विहे अणुभावे पन्नत्ते ॥ ६०६ ॥ सुहणामस्स णं भंते !  
 कम्मस्स जीवेणं पुच्छा । गोयमा ! सुहणामस्स णं कम्मस्स जीवेणं चउइस्सविहे  
 अणुभावे पन्नत्ते । तंजहा—इट्ठा सद्दा १, इट्ठा रूवा २, इट्ठा गंधा ३, इट्ठा रसा ४,  
 इट्ठा फासा ५, इट्ठा गई ६, इट्ठा ठिई ७, इट्ठे लावण्णे ८, इट्ठा जसोकिती ९,  
 इट्ठे उट्ठाणकम्मबलवीरियपुरिसक्कारपरकमे १०, इट्ठस्सरया ११, कंतस्सरया १२,  
 पियस्सरया १३, मणुण्णस्सरया १४, जं वेएइ पोग्गलं वा पोग्गले वा पोग्गल-  
 परिणामं वा वीससा वा पोग्गलाणं परिणामं तेसिं वा उदएणं सुहणामं कम्मं  
 वेएइ, एस णं गोयमा ! सुहणामकम्मे, एस णं गोयमा ! सुहणामस्स कम्मस्स जाव  
 चउइस्सविहे अणुभावे पन्नत्ते । दुहणामस्स णं भंते ! पुच्छा । गोयमा ! एवं चेव,

णवरं अणिट्ठा सद्वा जाव हीणस्सरया, दीणस्सरया, अकंतस्सरया, जं वेएइ सेसं तं  
चेव जाव चउइसविहे अणुभावे पन्नते ॥ ६०७ ॥ उच्चागोयस्स णं भंते ! कम्मस्स  
जीवेणं पुच्छा । गोयमा ! उच्चागोयस्स णं कम्मस्स जीवेणं वद्धस्स जाव अट्ठविहे  
अणुभावे पन्नते । तंजहा—जाइविसिट्ठया १, कुलविसिट्ठया २, बलविसिट्ठया ३,  
रूवविसिट्ठया ४, तवविसिट्ठया ५, सुयविसिट्ठया ६, लाभविसिट्ठया ७, इस्सरिय-  
विसिट्ठया ८, जं वेएइ पोग्गलं वा पोग्गले वा पोग्गलपरिणामं वा वीससा वा  
पोग्गलाणं परिणामं तेसिं वा उदएणं जाव अट्ठविहे अणुभावे पन्नते । णीयागोयस्स  
णं भंते ! पुच्छा । गोयमा ! एवं चेव, णवरं जाइविहीणया जाव इस्सरियविहीणया,  
जं वेएइ पुग्गलं वा पोग्गले वा पोग्गलपरिणामं वा वीससा वा पोग्गलाणं परिणामं  
तेसिं वा उदएणं जाव अट्ठविहे अणुभावे पन्नते ॥ ६०८ ॥ अंतराइयस्स णं भंते !  
कम्मस्स जीवेणं पुच्छा । गोयमा ! अंतराइयस्स णं कम्मस्स जीवेणं वद्धस्स जाव  
पंचविहे अणुभावे पन्नते । तंजहा—दाणंतराए लाभंतराए भोगंतराए उवभोगंतराए  
वीरियंतराए, जं वेएइ पोग्गलं वा जाव वीससा वा पोग्गलाणं परिणामं तेसिं वा  
उदएणं अंतराइयं कम्मं वेएइ, एस णं गोयमा ! अंतराइए कम्मे, एस णं गोयमा !  
जाव पंचविहे अणुभावे पन्नते ॥ ६०९ ॥ पन्नवणाए भगवईए तेवीसइ-  
मस्स पयस्स पढमो उद्देसो समत्तो ॥

कइ णं भंते ! कम्मपगडीओ पन्नत्ताओ ? गोयमा ! अट्ठ कम्मपगडीओ पन्न-  
त्ताओ । तंजहा—णाणावरणिज्जं जाव अंतराइयं । णाणावरणिजे णं भंते ! कम्मे  
कइविहे पन्नते ? गोयमा ! पंचविहे पन्नते । तंजहा—आभिणिबोहियनाणावरणिजे  
जाव केवलनाणावरणिजे ॥ ६१० ॥ दंसणावरणिजे णं भंते ! कम्मे कइविहे पन्नते ?  
गोयमा ! दुविहे पन्नते । तंजहा—निदापंचए य दंसणचउक्कए य । निदापंचए णं  
भंते ! कइविहे पन्नते ? गोयमा ! पंचविहे पन्नते । तंजहा—निदा जाव शीणद्धी ।  
दंसणचउक्कए णं पुच्छा । गोयमा ! चउव्विहे पन्नते । तंजहा—चक्खुदंसणावरणिजे  
जाव केवलदंसणावरणिजे ॥ ६११ ॥ वेयणिजे णं भंते ! कम्मे कइविहे पन्नते ?  
गोयमा ! दुविहे पन्नते । तंजहा—सायावेयणिजे य असायावेयणिजे य । साया-  
वेयणिजे णं भंते ! कम्मे पुच्छा । गोयमा ! अट्ठविहे पन्नते । तंजहा—मणुण्णा  
सद्वा जाव कायसुहया । असायावेयणिजे णं भंते ! कम्मे कइविहे पन्नते ?  
गोयमा ! अट्ठविहे पन्नते । तंजहा—अमणुण्णा सद्वा जाव कायदुहया ॥ ६१२ ॥  
मोहणिजे णं भंते ! कम्मे कइविहे पन्नते ? गोयमा ! दुविहे पन्नते । तंजहा—  
दंसणमोहणिजे य चरित्तमोहणिजे य । दंसणमोहणिजे णं भंते ! कम्मे कइविहे

पञ्चत्ते ? गोयमा ! तिविहे पञ्चत्ते । तंजहा-सम्मत्तवेयणिज्जे, सिच्छत्तवेयणिज्जे, सम्मामिच्छत्तवेयणिज्जे । चरित्तमोहणिज्जे णं भंते ! कम्मे कइविहे पञ्चत्ते ? गोयमा ! दुविहे पञ्चत्ते । तंजहा-कसायवेयणिज्जे, नोकसायवेयणिज्जे । कसायवेयणिज्जे णं भंते ! कम्मे कइविहे पञ्चत्ते ? गोयमा ! सोलसविहे पञ्चत्ते । तंजहा-अणंताणुबंधी कोहे, अणंताणुबंधी माणे, अणन्ताणुबंधी माया, अणन्ताणुबंधी लोमे, अपच्च-क्खाणे कोहे, एवं माणे, माया, लोमे, पच्चक्खाणावरणे कोहे, एवं माणे, माया, लोमे, संजलणकोहे, एवं माणे, माया, लोमे । नोकसायवेयणिज्जे णं भंते ! कम्मे कइविहे पञ्चत्ते ? गोयमा ! णवविहे पञ्चत्ते । तंजहा-इत्थीवेयवेयणिज्जे, पुरिसवेय-वेयणिज्जे, नपुंसगवेयवेयणिज्जे, हासे, रई, अरई, भए, सोगे, दुगुंछा ॥ ६१३ ॥ आउए णं भंते ! कम्मे कइविहे पञ्चत्ते ? गोयमा ! चउव्विहे पञ्चत्ते । तंजहा-नेरइयाउए जाव देवाउए ॥ ६१४ ॥ णामे णं भंते ! कम्मे कइविहे पञ्चत्ते ? गोयमा ! बायालीसइविहे पञ्चत्ते । तंजहा-गइणामे १, जाइणामे २, सरीरणामे ३, सरीरोवंगणामे ४, सरीरबंधणामे ५, सरीरसंधयणामे ६, संधायणामे ७, संठाणणामे ८, वण्णणामे ९, गंधणामे १०, रसणामे ११, फासणामे १२, अगुल्लुणामे १३, उवघायणामे १४, पराघायणामे १५, आणुपुव्विणामे १६, उस्सासणामे १७, आयवणामे १८, उज्जोयणामे १९, विहायगइणामे २०, तसणामे २१, थावरणामे २२, सुहुमणामे २३, वायरणामे २४, पज्जत्तणामे २५, अपज्जत्तणामे २६, साहारणसरीरणामे २७, पत्तेयसरीरणामे २८, थिरणामे २९, अथिरणामे ३०, सुभणामे ३१, असुभणामे ३२, सुभगणामे ३३, दुभग-णामे ३४, सूसरणामे ३५, दूसरणामे ३६, आदेज्जणामे ३७, अणादेज्जणामे ३८, जसोकित्तिणामे ३९, अजसोकित्तिणामे ४०, णिम्माणणामे ४१, तित्थ-गरणामे ४२ । गइणामे णं भंते ! कम्मे कइविहे पञ्चत्ते ? गोयमा ! चउव्विहे पञ्चत्ते । तंजहा-निरयगइणामे, तिरियगइणामे, मणयगइणामे, देवगइणामे । जाइणामे णं भंते ! कम्मे पुच्छा । गोयमा ! पंचविहे पञ्चत्ते । तंजहा-एगिंदियजाइणामे जाव पंचिंदियजाइणामे । सरीरणामे णं भंते ! कम्मे कइविहे पञ्चत्ते ? गोयमा ! पंचविहे पञ्चत्ते । तंजहा-ओरालियसरीरणामे जाव कम्मगसरीरणामे । सरीरोवंगणामे णं भंते ! कइविहे पञ्चत्ते ? गोयमा ! तिविहे पञ्चत्ते । तंजहा-ओरालियसरीरोवंगणामे, वेउ-व्वियसरीरोवंगणामे, आहारगसरीरोवंगणामे । सरीरबंधणामे णं भंते ! कइविहे पञ्चत्ते ? गोयमा ! पंचविहे पञ्चत्ते । तंजहा-ओरालियसरीरबंधणामे जाव कम्मग-सरीरबंधणामे । सरीरसंधायणामे णं भंते ! कइविहे पञ्चत्ते ? गोयमा ! पंचविहे

पन्नते । तंजहा—ओरालियसरीरसंघायनामे जाव कम्मगसरीरसंघायनामे । संघयण-  
नामे णं भंते !० कइविहे पन्नते ? गोयमा ! छव्विहे पन्नते । तंजहा—वइरोस-  
भनारायसंघयणनामे, उसहनारायसंघयणनामे, नारायसंघयणनामे, अद्धनाराय-  
संघयणनामे, कीलियासंघयणनामे, छेवट्टसंघयणनामे । संठाणनामे णं भंते !० कइविहे  
पन्नते ? गोयमा ! छव्विहे पन्नते । तंजहा—समच्चउरंससंठाणनामे, निग्गोहपरिमंडल-  
संठाणनामे, साइसंठाणनामे, वामणसंठाणनामे, खुज्जसंठाणनामे, हुंडसंठाणनामे ।  
वण्णनामे णं भंते ! कम्मे कइविहे पन्नते ? गोयमा ! पंचविहे पन्नते । तंजहा—  
कालवण्णनामे जाव सुक्खिणवण्णनामे । गंधनामे णं भंते ! कम्मे पुच्छा । गोयमा !  
दुविहे पन्नते । तंजहा—सुरभिगंधनामे, दुरभिगंधनामे । रसनामे णं पुच्छा । गोयमा !  
पंचविहे पन्नते । तंजहा—तित्तरसनामे जाव महुररसनामे । फासनामे णं पुच्छा ।  
गोयमा ! अट्टविहे पन्नते ! तंजहा—कक्खडफासनामे जाव लहुयफासनामे । अगुरु-  
लहुयनामे एगागारे पन्नते । उवघायनामे एगागारे पन्नते, पराघायनामे एगागारे  
पन्नते । आणुपुव्वीणामे चउव्विहे पन्नते । तंजहा—नेरइयआणुपुव्वीणामे जाव  
देवाणुपुव्वीणामे । उस्सासनामे एगागारे पन्नते, सेसाणि सव्वाणि एगागाराइं पण्ण-  
त्ताइं जाव तित्थगरणामे । नवरं विहायगइनामे दुविहे पन्नते । तंजहा—पसत्थविहा-  
यगइनामे, अपसत्थविहायगइनामे य ॥ ६१५ ॥ गोए णं भंते ! कम्मे कइविहे  
पन्नते ? गोयमा ! दुविहे पन्नते । तंजहा—उच्चागोए य नीयागोए य । उच्चागोए  
णं भंते !० कइविहे पन्नते ? गोयमा ! अट्टविहे पन्नते । तंजहा—जाइविसिद्धया  
जाव इस्सरियविसिद्धया, एवं नीयागोए वि, णवरं जाइविहीणया जाव इस्सरियवि-  
हीणया ॥ ६१६ ॥ अंतराइए णं भंते ! कम्मे कइविहे पन्नते ? गोयमा ! पंचविहे  
पन्नते । तंजहा—दाणंतराइए जाव वीरियंतराइए ॥ ६१७ ॥ णाणावरणिज्जस्स णं  
भंते ! कम्मस्स केवइयं कालं ठिई पन्नत्ता ? गोयमा ! जहण्णेणं अंतोमुहुत्तं, उक्कोसेणं  
तीसं सागरोवमकोडाकोडीओ, तिण्णि य वाससहस्साइं अबाहा, अबाहूणिया कम्म-  
ठिई कम्मनिसेगो ॥ ६१८ ॥ निहापंचगस्स णं भंते ! कम्मस्स केवइयं कालं ठिई  
पन्नत्ता ? गोयमा ! जहण्णेणं सागरोवमस्स तिण्णि सत्तभागा पल्लिओवमस्स असंखे-  
ज्जइभागेणं ऊणिया, उक्कोसेणं तीसं सागरोवमकोडाकोडीओ, तिण्णि य वाससहस्साइं  
अबाहा, अबाहूणिया कम्मठिई कम्मनिसेगो । दंसणचउक्कस्स णं भंते ! कम्मस्स केव-  
इयं कालं ठिई पन्नत्ता ? गोयमा ! जहण्णेणं अंतोमुहुत्तं, उक्कोसेणं तीसं सागरोवम-  
कोडाकोडीओ, तिण्णि य वाससहस्साइं अबाहा ॥ ६१९ ॥ सायावेयणिज्जस्स इरिया-  
वहियं बंधगं पडुच्च अजहण्णमणुक्कोसेणं दो समया, संपराइयबंधगं पडुच्च जहण्णेणं

वारस मुहुत्ता, उक्कोसेणं पण्णरस सागरोवमकोडाकोडीओ, पण्णरस वाससयाइं  
 अवाहा । असायावेयणिजस्स जह्वेणं सागरोवमस्स तिण्णि सत्तभागा पलिओवमस्स  
 असंखेज्जभागेणं ऊणया, उक्कोसेणं तीसं सागरोवमकोडाकोडीओ, तिण्णि य वास-  
 सहस्साइं अवाहा ॥ ६२० ॥ सम्मत्तवेयणिजस्स पुच्छा । गोयमा ! जह्वेणं अंतो-  
 मुहुत्तं, उक्कोसेणं छावट्ठि सागरोवमाइं साइरेगाइं । मिच्छत्तवेयणिजस्स जह्वेणं  
 सागरोवमं पलिओवमस्स असंखेज्जभागेणं ऊणगं, उक्कोसेणं सत्तारि कोडाकोडीओ,  
 सत्त य वाससहस्साइं अवाहा, अवाहूणिया० । सम्मामिच्छत्तवेयणिजस्स जह्वेणं  
 अंतोमुहुत्तं, उक्कोसेणं अंतोमुहुत्तं । कसायवारसगरस्स जह्वेणं सागरोवमस्स चत्तारि  
 सत्तभागा पलिओवमस्स असंखेज्जभागेणं ऊणया, उक्कोसेणं चत्तालीसं सागरोवम-  
 कोडाकोडीओ, चत्तालीसं वाससयाइं अवाहा जाव निसेगो । कोहसंजलणे पुच्छा ।  
 गोयमा ! जह्वेणं दो मासा, उक्कोसेणं चत्तालीसं सागरोवमकोडाकोडीओ, चत्तालीसं  
 वाससयाइं अवाहा जाव निसेगो । माणसंजलणाए पुच्छा । गोयमा ! जह्वेणं मासं,  
 उक्कोसेणं जहा कोहस्स । मायासंजलणाए पुच्छा । गोयमा ! जह्वेणं अदं मासं,  
 उक्कोसेणं जहा कोहस्स । लोहसंजलणाए पुच्छा । गोयमा ! जह्वेणं अंतोमुहुत्तं,  
 उक्कोसेणं जहा कोहस्स । इत्थिवेयस्स पुच्छा । गोयमा ! जह्वेणं सागरोवमस्स दिवहुं  
 सत्तभागं पलिओवमस्स असंखेज्जभागेणं ऊणयं, उक्कोसेणं पण्णरस सागरोवमकोडा-  
 कोडीओ, पण्णरस वाससयाइं अवाहा । पुरिसवेयस्स णं पुच्छा । गोयमा ! जह्वेणं  
 अट्ठ संवच्छराइं, उक्कोसेणं दस सागरोवमकोडाकोडीओ, दस वाससयाइं अवाहा  
 जाव निसेगो । णपुंसगवेयस्स णं पुच्छा । गोयमा ! जह्वेणं सागरोवमस्स दोण्णि  
 सत्तभागा पलिओवमस्स असंखेज्जभागेणं ऊणया, उक्कोसेणं वीसं सागरोवमकोडा-  
 कोडीओ, वीसइ वाससयाइं अवाहा । हासरइणं पुच्छा । गोयमा ! जह्वेणं सागरोव-  
 मस्स एकं सत्तभागं पलिओवमस्स असंखेज्जभागेणं ऊणं, उक्कोसेणं दस सागरोवम-  
 कोडाकोडीओ, दस वाससयाइं अवाहा । अरइभयसोगहुगुच्छाणं पुच्छा । गोयमा !  
 जह्वेणं सागरोवमस्स दोण्णि सत्तभागा पलिओवमस्स असंखेज्जभागेणं ऊणया,  
 उक्कोसेणं वीसं सागरोवमकोडाकोडीओ, वीसं वाससयाइं अवाहा ॥ ६२१ ॥  
 नेरइयाउयस्स णं पुच्छा । गोयमा ! जह्वेणं दस वाससहस्साइं अंतोमुहुत्तमब्भहि-  
 याइं, उक्कोसेणं तेत्तीसं सागरोवमाइं पुव्वकोडीतिभागमब्भहियाइं । तिरेक्खजोणि-  
 याउयस्स पुच्छा । गोयमा ! जह्वेणं अंतोमुहुत्तं, उक्कोसेणं तिण्णि पलिओवमाइं  
 पुव्वकोडीतिभागमब्भहियाइं, एवं मणूसाउयस्स वि । देवाउयस्स जहा नेरइयाउयस्स  
 ठिइति ॥ ६२२ ॥ निरयगइनामए णं पुच्छा । गोयमा ! जह्वेणं सागरोवमसह-

स्सस्स दो सत्तभागा पलिओवमस्स असंखेज्जइभागेणं ऊणया, उक्कोसेणं वीसं साग-  
रोवमकोडाकोडीओ, वीसं वाससयाइं अवाहा । तिरियगइनामए जहा नपुंसगवेयस्स ।  
मणुयगइनामए पुच्छा । गो० ! जह्वेणं सागरोवमस्स दिवङ्गं सत्तभागं पलिओवमस्स  
असंखेज्जइभागेणं ऊणगं, उक्कोसेणं पण्णरस सागरोवमकोडाकोडीओ, पण्णरसवास-  
सयाइं अवाहा । देवगइनामए णं पुच्छा । गोयमा ! जह्वेणं सागरोवमसहस्सस्स  
एगं सत्तभागं पलिओवमस्स असंखेज्जइभागेणं ऊणयं, उक्कोसेणं जहा पुरिसवेयस्स ।  
एगिंदियजाइनामए णं पुच्छा । गोयमा ! जह्वेणं सागरोवमस्स दोण्णि सत्तभागा  
पलिओवमस्स असंखेज्जइभागेणं ऊणया, उक्कोसेणं वीसं सागरोवमकोडाकोडीओ,  
वीसइ वाससयाइं अवाहा । वेइंदियजाइनामए णं पुच्छा । गोयमा ! जह्वेणं  
सागरोवमस्स नव पण्णीसइभागा पलिओवमस्स असंखेज्जइभागेणं ऊणया, उक्कोसेणं  
अट्टारस सागरोवमकोडाकोडीओ, अट्टारस य वाससयाइं अवाहा । तेइंदियजाइ-  
नामए णं जह्वेणं एवं चेव, उक्कोसेणं अट्टारस सागरोवमकोडाकोडीओ, अट्टारस  
वाससयाइं अवाहा । चउरिंदियजाइनामए पुच्छा । गोयमा ! जह्वेणं सागरोवमस्स  
णव पण्णीसइभागा पलिओवमस्स असंखेज्जइभागेणं ऊणया, उक्कोसेणं अट्टारस  
सागरोवमकोडाकोडीओ, अट्टारस वाससयाइं अवाहा । पंचिंदियजाइनामए पुच्छा ।  
गोयमा ! जह्वेणं सागरोवमस्स दोण्णि सत्तभागा पलिओवमस्स असंखेज्जइभागेणं  
ऊणया, उक्कोसेणं वीसं सागरोवमकोडाकोडीओ, वीस य वाससयाइं अवाहा । ओरा-  
लियसरीरनामए वि एवं चेव । वेउव्वियसरीरनामए णं भंते ! पुच्छा । गोयमा !  
जह्वेणं सागरोवमसहस्सस्स दो सत्तभागा पलिओवमस्स असंखेज्जइभागेणं ऊणया,  
उक्कोसेणं वीसं सागरोवमकोडाकोडीओ, वीसइ वाससयाइं अवाहा । आहारगसरीर-  
नामए जह्वेणं अंतोसागरोवमकोडाकोडीओ, उक्कोसेणं अंतोसागरोवमकोडाकोडीओ ।  
तेयाकम्मसरीरनामए जह्वेणं दोण्णि सत्तभागा पलिओवमस्स असंखेज्जइभागेणं  
ऊणया, उक्कोसेणं वीसं सागरोवमकोडाकोडीओ, वीस य वाससयाइं अवाहा ।  
ओरालियवेउव्वियआहारगसरीरोवंगनामए तिण्णि वि एवं चेव, सरीरबंधणनामए वि  
पंचण्ह वि एवं चेव, सरीरसंघायनामए पंचण्ह वि जहा सरीरनामए कम्मस्स ठिइत्ति,  
वइरोसभनारायसंघयणनामए जहा रहनामए । उसभनारायसंघयणनामए पुच्छा ।  
गोयमा ! ज० सागरोवमस्स छ पण्णीसइभागा पलिओवमस्स असंखेज्जइभागेणं ऊणया,  
उक्कोसेणं बारस सागरोवमकोडाकोडीओ, बारस वाससयाइं अवाहा । नारायसंघ-  
यणनामस्स जह्वेणं सागरोवमस्स सत्त पण्णीसइभागा पलिओवमस्स असंखेज्जइ-  
भागेणं ऊणया, उक्कोसेणं चोइस सागरोवमकोडाकोडीओ चउइस वाससयाइं अवाहा ।



अद्धनारायसंघयणनामस्स जह्वेणं सागरोवमस्स अट्ठ पणतीसइभागा पलिओवमस्स असंखेज्जइभागेणं ऊणया, उक्कोसेणं सोलस सागरोवमकोडाकोडीओ, सोलस वाससयाइं अवाहा । खीलियासंघयणे णं पुच्छा । गोयमा ! जह्वेणं सागरोवमस्स नव पणतीसइभागा पलिओवमस्स असंखेज्जइभागेणं ऊणया, उक्कोसेणं अट्ठारस सागरोवमकोडाकोडीओ, अट्ठारस वाससयाइं अवाहा । छेवट्ठसंघयणनामस्स पुच्छा । गोयमा ! जह्वेणं सागरोवमस्स दोणिण सत्तभागा पलिओवमस्स असंखेज्जइभागेणं ऊणया, उक्कोसेणं वीसं सागरोवमकोडाकोडीओ, वीस य वाससयाइं अवाहा, एवं जहा संघयणनामाए छब्भणिया एवं संठाणा वि छब्भणियव्वा । सुक्खिलवण्णणामए पुच्छा । गोयमा ! जह्वेणं सागरोवमस्स एणं सत्तभागं पलिओवमस्स असंखेज्जइभागेणं ऊणगं, उक्कोसेणं दस सागरोवमकोडाकोडीओ, दस वाससयाइं अवाहा । हालिद्वण्णणामए णं पुच्छा । गोयमा ! जह्वेणं सागरोवमस्स पंच अट्ठावीसइभागा पलिओवमस्स असंखेज्जइभागेणं ऊणया, उक्कोसेणं अट्ठतेरससागरोवमकोडाकोडी, अट्ठतेरस वाससयाइं अवाहा । लोहियवण्णणामए णं पुच्छा । गोयमा ! जह्वेणं सागरोवमस्स छ अट्ठावीसइभागा पलिओवमस्स असंखेज्जइभागेहिं ऊणया, उक्कोसेणं पण्णरस सागरोवमकोडाकोडीओ, पण्णरस वाससयाइं अवाहा । नीलवण्णणामए पुच्छा । गोयमा ! जह्वेणं सागरोवमस्स सत्त अट्ठावीसइभागा पलिओवमस्स असंखेज्जइभागेणं ऊणया, उक्कोसेणं अट्ठट्ठारस सागरोवमकोडाकोडीओ, अट्ठट्ठारस वाससयाइं अवाहा । कालवण्णणामए जहा छेवट्ठसंघयणनामस्स । सुब्भिगंधणामए पुच्छा । गोयमा ! जह्वेणं सागरोवमस्स दुब्भिगंधणामए जहा छेवट्ठसंघयणस्स, रसाणं महुराइणं जहा वण्णाणं भणियं तहेव परिवाडीए भाणियव्वं, फासा जे अपसत्था तेसिं जहा छेवट्ठस्स, जे पसत्था तेसिं जहा सुक्खिलवण्णणामस्स, अगुस्सहुनामाए जहा छेवट्ठस्स, एवं उवघायनामाए वि, पराघायनामाए वि एवं चेव । निरयाणुपुव्वीनामाए पुच्छा । गोयमा ! जह्वेणं सागरोवमसहस्सस्स दो सत्तभागा पलिओवमस्स असंखेज्जइभागेणं ऊणया, उक्कोसेणं वीसं सागरोवमकोडाकोडीओ, वीसं वाससयाइं अवाहा । तिरियाणुपुव्वीए पुच्छा । गोयमा ! जह्वेणं सागरोवमस्स दो सत्तभागा पलिओवमस्स असंखेज्जइभागेणं ऊणया, उक्कोसेणं वीसं सागरोवमकोडाकोडीओ, वीसइ वाससयाइं अवाहा । मणयाणुपुव्वीनामाए णं पुच्छा । गोयमा ! जह्वेणं सागरोवमस्स दिवट्ठं सत्तभागं पलिओवमस्स असंखेज्जइभागेणं ऊणयं, उक्कोसेणं पण्णरस सागरोवमकोडाकोडीओ, पण्णरस वाससयाइं अवाहा । देवाणुपुव्वीनामाए पुच्छा । गोयमा ! जह्वेणं सागरोवमसहस्सस्स एणं सत्तभागं पलिओवमस्स असं-

खेज्जभागेणं ऊणयं, उक्कोसेणं दस सागरोवमकोडाकोडीओ, दस य वाससयाई अवाहा । ऊत्तासनामाए पुच्छ । गोयमा ! जहा तिरियाणुपुच्चीए, आयवनामाए वि एवं चेव । उज्जोयनामाए वि पसत्थविहायोगइनामाए वि पुच्छ । गोयमा ! जह्जेणं एगं सागरोवमस्स सत्तभागं, उक्कोसेणं दस सागरोवमकोडाकोडीओ, दस वाससयाई अवाहा । अपसत्थविहायोगइनामस्स पुच्छ । गोयमा ! जह्जेणं सागरोवमस्स दोण्णि सत्तभागा पल्लिओवमस्स असंखेज्जभागेणं ऊणया, उक्कोसेणं वीसं सागरोवमकोडाकोडीओ, वीस य वाससयाई अवाहा । तसनामाए थावरनामाए य एवं चेव । सुहुमनामाए पुच्छ । गोयमा ! जह्जेणं सागरोवमस्स णव पण्णीसइभागा पल्लिओवमस्स असंखेज्जभागेणं ऊणया, उक्कोसेणं अट्ठारस सागरोवमकोडाकोडीओ, अट्ठारस य वाससयाई अवाहा । वायरनामाए जहा अपसत्थविहायोगइनामस्स । एवं पज्जत्तनामाए वि, अपज्जत्तनामाए जहा सुहुमनामस्स । पत्तयसरीरनामाए वि दो सत्तभागा, साहारणसरीरनामाए जहा सुहुमस्स, थिरनामाए एगं सत्तभागं, अथिरनामाए दो, सुभनामाए एगो, अलुभनामाए दो, सुभगनामाए एगो, दूभगनामाए दो, सुसरनामाए एगो, दूसरनामाए दो, आदिज्जनामाए एगो, अणादिज्जनामाए दो, जसोकित्तिनामाए जह्जेणं अट्ठ मुहुत्ता, उक्कोसेणं दस सागरोवमकोडाकोडीओ, दस वाससयाई अवाहा । अजसोकित्तिनामाए पुच्छ । गोयमा ! जहा अपसत्थविहायोगइनामस्स, एवं निम्माणनामाए वि । तित्थगरणामाए णं पुच्छ । गोयमा ! जह्जेणं अंतोसागरोवमकोडाकोडीओ, उक्कोसेणं वि अंतोसागरोवमकोडाकोडीओ । एवं जत्थ एगो सत्तभागो तत्थ उक्कोसेणं दस सागरोवमकोडाकोडीओ, दस वाससयाई अवाहा, जत्थ दो सत्तभागा तत्थ उक्कोसेणं वीसं सागरोवमकोडाकोडीओ वीस य वाससयाई अवाहा ॥ ६२३ ॥ उच्चागोयस्स णं पुच्छ । गोयमा ! जह्जेणं अट्ठ मुहुत्ता, उक्कोसेणं दस सागरोवमकोडाकोडीओ, दस य वाससयाई अवाहा । नीयागोत्तस्स पुच्छ । गोयमा ! जहा अपसत्थविहायोगइनामस्स ॥ ६२४ ॥ अंतराइए णं पुच्छ । गोयमा ! जह्जेणं अंतोमुहुत्तं, उक्कोसेणं तीसं सागरोवमकोडाकोडीओ, तिण्णि य वाससहस्साई अवाहा, अवाहूणिया कम्मट्ठिई कम्मनिसेगो ॥ ६२५ ॥ एगिंदिया णं भंते ! जीवा णाणावरणिज्जस्स कम्मस्स किं बंधंति ? गोयमा ! जह्जेणं सागरोवमस्स तिण्णि सत्तभागा पल्लिओवमस्स असंखेज्जभागेणं ऊणया, उक्कोसेणं ते चेव पडिपुण्णे बंधंति । एवं निद्वापंचगस्स वि, दंसणचउक्कस्स वि । एगिंदिया णं भंते ! सायावेयणिज्जस्स कम्मस्स किं बंधंति ? गोयमा ! जह्जेणं सागरोवमस्स दिवहं सत्तभागं पल्लिओवमस्स असंखेज्जभागेणं ऊणयं, उक्कोसेणं तं चेव पडिपुण्णं बंधंति । असायावेयणिज्जस्स

जहा णाणावरणिजस्स । एगिंदिया णं भंते ! जीवा सम्मतवेयणिजस्स किं बंधंति ? गोयमा ! णत्थि किंचि बंधंति । एगिंदिया णं भंते ! जीवा मिच्छत्तवेयणिजस्स कम्मस्स किं बंधंति ? गोयमा ! जहन्नेणं सागरोवमस्स पलिओवमस्स असंखेज्जइभागेणं ऊणं, उक्कोसेणं तं चेव पडिपुण्णं बंधंति । एगिंदिया णं भंते ! जीवा सम्मामिच्छत्तवेयणिजस्स० किं बंधंति ? गोयमा ! णत्थि किंचि बन्धन्ति । एगिंदिया णं भंते ! जीवा कसायवारसगस्स किं बंधंति ? गोयमा ! जहन्नेणं सागरोवमस्स चत्तारि सत्तभागे पलिओवमस्स असंखेज्जइभागेणं ऊणए, उक्कोसेणं ते चेव पडिपुण्णे बंधंति, एवं जाव कोहंसजलणाए वि जाव लोभसंजलणाए वि । इत्थिवेयस्स जहा सायावेयणिजस्स । एगिंदिया पुरिसवेयस्स कम्मस्स जहन्नेणं सागरोवमस्स एगं सत्तभागं पलिओवमस्स असंखेज्जइभागेणं ऊणयं, उक्कोसेणं तं चेव पडिपुण्णं बंधंति । एगिंदिया नपुंसगवेयस्स कम्मस्स जहन्नेणं सागरोवमस्स दो सत्तभागे पलिओवमस्स असंखेज्जइभागेणं ऊणए, उक्कोसेणं ते चेव पडिपुण्णे बंधंति । हासरइए जहा पुरिसवेयस्स, अरइभयसोगदुगुंछाए जहा नपुंसगवेयस्स । नेरइयाउयदेवाउयनिरयगइनामदेवगइनामवेउव्वियसरीरनामआहारगसरीरनामनेरइयाणुपुविनामदेवाणुपु-  
 व्विनामतिथगरनाम-एयाणि णव पयाणि ण बंधंति । तिरिक्खजोणियाउयस्स जहन्नेणं अंतोमुहुत्तं, उक्कोसेणं पुव्वकोडी सत्तहिं वाससहस्सेहिं वाससहस्सइभागेण य अहियं बंधंति । एवं मणुस्साउयस्स वि । तिरियगइनामाए जहा नपुंसगवेयस्स । मणुयगइनामाए जहा सायावेयणिजस्स । एगिंदियनामाए पंचिंदियजाइनामाए य जहा नपुंसगवेयस्स । बेइंदियतेइंदियजाइनामाए पुच्छ । ० जहन्नेणं सागरोवमस्स नव पणतीसइभागे पलिओवमस्स असंखेज्जइभागेणं ऊणए, उक्कोसेणं ते चेव पडिपुण्णे बंधंति । चउरिंदियनामाए वि जहन्नेणं सागरोवमस्स णव पणतीसइभागे पलिओवमस्स असंखेज्जइभागेणं ऊणए, उक्कोसेणं ते चेव पडिपुण्णे बंधंति । एवं जत्थ जहण्णं दो सत्तभागा तिन्नि वा चत्तारि वा सत्तभागा अट्ठावीसइभागा भवंति, तत्थ णं जहण्णेणं ते चेव पलिओवमस्स असंखेज्जइभागेणं ऊणगा भाणियव्वा, उक्कोसेणं ते चेव पडिपुण्णे बंधंति । जत्थ णं जहण्णेणं एगो वा दिवद्धो वा सत्तभागो तत्थ जहन्नेणं तं चेव भाणियव्वं उक्कोसेणं तं चेव पडिपुण्णं बंधंति । जसोकित्तिउच्चागोयाणं जहण्णेणं सागरोवमस्स एगं सत्तभागं पलिओवमस्स असंखेज्जइभागेणं ऊणं, उक्कोसेणं तं चेव पडिपुण्णं बंधंति । अंतराइयस्स णं भंते ! पुच्छ । गोयमा ! जहा णाणावरणिजस्स जाव उक्कोसेणं ते चेव पडिपुण्णे बंधंति ॥ ६२६ ॥ बेइंदिया णं भंते ! जीवा णाणावरणिजस्स कम्मस्स किं बंधंति ? गोयमा जहन्नेणं सागरोवमपणवीसाए

तिणिण सत्तभागा पलिओवमस्स असंखेज्जभागेणं ऊणया, उक्कोसेणं ते चेव पडिपुण्णे  
 बंधंति, एवं निदापंचगस्स वि । एवं जहा एगिंदियाणं भणियं तहा बेईदियाण वि  
 भाणियव्वं, नवरं सागरोवमपणवीसाए सह भाणियव्वा पलिओवमस्स असंखेज्जभागेणं  
 ऊणा, सेसं तं चेव पडिपुण्ण बंधंति । जत्थ एगिंदिया न बंधंति तत्थ एए वि न  
 बंधंति । बेईदिया णं भंते ! जीवा मिच्छत्तवेयणिजस्स० किं बंधंति ? गोयमा ! जहन्नेणं  
 सागरोवमपणवीसं पलिओवमस्स असंखेज्जभागेणं ऊणयं, उक्कोसेणं तं चेव पडिपुण्णं  
 बंधंति । तिरिक्खजोणियाउयस्स जहन्नेणं अंतोमुहुत्तं, उक्कोसेणं पुव्वकोडिं चउहिं  
 वासेहिं अहियं बंधंति । एवं मणुयाउयस्स वि, सेसं जहा एगिंदियाणं जाव अंतरा-  
 इयस्स ॥ ६२७ ॥ तेईदिया णं भंते ! जीवा णाणावरणिजस्स० किं बंधंति ? गोयमा !  
 जहन्नेणं सागरोवमपण्णासाए तिणिण सत्तभागा पलिओवमस्स असंखेज्जभागेणं ऊणया,  
 उक्कोसेणं ते चेव पडिपुण्णे बंधंति, एवं जस्स जइ भागा ते तस्स सागरोवमपण्णासाए  
 सह भाणियव्वा । तेईदिया णं भंते !० मिच्छत्तवेयणिजस्स कम्मस्स किं बंधंति ?  
 गोयमा ! जहन्नेणं सागरोवमपण्णासं पलिओवमस्सासंखेज्जभागेणं ऊणयं, उक्कोसेणं  
 तं चेव पडिपुण्णं बंधंति । तिरिक्खजोणियाउयस्स जहन्नेणं अंतोमुहुत्तं, उक्कोसेणं  
 पुव्वकोडिं सोलसेहिं राइदिएहिं राइदियतिभागेण य अहियं बंधंति, एवं  
 मणुस्साउयस्स वि, सेसं जहा बेईदियाणं जाव अंतराइयस्स ॥ ६२८ ॥  
 चउरिंदिया णं भंते ! जीवा णाणावरणिजस्स० किं बंधंति ? गोयमा ! जहन्नेणं  
 सागरोवमसयस्स तिणिण सत्तभागे पलिओवमस्स असंखेज्जभागेणं ऊणए, उक्कोसेणं  
 ते चेव पडिपुण्णे बंधंति, एवं जस्स जइ भागा तस्स सागरोवमसएण सह भाणि-  
 यव्वा । तिरिक्खजोणियाउयस्स कम्मस्स जहन्नेणं अंतोमुहुत्तं, उक्कोसेणं पुव्वकोडिं  
 दोहिं मासेहिं अहियं । एवं मणुस्साउयस्स वि, सेसं जहा बेईदियाणं, णवरं मिच्छत्त-  
 वेयणिजस्स जहन्नेणं सागरोवमसयं पलिओवमस्स असंखेज्जभागेणं ऊणयं, उक्कोसेणं  
 तं चेव पडिपुण्णं बंधंति, सेसं जहा बेईदियाणं जाव अंतराइयस्स ॥ ६२९ ॥  
 असण्णी णं भंते ! जीवा पंचिंदिया णाणावरणिजस्स कम्मस्स किं बंधंति ?  
 गोयमा ! जहन्नेणं सागरोवमसहस्सस्स तिणिण सत्तभागे पलिओवमस्सासंखेज्जभागेणं  
 ऊणए, उक्कोसेणं ते चेव पडिपुण्णे बंधंति, एवं सो चेव गमो जहा बेईदियाणं,  
 णवरं सागरोवमसहस्सेण समं भाणियव्वं जस्स जइ भागति । मिच्छत्तवेयणिजस्स  
 जहन्नेणं सागरोवमसहस्सं पलिओवमस्सासंखेज्जभागेणं ऊणयं, उक्कोसेणं तं चेव  
 पडिपुण्णं । नेरइयाउयस्स जहन्नेणं दस वाससहस्साइं अंतोमुहुत्तमब्भहियाइं, उक्को-  
 सेणं पलिओवमस्स असंखेज्जभागेणं पुव्वकोडितिभागम्भहियं बंधंति । एवं तिरिक्ख-

जोणियाउयस्स वि, णवरं जहण्णेणं अंतोमुहुत्तं, एवं मणुयाउयस्स वि, देवाउयस्स जहा नेरइयाउयस्स । असण्णी णं भंते ! जीवा पंचिदिया निरयगइनामाए कम्मस्स किं बंधंति ? गोयमा ! जहन्नेणं सागरोवमसहस्सस्स दो सत्तभागे पलिओवमस्स असंखेजइभागेणं ऊणए, उक्कोसेणं ते चेव पडिपुण्णे०, एवं तिरियगइनामाए वि । मणुयगइनामाए वि एवं चेव, नवरं जहन्नेणं सागरोवमसहस्सस्स दिवड्ढं सत्तभागं पलिओवमस्सासंखेजइभागेणं ऊणं, उक्कोसेणं तं चेव पडिपुण्णं बंधंति । एवं देवगइनामाए वि, नवरं जहन्नेणं सागरोवमसहस्सस्स एगं सत्तभागं पलिओवमस्सासंखेजइभागेणं ऊणं, उक्कोसेणं तं चेव पडिपुण्णं बंधंति । वेउव्वियसरीरनामाए पुच्छा । गोयमा ! जहन्नेणं सागरोवमसहस्सस्स दो सत्तभागे पलिओवमस्सासंखेजइभागेणं ऊणे, उक्कोसेणं दो पडिपुण्णे बंधंति । सम्मत्तसम्मासिच्छत्ताहारगसरीरनामाए तित्थगरनामाए न किंवि वि बंधंति । अवसिद्धं जहा वेइंदियार्णं, णवरं जस्स जत्तिया भागा तस्स ते सागरोवमसहस्सेण सह भाणियव्वा सव्वेसिं आणुपुव्वीए जाव अंतराइयस्स ॥ ६३० ॥ सण्णी णं भंते ! जीवा पंचिदिया णाणावरणिजस्स कम्मस्स किं बंधंति ? गोयमा ! जहन्नेणं अंतोमुहुत्तं, उक्कोसेणं तीसं सागरोवमकोडाकोडीओ, तिण्णि वाससहस्साइं अवाहा । सण्णी णं भंते ! ० पंचिदिया णिद्वापंचगस्स किं बंधंति ? गोयमा ! जहन्नेणं अंतोसागरोवमकोडाकोडीओ, उक्कोसेणं तीसं सागरोवमकोडाकोडीओ, तिण्णि य वाससहस्साइं अवाहा । दंसणचउकस्स जहा णाणावरणिजस्स । सायावेयणिजस्स जहा ओहिया ठिई भणिया तहेव भाणियव्वा, इरियावहियबंधयं पडुच्च संपराइयबंधयं च । असायावेयणिजस्स जहा णिद्वापंचगस्स । सम्मत्तवेयणिजस्स सम्मासिच्छत्तवेयणिजस्स जा ओहिया ठिई भणिया तं बंधंति । सिच्छत्तवेयणिजस्स जहन्नेणं अंतोसागरोवमकोडाकोडीओ, उक्कोसेणं सत्तरिं सागरोवमकोडाकोडीओ, सत्तरि य वाससहस्साइं अवाहा । कसायबारसगस्स जहन्नेणं एवं चेव, उक्कोसेणं चत्तालीसं सागरोवमकोडाकोडीओ, चत्तालीस य वाससयाइं अवाहा । कोहमाणमायालोभसंजलणाए य दो मासा, मासो, अद्धमासो, अंतोमुहुत्तो, एवं जहन्नगं; उक्कोसेणं पुण जहा कसायबारसगस्स । चउण्ह वि आउयाणं जा ओहिया ठिई भणिया तं बंधंति । आहारगसरीरस्स तित्थगरनामाए य जहण्णेणं अंतोसागरोवमकोडाकोडीओ, उक्कोसेणं अंतोसागरोवमकोडाकोडीओ । पुरिसवेयणिजस्स जहन्नेणं अट्ठ संवच्छराइं, उक्कोसेणं दस सागरोवमकोडाकोडीओ, दस य वाससयाइं अवाहा । जसोकित्तिणामाए उच्चागोत्तस्स एवं चेव, नवरं जहन्नेणं अट्ठ मुहुत्ता । अंतराइयस्स जहा णाणावरणिजस्स, सेसएसु सव्वेसु ठाणेसु संघयणेसु संठाणेसु वत्तेसु गंधेसु य जहन्नेणं अंतोसा-

गरोवमकोडाकोडीओ, उक्कोसेणं जा जस्स ओहिया ठिई भणिया तं बंधंति, णवरं इमं णाणत्तं-अवाहा अबाहूणिया ण वुच्चइ । एवं आणुपुव्वीए सव्वेसिं जाव अंतराइयस्स ताव भाणियव्वं ॥ ६३१ ॥ णाणावरणिजस्स णं भंते ! कम्मस्स जहण्णठिईबंधए के ? गोयमा ! अण्णयरे सुहुमसंपराए उवसामए वा खवगए वा, एस णं गोयमा ! णाणावरणिजस्स कम्मस्स जहण्णठिईबंधए, तव्वइरित्ते अजहण्णे, एवं एएणं अभिला-  
वेणं मोहाउयवज्जाणं सेसकम्माणं भाणियव्वं । मोहणिजस्स णं भंते ! कम्मस्स जह-  
ण्णठिईबंधए के ? गोयमा ! अन्नयरे वायरसंपराए उवसामए वा खवए वा, एस णं गोयमा ! मोहणिजस्स कम्मस्स जहण्णठिईबंधए, तव्वइरित्ते अजहण्णे । आउयस्स णं भंते ! कम्मस्स जहण्णठिईबंधए के ? गोयमा ! जे णं जीवे असंखेप्पद्वापविट्ठे, सव्वनिरुद्धे से आउए, सेसे सव्वमहंतीए आउयबंधद्वाए, तीसे णं आउयबंधद्वाए चरिमकालसमयंसि सव्वजहण्णियं ठिई पज्जत्तापज्जितियं निव्वत्तेइ, एस णं गोयमा ! आउयकम्मस्स जहण्णठिईबंधए, तव्वइरित्ते अजहण्णे ॥ ६३२ ॥ उक्कोसकालट्टिइयं णं भंते ! णाणावरणिजं० किं नेरइओ बंधइ, तिरिक्खजोणिओ बंधइ, तिरिक्खजो-  
णिणी बंधइ, मणूस्सो बंधइ, मणूस्सिणी बंधइ, देवो बंधइ, देवी बंधइ ? गोयमा ! नेरइओ वि बंधइ जाव देवी वि बंधइ । केरिसए णं भंते ! नेरइए उक्कोसकालट्टि-  
इयं णाणावरणिजं कम्मं बंधइ ? गोयमा ! सण्णी पंचिदिए सव्वाहिं पज्जत्तीहिं पज्जत्ते सागारे जागरे सुत्तो(ओ)वउत्ते मिच्छादिट्ठी कण्हलेसे य उक्कोससंकिलिट्ठपरि-  
णामे ईसिमज्झिमपरिणामे वा, एरिसए णं गोयमा ! नेरइए उक्कोसकालट्टिइयं णाणा-  
वरणिजं कम्मं बंधइ । केरिसए णं भंते ! तिरिक्खजोणिए उक्कोसकालट्टिइयं णाणा-  
वरणिजं कम्मं बंधइ ? गोयमा ! कम्मभूसए वा कम्मभूसगपलिभागी वा सण्णी पंचिदिए सव्वाहिं पज्जत्तीहिं पज्जत्तए सेसं तं चेव जहा नेरइयस्स । एवं तिरिक्ख-  
जोणिणी वि मणूसे वि मणूसी वि, देवदेवी जहा नेरइए, एवं आउयवज्जाणं सत्तण्हं कम्माणं । उक्कोसकालट्टिइयं णं भंते ! आउयं कम्मं किं नेरइओ बंधइ जाव देवी बंधइ ? गोयमा ! नो नेरइओ बंधइ, तिरिक्खजोणिओ बंधइ, नो तिरिक्खजोणिणी बंधइ, मणूसे वि बंधइ, मणूसी वि बंधइ, नो देवो बंधइ, नो देवी बंधइ । केरिसए णं भंते ! तिरिक्खजोणिए उक्कोसकालट्टिइयं आउयं कम्मं बंधइ ? गोयमा ! कम्मभूसए वा कम्मभूसगपलिभागी वा सण्णी पंचिदिए सव्वाहिं पज्जत्तीहिं पज्जत्तए सागारे जागरे सुत्तोवउत्ते मिच्छादिट्ठी परमकण्हलेसे उक्कोससंकिलिट्ठपरिणामे, एरिसए णं गोयमा ! तिरिक्खजोणिए उक्कोसकालट्टिइयं आउयं कम्मं बंधइ । केरिसए णं भंते ! मणूसे उक्कोसकालट्टिइयं आउयं कम्मं बंधइ ? गोयमा ! कम्मभूसए वा कम्मभूसग-

पलिभागी वा जाव सुत्तो(तो)वउत्ते सम्मदिट्ठी वा सिच्छदिट्ठी वा कण्हलेसे वा सुक्कलेसे वा णाणी वा अण्णाणी वा उक्कोससंकिलिट्ठपरिणामे वा असंकिलिट्ठपरिणामे वा तप्पा-उग्गविसुज्झमाणपरिणामे वा, एरिसिए णं गोयमा ! मणूसे उक्कोसकालट्ठियं आउयं कम्मं बन्धइ । केरिसिया णं भंते ! मणूस्सी उक्कोसकालट्ठियं आउयं कम्मं बन्धइ ? गोयमा ! कम्मभूमिया वा कम्मभूमगपलिभागी वा जाव सुत्तोवउत्ता सम्मादिट्ठी सुक्कलेसा तप्पाउग्गविसुज्झमाणपरिणामा, एरिसिया णं गोयमा ! मणूस्सी उक्कोसकालट्ठियं आउयं कम्मं बन्धइ, अंतराइयं जहा णाणावरणिज्जं ॥ ६३३ ॥ **वीओ उहेसो समत्तो ॥ पन्नवणाए भगवईए तेवीसइमं कम्मपगडीपयं समत्तं ॥**

कइ णं भंते ! कम्मपगडीओ पण्णत्ताओ ? गोयमा ! अट्ठ कम्मपगडीओ पण्ण-त्ताओ । तंजहा-णाणावरणिज्जं जाव अंतराइयं । एवं नेरइयाणं जाव वेमाणियाणं । जीवे णं भंते ! णाणावरणिज्जं कम्मं बन्धमाणे कइ कम्मपगडीओ बन्धइ ? गोयमा ! सत्तविहबन्धए वा अट्ठविहबन्धए वा छव्विहबन्धए वा । नेरइए णं भंते ! णाणा-वरणिज्जं कम्मं बन्धमाणे कइ कम्मपगडीओ बन्धइ ? गोयमा ! सत्तविहबन्धए वा अट्ठविहबन्धए वा, एवं जाव वेमाणिए, णवरं मणूस्से जहा जीवे । जीवा णं भंते ! णाणावरणिज्जं कम्मं बन्धमाणा कइ कम्मपगडीओ बन्धन्ति ? गोयमा ! सव्वे वि ताव होज्ज सत्तविहबन्धगा य अट्ठविहबन्धगा य, अहवा सत्तविहबन्धगा य अट्ठ-विहबन्धगा य छव्विहबन्धगे य, अहवा सत्तविहबन्धगा य अट्ठविहबन्धगा य छव्विहबन्धगा य । णेरइया णं भंते ! णाणावरणिज्जं कम्मं बन्धमाणा कइ कम्म-पगडीओ बन्धन्ति ? गोयमा ! सव्वे वि ताव होज्जा सत्तविहबन्धगा, अहवा सत्तविह-बन्धगा य अट्ठविहबन्धगे य, अहवा सत्तविहबन्धगा य अट्ठविहबन्धगा य तिण्णि संगा, एवं जाव थणियकुमारा । पुढविकाइया णं पुच्छा । गोयमा ! सत्तविहबन्धगा वि अट्ठविहबन्धगा वि, एवं जाव वणस्सइकाइया । विगलाणं पंचिदियतिरिक्ख-जोणियाणं तियभंगो-सव्वे वि ताव होज्जा सत्तविहबन्धगा, अहवा सत्तविहबन्धगा य अट्ठविहबन्धगे य, अहवा सत्तविहबन्धगा य अट्ठविहबन्धगा य । मणूसा णं भंते ! णाणावरणिज्जस्स पुच्छा । गोयमा ! सव्वे वि ताव होज्जा सत्तविहबन्धगा १, अहवा सत्तविहबन्धगा य अट्ठविहबन्धगे य २, अहवा सत्तविहबन्धगा य अट्ठविहबन्धगा य ३, अहवा सत्तविहबन्धगा य छव्विहबन्धए य ४, अहवा सत्तविहबन्धगा य छव्विहबन्धगा य ५, अहवा सत्तविहबन्धगा य अट्ठविहबन्धगे य छव्विहबन्धगे य ६, अहवा सत्तविहबन्धगा य अट्ठविहबन्धगे य छव्विहबन्धगा य ७, अहवा सत्त-विहबन्धगा य अट्ठविहबन्धगा य छव्विहबन्धगे य ८, अहवा सत्तविहबन्धगा य

अट्टविहवन्धगा य छव्विहवन्धगा य ९, एवं एए नव भंगा । सेसा वाणमंतराइथा जाव वेमाणिया जहा नेरइया सत्तविहवन्धगा भणिया तहा भाणियव्वा । एवं जहा णाणावरणं बन्धमाणा जहिं भणिया दंसणावरणं पि बन्धमाणा तहिं जीवाइया एगत्तपोहत्तएहिं भाणियव्वा ॥ ६३४ ॥ वेयणिज्जं० बंधमाणे जीवे कइ कम्मपगडीओ बन्धइ ? गोयमा ! सत्तविहवन्धए वा अट्टविहवन्धए वा छव्विहवन्धए वा एगविहवन्धए वा, एवं मणूसे वि । सेसा नारगाइया सत्तविहवन्धगा वा अट्टविहवन्धगा वा जाव वेमाणिए । जीवा णं भंते ! वेयणिज्जं कम्मं पुच्छा । गोयमा ! सव्वे वि ताव होज्जा सत्तविहवन्धगा य अट्टविहवन्धगा य एगविहवन्धगा य छव्विहवन्धए य, अहवा सत्तविहवन्धगा य अट्टविहवन्धगा य एगविहवन्धगा य छव्विहवन्धगा य, अवसेसा नारगाइया जाव वेमाणिया जाओ णाणावरणं बंधमाणा बंधन्ति ताहिं भाणियव्वा । नवरं मणूसा णं भंते ! वेयणिज्जं कम्मं बन्धमाणा कइ कम्मपगडीओ बंधंति ? गोयमा ! सव्वे वि ताव होज्जा सत्तविहवन्धगा य एगविहवन्धगा य १, अहवा सत्तविहवन्धगा य एगविहवन्धगा य अट्टविहवन्धगे य २, अहवा सत्तविहवन्धगा य एगविहवन्धगा य अट्टविहवन्धगा य ३, अहवा सत्तविहवन्धगा य एगविहवन्धगा य छव्विहवन्धगे य ४, अहवा सत्तविहवन्धगा य एगविहवन्धगा य छव्विहवन्धगा य ५, अहवा सत्तविहवन्धगा य एगविहवन्धगा य अट्टविहवन्धए य छव्विहवन्धए य ६, अहवा सत्तविहवन्धगा य एगविहवन्धगा य अट्टविहवन्धए य छव्विहवन्धगा य ७, अहवा सत्तविहवन्धगा य एगविहवन्धगा य अट्टविहवन्धगा य छव्विहवन्धगे य ८, अहवा सत्तविहवन्धगा य एगविहवन्धगा य अट्टविहवन्धगा य छव्विहवन्धगा य ९, एवं एए नव भंगा भाणियव्वा ॥ ६३५ ॥ मोहणिज्जं० बन्धमाणे जीवे कइ कम्मपगडीओ बन्धइ ? गोयमा ! जीवेगिंदियवज्जो तियभंगो । जीवेगिंदिया सत्तविहवन्धगा वि अट्टविहवन्धगा वि । जीवे णं भंते ! आउयं कम्मं बन्धमाणे कइ कम्मपगडीओ बन्धइ ? गोयमा ! नियमा अट्ट, एवं नेरइए जाव वेमाणिए, एवं पुहुत्तेण वि । णामगोयंतराइयं० बन्धमाणे जीवे कइ कम्मपगडीओ बन्धइ ? गोयमा ! जाओ णाणावरणिज्जं कम्मं बन्धमाणे बन्धइ ताहिं भाणियव्वो, एवं नेरइए वि जाव वेमाणिए, एवं पुहुत्तेण वि भाणियव्वं ॥ ६३६ ॥ पन्नवणाए भगवईए चउवीसइमं कम्मबन्धपयं समत्तं ॥

कइ णं भंते ! कम्मपगडीओ पन्नत्ताओ ? गोयमा ! अट्ट कम्मपगडीओ पन्नत्ताओ । तंजहा—णाणावरणिज्जं जाव अंतराइयं, एवं नेरइयाणं जाव वेमाणियाणं । जीवे णं भंते ! णाणावरणिज्जं कम्मं बन्धमाणे कइ कम्मपगडीओ वेएइ ? गोयमा ! नियमा



अट्ट कम्मपगडीओ वेइइ । एवं नेरइए जाव वेमाणिए, एवं पुहुत्तेण वि । एवं वेयणिज्जवज्जं जाव अंतराइयं । जीवे णं भंते ! वेयणिज्जं कम्मं बन्धमाणे कइ कम्म-पगडीओ वेदेइ ? गोयमा ! सत्तविहवेदए वा अट्टविहवेदए वा चउव्विहवेदए वा, एवं मणूसे वि । सेसा नेरइयाई एगत्तेणं पुहुत्तेण वि नियमा अट्ट कम्मपगडीओ वेदंति जाव वेमाणिया । जीवा णं भंते ! वेयणिज्जं कम्मं बन्धमाणा कइ कम्म-पगडीओ वेदंति ? गोयमा ! सव्वे वि ताव होज्जा अट्टविहवेदगा य चउव्विहवेदगा य १, अहवा अट्टविहवेदगा य चउव्विहवेदगा य सत्तविहवेदगे य २, अहवा अट्टविहवेदगा य चउव्विहवेदगा य सत्तविहवेदगा य ३, एवं मणूसा वि भाणियव्वा ॥६३७॥

**पन्नवणाए भगवईए कम्मवेयणामं पणवीसइमं पर्यं समत्तं ॥**

कइ णं भंते ! कम्मपगडीओ पन्नत्ताओ ? गोयमा ! अट्ट कम्मपगडीओ पन्नत्ताओ । तंजहा—णाणावरणिज्जं जाव अंतराइयं । एवं नेरइयाणं जाव वेमाणियाणं । जीवे णं भंते ! णाणावरणिज्जं कम्मं वेयमाणे कइ कम्मपगडीओ बन्धइ ? गोयमा ! सत्तविहबन्धए वा अट्टविहबन्धए वा छव्विहबन्धए वा एगविहबन्धए वा । नेरइए णं भंते ! णाणावरणिज्जं कम्मं वेयमाणे कइ कम्मपगडीओ बन्धइ ? गोयमा ! सत्तविहबन्धए वा अट्टविहबन्धए वा, एवं जाव वेमाणिए, एवं मणूसे जहा जीवे । जीवा णं भंते ! णाणावरणिज्जं कम्मं वेएमाणा कइ कम्मपगडीओ बन्धन्ति ? गोयमा ! सव्वे वि ताव होज्जा सत्तविहबन्धगा य अट्टविहबन्धगा य १, अहवा सत्तविहबन्धगा य अट्टविहबन्धगा य छव्विहबन्धगे य २, अहवा सत्तविहबन्धगा य अट्टविहबन्धगा य छव्विहबन्धगा य ३, अहवा सत्तविहबन्धगा य अट्टविहबन्धगा य एगविहबन्धए य ४, अहवा सत्तविहबन्धगा य अट्टविहबन्धगा य एगविहबन्धगा य ५, अहवा सत्तविहबन्धगा य अट्टविहबन्धगा य छव्विहबन्धए य एगविहबन्धए य ६, अहवा सत्तविहबन्धगा य अट्टविहबन्धगा य छव्विहबन्धए य एगविहबन्धगा य ७, अहवा सत्तविहबन्धगा य अट्टविहबन्धगा य छव्विहबन्धगा य एगविहबन्धए य ८, अहवा सत्तविहबन्धगा य अट्टविहबन्धगा य छव्विहबन्धगा य एगविहबन्धगा य ९, एवं एए नव भंगा । अवसेसाणं एगिंदियमणूसवजाणं तियभंमगे जाव वेमाणियाणं । एगिंदिया णं सत्तविहबन्धगा य अट्टविहबन्धगा य । मणूसाणं पुच्छा । गोयमा ! सव्वे वि ताव होज्ज सत्तविहबन्धगा १, अहवा सत्तविहबन्धगा य अट्टविहबन्धगे य २, अहवा सत्तविहबन्धगा य अट्टविहबन्धगा य ३, अहवा सत्तविहबन्धगा य छव्विहबन्धए य ४, एवं छव्विहबन्धएण वि समं दो भंगा ५, एगविहबन्धएण वि समं दो भंगा ६-७, अहवा सत्तविहबन्धगा य अट्टविहबन्धए य छव्वि-

हवन्धए य चउभंगो १, अहवा सत्तविहवन्धगा य अट्टविहवन्धए य एगविहवन्धगे य चउभंगो २, अहवा सत्तविहवन्धगा य छव्विहवन्धए य एगविहवन्धए य चउभंगो ३, अहवा सत्तविहवन्धगा य अट्टविहवन्धए य छव्विहवन्धए य एगविहवन्धए य भंगा अट्ट, एवं एए सत्तावीसं भंगा । एवं जहा णाणावरणिज्जं तहा दंसणावरणिज्जं पि अंतराइयं पि ॥ ६३८ ॥ जीवे णं भंते ! वेयणिज्जं कम्मं वेएमाणे कइ कम्मपगडीओ बन्धइ ? गोयमा ! सत्तविहवन्धए वा छव्विहवन्धए वा एगविहवन्धए वा अवंधए वा, एवं मणूसे वि । अवसेसा णारयाइया सत्तविहवन्धगा अट्टविहवन्धगा य, एवं जाव वेमाणिया । जीवा णं भंते ! वेयणिज्जं कम्मं वेएमाणा कइ कम्मपगडीओ बन्धन्ति ? गोयमा ! सव्वे वि ताव होज्जा सत्तविहवन्धगा य अट्टविहवन्धगा य एगविहवन्धगा य १, अहवा सत्तविहवन्धगा य अट्टविहवन्धगा य एगविहवन्धगा य छव्विहवन्धगे य २, अहवा सत्तविहवन्धगा य अट्टविहवन्धगा य एगविहवन्धगा य छव्विहवन्धगा य ३, अवंधगेण वि समं दो भंगा भाणियव्वा ५, अहवा सत्तविहवन्धगा य अट्टविहवन्धगा य एगविहवन्धगा य छव्विहवन्धगे य अवंधगे य चउभंगो, एवं एए नव भंगा । एगिंदियाणं अभंगयं नारगाईणं तियभंगा जाव वेमाणियाणं । नवरं मणूसाणं पुच्छा । सव्वे वि ताव होज्जा सत्तविहवन्धगा य एगविहवन्धगा य, अहवा सत्तविहवन्धगा य एगविहवन्धगा य छव्विहवन्धए य अट्टविहवन्धए य अवंधए य, एवं एए सत्तावीसं भंगा भाणियव्वा, एवं जहा वेयणिज्जं तहा आउयं नामं गोयं च भाणियव्वं । मोहणिज्जं वेएमाणे जहा णाणावरणिज्जं तहा भाणियव्वं ॥ ६३९ ॥ **पन्नवणाए भगवईए छव्वीसइमं कम्मवेयवन्धपयं समत्तं ॥**

कइ णं भंते ! कम्मपगडीओ पन्नताओ ? गोयमा ! अट्ट कम्मपगडीओ पन्नताओ । तंजहा-णाणावरणं जाव अंतराइयं, एवं नेरइयाणं जाव वेमाणियाणं । जीवे णं भंते ! णाणावरणिज्जं कम्मं वेएमाणे कइ कम्मपगडीओ वेएइ ? गोयमा ! सत्तविहवेयए वा अट्टविहवेयए वा, एवं मणूसे वि । अवसेसा एगत्तेण वि पुहुत्तेण वि णियमा अट्ट कम्मपगडीओ वेदंति जाव वेमाणिया । जीवा णं भंते ! णाणावरणिज्जं वेएमाणा कइ कम्मपगडीओ वेएंति ? गोयमा ! सव्वे वि ताव होज्जा अट्टविहवेयगा १, अहवा अट्टविहवेयगा य सत्तविहवेयगे य २, अहवा अट्टविहवेयगा य सत्तविहवेयगा य ३, एवं मणूसा वि । दरिसणावरणिज्जं अंतराइयं च एवं चेव भाणियव्वं । वेयणिज्जं आउयनामगोत्ताइं वेएमाणे कइ कम्मपगडीओ वेएइ ? गोयमा ! जहा बंधवेयगस्स वेयणिज्जं तहा भाणियव्वाणि । जीवे णं भंते ! मोहणिज्जं कम्मं वेएमाणे कइ कम्मपगडीओ वेएइ ? गोयमा ! नियमा अट्ट कम्मपगडीओ वेएइ, एवं नेरइए जाव

वेमाणिए, एवं पुहुत्तेण वि ॥ ६४० ॥ पन्नवणाए भगवईए सत्तावीसइमं कम्मवेयवेयपयं समत्तं ॥

सच्चित्ताहारट्ठी केवइ किं वावि सव्वओ चेव । कइभागं सव्वे खलु परिणामे चेव वोद्धव्वे ॥१॥ एगिंदियसरीराइ लोमाहारो तहेव मणभव्वी । एएसिं तु पयाणं विभावणा होइ कायव्वा ॥२॥ नेरइया णं भंते ! किं सच्चित्ताहारा, अचित्ताहारा, मीसाहारा ? गोयमा ! नो सच्चित्ताहारा, अचित्ताहारा, नो मीसाहारा, एवं असुरकुमारा जाव वेमाणिया । ओरालियसरीरा जाव मणूसा सच्चित्ताहारा वि अचित्ताहारा वि मीसाहारा वि । नेरइया णं भंते ! आहारट्ठी ? हन्ता ! आहारट्ठी । नेरइया णं भंते ! केवइकालस्स आहारट्ठे समुप्पज्जइ ? गोयमा ! नेरइयाणं दुविहे आहारे पव्वत्ते । तंजहा-आभोगनिव्वत्तिए य अणाभोगनिव्वत्तिए य । तत्थ णं जे से अणाभोगनिव्वत्तिए से णं अणुसमयमविरहिए आहारट्ठे समुप्पज्जइ । तत्थ णं जे से आभोगनिव्वत्तिए से णं असंखिज्जसमइए अंतोमुहुत्तिए आहारट्ठे समुप्पज्जइ ॥ ६४१ ॥ नेरइया णं भंते ! किमाहारमाहारेंति ? गोयमा ! दव्वओ अणंतपएसियाइं, खेत्तओ असंखेज्ज-पएसोगाडाइं, कालओ अण्णयरट्ठिइयाइं, भावओ वण्णमंताइं गंधमंताइं रसमंताइं फासमंताइं । जाइं भंते ! भावओ वण्णमंताइं आहारेंति ताइं किं एगवण्णाइं आहारेंति जाव पंचवण्णाइं आहारेंति ? गोयमा ! ठाणमग्गणं पडुच्च एगवण्णाइं पि आहारेंति जाव पंचवण्णाइं पि आहारेंति, विहाणमग्गणं पडुच्च कालवण्णाइं पि आहारेंति जाव सुक्खिळाइं पि आहारेंति । जाइं० वण्णओ कालवण्णाइं आहारेंति ताइं किं एगगुणकालां आहारेंति जाव दसगुणकालां आहारेंति, संखिज्जगुणकालां, असंखिज्जगुणकालां, अणंतगुणकालां आहारेंति ? गोयमा ! एगगुणकालां पि आहारेंति जाव अणंतगुणकालां पि आहारेंति, एवं जाव सुक्खिळाइं पि, एवं गंधओ विरसओ वि । जाइं भावओ फासमंताइं आहारेंति ताइं नो एगफासाइं आहारेंति, नो दुफासाइं आहारेंति, नो तिफासाइं आहारेन्ति, चउफासाइं पि आहारेन्ति जाव अट्ठफासाइं पि आहारेन्ति, विहाणमग्गणं पडुच्च कक्खळाइं पि आहारेन्ति जाव लुक्खाइं । जाइं० फासओ कक्खळाइं आहारेन्ति ताइं किं एगगुणकक्खळाइं आहारेन्ति जाव अणंतगुणकक्खळाइं आहारेंति ? गोयमा ! एगगुणकक्खळाइं पि आहारेन्ति जाव अणंतगुणकक्खळाइं पि आहारेन्ति, एवं अट्ठ वि फासा भाणियव्वा जाव अणंतगुणलुक्खाइं पि आहारेन्ति । जाइं भंते ! अणंतगुणलुक्खाइं आहारेन्ति ताइं किं पुट्ठाइं आहारेन्ति अपुट्ठाइं आहारेन्ति ? गोयमा ! पुट्ठाइं आहारेन्ति, नो अपुट्ठाइं आहारेन्ति, जहा भासुइएसए जाव णियमा लुद्धिसिं आहारेन्ति, ओसण्णं कारणं

पडुच्च वण्णओ कालनीलाइं, गंधओ दुब्बिगंधाईं, रसओ तित्तकडुयाईं, फासओ कक्खडगुरुयसीयलक्खाईं, तेसिं पोरणे वण्णगुणे गंधगुणे रसगुणे फासगुणे विपरिणामइत्ता परिपीलइत्ता परिसाडइत्ता परिविद्धंसइत्ता अण्णे अपुव्वे वण्णगुणे गंधगुणे रसगुणे फासगुणे उप्पाइत्ता आयसरीरखेतोगाढे पोग्गले सव्वप्पणयाए आहारं आहारेन्ति । नेरइया णं भंते ! सव्वओ आहारेन्ति, सव्वओ परिणामेति, सव्वओ ऊससंति, सव्वओ नीससंति, अभिक्खणं आहारेन्ति अभिक्खणं परिणामेति, अभिक्खणं ऊससंति, अभिक्खणं नीससंति, आहच्च आहारेन्ति, आहच्च परिणामेति, आहच्च ऊससंति, आहच्च नीससंति ? हंता गोयमा ! नेरइया सव्वओ आहारेन्ति एवं तं चेव जाव आहच्च नीससंति ॥ ६४२ ॥ नेरइया णं भंते ! जे पोग्गले आहारत्ताए गिण्हंति ते णं तेसिं पोग्गलाणं सेयालंसि कइभागं आहारेन्ति, कइभागं आसाएति ? गोयमा ! असंखेज्जइभागं आहारेन्ति, अणंतभागं अस्साएति । नेरइया णं भंते ! जे पोग्गले आहारत्ताए गिण्हंति ते किं सव्वे आहारेन्ति, नो सव्वे आहारेति ? गोयमा ! ते सव्वे अपरिसेसए आहारेन्ति । नेरइया णं भंते ! जे पोग्गला आहारत्ताए गिण्हंति ते णं पोग्गला तेसिं कीसत्ताए भुज्जो भुज्जो परिणमंति ? गोयमा ! सोइदियत्ताए जाव फासिंदियत्ताए अणिट्ठत्ताए अकंतत्ताए अप्पियत्ताए असुभत्ताए अमणुणत्ताए अमणामत्ताए अणिच्छियत्ताए अ(ण)भिज्झियत्ताए अहत्ताए नो उड्ढत्ताए दुक्खत्ताए नो सुहत्ताए तेसिं भुज्जो भुज्जो परिणमंति ॥ ६४३ ॥ असुरकुमारा णं भंते ! आहारट्ठी ? हंता ! आहारट्ठी । एवं जहा नेरइयाणं तहा असुरकुमाराण वि भाणियव्वं जाव तेसिं भुज्जो भुज्जो परिणमंति । तत्थ णं जे से आभोगनिव्वत्तिए से णं जहण्णेणं चउत्थमत्तस्स, उक्कोसेणं साइरेगवाससहस्सस्स आहारट्ठे समुप्पज्जइ । ओसण्णं कारणं पडुच्च वण्णओ हाल्लिदुसुक्खिआइं, गंधओ सुब्बिगंधाईं, रसओ अबिलमहुराईं, फासओ मउयलहुय-निज्झुण्हाईं, तेसिं पोरणे वण्णगुणे जाव फासिंदियत्ताए जाव मणामत्ताए इच्छियत्ताए भिज्झियत्ताए उड्ढत्ताए नो अहत्ताए सुहत्ताए नो दुहत्ताए तेसिं भुज्जो भुज्जो परिणमंति, सेसं जहा नेरइयाणं, एवं जाव थणियकुमाराणं, नवरं आभोगनिव्वत्तिए उक्कोसेणं दिवसपुहुत्तस्स आहारट्ठे समुप्पज्जइ ॥ ६४४ ॥ पुढविकाइया णं भंते ! आहारट्ठी ? हंता ! आहारट्ठी । पुढविकाइया णं भंते ! केवइकालस्स आहारट्ठे समुप्पज्जइ ? गोयमा ! अणुसमयमविरहिए आहारट्ठे समुप्पज्जइ । पुढविकाइया णं भंते ! किमाहारमाहारेन्ति ? एवं जहा नेरइयाणं जाव ताईं कइदिसिं आहारेन्ति ? गोयमा ! निव्वाघाएणं छइदिसिं, वाघायं पडुच्च सिय तिदिसिं सिय चउदिसिं सिय

पंचदिसिं, नवरं ओसन्नकारणं न भण्णइ । वण्णओ कालनीललोहियहालिइसुक्किळाई, गंधओ सुब्भिगंधदुब्भिगंधाई, रसओ तित्तरसकडुयरसकसायरसअंबिलमहुराई, फासओ कक्खडफासमउयगुस्यलहुयसीयउण्हणिद्वलुक्खाई, तेसिं पोराणे वण्णगुणे सेसं जहा नेरइयाणं जाव आहच्च नीससंति । पुढविकाइया णं भंते ! जे पोग्गले आहारत्ताए गिण्हंति तेसिं भंते ! पोग्गलाणं सेयालंसि कइभागं आहारेन्ति, कइभागं आसाएंति ? गोयमा ! असंखेज्जइभागं आहारेन्ति, अणंतभागं आसाएंति । पुढविकाइया णं भंते ! जे पोग्गले आहारत्ताए गिण्हंति ते किं सव्वे आहारेन्ति, नो सव्वे आहारेन्ति ? जहेव नेरइया तहेव । पुढविकाइया णं भंते ! जे पोग्गले आहारत्ताए गिण्हंति ते णं पुग्गला तेसिं कीसत्ताए भुज्जो भुज्जो परिणमंति ? गोयमा ! फासिंदियवेमायत्ताए तेसिं भुज्जो भुज्जो परिणमंति, एवं जाव वणस्सइकाइया ॥ ६४५ ॥ बेइंदिया णं भंते ! आहारट्ठी ? हन्ता ! आहारट्ठी । बेइंदिया णं भंते ! केवइकालस्स आहारट्ठे समुप्पज्जइ ? जहा नेरइयाणं, नवरं तत्थ णं जे से आभोगनिव्वत्तिए से णं असंखिज्जसमइए अंतोमुहुत्तिए वेमायाए आहारट्ठे समुप्पज्जइ, सेसं जहा पुढविकाइयाणं जाव आहच्च नीससंति, नवरं नियमा छइसिं । बेइंदियाणं भंते ! जे पोग्गले आहारत्ताए गिण्हंति ते णं तेसिं पुग्गलाणं सेयालंसि कइभागं आहारेन्ति कइभागं आसाएंति ? एवं जहा नेरइयाणं । बेइंदिया णं भंते ! जे पोग्गला आहारत्ताए गिण्हंति ते किं सव्वे आहारेन्ति, णो सव्वे आहारेन्ति ? गोयमा ! बेइंदियाणं दुविहे आहारे पन्नत्ते । तंजहा—लोमाहारे य पक्खेवाहारे य, जे पोग्गले लोमाहारत्ताए गिण्हन्ति ते सव्वे अपरिसेसे आहारेन्ति, जे पोग्गले पक्खेवाहारत्ताए गेण्हंति तेसिमसंखेज्जइभागमाहारेन्ति, अणेगाइं च णं भागसहस्साइं अफासाइज्जमाणाइं अणासाइज्जमाणाइं विद्वंसमागच्छंति । एएसिं णं भंते ! पोग्गलाणं अणासाइज्जमाणाणं अफासाइज्जमाणाणं य कयरे कयरेहिंतो अप्पा वा ४ ? गोयमा ! सव्वत्थोवा पोग्गला अणासाइज्जमाणा, अफासाइज्जमाणा अणंतगुणा । बेइंदिया णं भंते ! जे पोग्गला आहारत्ताए—पुच्छ । गोयमा ! जिब्भिंदियफासिंदियवेमायत्ताए तेसिं भुज्जो भुज्जो परिणमंति । एवं जाव चउरिंदिया, नवरं नेगाइं च णं भागसहस्साइं अणाघाइज्जमाणाइं अणासाइज्जमाणाइं अफासाइज्जमाणाइं विद्वंसमागच्छंति । एएसिं णं भंते ! पोग्गलाणं अणाघाइज्जमाणाणं अणासाइज्जमाणाणं अफासाइज्जमाणाणं य कयरे कयरेहिंतो अप्पा वा ४ ? गोयमा ! सव्वत्थोवा पोग्गला अणाघाइज्जमाणा, अणासाइज्जमाणा अणंतगुणा, अफासाइज्जमाणा अणंतगुणा ॥ ६४६ ॥ तेइंदिया णं भंते ! जे पोग्गला—पुच्छ । गोयमा ! ते णं पोग्गला घाणिंदियजिब्भि-

दियफासिंदियवेमायत्ताए तेसिं भुजो भुजो परिणमंति । चउरिंदियाणं चक्खिंदिय-  
घाणिंदियजिद्धिंदियफासिंदियवेमायत्ताए तेसिं भुजो भुजो परिणमंति, सेसं जहा  
तेइंदियाणं । पंचिंदियतिरिक्खजोणियाणं जहा तेइंदियाणं, णवरं तत्थ णं जे से  
आभोगनिव्वत्तिए से जहणेणं अंतोमुहुत्तस्स, उक्कोसेणं छट्ठभत्तस्स आहारट्ठे समुप्प-  
ज्जइ । पंचिंदियतिरिक्खजोणिया णं भंते ! जे पोग्गला आहारत्ताए-पुच्छा । गोयमा !  
सोइंदियचक्खिंदियघाणिंदियजिद्धिंदियफासिंदियवेमायत्ताए तेसिं भुजो भुजो परि-  
णमंति । मणूसा एवं चेव, नवरं आभोगनिव्वत्तिए जहणेणं अंतोमुहुत्तस्स, उक्कोसेणं  
अट्ठमभत्तस्स आहारट्ठे समुप्पज्जइ । वाणमंतरा जहा नागकुमारा, एवं जोइसिया वि,  
नवरं आभोगनिव्वत्तिए जहणेणं दिवसपुहुत्तस्स, उक्कोसेणं दिवसपुहुत्तस्स आहारट्ठे  
समुप्पज्जइ, एवं वेमाणिया वि, नवरं आभोगनिव्वत्तिए जहणेणं दिवसपुहुत्तस्स, उक्को-  
सेणं तेत्तीसाए वाससहस्साणं आहारट्ठे समुप्पज्जइ, सेसं जहा असुरकुमारणं जाव तेसिं  
भुजो भुजो परिणमंति । सोहम्मे आभोगनिव्वत्तिए जहणेणं दिवसपुहुत्तस्स, उक्कोसेणं  
दोण्हं वाससहस्साणं आहारट्ठे समुप्पज्जइ । ईसाणे पुच्छा । गोयमा ! जहणेणं दिवस-  
पुहुत्तस्स साइरेगस्स, उक्कोसेणं साइरेग दोण्हं वाससहस्साणं । सणकुमारणं पुच्छा ।  
गोयमा ! जहणेणं दोण्हं वाससहस्साणं, उक्कोसेणं सत्तण्हं वाससहस्साणं । माहिंदे  
पुच्छा । गोयमा ! जहणेणं दोण्हं वाससहस्साणं साइरेगाणं, उक्कोसेणं सत्तण्हं  
वाससहस्साणं साइरेगाणं । बंभलोए पुच्छा । गोयमा ! जहणेणं सत्तण्हं वाससह-  
स्साणं, उक्कोसेणं दसण्हं वाससहस्साणं । लंतए णं पुच्छा । गोयमा ! जहणेणं दसण्हं  
वाससहस्साणं, उक्कोसेणं चउदसण्हं वाससहस्साणं । महासुक्के णं पुच्छा । गोयमा !  
जहणेणं चउदसण्हं वाससहस्साणं, उक्कोसेणं सत्तरसण्हं वाससहस्साणं । सहस्सारे  
पुच्छा । गोयमा ! जहणेणं सत्तरसण्हं वाससहस्साणं, उक्कोसेणं अट्ठारसण्हं वाससह-  
स्साणं । आणए णं पुच्छा । गोयमा ! जहणेणं अट्ठारसण्हं वाससहस्साणं, उक्कोसेणं  
एगूणवीसाए वाससहस्साणं । पाणए णं पुच्छा । गोयमा ! जहणेणं एगूणवीसाए  
वाससहस्साणं, उक्कोसेणं वीसाए वाससहस्साणं । आरणे णं पुच्छा । गोयमा ! जह-  
णेणं वीसाए वाससहस्साणं, उक्कोसेणं एकवीसाए वाससहस्साणं । अच्चुए णं पुच्छा ।  
गोयमा ! जहणेणं एकवीसाए वाससहस्साणं, उक्कोसेणं बावीसाए वाससहस्साणं ।  
हिट्ठिमहिट्ठिमगेविज्जगाणं पुच्छा । गोयमा ! जहणेणं बावीसाए वाससहस्साणं,  
उक्कोसेणं तेवीसाए वाससहस्साणं, एवं सब्बत्थ सहस्साणि भाणियव्वाणि जाव सब्बट्ठं ।  
हिट्ठिममज्झिमगाणं पुच्छा । गोयमा ! जहणेणं तेवीसाए, उक्कोसेणं चउवीसाए ।  
हिट्ठिमउवरिमाणं पुच्छा । गोयमा ! जहणेणं चउवीसाए, उक्कोसेणं पणवीसाए ।

मज्झिमहेट्ठिमाणं पुच्छ । गोयमा ! जहन्नेणं पणवीसाए, उक्कोसेणं छव्वीसाए ।  
 मज्झिममज्झिमाणं पुच्छ । गोयमा ! जहन्नेणं छव्वीसाए, उक्कोसेणं सत्तावीसाए ।  
 मज्झिमउवरिमाणं पुच्छ । गोयमा ! जहन्नेणं सत्तावीसाए, उक्कोसेणं अट्ठावीसाए ।  
 उवरिमहेट्ठिमाणं पुच्छ । गोयमा ! जहन्नेणं अट्ठावीसाए, उक्कोसेणं एगूणतीसाए ।  
 उवरिममज्झिमाणं पुच्छ । गोयमा ! जहन्नेणं एगूणतीसाए, उक्कोसेणं तीसाए ।  
 उवरिमउवरिमाणं पुच्छ । गोयमा ! जहन्नेणं तीसाए, उक्कोसेणं एगतीसाए ।  
 विजयवेजयंतजयंतअपराजियाणं पुच्छ । गोयमा ! जहन्नेणं एगतीसाए, उक्कोसेणं  
 तेतीसाए । सव्वट्ठसिद्धगदेवाणं पुच्छ । गोयमा ! अजहण्णमणुक्कोसेणं तेतीसाए  
 वाससहससाणं आहारट्ठे समुप्पज्जइ ॥ ६४७ ॥ नेरइया णं भंते ! किं एगिंदियसरीराइं  
 आहारेन्ति जाव पंचिंदियसरीराइं आहारेन्ति ? गोयमा ! पुव्वभावपणवणं पडुच्च  
 एगिंदियसरीराइं पि आहारेन्ति जाव पंचिंदिय०, पडुप्पणभावपणवणं पडुच्च नियमा  
 पंचिंदियसरीराइं आहारेन्ति, एवं जाव थणियकुमारा । पुहविकाइयाणं पुच्छ ।  
 गोयमा ! पुव्वभावपणवणं पडुच्च एवं चेव, पडुप्पणभावपणवणं पडुच्च नियमा  
 एगिंदियसरीराइं आहारेन्ति । बेइंदिया पुव्वभावपणवणं पडुच्च एवं चेव, पडुप्पण-  
 भावपणवणं पडुच्च नियमा बेइंदियाणं सरीराइं आहारेन्ति, एवं जाव चउरिंदिया  
 जाव पुव्वभावपणवणं पडुच्च, एवं पडुप्पणभावपणवणं पडुच्च नियमा जस्स जइ  
 इंदियाइं तइइंदियाइं सरीराइं आहारेन्ति, सेसा जहा नेरइया, जाव वेमाणिआ ।  
 नेरइया णं भंते ! किं लोमाहारा पक्खेवाहारा ? गोयमा ! लोमाहारा, नो पक्खेवा-  
 हारा, एवं एगिंदिया सव्वे देवा य भाणियव्वा जाव वेमाणिआ । बेइंदिया जाव  
 मणूसा लोमाहारा वि पक्खेवाहारा वि ॥ ६४८ ॥ नेरइया णं भंते ! किं ओयाहारा  
 मणभक्खी ? गोयमा ! ओयाहारा, णो मणभक्खी, एवं सव्वे ओरालियसरीरा वि ।  
 देवा सव्वे वि जाव वेमाणिआ ओयाहारा वि मणभक्खी वि । तत्थ णं जे ते मण-  
 भक्खी देवा तेसि णं इच्छामणे समुप्पज्जइ 'इच्छामो णं मणभक्खणं करित्ते', तए णं  
 तेहिं देवेहिं एवं मणसीकए समाणे खिप्पामेव जे पोग्गला इट्ठा कंता जाव मणामा ते  
 तेसिं मणभक्खत्ताए परिणमंति, से जहानामए सीया पोग्गला सीयं पप्प सीयं चेव अइ-  
 वइत्ताणं चिट्ठंति, उस्सिणा वा पोग्गला उस्सिणं पप्प उस्सिणं चेव अइवइत्ताणं चिट्ठंति,  
 एवामेव तेहिं देवेहिं मणभक्खीकए समाणे से इच्छामणे खिप्पामेव अवेइ ॥ ६४९ ॥  
**पन्नवणाए भगवईए अट्ठावीसइमे आहारपए पढमो उद्देसो समत्तो ॥**

आहार भविय सण्णी लेसा दिट्ठी य संजय कसाए । णाणे जोगुवओगे वेए य सरीर  
 पज्जती । जीवे णं भंते ! किं आहारए अणाहारए ? गोयमा ! सिय आहारए, सिय

अणाहारए, एवं नेरइए जाव असुरकुमारे जाव वेमाणिए । सिद्धे णं भंते ! किं आहारए अणाहारए ? गोयमा ! नो आहारए, अणाहारए । जीवा णं भंते ! किं आहारया अणाहारया ? गोयमा ! आहारया वि अणाहारया वि । नेरइयाणं पुच्छा । गोयमा ! सव्वे वि ताव होज्जा आहारया १, अहवा आहारगा य अणाहारए य २, अहवा आहारगा य अणाहारगा य ३, एवं जाव वेमाणिया, णवरं एगिंदिया जहा जीवा । सिद्धाणं पुच्छा । गोयमा ! नो आहारगा, अणाहारगा ॥ दारं १ ॥ भवसिद्धिए णं भंते ! जीवे किं आहारए अणाहारए ? गोयमा ! सिय आहारए, सिय अणाहारए, एवं जाव वेमाणिए । भवसिद्धिया णं भंते ! जीवा किं आहारगा अणाहारगा ? गोयमा ! जीवेगिंदियवज्जो तियभंगो, अभवसिद्धिए वि एवं चेव । नोभवसिद्धिए नोअभवसिद्धिए णं भंते ! जीवे किं आहारए अणाहारए ? गोयमा ! णो आहारए, अणाहारए, एवं सिद्धे वि । नोभवसिद्धियनोअभवसिद्धिया णं भंते ! जीवा किं आहारगा अणाहारगा ? गोयमा ! नो आहारगा, अणाहारगा, एवं सिद्धा वि ॥ दारं २ ॥ सण्णी णं भंते ! जीवे किं आहारए अणाहारए ? गोयमा ! सिय आहारए, सिय अणाहारए, एवं जाव वेमाणिए, नवरं एगिंदियविगल्लिंदिया नो पुच्छिज्जंति । सण्णी णं भंते ! जीवा किं आहारगा अणाहारगा ? गोयमा ! जीवाइओ तियभंगो जाव वेमाणिया । असण्णी णं भंते ! जीवे किं आहारए अणाहारए ? गोयमा ! सिय आहारए, सिय अणाहारए, एवं णेरइए जाव वाणमंतरे । जोइसियवेमाणिया ण पुच्छिज्जंति । असण्णी णं भंते ! जीवा किं आहारगा अणाहारगा ? गोयमा ! आहारगा वि अणाहारगा वि एगो भंगो । असण्णी णं भंते ! णेरइया किं आहारया अणाहारया ? गोयमा ! आहारगा वा १, अणाहारगा वा २, अहवा आहारए य अणाहारए य ३, अहवा आहारए य अणाहारया य ४, अहवा आहारगा य अणाहारए य ५, अहवा आहारगा य अणाहारगा य ६, एवं एए छब्भंगा, एवं जाव थणियकुमारा । एगिंदिएसु अभंगयं, वेइंदिय जाव पंचिंदियतिक्खजोणिएसु तियभंगो, मणूसवाणमंतरेसु छब्भंगा । नोसण्णीनोअसण्णी णं भंते ! जीवे किं आहारए अणाहारए ? गोयमा ! सिय आहारए, सिय अणाहारए य, एवं मणूसे वि । सिद्धे अणाहारए, पुहुत्तेणं नोसण्णीनोअसण्णी जीवा आहारगा वि अणाहारगा वि, मणूसेसु तियभंगो, सिद्धा अणाहारगा ॥ दारं ३ ॥ ६५० ॥ सल्लेसे णं भंते ! जीवे किं आहारए अणाहारए ? गोयमा ! सिय आहारए, सिय अणाहारए, एवं जाव वेमाणिए । सल्लेसा णं भंते ! जीवा किं आहारगा अणाहारगा ? गोयमा ! जीवेगिंदियवज्जो तियभंगो, एवं कण्डलेसा वि नीललेसा वि काउलेसा वि जीवेगिंदियवज्जो



तियभंगो । तेउलेसाए पुढविआउवणस्सइकाइयाणं छब्भंगा, सेसाणं जीवाइओ तियभंगो जेसिं अत्थि तेउलेसा, पम्हलेसाए सुक्कलेसाए य जीवाइओ तियभंगो, अलेसा जीवा मणूसा सिद्धा य एगत्तेण वि पुहुत्तेण वि नो आहारगा अणाहारगा ॥ दारं ४ ॥ ६५१ ॥ सम्महिट्ठी णं भंते ! जीवा किं आहारगा अणाहारगा ? गोयमा ! सिय आहारगा, सिय अणाहारगा । बेईदिया तेईदिया चउरिंदिया छब्भंगा, सिद्धा अणाहारगा, अवसेसाणं तियभंगो, सिच्छादिट्ठीसु जीवेगिंदियवज्जो तियभंगो । सम्मा-सिच्छादिट्ठी णं भंते ! ० किं आहारए अणाहारए ? गोयमा ! आहारए, नो अणाहारए, एवं एगिंदियविगलिंदियवज्जं जाव वेमाणिए, एवं पुहुत्तेण वि ॥ दारं ५ ॥ ६५२ ॥ संजए णं भंते ! जीवे किं आहारए अणाहारए ? गोयमा ! सिय आहारए, सिय अणाहारए, एवं मणूसे वि, पुहुत्तेणं तियभंगो । असंजए पुच्छा । सिय आहारए, सिय अणाहारए, पुहुत्तेणं जीवेगिंदियवज्जो तियभंगो, संजयासंजए णं जीवे पंचिंदिय-तिरिक्खजोणिए मणूसे य ३ एए एगत्तेण वि पुहुत्तेण वि आहारगा नो अणाहारगा, नोसंजए-नोअसंजए-नोसंजयासंजए जीवे सिद्धे य एए एगत्तेण पोहत्तेण वि नो आहारगा अणाहारगा ॥ दारं ६ ॥ ६५३ ॥ सकसाई णं भंते ! जीवे किं आहारए अणाहारए ? गोयमा ! सिय आहारए, सिय अणाहारए, एवं जाव वेमाणिया, पुहुत्तेणं जीवेगिंदियवज्जो तियभंगो, कोहकसाईसु जीवाइसु एवं चेव, नवरं देवेसु छब्भंगा, माणकसाईसु मायाकसाईसु य देवनेरइएसु छब्भंगा, अवसेसाणं जीवेगिंदियवज्जो तियभंगो, लोहकसाईसु नेरइएसु छब्भंगा, अवसेसेसु जीवेगिंदियवज्जो तियभंगो, अकसाई जहा णोसण्णीणोअसण्णी ॥ दारं ७ ॥ ६५४ ॥ णाणी जहा सम्महिट्ठी । आभिणिबोहियणाणी सुयणाणी य बेईदियतेईदियचउरिंदिएसु छब्भंगा, अवसेसेसु जीवाइओ तियभंगो जेसिं अत्थि । ओहिणाणी पंचिंदियतिरिक्खजोणिया आहारगा, णो अणाहारगा, अवसेसेसु जीवाइओ तियभंगो जेसिं अत्थि ओहिनाणं, मणपजवनणाणी जीवा मणूसा य एगत्तेण वि पुहुत्तेण वि आहारगा, णो अणाहारगा । केवलनाणी जहा नोसण्णीनोअसण्णी ॥ दारं ८-१ ॥ अण्णाणी मइअण्णाणी सुयअण्णाणी जीवे-गिंदियवज्जो तियभंगो । विभंगणाणी पंचिंदियतिरिक्खजोणिया मणूसा य आहारगा, णो अणाहारगा, अवसेसेसु जीवाइओ तियभंगो ॥ दारं ८-२ ॥ ६५५ ॥ सजोगीसु जीवेगिंदियवज्जो तियभंगो । मणजोगी वइजोगी जहा सम्मामिच्छहिट्ठी, नवरं वइ-जोगो विगलिंदियाण वि । कायजोगीसु जीवेगिंदियवज्जो तियभंगो, अजोगी जीव-मणूससिद्धा अणाहारगा ॥ दारं ९ ॥ सागाराणागारोवउत्तेसु जीवेगिंदियवज्जो तियभंगो, सिद्धा अणाहारगा ॥ दारं १० ॥ सवेयए जीवेगिंदियवज्जो तियभंगो, इत्थिवेययपुरिस-

वेयएसु जीवाइओ तियभंगो, नपुंसगवेयए य जीवेगिंदियवज्जो तियभंगो, अवेयए जहा केवलणाणी ॥ दारं ११ ॥ ६५६ ॥ ससरीरी जीवेगिंदियवज्जो तियभंगो, ओरालिय-सरीरीजीवमणूसेसु तियभंगो, अवसेसा आहारगा, नो अणाहारगा जेसिं अत्थि ओरालियसरीरं, वेउव्वियसरीरी आहारगसरीरी य आहारगा, नो अणाहारगा जेसिं अत्थि, तेयकम्मसरीरी जीवेगिंदियवज्जो तियभंगो, असरीरी जीवा सिद्धा य नो आहारगा, अणाहारगा ॥ दारं १२ ॥ आहारपज्जतीए पज्जतए सरीरपज्जतीए पज्जतए इंदियपज्जतीए पज्जतए आणापाणुपज्जतीए पज्जतए भासामणपज्जतीए पज्जतए एयासु पंचसु वि पज्जतीसु जीवेसु मणूसेसु य तियभंगो, अवसेसा आहारगा, नो अणाहारगा, भासामणपज्जती पंचिंदियाणं, अवसेसाणं नत्थि । आहारपज्जतीअपज्जतए णो आहारए, अणाहारए एगत्तेण वि पुहुत्तेण वि, सरीरपज्जतीअपज्जतए सिय आहारए सिय अणाहारए, उवरिद्धियासु चउसु अपज्जतीसु नेरइयदेवमणूसेसु छब्भंगा, अवसेसाणं जीवेगिंदियवज्जो तियभंगो, भासामणपज्जतएसु जीवेसु पंचिंदियतिरिक्खजोणिएसु य तियभंगो, नेरइयदेवमणूएसु छब्भंगा । सव्वपएसु एगत्तपोहत्तेणं जीवाइया दंडगा पुच्छाए भाणियव्वा जस्स जं अत्थि तस्स तं पुच्छिज्जइ, जस्स जं णत्थि तस्स तं ण पुच्छिज्जइ जाव भासामणपज्जतीअपज्जतएसु नेरइयदेवमणूएसु छब्भंगा, सेसेसु तियभंगो ॥ ६५७ ॥ दारं १३ ॥ **विइओ उद्देसो समत्तो ॥ पन्नवणाए भगवईए अट्ठावीसइमं आहारपयं समत्तं ॥**

कइविहे णं भंते ! उवओगे पन्नते ? गोयमा ! दुविहे उवओगे पन्नते । तंजहा-सागारोवओगे य अणागारोवओगे य । सागारोवओगे णं भंते ! कइविहे पन्नते ? गोयमा ! अट्ठविहे पन्नते । तंजहा-आभिणिवोहियणाणसागारोवओगे, सुयणाणसागा-रोवओगे, ओहिणाणसागारोवओगे, मणपज्जवणाणसागारोवओगे, केवलणाणसागा-रोवओगे, मइअण्णाणसागारोवओगे, सुयअण्णाणसागारोवओगे, विभंगणाणसागा-रोवओगे । अणागारोवओगे णं भंते ! कइविहे पन्नते ? गोयमा ! चउव्विहे पन्नते । तंजहा-चक्खुदंसणअणागारोवओगे, अचक्खुदंसणअणागारोवओगे, ओहिंदंसणअणा-गारोवओगे, केवलदंसणअणागारोवओगे य । एवं जीवाणं ॥ ६५८ ॥ नेरइयाणं भंते ! कइविहे उवओगे पन्नते ? गोयमा ! दुविहे उवओगे पन्नते । तंजहा-सागारोव-ओगे य अणागारोवओगे य । नेरइयाणं भंते ! सागारोवओगे कइविहे पन्नते ? गोयमा ! छव्विहे पन्नते । तंजहा-मइणाणसागारोवओगे, सुयणाणसागारोवओगे, ओहिणाणसागारोवओगे, मइअण्णाणसागारोवओगे, सुयअण्णाणसागारोवओगे, विभं-गणाणसागारोवओगे । नेरइयाणं भंते ! अणागारोवओगे कइविहे पन्नते ? गोयमा !

तिविहे पन्नते । तंजहा-चक्खुदंसणअणागारोवओगे, अचक्खुदंसणअणागारोवओगे, ओहिदंसणअणागारोवओगे, एवं जाव थणियकुमारणं । पुढविकाइयाणं पुच्छा । गोयमा ! दुविहे उवओगे पन्नते । तंजहा-सागारोवओगे अणागारोवओगे य । पुढविकाइयाणं० सागारोवओगे कइविहे पन्नते ? गोयमा ! दुविहे पन्नते । तंजहा-मइअण्णाण-सागारोवओगे, सुयअण्णाणसागारोवओगे य । पुढविकाइयाणं० अणागारोवओगे कइविहे पन्नते ? गोयमा ! एगे अचक्खुदंसणअणागारोवओगे पन्नते, एवं जाव वणस्सइ-काइयाणं । बेइंदियाणं पुच्छा । गोयमा ! दुविहे उवओगे पन्नते । तंजहा-सागारोवओगे अणागारोवओगे य । बेइंदियाणं भंते ! सागारोवओगे कइविहे पन्नते ? गोयमा ! चउउविहे पन्नते । तंजहा-आभिणिबोहियणाण०, सुयणाण०, मइअण्णाण०, सुयअण्णाणसागारोवओगे । बेइंदियाणं भंते ! अणागारोवओगे कइविहे पन्नते ? गोयमा ! एगे अचक्खुदंसणअणागारोवओगे, एवं तेइंदियाण वि । चउरिंदियाण वि एवं चेव, नवरं अणागारोवओगे दुविहे पन्नते । तंजहा-चक्खुदंसणअणागारोवओगे, अचक्खुदंसणअणागारोवओगे । पंचिंदियतिरिक्खजोणियाणं जहा नेरइयाणं । मणुस्साणं जहा ओहिए उवओगे भणियं तहेव भाणियव्वं । वाणमंतरजोइसियवेमाणियाणं जहा णेरइयाणं ॥ ६५९ ॥ जीवा णं भंते ! किं सागारोवउत्ता अणागारोवउत्ता ? गोयमा ! सागारोवउत्ता वि अणागारोवउत्ता वि । से केणट्ठेणं भंते ! एवं वुच्चइ-‘जीवा सागारोवउत्ता वि अणागारोवउत्ता वि’ ? गोयमा ! जेणं जीवा आभिणिबोहियणाणसुयणाण-ओहिणाणमणपज्जवणाणकेवलणाणमइअण्णाणसुयअण्णाणविभंगणाणोवउत्ता तेणं जीवा सागारोवउत्ता, जेणं जीवा चक्खुदंसणअचक्खुदंसणओहिदंसणकेवलदंसणोवउत्ता तेणं जीवा अणागारोवउत्ता, से तेणट्ठेणं गोयमा ! एवं वुच्चइ-‘जीवा सागारोवउत्ता वि अणागारोवउत्ता वि’ । नेरइया णं भंते ! किं सागारोवउत्ता अणागारोवउत्ता ? गोयमा ! नेरइया सागारोवउत्ता वि अणागारोवउत्ता वि । से केणट्ठेणं भंते ! एवं वुच्चइ० ? गोयमा ! जेणं नेरइया आभिणिबोहियणाणसुयणाणओहिणाण-मइअण्णाणसुयअण्णाणविभंगणाणोवउत्ता तेणं नेरइया सागारोवउत्ता, जेणं नेरइया चक्खुदंसणअचक्खुदंसणओहिदंसणोवउत्ता तेणं नेरइया अणागारोवउत्ता, से तेणट्ठेणं गोयमा ! एवं वुच्चइ-जाव ‘सागारोवउत्ता वि अणागारोवउत्ता वि’, एवं जाव थणियकुमारा । पुढविकाइयाणं पुच्छा । गोयमा ! तहेव जाव जेणं पुढविकाइया मइअण्णाणसुयअण्णाणोवउत्ता तेणं पुढविकाइया सागारोवउत्ता, जेणं पुढविकाइया अचक्खुदंसणोवउत्ता तेणं पुढविकाइया अणागारोवउत्ता, से तेणट्ठेणं गोयमा ! एवं वुच्चइ जाव वणप्फइकाइया । बेइंदियाणं भंते ! अट्ठसहिया तहेव पुच्छा ।

गोयमा ! जाव जेणं बेइंदिया आभिणिबोहियणाणसुयणाणमइअण्णाणसुयणाणोवउत्ता तेणं बेइंदिया सागारोवउत्ता, जेणं बेइंदिया अचक्खुदंसणोवउत्ता तेणं अणागारोवउत्ता, से तेणट्ठेणं गोयमा ! एवं वुच्चइ०, एवं जाव चउरिंदिया, णवरं चक्खुदंसणं अब्भहिंयं चउरिंदियाणं ति । पंचिंदियतिरिक्खजोणिया जहा नेरइया, मणूसा जहा जीवा, वाणमंतरजोइसियवेमाणिया जहा नेरइया ॥ ६६० ॥ पञ्चवणाए भगवईए एगूणतीसइमं उवओगपयं समत्तं ॥

कइविहा णं भंते ! पासणया पन्नत्ता ? गोयमा ! दुविहा पासणया पन्नत्ता । तंजहा-सागारपासणया, अणागारपासणया । सागारपासणया णं भंते ! कइविहा पन्नत्ता ? गोयमा ! छव्विहा पन्नत्ता । तंजहा-सुयणाण०पासणया, ओहिणाण०पासणया, मणपज्जवणाण०पासणया, केवलणाण०पासणया, सुयअण्णाणसागारपासणया, विभंगणाणसागारपासणया । अणागारपासणया णं भंते ! कइविहा पन्नत्ता ? गोयमा ! तिविहा पन्नत्ता । तंजहा-चक्खुदंसणअणागारपासणया, ओहिदंसणअणागारपासणया, केवलदंसणअणागारपासणया, एवं जीवाणं पि । नेरइयाणं भंते ! कइविहा पासणया पन्नत्ता ? गोयमा ! दुविहा पन्नत्ता । तंजहा-सागारपासणया, अणागारपासणया । नेरइयाणं भंते ! सागारपासणया कइविहा पन्नत्ता ? गोयमा ! चउव्विहा पन्नत्ता । तंजहा-सुयणाण०पासणया, ओहिणाण०पासणया, सुयअण्णाण०पासणया, विभंगणाण०पासणया । नेरइयाणं भंते ! अणागारपासणया कइविहा पन्नत्ता ? गोयमा ! दुविहा पन्नत्ता । तंजहा-चक्खुदंसण० ओहिदंसण०, एवं जाव थणियकुमारा । पुढविकाइयाणं भंते ! कइविहा पासणया पन्नत्ता ? गोयमा ! एगा सागारपासणया प० । पुढविकाइयाणं भंते ! सागारपासणया कइविहा पन्नत्ता ? गोयमा ! एगा सुयअज्ञाणसागारपासणया पन्नत्ता, एवं जाव वणसइकाइयाणं । बेइंदियाणं भंते ! कइविहा पासणया पन्नत्ता ? गोयमा ! एगा सागारपासणया पन्नत्ता । बेइंदियाणं भंते ! सागारपासणया कइविहा पन्नत्ता ? गोयमा ! दुविहा पन्नत्ता । तंजहा-सुयणाणसागारपासणया, सुयअण्णाणसागारपासणया, एवं तेइंदियाणं वि । चउरिंदियाणं पुच्छ । गोयमा ! दुविहा पन्नत्ता । तंजहा-सागारपासणया य अणागारपासणया य । सागारपासणया जहा बेइंदियाणं । चउरिंदियाणं भंते ! अणागारपासणया कइविहा पन्नत्ता ? गोयमा ! एगा चक्खुदंसणअणागारपासणया पन्नत्ता । मणूसाणं जहा जीवाणं, सेसा जहा नेरइया जाव वेमाणियाणं ॥ ६६१ ॥ जीवा णं भंते ! किं सागारपस्ती, अणागारपस्ती ? गोयमा ! जीवा सागारपस्ती वि अणागारपस्ती वि । से केणट्ठेणं भंते ! एवं वुच्चइ-‘जीवा सागारपस्ती वि अणागारपस्ती वि’ ? गोयमा ! जेणं जीवा

सुयणाणी ओहिणाणी मणपज्जवणाणी केवलणाणी सुयअण्णाणी विमंगणाणी तेणं जीवा सागारपस्सी, जेणं जीवा चक्खुदंसणी ओहिदंसणी केवलदंसणी तेणं जीवा अणागारपस्सी, से एएणट्ठेणं गोयमा ! एवं वुच्चइ-‘जीवा सागारपस्सी वि अणागारपस्सी वि’ । नेरइया णं भंते ! किं सागारपस्सी, अणागारपस्सी ? गोयमा ! एवं चेव, नवरं सागारपासणयाए मणपज्जवणाणी केवलणाणी न वुच्चइ, अणागारपासणयाए केवलदंसणं नत्थि, एवं जाव थणियकुमारा । पुढविकाइयाणं पुच्छा । गोयमा ! पुढविकाइया सागारपस्सी, णो अणागारपस्सी । से केणट्ठेणं भंते ! एवं वुच्चइ० ? गोयमा ! पुढविकाइयाणं एमा सुयअण्णाणसागारपासणया पन्नत्ता, से तेणट्ठेणं गोयमा ! एवं वुच्चइ, एवं जाव वणस्सइकाइयाणं । बेइंदियाणं पुच्छा । गोयमा ! सागारपस्सी, णो अणागारपस्सी । से केणट्ठेणं भंते ! एवं वुच्चइ० ? गोयमा ! बेइंदियाणं दुविहा सागारपासणया पन्नत्ता । तंजहा-सुयणाणसागारपासणया, सुयअण्णाणसागारपासणया, से एएणट्ठेणं गोयमा ! एवं वुच्चइ० । एवं तेइंदियाण वि । चउरिंदियाणं पुच्छा । गोयमा ! चउरिंदिया सागारपस्सी वि अणागारपस्सी वि । से केणट्ठेणं० ? गोयमा ! जेणं चउरिंदिया सुयणाणी सुयअण्णाणी तेणं चउरिंदिया सागारपस्सी, जेणं चउरिंदिया चक्खुदंसणी तेणं चउरिंदिया अणागारपस्सी, से एएणट्ठेणं गोयमा ! एवं वुच्चइ० । मणूसा जहा जीवा, अवसेसा जहा नेरइया जाव वेमाणिया ॥ ६६२ ॥ केवली णं भंते ! इमं रयणप्पमं पुढविं आगारेहिं हेऊहिं उवमाहिं दिट्ठंतेहिं वण्णेहिं संठाणेहिं पमाणेहिं पडोयारेहिं जं समयं जाणइ तं समयं पासइ, जं समयं पासइ तं समयं जाणइ ? गोयमा ! नो इणट्ठे समट्ठे । से केणट्ठेणं भंते ! एवं वुच्चइ-‘केवली णं इमं रयणप्पमं पुढविं आगारेहिं० जं समयं जाणइ नो तं समयं पासइ, जं समयं पासइ नो तं समयं जाणइ ? गोयमा ! सागारे से णाणे भवइ, अणागारे से दंसणे भवइ, से तेणट्ठेणं जाव नो तं समयं जाणइ, एवं जाव अहेसत्तमं । एवं सोहम्मकप्पं जाव अच्चुयं, गेविज्जगविमाणा अणुत्तरविमाणा, ईसिप्पब्भारं पुढविं, परमाणुपोग्गलं दुपएसियं खंधं जाव अणंतपएसियं खंधं । केवली णं भंते ! इमं रयणप्पमं पुढविं अणागारेहिं अहेऊहिं अणुवमाहिं अदिट्ठंतेहिं अवण्णेहिं असंठाणेहिं अपमाणेहिं अपडोयारेहिं पासइ न जाणइ ? हंता गोयमा ! केवली णं इमं रयणप्पमं पुढविं अणागारेहिं जाव पासइ न जाणइ । से केणट्ठेणं भंते ! एवं वुच्चइ-‘केवली णं इमं रयणप्पमं पुढविं अणागारेहिं जाव पासइ न जाणइ’ ? गोयमा ! अणागारे से दंसणे भवइ, सागारे से णाणे भवइ, से तेणट्ठेणं गोयमा ! एवं वुच्चइ-‘केवली णं इमं रयणप्पमं पुढविं अणागारेहिं जाव पासइ न जाणइ’, एवं जाव ईसिप्पब्भारं

पुढविं परमाणुपोगलं अणंतपएसियं खंवं पासइ, न जाणइ ॥ ६६३ ॥ **पन्नवणाए भगवईए तीसइमं पासणयापयं समत्तं ॥**

जीवा णं भंते ! किं सण्णी, असण्णी, नोसण्णीनोअसण्णी ? गोयमा ! जीवा सण्णी वि असण्णी वि नोसण्णीनोअसण्णी वि । नेरइयाणं पुच्छा । गोयमा ! नेरइया सण्णी वि असण्णी वि नो नोसण्णीनोअसण्णी । एवं असुरकुमारा जाव थणियकुमारा । पुढविकाइयाणं पुच्छा । गोयमा ! नो सण्णी, असण्णी, नो नोसण्णीनोअसण्णी । एवं वेइंदियतेइंदियचउरिंदिया वि, मणूसा जहा जीवा, पंचिंदियतिरिक्खजोणिया वाणमंतरा य जहा नेरइया, जोइसियवेमाणिया सण्णी, नो असण्णी, नो नोसण्णीनोअसण्णी । सिद्धाणं पुच्छा । गोयमा ! नो सण्णी, नो असण्णी, नोसण्णीनोअसण्णी । नेरइयतिरियमणुया य वणयरगसुराइ सण्णींसण्णी य । विगलिंदिया असण्णी जोइसवेमाणिया सण्णी ॥ ६६४ ॥ **पन्नवणाए भगवईए इगतीसइमं सण्णीपयं समत्तं ॥**

जीवा णं भंते ! किं संजया, असंजया, संजयासंजया, नोसंजयनोअसंजयनोसंजयासंजया ? गोयमा ! जीवा संजया वि १, असंजया वि २, संजयासंजया वि ३, नोसंजयनोअसंजयनोसंजयासंजया वि ४ । नेरइया णं भंते ! पुच्छा । गोयमा ! नेरइया नो संजया, असंजया, नो संजयासंजया, नो नोसंजयनोअसंजयनोसंजयासंजया । एवं जाव चउरिंदिया । पंचिंदियतिरिक्खजोणियाणं पुच्छा । गोयमा ! पंचिंदियतिरिक्खजोणिया नो संजया, असंजया वि, संजयासंजया वि, नो नोसंजयनोअसंजयनोसंजयासंजया वि । मणुस्साणं पुच्छा । गोयमा ! मणूसा संजया वि असंजया वि संजयासंजया वि, नो नोसंजयनोअसंजयनोसंजयासंजया । वाणमंतरजोइसियवेमाणिया जहा नेरइया । सिद्धाणं पुच्छा । गोयमा ! सिद्धा नो संजया १, नो असंजया २, नो संजयासंजया ३, नोसंजयनोअसंजयनोसंजयासंजया ४ । **गाहा**—“संजयअसंजयमीसगा य जीवा तहेव मणुया य । संजयरहिया तिरिया सेसा अस्संजया होति” ॥ ६६५ ॥ **पन्नवणाए भगवईए बत्तीसइमं संजयपयं समत्तं ॥**

मेयविसयसंठाणे अब्भितरबाहिरे य देसोही । ओहिस्स य खयवुद्धी पडिवाई चेव अपडिवाई ॥ कइविहा णं भंते ! ओही पन्ना ? गोयमा ! दुविहा ओही पन्ना । तंजहा—भवपच्चइया य खओवसमिया य, दोण्हं भवपच्चइया, तंजहा—देवाण य नेरइयाण य, दोण्हं खओवसमिया, तंजहा—मणूसाणं पंचिंदियतिरिक्खजोणियाण य ॥ ६६६ ॥ नेरइया णं भंते ! केवइयं खेतं ओहिणा जाणंति पासंति ? गोयमा ! जहन्नेणं अद्ध-

गाउयं, उक्कोसेणं चत्तारि गाउयाइं ओहिणा जाणंति पासंति । रयणप्पभापुढवि-  
 नेरइया णं भंते ! केवइयं खेत्तं ओहिणा जाणंति पासंति ? गोयमा ! जहन्नेणं अद्दु-  
 डाइं गाउयाइं, उक्कोसेणं चत्तारि गाउयाइं ओहिणा जाणंति पासंति । सक्करप्पभा-  
 पुढविनेरइया जहन्नेणं तिण्णि गाउयाइं, उक्कोसेणं अद्दुडाइं गाउयाइं ओहिणा  
 जाणंति पासंति । बालुयप्पभापुढविनेरइया जहन्नेणं अद्दाइज्जाइं गाउयाइं, उक्कोसेणं  
 तिण्णि गाउयाइं ओहिणा जाणंति पासंति । पंकप्पभापुढविनेरइया जहन्नेणं दोण्णि  
 गाउयाइं, उक्कोसेणं अद्दाइज्जाइं गाउयाइं ओहिणा जाणंति पासंति । धूमप्पभापुढवि-  
 नेरइया जहन्नेणं दिवङ्गं गाउयाइं, उक्कोसेणं दो गाउयाइं ओहिणा जाणंति पासंति ।  
 तमापुढविनेरइया जहन्नेणं गाउयं, उक्कोसेणं दिवङ्गं गाउयं ओहिणा जाणंति  
 पासंति । अहेसत्तमाए पुच्छा । गोयमा ! जहन्नेणं अद्धं गाउयं, उक्कोसेणं गाउयं  
 ओहिणा जाणंति पासंति ॥ ६६७ ॥ असुरकुमारा णं भंते ! ओहिणा केवइयं खेत्तं  
 जाणंति पासंति ? गोयमा ! जहन्नेणं पणवीसं जोयणाइं, उक्कोसेणं असंखेजे दीवसमुद्दे  
 ओहिणा जाणंति पासंति । नागकुमारा णं जहन्नेणं पणवीसं जोयणाइं, उक्कोसेणं संखेजे  
 दीवसमुद्दे ओहिणा जाणंति पासंति, एवं जाव थणियकुमारा । पंचिदियतिरिक्ख-  
 जोणिया णं भंते ! केवइयं खेत्तं ओहिणा जाणंति पासंति ? गोयमा ! जहन्नेणं  
 अंगुलस्स असंखेज्जइभागं, उक्कोसेणं असंखेजे दीवसमुद्दे । मणूसा णं भंते ! ओहिणा  
 केवइयं खेत्तं जाणंति पासंति ? गोयमा ! जहन्नेणं अंगुलस्स असंखेज्जइभागं, उक्कोसेणं  
 असंखेज्जाइं अलोए लोयप्पमाणमेत्ताइं खंडाइं ओहिणा जाणंति पासंति । वाणमंतरा  
 जहा नागकुमारा ॥ ६६८ ॥ जोइसिया णं भंते ! केवइयं खेत्तं ओहिणा जाणंति  
 पासंति ? गोयमा ! जहन्नेणं संखेजे दीवसमुद्दे, उक्कोसेणं वि संखेजे दीवसमुद्दे ।  
 सोहम्मगदेवा णं भंते ! केवइयं खेत्तं ओहिणा जाणंति पासंति ? गोयमा ! जहन्नेणं  
 अंगुलस्स असंखेज्जइभागं, उक्कोसेणं अहे जाव इसीसे रयणप्पभाए हिट्ठिल्ले चरमंते,  
 तिरियं जाव असंखेजे दीवसमुद्दे, उद्धं जाव सगाइं विमाणायं ओहिणा जाणंति  
 पासंति, एवं ईसाणगदेवा वि । सणकुमारदेवा वि एवं चेव, नवरं जाव अहे दोच्चाए  
 सक्करप्पभाए पुढवीए हिट्ठिल्ले चरमंते, एवं माहिंददेवा वि । बंमलोयलंतगदेवा ।  
 तच्चाए पुढवीए हिट्ठिल्ले चरमंते, महासुक्कसहस्सारगदेवा । चउत्थीए पंकप्पभाए  
 पुढवीए हेट्ठिल्ले चरमंते, आणयपाणयआरणञ्जुयदेवा अहे जाव पंचमाए धूमप्प-  
 भाए । हेट्ठिल्ले चरमंते, हेट्ठिममज्झिमगेवेज्जगदेवा अहे जाव छट्ठाए तमाए पुढवीए  
 हेट्ठिल्ले चरमंते । उवरिमगेविज्जगदेवा णं भंते ! केवइयं खेत्तं ओहिणा जाणंति  
 पासंति ? गोयमा ! जहन्नेणं अंगुलस्स असंखेज्जइभागं, उक्कोसेणं अहेसत्तमाए ।

हेट्टिळे चरमंते, तिरियं जाव असंखेजे दीवसमुदे, उड्डं जाव सयाई विमाणाइं ओहिणा जाणंति पासंति । अणुत्तरोववाइयदेवा णं भंते ! केवइयं खेतं ओहिणा जाणंति पासंति ? गोयमा ! संभिन्नं लोगनालिं ओहिणा जाणंति पासंति ॥ ६६९ ॥ नेरइयाणं भंते ! ओही किंसंठिए पन्नते ? गोयमा ! तप्पागारसंठिए पन्नते । असुरकुमारणं पुच्छा । गोयमा ! पल्लगसंठिए, एवं जाव थणियकुमारणं । पंचिदियतिरिक्खजोणियाणं पुच्छा । गोयमा ! णाणासंठाणसंठिए, एवं मणूसाण वि । वाणमंतराणं पुच्छा । गोयमा ! पडहगसंठाणसंठिए । जोइसियाणं पुच्छा । गोयमा ! झलरिसंठाणसंठिए पन्नते । सोहम्मगदेवाणं पुच्छा । गोयमा ! उड्डसुर्यगागारसंठिए पन्नते, एवं जाव अच्चुयदेवाणं । गेवेज्जगदेवाणं पुच्छा । गोयमा ! पुप्फवंगेरिसंठिए पन्नते । अणुत्तरोववाइयाणं पुच्छा । गोयमा ! जवनालियासंठिए ओही पन्नते ॥ ६७० ॥ नेरइया णं भंते ! ओहिस्स किं अंतो, वाहिं ? गोयमा ! अंतो, नो वाहिं, एवं जाव थणियकुमारा । पंचिदियतिरिक्खजोणियाणं पुच्छा । गोयमा ! नो अंतो, वाहिं । मणूसाणं पुच्छा । गोयमा ! अंतो वि वाहिं पि । वाणमंतरजोइसियवेमाणियाणं जहा नेरइयाणं ॥ ६७१ ॥ नेरइयाणं भंते ! किं देसोही, सब्बोही ? गोयमा ! देसोही, नो सब्बोही, एवं जाव थणियकुमारा । पंचिदियतिरिक्खजोणियाणं पुच्छा । गोयमा ! देसोही, नो सब्बोही । मणूसाणं पुच्छा । गोयमा ! देसोही वि सब्बोही वि । वाणमंतरजोइसियवेमाणियाणं जहा नेरइयाणं ॥ ६७२ ॥ नेरइयाणं भंते ! ओही किं आणुगामिए, अणणुगामिए, वड्डमाणए, हीयमाणए, पडिवाई, अप्पडिवाई, अवट्टिए, अणवट्टिए ? गोयमा ! आणुगामिए, नो अणणुगामिए, नो वड्डमाणए, नो हीयमाणए, नो पडिवाई, अप्पडिवाई, अवट्टिए, नो अणवट्टिए, एवं जाव थणियकुमारणं । पंचिदियतिरिक्खजोणियाणं पुच्छा । गोयमा ! आणुगामिए वि जाव अणवट्टिए वि, एवं मणूसाण वि । वाणमंतरजोइसियवेमाणियाणं जहा नेरइयाणं ॥ ६७३ ॥ पन्नवणाए भगवईए तेत्तीसइमं ओहिपयं समत्तं ॥

अणंतरागयाहारे १ आहारे भोयणाइ य २ । पोगला नेव जाणंति ३ अज्झवसाणा ४ य आहिया ॥१॥ सम्मत्तस्साहिगमे ५ तत्तो परियारणा ६ य बोद्धवा । काए फासे हवे सदे य मणे य अप्पबहुं ७ ॥२॥ नेरइया णं भंते ! अणंतराहारा, तओ निव्वत्तणया, तओ परियाइणया, तओ परिणामया, तओ परियारणया, तओ पच्छा विउव्वणया ? हंता गोयमा ! नेरइया णं अणंतराहारा, तओ निव्वत्तणया, तओ परियाइणया, तओ परिणामया, तओ परियारणया, तओ पच्छा विउव्वणया । असुरकुमारा णं भंते ! अणंतराहारा, तओ निव्वत्तणया, तओ परियाइणया, तओ परिणा-



मया, तओ विउव्वणया, तओ पच्छा परियारणया ? हंता गोयमा ! असुरकुमारा अण-  
तराहारा, तओ निव्वत्तणया जाव तओ पच्छा परियारणया, एवं जाव थणियकुमारा ।  
पुढविकाइया णं भंते ! अणंतराहारा, तओ निव्वत्तणया, तओ परियाइणया, तओ  
परिणामया, तओ परियारणया, तओ विउव्वणया ? हंता गोयमा ! तं चेव जाव  
परियारणया, नो चेव णं विउव्वणया । एवं जाव चउरिंदिया, नवरं वाउक्काइया  
पंचिदियतिरिक्खजोणिया मणूसा य जहा नेरइया, वाणमंतरजोइसियवेमाणिया जहा  
असुरकुमारा ॥ ६७४ ॥ नेरइयाणं भंते ! आहारे किं आभोगनिव्वत्तिए, अणा-  
भोगनिव्वत्तिए ? गोयमा ! आभोगनिव्वत्तिए वि अणाभोगनिव्वत्तिए वि । एवं  
असुरकुमारणं जाव वेमाणियाणं, णवरं एगिंदियाणं नो आभोगनिव्वत्तिए, अणा-  
भोगनिव्वत्तिए । नेरइया णं भंते ! जे पोगले आहारताए णिण्हंति ते किं जाणंति  
पासंति आहारेंति, उदाहु न जाणंति न पासंति आहारेंति ? गोयमा ! न जाणंति  
न पासंति आहारेंति, एवं जाव तेइंदिया । चउरिंदियाणं पुच्छा । गोयमा ! अत्थेग-  
इया न जाणंति पासंति आहारेंति, अत्थेगइया न जाणंति न पासंति आहारेंति ।  
पंचिदियतिरिक्खजोणियाणं पुच्छा । गोयमा ! अत्थेगइया जाणंति पासंति आहारेंति  
१, अत्थेगइया जाणंति न पासंति आहारेंति २, अत्थेगइया न जाणंति पासंति  
आहारेंति ३, अत्थेगइया न जाणंति न पासंति आहारेंति ४, एवं जाव मणुस्साण  
वि । वाणमंतरजोइसिया जहा नेरइया । वेमाणियाणं पुच्छा । गोयमा ! अत्थेगइया  
जाणंति पासंति आहारेंति, अत्थेगइया न जाणंति न पासंति आहारेंति । से  
केणट्ठेणं भंते ! एवं बुच्चइ-‘वेमाणिया अत्थेगइया जाणंति पासंति आहारेंति,  
अत्थेगइया न जाणंति न पासंति आहारेंति’ ? गोयमा ! वेमाणिया दुविहा पन्नता ।  
तंजहा-माइमिच्छदिट्ठिउववन्नगा य अमाइसम्मदिट्ठिउववन्नगा य, एवं जहा इंदिय-  
उदेसए पढमे भणियं तहा भाणियव्वं जाव से एएणट्ठेणं गोयमा ! एवं बुच्चइ० ॥ ६७५ ॥  
नेरइयाणं भंते ! केवइया अज्झवसाणा पन्नता ? गोयमा ! असंखेज्जा अज्झवसाणा  
पन्नता । ते णं भंते ! किं पसत्था अपसत्था ? गोयमा ! पसत्था वि अपसत्था वि,  
एवं जाव वेमाणियाणं । नेरइया णं भंते ! किं सम्मत्ताभिगमी, मिच्छत्ताभिगमी,  
सम्माभिच्छत्ताभिगमी ? गोयमा ! सम्मत्ताभिगमी वि मिच्छत्ताभिगमी वि सम्मा-  
मिच्छत्ताभिगमी वि, एवं जाव वेमाणियाण वि । नवरं एगिंदियविगल्लिंदिया णो  
सम्मत्ताभिगमी, मिच्छत्ताभिगमी, नो सम्माभिच्छत्ताभिगमी ॥ ६७६ ॥ देवा णं  
भंते ! किं सदेवीया सपरियारा, सदेवीया अपरियारा, अदेवीया सपरियारा, अदेवीया  
अपरियारा ? गोयमा ! अत्थेगइया देवा सदेवीया सपरियारा, अत्थेगइया देवा

अदेवीया सपरियारा, अत्थेगइया देवा अदेवीया अपरियारा, नो चेव णं देवा सदेवीया अपरियारा । से केणट्ठेणं भंते ! एवं वुच्चइ-‘अत्थेगइया देवा सदेवीया सपरियारा, तं चेव जाव नो चेव णं देवा सदेवीया अपरियारा ? गोयमा ! भवण-वइवाणमंतरजोइससोहम्मीसाणेसु कप्पेसु देवा सदेवीया सपरियारा, सणंकुमार-माहिंदवंभलोगलंतगमहासुक्कसहस्सारआणयपाणयआरणञ्जुएसु कप्पेसु देवा अदेवीया सपरियारा, गेवेज्जअणुत्तरोववाइया देवा अदेवीया अपरियारा, नो चेव णं देवा सदेवीया अपरियारा, से तेणट्ठेणं गोयमा ! एवं वुच्चइ-‘अत्थेगइया देवा सदेवीया सपरियारा, तं चेव, नो चेव णं देवा सदेवीया अपरियारा’ ॥ ६७७ ॥ कइ-विहा णं भंते ! परियारणा पन्नत्ता ? गोयमा ! पंचविहा परियारणा पन्नत्ता । तंजहा-कायपरियारणा, फासपरियारणा, हवपरियारणा, सहपरियारणा, मणपरियारणा । से केणट्ठेणं भंते ! एवं वुच्चइ-पंचविहा परियारणा पन्नत्ता । तंजहा-कायपरियारणा जाव मणपरियारणा ? गोयमा ! भवणवइवाणमंतरजोइससोहम्मी-साणेसु कप्पेसु देवा कायपरियारणा, सणंकुमारमाहिंदेसु कप्पेसु देवा फासपरियारणा, वंभलोयलंतगेसु देवा हवपरियारणा, महासुक्कसहस्सारेसु देवा सहपरियारणा, आणयपाणयआरणञ्जुएसु कप्पेसु देवा मणपरियारणा, गेवेज्जअणुत्तरोववाइया देवा अपरियारणा, से तेणट्ठेणं गोयमा ! तं चेव जाव मणपरियारणा । तत्थ णं जे ते कायपरियारणा देवा तेसि णं इच्छामणे समुप्पज्जइ-‘इच्छामो णं अच्छराहिं सद्धिं कायपरियारं करेत्ताए’, तए णं तेहिं देवेहिं एवं मणसीकए समाणे खिप्पामेव ताओ अच्छराओ ओरालाई सिंगाराई मणुण्णाई मणोहराई मणोरमाई उत्तरवेउव्वियरूवाइं विउव्वंति विउव्वित्ता तेसिं देवाणं अंतियं पाउच्चमवंति, तए णं ते देवा ताहिं अच्छराहिं सद्धिं कायपरियारणं करेत्ति । से जहाणासए सीया पोग्गला सीयं पप्प सीयं चेव अइवइत्ताणं चिट्ठंति, उसिणा वा पोग्गला उसिणं पप्प उसिणं चेव अइवइत्ताणं चिट्ठंति, एवमेव तेहिं देवेहिं ताहिं अच्छराहिं सद्धिं कायपरियारणे कए समाणे से इच्छामणे खिप्पामेव अवेइ ॥ ६७८ ॥ अत्थि णं भंते ! तेसिं देवाणं सुक्कपोग्गला ? हंता ! अत्थि । ते णं भंते ! तासिं अच्छराणं कीसत्ताए भुज्जो भुज्जो परिणमंति ? गोयमा ! सोइंदियत्ताए चक्खुइंदियत्ताए घाणिंदियत्ताए रसिंदियत्ताए फासिंदियत्ताए इट्ठत्ताए कंतत्ताए मणुन्नत्ताए मणामत्ताए सुभगत्ताए सोहगगहवजोव्वणगुणलावन्नत्ताए ते तासिं भुज्जो भुज्जो परिणमंति ॥ ६७९ ॥ तत्थ णं जे ते फासपरियारणा देवा तेसि णं इच्छामणे समुप्पज्जइ, एवं जहेव कायपरियारणा तहेव निरवसेसं भाणि-यव्वं । तत्थ णं जे ते रूवपरियारणा देवा तेसि णं इच्छामणे समुप्पज्जइ—

‘इच्छामो णं अच्छराहिं सद्धिं ह्वपरियारणं करेत्तए’, तए णं तेहिं देवेहिं एवं मणसीकए समाणे तहेव जाव उत्तरवेउव्वियाइं ह्वाइं विउव्वित्ता जेणामेव ते देवा तेणामेव उवागच्छंति उवागच्छित्ता तेसिं देवाणं अदूरसामंते ठिच्चा ताइं उरालाइं जाव मणोरमाइं उत्तरवेउव्वियाइं ह्वाइं उवदंसेमाणीओ २ चिट्ठंति, तए णं ते देवा ताहिं अच्छराहिं सद्धिं ह्वपरियारणं करेत्ति, सेसं तं चेव जाव भुज्जो भुज्जो परिणमन्ति । तत्थ णं जे ते सद्परियारगा देवा तेसिं णं इच्छामणे समुप्पज्जइ— ‘इच्छामो णं अच्छराहिं सद्धिं सद्परियारणं करेत्तए’, तए णं तेहिं देवेहिं एवं मणसीकए समाणे तहेव जाव उत्तरवेउव्वियाइं ह्वाइं विउव्वंति विउव्वित्ता जेणामेव ते देवा तेणामेव उवागच्छंति उवागच्छित्ता तेसिं देवाणं अदूरसामंते ठिच्चा अणुत्तराइं उच्चावयाइं सद्दाइं समुदीरेमाणीओ २ चिट्ठंति, तए णं ते देवा ताहिं अच्छराहिं सद्धिं सद्परियारणं करेन्ति, सेसं तं चेव जाव भुज्जो भुज्जो परिणमंति । तत्थ णं जे ते मणपरियारगा देवा तेसिं इच्छामणे समुप्पज्जइ—‘इच्छामो णं अच्छराहिं सद्धिं मणपरियारणं करेत्तए’, तए णं तेहिं देवेहिं एवं मणसीकए समाणे खिप्पामेव ताओ अच्छराओ तत्थ—गयाओ चेव समाणीओ अणुत्तराइं उच्चावयाइं मणाइं संपहारेमाणीओ २ चिट्ठंति, तए णं ते देवा ताहिं अच्छराहिं सद्धिं मणपरियारणं करेत्ति, सेसं णिरवसेसं तं चेव जाव भुज्जो भुज्जो परिणमंति ॥ ६८० ॥ एएसि णं भंते ! देवाणं कायपरियारगाणं जाव मणपरियारगाणं, अपरियारगाणं य कयरे कयरेहिंतो अप्पा वा ४ ? गोयमा ! सव्वत्थोवा देवा अपरियारगा, मणपरियारगा संखेज्जगुणा, सद्परियारगा असंखेज्जगुणा, ह्वपरियारगा असंखेज्जगुणा, फासपरियारगा असंखेज्जगुणा, कायपरियारगा असंखेज्जगुणा ॥ ६८१ ॥ पच्चवणाए भगवईए चउत्तीसइमं परियारणापयं समत्तं ॥

सीया य दव्व सरीरा साया तह वेयणा भवइ दुक्खा । अब्भुवगमोवक्कमिया निदा य अणिदा य नायव्वा ॥ १ ॥ सायमसायं सव्वे सुहं च दुक्खं अदुक्खमसुहं च । माणसरहियं विगल्लिदिया उ सेसा दुविहमेव ॥ २ ॥ कइविहा णं भंते ! वेयणा पञ्चत्ता ? गोयमा ! तिविहा वेयणा पञ्चत्ता । तंजहा—सीया, उसिणा, सीओसिणा । नेरइया णं भंते ! किं सीयं वेयणं वेदेंति, उसिणं वेयणं वेदेंति, सीओसिणं वेयणं वेदेंति ? गोयमा ! सीयं पि वेयणं वेदेंति, उसिणं पि वेयणं वेदेंति, नो सीओसिणं वेयणं वेदेंति । केई एक्केपुढवीए वेयणाओ भणंति । रयणप्पभापुढविनेरइया णं भंते ! पुच्छा । गोयमा ! नो सीयं वेयणं वेदेंति, उसिणं वेयणं वेदेंति, नो सीओसिणं वेयणं वेदेंति, एवं जाव वाल्लयप्पभापुढविनेरइया । पंक्कप्पभापुढविनेरइयाणं पुच्छा ।

गोयमा ! सीयं पि वेयणं वेदेंति, उस्सिणं पि वेयणं वेदेंति, नो सीओसिणं वेयणं वेदेंति । ते बहुयतरागा जे उस्सिणं वेयणं वेदेंति, ते थोवतरागा जे सीयं वेयणं वेदेंति । धूसप्पभाए एवं चेव दुविहा, नवरं ते बहुतरागा जे सीयं वेयणं वेदेंति, ते थोवतरागा जे उस्सिणं वेयणं वेदेंति । तमाए य तमतमाए य सीयं वेयणं वेदेंति, नो उस्सिणं वेयणं वेदेंति, नो सीओसिणं वेयणं वेदेंति । असुरकुमारारणं पुच्छा । गोयमा ! सीयं पि वेयणं वेदेंति, उस्सिणं पि वेयणं वेदेंति, सीओसिणं पि वेयणं वेदेंति, एवं जाव वेमाणिया ॥ ६८२ ॥ कइविहा णं भंते ! वेयणा पन्नत्ता ? गोयमा ! चउव्विहा वेयणा पन्नत्ता । तंजहा-दव्वओ खेत्तओ कालओ भावओ । नेरइया णं भंते ! किं दव्वओ वेयणं वेदेंति जाव भावओ वेयणं वेदेंति ? गोयमा ! दव्वओ वि वेयणं वेदेंति जाव भावओ वि वेयणं वेदेंति, एवं जाव वेमाणिया । कइविहा णं भंते ! वेयणा पन्नत्ता ? गोयमा ! तिविहा वेयणा पन्नत्ता । तंजहा-सारीरा, माणसा, सारीरमाणसा । नेरइया णं भंते ! किं सारीरं वेयणं वेदेंति, माणसं वेयणं वेदेंति, सारीरमाणसं वेयणं वेदेंति ? गोयमा ! सारीरं पि वेयणं वेदेंति, माणसं पि वेयणं वेदेंति, सारीरमाणसं पि वेयणं वेदेंति । एवं जाव वेमाणिया, नवरं एगिंदियविगल्लिंदिया सारीरं वेयणं वेदेंति, नो माणसं वेयणं वेदेंति, नो सारीरमाणसं वेयणं वेदेंति । कइविहा णं भंते ! वेयणा पन्नत्ता ? गोयमा ! तिविहा वेयणा पन्नत्ता । तंजहा-साया, असाया, सायासाया । नेरइया णं भंते ! किं सायं वेयणं वेदेंति, असायं वेयणं वेदेंति, सायासायं वेयणं वेदेंति ? गोयमा ! तिविहं पि वेयणं वेदेंति, एवं सव्वजीवा जाव वेमाणिया । कइविहा णं भंते ! वेयणा पन्नत्ता ? गोयमा ! तिविहा वेयणा पन्नत्ता । तंजहा-दुक्खा, सुहा, अदुक्खमसुहा । नेरइया णं भंते ! किं दुक्खं वेयणं वेदेंति पुच्छा । गोयमा ! दुक्खं पि वेयणं वेदेंति, सुहं पि वेयणं वेदेंति, अदुक्खमसुहं पि वेयणं वेदेंति, एवं जाव वेमाणिया ॥ ६८३ ॥ कइविहा णं भंते ! वेयणा पन्नत्ता ? गोयमा ! दुविहा वेयणा पन्नत्ता । तंजहा-अब्भोवगमिया य उवक्कमिया य । नेरइया णं भंते ! अब्भोवगमियं वेयणं वेदेंति, उवक्कमियं वेयणं वेदेंति ? गोयमा ! नो अब्भोवगमियं वेयणं वेदेंति, उवक्कमियं वेयणं वेदेंति, एवं जाव चउरिंदिया । पंचिंदियतिरिक्खजोणिया मणूसा य दुविहं पि वेयणं वेदेंति, वाणमंतरजोइसियवेमाणिया जहा नेरइया ॥ ६८४ ॥ कइविहा णं भंते ! वेयणा पन्नत्ता ? गोयमा ! दुविहा वेयणा पन्नत्ता । तंजहा-निदा य अणिदा य । नेरइया णं भंते ! किं निदायं वेयणं वेदेंति, अणिदायं वेयणं वेदेंति ? गोयमा ! निदायं पि वेयणं वेदेंति, अणिदायं पि

वेयणं वेदेंति । से केणट्ठेणं भंते ! एवं वुच्चइ-‘नेरइया निदायं पि० अणिदायं पि वेयणं वेदेंति’ ? गोयमा ! नेरइया दुविहा पन्नत्ता । तंजहा-सण्णीभूया य असण्णीभूया य । तत्थ णं जे ते सण्णीभूया ते णं निदायं वेयणं वेदेंति, तत्थ णं जे ते असण्णीभूया ते णं अणिदायं वेयणं वेदेंति, से तेणट्ठेणं गोयमा ! एवं...नेरइया निदायं पि वेयणं वेदेंति अणिदायं पि वेयणं वेदेंति, एवं जाव थणियकुमारा । पुढ-विकाइयाणं पुच्छा । गोयमा ! नो निदायं वेयणं वेदेंति, अणिदायं वेयणं वेदेंति । से केणट्ठेणं भंते ! एवं वुच्चइ-‘पुढविकाइया नो निदायं वेयणं वेदेंति, अणिदायं वेयणं वेदेंति’ ? गोयमा ! पुढविकाइया सव्वे असण्णी असण्णिभूयं अणिदायं वेयणं वेदेंति, से तेणट्ठेणं गोयमा ! एवं वुच्चइ-पुढविकाइया नो निदायं वेयणं वेदेंति, अणिदायं वेयणं वेदेंति, एवं जाव चउरिंदिया । पंचिदियतिरिक्खजोणिया मणूसा वाणमंतरा जहा नेरइया । जोइसियाणं पुच्छा । गोयमा ! निदायं पि वेयणं वेदेंति, अणिदायं पि वेयणं वेदेंति । से केणट्ठेणं भंते ! एवं वुच्चइ-‘जोइसिया निदायं पि वेयणं वेदेंति, अणिदायं पि वेयणं वेदेंति’ ? गोयमा ! जोइसिया दुविहा पन्नत्ता । तंजहा-माइमिच्छहिट्ठिउववण्णगा य अमाइसम्महिट्ठिउववण्णगा य । तत्थ णं जे ते माइमिच्छहिट्ठिउववण्णगा ते णं अणिदायं वेयणं वेदेंति, तत्थ णं जे ते अमाइसम्महिट्ठिउववण्णगा ते णं निदायं वेयणं वेदेंति, से एणट्ठेणं गोयमा ! एवं वुच्चइ ‘जोइसिया दुविहं पि वेयणं वेदेंति’, एवं वेमाणिया वि ॥ ६८५ ॥ पन्नवणाए भगवईए पणतीसइमं वेयणापयं समत्तं ॥

वेयणकसायमरणे वेउव्वियतेयए य आहारे । केवल्लिए चेव भवे जीवमणुस्साण सत्तेव ॥ कइ णं भंते ! समुग्घाया पन्नत्ता ? गोयमा ! सत्त समुग्घाया पन्नत्ता । तंजहा-वेयणासमुग्घाए १, कसायसमुग्घाए २, मारणंतियसमुग्घाए ३, वेउव्वियसमुग्घाए ४, तेयासमुग्घाए ५, आहारगसमुग्घाए ६, केवल्लिसमुग्घाए ७ । वेयणासमुग्घाए णं भंते ! कइसमइए पन्नत्ते ? गोयमा ! असंखेजसमइए अंतोसुहुत्तिए पन्नत्ते, एवं जाव आहारगसमुग्घाए । केवल्लिसमुग्घाए णं भंते ! कइसमइए पन्नत्ते ? गोयमा ! अट्ठसमइए पन्नत्ते । नेरइयाणं भंते ! कइ समुग्घाया पन्नत्ता ? गोयमा ! चत्तारि समुग्घाया पन्नत्ता । तंजहा-वेयणासमुग्घाए, कसायसमुग्घाए, मारणंतियसमुग्घाए, वेउव्वियसमुग्घाए । असुरकुमाराणं भंते ! कइ समुग्घाया पन्नत्ता ? गोयमा ! पंच समुग्घाया पन्नत्ता । तंजहा-वेयणासमुग्घाए, कसायसमुग्घाए, मारणंतियसमुग्घाए, वेउव्वियसमुग्घाए, तेयासमुग्घाए, एवं जाव थणियकुमाराणं । पुढविकाइयाणं भंते ! कइ समुग्घाया पन्नत्ता ? गोयमा ! तिण्णि समुग्घाया पन्नत्ता ।

तंजहा-वेयणासमुग्घाए, कसायसमुग्घाए, मारणंतियसमुग्घाए, एवं जाव चउरिंदि-  
याणं । नवरं वाउकाइयाणं चत्तारि समुग्घाया पन्नत्ता । तंजहा-वेयणासमुग्घाए,  
कसायसमुग्घाए, मारणंतियसमुग्घाए, वेउव्वियसमुग्घाए । पंचिदियतिरिक्खजो-  
णियाणं जाव वेमाणियाणं भंते ! कइ समुग्घाया पन्नत्ता ? गोयमा ! पंच समुग्घाया  
पन्नत्ता । तंजहा-वेयणासमुग्घाए, कसायसमुग्घाए, मारणंतियसमुग्घाए, वेउव्विय-  
समुग्घाए, तेयासमुग्घाए । नवरं मणूसाणं सत्तविहे समुग्घाए पन्नत्ते । तंजहा-वेय-  
णासमुग्घाए, कसायसमुग्घाए, मारणंतियसमुग्घाए, वेउव्वियसमुग्घाए, तेयासमु-  
ग्घाए, आहारगसमुग्घाए, केवलिसमुग्घाए ॥ ६८६ ॥ एगमेगस्स णं भंते ! नेरइयस्स  
केवइया वेयणासमुग्घाया अतीता ? गोयमा ! अणंता, केवइया पुरेक्खडा ?  
गोयमा ! कस्सइ अत्थि कस्सइ नत्थि, जस्सत्थि तस्स जहण्णेणं एक्को वा दो वा  
तिणिण वा, उक्कोसेणं संखेज्जा वा असंखेज्जा वा अणंता वा । एवमसुरकुमारस्स वि  
निरंतरं जाव वेमाणियस्स, एवं जाव तेयगसमुग्घाए, एवमेए पंच चउवीसा  
दंडगा । एगमेगस्स णं भंते ! नेरइयस्स केवइया आहारगसमुग्घाया अतीता ?  
कस्सइ अत्थि कस्सइ नत्थि, जस्स अत्थि तस्स जहण्णेणं एक्को वा दो वा, उक्कोसेणं  
तिणिण । केवइया पुरेक्खडा ? कस्सइ अत्थि कस्सइ नत्थि, जस्सत्थि जहण्णेणं  
एक्को वा दो वा तिणिण वा, उक्कोसेणं चत्तारि, एवं निरंतरं जाव वेमाणियस्स, नवरं  
मणूस्स अतीता वि पुरेक्खडा वि जहा नेरइयस्स पुरेक्खडा । एगमेगस्स णं  
भंते ! नेरइयस्स केवइया केवलिसमुग्घाया अतीता ? गोयमा ! नत्थि । केवइया  
पुरेक्खडा ? गोयमा ! कस्सइ अत्थि कस्सइ नत्थि, जस्सत्थि एक्को, एवं जाव वेमा-  
णियस्स, नवरं मणूस्स अतीता कस्सइ अत्थि कस्सइ नत्थि, जस्सत्थि एक्को, एवं  
पुरेक्खडा वि ॥ ६८७ ॥ नेरइयाणं भंते ! केवइया वेयणासमुग्घाया अतीता ? गोयमा !  
अणंता । केवइया पुरेक्खडा ? गोयमा ! अणंता, एवं जाव वेमाणियाणं, एवं जाव  
तेयगसमुग्घाए, एवं एए वि पंच चउवीसदंडगा । नेरइयाणं भंते ! केवइया  
आहारगसमुग्घाया अतीता ? गोयमा ! असंखेज्जा । केवइया पुरेक्खडा ? गोयमा !  
असंखेज्जा, एवं जाव वेमाणियाणं । नवरं वणस्सइकाइयाणं मणूसाणं य इमं णाणत्तं-  
वणस्सइकाइयाणं भंते ! केवइया आहारगसमुग्घाया अतीता ? गोयमा ! अणंता ।  
मणूसाणं भंते ! केवइया आहारगसमुग्घाया अतीता ? गोयमा ! सिय संखेज्जा, सिय  
असंखेज्जा, एवं पुरेक्खडा वि । नेरइयाणं भंते ! केवइया केवलिसमुग्घाया  
अतीता ? गोयमा ! नत्थि । केवइया पुरेक्खडा ? गोयमा ! असंखेज्जा, एवं जाव  
वेमाणियाणं । नवरं वणस्सइमणूसेल्ल इमं नाणत्तं-वणस्सइकाइयाणं भंते ! केवइया

केवल्लिसमुग्घाया अतीता ? गोयमा ! नत्थि । केवइया पुरेक्खडा ? गोयमा !  
 अणंता । मणूसाणं भंते ! केवइया केवल्लिसमुग्घाया अतीता ? गोयमा ! सिय  
 अत्थि सिय नत्थि, जइ अत्थि जहण्णेणं एक्को वा दो वा तिणिण वा, उक्कोसेणं  
 सयपुट्ठत्तं । केवइया पुरेक्खडा ?० सिय संखेज्जा, सिय असंखेज्जा ॥ ६८८ ॥  
 एगमेगस्स णं भंते ! नेरइयस्स नेरइयत्ते केवइया वेयणासमुग्घाया अतीता ?  
 गोयमा ! अणंता । केवइया पुरेक्खडा ? गोयमा ! कस्सइ अत्थि कस्सइ नत्थि,  
 जस्स अत्थि जह्वेणं एक्को वा दो वा तिणिण वा, उक्कोसेणं संखेज्जा वा असंखेज्जा  
 वा अणंता वा । एवं असुरकुमारत्ते जाव वेमाणियत्ते । एगमेगस्स णं भंते ! असुर-  
 कुमारस्स नेरइयत्ते केवइया वेयणासमुग्घाया अतीता ? गोयमा ! अणंता । केवइया  
 पुरेक्खडा ? गोयमा ! कस्सइ अत्थि कस्सइ नत्थि, जस्सत्थि तस्स सिय संखेज्जा  
 वा सिय असंखेज्जा वा सिय अणंता वा । एगमेगस्स णं भंते ! असुरकुमारस्स  
 असुरकुमारत्ते केवइया वेयणासमुग्घाया अतीता ? गोयमा ! अणंता । केवइया  
 पुरेक्खडा ? गोयमा ! कस्सइ अत्थि कस्सइ नत्थि, जस्सत्थि जह्वेणं एक्को वा दो  
 वा तिणिण वा, उक्कोसेणं संखेज्जा वा असंखेज्जा वा अणंता वा, एवं नागकुमारत्ते  
 वि जाव वेमाणियत्ते, एवं जहा वेयणासमुग्घाएणं असुरकुमारे नेरइयाइवेमाणियप-  
 ज्जवसाणेसु भणियो तथा नागकुमाराइया अवसेसेसु सट्ठाणेसु परट्ठाणेसु भाणियव्वा  
 जाव वेमाणियस्स वेमाणियत्ते । एवमेए चउव्वीसं चउव्वीसा दंडगा भवंति ॥ ६८९ ॥  
 एगमेगस्स णं भंते ! नेरइयस्स नेरइयत्ते केवइया कसायसमुग्घाया अतीता ?  
 गोयमा ! अणंता । केवइया पुरेक्खडा ? गोयमा ! कस्सइ अत्थि कस्सइ नत्थि,  
 जस्सत्थि एगुत्तरियाए जाव अणंता । एगमेगस्स णं भंते ! नेरइयस्स असुरकुमारत्ते  
 केवइया कसायसमुग्घाया अतीता ? गोयमा ! अणंता, केवइया पुरेक्खडा ? गोयमा !  
 कस्सइ अत्थि कस्सइ नत्थि, जस्सत्थि सिय संखेज्जा, सिय असंखेज्जा, सिय अणंता,  
 एवं जाव नेरइयस्स थणियकुमारत्ते । पुढविकाइयत्ते एगुत्तरियाए नेयव्वं, एवं जाव  
 मणुयत्ते, वाणमंतरत्ते जहा असुरकुमारत्ते । जोइसियत्ते अतीता अणंता, पुरेक्खडा  
 कस्सइ अत्थि कस्सइ नत्थि, जस्सत्थि सिय असंखेज्जा, सिय अणंता, एवं वेमाणियत्ते  
 वि सिय असंखेज्जा, सिय अणंता । असुरकुमारस्स नेरइयत्ते अतीता अणंता, पुरे-  
 क्खडा कस्सइ अत्थि कस्सइ नत्थि, जस्सत्थि सिय संखेज्जा, सिय असंखेज्जा, सिय  
 अणंता । असुरकुमारस्स असुरकुमारत्ते अतीता अणंता, पुरेक्खडा एगुत्तरिया, एवं  
 नागकुमारत्ते जाव निरंतरं वेमाणियत्ते जहा नेरइयस्स भणियं तहेव भाणियव्वं, एवं  
 जाव थणियकुमारस्स वि वेमाणियत्ते, नवरं सव्वेसिं सट्ठाणे एगुत्तरियाए, परट्ठाणे

जहेव असुरकुमारस्स । पुढविकाइयस्स नेरइयत्ते जाव थणियकुमारत्ते अतीता अणंता, पुरेक्खडा कस्सइ अत्थि कस्सइ नत्थि, जस्सत्थि सिय संखेज्जा, सिय असंखेज्जा, सिय अणंता । पुढविकाइयस्स पुढविकाइयत्ते जाव मणूसत्ते अतीता अणंता, पुरेक्खडा कस्सइ अत्थि कस्सइ नत्थि, जस्स अत्थि एगुत्तरिया । वाणमंतरत्ते जहा णेरइयत्ते । जोइसियवेमाणियत्ते अतीता अणंता, पुरेक्खडा कस्सइ अत्थि कस्सइ नत्थि, जस्स अत्थि सिय असंखेज्जा, सिय अणंता, एवं जाव मणूसे वि नेयव्वं । वाणमंतरजोइ-सियवेमाणिया जहा असुरकुमारा, णवरं सट्ठाणे एगुत्तरियाए भाणियव्वे जाव वेमाणियस्स वेमाणियत्ते । एवं एए चउव्वीसं चउव्वीसा दंडगा ॥ ६९० ॥ मारणंति-यसमुग्घाओ सट्ठाणे वि परट्ठाणे वि एगुत्तरियाए नेयव्वो जाव वेमाणियस्स वेमाणियत्ते, एवमेए चउवीसं चउवीसदंडगा भाणियव्वा । वेउव्वियसमुग्घाओ जहा कसायसमु-ग्घाओ तहा निरवसेसो भाणियव्वो, नवरं जस्स नत्थि तस्स न चुच्चइ, एत्थ वि चउ-वीसं चउवीसा दंडगा भाणियव्वा । तेयगसमुग्घाओ जहा मारणंतिyसमुग्घाओ, णवरं जस्सत्थि, एवं एए वि चउव्वीसं चउव्वीसा दंडगा भाणियव्वा ॥ ६९१ ॥ एगमेगस्स णं भंते ! नेरइयस्स नेरइयत्ते केवइया आहारगसमुग्घाया अतीता ? गोयमा ! णत्थि । केवइया पुरेक्खडा ? गोयमा ! णत्थि, एवं जाव वेमाणियत्ते, नवरं मणूसत्ते अतीता कस्सइ अत्थि कस्सइ नत्थि, जस्सत्थि जह्वेणं एक्को वा दो वा, उक्कोसेणं तिच्चि । केवइया पुरेक्खडा ? गोयमा ! कस्सइ अत्थि कस्सइ नत्थि, जस्सत्थि जह्वेणं एक्को वा दो वा तिण्णि वा, उक्कोसेणं चत्तारि, एवं सव्वजीवाणं मणुस्साणं भाणियव्वं । मणूसस्स मणूसत्ते अतीता कस्सइ अत्थि कस्सइ नत्थि, जस्सत्थि जह्वेणं एक्को वा दो वा तिण्णि वा, उक्कोसेणं चत्तारि, एवं पुरेक्खडा वि । एवमेए चउवीसं चउवीसा दंडगा जाव वेमाणियत्ते ॥ ६९२ ॥ एगमेगस्स णं भंते ! नेरइयस्स नेरइयत्ते केवइया केवलिसमुग्घाया अतीता ? गोयमा ! णत्थि । केवइया पुरेक्खडा ? गोयमा ! नत्थि, एवं जाव वेमाणियत्ते, नवरं मणूसत्ते अतीता नत्थि, पुरेक्खडा कस्सइ अत्थि कस्सइ नत्थि, जस्सत्थि इक्को, मणूसस्स मणूसत्ते अतीता कस्सइ अत्थि कस्सइ नत्थि, जस्सत्थि एक्को, एवं पुरेक्खडा वि । एवमेए चउव्वीसं चउव्वीसा दंडगा ॥ ६९३ ॥ नेरइयाणं भंते ! नेरइयत्ते केवइया वेयणा-समुग्घाया अतीता ? गोयमा ! अणंता । केवइया पुरेक्खडा ? गोयमा ! अणंता, एवं जाव वेमाणियत्ते, एवं सव्वजीवाणं भाणियव्वं जाव वेमाणियाणं वेमाणियत्ते, एवं जाव तेयगसमुग्घाया, णवरं उवउज्जिऊण णेयव्वं जस्सत्थि वेउव्वियतेयगा ॥ ६९४ ॥ नेरइयाणं भंते ! नेरइयत्ते केवइया आहारगसमुग्घाया अतीता ? गोयमा ! नत्थि ।



केवइया पुरेक्खडा ? गोयमा ! णत्थि, एवं जाव वेमाणियत्ते । णवरं मणूसत्ते अतीता असंखेज्जा, पुरेक्खडा असंखेज्जा, एवं जाव वेमाणियाणं । णवरं वणस्सइकाइयाणं मणूसत्ते अतीता अणंता, पुरेक्खडा अणंता । मणूसाणं मणूसत्ते अतीता सिय संखेज्जा, सिय असंखेज्जा, एवं पुरेक्खडा वि । सेसा सव्वे जहा नेरइया, एवं एए चउवीसं चउवीसा दंडगा ॥ ६९५ ॥ नेरइयाणं भंते ! नेरइयत्ते केवइया केवलिसमुग्घाया अतीता ? गोयमा ! नत्थि । केवइया पुरेक्खडा ? गोयमा ! नत्थि, एवं जाव वेमाणियत्ते । णवरं मणूसत्ते अतीता णत्थि, पुरेक्खडा असंखेज्जा, एवं जाव वेमाणिया, नवरं वणस्सइकाइयाणं मणूसत्ते अतीता नत्थि, पुरेक्खडा अणंता । मणूसाणं मणूसत्ते अतीता सिय अत्थि सिय णत्थि, जइ अत्थि जह्वेणं एक्को वा दो वा तिण्णि वा, उक्कोसेणं सयपुहुत्तं । केवइया पुरेक्खडा ? गोयमा ! सिय संखेज्जा, सिय असंखेज्जा, एवं एए चउव्वीसं चउव्वीसा दंडगा सव्वे पुच्छाए भाणियव्वा जाव वेमाणियाणं वेमाणियत्ते ॥ ६९६ ॥ एएसि णं भंते ! जीवाणं वेयणासमुग्घाएणं कसायसमुग्घाएणं मारणंतियसमुग्घाएणं वेउव्वियसमुग्घाएणं तेयगसमुग्घाएणं आहारगसमुग्घाएणं केवलिसमुग्घाएणं समोहयाणं असमोहयाण य कयरे कयरेहिंतो अप्पा वा बहुया वा तुल्ला वा विसेसाहिया वा ? गोयमा ! सव्वत्थोवा जीवा आहारगसमुग्घाएणं समोहया, केवलिसमुग्घाएणं समोहया संखेज्जगुणा, तेयगसमुग्घाएणं समोहया असंखेज्जगुणा, वेउव्वियसमुग्घाएणं समोहया असंखेज्जगुणा, मारणंतियसमुग्घाएणं समोहया अणंतगुणा, कसायसमुग्घाएणं समोहया असंखेज्जगुणा, वेयणासमुग्घाएणं समोहया विसेसाहिया, असमोहया असंखेज्जगुणा ॥ ६९७ ॥ एएसि णं भंते ! नेरइयाणं वेयणासमुग्घाएणं कसायसमुग्घाएणं मारणंतियसमुग्घाएणं वेउव्वियसमुग्घाएणं समोहयाणं असमोहयाण य कयरे कयरेहिंतो अप्पा वा ४ ? गोयमा ! सव्वत्थोवा नेरइया मारणंतियसमुग्घाएणं समोहया, वेउव्वियसमुग्घाएणं समोहया असंखेज्जगुणा, कसायसमुग्घाएणं समोहया संखेज्जगुणा, वेयणासमुग्घाएणं समोहया संखेज्जगुणा, असमोहया संखेज्जगुणा । एएसि णं भंते ! असुरकुमाराणं वेयणासमुग्घाएणं कसायसमुग्घाएणं मारणंतियसमुग्घाएणं वेउव्वियसमुग्घाएणं तेयगसमुग्घाएणं समोहयाणं असमोहयाण य कयरे कयरेहिंतो अप्पा वा ४ ? गोयमा ! सव्वत्थोवा असुरकुमारा तेयगसमुग्घाएणं समोहया, मारणंतियसमुग्घाएणं समोहया असंखेज्जगुणा, वेयणासमुग्घाएणं समोहया असंखेज्जगुणा, कसायसमुग्घाएणं समोहया संखेज्जगुणा, वेउव्वियसमुग्घाएणं समोहया संखेज्जगुणा, असमोहया असंखेज्जगुणा, एवं जाव थणियकुमारा । एएसि णं भंते ! पुढविकाइयाणं

वेयणा० कसाय० मारणंतियसमुग्घाएणं समोहयाणं असमोहयाणं य कयरे कयरेहिंतो अप्पा वा ४ ? गोयमा ! सव्वत्थोवा पुढविकाइया मारणंतियसमुग्घाएणं समोहया, कसायसमुग्घाएणं समोहया संखेज्जगुणा, वेयणासमुग्घाएणं समोहया विसेसाहिया, असमोहया असंखेज्जगुणा । एवं जाव वणस्सइकाइया, णवरं सव्वत्थोवा वाउकाइया वेउव्वियसमुग्घाएणं समोहया, मारणंतियसमुग्घाएणं समोहया असंखेज्जगुणा, कसायसमुग्घाएणं समोहया संखेज्जगुणा, वेयणासमुग्घाएणं समोहया विसेसाहिया, असमोहया असंखेज्जगुणा । बेइंदियाणं भंते ! वेयणासमुग्घाएणं कसायसमुग्घाएणं मारणंतियसमुग्घाएणं समोहयाणं असमोहयाणं य कयरे कयरेहिंतो अप्पा वा ४ ? गोयमा ! सव्वत्थोवा बेइंदिया मारणंतियसमुग्घाएणं समोहया, वेयणासमुग्घाएणं समोहया असंखेज्जगुणा, कसायसमुग्घाएणं समोहया असंखेज्जगुणा, असमोहया संखेज्जगुणा, एवं जाव चउरिंदिया । पंचिंदियतिरिक्खजोणियाणं भंते ! वेयणासमुग्घाएणं कसायसमुग्घाएणं मारणंतियसमुग्घाएणं वेउव्वियसमुग्घाएणं तेयासमुग्घाएणं समोहयाणं असमोहयाणं य कयरे कयरेहिंतो अप्पा वा ४ ? गोयमा ! सव्वत्थोवा पंचिंदियतिरिक्खजोणिया तेयासमुग्घाएणं समोहया, वेउव्वियसमुग्घाएणं समोहया असंखेज्जगुणा, मारणंतियसमुग्घाएणं समोहया असंखेज्जगुणा, वेयणासमुग्घाएणं समोहया असंखेज्जगुणा, कसायसमुग्घाएणं समोहया संखेज्जगुणा, असमोहया संखेज्जगुणा । मणुस्साणं भंते ! वेयणासमुग्घाएणं कसायसमुग्घाएणं मारणंतियसमुग्घाएणं वेउव्वियसमुग्घाएणं तेयगसमुग्घाएणं आहारगसमुग्घाएणं केवल्लिसमुग्घाएणं समोहयाणं असमोहयाणं य कयरे कयरेहिंतो अप्पा वा ४ ? गोयमा ! सव्वत्थोवा मणुस्सा आहारगसमुग्घाएणं समोहया, केवल्लिसमुग्घाएणं समोहया संखेज्जगुणा, तेयगसमुग्घाएणं समोहया संखेज्जगुणा, वेउव्वियसमुग्घाएणं समोहया संखेज्जगुणा, मारणंतियसमुग्घाएणं समोहया असंखेज्जगुणा, वेयणासमुग्घाएणं समोहया असंखेज्जगुणा, कसायसमुग्घाएणं समोहया संखेज्जगुणा, असमोहया असंखेज्जगुणा । वाणमंतरजोइसियवेमाणियाणं जहा असुरकुमारारणं ॥ ६९८ ॥ कइ णं भंते ! कसायसमुग्घाया पन्नता ? गोयमा ! चत्तारि कसायसमुग्घाया पन्नता । तंजहा—कोहसमुग्घाए, माणसमुग्घाए, मायासमुग्घाए, लोहसमुग्घाए । नेरइयाणं भंते ! कइ कसायसमुग्घाया पन्नता ? गोयमा ! चत्तारि कसायसमुग्घाया पन्नता० एवं जाव वेमाणियाणं । एगमेगस्स णं भंते ! नेरइयस्स केवइया कोहसमुग्घाया अतीता ? गोयमा ! अणंता । केवइया पुरेक्खडा ? गोयमा ! कस्सइ अत्थि कस्सइ नत्थि, जस्सत्थि जहण्णेणं एको वा दो वा तिण्णि वा, उक्कोसेणं संखेज्जा वा असं-

खेज्जा वा अणंता वा, एवं जाव वेमाणियस्स, एवं जाव लोहसमुग्घाए, एए चत्तारि दंडगा । नेरइयाणं भंते ! केवइया कोहसमुग्घाया अतीता ? गोयमा ! अणंता । केवइया पुरेक्खडा ? गोयमा ! अणंता । एवं जाव वेमाणियाणं, एवं जाव लोहसमुग्घाए, एवं एए वि चत्तारि दंडगा । एगमेगस्स णं भंते ! नेरइयस्स नेरइयत्ते केवइया कोहसमुग्घाया अतीता ? गोयमा ! अणंता । एवं जहा वेयणासमुग्घाओ भणिओ तहा कोहसमुग्घाओ वि निरवसेसं जाव वेमाणियत्ते । माणसमुग्घाए मायासमुग्घाए वि निरवसेसं जहा मारणंतियसमुग्घाए, लोहसमुग्घाओ जहा कसायसमुग्घाओ, नवरं सव्वजीवा असुराइनेरइएस्स लोहकसाएणं एगुत्तरियाए नेयव्वा । नेरइयाणं भंते ! नेरइयत्ते केवइया कोहसमुग्घाया अतीता ? गोयमा ! अणंता । केवइया पुरेक्खडा ? गोयमा ! अणंता, एवं जाव वेमाणियत्ते, एवं सट्ठाणपरट्ठाणेषु सव्वत्थ भाणियव्वा, सव्वजीवाणं चत्तारि वि समुग्घाया जाव लोहसमुग्घाओ जाव वेमाणियाणं वेमाणियत्ते ॥ ६९९ ॥ एएसि णं भंते ! जीवाणं कोहसमुग्घाएणं माणसमुग्घाएणं मायासमुग्घाएणं लोभसमुग्घाएणं य समोहयाणं अकसायसमुग्घाएणं समोहयाणं असमोहयाणं य कयरे कयरेहिंतो अप्पा वा ४ ? गोयमा ! सव्वत्थोवा जीवा अकसायसमुग्घाएणं समोहया, माणसमुग्घाएणं समोहया अणंतगुणा, कोहसमुग्घाएणं समोहया विसेसाहिया, मायासमुग्घाएणं समोहया विसेसाहिया, लोभसमुग्घाएणं समोहया विसेसाहिया, असमोहया संखेज्जगुणा । एएसि णं भंते ! नेरइयाणं कोहसमुग्घाएणं माणसमुग्घाएणं मायासमुग्घाएणं लोभसमुग्घाएणं समोहयाणं असमोहयाणं य कयरे कयरेहिंतो अप्पा वा ४ ? गोयमा ! सव्वत्थोवा नेरइया लोभसमुग्घाएणं समोहया, मायासमुग्घाएणं समोहया संखेज्जगुणा, माणसमुग्घाएणं समोहया संखेज्जगुणा, कोहसमुग्घाएणं समोहया संखेज्जगुणा, असमोहया संखेज्जगुणा । असुरकुमारारणं पुच्छ । गोयमा ! सव्वत्थोवा असुरकुमारा कोहसमुग्घाएणं समोहया, माणसमुग्घाएणं समोहया संखेज्जगुणा, मायासमुग्घाएणं समोहया संखेज्जगुणा, लोभसमुग्घाएणं समोहया संखेज्जगुणा, असमोहया संखेज्जगुणा, एवं सव्वदेवा जाव वेमाणिया । पुढवि-काइयाणं पुच्छ । गोयमा ! सव्वत्थोवा पुढविकाइया माणसमुग्घाएणं समोहया, कोहसमुग्घाएणं समोहया विसेसाहिया, मायासमुग्घाएणं समोहया विसेसाहिया, लोभसमुग्घाएणं समोहया विसेसाहिया, असमोहया संखेज्जगुणा । एवं जाव पंचि-दियतिरिक्खजोणिया, मणुस्सा जहा जीवा, नवरं माणसमुग्घाएणं समोहया असंखे-ज्जगुणा ॥ ७०० ॥ कइ णं भंते ! छाउमत्थिया समुग्घाया पञ्चत्ता ? गोयमा ! छ छाउ-मत्थिया समुग्घाया पञ्चत्ता । तंजहा-वेयणासमुग्घाए, कसायसमुग्घाए, मारणंतिय-

समुग्धाए, वेडव्वियसमुग्धाए, तेयासमुग्धाए, आहारगसमुग्धाए । नेरइयाणं भंते ! कइ छाउमत्थिया समुग्धाया पन्नत्ता ? गोयमा ! चत्तारि छाउमत्थिया समुग्धाया पन्नत्ता । तंजहा-वेयणासमुग्धाए, कसायसमुग्धाए, मारणंतियसमुग्धाए, वेडव्वियसमुग्धाए । असुरकुमारारणं पुच्छा । गोयमा ! पंच छाउमत्थिया समुग्धाया पन्नत्ता । तंजहा-वेयणासमुग्धाए, कसायसमुग्धाए, मारणंतियसमुग्धाए, वेडव्वियसमुग्धाए, तेयासमुग्धाए । एगिंदियविगल्लिंदियाणं पुच्छा । गोयमा ! तिण्णि छाउमत्थिया समुग्धाया पन्नत्ता । तंजहा-वेयणासमुग्धाए, कसायसमुग्धाए, मारणंतियसमुग्धाए, गवरं वाउकाइयाणं चत्तारि समुग्धाया पन्नत्ता । तं०-वे० क० मा० वेड० । पं० पुच्छा । गो० । पंच स० प० । तंजहा-वेयणासमुग्धाए, कसायसमुग्धाए, मारणंतियसमुग्धाए, वेडव्वियसमुग्धाए, तेयगसमुग्धाए । मणूसाणं भंते ! कइ छाउमत्थिया समुग्धाया पन्नत्ता ? गोयमा ! छ छाउमत्थिया समुग्धाया पन्नत्ता । तंजहा-वेयणासमुग्धाए, कसायसमुग्धाए, मारणंतियसमुग्धाए, वेडव्वियसमुग्धाए, तेयगसमुग्धाए, आहारगसमुग्धाए ॥ ७०१ ॥ जीवे णं भंते ! वेयणासमुग्धाएणं समोहए समोहणित्ता जे पोग्गले निच्छुभइ तेहिं णं भंते ! पोग्गलेहिं केवइए खेत्ते अप्फुण्णे, केवइए खेत्ते फुडे ? गोयमा ! सरीरप्पमाणमेत्ते विक्खंभवाहल्लेणं नियमा छदिसिं एवइए खेत्ते अप्फुण्णे, एवइए खेत्ते फुडे । से णं भंते ! खेत्ते केवइकालस्स अप्फुण्णे, केवइकालस्स फुडे ? गोयमा ! एगसमइएण वा दुसमइएण वा तिसमइएण वा विग्गहेणं एवइयकालस्स अप्फुण्णे, एवइयकालस्स फुडे । ते णं भंते ! पोग्गले केवइकालस्स निच्छुभइ ? गोयमा ! जहण्णेणं अंतोमुहुत्तस्स, उक्कोसेण वि अंतोमुहुत्तस्स । ते णं भंते ! पोग्गला निच्छुद्धा समाणा जाइं तत्थ पाणाइं भूयाइं जीवाइं सत्ताइं अभिहणंति वत्तेति लेसेंति संघाएंति संघेइंति परियावेंति किलामेंति उह्वेंति तेहिंतो णं भंते ! से जीवे कइकिरिए ? गोयमा ! सिय तिकिरिए, सिय चउकिरिए, सिय पंचकिरिए । ते णं भंते ! जीवा ताओ जीवाओ कइकिरिया ? गोयमा ! सिय तिकिरिया, सिय चउकिरिया, सिय पंचकिरिया । से णं भंते ! जीवे ते य जीवा अण्णेसिं जीवाणं परंपराधाएणं कइकिरिया ? गोयमा ! तिकिरिया वि चउकिरिया वि पंचकिरिया वि ॥ ७०२ ॥ नेरइए णं भंते ! वेयणासमुग्धाएणं समोहए एवं जहेव जीवे, नवरं नेरइयाभिलावो, एवं निरवसेसं जाव वेमाणिए । एवं कसायसमुग्धाओ वि भाणियव्वो । जीवे णं भंते ! मारणंतियसमुग्धाएणं समोहणइ समोहणित्ता जे पोग्गले निच्छुभइ तेहिं णं भंते ! पोग्गलेहिं केवइए खेत्ते अप्फुण्णे, केवइए खेत्ते फुडे ? गोयमा ! सरीरप्पमाणमेत्ते विक्खंभवाहल्लेणं, आयामेणं जहण्णेणं अंगुलस्स असंखेज्जभागं, उक्कोसेणं असंखेज्जाइं जोयणाइं एगदिसिं एवइए

खेत्ते अप्फुण्णे, एवइए खेत्ते फुडे । से णं भंते ! खेत्ते केवइकालस्स अप्फुण्णे, केवइ-  
 कालस्स फुडे ? गोयमा ! एगसमइएण वा दुसमइएण वा तिसमइएण वा चउसमइ-  
 एण वा विग्गहेणं एवइकालस्स अप्फुण्णे, एवइकालस्स फुडे, सेसं तं चेव जाव  
 पंचकिरिया वि । एवं नेरइए वि, णवरं आयामेणं जहण्णेणं साइरेगं जोयणसहस्सं,  
 उक्कोसेणं असंखेज्जाइं जोयणाइं एगदिसिं एवइए खेत्ते अप्फुण्णे, एवइए खेत्ते फुडे,  
 विग्गहेणं एगसमइएण वा दुसमइएण वा तिसमइएण वा, नवरं चउसमइएण  
 वा न भन्नइ, सेसं तं चेव जाव पंचकिरिया वि । असुरकुमारस्स जहा जीव-  
 पए, णवरं विग्गहो तिसमइओ जहा नेरइयस्स, सेसं तं चेव जहा असुर-  
 कुमारे, एवं जाव वेमाणिए, नवरं एगिंदिए जहा जीवे निरवसेसं ॥ ७०३ ॥  
 जीवे णं भंते ! वेउव्वियसमुग्घाएणं समोहए समोहणित्ता जे पुग्गले निच्छुभइ  
 तेहि णं भंते ! पोग्गलेहिं केवइए खेत्ते अप्फुण्णे, केवइए खेत्ते फुडे ? गोयमा !  
 सरीरप्पमाणमेत्ते विक्खंभवाहल्लेणं, आयामेणं जहण्णेणं अंगुलस्स संखेज्जइभागं,  
 उक्कोसेणं संखेज्जाइं जोयणाइं एगदिसिं विदिसिं वा एवइए खेत्ते अप्फुण्णे, एवइए  
 खेत्ते फुडे । से णं भंते ! केवइकालस्स अप्फुण्णे, केवइकालस्स फुडे ? गोयमा !  
 एगसमइएण वा दुसमइएण वा तिसमइएण वा विग्गहेणं एवइकालस्स अप्फुण्णे,  
 एवइकालस्स फुडे, सेसं तं चेव जाव पंचकिरिया वि, एवं नेरइए वि, नवरं आया-  
 मेणं जहण्णेणं अंगुलस्स असंखेज्जइभागं, उक्कोसेणं संखेज्जाइं जोयणाइं एगदिसिं ॥  
 एवइए खेत्ते केवइकालस्स ? तं चेव जहा जीवपए, एवं जहा नेरइयस्स तहा  
 असुरकुमारस्स, नवरं एगदिसिं विदिसिं वा, एवं जाव थणियकुमारस्स । वाउका-  
 इयस्स जहा जीवपए, णवरं एगदिसिं । पंचिंदियतिरिक्खजोणियस्स निरवसेसं  
 जहा नेरइयस्स । मणूसवाणमंतरजोइसियवेमाणियस्स निरवसेसं जहा असुरकुमा-  
 रस्स ॥ ७०४ ॥ जीवे णं भंते ! तेयगसमुग्घाएणं समोहए समोहणित्ता जे  
 पोग्गले निच्छुभइ तेहि णं भंते ! पोग्गलेहिं केवइए खेत्ते अप्फुण्णे, केवइए खेत्ते  
 फुडे ? एवं जहेव वेउव्विए समुग्घाए तहेव, नवरं आयामेणं जहण्णेणं अंगुलस्स  
 असंखेज्जइभागं, सेसं तं चेव, एवं जाव वेमाणियस्स, णवरं पंचिंदियतिरिक्खजोणि-  
 यस्स एगदिसिं एवइए खेत्ते अप्फुण्णे, एवइए खेत्ते फुडे ॥ ७०५ ॥ जीवे णं भंते !  
 आहारगसमुग्घाएणं समोहए समोहणित्ता जे पोग्गले निच्छुभइ तेहि णं भंते !  
 पोग्गलेहिं केवइए खेत्ते अप्फुण्णे, केवइए खेत्ते फुडे ? गोयमा ! सरीरप्पमाणमेत्ते  
 विक्खंभवाहल्लेणं, आयामेणं जहण्णेणं अंगुलस्स असंखेज्जइभागं, उक्कोसेणं संखेज्जाइं  
 जोयणाइं एगदिसिं, एवइए खेत्ते एगसमइएण वा दुसमइएण वा तिसमइएण वा

विग्गहेण एवइकालस्स अप्पुण्णे, एवइकालस्स फुडे । ते णं भंते ! पोगला केवइ-  
कालस्स निच्छुब्भंति ? गोयमा ! जहन्नेण अंतोमुहुत्तस्स, उक्कोसेण वि अंतोमुहु-  
त्तस्स ॥ ७०६ ॥ ते णं भंते ! पोगला निच्छूढा समाणा जाइं तत्थ पाणाईं  
भूयाईं जीवाईं सत्ताईं अभिहणंति जाव उद्द्वेति, ते(हि)णं भंते ! जीवे कइ-  
किरिए ? गोयमा ! सिय तिकिरिए, सिय चउकिरिए, सिय पंचकिरिए । ते णं  
भंते ! ० जीवाओ कइकिरिया ? गोयमा ! एवं चेव । से णं भंते ! जीवे ते य जीवा  
अण्णेसिं जीवाणं परंपराघाएणं कइकिरिया ? गोयमा ! तिकिरिया वि चउकिरिया वि  
पंचकिरिया वि, एवं मणूसे वि ॥ ७०७ ॥ अणगारस्स णं भंते ! भावियप्पणो  
केवलिसमुग्घाएणं समोहयस्स जे चरमा णिज्जरापोगला सुहुमा णं ते पोगला  
पन्नत्ता समणाउसो ! सव्वलोगं पि य णं ते फुसित्ताणं चिट्ठंति ? हंता गोयमा !  
अणगारस्स भावियप्पणो केवलिसमुग्घाएणं समोहयस्स जे चरमा णिज्जरापोगला  
सुहुमा णं ते पोगला पन्नत्ता समणाउसो ! सव्वलोगं पि य णं ते फुसित्ताणं चिट्ठंति  
॥ ७०८ ॥ छउमत्थे णं भंते ! मणूसे तेसिं णिज्जरापोगलाणं किंचि वण्णेणं वण्णं  
गंधेणं गंधं रसेणं रसं फासेण वा फासं जाणइ पासइ ? गोयमा ! णो इणट्ठे  
समट्ठे । से केणट्ठेणं भंते ! एवं वुच्चइ-‘छउमत्थे णं मणूसे तेसिं णिज्जरापोगलाणं  
णो किंचि वण्णेणं वण्णं गंधेणं गंधं रसेणं रसं फासेणं फासं जाणइ पासइ’ ?  
गोयमा ! अयण्णं जंबुद्दीवे दीवे सव्वदीवसमुद्दाणं सव्वब्भंतराए सव्वखुड्डाए वट्ठे  
तेल्लापूयसंठाणसंठिए वट्ठे रहचक्कवालसंठाणसंठिए वट्ठे पुक्खरकण्णियासंठाणसंठिए  
वट्ठे पडिपुण्णचंदसंठाणसंठिए एगं जोयणसयसहस्सं आयामविकखंभेणं तिण्णि जोय-  
णसयसहस्साइं सोलस सहस्साइं दोण्णि य सत्तावीसे जोयणसए तिण्णि य कोसे  
अट्ठावीसं च वणुसयं तेरस य अंगुलाई अद्धंगुलं च किंचिविसेसाहिए परिकखेवणं  
पन्नत्ते । देवे णं महिद्धिए जाव महासोक्खे एगं महं सविलेवणं गंधसमुग्गयं  
गहाय तं अवदालेइ, तं महं एगं सविलेवणं गंधसमुग्गयं अवदालइत्ता इणामेव  
कट्ठु केवलकप्पं जंबुद्दीवं दीवं तिहिं अच्छराणिवाएहिं तिसत्तखुत्तो अणुपरियट्ठित्ताणं  
हव्वमागच्छेज्जा, से नूणं गोयमा ! से केवलकप्पे जंबुद्दीवे दीवे तेहिं घाणपोगलेहिं  
फुडे ? हंता ! फुडे, छउमत्थे णं गोयमा ! मणूसे तेसिं घाणपुग्गलाणं किंचि  
वण्णेणं वण्णं गंधेणं गंधं रसेणं रसं फासेणं फासं जाणइ पासइ ? भगवं ! नो  
इणट्ठे समट्ठे, से एणणट्ठेणं गोयमा ! एवं वुच्चइ-‘छउमत्थे णं मणूसे तेसिं णिज्ज-  
रापोगलाणं णो किंचि वण्णेणं वण्णं गंधेणं गंधं रसेणं रसं फासेणं फासं जाणइ  
पासइ, एसुहुमा णं ते पोगला पन्नत्ता समणाउसो ! सव्वलोगं पि य णं फुसित्ता-

णं चिट्ठंति' ॥ ७०९ ॥ कम्हा णं भंते ! केवली समुग्घायं गच्छइ ? गोयमा ! केवल्लिस्स चत्तारि कम्मसा अक्खीणा अवेइया अणिज्जिण्णा भवंति, तंजहा-वेयणिजे, आउए, नामे, गोए, सव्ववहुप्पएसे से वेयणिजे कम्ममे हवइ, सव्वत्थोवे आउए कम्ममे हवइ, विसमं समं करेइ बंधणेहिं ठिईहि य, विसमसमीकरणयाए बंधणेहिं ठिईहि य एवं खलु केवली समोहणइ, एवं खलु० समुग्घायं गच्छइ । सव्वे वि णं भंते ! केवली समोहणंति, सव्वे वि णं भंते ! केवली समुग्घायं गच्छंति ? गोयमा ! णो इणट्ठे समट्ठे । जरूसाउएण तुल्लाइं, बंधणेहिं ठिईहि य । भवोवग्गहकम्माइं, समुग्घायं से ण गच्छइ ॥ १ ॥ अगंतूणं समुग्घायं, अणंता केवली जिणा । जरमरणविप्पमुक्का, सिद्धिं वरगइं गया ॥ २ ॥ ७१० ॥ कइसमइए णं भंते ! आउज्जीकरणे पन्नते ? गोयमा ! असंखेजसमइए अंतोमुहुत्तिए आउज्जीकरणे पन्नते । कइसमइए णं भंते ! केवल्लिसमुग्घाए पन्नते ? गोयमा ! अट्ठसमइए० पन्नते । तंजहा-पढमे समए दंडं करेइ, वीए समए कवाडं करेइ, तइए समए मंथं करेइ, चउत्थे समए लोगं पूरेइ, पंचमे समए लोयं पडिसाहरइ, छट्ठे समए मंथं पडिसाहरइ, सत्तमए समए कवाडं पडिसाहरइ, अट्ठमे समए दंडं पडिसाहरइ, दंडं पडिसाहरेता तओ पच्छा सरीरत्थे भवइ ॥ ७११ ॥ से णं भंते ! तहा समुग्घायगए किं मणजोगं जुंजइ, वइजोगं जुंजइ, कायजोगं जुंजइ ? गोयमा ! नो मणजोगं जुंजइ, नो वइजोगं जुंजइ, कायजोगं जुंजइ । कायजोगं णं भंते ! जुंजमाणे किं ओरालियसरीरकायजोगं जुंजइ, ओरालियमीसासरीरकायजोगं जुंजइ, वेउव्वियसरीरकायजोगं जुंजइ, वेउव्वियमीसासरीरकायजोगं जुंजइ, आहारगसरीरकायजोगं०, आहारगमीसासरीरकायजोगं जुंजइ, कम्मगसरीरकायजोगं जुंजइ ? गोयमा ! ओरालियसरीरकायजोगं पि जुंजइ, ओरालियमीसासरीरकायजोगं पि जुंजइ, नो वेउव्वियसरीरकायजोगं०, नो वेउव्वियमीसासरीरकायजोगं०, नो आहारगसरीरकायजोगं०, नो आहारगमीसासरीरकायजोगं०, कम्मगसरीरकायजोगं पि जुंजइ, पढमट्ठमेसु समएसु ओरालियसरीरकायजोगं जुंजइ, बिइयल्लट्ठसत्तमेसु समएसु ओरालियमीसासरीरकायजोगं जुंजइ, तइयचउत्थपंचमेसु समएसु कम्मगसरीरकायजोगं जुंजइ ॥ ७१२ ॥ से णं भंते ! तहा समुग्घायगए सिज्झइ बुज्झइ मुचइ परिनिव्वाइ सव्वदुक्खाणं अंतं करेइ ? गोयमा ! नो इणट्ठे समट्ठे । से णं तओ पडिनियत्तइ पडिनियत्तइत्ता तओ पच्छा मणजोगं पि जुंजइ, वइजोगं पि जुंजइ, कायजोगं पि जुंजइ । मणजोगं जुंजमाणे किं सच्चमणजोगं जुंजइ, मोसमणजोगं जुंजइ, सच्चामोसमणजोगं जुंजइ, असच्चामोसमणजोगं जुंजइ ? गोयमा ! सच्चमणजोगं०, नो मोसम-

णजोगं०, नो सच्चा मोसमणजोगं जुंजइ, असच्चा मोसमणजोगं जुंजइ, वइजोगं जुंजमाणे किं सच्चवइजोगं जुंजइ, मोसवइजोगं जुंजइ, सच्चा मोसवइजोगं०, असच्चा मोसवइजोगं जुंजइ? गोयमा ! सच्चवइजोगं०, नो मोसवइजोगं०, नो सच्चा मोसवइजोगं०, असच्चा मोसवइजोगं पि जुंजइ, कायजोगं जुंजमाणे आगच्छेज्ज वा गच्छेज्ज वा चिट्ठेज्ज वा निसीएज्ज वा तुयट्ठेज्ज वा उल्लंघेज्ज वा पल्लंघेज्ज वा, पाडिहारियं पीढफलसजेजा-संथारणं पच्चप्पिणेज्जा ॥ ७१३ ॥ से णं भंते ! तद्वा सजोगी सिज्झइ जाव अंतं करेइ? गोयमा ! नो इणट्ठे समट्ठे । से णं पुव्वामेव सण्णिस्स पंचिदियपज्जत्तयस्स जहण्णजोगिस्स हेट्ठा असंखेज्जगुणपरिहीणं पढमं मणजोगं निरंभइ, तओ अणंतंरं वेईदियपज्जत्तगस्स जहण्णजोगिस्स हेट्ठा असंखेज्जगुणपरिहीणं दोच्चं वइजोगं निरंभइ, तओ अणंतंरं च णं सुहुमस्स पणगजीवस्स अपज्जत्तयस्स जहण्णजोगिस्स हेट्ठा असंखेज्जगुणपरिहीणं तच्चं कायजोगं निरंभइ, से णं एएण उवाएणं-पढमं मणजोगं निरंभइ, मणजोगं निरंभित्ता वइजोगं निरंभइ, वइजोगं निरंभित्ता कायजोगं निरंभइ, कायजोगं निरंभित्ता जोगनिरोहं करेइ, जोगनिरोहं करेत्ता अजोगत्तं पाउणइ, अजोगत्तं पाउणित्ता ईसिं हस्सपंचक्खरुच्चारणद्धाए असंखेज्जसमइयं अंतोमु-हुत्तिंयं सेलेसिं पडिवज्जइ, पुव्वरइयगुणसेदीयं च णं कम्मं, तीसे सेलेसिमद्धाए असंखेज्जाहिं गुणसेदीहिं असंखेजे कम्मखंधे खवयइ, खवइत्ता वेयणिज्जाउणामगेत्ते इच्चेए चत्तारि कम्मंसे जुगवं खवेइ, जुगवं खवेत्ता ओरालियतेयाकम्मगाई सव्वाहिं विप्पजहणाहिं विप्पजहइ, विप्पजहित्ता उज्जुसेदीपडिवण्णो अफुसमाणगईए एगस-मएणं अविग्गहेणं उड्ढं गंता सागारोवउत्ते सिज्झइ बुज्झइ०, तत्थ सिद्धो भवइ । ते णं तत्थ सिद्धा भवन्ति असरीरा जीवघणा दंसणणाणोवउत्ता णिट्ठियद्धा णीरया णिरेयणा वितिमिरा विसुद्धा सासयमणागयद्धं कालं चिट्ठंति । से केणट्ठेणं भंते ! एवं बुच्चइ-‘ते णं तत्थ सिद्धा भवन्ति असरीरा जीवघणा दंसणणाणोवउत्ता णिट्ठियद्धा णीरया णिरेयणा वितिमिरा विसुद्धा सासयमणागयद्धं कालं चिट्ठंति’? गोयमा ! से जह्वाणामए बीयाणं अग्गिदड्ढाणं पुणरवि अंकुरप्पत्ती ण भवइ, एवमेव सिद्धाण वि कम्मबीएसु दड्ढेसु पुणरवि जम्मुप्पत्ती ण भवइ, से तेणट्ठेणं गोयमा ! एवं बुच्चइ-‘ते णं तत्थ सिद्धा भवन्ति असरीरा जीवघणा दंसणणाणोवउत्ता णिट्ठियद्धा णीरया णिरेयणा वितिमिरा विसुद्धा सासयमणागयद्धं कालं चिट्ठंति’ ति । निच्छि-ण्णसव्वदुक्खा जाइजरामरणबन्धणविमुक्का । सासयमव्वाबाहं चिट्ठंति सुही सुहं पत्ता ॥ १ ॥ ७१४ ॥ पन्नवणाए भगवईए छत्तीसइमं समुग्घायपयं समत्तं ॥ पण्णवणासुत्तं समत्तं ॥





णमोऽस्त्यु णं समणस्स भगवओ णायपुत्तमहावीरस्स

# सुत्तागमे

तत्थ णं

## जंबुद्दीवपणत्ती

णमो अरिहंताणं णमो सिद्धाणं णमो आयरियाणं णमो उवज्झायाणं णमो लोए  
सव्वसाहूणं । तेणं कालेणं तेणं समएणं मिहिला णामं णयरी होत्था, रिद्धत्थिमिय-  
समिद्धा वण्णओ । तीसे णं मिहिलाए णयरीए वहिया उत्तरपुरच्छिमे दिसीभाए एत्थ  
णं भाणिमहे णामं उज्जाणे होत्था, वण्णओ । जियसतू राया, धारिणी देवी,  
वण्णओ । तेणं कालेणं तेणं समएणं सामी समोसढे, परिसा णिग्गया, धम्मो  
कहिओ, परिसा पडिग्गया ॥ १ ॥ तेणं कालेणं तेणं समएणं समणस्स भगवओ  
महावीरस्स जेट्ठे अंतेवासी इंदभूर्इ णामं अणगारे गोयमगोत्तेणं सत्तुस्सेहे समचउ-  
रंससंठाणे जाव [ तिक्खुत्तो आयाहिणं पयाहिणं करेइ २ ता वंदइ णमंसइ वंदित्ता  
णमंसित्ता ] एवं वयासी-कहि णं भंते ! जंबुद्दीवे २ ? केमहालए णं भंते ! जंबुद्दीवे  
२ ? किंसंठिए णं भंते ! जंबुद्दीवे २ ? किमायारभावपडोयारे णं भंते ! जंबुद्दीवे  
२ पणत्ते ?, गोयमा ! अयण्णं जंबुद्दीवे २ सव्वदीवसमुद्दाणं सव्वब्भंतराए  
सव्वखुड्ढाए वट्ठे तेज्जापूयसंठाणसंठिए वट्ठे रहचक्कवालसंठाणसंठिए वट्ठे पुक्खरकणि-  
यासंठाणसंठिए वट्ठे पडिपुण्णचंदसंठाणसंठिए एगं जोयणसयसहस्सं आयामवि-  
क्खंभेणं तिण्णि जोयणसयसहस्साइं सोलस सहस्साइं दोण्णि य सत्तावीसे जोयणसए  
तिण्णि य कोसे अट्ठावीसं च धणुसयं तेरस य अंगुलाइं अद्दंगुलं च किंचिविसेसाहिए  
परिक्खेवेणं पणत्ते ॥ २-३ ॥ से णं एगाए वइरामइए जगईए सव्वओ समंता  
संपरिकिक्खत्ते, सा णं जगई अट्ठ जोयणाइं उट्ठुं उच्चतेणं मूले बारस जोयणाइं  
विक्खंभेणं मज्झे अट्ठ जोयणाइं विक्खंभेणं उवरिं चत्तारि जोयणाइं विक्खंभेणं मूले  
विच्छिन्ना मज्झे संखित्ता उवरिं तणुया गोपुच्छसंठाणसंठिया सव्ववइरामइं अच्छा  
सण्हा लण्हा घट्ठा मट्ठा णीरया णिम्मला णिप्पंका णिक्कंडच्छाया सप्पभा समिरीया  
सउज्जोया पासादीया दरिसणिज्जा अभिह्वा पडिह्वा, सा णं जगई एगेणं महंतग-  
वक्खकडएणं सव्वओ समंता संपरिकिक्खत्ता, से णं गवक्खकडए अद्दजोयणं उट्ठुं उच्चतेणं  
पंच धणुसयाइं विक्खंभेणं सव्वरयणामए अच्छे जाव पडिह्वे, तीसे णं जगईए उप्पि

बहुमज्झदेसभाए एत्थ णं महइ एगा पउमवरवेइया पण्णत्ता, अद्धजोयणं उड्ढं उच्च-  
 तेणं पंच धणुसयाइं विक्खंभेणं जगईसमिया परिकखेवेणं सव्वरयणाभइ अच्छा जाव  
 पडिस्सवा । तीसे णं पउमवरवेइयाए अयमेयारूवे वण्णावासे पण्णत्ते, तंजहा-वइरामया  
 णेमा एवं जहा **जीवाभिगमे** जाव अट्ठो जाव धुवा णियया सासया जाव णिच्चा  
 ॥ ४ ॥ तीसे णं जगईए उप्पि वाहिं पउमवरवेइयाए एत्थ णं महं एगे वणसंडे पण्णत्ते,  
 देसूणाइं दो जोयणाइं विक्खंभेणं जगईसमए परिकखेवेणं वणसंडवण्णओ णेयव्वो  
 ॥ ५ ॥ तस्स णं वणसंडस्स अंतो बहुसमरमणिज्जे भूमिभागे पण्णत्ते, से जहाणामए-  
 आल्लिणपुक्खरेइ वा जाव णाणाविहपंचवण्णेहिं मणीहिं तणेहिं उवसोभिए, तंजहा-  
 किण्हेहिं एवं वण्णो गंधो रसो फासो सहो पुक्खरिणीओ पव्वयगा धरगा मंडवगा  
 पुढवित्तिनावट्टया य णेयव्वा, तत्थ णं बहवे वाणमंतरा देवा य देवीओ य  
 आसयंति सयंति चिद्धंति णिसीयंति तुयट्ठंति रमंति लळंति क्रीळंति मोहंति पुरा-  
 पोराणाणं सुपरक्कंताणं सुभाणं कल्लाणाणं कडाणं कम्माणं कल्लाणफलवित्तिविसेसं  
 पच्चणुभवमाणा विहरंति । तीसे णं जगईए उप्पि अंतो पउमवरवेइयाए एत्थ णं  
 एगे महं वणसंडे पण्णत्ते, देसूणाइं दो जोयणाइं विक्खंभेणं वेइयासमएण परिकखे-  
 वेणं किण्हे जाव तणविहूणे णेयव्वे ॥ ६ ॥ जंबुद्वीवस्स णं भंते ! दीवस्स कइ  
 दारा पण्णत्ता ? गो० ! चत्तारि दारा प०, तं०-विजए १ वेजयंते २ जयंते ३  
 अपराजिए ४ ॥ ७ ॥ कहि णं भंते ! जंबुद्वीवस्स दीवस्स विजए णामं दारे पण्णत्ते ?  
 गो० ! जंबुद्वीवे दीवे मंदरस्स पव्वयस्स पुरत्थिमेणं पणयालीसं जोयणसहस्साइं  
 वीइवइत्ता जंबुद्वीवदीवपुरत्थिमपेरंते लवणसमुदपुरत्थिमदस्स पच्चत्थिमेणं सीयाए  
 महाणइए उप्पि एत्थ णं जंबुद्वीवस्स० विजए णामं दारे पण्णत्ते, अट्ठ जोयणाइं उड्ढं  
 उच्चतेणं चत्तारि जोयणाइं विक्खंभेणं तावइयं चैव पवेसेणं, सेए दरकणगथूभियाए  
 जाव दारस्स वण्णओ जाव रायहाणी । एवं चत्तारि वि दारा सरायहाणिया  
 भाणियव्वा ॥ ८ ॥ जंबुद्वीवस्स णं भंते ! दीवस्स दारस्स य दारस्स य  
 केवइए अबाहाए अंतरे पण्णत्ते ? गो० ! अउणासीइं जोयणसहस्साइं वावण्णं च  
 जोयणाइं देसूणं च अद्धजोयणं दारस्स य २ अबाहाए अंतरे पण्णत्ते, **गाहा-**  
 अउणासीइं सहस्सा वावण्णं चैव जोयणा हुंति । ऊणं च अद्धजोयण दारंतर  
 जंबुद्वीवस्स ॥ ९ ॥ ९ ॥ कहि णं भंते ! जंबुद्वीवे दीवे भरहे णामं वासे पण्णत्ते ?  
 गो० ! चुल्लिमवंतस्स वासहरपव्वयस्स दाहिणेणं दाहिणलवणसमुदस्स उत्तरेणं  
 पुरत्थिमलवणसमुदस्स पच्चत्थिमेणं पच्चत्थिमलवणसमुदस्स पुरत्थिमेणं एत्थ णं  
 जंबुद्वीवे दीवे भरहे णामं वासे पण्णत्ते, खाणुबहुले कंटगबहुले विसमबहुले दुग्गबहुले

पञ्चयवहुले पवायवहुले उज्जरवहुले णिज्जरवहुले खड्गवहुले दरिवहुले णईवहुले दहवहुले रुक्खवहुले गुच्छवहुले गुम्भवहुले लयावहुले वल्लीवहुले अडवीवहुले साव-  
यवहुले तणवहुले तक्रवहुले डिम्बवहुले डमरवहुले दुम्भिव्खवहुले दुक्कालवहुले  
पासंडवहुले किवणवहुले वणीमगवहुले ईतिवहुले मारिवहुले कुबुट्टिवहुले अणावुट्टि-  
वहुले रायवहुले रोगवहुले संकिलेसवहुले अभिक्खणं अभिक्खणं संखोहवहुले पाईण-  
पडीणायए उदीणदाहिणविच्छिण्णे उत्तरओ पलियं कसंठाणसंठिए दाहिणओ धणपिट्ठ-  
संठिए तिहा लवणसमुदं पुट्ठे गंगासिंधूहिं महाणईहिं वेयङ्गेण य पव्वएण छव्भागपविभत्ते  
जंबुदीवदीवणउयसयभागे पंचछवीसे जोयणसए छच्च एगूणवीसइभाए जोयणस्स  
विक्खंभेणं । भरहस्स णं वासस्स बहुमज्झदेसभाए एत्थ णं वेयङ्गे णां पव्वए पण्णत्ते,  
जे णं भरहं वासं दुहा विभयमाणे २ चिट्ठइ, तं०—दाहिणङ्गभरहं च उत्तरङ्गभरहं च  
॥ १० ॥ कहि णं भंते ! जंबुदीवे दीवे दाहिणङ्गे भरहे णां वासे पण्णत्ते ? गो० ! वेयङ्गस्स  
पञ्चयस्स दाहिणेणं दाहिणलवणसमुदस्स उत्तरेणं पुरत्थिमलवणसमुदस्स पच्चत्थिमेणं  
पच्चत्थिमलवणसमुदस्स पुरत्थिमेणं एत्थ णं जंबुदीवे दीवे दाहिणङ्गभरहे णां वासे  
पण्णत्ते, पाईणपडीणायए उदीणदाहिणविच्छिण्णे अद्धचंदसंठाणसंठिए तिहा लवणसमुदं  
पुट्ठे गंगासिंधूहिं महाणईहिं तिभागपविभत्ते दोण्णि अट्ठतीसे जोयणसए तिण्णि य  
एगूणवीसइभागे जोयणस्स विक्खंभेणं, तस्स जीवा उत्तरेणं पाईणपडीणायया दुहा  
लवणसमुदं पुट्ठा पुरत्थिमिह्हाए कोडीए पुरत्थिमिह्ळं लवणसमुदं पुट्ठा पच्चत्थिमिह्हाए  
कोडीए पच्चत्थिमिह्ळं लवणसमुदं पुट्ठा णव जोयणसहस्साइं सत्त य अडयाले जोयणसए  
दुवालस य एगूणवीसइभाए जोयणस्स आयासेणं, तीसे धणुपुट्ठे दाहिणेणं णव जोयण-  
सहस्साइं सत्तछावट्ठे जोयणसए इक्कं च एगूणवीसइभागे जोयणस्स किंचिविसेसाहियं  
परिक्खेवेणं पण्णत्ते, दाहिणङ्गभरहस्स णं भंते ! वासस्स केरिसए आयारभावपडोयारे  
पण्णत्ते ? गो० ! बहुसमरमणिजे भूमिभागे पण्णत्ते, से जहाणामए—आलिगपुक्खरेइ  
वा जाव णाणाविहपञ्चवण्णेहिं मणीहिं तणेहिं उवसोमिए, तंजहा—कित्तिमेहिं चेव  
अकित्तिमेहिं चेव, दाहिणङ्गभरहे णं भंते ! वासे मणुयाणं केरिसए आयारभावपडो-  
यारे पण्णत्ते ? गोयमा ! ते णं मणुया बहुसंघयणा बहुसंठाणा बहुउच्चतपज्जवा  
बहुआउपज्जवा बहूइं वासाइं आउं पालेंति पालित्ता अप्पेगइया गिरयगामी अप्पेगइया  
तिरियगामी अप्पेगइया मणुयगामी अप्पेगइया देवगामी अप्पेगइया सिज्झंति बुज्झंति  
मुच्चंति परिणिव्वारयंति सव्वदुक्खाणमंतं करेंति ॥ ११ ॥ कहि णं भंते ! जंबुदीवे २  
भरहे वासे वेयङ्गे णां पव्वए पण्णत्ते ? गो० ! उत्तरङ्गभरहवासस्स दाहिणेणं दाहिणङ्ग-  
भरहवासस्स उत्तरेणं पुरत्थिमलवणसमुदस्स पच्चत्थिमेणं पच्चत्थिमलवणसमुदस्स पुर-

त्थिमेणं एत्थ णं जंबुद्वीवे २ भरहे वासे वेयङ्के णामं पव्वए पण्णत्ते, पाईणपडीणायए उदीणदाहिणविच्छिण्णे दुहा लवणसमुदं पुट्टे पुरत्थिमिह्णए कोडीए पुरत्थिमिह्णं लवणसमुदं पुट्टे पच्चत्थिमिह्णए कोडीए पच्चत्थिमिह्णं लवणसमुदं पुट्टे, पणवीसं जोयणाइं उड्ढं उच्चत्तेणं छस्सकोसाइं जोयणाइं उव्वेहेणं पण्णासं जोयणाइं विक्खंभेणं, तस्स बाहा पुरत्थिमपच्चत्थिमेणं चत्तारि अट्ठासीए जोयणसए सोलस य एगूणवीसइभागे जोयणस्स अट्ठभागं च आयामेणं पच्चत्ता, तस्स जीवा उत्तरेणं पाईणपडीणायया दुहा लवणसमुदं पुट्टा पुरत्थिमिह्णए कोडीए पुरत्थिमिह्णं लवणसमुदं पुट्टा पच्चत्थिमिह्णए कोडीए पच्चत्थिमिह्णं लवणसमुदं पुट्टा दस जोयणसहस्साइं सत्त य वीसे जोयणसए दुवालस य एगूणवीसइभागे जोयणस्स आयामेणं, तीसे धणुपट्टे दाहिणेणं दस जोयणसहस्साइं सत्त य तेयाले जोयणसए पण्णरस य एगूणवीसइभागे जोयणस्स परिवक्खेवेणं रुयगसंठाणसंठिए सव्वरययामए अच्छे सण्हे लट्ठे घट्टे मट्टे णीरए णिम्मले णिप्पंके णिक्कंफडच्छाए सप्पमे समिरीए पासाईए दरिसणिजे अभिरुवे पडिरुवे । उभओ पासिं दोहिं पउमवरवेइयाहिं दोहिं य वणसंडेहिं सव्वओ समंता संपरिविक्खत्ते । ताओ णं पउमवरवेइयाओ अट्ठजोयणं उड्ढं उच्चत्तेणं पंचधणुसयाइं विक्खंभेणं पव्वयसमियाओ आयामेणं वण्णओ भाणियव्वो । ते णं वणसंडा देसूणाइं दो जोयणाइं विक्खंभेणं पउमवरवेइयासमगा आयामेणं किण्हा किण्होभासा वण्णओ । वेयङ्कस्स णं पव्वयस्स पुरच्छिम्मपच्चच्छिमेणं दो गुहाओ पण्णत्ताओ, उत्तरदाहिणाययाओ पाईणपडीणवित्थिण्णाओ पण्णासं जोयणाइं आयामेणं दुवालस जोयणाइं विक्खंभेणं अट्ठ जोयणाइं उड्ढं उच्चत्तेणं वइरामयकवाडोहाडियाओ जमलजुयलकवाडघणदुप्पवेसाओ णिच्चंधयारतिमिस्साओ ववगयगहचंदसूरणक्खत्तजोइसपहाओ जाव पडिरुवाओ, तंजहा—तमिसगुहा चेव खंडप्पवायगुहा चेव, तत्थ णं दो देवा महिह्णिया महजुइया महाबला महायसा महासुक्खा महाणुभागा पल्लोवमट्ठिइया परिवसंति, तंजहा—कयमालए चेव णट्टमालए चेव । तेसि णं वणसंडाणं बहुसमरमणिजाओ भूमिभागाओ वेयङ्कस्स पव्वयस्स उभओ पासिं दस दस जोयणाइं उड्ढं उप्पइत्ता एत्थ णं दुवे विजाहरसेदीओ पण्णत्ताओ, पाईणपडीणाययाओ उदीणदाहिणविच्छिण्णाओ दस दस जोयणाइं विक्खंभेणं पव्वयसमियाओ आयामेणं उभओ पासिं दोहिं पउमवरवेइयाहिं दोहिं वणसंडेहिं संपरिविक्खत्ताओ, ताओ णं पउमवरवेइयाओ अट्ठजोयणं उड्ढं उच्चत्तेणं पंच धणुसयाइं विक्खंभेणं पव्वयसमियाओ आयामेणं वण्णओ णेयव्वो, वणसंडा वि पउमवरवेइयासमगा आयामेणं वण्णओ । विजाहरसेदीणं भंते ! भूमीणं केरिसए आयारभावपडोयारे पण्णत्ते ? गोयमा ! बहुसमर-

मणिज्जे भूमिभागे पण्णत्ते, से जहाणामए-आलिगपुक्खरेइ वा जाव गाणाविह-  
 पंचवण्णेहिं मणीहिं तणेहिं उवसोभिए, तंजहा-कित्तिमेहिं चेव अकित्तिमेहिं चेव,  
 तत्थ णं दाहिणिज्जाए विज्जाहरसेदीए गगणवल्हभपामोक्खा पण्णासं विज्जाहरण-  
 गरावासा पण्णत्ता, उत्तरिज्जाए विज्जाहरसेदीए रहनेउरचक्खवालपामोक्खा सट्ठिं  
 विज्जाहरणगरावासा पण्णत्ता, एवामेव सपुच्चावरेणं दाहिणिज्जाए उत्तरिज्जाए विज्जा-  
 हरसेदीए एगं दसुत्तरं विज्जाहरणगरावाससयं भवतीतिमक्खायं, ते विज्जाहरणगरा  
 रिद्धत्थिमियसमिद्धा पमुइयजणजाणवया जाव पडिरूवा, तेसु णं विज्जाहरणगरेसु  
 विज्जाहररायाणो परिवसंति महयाहिमवंतमलयमंदरमहिंदसारा रायवण्णओ भाणि-  
 यव्वो । विज्जाहरसेदीणं भंते ! मणुयाणं केरिसए आयारभावपडोयारे पण्णत्ते ?  
 गोयमा ! ते णं मणुया बहुसंघयणा बहुसंठाणा बहुउच्चत्तपज्जवा बहुआउप-  
 ज्जवा जाव सव्वदुक्खाणमंतं करेंति, तासि णं विज्जाहरसेदीणं बहुसमरमणि-  
 ज्जाओ भूमिभागाओ वेयङ्कुस्स पव्वयस्स उभओ पासिं दस दस जोयणाइं उड्ढं  
 उप्पइत्ता एत्थ णं दुवे आभिओगसेदीओ पण्णत्ताओ, पाईणपडीणाययाओ उदीण-  
 दाहिणविच्छिण्णाओ दस दस जोयणाइं विक्खंभेणं पव्वयसमियाओ आयामेणं  
 उभओ पासिं दोहिं पउमवरवेइयाहिं दोहिं य वणसंडेहिं संपरिक्खत्ताओ वण्णओ  
 दोण्ह वि पव्वयसमियाओ आयामेणं, आभिओगसेदीणं भंते ! केरिसए आयारभाव-  
 पडोयारे पण्णत्ते ? गोयमा ! बहुसमरमणिज्जे भूमिभागे पण्णत्ते जाव तणेहिं उव-  
 सोभिए वण्णाइं जाव तणाणं सदोत्ति, तासि णं आभिओगसेदीणं तत्थ तत्थ देसे २  
 तहिं तहिं जाव वाणमंतरा देवा य देवीओ य आसयंति सयंति जाव फलवित्ति-  
 विसेसं पच्चणुभवमाणा विहरंति, तासु णं आभिओगसेदीसु सक्कस्स देविंदस्स देवरण्णो  
 सोमजमवरुणवेसमणकाइयाणं आभिओगाणं देवाणं बहवे भवणा पण्णत्ता, ते णं  
 भवणा बाहिं वट्ठा अंतो चउरंसा वण्णओ जाव अच्छरघणसंघसंविक्किणा जाव पडि-  
 रूवा, तत्थ णं सक्कस्स देविंदस्स देवरण्णो सोमजमवरुणवेसमणकाइया बहवे आभि-  
 ओगा देवा महिद्धिया महज्जुइया जाव महासुक्खा पल्लिओवमट्ठिइया परिवसंति ।  
 तासि णं आभिओगसेदीणं बहुसमरमणिज्जाओ भूमिभागाओ वेयङ्कुस्स पव्वयस्स  
 उभओ पासिं पंच २ जोयणाइं उड्ढं उप्पइत्ता एत्थ णं वेयङ्कुस्स पव्वयस्स सिहरतले  
 पण्णत्ते, पाईणपडीणायए उदीणदाहिणविच्छिण्णे दस जोयणाइं विक्खंभेणं पव्वयसमगे  
 आयामेणं, से णं इक्काए पउमवरवेइयाए इक्केणं वणसंडेणं सव्वओ समंता संपरि-  
 क्खत्ते, पमाणं वण्णगो दोण्हंपि, वेयङ्कुस्स णं भंते ! पव्वयस्स सिहरतलस्स केरि-  
 सए आगारभावपडोयारे पण्णत्ते ? गोयमा ! बहुसमरमणिज्जे भूमिभागे पण्णत्ते, से

जहाणामए-आलिगपुक्खरेइ वा जाव णाणाविहपंचवण्णेहिं मणीहिं उवसोभिए जाव वावीओ पुक्खरिणीओ जाव वाणमंतरा देवा य देवीओ य आसयंति जाव भुंजमाणा विहरंति, जंबुदीवे णं भंते ! दीवे भारहे वासे वेयङ्गपव्वए कइ कूडा ५० ? गो० ! णव कूडा ५०, तं०-सिद्धकूडे १ दाहिणङ्गुभरहकूडे २ खंडप्पवायगुहाकूडे ३ माणिमइकूडे ४ वेयङ्गकूडे ५ पुण्णभइकूडे ६ तिमिस-गुहाकूडे ७ उत्तरङ्गुभरहकूडे ८ वेसमणकूडे ९ ॥ १२ ॥ कहि णं भंते ! जंबुदीवे २ भारहे वासे वेयङ्गपव्वए सिद्धकूडे णामं कूडे पणत्ते ? गो० ! पुरच्छि-मलवणसमुद्दस्स पच्चच्छिमेणं दाहिणङ्गुभरहकूडस्स पुरच्छिमेणं एत्थ णं जंबुदीवे दीवे भारहे वासे वेयङ्ग पव्वए सिद्धकूडे णामं कूडे पणत्ते, छ सक्कोसाइं जोयणाइं उड्डं उच्चत्तेणं मूले छ सक्कोसाइं जोयणाइं विक्खंमेणं मज्झे देसूणाइं पंच जोयणाइं विक्खंमेणं उवरि साइरेगाइं तिण्णि जोयणाइं विक्खंमेणं मूले देसू-णाइं वावीसं जोयणाइं परिकखेवेणं मज्झे देसूणाइं पण्णरस जोयणाइं परिकखेवेणं उवरि साइरेगाइं णव जोयणाइं परिकखेवेणं, मूले विच्छिण्णे मज्झे संखित्ते उप्पि तणए गोपुच्छसंठाणसंठिए; सव्वरयणामए अच्छे सण्हे जाव पडिस्सवे । से णं एगाए पउमवरवेइयाए एगेण य वणसंडेणं सव्वओ समंता संपरिक्खित्ते, पमाणं वण्णओ दोण्हंपि, सिद्धकूडस्स णं उप्पि बहुसमरमणिज्जे भूमिभागे पणत्ते, से जहाणामए-आलिगपुक्खरेइ वा जाव वाणमंतरा देवा य जाव विहरंति ॥ १३ ॥ कहि णं भंते ! वेयङ्ग पव्वए दाहिणङ्गुभरहकूडे णामं कूडे पणत्ते ? गो० ! खंडप्पवायकूडस्स पुरच्छिमेणं सिद्धकूडस्स पच्चच्छिमेणं एत्थ णं वेयङ्गपव्वए दाहिणङ्गुभरहकूडे णामं कूडे पणत्ते, सिद्धकूडप्पमाणसरिसे जाव तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं महं एगे पासायवडिंसए पणत्ते, कोसं उड्डं उच्चत्तेणं अद्वकोसं विक्खंमेणं अब्भुग्गयमूसियपहसिए जाव पासाइए ४, तस्स णं पासायवडिंसगस्स बहुमज्झदेसभाए एत्थ णं महं एगा मणिपेडिया पणत्ता, पंच धणुसयाइं आयामविक्खंमेणं अङ्गाइज्जाइं धणुसयाइं बाहल्लेणं सव्वमणिमइ०, तीसे णं मणिपेडियाए उप्पि सिंहासणं पणत्तं, सपरिवारं भाणियव्वं, से केणट्ठेणं भंते ! एवं वुच्चइ-दाहिणङ्गुभरहकूडे २ ? गो० ! दाहिणङ्गुभरहकूडे णं दाहिणङ्गुभरहे णामं देवे महिद्धिए जाव पल्लिओवमड्डिए परिवसइ, से णं तत्थ चउण्हं सामाणियसाह-स्सीणं चउण्हं अग्गमहिसीणं सपरिवाराणं तिण्हं परिसाणं सत्तण्हं अणियाणं सत्तण्हं अणियाहिवईणं सोलसण्हं आयरक्खदेवसाहस्सीणं दाहिणङ्गुभरहकूडस्स दाहिणङ्गाए रायहाणीए अण्णेसिं च बहूणं देवाण य देवीण य जाव विहरइ ॥ कहि णं भंते !

दाहिणङ्गुभरहकूडस्स देवस्स दाहिणङ्गा णामं रायहाणी पणत्ता ? गो० ! मंदरस्स पव्वयस्स दक्खिणेणं तिरियमसंखेज्जदीवसमुद्दे वीईवइत्ता अण्णंमि जंबुद्दीवे दीवे दक्खिणेणं वारस जोयणसहस्साई ओगाहिता एत्थ णं दाहिणङ्गुभरहकूडस्स देवस्स दाहिणङ्गुभरहा णामं रायहाणी भाणियव्वा जहा विजयस्स देवस्स, एवं सव्वकूडा णेयव्वा जाव वेसमणकूडे परोप्परं पुरच्छिमपच्चत्थिमेणं, **इमेसिं वण्णावासे गाहा**-मज्झे वेयङ्गुस्स उ कणयमया तिण्णि होंति कूडा उ । सेसा पव्वयकूडा सव्वे रयणामया होंति ॥ १ ॥ माणिभद्दकूडे १ वेयङ्गुकूडे २ पुण्णभद्दकूडे ३ एए तिण्णि कूडा कणगामया सेसा छप्पि रयणामया, दोण्हं विसरिसणामया देवा कयमालए चेव णट्टमालए चेव, सेसाणं छण्हं सरिसणामया-जण्णामया य कूडा तण्णामा खलु हवंति ते देवा । पलिओवमट्ठिइया हवंति पत्तेयपत्तेयं ॥ १ ॥ रायहाणीओ जंबुद्दीवे दीवे मंदरस्स पव्वयस्स दाहिणेणं तिरियं असंखेज्जदीवसमुद्दे वीईवइत्ता अण्णंमि जंबुद्दीवे दीवे वारस जोयणसहस्साई ओगाहिता एत्थ णं रायहाणीओ भाणियव्वाओ विजयरायहाणीसरिसयाओ ॥ १४ ॥ से केणट्ठेणं भंते ! एवं वुच्चइ-वेयङ्गे पव्वए वेयङ्गे पव्वए ? गोयमा ! वेयङ्गे णं पव्वए भरहं वासं दुहा विभयमाणे २ चिट्ठइ, तंजहा-दाहिणङ्गुभरहं च उत्तरङ्गुभरहं च, वेयङ्गुगिरिकुमारे य...महिट्ठिए जाव पलिओ-वमट्ठिए परिवसइ, से तेणट्ठेणं गोयमा ! एवं वुच्चइ-वेयङ्गे पव्वए २, अदुत्तरं च णं गोयमा ! वेयङ्गुस्स पव्वयस्स सासए णामधेजे पणत्ते जं ण कयाइ ण आसि ण कयाइ ण अत्थि ण कयाइ ण भविस्सइ भुविं च भवइ य भविस्सइ य धुवे णियए सासए अक्खए अव्वए अवट्ठिए णिच्चे ॥ १५ ॥ कहि णं भंते ! जंबुद्दीवे दीवे उत्तरङ्गुभरहे णामं वासे पणत्ते ? गोयमा ! चुल्लहिमवंतस्स वासहरपव्वयस्स दाहिणेणं वेयङ्गुस्स पव्वयस्स उत्तरेणं पुरच्छिमलवणसमुद्दस्स पच्चच्छिमेणं पच्च-च्छिमलवणसमुद्दस्स पुरच्छिमेणं एत्थ णं जंबुद्दीवे दीवे उत्तरङ्गुभरहे णामं वासे पणत्ते, पाईणपडीणायए उदीणदाहिणविच्छिण्णे पलियं कसंठाणसंठिए दुहा लवणसमुद्दं पुट्ठे पुरच्छिमिन्नाए कोडीए पुरच्छिमिन्लं लवणसमुद्दं पुट्ठे पच्चच्छिमिन्नाए जाव पुट्ठे गंगासिंधूहिं महान्णईहिं तिभागपविभत्ते दोण्णि अट्ठतीसे जोयणसए तिण्णि य एगूणवीसइभागे जोयणस्स विक्खंमेणं, तस्स बाहा पुरच्छिमपच्चच्छिमेणं अट्ठारस बाणउए जोयणसए सत्त य एगूणवीसइभागे जोयणस्स अट्ठभागं च आयामेणं, तस्स जीवा उत्तरेणं पाईणपडीणायया दुहा लवणसमुद्दं पुट्ठा तहेव जाव चोइस जोयणस-हस्साई चत्तारि य एकहत्तरे जोयणसए छच्च एगूणवीसइभाए जोयणस्स किंचिविसेसूणे आयामेणं पणत्ता, तीसे धणुपट्ठे दाहिणेणं चोइस जोयणसहस्साई पंच अट्ठावीसे



जोयणसए एक्कारस य एगूणवीसइभाए जोयणस्स परिकखेवेणं । उत्तरङ्गभरहस्स णं भंते ! वासस्स केरिसए आयारभावपडोयारे पण्णत्ते ? गोयमा ! बहुसमरमणिजे भूमि-भागे पण्णत्ते, से जहाणामए-आलिंगपुक्खरेइ वा जाव कित्तिमेहिं चेव अकित्तिमेहिं चेव, उत्तरङ्गभरहे णं भंते ! वासे मणुयाणं केरिसए आयारभावपडोयारे पण्णत्ते ? गोयमा ! ते णं मणुया बहुसंघयणा जाव अप्पेगइया सिज्झंति जाव सव्वदुक्खाणमंतं कैरंति ॥ १६ ॥ कहिं णं भंते ! जंबुद्वीवे दीवे उत्तरङ्गभरहे वासे उसभकूडे णामं पव्वए पण्णत्ते ? गोयमा ! गंगाकुंडस्स पच्चत्थिमेणं सिंधुकुंडस्स पुरच्छिमेणं चुल्लहि-मवंतस्स वासहरपव्वयस्स दाहिणिंले णियंवे एत्थ णं जंबुद्वीवे दीवे उत्तरङ्गभरहे वासे उसहकूडे णामं पव्वए पण्णत्ते, अट्ठ जोयणाइं उट्ठं उच्चत्तेणं, दो जोयणाइं उव्वेहेणं, मूले अट्ठ जोयणाइं विक्खंमेणं मज्झे छ जोयणाइं विक्खंमेणं उवरिं चत्तारि जोयणाइं विक्खंमेणं, मूले साइरेगाइं पणवीसं जोयणाइं परिकखेवेणं मज्झे साइरेगाइं अट्ठारस जोयणाइं परिकखेवेणं उवरिं साइरेगाइं दुवालस जोयणाइं परि-क्खेवेणं, ( पाढंतंरं-मूले बारस जोयणाइं विक्खंमेणं मज्झे अट्ठ जोयणाइं विक्खंमेणं उप्पि चत्तारि जोयणाइं विक्खंमेणं, मूले साइरेगाइं सत्ततीसं जोयणाइं परिकखेवेणं मज्झे साइरेगाइं पणवीसं जोयणाइं परिकखेवेणं उप्पि साइरेगाइं वारस जोयणाइं परिकखेवेणं ) मूले विच्छिण्णे मज्झे संखित्ते उप्पि तणुए गोपुच्छसंठाणसंठिए सव्वजंवूणयामए अच्छे सण्हे जाव पडिरुवे, से णं एगाए पउमवरवेइयाए तहेव जाव भवणं कोसं आयामेणं अट्ठकोसं विक्खंमेणं देसऊणं कोसं उट्ठं उच्चत्तेणं, अट्ठो तहेव, उप्पलाणि पउमाणि जाव उसमे य एत्थ देवे महिद्धिए जाव दाहिणेणं रायहाणी तहेव मंदरस्स पव्वयस्स जहा विजयस्स अविसेसियं ॥ १७ ॥ **पढमो वक्खारो समत्तो ॥**

जंबुद्वीवे णं भंते ! दीवे भारहे वासे कइविहे काले पण्णत्ते ? गो० ! दुविहे काले पण्णत्ते, तंजहा-ओसप्पिणिकाले य उस्सप्पिणिकाले य, ओसप्पिणिकाले णं भंते ! कइविहे पण्णत्ते ? गो० ! छव्विहे पण्णत्ते, तं०-सुसमसुसमकाले १ सुसमाकाले २ सुसमदुस्समकाले ३ दुस्समसुसमकाले ४ दुस्समाकाले ५ दुस्समदुस्समकाले

१ विजाहरसमणदंसणओ, कम्माणं खओवसमविचित्तयाए जाइसरणेणं, चक्कवट्ठि-काले अणुघाडियगुहाजुयलावट्ठाणेणं ( सयं गमणा ), चक्किं काले य तत्थुववण्णा वि इह तित्थयराइपासे धम्मसवणाइणा लद्धबोही अणुक्कमेणं पत्तकेवला तत्थ वि सिज्झंति अहवा तव्वासवासिणो इहमांगंतूण तहाविहधम्ममायरित्तु सिज्झंति अदुवा साहरणं पडुच्च तत्थ सिद्धी संभवेइति ।

६, उस्सप्पिणिकाले णं भंते ! कइविहे प० ? गो० ! छव्विहे पण्णत्ते, तं०-दुस्सम-  
दुस्समाकाले १ जाव सुसमसुसमाकाले ६ । एगमेगस्स णं भंते ! मुहुत्तस्स केवइया  
उस्सासद्धा वियाहिया ? गोयमा ! असंखिजाणं समयाणं समुदयसमिइसमागमेणं  
सा एगा आवलियत्ति वुच्चइ संखिजाओ आवलियाओ ऊसासो संखिजाओ आवलि-  
याओ नीसासो, गाहा-हट्टस्स अणवगल्लस्स, णिरुक्किट्टस्स जंतुणो । एगे ऊसास-  
नीसासे, एस पाणुत्ति वुच्चइ ॥ १ ॥ सत्त पाणूइं से थोवे, सत्त थोवाईं से लवे ।  
लवाणं सत्तहत्तरिंए, एस मुहुत्तेत्ति आहिए ॥ २ ॥ तिण्णि सहस्सा सत्त य सयाइं  
तेवत्तरिं च ऊसासा । एस मुहुत्तो भणिओ सव्वेहिं अणंतनाणीहिं ॥ ३ ॥ एएणं  
मुहुत्तप्पमाणेणं तीसं मुहुत्ता अहोरत्तो पण्णरस अहोरत्ता पक्खो दो पक्खा मासो  
दो मासा उऊ तिण्णि उऊ अयणे दो अयणा संवच्छरे पंचसंवच्छरिए जुगे वीसं  
जुगाइं वाससए दस वाससयाइं वाससहस्से सयं वाससहस्साणं वाससयसहस्से  
चउरासीइं वाससयसहस्साइं से एगे पुव्वंगे चउरासीइं पुव्वंगसयसहस्साइं से एगे  
पुव्वे एवं बिगुणं बिगुणं णेयव्वं तुडियंगे २ अडडंगे २ अववंगे २ हूहूयंगे २ उप्प-  
लंगे २ पडमंगे २ णलिंगे २ अच्छिणित्तरंगे २ अउयंगे २ नउयंगे २ पउयंगे २  
चूलियंगे २ जाव चउरासीइं सीसपहेलियंगसयसहस्साइं सा एगा सीसपहेलिया  
एताव ताव गणिए एताव ताव गणियस्स विसए तेण परं ओवमिए ॥ १८ ॥  
से किं तं ओवमिए ? २ दुविहे पण्णत्ते, तंजहा-पलिओवमे य सागरोवमे य, से किं  
तं पलिओवमे ? पलिओवमस्स परूवणं करिस्सामि, परमाणू दुविहे पण्णत्ते, तंजहा-  
सुहुमे य वावहारिए य, अणंताणं सुहुमपरमाणुपुग्गलाणं समुदयसमिइसमागमेणं  
वावहारिए परमाणू णिप्फज्जइ तत्थ णो सत्थं कमइ-सत्थेण सुत्तिकखेणवि छेत्तुं  
भित्तुं च जं ण किर सक्का । तं परमाणुं सिद्धा वयंति आईं पमाणानं ॥ १ ॥ वाव-  
हारियपरमाणूणं समुदयसमिइसमागमेणं सा एगा उस्सण्हसण्हियाइ वा सण्हसण्हि-  
याइ वा उड्डरेणूइ वा तसरेणूइ वा रहरेणूइ वा वालग्गेइ वा लिक्खाइ वा जूयाइ वा  
जवमज्झेइ वा उस्सेहंगुलेइ वा, अट्ठ उस्सण्हसण्हियाओ सा एगा सण्हसण्हिया  
अट्ठ सण्हसण्हियाओ सा एगा उड्डरेणू अट्ठ उड्डरेणूओ सा एगा तसरेणू अट्ठ  
तसरेणूओ सा एगा रहरेणू अट्ठ रहरेणूओ से एगे देवकुल्लतरकुराण मणुस्साणं  
वालग्गे अट्ठ देवकुल्लतरकुराण मणुस्साणं वालग्गा से एगे हरिवासरम्मयवासाण  
मणुस्साणं वालग्गे एवं हेमवयहेरणवयाण मणुस्साणं पुव्वविदेहअवरविदेहाणं  
मणुस्साणं वालग्गा सा एगा लिक्खा अट्ठ लिक्खाओ सा एगा जूया अट्ठ  
जूयाओ से एगे जवमज्झे अट्ठ जवमज्जा से एगे अंगुले एएणं अंगुलप्पमाणेणं

छ अंगुलाइ पाओ वारस अंगुलाइ विहत्थी चउवीसं अंगुलाइ रयणी अडयालीसं  
 अंगुलाइ कुच्छी छण्णउइ अंगुलाइं से एगे अक्खेइ वा दंडेइ वा धणूइ वा जुगेइ  
 वा मुसलेइ वा पालियाइ वा, एएणं धणुप्पमाणेणं दो धणुसहस्साइं गाउयं चत्तारि  
 गाउयाइं जोयणं, एएणं जोयणप्पमाणेणं जे पळे जोयणं आयामविकखंमेणं जोयणं  
 उड्डं उच्चत्तेणं तं तिगुणं सविसेसं परिकखेवेणं, से णं पळे एगाहियवेहियतेहिय  
 उक्कोसेणं सत्तरत्तपह्ढाणं संमट्ठे सण्णिचिए भरिए वालग्गकोडीणं । ते णं वालग्ग  
 णो कुत्थेज्जा णो परिविद्धंसेज्जा, णो अग्गी डहेज्जा, णो वाए हरेज्जा, णो पूइत्ताए  
 हव्वमागच्छेज्जा, तओ णं वाससए २ एगमेणं वालग्गं अवहाय जावइएणं कालेणं से  
 पळे खीणे पीरए णिल्लेवे णिट्ठिए भवइ से तं पळिओवमे । एएसिं पळाणं कोडाकोडी  
 हवेज्ज दसगुणिया । तं सागरोवमस्स उ एगस्स भवे परीमाणं ॥ १ ॥ एएणं  
 सागरोवमप्पमाणेणं चत्तारि सागरोवमकोडाकोडीओ कालो सुसमसुसमा १ तिण्णि  
 सागरोवमकोडाकोडीओ कालो सुसमा २ दो सागरोवमकोडाकोडीओ कालो सुसम-  
 दुस्समा ३ एगा सागरोवमकोडाकोडी वायालीसाए वाससहस्सेहिं ऊणिया कालो  
 दुस्समसुसमा ४ एकवीसं वाससहस्साइं कालो दुस्समा ५ एकवीसं वाससहस्साइं  
 कालो दुस्समदुस्समा ६, पुणरवि उस्सप्पिणीए एकवीसं वाससहस्साइं कालो दुस्स-  
 मदुस्समा १ एवं पडिल्लोमं णेयव्वं जाव चत्तारि सागरोवमकोडाकोडीओ कालो  
 सुसमसुसमा ६, दससागरोवमकोडाकोडीओ कालो ओसप्पिणी दससागरोवमकोडा-  
 कोडीओ कालो उस्सप्पिणी वीसं सागरोवमकोडाकोडीओ कालो ओसप्पिणीउस्स-  
 प्पिणी ॥ १९ ॥ जंबुद्वीवे णं भंते ! दीवे भरहे वासे इमीसे उस्सप्पिणीए सुसम-  
 सुसमाए समाए उत्तमकट्ठपत्ताए भरहस्स वासस्स केरिसए आयारभावपडोयारे  
 होत्था ? गो० ! बहुसमरमणिजे भूमिभागे होत्था से जहाणामए-आल्लिगपुक्खरेइ  
 वा जाव पाणाविहपंचवण्णेहिं तणेहि य मणीहि य उवसोभिए, तंजहा-किण्हेहिं  
 जाव सुक्खिल्लेहिं, एवं वण्णे गंधो फासो सद्दो य तणाण य मणीण य भाणियव्वो  
 जाव तत्थ णं बहवे मणुस्सा मणुस्सीओ य आसयंति सयंति चिट्ठंति णिसीयंति  
 तुयट्ठंति हसंति रमंति ललंति, तीसे णं समाए भरहे वासे बहवे उद्दाला कुद्दाला  
 मुद्दाला कयमाला णट्ठमाला दंतमाला नागमाला सिंगमाला संखमाला सेयमाला  
 णामं दुमगणा पण्णत्ता, कुसविकुसविसुद्धक्खमूला मूलमंतो कंदमंतो जाव बीयमंतो  
 पत्तेहि य पुप्फेहि य फलेहि य उच्छण्णपडिच्छण्णा सिरीए अईव २ उवसोभेमाणा २  
 चिट्ठंति, तीसे णं समाए भरहे वासे तत्थ तत्थ... बहवे भेरुतालवणाइं हेरुतालवणाइं  
 भेरुतालवणाइं पभयालवणाइं सालवणाइं सरलवणाइं सत्तिवण्णवणाइं पूयकलिवणाइं

खजूरीवणाई णालिएरीवणाई कुसविकुसविसुद्धस्खमूलाई जाव चिट्ठंति, तीसे णं समाए भरहे वासे तत्थ तत्थ...बहवे सेरियागुम्मा णोमालियागुम्मा कोरंटयगुम्मा वंधुजीवगुम्मा मणोज्जगुम्मा वीयगुम्मा बाणगुम्मा कणइरगुम्मा कुजायगुम्मा सिंदुवारगुम्मा मोगगरगुम्मा जूहियागुम्मा मल्लियागुम्मा वासंतियागुम्मा वत्थुलगुम्मा कत्थुलगुम्मा सेवालगुम्मा अगत्थिगुम्मा मगदंतियागुम्मा चंपगुम्मा जाईगुम्मा णवणीइयागुम्मा कुंदगुम्मा महाजाइगुम्मा रग्मा महामेहणितरंभूया दसद्धवण्णं कुसुमं कुसुमेति जे णं भरहे वासे बहुसमरमणिज्जं भूमिभागं वायविधुयग्गसाला मुक्कपुप्फुंजोवयारकलियं करेंति, तीसे णं समाए भरहे वासे तत्थ २...तहिं तहिं बहुईओ पउमल्याओ जाव सामल्याओ णिच्चं कुसुमियाओ जाव लयावण्णओ, तीसे णं समाए भरहे वासे तत्थ २...तहिं २ बहुईओ वणराईओ पणत्ताओ, किण्हाओ किण्होभासाओ जाव मणोहराओ रयसत्तगळप्पयकोरगभिंमारगकोंडलगजीवंजीवग-  
नंदीमुहकविलपिंगलक्खगकारंडवक्कवायगकलहंसहंससारसअणेगसउणगणमिहुणप-  
वियरियाओ सहुण्णइयमहुरसरणाइयाओ संपिडिय० णाणाविहगुच्छ० बावीपुक्ख-  
रिणीदीहियासु अ सुणि० विचित्त० अदिभत० साउ० णिरोगक० सव्वोउय-  
पुप्फफलसमिद्धाओ पिंडिम जाव पासाइयाओ ४ । तीसे णं समाए भरहे वासे तत्थ तत्थ...तहिं तहिं मत्तंगा णामं दुमगणा पणत्ता, से जहा० चंदप्पभा जाव छण्णपडिच्छणा चिट्ठंति, एवं जाव अणिगणा णामं दुमगणा पणत्ता ॥ २० ॥ तीसे णं भंते ! समाए भरहे वासे मणुयाणं केरिसए आयारभावपडोयारे पणत्ते ? गो० ! ते णं मणुया सुपइट्ठियकुम्मचारुचलणा जाव लक्खणवंगजगु-  
णोववेया सुजायसुविभत्तसंगयंगा पासादीया जाव पडिरुवा । तीसे णं भंते ! समाए भरहे वासे मणुईणं केरिसए आयारभावपडोयारे पणत्ते ? गो० ! ताओ णं मणुईओ सुजायसव्वंगसुंदरीओ पहाणमहिलागुणेहिं जुत्ताओ अइक्कंतविसप्पमाणमउ-  
याओ सुकुमालकुम्मसंठियविसिट्ठचलणाओ उज्जुमउयपीवरसुसाहयंगुलीओ अब्भुण्णय-  
रइयतलित्तंवसुइणिद्धणक्खाओ रोमरहियवट्ठलट्ठसंठियअजहण्णपसत्थलक्खणअको-  
प्पजंघजुयलाओ सुणिम्मियसुगूढसुजण्णमंडलसुबद्धसंधीओ कयलीखंभाइरेगसंठियणि-  
व्वणसुकुमालमउयमंसलअविरलसमसंहियसुजायवट्ठपीवरणिरंतरोरु अट्ठावयवीइयपट्ठ-  
संठियपसत्थविच्छिण्णपिहुलसोणीओ वयणायामप्पमाणदुगुणियविसालमंसलसुबद्धज-  
हणवरधारिणीओ वज्जविराइयपसत्थलक्खणनिरोदरतिवलियवलित्तणुणयमज्झिमाओ उज्जुयसमसहियजच्चतणुकसिणणिद्धाअइज्जलडहसुजायसुविभत्तकंतसोभंतइलरमणिज्ज-  
रोमराईओ गंगावत्तपयाहिणावत्ततरंगभंगुररविकिरणतरुणबोहियआकोसायंतपउमंग-

भीरवियडणाभीओ अणुब्भडपसत्थपीणकुच्छीओ सण्णयपासाओ संगयपासाओ  
 सुजायपासाओ मियमाइयपीणरइयपासाओ अकरंडुयकणगस्यगणिम्मलसुजायणिरुव-  
 ह्यगायलट्ठीओ कंचणकलसप्पमाणसमसहियलट्ठुचुच्चुयामेलगजमलजुयलवट्ठियअब्भु-  
 ण्णयपीणरइयपीवरपओहराओ भुयंगअणुपुव्वतणुयगोपुच्छवट्ठसंहियणमियआइजल-  
 लियवाहाओ तंवणहाओ मंसलगहत्थाओ पीवरकोमलवरंगुलियाओ णिद्धपाणिरेहाओ  
 रविससिंखचक्कसोत्थियसुविभत्तसुविरइयपाणिलेहाओ पीणुण्णयकरकक्खवत्थिप्पए-  
 साओ पडिपुण्णगलक्वोलाओ चउरंगुलसुप्पमाणकंबुवरसरिसगीवाओ मंसलसंठियप-  
 सत्थहणुगाओ दाडिमपुप्फप्पगासपीवरपलंबकुंचियवराधराओ सुंदरुत्तोटाओ दहि-  
 दगरयचंदकुंदवांसंतिमउलधवलअच्छिद्विमलदसणाओ रत्तुप्पलपत्तमउयसुकुमालता-  
 लुजीहाओ कणवीरमउलकुडिलअब्भुगयउज्जुतुंगणासाओ सारयणवकमलकुमुयकुवल-  
 यविमलदलणियरसरिसलक्खणपसत्थअजिम्हकंतणयणाओ पत्तलधवलाययआतंबलो-  
 यणाओ आणामियचावरुइलकिण्हब्भराइसंगयसुजायभुमगाओ अल्लीणपमाणजुत्तसव-  
 णाओ सुसवणाओ पीणमट्ठगंडलेहाओ चउरंसपसत्थसमणिडालाओ कोमुइरयणिय-  
 रविमलपडिपुण्णसोमवयणाओ छत्तुण्णयउत्तमंगाओ अकविलसुसिणिद्धसुगंधदीहसरि-  
 याओ छत्त १ ज्झय २ जूय ३ दामणि ४ कर्मंडलु ५ कलस ६ वावि ७ सोत्थिय ८  
 पडाग ९ जव १० मच्छ ११ कुम्म १२ रहवर १३ मगरज्झय १४ अंक १५  
 सुय १६ थाल १७ अंकुस १८ अट्ठावय १९ सुपइट्ठग २० मऊर २१ सिरिअभि-  
 सेय २२ तोरण २३ मेइणि २४ उदहि २५ वरभवण २६ गिरि २७ वरआयंस २८  
 सलीलगय २९ उसभ ३० सीह ३१ चामर ३२ उत्तमपसत्थवत्तीसलक्खणधरीओ  
 हंससरिसगईओ कोइलमहुरगिरिसुस्सराओ कंताओ सव्वरस अणुमयाओ ववगयवलि-  
 पलियवंगदुव्वण्णवाहिदोहग्गसोगमुक्काओ उच्चत्तेण य णराण थोवणमुस्सियाओ सभा-  
 वसिंगारचारुवेसाओ संगयगयहसियभणियचिद्वियविलाससंलावणिउणजुत्तोवयारकुस-  
 लाओ सुंदरथणजहणवयणकरचलणयणलावणरुवजोव्वणविलासकलियाओ णंदण-  
 वणविवरचारिणीउव्व अच्छराओ भरहवासमाणुसच्छराओ अच्छेरगपेच्छणिजाओ  
 पासाइयाओ जाव पडिरूवाओ, ते णं मणुया ओहस्सरा हंसस्सरा कौंचस्सरा णंदि-  
 स्सरा णंदिघोसा सीहस्सरा सीहघोसा सुस्सरा सूसरणिघोसा छायायवोज्जोविगंगंगा  
 वज्जरिसहनारायसंधयणा समचउरंसंठाणसंठिया छविणिरायंका अणुलोमवाउवेगा  
 कंकगहणी कवोयपरिणामा सउणिपोसपिड्ढंतोरुपरिणया छदणुसहस्समूसिया, तेसि  
 णं मणुयाणं बे छप्पणा पिट्टकरंडगसया पण्णत्ता समणाउसो !, पउमुप्पलगन्धसरि-  
 सणीसासुसुरभिवयणा, ते णं मणुया पगईउवसंता पगईपयणुकोहमणमायालोभा

मिउमद्वसंपन्ना अल्लीणा भद्गा विणीया अप्पिच्छा असण्हिसंचया विडिमंतरपरि-  
वसणा जहिच्छियकामकामिणो ॥ २१ ॥ तेसि णं भंते ! मणुयाणं केवइकालस्स  
आहारट्ठे समुप्पजइ ? गोयमा ! अट्टमभत्तस्स आहारट्ठे समुप्पजइ, पुढवीपुप्फफला-  
हारा णं ते मणुया पण्णत्ता समणाउसो !, तीसे णं भंते !० पुढवीए केरिसए आसाए  
पण्णत्ते ? गो० ! से जहाणामए-गुलेइ वा खंडेइ वा सक्कराइ वा मच्छंडियाइ वा  
पप्पडमोयएइ वा भिसेइ वा पुप्फुत्तराइ वा पउमुत्तराइ वा विजयाइ वा महावि-  
जयाइ वा आगासियाइ वा आदंसियाइ वा आगासफालिओवमाइ वा उग्गाइ वा अणो-  
वमाइ वा इमेए अज्झोववणाए, भवे एयारुवे ?, णो इणट्ठे समट्ठे, सा णं पुढवी इत्तो  
इट्ठतरिया चेव जाव मणामतरिया चेव आसाएणं पण्णत्ता । तेसि णं भंते ! पुप्फ-  
लाणं केरिसए आसाए पण्णत्ते ? गोयमा ! से जहाणामए-रणो चाउरंतचक्कवट्ठिस्स  
कल्लाणे भोयणजाए सयसहस्सनिप्फजे वण्णेणुवेए जाव फासेणं उववेए आसायणिजे  
विस्सायणिजे दिप्पणिजे दप्पणिजे मयणिजे [ विग्घणिजे ] बिंहणिजे सव्विदियगाय-  
पल्हायणिजे, भवे एयारुवे ?, णो इणट्ठे समट्ठे, तेसि णं पुप्फफलाणं एत्तो इट्ठतराए  
चेव जाव आसाए पण्णत्ते ॥ २२ ॥ ते णं भंते ! मणुया तमाहारमाहारेत्ता कहिं वसहिं  
उव्वंति ? गोयमा ! स्वखगेहालया णं ते मणुया पण्णत्ता समणाउसो !, तेसि णं  
भंते ! स्वखाणं केरिसए आयारभावपडोयारे पण्णत्ते ? गोयमा ! कूडागारसंठिया  
पेच्छाछत्तज्झयतोरणगोयरवेइयाचोप्फालगअट्ठालगपासायहम्मियगवक्खवालग्गपोइ-  
यावलभीघरसंठिया अत्थण्णे इत्थ बहवे वरभवणविसिट्ठसंठाणसंठिया दुमगणा सुह-  
सीयलच्छाया पण्णत्ता समणाउसो ! ॥ २३ ॥ अत्थि णं भंते ! तीसे समाए भरहे  
वासे गेहाइ वा गेहावणाइ वा ? गोयमा ! णो इणट्ठे समट्ठे, स्वखगेहालया णं ते  
मणुया पण्णत्ता समणाउसो !, अत्थि णं भंते ! तीसे समाए भरहे वासे गामाइ वा  
जाव संगिवेसाइ वा ? गोयमा ! णो इणट्ठे समट्ठे, जहिच्छियकामगामिणो णं ते  
मणुया पण्णत्ता०, अत्थि णं भंते !० असीइ वा मसीइ वा किसीइ वा वणिएत्ति वा  
पणिएत्ति वा वाणिज्जेइ वा ? गो० ! णो इणट्ठे समट्ठे, ववगयअसिमसिकिसिवणिगयपणिय-  
वाणिज्जा णं ते मणुया पण्णत्ता समणाउसो !, अत्थि णं भंते !० हिरण्णेइ वा सुवण्णेइ  
वा कंसेइ वा दूसेइ वा मणिमोत्तियसंखसिलप्पवालरत्तरयणसावइज्जेइ वा ? हुंता !  
अत्थि, णो चेव णं तेसि मणुयाणं परिभोगत्ताए हव्वमागच्छइ । अत्थि णं भंते !०  
भरहे० रायाइ वा जुवरायाइ वा ईसरतलवरमाडंबियकोडुंबियइब्भसेट्ठिसेणावइस-  
त्थवाहाइ वा ? गोयमा ! णो इणट्ठे समट्ठे, ववगयइड्डिसक्कारा णं ते मणुया०, अत्थि  
णं भंते !० भरहे वासे दासेइ वा पेसेइ वा सिस्सेइ वा भयगेइ वा भाइल्लएइ वा

कम्मयरएइ वा ?० णो इण्ठे समट्ठे, ववगयआभिओगा णं ते मणुया पण्णत्ता सम-  
 णाउसो !, अत्थि णं भंते ! तीसे समाए भरहे वासे मायाइ वा पियाइ वा भाया०  
 भगिणी० भज्जा० पुत्त० धूया० सुण्हाइ वा ? हंता ! अत्थि, णो चेव णं तिक्वे पेम्म-  
 बंधणे समुप्पज्जइ, अत्थि णं भंते !० भरहे वासे अरीइ वा वेरिएइ वा घायएइ वा  
 वहएइ वा पडिणीयएइ वा पच्चामित्तेइ वा ? गो० ! णो इण्ठे समट्ठे, ववगयवेराणुसया णं  
 ते मणुया पण्णत्ता समणाउसो !, अत्थि णं भंते !० भरहे वासे मिताइ वा वयंसाइ वा  
 णायएइ वा संघाडिइ वा सहाइ वा सुहीइ वा संगइएइ वा ? हंता ! अत्थि, णो चेव  
 णं तेसिं मणुयाणं तिक्वे रागबंधणे समुप्पज्जइ, अत्थि णं भंते !० भरहे वासे आवा-  
 हाइ वा वीवाहाइ वा जण्णाइ वा सद्धाइ वा थालीपागाइ वा मियपिंडनिवेयणाइ वा ?  
 गो इण्ठे समट्ठे, ववगयआवाहवीवाहजण्णसद्धथालीपागमियपिंडनिवेयणा णं ते  
 मणुया पण्णत्ता समणाउसो !, अत्थि णं भंते !० भरहे वासे इंदमहाइ वा खंद० णाग०  
 जक्ख० भूय० अगड० तडाग० दह० णइ० रुक्ख० पव्वयमहाइ वा ? गो० ! णो इण्ठे  
 समट्ठे, ववगयमहिमा णं ते मणुया प० स०, अत्थि णं भंते !० भरहे वासे णड-  
 पेच्छाइ वा णट्ठ० जल्ल० मल्ल० मुट्ठिय० वेलंबग० कहग० पवग० लासगपेच्छाइ  
 वा ? गो० ! णो इण्ठे समट्ठे, ववगयकोउहल्ला णं ते मणुया पण्णत्ता समणाउसो !,  
 अत्थि णं भंते !० भरहे वासे सगडाइ वा रहाइ वा जाणाइ वा जुग्गा० गिल्ली०  
 थिल्ली० सीया० संदमाणियाइ वा ?० गो इण्ठे समट्ठे, पायचारविहारा णं ते मणुया  
 प० समणाउसो !, अत्थि णं भंते !० भरहे वासे गावीइ वा महिसीइ वा अयाइ वा  
 एलगाइ वा ? हंता ! अत्थि, णो चेव णं तेसिं मणुयाणं परिभोगत्ताए हव्वमागच्छंति,  
 अत्थि णं भंते !० भरहे वासे आसाइ वा हत्थी० उट्ठा० गोणा० गवथा० अया०  
 एलगा० पसया० मिया० वराहा० रुह० सरभा० चमरा० कुरंगोक्रण्णमाइया ?  
 हंता ! अत्थि, णो चेव णं तेसिं परिभोगत्ताए हव्वमागच्छंति, अत्थि णं भंते !०  
 भरहे वासे सीहाइ वा वग्घाइ वा विगदीविगअच्छतरच्छसियालबिडालसुणगकोकं-  
 तियकोलसुणगाइ वा ? हंता ! अत्थि, णो चेव णं तेसिं मणुयाणं आबाहं वा वाबाहं  
 वा छविच्छेयं वा उप्पाएति, पगइमद्दया णं ते सावयगणा प० समणाउसो !, अत्थि  
 णं भंते !० भरहे वासे सालीइ वा वीहिगोहूमजवजवजवाइ वा कलममसूरसुग्गमा-  
 सतिलकुलत्थणिप्फावआलिसंदगअयसिकुलुंभकोहवकंगुवरगरालगसनसरिसवमूलगवी-  
 याइ वा ? हंता ! अत्थि, णो चेव णं तेसिं मणुयाणं परिभोगत्ताए हव्वमागच्छंति,  
 अत्थि णं भंते !० भरहे वासे गड्ढाइ वा दरीओवायपवायविसमविज्जलाइ वा ?० गो  
 इण्ठे समट्ठे, भरहे वासे बहुसमरमणिजे भूमिभागे पण्णत्ते, से जहाणामए-आलिंग-

पुक्खरेइ वा०, अत्थि णं भंते !० भरहे वासे खाणइ वा कंटगतणकयवराइ वा पत्तकयवराइ वा ?० णो इण्ठे सम्भे, ववगयखाणुकंटगतणकयवरपत्तकयवरा णं सा समा पण्णत्ता०, अत्थि णं भंते !० भरहे वासे डंसाइ वा मसगाइ वा जूयाइ वा लिक्खवाइ वा ठिकुणाइ वा पिसुयाइ वा ?० णो इण्ठे सम्भे, ववगयडंसमसगजूय-  
 लिक्खठिकुणपिसुया उवद्वविरहिया णं सा समा पण्णत्ता०, अत्थि णं भंते !० भरहे० अहीइ वा अयगराइ वा ? हंता ! अत्थि, णो चेव णं तेसिं मणुयाणं आवाहं वा जाव पगइभइया णं ते वालगगणा पण्णत्ता०, अत्थि णं भंते !० भरहे० डिंवाइ वा डमराइ वा कलहवोलखारवइरमहाजुद्धाइ वा महासंगामाइ वा महासत्थपडणाइ वा महापुरिसपडणाइ वा ? गोयमा ! णो इण्ठे सम्भे, ववगयवेराणुवंधा णं ते मणुया पण्णत्ता स० !, अत्थि णं भंते !० भरहे वासे दुब्भूयाणि वा कुलरोगाइ वा गामरो-  
 गाइ वा मंडलरोगाइ वा पोट्टवे० सीसवेयणाइ वा कण्णोट्टअच्छिणहदंतवेयणाइ वा कासाइ वा सासाइ वा सोसाइ वा दाहाइ वा अरिसाइ वा अजीरगाइ वा दओदराइ वा पंडुरोगाइ वा भगंदराइ वा एगाहियाइ वा बेयाहियाइ वा तेयाहियाइ वा चउ-  
 त्थाहियाइ वा इंदग्गहाइ वा धणुग्गहाइ वा खंदग्गहाइ वा कुमारग्गहाइ वा जक्ख-  
 ग्गहाइ वा भूयग्गहाइ वा मच्छसूलाइ वा हिययसूलाइ वा पोट्ट० कुच्छि० जोणिसू-  
 लाइ वा गाममारीइ वा जाव सण्णिवेसमारीइ वा पाणिक्खया जणक्खया कुलक्खया वसणब्भूयमणारिया ? गोयमा ! णो इण्ठे सम्भे, ववगयरोगायंका णं ते मणुया पण्णत्ता समणाउसो ! ॥ २४ ॥ तीसे णं भंते ! समाए भारहे वासे मणुयाणं केवइयं कालं ठिई पण्णत्ता ? गोयमा ! जहण्णेणं देसूणाइं तिण्णि पल्लिओवमाइं उक्कोसेणं देसू-  
 णाइं तिण्णि पल्लिओवमाइं, तीसे णं भंते ! समाए भारहे वासे मणुयाणं सरीरा केवइयं उच्चत्तेणं पण्णत्ता ? गोयमा ! जहन्नेणं तिण्णि गाउयाइं उक्कोसेणं तिण्णि गाउयाइं, ते णं भंते ! मणुया किंसंघयणी पण्णत्ता ? गोयमा ! वइरोसभनारायसंघयणी पण्णत्ता, तेसिं णं भंते ! मणुयाणं सरीरा किंसंठिया पण्णत्ता ? गोयमा ! समचउरंसंठाण-  
 संठिया, तेसिं णं मणुयाणं बेळपण्णा पिट्टकरंडयसया पण्णत्ता समणाउसो !, ते णं भंते ! मणुया कालमासे कालं किच्चा कहिं गच्छंति कहिं उववज्जंति ? गो० ! छम्मा-  
 सावसेसाउया जुयलगं पसवंति, एगूणपण्णं राइंदियाइं सारक्खंति संगोवेंति सा० २ ता कासित्ता छीइत्ता जंभाइत्ता अक्किट्ठा अव्वहिया अपरियाविद्या कालमासे कालं किच्चा देवलोएसु उववज्जंति, देवलोयपरिग्गहा णं ते मणुया पण्णत्ता०, तीसे णं भंते ! समाए भारहे वासे कइविहा मणुस्सा अणुसज्जित्था ? गो० ! छव्विहा प०, तं०-पम्हगंधा १ मियगंधा २ अममा ३ तेयतली ४ सहा ५ सणिचारी ६ ॥ २५ ॥ तीसे णं समाए



चउहिं सागरोवमकोडाकोडीहिं काले वीइक्कंते अणंतेहिं वण्णपज्जवेहिं अणंतेहिं  
 गंधपज्जवेहिं अणंतेहिं रसपज्जवेहिं अणंतेहिं फासपज्जवेहिं अणंतेहिं संघयणपज्जवेहिं  
 अणंतेहिं संठाणपज्जवेहिं अणंतेहिं उच्चत्तपज्जवेहिं अणंतेहिं आउपज्जवेहिं अणंतेहिं  
 गुरुलहुपज्जवेहिं अणंतेहिं अगुरुलहुपज्जवेहिं अणंतेहिं उट्ठाणकम्मबलवीरियपुरिसक्कार-  
 परक्कमपज्जवेहिं अणंतगुणपरिहाणीए परिहायमाणे २ एत्थ णं सुसमा णामं समाकाले  
 पडिवज्जिसु समणाउसो !, जंबुद्वीवे णं भंते ! दीवे इमीसे ओसप्पिणीए सुसमाए  
 समाए उत्तमकट्टपत्ताए भरहस्स वासस्स केरिसए आयारभावपडोयारे होत्था ?  
 गोयमा ! बहुसमरमणिजे भूमिभागे होत्था, से जहाणामए-आलिंगपुक्खरेइ वा तं  
 चेव जं सुसमसुसमाए पुव्ववण्णियं, णवरं णाणत्तं-चउधणुसहस्समूसिया, एगे  
 अट्ठावीसे पिट्ठकरंडयसए, छट्ठभत्तस्स आहारट्ठे, चउसट्ठिं राइंदियाइं सारक्खंति, दो  
 पल्लिओवमाइं आऊ, सेसं तं चेव, तीसे णं समाए चउव्विहा मणुस्सा अणुसज्जित्था,  
 तंजहा-एगा १ पउरजंघा २ कुसुमा ३ सुसमणा ४ ॥ २६ ॥ तीसे णं समाए तिहिं  
 सागरोवमकोडाकोडीहिं काले वीइक्कंते अणंतेहिं वण्णपज्जवेहिं जाव अणंतगुणपरि-  
 हाणीए परिहायमाणी २ एत्थ णं सुसमदुस्समा णामं समा पडिवज्जिसु समणाउसो !,  
 सा णं समा तिहा विभज्जइ-पढमे तिभाए १ मज्झिमे तिभाए २ पच्छिमे तिभाए ३,  
 जंबुद्वीवे णं भंते ! दीवे इमीसे ओसप्पिणीए सुसमदुस्समाए समाए पढममज्झिमेसु  
 तिभाएसु भरहस्स वासस्स केरिसए आयारभावपडोयारे पुच्छा, गोयमा ! बहुसम-  
 रमणिजे भूमिभागे होत्था, सो चेव गमो गेयव्वो णाणत्तं दो धणुसहस्साइं उट्ठं  
 उच्चत्तेणं, तेसिं च मणुयाणं चउसट्ठिपिट्ठकरंडगा चउत्थभत्तस्स आहारट्ठे समुप्पज्जइ  
 ठिइं पल्लिओवमं एगूणासीइं राइंदियाइं सारक्खंति संगोवेंति जाव देवलोणपरि-  
 गहिया णं ते मणुया पण्णत्ता समणाउसो !, तीसे णं भंते ! समाए पच्छिमे तिभाए  
 भरहस्स वासस्स केरिसए आयारभावपडोयारे होत्था ? गोयमा ! बहुसमरमणिजे  
 भूमिभागे होत्था, से जहाणामए-आलिंगपुक्खरेइ वा जाव मणीहिं उवसोमिए,  
 तंजहा-कित्तिमेहिं चेव अकित्तिमेहिं चेव, तीसे णं भंते ! समाए पच्छिमे तिभागे  
 भरहे वासे मणुयाणं केरिसए आयारभावपडोयारे होत्था ? गोयमा ! तेसिं मणुयाणं  
 छव्विहे संघयणे छव्विहे संठाणे बहूणि धणुसयाणि उट्ठं उच्चत्तेणं जहण्णेणं संखिज्जाणि  
 वासाणि उक्कोसेणं असंखिज्जाणि वासाणि आउयं पालंति पालित्ता अप्पेगइया णिरय-  
 गामी अप्पेगइया तिरियगामी अप्पेगइया मणुस्सगामी अप्पेगइया देवगामी अप्पे-  
 गइया सिज्जंति जाव सब्बदुक्खाणमंतं करेंति ॥ २७ ॥ तीसे णं समाए पच्छिमे तिभाए  
 पल्लिओवमद्वभागावसेसे एत्थ णं इमे पण्णरस कुलगरा समुप्पज्जित्था, तंजहा-सुमई १

पडिस्सुई २ सीमंकरे ३ सीमंधरे ४ खेमंकरे ५ खेमंधरे ६ विमलवाहणे ७ चक्खुमं ८ जसमं ९ अभिचंदे १० चंदाभे ११ पसेणेई १२ मरुदेवे १३ णाभी १४ उसभे १५ त्ति ॥ २८ ॥ तत्थ णं सुमइपडिस्सुइसीमंकरसीमंधरखेमंकराणं एएसिं पंचहं कुलगराणं हक्कारे णामं दण्डणीई होत्था, ते णं मणुया हक्कारेणं दंडेणं हया समाणा लज्जिया विलज्जिया वेड्ढा भीया तुसिणीया विणओणया चिट्ठंति, तत्थ णं खेमंधर-विमलवाहणचक्खुमजसमअभिचंदाणं एएसिं णं पंचहं कुलगराणं मक्कारे णामं दंडणीई होत्था, ते णं मणुया मक्कारेणं दंडेणं हया समाणा जाव चिट्ठंति, तत्थ णं चंदाभपसेणइमरुदेवणाभिसभाणं एएसिं णं पंचहं कुलगराणं धिक्कारे णामं दंडणीई होत्था, ते णं मणुया धिक्कारेणं दंडेणं हया समाणा जाव चिट्ठंति ॥ २९ ॥ णाभिस्स णं कुलगरस्स मरुदेवाए भारियाए कुच्छिसि एत्थ णं उसहे णामं अरहा कोसलिए पढमराया पढमजिणे पढमकेवली पढमत्तिथयरे पढमधम्मवरचक्कवट्ठी समुप्पजित्था, तए णं उसभे अरहा कोसलिए वीसं पुव्वसयसहस्साइं कुमारवास-मज्जे वसइ वसइत्ता तेवट्ठिं पुव्वसयसहस्साइं महारायवासमज्जे वसइ, तेवट्ठिं पुव्व-सयसहस्साइं महारायवासमज्जे वसमाणे लेहाइयाओ गणियप्पहाणाओ सउणस्य-यज्जवसाणाओ वावत्तिरं कलाओ चोसट्ठिं महिलाणुणे सिप्पसयं च कम्माणं तिण्णिवि पयाहियाए उवदिसइ उवदिस्सिता पुत्तसयं रजसए अभिसिंचइ अभिसिंचित्ता तेसीइं पुव्वसयसहस्साइं महारायवासमज्जे वसइ वसित्ता जे से गिम्हाणं पढमे मासे पढमे पक्खे चित्तवहुले तस्स णं चित्तवहुलस्स णवमीपक्खेणं दिवसस्स पच्छिमे भागे चइत्ता हिरणं चइत्ता सुवणं चइत्ता कोसं कोट्टागारं चइत्ता बलं चइत्ता वाहणं चइत्ता पुरं चइत्ता अंतेउरं चइत्ता विउलधणकणगरयणमणिमोत्तियसंखसिलप्पवाल-रत्तरयणसंतसारसावइज्जं विच्छड्ढइत्ता विगोवइत्ता दायं दाइयाणं परिभाएत्ता सुदंस-णाए सीयाए सदेवमणुयासुराए परिसाए समणुगम्ममाणमग्गे संखिदचक्कियणंगलि-यमुहमंगलियपूसमाणववद्धमाणगआइक्खगलंखमंखघंटियगणेहिं ताहिं इट्ठाहिं कंताहिं पियाहिं मणुण्णाहिं मणामाहिं उरालाहिं कल्लाणाहिं सिवाहिं धन्नाहिं मंगल्लाहिं सस्सि-रीयाहिं हिययगमणिजाहिं हिययपल्हायणिजाहिं कणमणणिव्वुइकराहिं अपुणस्ताहिं अट्टसइयाहिं वग्गूहिं अणवरयं अभिणंदंता य अभियुणंता य एवं वयासी-जय जय नंदा ! जय जय भद्दा ! धम्मेणं अभीए परीसहोवसग्गाणं खंतिखमे भयभेरवाणं धम्मे ते अविघं भवउत्तिकट्ठु अभिणंदंति य अभियुणंति य । तए णं उसभे अरहा कोसलिए णयणमालासहस्सेहिं पिच्छिज्जमाणे २ एवं जाव णिग्गच्छइ जहा उववाइए जाव आउलबोलबहुलं णमं करंते विणीयाए रायहाणीए मज्झमज्जेणं णिग्गच्छइ

आसियसंमज्जियसित्तसुइकपुप्फोवयारकलियं सिद्धत्थवणविउलरायमग्गं करेमाणे हय-  
 गयरहपहकरेण पाइक्कचडकरेण य मंदं २ उद्धतरेणुयं करेमाणे २ जेणेव सिद्धत्थ-  
 वणे उज्जाणे जेणेव असोगवरपायवे तेणेव उवागच्छइ २ ता असोगवरपायवस्स अहे-  
 सीयं ठावेइ २ ता सीयाओ पच्चोरुहइ २ ता सयमेवाभरणालंकारं ओमुयइ २ ता  
 सयमेव चउहिं सुट्ठीहिं लोयं करेइ २ ता छट्ठेणं भत्तेणं अपाणएणं आसाढाहिं  
 णक्खत्तेणं जोगमुवागएणं उग्गाणं भोगाणं राइन्नाणं खत्तियाणं चउहिं सहस्सेहिं  
 सद्धिं एणं देवदूसमादाय मुंडे भवित्ता अगाराओ अणगारियं पव्वइए ॥ ३० ॥  
 उसभे णं अरहा कोसलिए संवच्छरे साहियं चीवरधारी होत्था, तेण परं अचेलेए ।  
 जप्पभिइं च णं उसभे अरहा कोसलिए मुंडे भवित्ता अगाराओ अणगारियं पव्वइए  
 तप्पभिइं च णं उसभे अरहा कोसलिए णिच्चं वोसट्ठकाए चियत्तदेहे जे केइ उवसग्गा  
 उप्पज्जंति तं०-दिव्वा वा जाव पडिलोमा वा अणुलोमा वा, तत्थ पडिलोमा वेत्तेण  
 वा जाव कसेण वा काए आउट्टेज्जा अणुलोमा वंदेज्ज वा नमंसेज्ज वा जाव पज्जुवा-  
 सेज्ज वा ते (उप्पन्न) सव्वे सम्मं सहइ जाव अहियासेइ, तए णं से भगवं समणे  
 जाए इरियासमिए जाव पारिट्ठावणियासमिए मणसमिए वयसमिए कायसमिए  
 मणगुत्ते जाव गुत्तवंभयारी अक्रोहे जाव अलोहे संते पसंते उवसंते परिणिव्वुडे  
 छिण्णसोए निरुवलेवे संखमिव निरंजणे जच्चकणगं व जायहूवे आदरिसपडिभागे इव  
 पागडभावे कुम्भो इव गुत्तिदिए पुक्खरपत्तमिव निरुवलेवे गगणमिव निरालंबणे  
 अणिले इव गिरालए चंदो इव सोमदंसणे सूरु इव तेयसी विहग इव अपडिबद्ध-  
 गामी सागरो इव गंभीरे मंदरो इव अकंपे पुढवी विव सव्वफासविसहे जीवो विव  
 अप्पडिहयगइत्ति । णत्थि णं तस्स भगवंतस्स कत्थइ पडिबंधे, से पडिबंधे चउ-  
 विवहे भवइ, तंजहा-दव्वओ खित्तओ कालओ भावओ, दव्वओ इह खलु माया मे  
 पिथा मे भाया मे भगिणी मे जाव संगंथसंथुया मे हिरण्णं मे सुवण्णं मे जाव  
 उवगरणं मे अहवा समासओ सच्चित्ते वा अच्चित्ते वा मीसए वा दव्वजाए सेवं  
 तस्स ण भवइ, खित्तओ गामे वा णयरे वा अरण्णे वा खेत्ते वा खले वा गेहे वा  
 अंगणे वा एवं तस्स ण भवइ, कालओ थोवे वा लवे वा मुहुत्ते वा अहोरेत्ते वा  
 पक्खे वा मासे वा उऊए वा अयणे वा संवच्छरे वा अण्णयरे वा दीहकालपडिबंधे  
 एवं तस्स ण भवइ, भावओ क्रोहे वा जाव लोहे वा भए वा हासे वा एवं तस्स ण  
 भवइ, से णं भगवं वासावासवज्जं हेमंतगिम्हाइ गामे एगराइए णगरे पंचराइए  
 ववगयहाससोगअरइभयपरित्तासे णिम्ममे गिरहंकारे लहुभूए अगंथे वासीतच्छणे  
 दुअट्टे चंदणाणुलेवणे अरत्ते लेट्ठुमि कंचणंमि य समे इह लोए अपडिबद्धे जीविय-

मरणे निरवकंखे संसारपारगामी कम्मसंगणिग्घायणट्ठाए अब्भुट्ठिए विहरइ । तस्स  
 णं भगवंतस्स एएणं विहारेणं विहरमाणस्स एगे वाससहस्से विडिक्कंते समाणे पुरिम-  
 तालस्स णयरस्स बहिया सगडमुहंसि उज्जारणंसि णग्गोहवरपायवस्स अहे झानंतरी-  
 याए वट्टमाणस्स फग्गुणबहुलस्स इक्कारसीए पुव्वण्हकालसमयंसि अट्टमेणं भत्तेणं  
 अपाणएणं उत्तरासाढाणक्खत्तेणं जोगमुदागएणं अणुत्तरेणं नाणेणं जाव चरित्तेणं  
 अणुत्तरेणं तवेणं बलेणं वीरिएणं आलएणं विहारेणं भावणाए खंतीए गुत्तीए मुत्तीए  
 तुट्ठीए अज्जवेणं मद्दवेणं लाघवेणं सुचरियसोवचियफलनिव्वाणमग्गेणं अप्पाणं भावे-  
 माणस्स अणंते अणुत्तरे णिव्वाघाए णिरावरणे कसिणे पडिपुण्णे केवलवरनाणदंसणे  
 ससुप्पण्णे जिणे जाए केवली सव्वण्णू सव्वदरिसी सणेरइयतिरियणरामरस्स लोगस्स  
 पज्जवे जाणइ पासइ, तंजहा-आगइं गइं ठिइं उववायं भुत्तं कडं पडिसेवियं आवीकम्मं  
 रहोक्कम्मं तं तं कालं मणवयकाए जोगे एवमाइ जीवाणवि सव्वभावे अजीवाणवि  
 सव्वभावे मोक्खमग्गस्स विसुद्धतराए भावे जाणमाणे पासमाणे एस खलु मोक्खमग्गे  
 मम अण्णेसिं च जीवाणं हियसुहणिस्सेसकरे सव्वदुक्खविमोक्खणे परमसुहसमाणे  
 भविस्सइ । तए णं से भगवं समणाणं णिमग्गथाण य णिमग्गथीण य पंच महव्वयाइं  
 सभावणगाइं छच्च जीवणिकाए धम्मं देसमाणे विहरइ, तंजहा-पुढविकाइए भावणा-  
 गमेणं पंच महव्वयाइं सभावणगाइं भाणियव्वाइं । उसभस्स णं अरहओ कोसलियस्स  
 चउरासी गणा गणहरा होत्था, उसभस्स णं अरहओ कोसलियस्स उसभसेणपामो-  
 क्खाओ तुलसीइं समणसाहस्सीओ उक्कोसिया समणसंपया होत्था, उसभस्स णं० बंभी-  
 सुंदरीपामोक्खाओ तिण्णि अज्जियासयसाहस्सीओ उक्कोसिया अज्जियासंपया होत्था,  
 उसभस्स णं० सेज्जसपामोक्खाओ तिण्णि समणोवासगसयसाहस्सीओ पंच य साह-  
 स्सीओ उक्कोसिया समणोवासगसंपया होत्था, उसभस्स णं० सुभद्दापामोक्खाओ पंच  
 समणोवासियासयसाहस्सीओ चउपण्णं च सहस्सा उक्कोसिया समणोवासियासंपया  
 होत्था, उसभस्स णं अरहओ कोसलियस्स अजिणाणं जिणसंकासाणं सव्वक्खरस-  
 ण्णिवाइं जिणो विव अवितहं वागरमाणणं चत्तारि चउइसपुव्वीसहस्सा अद्धट्ठमा  
 य सया उक्कोसिया चउदसपुव्वीसंपया होत्था, उसभस्स णं० णव ओहिणाणि-  
 सहस्सा उक्कोसिया०, उसभस्स णं० वीसं जिणसहस्सा० वीसं वेउव्वियसहस्सा छच्च  
 सया उक्कोसिया० बारस विउलमईसहस्सा छच्च सया पण्णासा० बारस वाईसहस्सा  
 छच्च सया पण्णासा०, उसभस्स णं० गइक्कलाणाणं ठिइक्कलाणाणं आगमेसिभद्दाणं  
 बावीसं अणुत्तरोववाइयाणं सहस्सा णव य सया०, उसभस्स णं० वीसं समणसहस्सा  
 सिद्धा, चत्तालीसं अज्जियासहस्सा सिद्धा, सट्ठि अंतेवासीसहस्सा सिद्धा, उसभस्स णं

अरहओ० बहवे अंतेवासी अणगारा भगवंतो अप्पेगइया मासपरियाया जहा उव-  
वाइए सव्वओ अणगारवण्णओ जाव उड्डुजाणू अहोसिरा ज्ञाणकोट्ठोवगया संजमेणं  
तवसा अप्पाणं भावेमाणा विहरंति, उसभस्स णं अरहओ० दुविहा अंतकरभूमी  
होत्था, तंजहा—जुगंतकरभूमी य परियायंतकरभूमी य, जुगंतकरभूमी जाव असंखे-  
ज्जाई पुरिसजुगाई, परियायंतकरभूमी अंतोमुहुत्तपरियाए अंतमकासी ॥ ३१ ॥  
उसमे णं अरहा० पंचउत्तरासाढे अभीइच्छे होत्था, तंजहा—उत्तरासाढाहिं चुए चइत्ता  
गव्वं वक्कंते उत्तरासाढाहिं जाए उत्तरासाढाहिं रायाभिसेयं पत्ते उत्तरासाढाहिं मुंडे  
भविता अगाराओ अणगारियं पव्वइए उत्तरासाढाहिं अणंते जाव समुप्पण्णे, अभी-  
इणा परिणिव्वुए ॥ ३२ ॥ उसमे णं अरहा कोसलिए वज्जरिसहनारायसंघयणे  
समचउरंसंठाणसंठिए पंच धणुसयाई उड्डु उच्चतेणं होत्था । उसमे णं अरहा०  
वीसं पुव्वसयसहस्साई कुमारवासमज्झे वसित्ता तेवट्ठिं पुव्वसयसहस्साई महारज-  
वासमज्झे वसित्ता तेसीई पुव्वसयसहस्साई अगारवासमज्झे वसित्ता मुंडे भविता  
अगाराओ अणगारियं पव्वइए, उसमे णं अरहा० एगं वाससहस्सं छउमत्थपरियायं  
पाउणित्ता एगं पुव्वसयसहस्सं वाससहस्सुणं केवलिपरियायं पाउणित्ता एगं पुव्वस-  
यसहस्सं बहुपडिपुणं सामण्णपरियायं पाउणित्ता चउरासीई पुव्वसयसहस्साई  
सव्वाउयं पालइत्ता जे से हेमंताणं तच्चे मासे पंचमे पक्खे माहवहुले तस्स णं  
माहवहुलस्स तेरसीपक्खेणं दसहिं अणगारसहस्सेहिं सद्धिं संपरिवुडे अट्ठावयसेल-  
सिहरंसि चोद्दसमेणं भत्तेणं अपाणएणं संपलियंकणिसण्णे पुव्वण्हकालसमयंसि अभी-  
इणा णक्खत्तेणं जोगमुवागएणं सुसमदूसमाए समाए एगूणणवउईहिं पक्खेहिं  
सेसेहिं कालगए वीइक्कंते जाव सव्वदुक्खप्पहीणे । जं समयं च णं उसमे अरहा  
कोसलिए कालगए वीइक्कंते समुज्जाए छिण्णजाइजरामरणबंधणे सिद्धे बुद्धे जाव  
सव्वदुक्खप्पहीणे तं समयं च णं सक्कस्स देविंदस्स देवरण्णे आसणे चलिए, ताए  
णं से सक्के देविंदे देवराया आसणं चलियं पासइ पासित्ता ओहिं पउंजइ २ ता  
भयवं तित्थयरं ओहिणा आभोएइ २ ता एवं वयासी—परिणिव्वुए खलु जंबुदीवे  
दीवे भरहे वासे उसहे अरहा कोसलिए, तं जीयमेयं तीयपच्चुप्पणमणागयाणं  
सक्काणं देविंदाणं देवराईणं तित्थगराणं परिनिव्वाणमहिमं करेतए, तं गच्छामि णं  
अहंपि भगवओ तित्थगरस्स परिनिव्वाणमहिमं करेमि त्तिक्कट्ठु वंदइ णमंसइ वं० २ ता  
चउरासीईए सामाणियसाहस्सीहिं ताथत्तीसाए ताथत्तीसएहिं चउहिं लोगपालेहिं जाव  
चउहिं चउरासीईहिं आयरक्खदेवसाहस्सीहिं अण्णेहि य बहूहिं सोहम्मकप्पवासीहिं  
वेमाणिएहिं देवेहिं देवीहि य सद्धिं संपरिवुडे ताए उक्किट्ठाए जाव तिरियमसंखेज्जाणं

दीवसमुद्धानं मज्झिमज्जेणं जेणेव अट्ठावयपव्वए जेणेव भगवओ तित्थगरस्स सरीरए तेणेव उवागच्छइ उवागच्छिता विमणे णिराणंदे चिट्ठइ । तेणं कालेणं तेणं समएणं ईसाणे देविंदे देवराया उत्तरङ्गुलोगाहिंवई अट्ठावीसविमाणसयसहस्साहिंवई सूलपाणी वसहवाहणे सुरिंदे अरयंवरवत्थधरे जाव विउलाइं भोगभोगाइं भुंजमाणे विहरइ, तए णं तस्स ईसाणस्स देविंदस्स देवरणो आसणं चलइ, तए णं से ईसाणे जाव देवराया आसणं चलयं पासइ २ ता ओहिं पउंजइ २ ता भगवं तित्थगरं ओहिणा आभोएइ २ ता जहा सक्के नियगपरिवारेणं भाण्येव्वो जाव चिट्ठइ, एवं सव्वे देविंदा जाव अञ्जुए णियगपरिवारेणं आण्येव्वा, एवं जाव भवण-वासीणं वीस इंदा वाणमंतराणं सोलस जोइसियाणं दोणिण णियगपरिवारा णेयव्वा । तए णं सक्के देविंदे देवराया ते बहवे भवणवइवाणमंतरजोइसवेमाणिए देवे एवं वयासी-खिप्पामेव भो देवाणुप्पिया ! णंदणवणाओ सरसाइं गोसीसवरचंदणकट्ठाइं साहरह २ ता तओ चिइगाओ रएह-एणं भगवओ तित्थगरस्स एणं गणहराणं एणं अवसेसाणं अणगाराणं । तए णं ते० भवणवइ जाव वेमाणिया देवा णंदणवणाओ सरसाइं गोसीसवरचंदणकट्ठाइं साहरंति २ ता तओ चिइगाओ रएंति, एणं भगवओ तित्थगरस्स एणं गणहराणं एणं अवसेसाणं अणगाराणं, तए णं से सक्के देविंदे देवराया आभिओगे देवे सहावेइ २ ता एवं वयासी-खिप्पामेव भो देवाणुप्पिया ! खीरोदगसमुद्धानो खीरोदगं साहरह, तए णं ते आभिओगा देवा खीरोदगसमुद्धानो खीरोदगं साहरंति, तए णं से सक्के देविंदे देवराया तित्थगरसरीरगं खीरोदगेणं ण्हाणेइ २ ता सरसेणं गोसीसवरचंदणेणं अणुलिंपइ २ ता हंसलक्खणं पडसाडयं णियंसेइ २ ता सव्वालंकारविभूसियं करेइ, तए णं ते० भवणवइ जाव वेमाणिया० गणहरसरीरगाइं अणगारसरीरगाइंपि खीरोदगेणं ण्हावंति २ ता सरसेणं गोसीसवर-चंदणेणं अणुलिंपति २ ता अहयाइं दिव्वाइं देवदूसजुयलाइं णियंसंति २ ता सव्वा-लंकारविभूसियाइं करेंति, तए णं से सक्के देविंदे देवराया ते बहवे भवणवइ जाव वेमाणिए देवे एवं वयासी-खिप्पामेव भो देवाणुप्पिया ! ईहामिगउसभतुरय जाव वणलयभत्तिचित्ताओ तओ सिबियाओ विउव्वह, एणं भगवओ तित्थगरस्स एणं गणहराणं एणं अवसेसाणं अणगाराणं, तए णं ते बहवे भवणवइ जाव वेमाणिया० तओ सिबियाओ विउव्वंति, एणं भगवओ तित्थगरस्स एणं गणहराणं एणं अव-सेसाणं अणगाराणं, तए णं से सक्के देविंदे देवराया विमणे णिराणंदे भगवओ तित्थगरस्स विणट्ठजम्मजरामरणस्स सरीरगं सीयं आरुहेइ २ ता चिइगाए ठवेइ, तए णं ते बहवे भवणवइ जाव वेमाणिया देवा गणहराणं अणगाराणं य विणट्ठ-

जम्मजरामरणं सरीरगाईं सीयं आरुहंति २ ता चिइगाए ठवेंति, तए णं से सक्के देविंदे देवराया ते बहवे भवणवइ जाव वेमाणिए देवे एवं वयासी-खिप्पामेव भो देवाणुप्पिया ! तित्थगरचिइगाए जाव अणगरचिइगाए अगुस्तुसक्कघयं च कुंभगसो य भारगसो य साहरह, तए णं ते० भवणवइ जाव वेमाणिया देवा तित्थगरचिइगाए जाव अणगरचिइगाए जाव भारगसो य साहरंति, तए णं से सक्के देविंदे देवराया अग्गिकुमारे देवे सद्दावेइ २ ता एवं वयासी-खिप्पामेव भो देवाणुप्पिया ! तित्थ-गरचिइगाए जाव अणगरचिइगाए अगणिकायं विउव्वह २ ता एयमाणत्तियं पच्चप्पिणह, तए णं ते अग्गिकुमारा देवा विमणा णिराणंदा तित्थगरचिइगाए जाव अणगरचिइगाए अगणिकायं विउव्वंति, तए णं से सक्के देविंदे देवराया वाउकुमारे देवे सद्दावेइ २ ता एवं वयासी-खिप्पामेव भो देवाणुप्पिया ! तित्थ-गरचिइगाए जाव अणगरचिइगाए वाउक्कायं विउव्वह २ ता अगणिकायं उज्जालेह तित्थगरसरीरगं गणहरसरीरगाईं अणगरसरीरगाईं च झामेह, तए णं ते वाउकुमारा देवा विमणा णिराणंदा तित्थगरचिइगाए जाव विउव्वंति अगणिकायं उज्जालेंति तित्थगरसरीरगं जाव अणगरसरीरगाणि य झामेंति, तए णं ते बहवे भवणवइ जाव वेमाणिया देवा तित्थगरस्स परिणव्वाणमहिमं करंति २ ता जेणेव साईं साईं विमाणाईं जेणेव साईं २ भवणाईं जेणेव साओ २ सभाओ सुहम्माओ तेणेव उवागच्छंति २ ता विउलाईं भोगभोगाईं भुंजमाणा विहरंति ॥ ३३ ॥ तीसे णं समाए दोहिं सागरोवमकोडाकोडीहिं काले वीइकंते अणंतेहिं वण्णपज्जवेहिं तहेव जाव अणंतेहिं उट्ठाणकम्म जाव परिहायमाणे २ एत्थ णं दूसमसुसमा णामं समा-काले पड्विज्जिमु समणाउसो !, तीसे णं भंते ! समाए भरहस्स वासस्स केरिसए आगारभावपडोयारे पण्णत्ते ? गोयमा ! बहुसमरमणिजे भूमिभागे पण्णत्ते, से जहाणामए-आलिंगपुक्खरेइ वा जाव मणीहिं उवसोमिए, तंजहा-कित्तिमेहिं चेव०, तीसे णं भंते ! समाए भरहे० मणुयाणं केरिसए आयारभावपडोयारे प० ? गोयमा ! तेसिं मणुयाणं छव्विहे संघयणे छव्विहे संठाणे बहूइं धणूइं उट्ठं उच्चत्तेणं जह्णणेणं अंतोमुहुत्तं उक्कोसेणं पुव्वकोडीआउयं पालेंति २ ता अप्पेगइया णिरयगामी जाव देवगामी अप्पेगइया सिउज्झंति बुज्झंति जाव सव्वदुक्खाणमंतं करंति, तीसे णं समाए तओ वंसा समुप्पज्जित्था, तंजहा-अरहंतवंसे चक्कवट्ठिंसे दसारवंसे, तीसे णं समाए तेवीसं तित्थयरा इक्कारस चक्कवट्ठी णव बलदेवा णव वासुदेवा समुप्पज्जित्था ॥ ३४ ॥ तीसे णं समाए एक्काए सागरोवमकोडाकोडीए बायालीसाए वाससहस्सेहिं ऊणियाए काले वीइकंते अणंतेहिं वण्णपज्जवेहिं तहेव जाव परिहाणीए परिहायमाणे २

एत्थ णं दूसमा णामं समाकाले पडिवज्जिस्सइ समणाउसो !, तीसे णं भंते !  
 समाए भरहस्स वासस्स केरिसए आगारभावपडोयारे भविस्सइ ? गोयमा ! बहुसम-  
 रमणिज्जे भूमिभागे भविस्सइ से जहाणामए-आलिङ्गपुक्खरेइ वा मुङ्गपुक्खरेइ वा  
 जाव णाणामणिपंचवण्णेहिं कित्तिमेहिं चेव अकित्तिमेहिं चेव, तीसे णं भंते ! समाए  
 भरहस्स वासस्स मणुयाणं केरिसए आगारभावपडोयारे पण्णत्ते ? गो० ! तेसिं  
 मणुयाणं छव्विहे संवयणे छव्विहे संठाणे बहुईओ रयणीओ उड्ढं उच्चत्तेणं जहण्णेणं  
 अंतोमुहुत्तं उक्कोसेणं साइरेणं वाससयं आउयं पालेंति २ ता अप्पेगइया गिरयगामी  
 जाव सव्वदुक्खाणमंतं करेंति, तीसे णं समाए पच्छिमे तिभागे गणधम्ममे पासंड-  
 धम्ममे रायधम्ममे जायतेए धम्मचरणे य वोच्छिज्जिस्सइ ॥ ३५ ॥ तीसे णं समाए  
 एकवीसाए वाससहस्सेहिं काले विइकंते अणंतेहिं वण्णपज्जवेहिं गंध० रस०  
 फासपज्जवेहिं जाव परिहायमाणे २ एत्थ णं दूसमदूसमा णामं समाकाले पडिव-  
 ज्जिस्सइ समणाउसो !, तीसे णं भंते ! समाए उत्तमकट्टपत्ताए भरहस्स वासस्स  
 केरिसए आगारभावपडोयारे भविस्सइ ? गोयमा ! काले भविस्सइ हाहाभूए भंभाभूए  
 कोलाहलभूए समाणुभावेण य खरफरुसधूलिमइला दुव्विसहा वाउला भयंकरा य  
 वाया संवट्ठगा य वाइंति, इह अभिक्खणं २ धूमाहिंति य दिसाओ समंता  
 रउस्सला रेणुकलुसतमपडलणिरालोया समयलुक्खयाए णं अहियं चंदा सीयं  
 मोच्छिहिंति अहियं सूरिया तविस्संति, अदुत्तरं च णं गोयमा ! अभिक्खणं २  
 अरसमेहा विरसमेहा खारमेहा खत्तमेहा अग्गिमेहा विज्जुमेहा विसमेहा अजवणि-  
 ज्जोदगा वाहिरोगवेयणोदीरणपरिणामसलिला अमणुण्णपाणिधगा चंडाणिलपहयति-  
 क्खधाराणिवायपउरं वासं वासिहिंति, जेणं भरहे वासे गामागरणगरखेडकब्बडम-  
 डंबदोणमुहपट्ठणासमगयं जणवयं चउप्पयगवेलेए खहयरे पक्खिसंघे गामारणप्प-  
 यारणिरए तसे य पाणे बहुप्पयारे रुक्खगुच्छगुम्मलयवलिपवालंकुरमाइए तणवण-  
 स्सइकाइए ओसहीओ य विद्धंसेहिंति पव्वयगिरिडोंगरुत्थलभट्ठिमाइए य वेयङ्गगिरि-  
 वज्जे विरावेहिंति, सलिलबिलविसमगतणिणुण्णयाणि य गंगासिंधुवज्जाइं समीकरे-  
 हिंति, तीसे णं भंते ! समाए भरहस्स वासस्स भूमीए केरिसए आगारभावपडोयारे  
 भविस्सइ ? गोयमा ! भूमी भविस्सइ इंगालभूया मुम्मुरभूया छारियभूया तत्तकवेळु-  
 यभूया तत्तसमजोइभूया धूलिबहुला रेणुबहुला पंकबहुला पणयबहुला चलणिबहुला  
 बहूणं धरणिगोयराणं सत्ताणं दुञ्चिकमा यावि भविस्सइ । तीसे णं भंते ! समाए  
 भरहे वासे मणुयाणं केरिसए आगारभावपडोयारे भविस्सइ ? गोयमा ! मणुया  
 भविस्संति दुर्ह्वा दुवण्णा दुगंधा दुरसा दुफासा अणिट्ठा अकंता अप्पिया असुभा



अमणुण्णा अमणामा हीणस्सरा दीणस्सरा अणिट्ठस्सरा अकंतस्सरा अप्पियस्सरा  
 अमणामस्सरा अमणुण्णस्सरा अणादेज्जवयणपच्चायाया णिल्लजा कूडकवडकलहवंध-  
 वेरणि रथा मजायाइक्कमप्पहाणा अकज्जणिच्चुजया गुरुणिओगविणयरहिया य विक-  
 लरूवा पस्सणहकेसमंसुरोमा काला खरफस्ससमावण्णा फुट्टसिरा कविलपलियकेसा  
 बहुण्हारुणिसंपिणद्धुईसणिज्जरूवा संकुडियवलीतरंगपरिवेदियंगमंगा जरापरिणयव्व  
 थेरगणरा पविरलपरिसडियदंतसेढी उब्भडवडमुहा विसमणयणवंकणासा वंकवली  
 विगयभेसणमुहा दहुविकिटिमसिब्भफुडियफस्सच्छवी चित्तलंगमंगा कच्छखसराभि-  
 भूया खरतिक्खणक्खकंइइयविकयतणू टोलगइविसमसंधिवंधणा उक्कडुयट्टियविभत्त-  
 दुब्बलकुसंधयणकुप्पमाणकुसंठिया कुरूवा कुट्टाणासणकुसेज्जकुभोइणो असुइणो अणे-  
 गवाहिपीलियंगमंगा खलंतविब्भलगई णिरुच्छाहा सत्तपरिवज्जिया विगयचेट्टा नट्ट-  
 तेया अभिक्खणं २ सीउण्हखरफस्सवायविज्जडियमलिणपंसुरओणुंडियंगमंगा बहु-  
 कोहमाणमायालोभा बहुमोहा असुभदुक्खभागी ओसणं धम्मसणसम्मत्तपरिभट्टा  
 उक्कोसेणं रयणिप्पमाणमेत्ता सोलसवीसइवासपरमाउसो बहुपुत्तणत्तुपरियालपणयबहुला  
 गंगासिंधूओ महाणईओ वेयङ्गं च पव्वयं णीसाए वावत्तिरं णिगोयवीयं वीयमेत्ता  
 बिलवासिणो मणुया भविस्संति, ते णं भंते ! मणुया किमाहारिस्संति ? गोयमा !  
 तेणं कालेणं तेणं समएणं गंगासिंधूओ महाणईओ रहपहमितवित्थराओ अक्खसो-  
 यप्पमाणमेत्तं जलं वोज्झिहंति, सेविय णं जले बहुमच्छकच्छभाइणे, णो चेव णं  
 आउबहुले भविस्सइ, तए णं ते मणुया सूरुग्गमणमुहुतंसि य सूरत्थमणमुहुतंसि य  
 बिलेहिंतो णिद्धाइस्संति विले ० २ ता मच्छकच्छभे थलाइं गाहेहिंति मच्छकच्छभे  
 थलाइं गाहेता सीयायवततोहिं मच्छकच्छभेहिं इक्कवीसं वाससहस्साइं वित्तिं कप्पे-  
 माणा विहरिस्संति । ते णं भंते ! मणुया णिस्सीला णिव्वथा णिग्गुणा णिम्मेरा  
 णिप्पच्चक्खवाणपोसहोववासा ओसणं मंसाहारा मच्छाहारा खुड्डाहारा कुणिमाहारा  
 कालमासे कालं किच्चा कहिं गच्छिहंति कहिं उव्वज्जिहंति ? गो ० ! ओसणं णर-  
 गतिरिक्खजोणिएसुं उव्वज्जिहंति । तीसे णं भंते ! समाए सीहा वग्घा विगा दीविया  
 अच्छा तरच्छा परस्सरा सरभसियालबिरालसुणगा कोलसुणगा ससगा चित्तगा  
 चिल्ललगा ओसणं मंसाहारा मच्छाहारा खोदाहारा कुणिमाहारा कालमासे कालं  
 किच्चा कहिं गच्छिहंति कहिं उव्वज्जिहंति ? गो ० ! ओसणं णरगतिरिक्खजोणि-  
 एसुं उव्वज्जिहंति, ते णं भंते ! ढंका कंका पीलगा मग्गुगा सिही ओसणं  
 मंसाहारा जाव कहिं गच्छिहंति कहिं उव्वज्जिहंति ? गोयमा ! ओसणं  
 णरगतिरिक्खजोणिएसुं उव्वज्जिहंति ॥ ३६ ॥ तीसे णं समाए इक्कवीसाए

वाससहस्सेहिं काले वीइकंते आगमिस्साए उस्सप्पिणीए सावणवहुलपडिवए  
 बालवकरणंसि अभीइणक्खत्ते चोइसपढमसमए अणंतेहिं वण्णपज्जवेहिं जाव  
 अणंतगुणपरिवुड्डीए परिवुड्ढेमाणे २ एत्थ णं दूसमदूसमा णामं समाकाले पडिव-  
 ज्जिस्सइ समणाउसो ! । तीसे णं भंते ! समाए भरहस्स वासस्स केरिसए आगार-  
 भावपडोयारे भविस्सइ ? गोयमा ! काले भविस्सइ हाहाभूए भंभाभूए एवं सो  
 चेव दूसमदूसमावेढओ णेयव्वो, तीसे णं समाए एकवीसाए वाससहस्सेहिं काले  
 विइकंते अणंतेहिं वण्णपज्जवेहिं जाव अणंतगुणपरिवुड्डीए परिवुड्ढेमाणे २ एत्थ णं  
 दूसमा णामं समाकाले पडिवज्जिस्सइ समणाउसो ! ॥ ३७ ॥ तेणं कालेणं तेणं  
 समएणं पुक्खलसंवट्टए णामं महामेहे पाउब्भविस्सइ भरहप्पमाणमित्ते आयामेणं  
 तयणुरूवं च णं विक्खंभवाहल्लेणं, तए णं से पुक्खलसंवट्टए महामेहे खिप्पामेव  
 पतणतणाइस्सइ खिप्पामेव पतणतणाइत्ता खिप्पामेव पविज्जुयाइस्सइ खिप्पामेव  
 पविज्जुयाइत्ता खिप्पामेव जुगमुसलमुट्ठिप्पमाणमित्ताहिं धाराहिं ओघमेघं सत्तरत्तं  
 वासं वासिस्सइ, जेणं भरहस्स वासस्स भूमिभागं इंगालभूयं मुम्मुरभूयं छारियभूयं  
 तत्तक्वेल्लुगभूयं तत्तसमजोइभूयं णिव्वाविस्सइ, तंसि च णं पुक्खलसंवट्ठगंसि महा-  
 मेहंसि सत्तरत्तं णिवइयंसि समाणंसि एत्थ णं खीरमेहे णामं महामेहे पाउब्भविस्सइ  
 भरहप्पमाणमेत्ते आयामेणं तयणुरूवं च णं विक्खंभवाहल्लेणं, तए णं से खीरमेहे  
 णामं महामेहे खिप्पामेव पतणतणाइस्सइ जाव खिप्पामेव जुगमुसलमुट्ठि जाव सत्त-  
 रत्तं वासं वासिस्सइ, जेणं भरहवासस्स भूमीए वण्णं गंधं रसं फासं च जणइस्सइ,  
 तंसि च णं खीरमेहंसि सत्तरत्तं णिवइयंसि समाणंसि इत्थ णं घयमेहे णामं महामेहे  
 पाउब्भविस्सइ, भरहप्पमाणमेत्ते आयामेणं, तयणुरूवं च णं विक्खंभवाहल्लेणं, तए  
 णं से घयमेहे० महामेहे खिप्पामेव पतणतणाइस्सइ जाव वासं वासिस्सइ, जेणं भर-  
 हस्स वासस्स भूमीए सिणेहभावं जणइस्सइ, तंसि च णं घयमेहंसि सत्तरत्तं णिवइयंसि  
 समाणंसि एत्थ णं अमयमेहे णामं महामेहे पाउब्भविस्सइ भरहप्पमाणमित्तं आयामेणं  
 जाव वासं वासिस्सइ, जेणं भरहे वासे रुक्खगुच्छगुम्मललयवल्लितणपव्वगहरियग-  
 ओसहिपवालंकुरमाइए तणवणस्सइकाइए जणइस्सइ, तंसि च णं अमयमेहंसि सत्त-  
 रत्तं णिवइयंसि समाणंसि एत्थ णं रसमेहे णामं महामेहे पाउब्भविस्सइ भरहप्पमा-  
 णमित्ते आयामेणं जाव वासं वासिस्सइ, जेणं तेसि बट्ठूणं रुक्खगुच्छगुम्मललयवल्लितण-  
 पव्वयगहरियगओसहिपवालंकुरमाइणं तित्तकडुयकसायअंबिलमहुरे पंचविहे रसविसेसे  
 जणइस्सइ, तए णं भरहे वासे भविस्सइ परूढरुक्खगुच्छगुम्मललयवल्लितणपव्वयगहरिय-  
 गओसहिए, उवचियतयपत्तपवालंकुरपुप्फफलसमुइए सुहोवभोगे यावि भविस्सइ ॥ ३८ ॥

तए णं ते मणुया भरहं वासं परूढस्खगुच्छगुम्मलयवञ्चितणपव्वयगहरियगओसहियं उवचियतयपत्तपवालपल्लवंकुरपुप्फफलसमुइयं सुहोवभोगं जायं २ चावि पासिहिति पासित्ता विलेहितो णिद्धाइस्संति णिद्धाइत्ता हट्ठुट्ठा अण्णमण्णं सदाविस्संति २ ता एवं वइस्संति-जाए णं देवाणुप्पिया ! भरहे वासे परूढस्खगुच्छगुम्मलयवञ्चितण-पव्वयगहरियग जाव सुहोवभोगे, तं जे णं देवाणुप्पिया ! अम्हं केइ अज्जपभिइ असुभं कुणिमं आहारं आहारिस्सइ से णं अणेगाहिं छायाहिं वज्जणिजेत्तिकट्ठु संठिइ ठवेस्संति २ ता भरहे वासे सुहंसुहेणं अभिरममाणा २ विहरिस्संति ॥ ३९ ॥ तीसे णं भंते ! समाए भरहस्स वासस्स केरिसए आयारभावपडोयारे भविस्सइ ? गो० ! बहुसमरमणिजे भूमिभागे भविस्सइ जाव कित्तिमेहिं चेव अकित्तिमेहिं चेव, तीसे णं भंते ! समाए मणुयाणं केरिसए आयारभावपडोयारे भविस्सइ ? गोयमा ! तेषि णं मणुयाणं छव्विहे संघयणे छव्विहे संठाणे बहुइओ रयणीओ उड्डं उच्चत्तेणं जहण्णेणं अंतोमुहुत्तं उक्कोसेणं साइरेणं वाससयं आउयं पालेहिति २ ता अप्पेगइया णिरयगामी जाव अप्पेगइया देवगामी, ण सिज्झंति । तीसे णं समाए एकवीसाए वाससहस्सेहिं काले वीइकंते अणंतेहिं वण्णपज्जवेहिं जाव परिवुड्ढेमाणे २ एत्थ णं दुसमसूसमा णामं समाकाले पडिवज्जिस्सइ समणाउसो !, तीसे णं भंते ! समाए भरहस्स वासस्स केरिसए आयारभावपडोयारे भविस्सइ ? गोयमा ! बहुसमरमणिजे जाव अकित्तिमेहिं चेव, तेषि णं भंते ! मणुयाणं केरिसए आयारभावपडोयारे भविस्सइ ? गो० ! तेषि णं मणुयाणं छव्विहे संघयणे छव्विहे संठाणे बहूइं धणूइं उड्डं उच्चत्तेणं जहण्णेणं अंतोमुहुत्तं उक्कोसेणं पुव्वकोडीआउयं पालिहिति २ ता अप्पेगइया णिरयगामी जाव अंतं करेहिति, तीसे णं समाए तओ वंसा समुप्पज्जिस्संति, तं०-तित्थगरवंसे चक्कवट्ठिवंसे दसारवंसे, तीसे णं समाए तेवीसं तित्थगरा एकारस चक्कवट्ठी णव वलदेवा णव वासुदेवा समुप्पज्जिस्संति, तीसे णं समाए सागरोवम-कोडाकोडीए वायालीसाए वाससहस्सेहिं ऊणियाए काले वीइकंते अणंतेहिं वण्ण-पज्जवेहिं जाव अणंतगुणपरिवुड्ढीए परिवुड्ढेमाणे २ एत्थ णं सुसमदूसमा णामं समा-काले पडिवज्जिस्सइ समणाउसो !, सा णं समा तिहा विभज्जिस्सइ, पढमे तिभागे मज्झिमे तिभागे पच्छिमे तिभागे, तीसे णं भंते ! समाए पढमे तिभाए भरहस्स वासस्स केरिसए आयारभावपडोयारे भविस्सइ ? गोयमा ! बहुसमरमणिजे जाव भविस्सइ, मणुयाणं जा चेव ओसप्पिणीए पच्छिमे तिभागे वत्तव्वया सा भाणि-यव्वा, कुलगरवज्जा उसभसामिवज्जा, अण्णे पढंति-तीसे णं समाए पढमे तिभाए इमे पण्णरस कुलगरा समुप्पज्जिस्संति, तंजहा-सुमई जाव उसभे, सेसं तं चेव, दंड-

णीईओ पडिलोमाओ णेयव्वाओ, तीसे णं समाए पढमे तिभाए रायधम्ममे जाव धम्मचरणे य वोच्छिज्जिस्सइ, तीसे णं समाए मज्झिमपच्छिमेसु तिभागेसु जा पढममज्झिमेसु वत्तव्वया ओसप्पिणीए सा भाणियव्वा, सुसमा तहेव सुसमासुसमा- वि तहेव जाव छव्विहा मणुस्सा अणुसज्जिस्संति जाव सणिचारी ॥ ४० ॥ **वीओ वक्खारो समत्तो ॥**

से केणट्ठेणं भंते ! एवं वुच्चइ-भरहे वासे २ ? गोयमा ! भरहे णं वासे वेयङ्कुस्स पव्वयस्स दाहिणेणं चोदसुत्तरं जोयणसयं एगारस य एगूणवीसइभाए जोयणस्स अबाहाए दाहिणलवणसमुदस्स उत्तरेणं चोदसुत्तरं जोयणसयं एकारस य एगूण- वीसइभाए जोयणस्स अबाहाए गंगाए महाणईए पच्चत्थिमेणं सिंधूए महाणईए पुरत्थिमेणं दाहिणङ्कुभरहमज्झिन्नतिभागस्स बहुमज्झदेसभाए एत्थ णं विणीया णामं रायहाणी पणत्ता, पाईणपडीणायया उदीणदाहिणविच्छिण्णा दुवालसजोयणायामा णवजोयणविच्छिण्णा धणवइमइणिम्माया चाभीयरपागारा णाणामणिपञ्चवण्ण- कविसीसगपरिमंडियाभिरामा अलकापुरीसंकासा पमुइयपक्कीलिया पच्चक्खं देव- लोगभूया रिद्धित्थिमियसमिद्धा पमुइयजणजाणवया जाव पडिह्वा ॥ ४१ ॥ तत्थ णं विणीयाए रायहाणीए भरहे णामं राया चाउरंतचक्कवटी समुप्पजित्था, महयाहिमवंतमहंतमलयमंदर जाव रज्जं पसासेमाणे विहरइ । **विइओ गमो राय- वर्णगस्स इमो**-तत्थ असंखेज्जकालवासंतरेण उप्पज्जे जसंसी उत्तमे अभिजाए सत्तवीरियपरक्कमगुणे पसत्थवण्णसरसारसंघयणतणुगबुद्धिधारणमेहासंठाणसीलप्पगई पहाणगारवच्छायागइए अणेगवयणप्पहाणे तेयआउबलवीरियजुत्ते अद्भुत्तिसिखणणि- चियलोहसंकलणारायवइरउसहसंघयणदेहधारी झस १ जुग २ भिंगार ३ वद्धमाणग ४ भइमाणग ५ संख ६ छत्त ७ वीयणि ८ पडाग ९ चक्क १० णंगल ११ मुसल १२ रह १३ सोत्थिय १४ अंकुस १५ चंदाइच्च १६-१७ अगिग १८ जूय १९ सागर २० इंदज्जय २१ पुहवि २२ पउम २३ कुंजर २४ सीहासण २५ दंड २६ फुम्भ २७ गिरिवर २८ तुरगवर २९ वरमउड ३० कुंडल ३१ णंदावत्त ३२ धणु ३३ कौत्त ३४ गागर ३५ भवणविमाण ३६-अणेगलक्खणपसत्थसुवि- भत्तचित्तकरचरणदेसभाए उद्धामुहलोमजालसुकुमालणिद्धमउआवत्तपसत्थलोमविरइ- यसिरिवच्छच्छण्णविउलवच्छे देसखेत्तसुविभत्तदेहधारी तरुणरविरस्सिबोहियवरकमल- विबुद्धगम्भवण्णे ह्यपोसणकोससण्णिभपसत्थपिट्ठंतणिरुवलेवे पउमुप्पलकुंदजाइजुहि- यवरचंपगणागपुप्फसारंगतुल्लगंधी छत्तीसाहियपसत्थपत्थिवगुणेहिं जुत्ते अव्वोच्छि- ण्णायवत्ते पागडउभयजोणी विबुद्धणियगकुलगयणपुण्णचंदे चंदे इव सोमयाए णयण- ३६ सुत्ता०

मणिव्वुहकरे अक्खोमे सागरो व थिमिए धणवइव्व भोगसमुदयसहव्वयाए समरे अपराइए परमविक्रमगुणे अमरवइसमाणसरिसरूवे मणुयवई भरहचक्रवट्ठी भरहं भुंजइ पण्णट्ठसत्तू ॥ ४२ ॥ तए णं तस्स भरहस्स रण्णो अण्णया कयाइ आउहघरसालाए दिव्वे चक्करयणे समुप्पज्जित्था, तए णं से आउहघरिए भरहस्स रण्णो आउहघरसालाए दिव्वं चक्करयणं समुप्पणं पासइ पासित्ता हट्ठुट्ठचित्तमाणंदिए णंदिए पीइमणे परमसोम-  
णस्सिए हरिसवसविसप्पमाणहियए आउहघरसालाओ पडिणिक्खमइ २ ता जेणामेव बाहिरिया उवट्ठानसाला जेणामेव भरहे राया तेणामेव उवागच्छइ २ ता करयल जाव जएणं विजएणं वट्ठावेइ २ ता एवं वयासी-एवं खल्लु देवाणुप्पियाणं आउह-  
घरसालाए दिव्वे चक्करयणे समुप्पण्णे तं एयणं देवाणुप्पियाणं पियट्ठयाए पियं णिवेएमि पियं मे भवउ, तए णं से भरहे राया तस्स आउहघरियस्स अंतिए एयमट्ठं सोच्चा णिसम्म हट्ठ जाव सोमणस्सिए वियसियवरकमलगयणवयणे तस्स आउहघरियस्स अहमालियं मउडवज्जं ओमोयं दलयइ २ ता विउलं जीवियारिहं पीइदाणं दलयइ २ ता सक्कारेइ सम्माणेइ स० २ ता पडिविसज्जेइ । तए णं से भरहे राया कोडुंबियपुरिसे सट्ठावेइ २ ता एवं वयासी-खिप्पामेव भो देवाणुप्पिया !  
विणीयं रायहाणिं सव्वंभितरवाहिरियं आसियसंमज्जियसित्तसुइगरत्थंतरवीहियं मंचाइ-  
मंचकलियं णाणाविहरागवसणऊसियझयपडागाइपडागमंडियं लाउल्लोइयमहियं गोसी-  
ससरसरत्तचंदणकलसं चंदणघडसुकय जाव गंधुद्धयाभिरामं सुगंधवरगंधियं गंधवट्ठिभूयं करेह कारवेह करेत्ता कारवेत्ता य एयमाणत्तियं पच्चप्पिणह । तए णं ते कोडुंबिय-  
पुरिसा भरहेणं रण्णा एवं वुत्ता समाणा हट्ठ० करयल जाव एवं सामित्ति आणाए विणएणं वयणं पडिसुणंति २ ता भरहस्स० अंतियाओ पडिणिक्खमंति २ ता विणीयं रायहाणिं जाव करेत्ता कारवेत्ता य तमाणत्तियं पच्चप्पिणंति । तए णं से भरहे राया जेणेव मज्जणघरे तेणेव उवागच्छइ २ ता मज्जणघरं अणुपविसइ २ ता समुत्तजा-  
ल्लुल्लभिरामे विचित्तमणिरयणकुट्टिमतले रमणिज्जे ण्हाणमंडवंसि णाणामणिरयणभ-  
त्तिचित्तंति ण्हाणपीठंसि सुहणिसण्णे सुहोदएहिं गंधोदएहिं पुप्फोदएहिं सुद्धोदएहिं य पुण्णे कल्लाणगपवरमज्जणविहीए मज्जिए तत्थ कोउयसएहिं बहुविहेहिं कल्लाणगपवर-  
मज्जणावसाणे पम्हलसुकुमालगंधकासाइयल्लहियंगे सरससुरहिगोसीसचंदणाणुल्लितगत्ते अहयसुमहग्घूसरयणसुसंवुडे सुइमालावणगविलेवणे आविद्धमणिसुवण्णे कप्पियहा-  
रद्धहारतिसरियपालंबपलंबमाणकडिसुत्तसुकयसोहे पिणद्धगेविज्जगअंगुलिज्जगललियग-  
यललियकयाभरणे णाणामणिकडगतुडियथंभियभुए अहियसस्सिरीए कुंडलउज्जोइ-  
याणणे मउडदित्सिए हारोत्थयसुकयरइयवच्छे पालंबपलंबमाणसुकयपडउत्तरिजे

सुद्धियापिंगलंगुलीए पाणामणिकणगविमलमहरिहणित्तोवियमिसिमिसितविरइयसु-  
सिलिट्टविसिट्टलट्टसंठियपसत्थआविद्धवीरवलए, किं बहुणा ?, कप्पस्खए चेव अत्तं-  
कियविभूसिए णरिंदे सकोरंट जाव चउच्चाभरवालवीइयंगे भंगलजयजयसहकयालोए  
अणेगगणायगदंडणायग जाव दूयसंधिवालसद्धिं संपरिवुडे धवलमहामेहणिंगाए  
इव जाव ससिच्च पियदंसणे णरवई मज्जणघराओ पडिणिकखमइ २ ता जेणेव  
आउहघरसाला जेणेव चक्करयणे तेणामेव पहारेत्थ गमणाए । तए णं तस्स भरहस्स  
रण्णो बहवे ईसरपभिइओ भरहं रायाणं पिट्ठओ २ अणुगच्छंति । तए णं तस्स  
भरहस्स रण्णो बहुईओ-खुज्जा चिलाइ वामणिवडभीओ बव्वरी वडसियाओ ।  
जोणियपत्तहवियाओ ईसिणियथारुणिणियाओ ॥ १ ॥ लासियलउसियदमिली सिंहलि  
तह आरवी पुलिंदी य । पक्कणि बहलि मुहंढी सवरीओ पारसीओ य ॥ २ ॥ भरहं  
रायाणं पिट्ठओ २ अणुगच्छंति, तए णं से भरहे राया सव्विद्धीए सव्वजुइए  
सव्वबलेणं सव्वसमुदएणं सव्वायरेणं सव्वविभूईए सव्वालंकारविभूसाए सव्व-  
तुडियसहसणिणाएणं महया इद्धीए जाव महया वरतुडियजमगसमगप्पाइएणं  
संखपणवपडहमेरिञ्जल्लिरिखरसुहिमुरयमुइंगंदुडुहिणिघोसणाइएणं जेणेव आउहघर-  
साला तेणेव उवागच्छइ उवागच्छित्ता चक्करयणं पासइ २ ता आउहघरसालाओ  
पडिणिकखमइ २ ता जेणेव बाहिरिया उवट्ठाणसाला जेणेव सीहासणे तेणेव उवा-  
गच्छइ २ ता सीहासणवरगए पुरत्थाभिमुहे सण्णिसीयइ २ ता अट्ठारस सेणिप्पसे-  
णीओ सदावेइ २ ता एवं वयासी-खिप्पामेव भो देवाणुप्पिया ! उस्सुकं उक्करं  
उक्किट्ठं अदिज्जं अमिज्जं अभडप्पवेसं अदंडकोदंडिमं अधरिमं गणियावरणाडइज्ज-  
कलियं अणेगतालायराणुचरियं अणुद्धुयमुइंगं अमिलायमल्लदामं पमुइयपक्कीलियसपु-  
रजणजाणवयं विजयवेजइयं चक्करयणस्स अट्ठाहियं महामहिमं करेह २ ता ममेय-  
माणत्तियं खिप्पामेव पच्चप्पिणह, तए णं ताओ अट्ठारस सेणिप्पसेणीओ भरहेणं रत्ता  
एवं वुत्ताओ समाणीओ हट्ठ जाव विणएणं वयणं पडिणुणेंति २ ता भरहस्स रण्णो अंति-  
याओ पडिणिकखमेन्ति २ ता उस्सुकं उक्करं जाव करेंति य कारवेंति य क० २ ता  
जेणेव भरहे राया तेणेव उवागच्छंति २ ता तमाणत्तियं पच्चप्पिणंति ॥ ४३ ॥  
तए णं से दिव्वे चक्करयणे अट्ठाहियाए महामहिमाए णिव्वत्ताए समाणीए आउह-  
घरसालाओ पडिणिकखमइ २ ता अंतलिकखपडिणणे जक्खसहस्ससंपरिवुडे दिव्व-  
तुडियसहसणिणाएणं आपूर्ते चेव अंबरतलं विणीयाए रायहाणीए मज्झमज्जेणं  
णिग्गच्छइ २ ता गंगाए महाणईए दाहिणिन्नेणं कूलेणं पुरत्थिमं दिस्सि मागहत्तित्था-  
भिमुहे पयाए यावि होत्था, तए णं से भरहे राया तं दिव्वं चक्करयणं गंगाए

महाणइए दाहिणिण्णं कूलेणं पुरत्थिमं दिसिं मागहतित्थाभिमुहं पयायं पासइ २ ता हट्टतुट्ठ जाव हियए कोडुंबियपुरिसे सदावेइ २ ता एवं वयासी-खिप्पामेव भो देवाणुप्पिया ! आभिसेक्कं हत्थिरयणं पडिकप्पेह हयगयरहपवरजोहकलियं चाउरंगिणिं सेण्णं सण्णाहेह, एयमाणत्तियं पच्चप्पिणह, तए णं ते कोडुंबिय जाव पच्चप्पिणंति, तए णं से भरहे राया जेणेव मज्जणघरे तेणेव उवागच्छइ २ ता मज्जणघरं अणुपविसइ २ ता समुत्तजालाकुलाभिरामे तहेव जाव धवलमहामेहणिग्गए इव जाव ससिव्व पियदंसणे णरवई मज्जणघराओ पडिणिक्खमइ २ ता हयगयरहपवरवाहणभडचडगरपहगर-संकुलाए सेणाए पहियकिती जेणेव बाहिरिया उवट्ठाणसाला जेणेव आभिसेक्के हत्थिरयणे तेणेव उवागच्छइ २ ता अंजणगिरिकूडसण्णिमं गयवई णरवई दुरुहे । तए णं से भरहाहिवे णरिंदे हारोत्थयसुकयरइयवच्छे कुंडलउज्जोइयाणणे मउडदित्त-सिरए णरसीहे णरवई णरिंदे णरवसहे मस्यरायवसभकप्पे अब्भहियरायतेयलच्छीए दिप्पमाणे पसत्थमंगलसएहिं संथुव्वमाणे जय२सहकयालोए हत्थिखंधवरगए सकोरंटम-ल्लदामेणं छत्तेणं धरिज्जमाणेणं सेयवरचामराहिं उडुव्वमाणीहिं २ जक्खसहस्ससं-परिवुडे वेसमणे चैव धणवई अमरवइसण्णिभाइ इट्ठीए पहियकिती गंगाए महाणइए दाहिणिण्णं कूलेणं गामागरणगरखेडकब्बडमंडवदोणमुहपट्ठणासमसंवाहसहस्समंडियं थिमियमेइणीयं वसुहं अभिजिणमाणे २ अग्गाइं वराइं रयणाइं पडिच्छमाणे २ तं दिव्वं चक्ररयणं अणुगच्छमाणे २ जोयणंतरियाहिं वसहीहिं वसमाणे २ जेणेव माग-हतित्थे तेणेव उवागच्छइ २ ता मागहतित्थस्स अदूरसामंते दुवालसजोयणायामं णवजोयणविच्छिण्णं वरणगरसरिच्छं विजयखंधावारणिवेसं करेइ २ ता वड्डइरयणं सदावेइ सदावइत्ता एवं वयासी-खिप्पामेव भो देवाणुप्पिया ! ममं आवासं पोसह-सौलं च करेहिं करेत्ता ममेयमाणत्तियं पच्चप्पिणाहि, तए णं से वड्डइरयणे भरहेणं रण्णा एवं वुत्ते समाणे हट्टतुट्ठचित्तमाणंदिए पीइमणे जाव अंजलिं कट्ठु एवं सामी तहत्ति आणाए विणएणं वयणं पडिसुणेइ २ ता भरहस्स रण्णो आवसहं पोसहसालं च करेइ २ ता एयमाणत्तियं खिप्पामेव पच्चप्पिणइ, तए णं से भरहे राया आभि-सेक्काओ हत्थिरयणाओ पच्चोरुहइ २ ता जेणेव पोसहसाला तेणेव उवागच्छइ २ ता पोसहसालं अणुपविसइ २ ता पोसहसालं पमज्जइ २ ता दब्भसंथारगं संथरइ २ ता दब्भसंथारगं दुरुहइ २ ता मागहतित्थकुमारस्स देवस्स अट्टमभत्तं पणिण्णइ २ ता पोसहसालाए पोसहिए ईव बंभयारी उम्मुक्कमणिसुवण्णे ववगयमालावण्णगविलेवणे

१ रुढिसद्दोऽयं । २ णो पोसहिएत्ति अट्ठो पोसहे तहाविहदेवचित्तणवज्जणि-जत्तणओ ।

णिक्खित्तसत्थमुसले दब्भसंथारोवगए एगे अबीए अट्टमभत्तं पडिजागरमाणे २  
विहरइ । तए णं से भरहे राया अट्टमभत्तंसि परिणममाणंसि पोसहसालाओ पडिणि-  
क्खमइ २ ता जेणेव बाहिरिया उवट्ठाणसाला तेणेव उवागच्छइ २ ता कोडुंवि-  
पुरिसे सहावेइ २ ता एवं वयासी-खिप्पामेव भो देवाणुप्पिया ! हयगयरहपवरजो-  
हकलियं चाउरंगिणिं सेणं सण्णाहेह चाउग्घंटं आसरहं पडिकप्पेहत्तिकट्ठु मज्जणघरं  
अणुपविमइ २ ता समुत्त तहेव जाव धवलमहामेहणिग्गए जाव मज्जणघराओ पडिणि-  
क्खमइ २ ता हयगयरहपवरवाहण जाव पहियकित्ती जेणेव बाहिरिया उवट्ठाणसाला  
जेणेव चाउग्घंटं आसरहे तेणेव उवागच्छइ २ ता चाउग्घंटं आसरहं दुरुढे ॥ ४४ ॥  
तए णं से भरहे राया चाउग्घंटं आसरहं दुरुढे समाणे हयगयरहपवरजोहकलियाए  
साद्धं संपरिवुडे महयाभउचडगरपहगरवंदपरिक्खित्ते चक्ररयणदेसियमग्गे अणेगराय-  
वरसहस्साणुयायमग्गे महया उक्किट्ठिसीहणायबोलकलकलरवेणं पक्खुभियमहासमुद्ध-  
वभूयं पिव करेमाणे पुरत्थिमदिसाभिमुहे मागहतित्थेणं लवणसमुदं ओगाहइ जाव  
से रहवरस्स कुम्परा उल्ला, तए णं से भरहे राया तुरगे निगिण्हइ २ ता रहं ठवेइ २ ता  
धणुं परामुसइ, तए णं तं अइरुग्गयबालचंदइंदधणुसंकासं वरमहिसदरियदप्पि-  
यददघणसिगरइयसारं उरगवरपवरगवलपवरपरहुयभमरकुलणीलिण्हद्धंतधोयपट्ठं  
णिउणोवियमिसिमिसितमणिरयणधंटियाजालपरिक्खित्तं तडितरुणकिरणतवणिज्जबद्ध-  
चिंधं दहरमलयगिरिसिहरकेसरचामरवालद्धचंदचिंधं कालहरियरत्तपीयसुक्किल्लवहुण्हा-  
रुणिसंपिणद्धजीवं जीवियंतकरणं चलजीवं धणुं गहिऊण से णरवई उंसुं च वरवइर-  
कोडियं वइरसारतोढं कंचणमणिकणगरयणधोइट्ठसुकयपुंखं अणेगमणिरयणविविहसु-  
विरइयणामचिंधं वइसाहं ठाइऊण ठाणं आययकण्णाययं च काऊण उंसुमुदारं इमाइं  
वयणाइं तत्थ भाणीअ से णरवई-हंदि सुणंतु भवंतो बाहिरओ खलु सरस्स जे देवा ।  
णागासुरा सुवण्णा तेसिं खु णमो पणिवयामि ॥ १ ॥ हंदि सुणंतु भवंतो अब्भित-  
रओ सरस्स जे देवा । णागासुरा सुवण्णा सव्वे मे ते विसयवासी ॥ २ ॥ इतिकट्ठु  
उंसुं णिसिरइत्ति-परिगरणिरियमज्जो वाउद्धयसोभमाणकोसेज्जो । चित्तेण सोभाए  
धणुवरेण इंदोव्व पच्चक्खं ॥ ३ ॥ तं चंचलायमाणं पंचमिचंदोवमं महाचावं ।  
छज्जइ वामे हत्थे णरवइणो तंमि विजयंमि ॥ ४ ॥ तए णं से सरे भरहेणं रण्णा  
णिसट्ठे समाणे खिप्पामेव दुवाल्स जोयणाइं गंता मागहतित्थाहिवइस्स देवस्स भव-  
णंसि निवइए, तए णं से मागहतित्थाहिवई देवे भवणंसि सरं णिवइयं पासइ २ ता  
आसुत्ते रुढे चंडिकिए कुविए मिसिमिसेमाणे तिबलियं भिउडिं णिडाले साहरइ २ ता  
एवं वयासी-केस णं भो ! एस अपत्थियपत्थए दुरंतपंतलक्खणे हीणपुण्हसेउचा



हिरिसिरिपरिवज्जिए जे णं मम इमाए एयाणुक्खाए दिव्वाए देविद्धीए दिव्वाए देव-  
जुईए दिव्वेणं दिव्वाणुभावेणं लद्धाए पत्ताए अभिसमण्णागयाए उप्पि अप्पुस्सुए भव-  
णसि सरं णिसिरइत्तिकट्ठु सीहासणाओ अब्भुट्ठेइ २ ता जेणेव से णामाहयंके सरे  
तेणेव उवागच्छइ २ ता तं णामाहयंके सरं गेण्हइ णामंके अणुप्पवाएइ णामंके  
अणुप्पवाएमाणस्स इमे एयाक्खे अब्भत्थिए चित्तिए पत्थिए मणोगए संकप्पे ससु-  
प्पज्जित्था-उप्पण्णे खलु भो ! जंबुद्वीवे वीवे भरहे वासे भरहे णामं राया चाउरंत-  
चक्कवट्ठी तं जीयमेयं तीयपञ्चुप्पणमणागयाणं मागहतित्थकुमारारणं देवाणं राइण-  
मुवत्थाणियं करेतए, तं गच्छामि णं अहंपि भरहस्स रण्णो उवत्थाणियं करेमिति-  
कट्ठु एवं संपेहेइ संपेहेता हारं मउडं कुंडलाणि य कडगाणि य तुडियाणि य वत्थाणि य  
आभरणाणि य सरं च णामाहयंके मागहतित्थोदगं च गेण्हइ गिण्हित्ता ताए  
उक्किट्ठाए तुरियाए चवलाए चंडाए जइणाए सीहाए सिग्घाए उड्डयाए दिव्वाए  
देवगइए वीईवयमाणे २ जेणेव भरहे राया तेणेव उवागच्छइ २ ता अंतलिक्ख-  
पडिवण्णे सख्खिणिगियाइं पंचवण्णाइं वत्थाइं पवरपरिहिए करयलपरिग्गहियं दसणहं  
सिर जाव अंजलिं कट्ठु भरहं रायं जएणं विजएणं वद्धावेइ २ ता एवं वयासी-  
अभिजिए णं देवाणुप्पिएहिं केवलकप्पे भरहे वासे पुरच्छिमेणं मागहतित्थमेराए  
तं अहण्णं देवाणुप्पियाणं विसयवासी अहण्णं देवाणुप्पियाणं आणत्तीकिंकरे अहण्णं  
देवाणुप्पियाणं पुरच्छिमिल्ले अंतवाले तं पडिच्छंतु णं देवाणुप्पिया ! ममं इमेयाक्खं  
पीइदाणंतिकट्ठु हारं मउडं कुंडलाणि य कडगाणि य जाव मागहतित्थोदगं च उवणेइ,  
ताए णं से भरहे राया मागहतित्थकुमारस्स देवस्स इमेयाक्खं पीइदाणं पडिच्छइ २ ता  
मागहतित्थकुमारं देवं सक्कारेइ सम्माणेइ स० २ ता पडिविसजेइ, ताए णं से  
भरहे राया रहं परावत्तेइ २ ता मागहतित्थेणं लवणसमुदाओ पञ्चुत्तरइ २ ता  
जेणेव विजयखंधावारणिवेसे जेणेव बाहिरिया उवट्ठाणसाला तेणेव उवागच्छइ २ ता  
तुरए णिगिण्हइ २ ता रहं ठवेइ २ ता रहाओ पच्चोरुहइ २ ता जेणेव मज्जणघरे तेणेव  
उवागच्छइ २ ता मज्जणघरं अणुपविसइ २ ता जाव ससिक्ख पियदंसणे णरवइ  
मज्जणघराओ पडिणिक्खमइ २ ता जेणेव भोयणमंडवे तेणेव उवागच्छइ २ ता भोय-  
णमंडवंसि सुहासणवरगए अट्टमभत्तं पारेइ २ ता भोयणमंडवाओ पडिणिक्खमइ २ ता  
जेणेव बाहिरिया उवट्ठाणसाला जेणेव सीहासणे तेणेव उवागच्छइ २ ता सीहा-  
सणवरगए पुरत्थाभिमुहे णिसीयइ २ ता अट्ठारस सेणिप्पसेणीओ सद्दावेइ २ ता एवं  
वयासी-खिप्पामेव भो देवाणुप्पिया ! उस्सुक्कं उक्करं जाव मागहतित्थकुमारस्स देवस्स  
अट्ठाहियं महामहिमं करेइ २ ता मम एयमाणत्तियं पच्चप्पिणह, ताए णं ताओ अट्ठारस

सेणिप्पसेणीओ भरहेणं रण्णा एवं वुत्ताओ समाणीओ हट्ठ जाव करेति २ ता एयमा-  
 णत्तियं पच्चप्पिणंति, तए णं से दिव्वे चक्करयणे वइरामयतुंवे लोहियक्खामयारए जंबू-  
 णयणेमीए णाणामणिखुरप्पथालपरिगए मणिमुत्ताजालभूसिए सणंदिघोसे सखिखिणीए  
 दिव्वे तरुणरविमंडलणिमे णाणामणिरयणघट्टियाजालपरिक्खित्ते सव्वोउयसुरभिकुसुम-  
 आसत्तमल्लदामे अंतल्लिक्खपडिवण्णे जक्खसहस्ससंपरिवुडे दिव्वतुडियसइसण्णिणाएणं  
 पूरेते चेव अंवरतलं णामेण य सुदंसणे णरवइस्स पढमे चक्करयणे मागहत्तिथकुम्मा-  
 रस्स देवस्स अट्ठाहियाए महामहिमाए णिव्वत्ताए समाणीए आउहघरसालाओ पडिणि-  
 क्खमइ २ ता दाहिणपच्चत्थिमं दिसिं वरदामत्तिथाभिमुहे पयाए यावि होत्था ॥ ४५ ॥  
 तए णं से भरहे राया तं दिव्वं चक्करयणं दाहिणपच्चत्थिमं दिसिं वरदामत्तिथाभि-  
 मुहं पयायं चावि पासइ २ ता हट्ठतुट्ठं कोडुं वियपुरिसे सद्दावेइ २ ता एवं वयासी-  
 खिप्पामेव भो देवाणुप्पिया ! हयगयरहपवर० चाउरंगिणि सेणं सण्णाहेह आभि-  
 सेक्कं हत्थिरयणं पडिकप्पेहत्तिकट्ठु मज्जणघरं अणुपविसइ २ ता तेणेव कमेणं जाव  
 धवलमहामेहणिगए जाव सेयवरचामराहिं उड्डुव्वमाणीहिं २ माइयवरकलयपवर-  
 परिगारखेडयवरवम्मकवयमाढीसहस्सकलिए उक्कडवरमउडतिरीडपडागन्नयवेजयंति-  
 चामरचलंतछत्तंधयारकलिए असिखेवणिखग्गचावणारायकणयकप्पणिसूललउडमिडि-  
 मालधणुहतोणसरपहरणेहि य कालणीलरुहिरपीयसु क्किल्लअणेगचिंधसयसण्णिणिविट्ठे  
 अप्पोडियसीहणायछेलियहयहेसियहत्थिगुलुगुलाइयअणेगरहसयसहस्सवणघणंतणी-  
 हम्ममाणसइसहिएण जमगसमगमंभाहोरंभकिणिंतखरसुहिमुगुंदसंखियपरिलिक्खगप-  
 रिवाइणिवंसवेणुविपंचिमहइकच्छभिरिगिसिगियकलतालकंसतालकरधानुत्थिएण मइया  
 सइसण्णिणाएण सयलमवि जीवलोगं पूरयंते बलवाहणसमुदाएणं एवं जक्खसहस्स-  
 परिवुडे वेसमणे चेव धणवई अमरवइसण्णिभाइ इड्डीए पहियकिंती गामागरणगर-  
 खेडकब्बड तहेव सेसं जाव विजयखंधावारणिवेसं करेइ २ ता बड्डइरण्यं सद्दावेइ २ ता  
 एवं वयासी-खिप्पामेव भो देवाणुप्पिया ! मम आवसहं पोसहसालं च करेहि,  
 ममेयमाणत्तियं पच्चप्पिणाहि ॥ ४६ ॥ तए णं से आसमदोणमुहगामपट्ठणपुरवर-  
 खंधावारणिहावणविभागकुसले एगासीइपएसु सव्वेसु चेव वत्थूसु णेगगुणजाणए  
 पंडिए विहिण्णू पणयालीसाए देवयाणं वत्थुपरिच्छाए णेमिपासेसु भत्तसालासु कोट्ट-  
 णीसु य वासघरेसु य विभागकुसले छेजे वेज्जे य दाणकम्मे पहाणबुद्धी जलयाणं  
 भूमियाणं य भायणे जलथलगुहासु जंतेसु परिहासु य कालनाणे तहेव सदे वत्थुप्प-  
 एसे पहाणे गड्ढिभणिकण्णरुक्खवल्लिवेदियगुणदोसवियाणए गुणहे सोलसपासायकरण-  
 कुसले चउसट्ठिविकप्पवित्थियमई णंदावत्ते य बद्धमाणे सोत्थियरुयग तह सव्वओ-

भद्दसणिवेसे य बहुविसेसे उद्दंडियदेवकोट्टदारुगिरिखायवाहणविभागकुसले-इय तस्स  
 बहुगुणद्धे थवई रयणे णरिंदचंदस्स । तवसंजमणिव्विट्ठे किं करवाणीतुवट्ठाई ॥ १ ॥  
 सो देवकम्मविहिणा खंधावारं णरिंदवयणेणं । आवसहभवणकलियं करेइ सव्वं मुहु-  
 तेणं ॥ २ ॥ करेत्ता पवरपोसहघरं करेइ २ ता जेणेव भरहे राया जाव एयमाण-  
 त्तियं खिप्पामेव पच्चप्पिणइ, सेसं तहेव जाव मज्जणघराओ पडिणिकखमइ २ ता जेणेव  
 बाहिरिया उवट्ठाणसाला जेणेव चाउघंटं आसरहे तेणेव उवागच्छइ ॥ ४७ ॥  
 तए णं तं धरणितल्लमणलहुं तओ बहुलक्खणपसत्थं हिमवंतकंदरंतरणिवायसंवड्ढि-  
 यचित्तिणिसवल्लियं ज्वूणयसुकयकूवरं कणयदंडियारं पुल्लववरिंदणीलसासगपवाल-  
 फलिहवररयणलेट्ठुमणिविहुमविभूसियं अडयालीसारइयतवणिज्जपट्टसंगहियजुत्तुवं  
 पघसियपसियणिम्मियणवपट्टपुट्टपरिणिट्ठियं विसिट्ठलट्ठणवल्लोहवद्धकम्मं हरिपहरणर-  
 यणसरिसचक्कं कक्केयणईदणीलसासगसुसमाहियवद्धजालकडगं पसत्थविच्छिण्णसमधुरं  
 पुरवरं च गुत्तं सुकिरणतवणिज्जजुत्तकलियं कंकटयणिजुत्तकप्पणं पहरणाणुजायं खेड-  
 गकणगधणुमंडलमगवरसत्तिकोत्ततोमरसरसयवत्तीसतोणपरिमंडियं कणगरयणचित्तं  
 जुत्तं हलीमुहबलागगयदंतचंदमोत्तियतणसोल्लियकुंदकुडयवरसिंदुवारकंदलवरफेणणि-  
 गरहारकासप्पगासधव्वेलेहिं अमरमणपवणजइणचवलसिग्घगामीहिं चउहिं चामराकण-  
 गविभूसियंगेहिं तुरगेहिं सच्छत्तं सज्झयं सघंटं सपडागं सुकयसंधिकम्मं सुसमाहि-  
 यसमरक्कणगगंभीरतुल्लघोसं वरकुप्परं सुचक्कं वरणेमीमंडलं वरधारातोडं वरवइरवद्ध-  
 तुवं वरकंचणभूसियं वरायरियणिम्मियं वरतुरगसंपउत्तं वरसारहिसुसंप्पगहियं वर-  
 पुरिसे वरमहारहं दुरूढे आरूढे पवररयणपरिमंडियं कणयखिखिणीजालसोभियं  
 अउज्झं सोयामणिक्कणगतविशंपकयजासुयणजलणजलियसुयतोडरागं गुंजद्धबंधुजी-  
 वगरत्तहिं गुलगणिगरसिंदूरुइलकुंकुमपारेवयचलणयणकोइलदसणावरणरइयाइरेगर-  
 त्तसोक्कणगकेसुयगयतालुसुरिंदोगवगसमप्पमप्पगासं बिंबफलसिलप्पवालउट्ठितसूर-  
 सरिसं सव्वोउयसुरहिकुसुमआसत्तमल्लदामं ऊसियसेयज्झयं महामेहरसियगंभीरणिद्ध-  
 घोसं सत्तुहिययकंपणं पमाए य सस्सिरियं णामेणं पुहविविजयलंमंति विस्सुयं लोग-  
 विस्सुयजसोइहयं चाउघंटं आसरहं णरवई दुरूढे, तए णं से भरहे राया चाउघंटं  
 आसरहं दुरूढे समाणे सेसं तहेव दाहिणाभिसुहे वरदामतित्थेणं लवणसमुद्दं ओगा-  
 हइ जाव से रहवरस्स कुप्परा उल्ला जाव पीइदार्णं से, णवरं चूडामणिं च दिव्वं उर-  
 त्थगेविज्जगं सोणियसुत्तगं कडगाणि य तुडियाणि य जाव दाहिणिण्णे अंतवाले जाव  
 अट्ठाहियं महामहिमं करेत्ति २ ता एयमाणत्तियं पच्चप्पिणंति, तए णं से दिव्वे चक्कर-  
 यणे वरदामतित्थकुमारस्स देवस्स अट्ठाहियाए महामहिमाए णिव्वत्ताए समाणीए

आउहघरसालाओ पडिणिक्खमइ २ ता अंतलिक्खपडिवण्णे जाव पूरंते चेव अंवर-  
तलं उत्तरपच्चत्थिमं दिसिं पभासतित्थाभिमुहे पयाए यावि होत्था, तए णं से भरहे  
राया तं दिव्वं चक्करयणं जाव उत्तरपच्चत्थिमं दिसिं तहेव जाव पच्चत्थिमदिसाभिमुहे  
पभासतित्थेणं लवणसमुद्दं ओगाहेइ २ ता जाव से रहवरस्स कुप्परा उल्ला जाव  
पीइदाणं से, णवरं मालं मउडिं मुत्ताजालं हेमजालं कडगाणि य तुडियाणि य आभ-  
रणाणि य सरं च णामाहयंकं पभासतित्थोदगं च गिण्हइ २ ता जाव पच्चत्थिमेणं  
पभासतित्थमेराए अहण्णं देवाणुप्पियाणं विसयवासी जाव पच्चत्थिमिद्वे अंतवाले, सेसं  
तहेव जाव अट्ठाहिया णिव्वत्ता ॥४८-४९॥ तए णं से दिव्वे चक्करयणे पभासतित्थ-  
कुमारस्स देवस्स अट्ठाहियाए महामहिमाए णिव्वत्ताए समाणीए आउहघरसालाओ  
पडिणिक्खमइ २ ता जाव पूरंते चेव अंवरतलं सिंधूए महाणइए दाहिणिद्वेणं कूलेणं  
पुरच्छिमं दिसिं सिंधुदेवीभवणाभिमुहे पयाए यावि होत्था । तए णं से भरहे राया  
तं दिव्वं चक्करयणं सिंधूए महाणइए दाहिणिद्वेणं कूलेणं पुरत्थिमं दिसिं सिंधुदेवी-  
भवणाभिमुहं पयायं पासइ २ ता हट्टतुट्टचित्तं तहेव जाव जेणेव सिंधूए देवीए  
भवणं तेणेव उवागच्छइ २ ता सिंधूए देवीए भवणस्स अदूरसामंते दुवालसजोय-  
णायामं णवजोयणविच्छिण्णं वरणगरसारिच्छं विजयखंधावारणिवेसं करेइ जाव  
सिंधुदेवीए अट्टमभत्तं पगिण्हइ २ ता पोसहसालाए पोसहिए इव वंभयारी जाव  
दब्भसंथारोवगए अट्टमभत्तिए सिंधुदेविं मणसिं करेमाणे २ चिट्ठइ । तए णं तस्स  
भरहस्स रण्णो अट्टमभत्तंसि परिणममाणंसि सिंधूए देवीए आसणं चलइ, तए णं  
सा सिंधुदेवी आसणं चलिंयं पासइ २ ता ओहिं पउंजइ २ ता भरहं रायं ओहिणा  
आभोएइ २ ता इमे एयारूवे अब्भत्थिए चित्तिए पत्थिए मणोगए संकप्पे समुप्प-  
जित्था-उप्पण्णे खलु भो ! जंबुद्वीवे दीवे भरहे वासे भरहे णामं राया चाउरंत-  
चक्कवट्ठी, तं जीयमेयं तीयपच्चुप्पण्णमणागयाणं सिंधूणं देवीणं भरहाणं राइणं उव-  
त्थाणियं करेतए, तं गच्छामि णं अहंपि भरहस्स रण्णो उवत्थाणियं करेमिन्निकट्टु  
कुंभट्टसहस्सं रयणचित्तं णाणामणिक्कणगरयणभत्तिचित्ताणि य दुवे कणगभट्टासणाणि  
य कडगाणि य तुडियाणि य जाव आभरणाणि य गेण्हइ २ ता ताए उक्किट्ठाए  
जाव एवं वयासी-अभिजिए णं देवाणुप्पिएहिं केवलकप्पे भरहे वासे अहण्णं देवाणु-  
प्पियाणं विसयवासीणि अहण्णं देवाणुप्पियाणं आणत्तिकिकरी तं पडिच्छंतु णं  
देवाणुप्पिया ! मम इमं एयारूवं पीइदाणंतिकट्टु कुंभट्टसहस्सं रयणचित्तं  
णाणामणिक्कणगकडगाणि य जाव सो चेव गमो जाव पडिविसज्जेइ, तए णं से  
भरहे राया पोसहसालाओ पडिणिक्खमइ २ ता जेणेव मज्झणघरे तेणेव

उवागच्छइ २ ता ण्हाए सुद्धप्पावेसाई मंगलाई वत्थाई पवरपरिहिए अप्पमहघा-  
भरणालंकियसरीरे मज्जणघराओ पडिणिकखमइ २ ता जेणेव भोयणमंडवे तेणेव  
उवागच्छइ २ ता भोयणमंडवंसि सुहासणवरगए अट्टमभत्तं परियादियइ जाव  
सीहासणवरगए पुरत्थाभिमुहे णिसीयइ २ ता अट्टारस सेणिप्पसेणीओ सहावेइ २ ता  
जाव अट्टाहियाए महामहिमाए तमाणत्तियं पच्चप्पिणंति ॥ ५० ॥ तए णं से दिव्वे  
चक्करयणे सिंधूए देवीए अट्टाहियाए महामहिमाए णिव्वत्ताए समाणीए आउहघर-  
सालाओ तहेव जाव उत्तरपुरच्छिमं दिसिं वेयड्डुपव्वयाभिमुहे पयाए यावि होत्था,  
तए णं से भरहे राया जाव जेणेव वेयड्डुपव्वए जेणेव वेयड्डुस्स पव्वयस्स दाहिणिल्ले  
णियंवे तेणेव उवागच्छइ २ ता वेयड्डुस्स पव्वयस्स दाहिणिल्ले णियंवे दुवाल्सजोय-  
णायामं णवजोयणविच्छिण्णं वरणगरसरिच्छं विजयखंधावारणिवेसं करेइ २ ता जाव  
वेयड्डुगिरिकुमारस्स देवस्स अट्टमभत्तं पणिण्हइ २ ता पोसहसालाए जाव अट्टम-  
भत्तिए वेयड्डुगिरिकुमारं देवं मणसि करेमाणे २ चिट्ठइ, तए णं तस्स भरहस्स रण्णो  
अट्टमभत्तंसि परिणममाणंसि वेयड्डुगिरिकुमारस्स देवस्स आसणं चलइ, एवं सिंधुगमो  
णेयव्वो पीडदाणं आभिसेक्कं रयणालंकारं कडगाणि य तुड्डियाणि य वत्थाणि य आभर-  
णाणि य गेण्हइ २ ता ताए उक्किट्टाए जाव अट्टाहियं जाव पच्चप्पिणंति । तए णं से  
दिव्वे चक्करयणे अट्टाहियाए महामहिमाए णिव्वत्ताए समाणीए जाव पच्चत्थिमं दिसिं  
तिमिसुहाभिमुहे पयाए यावि होत्था, तए णं से भरहे राया तं दिव्वं चक्करयणं  
जाव पच्चत्थिमं दिसिं तिमिसुहाभिमुहं पयायं पासइ २ ता हट्ठतुट्ठचित्त जाव तिमि-  
सुहाए अदूरसामंते दुवाल्सजोयणायामं णवजोयणविच्छिण्णं जाव कयमालस्स  
देवस्स अट्टमभत्तं पणिण्हइ २ ता पोसहसालाए पोसहिए इव बंभयारी जाव  
कयमालगं देवं मणसि करेमाणे २ चिट्ठइ, तए णं तस्स भरहस्स रण्णो अट्टमभत्तंसि  
परिणममाणंसि कयमालस्स देवस्स आसणं चलइ तहेव जाव वेयड्डुगिरिकुमारस्स  
णवरं पीडदाणं इत्थीरयणस्स तिलगचोद्दंसं भंडालंकारं कडगाणि य जाव आभरणाणि य  
गेण्हइ २ ता ताए उक्किट्टाए जाव सक्कारेइ सम्माणेइ स० २ ता पडिविसजेइ  
जाव भोयणमंडवे, तहेव महामहिमा कयमालस्स पच्चप्पिणंति ॥ ५१ ॥ तए  
णं से भरहे राया कयमालस्स० अट्टाहियाए महामहिमाए णिव्वत्ताए समाणीए  
सुसेणं सेणावई सहावेइ २ ता एवं वयासी-गच्छाहि णं भो देवाणुप्पिया ! सिंधूए  
महाणइए पच्चत्थिमिल्लं णिकखुडं ससिंधुसागरगिरिमेरागं समविसमणिकखुडाणि य  
ओअवेहि ओअवेत्ता अग्गाई वराई रयणाई पडिच्छाहि अग्गाई० पडिच्छित्ता ममेय-  
माणत्तियं पच्चप्पिणाहि, तए णं से सेणावई बलस्स णेया भरहे वासंमि विस्सुयजसे

महाबलपरकमे महप्पा ओयंसी तेयलक्खणजुत्ते मिलक्खुभासाविसारए चित्तचारु-  
भासी भरहे वासंमि णिकखुडाणं णिण्णाण य दुग्गमाण य दुप्पवेसाण य वियाणाए  
अत्थसत्थकुसले रयणं सेणावई सुसेणे भरहेणं रण्णा एवं वुत्ते समाणे हट्ठतुट्ठचित्त-  
माणंदिए जाव करयलपरिग्गहिंयं दसणहं सिरसावत्तं मत्थए अंजलिं कट्ठु एवं सामी !  
तहत्ति आणाए विणएणं वयणं पडिसुणेइ २ ता भरहस्स रण्णो अंतियाओ पडिणि-  
क्खमइ २ ता जेणेव सए आवासे तेणेव उवागच्छइ २ ता कोडुंबियपुरिसे सद्दावेइ २ ता  
एवं वयासी-खिप्पामेव भो देवाणुप्पिया ! आभिसेकं हत्थिरयणं पडिकप्पेह  
हयगयरहपवर जाव चाउरंगिणिं सेणं सण्णाहेहत्तिकट्ठु जेणेव मज्जणघरे तेणेव  
उवागच्छइ २ ता मज्जणघरं अणुपविसइ २ ता ण्हाए सण्णद्धवद्धवम्मियकवए उप्पी-  
लियसरासणपट्टिए पिणद्धगेविज्जबद्धआविद्धविमलवरचंधपट्टे गहियाउहप्पहरणे अणे-  
गगणणायगदंडणायग जाव सद्धिं संपरिवुडे सकोरंटमल्लदामेणं छत्तेणं धरिजमाणेणं  
मंगलजय२सद्दक्यालोए मज्जणघराओ पडिणिक्खमइ २ ता जेणेव बाहिरिया उवट्ठा-  
णसाला जेणेव आभिसेके हत्थिरयणे तेणेव उवागच्छइ २ ता आभिसेकं हत्थिरयणं  
दुरुहे । तए णं से सुसेणे सेणावई हत्थिखंधवरगए सकोरंटमल्लदामेणं छत्तेणं धरिज-  
माणेणं हयगयरहपवरजोहकलियाए चाउरंगिणीए सेणाए सद्धिं संपरिवुडे महयाभ-  
डचडगरपहगरवंदपरिक्खिते महया उक्किट्टिसीहणायबोलकलकलसद्धेणं समुद्भवभूयं  
पिव करेमाणे सच्चिद्धीए सच्चजुईए सच्चबलेणं जाव निग्घोसनाइएणं जेणेव सिंधू  
महाणई तेणेव उवागच्छइ २ ता चम्मरयणं परामुसइ, तए णं तं सिरिवच्छसरिसरूवं  
मुत्ततारद्धचंदचित्तं अयलमकंपं अमेज्जकवयं जंतं सलिलासु सागरेसु य उत्तरणं  
दिव्वं चम्मरयणं सणसत्तरसाइं सच्चधण्णाइं जत्थ रोहंति एगदिवसेण वावियाइं,  
वासं णाऊण चक्कवट्टिणा परामुट्ठे दिव्वे चम्मरयणे दुवालस जोयणाइं तिरियं  
पवित्थरइ तत्थ साहियाइं, तए णं से दिव्वे चम्मरयणे सुसेणसेणावहणा परामुट्ठे  
समाणे खिप्पामेव णावाभूए जाए यावि होत्था, तए णं से सुसेणे सेणावई सखंधा-  
वारबलवाहणे णावाभूयं चम्मरयणं दुरूहइ २ ता सिंधुं महाणइं विमलजलतुंगवीइं  
णावाभूएणं चम्मरयणेणं सबलवाहणे ससेणे समुत्तिण्णे, तओ महाणइमुत्तिरित्तु सिंधुं  
अप्पडिहयसासणे सेणावई कहिंचि गामागरणगरपव्वयाणि खेडकब्बडमडंबाणि  
पट्टणाणि सिंहलए बब्बरए य सच्चं च अंगलोयं बलायालोयं च परमरम्मं जवण-  
दीवं च पवरमणिरयणकणगकोसागारसमिद्धं आरबए रोमए य अलसंडविसयवासी  
य पिक्खुरे कालमुहे जोणए य उत्तरवेयङ्गसंसियाओ य मेच्छजाइ बहुप्पगारा  
दाहिणअवरेण जाव सिंधुसागरंतोत्ति सच्चपवरकच्छं च ओअवेऊण पडिणियत्तो

बहुसमरमणिजे य भूमिभागे तस्स कच्छस्स सुहणिसण्णे, ताहे ते जणवयाण णगराण पट्टणाण य जे य तहिं सामिया पभूया आगरवई य मंडलवई य पट्टणवई य सब्बे घेतूण पाहुडाई आभरणाणि य भूसणाणि य रयणाणि य वत्थाणि य महरिहाणि अण्णं च जं वरिट्ठं रायारिहं जं च इच्छियव्वं एयं सेणावइस्स उवणेंति मत्थयकयंजलिपुडा, पुणरवि काऊण अंजलिं मत्थयंमि पणया तुब्बे अम्हेऽत्थ सामिया देवयं व सरणा-  
 गया मो तुब्भं विसयवासिणोत्ति विजयं जंपमाणा सेणावइणा जहारिहं ठविय सक्कारिय विसज्जिया णियत्ता सगाणि णगराणि पट्टणाणि अणुपविट्ठा, ताहे सेणावई सविणओ घेतूण पाहुडाई आभरणाणि भूसणाणि रयणाणि य पुणरवि तं सिंधुणा-  
 मधेज्जं उत्तिण्णे अणहसासणबले, तहेव भरहस्स रण्णे णिवेएइ णिवेइता य अप्पि-  
 णित्ता य पाहुडाई सक्कारियसम्माणि सहरिसे विसज्जिए सगं पडमंडवमइगए, तए णं सुसेणे सेणावई ण्हाए जिमियभुत्तुत्तरागए समाणे जाव सरसगोसीसचंदणुक्खि-  
 त्तागयसरीरे उप्पि पासायवरगए फुट्टमाणेहिं मुइंगमत्थएहिं बत्तीसइवद्धेहिं णाडएहिं वरतरुणीसंपउत्तेहिं उवणच्चिजमाणे २ उवणिजमाणे २ उवलालि (लभि) जमाणे २ महया हयणट्ठणीयवाइयतंतीतलतालतुडियघणमुइंगपडुप्पवाइयरवेणं इट्ठे सइफरि-  
 सरसख्वगंधे पंचविहे माणुस्सए कामभोगे भुंजमाणे विहरइ ॥ ५२ ॥ तए णं से भरहे राया अण्णया कयाइ सुसेणं सेणावई सइवेइ २ ता एवं वयासी-  
 गच्छ णं खिप्पामेव भो देवाणुप्पिया ! तिमिसगुहाए दाहिणिण्णस्स दुवारस्स कवाडे विहाडेहि २ ता मम एयमाणत्तियं पच्चप्पिणाहित्ति, तए णं से सुसेणे सेणावई भरहेणं रण्णा एवं वुत्ते समाणे हट्ठतुट्ठचित्तमाणंदिए जाव करयलपरिग्गहियं० सिरसावत्तं मत्थए अंजलिं कट्टु जाव पडिसुणेइ २ ता भरहस्स रण्णे अंतियाओ पडिणिक्खमइ २ ता जेणेव सए आवासे जेणेव पोसहसाला तेणेव उवागच्छइ २ ता दब्भसंथारगं संथ-  
 रइ जाव कयमालस्स देवस्स अट्टमभत्तं पणिण्णइ पोसहसालाए पोसहिए इव वंभ-  
 यारी जाव अट्टमभत्तंसि परिणममाणंसि पोसहसालाओ पडिणिक्खमइ २ ता जेणेव मज्जणघरे तेणेव उवागच्छइ २ ता ण्हाए सुद्धप्पावेसाई मंगलाई वत्थाई पवरप-  
 रिहिए अप्पमहग्घाभरणालंकियसरीरे मज्जणघराओ पडिणिक्खमइ २ ता जेणेव तिमिसगुहाए दाहिणिण्णस्स दुवारस्स कवाडा तेणेव पहारेतथ गमणाए, तए णं तस्स सुसेणस्स सेणावइस्स बहवे राईसरतलवरमाडंबिय जाव सत्थवाहप्पभियओ सुसेणं सेणावई पिट्ठो २ अणुगच्छंति, तए णं तस्स सुसेणस्स सेणावइस्स बहुईओ खुज्जाओ चिलाइयाओ जाव इंगियचित्तियपत्थियवियाणियाओ णिउणकुसलाओ विणीयाओ जाव अणुगच्छंति । तए णं से सुसेणे सेणावई सव्विड्डीए सव्वजुईए

जाव णिग्घोसणाइएणं जेणेव तिमिसगुहाए दाहिणिळस्स दुवारस्स कवाडा तेणेव उवागच्छइ २ ता दंडरयणं परामुसइ, तए णं तं दंडरयणं पंचलइयं वहरसारमइयं विणासणं सव्वसत्तुसेणणाणं खंधावारे णरवइस्स गडुदरिविसमपक्खमारगिरिवरपवायाणं समीकरणं संतिकरं सुभकरं हियकरं रण्णो हियइच्छियमणोरहपूरं दिव्वमप्पडिहयं दंडरयणं गहाय सत्तट्ठ पयाइं पच्चोसक्कइ पच्चोसक्किता तिमिस्सगुहाए दाहिणिळस्स दुवारस्स कवाडे दंडरयणेणं महया २ सहेणं तिक्खुत्तो आउडेइ, तए णं तिमिसगुहाए दाहिणिळस्स दुवारस्स कवाडा सुसेणसेणावइणा दंडरयणेणं महया २ सहेणं तिक्खुत्तो आउडिया समाणा महया २ सहेणं कौचारवं करेमाणा सरसरस्स सगाइं २ ठाणाइं पच्चोसक्किता, तए णं से सुसेणे सेणावइ तिमिसगुहाए दाहिणिळस्स दुवारस्स कवाडे विहाडेइ २ ता जेणेव भरहे राया तेणेव उवागच्छइ २ ता जाव भरहं रायं करयलपरिग्गहियं जएणं विजएणं वद्धावेइ २ ता एवं वयासी-विहाडिया णं देवाणुप्पिया ! तिमिसगुहाए दाहिणिळस्स दुवारस्स कवाडा एयणं देवाणुप्पियाणं पियं णिवेएमि पियं भे भवउ, तए णं से भरहे राया सुसेणस्स सेणावइस्स अंतिए एयमट्ठं सोच्चा निसम्म हट्ठतुट्ठचित्तमाणंदिए जाव हियए सुसेणं सेणावइं सक्कारेइ सम्माणेइ सक्कारिता सम्माणिता कोडुंबियपुरिसे सहावेइ २ ता एवं वयासी-खिप्पामेव भो देवाणुप्पिया ! आभिसेक्कं हत्थिरयणं पडिकप्पेह हयगयरहपवर तहेव जाव अंजणगिरिकूडसणिभं गयवरं णरवइं दुरुढे ॥ ५३ ॥ तए णं से भरहे राया मणिरयणं परामुसइ तोतं चउरंगुलप्पमाणमित्तं च अणग्घं तंसियं छलंसं अणोवमजुइं दिव्वं मणिरयणपइसमं वेरुलियं सव्वभूयकंतं जेण य मुद्दागएणं दुक्खं ण किंचि जाव हवइ आरोग्गे य सव्वकालं तेरिच्छियदेवमाणुसकया य उवसग्गा सव्वे ण करेति तस्स दुक्खं, संगामेऽवि असत्थवज्झो होइ णरो मणिवरं धरेतो ठियजोव्वणकेसअवट्ठियणहो हवइ य सव्वभयविप्पमुक्को, तं मणिरयणं गहाय से णरवइं हत्थिरयणस्स दाहिणिळाए कुंभीए णिक्खिवइ, तए णं से भरहाहिवे णरिंदे हारोत्थयसुकयरइयवच्छे जाव अमरवइ-सणिभाए इट्ठीए पहियकित्ती मणिरयणकउज्जोए चक्करयणदेसियमग्गे अणेगारायसहस्साणुयायमग्गे महया उक्किट्ठिसीहणायबोलकलकलरवेणं समुद्वरभूयं पिव करेमाणे जेणेव तिमिसगुहाए दाहिणिळे दुवारे तेणेव उवागच्छइ २ ता तिमिसगुहं दाहिणिळेणं दुवारेणं अईइ ससिक्ख मेहंधयारणिवहं । तए णं से भरहे राया छललं दुवालसंसियं अट्ठकणियं अहिगरणिसंठियं अट्ठसोवणियं कागणिरयणं परामुसइ । तए णं तं चउरंगुलप्पमाणमित्तं अट्ठसुवणं च विसहरणं अउलं चउरंसंठाणसंठियं समतलं माणुम्माणजोगा जओ लोगे चरेति सव्वजणपणवगा, ण इव चंदो ण इव



तत्थ सूरं ण इव अग्गी ण इव तत्थ मणिणो तिमिरं णासंति अंधयारे जत्थ तयं दिव्वं भावजुत्तं दुवालसजोयणाइं तस्स लेसाउ विवड्ढंति तिमिरणिगरपडिसेहियाओ, रत्तिं च सव्वकालं खंधावारे करेइ आलोयं दिवसभूयं जस्स पभावेण चक्कवट्ठी, तिमिसगुहं अईइ सेण्णसहिए अभिजेत्तुं बिइयमद्धभरहं रायवरे कागणिं गहाय तिमिसगुहाए पुरच्छिमिल्लपच्चत्थिमिल्लेसुं कडएसुं जोयणंतरियाइं पंचधणुसयविवक्खंभाइं जोयणुजोय-  
कराइं चक्कणेमीसंठियाइं चंदमंडलपडिणिगासाइं एगूणपण्णं मंडलाइं आलिहमाणे २ अणुप्पविसइ, तए णं सा तिमिसगुहा भरहेणं रण्णा तेहिं जोयणंतरिएहिं जाव जोयणु-  
जोयकरेहिं एगूणपण्णाए मंडलेहिं आलिहिजमाणेहिं २ खिप्पामेव आलोगभूया उजो-  
यभूया दिवसभूया जाया यावि होत्था ॥ ५४ ॥ तीसे णं तिमिसगुहाए बहुमज्झदेसभाए  
एत्थ णं उम्मग्गणिमग्गजलाओ णामं दुवे महाणईओ पण्णत्ताओ, जाओ णं तिमिस-  
गुहाए पुरच्छिमिल्लोओ भित्तिकडगाओ पवूढाओ समाणीओ पच्चत्थिमेणं सिंधुं महा-  
णईं समप्पेंति, से केणट्ठेणं मंते ! एवं वुच्चइ-उम्मग्गणिमग्गजलाओ महाणईओ ?  
गोयमा ! जण्णं उम्मग्गजलाए महाणईए तणं वा पत्तं वा कट्ठं वा सक्करं वा आसे वा  
हत्थी वा रहे वा जोहे वा मणुस्से वा पक्खिप्पइ तण्णं उम्मग्गजला महाणईं तिव्खुतो  
आहुणिय २ एगंते थलंसि एडेइ, जण्णं णिमग्गजलाए महाणईए तणं वा पत्तं वा कट्ठं  
वा सक्करं वा जाव मणुस्से वा पक्खिप्पइ तण्णं णिमग्गजला महाणईं तिव्खुत्तो आहु-  
णिय २ अंतो जलंसि णिमज्जावेइ, से तेणट्ठेणं गोयमा ! एवं वुच्चइ-उम्मग्गणिमग्ग-  
जलाओ महाणईओ, तए णं से भरहे राया चक्करयणदेसियमग्गे अणेगराय० महया  
उक्किट्ठिसीहणाय जाव करेमाणे सिंधूए महाणईए पुरच्छिमिल्लेणं कूलेणं जेणेव उम्म-  
ग्गजला महाणई तेणेव उवागच्छइ २ ता वड्डइरयणं सहावेइ २ ता एवं वयासी-  
खिप्पामेव भो देवाणुप्पिया ! उम्मग्गणिमग्गजलासु महाणईसु अणेगखंभसयसण्णि-  
विट्ठे अयलमकंपे अभेज्जकवए सालंबणवाहाए सव्वरयणामए सुहसंकमे करेहिं करेत्ता  
मम एयमाणत्तियं खिप्पामेव पच्चप्पिणाहि, तए णं से वड्डइरयणे भरहेणं रण्णा एवं  
वुत्ते समाणे हट्ठतुट्ठचित्तमाणंदिए जाव विणएणं० पडिसुणेइ २ ता खिप्पामेव उम्मग्ग-  
णिमग्गजलासु महाणईसु अणेगखंभसयसण्णिविट्ठे जाव सुहसंकमे करेइ २ ता जेणेव  
भरहे राया तेणेव उवागच्छइ २ ता जाव एयमाणत्तियं पच्चप्पिणइ, तए णं से भरहे  
राया सखंधावारवले उम्मग्गणिमग्गजलाओ महाणईओ तेहिं अणेगखंभसयसण्णिवि-  
ट्ठेहिं जाव सुहसंकमेहिं उत्तरइ, तए णं तीसे तिमिसगुहाए उत्तरिल्लस्स दुवारस्स कवाडा  
सयमेव महया २ कौचारवं करेमाणा सरसरस्स सगाइं २ ठाणाइं पच्चोसकित्था ॥ ५५ ॥  
तेणं कालेणं तेणं समएणं उत्तरड्ढभरहे वासे बहवे आवाडा णामं चिलाया परि-

वसंति अद्धा दित्ता वित्ता विच्छिण्णविउलभवणसयणासणजाणवाहणाइण्णा बहुधण-  
बहुजायरुवरयया आओगपओगसंपउत्ता विच्छड्डियपउरभत्तपाणा बहुदासीदासगो-  
महिसगवेलगप्पभूया बहुजणस्स अपरिभूया सूरा वीरा विकंता विच्छिण्णविउलवल-  
वाहणा बहुसु समरसंपराएसु लद्धलक्खा यावि होत्था, तए णं तेसिमावाडचिलायाणं  
अण्णया कयाई विसयंसि बहूइं उप्पाइयसयाई पाउब्भवित्था, तंजहा—अकाले गज्जियं  
अकाले विज्जुया अकाले पायवा पुप्फंति अभिक्खणं २ आगासे देवयाओ णच्चंति,  
तए णं ते आवाडचिलाया विसयंसि बहूइं उप्पाइयसयाई पाउब्भूयाई पासंति पासित्ता  
अण्णमण्णं सदावेंति २ ता एवं वयासी—एवं खलु देवाणुप्पिया ! अम्हं विसयंसि  
बहूइं उप्पाइयसयाई पाउब्भूयाई तंजहा—अकाले गज्जियं अकाले विज्जुया अकाले  
पायवा पुप्फंति अभिक्खणं २ आगासे देवयाओ णच्चंति, तं ण णज्जइ णं देवाणु-  
प्पिया ! अम्हं विसयस्स के म्भे उवह्वे भविस्सइत्तिकट्ठु ओहयमणसंकप्पा चिंतासो-  
सागरं पविट्ठा करयलपल्हत्थमुहा अट्टज्झाणोवगया भूमिगयदिट्ठिया झियायंति, तए  
णं से भरहे राया चक्करयणदेसियमगे जाव समुद्वरवभूयं पिव करेमाणे तिमिस-  
गुहाओ उत्तसिल्लेणं दारेणं णीइ ससिक्ख मेहंययारणिवहा, तए णं ते आवाडचिलाया  
भरहस्स रण्णो अग्गाणीयं एजमाणं पासंति २ ता आसुस्सत्ता रुट्ठा चंडिकिया कुविया  
मिसिमिसेमाणे अण्णमण्णं सदावेंति २ ता एवं वयासी—एस णं देवाणुप्पिया ! केइ  
अपत्थियपत्थए दुरंतपंतलक्खणे हीणपुण्णचाउइसे हिरिसिरिपरिवज्जिए जे णं अम्हं  
विसयस्स उवरिं विरिएणं हव्वमागच्छइ तं तहा णं घत्तामो देवाणुप्पिया ! जहा णं  
एस अम्हं विसयस्स उवरिं विरिएणं णो हव्वमागच्छइत्तिकट्ठु अण्णमण्णस्स अंतिए  
एयमट्ठं पडिसुणेंति २ ता सण्णद्वद्ववम्मियकवया उप्पीलियसरासणपट्ठिया पिणद्धो-  
विज्जा बद्धआविद्धविमलवरचिंधपट्ठा गहियाउहप्परहणा जेणेव भरहस्स रण्णो अग्गा-  
णीयं तेणेव उवागच्छंति २ ता भरहस्स रण्णो अग्गाणीएण सद्धिं संपलग्गा यावि  
होत्था, तए णं ते आवाडचिलाया भरहस्स रण्णो अग्गाणीयं हयमहियपवरवीर-  
चाइयविवडियचिंधद्वयपडागं किच्छप्पाणोवगयं दिसोदिसिं पडिसेहिंति ॥ ५६ ॥  
तए णं से सेणावलस्स पेया वेढो जाव भरहस्स रण्णो अग्गाणीयं आवाडचिलाएहिं  
हयमहियपवरवीर जाव दिसोदिसिं पडिसेहियं पासइ २ ता आसुस्सत्ते रुट्ठे चंडिकिए  
कुविए मिसिमिसेमाणे कमलामेलं आसरयणं दुरूहइ २ ता तए णं तं असीइमंगुल-  
मूसियं णवणउइमंगुलपरिणाहं अट्टसयमंगुलमाययं बत्तीसमंगुलमूसियसिरं चउरंगुल-  
कण्णागं वीसइअंगुलवाहागं चउरंगुलजाणूकं सोलसअंगुलजंघागं चउरंगुलमूसियखुरं  
मुत्तोलीसंवत्तवलयिमज्झं ईसिं अंगुलपणयपट्ठं सणयपट्ठं संगयपट्ठं सुजायपट्ठं पसत्थ-

पट्ठं विसिट्ठपट्ठं एणीजाणुण्यवित्थयथदपट्ठं वित्तलयकसणिवायअंकेल्लणपहारपरिवज्जि-  
यंगं तवणिज्जथासगाहिलाणं वरकणगसुफुल्लथासगविचित्तरयणरज्जुपासं कंचणमणिकण-  
गपयरगणाणविहंघटियाजालमुत्तियाजालएहिं परिमंडिएणं पट्टेण सोभमाणेण सोभमाणं  
कक्केयणइंदणीलमरगयमसारगल्लमुहमंडणरइयं आविद्धमाणिक्खुत्तागविभूसियं कणगाम-  
यपउमसुकयतिलयं देवमइविगप्पियं सुरवरिंदवाहणजोगावयं सुखं दूइजमाणपंचचा-  
रुचामरामेलगं धरेंतं अणब्भवाहं अमेलणयणं कोकासियवहलपत्तलच्छं सयावरणणव-  
कणगतवियतवणिज्जतालुजीहासयं सिरिआभिसेयघोणं पोक्खरपत्तमिव सलिलविंदुजुयं  
अचंचलं चंचलसरीरं चोक्खचरगपरिव्वायगो विव हिलीयमाणं २ खुरचलणचच्चु-  
डेहिं धरणियलं अभिहणमाणं २ दोवि य चरणे जमगसमगं मुहाओ विणिग्गमंतं  
व सिग्घयाए मुणालतंतुउदगमवि णिस्साए पक्कमंतं जाइकुलरूवपच्चयपसत्थवारसा-  
वत्तागविसुद्धलक्खणं सुकुलप्पसूयं मेहाविभइयविणीयं अनुयतणुयसुकुमाल्लोमणिद्व-  
च्छविं सुजायअमरमणपवणगरुलजइणचवलसिग्घगामिं इसिमिव खंतिखमए सुसीस-  
मिव पच्चक्खयाविणीयं उदगहुयवहपासाणपंसुकइमससक्करसवालुइल्लतठकडगविसमप-  
ब्भारगिरिदरीसुल्लघणपिळ्ळणणित्थारणासमत्थं अचंडपाडियं दंडयाइं अणंसुपाइं अका-  
लतालं च कालहेसिं जियणिइंगवेसगं जियपरिसहं जच्चजाइयं मल्लिहाणिं सुगपत्तसुव-  
ण्णकोमलं मणाभिरामं कमलामेलं णामेणं आसरयणं सेणावई कमेण समभिरूढे कुवल-  
यदलसामलं च रयणियरमंडलणिमं सत्तुजणविणासणं कणगरयणदंडं णवमालियपुप्फ-  
सुरहिगंधिं णाणामणिलयभत्तिचित्तं च पट्ठोयमिसिमिसिततिक्खधारं दिव्वं खग्गरयणं  
लोए अणोवमाणं तं च पुणो वंसरूक्खसिं गट्ठिट्तं कालायसविउल्लोहदंडयवरवइरभेयगं  
जाव सव्वत्थअप्पडिहयं किं पुण देहेसु जंगमाणं गाहा-पण्णासंगुलदीहो सोलस से  
अंगुलाइं विच्छिण्णो । अद्वंगुलसोणीको जेट्ठपमाणो असी भणिओ ॥ १ ॥ असिर-  
यणं णरवइस्स हत्थाओ तं गहिऊण जेणेव आवाडचिलाया तेणेव उवागच्छइ २ ता  
आवाडचिलाएहिं सद्धिं संपलग्गे यावि होत्था । तए णं से सुसेणे सेणावई  
ते आवाडचिलाए हयमहियपवरवीरवाइय जाव दिसोदिसिं पडिसेहेइ ॥ ५७ ॥ तए  
णं ते आवाडचिलाया सुसेणसेणावइणा हयमहिय जाव पडिसेहिया समाणा भीया  
तत्था वहिया उव्विग्गा संजायभया अत्थामा अबला अवीरिया अपुरिसक्कारपरक्कमा  
अधारणिज्जमितिकट्ठु अणेगाइं जोयणाइं अवक्कमति २ ता एगयओ मिलायंति २ ता  
जेणेव सिंधू महाणाइं तेणेव उवागच्छंति २ ता वालुयासंधारए संथरेंति २ ता  
वालुयासंधारए दुरुहंति २ ता अट्ठमभत्ताइं पणिहंति २ ता वालुयासंधारो-  
वगया उत्ताणगा अवसणा अट्ठमभत्तिया जे तेसिं कुलदेवया मेहमुहा णामं णागकु-

मारा देवा ते मणसीकरेमाणा २ चिद्धंति । तए णं तेसिमावाडचिलयाणं अट्टम-  
भत्तंसि परिणममाणंसि मेहमुहाणं णागकुमाराणं देवाणं आसणाइं चलंति, तए णं ते  
मेहमुहा णागकुमारा देवा आसणाइं चलियाइं पासंति २ ता ओहिं पउंजंति २ ता  
आवाडचिलाए ओहिणा आभोएंति २ ता अण्णमण्णं सहावेंति २ ता एवं वयासी-  
एवं खलु देवाणुप्पिया ! जंबुद्दीवे दीवे उत्तरद्भुमरहे वासे आवाडचिलया सिंधूए  
महान्णैए वालुयासंथारोवगया उत्ताणगा अवसणा अट्टमभत्तिया अम्हे कुलदेवए  
मेहमुहे णागकुमारे देवे मणसीकरेमाणा २ चिद्धंति, तं सेयं खलु देवाणुप्पिया ! अम्हं  
आवाडचिलयाणं अंतिए पाउब्भवित्तएत्तिकट्ठु अण्णमण्णस्स अंतिए एयमट्ठं पडिसुणेंति  
पडिसुणेंता ताए उक्किट्ठाए तुरियाए जाव वीइवयमाणा २ जेणेव जंबुद्दीवे दीवे उत्तर-  
द्भुमरहे वासे जेणेव सिंधू महान्णै जेणेव आवाडचिलया तेणेव उवागच्छंति २ ता  
अंतलिक्खपडिवण्णा सखिखिणियाइं पंचवण्णाइं वत्थाइं पवरपरिहिया ते आवाड-  
चिलाए एवं वयासी-हं भो आवाडचिलया ! जण्णं तुब्भे देवाणुप्पिया ! वालुया-  
संथारोवगया उत्ताणगा अवसणा अट्टमभत्तिया अम्हे कुलदेवए मेहमुहे णाग-  
कुमारे देवे मणसीकरेमाणा २ चिद्धह तए णं अम्हे मेहमुहा णागकुमारा देवा तुब्भं  
कुलदेवया तुम्हं अंतियण्णं पाउब्भूया, तं वदह णं देवाणुप्पिया ! किं करेमो के व भे  
मणसाइए?, तए णं ते आवाडचिलया मेहमुहाणं णागकुमाराणं देवाणं अंतिए  
एयमट्ठं सोच्चा णिसम्म हट्ठतुट्ठचित्तमाणंदिया जाव हियया उट्ठाए उट्ठेंति २ ता जेणेव  
मेहमुहा णागकुमारा देवा तेणेव उवागच्छंति २ ता करयलपरिग्गहियं जाव मत्थए  
अंजलिं कट्ठु मेहमुहे णागकुमारे देवे जएणं विजएणं वद्धावेंति २ ता एवं वयासी-  
एस णं देवाणुप्पिया ! केइ अपत्थियपत्थए दुरंतपंतलक्खणे जाव हिरिसिरिपरिवज्जिए  
जे णं अम्हं विसयस्स उवरिं विरिएणं हव्वमागच्छइ, तं तहा णं घत्तेह देवाणुप्पिया !  
जहा णं एस अम्हं विसयस्स उवरिं विरिएणं णो हव्वमागच्छइ, तए णं ते मेहमुहा  
णागकुमारा देवा ते आवाडचिलाए एवं वयासी-एस णं भो देवाणुप्पिया ! भरहे  
णामं राया चाउरंतचक्कवट्ठी महिद्धिए महज्जुइए जाव महासोक्खे, णो खलु एस  
सक्को केणइ देवेण वा दाणवेण वा किण्णरेण वा किंपुरिसेण वा महोरगेण वा गंध-  
व्वेण वा सत्थप्पओगेण वा अग्गिप्पओगेण वा मंतप्पओगेण वा उद्वित्तए पडिसेहि-  
त्ताए वा, तहाविय णं तुब्भं पियट्ठयाए भरहस्स रण्णो उवसगं करेमोत्तिकट्ठु तेसिं  
आवाडचिलयाणं अंतियाओ अवक्कमंति २ ता वेउव्वियसमुग्घाएणं समोहणंति २ ता  
मेहाणीयं विउव्वंति २ ता जेणेव भरहस्स रण्णो विजयक्खंधावारणिवेसे तेणेव  
उवागच्छंति २ ता उप्पिं विजयक्खंधावारणिवेसस्स खिप्पामेव पतणतणायंति २ ता

खिप्पामेव विज्जुयार्यन्ति २ ता खिप्पामेव जुगमुसलमुट्ठिप्पमाणमेत्ताहिं धाराहिं ओघमेघं सत्तरत्तं वासं वासित्तं पवत्ता यावि होत्था ॥ ५८ ॥ तए णं से भरहे राया उप्पि विजयकखंघावारस्स जुगमुसलमुट्ठिप्पमाणमेत्ताहिं धाराहिं ओघमेघं सत्तरत्तं वासं वासमाणं पासइ २ ता चम्मरयणं परामुसइ, तए णं तं सिरिवच्छ-सरिस्सुवं वेढो भाणियव्वो जाव दुवालसजोयणाइं तिरियं पवित्थरइ तत्थ साहियाइं, तए णं से भरहे राया खंघावारवले चम्मरयणं दुरूहइ २ ता दिव्वं छत्तरयणं परामुसइ, तए णं णवणउइसहस्सकंचणसलागपरिमंडियं महरिहं अउज्झं णिव्वणसुपसत्थविसिद्धलट्ठकंचणसुपुट्ठदंडं मिउराययवट्ठलट्ठअरविंदकणियसमाणरूवं वत्थिपएसे य पंजरविराइयं विविहभत्तिचित्तं मणिमुत्तपवालत्तत्तवणिज्जपंचवणिय-धोयरयणरूवरइयं रयणमरीइंसमोप्पणाकप्पकारमणुरंजिएल्लियं रायलच्छिचिधं अज्जु-णसुवण्णपंडुरपच्चत्थुयपट्ठेसभागं तहेव तवणिज्जपट्ठधम्मंतपरिगयं अहियसस्सिरियं सारय्यरयणियरविमलपडिपुण्णचंदमंडलसमाणरूवं णरिंदवामप्पमाणपगइवित्थडं कुमुय-संडधवलं रण्णो संचारिमं विमाणं सूरायववायवुट्ठिदोसाण य खयकरं तवगुणेहिं लद्धं-अहयं बहुगुणदाणं उऊण विवरीयसुहकयच्छायं । छत्तरयणं पहाणं सुदुल्लं अप्प-पुण्णाणं ॥ १ ॥ पमाणराइण तवगुणाण फलेगदेसभागं विमाणवासेवि दुल्लहत्तरं वग्घारियमल्लदामकलावं सारयधवलम्भरययणिगरप्पगासं दिव्वं छत्तरयणं महि-वइस्स धरणियलपुण्णइंदो । तए णं से दिव्वे छत्तरयणे भरहेणं रण्णा परामुट्ठे समाणे खिप्पामेव दुवालस जोयणाइं पवित्थरइ साहियाइं तिरियं ॥ ५९ ॥ तए णं से भरहे राया छत्तरयणं खंघावारस्सुवरिं ठवेइ २ ता मणिरयणं परामुसइ वेढो जाव छत्तरयणस्स वत्थिभागंसि ठवेइ, तस्स य अणइवरं चारूखं सिलणिहि-अत्थमंतमेत्तसालिजवगोहूममुग्गमासतिलकुलत्थसट्ठिगणिप्फावचणगकोद्वकोत्थुंमरिकं-गुवरगरालगअणेगधणावरणहारियगअल्लगमूलगहलिइलाउयतउसतुंबकालिगकविट्ठअं-बअंबिलियसव्वणिप्फायए सुकुसले गाहावइरयणेत्ति सव्वजणवीसुयगुणे । तए णं से गाहावइरयणे भरहस्स रण्णो तद्विक्कसप्पइण्णणिप्फाइयपूह्याणं सव्वधण्णाणं अणेगाइं कुंभसहस्साइं उवट्ठवेइ, तए णं से भरहे राया चम्मरयणसमारूढे छत्तरयणसमोच्छण्णे मणिरयणकउज्जोए समुग्गयभूएणं सुहंसुहेणं सत्तरत्तं परिवसइ—णवि से खुहा ण विलियं णेव भयं णेव विज्जे दुक्खं । भरहाहिवस्स रण्णो खंघावारस्सवि तहेव ॥ १ ॥ ६० ॥ तए णं तस्स भरहस्स रण्णो सत्तरत्तंसि परिणममाणंसि इमेयारूढे अब्भत्थिए चित्तिए पत्थिए मणोगए संकप्पे समुप्पजित्था—केस णं भो ! अपत्थिय-पत्थए दुरंतपंतलक्खणे जाव परिवज्जिए जे णं ममं इमाए एयाणुरूवाए जाव

अभिसमण्णागयाए उप्पिं विजयखंधावारस्स जुगमुसलमुट्ठि जाव वासं वासइ । तए णं तस्स भरहस्स रण्णो इमेयाह्वं अब्भत्थियं चित्थियं पत्थियं मणोगयं संकम्पं समुप्पणं जाणित्ता सोलस देवसहस्सा सण्णज्झिउं पवत्ता यावि होत्था, तए णं ते देवा सण्णद्वबद्ववम्मियकवया जाव गहियाउहप्पहरणा जेणेव ते मेहमुहा णाग-कुमारा देवा तेणेव उवागच्छंति २ ता मेहमुहे णागकुमारे देवे एवं वयासी-हं भो मेहमुहा णागकुमारा देवा ! अपत्थियपत्थगा जाव परिवज्जिया किण्णं तुब्भे ण जाणह भरहं रायं चाउरंतचक्कवट्ठिं महिद्धियं जाव उद्वित्तए वा पडिसेहित्तए वा तहा वि णं तुब्भे भरहस्स रण्णो विजयखंधावारस्स उप्पिं जुगमुसलमुट्ठिप्प-माणमित्ताहिं धाराहिं ओधमेधं सत्तरत्तं वासं वासह, तं एवमवि गए इत्तो खिप्पा-मेव अवक्कमह अहव णं अज्ज पासह चित्तं जीवलोगं, तए णं ते मेहमुहा णाग-कुमारा देवा तेहिं देवेहिं एवं वुत्ता समाणा भीया तत्था वहिया उव्विग्गा संजाय-भया मेहाणीयं पडिसाहरंति २ ता जेणेव आवाडचिलाया तेणेव उवागच्छंति २ ता आवाडचिलाए एवं वयासी-एस णं देवाणुप्पिया ! भरहे राया महिद्धिए जाव णो खलु एस सक्को केणइ देवेण वा जाव अग्गिप्पओगेण वा जाव उद्वित्तए वा पडि-सेहित्तए वा तहावि य णं अम्हेहिं देवाणुप्पिया ! तुब्भं पियट्ठयाए भरहस्स रण्णो उवसग्गे काए, तं गच्छह णं तुब्भे देवाणुप्पिया ! ण्हाया उल्लपडसाडगा ओचूलगणि-यच्छा अग्गाइं वराइं रयणाइं गहाय पंजलिउडा पायवडिया भरहं रायाणं सरणं उवेह, पणिवइयवच्छला खलु उत्तमपुरिसा णत्थि भे भरहस्स रण्णो अंतियाओ भय-मितिकट्ठु एवं वइत्ता जामेव दिस्सिं पाउब्भूया तामेव दिस्सिं पडिगया । तए णं ते आवाडचिलाया मेहमुहेहिं णागकुमारेहिं देवेहिं एवं वुत्ता समाणा उट्ठाए उट्ठेति २ ता ण्हाया उल्लपडसाडगा ओचूलगणियच्छा अग्गाइं वराइं रयणाइं गहाय जेणेव भरहे राया तेणेव उवागच्छंति २ ता करयलपरिग्गहियं जाव मत्थए अंजलिं कट्ठु भरहं रायं जएणं विजएणं वद्धाविति २ ता अग्गाइं वराइं रयणाइं उवणेति २ ता एवं वयासी-वसुहर गुणहर जयहर, हिरिसिरीधीकित्तिधारगणरिंद । लक्खणसह-स्सधारग रायमिदं णे चिरं धारे ॥ १ ॥ हयवइ गयवइ णरवइ णवणिहिवइ भरह-वासपढमवई । बत्तीसजणवयसहस्सराय सामी चिरं जीव ॥ २ ॥ पढमणीरीसर ईसर हियईसर महिलियासहस्साणं । देवसयसाहसीसर चोइसरयणीसर जसंसी ॥ ३ ॥ सागरगिरिमेराणं उत्तरवाईणमभिजियं तुमए । ता अम्हे देवाणुप्पियस्स विसए परि-वसामो ॥ ४ ॥ अहो णं देवाणुप्पियाणं इड्डी जुई जसे बले वीरिए पुरिसक्कारपर-क्कमे दिव्वा देवजुई दिव्वे देवाणुभावे लद्धे पत्ते अभिसमण्णागए, तं दिट्ठा णं देवा-

णुप्पियाणं इद्धी एवं चेव जाव अभिसमण्णागए, तं खामेमु णं देवाणुप्पिया ! खमंतु  
 णं देवाणुप्पिया ! खंतुमरहंति णं देवाणुप्पिया ! णाइ भुजो २ एवंकरणयाएत्तिकट्ठु  
 पंजलिउडा पायवडिया भरहं रायं सरणं उर्विति । तए णं से भरहे राया  
 तेसिं आवाडचिलायाणं अग्गाइं वराइं रयणाइं पडिच्छइ २ ता ते आवाडचिलाए  
 एवं वयासी—गच्छह णं भो तुब्भे ममं बाहुच्छायापरिग्गहिया णिब्भया णिरुव्विग्गा  
 सुहंसुहेणं परिवसह, णत्थि मे कत्तोवि भयमत्थित्तिकट्ठु सक्कारेइ सम्माणेइ सक्कारेत्ता  
 सम्माणेत्ता पडिविसजेइ । तए णं से भरहे राया सुसेणं सेणावइं सद्दावेइ २ ता एवं  
 वयासी—गच्छाहि णं भो देवाणुप्पिया ! दोच्चं पि सिंधूए महाणइए पच्चत्थिमं  
 णिक्खुडं ससिंधुसागरगिरिमेराणं समविसमणिक्खुडाणि य ओअवेहि २ ता अग्गाइं  
 वराइं रयणाइं पडिच्छाहि २ ता मम एयमाणत्तियं खिप्पामेव पच्चप्पिणाहि जहा  
 दाहिणिल्लस्स ओअवणं तथा सव्वं भाणियव्वं जाव पच्चणुभवमाणे विहरइ ॥ ६१ ॥  
 तए णं दिव्वे चक्करयणे अण्णया कयाइ आउहघरसालाओ पडिणिक्खमइ २ ता  
 अंतलिक्खपडिवण्णे जाव उत्तरपुरच्छिमं दिस्सिं चुल्लहिमवंतपव्वयाभिमुहे पयाए यावि  
 होत्था, तए णं से भरहे राया तं दिव्वं चक्करयणं जाव चुल्लहिमवंतवासहरप-  
 व्वयस्स अद्दूसांमंते दुवाल्लसजोयणायामं जाव चुल्लहिमवंतगिरिकुमारस्स देवस्स  
 अट्ठमभत्तं पणिण्हइ, तहेव जहा मागहतित्थस्स जाव समुद्रवभूयं पिव करेमाणे  
 उत्तरदिसाभिमुहे जेणेव चुल्लहिमवंतवासहरपव्वए तेणेव उवागच्छइ २ ता चुल्लहि-  
 मवंतवासहरपव्वयं तिव्खुत्तो रहसिरेणं फुसइ फुल्लिता तुरए णिणिण्हइ णिणिण्हिता  
 तहेव जाव आययक्कणाययं च काऊण उसुमुदारं इमाणि वयणाणि तत्थ  
 भाणीअ से णरवइं जाव सव्वे मे ते विसयवासित्तिकट्ठु उड्ढं वेहासं उडुं णिसिरइ  
 परिगणिरियमज्जे जाव तए णं से सरे भरहेणं रण्णा उड्ढं वेहासं णिसट्ठे समाणे  
 खिप्पामेव बावत्तरिं जोयणाइं गंता चुल्लहिमवंतगिरिकुमारस्स देवस्स मेराए णिव-  
 इए, तए णं से चुल्लहिमवंतगिरिकुमारे देवे मेराए सरं णिवइयं पासइ २ ता आसु-  
 रत्ते रुट्ठे जाव पीडदाणं सव्वोसहिं मालं गोसीसचंदणं च कडगाणि जाव दहोदगं  
 च गेण्हइ २ ता ताए उक्किट्ठाए जाव उत्तरेणं चुल्लहिमवंतगिरिमेराए अहण्णं देवाणु-  
 प्पियाणं विसयवासी जाव अहण्णं देवाणुप्पियाणं उत्तरिल्ले अंतवाले जाव पडिविस-  
 जेइ ॥ ६२ ॥ तए णं से भरहे राया तुरए णिणिण्हइ २ ता रहं परावत्तेइ २ ता  
 जेणेव उसहकूडे तेणेव उवागच्छइ २ ता उसहकूडं पव्वयं तिव्खुत्तो रहसिरेणं  
 फुसइ २ ता तुरए निगिण्हइ २ ता रहं ठवेइ २ ता छत्तलं दुवाल्लसंसियं अट्ठक-  
 णियं अहिगरणिसंठियं सोवणियं कागणिरयणं परामुसइ २ ता उसभकूडस्स

पव्वयस्स पुरत्थिमिल्लंस्सि कडगंस्सि णामगं आउडेइ-ओसप्पिणीइमीसे तइयाएँ समाइ पच्छिमे भाए। अहमंस्सि चक्कवट्ठी भरहो इय नामधिजेणं ॥ १ ॥ अहमंस्सि पढमराया अहयं भरहाहिवो णरवारिंदो । णत्थि महं पडिसत्तू जियं मए भारहं वासं ॥ २ ॥ तिकट्टु णामगं आउडेइ णामगं आउडित्ता रहं परावत्तेइ २ ता जेणेव विजयखंवा-  
रणिवेसे जेणेव बाहिरिया उवट्ठाणसाला तेणेव उवागच्छइ २ ता जाव चुल्लहिम-  
वंतगिरिकुमारस्स देवस्स अट्ठाहियाए महामहिमाए णिव्वत्ताए समाणीए आउहघ-  
रसालाओ पडिणिक्खमइ २ ता जाव दाहिणदिसिं वेयडुपव्वयाभिमुहे पयाए यावि  
होत्था ॥ ६३ ॥ तए णं से भरहे राया तं दिव्वं चक्करयणं जाव वेयडुस्स पव्व-  
यस्स उत्तरिल्ले णियंवे तेणेव उवागच्छइ २ ता वेयडुस्स पव्वयस्स उत्तरिल्ले णियंवे  
दुवालसजोयणायां जाव पोसहसालं अणुपविसइ जाव णमिविणमीणं विज्जाहरराईणं  
अट्टमभत्तं पणिण्हइ २ ता पोसहसालाए जाव णमिविणमिविज्जाहररायाणो मणसी-  
क्रेमाणे २ चिट्ठइ, तए णं तस्स भरहस्स रण्णो अट्टमभत्तंस्सि परिणममाणंस्सि णमि-  
विणमीविज्जाहररायाणो दिव्वाए मईए चोइयमई अण्णमण्णस्स अंतियं पाउब्भ-  
वंति २ ता एवं वयासी-उप्पण्णे खलु भो देवाणुप्पिया ! जंबुदीवे बीवे भरहे वासे  
भरहे राया चाउरंतचक्कवट्ठी तं जीयमेयं तीयपच्चुप्पणमणागयाणं विज्जाहरराईणं  
चक्कवट्ठीणं उवत्थाणियं करेतए, तं गच्छामो णं देवाणुप्पिया ! अम्हेवि भरहस्स रण्णो  
उवत्थाणियं करेमोत्तिकट्टु विणमी णाळणं चक्कवट्ठिं दिव्वाए मईए चोइयमई माणु-  
म्माणप्पमाणजुत्तं तेयस्सि रुवलक्खणजुत्तं ठियजुव्वणकेसवट्ठियणहं इच्छियसीउ-  
ण्हफासजुत्तं-तिसु तणुयं तिसु तवं तिवलीगइउण्णयं तिगंभीरं । तिसु कालं तिसु सेयं  
तियाययं तिसु य विच्छिण्णं ॥ १ ॥ समसरीरं भरहे वासंस्सि सव्वमहिलप्पहाणं सुंद-  
रथणजहणवरकरचलणयणसिरसिजदसणजणहिययरमणमणहरिं सिंगारागार जाव  
जुत्तोवयारकुसलं अमरवट्ठुणं सुरूवं रुवेणं अणुहरंति सुभइं भइंस्सि जोव्वणे वट्ठमाणिं  
इत्थीरयणं णमी य रयणाणि य कडगाणि य तुडियाणि य गेण्हइ २ ता ताए उक्किट्ठाए  
तुरियाए जाव उड्डुयाए विज्जाहरगईए जेणेव भरहे राया तेणेव उवागच्छंति २ ता  
अंतलिक्खपडिवण्णा सखिंखिणियाइं जाव जएणं विजएणं वट्ठावंति २ ता एवं  
वयासी-अभिजिएणं देवाणुप्पिया ! जाव अम्हे देवाणुप्पियाणं आणत्तिकिंकरा इतिकट्टु  
तं पडिच्छंतु णं देवाणुप्पिया ! अम्हं इमं जाव विणमी इत्थीरयणं णमी रयणाणि०  
समपेइ । तए णं से भरहे राया जाव पडिविसजेइ २ ता पोसहसालाओ पडिणिक्ख-  
मइ २ ता मज्जणघरं अणुपविसइ २ ता...भोयणमंडवे जाव णमिविणमीणं विज्जाहर-  
राईणं अट्ठाहियमहामहिमा, तए णं से दिव्वे चक्करयणे आउहघरसालाओ पडिणि-



क्खमइ जाव उत्तरपुरत्थिसं दिसिं गंगादेवीभवणाभिमुहे पयाए यावि होत्था,  
 सच्चैव सव्वा सिंधुवत्तव्वया जाव णवरं कुंभट्टसहस्सं रयणचित्तं णाणामणिकणग-  
 रयणभत्तिचित्ताणि य दुवे कणगसीहासणाइं सेसं तं चेव जाव महिमत्ति ॥ ६४ ॥  
 तए णं से दिव्वे चक्करयणे गंगाए देवीए अट्ठाहियाए महामहिमाए णिव्वत्ताए  
 समाणीए आउह्वरसालाओ पडिणिक्खमइ २ ता जाव गंगाए महाणइए पच्चत्थि-  
 मिद्धेणं कूलेणं दाहिणदिसिं खंडप्पवायगुहाभिमुहे पयाए यावि होत्था, तए णं से  
 भरहे राया जाव जेणेव खंडप्पवायगुहा तेणेव उवागच्छइ २ ता सव्वा कयमालग-  
 वत्तव्वया णेयव्वा णवरं णट्टमालगे देवे पीइदाणं से आलंकारियभंडं कडगाणि य  
 सेसं सव्वं तहेव जाव अट्ठाहिया महाम० । तए णं से भरहे राया णट्टमालगस्स  
 देवस्स अट्ठाहियाए म० णिव्वत्ताए समाणीए सुसेणं सेणावइं सद्दावेइ २ ता जाव  
 सिंधुगमो णेयव्वो जाव गंगाए महाणइए पुरत्थिमिद्धं णिक्खुडं सगंगासागरगिरिमेराणं  
 समविसमणिक्खुडाणि य ओअवेइ २ ता अग्गाणि वराणि रयणाणि पडिच्छइ २ ता  
 जेणेव गंगा महाणइ तेणेव उवागच्छइ २ ता दोच्चं पि सक्खंधावारवले गंगा-  
 महाणइं विमलजलतुंगवीइं णावाभूएणं चम्मरयणेणं उत्तरइ २ ता जेणेव भरहस्स  
 रण्णो विजयखंधावारणिवेसे जेणेव बाहिरिया उवट्ठाणसाला तेणेव उवाग-  
 च्छइ २ ता आभिसेक्काओ हत्थिरयणाओ पच्चोरुहइ २ ता अग्गाइं वराइं रयणाइं  
 गहाय जेणेव भरहे राया तेणेव उवागच्छइ २ ता करयलपरिग्गहिं जाव अंजलिं  
 कट्ठु भरहं रायं जएणं विजएणं वद्धावेइ २ ता अग्गाइं वराइं रयणाइं उवणेइ ।  
 तए णं से भरहे राया सुसेणस्स सेणावइस्स अग्गाइं वराइं रयणाइं पडिच्छइ २ ता  
 सुसेणं सेणावइं सक्कारेइ सम्माणेइ स० २ ता पडिविसज्जेइ, तए णं से सुसेणे सेणावइं  
 भरहस्स रण्णो सेसंपि तहेव जाव विहरइ, तए णं से भरहे राया अण्णया कयाइ  
 सुसेणं सेणावइरयणं सद्दावेइ २ ता एवं वयासी-गच्छ णं भो देवाणुप्पिया ! खंडग-  
 प्पवायगुहाए उत्तरिस्स दुवारस्स कवाडे विहाडेहि २ ता जहा तिमिसगुहाए तहा  
 भाणियव्वं जाव पियं भे भवउ सेसं तहेव जाव भरहो उत्तरिद्धेणं दुवारेणं अइइ  
 ससिव्व मेहंधयारणिवहं तहेव पविसंतो मंडलाइं आलिहइ, तीसे णं खंडगप्पवाय-  
 गुहाए बहुमज्झदेसभाए जाव उम्मग्गणिमग्गजलाओ णामं दुवे महाणइंओ तहेव  
 णवरं पच्चत्थिमिद्धाओ कडगाओ पवूढाओ समाणीओ पुरत्थिमेणं गंगं महाणइं  
 समपेंति, सेसं तहेव णवरं पच्चत्थिमिद्धेणं कूलेणं गंगाए संकमवत्तव्वया तहेवत्ति,  
 तए णं खंडगप्पवायगुहाए दाहिणिस्स दुवारस्स कवाडा सयमेव महया २  
 कौचारवं करेमाणा सरसरस्स सगाइं २ ठाणाइं पच्चोसक्कित्था, तए णं से भरहे राया

चक्रयणदेसियमग्गे जाव खंडगप्पवायगुहाओ दक्खिणिल्लिणं दारेणं णीणेइ ससिव्व  
मेहंघयारणिवहाओ ॥ ६५ ॥ तए णं से भरहे राया गंगाए महाणईए पच्चत्थिमिल्ले  
कूले दुवालसजोयणायासं णवजोयणविच्छिण्णं जाव विजयक्खंधावारणिवेसं करेइ,  
अवसिद्धं तं चेव जाव णिहिरयणाणं अट्टमभत्तं पणिण्हइ, तए णं से भरहे राया  
पोसहसालाए जाव णिहिरयणे मणसि करेमाणे करेमाणे चिद्धइ, तस्स य अपरि-  
सियरत्तरयणा धुयमक्खयमव्वया सदेवा लोकोपचयंकरा उवगया णव णिहओ  
लोगविस्सुयजसा, तंजहा—णेसप्पे १ पंडुयए २ पिंगलए ३ सव्वरयण ४ मह-  
पउमे ५ । काले ६ य महाकाले ७ माणवगे महाणिही ८ संखे ९ ॥ १ ॥ णेस-  
प्पमि णिवेसा गामागरणगरपट्टणाणं च । दोणमुहमडंवाणं खंधावारावणगिहाणं  
॥ १ ॥ गणियस्स य उप्पत्ती माणुम्माणस्स जं पमाणं च । धण्णस्स य  
बीयाण य उप्पत्ती पंडुए भणिया ॥ २ ॥ सव्वा आभरणविही पुरिसाणं जा य  
होइ महिलानं । आसाण य हत्थीण य पिंगलगणिहिंमि सा भणिया ॥ ३ ॥  
रयणाइं सव्वरयणे चउदसवि वराइं चक्कवट्टिस्स । उप्पजंते एगिदियाइं पंचिदियाइं  
च ॥ ४ ॥ वत्थाण य उप्पत्ती णिप्फत्ती चेव सव्वभत्तीणं । रंगाण य धोव्वाण  
य सव्वाएसा महापउमे ॥ ५ ॥ काले कालणाणं सव्वपुराणं च तिसुवि वंसेसु ।  
सिप्पसयं कम्माणि य तिण्णि पयाए हियकराणि ॥ ६ ॥ लोहस्स य उप्पत्ती होइ  
महाकालि आगराणं च । रुप्पस्स सुवण्णस्स य मणिमुत्तसिल्लपवालाणं ॥ ७ ॥  
जोहाण य उप्पत्ती आवरणाणं च पहरणाणं च । सव्वा य जुद्धणीइ माणवगे  
दंडणीइ य ॥ ८ ॥ णट्टविही णाडगविही कव्वस्स य चउव्विहस्स उप्पत्ती । संखे  
महाणिहिंमि तुडियंगाणं च सव्वेसिं ॥ ९ ॥ चक्कपइट्ठाणा अट्ठुस्सेहा य णव य  
विकखंभा । बारसदीहा मंजूससंठिया जण्हवीइ मुहे ॥ १० ॥ वेरुलियमणिकवाडा  
कणगमया विविहरयणपडिपुण्णा । ससिसूरचक्कलक्खण अणुसमवयणोववत्ती या  
॥ ११ ॥ पलिओवमट्ठिइया णिहिसरिणामा य तत्थ खलु देवा । जेसिं ते आवासा  
अक्किज्जा आहिवच्चा य ॥ १२ ॥ एए णव णिहिरयणा पभूयवणरयणसंचयसमिद्धा ।  
जे वसमुवगच्छंति भरहाहिवचक्कवट्ठीणं ॥ १३ ॥ तए णं से भरहे राया अट्टमभत्तंसि  
परिणममाणंसि पोसहसालाओ पडिणिकखमइ, एवं मज्जणघरपवेसो जाव सेणि-  
प्पसेणिसद्दावणया जाव णिहिरयणाणं अट्ठाहियं महामहिमं क०, तए णं से भरहे  
राया णिहिरयणाणं अट्ठाहियाए महामहिमाए णिवत्ताए समाणीए सुसेणं सेणा-  
वइरयणं सद्दावेइ २ ता एवं वयासी—गच्छ णं भो देवाणुप्पिया ! गंगामहाणईए  
पुरत्थिमिल्लं णिक्खुडं दुच्चमि सगंगासागरगिरिमेरागं समविसमणिक्खुडाणि य

ओअवेहि २ ता एयमाणत्तियं पच्चप्पिणाहिति । तए णं से सुसेणे तं चेव पुव्व-  
वण्णियं भाणियव्वं जाव ओअवित्ता तमाणत्तियं पच्चप्पिणहं...पडिविसज्जेइ जाव  
भोगभोगाई भुंजमाणे विहरइ । तए णं से दिव्वे चक्करयणे अन्नया कयाइ आउह-  
घरसालाओ पडिणिकखमइ २ ता अंतलिकखपडिवण्णे जक्खसहस्ससंपरिवुडे दिव्व-  
तुडिय जाव आपूरेंते चेव० विजयक्खंधावारणिवेसं मज्झमज्झेणं णिग्गच्छइ० दाहिण-  
पच्चत्थिमं दिसिं विणीयं रायहाणि अभिमुहे पयाए यावि होत्था । तए णं  
से भरहे राया जाव पासइ २ ता हट्ठुट्ठ जाव कोडुंबियपुरिसे सद्दावेइ २ ता  
एवं वयासी—खिप्पामेव भो देवाणुप्पिया ! आभिसेक्कं जाव पच्चप्पिणंति ॥ ६६ ॥  
तए णं से भरहे राया अज्जियरज्जो णिजियसत्तू उप्पण्णसमत्तरयणे चक्करयणप्पहाणे  
णवण्हिवई समिद्धकोसे बत्तीसरायवरसहस्साणुयायमग्गे सट्ठीए वरिससहस्सेहिं  
केवलकप्पं भरहं वासं ओअवेइ ओअवेत्ता कोडुंबियपुरिसे सद्दावेइ २ ता एवं  
वयासी—खिप्पामेव भो देवाणुप्पिया ! आभिसेक्कं हत्थिरयणं हयगयरह तहेव जाव  
अंजणगिरिकूडसण्णिभं गयवई णरवई दुरूढे । तए णं तस्स भरहस्स रण्णो आभि-  
सेक्कं हत्थिरयणं दुरूढस्स समाणस्स इमे अट्ठुमंगलगा पुरओ अहाणुपुव्वीए  
संपट्ठिया, तंजहा—सोत्थियसिरिवच्छ जाव दप्पणे, तयणंतरे च णं पुण्णकल्लस-  
भिंजार दिव्वा य छत्तपडागा जाव संपट्ठिया, तयणंतरे च णं वेरुलियमिसंतविमलदंडं  
जाव अहाणुपुव्वीए संपट्ठियं, तयणंतरे च णं सत्त एगिंदियरयणा पुरओ अहाणु-  
पुव्वीए संपट्ठिया, तं०— चक्करयणे १ छत्तरयणे २ चम्मरयणे ३ दंडरयणे ४ असि-  
रयणे ५ मणिरयणे ६ कागणिरयणे ७, तयणंतरे च णं णव महाणिहओ पुरओ  
अहाणुपुव्वीए संपट्ठिया, तंजहा—णेसप्पे पंडुयए जाव संखे, तयणंतरे च णं  
सोलस देवसहस्सा पुरओ अहाणुपुव्वीए संपट्ठिया, तयणंतरे च णं बत्तीसं रायवर-  
सहस्सा पुरओ अहाणुपुव्वीए संपट्ठिया, तयणंतरे च णं सेणावइरयणे पुरओ अहा-  
णुपुव्वीए संपट्ठिए, एवं गाहावइरयणे वड्डइरयणे पुरोहियरयणे, तयणंतरे च णं  
इत्थिरयणे पुरओ अहाणुपुव्वीए०, तयणंतरे च णं बत्तीसं उड्डकल्लणियासहस्सा  
पुरओ अहाणुपुव्वीए०, तयणंतरे च णं बत्तीसं जणवयकल्लणियासहस्सा पुरओ  
अहाणुपुव्वीए०, तयणंतरे च णं बत्तीसं बत्तीसइवद्धा णाडगसहस्सा पुरओ अहाणु-  
पुव्वीए०, तयणंतरे च णं तिण्णि सट्ठा सूयसया पुरओ अहाणुपुव्वीए०, तयणंतरे  
च णं अट्ठारस सेणिप्पसेणीओ पुरओ०, तयणंतरे च णं चउरासीई आससयस-  
हस्सा पुरओ०, तयणंतरे च णं चउरासीई हत्थिसयसहस्सा पुरओ अहाणुपुव्वीए०,  
तयणंतरे च णं चउरासीई रहसयसहस्सा पुरओ अहाणुपुव्वीए०, तयणंतरे च

णं छण्णउई मणुस्सकोडीओ पुरओ अहाणुपुव्वीए संपट्टिया, तयणंतरं च णं बहवे राईसरतलवर जाव सत्थवाहप्पभिइओ पुरओ अहाणुपुव्वीए संपट्टिया, तयणंतरं च णं बहवे असिग्गाहा लट्ठिग्गाहा कुंतग्गाहा चावग्गाहा चामरग्गाहा पासग्गाहा फलगग्गाहा परसुग्गाहा पोत्थयग्गाहा वीणग्गाहा कूयग्गाहा हडप्फग्गाहा दीवियग्गाहा सएहिं सएहिं रूवेहिं, एवं वेसेहिं चिधेहिं निओएहिं सएहिं २ वत्थेहिं पुरओ अहाणुपुव्वीए संपट्टिया, तयणंतरं च णं बहवे दंडिणो मुंडिणो सिहंडिणो जडिणो पिच्छिणो हासकारगा खेडुकारगा दवकारगा चाडुकारगा कंदप्पिया कुकुइया मोहरिया गायंता य दीवंता य (वायंता) नच्चंता य हसंता य रमंता य कीलंता य सासंता य सावेंता य जावेंता य रावेंता य सोमैंता य सोमावेंता य आलोयंता य जयजयसदं च पउंजमाणा पुरओ अहाणुपुव्वीए संपट्टिया, एवं उववाइयग्गेणं जाव तस्स रण्णो पुरओ महआसा आसधरा उभओ पासिं णागा णागधरा पिट्ठओ रहा रहसंगेल्ली अहाणुपुव्वीए संपट्टिया । तए णं से भरहादिवे णरिंदे हारोत्थयसुक-यरइयवच्छे जाव अमरवइसणिभाए इड्डीए पहियकित्ती चकरयणदेसियमग्गे अणे-गरायवरसहस्साणुयायमग्गे जाव समुहरवभूयं पिव करेमाणे सव्विड्डीए सव्वजुइए जाव णिग्घोसणाइयरवेणं गामागरणगरखेडकब्बडमडंब जाव जोयणंतरियाहिं वस-हीहिं वसमाणे २ जेणेव विणीया रायहाणी तेणेव उवागच्छइ उवागच्छिता विणी-याए रायहाणीए अदूरसामंते दुवालसजोयणायामं णवजोयणविच्छिण्णं जाव खंधा-वारणिवेसं करेइ २ ता वड्डुइरयणं सद्दावेइ २ ता जाव पोसहसालं अणुपविसइ २ ता विणीयाए रायहाणीए अट्ठमभत्तं पणिण्हइ २ ता जाव अट्ठमभत्तं पडिजागरमाणे २ विहरइ । तए णं से भरहे राया अट्ठमभत्तंसि परिणममाणंसि पोसहसालाओ पडिणि-क्खमइ २ ता कोडुंविद्यपुरिसे सद्दावेइ २ ता तहेव जाव अंजणगिरिकूडसण्णिभं गय-वइं णरवइं दुल्ले तं चेव सव्वं जहा हेट्ठा णवरं णव महाणिहओ चत्तारि सेणाओ ण पविसंति सेसो सो चेव गमो जाव णिग्घोसणाइएणं विणीयाए रायहाणीए मज्झं-मज्झेणं जेणेव सए गिहे जेणेव भवणवरवडिसगपडिडुवारे तेणेव पहारेत्थ गमणाए, तए णं तस्स भरहस्स रण्णो विणीयं रायहाणिं मज्झंमज्झेणं अणुपविसमाणस्स अप्पे-गइया देवा विणीयं रायहाणिं सब्भंतरबाहिरियं आसियसम्मज्जिओवलितं करेंति, अप्पेगइया० मंचाइमंचकलियं करेंति, एवं सेसेसुवि पएसु, अप्पेगइया० णाणाविहरागव-सणुस्सियधयपडागामंडियभूसियं०, अप्पेगइया० लाउल्लोइयमहियं करेंति, अप्पेगइया जाव गंधवट्ठिभूयं करेंति, अप्पेगइया० हिरण्णवासं वासिति० सुवण्णरयणवइरआभरण-वासं वासंति, तए णं तस्स भरहस्स रण्णो विणीयं रायहाणिं मज्झंमज्झेणं अणुपवि-

समाणस्स सिंघाडग जाव महापहपहेसु बहवे अत्थत्थिया कामत्थिया भोगत्थिया लाभ-  
 त्थिया इद्धिसिया किब्बिसिया कारोडिया कारवाहिया संखिया चक्रिया णंगलिया मुहमं-  
 गलिया पूसमाणया वद्धमाणया लंखमंखमाइया ताहिं ओरालाहिं इट्ठाहिं कंताहिं पियाहिं  
 मणुण्णाहिं मणामाहिं सिवाहिं धण्णाहिं मंगल्लाहिं सस्सिरियाहिं हिययगमणिज्जाहिं  
 हिययपल्हायणिज्जाहिं वग्गुहिं अणवरयं अभिणंदंता य अभियुणंता य एवं वयासी—  
 जय जय णंदा ! जय जय भद्दा ! भद्दं ते अजियं जिणाहिं जियं पालयाहिं जियमज्जे  
 वसाहिं इंदो विव देवाणं चंदो विव ताराणंचम रो विव असुराणं धरणो विव नागाणं  
 बहुइं पुव्वसयसहस्साइं बहुइंओ पुव्वकोडीओ बहुइंओ पुव्वकोडाकोडीओ विणीयाए  
 रायहाणीए चुल्लहिमवंतगिरिसागरमेरागस्स य केवलकप्पस्स भरहस्स वासस्स गामाग-  
 रणगरखेडकब्बडमडंबदोणमुहपट्टणासमसणिवेसेसु सम्मं पयापालणोवज्जियलद्धजसे  
 महया जाव आहेवच्चं पोरेवच्चं जाव विहराहित्तिक्कुट्टु जयजयसहं पउंजंति, तए णं से भरहे  
 राया णयणमालासहस्सेहिं पिच्छिज्जमाणे २ वयणमालासहस्सेहिं अभियुव्वमाणे २  
 हिययमालासहस्सेहिं उण्णंदिज्जमाणे २ मणोरहमालासहस्सेहिं विच्छिप्पमाणे २ कंति-  
 रूवसोहगगुणेहिं पिच्छिज्जमाणे २ अंगुलिमालासहस्सेहिं दाइज्जमाणे २ दाहिणहत्थेणं  
 बहूणं णरणारीसहस्साणं अंजलिमालासहस्साइं पडिच्छेमाणे २ भवणपंतीसहस्साइं  
 समइच्छमाणे २ तंतीतलुडियगीयवाइयरवेणं महुरेणं मणहरेणं मंजुमंजुणा घोसेणं  
 पडिबुज्जमाणे २ जेणेव सए गिहे जेणेव सए भवणवरवडिसयदुवारे तेणेव उवा-  
 गच्छइ २ ता आभिसेक्कं हत्थिरयणं ठवेइ २ ता आभिसेक्काओ हत्थिरयणाओ  
 पच्चोरुहइ २ ता सोलस देवसहस्से सक्कारेइ सम्माणेइ स० २ ता बत्तीसं रायसहस्से  
 सक्कारेइ सम्माणेइ स० २ ता सेणावइरयणं सक्कारेइ सम्माणेइ स० २ ता एवं  
 गाहावइरयणं वड्डइरयणं पुरोहियरयणं सक्कारेइ सम्माणेइ स० २ ता तिण्णि सट्ठे  
 सूयसए सक्कारेइ सम्माणेइ स० २ ता अट्टारस सेणिप्पसेणीओ सक्कारेइ सम्माणेइ  
 स० २ ता अण्णेवि बहवे राईसर जाव सत्थवाहप्पभिइओ सक्कारेइ सम्माणेइ स० २ ता  
 पडिविसज्जेइ, इत्थीरयणेणं बत्तीसाए उडुकल्लाणियासहस्सेहिं बत्तीसाए जण-  
 वयकल्लाणियासहस्सेहिं बत्तीसाए बत्तीसइबद्धेहिं णाडयसहस्सेहिं सद्धिं संपरिवुडे  
 भवणवरवडिसं अईइ जहा कुब्रेरोव्व देवराया केलाससिहरिसिंभयंति, तए णं से  
 भरहे राया मित्ताणाइणियगसयणसंबंधिपरियणं पच्चुवेक्खइ २ ता जेणेव मज्जणधरे  
 तेणेव उवागच्छइ २ ता जाव मज्जणधराओ पडिणिक्खमइ २ ता जेणेव भोयणमंडवे  
 तेणेव उवागच्छइ २ ता भोयणमंडवंसि सुहासणवरगए अट्ठमभत्तं पारेइ २ ता उप्पि  
 पासायवरगए फुट्टमाणेहिं मुइंगमत्थएहिं बत्तीसइबद्धेहिं णाडएहिं उवलालिज्जमाणे २

उवणच्चिज्जमाणे २ उवणिज्जमाणे २ महया जाव भुंजमाणे विहरइ ॥ ६७ ॥  
तए णं तस्स भरहस्स रण्णे अण्णया कयाइ रज्जधुरं चित्तेमाणस्स इमेयारूवे जाव  
समुप्पज्जित्था—अभिजिए णं मए णियगबलवीरियपुरिसक्कारपरक्कमेण तुल्लहिमवंत-  
गिरिसागरमेराए केवलकप्पे भरहे वासे तं सेयं खल्ल मे अप्पाणं महया २ रायाभि-  
सेएणं अभिसेएणं अभिसिंचावित्तएत्तिकट्ठु एवं सपेहेइ २ ता कल्लं पाउप्पभायाए जाव  
जलंते जेणेव मज्जणघरे जाव पड्डिणिकखमइ २ ता जेणेव वाहिरिया उवट्ठाणसाला  
जेणेव सीहासणे तेणेव उवागच्छइ २ ता सीहासणवरगए पुरत्थाभिमुहे णिसीयइ  
णिसीइत्ता सोलस देवसहस्से वत्तीसं रायवरसहस्से सेणावइरयणे जाव पुरोहियरयणे  
तिणिण सट्ठे सूयसए अट्टारस सेणिप्पसेणीओ अण्णे य वहवे राईसरतलवर जाव  
सत्थवाहप्पभियओ सद्दावेइ २ ता एवं वयासी—अभिजिए णं देवाणुप्पिया ! मए  
णियगबलवीरिय जाव केवलकप्पे भरहे वासे तं तुव्वमे णं देवाणुप्पिया ! ममं  
महयारायाभिसेयं वियरह, तए णं ते सोलस देवसहस्सा जाव पभिइओ भरहेणं  
रणा एवं वुत्ता समाणा हट्ठुट्ठु० करयल० मत्थए अंजलं कट्ठु भरहस्स रण्णे एयमट्ठं  
सम्मं विणएणं पड्डिसुणेंति, तए णं से भरहे राया जेणेव पोसहसाला तेणेव  
उवागच्छइ २ ता जाव अट्ठमभत्तिए पड्डिजागरमाणे २ विहरइ, तए णं से भरहे  
राया अट्ठमभत्तंसि परिणममाणंसि आभिओगिए देवे सद्दावेइ २ ता एवं वयासी-  
खिप्पामेव भो देवाणुप्पिया ! विणीयाए रायहाणीए उत्तरपुरच्छिमे दिसीभाए एणं  
महं अभिसेयमण्डवं विउव्वेह २ ता मम एयमाणत्तियं पच्चप्पिणह, तए णं ते  
आभिओगा देवा भरहेणं रणा एवं वुत्ता समाणा हट्ठुट्ठु जाव एवं सामित्ति  
आणाए विणएणं वयणं पड्डिसुणेंति पड्डिसुणिता विणीयाए रायहाणीए उत्तरपुरत्थिमं  
दिसीभागं अवक्कमंति २ ता वेउव्वियसमुग्घाएणं समोहणंति २ ता संखिज्जाई जोय-  
णाई दंडं णिसिरंति, तंजहा—रयणाणं जाव रिट्ठाणं अहावायरे पुग्गले परिसाडेंति २ ता  
अहासुहुमे पुग्गले परियादियंति २ ता दुच्चंपि वेउव्वियसमुग्घाएणं जाव  
समोहणंति २ ता बहुसमरमणिज्जं भूमिभागं विउव्वंति से जह्णामाए—आलिंगपु-  
क्खरेइ वा०, तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं  
महं एणं अभिसेयमण्डवं विउव्वंति अणेगखंभसयसणिविट्ठं जाव गंधवट्ठिभूयं पेच्छाघ-  
रमंडववण्णगोत्ति, तस्स णं अभिसेयमंडवस्स बहुमज्झदेसभाए एत्थ णं महं एणं  
अभिसेयपेढं विउव्वंति अच्छं सण्हं०, तस्स णं अभिसेयपेढस्स तिट्ठिं तओ तिसोवा-  
णपड्डिरूवए विउव्वंति, तेसि णं तिसोवाणपड्डिरूवगाणं अयमेयारूवे वण्णावासे पण्णत्ते  
जाव तोरणा, तस्स णं अभिसेयपेढस्स बहुसमरमणिज्जे भूमिभागे पण्णत्ते, तस्स णं

बहुसमरमणिजस्स भूमिभागस्स बहुमज्झदेसभाए एत्थ णं सहं एगं सीहासणं विउ-  
 व्वंति, तस्स णं सीहासणस्स अयमेयारूवे वण्णावासे पण्णत्ते जाव दामवण्णं सम-  
 त्तंति । तए णं ते देवा अभिसेयमंडवं विउव्वंति २ ता जेणेव भरहे राया जाव पच्च-  
 प्पिणंति, तए णं से भरहे राया आभिओगाणं देवाणं अंतिए एयमट्ठं सोच्चा णिसम्म  
 हट्ठुट्ठ जाव पोसहसालाओ पडिणिक्खमइ २ ता कोडुंबियपुरिसे सद्दावेइ २ ता  
 एवं वयासी-खिप्पामेव भो देवाणुप्पिया ! आभिसेक्कं हत्थिरयणं पडिक्कप्पेह २ ता  
 हयगय जाव सण्णाहेत्ता एयमाणत्तियं पच्चप्पिणह जाव पच्चप्पिणंति, तए णं से  
 भरहे राया मज्जनघरं अणुपविसइ जाव अंजणगिरिकूडसण्णिभं गयवई णरवई  
 दुरूढे, तए णं तस्स भरहस्स रण्णो आभिसेक्कं हत्थिरयणं दुरूढस्स समाणस्स  
 इमे अट्ठट्ठमंगलग्गा जो चेव गमो विणीयं पविसमाणस्स सो चेव णिक्खममाणस्सवि  
 जाव पडिबुज्झमाणे २ विणीयं रायहाणि मज्झमज्जेणं णिग्गच्छइ २ ता जेणेव विणी-  
 याए रायहाणीए उत्तरपुरत्थिमे दिसीभाए अभिसेयमंडवे तेणेव उवागच्छइ २ ता  
 अभिसेयमंडवदुवारे आभिसेक्कं हत्थिरयणं ठावेइ २ ता आभिसेक्काओ हत्थिरयणाओ  
 पच्चोत्तइ २ ता इत्थीरयणेणं बत्तीसाए उडुकल्लाणियासहस्सेहिं बत्तीसाए जणवयक-  
 ल्लाणियासहस्सेहिं बत्तीसाए बत्तीसइवद्धेहिं णाडगसहस्सेहिं सद्धिं संपरिवुडे अभिसेय-  
 मंडवं अणुपविसइ २ ता जेणेव अभिसेयपेढं तेणेव उवागच्छइ २ ता अभिसेयपेढं  
 अणुप्पयाहिणीकरेमाणे २ पुरत्थिमिल्लेणं तिसोवाणपडिक्खएणं दुरूहइ २ ता जेणेव  
 सीहासणे तेणेव उवागच्छइ २ ता पुरत्थाभिमुहे सण्णिसण्णे । तए णं तस्स भर-  
 हस्स रण्णो बत्तीसं रायसहस्सा जेणेव अभिसेयमण्डवे तेणेव उवागच्छंति २ ता  
 अभिसेयमंडवं अणुपविसंति २ ता अभिसेयपेढं अणुप्पयाहिणीकरेमाणा २ उत्तरिल्लेणं  
 तिसोवाणपडिक्खएणं जेणेव भरहे राया तेणेव उवागच्छंति २ ता करयल जाव  
 अंजलिं कट्ठु भरहं रायाणं जएणं विजएणं वद्धावेंति २ ता भरहस्स रण्णो णच्चासण्णे  
 णाइदूरे सुत्ससमाणा जाव पज्जुवासंति, तए णं तस्स भरहस्स रण्णो सेणावइरयणे  
 जाव सत्थवाहप्पभिइओ तेऽवि तह चेव णवरं दाहिणिल्लेणं तिसोवाणपडिक्खएणं  
 जाव पज्जुवासंति, तए णं से भरहे राया आभिओगे देवे सद्दावेइ २ ता एवं वयासी-  
 खिप्पामेव भो देवाणुप्पिया ! ममं महत्थं महग्गं महरिहं महारायाभिसेयं उवट्ठ-  
 वेह, तए णं ते आभिओइया देवा भरहेणं रण्णा एवं वुत्ता समाणा हट्ठुट्ठचित्तं  
 जाव उत्तरपुरत्थिमं दिसीभागं अवक्कमंति अवक्कमिता वेउव्वियसमुग्घाएणं समोह-  
 णंति, एवं जहा विजयस्स तहा इत्थंप्पि जाव पंडगवणे एगओ मिलायंति एगओ  
 मिलाइत्ता जेणेव दाहिणिभूरहे वासे जेणेव विणीया रायहाणी तेणेव उवागच्छंति २ ता

विणीयं रायहाणि अणुप्पयाहिणीकरेमाणा २ जेणेव अभिसेयमंडवे जेणेव भरहे राया तेणेव उवागच्छंति २ ता तं महत्थं महग्घं महरिहं महारायाभिसेयं उव-  
 द्धवेति, तए णं तं भरहं रायाणं बत्तीसं रायसहस्सा सोमणंसि तिहिकरणदिवसण-  
 क्खत्तसुहुत्तंसि उत्तरपोट्टवयाविजयंसि तेहिं साभाविएहि य उत्तरवेउव्विएहि य वर-  
 कमलपइट्ठाणेहिं सुरभिवरवारिपडिपुण्णेहिं जाव महया महया रायाभिसेएणं अभि-  
 सिंचंति, अभिसेओ जहा विजयस्स, अभिसिंचित्ता पत्तेयं २ जाव अंजलिं कट्ठु ताहिं  
 इट्ठाहिं जहा पविसंतस्स० भणिया जाव विहराहित्तिकट्ठु जयजयसइं पउंजंति । तए णं  
 तं भरहं रायाणं सेणावइरयणे जाव पुरोहियरयणे तिणिण य सट्ठा सयसया अट्ठारस  
 सेणिप्पसेणीओ अण्णे य बहवे जाव सत्थवाहप्पभिइओ एवं चेव अभिसिंचंति तेहिं  
 वरकमलपइट्ठाणेहिं तहेव जाव अभिथुणंति य सोलस देवसहस्सा एवं चेव णवरं  
 पम्हलसुकुमालाए जाव मउडं पिणद्धेति, तयणंतं च णं दहरमलयसुगंधिएहिं गंधेहिं  
 गायइं अब्भुक्खेति दिव्वं च सुमणोदामं पिणद्धेति, किं बहुणा ?, गंठिमवेहिम जाव  
 विभूसियं करेति, तए णं से भरहे राया महया २ रायाभिसेएणं अभिसिंचिए समाणे  
 कोडुं वियपुरिसे सद्दवेइ २ ता एवं वयासी-खिप्पामेव भो देवाणुप्पिया ! हत्थि-  
 खंधवरगया विणीयाए रायहाणीए सिंघाडगतिगचउक्कचच्चर जाव महापहपेइसु महया २  
 सहेणं उग्घेसेमाणा २ उस्सुक्कं उक्करं उक्किट्ठं अदिजं अमिजं अभडप्पवेसं अदंड-  
 कोदंडिमं जाव सपुरजणजाणवयं दुवालससंवच्छरियं पमोयं घोसेह २ ता ममेयमाण-  
 त्तियं पच्चप्पिणहत्ति, तए णं ते कोडुं वियपुरिसा भरहेणं रण्णा एवं वुत्ता समाणा हट्ठुट्ठ-  
 चित्तमाणंदिया पीइमणा० हरिसवसविसप्पमाणहियया विणएणं वयणं पडिसुणंति २ ता  
 खिप्पामेव हत्थिखंधवरगया जाव वोसेंति २ ता एयमाणत्तियं पच्चप्पिणंति, तए णं  
 से भरहे राया महया २ रायाभिसेएणं अभिसित्ते समाणे सीहासणाओ अब्भुट्ठेइ २ ता  
 इत्थिरयणेणं जाव णाडगसहस्सेहिं सद्धिं संपरिवुडे अभिसेयपेडाओ पुरत्थिमि-  
 ल्लेणं तिसोवाणपडिरूवएणं पच्चोरुहइ २ ता अभिसेयमंडवाओ पडिणिक्खमइ २ ता  
 जेणेव आभिसेक्के हत्थिरयणे तेणेव उवागच्छइ २ ता अंजणगिरिकूडसणिमं  
 गयवइं जाव दुरुडे, तए णं तस्स भरहस्स रण्णो बत्तीसं रायसहस्सा अभिसेयपेडाओ  
 उत्तरिल्लेणं तिसोवाणपडिरूवएणं पच्चोरुहंति, तए णं तस्स भरहस्स रण्णो सेणावइर-  
 यणे जाव सत्थवाहप्पभिइओ अभिसेयपेडाओ दाहिणिल्लेणं तिसोवाणपडिरूवएणं  
 पच्चोरुहंति, तए णं तस्स भरहस्स रण्णो आभिसेक्कं हत्थिरयणं दुरुडस्स समाणस्स  
 इमे अट्ठट्ठमंगलगा पुरओ जाव संपट्टिया, जोऽविय अइगच्छमाणस्स गमो पढमो  
 कुबेरावसाणो सो चेव इहंपि कमो सक्कारजडो णेयव्वो जाव कुबेरोव्व देवराया



केलासं सिहरिसिंगभूयंति । तए णं से भरहे राया मज्जणघरं अणुपविसइ २ ता जाव भोयणमंडवंसि सुहासणवरगए अट्टमभत्तं पारेइ २ ता भोयणमंडवाओ पडिणिक्खमइ २ ता उप्पि पासायवरगए फुट्टमाणेहिं मुइंगमत्थएहिं जाव भुंजमाणे विहरइ, तए णं से भरहे राया दुवालससंवच्छरियंसि पमोयंसि णिव्वत्तंसि समाणंसि जेणेव मज्जणघरे तेणेव उवागच्छइ २ ता जाव मज्जणघराओ पडिणिक्खमइ २ ता जेणेव बाहिरिया उवट्ठाणसाला जाव सीहासणवरगए पुरत्थाभिमुहे णिसीयइ २ ता सोलस देवसहस्से सक्कारेइ सम्माणेइ स० २ ता पडिविसजेइ २ ता बत्तीसं रायवरसहस्सा सक्कारेइ सम्माणेइ स० २ ता० सेणावइरयणं सक्कारेइ सम्माणेइ स० २ ता जाव पुरोहियरयणं सक्कारेइ सम्माणेइ स० २ ता० एवं तिण्णि सट्ठे सूरारसए अट्टारस सेणिप्पसेणीओ सक्कारेइ सम्माणेइ स० २ ता० अण्णे य बह्वे राईसरतलवर जाव सत्थवाहप्पभिइओ सक्कारेइ सम्माणेइ स० २ ता पडिविसजेइ २ ता उप्पि पासायवरगए जाव विहरइ ॥ ६८-१ ॥ भरहस्स रण्णे चक्ररयणे १ दंडरयणे २ असिरयणे ३ छत्ररयणे ४ एए णं चत्तारि एगिंदियरयणा आउहघरसालाए समुप्पण्णा, चम्मरयणे १ मणिरयणे २ कागणिरयणे ३ णव य महाणिहओ एए णं सिरिघरंसि समुप्पण्णा, सेणावइरयणे १ गाहावइरयणे २ बट्टइरयणे ३ पुरोहियरयणे ४ एए णं चत्तारि मण्यरयणा विणीयाए रायहाणीए समुप्पण्णा, आसरयणे १ हत्थिरयणे २ एए णं दुवे पंचिंदियरयणा वेयङ्कगिरिपायमूले समुप्पण्णा, सुभद्दा इत्थीरयणे उत्तरिळाए विज्जाहरसेदीए समुप्पण्णे ॥ ६८-२ ॥ तए णं से भरहे राया चउदसण्हं रयणाणं णवण्हं महाणिहीणं सोलसण्हं देवसाहस्सीणं बत्तीसाए रायसहस्साणं बत्तीसाए उड्डुकळाणियासहस्साणं बत्तीसाए जणवयकळाणियासहस्साणं बत्तीसाए बत्तीसइबद्धाणं णाडगसहस्साणं तिण्हं सट्ठीणं सूरारसयाणं अट्टारसण्हं सेणिप्पसेणीणं चउरासीइए आससयसहस्साणं चउरासीइए दंतिसयसहस्साणं चउरासीइए रहसयसहस्साणं छण्णउइए मणुस्स-कोडीणं वावत्तरीए पुरवरसहस्साणं बत्तीसाए जणवयसहस्साणं छण्णउइए गाम-कोडीणं णवणउइए दोगमुहसहस्साणं अडयालीसाए पट्टणसहस्साणं चउव्वीसाए कव्वडसहस्साणं चउव्वीसाए मडंबसहस्साणं वीसाए आगरसहस्साणं सोलसण्हं खेडसहस्साणं चउदसण्हं संवाहसहस्साणं छप्पण्णाए अंतरोदगाणं एगूणपण्णाए कुरजाणं विणीयाए रायहाणीए चुल्लहिमवंतगिरिसागरमेरागस्स केवलकप्पस्स भरहस्स वासस्स अण्णेसि च बहूणं राईसरतलवर जाव सत्थवाहप्पभिइणं आहेवच्चं पोरेवच्चं भट्ठित्तं सामित्तं महत्तरगतं आणाईसरसेणावच्चं कारेमाणे पालेमाणे ओहय-णिहएसु कंटएसु उद्धियमलिणसु सव्वसत्तूसु णिज्जिएसु भरहाहिवे णरिंदे वरचंदण-

चच्चियं वरहारइयवच्छे वरमउडविसिद्धए वरवत्थभूसणधरे सव्वोउयसुरहिकुसुम-  
 वरमल्लसोभियसिरे वरणाडगणाडइजवरइत्थिगुम्मसद्धिं संपरिवुडे सव्वोसहिसव्वरय-  
 णसव्वसमिइसमग्गे संपुण्णमणोरहे हयामित्तमाणमहणे पुव्वकयतवप्पभावणिविट्ठ-  
 संच्चियफले भुंजइ माणुस्सए सुहे भरहे णामधेजेत्ति ॥ ६९ ॥ तए णं से भरहे  
 राया अण्णया कयाइ जेणेव मज्जणघरे तेणेव उवागच्छइ २ ता जाव ससिक्ख  
 पियदंसणे णरवई मज्जणघराओ पडिणिक्खमइ २ ता जेणेव आर्यसघरे जेणेव  
 सीहासणे तेणेव उवागच्छइ २ ता सीहासणवरगए पुरत्थाभिमुहे णिसीयइ २ ता  
 आर्यसघरंति अत्ताणं देहमाणे २ चिट्ठई, तए णं तस्स भरहस्स रण्णो सुमेणं  
 परिणामेणं पसत्थेहिं अज्झवसाणेहिं लेसाहिं विसुज्झमाणीहिं २ ईहापोहमग्गणगवे-  
 सणं करेमाणस्स तयावरणिज्जाणं कम्मणं खएणं कम्मरयविकिरणकरं अपुव्वकरणं  
 पविट्ठस्स अणंते अणुत्तरे निव्वाघाए निरावरणे कसिणे पडिपुण्णे केवलरनानादंसणे  
 समुप्पण्णे, तए णं से भरहे केवली सयमेवाभरणालंकारं ओमुंयइ २ ता सयमेव  
 पंचमुट्ठियं लोयं करेइ २ ता आर्यसघराओ पडिणिक्खमइ २ ता अंतेउरमज्झमज्जेणं  
 णिग्गच्छइ २ ता दसहिं रायवरसहस्सेहिं सद्धिं संपरिवुडे विणीयं रायहाणिं  
 मज्झमज्जेणं णिग्गच्छइ २ ता मज्झदेसे सुहंसुहेणं विहरइ २ ता जेणेव अट्ठावए  
 पव्वए तेणेव उवागच्छइ २ ता अट्ठावयं पव्वयं सणियं २ दुरुहइ २ ता मेघघण-  
 सण्णिगासं देवसण्णिवायं पुढविसिलावट्ठयं पडिलेहेइ २ ता संलेहणाइसणाइसिए  
 भत्तपाणपडियाइक्खिए पाओवगए कालं अणवकंखमाणे विहरइ, तए णं से भरहे  
 केवली सत्तत्तरि पुव्वसयसहस्साइं कुमारवासमज्जे वसित्ता एणं वाससहस्सं  
 मंडलियरायमज्जे वसित्ता छ पुव्वसयसहस्साइं वाससहस्सूणगाइं महारायमज्जे  
 वसित्ता तेसीइपुव्वसयसहस्साइं अगारवासमज्जे वसित्ता एणं पुव्वसयसहस्सं  
 देसूणं केवलिपरियायं पाउणिता तमेव बहुपडिपुण्णं सामण्णपरियायं पाउणिता  
 चउरासीइपुव्वसयसहस्साइं सव्वाउयं पाउणिता मासिएणं भत्तेणं अपाणएणं सव-  
 णेणं णक्खत्तेणं जोगमुवागएणं खीणे वेयणिजे आउए णामे गोए कालगए वीइकंते  
 समुज्जाए छिण्णजाइजरामरणबंधणे सिद्धे बुद्धे मुत्ते परिणिवुडे अंतगडे सव्वदुक्ख-  
 प्पहीणे ॥ ७० ॥ इइ भरहचक्किचरियं समत्तं ॥

१ तहमप्पाणमवलोयंतस्स तस्सेगंगुलीए गलियमंगुलिज्जयं, सो य तं पडंत ण  
 जाणइ, अणुक्रमेण वुंदि पेहमाणे तमंगुलिमसोहंतियमवलोएइ ताहे हारकडगाइसव्व-  
 माभरणमवणेइ । २ गत्तअसारत्तभावणारूवजीवपरिणईए । ३ सयमेवाभरणभूयम-  
 लंकारं वत्थमल्लरूवमोमुयइत्ति अट्ठो ।

भरहे य इत्थ देवे महिद्धिए महज्जुइए जाव पलिओवमट्टिइए परिवसइ, से एएणट्ठेणं गोयमा ! एवं वुच्चइ-भरहे वासे २ इति । अदुत्तरं च णं गो० ! भरहस्स वासस्स सासए णामधेजे पण्णत्ते जं ण कयाइ ण आसि ण कयाइ णत्थि ण कयाइ ण भविस्सइ भुविं च भवइ य भविस्सइ य धुवे णियए सासए अक्खए अव्वए अवट्ठिए णिच्चे भरहे वासे ॥ ७१ ॥ तइओ वक्खारो समत्तो ॥

कहि णं भंते ! जम्बुद्वीवे २ चुल्लहिमवंते णामं वासहरपव्वए पण्णत्ते ? गोयमा ! हेमवयस्स वासस्स दाहिणेणं भरहस्स वासस्स उत्तरेणं पुरत्थिमलवणसमुद्स्स पच्चत्थिमेणं पच्चत्थिमलवणसमुद्स्स पुरत्थिमेणं एत्थ णं जम्बुद्वीवे दीवे चुल्लहिमवंते णामं वासहरपव्वए पण्णत्ते, पाईणपडीणायए उदीणदाहिविच्छिण्णे दुहा लवण-समुदं पुट्ठे पुरत्थिमिद्धाए कोडीए पुरत्थिमिद्धं लवणसमुदं पुट्ठे पच्चत्थिमिद्धाए कोडीए पच्चत्थिमिद्धं लवणसमुदं पुट्ठे एगं जोयणसयं उट्ठं उच्चत्तेणं पणवीसं जोयणाइं उव्वेहेणं एगं जोयणसहस्सं वावण्णं च जोयणाइं दुवालस य एगूणवीसइभाए जोयणस्स विक्खंमेणंति, तस्स बाहा पुरत्थिमपच्चत्थिमेणं पंच जोयणसहस्साइं तिण्णि य पण्णासे जोयणसए पण्णरस य एगूणवीसइभाए जोयणस्स अद्भभागं च आयामेणं, तस्स जीवा उत्तरेणं पाईणपडीणायया जाव पच्चत्थिमिद्धाए कोडीए पच्चत्थिमिद्धं लवणसमुदं पुट्ठा चउव्वीसं जोयणसहस्साइं णव य वत्तीसे जोयणसए अद्भभागं च किंचिविसेसूणा आयामेणं पण्णत्ता, तीसे धणुपट्ठे दाहिणेणं पणवीसं जोयणसहस्साइं दोण्णि य तीसे जोयणसए चत्तारि य एगूणवीसइभाए जोयणस्स परिवेवेणं पण्णत्ते, रुयगसंठाणसंठिए सव्वकणगामए अच्छे सण्हे तहेव जाव पडिह्वे, उमओ पासिं दोहिं पउमवरवेइयाहिं दोहिं य वणसंडेहिं संपरिविखत्ते दुण्हवि पमाणं वण्णगोत्ति । चुल्लहिमवन्तस्स वासहरपव्वयस्स उवरिं बहुसमर-मणिजे भूमिभागे पण्णत्ते, से जहाणामए-आलिगपुक्खरेइ वा जाव बहवे वाणमंतरा देवा य देवीओ य आसयंति जाव विहरंति ॥ ७२ ॥ तस्स णं बहुसमरमणिजस्स भूमिभागस्स बहुमज्झदेसभाए इत्थ णं इक्के महं पउमद्वहे णामं दहे पण्णत्ते, पाईणपडीणायए उदीणदाहिविच्छिण्णे इक्कं जोयणसहस्सं आयामेणं पंच जोयणसयाइं विक्खंमेणं दस जोयणाइं उव्वेहेणं अच्छे सण्हे रययामयकूले जाव पासाईए जाव पडिह्वेत्ति, से णं एगाए पउमवरवेइयाए एगेण य वणसंडेणं सव्वओ समंता संपरिविखत्ते वेइयावणसंडवण्णओ भाणियव्वोत्ति, तस्स णं पउमद्व-हस्स चउदिसिं चत्तारि तिसोवाणपडिह्वगा पण्णत्ता, वण्णावासो भाणियव्वोत्ति । तेसि णं तिसोवाणपडिह्वगाणं पुरओ पत्तेयं २ तोरणा पण्णत्ता, ते णं तोरणा

णाणामणिमया०, तस्स णं पउमइहस्स बहुमज्झदेसभाए एत्थं महं एगे पउमे पण्णत्ते, जोयणं आयामविकखंमेणं अद्धजोयणं बाहल्लेणं दस जोयणाइं उव्वेहेणं दो कोसे ऊसिए जलंताओ साइरेगाइं दसजोयणाइं सव्वगगेणं पण्णत्ते, से णं एगाए जगईए सव्वओ समंता संपरिक्खित्ते जम्बुद्वीवजगइप्पमाणा गवक्खकडएवि तह चेव पमाणे-  
णंति, तस्स णं पउमस्स अयमेयाह्वे वण्णावासे प०, तं०-वइरामया मूला रिट्ठामए कंदे वेहल्लियामए णाले वेहल्लियामया बाहिरपत्ता जम्बूणयामया अर्द्धिभतरपत्ता तवणिजमया केसरा णाणामणिमया पोक्खरवीयभाया कणगामई कणिया, सा णं० अद्धजोयणं आयामविकखंमेणं कोसं बाहल्लेणं सव्वकणगामई अच्छा०, तीसे णं कणियाए उप्पि बहुसमरमणिजे भूमिभागे पण्णत्ते, से जहाणामए-आलिं०, तस्स णं बहुसमरमणिजस्स भूमिभागस्स बहुमज्झदेसभाए एत्थ णं महं एगे भवणे प० कोसं आयामेणं अद्धकोसं विकखंमेणं देसूणं कोसं उद्धं उच्चत्तेणं अणेगखंससय-  
सणिजिह्वे पासाइए दरिसणिजे०, तस्स णं भवणस्स तिदिसिं तओ दारा प०, ते णं दारा पञ्चधणुसयाइं उद्धं उच्चत्तेणं अद्धाइजाइं धणुसयाइं विकखंमेणं तावइयं चेव पवेसेणं सेया वरकणगथूभियागा जाव वणमालाओ णेयव्वाओ, तस्स णं भवणस्स अंतो बहुसमरमणिजे भूमिभागे पण्णत्ते, से जहाणामए-आलिं०, तस्स णं बहुमज्झदेसभाए एत्थ णं महं एगा मणिपेटिया प०, सा णं मणिपेटिया पंचधणुसयाइं आयाम-  
विकखंमेणं अद्धाइजाइं धणुसयाइं बाहल्लेणं सव्वमणिमई अच्छा०, तीसे णं मणिपेटियाए उप्पि एत्थ णं महं एगे सयणिजे पण्णत्ते, सयणिजवण्णओ भाणियव्वो । से णं पउमे अण्णेणं अट्ठसएणं पउमाणं तदद्दुच्चत्तप्पमाणमित्ताणं सव्वओ समंता संपरिक्खित्ते, ते णं पउमा अद्धजोयणं आयामविकखंमेणं कोसं बाहल्लेणं दसजोयणाइं उव्वेहेणं कोसं ऊसिया जलंताओ साइरेगाइं दसजोयणाइं उच्चत्तेणं, तेसि णं पउमाणं अयमेयाह्वे वण्णावासे पण्णत्ते, तंजहा-वइरामया मूला जाव कणगामई कणिया, सा णं कणिया कोसं आयामेणं अद्धकोसं बाहल्लेणं सव्वकणगामई अच्छा इति, तीसे णं कणियाए उप्पि बहुसमरमणिजे जाव मणीहिं उव्वसोमिए, तस्स णं पउमस्स अवस्तरेणं उत्तरेणं उत्तरपुरत्थिमेणं एत्थ णं सिरीए देवीए चउण्हं सामाणियसाहस्सीणं चत्तारि पउम-  
साहस्सीओ पण्णत्ताओ, तस्स णं पउमस्स पुरत्थिमेणं एत्थ णं सिरीए देवीए चउण्हं महत्तरियाणं चत्तारि पउमा प०, तस्स णं पउमस्स दाहिणपुरत्थिमेणं सिरीए देवीए अर्द्धिभतरियाए परिसाए अट्ठण्हं देवसाहस्सीणं अट्ठ पउमसाहस्सीओ पण्णत्ताओ, दाहिणेणं मज्झिमपरिसाए दसण्हं देवसाहस्सीणं दस पउमसाहस्सीओ पण्णत्ताओ, दाहिणपच्चत्थिमेणं बाहिरियाए परिसाए बारसण्हं देवसाहस्सीणं बारस पउमसाह-

स्तीओ पण्णत्ताओ, पच्चत्थिमेणं सत्तण्हं अणियाहिवईणं सत्त पउमा पण्णत्ता, तस्स  
 णं पउमस्स चउद्धिसिं सव्वओ समंता इत्थ णं सिरीए देवीए सोलसण्हं आयरक्ख-  
 देवसाहस्सीणं सोलस पउमसाहस्सीओ पण्णत्ताओ, से णं तीहिं पउमपरिक्खेवेहिं  
 सव्वओ समंता संपरिक्खित्ते, तं०-अब्भितरएणं मज्झिमएणं बाहिरएणं, अब्भितरए  
 पउमपरिक्खेवे वत्तीसं पउमसयसाहस्सीओ पण्णत्ताओ मज्झिमए पउमपरिक्खेवे  
 चत्तालीसं पउमसयसाहस्सीओ पण्णत्ताओ बाहिरए पउमपरिक्खेवे अडयालीसं पउम-  
 सयसाहस्सीओ पण्णत्ताओ, एवामेव सपुव्वावरेणं तिहिं पउमपरिक्खेवेहिं एगा  
 पउमक्रोडी वीसं च पउमसयसाहस्सीओ भवन्तीति मक्खायं । से केणट्ठेणं भंते ! एवं  
 वुच्चइ-पउमद्दे २ ? गोयमा ! पउमद्दे णं० तत्थ २ देसे २ तहिं २ बहवे उप्पलाइं  
 जाव सयसहस्सपत्ताइं पउमद्दहप्पभाई पउमद्दहवण्णाभाई सिरी य इत्थ देवी महिङ्गिया  
 जाव पल्लिओवमट्ठिइया परिवसइ, से एएणट्ठेणं जाव अदुत्तरं च णं गोयमा !  
 पउमद्दहस्स सासए णामवेज्जे पण्णत्ते ण कयाइ णासि ण० ॥ ७३ ॥ तस्स  
 णं पउमद्दहस्स पुरत्थिमिद्धेणं तोरणेणं गंगा महाणइ पव्वा समाणी पुरत्था-  
 भिसुही पच्च जोयणसयाइं पव्वएणं गंता गंगावत्तणकूडे आवत्ता समाणी पच्च तेवीसे  
 जोयणसए तिण्णि य एगूणवीसइभाए जोयणस्स दाहिणाभिसुही पव्वएणं गंता  
 महया षडमुहपवित्तिएणं मुत्तावलिहारसंठिएणं साइरेगजोयणसइएणं पवाएणं पवडइ,  
 गंगा महाणइ जओ पवडइ इत्थ णं महं एगा जिट्ठिमया पण्णत्ता, सा णं जिट्ठिमया  
 अद्धजोयणं आयामेणं छ सकोसाइं जोयणाइं विक्खंभेणं अद्धकोसं बाहलेणं मगर-  
 मुहविउट्ठसंठाणसंठिया सव्ववइरामई अच्छा सण्हा, गंगा महाणइ जत्थ पवडइ एत्थ  
 णं महं एगे गंगप्पवायकुंडे णामं कुंडे पण्णत्ते सट्ठि जोयणाइं आयामविक्खंभेणं  
 णउयं जोयणसयं किञ्चिविसेसाहियं परिक्खेवेणं दस जोयणाइं उव्वेहेणं अच्छे सण्हे  
 रययामयकूले समतीरे वइरामयपासाणे वइरतले सुवण्णसुब्भरययामयवाळुयाए वेर-  
 लियमणिफालियपडलपच्चोयडे सुहोयारे सुहोतारे णाणामणितित्थसुव्वदे वेडे अणुपुव्व-  
 सुजायवप्पगंभीरसीयलजले संछणपत्तमिसमुणाले बहुउप्पलकुमुयणलिणसुभग-  
 सोगंधियपोंडरीयमहापोंडरीयसयपत्तसहस्सपत्तसयसहस्सपत्तपप्फुल्लकैसरोवचिए छप्प-  
 यमहुयरपरिभुजमाणकमले अच्छविमलपत्थसलिले पुण्णे पडिहत्थममन्तमच्छकच्छ-  
 भअणेगसउणगणमिहुणपवियरियसहुण्णइयमहुरसरणाइए पासाईए० । से णं एगाए  
 पउमवरवेइयाए एगेण य वणसण्डेणं सव्वओ समंता संपरिक्खित्ते वेइयावणसंडगाणं  
 पउमाणं वण्णओ भाणियव्वो, तस्स णं गंगप्पवायकुंडस्स तिदिसिं तओ तिसोवाण-  
 पडिह्वगा प०, तंजहा-पुरत्थिमेणं दाहिणेणं पच्चत्थिमेणं, तेसि णं तिसोवाणपडि-

रुवगाणं अयमेयारुवे वण्णावासे पण्णत्ते, तंजहा-वइरामया गेम्मा रिद्धामया पडट्ठाणा वैरुल्लियामया खंभा सुवण्णरुप्पमया फलया लोहियक्खमईओ सईओ वयरामया संघी णाणामणिमया आलंबणा आलंबणबाहाओत्ति, तेसि णं तिसोवाणपडिरुवगाणं पुरओ पत्तेयं पत्तेयं तोरणा पण्णत्ता, ते णं तोरणा णाणामणिमया णाणामणिमएसु खंमेसु उवणिविट्ठसंणिविट्ठा विविहमुत्तंतरोवचिया विविहताराखुवोवचिया ईहामियउसहतुर-गणरमगरविहगवालगकिण्णररुल्लसरभचमरकुंजरवणलयपउमलयभत्तिचित्ता खंमुगय-वइरवेइयापरिगयाभिरामा विज्जाहरजमलजुयलजंतजुत्ताविव अच्चीसहस्समालणीया रुवगसहस्सकलिया भिसंमाणा भिब्भिसंमाणा चक्खुल्लोयणलेसा सुहफासा सस्सिसी-यरूवा घंटावल्लिचलियमहुरमणहरसरा पासाईया०, तेसि णं तोरणाणं उवरिं बहवे अट्ठट्ठमंगला प०, तं०-सोत्थिए सिरिवच्छे जाव पडिरूवा, तेसि णं तोरणाणं उवरिं बहवे किण्हचामरज्झया जाव सुक्खिल्लचामरज्झया अच्छा सण्हा रुपपट्ठा वइरामयदण्डा जलयामलगंधिया सुरम्मा पासाईया ४, तेसि णं तोरणाणं उप्पि बहवे छत्ताइच्छत्ता पडागाइपडागा घंटाजुयला चामरजुयला उप्पलहत्थगा पउमहत्थगा जाव सय-सहस्सपत्तहत्थगा सव्वरयणामया अच्छा जाव पडिरूवा, तस्स णं गंगप्पवायकुंडस्स बहुमज्झदेसभाए एत्थ णं महं एगे गंगादीवे णामं दीवे पण्णत्ते अट्ठ जोयणाई आयामविक्खंमेणं साइरेगाई पणवीसं जोयणाई परिवक्खेवेणं दो कोसे ऊसिए जलंताओ सव्ववयरामए अच्छे सण्हे०, से णं एगाए पउमवरवेइयाए एगेण य वणसंडेणं सव्वओ समंता संपरिक्खत्ते वण्णओ भाणियव्वो, गंगादीवस्स णं दीवस्स उप्पि बहुसमरमणिजे भूमिभागे पण्णत्ते, तस्स णं बहुमज्झदेसभाए एत्थ णं महं गंगाए देवीए एगे भवणे पण्णत्ते कोसं आयामेणं अद्धकोसं विक्खंमेणं देसूणं च कोसं उट्ठं उच्चत्तेणं अणेगखंभसयसण्णिविट्ठे जाव बहुमज्झदेसभाए मणिपेडियाए सयणिजे, से केणट्ठेणं जाव सासए णामधेजे पण्णत्ते, तस्स णं गंगप्पवायकुंडस्स दक्खिणिक्खेणं तोरणेणं गंगामहाणई पवूडा समाणी उत्तरङ्गमरहवासं एजेमाणी २ सत्ताहिं सल्लिासहस्सेहिं आऊरेमाणी २ अहे खण्डप्पवायगुहाए वेयङ्गुपव्वयं दालइत्ता दाहिणङ्गमरहवासं एजेमाणी २ दाहिणङ्गमरहवासस्स बहुमज्झ-देसभागं गंता पुरत्थाभिमुही आवत्ता समाणी चोइसहिं सल्लिासहस्सेहिं समग्गा अहे जगइं दालइत्ता पुरत्थिमेणं लवणसमुदं समप्पेइ, गंगा णं महाणई पवहे छ सकोसाई जोयणाई विक्खंमेणं अद्धकोसं उव्वेहेणं तयणंतरे च णं मायाए २ परिवङ्गमाणी २ मुहे बासट्ठिं जोयणाई अद्धजोयणं च विक्खंमेणं सकोसं जोयणं उव्वेहेणं उभओ पासिं दोहिं पउमवरवेइयाहिं दोहिं वणसंडेहिं

संपरिक्खत्ता वेइयावणसंडवण्णओ भाणियव्वो, एवं सिंधूएवि णेयव्वं जाव तस्स णं पउमइहस्स पच्चत्थिमिल्लेणं तोरणेणं सिंधुआवत्तणकूडे दाहिणाभिमुही सिंधुपवा-  
यकुंडं सिंधुदीवो अट्ठो सो चेव जाव अहेतिमिसगुहाए वेयङ्गुपव्वयं दालइत्ता  
पच्चत्थिमाभिमुही आवत्ता समाणा चोइससल्लिा अहे जगइं पच्चत्थिमेणं लवणसमुइं  
जाव समप्पेइ, सेसं तं चेव । तस्स णं पउमइहस्स उत्तरिल्लेणं तोरणेणं रोहिंयसा  
महाणइं पवूढा समाणी दोण्णि छावत्तरे जोयणसए छच्च एगुणवीसइभाए जोयणस्स  
उत्तराभिमुही पव्वएणं गंता महया घडमुहपवित्तिएणं सुत्तावल्लिहारसंठिएणं साइरेग-  
जोयणसइएणं पवाएणं पवडइ, रोहिंयसा णामं महाणइं जओ पवडइ एत्थ णं महं  
एगा जिब्भिया पण्णत्ता, सा णं जिब्भिया जोयणं आयामेणं अद्धतेरसजोयणाइं  
विक्खंभेणं कोसं वाहल्लेणं मगरमुहविउट्ठसंठाणसंठिया सव्ववइरामइं अच्छा०, रोहि-  
यंसा महाणइं जहिं पवडइ एत्थ णं महं एगे रोहिंयसापवायकुण्डे णामं कुण्डे पण्णत्ते  
सवीसं जोयणसयं आयामविक्खंभेणं तिण्णि असीए जोयणसए किंचिविसेसूणे  
परिक्खेवेणं दसजोयणाइं उव्वेहेणं अच्छे कुंडवण्णओ जाव तोरणा, तस्स णं  
रोहिंयसापवायकुंडस्स बहुमज्जदेसभाए एत्थ णं महं एगे रोहिंयसा णामं दीवे  
पण्णत्ते सोलस जोयणाइं आयामविक्खंभेणं साइरेगाइं पण्णासं जोयणाइं परिक्खेवेणं  
दो कोसे ऊसिए जलंताओ सव्वरयणामए अच्छे सण्हे सेसं तं चेव जाव भवणं अट्ठो  
य भाणियव्वो, तस्स णं रोहिंयसप्पवायकुंडस्स उत्तरिल्लेणं तोरणेणं रोहिंयसा महाणइं  
पवूढा समाणी हेमवयं वासं एजेमाणी २ चउइसहिं सल्लिासहस्सेहिं आपूरेमाणी २  
सद्दावइवट्टेयङ्गुपव्वयं अद्धजोयणेणं असंपत्ता समाणी पच्चत्थाभिमुही आवत्ता  
समाणी हेमवयं वासं दुहा विभयमाणी २ अट्ठावीसाए सल्लिासहस्सेहिं समग्गा  
अहे जगइं दालइत्ता पच्चत्थिमेणं लवणसमुइं समप्पेइ, रोहिंयसा णं० पवहे अद्धतेर-  
सजोयणाइं विक्खंभेणं कोसं उव्वेहेणं तयणंतरं च णं मायाए २ परिवट्ठमाणी २  
मुहमूले पणवीसं जोयणसयं विक्खंभेणं अट्ठाइज्जाइं जोयणाइं उव्वेहेणं उभओ पासिं  
दोहिं पउमवरवेइयाहिं दोहिं य वणसंडेहिं संपरिक्खत्ता ॥ ७४ ॥ चुल्लहिमवन्ते  
णं भन्ते ! वासहरपव्वए कइ कूडा ५० ? गोयसा ! इक्कारस कूडा ५०, तं०-  
सिद्धकूडे १ चुल्लहिमवन्तकूडे २ भरहकूडे ३ इलादेवीकूडे ४ गंगादेवीकूडे ५  
सिरिकूडे ६ रोहिंयसकूडे ७ सिन्धुदेवीकूडे ८ सुरदेवीकूडे ९ हेमवयकूडे १०  
वेसमणकूडे ११ । कहिं णं भन्ते ! चुल्लहिमवन्ते वासहरपव्वए सिद्धकूडे णामं कूडे  
५० ? गोयसा ! पुरच्छिमलवणसमुहस्स पच्चत्थिमेणं चुल्लहिमवन्तकूडस्स पुरत्थिमेणं  
एत्थ णं सिद्धकूडे णामं कूडे पण्णत्ते पंच जोयणसयाइं उट्ठं उच्चत्तेणं मूले पंच जोय-

णसयाइं विक्खंभेणं मज्झे तिण्णि य पण्णत्तरे जोयणसए विक्खंभेणं उप्पि अट्ठाइजे जोयणसए विक्खंभेणं मूले एगं जोयणसहस्सं पंच य एगासीए जोयणसए किंचि-  
विसेसाहिए परिकखेवेणं मज्झे एगं जोयणसहस्सं एगं च छलसीयं जोयणसयं किंचि-  
विसेसणं परिकखेवेणं उप्पि सत्तइक्काणउए जोयणसए किंचिविसेसूणे परिकखेवेणं, मूले  
विच्छिण्णे मज्झे संखित्ते उप्पि तणुए गोपुच्छसंठाणसंठिए सव्वरयणामए अच्छे०, से  
णं एगाए पउमवरवेइयाए एगेण य वणसंडेणं सव्वओ समंता संपरिक्खित्ते, सिद्धस्स  
कूडस्स णं उप्पि बहुसमरमणिजे भूमिभागे पण्णत्ते जाव विहरंति । कहि णं भन्ते !  
चुल्लहिमवन्ते वासहरपव्वए चुल्लहिमवन्तकूडे णामं कूडे पण्णत्ते ? गो० । भरहकूडस्स  
पुरत्थिमेणं सिद्धकूडस्स पच्चत्थिमेणं एत्थ णं चुल्लहिमवन्ते वासहरपव्वए चुल्लहिमवन्त-  
कूडे णामं कूडे पण्णत्ते, एवं जो चेव सिद्धकूडस्स उच्चत्तविक्खंभपरिकखेवो जाव व० भू०  
प० वण्णओ, तस्स णं बहुसमरमणिजस्स भूमिभागस्स बहुमज्झदेसमाए एत्थ णं महं  
एगे पासायवडेंसए पण्णत्ते वासट्ठि जोयणाइं अद्धजोयणं च उच्चत्तेणं इक्कतीसं जोयणाइं  
कोसं च विक्खंभेणं अब्भुगगयमूसियपहसिए विव विविहमणिरयणमत्तिचित्ते वाउद्धुय-  
विजयवेजयंतीपडागच्छताइच्छत्तकलिए तुंगे गगणतलमभिलंघमाणसिहरे जालंतररय-  
णपंजरुमीलिएव्व मणिरयणथूमियाए वियसियसयवत्तपुंडरीयत्तिलयरयणद्धचंदचित्ते  
णाणामणिमयदामालंकिए अंतो बहिं च सण्हे वइरतवणिजस्सलवालुयापत्थडे सुहफासे  
सस्सिरीयरूवे पासाइए जाव पडिरूवे, तस्स णं पासायवडेंसगस्स अंतो बहुसमरमणिजे  
भूमिभागे प० जाव सीहासणं सपरिवारं, से केणट्ठेणं भन्ते ! एवं तुच्चइ-चुल्लहिमवन्त-  
कूडे २ ? गो० !... चुल्लहिमवन्ते णामं देवे महिद्धिए जाव परिवसइ, कहि णं भन्ते !  
चुल्लहिमवन्तगिरिकुमारस्स देवस्स चुल्लहिमवन्ता णामं रायहाणी प० ? गो० ! चुल्ल-  
हिमवन्तकूडस्स दक्खिणेणं तिरियमसंखेजे दीवसमुद्धे वीईवइत्ता अयणं जम्बुद्वीवं २  
दक्खिणेणं बारस जोयणसहस्साइं ओगाहिता इत्थ णं चुल्लहिमवन्तस्स गिरिकुमारस्स  
देवस्स चुल्लहिमवन्ता णामं रायहाणी प० बारस जोयणसहस्साइं आयामविक्खं-  
भेणं, एवं विजयरायहाणीसरिसा भाणियव्वा,... एवं अवसेसाणवि कूडाणं वत्तव्वया  
णेयव्वा, आयामविक्खंभपरिकखेवपासायदेवयाओ सीहासणपरिवारो अट्ठो य देवाण  
य देवीण य रायहाणीओ णेयव्वाओ, चउसु देवा चुल्लहिमवन्त १ भरह २ हेमवय ३  
वेसमणकूडेसु ४, सेसेसु देवयाओ, से केणट्ठेणं भन्ते ! एवं तुच्चइ-चुल्लहिमवन्ते  
वासहपव्वए २ ? गो० !... महाहिमवन्तवासहरपव्वयं पणिहाय आयामुच्चतुव्वे-  
हविक्खंभपरिकखेवं पडुच्च ईसिं खुडतराए चेव हस्सतराए चेव णीयतराए चेव,  
चुल्लहिमवन्ते य इत्थ देवे महिद्धिए जाव पल्लिओवमट्ठिए परिवसइ, से एएणट्ठेणं



गो० ! एवं वुच्चइ—चुल्लहिमवन्ते वासहरपव्वए २, अदुत्तरं च णं गो० ! चुल्लहि-  
मवन्तस्स० सासए णामधेजे पण्णत्ते जं ण कयाइ णासि० ॥ ७५ ॥ कहि णं भन्ते !  
जंबुद्वीवे दीवे हेमवए णामं वासे प० ? गो० ! महाहिमवन्तस्स वासहरपव्वयस्स  
दक्खिणेणं चुल्लहिमवन्तस्स वासहरपव्वयस्स उत्तरेणं पुरत्थिमलवणसमुद्दस्स पच्च  
त्थिमेणं पच्चत्थिमलवणसमुद्दस्स पुरत्थिमेणं एत्थ णं जंबुद्वीवे दीवे हेमवए णामं  
वासे पण्णत्ते, पाईणपडीणायए उदीणदाहिणविच्छिण्णे पलियंकसंठाणसंठिए दुहा  
लवणसमुद्दं पुट्ठे पुरत्थिमिळाए कोडीए पुरत्थिमिळं लवणसमुद्दं पुट्ठे पच्चत्थि-  
मिळाए कोडीए पच्चत्थिमिळं लवणसमुद्दं पुट्ठे दोणिं जोयणसहस्साइ एगं च  
पंचुत्तरं जोयणसयं पंच य एगूणवीसइभाए जोयणस्स विक्खंभेणं, तस्स बाहा  
पुरत्थिमपच्चत्थिमेणं छज्जोयणसहस्साइ सत्त य पणपण्णे जोयणसए तिण्णि य  
एगूणवीसइभाए जोयणस्स आयामेणं, तस्स जीवा उत्तरेणं पाईणपडीणायया दुहओ  
लवणसमुद्दं पुट्ठा पुरत्थिमिळाए कोडीए पुरत्थिमिळं लवणसमुद्दं पुट्ठा पच्चत्थिमिळाए  
जाव पुट्ठा सत्ततीसं जोयणसहस्साइ छच्च चउवत्तरे जोयणसए सोलस य एगूणवीस-  
इभाए जोयणस्स किंचिविसेसुणे आयामेणं, तस्स धणुं दाहिणेणं अट्ठतीसं जोयण-  
सहस्साइ सत्त य चत्ताले जोयणसए दस य एगूणवीसइभाए जोयणस्स परिवक्खेवेणं,  
हेमवयस्स णं भन्ते ! वासस्स केरिसए आयारभावपडोयारे पण्णत्ते ? गो० ! बहुसमर-  
मणिज्जे भूमिभागे पण्णत्ते, एवं तइयसमाणुभावो गेयव्वोत्ति ॥ ७६ ॥ कहि णं भन्ते !  
हेमवए वासे सद्दावई णामं वट्ठवेयडूपव्वए पण्णत्ते ? गोयमा ! रोहियाए महाणईए  
पच्चच्छिमेणं रोहियंसाए महाणईए पुरत्थिमेणं हेमवयवासस्स बहुमज्झदेसभाए  
एत्थ णं सद्दावई णामं वट्ठवेयडूपव्वए पण्णत्ते एगं जोयणसहस्सं उड्डं उच्चत्तेणं  
अड्डाइज्जाइ जोयणसयाइ उव्वेहेणं सव्वत्थसमे पल्लगसंठाणसंठिए एगं जोयणसहस्सं  
आयामविक्खंभेणं तिण्णि जोयणसहस्साइ एगं च वावट्ठं जोयणसयं किंचिविसेसा-  
हियं परिवक्खेवेणं पण्णत्ते, सव्वरयणामए अच्छे०, से णं एगाए पडमवरवेइयाए  
एगेण य वणसंडेणं सव्वओ समंता संपरिक्खित्ते, वेइयावणसंडवणओ भाणियव्वो,  
सद्दावइस्स णं वट्ठवेयडूपव्वयस्स उवरिं बहुसमरमणिज्जे भूमिभागे पण्णत्ते, तस्स णं  
बहुसमरमणिज्जस्स भूमिभागस्स बहुमज्झदेसभाए एत्थ णं महं एगे पासायवडेंसए  
पण्णत्ते वावट्ठिं जोयणाइ अद्वजोयणं च उड्डं उच्चत्तेणं इक्कतीसं जोयणाइ कोसं च  
आयामविक्खंभेणं जाव सीहासणं सपरिवारं, से केणट्ठेणं भंते ! एवं वुच्चइ—सद्दावई  
वट्ठवेयडूपव्वए २ ? गोयमा ! सद्दावइवट्ठवेयडूपव्वए णं खुड्डाखुड्डियासु वावीसु जाव  
बिलपंतियासु बहवे उप्पलाइं पडमाइं सद्दावइप्पमाइं सद्दावइवण्णाइं सद्दावइवण्णाभाइं

सद्वावई य इत्थ देवे महिङ्गिए जाव महाणभावे पलिओवमट्ठिइए परिवसइ, से णं तत्थ चउण्हं सामाणियसाहस्सीणं जाव रायहाणी मंदरस्स पव्वयस्स दाहिणेणं अण्णंमि जम्बुद्दीवे दीवे० ॥ ७७ ॥ से केणट्ठेणं भन्ते ! एवं वुच्चइ-हेमवए वासे २ ? गोयमा ! ... चुळ्हिमवन्तमहाहिमवन्तेहिं वासहरपव्वएहिं दुहओ समवगूढे णिच्चं हेमं दलइ णिच्चं हेमं दलइत्ता णिच्चं हेमं पगासइ हेमवए य इत्थ देवे महिङ्गिए० पलिओवमट्ठिइए परिवसइ, से तेणट्ठेणं गोयमा ! एवं वुच्चइ-हेमवए वासे हेमवए वासे ॥ ७८ ॥ कहि णं भन्ते ! जम्बुद्दीवे २ महाहिमवन्ते णामं वासहरपव्वए प० ? गो० ! हरि-वासस्स दाहिणेणं हेमवयस्स वासस्स उत्तरेणं पुरत्थिमलवणसमुदस्स पच्चत्थिमेणं पच्चत्थिमलवणसमुदस्स पुरत्थिमेणं एत्थ णं जम्बुद्दीवे दीवे महाहिमवन्ते णामं वासहरपव्वए पण्णत्ते, पाईणपडीणायए उदीणदाहिणविच्छिण्णे पलियंकसंठाणसंठिए दुहा लवणसमुदं पुट्ठे पुरत्थिमिळ्हाए कोडीए जाव पुट्ठे पच्चत्थिमिळ्हाए कोडीए पच्चत्थिमिळ्हे लवणसमुदं पुट्ठे दो जोयणसयाई उच्चं उच्चत्तेणं पण्णासं जोयणाई उव्वेहेणं चत्तारि जोयणसहस्साई दोण्णि य दसुत्तरे जोयणसए दस य एगूणवीसइभाए जोयणस्स विक्खंमेणं, तस्स बाहा पुरत्थिमपच्चत्थिमेणं णव जोयणसहस्साई दोण्णि य छावत्तरे जोयणसए णव य एगूणवीसइभाए जोयणस्स अद्धभागं च आयामेणं, तस्स जीवा उत्तरेणं पाईणपडीणायया दुहा लवणसमुदं पुट्ठा पुरत्थिमिळ्हाए कोडीए पुरत्थिमिळ्हे लवणसमुदं पुट्ठा पच्चत्थिमिळ्हाए जाव पुट्ठा तेवण्णं जोयणसहस्साई णव य एगतीसे जोयणसए छच्च एगूणवीसइभाए जोयणस्स किंचिविसेसाहिए आयामेणं, तस्स धणुं दाहिणेणं सत्तावण्णं जोयणसहस्साई दोण्णि य तेणउए जोयणसए दस य एगूणवीसइभाए जोयणस्स परिक्खेवेणं, रुयगसंठाणसंठिए सव्वरयणामए अच्छे० उभओ पासिं दोहिं पउमवरवेइयाहिं दोहि य वणसंडेहिं संपरिकिखत्ते । महाहिमवन्तस्स णं वासहरपव्वयस्स उप्पि बहुसमरमणिजे भूमिभागे पण्णत्ते जाव णाणाविहपञ्चवण्णेहिं मणीहि य तणेहि य उवसोमिए जाव आसयंति सयंति य ॥ ७९ ॥ महाहिमवन्तस्स णं० बहुमज्झदेसभाए एत्थ णं एगे महापउमद्दहे णामं दहे पण्णत्ते दो जोयणसहस्साई आयामेणं एणं जोयणसहस्सं विक्खंमेणं दस जोयणाई उव्वेहेणं अच्छे० रययामयकूले एवं आयामविक्खंभविट्ठणा जा चेव पउमद्दहस्स वत्तव्वया सा चेव णेयव्वा, पउमप्पमाणं दो जोयणाई अट्ठो जाव महापउमद्दहवण्णाभाई हिरी य इत्थ देवी जाव पलिओवमट्ठिइया परिवसइ, से एणट्ठेणं गोयमा ! एवं वुच्चइ०, अदुत्तरं च णं गोयमा ! महापउमद्दहस्स सासए णामधेजे प० जं ण कयाइ णासी ३ ... , तस्स णं महापउमद्दहस्स दक्खिणिल्लेणं तोरणेणं रोहिया महाणई पवूढा समाणी सोलस

पंचुत्तरे जोयणसए पंच य एगूणवीसइभाए जोयणस्स दाहिणाभिमुही पव्वएणं गंता  
महया घडमुहपवित्तिएणं मुत्तावल्लिहारसंठिएणं साइरेगदोजोयणसइएणं पवाएणं पवडइ,  
रोहिया णं महानइ जओ पवडइ एत्थ णं महं एगा जिब्बिया प०, सा णं जिब्बिया  
जोयणं आयामेणं अद्धतेरसजोयणाइं विक्खंभेणं कोसं बाहल्लेणं मगरमुहविउट्टसंठा-  
णसंठिया सव्ववइरामइ अच्छा०, रोहिया णं महानइ जहिं पवडइ एत्थ णं महं एगे  
रोहियप्पवायकुंडे णामं कुंडे प० सवीसं जोयणसयं आयामविक्खंभेणं पणत्तं तिण्णि  
असीए जोयणसए किंचिविसेसूणे परिकखेवेणं दस जोयणाइं उव्वेहेणं अच्छे सण्हे  
सो चेव वण्णओ वइरतले वट्टे समतीरे जाव तोरणा, तस्स णं रोहियप्पवायकुण्डस्स  
बहुमज्झदेसभाए एत्थ णं महं एगे रोहियदीवे णामं दीवे पणत्ते सोलस जोयणाइं  
आयामविक्खंभेणं साइरेगाइं पण्णासं जोयणाइं परिकखेवेणं दो कोसे ऊसिए जलं-  
ताओ सव्ववइरामए अच्छे०, से णं एगाए पउमवरवेइयाए एगेण य वणसंडेणं  
सव्वओ समंता संपरिकिखत्ते, रोहियदीवस्स णं दीवस्स उप्पि बहुसमरमणिजे भूमि-  
भागे पणत्ते, तस्स णं बहुसमरमणिजस्स भूमिभागस्स बहुमज्झदेसभाए एत्थ णं  
महं एगे भवणे पणत्ते कोसं आयामेणं सेसं तं चेव पमाणं च अट्ठो य भाणियव्वो ।  
तस्स णं रोहियप्पवायकुण्डस्स दक्खिणिल्लेणं तोरणेणं रोहिया महानइ पव्वा समाणी  
हेमवयं वासं एजेमाणी २ सहावइं वट्टवेयड्डपव्वयं अद्धजोयणेणं असंपत्ता पुरत्थाभि-  
मुही आवत्ता समाणी हेमवयं वासं दुहा विभयमाणी २ अट्ठावीसाए सल्लिसहस्सेहिं  
समग्गा अहे जगइं दालइत्ता पुरत्थिमेणं लवणसमुइं समप्पेइ, रोहिया णं० जहा  
रोहियंता तहा पवाहे य सुहे य भाणियव्वा जाव संपरिकिखत्ता । तस्स णं  
महापउमद्दहस्स उत्तरिल्लेणं तोरणेणं हरिकंता महानइ पव्वा समाणी सोलस  
पंचुत्तरे जोयणसए पंच य एगूणवीसइभाए जोयणस्स उत्तराभिमुही पव्वएणं गंता  
महया घडमुहपवित्तिएणं मुत्तावल्लिहारसंठिएणं साइरेगदुजोयणसइएणं पवाएणं  
पवडइ, हरिकंता णं महानइ जओ पवडइ एत्थ णं महं एगा जिब्बिया प० दो  
जोयणाइं आयामेणं पणवीसं जोयणाइं विक्खंभेणं अद्धं जोयणं बाहल्लेणं मगरमुह-  
विउट्टसंठाणसंठिया सव्वरयणामइ अच्छा०, हरिकंता णं महानइ जहिं पवडइ एत्थ  
णं महं एगे हरिकंतप्पवायकुंडे णामं कुंडे पणत्ते दोण्णि य चत्ताले जोयणसए आया-  
मविक्खंभेणं सत्तअउणट्टे जोयणसए परिकखेवेणं अच्छे एवं कुण्डवत्तव्वया सव्वा  
णेयव्वा जाव तोरणा, तस्स णं हरिकंतप्पवायकुण्डस्स बहुमज्झदेसभाए एत्थ णं महं  
एगे हरिकंतदीवे णामं दीवे प० बत्तीसं जोयणाइं आयामविक्खंभेणं एगुत्तरं जोयण-  
सयं परिकखेवेणं दो कोसे ऊसिए जलंताओ सव्वरयणामए अच्छे०, से णं एगाए पउ-

मवरवेइयाए एगेण य वणसंडेणं जाव संपरिक्खित्ते वण्णओ भाणियव्वोत्ति, पमाणं च सयणिजं च अट्ठो य भाणियव्वो । तस्स णं हरिकंतप्पवायकुण्डस्स उत्तरिल्लेणं तोरणेणं जाव पव्वा समाणी हरिवस्सं वासं एज्जेमाणी २ वियडावइं वट्ठेयइं जोगेणं असं-  
पत्ता पच्चत्थाभिमुही आवत्ता समाणी हरिवासं दुहा विभयमाणी २ छप्पण्णाए सलि-  
लासहस्सेहिं समग्गा अहे जगइं दालइत्ता पच्चत्थिमेणं लवणसमुदं समप्पेइ, हरिकंता  
णं महाणइं पवहे पणवीसं जोगणाइं विक्खम्भेणं अद्धजोगयं उव्वेहेणं तयणंतरे च णं  
मायाए २ परिवड्ढमाणी २ मुहमूले अड्ढाज्जाइं जोगणसयाइं विक्खम्भेणं पच्च जोग-  
णाइं उव्वेहेणं, उभओ पासि दोहिं पउमवरवेइयाहिं दोहि य वणसंडेहिं संपरिक्खित्ता  
॥ ८० ॥ महाहिमवन्ते णं भन्ते ! वासहरपव्वए कइ कूडा प० ? गो० ! अट्ठ कूडा प०,  
तं०-सिद्धकूडे १ महाहिमवन्तकूडे २ हेमवयकूडे ३ रोहियकूडे ४ हिरिकूडे ५ हरि-  
कंतकूडे ६ हरिवासकूडे ७ वेसलियकूडे ८, एवं चुल्लहिमवंतकूडाणं जा चेव वत्तव्वया  
सच्चेव णेयव्वा, से केणट्ठेणं भन्ते ! एवं वुच्चइ-महाहिमवंते वासहरपव्वए २ ?  
गोयमा ! महाहिमवंते णं वासहरपव्वए चुल्लहिमवंतं वासहरपव्वयं पणिहाय आया-  
मुच्चतुव्वेहविक्खम्भपरिक्खेवेणं महंततराए चेव वीहतराए चेव, महाहिमवंते य  
इत्थ देवे महिड्डिए जाव पलिओवमट्ठिए परिवसइ ...॥ ८१ ॥ कहिं णं भन्ते !  
जम्बुदीवे दीवे हरिवासे णामं वासे प० ? गो० ! णिसहस्स वासहरपव्वयस्स  
दक्खिणेणं महाहिमवन्तवासहरपव्वयस्स उत्तरेणं पुरत्थिमलवणसमुद्दस्स पच्चत्थिमेणं  
पच्चत्थिमलवणसमुद्दस्स पुरत्थिमेणं एत्थ णं जम्बुदीवे २ हरिवासे णामं वासे  
पण्णत्ते एवं जाव पच्चत्थिमिल्लाए कोडीए पच्चत्थिमिल्लं लवणसमुदं पुट्ठे अट्ठ जोगण-  
सहस्साइं चत्तारि य एगवीसे जोगणसए एगं च एगूणवीसइभागं जोगणस्स  
विक्खम्भेणं, तस्स बाहा पुरत्थिमपच्चत्थिमेणं तेरस्स जोगणसहस्साइं तिण्णि य एग-  
सट्ठे जोगणसए छच्च एगूणवीसइभाए जोगणस्स अद्धभागं च आयामेणंति, तस्स जीवा  
उत्तरेणं पाईणपडीणायया दुहा लवणसमुदं पुट्ठा पुरत्थिमिल्लाए कोडीए पुरत्थिमिल्लं  
जाव लवणसमुदं पुट्ठा तेवत्तरिं जोगणसहस्साइं णव य एगुत्तरे जोगणसए सत्तरस्स य  
एगूणवीसइभाए जोगणस्स अद्धभागं च आयामेणं, तस्स धणुं दाहिणेणं चउरासीइं  
जोगणसहस्साइं सोलस जोगणाइं चत्तारि एगूणवीसइभाए जोगणस्स परिक्खेवेणं ।  
हरिवासस्स णं भन्ते ! वासस्स केरिसए आगारभावपडोयारे प० ? गोयमा ! बहुसमर-  
मणिजे भूमिभागे पण्णत्ते जाव मणीहिं तणेहि य उव्वसोभिए एवं मणीणं तणाण य  
वण्णो गन्धो फासो सहो भाणियव्वो, हरिवासे णं० तत्थ २ देसे २ तहिं २ बहवे खुड्डा-  
खुड्डियाओ एवं जो सुसमाए अणुभावो सो चेव अपरिसेसो वत्तव्वो । कहिं णं भन्ते !

हरिवासे वासे वियडावई णां वट्टवेयडुपव्वए पण्णत्ते ? गो० ! हरीए महाणईए पच्चत्थि-  
मेणं हरिकंताए महाणईए पुरत्थिमेणं हरिवासस्स २ बहुमज्झदेसभाए एत्थ णं  
वियडावई णां वट्टवेयडुपव्वए पण्णत्ते, एवं जो चेव सद्दावइस्स विक्खंभुच्चतुव्वेह-  
परिक्खेवसंठाण वण्णावासो य सो चेव वियडावइस्सवि भाणियव्वो, णवरं अरुणो  
देवो पउमाई जाव वियडावइवण्णाभाई अरुणे य इत्थ देवे महिद्धिए एवं जाव दाहि-  
णेणं रायहाणी णेयव्वा, से केणट्ठेणं भन्ते ! एवं वुच्चइ-हरिवासे हरिवासे ? गोयमा !  
हरिवासे णं वासे मणुया अरुणा अरुणोभासा सेया णं संखदलसण्णिगासा हरिवासे  
य इत्थ देवे महिद्धिए जाव पलिओवमट्ठिइए परिवसइ, से तेणट्ठेणं गोयमा ! एवं वुच्चइ...  
॥ ८२ ॥ कट्ठि णं भन्ते ! जम्बुद्वीवे २ णिसहे णां वासहरपव्वए पण्णत्ते ? गोयमा !  
महाविदेहस्स वासस्स दक्खिणेणं हरिवासस्स उत्तरेणं पुरत्थिमलवणसमुद्दस्स पच्च-  
त्थिमेणं पच्चत्थिमलवणसमुद्दस्स पुरत्थिमेणं एत्थ णं जम्बुद्वीवे द्वीवे णिसहे णां  
वासहरपव्वए पण्णत्ते, पाईणपडीणायए उदीणदाहिणविच्छिण्णे दुहा लवणसमुद्दं पुट्ठे  
पुरत्थिमिच्छाए जाव पुट्ठे पच्चत्थिमिच्छाए जाव पुट्ठे चत्तारि जोयणसयाई उड्ढं उच्च-  
त्तेणं चत्तारि गाउयसयाई उव्वेहेणं सोलस जोयणसहस्साई अट्ठ य बायाले जोयण-  
सए दोण्णि य एगूणवीसइभाए जोयणस्स विक्खंभमेणं, तस्स बाहा पुरत्थिमपच्चत्थि-  
मेणं वीसं जोयणसहस्साई एगं च पणट्ठं जोयणसयं दुण्णि य एगूणवीसइभाए जोय-  
णस्स अट्ठभागं च आयामेणं, तस्स जीवा उत्तरेणं जाव चउणवइं जोयणसहस्साई  
एगं च छप्पणं जोयणसयं दुण्णि य एगूणवीसइभाए जोयणस्स आयामेणंति, तस्स  
धणुं दाहिणेणं एगं जोयणसयसहस्सं चउवीसं च जोयणसहस्साई तिण्णि य छायाले  
जोयणसए णव य एगूणवीसइभाए जोयणस्स परिक्खेवेणं रुयगसंठाणसंठिए सब्वतव-  
णिज्जमए अच्छे०, उभओ पासिं दोहिं पउमवरवेइयाहिं दोहि य वणसंडेहिं जाव संप-  
रिक्खत्ते, णिसहस्स णं वासहरपव्वयस्स उप्पि बहुसमरमणिज्जे भूमिभागे पण्णत्ते जाव  
आसयंति सयंति..., तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं  
महं एगे तिगिंछिइहे णां दहे पण्णत्ते, पाईणपडीणायए उदीणदाहिणविच्छिण्णे चत्तारि  
जोयणसहस्साई आयामेणं दो जोयणसहस्साई विक्खंभेणं दस जोयणाई उव्वेहेणं अच्छे  
सण्हे रययामयकूले०, तस्स णं तिगिंछिइहस्स चउदिसिं चत्तारि तिसोवाणपडिस्सुवा  
प० एवं जाव आयामविक्खंभविहूणा जा चेव महापउमइहस्स वत्तव्वया सा चेव तिगिं-  
छिइहस्सवि वत्तव्वया तं चेव पउमइहप्पमाणं अट्ठो जाव तिगिंछिवण्णाई, धिई य इत्थ  
देवी पलिओवमट्ठिइया परिवसइ, से तेणट्ठेणं गोयमा ! एवं वुच्चइ-तिगिंछिइहे तिगिंछिइहे  
॥ ८३ ॥ तस्स णं तिगिंछिइहस्स दक्खिणिज्जेणं तोरणेणं हरिमहाणई पव्वा समाणी सत्त

जोयणसहस्साई चत्तारि य एक्कवीसे जोयणसए एगं च एगूणवीसइभागं जोयणस्स दाहिणाभिमुही पव्वएणं गंता महया घडमुहपवित्तिएणं जाव साइरेगचउजोयण-सइएणं पवाएणं पवडइ, एवं जा चेव हरिकन्ताए वत्तववया सा चेव हरीएवि गेयव्वा, जिब्भियाए कुंडस्स दीवस्स भवणस्स तं चेव पमाणं अट्ठोऽवि भाणियव्वो जाव अहे जगइं दालइत्ता छप्पण्णाए सलिलासहस्सेहिं समग्गा पुरत्थिमं लवणसमुदं समप्पेइ, तं चेव पवहे य मुहमूले य पमाणं उव्वेहो य जो हरिकन्ताए जाव वण-संडसंपरिक्खत्ता, तस्स णं तिगिंछिद्वहस्स उत्तरिल्लेणं तोरणेणं सीओया महाणइं पवूढा समाणी सत्त जोयणसहस्साई चत्तारि य एगवीसे जोयणसए एगं च एगूण-वीसइभागं जोयणस्स उत्तराभिमुही पव्वएणं गंता महया घडमुहपवित्तिएणं जाव साइरेगचउजोयणसइएणं पवाएणं पवडइ, सीओया णं महाणइं जओ पवडइ एत्थ णं महं एगा जिब्भिया पणत्ता चत्तारि जोयणाईं आयामेणं पण्णासं जोयणाईं विक्खंभेणं जोयणं वाहल्लेणं मगरमुहविउट्ठसंठाणसंठिया सव्ववइरामई अच्छा०, सीओया णं महाणइं जहिं पवडइ एत्थ णं महं एगे सीओयप्पवायकुण्डे णामं कुण्डे पण्णत्ते चत्तारि असीए जोयणसए आयामविक्खंभेणं पण्णरसअट्ठारे जोयणसए किंचिविसेसूणे परिकखेवेणं अच्छे एवं कुंडवत्तववया गेयव्वा जाव तोरणा । तस्स णं सीओयप्पवायकुण्डस्स बहुमज्झदेसभाए एत्थ णं महं एगे सीओयदीवे णामं दीवे पण्णत्ते चउसट्ठिं जोयणाईं आयामविक्खंभेणं दोण्णि बिउत्तरे जोयणसए परिकखेवेणं दो कोसे ऊसिए जलंताओ सव्ववइरामए अच्छे सेसं तहेव वेइयावणसंडभूमिभाग-भवणसयणिज्जअट्ठो भाणियव्वो, तस्स णं सीओयप्पवायकुण्डस्स उत्तरिल्लेणं तोरणेणं सीओया महाणइं पवूढा समाणी देवकुरं एज्जेमाणी २ चित्तविचित्तकूडे पव्वए निसड-देवकुरसूरसुलसविज्जुप्पभदहे य दुहा विभयमाणी २ चउरासीए सलिलासहस्सेहिं आपूरेमाणी २ भइसालवणं एज्जेमाणी २ मंदरं पव्वयं दोहिं जोयणेहिं असंपत्ता पच्चत्थिमाभिमुही आवत्ता समाणी अहे विज्जुप्पभं वक्खारपव्वयं दारइत्ता मन्दरस्स पव्वयस्स पच्चत्थिमेणं अवरविदेहं वासं दुहा विभयमाणी २ एगमेगाओ चक्कवट्ठि-विजयाओ अट्ठावीसाए २ सलिलासहस्सेहिं आपूरेमाणी २ पच्चहिं सलिलासयसहस्सेहिं दुतीसाए य सलिलासहस्सेहिं समग्गा अहे जयंतस्स दारस्स जगइं दालइत्ता पच्चत्थिमेणं लवणसमुदं समप्पेइ, सीओया णं महाणइं पवहे पण्णासं जोयणाईं विक्खंभेणं जोयणं उव्वेहेणं, तयणंतरं च णं मायाए २ परिवड्ढमाणी २ मुहमूले पच्च जोयणसयाईं विक्खंभेणं दस जोयणाईं उव्वेहेणं उभओ पासिं दोहिं पउमवर-वेइयाहिं दोहि य वणसंडेहिं संपरिक्खत्ता । गिसडे णं भन्ते ! वासहरपव्वए

कइ कूडा पण्णत्ता ? गोयमा ! णव कूडा पण्णत्ता, तंजहा-सिद्धकूडे १ णिसदकूडे २ हरिवासकूडे ३ पुव्वविदेहकूडे ४ हरिकूडे ५ धिईकूडे ६ सीओयाकूडे ७ अवर-विदेहकूडे ८ रुयगकूडे ९ जो चेव चुल्लहिमवंतकूडाणं उच्चतविकखम्मपरिक्खेवो पुव्ववण्णिओ रायहाणी य सच्चेव इहंपि णेयव्वा, से केणट्ठेणं भन्ते ! एवं वुच्चइ-णिसहे वासहरपव्वए २ ? गोयमा ! णिसहे णं वासहरपव्वए बहवे कूडा णिसह-संठाणसंठिया उसभसंठाणसंठिया, णिसहे य इत्थ देवे महिद्धिए जाव पल्लोवम-ट्ठिए परिवसइ, से तेणट्ठेणं गोयमा ! एवं वुच्चइ-णिसहे वासहरपव्वए २...॥ ८४ ॥ कहि णं भन्ते ! जम्बुदीवे दीवे महाविदेहे णामं वासे पण्णत्ते ? गोयमा ! णील-वन्तस्स वासहरपव्वयस्स दक्खिणेणं णिसहस्स वासहरपव्वयस्स उत्तरेणं पुरत्थि-मलवणसमुद्दस्स पच्चत्थिमेणं पच्चत्थिमलवणसमुद्दस्स पुरत्थिमेणं एत्थ णं जम्बुदीवे २ महाविदेहे णामं वासे पण्णत्ते, पाईणपडीणायए उदीणदाहिणविच्छिण्णे पलियंक्-संठाणसंठिए दुहा लवणसमुदं पुट्ठे पुरत्थिम जाव पुट्ठे पच्चत्थिमिळाए कोडीए पच-त्थिमिळं जाव पुट्ठे तेत्तीसं जोयणसहस्साइं छच्च चुलसीए जोयणसए चत्तारि य एगूणवीसइभाए जोयणस्स विकखम्मभेणंति, तस्स बाहा पुरत्थिमपच्चत्थिमेणं तेत्तीसं जोयणसहस्साइं सत्त य सत्तसट्ठे जोयणसए सत्त य एगूणवीसइभाए जोयणस्स आयामेणंति, तस्स जीवा बहुमज्झदेसभाए पाईणपडीणायया दुहा लवणसमुदं पुट्ठा पुरत्थिमिळाए कोडीए पुरत्थिमिळं जाव पुट्ठा एवं पच्चत्थिमिळाए जाव पुट्ठा एगं जोयणसयसहस्सं आयामेणंति, तस्स धणं उभओ पासिं उत्तरदाहिणेणं एगं जोय-णसयसहस्सं अट्ठावणं जोयणसहस्साइं एगं च तेरसुत्तरं जोयणसयं सोलस य एगूण-वीसइभागे जोयणस्स किच्चिविसेसाहिए परिक्खेवेणंति, महाविदेहे णं वासे चउव्विहे चउप्पडोयारे पण्णत्ते, तंजहा-पुव्वविदेहे १ अवरविदेहे २ देवकुरा ३ उत्तरकुरा ४, महाविदेहस्स णं भन्ते ! वासस्स केरिसए आगारभावपडोयारे पण्णत्ते ? गोयमा ! बहुसमरमणिजे भूमिभागे पण्णत्ते जाव कितिमेहिं चेव अकितिमेहिं चेव । महाविदेहे णं भन्ते ! वासे मणुयाणं केरिसए आगारभावपडोयारे पण्णत्ते ? ० तेसि णं मणुयाणं छव्विहे संघयणे छव्विहे संठाणे पच्चधणुसयाइं उड्ढं उच्चत्तेणं जहण्णेणं अंतोमुहुत्तं उड्ढो-सेणं पुव्वकोडीआउयं पालेन्ति पालेत्ता अप्पेगइया णिरयगामी जाव अप्पेगइया सिज्झंति जाव अंतं करेन्ति । से केणट्ठेणं भन्ते ! एवं वुच्चइ-महाविदेहे वासे २ ? गोयमा ! महाविदेहे णं वासे भरहेरवयहेमवयहेरणवयहरिवासरम्मगावासेहिंतो आयामविकखम्मसंठाणपरिणाहेणं विच्छिण्णतराए चेव विपुलतराए चेव महंततराए चेव सुप्पमाणतराए चेव महाविदेहा य इत्थ मणूसा परिवसंति, महाविदेहे य इत्थ देवे

महिद्धिए जाव पलिओवमट्ठिए परिवसइ, से तेणट्ठेणं गोयमा ! एवं वुच्चइ-महा-  
विदेहे वासे २, अदुत्तरं च णं गोयमा ! महाविदेहस्स वासस्स सासए णामधेजे  
पण्णत्ते जं ण कयाइ णासि ३... ॥ ८५ ॥ कहि णं भन्ते ! महाविदेहे वासे गन्ध-  
मायणे णामं वक्खारपव्वए पण्णत्ते ? गोयमा ! णीलवन्तस्स वासहरपव्वयस्स  
दाहिणेणं मंदरस्स पव्वयस्स उत्तरपच्चत्थिमेणं गंधिलावइस्स विजयस्स पुरच्छिमेणं  
उत्तरकुराए पच्चत्थिमेणं एत्थ णं महाविदेहे वासे गन्धमायणे णामं वक्खारपव्वए  
पण्णत्ते, उत्तरदाहिणायए पाईणपडीणविच्छिण्णे तीसं जोयणसहस्साइं दुण्णि य  
णउत्तरे जोयणसए छच्च य एगूणवीसइभाए जोयणस्स आयामेणं णीलवंतवासहर-  
पव्वयंतेणं चत्तारि जोयणसयाइं उट्ठुं उच्चत्तेणं चत्तारि गाउयसयाइं उव्वेहेणं पच्च  
जोयणसयाइं विक्खम्भेणं तयणंतरे च णं मायाए २ उस्सेहुव्वेहपरिवट्ठीए परिवट्ठ-  
माणे २ विक्खम्भपरिहाणीए परिहायमाणे २ मंदरपव्वयंतेणं पच्च जोयणसयाइं उट्ठुं  
उच्चत्तेणं पच्च गाउयसयाइं उव्वेहेणं अंगुलस्स असंखिज्जइभागं विक्खम्भेणं पण्णत्ते  
गयदन्तसंठाणसंठिए सव्वरयणामए अच्छे०, उमओ पासिं दोहिं पउमवरवेइयाहिं  
दोहि य वणसंडेहिं सव्वओ समन्ता संपरिक्खित्ते, गन्धमायणस्स णं वक्खारपव्व-  
यस्स उप्पि बहुसमरमणिज्जे भूमिभागे जाव आसयन्ति... । गन्धमायणे णं० वक्खार-  
पव्वए कइ कूडा पण्णत्ता ? गो० ! सत्त कूडा प०, तंजहा-सिद्धकूडे १ गन्धमायणकूडे २  
गंधिलावइकूडे ३ उत्तरकुरूकूडे ४ फलिहकूडे ५ लोहियक्खकूडे ६ आणंदकूडे  
७ । कहि णं भन्ते ! गंधमायणे वक्खारपव्वए सिद्धकूडे णामं कूडे पण्णत्ते ?  
गोयमा ! मंदरस्स पव्वयस्स उत्तरपच्चत्थिमेणं गंधमायणकूडस्स दाहिणपुरत्थिमेणं  
एत्थ णं गंधमायणे वक्खारपव्वए सिद्धकूडे णामं कूडे पण्णत्ते, जं चेव जुल्लहिमवन्ते  
सिद्धकूडस्स पमाणं तं चेव एएसिं सव्वेसिं भाणियव्वं, एवं चेव विदिसाहिं तिण्णि  
कूडा भाणियव्वा, चउत्थे तइयस्स उत्तरपच्चत्थिमेणं पच्चमस्स दाहिणेणं, सेसा उ  
उत्तरदाहिणेणं, फलिहलोहियक्खेसु भोगंकरभोगवईओ देवयाओ सेसेसु सरिसणा-  
मया देवा, छसुवि पासायवडेंसगा रायहाणीओ विदिसालु, से केणट्ठेणं भन्ते !  
एवं वुच्चइ-गंधमायणे वक्खारपव्वए २ ? गो० ! गंधमायणस्स णं वक्खारपव्वयस्स  
गंधे से जहाणामए-कोट्टुपुडाण वा जाव पीसिज्जमाणेण वा उक्किरिज्जमाणेण वा  
विकिरिज्जमाणेण वा परिभुज्जमाणेण वा जाव ओराला मणुण्णा जाव गंधा अभि-  
णिसवन्ति, भवे एयारूवे ?, णो इणट्ठे समट्ठे, गंधमायणस्स णं इत्तो इट्ठतराए चेव  
जाव गंधे पण्णत्ते, से एणट्ठेणं गोयमा ! एवं वुच्चइ-गंधमायणे वक्खारपव्वए  
२, गंधमायणे य इत्थ देवे महिद्धिए...परिवसइ, अदुत्तरं च णं० सासए णामधेजे



...॥ ८६ ॥ कहि णं भन्ते ! महाविदेहे वासे उत्तरकुरा णामं कुरा प० ? गो० ! मंदरस्स पव्वयस्स उत्तरेणं णीलवन्तस्स वासहरपव्वयस्स दक्खिणेणं गन्धमायणस्स वक्खारपव्वयस्स पुरत्थिमेणं मालवन्तस्स वक्खारपव्वयस्स पच्चत्थिमेणं एत्थ णं उत्तरकुरा णामं कुरा पण्णत्ता, पाईणपडीणायया उदीणदाहिणविच्छिण्णा अद्धचंद-संठाणसंठिया इक्कारस जोयणसहस्साइं अट्ठ य वायाले जोयणसए दोणिण य एगूण-वीसइभाए जोयणस्स विक्खम्भेणंति, तीसे जीवा उत्तरेणं पाईणपडीणायया दुहा वक्खारपव्वयं पुट्ठा, तंजहा-पुरत्थिमिह्माए कोडीए पुरत्थिमिह्मं वक्खारपव्वयं पुट्ठा एवं पच्चत्थिमिह्माए जाव पच्चत्थिमिह्मं वक्खारपव्वयं पुट्ठा तेवण्णं जोयणसहस्साइं आयामेणंति, तीसे णं धणुं दाहिणेणं सट्ठिं जोयणसहस्साइं चत्तारि य अट्ठारसे जोयणसए दुवालस य एगूणवीसइभाए जोयणस्स परिकखेवेणं, उत्तरकुराए णं भन्ते ! कुराए केरिसए आयारभावपडोयारे पण्णत्ते ? गोयमा ! बहुसमरमणिजे भूमिभागे पण्णत्ते, एवं पुव्ववणिगया जच्चेव सुसमसुसमावत्तव्वया सच्चेव णेयव्वा जाव पउमगंधा १ मियगंधा २ अमसा ३ सहा ४ तेयतली ५ सणिंचारी ६ ॥ ८७ ॥ कहि णं भन्ते ! उत्तरकुराए २ जमगा णामं दुवे पव्वया पण्णत्ता ? गोयमा ! णीलवन्तस्स वासहरपव्वयस्स दक्खिणिह्माओ चरिमन्ताओ अट्ठजोयणसए चोत्तीसे चत्तारि य सत्तभाए जोयणस्स अवाहाए सीयाए महाणइए उभओ कूले एत्थ णं जमगा णामं दुवे पव्वया पण्णत्ता जोयणसहस्सं उट्ठं उच्चत्तेणं अट्ठाइजाइं जोयणसयाइं उव्वेहेणं मूले एगं जोयणसहस्सं आयामविक्खम्भेणं मज्झे अट्ठट्ठमाइं जोयणसयाइं आयाम-विक्खम्भेणं उवरिं पंच जोयणसयाइं आयामविक्खम्भेणं मूले तिणिण जोयणसह-स्साइं एगं च बावट्ठं जोयणसयं किंचिविसेसाहियं परिकखेवेणं मज्झे दो जोयणसह-स्साइं तिणिण बावत्तरे जोयणसए किंचिविसेसाहिए परिकखेवेणं उवरिं एगं जोयण-सहस्सं पच्च य एकासीए जोयणसए किंचिविसेसाहिए परिकखेवेणं मूले विच्छिण्णा मज्झे संखित्ता उप्पि तणुया जमगसंठाणसंठिया सव्वकणगामया अच्छा सण्हा० पत्तेयं २ पउमवरवेइयापरिक्खित्ता पत्तेयं २ वणसंडपरिक्खित्ता, ताओ णं पउम-वरवेइयाओ दो गाउयाइं उट्ठं उच्चत्तेणं पच्च धणुसयाइं विक्खम्भेणं, वेइयावण-सण्डवण्णओ भाणियव्वो, तेसि णं जमगपव्वयाणं उप्पि बहुसमरमणिजे भूमिभागे पण्णत्ते जाव तस्स णं बहुसमरमणिजस्स भूमिभागस्स बहुमज्झदेसभाए एत्थ णं दुवे पासायवडेंसगा प०, ते णं पासायवडेंसगा बावट्ठिं जोयणाइं अट्ठजोयणं च उट्ठं उच्चत्तेणं इक्कतीसं जोयणाइं कोसं च आयामविक्खम्भेणं पासायवण्णओ भाणियव्वो, सीहासणा सपरिवारा जाव एत्थ णं जमगाणं देवाणं सोलसण्हं

आयरक्खदेवसाहस्सीणं सोलस भद्दासणसाहस्सीओ पण्णत्ताओ, से केणट्ठेणं भंते ! एवं चुच्चइ-जमगा पव्वया २ ? गोयमा ! जमगपव्वएसु णं तत्थ २ देसे २ तहिं २ बहवे खुट्ठाखुट्ठियासु वावीसु जाव बिलपंतियासु बहवे उप्पलाइं जाव जमगवण्णा-भाइं जमगा य इत्थ दुवे देवा महिद्धिया०, ते णं तत्थ चउण्हं सामाणियसाह-स्सीणं जाव भुज्जमाणा विहरंति, से तेणट्ठेणं गो० ! एवं चुच्चइ-जमगपव्वया २, अदुत्तरं च णं सासए णामधेजे जाव जमगपव्वया २ । कहि णं भन्ते ! जमगाणं देवाणं जमिगाओ रायहाणीओ पण्णत्ताओ ? गोयमा ! जम्बुद्दीवे दीवे मन्दरस्स पव्वयस्स उत्तरेणं अण्णंमि जम्बुद्दीवे २ बारस जोयणसहस्साइं ओगाहिता एत्थ णं जमगाणं देवाणं जमिगाओ रायहाणीओ पण्णत्ताओ बारस जोयणसहस्साइं आयामविक्खम्भेणं सत्ततीसं जोयणसहस्साइं णव य अडयाले जोयणसए किंचिविसेसाहिए परिक्खेवेणं, पत्तेयं २ पायारपरिक्खित्ता, ते णं पागारा सत्ततीसं जोयणाइं अद्धजोयणं च उट्ठं उच्चत्तेणं मूले अद्धतेरसजोयणाइं विक्खम्भेणं मज्झे छ सकोसाइं जोयणाइं विक्खम्भेणं उवरिं तिण्णि सअद्धकोसाइं जोयणाइं विक्खम्भेणं मूले विच्छिण्णा मज्झे संखित्ता उट्ठिप तण्णया वाहिं वट्ठा अंतो चउरंसा सव्वरयणामया अच्छा०, ते णं पागारा णाणामणि-पञ्चवण्णेहिं कविसीसएहिं उवसोहिया, तंजहा-किण्हेहिं जाव सुक्खिस्सेहिं, ते णं कवि-सीसगा अद्धकोसं आयामेणं देसूणं अद्धकोसं उट्ठं उच्चत्तेणं पञ्च धणुसयाइं बाहल्लेणं सव्वमणिमया अच्छा०, जमिगाणं रायहाणीणं एगमेगाए बाहाए पणवीसं पणवीसं दारसयं पण्णत्तं, ते णं दारा वावट्ठि जोयणाइं अद्धजोयणं च उट्ठं उच्चत्तेणं इक्कतीसं जोयणाइं कोसं च विक्खम्भेणं तावइयं चेव पवेसेणं, सेया वरकणगथूभियागा एवं रायप्पसेणइज्जविमाणवत्तव्वयाए दारवण्णओ जाव अट्ठट्ठमंगलगाइंति, जमियाणं रायहाणीणं चउडिंसिं पञ्च पञ्च जोयणसए अवाहाए चत्तारि वणसण्डा पण्णत्ता, तंजहा—असोगवणे १ सत्तिवण्णवणे २ चंपगवणे ३ च्यूवणे ४, ते णं वणसंडा साइरेगाइं बारसजोयणसहस्साइं आयामेणं पञ्च जोयणसयाइं विक्खम्भेणं पत्तेयं २ पागारपरिक्खित्ता किण्हा वणसण्डवण्णओ भूमीओ पासायवडेंसगा य भाणियव्वा, जमिगाणं रायहाणीणं अंतो बहुसमरमणिजे भूमिभागे पण्णत्ते वण्णोत्ति, तेसि णं बहुसमरमणिजाणं भूमिभागार्णं बहुमज्झदेसभाए एत्थ णं दुवे उवयारियालथणा पण्णत्ता बारस जोयणसयाइं आयामविक्खम्भेणं तिण्णि जोयणसहस्साइं सत्त य पञ्चाणउए जोयणसए परिक्खेवेणं अद्धकोसं च बाहल्लेणं सव्वजंबूणयामया अच्छा०, पत्तेयं पत्तेयं पउमवरवेइयापरिक्खित्ता, पत्तेयं पत्तेयं वणसंडवण्णओ भाणियव्वो, तिसोवाणपडिरूवगा तोरणचउडिंसिं भूमिभागा य भाणियव्वत्ति, तस्स णं बहुमज्झ-

देसभाए एत्थ णं एगे पासायवडेंसए पण्णत्ते बावट्ठिं जोजणाइं अद्धजोयणं च उट्ठं उच्चत्तेणं इक्कीसं जोजणाइं कोसं च आयामविक्खम्मणेणं वण्णओ उल्लोया भूमिभागा सीहासणा सपरिवारा, एवं पासायपंतीओ एत्थ पढमा पंती ते णं पासायवडिंसगा एकतीसं जोजणाइं कोसं च उट्ठं उच्चत्तेणं साइरेगाइं अद्धसोलसजोयणाइं आयाम-विक्खम्मणेणं बिइयपासायपंती ते णं पासायवडेंसया साइरेगाइं अद्धसोलसजोयणाइं उट्ठं उच्चत्तेणं साइरेगाइं अद्धट्ठमाइं जोजणाइं आयामविक्खम्मणेणं तइयपासायपंती ते णं पासायवडेंसया साइरेगाइं अद्धट्ठमाइं जोजणाइं उट्ठं उच्चत्तेणं साइरेगाइं अद्धट्ठ-जोयणाइं आयामविक्खम्मणेणं वण्णओ सीहासणा सपरिवारा, तेसि णं मूलपासाय-वडिंसयाणं उत्तरपुरच्छिमे दिसीभाए एत्थ णं जमगाणं देवाणं सहाओ सुहम्माओ पण्णत्ताओ अद्धतेरसजोयणाइं आयामेणं छस्सकोसाइं जोजणाइं विक्खम्मणेणं णव जोयणाइं उट्ठं उच्चत्तेणं अणेगखम्मसयसण्णिविट्ठा सभावण्णओ, तासि णं सभाणं सुहम्माणं तिदिसिं तओ दारा पण्णत्ता, ते णं दारा दो जोयणाइं उट्ठं उच्चत्तेणं जोयणं विक्खम्मणेणं तावइयं चेव पवेसेणं, सेया वण्णओ जाव वणमाला, तेसि णं दाराणं पुरओ पत्तेयं २ तओ मुहमंडवा पण्णत्ता, ते णं मुहमंडवा अद्धतेरसजोयणाइं आयामेणं छस्सकोसाइं जोजणाइं विक्खम्मणेणं साइरेगाइं दो जोयणाइं उट्ठं उच्चत्तेणं जाव दारा भूमिभागा य त्ति, पेच्छाघरमंडवाणं तं चेव पमाणं भूमिभागो मणिपेडियाओत्ति, ताओ णं मणिपेडियाओ जोयणं आयामवि-क्खम्मणेणं अद्धजोयणं बाह्णेणं सव्वमणिमइया सीहासणा भाणियव्वा, तेसि णं पेच्छाघरमंडवाणं पुरओ तओ मणिपेडियाओ पण्णत्ताओ, ताओ णं मणिपेडियाओ जोयणं आयामविक्खम्मणेणं अद्धजोयणं बाह्णेणं, तासि णं उप्पि पत्तेयं २ माहिंदज्झया पण्णत्ता, ते णं अद्धट्ठमाइं जोजणाइं उट्ठं उच्चत्तेणं अद्धकोसं उव्वेहेणं अद्धकोसं बाह्णेणं वइरामयवट्ठ वण्णओ वेइयावणसंडतिसोवाणतोरणा य भाणियव्वा, तासि णं सभाणं सुहम्माणं छच्चमणोगुलियासाहस्सीओ पण्णत्ताओ, तंजहा-पुरत्थिमेणं दो साहस्सीओ पण्णत्ताओ पच्चत्थिमेणं दो साहस्सीओ दक्खिणेणं एगा साहस्सी उत्तरेणं एगा जाव दामा चिट्ठंति, एवं गोमाणसियाओ, णवरं धूवघडियाओत्ति, तासि णं सुहम्माणं सभाणं अंतो बहुसमरमणिजे भूमिभागे पण्णत्ते, मणिपेडिया सीहासणा सपरिवारा विदिसाए सयणिज्जवण्णओ, सयणिज्जाणं उत्तरपुरत्थिमे दिसीभाए खुट्ठग-माहिंदज्झया मणिपेडियाविट्ठूणा माहिंदज्झयप्पमाणा, तेसि अवरेणं चोप्फाला पहर-णकोसा, तत्थ णं बहवे फलिहरयणपामुक्खा जाव चिट्ठंति, सुहम्माणं० उप्पि अद्धट्ठ-मंगलगा, एवं अवसेसाणवि सभाणं जाव उववायसभाए सयणिज्जं हरओ य,

अभिसेयसभाए बहु आभिसेक्के भंडे, अलंकारियसभाए बहु अलंकारियभंडे चिट्ठइ, ववसायसभासु पुत्थयरयणा, णंदा पुक्खरिणीओत्ति,—उववाओ जमगाणं अभिसे-  
यविहूसणा य ववसाओ । अवरं च सुहम्मगमो जहा य परिवारणाइह्वी ॥ १ ॥  
जावइयंमि पमाणंमि हुंति जमगाओ णीलवंताओ । तावइयमन्तरं खलु जमगदहाणं  
दहाणं च ॥ २ ॥ ८८ ॥ कहि णं भन्ते ! उत्तरकुराए २ णीलवन्तदहे णामं दहे  
पण्णत्ते ? गोयमा ! जमगाणं० दक्खिणिज्जाओ चरिमन्ताओ अट्ठसए चोत्तीसे चत्तारि  
य सत्तभाए जोयणस्स अवाहाए सीयाए महाणइए बहुमज्झदेसभाए एत्थ णं  
णीलवन्तदहे णामं दहे पण्णत्ते, दाहिणउत्तरायए पाईणपडीणविच्छिण्णे जहेव पउमदहे  
तहेव वण्णओ गेयव्वो, गाणत्तं दोहिं पउमवरवेइयाहिं दोहि य वणसंडेहिं संपरि-  
क्खित्ते, णीलवन्ते णामं गागकुमारे देवे सेसं तं चेव गेयव्वं, णीलवन्तदहस्स पुव्वावरे  
पासे दस २ जोयणाइं अवाहाए एत्थ णं वीसं कंचणगपव्वया पण्णत्ता, एणं जोयणसयं  
उड्ढं उच्चत्तेणं—मूलंमि जोयणसयं पण्णत्तरि जोयणाइं मज्झंमि । उवरितले कंचणगा  
पण्णासं जोयणा हुंति ॥ १ ॥ मूलंमि तिण्णि सोले सत्तत्तीसाइं दुण्णि मज्झंमि । अट्ठावणं  
च सयं उवरितले परिरओ होइ ॥ २ ॥ पढमित्थ नीलवन्तो १ बिइओ उत्तरकुरु २  
मुणेयव्वो । चंदइहोत्थ तइओ ३ एरावय ४ मालवन्तो य ५ ॥ ३ ॥ एवं वण्णओ  
अट्ठो पमाणं पल्लोवमट्ठिइया देवा ॥ ८९ ॥ कहि णं भन्ते ! उत्तरकुराए २  
जम्बूपेढे णामं पेढे पण्णत्ते ? गोयमा ! णीलवन्तस्स वासहरपव्वयस्स दक्खिणेणं  
मन्दरस्स० उत्तरेणं मालवन्तस्स वक्खारपव्वयस्स पच्चत्थिमेणं सीयाए महाणइए  
पुरत्थिमिल्ले कूले एत्थ णं उत्तरकुराए कुराए जम्बूपेढे णामं पेढे पण्णत्ते पञ्च जोयण-  
सयाइं आयामविक्खम्मेणं पण्णरस एक्कासीयाइं जोयणसयाइं किंविचिसेसाहियाइं  
परिक्खेवेणं बहुमज्झदेसभाए बारस जोयणाइं बाहल्लेणं तयणन्तरं च णं मायाए २  
पएसपरिहाणीए परिहायमाणे २ सव्वेसु णं चरिमपेरंतेसु दो दो गाउयाइं बाहल्लेणं  
सव्वजम्बूणायामए अच्छे०, से णं एगाए पउमवरवेइयाए एगेण य वणसंडेणं सव्वओ  
समन्ता संपरिक्खित्ते दुण्हंमि वण्णओ, तस्स णं जम्बूपेढस्स चउडिहिं एए चत्तारि  
तिसोवाणपडिरूवगा पण्णत्ता वण्णओ जाव तोरणाइं, तस्स णं जम्बूपेढस्स बहुमज्झ-  
देसभाए एत्थ णं मणिपेढिया पण्णत्ता अट्ठजोयणाइं आयामविक्खम्मेणं चत्तारि जोय-  
णाइं बाहल्लेणं, तीसे णं मणिपेढियाए उप्पि एत्थ णं जम्बूसुदंसणा पण्णत्ता अट्ठ जोय-  
णाइं उड्ढं उच्चत्तेणं अट्ठजोयणं उव्वेहेणं, तीसे णं खंधो दो जोयणाइं उड्ढं उच्चत्तेणं  
अट्ठजोयणं बाहल्लेणं, तीसे णं साला छ जोयणाइं उड्ढं उच्चत्तेणं बहुमज्झदेसभाए  
अट्ठ जोयणाइं आयामविक्खंमेणं साहरेगाइं अट्ठ जोयणाइं सव्वग्गेणं, तीसे णं अय-  
३९ सुत्ता०

मेयाह्वे वण्णावासे प०, तं०—वइरामया मूला रययसुपइट्ठियविडिमा जाव अहियमण-  
 णिवुइकरी पासाईया दरिसणिजा०, जंबूए णं सुदंसणाए चउद्दिसि चत्तारि साला  
 प०, तत्थ णं जे से पुरत्थिमिह्णे साले एत्थ णं भवणे पण्णत्ते कोसं आयामेणं एवमेव  
 णवरमित्थ सयणिज्जं सेसेसु पासायवडेंसया सीहासणा य सपरिवारा इति । जम्बू णं०  
 वारसाहिं पडमवरवेइयाहिं सव्वओ समन्ता संपरिक्खित्ता, वेइयाणं वण्णओ, जम्बू  
 णं० अण्णेणं अट्ठसएणं जम्बूणं तदद्दुच्चत्ताणं सव्वओ समन्ता संपरिक्खित्ता, तासि णं  
 वण्णओ, ताओ णं जम्बूओ छहिं पडमवरवेइयाहिं संपरिक्खित्ता, जम्बूए णं सुदंसणाए  
 उत्तरपुरत्थिमेणं उत्तरेणं उत्तरपच्चत्थिमेणं एत्थ णं अणादियस्स देवस्स चउण्हं  
 सामाणियसाहस्सीणं चत्तारि जम्बूसाहस्सीओ पण्णत्ताओ, तीसे णं पुरत्थिमेणं  
 चउण्हं अग्गमहिस्सीणं चत्तारि जम्बूओ पण्णत्ताओ,—दाहिणपुरत्थिमे दक्खिणेण  
 तह अवरदक्खिणेणं च । अट्ठ दस वारसेव य भवन्ति जम्बूसहस्साइं ॥ १ ॥  
 अणियाहिवाण पच्चत्थिमेण सत्तेव होंति जम्बूओ । सोलस साहस्सीओ चउद्दिसिं  
 आयरक्खाणं ॥ २ ॥ जम्बू णं० तिहिं सइएहिं वणसंडेहिं सव्वओ समन्ता संप-  
 रिक्खित्ता, जम्बूए णं० पुरत्थिमेणं पण्णासं जोयणाइं पढमं वणसंडं ओगाहिता एत्थ  
 णं भवणे पण्णत्ते कोसं आयामेणं सो चेव वण्णओ सयणिज्जं च, एवं सेसासुवि  
 दिसासु भवणा, जम्बूए णं० उत्तरपुरत्थिमेणं पढमं वणसण्डं पण्णासं जोयणाइं  
 ओगाहिता एत्थ णं चत्तारि पुक्खरिणीओ पण्णत्ताओ, तंजहा—पडमा १ पडमप्पभा २  
 कुमुया ३ कुमुयप्पभा ४, ताओ णं कोसं आयामेणं अद्धकोसं विक्खम्भेणं  
 पच्चधणुसयाइं उव्वेहेणं वण्णओ, तासि णं मज्झे पासायवडेंसगा कोसं आयामेणं  
 अद्धकोसं विक्खम्भेणं देसूणं कोसं उड्डं उच्चत्तेणं वण्णओ सीहासणा सपरिवारा,  
 एवं सेसासु विदिसासु, गाहा—पडमा पडमप्पभा चेव, कुमुया कुमुयप्पहा । उप्पल-  
 गुम्मा णलिणा, उप्पला उप्पलुज्जला ॥ १ ॥ भिंगा भिंगप्पभा चेव, अंजणा  
 कज्जलप्पभा । सिरिकंता सिरिमहिया, सिरिचंदा चेव सिरिणिलया ॥ २ ॥ जम्बूए  
 णं० पुरत्थिमिह्णस्स भवणस्स उत्तरेणं उत्तरपुरत्थिमिह्णस्स पासायवडेंसगस्स दक्खि-  
 णेणं एत्थ णं कूडे पण्णत्ते अट्ठ जोयणाइं उड्डं उच्चत्तेणं दो जोयणाइं उव्वेहेणं मूले अट्ठ  
 जोयणाइं आयामविक्खम्भेणं बहुमज्झदेसभाए छ जोयणाइं आयामविक्खम्भेणं  
 उवरिं चत्तारि जोयणाइं आयामविक्खम्भेणं—पणवीसट्ठारस वारसेव मूले य मज्झि  
 उवरिं च । सविसेसाइं परिरओ कूडस्स इमस्स बोद्धवो ॥ १ ॥ मूले विच्छिण्णे  
 मज्झे संखित्ते उवरिं तणुए सव्वकणगामए अच्छे० वेइयावणसंडवण्णओ, एवं सेसावि  
 कूडा इति । जम्बूए णं सुदंसणाए दुवालस णामधेजा प०, तं०—सुदंसणा १ अमोह

२ य, सुप्पबुद्धा ३ जसोहरा ४ । विदेहजम्बू ५ सोमणसा ६, गियया ७ णिच्च-  
मंडिया ८ ॥ १ ॥ सुभद्दा य ९ विसाला य १०, सुजाया ११ सुमणा १२  
विया । सुदंसणाए जम्बूए, णामधेज्जा दुवालस ॥ २ ॥ जम्बूए णं० अट्ठमंगलगा०,  
से केणट्ठेणं भन्ते ! एवं वुच्चइ-जम्बू सुदंसणा २ ? गोयमा ! जम्बूए णं सुदंसणाए  
अणाडिए णामं देवे जम्बुद्दीवाहिर्वई परिवसइ महिङ्गिए०, से णं तत्थ चउण्हं सामाणिय-  
साहस्सीणं जाव आयरक्खदेवसाहस्सीणं जम्बुद्दीवस्स णं दीवस्स जम्बूए सुदंसणाए  
अणाडियाए रायहाणीए अणेसिं च बहूणं देवाण य देवीण य जाव विहरइ, से  
तेणट्ठेणं गो० ! एवं वुच्चइ०, अदुत्तरं च णं गोयमा ! जम्बूसुदंसणा जाव भुवि च ३  
धुवा गियया सासया अक्खया जाव अवट्ठिया । कहिं णं भन्ते ! अणाडियस्स  
देवस्स अणाडिया णामं रायहाणी पणत्ता ? गोयमा ! जम्बुद्दीवे २ मन्दरस्स  
पव्वयस्स उत्तरेणं जं चेव पुव्ववणिगं जमिगापमाणं तं चेव पेयव्वं जाव उववाओ  
अभिसेओ य निरवसेसोत्ति ॥ ९० ॥ से केणट्ठेणं भन्ते ! एवं वुच्चइ-उत्तरकुरा २ ?  
गोयमा ! उत्तरकुराए० उत्तरकुरु णामं देवे परिवसइ महिङ्गिए जाव पलिओ-  
वमट्ठिए, से तेणट्ठेणं गोयमा एवं वुच्चइ-उत्तरकुरा २, अदुत्तरं च णं जाव  
सासए... । कहिं णं भन्ते ! महाविदेहे वासे मालवंते णामं वक्खारपव्वए पणत्ते ?  
गोयमा ! मंदरस्स पव्वयस्स उत्तरपुरत्थिमेणं णीलवंतस्स वासहरपव्वयस्स दाहिणेणं  
उत्तरकुराए० पुरत्थिमेणं वच्छस्स चक्खवट्ठिविजयस्स पच्चत्थिमेणं एत्थ णं महाविदेहे  
वासे मालवंते णामं वक्खारपव्वए पणत्ते उत्तरदाहिणायए पाईणपडीणविच्छिण्णे जं  
चेव गंधमायणस्स पमाणं विक्खम्मो य णवरमिसं णाणत्तं सव्ववेसलियामए अवसिट्ठं तं  
चेव जाव गोयमा ! नव कूडा पणत्ता, तंजहा-सिद्धकूडे०, सिद्धे य मालवन्ते उत्तरकुरु  
कच्छसागरे रयए । सीओय पुण्णभद्दे हरिस्सहे चेव बोद्धव्वे ॥ १ ॥ कहिं णं भन्ते !  
मालवन्ते वक्खारपव्वए सिद्धकूडे णामं कूडे पणत्ते ? गोयमा ! मन्दरस्स पव्वयस्स  
उत्तरपुरत्थिमेणं मालवंतस्स कूडस्स दाहिणपच्चत्थिमेणं एत्थ णं सिद्धकूडे णामं कूडे  
पणत्ते पंच जोयणसयाइ उट्ठं उच्चत्तेणं अवसिट्ठं तं चेव जाव रायहाणी, एवं माल-  
वन्तस्स कूडस्स उत्तरकुरुकूडस्स कच्छकूडस्स, एए चत्तारि कूडा दिसाहिं पमाणेहिं  
पेयव्व, कूडसरिसणमया देवा, कहिं णं भन्ते ! मालवन्ते० सागरकूडे णामं कूडे पणत्ते ?  
गोयमा ! कच्छकूडस्स उत्तरपुरत्थिमेणं रययकूडस्स दक्खिणेणं एत्थ णं सागरकूडे  
णामं कूडे पणत्ते पंच जोयणसयाइ उट्ठं उच्चत्तेणं अवसिट्ठं तं चेव सुभोगा देवी  
रायहाणी उत्तरपुरत्थिमेणं रययकूडे भोगमालिणी देवी रायहाणी उत्तरपुरत्थिमेणं,  
अवसिट्ठा कूडा उत्तरदाहिणेणं पेयव्व एकेणं पमाणेणं ॥ ९१ ॥ कहिं णं भन्ते !

मालवन्ते हरिस्सहकूडे णामं कूडे पण्णत्ते ? गोयमा ! पुण्णमहस्स उत्तरेण णीलवन्तस्स दक्खिणेण एत्थ णं हरिस्सहकूडे णामं कूडे पण्णत्ते एगं जोयणसहस्सं उट्ठं उच्चत्तेणं जमगप्पमाणेणं पेयव्वं, रायहाणी उत्तरेणं असंखेजे दीवे अण्णमि जम्बुद्वीवे दीवे उत्तरेणं वारसजोयणसहस्साइं ओगाहिता एत्थ णं हरिस्सहस्स देवस्स हरिस्सहा णामं रायहाणी पण्णत्ता चउरासीइं जोयणसहस्साइं आयामविक्खम्भेणं बे जोयणसयसहस्साइं पण्णत्तिं च सहस्साइं छच्च छत्तीसे जोयणसए परिकखेवेणं, सेसं जहा चमरचच्चाए रायहाणीए तथा पमाणं भाणियव्वं, महिद्धिए महज्जुइए, से केणट्ठेणं भन्ते ! एवं वुच्चइ—मालवन्ते वक्खारपव्वए २ ? गोयमा ! मालवन्ते णं वक्खारपव्वए तत्थ तत्थ देसे २ तहिं २ बहवे सेरियागुम्मा णोमालियागुम्मा जाव मगदन्तियागुम्मा, ते णं गुम्मा दसद्धवणं कुसुमं कुसुमेति, जे णं तं मालवन्तस्स वक्खारपव्वयस्स बहुसमरमणिजं भूमिभागं वायविधुयग्गसालामुक्कपुप्फपुंजोवयारकलियं करेन्ति, मालवंते य इत्थ देवे महिद्धिए जाव पलिओवमट्ठिइए परिवसइ, से तेणट्ठेणं गोयमा ! एवं वुच्चइ०, अदुत्तरं च णं जाव णिच्चे ॥ ९२ ॥ कहि णं भन्ते ! जम्बुद्वीवे दीवे महाविदेहे वासे कच्छे णामं विजए पण्णत्ते ? गोयमा ! सीयाए महाणइए उत्तरेणं णीलवंतस्स वासहरपव्वयस्स दक्खिणेणं चित्तकूडस्स वक्खारपव्वयस्स पच्चत्थिमेणं मालवंतस्स वक्खारपव्वयस्स पुरत्थिमेणं एत्थ णं जम्बुद्वीवे २ महाविदेहे वासे कच्छे णामं विजए पण्णत्ते, उत्तरदाहिणायए पाईणपडीणविच्छिण्णे पलियंकसंठाणसंठिए गंगासिंधूहिं महाणइहिं वेयड्ढेण य पव्वएणं छव्वभागपविभत्ते सोलस जोयणसहस्साइं पंच य बाणउए जोयणसए दोण्णि य एगूणवीसइभाए जोयणस्स आयामेणं दो जोयणसहस्साइं दोण्णि य तेरसुत्तरे जोयणसए किंचिविसेसूणे विक्खंभेणंति । कच्छस्स णं विजयस्स बहुमज्झदेसभाए एत्थ णं वेयड्ढे णामं पव्वए पण्णत्ते जे णं कच्छं विजयं दुहा विभयमाणे २ चिट्ठइ, तंजहा—दाहिणद्धकच्छं च उत्तरद्धकच्छं चेति, कहि णं भन्ते ! जम्बुद्वीवे दीवे महाविदेहे वासे दाहिणद्धकच्छे णामं विजए प० ? गोयमा ! वेयड्ढस्स पव्वयस्स दाहिणेणं सीयाए महाणइए उत्तरेणं चित्तकूडस्स वक्खारपव्वयस्स पच्चत्थिमेणं मालवंतस्स वक्खारपव्वयस्स पुरत्थिमेणं एत्थ णं जम्बुद्वीवे दीवे महाविदेहे वासे दाहिणद्धकच्छे णामं विजए प०, उत्तरदाहिणायए पाईणपडीणविच्छिण्णे अट्ठ जोयणसहस्साइं दोण्णि य एगसत्तरे जोयणसए एक्कं च एगूणवीसइभागं जोयणस्स आयामेणं दो जोयणसहस्साइं दोण्णि य तेरसुत्तरे जोयणसए किंचिविसेसूणे विक्खंभेणं पलियंकसंठाणसंठिए, दाहिणद्धकच्छस्स णं भन्ते ! विजयस्स केरिसए आयारभावपडोयारे पण्णत्ते ? गोयमा ! बहुसमरमणिजे भूमिभागे पण्णत्ते, तंजहा—जाव कित्ति-

मेहिं चेव अकित्तिमेहिं चेव, दाहिणद्धकच्छे णं भन्ते ! विजए मणुयाणं केरिसए आयारभावपडोयारे पण्णत्ते ? गोयमा ! तेसि णं मणुयाणं छव्विहे संघयणे जाव सव्वदुक्खाणमंतं करेंति । कहि णं भन्ते ! जम्बुदीवे दीवे महाविदेहे वासे कच्छे विजए वेयङ्हे णामं पव्वए प० ? गोयमा ! दाहिणद्धकच्छविजयस्स उत्तरेणं उत्तरद्धकच्छस्स दाहिणेणं चित्तकूडस्स० पच्चत्थिमेणं मालवन्तस्स वक्खारपव्वयस्स पुरत्थिमेणं एत्थ णं कच्छे विजए वेयङ्हे णामं पव्वए पण्णत्ते, पाईणपडीणायए उदीणदाहिणविच्छिण्णे दुहा वक्खारपव्वए पुट्ठे पुरत्थिमिल्लए कोडीए जाव दोहि वि पुट्ठे भरहवेयङ्गसरिसए णवरं दो बाहाओ जीवा धणुपट्ठं च ण कायव्वं, विजयविकखम्मसरिसे आयामेणं, विकखम्मो उच्चतं उव्वेहो तहेव य विज्जाहरआभिओगसेदीओ तहेव, णवरं पणपणं २ विज्जाहरणगरावासा प०, आभिओगसेदीए उत्तरिल्लाओ सेदीओ सीयाए ईसाणस्स सेसाओ सकस्सत्ति, कूडा-सिद्धे १ कच्छे २ खंडग ३ माणी ४ वेयङ्ग ५, पुण्ण ६ तिमिसगुहा ७ । कच्छे ८ वेसमणे वा ९ वेयङ्गे होंति कूडाई ॥ १ ॥ कहि णं भन्ते ! जम्बुदीवे २ महाविदेहे वासे उत्तरद्धकच्छे णामं विजए पण्णत्ते ? गोयमा ! वेयङ्गस्स पव्वयस्स उत्तरेणं णीलवन्तस्स वासहरपव्वयस्स दाहिणेणं मालवन्तस्स वक्खारपव्वयस्स पुरत्थिमेणं चित्तकूडस्स वक्खारपव्वयस्स पच्चत्थिमेणं एत्थ णं जम्बुदीवे दीवे जाव सिञ्जन्ति तहेव णेयव्वं सव्वं, कहि णं भन्ते ! जम्बुदीवे दीवे महाविदेहे वासे उत्तरद्धकच्छे विजए सिंधुकुंडे णामं कुंडे पण्णत्ते ? गोयमा ! मालवन्तस्स वक्खारपव्वयस्स पुरत्थिमेणं उसभकूडस्स० पच्चत्थिमेणं णीलवन्तस्स वासहरपव्वयस्स दाहिणिंले णियंवे एत्थ णं जम्बुदीवे दीवे महाविदेहे वासे उत्तरद्धकच्छविजए सिंधुकुंडे णामं कुंडे पण्णत्ते सट्ठिं जोयणाई आयामविकखम्मेणं जाव भवणं अट्ठो रायहाणी य णेयव्वा, भरहसिंधुकुंडसरिसं सव्वं णेयव्वं जाव तस्स णं सिंधुकुण्डस्स दाहिणिंलेणं तोरणेणं सिंधुमहाणई पवूढा समाणी उत्तरद्धकच्छविजयं एजेमाणी २ सत्तहिं सलिलासहस्सेहिं आपूरेमाणी २ अहे तिमिसगुहाए वेयङ्गपव्वयं दालइत्ता दाहिणकच्छविजयं एजेमाणी २ चोइसहिं सलिलासहस्सेहिं समग्गा दाहिणेणं सीयं महाणइं समप्पेइ, सिंधुमहाणई पवहे य मूले य भरहसिंधुसरिसा पमाणेणं जाव दोहिं वणसंडेहिं संपरिक्खत्ता । कहि णं भन्ते ! उत्तरद्धकच्छविजए उसभकूडे णामं पव्वए पण्णत्ते ? गोयमा ! सिंधुकुंडस्स पुरत्थिमेणं गंगाकुण्डस्स पच्चत्थिमेणं णीलवन्तस्स वासहरपव्वयस्स दाहिणिंले णियंवे एत्थ णं उत्तरद्धकच्छविजए उसहकूडे णामं पव्वए पण्णत्ते अट्ठ जोयणाई उड्ढं उच्चतेणं तं चेव पमाणं जाव रायहाणी से णवरं उत्तरेणं भाणियव्वा । कहि णं भन्ते ! उत्तरद्धकच्छे विजए गंगा-



कुण्डे णामं कुण्डे पण्णत्ते ? गोयमा ! चित्तकूडस्स वक्खारपव्वयस्स पच्चत्थिमेणं  
 उसहकूडस्स पव्वयस्स पुरत्थिमेणं णीलवन्तस्स वासहरपव्वयस्स दाहिणिळे णियंवे  
 एत्थ णं उत्तरद्वक्खे ० गंगाकुण्डे णामं कुण्डे पण्णत्ते सट्ठिं जोयणाइं आयामविक्ख-  
 म्मेणं तहेव जहा सिंधू जाव वणसंडेण य संपरिक्खत्ता । से केणट्ठेणं भन्ते ! एवं  
 वुच्चइ-कच्छे विजए कच्छे विजए ? गोयमा ! कच्छे विजए वेयङ्गस्स पव्वयस्स दाहि-  
 गेणं सीयाए महाणइए उत्तरेणं गंगाए महाणइए पच्चत्थिमेणं सिंधूए महाणइए  
 पुरत्थिमेणं दाहिणद्वक्खविजयस्स बहुमज्झदेसभाए एत्थ णं खेमा णामं रायहाणी  
 प० विणीयारायहाणीसरिसा भाणियव्वा, तत्थ णं खेमाए रायहाणीए कच्छे  
 णामं राया समुप्पज्जइ, महयाहिमवन्त जाव सव्वं भरहोअवणं भाणियव्वं णिक्ख-  
 मणवज्जं सेसं सव्वं भाणियव्वं जाव भुंजए माणुस्सए सुहे, कच्छणामधेजे य कच्छे  
 इत्थ देवे महिङ्गिए जाव पलिओवमट्ठिए परिवसइ, से एएणट्ठेणं गोयमा ! एवं  
 वुच्चइ-कच्छे विजए कच्छे विजए जाव णिच्चे ॥ ९३ ॥ कहि णं भन्ते ! जम्बुदीवे  
 दीवे महाविदेहे वासे चित्तकूडे णामं वक्खारपव्वए पण्णत्ते ? गोयमा ! सीयाए  
 महाणइए उत्तरेणं णीलवन्तस्स वासहरपव्वयस्स दाहिणेणं कच्छविजयस्स पुरत्थिमेणं  
 सुक्कच्छविजयस्स पच्चत्थिमेणं एत्थ णं जम्बुदीवे दीवे महाविदेहे वासे चित्तकूडे  
 णामं वक्खारपव्वए पण्णत्ते, उत्तरदाहिणायए पाईणपडीणविच्छिणे सोलसजोयण-  
 सहस्साइं पञ्च य बाणउए जोयणसए दुण्णि य एगूणवीसइभाए जोयणस्स आयामेणं  
 पञ्च जोयणसयाइं विक्खम्मेणं णीलवन्तवासहरपव्वयंतेणं चत्तारि जोयणसयाइं उट्ठं  
 उच्चतेणं चत्तारि गाउयसयाइं उव्वेहेणं तयणंतरं च णं मायाए २ उस्सेहुव्वेहपरि-  
 वुट्ठीए परिवट्ठुमाणे २ सीयामहाणइअंतेणं पञ्च जोयणसयाइं उट्ठं उच्चतेणं पञ्च गाउय-  
 सयाइं उव्वेहेणं अस्सखन्धसंठाणसंठिए सव्वरयणामए अच्छे सपहे जाव पडिरूवे  
 उभओ पासिं दोहिं पडमवरवेइयाहिं दोहि य वणसंडेहिं संपरिक्खत्ते, वण्णओ दुण्हवि,  
 चित्तकूडस्स णं वक्खारपव्वयस्स उप्पि बहुसमरमणिजे भूमिभागे पण्णत्ते जाव आस-  
 यन्ति ०, चित्तकूडे णं भन्ते ! वक्खारपव्वए कइ कूडा पण्णत्ता ? गोयमा ! चत्तारि  
 कूडा पण्णत्ता, तंजहा—सिद्धकूडे चित्तकूडे कच्छकूडे सुक्कच्छकूडे, समा उत्तरदाहि-  
 गेणं पणुप्परंति, पढमं सीयाए उत्तरेणं चउत्थए नीलवन्तस्स वासहरपव्वयस्स  
 दाहिणेणं एत्थ णं चित्तकूडे णामं देवे महिङ्गिए जाव रायहाणी सेत्ति ॥ ९४ ॥  
 कहि णं भन्ते ! जम्बुदीवे दीवे महाविदेहे वासे सुक्कच्छे णामं विजए पण्णत्ते ?  
 गोयमा ! सीयाए महाणइए उत्तरेणं णीलवन्तस्स वासहरपव्वयस्स दाहिणेणं गहा-  
 वईए महाणइए पच्चत्थिमेणं चित्तकूडस्स वक्खारपव्वयस्स पुरत्थिमेणं एत्थ णं

जम्बुद्वीवे दीवे महाविदेहे वासे सुकच्छे णामं विजए पण्णत्ते, उत्तरदाहिणायए जहेव कच्छे विजए तहेव सुकच्छे विजए, णवरं खेमपुरा रायहाणी सुकच्छे राया ससुप्पज्जइ तहेव सव्वं । कहि णं भन्ते ! जम्बुद्वीवे २ महाविदेहे वासे गाहावइकुंडे० पण्णत्ते ? गो० ! सुकच्छविजयस्स पुरत्थिमेणं महाकच्छस्स विजयस्स पच्चत्थिमेणं णीलवन्तस्स वासहरपव्वयस्स दाहिणिल्लि णियम्बे एत्थ णं जम्बुद्वीवे दीवे महाविदेहे वासे गाहावइ-कुंडे णामं कुण्डे पण्णत्ते, जहेव रोहियंसाकुण्डे तहेव जाव गाहावइदीवे भवणे, तस्स णं गाहावइस्स कुण्डस्स दाहिणिल्लेणं तोरणेणं गाहावई महाणई पवूढा समाणी सुकच्छमहाकच्छविजए दुहा विभयमाणी २ दाहिणेणं सीयं महाणई समप्पेइ, गाहावई णं महाणई पवहे य मुहे य सव्वत्थ समा पणवीसं जोयणसयं विकखम्भेणं अद्वाइजाइ जोयणाइ उव्वेहेणं उभओ पासिं दोहिं पउमवरवेइयाहिं दोहि य वण-सण्डेहिं जाव दुण्हवि वण्णओ, कहि णं भन्ते ! महाविदेहे वासे महाकच्छे णामं विजए पण्णत्ते ? गोयमा ! णीलवन्तस्स वासहरपव्वयस्स दाहिणेणं सीयाए महाणईए उत्तरेणं पम्हकूडस्स वक्खारपव्वयस्स पच्चत्थिमेणं गाहावईए महाणईए पुरत्थिमेणं एत्थ णं महाविदेहे वासे महाकच्छे णामं विजए पण्णत्ते, सेसं जहा कच्छविजयस्स ( णवरं अरिट्ठा रायहाणी ) जाव महाकच्छे इत्थ देवे महिङ्खिए...अट्ठो य भाणियव्वो । कहि णं भन्ते ! महाविदेहे वासे पम्हकूडे णामं वक्खारपव्वए पण्णत्ते ? गोयमा ! णील-वन्तस्स० दक्खिणेणं सीयाए महाणईए उत्तरेणं महाकच्छस्स पुरत्थिमेणं कच्छावईए पच्चत्थिमेणं एत्थ णं महाविदेहे वासे पम्हकूडे णामं वक्खारपव्वए पण्णत्ते, उत्तर-दाहिणायए पाईणपडीणविच्छिण्णे सेसं जहा चित्तकूडस्स जाव आसयन्ति०, पम्हकूडे चत्तारि कूडा प०, तं०-सिद्धकूडे पम्हकूडे महाकच्छकूडे कच्छावइकूडे एवं जाव अट्ठो, पम्हकूडे य इत्थ देवे महिङ्खिए० पलिओवमट्ठिइए परिसद, से तेणट्ठेणं गोयमा ! एवं वुच्चइ० । कहि णं भन्ते ! महाविदेहे वासे कच्छगावई णामं विजए प० ? गो० ! णीलवन्तस्स० दाहिणेणं सीयाए महाणईए उत्तरेणं दहावईए महाणईए पच्चत्थिमेणं पम्हकूडस्स० पुरत्थिमेणं एत्थ णं महाविदेहे वासे कच्छगावई णामं विजए प०, उत्तर-दाहिणायए पाईणपडीणविच्छिण्णे सेसं जहा कच्छस्स विजयस्स जाव कच्छगावई य इत्थ देवे०, कहि णं भन्ते ! महाविदेहे वासे दहावईकुण्डे णामं कुण्डे पण्णत्ते ? गोयमा ! आवत्तस्स विजयस्स पच्चत्थिमेणं कच्छगावईए विजयस्स पुरत्थिमेणं णील-वन्तस्स० दाहिणिल्लि णियंवे एत्थ णं महाविदेहे वासे दहावईकुण्डे णामं कुण्डे प० सेसं जहा गाहावईकुण्डस्स जाव अट्ठो, तस्स णं दहावईकुण्डस्स दाहिणेणं तोरणेणं दहावई महाणई पवूढा समाणी कच्छावईआवत्ते विजए दुहा विभयमाणी २ दाहिणेणं

सीयं महाणईं समप्पेइ, सेसं जहा गाहावईए । कहि णं भन्ते ! महाविदेहे वासे आवत्ते णामं विजए पण्णत्ते ? गोयमा ! णीलवन्तस्स वासहरपव्वयस्स दाहिणेणं सीयाए महाणईए उत्तरेणं णलिणकूडस्स वक्खारपव्वयस्स पच्चत्थिमेणं दहावईए महाणईए पुरत्थिमेणं एत्थ णं महाविदेहे वासे आवत्ते णामं विजए पण्णत्ते, सेसं जहा कच्छस्स विजयस्स इति । कहि णं भन्ते ! महाविदेहे वासे णलिणकूडे णामं वक्खारपव्वए पण्णत्ते ? गो० ! णीलवन्तस्स दाहिणेणं सीयाए उत्तरेणं मंगलावइस्स विजयस्स पच्चत्थिमेणं आवत्तस्स विजयस्स पुरत्थिमेणं एत्थ णं महाविदेहे वासे णलिणकूडे णामं वक्खारपव्वए पण्णत्ते, उत्तरदाहिणायए पाईणपवीणविच्छिण्णे सेसं जहा चित्तकूडस्स जाव आसयन्ति०, णलिणकूडे णं भन्ते ।० कइ कूडा प० ? गोयमा ! चत्तारि कूडा पण्णत्ता, तंजहा-सिद्धकूडे णलिणकूडे आवत्तकूडे मंगलावत्तकूडे, एएकूडा पञ्चसइया रायहाणीओ उत्तरेणं । कहि णं भन्ते ! महाविदेहे वासे मंगलावत्ते णामं विजए पण्णत्ते ? गोयमा ! णीलवन्तस्स दक्खिणेणं सीयाए उत्तरेणं णलिणकूडस्स पुरत्थिमेणं पंकावईए पच्चत्थिमेणं एत्थ णं मंगलावत्ते णामं विजए पण्णत्ते, जहा कच्छस्स विजए तथा एसो भाणियव्वो जाव मंगलावत्ते य इत्थ देवे० परिवसइ, से एएणट्ठेणं० । कहि णं भन्ते ! महाविदेहे वासे पंकावईकुंडे णामं कुण्डे पण्णत्ते ? गोयमा ! मंगलावत्तस्स० पुरत्थिमेणं पुक्खलविजयस्स पच्चत्थिमेणं णीलवन्तस्स दाहिणे णियंबे एत्थ णं पंकावई जाव कुण्डे पण्णत्ते तं चेव गाहावइकुण्डप्पमाणं जाव मंगलावत्तपुक्खलावत्त-विजए दुहा विभयमाणी २ अवसेसं तं चेव जं चेव गाहावईए । कहि णं भन्ते ! महाविदेहे वासे पुक्खलावत्ते णामं विजए पण्णत्ते ? गोयमा ! णीलवन्तस्स दाहिणेणं सीयाए उत्तरेणं पंकावईए पुरत्थिमेणं एगसेलस्स वक्खारपव्वयस्स पच्चत्थिमेणं एत्थ णं पुक्खलावत्ते णामं विजए पण्णत्ते जहा कच्छविजए तथा भाणियव्वं जाव पुक्खले य इत्थ देवे महिङ्खिए० पलिओवमट्ठिइए परिवसइ, से एएणट्ठेणं०, कहि णं भन्ते ! महाविदेहे वासे एगसेले णामं वक्खारपव्वए प० ? गो० ! पुक्खलावत्तचक्खवट्ठिविजयस्स पुरत्थिमेणं पोक्खलावईचक्खवट्ठिविजयस्स पच्चत्थिमेणं णीलवन्तस्स दक्खिणेणं सीयाए उत्तरेणं एत्थ णं एगसेले णामं वक्खारपव्वए पण्णत्ते चित्तकूडगमेणं णेयव्वो जाव देवा आसयन्ति०, चत्तारि कूडा, तं०-सिद्धकूडे एगसेलकूडे पुक्खलावत्तकूडे पुक्खलावईकूडे, कूडाणं तं चेव पञ्चसइयं परिमाणं जाव एगसेले य० देवे महिङ्खिए० । कहि णं भन्ते ! महाविदेहे वासे पुक्खलावई णामं चक्खवट्ठिविजए पण्णत्ते ? गोयमा ! णीलवन्तस्स दक्खिणेणं सीयाए उत्तरेणं उत्तरि-ल्लस्स सीयामुहवणस्स पच्चत्थिमेणं एगसेलस्स वक्खारपव्वयस्स पुरत्थिमेणं एत्थ णं

महाविदेहे वासे पुक्खलावई णामं विजए पण्णत्ते, उत्तरदाहिणायए एवं जहा कच्छ-  
विजयस्स जाव पुक्खलावई य इत्थ देवै० परिवसइ, से एएणट्ठेणं० । कहि णं भन्ते !  
महाविदेहे वासे सीयाए महाणईए उत्तरिण्णे सीयामुहवणे णामं वणे प० ? गोयमा !  
णीलवन्तस्स दक्खिणेणं सीयाए उत्तरेणं पुरत्थिमलवणसमुद्दस्स पच्चत्थिमेणं पुक्ख-  
लावइच्चक्खवट्ठिविजयस्स पुरत्थिमेणं एत्थ णं सीयामुहवणे णामं वणे पण्णत्ते, उत्तर-  
दाहिणायए पाईणपडीणविच्छिण्णे सोलसजोयणसमुद्दसाई पच्च य बाणउए जोयणसए  
दोण्णि य एगूणवीसइभाए जोयणस्स आयामेणं सीयाए महाणईए अन्तेणं दो जोयण-  
समुद्दसाई णव य बावीसे जोयणसए विक्खम्मेणं तयणंतरे च णं मायाए २  
परिहायमाणे २ णीलवन्तवासहरपव्वयंतरेणं एगं एगूणवीसइभागं जोयणस्स  
विक्खम्मेणंति, से णं एगाए पउमवरवेइयाए एगेण य वणसण्डेणं संपरिकिस्सत्ते  
वण्णओ सीयामुहवणस्स जाव देवा आसयन्ति०, एवं उत्तरिण्णं पासं समत्तं ।  
विजया भणिया । रायहाणीओ इमाओ—खेमा १ खेमपुरा २ चेव, रिट्ठा ३ रिट्ठपुरा  
४ तहा । खग्गी ५ मंजूसा ६ अविय, ओसही ७ पुंडरीगिणी ८ ॥ १ ॥ सोलस  
विजाहुरसेढीओ तावइयाओ आभिओगसेढीओ सव्वाओ इमाओ ईसाणस्स, सव्वेसु  
विजएसु कच्छवत्तव्वया जाव अट्ठो रायाणो सरिसणामगा विजएसु सोलसण्हं  
वक्खारपव्वयाणं चित्तकूडवत्तव्वया जाव कूडा चत्तारि २ बारसण्हं णईणं गाहावइव-  
त्तव्वया जाव उभओ पासिं दोहिं पउमवरवेइयाहिं वणसण्डेहि य० वण्णओ ॥ ९५ ॥  
कहि णं भन्ते ! जम्बुदीवे दीवे महाविदेहे वासे सीयाए महाणईए दाहिणिण्णे  
सीयामुहवणे णामं वणे पण्णत्ते ? एवं जह चेव उत्तरिण्णं सीयामुहवणं तह चेव  
दाहिणं पि भाणियव्वं, णवरं णिसहस्स वासहरपव्वयस्स उत्तरेणं सीयाए महाणईए  
दाहिणेणं पुरत्थिमलवणसमुद्दस्स पच्चत्थिमेणं वच्छस्स विजयस्स पुरत्थिमेणं एत्थ  
णं जम्बुदीवे दीवे महाविदेहे वासे सीयाए महाणईए दाहिणिण्णे सीयामुहवणे णामं  
वणे प०, उत्तरदाहिणायए तहेव सव्वं णवरं णिसहवासहरपव्वयंतरेणं एगमेगूणवीस-  
इभागं जोयणस्स विक्खम्मेणं किण्हं किण्होभासे जाव महया गन्वद्धणिं मुयंते  
जाव आसयन्ति० उभओ पासिं दोहिं पउमवरवेइयाहिं० वणवणओ इति । कहि णं  
भन्ते ! जम्बुदीवे दीवे महाविदेहे वासे वच्छे णामं विजए पण्णत्ते ? गोयमा !  
णिसहस्स वासहरपव्वयस्स उत्तरेणं सीयाए महाणईए दाहिणेणं दाहिणिण्णस्स सीया-  
मुहवणस्स पच्चत्थिमेणं तिउडस्स वक्खारपव्वयस्स पुरत्थिमेणं एत्थ णं जम्बुदीवे  
दीवे महाविदेहे वासे वच्छे णामं विजए पण्णत्ते तं चेव पमाणं सुसीमा रायहाणी  
१, तिउडे वक्खारपव्वए सुवच्छे विजए कुण्डला रायहाणी २, तत्तजला णई महा-

वच्छे विजए अपराजिया रायहाणी ३, वेसमणकूडे वक्खारपव्वए वच्छावई विजए पभंकरा रायहाणी ४, मत्तजला णई रम्मे विजए अंकावई रायहाणी ५, अंजणे वक्खारपव्वए रम्मणे विजए पम्हावई रायहाणी ६, उम्मतजला महाणई रमणिजे विजए सुभा रायहाणी ७, मायंजणे वक्खारपव्वए मंगलावई विजए रयणसंचया रायहाणीति ८, एवं जह चेव सीयाए महाणईए उत्तरं पासं तह चेव दक्खिणिहं भाणियव्वं, दाहिणिहसीयामुहवणाइ, इमे वक्खारकूडा, तं०-तिउडे १ वेसमणकूडे २ अंजणे ३ मायंजणे ४, [ णईउ तत्तजला १ मत्तजला २ उम्मतजला ३, ] विजया, तं०-वच्छे सुवच्छे महावच्छे, चउत्थे वच्छगावई । रम्मे रम्मए चेव, रमणिजे मंगलावई ॥ १ ॥ रायहाणीओ, तंजहा-सुसीमा कुण्डला चेव, अवराइय पहंकरा ! अंकावई पम्हावई, सुभा रयणसंचया ॥ २ ॥ वच्छस्स विजयस्स णिसहे दाहिणेणं सीया उत्तरेणं दाहिणिहसीयामुहवणे पुरत्थिमेणं तिउडे पच्चत्थिमेणं सुसीमा रायहाणी पमाणं तं चेवेति, वच्छाणंतरे तिउडे तओ सुवच्छे विजए एएणं क्रमेणं तत्तजला णई महावच्छे विजए वेसमणकूडे वक्खारपव्वए वच्छावई विजए मत्तजला णई रम्मे विजए अंजणे वक्खारपव्वए रम्मए विजए उम्मतजला णई रमणिजे विजए मायंजणे वक्खारपव्वए मंगलावई विजए ॥ ९६ ॥ कहि णं भन्ते ! जम्बुद्वीवे दीवे महाविदेहे वासे सोमणसे णामं वक्खारपव्वए पण्णत्ते ? गो० ! णिसहस्स वासहरपव्वयस्स उत्तरेणं मन्दरस्स पव्वयस्स दाहिणपुरत्थिमेणं मंगलावईविजयस्स पच्चत्थिमेणं देवकुराए० पुरत्थिमेणं एत्थ णं जम्बुद्वीवे २ महाविदेहे वासे सोमणसे णामं वक्खारपव्वए पण्णत्ते, उत्तरदाहिणायए पाईणपडीण-विच्छिण्णे जहा मालवन्ते वक्खारपव्वए तहा णवरं सव्वरययामए अच्छे जाव पडिरूवे, णिसहवासहरपव्वयंतं चत्तारि जोयणसयाइं उड्डं उच्चत्तेणं चत्तारि गाउय-सयाइं उव्वेहेणं सेसं तह्वे सव्वं णवरं अट्ठो से गोयमा ! सोमणसे णं वक्खारपव्वए बहवे देवा य देवीओ य सोमा सुमणा सोमणसे य इत्थ देवे महिङ्खिए जाव परिवसइ, से एएणट्ठेणं गोयमा ! जाव णिच्चे । सोमणसे णं भंते ! वक्खारपव्वए कइ कूडा प० ? गो० ! सत्त कूडा प०, तं०-सिद्धे १ सोमणसे २ विज बोद्धव्वे मंगलावईकूडे ३ । देवकुरु ४ विमल ५ कंचण ६ वसिद्धकूडे ७ य बोद्धव्वे ॥ १ ॥ एवं सव्वे पञ्चसइया कूडा, एएसिं पुच्छा दिसिविदिसाए भाणियव्वा जहा गन्धमायणस्स, विमलकञ्चण-कूडेसु णवरं देवयाओ सुवच्छा वच्छमिता य अवसिद्धेसु कूडेसु सरिसणामया देवा रायहाणीओ दक्खिणेणंति । कहि णं भन्ते ! महाविदेहे वासे देवकुरा णामं कुरा पण्णत्ता ? गोयमा ! मन्दरस्स पव्वयस्स दाहिणेणं णिसहस्स वासहरपव्वयस्स उत्तरेणं

विज्जुप्पहस्स वक्खारपव्वयस्स पुरत्थिमेणं सोमणसवक्खारपव्वयस्स पच्चत्थिमेणं  
 एत्थ णं महाविदेहे वासे देवकुरा णामं कुरा पण्णत्ता, पाईणपडीणायया उदीण-  
 दाहिणविच्छिण्णा इक्कारस जोयणसहस्साइं अट्ठ य बायाले जोयणसए दुण्णि य  
 एगूणवीसइभाए जोयणस्स विक्खम्भेणं जहा उत्तरकुराए वत्तव्वया जाव अणुसज्ज-  
 माणा पम्हगन्धा मियगन्धा अममा सहा तेयतली सणिचारीति ६ ॥ ९७ ॥ कहि  
 णं भन्ते ! देवकुराए २ चित्तविचित्तकूडा णामं दुवे पव्वया प० ? गो० ! णिसहस्स  
 वासहरपव्वयस्स उत्तरिक्खाओ चरिमंताओ अट्ठचोत्तीसे जोयणसए चत्तारि य  
 सत्तभाए जोयणस्स अवाहाए सीओयाए महाणईए पुरत्थिमपच्चत्थिमेणं उभओकूले  
 एत्थ णं चित्तविचित्तकूडा णामं दुवे पव्वया प०, एवं जच्चेव जमगपव्वयाणं० सच्चेव०,  
 एएसिं रायहाणीओ दक्खिणेणंति ॥ ९८ ॥ कहि णं भन्ते ! देवकुराए २ णिसहस्स  
 णामं दहे पण्णत्ते ? गो० ! तेसिं चित्तविचित्तकूडाणं पव्वयाणं उत्तरिक्खाओ चरिमन्ताओ  
 अट्ठचोत्तीसे जोयणसए चत्तारि य सत्तभाए जोयणस्स अवाहाए सीओयाए महाण-  
 ईए बहुमज्झदेसभाए एत्थ णं णिसहस्स णामं दहे पण्णत्ते, एवं जच्चेव णीलवंत-  
 उत्तरकुरुचन्देरावयमालवंताणं वत्तव्वया सच्चेव णिसहदेवकुरुसूरसुलसविज्जुप्पभाणं  
 णेयव्वा, रायहाणीओ दक्खिणेणंति ॥ ९९ ॥ कहि णं भन्ते ! देवकुराए २ कूड-  
 सामलिपेडे णामं पेडे पण्णत्ते ? गोयमा ! मन्दरस्स पव्वयस्स दाहिणपच्चत्थिमेणं  
 णिसहस्स वासहरपव्वयस्स उत्तरेणं विज्जुप्पभस्स वक्खारपव्वयस्स पुरत्थिमेणं  
 सीओयाए महाणईए पच्चत्थिमेणं देवकुरुपच्चत्थिमदस्स बहुमज्झदेसभाए एत्थ णं  
 देवकुराए कुराए कूडसामलीपेडे णामं पेडे प०, एवं जच्चेव जम्बूए सुदंसणाए  
 वत्तव्वया सच्चेव सामलीएवि भाणियव्वा णामविहूणा गरुलदेवे रायहाणी दक्खि-  
 णेणं अवसिट्ठं तं चेव जाव देवकुरु य इत्थ देवे० पलिओवमट्ठिइए परिवसइ, से  
 तेणट्ठेणं गो० ! एवं चुच्चइ-देवकुरा २, अदुत्तरं च णं० देवकुराए० ॥ १०० ॥  
 कहि णं भन्ते ! जम्बुद्वीवे २ महाविदेहे वासे विज्जुप्पमे णामं वक्खारपव्वए  
 पण्णत्ते ? गो० ! णिसहस्स वासहरपव्वयस्स उत्तरेणं मन्दरस्स पव्वयस्स दाहिण-  
 पच्चत्थिमेणं देवकुराए० पच्चत्थिमेणं पम्हस्स विजयस्स पुरत्थिमेणं एत्थ णं जम्बु-  
 द्वीवे २ महाविदेहे वासे विज्जुप्पमे० वक्खारपव्वए प०, उत्तरदाहिणायए एवं जहा  
 मालवन्ते णवरिं सव्वतवणिज्जमए अच्छे जाव देवा आसयन्ति० । विज्जुप्पमे णं  
 भन्ते ! वक्खारपव्वए कइ कूडा प० ? गो० ! णव कूडा प०, तं०-सिद्धकूडे  
 विज्जुप्पमकूडे देवकुरुकूडे पम्हकूडे कणगकूडे सोवत्थियकूडे सीओयाकूडे सयज्ज-  
 कूडे हरिकूडे । सिद्धे य विज्जुणामे देवकुरु पम्हकणगसोवत्थी । सीओया य सयज्ज-

लहरिकूडे चेव वोद्धवे ॥ १ ॥ एए हरिकूडवज्जा पञ्चसइया गेयव्वा, एएसिं कूडाणं पुच्छा दिसिविदिसाओ गेयव्वाओ जहा मालवन्तस्स हरिस्सहकूडे तह चेव हरिकूडे रायहाणी जह चेव दाहिणेणं चमरचंचा रायहाणी तह गेयव्वा, कणग-सोवत्थियकूडेसु वारिसेणवलाहयाओ दो देवयाओ अवसिट्ठेसु कूडेसु कूडसरिसणा-मया देवा रायहाणीओ दाहिणेणं, से केणट्ठेणं भन्ते ! एवं वुच्चइ-विज्जुप्पमे वक्खार-पव्वए २ ? गोयमा ! विज्जुप्पमे णं वक्खारपव्वए विज्जुमिव सव्वओ समन्ता ओभासेइ उज्जोवेइ पभासइ विज्जुप्पमे य इत्थ देवे जाव पलिओवमट्ठिइए परिवसइ, से एएणट्ठेणं गोयमा ! एवं वुच्चइ-विज्जुप्पमे ० २, अदुत्तरं च णं जाव णिच्चे ॥ १०१ ॥ एवं पम्हे विजए अस्सपुरा रायहाणी अंकावई वक्खारपव्वए १, सुपम्हे विजए सीहपुरा रायहाणी खीरोया महाणई २, महापम्हे विजए महापुरा रायहाणी पम्हावई वक्खारपव्वए ३, पम्हगावई विजए विजयपुरा रायहाणी सीयसोया महाणई ४, संखे विजए अवराइया रायहाणी आसीविसे वक्खारपव्वए ५, कुमुए विजए अरया रायहाणी अंतोवाहिणी महाणई ६, गल्लिणे विजए असोगा रायहाणी सुहावहे वक्खारपव्वए ७, गल्लिणावई विजए वीयसोगा रायहाणी ८ दाहिणिळ्ळे सीओयामुहवणसंडे, उत्तरिल्लेवि एमेव भाणियव्वे जहा सीयाए, वप्पे विजए विजया रायहाणी चन्दे वक्खारपव्वए १, सुवप्पे विजए जयन्ती रायहाणी उम्मिमालिणी णई २, महावप्पे विजए जयन्ती रायहाणी सूरे वक्खारपव्वए ३, वप्पावई विजए अपराइया रायहाणी फेणमालिणी णई ४, वग्गू विजए चक्कपुरा रायहाणी णागे वक्खारपव्वए ५, सुवग्गू विजए खग्गपुरा रायहाणी गंसीरमालिणी अंतरणई ६, गन्धिळे विजए अवज्झा रायहाणी देवे वक्खारपव्वए ७, गंधिलावई विजए अओज्झा रायहाणी ८, एवं मन्दरस्स पव्वयस्स पच्चत्थिमिळं पासं भाणि-यव्वं तत्थ ताव सीओयाए णईए दक्खिणिळ्ळे णं कूले इमे विजया, तं०-पम्हे सुपम्हे महापम्हे, चउत्थे पम्हगावई । संखे कुमुए गल्लिणे, अट्ठमे गल्लिणावई ॥ १ ॥ इमाओ रायहाणीओ, तं०-आसपुरा सीहपुरा महापुरा चेव हवइ विजय-पुरा । अवराइया य अरया असोग तह वीयसोगा य ॥ २ ॥ इमे वक्खारा, तंजहा-अंके पम्हे आसीविसे सुहावहे, एवं इत्थ परिवाडीए दो दो विजया कूडसरि-सणामया भाणियव्वा दिसा विदिसाओ य भाणियव्वाओ, सीओयामुहवणं च भाणियव्वं सीओयाए दाहिणिळ्ळे उत्तरिल्लं च, सीओयाए उत्तरिल्ले पासे इमे विजया, तंजहा-वप्पे सुवप्पे महावप्पे, चउत्थे वप्पयावई । वग्गू य सुवग्गू य, गंधिले गंधिलावई ॥ १ ॥ रायहाणीओ इमाओ, तंजहा-विजया वेजयन्ती जयन्ती अपरा-

जिया । चक्कपुरा खग्गपुरा हवइ अवज्झा अउज्झा य ॥ २ ॥ इमे वक्खारा,  
तंजहा-चन्दपव्वए १ सूरपव्वए २ गागपव्वए ३ देवपव्वए ४, इमाओ णईओ  
सीओयाए महान्णईए दाहिणिल्ले कूले-खीरोया सीहसोया अंतरवाहिणीओ णईओ  
३, उम्मिमालिणी १ फेणमालिणी २ गंभीरमालिणी ३ उत्तरिह्विजयाणन्तराउत्ति,  
इत्थ परिवाडीए दो दो कूडा विजयसरिसणामया भाणियव्वा, इमे दो दो कूडा  
अवट्ठिया, तंजहा-सिद्धकूडे पव्वयसरिसणामकूडे ॥ १०२ ॥ कहि णं भन्ते !  
जम्बुद्वीवे २ महाविदेहे वासे मन्दरे णामं पव्वए पण्णत्ते ? गोयमा ! उत्तरकुराए  
दक्खिण्णेणं देवकुराए उत्तरेणं पुव्वविदेहस्स वासस्स पच्चत्थिमेणं अवरविदेहस्स  
वासस्स पुरत्थिमेणं जम्बुद्वीवस्स २ बहुमज्झदेसभाए एत्थ णं जम्बुद्वीवे दीवे मन्दरे  
णामं पव्वए पण्णत्ते णवणउइजोयणसहस्साइं उट्ठं उच्चत्तेणं एगं जोयणसहस्सं  
उव्वेहेणं मूले दसजोयणसहस्साइं णवइं च जोयणाइं दस य एगारसभाए जोयणस्स  
विक्खम्भेणं धरणिण्यले दस जोयणसहस्साइं विक्खम्भेणं तयणन्तरं च णं मायाए २  
परिहायमाणे परिहायमाणे उवरितले एगं जोयणसहस्सं विक्खम्भेणं मूले एकतीसं  
जोयणसहस्साइं णव य दसुत्तरे जोयणसए तिण्णि य एगारसभाए जोयणस्स परि-  
क्खेवेणं धरणिण्यले एकतीसं जोयणसहस्साइं छच्च तेवीसे जोयणसए परिक्खेवेणं  
उवरितले तिण्णि जोयणसहस्साइं एगं च वावट्ठं जोयणसयं किंचिविसेसाहियं परिक्खे-  
वेणं मूले विच्छिण्णे मज्झे संखित्ते उवरिं तण्णए गोपुच्छसंठाणसंठिए सव्वरयणामए  
अच्छे सण्हेत्ति । से णं एगाए पउमवरवेइयाए एगेण य वणसंडेणं सव्वओ समन्ता  
संपरिक्खित्ते वण्णओत्ति, मन्दरे णं भन्ते ! पव्वए कइ वणा प० ? गो० ! चत्तारि  
वणा प०, तं०-भइसालवणे १ णन्दणवणे २ सोमणसवणे ३ पंडगवणे ४, कहि णं  
भन्ते ! मन्दरे पव्वए भइसालवणे णामं वणे प० ? गोयमा ! धरणिण्यले एत्थ णं मन्दरे  
पव्वए भइसालवणे णामं वणे पण्णत्ते, पाईणपडीणायाए उदीणदाहिणिविच्छिण्णे सोमण-  
सविज्जुप्पहगंधमायणमालवंतेहिं वक्खारपव्वएहिं सीयासीओयाहि य महान्णईहिं  
अट्ठभागपविभत्ते मन्दरस्स पव्वयस्स पुरत्थिमपच्चत्थिमेणं बावीसं बावीसं जोयणसह-  
स्साइं आयामेणं उत्तरदाहिणेणं अट्ठाइज्जाइं अट्ठाइज्जाइं जोयणसयाइं विक्खम्भेणंति,  
से णं एगाए पउमवरवेइयाए एगेण य वणसंडेणं सव्वओ समन्ता संपरिक्खित्ते दुण्हवि  
वण्णओ भाणियव्वो किण्हे किण्होभासे जाव देवा आसयन्ति सयन्ति०, मन्दरस्स णं  
पव्वयस्स उत्तरपुरत्थिमेणं भइसालवणं पण्णासं जोयणाइं ओगाहिता एत्थ णं चत्तारि  
णन्दपुक्खरिणीओ पण्णत्ताओ, तं०-पउमा १ पउमप्पमा २ चेव, कुमुया ३ कुमु-  
यप्पमा ४, ताओ णं पुक्खरिणीओ पण्णासं जोयणाइं आयामेणं पणवीसं जोयणाइं



विक्खम्ममेणं दसजोयणाइं उव्वेहेणं वण्णओ वेइयावणसंडाणं भाणियव्वो, चउद्दिसिं तोरणा जाव तासिं णं पुक्खरिणीणं बहुमज्झदेसभाए एत्थ णं मंह एगे ईसाणस्स देविंदरस्स देवरण्णो पासायवडिंसए पण्णत्ते पच्चजोयणसयाइं उड्ढं उच्चत्तेणं अट्ठाइज्जाइं जोयणसयाइं विक्खंमेणं अब्भुग्गयमूसिय एवं सपरिवारो पासायवडिंसओ भाणियव्वो, मंदरस्स णं एवं दाहिणपुरत्थिमेणं पुक्खरिणीओ उप्पल्लुग्गमा णलिणा उप्पला उप्पल्लुज्जला तं चेव पमाणं मज्झे पासायवडिंसओ सक्कस्स सपरिवारो तेणं चेव पमाणेणं दाहिणपच्चत्थिमेणवि पुक्खरिणीओ-भिंगा भिंगणिभा चेव, अंजणा अंजणप्पभा । पासायवडिंसओ सक्कस्स सीहासणं सपरिवारं । उत्तरपुरत्थिमेणं पुक्खरिणीओ-सिरि-कंता १ सिरिचन्दा २ सिरिमहिया ३ चेव सिरिणिलया ४ । पासायवडिंसओ ईसाणस्स सीहासणं सपरिवारंति । मन्दरे णं भन्ते ! पव्वए भइसालवणे कइ दिसाहत्थि-कूडा प० ? गो० ! अट्ठ दिसाहत्थिकूडा पण्णत्ता, तंजहा-पउमुत्तरे १ णीलवन्ते २, सुहत्थी ३ अंजणागिरी ४ । कुमुए य ५ पलासे य ६, वडिंसे ७ रोयणागिरी ८ ॥ १ ॥ कहिं णं भन्ते ! मन्दरे पव्वए भइसालवणे पउमुत्तरे णामं दिसाहत्थि-कूडे प० ? गोयमा ! मन्दरस्स पव्वयस्स उत्तरपुरत्थिमेणं पुरत्थिमिह्णाए सीयाए उत्तरेणं एत्थ णं पउमुत्तरे णामं दिसाहत्थिकूडे पण्णत्ते पच्चजोयणसयाइं उड्ढं उच्चत्तेणं पच्चगाउयसयाइं उव्वेहेणं एवं विक्खम्मपरिक्खेवो भाणियव्वो चुल्लहिमवन्तसरिसो, पासायाण य तं चेव पउमुत्तरो देवो रायहाणी उत्तरपुरत्थिमेणं १, एवं णीलवन्त-दिसाहत्थिकूडे मन्दरस्स दाहिणपुरत्थिमेणं पुरत्थिमिह्णाए सीयाए दक्खिणेणं एयस्सवि णीलवन्तो देवो रायहाणी दाहिणपुरत्थिमेणं २, एवं सुहत्थिदिसाहत्थिकूडे मंदरस्स दाहिणपुरत्थिमेणं दक्खिणिह्णाए सीओयाए पुरत्थिमेणं एयस्सवि सुहत्थी देवो रायहाणी दाहिणपुरत्थिमेणं ३, एवं चेव अंजणागिरिदिसाहत्थिकूडे मन्दरस्स दाहिणपच्चत्थिमेणं दक्खिणिह्णाए सीओयाए पच्चत्थिमेणं एयस्सवि अंजणागिरी देवो रायहाणी दाहिणपच्चत्थिमेणं ४, एवं कुमुए विदिसाहत्थिकूडे मन्दरस्स दाहिणपच्चत्थिमेणं पच्चत्थिमिह्णाए सीओयाए दक्खिणेणं एयस्सवि कुमुओ देवो रायहाणी दाहिणपच्चत्थिमेणं ५, एवं पलासे विदिसाहत्थिकूडे मन्दरस्स उत्तरपच्चत्थिमेणं पच्चत्थिमिह्णाए सीओयाए उत्तरेणं एयस्सवि पलासो देवो रायहाणी उत्तरपच्चत्थिमेणं ६, एवं वडिंसे विदिसाहत्थिकूडे मन्दरस्स० उत्तरपच्चत्थिमेणं उत्तरिह्णाए सीयाए महाणईए पच्चत्थिमेणं एयस्सवि वडिंसो देवो रायहाणी उत्तरपच्चत्थिमेणं ७, एवं रोयणागिरी दिसाहत्थिकूडे मंदरस्स उत्तरपुरत्थिमेणं उत्तरिह्णाए सीयाए पुरत्थिमेणं एयस्सवि रोयणागिरी देवो रायहाणी उत्तरपुरत्थिमेणं ८ ॥ १०३ ॥ कहिं णं भन्ते ! मन्दरे पव्वए णंदणवणे णामं

वणे पण्णत्ते ? गो० ! भद्दसालवणस्स बहुसमरमणिज्जाओ भूमिभागाओ पञ्चजोयणसयाई उद्धं उप्पइत्ता एत्थ णं मन्दरे पव्वए णन्दणवणे णामं वणे पण्णत्ते पञ्चजोयणसयाई चक्रवालविकखम्भेणं वट्टे वलयागारसंठाणसंठिए जे णं मन्दरं पव्वयं सव्वओ समन्ता संपरिक्खित्ताणं चिट्ठइत्ति णवजोयणसहस्साई णव य चउप्पण्णे जोयणसए छच्चैगारसभाए जोयणस्स वाहिं गिरिविक्खम्भो एगत्तीसं जोयणसहस्साई चत्तारि य अउणासीए जोयणसए किंचिविसेसाहिए वाहिं गिरिपरिरएणं अट्ठ जोयणसहस्साई णव य चउप्पण्णे जोयणसए छच्चैगारसभाए जोयणस्स अंतो गिरिविक्खम्भो अट्ठावीसं जोयणसहस्साई तिण्णि य सोलसुत्तरे जोयणसए अट्ठ य इक्कारसभाए जोयणस्स अंतो गिरिपरिरएणं, से णं एगाए पउमवरवेइयाए एगेण य वणसंडेणं सव्वओ समन्ता संपरिक्खित्ते वण्णओ जाव देवा आसयन्ति०, मंदरस्स णं पव्वयस्स विदिसासु पुक्खरिणीओ तं चेव पमाणं पुक्खरिणीणं पासायवडिंसगा तह चेव सक्केसाणाणं तेणं चेव पमाणेणं, णंदणवणे णं भन्ते ! कइ कूडा प० ? गोयमा ! णव कूडा पण्णत्ता, तंजहा-णन्दण-वणकूडे १ मन्दरकूडे २ णिसहकूडे ३ हिमवयकूडे ४ रययकूडे ५ रयगकूडे ६ सागरचित्तकूडे ७ वइरकूडे ८ बलकूडे ९ । कहि णं भन्ते ! णन्दणवणे णंदणवणकूडे णामं कूडे प० ? गोयमा ! मन्दरस्स पव्वयस्स उत्तरपुरत्थिमिल्लस्स पासायवडेंसयस्स दक्खिणेणं एत्थ णं णन्दणवणे णंदणवणे णामं कूडे पण्णत्ते० पञ्चसइया कूडा पुव्व-वणिग्या भाणियव्वा, देवी मेहंकरा रायहाणी विदिसाएत्ति १ एयाहिं चेव पुव्वामि-लावेणं णेयव्वा इमे कूडा इमाहिं दिसाहिं दाहिणपुरत्थिमिल्लस्स पासायवडेंसगस्स उत्तरेणं मन्दरे कूडे मेहवई देवी रायहाणी पुव्वेणं २ दाहिणपुरत्थिमिल्लस्स पासायवडेंसगस्स पच्चत्थिमेणं णिसहे कूडे सुमेहा देवी रायहाणी दक्खिणेणं ३ दक्खिणपच्चत्थिमिल्लस्स पासायवडेंसगस्स पुरत्थिमेणं हेमवए कूडे हेममालिणी देवी रायहाणी दक्खिणेणं ४ दाहिणपच्चत्थिमिल्लस्स पासायवडेंसगस्स उत्तरेणं रयए कूडे सुवच्छा देवी रायहाणी पच्च-त्थिमेणं ५ उत्तरपच्चत्थिमिल्लस्स पासायवडेंसगस्स दक्खिणेणं रयगे कूडे वच्छमिता देवी रायहाणी पच्चत्थिमेणं ६ उत्तरपच्चत्थिमिल्लस्स पासायवडेंसगस्स पुरत्थिमेणं सागरचित्ते कूडे वइरसेणा देवी रायहाणी उत्तरेणं ७ उत्तरपुरत्थिमिल्लस्स पासायवडेंसगस्स पच्चत्थिमेणं वइरकूडे बलाहया देवी रायहाणी उत्तरेणंति ८, कहि णं भन्ते ! णन्दणवणे बलकूडे णामं कूडे पण्णत्ते ? गोयमा ! मन्दरस्स पव्वयस्स उत्तरपुरत्थिमेणं एत्थ णं णन्दणवणे बलकूडे णामं कूडे प०, एवं जं चेव हरिस्सहकूडस्स पमाणं रायहाणी य तं चेव बलकूडस्सवि, णवरं बलो देवो रायहाणी उत्तरपुरत्थिमेणंति ॥ १०४ ॥ कहि णं भंते ! मन्दरए पव्वए सोमणसवणे णामं वणे प० ? गोयमा ! णन्दणवणस्स

बहुसमरमणिज्जाओ भूमिभागाओ अद्धतेवट्ठिं जोगणसहस्साइं उट्ठं उप्पइत्ता एत्थ णं मन्दरे पव्वए सोमणसवणे णामं वणे पणत्ते पच्चजोगणसयाइं चक्रवालविकखम्भेणं वट्टे वलयागारसंठाणसंठिए जे णं मन्दरं पव्वयं सव्वओ समन्ता संपरिक्खित्ताणं चिट्ठइ चत्तारि जोगणसहस्साइं दुण्णि य बावत्तरे जोगणसए अट्ठ य इक्कारसभाए जोगणस्स बाहिं गिरिविक्खम्भेणं तेरस जोगणसहस्साइं पच्च य एक्कारे जोगणसए छच्च इक्कारसभाए जोगणस्स बाहिं गिरिपरिरएणं तिण्णि जोगणसहस्साइं दुण्णि य बावत्तरे जोगणसए अट्ठ य इक्कारसभाए जोगणस्स अंतो गिरिविक्खम्भेणं दस जोगणसहस्साइं तिण्णि य अउणापण्णे जोगणसए तिण्णि य इक्कारसभाए जोगणस्स अंतो गिरिपरिरएणंति । से णं एगाए पउमवरवेइयाए एगेण य वणसंडेणं सव्वओ समन्ता संपरिक्खित्ते वण्णओ किण्हे किण्होभासे जाव आसयन्ति० एवं कूडवज्जा सच्चैव णन्दणवणवत्तव्वया भाणियव्वा, तं चैव ओगाहिऊण जाव पासायवडेंसगा सक्कीसाणाणंति ॥ १०५ ॥ कहि णं भंते ! मन्दरपव्वए पंडगवणे णामं वणे प० ? गो० ! सोमणसवणस्स बहुसमरमणिज्जाओ भूमिभागाओ छत्तीसं जोगणसहस्साइं उट्ठं उप्पइत्ता एत्थ णं मन्दरे पव्वए सिहरतले पंडगवणे णामं वणे पणत्ते चत्तारि चउणउए जोगणसए चक्रवालविकखम्भेणं वट्टे वलयागारसंठाणसंठिए, जे णं मंदर-चूलियं सव्वओ समन्ता संपरिक्खित्ताणं चिट्ठइ तिण्णि जोगणसहस्साइं एणं च बावट्ठं जोगणसयं किंचिविसेसाहियं परिक्खेवेणं, से णं एगाए पउमवरवेइयाए एगेण य वण-संडेणं जाव किण्हे० देवा आसयन्ति०, पंडगवणस्स बहुमज्झदेसभाए एत्थ णं मंदर-चूलिया णामं चूलिया पणत्ता चत्तालीसं जोगणाइं उट्ठं उच्चतेणं मूले बारस जोगणाइं विक्खम्भेणं मज्झे अट्ठ जोगणाइं विक्खम्भेणं उप्पि चत्तारि जोगणाइं विक्खम्भेणं मूले साइरेगाइं सत्ततीसं जोगणाइं परिक्खेवेणं मज्झे साइरेगाइं पणवीसं जोगणाइं परिक्खेवेणं उप्पि साइरेगाइं बारस जोगणाइं परिक्खेवेणं मूले विच्छिण्णा मज्झे संखित्ता उप्पि तणुया गोपुच्छसंठाणसंठिया सव्ववेसलियामइं अच्छा०, सा णं एगाए पउमवर-वेइयाए जाव संपरिक्खित्ता इति उप्पि बहुसमरमणिज्जे भूमिभागे जाव विहरंति, एवं जच्चैव सोमणसे पुव्ववण्णिओ गमो पुक्खरिणीणं पासायवडेंसगाण य सो चैव णेयव्वो जाव सक्कीसाणवडेंसगा तेणं चैव परिमाणेणं ॥ १०६ ॥ पण्डगवणे णं भन्ते ! वणे कइ अभिसेयसिलाओ पणत्ताओ ? गोयमा ! चत्तारि अभिसेयसिलाओ प०, तं०-पंडुसिला १ पण्डुकंबलसिला २ रत्तसिला ३ रत्तकम्बलसिलेति ४ । कहि णं भन्ते ! पण्डगवणे पण्डुसिला णामं सिला पणत्ता ? गोयमा ! मन्दरचूलियाए पुरत्थिमेणं पंडगवणपुरत्थिमपेरंते एत्थ णं पंडगवणे पंडुसिला णामं सिला पणत्ता,

उत्तरदाहिणायया पाईणपडीणविच्छिण्णा अद्धचन्दसंठाणसंठिया पंचजोयणसयाई  
 आयामेणं अद्धाइजाई जोयणसयाई विक्खम्मेणं चत्तारि जोयणाई वाहल्लेणं सव्वक-  
 णगामई अच्छा वेइयावणसंडेणं सव्वओ समन्ता संपरिक्खत्ता वण्णओ, तीसे णं  
 पण्डुसिलाए चउदिसिं चत्तारि तिसोवाणपडिह्वगा पण्णत्ता जाव तोरणा वण्णओ,  
 तीसे णं पण्डुसिलाए उप्पि बहुसमरमणिज्जे भूमिभागे पण्णत्ते जाव देवा आसयन्ति०,  
 तस्स णं बहुसमरमणिज्जस्स भूमिभागस्स बहुमज्झदेसभाए उत्तरदाहिणेणं एत्थ णं  
 दुवे सीहासणा पण्णत्ता पच्च धणुसयाई आयामविक्खम्ममेणं अद्धाइजाई धणुसयाई  
 वाहल्लेणं सीहासणवण्णओ भाणियव्वो विजयदूसवज्जोत्ति । तत्थ णं जे से उत्तरिल्ले  
 सीहासणे तत्थ णं बहूहिं भवणवइवाणमन्तरजोइसियवेमाणिएहिं देवेहिं देवीहि य  
 कच्छाइया तित्थयरा अभिसिच्चन्ति, तत्थ णं जे से दाहिणिंल्ले सीहासणे तत्थ णं  
 बहूहिं भवण जाव वेमाणिएहिं देवेहिं देवीहि य वच्छाइया तित्थयरा अभि-  
 सिच्चन्ति । कहि णं भन्ते ! पण्डगवणे पण्डुकंबलसिला णामं सिला पण्णत्ता ?  
 गोयमा ! मन्दरचूलियाए दक्खिणेणं पण्डगवणदाहिणपेरंते एत्थ णं पंडगवणे  
 पंडुकंबलसिला णामं सिला पण्णत्ता, पाईणपडीणायया उत्तरदाहिणविच्छिण्णा एवं तं  
 चेव पमाणं वत्तव्वया य भाणियव्वा जाव तस्स णं बहुसमरमणिज्जस्स भूमिभागस्स  
 बहुमज्झदेसभाए एत्थ णं महं एगे सीहासणे प० तं चेव सीहासणपमाणं तत्थ णं  
 बहूहिं भवणवइ जाव भारहगा तित्थयरा अहिसिच्चन्ति, कहि णं भन्ते ! पण्डगवणे  
 रत्तसिला णामं सिला प० ? गो० ! मन्दरचूलियाए पच्चत्थिमेणं पण्डगवणपच्चत्थिम-  
 पेरंते एत्थ णं पण्डगवणे रत्तसिला णामं सिला पण्णत्ता, उत्तरदाहिणायया पाईण-  
 पडीणविच्छिण्णा जाव तं चेव पमाणं सव्वतवणिज्जमई अच्छा० उत्तरदाहिणेणं एत्थ  
 णं दुवे सीहासणा पण्णत्ता, तत्थ णं जे से दाहिणिंल्ले सीहासणे तत्थ णं बहूहिं  
 भवण० पम्हाइया तित्थयरा अहिसिच्चन्ति, तत्थ णं जे से उत्तरिल्ले सीहासणे तत्थ  
 णं बहूहिं भवण जाव वप्पाइया तित्थयरा अहिसिच्चन्ति, कहि णं भन्ते ! पण्डगवणे  
 रत्तकंबलसिला णामं सिला पण्णत्ता ? गोयमा ! मन्दरचूलियाए उत्तरेणं पंडगवण-  
 उत्तरचरिमंते एत्थ णं पंडगवणे रत्तकंबलसिला णामं सिला पण्णत्ता, पाईणपडीणा-  
 यया उदीणदाहिणविच्छिण्णा सव्वतवणिज्जमई अच्छा जाव मज्झदेसभाए सीहासणं,  
 तत्थ णं बहूहिं भवणवइ जाव देवेहिं देवीहि य एरावयगा तित्थयरा अहिसिच्चन्ति  
 ॥ १०७ ॥ मन्दरस्स णं भन्ते ! पव्वयस्स कइ कण्डा पण्णत्ता ? गोयमा ! तओ कंडा  
 पण्णत्ता, तंजहा-हिट्टिल्ले कंडे मज्झिल्ले कण्डे उवरिल्ले कण्डे, मन्दरस्स णं भन्ते ! पव्वयस्स  
 हिट्टिल्ले कण्डे कइविहे पण्णत्ते ? गोयमा ! चउव्विहे पण्णत्ते, तंजहा-पुडवी १ उवले २

वइरे ३ सक्करा ४, मज्झिमिल्ले णं भन्ते ! कण्डे कइविहे ५० ? गोयमा ! चउव्विहे  
 पण्णत्ते, तंजहा-अंके १ फलिहे २ जायरुवे ३ रयए ४, उवरिल्ले० कण्डे कइविहे  
 पण्णत्ते ? गोयमा ! एगागारे पण्णत्ते सव्वजम्बूणयामए, मन्दरस्स णं भन्ते ! पव्वयस्स  
 हेट्ठिल्ले कण्डे केवइयं बाहल्लेणं ५० ? गोयमा ! एगं जोयणसहरस्सं बाहल्लेणं पण्णत्ते,  
 मज्झिमिल्ले० कण्डे पुच्छा, गोयमा ! तेवट्ठिं जोयणसहरस्साइं बाहल्लेणं ५०, उवरिल्ले  
 पुच्छा, गोयमा ! छत्तीसं जोयणसहरस्साइं बाहल्लेणं ५०, एवामेव सपुव्वावरेणं  
 मन्दरे पव्वए एगं जोयणसयसहरस्सं सव्वग्गेणं पण्णत्ते ॥ १०८ ॥ मन्दरस्स  
 णं भन्ते ! पव्वयस्स कइ णामधेज्जा पण्णत्ता ? गोयमा ! सोलस णामधेज्जा पण्णत्ता,  
 तंजहा-मन्दर १ मेह २ मणोरम ३ सुदंसण ४ सयंपमे य ५ गिरिराया ६ ।  
 रयणोच्चय ७ सिलोच्चय ८ मज्झे लोगस्स ९ णामी य १० ॥ १ ॥ अच्छे य ११  
 सूरियावत्ते १२, सूरियावरणे १३ तिया । उत्तमे १४ य दिसादी य १५, वडेंसेति  
 १६ य सोलसे ॥ २ ॥ से केणट्ठेणं भन्ते ! एवं वुच्चइ-मन्दरे पव्वए २ ? गोयमा !  
 मन्दरे पव्वए मन्दरे णामं देवे परिवसइ महिण्णिए जाव पल्लोवमट्ठिए, से  
 तेणट्ठेणं गोयमा ! एवं वुच्चइ-मन्दरे पव्वए २, अटुत्तरं तं चेवत्ति ॥ १०९ ॥  
 कहि णं भन्ते ! जम्बुदीवे दीवे णीलवन्ते णामं वासहरपव्वए पण्णत्ते ? गोयमा !  
 महाविदेहस्स वासस्स उत्तरेणं रम्मगवासस्स दक्खिणेणं पुरत्थिमिल्लवणसमुद्स्स  
 पच्चत्थिमेणं पच्चत्थिमलवणसमुद्स्स पुरत्थिमेणं एत्थ णं जम्बुदीवे २ णीलवन्ते  
 णामं वासहरपव्वए पण्णत्ते, पाईणपडीणायए उदीणदाहिणविच्छिण्णे णिसहवत्तव्वया  
 णीलवन्तस्स भाणियव्वा, णवरं जीवा दाहिणेणं धणुं उत्तरेणं एत्थ णं केसरिइहो,  
 दाहिणेणं सीया महाणइ पवूढा समाणी उत्तरकुरुं एजेमाणी २ जमगपव्वए णील-  
 वन्तउत्तरकुरुचन्देरावयमालवन्तइहे य दुहा विभयमाणी २ चउरासीए सलिला-  
 सहस्सेहिं आपूरेमाणी २ भइसालवणं एजेमाणी २ मन्दरं पव्वयं दोहिं जोयणेहिं  
 असंपत्ता पुरत्थाभिमुही आवत्ता समाणी अहे मालवन्तवक्खारपव्वयं दालइत्ता  
 मन्दरस्स पव्वयस्स पुरत्थिमेणं पुव्वविदेहवासं दुहा विभयमाणी २ एगमेगाओ चक्क-  
 वट्ठिविजयाओ अट्ठावीसाए २ सलिलासहस्सेहिं आपूरेमाणी २ पच्चहिं सलिलासयसह-  
 स्सेहिं वत्तीसाए य सलिलासहस्सेहिं समग्गा अहे विजयस्स दारस्स जगइं दालइत्ता  
 पुरत्थिमेणं लवणसमुद्दं समप्पेइ, अवसिट्ठं तं चेवत्ति । एवं णारिकंतावि उत्तराभिमुही  
 णेयव्वा, णवरमिमं णाणत्तं गन्धावइवट्ठवेयङ्कपव्वयं जोयणेणं असंपत्ता पच्चत्थाभिमुही  
 आवत्ता समाणी अवसिट्ठं तं चेव पव्वहे य मुहे य जहा हरिकन्तासलिला इति ।  
 णीलवन्ते णं भन्ते ! वासहरपव्वए कइ कूडा पण्णत्ता ? गोयमा ! णव कूडा ५०,

तंजहा-सिद्धकूडे०, सिद्धे १ णीले २ पुव्वविदेहे ३ सीया य ४ कित्ति ५ णारी य ६ । अवरविदेहे ७ रम्मगकूडे ८ उवर्दसणे चेव ९ ॥ १ ॥ सव्वे एए कूडा पञ्च-सइया रायहाणीउ उत्तरेणं । से केणट्ठेणं भन्ते ! एवं वुच्चइ-णीलवन्ते वासहरपव्वए २ ? गोयमा ! णीले णीलोभासे णीलवन्ते य इत्थ देवे महिद्धिए जाव परिवसइ सव्ववेरुलियामए णीलवन्ते जाव णिच्चेत्ति ॥ ११० ॥ कहि णं भन्ते ! जम्बुद्दीवे २ रम्मए णामं वासे पण्णत्ते ? गो० ! णीलवन्तस्स उत्तरेणं रुप्पिस्स दक्खिणेणं पुरत्थिमलवणसमुद्दस्स पच्चत्थिमेणं पच्चत्थिमलवणसमुद्दस्स पुरत्थिमेणं एवं जह चेव हरिवासं तह चेव रम्मयं वासं भाणियव्वं, णवरं दक्खिणेणं जीवा उत्तरेणं धणुं अवसेसं तं चेव । कहि णं भन्ते ! रम्मए वासे गन्धावई णामं वट्ठेयद्धु-पव्वए पण्णत्ते ? गोयमा ! णरकन्ताए पच्चत्थिमेणं णारीकन्ताए पुरत्थिमेणं रम्म-गवासस्स वहुमज्झदेसभाए एत्थ णं गन्धावई णामं वट्ठेयद्धुपव्वए पण्णत्ते, जं चेव वियडावइस्स तं चेव गन्धावइस्सवि वत्तव्वं, अट्ठो बहवे उप्पलाई जाव गंधा-वईवण्णाई गन्धावइप्पभाई पउमे य इत्थ देवे महिद्धिए जाव पल्लिओवमट्ठिइए परिवसइ, रायहाणी उत्तरेणंति । से केणट्ठेणं भन्ते ! एवं वुच्चइ-रम्मए वासे २ ? गोयमा ! रम्मगवासे णं रम्मे रम्मए रमणिजे रम्मए य इत्थ देवे जाव परिवसइ, से तेणट्ठेणं० । कहि णं भन्ते ! जम्बुद्दीवे २ रुप्पी णामं वासहरपव्वए पण्णत्ते ? गोयमा ! रम्मग-वासस्स उत्तरेणं हेरणवयवासस्स दक्खिणेणं पुरत्थिमलवणसमुद्दस्स पच्चत्थिमेणं पच्चत्थिमलवणसमुद्दस्स पुरत्थिमेणं एत्थ णं जम्बुद्दीवे दीवे रुप्पी णामं वासहरपव्वए पण्णत्ते, पाईणपडीणायए उदीणदाहिणविच्छिण्णे, एवं जा चेव महाहिमवन्तवत्तव्वया सा चेव रुप्पिस्सवि, णवरं दाहिणेणं जीवा उत्तरेणं धणुं अवसेसं तं चेव महापुण्डरीए दहे णरकन्ता णई दक्खिणेणं णेयव्वा जहा रोहिया पुरत्थिमेणं गच्छइ, रुप्पकूला उत्तरेणं णेयव्वा जहा हरिकन्ता पच्चत्थिमेणं गच्छइ, अवसेसं तं चेवत्ति । रुप्पिमि णं भन्ते ! वासहरपव्वए कइ कूडा प० ? गो० ! अट्ठ कूडा प०, तं०-सिद्धे १ रुप्पी २ रम्मग ३ णरकन्ता ४ बुद्धि ५ रुप्पकूला य ६ । हेरणवय ७ मणिकं वण ८ अट्ठ य रुप्पिमि कूडाई ॥ १ ॥ सव्वेवि एए पंचसइया रायहाणीओ उत्तरेणं । से केणट्ठेणं भन्ते ! एवं वुच्चइ-रुप्पी वासहरपव्वए २ ? गोयमा ! रुप्पीणामवासहरपव्वए रुप्पी रुप्पट्ठे रुप्पोभासे सव्वरुप्पामए रुप्पी य इत्थ देवे... पल्लिओवमट्ठिइए परिवसइ, से एएणट्ठेणं गोयमा ! एवं वुच्चइत्ति । कहि णं भन्ते ! जम्बुद्दीवे २ हेरणवए णामं वासे पण्णत्ते ? गो० ! रुप्पिस्स उत्तरेणं सिहरिस्स दक्खिणेणं पुरत्थिमलवणसमुद्दस्स पच्चत्थिमेणं पच्चत्थिमलवणसमुद्दस्स पुरत्थिमेणं एत्थ णं जम्बुद्दीवे दीवे हेरणवए णामं

वासे पण्णत्ते, एवं जह चेव हेमवयं तह चेव हेरण्णवयपि भाणियव्वं, णवरं जीवा दाहि-  
णेणं उत्तरेणं धणुं अवसिट्ठं तं चेवत्ति । कहि णं भन्ते ! हेरण्णवए वासे मालवन्तपरियाए  
णामं वट्टवेयङ्गपव्वए प० ? गो० ! सुवण्णकूलाए पच्चत्थिमेणं रुप्पकूलाए पुरत्थिमेणं एत्थ  
णं हेरण्णवयस्स वासस्स बहुमज्झदेसभाए मालवन्तपरियाए णामं वट्टवेयङ्गपव्वए प०  
जह चेव सदावइ० तह चेव मालवन्तपरियाएवि, अट्ठो उप्पलाई पउमाई मालवन्त-  
प्पभाई मालवन्तवण्णाई मालवन्तवण्णाभाई पभासे य इत्थ देवे महिङ्घि... पलिओव-  
मट्ठिइए परिवसइ, से एएणट्ठेणं०, रायहाणी उत्तरेणंति । से केणट्ठेणं भन्ते ! एवं  
बुच्चइ-हेरण्णवए वासे २ ? गोयमा ! हेरण्णवए णं वासे रुप्पीसिहरीहिं वासहर-  
पव्वएहिं दुहओ समवगूढे णिच्चं हिरण्णं दलइ णिच्चं हिरण्णं मुंचइ णिच्चं हिरण्णं पगा-  
सइ हेरण्णवए य इत्थ देवे परिवसइ०, से एएणट्ठेणंति । कहि णं भन्ते ! जम्बुदीवे दीवे  
सिहरी णामं वासहरपव्वए पण्णत्ते ? गोयमा ! हेरण्णवयस्स उत्तरेणं एरावयस्स दाहि-  
णेणं पुरत्थिमलवणसमुद्दस्स० पच्चत्थिमलवणसमुद्दस्स पुरत्थिमेणं, एवं जह चेव बुल्लहि-  
मवन्तो तह चेव सिहरीवि णवरं जीवा दाहिणेणं धणुं उत्तरेणं अवसिट्ठं तं चेव पुण्डरीए  
दहे सुवण्णकूला महाणई दाहिणेणं णेयव्वा जहा रोहियंसा पुरत्थिमेणं गच्छइ, एवं  
जह चेव गंगासिन्धूओ तह चेव रत्तारत्तवईओ णेयव्वाओ पुरत्थिमेणं रत्ता पच्चत्थिमेणं  
रत्तवई अवसिट्ठं तं चेव [ अवसेसं भाणियव्वंति ] । सिहरिम्मि णं भन्ते ! वासह-  
रपव्वए कइ कूडा पण्णत्ता ? गो० ! इक्कारस कूडा प०, तं०-सिदकूडे १ सिहरिकूडे २  
हेरण्णवयकूडे ३ सुवण्णकूलाकूडे ४ सुरादेवीकूडे ५ रत्ताकूडे ६ लच्छीकूडे ७  
रत्तवईकूडे ८ इलादेवीकूडे ९ एरावयकूडे १० तिगिच्छिकूडे ११, एवं सव्वेवि  
कूडा पंचसइया रायहाणीओ उत्तरेणं । से केणट्ठेणं भन्ते ! एवमुच्चइ-सिहरिवासह-  
रपव्वए २ ? गोयमा ! सिहरिम्मि वासहरपव्वए बहवे कूडा सिहरिंसाणसंठिया  
सव्वरयणामया सिहरी य इत्थ देवे जाव परिवसइ, से तेणट्ठेणं०, कहि णं भन्ते !  
जम्बुदीवे दीवे एरावए णामं वासे पण्णत्ते ? गोयमा ! सिहरिस्स० उत्तरेणं उत्तरलव-  
णसमुद्दस्स दक्खिणेणं पुरत्थिमलवणसमुद्दस्स पच्चत्थिमेणं पच्चत्थिमलवणसमुद्दस्स  
पुरत्थिमेणं एत्थ णं जम्बुदीवे दीवे एरावए णामं वासे पण्णत्ते, खाणुबहुले कंटग-  
बहुले एवं जच्चेव भरहस्स वत्तव्वया सच्चेव सव्वा णिरवसेसा णेयव्वा सओअवणा  
सणिक्खमणा सपरिनिव्वाणा णवरं एरावओ चक्कवट्ठी एरावओ देवो, से तेणट्ठेणं०  
एरावए वासे २ ॥ १११ ॥ चउत्थो वक्खारो समत्तो ॥

जया णं एकमेकं चक्कवट्ठिविजए भगवन्तो तित्थयरा समुप्पजन्ति तेणं कालेणं  
तेणं समएणं अहोलोगवत्थव्वाओ अट्ठ दिसाकुमारीओ महत्तरियाओ सएहिं २ कूडेहिं

सएहिं २ भवणेहिं सएहिं २ पासायवडेंसएहिं पत्तेयं २ चउहिं सामाणियसाहस्सीहिं  
चउहिं महत्तरियाहिं सपरिवाराहिं सत्तिहिं अणिएहिं सत्तिहिं अणियाहिंवईहिं सोलसएहिं  
आयरक्खदेवसाहस्सीहिं अणेहिं य बहूहिं भवणवइवाणमन्तरेहिं देवेहिं देवीहिं य  
सद्धिं संपरिवुडाओ महया हयणट्ठगीयवाइय जाव भोगभोगाईं भुंजमाणीओ विहरंति,  
तंजहा-भोगंकरा १ भोगवई २, सुभोगा ३ भोगमालिणी ४ । तोयधारा ५ विचित्ता  
य ६, पुप्फमाला ७ अणिंदिया ८ ॥ १ ॥ तए णं तासिं अहेलोगवत्थव्वाणं अट्ठण्हं  
दिसाकुमारीणं मयहरियाणं पत्तेयं पत्तेयं आसणाईं चलंति, तए णं ताओ अहेलोग-  
वत्थव्वाओ अट्ठ दिसाकुमारीओ महत्तरियाओ पत्तेयं २ आसणाईं चलियाईं पासन्ति २ ता  
ओहिं पउंजंति पउंजित्ता भगवं तित्थयरं ओहिणा आभोएंति २ ता अण्ण-  
मण्णं सद्दविति २ ता एवं वयासी-उप्पण्णे खलु भो ! जम्बुद्वीवे दीवे भयवं  
तित्थयरं तं जीयमेयं तीयपच्चुप्पणमणागयाणं अहेलोगवत्थव्वाणं अट्ठण्हं दिसाकु-  
मारीमहत्तरियाणं भगवओ तित्थगरस्स जम्मणमहिमं करेतए, तं गच्छामो णं अम्हे-  
वि भगवओ जम्मणमहिमं करेमोत्तिकट्ठु एवं वयंति २ ता पत्तेयं २ आभिओगिए  
देवे सद्दवेंति २ ता एवं वयासी-खिप्पामेव भो देवाणुप्पिया ! अणेगखम्मसयस-  
णिविट्ठे लीलट्ठिय० एवं विमाणवण्णओ भाणियव्वो जाव जोयणविच्छिण्णे दिव्वे  
जाणविमाणे विउव्वित्ता एयमाणत्तियं पच्चप्पिणहत्ति, तए णं ते आभिओगा देवा  
अणेगखम्मसय जाव पच्चप्पिणंति, तए णं ताओ अहेलोगवत्थव्वाओ अट्ठ दिसाकु-  
मारीमहत्तरियाओ हट्ठुट्ठु० पत्तेयं २ चउहिं सामाणियसाहस्सीहिं चउहिं महत्तरि-  
याहिं जाव अणेहिं बहूहिं देवेहिं देवीहिं य सद्धिं संपरिवुडाओ ते दिव्वे जाणविमाणे  
दुरूहंति दुरूहिता सव्विद्वीए सव्वजुईए घणमुइंगणवपवाइयरवेणं ताए उक्किट्ठाए जाव  
देवगईए जेणेव भगवओ तित्थगरस्स जम्मणणगरे जेणेव० तित्थयरस्स जम्मणभवणे  
तेणेव उवागच्छन्ति २ ता भगवओ तित्थयरस्स जम्मणभवणस्स उत्तरपुरत्थिमे  
दिसीभाए ईसिं चउरंगुलमसंपत्ते धरणियले ते दिव्वे जाणविमाणे ठविति ठवित्ता  
पत्तेयं २ चउहिं सामाणियसाहस्सीहिं जाव सद्धिं संपरिवुडाओ दिव्वेहिंतो जाणविमा-  
णेहिंतो पच्चोरुहंति २ ता सव्विद्वीए जाव णाइएणं जेणेव भगवं तित्थयरं तित्थय-  
रमाया य तेणेव उवागच्छन्ति २ ता भगवं तित्थयरं तित्थयरमायरं च तिखुत्तो  
आयाहिणपयाहिणं करेंति २ ता पत्तेयं २ करयलपरिगगहियं सिरसावत्तं मत्थए  
अंजलिं कट्ठु एवं वयासी-णमोऽत्थु ते रयणकुच्छिधारिए जगप्पईवदाईए सव्वजग-  
मंगलस्स चक्खुणो य मुत्तस्स सव्वजगजीववच्छलस्स हियकारगमगदेसियवाणि-  
द्धिविभुपभुस्स जिणस्स णायगस्स बुहस्स बोहगस्स सव्वलोगणाहस्स



णिम्ममस्स पवरकुलसमुब्भवस्स जाईए खत्तियस्स जंसि लोगुत्तमस्स जणणी घण्णासि तं पुण्णासि कयत्थासि अम्हे णं देवाणुप्पिए ! अहेलोगवत्थव्वाओ अट्ठ दिसाकुमारीमहत्तरियाओ भगवओ तित्थयरस्स जम्मणमहिमं करिस्सामो तण्णं तुब्भाहिं ण भाइयव्वंतिकट्ठु उत्तरपुरत्थिमं दिसीभागं अवक्कमन्ति २ ता वेउव्वियसमुग्घाएणं समोहणंति २ ता संखिज्जाई जोयणाइं दंडं णिसिरंति, तंजहा-रयणाणं जाव संवट्ठगवाए विउव्वंति २ ता तेणं सिवेणं मउएणं मारुएणं अणुद्धुएणं भूमितलविमलकरणेणं मणहरेणं सव्वोउयसुरहिकुसुमगन्धाणुवासिएणं पिण्डिमणीहारिमेणं गन्धुद्धुएणं तिरियं पवाइएणं भगवओ तित्थयरस्स जम्मणभवणस्स सव्वओ समन्ता जोयणपरिमण्डलं से जहाणामए-कम्मगरदारए सिया जाव तहेव जं तत्थ तणं वा पत्तं वा कट्ठं वा कयवरं वा असुइमच्चोक्खं पूइयं दुब्भिमगन्धं तं सव्वं आहुणिय २ एगन्ते एडेंति २ ता जेणेव भगवं तित्थयरे तित्थयरमाया य तेणेव उवागच्छन्ति २ ता भगवओ तित्थयरस्स तित्थयरमायाए य अदूरसामन्ते आगायमाणीओ परिगायमाणीओ चिट्ठंति ॥ ११२ ॥ तेणं कालेणं तेणं समएणं उड्डुलोगवत्थव्वाओ अट्ठ दिसाकुमारीमहत्तरियाओ सएहिं २ कूडेहिं सएहिं २ भवणेहिं सएहिं २ पासायवडेंसएहिं पत्तेयं २ चउहिं सामाणियसाहस्सीहिं एवं तं चेव पुव्ववणियं जाव विहरंति, तंजहा-मेहंकरा १ मेहवई २, सुमेहा ३ मेहमालिणी ४ । सुवच्छा ५ वच्छमिता य ६, वारिसेणा ७ बलाहगा ८ ॥ १ ॥ तए णं तासिं उड्डुलोगवत्थव्वाणं अट्ठण्हं दिसाकुमारीमहत्तरियाणं पत्तेयं २ आसणाइं चलन्ति, एवं तं चेव पुव्ववणियं भाणियव्वं जाव अम्हे णं देवाणुप्पिए ! उड्डुलोगवत्थव्वाओ अट्ठ दिसाकुमारीमहत्तरियाओ जेणं भगवओ तित्थयरस्स जम्मणमहिमं करिस्सामो तेणं तुब्भाहिं ण भाइयव्वंतिकट्ठु उत्तरपुरत्थिमं दिसीभागं अवक्कमन्ति २ ता जाव अब्भवहलए विउव्वन्ति २ ता जाव तं णिहयरयं णट्ठरयं भट्ठरयं पसंतरयं उवसंतरयं करेंति २ ता खिप्पामेव पञ्चुवसमन्ति, एवं पुप्फवड्डंस्ति पुप्फवासं वासंति वासित्ता जाव कालागुरुपवर जाव सुरवराभिगमणजोगं करेंति २ ता जेणेव भयवं तित्थयरे तित्थयरमाया य तेणेव उवागच्छन्ति २ ता जाव आगायमाणीओ परिगायमाणीओ चिट्ठंति ॥ ११३ ॥ तेणं कालेणं तेणं समएणं पुरत्थिमवत्थगवत्थव्वाओ अट्ठ दिसाकुमारीमहत्तरियाओ सएहिं २ कूडेहिं तहेव जाव विहरंति, तंजहा-णंदुत्तरा य १ णन्दा २ आणन्दा ३ णंदिवद्धणा ४ । विजया य ५ वेजयन्ती ६, जयन्ती ७ अपराजिया ८ ॥ १ ॥ सेसं तं चेव जाव तुब्भाहिं ण भाइयव्वंतिकट्ठु भगवओ तित्थयरस्स तित्थयरमायाए य पुरत्थिमेणं आयंसहत्थगयाओ आगायमाणीओ परिगायमाणीओ चिट्ठन्ति । तेणं

कालेणं तेणं समएणं दाहिणस्यगवत्थव्वाओ अट्ठ दिसाकुमारीमहत्तरियाओ तहेव जाव विहरंति, तंजहा-समाहारा १ सुप्पइण्णा २, सुप्पबुद्धा ३ जसोहरा ४ । लच्छिमई ५ सेसवई ६, चित्तगुत्ता ७ वसुंधरा ८ ॥ १ ॥ तहेव जाव तुब्भाहिं ण भाइयव्वंतिकट्ठु भगवओ तिथ्ययरस्स तिथ्ययरमाऊए य दाहिणेणं भिंगारहत्थगयाओ आगायमाणीओ परिगायमाणीओ चिट्ठन्ति । तेणं कालेणं तेणं समएणं पच्चत्थिमस्यगवत्थव्वाओ अट्ठ दिसाकुमारीमहत्तरियाओ सएहिं २ जाव विहरंति, तं-इलादेवी १ सुरादेवी २, पुहवी ३ पडमावई ४ । एगणासा ५ णवमिया ६, मद्दा ७ सीया य ८ अट्ठमा ॥ १ ॥ तहेव जाव तुब्भाहिं ण भाइयव्वंतिकट्ठु जाव भगवओ तिथ्ययरस्स तिथ्ययरमाऊए य पच्चत्थिमेणं तालियंटहत्थगयाओ आगायमाणीओ परिगायमाणीओ चिट्ठन्ति । तेणं कालेणं तेणं समएणं उत्तरिस्सस्यगवत्थव्वाओ जाव विहरंति, तंजहा-अलंबुसा १ मिससकेसी २, पुण्डरीया य ३ वारुणी ४ । हासा ५ सव्वप्पमा ६ चेव, सिरि ७ हिरि ८ चेव उत्तरओ ॥ १ ॥ तहेव जाव वन्दिता भगवओ तिथ्ययरस्स तिथ्ययरमाऊए य उत्तरेणं चामरहत्थगयाओ आगायमाणीओ परिगायमाणीओ चिट्ठन्ति । तेणं कालेणं तेणं समएणं विदिसि-स्यगवत्थव्वाओ चत्तारि दिसाकुमारीमहत्तरियाओ जाव विहरंति, तंजहा-चित्ता य १ चित्तकणगा २, सतेरा ३ य सोदामिणी ४ । तहेव जाव ण भाइयव्वंतिकट्ठु भगवओ तिथ्ययरस्स तिथ्ययरमाऊए य चउसु विदिसासु वीवियाहत्थगयाओ आगायमाणीओ परिगायमाणीओ चिट्ठन्ति । तेणं कालेणं तेणं समएणं मज्झिमस्यगवत्थव्वाओ चत्तारि दिसाकुमारीमहत्तरियाओ सएहिं २ कूडेहिं तहेव जाव विहरंति, तंजहा-रूया रूयासिया चेव, सुरूया रूयगावई । तहेव जाव तुब्भाहिं ण भाइयव्वंतिकट्ठु भगवओ तिथ्ययरस्स चउरंगुलवज्जं णाभिणालं कप्पन्ति कप्पेत्ता वियरगं खणन्ति खणित्ता वियरगे णाभिं णिहणंति णिहणित्ता रयणाण य वइराण य पूरेंति २ ता हरियालियाए पेढं बन्धंति २ ता तिदिसिं तओ कयलीहरए विउव्वन्ति, तए णं तेसिं कयलीहरगाणं बहुमज्झदेसभाए तओ चाउस्सालए विउव्वन्ति, तए णं तेसिं चाउस्सालगाणं बहुमज्झदेसभाए तओ सीहासणे विउव्वन्ति, तेसिं णं सीहासणाणं अयमेयारूवे वण्णावासे पण्णत्ते सव्वो वण्णगो भाणियव्वो । तए णं ताओ स्यगमज्झवत्थव्वाओ चत्तारि दिसाकुमारीओ महत्तराओ जेणेव भयवं तिथ्ययरे तिथ्ययरमाया य तेणेव उवागच्छन्ति २ ता भगवं तिथ्ययरं करयल-संपुडेणं गिण्हन्ति तिथ्ययरमायरं च बाहाहिं गिण्हन्ति २ ता जेणेव दाहिणिळे कयलीहरए जेणेव चाउस्सालए जेणेव सीहासणे तेणेव उवागच्छन्ति २ ता भगवं

तित्थयरं तित्थयरमायरं च सीहासणे णिसीयावेंति २ ता सयपागसहस्सपागेहिं  
 तिच्छेहिं अच्भंणेति २ ता सुरभिणा गन्धवट्टएणं उव्वट्ठेति २ ता भगवं तित्थयरं  
 करयलसंपुडेणं तित्थयरमायरं च बाहासु गिण्हन्ति २ ता जेणेव पुरत्थिसिद्धे कयली-  
 हरए जेणेव चाउस्सालए जेणेव सीहासणे तेणेव उवागच्छन्ति उवागच्छित्ता भगवं  
 तित्थयरं तित्थयरमायरं च सीहासणे णिसीयावेंति २ ता तिहिं उदएहिं मज्जावेंति,  
 तंजहा-गन्धोदएणं १ पुप्फोदएणं २ सुद्धोदएणं ३, मज्जाविता सव्वालंकारविभूसियं  
 करेति २ ता भगवं तित्थयरं करयलसंपुडेणं तित्थयरमायरं च बाहाहिं गिण्हन्ति २ ता  
 जेणेव उत्तरिच्छे कयलीहरए जेणेव चाउस्सालए जेणेव सीहासणे तेणेव उवा-  
 गच्छन्ति २ ता भगवं तित्थयरं तित्थयरमायरं च सीहासणे णिसीयाविति २ ता  
 आभिओगे देवे सहाविन्ति २ ता एवं वयासी-खिप्पामेव भो देवाणुप्पिया ! चुल्ल-  
 हिमवन्ताओ वासहरपव्वयाओ गोसीसचन्दणकट्ठाई साहरह, तए णं ते आभिओगा  
 देवा ताहिं रुयगमज्जवत्थव्वाहिं चउहिं दिसाकुमारीमहत्तरियाहिं एवं वुत्ता समाणा  
 हट्टुत्तु जाव विणएणं वयणं पडिच्छन्ति २ ता खिप्पामेव चुल्लहिमवन्ताओ वास-  
 हरपव्वयाओ सरसाई, गोसीसचन्दणकट्ठाई साहरन्ति, तए णं ताओ मज्झिमरुयग-  
 वत्थव्वाओ चत्तारि दिसाकुमारीमहत्तरियाओ सरगं करेन्ति २ ता अरणिं घडेति  
 अरणिं घडित्ता सरएणं अरणिं महिति २ ता अग्गिं पाडेंति २ ता अग्गिं संधु-  
 क्खंति २ ता गोसीसचन्दणकट्ठे पक्खिवन्ति २ ता अग्गिं उज्जालंति २ ता भूइकम्मं  
 करेति २ ता रक्खापोट्टल्लियं बंधन्ति बन्धेत्ता णाणामणिरयणभत्तिचित्ते दुविहे  
 पाहाणवट्टगे गहाय भगवओ तित्थयरस्स कण्णमूलंसि टिट्ठियाविन्ति भवउ भयवं  
 पव्वयाउए २ । तए णं ताओ रुयगमज्जवत्थव्वाओ चत्तारि दिसाकुमारीमहत्तरि-  
 याओ भयवं तित्थयरं करयलसंपुडेणं तित्थयरमायरं च बाहाहिं गिण्हन्ति गिण्हित्ता  
 जेणेव भगवओ तित्थयरस्स जम्मणभवणे तेणेव उवागच्छन्ति २ ता तित्थयरमायरं  
 सयणिजंसि णिसीयाविति णिसीयाविता भयवं तित्थयरं माळए पासे ठवेंति ठवित्ता  
 आगायमाणीओ परिगायमाणीओ चिट्ठन्तीति ॥ ११४ ॥ तेणं कालेणं तेणं समएणं  
 सक्के णामं देविंदे देवराया वज्जपाणी पुरंदरे सयकेळु सहस्सकखे मघवं पागसासणे  
 दाहिणङ्गुलोगाहिवई बत्तीसविमाणावाससयसहस्साहिवई एरावणवाहणे सुरिंदे अरयं-  
 बरवत्थधरे आलइयमालमउडे णवहेमचारचित्तचंचलकुण्डलविलिहिज्जमाणगंडे भासुर-  
 बोदी पलम्बवणमाले महिद्धिए महज्जुइए महाबले महायसे महाणुभागे महा-

१ जेण कम्मेण कट्ठाई भस्सरूवाई भवंति तं तारिसं । २ भस्सेति वा भप्पेति वा  
 भूईति वा रक्खाति वा एगट्ठा । ३ जीयंति काळण बंधिज्जंती भस्सपोट्टल्लिया तं ।

सोकखे सोहम्मे कप्पे सोहम्मवडिंसए विमाणे सभाए सुहम्माए सक्कंसि सीहा-  
 सणंसि से णं तत्थ बत्तीसाए विमाणावाससयसाहस्सीणं चउरासीए सामाणि-  
 यसाहस्सीणं तायत्तीसाए तायत्तीसगाणं चउण्हं लोगपालाणं अट्ठण्हं अग्गमहि-  
 सीणं सपरिवाराणं तिण्हं परिसाणं सत्तण्हं अणियाणं सत्तण्हं अणियाहिवईणं चउण्हं  
 चउरासीणं आयरक्खदेवसाहस्सीणं अण्णेसिं च बहूणं सोहम्मकप्पवासीणं वेमाणियाणं  
 देवाणं य देवीणं य आहेवच्चं पोरेवच्चं सामित्तं भट्ठित्तं महत्तरगतं आणाईसरसेणावच्चं  
 कारेमाणे पालेमाणे महया ह्यणट्ठगीयवाइयत्तंतीतलतालतुडियवणमुइंगपडुपडह्वाइय-  
 रवेणं दिव्वाइं भोगभोगाईं भुंजमाणे विहरइ । तए णं तस्स सकस्स देविंदस्स  
 देवरण्णे आसणं चलइ, तए णं से सक्के जाव आसणं चलियं पासइ २ ता ओहिं  
 पउंजइ पउंजित्ता भगवं तित्थयरं ओहिणा आभोएइ २ ता हट्ठतुट्ठचित्ते आणंदिए  
 पीइमणे परमसोमणस्सिए हरिसवसविसप्पमाणहियए धाराहयकयंबकुसुमचंचुमालइय-  
 ऊसवियरोमकूवे वियसियवरकम्मलयणवयणे पयलियवरकडगतुडियकेऊरमउडे  
 कुण्डलहारविरायंतवच्छे पालम्बपलम्बमाणघोलंतभूसणधरे ससंभमं तुरियं चवलं सुरिंदे  
 सीहासणाओ अब्भुट्ठेइ २ ता पायपीडाओ पच्चोरुहइ २ ता वेरुलियवरिट्ठरिट्ठअंजणणि-  
 उणोवियमिसिमिसित्तमणिरयणमंडियाओ पाउयाओ ओमुयइ २ ता एगसाडियं उत्तरा-  
 संगं करेइ २ ता अंजलिमउलियगहत्थे तित्थयराभिमुहे सत्तट्ठ पयाइ अणुगच्छइ २ ता  
 वामं जाणुं अंचेइ २ ता दाहिणं जाणुं धरणीयलंसि साहट्ठु तिक्खुत्तो मुद्धानं  
 धरणीयलंसि णिवेसेइ २ ता ईसिं पच्चुण्णमइ २ ता कडगतुडियथंभियाओ भुयाओ  
 साहरइ २ ता करयलपरिगगहियं० सिरसावत्तं मत्थए अंजलिं कट्ठु एवं वयासी—णमोऽत्थु  
 णं अरहंताणं भगवन्ताणं, आइगराणं तित्थयराणं सयंसंबुद्धानं, पुरिसुत्तमाणं पुरिस-  
 सीहाणं पुरिसवरपुण्डरीयाणं पुरिसवरगन्धहत्थीणं, लोगुत्तमाणं लोगणाहाणं लोग-  
 हियाणं लोगपईवाणं लोगपज्जोगराणं, अमयदयाणं चक्खुदयाणं मगगदयाणं  
 सरणदयाणं जीवदयाणं बोहिदयाणं, धम्मदयाणं धम्मदेसयाणं धम्मणायगाणं  
 धम्मसारहीणं धम्मवरचाउरन्तचक्कवट्ठीणं, दीवो ताणं सरणं गई पइट्ठा अप्पडिहय-  
 वरनानंदंसणधराणं वियट्ठउमाणं, जिणाणं जावयाणं तिण्णाणं तारयाणं बुद्धानं  
 बोहयाणं मुत्ताणं भोगयाणं, सव्वण्णं सव्वदरिणीं सिवमयलमरुयमणन्तमक्खय-  
 मव्वाबाहमपुणरावित्तिसिद्धिगइणामधेयं ठाणं संपत्ताणं णमो जिणाणं जियभयाणं,  
 णमोऽत्थु णं भगवओ तित्थगरस्स आइगरस्स जाव संपाविउकामस्स, वंदासि णं  
 भगवन्तं तत्थगयं इहगए, पासउ मे भयवं ! तत्थगए इहगयंतिकट्ठु वन्दइ णमंसइ  
 वं० २ ता सीहासणवरंसि पुरत्थाभिमुहे सणिसण्णे, तए णं तस्स सकस्स देविंदस्स

देवरण्णो अयमेयारूवे जाव संकप्पे समुप्पज्जित्था-उप्पण्णे खलु भो ! जम्बुद्वीवे द्वीवे भगवं तित्थयरं तं जीयमेयं तीयपञ्चुप्पणमणागयाणं सकाणं देविंदाणं देवराईणं तित्थयराणं जम्मणमहिमं करेत्तए, तं गच्छामि णं अहंपि भगवओ तित्थगरस्स जम्मणमहिमं करेमिक्तिकहु एवं संपेहेइ २ ता हरिणेगमेसिं पायत्ताणीयाहिवइ देवं सद्दावेइ २ ता एवं वयासी-खिप्पामेव भो देवाणुप्पिया ! सभाए सुहम्माए मेघोघर-सियगंभीरमहुरयरसइं जोयणपरिमण्डलं सुघोसं सूसरं घंटं तिक्खुत्तो उल्लालेमाणे २ महया महया सद्देणं उग्घोसेमाणे २ एवं वयाहि-आणवेइ णं भो ! सक्के देविंदे देवराया गच्छइ णं भो ! सक्के देविंदे देवराया जम्बुद्वीवे २ भगवओ तित्थयरस्स जम्मणमहिमं करित्तए, तं तुब्भेवि णं देवाणुप्पिया ! सव्विद्धीए सव्वजुइए सव्ववलेणं सव्वसमुदएणं सव्वायरेणं सव्वविभूइए सव्वसंभमेणं सव्वणाडएहिं सव्वोवरोहेहिं सव्वालंकारविभूसाए सव्वदिव्वतुडियसइसण्णिणाएणं महया इद्धीए जाव रवेणं णिययपरियालसंपरिवुडा सयाइं २ जाणविमाणवाहणाइं दुरूडा समाणा अकाल-परिहीणं चेव सक्कस्स जाव अंतियं पाउब्भवह, तए णं से हरिणेगमेसी देवे पाय-त्ताणीयाहिवइ सक्केणं ३ जाव एवं वुत्ते समाणे हट्टतुट्ट जाव एवं देवोत्ति आणाए विणएणं वयणं पडिसुणेइ २ ता सक्कस्स ३ अंतियाओ पडिणिक्खमइ २ ता जेणेव सभाए सुहम्माए मेघोघरसियगंभीरमहुरयरसद्दा जोयणपरिमण्डला सुघोसा घण्टा तेणेव उवागच्छइ २ ता तं मेघोघरसियगंभीरमहुरयरसइं जोयणपरिमण्डलं सुघोसं घण्टं तिक्खुत्तो उल्लालेइ, तए णं तीसे मेघोघरसियगंभीरमहुरयरसद्दाए जोयणपरिमण्डलाए सुघोसाए घण्टाए तिक्खुत्तो उल्लालियाए समाणीए सोहम्मे कप्पे अण्णेहिं एगूणेहिं बत्तीसविमाणवाससयसहस्सेहिं अण्णाइं एगूणाइं बत्तीसं घण्टासयसहस्साइं जमगसमगं कणकणारावं काउं पयत्ताइं चावि हुत्था, तए णं सोहम्मे कप्पे पासाय-विमाणणिक्खुडावडियसइसमुट्टियघण्टापडंसुयासयसहस्ससंकुले जाए यावि होत्था, तए णं तेसिं सोहम्मकप्पवासीणं बहूणं वेमाणियाणं देवाण य देवीण य एगन्तरइपसत्तणिच्चप्पमतविसयसुहमुच्छियाणं सूसरघण्टारसियविउल्लोलपूरियचवल-पडिबोहणे कए समाणे घोसणकोऊहलदिण्णकणएगग्गचित्तउवउत्तमाणसाणं से पाय-त्ताणीयाहिवइ देवे तंसि घण्टारवंसि णिसंतपडिसंतंसि समाणंसि तत्थ तत्थ देसे २ तहिं २ महया महया सद्देणं उग्घोसेमाणे २ एवं वयासी-हन्त ! सुणंतु भवंतो बहवे सोहम्मकप्पवासी वेमाणियदेवा देवीओ य सोहम्मकप्पवइणो इणमो वयणं हियसुहत्थं-आणवेइ णं भो ! सक्के तं चेव जाव अंतियं पाउब्भवहत्ति, तए णं ते देवा देवीओ य एयमट्ठं सोच्चा हट्टतुट्ट जाव हियया अप्पेगइया वन्दणवत्तियं एवं णमंस-

गवत्तियं सक्कारवत्तियं सम्माणवत्तियं दंसणवत्तियं जिणभत्तिराणेणं अप्पेगइया तं  
जीयमेयं एवमाइत्तिकट्ठु जाव पाउब्भवंत्ति । तए णं से सक्के देविंदे देवराया ते  
वेमाणिए देवे देवीओ य अकालपरिहीणं चेव अंतियं पाउब्भवमाणे पासइ २ ता  
हट्ठं पालयं णामं आभिओगियं देवं सद्दावेइ २ ता एवं वयासी-खिप्पामेव भो  
देवाणुप्पिया ! अणेगखम्मसयसणिविट्ठं लीलट्ठियसालभंजियाकलियं ईहामियउसभ-  
तुरगणरमगरविहगवालगकिण्णररुसरभचमरकुंजरवणलयपउमलयभत्तिचित्तं खंभुग्ग-  
यवइरवेइयापरिगयाभिरामं विज्जाहरजमलयजंतजुत्तंपिव अच्चीसहस्समालिणीयं  
रुवगसहस्सकलियं भिसमाणं भिदिभसमाणं चक्खुल्लोयणलेसं सुहफासं सस्सिरीयल्लवं  
घण्टावलियमहुरमणहरसरं सुहं कन्तं दरिसणिज्जं णिउणोवियमिसिमिसिंतमणिरयण-  
घंटियाजालपरिक्खित्तं जोयणसहस्सविच्छिण्णं पच्चजोयणसयमुव्विद्धं सिग्गं तुरियं  
जइणणिव्वाहि-दिव्वं जाणविमाणं विउव्वाहि २ ता एयमाणत्तियं पच्चप्पिणाहि ॥ ११५॥  
तए णं से पालयदेवे सक्केणं देविंदेणं देवरण्णा एवं वुत्ते समाणे हट्ठतुट्ठ जाव  
वेउव्वियसमुग्घाएणं समोहणित्ता तहेव करेइ इति, तस्स णं दिव्वस्स जाणविमाणस्स  
तिदिसिं तओ तिसोवाणपडिरुवगा वण्णओ, तेसि णं पडिरुवगाणं पुरओ पत्तेयं २  
तोरणा वण्णओ जाव पडिरुवा, तस्स णं जाणविमाणस्स अंतो बहुसमरमणिज्जे भूमि-  
भागे०, से जहाणामए-आलिंगपुक्खरेइ वा जाव दीवियचम्मेइ वा अणेगसंकुकीलग-  
सहस्सवियए आवडपच्चावडसेहिप्पसेट्ठिसुत्थियसोवत्थियवद्धमाणूसमाणवमच्छंडगम-  
गरंडगजारमारफुल्लावलिपउमपत्तसागरतरंगवसंतलयपउमलयभत्तिचित्तेहिं सच्छाएहिं  
सप्पमेहिं समरीइएहिं सउज्जोएहिं णाणाविहपच्चवण्णेहिं मणीहिं उवसोमिए, तेसि णं  
मणीणं वण्णे गन्धे फासे य भाणियव्वे जहा **रायप्पसेणइज्जे**, तस्स णं भूमिभागस्स  
बहुमज्जदेसभाए पेच्छाघरमण्डवे अणेगखम्मसयसणिविट्ठे वण्णओ जाव पडिरुवे,  
तस्स उल्लोए पउमलयभत्तिचित्ते जाव सव्वतवणिज्जमए जाव पडिरुवे, तस्स णं  
मण्डवस्स बहुसमरमणिज्जस्स भूमिभागस्स बहुमज्जदेसभागंसि महं एग मणिपेट्ठिया०  
अट्ठ जोयणाइं आयासविक्खम्मणेणं चत्तारि जोयणाइं बाहल्लेणं सव्वमणिमई वण्णओ,  
तीए उवरिं महं एगे सीहासणे वण्णओ, तस्सुवरिं महं एगे विजयदस्से सव्वरयणाए  
वण्णओ, तस्स मज्जदेसभाए एगे वइरामए अंकुसे, एत्थ णं महं एगे कुम्भिके  
सुत्तादामे, से णं अण्णेहिं तदद्धुच्चत्तप्पमाणमित्तेहिं चउहिं अद्धकुम्भिकेहिं सुत्तादामेहिं  
सव्वओ समन्ता संपरिक्खित्ते, ते णं दामा तवणिज्जलंबूसगा सुवण्णपयरंगमण्डिया  
णाणामणिरयणविविहहारद्धहारउवसोभियसमुदया ईसिं अण्णमण्णमसंपत्ता पुव्वाइ-  
एहिं वाएहिं मन्दं २ एइज्जमाणा जाव निव्वुइकरेणं सदेणं ते पएसे आपूरेमाणा २

जाव अईव २ उवसोभेमाणा २ चिट्ठंति, तस्स णं सीहासणस्स अवरुत्तरेणं उत्तरेणं  
उत्तरपुरत्थिमेणं एत्थ णं सकस्स० चउरासीए सामाणियसाहस्सीणं चउरासीइभ्वा-  
सणसाहस्सीओ पुरत्थिमेणं अट्ठण्हं अगमहिस्सीणं एवं दाहिणपुरत्थिमेणं अर्ध्मतर-  
परिसाए दुवालसण्हं देवसाहस्सीणं दाहिणेणं मज्झिमाए० चउदसण्हं देवसाहस्सीणं  
दाहिणपच्चत्थिमेणं बाहिरपरिसाए सोलसण्हं देवसाहस्सीणं पच्चत्थिमेणं सत्तण्हं  
अणियाहिंवईणंति, तए णं तस्स सीहासणस्स चउद्विंसि चउण्हं चउरासीणं आयरक्ख-  
देवसाहस्सीणं एवमाई विभासियव्वं सूरियाभगमेणं जाव पच्चप्पिणन्ति ॥ ११६ ॥  
तए णं से सक्के दट्ठ जाव हियए दिव्वं जिणेंदाभिगमणजुगं सव्वालंकारविभूतियं  
उत्तरवेउव्वियं रुव्वं विउव्वइ २ ता अट्ठहिं अगमहिस्सीहिं सपरिवाराहिं णट्ठाणीएणं  
गन्धव्वाणीएण य सद्धिं तं विमाणं अणुपयाहिणीकरेमाणे २ पुव्विल्लेणं तिसोवाणेणं  
दुरुहइ २ ता जाव सीहासणंसि पुरत्थाभिमुहे सण्णिसण्णेति, एवं चैव सामाणिया-  
वि उत्तरेणं तिसोवाणेणं दुरुहिता पत्तेयं २ पुव्वण्णत्थेसु भद्दासणेसु णिसीयंति, अवसेसा  
देवा य देवीओ य दाहिणिस्सेणं तिसोवाणेणं दुरुहिता तद्देव जाव णिसीयंति, तए णं  
तस्स सकस्स तंसि० दुरुहस्स० इमे अट्ठमंगलगा पुरओ अहाणुपुव्वीए संपट्ठिया०,  
तयणंतरं च णं पुण्णकलसभिंगारं दिव्वा य छत्तपडागा सचामरा य दंसणरइय-  
आलोयदरिसणिजा वाउद्धुयविजयवेजयन्ती य समूसिया गगणतलमणुलिहंती पुरओ  
अहाणुपुव्वीए संपट्ठिया, तयणन्तरं... छत्तभिंगारं०, तयणंतरं च णं वइरामयवट्ठलट्ठ-  
संठियसुसिलिट्ठपरिघट्टमट्ठसुपइट्ठिए विसिट्ठे अणेगवरपञ्चवण्णकुडभीसहस्सपरिमण्डि-  
याभिरामे वाउद्धुयविजयवेजयन्तीपडागाछत्ताइच्छत्तकलिए तुंगे गयणयलमणुलिहंत-  
सिहरे जोयणसहस्समूसिए महइमहालए महिंदज्झए पुरओ अहाणुपुव्वीए संपट्ठिए,  
तयणन्तरं च णं सरुवणेवत्थपरियच्छियसुसज्जा सव्वालंकारविभूतिया पच्च अणिया पच्च  
अणियाहिंवइणो जाव संपट्ठिया, तयणन्तरं च णं बहवे आभिओगिया देवा य देवीओ य  
सएहिं सएहिं रुवेहिं जाव णिओगेहिं सक्कं देविंदं देवरायं पुरओ य मग्गओ य अहा०,  
तयणन्तरं च णं बहवे सोहम्मकप्पवासी देवा य देवीओ य सव्विह्वीए जाव दुरुहा  
समाणा० मग्गओ य जाव संपट्ठिया, तए णं से सक्के तेणं पञ्चाणियपरिक्खित्तेणं  
जाव महिंदज्झएणं पुरओ पक्कड्ढिज्जमाणेणं चउरासीए सामाणिय जाव परिवुडे  
सव्विह्वीए जाव रवेणं सोहम्मस्स कप्पस्स मज्झंमज्झेणं तं दिव्वं देविद्धिं जाव  
उवदंसेमाणे २ जेणेव सोहम्मस्स कप्पस्स उत्तरिल्ले निज्जाणमग्गे तेणेव उवागच्छइ  
उवागच्छिता जोयणसयसाहस्सिएहिं विग्गहेहिं ओवयमाणे २ ताए उक्किट्ठाए जाव  
देवगईए वीईवयमाणे २ तिरियमसंखिज्जाणं दीवसमुद्धानं मज्झंमज्झेणं जेणेव

णन्दीसरवरे दीवे जेणेव दाहिणपुरत्थिमिळे रइकरगपव्वए तेणेव उवागच्छइ २ ता एवं जा चेव सूरियाभस्स वत्तव्वया णवरं सकाहिगारो वत्तव्वो जाव तं दिव्वं देविहिं जाव दिव्वं जाणविमाणं पडिसाहरमाणे २ जाव जेणेव भगवओ तित्थयरस्स जम्मणणगरे जेणेव भगवओ तित्थयरस्स जम्मणभवणे तेणेव उवागच्छइ २ ता भगवओ तित्थयरस्स जम्मणभवणस्स उत्तरपुरत्थिमे दिसीभागे चउरंगुलमसंपत्तं धरणियले तं दिव्वं जाणविमाणं ठवेइ २ ता अट्ठाहिं अगमहिंसीहिं दोहिं अणीएहिं गन्धव्वाणीएण य गट्ठाणीएण य सद्धिं ताओ दिव्वाओ जाणविमाणाओ पुरत्थिमिळ्ळेणं तिसोवाणपडिरुव्वएणं पच्चोरुहइ, तए णं सक्कस्स देविंदस्स देवरणो चउरासीइ-सामाणियसाहस्सीओ दिव्वाओ जाणविमाणाओ उत्तरिळ्ळेणं तिसोवाणपडिरुव्वएणं पच्चोरुहंति, अवसेसा देवा य देवीओ य ताओ दिव्वाओ जाणविमाणाओ दाहिणिळ्ळेणं तिसोवाणपडिरुव्वएणं पच्चोरुहंति । तए णं से सक्के देविन्दे देवराया चउरासीए सामाणियसाहस्सिएहिं जाव सद्धिं संपरिवुडे सव्विद्धीए जाव दुंदुहिणिग्घोसणाइय-रवेणं जेणेव भगवं तित्थयरे तित्थयरमाया य तेणेव उवागच्छइ २ ता आलोए चेव पणामं करेइ २ ता भगवं तित्थयरं तित्थयरमायरं च तिकखुत्तो आयाहिण-पयाहिणं करेइ २ ता करयल जाव एवं वयासी-णमोऽत्थु ते रयणकुच्छियारिए एवं जहा दिसाकुमारीओ जाव धण्णासि पुण्णासि तं कयत्थासि, अहण्णं देवाणुप्पिए ! सक्के णामं देविन्दे देवराया भगवओ तित्थयरस्स जम्मणमहिमं करिस्सामि, तं णं तुब्भाहिं ण भाइयव्वंतिकहु ओसोवणिं दलयइ २ ता तित्थयरपडिरुव्वं विउव्वइ २ ता तित्थयरमाउयाए पासे ठवेइ २ ता पच्च सक्के विउव्वइ विउव्वित्ता एगे सक्के भगवं तित्थयरं करयलसंपुडेणं गिण्हइ एगे सक्के पिट्ठओ आयवत्तं धरेइ दुवे सक्का उभओ पासिं चामरुक्खेवं करेन्ति एगे सक्के पुरओ वज्जपाणी पक्कइत्ति, तए णं से सक्के देविन्दे देवराया अणेहिं बहूहिं भवणवइवाणमन्तरजोइसवेमाणिएहिं देवेहिं देवीहि य सद्धिं संपरिवुडे सव्विद्धीए जाव णाइयरवेणं ताए उक्किट्ठाए जाव वीईवयमाणे २ जेणेव मन्दरे पव्वए जेणेव पंडगवणे जेणेव अभिसेयसिला जेणेव अभिसेयसीहासणे तेणेव उवागच्छइ २ ता सीहासणवरगए पुरत्थाभिमुहे सण्णिसण्णेत्ति ॥ ११७ ॥ तेणं कालेणं तेणं समएणं ईसाणे देविन्दे देवराया सलपाणी वसभवाहणे सुरिन्दे उत्तरङ्गुलोगाहिंवई अट्ठावीसविमाणवाससयसहस्साहिंवई अरयंवरवत्थधरे एवं जहा सक्के इमं णाणत्तं-महाघोसा घण्टा लहुपरक्कमो पायत्ताणिगाहिंवई पुप्फओ विमाण-कारी दक्खिणे निज्जाणमगे उत्तरपुरत्थिमिळ्ळो रइकरगपव्वओ मन्दरे समोसरिओ जाव पज्जुवासइत्ति, एवं अवसिट्ठावि ईदा भाणियव्वा जाव अज्जुओत्ति, इमं णाणत्तं-



चउरासीइ असीई बावत्तरि सत्तरी य सट्ठी य । पण्णा चत्तालीसा तीसा वीसा दस सहस्सा ॥ १ ॥ एए सामाणियाणं, वत्तीसट्ठावीसा वारमट्ठ चउरो सयसहस्सा । पण्णा चत्तालीसा छच्च सहस्सा सहस्सारे ॥ १ ॥ आणयपाणयकप्पे चत्तारि सया-  
 ऽऽरणच्चुए तिण्णि । एए विमाणणं, इमे जाणविमाणकारी देवा, तंजहा—पालय १ पुप्फे य २ सोमणसे ३ तिरिवच्छे य ४ णंदियावत्ते ५ । कामगमे ६ पीङ्गमे ७ मणोरमे ८ विमल ९ सव्वओभेदे १० ॥ १ ॥ सोहम्मगाणं सणंकुमारगाणं वंभ-  
 लोयगाणं महासुक्कयाणं पाणयगाणं इंदाणं सुघोसा घण्टा हरिणेगमेसी पायत्ताणीया-  
 हिवई उत्तरिल्ला णिज्जाणभूमी दाहिणपुरत्थिमिल्ले रइकरगपव्वए, ईसाणगाणं माहिंद-  
 लंतगसहस्सारअच्चुयगाण य इंदाण महाघोसा घण्टा लहुपरक्को पायत्ताणीयाहिवई  
 दक्खिणिल्ले णिज्जाणमग्गे उत्तरपुरत्थिमिल्ले रइकरगपव्वए, परिसा णं जहा **जीवाभि-  
 गमे** आयरक्खा सामाणियचउग्गुणा सव्वेसिं जाणविमाणा सव्वेसिं जोयणसयसहस्स-  
 विच्छिण्णा उच्चत्तेणं सविमाणप्पमाणा माहिंदज्जया सव्वेसिं जोयणसाहस्सिया, सक्क-  
 वज्जा मन्दरे समोयरंति जाव पज्जुवासंति ॥ ११८ ॥ तेणं कालेणं तेणं समएणं  
 चमरे असुरिन्दे असुरराया चमरचच्चाए रायहाणीए सभाए सुहम्माए चमरंसि  
 सीहासणंसि चउसट्ठीए सामाणियसाहस्सीहिं तायत्तीसाए तायत्तीसेहिं चउहिं लोग-  
 पालेहिं पच्चहिं अग्गमहिसीहिं सपरिवाराहिं तिहिं परिसाहिं सत्ताहिं अणिएहिं सत्ताहिं  
 अणियाहिवईहिं चउहिं चउसट्ठीहिं आयरक्खदेवसाहस्सीहिं अण्णेहि य जहा सक्के णवरं  
 इमं णाणत्तं—दुमो पायत्ताणीयाहिवई ओघस्सरा घण्टा विमाणं पण्णासं जोयणसह-  
 स्साइं माहिन्दज्जओ पच्चजोयणसयाइं विमाणकारी आभिओणिओ देवो अवसिट्ठं तं  
 चेव जाव मन्दरे समोसरइ पज्जुवासइति । तेणं कालेणं तेणं समएणं बली असुरिन्दे  
 असुरराया एवमेव णवरं सट्ठी सामाणियसाहस्सीओ चउग्गुणा आयरक्खा महादुमो  
 पायत्ताणीयाहिवई महाओहस्सरा घण्टा सेसं तं चेव परिसाओ जहा **जीवाभिगमे ।**  
 तेणं कालेणं तेणं समएणं धरणे तहेव णाणत्तं—छ सामाणियसाहस्सीओ छ अग्गमहि-  
 सीओ चउग्गुणा आयरक्खा मेघस्सरा घण्टा भइसेणो पायत्ताणीयाहिवई विमाणं पण-  
 वीसं जोयणसहस्साइं माहिंदज्जओ अट्ठाइज्जाइं जोयणसयाइं एवमसुरिन्दवज्जियाणं भव-  
 णवासिइंदाणं, णवरं असुराणं ओघस्सरा घण्टा णागाणं मेघस्सरा सुवण्णाणं हंसस्सरा  
 विज्जूणं कौचस्सरा अग्गीणं मंजुस्सरा दिसाणं मंजुघोसा उदहीणं सुस्सरा दीवाणं  
 महुरस्सरा वाऊणं णंदिस्सरा थणियाणं णंदिघोसा, चउसट्ठी सट्ठी खलु छच्च सहस्सा  
 उ असुरवज्जाणं । सामाणिया उ एए चउग्गुणा आयरक्खा उ ॥ १ ॥ दाहिणिल्लाणं  
 पायत्ताणीयाहिवई भइसेणो उत्तरिल्लाणं दक्खोत्ति । वाणमन्तरजोइसिया णेयव्वा, एवं

चेव, णवरं चत्तारि सामाणियसाहस्सीओ चत्तारि अगमहिंसीओ सोलस आयरक्ख-  
सहस्सा विमाणा सहस्सं महिन्दज्झया पणवीसं जोयणसयं घण्टा दाहिणाणं मंजुस्सरा  
उत्तराणं मंजुघोसा पायत्ताणीयाहिवई विमाणकारी य आभिओगा देवा जोइसियाणं  
सुस्सरा सुस्सरणिग्घोसाओ घण्टाओ मन्दरे समोसरणं जाव पञ्जुवासंति ॥ ११९ ॥  
तए णं से अञ्चुए देविन्दे देवराया महं देवाहिवे आभिओगे देवे सदावेइ २ ता एवं  
वयासी-खिप्पामेव भो देवाणुप्पिया ! महत्थं महग्घं महरिहं विउलं तिथ्यराभिसेयं  
उवट्टवेह, तए णं ते अभिओगा देवा हट्टुतुट्ट जाव पडिसुणिता उत्तरपुरत्थिंमं दिसीभागं  
अवक्कमन्ति २ ता वेउव्वियसमुग्घाएणं जाव समोहणिता अट्टसहस्सं सोवणियकल-  
साणं एवं रूपमयाणं मणिमयाणं सुवण्णरूपमयाणं सुवण्णमणिमयाणं रूपमणिमयाणं  
सुवण्णरूपमणिमयाणं अट्टसहस्सं भोमिजाणं अट्टसहस्सं चन्दणकलसाणं एवं  
भिंकाराणं आयंसाणं थालाणं पाईणं सुपइट्टगाणं चित्ताणं रयणकरंडगाणं वाय-  
करगाणं विउव्वंति २ ता सीहासणल्लत्तामरतेल्लसमुग्ग जाव सरिसवसमुग्गा  
तालियंटा जाव वीयणा विउव्वंति विउव्विता साहाविए वेउव्विए य कलसे जाव  
वीयणे य गिण्हिता जेणेव खीरोदए समुदे तेणेव आगम्म खीरोदगं गिण्हन्ति २ ता  
जाइं तत्थ उप्पलाइं पउमाइं जाव सहस्सपत्ताइं ताइं गिण्हंति, एवं पुक्खरोदाओ  
जाव भरहेरवयाणं मागहाइत्तिथाणं उदगं मट्ठियं च गिण्हन्ति २ ता एवं गंगाईणं  
महाणईणं जाव चुल्लहिमवन्ताओ सव्वतुवरे सव्वपुप्फे सव्वगन्धे सव्वमल्ले जाव  
सव्वोसहीओ सिद्धत्थए य गिण्हन्ति २ ता पउमद्दाओ दहोदगं उप्पलाईणि य०, एवं  
सव्वकुलपव्वएसु वट्टवेयंहेसु सव्वमहद्देसु सव्ववासेसु सव्वचक्कशट्टिविएसु वक्खार-  
पव्वएसु अंतरणईसु विभासिज्जा जाव उत्तरकुरुसु जाव सुदंसणभइसालवणे सव्वतुवरे  
जाव सिद्धत्थए य गिण्हन्ति, एवं णन्दणवणाओ सव्वतुवरे जाव सिद्धत्थए य सरसं  
च गोसीसचन्दणं दिव्वं च सुमणदामं गेण्हन्ति, एवं सोमणसपंडगवणाओ य सव्व-  
तुवरे जाव सुमणदामं दइरमलयसुगन्धे य गिण्हन्ति २ ता एगओ मिलंति २ ता  
जेणेव सामी तेणेव उवागच्छन्ति २ ता महत्थं जाव तिथ्यराभिसेयं उवट्टवेत्ति ॥  
१२० ॥ तए णं से अञ्चुए देविन्दे दसहिं सामाणियसाहस्सीहिं तायत्तीसाए  
तायत्तीसाएहिं चउहिं लोगपालेहिं तिहिं परिसाहिं सत्तहिं अणिएहिं सत्तहिं अणिया-  
हिवईहिं चत्तालीसाए आयरक्खदेवसाहस्सीहिं सद्धिं संपरिवुडे तेहिं साभाविएहिं  
वेउव्विएहिं य वरकमलपइट्टाणेहिं सुरभिवरवारिपडिपुणेहिं चन्दणकयचच्चाएहिं  
आविद्धकण्ठेगुणेहिं पउमुप्पलपिहाणेहिं करयलसुकुमालपरिग्गहिएहिं अट्टसहस्सेणं  
सोवणियाणं कलसाणं जाव अट्टसहस्सेणं भोमेजाणं जाव सव्वोदएहिं सव्वमट्ठि-

याहिं सव्वतुवरेहिं जाव सव्वोसहिसिद्धत्थएहिं सव्विद्धीए जाव रवेणं महया २ तित्थ-  
 यराभिसेएणं अभिसिंचइ, तए णं सामिस्स महया २ अभिसेयंसि वट्ठमाणंसि  
 इंदाइया देवा छत्ताचामरकल्लसहत्थगया हट्ठुट्ठ जाव वज्जसूलपाणी पुरओ चिट्ठंति  
 पंजलिउडा इति, एवं विजयाणुसारेण जाव अप्पेगइया देवा आसियसंमज्जिओव-  
 लित्तसित्तसुइसम्मट्ठरत्थंतरावणवीहियं करेन्ति जाव गन्धवट्ठिभूयंति, अप्पेग०  
 हिरण्णवासं वासिंति एवं सुवण्णरयणवइरआभरणपत्तपुप्फफलवीयमल्लगन्धवण्ण जाव  
 चुण्णवासं वासंति, अप्पेगइया हिरण्णविहिं भाइंति एवं जाव चुण्णविहिं भाइंति,  
 अप्पेगइया चउव्विहं वज्जं वाएन्ति, तंजहा-ततं १ विततं २ घणं ३ झुसिरं  
 ४, अप्पेगइया चउव्विहं गेयं गायन्ति, तंजहा-उक्खित्तं १ पायत्तं २ मन्दाइयं ३  
 रोइयावसाणं ४, अप्पेगइया चउव्विहं णट्ठं णच्चन्ति, तं०-अंचियं १ दुयं २  
 आरभडं ३ भसोलं ४, अप्पेगइया चउव्विहं अभिणयं अभिणएन्ति, तं०-विट्ठंति  
 पाळिस्सुइयं सामण्णोवणिवाइयं लोगमज्जावसाणियं, अप्पेगइया वत्तीसइविहं दिव्वं  
 णट्ठविहिं उवदंसेन्ति, अप्पेगइया उप्पयनिवयं निवयउप्पयं संकुचियपसारियं जाव  
 भन्तसंभन्तणामं दिव्वं णट्ठविहिं उवदंसन्तीति, अप्पेगइया तंडवेन्ति अप्पेगइया  
 लासेन्ति, अप्पेगइया पीणेन्ति, एवं पुक्कारेन्ति अप्पेगेडेन्ति वग्गन्ति सीहणायं  
 णदन्ति अप्पे० सव्वाइं करेन्ति, अप्पे० हयहेसियं एवं हत्थिगुलुगुलाइयं रहघण-  
 घणाइयं अप्पे० तिण्णिवि, अप्पे० उच्छोलन्ति अप्पे० पच्छोलन्ति अप्पे० तिवइं  
 छिदन्ति पायदहरयं करेन्ति भूमिचवेडे दलयन्ति अप्पे० महया २ सहेणं रावेंति एवं  
 संजोगा विभासियव्वा, अप्पे० हक्कारेन्ति, एवं पुक्कारेन्ति थक्कारेन्ति ओवयंति  
 उप्पयंति परिवयंति जलन्ति तवंति पतवंति गज्जंति विज्जुयायंति वासिंति ...,  
 अप्पेगइया देवुकलियं करेन्ति एवं देवकहकहगं करेन्ति अप्पे० दुहुदुहुगं करेन्ति  
 अप्पे० विकियभूयाइं रुवाइं विउव्वित्ता पणचंति एवमाइ विभासेज्जा जहा  
 विजयस्स जाव सव्वओ समन्ता आधावेंति परिधावेंति ॥ १२१ ॥ तए  
 णं से अच्चुइंदे सपरिवारे सामिं तेणं महया महया अभिसेएणं अभिसिंचइ २ ता  
 करयलपरिग्गहियं जाव मत्थए अंजलिं कट्ठु जएणं विजएणं वद्धावेइ २ ता  
 ताहिं इट्ठाहिं जाव जयजयसइ पउंजइ पउंजित्ता जाव पम्हलसुकुमालाए सुरभीए  
 गन्धकासाइए गायाइं लहेइ २ ता एवं जाव कप्पहक्खगंपिव अलंकियविभूसियं  
 करेइ २ ता जाव णट्ठविहिं उवदंसेइ २ ता दसंगुलियं अंजलिं करिय मत्थयंमि  
 पयओ अट्ठसयविमुद्धगन्थजुत्तेहिं महावित्तेहिं अपुणरुत्तेहिं अत्थजुत्तेहिं संधुणइ २ ता  
 वामं जाणुं अंचेइ २ ता जाव करयलपरिग्गहियं० मत्थए अंजलिं कट्ठु एवं वयासी-

णमोऽत्थु ते सिद्धबुद्धणीरयसमणसमाहियसमत्तसमजोगिसल्लगतणणिब्भयणीरागदो-  
सणिम्ममणिरसंगणीसल्लमाणमूरणगुणरयणसीलसागरमणंतमप्पमेयभविद्यधम्मवरचा-  
उरंतचक्रवट्ठी णमोऽत्थु ते अरहओत्तिकट्ठु एवं वन्दइ णमंसइ वं० २ ता णच्चासण्णे  
णाइदूरे सुस्ससमाणे जाव पज्जुवासइ, एवं जहा अच्चुयस्स तहा जाव ईसाणस्स  
भाणियव्वं, एवं भवणवइवाणमन्तर जोइसिया य सूरपज्जवसाणा सएणं परिवारेणं  
पत्तेयं २ अभिसिंचंति, तए णं से ईसाणे देविन्दे देवराया पच्च ईसाणे विउव्वइ २ ता  
एगे ईसाणे भगवं तित्थयरं करयलसंपुडेणं णिण्हइ २ ता सीहासणवरगए  
पुरत्थाभिमुहे सण्णिण्णणे एगे ईसाणे पिट्ठओ आयवत्तं धरेइ दुवे ईसाणा उभओ  
पासिं चामरुक्खेवं करेन्ति एगे ईसाणे पुरओ सूलपाणी चिट्ठइ, तए णं से सक्के  
देविन्दे देवराया आभिओगे देवे सहावेइ २ ता एसोवि तह चेव अभिसेयाणत्तिं  
देइ तेऽवि तह चेव उवणेन्ति, तए णं से सक्के देविन्दे देवराया भगवओ तित्थ-  
यरस्स चउहिंसि चत्तारि धवलवसभे विउव्वेइ सेए संखदलविमलणिम्मलदधिघण-  
गोखीरफेणरययणिगरप्पगासे पासाइए दरिसणिज्जे अभिरुवे पडिरुवे, तए णं तेसिं  
चउण्हं धवलवसभाणं अट्ठहिं सिंगेहिंतो अट्ठ तोयधाराओ णिग्गच्छन्ति, तए णं  
ताओ अट्ठ तोयधाराओ उट्ठं वेहासं उप्पयन्ति २ ता एगओ मिलायन्ति २ ता  
भगवओ तित्थयरस्स मुद्धाणंसि णिवयंति । तए णं से सक्के देविन्दे देवराया  
चउरासीइए सामाणियसाहस्सीहिं एयस्सवि तहेव अभिसेओ भाणियव्वो जाव  
णमोऽत्थु ते अरहओत्तिकट्ठु वन्दइ णमंसइ जाव पज्जुवासइ ॥ १२२ ॥ तए णं से  
सक्के देविंदे देवराया पंच सक्के विउव्वइ २ ता एगे सक्के भयवं तित्थयरं करयल-  
संपुडेणं णिण्हइ एगे सक्के पिट्ठओ आयवत्तं धरेइ दुवे सक्का उभओ पासिं चामरुक्खेवं  
करेन्ति एगे सक्के वज्जपाणी पुरओ पक्कइ, तए णं से सक्के चउरासीइए सामाणिय-  
साहस्सीहिं जाव अण्णेहि य० भवणवइवाणमन्तरजोइसवेमाणिएहिं देवेहिं देवीहि य  
सद्धिं संपरिवुडे सव्विद्धीए जाव णाइयरवेणं ताए उक्किट्ठाए...जेणेव भगवओ तित्थ-  
यरस्स जम्मणणयरे जेणेव० जम्मणभवणे जेणेव तित्थयरमाथा तेणेव उवागच्छइ २ ता  
भगवं तित्थयरं माऊए पासे ठवेइ २ ता तित्थयरपडिरुवगं पडिसाहरइ २ ता  
ओसोवाणि पडिसाहरइ २ ता एगं महं खोमजुयलं कुंडलजुयलं च भगवओ तित्थ-  
यरस्स उस्सीसगमूले ठवेइ २ ता एगं महं सिरिदामगंडं तवणिज्जलंबूसगं सुवण्णपय-  
रगमंडियं णाणामणिरयणविविहहारद्धहारउवसोहियसमुदयं भगवओ तित्थयरस्स  
उल्लोयंसि णिक्खिवइ तण्णं भगवं तित्थयरे अणिमिसाए दिट्ठीए देहमाणे २ सुहंसुहेणं  
अभिरममाणे २ चिट्ठइ, तए णं से सक्के देविंदे देवराया वेसमणं देवं सहावेइ २ ता

एवं वयासी-खिप्पामेव भो देवाणुप्पिया ! बत्तीसं हिरण्णकोडीओ बत्तीसं सुवण्णको-  
डीओ बत्तीसं णंदाई बत्तीसं भद्दाई सुभगे सुभगरुवजुव्वणलावण्णे य भगवओ तित्थ-  
यरस्स जम्मणभवणंसि साहराहि २ ता एयमाणत्तियं पच्चप्पिणाहि, तए णं से  
वेसमणे देवे सक्केणं जाव विणएणं वयणं पडिसुणेइ २ ता जंभए देवे सद्दावेइ २ ता  
एवं वयासी-खिप्पामेव भो देवाणुप्पिया ! बत्तीसं हिरण्णकोडीओ जाव भगवओ  
तित्थयरस्स जम्मणभवणंसि साहरह साहरित्ता एयमाणत्तियं पच्चप्पिणह, तए णं ते  
जंभगा देवा वेसमणेणं देवेणं एवं युत्ता समाणा हट्ठुट्ठ जाव खिप्पामेव बत्तीसं  
हिरण्णकोडीओ जाव भगवओ तित्थगरस्स जम्मणभवणंसि साहरंति २ ता जेणेव  
वेसमणे देवे तेणेव जाव पच्चप्पिणंति, तए णं से वेसमणे देवे जेणेव सक्के देविंदे  
देवराया जाव पच्चप्पिणइ । तए णं से सक्के देविंदे देवराया ३ आभिओगे देवे  
सद्दावेइ २ ता एवं वयासी-खिप्पामेव भो देवाणुप्पिया ! भगवओ तित्थयरस्स  
जम्मणणयरंसि सिंघाडग जाव महापहपहेसु महया २ सहेणं उग्घोसेमाणा २ एवं  
वदह-हंदि सुणंतु भवंतो बहवे भवणवइवाणमंतरजोइसवेमाणिया देवा य देवीओ  
य जे णं देवाणुप्पिया ! ० तित्थयरस्स तित्थयरमाऊए वा असुभं मणं पधारेइ तस्स  
णं अज्जमंजरिया इव सयहा मुद्धाणं फुट्ठउत्तिकट्ठु घोसेह २ ता एयमाणत्तियं  
पच्चप्पिणहत्ति, तए णं ते आभिओगा देवा जाव एवं देवोत्ति आणाए विणएणं वयणं  
पडिसुणंति २ ता सक्कस्स देविंदस्स देवरण्णो अंतियाओ पडिणिक्खमंति २ ता  
खिप्पामेव भगवओ तित्थगरस्स जम्मणणगरंसि सिंघाडग जाव एवं वयासी-हंदि  
सुणंतु भवंतो बहवे भवणवइ जाव जे णं देवाणुप्पिया ! ० तित्थयरस्स जाव फुट्ठिही-  
तिकट्ठु घोसणं घोसेंति २ ता एयमाणत्तियं पच्चप्पिणंति, तए णं ते बहवे भवणवइवा-  
णमंतरजोइसवेमाणिया देवा भगवओ तित्थगरस्स जम्मणमहिमं करंति २ ता जामेव  
दिसिं पाउब्भूया तामेव दिसिं पडिगया ॥ १२३ ॥ **पंचमो वक्खारो समत्तो ॥**

जंबुद्वीवस्स णं भंते ! द्वीवस्स पएसा लवणसमुद्दं पुट्ठा ? हंता ! पुट्ठा, ते णं भंते !  
किं जंबुद्वीवे दीवे लवणसमुद्दे ? गोयमा ! जंबुद्वीवे णं दीवे णो खलु लवणसमुद्दे, एवं  
लवणसमुद्दस्सवि पएसा जंबुद्वीवे २ पुट्ठा भाणियव्वा । जंबुद्वीवे णं भंते ! ० जीवा उद्दा-  
हत्ता २ लवणसमुद्दे पच्चायंति ? गो ० ! अत्थेगइया पच्चायंति अत्थेगइया नो पच्चायंति,  
एवं लवणसमुद्दस्सवि जंबुद्वीवे दीवे णेयव्वमिति ॥ १२४ ॥ खंडा १ जोयण २ वासा ३  
पव्वय ४ कूडा ५ य तित्थ ६ सेढीओ ७ । विजय ८ इह ९ सल्लिलाओ १०  
पिंडए होइ संगहणी ॥ १ ॥ जंबुद्वीवे णं भंते ! दीवे भरहप्पमाणमेत्तेहिं खंडेहिं  
केवइयं खंडगणिएणं प० ? गो ० ! णउयं खंडसयं खंडगणिएणं पण्णत्ते । जंबुद्वीवे

णं भंते ! दीवे केवइयं जोयणगणिएणं पण्णत्ते ? गोयमा !—सत्तेव य कोडिसया णउया छप्पण सयसहस्साई । चउणवई च सहस्सा सयं दिवड्ढं च गणियपयं ॥ १ ॥ जंबुदीवे णं भंते ! दीवे कइ वासा पण्णत्ता ? गोयमा ! सत्त वासा प०, तंजहा—भरहे एरवए हेमवए हेरणवए हरिवासे रम्मगवासे महाविदेहे, जंबुदीवे णं भंते ! दीवे केवइया वासहरा पण्णत्ता केवइया मंदरा पव्वया पण्णत्ता केवइया चित्तकूडा केवइया विचित्तकूडा केवइया जमगपव्वया केवइया कंचणगपव्वया केवइया वक्खारा केवइया दीहवेयड्ढा केवइया वट्टवेयड्ढा पण्णत्ता ? गोयमा ! जंबुदीवे २ छ वासहरपव्वया एगे मंदरे पव्वए एगे चित्तकूडे एगे विचित्तकूडे दो जमगपव्वया दो कंचणगपव्वयसया वीसं वक्खारपव्वया चोत्तीसं दीहवेयड्ढा चत्तारि वट्टवेयड्ढा०, एवामेव सपुव्वावरेणं जंबुदीवे दीवे दुण्णि अउणत्तरा पव्वयसया भवन्तीतिमक्खायं । जंबुदीवे णं भंते ! दीवे केवइया वासहरकूडा केवइया वक्खारकूडा केवइया वेयड्ढकूडा केवइया मंदरकूडा प० ? गो० ! ...छप्पणं वासहरकूडा छण्णउई वक्खारकूडा तिण्णि छलुत्तरा वेयड्ढकूड-सया णव मंदरकूडा पण्णत्ता, एवामेव सपुव्वावरेणं जंबुदीवे २ चत्तारि सत्तट्ठा कूड-सया भवन्तीतिमक्खायं । जंबुदीवे णं भंते ! दीवे भरहे वासे कइ तित्था प० ? गो० ! तओ तित्था प०, तं०—मागहे वरदामे पभासे, जंबुदीवे० एरवए वासे कइ तित्था प० ? गो० ! तओ तित्था प०, तं०—मागहे वरदामे पभासे, जंबुदीवे णं भंते ! दीवे महाविदेहे वासे एगमेगे चक्कवट्ठिविजए कइ तित्था प० ? गो० ! तओ तित्था प०, तं०—मागहे वरदामे पभासे, एवामेव सपुव्वावरेणं जंबुदीवे २ एगे बिउत्तरे तित्थसए भवन्तीतिमक्खायं । जंबुदीवे णं भंते ! दीवे केवइयाओ विज्जा-हरसेढीओ केवइयाओ आभिओगसेढीओ प० ? गो० ! जंबुदीवे दीवे अट्टसट्ठी विज्जा-हरसेढीओ अट्टसट्ठी आभिओगसेढीओ पण्णत्ताओ, एवामेव सपुव्वावरेणं जंबुदीवे दीवे छत्तीसे सेढीसए भवन्तीतिमक्खायं, जंबुदीवे णं भंते ! दीवे केवइया चक्कवट्ठिविजया केवइयाओ रायहाणीओ केवइयाओ तिमिसगुहाओ केवइयाओ खंडप्पवायगुहाओ केवइया कयमालया देवा केवइया णट्टमालया देवा केवइया उसभकूडा० प० ? गो० ! जंबुदीवे दीवे चोत्तीसं चक्कवट्ठिविजया चोत्तीसं रायहाणीओ चोत्तीसं तिमिसगुहाओ चोत्तीसं खंडप्पवायगुहाओ चोत्तीसं कयमालया देवा चोत्तीसं णट्टमालया देवा चोत्तीसं उसभकूडा पव्वया प०, जंबुदीवे णं भंते ! दीवे केवइया महइहा प० ? गो० ! सोलस महइहा पण्णत्ता, जंबुदीवे णं भंते ! दीवे केवइयाओ महाणईओ वासहरपव्हाओ केव-इयाओ महाणईओ कुंडप्पवहाओ पण्णत्ताओ ? गोयमा ! जंबुदीवे २ चोइस महाणईओ वासहरपव्हाओ छावत्तरि महाणईओ कुंडप्पवहाओ०, एवामेव सपुव्वावरेणं जंबुदीवे

दीवे णउइं महाणइओ भवन्तीतिमक्खायं । जंबुद्वीवे... भरहेरवएसु वासेसु कइ महा-  
णइओ प० ? गोयमा ! चत्तारि महाणइओ पण्णत्ताओ, तं०-गंगा सिंधू रत्ता रत्तवई,  
तत्थ णं एगमेगा महाणइ चउइसहिं सलिलासहस्सेहिं समग्गा पुरत्थिमपच्चत्थिमेणं  
लवणसमुदं समप्पेइ, एवामेव सपुव्वावरेणं जंबुद्वीवे दीवे भरहेरवएसु वासेसु छप्पणं  
सलिलासहस्सा भवन्तीतिमक्खायं, जंबुद्वीवे णं भंते ! दीवे हेमवयहेरणवएसु वासेसु  
कइ महाणइओ पण्णत्ताओ ? गो० ! चत्तारि महाणइओ पण्णत्ताओ, तंजहा—रोहिया  
रोहियंसा सुवण्णकूला रुप्पकूला, तत्थ णं एगमेगा महाणइ अट्ठावीसाए अट्ठावीसाए  
सलिलासहस्सेहिं समग्गा पुरत्थिमपच्चत्थिमेणं लवणसमुदं समप्पेइ, एवामेव सपुव्वा-  
वरेणं जंबुद्वीवे २ हेमवयहेरणवएसु वासेसु वारसुत्तरे सलिलासयसहस्से भवन्तीति-  
मक्खायं । जंबुद्वीवे णं भंते ! दीवे हरिवासरम्मगवासेसु कइ महाणइओ पण्णत्ताओ ?  
गोयमा ! चत्तारि महाणइओ पण्णत्ताओ, तंजहा—हरी हरिकंता णरकंता णारिकंता,  
तत्थ णं एगमेगा महाणइ छप्पण्णाए २ सलिलासहस्सेहिं समग्गा पुरत्थिमपच्चत्थि-  
मेणं लवणसमुदं समप्पेइ, एवामेव सपुव्वावरेणं जंबुद्वीवे २ हरिवासरम्मगवासेसु  
दो चउवीसा सलिलासयसहस्सा भवन्तीतिमक्खायं, जंबुद्वीवे णं भंते ! दीवे महा-  
विदेहे वासे कइ महाणइओ पण्णत्ताओ ? गोयमा ! दो महाणइओ पण्णत्ताओ,  
तंजहा—सीया य सीओया य, तत्थ णं एगमेगा महाणइ पंचहिं २ सलिलासय-  
सहस्सेहिं बत्तीसाए य सलिलासहस्सेहिं समग्गा पुरत्थिमपच्चत्थिमेणं लवणसमुदं  
समप्पेइ, एवामेव सपुव्वावरेणं जंबुद्वीवे दीवे महाविदेहे वासे दस सलिलासयसहस्सा  
चउसट्ठिं च सलिलासहस्सा भवन्तीतिमक्खायं । जंबुद्वीवे णं भंते ! दीवे मंदरस्स  
पव्वयस्स दक्खिणेणं केवइया सलिलासयसहस्सा पुरत्थिमपच्चत्थिमाभिमुहा लवण-  
समुदं समप्पेति ? गो० ! एगे छण्णउए सलिलासयसहस्से पुरत्थिमपच्चत्थिमाभिमुहे  
लवणसमुदं समप्पेइ, जंबुद्वीवे णं भंते ! दीवे मंदरस्स पव्वयस्स उत्तरेणं केवइया  
सलिलासयसहस्सा पुरत्थिमपच्चत्थिमाभिमुहा लवणसमुदं समप्पेति ? गो० ! एगे  
छण्णउए सलिलासयसहस्से पुरत्थिमपच्चत्थिमाभिमुहे जाव समप्पेइ, जंबुद्वीवे णं  
भंते ! दीवे केवइया सलिलासयसहस्सा पुरत्थाभिमुहा लवणसमुदं समप्पेति ?  
गोयमा ! सत्त सलिलासयसहस्सा अट्ठावीसं च सहस्सा जाव समप्पेति, जंबुद्वीवे णं  
भंते ! दीवे केवइया सलिलासयसहस्सा पच्चत्थिमाभिमुहा लवणसमुदं समप्पेति ?  
गोयमा ! सत्त सलिलासयसहस्सा अट्ठावीसं च सहस्सा जाव समप्पेति, एवामेव  
सपुव्वावरेणं जंबुद्वीवे दीवे चोइस सलिलासयसहस्सा छप्पणं च सहस्सा भवन्तीति-  
मक्खायं ॥ १२५ ॥ छट्ठो वक्खारो समत्तो ॥

जंबुद्वीवे णं भंते ! दीवे कइ चंदा पभासिंसु पभासंति पभासिस्संति कइ सूरिया तवइंसु तवेंति तविस्संति केवइया णक्खत्ता जोगं जोइंसु जोयंति जोइस्संति केवइया महग्गहा चारं चरिंसु चरंति चरिस्संति केवइयाओ तारागणकोडाकोडीओ सोभिंसु सोभंति सोभिस्संति ? गोयमा ! दो चंदा पभासिंसु ३ दो सूरिया तवइंसु ३ छप्पणं णक्खत्ता जोगं जोइंसु ३ छावत्तरं महग्गहसयं चारं चरिंसु ३-एगं च सयसहस्सं तेत्तीसं खलु भवे सहस्साइं । णव य सया पण्णासा तारागणकोडिकोडीणं ॥ १ ॥ ति ॥ १२६ ॥ कइ णं भंते ! सूरमंडला पण्णत्ता ? गोयमा ! एगे चउरासीए मंडलसए पण्णत्ते । जंबुद्वीवे णं भंते ! दीवे केवइयं ओगाहिता केवइया सूरमंडला पण्णत्ता ? गोयमा ! जंबुद्वीवे २ असीयं जोयणसयं ओगाहिता एत्थ णं पण्णट्ठी सूरमंडला पण्णत्ता, लवणे णं भंते ! समुद्दे केवइयं ओगाहिता केवइया सूरमंडला पण्णत्ता ? गोयमा ! लवणे समुद्दे तिण्णि तीसे जोयणसए ओगाहिता एत्थ णं एगूणवीसे सूरमंडलसए पण्णत्ते, एवामेव सपुव्वावरेणं जंबुद्वीवे दीवे लवणे य समुद्दे एगे तुलसीए सूरमंडलसए भवतीतिमक्खायं १ ॥ १२७ ॥ सव्वब्भंताराओ णं भंते ! सूरमंडलाओ केवइयाए अवाहाए सव्वबाहिरए सूरमंडले ५० ? गोयमा ! पंचदसुत्तरे जोयणसए अवाहाए सव्वबाहिरए सूरमंडले पण्णत्ते २ ॥ १२८ ॥ सूरमंडलस्स णं भंते ! सूरमंडलस्स य केवइयं अवाहाए अंतरे पण्णत्ते ? गोयमा ! दो जोयणाइं अवाहाए अंतरे पण्णत्ते ३ ॥ १२९ ॥ सूरमंडले णं भंते ! केवइयं आयामविक्खंभेणं केवइयं परिक्खेवेणं केवइयं बाह्ळेणं पण्णत्ते ? गोयमा ! अडयालीसं एगसट्ठिभाए जोयणस्स आयामविक्खंभेणं तं तिगुणं सविसेसं परिक्खेवेणं चउवीसं एगसट्ठिभाए जोयणस्स बाह्ळेणं पण्णत्ते इति ४ ॥ १३० ॥ जंबुद्वीवे णं भंते ! दीवे मंदरस्स पव्वयस्स केवइयाए अवाहाए सव्वब्भंतरे सूरमंडले पण्णत्ते ? गोयमा ! चोयालीसं जोयणसहस्साइं अट्ठ य वीसे जोयणसए अवाहाए सव्वब्भंतरे सूरमंडले पण्णत्ते, जंबुद्वीवे णं भंते ! दीवे मंदरस्स पव्वयस्स केवइअवाहाए सव्वब्भंतराणंतरे सूरमंडले पण्णत्ते ? गो० ! चोयालीसं जोयणसहस्साइं अट्ठ य वावीसे जोयणसए अडयालीसं च एगसट्ठिभागे जोयणस्स अवाहाए अब्भंतराणंतरे सूरमंडले ५०, जंबुद्वीवे णं भंते ! दीवे मंदरस्स पव्वयस्स केवइयाए अवाहाए अब्भंतरतच्चे सूरमंडले पण्णत्ते ? गो० ! चोयालीसं जोयणसहस्साइं अट्ठ य पणवीसे जोयणसए पण्णत्तीसं च एगसट्ठिभागे जोयणस्स अवाहाए अब्भंतरतच्चे सूरमंडले पण्णत्ते, एवं खलु एएणं उवाएणं णिक्खममाणे सूरिए तयणंतराओ मंडलाओ तयणंतरं मंडलं संक्रममाणे २ दो दो जोयणाइं अडयालीसं च एगसट्ठिभाए जोयणस्स एगमेगे मंडले अवाहावुट्ठिं अभिवट्ठेमाणे २ सव्वबाहिरं



मंडलं उवसंकमिता चारं चरइत्ति, जंबुद्वीवे णं भंते ! दीवे मंदरस्स पव्वयस्स केवइ-  
याए अवाहाए सव्वबाहिरे सूरमंडले प० ? गो० ! पणयालीसं जोयणसहस्साइं  
तिण्णि य तीसे जोयणसए अवाहाए सव्वबाहिराणंतरे सूरमंडले पण्णत्ते ?  
दीवे मंदरस्स पव्वयस्स केवइयाए अवाहाए सव्वबाहिराणंतरे सूरमंडले पण्णत्ते ?  
गोयमा ! पणयालीसं जोयणसहस्साइं तिण्णि य सत्तावीसे जोयणसए तेरस य एग-  
सट्ठिभाए जोयणस्स अवाहाए बाहिराणंतरे सूरमंडले पण्णत्ते, जंबुद्वीवे णं भंते ! दीवे  
मंदरस्स पव्वयस्स केवइयाए अवाहाए बाहिरतच्चे सूरमंडले पण्णत्ते ? गो० ! पणया-  
लीसं जोयणसहस्साइं तिण्णि य चउवीसे जोयणसए छवीसं च एगसट्ठिभाए जोय-  
णस्स अवाहाए बाहिरतच्चे सूरमंडले पण्णत्ते, एवं खलु एएणं उवाएणं पविसमाणे  
सूरिए तयाणंतराओ मंडलाओ तयाणंतरं मंडलं संकममाणे संकममाणे दो दो  
जोयणाइं अडयालीसं च एगसट्ठिभाए जोयणस्स एगमेगे मंडले अवाहावुद्धिं  
णिवुद्धेमाणे २ सव्वब्भंतरे मंडलं उवसंकमिता चारं चरइ ५ ॥ १३१ ॥ जंबु-  
द्वीवे दीवे सव्वब्भंतरे णं भंते ! सूरमंडले केवइयं आयामविकखंभेणं केवइयं  
परिक्खेवेणं पण्णत्ते ? गो० ! णवणउइं जोयणसहस्साइं छच्च चत्ताले जोयणसए  
आयामविकखंभेणं तिण्णि य जोयणसयसहस्साइं पण्णरस य जोयणसहस्साइं एगूण-  
णउइं च जोयणाइं किंचिविसेसाहियाइं परिक्खेवेणं०, अब्भंतराणंतरे णं भंते !  
सूरमंडले केवइयं आयामविकखंभेणं केवइयं परिक्खेवेणं पण्णत्ते ? गोयमा ! णवणउइं  
जोयणसहस्साइं छच्च पणयाले जोयणसए पणतीसं च एगसट्ठिभाए जोयणस्स आया-  
मविकखंभेणं तिण्णि जोयणसयसहस्साइं पण्णरस य जोयणसहस्साइं एगं सत्तुत्तरं  
जोयणसयं परिक्खेवेणं पण्णत्ते, अब्भंतरतच्चे णं भंते ! सूरमंडले केवइयं आयाम-  
विकखंभेणं केवइयं परिक्खेवेणं प० ? गो० ! णवणउइं जोयणसहस्साइं छच्च एक्कावण्णे  
जोयणसए णव य एगसट्ठिभाए जोयणस्स आयामविकखंभेणं तिण्णि य जोयणसय-  
सहस्साइं पण्णरस जोयणसहस्साइं एगं च पणवीसं जोयणसयं परिक्खेवेणं०, एवं खलु  
एएणं उवाएणं णिक्खममाणे सूरिए तयाणंतराओ मंडलाओ तयाणंतरं मंडलं उव-  
संकममाणे २ पंच २ जोयणाइं पणतीसं च एगसट्ठिभाए जोयणस्स एगमेगे मंडले  
विकखंभवुद्धिं अभिवद्धेमाणे २ अट्ठारस २ जोयणाइं परिरयवुद्धिं अभिवद्धेमाणे २  
सव्वबाहिरं मंडलं उवसंकमिता चारं चरइ, सव्वबाहिरए णं भंते ! सूरमंडले केव-  
इयं आयामविकखंभेणं केवइयं परिक्खेवेणं पण्णत्ते ? गोयमा ! एगं जोयणसयसहस्सं  
छच्च सट्ठे जोयणसए आयामविकखंभेणं तिण्णि य जोयणसयसहस्साइं अट्ठारस य  
सहस्साइं तिण्णि य पण्णरसुत्तरे जोयणसए परिक्खेवेणं०, बाहिराणंतरे णं भंते !

सूरमंडले केवइयं आयामविक्रंभेणं केवइयं परिक्रवेणं पण्णत्ते ? गोयमा ! एगं जोयणसयसहस्सं छच्च चउप्पण्णे जोयणसए छव्वीसं च एगसट्ठिभागे जोयणस्स आयामविक्रंभेणं तिण्णि य जोयणसयसहस्साइं अट्ठारस य सहस्साइं दोण्णि य सत्ताणउए जोयणसए परिक्रवेणंति, बाहिरतच्चै णं भंते ! सूरमंडले केवइयं आया-  
मविक्रंभेणं केवइयं परिक्रवेणं पण्णत्ते ? गो० ! एगं जोयणसयसहस्सं छच्च अड-  
याले जोयणसए बावण्णं च एगसट्ठिभाए जोयणस्स आयामविक्रंभेणं तिण्णि  
जोयणसयसहस्साइं अट्ठारस य सहस्साइं दोण्णि य अउणासीए जोयणसए परिक्रवे-  
वेणं०, एवं खलु एएणं उवाएणं पविसमाणे सूरिए तयाणंतराओ मंडलाओ तयाणंतरं  
मंडलं संक्रममाणे २ पंच पंच जोयणाइं पणतीसं च एगसट्ठिभाए जोयणस्स एगमेगे  
मंडले विक्रंभवुद्धिं णिवुद्धेमाणे २ अट्ठारस २ जोयणाइं परिरयवुद्धिं णिवुद्धेमाणे २  
सव्वव्भंतरं मंडलं उवसंकमिता चारं चरइ ६ ॥ १३२ ॥ जया णं भंते ! सूरिए  
सव्वव्भंतरं मंडलं उवसंकमिता चारं चरइ तथा णं एगमेगेणं मुहुत्तेणं केवइयं खेत्तं  
गच्छइ ? गोयमा ! पंच पंच जोयणसहस्साइं दोण्णि य एगावण्णे जोयणसए एगूण-  
तीसं च सट्ठिभाए जोयणस्स एगमेगेणं मुहुत्तेणं गच्छइ, तथा णं इहगयस्स मणुस्सस्स  
सीयालीसाए जोयणसहस्सेहिं दोहि य तेवट्ठेहिं जोयणसएहिं एगवीसाए य जोयणस्स  
सट्ठिभाएहिं सूरिए चक्खुप्फासं हव्वमागच्छइ, से णिक्खममाणे सूरिए णवं संक्खरं  
अयमाणे पढमंसि अहोरत्तंसि सव्वव्भंतराणंतरं मंडलं उवसंकमिता चारं चरइ,  
जया णं भंते ! सूरिए अब्भंतराणंतरं मंडलं उवसंकमिता चारं चरइ तथा णं  
एगमेगेणं मुहुत्तेणं केवइयं खेत्तं गच्छइ ? गोयमा ! पंच पंच जोयणसहस्साइं दोण्णि  
य एगावण्णे जोयणसए सीयालीसं च सट्ठिभागे जोयणस्स एगमेगेणं मुहुत्तेणं  
गच्छइ, तथा णं इहगयस्स मणुस्सस्स सीयालीसाए जोयणसहस्सेहिं एगूणासीए  
जोयणसए सत्तावण्णाए य सट्ठिभाएहिं जोयणस्स सट्ठिभागं च एगसट्ठिहा छेत्ता  
एगूणवीसाए चुण्णियाभागेहिं सूरिए चक्खुप्फासं हव्वमागच्छइ, से णिक्खममाणे  
सूरिए दोच्चंसि अहोरत्तंसि अब्भंतरतच्चं मंडलं उवसंकमिता चारं चरइ, जया णं  
भंते ! सूरिए अब्भंतरतच्चं मंडलं उवसंकमिता चारं चरइ तथा णं एगमेगेणं मुहु-  
त्तेणं केवइयं खेत्तं गच्छइ ? गोयमा ! पंच पंच जोयणसहस्साइं दोण्णि य बावण्णे  
जोयणसए पंच य सट्ठिभाए जोयणस्स एगमेगेणं मुहुत्तेणं गच्छइ, तथा णं इहगयस्स  
मणुस्सस्स सीयालीसाए जोयणसहस्सेहिं छण्णउईए जोयणेहिं तेतीसाए सट्ठिभागेहिं  
जोयणस्स सट्ठिभागं च एगसट्ठिहा छेत्ता दोहिं चुण्णियाभागेहिं सूरिए चक्खुप्फासं  
हव्वमागच्छइ, एवं खलु एएणं उवाएणं णिक्खममाणे सूरिए तयाणंतराओ मंड-

लाओ तयाणंतरे मंडलं संकममाणे संकममाणे अट्टारस २ सट्ठिभागे जोयणस्स एगमेगे मंडले मुहुत्तगइं अभिवुद्धेमाणे अभिवुद्धेमाणे चुलसीईं २ सयाईं जोयणाईं पुरिसच्छायं णिवुद्धेमाणे २ सव्ववाहिरं मंडलं उवसंकमिता चारं चरइ । जया णं भंते ! सूरिए सव्ववाहिरमंडलं उवसंकमिता चारं चरइ तथा णं एगमेगेणं मुहुत्तेणं केवइयं खेतं गच्छइ ? गोयमा ! पंच पंच जोयणसहस्साईं तिण्णि य पंचुत्तरे जोयण-सए पण्णरस य सट्ठिभाए जोयणस्स एगमेगेणं मुहुत्तेणं गच्छइ, तथा णं इहगयस्स मणुस्सस्स एगतीसाए जोयणसहस्सेहिं अट्ठहि य एगत्तीसेहिं जोयणसएहिं तीसाए य सट्ठिभाएहिं जोयणस्स सूरिए चक्खुप्फासं हव्वमागच्छइ, एस णं पढमे छम्मासे, एस णं पढमस्स छम्मासस्स पज्जवसाणे, से पविसमाणे सूरिए दोच्चे छम्मासे अयमाणे पढमंति अहोरत्तंसि बाहिराणंतरे मंडलं उवसंकमिता चारं चरइ, जया णं भंते ! सूरिए बाहिराणंतरे मंडलं उवसंकमिता चारं चरइ तथा णं एगमेगेणं मुहुत्तेणं केवइयं खेतं गच्छइ ? गोयमा ! पंच पंच जोयणसहस्साईं तिण्णि य चउरुत्तरे जोयणसए सत्तावण्णं च सट्ठिभाए जोयणस्स एगमेगेणं मुहुत्तेणं गच्छइ, तथा णं इहगयस्स मणुस्सस्स एगतीसाए जोयणसहस्सेहिं णवहि य सोलसुत्तरेहिं जोयणसएहिं इगुणा-लीसाए य सट्ठिभाएहिं जोयणस्स सट्ठिभागं च एगसट्ठिहा छेत्ता सट्ठीए चुण्णिथाभागेहिं सूरिए चक्खुप्फासं हव्वमागच्छइ, से पविसमाणे सूरिए दोच्चे अहोरत्तंसि बाहिरतच्चं मंडलं उवसंकमिता चारं चरइ, जया णं भंते ! सूरिए बाहिरतच्चं मंडलं उवसंकमिता चारं चरइ तथा णं एगमेगेणं मुहुत्तेणं केवइयं खेतं गच्छइ ? गोयमा ! पंच पंच जोयणसहस्साईं तिण्णि य चउरुत्तरे जोयणसए इगुणालीसं च सट्ठिभाए जोयणस्स एगमेगेणं मुहुत्तेणं गच्छइ, तथा णं इहगयस्स मणुयस्स एगाहिएहिं बत्तीसाए जोयण-सहस्सेहिं एगूणमण्णाए य सट्ठिभाएहिं जोयणस्स सट्ठिभागं च एगसट्ठिहा छेत्ता तेवीसाए चुण्णिथाभाएहिं सूरिए चक्खुप्फासं हव्वमागच्छइ, एवं खलु एएणं उवाएणं पविसमाणे सूरिए तयाणंतराओ मंडलाओ तयाणंतरे मंडलं संकममाणे २ अट्टारस २ सट्ठिभाए जोयणस्स एगमेगे मंडले मुहुत्तगइं निवुद्धेमाणे २ साइरेगाइं पंचासीईं २ जोयणाईं पुरिसच्छायं अभिवुद्धेमाणे २ सव्वब्भंतरे मंडलं उवसंकमिता चारं चरइ, एस णं दोच्चे छम्मासे, एस णं दोच्चेस्स छम्मासस्स पज्जवसाणे, एस णं आइच्चे संवच्छरे, एस णं आइच्चेस्स संवच्छरस्स पज्जवसाणे पण्णते ७ ॥ १३३ ॥ जया णं भंते ! सूरिए सव्वब्भंतरे मंडलं उवसंकमिता चारं चरइ तथा णं केमहालए दिवसे केमहालिया राई भवइ ? गोयमा ! तया णं उत्तमकट्ठपत्ते उक्कोसए अट्टारसमुहुत्ते दिवसे भवइ जहण्णि या दुवाल्समुहुत्ता राई भवइ, से णिक्खममाणे सूरिए णवं

संवच्छरं अयमाणे पढमंसि अहोरत्तंसि अब्भंतराणंतरं मंडलं उवसंकमिता चारं चरइ, जया णं भंते ! सूरिए अब्भंतराणंतरं मंडलं उवसंकमिता चारं चरइ तथा णं केमहालए दिवसे केमहालिया राई भवइ ? गोयमा ! तथा णं अट्टारसमुहुत्ते दिवसे भवइ दोहिं एगट्ठिभागमुहुत्तेहिं ऊणे दुवालसमुहुत्ता राई भवइ दोहिं य एगट्ठिभागमुहुत्तेहिं अहियत्ति, से णिक्खममाणे सूरिए दोच्चंसि अहोरत्तंसि जाव चारं चरइ तथा णं केमहालए दिवसे केमहालिया राई भवइ ? गोयमा ! तथा णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे दुवालसमुहुत्ता राई भवइ चउहिं एगट्ठिभागमुहुत्तेहिं अहियत्ति, एवं खलु एएणं उवाएणं णिक्खममाणे सूरिए तयाणंतराओ मंडलाओ तयाणंतरं मंडलं संकममाणे २ दो दो एगट्ठिभागमुहुत्तेहिं मंडले दिवसखेतस्स निवुड्ढेमाणे २ रयणिखेतस्स अभिवुड्ढेमाणे २ सव्ववाहिरं मंडलं उवसंकमिता चारं चरइत्ति, जया णं सूरिए सव्वब्भंतराओ मंडलाओ सव्ववाहिरं मंडलं उवसंकमिता चारं चरइ तथा णं सव्वब्भंतरमंडलं पणिहाय एणेणं तेसीएणं राईदियसएणं तिण्णि छावट्ठे एगट्ठिभागमुहुत्तसए दिवसखेतस्स निवुड्ढेत्ता रयणिखेतस्स अभिवुड्ढेत्ता चारं चरइत्ति, जया णं भंते ! सूरिए सव्ववाहिरं मंडलं उवसंकमिता चारं चरइ तथा णं केमहालए दिवसे केमहालिया राई भवइ ? गोयमा ! तथा णं उत्तमकट्ठपत्ता उक्कोसिया अट्टारसमुहुत्ता राई भवइ जहण्णए दुवालसमुहुत्ते दिवसे भवइत्ति, एस णं पढमे छम्मासे, एस णं पढमस्स छम्मासस्स पज्जवसाणे । से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिता चारं चरइ, जया णं भंते ! सूरिए बाहिराणंतरं मंडलं उवसंकमिता चारं चरइ तथा णं केमहालए दिवसे केमहालिया राई भवइ ? गोयमा ! अट्टारसमुहुत्ता राई भवइ दोहिं एगट्ठिभागमुहुत्तेहिं ऊणा दुवालसमुहुत्ते दिवसे भवइ दोहिं एगट्ठिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि बाहिरतच्चं मंडलं उवसंकमिता चारं चरइ, जया णं भंते ! सूरिए बाहिरतच्चं मंडलं उवसंकमिता चारं चरइ तथा णं केमहालए दिवसे केमहालिया राई भवइ ? गोयमा ! तथा णं अट्टारसमुहुत्ता राई भवइ चउहिं एगट्ठिभागमुहुत्तेहिं ऊणा दुवालसमुहुत्ते दिवसे भवइ चउहिं एगट्ठिभागमुहुत्तेहिं अहिए इति, एवं खलु एएणं उवाएणं पविसमाणे सूरिए तयाणंतराओ मंडलाओ तयाणंतरं मंडलं संकममाणे संकममाणे दो दो एगट्ठिभागमुहुत्तेहिं एगमेगे मंडले रयणिखेतस्स निवुड्ढेमाणे २ दिवसखेतस्स अभिवुड्ढेमाणे २ सव्वब्भंतरं मंडलं उवसंकमिता चारं चरइत्ति, जया णं सूरिए सव्ववाहिराओ मंडलाओ सव्वब्भंतरं मंडलं उवसंकमिता चारं चरइ तथा णं

सव्वबाहिरं मंडलं पणिहाय एगेणं तेसीएणं राइंदियसएणं तिणिण छावट्ठे एगट्ठि-  
 भागमुहुत्तसए रयणिखेत्तस्स णिवुट्ठेता दिवसखेत्तस्स अभिवट्ठेता चारं चरइ,  
 एस णं दोच्चे छम्मासे, एस णं दुच्चस्स छम्मासस्स पज्जवसाणे, एस णं आइच्चे  
 संवच्छरे, एस णं आइच्चस्स संवच्छरस्स पज्जवसाणे पण्णत्ते ८ ॥ १३४ ॥ जया  
 णं भंते ! सूरिए सव्वब्भंतरे मंडलं उवसंकमिता चारं चरइ तथा णं किंसंठिया  
 तावखेत्तसंठिई पण्णत्ता ? गोयमा ! उट्ठीमुहकलंबुयापुप्फसंठाणसंठिया तावखेत्त-  
 संठिई पण्णत्ता, अंतो संकुया बाहिं वित्थडा अंतो वट्ठा बाहिं पिहुला अंतो अंकमुह-  
 संठिया बाहिं सगडुद्धीमुहसंठिया, उत्तरपासे णं तीसे दो बाहाओ अवट्ठियाओ  
 हवंति पणयालीसं २ जोयणसहस्साइं आयामेणं, दुवे य णं तीसे बाहाओ अण-  
 वट्ठियाओ हवंति, तंजहा-सव्वब्भंतरिया चेव बाहा सव्वबाहिरिया चेव बाहा,  
 तीसे णं सव्वब्भंतरिया बाहा मंदरपव्वयंतेणं णवजोयणसहस्साइं चत्तारि छलसीए  
 जोयणसए णव य दसभाए जोयणस्स परिकखेवेणं, एस णं भंते ! परिकखेवविसेसे  
 कओ आहिएति वएज्जा ? गोयमा ! जे णं मंदरस्स० परिकखेवे तं परिकखेवं तिहिं  
 गुणेत्ता दसहिं छेत्ता दसहिं भागे हीरमाणे एस णं परिकखेवविसेसे आहिएति वएज्जा,  
 तीसे णं सव्वबाहिरिया बाहा लवणसमुदंतेणं चउणवई जोयणसहस्साइं अट्ठसट्ठे  
 जोयणसए चत्तारि य दसभाए जोयणस्स परिकखेवेणं, से णं भंते ! परिकखेवविसेसे  
 कओ आहिएति वएज्जा ? गोयमा ! जे णं जंबुद्वीवस्स २ परिकखेवे तं परिकखेवं तिहिं  
 गुणेत्ता दसहिं छेत्ता दसभागे हीरमाणे एस णं परिकखेवविसेसे आहिएति वएज्जा ।  
 तथा णं भंते ! तावखेत्ते केवइयं आयामेणं प० ? गोयमा ! अट्ठहत्तरिं जोयण-  
 सहस्साइं तिणिण य तेत्तीसे जोयणसए जोयणस्स तिभागं च आयामेणं पण्णत्ते,  
 मेरुस्स मज्झयारे जाव य लवणस्स रंदछब्भागो । तावायामो एसो सगडुद्धीसंठिओ  
 णियमा ॥ १ ॥ तथा णं भंते ! किंसंठिया अंधयारसंठिई पण्णत्ता ? गोयमा !  
 उट्ठीमुहकलंबुयापुप्फसंठाणसंठिया अंधयारसंठिई पण्णत्ता, अंतो संकुया बाहिं  
 वित्थडा तं चेव जाव तीसे णं सव्वब्भंतरिया बाहा मंदरपव्वयंतेणं छज्जोयणसहस्साइं  
 तिणिण य चउवीसे जोयणसए छच्च दसभाए जोयणस्स परिकखेवेणंति, से णं भंते !  
 परिकखेवविसेसे कओ आहिएति वएज्जा ? गोयमा ! जे णं मंदरस्स पव्वयस्स परिकखेवे  
 तं परिकखेवं दोहिं गुणेत्ता दसहिं छेत्ता दसहिं भागे हीरमाणे एस णं परिकखेवविसेसे  
 आहिएति वएज्जा, तीसे णं सव्वबाहिरिया बाहा लवणसमुदंतेणं तेसट्ठी जोयणसह-  
 स्साइं दोणिण य पणयाले जोयणसए छच्च दसभाए जोयणस्स परिकखेवेणं, से णं  
 भंते ! परिकखेवविसेसे कओ आहिएति वएज्जा ? गोयमा ! जे णं जंबुद्वीवस्स २ परि-

क्खेवे तं परिक्खेवं दोहिं गुणेत्ता जाव तं चेव तया णं भंते ! अंधयारे केवइए  
आयामेणं प० ? गोयमा ! अट्टहत्तरिं जोयणसहस्साइं तिण्णि य तेतीसे जोयणसए  
तिभागं च आयामेणं प० । जया णं भंते ! सूरिए सव्ववाहिरमंडळं उवसंकमिता  
चारं चरइ तया णं किंसंठिया तावखेत्तसंठिइं प० ? गो० ! उट्ठीमुहकलंबुयापुप्फ-  
संठाणसंठिया० पण्णत्ता, तं चेव सव्वं नेयव्वं णवरं णाणत्तं जं अंधयारसंठिइंए  
पुव्ववण्णिणं पमाणं तं तावखेत्तसंठिइंए नेयव्वं, जं तावखेत्तसंठिइंए पुव्ववण्णिणं  
पमाणं तं अंधयारसंठिइंए नेयव्वंति ९ ॥ १३५ ॥ जंबुद्दीवे णं भंते ! दीवे सूरिया  
उग्गमणमुहुत्तंसि दूरे य मूले य दीसंति मज्झंतियमुहुत्तंसि मूले य दूरे य दीसंति  
अत्थमणमुहुत्तंसि दूरे य मूले य दीसंति ? हंता गोयमा ! तं चेव जाव दीसंति,  
जम्बुद्दीवे णं भन्ते !० सूरिया उग्गमणमुहुत्तंसि य मज्झंतियमुहुत्तंसि य अत्थमण-  
मुहुत्तंसि य सव्वत्थ समा उच्चत्तेणं ? हंता तं चेव जाव उच्चत्तेणं, जइ णं भन्ते !  
जम्बुद्दीवे दीवे सूरिया उग्गमणमुहुत्तंसि य मज्झं० अत्थ० सव्वत्थ समा उच्चत्तेणं  
कम्हा णं भन्ते ! जम्बुद्दीवे दीवे सूरिया उग्गमणमुहुत्तंसि दूरे य मूले य दीसंति० ?  
गोयमा ! लेसापडिघाएणं उग्गमणमुहुत्तंसि दूरे य मूले य दीसंति लेसाहितावेणं  
मज्झंतियमुहुत्तंसि मूले य दूरे य दीसंति लेसापडिघाएणं अत्थमणमुहुत्तंसि दूरे य  
मूले य दीसंति, एवं खलु गोयमा ! तं चेव जाव दीसंति १० ॥ १३६ ॥ जम्बुद्दीवे  
णं भन्ते ! दीवे सूरिया किं तीयं खेत्तं गच्छन्ति पडुप्पणं खेत्तं गच्छन्ति  
अणागयं खेत्तं गच्छन्ति ? गोयमा ! णो तीयं खेत्तं गच्छन्ति पडुप्पणं खेत्तं  
गच्छन्ति णो अणागयं खेत्तं गच्छन्ति, तं भन्ते ! किं पुट्ठं गच्छन्ति जाव  
नियमा छद्दिसिंति, एवं ओभासेंति, तं भन्ते ! किं पुट्ठं ओभासेंति० ? एवं आहारपयाइं  
णेयव्वाइं पुट्ठोगाढमणंतरअणुमहआइविसयाणुपुव्वी य जाव णियमा छद्दिसिं, एवं  
उज्जोवेत्ति तवेत्ति पभासेंति ११ ॥ १३७ ॥ जम्बुद्दीवे णं भन्ते ! दीवे सूरियाणं किं  
तीए खेत्ते किरिया कज्जइ पडुप्पण्णे० अणागए० ? गो० ! णो तीए खेत्ते किरिया  
कज्जइ पडुप्पण्णे० कज्जइ णो अणागए०, सा भन्ते ! किं पुट्ठा कज्जइ० ? गोयमा ! पुट्ठा०  
णो अणापुट्ठा कज्जइ जाव णियमा छद्दिसिं १२ ॥ १३८ ॥ जम्बुद्दीवे णं भन्ते ! दीवे  
सूरिया केवइयं खेत्तं उट्ठं तवयन्ति अहे तिरियं च ? गोयमा ! एगं जोयणसयं उट्ठं  
तवयन्ति अट्टारससयजोयणाइं अहे तवयन्ति सीयालीसं जोयणसहस्साइं दोण्णि य  
तेवट्ठे जोयणसए एगवीसं च सट्ठिभाए जोयणस्स तिरियं तवयन्ति १३ ॥ १३९ ॥  
अंतो णं भन्ते ! माणसुत्तरस्स पव्वयस्स जे चंदिमसूरियगहगणणक्खत्तताराह्वा ते  
णं भन्ते ! देवा किं उट्ठोववण्णगा कप्पोववण्णगा विमाणोववण्णगा चारोववण्णगा

चारट्टिइया गइरइया गइसमावण्णगा ? गोयमा ! अंतो णं माणुसुत्तरस्स पव्वयस्स जे चन्दिमसूरिय जाव ताराहूवा ते णं देवा णो उड्डोववण्णगा णो कप्पोववण्णगा विमाणोववण्णगा चारोववण्णगा णो चारट्टिइया गइरइया गइसमावण्णगा उड्डीमुह-  
 कलंबुयापुप्फसंठाणसंठिएहिं जोयणसाहस्सिएहिं तावखेत्तेहिं साहस्सियाहिं वेउव्वियाहिं  
 बाहिराहिं परिसाहिं महया हयणट्टगीयवाइयतंतीतलतालुडियघणमुइंगपडुप्पवाइयर-  
 वेणं दिव्वाइं भोगभोगाइं भुंजमाणा महया उक्किट्टिसीहणायबोलकलकलरवेणं  
 अच्छं पव्वयरायं पयाहिणावत्तमण्डलचारं मेरं अणुपरियट्ठंति १४ ॥ १४० ॥  
 तेसि णं भन्ते ! देवाणं जाहे इंदे चुए भवइ से कहमियाणि पकरंति ? गोयमा !  
 ताहे चत्तारि पंच वा सामाणिया देवा तं ठाणं उवसंपज्जित्तानं विहरंति जाव तत्थ  
 अण्णे इंदे उववणे भवइ । इंदट्ठाणे णं भंते ! केवइयं कालं उववाएणं विरहिए ?  
 गोयमा ! जहण्णेणं एगं समयं उक्कोसेणं छम्मासे उववाएणं विरहिए । बहिया णं  
 भन्ते ! माणुसुत्तरस्स पव्वयस्स जे चंदिम जाव ताराहूवा तं चेव णेयव्वं णाणत्तं  
 विमाणोववण्णगा णो चारोववण्णगा चारट्टिइया णो गइरइया णो गइसमावण्णगा  
 पक्किट्टगसंठाणसंठिएहिं जोयणसयसाहस्सिएहिं तावखेत्तेहिं सयसाहस्सियाहिं वेउव्वि-  
 याहिं बाहिराहिं परिसाहिं महया हयणट्ट जाव भुंजमाणा सुहलेसा मन्दलेसा मन्दा-  
 यवलेसा चित्तंतरलेसा अण्णेणसमोगाढाहिं लेसाहिं कूडाविव ठाणटिया सव्वओ  
 समन्ता ते एएसे ओभासंति उज्जोवंति पभासेन्तित्ति । तेसि णं भन्ते ! देवाणं  
 जाहे इंदे चुए भवइ से कहमियाणि पकरन्ति जाव जहण्णेणं एक्कं समयं उक्कोसेणं  
 छम्मासा इति १५ ॥ १४१ ॥ कइ णं भन्ते ! चंदमण्डला प० ? गो० ! पण्णरस  
 चंदमण्डला पण्णत्ता । जम्बुद्वीवे णं भन्ते ! द्वीवे केवइयं ओगाहिता केवइया चन्द-  
 मण्डला प० ? गो० ! जम्बुद्वीवे २ असीयं जोयणसयं ओगाहिता पंच चंदमण्डला  
 पण्णत्ता, लवणे णं भन्ते ! पुच्छा, गोयमा ! लवणे णं समुदे तिण्णि तीसे जोयण-  
 सए ओगाहिता एत्थ णं दस चंदमण्डला पण्णत्ता, एवामेव सपुव्वावरेणं जम्बुद्वीवे  
 द्वीवे लवणे य समुदे पण्णरस चंदमण्डला भवन्तीतिमक्खायं ॥ १४२ ॥ सव्व-  
 व्भंतराओ णं भन्ते ! चंदमंडलाओ केवइयाए अबाहाए सव्वबाहिरए चंदमंडले  
 प० ? गोयमा ! पंचदसुत्तरे जोयणसए अबाहाए सव्वबाहिरए चंदमंडले पण्णत्ते  
 ॥ १४३ ॥ चंदमंडलस्स णं भन्ते ! चंदमंडलस्स य एस णं केवइयाए अबाहाए अंतरे  
 प० ? गोयमा ! पण्णतीसं २ जोयणाइं तीसं च एगसट्ठिभाए जोयणस्स एगसट्ठिभां  
 च सत्तहा छेत्ता चत्तारि चुणियाभाए चंदमंडलस्स चंदमंडलस्स अबाहाए अंतरे  
 पण्णत्ते ॥ १४४ ॥ चंदमंडले णं भन्ते ! केवइयं आयामविवक्खंमेणं केवइयं परि-

क्खेवेणं केवइयं बाहल्लेणं पणत्ते ? गोयमा ! छप्पणं एगसट्ठिभाए जोगणस्स आयामविकखम्मेणं तं तिगुणं सविसेसं परिक्खेवेणं अट्ठावीसं च एगसट्ठिभाए जोगणस्स बाहल्लेणं ॥ १४५ ॥ जम्बुद्दीवे णं भन्ते ! दीवे मन्दरस्स पव्वयस्स केवइयाए अवाहाए सव्वभन्तरए चन्दमंडले पणत्ते ? गोयमा ! चोयालीसं जोगणसहस्साइं अट्ठ य वीसे जोगणसए अवाहाए सव्वभन्तरे चन्दमंडले पणत्ते, जम्बुद्दीवे...मन्दरस्स पव्वयस्स केवइयाए अवाहाए अब्भन्तराणन्तरे चन्दमंडले पणत्ते ? गोयमा ! चोयालीसं जोगणसहस्साइं अट्ठ य छप्पण्णे जोगणसए पणवीसं च एगसट्ठिभाए जोगणस्स एगसट्ठिभागं च सत्तहा छेत्ता चत्तारि चुण्णियाभाए अवाहाए अब्भन्तराणन्तरे चन्दमंडले पणत्ते, जम्बुद्दीवे० दीवे मन्दरस्स पव्वयस्स केवइयाए अवाहाए अब्भन्तरत्तच्चे चन्दमंडले प० ? गोयमा ! चोयालीसं जोगणसहस्साइं अट्ठ य वाणउए जोगणसए एगावण्णं च एगसट्ठिभाए जोगणस्स एगसट्ठिभागं च सत्तहा छेत्ता एगं चुण्णियाभागं अवाहाए अब्भन्तरत्तच्चे चन्दमंडले पणत्ते, एवं खलु एएणं उवाएणं णिक्खममाणे चंदे तयाणन्तराओ मंडलाओ तयाणन्तरं मंडलं संकममाणे २ छत्तीसं छत्तीसं जोगणाइं पणवीसं च एगसट्ठिभाए जोगणस्स एगसट्ठिभागं च सत्तहा छेत्ता चत्तारि चुण्णियाभाए एगमेगे मंडले अवाहाए वुद्धिं अभिवहेममाणे २ सव्ववाहिरं मंडलं उवसंकमिता चारं चरइ । जम्बुद्दीवे० दीवे मन्दरस्स पव्वयस्स केवइयाए अवाहाए सव्ववाहारे चन्दमंडले प० ? गो० ! पणयालीसं जोगणसहस्साइं तिण्णि य तीसे जोगणसए अवाहाए सव्ववाहिरए चन्दमंडले प०, जम्बुद्दीवे० दीवे मन्दरस्स पव्वयस्स केवइयाए अवाहाए बाहिराणन्तरे चन्दमंडले पणत्ते ? गो० ! पणयालीसं जोगणसहस्साइं दोण्णि य तेणउए जोगणसए पणतीसं च एगसट्ठिभाए जोगणस्स एगसट्ठिभागं च सत्तहा छेत्ता तिण्णि चुण्णियाभाए अवाहाए बाहिराणन्तरे चन्दमंडले पणत्ते, जम्बुद्दीवे० दीवे मन्दरस्स पव्वयस्स केवइयाए अवाहाए बाहिरत्तच्चे चन्दमंडले प० ? गो० ! पणयालीसं जोगणसहस्साइं दोण्णि य सत्तावण्णे जोगणसए णव य एगसट्ठिभाए जोगणस्स एगसट्ठिभागं च सत्तहा छेत्ता छ चुण्णियाभाए अवाहाए बाहिरत्तच्चे चन्दमंडले प० । एवं खलु एएणं उवाएणं पविसमाणे चंदे तयाणन्तराओ मंडलाओ तयाणन्तरं मंडलं संकममाणे २ छत्तीसं २ जोगणाइं पणवीसं च एगसट्ठिभाए जोगणस्स एगसट्ठिभागं च सत्तहा छेत्ता चत्तारि चुण्णियाभाए एगमेगे मंडले अवाहाए वुद्धिं णिवुहेममाणे २ सव्वभन्तरं मंडलं उवसंकमिता चारं चरइ ॥ १४६ ॥ सव्वभन्तरे णं भन्ते ! चन्दमंडले केवइयं आयामविकखम्मेणं केवइयं परिक्खेवेणं



पण्णत्ते ? गोयमा ! णवणउइं जोयणसहस्साइं छच्चत्ताले जोयणसए आयामविकख-  
म्भेणं तिणिण य जोयणसयसहस्साइं पण्णरस जोयणसहस्साइं अउणाणउइं च जोय-  
णाइं किंचिविसेसाहिए परिकखेवेणं प०, अब्भन्तराणंतरे सा चेव पुच्छां, गोयमा !  
णवणउइं जोयणसहस्साइं सत्त य बारसुत्तरे जोयणसए एगावण्णं च एगट्ठिभागे  
जोयणस्स एगट्ठिभागं च सत्तहा छेत्ता एगं चुण्णियाभागं आयामविकखम्भेणं तिणिण  
य जोयणसयसहस्साइं पण्णरस सहस्साइं तिणिण य एगूणवीसे जोयणसए किंचिविसे-  
साहिए परिकखेवेणं, अब्भन्तरत्तच्चै णं जाव प० ? गो० ! णवणउइं जोयणसहस्साइं  
सत्त य पञ्चासीए जोयणसए इगतालीसं च एगट्ठिभाए जोयणस्स एगट्ठिभागं च सत्तहा  
छेत्ता दोणिण य चुण्णियाभाए आयामविकखम्भेणं तिणिण य जोयणसयसहस्साइं  
पण्णरस जोयणसहस्साइं पंच य इगुणापण्णे जोयणसए किंचिविसेसाहिए परिकखे-  
वेणंति, एवं खलु एएणं उवाएणं णिक्खममाणे चंदे जाव संकममाणे २ बावत्तरिं २  
जोयणाइं एगावण्णं च एगट्ठिभाए जोयणस्स एगट्ठिभागं च सत्तहा छेत्ता एगं च  
चुण्णियाभागं एगमेगे मंडले विक्खम्भवुड्ढिं अभिवड्ढेमाणे २ दो दो तीसाइं जोयण-  
सयाइं परिणयवुड्ढिं अभिवड्ढेमाणे २ सव्ववाहिरं मंडलं उवसंकमिता चारं चरइ ।  
सव्ववाहिरए णं भन्ते ! चन्दमंडले केवइयं आयामविकखम्भेणं केवइयं परिकखेवेणं  
पण्णत्ते ? गो० ! एगं जोयणसयसहस्सं छच्चसट्ठे जोयणसए आयामविकखम्भेणं तिणिण  
य जोयणसयसहस्साइं अट्ठारस सहस्साइं तिणिण य पण्णरसुत्तरे जोयणसए परिकखे-  
वेणं०, बाहिराणन्तरे णं पुच्छा, गो० ! एगं जोयणसयसहस्सं पच्च सत्तासीए जोयण-  
सए णव य एगट्ठिभाए जोयणस्स एगट्ठिभागं च सत्तहा छेत्ता छ चुण्णियाभाए  
आयामविकखम्भेणं तिणिण य जोयणसयसहस्साइं अट्ठारस सहस्साइं पंचासीइं च  
जोयणाइं परिकखेवेणं०, बाहिरत्तच्चै णं भन्ते ! चन्दमण्डले० प० ? गो० ! एगं जोय-  
णसयसहस्सं पंच य चउदसुत्तरे जोयणसए एगूणवीसं च एगट्ठिभाए जोयणस्स  
एगट्ठिभागं च सत्तहा छेत्ता पंच चुण्णियाभाए आयामविकखम्भेणं तिणिण य जोयण-  
सयसहस्साइं सत्तरस सहस्साइं अट्ठ य पणपण्णे जोयणसए परिकखेवेणं०, एवं खलु  
एएणं उवाएणं पविसमाणे चन्दे जाव संकममाणे २ बावत्तरिं २ जोयणाइं एगावण्णं  
च एगट्ठिभाए जोयणस्स एगट्ठिभागं च सत्तहा छेत्ता एगं चुण्णियाभागं एगमेगे  
मण्डले विक्खम्भवुड्ढिं णिवुड्ढेमाणे २ दो दो तीसाइं जोयणसयाइं परिणयवुड्ढिं  
णिवुड्ढेमाणे २ सव्वब्भन्तरं मंडलं उवसंकमिता चारं चरइ ॥ १४७ ॥ जया णं  
भन्ते ! चन्दे सव्वब्भन्तरमण्डलं उवसंकमिता चारं चरइ तथा णं एगमेगेणं मुहुत्तेणं  
केवइयं खेत्तं गच्छइ ? गोयमा ! पंच जोयणसहस्साइं तेवत्तरिं च जोयणाइं सत्तत्तरिं

च चोयाले भागसए गच्छइ मण्डलं तेरसहिं सहस्सेहिं सत्तहि य पणवीसेहिं सएहिं छेत्ता इति, तथा णं इहगयस्स मणूसस्स सीयालीसाए जोयणसहस्सेहिं दोहि य तेवट्ठेहिं जोयणसएहिं एगवीसाए य सट्ठिभाएहिं जोयणस्स चन्दे चक्खुप्फासं हव्व-  
मागच्छइ । जया णं भन्ते ! चन्दे अब्भन्तराणन्तरं मण्डलं उवसंकमिता चारं चरइ जाव केवइयं खेत्तं गच्छइ ? गो० ! पंच जोयणसहस्साइं सत्तत्तरिं च जोयणाइं छत्तीसं च चोवतरे भागसए गच्छइ मण्डलं तेरसहिं सहस्सेहिं जाव छेत्ता, जया णं भन्ते !  
चन्दे अब्भन्तरतच्चं मण्डलं उवसंकमिता चारं चरइ तथा णं एगमेगेणं मुहुत्तेणं केव-  
इयं खेत्तं गच्छइ ? गोयमा ! पंच जोयणसहस्साइं असीइं च जोयणाइं तेरस य  
भागसहस्साइं तिणिण य एगूणवीसे भागसए गच्छइ मण्डलं तेरसहिं जाव छेत्ता  
इति । एवं खलु एएणं उवाएणं णिक्खममाणे चन्दे तयाणन्तराओ जाव संक्रममाणे २  
तिणिण २ जोयणाइं छण्णउइं च पंचावण्णे भागसए एगमेगे मण्डले मुहुत्तगइं  
अभिवट्ठेमाणे २ सव्वबाहिरं मण्डलं उवसंकमिता चारं चरइ, जया णं भन्ते ! चन्दे  
सव्वबाहिरं मण्डलं उवसंकमिता चारं चरइ तथा णं एगमेगेणं मुहुत्तेणं केवइयं खेत्तं  
गच्छइ ? गोयमा ! पंच जोयणसहस्साइं एगं च पणवीसं जोयणसयं अउणत्तरिं च  
णउए भागसए गच्छइ मण्डलं तेरसहिं भागसहस्सेहिं सत्तहि य जाव छेत्ता इति,  
तथा णं इहगयस्स मणूसस्स एकतीसाए जोयणसहस्सेहिं अट्ठहि य एगत्तीसेहिं  
जोयणसएहिं चन्दे चक्खुप्फासं हव्वमागच्छइ, जया णं भन्ते ! बाहिराणन्तरं  
पुच्छा, गोयमा ! पंच जोयणसहस्साइं एकं च एकवीसं जोयणसयं एकारस य सट्ठे  
भागसहस्से गच्छइ मण्डलं तेरसहिं जाव छेत्ता, जया णं भन्ते ! बाहिरतच्चं पुच्छा,  
गोयमा ! पंच जोयणसहस्साइं एगं च अट्ठारसुत्तरं जोयणसयं चोदस य पंचुत्तरे भागसए  
गच्छइ मण्डलं तेरसहिं सहस्सेहिं सत्तहि पणवीसेहिं सएहिं छेत्ता, एवं खलु एएणं उवा-  
एणं जाव संक्रममाणे २ तिणिण २ जोयणाइं छण्णउइं च पंचावण्णे भागसए एगमेगे  
मण्डले मुहुत्तगइं णिवुट्ठेमाणे २ सव्वब्भन्तरं मण्डलं उवसंकमिता चारं चरइ ॥ १४८ ॥  
कइ णं भन्ते ! णक्खत्तमण्डला प० ? गोयमा ! अट्ठ णक्खत्तमण्डला पण्णत्ता । जम्बु-  
द्वीवे णं भन्ते ! दीवे केवइयं ओगाहिता केवइया णक्खत्तमण्डला पण्णत्ता ? गोयमा !  
जम्बुद्वीवे दीवे असीयं जोयणसयं ओगाहेत्ता एत्थ णं दो णक्खत्तमण्डला पण्णत्ता, लवणे  
णं भन्ते ! समुदे केवइयं ओगाहेत्ता केवइया णक्खत्तमण्डला पण्णत्ता ? गोयमा ! लवणे  
णं समुदे तिणिण तीसे जोयणसए ओगाहिता एत्थ णं छ णक्खत्तमण्डला पण्णत्ता,  
एवामेव सपुव्वावरेणं जम्बुद्वीवे दीवे लवणसमुदे अट्ठ णक्खत्तमण्डला भवन्तीतिमक्खायं ।  
सव्वब्भन्तराओ णं भन्ते ! णक्खत्तमण्डलाओ केवइयाए अवाहाए सव्वबाहिरए

णक्खत्तमंडले पण्णत्ते ? गोयमा ! पंचदसुत्तरे जोयणसए अवाहाए सव्वबाहिरए  
णक्खत्तमंडले पण्णत्ते, णक्खत्तमंडलस्स णं भन्ते ! णक्खत्तमंडलस्स य एस णं  
केवइयाए अवाहाए अंतरे पण्णत्ते ? गोयमा ! दो जोयणाइं णक्खत्तमंडलस्स य  
णक्खत्तमंडलस्स य अवाहाए अंतरे पण्णत्ते । णक्खत्तमंडले णं भंते ! केवइयं  
आयामविकखम्भेणं केवइयं परिकखेवेणं केवइयं बाहल्लेणं पण्णत्ते ? गोयमा ! गाउयं  
आयामविकखम्भेणं तं तिगुणं सविसेसं परिकखेवेणं अद्दगाउयं बाहल्लेणं पण्णत्ते ।  
जम्बुदीवे णं भन्ते ! दीवे मंदरस्स पव्वयस्स केवइयाए अवाहाए सव्वभंतरे  
णक्खत्तमंडले पण्णत्ते ? गोयमा ! चोयालीसं जोयणसहस्साइं अद्द य वीसे जोयणसए  
अवाहाए सव्वभंतरे णक्खत्तमंडले पण्णत्ते, जम्बुदीवे णं भंते ! दीवे मंदरस्स पव्व-  
यस्स केवइयाए अवाहाए सव्वबाहिरए णक्खत्तमंडले पण्णत्ते ? गोयमा ! पणया-  
लीसं जोयणसहस्साइं तिणिण य तीसे जोयणसए अवाहाए सव्वबाहिरए णक्खत्त-  
मंडले पण्णत्ते । सव्वभंतरे णं भंते ! णक्खत्तमंडले केवइयं आयामविकखंभेणं  
केवइयं परिकखेवेणं प० ? गोयमा ! णवणउइं जोयणसहस्साइं छच्चत्ताले जोयणसए  
आयामविकखंभेणं तिणिण य जोयणसयसहस्साइं पण्णरस जोयणसहस्साइं एगूणणवई  
च जोयणाइं किंचिविसेसाहिए परिकखेवेणं पण्णत्ते, सव्वबाहिरए णं भंते ! णक्खत्त-  
मंडले केवइयं आयामविकखंभेणं केवइयं परिकखेवेणं पण्णत्ते ? गोयमा ! एगं जोयण-  
सयसहस्सं छच्च सट्ठे जोयणसए आयामविकखंभेणं तिणिण य जोयणसयसहस्साइं  
अद्दारस य जोयणसहस्साइं तिणिण य पण्णरसुत्तरे जोयणसए परिकखेवेणं प०, जया  
णं भंते ! णक्खत्ते सव्वभंतरमंडलं उवसंकमिता चारं चरइ तया णं एगमेगेणं  
मुहुत्तेणं केवइयं खेतं गच्छइ ? गोयमा ! पंच जोयणसहस्साइं दोणिण य पण्णट्ठे  
जोयणसए अद्दारस य भागसहस्से दोणिण य तेवट्ठे भागसए गच्छइ मंडलं एक्कवी-  
साए भागसहस्सेहिं णवहि य सट्ठेहिं सएहिं छेत्ता । जया णं भंते ! णक्खत्ते सव्व-  
बाहिरं मंडलं उवसंकमिता चारं चरइ तया णं एगमेगेणं मुहुत्तेणं केवइयं खेतं  
गच्छइ ? गोयमा ! पंच जोयणसहस्साइं तिणिण य एगूणवीसे जोयणसए सोलस य  
भागसहस्सेहिं तिणिण य पण्णट्ठे भागसए गच्छइ मंडलं एगवीसाए भागसहस्सेहिं  
णवहि य सट्ठेहिं सएहिं छेत्ता, एए णं भंते ! अद्द णक्खत्तमंडला कइहिं चंदमंडलेहिं  
समोयरंति ? गोयमा ! अद्दहिं चंदमंडलेहिं समोयरंति, तंजहा—पढमे चंदमंडले  
तइए० छट्ठे० सत्तमे० अद्दमे० दसमे० इक्कारसमे० पण्णरसमे चंदमंडले, एगमेगेणं  
भन्ते ! मुहुत्तेणं केवइयाइं भागसयाइं गच्छइ ? गोयमा ! जं जं मंडलं उवसंकमिता चारं  
चरइ तस्स २ मंडलपरिकखेवस्स सत्तरस अट्ठे भागसए गच्छइ मंडलं सयसहस्सेणं

अट्ठाणउईए य सएहिं छेत्ता इति । एगमेगेणं भन्ते ! मुहुत्तेणं सूरिए केवइयाईं भाग-  
सयाईं गच्छइ ? गोयमा ! जं जं मंडलं उवसंकमिता चारं चरइ तस्स २ मंडलपरि-  
क्खेवस्स अट्ठारसतीसे भागसए गच्छइ मंडलं सयसहस्सेहिं अट्ठाणउईए य सएहिं  
छेत्ता, एगमेगेणं भन्ते ! मुहुत्तेणं णक्खत्ते केवइयाईं भागसयाईं गच्छइ ? गोयमा !  
जं जं मंडलं उवसंकमिता चारं चरइ तस्स तस्स मंडलपरिक्खेवस्स अट्ठारस  
पणतीसे भागसए गच्छइ मंडलं सयसहस्सेणं अट्ठाणउईए य सएहिं छेत्ता ॥१४९॥  
जम्बुद्दीवे णं भन्ते ! दीवे सूरिया उदीणपाईणमुग्गच्छ पाईणदाहिणमागच्छंति १  
पाईणदाहिणमुग्गच्छ दाहिणपडीणमागच्छंति २ दाहिणपडीणमुग्गच्छ पडीणउदीण-  
मागच्छंति ३ पडीणउदीणमुग्गच्छ उदीणपाईणमागच्छंति ४ ? हंता गोयमा ! जहा  
पंचमसए पढमे उद्देसे जाव णेवत्थि ०उस्सप्पिणी अवट्टिए णं तत्थ काले प० समणा-  
उसो !, इच्चेसा जम्बुद्दीवपण्णत्ती सूरपण्णत्ती वत्थुसमौसेणं सम्मत्ता भवइ । जम्बुद्दीवे  
णं भन्ते ! दीवे चंदिमा उदीणपाईणमुग्गच्छ पाईणदाहिणमागच्छंति जहा सूरवत्त-  
व्वया जहा पंचमसयस्स दसमे उद्देसे जाव अवट्टिए णं तत्थ काले पण्णत्ते समणा-  
उसो !, इच्चेसा जम्बुद्दीवपण्णत्ती चंदपण्णत्ती वत्थुसमौसेणं सम्मत्ता भवइ ॥ १५० ॥  
कइ णं भन्ते ! संवच्छरा पण्णत्ता ? गोयमा ! पंच संवच्छरा प०, तं०-णक्खत्तसंव-  
च्छरे जुगसंवच्छरे पमाणसंवच्छरे लक्खणसंवच्छरे सणिच्छरसंवच्छरे । णक्खत्त-  
संवच्छरे णं भन्ते ! कइविहे पण्णत्ते ? गोयमा ! दुवालसविहे प०, तं०-सावणे  
भइवए आसोए जाव आसाढे, जं वा विहप्फई महग्गहे दुवालसेहिं संवच्छरेहिं  
सव्वणक्खत्तमंडलं समाणेइ सेत्तं णक्खत्तसंवच्छरे । जुगसंवच्छरे णं भन्ते ! कइविहे  
पण्णत्ते ? गोयमा ! पंचविहे प०, तंजहा—चंदे चंदे अभिवट्टिए चंदे अभिवट्टिए  
चेवेत्ति, पढमस्स णं भन्ते ! चन्दसंवच्छरस्स कइ पव्वा पण्णत्ता ? गोयमा ! चउव्वीसं  
पव्वा पण्णत्ता, बिइयस्स णं भन्ते ! चन्दसंवच्छरस्स कइ पव्वा पण्णत्ता ? गोयमा !  
चउव्वीसं पव्वा पण्णत्ता, एवं पुच्छा तइयस्स, गोयमा ! अभिवट्टियसंवच्छरस्स  
छव्वीसं पव्वा प०, चउत्थस्स० चन्दसंवच्छरस्स० चोव्वीसं पव्वा०, पंचमस्स णं०  
अभिवट्टियस्स० छव्वीसं पव्वा पण्णत्ता, एवामेव सपुव्वावरेणं पंचसंवच्छरिए जुए एगे  
चउव्वीसे पव्वसए पण्णत्ते, सेत्तं जुगसंवच्छरे । पमाणसंवच्छरे णं भन्ते ! कइविहे पण्णत्ते ?  
गोयमा ! पंचविहे पण्णत्ते, तंजहा—णक्खत्ते चन्दे उऊ आइच्चे अभिवट्टिए, सेत्तं

१ आइल्लदीवस्स जहावट्टियसरूवाणिहविगा गंथपइई—तीए । २ सूरियाहिगारप-  
डिबद्धापयपइई । ३ मंडलसंखाईणं सूरियपण्णत्तीआइमहागंथावेक्खाए संखेवो तेण ।  
४ चंदाहिगार० । ५ मंडलसंखाईणं चंदपण्णत्तीआइ० ।

पमाणसंवच्छरे । लक्खणसंवच्छरे णं भन्ते ! कइविहे पण्णत्ते ? गोयमा ! पंचविहे पण्णत्ते, तंजहा—“समयं णक्खत्ता जोगं जोयंति समयं उऊ परिणमंति । णञ्जुण्हाणइसीओ बहूदओ होइ णक्खत्ते ॥ १ ॥ ससि समगपुण्णमासिं जोएन्ति विसम-चारिणक्खत्ता । कहुओ बहूदओ य तमाहु संवच्छरं चन्दं ॥ २ ॥ विसमं पवाल्लिणो परिणमन्ति अणुऊसु दिति पुप्फफलं । वासं न सम्म वासइ तमाहु संवच्छरं कम्मं ॥ ३ ॥ पुढविदगाणं च रसं पुप्फफलाणं च देइ आइच्चो । अप्पेणवि वासेणं सम्मं निप्फज्जए सस्सं ॥ ४ ॥ आइच्चतेयतविया खणलवदिवसा उऊ परिणमन्ति । पूरेइ य णिण्णथले तमाहु अभिवद्धियं जाण ॥ ५ ॥” सणिच्छरसंवच्छरे णं भन्ते ! कइविहे पण्णत्ते ? गोयमा ! अट्ठावीसइविहे पण्णत्ते, तंजहा—अभिइं सवणें धणिट्ठा सयभिसया दो य होंति भइवया । रेवइ अस्सिणि भरणी कत्तिय तह रोहिणी चेव ॥ १ ॥ जाव उत्तराओ आसाढाओ जं वा सणिच्चरे महङ्गहे तीसाए संवच्छरेहिं सव्वं णक्खत्तमण्डलं समाणेइ सेत्तं सणिच्चरसंवच्छरे ॥ १५१ ॥ एगमेगस्स णं भन्ते ! संवच्छरस्स कइ मासा पण्णत्ता ? गोयमा ! दुवाल्स मासा पण्णत्ता, तेसि णं दुविहा णामधेज्जा प०, तं०—लोइया लोउत्तरिया य, तत्थ लोइया णामा इमे, तं०—सावणे भइवए जाव आसाढे, लोउत्तरिया णामा इमे, तंजहा—अभिणंदिए पइहे य, विजए पीइवद्धणे । सेयंसे य सिवे चेव, सिसिरे य सहेमवं ॥ १ ॥ णवमे वसंतमासे, दसमे कुसुमसंभवे । एक्कारसे निदाहे य, वणविरोहे य वारसे ॥ २ ॥ एगमेगस्स णं भन्ते ! मासस्स कइ पक्खा पण्णत्ता ? गोयमा ! दो पक्खा पण्णत्ता, तं०—बहुलपक्खे य सुक्कपक्खे य । एगमेगस्स णं भन्ते ! पक्खस्स कइ दिवसा पण्णत्ता ? गोयमा ! पण्णरस दिवसा पण्णत्ता, तं०—पडिवादिवसे विइयादिवसे जाव पण्णरसीदिवसे, एएसि णं भंते ! पण्णरसण्हं दिवसाणं कइ णामधेज्जा पण्णत्ता ? गोयमा ! पण्णरस णामधेज्जा पण्णत्ता, तं०—पुव्वंगे सिद्धमणोरमे य तत्तो मणोरहे चेव । जसभेइ य जसधरे छट्ठे सव्वकामसमिद्धे ॥ १ ॥ इंदमुद्धाभिसित्ते य सोमणस्स धणंजए य बोद्धवे । अत्थसिद्धे अभिजाए अच्चसणे सयंजए चेव ॥ २ ॥ अभिगवेसे उवसमे दिवसाणं होंति णामाई । एएसि णं भंते ! पण्णरसण्हं दिवसाणं कइ तिही पण्णत्ता ? गोयमा ! पण्णरस तिही पण्णत्ता, तं०—णंदे भेइ जए तुच्छे पुण्णे पक्खस्स पंचमी, पुणरवि णंदे भेइ जए तुच्छे पुण्णे पक्खस्स दसमी, पुणरवि णंदे भेइ जए तुच्छे पुण्णे पक्खस्स पण्णरसी, एवं ते तिगुणाओ तिहीओ सव्वेसिं दिवसा-णंति । एगमेगस्स णं भंते ! पक्खस्स कइ राईओ पण्णत्ताओ ? गोयमा ! पण्णरस राईओ पण्णत्ताओ, तं०—पडिवाराई जाव पण्णरसीराई, एयासि णं भंते ! पण्णरसण्हं

राईणं कइ णामधेज्जा पण्णत्ता ? गोयमा ! पण्णरस णामधेज्जा पण्णत्ता, तंजहा—  
उत्तमा य सुणक्खत्ता, एलावच्चा जसोहरा । सोमणसा चेव तहा, सिरिसंभूया य  
बोद्धव्वा ॥ १ ॥ विजया य वेजयन्ति जयति अपराजिया य इच्छा य । समाहारा  
चेव तहा तेया य तहा अईतेया ॥ २ ॥ देवाणंदा णिरई रयणीणं णामधिज्जाई ।  
एयासि णं भंते ! पण्णरसण्हं राईणं कइ तिही प० ? गोयमा ! पण्णरस तिही प०,  
तं०—उग्गवई भोगवई जसवई सव्वसिद्धा सुहणामा, पुणरवि उग्गवई भोगवई जसवई  
सव्वसिद्धा सुहणामा, पुणरवि उग्गवई भोगवई जसवई सव्वसिद्धा सुहणामा, एवं  
तिगुणा एए तिहीओ सव्वेसिं राईणं, एगमेगस्स णं भंते ! अहोरत्तस्स कइ सुहुत्ता  
पण्णत्ता ? गोयमा ! तीसं सुहुत्ता प०, तं०—स्से सेए मित्ते वाउ सुवीए तहेव अभिचंदे ।  
माहिंद बलव वंमे बहुसच्चे चेव ईसाणे ॥ १ ॥ तट्ठे य भावियप्पा वेसमणे वारुणे  
य आणंदे । विजए य वीससेणे पायावच्चे उवसमे य ॥ २ ॥ गंधव्व अग्गिवेसे सय-  
वसहे आयवे य अममे य । अणवं भोमे वसहे सव्वट्ठे रक्खसे चेव ॥ ३ ॥ १५२ ॥  
कइ णं भन्ते ! करणा पण्णत्ता ? गोयमा ! एक्कारस करणा पण्णत्ता, तंजहा—बवं  
बालवं कोलवं श्रीविलोयणं गराइ वणिजं विट्ठी सउणी चउप्पयं णागं किंथुग्घं, एएसि  
णं भन्ते ! एक्कारसण्हं करणाणं कइ करणा चरा कइ करणा थिरा पण्णत्ता ?  
गोयमा ! सत्त करणा चरा चत्तारि करणा थिरा पण्णत्ता, तंजहा—बवं बालवं  
कोलवं श्रीविलोयणं गराइ वणिजं विट्ठी, एए णं सत्त करणा चरा, चत्तारि करणा  
थिरा प०, तं०—सउणी चउप्पयं णागं किंथुग्घं, एए णं चत्तारि करणा थिरा पण्णत्ता,  
एए णं भन्ते ! चरा थिरा वा कया भवन्ति ? गोयमा ! सुक्कपक्खस्स पडिवाए  
राओ बवे करणे भवइ, बिइयाए दिवा बालवे करणे भवइ, राओ कोलवे करणे  
भवइ, तइयाए दिवा श्रीविलोयणं करणं भवइ, राओ गराइकरणं भवइ, चउत्थीए  
दिवा वणिजं राओ विट्ठी पंचमीए दिवा बवं राओ बालवं छट्ठीए दिवा कोलवं राओ  
श्रीविलोयणं सत्तमीए दिवा गराइ राओ वणिजं अट्ठमीए दिवा विट्ठी राओ बवं  
णवमीए दिवा बालवं राओ कोलवं दसमीए दिवा श्रीविलोयणं राओ गराइ एक्कारसीए  
दिवा वणिजं राओ विट्ठी बारसीए दिवा बवं राओ बालवं तेरसीए दिवा कोलवं  
राओ श्रीविलोयणं चउइसीए दिवा गराइकरणं राओ वणिजं पुण्णिमाए दिवा  
विट्ठीकरणं राओ बवं करणं भवइ, बहुलपक्खस्स पडिवाए दिवा बालवं राओ कोलवं  
बिइयाए दिवा श्रीविलोयणं राओ गराइ तइयाए दिवा वणिजं राओ विट्ठी चउत्थीए  
दिवा बवं राओ बालवं पंचमीए दिवा कोलवं राओ श्रीविलोयणं छट्ठीए दिवा गराइ  
राओ वणिजं सत्तमीए दिवा विट्ठी राओ बवं अट्ठमीए दिवा बालवं राओ कोलवं

णवमीए दिवा थीविलोयणं राओ गराइ दसमीए दिवा वणिजं राओ विट्ठी एकारसीए दिवा ववं राओ बालवं बारसीए दिवा कोलवं राओ थीविलोयणं तेरसीए दिवा गराइ राओ वणिजं चउइसीए दिवा विट्ठी राओ सउणी अमावासाए दिवा चउप्पयं राओ गाणं सुक्कपक्खस्स पाडिवए दिवा किंथुग्घं करणं भवइ ॥ १५३ ॥ किमाइया णं भन्ते ! संवच्छरा किमाइया अयणा किमाइया उऊ किमाइया मासा किमाइया पक्खा किमाइया अहोरत्ता किमाइया मुहुत्ता किमाइया करणा किमाइया णक्खत्ता पण्णत्ता ? गोयमा ! चंदाइया संवच्छरा दक्खिणाइया अयणा पाउसाइया उऊ सावणाइया मासा बहुलाइया पक्खा दिवसाइया अहोरत्ता रोदाइया मुहुत्ता बालवाइया करणा अभिजि-याइया णक्खत्ता पण्णत्ता समणाउसो ! इति । पंचसंवच्छरिए णं भन्ते ! जुगे केवइया अयणा केवइया उऊ एवं मासा पक्खा अहोरत्ता केवइया मुहुत्ता पण्णत्ता ? गोयमा ! पंचसंवच्छरिए णं जुगे दस अयणा तीसं उऊ सट्ठी मासा एगे वीसुत्तरे पक्खसए अट्टारसतीसा अहोरत्तसया चउप्पण्णं मुहुत्तसहस्सा णव सया पण्णत्ता ॥ १५४ ॥

**गाहा**—जोगा १ देवय २ तारग ३ गोत्त ४ संठाण ५ चंदरविजोगा ६ । कुल ७ पुणिम अमवस्सा य ८ सण्णिवाए ९ य णेया य १० ॥ १ ॥ कइ णं भन्ते ! णक्खत्ता ५० ? गोयमा ! अट्ठावीसं णक्खत्ता ५०, तं०—अभिई १ सवणो २ धणिट्ठा ३ सयमिसया ४ पुव्वभइवया ५ उत्तरभइवया ६ रेवई ७ अस्सिणी ८ भरणी ९ कत्तिया १० रोहिणी ११ मियसिर १२ अहा १३ पुणव्वसू १४ पूसो १५ अस्सेसा १६ मघा १७ पुव्वफगुणी १८ उत्तरफगुणी १९ हत्थो २० चित्ता २१ साई २२ विसाहा २३ अणुराहा २४ जेट्ठा २५ मूलं २६ पुव्वासाढा २७ उत्तरासाढा २८ इति ॥ १५५ ॥ एएसि णं भन्ते ! अट्ठावीसाए णक्खत्ताणं कयरे णक्खत्ता जे णं सया चन्दस्स दाहिणेणं जोयं जोएंति, कयरे णक्खत्ता जे णं सया चंदस्स उत्तरेणं जोयं जोएंति, कयरे णक्खत्ता जे णं चंदस्स दाहिणेणवि उत्तरेणवि पमईपि जोगं जोएंति, कयरे णक्खत्ता जे णं चंदस्स दाहिणेणंपि पमईपि जोयं जोएंति, कयरे णक्खत्ता जे णं सया चन्दस्स पमई जोयं जोएंति ? गोयमा ! एएसि णं अट्ठावीसाए णक्खत्ताणं तत्थ णं जे ते णक्खत्ता जे णं सया चंदस्स दाहि-णेणं जोयं जोएंति ते णं छ, तंजहा—संठाण १ अइ २ पुस्सो ३ ऽसिलेस ४ हत्थो ५ तहेव मूलो य ६ । बाहिरओ बाहिरमंडलस्स छप्पेत णक्खत्ता ॥ १ ॥ तत्थ णं जे ते णक्खत्ता जे णं सया चन्दस्स उत्तरेणं जोगं जोएंति ते णं बारस, तं०—अभिई सवणो धणिट्ठा सयमिसया पुव्वभइवया उत्तरभइवया रेवई अस्सिणी भरणी पुव्वा-फगुणी उत्तराफगुणी साई, तत्थ णं जे ते णक्खत्ता जे णं सया चन्दस्स दाहिण-

ओवि उत्तरओवि पमहंपि जोगं जोएति ते णं सत्त, तंजहा-कत्तिया रोहिणी पुणव्वसु मघा चित्ता विसाहा अणुराहा, तत्थ णं जे ते णक्खत्ता जे णं सया चन्दस्स दाहिणओवि पमहंपि जोगं जोएति ताओ णं दुवे आसाढाओ सव्ववाहिरए मंडले जोगं जोइंखु वा ३, तत्थ णं जे से णक्खत्ते जे णं सया चन्दस्स पमहं० जोएइ सा णं एगा जेट्ठा इति ॥ १५६ ॥ एएसि णं भन्ते ! अट्ठावीसाए णक्खत्ताणं अभिई णक्खत्ते किंदेवयाए पण्णत्ते ? गोयमा ! वम्हदेवयाए पण्णत्ते, सव्वणे णक्खत्ते विण्हु- देवयाए पण्णत्ते, धणिट्ठा० वसुदेवयाए पण्णत्ते, एएणं कमेणं णेयव्वा अणुपरिवाडी इमाओ देवयाओ-वम्हा विण्हू वसू वरुणे अए अभिवट्ठी पूसे आसे जमे अग्गी पया- वई सोमे रुहे अदिई वहस्साई सप्पे पिऊ भगे अज्जम सविया तट्ठा वाऊ इंदग्गी मित्तो ईंदे णिरई आऊ विस्सा य, एवं णक्खत्ताणं एसां परिवाडी णेयव्वा जाव उत्तरासाढा किंदेवया पण्णत्ता ? गोयमा ! विस्सदेवया पण्णत्ता ॥ १५७ ॥ एएसि णं भन्ते ! अट्ठावीसाए णक्खत्ताणं अभिईणक्खत्ते कइतारे पण्णत्ते ? गोयमा ! तितारे प०, एवं णेयव्वा जरस्स जइयाओ ताराओ, इमं च तं तारगं-तिगतिगपंच- गसयदुग दुगवत्तीसगतिगं तह तिगं च । छप्पंचगतिगएक्कगपंचगतिग छक्कं चैव ॥ १ ॥ सत्तगदुगदुग पंचग एक्केक्कग पंच चउतिगं चैव । एकारसग चउक्कं चउक्कं चैव तारगं ॥ २ ॥ ति ॥ १५८ ॥ एएसि णं भन्ते ! अट्ठावीसाए णक्खत्ताणं अभिई णक्खत्ते किंगोत्ते प० ? गोयमा ! मोग्गलायणसगोत्ते०, गाहा-मोग्गलायण १ संखायणे २ य तह अग्गभाव ३ कण्णिहे ४ । तत्तो य जाउकण्णे ५ धर्णजए ६ चैव बोद्धव्वे ॥ १ ॥ पुस्सायणे ७ य अस्सायणे य ८ भग्गवेसे ९ य अग्गिवेसे १० य । गोयम ११ भारद्वाए १२ लोहिच्चे १३ चैव वासिट्ठे १४ ॥ २ ॥ ओम- ज्जायण १५ मंडव्वायणे १६ य पिंगायणे १७ य गोवहे १८ । कासव १९ कोसिय २० दब्भा २१ य चामरच्छाय २२ सुंगा य २३ ॥ ३ ॥ गोवलायण २४ तेगि- च्छायणे २५ य कच्चायणे २६ हवइ मूले । तत्तो य वज्झियायण २७ वग्घावच्चे य गोत्ताई २८ ॥ ४ ॥ एएसि णं भन्ते ! अट्ठावीसाए णक्खत्ताणं अभिईणक्खत्ते किंसंठिए पण्णत्ते ? गोयमा ! गोसीसावलिंसंठिए प०, गाहा-गोसीसावलि १ काहार २ सउणि ३ पुप्फोवयार ४ वावी य ५-६ । णावा ७ आसक्खंधग ८ भग ९ छुरघरए १० य सगडुद्धी ११ ॥ १ ॥ मिगसीसावलि १२ रुहिरविंदु १३ तुल्ल १४ वद्धमाणग १५ पडागा १६ । पागारे १७ पलियंके १८-१९ हत्थे २० मुहफुल्लए २१ चैव ॥ २ ॥ खीलंग २२ दामणि २३ एगावली २४ य गयदंत २५ विच्छुअयले य २६ । गयविक्रमे २७ य तत्तो सीहणिसीही य २८ संठाणा ॥ ३ ॥ १५९ ॥



एएसि णं भन्ते ! अट्ठावीसाए णक्खत्ताणं अभिईणक्खत्ते कइमुहुत्ते चन्देण सद्धिं जोगं जोएइ ? गोयमा ! णव मुहुत्ते सत्तावीसं च सत्तट्ठिभाए मुहुत्तस्स चन्देण सद्धिं जोगं जोएइ, एवं इमाहिं गाहाहिं अणुगन्तव्वं-अभिइस्स चन्दजोगो सत्तट्ठिंखंडिओ अहोरत्तो । ते हुंति णव मुहुत्ता सत्तावीसं कलाओ य ॥ १ ॥ सयभिसया भरणीओ अद्दा अस्सेस साइ जेट्ठा य । एए छण्णक्खत्ता पण्णरसमुहुत्तसंजोगा ॥ २ ॥ तिण्णेव उत्तराई पुणव्वसू रोहिणी विसाहा य । एए छण्णक्खत्ता पणयालमुहुत्तसंजोगा ॥ ३ ॥ अवसेसा णक्खत्ता पण्णरसवि हुंति तीसइमुहुत्ता । चन्दंमि एस जोगो णक्खत्ताणं मुण्यव्वो ॥ ४ ॥ एएसि णं भन्ते ! अट्ठावीसाए णक्खत्ताणं अभिईणक्खत्ते कइ अहोरत्ते सूरेंण सद्धिं जोगं जोएइ ? गोयमा ! चत्तारि अहोरत्ते छच्च मुहुत्ते सूरेंण सद्धिं जोगं जोएइ, एवं इमाहिं गाहाहिं ण्यव्वं-अभिइं छच्च मुहुत्ते चत्तारि य केवले अहोरत्ते । सूरेंण समं गच्छइ एत्तो सेसाण वोच्छामि ॥ १ ॥ सयभिसया भरणीओ अद्दा अस्सेस साइ जेट्ठा य । वच्चंति मुहुत्ते इक्खीस छच्चेवऽहोरत्ते ॥ २ ॥ तिण्णेव उत्तराई पुणव्वसू रोहिणी विसाहा य । वच्चंति मुहुत्ते तिण्णि चैव वीसं अहोरत्ते ॥ ३ ॥ अवसेसा णक्खत्ता पण्णरसवि सूरसहगया जंति । बारस चैव मुहुत्ते तेरस य समे अहोरत्ते ॥ ४ ॥ १६० ॥ कइ णं भन्ते ! कुला कइ उवकुला कइ कुलोवकुला पण्णत्ता ? गोयमा ! बारस कुला बारस उवकुला चत्तारि कुलोवकुला पण्णत्ता, बारस कुला, तंजहा—धणिट्ठाकुलं १ उत्तरभद्दवयाकुलं २ अस्सिणीकुलं ३ कत्तियाकुलं ४ मिगसिरकुलं ५ पुस्सो कुलं ६ मघाकुलं ७ उत्तरफगुणीकुलं ८ चित्ताकुलं ९ विसाहाकुलं १० मूलो कुलं ११ उत्तरासाढाकुलं १२ । सासाणं परिणामा होंति कुला उवकुला उ हेट्ठिमगा । होंति पुण कुलोवकुला अभीइसय अइ अणुराहा ॥ १ ॥ बारस उवकुला, तं०-सवणो उवकुलं १ पुव्वभद्दवया उवकुलं २ रेवई उवकुलं ३ भरणी उवकुलं ४ रोहिणी उवकुलं ५ पुणव्वसू उवकुलं ६ अस्सेसा उवकुलं ७ पुव्वफगुणी उवकुलं ८ हत्थो उवकुलं ९ साई उवकुलं १० जेट्ठा उवकुलं ११ पुव्वासाढा उवकुलं १२ । चत्तारि कुलोवकुला, तंजहा-अभिइ कुलोवकुला १ सयभिसया कुलोवकुला २ अद्दा कुलोवकुला ३ अणुराहा कुलोवकुला ४ । कइ णं भन्ते ! पुण्णिमाओ कइ अमावासाओ पण्णत्ताओ ? गोयमा ! बारस पुण्णिमाओ बारस अमावासाओ ५०, तं०-साविट्ठी पोट्ठवई आसोई कत्तिगी मगसिरी पोसी माही फगुणी चेत्ती वइसाही जेट्ठामूलो आसाढी, साविट्ठिणं भन्ते ! पुण्णिमासिं कइ णक्खत्ता जोगं जोएंति ? गोयमा ! तिण्णि णक्खत्ता जोगं जोएंति, तं०-अभिइ सवणो धणिट्ठा । पोट्ठवइणं भंते !

पुण्णिमं कइ णक्खत्ता जोगं जोएंति ? गोयमा ! तिण्णि णक्खत्ता० जोएंति, तं०—  
सयभिसया पुव्वभद्दवया उत्तरभद्दवया, अस्सोइण्णं भंते ! पुण्णिमं कइ णक्खत्ता  
जोगं जोएंति ? गोयमा ! दो...जोएंति, तं०—रेवई अस्सिणी य, कत्तिइण्णं दो—भरणी  
कत्तिया य, मग्गसिरिण्णं दो—रोहिणी मग्गसिरं च, पोसिं णं तिण्णि—अद्दा पुणव्वस्स  
पुस्सो, माविण्णं दो—अस्सेसा मघा य, फग्गुणिं णं दो—पुव्वाफग्गुणी य उत्तरा-  
फग्गुणी य, चेत्तिण्णं दो—हत्थो चित्ता य, विसाहिण्णं दो—साई विसाहा य, जेट्ठा-  
मूलिण्णं तिण्णि—अणुराहा जेट्ठा मूलो, आसाहिण्णं दो—पुव्वासाढा उत्तरासाढा ।  
साविट्ठिण्णं भन्ते ! पुण्णिमं किं कुलं जोएइ उवकुलं जोएइ कुलोवकुलं जोएइ ?  
गोयमा ! कुलं वा जोएइ उवकुलं वा जोएइ कुलोवकुलं वा जोएइ, कुलं जोएमाणे  
धणिट्ठा णक्खत्ते जोएइ उवकुलं जोएमाणे सवणे णक्खत्ते जोएइ कुलोवकुलं जोए-  
माणे अभिई णक्खत्ते जोएइ, साविट्ठिण्णं पुण्णिमासिं कुलं वा जोएइ जाव कुलो-  
वकुलं वा जोएइ, कुलेण वा जुत्ता उवकुलेण वा जुत्ता कुलोवकुलेण वा जुत्ता  
साविट्ठी पुण्णिमा जुत्तत्ति वत्तव्वं सिया, पोट्टवइण्णं भंते ! पुण्णिमं किं कुलं जोएइ  
३ पुच्छा, गोयमा ! कुलं वा० उवकुलं वा० कुलोवकुलं वा जोएइ, कुलं जोएमाणे  
उत्तरभद्दवया णक्खत्ते जोएइ उ० पुव्वभद्दवया० कुलोव० सयभिसया णक्खत्ते  
जोएइ, पोट्टवइण्णं पुण्णिमं कुलं वा जोएइ जाव कुलोवकुलं वा जोएइ कुलेण वा  
जुत्ता जाव कुलोवकुलेण वा जुत्ता पोट्टवई पुण्णिमासी जुत्तत्ति वत्तव्वं सिया,  
अस्सोइण्णं भन्ते ! पुच्छा, गो० ! कुलं वा जोएइ उवकुलं वा जोएइ णो लब्भइ  
कुलोवकुलं, कुलं जोएमाणे अस्सिणीणक्खत्ते जोएइ उवकुलं जोएमाणे रेवइणक्खत्ते  
जोएइ, अस्सोइण्णं पुण्णिमं कुलं वा जोएइ उवकुलं वा जोएइ कुलेण वा जुत्ता  
उवकुलेण वा जुत्ता अस्सोई पुण्णिमा जुत्तत्ति वत्तव्वं सिया, कत्तिइण्णं भंते !  
पुण्णिमं किं कुलं...पुच्छा, गोयमा ! कुलं वा जोएइ उवकुलं वा जोएइ णो  
कुलोवकुलं जोएइ, कुलं जोएमाणे कत्तियाणक्खत्ते जोएइ उव० भरणी०, कत्तिइण्णं  
जाव वत्तव्वं०, मग्गसिरिण्णं भंते ! पुण्णिमं किं कुलं तं चैव दो जोएइ णो भवइ  
कुलोवकुलं, कुलं जोएमाणे मग्गसिरणक्खत्ते जोएइ उ० रोहिणी०, मग्गसिरिण्णं  
पुण्णिमं जाव वत्तव्वं सिया इति । एवं सेसियाओऽवि जाव आसाढि, पोसिं जेट्ठा-  
मूलिं च कुलं वा उ० कुलोवकुलं वा, सेसियाणं कुलं वा उवकुलं वा कुलोवकुलं ण  
भण्णइ । साविट्ठिण्णं भंते ! अमावासं कइ णक्खत्ता जोएंति ? गोयमा ! दो  
णक्खत्ता जोएंति, तं०—अस्सेसा य महा य, पोट्टवइण्णं भंते ! अमावासं कइ णक्खत्ता  
जोएंति ? गोयमा ! दो...पुव्वाफग्गुणी उत्तराफग्गुणी य, अस्सोइण्णं भंते !...

दो-हत्थे चित्ता य, कत्तिङ्णं दो-साई विसाहा य, मग्गसिरिणं तिण्णि-अणुराहा जेद्धा मूलो य, पोसिणं दो-पुव्वासाढा उत्तरासाढा, माहिणं तिण्णि-अभिई सवणो धणिट्ठा, फग्गुणिं णं तिण्णि-सयभिसया पुव्वभद्दवया उत्तरभद्दवया, चेत्तिणं दो-रेवई अस्सिणी य, वइसाहिणं दो-भरणी कत्तिया य, जेद्धामूलिणं दो-रोहिणी मग्गसिरं च, आसाढिणं तिण्णि-अहा पुणव्वसू पुस्सो इति । साविट्ठिणं भंते ! अमावासं किं कुलं जोएइ उवकुलं जोएइ कुलोवकुलं जोएइ ? गोयमा ! कुलं वा जोएइ उवकुलं वा जोएइ णो लब्भइ कुलोवकुलं, कुलं जोएमाणे महाणक्खत्ते जोएइ उवकुलं जोएमाणे अस्सेसाणक्खत्ते जोएइ, साविट्ठिणं अमावासं कुलं वा जोएइ उवकुलं वा जोएइ, कुलेण वा जुत्ता उवकुलेण वा जुत्ता साविट्ठी अमावासा जुत्तत्ति वत्तव्वं सिया, पोट्टवइणं भंते ! अमावासं तं चेव दो जोएइ कुलं वा जोएइ उवकुलं, कुलं जोएमाणे उत्तराफग्गुणी णक्खत्ते जोएइ उव० पुव्वाफग्गुणी०, पोट्टवइणं अमावासं जाव वत्तव्वं सिया, मग्गसिरिणं तं चेव कुलं मूले णक्खत्ते जोएइ उ० जेद्धा० कुलोवकुलं अणुराहा जाव जुत्तत्ति वत्तव्वं सिया, एवं माहीए फग्गुणीए आसाढीए कुलं वा उवकुलं वा कुलोवकुलं वा, अवसेसियाणं कुलं वा उवकुलं वा जोएइ ॥ जया णं भन्ते ! साविट्ठी पुणिमा भवइ तथा णं माही अमावासा भवइ जया णं माही पुणिमा भवइ तथा णं साविट्ठी अमावासा भवइ ? हंता गोयमा ! जया णं साविट्ठी तं चेव वत्तव्वं, जया णं भन्ते ! पोट्टवइ पुणिमा भवइ तथा णं फग्गुणी अमावासा भवइ जया णं फग्गुणी पुणिमा भवइ तथा णं पोट्टवई अमावासं भवइ ? हंता गोयमा ! तं चेव, एवं एएणं अभिलावेणं इमाओ पुणिमाओ अमावासाओ णेयव्वाओ-अस्सिणी पुणिमा चेत्ती अमावासा कत्तिणी पुणिमा वइसाही अमावासा मग्गसिरी पुणिमा जेद्धामूली अमावासा पोसी पुणिमा आसाढी अमावासा ॥ १६१ ॥ वासाणं भंते ! पढमं मासं कइ णक्खत्ता णेति ? गोयमा ! चत्तारि णक्खत्ता णेति, तं०-उत्तरासाढा अभिई सवणो धणिट्ठा, उत्तरासाढा चउद्दस अहोरेत्ते णेइ, अभिई सत्त अहोरेत्ते णेइ, सवणो अट्ठसहोरेत्ते णेइ, धणिट्ठा एणं अहोरेत्तं णेइ, तंसि च णं मासंसि चउरंगुलोपरिसीए छायाए सूरिए अणुपरियट्ठइ, तस्स णं मासस्स चरिमदिवसे दो पया चत्तारि य अंगुला पोरिसी भवइ । वासाणं भन्ते ! दोच्चं मासं कइ णक्खत्ता णेति ? गोयमा ! चत्तारि०, तं०-धणिट्ठा सयभिसया पुव्वाभद्दवया उत्तराभद्दवया, धणिट्ठा णं चउद्दस अहोरेत्ते णेइ, सयभिसया सत्त अहोरेत्ते णेइ, पुव्वाभद्दवया अट्ठ अहोरेत्ते णेइ, उत्तराभद्दवया एणं०, तंसि च णं मासंसि अट्ठगुलोपरिसीए छायाए सूरिए अणुपरियट्ठइ, तस्स णं मासस्स चरिमे दिवसे दो पया अट्ठ य अंगुला

पोरिसी भवइ । वासाणं भन्ते ! तइयं मासं कइ णक्खत्ता णेंति ? गोयमा ! तिण्णि णक्खत्ता णेंति, तं०-उत्तरभइवया रेवई अस्सिणी, उत्तरभइवया चउइस राईदिए णेइ, रेवई पण्णरस० अस्सिणी एगं०, तंसि च णं मासंसि दुवालसंगुलपोरिसीए छायाए सूरिए अणुपरियट्ठइ, तस्स णं मासस्स चरिमे दिवसे लेहट्ठाई तिण्णि पयाई पोरिसी भवइ । वासाणं भन्ते ! चउत्थं मासं कइ णक्खत्ता णेंति ? गोयमा ! तिण्णि०, तं०-अस्सिणी भरणी कत्तिया, अस्सिणी चउइस० भरणी पण्णरस० कत्तिया एगं०, तंसि च णं मासंसि सोलसंगुलपोरिसीए छायाए सूरिए अणुपरियट्ठइ, तस्स णं मासस्स चरिमे दिवसे तिण्णि पयाई चत्तारि अंगुलाई पोरिसी भवइ । हेमन्ताणं भन्ते ! पढमं मासं कइ णक्खत्ता णेंति ? गोयमा ! तिण्णि०, तं०-कत्तिया रोहिणी मिगसिरं, कत्तिया चउइस० रोहिणी पण्णरस० मिगसिरं एगं अहोरत्तं णेइ, तंसि च णं मासंसि वीसंगुलपोरिसीए छायाए सूरिए अणुपरियट्ठइ, तस्स णं मासस्स जे से चरिमे दिवसे तंसि च णं दिवसंसि तिण्णि पयाई अट्ठ य अंगुलाई पोरिसी भवइ, हेमन्ताणं भन्ते ! दोच्चं मासं कइ णक्खत्ता णेंति ? गोयमा ! चत्तारि णक्खत्ता णेंति, तंजहा-मिगसिरं अद्दा पुणव्वसू पुस्सो, मिगसिरं चउइस राईदियाई णेइ, अद्दा अट्ठ० णेइ, पुणव्वसू सत्त राईदियाई०, पुस्सो एगं राईदियं णेइ, तया णं चउव्वीसंगुलपोरिसीए छायाए सूरिए अणुपरियट्ठइ, तस्स णं मासस्स जे से चरिमे दिवसे तंसि च णं दिवसंसि लेहट्ठाई चत्तारि पयाई पोरिसी भवइ, हेमन्ताणं भन्ते ! तच्चं मासं कइ णक्खत्ता णेंति ? गोयमा ! तिण्णि०, तं०-पुस्सो असिलेसा महा, पुस्सो चोइस राईदियाई णेइ, असिलेसा पण्णरस० महा एक्कं०, तया णं वीसंगुलपोरिसीए छायाए सूरिए अणुपरियट्ठइ, तस्स णं मासस्स जे से चरिमे दिवसे तंसि च णं दिवसंसि तिण्णि पयाई अट्ठंगुलाई पोरिसी भवइ । हेमन्ताणं भन्ते ! चउत्थं मासं कइ णक्खत्ता णेंति ? गोयमा ! तिण्णि ण०, तं०-महा पुव्वाफग्गुणी उत्तराफग्गुणी, महा चउइस राईदियाई णेइ, पुव्वाफग्गुणी पण्णरस राईदियाई णेइ, उत्तराफग्गुणी एगं राईदियं णेइ, तया णं सोलसंगुलपोरिसीए छायाए सूरिए अणुपरियट्ठइ, तस्स णं मासस्स जे से चरिमे दिवसे तंसि च णं दिवसंसि तिण्णि पयाई चत्तारि अंगुलाई पोरिसी भवइ । गिम्हाणं भन्ते ! पढमं मासं कइ णक्खत्ता णेंति ? गोयमा ! तिण्णि णक्खत्ता णेंति, तं०-उत्तराफग्गुणी हत्थो चित्ता, उत्तराफग्गुणी चउइस राईदियाई णेइ, हत्थो पण्णरस राईदियाई णेइ, चित्ता एगं राईदियं णेइ, तया णं दुवालसंगुलपोरिसीए छायाए सूरिए अणुपरियट्ठइ, तस्स णं मासस्स जे से चरिमे दिवसे तंसि च णं दिवसंसि लेहट्ठाई तिण्णि पयाई पोरिसी भवइ, गिम्हाणं भन्ते ! दोच्चं मासं कइ णक्खत्ता णेंति ? गोयमा ! तिण्णि णक्खत्ता

णेति, तं०—चित्ता साई विसाहा, चित्ता चउइस राईदियाई णेइ, साई पण्णरस राईदि-  
 याई णेइ, विसाहा एगं राईदियं णेइ, तथा णं अट्ठंगुलपोरिसीए छायाए सूरिए अणु-  
 परियट्ठइ, तस्स णं मासस्स जे से चरिमे दिवसे तंसि च णं दिवसंसि दो पयाई  
 अट्ठंगुलाई पोरिसी भवइ । गिम्हाणं भन्ते ! तच्चं मासं कइ णक्खत्ता णेति ? गोयमा !  
 चत्तारि णक्खत्ता णेति, तंजहा—विसाहाऽणुराहा जेट्ठा मूलो, विसाहा चउइस  
 राईदियाई णेइ, अणुराहा अट्ठ राईदियाई णेइ, जेट्ठा सत्त राईदियाई णेइ, मूलो एक्कं  
 राईदियं०, तथा णं चउरंगुलपोरिसीए छायाए सूरिए अणुपरियट्ठइ, तस्स णं मासस्स  
 जे से चरिमे दिवसे तंसि च णं दिवसंसि दो पयाई चत्तारि य अंगुलाई पोरिसी  
 भवइ । गिम्हाणं भन्ते ! चउत्थं मासं कइ णक्खत्ता णेति ? गोयमा ! तिण्णि  
 णक्खत्ता णेति, तं०—मूलो पुव्वासाढा उत्तरासाढा, मूलो चउइस राईदियाई णेइ, पुव्वा-  
 साढा पण्णरस राईदियाई णेइ, उत्तरासाढा एगं राईदियं णेइ, तथा णं वट्ठाए समचउरं-  
 ससंठाणसंठियाए णग्गोहपरिमण्डलाए सकायमणुरंगियाए छायाए सूरिए अणुपरियट्ठइ,  
 तस्स णं मासस्स जे से चरिमे दिवसे तंसि च णं दिवसंसि लेहट्ठाई दो पयाई पोरिसी  
 भवइ । एएसि णं पुव्ववणियाणं पयाणं इमा संगहणी, तं०—जोगो देवयतारग्ग-  
 गोत्तसंठाण चन्दरविजोगो । कुलपुण्णिमअमवस्सा णेया छाया य बोद्धवा ॥१॥१६२॥  
**गाहा**—हिट्ठिं ससिपरिवारो मन्दरऽवाहा तहेव लोगंते । धरणितलाओं अबाहा  
 अंतो बाहिं च उट्ठमुहे ॥ १ ॥ संठाणं च पमाणं वहंति सीहगई इड्ढिमन्ता  
 य । तारंतरऽग्गमहिंसी तुडिय पटु ठिई य अप्पबहू ॥ २ ॥ अत्थि णं भन्ते !  
 चंदिमसूरियाणं हिट्ठिपि ताराखा अणुपि तुल्लावि समेवि ताराखा अणुपि तुल्लावि  
 उप्पिपि ताराखा अणुपि तुल्लावि ? हंता गोयमा ! तं चेव उच्चारयेयव्वं, से  
 केणट्ठेणं भन्ते ! एवं वुच्चइ—अत्थि णं० जहा जहा णं तेसिं देवाणं तवणिय-  
 मवंबचेराई ऊसियाई भवन्ति तहा तहा णं तेसिं देवाणं एवं पण्णायए,  
 तंजहा—अणुत्ते वा तुल्लत्ते वा, जहा जहा णं तेसिं देवाणं तवणियमवंबचेराई णो  
 ऊसियाई भवंति तहा तहा णं तेसिं देवाणं एवं णो पण्णायए, तं०—अणुत्ते वा तुल्लत्ते  
 वा ॥ १६३ ॥ एगमेगस्स णं भन्ते ! चन्दस्स केवइया महग्गहा परिवारो केवइया  
 णक्खत्ता परिवारो केवइयाओ तारागणकोडाकोडीओ पण्णत्ताओ ? गोयमा ! अट्ठासीइ-  
 महग्गहा परिवारो अट्ठावीसं णक्खत्ता परिवारो छावट्टिसहस्साई णव सया पण्णत्तरा  
 तारागणकोडाकोडीओ पण्णत्ताओ ॥ १६४ ॥ मन्दरस्स णं भन्ते ! पव्वयस्स केवइ-  
 याए अवाहाए जोइसं चारं चरइ ? गोयमा ! इक्कारसहिं इक्कीसेहिं जोयणसएहिं  
 अवाहाए जोइसं चारं चरइ, लोगंताओ णं भन्ते ! केवइयाए अवाहाए जोइसे

पण्णत्ते ? गोयमा ! एकारस एकारसेहिं जोयणसएहिं अवाहाए जोइसे पण्णत्ते । धरणितलाओ णं भन्ते ! ० सत्तहिं णउएहिं जोयणसएहिं जोइसे चारं चरइत्ति, एवं सूरविमाणे अट्ठहिं सएहिं, चंदविमाणे अट्ठहिं असीएहिं, उवरिल्ले ताराख्वे णवहिं जोयणसएहिं चारं चरइ । जोइसस्स णं भन्ते ! हेट्ठिलाओ तलाओ केवइयाए अवाहाए सूरविमाणे चारं चरइ ? गोयमा ! दसहिं जोयणेहिं अवाहाए चारं चरइ, एवं चन्दविमाणे णउईए जोयणेहिं चारं चरइ, उवरिल्ले ताराख्वे दसुत्तरे जोयणसए चारं चरइ, सूरविमाणाओ चन्दविमाणे असीईए जोयणेहिं चारं चरइ, सूरविमाणाओ जोयणसए उवरिल्ले ताराख्वे चारं चरइ, चन्दविमाणाओ वीसाए जोयणेहिं उवरिल्ले णं ताराख्वे चारं चरइ ॥ १६५ ॥ जम्बुदीवे णं भन्ते ! दीवे अट्ठावीसाए णक्खत्ताणं कयरे णक्खत्ते सव्वब्भंतारिळं चारं चरइ ? कयरे णक्खत्ते सव्वबाहिरं चारं चरइ ? कयरे ० सव्वहिट्ठिळं चारं चरइ ? कयरे ० सव्वउवरिल्लं चारं चरइ ?, गोयमा ! अभिई णक्खत्ते सव्वब्भंतारं चारं चरइ, मूलो सव्वबाहिरं चारं चरइ, भरणी सव्वहिट्ठिळं ० साई सव्वुवरिल्लं चारं चरइ । चन्दविमाणे णं भन्ते ! किंसंठिए पण्णत्ते ? गोयमा ! अद्धकविट्ठसंठाणसंठिए सव्वफालियामए अब्भुगयमूसिए एवं सव्वाइं णेयव्वाइं, चन्दविमाणे णं भन्ते ! केवइयं आयामविकखंभेणं केवइयं बाहल्लेणं ? गो ० !-छप्पणं खलु भाए विच्छिण्णं चन्दमंडलं होइ । अट्ठावीसं भाए बाहल्लं तस्स बोद्धवं ॥ १ ॥ अड्यालीसं भाए विच्छिण्णं सूरमण्डलं होइ । चउवीसं खलु भाए बाहल्लं तस्स बोद्धवं ॥ २ ॥ दो कोसे य गहाणं णक्खत्ताणं तु हवइ तस्सद्धं । तस्सद्धं ताराणं तस्सद्धं चेव बाहल्लं ॥ ३ ॥ १६६ ॥ चन्दविमाणं णं भन्ते ! कइ देवसाहस्सीओ परिवहंति ? गोयमा ! सोलस देवसाहस्सीओ परिवहंति । चन्दविमाणस्स णं पुरत्थिमेणं सेयाणं सुभगाणं सुप्पभाणं संखतलविमलणिम्मल-दहिघणगोखीरफेणरययणिगरप्पगासाणं थिरलट्ठपउट्ठवट्ठपीवरसुसिलिट्ठविसिट्ठवित्ठिक्ख-दाढाविडंभियसुहाणं रत्तुप्पलपत्तमउयस्समालतालुजीहाणं महुगुलियपिंगलक्खाणं पीवरवरोरुपडिपुण्णविउलखंधाणं मिउविसयसुहुमलक्खणपसत्थवरवण्णकेसरसडोव-सोहियाणं ऊसियसुणमियसुजायअप्फोडियलंगूलाणं वइरामयणक्खाणं वइरामय-दाढाणं वइरामयदन्ताणं तवणिज्जजीहाणं तवणिज्जतालुयाणं तवणिज्जजोत्तगसु-जोइयाणं कामगमाणं पीइगमाणं मणोगमाणं मणोरमाणं अमियगईणं अमिय-बलवीरियपुरिसकारपरक्कमाणं महुया अप्फोडियसीहणायबोलक्कलक्कलरेवेणं महुरेणं मणहरेणं पूरेंता अंबरं दिसाओ य सोभयंता चत्तारि देवसाहस्सीओ सीहरूव-धारीणं पुरत्थिमिल्लं बाहं परिवहंति । चंदविमाणस्स णं दाहिणेणं सेयाणं सुभगाणं

सुप्पभाणं संखतलविमलणिम्मलदहिघणगोखीरफेणरयणिगारप्पगासाणं वइराम-  
 यकुंभजुयलसुट्ठियपीवरवरवइरसोंडवट्ठियदित्तसुरत्तपउमप्पगासाणं अब्भुण्णयमुहाणं  
 तवणिज्जविसालकण्णचंचलचलंतविमलज्जलाणं महुवण्णभिसंतणिद्धपत्तलनिम्मलतिव-  
 ण्णमणिरयणलेयणाणं अब्भुग्गयमउलमल्लियाधवलसरिससंठियणिव्वणदढकसिणफा-  
 लियामयसुजायदन्तमुसलोवसोभियाणं कंचणकोसीपविट्ठदन्तगविमलमणिरयणरुइल-  
 पेरंतत्तित्तरुव्गविराइयाणं तवणिज्जविसालतिलगप्पमुहुपरिमण्डियाणं नाणामणिरयण-  
 मुद्धगेविज्जबद्धगलयवरभूसणाणं वेरुलियविचित्तदण्डणिम्मलवइरामयतिक्खलट्ठअंकुस-  
 कुंभजुयलयंतरोडियाणं तवणिज्जसुबद्धकच्छदप्पियबलुद्धराणं विमलघणमण्डलवइराम-  
 यलालालियतालणाणं णाणामणिरयणघण्टपासगरययामयबद्धलज्जुलंबियघंटाजुय-  
 लमहुरसरमणहराणं अल्लीणपमाणजुतवट्ठियसुजायलक्खणपसत्थरमणिज्जवालगतपरि-  
 पुंछणाणं उवचियपडिपुण्णकुम्भचलणलहुविक्रमाणं अंकमयणक्खाणं तवणिज्जजीहाणं  
 तवणिज्जतालुयाणं तवणिज्जजोत्तगसुजोइयाणं कामगमाणं पीइगमाणं मणोगमाणं  
 मणोरमाणं अमियगईणं अमियबलवीरियपुरिसक्कारपरक्कमाणं महया गंभीरगुलुगुलाइय-  
 रवेणं महुरेणं मणहरेणं पूरेंता अंबरं दिसाओ य सोभयंता चत्तारि देवसाहस्सीओ  
 गयस्वधारीणं देवाणं दक्खिणिळं बाहं परिवहंति । चन्दविमाणस्स णं पच्चत्थिमेणं  
 सेयाणं सुभगाणं सुप्पभाणं चलचवलककुहसालीणं घणणिचियसुबद्धलक्खणुण्णयई-  
 सियाणयवसभोद्धाणं चंकमियललियपुलियचलचवलगव्वियगईणं सण्णयपासाणं संगय-  
 पासाणं सुजायपासाणं पीवरवट्ठियसुसंठियकडीणं ओलंबपलंबलक्खणपमाणजुत्तर-  
 मणिज्जवालगण्डाणं समखुरवालिधाणाणं समलिहियसिंगतिक्खगगसंगयाणं तणुसुहुम-  
 सुजायणिद्धलोमच्छविधराणं उवचियमंसलविसालपडिपुण्णखंधपएससुंदराणं वेरुलिय-  
 भिसंतकडक्खसुणिरिक्खणाणं जुत्तपमाणपहाणलक्खणपसत्थरमणिज्जगगरगल्लसोभि-  
 याणं घरघरगसुसद्दवद्धकंठपरिमण्डियाणं णाणामणिकणगरयणघण्टियावेगच्छिगसुकय-  
 मालियाणं वरघण्टागलयमालुज्जलसिरिधराणं पउमुप्पलसगलसुरभिमालाविभूसियाणं  
 वइरखुराणं विविहविक्खुराणं फालियामयदन्ताणं तवणिज्जजीहाणं तवणिज्जतालुयाणं  
 तवणिज्जजोत्तगसुजोइयाणं कामगमाणं पीइगमाणं मणोगमाणं मणोरमाणं अमियगईणं  
 अमियबलवीरियपुरिसक्कारपरक्कमाणं महया गज्जियगंभीररवेणं महुरेणं मणहरेणं पूरेंता  
 अंबरं दिसाओ य सोभयंता चत्तारि देवसाहस्सीओ वसहस्वधारीणं देवाणं पच्चत्थि-  
 मिळं बाहं परिवहंति । चन्दविमाणस्स णं उत्तरेणं सेयाणं सुभगाणं सुप्पभाणं तरमल्लि-  
 हायणाणं हरिमेल्मउलमल्लियच्छाणं चंचुच्चियललियपुलियचलचवलचंचलगईणं लंघ-  
 णवग्गणधावणधोरणतिवइज्जणसिक्खियगईणं ललंतलमगललायवरभूसणाणं सण्ण-

यपासाणं संगयपासाणं सुजायपासाणं पीवरवट्टियसुसंठियकडीणं ओलंखपलंवलक्ख-  
णपमाणजुत्तरमणिज्जवालपुच्छाणं तणसुहुमसुजायणिद्वलोमच्छविहराणं मिउविसयसुहु-  
मलक्खणपसत्थविच्छिण्णकेसरवालिहराणं ललंतथासगललाडवरभूसणाणं मुहमण्डग-  
ओचूलगचामरथासगपरिमण्डियकडीणं तवणिज्जखुराणं तवणिज्जजीहाणं तवणिज्जतालु-  
याणं तवणिज्जजोत्तगसुजोइयाणं कामगमाणं जाव मणोरमाणं अमियगईणं अमिय-  
वलवीरियपुरिसक्कारपरक्कमाणं महया हयहेसियकिलकिलाइयरवेणं मणहरेणं पूरेंता  
अंवरं दिसाओ य सोभयंता चत्तारि देवसाहस्सीओ हयह्वधारीणं देवाणं उत्तरिल्लं  
बाहं परिवहंति । गाहा—सोलसदेवसहस्सा हवंति चंदेसु चेव सूरेंसु । अट्टेव सह-  
स्साइं एकेकंमी गहविमाणे ॥ १ ॥ चत्तारि सहस्साइं णक्खत्तंमि य हवंति इक्किंके ।  
दो चेव सहस्साइं ताराह्वेक्केमेकंमि ॥ २ ॥ एवं सूरविमाणानं जाव ताराह्वविमा-  
णाणं, णवरं एस देवसंघाएत्ति ॥ १६७ ॥ एएसि णं भन्ते ! चंदिमसूरियगहगण-  
णक्खत्तताराह्वानं कयरे सव्वसिग्घगई कयरे सव्वसिग्घतराए चेव ? गोयमा !  
चन्देहिंतो सूरा सिग्घगई, सूरैहिंतो गहा सिग्घगई, गहेहिंतो णक्खत्ता सिग्घगई,  
णक्खत्तेहिंतो ताराह्व सिग्घगई, सव्वप्पगई चंदा, सव्वसिग्घगई ताराह्व इति  
॥ १६८ ॥ एएसि णं भन्ते ! चंदिमसूरियगहगणणक्खत्तताराह्वानं कयरे सव्वमहिद्धिया  
कयरे सव्वप्पद्धिया ? गो० ! ताराह्वेहिंतो णक्खत्ता महिद्धिया, णक्खत्तेहिंतो गहा  
महिद्धिया, गहेहिंतो सूरिया महिद्धिया, सूरैहिंतो चन्दा महिद्धिया, सव्वप्पिद्धिया  
ताराह्व, सव्वमहिद्धिया चन्दा ॥ १६९ ॥ जम्बुदीवे णं भन्ते ! दीवे ताराह्वस्स य  
ताराह्वस्स य केवइए अवाहाए अंतरे पण्णत्ते ? गोयमा ! दुविहे प०, तं०—वाघाइए  
य निव्वाघाइए य, निव्वाघाइए जहण्णेणं पंचघणुसयाइं उक्कोसेणं दो गाउयाइं,  
वाघाइए जहण्णेणं दोणिण छावट्टे जोयणसए उक्कोसेणं बारस जोयणसहस्साइं  
दोणिण य बायाले जोयणसए ताराह्वस्स य २ अवाहाए अंतरे पण्णत्ते ॥ १७० ॥  
चन्दस्स णं भंते ! जोइसिंदस्स जोइसरण्णो कइ अग्गमहिंसीओ पण्णत्ताओ ? गोयमा !  
चत्तारि अग्गमहिंसीओ पण्णत्ताओ, तं०—चन्दप्पभा दोसिणाभा अच्चिमाली पभंकरा,  
तओ णं एगमेगाए देवीए चत्तारि २ देवीसहस्साइं परिवारो पण्णत्तो, पभू णं ताओ  
एगमेगा देवी अन्नं देवीसहस्सं विउव्वित्तए, एवामेव सपुव्वावरेणं सोलस  
देवीसहस्सा, सेतं तुडिण । पट्ट णं भंते ! चंदे जोइसिंदे जोइसराया चंदवडेंसए  
विमाणे चन्दाए रायहाणीए सभाए सुहम्माए तुडिणं सद्धिं महया हयणट्ठीय-  
वाइय जाव दिव्वाइं भोगभोगाइं भुंजमाणे विहरित्तए ? गोयमा ! णो इणट्टे समट्टे,  
पभू णं चंदे...सभाए सुहम्माए चउहिं सामाणियसाहस्सीहिं एवं जाव दिव्वाइं भोग-



भोगाईं भुंजमाणे विहरितए केवलं परियारिद्धीए, णो चेव णं मेहुणवत्तियं । विजया १  
वेजयंती २ जयंती ३ अपराजिया ४ सन्वेसिं गहाईणं एयाओ अगमहिंसीओ,  
छावत्तरस्सवि गहसयस्स एयाओ अगमहिंसीओ वत्तव्वाओ, इमाहिं गाहाहिंति-  
इंगालए १ विथालए २ लोहियंके ३ सणिच्छरे चेव ४ । आहुणिए ५ पाहुणिए ६  
कणगसणामा य पंचेव ११ ॥ १ ॥ सोमे १२ सहिए १३ आसासणे य १४ कज्जो-  
वए १५ य कब्बुरए १६ । अयकरए १७ दुंदुभए संखसणामेवि तिण्णेव २० ॥ २ ॥  
एवं भाणियव्वं जाव भावकेउस्स अगमहिंसीओत्ति ॥ १७१ ॥ गाहा-बम्हा विण्हू  
य वसू वरुणे अय वुद्धीं पूस आस जमे । अग्गि पयावइ सोमे रुदे अदिई वहस्सई  
सप्पे ॥ १ ॥ पिउ भगअज्जमसविआ तट्ठा वाळ तहेव इंदग्गी । मिंते ईदे णिरई  
आळ विस्सा य बोद्धव्वे ॥ २ ॥ १७२ ॥ चंदविमाणे णं भंते ! देवाणं केवइयं  
कालं ठिई पण्णत्ता ? गो० ! जहण्णेणं चउभागपलिओवमं उक्कोसेणं पलिओवमं  
वाससयसहस्समब्भहियं, चंदविमाणे णं० देवीणं... जहण्णेणं चउभागपलिओवमं उ०  
अद्धपलिओवमं पण्णासाए वाससहस्सेहिमब्भहियं, सूरविमाणे देवाणं ज० चउ-  
ब्भागपलिओवमं उक्कोसेणं पलिओवमं वाससहस्समब्भहियं, सूरविमाणे देवीणं  
जहण्णेणं चउब्भागपलिओवमं उक्कोसेणं अद्धपलिओवमं पंचहिं वाससएहिं  
अब्भहियं, गहविमाणे देवाणं जहण्णेणं चउब्भागपलिओवमं उक्कोसेणं पलिओ-  
वमं, गहविमाणे देवीणं जहण्णेणं चउब्भागपलिओवमं उक्कोसेणं अद्धपलिओ-  
वमं, णक्खत्तविमाणे देवाणं जहण्णेणं चउब्भागपलिओवमं उक्कोसेणं अद्धपलिओ-  
वमं, णक्खत्तविमाणे देवीणं जहण्णेणं चउब्भागपलिओवमं उक्कोसेणं साहियं  
चउब्भागपलिओवमं, ताराविमाणे देवाणं जहण्णेणं अट्ठभागपलिओवमं उक्कोसेणं  
चउब्भागपलिओवमं, ताराविमाणदेवीणं जहण्णेणं अट्ठभागपलिओवमं उक्कोसेणं  
साइरेणं अट्ठभागपलिओवमं ॥ १७३ ॥ एएसि णं भंते ! चंदिमसूरियगहगणणक्खत्त-  
ताराव्वाणं कयरे २ हिंतो अप्पा वा बहुया वा तुल्ला वा विसेसाहिया वा ? गो० !  
चंदिमसूरिया दुवे तुल्ला सव्वत्थोवा, णक्खत्ता संखेज्जगुणा, गहा संखेज्जगुणा, तारा-  
व्वा संखेज्जगुणा इति ॥ १७४ ॥ जम्बुद्वीवे णं भन्ते ! दीवे जहण्णपए वा  
उक्कोसपए वा केवइया तित्थयरा सव्वग्गेणं प० ? गो० ! जहण्णपए चत्तारि उक्को-  
सपए चोतीसं तित्थयरा सव्वग्गेणं पण्णत्ता । जम्बुद्वीवे णं भंते ! दीवे जहण्णपए  
वा उक्कोसपए वा केवइया चक्कवट्ठी सव्वग्गेणं प० ? गो० ! जहण्णपए चत्तारि  
उक्कोसपए तीसं चक्कवट्ठी सव्वग्गेणं पण्णत्ता इति, बलदेवा तत्तिया चेव जत्तिया  
चक्कवट्ठी, वासुदेवावि तत्तिया चेवत्ति । जम्बुद्वीवे णं भंते ! दीवे केवइया णिहिरयणा

सव्वग्गेणं प० ? गो० ! तिण्णि छलुत्तरा णिहिरयणसया सव्वग्गेणं प०, जम्बुद्दीवे  
 णं भन्ते ! दीवे केवइया णिहिरयणसया परिभोगत्ताए हव्वमागच्छंति ? गो० !  
 जहण्णपए छत्तीसं उक्कोसपए दोण्णि सत्तरा णिहिरयणसया परिभोगत्ताए हव्वमा-  
 गच्छंति, जम्बुद्दीवे० केवइया पंचिंदियरयणसया सव्वग्गेणं पण्णत्ता ? गो० ! दो  
 दसुत्तरा पंचिंदियरयणसया सव्वग्गेणं पण्णत्ता, जम्बुद्दीवे० जहण्णपए वा उक्कोस-  
 पए वा केवइया पंचिंदियरयणसया परिभोगत्ताए हव्वमागच्छंति ? गो० ! जहण्णपए  
 अट्ठावीसं उक्कोसपए दोण्णि दसुत्तरा पंचिंदियरयणसया परिभोगत्ताए हव्वमा-  
 गच्छंति, जम्बुद्दीवे णं भन्ते ! दीवे केवइया एगिंदियरयणसया सव्वग्गेणं प० ?  
 गो० ! दो दसुत्तरा एगिंदियरयणसया सव्वग्गेणं प०, जम्बुद्दीवे णं भन्ते ! दीवे  
 केवइया एगिंदियरयणसया परिभोगत्ताए हव्वमागच्छन्ति ? गो० ! जहण्णपए अट्ठा-  
 वीसं उक्कोसेणं दोण्णि दसुत्तरा एगिंदियरयणसया परिभोगत्ताए हव्वमागच्छंति  
 ॥ १७५ ॥ जम्बुद्दीवे णं भन्ते ! दीवे केवइयं आयामविकखंभेणं केवइयं परिकखे-  
 वेणं केवइयं उव्वेहेणं केवइयं उड्डं उच्चत्तेणं केवइयं सव्वग्गेणं प० ? गो० ! जम्बु-  
 द्दीवे २ एणं जोयणसयसहस्सं आयामविकखंभेणं तिण्णि जोयणसयसहस्साइं सोलस  
 य सहस्साइं दोण्णि य सत्तावीसे जोयणसए तिण्णि य कोसे अट्ठावीसं च धणुसयं  
 तेरस य अंगुलाइं अदंगुलं च किंचिविसेसाहियं परिकखेवेणं प०, एणं जोयणसहस्सं  
 उव्वेहेणं णवणउइं जोयणसहस्साइं साइरेगाइं उड्डं उच्चत्तेणं साइरेगं जोयणसय-  
 सहस्सं सव्वग्गेणं पण्णत्ते ॥ १७६ ॥ जम्बुद्दीवे णं भन्ते ! दीवे किं सासए असा-  
 सए ? गोयमा ! सिय सासए सिय असासए, से केणट्ठेणं भन्ते ! एवं वुच्चइ-सिय  
 सासए सिय असासए ? गो० ! दव्वट्ठयाए सासए वण्णपज्जवेहिं गंध० रस० फास-  
 पज्जवेहिं असासए, से तेणट्ठेणं गो० ! एवं वुच्चइ-सिय सासए सिय असासए ।  
 जम्बुद्दीवे णं भन्ते ! दीवे कालओ केवच्चिरं होइ ? गोयमा ! ण कयावि णासि ण  
 कयावि णत्थि ण कयावि ण भविस्सइ भुवि च भवइ य भविस्सइ य ध्रुवे णिइए  
 सासए अव्वए अव्वट्ठिए णिच्चे जम्बुद्दीवे दीवे पण्णत्ते इति ॥ १७७ ॥ जम्बुद्दीवे  
 णं भन्ते ! दीवे किं पुढविपरिणामे आउपरिणामे जीवपरिणामे पोगलपरिणामे ?  
 गोयमा ! पुढविपरिणामेवि आउपरिणामेवि जीवपरिणामेवि पुगलपरिणामेवि ।  
 जम्बुद्दीवे णं भन्ते ! दीवे सव्वपाणा सव्वजीवा सव्वभूया सव्वसत्ता पुढविकाइ-  
 यत्ताए आउकाइयत्ताए तेउकाइयत्ताए वाउकाइयत्ताए वणस्सइकाइयत्ताए उव्ववण-  
 पुव्वा ? हंता गो० ! असइं अदुवा अणंतखुत्तो ॥ १७८ ॥ से केणट्ठेणं भन्ते !  
 एवं वुच्चइ-जम्बुद्दीवे २ ? गो० ! जम्बुद्दीवे णं दीवे तत्थ २ देसे २ तहिं २ बहवे

जम्बूख्वा जम्बूवणा जम्बूवणसंडा णिच्चं कुसुमिया जाव पिंडिममंजरिवडेंसगधरा  
 सिरीए अईव २ उवसोभेमाणा २ चिट्ठंति, जम्बूए० सुदंसणाए अणाहिए णामं देवे  
 महिद्धिए जाव पल्लिओवमट्ठिइए परिवसइ, से तेणट्ठेणं गोयमा ! एयं वुच्चइ-जम्बु-  
 द्वीवे दीवे इति ॥ १७९ ॥ तए णं समणे भगवं महावीरे मिहिलाए णयरीए माणि-  
 भदे उज्जाणे बहूणं समणाणं बहूणं समणीणं बहूणं सावयाणं बहूणं सावियाणं  
 बहूणं देवाणं बहूणं देवीणं मज्झगए एवमाइक्खइ एवं भासइ एवं पण्णवेइ एवं  
 पह्वेइ जम्बूद्वीवपण्णत्ती णामत्ति अज्जो ! अज्झयणे अट्ठं च हेउं च पत्तिणं च  
 कारणं च वागरणं च भुज्जो २ उवदंसैइत्तिवेमि ॥ १८० ॥ सत्तमो वक्खारो  
 समत्तो ॥ जंबुद्वीवपण्णत्तिसुत्तं समत्तं ॥



गमोऽत्यु णं समणस्स भगवओ णायपुत्तमहावीरस्स

# सुत्तागमे

तत्थ णं

## चंदपणत्ती

जयइ णवणलिणकुवलयवियसियसयवत्तपत्तलदलच्छो । वीरो गयंदमयगलसललि-  
यगयविक्रमो भयवं ॥ १ ॥ नमिऊण सुरअसुरगरुलभुयगपरिवंदिए गयकिलेसे ।  
अरिहे सिद्धायरिए उवज्जाय सव्वसाहू य ॥ २ ॥ फुडवियडपागडत्थं वुच्छं पुव्व-  
सुयसारणीसंदं । सुहुमगणिणोवइत्तं जोइसगणरायपण्णत्ति ॥ ३ ॥ णामेण इंदभूत्ति  
गोयसो वंदिऊण ति विहेणं । पुच्छइ जिणवरवसहं जोइसगणरायपण्णत्ति ॥ ४ ॥ कइ  
मंडलाइ वच्चइ १, तिरिच्छा किं च गच्छइ २ । ओभासइ केवइयं ३, सेयाई किं ते  
संठिई ४ ॥ ५ ॥ कहिं पडिहया लेसा ५, कहिं ते ओयसंठिई ६ । के सूरियं वर-  
यए ७, कहां ते उदयसंठिई ८ ॥ ६ ॥ कहां कट्ठा पोरिसिच्छया ९, जोगे किं ते व  
आहिए १० । किं ते संवच्छरेणाई ११, कइ संवच्छराइ य १२ ॥ ७ ॥ कहां चंद-  
मसो वुड्ढी १३, कया ते दोसिणा बहू १४ । केइ सिग्घगई वुत्ते १५, कहां दोसिण-  
लक्खणं १६ ॥ ८ ॥ चयणोववाय १७ उच्चते १८, सूरिया कइ आहिया १९ ।  
अणुभावे के व संवुत्ते २०, एवमेयाई वीसई ॥ ९ ॥ वड्ढोवड्ढी मुहुत्ताणं १, अद्ध-  
मंडलसंठिई २ । के ते चिण्णं परियरइ ३, अंतरं किं चरंति य ४ ॥ १० ॥ उग्गा-  
हइ केवइयं ५, केवइयं च विकंपइ ६ । मंडलाण य संठाणे ७, विक्खंमो ८ अट्ठ  
पाहुडा ॥ ११ ॥ छप्पंच य सत्तेव य अट्ठ तिणिण य हवंति पडिवत्ती । पढमस्स  
पाहुडस्स हवंति एयाउ पडिवत्ती ॥ १२ ॥ पडिवत्तीओ उदए, तहा अत्थमणेषु य ।  
भियवाए कण्णकला, मुहुत्ताण गइइ य ॥ १३ ॥ णिक्खममाणे सिग्घगई,  
पविसंते मंदगइइ य । चुलसीइसयं पुरिसाणं, तेसिं च पडिवत्तीओ ॥ १४ ॥  
उदयम्मि अट्ठ भणिया भेयग्घाए दुवे य पडिवत्ती । चत्तारि मुहुत्तगईए हुंति तइयम्मि  
पडिवत्ती ॥ १५ ॥ आवलिय १ मुहुत्तग्गे २, एवंभागा य ३ जोगस्सा ४ । कुलाइं ५  
पुण्णमासी ६ य, सण्णिवाए ७ य संठिई ८ ॥ १६ ॥ तार(य)ग्गं च ९ णेया य  
१०, चंदमग्गत्ति ११ यावरे । देवयाण य अज्झयणे १२, मुहुत्ताणं णामया इय  
१३ ॥ १७ ॥ दिवसा राइ वुत्ता य १४, तिहिं १५ गोत्ता १६ भोयणाणि १७ य ।

आइच्चवार १८ मासा १९ य, पंच संवच्छरा इय २० ॥ १८ ॥ जोइसस्स य दाराइं २१, णक्खत्तविजए विय २२ । दसमे पाहुडे एए, बावीसं पाहुडपाहुडा ॥ १९ ॥ तेणं कालेणं तेणं समएणं मिहिला णामं णयरी होत्था रिद्धत्थिमियसमिद्धा पमुइय-जणजाणवया...पासादीया ४ ॥ १ ॥ तीसे णं मिहिलाए णयरीए बहिया उत्तर-पुरच्छिमे दिसीभाए माणिभेदे णामं उज्जाणे होत्था वण्णओ ॥ २ ॥ तीसे णं मिहिलाए णयरीए जियसत्तू णामं राया होत्था वण्णओ ॥ ३ ॥ तस्स णं जियसत्तुस्स रण्णो धारिणी णामं देवी होत्था वण्णओ ॥ ४ ॥ तेणं कालेणं तेणं समएणं तम्मि उज्जाणे सामी समोसडे, परिसा णिग्गया, धम्मो कहिओ, परिसा पडिग्गया जाव राया जामेव दिसिं पाउब्भूए तामेव दिसिं पडिग्गए ॥ ५ ॥ तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदभूई णामं अणगारे गोयमे गोत्तेणं सत्तुस्सेहे समचउरंसंठाणसंठिए वज्जरिसहणारायसंघयणे जाव एवं वयासी-ता कहं ते वट्ठोवट्ठी मुहुत्ताणं आहितेति वएज्जा ? ता अट्ठएगूणवीसे मुहुत्तसए सत्तावीसं च सट्ठिभागे मुहुत्तस्स आहितेति वएज्जा ॥ ६ ॥ ता जया णं सूरिए सव्वब्भंतराओ मंडलाओ सव्वबाहिरं मंडलं उवसंकमिता चारं चरइ सव्वबाहिराओ मंडलाओ सव्वब्भंतरं मंडलं उवसंकमिता चारं चरइ एस णं अद्धा केवइयं राइंदियगेणं आहितेति वएज्जा ? ता तिण्णि छावट्ठे राइंदियसए राइंदियगेणं आहितेति वएज्जा ॥ ७ ॥ ता एयाए अद्धाए सूरिए कइ मंडलाई चरइ, कइ मंडलाई दुक्खुत्तो चरइ, कइ मंडलाई एगक्खुत्तो चरइ ? ता चुलसीयं मंडलसयं चरइ, बासीइ मंडलसयं दुक्खुत्तो चरइ, तंजहा-णिक्खममाणे चेव पविसमाणे चेव, दुवे य खलु मंडलाई सइ चरइ, तंजहा-सव्वब्भंतरं चेव मंडलं सव्वबाहिरं चेव मंडलं ॥ ८ ॥ जइ खलु तस्सेव आइच्चस्स संवच्छरस्स सयं अट्ठारसमुहुत्ते दिवसे भवइ सइ अट्ठारसमुहुत्ता राई भवइ सयं दुवाल्समुहुत्ते दिवसे भवइ सइ दुवाल्स-मुहुत्ता राई भवइ, पढमे छम्मासे अत्थि अट्ठारसमुहुत्ता राई, णत्थि अट्ठारसमुहुत्ते दिवसे, अत्थि दुवाल्समुहुत्ते दिवसे, णत्थि दुवाल्समुहुत्ता राई भवइ, दोच्चे छम्मासे अत्थि अट्ठारसमुहुत्ते दिवसे, णत्थि अट्ठारसमुहुत्ता राई, अत्थि दुवाल्समुहुत्ता राई, णत्थि दुवाल्समुहुत्ते दिवसे भवइ, पढमे वा छम्मासे दोच्चे वा छम्मासे णत्थि पण्णरसमुहुत्ते दिवसे भवइ, णत्थि पण्णरसमुहुत्ता राई भवइ, तत्थ णं कं हेउं वएज्जा ? ता अयण्णं जंबूदीवे २ सव्वदीवसमुद्दाणं सव्वब्भंतराए जाव विसेसा-हिए परिवक्खेवेणं पण्णत्ते, ता जया णं सूरिए सव्वब्भंतरमंडलं उवसंकमिता चारं चरइ तथा णं उत्तमकट्ठपत्ते उक्कोसए अट्ठारसमुहुत्ते दिवसे भवइ, जहणिया

दुवालसमुहुत्ता राई भवइ, से णिक्खममाणे सूरिए णवं संवच्छरं अयमाणे पढ-  
मंसि अहोरत्तंसि अब्भितराणंतंरं मंडलं उवसंकमिता चारं चरइ, ता जया णं  
सूरिए अब्भितराणंतंरं मंडलं उवसंकमिता चारं चरइ तथा णं अट्टारसमुहुत्ते दिवसे  
भवइ दोहिं एगट्ठिभागमुहुत्तेहिं ऊणे, दुवालसमुहुत्ता राई भवइ दोहिं एगट्ठिभाग-  
मुहुत्तेहिं अहिया, से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं  
उवसंकमिता चारं चरइ, ता जया णं सूरिए अब्भितरं तच्चं मंडलं उवसंकमिता चारं  
चरइ तथा णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे, दुवाल-  
समुहुत्ता राई भवइ चउहिं एगट्ठिभागमुहुत्तेहिं अहिया, एवं खलु एएणं उवाएणं  
णिक्खममाणे सूरिए तथाणंतराओ० मंडलाओ मंडलं संकममाणे २ दो २ एगट्ठिभागमुहुत्ते  
एगमेगे मंडले दिवसखेतस्स णिवुट्ठेमाणे २ रयणिखेतस्स अभिवुट्ठेमाणे २ सव्वबाहिर-  
मंडलं उवसंकमिता चारं चरइ, ता जया णं सूरिए सव्वब्भंतराओ मंडलाओ सव्व-  
बाहिरं मंडलं उवसंकमिता चारं चरइ तथा णं सव्वब्भंतरमंडलं पणिहाय एगेणं  
तेसीएणं राइंदियसएणं तिण्णिछावट्टे एगट्ठिभागमुहुत्ते सए दिवसखेतस्स णिवुट्ठिता  
रयणिक्खेतस्स अभिवुट्ठिता चारं चरइ, तथा णं उत्तमकट्टपत्ता उक्कोसिया अट्टार-  
समुहुत्ता राई भवइ, जहण्णए बारसमुहुत्ते दिवसे भवइ, एस णं पढमे छम्मासे, एस  
णं पढमस्स छम्मासस्स पज्जवसाणे । से पविसमाणे सूरिए दोच्चं छम्मासं अयमाणे  
पढमंसि अहोरत्तंसि बाहिराणंतंरं मंडलं उवसंकमिता चारं चरइ, ता जया णं सूरिए  
बाहिराणंतंरं मंडलं उवसंकमिता चारं चरइ तथा णं अट्टारसमुहुत्ता राई भवइ  
दोहिं एगट्ठिभागमुहुत्तेहिं ऊणा, दुवालसमुहुत्ते दिवसे भवइ दोहिं एगट्ठिभागमुहुत्तेहिं  
अहिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं  
चरइ, ता जया णं सूरिए बाहिरं तच्चं मंडलं उवसंकमिता चारं चरइ तथा णं  
अट्टारसमुहुत्ता राई भवइ चउहिं एगट्ठिभागमुहुत्तेहिं ऊणा, दुवालसमुहुत्ते दिवसे  
भवइ चउहिं एगट्ठिभागमुहुत्तेहिं अहिए । एवं खलु एएणुवाएणं पविसमाणे सूरिए  
तथाणंतराओ तथाणंतरं मंडलाओ मंडलं संकममाणे २ दो दो एगट्ठिभागमुहुत्ते एगमेगे  
मंडले रयणिखेतस्स णिवुट्ठेमाणे २ दिवसखेतस्स अभिवुट्ठेमाणे २ सव्वब्भंतरं मंडलं  
उवसंकमिता चारं चरइ, ता जया णं सूरिए सव्वबाहिराओ मंडलाओ सव्वब्भंतरं  
मंडलं उवसंकमिता चारं चरइ तथा णं सव्वबाहिरं मंडलं पणिहाय एगेणं तेसीएणं  
राइंदियसएणं तिण्णिछावट्टे एगट्ठिभागमुहुत्तसए रयणिखेतस्स निवुट्ठिता दिवसखेतस्स  
अभिवुट्ठिता चारं चरइ, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ,  
जहण्णिगया दुवालसमुहुत्ता राई भवइ, एस णं दोच्चं छम्मासे, एस णं दुच्चस्स छम्मा-

सस्स पज्जवसाणे, एस णं आइच्चै संवच्छरे, एस णं आइच्चस्स संवच्छरस्स पज्जवसाणे, इइ खलु तस्सेवं आइच्चस्स संवच्छरस्स सइं अट्टारसमुहुत्ते दिवसे भवइ, सइं अट्टारसमुहुत्ता राई भवइ, सयं दुवालसमुहुत्ते दिवसे भवइ, सयं दुवालसमुहुत्ता राई भवइ, पढमे छम्मासे अत्थि अट्टारसमुहुत्ता राई भवइ, णत्थि अट्टारसमुहुत्ते दिवसे भवइ, अत्थि दुवालसमुहुत्ते दिवसे, णत्थि दुवालसमुहुत्ता राई भवइ, दोच्चै छम्मासे अत्थि अट्टारसमुहुत्ते दिवसे भवइ, णत्थि अट्टारसमुहुत्ता राई, अत्थि दुवालसमुहुत्ता राई, णत्थि दुवालसमुहुत्ते दिवसे भवइ, पढमे वा छम्मासे दोच्चै वा छम्मासे णत्थि पण्णरसमुहुत्ते दिवसे भवइ, णत्थि पण्णरसमुहुत्ता राई भवइ, णणत्थ राईदियाणं वद्धोवड्डीए मुहुत्ताण वा चओवचएणं, णणत्थ वा अणुवायगईए० गाहाओ भाणियव्वाओ ॥ ९ ॥

**पढमस्स पाहुडस्स पढमं पाहुडपाहुडं समत्तं ॥ १-१ ॥**

ता क्हं ते अद्धमंडलसंठिई आहिताति वएज्जा ? तत्थ खलु इमा दुविहा अद्धमंडलसंठिई पण्णत्ता, तंजहा-दाहिणा चेव अद्धमंडलसंठिई उत्तरा चेव अद्धमंडलसंठिई । ता क्हं ते दाहिणअद्धमंडलसंठिई आहिताति वएज्जा ? ता अयणं जबूदीवे दीवे सव्वदीवसमुद्दाणं जाव परिकखेवेणं०, ता जया णं सूरिए सब्भंतरं दाहिणं अद्धमंडलसंठिई उवसंकमिता चारं चरइ तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, से णिक्खममाणे सूरिए णवं संवच्छरं अयमाणे पढमंसि अहोरत्तंसि दाहिणाए अंतराए भागाए तस्साइपएसाए अर्द्धभितराणंतरं उत्तरद्धमंडलं संठिई उवसंकमिता चारं चरइ, जया णं सूरिए अर्द्धभितराणंतरं उत्तरं अद्धमंडलसंठिई उवसंकमिता चारं चरइ तथा णं अट्टारसमुहुत्ते(हिं) दिवसे भवइ दोहिं एगट्ठिभागमुहुत्तेहिं ऊणे, दुवालसमुहुत्ता राई० दोहिं एगट्ठिभागमुहुत्तेहिं अहिया, से णिक्खममाणे सूरिए दोच्चंसि अहोरत्तंसि उत्तराए अंतराए भागाए तस्साइपएसाए अर्द्धभितरं तच्चं दाहिणं अद्धमंडलं संठिई उवसंकमिता चारं चरइ । ता जया णं सूरिए अर्द्धभितरं तच्चं दाहिणं अद्धमंडलं संठिई उवसंकमिता चारं चरइ तथा णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे, दुवालसमुहुत्ता राई भवइ चउहिं एगट्ठिभागमुहुत्तेहिं अहिया, एवं खलु एएणं उवाएणं णिक्खममाणे सूरिए तयणंतराओऽणंतरंसि तंसि २ देसंसि तं तं अद्धमंडलसंठिई संकममाणे २ दाहिणाए २ अंतराए भागाए तस्साइपएसाए सव्वबाहिरं उत्तरं अद्धमंडलसंठिई उवसंकमिता चारं चरइ, ता जया णं सूरिए सव्वबाहिरं उत्तरं अद्धमंडलसंठिई उवसंकमिता चारं चरइ तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहणए दुवालसमुहुत्ते दिवसे भवइ । एस णं

पदमे छम्मासे, एस णं पदमछम्मासस्स पज्जवसाणे, से पविसमाणे सूरिए दोच्चं छम्मासं अयमाणे पदमंसि अहोरत्तंसि उत्तराए अंतराभागाए तस्साइपएसाए बाहिराणंतरं दाहिणं अद्धमंडलसंठिइं उवसंकमिता चारं चरइ, ता जया णं सूरिए बाहिराणंतरं दाहिणअद्धमंडलसंठिइं उवसंकमिता चारं चरइ तथा णं अट्टारसमुहुत्ता राई भवइ दोहिं एगट्ठिभागमुहुत्तेहिं ऊणा, दुवालसमुहुत्ते दिवसे भवइ दोहिं एगट्ठिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि दाहिणाए अंतराए भागाए तस्साइपएसाए बाहिरंतरं तच्चं उत्तरं अद्धमंडलसंठिइं उवसंकमिता चारं चरइ, ता जया णं सूरिए बाहिरं तच्चं उत्तरं अद्धमंडलसंठिइं उवसंकमिता चारं चरइ तथा णं अट्टारसमुहुत्ता राई भवइ चउहिं एगट्ठिभागमुहुत्तेहिं अहिया, एवं खलु एएणं उवाएणं पविसमाणे सूरिए तयाणंतराओ तयाणंतरं० तंसि २ देसंसि तं तं अद्धमंडलसंठिइं संकममाणे २ उत्तराए अंतराभागाए तस्साइपएसाए सव्वब्भंतरं दाहिणं अद्धमंडलसंठिइं उवसंकमिता चारं चरइ, ता जया णं सूरिए सव्वब्भंतरं दाहिणं अद्धमंडलसंठिइं उवसंकमिता चारं चरइ तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, एस णं दोच्चे छम्मासे, एस णं दोच्चस्स छम्मासस्स पज्जवसाणे, एस णं आइच्चे संवच्छरे, एस णं आइच्चसंवच्छरस्स पज्जवसाणे ॥ १० ॥ ता क्हं ते उत्तरा अद्धमंडलसंठिइं आहिताति वएज्जा ? ता अयं णं जंबूदीवे दीवे सव्वदीव जाव परिवेवेणं, ता जया णं सूरिए सव्वब्भंतरं उत्तरं अद्धमंडलसंठिइं उवसंकमिता चारं चरइ तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, जहा दाहिणा तहा चेव णवरं उत्तरट्ठिओ अट्ठिभतराणंतरं दाहिणं उवसंकमइ, दाहिणाओ अट्ठिभतरं तच्चं उत्तरं उवसंकमइ, एवं खलु एएणं उवाएणं जाव सव्वबाहिरं दाहिणं उवसंकमइ सव्वबाहिरं दाहिणं उवसंकमिता दाहिणाओ बाहिराणंतरं उत्तरं उवसंकमइ, उत्तराओ बाहिरं तच्चं दाहिणं तच्चाओ दाहिणाओ संकममाणे २ जाव सव्वब्भंतरं उवसंकमइ, तहेव । एस णं दोच्चे छम्मासे, एस णं दोच्चस्स छम्मासस्स पज्जवसाणे, एस णं आइच्चे संवच्छरे, एस णं आइच्चस्स संवच्छरस्स पज्जवसाणे, गाहाओ ॥ ११ ॥ पढमस्स पाहुडस्स बीयं पाहुडपाहुडं समत्तं ॥ १-२ ॥

ता के ते चिण्णं पडिचरइ आहितेति वएज्जा ? तत्थ खलु इमे दुवे सूरिया पवत्ता, तंजहा-भारहे चेव सूरिए एरवए चेव सूरिए, ता एए णं दुवे सूरिया पत्तेयं २ तीसाए २ मुहुत्तेहिं एगमेगं अद्धमंडलं चरंति, सट्ठीए २ मुहुत्तेहिं एगमेगं



मंडलं संघायंति, ता णिक्खममाणा खलु एए दुवे सूरिया णो अण्णमण्णस्स चिण्णं पडिचरंति, पविसमाणा खलु एए दुवे सूरिया अण्णमण्णस्स चिण्णं पडिचरंति, तं सयमेगं चोयालं, तत्थ के हेऊ०ति वएज्जा ? ता अयण्णं जंबूदीवे २ जाव परिक्खे-वेणं०, तत्थ णं अयं भारहए चेव सूरिए जंबूदीवस्स २ पाईणपडीणाययाउदीण-दाहिणाययाए जीवाए मंडलं चउवीसएणं सएणं छेत्ता दाहिणपुरत्थिमिल्लंसि चउ-भागमंडलंसि बाणउइयसूरियमयाइं जाइं अप्पणा चेव चिण्णाइं पडिचरइ, उत्तरपच्च-त्थिमिल्लंसि चउभागमंडलंसि एक्काणउइं सूरियमयाइं जाइं सूरिए अप्पणो चेव चिण्णं पडिचरइ, तत्थ णं अयं भारहं सूरिए एरवयस्स सूरियस्स जंबूदीवस्स २ पाईण-पडीणाययाए उदीणदाहिणाययाए जीवाए मंडलं चउवीसएणं सएणं छेत्ता उत्तर-पुरत्थिमिल्लंसि चउभागमंडलंसि बाणउइं सूरियमयाइं जाव सूरिए परस्स चिण्णं पडिचरइ, दाहिणपच्चत्थिमिल्लंसि चउभागमंडलंसि एगूणणउइं सूरियमयाइं जाइं सूरिए परस्स चेव चिण्णं पडिचरइ, तत्थ णं अयं एरवए सूरिए जंबूदीवस्स २ पाईणपडीणाययाए उदीणदाहिणाययाए जीवाए मंडलं चउवीसएणं सएणं छेत्ता उत्तरपुरत्थिमिल्लंसि चउभागमंडलंसि बाणउइं सूरियमयाइं जाव सूरिए अप्पणो चेव चिण्णं पडिचरइ, दाहिणपुरत्थिमिल्लंसि चउभागमंडलंसि एक्काणउइं सूरियमयाइं जाव सूरिए अप्पणो चेव चिण्णं पडिचरइ, तत्थ णं अयं एरवइए सूरिए भारहस्स सूरियस्स जंबूदीवस्स २ पाईणपडीणाययाए उदीणदाहिणाययाए जीवाए मंडलं चउवीसएणं सएणं छेत्ता दाहिणपच्चत्थिमिल्लंसि चउभागमंडलंसि बाणउइं सूरियमयाइं सूरिए परस्स चिण्णं पडिचरइ, उत्तरपुरत्थिमिल्लंसि चउभागमंडलंसि एक्काणउइं सूरियमयाइं जाइं सूरिए परस्स चेव चिण्णं पडिचरइ, ता णिक्खममाणा खलु एए दुवे सूरिया णो अण्णमण्णस्स चिण्णं पडिचरंति, पविसमाणा खलु एए दुवे सूरिया अण्णमण्णस्स चिण्णं पडिचरंति, सयमेगं चोयालं । गाहाओ ॥ १२ ॥

**पढमस्स पाहुडस्स तइयं पाहुडपाहुडं समत्तं ॥ १-३ ॥**

ता केवइयं एए दुवे सूरिया अण्णमण्णस्स अंतरं कट्ठु चारं चरंति आहिताति वएज्जा ? तत्थ खलु इमाओ छ पडिवत्तीओ पण्णत्ताओ, तंजहा-तत्थ एगे एवमा-हंसु-ता एगं जोयणसहस्सं एगं च तेत्तीसं जोयणसयं अण्णमण्णस्स अंतरं कट्ठु सूरिया चारं चरंति आहिताति वएज्जा एगे एवमाहंसु १, एगे पुण एवमाहंसु-ता एगं जोयणसहस्सं एगं च चउतीसं जोयणसयं अण्णमण्णस्स अंतरं कट्ठु सूरिया चारं चरंति आहिताति वएज्जा एगे एवमाहंसु २, एगे पुण एवमाहंसु-ता एगं जोयण-सहस्सं एगं च पण्णत्तीसं जोयणसयं अण्णमण्णस्स अंतरं कट्ठु सूरिया चारं चरंति

आहिताति वएजा एगे एवमाहंसु ३, एवं एगं दीवं एगं समुद्दं अण्णमण्णस्स अंतरं कट्ठु ४, एगे...दो दीवे दो समुद्दे अण्णमण्णस्स अंतरं कट्ठु सूरिया चारं चरंति आहिताति वएजा एगे एवमाहंसु ५, एगे...तिणिण दीवे तिणिण समुद्दे अण्णमण्णस्स अंतरं कट्ठु सूरिया चारं चरंति आहिताति वएजा एगे एवमाहंसु ६, वयं पुण एवं वयामो-ता पंच पंच जोयणाइं पण्णीसं च एगट्ठिभागे जोयणस्स एगमेगे मंडले अण्णमण्णस्स अंतरं अभिवट्ठेमाणा वा निवट्ठेमाणा वा सूरिया चारं चरंति० । तत्थ णं को हेऊ आहिएति वएजा ? ता अयण्णं जंबूदीवे २ जाव परिकखेवेणं पण्णत्ते, ता जया णं एए दुवे सूरिया सव्वब्भंतरमंडलं उवसंकमिता चारं चरंति तया णं णवणउइजोयणसहस्साइं छच्चत्ताले जोयणसए अण्णमण्णस्स अंतरं कट्ठु चारं चरंति आहिताति वएजा, तया णं उत्तमकट्ठपत्ते उक्कोसए अट्टारसमुहुत्ते दिवसे भवइ, जहण्णिया दुवालसमुहुत्ता राई भवइ, ते णिकखममाणा सूरिया णवं संवच्छरं अयमाणा पढमंसि अहोरत्तंसि अब्भितराणंतरं मंडलं उवसंकमिता चारं चरंति, ता जया णं एए दुवे सूरिया अब्भितराणंतरं मंडलं उवसंकमिता चारं चरंति तया णं णवणवई जोयणसहस्साइं छच्च पणयाले जोयणसए पणवीसं च एगट्ठिभागे जोयणस्स अण्णमण्णस्स अंतरं कट्ठु चारं चरंति आहिताति वएजा, तया णं अट्टारसमुहुत्ते दिवसे भवइ दोहिं एगट्ठिभागमुहुत्तेहिं ऊणे, दुवालसमुहुत्ता राई भवइ दोहिं एगट्ठिभागमुहुत्तेहिं अहिया, ते णिकखममाणा सूरिया दोच्चंसि अहोरत्तंसि अब्भितरं तच्चं मंडलं उवसंकमिता चारं चरंति, ता जया णं एए दुवे सूरिया अब्भितरं तच्चं मंडलं उवसंकमिता चारं चरंति तया णं वणणवई जोयणसहस्साइं छच्चइक्कावण्णे जोयणसए णवय एगट्ठिभागे जोयणस्स अण्णमण्णस्स अंतरं कट्ठु चारं चरंति आहिताति वएजा, तया णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे, दुवालसमुहुत्ता राई भवइ चउहिं एगट्ठिभागमुहुत्तेहिं अहिया, एवं खलु एएणु-वाएणं णिकखममाणा एए दुवे सूरिया तओऽणंतराओ तयाणंतरं मंडलाओ मंडलं संकममाणा २ पंच २ जोयणाइं पण्णीसं च एगट्ठिभागे जोयणस्स एगमेगे मंडले अण्णमण्णस्स अंतरं अभिवट्ठेमाणा २ सव्वबाहिरं मंडलं उवसंकमिता चारं चरंति, ता जया णं एए दुवे सूरिया सव्वबाहिरं मंडलं उवसंकमिता चारं चरंति तया णं एगं जोयणसयसहस्सं छच्च सट्ठे जोयणसए अण्णमण्णस्स अंतरं कट्ठु चारं चरंति, तया णं उत्तमकट्ठपत्ता उक्कोसिया अट्टारसमुहुत्ता राई भवइ, जहण्णए दुवालसमुहुत्ते दिवसे भवइ, एस णं पढमे छम्मासे, एस णं पढमस्स छम्मासस्स पज्जवसाणे, ते पविसमाणा सूरिया दोच्चं छम्मासं अयमाणा पढमंसि अहोरत्तंसि

વાહિરાણંતરં મંડલં ઉવસંકમિત્તા ચારં ચરંતિ, તા જયા ણં એ દુવે સૂરિયા વાહિ-  
રાણંતરં મંડલં ઉવસંકમિત્તા ચારં ચરંતિ તયા ણં એઁ જોયણસયસહસ્સં છ્ચ ચડ-  
પ્પણ્ણે જોયણસે છત્તીસં ચ એગઢ્ઢિભાગે જોયણસસ અણ્ણમણ્ણસસ અંતરં કઠુ ચારં  
ચરંતિ આહિતાતિ વણ્ણા, તયા ણં અઢ્ઢારસમુહુત્તા રાઈ ભવઈ દોહિં એગઢ્ઢિભાગમુહુ-  
ત્તેહિં ઝ્ઞા, દુવાલસમુહુત્તે દિવસે ભવઈ દોહિં એગઢ્ઢિભાગમુહુત્તેહિં અહિએ, તે પવિસ-  
માણા સૂરિયા દોચ્ચંસિ અહોરત્તંસિ વાહિરં તચ્ચં મંડલં ઉવસંકમિત્તા ચારં ચરંતિ, તા  
જયા ણં એ દુવે સૂરિયા વાહિરં તચ્ચં મંડલં ઉવસંકમિત્તા ચારં ચરંતિ તયા ણં એઁ  
જોયણસયસહસ્સં છ્ચ અઢ્યાલે જોયણસે વાવણ્ણં ચ એગઢ્ઢિભાગે જોયણસસ અણ્ણ-  
મણ્ણસસ અંતરં કઠુ ચારં ચરંતિ, તયા ણં અઢ્ઢારસમુહુત્તા રાઈ ભવઈ ચડહિં એગઢ્ઢિ-  
ભાગમુહુત્તેહિં ઝ્ઞા, દુવાલસમુહુત્તે દિવસે ભવઈ ચડહિં એગઢ્ઢિભાગમુહુત્તેહિં અહિએ ।  
એવં ચ્છલુ એણ્ણવાણં પવિસમાણા એ દુવે સૂરિયા તઓડંપંતરાઓ તયાણંતરં મંડ-  
લાઓ મંડલં ઉવસંકમમાણા ૨ પંચ ૨ જોયણાઈ પ્પણત્તીસે એગઢ્ઢિભાગે જોયણસસ  
એમમેગે મંડલે અણ્ણમણ્ણસસંતરં ણિવુઢ્ઢેમાણા ૨ સવ્વબ્ભંતરંમંડલં ઉવસંકમિત્તા ચારં  
ચરંતિ, તા જયા ણં એ દુવે સૂરિયા સવ્વબ્ભંતરં મંડલં ઉવસંકમિત્તા ચારં ચરંતિ  
તયા ણં ણવણડજોયણસહસ્સાઈ છ્ચ ચત્તાલે જોયણસે અણ્ણમણ્ણસસ અંતરં કઠુ  
ચારં ચરંતિ, તયા ણં ઉત્તમકઠુપત્તે ઉક્કોસે અઢ્ઢારસમુહુત્તે દિવસે ભવઈ, જહ્ણિયયા  
દુવાલસમુહુત્તા રાઈ ભવઈ, એસ ણં દોચ્ચે છમ્માસે, એસ ણં દોચ્ચસસ છમ્માસસસ  
પજ્જવસાણે, એસ ણં આઈચ્ચે સંવચ્છરે, એસ ણં આઈચ્ચસંવચ્છરસસ પજ્જવસાણે ॥ ૧૩ ॥

**પઢમસસ પાહુડસસ ચડત્થં પાહુડપાહુડં સમત્તં ॥ ૧-૪ ॥**

તા કેવઈયં તે દીવં વા સમુદં વા ઓગાહિતા સૂરિએ ચારં ચરઈ આહિતાતિ  
વણ્ણા ? તથ ચ્છલુ હમાઓ પંચ પઢિવત્તીઓ પ્પણ્ણાઓ, તં-તથ એ એવમાહંસુ-  
તા એઁ જોયણસહસ્સં એઁ ચ તેત્તીસં જોયણસયં દીવં વા સમુદં વા ઓગાહિતા સૂરિએ  
ચારં ચરઈ...૧, એગે પુણ એવમાહંસુ-તા એઁ જોયણસહસ્સં એઁ ચ ચડત્તીસં જોયણસયં  
દીવં વા સમુદં વા ઓગાહિતા સૂરિએ ચારં ચરઈ ૦ એગે એવમાહંસુ ૨, એગે પુણ એવમા-  
હંસુ-તા એઁ જોયણસહસ્સં એઁ ચ પ્પણત્તીસં જોયણસયં દીવં વા સમુદં વા ઓગાહિતા  
સૂરિએ ચારં ચરઈ ૦ એગે એવમાહંસુ ૩, એગે પુણ એવમાહંસુ-તા અવઢ્ઢં દીવં વા સમુદં વા  
ઓગાહિતા સૂરિએ ચારં ચરઈ ૦ એગે એવમાહંસુ ૪, એગે પુણ એવમાહંસુ-તા ણો કિંચિ  
દીવં વા સમુદં વા ઓગાહિતા સૂરિએ ચારં ચરઈ...૫, તથ જે તે એવમાહંસુ-તા એઁ  
જોયણસહસ્સં એઁ ચ તેત્તીસં જોયણસયં દીવં વા સમુદં વા ઓગાહિતા સૂરિએ ચારં ચરઈ,  
તે એવમાહંસુ-તા જયા ણં સૂરિએ સવ્વબ્ભંતરં મંડલં ઉવસંકમિત્તા ચારં ચરઈ તયા

णं जंबूदीवं २ एगं जोयणसहस्सं एगं च तेत्तीसं जोयणसयं ओगाहिता सूरिए चारं चरइ, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, ता जया णं सूरिए सव्ववाहिरं मंडलं उवसंकमिता चारं चरइ तथा णं लवणसमुद्दं एगं जोयणसहस्सं एगं च तेत्तीसं जोयणसयं ओगाहिता चारं चरइ, तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहणए दुवालसमुहुत्ते दिवसे भवइ । एवं चोत्तीसं जोयणसयं । एवं पणतीसं जोयणसयं । तत्थ जे ते एवमाहंसु—ता अवहं दीवं वा समुद्दं वा ओगाहिता सूरिए चारं चरइ, ते एवमाहंसु—ता जया णं सूरिए सव्वब्भंतं मंडलं उवसंकमिता चारं चरइ तथा णं अवहं जंबूदीवं २ ओगाहिता चारं चरइ, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, एवं सव्ववाहिरएवि, णवरं अवहं लवणसमुद्दं, तथा णं राईदियं तहेव, तत्थ जे ते एवमाहंसु—ता णो किंचि दीवं वा समुद्दं वा ओगाहिता सूरिए चारं चरइ, ते एवमाहंसु—ता जया णं सूरिए सव्वब्भंतं मंडलं उवसंकमिता चारं चरइ तथा णं णो किंचि दीवं वा समुद्दं वा ओगाहिता सूरिए चारं चरइ, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ तहेव एवं सव्ववाहिरए मंडले णवरं णो किंचि लवणसमुद्दं ओगाहिता चारं चरइ, राईदियं तहेव, एगे एवमाहंसु ५ ॥ १४ ॥ वयं पुण एवं वयामो—ता जया णं सूरिए सव्वब्भंतं मंडलं उवसंकमिता चारं चरइ तथा णं जंबूदीवं २ असीयं जोयणसयं ओगाहिता चारं चरइ, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, एवं सव्ववाहिरेवि, णवरं लवणसमुद्दं तिणि तीसे जोयणसए ओगाहिता चारं चरइ, तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहणए दुवालसमुहुत्ते दिवसे भवइ, गाहाओ भाणिय-व्वाओ ॥ १५ ॥ **पढमस्स पाहुडस्स पंचमं पाहुडपाहुडं समत्तं ॥ १-५॥**

ता केवइयं (ते) एगमेगेणं राईदिएणं विकंपइता २ सूरिए चारं चरइ आहितेति वएजा ? तत्थ खलु इमाओ सत्त पडिवत्तीओ पणत्ताओ, तं०—तत्थेगे एवमाहंसु—ता दो जोयणाइं अद्धउत्तालीसं तेसीयसयभागे जोयणस्स एगमेगेणं राईदिएणं विकंपइता २ सूरिए चारं चरइ० एगे एवमाहंसु १, एगे पुण एवमाहंसु—ता अट्टा-ज्जाइं जोयणाइं एगमेगेणं राईदिएणं विकंपइता २ सूरिए चारं चरइ० एगे एवमाहंसु २, एगे पुण एवमाहंसु—ता तिभागूणाइं तिणि जोयणाइं एगमेगेणं राईदिएणं विकंप-इता २ सूरिए चारं चरइ० एगे एवमाहंसु ३, एगे पुण एवमाहंसु—ता तिणि जोयणाइं अद्धसीयालीसं च तेसीइसयभागे जोयणस्स एगमेगेणं राईदिएणं विकंप-

इत्ता २ सूरिए चारं चरइ० एगे एवमाहंसु ४, एगे पुण एवमाहंसु-ता अद्दुद्धां जोगणाइं एगमेगेणं राइंदिएणं विकंपइत्ता २ सूरिए चारं चरइ० एगे एवमाहंसु ५, एगे पुण एवमाहंसु-ता चउब्भागूणाइं चत्तारि जोगणाइं एगमेगेणं राइंदिएणं विकंपइत्ता २ सूरिए चारं चरइ० एगे एवमाहंसु ६, एगे पुण एवमाहंसु-ता चत्तारि जोगणाइं अद्धवावणं च तेसीइसयभागे जोगणस्स एगमेगेणं राइंदिएणं विकंपइत्ता २ सूरिए चारं चरइ० एगे एवमाहंसु ७ । वयं पुण एवं वयामो-ता दो जोगणाइं अडयालीसं च एगट्ठिभागे जोगणस्स एगमेगं मंडलं एगमेगेणं राइंदिएणं विकंपइत्ता २ सूरिए चारं चरइ०, तत्थ णं को हेऊ०ति वएज्जा ? ता अयणं जंबूदीवे २ जाव परिकखेवेणं पण्णत्ते, ता जया णं सूरिए सव्वब्भंतरं मंडलं उवसंकमिता चारं चरइ तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, से णिक्खममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिता चारं चरइ, ता जया णं सूरिए अब्भितराणंतरं मंडलं उवसंकमिता चारं चरइ तथा णं दो जोगणाइं अडयालीसं च एगट्ठिभागे जोगणस्स एगेणं राइंदिएणं विकंपइत्ता चारं चरइ, तथा णं अट्टारसमुहुत्ते दिवसे भवइ दोहिं एगट्ठिभागमुहुत्तेहिं ऊणे, दुवालसमुहुत्ता राई भवइ दोहिं एगट्ठिभागमुहुत्तेहिं अहिया । से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमिता चारं चरइ, ता जया णं सूरिए अब्भितरं तच्चं मंडलं उवसंकमिता चारं चरइ तथा णं पंच जोगणाइं पणतीसं च एगट्ठिभागे जोगणस्स दोहिं राइंदिएहिं विकंपइत्ता २ चारं चरइ, तथा णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे, दुवालसमुहुत्ता राई भवइ चउहिं एगट्ठिभागमुहुत्तेहिं अहिया, एवं खलु एएणं उवाएणं णिक्खममाणे सूरिए तयाणंतराओ तयाणंतरं मंडलाओ मंडलं संकममाणे २ दो २ जोगणाइं अडयालीसं च एगट्ठिभागे जोगणस्स एगमेगं मंडलं एगमेगेणं राइंदिएणं विकंपमाणे २ सव्वबाहिरं मंडलं उवसंकमिता चारं चरइ, ता जया णं सूरिए सव्वब्भंतराओ मंडलाओ सव्वबाहिरं मंडलं उवसंकमिता चारं चरइ तथा णं सव्वब्भंतरं मंडलं पणिहाय एगेणं तेसीएणं राइंदियसएणं पंचदसुत्तर-जोगणसए विकंपइत्ता २ चारं चरइ, तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहणए दुवालसमुहुत्ते दिवसे भवइ, एस णं पढमछम्मासे, एस णं पढमछम्मासस्स पजवसाणे, से य पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिता चारं चरइ, ता जया णं सूरिए बाहिराणंतरं मंडलं उवसंकमिता चारं चरइ तथा णं दो दो जोगणाइं अडयालीसं

च एगट्टिभागे जोयणस्स एगेणं राईदिएणं विकंपइत्ता २ चारं चरइ, तथा णं अट्टारसमुहुत्ता राई भवइ दोहिं एगट्टिभागमुहुत्तेहिं ऊणा, दुवालसमुहुत्ते दिवसे भवइ दोहिं एगट्टिभागमुहुत्तेहिं अहिए, से पविसमाणे सूरिए दोब्बंसि अहोरत्तंसि बाहिरतच्चंसि मंडलंसि उवसंकमिता चारं चरइ, ता जया णं सूरिए बाहिरतच्चं मंडलं उवसंकमिता चारं चरइ तथा णं पंच जोयणाइं पणतीसं च एगट्टिभागे जोयणस्स दोहिं राईदिएहिं विकंपइत्ता २ चारं चरइ, राईदिए तहेव, एवं खलु एणुवाएणं पविसमाणे सूरिए तओऽणंतराओ तथाणंतरं च णं मंडलं संकममाणे २ दो २ जोयणाइं अड्यालीसं च एगट्टिभागे जोयणस्स एगमेगेणं राईदिएणं विकंपमाणे २ सव्वब्भंतं मंडलं उवसंकमिता चारं चरइ, ता जया णं सूरिए सव्ववाहिराओ मंडलाओ सव्वब्भंतं मंडलं उवसंकमिता चारं चरइ तथा णं सव्ववाहिरं मंडलं पणिहाय एगेणं तेसीएणं राईदियसएणं पंचदसुत्तरे जोयणसए विकंपइत्ता २ चारं चरइ, तथा णं उत्तमकट्ठपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, एस णं दोच्चे छम्मासे, एस णं दोच्चेस्स छम्मासस्स पज्जसाणे, एस णं आइच्चे संवच्छरे, एस णं आइच्चेस्स संवच्छरस्स पज्जसाणे ॥ १६ ॥

**पढमस्स पाहुडस्स छट्ठं पाहुडपाहुडं समत्तं ॥ १-६ ॥**

ता क्हं ते मंडलसंठिई आहिताति वएजा ? तत्थ खलु इमाओ अट्ठ पड्डिवत्तीओ पणत्ताओ, तं०-तत्थेगे एवमाहंसु-ता सव्वावि णं मंडलवया समचउरंस-संठाणसंठिया पणत्ता एगे एवमाहंसु १, एगे पुण एवमाहंसु-ता सव्वावि णं मंडलवया विसमचउरंससंठाणसंठिया पणत्ता एगे एवमाहंसु २, एगे पुण एवमाहंसु-ता सव्वावि णं मंडलवया समचउक्कोणसंठिया पणत्ता एगे एवमाहंसु ३, एगे पुण एवमाहंसु-ता सव्वावि णं मंडलवया विसमचउक्कोणसंठिया पणत्ता एगे एवमाहंसु ४, एगे पुण एवमाहंसु-ता सव्वावि णं मंडलवया समचक्कवालसंठिया पणत्ता एगे एवमाहंसु ५, एगे पुण एवमाहंसु-ता सव्वावि णं मंडलवया विसमचक्कवालसंठिया पणत्ता एगे एवमाहंसु ६, एगे पुण एवमाहंसु-ता सव्वावि णं मंडलवया चक्कच्चक्कवालसंठिया पणत्ता एगे एवमाहंसु ७, एगे पुण एवमाहंसु-ता सव्वावि णं मंडलवया छत्तागारसंठिया पणत्ता एगे एवमाहंसु ८, तत्थ जे ते एवमाहंसु-ता सव्वावि णं मंडलवया छत्तागारसंठिया पणत्ता एएणं नएणं गायव्वं, णो चेव णं इयरेहिं, पाहुडगाहाओ भाणियव्वाओ ॥ १७ ॥

**पाहुडस्स सत्तमं पाहुडपाहुडं समत्तं ॥ १-७ ॥**

ता सव्वावि णं मंडलवया केवइयं बाह्येणं केवइयं आयामविकखंमेणं केवइयं

परिक्खेवेणं आहिताति वएज्जा ? तत्थ खलु इमाओ तिणिण पड्वित्तीओ पण्णत्ताओ, तंजहा-तत्थेगे एवमाहंसु-ता सव्वावि णं मंडलवया जोयणं बाह्हेणं एगं जोयण-सहस्सं एगं च तेत्तीसं जोयणसयं आयामविक्खंभेणं तिणिण जोयणसहस्साइं तिणिण य णवणउए जोयणसए परिक्खेवेणं पण्णत्ता एगे एवमाहंसु १, एगे पुण एवमाहंसु-ता सव्वावि णं मंडलवया जोयणं बाह्हेणं एगं जोयणसहस्सं एगं च चउ-तीसं जोयणसयं आयामविक्खंभेणं तिणिण जोयणसहस्साइं चत्तारि बिउत्तरे जोयण-सए परिक्खेवेणं पण्णत्ता एगे एवमाहंसु २, एगे पुण एवमाहंसु-ता० जोयणं बाह्-हेणं एगं जोयणसहस्सं एगं च पणतीसं जोयणसयं आयामविक्खंभेणं तिणिण जोयण-सहस्साइं चत्तारि य पंचुत्तरे जोयणसए परिक्खेवेणं पण्णत्ता एगे एवमाहंसु ३, वयं पुण एवं वयामो-ता सव्वावि णं मंडलवया अडयालीसं च एगट्ठिभागे जोयणस्स बाह्हेणं अणियया आयामविक्खंभेणं परिक्खेवेणं आहिताति वएज्जा, तत्थ णं को हेऊ०ति वएज्जा ? ता अयणं जंवूदीवे २ जाव परिक्खेवेणं०, ता जया णं सूरिए सव्वब्भंतरे मंडलं उवसंकमिता चारं चरइ तथा णं सा मंडलवया अडयालीसं च एगट्ठिभागे जोयणस्स बाह्हेणं णवणउइं जोयणसहस्साइं छच्च चत्ताले जोयणसए आयामविक्खंभेणं तिणिण जोयणसयसहस्साइं पण्णरसजोयणसहस्साइं एगणूणउइं जोयणाइं किंचिविसेसाहिए परिक्खेवेणं०, तथा णं उत्तमकट्ठपत्ते उक्कोसए अट्ठारस-मुहुत्ते दिवसे भवइ, जहणिया दुवालसमुहुत्ता राई भवइ, से णिक्खममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरे मंडलं उवसंकमिता चारं चरइ, ता जया णं सूरिए अब्भितराणंतरे मंडलं उवसंकमिता चारं चरइ तथा णं सा मंडलवया अडयालीसं च एगट्ठिभागे जोयणस्स बाह्हेणं णवणउइ-जोयणसहस्साइं छच्च पणयाले जोयणसए पणतीसं च एगट्ठिभागे जोयणस्स आयामविक्खंभेणं तिणिण जोयणसयसहस्साइं पन्नरस य सहस्साइं एगं चउत्तरं जोयणसयं किंचिविसेसूणं परिक्खेवेणं०, तथा णं दिवसराइपमाणं तहेव । से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमिता चारं चरइ, ता जया णं सूरिए अब्भितरं तच्चं मंडलं उवसंकमिता चारं चरइ तथा णं सा मंडलवया अडयालीसं च एगट्ठिभागे जोयणस्स बाह्हेणं णवणउइंजोयण-सहस्साइं छच्च एक्कावण्णे जोयणसए णव य एगट्ठिभागा जोयणस्स आयामविक्खं-भेणं तिणिण जोयणसयसहस्साइं पण्णरस य सहस्साइं एगं च पणवीसं जोयणसयं परिक्खेवेणं पण्णत्ता, तथा णं दिवसराई तहेव, एवं खलु एएणं णएणं णिक्खममाणे सूरिए तयाणंताराओ तयाणंतरे मंडलाओ मंडलं उवसंकममाणे २ पंच जोयणाइं

पणतीसं च एगट्टिभागे जोयणस्स एगमेगे मंडले विक्खंभवुद्धिं अभिवट्ठेमाणे २ अट्टारस २ जोयणाई परिरयवुद्धिं अभिवट्ठेमाणे २ सव्ववाहिरं मंडलं उवसंक-  
मिता चारं चरइ, ता जया णं सूरिए सव्ववाहिरमंडलं उवसंकमिता चारं चरइ  
तया णं सा मंडलवया अडयालीसं च एगट्टिभागा जोयणस्स बाह्लेणं एगं जोयण-  
सयसहस्सं छच्च सट्ठे जोयणसए आयामविक्रंभेणं तिण्णि जोयणसयसहस्साई अट्टारस  
सहस्साई तिण्णि य पण्णरसुत्तरे जोयणसए परिकखेवेणं०, तया णं उक्कोसिया अट्टा-  
रसमुहुत्ता राई भवइ, जहण्णए दुवालसमुहुत्ते दिवसे भवइ, एस णं पढमे छम्मासे,  
एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अय-  
माणे पढमंसि अहोरत्तंसि बाहिराणंतरे मंडलं उवसंकमिता चारं चरइ, ता जया णं  
सूरिए बाहिराणंतरे मंडलं उवसंकमिता चारं चरइ तया णं सा मंडलवया अडया-  
लीसं च एगट्टिभागे जोयणस्स बाह्लेणं एगं जोयणसयसहस्सं छच्च चउप्पण्णे  
जोयणसए छव्वीसं च एगट्टिभागे जोयणस्स आयामविक्रंभेणं तिण्णि जोयणसय-  
सहस्साई अट्टारससहस्साई दोण्णि य सत्ताणउए जोयणसए परिकखेवेणं पण्णत्ता,  
तया णं राईदियं तहेव, से पविसमाणे सूरिए दोच्चंसि अहोरत्तंसि बाहिरं तच्चं मंडलं  
उवसंकमिता चारं चरइ, ता जया णं सूरिए बाहिरं तच्चं मंडलं उवसंकमिता चारं  
चरइ तया णं सा मंडलवया अडयालीसं च एगट्टिभागे जोयणस्स बाह्लेणं एगं  
जोयणसयसहस्सं छच्च अडयाले जोयणसए बावण्णं च एगट्टिभागे जोयणस्स आया-  
मविक्रंभेणं तिण्णि जोयणसयसहस्साई अट्टारससहस्साई दोण्णि य अउयणातीसे  
जोयणसए परिकखेवेणं पण्णत्ता, दिवसराई तहेव, एवं खलु एएण्णवाएणं से पवि-  
समाणे सूरिए तयाणंतराओ तयाणंतरे मंडलाओ मंडलं संक्रममाणे २ पंच २  
जोयणाई पणतीसं च एगट्टिभागे जोयणस्स एगमेगे मंडले विक्खंभवुद्धिं णिवुट्ठे-  
माणे २ अट्टारस जोयणाई परिरयवुद्धिं णिवुट्ठेमाणे २ सव्वव्भंतरे मंडलं उव-  
संकमिता चारं चरइ, ता जया णं सूरिए सव्वव्भंतरे मंडलं उवसंकमिता चारं  
चरइ तया णं सा मंडलवया अडयालीसं च एगट्टिभागे जोयणस्स बाह्लेणं गवणउई  
जोयणसहस्साई छच्च चत्ताले जोयणसए आयामविक्रंभेणं तिण्णि जोयणसयसहस्साई  
पण्णरस य सहस्साई अउणाउई च जोयणाई किंचिविसेसाहियाई परिकखेवेणं पण्णत्ता,  
तया णं उत्तमकट्ठपत्ते उक्कोसए अट्टारसमुहुत्ते दिवसे भवइ, जहण्णिया दुवालसमुहुत्ता  
राई भवइ, एस णं दोच्चे छम्मासे, एस णं दोच्चस्स छम्मासस्स पज्जवसाणे, एस णं  
आइच्चे संवच्छरे, एस णं आइच्चस्स संवच्छरस्स पज्जवसाणे, ता सव्वावि णं मंडल-  
वया अडयालीसं च एगट्टिभागे जोयणस्स बाह्लेणं, सव्वावि णं मंडलंतरिया दो



जोयणाइं विक्खंमेणं, एस णं अद्धा तेसीयसयपडुप्पण्णो पंचदसुत्तरे जोयणसए आहिताति वएज्जा, ता अब्भितराओ मंडलवयाओ बाहिरं मंडलवयं बाहिराओ वा० अब्भितरं मंडलवयं एस णं अद्धा केवइयं आहिताति वएज्जा ? ता पंचदसुत्तरजोयणसए आहिताति वएज्जा, ता अब्भितराए मंडलवयाए बाहिरा मंडलवया बाहिराओ मंडलवयाओ अब्भितरा मंडलवया एस णं अद्धा केवइयं आहिताति वएज्जा ? ता पंचदसुत्तरे जोयणसए अडयालीसं च एगट्ठिभागे जोयणस्स आहिताति वएज्जा, ता अब्भितराओ मंडलवयाओ बाहिरमंडलवया बाहिराओ० अब्भितरमंडलवया एस णं अद्धा केवइयं आहिताति वएज्जा ? ता पंचणवुत्तरे जोयणसए तेरस य एगट्ठिभागे जोयणस्स आहिताति वएज्जा, ता अब्भितराए मंडलवयाए बाहिरा मंडलवया बाहिराए मंडलवयाए अब्भितरमंडलवया एस णं अद्धा केवइयं आहिताति वएज्जा ? ता पंचदसुत्तरे जोयणसए आहिताति वएज्जा ॥ १८ ॥ पढमस्स पाहुडस्स अट्ठमं पाहुडपाहुडं समत्तं ॥ १-८ ॥ पढमं पाहुडं समत्तं ॥ १ ॥

ता क्हं तेरिच्छगई आहिताति वएज्जा ? तत्थ खलु इमाओ अट्ठ पड्वितीओ पण्णत्ताओ, तं०-तत्थेगे एवमाहंसु-ता पुरच्छिमाओ लोयंताओ पाओ मरीई आगासंसि उत्तिट्ठइ, से णं इमं तिरियं लोयं तिरियं करेइ तिरियं करेत्ता पच्चत्थिमंसि लोयंतंसि सायंसि रायं आगासंसि विट्ठंसइ एगे एवमाहंसु १, एगे पुण एवमाहंसु-ता पुरच्छिमाओ लोयंताओ पाओ सूरिए आगासंसि उत्तिट्ठइ, से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि सूरिए आगासंसि विट्ठंसइ एगे एवमाहंसु २, एगे पुण एवमाहंसु-ता पुरत्थिमाओ लोयंताओ पाओ सूरिए आगासंसि उत्तिट्ठइ, से णं इमं तिरियं लोयं तिरियं करेइ करेत्ता पच्चत्थिमंसि लोयंसि सायं सूरिए आगासं अणुपविसइ २ ता अहे पडियागच्छइ अहे पडियागच्छेत्ता पुणरवि अवरभूपुरत्थिमाओ लोयंताओ पाओ सूरिए आगासंसि उत्तिट्ठइ एगे एवमाहंसु ३, एगे पुण एवमाहंसु-ता पुरत्थिमाओ लोयंताओ पाओ सूरिए पुढविकायंसि उत्तिट्ठइ, से णं इमं तिरियं लोयं तिरियं करेइ करेत्ता पच्चत्थिमिळंसि लोयंतंसि सायं सूरिए पुढविकायंसि विट्ठंसइ एगे एवमाहंसु ४, एगे पुण एवमाहंसु-ता पुरत्थिमाओ लोयंताओ पाओ सूरिए पुढविकायंसि उत्तिट्ठइ, से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि सायं सूरिए पुढविकायंसि अणुपविसइ अणुपविसित्ता अहे पडियागच्छइ २ ता पुणरवि अवरभूपुरत्थिमाओ लोयंताओ पाओ सूरिए पुढविकायंसि उत्तिट्ठइ एगे एवमाहंसु ५, एगे पुण एवमाहंसु-ता पुरत्थिमिळ्ळाओ लोयंताओ पाओ सूरिए आडकायंसि उत्तिट्ठइ, से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि

पाओ सूरिए आउकायंसि विद्धंसइ एगे एवमाहंसु ६, एगे पुण एवमाहंसु-ता पुरत्थि-  
माओ लोगंताओ पाओ सूरिए आउकायंसि उत्तिट्ठइ, से णं इमं तिरियं लोयं तिरियं  
करेइ करेत्ता पच्चत्थिमंसि लोयंतंसि सायं सूरिए आउकायंसि अणुपविसइ २ ता अहे  
पडियागच्छइ २ ता पुणरवि अवरभूपुरत्थिमाओ लोयंताओ पाओ सूरिए आउ-  
कायंसि उत्तिट्ठइ एगे एवमाहंसु ७, एगे पुण एवमाहंसु-ता पुरत्थिमाओ लोयंताओ  
बहूइं जोयणाइं बहूइं जोयणसयाइं बहूइं जोयणसहस्साइं उट्ठं दूरं उप्पइत्ता एत्थ णं  
पाओ सूरिए आगासंसि उत्तिट्ठइ, से णं इमं दाहिणद्धं लोयं तिरियं करेइ करेत्ता  
उत्तरङ्गुलोयं तमेव राओ, से णं इमं उत्तरङ्गुलोयं तिरियं करेइ २ ता दाहिणङ्गुलोयं  
तमेव राओ, से णं इमाइं दाहिणुत्तरङ्गुलोयाइं तिरियं करेइ करेत्ता पुरत्थिमाओ  
लोयंताओ बहूइं जोयणाइं बहूइं जोयणसयाइं बहूइं जोयणसहस्साइं उट्ठं दूरं उप्प-  
इत्ता एत्थ णं पाओ सूरिए आगासंसि उत्तिट्ठइ एगे एवमाहंसु ८ । वयं पुण एवं  
वयामो-ता जंबूदीवस्स २ पाईणपडीणाययउदीणदाहिणाययाए जीवाए मंडलं चउ-  
व्वीसेणं सएणं छेत्ता दाहिणपुरच्छिमंसि उत्तरपच्चत्थिमंसि य चउव्वभागमंडलंसि इमीसे  
रयणप्पभाए पुढवीए बहुसमरमणिजाओ भूमिभागाओ अट्ठ जोयणसयाइं उट्ठं उप्प-  
इत्ता एत्थ णं पाओ दुवे सूरिया० उत्तिट्ठति, ते णं इमाइं दाहिणुत्तरां जंबूदीव-  
भागाइं तिरियं करेति २ ता पुरत्थिमपच्चत्थिमाइं जंबूदीवभागाइं तामेव राओ, ते णं  
इमाइं पुरच्छिमपच्चत्थिमाइं जंबूदीवभागाइं तिरियं करेति २ ता दाहिणुत्तरां जंबू-  
दीवभागाइं तामेव राओ, ते णं इमाइं दाहिणुत्तरां पुरच्छिमपच्चत्थिमाइं च जंबू-  
दीवभागाइं तिरियं करेति २ ता जंबूदीवस्स २ पाईणपडीणाययउदीणदाहिणाययाए  
जीवाए मंडलं चउव्वीसेणं सएणं छेत्ता दाहिणपुरच्छिमिल्लंसि उत्तरपच्चत्थिमिल्लंसि य  
चउभागमंडलंसि इमीसे रयणप्पभाए पुढवीए बहुसमरमणिजाओ भूमिभागाओ अट्ठ  
जोयणसयाइं उट्ठं उप्पइत्ता एत्थ णं पाओ दुवे सूरिया आगासंसि उत्तिट्ठति ॥ १९ ॥

**विइयस्स पाहुडस्स पदमं पाहुडपाहुडं समत्तं ॥ २-१ ॥**

ता कहं ते मंडलाओ मंडलं संकममाणे २ सूरिए चारं चरइ आहिताति वएजा ?  
तत्थ खलु इमाओ दुवे पडिवत्तीओ पण्णत्ताओ, तं०-तत्थेगे एवमाहंसु-ता मंडलाओ  
मंडलं संकममाणे २ सूरिए भेयघाएणं संकमइ० एगे एवमाहंसु १, एगे पुण एवमाहंसु-  
ता मंडलाओ मंडलं संकममाणे २ सूरिए कण्णकलं णिव्वेढेइ...२, तत्थ ( णं ) जे ते  
एवमाहंसु-ता मंडलाओ मंडलं संकममाणे २ सूरिए भेयघाएणं संकमइ, तेसि णं  
अयं दोसे, ता जेणंतरेणं मंडलाओ मंडलं संकममाणे २ सूरिए भेयघाएणं संकमइ  
एवइयं च णं अद्धं पुरओ ण गच्छइ, पुरओ अगच्छमाणे मंडलकालं परिहवेइ, तेसि

णं अयं दोसे, तत्थ जे ते एवमाहंसु-ता मंडलाओ मंडलं संकममाणे २ सूरिए कण्णकलं णिव्वेढेइ, तेसि णं अयं विसेसे, ता जेणंतरेणं मंडलाओ मंडलं संकममाणे २ सूरिए कण्णकलं णिव्वेढेइ एवइयं च णं अइं पुरओ गच्छइ, पुरओ गच्छमाणे मंडलकालं ण परिह्वेइ, तेसि णं अयं विसेसे, तत्थ जे ते एवमाहंसु-ता मंडलाओ मंडलं संकममाणे २ सूरिए कण्णकलं णिव्वेढेइ, एएणं णएणं णेयव्वं, णो चेव णं इयरेणं ॥ २० ॥ विइयस्स पाहुडस्स विइयं पाहुडपाहुडं समत्तं ॥ २-२ ॥

ता केवइयं ते खेतं सूरिए एगमेगेणं मुहुत्तेणं गच्छइ आहिताति वएज्जा ? तत्थ खलु इमाओ चत्तारि पडिवत्तीओ पण्णत्ताओ, तं०-तत्थ एगे एवमाहंसु-ता छ छ जोयणसहस्साइं सूरिए एगमेगेणं मुहुत्तेणं गच्छइ० एगे एवमाहंसु १, एगे पुण एवमाहंसु-ता पंच पंच जोयणसहस्साइं सूरिए एगमेगेणं मुहुत्तेणं गच्छइ० एगे एवमाहंसु २, एगे पुण एवमाहंसु-ता चत्तारि २ जोयणसहस्साइं सूरिए एगमेगेणं मुहुत्तेणं गच्छइ० एगे एवमाहंसु ३, एगे पुण एवमाहंसु-ता छवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छइ० एगे एवमाहंसु ४, तत्थ खलु जे ते एवमाहंसु-ता छ छ जोयणसहस्साइं सूरिए एगमेगेणं मुहुत्तेणं गच्छइ, ते एवमाहंसु-ता जया णं सूरिए सव्वब्भंतरे मंडलं उवसंकमिता चारं चरइ तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, तंसि च णं दिवसंसि एगं जोयणसयसहस्सं अट्ट य जोयणसहस्साइं तावक्खेत्ते पण्णत्ते, ता जया णं सूरिए सव्वबाहिरं मंडलं उवसंकमिता चारं चरइ तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहणए दुवालसमुहुत्ते दिवसे भवइ, तंसि च णं दिवसंसि बावत्तरिं जोयणसहस्साइं तावक्खेत्ते पण्णत्ते, तथा णं छ छ जोयणसहस्साइं सूरिए एगमेगेणं मुहुत्तेणं गच्छइ, तत्थ जे ते एवमाहंसु-ता पंच पंच जोयणसहस्साइं सूरिए एगमेगेणं मुहुत्तेणं गच्छइ, ते एवमाहंसु-ता जया णं सूरिए सव्वब्भंतरे मंडलं उवसंकमिता चारं चरइ, तहेव दिवसराइप्पमाणं, तंसि च णं दिवसंसि तावक्खेत्तं णउइजोयणसहस्साइं, ता जया णं सूरिए सव्वबाहिरं मंडलं उवसंकमिता चारं चरइ तथा णं तं चेव राइंदियप्पमाणं, तंसि च णं दिवसंसि सट्ठिं जोयणसहस्साइं तावक्खेत्ते पण्णत्ते, तथा णं पंच पंच जोयणसहस्साइं सूरिए एगमेगेणं मुहुत्तेणं गच्छइ, तत्थ जे ते एवमाहंसु-ता चत्तारि २ जोयणसहस्साइं सूरिए एगमेगेणं मुहुत्तेणं गच्छइ, ते एवमाहंसु-ता जया णं सूरिए सव्वब्भंतरे मंडलं उवसंकमिता चारं चरइ तथा णं दिवसराई तहेव, तंसि च णं दिवसंसि बावत्तरिं

जोयणसहस्साइं तावक्खेत्ते पण्णत्ते, ता जया णं सूरिए सव्ववाहिरं मंडलं उवसंकमिता चारं चरइ तथा णं राईदियं तहेव, तंसि च णं दिवसंसि अडयालीसं जोयणसहस्साइं तावक्खेत्ते पण्णत्ते, तथा णं चत्तारि २ जोयणसहस्साइं सूरिए एगमेगेणं मुहुत्तेणं गच्छइ, तत्थ जे ते एवमाहंसु-ता छवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छइ, ते एवमाहंसु-ता सूरिए णं उग्गमणमुहुत्तंसि य अत्थमणमुहुत्तंसि य सिग्गवगई भवइ, तथा णं छ छ जोयणसहस्साइं एगमेगेणं मुहुत्तेणं गच्छइ, मज्झिमतावक्खेत्तं समासाएमाणे २ सूरिए मज्झिमगई भवइ, तथा णं पंच पंच जोयणसहस्साइं एगमेगेणं मुहुत्तेणं गच्छइ, मज्झिम २ तावक्खेत्तं संपत्ते सूरिए मंदगई भवइ, तथा णं चत्तारि जोयणसहस्साइं एगमेगेणं मुहुत्तेणं गच्छइ, तत्थ को हेऊ०ति वएज्जा ? ता अयण्णं जंबुद्दीवे २ जाव परिक्खेवेणं०, ता जया णं सूरिए सव्ववभंतं मंडलं उवसंकमिता चारं चरइ तथा णं दिवसराइं तहेव, तंसि च णं दिवसंसि एक्काणउइं जोयणसहस्साइं तावक्खेत्ते पण्णत्ते, ता जया णं सूरिए सव्ववाहिरं मंडलं उवसंकमिता चारं चरइ तथा णं राईदियं तहेव, तंसि च णं दिवसंसि एगट्ठिजोयणसहस्साइं तावक्खेत्ते पण्णत्ते, तथा णं छवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छइ एगे एवमाहंसु । वयं पुण एवं वयामो-ता साइरेगाइं पंच पंच जोयणसहस्साइं सूरिए एगमेगेणं मुहुत्तेणं गच्छइ०, तत्थ को हेऊ०ति वएज्जा ? ता अयण्णं जंबुद्दीवे २ परिक्खेवेणं०, ता जया णं सूरिए सव्ववभंतं मंडलं उवसंकमिता चारं चरइ तथा णं पंच २ जोयणसहस्साइं दोण्णि य एक्कावण्णे जोयणसए एगूणतीसं च सट्ठिभागे जोयणस्स एगमेगेणं मुहुत्तेणं गच्छइ, तथा णं इहगयस्स मणूस्सस्स सीयालीसाए जोयणसहस्सेहिं दोहि य तेवट्ठेहिं जोयणसएहिं एक्कवीसाए य सट्ठिभागेहिं जोयणस्स सूरिए चक्खुप्फासं हव्वमागच्छइ, तथा णं दिवसे राई तहेव, से णिकखममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतं मंडलं उवसंकमिता चारं चरइ, ता जया णं सूरिए अब्भितराणंतं मंडलं उवसंकमिता चारं चरइ तथा णं पंच पंच जोयणसहस्साइं दोण्णि य एक्कावण्णे जोयणसए सीयालीसं च सट्ठिभागे जोयणस्स एगमेगेणं मुहुत्तेणं गच्छइ, तथा णं इहगयस्स मणूस्सस्स सीयालीसाए जोयणसहस्सेहिं अउणासीए य जोयणसए सत्तावण्णाए सट्ठिभागेहिं जोयणस्स सट्ठिभागं च एगट्ठिहा छेत्ता अउणावीसाए चुण्णिगयाभागेहिं सूरिए चक्खुप्फासं हव्वमागच्छइ, तथा णं दिवसराइं तहेव, से णिकखममाणे सूरिए दोच्चंसि अहोरत्तंसि अब्भितरतच्चं मंडलं उवसंकमिता चारं चरइ, ता जया णं सूरिए अब्भितरतच्चं मंडलं उवसंकमिता चारं चरइ तथा णं

पंच २ जोयणसहस्साइं दोणिण य बावण्णे जोयणसए पंच य सट्ठिभागे जोयणस्स एगमेगेणं मुहुत्तेणं गच्छइ, तथा णं इहगयस्स मणूसस्स सीयालीसाए जोयणसहस्सेहिं छण्णउईए य जोयणेहिं तेत्तीसाए य सट्ठिभागेहिं जोयणस्स सट्ठिभागं च एगट्ठिहा छेत्ता दोहिं चुणिण्याभागेहिं सूरिए चक्खुप्फासं हव्वमागच्छइ, तथा णं दिवसराइं तहेव, एवं खलु एएणं उवाएणं णिक्खममाणे सूरिए तयाणंतराओ तयाणंतरं मंडलाओ मंडलं संकममाणे २ अट्टारस २ सट्ठिभागे जोयणस्स एगमेगे मंडले मुहुत्तगइं अमिबुद्धेमाणे २ चुलसीईं साइरेगाइं जोयणाइं पुरिसच्छायं णिवुद्धेमाणे २ सव्वबाहिरं मंडलं उवसंकमिता चारं चरइ, ता जया णं सूरिए सव्वबाहिरमंडलं उवसंकमिता चारं चरइ तथा णं पंच २ जोयणसहस्साइं तिणिण य पंचुत्तरे जोयणसए पण्णरस य सट्ठिभागे जोयणस्स एगमेगेणं मुहुत्तेणं गच्छइ, तथा णं इहगयस्स मणूसस्स एकतीसाए जोयणसहस्सेहिं अट्ठहिं एकतीसेहिं जोयणसएहिं तीसाए य सट्ठिभागेहिं जोयणस्स सूरिए चक्खुप्फासं हव्वमागच्छइ, तथा णं उत्तमकट्ठपत्ता उक्कोसिया अट्टारसमुहुत्ता राईं भवइ, जहण्णाए दुवालसमुहुत्ते दिवसे भवइ, एस णं पढमे छम्मासे, एस णं पढमस्स छम्मासस्स पज्जवसाणे । से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिता चारं चरइ, ता जया णं सूरिए बाहिराणंतरं मंडलं उवसंकमिता चारं चरइ तथा णं पंच २ जोयणसहस्साइं तिणिण य चउरुत्तरे जोयणसए सत्तावण्णं च सट्ठिभाए जोयणस्स एगमेगेणं मुहुत्तेणं गच्छइ, तथा णं इहगयस्स मणूसस्स एकतीसाए जोयणसहस्सेहिं णवहि य सोलेहिं जोयणसएहिं एगूणयालीसाए सट्ठिभागेहिं जोयणस्स सट्ठिभागं च एगट्ठिहा छेत्ता सट्ठिए चुणिण्याभागे सूरिए चक्खुप्फासं हव्वमागच्छइ, तथा णं राईदियं तहेव, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं चरइ, ता जया णं सूरिए बाहिरतच्चं मंडलं उवसंकमिता चारं चरइ तथा णं पंच पंच जोयणसहस्साइं तिणिण य चउत्तरे जोयणसए ऊयालीसं च सट्ठिभागे जोयणस्स एगमेगेणं मुहुत्तेणं गच्छइ, तथा णं इहगयस्स मणूसस्स एगादिगेहिं बत्तीसाए जोयणसहस्सेहिं एकावण्णाए य सट्ठिभागेहिं जोयणस्स सट्ठिभागं च एगट्ठिहा छेत्ता तेवीसाए चुणिण्याभागेहिं सूरिए चक्खुप्फासं हव्वमागच्छइ, राईदियं तहेव, एवं खलु एएणुवाएणं पविसमाणे सूरिए तयाणंतराओ तयाणंतरं मंडलाओ मंडलं संकममाणे २ अट्टारस २ सट्ठिभागे जोयणस्स एगमेगे मंडले मुहुत्तगइं णिवुद्धेमाणे २ साइरेगाइं पंचासीईं २ जोयणाइं पुरिसच्छायं अमिबुद्धेमाणे २ सव्वब्भंतरं मंडलं उवसंकमिता चारं चरइ, ता जया णं सूरिए सव्वब्भंतरं मंडलं उवसंकमिता चारं चरइ तथा णं

पंच २ जोयणसहस्साई दोण्णि य एक्कावण्णे जोयणसए अट्टतीसं च सट्ठिभागे जोय-  
णस्स एगमेगेणं सुहुत्तेणं गच्छइ तया णं इहगयस्स मणूसस्स सीयालीसाए जोयणसह-  
स्सेहिं दोहि य दोवट्ठेहिं जोयणसएहिं एकवीसाए य सट्ठिभागेहिं जोयणस्स सूरिए  
चक्खुप्फासं हव्वमागच्छइ, तया णं उत्तमकट्ठपत्ते उक्कोसए अट्टारसमुहुत्ते दिवसे भवइ,  
जहण्णि या दुवालसमुहुत्ता राई भवइ, एस णं दोचे छम्मासे, एस णं दोचस्स छम्मा-  
सस्स पजवसाणे, एस णं आइचे संवच्छरे, एस णं आइचस्स संवच्छरस्स पजव-  
साणे ॥ २१ ॥ **विइयस्स पाहुडस्स तइयं पाहुडपाहुडं समत्तं ॥ २-३ ॥**  
**विइयं पाहुडं समत्तं ॥ २ ॥**

ता केवइयं खेतं चंदिमसूरिया ओभासंति उज्जोवेंति तवेंति पगासंति आहिताति  
वएजा ? तत्थ खल्ल इमाओ बारस पडिवत्तीओ पण्णत्ताओ, तं०-तत्थेगे एवमाहंसु-  
ता एगं दीवं एगं समुद्दं चंदिमसूरिया ओभासंति उज्जोवेंति तवेंति पगासंति...१,  
एगे पुण एवमाहंसु-ता तिण्णि दीवे तिण्णि समुद्दे चंदिमसूरिया ओभासंति...एगे  
एवमाहंसु २, एगे पुण एवमाहंसु-ता अद्धचउत्थे दीवसमुद्दे चंदिमसूरिया ओभा-  
संति...एगे एवमाहंसु ३, एगे पुण एवमाहंसु-ता सत्त दीवे सत्त समुद्दे चंदिमसू-  
रिया ओभासंति...एगे एवमाहंसु ४, एगे पुण एवमाहंसु-ता दस दीवे दस समुद्दे  
चंदिमसूरिया ओभासंति...एगे एवमाहंसु ५, एगे पुण एवमाहंसु-ता बारस दीवे  
बारस समुद्दे चंदिमसूरिया ओभासंति...६, एगे पुण एवमाहंसु-ता बायालीसं दीवे  
बायालीसं समुद्दे चंदिमसूरिया ओभासंति...एगे एवमाहंसु ७, एगे पुण एवमाहंसु-  
ता बावत्तरिं दीवे बावत्तरिं समुद्दे चंदिमसूरिया ओभासंति...एगे एवमाहंसु ८, एगे  
पुण एवमाहंसु-ता बायालीसं दीवसयं बायालीसं समुद्दसयं चंदिमसूरिया ओभासंति  
...एगे एवमाहंसु ९, एगे पुण एवमाहंसु-ता बावत्तरिं दीवसयं बावत्तरिं समुद्दसयं  
चंदिमसूरिया ओभासंति...एगे एवमाहंसु १०, एगे पुण एवमाहंसु-ता बायालीसं  
दीवसहस्सं बायालं समुद्दसहस्सं चंदिमसूरिया ओभासंति...एगे एवमाहंसु ११, एगे  
पुण एवमाहंसु-ता बावत्तरिं दीवसहस्सं बावत्तरिं समुद्दसहस्सं चंदिमसूरिया ओभा-  
संति...एगे एवमाहंसु १२, कथं पुण एवं वयामो-ता अयण्णं जंबुद्दीवे २ सव्वदी-  
वसमुद्दाणं जाव परिक्खेवेणं पण्णत्ते, से णं एगाए जगईए सव्वओ समंता संपरि-  
क्खत्ते, सा णं जगई तहेव जहा **जंबुदीवपण्णत्तीए** जाव एवामेव सपुव्वावरेणं  
जंबुद्दीवे २ चोइससलिलासयसहस्सा छप्पण्णं च सलिलासहस्सा भवंतीति मक्खाया,  
जंबुद्दीवे णं दीवे पंचचक्रभागसंठिए आहिएति वएजा, ता क्हं जंबुद्दीवे २ पंचचक्र-  
भागसंठिए आहिएति वएजा ? ता जया णं एए दुवे सूरिया सव्वब्भंतरं मंडलं

उवसंकमिता चारं चरंति तथा णं जंबुद्दीवस्स २ तिण्णि पंचचक्रभागे ओभासंति... , तंजहा-एगेवि एगं दिवहं पंचचक्रभागं ओभासइ... , एगेवि एगं दिवहं पंचचक्रभागं ओभासेइ... , तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहण्णि या दुवालसमुहुत्ता राई भवइ, ता जया णं एए दुवे सूरिया सव्ववाहिरं मंडलं उवसंकमिता चारं चरंति तथा णं जंबुद्दीवस्स २ दोण्णि चक्रभागे ओभासंति... ता एगेवि सूरिए एगं पंचचक्रवालभागं ओभासइ उज्जोवेइ तवेइ पभासेइ, एगेवि एगं पंचचक्रवालभागं ओभासइ... , तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहण्णे ए दुवालसमुहुत्ते दिवसे भवइ ॥ २२ ॥ तइयं पाहुडं समत्तं ॥ ३ ॥

ता क्हं ते सेयाए संठिई आहिताति वएज्जा ? तत्थ खलु इमा दुविहा संठिई पण्णत्ता, तंजहा-चंदिमसूरियसंठिई य तावक्खेतसंठिई य, ता क्हं ते चंदिमसूरियसंठिई आहिताति वएज्जा ? तत्थ खलु इमाओ सोलस पडिवत्तीओ पण्णत्ताओ, तं०-तत्थेगे एवमाहंसु-ता समचउरंससंठिया णं चंदिमसूरियसंठिई० एगे एवमाहंसु १, एगे पुण एवमाहंसु-ता विसमचउरंससंठिया णं चंदिमसूरियसंठिई पण्णत्ता० २, एवं एएणं अभिलावेणं समचउक्कोणसंठिया ३, विसमचउक्कोणसंठिया ४, समचक्रवालसंठिया ५, विसमचक्रवालसंठिया ६, ...ता चक्रद्वचक्रवालसंठिया...पण्णत्ता एगे एवमाहंसु ७, एगे पुण एवमाहंसु-ता छत्तागारसंठिया णं चंदिमसूरियसंठिई पण्णत्ता० ८, एवं गेहसंठिया ९, गेहावणसंठिया १०, पासायसंठिया ११, गोपुरसंठिया १२, पेच्छाघरसंठिया १३, वलभीसंठिया १४, हम्मियतलसंठिया १५, एगे पुण एवमाहंसु-ता वाल्गगपोइयासंठिया णं चंदिमसूरियसंठिई पण्णत्ता० १६, तत्थ जे ते एवमाहंसु-ता समचउरंससंठिया णं चंदिमसूरियसंठिई पण्णत्ता०, एवं एएणं एएणं गेयव्वं णो चेव णं इयरेहिं । ता क्हं ते तावक्खेतसंठिई आहिताति वएज्जा ? तत्थ खलु इमाओ सोलस पडिवत्तीओ पण्णत्ताओ, तं०-तत्थ णं एगे एवमाहंसु-ता गेहसंठिया णं तावक्खेतसंठिई पण्णत्ता एवं जाव वाल्गगपोइयासंठिया णं तावक्खेतसंठिई०, एगे पुण एवमाहंसु-ता जस्संठिए णं जंबुद्दीवे २ तस्संठिया णं तावक्खेतसंठिई पण्णत्ता एगे एवमाहंसु ९, एगे पुण एवमाहंसु-ता जस्संठिए णं भारहे वासे तस्संठिया० पण्णत्ता० १०, एवं उज्जाणसंठिया निज्जाणसंठिया एगओ णिसहसंठिया दुहुओ णिसहसंठिया सेयणगसंठिया० एगे एवमाहंसु १५, एगे पुण एवमाहंसु-ता सेणगपट्टसंठिया णं तावक्खेतसंठिई पण्णत्ता एगे एवमाहंसु १६, वयं पुण एवं वयामो-ता उट्ठीमुहकलंबुयापुप्फसंठिया णं तावक्खेतसंठिई पण्णत्ता, अंतो संकुडा बाहिं वित्थडा अंतो वट्ठा बाहिं पिहुला अंतो अंकमुहसंठिया बाहिं सत्थिमुहसंठिया, उभओ पासेणं

तीसे दुवे बाहाओ अवट्टियाओ भवन्ति पणयालीसं २ जोयणसहस्साइं आयामेणं, तीसे दुवे बाहाओ अणवट्टियाओ भवन्ति, तंजहा-सव्वब्भन्तरिया चेव बाहा सव्व-बाहिरिया चेव बाहा, तत्थ को हेऊ०ति वएज्जा ? ता अयण्णं जंबुद्वीवे २ जाव परिकखेवेणं०, ता जया णं सूरिए सव्वब्भन्तरं मंडलं उवसंक्रमिता चारं चरइ तथा णं उट्ठीमुहकलंबुयापुप्फसंठिया णं तावक्खेतसंठिई आहिताति वएज्जा, अंतो संकुडा बाहिं वित्थडा अंतो वट्ठा बाहिं पिहुला अंतो अंकमुहसंठिया बाहिं सत्थिमुहसंठिया, दुहओ पासेणं तीसे तहेव जाव सव्वबाहिरिया चेव बाहा, तीसे णं सव्वब्भन्तरिया बाहा मंदरपव्वयंतेणं णव जोयणसहस्साइं चत्तारि य छलसीए जोयणसए णव य दसभागे जोयणस्स परिकखेवेणं आहिताति वएज्जा, तासे णं परिकखेवविसेसे कओ आहिएति वएज्जा ? ता जे णं मंदरस्स पव्वयस्स परिकखेवे तं परिकखेवं तिहिं गुणिता दसहिं छेत्ता दसहिं भागे हीरमाणे एस णं परिकखेवविसेसे आहिएति वएज्जा, तीसे णं सव्वबाहिरिया बाहा लवणसमुद्दंतेणं चउणउइं जोयणसहस्साइं अट्ठ य अट्ठसट्ठे जोयणसए चत्तारि य दसभागे जोयणस्स परिकखेवेणं आहिताति वएज्जा, तासे णं परिकखेवविसेसे कओ आहिएति वएज्जा ? ता जे णं जंबुद्वीवस्स २ परिकखेवे...तिहिं गुणिता दसहिं छेत्ता दसहिं भागे हीरमाणे एस णं परिकखेवविसेसे आहिएति वएज्जा, तीसे णं तावक्खेते केवइयं आयामेणं आहिएति वएज्जा ? ता अट्ठत्तरिं जोयणसहस्साइं तिणिण य तेत्तीसे जोयणसए जोयणतिभागे य आयामेणं आहिएति वएज्जा, तथा णं किंसंठिया अंधयारसंठिई आहिताति वएज्जा ? ता उट्ठीमुहकलंबुयापुप्फसंठिया तहेव जाव बाहिरिया चेव बाहा, तीसे णं सव्वब्भन्तरिया बाहा मंदरपव्वयंतेणं छज्जोयणसहस्साइं तिणिण य चउवीसे जोयणसए छच्च दसभागे जोयणस्स परिकखे-वेणं आहिताति वएज्जा, तीसे णं परिकखेवविसेसे कओ आहिएति वएज्जा ? ता जे णं मंदरस्स पव्वयस्स परिकखेवे तं परिकखेवं दोहिं गुणिता सेसं तहेव, तीसे णं सव्वबाहिरिया बाहा लवणसमुद्दंतेणं तेवट्ठिजोयणसहस्साइं दोणिण य पणयाले जोयणसए छच्च दसभागे जोयणस्स परिकखेवेणं आहिताति वएज्जा, तासे णं परि-क्खेवविसेसे कओ आहिएति वएज्जा ? ता जे णं जंबुद्वीवस्स २ परिकखेवे तं परि-क्खेवं दोहिं गुणिता दसहिं छेत्ता दसहिं भागे हीरमाणे एस णं परिकखेवविसेसे आहि-एति वएज्जा, ता से णं अंधयारे केवइयं आयामेणं आहिएति वएज्जा ? ता अट्ठत्तरिं जोयणसहस्साइं तिणिण य तेत्तीसे जोयणसए जोयणतिभागं च आयामेणं आहिएति वएज्जा, तथा णं उतमकट्ठपत्ते अट्ठारसमुहुते दिवसे भवइ, जहणिया दुवाल्समुहुता राई भवइ, ता जया णं सूरिए सव्वबाहिरं मंडलं उवसंक्रमिता चारं चरइ तथा णं



किंसंठिया तावक्खेतसंठिई आहिताति वएजा ? ता उद्धीमुहकलंबुयापुप्फसंठिया तावक्खेतसंठिई आहिताति वएजा, एवं जं अब्भितरमंडले अंधयारसंठिईए पमाणं तं बाहिरमंडले तावक्खेतसंठिईए जं तहिं तावक्खेतसंठिईए तं बाहिरमंडले अंधयारसंठिईए भाणियव्वं जाव तया णं उत्तमकट्टपत्ता उक्कोसिया अट्टारसमुहुत्ता राई भवइ, जहण्णए दुवाल्समुहुत्ते दिवसे भवइ, ता जंबुदीवे २ सूरिया केवइयं खेतं उड्ढं तवंति केवइयं खेतं अहे तवंति केवइयं खेतं तिरियं तवंति ? ता जंबुदीवे णं दीवे सूरिया एगं जोयणसयं उड्ढं तवंति अट्टारस जोयणसयाइं अहे तवंति सीयालीसं जोयणसहस्साइं दुण्णि य तेवट्ठे जोयणसए एगवीसं च सट्ठिभागे जोयणस्स तिरियं तवंति ॥ २३ ॥ **चउत्थं पाहुडं समत्तं ॥ ४ ॥**

ता कस्सि णं सूरियस्स लेस्सा पडिहया आहिताति वएजा ? तत्थ खलु इमाओ वीसं पडिवत्तीओ पण्णत्ताओ, तं०-तत्थेगे एवमाहंसु-ता मंदरंसि णं पव्वयंसि सूरियस्स लेस्सा पडिहया आहिताति वएजा एगे एवमाहंसु १, एगे पुण एवमाहंसु-ता मेरंसि णं पव्वयंसि सूरियस्स लेस्सा पडिहया आहिताति वएजा एगे एवमाहंसु २, एवं एएणं अभिलावेणं भाणियव्वं-ता मणोरमंसि णं पव्वयंसि, ता सुदंसणंसि णं पव्वयंसि, ता सयंपमंसि णं पव्वयंसि, ता गिरिरायंसि णं पव्वयंसि, ता रयणुच्चयंसि णं पव्वयंसि, ता सिलुच्चयंसि णं पव्वयंसि, ता लोयमज्झंसि णं पव्वयंसि, ता लोयणाभिंसि णं पव्वयंसि, ता अच्छंसि णं पव्वयंसि, ता सूरियावत्तंसि णं पव्वयंसि, ता सूरियावरणंसि णं पव्वयंसि, ता उत्तमंसि णं पव्वयंसि, ता दिसाइंसि णं पव्वयंसि, ता अवयंसंसि णं पव्वयंसि, ता धरणिखीलंसि णं पव्वयंसि, ता धरणिसिगंसि णं पव्वयंसि, ता पव्वइंदंसि णं पव्वयंसि, ता पव्वयरायंसि णं पव्वयंसि सूरियस्स लेस्सा पडिहया आहिताति वएजा, एगे एवमाहंसु २० । वयं पुण एवं वयामो-ता मंदरेवि पवुच्चइ जाव पव्वयराया० पवुच्चइ, ता जे णं पुग्गला सूरियस्स लेस्सं फुसंति ते णं पुग्गला सूरियस्स लेस्सं पडिहणंति, अदिट्ठावि णं पोग्गला सूरियस्स लेस्सं पडिहणंति, चरिमलेस्संतरगयावि णं पोग्गला सूरियस्स लेस्सं पडिहणंति० ॥ २४ ॥

**पंचमं पाहुडं समत्तं ॥ ५ ॥**

ता कहं ते ओयसंठिई आहिताति वएजा ? तत्थ खलु इमाओ पणवीसं पडिवत्तीओ पण्णत्ताओ, तं०-तत्थेगे एवमाहंसु-ता अणुसमयमेव सूरियस्स ओया अण्णा उप्पजइ अण्णा अवेइ एगे एवमाहंसु १, एगे पुण एवमाहंसु-ता अणुमुहुत्तमेव सूरियस्स ओया अण्णा उप्पजइ अण्णा अवेइ० २, एवं एएणं अभिलावेणं णेयव्वा-ता अणुराइंदियमेव, ता अणुपक्खमेव, ता अणुमासमेव, ता अणुउडुमेव, ता अणु-

अयणमेव, ता अणुसंवच्छरमेव, ता अणुजुगमेव, ता अणुवाससयमेव, ता अणुवास-  
 सहस्समेव, ता अणुवाससयसहस्समेव, ता अणुपुव्वमेव, ता अणुपुव्वसयमेव, ता  
 अणुपुव्वसहस्समेव, ता अणुपुव्वसयसहस्समेव, ता अणुपलिओवममेव, ता अणुपलि-  
 ओवमसयमेव, ता अणुपलिओवमसहस्समेव, ता अणुपलिओवमसयसहस्समेव, ता  
 अणुसागरोवममेव, ता अणुसागरोवमसयमेव, ता अणुसागरोवमसहस्समेव, ता  
 अणुसागरोवमसयसहस्समेव, एगे पुण एवमाहंसु-ता अणुउरस्सप्पिणिओसप्पिणिमेव  
 सूरियस्स ओया अण्णा उप्पज्जइ अण्णा अवेइ, एगे एवमाहंसु २५। वयं पुण एवं  
 वयामो-ता तीसं २ मुहुत्ते सूरियस्स ओया अवट्ठिया भवइ, तेण परं सूरियस्स ओया  
 अणवट्ठिया भवइ, छम्मासे सूरिए ओयं णिवुट्ठेइ छम्मासे सूरिए ओयं अभिवट्ठेइ,  
 णिक्खममाणे सूरिए देसं णिवुट्ठेइ पविसमाणे सूरिए देसं अभिवुट्ठेइ, तत्थ को हेऊ०ति  
 वएज्जा ? ता अयणं जंबुद्वीवे २ सव्वदीवसमु० जाव परिकखेवेणं०, ता जया णं  
 सूरिए सव्वब्भंतरं मंडलं उवसंकमिता चारं चरइ तथा णं उत्तमकट्टपत्ते उक्कोसए  
 अट्टारसमुहुत्ते दिवसे भवइ, जहणिया दुवालसमुहुत्ता राई भवइ, से णिक्खममाणे  
 सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिता  
 चारं चरइ, ता जया णं सूरिए अब्भितराणंतरं मंडलं उवसंकमिता चारं चरइ तथा णं  
 एगेणं राईदिएणं एगं भागं ओयाए दिवसखेत्तस्स णिवुट्ठिता रयणिखेत्तस्स अभि-  
 वट्ठिता चारं चरइ मंडलं अट्टारसहिं तीसेहिं सएहिं छेत्ता, तथा णं अट्टारसमुहुत्ते  
 दिवसे भवइ दोहिं एगट्ठिभागमुहुत्तेहिं ऊणे, दुवालसमुहुत्ता राई भवइ दोहिं  
 एगट्ठिभागमुहुत्तेहिं अहिया, से णिक्खममाणे सूरिए दोच्चंसि अहोरत्तंसि अब्भितरतच्चं  
 मंडलं उवसंकमिता चारं चरइ, ता जया णं सूरिए अब्भितरतच्चं मंडलं उवसंकमिता  
 चारं चरइ तथा णं दोहिं राईदिएहिं दो भागे ओयाए दिवसखेत्तस्स णिवुट्ठिता  
 रयणिखेत्तस्स अभिवट्ठेत्ता चारं चरइ मंडलं अट्टारसतीसेहिं सएहिं छेत्ता, तथा णं  
 अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे, दुवालसमुहुत्ता राई  
 भवइ चउहिं एगट्ठिभागमुहुत्तेहिं अहिया, एवं खलु एएणुवाएणं णिक्खममाणे  
 सूरिए तयाणंतराओ तयाणंतरं मंडलाओ मंडलं संकममाणे २ एगमेगे मंडले एग-  
 मेगेणं राईदिएणं एगमेगं भागं ओयाए दिवसखेत्तस्स णिवुट्ठेमाणे २ रयणिखे-  
 त्तस्स अभिवट्ठेमाणे २ सव्वबाहिरं मंडलं उवसंकमिता चारं चरइ, ता जया णं  
 सूरिए सव्वब्भंतराओ मंडलाओ सव्वबाहिरं मंडलं उवसंकमिता चारं चरइ तथा  
 णं सव्वब्भंतरं मंडलं पणिहाय एगेणं तेसीएणं राईदियसएणं एगं तेसीयं भागसयं  
 ओयाए दिवसखेत्तस्स णिवुट्ठेत्ता रयणिखेत्तस्स अभिवुट्ठेत्ता चारं चरइ मंडलं अट्टा-

रसहिं तीसेहिं० छेत्ता, तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहण्णए दुवालसमुहुत्ते दिवसे भवइ, एस णं पढमछम्मासे, एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरे मंडलं उवसंकमिता चारं चरइ, ता जया णं सूरिए बाहिराणंतरे मंडलं उवसंकमिता चारं चरइ तथा णं एगेणं राइंदिएणं एगं भागं ओयाए रयणिक्खेत्तस्स णिवुड्डेत्ता दिवसखेत्तस्स अभिवड्डेत्ता चारं चरइ मंडलं अट्टारसहिं तीसेहिं० छेत्ता, तथा णं अट्टारसमुहुत्ता राई भवइ दोहिं एगट्ठिभागमुहुत्तेहिं ऊणा, दुवालसमुहुत्ते दिवसे भवइ दोहिं एगट्ठिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं चरइ, ता जया णं सूरिए बाहिरतच्चं मंडलं उवसंकमिता चारं चरइ तथा णं दोहिं राइंदिएहिं दो भाए ओयाए रयणिक्खेत्तस्स णिवुड्डेत्ता दिवसखेत्तस्स अभिवड्डेत्ता चारं चरइ मंडलं अट्टारसहिं तीसेहिं० छेत्ता, तथा णं अट्टारसमुहुत्ता राई भवइ चउहिं एगट्ठिभागमुहुत्तेहिं ऊणा, दुवालसमुहुत्ते दिवसे भवइ चउहिं एगट्ठिभागमुहुत्तेहिं अहिए, एवं खलु एएणुवाएणं पविसमाणे सूरिए तयाणंतराओ तयाणंतरं मंडलाओ मंडलं संकममाणे २ एगमेगेणं राइंदिएणं एगमेगं भागं ओयाए रयणिक्खेत्तस्स णिवुड्डेमाणे २ दिवसखेत्तस्स अभिवड्डेमाणे २ सव्वब्भंतरे मंडलं उवसंकमिता चारं चरइ, ता जया णं सूरिए सव्वबाहिराओ मंडलाओ सव्वब्भंतरे मंडलं उवसंकमिता चारं चरइ तथा णं सव्वबाहिरं मंडलं पणिहाय एगेणं तेसीएणं राइंदियसएणं एगं तेसीयं भागसयं ओयाए रयणिक्खेत्तस्स णिवुड्डेत्ता दिवसखेत्तस्स अभिवड्डेत्ता चारं चरइ मंडलं अट्टारसतीसेहिं सएहिं छेत्ता, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहण्णिया दुवालसमुहुत्ता राई भवइ, एस णं दोच्चे छम्मासे, एस णं दोच्चस्स छम्मासस्स पज्जवसाणे, एस णं आइच्चे संवच्छरे, एस णं आइच्चस्स संवच्छरस्स पज्जवसाणे ॥ २५ ॥

**छट्ठं पाहुडं समत्तं ॥ ६ ॥**

ता के ते सूरियं वरंति आहिताति वएज्जा ? तत्थ खलु इमाओ वीसं पडिक्कतीओ पण्णत्ताओ, तं०-तत्थेगे एवमाहंसु-ता मंदरे णं पव्वए सूरियं वरयइ आहितेति वएज्जा एगे एवमाहंसु १, एगे पुण एवमाहंसु-ता मेरु णं पव्वए सूरियं वरइ आहितेति वएज्जा० २, एवं एएणं अभिलावेणं णेयव्वं जाव पव्वयराए णं पव्वए सूरियं वरयइ आहितेति वएज्जा एगे एवमाहंसु २०, वयं पुण एवं वयामो-ता मंदरेवि पवुच्चइ तहेव जाव पव्वयराएवि पवुच्चइ, ता जे णं पोग्गला सूरियस्स लेसं फुंसंति ते णं पोग्गला सूरियं वरयंति, अदिट्ठावि णं पोग्गला

सूर्यं वरयन्ति, चरमलेसंतरगयावि णं पोगगला सूर्यं वरयन्ति० ॥ २६ ॥ सत्तमं पाहुडं समत्तं ॥ ७ ॥

ता कहं ते उदयसंतिडि आहितेति वएज्जा ? तत्थ खलु इमाओ तिणिण पडि-  
वत्तीओ पण्णत्ताओ, तं०-तत्थेगे एवमाहंसु-ता जया णं जंबुदीवे २ दाहिणङ्गे  
अट्टारसमुहुत्ते दिवसे भवइ तथा णं उत्तरङ्गेवि अट्टारसमुहुत्ते दिवसे भवइ, जया  
णं उत्तरङ्गे अट्टारसमुहुत्ते दिवसे भवइ तथा णं दाहिणङ्गेवि अट्टारसमुहुत्ते दिवसे  
भवइ, जया णं जंबुदीवे २ दाहिणङ्गे सत्तरसमुहुत्ते दिवसे भवइ तथा णं उत्तरङ्गेवि  
सत्तरसमुहुत्ते दिवसे भवइ, जया णं उत्तरङ्गे सत्तरसमुहुत्ते दिवसे भवइ तथा णं  
दाहिणङ्गेवि सत्तरसमुहुत्ते दिवसे भवइ, एवं (एएणं अभिलावेणं) परिहावेयव्वं, सोल-  
समुहुत्ते दिवसे पण्णरसमुहुत्ते दिवसे चउद्दसमुहुत्ते दिवसे तेरसमुहुत्ते दिवसे जाव  
जया णं जंबुदीवे २ दाहिणङ्गे बारसमुहुत्ते दिवसे० तथा णं उत्तरङ्गेवि बारसमुहुत्ते  
दिवसे भवइ, जया णं उत्तरङ्गे बारसमुहुत्ते दिवसे भवइ तथा णं दाहिणङ्गेवि बारस-  
मुहुत्ते दिवसे भवइ, जया णं दाहिणङ्गे बारसमुहुत्ते दिवसे भवइ तथा णं जंबुदीवे २  
मंदरस्स पव्वयस्स पुरच्छिमपच्चत्थिमेणं सया पण्णरसमुहुत्ते दिवसे भवइ, सया  
पण्णरसमुहुत्ता राई भवइ, अवट्ठिया णं तत्थ राईदिया पण्णत्ता समणाउसो ! एगे  
एवमाहंसु १, एगे पुण एवमाहंसु-ता जया णं जंबुदीवे २ दाहिणङ्गे अट्टारसमुहुत्ता-  
णंतरे दिवसे भवइ तथा णं उत्तरङ्गेवि अट्टारसमुहुत्ताणंतरे दिवसे भवइ, जया णं  
उत्तरङ्गे अट्टारसमुहुत्ताणंतरे दिवसे भवइ तथा णं दाहिणङ्गेवि अट्टारसमुहुत्ताणंतरे  
दिवसे भवइ, एवं परिहावेयव्वं, सत्तरसमुहुत्ताणंतरे दिवसे भवइ सोलसमुहुत्ता-  
णंतरे०, पण्णरसमुहुत्ताणंतरे दिवसे भवइ चोद्दसमुहुत्ताणंतरे०, तेरसमुहुत्ता-  
णंतरे०, जया णं जंबुदीवे २ दाहिणङ्गे बारसमुहुत्ताणंतरे दिवसे भवइ  
तथा णं उत्तरङ्गेवि बारसमुहुत्ताणंतरे दिवसे०, जया णं उत्तरङ्गे बारस-  
मुहुत्ताणंतरे दिवसे भवइ तथा णं दाहिणङ्गेवि बारसमुहुत्ताणंतरे दिवसे भवइ, तथा णं  
जंबुदीवे २ मंदरस्स पव्वयस्स पुरत्थिमपच्चत्थिमेणं णो सया पण्णरसमुहुत्ते दिवसे  
भवइ, णो सया पण्णरसमुहुत्ता राई भवइ, अणवट्ठिया णं तत्थ राईदिया प० समणा-  
उसो ! एगे एवमाहंसु २, एगे पुण एवमाहंसु-ता जया णं जंबुदीवे २ दाहिणङ्गे  
अट्टारसमुहुत्ते दिवसे भवइ तथा णं उत्तरङ्गे दुवालसमुहुत्ता राई भवइ, जया णं उत्तरङ्गे  
अट्टारसमुहुत्ते दिवसे भवइ तथा णं दाहिणङ्गे बारसमुहुत्ता राई भवइ, जया णं दाहि-  
णङ्गे अट्टारसमुहुत्ताणंतरे दिवसे भवइ तथा णं उत्तरङ्गे बारसमुहुत्ता राई भवइ, जया  
णं उत्तरङ्गे अट्टारसमुहुत्ताणंतरे दिवसे भवइ तथा णं दाहिणङ्गे बारसमुहुत्ता राई

भवइ, एवं णेयव्वं सगलेहि य अणंतरेहि य एक्के दो दो आलावगा सव्वेहि दुवाल-  
समुहुत्ता राई भवइ जाव ता जया णं जंबुदीवे २ दाहिणङ्गे बारसमुहुत्ताणंतरे दिवसे  
भवइ तथा णं उत्तरङ्गे दुवालसमुहुत्ता राई भवइ, जया णं उत्तरङ्गे दुवासलमुहुत्ताणंतरे  
दिवसे भवइ तथा णं दाहिणङ्गे दुवालसमुहुत्ता राई भवइ, तथा णं जंबुदीवे २ मंद-  
रस्स पव्वयस्स पुरत्थिमपच्चत्थिमेणं णेवत्थि पण्णरसमुहुत्ते दिवसे भवइ, णेवत्थि  
पण्णरसमुहुत्ता राई भवइ, वोच्छिण्णा णं तत्थ राईदिया प० समणाउसो ! एगे एवमा-  
हंसु ३ । वयं पुण एवं वयामो-ता जंबुदीवे २ सुरिया उदीणपाईणमुग्गच्छंति पाईण-  
दाहिणमागच्छंति पाईणदाहिणमुग्गच्छंति दाहिणपडीणमागच्छंति दाहिणपडीणमुग्ग-  
च्छंति पडीणउदीणमागच्छंति पडीणउदीणमुग्गच्छंति उदीणपाईणमागच्छंति, ता  
जया णं जंबुदीवे २ दाहिणङ्गे दिवसे भवइ तथा णं उत्तरङ्गे० दिवसे भवइ, जया णं  
उत्तरङ्गे० तथा णं जंबुदीवे २ मंदरस्स पव्वयस्स पुरच्छिमपच्चच्छिमेणं राई भवइ,  
ता जया णं जंबुदीवे २ मंदरस्स पव्वयस्स पुरत्थिमेणं दिवसे भवइ तथा णं पच्च-  
च्छिमेणवि दिवसे भवइ, जया णं पच्चत्थिमेणं दिवसे भवइ तथा णं जंबुदीवे २ मंद-  
रस्स पव्वयस्स उत्तरदाहिणेणं राई भवइ, ता जया णं० दाहिणङ्गे उक्कोसए अट्टार-  
समुहुत्ते दिवसे भवइ तथा णं उत्तरङ्गेवि उक्कोसए अट्टारसमुहुत्ते दिवसे भवइ, जया  
णं उत्तरङ्गे० तथा णं जंबुदीवे २ मंदरस्स पव्वयस्स पुरत्थिमपच्चत्थिमेणं जहण्णिया  
दुवालसमुहुत्ता राई भवइ, ता जया णं जंबुदीवे २ मंदरस्स पव्वयस्स पुरच्छिमेणं  
उक्कोसए अट्टारसमुहुत्ते दिवसे भवइ तथा णं पच्चत्थिमेणवि उक्कोसए अट्टारसमुहुत्ते  
दिवसे भवइ, जया णं पच्चत्थिमेणं उक्कोसए अट्टारसमुहुत्ते दिवसे भवइ तथा णं  
जंबुदीवे २ मंदरस्स पव्वयस्स उत्तरदाहिणेणं जहण्णिया दुवालसमुहुत्ता राई भवइ,  
एवं एएणं गमेणं णेयव्वं, अट्टारसमुहुत्ताणंतरे दिवसे भवइ, साइरेगदुवालसमुहुत्ता  
राई भवइ, सत्तरसमुहुत्ते दिवसे तेरसमुहुत्ता राई, सत्तरसमुहुत्ताणंतरे दिवसे भवइ,  
साइरेगतेरसमुहुत्ता राई भवइ, सोलसमुहुत्ते दिवसे भवइ, चोइसमुहुत्ता राई भवइ,  
सोलसमुहुत्ताणंतरे दिवसे भवइ, साइरेगचोइसमुहुत्ता राई भवइ, पण्णरसमुहुत्ते दिवसे  
पण्णरसमुहुत्ता राई, पण्णरसमुहुत्ताणंतरे दिवसे० साइरेगपण्णरसमुहुत्ता राई भवइ,  
चउइसमुहुत्ते दिवसे सोलसमुहुत्ता राई, चोइसमुहुत्ताणंतरे दिवसे साइरेगसोलसमु-  
हुत्ता राई, तेरसमुहुत्ते दिवसे सत्तरसमुहुत्ता राई, तेरसमुहुत्ताणंतरे दिवसे साइरेग-  
सत्तरसमुहुत्ता राई, ता जया णं जंबुदीवे दीवे दाहिणङ्गे जहण्णए दुवालसमुहुत्तए  
दिवसे भवइ तथा णं उत्तरङ्गे० जहण्णए दुवालसमुहुत्ते दिवसे भवइ, ता जया णं  
उत्तरङ्गे जहण्णए दुवालसमुहुत्ते दिवसे भवइ तथा णं जंबुदीवे २ मंदरस्स पव्वयस्स

पुरत्थिमपच्चत्थिमेणं उक्कोसिया अट्टारसमुहुत्ता राई भवइ, ता जया णं जंबुद्दीवे २ मंदरस्स पव्वयस्स पुरत्थिमेणं जहण्णए दुवाल्समुहुत्ते दिवसे भवइ तथा णं पच्चत्थिमेणवि जहण्णए दुवाल्समुहुत्ते दिवसे भवइ, जया णं पच्चत्थिमेणं जहण्णए दुवाल्समुहुत्ते दिवसे भवइ तथा णं जंबुद्दीवे २ मंदरस्स० उत्तरदाहिणेणं उक्कोसिया अट्टारसमुहुत्ता राई भवइ, ता जया णं जंबुद्दीवे २ दाहिणद्धे वासाणं पढमे समए पडिवज्जइ तथा णं उत्तरद्धेवि वासाणं पढमे समए पडिवज्जइ, जया णं उत्तरद्धे वासाणं पढमे समए पडिवज्जइ तथा णं जंबुद्दीवे २ मंदरस्स पव्वयस्स पुरच्छिमपच्चत्थिमेणं अणंतरपुरक्खडकालसमयंसि वासाणं पढमे समए पडिवज्जइ, ता जया णं जंबुद्दीवे २ मंदरस्स पव्वयस्स पुरच्छिमेणं वासाणं पढमे समए पडिवज्जइ तथा णं पच्चत्थिमेणवि वासाणं पढमे समए पडिवज्जइ, जया णं पच्चत्थिमेणं वासाणं पढमे समए पडिवज्जइ तथा णं जंबुद्दीवे २ मंदरउत्तरदाहिणेणं अणंतरपच्छाकडकालसमयंसि वासाणं पढमे समए पडिवज्जइ, जहा समओ एवं आवलिया आणापाण् थोवे लवे मुहुत्ते अहोरेत्ते पक्खे मासे ऊऊ, एवं दस आलावगा जहा वासाणं एवं हेमंताणं गिम्हाणं च भाणियव्वा, ता जया णं जंबुद्दीवे २ दाहिणद्धे पढमे अयणे पडिवज्जइ तथा णं उत्तरद्धेवि पढमे अयणे पडिवज्जइ, जया णं उत्तरद्धे पढमे अयणे पडिवज्जइ तथा णं दाहिणद्धेवि पढमे अयणे पडिवज्जइ, जया णं उत्तरद्धे पढमे अयणे पडिवज्जइ तथा णं जंबुद्दीवे २ मंदरस्स पव्वयस्स पुरत्थिमपच्चत्थिमेणं अणंतरपुरक्खडकालसमयंसि पढमे अयणे पडिवज्जइ, ता जया णं जंबुद्दीवे २ मंदरस्स पव्वयस्स पुरत्थिमेणं पढमे अयणे पडिवज्जइ तथा णं पच्चत्थिमेणवि पढमे अयणे पडिवज्जइ, जया णं पच्चत्थिमेणं पढमे अयणे पडिवज्जइ तथा णं जंबुद्दीवे २ मंदरस्स पव्वयस्स उत्तरदाहिणेणं अणंतरपच्छाकडकालसमयंसि पढमे अयणे पडिवज्जइ, जहा अयणे तहा संवच्छरे जुगे वाससए, एवं वाससहस्से वाससयसहस्से पुव्वंगे पुव्वे एवं जाव सीसपहेलिया पलिओवमे सागरोवमे, ता जया णं जंबुद्दीवे २ दाहिणद्धे उस्सप्पिणी पडिवज्जइ तथा णं उत्तरद्धेवि उस्सप्पिणी पडिवज्जइ, जया णं उत्तरद्धे उस्सप्पिणी पडिवज्जइ तथा णं जंबुद्दीवे २ मंदरस्स पव्वयस्स पुरत्थिमपच्चत्थिमेणं णैवत्थि उस्सप्पिणी णेव अत्थि ओसप्पिणी अवट्ठिए णं तत्थ काले पण्णत्ते समणाउसो !० एवं ओस्सप्पिणीवि । ता जया णं लवणे समुद्दे दाहिणद्धे दिवसे भवइ तथा णं लवणसमुद्दे उत्तरद्धे० दिवसे भवइ, जया णं उत्तरद्धे दिवसे भवइ तथा णं लवणसमुद्दे पुरच्छिमपच्चत्थिमेणं राई भवइ, जहा जंबूद्दीवे २ तहेव जाव उस्सप्पिणी०, तहा धायइसंडे णं दीवे सूरिया उदीण० तहेव, ता जया णं धायइसंडे

दीवे दाहिणद्धे दिवसे भवइ तथा णं उत्तरद्धेवि दिवसे भवइ, जया णं उत्तरद्धे दिवसे भवइ तथा णं धायइसंडे दीवे मंदराणं पव्वयाणं पुरत्थिमपच्चत्थिमेणं राई भवइ, एवं जंबुदीवे २ जहा तहेव जाव उस्सप्पिणी०, कालोए णं जहा लवणे समुदे तहेव, ता अब्भंतरपुक्खरद्धे णं सूरिया उदीणपाईणमुग्गच्छ तहेव, ता जया णं अब्भंतरपुक्खरद्धे णं दाहिणद्धे दिवसे भवइ तथा णं उत्तरद्धेवि दिवसे भवइ, जया णं उत्तरद्धे दिवसे भवइ तथा णं अब्भंतरपुक्खरद्धे मंदराणं पव्वयाणं पुरत्थिमपच्चत्थिमेणं राई भवइ, सेसं जहा जंबुदीवे २ तहेव जाव उस्सप्पिणीओसप्पिणीओ ॥ २७ ॥ अट्ठमं पाहुडं समत्तं ॥ ८ ॥

ता कइक्कट्ठे ते सूरिए पोरिसिच्छायं णिव्वत्तेइ आहितेति वएज्जा ? तत्थ खलु इमाओ तिण्णि पडिव्वत्तीओ पण्णत्ताओ, तं०-तत्थेगे एवमाहंसु-ता जे णं पोगगला सूरियस्स लेसं फुसंति ते णं पोगगला संतप्पंति, ते णं पोगगला संतप्पमाणा तयणंतराई बाहिराई पोगगलाई संतावेंतीति एस णं से समिए तावक्खेत्ते एगे एवमाहंसु १, एगे पुण एवमाहंसु-ता जे णं पोगगला सूरियस्स लेसं फुसंति ते णं पोगगला णो संतप्पंति, ते णं पोगगला असंतप्पमाणा तयणंतराई बाहिराई पोगगलाई णो संतावेंतीति एस णं से समिए तावक्खेत्ते एगे एवमाहंसु २, एगे पुण एवमाहंसु-ता जे णं पोगगला सूरियस्स लेसं फुसंति ते णं पोगगला अत्थेगइया संतप्पंति अत्थेगइया णो संतप्पंति, तत्थ अत्थेगइया संतप्पमाणा तयणंतराई बाहिराई पोगगलाई संतावेंति अत्थेगइया असंतप्पमाणा तयणंतराई बाहिराई पोगगलाई णो संतावेंति, एस णं से समिए तावक्खेत्ते एगे एवमाहंसु ३ । वयं पुण एवं वयामो-ता जाओ इमाओ चंदिमसूरियाणं देवाणं विमाणेहिंतो लेसाओ बहिया [ उच्छृढा ] अभिणिसट्ठाओ पतावेंति, एयासि णं लेसाणं अंतरेसु अण्णयरीओ छिण्णलेसाओ संमुच्छंति, तए णं ताओ छिण्णलेसाओ संमुच्छियाओ समाणीओ तयणंतराई बाहिराई पोगगलाई संतावेंति इइ एस णं से समिए तावक्खेत्ते ॥ २८ ॥ ता कइक्कट्ठे ते सूरिए पोरिसिच्छायं णिव्वत्तेइ आहितेति वएज्जा ? तत्थ खलु इमाओ पणवीसं पडिव्वत्तीओ पण्णत्ताओ, तं०-तत्थेगे एवमाहंसु-ता अणुसमयमेव सूरिए पोरिसिच्छायं णिव्वत्तेइ आहितेति वएज्जा एगे एवमाहंसु १, एगे पुण एवमाहंसु-ता अणुमुहुत्तमेव सूरिए पोरिसिच्छायं णिव्वत्तेइ आहितेति वएज्जा० २, एवं एएणं अभिलावेणं णेयव्वं, ता जाओ चेव ओयसंठिईए पणवीसं पडिव्वत्तीओ ताओ चेव णेयव्वाओ जाव अणु-उस्सप्पिणी०मेव सूरिए पोरिसिच्छायं णिव्वत्तेइ आहिताति वएज्जा, एगे एवमाहंसु २५ । वयं पुण एवं वयामो-ता सूरियस्स णं उच्चत्तं च लेसं च पडुच्च छाउदेसे

उच्चत्तं च छायां च पडुच्च लेसुद्देसे लेसं च छायां च पडुच्च उच्चत्तुद्देसे, तत्थ खलु इमाओ दुवे पडिवत्तीओ पण्णत्ताओ, तं०-तत्थेगे एवमाहंसु-ता अत्थि णं से दिवसे जंसि च णं दिवसंसि सूरिए चउपोरिसिच्छायं णिव्वत्तेइ, अत्थि णं से दिवसे जंसि च णं दिवसंसि सूरिए दुपोरिसिच्छायं णिव्वत्तेइ० एगे एवमाहंसु १, एगे पुण एवमाहंसु-ता अत्थि णं से दिवसे जंसि च णं दिवसंसि सूरिए दुपोरिसिच्छायं णिव्वत्तेइ, अत्थि णं से दिवसे जंसि० दिवसंसि सूरिए णो किंचि पोरिसिच्छायं णिव्वत्तेइ० २, तत्थ जे ते एवमाहंसु-ता अत्थि णं से दिवसे जंसि च णं दिवसंसि सूरिए चउपोरिसियं छायां णिव्वत्तेइ, अत्थि णं से दिवसे जंसि च णं दिवसंसि सूरिए दोपोरिसियं छायां णिव्वत्तेइ, ते एवमाहंसु-ता जया णं सूरिए सव्वब्भंतरं मंडलं उवसंकमिता चारं चरइ तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, तंसि च णं दिवसंसि सूरिए चउपोरिसियं छायां णिव्वत्तेइ, तं०-उग्गमणमुहुत्तंसि य अत्थमणमुहुत्तंसि य, लेसं अभिवुद्धेमाणे णो चेव णं णिवुद्धेमाणे, ता जया णं सूरिए सव्वबाहिरं मंडलं उवसंकमिता चारं चरइ तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहणए दुवालसमुहुत्ते दिवसे भवइ, तंसि च णं दिवसंसि सूरिए दुपोरिसियं छायां णिव्वत्तेइ, तं०-उग्गमणमुहुत्तंसि य अत्थमणमुहुत्तंसि य, लेसं अभिवुद्धेमाणे णो चेव णं णिवुद्धेमाणे० १, तत्थ णं जे ते एवमाहंसु-ता अत्थि णं से दिवसे जंसि च णं दिवसंसि सूरिए दुपोरिसियं छायां णिव्वत्तेइ, अत्थि णं से दिवसे जंसि च णं दिवसंसि सूरिए णो किंचि पोरिसियं छायां णिव्वत्तेइ, ते एवमाहंसु-ता जया णं सूरिए सव्वब्भंतरं मंडलं उवसंकमिता चारं चरइ तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, तंसि च णं दिवसंसि सूरिए दुपोरिसियं छायां णिव्वत्तेइ, तं०-उग्गमणमुहुत्तंसि य अत्थमणमुहुत्तंसि य, लेसं अभिवुद्धेमाणे णो चेव णं णिवुद्धेमाणे०, ...ता जया णं सूरिए सव्वबाहिरं मंडलं उवसंकमिता चारं चरइ तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहणए दुवालसमुहुत्ते दिवसे भवइ, तंसि च णं दिवसंसि सूरिए णो किंचि पो-रिसिच्छायं णिव्वत्तेइ, तं०-उग्गमणमुहुत्तंसि य अत्थमणमुहुत्तंसि य, णो चेव णं लेसं अभिवुद्धेमाणे वा णिवुद्धेमाणे वा० २, ता कइकट्ठं ते सूरिए पो-रिसिच्छायं णिव्वत्तेइ आहिताति वएज्जा ? तत्थ खलु इमाओ छण्णउई पडिवत्तीओ पण्णत्ताओ, तं०-तत्थेगे एवमाहंसु-ता अत्थि णं से देसे जंसि च णं देसंसि सूरिए एगपोरिसियं छायां णिव्वत्तेइ० एगे एवमाहंसु, एगे पुण एवमाहंसु-ता अत्थि णं से देसे जंसि च णं देसंसि



सूरिए दुपोरिसियं छायं णिव्वत्तेइ०, एवं एएणं अभिलावेणं णेयव्वं जाव छण्णउइं पोरिसिच्छायं णिव्वत्तेइ, तत्थ जे ते एवमाहंसु-ता अत्थि णं से देसे जंसि च णं देसंसि सूरिए एगपोरिसियं छायं णिव्वत्तेइ, ते एवमाहंसु-ता सूरियस्स णं सव्वहेट्ठिमाओ सूरप्पडिहीओ बहिया अभिणिसट्ठाहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिज्जाओ भूमिभागाओ जावइयं सूरिए उड्डं उच्चत्तेणं एवइयाए एगाए अद्धाए एगेणं छायाणुमाणप्पमाणेणं उमाए तत्थ से सूरिए एगपोरिसियं छायं णिव्वत्तेइ, तत्थ जे ते एवमाहंसु-ता अत्थि णं से देसे जंसि च णं देसंसि सूरिए दुपोरिसियं छायं णिव्वत्तेइ, ते एवमाहंसु-ता सूरियस्स णं सव्वहेट्ठिमाओ सूरियप्पडिहीओ बहिया अभिणिसट्ठियाहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिज्जाओ भूमिभागाओ जावइयं सूरिए उड्डं उच्चत्तेणं एवइयाहिं दोहिं अद्धाहिं दोहिं छायाणुमाणप्पमाणेहिं उमाए एत्थ णं से सूरिए दुपोरिसियं छायं णिव्वत्तेइ, एवं णेयव्वं जाव तत्थ जे ते एवमाहंसु-ता अत्थि णं से देसे जंसि च णं देसंसि सूरिए छण्णउइं पोरिसियं छायं णिव्वत्तेइ, ते एवमाहंसु-ता सूरियस्स णं सव्वहेट्ठिमाओ सूरप्पडिहीओ बहिया अभिणिसट्ठाहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिज्जाओ भूमिभागाओ जावइयं सूरिए उड्डं उच्चत्तेणं एवइयाहिं छण्णवईए छायाणुमाणप्पमाणेहिं उमाए एत्थ णं से सूरिए छण्णउइं पोरिसियं छायं णिव्वत्तेइ एगे एवमाहंसु, वयं पुण एवं वयासो-ता साइरेगअउणट्ठिपोरिसीणं सूरिए पोरिसिच्छायं णिव्वत्तेइ०, ता अवड्डुपोरिसी णं छाया दिवसस्स किं गए वा सेसे वा ? ता तिभागे गए वा सेसे वा, ता पोरिसी णं छाया दिवसस्स किं गए वा सेसे वा ? ता चउब्भागे गए वा सेसे वा, ता दिवड्डुपोरिसी णं छाया दिवसस्स किं गए वा सेसे वा ? ता पंचमभागे गए वा सेसे वा, एवं अद्धपोरिसिं छोडुं पुच्छा दिवसस्स भागं छोडुं वागरणं जाव ता अद्धअउणासट्ठिपोरिसीछाया दिवसस्स किं गए वा सेसे वा ? ता एगूणवीससयभागे गए वा सेसे वा, ता अउणासट्ठिपोरिसी णं छाया दिवसस्स किं गए वा सेसे वा ? ता बावीससहस्सभागे गए वा सेसे वा, ता साइरेगअउणासट्ठिपोरिसी णं छाया दिवसस्स किं गए वा सेसे वा ? ता णत्थि किंचि गए वा सेसे वा, तत्थ खलु इमा पणवीसणिविद्धा छाया ५०, तं०-खंभच्छाया रज्जुच्छाया पागारच्छाया पासायच्छाया उवग्गच्छाया उच्चत्तच्छाया अणुलोमच्छाया आरुभिया समा पडिहया खीलच्छाया पक्खच्छाया पुरओउदया पुरिमकंठाउवगया पच्छिमकंठाउवगया छायाणुवाइणी किट्ठाणुवाइणीछाया छाया-छाया १७ गोलछाया, तत्थ णं गोलच्छाया अट्ठविहा पण्णत्ता, तंजहा-गोलच्छाया अवड्ड-

गोलच्छाया गाढलगोलच्छाया अवङ्गगाढलगोलच्छाया गोलवलच्छाया अवङ्गगोला-  
वलच्छाया गोलपुञ्जच्छाया अवङ्गगोलपुञ्जच्छाया २५ ॥ २९ ॥ **णवमं पाहुडं**  
**समत्तं ॥ ९ ॥**

ता जोगेति वत्थुस्स आवलियाणिवाए आहितेति वएज्जा, ता क्हं ते जोगेति  
वत्थुस्स आवलियाणिवाए आहितेति वएज्जा ? तत्थ खलु इमाओ पंच पडिवत्तीओ  
पण्णत्ताओ, तं०-तत्थेगे एवमाहंसु-ता सव्वेवि णं णक्खत्ता कत्तियाइया भरणिपज्जव-  
साणा प० एगे एवमाहंसु १, एगे पुण एवमाहंसु-ता सव्वेवि णं णक्खत्ता महाइया  
अस्सेसपज्जवसाणा पण्णत्ता एगे एवमाहंसु २, एगे पुण एवमाहंसु-ता सव्वेवि णं  
णक्खत्ता धणिट्ठाइया सवणपज्जवसाणा पण्णत्ता एगे एवमाहंसु ३, एगे पुण एवमाहंसु-  
ता सव्वेवि णं णक्खत्ता अस्सिणीआइया रेवइपज्जवसाणा प० एगे एवमाहंसु ४,  
एगे पुण एवमाहंसु-ता सव्वेवि णं णक्खत्ता भरणीआइया अस्सिणीपज्जवसाणा०  
एगे एवमाहंसु ५, वयं पुण एवं वयामो-ता सव्वेवि णं णक्खत्ता अभिईआइया  
उत्तरासाढापज्जवसाणा पण्णत्ता, तंजहा-अभिई सवणो जाव उत्तरासाढा ॥ ३० ॥

**दसमस्स पाहुडस्स पढमं पाहुडपाहुडं समत्तं ॥ १०-१ ॥**

ता क्हं ते मुहुत्ता आहितेति वएज्जा ? ता एएसि णं अट्ठावीसाए णक्खत्ताणं  
अत्थि णक्खत्ते जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं  
जोयं जोएइ, अत्थि णक्खत्ता जे णं पण्णरस मुहुत्ते चंदेण सद्धिं जोयं जोएंति,  
अत्थि णक्खत्ता जे णं तीसं मुहुत्ते चंदेण सद्धिं जोयं जोएंति, अत्थि णक्खत्ता जे  
णं पणयालीसे मुहुत्ते चंदेण सद्धिं जोयं जोएंति, ता एएसि णं अट्ठावीसाए णक्ख-  
त्ताणं कयरे णक्खत्ते जे णं णवमुहुत्ते सत्तावीसं च सत्तट्ठिभाए मुहुत्तस्स चंदेण  
सद्धिं जोयं जोएइ, कयरे णक्खत्ता जे णं पण्णरसमुहुत्ते चंदेण सद्धिं जोयं जोएंति,  
कयरे णक्खत्ता जे णं तीसं मुहुत्ते चंदेण सद्धिं जोयं जोएंति, कयरे णक्खत्ता जे णं  
पणयालीसं मुहुत्ते चंदेण सद्धिं जोयं जोएंति ? ता एएसि णं अट्ठावीसाए णक्खत्ताणं  
तत्थ जे से णक्खत्ते जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं  
जोयं जोएइ से णं एगे अभीई, तत्थ जे ते णक्खत्ता जे णं पण्णरसमुहुत्ते चंदेण  
सद्धिं जोयं जोएंति ते णं छ, तं०-सयभिसया भरणी अहा अस्सेसा साई जेट्ठा,  
तत्थ जे ते णक्खत्ता जे णं तीसं मुहुत्तं चंदेण सद्धिं जोयं जोएंति ते णं पण्णरस,  
तं०-सवणे धणिट्ठा पुव्वाभइवया रेवई अस्सिणी कत्तिया मिगसिरपुस्सा महा  
पुव्वाफग्गुणी हत्थो चित्ता अणुराहा मूलो पुव्वासाढा, तत्थ जे ते णक्खत्ता जे णं  
पणयालीसं मुहुत्ते चंदेण सद्धिं जोयं जोएंति ते णं छ, तंजहा-उत्तराभइवया रोहिणी

पुणव्वसू उत्तराफग्गुणी विसाहा उत्तरासाढा ॥ ३१ ॥ ता एएसि णं अट्ठावीसाए णक्खत्ताणं अत्थि णक्खत्ते जे णं चत्तारि अहोरत्ते छच्च मुहुत्ते सूरिएण सद्धिं जोयं जोएइ, अत्थि णक्खत्ता जे णं छ अहोरत्ते एकवीसं च मुहुत्ते सूरिएण सद्धिं जोयं जोएति, अत्थि णक्खत्ता जे णं तेरस अहोरत्ते बारस य मुहुत्ते सूरिएण सद्धिं जोयं जोएति, अत्थि णक्खत्ता जे णं वीसं अहोरत्ते तिण्णि य मुहुत्ते सूरिएण सद्धिं जोयं जोएति, ता एएसि णं अट्ठावीसाए णक्खत्ताणं कयरे णक्खत्ते जे णं चत्तारि अहोरत्ते छच्च मुहुत्ते सूरिएण सद्धिं जोयं जोएइ, कयरे णक्खत्ता जे णं छ अहोरत्ते एकवीस-मुहुत्ते सूरिएण सद्धिं जोयं जोएति, कयरे णक्खत्ता जे णं तेरस अहोरत्ते बारस मुहुत्ते सूरिएण सद्धिं जोयं जोएति, कयरे णक्खत्ता जे णं वीसं अहोरत्ते तिण्णि य मुहुत्ते सूरिएण सद्धिं जोयं जोएति, ता एएसि णं अट्ठावीसाए णक्खत्ताणं तत्थ जे से णक्खत्ते जे णं चत्तारि अहोरत्ते छच्च मुहुत्ते सूरिएण सद्धिं जोयं जोएइ से णं एगे अभीइ, तत्थ जे ते णक्खत्ता जे णं छ अहोरत्ते एकवीसं च मुहुत्ते सूरिएण सद्धिं जोयं जोएति ते णं छ, तंजहा-सयभिसया भरणी अद्दा अस्सेसा साई जेट्ठा, तत्थ जे ते...तेरस अहोरत्ते दुवाळस य मुहुत्ते सूरिएण सद्धिं जोयं जोएति ते णं पण्णरस, तंजहा-सवणो धणिट्ठा पुव्वाभइवया रेवई अस्सिणी कत्तिया मिगसिरं पूसो महा पुव्वाफग्गुणी हत्थो चित्ता अणुराहा मूलो पुव्वासाढा, तत्थ जे ते णक्खत्ता जे णं वीसं अहोरत्ते तिण्णि य मुहुत्ते सूरिएण सद्धिं जोयं जोएति ते णं छ, तंजहा-उत्तराभइवया रोहिणी पुणव्वसू उत्तराफग्गुणी विसाहा उत्तरासाढा ॥ ३२ ॥ **दसमस्स पाहुडस्स विइयं पाहुडपाहुडं समत्तं ॥ १०-२ ॥**

ता कहं ते एवंभागा आहिताति वएज्जा ? ता एएसि णं अट्ठावीसाए णक्खत्ताणं अत्थि णक्खत्ता पुव्वंभागा समक्खेत्ता तीसइमुहुत्ता प०, अत्थि णक्खत्ता पच्छंभागा समक्खेत्ता तीसइमुहुत्ता प०, अत्थि णक्खत्ता णत्तंभागा अवड्ढक्खेत्ता पण्णरसमुहुत्ता प०, अत्थि णक्खत्ता उभयंभागा दिवड्ढक्खेत्ता पणयालीसं मुहुत्ता प०, ता एएसि णं अट्ठावीसाए णक्खत्ताणं कयरे णक्खत्ता० पुव्वंभागा समक्खेत्ता तीसइमुहुत्ता प० जाव कयरे णक्खत्ता० उभयंभागा दिवड्ढक्खेत्ता पणयालीसइमुहुत्ता प० ? ता एएसि णं अट्ठावीसाए णक्खत्ताणं तत्थ जे ते णक्खत्ता पुव्वंभागा समक्खेत्ता तीसइमुहुत्ता प० ते णं छ, तंजहा-पुव्वापोट्टवया कत्तिया महा पुव्वाफग्गुणी मूलो पुव्वासाढा, तत्थ जे ते णक्खत्ता० पच्छंभागा समक्खेत्ता तीसइमुहुत्ता प० ते णं दस, तंजहा-अभीई सवणो धणिट्ठा रेवई अस्सिणी मिगसिरं पूसो हत्थो चित्ता अणुराहा, तत्थ जे ते णक्खत्ता० णत्तंभागा अवड्ढक्खेत्ता पण्णरसमुहुत्ता प० ते णं छ, तंजहा-

सयभिसया भरणी अहा अस्सेसा साई जेट्ठा, तत्थ जे ते णक्खत्ता० उभयंभागा दिवड्ढक्खेत्ता पणयालीसं मुहुत्ता प० ते णं छ, तंजहा-उत्तरापोट्टवया रोहिणी पुणव्वस्स उत्तराफण्णुणी विसाहा उत्तरासाढा ॥ ३३ ॥ **दसमस्स पाहुडस्स तइयं पाहुडपाहुडं समत्तं ॥ १०-३ ॥**

ता कहं ते जोगस्स आई आहिताति वएज्जा ? ता अभीईसवणा खलु दुवे णक्खत्ता पच्छाभागा समक्खेत्ता साइरेगऊयालीसइमुहुत्ता तप्पढमयाए सायं चंदेण सद्धिं जोयं जोएंति, तओ पच्छा अवरं साइरेयं दिवसं, एवं खलु अभिईसवणा दुवे णक्खत्ता एगराई एगं च साइरेगं दिवसं चंदेण सद्धिं जोयं जोएंति जोयं जोएत्ता जोयं अणुपरियट्ठंति जोयं अणुपरियट्ठित्ता सायं चंदं धणिट्ठाणं समप्पेति, ता धणिट्ठा खलु णक्खत्ते पच्छंभागे समक्खेत्ते तीसइमुहुत्ते तप्पढमयाए सायं चंदेण सद्धिं जोयं जोएइ २ ता तओ पच्छा राई अवरं च दिवसं, एवं खलु धणिट्ठा णक्खत्ते एगं च राई एगं च दिवसं चंदेण सद्धिं जोयं जोएइ जोएत्ता जोयं अणुपरियट्ठइ जोयं अणुपरियट्ठित्ता सायं चंदं सयभिसयाणं समप्पेइ, ता सयभिसया खलु णक्खत्ते णत्तंभागे अवड्ढक्खेत्ते पण्णरसमुहुत्ते तप्पढमयाए सायं चंदेण सद्धिं जोयं जोएइ णो लभइ अवरं दिवसं, एवं खलु सयभिसया णक्खत्ते एगं राई चंदेण सद्धिं जोयं जोएइ जोयं जोएत्ता जोयं अणुपरियट्ठइ जोयं अणुपरियट्ठित्ता पाओ चंदं पुव्वाणं पोट्टवयाणं समप्पेइ, ता पुव्वापोट्टवया खलु णक्खत्ते पुव्वंभागे समक्खेत्ते तीसइमुहुत्ते तप्पढमयाए पाओ चंदेण सद्धिं जोयं जोएइ, तओ पच्छा अवरराई, एवं खलु पुव्वापोट्टवया णक्खत्ते एगं च दिवसं एगं च राई चंदेण सद्धिं जोयं जोएइ २ ता जोयं अणुपरियट्ठइ २ ता पाओ चंदं उत्तरापोट्टवयाणं समप्पेइ, ता उत्तरापोट्टवया खलु णक्खत्ते उभयंभागे दिवड्ढक्खेत्ते पणयालीसइमुहुत्ते तप्पढमयाए पाओ चंदेण सद्धिं जोयं जोएइ अवरं च राई तओ पच्छा अवरं दिवसं, एवं खलु उत्तरापोट्टवया णक्खत्ते दो दिवसे एगं च राई चंदेण सद्धिं जोयं जोएइ अवरं च राई तओ पच्छा अवरं दिवसं, एवं खलु उत्तरापोट्टवया णक्खत्ते दो दिवसे एगं च राई चंदेण सद्धिं जोयं जोएइ जोइत्ता जोयं अणुपरियट्ठइ २ ता सायं चंदं रेवईणं समप्पेइ, ता रेवई खलु णक्खत्ते पच्छंभागे समक्खेत्ते तीसइमुहुत्ते तप्पढमयाए सायं चंदेण सद्धिं जोयं जोएइ, तओ पच्छा अवरं दिवसं, एवं खलु रेवई णक्खत्ते एगं राई एगं च दिवसं चंदेण सद्धिं जोयं जोएइ २ ता जोयं अणुपरियट्ठइ २ ता सायं चंदं अस्तिणीणं समप्पेइ, ता अस्तिणी खलु णक्खत्ते पच्छंभागे समक्खेत्ते तीसइमुहुत्ते तप्पढमयाए सायं चंदेण सद्धिं जोयं जोएइ, तओ पच्छा अवरं दिवसं, एवं खलु अस्तिणी णक्खत्ते एगं च

राइं एगं च दिवसं चंदेण सद्धिं जोयं जोएइ २ ता जोयं अणुपरियट्ठइ २ ता सायं चंदं भरणीणं समप्पेइ, ता भरणी खलु णक्खत्ते णत्तंभागे अवद्धक्खत्ते पण्णरसमुहुत्ते तप्पढमयाए सायं चंदेण सद्धिं जोयं जोएइ, णो लभइ अवरं दिवसं, एवं खलु भरणी णक्खत्ते एगं राइं चंदेण सद्धिं जोयं जोएइ २ ता जोयं अणुपरियट्ठइ २ ता पाओ चंदं कत्तियाणं समप्पेइ, ता कत्तिया खलु णक्खत्ते पुव्वंभागे समक्खत्ते तीसइ-मुहुत्ते तप्पढमयाए पाओ चंदेण सद्धिं जोयं जोएइ, तओ पच्छा राइं, एवं खलु कत्तिया णक्खत्ते एगं च दिवसं एगं च राइं चंदेण सद्धिं जोयं जोएइ २ ता जोयं अणुपरियट्ठइ २ ता पाओ चंदं रोहिणीणं समप्पेइ, रोहिणी जहा उत्तरभद्वया मिगसिरं जहा धणिट्ठा अद्दा जहा सयभिसया पुणव्वसू जहा उत्तराभद्वया पुस्सो जहा धणिट्ठा अस्सेसा जहा सयभिसया महा जहा पुव्वाफग्गुणी पुव्वाफग्गुणी जहा पुव्वाभद्वया उत्तराफग्गुणी जहा उत्तराभद्वया हत्थो चित्ता य जहा धणिट्ठा साइ जहा सयभिसया विसाहा जहा उत्तराभद्वया अणुराहा जहा धणिट्ठा सयभिसया मूला पुव्वासाढा य जहा पुव्वाभद्वया उत्तरासाढा जहा उत्तराभद्वया ॥ ३४ ॥

**दसमस्स पाहुडस्स चउत्थं पाहुडपाहुडं समत्तं ॥ १०-४ ॥**

ता क्हं ते कुला उवकुला कुलोवकुला आहिताति वएजा ? तत्थ खलु इमे बारस कुला बारस उवकुला चत्तारि कुलोवकुला ५०, बारस कुला०, तंजहा-धणिट्ठाकुलं उत्तराभद्वयाकुलं अस्सिणीकुलं कत्तियाकुलं संठाणाकुलं पुस्साकुलं महाकुलं उत्तरा-फग्गुणीकुलं चित्ताकुलं विसाहाकुलं मूलाकुलं उत्तरासाढाकुलं, बारस उवकुला०, तंजहा-सवणो उवकुलं पुव्वापुट्टवयाउवकुलं रेवईउवकुलं भरणीउवकुलं रोहिणीउवकुलं पुणव्वसूउवकुलं अस्सेसाउवकुलं पुव्वाफग्गुणीउवकुलं हत्थाउवकुलं साइउवकुलं जेट्ठा-उवकुलं पुव्वासाढाउवकुलं, चत्तारि कुलोवकुला०, तंजहा-अभीईकुलोवकुलं सयभिसयाकुलोवकुलं अद्दाकुलोवकुलं अणुराहाकुलोवकुलं ॥ ३५ ॥ **दसमस्स पाहुडस्स पंचमं पाहुडपाहुडं समत्तं ॥ १०-५ ॥**

ता क्हं ते पुण्णिमासिणी आहितेति वएजा ? तत्थ खलु इमाओ बारस पुण्णि-मासिणीओ बारस अमावासाओ पण्णत्ताओ, तंजहा-साविट्ठी पोट्टवई आसोया कत्तिया मग्गसिरी पोसी माही फग्गुणी चेत्ती वेसाही जेट्ठासूली आसाढी, ता साविट्ठिण्णं पुण्णिमासिं कइ णक्खत्ता जोएंति ? ता तिण्णि णक्खत्ता जोएंति, तंजहा-अभिई सवणो धणिट्ठा, ता पुट्टवइण्णं पुण्णिमं कइ णक्खत्ता जोएंति ? ता तिण्णि णक्खत्ता जोएंति, तंजहा-सयभिसया पुव्वापोट्टवया उत्तरापोट्टवया, ता आसोइण्णं पुण्णिमं कइ णक्खत्ता जोएंति ? ता दोण्णि णक्खत्ता जोएंति, तंजहा-

रेवई य अस्सिणी य, ता कत्तियण्णं पुण्णिमं कइ णक्खत्ता जोएंति ? ता दोण्णि  
 णक्खत्ता जोएंति, तंजहा-भरणी कत्तिया य, ता मग्गसिरीपुण्णिमं कइ णक्खत्ता  
 जोएंति ? ता दोण्णि णक्खत्ता जोएंति, तंजहा-रोहिणी मिंगसिरो य, ता पोसिण्णं  
 पुण्णिमं कइ णक्खत्ता जोएंति ? ता तिण्णि णक्खत्ता जोएंति, तंजहा-अद्दा पुण-  
 व्वसू पुस्सो, ता माहिण्णं पुण्णिमं कइ णक्खत्ता जोएंति ? ता दोण्णि णक्खत्ता  
 जोएंति, तं०-अस्सेसा महा य, ता फग्गुणिण्णं पुण्णिमं कइ णक्खत्ता जोएंति ? ता  
 दुण्णि णक्खत्ता जोएंति, तं०-पुव्वाफग्गुणी उत्तराफग्गुणी य, ता चेत्तिण्णं  
 पुण्णिमं कइ णक्खत्ता जोएंति ? ता दोण्णि०, तं०-हत्थो चित्ता य, ता वेसाहिण्णं  
 पुण्णिमं कइ णक्खत्ता जोएंति ? ता दोण्णि णक्खत्ता जोएंति, तं०-साई विसाहा  
 य, ता जेट्ठमूलिण्णं पुण्णिमासिणिं कइ णक्खत्ता जोएंति ? ता तिण्णि णक्खत्ता  
 जोएंति, तं०-अणुराहा जेट्ठा मूलो, ता आसाढिण्णं पुण्णिमं कइ णक्खत्ता जोएंति ?  
 ता दो णक्खत्ता जोएंति, तंजहा-पुव्वासाढा उत्तरासाढा ॥ ३६ ॥ [ णाउमिह  
 अमावासं जइ इच्छसि कम्मि होइ रिक्खम्मि । अवहारं ठाविज्जा तत्तियरूवेहि  
 संगुणए ॥ १ ॥ छावट्ठी य सुहुत्ता विसट्ठिभागा य पंच पडिपुण्णा । वासट्ठिभाग-  
 सत्तट्ठिगो य इक्को हवइ भागो ॥ २ ॥ एयमवहाररासिं इच्छअमावाससंगुणं कुज्जा ।  
 णक्खत्ताणं एत्तो सोहणगविहिं णिसामेह ॥ ३ ॥ बावीसं च सुहुत्ता छायालीसं  
 विसट्ठिभागा य । एयं पुणव्वसुस्स य सोहयव्वं हवइ वुच्छं ॥ ४ ॥ बावत्तरं  
 सयं फग्गुणीणं बाणउइय बे विसाहासु । चत्तारि य बायाला सोज्झा उ उत्तरासाढा  
 ॥ ५ ॥ एयं पुणव्वसुस्स य विसट्ठिभागसहिं तु सोहणगं । इत्तो अभिईआई  
 बिइयं वुच्छामि सोहणगं ॥ ६ ॥ अभिइस्स णव सुहुत्ता विसट्ठिभागा य हुंति  
 चउवीसं । छावट्ठी असमत्ता भागा सत्तट्ठिछेयकया ॥ ७ ॥ उगुणट्ठं पोट्टवयाइसु  
 चेव णवोत्तरं च रोहिणिया । तिसु णवणवएसु भवे पुणव्वसू फग्गुणीओ य ॥ ८ ॥  
 पंचेव उगुणपण्णं सयाइ उगुणत्तराई छचेव । सोज्झाणि विसाहासुं मूले सत्तेव  
 चोयाला ॥ ९ ॥ अट्ठसय उगुणवीसा सोहणगं उत्तराण साढाणं । चउवीसं खल्ल  
 भागा छावट्ठी चुण्णियाओ य ॥ १० ॥ एयाइ सोहइत्ता जं सेसं तं हवेइ णक्खत्तं ।  
 इत्थं करेइ उडुवइ सूरेण समं अमावासं ॥ ११ ॥ इच्छापुण्णिमगुणिओ अवहारो  
 सोत्थ होइ कायव्वो । तं चेव य सोहणगं अभिईआई तु कायव्वं ॥ १२ ॥  
 सुद्धंमि य सोहणगे जं सेसं तं भविज्ज णक्खत्तं । तत्थ य करेइ उडुवइ पडिपुण्णो  
 पुण्णिमं विउलं ॥ १३ ॥ ] ता साविट्ठिण्णं पुण्णिमासिणिं किं कुलं जोएइ उवकुलं  
 जोएइ कुलोवकुलं जोएइ ? ता कुलं वा जोएइ उवकुलं वा जोएइ कुलोवकुलं वा

जोएइ, कुलं जोएमाणे धणिट्ठा णक्खत्ते०, उवकुलं जोएमाणे सवणे णक्खत्ते जोएइ, कुलोवकुलं जोएमाणे अभिई णक्खत्ते जोएइ, ता साविट्ठि० पुण्णिमं कुलं वा जोएइ उवकुलं वा जोएइ कुलोवकुलं वा जोएइ, कुलेण वा जुत्ता उवकुलेण वा जुत्ता कुलोवकुलेण वा जुत्ता साविट्ठी पुण्णिमा जुत्ताति वत्तव्वं सिया, ता पोट्टवइणं पुण्णिमं किं कुलं जोएइ उवकुलं जोएइ कुलोवकुलं वा जोएइ ? ता कुलं वा जोएइ उवकुलं वा जोएइ कुलोवकुलं वा जोएइ, कुलं जोएमाणे उत्तरापोट्टवया णक्खत्ते जोएइ, उवकुलं जोएमाणे पुव्वापुट्टवया णक्खत्ते जोएइ, कुलोवकुलं जोएमाणे सयभिसया णक्खत्ते जोएइ, पोट्टवइणं पुण्णिमासिणिं कुलं वा जोएइ उवकुलं वा जोएइ कुलोवकुलं वा जोएइ, कुलेण वा जुत्ता ३ पुट्टवया पुण्णिमा जुत्ताति वत्तव्वं सिया, ता आसोइं णं पुण्णिमासिणिं किं कुलं जोएइ उवकुलं जोएइ कुलोवकुलं जोएइ ? ता कुलंपि जोएइ उवकुलंपि जोएइ णो लब्भइ कुलोवकुलं, कुलं जोएमाणे अस्सिणी णक्खत्ते जोएइ, उवकुलं जोएमाणे रेवई णक्खत्ते जोएइ, आसोइं णं पुण्णिमं कुलं वा जोएइ उवकुलं वा जोएइ, कुलेण वा जुत्ता उवकुलेण वा जुत्ता अस्सोइं णं पुण्णिमा जुत्ताति वत्तव्वं सिया, एवं णेयव्वाउ, पोसं पुण्णिमं जेट्ठामूलं पुण्णिमं च कुलोवकुलंपि जोएइ, अवसेसासु णत्थि कुलोवकुलं जाव आसाढी पुण्णिमा जुत्ताति वत्तव्वं सिया । ता साविट्ठिं णं अमावासं कइ णक्खत्ता जोएंति ? ता दुण्णि णक्खत्ता जोएंति, तंजहा-अस्सेसा य महा य, एवं एएणं अभिलवेणं णेयव्वं, पोट्टवयं दो णक्खत्ता जोएंति, तंजहा-पुव्वाफग्गुणी उत्तराफग्गुणी, अस्सोइं दो० हत्थो चित्ता य, कत्तिर्यं० साई विसाहा य, मग्गसिरं० अणुराहा जेट्ठा मूलो, पोसिं० पुव्वासाढा उत्तरासाढा, माहिं० अभीई सवणो धणिट्ठा, फग्गुणिं० सयभिसया पुव्वापोट्टवया उत्तरापोट्टवया, चेत्तिं० रेवई अस्सिणी य, विसाहिं० भरणी कत्तिया य, जेट्ठामूलं० रोहिणी मिगसिरं च, ता आसाढिं णं अमावासिं कइ णक्खत्ता जोएंति ? ता तिण्णि णक्खत्ता जोएंति, तं०-अद्दा पुणव्वसू पुरसो, ता साविट्ठिं णं अमावासं किं कुलं जोएइ उवकुलं जोएइ कुलोवकुलं जोएइ ? ता कुलं वा जोएइ उवकुलं वा जोएइ णो लब्भइ कुलोवकुलं, कुलं जोएमाणे महा णक्खत्ते जोएइ, उवकुलं जोएमाणे असिलेसा० जोएइ, कुलेण वा जुत्ता उवकुलेण वा जुत्ता साविट्ठी अमावासा जुत्ताति वत्तव्वं सिया, एवं णेयव्वं, णवरं मग्गसिराए माहीए फग्गुणीए आसाढीए य अमावासाए कुलोवकुलंपि जोएइ, सेसेसु णत्थि जाव आसाढी अमावासा जुत्ताति वत्तव्वं सिया ॥ ३७ ॥ दसमस्स पाहुडस्स छट्ठं पाहुडपाहुडं समत्तं ॥ १०-६ ॥

ता क्हं ते सण्णिवाए आहिएति वएज्जा ? ता जया णं साविट्ठी पुण्णिमा भवइ  
 तथा णं माही अमावासा भवइ, जया णं माही पुण्णिमा भवइ तथा णं साविट्ठी  
 अमावासा भवइ, जया णं पुट्टवई पुण्णिमा भवइ तथा णं फग्गुणी अमावासा भवइ,  
 जया णं फग्गुणी पुण्णिमा भवइ तथा णं पुट्टवई अमावासा भवइ, जया णं आसोई  
 पुण्णिमा भवइ तथा णं चेत्ती अमावासा भवइ, जया णं चेत्ती पुण्णिमा भवइ तथा णं  
 आसोई अमावासा भवइ, जया णं कत्तिई पुण्णिमा भवइ तथा णं वेसाही अमावासा  
 भवइ, जया णं वेसाही पुण्णिमा भवइ तथा णं कत्तिया अमावासा भवइ, जया णं  
 मग्गसिरी पुण्णिमा भवइ तथा णं जेट्ठामूली अमावासा भवइ, जया णं जेट्ठामूली  
 पुण्णिमा भवइ तथा णं मग्गसिरी अमावासा भवइ, जया णं पोसी पुण्णिमा भवइ  
 तथा णं आसाढी अमावासा भवइ, जया णं आसाढी पुण्णिमा भवइ तथा णं  
 पोसी अमावासा भवइ ॥ ३८ ॥ **दसमस्स पाहुडस्स सत्तमं पाहुडपाहुडं  
 समत्तं ॥ १०-७ ॥**

ता क्हं ते णक्खत्तसंठिई आहितेति वएज्जा ? ता एएसि णं अट्ठावीसाए  
 णक्खत्ताणं अभीईणक्खत्ते किंसंठिए पण्णत्ते ? ता गोसीसावलिसंठिए पण्णत्ते,  
 ता सवणे णक्खत्ते किंसंठिए पण्णत्ते ? ता काहारसंठिए प०, धणिट्ठाणक्खत्ते सजणि-  
 पलीणगसंठिए, सयभिसयाणक्खत्ते पुप्फोवयारसंठिए, पुव्वापोट्टवयाणक्खत्ते अवङ्क-  
 वाविसंठिए, एवं उत्तरावि, रेवईणक्खत्ते णावासंठिए, अस्सिणीणक्खत्ते आसक्खंध-  
 संठिए, भरणीणक्खत्ते भगसंठिए, कत्तियाणक्खत्ते छुरघरगसंठिए, रोहिणीणक्खत्ते  
 सगड्डुद्धिसंठिए, मिगसिराणक्खत्ते मिगसीसावलिसंठिए, अद्दाणक्खत्ते रुहिरविंदु-  
 संठिए, पुणव्वसूणक्खत्ते तुलासंठिए, पुप्फे णक्खत्ते वट्ठमाणसंठिए, अस्सेसाणक्खत्ते  
 पडागसंठिए, महाणक्खत्ते पागारसंठिए, पुव्वाफग्गुणीणक्खत्ते अद्धपल्लियंक्कसंठिए,  
 एवं उत्तरावि, हत्थे णक्खत्ते हत्थसंठिए, चित्ताणक्खत्ते मुहुक्कुल्लसंठिए, साईणक्खत्ते  
 खील्लगसंठिए, विसाहाणक्खत्ते दामणिसंठिए, अणुराहाणक्खत्ते एगावलिसंठिए,  
 जेट्ठाणक्खत्ते गयदंतसंठिए, मूले णक्खत्ते विच्छुयलंगोलसंठिए, पुव्वासाढाणक्खत्ते  
 गयविक्रमसंठिए, उत्तरासाढाणक्खत्ते साइयसंठिए प० ॥ ३९ ॥ **दसमस्स पाहु-  
 डस्स अट्ठमं पाहुडपाहुडं समत्तं ॥ १०-८ ॥**

ता क्हं ते तारगमे आहिएति वएज्जा ? ता एएसि णं अट्ठावीसाए णक्खत्ताणं  
 अभीईणक्खत्ते कइतारे प० ? ता तितारे पण्णत्ते, सवणे णक्खत्ते तितारे, धणिट्ठाणक्खत्ते  
 पणतारे, सयभिसयाणक्खत्ते सयतारे, पुव्वापोट्टवयाणक्खत्ते दुतारे, एवं उत्तरावि,  
 रेवई० वत्तीसइतारे, अस्सिणीणक्खत्ते तितारे, भरणी तितारे, कत्तिया छतारे,



रोहिणी पंचतारे, मिंगसिरे तितारे, अद्दा एगतारे, पुणव्वसू पंचतारे, पुस्से तितारे, अस्सेसा छतारे, महा सत्ततारे, पुव्वाफग्गुणी दुतारे, एवं उत्तरावि, हत्थे पंचतारे, चित्ता एगतारे, साई एगतारे, विसाहा पंचतारे, अणुराहा चउतारे, जेद्धा तितारे, मूले एगतारे, पुव्वासाढा चउतारे, उत्तरासाढा चउतारे ॥ ४० ॥ **दसमस्स पाहुडस्स णवमं पाहुडपाहुडं समत्तं ॥ १०-९ ॥**

ता कहं ते गेया आहितेति वएज्जा ? ता वासाणं पढमं मासं कइ णक्खत्ता गेंति ? ता चत्तारि णक्खत्ता गेंति, तंजहा-उत्तरासाढा अभिई सवणे धणिट्ठा, उत्तरासाढा चोद्दस अहोरेत्ते गेइ, अभिई सत्त अहोरेत्ते गेइ, सवणे अट्ठ अहोरेत्ते गेइ, धणिट्ठा एगं अहोरेत्तं गेइ, तंसि च णं मासंसि चउरंगुलपोरिसीए छायाए सूरिए अणुपरियट्ठइ, तस्स णं मासस्स चरिमे दिवसे दो पायाइं चत्तारि य अंगुलाइं पोरिसी भवइ, ता वासाणं दोच्चं मासं कइ णक्खत्ता गेंति ? ता चत्तारि णक्खत्ता गेंति, तंजहा-धणिट्ठा सयभिसया पुव्वापोट्टवया उत्तरापोट्टवया, धणिट्ठा चोद्दस अहोरेत्ते गेइ, सयभिसया सत्त अहोरेत्ते गेइ, पुव्वापोट्टवया अट्ठ अहोरेत्ते गेइ, उत्तरापोट्टवया एगं अहोरेत्तं गेइ, तंसि च णं मासंसि अट्ठंगुलपोरिसीए छायाए सूरिए अणुपरियट्ठइ, तस्स णं मासस्स चरिमे दिवसे दो पयाइं अट्ठ य अंगुलाइं पोरिसी भवइ, ता वासाणं तइयं मासं कइ णक्खत्ता गेंति ? ता तिण्णि णक्खत्ता गेंति, तं०-उत्तरापोट्टवया रेवई अस्सिणी, उत्तरापोट्टवया चोद्दस अहोरेत्ते गेइ, रेवई पण्णरस अहोरेत्ते गेइ, अस्सिणी एगं अहोरेत्तं गेइ, तंसि च णं मासंसि दुवालसंगुलाए पोरिसीए छायाए सूरिए अणुपरियट्ठइ, तस्स णं मासस्स चरिमदिवसे लेहट्ठइ तिण्णि पयाइं पोरिसी भवइ, ता वासाणं चउत्थं मासं कइ णक्खत्ता गेंति ? ता तिण्णि णक्खत्ता गेंति, तं०-अस्सिणी भरणी कत्तिया, अस्सिणी चउद्दस अहोरेत्ते गेइ, भरणी पण्णरस अहोरेत्ते गेइ, कत्तिया एगं अहोरेत्तं गेइ, तंसि च णं मासंसि सोलसंगुलाए पोरिसिच्छायाए सूरिए अणुपरियट्ठइ, तस्स णं मासस्स चरिमे दिवसे तिण्णि पयाइं चत्तारि य अंगुलाइं पोरिसी भवइ । ता हेमंताणं पढमं मासं कइ णक्खत्ता गेंति ? ता तिण्णि णक्खत्ता गेंति, तं०-कत्तिया रोहिणी संठाणा, कत्तिया चोद्दस अहोरेत्ते गेइ, रोहिणी पण्णरस अहोरेत्ते गेइ, संठाणा एगं अहोरेत्तं गेइ, तंसि च णं मासंसि वीसंगुलपोरिसीए छायाए सूरिए अणुपरियट्ठइ, तस्स णं मासस्स चरिमे दिवसे तिण्णि पयाइं अट्ठ य अंगुलाइं पोरिसी भवइ, ता हेमंताणं दोच्चं मासं कइ णक्खत्ता गेंति ? ता चत्तारि णक्खत्ता गेंति, तं०-संठाणा अद्दा पुणव्वसू पुस्तो, संठाणा चोद्दस अहोरेत्ते गेइ, अद्दा सत्त अहोरेत्ते गेइ, पुणव्वसू अट्ठ अहोरेत्ते गेइ,

पुस्से एगं अहोरत्तं गेइ, तंसि च णं मासंसि चउवीसंगुलपोरिसीए छायाए सूरिए अणुपरियट्ठइ, तस्स णं मासस्स चरिमे दिवसे लेहट्ठाइं चत्तारि पयाइं पोरिसी भवइ, ता हेमंताणं तइयं मासं कइ णक्खत्ता गेंति ? ता तिणिण णक्खत्ता गेंति, तं०-पुस्से अस्सेसा महा, पुस्से चोइस अहोरत्ते गेइ, अस्सेसा पंचदस अहोरत्ते गेइ, महा एगं अहोरत्तं गेइ, तंसि च णं मासंसि वीसंगुलाए पोरिसीए छायाए सूरिए अणुपरियट्ठइ, तस्स णं मासस्स चरिमे दिवसे तिणिण पयाइं अट्ठंगुलाइं पोरिसी भवइ, ता हेमंताणं चउत्थं मासं कइ णक्खत्ता गेंति ? ता तिणिण णक्खत्ता गेंति, तं०-महा पुव्वा-फग्गुणी उत्तराफग्गुणी, महा चोइस अहोरत्ते गेइ, पुव्वाफग्गुणी पण्णरस अहोरत्ते गेइ, उत्तराफग्गुणी एगं अहोरत्तं गेइ, तंसि च णं मासंसि सोलसअंगुलाए पोरिसीए छायाए सूरिए अणुपरियट्ठइ, तस्स णं मासस्स चरिमे दिवसे तिणिण पयाइं चत्तारि य अंगुलाइं पोरिसी भवइ । ता गिम्हाणं पढमं मासं कइ णक्खत्ता गेंति ? ता तिणिण णक्खत्ता गेंति, तं०-उत्तराफग्गुणी हत्थो चित्ता, उत्तराफग्गुणी चोइस अहोरत्ते गेइ, हत्थो पण्णरस अहोरत्ते गेइ, चित्ता एगं अहोरत्तं गेइ, तंसि च णं मासंसि दुवा-लसंगुलपोरिसीए छायाए सूरिए अणुपरियट्ठइ, तस्स णं मासस्स चरिमे दिवसे लेहट्ठाइं तिणिण पयाइं पोरिसी भवइ, ता गिम्हाणं विइयं मासं कइ णक्खत्ता गेंति ? ता तिणिण णक्खत्ता गेंति, तं०-चित्ता साई विसाहा, चित्ता चोइस अहोरत्ते गेइ, साई पण्णरस अहोरत्ते गेइ, विसाहा एगं अहोरत्तं गेइ, तंसि च णं मासंसि अट्ठंगुलाए पोरिसीए छायाए सूरिए अणुपरियट्ठइ, तस्स णं मासस्स चरिमे दिवसे दो पयाइं अट्ठ य अंगुलाइं पोरिसी भवइ, ता गिम्हाणं तइयं मासं कइ णक्खत्ता गेंति ? ता तिणक्खत्ता गेंति, तं०-विसाहा अणुराहा जेट्ठामूलो, विसाहा चोइस अहोरत्ते गेइ, अणुराहा पण्णरस०, जेट्ठामूलो एगं अहोरत्तं गेइ, तंसि च णं मासंसि चउरंगुलपो-रिसीए छायाए सूरिए अणुपरियट्ठइ, तस्स णं मासस्स चरिमे दिवसे दो पयाणि य चत्तारि अंगुलाणि पोरिसी भवइ, ता गिम्हाणं चउत्थं मासं कइ णक्खत्ता गेंति ? ता तिणिण णक्खत्ता गेंति, तं०-मूलो पुव्वासाढा उत्तरासाढा, मूलो चोइस अहोरत्ते गेइ, पुव्वासाढा पण्णरस अहोरत्ते गेइ, उत्तरासाढा एगं अहोरत्तं गेइ, तंसि च णं मासंसि वट्ठाए समचउरंससंठियाए णग्गोहपरिमंडलाए सकायमणुरंगिणीए छायाए सूरिए अणुपरियट्ठइ, तस्स णं मासस्स चरिमे दिवसे लेहट्ठाइं दो पयाइं पोरिसी भवइ ॥ ४१ ॥

**दसमस्स पाहुडस्स दसमं पाहुडपाहुडं समत्तं ॥ १०-१० ॥**

ता क्हं ते चंदमग्गा आहितेति वएज्जा ? ता एसि णं अट्ठावीसाए णक्खत्ताणं अत्थि णक्खत्ता जे णं सया चंदस्स दाहिणेणं जोयं जोएति, अत्थि णक्खत्ता जे णं

सया चंदस्स उत्तरेणं जोयं जोएति, अत्थि णक्खत्ता जे णं चंदस्स दाहिणेणवि उत्तरेणवि पमइंपि जोयं जोएति, अत्थि णक्खत्ता जे णं चंदस्स दाहिणेणवि पमइंपि जोयं जोएति, अत्थि णक्खत्ते जे णं सया चंदस्स पमइं जोयं जोएइ, ता एएसि णं अट्ठावीसाए णक्खत्ताणं कयरे णक्खत्ता जे णं सया चंदस्स दाहिणेणं जोयं जोएति तहेव जाव कयरे णक्खत्ते जे णं सया चंदस्स पमइं जोयं जोएइ ? ता एएसि णं अट्ठावीसाए णक्खत्ताणं जे णं णक्खत्ता सया चंदस्स दाहिणेणं जोयं जोएति ते णं छ, तं०-संठाणा अद्दा पुरस्सो अस्सेसा हत्थो मूलो, तत्थ जे ते णक्खत्ता जे णं सया चंदस्स उत्तरेणं जोयं जोएति ते णं वारस, तंजहा-अभिई सवणो अण्णिहा सयभिसया पुव्वाभइवया उत्तरापोट्टवया रेवई अस्सिणी भरणी पुव्वाफगुणी उत्तराफगुणी साई १२, तत्थ जे ते णक्खत्ता जे णं चंदस्स दाहिणेणवि उत्तरेणवि पमइंपि जोयं जोएति ते णं सत्त, तंजहा-कत्तिया रोहिणी पुणव्वसू महा चित्ता विसाहा अणुराहा, तत्थ जे ते णक्खत्ता जे णं चंदस्स दाहिणेणवि पमइंपि जोयं जोएति ताओ णं दो आसाढाओ सव्वबाहिरे मंडले जोयं जोएसु वा जोएति वा जोए-स्संति वा, तत्थ जे से णक्खत्ते जे णं सया चंदस्स पमइं जोयं जोएइ सा णं एगा जेट्ठा ॥ ४२ ॥ ता कइ ते चंदमंडला पण्णत्ता ? ता पण्णरस चंदमंडला पण्णत्ता, ता एएसि णं पण्णरसण्हं चंदमंडलाणं अत्थि चंदमंडला जे णं सया णक्खत्तेहिं अविरहिया०, अत्थि चंदमंडला जे णं रविससिणक्खत्ताणं सामण्णा भवंति, अत्थि चंदमंडला जे णं सया आइच्चेहिं विरहिया, ता एएसि णं पण्णरसण्हं चंदमंडलाणं कयरे चंदमंडला जे णं सया णक्खत्तेहिं अविरहिया जाव कयरे चंदमंडला जे णं सया आइच्चविरहिया ? ता एएसि णं पण्णरसण्हं चंदमंडलाणं तत्थ जे ते चंदमंडला जे णं सया णक्खत्तेहिं अविरहिया ते णं अट्ठ, तंजहा-पढमे चंदमंडले तइए चंदमंडले छट्ठे चंदमंडले सत्तमे चंदमंडले अट्ठमे चंदमंडले दसमे चंदमंडले एक्कारसमे चंदमंडले पण्णरसमे चंदमंडले, तत्थ जे ते चंदमंडला जे णं सया णक्खत्तेहिं विरहिया ते णं सत्त, तंजहा-बिइए चंदमंडले चउत्थं चंदमंडले पंचमे चंदमंडले णवमे चंदमंडले वारसमे चंदमंडले तेरसमे चंदमंडले चउद्दसमे चंदमंडले, तत्थ जे ते चंदमंडला जे णं रविससिणक्खत्ताणं सामण्णा भवंति ते णं चत्तारि, तंजहा-पढमे चंदमंडले बीए चंदमंडले इक्कारसमे चंदमंडले पण्णरसमे चंदमंडले, तत्थ जे ते चंदमंडला जे णं सया आइच्चविरहिया ते णं पंच, तंजहा-छट्ठे चंदमंडले सत्तमे चंदमंडले अट्ठमे चंदमंडले णवमे चंदमंडले दसमे चंदमंडले ॥ ४३ ॥ दसमस्स पाहुडस्स एक्कारसमं पाहुडपाहुडं समत्तं ॥ १०-११ ॥

ता कहं ते देवयाणं अज्झयणा आहिताति वएज्जा ? ता एएसि णं अट्ठावीसाए णक्खत्ताणं अभिईणक्खत्ते किंदेवयाए पण्णत्ते ? ता बंभदेवयाए पण्णत्ते, सवणे० विण्हु०, धणिट्ठाणक्खत्ते वसुदेवयाए०, सयमिसयाणक्खत्ते वरुण०, पुव्वापोट्ठ० अयदे०, उत्तरापोट्ठवयाणक्खत्ते अभिवट्ठि०, एवं सव्वेवि पुच्छिज्जंति, रेवई पुरस्सदेवया०, अस्सिणी अस्सदेवया०, भरणी जमदेवया०, कत्तिया अग्गिदेवया०, रोहिणी पया-वइदेवया०, संठाणा सोमदेवयाए०, अट्ठा रुद्धदेवयाए०, पुणव्वस् अदिति०, पुस्सो वहस्सइ०, अस्सेसा सप्प०, महा पिइ०, पुव्वाफग्गुणी भग०, उत्तराफग्गुणी अज्जम०, हत्थे सविया०, चित्ता तट्ठ०, साई वाउ०, विसाहा इंदग्गी०, अणुराहा मित्त०, जेट्ठा इंद०, मूले गिरइ०, पुव्वासाढा आउ०, उत्तरासाढा० विस्सदेवयाए पण्णत्ते ॥ ४४ ॥

**दसमस्स पाहुडस्स बारसमं पाहुडपाहुडं समत्तं ॥ १०-१२ ॥**

ता कहं ते मुहुत्ताणं नामधेज्जा आहिताति वएज्जा ? ता एगमेगस्स णं अहोरत्तस्स तीसं मुहुत्ता प०, तंजहा-रुद्धे सेए मित्ते वाउ सुगी(पी)ए तहेव अभिचंदे । माहिंद बलव बंभे बहुसच्चे चेव ईसाणे ॥ १ ॥ तट्ठे य भावियप्पा वेसमणे वारुणे य आणंदे । विजए य वीससेणे पयावई चेव उवसामे ॥ २ ॥ गंधव्व अग्गिवेसे सयरिसहे आयवं च अममे य । अणवं भोमे रिसहे सव्वट्ठे रक्खसे चेव ॥ ३ ॥ ४५ ॥

**दसमस्स पाहुडस्स तेरसमं पाहुडपाहुडं समत्तं ॥ १०-१३ ॥**

ता कहं ते दिवसा आहिताति वएज्जा ? ता एगमेगस्स णं पक्खस्स पण्णरस दिवसा पण्णत्ता, तं०-पडिवादिवसे बिइयादिवसे जाव पण्णरसीदिवसे, ता एएसि णं पण्णरसण्हं दिवसाणं पण्णरस णामधेज्जा प०, तं०-पुव्वगे सिद्धमणोरमे य तत्तो मणोरहे(हरे) चेव । जसभेइ य जसोधर य सव्वकामसमिद्धे ॥ १ ॥ इंदमुद्धाभिसित्ते य सोमणस धणंजए य बोद्धव्वे । अत्थसिद्धे अभिजाए अच्चसणे सयंजए चेव ॥ २ ॥ अग्गिवेसे उवसमे दिवसाणं णामधेज्जाइं । ता कहं ते राईओ आहिताति वएज्जा ? ता एगमेगस्स णं पक्खस्स पण्णरस राईओ पण्णत्ताओ, तंजहा-पडिवाराई बिइयाराई जाव पण्णरसीराई, ता एयासि णं पण्णरसण्हं राईणं पण्णरस णामधेज्जा पण्णत्ता, तं०-उत्तमा य सुणक्खत्ता, एलावच्चा जसोधरा । सोमणसा चेव तहा सिरिसंभूया य बोद्धव्वा ॥ १ ॥ विजया य वेजयंति जयंति अपराजिया य इच्छा य । समाहारा चेव तहा तेया य तहा य अइतेया ॥ १ ॥ देवाणंदा गिरइ रयणीणं णामधेज्जाइं ॥ ४६ ॥ **दसमस्स पाहुडस्स चउदसमं पाहुडपाहुडं समत्तं ॥ १०-१४ ॥**

ता कहं ते तिही आहितेति वएज्जा ? तत्थ खलु इमा दुविहा तिही पण्णत्ता,

तंजहा-दिवसतिही य राईतिही य, ता कहं ते दिवसतिही आहितेति वएज्जा ? ता एगमेगस्स णं पक्खस्स पण्णरस २ दिवसतिही पण्णत्ता, तं०-णंदे भेदे जए तुच्छे पुण्णे पक्खस्स पंचमी पुणरवि णंदे भेदे जए तुच्छे पुण्णे पक्खस्स दसमी पुणरवि णंदे भेदे जए तुच्छे पुण्णे पक्खस्स पण्णरसी, एवं ते तिगुणा तिहीओ सव्वेसिं दिवसाणं, ता कहं ते राईतिही आहितेति वएज्जा ? ता एगमेगस्स णं पक्खस्स पण्णरस राईतिही प०, तं०-उग्गवई भोगवई जसवई सव्वसिद्धा सुहणामा पुणरवि उग्गवई भोगवई जसवई सव्वसिद्धा सुहणामा पुणरवि उग्गवई भोगवई जसवई सव्वसिद्धा सुहणामा, एए तिगुणा तिहीओ सव्वासिं राईणं ॥ ४७ ॥ **दसमस्स पाहुडस्स पण्णरसमं पाहुडपाहुडं समत्तं ॥ १०-१५ ॥**

ता कहं ते गोत्ता आहिताति वएज्जा ? ता एएसि णं अट्ठावीसाए णक्खत्ताणं अभिईणक्खत्ते किंगोत्ते प० ? ता मोग्गल्लायणसगोत्ते पण्णत्ते, सव्वणे० संखायण०, धणिट्ठा० अमिंतावस०, सयभिसया० कण्णिंलायणसगोत्ते, पुव्वापोट्टवया० जोउक-ण्णियसगोत्ते, उत्तरापोट्टवया० धणंजयसगोत्ते, रेवईणक्खत्ते पुस्सायणसगोत्ते, अस्सिणीणक्खत्ते अस्सायणसगोत्ते, भरणीणक्खत्ते भग्गवेससगोत्ते, कत्तियाणक्खत्ते अग्गि-वेससगोत्ते, रोहिणीणक्खत्ते गोयम०, संठाणाणक्खत्ते भारद्वायसगोत्ते, अद्दाणक्खत्ते लोहिच्चायणसगोत्ते, पुणव्वसूणक्खत्ते वासिट्ठसगोत्ते, पुस्से० उमज्जायणसगोत्ते, अस्सेसाणक्खत्ते मंडव्वायणसगोत्ते, महाणक्खत्ते पिंगायणसगोत्ते, पुव्वाफग्गुणीणक्खत्ते गोवल्लायणसगोत्ते, उत्तराफग्गुणीणक्खत्ते कासव०, हत्थे० कोसिय०, चित्ताणक्खत्ते दभियाणस्सगोत्ते, साईणक्खत्ते चामरच्छायणसगोत्ते, विसाहाणक्खत्ते सुंगायणसगोत्ते, अणुराहाणक्खत्ते गोलव्वायणसगोत्ते, जेट्ठाणक्खत्ते तिगिच्छायणसगोत्ते, मूले णक्खत्ते कच्चायणसगोत्ते, पुव्वासाढाणक्खत्ते वज्जिंयायणसगोत्ते, उत्तरासाढाणक्खत्ते वघा-वच्चसगोत्ते ॥ ४८ ॥ **दसमस्स पाहुडस्स सोलसमं पाहुडपाहुडं समत्तं ॥ १०-१६ ॥**

ता कहं ते भोयणा आहिताति वएज्जा ? ता एएसि णं अट्ठावीसाए णक्खत्ताणं कत्तियाहिं दहिणा भोच्चा कज्जं सार्धेति, रोहिणीहिं मुग्गं भोच्चा कज्जं सार्धेति, संठाणाहिं कत्थूरिं भोच्चा कज्जं सार्धेति, अद्दाहिं णवणीएण भोच्चा कज्जं सार्धेति, पुणव्वसुणा घएण भोच्चा कज्जं सार्धेति, पुस्सेणं खीरेण भोच्चा कज्जं सार्धेति, अस्सेसाए णालिएरं भोच्चा कज्जं सार्धेति, महाहिं कसोतिं भोच्चा कज्जं सार्धेति, पुव्वाहिं फग्गुणीहिं एलाफेळं भोच्चा कज्जं सार्धेति, उत्तराफग्गुणीहिं दुद्धेणं भोच्चा कज्जं सार्धेति,

१ पकेहुए मूंग, २ नारियलकी गिरी, ३ खाद्यविशेष, ४ आबजोश इलायची ।

हृथेण वत्थाणीएणं भोच्चा कज्जं साधेति, वित्ताहिं मुग्गसूवेणं भोच्चा कज्जं साधेति, साइणा फलैइं भोच्चा कज्जं साधेति, विसाहाहिं आसित्थिआओ भोच्चा कज्जं साधेति, अणुराहाहिं मिस्साकूरं भोच्चा कज्जं साधेति, जेट्ठाहिं लट्ठिएणं भोच्चा कज्जं साधेति, मूलेणं मूलणेणं भोच्चा कज्जं साधेति, पुव्वाहिं आसाढाहिं आमलगं भोच्चा कज्जं साधेति, उत्तराहिं आसाढाहिं बिळ्ळफ्लेहिं [णिम्मियं] भोच्चा कज्जं साधेति, अभीइणा पुप्फेहिं [निम्मियं] भोच्चा कज्जं साधेति, सवणेणं खीरेणं भोच्चा कज्जं साधेति, धण्डाहिं जूसेणं भोच्चा कज्जं साधेति, सयभिसयाए तुवराउ भोच्चा कज्जं साधेति, पुव्वाहिं पुट्टवयाहिं कारियेळएहिं भोच्चा कज्जं साधेति, उत्तरापुट्टवयाहिं वंसरोयणं भोच्चा कज्जं साधेति, रेवईहिं सिध्दंभं भोच्चा कज्जं साधेति, अस्सिणीहिं तित्तफलं भोच्चा कज्जं साधेति, भरणीहिं तिलतंडुलयं भोच्चा कज्जं साधेति ॥ ४९ ॥ **दसमस्स पाहुडस्स सत्तरसमं पाहुडपाहुडं समत्तं ॥ १०-१७ ॥**

ता क्हं ते चारा आहिताति वएज्जा ? तत्थ खलु इमे दुविहा चारा पण्णत्ता, तं०-आइच्चारा य चंदचारा य, ता क्हं ते चंदचारा आहिताति वएज्जा ? ता पंच संवच्छरिए णं जुगे अभीइणक्खत्ते सत्तसट्ठिचारे चंदेण सद्धिं जोयं जोएइ, सवणे णक्खत्ते सत्तसट्ठिचारे चंदेण सद्धिं जोयं जोएइ, एवं जाव उत्तरासाढाणक्खत्ते सत्तसट्ठिचारे चंदेण सद्धिं जोयं जोएइ । ता क्हं ते आइच्चारा आहितेति वएज्जा ? ता पंच संवच्छरिए णं जुगे अभीइणक्खत्ते पंचचारे सूरेण सद्धिं जोयं जोएइ, एवं जाव उत्तरासाढाणक्खत्ते पंचचारे सूरेण सद्धिं जोयं जोएइ ॥ ५० ॥ **दसमस्स पाहुडस्स अट्ठारसमं पाहुडपाहुडं समत्तं ॥ १०-१८ ॥**

ता क्हं ते मासा आहिताति वएज्जा ? ता एगमेगस्स णं संवच्छरस्स बारस मासा पण्णत्ता, तेसिं च दुविहा णामधेज्जा पण्णत्ता, तं०-लोइया य लोउत्तरिया य, तत्थ लोइया णामा०, तं०-सावणे भइवए आसोए जाव आसाढे, लोउत्तरिया णामा०, तं०-अभिण्दि पइट्ठे य, विजए पीइवद्धणे । सेज्जेसं य सिवे यावि, सिसिरेवि य हेमवं ॥ १ ॥ णवमे वसंतमासे, दसमे कुसुमसंभवे । एक्कारसमे णिदाहो, वणविरोही य बारसे ॥ २ ॥ ५१ ॥ **दसमस्स पाहुडस्स एगूणवीसइमं पाहुडपाहुडं समत्तं ॥ १०-१९ ॥**

ता क्हं ते संवच्छरा आहिताति वएज्जा ? ता पंच संवच्छरा आहिताति वएज्जा,

१ खाद्यविशेष, २ त्रिफला, ३ खाद्यविशेष, ४ खाद्यविशेष, ५ शाकविशेष, ६ बेलफलका मुरब्बा, ७ गुलकंद, ८ करेले का शाक, ९ वंशलोचन, १० सूखा सिंघाडा, ११ त्रिकुटा सोंठ-काली मिर्च-पीपल ।

तं०-णक्खत्तसंवच्छरे जुगसंवच्छरे पमाणसंवच्छरे लक्खणसंवच्छरे सणिच्छरसंवच्छरे ॥ ५२ ॥ ता णक्खत्तसंवच्छरे णं कइविहे प० ? ता णक्खत्तसंवच्छरे णं दुवालसविहे पण्णत्ते, तं०-सावणे भद्दवए जाव आसाढे, जं वा बहस्सइमहग्गहे दुवालसहिं संवच्छरेहिं सर्व्वं णक्खत्तमंडलं समाणेइ ॥ ५३ ॥ ता जुगसंवच्छरे णं पंचविहे पण्णत्ते, तंजहा-चंदे चंदे अभिवद्धिए चंदे अभिवद्धिए चेव, ता पढमस्स णं चंदसंवच्छरस्स चउवीसं पव्वा प०, दोच्चस्स णं चंदसंवच्छरस्स चउवीसं पव्वा प०, तच्चस्स णं अभिवद्धियसंवच्छरस्स छव्वीसं पव्वा प०, चउत्थस्स णं चंदसंवच्छरस्स चउवीसं पव्वा प०, पंचमस्स णं अभिवद्धियसंवच्छरस्स छव्वीसं पव्वा पण्णत्ता, एवामेव सपुव्वावरेणं पंचसंवच्छरिए जुगे एगे चउवीसे पव्वसए भवतीति मक्खायं ॥ ५४ ॥ ता पमाणसंवच्छरे णं पंचविहे प०, तंजहा-णक्खत्ते चंदे उद्ध आइचे अभिवद्धिए ॥ ५५ ॥ ता लक्खणसंवच्छरे णं पंचविहे प०, तं०-समगं णक्खत्ता जोयं जोएंति समगं उऊ परिणमंति । णच्चुण्ह णाइसीए बहु-उदए होइ णक्खत्ते ॥ १ ॥ सत्ति समग पुण्णिमासिं जोइंता विसमचारिणक्खत्ता । कडुओ बहूदओ य तमाहु संवच्छरं चंदं ॥ २ ॥ विसमं पवाल्लिणो परिणमंति अणु-ऊसु दिंति पुप्फफलं । वासं न सम्म वासइ तमाहु संवच्छरं कम्मं ॥ ३ ॥ पुढविद-गाणं च रसं पुप्फफलाणं च देइ आइचे । अप्पेणवि वासेणं सम्मं निप्फज्जए सस्सं ॥ ४ ॥ आइचेतेयतविथा खणलवदिवसा उऊ परिणमंति । पूरेइ णिण्णथलए तमाहु अभिवद्धियं जाण ॥ ५ ॥ ता सणिच्छरसंवच्छरे णं अट्ठावीसइविहे प०, तं०-अभीई सवणे जाव उत्तरासाढा, जं वा सणिच्छरे महग्गहे तीसाए संवच्छरेहिं सर्व्वं णक्खत्तमंडलं समाणेइ ॥ ५६ ॥ दसमस्स पाहुडस्स वीसइमं पाहुड-पाहुडं समत्तं ॥ १०-२० ॥

ता कहं ते जोइस्स दारा आहिताति वएज्जा ? तत्थ खलु इमाओ पंच पडि-वत्तीओ पण्णत्ताओ, तं०-तत्थेगे एवमाहंसु-ता कत्तियाइया णं सत्त णक्खत्ता पुव्व-दारिया पण्णत्ता एगे एवमाहंसु १, एगे पुण एवमाहंसु-ता महाइया णं सत्त णक्खत्ता पुव्वदारिया पण्णत्ता एगे एवमाहंसु २, एगे पुण एवमाहंसु-ता धणिट्ठाइया णं सत्त णक्खत्ता पुव्वदारिया पण्णत्ता एगे एवमाहंसु ३, एगे पुण एवमाहंसु-ता अस्सिणी-आइया णं सत्त णक्खत्ता पुव्वदारिया पण्णत्ता एगे एवमाहंसु ४, एगे पुण एव-माहंसु-ता भरणीआइया णं सत्त णक्खत्ता पुव्वदारिया पण्णत्ता ० ५ । तत्थ जे ते एवमाहंसु-ता कत्तियाइया णं सत्त णक्खत्ता पुव्वदारिया पण्णत्ता, ते एवमाहंसु-तं०-कत्तिया रोहिणी संठाणा अहा पुणव्वसू पुस्तो अस्सेसा, महाइया णं सत्त णक्खत्ता

दाहिणदारिया पण्णत्ता, तंजहा-महा पुव्वाफग्गुणी उत्तराफग्गुणी हत्थो चित्ता साई विसाहा, अणुराहाइया णं सत्त णक्खत्ता पच्छिमदारिया पण्णत्ता, तंजहा-अणुराहा जेट्ठा मूले पुव्वासाढा उत्तरासाढा अभिई सवणो, धणिट्ठाइया णं सत्त णक्खत्ता उत्तरदारिया पण्णत्ता, तंजहा-धणिट्ठा सयभिसया पुव्वापोट्ठवया उत्तरा-पोट्ठवया रेवई अस्सिणी भरणी । तत्थ जे ते एवमाहंसु-ता महाइया णं सत्त णक्खत्ता पुव्वदारिया पण्णत्ता, ते एवमाहंसु-तंजहा-महा पुव्वाफग्गुणी हत्थो चित्ता साई विसाहा, अणुराहाइया णं सत्त णक्खत्ता दाहिणदारिया पण्णत्ता, तंजहा-अणुराहा जेट्ठा मूले पुव्वासाढा उत्तरासाढा अभिई सवणे, धणिट्ठाइया णं सत्त णक्खत्ता पच्छिमदारिया पण्णत्ता, तंजहा-धणिट्ठा सयभिसया पुव्वापोट्ठवया उत्तरापोट्ठवया रेवई अस्सिणी भरणी, कत्तियाइया णं सत्त णक्खत्ता उत्तरदारिया पण्णत्ता, तंजहा-कत्तिया रोहिणी संठाणा अद्दा पुणव्वसू पुस्सो अस्सेसा । तत्थ जे ते एवमाहंसु-ता धणिट्ठाइया णं सत्त णक्खत्ता पुव्वदारिया पण्णत्ता, ते एवमाहंसु-तंजहा-धणिट्ठा सयभिसया पुव्वाभट्ठवया उत्तराभट्ठवया रेवई अस्सिणी भरणी, कत्तियाइया णं सत्त णक्खत्ता दाहिणदारिया पण्णत्ता, तंजहा-कत्तिया रोहिणी संठाणा अद्दा पुणव्वसू पुस्सो अस्सेसा, महाइया णं सत्त णक्खत्ता पच्छिमदारिया पण्णत्ता, तंजहा-महा पुव्वाफग्गुणी उत्तराफग्गुणी हत्थो चित्ता साई विसाहा, अणुराहाइया णं सत्त णक्खत्ता उत्तरदारिया पण्णत्ता, तंजहा-अणुराहा जेट्ठा मूले पुव्वासाढा उत्तरासाढा अभीई सवणो । तत्थ जे ते एवमाहंसु-ता अस्सिणी-आइया णं सत्त णक्खत्ता पुव्वदारिया पण्णत्ता ते एवमाहंसु-तंजहा-अस्सिणी भरणी कत्तिया रोहिणी संठाणा अद्दा पुणव्वसू, पुस्साइया णं सत्त णक्खत्ता दाहिणदारिया पण्णत्ता, तंजहा-पुस्सा अस्सेसा महा पुव्वाफग्गुणी उत्तराफग्गुणी हत्थो चित्ता, साईआइया णं सत्त णक्खत्ता पच्छिमदारिया पण्णत्ता, तंजहा-साई विसाहा अणुराहा जेट्ठा मूले पुव्वासाढा उत्तरासाढा, अभीईआइया णं सत्त णक्खत्ता उत्तरदारिया पण्णत्ता, तंजहा-अभिई सवणो धणिट्ठा सयभिसया पुव्वा-भट्ठवया उत्तराभट्ठवया रेवई । तत्थ जे ते एवमाहंसु-ता भरणीआइया णं सत्त णक्खत्ता पुव्वदारिया पण्णत्ता, ते एवमाहंसु-तंजहा-भरणी कत्तिया रोहिणी संठाणा अद्दा पुणव्वसू पुस्सो, अस्सेसाइया णं सत्त णक्खत्ता दाहिणदारिया पण्णत्ता, तंजहा-अस्सेसा महा पुव्वाफग्गुणी उत्तराफग्गुणी हत्थो चित्ता साई, विसाहाइया णं सत्त णक्खत्ता पच्छिमदारिया पण्णत्ता, तं-विसाहा अणुराहा जेट्ठा मूले पुव्वासाढा उत्तरासाढा अभिई, सवणाइया णं सत्त णक्खत्ता उत्तरदारिया पण्णत्ता,



तं०-सवणो धणिट्ठा सयभिसया पुव्वापोट्टवया उत्तरापोट्टवया रेवई अस्सिणी, एए एवमाहुंसु, वयं पुण एवं वयामो-ता अभिईआइया णं सत्त णक्खत्ता पुव्वदारिया प०, तंजहा-अभिई सवणो धणिट्ठा सयभिसया पुव्वापोट्टवया उत्तरापोट्टवया रेवई, अस्सिणीआइया णं सत्त णक्खत्ता दाहिणदारिया पण्णत्ता, तं०-अस्सिणी भरणी कत्तिया रोहिणी संठाणा अद्दा पुणव्वसू, पुस्साइया णं सत्त णक्खत्ता पच्छिम-दारिया पण्णत्ता, तं०-पुस्सो अस्सेसा महा पुव्वाफग्गुणी उत्तराफग्गुणी हत्थो चित्ता, साईआइया णं सत्त णक्खत्ता उत्तरदारिया पण्णत्ता, तं०-साई विसाहा अणुराहा जेट्ठा मूले पुव्वासाढा उत्तरासाढा ॥ ५७ ॥ **दसमस्स पाहुडस्स एकवीसइमं पाहुडपाहुडं समत्तं ॥ १०-२१ ॥**

ता कहं ते णक्खत्तविजए आहिएति वएज्जा ? ता अयण्णं जंबुदीवे २ जाव परिकखेवेणं०, ता जंबुदीवे णं दीवे दो चंदा पभासेंसु वा पभासेंति वा पभासिरसंति वा, दो सूरिया तविंसु वा तवेति वा तविरसंति वा, छप्पण्णं णक्खत्ता जोयं जोएंसु वा ३, तंजहा-दो अभीई दो सवणा दो धणिट्ठा दो सयभिसया दो पुव्वा-पोट्टवया दो उत्तरापोट्टवया दो रेवई दो अस्सिणी दो भरणी दो कत्तिया दो रोहिणी दो संठाणा दो अद्दा दो पुणव्वसू दो पुस्सा दो अस्सेसाओ दो महा दो पुव्वा-फग्गुणी दो उत्तराफग्गुणी दो हत्था दो चित्ता दो साई दो विसाहा दो अणुराहा दो जेट्ठा दो मूला दो पुव्वासाढा दो उत्तरासाढा, ता एएसि णं छप्पण्णाए णक्खत्ताणं अत्थि णक्खत्ता जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं जोयं जोएंति, अत्थि णक्खत्ता जे णं पण्णरस मुहुत्ते चंदेण सद्धिं जोयं जोएंति, अत्थि णक्खत्ता जे णं तीसमुहुत्ते चंदेण सद्धिं जोयं जोएंति, अत्थि णक्खत्ता जे णं पणयालीसं मुहुत्ते चंदेण सद्धिं जोयं जोएंति, ता एएसि णं छप्पण्णाए णक्खत्ताणं कयरे णक्खत्ता जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं जोयं जोएंति, कयरे णक्खत्ता जे णं पण्णरसमुहुत्ते चंदेण सद्धिं जोयं जोएंति, कयरे णक्खत्ता जे णं तीसं मुहुत्ते चंदेण सद्धिं जोयं जोएंति, कयरे णक्खत्ता जे णं पणयालीसं मुहुत्ते चंदेण सद्धिं जोयं जोएंति ? ता एएसि णं छप्पण्णाए णक्खत्ताणं तत्थ जे ते णक्खत्ता जे णं णव मुहुत्ते सत्तावीसं च सत्तट्ठि-भागे मुहुत्तस्स चंदेण सद्धिं जोयं जोएंति ते णं दो अभीई, तत्थ जे ते णक्खत्ता जे णं पण्णरस मुहुत्ते चंदेण सद्धिं जोयं जोएंति ते णं बारस, तंजहा-दो सयभि-सया दो भरणी दो अद्दा दो अस्सेसा दो साई दो जेट्ठा, तत्थ जे ते णक्खत्ता जे णं तीसं मुहुत्ते चंदेण सद्धिं जोयं जोएंति ते णं तीसं, तंजहा-दो सवणा दो

धणिद्धा दो पुव्वाभद्वयया दो रेवई दो अस्सिणी दो कत्तिया दो संठाणा दो पुस्सा  
 दो महा दो पुव्वाफग्गुणी दो हत्था दो चित्ता दो अणुराहा दो मूला दो पुव्वा-  
 साढा, तत्थ जे ते णक्खत्ता जे णं पणयालीसं मुहुत्ते चंदेण सद्धिं जोयं जोएंति  
 ते णं बारस, तंजहा-दो उत्तरापोद्धवया दो रोहिणी दो पुणव्वसू दो उत्तराफग्गुणी  
 दो विसाहा दो उत्तरासाढा, ता एएसि णं छप्पण्णाए णक्खत्ताणं अत्थि णक्खत्ता  
 जे णं चत्तारि अहोरेत्ते छच्च मुहुत्ते सूरिण सद्धिं जोयं जोएंति, अत्थि णक्खत्ता  
 जे णं छ अहोरेत्ते एकवीसं च मुहुत्ते सूरिण सद्धिं जोयं जोएंति, अत्थि णक्खत्ता  
 जे णं तेरस अहोरेत्ते बारसमुहुत्ते सूरिण सद्धिं जोयं जोएंति, अत्थि णक्खत्ता जे णं  
 वीसं अहोरेत्ते तिणिण य मुहुत्ते सूरिण सद्धिं जोयं जोएंति, ता एएसि णं छप्पण्णाए  
 णक्खत्ताणं कयरे णक्खत्ता जे णं तं चेव उच्चारयव्वं, ता एएसि णं छप्पण्णाए  
 णक्खत्ताणं तत्थ जे ते णक्खत्ता जे णं चत्तारि अहोरेत्ते छच्च मुहुत्ते सूरिण सद्धिं  
 जोयं जोएंति ते णं दो अभीई, तत्थ जे ते णक्खत्ता जे णं छ अहोरेत्ते एकवीसं  
 च मुहुत्ते सूरिण सद्धिं जोयं जोएंति ते णं बारस, तंजहा-दो सयभिसया दो अद्दा  
 दो अस्सेसा दो साई दो विसाहा दो जेद्धा, तत्थ जे ते णक्खत्ता जे णं तेरस  
 अहोरेत्ते बारसमुहुत्ते सूरिण सद्धिं जोयं जोएंति ते णं तीसं, तंजहा-दो सवणा  
 जाव दो पुव्वासाढा, तत्थ जे ते णक्खत्ता जे णं वीसं अहोरेत्ते तिणिण य मुहुत्ते  
 सूरिण सद्धिं जोयं जोएंति ते णं बारस, तंजहा-दो उत्तरापोद्धवया जाव दो उत्तरा-  
 साढा ॥ ५८ ॥ ता कहं ते सीमाविक्रंभे आहिएति वएज्जा ? ता एएसि णं  
 छप्पण्णाए णक्खत्ताणं अत्थि णक्खत्ता जेसि णं छ सया तीसा सत्तट्ठिभागती-  
 सइभागणं सीमाविक्रंभो, अत्थि णक्खत्ता जेसि णं सहस्सं पंचोत्तरं सत्तट्ठि-  
 भागतीसइभागणं सीमाविक्रंभो, अत्थि णक्खत्ता जेसि णं दो सहस्सा दसुत्तरा  
 सत्तट्ठिभागतीसइभागणं सीमाविक्रंभो, अत्थि णक्खत्ता जेसि णं तिसहस्सं पंच-  
 दसुत्तरं सत्तट्ठिभागतीसइभागणं सीमाविक्रंभो, ता एएसि णं छप्पण्णाए णक्ख-  
 त्ताणं कयरे णक्खत्ता जेसि णं छ सया तीसा तं चेव उच्चारयव्वं जाव कयरे  
 णक्खत्ता जेसि णं तिसहस्सं पंचदसुत्तरं सत्तट्ठिभागतीसइभागणं सीमाविक्रंभो ?  
 ता एएसि णं छप्पण्णाए णक्खत्ताणं तत्थ जे ते णक्खत्ता जेसि णं छ सया तीसा  
 सत्तट्ठिभागतीसइभागणं सीमाविक्रंभो ते णं दो अभीई, तत्थ जे ते णक्खत्ता  
 जेसि णं सहस्सं पंचुत्तरं सत्तट्ठिभागतीसइभागणं सीमाविक्रंभो ते णं बारस,  
 तंजहा-दो सयभिसया जाव दो जेद्धा, तत्थ जे ते णक्खत्ता जेसि णं दो सहस्सा  
 दसुत्तरा सत्तट्ठिभागतीसइभागणं सीमाविक्रंभो ते णं तीसं, तंजहा-दो सवणा

जाव दो पुव्वासाढा, तत्थ जे ते णक्खत्ता जेसि णं तिण्णि सहस्सा पण्णरसुत्तरा सत्तट्ठिभागतीसइभागणं सीमाविक्खंभो ते णं बारस, तं०-दो उत्तरापोट्टवया जाव दो उत्तरासाढा ॥ ५९ ॥ ता एएसि णं छप्पण्णाए णक्खत्ताणं किं सया पाओ चंदेण सद्धिं जोयं जोएंति, किं सया सायं चंदेण सद्धिं जोयं जोएंति, किं सया दुहुओ पविसिय २ चंदेण सद्धिं जोयं जोएंति ? ता एएसि णं छप्पण्णाए णक्खत्ताणं ण किमवि तं जं सया पाओ चंदेण सद्धिं जोयं जोएंति, णो सया सायं चंदेण सद्धिं जोयं जोएंति, णो सया दुहुओ पविसित्ता २ चंदेण सद्धिं जोयं जोएंति, णत्थि राइंदियाणं तुद्धोवुद्धीए मुहुत्ताणं च चओवचएणं णण्णत्थ दोहिं अमीईहिं, ता एएणं दो असीई पायंचिय पायंचिय चोत्तालीसं २ अमावासं जोएंति, णो चेव णं पुण्णिमासिणि ॥ ६० ॥ तत्थ खलु इमाओ बावट्ठिं पुण्णिमासिणीओ बावट्ठिं अमावासाओ पण्णत्ताओ, ता एएसि णं पंचण्हं संवच्छराणं पढमं पुण्णिमासिणि चंदे कंसि देसंसि जोएइ ? ता जंसि णं देसंसि चंदे चरिमं बावट्ठिं पुण्णिमासिणि जोएइ ताओ पुण्णिमासिणिट्ठाणाओ मंडलं चउव्वीसेणं सएणं छेत्ता दुवत्तीसं भागे उवाइणावेत्ता एत्थ णं से चंदे पढमं पुण्णिमासिणि जोएइ, ता एएसि णं पंचण्हं संवच्छराणं दोच्चं पुण्णिमासिणि चंदे कंसि देसंसि जोएइ ? ता जंसि णं देसंसि चंदे पढमं पुण्णिमासिणि जोएइ ताओ पुण्णिमासिणिट्ठाणाओ मंडलं चउव्वीसेणं सएणं छेत्ता दुवत्तीसं भागे उवाइणावेत्ता एत्थ णं से चंदे दोच्चं पुण्णिमासिणि जोएइ, ता एएसि णं पंचण्हं संवच्छराणं तच्चं पुण्णिमासिणि चंदे कंसि देसंसि जोएइ ? ता जंसि णं देसंसि चंदे पढमं पुण्णिमासिणि जोएइ ताओ पुण्णिमासिणिट्ठाणाओ मंडलं चउव्वीसेणं सएणं छेत्ता दोण्णि अट्ठासीए भागसए उवाइणावेत्ता एत्थ णं से चंदे दुवाल्समं पुण्णिमासिणि जोएइ, एवं खलु एएण्णवाएणं ताओ २ पुण्णिमासिणिट्ठाणाओ मंडलं चउव्वीसेणं सएणं छेत्ता दुवत्तीसं भागे उवाइणावेत्ता तंसि २ देसंसि तं तं पुण्णिमासिणि चंदे जोएइ, ता एएसि णं पंचण्हं संवच्छराणं चरिमं बावट्ठिं पुण्णिमासिणि चंदे कंसि देसंसि जोएइ ? ता जंबुद्दीवस्स णं० पाईणपडीणाययाए उदीणदाहिणाययाए जीवाए मंडलं चउव्वीसेणं सएणं छेत्ता दाहिणिहंसि चउब्भागमंडलंसि सत्तावीसं चउभागे उवाइणावेत्ता अट्ठावीसइभागे वीसहा छेत्ता अट्ठारसभागे उवाइणावेत्ता तिहिं भागेहिं दोहिं य कलाहिं पच्चत्थिमिहं चउ-

अभागमंडलं असंपत्ते एत्थ णं से चंदे चरिमं बावट्ठि पुण्णिमासिणि जोएइ ॥ ६१ ॥ ता एएसि णं पंचण्हं संवच्छराणं पढमं पुण्णिमासिणि सूरं कंसि देसंसि जोएइ ? ता जंसि णं देसंसि सूरं चरिमं बावट्ठि पुण्णिमासिणि जोएइ ताओ पुण्णिमासिणिट्ठाणाओ मंडलं चउव्वीसेणं सएणं छेत्ता चउणवइ भागे उवाइणावेत्ता एत्थ णं से सूरं पढमं पुण्णिमासिणि जोएइ, ता एएसि णं पंचण्हं संवच्छराणं दोच्चं पुण्णिमासिणि सूरं कंसि देसंसि जोएइ ? ता जंसि णं देसंसि सूरं पढमं पुण्णिमासिणि जोएइ ताओ पुण्णिमासिणिट्ठाणाओ मंडलं चउव्वीसेणं सएणं छेत्ता दो चउणवइभागे उवाइणावेत्ता एत्थ णं से सूरं दोच्चं पुण्णिमासिणि जोएइ, ता एएसि णं पंचण्हं संवच्छराणं तच्चं पुण्णिमासिणि सूरं कंसि देसंसि जोएइ ? ता जंसि णं देसंसि सूरं दोच्चं पुण्णिमासिणि जोएइ ताओ पुण्णिमासिणिट्ठाणाओ मंडलं चउव्वीसेणं सएणं छेत्ता चउणउइभागे उवाइणावेत्ता एत्थ णं से सूरं तच्चं पुण्णिमासिणि जोएइ, ता एएसि णं पंचण्हं संवच्छराणं दुवालसमं पुण्णिमासिणि सूरं कंसि देसंसि जोएइ ? ता जंसि णं देसंसि सूरं तच्चं पुण्णिमासिणि जोएइ ताओ पुण्णिमासिणिट्ठाणाओ मंडलं चउव्वीसेणं सएणं छेत्ता अट्ठछताले भागसए उवाइणावेत्ता एत्थ णं से सूरं दुवालसमं पुण्णिमासिणि जोएइ, एवं खलु एणुवाएणं ताओ २ पुण्णिमासिणिट्ठाणाओ मंडलं चउव्वीसेणं सएणं छेत्ता चउणउइ २ भागे उवाइणावेत्ता तंसि २ देसंसि तं तं पुण्णिमासिणि सूरं जोएइ, ता एएसि णं पंचण्हं संवच्छराणं चरिमं बावट्ठि पुण्णिमासिणि सूरं कंसि देसंसि जोएइ ? ता जंबुदीवस्स णं पाईणपडीणाययाए उदीणदाहिणाययाए जीवाए मंडलं चउव्वीसेणं सएणं छेत्ता पुरच्छिमिल्लंसि चउभागमंडलंसि सत्तावीसं भागे उवाइणावेत्ता अट्ठावीसइमं भागं वीसहा छेत्ता अट्ठारसभागे उवाइणावेत्ता तिहिं भागेहिं दोहि य कलाहिं दाहिणिळं चउभागमंडलं असंपत्ते एत्थ णं सूरं चरिमं बावट्ठि पुण्णिमं जोएइ ॥ ६२ ॥ ता एएसि णं पंचण्हं संवच्छराणं पढमं अमावासं चंदे कंसि देसंसि जोएइ ? ता जंसि णं देसंसि चंदे चरिमबावट्ठि अमावासं जोएइ ताओ अमावासट्ठाणाओ मंडलं चउव्वीसेणं सएणं छेत्ता दुवत्तीसं भागे उवाइणावेत्ता एत्थ णं से चंदे पढमं अमावासं जोएइ, एवं जेणेव अभिलावेणं चंदस्स पुण्णिमासिणीओ० तेणेव अभिलावेणं अमावासाओवि भाणियव्वाओ-विइया तइया दुवालसमी, एवं खलु एणुवाएणं ताओ २ अमावासट्ठाणाओ मंडलं चउव्वीसेणं सएणं छेत्ता दुवत्तीसं २ भागे उवाइणावेत्ता तंसि २ देसंसि तं तं अमावासं० चंदे जोएइ, ता एएसि णं पंचण्हं संवच्छराणं चरिमं बावट्ठि अमावासं चंदे कंसि देसंसि जोएइ ? ता जंसि णं देसंसि चंदे चरिमं बावट्ठि पुण्णिमासिणि जोएइ ताओ

पुण्णिमासिणिट्ठाणाओ मंडलं चउव्वीसेणं सएणं छेत्ता सोलसभागे उक्कोवइत्ता एत्थ णं से चंदे चरिमं बावट्ठिं अमावासं जोएइ ॥ ६३ ॥ ता एएसि णं पंचण्हं संवच्छराणं पढमं अमावासं सूरै केसि देसंसि जोएइ ? ता जंसि णं देसंसि सूरै चरिमं बावट्ठिं अमावासं जोएइ ताओ अमावासट्ठाणाओ मंडलं चउव्वीसेणं सएणं छेत्ता चउणउइभागे उवाइणावेत्ता एत्थ णं से सूरै पढमं अमावासं जोएइ, एवं जेणेव अभिलावेणं सूरियस्स पुण्णिमासिणीओ० तेणेव अमावासाओवि०, तंजहा-विइया तइया दुवालसमी, एवं खल्ल एएणुवाएणं ताओ अमावासट्ठाणाओ मंडलं चउव्वीसेणं सएणं छेत्ता चउणउइ २ भागे उवाइणावेत्ता तंसि २ देसंसि तं २ अमावासं० सूरै जोएइ, ता एएसि णं पंचण्हं संवच्छराणं चरिमं बावट्ठिं अमावासं पुच्छा, ता जंसि णं देसंसि सूरै चरिमं बावट्ठिं पुण्णिमासिणिं जोएइ ताओ पुण्णिमासिणिट्ठाणाओ मंडलं चउव्वीसेणं सएणं छेत्ता सत्तालीसं भागे उक्कोवइत्ता एत्थ णं से सूरै चरिमं बावट्ठिं अमावासं जोएइ ॥ ६४ ॥ ता एएसि णं पंचण्हं संवच्छराणं पढमं पुण्णिमासिणिं चंदे केणं णक्खत्तेणं (जोयं) जोएइ ? ता धणिट्ठाहिं, धणिट्ठाणं तिण्णि मुहुत्ता एगूणवीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता पण्णट्ठिं चुण्णियाभागा सेसा, तं समयं च णं सूरै केणं णक्खत्तेणं जोएइ ? ता पुव्वाफग्गुणीहिं, पुव्वाफग्गुणीणं अट्ठावीसं मुहुत्ता अट्ठतीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता दुवतीसं चुण्णियाभागा सेसा, ता एएसि णं पंचण्हं संवच्छराणं दोच्चं पुण्णिमासिणिं चंदे केणं णक्खत्तेणं जोएइ ? ता उत्तराहिं पोट्ठवयाहिं, उत्तराणं पोट्ठवयाणं सत्तावीसं मुहुत्ता चोइस य बावट्ठिभागे मुहुत्तस्स बावट्ठिभागं च सत्तट्ठिहा छेत्ता बावट्ठिं चुण्णियाभागा सेसा, तं समयं च णं सूरै केणं णक्खत्तेणं जोएइ ? ता उत्तराहिं फग्गुणीहिं, उत्तराफग्गुणीणं सत्त मुहुत्ता तेत्तीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता एकवीसं चुण्णियाभागा सेसा, ता एएसि णं पंचण्हं संवच्छराणं तच्चं पुण्णिमासिणिं चंदे केणं णक्खत्तेणं जोएइ ? ता अस्सिणीहिं, अस्सिणीणं एकवीसं मुहुत्ता णव य एगट्ठिभागा मुहुत्तस्स बावट्ठिभागं च सत्तट्ठिहा छेत्ता तेवट्ठिं चुण्णियाभागा सेसा, तं समयं च णं सूरै केणं णक्खत्तेणं जोएइ ? ता चित्ताहिं, चित्ताणं एको मुहुत्तो अट्ठावीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता तीसं चुण्णियाभागा सेसा, ता एएसि णं पंचण्हं संवच्छराणं दुवालसमं पुण्णिमासिणिं चंदे केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं छदुवीसं मुहुत्ता छदुवीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता चउप्पण्णं चुण्णियाभागा सेसा, तं समयं च णं सूरै केणं णक्खत्तेणं जोएइ ? ता पुणव्वसुणा, पुणव्वसुस्स सोलसमु-

हुत्ता अट्ट य वावट्ठिभागा मुहुत्तस्स वावट्ठिभागं च सत्तट्ठिहा छेत्ता वीसं चुण्णिया-  
 भागा सेसा, ता एएसि णं पंचण्हं संवच्छराणं चरिमं वावट्ठि पुण्णिमासिणि चंदे केणं  
 णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चरमसमए, तं  
 समयं च णं सूरं केणं णक्खत्तेणं जोएइ ? ता पुस्सेणं, पुस्सस्स एगूणवीसं मुहुत्ता  
 तेयालीसं च वावट्ठिभागा मुहुत्तस्स वावट्ठिभागं च सत्तट्ठिहा छेत्ता तेत्तीसं चुण्णिया-  
 भागा सेसा ॥ ६५ ॥ ता एएसि णं पंचण्हं संवच्छराणं पढमं अमावासं चंदे केणं  
 णक्खत्तेणं जोएइ ? ता अस्सेसाहिं, अस्सेसाणं एक्के मुहुत्ते चत्तालीसं च वावट्ठि-  
 भागा मुहुत्तस्स वावट्ठिभागं च सत्तट्ठिहा छेत्ता वावट्ठि चुण्णियाभागा सेसा, तं  
 समयं च णं सूरं केणं णक्खत्तेणं जोएइ ? ता अस्सेसाहिं चेव, अस्सेसाणं एक्को  
 मुहुत्तो चत्तालीसं च वावट्ठिभागा मुहुत्तस्स वावट्ठिभागं च सत्तट्ठिहा छेत्ता वावट्ठि  
 चुण्णियाभागा सेसा, ता एएसि णं पंचण्हं संवच्छराणं दोच्चं अमावासं चंदे केणं  
 णक्खत्तेणं जोएइ ? ता उत्तराहिं फग्गुणीहिं, उत्तराणं फग्गुणीणं चत्तालीसं मुहुत्ता  
 पणतीसं वावट्ठिभागा मुहुत्तस्स वावट्ठिभागं च सत्तट्ठिहा छेत्ता पण्णट्ठि चुण्णियाभागा  
 सेसा, तं समयं च णं सूरं केणं णक्खत्तेणं जोएइ ? ता उत्तराहिं चेव फग्गुणीहिं,  
 उत्तराणं फग्गुणीणं जहेव चंदस्स । ता एएसि णं पंचण्हं संवच्छराणं तच्चं अमावासं  
 चंदे केणं णक्खत्तेणं जोएइ ? ता हत्थेणं, हत्थस्स चत्तारि मुहुत्ता तीसं च वावट्ठि-  
 भागा मुहुत्तस्स वावट्ठिभागं च सत्तट्ठिहा छेत्ता वावट्ठि चुण्णियाभागा सेसा, तं  
 समयं च णं सूरं केणं णक्खत्तेणं जोएइ ? ता हत्थेणं चेव, हत्थस्स जहा चंदस्स,  
 ता एएसि णं पंचण्हं संवच्छराणं दुवालसमं अमावासं चंदे केणं णक्खत्तेणं जोएइ ?  
 ता अद्दाहिं, अद्दाणं चत्तारि मुहुत्ता दस य वावट्ठिभागा मुहुत्तस्स वावट्ठिभागं च सत्त-  
 ट्ठिहा छेत्ता चउप्पणं चुण्णियाभागा सेसा, तं समयं च णं सूरं केणं णक्खत्तेणं जोएइ ?  
 ता अद्दाहिं चेव, अद्दाणं जहा चंदस्स । ता एएसि णं पंचण्हं संवच्छराणं चरिमं वावट्ठि  
 अमावासं चंदे केणं णक्खत्तेणं जोएइ ? ता पुणव्वसुणा, पुणव्वसुस्स बावीसं मुहुत्ता  
 बायालीसं च वावट्ठिभागा मुहुत्तस्स सेसा, तं समयं च णं सूरं केणं णक्खत्तेणं  
 जोएइ ? ता पुणव्वसुणा चेव, पुणव्वसुस्स णं जहा चंदस्स ॥ ६६ ॥ ता जेणं  
 अज्जणक्खत्तेणं चंदे जोयं जोएइ जंसि देसंसि से णं इमाइं अट्ट एगूणवीसाइं मुहुत्त-  
 सयाइं चउवीसं च वावट्ठिभागे मुहुत्तस्स वावट्ठिभागं च सत्तट्ठिहा छेत्ता वावट्ठि  
 चुण्णियाभागे उवाइणावेत्ता पुणरवि से चंदे अण्णेणं सरिसएणं चेव णक्खत्तेणं जोयं  
 जोएइ अण्णंसि देसंसि, ता जेणं अज्जणक्खत्तेणं चंदे जोयं जोएइ जंसि देसंसि से णं  
 इमाइं सोलस अट्टतीसे मुहुत्तसयाइं अउणापण्णं च वावट्ठिभागे मुहुत्तस्स वावट्ठिभागं

च सत्तट्ठिहा छेत्ता पण्णट्ठिं चुण्णियाभागे उवाइणावेत्ता पुणरवि से णं चंदे तेणं चेव  
 णक्खत्तेणं जोयं जोएइ अण्णंसि देसंसि, ता जेणं अज्जणक्खत्तेणं चंदे जोयं जोएइ जंसि  
 देसंसि से णं इमाइं चउप्पण्णमुहुत्तसहस्साइं णव य मुहुत्तसयाइं उवाइणावेत्ता पुण-  
 रवि से चंदे अण्णेणं तारिसएणं चेव० जोयं जोएइ तंसि देसंसि, ता जेणं अज्जणक्खत्तेणं  
 चंदे जोयं जोएइ जंसि देसंसि से णं इमाइं एगं लक्खं णव य सहस्से अट्ठ य  
 मुहुत्तसए उवाइणावेत्ता पुणरवि से चंदे तेणं चेव णक्खत्तेणं जोयं जोएइ तंसि  
 देसंसि, ता जेणं अज्जणक्खत्तेणं सूरे जोयं जोएइ जंसि देसंसि से णं इमाइं तिण्णि  
 छावट्ठाइं राइंदियसयाइं उवाइणावेत्ता पुणरवि से सूरिए अण्णेणं तारिसएणं चेव  
 णक्खत्तेणं जोयं जोएइ तंसि देसंसि, ता जेणं अज्जणक्खत्तेणं सूरे जोयं जोएइ तंसि  
 देसंसि से णं इमाइं सत्तडुवीसं राइंदियसयाइं उवाइणावेत्ता पुणरवि से सूरे तेणं चेव  
 णक्खत्तेणं जोयं जोएइ तंसि देसंसि, ता जेणं अज्जणक्खत्तेणं सूरे जोयं जोएइ जंसि  
 देसंसि से णं इमाइं अट्ठारस वीसाइं राइंदियसयाइं उवाइणावेत्ता पुणरवि से सूरे  
 अण्णेणं चेव णक्खत्तेणं जोयं जोएइ तंसि देसंसि, ता जेणं अज्जणक्खत्तेणं सूरे जोयं  
 जोएइ जंसि देसंसि तेणं इमाइं छत्तीसं सट्ठाइं राइंदियसयाइं उवाइणावेत्ता पुणरवि  
 से सूरे तेणं चेव णक्खत्तेणं जोयं जोएइ तंसि देसंसि ॥ ६७ ॥ ता जया णं इमे  
 चंदे गइसमावण्णए भवइ तया णं इयरेवि चंदे गइसमावण्णए भवइ, जया णं  
 इयरे चंदे गइसमावण्णए भवइ तया णं इमेवि चंदे गइसमावण्णए भवइ, ता  
 जया णं इमे सूरिए गइसमावण्णे भवइ तया णं इयरेवि सूरिए गइसमावण्णे भवइ,  
 जया णं इयरे सूरिए गइसमावण्णे भवइ तया णं इमेवि सूरिए गइसमावण्णे भवइ,  
 एवं गहेवि णक्खत्तेवि, ता जया णं इमे चंदे जुत्ते जोगेणं भवइ तया णं इयरेवि  
 चंदे जुत्ते जोगेणं भवइ, जया णं इयरे चंदे जुत्ते जोगेणं भवइ तया णं इमेवि चंदे  
 जुत्ते जोगेणं भवइ, एवं सूरैवि गहेवि णक्खत्तेवि, सयावि णं चंदा जुत्ता जोगेहिं  
 सयावि णं सूरा जुत्ता जोगेहिं सयावि णं गहा जुत्ता जोगेहिं सयावि णं णक्खत्ता  
 जुत्ता जोगेहिं दुहओवि णं चंदा जुत्ता जोगेहिं दुहओवि णं सूरा जुत्ता जोगेहिं  
 दुहओवि णं गहा जुत्ता जोगेहिं दुहओवि णं णक्खत्ता जुत्ता जोगेहिं, मंडळं सय-  
 सहस्सेणं अट्ठाणउयाए सएहिं छेत्ता । इच्चेस णक्खत्ते खेत्तपरिभागे णक्खत्तविजए  
 पाहुडेति आहिएत्ति-वेमि ॥ ६८ ॥ दसमस्स पाहुडस्स बावीसइमं पाहुड-  
 पाहुडं समत्तं ॥ १०-२२ ॥ दसमं पाहुडं समत्तं ॥ १० ॥

ता कहं ते संवच्छराणाइं आहिएत्ति वएज्जा ? तत्थ खलु इमे पंच संवच्छरा  
 पण्णत्ता, तंजहा-चंदे २ अभिवट्ठिए चंदे अभिवट्ठिए, ता एएसि णं पंचण्हं संवच्छ-

राणं पढमस्स चंदसंवच्छरस्स के आई आहिएति वएज्जा ? ता जे णं पंचमस्स अभिवद्धियसंवच्छरस्स पञ्चवसाणे से णं पढमस्स चंदसंवच्छरस्स आई अणंतर-पुरक्खडे समए, ता से णं किं पञ्चवसिए आहिएति वएज्जा ? ता जे णं दोच्चस्स चंदसंवच्छरस्स आई से णं पढमस्स चंदसंवच्छरस्स पञ्चवसाणे अणंतरपच्छाकडे समए, तं समयं च णं चंदे केणं णक्खत्तेणं (जोगं) जोएइ ? ता उत्तराहिं आसा-ढाहिं, उत्तराणं आसाढाणं छदुवीसं मुहुत्ता छदुवीसं च वावट्ठिभागा मुहुत्तस्स वाव-ट्ठिभागं च सत्तट्ठिहा छेता चउप्पणं चुणियाभागा सेसा, तं समयं च णं सूरे केणं णक्खत्तेणं जोएइ ? ता पुणव्वसुणा, पुणव्वसुस्स सोलस मुहुत्ता अट्ठ य वाव-ट्ठिभागा मुहुत्तस्स वावट्ठिभागं च सत्तट्ठिहा छेता वीसं चुणियाभागा सेसा । ता एएसि णं पंचण्हं संवच्छराणं दोच्चस्स चंदसंवच्छरस्स के आई आहिएति वएज्जा ? ता जे णं पढमस्स चंदसंवच्छरस्स पञ्चवसाणे से णं दोच्चस्स चंदसंवच्छरस्स आई अणंतरपुरक्खडे समए, ता से णं किं पञ्चवसिए आहिएति वएज्जा ? ता जे णं तच्चस्स अभिवद्धियसंवच्छरस्स आई से णं दोच्चस्स चंदसंवच्छरस्स पञ्चवसाणे अणंतरपच्छाकडे समए, तं समयं च णं चंदे केणं णक्खत्तेणं जोएइ ? ता पुव्वहिं आसाढाहिं, पुव्वाणं आसाढाणं सत्त मुहुत्ता तेवणं च वावट्ठिभागा मुहुत्तस्स वावट्ठिभागं च सत्तट्ठिहा छेता इगतालीसं चुणियाभागा सेसा, तं समयं च णं सूरे केणं णक्खत्तेणं [जोयं] जोएइ ? ता पुणव्वसुणा, पुणव्वसुस्स णं बायालीसं मुहुत्ता पणतीसं च वावट्ठिभागा मुहुत्तस्स वावट्ठिभागं च सत्तट्ठिहा छेता सत्त चुणिया-भागा सेसा । ता एएसि णं पंचण्हं संवच्छराणं तच्चस्स अभिवद्धियसंवच्छरस्स के आई आहिएति वएज्जा ? ता जे णं दोच्चस्स चंदसंवच्छरस्स पञ्चवसाणे से णं तच्चस्स अभिवद्धियसंवच्छरस्स आई अणंतरपुरक्खडे समए, ता से णं किं पञ्चवसिए आहिएति वएज्जा ? ता जे णं चउत्थस्स चंदसंवच्छरस्स आई से णं तच्चस्स अभि-वद्धियसंवच्छरस्स पञ्चवसाणे अणंतरपच्छाकडे समए, तं समयं च णं चंदे केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं तेरस मुहुत्ता तेरस य वावट्ठिभागा मुहुत्तस्स वावट्ठिभागं च सत्तट्ठिहा छेता सत्तावीसं च चुणि-याभागा सेसा, तं समयं च णं सूरे केणं णक्खत्तेणं जोएइ ? ता पुणव्वसुणा, पुण-व्वसुस्स दो मुहुत्ता छप्पणं च वावट्ठिभागा मुहुत्तस्स वावट्ठिभागं च सत्तट्ठिहा छेता सट्ठी चुणियाभागा सेसा । ता एएसि णं पंचण्हं संवच्छराणं चउत्थस्स चंदसंवच्छ-रस्स के आई आहिएति वएज्जा ? ता जे णं तच्चस्स अभिवद्धियसंवच्छरस्स पञ्चव-साणे से णं चउत्थस्स चंदसंवच्छरस्स आई अणंतरपुरक्खडे समए, ता से णं किं



पज्जवसिए आहिएति वएज्जा ? ता जे णं चरिमस्स अभिवद्धियसंवच्छरस्स आई से णं चउत्थस्स चंदसंवच्छरस्स पज्जवसाणे अणंतरपच्छाकडे समए, तं समयं च णं चंदे केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चत्तालीसं मुहुत्ता चत्तालीसं च बासट्ठिभागा मुहुत्तस्स बावट्ठिभागं च सत्तट्ठिहा छेत्ता चउसट्ठी चुण्णियाभागा सेसा, तं समयं च णं सूरे केणं णक्खत्तेणं जोएइ ? ता पुणव्वसुणा, पुणव्वसुस्स अउणतीसं मुहुत्ता एकवीसं बावट्ठिभागा मुहुत्तस्स बावट्ठिभागं च सत्तट्ठिहा छेत्ता सीयालीसं चुण्णियाभागा सेसा । ता एएसि णं पंचण्हं संवच्छराणं पंचमस्स अभिवद्धियसंवच्छरस्स के आई आहिएति वएज्जा ? ता जे णं चउत्थस्स चंदसंवच्छरस्स पज्जवसाणे से णं पंचमस्स अभिवद्धियसंवच्छरस्स आई अणंतरपुरक्खडे समए, ता से णं किं पज्जवसिए आहिएति वएज्जा ? ता जे णं पढमस्स चंदसंवच्छरस्स आई से णं पंचमस्स अभिवद्धियसंवच्छरस्स पज्जवसाणे अणंतरपच्छाकडे समए, तं समयं च णं चंदे केणं णक्खत्तेणं जोएइ ? ता उत्तराहिं आसाढाहिं, उत्तराणं० चरमसमए, तं समयं च णं सूरे केणं णक्खत्तेणं जोएइ ? ता पुस्सेणं, पुस्सत्त णं एकवीसं मुहुत्ता तेयालीसं च बावट्ठिभागे मुहुत्तस्स बावट्ठिभागं च सत्तट्ठिहा छेत्ता तेत्तीसं चुण्णियाभागा सेसा ॥ ६९ ॥ **एक्कारसमं पाहुडं समत्तं ॥ ११ ॥**

ता कइ णं संवच्छरा आहिताति वएज्जा ? तत्थ खलु इमे पंच संवच्छरा पण्णत्ता, तंजहा-णक्खत्ते चंदे उइ आइच्चे अभिवद्धिए, ता एएसि णं पंचण्हं संवच्छराणं पढमस्स णक्खत्तसंवच्छरस्स णक्खत्तमासे तीसइमुहुत्तेणं अहोरेत्तेणं भिज्जमाणे केवइए राइंदियगेणं आहिएति वएज्जा ? ता सत्तावीसं राइंदियाइ एकवीसं च सत्तट्ठिभागा राइंदियस्स राइंदियगेणं आहिएति वएज्जा, ता से णं केवइए मुहुत्तगेणं आहिएति वएज्जा ? ता अट्ठसए एगूणवीसे मुहुत्ताणं सत्तावीसं च सत्तट्ठिभागे मुहुत्तस्स मुहुत्तगेणं आहिएति वएज्जा, ता एस णं अट्ठा दुवालसक्खुत्तकडा णक्खत्ते संवच्छरे, ता से णं केवइए राइंदियगेणं आहिएति वएज्जा ? ता तिण्णि सत्तावीसे राइंदियसए एक्कावण्णं च सत्तट्ठिभागे राइंदियस्स राइंदियगेणं आहिएति वएज्जा, ता से णं केवइए मुहुत्तगेणं आहिएति वएज्जा ? ता णव मुहुत्तसहस्सा अट्ठ य बत्तीसे मुहुत्तसए छप्पणं च सत्तट्ठिभागे मुहुत्तस्स मुहुत्तगेणं आहिएति वएज्जा । ता एएसि णं पंचण्हं संवच्छराणं दोच्चस्स चंदसंवच्छरस्स चंदे मासे तीसइमुहुत्तेणं अहोरेत्तेणं गणिज्जमाणे केवइए राइंदियगेणं आहिएति वएज्जा ? ता एगूणतीसं राइंदियाइ बत्तीसं बावट्ठिभागा राइंदियस्स राइंदियगेणं आहिएति वएज्जा, ता से णं केवइए मुहुत्त-

ग्गेणं आहिएति वएज्जा ? ता अट्ठपंचासए मुहुत्ते तेत्तीसं च छावट्ठिभागे मुहुत्तग्गेणं  
 आहिएति वएज्जा, ता एस णं अट्ठा दुवाल्सक्खुत्तकडा चंदे संवच्छरे, ता से णं केव-  
 इए राईदियग्गेणं आहिएति वएज्जा ? ता तिण्णि चउत्पण्णे राईदियसए दुवाल्स  
 य बावट्ठिभागा राईदियग्गेणं आहिएति वएज्जा, ता से णं केवइए मुहुत्तग्गेणं आहिएति  
 वएज्जा ? ता दस मुहुत्तसहस्साई छच्च पणवीसे मुहुत्तसए पण्णासं च बावट्ठिभागे  
 मुहुत्तग्गेणं आहिएति वएज्जा । ता एएसि णं पंचण्हं संवच्छराणं तच्चस्स उडुसंवच्छरस्स  
 उडुमासे तीसइमुहुत्तेणं० गणिज्जमाणे केवइए राईदियग्गेणं आहिएति वएज्जा ? ता  
 तीसं राईदियाणं राईदियग्गेणं आहिएति वएज्जा, ता से णं केवइए मुहुत्तग्गेणं आहि-  
 एति वएज्जा ? ता णव मुहुत्तसयाई मुहुत्तग्गेणं आहिएति वएज्जा, ता एस णं अट्ठा  
 दुवाल्सक्खुत्तकडा उडु संवच्छरे, ता से णं केवइए राईदियग्गेणं आहिएति वएज्जा ?  
 ता तिण्णि सट्ठे राईदियसए राईदियग्गेणं आहिएति वएज्जा, ता से णं केवइए मुहुत्तग्गेणं  
 आहिएति वएज्जा ? ता दस मुहुत्तसहस्साई अट्ठ य सयाई मुहुत्तग्गेणं आहिएति  
 वएज्जा । ता एएसि णं पंचण्हं संवच्छराणं चउत्थस्स आइच्चसंवच्छरस्स आइच्चे मासे  
 तीसइमुहुत्तेणं अहोरत्तेणं गणिज्जमाणे केवइए राईदियग्गेणं आहिएति वएज्जा ?  
 ता तीसं राईदियाई अवट्ठुभागं च राईदियस्स राईदियग्गेणं आहिएति वएज्जा, ता  
 से णं केवइए मुहुत्तग्गेणं आहिएति वएज्जा ? ता णव पण्णरस मुहुत्तसए मुहुत्त-  
 ग्गेणं आहिएति वएज्जा, ता एस णं अट्ठा दुवाल्सक्खुत्तकडा आइच्चे संवच्छरे, ता  
 से णं केवइए राईदियग्गेणं आहिएति वएज्जा ? ता तिण्णि छावट्ठे राईदियसए राई-  
 दियग्गेणं आहिएति वएज्जा, ता से णं केवइए मुहुत्तग्गेणं आहिएति वएज्जा ? ता  
 दस मुहुत्तस्स सहस्साई णव असीए मुहुत्तसए मुहुत्तग्गेणं आहिएति वएज्जा । ता  
 एएसि णं पंचण्हं संवच्छराणं पंचमस्स अभिवट्ठियसंवच्छरस्स अभिवट्ठिए मासे  
 तीसइमुहुत्तेणं गणिज्जमाणे केवइए राईदियग्गेणं आहिएति वएज्जा ? ता एकतीसं  
 राईदियाई एगूणतीसं च मुहुत्ता सत्तरस बावट्ठिभागे मुहुत्तस्स राईदियग्गेणं आहिएति  
 वएज्जा, ता से णं केवइए मुहुत्तग्गेणं आहिएति वएज्जा ? ता णव एगूणसट्ठे मुहुत्तसए  
 सत्तरस बावट्ठिभागे मुहुत्तस्स मुहुत्तग्गेणं आहिएति वएज्जा, ता एस णं अट्ठा दुवाल्-  
 सक्खुत्तकडा अभिवट्ठियसंवच्छरे, ता से णं केवइए राईदियग्गेणं आहिएति वएज्जा ?  
 ता तिण्णि तेसीए राईदियसए एकवीसं च मुहुत्ता अट्ठारस बावट्ठिभागे मुहुत्तस्स  
 राईदियग्गेणं आहिएति वएज्जा, ता से णं केवइए मुहुत्तग्गेणं आहिएति वएज्जा ? ता  
 एकारस मुहुत्तसहस्साई पंच य एकारस मुहुत्तसए अट्ठारस बावट्ठिभागे मुहुत्तस्स  
 मुहुत्तग्गेणं आहिएति वएज्जा ॥ ७० ॥ ता केवइयं ते नोजुगे राईदियग्गेणं आहिएति

वएज्जा ? ता सत्तरस एकाणउए राईदियसए एगूणवीसं च मुहुत्तं सत्तावण्णे वावट्ठि-  
भागे मुहुत्तस्स वावट्ठिभागं च सत्तट्ठिहा छेत्ता पणपण्णं चुण्णिआभागे राईदियग्गेणं  
आहिएति वएज्जा, ता से णं केवइए मुहुत्तग्गेणं आहिएति वएज्जा ? ता तेपण्णमुहुत्त-  
सहस्साईं सत्त य अउणापण्णे मुहुत्तसए सत्तावण्णं वावट्ठिभागे मुहुत्तस्स वावट्ठि-  
भागं च सत्तट्ठिहा छेत्ता पणपण्णं चुण्णिआभागा मुहुत्तग्गेणं आहिएति वएज्जा, ता  
केवइए णं ते जुगप्पत्ते राईदियग्गेणं आहिएति वएज्जा ? ता अट्ठतीसं राईदियाईं दस य  
मुहुत्ता चत्तारि य वावट्ठिभागे मुहुत्तस्स वावट्ठिभागं च सत्तट्ठिहा छेत्ता दुवालस चुण्णि-  
आभागे राईदियग्गेणं आहिएति वएज्जा, ता से णं केवइए मुहुत्तग्गेणं आहिएति वएज्जा ?  
ता एकारस पण्णासे मुहुत्तसए चत्तारि य वावट्ठिभागे वावट्ठिभागं च सत्तट्ठिहा  
छेत्ता दुवालस चुण्णिआभागे मुहुत्तग्गेणं आहिएति वएज्जा, ता केवइयं जुगे राईदिय-  
ग्गेणं आहिएति वएज्जा ? ता अट्ठारसतीसे राईदियसए राईदियग्गेणं आहिएति वएज्जा,  
ता से णं केवइए मुहुत्तग्गेणं आहिएति वएज्जा ? ता चउप्पणं मुहुत्तसहस्साईं णव  
य मुहुत्तसयाईं मुहुत्तग्गेणं आहिएति वएज्जा, ता से णं केवइए वावट्ठिभागमुहुत्तग्गेणं  
आहिएति वएज्जा ? ता चउत्तीसं सयसहस्साईं अट्ठतीसं च वावट्ठिभागमुहुत्तसए  
वावट्ठिभागमुहुत्तग्गेणं आहिएति वएज्जा ॥ ७१ ॥ ता कया णं एए आइच्चचंद-  
संवच्छरा समाइया समपज्जवसिया आहितेति वएज्जा ? ता सट्ठिं एए आइच्चमासा  
वावट्ठिं एए चंदमासा, एस णं अद्धा छक्खुत्तकडा दुवालसभइया तीसं एए आइच्च-  
संवच्छरा एकतीसं एए चंदसंवच्छरा, तया णं एए आइच्चचंदसंवच्छरा समाइया  
समपज्जवसिया आहिताति वएज्जा । ता कया णं एए आइच्चउडुचंदणक्खत्ता  
संवच्छरा समाइया समपज्जवसिया आहितेति वएज्जा ? ता सट्ठिं एए आइच्चमासा  
एगट्ठिं एए उडुमासा वावट्ठिं एए चंदमासा सत्तट्ठिं एए णक्खत्तामासा, एस णं अद्धा  
दुवालसक्खुत्तकडा दुवालसभइया सट्ठिं एए आइच्चा संवच्छरा एगट्ठिं एए उडुसंवच्छरा  
वावट्ठिं एए चंदा संवच्छरा सत्तट्ठिं एए णक्खत्ता संवच्छरा, तया णं एए आइच्च-  
उडुचंदणक्खत्ता संवच्छरा समाइया समपज्जवसिया आहितेति वएज्जा । ता कया णं  
एए अभिवड्ढियआइच्चउडुचंदणक्खत्ता संवच्छरा समाइया समपज्जवसिया आहितेति  
वएज्जा ? ता सत्तावण्णं मासा सत्त य अहोरत्ता एकारस य मुहुत्ता तेवीसं वावट्ठिभागा  
मुहुत्तस्स एए अभिवड्ढिया मासा सट्ठिं एए आइच्चमासा एगट्ठिं एए उडुमासा  
वावट्ठिं एए चंदमासा सत्तट्ठिं एए णक्खत्तामासा, एस णं अद्धा छप्पणसयक्खुत्तकडा  
दुवालसभइया सत्त सया चोत्ताला एए णं अभिवड्ढिया संवच्छरा, सत्त सया असीया  
एए णं आइच्चा संवच्छरा, सत्त सया तेणउया एए णं उडुसंवच्छरा अट्ठसया छल्लतरा

एए णं चंदा संवच्छरा, एकसत्तरी अट्टसया एए णं णक्खत्ता संवच्छरा, तया णं एए अभिवड्ढिया आइच्चउड्डुचंदणक्खत्ता संवच्छरा समाइया समपज्जवसिया आहितेति वएजा, ता णयट्ठयाए णं चंदे संवच्छरे तिणिण चउप्पण्णे राईदियसए दुवाल्स य बावट्ठिभागे राईदियस्स आहिएति वएजा, ता अहातच्चेणं चंदे संवच्छरे तिणिण चउप्पण्णे राईदियसए पंच य मुहुत्ते पण्णासं च बावट्ठिभागे मुहुत्तस्स आहिएति वएजा ॥ ७२ ॥ तत्थ खलु इमे छ उड्डु पण्णत्ता, तंजहा-पाउसे वरिसारत्ते सरए हेमंते वसंते गिम्हे, ता सव्वेवि णं एए चंदउड्डु दुवे २ मासाइ चउप्पण्णेणं २ आयाणेणं गणिजमाणा साइरेगाइं एगूणसट्ठि २ राईदियाइं राईदियगेणं आहितेति वएजा, तत्थ खलु इमे छ ओमरत्ता पण्णत्ता, तंजहा-तइए पव्वे सत्तमे पव्वे एक्कार-समे पव्वे पण्णरसमे पव्वे एगूणवीसइमे पव्वे तेवीसइमे पव्वे, तत्थ खलु इमे छ अइरत्ता प०, तं०-चउत्थे पव्वे अट्टमे पव्वे वारसमे पव्वे सोलसमे पव्वे वीसइमे पव्वे चउवीसइमे पव्वे । छच्चेव य अइरत्ता आइच्चाओ हवंति माणाइं । छच्चेव ओम-रत्ता चंदाहि हवंति माणाहिं ॥ १ ॥ ७३ ॥ तत्थ खलु इमाओ पंच वासिकीओ पंच हेमंताओ आउट्ठीओ पण्णत्ताओ, ता एएसि णं पंचण्हं संवच्छराणं पढमं वासिकिं आउट्ठिं चंदे केणं णक्खत्तेणं जोएइ ? ता असीइणा, असीइस्स पढमसमएणं, तं समयं च णं सूरे केणं णक्खत्तेणं जोएइ ? ता पूसेणं, पूसस्स एगूणवीसं मुहुत्ता तेत्तालीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता तेत्तीसं चुण्णिया-भागा सेसा, ता एएसि णं पंचण्हं संवच्छराणं दोच्चं वासिकिं आउट्ठिं चंदे केणं णक्खत्तेणं जोएइ ? ता संठाणाहिं, संठाणाणं एक्कारसमुहुत्ते ऊयालीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता तेपण्णं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता पूसेणं, पूसस्स णं तं चेव जं पढमाए, ता एएसि णं पंचण्हं संवच्छराणं तच्चं वासिकिं आउट्ठिं चंदे केणं णक्खत्तेणं जोएइ ? ता विसाहाहिं, विसाहाणं तेरस मुहुत्ता चउप्पण्णं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता चत्तालीसं चुण्णियाभागा सेसा, तं समयं च णं सूरे केणं णक्ख-त्तेणं जोएइ ? ता पूसेणं, पूसस्स तं चेव, ता एएसि णं पंचण्हं संवच्छराणं चउत्थं वासिकिं आउट्ठिं चंदे केणं णक्खत्तेणं जोएइ ? ता रेवईहिं, रेवईणं पणवीसं मुहुत्ता बासट्ठिभागा मुहुत्तस्स बावट्ठिभागं च सत्तट्ठिहा छेत्ता बत्तीसं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता पूसेणं, पूसस्स तं चेव, ता एएसि णं पंचण्हं संवच्छराणं पंचमं वासिकिं आउट्ठिं चंदे केणं णक्खत्तेणं जोएइ ? ता पुव्वाहिं फग्गुणीहिं, पुव्वाफग्गुणीणं बारस मुहुत्ता सत्तालीसं च बावट्ठिभागा

मुहुत्तस्स बावट्ठिभागं च सत्तट्ठिहा छेत्ता तेरस्स चुण्णियाभागा सेसा, तं समयं च णं सूरं केणं णक्खत्तेणं जोएइ ? ता पूसेणं, पूसस्स तं चेव ॥ ७४ ॥ ता एएसि णं पंचण्हं संवच्छराणं पढमं हेमंतिं आउट्ठिं चंदे केणं णक्खत्तेणं जोएइ ? ता हत्थेणं, हत्थस्स णं पंच मुहुत्ता पण्णासं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता सट्ठि चुण्णियाभागा सेसा, तं समयं च णं सूरं केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चरिमसमए, ता एएसि णं पंचण्हं संवच्छराणं दोच्चं हेमंतिं आउट्ठिं चंदे केणं णक्खत्तेणं जोएइ ? ता सयभिसयाहिं, सयभिसयाणं दुण्णि मुहुत्ता अट्ठावीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता छत्तालीसं चुण्णियाभागा सेसा, तं समयं च णं सूरं केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चरिमसमए, ता एएसि णं पंचण्हं संवच्छराणं तच्चं हेमंतिं आउट्ठिं चंदे केणं णक्खत्तेणं जोएइ ? ता पूसेणं, पूसस्स एगूणवीसं मुहुत्ता तेयालीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता तेत्तीसं चुण्णियाभागा सेसा, तं समयं च णं सूरं केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चरिमसमए, ता एएसि णं पंचण्हं संवच्छराणं चउत्थिं हेमंतिं आउट्ठिं चंदे केणं णक्खत्तेणं जोएइ ? ता मूलेणं, मूलस्स छ मुहुत्ता अट्ठावणं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता वीसं चुण्णियाभागा सेसा, तं समयं च णं सूरं केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चरिमसमए, ता एएसि णं पंचण्हं संवच्छराणं पंचमं हेमंतिं आउट्ठिं चंदे केणं णक्खत्तेणं जोएइ ? ता कत्तियाहिं, कत्तियाणं अट्ठारस्स मुहुत्ता छत्तीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता छ चुण्णियाभागा सेसा, तं समयं च णं सूरं केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चरिमसमए ॥ ७५ ॥ तत्थ खलु इमे दसविहे जोए पण्णत्ते, तंजहा-वस-भाणुजोए वेणुयाणुजोए मंचे मंचाइमंचे छत्ते छत्ताइछत्ते जुयणद्धे घणसंमद्धे पीणिण्णं मंडगप्पुत्ते णामं दसमे, ता एएसि णं पंचण्हं संवच्छराणं छत्ताइच्छत्तं जोयं चंदे कंसि देसंसि जोएइ ? ता जंबुद्वीवस्स २ पाईणपडीणायायाए उदीणदाहिणायायाए जीवाए मंडलं चउव्वीसेणं सएणं छेत्ता दाहिणपुरच्छिमिळंसि चउभागमंडलंसि सत्तावीसं भागे उवा-इणावेत्ता अट्ठावीसइभागं वीसहा छेत्ता अट्ठारसभागे उवाइणावेत्ता तिहिं भागेहिं दोहिं कलाहिं दाहिणपुरच्छिमिळं चउब्भागमंडलं असंपत्ते एत्थ णं से चंदे छत्ताइच्छत्तं जोयं जोएइ, उप्पि चंदो मज्झे णक्खत्ते हेट्ठा आइच्चे, तं समयं च णं चंदे केणं णक्खत्तेणं जोएइ ? ता चित्ताहिं, ० चरमसमए ॥ ७६ ॥ बारसमं पाहुडं समत्तं ॥ १२ ॥

ता कहां ते चंदमसो वड्ढोवड्ढी आहितेति वएज्जा ? ता अट्ठ पंचासीए मुहुत्तसए तीसं च बावट्ठिभागे मुहुत्तस्स, ता दोसिणापक्खाओ अंधयारपक्खमयमाणे चंदे चत्तारि बायालसए छत्तालीसं च बावट्ठिभागे मुहुत्तस्स जाई चंदे रज्जइ, तंजहा-पढमाए पढमं भागं विइयाए विइयं भागं जाव पण्णरसीए पण्णरसमं भागं, चरिम-समए चंदे रत्ते भवइ, अवसेसे समए चंदे रत्ते य विरत्ते य भवइ, इयण्णं अमा-वासा, एत्थ णं पढमे पव्वे अमावासा, ता अंधयारपक्खो, तो णं दोसिणापक्खं अयमाणे चंदे चत्तारे बायाले मुहुत्तसए छत्तालीसं च बावट्ठिभागा मुहुत्तस्स जाई चंदे विरज्जइ, तं०-पढमाए पढमं भागं विइयाए विइयं भागं जाव पण्णरसीए पण्णरसमं भागं, चरिमे समए चंदे विरत्ते भवइ, अवसेससमए चंदे रत्ते य विरत्ते य भवइ, इयण्णं पुण्णिमासिणी, एत्थ णं दोच्चे पव्वे पुण्णिमासिणी ॥ ७७ ॥ तत्थ खलु इमाओ बावट्ठि पुण्णिमासिणीओ बावट्ठि अमावासाओ पण्णत्ताओ, बावट्ठि एए कसिणा रागा, बावट्ठि एए कसिणा विरागा, एए चउव्वीसे पव्वसए, एए चउव्वीसे कसिणारागविरागसए, जावइया णं पंचण्हं संवच्छराणं समया एगेणं चउव्वीसेणं समयसएण्णगा एवइया परिता असंखेज्जा देसरागविरागसया भवंतीति मक्खाया, ता अमावासाओ णं पुण्णिमासिणी चत्तारि बायाले मुहुत्तसए छत्तालीसं च बावट्ठि-भागे मुहुत्तस्स आहितेति वएज्जा, ता पुण्णिमासिणीओ णं अमावासा चत्तारि बायाले मुहुत्तसए छत्तालीसं च बावट्ठिभागे मुहुत्तस्स आहितेति वएज्जा, ता अमा-वासाओ णं अमावासा अट्ठपंचासीए मुहुत्तसए तीसं च बावट्ठिभागे मुहुत्तस्स आहितेति वएज्जा, ता पुण्णिमासिणीओ णं पुण्णिमासिणी अट्ठपंचासीए मुहुत्तसए तीसं च बावट्ठिभागे मुहुत्तस्स आहितेति वएज्जा, एस णं एवइए चंदे मासे एस णं एवइए सगले जुगे ॥ ७८ ॥ ता चंदेणं अद्धमासेणं चंदे कइ मंडलाइं चरइ ? ता चोइस चउव्वीससयभागं मंडलस्स, ता आइच्चेणं अद्धमासेणं चंदे कइ मंडलाइं चरइ ? ता १४ वड्ढो मंडलाइं चरइ, ता णक्खत्तेणं अद्धमासेणं चंदे कइ मंडलाइं चरइ ? ता तेरस मंडलाइं चरइ, तेरस सत्ताट्ठिभागं मंडलस्स, तथा अवराइं खलु दुवे अट्ठगाइं जाई चंदे केणइ असामण्णगाइं सयमेव पविट्ठिता २ चारं चरइ, कयराइं खलु ताइं दुवे अट्ठगाइं जाई चंदे केणइ असा-मण्णगाइं सयमेव पविट्ठिता २ चारं चरइ ? ता इमाइं खलु ते बे अट्ठगाइं जाई चंदे केणइ असामण्णगाइं सयमेव पविट्ठिता २ चारं चरइ, तंजहा-णिकक्खममाणे चेव अमावासंतेणं पविसमाणे चेव पुण्णिमासितेणं, एयाइं खलु दुवे अट्ठगाइं जाई चंदे केणइ असामण्णगाइं सयमेव पविट्ठिता २ चारं चरइ, ता पढमायणगए चंदे

दाहिणाए भागाए पविसमाणे सत्त अद्धमंडलाइं जाइं चंदे दाहिणाए भागाए पविसमाणे चारं चरइ, कयराइं खलु ताइं सत्त अद्धमंडलाइं जाइं चंदे दाहिणाए भागाए पविसमाणे चारं चरइ? इमाइं खलु ताइं सत्त अद्धमंडलाइं जाइं चंदे दाहिणाए भागाए पविसमाणे चारं चरइ, तंजहा-विइए अद्धमंडले चउत्थे अद्धमंडले छट्ठे अद्धमंडले अट्ठमे अद्धमंडले दसमे अद्धमंडले वारसमे अद्धमंडले चउदसमे अद्धमंडले, एयाइं खलु ताइं सत्त अद्धमंडलाइं जाइं चंदे दाहिणाए भागाए पविसमाणे चारं चरइ, ता पढमायणगए चंदे उत्तराए भागाए पविसमाणे छ अद्धमंडलाइं तेरस य सत्तट्ठिभागाइं अद्धमंडलस्स जाइं चंदे उत्तराए भागाए पविसमाणे चारं चरइ, कयराइं खलु ताइं छ अद्धमंडलाइं तेरस य सत्तट्ठिभागाइं अद्धमंडलस्स जाइं चंदे उत्तराए भागाए पविसमाणे चारं चरइ? इमाइं खलु ताइं छ अद्धमंडलाइं तेरस य सत्तट्ठिभागाइं अद्धमंडलस्स जाइं चंदे उत्तराए भागाए पविसमाणे चारं चरइ, तंजहा-तइए अद्धमंडले पंचमे अद्धमंडले सत्तमे अद्धमंडले णवमे अद्धमंडले एक्कारसमे अद्धमंडले तेरसमे अद्धमंडले पण्णरसमस्स अद्धमंडलस्स तेरस सत्तट्ठिभागाइं, एयाइं खलु ताइं छ अद्धमंडलाइं तेरस य सत्तट्ठिभागाइं अद्धमंडलस्स जाइं चंदे उत्तराए भागाए पविसमाणे चारं चरइ, एतावता य पढमे चंदायणे समत्ते भवइ, ता णक्खत्ते अद्धमासे नो चंदे अद्धमासे नो चंदे अद्धमासे णक्खत्ते अद्धमासे, ता णक्खत्ताओ अद्धमासाओ से चंदे चंदेणं अद्धमासेणं किमहिंयं चरइ? ता एगं अद्धमंडलं चरइ चत्तारि य सत्तट्ठिभागाइं अद्धमंडलस्स सत्तट्ठिभागां एगतीसाए छेत्ता णव भागाइं, ता दोच्चायणगए चंदे पुरच्छिमाए भागाए णिक्खममाणे सचउप्पण्णाइं जाइं चंदे परस्स चिण्णं पडिचरइ, सत्त तेरसगाइं जाइं चंदे अप्पणो चिण्णं पडिचरइ, ता दोच्चायणगए चंदे पच्चत्थिमाए भागाए णिक्खममाणे चउप्पण्णाइं जाइं चंदे परस्स चिण्णं पडिचरइ, छ तेरसगाइं० चंदे अप्पणो चिण्णं पडिचरइ, अवरगाइं खलु दुवे तेरसगाइं जाइं चंदे केणइ असामण्णगाइं सयमेव पविट्ठिता २ चारं चरइ, कयराइं खलु ताइं दुवे तेरसगाइं जाइं चंदे केणइ असामण्णगाइं सयमेव पविट्ठिता २ चारं चरइ? इमाइं खलु ताइं दुवे तेरसगाइं जाइं चंदो केणइ असामण्णगाइं सयमेव पविट्ठिता २ चारं चरइ, तं०-सव्वब्भंतरे चेव मंडले सव्वबाहिरे चेव मंडले, एयाइं खलु ताइं दुवे तेरसगाइं जाइं चंदे केणइ जाव चारं चरइ, एतावता दोच्चे चंदायणे समत्ते भवइ, ता णक्खत्ते मासे णो चंदे मासे चंदे मासे णो णक्खत्ते मासे, ता णक्खत्ते मासे चंदेणं मासेणं किं अहिंयं चरइ? ता दो अद्धमंडलाइं चरइ अट्ठ य सत्तट्ठिभागाइं अद्धमंडलस्स

सत्तट्टिभागं च एकतीसहा छेत्ता अट्टारस भागाइं, ता तच्चायणगए चंदे पच्चत्थिमाए भागाए पविसमाणे बाहिराणंतरस्स पच्चत्थिमिळस्स अट्टमंडलस्स ईयालीसं सत्तट्टि-  
भागाइं जाइं चंदे अप्पणो परस्स य चिण्णं पडिचरइ, तेरस सत्तट्टिभागाइं जाइं चंदे परस्स चिण्णं पडिचरइ, तेरस सत्तट्टिभागाइं चंदे अप्पणो परस्स चिण्णं पडि-  
चरइ, एतावता बाहिराणंतरे पच्चत्थिमिळ्हे अट्टमंडले समत्ते भवइ, ता तच्चायणगए चंदे पुरच्छिमाए भागाए पविसमाणे बाहिरतत्तरस्स पुरच्छिमिळस्स अट्टमंडलस्स  
ईयालीसं सत्तट्टिभागाइं जाइं चंदे अप्पणो परस्स य चिण्णं पडिचरइ, तेरस सत्त-  
ट्टिभागाइं जाइं चंदे परस्स चिण्णं पडिचरइ, तेरस सत्तट्टिभागाइं जाइं चंदे अप्पणो  
परस्स चिण्णं पडिचरइ, एतावता बाहिरतच्चे पुरच्छिमिळ्हे अट्टमंडले समत्ते भवइ,  
ता तच्चायणगए चंदे पच्चत्थिमाए भागाए पविसमाणे बाहिरचउत्थस्स पच्चत्थिमिळस्स  
अट्टमंडलस्स अट्टसत्तट्टिभागाइं च एकतीसहा छेत्ता अट्टारस भागाइं जाइं चंदे  
अप्पणो परस्स य चिण्णं पडिचरइ, एतावता बाहिरचउत्थपच्चत्थिमिळ्हे अट्टमंडले  
समत्ते भवइ । एवं खलु चंदेणं मासेणं चंदे तेरस चउप्पणगाइं दुवे तेरसगाइं जाइं  
चंदे परस्स चिण्णं पडिचरइ, तेरस तेरसगाइं जाइं चंदे अप्पणो चिण्णं पडिचरइ,  
दुवे ईयालीसगाइं अट्ट सत्तट्टिभागाइं सत्तट्टिभागं च एकतीसहा छेत्ता अट्टारसभागाइं  
जाइं चंदे अप्पणो परस्स य चिण्णं पडिचरइ, अवराइं खलु दुवे तेरसगाइं जाइं  
चंदे केणइ असामणगाइं सयमेव पविट्ठिता २ चारं चरइ, इच्चैसो चंदमासोऽभि-  
गमणिकखमणवुट्ठिणिवुट्ठिअणवट्ठियसंठाणसंठिईविउव्वणगिड्ढिपत्ते रूवी चंदे देवे २  
आहिएति वएज्जा ॥ ७९ ॥ **तेरसमं पाहुडं समत्तं ॥ १३ ॥**

ता कया ते दोसिणा बहू आहितेति वएज्जा ? ता दोसिणापक्खे णं दोसिणा बहू  
आहितेति वएज्जा, ता कहं ते दोसिणापक्खे दोसिणा बहू आहितेति वएज्जा ? ता  
अंधयारपक्खाओ णं० दोसिणा बहू आहिताति वएज्जा, ता कहं ते अंधयारपक्खाओ  
दोसिणापक्खे दोसिणा बहू आहिताति वएज्जा ? ता अंधयारपक्खाओ णं दोसिणा-  
पक्खं अयमाणे चंदे चत्तारि वायाले सुहुत्तसए छतालीसं च वावट्टिभागे सुहुत्तस्स  
जाइं चंदे विरज्जइ, तं०-पढमाए पढमं भागं विइयाए विइयं भागं जाव पण्णरसीए  
पण्णरसमं भागं, एवं खलु अंधयारपक्खाओ दोसिणापक्खे दोसिणा बहू आहिताति  
वएज्जा, ता केवइया णं दोसिणापक्खे दोसिणा बहू आहिताति वएज्जा ? ता परित्ता  
असंखेज्जा भागा । ता कया ते अंधयारे बहू आहिएति वएज्जा ? ता अंधयारपक्खे  
णं अंधयारे बहू आहिएति वएज्जा, ता कहं ते अंधयारपक्खे० बहू आहिएति  
वएज्जा ? ता दोसिणापक्खाओ णं अंधयारपक्खे अंधयारे बहू आहिएति वएज्जा,



ता क्हं ते दोसिणापक्खाओ अंधयारपक्खे अंधयारे बहू आहिएति वएज्जा ? ता दोसिणापक्खाओ णं अंधयारपक्खं अयमाणे चंदे चत्तारि बायाले मुहुत्तसए बायालीसं च बावट्ठिभागे मुहुत्तस जाई चंदे रज्जइ, तं०-पढमाए पढमं भागं विइयाए विइयं भागं जाव पण्णरसीए पण्णरसमं भागं, एवं खलु दोसिणापक्खाओ अंधयारपक्खे अंधयारे बहू आहिएति वएज्जा, ता केवइए णं अंधयारपक्खे अंधयारे बहू आहिएति वएज्जा ? ता परित्ता असंखेज्जा भागा ॥ ८० ॥ **चोइसमं पाहुडं समत्तं ॥ १४ ॥**

ता क्हं ते सिग्घगई वत्थू आहितेति वएज्जा ? ता एएसि णं चंदिमसूरियगह-  
गणणक्खत्ततारावुवाणं चंदेहिंतो सूरु सिग्घगई सूरुहिंतो गहा सिग्घगई गहेहिंतो  
णक्खत्ता सिग्घगई णक्खत्तेहिंतो तारा० सिग्घगई, सव्वप्पगई चंदा सव्वसिग्घगई  
तारा०, ता एगमेगेणं मुहुत्तेणं चंदे केवइयाई भागसयाई गच्छइ ? ता जं जं मंडलं  
उवसंक्कमिता चारं चरइ तस्स २ मंडलपरिक्खेवस्स सत्तरस अडसट्ठि भागसए  
गच्छइ मंडलं सयसहस्सेणं अट्ठाणउईसएहिं छेत्ता, ता एगमेगेणं मुहुत्तेणं सूरिए  
केवइयाई भागसयाई गच्छइ ? ता जं जं मंडलं उवसंक्कमिता चारं चरइ तस्स २ मंडल-  
परिक्खेवस्स अट्ठारस तीसे भागसए गच्छइ मंडलं सयसहस्सेणं अट्ठाणउईसएहिं छेत्ता,  
ता एगमेगेणं मुहुत्तेणं णक्खत्ते केवइयाई भागसयाई गच्छइ ? ता जं जं मंडलं उव-  
संक्कमिता चारं चरइ तस्स २ मंडलपरिक्खेवस्स अट्ठारस पण्णतीसे भागसए गच्छइ  
मंडलं सयसहस्सेणं अट्ठाणउईसएहिं छेत्ता ॥ ८१ ॥ ता जया णं चंदं गइसमावण्णं सूरु  
गइसमावण्णे भवइ से णं गइमायाए केवइयं विसेसेइ ? ता बावट्ठिभागे विसेसेइ, ता  
जया णं चंदं गइसमावण्णं णक्खत्ते गइसमावण्णे भवइ से णं गइमायाए केवइयं  
विसेसेइ ? ता सत्तट्ठि भागे विसेसेइ, ता जया णं सूरं गइसमावण्णं णक्खत्ते गइ-  
समावण्णे भवइ से णं गइमायाए केवइयं विसेसेइ ? ता पंचभागे विसेसेइ, ता जया  
णं चंदं गइसमावण्णं अभीइणक्खत्ते गइसमावण्णे पुरच्छिमाए भागाए समासादेइ  
पुरच्छिमाए भागाए समासादित्ता णव मुहुत्ते सत्तावीसं च सत्तट्ठिभागे मुहुत्तस  
चंदेण सद्धिं जोयं जोएइ जोयं जोएत्ता जोयं अणुपरियट्ठइ जोयं अणुपरियट्ठित्ता विप्प-  
जहइ २ ता विगयजोई यावि भवइ, ता जया णं चंदं गइसमावण्णं सवणे णक्खत्ते  
गइसमावण्णे पुरच्छिमाए भागाए समासादेइ पुरच्छिमाए भागाए समासादित्ता तीसं  
मुहुत्ते चंदेण सद्धिं जोयं जोएइ २ ता जोयं अणुपरियट्ठइ जो० २ ता विप्पजहइ०  
विगयजोई यावि भवइ, एवं एएणं अभिलावेणं पेयव्वं, पण्णरसमुहुत्ताई तीसइमुहुत्ताई  
पणयालीसमुहुत्ताई भाणियव्वाइ जाव उत्तरासाढा० । ता जया णं चंदं गइसमावण्णं  
गहे गइसमावण्णे पुरच्छिमाए भागाए समासादेइ पुर० २ ता चंदेणं सद्धिं जोगं

जुंजइ २ ता जोगं अणुपरियट्ठइ २ ता विप्पजहइ० विगयजोई यावि भवइ । ता जया  
 णं सूरं गइसमावण्णं अभीईणक्खत्ते गइसमावण्णे पुरच्छिमाए भागाए समासादेइ  
 पु० २ ता चत्तारि अहोरेत्ते छच्च मुहुत्ते सूरें सद्धिं जोयं जोएइ २ ता जोयं  
 अणुपरियट्ठइ २ ता विप्पजहइ० विगयजोई यावि भवइ, एवं अहोरेत्ता छ एकवीसं  
 मुहुत्ता य तेरस अहोरेत्ता बारस मुहुत्ता य वीसं अहोरेत्ता तिण्णि मुहुत्ता य सव्वे  
 भाणियव्वा जाव जया णं सूरं गइसमावण्णं उत्तरासाढाणक्खत्ते गइसमावण्णे पुरच्छि-  
 माए भागाए समासादेइ पु० २ ता वीसं अहोरेत्ते तिण्णि य मुहुत्ते सूरें सद्धिं जोयं  
 जोएइ जो० २ ता जोयं अणुपरियट्ठइ जो० २ ता विप्पजहइ० विगयजोई यावि भवइ,  
 ता जया णं सूरं गइसमावण्णं णक्खत्ते गइसमावण्णे पुरच्छिमाए भागाए समासादेइ  
 पु० २ ता सूरें सद्धिं जोयं जुंजइ २ ता जोयं अणुपरियट्ठइ २ ता जाव विगय-  
 जोई यावि भवइ ॥ ८२ ॥ ता णक्खत्तेणं मासेणं चंदे कइ मंडलाई चरइ ?  
 ता तेरस मंडलाई चरइ तेरस य सत्तट्ठिभागे मंडलस्स, ता णक्खत्तेणं मासेणं सूरें  
 कइ मंडलाई चरइ ? ता तेरस मंडलाई चरइ चोत्तालीसं च सत्तट्ठिभागे मंडलस्स,  
 ता णक्खत्तेणं मासेणं णक्खत्ते कइ मंडलाई चरइ ? ता तेरस मंडलाई चरइ अद्ध-  
 सीयालीसं च सत्तट्ठिभागे मंडलस्स, ता चंदेणं मासेणं चंदे कइ मंडलाई चरइ ? ता  
 चोइस चउभागाइं मंडलाई चरइ एणं च चउव्वीससयभागं मंडलस्स, ता चंदेणं  
 मासेणं सूरें कइ मंडलाई चरइ ? ता पण्णरस चउभागूणाइं मंडलाई चरइ एणं च  
 चउवीससयभागं मंडलस्स, ता चंदेणं मासेणं णक्खत्ते कइ मंडलाई चरइ ? ता  
 पण्णरस चउभागूणाइं मंडलाई चरइ छच्च चउवीससयभागे मंडलस्स, ता उड्डुणा  
 मासेणं चंदे कइ मंडलाई चरइ ? ता चोइस मंडलाई चरइ तीसं च एणट्ठिभागे  
 मंडलस्स, ता उड्डुणा मासेणं सूरें कइ मंडलाई चरइ ? ता पण्णरस मंडलाई चरइ,  
 ता उड्डुणा मासेणं णक्खत्ते कइ मंडलाई चरइ ? ता पण्णरस मंडलाई चरइ पंच य  
 बावीससयभागे मंडलस्स, ता आइच्चेणं मासेणं चंदे कइ मंडलाई चरइ ? ता चोइस  
 मंडलाई चरइ एकारसभागे मंडलस्स, ता आइच्चेणं मासेणं सूरें कइ मंडलाई  
 चरइ ? ता पण्णरस चउभागाहियाइं मंडलाई चरइ, ता आइच्चेणं मासेणं णक्खत्ते  
 कइ मंडलाई चरइ ? ता पण्णरस चउभागाहियाइं मंडलाई चरइ पंचतीसं च चउ-  
 व्वीससयभागमंडलाई चरइ, ता अभिवट्ठिणं मासेणं चंदे कइ मंडलाई चरइ ? ता  
 पण्णरस मंडलाई० तेसीइं छलसीयसयभागे मंडलस्स, ता अभिवट्ठिणं मासेणं सूरें  
 कइ मंडलाई चरइ ? ता सोलस मंडलाई चरइ तिहिं भागेहिं ऊणगाइं दोहिं अडया-  
 लेहिं सएहिं मंडलं छेत्ता, ता अभिवट्ठिणं मासेणं णक्खत्ते कइ मंडलाई चरइ ? ता

सोलस मंडलाई चरइ सीयालीसएहिं भागेहिं अहियाइ चोइसहिं अट्ठासीएहिं मंडलं  
छेता ॥ ८३ ॥ ता एगमेगेणं अहोरत्तेणं चंदे कइ मंडलाई चरइ ? ता एगं अद-  
मंडलं चरइ एकतीसाए भागेहिं ऊणं णवहिं पण्णरसेहिं अद्धमंडलं छेता, ता एगमेगेणं  
अहोरत्तेणं सरिए कइ मंडलाई चरइ ? ता एगं अद्धमंडलं चरइ, ता एगमेगेणं अहो-  
रत्तेणं णक्खत्ते कइ मंडलाई चरइ ? ता एगं अद्धमंडलं चरइ दोहिं भागेहिं अहियं  
सत्तहिं बत्तीसेहिं सएहिं अद्धमंडलं छेता, ता एगमेगं मंडलं चंदे कइहिं अहोरत्तेहिं  
चरइ ? ता दोहिं अहोरत्तेहिं चरइ एकतीसाए भागेहिं अहिएहिं चउहिं चोयालेहिं  
सएहिं राईदिएहिं छेता, ता एगमेगं मंडलं सूरे कइहिं अहोरत्तेहिं चरइ ? ता दोहिं  
अहोरत्तेहिं चरइ, ता एगमेगं मंडलं णक्खत्ते कइहिं अहोरत्तेहिं चरइ ? ता दोहिं  
अहोरत्तेहिं चरइ दोहिं ऊणेहिं तिहिं सत्तसट्ठेहिं सएहिं राईदिएहिं छेता, ता जुगेणं  
चंदे कइ मंडलाई चरइ ? ता अट्ठ चुळसीए मंडलसए चरइ, ता जुगेणं सूरे कइ  
मंडलाई चरइ ? ता णवपण्णरसमंडलसए चरइ, ता जुगेणं णक्खत्ते कइ मंडलाई  
चरइ ? ता अट्ठारस पण्णत्तीसे दुभागमंडलसए चरइ । इच्चेसा मुहुत्तागई रिक्खाइमा-  
सराईदियजुगमंडलपविभत्ता सिग्घगई वत्थू आहितेति (वएजा) वेमि ॥ ८४ ॥

**पण्णरसमं पाहुडं समत्तं ॥ १५ ॥**

ता क्हं ते दोसिणालक्खणे आहिएति वएजा ? ता चंदेसाइ य दोसिणइ य  
दोसिणइ य चंदेसाइ य के अट्ठे किं लक्खणे ?, ता एगट्ठे एगलक्खणे, ता क्हं ते  
सूरलक्खणे आहिएति वएजा ? ता सूरलेस्साइ य आयवेइ य आयवेइ य सूरलेस्साइ  
य के अट्ठे किं लक्खणे ?, ता एगट्ठे एगलक्खणे, ता क्हं ते छायालक्खणे आहिएति  
वएजा ? ता अंधयारेइ य छायाइ य छायाइ य अंधयारेइ य के अट्ठे किं लक्खणे ?,  
ता एगट्ठे एगलक्खणे ॥ ८५ ॥ **सोलसमं पाहुडं समत्तं ॥ १६ ॥**

ता क्हं ते चयणोववाया आहितेति वएजा ? तत्थ खलु इमाओ पण्णत्तीसं पडि-  
वत्तीओ पण्णत्ताओ, तं०-तत्थ एगे एवमाहंसु-ता अणुसमयमेव चंदिमसूरिया अण्णे  
चयंति अण्णे उववज्जंति० एगे एवमाहंसु १, एगे पुण एवमाहंसु-ता अणुमुहुत्तमेव  
चंदिमसूरिया अण्णे चयंति अण्णे उववज्जंति...२, एवं जहेव हेट्ठा तहेव जाव ता  
एगे पुण एवमाहंसु-ता अणुउस्सप्पिणिओसप्पिणिमेव चंदिमसूरिया अण्णे चयंति  
अण्णे उववज्जंति० एगे एवमाहंसु २५, वयं पुण एवं वयामो-ता चंदिमसूरिया णं  
जोइसिया देवा महिद्धिया महज्जुइया महाबला महाजसा महासोक्खा महाणुभावा  
वरवत्थधरा वरमल्लधरा वरगंधधरा वराभरणधरा अवोच्छित्तिणयट्ठयाए काले अण्णे  
चयंति अण्णे उववज्जंति० ॥ ८६ ॥ **सत्तरसमं पाहुडं समत्तं ॥ १७ ॥**

ता कहं ते उच्चते आहितेति वएज्जा ? तत्थ खलु इमाओ पणवीसं पडिवत्तीओ  
 प०, तं०-तत्थेगे एवमाहंसु-ता एगं जोयणसहस्सं सूरे उड्डं उच्चतेणं दिवड्डं चंदे  
 एगे एवमाहंसु १, एगे पुण एवमाहंसु-ता दो जोयणसहस्साइं सूरे उड्डं उच्चतेणं  
 अट्ठाइज्जाइं चंदे एगे एवमाहंसु २, एगे पुण एवमाहंसु-ता तिणिण जोयणसहस्साइं  
 सूरे उड्डं उच्चतेणं अट्ठट्ठाइं चंदे एगे एवमाहंसु ३, एगे पुण एवमाहंसु-ता चत्तारि  
 जोयणसहस्साइं सूरे उड्डं उच्चतेणं अट्ठपंचमाइं चंदे एगे एवमाहंसु ४, एगे पुण  
 एवमाहंसु-ता पंच जोयणसहस्साइं सूरे उड्डं उच्चतेणं अट्ठछट्ठाइं चंदे एगे एवमाहंसु  
 ५, एगे पुण एवमाहंसु-ता छ जोयणसहस्साइं सूरे उड्डं उच्चतेणं अट्ठसत्तमाइं चंदे एगे  
 एवमाहंसु ६, एगे पुण एवमाहंसु-ता सत्त जोयणसहस्साइं सूरे उड्डं उच्चतेणं अट्ठट्ठमाइं  
 चंदे एगे एवमाहंसु ७, एगे पुण एवमाहंसु-ता अट्ठ जोयणसहस्साइं सूरे उड्डं उच्चतेणं  
 अट्ठणवमाइं चंदे एगे एवमाहंसु ८, एगे पुण एवमाहंसु-ता णवजोयणसहस्साइं सूरे उड्डं  
 उच्चतेणं अट्ठदसमाइं चंदे एगे एवमाहंसु ९, एगे पुण एवमाहंसु-ता दस जोयणसहस्साइं  
 सूरे उड्डं उच्चतेणं अट्ठएकारस चंदे एगे एवमाहंसु १०, एगे पुण एवमाहंसु-ता एकारस  
 जोयणसहस्साइं सूरे उड्डं उच्चतेणं अट्ठवारस चंदे ११, एणं अभिलावेणं णेयव्वं  
 वारस सूरे अट्ठतेरस चंदे १२, तेरस सूरे अट्ठचोइस चंदे १३, चोइस सूरे अट्ठपण्णरस  
 चंदे १४, पण्णरस सूरे अट्ठसोलस चंदे १५, सोलस सूरे अट्ठसत्तरस चंदे १६,  
 सत्तरस सूरे अट्ठअट्ठारस चंदे १७, अट्ठारस सूरे अट्ठएगूणवीसं चंदे १८, एगूण-  
 वीसं सूरे अट्ठवीसं चंदे १९, वीसं सूरे अट्ठएक्कवीसं चंदे २०, एक्कवीसं सूरे अट्ठ-  
 बावीसं चंदे २१, बावीसं सूरे अट्ठतेवीसं चंदे २२, तेवीसं सूरे अट्ठचउवीसं चंदे  
 २३, चउवीसं सूरे अट्ठपणवीसं चंदे एगे एवमाहंसु २४, एगे पुण एवमाहंसु-ता  
 पणवीसं जोयणसहस्साइं सूरे उड्डं उच्चतेणं अट्ठछव्वीसं चंदे एगे एवमाहंसु २५ ।  
 वयं पुण एवं वयामो-ता इमीसे रयणप्पमाए पुढवीए बहुसमरमणिज्जाओ भूमिमाणाओ  
 सत्तणउड्जोयणसए उड्डं उप्पइत्ता हेट्ठिल्ले ताराविमाणे चारं चरइ अट्ठजोयणसए उड्डं  
 उप्पइत्ता सूरविमाणे चारं चरइ अट्ठअसीए जोयणसए उड्डं उप्पइत्ता चंदविमाणे चारं  
 चरइ णव जोयणसयाइं उड्डं उप्पइत्ता उवरिं ताराविमाणे चारं चरइ, हेट्ठिल्लाओ  
 ताराविमाणाओ दसजोयणाइं उड्डं उप्पइत्ता सूरविमाणे चारं चरइ णउड्जं जोयणाइं  
 उड्डं उप्पइत्ता चंदविमाणे चारं चरइ दसोत्तरं जोयणसयं उड्डं उप्पइत्ता उवरिल्ले  
 ताराव्वे चारं चरइ, सूरविमाणाओ असीइं जोयणाइं उड्डं उप्पइत्ता चंदविमाणे चारं  
 चरइ जोयणसयं उड्डं उप्पइत्ता उवरिल्ले ताराव्वे चारं चरइ, चंदविमाणाओ णं वीसं  
 जोयणाइं उड्डं उप्पइत्ता उवरिल्ले ताराव्वे चारं चरइ, एवामेव सपुब्बावरेणं दसुत्तर-

जोयणसयं बाहल्ले तिरियमसंखेजे जोइसविसए जोइसं चारं चरइ आहितेति वएजा ॥ ८७ ॥ ता अत्थि णं चंदिमसूरियाणं देवाणं हिट्ठंपि ताराख्वा अणुंपि तुल्लावि समंपि ताराख्वा अणुंपि तुल्लावि उप्पिपि ताराख्वा अणुंपि तुल्लावि ? ता अत्थि, ता क्हं ते चंदिमसूरियाणं देवाणं हिट्ठंपि ताराख्वा अणुंपि तुल्लावि समंपि ताराख्वा अणुंपि तुल्लावि उप्पिपि ताराख्वा अणुंपि तुल्लावि ? ता जहा जहा णं तेसिं णं देवाणं तवणियमबंभचेराइं उरिसयाइं भवंति तहा तहा णं तेसिं देवाणं एवं भवइ, तंजहा-अणुत्ते वा तुल्लते वा, ता एवं खलु चंदिमसूरियाणं देवाणं हिट्ठंपि ताराख्वा अणुंपि तुल्लावि तहेव जाव उप्पिपि ताराख्वा अणुंपि तुल्लावि ॥ ८८ ॥ ता एगमेगस्स णं चंदस्स देवस्स केवइया गहा परिवारो प०, केवइया णक्खत्ता परिवारो पण्णत्तो, केवइया तारा परिवारो पण्णत्तो ? ता एगमेगस्स णं चंदस्स देवस्स अट्ठासीइगहा परिवारो पण्णत्तो, अट्ठावीसं णक्खत्ता परिवारो पण्णत्तो, छावट्ठि-सहस्साइं णव चेव सयाइं पंचुत्तराइं [पंचसयराइं] । एगससीपरिवारो तारागण-कोडिकोडीणं ॥ १ ॥ परिवारो प० ॥ ८९ ॥ ता मंदरस्स णं पव्वयस्स केवइयं अवाहाए जोइसे चारं चरइ ? ता एकारस एक्कवीसे जोयणसए अवाहाए जोइसे चारं चरइ, ता लोयंताओ णं केवइयं अवाहाए जोइसे प० ? ता एकारस एकारे जोयण-सए अवाहाए जोइसे प० ॥ ९० ॥ ता जंबुद्वीचे णं द्वीवे कयरे णक्खत्ते सव्ववर्त्तारिं चारं चरइ, कयरे णक्खत्ते सव्ववाहिरिं चारं चरइ, कयरे णक्खत्ते सव्ववुरिं चारं चरइ, कयरे णक्खत्ते सव्वहिट्ठिं चारं चरइ ? ता अभीई णक्खत्ते सव्व-ब्भितरिं चारं चरइ, मूले णक्खत्ते सव्ववाहिरिं चारं चरइ, साई णक्खत्ते सव्व-वरिं चारं चरइ, भरणी णक्खत्ते सव्वहेट्ठिं चारं चरइ ॥ ९१ ॥ ता चंदविमाणे णं किंसंठिए प० ? ता अद्धकविट्ठगसंठाणसंठिए सव्वफालियामए अब्भुगयमसिय-पहसिए विविहमणिरियभत्तिचित्ते जाव पडिरूवे, एवं सूरविमाणे गहविमाणे णक्खत्त-विमाणे ताराविमाणे । ता चंदविमाणे णं केवइयं आयामविक्खंभेणं केवइयं परि-क्खेवेणं केवइयं बाहल्लेणं प० ? ता छप्पणं एगट्ठिभागे जोयणस्स आयामविक्खंभेणं तं तिगुणं सविसेसं परिरएणं अट्ठावीसं एगट्ठिभागे जोयणस्स बाहल्लेणं पण्णत्ते, ता सूरविमाणे णं केवइयं आयामविक्खंभेणं पुच्छा, ता अडयालीसं एगट्ठिभागे जोय-णस्स आयामविक्खंभेणं तं तिगुणं सविसेसं परिरएणं चउव्वीसं एगट्ठिभागे जोयणस्स बाहल्लेणं प०, ता णक्खत्तविमाणे णं केवइयं पुच्छा, ता कोसं आयामविक्खंभेणं तं तिगुणं सविसेसं परिरएणं अद्धकोसं बाहल्लेणं प०, ता ताराविमाणे णं केवइयं पुच्छा, ता अद्धकोसं आयामविक्खंभेणं तं तिगुणं सविसेसं परिरएणं पंचधणुसयाइं बाहल्लेणं

प० । ता चंदविमाणं णं कइ देवसाहस्सीओ परिवहंति ? ता सोलस देवसाहस्सीओ परिवहंति, तं०-पुरच्छिमेणं सीहरूवधारीणं चत्तारि देवसाहस्सीओ परिवहंति, दाहिणेणं गयरूवधारीणं चत्तारि देवसाहस्सीओ परिवहंति, पच्चत्थिमेणं वसहरूवधारीणं चत्तारि देवसाहस्सीओ परिवहंति, उत्तरेणं तुरगरूवधारीणं चत्तारि देवसाहस्सीओ परिवहंति, एवं सूरविमाणंपि, ता गहविमाणे णं कइ देवसाहस्सीओ परिवहंति ? ता अट्ठ देवसाहस्सीओ परिवहंति, तं०-पुरच्छिमेणं सीहरूवधारीणं देवाणं दो देवसाहस्सीओ परिवहंति, एवं जाव उत्तरेणं तुरगरूवधारीणं०, ता णक्खत्तविमाणे णं कइ देवसाहस्सीओ परिवहंति ? ता चत्तारि देवसाहस्सीओ परिवहंति, तं०-पुरच्छिमेणं सीहरूवधारीणं देवाणं एक्का देवसाहस्सी परिवहइ, एवं जाव उत्तरेणं तुरगरूवधारीणं देवाणं०, ता ताराविमाणे णं कइ देवसाहस्सीओ परिवहंति ? ता दो देवसाहस्सीओ परिवहंति, तं०-पुरच्छिमेणं सीहरूवधारीणं देवाणं पंच देवसया परिवहंति, एवं जावुत्तरेणं तुरगरूवधारीणं० ॥ ९२ ॥ ता एएसि णं चंदिमसूरियगहगणणक्खत्तताराख्वाणं कयरे २ हिंतो सिग्घगई वा मंदगई वा ? ता चंदेहिंतो सूर सिग्घगई, सूरैहिंतो गहा सिग्घगई, गहेहिंतो णक्खत्ता सिग्घगई, णक्खत्तेहिंतो तारा० सिग्घगई, सच्चप्पगई चंदा, सच्चसिग्घगई तारा० । ता एएसि णं चंदिमसूरियगहगणणक्खत्तताराख्वाणं कयरे २ हिंतो अप्पिड्डिया वा महिड्डिया वा ? ता तारा०हिंतो णक्खत्ता महिड्डिया, णक्खत्तेहिंतो गहा महिड्डिया, गहेहिंतो सूर महिड्डिया, सूरैहिंतो चंदा महिड्डिया, सच्चप्पड्डिया तारा०, सच्चमहिड्डिया चंदा ॥ ९३ ॥ ता जंबुदीवे णं दीवे ताराख्वस्स य २ एस णं केवइए अवाहाए अंतरे पण्णत्ते ? ता दुविहे अंतरे प०, तं०-वाघाइमे य निव्वाघाइमे य, तत्थ णं जे से वाघाइमे से णं जहण्णेणं दोण्णि बावट्ठे जोयणसए उक्कोसेणं बारस जोयणसहस्साइं दोण्णि बायाले जोयणसए ताराख्वस्स य २ अवाहाए अंतरे पण्णत्ते, तत्थ णं जे से निव्वाघाइमे से णं जहण्णेणं पंच धणुसयाइं उक्कोसेणं अद्धजोयणं ताराख्वस्स य २ अवाहाए अंतरे प० ॥ ९४ ॥ ता चंदस्स णं जोइसिंदस्स जोइसरण्णो कइ अग्गमहिंसीओ पण्णत्ताओ ? ता चत्तारि अग्गमहिंसीओ पण्णत्ताओ, तं०-चंदप्पभा दोसिणाभा अब्बिमाली पभंकरा, तत्थ णं एगमेगाए देवीए चत्तारि देवीसाहस्सी परिवारो पण्णत्तो, पभू णं ताओ एगमेगा देवी अण्णाइं चत्तारि २ देवीसहस्साइं परिवारं विउव्वित्तए, एवामेव सपुव्वावरेणं सोलस देवीसहस्सा, सेतं तुडिए, ता पभू णं चंदे जोइसिंदे जोइसराया चंदवडिंसए विमाणे सभाए सुहम्माए तुडिणं सद्धि दिव्वाइं भोगभोगाईं भुंजमाणे विहरित्तए ? णो इण्ठे समट्ठे, पभू णं चंदे जोइसिंदे जोइसराया चंदवडिंसए विमाणे

सभाए सुहम्माए चंदंसि सीहासणंसि चउहिं सामाणियसाहस्सीहिं चउहिं अग्गमहि-  
सीहिं सपरिवाराहिं तिहिं परिसाहिं सत्तहिं अणिएहिं सत्तहिं अणियाहिवइहिं सोलंसहिं  
आयरक्खदेवसाहस्सीहिं अण्णेहि य बहूहिं जोइसिएहिं देवेहिं देवीहि य सद्धिं  
महया हयणट्ठगीयवाइयतंतीतलतालतुडियघणमुइंगपडुप्पवाइयरवेणं दिव्वाइं भोग-  
भोगाइं भुंजमाणे विहरित्तए केवलं परियारणिद्धीए णो चेव णं मेहुणवत्तियाए । ता  
सूरस्स णं जोइसिंदस्स जोइसरण्णो कइ अग्गमहिसीओ प० ? ता चत्तारि अग्ग-  
महिसीओ प०, तंजहा-सूरप्पभा आयवा अच्चिमाला पमंकरा, सेसं जहा चंदस्स  
णवरं सूरवडेंसए विमाणे जाव णो चेव णं मेहुणवत्तियाए ॥ ९५ ॥ ता जोइसिया-  
णं देवाणं केवइयं कालं ठिई पण्णत्ता ? ता जहण्णेणं अडभागपलिओवमं उक्कोसेणं  
पलिओवमं वाससयसहस्समब्भहियं, ता जोइसिणीणं देवीणं केवइयं कालं ठिई  
प० ? ता जहण्णेणं अट्ठभागपलिओवमं उक्कोसेणं अद्धपलिओवमं पण्णासाए वास-  
सहस्सेहिं अब्भहियं, ता चंदविमाणे णं देवाणं केवइयं कालं ठिई पण्णत्ता ? ता  
जहण्णेणं चउब्भागपलिओवमं उक्कोसेणं पलिओवमं वाससयसहस्समब्भहियं, ता  
चंदविमाणे णं देवीणं केवइयं कालं ठिई प० ? ता जहण्णेणं चउब्भागपलिओवमं  
उक्कोसेणं अद्धपलिओवमं पण्णासाए वाससहस्सेहिं अब्भहियं, ता सूरविमाणे णं  
देवाणं केवइयं कालं ठिई पण्णत्ता ? ता जहण्णेणं चउब्भागपलिओवमं उक्कोसेणं  
पलिओवमं वाससहस्समब्भहियं, ता सूरविमाणे णं देवाणं केवइयं कालं ठिई प० ?  
ता जहण्णेणं चउब्भागपलिओवमं उक्कोसेणं अद्धपलिओवमं पंचहिं वाससएहिं  
अब्भहियं, ता गहविमाणे णं देवाणं केवइयं कालं ठिई प० ? ता जहण्णेणं चउ-  
ब्भागपलिओवमं उक्कोसेणं पलिओवमं, ता गहविमाणे णं देवीणं केवइयं कालं  
ठिई प० ? ता जहण्णेणं चउब्भागपलिओवमं उक्कोसेणं अद्धपलिओवमं, ता  
णक्खत्तविमाणे णं देवाणं केवइयं कालं ठिई प० ? ता जहण्णेणं चउब्भागपलि-  
ओवमं उक्कोसेणं अद्धपलिओवमं, ता णक्खत्तविमाणे णं देवीणं केवइयं कालं ठिई  
प० ? ता जहण्णेणं अट्ठभागपलिओवमं उक्कोसेणं चउब्भागपलिओवमं, ता तारा-  
विमाणे णं देवाणं पुच्छा, ता जहण्णेणं अट्ठभागपलिओवमं उक्कोसेणं चउब्भाग-  
पलिओवमं, ता ताराविमाणे णं देवीणं पुच्छा, ता जहण्णेणं अट्ठभागपलिओवमं  
उक्कोसेणं साइरेगअट्ठभागपलिओवमं ॥ ९६ ॥ ता एएसि णं चंदिमसूरियगहगण-  
णक्खत्तताराह्वाणं कयरे २ हितो अप्पा वा बहुया वा तुल्ला वा विसेसाहिया वा ?  
ता चंदा य सूरा य एए णं दो वि तुल्ला सव्वत्थोवा, णक्खत्ता संखिज्जगुणा, गहा  
संखिज्जगुणा, तारा० संखिज्जगुणा ॥ ९७ ॥ अट्ठारसमं पाहुडं समत्तं ॥ ९८ ॥

ता कइ णं चंदिमसूरिया सव्वल्लोयं ओभासंति उज्जोएंति तवेंति पभासंति आहि-  
तेति वएज्जा ? तत्थ खलु इमाओ दुवालस पडिवत्तीओ पण्णत्ताओ, तं०-तत्थेगे  
एवमाहंसु-ता एगे चंदे एगे सूरे सव्वल्लोयं ओभासइ उज्जोएइ तवेइ पभासेइ० एगे  
एवमाहंसु १, एगे पुण एवमाहंसु-ता तिण्णि चंदा तिण्णि सूरा सव्वल्लोयं ओभासंति  
४००० एगे एवमाहंसु २, एगे पुण एवमाहंसु-ता आउट्ठिं चंदा आउट्ठिं सूरा सव्वल्लोयं  
ओभासंति ४००० एगे एवमाहंसु ३, एगे पुण एवमाहंसु-एएणं अभिलावेणं णेयव्वं  
सत्त चंदा सत्त सूरा दस चंदा दस सूरा बारस चंदा बारस सूरा बायालीसं चंदा  
२ वावत्तरिं चंदा २ बायालीसं चंदसयं २ वावत्तरं चंदसयं वावत्तरं सूरसयं  
बायालीसं चंदसहस्सं बायालीसं सूरसहस्सं वावत्तरं चंदसहस्सं वावत्तरं सूरसहस्सं  
सव्वल्लोयं ओभासंति ४००० एगे एवमाहंसु १२, वयं पुण एवं वयामो-ता अयण्णं  
जंबुद्दीवे २ जाव परिकखेवेणं०, ता जंबुद्दीवे २ केवइया चंदा पभासंसु वा पभासिति  
वा पभासिस्संति वा ? केवइया सूरा तविंसु वा तवेंति वा तविस्संति वा ? केवइया  
णक्खत्ता जोयं जोइंसु वा जोएंति वा जोइस्संति वा ? केवइया गहा चारं चरिंसु  
वा चरंति वा चरिस्संति वा ? केवइयाओ तारागणकोडिकोडीओ सोमं सोमैसु वा  
सोमंति वा सोमिस्संति वा ? ता जंबुद्दीवे २ दो चंदा पभासंसु वा ३, दो सूरिया  
तवइंसु वा ३, छप्पण्णं णक्खत्ता जोयं जोएंसु वा ३, छावत्तरि गहसयं चारं चरिंसु  
वा ३, एगं सयसहस्सं तेत्तीसं च सहस्सा णव य सया पण्णासा तारागणकोडिको-  
डीणं सोमं सोमैसु वा ३, “दो चंदा दो सूरा णक्खत्ता खलु हवंति छप्पण्णा । छावत्तरं  
गहसयं जंबुद्दीवे विचारीणं ॥ १ ॥ एगं च सयसहस्सं तेत्तीसं खलु भवे सहस्साइ ।  
णव य सया पण्णासा तारागणकोडिकोडीणं ॥ २ ॥” ता जंबुद्दीवं णं दीवं लवणे  
णामं समुद्दे वट्ठे वलयागारसंठाणसंठिए सव्वओ समंता संपरिक्खत्ताणं चिट्ठइ, ता  
लवणे णं समुद्दे किं समचक्कवालसंठिए विसमचक्कवालसंठिए ? ता लवणसमुद्दे  
समचक्कवालसंठिए णो विसमचक्कवालसंठिए, ता लवणसमुद्दे केवइयं चक्कवाल-  
विकखंभेणं केवइयं परिकखेवेणं आहिएति वएज्जा ? ता दो जोयणसयसहस्साइ  
चक्कवालविकखंभेणं पण्णरस जोयणसयसहस्साइ एकासीयं च सहस्साइ सयं च  
ऊयालं किंचिविसेसूणं परिकखेवेणं आहिएति वएज्जा, ता लवणसमुद्दे केवइयं चंदा  
पभासंसु वा ३ ? एवं पुच्छा जाव केवइयाउ तारागणकोडिकोडीओ० सोमिंसु वा ३ ?,  
ता लवणे णं समुद्दे चत्तारि चंदा पभासंसु वा ३, चत्तारि सूरिया तवइंसु वा ३,  
बारस णक्खत्तसयं जोयं जोएंसु वा ३, तिण्णि वावण्णा महम्महसया चारं चरिंसु  
वा ३, दो सयसहस्सा सत्तट्ठिं च सहस्सा णव य सया तारागणकोडिकोडीणं० सोमिंसु



वा ३ । पण्णरस सयसहस्सा एकासीयं सयं च ऊयालं । किंचिविसेसेण्णो लवणो-  
 दहिणो परिकखेवो ॥ १ ॥ चत्तारि चेव चंदा चत्तारि य सूरिया लवणतोए । बारस  
 णक्खत्तसयं गहाण तिण्णेव बावण्णा ॥ २ ॥ दो चेव सयसहस्सा सत्तद्धिं खलु भवे  
 सहस्साइं । णव य सया लवणजले तारागणकोडिकोडीणं ॥ ३ ॥ ता लवणसमुद्दं  
 धायईसंडे णामं दीवे वट्टे वलयागारसंठाणसंठिए तहेव जाव णो विसमचक्कवालसंठिए,  
 धायईसंडे णं दीवे केवइयं चक्कवालविकखंभेणं केवइयं परिकखेवेणं आहिएति वएज्जा ?  
 ता चत्तारि जोयणसयसहस्साइं चक्कवालविकखंभेणं ईयालीसं जोयणसयसहस्साइं दस  
 य सहस्साइं णव य एगट्ठे जोयणसए किंचिविसेसूणे परिकखेवेणं आहिएति वएज्जा,  
 धायईसंडे० दीवे केवइया चंदा पभासंसु वा ३ पुच्छा तहेव, ता धायईसंडे णं  
 दीवे बारस चंदा पभासंसु वा ३, बारस सूरिया तवेंसु वा ३, तिण्णि छत्तीसा  
 णक्खत्तसया जोयं जोएसु वा ३, एगं छप्पणं महग्गहसहस्सं चारं चरिसु वा ३,  
 अट्ठेव सयसहस्सा तिण्णि सहस्साइं सत्त य सयाइं । एगससीपरिवारो तारागण-  
 कोडिकोडीओ ॥ १ ॥ सोभं सोभेंसु वा ३-धायईसंडपरिरओ ईयाल दसुत्तरा सय-  
 सहस्सा । णव सया य एगट्ठा किंचिविसेसपरिहीणा ॥ १ ॥ चउवीसं ससिरविणो  
 णक्खत्तसया य तिण्णि छत्तीसा । एगं च गहसहस्सं छप्पणं धायईसंडे ॥ २ ॥  
 अट्ठेव सयसहस्सा तिण्णि सहस्साइं सत्त य सयाइं । धायईसंडे दीवे तारागणकोडि-  
 कोडीणं ॥ ३ ॥ ता धायईसंडं णं दीवं कालोए णामं समुदे वट्टे वलयागारसंठाण-  
 संठिए जाव णो विसमचक्कवालसंठाणसंठिए, ता कालोए णं समुदे केवइयं चक्क-  
 वालविकखंभेणं केवइयं परिकखेवेणं आहिएति वएज्जा ? ता कालोए णं समुदे अट्ठ  
 जोयणसयसहस्साइं चक्कवालविकखंभेणं पण्णत्ते एकाणउइं जोयणसयसहस्साइं सत्तरिं  
 च सहस्साइं छच्च पंचुत्तरं जोयणसए किंचिविसेसाहिए परिकखेवेणं आहिएति वएज्जा,  
 ता कालोए णं समुदे केवइया चंदा पभासंसु वा ३ पुच्छा, ता कालोए समुदे  
 बायालीसं चंदा पभासंसु वा ३, बायालीसं सूरिया तवेंसु वा ३, एकारस बावत्तरा  
 णक्खत्तसया जोयं जोइंसु वा ३, तिण्णि सहस्सा छच्च छण्णउया महग्गहसया चारं  
 चरिसु वा ३, बारस सयसहस्साइं अट्ठावीसं च सहस्साइं णव य सयाइं पण्णासा  
 तारागणकोडिकोडीओ सोभं सोभेंसु वा सोभंति वा सोभिस्संति वा, “एकाणउइं  
 सयराइं सहस्साइं परिरओ तस्स । अहियाइं छच्च पंचुत्तराइं कालोयहिवरस्स ॥ १ ॥  
 बायालीसं चंदा बायालीसं च दिणयरा दित्ता । कालोयहिंसि एए चरंति संबद्धलेसागा  
 ॥ २ ॥ णक्खत्तसहस्सं एगमेव छावत्तरं च सयमण्णं । छच्च सया छण्णउया मह-  
 ग्गहा तिण्णि य सहस्सा ॥ ३ ॥ अट्ठावीसं कालोयहिंसि बारस य सहस्साइं । णव

य सया पण्णासा तारागणकोडिकोडीणं ॥ ४ ॥” ता कालोयं णं समुद्दं पुक्खरवरे  
 णामं दीवे वट्टे वलयागारसंठाणसंठिए सव्वओ समंता संपरिक्खित्ताणं चिट्ठइ, ता  
 पुक्खरवरे णं दीवे किं समचक्कवालसंठिए विसमचक्कवालसंठिए ? ता समचक्कवाल-  
 संठिए णो विसमचक्कवालसंठिए, ता पुक्खरवरे णं दीवे केवइयं समचक्कवालविकखं-  
 भेणं केवइयं परिकखेवेणं ? ता सोलस जोयणसयसहस्साइं चक्कवालविकखंभेणं एगा  
 जोयणकोडी बाणउइं च सयसहस्साइं अउणावण्णं च सहस्साइं अट्ठचउणउए  
 जोयणसए परिकखेवेणं आहिएति वएज्जा, ता पुक्खरवरे णं दीवे केवइया चंदा  
 पभासंसु वा ३ पुच्छा तहेव, ता चोयालचंदसयं पभासंसु वा ३, चोत्तालं सूरियाणं  
 सयं तवइंसु वा ३, चत्तारि सहस्साइं बत्तीसं च णक्खत्ता जोयं जोएंसु वा ३, वारस  
 सहस्साइं छच्च बावत्तरा महग्गहसया चारं चरिंसु वा ३, छण्णउइसयसहस्साइं  
 चोयालीसं सहस्साइं चत्तारि य सयाइं तारागणकोडिकोडीणं सोभं सोभिंसु वा ३,  
 “कोडी बाणउइं खलु अउणाणउइं भवे सहस्साइं । अट्ठसया चउणउया य परिरओ  
 पोक्खरवरस्स ॥ १ ॥ चोत्तालं चंदसयं चत्तालं चेव सूरियाण सयं । पोक्खरवर-  
 दीवम्मि चरंति एए पभासंता ॥ २ ॥ चत्तारि सहस्साइं छत्तीसं चेव हुंति णक्खत्ता ।  
 छच्च सया बावत्तरा महग्गहा वारह सहस्सा ॥ ३ ॥ छण्णउइ सयसहस्सा चोत्तालीसं  
 खलु भवे सहस्साइं । चत्तारि य सया खलु तारागणकोडिकोडीणं ॥ ४ ॥” ता  
 पुक्खरवरस्स णं दीवस्स० बहुमज्झदेसभाए माणुसुत्तरे णामं पव्वए वलयागार-  
 संठाणसंठिए जे णं पुक्खरवरं दीवं दुहा विभयमाणे २ चिट्ठइ, तंजहा-अब्भितर-  
 पुक्खरद्धं च बाहिरपुक्खरद्धं च, ता अब्भितरपुक्खरद्धे णं किं समचक्कवालसंठिए  
 विसमचक्कवालसंठिए ? ता समचक्कवालसंठिए णो विसमचक्कवालसंठिए, ता अब्भि-  
 तरपुक्खरद्धे णं केवइयं चक्कवालविकखंभेणं केवइयं परिकखेवेणं आहिएति वएज्जा ?  
 ता अट्ठ जोयणसयसहस्साइं चक्कवालविकखंभेणं एक्का जोयणकोडी बायालीसं च  
 सयसहस्साइं तीसं च सहस्साइं दो अउणापण्णे जोयणसए परिकखेवेणं आहिएति  
 वएज्जा, ता अब्भितरपुक्खरद्धे णं केवइया चंदा पभासंसु वा ३ केवइया सूरा तविंसु  
 वा ३ पुच्छा, ता बावत्तरि चंदा पभासंसु वा ३, बावत्तरि सूरिया तवइंसु वा ३,  
 दोण्णि सोला णक्खत्तसहस्सा जोयं जोएंसु वा ३, छ महग्गहसहस्सा तिण्णि य  
 बत्तीसा चारं चरंसु वा ३, अडयालीससयसहस्सा बावीसं च सहस्सा दोण्णि य  
 सया तारागणकोडिकोडीणं सोभं सोभिंसु वा ३ । ता समयक्खेत्ते णं केवइयं आयाम-  
 विकखंभेणं केवइयं परिकखेवेणं आहिएति वएज्जा ? ता पणयालीसं जोयणसयसह-  
 स्साइं आयामविकखंभेणं एगा जोयणकोडी बायालीसं च सयसहस्साइं दोण्णि य

अउणपण्णे जोयणसए परिकखेवेणं आहिएति वएज्जा, ता समयकखेत्ते णं केवइया चंदा पभासेंसु वा ३ पुच्छा तहेव, ता बत्तीसं चंदसयं पभासेंसु वा ३, बत्तीसं सूरियाण सयं तवईसु वा ३, तिणिण सहस्सा छच्च छण्णउया णक्खत्तसया जोयं जोएंसु वा ३, एक्कारस सहस्सा छच्च सोलस महग्गहसया चारं चरईसु वा ३, अट्ठासीइं सयसहस्साइं चत्तालीसं च सहस्सा सत्त य सया तारागणकोडिकोडीणं सोमं सोमिंसु वा ३, अट्ठेव सयसहस्सा अब्भितरपुक्खरस्स विक्खंभो । पणयालसयसहस्सा माणुसखेत्तस्स विक्खंभो ॥ १ ॥ कोडी बायालीसं सहस्स दुसया य अउणपण्णासा । माणुसखेत्तपरिरओ एमेव य पुक्खरद्धस्स ॥ २ ॥ वावत्तिरिं च चंदा वावत्तिरिमेव दिणयरा दिता । पुक्खरवरवीवड्ढे चरंति एए पभासेंता ॥ ३ ॥ तिणिण सया छत्तीसा छच्च सहस्सा महग्गहाणं तु । णक्खत्ताणं तु भवे सोलाई दुवे सहस्साइं ॥ ४ ॥ अडयालसयसहस्सा वावीसं खलु भवे सहस्साइं । दो य सय पुक्खरद्धे तारागणकोडिकोडीणं ॥ ५ ॥ बत्तीसं चंदसयं बत्तीसं चेव सूरियाण सयं । सयलं माणुसलोयं चरंति एए पभासेंता ॥ ६ ॥ एक्कारस य सहस्सा छप्पि य सोला महग्गहाणं तु । छच्च सया छण्णउया णक्खत्ता तिणिण य सहस्सा ॥ ७ ॥ अट्ठासीइं चत्ताइं सयसहस्साइं मणुयलोगंमि । सत्त य सया अणूणा तारागणकोडिकोडीणं ॥ ८ ॥ एसो तारापिंडो सव्वसमासेण मणुयलोयंमि । बहिया पुण ताराओ जिणेहिं भणिया असंखेज्जा ॥ ९ ॥ एवइयं तारग्गं जं भणियं माणुसंमि लोयंमि । चारं कलंबुयापुप्फसंठियं जोइसं चरइ ॥ १० ॥ रविससिगहणक्खत्ता एवइया आहिया मणुयलोए । जेसिं णामागोत्तं ण पागया पण्णवेहिंति ॥ ११ ॥ छावट्ठिं पिडगाइं चंदाइच्चाण मणुयलोयंमि । दो चंदा दो सूरा य हुंति एक्केक्कए पिडए ॥ १२ ॥ छावट्ठिं पिडगाइं णक्खत्ताणं तु मणुयलोयंमि । छप्पणं णक्खत्ता हुंति एक्केक्कए पिडए ॥ १३ ॥ छावट्ठिं पिडगाइं महग्गहाणं तु मणुयलोयंमि । छावत्तरं गहसयं होइ एक्केक्कए पिडए ॥ १४ ॥ चत्तारि य पंतीओ चंदाइच्चाण मणुयलोयंमि । छावट्ठिं २ च होइ एकिक्रिया पंती ॥ १५ ॥ छप्पणं पंतीओ णक्खत्ताणं तु मणुयलोयंमि । छावट्ठिं २ हवंति एक्केक्रिया पंती ॥ १६ ॥ छावत्तरं गहाणं पंतिसयं हवइ मणुयलोयंमि । छावट्ठिं २ हवइ य एक्केक्रिया पंती ॥ १७ ॥ ते मेरुमणुचरंता पयाहिणावत्तमंडला सव्वे । अणवट्ठियजोगेहिं चंदा सूरा गहगणा य ॥ १८ ॥ णक्खत्ततारागणं अवट्ठिया मंडला मुणेयव्वा । तेवि य पयाहिणावत्तमेव मेरं अणुचरंति ॥ १९ ॥ रयणियरदिणयराणं उड्ढं च अहे व संकमो णत्थि । मंडलसंकमणं पुण सव्विभतरवाहिरं तिरिए ॥ २० ॥ रयणियरदिणयराणं

णक्खत्ताणं महग्गहाणं च । चारविसेसेण भवे सुहदुक्खविही मणुस्साणं ॥ २१ ॥  
 तेसिं पविसंताणं तावक्खेत्तं तु वड्ढुए णिययं । तेणेव कमेण पुणो परिहायइ णिक्ख-  
 मंताणं ॥ २२ ॥ तेसिं कलंबुयापुप्फसंठिया हुंति तावक्खेत्तपहा । अंतो य संकुडा  
 बाहि वित्थडा चंदसूराणं ॥ २३ ॥ केणं वड्ढुइ चंदो? परिहाणी केण होइ चंदस्स? ।  
 कालो वा जोण्हो वा केणऽणभावेण चंदस्स ॥ २४ ॥ किण्हं राहुविमाणं णिच्चं चंदेण  
 होइ अविरहियं । चउरंगुलमसंपत्तं हिच्चा चंदस्स तं चरइ ॥ २५ ॥ बावट्ठिं २ दिवसे २  
 उ सुक्कपक्खस्स । जं परिवड्ढुइ चंदो खवेइ तं चेव कालेणं ॥ २६ ॥ पण्णरसइभागेण  
 य चंदं पण्णरसमेव तं वरइ । पण्णरसइभागेण य पुणोवि तं चेव वक्कमइ ॥ २७ ॥  
 एवं वड्ढुइ चंदो परिहाणी एव होइ चंदस्स । कालो वा जुण्हो वा एवऽणभावेण  
 चंदस्स ॥ २८ ॥ अंतो मणुस्सखेत्ते हवंति चारोवगा उ उववण्णा । पंचविहा जोइ-  
 सिया चंदा सूरा गहगणा य ॥ २९ ॥ तेण परं जे सेसा चंदाइच्चगहतारणक्खत्ता ।  
 णत्थि गई णवि चारो अवट्ठिया ते सुणेयव्वा ॥ ३० ॥ एवं जंबुदीवे दुगुणा लवणे  
 चउग्गुणा हुंति । लावणगा य तिगुणिया ससिसूरा धायईसंडे ॥ ३१ ॥ दो चंदा इह  
 दीवे चत्तारि य सायरे लवणतोए । धायइसंडे दीवे बारस चंदा य सूरा य ॥ ३२ ॥  
 धायइसंडपमिइसु उट्ठिद्वा तिगुणिया भवे चंदा । आइल्लचंदसहिया अणंतराणंतरे  
 खेत्ते ॥ ३३ ॥ रिक्खग्गहतारग्गं दीवसमुदे जहिच्छसी णाउं । तस्ससीहिं तग्गुणियं  
 रिक्खग्गहतारग्गं तु ॥ ३४ ॥ बहिया उ माणसणगस्स चंदसूराणऽवट्ठिया  
 जोण्हा । चंदा अभीइजुत्ता सूरा पुण हुंति पुस्सेहिं ॥ ३५ ॥ चंदाओ सूरस्स य  
 सूरा चंदस्स अंतरं होइ । पण्णाससहस्साई तु जोयणाणं अण्णुणई ॥ ३६ ॥ सूरस्स  
 य २ ससिणो २ य अंतरं होइ । वाहिं तु माणसणगस्स जोयणाणं सयसहस्सं ॥ ३७ ॥  
 सूरंतरिया चंदा चंदंतरिया य दिणयरा दित्ता । चित्तंतरलेसाग सुहलेसा मंदलेसा  
 य ॥ ३८ ॥ अट्ठासीई च गहा अट्ठावीसं च हुंति णक्खत्ता । एगससीपरिवारो  
 एत्तो ताराण वोच्छामि ॥ ३९ ॥ छावट्ठिसहस्साई णव चेव सयाई पंचसयराई ।  
 एगससीपरिवारो तारागणकोडिकोडीणं ॥ ४० ॥ ता अंतो मणुस्सखेत्ते जे चंदिमसूरिया  
 गहगणणक्खत्ततारारूवा ते णं देवा किं उड्ढोववण्णगा कप्पोववण्णगा विमाणोव-  
 वण्णगा चारोववण्णगा चारट्ठिइया गइरइया गइसमावण्णगा? ता ते णं देवा णो  
 उड्ढोववण्णगा णो कप्पोववण्णगा विमाणोववण्णगा चारोववण्णगा णो चारट्ठिइया  
 गइरइया गइसमावण्णगा उड्ढामुहकलंबुयापुप्फसंठाणसंठिएहिं जोयणसाहस्सिएहिं  
 तावक्खेत्तेहिं साहस्सिएहिं बाहिराहि य वेउव्वियाहिं परिसाहिं महया हयणट्ठ-  
 गीयवाइयतंतीतलतालुडियघणमुइंगपडुप्पवाइयरवेणं महया उक्किट्ठिसीहणायकल-

कलरवेणं अच्छं पव्वयरायं पयाहिणावत्तमंडलचारं मेरं अणुपरियटंति, ता तेसि णं देवाणं जाहे इंदे चयइ से कहमियाणिं पकरेंति ? ता चत्तारि पंच सामाणिय-देवा तं ठाणं उवसंपज्जिताणं विहरंति जाव अण्णे इत्थ इंदे उववण्णे भवइ, ता इंदट्ठाणे णं केवइएणं कालेणं विरहिए पण्णत्ते ? ता जहण्णेणं इक्कं समयं उक्कोसेणं छम्मासे, ता बहिया णं माणुस्सक्खेत्तस्स जे चंदिमसूरियगह जाव ताराह्वा ते णं देवा किं उद्धोववण्णगा कप्पोववण्णगा विमाणोववण्णगा चारट्ठिइया गइरइया गइसमावण्णगा ? ता ते णं देवा णो उद्धोववण्णगा णो कप्पोववण्णगा विमाणोव-वण्णगा णो चारोववण्णगा चारट्ठिइया णो गइरइया णो गइसमावण्णगा पक्किट्ठग-संठाणसंठिएहिं जोयणसयसाहस्सिएहिं तावक्खेत्तेहिं सयसाहस्सियाहिं बाहिराहिं वेउव्वियाहिं परिसाहिं महया हयणट्ठणीयवाइय जाव रवेणं दिव्वाइं भोगभोगाईं भुंजमाणा विहरंति, सुहलेसा मंदलेसा मंदायवलेसा चित्तंतरेलेसा अण्णोण्णसमो-गाढाहिं लेसाहिं कूडा इव ठाणठिया ते पएसे सव्वओ समंता ओभासंति उज्जोवेति तवेति पभासंति, ता तेसि णं देवाणं जाहे इंदे चयइ से कहमियाणिं पकरेंति ? ता चत्तारि पंच सामाणियदेवा तं ठाणं तहेव जाव छम्मासे ॥ ९८ ॥ ता पुक्खरवरं णं दीवं पुक्खरोदे णामं समुदे वट्टे वलयागारसंठाणसंठिए सव्व जाव चिट्ठइ, ता पुक्खरोदे णं समुदे किं समचक्कवालसंठिए जाव णो विसमचक्कवाल-संठिए, ता पुक्खरोदे णं समुदे केवइयं चक्कवालविकखंभेणं केवइयं परिकखेवेणं आहिएति वएज्जा ? ता संखेज्जाइं जोयणसहस्साइं आयामविकखंभेणं संखेज्जाइं जोयणसहस्साइं परिकखेवेणं आहिएति वएज्जा, ता पुक्खरवरोदे णं समुदे केवइया चंदा पभासंसु वा ३ पुच्छा तहेव, ता पुक्खरोदे णं समुदे संखेज्जा चंदा पभासंसु वा ३ जाव संखेज्जाओ तारागणकोडिकोडीओ सोभं सोभंसु वा ३ । एएणं अभिलावेणं वरुणवरे दीवे वरुणोदे समुदे ४ खीरवरे दीवे खीरवरे समुदे ५ घयवरे दीवे घओदे समुदे ६ खोयवरे दीवे खोओदे समुदे ७ णंदिस्सरे दीवे णंदिस्सरवरे समुदे ८ अरु-णोदे दीवे अरुणोदे समुदे ९ अरुणवरे दीवे अरुणवरे समुदे १० अरुणवरोभासे दीवे अरुणवरोभासे समुदे ११ कुंडले दीवे कुंडलोदे समुदे १२ कुंडलवरे दीवे कुंडलवरोदे समुदे १३ कुंडलवरोभासे दीवे कुंडलवरोभासे समुदे १४ सव्वेसिं विकखंभपरिकखेवो जोइसाइं पुक्खरोदसागरसरिसाइं । ता कुंडलवरोभासणं समुदं रुयए दीवे वट्टे वलयागारसंठाणसंठिए सव्वओ जाव चिट्ठइ, ता रुयए णं दीवे किं समचक्कवाल जाव णो विसमचक्कवालसंठिए, ता रुयए णं दीवे केवइयं समचक्कवाल-विकखंभेणं केवइयं परिकखेवेणं आहिएति वएज्जा ? ता असंखेज्जाइं जोयणसह-

स्साईं चक्कवालविकखंभेणं असंखेज्जाईं जोयणसहस्साईं परिकखेवेणं आहिएति वएज्जा, ता रुयगे णं दीवे केवइया चंदा पभासंसु वा ३ पुच्छा, ता रुयगे णं दीवे असंखेज्जा चंदा पभासंसु वा ३ जाव असंखेज्जाओ तारागणकोडिकोडीओ सोभं सोभंसु वा ३, एवं रुयगे समुदे रुयगवरे दीवे रुयगवरोदे समुदे रुयगवरोभासे दीवे रुयगवरोभासे समुदे, एवं तिपडोयारा णेयव्वा जाव सूरु दीवे सूरुदे समुदे सूरुवरे दीवे सूरुवरे समुदे सूरुवरोभासे दीवे सूरुवरोभासे समुदे, सव्वेसिं विक्खंभपरिक्खेवजोड-साईं रुयगवरदीवसरिसाईं, ता सूरुवरोभासोदणं समुदं देवे णामं दीवे वट्टे वल्ल्या-गारसंठाणसंठिए सव्वओ समंता संपरिक्खित्ताणं चिट्ठइ जाव णो विसमचक्कवाल-संठिए, ता देवे णं दीवे केवइयं चक्कवालविकखंभेणं केवइयं परिकखेवेणं आहिएति वएज्जा ? ता असंखेज्जाईं जोयणसहस्साईं चक्कवालविकखंभेणं असंखेज्जाईं जोयण-सहस्साईं परिकखेवेणं आहिएति वएज्जा, ता देवे णं दीवे केवइया चंदा पभासंसु वा ३ पुच्छा तहेव, ता देवे णं दीवे असंखेज्जा चंदा पभासंसु वा ३ जाव असंखेज्जाओ तारागणकोडिकोडीओ० सोभंसु वा ३ । एवं देवोदे समुदे णागे दीवे णागोदे समुदे जक्खे दीवे जक्खोदे समुदे भूए दीवे भूओदे समुदे सयंभुरमणे दीवे सयंभुर-मणे समुदे सव्वे देवदीवसरिसा ॥ ९९-१००-१०१ ॥ एगूणवीसइमं पाहुडं समत्तं ॥ १९ ॥

ता कहं ते अणुभावे आहिएति वएज्जा ? तत्थ खलु इमाओ दो पडिवत्तीओ पणत्ताओ, तं०-तत्थेगे एवमाहंसु-ता चंदिमसूरिया णं णो जीवा अजीवा णो घणा झुसिरा णो बादरबोधिधरा कलेवरा णत्थि णं तेसिं उट्ठाणेइ वा कम्मेइ वा बलेइ वा वीरिएइ वा पुरिसक्कारपरक्कमेइ वा ते णो विज्जुं लवंति णो असणिं लवंति णो थणियं लवंति, अहे य णं बायरे वाउकाए संमुच्छइ अहे य णं बायरे वाउकाए संमुच्छित्ता विज्जुंमि लवंति असणिंमि लवंति थणियंमि लवंति एगे एवमाहंसु १, एगे पुण एवमाहंसु-ता चंदिमसूरिया णं जीवा णो अजीवा घणा णो झुसिरा बादर-बुंदिधरा कलेवरा अत्थि णं तेसिं उट्ठाणेइ वा० ते विज्जुंमि लवंति ३ एगे एवमाहंसु २, वयं पुण एवं वयामो-ता चंदिमसूरिया णं देवा महिद्धिया जाव महाणुभागा वरवत्थधरा वरमल्लधरा० वराभरणधारी अवोच्छित्तिणयट्ठ-याए अण्णे चयंति अण्णे उववज्जंति० ॥ १०२ ॥ ता कहं ते राहुकम्मे आहि-एति वएज्जा ? तत्थ खलु इमाओ दो पडिवत्तीओ पणत्ताओ, तं०-तत्थेगे एवमाहंसु-ता अत्थि णं से राहु देवे जे णं चंदं वा सूरं वा गिण्हइ एगे एवमा-हंसु १, एगे पुण एवमाहंसु-ता णत्थि णं से राहु देवे जे णं चंदं वा सूरं वा गिण्हइ० २,

तत्थ जे ते एवमाहंसु-ता अत्थि णं से राहू देवे जे णं चंदं वा सूरं वा गिण्हइ, ते एवमाहंसु-ता राहू णं देवे चंदं वा सूरं वा गेण्हमाणे बुद्धंतेणं गिण्हत्ता बुद्धं-तेणं मुयइ बुद्धंतेणं गिण्हत्ता मुद्धंतेणं मुयइ मुद्धंतेणं गिण्हत्ता मुद्धंतेणं मुयइ, वामभुयंतेणं गिण्हत्ता वामभुयंतेणं मुयइ वामभुयंतेणं गिण्हत्ता दाहिणभुयंतेणं मुयइ दाहिणभुयंतेणं गिण्हत्ता वामभुयंतेणं मुयइ दाहिणभुयंतेणं गिण्हत्ता दाहिण-भुयंतेणं मुयइ, तत्थ जे ते एवमाहंसु-ता गत्थि णं से राहू देवे जे णं चंदं वा सूरं वा गेण्हइ, ते एवमाहंसु-तत्थ णं इमे पण्णरस कसिणपोग्गला प०, तं०-सिंघाणए जड्डिए खरए खयए अंजणे खंजणे सीयले हिमसीयले केलासे अरुणाभे परिज्जए णभसूरए कविए पिंगलए राहू, ता जया णं एए पण्णरस कसिणा पोग्गला सया चंदस्स वा सूरस्स वा लेसाणुबद्धचारिणो भवंति तथा णं माणुसलोयंसि माणुसा एवं वयंति—एवं खलु राहू चंदं वा सूरं वा गेण्हइ २, ता जया णं एए पण्णरस कसिणा पोग्गला णो सया चंदस्स वा सूरस्स वा लेसाणुबद्धचारिणो भवंति तथा णं माणुस-लोयम्मि मणुस्सा एवं वयंति—एवं खलु राहू चंदं वा सूरं वा गेण्हइ०, एए एवमाहंसु, वयं पुण एवं वयामो-ता राहू णं देवे महिङ्गिए० महाणुभावे वरवत्थधरे जाव वराभरणधारी, राहुस्स णं देवस्स णव णामधेज्जा प०, तं०-सिंघाडए जड्डिए खरए खेतए ढङ्गरे मगरे मच्छे कच्छभे किण्हसप्पे, ता राहुस्स णं देवस्स विमाणा पंच-वण्णा प०, तं०-किण्हा णीला लोहिया हालिद्वा सुक्खिळा, अत्थि कालए राहुविमाणे खंजणवण्णाभे प०, अत्थि णीलए राहुविमाणे लाउयवण्णाभे पण्णत्ते, अत्थि लोहिए राहुविमाणे मंजिद्धावण्णाभे पण्णत्ते, अत्थि हालिद्दए राहुविमाणे हालिद्दावण्णाभे प०, अत्थि सुक्खिळए राहुविमाणे भासरासिवण्णाभे प०, ता जया णं राहुदेवे आगच्छमाणे वा गच्छमाणे वा विउव्वेमाणे वा परियारेमाणे वा चंदस्स वा सूरस्स वा लेस्सं पुरच्छि-मेणं आवरित्ता पच्चत्थिमेणं वीईवयइ तथा णं पुरच्छिमेणं चंदे वा सूरे वा उवदंसेइ पच्चत्थिमेणं राहू, जया णं राहुदेवे आगच्छेमाणे वा गच्छेमाणे वा विउव्वेमाणे वा परियारेमाणे वा चंदस्स वा सूरस्स वा लेस्सं दाहिणेणं आवरित्ता उत्तरेणं वीईवयइ तथा णं दाहिणेणं चंदे वा सूरे वा उवदंसेइ उत्तरेणं राहू, एएणं अमिलावेणं पच्चत्थिमेणं आवरित्ता पुरच्छिमेणं वीईवयइ उत्तरेणं आवरित्ता दाहिणेणं वीईवयइ, जया णं राहू देवे आगच्छमाणे वा गच्छमाणे वा विउव्वेमाणे वा परियारेमाणे वा चंदस्स वा सूरस्स वा लेस्सं दाहिणपुरच्छिमेणं आवरित्ता उत्तरपच्चत्थिमेणं वीईवयइ तथा णं दाहिणपुरच्छिमेणं चंदे वा सूरे वा उवदंसेइ उत्तरपच्चत्थिमेणं राहू, जया णं राहू देवे आगच्छमाणे वा गच्छमाणे वा विउव्वमाणे वा परियारेमाणे वा चंदस्स

वा सूरस्स वा लेसं दाहिणपच्चत्थिमेणं आवरित्ता उत्तरपुरच्छिमेणं वीईवयइ तथा णं दाहिणपच्चत्थिमेणं चंदे वा सूरे वा उवदंसेइ उत्तरपुरच्छिमेणं राहू, एणं अभि-  
लावेणं उत्तरपच्चत्थिमेणं आवरेत्ता दाहिणपुरच्छिमेणं वीईवयइ, उत्तरपुरच्छिमेणं  
आवरेत्ता दाहिणपच्चत्थिमेणं वीईवयइ, ता जया णं राहू देवे आगच्छमाणे वा०  
चंदस्स वा सूरस्स वा लेसं आवरेमाणे चिट्ठइ [आवरेत्ता वीईवयइ], तथा णं मणुस्स-  
लोए मणुस्सा वयंति-एवं खलु राहुणा चंदे वा सूरे वा गहिए०, ता जया णं राहू  
देवे आगच्छमाणे वा० चंदस्स वा सूरस्स वा लेसं आवरेत्ता पासेणं वीईवयइ तथा णं  
मणुस्सलोयंसि मणुस्सा वयंति-एवं खलु चंदेण वा सूरेण वा राहुस्स कुच्छी भिण्णा०,  
ता जया णं राहुदेवे आगच्छमाणे वा...चंदस्स वा सूरस्स वा लेसं आवरेत्ता  
पच्चोसकइ तथा णं मणुस्सलोए मणुस्सा वयंति-एवं खलु राहुणा चंदे वा सूरे वा  
वंते० राहुणा० २, ता जया णं राहू देवे आगच्छमाणे वा० चंदस्स वा सूरस्स वा  
लेसं आवरेत्ता मज्झमज्जेणं वीईवयइ तथा णं मणुस्सलोए मणुस्सा वयंति० राहुणा  
चंदे वा सूरे वा वीइयरिए० राहुणा० २, ता जया णं राहू देवे आगच्छमाणे०  
चंदस्स वा सूरस्स वा लेसं आवरेत्ताणं अहे सपक्खिं सपडिदिसिं चिट्ठइ तथा  
णं मणुस्सलोयंसि मणुस्सा वयंति० राहुणा चंदे वा० घत्थे० राहुणा० २ । ता  
कइविहे णं राहू प० ? ता दुविहे प०, तं०-धुवराहू य पव्वराहू य, तत्थ णं जे  
से धुवराहू से णं बहुलपक्खस्स पाडिबए पण्णरसइभागेणं भागं चंदस्स लेसं आवरे-  
माणे० चिट्ठइ, तं०-पढमाए पढमं भागं जाव पण्णरसमं भागं, चरमे समए चंदे  
रत्ते भवइ, अवसेसे समए चंदे रत्ते य विरत्ते य भवइ, तमेव सुक्कपक्खे उवदंसेमाणे २  
चिट्ठइ, तं०-पढमाए पढमं भागं जाव चंदे विरत्ते भवइ, अवसेसे समए चंदे  
रत्ते य विरत्ते य भवइ, तत्थ णं जे से पव्वराहू से जहुणेणं छण्हं मासाणं, उक्कोसेणं  
बायालीसाए मासाणं चंदस्स अडयालीसाए संवच्छराणं सूरस्स ॥ १०३ ॥ ता क्हं  
ते चंदे ससी २ आहिएति वएज्जा ? ता चंदस्स णं जोइसिंदस्स जोइसरण्णे मियंके  
विमाणे कंता देवा कंताओ देवीओ कंताइ आसणसयणखंभंडमतोवगरणाइ अप्प-  
णावि य णं चंदे देवे जोइसिंदे जोइसराया सोमे कंते सुभगे पियदंसणे सुरूवे ता  
एवं खलु चंदे ससी चंदे ससी आहिएति वएज्जा । ता क्हं ते सूरिए आइच्चे सूरे २  
आहिएति वएज्जा ? ता सूराइया णं समयाइ वा आवलियाइ वा आणापाणूइ वा  
थोवेइ वा जाव उरस्सप्पिणिओसप्पिणीइ वा, एवं खलु सूरे आइच्चे २ आहिएति  
वएज्जा ॥ १०४ ॥ ता चंदस्स णं जोइसिंदस्स जोइसरण्णे कइ अगमहिंसीओ  
पण्णत्ताओ ? ता चंदस्स० चत्तारि अगमहिंसीओ पण्णत्ताओ, तं०-चंदप्पभा



दोसिणाभा अच्चिमाली पभंकरा, जहा हेट्ठा तं चेव जाव णो चेव णं मेहुणवत्तियं, एवं  
 सूरस्सवि णेयव्वं, ता चंदिमसूरिया णं जोइसिंदा णं जोइसरायाणो केरिसए कामभोगे  
 पच्चणुभवमाणा विहरंति ? ता से जहाणामए-केइ पुरिसे पढमजोव्वणुट्ठाणवलसमत्थे  
 पढमजोव्वणुट्ठाणवलसमत्थाए भारियाए सद्धि अचिरवत्तविवाहे अत्थत्थी अत्थगवे-  
 सणयाए सोलसवासविप्पवसिए से णं तओ लद्धे कयकजे अणहसमग्गे पुणरवि णियघरं  
 हव्वमागए ण्हाए सुद्धप्पावेसाई मंगलाई वत्थाई पवरपरिहिए अप्पमहग्घाभरणाळंकिय-  
 सरीरे मणुणं थालीपागसुद्धं अट्ठारसवंजणाउलं भोयणं भुत्ते समाणे तंसि तारिसगंसि  
 वासघरंसि अंतो बाहिरओ दूमियघट्टमट्टे विचित्तउल्लोयचिच्चियतले बहुसमसुविभत्तभू-  
 मिभाए मणिरयणपणासियंययारे कालागरुपवरकुंदुरुक्कतुरुक्कध्वमधमचंतगंधुद्धुयाभिरामे  
 सुगंधवरगंधिए गंधवट्ठिभूए तंसि तारिसगंसि सयणिजंसि दुहओ उण्णाए मज्झो-  
 णयगंभीरे साल्लिगणवट्टिए पण्णत्तगंडविब्बोयणे सुरम्मे गंगापुल्लिणवालुयाउट्ठालसालि-  
 सए सुविरइयरयत्ताणे ओयवियखोमियखोमदुगूलपट्टपडिच्छायणे रत्तंसुयसंवुडे सुरम्मे  
 आईणगरुह्यव्वरणवणीयतूलफासे सुगंधवरकुसुमचुण्णसयणोवयारकलिए ताए तारिसाए  
 भारियाए सद्धि सिंगारागारचारवेसाए संगयगयहसियभणियचिच्चियसंलावविलासणि-  
 उणजुत्तोवयारकुसलाए अणुरत्ताविरत्ताए मणाणुकूलाए एगंतरइपसत्ते अण्णत्थ कच्छइ  
 मणं अकुव्वमाणे इट्ठे सद्धफरिसरसरुवगंधे पंचविहे माणुस्सए कामभोगे पच्चणुभव-  
 माणे विहरिज्जा, ता से णं पुरिसे विउसमणकालसमयंसि केरिसयं सायासोक्खं पच्चणु-  
 भवमाणे विहरइ ? उरालं समणाउसो !, ता तस्स णं पुरिसस्स कामभोगेहिंतो एत्तो  
 अणंतगुणविसिद्धतरा चेव वाणमंतराणं देवाणं कामभोगा, वाणमंतराणं देवाणं काम-  
 भोगाहिंतो अणंतगुणविसिद्धतरा चेव असुरिंदवज्जियाणं भवणवासीणं देवाणं कामभोगा,  
 असुरिंदवज्जियाणं० देवाणं कामभोगेहिंतो अणंतगुणविसिद्धतरा चेव असुरकुमाराणं  
 इंदभूयाणं देवाणं कामभोगा, असुरकुमाराणं० देवाणं कामभोगेहिंतो० गहगणण-  
 व्खत्ततारारूवाणं कामभोगा, गहगणणव्खत्ततारारूवाणं कामभोगेहिंतो अणंतगुण-  
 विसिद्धतरा चेव चंदिमसूरियाणं देवाणं कामभोगा, ता एरिसए णं चंदिमसूरिया  
 जोइसिंदा जोइसरायाणो कामभोगे पच्चणुभवमाणा विहरंति ॥ १०५ ॥ तत्थ खल्ल  
 इमे अट्ठासीई महग्गहा पण्णत्ता, तं०-इंगालए वियालए लोहियंके सणिच्छरे आहु-  
 णिए पाहुणिए कणे कणए कणकणए कणविद्याणए १० कणगसंताणे सोमे सहिए  
 आसासणे कज्जोवए कव्वरए अयकरए दुंदुभए संखे संखणामे २० संखवण्णामे कंसे  
 कंसणामे कंसवण्णामे णीले णीलोभासे रुपे रुपोभासे भासे भासरासी ३० तिले  
 तिलपुप्फवण्णे दगे दगवण्णे काए बंधे इंदग्गी धूमकेऊ हरी पिंगलए ४० बुहे

सुक्के बहस्सई राहू अगत्थी माणवए कामफासे धुरे पमुहे वियडे ५० विसंधी कप्पे-  
 ल्लए पइल्ले जडियालए अरुणे अग्गिल्लए काले महाकाले सोत्थिए सोवत्थिए ६० वद्ध-  
 माणगे पलंबे णिच्चालोए णिच्चुजोए सयंपमे ओभासे सेयंकरे खेमंकरे आभंकरे  
 पभंकरे ७० अरए विरए असोगे विसोगे विमले विवत्ते विवत्थे विसाले साले  
 सुव्वए ८० अणियट्ठी अणाविए एगजडी दुजडी करकरिए रायग्गले पुप्फकेऊ  
 भावकेऊ ८८ ॥ १०६ ॥ **वीसइमं पाहुडं समत्तं ॥ २० ॥**

इइ एस पाहुडत्था अभव्वजणहिययदुल्लहा इणमो । उक्कित्तिया भगवया जोइसरा-  
 यस्स पणत्ती ॥ १ ॥ एस गहियावि संता थद्धे गारवियमाणिपडिणीए । अबहुस्सुए  
 ण देया तव्विवरीए भवे देया ॥ २ ॥ सद्धाधिइउट्ठाणुच्छाहकम्मवलवीरियपु रि-  
 सकारेहिं । जो सिक्खिओवि संतो अभायणे परिकहेजाहि ॥ ३ ॥—सो पवयणकुल्लगण-  
 संघवाहिरो णाणविणयपरिहीणो । अरहंतथेरगणहरमेरं किर होइ बोलीणो ॥ ४ ॥  
 तम्हा धिइउट्ठाणुच्छाहकम्मवलवीरियसिक्खियं णाणं । धारेयव्वं णियमा ण य  
 अविणीएसु दायव्वं ॥ ५ ॥ वीरवरस्स भगवओ जरसरणकिलेसदोसरहियस्स ।  
 वंदामि विणयपणओ सोक्खुप्पाए सया पाए ॥ ६ ॥ १०७ ॥ **चंदपणत्ती समत्ता ॥**





णमोऽस्तु णं समणस्स भगवओ णायपुत्तमहावीरस्स


## सुत्तागमे

तत्थ णं

### सूरियपण्णत्ती

णमो अरिहंताणं णमो सिद्धाणं णमो आयरियाणं णमो उवज्झायाणं णमो लोए सव्वसाहूणं । तेणं कालेणं तेणं समएणं मिहिला णामं णयरी होत्था रिद्धत्थि-  
मियसमिद्धा पमुइयजणजाणवया...पासादीया ४ । तीसे णं मिहिलाए णयरीए  
वहिया उत्तरपुरच्छिमे विसीभाए माणिभेदे णामं उज्जाणे होत्था वण्णओ । तीसे  
णं मिहिलाए णयरीए जियसत्तू णामं राया होत्था वण्णओ । तस्स णं जिय-  
सत्तुस्स रण्णो धारिणी णामं देवी होत्था वण्णओ । तेणं कालेणं तेणं समएणं  
तम्मि उज्जाणे सामी समोसदे, परिसा णिगया, धम्मो कहिओ, परिसा पडिगया  
जाव राया जामेव दिस्सि पाउब्भूए तामेव दिस्सि पडिगए ॥ १ ॥ तेणं कालेणं  
तेणं समएणं समणस्स भगवओ महावीरस्स जेट्ठे अंतेवासी इंदभूई णामं अणगारे  
गोयमे गोतेणं सत्तुस्सेहे समचउरंससंठाणसंठिए वज्जरिसहणारायसंघयणे जाव एवं  
वयासी-कइ मंडलाइ वच्चइ १, तिरिच्छा किं च गच्छइ २ । ओभासइ केवइयं ३,  
सेयाई किं ते संठिई ४ ॥ १ ॥ कहिं पडिहया लेसा ५, कहिं ते ओयसंठिई ६ ।  
के सूरियं वरयए ७, कहं ते उदयसंठिई ८ ॥ २ ॥ कहं कट्ठा पोरिसिच्छाया ९,  
जोगे किं ते व आहिए १० । किं ते संवच्छराणाई ११, कइ संवच्छराइ य १२ ॥ ३ ॥  
कहं चंदमसो वुड्ढी १३, कया ते दोसिणा बहू १४ । केइ सिग्घगई वुत्ते १५, कहं  
दोसिणलक्खणं १६ ॥ ४ ॥ चयणोववाय १७ उच्चते १८, सूरिया कइ आहिया १९ ।  
अणभावे के व संवुत्ते २०, एवमेयाइं वीसई ॥ ५ ॥ २ ॥ वड्ढोवड्ढी सुहुत्ताणं १,  
अद्धमंडलसंठिई २ । के ते चिण्णं परियरइ ३, अंतरं किं चरंति य ४ ॥ ६ ॥  
उग्गाहइ केवइयं ५, केवइयं च विकंपइ ६ । मंडलाण य संठाणे ७, विक्खंभो ८  
अट्ठ पाहुडा ॥ ७ ॥ छप्पंच य सत्तेव य अट्ठ तिण्णि य हवंति पडिवत्ती । पढमस्स  
पाहुडस्स हवंति एयाउ पडिवत्ती ॥ ८ ॥ ३ ॥ पडिवत्तीओ उदए, तहा अत्थमणेसु  
य । भियवाए कण्णकला, सुहुत्ताण गइइ य ॥ ९ ॥ णिक्खममाणे सिग्घगई, पविसंते  
मंदगइइ य । चुलसीइसयं पुरिसाणं, तेस्सि च पडिवत्तीओ ॥ १० ॥ उदयम्मि अट्ठ

भणिया भेयग्घाए दुवे य पडिवत्ती । चत्तारि मुहुत्तगईए हुंति तइयम्मि पडिवत्ती  
 ॥ ११ ॥ ४ ॥ आवलिय १ मुहुत्तगगे २, एवंभागा य ३ जोगस्सा ४ । कुलाइं ५  
 पुण्णमासी ६ य, सण्णिवाए ७ य संठिई ८ ॥ १२ ॥ तार(य)ग्गं च ९ पेया य  
 १०, चंदमग्गत्ति ११ यावरे । देवयाण य अज्झयणे १२, मुहुत्ताणं णामया इय  
 १३ ॥ १३ ॥ दिवसा राइ वुत्ता य १४, तिहि १५ गोत्ता १६ भोयणाणि १७ य,  
 आइच्चवार १८ मासा १९ य, पंच संक्छरा २० इय ॥ १४ ॥ जोइसस्स दाराइं  
 २१, णक्खत्तविजए विय २२ । दससे पाहुडे एए बावीसं पाहुडपाहुडा ॥ १५ ॥ ५ ॥  
 एसो कमविसेसो ताव सूरियपण्णत्तीए अवसेसो अपरिसेसो  
 भावियच्चो जहा चंदपण्णत्तीए जाव अंतिमा गाहत्ति ॥ सूरिय-  
 पण्णत्ती समत्ता ॥



णमोऽत्थु णं समणस्स भगवओ णायपुत्तमहावीरस्स

## सुत्तागमे

तत्थ णं

### निरयावलियाओ

[ कप्पिया ]

तेणं कालेणं तेणं समएणं रायगिहे नामं नयरे होत्था, रिद्धित्थिमियसमिद्धे०।... गुणसिलए नामं उज्जाणे...वण्णओ। असोगवरपायवे। पुढविसिलापट्टए वण्णओ ॥ १ ॥ तेणं कालेणं तेणं समएणं समणस्स भगवओ महावीरस्स अन्तेवासी अज्जसुहम्मे नामं अणगारे जाइसंपन्ने जहा केसी जाव पच्चहिं अणगारसएहिं सद्धिं संपरिवुडे पुव्वाणुपुव्वि चरमाणे...जेणेव रायगिहे नयरे जाव अहापडिरुव्वं उग्गहं ओगि- ण्हित्ता संजमेणं जाव विहरइ। परिसा निग्गया। धम्मो कहिओ। परिसा पडिगया ॥ २ ॥ तेणं कालेणं तेणं समएणं अज्जसुहम्मस्स अणगारस्स अन्तेवासी जम्बू नामं अणगारे समचउरंससंठाणसंठिए जाव संखितविउलतेउलेस्से अज्जसुहम्मस्स अणगारस्स अदूरसामन्ते उद्धंजाणू जाव विहरइ। तए णं से जम्बू जायसद्धे जाव पज्जुवासमाणे एवं वयासी-उवज्जाणं भन्ते ! समणेणं जाव संपत्तेणं के अट्ठे पन्नत्ते ? एवं खलु जम्बू ! समणेणं भगवया जाव संपत्तेणं एवं उवज्जाणं पच्च वग्गा पन्नत्ता, तंजहा-निरयावलियाओ, कप्पवडिंसियाओ, पुप्फियाओ, पुप्फचूलियाओ, वण्हि, दसाओ ॥ ३ ॥ जइ णं भन्ते ! समणेणं जाव संपत्तेणं उवज्जाणं पच्च वग्गा पन्नत्ता, तंजहा-निरयावलियाओ जाव वण्हिदसाओ, पढमस्स णं भन्ते ! वग्गस्स उवज्जाणं निरयावलियाणं समणेणं भगवया जाव संपत्तेणं कइ अज्झयणा पन्नत्ता ? एवं खलु जम्बू ! समणेणं जाव संपत्तेणं उवज्जाणं पढमस्स वग्गस्स निरयावलियाणं दस अज्झयणा पन्नत्ता, तंजहा—काले सुकाले महाकाले कण्हे सुकण्हे तहा महा- कण्हे । वीरकण्हे य बोद्धवे रामकण्हे तहेव य ॥ १ ॥ पिउसेणकण्हे नवमे दसमे महासेणकण्हे उ । जइ णं भन्ते ! समणेणं जाव संपत्तेणं उवज्जाणं पढमस्स वग्गस्स निरयावलियाणं दस अज्झयणा पन्नत्ता, पढमस्स णं भन्ते ! अज्झयणस्स निर- यावलियाणं समणेणं जाव संपत्तेणं के अट्ठे पन्नत्ते ? एवं खलु जम्बू ! तेणं कालेणं तेणं समएणं इहेव जम्बुद्दीवे दीवे भारहे वासे चम्पा नामं नयरी होत्था,

रिद्ध० । पुण्णभेदे उज्जाणे । तत्थ णं चम्पाए नयरीए सेणियस्स रत्तो पुत्ते चेह्ण-  
णाए देवीए अत्तए कूणिए नामं राया होत्था, महया० । तस्स णं कूणियस्स रत्तो  
पउमावई नामं देवी होत्था, सोमालपाणिपाया जाव विहरइ ॥ ४ ॥ तत्थ णं  
चम्पाए नयरीए सेणियस्स रत्तो भज्जा कूणियस्स रत्तो सुल्लमाउया काली नामं देवी  
होत्था, सोमाल० जाव सुरूवा । तीसे णं कालीए देवीए पुत्ते काले नामं कुमारे  
होत्था, सोमाल० जाव सुरूवे ॥ ५ ॥ तए णं से काले कुमारे अन्नया कयाइ तिहिं  
दन्तिसहस्सेहिं तिहिं रहसहस्सेहिं तिहिं आससहस्सेहिं तिहिं मण्यकोधीहिं गरुलवूहे  
एकारसमेणं खण्डेणं कूणिएणं रत्ता सद्धि रहमुसलं संगामं ओयाए ॥ ६ ॥ तए णं  
तीसे कालीए देवीए अन्नया कयाइ कुडुम्बजागरियं जागरमाणीए अयमेयाहूवे  
अज्झत्थिए जाव समुप्पज्जित्था—एवं खलु ममं पुत्ते कालकुमारे तिहिं दन्तिसह-  
स्सेहिं जाव ओयाए, से भन्ने किं जइस्सइ ? नो जइस्सइ ? जीविस्सइ ? नो  
जीविस्सइ ? पराजिणिस्सइ ? नो पराजिणिस्सइ ? काले णं कुमारे अहं जीवमाणं  
पासिज्जा ? ओहयमण० जाव झियाइ ॥ ७ ॥ तेणं कालेणं तेणं समएणं समणे  
भगवं महावीरे समोसरिए । परिसा निग्गया । तए णं तीसे कालीए देवीए इमीसे  
कहाए लद्धट्ठाए समाणीए अयमेयाहूवे अज्झत्थिए जाव समुप्पज्जित्था—एवं खलु  
समणे भगवं० पुच्चाणुपुच्चि जाव विहरइ, तं महाफलं खलु तहारूवाणं जाव विउलस्स  
अट्ठस्स गहणयाए, तं गच्छामि णं समणं जाव पज्जुवासामि, इमं च णं एयाहूवं  
वागरणं पुच्छिस्सामित्तिक्कु एवं संपेहेइ २ ता कोडुम्बियपुरिसे सद्दावेइ २ ता एवं  
वयासी—खिप्पामेव भो देवाणुप्पिया ! धम्मियं जाणप्पवरं जुत्तामेव उवट्ठवेह उवट्ठवित्ता  
जाव पच्चप्पिणन्ति ॥ ८ ॥ तए णं सा काली देवी ण्हाया अप्पमहग्घाभरणालंक्रिय-  
सरीरावहूहिं खुज्जाहिं जाव महत्तरगविन्दपरिक्खित्ता अन्तेउराओ निग्गच्छइ २ ता  
जेणेव वाहिरिया उवट्ठाणसाला जेणेव धम्मिए जाणप्पवरे तेणेव उवागच्छइ २ ता  
धम्मियं जाणप्पवरं दुरूहइ २ ता नियगपरियालसंपरिवुडा चम्पं नयरिं  
मज्झमज्झेणं निग्गच्छइ २ ता जेणेव पुण्णभेदे उज्जाणे तेणेव उवागच्छइ २ ता  
छत्ताइए जाव धम्मियं जाणप्पवरं ठवेइ २ ता धम्मियाओ जाणप्पवराओ पच्चोरुहइ २ ता  
वहूहिं खुज्जाहिं जाव ०विन्दपरिक्खित्ता जेणेव समणे भगवं महावीरे तेणेव  
उवागच्छइ २ ता समणं भगवं महावीरं तिकखुत्तो वन्दइ २ ता ठिया चेव सपरि-  
वारा सुस्ससमाणी नमंसमाणी अभिमुहा विणएणं पज्जलिउडा पज्जुवासइ ॥ ९ ॥  
तए णं समणे भगवं जाव कालीए देवीए तीसे य महइमहालियाए धम्मकहा भाणि-  
यव्वा जाव समणोवासए वा समणोवासिया वा विहरमाणे आणाए आराहए भवइ

॥ १० ॥ तए णं सा काली देवी समणस्स भगवओ महावीरस्स अन्तियं धम्मं सोच्चा निसम्म हट्ठ जाव हियया समणं भगवं तिव्खुत्तो जाव एवं वयासी—एवं खलु भन्ते ! मम पुत्ते काले कुमारे तिहिं दन्तिसहस्सेहिं जाव रहमुसलं संगामं ओयाए, से णं भन्ते ! किं जइस्सइ ? नो जइस्सइ जाव काले णं कुमारे अहं जीवमाणं पासिज्जा ? कालीइ समणे भगवं० कालिं देविं एवं वयासी—एवं खलु काली ! तव पुत्ते काले कुमारे तिहिं दन्तिसहस्सेहिं जाव कूणिएणं रत्ता सद्धिं रहमुसलं संगामं संगामेमाणे हयमहियपवरवीरघाइयनिवडियचिन्धज्झयपडागे निरालोयाओ दिसाओ करेमाणे चेडगस्स रत्तो सपक्खं सपडिदिसिं रहेणं पडिरहं हव्वमाणए, तए णं से चेडए राया कालं कुमारं एज्जमाणं पासइ २ ता आसुरुत्ते जाव मित्तिमिसेमाणे धणुं परामुसइ २ ता उसुं परामुसइ २ ता वइसाहं ठाणं ठाइ २ ता आययकण्णाययं उसुं करेइ २ ता कालं कुमारं एगाहच्चं कूडाहच्चं जीवियाओ ववरोवेइ, तं कालगए णं काली ! काले कुमारे, नो चेव णं तुमं कालं कुमारं जीवमाणं पासिहिसि ॥ ११ ॥ तए णं सा काली देवी समणस्स भगवओ महावीरस्स अन्तियं एयमट्ठं सोच्चा निसम्म महया पुत्तसोएणं अप्फुत्ता समाणी परसुनियत्ता विव चम्पगलया धसत्ति धरणीयलंसि सव्वङ्गेहिं संनिवडिया । तए णं सा काली देवी मुहुत्तन्तरेणं आसत्था समाणी उट्ठाए उट्ठेइ २ ता समणं भगवं० वन्दइ नमंसइ वं० २ ता एवं वयासी—एवमेयं भन्ते ! तहमेयं भन्ते ! अवितहमेयं भन्ते ! असंदिद्धमेयं भन्ते ! सच्चे णं भन्ते ! एसमट्ठे जहेयं तुब्भे वयहत्तिकट्ठुं समणं भगवं० वन्दइ नमंसइ वं० २ ता तमेव धम्मियं जाणप्पवरं दुरूहइ २ ता जामेव दिसिं पाउब्भूया तामेव दिसिं पडिगया ॥ १२ ॥ भन्ते ! त्ति भगवं गोयमे जाव वन्दइ नमंसइ वं० २ ता एवं वयासी—काले णं भन्ते ! कुमारे तिहिं दन्तिसहस्सेहिं जाव रहमुसलं संगामं संगामेमाणे चेडएणं रत्ता एगाहच्चं कूडाहच्चं जीवियाओ ववरोविए समाणे कालमासे कालं किच्चा कहिं गए कहिं उववन्ने ? गोयमाइ समणे भगवं० गोयमं एवं वयासी—एवं खलु गोयमा ! काले कुमारे तिहिं दन्तिसहस्सेहिं जाव जीवियाओ ववरोविए समाणे कालमासे कालं किच्चा चउत्थीए पङ्कप्पभाए पुढवीए हेमाभे नरगे दससागरोवमट्ठिइएसु नेरइएसु नेरइयत्ताए उववन्ने ॥ १३ ॥ काले णं भन्ते ! कुमारे केरिसएहिं आरम्भेहिं केरिसएहिं समारम्भेहिं केरिसएहिं आरम्भसमारम्भेहिं केरिसएहिं भोगेहिं केरिसएहिं संभोगेहिं केरिसएहिं भोगसंभोगेहिं केरिसेण वा असुभकडकम्मपब्भारेणं कालमासे कालं किच्चा चउत्थीए पङ्कप्पभाए पुढवीए जाव नेरइयत्ताए उववन्ने ? एवं खलु गोयमा ! तेणं कालेणं तेणं समएणं रायगिहे नामं नयरे होत्था, रिद्धत्थिमियसमिद्धे० ।



तत्थ णं रायगिहे नयरे सेणिए नामं राया होत्था, महया० । तस्स णं सेणियस्स रत्तो नन्दा नामं देवी होत्था, सोमाल० जाव विहरइ । तस्स णं सेणियस्स रत्तो पुत्ते नन्दाए देवीए अत्तए अभए नामं कुमारे होत्था, सोमाल० जाव सुरुवे, साम-  
 दाणमेयदण्ड० जहा चित्तो जाव रज्जधुराए चिन्तए यावि होत्था । तस्स णं सेणि-  
 यस्स रत्तो चेळणा नामं देवी होत्था, सोमाल० जाव विहरइ ॥ १४ ॥ तए णं सा  
 चेळणा देवी अन्नया कयाइ तंसि तारिसयंसि वासघरंसि जाव सीहं सुमिणे पासित्ताणं  
 पडिबुद्धा, जहा पभावई जाव सुमिणपाढगा पडिविसजिया जाव चेळणा से वयणं  
 पडिच्छित्ता जेणेव सए भवणे तेणेव अणुपविट्ठा ॥ १५ ॥ तए णं तीसे चेळणाए  
 देवीए अन्नया कयाइ तिण्हं मासाणं बहुपडिपुण्णाणं अयमेयारुवे दोहले पाउब्भूए-  
 धन्नाओ णं ताओ अम्मयाओ जाव जम्मजीवियफले जाओ णं सेणियस्स रत्तो उयर-  
 वलीमंसेहिं सोल्लेहि य तलिएहि य भजिएहि य सुरं च जाव पसन्नं च आसाएमा-  
 णीओ जाव परिभाएमाणीओ दोहलं पविणेन्ति । तए णं सा चेळणा देवी तंसि  
 दोहलंसि अविणिज्जमाणंसि सुक्का भुक्खा निम्मंसा ओलुग्गा ओलुग्गसरीरा नित्तेया  
 दीणविमणवयणा पण्डुइयमुही ओमन्थियनयणवयणकमला जहोच्चियं पुप्फवत्थगन्ध-  
 मल्लालंकारं अपरिभुज्जमाणी करयलमलियव्व कमलमाला ओहयमणसंकप्पा जाव  
 झियाइ ॥ १६ ॥ तए णं तीसे चेळणाए देवीए अङ्गपडियारियाओ चेळणं देवि सुक्कं  
 भुक्खं जाव झियायमाणिं पासन्ति २ ता जेणेव सेणिए राया तेणेव उवागच्छन्ति २ ता  
 करयलपरिग्गहियं सिरसावत्तं मत्थए अज्जलिं कट्ठु सेणियं रायं एवं वयासी-एवं  
 खलु सामी ! चेळणा देवी न याणामो केणइ कारणेणं सुक्का भुक्खा जाव झियाइ  
 ॥ १७ ॥ तए णं से सेणिए राया तासिं अङ्गपडियारियाणं अन्तिए एयमट्ठं सोच्चा  
 निसम्म तहेव संभन्ते समाणे जेणेव चेळणा देवी तेणेव उवागच्छइ २ ता चेळणं  
 देविं सुक्कं भुक्खं जाव झियायमाणिं पासित्ता एवं वयासी-किं णं तुमं देवाणुप्पिए !  
 सुक्का भुक्खा जाव झियासि ? ॥ १८ ॥ तए णं सा चेळणा देवी सेणियस्स रत्तो  
 एयमट्ठं नो आढाइ नो परिजाणाइ, तुसिणीया संचिट्ठइ । तए णं से सेणिए राया  
 चेळणं देविं दोच्चपि तच्चपि एवं वयासी-किं णं अहं देवाणुप्पिए ! एयमट्ठस्स नो  
 अरिहे सवणयाए जं णं तुमं एयमट्ठं रहस्सीकरेसि ? ॥ १९ ॥ तए णं सा चेळणा  
 देवी सेणिएणं रत्ता दोच्चपि तच्चपि एवं वुत्ता समाणी सेणियं रायं एवं वयासी-नत्थि  
 णं सामी ! से केइ अट्ठे जस्स णं तुब्भे अणरिहा सवणयाए, नो चेव णं इमस्स  
 अट्ठस्स सवणयाए, एवं खलु सामी ! ममं तस्स ओरालस्स जाव महासुमिणस्स  
 तिण्हं मासाणं बहुपडिपुण्णाणं अयमेयारुवे दोहले पाउब्भूए-धन्नाओ णं ताओ

अम्मयाओ जाओ णं तुब्भं उयरवल्लमंसेहिं सोल्लएहि य जाव दोहलं विणेन्ति, तए णं अहं सामी ! तंसि दोहलंसि अविणिज्जमाणंसि सुक्का भुक्खा जाव झियामि ॥ २० ॥ तए णं से सेणिए राया चेळ्ळणं देविं एवं वयासी-मा णं तुमं देवाणुप्पिए ! ओहय० जाव झियाहि, अहं णं तहा जत्तिहामि जहा णं तव दोहलस्स संपत्ती भविस्सइत्तिकट्ठु चेळ्ळणं देविं ताहिं इट्ठाहिं कन्ताहिं पियाहिं मणुत्ताहिं मणामाहिं ओरालाहिं कल्लाणाहिं सिवाहिं धन्नाहिं मज्झल्लहिं मियमहुरस्सिसरीयाहिं वग्गूहिं समासासेइ २ ता चेळ्ळणाए देवीए अन्तियाओ पडिनिक्खमइ २ ता जेणेव वाहिरिया उवट्ठाणसाला जेणेव सीहासणे तेणेव उवागच्छइ २ ता सीहासणवरंसि पुरत्थाभिमुहे निसीयइ २ ता तस्स दोहलस्स संपत्तिनिमित्तं बहूहिं आएहिं उवाएहि य उप्पत्तियाए य वेणइ-याए य कम्मियाए य पारिणामियाए य परिणामेमाणे २ तस्स दोहलस्स आयं वा उवायं वा ठिइं वा अविन्दमाणे ओहयमणसंकप्पे जाव झियाइ ॥ २१ ॥ इमं च णं अभए कुमारे ष्हाए अप्पमहवघाभरणालंक्रियसरीरे सयाओ गिहाओ पडिनिक्खमइ २ ता जेणेव वाहिरिया उवट्ठाणसाला जेणेव सेणिए राया तेणेव उवागच्छइ २ ता सेणियं रायं ओहय० जाव झियायमाणं पासइ २ ता एवं वयासी-अन्नया णं ताओ ! तुब्भे ममं पासित्ता हट्ठ जाव हियया भवह किं णं ताओ ! अज्ज तुब्भे ओहय० जाव झियाह ? तं जइ णं अहं ताओ ! एयमट्ठस्स अरिहे सवणयाए तो णं तुब्भे मम एयमट्ठं जहाभूयमवितहं असंदिद्धं परिकहेह, जा णं अहं तस्स अट्ठस्स अन्तगमणं करेमि ॥ २२ ॥ तए णं से सेणिए राया अभयं कुमारं एवं वयासी-नत्थि णं पुत्ता ! से केइ अट्ठे जस्स णं तुमं अणरिहे सवणयाए, एवं खलु पुत्ता ! तव चुल्लमाउयाए चेळ्ळणाए देवीए तस्स ओरालस्स जाव महासुमिणस्स तिण्हं मासाणं बहुपडिपुण्णाणं जाव जाओ णं मम उयरवल्ली-मंसेहिं सोल्लेहि य जाव दोहलं विणेन्ति, तए णं सा चेळ्ळणा देवी तंसि दोहलंसि अविणिज्जमाणंसि सुक्का जाव झियाइ, तए णं अहं पुत्ता ! तस्स दोहलस्स संपत्ति-निमित्तं बहूहिं आएहि य जाव ठिइं वा अविन्दमाणे ओहय० जाव झियामि ॥ २३ ॥ तए णं से अभए कुमारे सेणियं रायं एवं वयासी-मा णं ताओ ! तुब्भे ओहय० जाव झियाह, अहं णं तहा जत्तिहामि जहा णं मम चुल्लमाउयाए चेळ्ळणाए देवीए तस्स दोहलस्स संपत्ती भविस्सइत्तिकट्ठु सेणियं रायं ताहिं इट्ठाहिं जाव वग्गूहिं समासासेइ २ ता जेणेव सए गिहे तेणेव उवागच्छइ २ ता अब्भिन्तरए रहस्सियए ठाणिजे पुरिसे सदावेइ २ ता एवं वयासी-गच्छह णं तुब्भे देवाणुप्पिया ! सूणाओ अल्लं मंसं रुहिरं बत्थिपुडगं च गिण्हह ॥ २४ ॥ तए णं ते ठाणिजा पुरिसा

अभएणं कुमारेणं एवं वुत्ता समाणा हट्टुट्टु० जाव पडिसुणेत्ता अभयस्स कुमारस्स अन्तियाओ पडिनिक्खमन्ति २ ता जेणेव सृणा तेणेव उवागच्छन्ति २ ता अल्लं मंसं रुहिरं वत्थिपुडगं च गिण्हन्ति २ ता जेणेव अभए कुमारे तेणेव उवागच्छन्ति २ ता करयल० तं अल्लं मंसं रुहिरं वत्थिपुडगं च उवणेन्ति ॥ २५ ॥ तए णं से अभए कुमारे तं अल्लं मंसं रुहिरं कप्पणी[ अप्प ]कप्पियं करेइ २ ता जेणेव सेणिए राया तेणेव उवागच्छइ २ ता सेणियं रायं रहस्सिगयं सयणिजंसि उत्ताणयं निवज्जावेइ २ ता सेणियस्स उयरवलीलु तं अल्लं मंसं रुहिरं विरवेइ २ ता वत्थि-पुडएणं वेडेइ २ ता सवन्तीकरणेणं करेइ २ ता चेळणं देविं उप्पि पासाए अव-लोयणवरगयं ठवावेइ २ ता चेळणाए देवीए अहे सपक्खं सपडिदिसि सेणियं रायं सयणिजंसि उत्ताणयं निवज्जावेइ, सेणियस्स रत्तो उयरवलिमंसाइं कप्प[णि]णी-कप्पियाइं करेइ २ ता से य भायणंसि पक्खिवइ । तए णं से सेणिए राया अल्लिय-मुच्छियं करेइ २ ता मुहुत्तन्तरेणं अब्भमन्नेण सद्धिं संलवमाणे चिट्ठइ । तए णं से अभयकुमारे सेणियस्स रत्तो उयरवलिमंसाइं गिण्हेइ २ ता जेणेव चेळणा देवी तेणेव उवागच्छइ २ ता चेळणाए देवीए उवणेइ । तए णं सा चेळणा देवी सेणि-यस्स रत्तो तेहिं उयरवलिमंसेहिं सोल्लेहिं जाव दोहलं विणेइ । तए णं सा चेळणा देवी संपुण्णदोहला एवं संमाणियदोहला विच्छिन्नदोहला तं गब्भं सुहंसुहेणं परि-वहइ ॥ २६ ॥ तए णं तीसे चेळणाए देवीए अन्नया कयाइ पुव्वरतावरत्तकाल-समयंसि अयमेयारूवे जाव समुप्पज्जित्था-जइ ताव इमेणं दारएणं गब्भगएणं चेव पिउणो उयरवलिमंसाणि खाइयाणि, तं सेयं खलु मए एयं गब्भं साडित्तए वा पाडित्तए वा गालित्तए वा विद्धंसित्तए वा, एवं संपेहेइ २ ता तं गब्भं बहूहिं गब्भसाडणेहि य गब्भपाडणेहि य गब्भगालणेहि य गब्भविद्धंसणेहि य इच्छइ तं गब्भं साडित्तए वा पाडित्तए वा गालित्तए वा विद्धंसित्तए वा, नो चेव णं से गब्भे सडइ वा पडइ वा गलइ वा विद्धंसइ वा । तए णं सा चेळणा देवी तं गब्भं जाहे नो संचाएइ बहूहिं गब्भसाडणेहि य जाव गब्भविद्धंसणेहि य साडित्तए वा जाव विद्धंसित्तए वा ताहे सन्ता तन्ता परितन्ता निव्विण्णा समाणी अकामिया अव-सवसा अट्ठवसट्ठुहट्ठा तं गब्भं परिवहइ ॥ २७ ॥ तए णं सा चेळणा देवी नवण्हं मासाणं बहुपडिपुण्णाणं जाव सोमालं सुखं दारगं पयाया । तए णं तीसे चेळणाए देवीए इमे एयारूवे जाव समुप्पज्जित्था-जइ ताव इमेणं दारएणं गब्भगएणं चेव पिउणो उयरवलिमंसाइं खाइय इं, तं न नज्जइ णं एस दारए संवड्डमाणे अम्हं कुलस्स अन्तकरे भविस्सइ, तं सेयं खलु अम्हं एयं दारगं एगन्ते उकुरुडियाए

उज्झावित्तए, एवं संपेहेइ २ ता दासचेडिं सद्दावेइ २ ता एवं वयासी-गच्छ णं तुमं देवाणुप्पिए ! एयं दारगं एगंते उक्कुसडियाए उज्झाहि ॥ २८ ॥ तए णं सा दासचेडी चेळणाए देवीए एवं वुत्ता समाणी करयल० जाव कट्टु चेळणाए देवीए एयमट्ठं विणएणं पडिउणेइ २ ता तं दारगं करयलपुडेणं गिण्हइ २ ता जेणेव असोगवणिया तेणेव उवागच्छइ २ ता तं दारगं एगन्ते उक्कुसडियाए उज्झाइ । तए णं तेणं दारगेणं एगन्ते उक्कुसडियाए उज्झिएणं समाणेणं सा असोगवणिया उज्जोविया यावि होत्था ॥ २९ ॥ तए णं से सेणिए राया इमीसे कहाए लद्धट्ठे समाणे जेणेव असोगवणिया तेणेव उवागच्छइ २ ता तं दारगं एगन्ते उक्कुसडियाए उज्झियं पासेइ २ ता आसुरुते जाव मिसिमिसेमाणे तं दारगं करयलपुडेणं गिण्हइ २ ता जेणेव चेळणा देवी तेणेव उवागच्छइ २ ता चेळणं देविं उच्चावयाहिं आओसणाहिं आओसइ २ ता उच्चावयाहिं निब्भच्छणाहिं निब्भच्छेइ एवं उद्धं-सणाहिं उद्धंसेइ २ ता एवं वयासी-किस्स णं तुमं मम पुत्तं एगन्ते उक्कुसडियाए उज्झावेसि ? तिकट्टु चेळणं देविं उच्चावयसवहसावियं करेइ २ ता एवं वयासी-तुमं णं देवाणुप्पिए ! एयं दारगं अणुपुव्वेणं सारक्खमाणी संगोवेमाणी संवट्ठेहि ॥ ३० ॥ तए णं सा चेळणा देवी सेणिएणं रत्ता एवं वुत्ता समाणी लज्जिया विलिया विट्ठा करयलपरिग्गहिं० सेणियस्स रत्तो विणएणं एयमट्ठं पडिउणेइ २ ता तं दारगं अणुपुव्वेणं सारक्खमाणी संगोवेमाणी संवट्ठेहि ॥ ३१ ॥ तए णं तस्स दारगस्स एगंते उक्कुसडियाए उज्झजमाणस्स अग्गङ्गुलिया कुक्कुडपिच्छएणं दूमिया यावि होत्था, अभिक्खणं अभिक्खणं पूयं च सोणियं च अभिनिस्सवइ । तए णं से दारए वेयणाभिभूए समाणे महया महया सद्देणं आरसइ । तए णं सेणिए राया तस्स दारगस्स आरसियसइं सोच्चा निसम्म जेणेव से दारए तेणेव उवागच्छइ २ ता तं दारगं करयलपुडेणं गिण्हइ २ ता तं अग्गङ्गुलियं आसयंसि पक्खिवइ २ ता पूयं च सोणियं च आसएणं आमुसइ । तए णं से दारए निव्वुए निव्वेयणे तुसिणीए संचिट्ठइ । जाहे वि य णं से दारए वेयणाए अभिभूए समाणे महया महया सद्देणं आरसइ ताहे वि य णं सेणिए राया जेणेव से दारए तेणेव उवागच्छइ २ ता तं दारगं करयलपुडेणं गिण्हइ तं चेव जाव निव्वेयणे तुसिणीए संचिट्ठइ ॥ ३२ ॥ तए णं तस्स दारगस्स अम्मापियरो तइए दिवसे चन्दसूरदरिसणियं करेन्ति जाव संपत्ते बारसाहे दिवसे अयमेयारुवं गुणनिप्फन्नं नामधेज्जं करेन्ति-जम्हा णं अम्हं इमस्स दारगस्स एगन्ते उक्कुसडियाए उज्झजमाणस्स अङ्गुलिया कुक्कुडपिच्छएणं दूमिया तं होउ णं अम्हं इमस्स दारगस्स नामधेज्जं कूणिए २ । तए णं तस्स दार-

गस्स अम्मापियरो नामधेज्जं करेन्ति 'कूणिय' ति । तए णं तस्स कूणियस्स आणु-  
 पुव्वेणं ठिइवडियं च जह्वा मेहस्स जाव उप्पि पासायवरगए विहरइ, अट्टटुओ दाओ  
 ॥ ३३ ॥ तए णं तस्स कूणियस्स कुमारस्स अन्नया० पुव्वरत्ता० जाव समुप्पजित्था-  
 एवं खलु अहं सेणियस्स रत्तो वाघाएणं नो संचाएमि सयमेव रज्जसिरिं करेमाणे  
 पालेमाणे विहरित्तए, तं सेयं खलु मम सेणियं रायं नियलबन्धणं करेत्ता अप्पाणं महया  
 महया रायाभिसेएणं अभिसिञ्चावित्तएत्तिकहु एवं संपेहेइ २ ता सेणियस्स रत्तो अन्त-  
 राणि य छिड्डाणि य विरहाणि य पडिजागरमाणे २ विहरइ ॥ ३४ ॥ तए णं से  
 कूणिए कुमारे सेणियस्स रत्तो अन्तरं वा जाव मम्मं वा अलभमाणे अन्नया कयाइ  
 कालाईए दस कुमारे नियवरे सदावेइ २ ता एवं वयासी—एवं खलु देवाणुप्पिया !  
 अम्हे सेणियस्स रत्तो वाघाएणं नो संचाएमो सयमेव रज्जसिरिं करेमाणा पालेमाणा  
 विहरित्तए, तं सेयं खलु देवाणुप्पिया ! अम्हं सेणियं रायं नियलबन्धणं करेत्ता रज्जं  
 च रट्ठं च बलं च वाहणं च कोसं च कोट्टागारं च जणवयं च एक्कारसभाए विरि-  
 ङ्खित्ता सयमेव रज्जसिरिं करेमाणाणं पालेमाणाणं जाव विहरित्तए ॥ ३५ ॥ तए णं  
 ते कालाईया दस कुमारा कूणियस्स कुमारस्स एयमट्ठं विणएणं पडिमुणन्ति । तए  
 णं से कूणिए कुमारे अन्नया कयाइ सेणियस्स रत्तो अन्तरं जाणइ २ ता सेणियं  
 रायं नियलबन्धणं करेइ २ ता अप्पाणं महया महया रायाभिसेएणं अभिसिञ्चावेइ ।  
 तए णं से कूणिए कुमारे राया जाए महया० ॥ ३६ ॥ तए णं से कूणिए राया अन्नया  
 कयाइ ण्हाए सव्वालंकारविभूसिए चेळणाए देवीए पायवन्दए हव्वमागच्छइ । तए णं  
 से कूणिए राया चेळणं देविं ओहय० जाव झियायमाणं पासइ २ ता चेळणाए देवीए  
 पायग्गहणं करेइ २ ता चेळणं देविं एवं वयासी—किं णं अम्मो ! तुम्हं न तुट्ठी  
 वा न ऊसए वा न हरिसे वा न आणन्दे वा, जं णं अहं सयमेव रज्जसिरिं जाव  
 विहरामि ? ॥ ३७ ॥ तए णं सा चेळणा देवी कूणियं रायं एवं वयासी—कहं  
 णं पुत्ता ! ममं तुट्ठी वा ऊसए वा हरिसे वा आणन्दे वा भविस्सइ जं णं तुमं सेणियं  
 रायं पियं देवयं गुरुजणं अच्चन्तनेहाणुरागरत्तं नियलबन्धणं करित्ता अप्पाणं महया २  
 रायाभिसेएणं अभिसिञ्चावेसि ? ॥ ३८ ॥ तए णं से कूणिए राया चेळणं देविं एवं  
 वयासी—घाएउकामे णं अम्मो ! मम सेणिए राया, एवं मारेउ० बन्धिउ० निच्छु-  
 मिउकामे णं अम्मो ! ममं सेणिए राया, तं कहं णं अम्मो ! ममं सेणिए राया  
 अच्चन्तनेहाणुरागरत्ते ? ॥ ३९ ॥ तए णं सा चेळणा देवी कूणियं कुमारं एवं वयासी—  
 एवं खलु पुत्ता ! तुमंसि ममं गबभे आभूए समाणे तिण्हं मासाणं बहुपडिपुण्णाणं  
 ममं अयमेयारुवे दोहले पाउबभूए—धन्नाओ णं ताओ अम्मयाओ जाव अंगपडिचारि-

याओ निरवसेसं भाणियव्वं जाव जाहे वि य णं तुमं वेयणाए अभिभूए महया जाव तुसिणीए संविट्ठसि, एवं खलु तव पुत्ता ! सेणिए राया अच्चन्तनेहाणुरागरत्ते ॥४०॥ तए णं से कूणिए राया चेळ्ळणाए देवीए अन्तिए एयमट्ठं सोच्चा निसम्म चेळ्ळणं देविं एवं वयासी—दुट्ठु णं अम्मो ! मए कयं सेणियं रायं पियं देवयं गुरुजणं अच्चन्तनेहाणुरागरत्तं नियलवन्धणं करन्तेणं, तं गच्छामि णं सेणियस्स रत्तो सयमेव नियलाणि छिन्दामित्तिकट्ठु परसुहत्थगए जेणेव चारगसाला तेणेव पहारेत्थ गमणाए ॥ ४१ ॥ तए णं सेणिए राया कूणियं कुमारे परसुहत्थगयं एज्जमाणं पासइ २ ता एवं वयासी—एस णं कूणिए कुमारे अपत्थियपत्थिए जाव सिरिहिरिपरिवज्जिए परसुहत्थगए इह हव्वमागच्छइ, तं न नज्जइ णं ममं केणइ कुमारेणं मारिस्सइत्तिकट्ठु मीए जाव संजायमए तालपुडगं विसं आसगंसि पक्खिवइ । तए णं से सेणिए राया तालपुडगविसंसि आसगंसि पक्खित्ते समाणे मुहुत्तन्तरेणं परिणममाणंसि निप्पाणे निचेट्ठे जीवविप्पजडे ओइण्णे ॥ ४२ ॥ तए णं से कूणिए कुमारे जेणेव चारगसाला तेणेव उवागए, सेणियं रायं निप्पाणं निचेट्ठं जीवविप्पजडं ओइण्णं पासइ २ ता महया पिइसोएणं अप्फुण्णे समाणे परसुनियत्ते विव चम्पगवरपायवे धसत्ति धरणीयलंसि सव्वज्जेहिं संनिवडिए । तए णं से कूणिए कुमारे मुहुत्तन्तरेण आसत्थे समाणे रोयमाणे कन्दमाणे सोयमाणे विलवमाणे एवं वयासी—अहो णं मए अधच्चेणं अपुण्णेणं अकयपुण्णेणं दुट्ठुकयं सेणियं रायं पियं देवयं अच्चन्तनेहाणुरागरत्तं नियलवन्धणं करन्तेणं, मममूलागं चेव णं सेणिए राया कालगएत्तिकट्ठु ईसरतलवर जाव संधिवालसद्धिं संपरिवुडे रोयमाणे ३ महया इट्ठीसक्कारसमुदएणं सेणियस्स रत्तो नीहरणं करेइ २ ता बहूइं लोइयाइं मयकिच्चाइं करेइ । तए णं से कूणिए कुमारे एएणं महया मणोमाणसिएणं दुक्खेणं अभिभूए समाणे अन्नया कयाइ अन्तेउरपरियालसंपरिवुडे सभण्डमत्तोवगरणमायाए रायगिहाओ पडिनिक्खमइ २ ता जेणेव चम्पा-नयरी तेणेव उवागच्छइ, तत्थवि णं विउलभोगसमिइसमन्नागए कालेणं अप्पसोए जाए यावि होत्था ॥ ४३ ॥ तए णं से कूणिए राया अन्नया कयाइ कालाईए दस कुमारे सद्दावेइ २ ता रज्जं च जाव जणवयं च एक्कारसभाए विरिञ्चइ २ ता सयमेव रज्जसिंरिं करेमाणे पालेमाणे विहरइ ॥ ४४ ॥ तत्थ णं चम्पाए नयरीए सेणियस्स रत्तो पुत्ते चेळ्ळणाए देवीए अत्तए कूणियस्स रत्तो सहोयरे कणीयसे भाया वेहल्ले नामं कुमारे होत्था, सोमाले जाव सुरुवे । तए णं तस्स वेहल्लस्स कुमारस्स सेणिएणं रत्ता जीवंतएणं चेव सेयणए गन्धहत्थी अट्टारसवंके य हारे पुव्वदिच्चे । तए णं से वेहल्ले कुमारे सेयणएणं गन्धहत्थिणा अन्तेउरपरियालसंपरिवुडे चम्पं नयरीं मज्झंमज्झेणं निगच्छइ २ ता अभिक्खणं २ गङ्गं

महाणइं मज्जणयं ओयरइ । तए णं सेयणए गन्धहत्थी देवीओ सोण्डाए गिण्हइ २ ता अप्पेगइयाओ पुट्ठे ठवेइ, अप्पेगइयाओ खन्धे ठवेइ, एवं कुम्भे ठवेइ, सीसे ठवेइ, दन्तमुसले ठवेइ, अप्पेगइयाओ सोंडाए गहाय उट्ठं वेहासं उच्चिहइ, अप्पेगइयाओ सोण्डागयाओ अन्दोलावेइ, अप्पेगइयाओ दन्तन्तरेसु नीणेइ, अप्पेगइयाओ सीमरेणं ण्हाणेइ, अप्पेगइयाओ अणेगेहिं कीलावणेहिं कीलावेइ । तए णं चम्पाए नयरीए सिंघाडगतिगच्छकचरमहापहपहेसु बहुजणो अन्नमन्नस्स एवमाइक्खइ जाव पस्सेइ-एवं खलु देवाणुप्पिया ! वेहल्ले कुमारे सेयणएणं गन्धहत्थिणा अन्तेउर० तं चेव जाव अणेगेहिं कीलावणएहिं कीलावेइ, तं एस णं वेहल्ले कुमारे रज्जसिरिफलं पच्चणुभवमाणे विहरइ, नो कूणिए राया ॥ ४५ ॥ तए णं तीसे पउमावईए देवीए इमीसे कहाए लद्धट्ठाए समाणीए अयमेयारूवे जाव समुप्पज्जित्था-एवं खलु वेहल्ले कुमारे सेयणएणं गन्धहत्थिणा जाव अणेगेहिं कीलावणएहिं कीलावेइ, तं एस णं वेहल्ले कुमारे रज्जसिरिफलं पच्चणुभवमाणे विहरइ, नो कूणिए राया, तं किं णं अम्हं रज्जेण वा जाव जणवएण वा जइ णं अम्हं सेयणगे गन्धहत्थी नत्थि ? तं सेयं खलु ममं कूणियं रायं एयमट्ठं विज्जवित्तएत्तिकट्ठु एवं संपेहेइ २ ता जेणेव कूणिए राया तेणेव उवागच्छइ २ ता करयल० जाव एवं वयासी-एवं खलु सामी ! वेहल्ले कुमारे सेयणएणं गन्धहत्थिणा जाव अणेगेहिं कीलावणएहिं कीलावेइ, तं किं णं अम्हं रज्जेण वा जाव जणवएण वा जइ णं अम्हं सेयणए गन्धहत्थी नत्थि ? ॥ ४६ ॥ तए णं से कूणिए राया पउमावईए० एयमट्ठं नो आढाइ नो परिजाणाइ, तुसिणीए संचिट्ठइ । तए णं सा पउमावई देवी अभिक्खणं २ कूणियं रायं एयमट्ठं विज्जवेइ । तए णं से कूणिए राया पउमावईए देवीए अभिक्खणं २ एयमट्ठं विज्ज-विज्जमाणे अन्नया कयाइ वेहल्ले कुमारे सदावेइ २ ता सेयणगं गन्धहत्थि अट्टारसवंकं च हारं जायइ ॥ ४७ ॥ तए णं से वेहल्ले कुमारे कूणियं रायं एवं वयासी-एवं खलु सामी ! सेणिएणं रत्ता जीवन्तेणं चेव सेयणए गन्धहत्थी अट्टारसवंकं य हारे दिन्ने, तं जइ णं सामी ! तुब्भे ममं रज्जस्स य जाव जणवयस्स य अट्ठं दलयह तो णं अहं तुब्भं सेयणगं गन्धहत्थि अट्टारसवंकं च हारं दलयामि । तए णं से कूणिए राया वेहल्लस्स कुमारस्स एयमट्ठं नो आढाइ नो परिजाणइं, अभिक्खणं २ सेयणगं गन्धहत्थि अट्टारसवंकं च हारं जायइ ॥ ४८ ॥ तए णं तस्स वेहल्लस्स कुमारस्स कूणिएणं रत्ता अभिक्खणं २ सेयणगं गन्धहत्थि अट्टारसवंकं च हारं...एवं खलु अक्खिखविज्जकामे णं गिण्हिउकामे णं उद्दालेउकामे णं ममं कूणिए राया सेयणगं गन्धहत्थि अट्टारसवंकं च हारं, तं जाव न उद्दालेइ ममं कूणिए राया ताव ( सेयं मे )

सेयणगं गन्धहत्थि अट्टारसवंकं च हारं गहाय अन्तेउरपरियालसंपरिवुडस्स समण्डम-  
 त्तोवगरणमायाए चम्पाओ नयरीओ पडिनिक्खमिता वेसालीए नयरीए अज्जगं चेडयं  
 रायं उवसंपज्जित्ताणं विहरित्ताए, एवं संपेहेइ २ ता कूणियस्स रत्तो अन्तराणि जाव  
 पडिजागरमाणे २ विहरइ । तए णं से वेहल्ले कुमारे अन्नया कयाइ कूणियस्स रत्तो  
 अन्तरं जाणइ २ ता सेयणगं गन्धहत्थि अट्टारसवंकं च हारं गहाय अन्तेउरपरियाल-  
 संपरिवुडे समण्डमत्तोवगरणमायाए चम्पाओ नयरीओ पडिनिक्खमइ २ ता जेणेव  
 वेसाली नयरी तेणेव उवागच्छइ २ ता वेसालीए नयरीए अज्जगं चेडयं रायं  
 उवसंपज्जित्ताणं विहरइ ॥ ४९ ॥ तए णं से कूणिए राया इमीसे कहाए लद्धट्ठे  
 समाणे—एवं खलु वेहल्ले कुमारं मम असंविदिएणं सेयणगं गन्धहत्थि अट्टारसवंकं च  
 हारं गहाय अन्तेउरपरियालसंपरिवुडे जाव अज्जगं चेडयं रायं उवसंपज्जित्ताणं  
 विहरइ, तं सेयं खलु ममं सेयणगं गन्धहत्थि अट्टारसवंकं च हारं आणेउं दूयं  
 पेत्तित्ताए, एवं संपेहेइ २ ता दूयं सहावेइ २ ता एवं वयासी—गच्छह णं तुमं  
 देवाणुप्पिया ! वेसालिं नयरिं, तत्थ णं तुमं ममं अज्जं चेडगं रायं करयल० वद्धावेत्ता  
 एवं वयाहि—एवं खलु सामी ! कूणिए राया विन्नवेइ—एस णं वेहल्ले कुमारं कूणि-  
 यस्स रत्तो असंविदिएणं सेयणगं० अट्टारसवंकं च हारं गहाय इह हव्वमाणए, तए  
 णं तुब्भे सामी ! कूणियं रायं अणुगिण्हमाणा सेयणगं० अट्टारसवंकं च हारं कूणियस्स  
 रत्तो पच्चप्पिण्ह वेहल्लं कुमारं च पेसेह ॥ ५० ॥ तए णं से दूए कूणिएणं० करयल०  
 जाव पडिसुणित्ता जेणेव सए गिहे तेणेव उवागच्छइ २ ता जहा चित्तो जाव  
 वद्धावेत्ता एवं वयासी—एवं खलु सामी ! कूणिए राया विन्नवेइ—एस णं वेहल्ले कुमारं  
 तहेव भाणियव्वं जाव वेहल्लं कुमारं च पेसेह ॥ ५१ ॥ तए णं से चेडए राया  
 तं दूयं एवं वयासी—जह चेव णं देवाणुप्पिया ! कूणिए राया सेणियस्स रत्तो पुत्ते  
 चेळणाए देवीए अत्तए ममं नत्तुए तहेव णं वेहल्लेवि कुमारं सेणियस्स रत्तो पुत्ते  
 चेळणाए देवीए अत्तए ममं नत्तुए, सेणिएणं रत्ता जीवन्तेणं चेव वेहल्लस्स कुमारस्स  
 सेयणगे गन्धहत्थी अट्टारसवंके य हारे पुव्वविइण्णे, तं जइ णं कूणिए राया वेहल्लस्स  
 रज्जस्स य० जणवयस्स य अद्धं दलयइ तो णं अहं सेयणगं० अट्टारसवंकं च हारं  
 कूणियस्स रत्तो पच्चप्पिणामि वेहल्लं च कुमारं पेसेमि । तं दूयं सक्कारेइ संमाणेइ  
 पडिविसज्जेइ ॥ ५२ ॥ तए णं से दूए चेडएणं रत्ता पडिविसज्जिए समाणे जेणेव  
 चाउग्घण्टे आसरहे तेणेव उवागच्छइ २ ता चाउग्घण्टं आसरहं दुरुहइ २ ता  
 वेसालिं नयरिं मज्झमज्झेणं निग्गच्छइ २ ता सुमेहिं वसहीहिं पायरासेहिं जाव  
 वद्धावेत्ता एवं वयासी—एवं खलु सामी ! चेडए राया आणवेइ—जह चेव णं



कूणिए राया सेणियस्स रत्तो पुत्ते चेळणाए देवीए अत्तए मम नत्तुए, तं चेव भाणि-  
यव्वं जाव वेहळं च कुमारं पेसेमि, तं न देइ णं सामी ! चेडए राया सेयणं०  
अट्टारसव्वं च हारं वेहळं च नो पेसेइ ॥ ५३ ॥ तए णं से कूणिए राया दोच्चं पि  
दूयं सदावेत्ता एवं वयासी-गच्छह णं तुमं देवाणुप्पिया ! वेसालिं नयरिं, तत्थ णं  
तुमं मम अज्जगं चेडगं रायं जाव एवं वयाहि—एवं खलु सामी ! कूणिए राया  
विन्नवेइ—जाणि काणि रयणाणि समुप्पज्जन्ति सव्वाणि ताणि रायकुलगामीणि,  
सेणियस्स रत्तो रज्जसिरिं करेमाणस्स पालेमाणस्स दुवे रयणा समुप्पजा, तंजहा-  
सेयणए गन्धहत्थी अट्टारसव्वं हारे, तं णं तुब्भे सामी ! रायकुलपरंपरागयं ठिइयं  
अलोवेमाणा सेयणं गन्धहत्थि अट्टारसव्वं च हारं कूणियस्स रत्तो पच्चप्पिणह,  
वेहळं कुमारं पेसेइ ॥ ५४ ॥ तए णं से दूए कूणियस्स रत्तो तहेव जाव वद्धावेत्ता  
एवं वयासी—एवं खलु सामी ! कूणिए राया विन्नवेइ—जाणि काणि जाव वेहळं  
कुमारं पेसेइ । तए णं से चेडए राया तं दूयं एवं वयासी—जह चेव णं देवाणु-  
प्पिया ! कूणिए राया सेणियस्स रत्तो पुत्ते चेळणाए देवीए अत्तए जहा पढमं जाव  
वेहळं च कुमारं पेसेमि । तं दूयं सक्कारेइ संमाणेइ पडिविसजेइ ॥ ५५ ॥ तए णं  
से दूए जाव कूणियस्स रत्तो वद्धावेत्ता एवं वयासी—चेडए राया आणवेइ—जह चेव  
णं देवाणुप्पिया ! कूणिए राया सेणियस्स रत्तो पुत्ते चेळणाए देवीए अत्तए जाव  
वेहळं कुमारं पेसेमि, तं न देइ णं सामी ! चेडए राया सेयणं गन्धहत्थि अट्टार-  
सव्वं च हारं, वेहळं कुमारं नो पेसेइ ॥ ५६ ॥ तए णं से कूणिए राया तस्स  
दूयस्स अन्तिए एयमट्ठं सोच्चा निसम्म आसुरुत्ते जाव मिसिमिसेमाणे तच्च दूयं  
सदावेइ २ ता एवं वयासी—गच्छह णं तुमं देवाणुप्पिया ! वेसालीए नयरीए चेडगस्स  
रत्तो वामेणं पाएणं पाय[वी]पीढं अक्कमाहि २ ता कुन्तग्गेणं लेहं पणावेहि २ ता  
आसुरुत्ते जाव मिसिमिसेमाणे तिवलियं भिउडिं निडाले साहट्ठु चेडगं रायं एवं  
वयाहि—हं भो चेडगराया ! अपत्थियपत्थिया ! दुरन्त० जाव ० परिवज्जिया ! एस णं  
कूणिए राया आणवेइ—पच्चप्पिणाहि णं कूणियस्स रत्तो सेयणं० अट्टारसव्वं च  
हारं वेहळं च कुमारं पेसेहि अहवा जुद्धसज्जो चिट्ठाहि, एस णं कूणिए राया सबले  
सवाहणे सखन्धावारे णं जुद्धसज्जे इह हव्वमागच्छइ ॥ ५७ ॥ तए णं से दूए  
करयल० तहेव जाव जेणेव चेडए० तेणेव उवागच्छइ २ ता करयल० जाव  
वद्धावेत्ता एवं वयासी—एस णं सामी ! ममं विणयपडिवती, इयाणि कूणियस्स रत्तो  
आणत्ति चेडगस्स रत्तो वामेणं पाएणं पायपीढं अक्कमइ २ ता आसुरुत्ते कुन्तग्गेण  
लेहं पणावेइ तं चेव सबलखन्धावारे णं इह हव्वमागच्छइ ॥ ५८ ॥ तए णं से


चेडए राया तस्स दूयस्स अंतिए एयमट्ठं सोच्चा निसम्म आसुस्ते जाव साहट्टु एव वयासी-न अप्पिणामि णं कूणियस्स रत्तो सेयणणं अट्टारसवंकं हारं वेहत्थं च कुमारे नो पेसेमि, एस णं जुद्धसज्जे चिट्ठामि । तं दूयं असक्कारियं असंमाणियं अवदारेणं निच्छुहावेइ ॥ ५९ ॥ तए णं से कूणिए राया तस्स दूयस्स अन्तिए ए[अ]यमट्ठं सोच्चा निसम्म आसुस्ते कालाईए दस कुमारे सद्दावेइ २ ता एवं वयासी-एवं खलु देवाणुप्पिया ! वेहत्थे कुमारे ममं असंविदिएणं सेयणणं गन्धहत्थि अट्टारसवंकं हारं अन्तेउरं सभण्डं च गहाय चम्पाओ पडिनिक्खमइ २ ता वेसालिं अज्जमं जाव उवसंपज्जित्तणं विहरइ, तए णं मए सेयणगस्स गन्धहत्थिस्स अट्टारसवंकस्स० अट्टाए दूया पेसिया, ते थ चेडएण रत्ता इमेणं कारणेणं पडिसेहिया, अटुत्तरं च णं ममं तच्चे दूए असक्कारिए असंमाणिए अवदारेणं निच्छुहावेइ, तं सेयं खलु देवाणुप्पिया ! अम्हं चेडगस्स रत्तो जुत्तं गिहित्तए ! तए णं कालाईया दस कुमारा कूणियस्स रत्तो एयमट्ठं विणएणं पडिउणेन्ति ॥ ६० ॥ तए णं से कूणिए राया कालाईए दस कुमारे एवं वयासी-गच्छह णं तुब्भे देवाणुप्पिया ! सएसु सएसु रज्जेसु पत्तेयं पत्तेयं ण्हाया हत्थिखन्धवरगया पत्तेयं पत्तेयं तिहिं दन्तिसहस्सेहिं एवं तिहिं रहसहस्सेहिं तिहिं आससहस्सेहिं तिहिं मणुस्सकोडीहिं सद्धिं संपरिवुडा सव्विद्धीए जाव रवेणं सएहिन्तो २ नयरेहिन्तो पडिनिक्खमइ २ ता ममं अन्तियं पाउब्भवह ॥ ६१ ॥ तए णं ते कालाईया दस कुमारा कूणियस्स रत्तो एयमट्ठं सोच्चा सएसु सएसु रज्जेसु पत्तेयं २ ण्हाया हत्थि जाव तिहिं मणुस्सकोडीहिं सद्धिं संपरिवुडा सव्विद्धीए जाव रवेणं सएहिन्तो २ नयरेहिन्तो पडिनिक्खमन्ति २ ता जेणेव अज्जा जणवए जेणेव चम्पा नयरी जेणेव कूणिए राया तेणेव उवागया करयल० जाव वद्दावेन्ति ॥ ६२ ॥ तए णं से कूणिए राया कोडुम्बियपुरिसे सद्दावेइ २ ता एवं वयासी-खिप्पामेव भो देवाणुप्पिया ! आभिसेकं हत्थिरयणं पडिकप्पेह, हयगयरहजोहचाउरक्किणिं सेणं संनाहेह, ममं एयमाणत्तिथं पच्चप्पिणह जाव पच्चप्पिणन्ति । तए णं से कूणिए राया जेणेव मज्जणघरे तेणेव उवागच्छइ जाव पडिनिग्गच्छित्ता जेणेव बाहिरिया उवट्ठा-णसाला जाव नरवई दुरुढे ॥ ६३ ॥ तए णं से कूणिए राया तिहिं दन्तिसहस्सेहिं जाव रवेणं चम्पं नयरिं मज्झमज्झेणं निग्गच्छइ २ ता जेणेव कालाईया दस कुमारा तेणेव उवागच्छइ २ ता कालाईएहिं दसहिं कुमारेहिं सद्धिं एगओ मेल-यन्ति । तए णं से कूणिए राया तेत्तीसाए दन्तिसहस्सेहिं तेत्तीसाए आससहस्सेहिं तेत्तीसाए रहसहस्सेहिं तेत्तीसाए मणुस्सकोडीहिं सद्धिं संपरिवुडे सव्विद्धीए जाव रवेणं सुभेहिं वसहीहिं सुभेहिं पायरासेहिं नाइविगिट्ठेहिं अन्तरावासेहिं वसमाणे २

अङ्गजणवयस्स मज्झमज्जेणं जेणेव विदेहे जणवए जेणेव वेसाली नयरी तेणेव  
 पहारेत्थ गमणाए ॥ ६४ ॥ तए णं से चेडए राया इमीसे कहाए लद्धे समाणे  
 नव मल्लई नव लेच्छई कासीकोसलगा अट्टारसवि गणरायाणो सद्दावेइ २ ता एवं  
 वयासी-एवं खलु देवाणुप्पिया ! वेहल्ले कुमारे कूणियस्स रत्तो असंविदिएणं सेयणगं  
 अट्टारसवंकं च द्वारं गहाय इहं हव्वमागए, तए णं कूणिएणं सेयणगस्स अट्टारसवंकस्स  
 य अट्टाए तओ दूया पेसिया, ते य मए इमेणं कारणेणं पडिसेहिया, तए णं से  
 कूणिए ममं एयमट्ठं अपडिसुणमाणे चाउरङ्गिणीए सेणाए सद्धिं संपरिवुडे जुज्झ-  
 सजे इहं हव्वमागच्छइ, तं किं णं देवाणुप्पिया ! सेयणगं अट्टारसवंकं (च) कूणियस्स  
 रत्तो पच्चप्पिणामो ? वेहल्ले कुमारं पेसेमो ? उदाहु जुज्झत्था ॥ ६५ ॥ तए णं  
 नव मल्लई नव लेच्छई कासीकोसलगा अट्टारसवि गणरायाणो चेडगं रायं एवं  
 वयासी-न एयं सामी ! जुत्तं वा पत्तं वा रायसरिसं वा जं णं सेयणगं अट्टार-  
 सवंकं कूणियस्स रत्तो पच्चप्पिणिजइ वेहल्ले य कुमारे सरणागए पेसिजइ, तं जइ  
 णं कूणिए राया चाउरङ्गिणीए सेणाए सद्धिं संपरिवुडे जुज्झसजे इहं हव्वमागच्छइ,  
 तए णं अम्हे कूणिएणं रत्ता सद्धिं जुज्झामो ॥ ६६ ॥ तए णं से चेडए राया ते  
 नव मल्लई नव लेच्छई कासीकोसलगा अट्टारसवि गणरायाणो एवं वयासी-जइ णं  
 देवाणुप्पिया ! तुव्मे कूणिएणं रत्ता सद्धिं जुज्झह तं गच्छइ णं देवाणुप्पिया !  
 सएसु २ रजेसु ण्हाया जहा कालाईया जाव जएणं विजएणं वद्धावेन्ति । तए णं  
 से चेडए राया कोडुम्बियपुरिसे सद्दावेइ २ ता एवं वयासी-आभिसेक्कं जहा कूणिए  
 जाव दुरुडे ॥ ६७ ॥ तए णं से चेडए राया तिहिं दन्तिसहस्सेहिं जहा कूणिए  
 जाव वेसालिं नयरिं मज्झमज्जेणं निग्गच्छइ २ ता जेणेव ते नव मल्लई नव  
 लेच्छई कासीकोसलगा अट्टारसवि गणरायाणो तेणेव उवागच्छइ । तए णं से चेडए  
 राया सत्तावन्नाए दन्तिसहस्सेहिं सत्तावन्नाए आससहस्सेहिं सत्तावन्नाए रहसहस्सेहिं  
 सत्तावन्नाए मणुस्सकोडीहिं सद्धिं संपरिवुडे सव्विद्धीए जाव रवेणं सुमेहिं वसहीहिं  
 पायरासेहिं नाइविनिट्ठेहिं अन्तरेहिं वसमाणे २ विदेहं जणवयं मज्झमज्जेणं जेणेव  
 देसपन्ते तेणेव उवागच्छइ २ ता खन्धावारनिवेसणं करेइ २ ता कूणियं रायं  
 पडिवालमाणे जुज्झसजे चिट्ठइ ॥ ६८ ॥ तए णं से कूणिए राया सव्विद्धीए जाव  
 रवेणं जेणेव देसपन्ते तेणेव उवागच्छइ २ ता चेडयस्स रत्तो जोयणन्तरियं  
 खन्धावारनिवेसं करेइ ॥ ६९ ॥ तए णं ते दोन्निवि रायाणो रणभूमिं सज्जावेन्ति २ ता  
 रणभूमिं जयन्ति । तए णं से कूणिए राया तेत्तीसाए दन्तिसहस्सेहिं जाव  
 मणुस्सकोडीहिं गरुलवूहं रएइ २ ता गरुलवूहेणं रहसुसलं संगमं उवायाए । तए

णं से चेडगे राया सत्तावन्नाए दन्तिसहस्सेहिं जाव सत्तावन्नाए मणुस्सकोडीहिं सगडवूहं एइ २ ता सगडवूहेणं रहमुसलं संगामं उवायाए । तए णं ते दोण्हवि राइणं अणीया संनद्धं जाव गहियाउहपहरणा मंगइएहिं फलएहिं निक्कट्टाहिं असीहिं अंसागएहिं तोणेहिं सजीवेहिं धण्हिं समुक्खित्तेहिं सरेहिं समुल्लालियाहिं डावाहिं ओसारियाहिं ऊरुघण्टाहिं छिप्पतूरेणं वज्जमाणेणं महया उक्किट्टसीहनाय-बोलकलकलरवेणं समुदरवभूयं पिव करेमाणा सव्विड्ढीए जाव रवेणं हयगया हय-गएहिं गयगया गयगएहिं रहगया रहगएहिं पायत्तिया पायत्तिएहिं अन्नमन्नेहिं सद्धिं संपलगा यावि होत्था । तए णं ते दोण्हवि रायाणं अणीया नियगसामी-सासणाणुरत्ता मह[या]न्तं जणक्खयं जणवहं जणप्पमहं जणसंवट्ठकप्पं नचन्तकबन्ध-वारभीमं रुहिरकहमं करेमाणा अन्नमन्नेणं सद्धिं जुज्झन्ति ॥ ७० ॥ तए णं से काले कुमारे तिहिं दन्तिसहस्सेहिं जाव मणुस्सकोडीहिं गरुलवूहेणं एक्कारसमेणं खन्धेणं कूणिएणं रत्ता सद्धिं रहमुसलं संगामं संगामेमाणे हयमहियं जहा भग-वया कालीए देवीए परिकहियं जाव जीवियाओ ववरोविए ॥ ७१ ॥ तं एयं खलु गोयमा ! काले कुमारे एरिसएहिं आरम्भेहिं जाव एरिसएणं असुभकडकम्मपम्भा-रेणं कालमासे कालं किच्चा चउत्थीए पङ्कप्पभाए पुढवीए हेमामे नरए नेरइयत्ताए उववन्ने ॥ ७२ ॥ काले णं भन्ते ! कुमारे चउत्थीए पुढवीए...अणन्तरं उव्व-ट्ठित्ता कहिं गच्छिहिइ कहिं उववज्जिहिइ ? गोयमा ! महाविदेहे वासे जाइं कुलाई भवन्ति अट्ठाइं जहा दडपइओ जाव सिज्झिहिइ बुज्झिहिइ जाव अन्तं काहिइ ॥ ७३ ॥ तं एवं खलु जम्बू ! समणेणं भगवया जाव संपत्तेणं निरयावलियाणं पढमस्स अज्जयणस्स अयमट्ठे पन्नते-तिवेमि ॥ ७४ ॥ पढमं अज्जयणं समत्तं ॥ १ । १ ॥

जइ णं भन्ते ! समणेणं जाव संपत्तेणं निरयावलियाणं पढमस्स अज्जयणस्स अयमट्ठे पन्नते, दोच्चस्स णं भन्ते ! अज्जयणस्स निरयावलियाणं समणेणं भगवया जाव संपत्तेणं के अट्ठे पन्नते ? एवं खलु जम्बू ! तेणं कालेणं तेणं समएणं चम्पा नामं नयरी होत्था । पुण्णभदे उज्जाणे । कूणिए राया । पउमावई देवी । तत्थ णं चम्पाए नयरीए सेणियस्स रत्तो भज्जा कूणियस्स रत्तो चुल्लाउया सुकाली नामं देवी होत्था, सुकुमालं । तीसे णं सुकालीए देवीए पुत्ते सुकाले नामं कुमारे होत्था, सुकुमालं । तए णं से सुकाले कुमारे अन्नया कयाइ तिहिं दन्तिसहस्सेहिं जहा काले कुमारो निरवसेसं तं चेव भाणियव्वं जाव महाविदेहे वासे...अन्तं काहिइ । निक्खेवो ॥ ७५ ॥ वीयं अज्जयणं समत्तं ॥ १ । २ ॥

एवं सेसावि अट्ट अज्झयणा नेयव्वा पढमसरिसा, नवरं मायाओ सरिसनामाओ ।  
 निक्खेवो सव्वेसि भाणियव्वो तथा ॥ ७६ ॥ १ । १० ॥ निरयावलियाओ  
 समत्ताओ ॥ पढमो वग्गो समत्तो ॥ १ ॥



गमोऽत्यु णं समणस्स भगवओ णायपुत्तमहावीरस्स

## सुत्तागमे

तत्थ णं

### कप्पवडिसियाओ

जइ णं भन्ते ! समणेणं भगवया जाव संपत्तेणं उवङ्गाणं पढमस्स वग्गस्स निरयाव-  
लियाणं अयमट्ठे पन्नत्ते, दोच्चस्स णं भन्ते ! वग्गस्स कप्पवडिसियाणं समणेणं जाव  
संपत्तेणं कइ अज्झयणा पन्नत्ता ? एवं खलु जम्बू ! समणेणं भगवया जाव संपत्तेणं  
कप्पवडिसियाणं दस अज्झयणा पन्नत्ता, तंजहा-पउमे १, महापउमे २, भेदे ३, सुभेदे  
४, पउमभेदे ५, पउमसेणे ६, पउमगुम्मे ७, नल्लिणिगुम्मे ८, आणन्दे ९, नन्दणे १०  
॥ ७७ ॥ जइ णं भन्ते ! समणेणं जाव संपत्तेणं कप्पवडिसियाणं दस अज्झयणा पन्नत्ता,  
पढमस्स णं भन्ते ! अज्झयणस्स कप्पवडिसियाणं समणेणं भगवया जाव संपत्तेणं  
के अट्ठे पन्नत्ते ? एवं खलु जम्बू ! तेणं कालेणं तेणं समएणं चम्पा नामं नयरी  
होत्था । पुण्णभेदे उज्जाणे । कूणिए राया । पउमावई देवी । तत्थ णं चम्पाए  
नयरीए सेणियस्स रत्तो भज्जा कूणियस्स रत्तो चुल्लमाउया काली नामं देवी होत्था,  
सुउमाल० । तीसे णं कालीए देवीए पुत्ते काले नामं कुमारे होत्था, सुउमाल० ।  
तस्स णं कालस्स कुमारस्स पउमावई नामं देवी होत्था, सोमाल० जाव विहरइ  
॥ ७८ ॥ तए णं सा पउमावई देवी अन्नया कयाइं तंसि तारिसगंसि वासघरंसि  
अब्भिन्तरओ सचित्तकम्मे जाव सीहं सुमिणे पासित्तानं पडिबुद्धा । एवं जम्मणं  
जहा महाबलस्स जाव नामधेज्जं—जम्हा णं अम्हं इमे दारए कालस्स कुमारस्स  
पुत्ते पउमावईए देवीए अत्तए तं होउ णं अम्हं इमस्स दारगस्स नामधेज्जं पउमे  
पउमे, सेसं जहा महाबलस्स, अट्ठओ दाओ जाव उप्पि पासायवरगए विहरइ । सामी  
समोसरिए । परिस्सा निग्गया । कूणिए निग्गए । पउमेवि जहा महाबले निग्गए  
तहेव अम्मापिइआपुच्छणा जाव पव्वइए अणगारे जाए जाव गुत्तवम्भयारी ॥ ७९ ॥  
तए णं से पउमे अणगारे समणस्स भगवओ महावीरस्स तहारूवाणं थेराणं अत्तिए  
सामाइयमाइयाईं एकारस्स अज्जाईं अहिज्जइ २ ता बहूहिं चउत्थल्लट्ठम० जाव विह-  
रइ ॥ ८० ॥ तए णं से पउमे अणगारे तेणं ओरालेणं जहा मेहो तहेव धम्मजाग-  
रिया चिन्ता एवं जहेव मेहो तहेव समणं भगवं० आपुच्छित्ता विउले जाव पाओ-

वगाए समाणे तहाख्वाणं थेराणं अन्तिए सामाइयमाइयाई एकारस अङ्गाई बहुपडि-  
पुण्णाई पञ्च वासाई सामण्णपरियाए, मासियाए संलेहणाए सट्ठि भत्ताई० आणुपुव्वीए  
कालगए । थेरा ओइण्णा । भगवं गोयमे पुच्छइ, सामी कहेइ जाव सट्ठि भत्ताई  
अणसणाए छेइत्ता आलोइयपडिक्कन्ते उड्डं चन्दिम० सोहम्मे कप्पे देवत्ताए उववञ्जे ।  
दो सागराई ॥ ८१ ॥ से णं भन्ते ! पउमे देवे ताओ देवलोगाओ आउक्खएणं  
पुच्छा । गोयमा ! महाविदेहे वासे जहा दढपइञ्चो जाव अन्तं काहिइ । तं एवं खलु  
जम्बू ! समणेणं जाव संपत्तेणं कप्पवडिसियाणं पढमस्स अज्झयणस्स अयमट्ठे पच्चते-  
त्तिवेमि ॥ ८२ ॥ पढमं अज्झयणं समत्तं ॥ २ । १ ॥

जइ णं भन्ते ! समणेणं भगवया जाव संपत्तेणं कप्पवडिसियाणं पढमस्स अज्झ-  
यणस्स अयमट्ठे पच्चते, दोच्चस्स णं भन्ते ! अज्झयणस्स के अट्ठे पच्चते ? एवं खलु  
जम्बू ! तेणं कालेणं तेणं समएणं चम्पा नामं नयरी होत्था । पुण्णभेइ उज्जाणे ।  
कूणिए राया । पउमावई देवी । तत्थ णं चम्पाए नयरीए सेणियस्स रञ्चो भज्जा  
कूणियस्स रञ्चो चुल्लमाउया सुकाली नामं देवी होत्था० । तीसे णं सुकालीए पुत्ते  
सुकाले नामं कुमारे० । तस्स णं सुकालस्स कुमारस्स महापउमा नामं देवी होत्था,  
सुउमाल० ॥ ८३ ॥ तए णं सा महापउमा देवी अञ्जया कयाई तंसि तारिसगंसि  
एवं तहेव महापउमे नामं दारए जाव सिज्झिहिइ, नवरं ईसाणे कप्पे उववाओ  
उक्कोसट्ठिइओ । निक्खेवो ॥ ८४ ॥ वीयं अज्झयणं समत्तं ॥ २ । २ ॥

एवं सेसावि अट्ठ नेयव्वा । मायाओ सरिसनामाओ । कालाईणं दसण्हं पुत्ताणं  
अणुपुव्वीए—दोण्हं च पञ्च चत्तारि तिण्हं तिण्हं च होन्ति तिण्णेव । दोण्हं च दोञ्चि  
वासा सेणियनत्तूणं परियाओ ॥ १ ॥ उववाओ आणुपुव्वीए—पढमो सोहम्मे, विइओ  
ईसाणे, तइओ सणकुमारे, चउत्थो माहिन्दे, पञ्चमो बम्मलोए, छट्ठो लन्तए,  
सत्तमो महासुक्के, अट्ठमो सहस्सारे, नवमो पाणए, दसमो अञ्जुए । सव्वत्थ उक्को-  
सट्ठिई भाणियव्वा । महाविदेहे सिज्झिहिंति ॥ ८५ ॥ २ । १० ॥ कप्पवडि-  
सियाओ समत्ताओ ॥ वीओ वग्गो समत्तो ॥ २ ॥



णमोऽत्थु णं समणस्स भगवओ णायपुत्तमहावीरस्स

## सुत्तागमे

तत्थ णं  
पुप्फियाओ

जइ णं भंते ! समणेणं भगवया जाव संपत्तेणं उवज्जाणं दोच्चस्स० कप्पवडिंसियाणं अयमट्ठे पन्नत्ते, तच्चस्स णं भन्ते ! वग्गस्स उवज्जाणं पुप्फियाणं के अट्ठे पन्नत्ते ? एवं खलु जम्बू ! समणेणं जाव संपत्तेणं उवज्जाणं तच्चस्स वग्गस्स पुप्फियाणं दस अज्झयणा पन्नत्ता, तंजहा—चंदे सूरु सुक्के बहुपुत्तिय पुण्ण माणिभेदे य । दत्ते सिवे बले या अणादिए चेव बोद्धव्वे ॥ १ ॥ जइ णं भन्ते ! समणेणं जाव संपत्तेणं पुप्फियाणं दस अज्झयणा पन्नत्ता, पढमस्स णं भन्ते !...समणेणं जाव संपत्तेणं के अट्ठे पन्नत्ते ? एवं खलु जम्बू ! तेणं कालेणं तेणं समएणं रायगिहे नामं नयरे । गुणसिलए उज्जाणे । सेणिए राया । तेणं कालेणं तेणं समएणं सामी समोसढे । परिसा निग्गया । तेणं कालेणं तेणं समएणं चन्दे जोइसिन्दे जोइसराया चन्द-वडिंसए विमाणे सभाए सुहम्माए चन्दंसि सीहासणंसि चउहिं सामाणियसाहस्सीहिं जाव विहरइ । इमं च णं केवलकप्पं जम्बुद्वीवं दीवं विउलेणं ओहिणा आभोएमाणे २ पासइ २ ता समणं भगवं महावीरं जहा सूरियाभे आभिओगे देवे सदावेत्ता जाव सुरिन्दाभिगमणजोग्गं करेत्ता तमाणत्तियं पच्चप्पिणन्ति । सूसरा घण्टा जाव विउव्वणा, नवरं जाणविमाणं जोयणसहस्सवित्थिण्णं अद्धतेवट्ठिजोयणसमूसियं, महिन्दज्झओ पणुवीसं जोयणमूसिओ, सेसं जहा सूरियाभस्स जाव आगओ, नट्ठविही तहेव पडिगओ ॥ ८६ ॥ भन्ते ! ति भगवं गोयमे समणं भगवं० पुच्छ । कूडागारसाला । सरीरं अणुपविट्ठा । पुव्वभवो । एवं खलु गोयमा । तेणं कालेणं तेणं समएणं सावत्थी नामं नयरी होत्था । कोट्टए उज्जाणे । तत्थ णं सावत्थीए० अज्झई नामं गाहावई होत्था, अट्ठे जाव अपरिभूए । तए णं से अज्झई गाहावई साव-त्थीए नयरीए बहूणं नगरनिगम० जहा आणन्दो ॥ ८७ ॥ तेणं कालेणं तेणं समएणं पासे णं अरहा पुरिसादाणीए आइगरे जहा महावीरो नवुस्सेहे सोलसेहिं समणसाहस्सीहिं अट्ठतीसाए अज्जियासहस्सेहिं जाव कोट्टए समोसढे । परिसा निग्गया ॥ ८८ ॥ तए णं से अज्झई गाहावई इमीसे कहाए लद्धे समणे हट्ठे जहा



कत्तिओ सेट्टी तहा निगच्छइ जाव पज्जुवासइ, धम्मं सोच्चा निसम्म० जं नवरं देवाणु-  
प्पिया ! जेट्ठपुत्तं कुट्टम्बे ठावेमि, तए णं अहं देवाणुप्पियाणं जाव पव्वयामि, जहा  
गज्जदत्ते तहा पव्वइए जाव गुत्तबम्मभयारी ॥ ८९ ॥ तए णं से अज्झई अणगारे पासस्स  
अरहओ तहारूवाणं थेराणं अन्तिए सामाइयमाइयाई एकारसं अज्झाई अहिज्जइ २ ता  
बहूहिं चउत्थ जाव भावेमाणे बहूइं वासाई सामण्णपरियाणं पाउणइ २ ता अद्ध-  
मासियाए संलेहणाए तीसं भत्ताई अणसणाए छेइत्ता विराहियसामण्णे कालमासे कालं  
किच्चा चन्दवडिंसए विमाणे उववा(य)इयाए सभाए देवसयणिजंसि देवदूसन्तरिए  
चन्दे जोइसिन्दत्ताए उववन्ने ॥ ९० ॥ तए णं से चन्दे जोइसिन्दे जोइ[सि]सराया  
अहुणोववन्ने समाणे पञ्चविहाए पज्जतीए पज्जतीभावं गच्छइ, तंजहा-आहारपज्जतीए  
सरीरपज्जतीए इन्दियपज्जतीए सासोसासपज्जतीए भासामणपज्जतीए ॥ ९१ ॥  
चन्दस्स णं भन्ते ! जोइसिन्दस्स जोइसरन्नो केवइयं कालं ठिई पन्नता ? गोयमा !  
पलिओवमं वाससयसहस्समब्भहियं । एवं खलु गोयमा ! चन्दस्स जाव जोइसरन्नो  
सा दिव्वा देविट्ठी० । चन्दे णं भन्ते ! जोइसिन्दे जोइसराया ताओ देवलोगाओ  
आउक्खएणं ३ चइत्ता कहिं गच्छिहिइ २ ? गोयमा ! महाविदेहे वासे सिज्झिहिइ ५ ।  
निकखेवओ ॥ ९२ ॥ **पढमं अज्झयणं समत्तं ॥ ३ । १ ॥**

जइ णं भन्ते ! समणेणं भगवया जाव पुष्पियाणं पढमस्स अज्झयणस्स  
अयमट्ठे पन्नते, दोच्चस्स णं भन्ते ! अज्झयणस्स पुष्पियाणं समणेणं भगवया जाव  
संपत्तेणं के अट्ठे पन्नते ? एवं खलु जम्बू ! तेणं कालेणं तेणं समएणं रायगिहे नामं  
नयरे । गुणसलिए उज्जाणे । सेणिए राया । समोसरणं । जहा चन्दो तहा सूरोवि  
आगओ जाव नट्ठविहिं उवदंसित्ता पडिगओ । पुव्वभवपुच्छा । सावत्थी नयरी ।  
सुपइट्ठे नामं गाहावई होत्था, अट्ठे जहेव अज्झई जाव विहरइ । पासो समोसटो,  
जहा अज्झई तहेव पव्वइए, तहेव विराहियसामण्णे जाव महाविदेहे वासे सिज्झिहिइ  
जाव अन्तं करेहिइ । निकखेवओ ॥ ९३ ॥ **विइयं अज्झयणं समत्तं ॥ ३ । २ ॥**

जइ णं भन्ते ! जाव संपत्तेणं उक्खेवओ भाणियव्वो । रायगिहे नयरे । गुणसलिए  
उज्जाणे । सेणिए राया । सामी समोसटो । परिसा निगगया । तेणं कालेणं तेणं समएणं  
सुक्के महग्गहे सुक्कवडिंसए विमाणे सुक्कंसि सीहासणंसि चउहिं सामाणियसाहस्सीहिं  
जहेव चन्दो तहेव आगओ, नट्ठविहिं उवदंसित्ता पडिगओ । भन्ते ! ति । कूडागार-  
साला । पुव्वभवपुच्छा । एवं खलु गोयमा ! तेणं कालेणं तेणं समएणं वाणारसी नामं  
नयरी होत्था । तत्थ णं वाणारसीए नयरीए सोमिले नामं माहणे परिवसइ, अट्ठे जाव  
अपरिभूए, रिउव्वेय जाव सुपरिनिट्ठिए । पासे समोसटो । परिसा पज्जुवासइ ॥ ९४ ॥

तए णं तस्स सोमिलस्स माहणस्स इमीसे कहाए लद्धट्ठस्स समाणस्स इमे एयारुवे अज्झत्थिए०—एवं खलु पासे अरहा पुरिसादाणीए पुट्वाणुपुत्वि जाव अम्बसालवणे विहरइ, तं गच्छामि णं पासस्स अरहओ अन्तिए पाउब्भवामि, इमाइं च णं एयारुवाइं अट्ठाइं हेऊइं जहा **पण्णसीए** । सोमिलो निग्गओ खण्डियविहूणो जाव एवं वयासी-जत्ता ते भन्ते ! जवणिज्जं च ते ? पुच्छा । सरिसवया मासा कुलत्था एगे भवं जाव संबुद्धे सावगधम्मं पडिविज्जिता पडिगए ॥ ९५ ॥ तए णं पासे णं अरहा अन्नया कयाइ वाणारसीओ नयरीओ अम्बसालवणाओ उज्जाणाओ पडिनिक्खमइ २ ता बहिया जणवयविहारं विहरइ । तए णं से सोमिले माहणे अन्नया कयाइ असाहुदंसणेण य अपज्जुवासणयाए य मिच्छत्तपज्जवेहिं परिवड्ढमाणेहिं २ सम्मतपज्जवेहिं परिहाय-माणेहिं २ मिच्छत्तं च पडिवन्ने ॥ ९६ ॥ तए णं तस्स सोमिलस्स माहणस्स अन्नया कयाइ पुव्वरत्तावरत्तकालसमयंसि कुडुम्बजागरियं जागरमाणस्स अयमेयारुवे अज्झत्थिए जाव समुप्पज्जित्था—एवं खलु अहं वाणारसीए नयरीए सोमिले नामं माहणे अच्चन्तमाहणकुलप्पसए, तए णं मए वयाइं चिण्णाइं, वेया य अहीया, दारा आहूया, पुत्ता जणिया, इड्ढीओ समाणीयाओ, पसुव[वन्]धा कया, जन्ना जेट्ठा, दक्खिणा दिन्ना, अतिही पूइया, अग्गी दूया, जूवा निक्खित्ता, तं सेयं खलु मम इयाणिं कत्लं जाव जलन्ते वाणारसीए नयरीए बहिया बहवे अम्बारामा रोवावित्ते, एवं माउलिन्ना बिन्ना कविट्ठा चिन्ना पुप्फारामा रोवावित्ते, एवं संपेहेइ २ ता कल्लं जाव जलन्ते वाणारसीए नयरीए बहिया अम्बारामे य जाव पुप्फारामे य रोवावेइ । तए णं बहवे अम्बारामा य जाव पुप्फारामा य अणुपुव्वेणं सारक्खिज्जमाणा संगोविज्जमाणा संवड्ढिज्जमाणा आरामा जाया किण्हा किण्होभासा जाव रम्मा महामेहनिकुरम्बभूया पत्तिया पुप्फिया फलिया हरियगरेरिज्जमाणसिरीया अईव २ उवसोभेमाणा २ चिट्ठन्ति ॥ ९७ ॥ तए णं तस्स सोमिलस्स माहणस्स अन्नया कयाइ पुव्वरत्तावरत्तकालसमयंसि कुडुम्बजागरियं जागरमाणस्स अयमेयारुवे अज्झत्थिए जाव समुप्पज्जित्था—एवं खलु अहं वाणारसीए नयरीए सोमिले नामं माहणे अच्चन्तमाहणकुलप्पसए, तए णं मए वयाइं चिण्णाइं जाव जूवा निक्खित्ता, तए णं मए वाणारसीए नयरीए बहिया बहवे अम्बारामा जाव पुप्फारामा य रोवाविया, तं सेयं खलु मम इयाणिं कल्लं जाव जलन्ते सुबहुं लोहकडाहकडुच्छुयं तम्बियं तावसभण्डं घडावेत्ता विउलं असणं पाणं खाइमं साइमं...मित्तनाइ...आमन्तेत्ता तं मित्तनाइनियग० विउलेणं असण० जाव संमाणेत्ता तस्सेव मित्त० जाव जेट्ठपुत्तं कुडुम्बे ठवेत्ता तं मित्तनाइ जाव आपुच्छित्ता सुबहुं लोहकडाहकडुच्छुयं तम्बियं तावसभण्डं गहाय जे इमे गङ्गाकूला वाणपत्था

तावसा भवन्ति, तंजहा-होत्तिया पोत्तिया कोत्तिया जन्नई सव्वई थालई हुम्बउद्धा  
दन्तुक्खलिया उम्मज्जगा संमज्जगा निमज्जगा संपक्खालगा दक्खिणकूला उत्तरकूला  
संखधमा कूलधमा मिथलुद्धया हत्थितावसा उद्धा दिसापोक्खिणो वक्खवासिणो  
विलवासिणो जलवासिणो खक्खमूलिया अम्बुभक्खिणो वाउभक्खिणो सेवालभक्खिणो  
मूलाहारा कन्दाहारा तयाहारा पत्ताहारा पुप्फाहारा फलाहारा बीयाहारा परिसड्ढिय-  
कन्दमूलतयपत्तपुप्फफलाहारा जलाभिसेयकढिणगायभूया आयावणाहिं पञ्चगितावेहिं  
इज्जालसोल्लियं कन्दुसोल्लियं पिव अप्पाणं करेमाणा विहरन्ति, तत्थ णं जे ते दिसा-  
पोक्खिया तावसा तेसिं अन्तिए दिसापोक्खियत्ताए पव्वइत्तए, पव्वइए वि य णं  
समाणे इमं एयाख्वं अभिग्गहं अभिगिण्हिस्सामि-कप्पइ मे जावजीवाए छट्ठंछट्ठेणं  
अणिक्खित्तेणं दिसाचक्खालेणं तवोकम्मणेणं उद्धं वाहाओ पणिज्झिय २ सराभिमुहस्स  
आयावणभूमीए आयावेमाणस्स विहरित्तएत्तिकट्ठु एवं संपेहेइ २ ता कल्लं जाव जलन्ते  
सुबहुं लोह० जाव दिसापोक्खियतावसत्ताए पव्वइए । पव्वइए वि य णं समाणे  
इमं एयाख्वं अभिग्गहं जाव अभिगिण्हित्ता पढमं छट्ठक्खमणं उवसंपज्जिताणं  
विहरइ ॥ ९८ ॥ तए णं सोमिले माहणे रिसी पढमछट्ठक्खमणपारणंसि आयावणभूमीए  
पच्चोरुहइ २ ता वागलवत्थनियत्थे जेणेव सए उडए तेणेव उवागच्छइ २ ता  
किढिणसंकाइयं गेण्हइ २ ता पुरत्थिमं दिस्सि पुक्खेइ २ ता पुरत्थिमाए दिसाए सोमे  
महाराया पत्थाणे पत्थियं अभिरक्खउ सोमिलमाहणरिसिं, जाणि य तत्थ कन्दाणि  
य मूलाणि य तयाणि य पत्ताणि य पुप्फाणि य फलाणि य बीयाणि य हरियाणि य  
ताणि अणुजाणउत्तिकट्ठु पुरत्थिमं दिस्सं पसरइ २ ता जाणि य तत्थ कन्दाणि य  
जाव हरियाणि य ताई गेण्हइ २ ता किढिणसंकाइयगं भरेइ २ ता दब्भे य कुसे य  
पत्तामोडं च समिहाकट्ठाणि य गेण्हइ २ ता जेणेव सए उडए तेणेव उवागच्छइ २ ता  
किढिणसंकाइयगं ठवेइ २ ता वेई वट्ठेइ २ ता उवलेवणसंमज्जणं करेइ २ ता  
दब्भकलसहत्थगए जेणेव गज्जा महाणई तेणेव उवागच्छइ २ ता गज्जं महाणइ ओगा-  
हइ २ ता जलमज्जणं करेइ २ ता जलकिट्ठं करेइ २ ता जलाभिसेयं करेइ २ ता  
आयन्ते चोक्खे परमसुइभए देवपिकयकज्जे दब्भकलसहत्थगए गज्जाओ महाणईओ  
पञ्चुतरइ २ ता जेणेव सए उडए तेणेव उवागच्छइ २ ता दब्भेहि य कुसेहि य वालु-  
याए य वेई रएइ २ ता सरयं करेइ २ ता अरणिं करेइ २ ता सरएणं अरणिं महेइ २ ता  
अग्गिं पाडेइ २ ता अग्गिं संघुक्खेइ २ ता समिहाकट्ठाइं पक्खिवइ २ ता अग्गिं उज्जा-  
लेइ २ ता अग्गिस्स दाहिणे पासे सत्तज्जाइं समादहे । तंजहा-सकत्थं वक्कलं ठाणं, सेज्ज-  
भण्डं कमण्डलुं । दण्डदारं तहप्पाणं, अह ताई समादहे ॥ १ ॥ महुणा य घएण य तन्दु-

लेहि य अग्निं हुणइ, चरं साहेइ २ ता बलिवइस्सदेवं करेइ २ ता अतिहिपूयं करेइ २ ता तओ पच्छा अप्पणा आहारं आहारेइ ॥ ९९ ॥ तए णं से सोमिले माहणरिसी दोच्चंसि छट्ठक्खमणपारणंसि तं चेव सव्वं भाणियव्वं जाव आहारं आहारेइ, नवरं इमं नाणत्तं—दाहिणाए दिसाए जमे महाराया पत्थाणे पत्थियं अभिरक्खउ सोमिलं माहणरिसिं, जाणि य तत्थ कन्दाणि य जाव अणुजाणउत्तिकट्ठु दाहिणं दिसिं पसरइ । एवं पच्चत्थिमेणं वरुणे महाराया जाव पच्चत्थिमं दिसिं पसरइ । उत्तरेणं वेसमणे महाराया जाव उत्तरं दिसिं पसरइ । पुव्वदिसागमेणं चत्तारि विदिसाओ भाणियव्वाओ जाव आहारं आहारेइ ॥ १०० ॥ तए णं तस्स सोमिलमाहणरिसिस्स अजया कयाइ पुव्वरत्तावरत्तकालसमयंसि अणिच्चजागरियं जागरमाणस्स अयमेयारूवे अज्झत्थिए जाव समुप्पजित्था—एवं खलु अहं वाणारसीए नयरीए सोमिले नामं माहणरिसी अचन्तमाहणकुलप्पसूए, तए णं मए वयाइं चिण्णाइं जाव जूवा निक्खित्ता, तए णं मए वाणारसीए जाव पुप्फारामा य जाव रोविया, तए णं मए सुबहुं लोहं जाव घडावेत्ता जाव जेट्ठपुत्तं कुडुंबे ठवेत्ता जाव जेट्ठपुत्तं आपुच्छित्ता सुबहुं लोहं जाव गहाय मुण्डे जाव पव्वइए, पव्वइए वि य णं समाणे छट्ठंछट्ठेणं जाव विहरामि, तं सेयं खलु ममं इयाणिं कल्लं जाव जलन्ते बहवे तावसे दिट्ठाभट्ठे य पुव्वसंगइए य परियायसंगइए य आपुच्छित्ता आसमसंसियाणि य बहूइं सत्तसयाइं अणुमाणइत्ता वागलवत्थनियत्थस्स किट्ठिणसंकाइयगहियसभण्डोवगरणस्स कट्ठमुद्दाए मुहं बन्धित्ता उत्तरदिसाए उत्तराभिमुहस्स महपत्थाणं पत्थावेत्तए; एवं संपेहेइ २ ता कल्लं जाव जलन्ते बहवे तावसे य दिट्ठाभट्ठे य पुव्वसंगइए य तं चेव जाव कट्ठमुद्दाए मुहं बन्धइ २ ता अयमेयारूवं अभिग्गहं अभिग्गिण्हइ—जत्थेव णं अहं जलंसि वा एवं थलंसि वा दुग्गंसि वा निचंसि वा पव्वयंसि वा विसमंसि वा गड्ढाए वा दरीए वा पक्खलिज्ज वा पवडिज्ज वा, नो खलु मे कप्पइ पच्चुट्ठित्तएत्तिकट्ठु अयमेयारूवं अभिग्गहं अभिग्गिण्हइ २ ता उत्तराए दिसाए उत्तराभिमुहपत्थाणं पत्थिए से सोमिले माहणरिसी पुव्वावरण्हकालसमयंसि जेणेव असोगवरपायवे तेणेव उवागए, असोगवरपायवस्स अहे किट्ठिणसंकाइयं ठवेइ २ ता वेइं वट्ठेइ २ ता उवलेवणसंमज्जणं करेइ २ ता दब्भकलसहत्थगए जेणेव गङ्गा महाणइं जहा सिवो जाव गङ्गाओ महाणइंओ पच्चुत्तरइ २ ता जेणेव असोगवरपायवे तेणेव उवागच्छइ २ ता दब्भेहि य कुसेहि य वालुयाए य वेइं रएइ २ ता सरगं करेइ २ ता जाव बलिवइस्सदेवं करेइ २ ता कट्ठमुद्दाए मुहं बन्धइ २ ता तुसिणीए संचिट्ठइ ॥ १०१ ॥ तए णं तस्स सोमिलमाहणरिसिस्स पुव्वरत्तावरत्तकालसमयंसि एगे देवे अन्तियं

पाउब्भूए । तए णं से देवे सोमिलमाहणं एवं वयासी-हं भो सोमिलमाहणा ! पव्वइया ! दुप्पव्वइयं ते । तए णं से सोमिले तस्स देवस्स दोच्चं पि तच्चं पि एय-मद्धं नो आढाइ नो परिजाणइ जाव तुसिणीए संचिद्धइ । तए णं से देवे सोमिलेणं माहणरिसिणा अणाढाइज्जमाणे जामेव दिसिं पाउब्भूए तामेव दिसिं पडिगए । तए णं से सोमिले कळं जाव जलन्ते वागलवत्थनियत्थे किट्ठिणसंकाइयं गहाय गहियभण्डोवगरणे कट्ठमुद्दाए मुहं बन्धइ २ ता उत्तराभिमुहे संपत्थिए ॥ १०२ ॥ तए णं से सोमिले बिइयदिवसम्मि पुव्वावरण्हकालसमयंसि जेणेव सत्तवण्णे तेणेव उवागए, सत्तवणस्स अहे किट्ठिणसंकाइयं ठवेइ २ ता वेइं वड्ढेइ जहा असोग-वरपायवे जाव अग्गिं हुणइ, कट्ठमुद्दाए मुहं बन्धइ, तुसिणीए संचिद्धइ । तए णं तस्स सोमिलस्स पुव्वरत्तावरत्तकालसमयंसि एगे देवे अन्तितयं पाउब्भूए । तए णं से देवे अन्तलिक्खपडिववे जहा असोगवरपायवे जाव पडिगए । तए णं से सोमिले कळं जाव जलन्ते वागलवत्थनियत्थे किट्ठिणसंकाइयं गेण्हइ २ ता कट्ठमुद्दाए मुहं बन्धइ २ ता उत्तरदिसाए उत्तराभिमुहे संपत्थिए ॥ १०३ ॥ तए णं से सोमिले तइयदिवसम्मि पुव्वा(पच्छा)वरण्हकालसमयंसि जेणेव असोगवरपायवे तेणेव उवागच्छइ २ ता असोगवरपायवस्स अहे किट्ठिणसंकाइयं ठवेइ २ ता वेइं वड्ढेइ जाव गज्जं महाणइं पञ्चुत्तरइ २ ता जेणेव असोगवरपायवे तेणेव उवागच्छइ २ ता असोगवरपायवस्स अहे किट्ठिणसंकाइयं ठवेइ २ ता वेइं रएइ २ ता कट्ठमुद्दाए मुहं बन्धइ २ ता तुसिणीए संचिद्धइ । तए णं तस्स सोमिलस्स पुव्वरत्तावरत्तकाले एगे देवे अन्तितयं पाउब्भवित्था, तं चेव भणइ जाव पडिगए । तए णं से सोमिले जाव जलन्ते वागलवत्थनियत्थे किट्ठिणसंकाइयं जाव कट्ठमुद्दाए मुहं बन्धइ २ ता उत्तराए दिसाए उत्तराभिमुहे संपत्थिए ॥ १०४ ॥ तए णं से सोमिले चउत्थ-दिवसपुव्वावरण्हकालसमयंसि जेणेव वडपायवे तेणेव उवागए, वडपायवस्स अहे किट्ठिणं ठवेइ २ ता वेइं वड्ढेइ, उवलेवणसंमज्जणं करेइ जाव कट्ठमुद्दाए मुहं बन्धइ, तुसिणीए संचिद्धइ । तए णं तस्स सोमिलस्स पुव्वरत्तावरत्तकाले एगे देवे अन्तितयं पाउब्भवित्था, तं चेव भणइ जाव पडिगए । तए णं से सोमिले जाव जलन्ते वाग-लवत्थनियत्थे किट्ठिणसंकाइयं जाव कट्ठमुद्दाए मुहं बन्धइ... उत्तराए० उत्तराभिमुहे संपत्थिए ॥ १०५ ॥ तए णं से सोमिले पञ्चमदिवसम्मि पुव्वावरण्हकालसमयंसि जेणेव उम्बरपायवे तेणेव उवागच्छइ, उम्बरपायवस्स अहे किट्ठिणसंकाइयं ठवेइ, वेइं वड्ढेइ जाव कट्ठमुद्दाए मुहं बन्धइ जाव तुसिणीए संचिद्धइ । तए णं तस्स सोमिलमाहणस्स पुव्वरत्तावरत्तकाले एगे देवे जाव एवं वयासी-हं भो सोमिला !

पव्वइया ! दुप्पव्वइयं ते, पढमं भणइ तहेव तुसिणीए संचिद्धइ । देवो दोच्चंपि तच्चंपि वयइ-सोमिला ! पव्वइया ! दुप्पव्वइयं ते । तए णं से सोमिले तेणं देवेणं दोच्चंपि तच्चंपि एवं वुत्ते समाणे तं देवं एवं वयासी-कहं णं देवाणुप्पिया ! मम दुप्पव्वइयं ? । तए णं से देवे सोमिलं माहणं एवं वयासी-एवं खलु देवाणुप्पिया ! तुमं पासस्स अरहओ पुरिसादाणीयस्स अन्तियं पञ्चाणुव्वए सत्तसिक्खावए दुवालसविहे सावयधम्मे पडिवन्ने, तए णं तव अन्नया कयाइ असाहुदंसणेण० पुव्वरत्तावरत्तकाल-समयंसि कुड्डमजागरियं जाव पुव्वचिन्तियं देवो उच्चारइ जाव जेणेव असो-गवरपायवे तेणेव उवागच्छसि २ ता किट्ठिणसंकाइयं जाव तुसिणीए संचिद्धसि, तए णं पुव्वरत्तावरत्तकाले तव अन्तियं पाउब्भवामि, हं भो सोमिला ! पव्वइया ! दुप्पव्वइयं ते, तह चेव देवो नियवयणं भणइ जाव पञ्चमदिवसम्मि पुव्वावरण्हकालसमयंसि जेणेव उम्बरपायवे तेणेव उवागए किट्ठिणसंकाइयं ठवेसि, वेइं वड्डेसि, उवलेवणं० करेसि २ ता कट्ठमुहाए सुहं वन्धेसि २ ता तुसिणीए संचिद्धसि, तं एवं खलु देवा-णुप्पिया ! तव दुप्पव्वइयं ॥ १०६ ॥ तए णं से सोमिले तं देवं एवं वयासी-कहं णं देवाणुप्पिया ! मम सुप्पव्वइयं ? । तए णं से देवे सोमिलं एवं वयासी-जइ णं तुमं देवाणुप्पिया ! इयाणि पुव्वपडिवन्नाइं पञ्च अणुव्वयाइं० सयमेव उवसंपज्जित्ताणं विहरसि तो णं तुज्झ इयाणि सुप्पव्वइयं भवेज्जा । तए णं से देवे सोमिलं वन्दइ नम-सइ वं० २ ता जामेव दिसिं पाउब्भूए तामेव दिसिं पडिगए । तए णं सोमिले माहणरिसी तेणं देवेणं एवं वुत्ते समाणे पुव्वपडिवन्नाइं पञ्च अणुव्वयाइं० सयमेव उवसंपज्जित्ताणं विहरइ ॥ १०७ ॥ तए णं से सोमिले बहूहिं चउत्थल्लुट्ठम जाव मासद्धमासखमणेहिं विचित्तेहिं तवोवहाणेहिं अप्पाणं भावेमाणे बहूइं वासाइं समणो-वासगपरियागं पाउणइ २ ता अद्धमासियाए संलेहणाए अत्ताणं झुसेइ २ ता तीसं भत्ताइं अणसणाए छेणइ २ ता तस्स ठाणस्स अणालोइयपडिक्कन्ते विराहियसम्मत्ते कालमासे कालं किच्चा सुक्कवडिसए विमाणे उववायसभाए देवसयणिज्जंसि जाव ओगाहणाए सुक्कमहग्गहत्ताए उववन्ने ॥ १०८ ॥ तए णं से सुक्के महग्गहे अहुणोव-वन्ने समाणे जाव मासामणपज्जत्तीए... । एवं खलु गोयमा ! सुक्केणं० सा दिव्वा जाव अभिसमन्नागया । एगं पल्लिओवमं ठिइ । सुक्के णं भन्ते । महग्गहे तओ देवलोगाओ आउक्खएणं० कहिं गच्छहिइ २ ? गोयमा ! महाविदेहे वासे सिज्झि-हिइ ५ । निक्खेवओ ॥ १०९ ॥ तइयं अज्झयणं समत्तं ॥ ३ । ३ ॥

जइ णं भंते ! उक्खेवओ । एवं खलु जंबू ! तेणं कालेणं तेणं समएणं रायगिहे नामं नयरे । गुणसिलए उज्जाणे । सेणिए राया । सामी समोसडे । परिसा निगया

॥ ११० ॥ तेणं कालेणं तेणं समएणं बहुपुत्तिया देवी सोहम्मे कप्पे बहुपुत्तिए विमाणे सभाए सुहम्माए बहुपुत्तियंसि सीहासणंसि चउहिं सामाणियसाहस्सीहिं चउहिं महत्तरियाहिं जहा सूरियाभे जाव भुज्जमाणी विहरइ, इमं च णं केवलकपं जम्बुद्वीवं दीवं विउल्लेणं ओहिणा आभोएमाणी २ पासइ २ ता समणं भगवं महावीरं जहा सूरियाभो जाव नमंसित्ता सीहासणवरंसि पुरत्थाभिमुहा संनिसण्णा । आभिओगा जहा सूरियाभस्स, सूसरा घण्टा, आभिओगियं देवं सदावेइ, जाणविमाणं जोयणसहस्सवित्थिण्णं, जाणविमाणवण्णओ जाव उत्तरिल्लेणं निज्जाणमग्गेणं जोयणसाहस्सिएहिं विग्गहेहिं आगया जहा सूरियाभे । धम्मकहा सम्मत्ता । तए णं सा बहुपुत्तिया देवी दाहिणं भुयं पसारेइ देवकुमारारणं अट्टसयं, देवकुमारियाण य वामाओ भुयाओ अट्टसयं, तयाणन्तरं च णं बहवे दारगा य दारियाओ य डिम्भए य डिम्भियाओ य विउव्वइ, नट्टविहिं जहा सूरियाभो उवदंसित्ता पडिगया ॥ १११ ॥ भन्ते ! ति भगवं गोयमे समणं भगवं महावीरं वन्दइ नमंसइ । कूडागारसाला । बहुपुत्तियाए णं भन्ते ! देवीए सा दिव्वा देविद्धी पुच्छा जाव अभिसमन्नागया ? एवं खलु गोयमा ! तेणं कालेणं तेणं समएणं वाणारसी नामं नयरी, अम्बसालवणे उज्जाणे । तत्थ णं वाणारसीए नयरीए भदे नामं सत्थवाहे होत्था, अट्ठे जाव अपरिभूए । तस्स णं भदस्स सुभद्दा नामं भारिया सुउमाल० वञ्छा अविद्याउरी जाणुकोप्परमाया यावि होत्था ॥ ११२ ॥ तए णं तीसे सुभद्दाए सत्थवाहीए अन्नया कयाइं पुव्वरत्तावरत्तकाले कुड्डम्बजागरियं जागरमाणीए इमेयारूवे जाव संकप्पे समुप्पज्जित्था—एवं खलु अहं भद्देणं सत्थवाहेणं सद्धिं विउलाइं भोगभोगाइं भुज्जमाणी विहरामि, नो चेव णं अहं दारगं वा दारियं वा पयाया, तं धन्नाओ णं ताओ अम्मयाओ जाव सुलद्धे णं तासिं अम्मयाणं मणुयजम्मजीवियफले, जासिं मन्ने नियकुच्छिसंभूयगाइं थणदुद्धलुद्धगाइं महरसमुल्लावगाणि मम्मण(मंजुल)प्पजम्पियाणि थणमूलकक्खदेसभागं अभिसरमाणगाणि पण्हयन्ति, पुणो य कोमलकमलोवमेहिं हत्थेहिं गिण्हऊणं उच्छङ्गनिवेसियाणि देन्ति, समुल्लावए सुमहुरे पुणो पुणो मम्मणप्पभणिए, अहं णं अधन्ना अपुण्णा अकयपुण्णा एत्तो एगमवि न पत्ता, ओहय० जाव झियाइ ॥ ११३ ॥ तेणं कालेणं २ सुव्वयाओ णं अज्जाओ इरियासमियाओ भासासमियाओ एसणासमियाओ आयाणभण्डमत्तनिकखेवणासमियाओ उच्चारपासवणखेलजल्लसिंघाणपारिट्ठावणासमियाओ मणगुत्तीओ वयगुत्तीओ कायगुत्तीओ गुत्तिन्दियाओ गुत्तवम्भयारिणीओ बहुस्सुयाओ बहुपरिवाराओ पुव्वाणुपुव्वि चरमाणीओ गामाणुगामं दूइज्जमाणीओ जेणेव वाणारसी नयरी तेणेव उवागया उवागच्छित्ता अहापडिख्वं उग्गहं

ओगिण्हिता संजमेणं तवसा० विहरन्ति ॥ ११४ ॥ तए णं तासिं सुव्वयाणं अज्जाणं एगे संवाडए वाणारसीनयरीए उच्चनीयमज्झिमाइं कुलाइं घरसमुदाणस्स भिक्खा-यरियाए अडमाणे भइस्स सत्थवाहस्स गिहं अणुपविट्ठे । तए णं सुभद्दा सत्थवाही ताओ अज्जाओ एज्जमाणीओ पासइ २ ता हट्ठं खिप्पामेव आसणाओ अब्भु-ट्ठेइ २ ता सत्तट्ठपयाइं अणुगच्छइ २ ता वन्दइ नमंसइ वं० २ ता विउलेणं असणपाणखाइमसाइमेणं पडिलाभेत्ता एवं वयासी—एवं खलु अहं अज्जाओ ! भइेणं सत्थवाहेणं सद्धिं विउलाइं भोगभोगाइं भुज्जमाणी विहरामि, नो चेव णं अहं दारगं वा दारियं वा पयायामि, तं धन्नाओ णं ताओ अम्मयाओ जाव एत्तो एगमवि न पत्ता, तं तुव्वमे अज्जाओ ! बहुणायाओ बहुपढियाओ बहूणि गामागरनगर जाव संनिवेसाइं आहिण्डह, बहूणं राईसरतलवर जाव सत्थवाहप्पमिइेणं गिहाइं अणु-पविसह, अत्थि से केइ कहिंचि विज्जापओए वा मन्तप्पओए वा वमणं वा विरेयणं वा वत्थिकम्मं वा ओसहे वा भेसजे वा उवल्हे, जेणं अहं दारगं वा दारियं वा पयाएजा ? ॥ ११५ ॥ तए णं ताओ अज्जाओ सुभइं सत्थवाहिं एवं वयासी—अम्हे णं देवाणुप्पिए ! समणीओ निग्गन्थीओ इरियासमियाओ जाव गुत्तवम्भया-रिणीओ, नो खलु कप्पइ अम्हं एयमट्ठं कण्णेहिंवि निसामेत्तए किमङ्ग पुण उडिसितए वा समायरितए वा, अम्हे णं देवाणुप्पिए ! नवरं तव विचित्तं केवल्लिपन्नत्तं धम्मं परिकहेमो ॥ ११६ ॥ तए णं सा सुभद्दा सत्थवाही तासिं अज्जाणं अन्तिए धम्मं सोच्चा निसम्म हट्ठतुट्ठा ताओ अज्जाओ तिक्खुत्तो वन्दइ नमंसइ वं० २ ता एवं वयासी—सद्दहामि णं अज्जाओ ! निग्गन्थं पावयणं, पत्तियामि णं रोएमि णं अज्जाओ ! निग्गन्थं पावयणं, एवमेयं तहमेयं अवितहमेयं जाव सावगधम्मं पडिवज्जए, अहासुहं देवाणुप्पिए ! मा पडिवन्धं करेह, तए णं सा सुभद्दा सत्थवाही तासिं अज्जाणं अन्तिए जाव पडिवज्जइ २ ता ताओ अज्जाओ वन्दइ नमंसइ वं० २ ता पडिविसज्जइ । तए णं सा सुभद्दा सत्थवाही समणोवासिया जाया जाव विहरइ ॥ ११७ ॥ तए णं तीसे सुभद्दाए समणोवासियाए अन्नया कयाइ पुव्वरत्तावरत्त-कालसमयंसि कुटुम्बजागरियं जागरमाणीए अयमेयारुवे अज्जत्थिए जाव समुप्प-जित्था—एवं खलु अहं भइेणं सत्थवाहेणं० विउलाइं भोगभोगाइं जाव विहरामि, नो चेव णं अहं दारगं वा...; तं सेयं खलु ममं कलं जाव जलन्ते भइस्स आपुच्छित्ता सुव्वयाणं अज्जाणं अन्तिए अज्जा भविता आगाराओ जाव पव्वइतए, एवं सपेहेइ २ ता कळे...जेणेव भइे सत्थवाहे तेणेव उवागया करयल जाव एवं वयासी—एवं खलु अहं देवाणुप्पिया ! तुव्वमेहिं सद्धिं बहूइं वासाइं विउलाइं



भोगभोगाई जाव विहरामि, नो चेव णं दारगं वा दारियं वा पयायामि, तं  
इच्छामि णं देवाणुप्पिया ! तुब्भेहिं अब्भणुत्ताया समाणी सुव्वयाणं अज्जाणं जाव  
पव्वइत्तए ॥ ११८ ॥ तए णं से भेइ सत्थवाहे सुभइं सत्थवाहिं एवं वयासी-मा णं  
तुमं देवाणुप्पिए ! इयाणिं मुण्डा जाव पव्वयाहि, भुज्जाहि ताव देवाणुप्पिए ! मए  
सद्धिं विउलाई भोगभोगाई, तओ पच्छा भुत्तभोई सुव्वयाणं अज्जाणं जाव पव्वयाहि ।  
तए णं सुभद्दा सत्थवाही भइस्स० एयमट्ठं नो० परियाणइ । दोच्चंपि तच्चंपि सुभद्दा  
सत्थवाही भइं सत्थवाहं एवं वयासी-इच्छामि णं देवाणुप्पिया ! तुब्भेहिं अब्भणु-  
त्ताया समाणी जाव पव्वइत्तए । तए णं से भेइ सत्थवाहे जाहे नो संचाएइ वट्ठहिं  
आधवणाहि य एवं पन्नवणाहि य सन्नवणाहि य विन्नवणाहि य आधवित्तए वा जाव  
विन्नवित्तए वा ताहे अकामए चेव सुभद्दाए निक्खमणं अणुमत्तिथा ॥ ११९ ॥ तए  
णं से भेइ सत्थवाहे विउलं असणं ४ उव्वक्खडावेइ, मित्तनाइ०...तओ पच्छा भोयण-  
वेलाए जाव मित्तनाइ...सक्कारेइ संमाणेइ, सुभइं सत्थवाहिं ण्हायं सव्वालंकारविभू-  
सियं पुरिससहस्सवाहिणिं सीयं दुरुहेइ । तओ सा सुभद्दा सत्थवाही मित्तनाइ जाव  
संवन्धिसंपरिवुडा सव्विद्धीए जाव रवेणं वाणारसीनयरीए मज्झंसज्जेणं जेणेव  
सुव्वयाणं अज्जाणं उव्वस्सए तेणेव उवागच्छइ २ ता पुरिससहस्सवाहिणिं सीयं  
ठवेइ, सुभइं सत्थवाहिं सीयाओ पच्चोरुहेइ ॥ १२० ॥ तए णं भेइ सत्थवाहे सुभइं  
सत्थवाहिं पुरओ काउं जेणेव सुव्वया अज्जा तेणेव उवागच्छइ २ ता सुव्वयाओ  
अज्जाओ वन्दइ नमंसइ वं० २ ता एवं वयासी-एवं खलु देवाणुप्पिया ! सुभद्दा  
सत्थवाही मम भारिया इट्ठा कन्ता जाव मा णं वाइया पित्तिया सिम्भिया संनि-  
वाइया विविहा रोगायङ्का फुसन्तु, एस णं देवाणुप्पिया ! संसारभउव्विग्गा भीया  
जम्म(ण)मरणणं देवाणुप्पियाणं अन्तिए मुण्डा भवित्ता जाव पव्वयाइ, तं एयं अहं  
देवाणुप्पियाणं सीसिणीभिकखं दलयामि, पडिच्छन्तु णं देवाणुप्पिया ! सीसिणी-  
भिकखं । अहासुहं देवाणुप्पिया ! मा पडिबन्धं करेह ॥ १२१ ॥ तए णं सा सुभद्दा  
सत्थवाही सुव्वयाहिं अज्जाहिं एवं वुत्ता समाणी हट्ठ० सयमेव आभरणमल्लालंकारं  
ओमुयइ २ ता सयमेव पञ्चमुट्ठियं लोयं करेइ २ ता जेणेव सुव्वयाओ अज्जाओ  
तेणेव उवागच्छइ २ ता सुव्वयाओ अज्जाओ तिक्खुत्तो आयाहिणपयाहिणेणं वन्दइ  
नमंसइ वं० २ ता एवं वयासी-आलित्ते णं भन्ते...जहा देवाणन्दा तहा पव्वइया  
जाव अज्जा जाया जाव गुत्तवम्भयारिणी ॥ १२२ ॥ तए णं सा सुभद्दा अज्जा अन्नया  
कयाइ बहुजणस्स चेडरूवे संमुच्छिया जाव अज्जोववन्ना अब्भङ्गणं च उव्वट्ठणं च  
फासुयपाणं च अलत्तणं च कङ्कणाणि य अङ्गणं च वण्णणं च चुण्णणं च खेळणगाणि

य खज्जलगाणि य खीरे च पुप्फाणि य गवेसइ गवेसित्ता बहुजणस्स दारए वा दारिया वा कुमारे य कुमारियाओ य डिम्भए य डिम्भियाओ य अप्पेगइयाओ अब्भङ्गेइ, अप्पेगइयाओ उव्वेद्वेइ, एवं फासुयपाणएणं ण्हावेइ, अप्पेगइयाणं पाए रयइ,० ओट्ठे रयइ,० अच्छीणि अजेइ,० उसुए करेइ,० तिलए करेइ, अप्पेगइयाओ दिग्गिदलए करेइ, अप्पेगइयाणं पन्तियाओ करेइ, अप्पेगगाइं छिज्जाइं करेइ, अप्पेगइया वण्णएणं समालभइ,० चुण्णएणं समालभइ, अप्पेगइयाणं खेळ्ळणगाइं दलयइ,० खज्जलगाइं दलयइ, अप्पेगइयाओ खीरभोयणं भुज्जावेइ, अप्पेगइयाणं पुप्फाइं ओमुयइ, अप्पेगइयाओ पाएसु ठवेइ, जंघासु करेइ, एवं ऊरुसु उच्छङ्गे कडीए पिट्ठे उरसि खन्धे सीसे य करयलपुडेणं गहाय हलउलेमाणी २ आगायमाणी २ परिगायमाणी २ पुत्तपिवासं च धूयपिवासं च नत्तुयपिवासं च नत्तिपिवासं च पच्चणुभवमाणी विहरइ ॥ १२३ ॥ तए णं ताओ सुव्वयाओ अज्जाओ सुभइं अज्जं एवं वयासी-अम्हे णं देवाणुप्पिए ! समणीओ निग्गन्धीओ इरियासमियाओ जाव गुत्तवम्भयारिणीओ, नो खलु अम्हं कप्पइ जातककम्मं करेतए, तुमं च णं देवाणुप्पिए ! बहुजणस्स चेडरूवेषु सुच्छिद्या जाव अज्जोववन्ना अब्भङ्गणं जाव नत्तिपिवासं वा पच्चणुभवमाणी विहरसि, तं णं तुमं देवाणुप्पिए ! एयस्स ठाणस्स आलोएहि जाव पाय[प]च्छित्तं पडिवज्जाहि ॥ १२४ ॥ तए णं सा सुभद्दा अज्जा सुव्वयाणं अज्जाणं एयमट्ठं नो आढाइ नो परिजाणइ अणाढायमाणी अपरिजाणमाणी विहरइ । तए णं ताओ समणीओ निग्गन्धीओ सुभइं अज्जं हीलेन्ति निन्दन्ति खिसन्ति गरहन्ति अभिक्खणं २ एयमट्ठं निवारिन्ति ॥ १२५ ॥ तए णं ती[ए]से सुभद्दाए अज्जाए समणीहिं निग्गन्धीहिं हीलिज्जमाणीए जाव अभिक्खणं २ एयमट्ठं निवारिज्जमाणीए अयमेयारूवे अज्जत्थिए जाव समुप्पज्जित्था—जया णं अहं अणारवासं वसामि तया णं अहं अप्पवसा, जप्पभिइं च णं अहं सुण्डा भवित्ता आगाराओ अणगारियं पव्वइया तप्पभिइं च णं अहं परवसा, पुत्वि च समणीओ निग्गन्धीओ आढेन्ति परिजाणेन्ति इयाणि नो आढाएन्ति नो परिजाणन्ति, तं सेयं खलु मे कल्लं जाव जलन्ते सुव्वयाणं अज्जाणं अन्तियाओ पडिनिक्खमिता पाडिएकं उवस्सयं उवसंपज्जित्तार्णं विहरितए, एवं संपेहेइ २ ता कल्लं जाव जलन्ते सुव्वयाणं अज्जाणं अन्तियाओ पडिनिक्खमइ २ ता पाडिएकं उवस्सयं उवसंपज्जित्तार्णं विहरइ । तए णं सा सुभद्दा अज्जा अज्जाहिं अणोहट्ठिया अणिवारिया सच्छन्दमइ बहुजणस्स चेडरूवेषु सुच्छिद्या जाव अब्भङ्गणं च जाव नत्तिपिवासं च पच्चणुभवमाणी विहरइ ॥ १२६ ॥ तए णं सा सुभद्दा पासत्था पासत्थविहारिणी एवं ओसन्ना ओसन्नविहारिणी कुसीला कुसीलविहारिणी संसत्ता संसत्तविहारिणी

अहाछन्दा अहाछन्दविहारिणी बहूइं वासाइं सामणपेरियाणं पाउणइ २ ता अद्धमा-  
 सियाए संलेहणाए अत्ताणं...तीसं भत्ताइं अणसणाए छेइत्ता तस्स ठाणस्स अणा-  
 लोइयपडिक्कन्ता कालमासे कालं किच्चा सोहम्मसे कप्पे बहुपुत्तियाविमाणे उववायसभाए  
 देवसयणिज्जंसि देवदूसन्तरिया अङ्गुलस्स असंखेज्जभागमेत्ताए ओगाहणाए बहुपुत्तिय-  
 देविताए उववच्चा ॥ १२७ ॥ तए णं सा बहुपुत्तिया देवी अहुणोववन्नमेत्ता समाणी  
 पञ्चविहाए पज्जत्तीए जाव भासामणपज्जत्तीए, एवं खल्ल गोयमा ! बहुपुत्तियाए देवीए  
 सा दिव्वा देविङ्गी जाव अभिसमन्नागया ॥ १२८ ॥ से केणट्ठेणं भन्ते ! एवं वुच्चइ-  
 बहुपुत्तिया देवी २ ? गोयमा ! बहुपुत्तिया णं देवी जाहे जाहे सक्कस्स देविन्दस्स  
 देवरत्तो उवत्थाणियणं करेइ ताहे २ वहवे दारए य दारियाओ य डिम्भए य  
 डिम्भियाओ य विउव्वइ २ ता जेणेव सक्के देविन्दे देवराया तेणेव उवागच्छइ २ ता  
 सक्कस्स देविन्दस्स देवरत्तो दिव्वं देविङ्गिं दिव्वं देवज्जुइं दिव्वं देवाणुभावं उवदंसेइ,  
 से तेणट्ठेणं गोयमा ! एवं वुच्चइ-बहुपुत्तिया देवी २ । बहुपुत्तियाए णं भन्ते ! देवीए  
 केवइयं कालं ठिईं पत्तत्ता ? गोयमा ! चत्तारि पलिओवमाइं ठिईं पत्तत्ता । बहुपुत्तिया णं  
 भन्ते ! देवी ताओ देवलोगाओ आउक्खएणं ठिइक्खएणं भवक्खएणं अणन्तरं चयं  
 चइत्ता कहिं गच्छिहिइ कहिं उववज्जिहिइ ? गोयमा ! इहेव जम्बुद्वीवे दीवे भारहे वासे  
 विञ्जगिरिपायमूले विमेलसंनिवेशे माहणकुलंसि दारियत्ताए पच्चायाहिइ ॥ १२९ ॥ तए  
 णं तीसे दारियाए अम्मापियरो एक्कारसमे दिवसे वीइक्कन्ते जाव बारसेहिं दिवसेहिं  
 वीइक्कन्तेहिं अयमेयारुवं नामधेज्जं करेन्ति—होउ णं अम्हं इमीसे दारियाए नामधेज्जं  
 सोमा ॥ १३० ॥ तए णं सोमा उम्मुक्कबालभावा विञ्जयपरिणयमेत्ता जोव्वणगमणुप्पत्ता  
 रूवेण य जोव्वणेण य लावण्णेण य उक्किट्ठा उक्किट्ठसरीरा जाव भविस्सइ । तए णं  
 तं सोमं दारियं अम्मापियरो उम्मुक्कबालभावं विञ्जयपरिणयमेत्तं जोव्वणगमणुप्पत्तं  
 पडिक्कूविएणं सुक्केणं पडिरूवएणं नियगस्स भाइणेज्जस्स रट्ठकूडस्स भारियत्ताए  
 दलइस्सइ । सा णं तस्स भारिया भविस्सइ इट्ठा कन्ता जाव भण्डकरण्डगसमाणा  
 तेह्णकेला इव सुसंगोविया चेलपे(ला)डा इव सुसंपरिगहिया रयणकरण्डगो विव  
 सुसारक्खिया सुसंगोविया मा णं सीयं जाव विविहा रोगायङ्का फुसन्तु ॥ १३१ ॥  
 तए णं सा सोमा माहणी रट्ठकूडेणं सद्धिं विउलाइं भागभोगाइं भुज्जमाणी संवच्छरे २  
 जुयलगं पयायमाणी सोलसेहिं संवच्छरेहिं वत्तीसं दारगरूवे पयायइ । तए णं सा  
 सोमा माहणी तेहिं बहूहिं दारगेहि य दारियाहि य कुमारेहि य कुमारियाहि य  
 डिम्भएहि य डिम्भियाहि य अप्पेगइएहिं उत्ताणसेज्जएहि य अप्पेगइएहिं थणिया-  
 एहि य अप्पेगएहिं पीहगपाएहिं अप्पेगइएहिं परंगणएहिं अप्पेगइएहिं परक्कमाणेहिं

अप्पेगइएहिं पक्खोलणएहिं अप्पेगइएहिं थणं मग्गमाणेहिं अप्पेगइएहिं खीरं मग्ग-  
माणेहिं अप्पेगइएहिं खेळणयं मग्गमाणेहिं अप्पेगइएहिं खज्जं मग्गमाणेहिं अप्पेगइ-  
एहिं कूरं मग्गमाणेहिं पाणियं मग्गमाणेहिं हसमाणेहिं हसमाणेहिं अक्कोसमाणेहिं  
अक्कुरसमाणेहिं हणमाणेहिं विप्पलायमाणेहिं अणुगम्ममाणेहिं रोवमाणेहिं कन्दमाणेहिं  
विलवमाणेहिं कूवमाणेहिं उक्कूवमाणेहिं निहायमाणेहिं पलंवमाणेहिं दहमाणेहिं  
दंसमाणेहिं वसमाणेहिं छेरमाणेहिं मुत्तमाणेहिं मुत्तपुरीसवमियसुलित्तोवलित्ता मइल-  
वसणपुच्छा जाव असुइवीभच्छा परमदुग्गन्धा नो संचाएइ रट्टकूडेणं सद्धिं विउलाइं  
भोगभोगाइं भुज्जमाणी विहरित्तए ॥ १३२ ॥ तए णं तीसे सोमाए माहणीए अन्नया  
कयाइ पुव्वरत्तावरत्तकालसमयंसि कुडुम्बजागरियं जागरमाणीए अयमेयाह्वे जाव  
समुप्पजित्था-एवं खलु अहं इमेहिं बहूहिं दारगेहि य जाव डिम्भियाहि य अप्पेग-  
इएहिं उत्ताणसेज्जएहि य जाव अप्पेगइएहिं मुत्तमाणेहिं दुज्जाएहिं दुज्जम्मएहिं  
हयविप्पहयभगेहिं एगप्पहारपडिएहिं जेणं मुत्तपुरीसवमियसुलित्तोवलित्ता जाव परम-  
दुब्बिभगन्धा नो संचाएमि रट्टकूडेणं सद्धिं जाव भुज्जमाणी विहरित्तए, तं धन्नाओ णं  
ताओ अम्मयाओ जाव जीवियफले जाओ णं वज्झाओ अवियाउरीओ जाणुक्कोप्पर-  
मायाओ सुरभिसुगन्धगन्धियाओ विउलाइं माणुस्सगाइं भोगभोगाइं भुज्जमाणीओ  
विहरन्ति, अहं णं अधन्ना अपुण्णा अकयपुण्णा नो संचाएमि रट्टकूडेणं सद्धिं  
विउलाइं जाव विहरित्तए ॥ १३३ ॥ तेणं कालेणं तेणं समएणं सुव्वयाओ नाम अज्जाओ  
इरियासमियाओ जाव बहुपरिवाराओ पुव्वानुपुव्वि...जेणेव विमेले संनिवेसे...  
अहापडिह्वं उग्गहं जाव विहरन्ति । तए णं तासिं सुव्वयाणं अज्जाणं एगे संचाडए  
विमेले संनिवेसे उच्चनीय० जाव अडमाणे रट्टकूडस्स गिहं अणुपविट्ठे । तए णं सा  
सोमा माहणी ताओ अज्जाओ एज्जमाणीओ पासइ २ ता हट्ठ० खिप्पामेव आसणाओ  
अब्भुट्ठेइ २ ता सत्तट्ठपयाइं अणुगच्छइ २ ता वन्दइ नमंसइ वं० २ ता विउलेणं  
असण ४ पडिलाभेइ २ ता एवं वयासी-एवं खलु अहं अज्जाओ ! रट्टकूडेणं सद्धिं  
विउलाइं जाव संवच्छरे २ जुगलं पयामि, सोलसाहिं संवच्छरेहिं बत्तीसं दारगरुवे  
पयाया, तए णं अहं तेहिं बहूहिं दारएहि य जाव डिम्भियाहि य अप्पेगइएहिं  
उत्ताणसेज्जएहिं जाव मुत्तमाणेहिं दुज्जाएहिं जाव नो संचाएमि...विहरित्तए, तं  
इच्छामि णं अहं अज्जाओ ! तुम्हं अन्तिए धम्मं निसामेत्तए । तए णं ताओ अज्जाओ  
सोमाए माहणीए विचित्तं केवलपन्नत्तं धम्मं परिकहेन्ति ॥ १३४ ॥ तए णं  
सा सोमा माहणी तासिं अज्जाणं अन्तिए धम्मं सोच्चा निसम्म हट्ठ जाव हियया  
ताओ अज्जाओ वन्दइ नमंसइ वं० २ ता एवं वयासी-सद्दहामि णं अज्जाओ !


निगगन्थं पावयणं जाव अब्भुट्ठेसि णं अज्जाओ ! निगगन्थं पावयणं, एवमेयं अज्जाओ ! जाव से जहेयं तुब्भे वयह, जं नवरं अज्जाओ ! रट्ठकूडं आपुच्छामि, तए णं अहं देवाणुप्पियाणं अन्तिए मुण्डा जाव पव्वयामि । अहासुहं देवाणुप्पिए ! मा पडिबन्धं... । तए णं सा सोमा माहणी ताओ अज्जाओ वन्दइ नमंसइ वं० २ ता पडिविसजेइ ॥ १३५ ॥ तए णं सा सोमा माहणी जेणेव रट्ठकूडे तेणेव उवागया करयल०... एवं वयासी-एवं खलु मए देवाणुप्पिया ! अज्जाणं अन्तिए धम्मे निसन्ते, से वि य णं धम्मे इच्छिए जाव अभिरुइए, तए णं अहं देवाणुप्पिया ! तुब्भेहि अब्भणुत्ताया सुव्वयाणं अज्जाणं जाव पव्वइत्तए ॥ १३६ ॥ तए णं से रट्ठकूडे सोमं माहणि एवं वयासी-मा णं तुमं देवाणुप्पिए ! इयाणि मुण्डा भवित्ता जाव पव्वयाहि, भुज्जाहि ताव देवाणुप्पिए ! मए सद्धिं विउलइं भोगभोगाईं, तओ पच्छा भुत्तमोई सुव्वयाणं अज्जाणं अन्तिए मुण्डा जाव पव्वयाहि ॥ १३७ ॥ तए णं सा सोमा माहणी ण्हाया अप्पमहप्पाभरणालंकियसरीरा चेडियाचक्रवालपरिकिण्णा साओ गिहाओ पडिनिक्खमइ २ ता विभेलं संनिवेसं मज्झमज्झेणं जेणेव सुव्वयाणं अज्जाणं उवस्सए तेणेव उवागच्छइ २ ता सुव्वयाओ अज्जाओ वन्दइ नमंसइ पज्जुवासइ । तए णं ताओ सुव्वयाओ अज्जाओ सोमाए माहणीए विचित्तं केवलपिन्नत्तं धम्मं परिकहेन्ति जहा जीवा बज्झन्ति । तए णं सा सोमा माहणी सुव्वयाणं अज्जाणं अन्तिए जाव दुवाल्सविहं सावगधम्मं पडिवज्जइ २ ता सुव्वयाओ अज्जाओ वन्दइ नमंसइ वं० २ ता जामेव दिसिं पाउब्भूया तामेव दिसिं पडिगया । तए णं सा सोमा माहणी समणोवासिया जाया अभिगय० जाव अप्पाणं भावेमाणी विहरइ । तए णं ताओ सुव्वयाओ अज्जाओ अन्नया कयाइ विभेलाओ संनिवेसाओ पडिनिक्खमन्ति २ ता बहिया जणवयविहारं विहरन्ति ॥ १३८ ॥ तए णं ताओ सुव्वयाओ अज्जाओ अन्नया कयाइ पुव्वाणुपुर्व्वि... जाव विहरन्ति । तए णं सा सोमा माहणी इमीसे कहाए लद्धट्ठा समाणी हट्ठ० ण्हाया तहेव निगगया जाव वन्दइ नमंसइ वं० २ ता धम्मं सोक्खा जाव नवरं रट्ठकूडं आपुच्छामि, तए णं पव्वयामि । अहासुहं... । तए णं सा सोमा माहणी सुव्वयं अज्जं वन्दइ नमंसइ वं० २ ता सुव्वयाणं अन्तियाओ पडिनिक्खमइ २ ता जेणेव सए गिहे जेणेव रट्ठकूडे तेणेव उवागच्छइ २ ता करयल० तहेव आपुच्छइ जाव पव्वइत्तए । अहासुहं देवाणुप्पिए ! मा पडिबन्धं... । तए णं से रट्ठकूडे विउलं असणं तहेव जाव पुव्वभवे सुभद्दा जाव अज्जा जाया इरियासमिया जाव गुत्तबम्भयारिणी ॥ १३९ ॥ तए णं सा सोमा अज्जा सुव्वयाणं अज्जाणं अन्तिए सामाइयमाइयाइं एक्कारस

अङ्गाइ अहिज्जइ २ ता बहूहिं छट्ठमदसमदुवाल्स जाव भावेमाणी बहूइं वासाइं सामण्णपरियागं पाउणइ २ ता मासियाए संलेहणाए सट्ठिं भत्ताइं अणसणाए छेइत्ता आलोइयपडिक्कन्ता समाहिपत्ता कालमासे कालं किच्चा सक्कस्स देविन्दस्स देवरत्तो सामाणियदेवत्ताए उववज्जिहिइ । तत्थ णं अत्थेगइयाणं देवाणं दो सागरोवमाइं ठिइ पन्नत्ता, तत्थ णं सोमस्सवि देवस्स दो सागरोवमाइं ठिइ पन्नत्ता ॥ १३९ ॥ से णं भन्ते ! सोमे देवे ताओ देवलोगाओ आउक्खएणं जाव चयं चइत्ता कहिं गच्छिहिइ कहिं उववज्जिहिइ ? गोयमा ! महाविदेहे वासे जाव अन्तं काहिइ । निक्खेवओ ॥ १४० ॥ **चउत्थं अज्झयणं समत्तं ॥ ३ । ४ ॥**

जइ णं भंते ! समणेणं० उक्खेवओ । एवं खलु जम्बू ! तेणं कालेणं तेणं समएणं रायगिहे नामं नयरे । गुणसिलए उज्जाणे । सेणिए राया । सामी समोसरिए । परिसा निग्गया ॥ १४१ ॥ तेणं कालेणं तेणं समएणं पुण्णभेइ देवे सोहम्मे कप्पे पुण्णभेइ विमाणे सभाए सुहम्माए पुण्णभइंसि सीहासणंसि चउहिं सामाणियसाहस्सीहिं जहा सूरियाभो जाव बत्तीसइविहं नट्टविहिं उवदंसित्ता जामेव दिसिं पाउब्भूए तामेव दिसिं पडिगए । कूडागारसाला । पुव्वभवपुच्छा । एवं खलु गोयमा ! तेणं कालेणं तेणं समएणं इहेव जम्बुदीवे वीवे भारहे वासे मणिवइया नामं नयरी होत्था, रिद्ध० । चन्दो राया । ताराइण्णे उज्जाणे । तत्थ णं मणिवइयाए नयरीए पुण्णभेइ नामं गाहावइ परिवसइ, अद्धे० । तेणं कालेणं तेणं समएणं थेरा भगवन्तो जाइ-संपन्ना जाव जीवियासमरणभयविप्पमुक्का बहुस्सुया बहुपरिवारा पुव्वाणुपुल्वि जाव समोसडा । परिसा निग्गया । तए णं से पुण्णभेइ गाहावइ इमीसे कहाए लद्धे० हट्ठ० जाव जहा **पुण्णत्तीए** गङ्गदत्ते तहेव निग्गच्छइ जाव निक्खन्तो जाव गुत्त-वम्मयारी ॥ १४२ ॥ तए णं से पुण्णभेइ अणगारे भगवन्ताणं अन्तिए सामाइय-माइयाइं एकारस अङ्गाइं अहिज्जइ २ ता बहूहिं चउत्थछट्ठम जाव भावित्ता बहूइं वासाइं सामण्णपरियागं पाउणइ २ ता मासियाए संलेहणाए सट्ठिं भत्ताइं अणसणाए छेइत्ता आलोइयपडिक्कन्ते समाहिपत्ते कालमासे कालं किच्चा सोहम्मे कप्पे पुण्णभेइ विमाणे उववायसभाए देवसयणिजंसि जाव भासामणपज्जतीए ॥ १४२ ॥ एवं खलु गोयमा ! पुण्णभेइणं देवेणं सा दिव्वा देविद्धी जाव अभिसमन्नागया । पुण्णभइस्स णं भन्ते ! देवस्स केवइयं कालं ठिइ पन्नत्ता ? गोयमा ! दो सागरोवमाइं ठिइ पन्नत्ता । पुण्णभेइ णं भन्ते ! देवे ताओ देवलोयाओ जाव कहिं गच्छिहिइ कहिं उववज्जिहिइ ? गोयमा ! महाविदेहे वासे सिज्जिहिइ जाव अन्तं काहिइ । निक्खेवओ ॥ १४३ ॥ **पंचमं अज्झयणं समत्तं ॥ ३ । ५ ॥**

जइ णं भंते ! समणेणं० उक्खेवओ । एवं खलु जम्बू ! तेणं कालेणं तेणं समएणं  
 रायणिहे नयरे । गुणसिलए उज्जाणे । सेणिए राया । सामी समोसरिए ॥ १४४ ॥  
 तेणं कालेणं तेणं समएणं माणिभेदे देवे सभाए सुहम्माए माणिभेदंसि सीहासणंसि  
 चउहिं सामाणियसाहस्सीहिं जहा पुण्णभेदो तहेव आगमणं, नट्टविही, पुव्वभव-  
 पुच्छा । मणिवई नयरी, माणिभेदे गाहावई, धेराणं अन्तिए पव्वज्जा, एक्कारस अज्जाइं  
 अहिज्जइ, बट्टइं वासाइं परियाओ, मासिया संलेहणा, सट्ठिं भत्ताइं०, माणिभेदे  
 विमाणे उववाओ, दो सागरोवमाइं ठिई, महाविदेहे वासे सिज्झिहिइ । निक्खे-  
 वओ ॥ १४५ ॥ छट्ठं अज्झयणं समत्तं ॥ ३ । ६ ॥

एवं दत्ते ७, सिवे ८, बले ९, अणाटिए १०, सव्वे जहा पुण्णभेदे देवे । सव्वेसिं  
 दो सागरोवमाइं ठिई । विमाणा देवसरिसनामा । पुव्वभवे दत्ते चन्दणानामाए,  
 सिवे मिहिलाए, बले हत्थिणपुरे नयरे, अणाटिए काकन्वीए । उज्जाणाइं जहा संगह-  
 णीए ॥ १४६ ॥ ३ । १० ॥ पुष्पिकाओ समत्ताओ ॥ तइओ वग्गो  
 समत्तो ॥ ३ ॥



णमोऽत्थु णं समणस्स भगवओ णायपुत्तमहावीरस्स

# सुत्तागमे

तत्थ णं

## पुप्फचूलियाओ

जइ णं भन्ते ! समणेणं भगवया... उक्खेवओ जाव दस अज्झयणा पन्नत्ता,  
तंजहा—सिरि—हिरि—धिइ—कित्तीओ बुद्धी लच्छी य होइ वोद्धवा । इलादेवी  
सुरादेवी रसदेवी गन्धदेवी य ॥ १ ॥ जइ णं भन्ते ! समणेणं भगवया जाव  
संपत्तेणं उवङ्गाणं चउत्थस्स वग्गस्स पुप्फचूलियाणं दस अज्झयणा पन्नत्ता, पढमस्स  
णं भन्ते ! उक्खेवओ । एवं खलु जम्बू ! तेणं कालेणं तेणं समएणं रायगिहे नयरे,  
गुणसिलए उज्जाणे, सेणिए राया । सामी समोसढे, परिसा निग्गया । तेणं कालेणं  
तेणं समएणं सिरिदेवी सोहम्मो कप्पे सिरिवडिंसए विमाणे सभाए सुहम्माए सिरिसि  
सीहासणंसि चउहिं सामाणियसाहस्सीहिं चउहिं महत्तरियाहिं० जहा बहुपुत्तिया  
जाव नट्ठविहिं उवदंसित्ता पडिगया । नवरं [दारय]दारियाओ नत्थि । पुव्वभवपुच्छा ।  
एवं खलु गोयमा ! तेणं कालेणं तेणं समएणं रायगिहे नयरे, गुणसिलए उज्जाणे, जिय-  
सत्तू राया । तत्थ णं रायगिहे नयरे सुदंसणे नामं गाहावई परिवसइ, अट्ठे० । तस्स णं  
सुदंसणस्स गाहावइस्स पिया नामं भारिया होत्था, सोमाल० । तस्स णं सुदंसणस्स  
गाहावइस्स धूया पियाए गाहावइणीए अत्तिया भूया नामं दारिया होत्था वु[बु]द्धा  
वुद्धकुमारी जुण्णा जुण्णकुमारी पडियपुयत्थणी वरगपरिवज्जिया यावि होत्था ॥ १४७ ॥  
तेणं कालेणं तेणं समएणं पासे अरहा पुरिसादाणीए जाव नवरयणिए वण्णओ सो  
चेव, समोसरणं । परिसा निग्गया ॥ १४८ ॥ तए णं सा भूया दारिया इमीसे  
कहाए लद्धट्ठा समाणी हट्ठतुट्ठ० जेणेव अम्मापियरो तेणेव उवागच्छइ २ ता एवं  
वयासी—एवं खलु अम्मताओ ! पासे अरहा पुरिसादाणीए पुव्वाणपुर्व्वि चरमाणे  
जाव गणपरिचुडे विहरइ, तं इच्छामि णं अम्मताओ । तुब्भेहिं अब्भणुच्चाया समाणी  
पासस्स अरहओ पुरिसादाणीयस्स पायवन्दिया गमित्तए । अहासुहं देवाणुप्पिए !  
मा पडिबन्धं... ॥ १४९ ॥ तए णं सा भूया दारिया ण्हाया अप्पमहग्गघाभरणालंकिय-  
सरीरा चेबीचक्कवालपरिकिण्णा साओ गिहाओ पडिनिक्खमइ २ ता जेणेव बाहिरिया  
उवट्ठानसाला तेणेव उवागच्छइ २ ता धम्मियं जाणप्पवरं दुरुढा । तए णं सा



भूया दारिया निययपरिवारपरिवुडा रायगिहं नयरं मज्झमज्झेणं निग्गच्छइ २ ता जेणेव गुणसिलए उज्जाणे तेणेव उवागच्छइ २ ता छताईए तित्थयराइसए पासइ २ ता धम्मियाओ जाणप्पवराओ पच्चोरु[भि]हइ २ ता चेडीचक्कवालपरिकिण्णा जेणेव पासे अरहा पुरिसादाणीए तेणेव उवागच्छइ २ ता तिकखुत्तो जाव पज्जुवासइ ॥ १५० ॥ तए णं पासे अरहा पुरिसादाणीए भूयाए दारियाए महइ० धम्मकहा, धम्मं सोच्चा निसम्म हट्ठ० वन्दइ नमंसइ वं० २ ता एवं वयासी-सद्दहामि णं भन्ते ! निग्गन्थं पावयणं जाव अब्भुट्टेमि णं भन्ते ! निग्गन्थं पावयणं, से जहेयं तुब्भे वयह, जं नवरं भन्ते ! अम्मापियरो आपुच्छामि, तए णं अहं जाव पव्वइत्तए । अहासुहं देवाणुप्पिए । ० ॥ १५१ ॥ तए णं सा भूया दारिया तमेव धम्मियं जाणप्पवरं जाव दुरुहइ २ ता जेणेव रायगिहे नयरे तेणेव उवागया, रायगिहं नयरं मज्झमज्झेणं जेणेव सए गिहे तेणेव उवागया, रहाओ पच्चोरुहिता जेणेव अम्मापियरो तेणेव उवागया, करयल० जहा जमाली आपुच्छइ । अहा-सुहं देवाणुप्पिए । ॥ १५२ ॥ तए णं से सुदंसणे गाहावई विउलं असणं ४ उव-क्खडावेइ सित्ताइ० आमन्तेइ २ ता जाव जिमियमुत्ततरकाले सुईभूए निक्खम-णमाणेत्ता कोडुम्बियपुरिसे सद्दवेइ २ ता एवं वयासी-खिप्पामेव भो देवाणुप्पिया ! भूयादारियाए पुरिससहस्सवाहिणीयं सीयं उवट्ठवेह २ ता जाव पच्चप्पिणह । तए णं ते जाव पच्चप्पिणन्ति ॥ १५३ ॥ तए णं से सुदंसणे गाहावई भूयं दारियं ण्हायं स० विभूसियसरीरं पुरिससहस्सवाहिणिं सीयं दुरुहेइ २ ता मित्ताइ० जाव रवेणं रायगिहं नयरं मज्झमज्झेणं जेणेव गुणसिलए उज्जाणे तेणेव उवागए छताईए तित्थयराइसए पासइ २ ता सीयं ठावेइ २ ता भूयं दारियं सीयाओ पच्चोरुहेइ ॥ १५४ ॥ तए णं तं भूयं दारियं अम्मापियरो पुरओ काउं जेणेव पासे अरहा पुरिसादाणीए तेणेव उवागया तिकखुत्तो वन्दन्ति नमंसन्ति वं० २ ता एवं वयासी-एवं खलु देवाणुप्पिया ! भूया दारिया अम्हं एगा धूया इट्ठा०, एस णं देवाणुप्पिया ! संसारभउव्विग्गा भीया जाव देवाणुप्पियाणं अन्तिए मुण्डा जाव पव्व[या]यइ, तं एयं णं देवाणुप्पिया ! सिस्सिणिभिकखं दलयाओ, पडिच्छन्तु णं देवाणुप्पिया ! सिस्सिणिभिकखं । अहासुहं देवाणुप्पिया ! ० ॥ १५५ ॥ तए णं सा भूया दारिया पासेणं अरहया...एवं वुत्ता समाणी हट्ठ० उत्तरपुरत्थिमं सयमेव आभरणमल्लालंकारं ओ[उम्]मुयइ जहा देवाणन्दा पुष्फचूलाणं अन्तिए जाव गुत्तबम्भयाणि ॥ १५६ ॥ तए णं सा भूया अज्जा अन्नया कयाइ सरीरबाओसिया जाया यावि होत्था, अभिक्खणं २ हत्थे धोवइ, पाए धोवइ, एवं सीसं धोवइ, मुहं धोवइ, थणगन्तराई

धोवइ, कम्बन्तराई धोवइ, गुज्जन्तराई धोवइ, जत्थ जत्थ वि य णं ठाणं वा  
 सेज्जं वा निसीहियं वा चेएइ, तत्थ तत्थ वि य णं पुव्वामेव पाणएणं अब्भुक्खेइ,  
 तओ पच्छा ठाणं वा सेज्जं वा निसीहियं वा चेएइ ॥ १५७ ॥ तए णं  
 ताओ पुप्फचूलाओ अज्जाओ भूयं अज्जं एवं वयासी-अम्हे णं देवाणुप्पिए !  
 समणीओ निग्गन्थीओ इरियासमियाओ जाव गुत्तबम्भयारिणीओ, नो खलु कप्पइ  
 अम्हं सरीरबाओसियाणं होत्तए, तुमं च णं देवाणुप्पिए ! सरीरबाओसिया अभि-  
 क्खणं २ हत्थे धोवसि जाव निसीहियं चेएसि, तं णं तुमं देवाणुप्पिए ! एयस्स  
 ठाणस्स आलोएहिति, सेसं जहा सुभद्दाए जाव पाडिएक्कं उवस्सयं उवसेपज्जिताणं  
 विहरइ । तए णं सा भूया अज्जा अणोहट्ठिया अणिवारिया सच्छन्दमई अभिक्खणं २  
 हत्थे धोवइ जाव चेएइ ॥ १५८ ॥ तए णं सा भूया अज्जा बहूहिं चउत्थल्लुद्धं  
 बहूइं वासाइं सामण्णपरियाणं पाउणिता तस्स ठाणस्स अणालोइयपडिक्कन्ता कालमासे  
 कालं किच्चा सोहम्मे कप्पे सिरिवडिंसए विमाणे उववायसभाए देवसयणिजंसि जाव  
 ओगाहणाए सिरिदेवित्ताए उववन्ना पञ्चविहाए पज्जतीए जाव भासामणपज्जतीए  
 पज्जता । एवं खलु गोयमा ! सिरिए देवीए एसा दिव्वा देविद्धी लद्धा पत्ता । एणं  
 पल्लिओवमं ठिई । सिरि णं भन्ते ! देवी जाव कहिं गच्छिहिइं ? ...महाविदेहे वासे  
 सिज्झिहिइ । निक्खेवओ ॥ १५९ ॥ **पढमं अज्झयणं समत्तं ॥ ४ । १ ॥**

एवं सेसाणवि नवण्हं भाणियव्वं । सरिसनामा विमाणा । सोहम्मे कप्पे । पुव्वभवे  
 नयरउज्जाणपियमाईणं अप्पणो य नामाई जहा संगहणीए । सव्वा पासस्स अन्तिए  
 निक्खन्ता । ताओ पुप्फचूलाणं सिस्सिणियाओ सरीरबाओसियाओ सव्वाओ अणन्तरं  
 चयं चइत्ता महाविदेहे वासे सिज्झिहन्ति ... ॥ १६० ॥ **४ । १० ॥ पुप्फचू-**  
**[ला]लियाओ समत्ताओ ॥ चउत्थो वग्गो समत्तो ॥ ४ ॥**



णमोऽस्थु णं समणस्स भगवओ णायपुत्तमहावीरस्स

## सुत्तागमे

तत्थ णं

### वणिहदसाओ

जइ णं भन्ते ! उक्खेवओ जाव दुवालस अज्झयणा पत्तता, तंजहा—निसडे मायणि-वह-वहे पगया जुत्ती दसरहे दढरहे य । महाधणू सत्तधणू दसधणू नामे सयधणू य ॥ १ ॥ जइ णं भन्ते ! समणेणं जाव दुवालस अज्झयणा पत्तता, पढमस्स णं भन्ते !...उक्खेवओ । एवं खलु जम्बू ! तेणं कालेणं तेणं समएणं बारवई नामं नयरी होत्था, दुवालसजोयणायामा जाव पच्चक्खं देवल्लोयभूया पासा-दीया दरिसणिज्जा अभिरूवा पडिरूवा ॥ १६१ ॥ तीसे णं बारवईए नयरीए बहिया उत्तरपुरत्थिमे दिसीमाए एत्थ णं रेवए नामं पव्वए होत्था, तुङ्गे गयणयलमणु-लिहन्तसिहरे नाणाविहरूक्खगुच्छगुम्मलयावल्लीपरिगयाभिरामे हंसमियमयूरकोञ्चसार-सच्चक्कागमयणसालाकोइलकुलोववेए तडकडगवियरओज्झरपवायपब्भारसिहरपउरे अच्छरगणदेवसंघचारणविज्जाहरमिहुणसंनिचिण्णे निच्चच्छणए दसारवरवीरपुरिस-तेल्लोक्कवलवगाणं सोमे सुभए पियदंसणे सुरुवे पासाईए जाव पडिरूवे ॥ १६२ ॥ तस्स णं रेवयगस्स पव्वयस्स अदूरसामन्ते एत्थ णं नन्दणवणे नामं उज्जाणे होत्था, सव्वोउयपुप्फं जाव दरिसणिज्जे ॥ १६३ ॥ तत्थ णं बारवईए नयरीए कण्हे नामं वासुदेवे राया होत्था जाव पसासेमाणे विहरइ । से णं तत्थ समुहविजयपामोक्खाणं दसण्हं दसारारणं, बलदेवपामोक्खाणं पच्चण्हं महावीराणं, उग्गसेणपामोक्खाणं सोल-सण्हं राईसाहस्सीणं, पज्जुणपामोक्खाणं अद्धुट्ठाणं कुमारोडीणं, सम्बपामोक्खाणं सट्ठीए दुद्धन्तसाहस्सीणं, वीरसेणपामोक्खाणं एकवीसाए वीरसाहस्सीणं, महासेण-पामोक्खाणं छप्पन्नाए बलवगसाहस्सीणं, रुप्पिणिपामोक्खाणं सोलसण्हं देवीसाह-स्सीणं, अञ्जेसिं च बहूणं राईसर जाव सत्थवाहप्पभिईणं वेयङ्कुगिरिसागरमेरागस्स दाहिणङ्गभरहस्स आहेवच्चं जाव विहरइ ॥ १६४ ॥ तत्थ णं बारवईए नयरीए बलदेवे नामं राया होत्था, महया जाव रज्जं पसासेमाणे विहरइ । तस्स णं बलदेवस्स रत्तो रेवई नामं देवी होत्था, सोमाल० जाव विहरइ । तए णं सा रेवई देवी अज्जया कयाइ तंसि तारिसगंसि सयणिज्जंसि जाव सीहं सुमिणे पासित्ताणं... एवं सुमिणदंसण-

परिकहणं, कलाओ जहा महाबलस्स, पन्नासओ दाओ, पन्नासरायकन्नगणं एगदिव-  
 सेणं पाणिग्गहणं... नवरं निसडे नामं जाव उप्पि पासाए विहरइ ॥ १६५ ॥  
 तेणं कालेणं तेणं समएणं अरहा अरिट्ठनेसी आइगरे...दस धण्डूं वण्णओ जाव  
 समोसरिए । परिसा निग्गया ॥ १६६ ॥ तए णं से कण्हे वासुदेवे इमीसे कहाए लद्धे  
 समाणे हट्ठुट्ठे० कोडुम्बियपुरिसं सद्दावेइ २ ता एवं वयासी-खिप्पामेव देवाणुप्पिया !  
 सभाए सुहम्माए सामुदाणियं भेरिं तालेह । तए णं से कोडुम्बियपुरिसे जाव पडिसुणित्ता  
 जेणेव सभाए सुहम्माए सामुदाणिया भेरी तेणेव उवागच्छइ २ ता सामुदाणियं भेरिं  
 महया २ सहेणं तालेइ ॥ १६७ ॥ तए णं तीसे सामुदाणियाए भेरीए महया २ सहेणं  
 तालियाए समाणीए समुद्विजयपामोक्खा दस दसारा...देवीओ(उण) भाणियव्वाओ,  
 अन्ने य बहवे राईसर जाव सत्थवाहप्पभिइओ ण्हाया सव्वालंकारविभूसिया जहाविभव-  
 इह्वीसक्कारसमुदएणं अप्पेगइया हयगया जाव पुरिसवग्गुरापरिक्खित्ता जेणेव कण्हे  
 वासुदेवे तेणेव उवागच्छन्ति २ ता करयल० कण्हं वासुदेवं जएणं विजएणं वद्धावेन्ति ।  
 तए णं से कण्हे वासुदेवे कोडुम्बियपुरिसे एवं वयासी-खिप्पामेव भो देवाणुप्पिया !  
 आभिसेक्कहत्थिरयणं पडिक्कप्पेह हयगयरहपवर जाव पच्चप्पिणन्ति । तए णं से  
 कण्हे वासुदेवे मज्जणघरे जाव दुल्ले, अट्ठट्ठ मज्जंगा, जहा कूणिए, सेयवरचामरेहिं  
 उद्धव्वमाणेहिं २ समुद्विजयपामोक्खेहिं दसहिं दसारेहिं जाव सत्थवाहप्पभिइहिं  
 सद्धिं संपरिवुडे सव्विद्धीए जाव रवेणं बारावइं नयरिं मज्झंमज्झेणं...सेसं जहा  
 कूणिओ जाव पज्जुवासइ ॥ १६८ ॥ तए णं तस्स निसदस्स कुमारस्स उप्पि पासा-  
 यवरगयस्स तं महया जणसइं च...जहा जमाली जाव धम्मं सोच्चा निसम्म  
 वन्दइ नमंसइ वं० २ ता एवं वयासी-सद्दहामि णं भन्ते ! निग्गन्थं पावयणं  
 जहा चित्तो जाव सावगधम्मं पडिवज्जइ २ ता पडिगए ॥ १६९ ॥ तेणं कालेणं  
 तेणं समएणं अरहओ अरिट्ठनेमिस्स अन्तेवासी वरदत्ते नामं अणगारे उराले  
 जाव विहरइ । तए णं से वरदत्ते अणगारे निसदं कुमारं पासइ २ ता जायसद्धे जाव  
 पज्जुवासमाणे एवं वयासी-अहो णं भन्ते ! निसदे कुमारे इट्ठे इट्ठरूवे कन्ते कन्तरूवे,  
 एवं पिए० मणुन्नए० भणामे मणामरूवे सोमे सोमरूवे पियदंसणे सुरूवे, निसदेणं  
 भन्ते ! कुमारेणं अयमेयारूवा माणुयइह्वी किण्णा लद्धा किण्णा पत्ता ? पुच्छा जहा  
 सूरियामस्स । एवं खलु वरदत्ता ! तेणं कालेणं तेणं समएणं इहेव जम्बुदीवे दीवे  
 भारहे वासे रोहीडए नामं नयरे होत्था, रिद्ध०... मेहवण्णे उज्जाणे । तत्थ णं  
 रोहीडए नयरे महब्बले नामं राया, पउमावई नामं देवी, अन्नया कयाइ तंसि  
 तारिसगंसि सयणिज्जंसि सीहं सुमिणे... एवं जम्मणं भाणियव्वं जहा महाबलस्स,

नवरं वीरङ्गओ नामं बत्तीसओ दाओ, बत्तीसाए रायवरकन्नगाणं पाणिं जाव उव-  
 गिज्जमाणे २ पाउसवरिसारत्तसरयहेमन्तवसन्तगिम्हपज्जन्ते छप्पि उऊ जहाविभवेणं  
 भुंजमाणे २ कालं गालेमाणे इट्ठे सद् जाव विहरइ ॥ १७० ॥ तेणं कालेणं तेणं  
 समएणं सिद्धत्था नाम आयरिया जाइसंपन्ना जहा केसी, नवरं बहुसुद्धा बहुपरिवारा  
 जेणेव रोहीडए नयरे जेणेव मेहवण्णे उज्जाणे तेणेव उवागया अहापडिरूवं जाव  
 विहरन्ति । परिसा निग्गया ॥ १७१ ॥ तए णं तस्स वीरङ्गयस्स कुमारस्स उप्पि  
 पासायवरगयस्स तं महया जणसद्...जहा जमाली निग्गओ धम्मं सोच्चा...जं  
 नवरं देवाणुप्पिया ! अम्मापियरो आपुच्छामि जहा जमाली तहेव निक्खन्तो जाव  
 अणगारे जाए जाव गुत्तवम्भयारी ॥ १७२ ॥ तए णं से वीरङ्गए अणगारे सिद्धत्थाणं  
 आयरियाणं अन्तिए सामाइयमाइयाइं एकारस्स अज्जाइं अहिज्जइ २ ता बहूहिं  
 चउत्थ जाव अप्पाणं भावेमाणे बहुपडिपुण्णाइं पणयालीसवासाइं सामण्णपरियाणं  
 पाउणिता दोमासियाए संलेहणाए अत्ताणं झूसित्ता सवीसं भत्तसयं अणसणाए  
 छेइत्ता आलोइयपडिक्कन्ते समाहिपत्ते कालमासे कालं किच्चा बम्भलोए कप्पे मणोरमे  
 विमाणे देवत्ताए उववच्चे । तत्थ णं अत्थेगइयाणं देवाणं दससागरोवमाइं ठिई  
 पन्नत्ता ॥ १७३ ॥ से णं वीरङ्गए देवे ताओ देवलोगाओ आउक्खएणं जाव  
 अणन्तरं चयं चइत्ता इहेव बारवईए नयरीए बलदेवस्स रत्तो रेवईए देवीए  
 कुच्छिसि पुत्तत्ताए उववच्चे । तए णं सा रेवई देवी तंसि तारिसगंसि सयणिज्जंसि  
 सुमिणदंसणं जाव उप्पि पासायवरगए विहरइ । तं एवं खलु वरदत्ता ! निसडेणं कुमा-  
 रेणं अयमेयारूवा उराला मणुयइह्वी लद्धा ३ ॥ १७४ ॥ पभू णं भन्ते ! निसडे  
 कुमारे देवाणुप्पियाणं अन्तिए जाव पव्वइत्तए ? हन्ता ! पभू । से एवं भन्ते ! २  
 इय वरदत्ते अणगारे जाव अप्पाणं भावेमाणे विहरइ । तए णं अरहा अरिद्ध-  
 नेमी अन्नया कयाइ बारवईओ नयरीओ जाव बहिया जणवयविहारं विहरइ ।  
 निसडे कुमारे समणोवासए जाए अभिगयजीवाजीवे जाव विहरइ ॥ १७५ ॥  
 तए णं से निसडे कुमारे अन्नया कयाइ जेणेव पोसहसाला तेणेव उवागच्छइ २ ता  
 जाव दम्भसंथारोवगए विहरइ । तए णं तस्स निसदस्स कुमारस्स पुव्वरत्तावरत्त-  
 कालसमयंसि धम्मजागरियं जागरमाणस्स इमेयारूवे अज्झत्थिए जाव समुप्प-  
 जित्था—धच्चा णं ते गामागर जाव संनिवेसा जत्थ णं अरहा अरिद्धनेमी विहरइ,  
 धच्चा णं ते राईसर जाव सत्थवाहप्पमिइओ जे णं अरिद्धनेमिं वन्दन्ति नमंसन्ति  
 जाव पज्जुवासन्ति, जइ णं अरहा अरिद्धनेमी पुव्वाणुपुब्बि...नन्दणवणे विहरेज्जा  
 तो णं अहं अरहं अरिद्धनेमिं वन्दिज्जा जाव पज्जुवासिज्जा ॥ १७६ ॥ तए णं अरहा

अरिट्टनेमी निसडस्स कुमारस्स अयमेयाख्वमज्झत्थियं जाव वियाणित्ता अट्टारसहिं समणसहस्सेहिं जाव नन्दणवणे उज्जाणे समोसडे । परिसा निग्गया । तए णं निसडे कुमारे इमीसे कहाए लद्धे समणे हट्ठ० चाउग्घण्टेणं आसरहेणं निग्गए जहा जमाली जाव अम्मापियरो आपु च्छित्ता पव्वइए अणगारे जाए जाव गुत्तवम्भयारी ॥ १७७ ॥ तए णं से निसडे अणगारे अरहओ अरिट्टनेमिस्स तहाख्वाणं थेराणं अन्तिए सामाइयमाइयाइं एक्कारस अज्जाइं अहिज्जइ २ ता बहूहिं चउत्थल्लट्ठ जाव विचित्तेहिं तवोकम्मेहिं अप्पाणं भावेमाणे बहुपडिपुण्णाइं नव वासाइं सामण्णपरियागं पाउणइ २ ता बायालीसं भत्ताइं अणसणाए छेएइ, आलोइयपडिक्कन्ते समाहिपत्ते आणुपुव्वीए कालगए ॥ १७८ ॥ तए णं से वरदत्ते अणगारे निसडं अणगारं कालगयं जाणित्ता जेणेव अरहा अरिट्टनेमी तेणेव उवागच्छइ २ ता जाव एवं वयासी—एवं खलु देवाणु-प्पियाणं अन्तेवासी निसडे नामं अणगारे पगइभइए जाव विणीए, से णं भन्ते ! निसडे अणगारे कालमासे कालं किच्चा कहिं गए कहिं उववन्ने ? ॥ १७९ ॥ वरदत्ताइ अरहा अरिट्टनेमी वरदत्तं अणगारं एवं वयासी—एवं खलु वरदत्ता ! ममं अन्ते-वासी निसडे नामं अणगारे पगइभइ जाव विणीए ममं तहाख्वाणं थेराणं अन्तिए सामाइयमाइयाइं एक्कारस अज्जाइं अहिज्जित्ता बहुपडिपुण्णाइं नव वासाइं सामण्णपरि-यागं पाउणित्ता बायालीसं भत्ताइं अणसणाए छेइत्ता आलोइयपडिक्कन्ते समाहिपत्ते कालमासे कालं किच्चा उट्ठं चन्दिमसूरियगहगणणक्खत्तताराख्वाणं सोहम्मीसाणं जाव अञ्चए तिण्णि य अट्टारसुत्तरे गेविज्जविमाणवाससए वीइवइत्ता सव्वट्ठसिद्धविमाणे देवत्ताए उववन्ने, तत्थ णं देवाणं तेत्तीसं सागरोवमाइं ठिई पव्वत्ता, तत्थ णं निसडस्सवि देवस्स तेत्तीसं सागरोवमाइं ठिई पण्णत्ता ॥ १८० ॥ से णं भन्ते ! निसडे देवे ताओ देवलोगाओ आउक्खएणं भवक्खएणं ठिइक्खएणं अणन्तरं चयं चइत्ता कहिं गच्छिहिइ, कहिं उववज्जिहिइ ? वरदत्ता ! इहेव जम्बुदीवे रीवे महाविदेहे वासे उज्जाए नयरे विसुद्धपिइवंसे रायकुले पुत्तत्ताए पच्चायाहिइ । तए णं से उम्मुक्कवाल-भावे विन्नयपरिणयमेत्ते जोव्वणगमणुप्पत्ते तहाख्वाणं थेराणं अन्तिए केवलबोहिं बुज्झिहिइ २ ता अगाराओ अणगारियं पव्वज्जिहिइ । से णं तत्थ अणगारे भविस्सइ इरियासमिए जाव गुत्तवम्भयारी । से णं तत्थ बहूहिं चउत्थल्लट्ठमदसमदुवाल्सेहिं मासद्धमासखमणेहिं विचित्तेहिं तवोकम्मेहिं अप्पाणं भावेमाणे बहूइं वासाइं सामण्ण-परियागं पाउणिस्सइ २ ता मासियाए संलेहणाए अत्ताणं झूसिहिइ २ ता सट्ठिं भत्ताइं अणसणाए छेइहिइ, जस्सट्ठाए कीरइ थेरकप्पभावे जिणकप्पभावे मुण्डभावे अण्हाणाए जाव अदन्तवणए अच्छत्ताए अणोवाहणए फलहसेज्जा कट्ठसेज्जा केसलोए बम्भचेर-

वासे परघरपवेसे पिण्डवाओ लद्धावलद्धे उच्चावथा य गामकण्टगा अहियासिज्जन्ति  
तमट्ठं आराहेइ २ ता चरिमेहिं उस्सासनिस्सासेहिं सिज्झिहिइ बुज्झिहिइ जाव सब्ब-  
दुक्खाणं अन्तं काहिइ । निक्खेवओ ॥ १८१ ॥ पढमं अज्झयणं समत्तं ॥ ५।१ ॥

एवं सेसावि एकारस अज्झयणा नेयव्वा संगहणीअणुसारेण अहीणमइरित्तं  
एकारससुवि तिवेमि ॥ १८२ ॥ ५ । १२ ॥ वणिहदसाओ समत्ताओ ॥  
पञ्चमो वग्गो समत्तो ॥ ५ ॥ निरयावलियाइसुयक्खन्धो समत्तो ॥  
समत्ताणि उवङ्गाणि ॥

निरियावलियाइउवङ्गाणं एगो सुयक्खन्धो, पञ्च वग्गा, पञ्चसु दिवसेसु उद्दि-  
स्सन्ति, तत्थ चउसु वग्गेषु दस दस उद्देसगा, पञ्चमवग्गे वारस उद्देसगा ॥

॥ निरयावलियाइसुत्ताइं समत्ताइं ॥

तेसिं समत्तीए

**वारस उवंगाइं समत्ताइं**

॥ सब्बसिलोगसंखा २५००० ॥



णमोऽस्तु णं समणस्स भगवओ णायपुत्तमहावीरस्स

# सुत्तागमे

चउछेयसुत्ताइं

तत्थ णं

ववहारो

पढमो उद्देसओ

जे भिक्खू मासियं परिहारट्ठाणं पडिसेवित्ता आलोएज्जा, अपलिउंचिय आलोए-  
माणस्स मासियं, पलिउंचिय आलोएमाणस्स दोमासियं ॥ १ ॥ जे भिक्खू दोमासियं  
परिहारट्ठाणं पडिसेवित्ता आलोएज्जा, अपलिउंचिय आलोएमाणस्स दोमासियं,  
पलिउंचिय आलोएमाणस्स तेमासियं ॥ २ ॥ जे भिक्खू तेमासियं परिहारट्ठाणं  
पडिसेवित्ता आलोएज्जा, अपलिउंचिय आलोएमाणस्स तेमासियं, पलिउंचिय आलोए-  
माणस्स चाउम्मासियं ॥ ३ ॥ जे भिक्खू चाउम्मासियं परिहारट्ठाणं पडिसेवित्ता  
आलोएज्जा, अपलिउंचिय आलोएमाणस्स चाउम्मासियं, पलिउंचिय आलोएमाणस्स  
पंचमासियं ॥ ४ ॥ जे भिक्खू पंचमासियं परिहारट्ठाणं पडिसेवित्ता आलोएज्जा,  
अपलिउंचिय आलोएमाणस्स पंचमासियं, पलिउंचिय आलोएमाणस्स छम्मासियं  
॥ ५ ॥ तेण परं पलिउंचिए वा अपलिउंचिए वा ते चेव छम्मासा ॥ ६ ॥ जे  
भिक्खू बहुसो वि मासियं परिहारट्ठाणं पडिसेवित्ता आलोएज्जा, अपलिउंचिय आलोए-  
माणस्स मासियं, पलिउंचिय आलोएमाणस्स दोमासियं ॥ ७ ॥ जे भिक्खू बहुसो  
वि दोमासियं परिहारट्ठाणं पडिसेवित्ता आलोएज्जा, अपलिउंचिय आलोएमाणस्स  
दोमासियं, पलिउंचिय आलोएमाणस्स तेमासियं ॥ ८ ॥ जे भिक्खू बहुसो वि  
तेमासियं परिहारट्ठाणं पडिसेवित्ता आलोएज्जा, अपलिउंचिय आलोएमाणस्स तेमा-  
सियं, पलिउंचिय आलोएमाणस्स चाउम्मासियं ॥ ९ ॥ जे भिक्खू बहुसो वि  
चाउम्मासियं परिहारट्ठाणं पडिसेवित्ता आलोएज्जा, अपलिउंचिय आलोएमाणस्स  
चाउम्मासियं, पलिउंचिय आलोएमाणस्स पंचमासियं ॥ १० ॥ जे भिक्खू बहुसो  
वि पंचमासियं परिहारट्ठाणं पडिसेवित्ता आलोएज्जा, अपलिउंचिय आलोएमाणस्स  
पंचमासियं, पलिउंचिय आलोएमाणस्स छम्मासियं ॥ ११ ॥ तेण परं पलिउंचिए



વા અપલિંચિએ વા તે ચેવ છમ્માસા ॥ ૧૨ ॥ જે ભિક્ખૂ માસિયં વા દોમાસિયં વા તેમાસિયં વા ચાઉમ્માસિયં વા પંચમાસિયં વા એસિં પરિહારદ્વાણાં અણ્ણયરં પરિહારદ્વાણં પહિસેવિત્તા આલોએજ્ઞા, અપલિંચિય આલોએમાણસ્સ માસિયં વા દોમાસિયં વા તેમાસિયં વા ચાઉમ્માસિયં વા પંચમાસિયં વા, પલિંચિય આલોએમાણસ્સ દોમાસિયં વા તેમાસિયં વા ચાઉમ્માસિયં વા પંચમાસિયં વા છમ્માસિયં વા, તેણ પરં પલિંચિએ વા અપલિંચિએ વા તે ચેવ છમ્માસા ॥ ૧૩ ॥ જે ભિક્ખૂ बहुसो वि मासियं वा बहुसो वि दोमासियं वा बहुसो वि तेमासियं वा बहुसो वि चाउममासियं वा बहुसो वि पंचमासियं वा एसिं परिहारद्वानाणं अण्णयरं परिहारद्वानं पडिसेवित्ता आलोएज्जा, अपलिंचिय आलोएमाणस्स मासियं वा दोमासियं वा तेमासियं वा चाउममासियं वा पंचमासियं वा, પલિંચિય આલોએમાણસ્સ દોમાસિયં વા તેમાસિયં વા ચાઉમ્માસિયં વા પંચમાસિયં વા છમ્માસિયં વા, તેણ પરં પલિંચિએ વા અપલિંચિએ વા તે ચેવ છમ્માસા ॥ ૧૪ ॥ જે ભિક્ખૂ ચાઉમ્માસિયં વા સાહરેગચાઉમ્માસિયં વા પંચમાસિયં વા સાહરેગપંચમાસિયં વા એસિં પરિહારદ્વાણાં અણ્ણયરં પરિહારદ્વાણં પહિસેવિત્તા આલોએજ્ઞા, અપલિંચિય આલોએમાણસ્સ ચાઉમ્માસિયં વા સાહરેગચાઉમ્માસિયં વા પંચમાસિયં વા સાહરેગપંચમાસિયં વા, પલિંચિય આલોએમાણસ્સ પંચમાસિયં વા સાહરેગપંચમાસિયં વા છમ્માસિયં વા, તેણ પરં પલિંચિએ વા અપલિંચિએ વા તે ચેવ છમ્માસા ॥ ૧૫ ॥ જે ભિક્ખૂ बहुसो वि चाउममासियं वा बहुसो वि साइरेगचाउममासियं वा बहुसो वि पंचमासियं वा बहुसो वि साइरेगपंचमासियं वा एसिं परिहारद्वानाणं अण्णयरं परिहारद्वानं पडिसेवित्ता आलोएज्जा, અપલિંચિય આલોએમાણસ્સ ચાઉમ્માસિયં વા સાહરેગચાઉમ્માસિયં વા પંચમાસિયં વા સાહરેગપંચમાસિયં વા, પલિંચિય આલોએમાણસ્સ પંચમાસિયં વા સાહરેગપંચમાસિયં વા છમ્માસિયં વા, તેણ પરં પલિંચિએ વા અપલિંચિએ વા તે ચેવ છમ્માસા ॥ ૧૬ ॥ જે ભિક્ખૂ ચાઉમ્માસિયં વા સાહરેગચાઉમ્માસિયં વા પંચમાસિયં વા સાહરેગપંચમાસિયં વા એસિં પરિહારદ્વાણાં અણ્ણયરં પરિહારદ્વાણં પહિસેવિત્તા આલોએજ્ઞા, અપલિંચિય આલોએમાણે ઠવગિજ્ઞં ઠવહિત્તા કરગિજ્ઞં વેયાવહિયં, ઠવિએ વિ પહિસેવિત્તા સે વિ કસિણે તત્થેવ આરુહેયવ્વે સિયા, પુલ્લિં પહિસેવિયં પુલ્લિં આલોહિયં, પુલ્લિં પહિસેવિયં પચ્છા આલોહિયં, પચ્છા પહિસેવિયં પુલ્લિં આલોહિયં, પચ્છા પહિસેવિયં પચ્છા આલોહિયં, અપલિંચિએ અપલિંચિયં, અપલિંચિએ પલિંચિયં, પલિંચિએ અપલિંચિયં, પલિંચિએ પલિંચિયં, અપલિંચિએ અપલિંચિયં આલોએમાણસ્સ સવ્વમેયં સકયં સાહણિય જે યયાએ પટ્ટવણાએ

पट्टविण् निव्विसमाणे पडिसेवेइ से वि कसिणे तत्थेव आरुहेयव्वे सिया ॥ १७ ॥ जे भिक्खू चाउम्मासियं वा साइरेगचाउम्मासियं वा पंचमासियं वा साइरेगपंचमासियं वा एएसिं परिहारट्टाणाणं अण्णयरं परिहारट्टाणं पडिसेवित्ता आलोएज्जा, पलिउंचिय आलोएमाणे ठवणिज्जं ठवइत्ता करणिज्जं वेयावडियं, ठविण् वि पडिसेवित्ता से वि कसिणे तत्थेव आरुहेयव्वे सिया, पुव्वि पडिसेवियं पुव्वि आलोइयं, पुव्वि पडिसेवियं पच्छा आलोइयं, पच्छा पडिसेवियं पुव्वि आलोइयं, पच्छा पडिसेवियं पच्छा आलोइयं, अपलिउंचिए अपलिउंचियं, अपलिउंचिए पलिउंचियं, पलिउंचिए अपलिउंचियं, पलिउंचिए पलिउंचियं, पलिउंचिए पलिउंचियं आलोएमाणस्स सव्वमेयं सकयं साहणिय जे एयाए पट्टवणाए पट्टविण् निव्विसमाणे पडिसेवेइ से वि कसिणे तत्थेव आरुहेयव्वे सिया ॥ १८ ॥ जे भिक्खू बहुसो वि चाउम्मासियं वा बहुसो वि साइरेगचाउम्मासियं वा बहुसो वि पंचमासियं वा बहुसो वि साइरेगपंचमासियं वा एएसिं परिहारट्टाणाणं अण्णयरं परिहारट्टाणं पडिसेवित्ता आलोएज्जा, अपलिउंचिय आलोएमाणे ठवणिज्जं ठवइत्ता करणिज्जं वेयावडियं, ठविण् वि पडिसेवित्ता से वि कसिणे तत्थेव आरुहेयव्वे सिया, पुव्वि पडिसेवियं पुव्वि आलोइयं, पुव्वि पडिसेवियं पच्छा आलोइयं, पच्छा पडिसेवियं पुव्वि आलोइयं, पच्छा पडिसेवियं पच्छा आलोइयं, अपलिउंचिए अपलिउंचियं, अपलिउंचिए पलिउंचियं, पलिउंचिए अपलिउंचियं, पलिउंचिए पलिउंचियं आलोएमाणस्स सव्वमेयं सकयं साहणिय जे एयाए पट्टवणाए पट्टविण् निव्विसमाणे पडिसेवेइ से वि कसिणे तत्थेव आरुहेयव्वे सिया ॥ १९ ॥ जे भिक्खू बहुसो वि चाउम्मासियं वा बहुसो वि साइरेगचाउम्मासियं वा बहुसो वि पंचमासियं वा बहुसो वि साइरेगपंचमासियं वा एएसिं परिहारट्टाणाणं अण्णयरं परिहारट्टाणं पडिसेवित्ता आलोएज्जा, पलिउंचिय आलोएमाणे ठवणिज्जं ठवइत्ता करणिज्जं वेयावडियं, ठविण् वि पडिसेवित्ता से वि कसिणे तत्थेव आरुहेयव्वे सिया, पुव्वि पडिसेवियं पुव्वि आलोइयं, पुव्वि पडिसेवियं पच्छा आलोइयं, पच्छा पडिसेवियं पुव्वि आलोइयं, पच्छा पडिसेवियं पच्छा आलोइयं, अपलिउंचिए अपलिउंचियं, अपलिउंचिए पलिउंचियं, पलिउंचिए अपलिउंचियं, पलिउंचिए पलिउंचियं आलोएमाणस्स सव्वमेयं सकयं साहणिय जे एयाए पट्टवणाए पट्टविण् निव्विसमाणे पडिसेवेइ से वि कसिणे तत्थेव आरुहेयव्वे सिया ॥ २० ॥ बहवे पारिहारिया बहवे अपारिहारिया इच्छेज्जा एगयओ अभिनिसेज्जं वा अभिनि-सीहियं वा चेएत्तए, नो ण्हं कप्पइ थेरे अणापुच्छित्ता एगयओ अभिनिसेज्जं वा अभिनिसीहियं वा चेएत्तए, कप्पइ ण्हं थेरे आपुच्छित्ता एगयओ अभिनिसेज्जं वा

अभिनिसीहियं वा चेएत्तए, थेरा य ण्हं से वियरेज्जा एव ण्हं कप्पइ एगयओ अभिनिसेज्जं वा अभिनिसीहियं वा चेएत्तए, थेरा य ण्हं से नो वियरेज्जा एव ण्हं नो कप्पइ एगयओ अभिनिसेज्जं वा अभिनिसीहियं वा चेएत्तए, जो णं थेरेहिं अविइण्णे अभिनिसेज्जं वा अभिनिसीहियं वा चेएइ, से संतरा छेए वा परिहारे वा ॥ २१ ॥ परिहारकप्पट्टिए भिक्खू बहिया थेराणं वेयावडियाए गच्छेज्जा, थेरा य से सरेज्जा, कप्पइ से एगराइयाए पडिमाए जण्णं २ दिसं अण्णे साहम्मिया विहरंति तण्णं २ दिसं उवलित्तए, नो से कप्पइ तत्थ विहारवत्तिं वत्थए, कप्पइ से तत्थ कारणवत्तिं वत्थए, तंसि च णं कारणंसि निट्ठियंसि परो वएज्जा-वसाहि अज्जो ! एगरायं वा दुरायं वा, एवं से कप्पइ एगरायं वा दुरायं वा वत्थए, नो से कप्पइ परं एगरायाओ वा दुरायाओ वा वत्थए, जं तत्थ परं एगरायाओ वा दुरायाओ वा वसइ से संतरा छेए वा परिहारे वा ॥ २२ ॥ परिहारकप्पट्टिए भिक्खू बहिया थेराणं वेयावडियाए गच्छेज्जा, थेरा य नो सरेज्जा, कप्पइ से निव्विसमाणस्स एगराइयाए पडिमाए जण्णं जण्णं दिसिं अन्ने साहम्मिया विहरंति तण्णं तण्णं दिसं उवलित्तए, नो से कप्पइ तत्थ विहारवत्तिं वत्थए, कप्पइ से तत्थ कारणवत्तिं वत्थए, तंसि च णं कारणंसि निट्ठियंसि परो वएज्जा-वसाहि अज्जो ! एगरायं वा दुरायं वा, एवं से कप्पइ एगरायं वा दुरायं वा वत्थए, नो से कप्पइ परं एगरायाओ वा दुरायाओ वा वत्थए, जं तत्थ परं एगरायाओ वा दुरायाओ वा वसइ, से संतरा छेए वा परिहारे वा ॥ २३ ॥ परिहारकप्पट्टिए भिक्खू बहिया थेराणं वेयावडियाए गच्छेज्जा, थेरा य से सरेज्जा वा नो सरेज्जा, कप्पइ से निव्विसमाणस्स एगराइयाए पडिमाए जण्णं जण्णं दिसं अन्ने साहम्मिया विहरंति तण्णं तण्णं दिसं उवलित्तए, नो से कप्पइ तत्थ विहारवत्तिं वत्थए, कप्पइ से तत्थ कारणवत्तिं वत्थए, तंसि च णं कारणंसि निट्ठियंसि परो वएज्जा-वसाहि अज्जो ! एगरायं वा दुरायं वा, एवं से कप्पइ एगरायं वा दुरायं वा वत्थए, नो से कप्पइ परं एगरायाओ वा दुरायाओ वा वत्थए, जं तत्थ परं एगरायाओ वा दुरायाओ वा वसइ, से संतरा छेए वा परिहारे वा ॥ २४ ॥ जे भिक्खू य गणाओ अवक्कम्म एगल्लविहारपडिमं उवसंपज्जित्ताणं विहरेज्जा से य नो संथरेज्जा से य इच्छेज्जा दोच्चं पि तमेव गणं उवसंपज्जित्ताणं विहरित्तए, पुणो आलोएज्जा पुणो पडिक्कमेज्जा पुणो छेयपरिहारस्स उवट्ठाएज्जा ॥ २५ ॥ गणावच्छेइए य गणाओ अवक्कम्म एगल्लविहारपडिमं उवसंपज्जित्ताणं विहरेज्जा से य नो संथरेज्जा से य इच्छेज्जा दोच्चं पि तमेव गणं उवसंपज्जित्ताणं विहरित्तए, पुणो आलोएज्जा पुणो

पडिक्केम्मेजा पुणो छेयपरिहारस्स उवट्ठाएज्जा ॥ २६ ॥ एवं आयरियउवज्झाए य गणाओ अवक्कम्म एगल्लविहारपडिमं उवसंपज्जित्ताणं विहरेज्जा, से य इच्छेज्जा दोच्चं पि तमेव गणं उवसंपज्जित्ताणं विहरित्तए, पुणो आलोएज्जा पुणो पडिक्केम्मेजा पुणो छेयपरिहारस्स उवट्ठाएज्जा ॥ २७ ॥ भिक्खू य गणाओ अवक्कम्म पासत्थविहारं उवसंपज्जित्ताणं विहरेज्जा, से य इच्छेज्जा दोच्चं पि तमेव गणं उवसंपज्जित्ताणं विहरित्तए, अत्थि याइं थ सेसे, पुणो आलोएज्जा पुणो पडिक्केम्मेजा पुणो छेयपरिहारस्स उवट्ठाएज्जा ॥ २८ ॥ भिक्खू य गणाओ अवक्कम्म अहाछंदविहारं उवसंपज्जित्ताणं विहरेज्जा, से य इच्छेज्जा दोच्चं पि तमेव गणं उवसंपज्जित्ताणं विहरित्तए, अत्थि याइं थ सेसे, पुणो आलोएज्जा पुणो पडिक्केम्मेजा पुणो छेयपरिहारस्स उवट्ठाएज्जा ॥ २९ ॥ भिक्खू य गणाओ अवक्कम्म कुसीलविहारं उवसंपज्जित्ताणं विहरेज्जा, से य इच्छेज्जा दोच्चं पि तमेव गणं उवसंपज्जित्ताणं विहरित्तए, अत्थि याइं थ सेसे, पुणो आलोएज्जा पुणो पडिक्केम्मेजा पुणो छेयपरिहारस्स उवट्ठाएज्जा ॥ ३० ॥ भिक्खू य गणाओ अवक्कम्म ओसण्णविहारं उवसंपज्जित्ताणं विहरेज्जा, से य इच्छेज्जा दोच्चं पि तमेव गणं उवसंपज्जित्ताणं विहरित्तए, अत्थि याइं थ सेसे, पुणो आलोएज्जा पुणो पडिक्केम्मेजा पुणो छेयपरिहारस्स उवट्ठाएज्जा ॥ ३१ ॥ भिक्खू य गणाओ अवक्कम्म संसत्तविहारं उवसंपज्जित्ताणं विहरेज्जा, से य इच्छेज्जा दोच्चं पि तमेव गणं उवसंपज्जित्ताणं विहरित्तए, अत्थि याइं थ सेसे, पुणो आलोएज्जा पुणो पडिक्केम्मेजा पुणो छेयपरिहारस्स उवट्ठाएज्जा ॥ ३२-१ ॥ भिक्खू य गणाओ अवक्कम्म परपासंडं उवसंपज्जित्ताणं विहरेज्जा, से य इच्छेज्जा दोच्चं पि तमेव गणं उवसंपज्जित्ताणं विहरित्तए, नत्थि णं तस्स तप्पत्तियं केइ छेए वा परिहारे वा णणत्थ एगाए आलोयणाए ॥ ३२-२ ॥ भिक्खू य गणाओ अवक्कम्म ओहावेज्जा, से य इच्छेज्जा दोच्चं पि तमेव गणं उवसंपज्जित्ताणं विहरित्तए, नत्थि णं तस्स केइ छेए वा परिहारे वा णणत्थ एगाए सेहोवट्ठावणियाए ॥ ३३ ॥ भिक्खू य अण्णयंरं अक्किच्चट्ठाणं (पडि)सेविता इच्छेज्जा आलोएत्तए, जत्थेव अप्पणो आयरियउवज्झाए पासेज्जा, तेसंतियं आलोएज्जा पडिक्केम्मेजा निंदेज्जा गरहेज्जा विउट्ठेज्जा विसोहेज्जा अकरणयाए अब्भुट्ठेज्जा अहारिहं तवोक्कम्मं पायच्छित्तं पडिवजेज्जा ॥ ३४ ॥ नो चेव अप्पणो आयरियउवज्झाए पासेज्जा, जत्थेव संभोइयं साहम्मियं पासेज्जा बहुस्सुयं

१ फुडीकरणमेयस्स विवाहपण्णत्तिपणवीसइमसयणियंठवत्तव्वया-ठाणचउभंगीओ तह इमस्स चेव ववहारस्स दसमुहेसाओ णायव्वं । २ पाढंतंरं-कप्पइ से तस्संतियं आलोइत्तए वा पडिक्कमित्तए वा जाव पडिवज्जित्तए ।

बब्भागमं, तस्संतियं आलोएज्जा जाव पडिवजेज्जा ॥ ३५ ॥ नो चेव णं संभोइयं साहम्मियं... जत्थेव अन्नसंभोइयं साहम्मियं पासेज्जा बहुस्सुयं बब्भागमं, तस्संतियं आलोएज्जा जाव पडिवजेज्जा ॥ ३६ ॥ नो चेव णं अन्नसंभोइयं... जत्थेव सारुवियं पासेज्जा बहुस्सुयं बब्भागमं, तस्संतियं आलोएज्जा जाव पडिवजेज्जा ॥ ३७-१ ॥ नो चेव णं सारुवियं पासेज्जा बहुस्सुयं बब्भागमं, जत्थेव समणोवासणं पच्छाकडं पासेज्जा बहुस्सुयं बब्भागमं, कप्पइ से तस्संतिए आलोएत्तए वा पडिक्कमेत्तए वा जाव पायच्छित्तं पडिवजेत्तए वा ॥ ३७-२ ॥ नो चेव णं समणोवासणं पच्छाकडं पासेज्जा बहुस्सुयं बब्भागमं, जत्थेव समभावियं णाणि<sup>१</sup> पासेज्जा, कप्पइ से तस्संतिए आलोएत्तए वा पडिक्कमेत्तए वा जाव पायच्छित्तं पडिवजेत्तए वा ॥ ३८ ॥ नो चेव समभावियं णाणि पासेज्जा, बहिया गामस्स वा नगरस्स वा निगमस्स वा रायहाणीए वा खेडस्स वा कब्बडस्स वा मडंवस्स वा पट्टणस्स वा दोणमुहस्स वा आसमस्स वा संवाहस्स वा संनिवेसस्स वा पाईणाभिमुहे वा उदीणाभिमुहे वा करयलपरिग-  
हियं सिरसावतं मत्थए अंजलिं कट्ठु एवं वएज्जा—एवइया मे अवरहा, एवइक्खुत्तो अहं अवरद्धो । अरहंताणं सिद्धाणं अंतिए आलोएज्जा जाव पडिवजेज्जासि ॥ ३९ ॥  
त्ति-वेमि ॥ ववहारस्स पढमो उद्देसओ समत्तो ॥ १ ॥

### ववहारस्स विइओ उद्देसओ

दो साहम्मिया एगयओ विहरंति, एगे तत्थ अण्णयरं अकिच्चट्ठाणं पडिसेवेत्ता आलोएज्जा, ठवणिज्जं ठवइत्ता करणिज्जं वेयावडियं ॥ ४० ॥ दो साहम्मिया एगयओ विहरंति, दो वि ते अण्णयरं अकिच्चट्ठाणं पडिसेवेत्ता आलोएज्जा, एगं तत्थ कप्पाणं ठवइत्ता एगे निव्विसेज्जा, अह पच्छा से वि निव्विसेज्जा ॥ ४१ ॥ बहवे साहम्मिया एगयओ विहरंति, एगे तत्थ अण्णयरं अकिच्चट्ठाणं पडिसेवेत्ता आलोएज्जा, ठवणिज्जं ठवइत्ता करणिज्जं वेयावडियं ॥ ४२ ॥ बहवे साहम्मिया एगयओ विहरंति, सव्वे वि ते अण्णयरं अकिच्चट्ठाणं पडिसेवेत्ता आलोएज्जा, एगं तत्थ कप्पाणं ठवइत्ता अवसेसा निव्विसेज्जा, अह पच्छा से वि निव्विसेज्जा ॥ ४३ ॥ परिहार-  
कप्पट्टिए भिक्खू गिलायमाणे अण्णयरं अकिच्चट्ठाणं पडिसेवेत्ता आलोएज्जा, से य संथेरज्जा ठवणिज्जं ठवइत्ता करणिज्जं वेयावडियं ॥ ४४ ॥ से य नो संथेरज्जा अणु-  
परिहारिएणं करणिज्जं वेयावडियं, से तं अणुपरिहारिएणं कीरमाणं वेयावडियं साइ-  
जेज्जा, से वि कसिणे तत्थेव आरुहेयव्वे सिया ॥ ४५ ॥ परिहारकप्पट्टियं भिक्खुं गिलायमाणं नो कप्पइ तस्स गणावच्छेइयस्स निज्जुहित्तए, अगिलाए तस्स

[illegible]

करणिजं वेयावडियं जाव तओ रोगायंकाओ विप्पमुक्को, तओ पच्छा तस्स अहा-  
लहुसए नामं ववहारे पट्टवियव्वे सिया ॥ ५७ ॥ अणवट्ठप्पं भिक्खुं अगिहिभूयं नो  
कप्पइ तस्स गणावच्छेइयस्स उवट्ठावेत्तए ॥ ५८ ॥ अणवट्ठप्पं भिक्खुं गिहिभूयं  
कप्पइ तस्स गणावच्छेइयस्स उवट्ठावेत्तए ॥ ५९ ॥ पारंचियं भिक्खुं अगिहिभूयं  
नो कप्पइ तस्स गणावच्छेइयस्स उवट्ठावेत्तए ॥ ६० ॥ पारंचियं भिक्खुं गिहिभूयं  
कप्पइ तस्स गणावच्छेइयस्स उवट्ठावेत्तए ॥ ६१ ॥ अणवट्ठप्पं भिक्खुं अगिहिभूयं  
वा गिहिभूयं वा कप्पइ तस्स गणावच्छेइयस्स उवट्ठावेत्तए, जहा तस्स गणस्स पत्तियं  
सिया ॥ ६२ ॥ पारंचियं भिक्खुं अगिहिभूयं वा गिहिभूयं वा कप्पइ तस्स गणावच्छे-  
इयस्स उवट्ठावेत्तए, जहा तस्स गणस्स पत्तियं सिया ॥ ६३ ॥ दो साहम्मिया एगओ  
विहरंति, एगे तत्थ अण्णयरं अक्किच्चट्ठाणं पडिसेविता आलोएज्जा-अहं णं भंते !  
अमुगेणं साहुणा सद्धिं इमम्मि कारणम्मि पडिसेवी, से य पुच्छियव्वे, किं पडिसेवी ?  
से य वएज्जा-पडिसेवी, परिहारपत्ते, से य वएज्जा-नो पडिसेवी, नो परिहारपत्ते, जं  
से पमाणं वयइ से पमाणाओ घेयव्वे, से किमाहु भंते (!) ? सच्चपइशा ववहारा ॥ ६४ ॥  
भिक्खू य गणाओ अवक्कम्म ओहाणुप्पे(हि)एही वज्जे(गच्छे)ज्जा, से य (आहच्च)  
अणोहाइए इच्छेज्जा दोच्चं पि तमेव गणं उवसंपज्जित्ताणं विहरित्तए, तत्थ णं थेराणं  
इमेयारूवे विवाए ससुप्पज्जित्था-इमं भो ! जाणह किं पडिसेवी ? से य पुच्छियव्वे,  
किं पडिसेवी ? से य वएज्जा-पडिसेवी, परिहारपत्ते, से य वएज्जा-नो पडिसेवी,  
नो परिहारपत्ते, जं से पमाणं वयइ से पमाणाओ घेयव्वे, से किमाहु भंते ? सच्च-  
पइशा ववहारा ॥ ६५ ॥ एगपक्खियस्स भिक्खुस्स कप्पइ आयरियउवज्जायाणं  
इत्तरियं दिसं वा अणुदिसं वा उद्दिसित्तए वा धारेत्तए वा, जहा वा तस्स गणस्स  
पत्तियं सिया ॥ ६६ ॥ बहवे परिहारिया बहवे अपरिहारिया इच्छेज्जा एगयओ  
एगमासं वा दुमासं वा तिमासं वा चउमासं वा पंचमासं वा छम्मासं वा वत्थए,  
ते अण्णमण्णं संभुंजंति अण्णमण्णं नो संभुंजंति (एग) मासं(…मासंते), तओ पच्छा  
सव्वे वि एगयओ संभुंजंति ॥ ६७ ॥ परिहारकप्पट्टियस्स भिक्खुस्स नो कप्पइ  
असणं वा पाणं वा खाइमं वा साइमं वा दाउं वा अणुप्पदाउं वा, थेरा य णं  
वएज्जा-इमं ता अज्जो ! तुमं एएसिं देहि वा अणुप्पएहि वा, एवं से कप्पइ दाउं  
वा अणुप्पदाउं वा, कप्पइ से लेवं अणुजाणावेत्तए, अणुजाणह तं लेवाए ? एवं से  
कप्पइ लेवं अणुजाणावेत्तए ॥ ६८ ॥ परिहारकप्पट्टिए भिक्खू सएणं पडिग्गहेणं  
बहिया थेराणं वेयावडियाए गच्छेज्जा, थेरा य णं वएज्जा-पडिग्गहे(हि) अज्जो !  
अहं पि भोक्खामि वा पाहामि वा, एवं से कप्पइ पडिग्गहेत्तए, तत्थ नो कप्पइ

अपरिहारिएणं परिहारियस्स पडिग्गहंसि असणं वा पाणं वा खाइमं वा साइमं वा भोत्तए वा पायए वा, कप्पइ से सयंसि वा पडिग्गहंसि पाणिसि वा उद्धट्ठु उद्धट्ठु भोत्तए वा पायए वा, एस कप्पो अपरिहारियस्स परिहारियाओ ॥ ६९ ॥ परिहार-  
कप्पट्ठिए भिक्खू थेराणं पडिग्गहएणं बहिया थेराणं वेयावडियाए गच्छेज्जा, थेरा  
य णं वएज्जा-पडिग्गाहे अज्जो ! तुमं पि पच्छा भोक्खसि वा पाहिसि वा, एवं से  
कप्पइ पडिग्गाहित्तए, तत्थ नो कप्पइ परिहारिएणं अपरिहारियस्स पडिग्गहंसि  
असणं वा पाणं वा खाइमं वा साइमं वा भोत्तए वा पायए वा, कप्पइ से सयंसि  
वा पडिग्गहंसि पाणिसि वा उद्धट्ठु उद्धट्ठु भोत्तए वा पायए वा, एस[लेस] कप्पो  
परिहारियस्स अपरिहारियाओ ॥ ७० ॥ ति-वेमि ॥ ववहारस्स विइओ  
उहेसओ समत्तो ॥ २ ॥

### ववहारस्स तइओ उहेसओ

भिक्खू य इच्छेज्जा गणं धारेत्तए, भगवं च से अपलिच्छ(न्ने)ए, एवं नो से कप्पइ  
गणं धारेत्तए, भगवं च से पलिच्छन्ने, एवं से कप्पइ गणं धारेत्तए ॥ ७१ ॥ भिक्खू  
य इच्छेज्जा गणं धारेत्तए, नो से कप्पइ थेरे अणापुच्छित्ता गणं धारेत्तए, कप्पइ से  
थेरे आपुच्छित्ता गणं धारेत्तए, थेरा य से वियरेज्जा, एवं से कप्पइ गणं धारेत्तए,  
थेरा य से नो वियरेज्जा, एवं से नो कप्पइ गणं धारेत्तए, जणं थेरेहिं अविइणं  
गणं धारेज्जा, से संतरा छेओ वा परिहारो वा (‘‘साहम्मिया उट्ठाए विहरंति नत्थि  
णं तेसिं केइ छेए वा परिहारे वा) ॥ ७२ ॥ तिवासपरियाए समणे णिग्गंथे आयार-  
कुसले संजमकुसले पवयणकुसले पणत्तिकुसले संगहकुसले उवग्गहकुसले अक्खयायारे  
अभिन्नायारे असबलायारे असंकिल्लिट्ठायारचि(चरि)त्ते बहुत्सुए बग्भागमे जहण्णेणं  
आयारपक्कपधरे कप्पइ उवज्झायत्ताए उद्दिसित्तए ॥ ७३ ॥ सच्चेव णं से तिवास-  
परियाए समणे णिग्गंथे नो आयारकुसले नो संजमकुसले नो पवयणकुसले नो  
पणत्तिकुसले नो संगहकुसले नो उवग्गहकुसले खयायारे भिन्नायारे सबलायारे  
संकिल्लिट्ठायारचित्ते अप्पत्तुए अप्पागमे नो कप्पइ उवज्झायत्ताए उद्दिसित्तए ॥ ७४ ॥  
पंचवासपरियाए समणे णिग्गंथे आयारकुसले संजमकुसले पवयणकुसले पणत्तिकुसले  
संगहकुसले उवग्गहकुसले अक्खयायारे अभिन्नायारे असबलायारे असंकिल्लिट्ठायार-  
चित्ते बहुत्सुए बग्भागमे जहण्णेणं द[स]साकप्पववहारधरे कप्पइ आयारियउवज्झाय-  
त्ताए उद्दिसित्तए ॥ ७५ ॥ सच्चेव णं से पंचवासपरियाए समणे णिग्गंथे नो आयारकुसले  
नो संजमकुसले नो पवयणकुसले नो पणत्तिकुसले नो संगहकुसले नो उवग्गहकुसले  
खयायारे भिन्नायारे सबलायारे संकिल्लिट्ठायारचित्ते अप्पत्तुए अप्पागमे नो कप्पइ



आयरियउवज्झायत्ताए उद्दिस्सिए ॥ ७६ ॥ अट्ठवासपरियाए समणे णिग्गंथे आचार-  
कुसले संजमकुसले पवयणकुसले पण्णत्तिकुसले संगहकुसले उवग्गहकुसले अक्खयायारे  
अभिन्नायारे असवलायारे असंकिल्लिद्धायारचित्ते बहुस्सुए वब्भभागमे जहण्णेणं ठाण-  
समवायधरे कप्पइ आयरियत्ताए जाव गणावच्छेइयत्ताए उद्दिस्सिए ॥ ७७ ॥ सच्चैव  
णं से अट्ठवासपरियाए समणे णिग्गंथे नो आचारकुसले नो संजमकुसले नो पवयण-  
कुसले नो पण्णत्तिकुसले नो संगहकुसले नो उवग्गहकुसले खयायारे भिन्नायारे सब-  
लायारे संकिल्लिद्धायारचित्ते अप्पसुए अप्पागमे नो कप्पइ आयरियत्ताए जाव गणाव-  
च्छेइयत्ताए उद्दिस्सिए ॥ ७८ ॥ निरुद्धपरियाए समणे णिग्गंथे कप्पइ तद्विवसं आय-  
रियउवज्झायत्ताए उद्दिस्सिए, से किमाहु भंते ? अत्थि णं थेराणं तहारूवाणि कुलाणि  
कडाणि पत्तियाणि थेज्जाणि वेसासियाणि संमयाणि सम्मुइकराणि अणुमयाणि बहु-  
मयाणि भवंति, तेहिं कडेहिं तेहिं पत्तिएहिं तेहिं थेजेहिं तेहिं वेसासिएहिं तेहिं  
संमएहिं तेहिं सम्मुइकरेहिं तेहिं अणुमएहिं तेहिं बहुमएहिं जं से निरुद्धपरियाए  
समणे णिग्गंथे कप्पइ आयरियउवज्झायत्ताए उद्दिस्सिए तद्विवसं ॥ ७९ ॥ निरुद्ध-  
वासपरियाए समणे णिग्गंथे कप्पइ आयरियउवज्झायत्ताए उद्दिस्सिए समुच्छेय-  
कप्पंसि, तस्स णं आचारपकप्पस्स देसे अवट्ठिए, से य अहिज्जिस्सामिति अहिजेज्जा,  
एवं से कप्पइ आयरियउवज्झायत्ताए उद्दिस्सिए, से य अहिज्जिस्सामिति नो अहिजेज्जा,  
एवं से नो कप्पइ आयरियउवज्झायत्ताए उद्दिस्सिए ॥ ८० ॥ णिग्गंथस्स णं नवड-  
हरतरुणस्स आयरियउवज्झाए वी(सुं)संभेज्जा, नो से कप्पइ अणायरियउवज्झायस्स  
होत्ताए, कप्पइ से पुवं आयरियं उद्दिस्सिवेत्ता तओ पच्छा उवज्झायं, से किमाहु भंते ?  
दुसंग्हिए समणे णिग्गंथे, तंजहा—आयरिएणं उवज्झाएण य ॥ ८१ ॥ णिग्गंथीए  
णं नवडहरतरुणीए आयरियउवज्झाए प(वि)वत्तिणी य वीसंभेज्जा, नो से कप्पइ अणा-  
यरियउवज्झाइयाए अपवत्तिणीए होत्ताए, कप्पइ से पुवं आयरियं उद्दिस्सिवेत्ता तओ  
उवज्झायं तओ पच्छा पवत्तिणि, से किमाहु भंते ? तिसंग्हिया समणी णिग्गंथी,  
तंजहा—आयरिएणं उवज्झाएणं पवत्तिणीए य ॥ ८२ ॥ भिक्खू गणाओ अणिक्खि-  
वित्ता मेहुणधम्मं पडिसेवेज्जा, जावजीवाए तस्स तप्पत्तियं नो से कप्पइ आयरियत्तं  
वा उवज्झायत्तं वा पवत्तित्तं वा थेरत्तं वा गणित्तं वा गणावच्छेइयत्तं वा उद्दिस्सिए  
वा धारित्तए वा ॥ ८३ ॥ भिक्खू य गणाओ अवक्कम्म मेहुणधम्मं पडिसेवेज्जा,  
तिणिण संवच्छराणि तस्स तप्पत्तियं नो कप्पइ आयरियत्तं वा जाव गणावच्छेइयत्तं  
वा उद्दिस्सिए वा धारेत्ताए वा, तिहिं संवच्छरेहिं वीइकंतेहिं चउत्थंगंसि संवच्छरंसि  
प(उव)ट्ठियंसि ठियस्स उवसंतस्स उवरयस्स पडिविरयस्स (णिव्विकारस्स) एवं से



संवच्छरेहिं वीइकंतेहिं चउत्थंगंसि संवच्छरंसि पट्टियंसि ठियस्स उवसंतस्स उवर-  
 यस्स पडिविरयस्स एवं से कप्पइ आयरियत्तं वा जाव गणावच्छेइयत्तं वा उद्दिसित्तए  
 वा धारेत्तए वा ॥ ९३ ॥ भिक्खू य बहुस्सुए वब्भागमे बहुसो बहुआगाढागाढेसु  
 कारणेसु माई मुसावाई असुई पावजीवी, जावजीवाए तस्स तप्पत्तियं नो कप्पइ  
 आयरियत्तं वा जाव गणावच्छेइयत्तं वा उद्दिसित्तए वा धारेत्तए वा ॥ ९४ ॥  
 गणावच्छेइए बहुस्सुए वब्भागमे बहुसो बहुआगाढागाढेसु कारणेसु माई मुसावाई  
 असुई पावजीवी, जावजीवाए तस्स तप्पत्तियं नो कप्पइ आयरियत्तं वा जाव गणा-  
 वच्छेइयत्तं वा उद्दिसित्तए वा धारेत्तए वा ॥ ९५ ॥ आयरियउवज्झाए बहुस्सुए  
 वब्भागमे बहुसो बहुआगाढागाढेसु कारणेसु माई मुसावाई असुई पावजीवी,  
 जावजीवाए तस्स तप्पत्तियं नो कप्पइ आयरियत्तं वा जाव गणावच्छेइयत्तं वा  
 उद्दिसित्तए वा धारेत्तए वा ॥ ९६ ॥ बहवे भिक्खुणो बहुस्सुया वब्भागमा बहुसो  
 बहुआगाढागाढेसु कारणेसु माई मुसावाई असुई पावजीवी, जावजीवाए तेसिं  
 तप्पत्तियं नो कप्पइ आयरियत्तं वा जाव गणावच्छेइयत्तं वा उद्दिसित्तए वा धारेत्तए  
 वा ॥ ९७ ॥ बहवे गणावच्छेइया बहुस्सुया वब्भागमा बहुसो बहुआगाढागाढेसु  
 कारणेसु माई मुसावाई असुई पावजीवी, जावजीवाए तेसिं तप्पत्तियं नो कप्पइ  
 आयरियत्तं वा जाव गणावच्छेइयत्तं वा उद्दिसित्तए वा धारेत्तए वा ॥ ९८ ॥ बहवे  
 आयरियउवज्झाया बहुस्सुया वब्भागमा बहुसो बहुआगाढागाढेसु कारणेसु माई  
 मुसावाई असुई पावजीवी, जावजीवाए तेसिं तप्पत्तियं नो कप्पइ आयरियत्तं वा  
 जाव गणावच्छेइयत्तं वा उद्दिसित्तए वा धारेत्तए वा ॥ ९९ ॥ बहवे भिक्खुणो  
 बहवे गणावच्छेइया बहवे आयरियउवज्झाया बहुस्सुया वब्भागमा बहुसो बहु-  
 आगाढागाढेसु कारणेसु माई मुसावाई असुई पावजीवी, जावजीवाए तेसिं तप्प-  
 त्तियं नो कप्पइ आयरियत्तं वा जाव गणावच्छेइयत्तं वा उद्दिसित्तए वा धारेत्तए  
 वा ॥ १०० ॥ ति-बेमि ॥ ववहारस्स तइओ उदेसओ समत्तो ॥ ३ ॥

### ववहारस्स चउत्थो उदेसओ

नो कप्पइ आयरियउवज्झायस्स एगाणियस्स हेमन्तगिम्हासु चरि(त्त)ए ॥ १०१ ॥  
 कप्पइ आयरियउवज्झायस्स अप्पबिइयस्स हेमंतगिम्हासु चरि(चार)ए ॥ १०२ ॥  
 नो कप्पइ गणावच्छेइयस्स अप्पबिइयस्स हेमंतगिम्हासु चरिए ॥ १०३ ॥ कप्पइ  
 गणावच्छेइयस्स अप्पतइयस्स हेमंतगिम्हासु चरिए ॥ १०४ ॥ नो कप्पइ आय-  
 रियउवज्झायस्स अप्पबिइयस्स वासावासं वत्थए ॥ १०५ ॥ कप्पइ आयरियउव-  
 ज्झायस्स अप्पतइयस्स वासावासं वत्थए ॥ १०६ ॥ नो कप्पइ गणावच्छेइयस्स

अप्पतइयस्स वासावासं वत्थए ॥ १०७ ॥ कप्पइ गणावच्छेइयस्स अप्पचउत्थस्स वासावासं वत्थए ॥ १०८ ॥ से गामंसि वा नगरंसि वा निगमंसि वा रायहाणीए वा खेडंसि वा कब्बडंसि वा मडंबंसि वा पट्टणंसि वा दोणमुहंसि वा आसमंसि वा संवाहंसि वा संनिवेसंसि वा बहूणं आयरियउवज्झायाणं अप्पबिइयाणं बहूणं गणावच्छेइयाणं अप्पतइयाणं कप्पइ हेमंतगिम्हासु चरिए अण्णमण्णं निस्साए ॥ १०९ ॥ से गामंसि वा नगरंसि वा निगमंसि वा रायहाणीए वा खेडंसि वा कब्बडंसि वा मडंबंसि वा पट्टणंसि वा दोणमुहंसि वा आसमंसि वा संवाहंसि वा संनिवेसंसि वा बहूणं आयरियउवज्झायाणं अप्पतइयाणं बहूणं गणावच्छेइयाणं अप्पचउत्थाणं कप्पइ वासावासं वत्थए अण्णमण्णं निस्साए ॥ ११० ॥ गामाणु-गामं दूहज्जमा(णे)णो भिक्खू य जं पुरओ कट्ठु विह(रे)ज्जा से य)रइ आहच्च वीसंभेज्जा, अत्थि याइं थ अण्णे केइ उवसंपज्जणारिहे कप्पइ से(०) उवसंपज्जि(त्ताणं विहरित्तए)यव्वे, नत्थि याइं थ अण्णे केइ उवसंपज्जणारिहे, तस्स अप्पणो कप्पाए असमत्ते कप्पइ से एगराइयाए पडिमाए जण्णं जण्णं दि(सिं)सं अण्णे साहम्मिया विहरंति तण्णं तण्णं दिसं उवलित्तए, नो से कप्पइ तत्थ विहारवत्तिं वत्थए, कप्पइ से तत्थ कारणवत्तिं वत्थए, तंसि च णं कारणंसि निट्ठियंसि परो वएज्जा-वसाहि अज्जो ! एगरायं वा दुरायं वा, एवं से कप्पइ एगरायं वा दुरायं वा वत्थए, नो से कप्पइ परं एगरायाओ वा दुरायाओ वा वत्थए, जं तत्थ परं एगरायाओ वा दुरायाओ वा वसइ, से संतरा छेए वा परिहारे वा ॥ १११ ॥ वासावासं पज्जो-सवि(ए)ओ भिक्खू य जं पुरओ कट्ठु विहरइ आहच्च वीसंभेज्जा, अत्थि याइं थ अण्णे केइ उवसंपज्जणारिहे से उवसंपज्जियव्वे, नत्थि याइं थ अण्णे केइ उवसंपज्जणारिहे, तस्स अप्पणो कप्पाए असमत्ते कप्पइ से एगराइयाए पडिमाए जण्णं जण्णं दिसं अण्णे साहम्मिया विहरंति तण्णं तण्णं दिसं उवलित्तए, नो से कप्पइ तत्थ विहारवत्तिं वत्थए, कप्पइ से तत्थ कारणवत्तिं वत्थए, तंसि च णं कारणंसि निट्ठियंसि परो वएज्जा-वसाहि अज्जो ! एगरायं वा दुरायं वा, एवं से कप्पइ एगरायं वा दुरायं वा वत्थए, नो से कप्पइ परं एगरायाओ वा दुरायाओ वा वत्थए, जं तत्थ परं एगरायाओ वा दुरायाओ वा वसइ, से संतरा छेए वा परिहारे वा ॥ ११२ ॥ आयरिय-उवज्झाए गिलायमाणे अण्णयरं वएज्जा-अज्जो ! ममंसि णं कालगयंसि समानंसि अयं समुक्कसियव्वे, से य समुक्कसणारिहे समुक्कसियव्वे से य नो समुक्कसणारिहे नो समुक्कसियव्वे, अत्थि याइं थ अण्णे केइ समुक्कसणारिहे से समुक्कसियव्वे, नत्थि याइं थ अण्णे केइ समुक्कसणारिहे से चेव समुक्कसियव्वे, तंसि च णं समुक्किट्ठंसि परो

वएजा-दुस्समुक्किट्ठं ते अज्जो ! निक्खिवाहि, तस्स णं निक्खिबमाणस्स नत्थि केइ छेए वा परिहारे वा, जे (तं) साहम्मिया अहाकप्पेणं नो उट्ठाए विहरं(अब्भुट्ठे)-  
 ति (तेसिं) सव्वेसिं तेसिं तप्पत्तिं छेए वा परिहारे वा ॥ ११३ ॥ आयरिय-  
 उवज्जाए ओहायमाणे अण्णयरं वएजा-अज्जो ! ममंसि णं ओहावियंसि समाणंसि  
 अयं समुक्कसियव्वे, से य समुक्कसणारिहे समुक्कसियव्वे, से य नो समुक्कसणारिहे  
 नो समुक्कसियव्वे, अत्थि याइं थ अण्णे केइ समुक्कसणारिहे समुक्कसियव्वे, नत्थि  
 याइं थ अण्णे केइ समुक्कसणारिहे से चेव समुक्कसियव्वे, तंसि च णं समुक्किट्ठंसि  
 परो वएजा-दुस्समुक्किट्ठं ते अज्जो ! निक्खिवाहि, तस्स णं निक्खिबमाणस्स नत्थि  
 केइ छेए वा परिहारे वा, जे साहम्मिया अहाकप्पेणं नो उट्ठाए विहरंति सव्वेसिं  
 तेसिं तप्पत्तिं छेए वा परिहारे वा ॥ ११४ ॥ आयरियउवज्जाए सरमाणे (परं)  
 जाव चउरायपंचरायाओ कप्पागं भिक्खुं नो उवट्ठावेइ, कप्पाए अत्थि याइं थ  
 से केइ माणणिज्जे कप्पाए, नत्थि से केइ छेए वा परिहारे वा, नत्थि याइं थ से  
 केइ माणणिज्जे कप्पाए, से संतरा छेए वा परिहारे वा ॥ ११५ ॥ आयरियउवज्जाए  
 असरमाणे परं चउ(पंच)रायाओ कप्पागं भिक्खुं नो उवट्ठावेइ, कप्पाए अत्थि  
 याइं थ से केइ माणणिज्जे कप्पाए, नत्थि से केइ छेए वा परिहारे वा, नत्थि याइं  
 थ से केइ माणणिज्जे कप्पाए, से संतरा छेए वा परिहारे वा ॥ ११६ ॥ आयरिय-  
 उवज्जाए सरमाणे वा असरमाणे वा परं दसरायकप्पाओ कप्पागं भिक्खुं नो  
 उवट्ठावेइ, कप्पाए अत्थि याइं थ से केइ माणणिज्जे कप्पाए, नत्थि से केइ छेए वा  
 परिहारे वा, नत्थि याइं थ से केइ माणणिज्जे कप्पाए, संवच्छरं तस्स तप्पत्तिं नो  
 कप्पइ आयरियत्तं (जाव) उद्दिस्सित्ते (०) ॥ ११७ ॥ भिक्खु य गणाओ अवक्कम्म अण्णं  
 गैणं उवसंपज्जित्ताणं विहरेज्जा, तं च केइ साहम्मिए पासित्ता वएजा-कं अज्जो !  
 उवसंपज्जित्ताणं विहरसि ? जे तत्थ सव्वराइणिए तं वएजा, राइणिए तं वएजा ।  
 अह भंते ! कस्स कप्पाए ? जे तत्थ सव्वबहुस्सए तं वएजा, जं वा से भगवं वक्खइ  
 तस्स आणाउववायवयणणिहेसे चिद्धिस्सामि ॥ ११८ ॥ बहवे साहम्मिया इच्छेज्जा  
 एगयओ अभिणिचारियं चारए, कप्पइ नो ण्हं थेरे अणापुच्छित्ता एगयओ अभिणि-  
 चारियं चारए, कप्पइ ण्हं थेरे आपुच्छित्ता एगयओ अभिणिचारियं चारए, थेरा  
 य से वियरेज्जा ए(वं)वण्हं कप्पइ एगयओ अभिणिचारियं चारए, थेरा य से नो  
 वियरेज्जा एव ण्हं नो कप्पइ एगयओ अभिणिचारियं चारए, जं तत्थ थेरेहिं अवि-  
 इण्णे अभिणिचारियं चरंति, से संतरा छेए वा परिहारे वा ॥ ११९ ॥ चरियापविट्ठे

भिक्षू जाव चउरायपंचरायाओ थेरे पासेज्जा, सच्चैव आलोयणा सच्चैव पडिक्कमणा सच्चैव ओग्गहस्स पुव्वाणुणवणा चिट्ठइ अहालंदमवि ओग्गहे ॥ १२० ॥ चरियापविट्ठे भिक्षू परं चउरायपंचरायाओ थेरे पासेज्जा, पुणो आलोएज्जा पुणो पडिक्कमेज्जा पुणो छेयपरिहारस्स उवट्ठाएज्जा, भिक्षुभावस्स अट्ठाए दोच्चं पि ओग्गहे अणुणवेयव्वे सिया, अणुजाणह भंते । मिओग्गहं अहालंदं धुवं नि(च्छइ)तियं वेउट्ठियं, तओ पच्छा कायसंफासं ॥ १२१ ॥ चरियानियट्ठे भिक्षू जाव चउरायपंचरायाओ थेरे पासेज्जा, सच्चैव आलोयणा सच्चैव पडिक्कमणा सच्चैव ओग्गहस्स पुव्वाणुणवणा चिट्ठइ अहालंदमवि ओग्गहे ॥ १२२ ॥ चरियानियट्ठे भिक्षू परं चउरायपंचरायाओ थेरे पासेज्जा, पुणो आलोएज्जा, पुणो पडिक्कमेज्जा, पुणो छेयपरिहारस्स उवट्ठाएज्जा, भिक्षुभावस्स अट्ठाए दोच्चं पि ओग्गहे अणुणवेयव्वे सिया । अणुजाणह भंते ! मिओग्गहं अहालंदं धुवं नितियं वेउट्ठियं, तओ पच्छा कायसंफासं ॥ १२३ ॥ दो साहम्मिया एगयओ विहरंति, तंजहा-सेहे य राइणिए य, तत्थ सेहतराए पलिच्छण्णे, राइणिए अपलिच्छण्णे, सेहतराएणं राइणिए उवसंपजियव्वे, भिक्षोववायं च दलयइ कप्पागं ॥ १२४ ॥ दो साहम्मिया एगयओ विहरंति, तंजहा-सेहे य राइणिए य, तत्थ राइणिए पलिच्छण्णे, सेहतराए अपलिच्छण्णे, इच्छा राइणिए सेहतरागं उवसंपज्जइ इच्छा नो उवसंपज्जइ, इच्छा भिक्षोववायं दलयइ कप्पागं इच्छा नो दलयइ कप्पागं ॥ १२५ ॥ दो भिक्षुणो एगयओ विहरंति, नो ण्हं कप्पइ अण्णमण्णं उवसंपज्जित्ताणं विहरित्तए, कप्पइ ण्हं अहाराइणियाए अण्णमण्णं उवसंपज्जित्ताणं विहरित्तए ॥ १२६ ॥ दो गणावच्छेइया एगयओ विहरंति, नो ण्हं कप्पइ अण्णमण्णं उवसंपज्जित्ताणं विहरित्तए, कप्पइ ण्हं अहाराइणियाए अण्णमण्णं उवसंपज्जित्ताणं विहरित्तए ॥ १२७ ॥ दो आयरियउवज्झाया एगयओ विहरंति, नो ण्हं कप्पइ अण्णमण्णं उवसंपज्जित्ताणं विहरित्तए, कप्पइ ण्हं अहाराइणियाए अण्णमण्णं उवसंपज्जित्ताणं विहरित्तए ॥ १२८ ॥ बहवे भिक्षुणो एगयओ विहरंति, नो ण्हं कप्पइ अण्णमण्णं उवसंपज्जित्ताणं विहरित्तए, कप्पइ ण्हं अहाराइणियाए अण्णमण्णं उवसंपज्जित्ताणं विहरित्तए ॥ १२९ ॥ बहवे गणावच्छेइया एगयओ विहरंति, नो ण्हं कप्पइ अण्णमण्णं उवसंपज्जित्ताणं विहरित्तए, कप्पइ ण्हं अहाराइणियाए अण्णमण्णं उवसंपज्जित्ताणं विहरित्तए ॥ १३० ॥ बहवे आयरियउवज्झाया एगयओ विहरंति, नो ण्हं कप्पइ अण्णमण्णं उवसंपज्जित्ताणं विहरित्तए, कप्पइ ण्हं अहाराइणियाए अण्णमण्णं उवसंपज्जित्ताणं विहरित्तए ॥ १३१ ॥ बहवे भिक्षुणो बहवे गणावच्छेइया बहवे आयरियउवज्झाया एगयओ विहरंति,

नो ण्हं कप्पइ अण्णमण्णं उवसंपज्जिताणं विहरित्तए (वासावासं वत्थए कप्पइ प०),  
कप्पइ ण्हं अहाराइणियाए अण्णमण्णं उवसंपज्जिताणं विहरित्तए (हेमंतगिम्हासु)  
॥ १३२ ॥ त्ति-बेमि ॥ ववहारस्स चउत्थो उद्देसओ समत्तो ॥ ४ ॥

### ववहारस्स पंचमो उद्देसओ

नो कप्पइ पवत्तिणीए अप्पविइयाए हेमंतगिम्हासु चारए ॥ १३३ ॥ कप्पइ  
पवत्तिणीए अप्पतइयाए हेमंतगिम्हासु चारए ॥ १३४ ॥ नो कप्पइ गणावच्छेइणीए  
अप्पतइयाए हेमंतगिम्हासु चारए ॥ १३५ ॥ कप्पइ गणावच्छेइणीए अप्पचउत्थाए  
हेमंतगिम्हासु चारए ॥ १३६ ॥ नो कप्पइ पवत्तिणीए अप्पतइयाए वासावासं  
वत्थए ॥ १३७ ॥ कप्पइ पवत्तिणीए अप्पचउत्थाए वासावासं वत्थए ॥ १३८ ॥  
नो कप्पइ गणावच्छेइणीए अप्पचउत्थाए वासावासं वत्थए ॥ १३९ ॥ कप्पइ  
गणावच्छेइणीए अप्पपंचमाए वासावासं वत्थए ॥ १४० ॥ से गामंसि वा नगरंसि  
वा निगमंसि वा रायहाणिसि वा बहूणं पवत्तिणीणं अप्पतइयाणं बहूणं गणावच्छेइ-  
णीणं अप्पचउत्थाणं कप्पइ हेमंतगिम्हासु चारए अण्णमण्णं नी(निस्)साए ॥ १४१ ॥  
से गामंसि वा नगरंसि वा निगमंसि वा रायहाणिसि वा बहूणं पवत्तिणीणं अप्प-  
चउत्थाणं बहूणं गणावच्छेइणीणं अप्पपंचमाणं कप्पइ वासावासं वत्थए अण्णमण्णं  
नीसाए ॥ १४२ ॥ गामाणुगामं दूइज्जमाणी णिग्गंथी य जं पुरओ (कट्ठु) काउं  
विह(रेज्जा)रइ सा आहच्च वीसंभेज्जा, अत्थि याइं थ काइ अण्णा उवसंपज्जणारिहा  
सा उवसंपज्जियव्वा, नत्थि याइं थ काइ अण्णा उवसंपज्जणारिहा तीसे य अप्पणो  
कप्पाए असमत्ते (एवं) कप्पइ सा एगराइयाए पडिमाए जण्णं जण्णं दिसं अण्णाओ  
साहम्मिणीओ विहरंति तण्णं तण्णं दिसं उवलित्तए, नो सा कप्पइ तत्थ विहार-  
वत्तियं वत्थए, कप्पइ सा तत्थ कारणवत्तियं वत्थए, तंसि च णं कारणंसि निट्ठियंसि  
परो वएज्जा-वसाहि अज्जो ! एगरायं वा दुरायं वा, एवं सा कप्पइ एगरायं वा दुरायं  
वा वत्थए, नो सा कप्पइ परं एगरायाओ वा दुरायाओ वा वत्थए, जं तत्थ परं  
एगरायाओ वा दुरायाओ वा वसइ, सा संतरा छेए वा परिहारे वा ॥ १४३ ॥  
वासावासं पज्जोसविद्या णिग्गंथी य जं पुरओ काउं विहरइ सा आहच्च वीसंभेज्जा,  
अत्थि याइं थ काइ अण्णा उवसंपज्जणारिहा सा उवसंपज्जियव्वा, नत्थि याइं थ  
काइ अण्णा उवसंपज्जणारिहा तीसे य अप्पणो कप्पाए असमत्ते कप्पइ सा एगराइ-  
याए पडिमाए जण्णं जण्णं दिसं अण्णाओ साहम्मिणीओ विहरंति तण्णं तण्णं दिसं  
उवलित्तए, नो सा कप्पइ तत्थ विहारवत्तियं वत्थए, कप्पइ सा तत्थ कारणवत्तियं  
वत्थए, तंसि च णं कारणंसि निट्ठियंसि परो वएज्जा-वसाहि अज्जो ! एगरायं वा

दुरायं वा, एवं सा कप्पइ एगरायं वा दुरायं वा वत्थए, नो सा कप्पइ परं एग-  
 रायाओ वा दुरायाओ वा वत्थए, जं तत्थ परं एगरायाओ वा दुरायाओ वा वसइ,  
 सा संतरा छेए वा परिहारे वा ॥ १४४ ॥ पवत्तिणी य गिलायमाणी अण्णयरं  
 वएज्जा-मए णं अज्जो ! कालगयाए समाणीए अयं समुक्कसियव्वा, सा य समुक्क-  
 सणारिहा समुक्कसियव्वा, सा य नो समुक्कसणारिहा नो समुक्कसियव्वा, अत्थि याइं  
 थ अण्णा काइ समुक्कसणारिहा सा समुक्कसियव्वा, नत्थि याइं थ अण्णा काइ  
 समुक्कसणारिहा सा चेव समुक्कसियव्वा, ताए व णं समुक्किट्ठाए परो वएज्जा-दुस्स-  
 मुक्किट्ठं ते अज्जो ! निक्खिवाहि ताए णं निक्खिवमाणाए नत्थि केइ छेए वा परिहारे  
 वा, जाओ साहम्मिणीओ अहाकप्पं नो उट्ठाए विहरंति सव्वासिं तासिं तप्पत्तिं  
 छेए वा परिहारे वा ॥ १४५ ॥ पवत्तिणी य ओहायमाणी अण्णयरं वएज्जा-मए णं  
 अज्जो ! ओहावियाए समाणीए अयं समुक्कसियव्वा, सा य समुक्कसणारिहा समुक्क-  
 सियव्वा, सा य नो समुक्कसणारिहा नो समुक्कसियव्वा, अत्थि याइं थ अण्णा काइ  
 समुक्कसणारिहा सा समुक्कसियव्वा, नत्थि याइं थ अण्णा काइ समुक्कसणारिहा सा  
 चेव समुक्कसियव्वा, ताए व णं समुक्किट्ठाए परो वएज्जा-दुस्समुक्किट्ठं ते अज्जो !  
 निक्खिवाहि, ताए णं निक्खिवमाणाए नत्थि केइ छेए वा परिहारे वा, जाओ  
 साहम्मिणीओ अहाकप्पं नो उट्ठाए विहरंति सव्वासिं तासिं तप्पत्तिं छेए वा  
 परिहारे वा ॥ १४६ ॥ निग्गंथस्स (णं) नवडहरतरुण(ग)स्स आचारपकप्पे नामं  
 अज्झयणे परिब्भट्ठे सिया, से य पुच्छियव्वे, केण ते अज्जो ! कारणेणं आचार-  
 पकप्पे नामं अज्झयणे परिब्भट्ठे, किं आवाहेणं पमाएणं ? से य वएज्जा-नो आवा-  
 हेणं पमाएणं, जावज्जी(वाए)वं तस्स तप्पत्तिं नो कप्पइ आयरियत्तं वा जाव  
 गणावच्छेइयत्तं वा उद्दिस्सित्तएवा धारेत्तए वा, से य वएज्जा-आवाहेणं नो पमाएणं,  
 से य संठवेस्सामीति संठवेज्जा, एवं से कप्पइ आयरियत्तं वा जाव गणावच्छेइयत्तं  
 वा उद्दिस्सित्तए वा धारेत्तए वा, से य संठवेस्सामीति नो संठवेज्जा, एवं से नो कप्पइ  
 आयरियत्तं वा जाव गणावच्छेइयत्तं वा उद्दिस्सित्तए वा धारेत्तए वा ॥ १४७ ॥  
 निग्गंथीए (णं) नवडहरतरु(णिया)णाए आचारपकप्पे नामं अज्झयणे परिब्भट्ठे  
 सिया, सा य पुच्छियव्वा, केण मे कारणेणं (अज्जा ! ) आचारपकप्पे नामं अज्झयणे  
 परिब्भट्ठे, किं आवाहेणं पमाएणं ? सा य वएज्जा-नो आवाहेणं पमाएणं, जावज्जीवं  
 तीसे तप्पत्तिं नो कप्पइ पवत्तिणिं वा गणावच्छेइणिं वा उद्दिस्सित्तए वा धारेत्तए  
 वा, सा य वएज्जा-आवाहेणं नो पमाएणं, सा य संठवेस्सामीति संठवेज्जा, एवं से  
 कप्पइ पवत्तिणिं वा गणावच्छेइणिं वा उद्दिस्सित्तए वा धारेत्तए वा, सा य संठवेस्स-



मीति नो संठवेजा, एवं से नो कप्पइ पवत्तिणिंतं वा गणावच्छेइणिंतं वा उद्दिस्सित्तए वा धारेत्तए वा ॥ १४८ ॥ थेराणं थेरभूमिपत्ताणं आयारपकप्पे नामं अज्झयणे परिब्भट्ठे सिया, कप्पइ तेसिं संठवेत्ताण वा असंठवेत्ताण वा आयरियत्तं वा जाव गणावच्छेइयत्तं वा उद्दिस्सित्तए वा धारेत्तए वा ॥ १४९ ॥ थेराणं थेरभूमिपत्ताणं आयारपकप्पे नामं अज्झयणे परिब्भट्ठे सिया, कप्पइ तेसिं संनिसण्णाण वा संतुयट्ठाण वा उत्ताणयाण वा पात्तिस्सयाण वा आयारपकप्पं नामं अज्झयणं दोच्चं पि तच्चं पि पडिपुच्छित्तए वा पडि-  
सारेत्तए वा ॥ १५० ॥ जे णिग्गंथा य णिग्गंथीओ य संभोइया सिया, नो ण्हं कप्पइ अण्णमण्णस्स अंतिए आलोएत्तए, अत्थि याईं (थ) ण्हं केइ आलोयणारिहे, कप्पइ ण्हं तस्स अंतिए आलोइत्तए, नत्थि याईं ण्हं केइ आलोयणारिहे, एव ण्हं कप्पइ अण्ण-  
मण्णस्स अंतिए आलोएत्तए ॥ १५१ ॥ जे णिग्गंथा य णिग्गंथीओ य संभोइया सिया, नो ण्हं कप्पइ अण्णम(ण्णस्स अंतिए)ण्णेणं वेयावच्चं कारवेत्तए, अत्थि याईं ण्हं केइ वेयावच्चकरे कप्पइ ण्हं वेयावच्चं कारवेत्तए, नत्थि याईं ण्हं केइ वेयावच्चकरे एव ण्हं कप्पइ अण्णमण्णेणं वेयावच्चं कारवेत्तए ॥ १५२ ॥ णिग्गंथं च णं राओ वा वियाले वा दीहपट्ठो ल्खेज्जा, इत्थी वा पुरिसस्स ओमावेजा पुरिसो-वा इत्थीए ओमावेजा, एवं से कप्पइ, एवं से चिट्ठइ, परिहारं च से न(णो) पाउणइ-एस कप्(पो)पे थेरकप्पियाणं, एवं से नो कप्पइ, एवं से नो चिट्ठइ, परिहारं च नो पाउणइ-एस कप्पे जिणकप्पि-  
याणं ॥ १५३ ॥ ति-वेमि ॥ ववहारस्स पंचमो उद्देसओ समत्तो ॥ ५ ॥

### ववहारस्स छट्ठो उद्देसओ

भिक्खू य इच्छेज्जा नायविहं एत्तए, नो(से) कप्पइ थेरे अणापुच्छित्ता नायविहं एत्तए, कप्पइ(से) थेरे आपुच्छित्ता नायविहं एत्तए, थेरा य से वियरजेजा, एवं से कप्पइ नायविहं एत्तए, थेरा य से नो वियरजेजा, एवं से नो कप्पइ नायविहं एत्तए, जं(जे) तत्थ थेरेहिं अविइण्णे नायविहं एइ, से संतरा छेए वा परिहारे वा ॥ १५४ ॥ नो से कप्पइ अप्पसुयस्स अप्पागमस्स एगाणियस्स नायविहं एत्तए ॥ १५५ ॥ कप्पइ से जे तत्थ बहुस्सुए बब्भागमे तेण सद्धिं नायविहं एत्तए ॥ १५६ ॥ तत्थ से पुव्वागमणेणं पुव्वाउत्ते चाउलोदणे पच्छाउत्ते भिल्लिगसूवे, कप्पइ से चाउलोदणे पडिग्गा(हि)हेत्तए, नो से कप्पइ भिल्लिगसूवे पडिग्गाहेत्तए ॥ १५७ ॥ तत्थ से पुव्वा-  
गमणेणं पुव्वाउत्ते भिल्लिगसूवे पच्छाउत्ते चाउलोदणे, कप्पइ से भिल्लिगसूवे पडिग्गा-  
हेत्तए, नो से कप्पइ चाउलोदणे पडिग्गाहेत्तए ॥ १५८ ॥ तत्थ से पुव्वागमणेणं दो वि पुव्वाउत्ते कप्पइ से दो वि पडिग्गाहेत्तए ॥ १५९ ॥ तत्थ से पुव्वागमणेणं दो वि पच्छाउत्ते नो से कप्पइ दो वि पडिग्गाहेत्तए ॥ १६० ॥ जे से तत्थ पुव्वा-

गमणेणं पुव्वाउत्ते से कप्पइ पडिग्गाहेत्तए ॥ १६१ ॥ जे से तत्थ पुव्वागमणेणं पच्छाउत्ते नो से कप्पइ पडिग्गाहेत्तए ॥ १६२ ॥ आयरियउवज्झायस्स गणंसि पंच अइसेसा पण्णत्ता, तंजहा-(१) आयरियउवज्झाए अंतो उवस्सयस्स पाए निगिज्झय २ पप्फोडेमाणे वा पमज्जेमाणे वा नो अ(णा)इक्कमइ ॥ १६३ ॥ (२) आयरियउवज्झाए अंतो उवस्सयस्स उच्चारपासवणं विगिंचमाणे वा विसोहेमाणे वा नो अइक्कमइ ॥ १६४ ॥ (३) आयरियउवज्झाए पभू वेयावडियं इच्छा करेज्जा इच्छा नो करेज्जा ॥ १६५ ॥ (४) आयरियउवज्झाए अंतो उवस्सयस्स एगरायं वा दुरायं वा वसमाणे नो अइक्कमइ ॥ १६६ ॥ (५) आयरियउवज्झाए वाहिं उवस्सयस्स एगरायं वा दुरायं वा वसमाणे नो अइक्कमइ ॥ १६७ ॥ गणावच्छेइयस्स णं गणंसि दो अइसेसा प०, तं०-(१) गणावच्छेइए अंतो उवस्सयस्स एगरायं वा दुरायं वा वसमाणे नो अइक्कमइ ॥ १६८ ॥ (२) गणावच्छेइए वाहिं उवस्सयस्स एगरायं वा दुरायं वा वसमाणे नो अइक्कमइ ॥ १६९ ॥ से गामंसि वा जाव रायहाणिं-(सण्णिवेसं)सि वा एगवगडाए एगदुवाराए एगणिकखमणपवेसाए णो कप्पइ बहूणं अगडसुयाणं एगयओ वत्थए, अत्थि याइं ण्हं केइ आयारपकप्पधरे णत्थि याइं ण्हं केइ छेए वा परिहारे वा, णत्थि याइं ण्हं केइ आयारपकप्पधरे से (सव्वेसिं तेसिं) संतरा छेए वा परिहारे वा ॥ १७० ॥ से गामंसि वा जाव रायहाणिंसि वा अभि-णिव्वगडाए अभिणिदुवाराए अभिणिकखमणपवेसणाए णो कप्पइ बहूण वि अगड-सुयाणं एगयओ वत्थए, अत्थि याइं ण्हं केइ आयारपकप्पधरे जे तत्तियं रयणिं संवसइ णत्थि याइं ण्हं केइ छेए वा परिहारे वा, णत्थि याइं ण्हं केइ आयारपकप्पधरे जे तत्तियं रयणिं संवसइ सव्वेसिं तेसिं तप्पत्तियं छेए वा परिहारे वा ॥ १७१ ॥ से गामंसि वा जाव रायहाणिंसि वा अभिणिव्वगडाए अभिणिदुवाराए अभिणिकख-मणपवेसणाए णो कप्पइ बहुसुयस्स बब्भागमस्स एगाणियस्स भिक्खुस्स वत्थए, किमंग-पुण अप्पागमस्स अप्पस्सुयस्स ? ॥ १७२ ॥ से गामंसि वा जाव रायहाणिंसि वा एगवगडाए एगदुवाराए एगणिकखमणपवेसाए कप्पइ बहुसुयस्स बब्भागमस्स एगाणियस्स भिक्खुस्स वत्थए दुह(उभ)ओ कालं भिक्खुभावं पडिजागरमाणस्स ॥ १७३ ॥ ज(जे त)त्थ एए बहवे इत्थीओ य पुरिसा य पण्हावेंति तत्थ से समणे णिगंग्थे अण्णयरंसि अचित्तंसि सोयंसि सुक्कपोगले णिग्घाएमाणे हत्थकम्मपडि-सेवणपत्ते आवज्जइ भासियं परिहारट्ठणं अणुग्घाइयं ॥ १७४ ॥ जत्थ एए बहवे इत्थीओ य पुरिसा य पण्हावेंति तत्थ से समणे णिगंग्थे अण्णयरंसि अचित्तंसि सोयंसि सुक्कपोगले णिग्घाएमाणे मेहुणपडिसेवणपत्ते आवज्जइ चाउम्मासियं परि-

हारट्ठाणं अणुग्घाइयं ॥ १७५ ॥ णो कप्पइ णिग्गंथाण वा णिग्गंशीण वा णिग्गंथि  
(अण्णगणाओ आगयं) खुयायारं सबलायारं भिन्नायारं संकिलिद्धायारचित्तं तस्स ठाणस्स  
अणालोयावेत्ता अपडिक्कमावेत्ता अनिंदावेत्ता अगरहावेत्ता अविउट्ठावेत्ता अवि-  
सोहावेत्ता अकरणाए अणब्भुट्ठावेत्ता अहारिहं पायच्छित्तं अपडिवज्जावेत्ता (पुच्छित्तए  
वा वाएत्तए वा) उवट्ठावेत्तए वा संभुंजित्तए वा संवसित्तए वा तेसिं (तीसे)  
इत्तरियं दिसं वा अणुदिसं वा उद्दिसित्तए वा धारेत्तए वा ॥ १७६ ॥ कप्पइ  
णिग्गंथाण वा णिग्गंशीण वा णिग्गंथि अण्णगणाओ आगयं खुयायारं सबलायारं  
भिन्नायारं संकिलिद्धायारचित्तं तस्स ठाणस्स आलोयावेत्ता पडिक्कमावेत्ता निंदावेत्ता  
गरहावेत्ता विउट्ठावेत्ता अकरणाए अणब्भुट्ठावेत्ता अहारिहं पायच्छित्तं पडिवज्जावेत्ता  
उवट्ठावेत्तए वा संभुंजित्तए वा संवसित्तए वा तेसिं इत्तरियं दिसं वा अणुदिसं वा  
उद्दिसित्तए वा धारेत्तए वा ॥ १७७ ॥ ति-वेमि ॥ ववहारस्स छट्ठो उद्देसओ  
समत्तो ॥ ६ ॥

### ववहारस्स सत्तमो उद्देसओ

जे णिग्गंथा य णिग्गंशीओ य संभोइया सिया, नो कप्पइ णिग्गंशीणं णिग्गंथे  
अणापुच्छित्ता णिग्गंथिं अण्णगणाओ आगयं खुयायारं सबलायारं भिन्नायारं  
संकिलिद्धायारचित्तं तस्स ठाणस्स अणालोयावेत्ता जाव पायच्छित्तं अपडिवज्जावेत्ता  
पुच्छित्तए वा वाएत्तए वा उवट्ठावेत्तए वा संभुंजित्तए वा संवसित्तए वा तीसे इत्तरियं  
दिसं वा अणुदिसं वा उद्दिसित्तए वा धारेत्तए वा ॥ १७८ ॥ जे णिग्गंथा य  
णिग्गंशीओ य संभोइया सिया, कप्पइ णिग्गंशीणं णिग्गंथे आपुच्छित्ता णिग्गंथिं  
अण्णगणाओ आगयं खुयायारं सबलायारं भिन्नायारं संकिलिद्धायारचित्तं तस्स  
ठाणस्स आलोयावेत्ता जाव पायच्छित्तं पडिवज्जावेत्ता पुच्छित्तए वा वाएत्तए वा  
उवट्ठावेत्तए वा संभुंजित्तए वा संवसित्तए वा तीसे इत्तरियं दिसं वा अणुदिसं वा  
उद्दिसित्तए वा धारेत्तए वा ॥ १७९ ॥ जे णिग्गंथा य णिग्गंशीओ य संभोइया  
सिया, कप्पइ णिग्गंथाणं णिग्गंशीओ आपुच्छित्ता वा अणापुच्छित्ता वा णिग्गंथिं  
अण्णगणाओ आगयं खुयायारं सबलायारं भिन्नायारं संकिलिद्धायारचित्तं तस्स  
ठाणस्स आलोयावेत्ता जाव पायच्छित्तं पडिवज्जावेत्ता पुच्छित्तए वा वाएत्तए वा  
उवट्ठावेत्तए वा संभुंजित्तए वा संवसित्तए वा तीसे इत्तरियं दिसं वा अणुदिसं वा  
उद्दिसित्तए वा धारेत्तए वा, तं च णिग्गंशीओ नो इच्छेज्जा, सेव(सय)मेव नियं ठाणं

१ अण्णे आयरिसे सुत्तदुग्गमहिग्गमुक्कलब्भइ १७६-१७७ सरिसं, णवरं “णिग्गंथि”  
ठाणे “णिग्गंथं” ति ।

॥ १८० ॥ जे णिग्गंथा य णिग्गंथीओ य संभोइया सिया, नो ण्हं कप्पइ (णिग्गंथे) पारोक्खं पाडिएक्कं संभोइयं विसंभोगं करेत्तए, कप्पइ ण्हं पच्चक्खं पाडिएक्कं संभोइयं विसंभोगं करेत्तए, जत्थेव अण्णमण्णं पासेज्जा तत्थेव एवं वएज्जा-अहं णं अज्जो ! तु(म)माए सद्धिं इमम्मि कारणम्मि पच्चक्खं संभोगं विसंभोगं करेमि, से य पडितप्पेज्जा एवं से नो कप्पइ पच्चक्खं पाडिएक्कं संभोइयं विसंभोगं करेत्तए, से य नो पडितप्पेज्जा एवं से कप्पइ पच्चक्खं पाडिएक्कं संभोइयं विसंभोगं करेत्तए ॥ १८१ ॥ जाओ णिग्गंथीओ वा णिग्गंथा वा संभोइया सिया, नो ण्हं कप्पइ (णिग्गंथीओ) पच्चक्खं पाडिएक्कं संभोइयं विसंभोगं करेत्तए, कप्पइ ण्हं पारोक्खं पाडिएक्कं संभोइयं विसंभोगं करेत्तए, जत्थेव ताओ अप्पणो आयरियउवज्झाए पासेज्जा, तत्थेव एवं वएज्जा-अहं णं भंते ! अमुगीए अज्जाए सद्धिं इमम्मि कारणम्मि पारोक्खं पाडिएक्कं संभोगं विसंभोगं करेमि, सा य से पडितप्पेज्जा एवं से नो कप्पइ पारोक्खं पाडिएक्कं संभोइयं विसंभोगं करेत्तए, सा य से नो पडितप्पेज्जा एवं से कप्पइ पारोक्खं पाडिएक्कं संभोइयं विसंभोगं करेत्तए ॥ १८२ ॥ नो कप्पइ णिग्गंथाणं णिग्गंथिं अप्पणो अट्ठाए पव्वावेत्तए वा सुंडावेत्तए वा (सिक्खावेत्तए वा) सेहावेत्तए वा उवट्ठावेत्तए वा संवसित्तए वा संभुंजित्तए वा तीसे इत्तरियं दिसं वा अणुदिसं वा उद्दिसित्तए वा धारेत्तए वा ॥ १८३ ॥ कप्पइ णिग्गंथाणं णिग्गंथिं अप्पणो अट्ठाए पव्वावेत्तए वा जाव संभुंजित्तए वा तीसे इत्तरियं दिसं वा अणुदिसं वा उद्दिसित्तए वा धारेत्तए वा ॥ १८४ ॥ नो कप्पइ णिग्गंथीणं णिग्गंथं अप्पणो अट्ठाए पव्वावेत्तए वा सुंडावेत्तए वा जाव उद्दिसित्तए वा धारेत्तए वा ॥ १८५ ॥ कप्पइ णिग्गंथीणं णिग्गंथं अप्पणो अट्ठाए पव्वावेत्तए वा सुंडावेत्तए वा जाव उद्दिसित्तए वा धारेत्तए वा ॥ १८६ ॥ नो कप्पइ णिग्गंथीणं विइकिट्ठियं दिसं वा अणुदिसं वा उद्दिसित्तए वा धारेत्तए वा ॥ १८७ ॥ कप्पइ णिग्गंथाणं विइकिट्ठियं दिसं वा अणुदिसं वा उद्दिसित्तए वा धारेत्तए वा ॥ १८८ ॥ नो कप्पइ णिग्गंथाणं विइकिट्ठाइं पाहुडाइं विओसवेत्तए ॥ १८९ ॥ कप्पइ णिग्गंथीणं विइकिट्ठाइं पाहुडाइं विओसवेत्तए ॥ १९० ॥ नो कप्पइ णिग्गंथा-  
(ण वा णिग्गंथीण वा)णं विइकिट्ठए काले सज्झायं (उद्दिसित्तए वा) करेत्तए (वा) ॥ १९१ ॥ कप्पइ णिग्गंथीणं विइकिट्ठए काले सज्झायं करेत्तए णिग्गंथणिस्साए ॥ १९२ ॥ नो कप्पइ णिग्गंथाण वा णिग्गंथीण वा असज्झाए सज्झायं करेत्तए ॥ १९३ ॥ कप्पइ णिग्गंथाण वा णिग्गंथीण वा सज्झाए सज्झायं करेत्तए ॥ १९४ ॥ नो कप्पइ णिग्गंथाण वा णिग्गंथीण वा अप्पणो असज्झाए सज्झायं करेत्तए, कप्पइ ण्हं अण्णमण्णस्स वायणं दल्लइत्तए ॥ १९५ ॥ तिवासपरियाए समणे णिग्गंथे

तीसं वासपरियाए समणीए णिगंथीए कप्पइ उवज्जायत्ताए उद्दिस्सित्ताए ॥ १९६ ॥  
 पंचवासपरियाए समणे णिगंथे सट्ठिवासपरियाए समणीए णिगंथीए कप्पइ आय-  
 रिय(ताए)उवज्जायत्ताए उद्दिस्सित्ताए ॥ १९७ ॥ गामाणुगामं दूइज्जमाणे भिक्खु  
 य आहच्च वीसंभेज्जा तं च सरीरगं केइ साहम्मिए पासेज्जा, कप्पइ से तं सरीरगं  
 से न (मा) सागारियमिति कट्ठु (एगंते अचित्ते०) थंडिल्ले बहुफासुए पडिल्लेहिता  
 पमज्जिता परिट्ठवेत्ताए, अत्थि याइं थ केइ साहम्मियसंतिए उवगरणजाए परि-  
 हरणारिहे, कप्पइ से सागारकडं गहाय दोच्चं पि ओग्गहं अणुणवेत्ता परिहारं परि-  
 हारेत्ताए ॥ १९८ ॥ सागारिए उवस्सयं वक्कएणं पउंजेज्जा, से य वक्कइयं वएज्जा-  
 इमं(मिह)मि य इमंमि य ओवासे समणा णिगंथा परिवसंति, से सागारिए पारिहा-  
 रिए, से य नो (एवं) वएज्जा, वक्कइए वएज्जा(०), से सागारिए पारिहारिए, दो वि  
 ते (एवं) वएज्जा (जाव), दो वि सागारिया पारिहारिया ॥ १९९ ॥ सागारिए उव-  
 स्सयं विकिणेज्जा, से य कइयं वएज्जा-इमंमि य इमंमि य ओवासे समणा णिगंथा  
 परिवसंति, से सागारिए पारिहारिए, से य नो वएज्जा, कइए वएज्जा, से सागारिए  
 पारिहारिए, दो वि ते वएज्जा, दो वि सागारिया पारिहारिया ॥ २०० ॥ विहवधूया  
 ना(नि)यकुलवासिणी, सा वि यावि ओग्गहं अणुणवेयव्वा, किमंग-पुण पिया वा  
 भाया वा पुत्ते वा, से (य) वि या(दो)वि ओ(उ)ग्ग(हं)हे ओगेण्हिय(व्वा)व्वे  
 ॥ २०१ ॥ पहिए वि ओग्गहं अणुणवेयव्वे ॥ २०२ ॥ से रज्ज(राय)परियट्ठेसु  
 संथडेसु अव्वोगडेसु अव्वोच्छिण्णेसु अपरपरिग्गहिएसु सच्चेव ओग्गहस्स पुव्वाणुण-  
 वणा चिट्ठइ अहालंदमवि ओग्गहे ॥ २०३ ॥ से रज्जपरियट्ठेसु असंथडेसु वोगडेसु  
 वोच्छिण्णेसु परपरिग्गहिएसु भिक्खुभावस्स अट्ठाए दोच्चं पि ओग्गहं अणुणवेयव्वे  
 सिया ॥ २०४ ॥ ति-वेमि ॥ ववहारस्स सत्तमो उद्देसओ समत्तो ॥ ७ ॥

### ववहारस्स अट्ठमो उद्देसओ

गाहा(गिह)उ(डु)व्वप्पजोसविए, ताए गाहाए ताए पएसाए ताए उवासंतराए  
 जमिणं २ सेज्जासंथारगं लभेज्जा तमिणं तमिणं ममेव सिया, थेरा य से अणुजाणेज्जा,  
 तस्सेव सिया, थेरा य से नो अणुजाणेज्जा, (पो तस्सेव सिया) एवं से कप्पइ  
 आहाराइणियाए सेज्जासंथारगं पडिग्गाहेत्ताए ॥ २०५ ॥ से अहालहुसगं सेज्जा-  
 संथारगं गवेसेज्जा, जं चक्किया एगेणं हत्थेणं ओणि(ज्झिय २)ज्झ जाव एगाहं वा  
 दुयाहं वा तियाहं वा (अट्ठाणं) परिवहित्ताए, एस मे हेमंतगिम्हासु भविस्सइ  
 ॥ २०६ ॥ से य अहालहुसगं सेज्जासंथारगं गवेसेज्जा, जं चक्किया एगेणं हत्थेणं  
 ओणिज्झ जाव एगाहं (०) अट्ठाणं परिवहित्ताए, एस मे वासावासासु भविस्सइ

॥ २०७ ॥ से अहालहुसगं सेज्जासंथारगं जाए(गवेसे)जा जं चक्किया एगेणं हत्थेण ओगिञ्ज जाव एगाहं वा दुयाहं वा तियाहं वा चउयाहं वा पं(चाहं वा दूरमवि)चगाहं वा अद्धाणं परिवहित्तए, एस मे वुद्धावासासु भविस्सइ ॥ २०८ ॥ थेराणं थेरभूसिपत्ताणं कप्पइ दंडए वा मंडए वा सत्तए वा चेले वा चेलेचिलमिली वा अविरहिए ओवासे ठवेत्ता गाहावइकुलं पिंडवायपडिया(भत्ताए वा पाणा)ए (वा) पविसित्तए वा णिक्खसित्तए वा, कप्पइ ण्हं संगियट्ठचारीणं दोच्चं पि ओग्गहं अणुण्णवेत्ता (परिहारं) परिहरित्तए ॥ २०९ ॥ नो कप्पइ णिग्गंथाण वा णिग्गंशीण वा पाडिहारियं वा सागारियसंतियं वा सेज्जासंथारगं दोच्चं पि ओग्गहं अणुण्णवेत्ता बहिया नीहरित्तए ॥ २१० ॥ कप्पइ णिग्गंथाण वा णिग्गंशीण वा पाडिहारियं वा सागारियसंतियं वा सेज्जासंथारगं दोच्चं पि ओग्गहं अणुण्णवेत्ता बहिया नीहरित्तए ॥ २११ ॥ नो कप्पइ णिग्गंथाण वा णिग्गंशीण वा पाडिहारियं वा सागारियसंतियं वा सेज्जासंथारगं सव्वप्पणा अ(पच्च)प्पिणित्ता दोच्चं पि (तमेव) ओग्गहं अणुण्णवेत्ता अहिट्ठित्तए, कप्पइ (०) अणुण्णवेत्ता (०) ॥ २१२ ॥ नो कप्पइ णिग्गंथाण वा णिग्गंशीण वा पुव्वामेव ओग्गहं ओगिण्हित्ता तओ पच्छा अणुण्णवेत्ता ॥ २१३ ॥ कप्पइ णिग्गंथाण वा णिग्गंशीण वा पुव्वामेव ओग्गहं अणुण्णवेत्ता तओ पच्छा ओगिण्हित्तए ॥ २१४ ॥ अह पुण एवं जाणेज्जा, इह खल्ल णिग्गंथाण वा णिग्गंशीण वा नो सुलमे पाडिहारिए सेज्जासंथारए ति कट्ठु एव ण्हं कप्पइ पुव्वामेव ओग्गहं ओगिण्हित्ता तओ पच्छा अणुण्णवेत्ता, मा व(डु)ह(ओ)उ अज्जो० व(त्तियं)इ अणुलोमेणं अणुलोमेयव्वे सिया ॥ २१५ ॥ णिग्गंथस्स णं गाहावइकुलं पिंडवायपडियाए अणुपविट्ठस्स अहालहुसए उवगरणजाए परिब्भट्ठे सिया, तं च केइ साहम्मिए पासेज्जा, कप्पइ से सागारकडं गहाय जत्थेव (ते) अण्णमण्णं पासेज्जा तत्थेव एवं वएज्जा-इ(मं ते)मे मे अज्जो ! किं परिण्णाए ? से य वएज्जा-परिण्णाए, तस्सेव पडिणिज्जाएयव्वे सिया, से य वएज्जा-नो परिण्णाए, तं नो अप्पणा परिभुं(जए)जेज्जा नो अ(ण्णेसिं)ण्णमण्णस्स दावए, एगंते बहुफासुए (पएसे पडिलेहिता) थंडिल्ले परिट्ठवेयव्वे सिया ॥ २१६ ॥ णिग्गंथस्स णं बहिया विचारभूमिं वा विहारभूमिं वा णिक्खंतस्स अहालहुसए उवगरणजाए परिब्भट्ठे सिया, तं च केइ साहम्मिए पासेज्जा, कप्पइ से सागारकडं गहाय जत्थेव अण्णमण्णं पासेज्जा तत्थेव एवं वएज्जा-इमे (ते) मे अज्जो ! किं परिण्णाए ? से य वएज्जा-परिण्णाए, तस्सेव पडिणिज्जाएयव्वे सिया, से य वएज्जा-नो परिण्णाए, तं नो अप्पणा परिभुंजेज्जा नो अण्णमण्णस्स दावए, एगंते बहुफासुए थंडिल्ले परिट्ठवेयव्वे सिया ॥ २१७ ॥

णिग्गंथस्स णं गामाणुगामं दूइज्जमाणस्स अण्णयरे उवगरणजाए परिब्भट्ठे सिया, तं च केइ साहम्मिए पासेज्जा, कप्पइ से सागारकळं गहाय दूर(मवि)मेवयद्धाणं परिवहित्तए, जत्थेव अण्णमण्णं पासेज्जा तत्थेव एवं वएज्जा-इमे भे अज्जो ! किं परिण्णाए ? से य वएज्जा-परिण्णाए, तस्सेव पडिणिज्जाएयव्वे सिया, से य वएज्जा-नो परिण्णाए, तं नो अप्पणा परिभुंजेज्जा नो अण्णमण्णस्स दावए, एगंते बहुफासुए थंडिल्ले परिट्ठेयव्वे सिया ॥ २१८ ॥ कप्पइ णिग्गंथाण वा णिग्गंथीण वा अइरेण-पडिग्गहं अण्णमण्णस्स अट्ठाए (दूरमवि अद्धाणं परिवहित्तए) धारेत्तए वा परिग्गहित्तए वा सो वा णं धारेस्सइ अहं वा णं धारेस्सामि अण्णो वा णं धारेस्सइ, नो से कप्पइ ते अणापुच्छिय अणामंतिय अण्णमण्णेसिं दाउं वा अणुप्पयाउं वा, कप्पइ से ते आपुच्छिय आमंतिय अण्णमण्णेसिं दाउं वा अणुप्पयाउं वा ॥ २१९ ॥ अट्ठ कवलप्पमाणमेत्ते आहारं आहारेमाणे (समणे) णिग्गंथे अप्पाहारे, वार(दुवाल)स कवलप्पमाणमेत्ते आहारं आहारेमाणे णिग्गंथे अवद्धोमोयरिया, सोलस कवलप्पमाणमेत्ते आहारं आहारेमाणे णिग्गंथे दुभागपत्ते, चउवीसं कवलप्पमाणमेत्ते आहारं आहारेमाणे णिग्गंथे ओ(पतो)मोयरिया, एगतीसं कवलप्पमाणमेत्ते आहारं आहारेमाणे णिग्गंथे किंचूणोमोयरिया, बत्तीसं कवलप्पमाणमेत्ते आहारं आहारेमाणे णिग्गंथे पमाणपत्ते, एत्तो एगेण वि कउले(घासे)णं ऊणगं आहारं आहारेमाणे समणे णिग्गंथे णो पकामरसभोइ-त्ति वत्तव्वं सिया ॥ २२० ॥ ति-वेमि ॥ ववहारस्स अट्ठमो उद्देसओ समत्तो ॥ ८ ॥

### ववहारस्स णवमो उद्देसओ

सागारियस्स आएसे अंतो वगडाए भुंजइ निट्ठिए नि(सि)सट्ठे पाडिहारिए, तम्हा दावए, नो से कप्पइ पडिगाहेत्तए ॥ २२१ ॥ सागारियस्स आएसे अंतो वगडाए भुंजइ निट्ठिए निसट्ठे अपाडिहारिए, तम्हा दावए, एवं से कप्पइ पडिगाहेत्तए ॥ २२२ ॥ सागारियस्स आएसे बाहिं वगडाए भुंजइ निट्ठिए निसट्ठे पाडिहारिए, तम्हा दावए, नो से कप्पइ पडिगाहेत्तए ॥ २२३ ॥ सागारियस्स आएसे बाहिं वगडाए भुंजइ निट्ठिए निसट्ठे अपाडिहारिए, तम्हा दावए, एवं से कप्पइ पडिगाहेत्तए ॥ २२४ ॥ सागारियस्स दासे वा वेसे वा भयए वा भइण्णए वा अंतो वगडाए भुंजइ निट्ठिए निसट्ठे पाडिहारिए, तम्हा दावए, नो से कप्पइ पडिगाहेत्तए ॥ २२५ ॥ सागारियस्स दासे (इ) वा वेसे वा भयए वा भइण्णए (पेसे) वा अंतो वगडाए भुंजइ निट्ठिए निसट्ठे अपाडिहारिए, तम्हा दावए, एवं से कप्पइ पडिगाहेत्तए ॥ २२६ ॥ सागारियस्स दासे वा वेसे वा भयए वा भइण्णए वा बाहिं वगडाए

भुंजइ निट्टिए निसट्ठे पाडिहारिए, तम्हा दावए, नो से कप्पइ पडिगाहेत्तए ॥ २२७ ॥  
 सागारियस्स दासे वा वेसे वा भयए वा भइण्णए वा बाहिं वगडाए भुंजइ निट्टिए  
 निसट्ठे अपाडिहारिए, तम्हा दावए, एवं से कप्पइ पडिगाहेत्तए ॥ २२८ ॥  
 सागारिय(स्स)णायए सिया सागारियस्स एगवगडाए अंतो (सागारियस्स) एगपयाए  
 सागारियं चो(च उ)वजीवइ, तम्हा दावए, णो से कप्पइ पडिगाहेत्तए ॥ २२९ ॥  
 सागारियणायए सिया सागारियस्स एगवगडाए अंतो अभिणिपयाए सागारियं चोव-  
 जीवइ, तम्हा दावए, णो से कप्पइ पडिगाहेत्तए ॥ २३० ॥ सागारियणायए सिया  
 सागारियस्स एगवगडाए बाहिं एगपयाए सागारियं चोवजीवइ, तम्हा दावए, णो से  
 कप्पइ पडिगाहेत्तए ॥ २३१ ॥ सागारियणायए सिया सागारियस्स एगवगडाए  
 बाहिं अभिणिपयाए सागारियं चोवजीवइ, तम्हा दावए, णो से कप्पइ पडिगाहेत्तए  
 ॥ २३२ ॥ सागारियणायए सिया सागारियस्स अभिणिव्वगडाए एगदुवाराए एग-  
 णिक्खमणपवेसाए अंतो एगपयाए सागारियं चोवजीवइ, तम्हा दावए, णो से कप्पइ  
 पडिगाहेत्तए ॥ २३३ ॥ सागारियणायए सिया सागारियस्स अभिणिव्वगडाए एग-  
 दुवाराए एगणिक्खमणपवेसाए अंतो अभिणिपयाए सागारियं चोवजीवइ, तम्हा  
 दावए, णो से कप्पइ पडिगाहेत्तए ॥ २३४ ॥ सागारियणायए सिया सागारियस्स  
 अभिणिव्वगडाए एगदुवाराए एगणिक्खमणपवेसाए बाहिं एगपयाए सागारियं चोव-  
 जीवइ, तम्हा दावए, णो से कप्पइ पडिगाहेत्तए ॥ २३५ ॥ सागारियणायए सिया  
 सागारियस्स अभिणिव्वगडाए एगदुवाराए एगणिक्खमणपवेसाए बाहिं अभिणिपयाए  
 सागारियं चोवजीवइ, तम्हा दावए, णो से कप्पइ पडिगाहेत्तए ॥ २३६ ॥ सागा-  
 रियस्स चक्कियासाला साहारणवक्कयपउत्ता, तम्हा दावए, णो से कप्पइ पडिगाहेत्तए  
 ॥ २३७ ॥ सागारियस्स चक्कियासाला णिस्साहारणवक्कयपउत्ता, तम्हा दावए, एवं  
 से कप्पइ पडिगाहेत्तए ॥ २३८ ॥ सागारियस्स गोळियसाला साहारणवक्कयपउत्ता,  
 तम्हा दावए, णो से कप्पइ पडिगाहेत्तए ॥ २३९ ॥ सागारियस्स गोळियसाला  
 णिस्साहारणवक्कयपउत्ता, तम्हा दावए, एवं से कप्पइ पडिगाहेत्तए ॥ २४० ॥  
 सागारियस्स वो(बो)धियसाला साहारणवक्कयपउत्ता, तम्हा दावए, णो से कप्पइ  
 पडिगाहेत्तए ॥ २४१ ॥ सागारियस्स वोधियसाला णिस्साहारणवक्कयपउत्ता, तम्हा  
 दावए, एवं से कप्पइ पडिगाहेत्तए ॥ २४२ ॥ सागारियस्स दोसियसाला साहारण-  
 वक्कयपउत्ता, तम्हा दावए, णो से कप्पइ पडिगाहेत्तए ॥ २४३ ॥ सागारियस्स  
 दोसियसाला णिस्साहारणवक्कयपउत्ता, तम्हा दावए, एवं से कप्पइ पडिगाहेत्तए  
 ॥ २४४ ॥ सागारियस्स सोत्थियसाला साहारणवक्कयपउत्ता, तम्हा दावए, णो से



कप्पइ पडिगाहेत्तए ॥ २४५ ॥ सागारियस्स सोत्तियसाला णिस्साहारणवक्कयपउत्ता,  
 तम्हा दावए, एवं से कप्पइ पडिगाहेत्तए ॥ २४६ ॥ सागारियस्स बोडियसाला  
 साहारणवक्कयपउत्ता, तम्हा दावए, णो से कप्पइ पडिगाहेत्तए ॥ २४७ ॥ सागा-  
 रियस्स बोडियसाला णिस्साहारणवक्कयपउत्ता, तम्हा दावए, एवं से कप्पइ पडि-  
 गाहेत्तए ॥ २४८ ॥ सागारियस्स गंधियसाला साहारणवक्कयपउत्ता, तम्हा दावए,  
 णो से कप्पइ पडिगाहेत्तए ॥ २४९ ॥ सागारियस्स गंधियसाला णिस्साहारणवक्कय-  
 पउत्ता, तम्हा दावए, एवं से कप्पइ पडिगाहेत्तए ॥ २५० ॥ सागारियस्स सोडिय-  
 साला साहारणवक्कयपउत्ता, तम्हा दावए, णो से कप्पइ पडिगाहेत्तए ॥ २५१ ॥  
 सागारियस्स सोडियसाला णिस्साहारणवक्कयपउत्ता, तम्हा दावए, एवं से कप्पइ  
 पडिगाहेत्तए ॥ २५२ ॥ सागारियस्स ओसहीओ संथडाओ, तम्हा दावए, णो से  
 कप्पइ पडिगाहेत्तए ॥ २५३ ॥ सागारियस्स ओसहिओ असंथडाओ, तम्हा दावए,  
 एवं से कप्पइ पडिगाहेत्तए ॥ २५४ ॥ सागारियस्स अंवफला संथडा, तम्हा दावए,  
 णो से कप्पइ पडिगाहेत्तए ॥ २५५ ॥ सागारियस्स अंवफला असंथडा, तम्हा  
 दावए, एवं से कप्पइ पडिगाहेत्तए ॥ २५६ ॥ सागारियणायए सिया सागारियस्स  
 एगवगडाए एगदुवाराए एगणिक्खमणपवेसाए सागारियस्स एगवयू सागारियं च  
 उवजीवइ, तम्हा दावए, णो से कप्पइ पडिगाहेत्तए ॥ २५७ ॥ सागारियणायए सिया  
 सागारियस्स एगवगडाए एगदुवाराए एगणिक्खमणपवेसाए सागारियस्स अभिणिवयू  
 सागारियं च उवजीवइ, तम्हा दावए, णो से कप्पइ पडिगाहेत्तए ॥ २५८ ॥  
 सागारियणायए सिया सागारियस्स अभिणिव्वगडाए अभिणिदुवाराए अभिणिक्ख-  
 मणपवेसाए सागारियस्स एगवयू सागारियं च उवजीवइ, तम्हा दावए, णो से  
 कप्पइ पडिगाहेत्तए ॥ २५९ ॥ सागारियणायए सिया सागारियस्स अभिणिव्वगडाए  
 अभिणिदुवाराए अभिणिक्खमणपवेसाए सागारियस्स अभिणिवयू सागारियं च  
 उवजीवइ, तम्हा दावए, णो से कप्पइ पडिगाहेत्तए ॥ २६० ॥ सत्तसत्तमिया णं  
 भिक्खुपडिमा (णं) एगूणपण्णाए राइंदिएहिं एगेण छण्णउएणं भिक्खासएणं अहासुत्तं  
 अहाकप्पं अहामग्गं अहातच्चं अहासम्म(मकाएणं)मं फासि(त्ता)या पालिया (साहिता)  
 तीरिया किट्टिया (आणाए) अणुपालिया भवइ ॥ २६१ ॥ अट्टअट्टमिया णं भिक्खु-  
 पडिमा चउसट्ठीए राइंदिएहिं दोहि य अट्टासीएहिं भिक्खासएहिं अहासुत्तं अहाकप्पं  
 अहामग्गं अहातच्चं अहासम्मं फासिया पालिया तीरिया किट्टिया अणुपालिया भवइ  
 ॥ २६२ ॥ णवणवमिया णं भिक्खुपडिमा एगासीए राइंदिएहिं चउहि य पंचुत्तरेहिं  
 भिक्खासएहिं अहासुत्तं अहाकप्पं अहामग्गं अहातच्चं अहासम्मं फासिया पालिया

तीरिया किट्टिया अणुपालिया भवइ ॥ २६३ ॥ दसदसमिया णं भिक्खुपडिमा एगेणं राइंदियसएणं अद्धछट्टेहि य भिक्खासएहिं अहासुत्तं अहाकप्पं अहामगं अहातच्चं अहा-  
सम्मं फासिया पालिया तीरिया किट्टिया अणुपालिया भवइ ॥ २६४ ॥ दो पडिमाओ  
पण्णत्ताओ, तंजहा-खुड्डिया वा (चेव) मोयपडिमा महल्लिया वा मोयपडिमा, खुड्डियणं  
मोयपडिमं पडिवण्णस्स अणगारस्स कप्पइ पढ(मेसरद)मणिदाहकालसमयंसि वा  
चरिमणिदाहकालसमयंसि वा बहिया गामस्स वा जाव रायहाणीए (संणिवेसंसि) वा  
वणंसि वा वणदुग्गंसि वा पव्वयंसि वा पव्वयदुग्गंसि वा, भोच्चा आरुभइ चोइसमेणं  
पारेइ, अभोच्चा आरुभइ सोलसमेणं पारेइ, एवं खलु एसा खुड्डिया मोयपडिमा अहा-  
सुत्तं जाव अणुपालिता भवइ ॥ २६५ ॥ महल्लियणं मोयपडिमं पडिवण्णस्स अणगारस्स  
कप्पइ से पढमणिदाहकालसमयंसि वा चरिमणिदाहकालसमयंसि वा बहिया गामस्स  
वा जाव रायहाणीए वा वणंसि वा वणदुग्गंसि वा पव्वयंसि वा पव्वयदुग्गंसि वा, भोच्चा  
आरुभइ, सोलसमेणं पारेइ, अभोच्चा आरुभइ, अट्टारसमेणं पारेइ, एवं खलु एसा मह-  
ल्लिया मोयपडिमा अहासुत्तं जाव अणुपालिता भवइ ॥ २६६ ॥ संखादत्तियस्स णं  
(भिक्खुस्स पडिग्गहधारिस्स गाहावइकुलं पिंडवायपडियाए अणुप्पविट्ठस्स) जावइयं  
केइ अंतो पडिग्गहंसि उ(वित्ता)वइत्तु दलएज्जा तावइयाओ (ताओ) दत्तीओ वत्तव्वं  
सिया, तत्थ से केइ छ[प्प]व्वएण वा दू(दुस्)सएण वा वालएण वा अंतो पडिग्गहंसि  
उविता दलएज्जा, सा (सव्वा) वि णं सा एगा दत्ती वत्तव्वं सिया, तत्थ से बहवे भुंज-  
माणा सव्वे ते सयं (२) पिं(डसाहणियं)डं अंतो पडिग्गहंसि उविता दलएज्जा, सव्वा  
वि णं सा एगा दत्ती वत्तव्वं सिया ॥ २६७ ॥ (संखादत्तियस्स णं भिक्खुस्स) पाणि-  
पडिग्गहियस्स णं (गा०) जावइयं केइ अंतो पाणिंसि उवइत्तु दलएज्जा तावइयाओ  
दत्तीओ वत्तव्वं सिया, तत्थ से केइ छव्वएण वा दूसएण वा वालएण वा अंतो पाणिंसि  
उविता दलएज्जा, सा वि णं सा एगा दत्ती वत्तव्वं सिया, तत्थ से बहवे भुंजमाणा सव्वे  
ते सयं (एगं) पिं(ड)डं अंतो पाणिंसि उविता दलएज्जा, सव्वा वि णं सा एगा दत्ती  
वत्तव्वं सिया ॥ २६८ ॥ तिविहे उवहडे पण्णत्ते, तंजहा-खुड्ढोवहडे फलिओवहडे  
संसट्ठोवहडे ॥ २६९ ॥ तिविहे ओग्गहिए पण्णत्ते, तंजहा-जं च ओग्गिण्हइ, जं च  
साहरइ, जं च आसगंसि पक्खिवइ, एगे एवमाहंसु ॥ २७० ॥ (एगे पुण एव माहंसु)  
दुविहे ओग्गहिए पण्णत्ते, तंजहा-जं च ओग्गिण्हइ, जं च आसगंसि पक्खिवइ ॥ २७१ ॥  
त्ति-वेमि ॥ ववहारस्स णवमो उद्देसओ समत्तो ॥ ९ ॥

### ववहारस्स दसमो उद्देसओ

दो पडिमाओ पण्णत्ताओ, तंजहा-जवमज्झा य चंदपडिमा वइरमज्झा य

चंदपडिमा, जवमज्झणं चंदपडिमं पडिवणस्स अणगारस्स निच्चं (मासं) वोसट्ठकाए चियत्तदेहे जे केइ परीसहो(उ)वसग्गा समु(उ)प्पज्जंति दिव्वा वा माणुस्सग्गा वा तिरिक्खजोणिया वा(अणुलोमा वा...), ते (सव्वे)उप्पण्णे सम्मं स(हेज्जा)हइ खमइ तितिकखेइ अहियासेइ ॥ २७२ ॥ जवमज्झणं चंदपडिमं पडिवणस्स अणगारस्स सुक्कपक्खस्स से पाडिवए कप्पइ एगा दत्ती भोयणस्स पडिगाहेत्तए एगा पाणस्स, (सव्वेहिं दुपयचउप्पयाइएहिं आहारकंखीहिं सत्तेहिं पडिणियत्तेहिं) अण्णायउंछं सुद्धोवहडं णिज्जुहिता बहवे समणमाहणअइहिकिवणवणीमगा, कप्पइ से एगस्स भुंजमाणस्स पडिगाहेत्तए, णो दोण्हं णो तिण्हं णो चउण्हं णो पंचण्हं, णो गुव्विणीए णो बालवत्थाए णो दारगं पेज्जमाणीए, णो (से कप्पइ) अंतो एलुयस्स दो वि पाए साहट्ठु दलमाणीए, (पडिगाहेत्तए अह पुण एवं जाणिज्जा) णो बाहिं एलुयस्स दो वि पाए साहट्ठु दलमाणीए, एगं पायं अंतो किच्चा एगं पायं बाहिं किच्चा एलुयं विक्खंभइत्ता (एयाए एसणाए एसमाणे लब्भेज्जा आहारे० एयाए एसणाए एसमाणे णो लब्भेज्जा णो आहारेज्जा) एवं दलयइ, एवं से कप्पइ पडिगाहेत्तए, एवं णो दलयइ, एवं से णो कप्पइ पडिगाहेत्तए, बिइजाए से कप्पइ दोण्णि दत्तीओ भोयणस्स पडिगाहेत्तए दोण्णि पाणस्स (सव्वेहिं...), तइयाए से कप्पइ तिण्णि दत्तीओ भोयणस्स पडिगाहेत्तए तिण्णि पाणस्स, चउत्थीए से कप्पइ चउदत्तीओ भोयणस्स पडिगाहेत्तए चउपाणस्स, पंचमीए से कप्पइ पंचदत्तीओ भोयणस्स पडिगाहेत्तए पंचपाणस्स, छट्ठीए से कप्पइ छ दत्तीओ भोयणस्स पडिगाहेत्तए छ पाणस्स, सत्तमीए से कप्पइ सत्त दत्तीओ भोयणस्स पडिगाहेत्तए सत्त पाणस्स, अट्ठमीए से कप्पइ अट्ठ दत्तीओ भोयणस्स पडिगाहेत्तए अट्ठ पाणस्स, णवमीए से कप्पइ णव दत्तीओ भोयणस्स पडिगाहेत्तए णव पाणस्स, दसमीए से कप्पइ दस दत्तीओ भोयणस्स पडिगाहेत्तए दस पाणस्स, एगार(सी)समीए से कप्पइ एगारस दत्तीओ भोयणस्स पडिगाहेत्तए एगारस पाणस्स, बारसमीए से कप्पइ बारस दत्तीओ भोयणस्स पडिगाहेत्तए बारस पाणस्स, तेरसमीए से कप्पइ तेरस दत्तीओ भोयणस्स पडिगाहेत्तए तेरस पाणस्स, चोइसमीए से कप्पइ चोइस दत्तीओ भोयणस्स पडिगाहेत्तए चोइस पाणस्स, पण्णरसमी(पुण्णिमा)ए से कप्पइ पण्णरस दत्तीओ भोयणस्स पडिगाहेत्तए पण्णरस पाणस्स, बहुलपक्खस्स से पाडिवए कर्पंति चोइस (दत्तीओ भोयणस्स पडिगाहेत्तए चोइस पाणस्स सव्वेहिं दुप्पय जाव णो आहारेज्जा), बिइयाए कप्पइ तेरस दत्तीओ भोयणस्स पडिगाहेत्तए तेरस पाणस्स जाव णो आहारेज्जा, तइयाए कप्पइ बारस दत्तीओ भोयणस्स पडिगाहेत्तए बारस पाणस्स जाव णो आहारेज्जा, चउत्थीए

कप्पइ एकारस दत्तीओ भोयणस्स जाव णो आहारेजा, पंचमीए कप्पइ दस दत्तीओ भोयणस्स जाव णो आहारेजा, छट्ठीए कप्पइ णव दत्तीओ भोयणस्स जाव णो आहारेजा, सत्तमीए कप्पइ अट्ठ दत्तीओ भोयणस्स जाव णो आहारेजा, अट्ठमीए कप्पइ सत्त दत्तीओ भोयणस्स जाव णो आहारेजा, णवमीए कप्पइ छ दत्तीओ भोयणस्स जाव णो आहारेजा, दसमीए कप्पइ पंच दत्तीओ भोयणस्स जाव णो आहारेजा, एकारसीए कप्पइ चउदत्तीओ भोयणस्स जाव णो आहारेजा, वारसीए कप्पइ तिदत्तीओ भोयणस्स जाव णो आहारेजा, तेरसीए कप्पइ दो दत्तीओ भोयणस्स जाव णो आहारेजा. चउद्सीए कप्पइ एगा दत्ती भोयणस्स जाव णो आहारेजा, अमावासाए से य अभत्तट्ठे भवइ, एवं खलु एसा जवमज्झचंदपडिमा अहासुत्तं अहाकप्पं जाव अणुपालित्ता भवइ ॥ २७३ ॥ वइरमज्झणं चंदपडिमं पडिवण्णस्स अणगारस्स मासं वोसट्ठकाए चियत्तदेहे जे केइ परिसहोवसग्गा समुप्पज्जंति, तंजहा-दिव्वा वा माणुस्सगा वा तिरिक्खजोणिया वा अणुलोमा वा पडिलोमा वा, तत्थ अणुलोमा वा ताव वंदेजा वा नमंसेजा वा सक्कारेजा वा सम्माणेजा वा कल्लणं मंगलं देवयं चेइयं पज्जुवासेजा, तत्थ पडिलोमा वा अण्णयरें पंदेण वा लट्ठीण वा सुट्ठीण वा जोत्तेण वा वेत्तेण वा कसेण वा काए आउट्टेजा, ते सव्वे उप्पण्णे सम्मं सहेजा खमेजा तिइक्खेजा अहियासेजा ॥ २७४ ॥ वइरमज्झणं चंदपडिमं पडिवण्णस्स अणगारस्स बहुलपक्खस्स पाडिवए कप्पइ पण्णरस दत्तीओ भोयणस्स पडिगाहेत्तए पण्णरस पाणगस्स सव्वेहिं दुप्पयचउप्पयाइएहिं आहारकंखेहिं जाव णो आहारेजा, बिइयाए से कप्पइ चउद्स दत्तीओ भोयणस्स पडिगाहेत्तए जाव णो आहारेजा, तइयाए कप्पइ तेरस दत्तीओ भोयणस्स जाव णो आहारेजा, चउत्थीए कप्पइ वारस दत्तीओ भोयणस्स जाव णो आहारेजा, पंचमीए कप्पइ एगारस दत्तीओ भोयणस्स जाव णो आहारेजा, छट्ठीए कप्पइ दस दत्तीओ भोयणस्स जाव णो आहारेजा, सत्तमीए कप्पइ णव दत्तीओ भोयणस्स जाव णो आहारेजा, अट्ठमीए कप्पइ अट्ठ दत्तीओ भोयणस्स जाव णो आहारेजा, णवमीए कप्पइ सत्त दत्तीओ भोयणस्स जाव णो आहारेजा, दसमीए कप्पइ छ दत्तीओ भोयणस्स जाव णो आहारेजा, एगारसीए कप्पइ पंच दत्तीओ भोयणस्स जाव णो आहारेजा, वारसीए कप्पइ चउदत्तीओ भोयणस्स जाव णो आहारेजा, तेरसीए कप्पइ तिण्णि दत्तीओ भोयणस्स जाव णो आहारेजा, चउद्सीए कप्पइ दो दत्तीओ भोयणस्स जाव णो आहारेजा, अमावासाए कप्पइ एगा दत्ती भोयणस्स पडिगाहेत्तए जाव णो आहारेजा, सुक्कपक्खस्स पाडिवए से कप्पइ दो

इत्तीओ भोयणस्स जाव णो आहारेज्जा, बिइयाए से कप्पइ तिण्णि दत्तीओ भोय-  
 णस्स जाव णो आहारेज्जा, तइयाए से कप्पइ चउदत्तीओ भोयणस्स जाव णो  
 आहारेज्जा, चउत्थीए से कप्पइ पंचदत्तीओ भोयणस्स जाव णो आहारेज्जा,  
 पंचमीए कप्पइ छ दत्तीओ भोयणस्स जाव णो आहारेज्जा, छट्ठीए कप्पइ सत्त  
 दत्तीओ भोयणस्स जाव णो आहारेज्जा, सत्तमीए कप्पइ अट्ठ दत्तीओ भोय-  
 णस्स जाव णो आहारेज्जा, अट्ठमीए कप्पइ णव दत्तीओ भोयणस्स जाव णो  
 आहारेज्जा, णवमीए कप्पइ दस दत्तीओ भोयणस्स जाव णो आहारेज्जा, दसमीए  
 कप्पइ एगारस दत्तीओ भोयणस्स जाव णो आहारेज्जा, एगारसीए कप्पइ बारस  
 दत्तीओ भोयणस्स जाव णो आहारेज्जा, बारसीए कप्पइ तेरस दत्तीओ भोय-  
 णस्स जाव णो आहारेज्जा, तेरसीए कप्पइ चउद्दस दत्तीओ भोयणस्स जाव णो  
 आहारेज्जा, चउद्दसीए कप्पइ पण्णरस दत्तीओ भोयणस्स पडिगाहेत्तए, पण्णरस  
 पाणगस्स पडिगाहेत्तए, सब्बेहिं दुप्पयचउप्पय जाव णो लभेज्जा णो आहारेज्जा,  
 पुण्णिमाए अभत्तट्ठे भवइ, एवं खलु एसा वइरमज्झा चंदपडिमा अहासुत्तं अहाकप्पं  
 जाव अणुपालिता भवइ ॥ २७५ ॥ पंचविहे ववहारे पण्णत्ते, तंजहा-आगमे सुए  
 आणा धारणा जीए । जत्थेव तत्थ आगमे सिया, आगमेणं ववहारं पट्ठवेज्जा, णो  
 से तत्थ आगमे सिया, जहा से तत्थ सुए सिया, सुएणं ववहारं पट्ठवेज्जा, णो से  
 तत्थ सुए सिया, जहा से तत्थ आणा सिया, आणाए ववहारं पट्ठवेज्जा, णो से तत्थ  
 आणा सिया, जहा से तत्थ धारणा सिया, धारणाए ववहारं पट्ठवेज्जा, णो से तत्थ  
 धारणा सिया, जहा से तत्थ जीए सिया, जीएणं ववहारं पट्ठवेज्जा, एएहिं पंचहिं  
 ववहारेहिं ववहारं पट्ठवेज्जा, तंजहा-आगमेणं सुएणं आणाए धारणाए जीएणं, जहा  
 से आगमे सुए आणा धारणा जीए तहा तहा ववहारे पट्ठवेज्जा, से किमाहु भंते ?  
 आगमवलिआ समणा निग्गंधा, इच्चैयं पंचविहं ववहारं जया जया जहिं जहिं तहा  
 तहा तहिं तहिं अणिसिओवस्सियं ववहारं ववहारेमाणे समणे निग्गंधे आणाए  
 आराहए भवइ ॥ २७६ ॥ चत्तारि पुरिस[जा]जाया पण्णत्ता, तंजहा-अट्ठकरे  
 णा(ममे)मं एगे णो माणकरे, माणकरे णामं एगे णो अट्ठकरे, एगे अट्ठकरे वि माण-  
 करे वि, एगे णो अट्ठकरे णो माणकरे ॥ २७७ ॥ चत्तारि पुरिसजाया पण्णत्ता,  
 तंजहा-गणट्ठकरे णामं एगे णो माणकरे, माणकरे णामं एगे णो गणट्ठकरे, एगे  
 गणट्ठकरे वि माणकरे वि, एगे णो गणट्ठकरे णो माणकरे ॥ २७८ ॥ चत्तारि  
 पुरिसजाया पण्णत्ता, तं-गणसंगहकरे णामं एगे णो माणकरे, माणकरे णामं एगे  
 णो गणसंगहकरे, एगे गणसंगहकरे वि माणकरे वि, एगे णो गणसंगहकरे णो


माणकरे ॥ २७९ ॥ चत्तारि पुरिसजाया पण्णत्ता, तंजहा-गणसो(भ)हकरे णांमं एगे  
 णो माणकरे, माणकरे णांमं एगे णो गणसोहकरे, एगे गणसोहकरे वि माणकरे वि,  
 एगे णो गणसोहकरे णो माणकरे ॥ २८० ॥ चत्तारि पुरिसजाया पण्णत्ता, तं०-  
 गणसोहिकरे णांमं एगे णो माणकरे, माणकरे णांमं एगे णो गणसोहिकरे, एगे गण-  
 सोहिकरे वि माणकरे वि, एगे णो गणसोहिकरे णो माणकरे ॥ २८१ ॥ चत्तारि  
 पुरिसजाया पण्णत्ता, तंजहा-रूवं णामेगे जहइ णो धम्मं, धम्मं णामेगे जहइ नो  
 रूवं, एगे रूवं पि जहइ धम्मं पि जहइ, एगे णो रूवं जहइ णो धम्मं जहइ ॥ २८२ ॥  
 चत्तारि पुरिसजाया पण्णत्ता, तंजहा-धम्मं णामेगे जहइ णो गणसंठिइं, गणसंठिइं  
 णामेगे जहइ णो धम्मं, एगे गणसंठिइं पि जहइ धम्मं पि जहइ, एगे णो गणसंठिइं  
 जहइ णो धम्मं जहइ ॥ २८३ ॥ चत्तारि पुरिसजाया पण्णत्ता, तंजहा-पियधम्मं  
 णामेगे णो दढधम्मं, दढधम्मं णामेगे णो पियधम्मं, एगे पियधम्मं वि दढधम्मं  
 वि, एगे णो पियधम्मं णो दढधम्मं ॥ २८४ ॥ चत्तारि आयरिया पण्णत्ता, तंजहा-  
 पव्वावणायरिए णामेगे णो उवट्ठावणायरिए, उवट्ठावणायरिए णामेगे णो पव्वावणा-  
 यरिए, एगे पव्वावणायरिए वि उवट्ठावणायरिए वि, एगे णो पव्वावणायरिए णो  
 उवट्ठावणायरिए ॥ २८५ ॥ चत्तारि आयरिया पण्णत्ता, तंजहा-उद्देसणायरिए णामेगे  
 णो वायणायरिए, वायणायरिए णामेगे णो उद्देसणायरिए, एगे उद्देसणायरिए वि  
 वायणायरिए वि, एगे णो उद्देसणायरिए णो वायणायरिए ॥ २८६ ॥ धम्मायरियस्स  
 चत्तारि अंतेवासी पण्णत्ता, तंजहा-पव्वावणंतेवासी णामेगे णो उवट्ठावणंतेवासी,  
 उवट्ठावणंतेवासी णामेगे णो पव्वावणंतेवासी, एगे पव्वावणंतेवासी वि उव-  
 ट्ठावणंतेवासी वि, एगे णो पव्वावणंतेवासी णो उवट्ठावणंतेवासी ॥ २८७ ॥ चत्तारि  
 अंतेवासी पण्णत्ता, तं०-उद्देसणंतेवासी णामेगे णो वायणंतेवासी, वायणंतेवासी  
 णामेगे णो उद्देसणंतेवासी, एगे उद्देसणंतेवासी वि वायणंतेवासी वि, एगे णो उद्दे-  
 सणंतेवासी णो वायणंतेवासी ॥ २८८ ॥ चत्तारि धम्मायरिया पण्णत्ता, तंजहा-  
 पव्वावणधम्मायरिए णामेगे णो उवट्ठावणधम्मायरिए, उवट्ठावणधम्मायरिए णामेगे  
 णो पव्वावणधम्मायरिए, एगे पव्वावणधम्मायरिए वि उवट्ठावणधम्मायरिए वि, एगे  
 णो पव्वावणधम्मायरिए णो उवट्ठावणधम्मायरिए ॥ २८९ ॥ चत्तारि धम्मायरिया  
 पण्णत्ता, तं०-उद्देसणधम्मायरिए णामेगे णो वायणधम्मायरिए, वायणधम्मायरिए  
 णामेगे णो उद्देसणधम्मायरिए, एगे उद्देसणधम्मायरिए वि वायणधम्मायरिए वि,  
 एगे णो उद्देसणधम्मायरिए णो वायणधम्मायरिए ॥ २९० ॥ चत्तारि धम्मंतेवासी  
 पण्णत्ता, तंजहा-पव्वावणधम्मंतेवासी णामेगे णो उवट्ठावणधम्मंतेवासी, उवट्ठावण-

धम्मंतेवासी णामेगे णो पव्वावणधम्मंतेवासी, एगे पव्वावणधम्मंतेवासी वि उवट्ठा-  
वणधम्मंतेवासी वि, एगे णो पव्वावणधम्मंतेवासी णो उवट्ठावणधम्मंतेवासी  
॥ २९१ ॥ चत्तारि धम्मंतेवासी पण्णत्ता, तंजहा-उट्ठेसणधम्मंतेवासी णामेगे णो  
वायणधम्मंतेवासी, वायणधम्मंतेवासी णामेगे णो उट्ठेसणधम्मंतेवासी, एगे उट्ठे-  
सणधम्मंतेवासी वि वायणधम्मंतेवासी वि, एगे णो उट्ठेसणधम्मंतेवासी णो वायण-  
धम्मंतेवासी ॥ २९२ ॥ तओ थेरभूमीओ पण्णत्ताओ, तंजहा-जाइथेरे सुयथेरे  
प(वज्जा)रियायथेरे । सट्ठिवा(वरि)सजाए (समणे णिग्गंथे) जाइथेरे, (ठाण)समवा-  
यंगं जाव सुयधारए सुयथेरे, वीसवासपरियाए परियायथेरे ॥ २९३ ॥ तओ सेह-  
भूमीओ पण्णत्ताओ, तं०-सत्तराईदिया चाउम्मासिया छम्मासिया, छम्मासिया  
उक्कोसिया, चाउम्मासिया मज्झमिया, सत्तराईणो जहणिया ॥ २९४ ॥ णो कप्पइ  
णिग्गंथाण वा णिग्गंथीण वा खुडुगं वा खुडियं वा ऊणट्ठावासजायं उवट्ठावेत्तए वा  
संभुजित्तए वा ॥ २९५ ॥ कप्पइ णिग्गंथाण वा णिग्गंथीण वा खुडुगं वा खुडियं वा  
साइरेगट्ठावासजायं उवट्ठावेत्तए वा संभुजित्तए वा ॥ २९६ ॥ णो कप्पइ णिग्गंथाण  
वा णिग्गंथीण वा खुडुगस्स वा खुडियाए वा अव्वंजणजायस्स आयारपकप्पे णामं  
अज्झयणे उद्दिस्सिए ॥ २९७ ॥ कप्पइ णिग्गंथाण वा णिग्गंथीण वा खुडुगस्स वा  
खुडियाए वा वंजणजायस्स आयारपकप्पे णामं अज्झयणे उद्दिस्सिए ॥ २९८ ॥  
तिवासपरियायस्स समणस्स णिग्गंथस्स कप्पइ आयारपकप्पे णामं अज्झयणे उद्दि-  
स्सिए ॥ २९९ ॥ चउवासपरिया(यस्स...)ए कप्पइ सूयगडे णामं अंगे उद्दिस्सिए  
॥ ३०० ॥ पंचवासपरियाए कप्पइ दसाकप्पववहारे (णाममज्झयणे) उद्दिस्सिए  
॥ ३०१ ॥ अट्ठावासपरियाए कप्पइ ठाणसमवाए (णामं अंगे) उद्दिस्सिए ॥ ३०२ ॥  
दसवासपरियाए कप्पइ वि(वाहे)याहे णामं अंगे उद्दिस्सिए ॥ ३०३ ॥ एक्कारस-  
वासपरियाए कप्पइ खुडिया विमाणपविभत्ती महल्लिया विमाणपविभत्ती अंगचूलिया  
व(वं)गचूलिया वियाहचूलिया णामं अज्झयणे उद्दिस्सिए ॥ ३०४ ॥ बारसवास-  
परियाए कप्पइ गरुलोववाए धरणोववाए वेसमणोववाए वेलंधरोववाए णामं अज्झ-  
यणे उद्दिस्सिए ॥ ३०५ ॥ तेरसवासपरियाए कप्पइ उट्ठाण(सु)परियावणिए समु-  
ट्ठाणसुए देविंदोववाए णागपरियावणिए णामं अज्झयणे उद्दिस्सिए ॥ ३०६ ॥  
चोइ(चउद्)सवासपरियाए कप्पइ सि(सु)मिणभावणा णामं अज्झयणे उद्दिस्सिए  
॥ ३०७ ॥ पण्णरसवासपरियाए कप्पइ चार(णा)णभावणा णामं अज्झयणे उद्दि-  
स्सिए ॥ ३०८ ॥ सोलसवासपरियाए कप्पइ तेयणीसंगे णामं अज्झयणे उद्दिस्सिए  
॥ ३०९ ॥ सत्तरसवासपरियाए कप्पइ आसीविसभावणा णामं अज्झयणे उद्दिस्सिए

॥ ३१० ॥ अट्टारसवासपरियागस्स समणस्स णिग्गंथस्स कप्पइ दिट्ठीविसभावणा  
 णामं अज्झयणे उद्दिस्सिए ॥ ३११ ॥ एगूणवीसवासपरियाए कप्पइ दिट्ठिवाए णामं  
 अंगे उद्दिस्सिए ॥ ३१२ ॥ वीसवासपरियाए समणे णिग्गंथे सव्वसुयाणुवाई भवइ  
 ॥ ३१३ ॥ दसविहे वेयावच्चे पण्णत्ते, तंजहा-आयरियवेयावच्चे उवज्झायवेयावच्चे  
 थेरवेयावच्चे सेहवेयावच्चे गिलाणवेयावच्चे तवस्सिवेयावच्चे साहम्मियवेयावच्चे कुल-  
 वेयावच्चे गणवेयावच्चे संघवेयावच्चे ॥ ३१४ ॥ आयरियवेयावच्चं करेमाणे समणे  
 णिग्गंथे महाणिज्जरे महापज्जवसाणे भवइ ॥ ३१५ ॥ उवज्झायवेयावच्चं करेमाणे  
 समणे णिग्गंथे महाणिज्जरे महापज्जवसाणे भवइ ॥ ३१६ ॥ थेरवेयावच्चं करेमाणे  
 समणे णिग्गंथे महाणिज्जरे महापज्जवसाणे भवइ ॥ ३१७ ॥ तवस्सिवेयावच्चं करेमाणे  
 समणे णिग्गंथे महाणिज्जरे महापज्जवसाणे भवइ ॥ ३१८ ॥ सेहवेयावच्चं करेमाणे  
 समणे णिग्गंथे महाणिज्जरे महापज्जवसाणे भवइ ॥ ३१९ ॥ गिलाणवेयावच्चं करेमाणे  
 समणे णिग्गंथे महाणिज्जरे महापज्जवसाणे भवइ ॥ ३२० ॥ साहम्मियवेयावच्चं  
 करेमाणे समणे णिग्गंथे महाणिज्जरे महापज्जवसाणे भवइ ॥ ३२१ ॥ कुलवेयावच्चं  
 करेमाणे समणे णिग्गंथे महाणिज्जरे महापज्जवसाणे भवइ ॥ ३२२ ॥ गणवेयावच्चं  
 करेमाणे समणे णिग्गंथे महाणिज्जरे महापज्जवसाणे भवइ ॥ ३२३ ॥ संघवेयावच्चं  
 करेमाणे समणे णिग्गंथे महाणिज्जरे महापज्जवसाणे भवइ ॥ ३२४ ॥ त्ति-वेमि ॥  
 ववहारस्स दसमो उद्देसओ समत्तो ॥ १० ॥ ववहारसुत्तं समत्तं ॥







णमोऽस्तु णं समणस्स भगवओ णायपुत्तमहावीरस्स

# सुत्तागमे

तत्थ णं

बिहकप्पसुत्तं

पढमो उद्देसओ

नो कप्पइ निग्गन्थाण वा निग्गन्थीण वा आमे तालपलम्बे अभिन्ने पडि(गाहि)-  
ग्गाहेत्तए ॥ १ ॥ कप्पइ निग्गन्थाण वा निग्गन्थीण वा आमे तालपलम्बे भिन्ने  
पडिग्गाहेत्तए ॥ २ ॥ कप्पइ निग्गन्थाणं पक्के तालपलम्बे भिन्ने वा अभिन्ने वा  
पडिग्गाहेत्तए ॥ ३ ॥ नो कप्पइ निग्गन्थीणं पक्के तालपलम्बे अभिन्ने पडिग्गाहेत्तए  
॥ ४ ॥ कप्पइ निग्गन्थीणं पक्के तालपलम्बे भिन्ने पडिग्गाहेत्तए, से वि य विहिभिन्ने,  
नो (चेव-णं) अविहिभिन्ने ॥ ५ ॥ से गामंसि वा नगरंसि वा खेडंसि वा कक्वडंसि  
वा मडम्बंसि वा पट्ठणंसि वा आगरंसि वा दोणमुहंसि वा निगमंसि वा रायहाणंसि  
वा आसमंसि वा संनिवेसंसि वा संवाहंसि वा घोसंसि वा अंसियंसि वा पुडमेयणंसि  
वा सपरिक्खेवंसि अवाहिरियंसि कप्पइ निग्गन्थाणं हेमन्तगिम्हासु एगं मासं वत्थए  
॥ ६ ॥ से गामंसि वा जाव रायहाणंसि वा सपरिक्खेवंसि सवाहिरियंसि कप्पइ  
निग्गन्थाणं हेमन्तगिम्हासु दो मासे वत्थए, अन्तो एगं मासं बाहिं एगं मासं;  
अन्तो वसमाणाणं अन्तोभिक्षायरिया बाहिं वसमाणाणं बाहिंभिक्षायरिया ॥ ७ ॥  
से गामंसि वा जाव रायहाणंसि वा सपरिक्खेवंसि अवाहिरियंसि कप्पइ निग्गन्थीणं  
हेमन्तगिम्हासु दो मासे वत्थए ॥ ८ ॥ से गामंसि वा जाव रायहाणंसि वा सप-  
रिक्खेवंसि सवाहिरियंसि कप्पइ निग्गन्थीणं हेमन्तगिम्हासु चत्तारि मासे वत्थए,  
अन्तो दो मासे, बाहिं दो मासे; अन्तो वस(न्ती)माणीणं अन्तोभिक्षायरिया  
बाहिं वसमाणीणं बाहिंभिक्षायरिया ॥ ९ ॥ से गामंसि वा जाव रायहाणंसि वा  
एगवगडाए एगदुवाराए एगनिक्खमणपवेसाए नो कप्पइ निग्गन्थाण य निग्गन्थीण  
य एगयओ वत्थए ॥ १० ॥ से गामंसि वा जाव रायहाणंसि वा अभिनिव्वगडाए  
अभिनिदुवाराए अभिनिक्खमणपवेसाए कप्पइ निग्गन्थाण य निग्गन्थीण य एगयओ

वत्थए ॥ ११ ॥ नो कप्पइ निग्गन्थीणं आवणगिहंसि वा र(त्था)च्छामुहंसि वा  
 सिङ्खाडगंसि वा तियंसि वा चउक्कंसि वा चच्चरंसि वा अन्तरावणंसि वा वत्थए ॥ १२ ॥  
 कप्पइ निग्गन्थाणं आवणगिहंसि वा जाव अन्तरावणंसि वा वत्थए ॥ १३ ॥ नो  
 कप्पइ निग्गन्थीणं अवङ्कुयदुवारिए उवस्सए वत्थए, एणं पत्थारं अन्तो किच्चा एणं  
 पत्थारं वाहिं किच्चा ओहाडिय(चेल)चिलिमिलियागंसि ए(वं णं)व ण्हं कप्पइ वत्थए  
 ॥ १४ ॥ कप्पइ निग्गन्थाणं अवङ्कुयदुवारिए उवस्सए वत्थए ॥ १५ ॥ कप्पइ  
 निग्गन्थीणं अन्तोलित्तयं घडिमत्तयं धारेत्तए वा परिहरित्तए वा ॥ १६ ॥ नो कप्पइ  
 निग्गन्थाणं अन्तोलित्तयं घडिमत्तयं धारेत्तए वा परिहरित्तए वा ॥ १७ ॥ कप्पइ  
 निग्गन्थाण वा निग्गन्थीण वा चेलच्चिलिमि(लि)णियं धारेत्तए वा परिहरित्तए वा  
 ॥ १८ ॥ नो कप्पइ निग्गन्थाण वा निग्गन्थीण वा दगतीरंसि चिट्ठित्तए वा निसी-  
 इत्तए वा तुयट्ठित्तए वा निहाइत्तए वा पयलाइत्तए वा, असणं वा पाणं वा खाइमं वा  
 साइमं वा आहारमाहा(रि)रेत्तए(वा), उच्चारं वा पासवणं वा खेलं वा सिङ्खाणं वा  
 परिट्ठ(वि)वेत्तए, सज्जायं वा करेत्तए, (धम्मजागरियं वा जाग(रे)रित्तए) झाणं वा  
 झाइत्तए, काउस्सगं वा ठाणं वा ठाइत्तए ॥ १९ ॥ नो कप्पइ निग्गन्थाण वा  
 निग्गन्थीण वा सचित्तकम्मे उवस्सए वत्थए ॥ २० ॥ कप्पइ निग्गन्थाण वा  
 निग्गन्थीण वा अचित्तकम्मे उवस्सए वत्थए ॥ २१ ॥ नो कप्पइ निग्गन्थीणं  
 सागारियअनिस्साए वत्थए ॥ २२ ॥ कप्पइ निग्गन्थीणं सागारियनिस्साए वत्थए  
 ॥ २३ ॥ कप्पइ निग्गन्थाणं सागारियनिस्साए वा अनिस्साए वा वत्थए ॥ २४ ॥  
 नो कप्पइ निग्गन्थाण वा निग्गन्थीण वा सागारिए उवस्सए वत्थए ॥ २५ ॥  
 कप्पइ निग्गन्थाण वा निग्गन्थीण वा अप्पसागारिए उवस्सए वत्थए ॥ २६ ॥ नो  
 कप्पइ निग्गन्थाणं इत्थिसागारिए उवस्सए वत्थए ॥ २७ ॥ कप्पइ निग्गन्थाणं  
 पुरिससागारिए उवस्सए वत्थए ॥ २८ ॥ नो कप्पइ निग्गन्थीणं पुरिससागारिए  
 उवस्सए वत्थए ॥ २९ ॥ कप्पइ निग्गन्थीणं इत्थिसागारिए उवस्सए वत्थए ॥ ३० ॥  
 नो कप्पइ निग्गन्थाणं पडिब(द्ध)द्वाए सेज्जाए वत्थए ॥ ३१ ॥ कप्पइ निग्गन्थीणं  
 पडिबद्वाए सेज्जाए वत्थए ॥ ३२ ॥ नो कप्पइ निग्गन्थाणं गाहावइकुलस्स मज्झं-  
 मज्झेणं गन्तुं वत्थए ॥ ३३ ॥ कप्पइ निग्गन्थीणं गाहावइकुलस्स मज्झंमज्झेणं  
 गन्तुं वत्थए ॥ ३४ ॥ भिक्खू य अहिगरणं कट्ठु तं अहिगरणं अविओसवेत्ता अवि-  
 ओसवियपाहुडे-इच्छाए परो आढाएज्जा, इच्छाए परो नो आढाएज्जा; इच्छाए परो  
 अब्भुट्ठेज्जा, इच्छाए परो नो अब्भुट्ठेज्जा; इच्छाए परो वन्देज्जा, इच्छाए परो नो  
 वन्देज्जा; इच्छाए परो संभुजेज्जा, इच्छाए परो नो संभुजेज्जा; इच्छाए परो संवसेज्जा,

इच्छाए परो नो संवसेज्जा; इच्छाए परो उवसमेज्जा, इच्छाए परो नो उवसमेज्जा;  
जे (जो) उवसमइ तस्स अत्थि आराहणा, जे न उवसमइ तस्स नत्थि आराहणा;  
तम्हा अप्पणा चेव उवसमियव्वं, से किमाहु भन्ते (!) ? उवसमसारं सामण्णं ॥ ३५ ॥  
नो कप्पइ निग्गन्थाण वा निग्गन्धीण वा वासावासासु चार(चरित्त)ए ॥ ३६ ॥  
कप्पइ निग्गन्थाण वा निग्गन्धीण वा हेमन्तणिम्हासु चारए ॥ ३७ ॥ नो कप्पइ  
निग्गन्थाण वा निग्गन्धीण वा वेरज्जविरुद्धरज्जंसि सज्जं गमणं सज्जं आगमणं सज्जं  
गमणागमणं क(रि)रेत्तए जे (जो) खलु निग्गन्(थो)थे वा निग्गन्धी वा वेरज्जविरुद्ध-  
रज्जंसि सज्जं गमणं सज्जं आगमणं सज्जं गमणागमणं करेइ क(रं-रिं)रेन्तं वा साइज्जइ,  
से दुहओ(वि) वीइक्कममाणे आवज्जइ चाउम्मासियं परिहारट्ठाणं अणुगघाइयं ॥ ३८ ॥  
निग्गन्थं च णं गाहावइकुलं पिण्डवायपडियाए अणुप्पविट्ठं केइ वत्थेण वा पडिग्गहेण  
वा कम्बलेण वा पायपुञ्छणेण वा उवनिमन्तेज्जा, कप्पइ से सागारकडं गहाय आयरि-  
यपायमूले ठवेत्ता दोच्चं पि ओग्गहं अणुन्नवेत्ता परिहारं परिहरित्तए ॥ ३९ ॥ निग्गन्थं च  
णं बहिया वियारभूमिं वा विहारभूमिं वा निक्खन्तं समाणं केइ वत्थेण वा पडिग्गहेण  
वा कम्बलेण वा पायपुञ्छणेण वा उवनिमन्तेज्जा, कप्पइ से सागारकडं गहाय  
आयरियपायमूले ठवेत्ता दोच्चं पि ओग्गहं अणुन्नवेत्ता परिहारं परिहरित्तए ॥ ४० ॥  
निग्गन्थं च णं गाहावइकुलं पिण्डवायपडियाए अणुप्पविट्ठं केइ वत्थेण वा पडिग्गहेण  
वा कम्बलेण वा पायपुञ्छणेण वा उवनिमन्तेज्जा, कप्पइ से सागारकडं गहाय  
प(वि)वत्ति(णि)णीपायमूले ठवेत्ता दोच्चं पि ओग्गहं अणुन्नवेत्ता परिहारं परिहरित्तए  
॥ ४१ ॥ निग्गन्थं च णं बहिया वियारभूमिं वा विहारभूमिं वा निक्खन्तं समाणिं  
केइ वत्थेण वा पडिग्गहेण वा कम्बलेण वा पायपुञ्छणेण वा उवनिमन्तेज्जा, कप्पइ  
से सागारकडं गहाय पवत्तिणीपायमूले ठवेत्ता दोच्चं पि ओग्गहं अणुन्नवेत्ता परिहारं  
परिहरित्तए ॥ ४२ ॥ नो कप्पइ निग्गन्थाण वा निग्गन्धीण वा राओ वा वियाले  
वा असणं वा ४ पडिग्गाहेत्तए नन्नत्(थे)थ एगेणं पुव्वपडिलेहिणं सेज्जासंथारएणं  
॥ ४३ ॥ नो कप्पइ निग्गन्थाण वा निग्गन्धीण वा राओ वा वियाले वा वत्थं वा  
पडिग्गहं वा कम्बलं वा पायपुञ्छणं वा पडिग्गाहेत्तए, नन्नत्थ एगाए हरियाह(रि)-  
डियाए, सा वि (य) याइं परिभुत्ता वा धोया वा रत्ता वा घट्ठा वा मट्ठा वा संपधूमिया  
वा ॥ ४४ ॥ नो कप्पइ निग्गन्थाण वा निग्गन्धीण वा राओ वा वियाले वा अद्धा-  
णगम(णा)एणं एत्तए, (नो...) संखडिं संखडिपडियाए एत्तए ॥ ४५ ॥ नो कप्पइ  
निग्गन्थस्स एगाणियस्स राओ वा वियाले वा बहिया वियारभूमिं वा विहारभूमिं वा  
निक्खमित्तए वा पविसित्तए वा, कप्पइ से अप्पविइयस्स वा अप्पतइयस्स वा राओ

वा वियाले वा बहिया वियारभूमिं वा विहारभूमिं वा निक्खमित्तए वा पविसित्तए वा ॥ ४६ ॥ नो कप्पइ निग्गन्थीए एगाणिद्याए राओ वा वियाले वा बहिया वियारभूमिं वा विहारभूमिं वा निक्खमित्तए वा पविसित्तए वा, कप्पइ से अप्पविइयाए वा अप्पतइयाए वा अप्पचउत्थीए वा राओ वा वियाले वा बहिया वियारभूमिं वा विहारभूमिं वा निक्खमित्तए वा पविसित्तए वा ॥ ४७ ॥ कप्पइ निग्गन्थाण वा निग्गन्थीण वा पुरत्थिमेणं जाव अङ्गमगहाओ एत्तए, दक्खिणेणं जाव कोसम्बीओ एत्तए, पच्चत्थिमेणं जाव थूणाविसयाओ एत्तए, उत्तरेणं जाव कुणालाविसयाओ एत्तए; एयावयाव कप्पइ, एयावयाव आरिए खेतै; नो से कप्पइ एत्तो वाहिं, तेण परं जत्थ नाणदंसणचरित्ताइं उस्सप्पन्ति ॥ ४८ ॥ ति-वेमि ॥ बिहकप्पे पढमो उद्देसओ समत्तो ॥ १ ॥

### विइओ उद्देसओ

उवस्सयस्स अन्तो वगडाए सालीणि वा वीहीणि वा मुग्गाणि वा मासाणि वा तिलाणि वा कुलत्थाणि वा गोहूमाणि वा जवाणि वा जवजवाणि वा ओखि(त्ता)-  
ण्णाणि वा वि(कि)क्खिण्णाणि वा विइगिण्णाणि वा विप्पइण्णाणि वा, नो कप्पइ निग्गन्थाण वा निग्गन्थीण वा अहालन्दमवि वत्थए ॥ ४९ ॥ अह पुण एवं जाणेज्जा-  
नो ओखिण्णाइं नो विक्खिण्णाइं नो विइगिण्णाइं नो विप्पइण्णाइं, रासिकडाणि वा पुज्जकडाणि वा भित्तिकडाणि वा कुलियकडाणि वा लञ्छियाणि वा मुद्दियाणि वा पिहियाणि वा, कप्पइ निग्गन्थाण वा निग्गन्थीण वा हेमन्तगिम्हासु वत्थए ॥ ५० ॥  
अह पुण एवं जाणेज्जा-नो रासिकडाइं नो पुज्जकडाइं नो भित्तिकडाइं नो कुलिय-  
कडाइं, कोट्ठाउत्ताणि वा पल्लाउत्ताणि वा मञ्चाउत्ताणि वा मालाउत्ताणि वा ओलि-  
त्ताणि वा विलित्ताणि वा लञ्छियाणि वा मुद्दियाणि वा पिहियाणि वा, कप्पइ निग्गन्थाण वा निग्गन्थीण वा वासावासं वत्थए ॥ ५१ ॥ उवस्सयस्स अन्तो  
वगडाए सुरावियडकुम्भे वा सोवीरयवियडकुम्भे वा उवनिक्खित्ते सिया, नो कप्पइ निग्गन्थाण वा निग्गन्थीण वा अहालन्दमवि वत्थए, हुरत्था य उवस्सयं पडिलेह-  
माणे नो लभेज्जा, एवं से कप्पइ एगरायं वा दुरायं वा वत्थए, नो से कप्पइ परं  
एगरायाओ वा दुरायाओ वा वत्थए, जे तत्थ एगरायाओ वा दुरायाओ वा परं  
व(सइ)सेज्जा, से सन्तरा छेए वा परिहारे वा ॥ ५२ ॥ उवस्सयस्स अन्तो वगडाए  
सीओदगवियडकुम्भे वा उसिणोदगवियडकुम्भे वा उवनिक्खित्ते सिया, नो कप्पइ निग्गन्थाण वा निग्गन्थीण वा अहालन्दमवि वत्थए, हुरत्था य उवस्सयं पडिलेह-  
माणे नो लभेज्जा, एवं से कप्पइ एगरायं वा दुरायं वा वत्थए, नो से कप्पइ परं

एगरायाओ वा दुरायाओ वा वत्थए, जे तत्थ एगरायाओ वा दुरायाओ वा परं वसेज्जा, से सन्तरा छेए वा परिहारे वा ॥ ५३ ॥ उवस्सयस्स अन्तो वगडाए सव्वरा(इ)इए जोई क्षियाएज्जा, नो कप्पइ निग्गन्थाण वा निग्गन्थीण वा अहा-लन्दमवि वत्थए, हुत्था य उवस्सयं पडिलेहमाणे नो लभेज्जा, एवं से कप्पइ एग-रायं वा दुरायं वा वत्थए, नो से कप्पइ परं एगरायाओ वा दुरायाओ वा वत्थए, जे तत्थ एगरायाओ वा दुरायाओ वा परं वसेज्जा, से सन्तरा छेए वा परिहारे वा ॥ ५४ ॥ उवस्सयस्स अन्तो वगडाए सव्वराइए पईये दिप्पेज्जा, नो कप्पइ निग्गन्थाण वा निग्गन्थीण वा अहालन्दमवि वत्थए, हुत्था य उवस्सयं पडिलेहमाणे नो लभेज्जा, एवं से कप्पइ एगरायं वा दुरायं वा वत्थए, नो से कप्पइ परं एग-रायाओ वा दुरायाओ वा वत्थए, जे तत्थ एगरायाओ वा दुरायाओ वा परं वसेज्जा, से सन्तरा छेए वा परिहारे वा ॥ ५५ ॥ उवस्सयस्स अन्तो वगडाए पिण्डए वा लोयए वा खी(रे)रं वा दाहिं वा सप्पि वा नवणीए वा तेहे वा फाणि(ए)यं वा पूवे वा सक्कुली वा सिहरिणी वा ओखिण्णाणि वा विक्खिण्णाणि वा विइणिण्णाणि वा विप्पइण्णाणि वा, नो कप्पइ निग्गन्थाण वा निग्गन्थीण वा अहालन्दमवि वत्थए ॥ ५६ ॥ अह पुण एवं जाणेज्जा-नो ओखिण्णाइं ४, रासिकडाणि वा पुज्जकडाणि वा भित्तिकडाणि वा कुलियकडाणि वा लञ्छियाणि वा मुद्दियाणि वा पिहियाणि वा, कप्पइ निग्गन्थाण वा निग्गन्थीण वा हेमन्तगिम्हासु वत्थए ॥ ५७ ॥ अह पुण एवं जाणेज्जा-नो रासिकडाइं ४, कोट्टाउत्ताणि वा पल्लाउत्ताणि वा मञ्चाउत्ताणि वा मालाउत्ताणि वा कुम्भिउत्ताणि वा करभिउत्ताणि वा ओलित्ताणि वा विलित्ताणि वा लञ्छियाणि वा मुद्दियाणि वा पिहियाणि वा, कप्पइ निग्गन्थाण वा निग्गन्थीण वा वासावांसं वत्थए ॥ ५८ ॥ नो कप्पइ निग्गन्थीणं अहे आगमणगिहंसि वा वियडगिहंसि वा वंसीमूलंसि वा ख्वखमूलंसि वा अब्भावगासियंसि वा वत्थए ॥ ५९ ॥ कप्पइ निग्गन्थाणं अहे आगमणगिहंसि वा वंसीमूलंसि वा ख्वखमूलंसि वा अब्भा-वगासियंसि वा वत्थए ॥ ६० ॥ एगे सागारिए पारिहारिए, दो(बि) तिण्णि चत्तारि पञ्च सागारिया पारिहारिया; एगं तत्थ कप्पागं ठवइत्ता अवसेसे निव्विसेज्जा ॥ ६१ ॥ नो कप्पइ निग्गन्थाण वा निग्गन्थीण वा सागारियपिण्डं बहिया अनीहडं (असंसट्ठं वा) संसट्ठं-पडिग्गाहेत्तए ॥ ६२ ॥ नो कप्पइ निग्गन्थाण वा निग्गन्थीण वा सागारियपिण्डं बहिया अनीहडं असंसट्ठं पडिग्गाहेत्तए ॥ ६३ ॥ नो कप्पइ निग्गन्थाण वा निग्गन्थीण वा सागारियपिण्डं बहिया नीहडं असंसट्ठं पडिग्गाहेत्तए ॥ ६४ ॥ कप्पइ निग्गन्थाण वा निग्गन्थीण वा सागारियपिण्डं बहिया नीहडं संसट्ठं

पडिग्गाहेत्तए ॥ ६५ ॥ नो कप्पइ निग्गन्थाण वा निग्गन्थीण वा सागारियपिण्डं  
 बहिया नीहडं असंसट्ठं संसट्ठं करेत्तए, जे खलु निग्गन्थे वा निग्गन्थी वा सागा-  
 रियपिण्डं बहिया नीहडं असंसट्ठं संसट्ठं करेइ करेन्तं वा साइज्जइ, से दुहओ वीइक्क-  
 ममाणे आवज्जइ चाउम्मासियं परिहारट्ठाणं अणुग्घाइयं ॥ ६६ ॥ सागारियस्स  
 आहडिया सागारि(ण)णं पडिग्गाहि(या)त्ता, तम्हा दावए, नो से कप्पइ पडिग्गाहे-  
 त्तए ॥ ६७ ॥ सागारियस्स आहडिया सागारिएणं अपडिग्गाहिता, तम्हा दावए,  
 एवं से कप्पइ पडिग्गाहेत्तए ॥ ६८ ॥ सागारियस्स नीहडिया परेण अपडिग्गाहिता,  
 तम्हा दावए, नो से कप्पइ पडिग्गाहेत्तए ॥ ६९ ॥ सागारियस्स नीहडिया परेण  
 पडिग्गाहिता, तम्हा दावए, एवं से कप्पइ पडिग्गाहेत्तए ॥ ७० ॥ सागारियस्स  
 असियाओ अविभत्ताओ अव्वोच्छिन्नाओ अव्वोगडाओ अनिज्जूडाओ, (एवं से) तम्हा  
 दावए, नो से कप्पइ पडिग्गाहेत्तए ॥ ७१ ॥ सागारियस्स असियाओ विभत्ताओ  
 वोच्छिन्नाओ वोगडाओ निज्जूडाओ, तम्हा दावए, एवं से कप्पइ पडिग्गाहेत्तए  
 ॥ ७२ ॥ सागारियस्स पूयाभत्ते उद्देसिए चेइए पाहुडियाए, सागारियस्स उवगरण-  
 जाए निट्ठिए निसट्ठे प(पा)डिहारिए, तं सागारिओ दे(जा)इ, सागारियस्स परिजणो  
 देइ, तम्हा दावए, नो से कप्पइ पडिग्गाहेत्तए ॥ ७३ ॥ सागारियस्स पूयाभत्ते उद्देसिए  
 चेइए पाहुडियाए, सागारियस्स उवगरणजाए निट्ठिए नि(सि)सट्ठे पडिहारिए, तं  
 नो सागारिओ देइ, नो सागारियस्स परिजणो देइ, सागारियस्स पूया देइ, तम्हा  
 दावए, नो से कप्पइ पडिग्गाहेत्तए ॥ ७४ ॥ सागारियस्स पूयाभत्ते उद्देसिए चेइए  
 पाहुडियाए, सागारियस्स उवगरणजाए निट्ठिए निसट्ठे अपडिहारिए, तं सागारिओ  
 देइ, सागारियस्स परिजणो देइ, तम्हा दावए, नो से कप्पइ पडिग्गाहेत्तए ॥ ७५ ॥  
 सागारियस्स पूयाभत्ते उद्देसिए चेइए पाहुडियाए, सागारियस्स उवगरणजाए निट्ठिए  
 निसट्ठे अपडिहारिए, तं नो सागारिओ देइ, नो सागारियस्स परिजणो देइ, सागा-  
 रियस्स पूया देइ, तम्हा दावए, एवं से कप्पइ पडिग्गाहेत्तए ॥ ७६ ॥ कप्पइ  
 निग्गन्थाण वा निग्गन्थीण वा (पच्चिमाणि) इमाइ पच्च वत्था(णि)इं धारेत्तए वा  
 परिहरित्तए वा, तंजहा—जङ्गिए खोमिए साणए पोत्तए तिरीडपेठे ना(मं)म पच्चमे  
 ॥ ७७ ॥ कप्पइ निग्गन्थाण वा निग्गन्थीण वा इमाइ प(च्चैव)च्च रयहरणाइं धारेत्तए  
 वा परिहरित्तए वा, तंजहा—ओणिए ओट्ठि(उट्ठि)ए साणए वच्चापिच्चि(वच्चा-  
 चिप्प)ए मुज्जपिच्चिए नाम पच्चमे ॥ ७८ ॥ ति-वेमि ॥ बिहक्कप्पे बिइओ  
 उद्देसओ समत्तो ॥ २ ॥

## तइओ उद्देसओ

नो कप्पइ निग्गन्थाणं निग्गन्धीणं उवस्स(यंसि)ए आसइत्तए वा चिट्ठित्तए वा निसीइत्तए वा तुयट्ठित्तए वा निदाइत्तए वा पयलाइत्तए वा, असणं वा ४ आहार-  
माहारेत्तए, उच्चारं वा पासवणं वा खेलं वा सिङ्घाणं वा परिट्टवेत्तए, सज्झायं वा  
करेत्तए, झाणं वा झाइत्तए, काउस्सग्गं वा ठाणं वा ठाइत्तए ॥ ७९ ॥ नो कप्पइ  
निग्गन्धीणं निग्गन्(थ)थाणं उवस्सए आसइत्तए जाव ठाइत्तए ॥ ८० ॥ नो कप्पइ  
निग्गन्थाण वा निग्गन्धीण वा कसिणाइं वत्थाइं धारेत्तए वा परिहरित्तए वा ॥ ८१ ॥  
कप्पइ निग्गन्थाण वा निग्गन्धीण वा अकसिणाइं वत्थाइं धारेत्तए वा परिहरित्तए  
वा ॥ ८२ ॥ नो कप्पइ निग्गन्थाण वा निग्गन्धीण वा अभिजाइं वत्थाइं धारेत्तए  
वा परिहरित्तए वा ॥ ८३ ॥ कप्पइ निग्गन्थाण वा निग्गन्धीण वा भिजाइं वत्थाइं  
धारेत्तए वा परिहरित्तए वा ॥ ८४ ॥ नो कप्पइ निग्गन्थाणं ओ(उ)ग्गहणन्तगं वा  
ओग्गहणपट्ठगं वा धारेत्तए वा परिहरित्तए वा ॥ ८५ ॥ कप्पइ निग्गन्धीणं ओग्ग-  
हणन्तगं वा ओग्गहणपट्ठगं वा धारेत्तए वा परिहरित्तए वा ॥ ८६ ॥ निग्गन्धीए य  
गाहावइकुलं पिण्डवायपडियाए अणुप्पविट्ठाए चेलट्ठे समुप्पजेजा, नो से कप्पइ  
अप्पणो नीसाए चेलं पडिग्गाहेत्तए; कप्पइ से पवत्तिणीनीसाए चेलं पडिग्गाहेत्तए  
॥ ८७ ॥ नो (य से) ज(त)त्थ पवत्तिणी समा(णा)णी सिया, जे तत्थ समाणे  
आयरिए वा उवज्जाए वा प(वि)वत्ती वा थेरे वा गणी वा गणहरे वा गणावच्छेइए  
वा (जं चऽन्नं पुरओ कट्ठु विहरइ), कप्पइ से तं(तेसिं)नी(निर)साए चेलं पडि-  
ग्गाहेत्तए ॥ ८८ ॥ निग्गन्थस्स (य) णं तप्पढमयाए संपव्वयमाणस्स कप्पइ रय-  
हरणपडिग्गहगोच्छगमायाए ति(हिं)हिं य कसिणेहिं वत्थेहिं आयाए संपव्वइत्तए, से  
य पुव्वोवट्ठविए सिया, एवं से नो कप्पइ रयहरणपडिग्गहगोच्छगमायाए तिहिं य  
कसिणेहिं वत्थेहिं आयाए संपव्वइत्तए; कप्पइ से अहापरिग्गहियाइं वत्थाइं गहाय  
आयाए संपव्वइत्तए ॥ ८९ ॥ निग्गन्धीए णं तप्पढमयाए संपव्वयमाणीए कप्पइ  
रयहरणपडिग्गहगोच्छगमायाए चउहिं य कसिणेहिं वत्थेहिं आयाए संपव्वइत्तए, सा  
य पुव्वोवट्ठविया सिया, एवं से नो कप्पइ रयहरणपडिग्गहगोच्छगमायाए चउहिं  
य कसिणेहिं वत्थेहिं आयाए संपव्वइत्तए; कप्पइ से अहापरिग्गहियाइं वत्थाइं गहाय  
आयाए संपव्वइत्तए ॥ ९० ॥ नो कप्पइ निग्गन्थाण वा निग्गन्धीण वा पढमसमो-  
सरणुइसपत्ताइं चेला(चीवरा)इं पडिग्गाहेत्तए ॥ ९१ ॥ कप्पइ निग्गन्थाण वा निग्ग-  
न्धीण वा दोच्चसमोसरणुइसपत्ताइं चेलाइं पडिग्गाहेत्तए ॥ ९२ ॥ कप्पइ निग्गन्थाण  
वा निग्गन्धीण वा आ(अ)हाराइणियाए चेलाइं पडिग्गाहेत्तए ॥ ९३ ॥ कप्पइ निग्ग-



न्थाण वा निग्गन्धीण वा आहाराइणियाए सेज्जासंथारयं पडिग्गाहेत्तए ॥ ९४ ॥  
 कप्पइ निग्गन्थाण वा निग्गन्धीण वा आहाराइणियाए किइकम्मं करेत्तए ॥ ९५ ॥  
 नो कप्पइ निग्गन्थाण वा निग्गन्धीण वा अन्त(रा)रगिहंसि आसइत्तए वा चिट्ठित्तए  
 वा निसीइत्तए वा तुयट्ठित्तए वा निद्दाइत्तए वा पयलाइत्तए वा, असणं वा ४ आहार-  
 माहारेत्तए, उच्चारं वा ४ परिट्ठवेत्तए, सज्झायं वा करेत्तए, ज्ञाणं वा ज्ञाइत्तए,  
 काउस्सग्गं वा ठाणं वा ठाइत्तए, अहं पुण एवं जाणेज्जा-जरानुण्णे वाहिण (थेरे)  
 तवस्सी दुब्बले किलन्ते (....जजरिए) मुच्छेज्ज वा पवडेज्ज वा, एवं से कप्पइ  
 अन्तरगिहंसि आसइत्तए वा जाव ठाणं वा ठाइत्तए ॥ ९६ ॥ नो कप्पइ निग्गन्थाण  
 वा निग्गन्धीण वा अन्तरगिहंसि जाव चउगाहं वा पञ्चगाहं वा आइक्खित्तए वा  
 विभावेत्तए वा किट्ठित्तए वा पवेइत्तए वा, नन्नत्थ एगनाएण वा एगवागरणेण वा  
 एगगाहाए वा एगसिलोएण वा, से वि य ठिच्चा, नो चेव णं अट्ठिच्चा ॥ ९७ ॥  
 नो कप्पइ निग्गन्थाण वा निग्गन्धीण वा अन्तरगिहंसि इमाइं ( च णं ) पद्ध  
 महव्वयाइं सभावणाइं आइक्खित्तए वा जाव पवेइत्तए वा, नन्नत्थ एगनाएण वा  
 जाव एगसिलोएण वा, से वि य ठिच्चा, नो चेव णं अ(ठि)ट्ठिच्चा ॥ ९८ ॥ नो कप्पइ  
 निग्गन्थाण वा निग्गन्धीण वा पडिहारियं (वा सागारियसन्तियं) सेज्जासंथारयं  
 आयाए अपडिहट्ठु संपव्वइत्तए ॥ ९९ ॥ नो कप्पइ निग्गन्थाण वा निग्गन्धीण  
 वा सागारियसन्तियं सेज्जासंथारयं आयाए अहिगरणं कट्ठु संपव्वइत्तए ॥ १०० ॥  
 कप्पइ निग्गन्थाण वा निग्गन्धीण वा पडिहारियं वा सागारियसन्तियं वा सेज्जा-  
 संथारयं आयाए विगरणं कट्ठु संपव्वइत्तए ॥ १०१ ॥ इह खलु निग्गन्थाण वा  
 निग्गन्धीण वा पडिहारिए वा सागारियसन्तिए वा सेज्जासंथारए (विप्पण(से)सिज्जा)  
 परिब्भट्ठे सिया, से य अणुगवेसियव्वे सिया; से य अणुगवेसमाणे लभेज्जा, तस्सेव  
 अणुप्प(पडि)दायव्वे सिया; से य अणुगवेसमाणे नो लभेज्जा, एवं से कप्पइ दोच्चं  
 पि ओग्गहं ओगिण्हि(अणुन्न(१)वि)त्ता परिहारं परिहरित्तए ॥ १०२ ॥ जहिं(जं दि)वसं  
 च णं समणा निग्गन्था सेज्जासंथारयं विप्पजहन्ति, तहिं(तं दि)वसं च णं अवरे  
 समणा निग्गन्था हव्वमागच्छेज्ज; सच्चेव ओग्गहस्स पुव्वाणु(आ-व)न्नवणा चिट्ठइ  
 अहालन्दमवि ओग्गहे ॥ १०३ ॥ अत्थि याइं थ केइ उवस्सयपरियाव(आए)जे अचित्ते  
 परिहरणारिहे, सच्चेव ओग्गहस्स पुव्वाणुन्नवणा चिट्ठइ अहालन्दमवि ओग्गहे ॥ १०४ ॥  
 से वत्थूसु अव्वावडेसु अव्वोगडेसु अपरपरिग्गहिएसु अमरपरिग्गहिएसु सच्चेव  
 ओग्गहस्स पुव्वाणुन्नवणा चिट्ठइ अहालन्दमवि ओग्गहे ॥ १०५ ॥ से वत्थूसु  
 वावडेसु वोगडेसु परपरिग्गहिएसु भिक्खुभावस्सट्ठाए दोच्चं पि ओग्गहे अणुन्नवेयव्वे

सिया (अहलंदमवि उग्गहे) ॥ १०६ ॥ से अणुकुड्डेसु वा अणुभित्तीसु वा अणुचरि-  
यासु वा अणुफरिहासु वा अणुपन्थेसु वा अणुमेरासु वा सच्चैव ओग्गहस्स पुव्वाण-  
न्नवणा चिट्ठइ अहलंदमवि ओग्गहे ॥ १०७ ॥ से गा(मस्स)मंसि वा जाव  
(रायहाणीए) संनिवेसंसि वा बहिया सेणं संनिविट्ठं पेहाए कप्पइ निग्गन्थाण वा  
निग्गन्थीण वा तद्धिवसं भिक्खायरियाए गन्तूणं पडि(ए)नियत्तए, नो से कप्पइ  
(सा रयणी) तं रयणिं तत्थेव उवा(य)इणा(वि)वेत्तए, जे खलु निग्गन्थे वा निग्गन्थी  
वा तं रयणिं तत्थेव उवाइणावेइ उवाइणावेन्तं वा साइज्जइ, से दुहओ वीइक्कममाणे  
आवज्जइ चाउम्मासियं परिहारट्ठाणं अणुग्घाइयं ॥ १०८ ॥ से गामंसि वा जाव  
संनिवेसंसि वा कप्पइ निग्गन्थाण वा निग्गन्थीण वा सव्वओ समन्ता सकोसं  
जोयणं ओग्गहं ओगिणिहत्ताणं परिहारं परिहरि(चिट्ठि)त्तए ॥ १०९ ॥ त्ति-वेमि ॥  
बिहक्कप्पे तइओ उदेसओ समत्तो ॥ ३ ॥

### चउत्थो उदेसओ

तओ अणुग्घाइ(मा)या पन्नत्ता, तंजहा-हत्थकम्मं करेमाणे, मेहुणं पडिसेवमाणे,  
राईभोयणं भुज्जमाणे ॥ ११० ॥ तओ पारच्चिया पन्नत्ता, तंजहा-दुट्ठे पारच्चिए,  
पमत्ते पारच्चिए, अन्नमन्नं करेमाणे पारच्चिए ॥ १११ ॥ तओ अणवट्ठप्पा पन्नत्ता,  
तंजहा-साहम्मि(य)याणं ते(णियं)न्नं करेमाणे, अन्नध(पर-ह)म्मि(य)याणं तेन्नं  
करेमाणे, हत्थताथायालं दलमाणे ॥ ११२ ॥ तओ नो कप्पन्ति पव्वावेत्तए,  
तंजहा-पण्डए कीवे वा(हि)इए, एवंमुण्डावेत्तए सिक्खावेत्तए उवट्ठावेत्तए संभुज्जितए  
सं(वा)वसित्तए ॥ ११३ ॥ तओ नो कप्पन्ति वा(इ)एत्तए, तंजहा-अविणीए विगई-  
पडिबद्धे अविओसवियपाहुडे ॥ ११४ ॥ तओ कप्पन्ति वाएत्तए, तंजहा-विणीए  
नो विगईपडिबद्धे विओसवियपाहुडे ॥ ११५ ॥ तओ दुस्सन्नप्पा पन्नत्ता, तंजहा-  
दुट्ठे मूढे वुग्गाहिए ॥ ११६-११ ॥ तओ सुस्सन्नप्पा पन्नत्ता, तंजहा-अदुट्ठे अमूढे अवुग्गा-  
हिए ॥ ११६-२ ॥ निग्गन्थि च णं गिलायमाणि माया वा भगिणी वा धूया (पिया वा  
भाया वा पुत्ते) वा पल्लिस्सएज्जा, तं च निग्गन्(थी)थे साइज्ज(जइ)जेज्जा, मेहुणपडि-  
सेवणप(त्ता)त्ते आवज्जइ चाउम्मासियं परिहारट्ठाणं अणुग्घाइयं ॥ ११७ ॥ निग्गन्थं च  
णं गिलायमाणं पिया वा भाया वा पुत्ते वा (माया वा भगिणी वा धूया वा) पल्लिस्स-  
एज्जा, तं च निग्गन्(थे)थी साइजेज्जा, मेहुणपडिसेवणप(त्ते)त्ता आवज्जइ चाउम्मासियं  
परिहारट्ठाणं अणुग्घाइयं ॥ ११८ ॥ नो कप्पइ निग्गन्थाण वा निग्गन्थीण वा  
असणं वा ४ पढमाए पो(रि-र)हसीए पडिग्गाहेत्ता (चउ-रत्थं-त्थि) पच्छिमं पोस्सिं  
उवाइणावेत्तए, से य आहन्न उवाइणाविए सिया, तं नो अप्पणा भुज्जेज्जा नो अज्जेसिं

अणुप्पदेज्जा; एग(न्तम)न्ते बहुफासुए (पएसे) थण्डिले पडिलेहिता पमज्जिता परिट्ठ-  
वेयव्वे सिया; तं अप्पणा भुज्जमाणे अञ्जेसिं वा अणुप्पदेमाणे आवज्जइ चाउम्मासियं  
परिहारट्ठाणं उ(अणु)ग्घाइयं ॥ ११९ ॥ नो कप्पइ निग्गन्थाण वा निग्गन्थीण वा  
असणं वा ४ परं अद्धजोयणमे(रं)राए उवाइणावेत्तए, से य आहच्च उवाइणाविए  
सिया, तं नो अप्पणा भुज्जजा नो अञ्जेसिं अणुप्पदेज्जा, एगन्ते बहुफासुए थण्डिले  
पडिलेहिता पमज्जिता परिट्ठवेयव्वे सिया; तं अप्पणा भुज्जमाणे अञ्जेसिं वा अणुप्प-  
देमाणे आवज्जइ चाउम्मासियं परिहारट्ठाणं उग्घाइयं ॥ १२० ॥ निग्गन्थेण य  
गाहावड्ढुलं पिण्डवायपडियाए अणुप्पविट्ठेणं अन्नयरे अन्विते अणेसणिज्जे पाणभोयणे  
पडिग्गाहिए सिया, अत्थि याइं थ केइ सेह(न्)तराए अणुवट्ठावियए, कप्पइ से तस्स  
दाउं वा अणुप्पदाउं वा; नत्थि याइं थ केइ सेहतराए अणुवट्ठावियए (सिया), तं  
नो अप्पणा भुज्जजा नो अञ्जेसिं अणुप्पदेज्जा; एगन्ते बहुफासुए थण्डिले पडिलेहिता  
पमज्जिता परिट्ठवेयव्वे सिया ॥ १२१ ॥ जे कडे कप्पट्ठियाणं नो से कप्पइ कप्पट्ठि-  
याणं, जे कडे कप्पट्ठियाणं कप्पइ से अकप्पट्ठियाणं; जे कडे अकप्पट्ठियाणं नो से  
कप्पइ कप्पट्ठियाणं, जे कडे अकप्पट्ठियाणं कप्पइ से अकप्पट्ठियाणं; कप्पट्ठिया विकप्पे  
ठिया कप्पट्ठिया, अकप्पे ठिया अकप्पट्ठिया ॥ १२२ ॥ भिक्खू य गणा(ओ अ)य-  
वक्कम्म इच्छेज्जा अ(ञ्च)ञ्चं गणं उवसंपज्जिताणं विहरित्तए, नो से कप्पइ अणा-  
पुच्छिता(णं) आयरियं वा उवज्झायं वा पवत्तिं वा थेरं वा गणिं वा गणहरं वा  
गणावच्छेइयं वा अञ्चं गणं उवसंपज्जिताणं विहरित्तए; कप्पइ से आपुच्छिता आय-  
रियं वा जाव गणावच्छेइयं वा अञ्चं गणं उवसंपज्जिताणं विहरित्तए, ते य से  
विय(रेज्जा)रन्ति, एवं से कप्पइ अञ्चं गणं उवसंपज्जिताणं विहरित्तए; ते य से नो  
वियरन्ति, एवं से नो कप्पइ अञ्चं गणं उवसंपज्जिताणं विहरित्तए ॥ १२३ ॥ गणा-  
वच्छेइए य गणायवक्कम्म इच्छेज्जा अञ्चं गणं उवसंपज्जिताणं विहरित्तए, नो कप्पइ  
गणावच्छेइयस्स गणावच्छेइयत्तं अनिक्खवित्ता अञ्चं गणं उवसंपज्जिताणं विहरित्तए;  
कप्पइ गणावच्छेइयस्स गणावच्छेइयत्तं निक्खवित्ता अञ्चं गणं उवसंपज्जिताणं  
विहरित्तए, नो से कप्पइ अणापुच्छिता आयरियं वा जाव गणावच्छेइयं वा अञ्चं गणं  
उवसंपज्जिताणं विहरित्तए; कप्पइ से आपुच्छिता आयरियं वा जाव गणावच्छेइयं वा  
अञ्चं गणं उवसंपज्जिताणं विहरित्तए, ते य से वियरन्ति, एवं से कप्पइ अञ्चं गणं  
उवसंपज्जिताणं विहरित्तए; ते य से नो वियरन्ति, एवं से नो कप्पइ अञ्चं गणं  
उवसंपज्जिताणं विहरित्तए ॥ १२४ ॥ आयरियउवज्झाए य गणायवक्कम्म इच्छेज्जा  
अञ्चं गणं उवसंपज्जिताणं विहरित्तए, नो कप्पइ आयरियउवज्झायस्स आयरिय-



[illegible]

वा आहच वीसुम(भि)मेजा, तं च सरीरगं (केइ) वेयावच्चक(रा-रे भिक्खू)रा  
इ(च्छि)च्छेज्जा एगन्ते बहुफासुए (पएसे) थण्डिले परिट्टवेत्ताए, अत्थि याइं थ  
केइ सागारियसन्तिए उवगरणजाए अचित्ते परिहरणारिहें, कप्पइ से सागा(रि)रकडं  
गहाय तं सरीरगं एगन्ते बहुफासुए थण्डिले परिट्टवेत्ता तत्थेव उवनिकखेवियव्वे  
सिया ॥ १३२ ॥ भिक्खू य अहिगरणं कट्ठु तं अहिगरणं अविओसवेत्ता-नो से  
कप्पइ गाहावड्कुलं (पिण्डवायपडियाए) भत्ताए वा पाणाए वा निक्खमित्तए वा  
पविसित्तए वा, नो से कप्पइ बहिया वियारभूमिं वा विहारभूमिं वा निक्खमित्तए वा  
पविसित्तए वा, नो से कप्पइ गामाणुगामं (वा) दूइज्जित्तए, (गणाओ वां गणं संकमित्तए  
वासावासं वा वत्थए) जत्थेव अप्पणो आयरि(ओ)यउवज्जायं पासेज्जा बहुस्सुयं  
वब्भागमं, कप्पइ से तस्स(अ)न्ति(यं)ए आलो(इज्जा)एत्तए पडिक्कमित्तए निन्दित्तए  
गरहित्तए विउट्ठित्तए विसोहित्तए अकरणाए अब्भुट्ठित्तए अहारिहं पायच्छित्तं (तवो-  
कम्मं) पडिवज्जित्तए; से य सुएणं पट्टविए आइयव्वे सिया, से य सुएणं नो पट्टविए नो  
आइयव्वे सिया; से य सुएणं पट्टविज्जमाणे नो आइयइ, से निज्जुहियव्वे सिया ॥ १३३ ॥  
परिहारकप्पट्टियस्स णं भिक्खुस्स कप्पइ (आयरियउवज्जा(या)एणं) तद्विवसं ए(गंसि)-  
गसिहंसि पिण्डवायं दवावे(पडिग्गाहे)त्तए, तेण परं नो से कप्पइ असणं वा ४ दाउं  
वा अणुप्पदाउं वा, कप्पइ से अन्नयरं वेयावडियं करेत्तए, तंजहा-उट्ठावणं वा  
अणुट्ठावणं वा निसीयावणं वा तुयट्ठावणं वा, उच्चा(रं)रपासवणखेलजल्लसिङ्घाणविणि-  
ञ्चणं वा विसोहणं वा करेत्तए, अह पुण एवं जाणेज्जा-छिन्नावाएसु पन्थेसु (आउरे  
जजरि(झिंझि)ए पिवासिए) तवस्सी दुव्वले किलन्ते सु(च्छि)च्छेज्ज वा पव(डि)डेज्ज  
वा, एवं से कप्पइ असणं वा ४ दाउं वा अणुप्पदाउं वा ॥ १३४ ॥ नो कप्पइ  
निग्गन्थाण वा निग्गन्थीण वा इमाओ पञ्च (महण्णावाओ) महानईओ उट्ठिआओ  
गणियाओ वज्जियाओ अन्तो मासस्स दुक्खुत्तो वा तिक्खुत्तो वा उत्तरित्तए वा संतरि-  
त्तए वा, तंजहा-गङ्गा जउणा सरयू (एरावई) कोसिया मही, अह पुण एवं जाणेज्जा-  
ए(रा)रवई कुणालाए-जत्थ चक्किया एणं पायं जले किच्चा एणं पायं थले किच्चा,  
एवं से कप्पइ अन्तो मासस्स दुक्खुत्तो वा तिक्खुत्तो वा उत्तरित्तए वा संतरित्तए  
वा; जत्थ नो एवं चक्किया, एवं से नो कप्पइ अन्तो मासस्स दुक्खुत्तो वा तिक्खुत्तो  
वा उत्तरित्तए वा संतरित्तए वा ॥ १३५ ॥ से तणेसु वा तणपुञ्जेसु वा पलालेसु वा  
पलालपुञ्जेसु वा अप्पण्डेसु अप्पपाणेसु अप्पवीएसु अप्पहरिएसु अप्पोस्सेसु अप्पुत्तिङ्ग-  
पणगदगमट्ठि(य)यामक्क(डग)डासंताणएसु अहेसवणमायाए नो कप्पइ निग्गन्थाण  
वा निग्गन्थीण वा तहप्पगारे उवस्सए हेमन्तणिम्हासु वत्थए ॥ १३६ ॥ से तणेसु

वा जाव ० संताणएसु; उप्पिसवणमायाए कप्पइ निग्गन्थाण वा निग्गन्धीण वा तहप्पगारे उवस्सए हेमन्तगिम्हासु वत्थए ॥ १३७ ॥ से तणेषु वा जाव ० संताण-एसु अहेरयणिसुक्कमउडे(सु) नो कप्पइ निग्गन्थाण वा निग्गन्धीण वा तहप्पगारे उवस्सए वासावासं वत्थए ॥ १३८ ॥ से तणेषु वा जाव ० संताणएसु उप्पिरयणि-सुक्कमउडे कप्पइ निग्गन्थाण वा निग्गन्धीण वा तहप्पगारे उवस्सए वासावासं वत्थए ॥ १३९ ॥ त्ति-वेमि ॥ बिहक्कप्पे चउत्थो उद्देसओ समत्तो ॥ ४ ॥

### पञ्चमो उद्देसओ

देवे य इत्थिरूवं विउव्वित्ता निग्गन्थं पडिग्गाहे(गेण्हे)ज्जा, तं च निग्गन्थे साइज्जे(जइ)जेज्जा, मेहुणपडिसेवणपत्ते आवज्जइ चाउम्मासियं परिहारट्ठाणं अणुग्घाइयं ॥ १४० ॥ देवे य पुरिसरूवं विउव्वित्ता निग्गन्थि पडिग्गाहेज्जा, तं च निग्गन्थी साइजेज्जा, मेहुणपडिसेवणपत्ता आवज्जइ चाउम्मासियं परिहारट्ठाणं अणुग्घाइयं ॥ १४१ ॥ देवी य इत्थिरूवं विउव्वित्ता निग्गन्थं पडिग्गाहेज्जा, तं च निग्गन्थे साइजेज्जा, मेहुणपडिसेवणपत्ते आवज्जइ चाउम्मासियं परिहारट्ठाणं अणुग्घाइयं ॥ १४२ ॥ देवी य पुरिसरूवं विउव्वित्ता निग्गन्थि पडिग्गाहेज्जा, तं च निग्गन्थी साइजेज्जा, मेहुणपडिसेवणपत्ता आवज्जइ चाउम्मासियं परिहारट्ठाणं अणुग्घाइयं ॥ १४३ ॥ भिक्खू य अहिगरणं कट्ठु तं अहिगरणं अविओसवेत्ता इच्छेज्जा अ(ञ्ज)ञ्जं गणं उवसंपज्जिताणं विहरित्तए, कप्पइ तस्स पञ्च राइन्दि(यं)याइं छेयं कट्ठु परि-णि(व्वा)व्वविय २ तामेव गणं पडिनिज्जाएयव्वे सिया, जहा वा तस्स गणस्स पत्तियं सिया ॥ १४४ ॥ भिक्खू य उग्गयवित्तीए अणत्थमियसंकप्पे संथडिए निव्विइ-(गिंछा-गिच्छा-समावन्ने)गिच्छे असणं वा ४ पडिग्गाहेत्ता आहारमाहारेमाणे अह पच्छा जाणेज्जा-अणुग्गए सूरिए अत्थमिए वा, से जं च (आसयंसि) मुहे जं च पाणिसि जं च पडिग्ग(हयंसि)हे तं विगिञ्चमाणे (वा) विसोहेमाणे ना(नो अ)इक्कमइ; तं अप्पणा भुज्जमाणे अञ्जेसिं वा (दलमाणे) अणुप्पदेमाणे (राइभोयणपडिसेणपवत्ते) आवज्जइ चाउम्मासियं परिहारट्ठाणं अणुग्घाइयं ॥ १४५ ॥ भिक्खू य उग्गयवित्तीए अणत्थमियसंकप्पे संथडिए विइगिच्छासमावन्ने असणं वा ४ पडिग्गाहेत्ता आहार-माहारेमाणे अह पच्छा जाणेज्जा-अणुग्गए सूरिए अत्थमिए वा, से जं च मुहे जं च पाणिसि जं च पडिग्गहे तं विगिञ्चमाणे विसोहेमाणे नाइक्कमइ; तं अप्पणा भुज्जमाणे अञ्जेसिं वा अणुप्पदेमाणे आवज्जइ चाउम्मासियं परिहारट्ठाणं अणुग्घाइयं ॥ १४६ ॥ भिक्खू य उग्गयवित्तीए अणत्थमियसंकप्पे असंथडिए निव्विइगिच्छे असणं वा ४ पडिग्गाहेत्ता आहारमाहारेमाणे अह पच्छा जाणेज्जा-अणुग्गए सूरिए

अथमिए वा, से जं च मुहे जं च पाणिसि जं च पडिग्गहे तं विगिञ्चमाणे विसोहे-  
माणे नाइक्कमइ; तं अप्पणा भुज्जमाणे अन्नसिं वा अणुप्पदेमाणे आवज्जइ चाउम्मासियं  
परिहारट्ठाणं अणुग्घाइयं ॥ १४७ ॥ भिक्खू य उग्गयवित्तीए अणत्थमियसंकप्पे  
असंघडिए विडिगिच्छासमावज्जे असणं वा ४ पडिग्गहेत्ता आहारमाहारेमाणे अह  
पच्छा जाणेज्जा-अणुग्गए सूरिए अथमिए वा, से जं च मुहे जं च पाणिसि जं च  
पडिग्गहे तं विगिञ्चमाणे विसोहेमाणे नाइक्कमइ; तं अप्पणा भुज्जमाणे अन्नसिं वा  
अणुप्पदेमाणे आवज्जइ चाउम्मासियं परिहारट्ठाणं अणुग्घाइयं ॥ १४८ ॥ इह खलु  
निग्गन्थस्स वा निग्गन्धीए वा राओ वा वियाले वा सप्पणे सभोयणे उग्गाले आग-  
च्छेज्जा, तं विगिञ्चमाणे विसोहेमाणे नाइक्कमइ; तं उग्गिलित्ता पच्चोगिलमाणे राइ-  
भोयणपडिसेवणपत्ते आवज्जइ चाउम्मासियं परिहारट्ठाणं अणुग्घाइयं ॥ १४९ ॥  
निग्गन्थस्स य गाहावइकुलं पिण्डवायपडियाए अणुप्पविट्ठस्स अन्तो (०) पडिग्गहंसि  
पा(णाणि)णे वा बी(याणि)ए वा रए वा परियावज्जेज्जा, तं च संचाएइ विगिञ्चित्तए  
वा विसोहेत्तए वा, (तं पुव्वामेव आलो० विसोहि-य-या-तं) तओ संजयामेव भुज्जेज्ज  
वा पिएज्ज वा; तं च नो संचाएइ विगिञ्चित्तए वा विसोहेत्तए वा, तं नो अप्पणा  
भुज्जेज्जा (तं) नो अन्नसिं अणुप्पदेज्जा; एगन्ते बहुफासुए थण्डिले पडिलेहिता  
पमज्जित्ता परिट्ठवेयव्वे सिया ॥ १५० ॥ निग्गन्थस्स य गाहावइकुलं पिण्डवाय-  
पडियाए अणुप्पविट्ठस्स अन्तो पडिग्ग(हगं)हंसि दए वा दगरए वा दगफुसिए वा  
परियावज्जेज्जा, से य उसि(णे)णभोयणजाए, परिभोत्तव्वे सिया; से य (नो उसिणे)  
सीयभोयणजाए, तं नो अप्पणा भुज्जेज्जा नो अन्नसिं अणुप्पदेज्जा; एगन्ते  
बहुफासुए थण्डिले पडिलेहिता पमज्जित्ता परिट्ठवेयव्वे सिया ॥ १५१ ॥ निग्गन्धीए  
य राओ वा वियाले वा उच्चारं वा पासवणं वा विगिञ्चमाणीए वा विसोहेमाणीए वा  
अन्नयरे पसुजाईए वा पक्खिजाईए वा अन्नयइन्दिज्जजाए तं परामुसेज्जा, तं च  
निग्गन्धी साइजेज्जा, हत्थकम्मपडिसेवणपत्ता आवज्जइ चाउम्मासियं परिहारट्ठाणं  
अणुग्घाइयं ॥ १५२ ॥ निग्गन्धीए य राओ वा वियाले वा उच्चारं वा पासवणं वा  
विगिञ्चमाणीए वा विसोहेमाणीए वा अन्नयरे पसुजाईए वा पक्खिजाईए वा अन्नयरं  
सोयंसि ओगाहेज्जा, तं च निग्गन्धी साइज्ज(जइ)जेज्जा, मेहुणपडिसेवणपत्ता आवज्जइ  
चाउम्मासियं परिहारट्ठाणं अणुग्घाइयं ॥ १५३ ॥ नो कप्पइ निग्गन्धीए एगाणियाए  
होत्तए ॥ १५४ ॥ नो कप्पइ निग्गन्धीए एगाणियाए गाहावइकुलं भत्ताए वा पाणाए  
वा निक्खमित्तए वा पविसित्तए वा ॥ १५५ ॥ नो कप्पइ निग्गन्धीए एगाणियाए  
बहिया वियारभूमिं वा विहारभूमिं वा निक्खमित्तए वा पविसित्तए वा ॥ १५६ ॥



नो कप्पइ निग्गन्धीए एगणियाए गामाणुगामं दूइजित्तए (वासावासं) (वा) वत्थए ॥ १५७ ॥ नो कप्पइ निग्गन्धीए अचेलियाए होत्त(हुंत)ए ॥ १५८ ॥ नो कप्पइ निग्गन्धीए अपाइयाए होत्तए ॥ १५९ ॥ नो कप्पइ निग्गन्धीए वोसट्टकाइयाए होत्तए ॥ १६० ॥ नो कप्पइ निग्गन्धीए वहिया गामस्स वा जाव (रायहाणीए) संनिवेसस्स वा उह्वं बाहाओ पणिज्झिय २ सूरामिसु(ही)हाए एगपाइयाए ठिच्चा आयावणाए आयावेत्तए ॥ १६१ ॥ कप्पइ से उवस्सयस्स अन्तो वगडाए संघाडिपडिबद्धाए समतलपाइयाए ठिच्चा आयावणाए आयावेत्तए ॥ १६२ ॥ नो कप्पइ निग्गन्धीए ठाणाइयाए होत्तए ॥ १६३ ॥ नो कप्पइ निग्गन्धीए पडिमट्टावियाए होत्तए ॥ १६४ ॥ नो कप्पइ निग्गन्धीए ठाणुकुडि-यासणियाए होत्तए ॥ १६५ ॥ नो कप्पइ निग्गन्धीए ने(सि)सजियाए होत्तए ॥ १६६ ॥ नो कप्पइ निग्गन्धीए वीरासणियाए होत्तए ॥ १६७ ॥ नो कप्पइ निग्गन्धीए दण्डा(ई)सणियाए (पलम्बियवाहाए) होत्तए ॥ १६८ ॥ नो कप्पइ निग्गन्धीए लगण्डसाइयाए होत्तए ॥ १६९ ॥ नो कप्पइ निग्गन्धीए ओमंथि-याए होत्तए ॥ १७० ॥ नो कप्पइ निग्गन्धीए उत्ता(णसाइ)णियाए होत्तए ॥ १७१ ॥ नो कप्पइ निग्गन्धीए अम्बखुजियाए होत्तए ॥ १७२ ॥ नो कप्पइ निग्गन्धीए एगपासियाए होत्तए ॥ १७३ ॥ नो कप्पइ निग्गन्धीणं आउञ्चणपट्ठं धारेत्तए वा परिहरित्तए वा ॥ १७४ ॥ कप्पइ निग्गन्थाणं आउञ्चणपट्ठं धारेत्तए वा परिहरि(वहि)त्तए वा ॥ १७५ ॥ नो कप्पइ निग्गन्धीणं सा(वा)वस्सयंसि आस(णयं)णंसि आसइ(चिट्ठि)त्तए वा तुयट्ठि(निसिइ)त्तए वा ॥ १७६ ॥ कप्पइ निग्गन्थाणं सावस्सयंसि आसणंसि आसइत्तए वा तुयट्ठित्तए वा ॥ १७७ ॥ नो कप्पइ निग्गन्धीणं सविसा(णयं)णंसि फलंगंसि वा पी(ढगं)ढंसि वा चिट्ठित्तए वा निसीइत्तए वा (आसइत्तए वा तुयट्ठित्तए वा) ॥ १७८ ॥ कप्पइ निग्गन्थाणं जाव निसीइत्तए वा ॥ १७९ ॥ नो कप्पइ निग्गन्धीणं (सना(ला)लयाइं पायाइं अहिट्ठित्तए) सवेण्टयं लाउयं धारेत्तए वा परिहरित्तए वा ॥ १८० ॥ कप्पइ निग्गन्थाणं सवेण्टयं लाउयं धारेत्तए वा परिहरित्तए वा ॥ १८१ ॥ नो कप्पइ निग्गन्धीणं स(विट्ठ)वे(ढिया-ओ)ण्टयं पायकेसरि(याओ)यं धारेत्तए वा परिहरित्तए वा ॥ १८२ ॥ कप्पइ निग्गन्थाणं सवेण्टयं पायकेसरियं धारेत्तए वा परिहरित्तए वा ॥ १८३ ॥ नो

१ जत्थाभिणवसंकडमुहे अलाउए हत्थो ण माइ तस्स अलाउणो जमुच्चंतं तप्पमाणो दंडो किज्जइ, तस्सग्गभागे बद्धा जा पञ्चुवेक्खणिया सा पायकेसरिया सर्विटया भण्णइ ।

कप्पइ निग्गन्धीणं दारुदण्डयं पायपुञ्छणं धारेत्तए वा परिहरित्तए वा ॥ १८४ ॥  
 कप्पइ निग्गन्धानं दारुदण्डयं पायपुञ्छणं धारेत्तए वा परिहरित्तए वा ॥ १८५ ॥  
 नो कप्पइ निग्गन्धान वा निग्गन्धीण वा पारियासि(ए भोयणजाए)यस्स आहारस्स  
 जाव त(ट्ट)यप्पमाणमेत्तमवि भूहप्पमाणमेत्तमवि बिन्दुप्पमाणमेत्तमवि आहारमाहारे-  
 त्तए, नन्नत्थ आ(गाढा)गाढे(सु)हिं रोगायङ्केहिं ॥ १८६ ॥ नो कप्पइ निग्गन्धान  
 वा निग्गन्धीण वा पारियासिएणं आलेवणजाएणं गा(यं)याइं आलिम्पित्तए वा  
 विलिम्पित्तए वा, नन्नत्थ आगाढेहिं रोगायङ्केहिं ॥ १८७ ॥ नो कप्पइ निग्गन्धान  
 वा निग्गन्धीण वा पारियासिएणं तेलेण वा घएण वा गायार्इं अब्भञ्जेत्तए वा  
 म(क्ख)क्खेत्तए वा, नन्नत्थ आगाढेहिं रोगायङ्केहिं ॥ १८८ ॥ नो कप्पइ निग्ग-  
 न्धान वा निग्गन्धीण वा कक्केण वा लोडेण वा अन्नयरेण वा आलेवणजाएणं  
 गायार्इं उव्वलेत्तए वा उव्वट्ठित्तए वा, नन्नत्थ आगाढेहिं रोगायङ्केहिं ॥ १८९ ॥  
 परिहारकप्पट्टिए णं भिक्खू वहिया थेराणं वेयावडियाए गच्छेज्जा, से य आहच्च  
 अङ्कमेज्जा, तं च थेरा जाणेज्ज अप्पणो आगमेणं अजेसिं वा अन्तिए सोच्चा, तओ  
 पच्छा तस्स अहालहुसए नाम ववहारे पट्टविग्वे सिया ॥ १९० ॥ निग्गन्धीए य  
 गाहावइकुलं पिण्डवायपडियाए अणुप्पविट्ठाए अन्नयरे पुंलागभत्ते पडिग्गाहिए  
 सिया, सा य संथरेज्जा, एवं से कप्पइ (तं दिवसं) तेणेव भत्तट्ठेणं पज्जोसवेत्तए;  
 सा य नो संथरे, एवं से कप्पइ दोच्चं पि गाहावइकुलं (पिण्डवायपडियाए अ०)  
 भत्ताए वा पाणाए वा निक्खमित्तए वा पविसित्तए वा ॥ १९१ ॥ ति-वेमि ॥  
 बिहकप्पे पञ्चमो उद्देसओ समत्तो ॥ ५ ॥

### छट्ठो उद्देसओ

नो कप्पइ निग्गन्धान वा निग्गन्धीण वा इमाइं छ अव(यणा)तव्वाइं वइत्तए,  
 तंजहा-अलियवयणे हीलियवयणे खिसियवयणे फरुसवयणे गारस्थियवयणे, वि(उ)-  
 ओसविं वा पुणो उडी(रि)रेत्तए ॥ १९२ ॥ छ कप्पस्स पत्थारा पन्नत्ता, तंजहा-  
 पाणाइवायस्स वायं वयमाणे, मुसावायस्स वायं वयमाणे, अदिन्नादाणस्स वायं वय-  
 माणे, अविरइ(य)यावायं वयमाणे, अपुरिसवायं वयमाणे, दासवायं वयमाणे, इच्चेए  
 कप्पस्स छप्पत्थारे पत्थरेत्ता सम्मं अप्पडिपूरेमाणे तट्ठानपत्ते सिया ॥ १९३ ॥  
 निग्गन्थस्स य अहे पायंसि खा(णू)णुए वा क(णू)ण्टए वा ही(सक्क)रे वा  
 परियावज्जेज्जा, तं च निग्गन्थे नो संचाएइ नीहरित्तए वा विसोहेत्तए वा, तं (च)  
 निग्गन्धी नीहरमाणी वा विसोहेमाणी वा नाइक्कमइ ॥ १९४ ॥ निग्गन्थस्स य

अच्छिसि पाणे वा वीए वा रए वा परियावजेजा, तं च निग्गन्(थो)थे नो संचाए-  
 (जा)इ नीहरित्तए वा विसोहेत्तए वा, तं निग्गन्थी नीहरमाणी वा विसोहेमाणी वा  
 नाइक्कमइ ॥ १९५ ॥ निग्गन्थीए य अहे पायंसि खाणूए वा कण्टए वा ही(रए)रे वा  
 (सक्रे वा) परियावजेजा, तं च निग्गन्थी नो संचाएइ नीहरित्तए वा विसोहेत्तए  
 वा, तं निग्गन्थे नीहरमाणे वा विसोहेमाणे वा नाइक्कमइ ॥ १९६ ॥ निग्गन्थीए य  
 अच्छिसि पाणे वा वीए वा रए वा परियावजेजा, तं च निग्गन्थी नो संचाएइ  
 नीहरित्तए वा विसोहेत्तए वा, तं निग्गन्थे नीहरमाणे वा विसोहेमाणे वा नाइक्कमइ  
 ॥ १९७ ॥ निग्गन्थे निग्गन्थि दुग्गंसि वा विसमंसि वा पव्वयंसि वा पक्(खु)खल-  
 माणिं वा पवडमाणिं वा गेण्हमाणे वा अवलम्बमाणे वा नाइक्कमइ ॥ १९८ ॥  
 निग्गन्थे निग्गन्थि सेयंसि वा पङ्कंसि वा पणगंसि वा उदयंसि वा ओक(उक्क)समाणिं  
 वा ओत्तु(ज्झ)ब्भमाणिं वा गेण्हमाणे वा अवलम्बमाणे वा नाइक्कमइ ॥ १९९ ॥  
 निग्गन्थे निग्गन्थि नावं आ(रोह)रुममाणिं वा ओ(उ-रोह)रुममाणिं वा गेण्हमाणे  
 वा अवलम्बमाणे वा नाइक्कमइ ॥ २०० ॥ खित्तचित्तं निग्गन्थि निग्गन्थे गे(नि)ण्ह-  
 माणे वा अवलम्बमाणे वा नाइक्कमइ ॥ २०१ ॥ दित्तचित्तं निग्गन्थि निग्गन्थे  
 गेण्हमाणे वा अवलम्बमाणे वा नाइक्कमइ ॥ २०२ ॥ जक्खाइट्ठं (०) उम्मायपत्तं  
 (०) उवसग्गपत्तं (०) साहिरणं (०) सपायच्छित्तं (०) भत्तपाणपडियाइक्खियं  
 (०) अट्टजा(यम्मि)यं निग्गन्थि निग्गन्थे गेण्हमाणे वा अवलम्बमाणे वा नाइक्कमइ  
 ॥ २०३ ॥ छ कप्पस्स पलिमन्थू पन्नत्ता, तंजहा-कोकुइए संजमस्स पलिमन्थू, मोहरिए  
 सच्चवयणस्स पलिमन्थू, तित्ति(णी)णिए एसणागोयरस्स पलिमन्थू, चक्खुलोलुए  
 इरियावहियाए पलिमन्थू, इच्छालो(भ-ल-ए)भे मुत्तिमग्गस्स पलिमन्थू, (भिज्जा)  
 भुज्जो भुज्जो नियाणकरणे सिद्धि(मोक्ख)मग्गस्स पलिमन्थू, सव्वत्थ भगवया अनि-  
 याणया पसत्था ॥ २०४ ॥ छव्विहा कप्पट्ठिइ पन्नत्ता, तंजहा-सामाइयसंजयकप्पट्ठिइ,  
 छेओवट्ठावणियसंजयकप्पट्ठिइ, निव्विसमाणकप्पट्ठिइ, निव्विट्ठकाइयकप्पट्ठिइ, जिण-  
 कप्पट्ठिइ, थेरकप्पट्ठिइ ॥ २०५ ॥ ति-वेमि ॥ बिहकप्पे छट्ठो उदेसओ  
 समत्तो ॥ ६ ॥ बिहकप्पसुत्तं समत्तं ॥



णमोऽस्त्यु णं समणस्स भगवओ णायपुत्तमहावीरस्स

## सुत्तागमे

तत्थ णं

णिसीहसुत्तं

पढमो उद्देसो

जे भिक्खू हत्थकम्मं करेइ करेत्तं वा साइज्जइ ॥ १ ॥ जे भिक्खू अंगादाणं कट्ठेण वा किलिंचेण वा अंगुलियाए वा सलागाए वा संचालेइ संचालेत्तं वा साइज्जइ ॥ २ ॥ जे भिक्खू अंगादाणं संवाहेज्ज वा पलिमहेज्ज वा संवाहेत्तं वा पलिमहेत्तं वा साइज्जइ ॥ ३ ॥ जे भिक्खू अंगादाणं तेल्लेण वा घएण वा णवणीएण वा अब्भंगेज्ज वा मक्खेज्ज वा भिल्लिगेज्ज वा अब्भंगेत्तं वा मक्खेत्तं वा भिल्लिगेत्तं वा साइज्जइ ॥ ४ ॥ जे भिक्खू अंगादाणं कक्केण वा लोद्धेण वा पउमचुण्णेण वा ण्हाणेण वा सिणाणेण वा चुण्णेहिं वा वण्णेहिं वा उव्वेद्वेइ वा परिवेद्वेइ वा उव्वेद्वेत्तं वा परिवेद्वेत्तं वा साइज्जइ ॥ ५ ॥ जे भिक्खू अंगादाणं सीओदगवियडेण वा उसिणोदगवियडेण वा उच्छोल्लेज्ज वा पथोवेज्ज वा उच्छोल्लेत्तं वा पथोवेत्तं वा साइज्जइ ॥ ६ ॥ जे भिक्खू अंगादाणं णिच्छल्लेइ णिच्छल्लेत्तं वा साइज्जइ ॥ ७ ॥ जे भिक्खू अंगादाणं जिं(जिग)घइ जिघत्तं वा साइज्जइ ॥ ८ ॥ जे भिक्खू अंगादाणं अण्णयरंसि अचित्तंसि सोयंसि अणुप्पवेसेत्ता सुक्कपोग्गले णिग्घाएइ णिग्घायत्तं वा साइज्जइ ॥ ९ ॥ जे भिक्खू सचि(त्तं)तपइट्ठियं गंधं जिघइ जिघत्तं वा साइज्जइ ॥ १० ॥ जे भिक्खू पयमग्गं वा संकमं वा अवलंबणं वा अण्णउत्थिएण वा गारत्थिएण वा कारेइ कारेत्तं वा साइज्जइ ॥ ११ ॥ जे भिक्खू दगवीणियं अण्णउत्थिएहिं वा गारत्थिएहिं वा कारेइ कारेत्तं वा साइज्जइ ॥ १२ ॥ जे भिक्खू सिक्कगं वा सिक्कगणंतगं वा अण्णउत्थिएण वा गारत्थिएण वा कारेइ कारेत्तं वा साइज्जइ ॥ १३ ॥ जे भिक्खू सोत्थियं वा रज्जुयं वा चिलिमिलिं वा अण्णउत्थिएण वा गारत्थिएण वा कारेइ कारेत्तं वा साइज्जइ ॥ १४ ॥ जे भिक्खू सूइए उत्तरकरणं अण्णउत्थिएण वा गारत्थिएण वा कारेइ कारेत्तं वा साइज्जइ ॥ १५ ॥ जे भिक्खू पिप्पलगस्स उत्तरकरणं अण्णउत्थिएण वा गारत्थिएण वा कारेइ कारेत्तं वा साइज्जइ ॥ १६ ॥ जे भिक्खू णखच्छेयणगस्सुत्तरकरणं अण्णउत्थिएण वा गारत्थिएण

वा कारेइ कारेंतं वा साइज्जइ ॥ १७ ॥ जे भिक्खू कण्णसोहणगस्सुत्तरकरणं अण्ण-  
 उत्थिएण वा गारत्थिएण वा कारेइ कारेंतं वा साइज्जइ ॥ १८ ॥ जे भिक्खू अणट्ठाए  
 सूइं जायइ जायंतं वा साइज्जइ ॥ १९ ॥ जे भिक्खू अणट्ठाए पिप्पलंगं जायइ जायंतं वा  
 साइज्जइ ॥ २० ॥ जे भिक्खू अणट्ठाए कण्णसोहणगं जायइ जायंतं वा साइज्जइ ॥ २१ ॥  
 जे भिक्खू अणट्ठाए णखच्छेयणगं जायइ जायंतं वा साइज्जइ ॥ २२ ॥ जे भिक्खू  
 अविहीए सूइं जायइ जायंतं वा साइज्जइ ॥ २३ ॥ जे भिक्खू अविहीए पिप्पलंगं  
 जायइ जायंतं वा साइज्जइ ॥ २४ ॥ जे भिक्खू अविहीए णहच्छेयणगं जायइ  
 जायंतं वा साइज्जइ ॥ २५ ॥ जे भिक्खू अविहीए कण्णसोहणयं जायइ जायंतं वा  
 साइज्जइ ॥ २६ ॥ जे भिक्खू पाडिहारियं सूइं जाइत्ता वत्थं सिव्विस्सामिति पायं  
 सिव्वइ सिव्वंतं वा साइज्जइ ॥ २७ ॥ जे भिक्खू पाडिहारियं पिप्पलंगं जाइत्ता वत्थं  
 छिंदिस्सामिति पायं छिंदइ छिंदंतं वा साइज्जइ ॥ २८ ॥ जे भिक्खू पाडिहारियं  
 णहच्छेयणयं जाइत्ता णहं छिंदिस्सामिति सल्लुद्धरणं करेइ करेंतं वा साइज्जइ ॥ २९ ॥  
 जे भिक्खू पाडिहारियं कण्णसोहणगं जाइत्ता कण्णमलं णीहरिस्सामिति दंतमलं वा  
 णखमलं वा णीहरेइ णीहरेंतं वा साइज्जइ ॥ ३० ॥ जे भिक्खू अप्पणो एकस्स  
 अट्ठाए सूइं जाइत्ता अण्णमण्णस्स अणुप्पदेइ अणुप्पदेंतं वा साइज्जइ ॥ ३१ ॥ जे  
 भिक्खू अप्पणो एकस्स अट्ठाए पिप्पलंगं जाइत्ता अण्णमण्णस्स अणुप्पदेइ अणुप्पदेंतं  
 वा साइज्जइ ॥ ३२ ॥ जे भिक्खू अप्पणो एकस्स अट्ठाए णहच्छेयणयं जाइत्ता  
 अण्णमण्णस्स अणुप्पदेइ अणुप्पदेंतं वा साइज्जइ ॥ ३३ ॥ जे भिक्खू अप्पणो एकस्स  
 अट्ठाए कण्णसोहणयं जाइत्ता अण्णमण्णस्स अणुप्पदेइ अणुप्पदेंतं वा साइज्जइ ॥ ३४ ॥  
 जे भिक्खू सूइं अविहीए पच्चप्पिणइ पच्चप्पिणंतं वा साइज्जइ ॥ ३५ ॥ जे भिक्खू  
 अविहीए पिप्पलंगं पच्चप्पिणइ पच्चप्पिणंतं वा साइज्जइ ॥ ३६ ॥ जे भिक्खू अविहीए  
 णहच्छेयणगं पच्चप्पिणइ पच्चप्पिणंतं वा साइज्जइ ॥ ३७ ॥ जे भिक्खू अविहीए कण्णसोह-  
 णयं पच्चप्पिणइ पच्चप्पिणंतं वा साइज्जइ ॥ ३८ ॥ जे भिक्खू लाउयपायं वा दासपायं  
 वा मट्ठियापायं वा अण्णउत्थिएण वा गारत्थिएण वा परिघट्ठावेइ वा संठवेइ वा  
 जमावेइ वा अलमप्पणो कारणयाए सुहुमसवि णो कप्पइ जाणमाणे सरमाणे अण्ण-  
 मण्णस्स वियरइ वियरंतं वा साइज्जइ ॥ ३९ ॥ जे भिक्खू दंडयं वा अवलेहणियं  
 वा वेणुसूइयं वा अण्णउत्थिएण वा गारत्थिएण वा परिघट्ठावेइ वा संठवेइ वा  
 जमावेइ वा अलमप्पणो कारणयाए सुहुमसवि णो कप्पइ जाणमाणे सरमाणे अण्ण-  
 मण्णस्स वियरइ वियरंतं वा साइज्जइ ॥ ४० ॥ जे भिक्खू पायस्स एकं तुंडियं

१ थेरावेक्खाए, तेसिं कप्पइ ति ।

तड्डेइ तड्डेंतं वा साइज्जइ ॥ ४१ ॥ जे भिक्खू पायस्स परं तिण्हं तुड्डियाणं तड्डेइ तड्डेंतं वा साइज्जइ ॥ ४२ ॥ जे भिक्खू पायं अविहीए बंधइ बंधंतं वा साइज्जइ ॥ ४३ ॥ जे भिक्खू पायं एगेण बंधेण बंधइ बंधंतं वा साइज्जइ ॥ ४४ ॥ जे भिक्खू पायं परं तिण्हं बंधाणं बंधइ बंधंतं वा साइज्जइ ॥ ४५ ॥ जे भिक्खू अइरेगबंधणं पायं दिवड्ढाओ मासाओ परेण धरेइ धरेंतं वा साइज्जइ ॥ ४६ ॥ जे भिक्खू वत्थस्स एगं पडियाणियं देइ देंतं वा साइज्जइ ॥ ४७ ॥ जे भिक्खू वत्थस्स परं तिण्हं पडियाणियाणं देइ देंतं वा साइज्जइ ॥ ४८ ॥ जे भिक्खू अविहीए वत्थं सिव्वइ सिव्वंतं वा साइज्जइ ॥ ४९ ॥ जे भिक्खू वत्थस्सेगं फालियगंठियं करेइ करेंतं वा साइज्जइ ॥ ५० ॥ जे भिक्खू वत्थस्स परं तिण्हं फालियगंठियाणं करेइ करेंतं वा साइज्जइ ॥ ५१ ॥ (‘‘वि० दे० साइज्जइ...परं तिण्हं...’) जे भिक्खू वत्थं अविहीए गंटेइ गंठंतं वा साइज्जइ ॥ ५२ ॥ जे भिक्खू अतज्जाएणं गहेइ गहंतं वा साइज्जइ ॥ ५३ ॥ जे भिक्खू अइरेगगहियं वत्थं परं दिवड्ढाओ मासाओ धरेइ धरेंतं वा साइज्जइ ॥ ५४ ॥ जे भिक्खू गिहधूमं अण्णउत्थिएण वा गारत्थिएण वा परिसाडावेइ परिसाडावेंतं वा साइज्जइ ॥ ५५ ॥ जे भिक्खू पूइकम्मं भुंजइ भुंजंतं वा साइज्जइ । तं सेवमाणे आवज्जइ मासियं परिहारट्ठणं अणुग्धाइयं ॥ ५६ ॥  
**गिंसीहउज्झयणे पढमो उद्देसो समत्तो ॥ १ ॥**

### विइओ उद्देसो

जे भिक्खू दारुदंडयं पायपुंछणयं करेइ करेंतं वा साइज्जइ ॥ ५७ ॥ जे भिक्खू दारुदंडयं पायपुंछणं गेण्हइ गेण्हंतं वा साइज्जइ ॥ ५८ ॥ जे भिक्खू दारुदंडयं पायपुंछणं धरेइ धरेंतं वा साइज्जइ ॥ ५९ ॥ जे भिक्खू दारुदंडयं पायपुंछणं वियरइ वियरंतं वा साइज्जइ ॥ ६० ॥ जे भिक्खू दारुदंडयं पायपुंछणं परिभाएइ परिभाएंतं वा साइज्जइ ॥ ६१ ॥ जे भिक्खू दारुदंडयं पायपुंछणं परिभुंजइ परिभुंजंतं वा साइज्जइ ॥ ६२ ॥ जे भिक्खू दारुदंडयं पायपुंछणं परं दिवड्ढाओ मासाओ धरेइ धरेंतं वा साइज्जइ ॥ ६३ ॥ जे भिक्खू दारुदंडयं पायपुंछणयं विसुयावेइ विसुयावेंतं वा साइज्जइ ॥ ६४ ॥ जे भिक्खू अचित्तपइट्ठियं गंधं जिंघइ जिंघंतं वा

१ गणु बिहक्कप्पे ‘कप्पइ गिग्गंथाणं दारुदंडयं पायपुंछणयं धारित्ताए’ ति एत्थ धारगस्स पायच्छित्तं ति विरोहाभासो, णेवं, तत्थ ‘दारुदंडयं पायपुंछणयं’ इच्चैयस्स सदब्धियं रयहरणिं ति अट्ठो, जा साहूणं कप्पइ णो साहुणीणं, ‘पूजणी’ ति भासाए, इत्थ दारुदंडएण पायपुंछणेण वत्थावेढणरहियस्स रयहरणस्स गहणं ति ।  
 २ सकारणं कप्पइ दिवड्ढमासदारुदंडयपायपुंछणयधारणं ति ।

साइज्जइ ॥ ६५ ॥ जे भिक्खू पयमग्गं वा संकमं वा आलंबणं वा सयमेव करेइ  
 करेत्तं वा साइज्जइ ॥ ६६ ॥ जे भिक्खू दग्गवीणियं सयमेव करेइ करेत्तं वा साइज्जइ  
 ॥ ६७ ॥ जे भिक्खू सिक्कगं वा सिक्कगणंतगं वा सयमेव करेइ करेत्तं वा साइज्जइ  
 ॥ ६८ ॥ जे भिक्खू सोत्तियं वा रज्जुयं वा चिलिमिलिं वा सयमेव करेइ करेत्तं वा  
 साइज्जइ ॥ ६९ ॥ जे भिक्खू सईए उत्तरकरणं सयमेव करेइ करेत्तं वा साइज्जइ  
 ॥ ७० ॥ जे भिक्खू पिप्पलयस्स उत्तरकरणं सयमेव करेइ करेत्तं वा साइज्जइ ॥ ७१ ॥  
 जे भिक्खू णहच्छेयणगस्स उत्तरकरणं सयमेव करेइ करेत्तं वा साइज्जइ ॥ ७२ ॥  
 जे भिक्खू कण्णसोहणयस्स उत्तरकरणं सयमेव करेइ करेत्तं वा साइज्जइ ॥ ७३ ॥  
 जे भिक्खू लहुसगं फरुसं वयइ वयंतं वा साइज्जइ ॥ ७४ ॥ जे भिक्खू लहुसगं मुसं  
 वयइ वयंतं वा साइज्जइ ॥ ७५ ॥ जे भिक्खू लहुसगं अदत्तं आदियइ आवियंतं वा  
 साइज्जइ ॥ ७६ ॥ जे भिक्खू लहुसएण सीओदगवियडेण वा उसिणोदगवियडेण वा  
 हत्थाणि वा पायाणि वा कण्णाणि वा अच्छीणि वा दंताणि वा णहाणि वा (मुहं वा)  
 उच्छोलेज्ज वा पधोवेज्ज वा उच्छोलेंतं वा पधोवेंतं वा साइज्जइ ॥ ७७ ॥ जे भिक्खू  
 कसिणाइं वत्थाइं धरेइ धरेत्तं वा साइज्जइ ॥ ७८ ॥ जे भिक्खू अभिण्णाइं वत्थाइं  
 धरेइ धरेत्तं वा साइज्जइ ॥ ७९ ॥ जे भिक्खू लाउयपायं वा दारुयपायं वा मट्ठिया-  
 पायं वा सयमेव परिघट्टेइ वा संठवेइ वा जमावेइ वा परिघट्टेंतं वा संठवेंतं वा  
 जमावेंतं वा साइज्जइ ॥ ८० ॥ जे भिक्खू दंडगं वा अवलेहणं वा वेणुसूइयं वा  
 सयमेव परिघट्टेइ वा संठवेइ वा जमावेइ वा परिघट्टेंतं वा संठवेंतं वा जमावेंतं वा  
 साइज्जइ ॥ ८१ ॥ जे भिक्खू णियगवेसियगं पडिग्गहगं धरेइ धरेत्तं वा साइज्जइ  
 ॥ ८२ ॥ जे भिक्खू परगवेसियगं पडिग्गहगं धरेइ धरेत्तं वा साइज्जइ ॥ ८३ ॥  
 जे भिक्खू वरगवेसियगं पडिग्गहगं धरेइ धरेत्तं वा साइज्जइ ॥ ८४ ॥ जे भिक्खू  
 बलगवेसियगं पडिग्गहगं धरेइ धरेत्तं वा साइज्जइ ॥ ८५ ॥ जे भिक्खू लवंगवेसियगं  
 पडिग्गहगं धरेइ धरेत्तं वा साइज्जइ ॥ ८६ ॥ जे भिक्खू नितियं अगगपिंडं भुंजइ  
 भुंजंतं वा साइज्जइ ॥ ८७ ॥ जे भिक्खू नितियं पिंडं भुंजइ भुंजंतं वा साइज्जइ  
 ॥ ८८ ॥ जे भिक्खू नितियं अवद्धभागं भुंजइ भुंजंतं वा साइज्जइ ॥ ८९ ॥ जे भिक्खू  
 नितियं भागं भुंजइ भुंजंतं वा साइज्जइ ॥ ९० ॥ जे भिक्खू नितियं उवद्धभागं  
 भुंजइ भुंजंतं वा साइज्जइ ॥ ९१ ॥ जे भिक्खू नितियावासं वसइ वसंतं वा  
 साइज्जइ ॥ ९२ ॥ जे भिक्खू पुरेसंथवं वा पच्छासंथवं वा करेइ करेत्तं वा साइज्जइ  
 ॥ ९३ ॥ जे भिक्खू समाणे वा वसमाणे वा गामाणुगामं वा दूइज्जमाणे पुरेसंथु-

याणि वा पच्छासंथुयाणि वा कुलाइं पुव्वामेव भिक्खुवरियेण अणुपविसइ अणुप-  
 विसंतं वा साइज्जइ ॥ ९४ ॥ जे भिक्खू अणुउत्थिएण वा गारत्थिएण वा अपरि-  
 हारिए वा अपरिहारिएण सद्धिं गाहावइकुलं पिंडवायपडियाए णिक्खमइ वा अणुप-  
 विसइ वा णिक्खमंतं वा अणुपविसंतं वा साइज्जइ ॥ ९५ ॥ जे भिक्खू अणुउत्थिएण  
 वा गारत्थिएण वा परिहारिओ वा अपरिहारिएण सद्धिं बहिया विहारभूमिं वा वियारभूमिं  
 वा णिक्खमइ वा पविसइ वा णिक्खमंतं वा पविसंतं वा साइज्जइ ॥ ९६ ॥ जे भिक्खू  
 अणुउत्थिएण वा गारत्थिएण वा परिहारिओ अपरिहारिएहिं सद्धिं गामाणुगामं  
 दूइज्जइ दूइजंतं वा साइज्जइ ॥ ९७ ॥ जे भिक्खू अणुययं पाणगजायं पडिगाहिता  
 पुप्फं पुप्फं आइयइ कसायं २ परिट्टवेइ परिट्टवेंतं वा साइज्जइ ॥ ९८ ॥ जे भिक्खू  
 अणुययं भोयणजायं पडिगाहिता सुब्बि २ भुंजइ दुब्बि २ परिट्टवेइ परिट्टवेंतं वा  
 साइज्जइ ॥ ९९ ॥ जे भिक्खू मणुणं भोयणजायं पडिगाहेता बहुपरियावणं सिया  
 अदूरे तत्थ साहम्मिया संभोइया समणुणा अपरिहारिया संता परिवसंति ते अणापु-  
 च्छि(य)या अणिमंतिया परिट्टवेइ परिट्टवेंतं वा साइज्जइ ॥ १०० ॥ जे भिक्खू सागारियं  
 पिंडं गिण्हइ गिण्हंतं वा साइज्जइ ॥ १०१ ॥ जे भिक्खू सागारियं पिंडं भुंजइ  
 भुंजंतं वा साइज्जइ ॥ १०२ ॥ जे भिक्खू सागारियं कुलं अजाणिय अपुच्छिय  
 अगवेसिय पुव्वामेव पिंडवायपडियाए अणुपविसइ अणुपविसंतं वा साइज्जइ ॥ १०३ ॥  
 जे भिक्खू सागारियनीसाए असणं वा पाणं वा खाइमं वा साइमं वा ओभासिय २  
 जायइ जायंतं वा साइज्जइ ॥ १०४ ॥ जे भिक्खू उडुबद्धियं सेज्जासंधारयं  
 परं पज्जोसवणाओ उवाइणाइ उवाइणंतं वा साइज्जइ ॥ १०५ ॥ जे भिक्खू वासा-  
 वासियं सेज्जासंधारयं परं दसरायकप्पाओ उवाइणाइ उवाइणंतं वा साइज्जइ  
 ॥ १०६ ॥ जे भिक्खू उडुबद्धियं वा वासावासियं वा सेज्जासंधारणं उवरि सिज्ज-  
 माणं पेहाए न ओसारेइ न ओसारेंतं वा साइज्जइ ॥ १०७ ॥ जे भिक्खू पाडि-  
 हारियं सेज्जासंधारयं अणुणुवेत्ता बाहिं णीणेइ णीणेंतं वा साइज्जइ ॥ १०८ ॥  
 जे भिक्खू सागारियसंतियं सेज्जासंधारयं अणुणुवेत्ता बाहिं णीणेइ णीणेंतं वा  
 साइज्जइ ॥ १०९ ॥ जे भिक्खू पाडिहारियं सागारियसंतियं वा सेज्जासंधारयं  
 दोच्चं पि अणुणुवेत्ता बाहिं णीणेइ णीणेंतं वा साइज्जइ ॥ ११० ॥ जे भिक्खू  
 पाडिहारियं सेज्जासंधारयं आदाय अप्पडिहट्ठु संपव्वयइ संपव्वयंतं वा साइज्जइ  
 ॥ १११ ॥ जे भिक्खू सागारियसंतियं सेज्जासंधारयं आदाय अहिगरणं कट्ठु अण-  
 प्पिणेत्ता संपव्वयइ संपव्वयंतं वा साइज्जइ ॥ ११२ ॥ जे भिक्खू पाडिहारियं  
 वा सागारियसंतियं वा सेज्जासंधारयं विप्पणट्ठं ण गवेसइ ण गवेसंतं वा साइज्जइ



॥ ११३ ॥ जे भिक्खु इत्तरियंपि उवहिं ण पडिलेहेइ ण पडिलेहेतं वा साइज्जइ ।  
तं सेवमाणे आवज्जइ मासियं परिहारट्ठाणं उग्घाइयं ॥ ११४ ॥ णिसीहऽज्ज-  
यणे वीओ उद्देसो समत्तो ॥ २ ॥

### तइओ उद्देसो

जे भिक्खु आगंतारेसु वा आरामागारेसु वा गाहावइकुलेसु वा परियावसहेसु  
वा अण्णउत्थियं वा गारत्थियं वा असणं वा ४ ओभासिय २ जायइ जायंतं वा  
साइज्जइ ॥ ११५ ॥ एवं अण्णउत्थिया वा गारत्थिया वा, अण्णउत्थिणी वा  
गारत्थिणी वा, अण्णउत्थिणीओ वा गारत्थिणीओ वा असणं वा ४ ओभासिय २  
जायइ जायंतं वा साइज्जइ ॥ ११६-११७-११८ ॥ जे भिक्खु आगंतारेसु वा  
आरामागारेसु वा गाहावइकुलेसु वा परियावसहेसु वा कोउहल्लपडियाए पडियागयं  
समाणं अण्णउत्थियं वा गारत्थियं वा, अण्णउत्थिया वा गारत्थिया वा, अण्ण-  
उत्थिणी वा गारत्थिणी वा, अण्णउत्थिणीओ वा गारत्थिणीओ वा असणं वा  
४ ओभासिय २ जायइ जायंतं वा साइज्जइ ॥ ११९-१२०-१२१-१२२ ॥ जे  
जे भिक्खु आगंतारेसु वा आरामागारेसु वा गाहावइकुलेसु वा परियावसहेसु वा  
अण्णउत्थिएण वा गारत्थिएण वा, अण्णउत्थिएहि वा गारत्थिएहि वा, अण्ण-  
उत्थिणीए वा गारत्थिणीए वा, अण्णउत्थिणीहि वा गारत्थिणीहि वा असणं वा  
४ अभिहडं आहट्ठु दिज्जमाणं पडिसेहेत्ता तमेव अणुवत्थिय २ परिवेदिय २ परि-  
जविय २ ओभासिय २ जायइ जायंतं वा साइज्जइ ॥ १२३-१२४-१२५-१२६ ॥  
जे भिक्खु गाहावइकुलं पिंडवायपडियाए पविट्ठे पडियाइक्खिए समाणे दोच्चं(पि)  
तमेव कुलं अणुप्पविसइ अणुप्पविसंतं वा साइज्जइ ॥ १२७ ॥ जे भिक्खु संख-  
डिपलोयणाए असणं वा ४ पडिग्गाहेइ पडिग्गाहेतं वा साइज्जइ ॥ १२८ ॥ जे  
भिक्खु गाहावइकुलं पिंडवायपडियाए अणुपविट्ठे समाणे परं तिघरंतराओ असणं  
वा ४ अभिहडं आहट्ठु दिज्जमाणं पडिग्गाहेइ पडिग्गाहेतं वा साइज्जइ ॥ १२९ ॥  
जे भिक्खु अप्पणो पाए आमजेज वा पमजेज वा आमजंतं वा पमजंतं वा  
साइज्जइ ॥ १३० ॥ जे भिक्खु अप्पणो पाए संवाहेज वा पल्लिमहेज वा संवाहेतं  
वा पल्लिमहेतं वा साइज्जइ ॥ १३१ ॥ जे भिक्खु अप्पणो पाए तेल्लेण वा चएण  
वा णवणीएण वा मक्खेज वा अब्भंगेज वा मक्खेतं वा अब्भंगेतं वा साइज्जइ  
॥ १३२ ॥ जे भिक्खु अप्पणो पाए लोद्धेण वा कक्केण वा (०) उल्लोद्धेज वा  
उव्वट्ठेज वा उल्लोल्लेतं वा उव्वट्ठेतं वा साइज्जइ ॥ १३३ ॥ जे भिक्खु अप्पणो

पाए सीओदगवियडेण वा उसिणोदगवियडेण वा उच्छोलेज वा पधोवेज वा उच्छोलेंतं वा पधोवेंतं वा साइज्जइ ॥ १३४ ॥ जे भिक्खू अप्पणो पाए फूमेज वा रएज वा फूमेंतं वा रएंतं वा साइज्जइ ॥ १३५ ॥ जे भिक्खू अप्पणो कायं आमजेज वा पमजेज वा आमजंतं वा पमजंतं वा साइज्जइ ॥ १३६ ॥ जे भिक्खू अप्पणो कायं संवाहेज वा पलिमेहेज वा संवाहेंतं वा पलिमहेंतं वा साइज्जइ ॥ १३७ ॥ जे भिक्खू अप्पणो कायं तेहेण वा घएण वा णवणीएण वा मक्खेज वा भिल्लिगेज वा मक्खेंतं वा भिल्लिगेंतं वा साइज्जइ ॥ १३८ ॥ जे भिक्खू अप्पणो कायं लोद्धेण वा कक्केण वा उल्लोलेज वा उव्वट्टेज वा उल्लोलेंतं वा उव्वट्टेंतं वा साइज्जइ ॥ १३९ ॥ जे भिक्खू अप्पणो कायं सीओदगवियडेण वा उसिणोदगवियडेण वा उच्छोलेज वा पधोवेज वा उच्छोलेंतं वा पधोवेंतं वा साइज्जइ ॥ १४० ॥ जे भिक्खू अप्पणो कायं फूमेज वा रएज वा फूमेंतं वा रएंतं वा साइज्जइ ॥ १४१ ॥ जे भिक्खू अप्पणो कायंसि वणं आमजेज वा पमजेज वा आमजंतं वा पमजंतं वा साइज्जइ ॥ १४२ ॥ जे भिक्खू अप्पणो कायंसि वणं संवाहेज वा पलिमेहेज वा संवाहेंतं वा पलिमहेंतं वा साइज्जइ ॥ १४३ ॥ जे भिक्खू अप्पणो कायंसि वणं तेहेण वा घएण वा णवणीएण वा मक्खेज वा भिल्लिगेज वा मक्खेंतं वा भिल्लिगेंतं वा साइज्जइ ॥ १४४ ॥ जे भिक्खू अप्पणो कायंसि वणं लोद्धेण वा कक्केण वा उल्लोलेज वा उव्वट्टेज वा उल्लोलेंतं वा उव्वट्टेंतं वा साइज्जइ ॥ १४५ ॥ जे भिक्खू अप्पणो कायंसि वणं सीओदगवियडेण वा उसिणोदगवियडेण वा उच्छोलेज वा पधोवेज वा उच्छोलेंतं वा पधोवेंतं वा साइज्जइ ॥ १४६ ॥ जे भिक्खू अप्पणो कायंसि वणं फूमेज वा रएज वा फूमेंतं वा रएंतं वा साइज्जइ ॥ १४७ ॥ जे भिक्खू अप्पणो कायंसि गंडं वा पलियं वा अरइयं वा अंसियं वा भगंदलं वा अण्णयरेणं तिक्खेणं सत्थजाएणं अच्छिदेज वा विच्छिदेज वा अच्छिदंतं वा विच्छिदंतं वा साइज्जइ ॥ १४८ ॥ जे भिक्खू अप्पणो कायंसि गंडं वा पलियं वा अरइयं वा अंसियं वा भगंदलं वा अण्णयरेणं तिक्खेणं सत्थजाएणं अच्छिदित्ता विच्छिदित्ता पूयं वा सोणियं वा णीहरेज वा विसोहेज वा णीहरेंतं वा विसोहेंतं वा साइज्जइ ॥ १४९ ॥ जे भिक्खू अप्पणो कायंसि गंडं वा पलियं वा अरइयं वा अंसियं वा भगंदलं वा अण्णयरेणं तिक्खेणं सत्थजाएणं अच्छिदित्ता विच्छिदित्ता (पू०) णीहरित्ता विसोहेत्ता सीओदगवियडेण वा उसिणोदगवियडेण वा उच्छोलेज वा पधोवेज वा उच्छोलेंतं वा पधोवेंतं वा साइज्जइ ॥ १५० ॥ जे भिक्खू अप्पणो कायंसि गंडं वा पलियं वा अरइयं वा अंसियं वा

भगंदलं वा अण्णयरेणं तिकखेणं सत्थजाएणं अच्छिदिता विच्छिदिता णीहरिता  
 विसोहेत्ता पधोइत्ता अण्णयरेणं आलेवणजाएणं आलिपेज वा विलिपेज वा आलिपंतं  
 वा विलिपंतं वा साइज्जइ ॥ १५१ ॥ जे भिक्खू अप्पणो कायंसि गंडं वा पलियं वा  
 अरइयं वा अंसियं वा भगंदलं वा अण्णयरेणं तिकखेणं सत्थजाएणं अच्छिदिता  
 विच्छिदिता णीहरिता विसोहेत्ता पधोइत्ता विलिपिता तेहेण वा घएण वा णवणीएण  
 वा अब्भंगेज वा मक्खेज वा अब्भंगंतं वा मक्खंतं वा साइज्जइ ॥ १५२ ॥ जे  
 भिक्खू अप्पणो कायंसि गंडं वा पलियं वा अरइयं वा अंसियं वा भगंदलं वा  
 अण्णयरेणं तिकखेणं सत्थजाएणं अच्छिदिता विच्छिदिता णीहरिता विसोहेत्ता  
 पधोइत्ता विलिपिता मक्खेत्ता अण्णयरेणं धूवणजाएणं धूवेज वा पधूवेज वा धूवेंतं  
 वा पधूवेंतं वा साइज्जइ ॥ १५३ ॥ जे भिक्खू अप्पणो पालुकिमियं वा कुच्छिकिमियं  
 वा अंगुलीए णिवेसिय २ णीहरइ णीहरंतं वा साइज्जइ ॥ १५४ ॥ जे भिक्खू अप्पणो  
 दीहाओ णहसिहोओ कप्पेज वा संठवेज वा कप्पंतं वा संठवेंतं वा साइज्जइ ॥ १५५ ॥  
 जे भिक्खू अप्पणो दीहाइं जंधरोमाइं कप्पेज वा संठवेज वा कप्पंतं वा संठवेंतं वा  
 साइज्जइ ॥ १५६ ॥ जे भिक्खू अप्पणो दीहाइं कक्खरोमाइं कप्पेज वा संठवेज  
 वा कप्पंतं वा संठवेंतं वा साइज्जइ ॥ १५७ ॥ जे भिक्खू अप्पणो दीहाइं मंसुरोमाइं  
 कप्पेज वा संठवेज वा कप्पंतं वा संठवेंतं वा साइज्जइ ॥ १५८ ॥ जे भिक्खू अप्पणो  
 दीहाइं णासारोमाइं कप्पेज वा संठवेज वा कप्पंतं वा संठवेंतं वा साइज्जइ ॥ १५९ ॥  
 जे भिक्खू अप्पणो दीहाइं चक्खुरोमाइं कप्पेज वा संठवेज वा कप्पंतं वा संठवेंतं वा  
 साइज्जइ ॥ १६० ॥ जे भिक्खू अप्पणो दीहाइं कणरोमाइं कप्पेज वा संठवेज वा  
 कप्पंतं वा संठवेंतं वा साइज्जइ ॥ १६१ ॥ जे भिक्खू अप्पणो दंते आघंसेज वा  
 पघंसेज वा आघंसंतं वा पघंसंतं वा साइज्जइ ॥ १६२ ॥ जे भिक्खू अप्पणो दंते<sup>१</sup>  
 सीओदगवियडेण वा उसिणोदगवियडेण वा उच्छोलेज वा पधोवेज वा उच्छोलेंतं  
 वा पधोवेंतं वा साइज्जइ ॥ १६३ ॥ जे भिक्खू अप्पणो दंते फूमेज वा रएज  
 वा फूमंतं वा रएंतं वा साइज्जइ ॥ १६४ ॥ जे भिक्खू अप्पणो उट्ठे आमजेज  
 वा पमजेज वा आमजंतं वा पमजंतं वा साइज्जइ ॥ १६५ ॥ जे भिक्खू अप्पणो  
 उट्ठे संवाहेज वा पलिमहेज वा संवाहंतं वा पलिमहंतं वा साइज्जइ ॥ १६६ ॥  
 जे भिक्खू अप्पणो उट्ठे तेहेण वा घएण वा णवणीएण वा मक्खेज वा भिलिगेज  
 वा मक्खंतं वा भिलिगंतं वा साइज्जइ ॥ १६७ ॥ जे भिक्खू अप्पणो उट्ठे लोद्वेण

१ गंडाइछेयणे कयाइ घाओ, असज्झाइयं, रोगवित्थाराइदोस त्ति पायच्छित्तठाणं ।  
 २ सोहाणिमित्तं । ३ विहूसाए ।

वा कक्केण वा उल्लोलेज्ज वा उव्वहेज्ज वा उल्लोलेंतं वा उव्वहेंतं वा साइज्जइ ॥ १६८ ॥  
 जे भिक्खू अप्पणो उट्ठे सीओदगवियडेण वा उसिणोदगवियडेण वा उच्छोलेज्ज  
 वा पधोवेज्ज वा उच्छोलेंतं वा पधोवेंतं वा साइज्जइ ॥ १६९ ॥ जे भिक्खू  
 अप्पणो उट्ठे फूमेज्ज वा रएज्ज वा फूमेंतं वा रएंतं वा साइज्जइ ॥ १७० ॥ जे भिक्खू  
 अप्पणो दीहाइं उत्तरोद्वरोमाइं कप्पेज्ज वा संठवेज्ज वा कप्पेंतं वा संठवेंतं वा साइज्जइ  
 ॥ १७१ ॥ जे भिक्खू अप्पणो दीहाइं अच्छिपत्ताइं कप्पेज्ज वा संठवेज्ज वा कप्पेंतं  
 वा संठवेंतं वा साइज्जइ ॥ १७२ ॥ जे भिक्खू अप्पणो अच्छीणि आमजेज्ज वा  
 पमजेज्ज वा आमजंतं वा पमजंतं वा साइज्जइ ॥ १७३ ॥ जे भिक्खू अप्पणो  
 अच्छीणि संवाहेज्ज वा पलिमहेज्ज वा संवाहेंतं वा पलिमहेंतं वा साइज्जइ ॥ १७४ ॥  
 जे भिक्खू अप्पणो अच्छीणि तेहेण वा घएण वा गवणीएण वा मक्खेज्ज वा  
 भिल्लिगेज्ज वा मक्खेंतं वा भिल्लिगेंतं वा साइज्जइ ॥ १७५ ॥ जे भिक्खू अप्पणो  
 अच्छीणि लोहेण वा कक्केण वा उल्लोलेज्ज वा उव्वहेज्ज वा उल्लोलेंतं वा उव्वहेंतं वा  
 साइज्जइ ॥ १७६ ॥ जे भिक्खू अप्पणो अच्छीणि सीओदगवियडेण वा उसिणोदग-  
 वियडेण वा उच्छोलेज्ज वा पधोवेज्ज वा उच्छोलेंतं वा पधोवेंतं वा साइज्जइ ॥ १७७ ॥  
 जे भिक्खू अप्पणो अच्छीणि फूमेज्ज वा रएज्ज वा फूमेंतं वा रएंतं वा साइज्जइ  
 ॥ १७८ ॥ जे भिक्खू अप्पणो दीहाइं भुमगरोमाइं कप्पेज्ज वा संठवेज्ज वा कप्पेंतं  
 वा संठवेंतं वा साइज्जइ ॥ १७९ ॥ जे भिक्खू अप्पणो दीहाइं पासरोमाइं कप्पेज्ज  
 वा संठवेज्ज वा कप्पेंतं वा संठवेंतं वा साइज्जइ ॥ १८० ॥ जे भिक्खू अप्पणो दीहाइं  
 केसरोमाइं कप्पेज्ज वा संठवेज्ज वा कप्पेंतं वा संठवेंतं वा साइज्जइ ॥ १८१ ॥ जे  
 भिक्खू अप्पणो कायाओ सेयं वा जल्लं वा पंकं वा मलं वा णीहरेज्ज वा विसोहेज्ज  
 वा णीहरेंतं वा विसोहेंतं वा साइज्जइ ॥ १८२ ॥ जे भिक्खू अप्पणो अच्छिमलं वा  
 कण्णमलं वा दंतमलं वा णहमलं वा णीहरेज्ज वा विसोहेज्ज वा णीहरेंतं वा विसोहेंतं  
 वा साइज्जइ ॥ १८३ ॥ जे भिक्खू गामाणुगामं दूइज्जमाणे अप्पणो सीसदुवारियं  
 करेइ करेंतं वा साइज्जइ ॥ १८४ ॥ जे भिक्खू सणकप्पा(सा)सओ वा उण्णकप्पासओ  
 वा पोण्डकप्पासओ वा अमिलकप्पासओ वा वसीकरणसोत्तियं करेइ करेंतं वा साइज्जइ  
 ॥ १८५ ॥ जे भिक्खू गिहंसि वा गिहमुहंसि वा गिहदुवारियंसि वा गिहपडि-  
 दुवारियंसि वा गिहेल्लयंसि वा गिहंगणंसि वा गिहवच्चंसि वा उच्चारं वा पासवणं वा  
 परिट्ठवेइ परिट्ठवेंतं वा साइज्जइ ॥ १८६ ॥ जे भिक्खू मडगगिहंसि वा मडगल्लारियंसि  
 वा मडगथूभियंसि वा मडगासयंसि वा मडगलेणंसि वा मडगथंडिलंसि वा मडगवच्चंसि  
 वा उच्चारं वा पासवणं वा परिट्ठवेइ परिट्ठवेंतं वा साइज्जइ ॥ १८७ ॥ जे भिक्खू

इंगालदाहंसि वा खारदाहंसि वा गायदाहंसि वा तुसदाहंसि वा ऊसदाहंसि वा उच्चारं  
 वा पासवणं वा परिट्टवेइ परिट्टवेतं वा साइज्जइ ॥ १८८ ॥ जे भिक्खू अभिणवियासु  
 वा गोलेहणियासु अभिणवियासु वा मट्टियाखाणीसु वा परिभुजमाणियासु वा अपरि-  
 भुजमाणियासु वा उच्चारं वा पासवणं वा परिट्टवेइ परिट्टवेतं वा साइज्जइ ॥ १८९ ॥  
 जे भिक्खू सेयायणंसि वा पंकंसि वा पणगंसि वा उच्चारं वा पासवणं वा परिट्टवेइ  
 परिट्टवेतं वा साइज्जइ ॥ १९० ॥ जे भिक्खू उंवरवच्चंसि वा गग्गोहवच्चंसि वा  
 अस्सत्थवच्चंसि वा उच्चारं वा पासवणं वा परिट्टवेइ परिट्टवेतं वा साइज्जइ ॥ १९१ ॥  
 जे भिक्खू डागवच्चंसि वा सागवच्चंसि वा मूल्यवच्चंसि वा कोत्थुं(वरी)भरिवच्चंसि वा  
 खारवच्चंसि वा जीरयवच्चंसि वा दमण(ग)वच्चंसि वा मरुगवच्चंसि वा उच्चारं वा  
 पासवणं वा परिट्टवेइ परिट्टवेतं वा साइज्जइ ॥ १९२ ॥ जे भिक्खू इक्खुवणंसि वा  
 सालिवणंसि वा कुसुंभवणंसि वा कप्पासवणंसि वा उच्चारं वा पासवणं वा परिट्टवेइ  
 परिट्टवेतं वा साइज्जइ ॥ १९३ ॥ जे भिक्खू असोगवणंसि वा सत्तिवण्णवणंसि वा  
 चंपगवणंसि वा न्यूवणंसि वा अण्णयरेसु वा तहप्पगारेसु वा पत्तोवएसु पुप्फोवएसु  
 फलोवएसु वी(छाओ)योवएसु उच्चारं वा पासवणं वा परिट्टवेइ परिट्टवेतं वा साइज्जइ  
 ॥ १९४ ॥ जे भिक्खू सपायंसि वा परपायंसि वा दिया वा राओ वा वियाले वा उच्चा-  
 हिजमाणे सपायं गहाय परपायं जाइत्ता वा उच्चारं पासवणं वा परिट्टवेत्ता अणुग्गए  
 सूरिए एडेइ एडेंतं वा साइज्जइ । तं सेवमाणे आवज्जइ मासियं परिहारट्ठाणं उग्घाइयं  
 ॥ १९५ ॥ **गिन्सीहऽज्जयणे तइओ उहेसो समत्तो ॥ ३ ॥**

### चउत्थो उहेसो

जे भिक्खू रायं अत्तीकरेइ अत्तीकरेंतं वा साइज्जइ ॥ १९६ ॥ जे भिक्खू राया-  
 रक्खियं अत्तीकरेइ अत्तीकरेंतं वा साइज्जइ ॥ १९७ ॥ जे भिक्खू णगरारक्खियं  
 अत्तीकरेइ अत्तीकरेंतं वा साइज्जइ ॥ १९८ ॥ जे भिक्खू णिगमारक्खियं अत्तीकरेइ  
 अत्तीकरेंतं वा साइज्जइ ॥ १९९ ॥ जे भिक्खू देसारक्खियं अत्तीकरेइ अत्तीकरेंतं  
 वा साइज्जइ ॥ २०० ॥ जे भिक्खू सव्वारक्खियं अत्तीकरेइ अत्तीकरेंतं वा साइज्जइ  
 ॥ २०१ ॥ जे भिक्खू रायं अच्चीकरेइ अच्चीकरेंतं वा साइज्जइ ॥ २०२ ॥ जे भिक्खू  
 रायारक्खियं अच्चीकरेइ अच्चीकरेंतं वा साइज्जइ ॥ २०३ ॥ जे भिक्खू णगरारक्खियं  
 अच्चीकरेइ अच्चीकरेंतं वा साइज्जइ ॥ २०४ ॥ जे भिक्खू णिगमारक्खियं अच्चीकरेइ  
 अच्चीकरेंतं वा साइज्जइ ॥ २०५ ॥ जे भिक्खू देसारक्खियं अच्चीकरेइ अच्चीकरेंतं  
 वा साइज्जइ ॥ २०६ ॥ जे भिक्खू सव्वारक्खियं अच्चीकरेइ अच्चीकरेंतं वा साइज्जइ

॥ २०७ ॥ जे भिक्खू रायं अत्थीकरेइ अत्थीकरेंतं वा साइज्जइ ॥ २०८ ॥ जे भिक्खू रायारक्खियं अत्थीकरेइ अत्थीकरेंतं वा साइज्जइ ॥ २०९ ॥ जे भिक्खू णगरारक्खियं अत्थीकरेइ अत्थीकरेंतं वा साइज्जइ ॥ २१० ॥ जे भिक्खू णिगमारक्खियं अत्थीकरेइ अत्थीकरेंतं वा साइज्जइ ॥ २११ ॥ जे भिक्खू देसारक्खियं अत्थीकरेइ अत्थीकरेंतं वा साइज्जइ ॥ २१२ ॥ जे भिक्खू सव्वारक्खियं अत्थीकरेइ अत्थीकरेंतं वा साइज्जइ ॥ २१३ ॥ जे भिक्खू कसिणाओ ओसहीओ आहारेइ आहारेंतं वा साइज्जइ ॥ २१४ ॥ जे भिक्खू आयरिएहिं अदिण्णं आहारेइ आहारेंतं वा साइज्जइ ॥ २१५ ॥ जे भिक्खू आयरियोवज्जाएहिं अविदिण्णं विगइं आहारेइ आहारेंतं वा साइज्जइ ॥ २१६ ॥ जे भिक्खू ठवणाकुलाइं अजाणिय अपुच्छिय अग-  
वेसिय पुव्वामेव पिंढवायपडियाए अणुप्पविसइ अणुप्पविसंतं वा साइज्जइ ॥ २१७ ॥ जे भिक्खू णिग्गंथीणं उवस्सयंसि अविहीए अणुप्पविसइ अणुप्पविसंतं वा साइज्जइ ॥ २१८ ॥ जे भिक्खू णिग्गंथीणं आगमणपहंसि दंडगं वा रयहरणं वा मुहुपोत्तियं वा अण्णयरं वा उवगरणजायं ठवेइ ठवेंतं वा साइज्जइ ॥ २१९ ॥ जे भिक्खू णवाइं अणुप्पणाइं अहिगरणाइं उप्पाएइ उप्पाएंतं वा साइज्जइ ॥ २२० ॥ जे भिक्खू पोराणाइं अहिगरणाइं खामिय विओसवियाइं पुणो उदीरेइ उदीरेंतं वा साइज्जइ ॥ २२१ ॥ जे भिक्खू मुहं विप्फालिय हसइ हसंतं वा साइज्जइ ॥ २२२ ॥ जे भिक्खू पासत्थस्स संघाडयं देइ देंतं वा साइज्जइ ॥ २२३ ॥ जे भिक्खू पास-  
त्थस्स संघाडयं पडिच्छइ पडिच्छंतं वा साइज्जइ ॥ २२४ ॥ जे भिक्खू ओसण्णस्स संघाडयं देइ देंतं वा साइज्जइ ॥ २२५ ॥ जे भिक्खू ओसण्णस्स संघाडयं पडिच्छइ पडिच्छंतं वा साइज्जइ ॥ २२६ ॥ जे भिक्खू कुसीलस्स संघाडयं देइ देंतं वा साइज्जइ ॥ २२७ ॥ जे भिक्खू कुसीलस्स संघाडयं पडिच्छइ पडिच्छंतं वा साइज्जइ ॥ २२८ ॥ जे भिक्खू नितियस्स संघाडयं देइ देंतं वा साइज्जइ ॥ २२९ ॥ जे भिक्खू नितियस्स संघाडयं पडिच्छइ पडिच्छंतं वा साइज्जइ ॥ २३० ॥ जे भिक्खू संसत्तस्स संघाडयं देइ देंतं वा साइज्जइ ॥ २३१ ॥ जे भिक्खू संसत्तस्स संघाडयं पडिच्छइ पडिच्छंतं वा साइज्जइ ॥ २३२ ॥ जे भिक्खू उदओल्लिण वा ससिणिद्धेण वा हत्थेण वा दव्वीए वा भायणेण वा असणं वा ४ पडिग्गाहेइ पडिग्गाहेंतं वा साइज्जइ ॥ २३३ ॥ जे भिक्खू ससरक्खेण वा मट्टियासंसट्ठेण वा ऊसासंसट्ठेण वा लोणियसंसट्ठेण वा हरियालसंसट्ठेण वा मणोसिलसंसट्ठेण वा लोद्धसंसट्ठेण वा गेरुय-  
संसट्ठेण वा सेट्ठियसंसट्ठेण वा हिंगुलसंसट्ठेण वा अंजणसंसट्ठेण वा कुकुससंसट्ठेण वा पिट्ठसंसट्ठेण वा कंतवसंसट्ठेण वा कंदमूलसंसट्ठेण वा सिंगवेरसंसट्ठेण वा पुप्फसंसट्ठेण

वा उक्कुट्टसंसट्ठेण वा असंसट्ठेण वा हत्थेण वा दव्वीए वा भायणेण वा असणं वा  
 ४ पडिग्गाहेइ पडिग्गाहेंतं वा साइज्जइ ॥ २३४ ॥ जे भिक्खू गामारक्खियं अत्ती-  
 करेइ अत्तीकरेंतं वा साइज्जइ ॥ २३५ ॥ जे भिक्खू गामारक्खियं अच्चीकरेइ  
 अच्चीकरेंतं वा साइज्जइ ॥ २३६ ॥ जे भिक्खू गामारक्खियं अत्थीकरेइ अत्थीकरेंतं  
 वा साइज्जइ ॥ २३७ ॥ जे भिक्खू सीमारक्खियं अत्तीकरेइ अत्तीकरेंतं वा  
 साइज्जइ ॥ २३८ ॥ जे भिक्खू सीमारक्खियं अच्चीकरेइ अच्चीकरेंतं वा साइज्जइ  
 ॥ २३९ ॥ जे भिक्खू सीमारक्खियं अत्थीकरेइ अत्थीकरेंतं वा साइज्जइ  
 ॥ २४० ॥ जे भिक्खू रण्णारक्खियं अत्तीकरेइ अत्तीकरेंतं वा साइज्जइ ॥ २४१ ॥  
 जे भिक्खू रण्णारक्खियं अच्चीकरेइ अच्चीकरेंतं वा साइज्जइ ॥ २४२ ॥ जे भिक्खू  
 रण्णारक्खियं अत्थीकरेइ अत्थीकरेंतं वा साइज्जइ ॥ २४३ ॥ जे भिक्खू  
 अण्णमण्णस्स पाए आमजेज्ज वा पमजेज्ज वा आमजंतं वा पमजंतं वा साइज्जइ  
 ॥ २४४ ॥ जे भिक्खू अण्णमण्णस्स पाए संवाहेज्ज वा पलिमहेज्ज वा संवाहेंतं वा  
 पलिमहेंतं वा साइज्जइ ॥ २४५ ॥ जे भिक्खू अण्णमण्णस्स पाए तेहेण वा घएण  
 वा णवणीएण वा मक्खेज्ज वा भिल्लिगेज्ज वा मक्खेंतं वा भिल्लिगेंतं वा साइज्जइ  
 ॥ २४६ ॥ जे भिक्खू अण्णमण्णस्स पाए लोद्धेण वा कक्केण वा उल्लोलेज्ज वा  
 उव्वट्ठेज्ज वा उल्लोलेंतं वा उव्वट्ठेंतं वा साइज्जइ ॥ २४७ ॥ जे भिक्खू अण्णमण्णस्स  
 पाए सीओदगवियडेण वा उसिणोदगवियडेण वा उच्छोल्लेज्ज वा पधोएज्ज वा  
 उच्छोल्लेंतं वा पधोएंतं वा साइज्जइ ॥ २४८ ॥ जे भिक्खू अण्णमण्णस्स पाए  
 फूमेज्ज वा रएज्ज वा फूमेंतं वा रएंतं वा साइज्जइ ॥ २४९ ॥ जे भिक्खू अण्ण-  
 मण्णस्स कायं आमजेज्ज वा पमजेज्ज वा आमजंतं वा पमजंतं वा साइज्जइ ॥ २५० ॥  
 जे भिक्खू अण्णमण्णस्स कायं संवाहेज्ज वा पलिमहेज्ज वा संवाहेंतं वा पलिमहेंतं वा  
 साइज्जइ ॥ २५१ ॥ जे भिक्खू अण्णमण्णस्स कायं तेहेण वा घएण वा णवणीएण  
 वा मक्खेज्ज वा भिल्लिगेज्ज वा मक्खेंतं वा भिल्लिगेंतं वा साइज्जइ ॥ २५२ ॥ जे  
 भिक्खू अण्णमण्णस्स कायं लोद्धेण वा कक्केण वा उल्लोलेज्ज वा उव्वट्ठेज्ज वा उल्लोलेंतं  
 वा उव्वट्ठेंतं वा साइज्जइ ॥ २५३ ॥ जे भिक्खू अण्णमण्णस्स कायं सीओदगवियडेण  
 वा उसिणोदगवियडेण वा उच्छोल्लेज्ज वा पधोएज्ज वा उच्छोल्लेंतं वा पधोएंतं वा  
 साइज्जइ ॥ २५४ ॥ जे भिक्खू अण्णमण्णस्स कायं फूमेज्ज वा रएज्ज वा फूमेंतं वा  
 रएंतं वा साइज्जइ ॥ २५५ ॥ जे भिक्खू अण्णमण्णस्स कायंसि वर्णं आमजेज्ज वा  
 पमजेज्ज वा आमजंतं वा पमजंतं वा साइज्जइ ॥ २५६ ॥ जे भिक्खू अण्णमण्णस्स  
 कायंसि वर्णं संवाहेज्ज वा पलिमहेज्ज वा संवाहेंतं वा पलिमहेंतं वा साइज्जइ ॥ २५७ ॥

जे भिक्खू अण्णमण्णस्स कायंसि वणं तेह्णेण वा घएण वा णवणीएण वा मक्खेज्ज वा भिल्लिगेज्ज वा मक्खेतं वा भिल्लिगेतं वा साइज्जइ ॥ २५८ ॥ जे भिक्खू अण्णमण्णस्स कायंसि वणं लोद्धेण वा कक्केण वा उल्लोलेज्ज वा उव्वट्टेज्ज वा उल्लोलेंतं वा उव्वट्टेंतं वा साइज्जइ ॥ २५९ ॥ जे भिक्खू अण्णमण्णस्स कायंसि वणं सीओदगवियडेण वा उसिणोदगवियडेण वा उच्छोलेज्ज वा पधोएज्ज वा उच्छोलेंतं वा पधोएंतं वा साइज्जइ ॥ २६० ॥ जे भिक्खू अण्णमण्णस्स कायंसि वणं फूमेज्ज वा एएज्ज वा फूमेंतं वा एएंतं वा साइज्जइ ॥ २६१ ॥ जे भिक्खू अण्णमण्णस्स कायंसि गंडं वा पिलगं वा अरइयं वा अंसियं वा भगंदलं वा अण्णयरेणं तिकखेणं सत्थजाएणं अच्छिदेज्ज वा विच्छिदेज्ज वा अच्छिदेतं वा विच्छिदेतं वा साइज्जइ ॥ २६२ ॥ जे भिक्खू अण्णमण्णस्स कायंसि गंडं वा पिलयं वा अरइयं वा अंसियं वा भगंदलं वा अण्णयरेणं तिकखेणं सत्थजाएणं अच्छिदित्ता विच्छिदित्ता पूयं वा सोणियं वा णीहरेज्ज वा विसोहेज्ज वा णीहरेंतं वा विसोहेतं वा साइज्जइ ॥ २६३ ॥ जे भिक्खू अण्णमण्णस्स कायंसि गंडं वा पिलयं वा अरइयं वा अंसियं वा भगंदलं वा अण्णयरेणं तिकखेणं सत्थजाएणं अच्छिदित्ता विच्छिदित्ता णीहरित्ता विसोहित्ता सीओदगवियडेण वा उसिणोदगवियडेण वा उच्छोलेज्ज वा पधोएज्ज वा उच्छोलेंतं वा पधोएंतं वा साइज्जइ ॥ २६४ ॥ जे भिक्खू अण्णमण्णस्स कायंसि गंडं वा पिलयं वा अरइयं वा अंसियं वा भगंदलं वा अण्णयरेणं तिकखेणं सत्थजाएणं अच्छिदित्ता विच्छिदित्ता णीहरित्ता विसोहेत्ता उच्छोलेत्ता पधोएत्ता अण्णयरेणं आलेवणजाएणं आलिपेज्ज वा विलिपेज्ज वा आलिपेंतं वा विलिपेंतं वा साइज्जइ ॥ २६५ ॥ जे भिक्खू अण्णमण्णस्स कायंसि गंडं वा पिलगं वा अरइयं वा अंसियं वा भगंदलं वा अण्णयरेणं तिकखेणं सत्थजाएणं अच्छिदित्ता विच्छिदित्ता णीहरित्ता विसोहेत्ता उच्छोलेत्ता पधोएत्ता आलिपित्ता विलिपित्ता तेह्णेण वा घएण वा णवणीएण वा अब्भंगेज्ज वा मक्खेज्ज वा अब्भंगेतं वा मक्खेतं वा साइज्जइ ॥ २६६ ॥ जे भिक्खू अण्णमण्णस्स कायंसि गंडं वा पिलगं वा अरइयं वा अंसियं वा भगंदलं वा अण्णयरेणं तिकखेणं सत्थजाएणं अच्छिदित्ता विच्छिदित्ता णीहरित्ता विसोहेत्ता उच्छोलेत्ता पधोएत्ता आलिपित्ता विलिपित्ता अब्भंगेत्ता मक्खेत्ता अण्णयरेणं धूवणजाएणं धूवेज्ज वा पधूवेज्ज वा धूवंतं वा पधूवंतं वा साइज्जइ ॥ २६७ ॥ जे भिक्खू अण्णमण्णस्स पाळुकिमियं वा कुच्छिकिमियं वा अंगुलीए णिवेसिय २ णीहरइ णीहरंतं वा साइज्जइ ॥ २६८ ॥ जे भिक्खू अण्णमण्णस्स दीहाओ णहसिहाओ कप्पेज्ज वा संठवेज्ज वा कप्पेंतं वा संठवेंतं वा साइज्जइ ॥ २६९ ॥ जे भिक्खू अण्णमण्णस्स दीहाइं जंघ-



रोमाइं कप्पेज वा संठवेज वा कप्पेंतं वा संठवेंतं वा साइजइ ॥ २७० ॥  
 जे भिक्खू अण्णमण्णस्स दीहाइं कक्खरोमाइं कप्पेज वा संठवेज वा कप्पेंतं  
 वा संठवेंतं वा साइजइ ॥ २७१ ॥ जे भिक्खू अण्णमण्णस्स दीहाइं मंसुरोमाइं  
 कप्पेज वा संठवेज वा कप्पेंतं वा संठवेंतं वा साइजइ ॥ २७२ ॥ जे भिक्खू  
 अण्णमण्णस्स दीहाइं णासारोमाइं कप्पेज वा संठवेज वा कप्पेंतं वा संठवेंतं  
 वा साइजइ ॥ २७३ ॥ जे भिक्खू अण्णमण्णस्स दीहाइं चक्खुरोमाइं कप्पेज  
 वा संठवेज वा कप्पेंतं वा संठवेंतं वा साइजइ ॥ २७४-१ ॥ जे भिक्खू  
 अण्णमण्णस्स दीहाइं कण्णरोमाइं कप्पेज वा संठवेज वा कप्पेंतं वा संठवेंतं वा  
 साइजइ ॥ २७४-२ ॥ जे भिक्खू अण्णमण्णस्स दंते आघंसेज वा पघंसेज  
 वा आघंसंतं वा पघंसंतं वा साइजइ ॥ २७५ ॥ जे भिक्खू अण्णमण्णस्स दंते  
 उच्छोलेज वा पधोएज वा उच्छोलेंतं वा पधोएंतं वा साइजइ ॥ २७६ ॥ जे  
 भिक्खू अण्णमण्णस्स दंते फूमेज वा रएज वा फूमेंतं वा रएंतं वा साइजइ  
 ॥ २७७ ॥ जे भिक्खू अण्णमण्णस्स उट्ठे आमजेज वा पमजेज वा आमजंतं  
 वा पमजंतं वा साइजइ ॥ २७८ ॥ जे भिक्खू अण्णमण्णस्स उट्ठे संवाहेज वा  
 पलिमहेज वा संवाहेंतं वा पलिमहेंतं वा साइजइ ॥ २७९ ॥ जे भिक्खू अण्ण-  
 मण्णस्स उट्ठे तेहेण वा घएण वा णवणीएण वा मक्खेज वा भिल्लिगेज वा  
 मक्खेंतं वा भिल्लिगेंतं वा साइजइ ॥ २८० ॥ जे भिक्खू अण्णमण्णस्स उट्ठे  
 लोद्रेण वा कक्केण वा उल्लोलेज वा उव्वहेज वा उल्लोलेंतं वा उव्वहेंतं वा साइजइ  
 ॥ २८१ ॥ जे भिक्खू अण्णमण्णस्स उट्ठे सीओदगवियडेण वा उसिणोदगवियडेण  
 वा उच्छोलेज वा पधोवेज वा उच्छोलेंतं वा पधोवेंतं वा साइजइ ॥ २८२ ॥  
 जे भिक्खू अण्णमण्णस्स उट्ठे फूमेज वा रएज वा फूमेंतं वा रएंतं वा साइजइ  
 ॥ २८३ ॥ जे भिक्खू अण्णमण्णस्स दीहाइं उत्तरोट्ठरोमाइं कप्पेज वा संठवेज वा  
 कप्पेंतं वा संठवेंतं वा साइजइ ॥ २८४ ॥ जे भिक्खू अण्णमण्णस्स दीहाइं अच्छि-  
 पत्ताइं कप्पेज वा संठवेज वा कप्पेंतं वा संठवेंतं वा साइजइ ॥ २८५ ॥ जे  
 भिक्खू अण्णमण्णस्स अच्छीणि आमजेज वा पमजेज वा आमजंतं वा पमजंतं  
 वा साइजइ ॥ २८६ ॥ जे भिक्खू अण्णमण्णस्स अच्छीणि संवाहेज वा पलि-  
 महेज वा संवाहेंतं वा पलिमहेंतं वा साइजइ ॥ २८७ ॥ जे भिक्खू अण्णमण्णस्स  
 अच्छीणि तेहेण वा घएण वा णवणीएण वा मक्खेज वा भिल्लिगेज वा मक्खेंतं  
 वा भिल्लिगेंतं वा साइजइ ॥ २८८ ॥ जे भिक्खू अण्णमण्णस्स अच्छीणि लोद्रेण  
 वा कक्केण वा उल्लोलेज वा उव्वहेज वा उल्लोलेंतं वा उव्वहेंतं वा साइजइ

॥ २८९ ॥ जे भिक्खू अण्णमण्णस्स अच्छीणि सीओदगवियडेण वा उसिणोदग-  
वियडेण वा उच्छोलेज वा पधोएज वा उच्छोलेतं वा पधोएतं वा साइज्जइ  
॥ २९० ॥ जे भिक्खू अण्णमण्णस्स अच्छीणि फूमेज वा रएज वा फूमेतं वा रएतं  
वा साइज्जइ ॥ २९१ ॥ जे भिक्खू अण्णमण्णस्स दीहाइं भुमगरोमाइं कप्पेज वा  
संठवेज वा कप्पेतं वा संठवेतं वा साइज्जइ ॥ २९२ ॥ जे भिक्खू अण्णमण्णस्स  
दीहाइं पासरोमाइं कप्पेज वा संठवेज वा कप्पेतं वा संठवेतं वा साइज्जइ ॥ २९३-१ ॥  
...केसरोमाइं... ॥ २९३-२ ॥ जे भिक्खू अण्णमण्णस्स अच्छिमलं वा कणमलं वा  
दंतमलं वा णहमलं वा णीहरेज वा विसोहेज वा णीहरेतं वा विसोहेतं वा साइज्जइ  
॥ २९४ ॥ जे भिक्खू अण्णमण्णस्स कायाओ सेयं वा जलं वा पंकं वा मलं वा णीहरेज  
वा विसोहेज वा णीहरेतं वा विसोहेतं वा साइज्जइ ॥ २९५ ॥ जे भिक्खू गामाण्णा-  
[मियं]मं दूइज्जमाणे अण्णमण्णस्स सीसदुवारियं करेइ करेतं वा साइज्जइ ॥ २९६ ॥ जे  
भिक्खू साणुप्पए उच्चारपासवणभूमिं साणुप्पए ण पडिलेहइ ण पडिलेहंतं वा साइज्जइ  
॥ २९७ ॥ जे भिक्खू तओ उच्चारपासवणभूमीओ ण पडिलेहइ ण पडिलेहंतं वा साइज्जइ  
॥ २९८ ॥ जे भिक्खू खुट्ठागंसि थंडिलंसि उच्चारपासवणं परिट्टवेइ परिट्टवेतं वा साइज्जइ  
॥ २९९ ॥ जे भिक्खू उच्चारपासवणं अविहीए परिट्टवेइ परिट्टवेतं वा साइज्जइ ॥ ३०० ॥  
जे भिक्खू उच्चारपासवणं परिट्टवेत्ता ण पुंछइ ण पुंछंतं वा साइज्जइ ॥ ३०१ ॥ जे भिक्खू  
उच्चारपासवणं परिट्टवेत्ता कट्ठेण वा किलिंचेण वा अंगुलियाए वा सलागाए वा पुंछइ  
पुंछंतं वा साइज्जइ ॥ ३०२ ॥ जे भिक्खू उच्चारपासवणं परिट्टवेत्ता णायमइ णायमंतं  
वा साइज्जइ ॥ ३०३ ॥ जे भिक्खू उच्चारपासवणं परिट्टवेत्ता तत्थेव आयमइ आय-  
मंतं वा साइज्जइ ॥ ३०४ ॥ जे भिक्खू उच्चारपासवणं परिट्टवेत्ता दूरे आयमइ आय-  
मंतं वा साइज्जइ ॥ ३०५ ॥ जे भिक्खू उच्चारपासवणं परिट्टवेत्ता णावापूराणं आय-  
मइ आयमंतं वा साइज्जइ ॥ ३०६ ॥ जे भिक्खू अपरिहारिएण परिहारियं वएजा-  
एहि अज्जो ! तुमं च अहं च एगओ असणं वा ४ पडिग्गाहेत्ता तओ पच्छा पत्तेयं २  
भोक्खामो वा पाहामो वा, जे तं एवं वयइ वयंतं वा साइज्जइ । तं सेवमाणे  
आवज्जइ मासियं परिहारट्ठाणं उग्वाइयं ॥ ३०७ ॥ **णिसीहऽज्जयणे चउत्थो**  
**उहेसो समत्तो ॥ ४ ॥**

### पंचमो उहेसो

जे भिक्खू सचित्तस्सकखमूलंसि ठिच्चा आलोएज वा पलोएज वा आलोएतं वा

१ कयाइ एगट्ठाणे केण वि कारणेण पारिट्ठावणाऽवसरो ण होज तो दोब्बं तच्चं  
ठाणं उवओगी होउ त्ति तिण्णि ठाणाइं वुत्ताइं त्ति ।

पलोएतं वा साइज्जइ ॥ ३०८ ॥ जे भिक्खू सच्चित्तस्समूलंसि ठिच्चा ठाणं वा सेज्जं वा निसीहियं वा तुयट्ठणं वा चेएइ चेएतं वा साइज्जइ ॥ ३०९ ॥ जे भिक्खू सच्चित्तस्समूलंसि ठिच्चा असणं वा ४ आहारेइ आहारेंतं वा साइज्जइ ॥ ३१० ॥ जे भिक्खू सच्चित्तस्समूलंसि ठिच्चा उच्चारपासवणं परिट्ठवेइ परिट्ठवेंतं वा साइज्जइ ॥ ३११ ॥ जे भिक्खू सच्चित्तस्समूलंसि ठिच्चा सज्झायं करेइ करेंतं वा साइज्जइ ॥ ३१२ ॥ जे भिक्खू सच्चित्तस्समूलं ठिच्चा सज्झायं उद्दिसइ उद्दिसेंतं वा साइज्जइ ॥ ३१३ ॥ जे भिक्खू सच्चित्तस्समूलं ठिच्चा सज्झायं समुद्दिसइ समुद्दिसेंतं वा साइज्जइ ॥ ३१४ ॥ जे भिक्खू सच्चित्तस्समूलंसि ठिच्चा सज्झायं अणुजाणइ अणुजाणंतं वा साइज्जइ ॥ ३१५ ॥ जे भिक्खू सच्चित्तस्समूलंसि ठिच्चा सज्झायं वाएइ वाएतं वा साइज्जइ ॥ ३१६ ॥ जे भिक्खू सच्चित्तस्समूलंसि ठिच्चा सज्झायं पडिच्छइ पडिच्छंतं वा साइज्जइ ॥ ३१७ ॥ जे भिक्खू सच्चित्तस्समूलंसि ठिच्चा सज्झायं परियट्ठेइ परियट्ठेंतं वा साइज्जइ ॥ ३१८ ॥ जे भिक्खू अप्पणो संघाडिं अण्णउत्थिएण वा गारत्थिएण वा सागारिएण वा सिव्वावेइ सिव्वावेंतं वा साइज्जइ ॥ ३१९ ॥ जे भिक्खू अप्पणो संघाडिए दीहसुत्ताइं करेइ करेंतं वा साइज्जइ ॥ ३२० ॥ जे भिक्खू पिउमंदपलासयं वा पडोलपलासयं वा बिलपलासयं वा सीओदगवियडेण वा उसिणोदगवियडेण वा संकाणिय २ आहारेइ आहारेंतं वा साइज्जइ ॥ ३२१ ॥ जे भिक्खू पाडिहारियं पायपुंछणं जाइत्ता तमेव रयणिं पच्चप्पिणिस्सामिति सुए पच्चप्पिणइ पच्चप्पिणंतं वा साइज्जइ ॥ ३२२ ॥ जे भिक्खू पाडिहारियं पायपुंछणं जाइत्ता सुए पच्चप्पिणिस्सामिति तमेव रयणिं पच्चप्पिणइ पच्चप्पिणंतं वा साइज्जइ ॥ ३२३ ॥ जे भिक्खू सागारिय-संतियं पायपुंछणं जाइत्ता तमेव रयणिं पच्चप्पिणिस्सामिति सुए पच्चप्पिणइ पच्चप्पिणंतं वा साइज्जइ ॥ ३२४ ॥ जे भिक्खू सागारियसंतियं पायपुंछणं जाइत्ता सुए पच्चप्पिणिस्सामिति तमेव रयणिं पच्चप्पिणइ पच्चप्पिणंतं वा साइज्जइ ॥ ३२५ ॥ जे भिक्खू पाडिहारियं दंडयं वा अवलेहणियं वा वेलुसूईं वा जाइत्ता तमेव रयणिं पच्चप्पिणिस्सामिति सुए पच्चप्पिणइ पच्चप्पिणंतं वा साइज्जइ ॥ ३२६ ॥ जे भिक्खू पाडिहारियं दंडयं वा अवलेहणियं वा वेलुसूईं वा जाइत्ता सुए पच्चप्पिणिस्सामिति तमेव रयणिं पच्चप्पिणइ पच्चप्पिणंतं वा साइज्जइ ॥ ३२७ ॥ जे भिक्खू सागारिय-संतियं दंडयं वा अवलेहणियं वा वेलुसूईं वा जाइत्ता तमेव रयणिं पच्चप्पिणिस्सामिति सुए पच्चप्पिणइ पच्चप्पिणंतं वा साइज्जइ ॥ ३२८ ॥ जे भिक्खू सागारियसंतियं दंडयं वा अवलेहणियं वा वेलुसूईं वा जाइत्ता सुए पच्चप्पिणिस्सामिति तमेव रयणिं

पच्चप्पिणइ पच्चप्पिणंतं वा साइज्जइ ॥ ३२९ ॥ जे भिक्खू पाडिहारियं वा साग-  
रियसंतियं वा सेजासंथारयं पच्चप्पिणिता दोच्चं पि अण्णण्णविय अहिट्ठेइ अहिट्ठंतं वा  
साइज्जइ ॥ ३३० ॥ जे भिक्खू सणकप्पासओ वा उण्णकप्पासओ वा पोण्डकप्पासओ  
वा अमिलकप्पासओ वा दीहसुत्ताइं करेइ करेत्तं वा साइज्जइ ॥ ३३१ ॥ जे भिक्खू  
सच्चित्ताइं दारुदंडाणि वा वेलुदंडाणि वा वेत्तदंडाणि वा करेइ करेत्तं वा साइज्जइ  
॥ ३३२ ॥ जे भिक्खू सच्चित्ताइं दारुदंडाणि वा वेलुदंडाणि वा वेत्तदंडाणि वा धरेइ  
धरेत्तं वा साइज्जइ ॥ ३३३ ॥ जे भिक्खू चित्ताइं दारुदंडाणि वा वेलुदंडाणि वा  
वेत्तदंडाणि वा करेइ करेत्तं वा साइज्जइ ॥ ३३४ ॥ जे भिक्खू चित्ताइं दारुदंडाणि  
वा वेलुदंडाणि वा वेत्तदंडाणि वा धरेइ धरेत्तं वा साइज्जइ ॥ ३३५ ॥ जे भिक्खू  
विचित्ताइं दारुदंडाणि वा वेलुदंडाणि वा वेत्तदंडाणि वा करेइ करेत्तं वा साइज्जइ  
॥ ३३६ ॥ जे भिक्खू विचित्ताइं दारुदंडाणि वा वेलुदंडाणि वा वेत्तदंडाणि वा  
धरेइ धरेत्तं वा साइज्जइ ॥ ३३७ ॥ जे भिक्खू सच्चित्ताइं दारुदंडाणि वा वेलुदंडाणि  
वा वेत्तदंडाणि वा परिभुंजइ परिभुंजंतं वा साइज्जइ ॥ ३३८ ॥ जे भिक्खू चित्ताइं  
दारुदंडाणि वा वेलुदंडाणि वा वेत्तदंडाणि वा परिभुंजइ परिभुंजंतं वा साइज्जइ  
॥ ३३९ ॥ जे भिक्खू विचित्ताइं दारुदंडाणि वा वेलुदंडाणि वा वेत्तदंडाणि वा  
परिभुंजइ परिभुंजंतं वा साइज्जइ ॥ ३४० ॥ जे भिक्खू णवगणिवेसंसि वा गामंसि  
वा जाव सणिवेसंसि वा अणुप्पविसित्ता असणं वा ४ पडिग्गाहेइ पडिग्गाहेत्तं वा  
साइज्जइ ॥ ३४१ ॥ जे भिक्खू णवगणिवेसंसि वा अयागरंसि वा तंवागरंसि वा  
तउयागरंसि वा सीसागरंसि वा हिरण्णागरंसि वा सुवण्णागरंसि वा (रयणागरंसि वा)  
वइरागरंसि वा अणुप्पविसित्ता असणं वा ४ पडिग्गाहेइ पडिग्गाहेत्तं वा साइज्जइ  
॥ ३४२ ॥ जे भिक्खू मुहवीणियं करेइ करेत्तं वा साइज्जइ ॥ ३४३ ॥ जे भिक्खू  
दंतवीणियं करेइ करेत्तं वा साइज्जइ ॥ ३४४ ॥ जे भिक्खू उट्ठवीणियं करेइ करेत्तं  
वा साइज्जइ ॥ ३४५ ॥ जे भिक्खू णासावीणियं करेइ करेत्तं वा साइज्जइ ॥ ३४६ ॥  
जे भिक्खू कक्खवीणियं करेइ करेत्तं वा साइज्जइ ॥ ३४७ ॥ जे भिक्खू हत्थ-  
वीणियं करेइ करेत्तं वा साइज्जइ ॥ ३४८ ॥ जे भिक्खू णहवीणियं करेइ करेत्तं  
वा साइज्जइ ॥ ३४९ ॥ जे भिक्खू पत्तवीणियं करेइ करेत्तं वा साइज्जइ ॥ ३५० ॥  
जे भिक्खू पुप्फवीणियं करेइ करेत्तं वा साइज्जइ ॥ ३५१ ॥ जे भिक्खू फल-  
वीणियं करेइ करेत्तं वा साइज्जइ ॥ ३५२ ॥ जे भिक्खू वीयवीणियं करेइ करेत्तं  
वा साइज्जइ ॥ ३५३ ॥ जे भिक्खू हरियवीणियं करेइ करेत्तं वा साइज्जइ  
॥ ३५४ ॥ जे भिक्खू मुहवीणियं वाएइ वाएत्तं वा साइज्जइ ॥ ३५५ ॥ जे

भिक्खू दंतवीणियं वाएइ वाएंत्तं वा साइज्जइ ॥ ३५६ ॥ जे भिक्खू उट्टवीणियं  
 वाएइ वाएंत्तं वा साइज्जइ ॥ ३५७ ॥ जे भिक्खू णासावीणियं वाएइ वाएंत्तं वा  
 साइज्जइ ॥ ३५८ ॥ जे भिक्खू कक्खवीणियं वाएइ वाएंत्तं वा साइज्जइ ॥ ३५९ ॥  
 जे भिक्खू हत्थवीणियं वाएइ वाएंत्तं वा साइज्जइ ॥ ३६० ॥ जे भिक्खू णहवीणियं  
 वाएइ वाएंत्तं वा साइज्जइ ॥ ३६१ ॥ जे भिक्खू पत्तवीणियं वाएइ वाएंत्तं वा  
 साइज्जइ ॥ ३६२ ॥ जे भिक्खू पुप्फवीणियं वाएइ वाएंत्तं वा साइज्जइ ॥ ३६३ ॥  
 जे भिक्खू फलवीणियं वाएइ वाएंत्तं वा साइज्जइ ॥ ३६४ ॥ जे भिक्खू बीयवीणियं  
 वाएइ वाएंत्तं वा साइज्जइ ॥ ३६५ ॥ जे भिक्खू हरियवीणियं वाएइ वाएंत्तं वा  
 साइज्जइ (एवं अण्णयराणि वा तहप्पगाराणि वा अणुदिण्णाइं सद्दाइं उदीरेइ उदीरेत्तं  
 वा साइज्जइ) ॥ ३६६ ॥ जे भिक्खू उद्देसियं सेज्जं अणुपविसइ अणुपविसत्तं वा  
 साइज्जइ ॥ ३६७ ॥ जे भिक्खू सपाहुडियं सेज्जं अणुपविसइ अणुपविसत्तं वा साइज्जइ  
 ॥ ३६८ ॥ जे भिक्खू सपरिकम्मं सेज्जं अणुपविसइ अणुपविसत्तं वा साइज्जइ  
 ॥ ३६९ ॥ जे भिक्खू णत्थि संभोगवत्तिया किरियत्ति वयइ वयत्तं वा साइज्जइ  
 ॥ ३७० ॥ जे भिक्खू लाउयपायं वा दासपायं वा मट्ठियापायं वा अलं थिरं धुवं  
 धारणिज्जं परिभिंदिय परिळिंदिय परिट्टवेइ परिट्टवेत्तं वा साइज्जइ ॥ ३७१ ॥ जे  
 भिक्खू वत्थं वा पडिगहं वा कंवलं वा पायपुंछणं वा अलं थिरं धुवं धारणिज्जं  
 पलिळिंदिय परिट्टवेइ परिट्टवेत्तं वा साइज्जइ ॥ ३७२ ॥ जे भिक्खू दंडगं वा अवले-  
 हणियं वा वेल्लसुइं वा पलिमंजिय २ परिट्टवेइ परिट्टवेत्तं वा साइज्जइ ॥ ३७३ ॥ जे  
 भिक्खू अइरेयपमाणं रयहरणं धरेइ धरेत्तं वा साइज्जइ ॥ ३७४ ॥ जे भिक्खू  
 सुहुमाइं रयहरणसीसाइं करेइ करेत्तं वा साइज्जइ ॥ ३७५ ॥ जे भिक्खू रयहरणस्स  
 एक्कं बंधं देइ देत्तं वा साइज्जइ ॥ ३७६ ॥ जे भिक्खू रयहरणं कंझसगबंधेणं बंधइ  
 बंधत्तं वा साइज्जइ ॥ ३७७ ॥ जे भिक्खू रयहरणं अविहीए बंधइ बंधत्तं वा  
 साइज्जइ ॥ ३७८ ॥ जे भिक्खू रयहरणं एगेण बंधेण बंधइ बंधत्तं वा साइज्जइ  
 ॥ ३७९ ॥ जे भिक्खू रयहरणस्स परं तिण्हं बंधाणं देइ देत्तं वा साइज्जइ ॥ ३८० ॥  
 जे भिक्खू रयहरणं अणिसट्ठं धरेइ धरेत्तं वा साइज्जइ ॥ ३८१ ॥ जे भिक्खू रयहरणं  
 वोसट्ठं धरेइ धरेत्तं वा साइज्जइ ॥ ३८२ ॥ जे भिक्खू रयहरणं अभिक्खणं २  
 अहिट्ठेइ अहिट्ठेत्तं वा साइज्जइ ॥ ३८३ ॥ जे भिक्खू रयहरणं उस्सीसमूले ठवेइ  
 ठवेत्तं वा साइज्जइ ॥ ३८४ ॥ जे भिक्खू रयहरणं तुयट्ठेइ तुयट्ठेत्तं वा साइज्जइ ॥  
 तं सेवमाणे आवज्जइ मासियं परिहारट्ठानं उग्घाइयं ॥ ३८५ ॥ **गिन्सीहऽज्झयणे**  
**पंचमो उद्देसो समत्तो ॥ ५ ॥**

## छटो उद्देशो

जे भिक्खू माउग्गामं मेहुणपडियाए विण्णवेइ विण्णवेंतं वा साइज्जइ ॥ ३८६ ॥  
जे भिक्खू माउग्गामस्स मेहुणपडियाए हत्थकम्मं करेइ करेंतं वा साइज्जइ ॥ ३८७ ॥  
जे भिक्खू माउग्गामस्स मेहुणपडियाए अंगादाणं कट्ठेण वा किलिंचेण वा अंगुलि-  
याए वा सलागाए वा संचालेइ संचालेंतं वा साइज्जइ ॥ ३८८ ॥ जे भिक्खू  
माउग्गामस्स मेहुणपडियाए अंगादाणं संवाहेज्ज वा पल्लिमहेज्ज वा संवाहेंतं वा  
पल्लिमहेंतं वा साइज्जइ ॥ ३८९ ॥ जे भिक्खू माउग्गामस्स मेहुणवडियाए अंगादाणं  
तेल्लेण वा घएण वा णवणीएण वा अब्भंगेज्ज वा मक्खेज्ज वा अब्भंगेंतं वा मक्खेंतं  
वा साइज्जइ ॥ ३९० ॥ जे भिक्खू माउग्गामस्स मेहुणवडियाए अंगादाणं कक्केण  
वा लोद्वेण वा पउमचुण्णेण वा ण्हाणेण वा सिणाणेण वा चुण्णेहिं वा वण्णेहिं वा  
उव्वट्ठेइ वा परिवट्ठेइ वा उव्वट्ठेंतं वा परिवट्ठेंतं वा साइज्जइ ॥ ३९१ ॥ जे भिक्खू  
माउग्गामस्स मेहुणवडियाए अंगादाणं सीओदगवियडेण वा उप्पिणोदगवियडेण वा  
उच्छोलेज्ज वा पधोएज्ज वा उच्छोलेंतं वा पधोएंतं वा साइज्जइ ॥ ३९२ ॥ जे भिक्खू  
माउग्गामस्स मेहुणवडियाए अंगादाणं णिच्छल्लेइ णिच्छल्लेंतं वा साइज्जइ ॥ ३९३ ॥  
जे भिक्खू माउग्गामस्स मेहुणवडियाए अंगादाणं जिग्घइ जिग्घंतं वा साइज्जइ  
॥ ३९४ ॥ जे भिक्खू माउग्गामस्स मेहुणवडियाए अंगादाणं अण्णयरंसि अचित्तंसि  
सोयंसि अणुपवेसेत्ता सुक्कपोग्गले णिग्घायइ णिग्घायंतं वा साइज्जइ ॥ ३९५ ॥ जे  
भिक्खू माउग्गामं मेहुणवडियाए (अवाउडिं) सयं कुज्जा सयं बूया करेंतं वा (बूएंतं  
वा) साइज्जइ ॥ ३९६ ॥ जे भिक्खू माउग्गामस्स मेहुणवडियाए कलहं कुज्जा कलहं  
बूया कलहवडियाए गच्छइ गच्छंतं वा साइज्जइ ॥ ३९७ ॥ जे भिक्खू माउग्गामस्स  
मेहुणवडियाए लेहं लिहइ लेहं लिहावेइ लेहवडियाए वा गच्छइ गच्छंतं वा साइज्जइ  
॥ ३९८ ॥ जे भिक्खू माउग्गामस्स मेहुणवडियाए पिट्ठंतं वा सोयं(तं) वा पोसंतं वा  
भ(ल्लि)ल्लायएण उप्पाएइ उप्पाएंतं वा साइज्जइ ॥ ३९९ ॥ जे भिक्खू माउग्गामस्स  
मेहुणवडियाए पिट्ठंतं वा सोयं वा पोसंतं वा भल्लायएण उप्पाएत्ता सीओदगवियडेण  
वा उप्पिणोदगवियडेण वा उच्छोलेज्ज वा पधोएज्ज वा उच्छोलेंतं वा पधोएंतं वा साइज्जइ  
॥ ४०० ॥ जे भिक्खू माउग्गामस्स मेहुणवडियाए पिट्ठंतं वा सोयं वा पोसंतं वा  
उच्छोलेत्ता पधोएत्ता अण्णयरेण आलेवणजाएणं आलिंपेज्ज वा विलिंपेज्ज वा  
आलिंपेंतं वा विलिंपेंतं वा साइज्जइ ॥ ४०१ ॥ जे भिक्खू माउग्गामस्स मेहुण-  
वडियाए पिट्ठंतं वा सोयं वा पोसंतं वा उच्छोलेत्ता पधोएत्ता आलिंपेत्ता विलिंपेत्ता  
तेल्लेण वा घएण वा णवणीएण वा अब्भंगेज्ज वा मक्खेज्ज वा अब्भंगेंतं वा

मक्खेंतं वा साइज्जइ ॥ ४०२ ॥ जे भिक्खू माउग्गामस्स मेहुणवडियाए पिट्ठंतं वा सोयं वा पोसंतं वा उच्छोलेत्ता पधोएत्ता आलिपेत्ता विलिपेत्ता अब्भंगेत्ता मक्खेत्ता अण्णयरेंण धूवणजाएणं धूवेज्ज वा पधूवेज्ज वा धूवेंतं वा पधूवेंतं वा साइज्जइ ॥ ४०३ ॥ जे भिक्खू माउग्गामस्स मेहुणवडियाए कसिणाइं वत्थाइं धरेइ धरेंतं वा साइज्जइ ॥ ४०४ ॥ जे भिक्खू माउग्गामस्स मेहुणवडियाए अहयाइं वत्थाइं धरेइ धरेंतं वा साइज्जइ ॥ ४०५ ॥ जे भिक्खू माउग्गामस्स मेहुणवडियाए धोवरत्ताइं वत्थाइं धरेइ धरेंतं वा साइज्जइ ॥ ४०६ ॥ जे भिक्खू माउग्गामस्स मेहुणवडियाए चित्ताइं वत्थाइं धरेइ धरेंतं वा साइज्जइ ॥ ४०७ ॥ जे भिक्खू माउग्गामस्स मेहुणवडियाए विचित्ताइं वत्थाइं धरेइ धरेंतं वा साइज्जइ ॥ ४०८ ॥ जे भिक्खू माउग्गामस्स मेहुणवडियाए अप्पणो पाए आमजेज्ज वा पमजेज्ज वा आमज्जंतं वा पमज्जंतं वा साइज्जइ ॥ ४०९ ॥ जे भिक्खू माउग्गामस्स मेहुणवडियाए अप्पणो पाए संवाहेज्ज वा पलिमहेज्ज वा संवाहेंतं वा पलिमहेंतं वा साइज्जइ ॥ ४१० ॥ जे भिक्खू माउग्गामस्स मेहुणवडियाए अप्पणो पाए तेहेण वा घएण वा णवणीएण वा मक्खेज्ज वा भिलिगेज्ज वा मक्खेंतं वा भिलिगेंतं वा साइज्जइ ॥ ४११ ॥ जे भिक्खू माउग्गामस्स मेहुणवडियाए अप्पणो पाए लोद्धेण वा कक्केण वा उल्लोलेज्ज वा उव्वट्टेज्ज वा उल्लोलेंतं वा उव्वट्टेंतं वा साइज्जइ ॥ ४१२ ॥ जे भिक्खू माउग्गामस्स मेहुणवडियाए अप्पणो पाए सीओदगवियडेण वा उसिणोदगवियडेण वा उच्छोलेज्ज वा पधोएज्ज वा उच्छोलेंतं वा पधोएंतं वा साइज्जइ ॥ ४१३ ॥ जे भिक्खू माउग्गामस्स मेहुणवडियाए अप्पणो पाए फूमेज्ज वा रएज्ज वा फूमेंतं वा रएंतं वा साइज्जइ ॥ ४१४ ॥ जे भिक्खू माउग्गामस्स मेहुणवडियाए अप्पणो कायं आमजेज्ज वा पमजेज्ज वा आमज्जंतं वा पमज्जंतं वा साइज्जइ ॥ ४१५ ॥ जे भिक्खू माउग्गामस्स मेहुणवडियाए अप्पणो कायं संवाहेज्ज वा पलिमहेज्ज वा संवाहेंतं वा पलिमहेंतं वा साइज्जइ ॥ ४१६ ॥ जे भिक्खू माउग्गामस्स मेहुणवडियाए अप्पणो कायं तेहेण वा घएण वा णवणीएण वा मक्खेज्ज वा भिलिगेज्ज वा मक्खेंतं वा भिलिगेंतं वा साइज्जइ ॥ ४१७ ॥ जे भिक्खू माउग्गामस्स मेहुणवडियाए अप्पणो कायं लोद्धेण वा कक्केण वा उल्लोलेज्ज वा उव्वट्टेज्ज वा उल्लोलेंतं वा उव्वट्टेंतं वा साइज्जइ ॥ ४१८ ॥ जे भिक्खू माउग्गामस्स मेहुणवडियाए अप्पणो कायं सीओदगवियडेण वा उसिणोदगवियडेण वा उच्छोलेज्ज वा पधोएज्ज वा उच्छोलेंतं वा पधोएंतं वा साइज्जइ ॥ ४१९ ॥ जे भिक्खू माउग्गामस्स मेहुणवडियाए अप्पणो कायं फूमेज्ज वा रएज्ज

वा फूमैतं वा रएतं वा साइज्जइ ॥ ४२० ॥ जे भिक्खू माउग्गामस्स मेहुणवडियाए  
 अप्पणो कायंसि वणं आमजेज्ज वा पमजेज्ज वा आमजंतं वा पमजंतं वा साइज्जइ  
 ॥ ४२१ ॥ जे भिक्खू माउग्गामस्स मेहुणवडियाए अप्पणो कायंसि वणं संवाहेज्ज  
 वा पल्लिमेहेज्ज वा संवाहेतं वा पल्लिमहेतं वा साइज्जइ ॥ ४२२ ॥ जे भिक्खू  
 माउग्गामस्स मेहुणवडियाए अप्पणो कायंसि वणं तेलेण वा घएण वा णवणीएण  
 वा मक्खेज्ज वा भिल्लिगेज्ज वा मक्खेतं वा भिल्लिगेतं वा साइज्जइ ॥ ४२३ ॥ जे  
 भिक्खू माउग्गामस्स मेहुणवडियाए अप्पणो कायंसि वणं लोद्धेण वा कक्केण वा  
 उल्लोलेज्ज वा उव्वहेज्ज वा उल्लोलेतं वा उव्वहेतं वा साइज्जइ ॥ ४२४ ॥ जे भिक्खू  
 माउग्गामस्स मेहुणवडियाए अप्पणो कायंसि वणं सीओदगवियडेण वा उसिणो-  
 दगवियडेण वा उच्छोलेज्ज वा पधोएज्ज वा उच्छोलेतं वा पधोएतं वा साइज्जइ  
 ॥ ४२५ ॥ जे भिक्खू माउग्गामस्स मेहुणवडियाए अप्पणो कायंसि वणं फूमेज्ज  
 वा रएज्ज वा फूमैतं वा रएतं वा साइज्जइ ॥ ४२६ ॥ जे भिक्खू माउग्गामस्स  
 मेहुणवडियाए अप्पणो कायंसि गंडं वा पिलगं वा अरइयं वा अंसियं वा भगंदलं  
 वा अण्णयरेणं तिक्खेणं सत्थजाएणं अच्छिदेज्ज वा विच्छिदेज्ज वा अच्छिदैतं  
 वा विच्छिदैतं वा साइज्जइ ॥ ४२७ ॥ जे भिक्खू माउग्गामस्स मेहुणवडियाए  
 अप्पणो कायंसि गंडं वा पिलगं वा अरइयं वा अंसियं वा भगंदलं वा अण्णयरेणं  
 तिक्खेणं सत्थजाएणं अच्छिदिता विच्छिदिता पूयं वा सोणियं वा णीहरेज्ज वा  
 विसोहेज्ज वा णीहरैतं वा विसोहेतं वा साइज्जइ ॥ ४२८ ॥ जे भिक्खू माउग्गा-  
 मस्स मेहुणवडियाए अप्पणो कायंसि गंडं वा पिलगं वा अरइयं वा अंसियं  
 वा भगंदलं वा अण्णयरेणं तिक्खेणं सत्थजाएणं अच्छिदिता विच्छिदिता  
 णीहरिता विसोहेता सीओदगवियडेण वा उसिणोदगवियडेण वा उच्छोलेज्ज  
 वा पधोएज्ज वा उच्छोलेतं वा पधोएतं वा साइज्जइ ॥ ४२९ ॥ जे भिक्खू माउग्गा-  
 मस्स मेहुणवडियाए अप्पणो कायंसि गंडं वा पिलगं वा अरइयं वा अंसियं वा भगं-  
 दलं वा अण्णयरेणं तिक्खेणं सत्थजाएणं अच्छिदिता विच्छिदिता णीहरिता विसोहेता  
 पधोएता अण्णयरेणं आलेवणजाएणं आलिपेज्ज वा विलिपेज्ज वा आलिपेतं वा  
 विलिपेतं वा साइज्जइ ॥ ४३० ॥ जे भिक्खू माउग्गामस्स मेहुणवडियाए अप्पणो  
 कायंसि गंडं वा पिलगं वा अरइयं वा अंसियं वा भगंदलं वा अण्णयरेणं तिक्खेणं  
 सत्थजाएणं अच्छिदिता विच्छिदिता णीहरिता विसोहेता उच्छोलेता पधोएता  
 आलिपेता विलिपेता तेलेण वा घएण वा णवणीएण वा अब्भगेज्ज वा मक्खेज्ज  
 वा अब्भगेतं वा मक्खेतं वा साइज्जइ ॥ ४३१ ॥ जे भिक्खू माउग्गामस्स मेहुण-



वडियाए अप्पणो कायंसि गंडं वा पिलगं वा अरइयं वा अंसियं वा भगंदलं वा  
 अण्णयरेणं तिक्खेणं सत्थजाएणं अच्छिदिता विच्छिदिता णीहरिता विसोहेता उच्छो-  
 लेता पथोएत्ता आलिपेत्ता विलिपेत्ता अट्ठिभगेत्ता मक्खेत्ता अण्णयरेणं धूवणजाएणं  
 धूवेज्ज वा पधूवेज्ज वा धूवेत्तं वा पधूवेत्तं वा साइज्जइ ॥ ४३२ ॥ जे भिक्खू माउग्गा-  
 मस्स मेहुणवडियाए अप्पणो पालुकिमियं वा कुच्छिकिमियं वा अंगुलीए णिवेसिय २  
 णीहरेइ णीहरेंतं वा साइज्जइ ॥ ४३३ ॥ जे भिक्खू माउग्गामस्स मेहुणवडि-  
 याए अप्पणो दीहाओ णहसिहाओ कप्पेज्ज वा संठवेज्ज वा कप्पेंतं वा संठवेत्तं वा  
 साइज्जइ ॥ ४३४ ॥ जे भिक्खू माउग्गामस्स मेहुणवडियाए अप्पणो दीहाइं जंघ-  
 रोमाइं कप्पेज्ज वा संठवेज्ज वा कप्पेंतं वा संठवेत्तं वा साइज्जइ ॥ ४३५ ॥ जे  
 भिक्खू माउग्गामस्स मेहुणवडियाए अप्पणो० कक्खरोमाइं कप्पेज्ज वा संठवेज्ज वा  
 कप्पेंतं वा संठवेत्तं वा साइज्जइ ॥ ४३६ ॥ जे भिक्खू माउग्गामस्स मेहुणवडियाए  
 अप्पणो० मंसुरोमाइं कप्पेज्ज वा संठवेज्ज वा कप्पेंतं वा संठवेत्तं वा साइज्जइ ॥ ४३७ ॥  
 जे भिक्खू माउग्गामस्स मेहुणवडियाए अप्पणो० णासारोमाइं कप्पेज्ज वा संठवेज्ज  
 वा कप्पेंतं वा संठवेत्तं वा साइज्जइ ॥ ४३८ ॥ जे भिक्खू माउग्गामस्स मेहुण-  
 वडियाए अप्पणो० चक्खुरोमाइं कप्पेज्ज वा संठवेज्ज वा कप्पेंतं वा संठवेत्तं वा साइज्जइ  
 ॥ ४३९-१ ॥ जे भिक्खू माउग्गामस्स मेहुणवडियाए अप्पणो० कण्णरोमाइं कप्पेज्ज  
 वा संठवेज्ज वा कप्पेंतं वा संठवेत्तं वा साइज्जइ ॥ ४३९-२ ॥ जे भिक्खू माउग्गा-  
 मस्स मेहुणवडियाए अप्पणो दंतं आघंसेज्ज वा पघंसेज्ज वा आघंसंतं वा पघंसंतं  
 वा साइज्जइ ॥ ४४० ॥ जे भिक्खू माउग्गामस्स मेहुणवडियाए अप्पणो दंतं  
 उच्छोलेज्ज वा पथोएज्ज वा उच्छोलेंतं वा पथोएंतं वा साइज्जइ ॥ ४४१ ॥ जे भिक्खू  
 माउग्गामस्स मेहुणवडियाए अप्पणो दंतं फूमेज्ज वा रएज्ज वा फूमेंतं वा रएंतं वा  
 साइज्जइ ॥ ४४२ ॥ जे भिक्खू माउग्गामस्स मेहुणवडियाए अप्पणो उट्ठे आमजेज्ज  
 वा पमजेज्ज वा आमजंतं वा पमजंतं वा साइज्जइ ॥ ४४३ ॥ जे भिक्खू माउग्गा-  
 मस्स मेहुणवडियाए अप्पणो उट्ठे संवाहेज्ज वा पल्लिमहेज्ज वा संवाहेंतं वा पल्लिमहेंतं  
 वा साइज्जइ ॥ ४४४ ॥ जे भिक्खू माउग्गामस्स मेहुणवडियाए अप्पणो उट्ठे  
 तेल्लेण वा घएण वा णवणीएण वा मक्खेज्ज वा भिल्लिगेज्ज वा मक्खेंतं वा भिल्लिगेंतं  
 वा साइज्जइ ॥ ४४५ ॥ जे भिक्खू माउग्गामस्स मेहुणवडियाए अप्पणो उट्ठे  
 लोद्धेण वा क्कळेण वा उल्लोलेज्ज वा उव्वट्टेज्ज वा उल्लोलेंतं वा उव्वट्टेंतं वा साइज्जइ  
 ॥ ४४६ ॥ जे भिक्खू माउग्गामस्स मेहुणवडियाए अप्पणो उट्ठे सीओदगवियडेण  
 वा उप्पिणोदगवियडेण वा उच्छोलेज्ज वा पथोएज्ज वा उच्छोलेंतं वा पथोएंतं वा

साइज्जइ ॥ ४४७ ॥ जे भिक्खू माउग्गामस्स मेहुणवडियाए अप्पणो उट्ठे फूमेज  
वा रएज्ज वा फूमेंतं वा रएंतं वा साइज्जइ ॥ ४४८ ॥ जे भिक्खू माउग्गामस्स मेहुण-  
वडियाए अप्पणो दीहाइं उत्तरोट्ठरोमाइं कप्पेज्ज वा संठवेज्ज वा कप्पेंतं वा संठवेंतं वा  
साइज्जइ ॥ ४४९ ॥ जे भिक्खू माउग्गामस्स मेहुणवडियाए अप्पणो दीहाइं अच्छि-  
पत्ताइं कप्पेज्ज वा संठवेज्ज वा कप्पेंतं वा संठवेंतं वा साइज्जइ ॥ ४५० ॥ जे भिक्खू  
माउग्गामस्स मेहुणवडियाए अप्पणो अच्छीणि आमजेज्ज वा पमजेज्ज वा आमजंतं  
वा पमजंतं वा साइज्जइ ॥ ४५१ ॥ जे भिक्खू माउग्गामस्स मेहुणवडियाए अप्पणो  
अच्छीणि संवाहेज्ज वा पलिमहेज्ज वा संवाहेंतं वा पलिमहेंतं वा साइज्जइ ॥ ४५२ ॥  
जे भिक्खू माउग्गामस्स मेहुणवडियाए अप्पणो अच्छीणि तेल्लेण वा घएण वा णवणी-  
एण वा मक्खेज्ज वा मिलिगेज्ज वा मक्खेंतं वा मिलिगेंतं वा साइज्जइ ॥ ४५३ ॥ जे  
भिक्खू माउग्गामस्स मेहुणवडियाए अप्पणो अच्छीणि लोद्वेण वा कक्खेण वा उल्लोलेज्ज  
वा उव्वट्टेज्ज वा उल्लोलेंतं वा उव्वट्टेंतं वा साइज्जइ ॥ ४५४ ॥ जे भिक्खू माउ-  
ग्गामस्स मेहुणवडियाए अप्पणो अच्छीणि सीओदगवियडेण वा उस्सिणोदगवियडेण  
वा उच्छोलेज्ज वा पधोएज्ज वा उच्छोलेंतं वा पधोएंतं वा साइज्जइ ॥ ४५५ ॥ जे भिक्खू  
माउग्गामस्स मेहुणवडियाए अप्पणो अच्छीणि फूमेज्ज वा रएज्ज वा फूमेंतं वा रएंतं  
वा साइज्जइ ॥ ४५६ ॥ जे भिक्खू माउग्गामस्स मेहुणवडियाए अप्पणो दीहाइं  
भुमगरोमाइं कप्पेज्ज वा संठवेज्ज वा कप्पेंतं वा संठवेंतं वा साइज्जइ ॥ ४५७ ॥ जे  
भिक्खू माउग्गामस्स मेहुणवडियाए अप्पणो दीह इं पासरोमाइं कप्पेज्ज वा संठवेज्ज  
वा कप्पेंतं वा संठवेंतं वा साइज्जइ ॥ ४५८-१ ॥ ...केसरामाइं... ॥ ४५८-२ ॥ जे  
भिक्खू माउग्गामस्स मेहुणवडियाए अप्पणो अच्छिमलं वा कणमलं वा दंतमलं वा  
णहमलं वा णीहरेज्ज वा विसोहेज्ज वा णीहरेंतं वा विसोहेंतं वा साइज्जइ ॥ ४५९ ॥ जे  
भिक्खू माउग्गामस्स मेहुणवडियाए अप्पणो कायाओ सेयं वा जल्लं वा पंकं वा मलं  
वा णीहरेज्ज वा विसोहेज्ज वा णीहरेंतं वा विसोहेंतं वा साइज्जइ ॥ ४६० ॥ जे भिक्खू  
माउग्गामस्स मेहुणवडियाए गामाणुगामं दूइज्जमाणे सीसडुवारियं करेइ करेंतं वा साइ-  
ज्जइ ॥ ४६१ ॥ जे भिक्खू माउग्गामस्स मेहुणवडियाए खीरं वा दहिं वा णवणीयं  
वा सप्पि वा गुलं वा खंडं वा सक्करं वा मच्छंडियं वा अण्णयरं वा पणीयं आहारं  
आहारेइ आहारेंतं वा साइज्जइ । तं सेवमाणे आवज्जइ चाउम्मासियं परिहारद्वाणं  
अणुग्वाइयं ॥ ४६२ ॥ णिसीहऽज्झयणे छट्ठो उद्देसो समत्तो ॥ ६ ॥

### सत्तमो उद्देसो

जे भिक्खू माउग्गामस्स मेहुणवडियाए तणमालियं वा मुंजमालियं वा वेत्त-

मालियं वा मयणमालियं वा पिंछमालियं वा पोंडियदंतमालियं वा सिंगमालियं वा  
 संखमालियं वा हड्डमालियं वा भिंडमालियं वा कट्टमालियं वा पत्तमालियं वा पुप्फ-  
 मालियं वा फलमालियं वा वीयमालियं वा हरियमालियं वा करेइ करेंतं वा साइज्जइ  
 ॥ ४६३ ॥ जे भिक्खू माउग्गामस्स मेहुणवडियाए तणमालियं वा मुंजमालियं वा  
 वेत्तमालियं वा मयणमालियं वा पिंछमालियं वा पोंडियदंतमालियं वा सिंगमालियं  
 वा संखमालियं वा हड्डमालियं वा भिंडमालियं वा कट्टमालियं वा पत्तमालियं वा  
 पुप्फमालियं वा फलमालियं वा वीयमालियं वा हरियमालियं वा धरेइ धरेंतं वा  
 साइज्जइ ॥ ४६४ ॥ जे भिक्खू माउग्गामस्स मेहुणवडियाए तणमालियं वा मुंज-  
 मालियं वा वेत्तमालियं वा मयणमालियं वा पिंछमालियं वा पोंडियदंतमालियं वा  
 सिंगमालियं वा संखमालियं वा हड्डमालियं वा भिंडमालियं वा कट्टमालियं वा पत्त-  
 मालियं वा पुप्फमालियं वा फलमालियं वा वीयमालियं वा हरियमालियं वा  
 पिण[ड्ड]इ पिणद्धंतं वा साइज्जइ ॥ ४६५ ॥ जे भिक्खू माउग्गामस्स मेहुणवडियाए  
 अयलोहाणि वा तंबलोहाणि वा तउयलोहाणि वा सीसगलोहाणि वा रुप्लोहाणि वा  
 सुवण्णलोहाणि वा करेइ करेंतं वा साइज्जइ ॥ ४६६ ॥ जे भिक्खू माउग्गामस्स  
 मेहुणवडियाए अयलोहाणि वा तंबलोहाणि वा तउयलोहाणि वा सीसगलोहाणि वा  
 रुप्लोहाणि वा सुवण्णलोहाणि वा धरेइ धरेंतं वा साइज्जइ ॥ ४६७ ॥ जे भिक्खू  
 माउग्गामस्स मेहुणवडियाए अयलोहाणि वा तंबलोहाणि वा तउयलोहाणि वा  
 सीसगलोहाणि वा रुप्लोहाणि वा सुवण्णलोहाणि वा परिमुंजइ परिमुंजंतं वा  
 साइज्जइ ॥ ४६८ ॥ जे भिक्खू माउग्गामस्स मेहुणवडियाए हाराणि वा अद्धहाराणि  
 वा एगावली वा मुत्तावली वा कणगावली वा रयणावली वा कडगाणि वा तुडियाणि  
 वा केऊराणि वा कुंडलाणि वा पट्टाणि वा मउडाणि वा पलंबसुत्ताणि वा सुवण्ण-  
 सुत्ताणि वा करेइ करेंतं वा साइज्जइ ॥ ४६९ ॥ जे भिक्खू माउग्गामस्स मेहुण-  
 वडियाए हाराणि वा अद्धहाराणि वा एगावली वा मुत्तावली वा कणगावली वा  
 रयणावली वा कडगाणि वा तुडियाणि वा केऊराणि वा कुंडलाणि वा पट्टाणि वा  
 मउडाणि वा पलंबसुत्ताणि वा सुवण्णसुत्ताणि वा धरेइ धरेंतं वा साइज्जइ ॥ ४७० ॥  
 जे भिक्खू माउग्गामस्स मेहुणवडियाए हाराणि वा अद्धहाराणि वा एगावली वा  
 मुत्तावली वा कणगावली वा रयणावली वा कडगाणि वा तुडियाणि वा केऊराणि  
 वा कुंडलाणि वा पट्टाणि वा मउडाणि वा पलंबसुत्ताणि वा सुवण्णसुत्ताणि वा  
 परिमुंजइ परिमुंजंतं वा साइज्जइ ॥ ४७१ ॥ जे भिक्खू माउग्गामस्स मेहुणवडियाए  
 आईणाणि वा आईणपावराणि वा कंबलाणि वा कंबलपावराणि वा कोयरा(वा)णि

वा कोयर(व)पावराणि वा कालमियाणि वा णीलमियाणि वा सामाणि वा मि(सा)हा-  
सामाणि वा उट्टाणि वा उट्टलेस्साणि वा वग्घाणि वा विवग्घाणि वा परवंगाणि वा  
सहिणाणि वा सहिणकल्लाणि वा खोमाणि वा दुगुल्लाणि वा (तिरीडपट्टाणि वा) पतु-  
[ल्ला]ण्णाणि वा आवरंताणि वा वी(ची)णाणि वा अंसुयाणि वा कणककंताणि वा कणग-  
खचियाणि वा कणगचित्ताणि वा कणगविचित्ताणि वा आभरणविचित्ताणि वा करेइ  
करेंतं वा साइजइ ॥ ४७२ ॥ जे भिक्खू माउग्गामस्स मेहुणवडियाए आईणाणि  
वा आईणपावराणि वा कंबलाणि वा कंबलपावराणि वा कोयराणि वा कोयरपाव-  
राणि वा कालमियाणि वा णीलमियाणि वा सामाणि वा मिहासामाणि वा उट्टाणि वा  
उट्टलेस्साणि वा वग्घाणि वा विवग्घाणि वा परवंगाणि वा सहिणाणि वा सहिणक-  
ल्लाणि वा खोमाणि वा दुगुल्लाणि वा पतुण्णाणि वा (पणलाणि वा) आवरंताणि वा  
वीणाणि वा अंसुयाणि वा कणककंताणि वा कणगचित्ताणि वा कणगविचित्ताणि  
वा आभरणविचित्ताणि वा धरेइ धरेंतं वा साइजइ ॥ ४७३ ॥ जे भिक्खू माउग्गा-  
मस्स मेहुणवडियाए आईणाणि वा आईणपावराणि वा कंबलाणि वा कंबलपावराणि  
वा कोयराणि वा कोयरपावराणि वा कालमियाणि वा णीलमियाणि वा सामाणि  
वा मिहासामाणि वा उट्टाणि वा उट्टलेस्साणि वा वग्घाणि वा विवग्घाणि वा पर-  
वंगाणि वा सहिणाणि वा सहिणकल्लाणि वा खोमाणि वा दुगुल्लाणि वा पतुण्णाणि  
वा आवरंताणि वा वीणाणि वा अंसुयाणि वा कणककंताणि वा कणगचित्ताणि वा  
कणगविचित्ताणि वा आभरणविचित्ताणि वा परिभुंजइ परिभुंजंतं वा साइजइ  
॥ ४७४ ॥ जे भिक्खू माउग्गामस्स मेहुणवडियाए अ(विंख)क्खंसि वा ऊरंसि वा  
उयरंसि वा थणंसि वा गहाय संचालेइ संचालेंतं वा साइजइ ॥ ४७५ ॥ जे  
भिक्खू माउग्गामस्स मेहुणवडियाए अण्णमण्णस्स पाए आमजेज्ज वा पमजेज्ज  
वा आमज्जंतं वा पमज्जंतं वा साइजइ ॥ ४७६ ॥ जे भिक्खू माउग्गामस्स मेहुण-  
वडियाए अण्णमण्णस्स पाए संवाहेज्ज वा पलिमहेज्ज वा संवाहेंतं वा पलिमहेंतं  
वा साइजइ ॥ ४७७ ॥ जे भिक्खू माउग्गामस्स मेहुणवडियाए अण्णमण्णस्स  
पाए तेल्लेण वा घएण वा णवणीएण वा मक्खेज्ज वा मिल्लिगेज्ज वा मक्खेंतं  
वा मिल्लिगेंतं वा साइजइ ॥ ४७८ ॥ जे भिक्खू माउग्गामस्स मेहुणवडियाए  
अण्णमण्णस्स पाए लोद्धेण वा कक्केण वा उल्लोलेज्ज वा उव्वट्टेज्ज वा उल्लोलेंतं वा  
उव्वट्टेंतं वा साइजइ ॥ ४७९ ॥ जे भिक्खू माउग्गामस्स मेहुणवडियाए अण्ण-  
मण्णस्स पाए सीओदगवियडेण वा उसिणोदगवियडेण वा उच्छोलेज्ज वा पधोएज्ज  
वा उच्छोलेंतं वा पधोएंतं वा साइजइ ॥ ४८० ॥ जे भिक्खू माउग्गामस्स मेहुण-

वडियाए अण्णमण्णस्स पाए फूमेज वा रएज वा फूमेंतं वा रएंतं वा साइज्जइ ॥ ४८१ ॥ जे भिक्खू माउग्गामस्स मेहुणवडियाए अण्णमण्णस्स कायं आमजेज वा पमजेज वा आमजंतं वा पमजंतं वा साइज्जइ ॥ ४८२ ॥ जे भिक्खू माउग्गामस्स मेहुणवडियाए अण्णमण्णस्स कायं संवाहेज वा पलिमहेज वा संवाहेंतं वा पलिमहेंतं वा साइज्जइ ॥ ४८३ ॥ जे भिक्खू माउग्गामस्स मेहुणवडियाए अण्णमण्णस्स कायं तेहेण वा घएण वा णवणीएण वा मक्खेज वा भिल्लिगेज वा मक्खेंतं वा भिल्लिगेंतं वा साइज्जइ ॥ ४८४ ॥ जे भिक्खू माउग्गामस्स मेहुणवडियाए अण्णमण्णस्स कायं लोद्धेण वा कक्केण वा उल्लोलेज वा उव्वट्टेज वा उल्लोलेंतं वा उव्वट्टेंतं वा साइज्जइ ॥ ४८५ ॥ जे भिक्खू माउग्गामस्स मेहुणवडियाए अण्णमण्णस्स कायं सीओदगवियडेण वा उसिणोदगवियडेण वा उच्छोलेज वा पथोएज वा उच्छोलेंतं वा पथोएंतं वा साइज्जइ ॥ ४८६ ॥ जे भिक्खू माउग्गामस्स मेहुणवडियाए अण्णमण्णस्स कायं फूमेज वा रएज वा फूमेंतं वा रएंतं वा साइज्जइ ॥ ४८७ ॥ जे भिक्खू माउग्गामस्स मेहुणवडियाए अण्णमण्णस्स कायंसि वणं आमजेज वा पमजेज वा आमजंतं वा पमजंतं वा साइज्जइ ॥ ४८८ ॥ जे भिक्खू माउग्गामस्स मेहुणवडियाए अण्णमण्णस्स कायंसि वणं संवाहेज वा पलिमहेज वा संवाहेंतं वा पलिमहेंतं वा साइज्जइ ॥ ४८९ ॥ जे भिक्खू माउग्गामस्स मेहुणवडियाए अण्णमण्णस्स कायंसि वणं तेहेण वा घएण वा णवणीएण वा मक्खेज वा भिल्लिगेज वा मक्खेंतं वा भिल्लिगेंतं वा साइज्जइ ॥ ४९० ॥ जे भिक्खू माउग्गामस्स मेहुणवडियाए अण्णमण्णस्स कायंसि वणं लोद्धेण वा कक्केण वा उल्लोलेज वा उव्वट्टेज वा उल्लोलेंतं वा उव्वट्टेंतं वा साइज्जइ ॥ ४९१ ॥ जे भिक्खू माउग्गामस्स मेहुणवडियाए अण्णमण्णस्स कायंसि वणं सीओदगवियडेण वा उसिणोदगवियडेण वा उच्छोलेज वा पथोएज वा उच्छोलेंतं वा पथोएंतं वा साइज्जइ ॥ ४९२ ॥ जे भिक्खू माउग्गामस्स मेहुणवडियाए अण्णमण्णस्स कायंसि वणं फूमेज वा रएज वा फूमेंतं वा रएंतं वा साइज्जइ ॥ ४९३ ॥ जे भिक्खू माउग्गामस्स मेहुणवडियाए अण्णमण्णस्स कायंसि गंडं वा पिलगं वा अरइयं वा अंसियं वा भगंदलं वा अण्णयरेंणं तिव्खेणं सत्थजाएणं अच्छिदेज वा विच्छिदेज वा अच्छिदेंतं वा विच्छिदेंतं वा साइज्जइ ॥ ४९४ ॥ जे भिक्खू माउग्गामस्स मेहुणवडियाए अण्णमण्णस्स कायंसि गंडं वा पिलगं वा अरइयं वा अंसियं वा भगंदलं वा अण्णयरेंणं तिव्खेणं सत्थजाएणं अच्छिदिता विच्छिदिता पूयं वा सोणियं वा णीहरेज वा विसोहेज वा णीहरेंतं वा विसोहेंतं वा साइज्जइ ॥ ४९५ ॥ जे भिक्खू माउग्गामस्स मेहुणवडियाए अण्णमण्णस्स कायंसि गंडं वा

पिलगं वा अरइयं वा अंसियं वा भगंदलं वा अण्णयरेणं तिकखेणं सत्थजाएणं  
 अच्छिदिता विच्छिदिता णीहरित्ता विसोहेत्ता सीओदगवियडेण वा उसिणोदगवियडेण  
 वा उच्छोलेज्ज वा पधोएज्ज वा उच्छोलेतं वा पधोएतं वा साइज्जइ ॥ ४९६ ॥ जे भिक्खू  
 माउग्गामस्स मेहुणवडियाए अण्णमण्णस्स कायंसि गंडं वा पिलगं वा अरइयं  
 वा अंसियं वा भगंदलं वा अण्णयरेणं तिकखेणं सत्थजाएणं अच्छिदिता विच्छिदिता  
 णीहरित्ता विसोहेत्ता उच्छोलेत्ता पधोएत्ता अण्णयरेणं आलेवणजाएणं आलिपेज्ज वा  
 विलिपेज्ज वा आलिपंतं वा विलिपंतं वा साइज्जइ ॥ ४९७ ॥ जे भिक्खू माउग्गामस्स  
 मेहुणवडियाए अण्णमण्णस्स कायंसि गंडं वा पिलगं वा अरइयं वा अंसियं वा  
 भगंदलं वा अण्णयरेणं तिकखेणं सत्थजाएणं अच्छिदिता विच्छिदिता णीहरित्ता  
 विसोहेत्ता उच्छोलेत्ता पधोएत्ता आलिपित्ता विलिपित्ता तेत्तेण वा घएण वा णवणीएण  
 वा अब्भंगेज्ज वा मक्खेज्ज वा अब्भंगेतं वा मक्खेतं वा साइज्जइ ॥ ४९८ ॥ जे भिक्खू  
 माउग्गामस्स मेहुणवडियाए अण्णमण्णस्स कायंसि गंडं वा पिलगं वा अरइयं वा अंसियं  
 वा भगंदलं वा अण्णयरेणं तिकखेणं सत्थजाएणं अच्छिदिता विच्छिदिता णीहरेत्ता  
 विसोहेत्ता उच्छोलेत्ता पधोएत्ता आलिपेत्ता अब्भंगेत्ता अण्णयरेणं धूवणजाएणं धूवेज्ज वा  
 पधूवेज्ज वा धूवेतं वा पधूवेतं वा साइज्जइ ॥ ४९९ ॥ जे भिक्खू माउग्गामस्स मेहुण-  
 वडियाए अण्णमण्णस्स पालुकिमियं वा कुच्छिकिमियं वा अंगुलीए णिवेसिय २ णीहरइ  
 णीहरंतं वा साइज्जइ ॥ ५०० ॥ जे भिक्खू माउग्गामस्स मेहुणवडियाए अण्णमण्णस्स  
 दीहाओ णहसिहाओ कप्पेज्ज वा संठवेज्ज वा कप्पेतं वा संठवेतं वा साइज्जइ ॥ ५०१ ॥  
 जे भिक्खू माउग्गामस्स मेहुणवडियाए अण्णमण्णस्स दीहाइं जंघरोमाइं कप्पेज्ज वा  
 संठवेज्ज वा कप्पेतं वा संठवेतं वा साइज्जइ ॥ ५०२ ॥ जे भिक्खू माउग्गामस्स मेहुण-  
 वडियाए अण्णमण्णस्स दीहाइं कक्खरोमाइं कप्पेज्ज वा संठवेज्ज वा कप्पेतं वा संठवेतं  
 वा साइज्जइ ॥ ५०३ ॥ जे भिक्खू माउग्गामस्स मेहुणवडियाए अण्णमण्णस्स दीहाइं  
 मंसुरोमाइं कप्पेज्ज वा संठवेज्ज वा कप्पेतं वा संठवेतं वा साइज्जइ ॥ ५०४ ॥ जे भिक्खू  
 माउग्गामस्स मेहुणवडियाए अण्णमण्णस्स दीहाइं णासारोमाइं कप्पेज्ज वा संठवेज्ज  
 वा कप्पेतं वा संठवेतं वा साइज्जइ ॥ ५०५ ॥ जे भिक्खू माउग्गामस्स मेहुणवडि-  
 याए अण्णमण्णस्स दीहाइं चक्खुरोमाइं कप्पेज्ज वा संठवेज्ज वा कप्पेतं वा संठवेतं  
 वा साइज्जइ ॥ ५०६-१ ॥ जे भिक्खू माउग्गामस्स मेहुणवडियाए अण्णमण्णस्स  
 दीहाइं कण्णरोमाइं कप्पेज्ज वा संठवेज्ज वा कप्पेतं वा संठवेतं वा साइज्जइ ॥ ५०६-२ ॥  
 जे भिक्खू माउग्गामस्स मेहुणवडियाए अण्णमण्णस्स दंते आघंसेज्ज वा पधंसेज्ज वा  
 आघंसंतं वा पधंसंतं वा साइज्जइ ॥ ५०७ ॥ जे भिक्खू माउग्गामस्स मेहुणवडियाए

अण्णमण्णस्स दंतं उच्छोलेज वा पधोएज वा उच्छोलेंतं वा पधोएंत्तं वा साइज्ज  
॥ ५०८ ॥ जे भिक्खू माउग्गामस्स मेहुणवडियाए अण्णमण्णस्स दंतं फूमेज वा  
रण्ण वा फूमैंतं वा रएंत्तं वा साइज्ज ॥ ५०९ ॥ जे भिक्खू माउग्गामस्स मेहुण-  
वडियाए अण्णमण्णस्स उट्टे आमजेज वा पमजेज वा आमज्जंतं वा पमज्जंतं वा  
साइज्ज ॥ ५१० ॥ जे भिक्खू माउग्गामस्स मेहुणवडियाए अण्णमण्णस्स उट्टे  
संवाहेज वा पलिमद्देज वा संवाहेंत्तं वा पलिमद्देंत्तं वा साइज्ज ॥ ५११ ॥ जे भिक्खू  
माउग्गामस्स मेहुणवडियाए अण्णमण्णस्स उट्टे तेळेण वा घएण वा णवणीएण वा  
मक्खेज वा भिल्लिगेज वा मक्खेंटं वा भिल्लिंगेंतं वा साइज्ज ॥ ५१२ ॥ जे भिक्खू  
माउग्गामस्स मेहुणवडियाए अण्णमण्णस्स उट्टे लोद्धेण वा कक्केण वा उल्लोलेज वा  
उव्वट्टेज वा उल्लोलेंतं वा उव्वट्टेंत्तं वा साइज्ज ॥ ५१३ ॥ जे भिक्खू माउग्गामस्स  
मेहुणवडियाए अण्णमण्णस्स उट्टे सीओदगवियडेण वा उसिणोदगवियडेण वा उच्छो-  
लेज वा पधोएज वा उच्छोलेंतं वा पधोएंत्तं वा साइज्ज ॥ ५१४ ॥ जे भिक्खू  
माउग्गामस्स मेहुणवडियाए अण्णमण्णस्स उट्टे फूमेज वा रण्ण वा फूमैंतं वा रएंत्तं  
वा साइज्ज ॥ ५१५ ॥ जे भिक्खू माउग्गामस्स मेहुणवडियाए अण्णमण्णस्स दीहाई  
उत्तरोट्ठरोमाई कप्पेज वा संठवेज वा कप्पेंत्तं वा संठवेंत्तं वा साइज्ज ॥ ५१६ ॥  
जे भिक्खू माउग्गामस्स मेहुणवडियाए अण्णमण्णस्स दीहाई अच्चिपताई कप्पेज वा  
संठवेज वा कप्पेंत्तं वा संठवेंत्तं वा साइज्ज ॥ ५१७ ॥ जे भिक्खू माउग्गामस्स मेहु-  
णवडियाए अण्णमण्णस्स अच्छीणि आमजेज वा पमजेज वा आमज्जंतं वा पमज्जंतं  
वा साइज्ज ॥ ५१८ ॥ जे भिक्खू माउग्गामस्स मेहुणवडियाए अण्णमण्णस्स  
अच्छीणि संवाहेज वा पलिमद्देज वा संवाहेंत्तं वा पलिमद्देंत्तं वा साइज्ज ॥ ५१९ ॥  
जे भिक्खू माउग्गामस्स मेहुणवडियाए अण्णमण्णस्स अच्छीणि तेळेण वा घएण  
वा णवणीएण वा मक्खेज वा भिल्लिगेज वा मक्खेंटं वा भिल्लिंगेंतं वा साइज्ज  
॥ ५२० ॥ जे भिक्खू माउग्गामस्स मेहुणवडियाए अण्णमण्णस्स अच्छीणि लोद्धेण  
वा कक्केण वा उल्लोलेज वा उव्वट्टेज वा उल्लोलेंतं वा उव्वट्टेंत्तं वा साइज्ज ॥ ५२१ ॥  
जे भिक्खू माउग्गामस्स मेहुणवडियाए अण्णमण्णस्स अच्छीणि सीओदगवियडेण वा  
उसिणोदगवियडेण वा उच्छोलेज वा पधोएज वा उच्छोलेंतं वा पधोएंत्तं वा साइ-  
ज्ज ॥ ५२२ ॥ जे भिक्खू माउग्गामस्स मेहुणवडियाए अण्णमण्णस्स अच्छीणि  
फूमेज वा रण्ण वा फूमैंतं वा रएंत्तं वा साइज्ज ॥ ५२३ ॥ जे भिक्खू माउग्गा-  
मस्स मेहुणवडियाए अण्णमण्णस्स दीहाई भुमगरोमाई कप्पेज वा संठवेज वा  
कप्पेंत्तं वा संठवेंत्तं वा साइज्ज ॥ ५२४ ॥ जे भिक्खू माउग्गामस्स मेहुणवडियाए

अण्णमण्णस्स दीहाइं पासरोमाइं कप्पेज वा संठवेज वा कप्पेंतं वा संठवेतं वा साइज्जइ  
 ॥ ५२५-१ ॥ ...केसरोमाइं ... ॥ ५२५-२ ॥ जे भिक्खू माउग्गामस्स मेहुणवडियाए  
 अण्णमण्णस्स अच्छिमलं वा कण्णमलं वा दंतमलं वा णहमलं वा णीहरेज वा विसोहेज  
 वा णीहरेंतं वा विसोहेतं वा साइज्जइ ॥ ५२६ ॥ जे भिक्खू माउग्गामस्स मेहुणवडियाए  
 अण्णमण्णस्स कायाओ सेयं वा जल्लं वा पंकं वा मलं वा णीहरेज वा विसोहेज वा णीहरेंतं  
 वा विसोहेतं वा साइज्जइ ॥ ५२७ ॥ जे भिक्खू माउग्गामस्स मेहुणवडियाए अण्णम-  
 ण्णस्स गामाणुगामं दूइजमाणे सीसदुवारियं करेइ करेंतं वा साइज्जइ ॥ ५२८ ॥ जे  
 भिक्खू माउग्गामस्स मेहुणवडियाए अणंतरहियाए पुढवीए णिसीयावेज वा तुयट्टावेज  
 वा णिसीयावेतं वा तुयट्टावेतं वा साइज्जइ ॥ ५२९ ॥ जे भिक्खू माउग्गामस्स मेहुण-  
 वडियाए ससिणिद्धाए पुढवीए णिसीयावेज वा तुयट्टावेज वा णिसीयावेतं वा तुयट्टावेतं  
 वा साइज्जइ ॥ ५३० ॥ जे भिक्खू माउग्गामस्स मेहुणवडियाए ससरक्खाए पुढ-  
 वीए णिसीयावेज वा तुयट्टावेज वा णिसीयावेतं वा तुयट्टावेतं वा साइज्जइ ॥ ५३१ ॥  
 जे भिक्खू माउग्गामस्स मेहुणवडियाए म[ह]डियाकडाए पुढवीए णिसीयावेज वा  
 तुयट्टावेज वा णिसीयावेतं वा तुयट्टावेतं वा साइज्जइ ॥ ५३२ ॥ जे भिक्खू माउग्गा-  
 मस्स मेहुणवडियाए चित्तमंताए पुढवीए णिसीयावेज वा तुयट्टावेज वा णिसीया-  
 वेतं वा तुयट्टावेतं वा साइज्जइ ॥ ५३३ ॥ जे भिक्खू माउग्गामस्स मेहुणवडियाए  
 चित्तमंताए सिलाए णिसीयावेज वा तुयट्टावेज वा णिसीयावेतं वा तुयट्टावेतं वा  
 साइज्जइ ॥ ५३४ ॥ जे भिक्खू माउग्गामस्स मेहुणवडियाए चित्तमंताए लेल्लए  
 णिसीयावेज वा तुयट्टावेज वा णिसीयावेतं वा तुयट्टावेतं वा साइज्जइ ॥ ५३५ ॥ जे  
 भिक्खू माउग्गामस्स मेहुणवडियाए कोलावासंसि वा दारुए जीवपइट्टिए सअंडे  
 सपाणे सवीए सहुरिए सओसे सउदए सउत्तिंगपणगदग्गमट्टियमक्कडासंताणगंसि णिसी-  
 यावेज वा तुयट्टावेज वा णिसीयावेतं वा तुयट्टावेतं वा साइज्जइ ॥ ५३६ ॥ जे भिक्खू  
 माउग्गामस्स मेहुणवडियाए अंकंसि वा पलियंकंसि वा णिसीयावेज वा तुयट्टावेज वा  
 णिसीयावेतं वा तुयट्टावेतं वा साइज्जइ ॥ ५३७ ॥ जे भिक्खू माउग्गामस्स मेहुण-  
 वडियाए अंकंसि वा पलियंकंसि वा णिसीयावेत्ता वा तुयट्टावेत्ता वा असणं वा  
 ४ अणुग्वासेज वा अणुपाएज वा अणुग्वासेंतं वा अणुपाएंतं वा साइज्जइ  
 ॥ ५३८ ॥ जे भिक्खू माउग्गामस्स मेहुणवडियाए आगंतागारेसु वा आरामा-  
 गारेसु वा गाहावइकुलेसु वा परियावसहेसु वा णिसीयावेज वा तुयट्टावेज वा  
 णिसीयावेतं वा तुयट्टावेतं वा साइज्जइ ॥ ५३९ ॥ जे भिक्खू माउग्गामस्स मेहुण-  
 वडियाए आगंतागारेसु वा आरामागारेसु वा गाहावइकुलेसु वा परियावसहेसु



वा णिसीयावेत्ता वा तुयट्ठवेत्ता वा असणं वा ४ अणुग्घासेज्ज वा अणुपाएज्ज वा अणुग्घासेत्तं वा अणुपाएत्तं वा साइज्जइ ॥ ५४० ॥ जे भिक्खू माउग्गामस्स मेहुणवडियाए अण्णयरं तेइच्छं आउट्ठं आउट्ठं वा साइज्जइ ॥ ५४१ ॥ जे भिक्खू माउग्गामस्स मेहुणवडियाए अमणुण्णाइं पोग्गलाइं अवणीहरइ णीहरंतं वा साइज्जइ ॥ ५४२ ॥ जे भिक्खू माउग्गामस्स मेहुणवडियाए मणुण्णाइं पोग्गलाइं उवकिरइ उवकिरंतं वा साइज्जइ ॥ ५४३ ॥ जे भिक्खू माउग्गामस्स मेहुणवडियाए अण्णयरं पसुजाइं वा पक्खिज्जाइं वा पायंसि वा पक्खंसि वा पुंछंसि वा सीसंसि वा गहाय (उज्जिहइ वा पव्विहइ वा) संचालेइ (उज्जिहंतं वा पव्विहंतं वा) संचालंतं वा साइज्जइ ॥ ५४४ ॥ जे भिक्खू माउग्गामस्स मेहुणवडियाए अण्णयरं पसुजायं वा पक्खिजायं वा सोयंसि कट्ठं वा कल्लिं वा अंगुलियं वा सलागं वा अणुप्पवेसित्ता संचालेइ संचालंतं वा साइज्जइ ॥ ५४५ ॥ जे भिक्खू माउग्गामस्स मेहुणवडियाए अण्णयरं पसुजायं वा पक्खिजायं वा अयमित्थित्तिकट्ठु आलिंगेज्ज वा परिस्सएज्ज वा परिचुंवेज्ज वा विच्छेदेज्ज वा आलिंगंतं वा परिस्सयंतं वा परिचुंबंतं वा विच्छेदंतं वा साइज्जइ ॥ ५४६ ॥ जे भिक्खू माउग्गामस्स मेहुणवडियाए असणं वा ४ देइ देंतं वा साइज्जइ ॥ ५४७ ॥ जे भिक्खू माउग्गामस्स मेहुणवडियाए असणं वा ४ पडिच्छइ पडिच्छंतं वा साइज्जइ ॥ ५४८ ॥ जे भिक्खू माउग्गामस्स मेहुणवडियाए वत्थं वा पडिग्गहं वा कंबलं वा पायपुंछणं वा देइ देंतं वा साइज्जइ ॥ ५४९ ॥ जे भिक्खू माउग्गामस्स मेहुणवडियाए वत्थं वा ४ पडिच्छइ पडिच्छंतं वा साइज्जइ ॥ ५५० ॥ जे भिक्खू माउग्गामस्स मेहुणवडियाए सज्झायं वाएइ वाएत्तं वा साइज्जइ ॥ ५५१ ॥ जे भिक्खू माउग्गामस्स मेहुणवडियाए सज्झायं पडिच्छइ पडिच्छंतं वा साइज्जइ ॥ ५५२ ॥ जे भिक्खू माउग्गामस्स मेहुणवडियाए अण्णयरं ईदिणं आकारं करेइ करंतं वा साइज्जइ । तं सेवमाणे आवज्जइ चाउम्मासियं परिहारट्ठाणं अणुग्घाइयं ॥ ५५३ ॥ **णिसीहउज्झयणे सत्तमो उद्देसो समत्तो ॥ ७ ॥**

### अट्ठमो उद्देसो

जे भिक्खू आगंतारेसु वा आरामागारेसु वा गाहावइकुलेसु वा परियावसहेसु वा एगो एगाए इत्थीए सद्धिं विहारं वा करेइ सज्झायं वा करेइ असणं वा ४ आहारेइ उच्चारं वा पासवणं वा परिट्ठवेइ अण्णयरं वा अणारियं णिट्ठुरं (पिहुणं) अस्सव(म)णपाओगं कहं कहेइ कहंतं वा साइज्जइ ॥ ५५४ ॥ जे भिक्खू उज्जाणंसि वा उज्जाणणिहंसि वा उज्जाणसालंसि वा णिज्जाणंसि वा णिज्जाणणिहंसि वा णिज्जाणसालंसि वा एगो

एगाए इत्थीए सद्धिं विहारं वा करेइ सज्झायं वा करेइ असणं वा ४ आहारेइ उच्चारं वा पासवणं वा परिट्ठवेइ अण्णयरं वा अणारियं पिहुणं अस्समणपाउग्गं क्हं कहेइ कहेतं वा साइज्जइ ॥ ५५५ ॥ जे भिक्खू अट्ठंसि वा अट्ठालयंसि वा चारियंसि वा पागारंसि वा दारंसि वा गोपुरंसि वा एगो० इत्थीए सद्धिं विहारं वा करेइ सज्झायं वा करेइ असणं वा ४ आहारेइ उच्चारं वा पासवणं वा परिट्ठवेइ अण्णयरं वा अणारियं पिहुणं अस्समणपाउग्गं क्हं कहेइ कहेतं वा साइज्जइ ॥ ५५६ ॥ जे भिक्खू दग्गंसि वा दग्गमग्गंसि वा दग्गपहंसि वा दग्गतीरंसि वा दग्गठाणंसि वा एगो० इत्थीए सद्धिं विहारं वा करेइ सज्झायं वा करेइ असणं वा ४ आहारेइ उच्चारं वा पासवणं वा परिट्ठवेइ अण्णयरं वा अणारियं पिहुणं अस्समणपाउग्गं क्हं कहेइ कहेतं वा साइज्जइ ॥ ५५७ ॥ जे भिक्खू सुण्णगिहंसि वा सुण्णसालंसि वा भिण्णगिहंसि वा भिण्णसालंसि वा कूडागारंसि वा कोट्टागारंसि वा एगो० इत्थीए सद्धिं विहारं वा करेइ सज्झायं वा करेइ असणं वा ४ आहारेइ उच्चारं वा पासवणं वा परिट्ठवेइ अण्णयरं वा अणारियं पिहुणं अस्समणपाउग्गं क्हं कहेइ कहेतं वा साइज्जइ ॥ ५५८ ॥ जे भिक्खू तणगिहंसि वा तणसालंसि वा तुसगिहंसि वा तुससालंसि वा भुसगिहंसि वा भुससालंसि वा एगो० इत्थीए सद्धिं विहारं वा करेइ सज्झायं वा करेइ असणं वा ४ आहारेइ उच्चारं वा पासवणं वा परिट्ठवेइ अण्णयरं वा अणारियं पिहुणं अस्समणपाउग्गं क्हं कहेइ कहेतं वा साइज्जइ ॥ ५५९ ॥ जे भिक्खू जाणसालंसि वा जाणगिहंसि वा जुग्गसालंसि वा जुग्गगिहंसि वा एगो० इत्थीए सद्धिं विहारं वा करेइ सज्झायं वा करेइ असणं वा ४ आहारेइ उच्चारं वा पासवणं वा परिट्ठवेइ अण्णयरं वा अणारियं पिहुणं अस्समणपाउग्गं क्हं कहेइ कहेतं वा साइज्जइ ॥ ५६० ॥ जे भिक्खू पणियसालंसि वा पणियगिहंसि वा परियासालंसि वा परियागिहंसि वा कम्मियसालंसि वा कम्मियगिहंसि वा एगो० इत्थीए सद्धिं विहारं वा करेइ सज्झायं वा करेइ असणं वा ४ आहारेइ उच्चारं वा पासवणं वा परिट्ठवेइ अण्णयरं वा अणारियं पिहुणं अस्समणपाउग्गं क्हं कहेइ कहेतं वा साइज्जइ ॥ ५६१ ॥ जे भिक्खू गोणसालंसि वा गोणगिहंसि वा महाकुलंसि वा महागिहंसि वा एगो० इत्थीए सद्धिं विहारं वा करेइ सज्झायं वा करेइ असणं वा ४ आहारेइ उच्चारं वा पासवणं वा परिट्ठवेइ अण्णयरं वा अणारियं पिहुणं अस्समणपाउग्गं क्हं कहेइ कहेतं वा साइज्जइ ॥ ५६२ ॥ जे भिक्खू राओ वा वियाले वा इत्थिमज्झगए इत्थिसंसत्ते इत्थिपरिवुडे क्हं कहेइ कहेतं वा साइज्जइ ॥ ५६३ ॥ जे भिक्खू सगणिच्चियाए वा परगणिच्चियाए वा गिग्गथीए सद्धिं

गामाणुग्गामं दूइज्जमाणे पुरओ गच्छमाणे पिट्ठओ रीयमाणे ओहयमणसंकप्पे विंता-  
 सोयसागरसंपविट्ठे करयलपल्लत्थमुहे अट्ठज्जाणोवगए विहारं वा करेइ सज्जायं वा  
 करेइ असणं वा ४ आहारेइ उच्चारं वा पासवणं वा परिट्ठवेइ अण्णयरं वा अणारियं  
 पिट्ठुणं अस्समणपाउग्गं कहं कहेइ कहेतं वा साइज्जइ ॥ ५६४ ॥ जे भिक्खू णायगं  
 वा अणायगं वा उवासयं वा अणुवासयं वा अंतो उवस्सयस्स अद्धं वा राइं कसिणं  
 वा राइं संवसावेइ (तं न पडियाइक्खइ तं पडुच्च निक्खमइ वा पविसइ वा) संव-  
 सावेतं वा साइज्जइ ॥ ५६५ ॥ जे भिक्खू णायगं वा अणायगं वा उवासयं वा  
 अणुवासयं वा अंतो उवस्सयस्स अद्धं वा राइं कसिणं वा राइं संवसावेइ तं पडुच्च  
 निक्खमइ वा पविसइ वा निक्खमंतं वा पविसंतं वा साइज्जइ ॥ ५६६ ॥ जे भिक्खू  
 रण्णो खत्तियाणं मुदियाणं मुद्धाभिसित्ताणं संवायमहेसु वा पिंडमहेसु वा जाव असणं  
 वा ४ पडिग्गाहेइ पडिग्गाहेतं वा साइज्जइ ॥ ५६७ ॥ जे भिक्खू रण्णो खत्तियाणं  
 मुदियाणं मुद्धाभिसित्ताणं उत्तरसालंति वा उत्तरगिहंसि वा रीयमाणं असणं वा  
 ४ पडिग्गाहेइ पडिग्गाहेतं वा साइज्जइ ॥ ५६८ ॥ जे भिक्खू रण्णो खत्तियाणं  
 मुदियाणं मुद्धाभिसित्ताणं हयसालागयाण वा गयसालागयाण वा मंतसालागयाण  
 वा गुज्जसालागयाण वा रहस्ससालागयाण वा मेहुणसालागयाण वा असणं वा  
 ४ पडिग्गाहेइ पडिग्गाहेतं वा साइज्जइ ॥ ५६९ ॥ जे भिक्खू रण्णो खत्तियाणं  
 मुदियाणं मुद्धाभिसित्ताणं सन्निहिंसंनिचयाओ खीरं वा दहिं वा णवणीयं वा सप्पि  
 वा गुलं वा खंडं वा सक्करं वा मच्छंडियं वा अण्णयरं वा भोयणजाणं पडिग्गाहेइ  
 पडिग्गाहेतं वा साइज्जइ ॥ ५७० ॥ जे भिक्खू रण्णो खत्तियाणं मुदियाणं मुद्धाभि-  
 सित्ताणं उस्सट्ठपिंडं वा संसट्ठपिंडं वा अणाहपिंडं वा किविणपिंडं वा वणीमगपिंडं  
 वा पडिग्गाहेइ पडिग्गाहेतं वा साइज्जइ । तं सेवमाणे आवज्जइ चाउम्मासियं परिहार-  
 द्वाणं अणुग्वाइयं ॥ ५७१ ॥ गिंसीहऽज्जयणे अट्ठमो उद्देसो समत्तो ॥ ८ ॥

### णवमो उद्देसो

जे भिक्खू रायपिंडं गेण्हइ गेण्हंतं वा साइज्जइ ॥ ५७२ ॥ जे भिक्खू रायपिंडं  
 भुंजइ भुंजंतं वा साइज्जइ ॥ ५७३ ॥ जे भिक्खू रायंतेपुरं पविसइ पविसंतं वा  
 साइज्जइ ॥ ५७४ ॥ जे भिक्खू रायंतेपुरियं वदेज्जा-‘आउसो ! रायंतेपुरिए णो  
 खलु अम्हं कप्पइ रायंतेपुरं णिक्खमित्तए वा पविसित्तए वा, इमम्हं तुमं पडिग्गहगं  
 गहाय रायंतेपुराओ असणं वा ४ अभिहडं आहट्ठु दलयाहि’ जो तं एवं वयइ वयंतं  
 वा साइज्जइ ॥ ५७५ ॥ जे भिक्खू णो वएज्जा, रायंतेपुरिया वएज्जा-‘आउसंतो !  
 समणा णो खलु तुज्झं कप्पइ रायंतेपुरं णिक्खमित्तए वा पविसित्तए वा, आहरेयं

पडिग्गहंगं जाए अम्हं रायंतेपुराओ असणं वा ४ अभिहडं आहट्टु दलयामि' जो तं एवं वयंतं पडिणुणै पडिणुणंतं वा साइज्जइ ॥ ५७६ ॥ जे भिक्खू रण्णो खत्तियाणं मुदियाणं मुद्धाभिसित्ताणं दुवारियभत्तं वा पसुभत्तं वा भयगभत्तं वा बलभत्तं वा कयगभत्तं वा हयभत्तं वा गयभत्तं वा कंतारभत्तं वा दुब्भिकखभत्तं वा दमगभत्तं वा गिलाणभत्तं वा वडलियाभत्तं वा पाहुणभत्तं वा पडिग्गाहेइ पडिग्गाहेंतं वा साइज्जइ ॥ ५७७ ॥ जे भिक्खू रण्णो खत्तियाणं मुदियाणं मुद्धाभिसित्ताणं इमाइं छद्देसाय-यणाइं अजाणि(य)त्ता अपुच्छिय अगवेसिय परं चउरायपंचरायाओ गाहावड्कुलं पिंड-वायपडियाए णिक्खमइ वा पविसइ वा णिक्खमंतं वा पविसंतं वा साइज्जइ, तंजहा-कोट्टागारसालाणि वा भंडागारसालाणि वा पाणसालाणि वा खीरसालाणि वा गंज-सालाणि वा महाणससालाणि वा ॥ ५७८ ॥ जे भिक्खू रण्णो खत्तियाणं मुदियाणं मुद्धाभिसित्ताणं अइगच्छमाणाण वा णिग्गच्छमाणाण वा पयमवि चक्खुदंसणपडि-याए अभिसंधारेइ अभिसंधारेंतं वा साइज्जइ ॥ ५७९ ॥ जे भिक्खू रण्णो खत्तियाणं मुदियाणं मुद्धाभिसित्ताणं इत्थीओ सव्वालंकारविभूसियाओ पयमवि चक्खुदंसण-पडियाए अभिसंधारेइ अभिसंधारेंतं वा साइज्जइ ॥ ५८० ॥ जे भिक्खू रण्णो खत्तियाणं मुदियाणं मुद्धाभिसित्ताणं मंस(क)खाया[ण]ण वा मच्छखायाण वा छवि-खायाण वा बहिया णिग्गयाणं असणं वा ४ पडिग्गाहेइ पडिग्गाहेंतं वा साइज्जइ ॥ ५८१ ॥ जे भिक्खू रण्णो खत्तियाणं मुदियाणं मुद्धाभिसित्ताणं अण्णयरं उववूहणियं समीहियं पेहाए तीसे परिसाए अणुट्टियाए अभिण्णाए अव्वोच्छिण्णाए जो तमण्णं पडिग्गाहेइ पडिग्गाहेंतं वा साइज्जइ ॥ ५८२ ॥ अह पुण एवं जाणेज्ज 'इहज्ज रायखत्तिए परिवुसिए' जे भिक्खू ताए गिहाए ताए पएसाए ताए उवासंतराए विहारं वा करेइ सज्झायं वा करेइ असणं वा ४ आहारेइ उच्चारं वा पासवणं वा परिट्टवेइ अण्णयरं वा अणारियं पिहुणं अस्समणपाउगं कहं कहेइ कहेतं वा साइज्जइ ॥ ५८३ ॥ जे भिक्खू रण्णो खत्तियाणं मुदियाणं मुद्धाभिसित्ताणं बहिया जत्तासं(पट्टि)ठियाणं असणं वा ४ पडिग्गाहेइ पडिग्गाहेंतं वा साइज्जइ ॥ ५८४ ॥ जे भिक्खू रण्णो खत्तियाणं मुदियाणं मुद्धाभिसित्ताणं बहिया जत्तापडिणियत्ताणं असणं वा ४ पडि-ग्गाहेइ पडिग्गाहेंतं वा साइज्जइ ॥ ५८५ ॥ जे भिक्खू रण्णो खत्तियाणं मुदियाणं मुद्धाभिसित्ताणं णइजत्ता(सं)पट्टियाणं असणं वा ४ पडिग्गाहेइ पडिग्गाहेंतं वा साइ-ज्जइ ॥ ५८६ ॥ जे भिक्खू रण्णो खत्तियाणं मुदियाणं मुद्धाभिसित्ताणं णइजत्तापडि-णियत्ताणं असणं वा ४ पडिग्गाहेइ पडिग्गाहेंतं वा साइज्जइ ॥ ५८७ ॥ जे भिक्खू रण्णो खत्तियाणं मुदियाणं मुद्धाभिसित्ताणं गिरिजत्तापट्टियाणं असणं वा ४ पडिग्गा-

हेइ पडिग्गाहेतं वा साइज्जइ ॥ ५८८ ॥ जे भिक्खू रण्णो खत्तियाणं मुदियाणं मुद्धा-  
 भिसित्ताणं गिरिजत्तापडिणियत्ताणं असणं वा ४ पडिग्गाहेइ पडिग्गाहेतं वा साइ-  
 ज्जइ ॥ ५८९ ॥ जे भिक्खू रण्णो खत्तियाणं मुदियाणं मुद्धाभिसित्ताणं महाभिसेयंसि  
 वट्टमाणंसि णिक्खमइ वा पविसइ वा णिक्खमंतं वा पविसंतं वा साइज्जइ ॥ ५९० ॥  
 जे भिक्खू रण्णो खत्तियाणं मुदियाणं मुद्धाभिसित्ताणं इमाओ दस अभिसेयाओ  
 रायहाणीओ उद्दिट्ठाओ गणियाओ वज्जियाओ अंतो मासस्स दुक्खुत्तो वा तिक्खुत्तो  
 वा णिक्खमइ वा पविसइ वा णिक्खमंतं वा पविसंतं वा साइज्जइ, तंजहा-चंपा महुरा  
 वाणारसी सावत्थी साएयं कंपिळं कोसंबी मिहिला हत्थि(णा)णपुरं रायगिहं ॥ ५९१ ॥  
 जे भिक्खू रण्णो खत्तियाणं मुदियाणं मुद्धाभिसित्ताणं असणं वा ४ परस्स णीहडं  
 पडिग्गाहेइ पडिग्गाहेतं वा साइज्जइ, तंजहा-खत्तियाण वा राईण वा कुराईण वा  
 रायसंसियाण वा रायपेसियाण वा ॥ ५९२ ॥ जे भिक्खू रण्णो खत्तियाणं मुदियाणं  
 मुद्धाभिसित्ताणं असणं वा ४ परस्स णीहडं पडिग्गाहेइ पडिग्गाहेतं वा साइज्जइ,  
 तंजहा-णडाण वा णट्टाण वा कच्छुयाण वा जल्लाण वा मल्लाण वा मुट्ठियाण वा  
 वेल्बगाण वा कहगाण वा पवगाण वा लासगाण वा दोखलयाण वा छत्ताणुयाण वा  
 ॥ ५९३ ॥ जे भिक्खू रण्णो खत्तियाणं मुदियाणं मुद्धाभिसित्ताणं असणं वा ४ परस्स  
 णीहडं पडिग्गाहेइ पडिग्गाहेतं वा साइज्जइ, तंजहा-आसपोसयाण वा हत्थि-  
 पोसयाण वा महिसपोसयाण वा वसहपोसयाण वा सीहपोसयाण वा वग्घपोसयाण  
 वा अयपोसयाण वा पोयपोसयाण वा सिगपोसयाण वा सुण्हपोसयाण वा सूयरपोस-  
 याण वा मेंढपोसयाण वा कुक्कुडपोसयाण वा तित्तिरपोसयाण वा वट्ठयपोसयाण वा  
 लावयपोसयाण वा चीर[हु]ल्लपोसयाण वा हंसपोसयाण वा मऊरपोसयाण वा सुय-  
 पोसयाण वा ॥ ५९४ ॥ जे भिक्खू रण्णो खत्तियाणं मुदियाणं मुद्धाभिसित्ताणं असणं  
 वा ४ परस्स णीहडं पडिग्गाहेइ पडिग्गाहेतं वा साइज्जइ, तंजहा-आस(मद्दा)दम-  
 गाण वा हत्थिदमगाण वा ॥ ५९५ ॥ जे भिक्खू रण्णो खत्तियाणं मुदियाणं मुद्धा-  
 भिसित्ताणं असणं वा ४ परस्स णीहडं पडिग्गाहेइ पडिग्गाहेतं वा साइज्जइ, तंजहा-  
 आसमिठाण वा हत्थिमिठाण वा ॥ ५९६ ॥ जे भिक्खू रण्णो खत्तियाणं मुदियाणं  
 मुद्धाभिसित्ताणं असणं वा ४ परस्स णीहडं पडिग्गाहेइ पडिग्गाहेतं वा साइज्जइ,  
 तंजहा-आसरोहाण वा हत्थिरोहाण वा ॥ ५९७ ॥ जे भिक्खू रण्णो खत्तियाणं  
 मुदियाणं मुद्धाभिसित्ताणं असणं वा ४ परस्स णीहडं पडिग्गाहेइ पडिग्गाहेतं वा  
 साइज्जइ, तंजहा-सत्थवाहाण वा संवाहावयाण वा अब्भंगावयाण वा उव्वट्ठावयाण  
 वा मज्जावयाण वा मंडावयाण वा छत्तग्गाहाण वा चमरग्गाहाण वा हडप्पग्गाहाण

वा परियट्ठयग्गहाण वा दीवियग्गहाण वा असिग्गहाण वा धणुग्गहाण वा सत्तिग्गहाण वा कौत्तग्गहाण वा ॥ ५९८ ॥ जे भिक्खू रण्णो खत्तियाणं मुदियाणं मुद्धाभिसित्ताणं असणं वा ४ परस्स णीहडं पडिग्गहेइ पडिग्गहेतं वा साइज्जइ, तंजहा-वरिसधराण वा कंचुइज्जाण वा दोवारियाण वा दं[डं]डारक्खियाण वा ॥ ५९९ ॥ जे भिक्खू रण्णो खत्तियाणं मुदियाणं मुद्धाभिसित्ताणं असणं वा ४ परस्स णीहडं पडिग्गहेइ पडिग्गहेतं वा साइज्जइ, तंजहा-खुज्जाण वा चिलाइयाण वा वामणीण वा घडभीण वा वब्बरीण वा प[पा]उसीण वा जोणियाण वा पट्ठवियाण वा ईसणीण वा थारुणिणीण वा लउसीण वा लासीण वा दमिलीण वा सिंहलीण वा आलवीण वा पुल्लिदीण वा... सबरीण वा पारसी[परिसिणी]ण वा । तं सेवमाणे आवज्जइ चाउम्मासियं परिहारट्ठाणं अणुग्घाइयं ॥ ६०० ॥ णिसीहउज्जयणे णवमो उद्देसो समत्तो ॥ ९ ॥

### दसमो उद्देसो

जे भिक्खू भदंतं आगाढं वयइ वयंतं वा साइज्जइ ॥ ६०१ ॥ जे भिक्खू भदंतं फरुसं वयइ वयंतं वा साइज्जइ ॥ ६०२ ॥ जे भिक्खू भदंतं आगाढं फरुसं वयइ वयंतं वा साइज्जइ ॥ ६०३ ॥ जे भिक्खू भदंतं अण्णयरीए अच्चासायणाए अच्चासाएइ अच्चासाएतं वा साइज्जइ ॥ ६०४ ॥ जे भिक्खू अणंतकायसंजुत्तं आहारं आहारेइ आहारंतं वा साइज्जइ ॥ ६०५ ॥ जे भिक्खू आहाकम्मं भुंजइ भुंजंतं वा साइज्जइ ॥ ६०६ ॥ (‘‘‘लाभातित्तं नि० कहेइ कहंतं वा सा०) जे भिक्खू पुट्ठप्पणं निमित्तं वागरेइ वागरंतं वा साइज्जइ ॥ ६०७ ॥ जे भिक्खू अणागयं निमित्तं वागरेइ वागरंतं वा साइज्जइ ॥ ६०८ ॥ जे भिक्खू सेहं अवहरइ अवहरंतं वा साइज्जइ ॥ ६०९ ॥ जे भिक्खू सेहं विप्परिणामेइ विप्परिणामंतं वा साइज्जइ ॥ ६१० ॥ जे भिक्खू दिसं अवहरइ अवहरंतं वा साइज्जइ ॥ ६११ ॥ जे भिक्खू दिसं विप्परिणामेइ विप्परिणामंतं वा साइज्जइ ॥ ६१२ ॥ जे भिक्खू बहियावासियं आप्पसं परं तिरायाओ अविफलेत्ता संवसावेइ संवसावेंतं वा साइज्जइ ॥ ६१३ ॥ जे भिक्खू साहिरणं अविओसवियपाहुडं अकडपायच्छित्तं परं तिरायाओ विप्फालिय अविप्फालिय संभुंजइ संभुंजंतं वा साइज्जइ ॥ ६१४ ॥ जे भिक्खू उग्घाइयं अणुग्घाइयं वयइ वयंतं वा साइज्जइ ॥ ६१५ ॥ जे भिक्खू अणुग्घाइयं उग्घाइयं देइ देंतं वा साइज्जइ ॥ ६१६ ॥ जे भिक्खू उग्घाइयं अणुग्घाइयं देइ देंतं वा साइज्जइ ॥ ६१७ ॥ जे भिक्खू उग्घाइयं उग्घाइयं देइ देंतं वा साइज्जइ ॥ ६१८ ॥ जे भिक्खू उग्घाइयं सोच्चा णच्चा संभुंजइ संभुंजंतं वा साइज्जइ ॥ ६१९ ॥ जे भिक्खू उग्घाइयहेउं सोच्चा णच्चा संभुंजइ संभुंजंतं वा साइज्जइ ॥ ६२० ॥ जे भिक्खू



अप्पणा भुंजमा० अण्णेसिं वा दलमाणे राइभोयणपडिसेवणपत्ते) जो तं भुंजइ भुंजंतं वा साइज्जइ ॥ ६३४ ॥ जे भिक्खू राओ वा वियाले वा सपाणं सभोयणं उग्गालं उग्गालित्ता पच्चोगिलइ पच्चोगिलंतं वा साइज्जइ ॥ ६३५ ॥ जे भिक्खू गिलाणं सोच्चा ण गवेसइ ण गवेसंतं वा साइज्जइ ॥ ६३६ ॥ जे भिक्खू गिलाणं सोच्चा उम्मगं वा पडिपहं वा गच्छइ गच्छंतं वा साइज्जइ ॥ ६३७ ॥ जे भिक्खू गिलाणवेयावच्चे अब्भुट्ठियस्स सएण लामेण असंथरमाणस्स जो तस्स न पडितप्पइ न पडितप्पंतं वा साइज्जइ ॥ ६३८ ॥ जे भिक्खू गिलाणवेयावच्चे अब्भुट्ठिए गिलाणपाउग्गे द्ववजाए अलब्भमाणे जो तं न पडियाइक्खइ न पडियाइक्खंतं वा साइज्जइ ॥ ६३९ ॥ जे भिक्खू पढमपाउसम्मि गामाणुग्गामं दूइज्जइ दूइज्जंतं वा साइज्जइ ॥ ६४० ॥ जे भिक्खू वासावासं पज्जोसवियंसि दूइज्जइ दूइज्जंतं वा साइज्जइ ॥ ६४१ ॥ जे भिक्खू अपज्जोसवणाए पज्जोसवेइ पज्जोसवेतं वा साइज्जइ ॥ ६४२ ॥ जे भिक्खू पज्जोसवणाए ण पज्जोसवेइ ण पज्जोसवेतं वा साइज्जइ ॥ ६४३ ॥ जे भिक्खू पज्जोसवणाए गोलोमाई-पि वा(वा)लाइं उवाइणाइ उवाइणंतं वा साइज्जइ ॥ ६४४ ॥ जे भिक्खू पज्जोसवणाए इत्तिरियं पा(पि-आ)हारं आहारेइ आहारंतं वा साइज्जइ ॥ ६४५ ॥ जे भिक्खू गारत्थियं पज्जोसवेइ पज्जोसवेतं वा साइज्जइ ॥ ६४६ ॥ जे भिक्खू पढमसमोसरणुद्देसे पत्ताइं चीवराइं पडिग्गाहेइ पडिग्गाहेतं वा साइज्जइ । तं सेवमाणे आवज्जइ चाउम्मासियं परिहारट्ठणं अणुग्घाइयं ॥ ६४७ ॥

णिसीहऽज्झयणे दसमो उद्देसो समत्तो ॥ १० ॥

### एकारसमो उद्देसो

जे भिक्खू अयपायाणि वा तंबपायाणि वा तउयपायाणि वा कंसपायाणि वा रूपपायाणि वा सुवण्णपायाणि वा जायरूवपायाणि वा मणिपायाणि वा कायपायाणि वा दंतपायाणि वा सिंगपायाणि वा चम्मपायाणि वा चेलपायाणि वा संखपायाणि वा वइरपायाणि वा करेइ करंतं वा साइज्जइ ॥ ६४८ ॥ जे भिक्खू अयपायाणि वा तंबपायाणि वा तउयपायाणि वा कंसपायाणि वा रूपपायाणि वा सुवण्णपायाणि वा जायरूवपायाणि वा मणिपायाणि वा कायपायाणि वा दंतपायाणि वा सिंगपायाणि वा चम्मपायाणि वा चेलपायाणि वा संखपायाणि वा वइरपायाणि वा धरेइ धरंतं वा साइज्जइ ॥ ६४९ ॥ जे भिक्खू अयपायाणि वा तंबपायाणि वा तउयपायाणि वा कंसपायाणि वा रूपपायाणि वा सुवण्णपायाणि वा जायरूवपायाणि वा मणिपायाणि वा कायपायाणि वा दंतपायाणि वा सिंगपायाणि वा चम्मपायाणि



वा चेलपायाणि वा संखपायाणि वा वड्ढरपायाणि वा परिभुंजइ परिभुंजंतं वा साइ-  
 ज्जइ ॥ ६५० ॥ जे भिक्खू अयबंधणाणि वा तंवबंधणाणि वा तउयबंधणाणि वा  
 कंसबंधणाणि वा रूपबंधणाणि वा सुवण्णबंधणाणि वा जायरूबबंधणाणि वा मणि-  
 बंधणाणि वा कायबंधणाणि वा दंतबंधणाणि वा सिंगबंधणाणि वा चम्मबंधणाणि  
 वा चेलबंधणाणि वा संखबंधणाणि वा वड्ढरबंधणाणि वा करेइ करेतं वा साइज्जइ  
 ॥ ६५१ ॥ जे भिक्खू अयबंधणाणि वा तंवबंधणाणि वा तउयबंधणाणि वा कंस-  
 बंधणाणि वा रूपबंधणाणि वा सुवण्णबंधणाणि वा जायरूबबंधणाणि वा मणिवंध-  
 णाणि वा कायबंधणाणि वा दंतबंधणाणि वा सिंगबंधणाणि वा चम्मबंधणाणि वा चेल-  
 बंधणाणि वा संखबंधणाणि वा वड्ढरबंधणाणि वा धरेइ धरेतं वा साइज्जइ  
 ॥ ६५२ ॥ जे भिक्खू अयबंधणाणि वा तंवबंधणाणि वा तउयबंधणाणि वा कंस-  
 बंधणाणि वा रूपबंधणाणि वा सुवण्णबंधणाणि वा जायरूबबंधणाणि वा मणिवंधणाणि  
 वा कायबंधणाणि वा दंतबंधणाणि वा सिंगबंधणाणि वा चम्मबंधणाणि वा चेल-  
 बंधणाणि वा संखबंधणाणि वा वड्ढरबंधणाणि वा परिभुंजइ परिभुंजंतं वा साइज्जइ  
 ॥ ६५३ ॥ जे भिक्खू परं अद्धजोयणमेराओ पायपडियाए गच्छइ गच्छंतं वा  
 साइज्जइ ॥ ६५४ ॥ जे भिक्खू परमद्धजोयणमेराओ सपच्चवायंसि पायं अभिहं  
 आहट्टु दिज्जमाणं पडिग्गाहेइ पडिग्गाहेतं वा साइज्जइ ॥ ६५५ ॥ जे भिक्खू  
 धम्मस्स अवण्णं वयइ वयंतं वा साइज्जइ ॥ ६५६ ॥ जे भिक्खू अधम्मस्स वण्णं  
 वयइ वयंतं वा साइज्जइ ॥ ६५७ ॥ जे भिक्खू अण्णउत्थियस्स वा गारत्थियस्स  
 वा पाए आमजेज्ज वा पमजेज्ज वा आमज्जंतं वा पमज्जंतं वा साइज्जइ ॥ ६५८ ॥  
 जे भिक्खू अण्णउत्थियस्स वा गारत्थियस्स वा पाए संवाहेज्ज वा पलिमहेज्ज वा  
 संवाहेतं वा पलिमहेतं वा साइज्जइ ॥ ६५९ ॥ जे भिक्खू अण्णउत्थियस्स वा  
 गारत्थियस्स वा पाए तेहेण वा घएण वा णवणीएण वा मक्खेज्ज वा भिल्लिगेज्ज  
 वा मक्खेतं वा भिल्लिगेतं वा साइज्जइ ॥ ६६० ॥ जे भिक्खू अण्णउत्थियस्स वा  
 गारत्थियस्स वा पाए लोद्रेण वा कक्केण वा उल्लोलेज्ज वा उव्वहेज्ज वा उल्लोलेतं वा  
 उव्वहेतं वा साइज्जइ ॥ ६६१ ॥ जे भिक्खू अण्णउत्थियस्स वा गारत्थियस्स वा  
 पाए सीओदगवियडेण वा उसिणोदगवियडेण वा उच्छोलेज्ज वा पधोएज्ज वा  
 उच्छोलेतं वा पधोएतं वा साइज्जइ ॥ ६६२ ॥ जे भिक्खू अण्णउत्थियस्स वा  
 गारत्थियस्स वा पाए फूमेज्ज वा रएज्ज वा फूमेतं वा रएतं वा साइज्जइ ॥ ६६३ ॥  
 जे भिक्खू अण्णउत्थियस्स वा गारत्थियस्स वा कायं आमजेज्ज वा पमजेज्ज वा  
 आमज्जंतं वा पमज्जंतं वा साइज्जइ ॥ ६६४ ॥ जे भिक्खू अण्णउत्थियस्स वा

गारत्थियस्स वा कायं संवाहेज्ज वा पलिमहेज्ज वा संवाहेतं वा पलिमहेतं वा साइज्जइ ॥ ६६५ ॥ जे भिक्खू अण्णउत्थियस्स वा गारत्थियस्स वा कायं तेहेण वा घएण वा णवणीएण वा मक्खेज्ज वा भिल्लिगेज्ज वा मक्खेतं वा भिल्लिगेतं वा साइज्जइ ॥ ६६६ ॥ जे भिक्खू अण्णउत्थियस्स वा गारत्थियस्स वा कायं लोद्धेण वा कक्केण वा उल्लोलेज्ज वा उव्वट्टेज्ज वा उल्लोलेंतं वा उव्वट्टेंतं वा साइज्जइ ॥ ६६७ ॥ जे भिक्खू अण्णउत्थियस्स वा गारत्थियस्स वा कायं सीओदगवियडेण वा उसिणो-  
दगवियडेण वा उच्छोलेज्ज वा पधोएज्ज वा उच्छोलेंतं वा पधोएंतं वा साइज्जइ ॥ ६६८ ॥ जे भिक्खू अण्णउत्थियस्स वा गारत्थियस्स वा कायं फूमेज्ज वा रएज्ज वा फूमेंतं वा रएंतं वा साइज्जइ ॥ ६६९ ॥ जे भिक्खू अण्णउत्थियस्स वा गारत्थियस्स वा कायंसि वर्णं आमजेज्ज वा पमजेज्ज वा आमजंतं वा पमजंतं वा साइज्जइ ॥ ६७० ॥ जे भिक्खू अण्णउत्थियस्स वा गारत्थियस्स वा कायंसि वर्णं संवाहेज्ज वा पलिमहेज्ज वा संवाहेतं वा पलिमहेतं वा साइज्जइ ॥ ६७१ ॥ जे भिक्खू अण्णउत्थियस्स वा गारत्थियस्स वा कायंसि वर्णं तेहेण वा घएण वा णवणीएण वा मक्खेज्ज वा भिल्लिगेज्ज वा मक्खेतं वा भिल्लिगेतं वा साइज्जइ ॥ ६७२ ॥ जे भिक्खू अण्णउत्थियस्स वा गारत्थियस्स वा कायंसि वर्णं लोद्धेण वा कक्केण वा उल्लोलेज्ज वा उव्वट्टेज्ज वा उल्लोलेंतं वा उव्वट्टेंतं वा साइज्जइ ॥ ६७३ ॥ जे भिक्खू अण्णउत्थियस्स वा गारत्थियस्स वा कायंसि वर्णं सीओदगवियडेण वा उसि-  
णोदगवियडेण वा उच्छोलेज्ज वा पधोएज्ज वा उच्छोलेंतं वा पधोएंतं वा साइज्जइ ॥ ६७४ ॥ जे भिक्खू अण्णउत्थियस्स वा गारत्थियस्स वा कायंसि वर्णं फूमेज्ज वा रएज्ज वा फूमेंतं वा रएंतं वा साइज्जइ ॥ ६७५ ॥ जे भिक्खू अण्णउत्थियस्स वा गारत्थियस्स वा कायंसि गंडं वा पिलगं वा अरइयं वा अंसियं वा भगंदलं वा अण्णयरेणं तिव्खेणं सत्थ-  
जाएणं अच्छिदेज्ज वा विच्छिदेज्ज वा अच्छिदेतं वा विच्छिदेतं वा साइज्जइ ॥ ६७६ ॥ जे भिक्खू अण्णउत्थियस्स वा गारत्थियस्स वा कायंसि गंडं वा पिलगं वा अरइयं वा अंसियं वा भगंदलं वा अण्णयरेणं तिव्खेणं सत्थजाएणं अच्छिदिता विच्छिदिता पूयं वा सोणियं वा णीहरेज्ज वा विसोहेज्ज वा णीहरेंतं वा विसोहेतं वा साइज्जइ ॥ ६७७ ॥ जे भिक्खू अण्णउत्थियस्स वा गारत्थियस्स वा कायंसि गंडं वा पिलगं वा अरइयं वा अंसियं वा भगंदलं वा अण्णयरेणं तिव्खेणं सत्थजाएणं अच्छिदिता विच्छिदिता पूयं वा सोणियं वा णीहरेत्ता विसोहेत्ता सीओदगवियडेण वा उसिणोदगवियडेण वा उच्छोलेज्ज वा पधोएज्ज वा उच्छोलेंतं वा पधोएंतं वा साइज्जइ ॥ ६७८ ॥ जे भिक्खू अण्णउत्थियस्स वा गारत्थियस्स वा कायंसि गंडं वा पिलगं वा अरइयं वा अंसियं

वा भगंदलं वा अण्णयरेणं तिक्खेणं सत्थजाएणं अच्छिदित्ता विच्छिदित्ता पूयं वा सोणियं वा णीहरेत्ता विसोहेत्ता सीओदगवियडेण वा उसिणोदगवियडेण वा उच्छो-  
लेत्ता पधोएत्ता अण्णयरेणं आलेवणजाएणं आलिपेज्ज वा विलिपेज्ज वा आलिपंतं वा विलिपंतं वा साइज्जइ ॥ ६७९ ॥ जे भिक्खू अण्णउत्थियस्स वा गारत्थियस्स वा कायंसि गंडं वा पिलगं वा अरइयं वा अंसियं वा भगंदलं वा अण्णयरेणं तिक्खेणं  
सत्थजाएणं अच्छिदित्ता विच्छिदित्ता पूयं वा सोणियं वा णीहरेत्ता विसोहेत्ता सीओदगवियडेण वा उसिणोदगवियडेण वा उच्छोलेत्ता पधोएत्ता अण्णयरेणं आले-  
वणजाएणं आलिपित्ता विलिपित्ता तेहेण वा घएण वा णवणीएण वा अब्भगेज्ज वा मक्खेज्ज वा अब्भंगेतं वा मक्खेतं वा साइज्जइ ॥ ६८० ॥ जे भिक्खू अण्णउत्थि-  
यस्स वा गारत्थियस्स वा कायंसि गंडं वा पिलगं वा अरइयं वा अंसियं वा भगंदलं वा अण्णयरेणं तिक्खेणं सत्थजाएणं अच्छिदित्ता विच्छिदित्ता पूयं वा सोणियं वा  
णीहरेत्ता विसोहेत्ता सीओदगवियडेण वा उसिणोदगवियडेण वा उच्छोलेत्ता पधोएत्ता अण्णयरेणं आलेवणजाएणं आलिपित्ता विलिपित्ता तेहेण वा घएण वा णवणीएण  
वा अब्भगेत्ता मक्खेत्ता अण्णयरेणं धूवणजाएणं धूवेज्ज वा पधूवेज्ज वा धूवेंतं वा पधूवेंतं वा साइज्जइ ॥ ६८१ ॥ जे भिक्खू अण्णउत्थियस्स वा गारत्थियस्स वा  
पालुकिमियं वा कुच्छिकिमियं वा अंगुलीए णिवेसिय २ णीहरेइ णीहरेतं वा साइज्जइ ॥ ६८२ ॥ जे भिक्खू अण्णउत्थियस्स वा गारत्थियस्स वा दीहाओ णहसिहाओ  
कप्पेज्ज वा संठवेज्ज वा कप्पेतं वा संठवेंतं वा साइज्जइ ॥ ६८३ ॥ जे भिक्खू अण्ण-  
उत्थियस्स वा गारत्थियस्स वा दीहाइं जंघरोमाइं कप्पेज्ज वा संठवेज्ज वा कप्पेतं वा संठवेंतं वा साइज्जइ ॥ ६८४ ॥ जे भिक्खू अण्णउत्थियस्स वा गारत्थियस्स वा  
दीहाइं कक्खरोमाइं कप्पेज्ज वा संठवेज्ज वा कप्पेतं वा संठवेंतं वा साइज्जइ ॥ ६८५ ॥ जे भिक्खू अण्णउत्थियस्स वा गारत्थियस्स वा दीहाइं मंझुरोमाइं कप्पेज्ज वा संठवेज्ज  
वा कप्पेतं वा संठवेंतं वा साइज्जइ ॥ ६८६ ॥ जे भिक्खू अण्णउत्थियस्स वा गारत्थियस्स वा दीहाइं णासारोमाइं कप्पेज्ज वा संठवेज्ज वा कप्पेतं वा संठवेंतं वा  
साइज्जइ ॥ ६८७ ॥ जे भिक्खू अण्णउत्थियस्स वा गारत्थियस्स वा दीहाइं चक्खु-  
रोमाइं कप्पेज्ज वा संठवेज्ज वा कप्पेतं वा संठवेंतं वा साइज्जइ ॥ ६८८-१ ॥ जे  
भिक्खू अण्णउत्थियस्स वा गारत्थियस्स वा दीहाइं कण्णरोमाइं कप्पेज्ज वा संठवेज्ज  
वा कप्पेतं वा संठवेंतं वा साइज्जइ ॥ ६८८-२ ॥ जे भिक्खू अण्णउत्थियस्स वा  
गारत्थियस्स वा दंतं आघंसेज्ज वा पधंसेज्ज वा आघंसंतं वा पधंसंतं वा साइज्जइ  
॥ ६८९ ॥ जे भिक्खू अण्णउत्थियस्स वा गारत्थियस्स वा दंतं उच्छोलेज्ज वा

पधोएज वा उच्छोलेंतं वा पधोएंतं वा साइजइ ॥ ६९० ॥ जे भिक्खू अण्णउत्थि-  
यस्स वा गारत्थियस्स वा दंतं फूमेज वा रएज वा फूमेंतं वा रएंतं वा साइजइ  
॥ ६९१ ॥ जे भिक्खू अण्णउत्थियस्स वा गारत्थियस्स वा उट्ठे आमजेज वा  
पमजेज वा आमजंतं वा पमजंतं वा साइजइ ॥ ६९२ ॥ जे भिक्खू अण्णउत्थि-  
यस्स वा गारत्थियस्स वा उट्ठे संवाहेज वा पल्लिमहेज वा संवाहेंतं वा पल्लिमहेंतं  
वा साइजइ ॥ ६९३ ॥ जे भिक्खू अण्णउत्थियस्स वा गारत्थियस्स वा उट्ठे  
तेल्लेण वा घएण वा णवणीएण वा मक्खेज वा भिल्लिगेज वा मक्खेंतं वा  
भिल्लिगेंतं वा साइजइ ॥ ६९४ ॥ जे भिक्खू अण्णउत्थियस्स वा गारत्थियस्स वा उट्ठे  
लोद्धेण वा कक्केण वा उल्लोलेज वा उव्वट्टेज वा उल्लोलेंतं वा उव्वट्टेंतं वा साइजइ  
॥ ६९५ ॥ जे भिक्खू अण्णउत्थियस्स वा गारत्थियस्स वा उट्ठे सीओदगवियडेण वा  
उसिणोदगवियडेण वा उच्छोलेज वा पधोएज वा उच्छोलेंतं वा पधोएंतं वा  
साइजइ ॥ ६९६ ॥ जे भिक्खू अण्णउत्थियस्स वा गारत्थियस्स वा उट्ठे फूमेज वा  
रएज वा फूमेंतं वा रएंतं वा साइजइ ॥ ६९७ ॥ जे भिक्खू अण्णउत्थियस्स वा  
गारत्थियस्स वा दीहाइं उत्तरोट्ठरोमाइं कप्पेज वा संठवेज वा कप्पेंतं वा संठवेंतं वा  
साइजइ ॥ ६९८ ॥ जे भिक्खू अण्णउत्थियस्स वा गारत्थियस्स वा दीहाइं  
अच्छिपत्ताइं कप्पेज वा संठवेज वा कप्पेंतं वा संठवेंतं वा साइजइ ॥ ६९९ ॥ जे भिक्खू  
अण्णउत्थियस्स वा गारत्थियस्स वा अच्छीणि आमजेज वा पमजेज वा आमजंतं  
वा पमजंतं वा साइजइ ॥ ७०० ॥ जे भिक्खू अण्णउत्थियस्स वा गारत्थियस्स वा  
अच्छीणि संवाहेज वा पल्लिमहेज वा संवाहेंतं वा पल्लिमहेंतं वा साइजइ ॥ ७०१ ॥ जे  
भिक्खू अण्णउत्थियस्स वा गारत्थियस्स वा अच्छीणि तेल्लेण वा घएण वा णवणीएण  
वा मक्खेज वा भिल्लिगेज वा मक्खेंतं वा भिल्लिगेंतं वा साइजइ ॥ ७०२ ॥ जे भिक्खू  
अण्णउत्थियस्स वा गारत्थियस्स वा अच्छीणि लोद्धेण वा कक्केण वा उल्लोलेज वा  
उव्वट्टेज वा उल्लोलेंतं वा उव्वट्टेंतं वा साइजइ ॥ ७०३ ॥ जे भिक्खू अण्णउत्थि-  
यस्स वा गारत्थियस्स वा अच्छीणि सीओदगवियडेण वा उसिणोदगवियडेण वा  
उच्छोलेज वा पधोएज वा उच्छोलेंतं वा पधोएंतं वा साइजइ ॥ ७०४ ॥ जे भिक्खू  
अण्णउत्थियस्स वा गारत्थियस्स वा अच्छीणि फूमेज वा रएज वा फूमेंतं वा रएंतं  
वा साइजइ ॥ ७०५ ॥ जे भिक्खू अण्णउत्थियस्स वा गारत्थियस्स वा दीहाइं  
भुमगरोमाइं कप्पेज वा संठवेज वा कप्पेंतं वा संठवेंतं वा साइजइ ॥ ७०६ ॥ जे  
भिक्खू अण्णउत्थियस्स वा गारत्थियस्स वा दीहाइं पासरोमाइं कप्पेज वा संठवेज  
वा कप्पेंतं वा संठवेंतं वा साइजइ ॥ ७०७-१ ॥ \*\*\*केसरोमाइं\*\*\* ॥ ७०७-२ ॥

जे भिक्खू अण्णउत्थियस्स वा गारत्थियस्स वा अच्छिमलं वा कण्णमलं वा दंतमलं  
 वा णहमलं वा णीहरेज्ज वा विसोहेज्ज वा णीहरेंतं वा विसोहेतं वा साइज्जइ ॥ ७०८ ॥  
 जे भिक्खू अण्णउत्थियस्स वा गारत्थियस्स वा कायाओ सेयं वा जल्लं वा पंकं वा  
 मलं वा णीहरेज्ज वा विसोहेज्ज वा णीहरेंतं वा विसोहेतं वा साइज्जइ ॥ ७०९ ॥  
 जे भिक्खू गामाणुगामं दूइज्जमाणे अण्णउत्थियस्स वा गारत्थियस्स वा सीसदुवारियं  
 करेइ करेंतं वा साइज्जइ ॥ ७१० ॥ जे भिक्खू अप्पाणं बीभावेइ बीभावेंतं वा  
 साइज्जइ ॥ ७११ ॥ जे भिक्खू परं बीभावेइ बीभावेंतं वा साइज्जइ ॥ ७१२ ॥ जे  
 भिक्खू अप्पाणं विम्हावेइ विम्हावेंतं वा साइज्जइ ॥ ७१३ ॥ जे भिक्खू परं विम्हावेइ  
 विम्हावेंतं वा साइज्जइ ॥ ७१४ ॥ जे भिक्खू अप्पाणं विप्परियासेइ विप्परियासेतं  
 वा साइज्जइ ॥ ७१५ ॥ जे भिक्खू परं विप्परियासेइ विप्परियासेतं वा साइज्जइ  
 ॥ ७१६ ॥ जे भिक्खू मुहवण्णं करेइ करेंतं वा साइज्जइ ॥ ७१७ ॥ जे भिक्खू  
 वैरज्जविरुद्धरज्जंसि सज्जं गमणं सज्जं आगमणं सज्जं गमणागमणं करेइ करेंतं वा  
 साइज्जइ ॥ ७१८ ॥ जे भिक्खू दियाभोयणस्स अवण्णं वयइ वयंतं वा साइज्जइ  
 ॥ ७१९ ॥ जे भिक्खू राइभोयणस्स वण्णं वयइ वयंतं वा साइज्जइ ॥ ७२० ॥ जे  
 भिक्खू दिय्या असणं वा ४ पडिग्गाहेत्ता दिया भुंजइ भुजंतं वा साइज्जइ ॥ ७२१ ॥  
 जे भिक्खू दिया असणं वा ४ पडिग्गाहेत्ता रत्तिं भुंजइ भुजंतं वा साइज्जइ ॥ ७२२ ॥  
 जे भिक्खू रत्तिं असणं वा ४ पडिग्गाहेत्ता दिया भुंजइ भुजंतं वा साइज्जइ ॥ ७२३ ॥  
 जे भिक्खू रत्तिं असणं वा ४ पडिग्गाहेत्ता रत्तिं भुंजइ ॥ ७२४ ॥ जे भिक्खू असणं  
 वा ४ परिवासेइ परिवासेतं वा साइज्जइ ॥ ७२५ ॥ जे भिक्खू परिवासियस्स असणस्स  
 वा ४ तयप्पमाणं वा भूइप्पमाणं वा विटुप्पमाणं वा आहारं आहारेइ आहारेंतं वा  
 साइज्जइ ॥ ७२६ ॥ जे भिक्खू आहेणं वा पहेणं वा समेलं वा हिंगोलं वा अण्णयरं  
 वा तहप्पगारं विरुक्खवं हीरमाणं पेहाए ताए आसाए ताए पिवासाए तं रयणिं  
 अण्णत्थ उवाइणावेइ उवाइणावेंतं वा साइज्जइ ॥ ७२७ ॥ जे भिक्खू णिवेयणपिंडं  
 भुंजइ भुजंतं वा साइज्जइ ॥ ७२८ ॥ जे भिक्खू अहाळंदं पसंसइ पसंसंतं वा साइज्जइ  
 ॥ ७२९ ॥ जे भिक्खू अहाळंदं वंदइ वंदंतं वा साइज्जइ ॥ ७३० ॥ जे भिक्खू  
 णायगं वा अणायगं वा उवासगं वा अणुवासगं वा अणलं पव्वावेइ पव्वावेंतं वा  
 साइज्जइ ॥ ७३१ ॥ जे भिक्खू णायगं वा अणायगं वा उवासगं वा अणुवासगं वा  
 अणलं उवट्ठावेइ उवट्ठावेंतं वा साइज्जइ ॥ ७३२ ॥ जे भिक्खू अणल्लेणं वेयावच्चं

१ दिया घेत्तुं निसिं संवासेत्तुं तं विइयदिणे भुंजमाणस्स पढमभंगो भवइ ।  
 २ अकारणं—...णणत्थ आगाढेहिं रोगायंकेहिं ति बिहक्कप्पे ।

कारावेइ कारावेतं वा साइज्जइ ॥ ७३३ ॥ जे भिक्खू सचेले सचेलगौणं मज्झे संवसइ संवसंतं वा साइज्जइ ॥ ७३४ ॥ जे भिक्खू सचेले अचेलगौणं मज्झे संवसइ संवसंतं वा साइज्जइ ॥ ७३५ ॥ जे भिक्खू अचेले सचेलगौणं मज्झे संवसइ संवसंतं वा साइज्जइ ॥ ७३६ ॥ जे भिक्खू अचेले अचेलगौणं मज्झे संवसइ संवसंतं वा साइज्जइ ॥ ७३७ ॥ जे भिक्खू पारियासियं पिप्पलं वा पिप्पलित्तुण्णं वा सिंगबेरं वा सिंगबेरत्तुण्णं वा विलं वा लोणं उब्भियं वा लोणं आहारेइ आहारेंतं वा साइज्जइ ॥ ७३८ ॥ जे भिक्खू गिरिपडणाणि वा मरुपडणाणि वा भिगुपडणाणि वा तरुपडणाणि वा गिरिपक्खंदणाणि वा मरुपक्खंदणाणि वा भिगुपक्खंदणाणि वा तरुपक्खंदणाणि वा जलपवेसाणि वा जलणपवेसाणि वा जलपक्खंदणाणि वा जलणपक्खंदणाणि वा विसभक्खणाणि वा सत्थोपाडणाणि वा वलयमरणाणि वा वसट्ठाणि वा तब्भवाणि वा अंतोसल्लाणि वा वेह्माणसाणि वा गिद्धपिट्ठाणि वा जाव अण्णयराणि वा तहप्पगाराणि बालमरणाणि पसंसइ पसंसंतं वा साइज्जइ । तं सेवमाणे आवज्जइ चाउम्मासियं परिहारट्ठणं अणुग्घाइयं ॥ ७३९ ॥ णिसीहज्झयणे एक्कारसमो उद्देसो समत्तो ॥ ११ ॥

### बारसमो उद्देसो

जे भिक्खू अण्णयरिं तसपाणजाइं तणपासएण वा मुंजपासएण वा कट्ठपासएण वा चम्मपासएण वा वेत्तपासएण वा सुत्तपासएण वा रज्जुपासएण वा वंधइ वंधंतं वा साइज्जइ ॥ ७४०-१ ॥ जे भिक्खू अण्णयरिं तसपाणजाइं तणपासएण वा मुंजपासएण वा कट्ठपासएण वा चम्मपासएण वा वेत्तपासएण वा सुत्तपासएण वा रज्जुपासएण वा बद्धेह्यं मुंच(मुय)इ मुंचं(-यं)तं वा साइज्जइ ॥ ७४०-२ ॥ जे भिक्खू अभिक्खणं २ पक्कखाणं भंजइ भंजंतं वा साइज्जइ ॥ ७४१ ॥ जे भिक्खू परित्तकायसंजुतं० आहारेइ आहारेंतं वा साइज्जइ ॥ ७४२ ॥ जे भिक्खू तणपीढगं वा पलालपीढगं वा छगणपीढगं वा कट्ठपीढगं वा परैवत्थेणोच्छण्णं अहिट्ठेइ अहिट्ठंतं वा साइज्जइ ॥ ७४३ ॥ जे भिक्खू णिग्गंथीए संघाडिं अण्णउत्थिएण वा गारत्थिएण वा सिव्वावेइ सिव्वावेतं वा साइज्जइ ॥ ७४४ ॥ जे भिक्खू पुढवीकायस्स वा आउक्कायस्स वा अगणिकायस्स वा वाउकायस्स वा वणप्फइकायस्स वा कलमायमवि समा(रं)रभइ समारभंतं वा साइज्जइ ॥ ७४५ ॥ जे भिक्खू सच्चित्तक्खं दुरूहइ दुरूहंतं वा साइज्जइ ॥ ७४६ ॥ जे भिक्खू गिहिमत्ते भुंजइ भुंजंतं वा

१ संजईणं । २ जिणकप्पीणं । ३ थेरकप्पीणं । ४ जिणकप्पिणो कस्स वि साहेजं णेच्छंति अओ एगल्ला विहरंति ति । ५ 'गिहत्य' ।

साइज्जइ ॥ ७४७ ॥ जे भिक्खू गिहिवत्थं परिहेइ परिहेतं वा साइज्जइ ॥ ७४८ ॥  
 जे भिक्खू गिहिणिसेज्जं वाहेइ वाहेतं वा साइज्जइ ॥ ७४९ ॥ जे भिक्खू गिहिते-  
 इच्छं करेइ करेत्तं वा साइज्जइ ॥ ७५० ॥ जे भिक्खू पुराकम्मकडेण हत्थेण वा  
 मत्तेण वा द[व्वि]व्वीएण वा भायणेण वा असणं वा ४ पडिग्गाहेइ पडिग्गाहेतं वा  
 साइज्जइ ॥ ७५१ ॥ जे भिक्खू गिहत्थाण वा अण्ण(उ)तित्थियाण वा सीओदगपरि-  
 भोगेण हत्थेण वा मत्तेण वा दव्वीएण वा भायणेण वा असणं वा ४ पडिग्गाहेइ  
 पडिग्गाहेतं वा साइज्जइ ॥ ७५२ ॥ जे भिक्खू वप्पाणि वा फलिहाणि वा उप्पलाणि  
 वा पल्लवाणि वा उज्झराणि वा णिज्झराणि वा वावीणि वा पोक्खराणि वा दीहि-  
 याणि वा सराणि वा सरपंतियाणि वा सरसरपंतियाणि वा चक्खुदंसणपडियाए  
 अभिसंधारेइ अभिसंधारेत्तं वा साइज्जइ ॥ ७५३ ॥ जे भिक्खू कच्छाणि वा  
 गहणाणि वा णूसाणि वा वणाणि वा वणविदुग्गाणि वा पव्वयाणि वा पव्वयविदु-  
 ग्गाणि वा चक्खुदंसणपडियाए अभिसंधारेइ अभिसंधारेत्तं वा साइज्जइ ॥ ७५४ ॥  
 जे भिक्खू गामाणि वा णगराणि वा खेडाणि वा कब्बडाणि वा मडंबाणि वा  
 दोणमुहाणि वा पट्टणाणि वा आगराणि वा संवाहाणि वा सण्णिवेसाणि वा चक्खु[हं]-  
 दंसणपडियाए अभिसंधारेइ अभिसंधारेत्तं वा साइज्जइ ॥ ७५५ ॥ जे भिक्खू  
 गाममहाणि वा णगरमहाणि वा खेडमहाणि वा कब्बडमहाणि वा मडंबमहाणि वा  
 दोणमुहमहाणि वा पट्टणमहाणि वा आगरमहाणि वा संवाहमहाणि वा सण्णिवेस-  
 महाणि वा चक्खुदंसणपडियाए अभिसंधारेइ अभिसंधारेत्तं वा साइज्जइ ॥ ७५६ ॥  
 जे भिक्खू गामवहाणि वा णगरवहाणि वा खेडवहाणि वा कब्बडवहाणि वा  
 मडंबवहाणि वा दोणमुहवहाणि वा पट्टणवहाणि वा आगरवहाणि वा संवाहवहाणि  
 वा सण्णिवेसवहाणि वा चक्खुदंसणपडियाए अभिसंधारेइ अभिसंधारेत्तं वा साइज्जइ  
 ॥ ७५७ ॥ जे भिक्खू गामपहाणि वा णगरपहाणि वा खेडपहाणि वा कब्बडपहाणि  
 वा मडंबपहाणि वा दोणमुहपहाणि वा पट्टणपहाणि वा आगरपहाणि वा संवाहपहाणि  
 वा सण्णिवेसपहाणि वा चक्खुदंसणपडियाए अभिसंधारेइ अभिसंधारेत्तं वा साइज्जइ  
 ॥ ७५८ ॥ जे भिक्खू गामदाहाणि वा जाव सण्णिवेसदाहाणि वा चक्खुदंसणपडि-  
 याए अभिसंधारेइ अभिसंधारेत्तं वा साइज्जइ ॥ ७५९ ॥ जे भिक्खू आसकरणाणि  
 वा हत्थिकरणाणि वा उट्टकरणाणि वा गोणकरणाणि वा महिसकरणाणि वा सूयरक-  
 रणाणि वा चक्खुदंसणपडियाए अभिसंधारेइ अभिसंधारेत्तं वा साइज्जइ ॥ ७६० ॥  
 जे भिक्खू आसजुद्धाणि वा हत्थिजुद्धाणि वा उट्टजुद्धाणि वा गोणजुद्धाणि वा  
 महिसजुद्धाणि वा सूयरजुद्धाणि वा चक्खुदंसणपडियाए अभिसंधारेइ अभिसंधारेत्तं

वा साइज्जइ ॥ ७६१ ॥ जे भिक्खू उज्झूहिय[ट्ठा]ठाणाणि वा हयज्झूहियठाणाणि वा गयज्झूहियठाणाणि वा चक्खुदंसणपडियाए अभिसंधारेइ अभिसंधारेंतं वा साइज्जइ ॥ ७६२ ॥ जे भिक्खू अ(भिसे)ग्घायठाणाणि वा अक्खाइयठाणाणि वा माणुम्मा-  
णियठाणाणि वा महया हयणट्ठगीयवाइयतंतीतलतालनुडियपडुप्पवाइयठाणाणि वा चक्खुदंसणपडियाए अभिसंधारेइ अभिसंधारेंतं वा साइज्जइ ॥ ७६३ ॥ जे भिक्खू  
कट्ठकम्माणि वा चित्तकम्माणि वा (लेक्कम्माणि वा) पोत्थकम्माणि वा दंतकम्माणि  
वा मणिकम्माणि वा सेलकम्माणि वा गंठिमाणि वा वेढिमाणि वा पूरिमाणि  
वा संघाइमाणि वा पत्तच्छेज्जाणि वा वाहीणि वा वेहिमाणि वा चक्खुदंसण-  
पडियाए अभिसंधारेइ अभिसंधारेंतं वा साइज्जइ ॥ ७६४ ॥ जे भिक्खू  
डिम्बाणि वा डमराणि वा खाराणि वा वेराणि वा महाजुद्धाणि वा महासंगा-  
माणि वा कलहाणि वा बोलाणि वा चक्खुदंसणपडियाए अभिसंधारेइ अभि-  
संधारेंतं वा साइज्जइ ॥ ७६५ ॥ जे भिक्खू विरूवरूवेसु महस्सवेसु इत्थीणि वा  
पुरिसाणि वा थेराणि वा मज्झिमाणि वा डहराणि वा अणलंक्रियाणि वा सुअलंक्रि-  
याणि वा गायंताणि वा वायंताणि वा णच्चंताणि वा हसंताणि वा रमंताणि वा  
मोहंताणि वा विउलं असणं वा ४ परिभायंताणि वा परिभुंजंताणि वा चक्खुदंसण-  
पडियाए अभिसंधारेइ अभिसंधारेंतं वा साइज्जइ ॥ ७६६ ॥ जे भिक्खू इहलोइएसु  
वा रूवेसु परलोइएसु वा रूवेसु दिट्ठेसु वा रूवेसु अदिट्ठेसु वा रूवेसु सुएसु वा रूवेसु  
असुएसु वा रूवेसु विण्णाएसु वा रूवेसु अविण्णाएसु वा रूवेसु सज्जइ रज्जइ गिज्जइ  
अज्झोववज्जइ सर्जंतं रज्जंतं गिज्जंतं अज्झोववज्ज(जमाणं)जंतं वा साइज्जइ ॥ ७६७ ॥  
जे भिक्खू पढमाए पोरिसीए असणं वा ४ पडिग्गाहेत्ता पच्छिमं पोरिसिं उवाइणावेइ  
उवाइणावेंतं वा साइज्जइ ॥ ७६८ ॥ जे भिक्खू परं अद्धजोयणमेराओ असणं वा ४  
उवाइणावेइ उवाइणावेंतं वा साइज्जइ ॥ ७६९ ॥ जे भिक्खू दिया गोमयं पडिग्गा-  
हेत्ता दिया कायंसि वणं आलिपेज वा विलिपेज वा आलिपंतं वा विलिपंतं वा  
साइज्जइ ॥ ७७० ॥ जे भिक्खू दिया गोमयं पडिग्गाहेत्ता रत्तिं कायंसि वणं  
आलिपेज वा विलिपेज वा आलिपंतं वा विलिपंतं वा साइज्जइ ॥ ७७१ ॥ जे  
भिक्खू रत्तिं गोमयं पडिग्गाहेत्ता दिया कायंसि वणं आलिपेज वा विलिपेज वा  
आलिपंतं वा विलिपंतं वा साइज्जइ ॥ ७७२ ॥ जे भिक्खू रत्तिं गोमयं पडिग्गाहेत्ता  
रत्तिं कायंसि वणं आलिपेज वा विलिपेज वा आलिपंतं वा विलिपंतं वा साइ-  
ज्जइ ॥ ७७३ ॥ जे भिक्खू दिया आलेवणजायं पडिग्गाहेत्ता दिया कायंसि वणं  
आलिपेज वा विलिपेज वा आलिपंतं वा विलिपंतं वा साइज्जइ ॥ ७७४ ॥



जे भिक्खू दिया आलेवणजायं पडिग्गाहेत्ता रत्तिं कायंसि वणं आलिपेज वा विलिपेज वा आलिपंतं वा विलिपंतं वा साइज्जइ ॥ ७७५ ॥ जे भिक्खू रत्तिं आलेवणजायं पडिग्गाहेत्ता दिया कायंसि वणं आलिपेज वा विलिपेज वा आलिपंतं वा विलिपंतं वा साइज्जइ ॥ ७७६ ॥ जे भिक्खू रत्तिं आलेवणजायं पडिग्गाहेत्ता रत्तिं कायंसि वणं आलिपेज वा विलिपेज वा आलिपंतं वा विलिपंतं वा साइज्जइ ॥ ७७७ ॥ जे भिक्खू अण्णउत्थिएण वा गारत्थिएण वा उवहिं वहावेइ वहावेतं वा साइज्जइ ॥ ७७८ ॥ जे भिक्खू तण्णीसाए असणं वा ४ देइ देंतं वा साइज्जइ ॥ ७७९ ॥ जे भिक्खू इमाओ पंच महण्णवाओ महाण्णइओ उद्दिट्ठाओ गणियाओ वज्जियाओ अंतो मासस्स दुक्खुत्तो वा तिक्खुत्तो वा उत्तरइ वा संतरइ वा उत्तरंतं वा संतरंतं वा साइज्जइ, तंजहा-गंगा जउणा सरऊ एरावई मही । तं सेवमाणे आवज्जइ चाउम्मासियं परिहारट्ठाणं उ[अणु]ग्घाइयं ॥ ७८० ॥ **गिसीह-  
उज्झयणे वारस्समो उद्देसो समत्तो ॥ १२ ॥**

### तेरहमो उद्देसो

जे भिक्खू अणंतरहियाए पुढवीए ठाणं वा सेज्जं वा अणिसेज्जं वा गिसीहियं वा चेइ चेट्तं वा साइज्जइ ॥ ७८१ ॥ जे भिक्खू ससिणिट्ठाए पुढवीए ठाणं वा... साइज्जइ ॥ ७८२ ॥ जे भिक्खू मट्ठियाकडाए पुढवीए ठाणं वा...साइज्जइ ॥ ७८३ ॥ जे भिक्खू ससरक्खाए पुढवीए ठाणं वा...साइज्जइ ॥ ७८४ ॥ जे भिक्खू चित्तमंताए पुढवीए ठाणं वा...साइज्जइ ॥ ७८५ ॥ जे भिक्खू चित्तमंताए सिलाए ठाणं वा...साइज्जइ ॥ ७८६ ॥ जे भिक्खू चित्तमंताए लेल्लए ठाणं वा... साइज्जइ ॥ ७८७ ॥ जे भिक्खू कोलावासंसि वा दारए जीवपइट्ठिए सअंढे सपाणे सवीए सहिए सओस्से सउदए सउत्तिगपणगदगम[ट्ठी]ट्ठियमक्कडासंताणगंसि ठाणं वा...साइज्जइ ॥ ७८८ ॥ जे भिक्खू थूणंसि वा गिहेल्लुयंसि वा उल्लु[का]यालंसि वा कामजलंसि वा दुब्बद्धे दुण्णिक्खित्ते अणिकंपे चलाचले ठाणं वा...साइज्जइ ॥ ७८९ ॥ जे भिक्खू कुलियंसि वा भित्तिसि वा सिलंसि वा लेल्लंसि वा अंतरिक्खजायंसि वा दुब्बद्धे दुण्णिक्खित्ते अणिकंपे चलाचले ठाणं वा...साइज्जइ ॥ ७९० ॥ जे भिक्खू खंधंसि वा फलिहंसि वा मंचंसि वा मंडवंसि वा मालंसि वा पासायंसि वा हम्म-तलंसि वा दुब्बद्धे दुण्णिक्खित्ते अणिकंपे चलाचले ठाणं वा...साइज्जइ ॥ ७९१ ॥ जे भिक्खू अण्णउत्थियं वा गारत्थियं वा सिप्पं वा सिलोगं वा अट्ठावयं वा कक्कडगं वा गुग्ग[गा]गर्हंसि वा सलाहत्थयंसि वा सिक्खावेइ सिक्खावेतं वा साइज्जइ ॥ ७९२ ॥ जे भिक्खू अण्णउत्थियं वा गारत्थियं वा आगाढं वयइ वयंतं वा साइज्जइ

॥ ७९३ ॥ जे भिक्खू अण्णउत्थियं वा गारत्थियं वा फरुसं वयइ वयंतं वा साइज्जइ  
 ॥ ७९४ ॥ जे भिक्खू अण्णउत्थियं वा गारत्थियं वा आगाढं फरुसं वयइ वयंतं वा  
 साइज्जइ ॥ ७९५ ॥ जे भिक्खू अण्णउत्थियं वा गारत्थियं वा अण्णयरीए अच्चा-  
 सायणाए अच्चासाएइ अच्चासाएंतं वा साइज्जइ ॥ ७९६ ॥ जे भिक्खू अण्णउत्थि-  
 याण वा गारत्थियाण वा कोउगकम्मं करेइ करेंतं वा साइज्जइ ॥ ७९७ ॥ जे  
 भिक्खू अण्णउत्थियाण वा गारत्थियाण वा भूइकम्मं करेइ करेंतं वा साइज्जइ  
 ॥ ७९८ ॥ जे भिक्खू अण्णउत्थियाण वा गारत्थियाण वा पसिणं करेइ करेंतं वा  
 साइज्जइ ॥ ७९९ ॥ जे भिक्खू अण्णउत्थियाण वा गारत्थियाण वा पसिणा-  
 पसिणं करेइ करेंतं वा साइज्जइ ॥ ८०० ॥ (जे...पसिणं कहेइ कहेंतं...पसि-  
 णापसिणं...) जे भिक्खू अण्णउत्थियाण वा गारत्थियाण वा तीयं निमित्तं  
 क(हे)रेइ करेंतं वा साइज्जइ ॥ ८०१ ॥ (...पडुप्पणं...आगमिस्सं...) जे  
 भिक्खू अण्णउत्थियाण वा गारत्थियाण वा लक्खणं करेइ करेंतं वा साइज्जइ  
 ॥ ८०२ ॥ जे भिक्खू अण्णउत्थियाण वा गारत्थियाण वा वंजणं करेइ करेंतं  
 वा साइज्जइ ॥ ८०३ ॥ जे भिक्खू अण्णउत्थियाण वा गारत्थियाण वा नुमिणं  
 करेइ करेंतं वा साइज्जइ ॥ ८०४ ॥ जे भिक्खू अण्णउत्थियाण वा गारत्थियाण  
 वा विज्जं पउंजइ पउंजंतं वा साइज्जइ ॥ ८०५ ॥ जे भिक्खू अण्णउत्थियाण  
 वा गारत्थियाण वा मंतं पउंजइ पउंजंतं वा साइज्जइ ॥ ८०६ ॥ जे भिक्खू  
 अण्णउत्थियाण वा गारत्थियाण वा जोगं पउंजइ पउंजंतं वा साइज्जइ ॥ ८०७ ॥  
 जे भिक्खू अण्णउत्थियाण वा गारत्थियाण वा मग्गं वा पवेएइ संधिं वा  
 पवेएइ (मग्गाओ वा संधिं पवेएइ) संधीओ वा मग्गं पवेएइ पवेएंतं वा  
 साइज्जइ ॥ ८०८ ॥ जे भिक्खू अण्णउत्थियाण वा गारत्थियाण वा धाउं पवेएइ  
 पवेएंतं वा साइज्जइ ॥ ८०९ ॥ जे भिक्खू अण्णउत्थियाण वा गारत्थियाण वा  
 णिहिं पवेएइ पवेएंतं वा साइज्जइ ॥ ८१० ॥ जे भिक्खू मत्तए अ(प्पा)त्ताणं देहइ  
 देहंतं वा (पलोएइ पलोएंतं वा) साइज्जइ ॥ ८११ ॥ जे भिक्खू अहाए अप्पाणं  
 देहइ देहंतं वा साइज्जइ ॥ ८१२ ॥ जे भिक्खू असीए अप्पाणं देहइ देहंतं वा  
 साइज्जइ ॥ ८१३ ॥ जे भिक्खू मणीए अप्पाणं देहइ देहंतं वा साइज्जइ ॥ ८१४ ॥  
 जे भिक्खू कुंडपाणिए अप्पाणं देहइ देहंतं वा साइज्जइ ॥ ८१५ ॥ जे भिक्खू  
 तेले अप्पाणं देहइ देहंतं वा साइज्जइ ॥ ८१६ ॥ जे भिक्खू सप्पिए अप्पाणं  
 देहइ देहंतं वा साइज्जइ ॥ ८१७ ॥ जे भिक्खू फाणिए अप्पाणं देहइ देहंतं वा

साइज्जइ ॥ ८१८ ॥ जे भिक्खू वमणं करेइ करेत्तं वा साइज्जइ ॥ ८१९ ॥ जे  
 भिक्खू विरेयणं करेइ करेत्तं वा साइज्जइ ॥ ८२० ॥ जे भिक्खू वमणविरेयणं  
 करेइ करेत्तं वा साइज्जइ ॥ ८२१ ॥ जे भिक्खू अरोगियपडिक्कम्मं करेइ करेत्तं  
 वा साइज्जइ ॥ ८२२ ॥ जे भिक्खू पासत्थं वंदइ वंदेत्तं वा साइज्जइ ॥ ८२३ ॥  
 जे भिक्खू पासत्थं पसंसइ पसंसेत्तं वा साइज्जइ ॥ ८२४ ॥ जे भिक्खू कुसीलं वंदइ  
 वंदेत्तं वा साइज्जइ ॥ ८२५ ॥ जे भिक्खू कुसीलं पसंसइ पसंसेत्तं वा साइज्जइ  
 ॥ ८२६ ॥ जे भिक्खू ओसणं वंदइ वंदेत्तं वा साइज्जइ ॥ ८२७ ॥ जे भिक्खू  
 ओसणं पसंसइ पसंसेत्तं वा साइज्जइ ॥ ८२८ ॥ जे भिक्खू संसत्तं वंदइ वंदेत्तं  
 वा साइज्जइ ॥ ८२९ ॥ जे भिक्खू संसत्तं पसंसइ पसंसेत्तं वा साइज्जइ ॥ ८३० ॥  
 जे भिक्खू नितियं वंदइ वंदेत्तं वा साइज्जइ ॥ ८३१ ॥ जे भिक्खू नितियं पसंसइ  
 पसंसेत्तं वा साइज्जइ ॥ ८३२ ॥ जे भिक्खू काहियं वंदइ वंदेत्तं वा साइज्जइ  
 ॥ ८३३ ॥ जे भिक्खू काहियं पसंसइ पसंसेत्तं वा साइज्जइ ॥ ८३४ ॥ जे भिक्खू  
 पासणियं वंदइ वंदेत्तं वा साइज्जइ ॥ ८३५ ॥ जे भिक्खू पासणियं पसंसइ पसंसेत्तं  
 वा साइज्जइ ॥ ८३६ ॥ जे भिक्खू मामगं वंदइ वंदेत्तं वा साइज्जइ ॥ ८३७ ॥ जे  
 भिक्खू मामगं पसंसइ पसंसेत्तं वा साइज्जइ ॥ ८३८ ॥ जे भिक्खू संपसारियं  
 वंदइ वंदेत्तं वा साइज्जइ ॥ ८३९ ॥ जे भिक्खू संपसारियं पसंसइ पसंसेत्तं वा  
 साइज्जइ ॥ ८४० ॥ जे भिक्खू धा(इ)ईपिंडं भुंजइ भुंजेत्तं वा साइज्जइ ॥ ८४१ ॥  
 जे भिक्खू वूईपिंडं भुंजइ भुंजेत्तं वा साइज्जइ ॥ ८४२ ॥ जे भिक्खू णिमित्तपिंडं  
 भुंजइ भुंजेत्तं वा साइज्जइ ॥ ८४३ ॥ जे भिक्खू आजीवियपिंडं भुंजइ भुंजेत्तं वा  
 साइज्जइ ॥ ८४४ ॥ जे भिक्खू वणीमगपिंडं भुंजइ भुंजेत्तं वा साइज्जइ ॥ ८४५ ॥  
 जे भिक्खू तिगिच्छापिंडं भुंजइ भुंजेत्तं वा साइज्जइ ॥ ८४६ ॥ जे भिक्खू  
 को(ह)वपिंडं भुंजइ भुंजेत्तं वा साइज्जइ ॥ ८४७ ॥ जे भिक्खू माणपिंडं भुंजइ  
 भुंजेत्तं वा साइज्जइ ॥ ८४८ ॥ जे भिक्खू मायापिंडं भुंजइ भुंजेत्तं वा साइज्जइ  
 ॥ ८४९ ॥ जे भिक्खू लोभपिंडं भुंजइ भुंजेत्तं वा साइज्जइ ॥ ८५० ॥ जे भिक्खू  
 विजापिंडं भुंजइ भुंजेत्तं वा साइज्जइ ॥ ८५१ ॥ जे भिक्खू मंतपिंडं भुंजइ भुंजेत्तं  
 वा साइज्जइ ॥ ८५२ ॥ जे भिक्खू चुण्णयपिंडं भुंजइ भुंजेत्तं वा साइज्जइ  
 ॥ ८५३ ॥ जे भिक्खू अंतद्धाणपिंडं भुंजइ भुंजेत्तं वा साइज्जइ ॥ ८५४ ॥ जे  
 भिक्खू जोगपिंडं भुंजइ भुंजेत्तं वा साइज्जइ । तं सेवमाणे आवज्जइ वाउम्मासियं  
 परिहारद्धानं उग्घाइयं ॥ ८५५ ॥ णिसीहज्झयणे तेरहमो उद्देसो  
 समत्तो ॥ १३ ॥

## चउदसमो उद्देसो

जे भिक्खू पडिग्गहं किणइ किणावेइ कीयमाहट्टु दिज्जमाणं पडिग्गाहेइ पडि-  
ग्गाहेतं वा साइज्जइ ॥ ८५६ ॥ जे भिक्खू पडिग्गहं पामिच्चेइ पामिच्चावेइ  
पामिच्चामाहट्टु दिज्जमाणं पडिग्गाहेइ पडिग्गाहेतं वा साइज्जइ ॥ ८५७ ॥ जे भिक्खू  
पडिग्गहं परियट्ठेइ परियट्ठावेइ परियट्ठियमाहट्टु दिज्जमाणं पडिग्गाहेइ पडिग्गाहेतं  
वा साइज्जइ ॥ ८५८ ॥ जे भिक्खू पडिग्गहं अ(च्छि)च्छेज्जं अणिसिट्ठं अभिहड-  
माहट्टु दि[दि]ज्जमाणं पडिग्गाहेइ पडिग्गाहेतं वा साइज्जइ ॥ ८५९ ॥ जे भिक्खू  
अइरेगपडिग्गहं गणिं उद्दिसिय गणिं समुद्दिसिय तं गणिं अणापुच्छिय अणामंतिय  
अणमण्णस्स वियरइ वियरंतं वा साइज्जइ ॥ ८६० ॥ जे भिक्खू अइरेगं पडिग्गहं  
खुडुगस्स वा खुड्डियाए वा थेरगस्स वा थेरियाए वा अहत्थच्छिण्णस्स अपायच्छि-  
ण्णस्स अणासाछिण्णस्स अकणच्छिण्णस्स अणोद्धच्छिण्णस्स सत्तस्स देइ दैतं वा  
साइज्जइ ॥ ८६१ ॥ जे भिक्खू अइरेगं पडिग्गहं खुडुगस्स वा खुड्डियाए वा थेर-  
गस्स वा थेरियाए वा [अ]हत्थच्छिण्णस्स [अ]पायच्छिण्णस्स [अ]णासाछिण्णस्स  
[अ]कणच्छिण्णस्स [अण]ोद्धच्छिण्णस्स असक्कस्स न देइ न दैतं वा साइज्जइ  
॥ ८६२ ॥ जे भिक्खू पडिग्गहं अणलं अथिरं अयुवं अवारणिज्जं धरेइ धरेंतं वा  
साइज्जइ ॥ ८६३ ॥ जे भिक्खू पडिग्गहं अलं थिरं धुवं धारणिज्जं न धरेइ न धरेंतं  
वा साइज्जइ ॥ ८६४ ॥ जे भिक्खू वण्णमंतं पडिग्गहं विवण्णं करेइ करेंतं वा साइ-  
ज्जइ ॥ ८६५ ॥ जे भिक्खू विवण्णं पडिग्गहं वण्णमंतं करेइ करेंतं वा साइज्जइ ॥ ८६६ ॥  
जे भिक्खू णो णवए मे पडिग्गहे लद्धेत्तिकट्ठु तेहेण वा घएण वा णवणीएण वा  
मक्खेज वा भिल्लिगेज वा मक्खेंतं वा भिल्लिगेतं वा साइज्जइ ॥ ८६७ ॥ जे भिक्खू  
णो णवए मे पडिग्गहे लद्धेत्तिकट्ठु लोद्धेण वा कक्केण वा चुण्णेण वा वण्णेण वा  
उच्छोल्लेज वा उव्वलेज वा उच्छोल्लेंतं वा उव्वलेंतं वा साइज्जइ ॥ ८६८ ॥ जे  
भिक्खू णो णवए मे पडिग्गहे लद्धेत्तिकट्ठु सीओदगवियडेण वा उसिणोदगवियडेण  
वा उच्छोल्लेज वा पधोएज वा उच्छोल्लेंतं वा पधोएंतं वा साइज्जइ ॥ ८६९ ॥ जे  
भिक्खू णो णवए मे पडिग्गहे लद्धेत्तिकट्ठु बहु(दि)देवसिएण [वा] तेहेण वा घएण वा  
णवणीएण वा मक्खेज वा भिल्लिगेज वा मक्खेंतं वा भिल्लिगेतं वा साइज्जइ ॥ ८७० ॥  
जे भिक्खू णो णवए मे पडिग्गहे लद्धेत्तिकट्ठु बहुदेवसिए(णं)ण लोद्धेण वा  
कक्केण वा चुण्णेण वा वण्णेण वा उल्लोलेज वा उव्वलेज वा उल्लोल्लेंतं वा उव्वल्लेंतं वा  
साइज्जइ ॥ ८७१ ॥ जे भिक्खू णो णवए मे पडिग्गहे लद्धेत्तिकट्ठु बहुदेवसिएण

सीओदगवियडेण वा उसिणोदगवियडेण वा उच्छोलेज वा पधोएज वा उच्छोलेंतं वा पधोएंत्तं वा साइज्जइ ॥ ८७२ ॥ जे भिक्खू दुब्बिगंधे मे पडिग्गहे लद्धेत्तिकहु तेह्णेण वा घएण वा णवणीएण वा मक्खेज वा भिल्लिगेज वा मक्खेंतं वा भिल्लिगेंतं वा साइज्जइ ॥ ८७३ ॥ जे भिक्खू दुब्बिगंधे मे पडिग्गहे लद्धेत्तिकहु लोद्धेण वा कक्केण वा चुण्णेण वा वण्णेण वा उल्लोलेज वा उव्वलेज वा उल्लोलेंतं वा उव्वलेंतं वा साइज्जइ ॥ ८७४ ॥ जे भिक्खू दुब्बिगंधे मे पडिग्गहे लद्धेत्तिकहु सीओदगवियडेण वा उसिणोदगवियडेण वा उच्छोलेज वा पधोएज वा उच्छोलेंतं वा पधोएंत्तं वा साइज्जइ ॥ ८७५ ॥ जे भिक्खू दुब्बिगंधे मे पडिग्गहे लद्धेत्तिकहु बहुदेवसिएण तेह्णेण वा घएण वा णवणीएण वा मक्खेज वा भिल्लिगेज वा मक्खेंतं वा भिल्लिगेंतं वा साइज्जइ ॥ ८७६ ॥ जे भिक्खू दुब्बिगंधे मे पडिग्गहे लद्धेत्तिकहु बहुदेवसिएण लोद्धेण वा कक्केण वा चुण्णेण वा वण्णेण वा उल्लोलेज वा उव्वलेज वा उल्लोलेंतं वा उव्वलेंतं वा साइज्जइ ॥ ८७७ ॥ जे भिक्खू दुब्बिगंधे मे पडिग्गहे लद्धेत्तिकहु बहुदेवसिएण सीओदगवियडेण वा उसिणोदगवियडेण वा उच्छोलेज वा पधोएज वा उच्छोलेंतं वा पधोएंत्तं वा साइज्जइ ॥ ८७८ ॥ जे भिक्खू अणंत-रहियाए पुढवीए दुव्वद्धे दुण्णिक्खित्ते अणिकंपे चलाचले पडिग्गहं आयावेज वा पयावेज वा आयावेंतं वा पयावेंतं वा साइज्जइ ॥ ८७९ ॥ जे भिक्खू ससिणिद्धाए पुढवीए दुव्वद्धे दुण्णिक्खित्ते अणिकंपे चलाचले पडिग्गहं आयावेज वा पयावेज वा आयावेंतं वा पयावेंतं वा साइज्जइ ॥ ८८० ॥ जे भिक्खू ससरक्खाए पुढवीए दुव्वद्धे दुण्णिक्खित्ते अणिकंपे चलाचले पडिग्गहं आयावेज वा पयावेज वा आयावेंतं वा पयावेंतं वा साइज्जइ ॥ ८८१ ॥ जे भिक्खू मट्ठियाकडाए पुढवीए दुव्वद्धे दुण्णिक्खित्ते अणिकंपे चलाचले पडिग्गहं आयावेज वा पयावेज वा आयावेंतं वा पयावेंतं वा साइज्जइ ॥ ८८२ ॥ जे भिक्खू चित्तमंताए पुढवीए दुव्वंधे दुण्णिक्खित्ते अणिकंपे चलाचले पडिग्गहं आयावेज वा पयावेज वा आयावेंतं वा पयावेंतं वा साइज्जइ ॥ ८८३ ॥ जे भिक्खू चित्तमंताए सिलाए दुव्वंधे दुण्णिक्खित्ते अणिकंपे चलाचले पडिग्गहं आयावेज वा पयावेज वा आयावेंतं वा पयावेंतं वा साइज्जइ ॥ ८८४ ॥ जे भिक्खू चित्तमंताए लेल्लए दुव्वंधे दुण्णिक्खित्ते अणिकंपे चलाचले पडिग्गहं आयावेज वा पयावेज वा आयावेंतं वा पयावेंतं वा साइज्जइ ॥ ८८५ ॥ जे भिक्खू कोलावासंसि वा दारुए जीवपइट्ठिए सअंडे सपाणे सबीए सहरिए सओस्से सउदए सउत्तिंगपणगदगमट्ठियमक्कडासंताण(ए)गंसि दुव्वंधे दुण्णिक्खित्ते अणिकंपे चलाचले पडिग्गहं आयावेज वा पयावेज वा आयावेंतं वा पयावेंतं वा

साइज्जइ ॥ ८८६ ॥ जे भिक्खू थूणंसि वा गिहेल्लयंसि वा उसुयालंसि वा का[त्ता]म[व]-  
जलंसि वा दुब्बद्धे दुण्णिक्खित्ते अणिकंपे चलाचले पडिग्गहं आयावेज वा पयावेज  
वा आयावेतं वा पयावेतं वा साइज्जइ ॥ ८८७ ॥ जे भिक्खू कुलियंसि वा भित्तिसि  
वा सिलंसि वा लेल्लंसि वा अंत(रि)ल्लिक्खजायंसि वा दुब्बद्धे दुण्णिक्खित्ते अणिकंपे  
चलाचले पडिग्गहं आयावेज वा पयावेज वा आयावेतं वा पयावेतं वा साइज्जइ  
॥ ८८८ ॥ जे भिक्खू खंयंसि वा फलहंसि वा मंचंसि वा मंडवंसि वा मालंसि वा  
पासायंसि वा दुब्बद्धे दुण्णिक्खित्ते अणिकंपे चलाचले पडिग्गहं आयावेज वा पयावेज  
वा आयावेतं वा पयावेतं वा साइज्जइ ॥ ८८९ ॥ जे भिक्खू पडिग्गहाओ पुढवी-  
कायं णीहरइ णीहरावेइ णीहरियं आहट्ठु देज्जमाणं पडिग्गहाइ पडिग्गाहेतं वा साइज्जइ  
॥ ८९० ॥ जे भिक्खू पडिग्गहाओ आउक्कायं णीहरइ णीहरावेइ णीहरियं आहट्ठु  
देज्जमाणं पडिग्गहाइ पडिग्गाहेतं वा साइज्जइ ॥ ८९१ ॥ जे भिक्खू पडिग्गहाओ  
तेउक्कायं णीहरइ णीहरावेइ णीहरियं आहट्ठु देज्जमाणं पडिग्गहाइ पडिग्गाहेतं वा  
साइज्जइ ॥ ८९२ ॥ जे भिक्खू पडिग्गहाओ कंदाणि वा मूलाणि वा पत्ताणि वा  
पुप्फाणि वा फलाणि वा णीहरइ णीहरावेइ णीहरियं आहट्ठु देज्जमाणं पडिग्गहाइ  
पडिग्गाहेतं वा साइज्जइ ॥ ८९३ ॥ जे भिक्खू पडिग्गहाओ ओसहिवीयाणि णीहरइ  
णीहरावेइ णीहरियं आहट्ठु देज्जमाणं पडिग्गहाइ पडिग्गाहेतं वा साइज्जइ ॥ ८९४ ॥  
जे भिक्खू पडिग्गहाओ तसपाणजाइं णीहरइ णीहरावेइ णीहरियं आहट्ठु देज्जमाणं  
पडिग्गहाइ पडिग्गाहेतं वा साइज्जइ ॥ ८९५ ॥ जे भिक्खू पडिग्गहाओ कोरेइ  
कोरावेइ कोरियं आहट्ठु देज्जमाणं पडिग्गहाइ पडिग्गाहेतं वा साइज्जइ ॥ ८९६ ॥  
जे भिक्खू णायगं वा अणायगं वा उवासगं वा अणुवासगं वा गामंतरंसि वा गाम-  
पहंतरंसि वा पडिग्गहं ओमासिय २ जायइ जायंतं वा साइज्जइ ॥ ८९७ ॥ जे भिक्खू  
णायगं वा अणायगं वा उवासगं वा अणुवासगं वा परिसामज्झाओ उट्ठवेत्ता पडिग्गहं  
ओमासिय २ जायइ जायंतं वा साइज्जइ ॥ ८९८ ॥ जे भिक्खू पडिग्गहणीसाए उडुवद्धं  
वसइ वसंतं वा साइज्जइ ॥ ८९९ ॥ जे भिक्खू पडिग्गहणीसाए वासावासं वसइ वसंतं  
वा साइज्जइ । तं सेवमाणे आवज्जइ चाउम्मासियं परिहारट्ठाणं उग्घाइयं ॥ ९०० ॥  
णिसीहऽज्झयणे चउहसमो उद्देसो समत्तो ॥ १४ ॥

### पण्णरसमो उद्देसो

जे भिक्खू भिक्खूणं आगाढं वयइ वयंतं वा साइज्जइ ॥ ९०१ ॥ जे भिक्खू०  
फरुसं वयइ वयंतं वा साइज्जइ ॥ ९०२ ॥ जे भिक्खू भिक्खूणं आगाढं फरुसं वयइ  
वयंतं वा साइज्जइ ॥ ९०३ ॥ जे भिक्खू भिक्खूणं अण्णयरीए अच्चासायणाए

અન્નાસાણ્ઠ અન્નાસાણ્ઠં વા સાહજ્ઞહ ॥ ૧૦૪ ॥ જે ભિક્ખૂ સચિત્તં અંવં મુંજહ મુંજતં વા સાહજ્ઞહ ॥ ૧૦૫ ॥ જે ભિક્ખૂ સચિત્તં અંવં વિ(હં)હસહ વિહસંતં વા સાહજ્ઞહ ॥ ૧૦૬ ॥ જે ભિક્ખૂ સચિત્તપહટ્ઠિયં અંવં મુંજહ મુંજતં વા સાહજ્ઞહ ॥ ૧૦૭ ॥ જે ભિક્ખૂ સચિત્તપહટ્ઠિયં અંવં વિહસહ વિહસંતં વા સાહજ્ઞહ ॥ ૧૦૮ ॥ જે ભિક્ખૂ સચિત્તં અંવં વા અંવપે(સિયં)સિં વા અંવભિ(ત્તિ)ત્તં વા અંવસાલગં વા અંવડાલગં વા અંવચોયગં વા મુંજહ મુંજતં વા સાહજ્ઞહ ॥ ૧૦૯ ॥ જે ભિક્ખૂ સચિત્તં અંવં વા અંવપેસિં વા અંવભિત્તં વા અંવસાલગં વા અંવડાલગં વા અંવચોયગં વા વિહસહ વિહસંતં વા સાહજ્ઞહ ॥ ૧૧૦ ॥ જે ભિક્ખૂ સચિત્તપહટ્ઠિયં અંવં વા અંવપેસિં વા અંવભિત્તં વા અંવસાલગં વા અંવડાલગં વા અંવચોયગં મુંજહ મુંજતં વા સાહજ્ઞહ ॥ ૧૧૧ ॥ જે ભિક્ખૂ સચિત્તપહટ્ઠિયં અંવં વા અંવપેસિં વા અંવભિત્તં વા અંવસાલગં વા અંવડાલગં વા અંવચોયગં વા વિહસહ વિહસંતં વા સાહજ્ઞહ ॥ ૧૧૨ ॥ જે ભિક્ખૂ અણ્ણહત્થિણ વા ગારત્થિણ વા અપ્પણો પાણ આમજ્ઞાવેજ વા પમજ્ઞાવેજ વા આમજ્ઞાવેતં વા પમજ્ઞાવેતં વા સાહજ્ઞહ ॥ ૧૧૩ ॥ જે ભિક્ખૂ અણ્ણહત્થિણ વા ગારત્થિણ વા અપ્પણો પાણ સંવાહાવેજ વા પલિમદ્દાવેજ વા સંવાહાવેતં વા પલિમદ્દાવેતં વા સાહજ્ઞહ ॥ ૧૧૪ ॥ જે ભિક્ખૂ અણ્ણહત્થિણ વા ગારત્થિણ વા અપ્પણો પાણ તેલ્લેણ વા ઘણ વા ણવળીણ વા મક્ખાવેજ વા ભિલિંગાવેજ વા મક્ખાવેતં વા ભિલિંગાવેતં વા સાહજ્ઞહ ॥ ૧૧૫ ॥ જે ભિક્ખૂ અણ્ણહત્થિણ વા ગારત્થિણ વા અપ્પણો પાણ લોદ્દેણ વા કક્કેણ વા ઊલ્લોલાવેજ વા ઊવ્વદ્દાવેજ વા ઊલ્લોલાવેતં વા ઊવ્વદ્દાવેતં વા સાહજ્ઞહ ॥ ૧૧૬ ॥ જે ભિક્ખૂ અણ્ણહત્થિણ વા ગારત્થિણ વા અપ્પણો પાણ સીઓદગવિયડેણ વા ઉસિપોદગવિયડેણ વા ઉચ્છોલાવેજ વા પધોવાવેજ વા ઉચ્છોલાવેતં વા પધોવાવેતં વા સાહજ્ઞહ ॥ ૧૧૭ ॥ જે ભિક્ખૂ અણ્ણહત્થિણ વા ગારત્થિણ વા અપ્પણો પાણ ફૂમાવેજ વા રયાવેજ વા ફૂમાવેતં વા રયાવેતં વા સાહજ્ઞહ ॥ ૧૧૮ ॥ જે ભિક્ખૂ અણ્ણહત્થિણ વા ગારત્થિણ વા અપ્પણો કાયાં આમજ્ઞાવેજ વા પમજ્ઞાવેજ વા આમજ્ઞાવેતં વા પમજ્ઞાવેતં વા સાહજ્ઞહ ॥ ૧૧૯ ॥ જે ભિક્ખૂ અણ્ણહત્થિણ વા ગારત્થિણ વા અપ્પણો કાયાં સંવાહાવેજ વા પલિમદ્દાવેજ વા સંવાહાવેતં વા પલિમદ્દાવેતં વા સાહજ્ઞહ ॥ ૧૨૦ ॥ જે ભિક્ખૂ અણ્ણહત્થિણ વા ગારત્થિણ વા અપ્પણો કાયાં તેલ્લેણ વા ઘણ વા ણવળીણ વા મક્ખાવેજ વા ભિલિંગાવેજ વા મક્ખાવેતં વા ભિલિંગાવેતં વા સાહજ્ઞહ ॥ ૧૨૧ ॥ જે ભિક્ખૂ અણ્ણહત્થિણ વા ગારત્થિણ વા અપ્પણો કાયાં લોદ્દેણ વા કક્કેણ વા ઊલ્લોલાવેજ વા ઊવ્વદ્દાવેજ વા ઊલ્લોલાવેતં વા ઊવ્વદ્દાવેતં વા સાહજ્ઞહ

॥ ९२२ ॥ जे भिक्खू अण्णउत्थिएण वा गारत्थिएण वा अप्पणो कायं सीओदग-  
वियडेण वा उसिणोदगवियडेण वा उच्छोलावेज्ज वा पधोवावेज्ज वा उच्छोलावेतं  
वा पधोवावेतं वा साइज्जइ ॥ ९२३ ॥ जे भिक्खू अण्णउत्थिएण वा गारत्थिएण  
वा अप्पणो कायं फूमावेज्ज वा रयावेज्ज वा फूमावेतं वा रयावेतं वा साइज्जइ  
॥ ९२४ ॥ जे भिक्खू अण्णउत्थिएण वा गारत्थिएण वा अप्पणो कायंसि वणं  
आमज्जावेज्ज वा पमज्जावेज्ज वा आमज्जावेतं वा पमज्जावेतं वा साइज्जइ ॥ ९२५ ॥  
जे भिक्खू अण्णउत्थिएण वा गारत्थिएण वा अप्पणो कायंसि वणं संवाहावेज्ज वा  
पल्लिमहावेज्ज वा संवाहावेतं वा पल्लिमहावेतं वा साइज्जइ ॥ ९२६ ॥ जे भिक्खू  
अण्णउत्थिएण वा गारत्थिएण वा अप्पणो कायंसि वणं तेह्लेण वा घएण वा णवणी-  
एण वा मक्खावेज्ज वा भिल्लिंगावेज्ज वा मक्खावेतं वा भिल्लिंगावेतं वा साइज्जइ  
॥ ९२७ ॥ जे भिक्खू अण्णउत्थिएण वा गारत्थिएण वा अप्पणो कायंसि वणं  
लोद्धेण वा कक्केण वा उल्लोलावेज्ज वा उव्वट्ठावेज्ज वा उल्लोलावेतं वा उव्वट्ठावेतं वा  
साइज्जइ ॥ ९२८ ॥ जे भिक्खू अण्णउत्थिएण वा गारत्थिएण वा अप्पणो कायंसि  
वणं सीओदगवियडेण वा उसिणोदगवियडेण वा उच्छोलावेज्ज वा पधोवावेज्ज वा  
उच्छोलावेतं वा पधोवावेतं वा साइज्जइ ॥ ९२९ ॥ जे भिक्खू अण्णउत्थिएण वा  
गारत्थिएण वा अप्पणो कायंसि वणं फूमावेज्ज वा रयावेज्ज वा फूमावेतं वा रयावेतं  
वा साइज्जइ ॥ ९३० ॥ जे भिक्खू अण्णउत्थिएण वा गारत्थिएण वा अप्पणो  
कायंसि गंडं वा पिलगं वा अरइयं वा अंसियं वा भगंदलं वा अण्णयरेणं तिकखेणं  
सत्थजाएणं अच्छिदावेज्ज वा विच्छिदावेज्ज वा अच्छिदावेतं वा विच्छिदावेतं वा  
साइज्जइ ॥ ९३१ ॥ जे भिक्खू अण्णउत्थिएण वा गारत्थिएण वा अप्पणो कायंसि  
गंडं वा पिलगं वा अरइयं वा अंसियं वा भगंदलं वा अण्णयरेणं तिकखेणं सत्थजाएणं  
अच्छिदावेत्ता विच्छिदावेत्ता पूयं वा सोणियं वा णीहरावेज्ज वा विसोहावेज्ज  
वा णीहरावेतं वा विसोहावेतं वा साइज्जइ ॥ ९३२ ॥ जे भिक्खू अण्णउत्थिएण  
वा गारत्थिएण वा अप्पणो कायंसि गंडं वा पिलगं वा अरइयं वा अंसियं वा भगंदलं  
वा अण्णयरेणं तिकखेणं सत्थजाएणं अच्छिदावेत्ता विच्छिदावेत्ता पूयं वा सोणियं वा  
णीहरावेत्ता विसोहावेत्ता सीओदगवियडेण वा उसिणोदगवियडेण वा उच्छोलावेज्ज  
वा पधोयावेज्ज वा उच्छोलावेतं वा पधोयावेतं वा साइज्जइ ॥ ९३३ ॥ जे भिक्खू  
अण्णउत्थिएण वा गारत्थिएण वा अप्पणो कायंसि गंडं वा पिलगं वा अरइयं वा  
अंसियं वा भगंदलं वा अण्णयरेणं तिकखेणं सत्थजाएणं अच्छिदावेत्ता विच्छिदावेत्ता  
पूयं वा सोणियं वा णीहरावेत्ता विसोहावेत्ता सीओदगवियडेण वा उसिणोदगवियडेण



वा उच्छोलावेत्ता पधोयावेत्ता अण्णयरेणं आलेवणजाएणं आलिंपावेज्ज वा विलिंपा-  
 वेज्ज वा आलिंपावेत्तं वा विलिंपावेत्तं वा साइज्जइ ॥ ९३४ ॥ जे भिक्खू अण्ण-  
 उत्थिएण वा गारत्थिएण वा अप्पणो कायंसि गंडं वा पिलगं वा अरइयं वा अंसियं  
 वा भगंदलं वा अण्णयरेणं तिकखेणं सत्थजाएणं अच्छिदावेत्ता विच्छिदावेत्ता पूयं वा  
 सोणियं वा णीहरावेत्ता विसोहावेत्ता सीओदगवियडेण वा उसिणोदगवियडेण वा  
 उच्छोलावेत्ता पधोयावेत्ता अण्णयरेणं आलेवणजाएणं आलिंपावेत्ता विलिंपावेत्ता  
 तेहेण वा घएण वा णवणीएण वा अब्भंगावेज्ज वा मक्खावेज्ज वा अब्भंगावेत्तं वा  
 मक्खावेत्तं वा साइज्जइ ॥ ९३५ ॥ जे भिक्खू अण्णउत्थिएण वा गारत्थिएण वा  
 अप्पणो कायंसि गंडं वा पिलगं वा अरइयं वा अंसियं वा भगंदलं वा अण्णयरेणं  
 तिकखेणं सत्थजाएणं अच्छिदावेत्ता विच्छिदावेत्ता पूयं वा सोणियं वा णीहरावेत्ता  
 विसोहावेत्ता सीओदगवियडेण वा उसिणोदगवियडेण वा उच्छोलावेत्ता पधोयावेत्ता  
 अण्णयरेणं आलेवणजाएणं आलिंपावेत्ता विलिंपावेत्ता तेहेण वा घएण वा णवणीएण  
 वा अब्भंगावेत्ता मक्खावेत्ता अण्णयरेणं धूवणजाएणं धूवावेज्ज वा पधूवावेज्ज वा  
 धूवावेत्तं वा पधूवावेत्तं वा साइज्जइ ॥ ९३६ ॥ जे भिक्खू अण्णउत्थिएण वा  
 गारत्थिएण वा० पालुकमियं वा कुच्छिकमियं वा अंगुलीए णिवेसाविय २ णीहरावेइ  
 णीहरावेत्तं वा साइज्जइ ॥ ९३७ ॥ जे भिक्खू अण्णउत्थिएण वा गारत्थिएण वा०  
 दीहाओ णहसिहाओ कप्पावेज्ज वा संठवावेज्ज वा कप्पावेत्तं वा संठवावेत्तं वा साइज्जइ  
 ॥ ९३८ ॥ जे भिक्खू अण्णउत्थिएण वा गारत्थिएण वा० दीहाइ जंघरोमाइ कप्पावेज्ज  
 वा संठवावेज्ज वा कप्पावेत्तं वा संठवावेत्तं वा साइज्जइ ॥ ९३९ ॥ जे भिक्खू अण्ण-  
 उत्थिएण वा गारत्थिएण वा० दीहाइ कक्खुरोमाइ कप्पावेज्ज वा संठवावेज्ज वा कप्पा-  
 वेत्तं वा संठवावेत्तं वा साइज्जइ ॥ ९४० ॥ जे भिक्खू अण्णउत्थिएण वा गारत्थिएण  
 वा० दीहाइ मंसुरोमाइ कप्पावेज्ज वा संठवावेज्ज वा कप्पावेत्तं वा संठवावेत्तं वा साइज्जइ  
 ॥ ९४१ ॥ जे भिक्खू अण्णउत्थिएण वा गारत्थिएण वा० दीहाइ णासारोमाइ  
 कप्पावेज्ज वा संठवावेज्ज वा कप्पावेत्तं वा संठवावेत्तं वा साइज्जइ ॥ ९४२ ॥ जे  
 भिक्खू अण्णउत्थिएण वा गारत्थिएण वा० दीहाइ चक्खुरोमाइ कप्पावेज्ज वा संठवा-  
 वेज्ज वा कप्पावेत्तं वा संठवावेत्तं वा साइज्जइ ॥ ९४३-१ ॥ जे भिक्खू...दीहाइ कण-  
 रोमाइ...साइज्जइ ॥ ९४३-२ ॥ जे भिक्खू अण्णउत्थिएण वा गारत्थिएण वा अप्पणो  
 दंते आघंसावेज्ज वा पघंसावेज्ज वा आघंसावेत्तं वा पघंसावेत्तं वा साइज्जइ ॥ ९४४ ॥  
 जे भिक्खू अण्णउत्थिएण वा गारत्थिएण वा अप्पणो दंते उच्छोलावेज्ज वा पधोया-  
 वेज्ज वा उच्छोलावेत्तं वा पधोयावेत्तं वा साइज्जइ ॥ ९४५ ॥ जे भिक्खू अण्णउत्थिएण

[illegible]

॥ ९६१ ॥ जे भिक्खू अण्णउत्थिएण वा गारत्थिएण वा अप्पणो दीहाइं पासरोमाइं कप्पावेज्ज वा संठवावेज्ज वा कप्पावेंतं वा संठवावेंतं वा साइज्जइ ॥ ९६२-१ ॥ ...केसरो-  
माइं... ॥ ९६२-२ ॥ जे भिक्खू अण्णउत्थिएण वा गारत्थिएण वा अप्पणो अच्छिमलं  
वा कण्णमलं वा दंतमलं वा ण्हमलं वा णीहरावेज्ज वा विसोहावेज्ज वा णीहरावेंतं वा  
विसोहावेंतं वा साइज्जइ ॥ ९६३ ॥ जे भिक्खू अण्णउत्थिएण वा गारत्थिएण वा अप्पणो  
कायाओ सेयं वा जल्लं वा पंकं वा मलं वा णीहरावेज्ज वा विसोहावेज्ज वा णीहरावेंतं वा  
विसोहावेंतं वा साइज्जइ ॥ ९६४ ॥ जे भिक्खू अण्णउत्थिएण वा गारत्थिएण वा गामाणु-  
गामं दूइज्जमाणे अप्पणो सीसदुवारियं कारवेइ कारवेंतं वा साइज्जइ ॥ ९६५ ॥ जे भिक्खू  
आगंतागारेसु वा आरामागारेसु वा गाहावइकुलेसु वा परियावसहेसु वा उच्चारपास-  
वणं परिट्ठवेइ परिट्ठवेंतं वा साइज्जइ ॥ ९६६ ॥ जे भिक्खू उज्जाणंसि वा उज्जाण-  
गिहंसि वा उज्जाणसालंसि वा णिज्जाणंसि वा णिज्जाणगिहंसि वा णिज्जाणसालंसि वा  
उच्चारपासवणं परिट्ठवेइ परिट्ठवेंतं वा साइज्जइ ॥ ९६७ ॥ जे भिक्खू अट्ठंसि वा  
अट्ठालयंसि वा चरियंसि वा पागारंसि वा दारंसि वा गोपुरंसि वा उच्चारपासवणं  
परिट्ठवेइ परिट्ठवेंतं वा साइज्जइ ॥ ९६८ ॥ जे भिक्खू दगंसि वा दगमगंसि वा  
दगपंहंसि वा दगतीरंसि वा दग[ट्ठा]ठाणंसि वा उच्चारपासवणं परिट्ठवेइ परिट्ठवेंतं वा  
साइज्जइ ॥ ९६९ ॥ जे भिक्खू सुण्णगिहंसि वा सुण्णसालंसि वा भिन्नगिहंसि वा  
भिण्णसालंसि वा कूडागारंसि वा कोट्टागारंसि वा उच्चारपासवणं परिट्ठवेइ परिट्ठवेंतं वा  
साइज्जइ ॥ ९७० ॥ जे भिक्खू तणगिहंसि वा तणसालंसि वा तुसगिहंसि वा तुस-  
सालंसि वा छु(भु)सगिहंसि वा छुससालंसि वा उच्चारपासवणं परिट्ठवेइ परिट्ठवेंतं वा  
साइज्जइ ॥ ९७१ ॥ जे भिक्खू जाणगिहंसि वा जाणसालंसि वा जुगगिहंसि वा  
जुगसालंसि वा उच्चारपासवणं परिट्ठवेइ परिट्ठवेंतं वा साइज्जइ ॥ ९७२ ॥ जे भिक्खू  
पणियसालंसि वा पणियगिहंसि वा परियासालंसि वा परियागिहंसि वा कुवियसालंसि  
वा कुवियगिहंसि वा उच्चारपासवणं परिट्ठवेइ परिट्ठवेंतं वा साइज्जइ ॥ ९७३ ॥ जे  
भिक्खू गोणसालंसि वा गोणगिहंसि वा महाकु(ल)सालंसि वा महागिहंसि वा उच्चार-  
पासवणं परिट्ठवेइ परिट्ठवेंतं वा साइज्जइ ॥ ९७४ ॥ जे भिक्खू अण्णउत्थियस्स वा  
गारत्थियस्स वा असणं वा ४ देइ देंतं वा साइज्जइ ॥ ९७५ ॥ जे भिक्खू पास-  
त्थस्स अस[णस्स]णं वा ४ देइ देंतं वा साइज्जइ ॥ ९७६ ॥ जे भिक्खू पासत्थस्स  
असणं वा ४ पडिच्छइ पडिच्छंतं वा साइज्जइ ॥ ९७७ ॥ जे भिक्खू ओसणस्स  
असणं वा ४ देइ देंतं वा साइज्जइ ॥ ९७८ ॥ जे भिक्खू ओसणस्स असणं वा  
४ पडिच्छइ पडिच्छंतं वा साइज्जइ ॥ ९७९ ॥ जे भिक्खू कुसीलस्स असणं वा

४ देइ देंतं वा साइज्जइ ॥ ९८० ॥ जे भिक्खू कुसीलस्स असणं वा ४ पडिच्छइ पडिच्छंतं वा साइज्जइ ॥ ९८१ ॥ जे भिक्खू णितियस्स असणं वा ४ देइ देंतं वा साइज्जइ ॥ ९८२ ॥ जे भिक्खू णितियस्स असणं वा ४ पडिच्छइ पडिच्छंतं वा साइज्जइ ॥ ९८३ ॥ जे भिक्खू संसत्तस्स असणं वा ४ देइ देंतं वा साइज्जइ ॥ ९८४ ॥ जे भिक्खू संसत्तस्स असणं वा ४ पडिच्छइ पडिच्छंतं वा साइज्जइ ॥ ९८५ ॥ जे भिक्खू अण्णउत्थियस्स वा गारत्थियस्स वा वत्थं वा पडिग्गहं वा कंबलं वा पायपुच्छणं वा देइ देंतं वा साइज्जइ ॥ ९८६ ॥ जे भिक्खू पासत्थस्स वत्थं वा ४ देइ देंतं वा साइज्जइ ॥ ९८७ ॥ जे भिक्खू पासत्थस्स वत्थं वा ४ पडिच्छइ पडिच्छंतं वा साइज्जइ ॥ ९८८ ॥ जे भिक्खू ओसण्णस्स वत्थं वा ४ देइ देंतं वा साइज्जइ ॥ ९८९ ॥ जे भिक्खू ओसण्णस्स वत्थं वा ४ पडिच्छइ पडिच्छंतं वा साइज्जइ ॥ ९९० ॥ जे भिक्खू कुसीलस्स वत्थं वा ४ देइ देंतं वा साइज्जइ ॥ ९९१ ॥ जे भिक्खू कुसीलस्स वत्थं वा ४ पडिच्छइ पडिच्छंतं वा साइज्जइ ॥ ९९२ ॥ जे भिक्खू नितियस्स वत्थं वा ४ देइ देंतं वा साइज्जइ ॥ ९९३ ॥ जे भिक्खू नितियस्स वत्थं वा ४ पडिच्छइ पडिच्छंतं वा साइज्जइ ॥ ९९४ ॥ जे भिक्खू संसत्तस्स वत्थं वा ४ देइ देंतं वा साइज्जइ ॥ ९९५ ॥ जे भिक्खू संसत्तस्स वत्थं वा ४ पडिच्छइ पडिच्छंतं वा साइज्जइ ॥ ९९६ ॥ जे भिक्खू जायणवत्थं वा णिमं-  
तणावत्थं वा अजाणिय अपुच्छिय अगवेसिय पडिग्गाहेइ पडिग्गाहेतं वा साइज्जइ से य वत्थे चउण्हं अण्णयरे सिया, तंजहा-णिच्चणियंसणिए म[ज्झण्हि]ज्जणिए छणूसविए रायदुवारिए ॥ ९९७ ॥ जे भिक्खू विभूसापडियाए अप्पणो पाए आमजेज्ज वा पमजेज्ज वा आमज्जंतं वा पमज्जंतं वा साइज्जइ ॥ ९९८ ॥ एवं जाव सीसदुवारियं करेइ करेतं वा साइज्जइ ॥ १०५१ ॥ जे भिक्खू विभूसापडियाए वत्थं वा ४ अण्णयरं वा उवगरणजायं धरेइ धरेतं वा साइज्जइ ॥ १०५२ ॥ जे भिक्खू विभूसा-  
पडियाए वत्थं वा ४ अण्णयरं वा उवगरणजायं धोवेइ धोवेतं वा साइज्जइ । तं सेवमाणे आवज्जइ चाउम्मासियं परिहारट्ठाणं उग्घाइयं ॥ १०५३ ॥ **णिसीहऽज्झ-**  
**यणे पण्णरसमो उद्देसो समत्तो ॥ १५ ॥**

### सोलसमो उद्देसो

जे भिक्खू सागारियसेज्जं अणुपविसइ अणुपविसंतं वा साइज्जइ ॥ १०५४ ॥ जे भिक्खू स(सी)उदगं सेज्जं उवागच्छइ उवागच्छंतं वा साइज्जइ ॥ १०५५ ॥ जे भिक्खू सअगणिसेज्जं अणुपविसइ अणुपविसंतं वा साइज्जइ ॥ १०५६ ॥ जे भिक्खू सच्चित्तं उच्छं भुंजइ भुंजंतं वा साइज्जइ ॥ १०५७ ॥ जे भिक्खू सच्चित्तं

उच्छं विडसइ विडसंतं वा साइज्जइ ॥ १०५८ ॥ जे भिक्खू सचित्तपइट्ठियं उच्छं  
 भुंजइ भुंजंतं वा साइज्जइ ॥ १०५९ ॥ जे भिक्खू सचित्तपइट्ठियं उच्छं विडसइ  
 विडसंतं वा साइज्जइ ॥ १०६० ॥ जे भिक्खू सचित्तं अंतरुच्छुयं वा उच्छुखंडियं वा  
 उच्छुचोयगं वा उच्छुमेरगं वा उच्छुसालगं वा उच्छुडालगं वा भुंजइ भुंजंतं वा साइज्जइ  
 ॥ १०६१ ॥ जे भिक्खू सचित्तं अंतरुच्छुयं वा... उच्छुडालगं वा विडसइ विडसंतं  
 वा साइज्जइ ॥ १०६२ ॥ जे भिक्खू सचित्तपइट्ठियं अंतरुच्छुयं वा... उच्छुडालगं वा  
 भुंजइ भुंजंतं वा साइज्जइ ॥ १०६३ ॥ जे भिक्खू सचित्तपइट्ठियं अंतरुच्छुयं वा... उच्छु-  
 डालगं वा विडसइ विडसंतं वा साइज्जइ ॥ १०६४ ॥ जे भिक्खू आरणाणं वण्णं धाणं  
 अडवीजत्तासंप[इ]ट्ठियाणं असणं वा ४ पडिग्गाहेइ पडिग्गाहेतं वा साइज्जइ  
 ॥ १०६५ ॥ जे भिक्खू आ(अ)रणा(य)णं वण्णं धाणं अडवीजत्ताओ पडिणियत्ताणं  
 असणं वा ४ पडिग्गाहेइ पडिग्गाहेतं वा साइज्जइ ॥ १०६६ ॥ जे भिक्खू वसु-  
 (वुसि)राइयं अ(वुसि)वसुराइयं वयइ वयंतं वा साइज्जइ ॥ १०६७ ॥ जे भिक्खू  
 अवुसिराइयं वुसिराइयं वयइ वयंतं वा साइज्जइ ॥ १०६८ ॥ जे भिक्खू वुसिराइ-  
 यणाओ अवुसिराइयं गणं संकमइ संकमंतं वा साइज्जइ ॥ १०६९ ॥ जे भिक्खू  
 वुग्गहवक्कंताणं असणं वा ४ देइ देंतं वा साइज्जइ ॥ १०७० ॥ जे भिक्खू वुग्गहव-  
 क्कंताणं असणं वा ४ पडिच्छइ पडिच्छंतं वा साइज्जइ ॥ १०७१ ॥ जे भिक्खू  
 वुग्गहवक्कंताणं वत्थं वा ४ देइ देंतं वा साइज्जइ ॥ १०७२ ॥ जे भिक्खू वुग्गहव-  
 क्कंताणं वत्थं वा ४ पडिच्छइ पडिच्छंतं वा साइज्जइ ॥ १०७३ ॥ जे भिक्खू  
 वुग्गहवक्कंताणं वसहिं देइ देंतं वा साइज्जइ ॥ १०७४ ॥ जे भिक्खू वुग्गहवक्कंताणं  
 वसहिं पडिच्छइ पडिच्छंतं वा साइज्जइ ॥ १०७५ ॥ जे भिक्खू वुग्गहवक्कंताणं  
 वसहिं अणुपविसइ अणुपविसंतं वा साइज्जइ ॥ १०७६ ॥ जे भिक्खू वुग्गहवक्कंताणं  
 सज्जायं देइ देंतं वा साइज्जइ ॥ १०७७ ॥ जे भिक्खू वुग्गहवक्कंताणं सज्जायं  
 पडिच्छइ पडिच्छंतं वा साइज्जइ ॥ १०७८ ॥ जे भिक्खू विहं अणेगाहगमणिजं  
 सइ लाढे विहाराए संथरमाणेसु जणवएसु विहारपडियाए अभिसंधारेइ अभिसंधारेतं  
 वा साइज्जइ ॥ १०७९ ॥ जे भिक्खू विरूक्खाइ दसुयायणाइ अणारियाइ मिल-  
 क्खुइ पंचंतियाइ सइ लाढे विहाराए संथरमाणेसु जणवएसु विहारपडियाए अभिसं-  
 धारेइ अभिसंधारेतं वा साइज्जइ ॥ १०८० ॥ जे भिक्खू दुगुंछियकुलेसु असणं  
 वा ४ पडिग्गाहेइ पडिग्गाहेतं वा साइज्जइ ॥ १०८१ ॥ जे भिक्खू दुगुंछियकुलेसु  
 वत्थं वा ४ पडिग्गाहेइ पडिग्गाहेतं वा साइज्जइ ॥ १०८२ ॥ जे भिक्खू दुगुंछि-  
 यकुलेसु वसहिं पडिग्गाहेइ पडिग्गाहेतं वा साइज्जइ ॥ १०८३ ॥ जे भिक्खू

दुगुंछियकुलेसु सज्जायं करेइ करेंतं वा साइज्जइ ॥ १०८४ ॥ जे भिक्खू दुगुंछिय-  
कुलेसु सज्जायं उद्दिसइ उद्दिसंतं वा साइज्जइ ॥ १०८५ ॥ ( ...समुद्दिसइ...  
अणुजाणइ... ) जे भिक्खू दुगुंछियकुलेसु सज्जायं वाएइ वाएंतं वा साइज्जइ  
॥ १०८६ ॥ जे भिक्खू दुगुंछियकुलेसु सज्जायं पडिच्छइ पडिच्छंतं वा साइज्जइ  
॥ १०८७ ॥ ( ...परियट्ठइ... ) जे भिक्खू असणं वा ४ पुढवीए णिक्खिवइ  
णिक्खिवंतं वा साइज्जइ ॥ १०८८ ॥ जे भिक्खू असणं वा ४ संधारए णिक्खिवइ  
णिक्खिवंतं वा साइज्जइ ॥ १०८९ ॥ जे भिक्खू असणं वा ४ वेहासे णिक्खिवइ  
णिक्खिवंतं वा साइज्जइ ॥ १०९० ॥ जे भिक्खू अण्ण(उत्थिएण)तित्थीहिं वा  
गार(त्थिएण)त्थीहिं वा सद्धिं भुंजइ भुंजंतं वा साइज्जइ ॥ १०९१ ॥ जे भिक्खू  
अण्णतित्थीहिं वा गारत्थीहिं वा सद्धिं आवेढिय परिवेढिय भुंजइ भुंजंतं वा  
साइज्जइ ॥ १०९२ ॥ जे भिक्खू आयरियउवज्जायाणं सेजासंधारणं पाएणं संघट्टेत्ता  
हत्थेणं अणुण्णवेत्ता धा(रे)रयमा(णे)णो गच्छइ गच्छंतं वा साइज्जइ ॥ १०९३ ॥  
जे भिक्खू पमाणाइरित्तं वा गणणाइरित्तं वा उवहिं धरेइ धरेंतं वा साइज्जइ  
॥ १०९४ ॥ जे भिक्खू अणंतरहियाए पुढवीए जीवपइट्टिए सअंडे सपाणे सवीए  
सहरिए सओस्से सउदए सउत्तिगपणगदगमट्टियमकडासंताणगंसि चलाचले उच्चार-  
पासवणं परिट्ठवेइ परिट्ठवेंतं वा साइज्जइ ॥ १०९५ ॥ जे भिक्खू ससिणिद्धाए पुढवीए  
जाव साइज्जइ ॥ १०९६ ॥ जे भिक्खू ससरक्खाए पुढवीए जाव साइज्जइ ॥ १०९७ ॥  
जे भिक्खू मट्टियाकडाए पुढवीए जाव साइज्जइ ॥ १०९८ ॥ जे भिक्खू चित्तमंताए  
पुढवीए जाव साइज्जइ ॥ १०९९ ॥ जे भिक्खू चित्तमंताए सिलाए जाव साइज्जइ  
॥ ११०० ॥ जे भिक्खू चित्तमंताए लेल्लए जाव साइज्जइ ॥ ११०१ ॥ जे भिक्खू  
कोलावासंसि वा दाहए जाव साइज्जइ ॥ ११०२ ॥ जे भिक्खू थूणंसि वा निहेलुयंसि  
वा उसुयालंसि वा कामजलंसि वा चलाचले उच्चारपासवणं परिट्ठवेइ परिट्ठवेंतं वा  
साइज्जइ ॥ ११०३ ॥ जे भिक्खू कुलियंसि वा भित्तिसि वा सिलंसि वा लेल्लंसि वा  
अन्तलिक्खजायंसि वा चलाचले उच्चारपासवणं परिट्ठवेइ परिट्ठवेंतं वा साइज्जइ  
॥ ११०४ ॥ जे भिक्खू खंयंसि वा फलहंसि वा मंचंसि वा मंडवंसि वा मालंसि वा  
पासायंसि वा (अण्णयरंसि वा अंतरिक्खजायंसि ) उच्चारपासवणं परिट्ठवेइ परिट्ठवेंतं  
वा साइज्जइ । तं सेवमाणे आवज्जइ चाउम्मासियं परिहारट्ठाणं उग्वाइयं ॥ ११०५ ॥  
णिसीहऽज्झयणे सोलसमो उद्देसो समत्तो ॥ १६ ॥

### सत्तरसमो उद्देसो

जे भिक्खू कोउहल्लपडियाए अण्णयरं तसपाणजायं तणपासएण वा भुंजपासएण

वा कट्टपासएण वा चम्मपासएण वा वेत्तपासएण वा रज्जुपासएण वा सुत्तपासएण  
 वा बंधइ बंधंतं वा साइज्जइ ॥ ११०६ ॥ जे भिक्खू कोउहल्लपडियाए अण्णयरं  
 तसपाणजायं तणपासएण वा जाव सुत्तपासएण वा बंधेळ्ळं मुयइ मुयंतं वा साइज्जइ  
 ॥ ११०७ ॥ जे भिक्खू कोउहल्लपडियाए तणमालियं वा मुंजमालियं वा भिं-  
 मालियं वा मयणमालियं वा पिंलमालियं वा दंतमालियं वा सिंगमालियं वा संख-  
 मालियं वा हड्डमालियं वा कट्टमालियं वा पत्तमालियं वा पुप्फमालियं वा फलमालियं  
 वा वीयमालियं वा हरियमालियं वा करेइ करंतं वा साइज्जइ ॥ ११०८ ॥ जे  
 भिक्खू कोउहल्लपडियाए तणमालियं वा जाव हरियमालियं वा धरेइ धरंतं वा साइज्जइ  
 ॥ ११०९ ॥ जे भिक्खू कोउहल्लपडियाए तणमालियं वा जाव हरियमालियं वा  
 पिणद्धइ पिणद्धंतं वा साइज्जइ ॥ १११० ॥ (…परिभुंजइ…) जे भिक्खू कोउ-  
 हल्लपडियाए अयलोहाणि वा तंबलोहाणि वा तउयलोहाणि वा सीसलोहाणि वा  
 रुप्पलोहाणि वा सुवण्णलोहाणि वा करेइ करंतं वा साइज्जइ ॥ ११११ ॥ जे भिक्खू  
 कोउहल्लपडियाए अयलोहाणि वा जाव सुवण्णलोहाणि वा धरेइ धरंतं वा साइज्जइ  
 ॥ १११२ ॥ जे भिक्खू कोउहल्लपडियाए अयलोहाणि वा जाव सुवण्णलोहाणि वा  
 परिभुंज[पिणद्ध]इ परिभुंजंतं वा साइज्जइ ॥ १११३ ॥ जे भिक्खू कोउहल्लपडि-  
 याए हाराणि वा अद्धहाराणि वा एगावलं वा सुत्तावलं वा कणगावलं वा  
 रयणावलं वा कडगाणि वा तुडियाणि वा केउराणि वा कुंडलाणि वा पट्टाणि वा  
 मउडाणि वा पलंबसुत्ताणि वा सुवण्णसुत्ताणि वा करेइ करंतं वा साइज्जइ ॥ १११४ ॥  
 जे भिक्खू कोउहल्लपडियाए हाराणि वा जाव सुवण्णसुत्ताणि वा धरेइ धरंतं वा  
 साइज्जइ ॥ १११५ ॥ जे भिक्खू कोउहल्लपडियाए हाराणि वा जाव सुवण्णसुत्ताणि वा  
 पिणद्धइ पिणद्धंतं वा साइज्जइ ॥ १११६ ॥ जे भिक्खू कोउहल्लपडियाए आईणाणि  
 वा आईणपावराणि वा कंबलाणि वा कंबलपावराणि वा कोयराणि वा कोयरपावराणि  
 वा कालमियाणि वा णीलमियाणि वा सामाणि वा मिहासामाणि वा उट्टाणि वा उट्ट-  
 लेस्साणि वा वग्घाणि वा विवग्घाणि वा परवंगाणि वा सहिणाणि वा सहिणकल्लाणि  
 वा खोमाणि वा दुगूलाणि वा पतुण्णाणि वा आवरंताणि वा वीणाणि वा अंसुयाणि  
 वा कणगकंताणि वा कणगखचियाणि वा कणगचित्ताणि वा० आभरणविचित्ताणि वा  
 करेइ करंतं वा साइज्जइ ॥ १११७ ॥ जे भिक्खू कोउहल्लपडियाए आईणाणि वा  
 जाव आभरणविचित्ताणि वा धरेइ धरंतं वा साइज्जइ ॥ १११८ ॥ जे भिक्खू  
 कोउहल्लपडियाए आईणाणि वा जाव आभरणविचित्ताणि वा परिभुंजइ परिभुंजंतं वा  
 साइज्जइ ॥ १११९ ॥ जा (जे भिक्खू) गि(नि)ग्गं(थे)थी गि-ग्गंथस्स पाए अण्ण-

उत्थिएण वा गारत्थिएण वा आमंजावेज्ज वा पमंजावेज्ज वा आमंजावेतं वा पमंजावेतं वा साइज्जइ ॥ ११२० ॥ जाव जा णिग्गंथी...सीसदुवारियं कारवेइ कारवेतं वा साइज्जइ ॥ ११७२ ॥ जे णिग्गंथे णिग्गंथीए पाए अण्णउत्थिएण वा गारत्थिएण वा जाव सीसदुवारियं कारवेइ कारवेतं वा साइज्जइ ॥ १२२५ ॥ जे णिग्गंथे णिग्गंथस्स सरिसगस्स संते ओवासे अंते ओवासे ण देइ ण देंतं वा साइज्जइ ॥ १२२६ ॥ जा णिग्गंथी णिग्गंथीए सरिसियाए संते ओवासे अंते ओवासे ण देइ ण देंतं वा साइज्जइ ॥ १२२७ ॥ जे भिक्खू मालोहडं असणं वा ४ उट्ठिभदिय देज्जमाणं पडिग्गाहेइ पडिग्गाहेतं वा साइज्जइ ॥ १२२८ ॥ जे भिक्खू कोट्टियाउत्तं असणं वा ४ उक्कुज्जिय निक्कुज्जिय उहरिय देज्जमाणं पडिग्गाहेइ पडिग्गाहेतं वा साइज्जइ ॥ १२२९ ॥ जे भिक्खू मट्ठिओलितं असणं वा ४ उट्ठिभदिय णिट्ठिभदिय देज्जमाणं पडिग्गाहेइ पडिग्गाहेतं वा साइज्जइ ॥ १२३० ॥ जे भिक्खू (असणं वा...) पुढविपइट्ठियं पडिग्गाहेइ पडिग्गाहेतं वा साइज्जइ ॥ १२३१ ॥ जे भिक्खू आउपइट्ठियं पडिग्गाहेइ पडिग्गाहेतं वा साइज्जइ ॥ १२३२ ॥ जे भिक्खू तेउपइट्ठियं पडिग्गाहेइ पडिग्गाहेतं वा साइज्जइ ॥ १२३३ ॥ जे भिक्खू वणस्सइकायपइट्ठियं पडिग्गाहेइ पडिग्गाहेतं वा साइज्जइ ॥ १२३४ ॥ जे भिक्खू अञ्जुसिणं असणं वा ४ सुप्पेण वा विहुयणेण वा तालियंटेण वा पत्तेण वा पत्तभंणेण वा साहाए वा साहाभंणेण वा पिहुणेण वा पिहुणहत्थेण वा चेल्लेण वा चेल्लकणेण वा हत्थेण वा मुहेण वा फूमित्ता वीइत्ता आहट्ठ देज्जमाणं पडिग्गाहेइ पडिग्गाहेतं वा साइज्जइ ॥ १२३५ ॥ जे भिक्खू असणं वा ४ उसिणुसिणं पडिग्गाहेइ पडिग्गाहेतं वा साइज्जइ ॥ १२३६ ॥ जे भिक्खू उस्सेइमं वा संसेइमं वा चाउलोदगं वा वालोदगं वा तिलोदगं वा तुसोदगं वा जवोदगं वा आयामं वा सोवीरं वा अंबकंजियं वा सुद्धवियडं वा अहुणाधोयं अणंविळं अपरिणयं अवक्कंतजीवं अविद्धत्थं पडिग्गाहेइ पडिग्गाहेतं वा साइज्जइ ॥ १२३७ ॥ जे भिक्खू अप्पणो आयरियत्ताए लक्खणाइं वागरेइ वागरेतं वा साइज्जइ ॥ १२३८ ॥ जे भिक्खू गाएज्ज वा (हसेज्ज वा) वाएज्ज वा णच्चेज्ज वा अमिणवेज्ज वा हयहेसियं वा हत्थिगुल्लगुलाइयं वा उक्कु(क्कि)ट्ठिक्कट्ठिसीहणायं वा करेइ करेतं वा साइज्जइ ॥ १२३९ ॥ जे भिक्खू मेरिसद्दाणि वा पडहसद्दाणि वा मुरवसद्दाणि वा सुइंगसद्दाणि वा णंदिसद्दाणि वा झल्लरिसद्दाणि वा वल्लरिसद्दाणि वा डमस्स(य)गसद्दाणि वा मड्डयसद्दाणि वा सदुयसद्दाणि वा पएससद्दाणि वा गोलुइसद्दाणि वा अण्णयरणि वा तहप्पगाराणि वितयाणि सद्दाणि कण्णसोयपडियाए अभिसंधारेइ अभिसंधारेतं वा साइज्जइ ॥ १२४० ॥ जे भिक्खू वीणासद्दाणि वा विवंचिसद्दाणि वा तुणसद्दाणि



वा वव्वीसगसद्दाणि वा वीणाइयसद्दाणि वा तुंबवीणासद्दाणि वा झोडयसद्दाणि वा  
 ढंकुणसद्दाणि वा अण्णयराणि वा तहप्पगाराणि तयाणि सद्दाणि कण्णसोयपडियाए  
 अभिसंधारेइ अभिसंधारेंतं वा साइज्जइ ॥ १२४१ ॥ जे भिक्खू तालसद्दाणि  
 वा कंसतालसद्दाणि वा लित्तियसद्दाणि वा गोहियसद्दाणि वा मकरियसद्दाणि वा  
 कच्छभिसद्दाणि वा महइसद्दाणि वा सणालियासद्दाणि वा वालियासद्दाणि वा अण्ण-  
 यराणि वा तहप्पगाराणि घणाणि सद्दाणि कण्णसोयपडियाए अभिसंधारेइ अभि-  
 संधारेंतं वा साइज्जइ ॥ १२४२ ॥ जे भिक्खू संखसद्दाणि वा वंससद्दाणि वा वेणु-  
 सद्दाणि वा खरमुहिसद्दाणि वा परिलिसद्दाणि वा वेवासद्दाणि वा अण्णयराणि वा  
 तहप्पगाराणि झुसिराणि सद्दाणि कण्णसोयपडियाए अभिसंधारेइ अभिसंधारेंतं वा  
 साइज्जइ ॥ १२४३ ॥ जे भिक्खू वप्पाणि वा फलिहाणि वा उप्पलाणि वा पल्ल-  
 लाणि वा उज्झराणि वा णिज्झराणि वा वावीणि वा पोक्खराणि वा बीहियाणि  
 वा सराणि वा सरपंतियाणि वा सरसरपंतियाणि वा कण्णसोयपडियाए अभिसंधा-  
 रेइ अभिसंधारेंतं वा साइज्जइ ॥ १२४४ ॥ जे भिक्खू कच्छाणि वा गहणाणि  
 वा णूसाणि वा वणाणि वा वणविदुग्गाणि वा पव्वयाणि वा पव्वयविदुग्गाणि वा  
 कण्णसोयपडियाए अभिसंधारेइ अभिसंधारेंतं वा साइज्जइ ॥ १२४५ ॥ जे भिक्खू  
 गामाणि वा नगराणि वा खेडाणि वा कब्बडाणि वा मडंवाणि वा दोणमुहाणि वा  
 पट्टणाणि वा आगराणि वा संवाहाणि वा सणिवेसाणि वा कण्णसोयपडियाए अभि-  
 संधारेइ अभिसंधारेंतं वा साइज्जइ ॥ १२४६ ॥ जे भिक्खू गाममहाणि वा जाव  
 सणिवेसमहाणि वा कण्णसोयपडियाए अभिसंधारेइ अभिसंधारेंतं वा साइज्जइ  
 ॥ १२४७ ॥ जे भिक्खू गामवहाणि वा नगरवहाणि वा खेडवहाणि वा कब्बड-  
 वहाणि वा जाव सणिवेसवहाणि वा कण्णसोयपडियाए अभिसंधारेइ अभिसंधारेंतं  
 वा साइज्जइ ॥ १२४८ ॥ जे भिक्खू गामपहाणि वा जाव सणिवेसपहाणि वा  
 कण्णसोयपडियाए अभिसंधारेइ अभिसंधारेंतं वा साइज्जइ ॥ १२४९-१ ॥ ...  
 गामदाहाणि वा जाव सणिवेसदाहाणि वा ... ॥ १२४९-२ ॥ जे भिक्खू आसकर-  
 णाणि वा हत्थिकरणाणि वा उट्टकरणाणि वा गौणकरणाणि वा महिसकरणाणि  
 वा मज्ज(सूय)रकरणाणि वा कण्णसोयपडियाए अभिसंधारेइ अभिसंधारेंतं वा  
 साइज्जइ ॥ १२५० ॥ जे भिक्खू आसजुद्धाणि वा हत्थिजुद्धाणि वा उट्टजुद्धाणि  
 वा गौणजुद्धाणि वा महिसजुद्धाणि वा ० कण्णसोयपडियाए अभिसंधारेइ अभिसंधारेंतं  
 वा साइज्जइ ॥ १२५१ ॥ जे भिक्खू उज्जहियट्ठाणाणि वा हयज्जहियट्ठाणाणि वा  
 गयज्जहियट्ठाणाणि वा कण्णसोयपडियाए अभिसंधारेइ अभिसंधारेंतं वा साइज्जइ

॥ १२५२ ॥ जे भिक्खू अभिसेय(ठा)ट्टाणाणि वा अक्खाइयट्टाणाणि वा माणुम्मा-  
णट्टाणाणि वा महया ह्यणट्ठगीयवाइयतंतीतलतालुडियपडुप्पवाइयट्टाणाणि वा  
कण्णसोयपडियाए अभिसंधारेइ अभिसंधारेंतं वा साइज्जइ ॥ १२५३ ॥ जे भिक्खू  
डिंवाणि वा डमराणि वा खाराणि वा वेराणि वा महाजुद्धाणि वा महासंगामाणि वा  
कलहाणि वा बोलाणि वा कण्णसोयपडियाए अभिसंधारेइ अभिसंधारेंतं वा साइ-  
ज्जइ ॥ १२५४ ॥ जे भिक्खू विरूवरूवेसु महुरसवेसु इत्थीणि वा पुरिसाणि वा  
थेराणि वा मज्झिमाणि वा डहराणि वा अणलंकियाणि वा सुअलंकियाणि वा गायं-  
ताणि वा वायंताणि वा णच्चंताणि वा हसंताणि वा रमंताणि वा मोहंताणि वा  
विउलं असणं वा ४ परिभायंताणि वा परिभुजंताणि वा कण्णसोयपडियाए अभि-  
संधारेइ अभिसंधारेंतं वा साइज्जइ ॥ १२५५ ॥ जे भिक्खू इहलोइएसु वा  
सदेसु परलोइएसु वा सदेसु विट्ठेसु वा सदेसु अदिट्ठेसु वा सदेसु सुएसु वा सदेसु  
असुएसु वा सदेसु विण्णाएसु वा सदेसु...सज्जइ रज्जइ गिज्जइ अज्झोववज्जइ सज्जंतं  
रज्जंतं गिज्जंतं अज्झोववज्जंतं वा साइज्जइ । तं सेवमाणे आवज्जइ चाउम्मासियं  
परिहारट्टाणं उग्घाइयं ॥ १२५६ ॥ **णिसीहऽज्झयणे सत्तरसमो उद्देसो**  
**समत्तो ॥ १७ ॥**

### अट्टारसमो उद्देसो

जे भिक्खू अणट्टाए णावं दुरूहइ दुरूहंतं वा साइज्जइ ॥ १२५७ ॥ जे भिक्खू  
णावं किणइ किणावेइ कीयं आहट्टु देज्जमाणं दुरूहइ दुरूहंतं वा साइज्जइ ॥ १२५८ ॥  
जे भिक्खू णावं पामिच्चइ पामिच्चावेइ पामिच्चं आहट्टु देज्जमाणं दुरूहइ दुरूहंतं वा  
साइज्जइ ॥ १२५९ ॥ जे भिक्खू णावं परियट्ठेइ परियट्ठावेइ परियट्ठं आहट्टु देज्जमाणं  
दुरूहइ दुरूहंतं वा साइज्जइ ॥ १२६० ॥ जे भिक्खू णावं अच्छेज्जं अणिसिट्ठं  
अभिहडं आहट्टु देज्जमाणं दुरूहइ दुरूहंतं वा साइज्जइ ॥ १२६१ ॥ जे भिक्खू  
थलाओ णावं जले ओकसावेइ ओकसावेंतं वा साइज्जइ ॥ १२६२ ॥ जे भिक्खू  
जलाओ णावं थले उक्कसावेइ उक्कसावेंतं वा साइज्जइ ॥ १२६३ ॥ जे भिक्खू पुण्णं  
णावं उरुसिचइ उरुसिचंतं वा साइज्जइ ॥ १२६४ ॥ जे भिक्खू सण्णं णावं उप्पिला-  
वेइ उप्पिलावेंतं वा साइज्जइ ॥ १२६५ ॥ जे भिक्खू उवद्वियं णावं उत्तिगं वा  
उदगं वा आसिंचमाणि वा उवरुवरि वा कज्जलावेमाणि पेहाए हत्थेण वा पाएण वा  
असिपत्तेण वा कुसपत्तेण वा मट्ठियाए वा चेलेण वा पडिपिहेइ पडिपिहेंतं वा साइज्जइ  
॥ १२६६ ॥ जे भिक्खू पडिणावियं कट्ठु णावाए दुरूहइ दुरूहंतं वा साइज्जइ  
॥ १२६७ ॥ जे भिक्खू उड्ढुगामिणि वा णावं अहोगामिणि वा णावं दुरूहइ दुरूहंतं

वा साइज्जइ ॥ १२६८ ॥ जे भिक्खू जोयणवेलागामिणिं वा अद्धजोयणवेलागामिणिं वा णावं दुरुहइ दुरुहंतं वा साइज्जइ ॥ १२६९ ॥ जे भिक्खू णावं आकसइ आकसावेइ आकसावेतं वा साइज्जइ ॥ १२७० ॥ जे भिक्खू णावं खेवावेइ खेवावेतं वा साइज्जइ ॥ १२७१ ॥ जे भिक्खू णावं रज्जुणा वा कट्ठेण वा कट्ठइ कट्ठंतं वा साइज्जइ ॥ १२७२ ॥ जे भिक्खू णावं अल्लिण्ण वा पप्फिड्ढण्ण वा वंसेण वा बलेण वा वाहेइ वाहेतं वा साइज्जइ ॥ १२७३ ॥ जे भिक्खू णावाओ उदगं भायणेण वा पडिग्गहणेण वा मत्तेण वा णावाउस्सिचणेण वा उस्सिचइ उस्सिचंतं वा साइज्जइ ॥ १२७४ ॥ जे भिक्खू णावं उत्तिगेण उदगं आसवमाणं उवरुवरिं कज्जलावेमाणं (पेहाए) पलोय हत्थेण वा पाएण वा आसत्थ(अस्ति)पत्तेण वा कुसपत्तेण वा मट्ठियाए वा चेलक्कणेण वा पडिपिहेइ पडिपिहेतं वा साइज्जइ ॥ १२७५ ॥ जे भिक्खू णावाओ णावागयस्स असणं वा ४ पडिग्गाहेइ पडिग्गाहेतं वा साइज्जइ ॥ १२७६ ॥ जे भिक्खू णावाओ जलगयस्स असणं वा ४ पडिग्गाहेइ पडिग्गाहेतं वा साइज्जइ ॥ १२७७ ॥ जे भिक्खू णावाओ पंकगयस्स असणं वा ४ पडिग्गाहेइ पडिग्गाहेतं वा साइज्जइ ॥ १२७८ ॥ जे भिक्खू णावाओ थलगयस्स असणं वा ४ पडिग्गाहेइ पडिग्गाहेतं वा साइज्जइ ॥ १२७९ ॥ जे भिक्खू वत्थं किणइ किणावेइ कीयं आहट्ठ देजमाणं पडिग्गाहेइ पडिग्गाहेतं वा साइज्जइ ॥ १२८० ॥ (इओ आरब्भ चउदस-मुद्देसस्स सयलाणिवि सुत्ताणि पडिग्गहठाणे वत्थमुवजुंजिय वत्तव्वाणि जाव) जे भिक्खू वत्थणीसाए वासावासं वसइ वसंतं वा साइज्जइ । तं सेवमाणे आवज्जइ चाउ-म्मासियं परिहारट्ठाणं उग्वाइयं ॥ १३२४ ॥ **गिनीहऽज्झयणे अट्ठारसमो उद्देसो समत्तो ॥ १८ ॥**

### एग्गणवीसइमो उद्देसो

जे भिक्खू चउहिं संज्ञाहिं सज्झायं करेइ करेंतं वा साइज्जइ, तंजहा-पुव्वाए संज्ञाए पच्छिमाए संज्ञाए अवरण्हे अट्ठरत्ते ॥ १३२५ ॥ जे भिक्खू कालियसुयस्स परं तिण्हं पुँच्छाणं पुच्छइ पुच्छंतं वा साइज्जइ ॥ १३२६ ॥ जे भिक्खू दिट्ठियायस्स परं सत्तण्हं पुच्छाणं पुच्छइ पुच्छंतं वा साइज्जइ ॥ १३२७ ॥ जे भिक्खू चउसु महापाडिवएसु सज्झायं करेइ करेंतं वा साइज्जइ तंजहा-सुगिम्हय(चेत्तपुण्णिमा-ओ-वइसाहकिण्ह)पाडिवए, आसादी(पुण्णिमाओ-सावणकिण्ह)पाडिवए, (भइवय-

१ अण्णे आयरिसे सोल्लसभंगा । २ पुच्छा-अपुणरुतं जावइयं कट्ठिउं पुच्छंति सा एगा पुच्छा । अहवा जत्थियं आयरिण तरइ उच्चारियं घेतुं सा एगा पुच्छा । अहवा जत्थ पगयं समप्पइ थोवं वा वहुं वा सा एगा पुच्छा ।

पुण्णिमाओ-आसोय(किण्ह)पाडिवए, कत्तिय(पुण्णिमाओ-मग्गसिरकिण्ह)पाडिवए  
 [वा] ॥ १३२८ ॥ जे भिक्खू पोरिसिं सज्जायं उवाइणावेइ उवाइणावेतं वा साइजइ  
 ॥ १३२९ ॥ जे भिक्खू चउकालं सज्जायं न करेइ न करेतं वा साइजइ ॥ १३३० ॥  
 जे भिक्खू असज्जाइए सज्जायं करेइ करेतं वा साइजइ ॥ १३३१ ॥ जे भिक्खू  
 अप्पणो असज्जाइए सज्जायं करेइ करेतं वा साइजइ ॥ १३३२ ॥ जे भिक्खू  
 हेट्ठिळाइं समोसरणाइं अवाएत्ता उवरिळाइं समोसरणाइं वाएइ वाएंत्तं वा साइजइ  
 ॥ १३३३ ॥ जे भिक्खू णव बंभचेराइं अवाएत्ता उवरिं सुयं वाएइ वाएंत्तं वा  
 साइजइ ॥ १३३४ ॥ जे भिक्खू अपत्तं वाएइ वाएंत्तं वा साइजइ ॥ १३३५ ॥ जे  
 भिक्खू पत्तं ण वाएइ वाएंत्तं वा साइजइ ॥ १३३६ ॥ जे भिक्खू अव्वत्तं वाएइ  
 वाएंत्तं वा साइजइ ॥ १३३७ ॥ जे भिक्खू वत्तं ण वाएइ ण वाएंत्तं वा साइजइ  
 ॥ १३३८ ॥ जे भिक्खू दोण्हं सरिसगाणं एक्कं सं(सि)चिक्खावेइ एक्कं ण संचिक्खावेइ  
 एक्कं वाएइ एक्कं ण वाएइ तं करेतं वा साइजइ ॥ १३३९ ॥ जे भिक्खू आयरिय-  
 उवज्जाएहिं अविदिण्णं गिरं आइयइ आइयंतं वा साइजइ ॥ १३४० ॥ जे  
 भिक्खू अण्णउत्थियगारत्थियं वाएइ वाएंत्तं वा साइजइ ॥ १३४१ ॥ जे भिक्खू  
 अण्णउत्थियगारत्थियं (वायणं) पडिच्छइ पडिच्छंतं वा साइजइ ॥ १३४२ ॥ जे  
 भिक्खू पासत्थं वाएइ वाएंत्तं वा साइजइ ॥ १३४३ ॥ जे भिक्खू पासत्थं पडिच्छइ  
 पडिच्छंतं वा साइजइ ॥ १३४४ ॥ जे भिक्खू ओसण्णं वाएइ वाएंत्तं वा साइजइ  
 ॥ १३४५ ॥ जे भिक्खू ओसण्णं पडिच्छइ पडिच्छंतं वा साइजइ ॥ १३४६ ॥ जे भिक्खू  
 कुसीलं वाएइ वाएंत्तं वा साइजइ ॥ १३४७ ॥ जे भिक्खू कुसीलं पडिच्छइ पडिच्छंतं  
 वा साइजइ ॥ १३४८ ॥ जे भिक्खू णितियं वाएइ वाएंत्तं वा साइजइ ॥ १३४९ ॥  
 जे भिक्खू णितियं पडिच्छइ पडिच्छंतं वा साइजइ ॥ १३५० ॥ जे भिक्खू  
 संसत्तं वाएइ वाएंत्तं वा साइजइ ॥ १३५१ ॥ जे भिक्खू संसत्तं पडिच्छइ पडिच्छंतं  
 वा साइजइ । तं सेवमाणे आवज्जइ चाउम्मासियं परिहारट्ठाणं उग्घाइयं ॥ १३५२ ॥  
**णिसीहऽज्झयणे एगूणवीसइमो उद्देसो समत्तो ॥ १९ ॥**

### वीसइमो उद्देसो

जे भिक्खू मासियं परिहारट्ठाणं पडिसेविता आलोएजा, अपलिउंचिय आलोएमा-  
 णस्स मासियं, पलिउंचिय आलोएमाणस्स दोमासियं ॥ १३५३ ॥ जे भिक्खू


१ अण्णधम्मिओ वाइजंतो वायणाए दुक्खओगं करेज्जति पायच्छित्तठाणं ।  
 २ आगमट्ठो दुरहिगमो परहम्मिओ आगमाणमणहिगमणिजा अट्ठविज्जासं कुणे-  
 ज्जति पायच्छित्तं ।



सियं वा साइरेगचाउम्मासियं वा पंचमासियं वा साइरेगपंचमासियं वा एएसिं परिहार-  
 द्वाणानं अण्णयरं परिहारद्वाणं पडिसेवित्ता आलोएज्जा, अपलिउंचिय आलोएमाणस्स  
 चाउम्मासियं वा साइरेगं वा पंचमासियं वा साइरेगं वा, पलिउंचिय आलोएमाणस्स  
 पंचमासियं वा साइरेगं वा छम्मासियं वा ॥ १३६७-१ ॥ तेण परं पलिउंचिए वा  
 अपलिउंचिए वा ते चेव छम्मासा ॥ १३६७-२ ॥ जे भिक्खू बहुसोवि चाउम्मासियं  
 वा बहुसोवि साइरेगचाउम्मासियं वा बहुसोवि पंचमासियं वा बहुसोवि साइरेगपंचमा-  
 सियं वा एएसिं परिहारद्वाणानं अण्णयरं परिहारद्वाणं पडिसेवित्ता आलोएज्जा, अपलिउं-  
 चिय आलोएमाणस्स बहुसोवि चाउम्मासियं वा बहुसोवि साइरेगं वा बहुसोवि पंचमा-  
 सियं वा बहुसोवि साइरेगं वा, पलिउंचिय आलोएमाणस्स बहुसोवि पंचमासियं वा  
 बहुसोवि साइरेगं वा बहुसोवि छम्मासियं वा ॥ १३६८-१ ॥ तेण परं पलिउंचिए वा  
 अपलिउंचिए वा ते चेव छम्मासा ॥ १३६८-२ ॥ जे भिक्खू चाउम्मासियं वा  
 साइरेगचाउम्मासियं वा पंचमासियं वा साइरेगपंचमासियं वा एएसिं परिहारद्वाणानं  
 अण्णयरं परिहारद्वाणं पडिसेवित्ता आलोएज्जा, अपलिउंचिय आलोएमाणे ठवणिज्जं  
 ठवइत्ता करणिज्जं वेयावडियं, ठविएवि पडिसेवित्ता सेवि कसिणे तत्थेव आरुहेयव्वे  
 सिया, पुव्वि पडिसेवियं पुव्वि आलोइयं, पुव्वि पडिसेवियं पच्छा आलोइयं, पच्छा  
 पडिसेवियं पुव्वि आलोइयं, पच्छा पडिसेवियं पच्छा आलोइयं, अपलिउंचिए अपलि-  
 उंचियं, अपलिउंचिए पलिउंचियं, पलिउंचिए अपलिउंचियं, पलिउंचिए पलिउंचियं  
 आलोएमाणस्स सव्वमेयं सकयं साहणिय जे एयाए पट्टवणाए पट्टविए णिव्विसमाणे  
 पडिसेवेइ सेवि कसिणे तत्थेव आरुहेयव्वे सिया ॥ १३६९ ॥ जे भिक्खू बहुसोवि  
 चाउम्मासियं वा बहुसोवि साइरेगचाउम्मासियं वा (जहा हेट्ठा णवरं बहुसोवि)  
 जाव आरुहेयव्वे सिया एयं पलिउंचिए ॥ १३७० ॥ जे भिक्खू चाउम्मासियं  
 वा...आलोएज्जा, पलिउंचिय आलोएमाणे (जहा हेट्ठा) जाव पलिउंचिए पलिउंचियं,  
 पलिउंचिए पलिउंचियं आलोएमाणस्स...आरुहेयव्वे सिया ॥ १३७१ ॥ जे भिक्खू  
 बहुसोवि चाउम्मासियं वा (जहा हेट्ठा णवरं बहुसोवि) जाव आरुहेयव्वे सिया  
 ॥ १३७२ ॥ छम्मासियं परिहारद्वाणं पट्टविए अणगारे अंतरा दोमासियं परिहार-  
 द्वाणं पडिसेवित्ता आलोएज्जा, अहावरा वीसइराइया आरोवणा आइमज्जावसाणे  
 सअट्ठं सहेउं सकारणं अहीणमइरित्तं, तेण परं सवीसइराइया दो मासा ॥ १३७३ ॥  
 पंचमासियं परिहारद्वाणं (जहा हेट्ठा) जाव दो मासा ॥ १३७४ ॥ चाउम्मासियं  
 परिहारद्वाणं (जहा हेट्ठा) जाव दो मासा ॥ १३७५ ॥ तेमासियं परिहारद्वाणं  
 (जहा हेट्ठा) जाव दो मासा ॥ १३७६ ॥ दोमासियं परिहारद्वाणं (जहा हेट्ठा)

जाव दो मासा ॥ १३७७ ॥ मासियं परिहारट्ठाणं (जहा हेट्ठा) जाव दो मासा  
 ॥ १३७८ ॥ सवीसइराइयं दोमासियं परिहारट्ठाणं पट्ठविण् अणगारे (जहा हेट्ठा)  
 जाव अहीणमइरित्तं, तेण परं सदसराया तिणिण मासा ॥ १३७९ ॥ सदसराय-  
 तेमासियं परिहारट्ठाणं (जहा हेट्ठा) जाव तेण परं चत्तारि मासा ॥ १३८० ॥  
 चाउम्मासियं परिहारट्ठाणं (जहा हेट्ठा) जाव तेण परं सवीसइराया चत्तारि मासा  
 ॥ १३८१ ॥ सवीसइरायचाउम्मासियं परिहारट्ठाणं (जहा हेट्ठा) जाव तेण परं  
 सदसराया पंच मासा ॥ १३८२ ॥ सदसरायपंचमासियं परिहारट्ठाणं (जहा हेट्ठा)  
 जाव तेण परं छम्मासा ॥ १३८३ ॥ छम्मासियं परिहारट्ठाणं पट्ठविण् अणगारे  
 अंतरा मासियं परिहारट्ठाणं पडिसेवित्ता आलोएज्जा, अहावरा पक्खिया आरोवणा  
 आइमज्जावसाणे सअट्ठं सहेउं सकारणं अहीणमइरित्तं, तेण परं दिवङ्घो मासो  
 ॥ १३८४ ॥ पंचमासियं परिहारट्ठाणं (जहा हेट्ठा) जाव दिवङ्घो मासो ॥ १३८५ ॥  
 चाउम्मासियं परिहारट्ठाणं (जहा हेट्ठा) जाव दिवङ्घो मासो ॥ १३८६ ॥  
 तेमासियं परिहारट्ठाणं (जहा हेट्ठा) जाव दिवङ्घो मासो ॥ १३८७ ॥ दोमासियं  
 परिहारट्ठाणं (जहा हेट्ठा) जाव दिवङ्घो मासो ॥ १३८८ ॥ मासियं परिहारट्ठाणं  
 (जहा हेट्ठा) जाव दिवङ्घो मासो ॥ १३८९ ॥ दिवङ्घुमासियं परिहारट्ठाणं पट्ठविण्  
 अणगारे अंतरा मासियं परिहारट्ठाणं पडिसेवित्ता आलोएज्जा, अहावरा पक्खिया  
 आरोवणा आइमज्जावसाणे सअट्ठं सहेउं सकारणं अहीणमइरित्तं, तेण परं दो मासा  
 ॥ १३९० ॥ दोमासियं परिहारट्ठाणं (जहा हेट्ठा) णवरं अट्ठाइज्जा मासा ॥ १३९१ ॥  
 अट्ठाइज्जमासियं परिहारट्ठाणं (जहा हेट्ठा) णवरं तिणिण मासा ॥ १३९२ ॥ तेमा-  
 सियं परिहारट्ठाणं (जहा हेट्ठा) णवरं अट्ठुट्ठा मासा ॥ १३९३ ॥ अट्ठुट्ठुमासियं  
 परिहारट्ठाणं (जहा हेट्ठा) णवरं चत्तारि मासा ॥ १३९४ ॥ चाउम्मासियं परिहार-  
 ट्ठाणं (जहा हेट्ठा) णवरं अट्ठुपंचमा मासा ॥ १३९५ ॥ अट्ठुपंचमासियं परि-  
 हारट्ठाणं (जहा हेट्ठा) णवरं पंच मासा ॥ १३९६ ॥ पंचमासियं परिहारट्ठाणं (जहा  
 हेट्ठा) णवरं अट्ठछट्ठा मासा ॥ १३९७ ॥ अट्ठछट्ठुमासियं परिहारट्ठाणं (जहा हेट्ठा)  
 णवरं छम्मासा ॥ १३९८ ॥ दोमासियं परिहारट्ठाणं पट्ठविण् अणगारे अंतरा मासियं  
 परिहारट्ठाणं पडिसेवित्ता आलोएज्जा, अहावरा पक्खिया आरोवणा आइमज्जावसाणे  
 सअट्ठं सहेउं सकारणं अहीणमइरित्तं, तेण परं अट्ठाइज्जा मासा ॥ १३९९ ॥ अट्ठा-  
 इज्जमासियं...अंतरा दोमासियं...अहावरा वीसिया आरोवणा (जहा हेट्ठा), तेण  
 परं सपंचराइया तिणिण मासा ॥ १४०० ॥ सपंचरायतेमासियं...अंतरा मासियं  
 ...अहावरा पक्खिया आरोवणा (जहा हेट्ठा), तेण परं सवीसइराइया तिणिण मासा

॥ १४०१ ॥ सवीसइरायतेमासियं...अंतरा दोमासियं...अहावरा वीसइराइया अरोवणा (जहा हेट्टा), तेण परं सदसराया चत्तारि मासा ॥ १४०२ ॥ सदसराय-  
चाउम्मासियं...अंतरा मासियं...अहावरा पक्खिया आरोवणा (जहा हेट्टा), तेण  
परं पंचूणा पंच मासा ॥ १४०३ ॥ पंचूणपंचमासियं...अंतरा दोमासियं...अहा-  
वरा वीसइराइया आरोवणा (जहा हेट्टा), तेण परं अद्धछट्ठा मासा ॥ १४०४ ॥  
अद्धछट्ठमासियं...अंतरा मासियं...अहावरा पक्खिया आरोवणा (जहा हेट्टा), तेण  
परं छम्मासा ॥ १४०५ ॥ णिसीहऽज्झयणे वीसइमो उद्देसो समत्तो ॥ २० ॥  
णिसीहसुत्तं समत्तं ॥







नमोऽस्तु नं समणस्स भगवओ णायपुत्तमहावीरस्स

## सुत्तागमे

तत्थ णं

दसासुयक्खंधो

पढमा दसा

सुयं मे आउसं ! तेणं भगवया एवमक्खायं, इह खलु थेरेहिं भगवंतेहिं वी[वी]सं असमाहि[ठ]ट्ठाणा पणत्ता, कयरे खलु ते थेरेहिं भगवंतेहिं वीसं असमाहिट्ठाणा पणत्ता ? इमे खलु ते थेरेहिं भगवंतेहिं वीसं असमाहिट्ठाणा पणत्ता । तंजहा-द्वदवचारी यावि भवइ ॥ १ ॥ अ(ए)पमज्जियचारी यावि भवइ ॥ २ ॥ दुपमज्जियचारी यावि भवइ ॥ ३ ॥ अइरित्तसेज्जासणिए ॥ ४ ॥ राइणि-यपरिभासी ॥ ५ ॥ थेरोवचाइए ॥ ६ ॥ भूओवचाइए ॥ ७ ॥ संजलणे ॥ ८ ॥ कोहणे ॥ ९ ॥ पिट्ठिमंसिए ॥ १० ॥ अभिक्खणं अभिक्खणं ओहा(रि)रइत्ता भवइ ॥ ११ ॥ णवाणं अहिगरणणं अणुप्पण्णाणं उप्पाइत्ता भवइ ॥ १२ ॥ पोराणाणं अहिगरणणं खामिय विउसवियाणं पुणो(उ)वी(रि)रेत्ता भवइ ॥ १३ ॥ अकालसज्जायकारए यावि भवइ ॥ १४ ॥ ससरक्खपाणिपाए ॥ १५ ॥ सइकरे (मेयकरे) ॥ १६ ॥ झंझकरे ॥ १७ ॥ कलहकरे ॥ १८ ॥ सूरप्पमाणमोइ ॥ १९ ॥ एसणाऽसमिए यावि भवइ ॥ २० ॥ एए खलु ते थेरेहिं भगवंतेहिं वीसं असमाहिट्ठाणा पणत्ता ॥ २१ ॥ ति-बेमि ॥ पढमा दसा समत्ता ॥ १॥

## विइया दसा

सुयं मे आउसं ! तेणं भगवया एवमक्खायं, इह खलु थेरेहिं भगवंतेहिं एगवीसं सबला पणत्ता, कयरे खलु ते थेरेहिं भगवंतेहिं एगवीसं सबला पणत्ता ? इमे खलु ते थेरेहिं भगवंतेहिं एगवीसं सबला पणत्ता । तंजहा-हत्थकम्मं करेमाणे सबले ॥ २२ ॥ मेहुणं पडिसेवमाणे सबले ॥ २३ ॥ राइभोयणं भुंजमाणे सबले ॥ २४ ॥ आहाकम्मं भुंजमाणे सबले ॥ २५ ॥ रायपिंडं भुंजमाणे सबले ॥ २६ ॥ (उद्देसियं) कीयं वा पामिच्चं वा अच्छिज्जं वा अणिसिट्ठं वा आहट्ठु दिज्जमाणं वा भुंजमाणे सबले ॥ २७ ॥ अभिक्खणं अभिक्खणं पडियाइक्खेत्ताणं भुंजमाणे सबले ॥ २८ ॥

१ अण्णे आयरिसे पारंमे पंच णमोक्कारोऽहिगो लब्भइ ।

अंतो छण्हं मासाणं गणाओ गणं संक्रममाणे सबले ॥ २९ ॥ अंतो मासस्स तओ दगलेवे करेमाणे सबले ॥ ३० ॥ अंतो मासस्स तओ मा[इंठा]इट्ठाणे करे(सेव)माणे सबले ॥ ३१ ॥ सा[ग]गारियपिंडं भुंजमाणे सबले ॥ ३२ ॥ आउट्टियाए पाणा-इवायं करेमाणे सबले ॥ ३३ ॥ आउट्टियाए मुसावायं वयमाणे सबले ॥ ३४ ॥ आउट्टियाए अदिण्णादाणं गिण्हमाणे सबले ॥ ३५ ॥ आउट्टियाए अणंतरहियाए पुढवीए ठाणं वा सेज्जं वा निसीहियं वा चे[त]एमाणे सबले ॥ ३६ ॥ एवं ससिणि-द्धाए पुढवीए एवं ससरक्खाए पुढवीए ॥ ३७ ॥ एवं आउट्टियाए चित्तमंताए सिलाए चित्तमंताए लेल्लए कोलावासंसि वा दारुए जीवपइट्टिए सअंडे सपाणे सबीए सहरिए सउस्से सउदगे सउत्तिगे पणगदगम(ट्टिय)डीए मक्कडासंताणए तहप्पगारं ठाणं वा सिज्जं वा निसीहियं वा चेएमाणे सबले ॥ ३८ ॥ आउट्टियाए मूलभोयणं वा कंदभोयणं वा खंभोयणं वा तयाभोयणं वा पवालभोयणं वा पत्तभोयणं वा पुप्फ-भोयणं वा फलभोयणं वा वीयभोयणं वा हरियभोयणं वा भुंजमाणे सबले ॥ ३९ ॥ अंतो संवच्छरस्स दस दगलेवे करेमाणे सबले ॥ ४० ॥ अंतो संवच्छरस्स दस माइट्ठाणाइं करेमाणे सबले ॥ ४१ ॥ आउट्टियाए सीओदयवियडवग्गारिय(पाणिणा)-हत्थेण वा मत्तेण वा द[विण्ण]व्वीए वा भायणेण वा असणं वा पाणं वा खाइमं वा साइमं वा पडिगाहिता भुंजमाणे सबले ॥ ४२ ॥ एए खलु ते थेरेहिं भगवंतेहिं एगवीसं सबला पण्णत्ता ॥ ४३ ॥ ति-वेमि ॥ **विइया दसा समत्ता ॥ २ ॥**

### तइया दसा

सुयं मे आउसं ! तेणं भगवया एवमक्खायं, इह खलु थेरेहिं भगवंतेहिं ते[ती]त्तीसं आसायणाओ पण्णत्ताओ, कयरा खलु ताओ थेरेहिं भग-वंतेहिं तेत्तीसं आसायणाओ पण्णत्ताओ ? इमाओ खलु ताओ थेरेहिं भगवंतेहिं तेत्तीसं आसायणाओ पण्णत्ताओ । तंजहा-सेहे रा[य]इणियस्स पुरओ गंता भवइ आसायणा सेहस्स ॥ ४४-४५ ॥ सेहे राइणियस्स सपक्खं गंता भवइ आसायणा सेहस्स ॥ ४६ ॥ सेहे राइणियस्स आसन्नं गंता भवइ आसायणा सेहस्स ॥ ४७ ॥ सेहे राइणियस्स पुरओ चिट्ठिता भवइ आसायणा सेहस्स ॥ ४८ ॥ सेहे राइणियस्स सपक्खं चिट्ठिता भवइ आसायणा सेहस्स ॥ ४९ ॥ सेहे राइणियस्स आसन्नं (ठिच्चा) चिट्ठिता भवइ आसायणा सेहस्स ॥ ५० ॥ सेहे राइणियस्स पुरओ निसीइत्ता भवइ आसायणा सेहस्स ॥ ५१ ॥ सेहे राइणियस्स सपक्खं निसीइत्ता भवइ आसा-यणा सेहस्स ॥ ५२ ॥ सेहे राइणियस्स आसन्नं निसीइत्ता भवइ आसायणा सेहस्स ॥ ५३ ॥ सेहे राइणिणं सद्धि बहिया वियारभूमिं [वा] निक्खंते समाणे तत्थ सेहे

पुव्वतरागं आयमइ पच्छा राइणिण भवइ आसायणा सेहस्स ॥ ५४ ॥ सेहे राइ-  
 णिणं सद्धिं बहिया वियारभूमिं वा विहारभूमिं वा निक्खंते समाणे तत्थ सेहे पुव्वत-  
 रागं आलोएइ पच्छा राइणिण भवइ आसायणा सेहस्स ॥ ५५ ॥ केइ राइणियस्स  
 पुव्वसंलवित्ताए सिया, तं सेहे पुव्वतरागं आलवइ पच्छा राइणिण भवइ आसायणा  
 सेहस्स ॥ ५६ ॥ सेहे राइणियस्स राओ वा वियाले वा वाहरमाणस्स अज्जो ! के  
 सु(त्ते)त्ता के जाग(रे)रा ? तत्थ सेहे जागरमाणे राइणियस्स अपडिसुणेत्ता भवइ  
 आसायणा सेहस्स ॥ ५७ ॥ सेहे असणं वा पाणं वा खाइमं वा साइमं वा पडि-  
 गाहिता तं पु[व्व]व्वामेव सेहतरागस्स आलोएइ पच्छा राइणियस्स भवइ आसा-  
 यणा सेहस्स ॥ ५८ ॥ सेहे असणं वा पाणं वा खाइमं वा साइमं वा पडिगाहिता  
 तं पुव्वामेव सेहतरागस्स उवदंसेइ पच्छा राइणियस्स भवइ आसायणा सेहस्स  
 ॥ ५९ ॥ सेहे असणं वा...पडिगाहिता तं पुव्वामेव सेहतरागं उवणिमंतेइ पच्छा  
 राइणि[ए]यं भवइ आसायणा सेहस्स ॥ ६० ॥ सेहे राइणिण सद्धिं असणं  
 वा पाणं वा खाइमं वा साइमं वा पडिगाहिता तं राइणियं अणापुच्छिता जस्स  
 जस्स इच्छइ तस्स तस्स खद्धं [खंथं] २ तं दलयइ आसायणा सेहस्स ॥ ६१ ॥  
 सेहे असणं वा ४ पडिगाहिता राइणिणं सद्धिं भुंजमाणे तत्थ सेहे खद्धं २  
 डागं डागं ऊसढं ऊसढं रसियं रसियं मणुजं मणुजं मणामं मणामं निद्धं निद्धं  
 लुक्खं लुक्खं आहारित्ता भवइ आसायणा सेहस्स ॥ ६२ ॥ सेहे राइणियस्स  
 वाहर(आलव)माणस्स अपडिसुणिता भवइ आसायणा सेहस्स ॥ ६३ ॥ सेहे राइ-  
 णियस्स वाहरमाणस्स तत्थ गए चेव पडिसुणिता भवइ आसायणा सेहस्स ॥ ६४ ॥  
 सेहे राइणियस्स किंति-वत्ता भवइ आसायणा सेहस्स ॥ ६५ ॥ सेहे राइणियं तुमंति-  
 वत्ता भवइ आसायणा सेहस्स ॥ ६६ ॥ सेहे राइणियं खद्धं खद्धं वत्ता भवइ  
 आसायणा सेहस्स ॥ ६७ ॥ सेहे राइणियं तज्जाएणं [२] पडिहणिता भवइ आसा-  
 यणा सेहस्स ॥ ६८ ॥ सेहे राइणियस्स क्हं कहेमाणस्स इति एवं वत्ता भवइ  
 आसायणा सेहस्स ॥ ६९ ॥ सेहे राइणियस्स क्हं कहेमाणस्स णो सुमरसीति वत्ता  
 भवइ आसायणा सेहस्स ॥ ७० ॥ सेहे राइणियस्स क्हं कहेमाणस्स णो सुमणसे  
 भवइ आसायणा सेहस्स ॥ ७१ ॥ सेहे राइणियस्स क्हं कहेमाणस्स परिंसे भेत्ता  
 भवइ आसायणा सेहस्स ॥ ७२ ॥ सेहे राइणियस्स क्हं कहेमाणस्स क्हं अच्छि-  
 दित्ता भवइ आसायणा सेहस्स ॥ ७३ ॥ सेहे राइणियस्स क्हं कहेमाणस्स तीसे  
 परिसाए अणुट्ठियाए अभिन्नाए अवुच्छिन्नाए अवोण्डाए दो(डु)व्वं पि तच्चं पि तमेव  
 क्हं कहित्ता भवइ आसायणा सेहस्स ॥ ७४ ॥ सेहे राइणियस्स सिज्जासंथारगं

पाएणं संघट्ठिता हत्थेण अणणुतावित्ता (अणणु(णवे)वित्ता) गच्छइ भवइ आसा-  
यणा सेहस्स ॥ ७५ ॥ सेहे राइणियस्स सिज्जासंथारए चिट्ठिता वा निसीइत्ता वा  
तुयट्ठिता वा भवइ आसायणा सेहस्स ॥ ७६ ॥ सेहे राइणियस्स उच्चासणंसि वा  
समासणंसि वा चिट्ठिता वा निसीइत्ता वा तुयट्ठिता वा भवइ आसायणा सेहस्स  
॥ ७७ ॥ एयाओ खलु ताओ थेरेहिं भगवंतेहिं तेत्तीसं आसायणाओ पण्णत्ताओ  
॥ ७८ ॥ त्ति-वेमि ॥ तइया दसा समत्ता ॥ ३ ॥

### चउत्था दसा

सुयं मे आउसं ! तेणं भगवया एवमक्खायं, इह खलु थेरेहिं भगवंतेहिं अट्ठविहा  
गणिसंपया पण्णत्ता, कयरा खलु अट्ठविहा गणिसंपया पण्णत्ता ? इमा खलु अट्ठविहा  
गणिसंपया पण्णत्ता । तंजहा—आयारसंपया १, सुयसंपया २, सरीरसंपया ३,  
वयणसंपया ४, वायणासंपया ५, मइसंपया ६, पओगसंपया ७, संगहपरिज्जा(नाम)  
अट्ठमा ८ । से किं तं आयारसंपया ? आयारसंपया चउव्विहा पण्णत्ता । तंजहा-  
संजमधुवजोगजुत्ते यावि भवइ, असंपगहियअप्पा, अणिययवित्ती, वुड्ढसीले यावि भवइ ।  
से तं आयारसंपया ॥ ७९ ॥ से किं तं सुयसंपया ? सुयसंपया चउव्विहा पण्णत्ता ।  
तंजहा-बहुसु(त्ते)ए यावि भवइ, परिन्चियसुए यावि भवइ, विचित्तसुए यावि भवइ,  
घोसविमुद्धिकारए यावि भवइ । से तं सुयसंपया ॥ ८० ॥ से किं तं सरीरसंपया ?  
सरीरसंपया चउव्विहा पण्णत्ता । तंजहा-आरोहपरिणाहसंपन्ने यावि भवइ, अणोत्प-  
सरीरे, थिरसंघयणे, बहुपडिपुण्णिदिए यावि भवइ । से तं सरीरसंपया ॥ ८१ ॥ से  
किं तं वयणसंपया ? वयणसंपया चउव्विहा पण्णत्ता । तंजहा-आदेयवयणे यावि  
भवइ, महुरवयणे यावि भवइ, अणित्तिसयवयणे यावि भवइ, असंदिद्धवयणे यावि  
भवइ । से तं वयणसंपया ॥ ८२ ॥ से किं तं वायणासंपया ? वायणासंपया चउव्विहा  
पण्णत्ता । तंजहा-विजयं उहिसइ, विजयं वाएइ, परिनिव्वावियं वाएइ, अत्थनिज्जा-  
वए यावि भवइ । से तं वायणासंपया ॥ ८३ ॥ से किं तं मइसंपया ? मइसंपया  
चउव्विहा पण्णत्ता । तंजहा-उग्गहमइसंपया, ईहामइसंपया, अवायमइसंपया,  
धारणामइसंपया । से किं तं उग्गहमइसंपया ? उग्गहमइसंपया छव्विहा पण्णत्ता ।  
तंजहा-खिप्पं उगिण्हेइ, बहु उगिण्हेइ, बहुविहं उगिण्हेइ, धुवं उगिण्हेइ, अणित्तिसयं  
उगिण्हेइ, असंदिद्धं उगिण्हेइ । से तं उग्गहमइसंपया । एवं ईहामइवि । एवं अवाय-  
मइवि । से किं तं धारणामइसंपया ? धारणामइसंपया छव्विहा पण्णत्ता । तंजहा-  
बहु धरेइ, बहुविहं धरेइ, पोराणं धरेइ, दुद्धरं धरेइ, अणित्तिसयं धरेइ, असंदिद्धं  
धरेइ । से तं धारणामइसंपया ॥ ८४ ॥ से किं तं पओगमइसंपया ? पओगमइसंपया

चउव्विहा पण्णत्ता । तंजहा—आयं विदाय वायं पउंजित्ता भवइ, परिसं विदाय वायं पउंजित्ता भवइ, खेतं विदाय वायं पउंजित्ता भवइ, वत्थु विदाय वायं पउंजित्ता भवइ । से तं पओगमइसंपया ॥ ८५ ॥ से किं तं संगहपरिच्चा नामं संपया ? संगह-परिच्चा नामं संपया चउव्विहा पण्णत्ता । तंजहा—वासावासेसु खेतं पडिलेहिता भवइ बहुजणपाउग्गयाए, बहुजणपाउग्गयाए पाडिहारियपीढफलगसेज्जासंथारयं उगिण्हित्ता भवइ, कालेणं कालं समाणइत्ता भवइ, अहागुरु संपूएत्ता भवइ । से तं संगहपरिच्चा नामं संपया ॥ ८६ ॥ आयरिओ अंतेवासी इमाए चउव्विहाए विणयपडिवत्तीए विणइत्ता भवइ निरणत्तं गच्छइ । तंजहा—आयारविणएणं, सुयविणएणं, विक्खेवणाविणएणं, दोसनिग्घायणविणएणं ॥ ८७ ॥ से किं तं आयारविणए ? आयारविणए चउव्विहे पण्णत्ते । तंजहा—संजमसा(स)मायारी यावि भवइ, तवसामायारी यावि भवइ, गणसा-मायारी यावि भवइ, एगल्लविहारसामायारी यावि भवइ । से तं आयारविणए ॥ ८८ ॥ से किं तं सुयविणए ? सुयविणए चउव्विहे पण्णत्ते । तंजहा—सुत्तं वाएइ, अत्थं वाएइ, हियं वाएइ, निस्सेसं वाएइ । से तं सुयविणए ॥ ८९ ॥ से किं तं विक्खे-वणाविणए ? विक्खेवणाविणए चउव्विहे पण्णत्ते । तंजहा—अदिट्ठधम्मं दिट्ठपुव्व-गत्ताए विणएइत्ता भवइ, दिट्ठपुव्वगं साहम्मियत्ताए विणएइत्ता भवइ, चुय-धम्माओ धम्मे ठावइत्ता भवइ, तस्सेव धम्मस्स हियाए सुहाए खमाए निस्सेसाए अणुगामिय-त्ताए अब्भुट्ठेत्ता भवइ । से तं विक्खेवणाविणए ॥ ९० ॥ से किं तं दोसनिग्घायणा-विणए ? दोसनिग्घायणाविणए चउव्विहे पण्णत्ते । तंजहा—कुड्डस्स कोहविणएत्ता भवइ, दुड्डस्स दोसं णिगिण्हित्ता भवइ, कंखियस्स कंखं छिंदित्ता भवइ, आयासुप्प-णिहिए यावि भवइ । से तं दोसनिग्घायणाविणए ॥ ९१ ॥ तस्सेवं गुणजाइयस्स अंतेवासिस्स इमा चउव्विहा विणयपडिवत्ती भवइ । तंजहा—उवगरणउप्पायणया, साहिल्लया, वण्णसंजलणया, भारपच्चोरुहणया ॥ ९२ ॥ से किं तं उवगरणउप्पाय-णया ? उवगरणउप्पायणया चउव्विहा पण्णत्ता । तंजहा—अणुप्पण्णाणं उवगरणाणं उप्पाइत्ता भवइ, पोरणाणं उवगरणाणं सारक्खित्ता संगोवित्ता भवइ, परित्तं जाणित्ता पञ्चुद्धरित्ता भवइ, अहाविहि संविभइत्ता भवइ । से तं उवगरणउप्पायणया ॥ ९३ ॥ से किं तं साहिल्लया ? साहिल्लया चउव्विहा पण्णत्ता । तंजहा—अणुलोमवइसहिए यावि भवइ, अणुलोमकायकिरियत्ता, पडिरूवकायसंफासणया, सव्वत्थेसु अपडि-लोमया । से तं साहिल्लया ॥ ९४ ॥ से किं तं वण्णसंजलणया ? वण्णसंजलणया चउव्विहा पण्णत्ता । तंजहा—अहातच्चाणं वण्णवाई भवइ, अवण्णवाई पडिहणित्ता भवइ, वण्णवाई अणुबूहित्ता भवइ, आयवुद्धसेवी यावि भवइ । से तं वण्णसंजलणया

॥ ९५ ॥ से किं तं भारपच्चोरुहणया ? भारपच्चोरुहणया चउव्विहा पण्णत्ता । तंजहा-  
असंगहियपरिजणसंगहिता भवइ, सेहं आयारगोयर-संगाहिता भवइ, साहम्मियस्स  
गिलायमाणस्स अहाथामं वेयावच्चे अब्भुट्ठिता भवइ, साहम्मियाणं अहिगरणंसि उप्प-  
णंसि तत्थ अणिसिओवस्सिए [वसित्तो] अपक्खग[गहिय]गाही मज्झत्थभावभूए सम्मं  
ववहरमाणे तस्स अहिगरणस्स खमावणाए विउसमण्याए सयासमियं अब्भुट्ठिता  
भवइ, कहं नु साहम्मिया अप्पसद्दा अप्पद्दंशा अप्पकलहा अप्पकसाया अप्पतुमंतुमा  
संजमवहुला संवरवहुला समाहिवहुला अप्पमत्ता संजमेणं तवसा अप्पाणं भावेमाणाणं  
एवं च णं विहरेजा । से तं भारपच्चोरुहणया ॥ ९६ ॥ एसा खलु थेरेहिं भगवंतेहिं  
अट्ठविहा गणिसंपया पण्णत्ता ॥ ९७ ॥ ति-वेमि ॥ चउत्था दसा समत्ता ॥ ४ ॥

### पंचमा दसा

सुयं मे आउसं ! तेणं भगवया एवमक्खायं, इह खलु थेरेहिं भगवंतेहिं दस  
चित्तसमाहिठाणा पण्णत्ता, कयरे खलु ते थेरेहिं भगवंतेहिं दस चित्तसमाहिठाणा  
पण्णत्ता ? इमे खलु ते थेरेहिं भगवंतेहिं दस चित्तसमाहिठाणा पण्णत्ता । तंजहा-  
तेणं कालेणं तेणं समएणं वाणियगामे णयरे होत्था, एत्थं णयरवण्णओ भाणियव्वो ।  
तस्स णं वाणियगामस्स णयरस्स वहिया उत्तरपुरच्छिमे दिसीभाए दूइपलासए णामं  
उजाणे होत्था, वण्णओ । जियसत्तू राया, तस्स धारणी नामं देवी, एवं सव्वं  
समोसरणं भाणियव्वं जाव पुढवीसिलापट्टए सामी समोसडे, परिसा निग्गया,  
धम्मो कहिओ, परिसा पडिगया ॥ ९८ ॥ अज्जो ! [इ]ति समणे भगवं महावीरे  
समणा निग्गंथा निग्गंथीओ य आसंतिता एवं वयासी-“इह खलु अज्जो ! निग्गं-  
थाण वा निग्गंथीण वा इरियासमियाणं भासासमियाणं एसणासमियाणं आयाण-  
भंडमत्तनिकखेवणासमियाणं उच्चारपासवणखेलजल्लसिंघाणपारिठावणियासमियाणं मण-  
समियाणं व[वा]यसमियाणं कायसमियाणं मणगुत्तीणं वायगुत्तीणं कायगुत्तीणं गुत्तिदि-  
याणं गुत्तवंभयारीणं आयट्ठीणं आयहियाणं आयजोईणं आयपरक्कमाणं सुसमाहि-  
पत्ताणं झियायमाणानं इमाइं दस चित्तसमाहिठाणाइं असमुप्पण्णपुव्वाइं समुप्प-  
जेजा । तंजहा-धम्मचिंता वा से असमुप्पण्णपुव्वा समुप्पजेजा सव्वं धम्मं  
जाणितए ॥ ९९ ॥ सुमिणंदंसणे वा से असमुप्पण्णपुव्वे समुप्पजेजा अहातच्चं  
सुमिणं पासित्तए ॥ १०० ॥ सण्णिजाइसरणेणं सण्णिणा(णे)णं वा से असमुप्पण्णपुव्वे  
समुप्पजेजा (पुव्वभवे) अप्पणो पोराणियं जाइं सुमरितए ॥ १०१ ॥ देवदंसणे वा से  
असमुप्पण्णपुव्वे समुप्पजेजा दिवं देविद्धिं दिवं देवजुइं दिवं देवाणुभावं पासित्तए  
॥ १०२ ॥ ओहिणाणे वा से असमुप्पण्णपुव्वे समुप्पजेजा ओहिणा लोगं जाणित्तए

॥ १०३ ॥ ओहिदंसणे वा से असमुप्पण्णपुव्वे समुप्पजेज्जा ओहिणा लोयं पासि-  
त्तए ॥ १०४ ॥ मणपज्जवणाणे वा से असमुप्पण्णपुव्वे समुप्पजेज्जा अंतो मणुस्स-  
विस्वत्तेसु अट्ठाइज्जेसु दीवससुइसु सण्णीणं पंचिदियाणं पज्जत्ताणं मणोगए भावे  
जाणित्तए ॥ १०५ ॥ केवलणाणे वा से असमुप्पण्णपुव्वे समुप्पजेज्जा केव(लं)लकप्पं  
लो(गं)यालोयं जाणित्तए ॥ १०६ ॥ केवलदंसणे वा से असमुप्पण्णपुव्वे समुप्पजेज्जा  
केवलकप्पं लोयालोयं पासित्तए ॥ १०७ ॥ केव(लि)लमर(णं)णे वा से असमुप्पण्णपुव्वे  
समुप्पजे(मरि)ज्जा सव्वदुक्खपही[हा]णाए ॥ १०८ ॥ ओयं चित्तं समादाय, ज्ञाणं स-  
मुप्पज्जइ । धम्मं ठिओ अविमणो, निव्वाणमभिगच्छइ ॥ १०९ ॥ ण इमं चित्तं समादाय,  
भुज्जो लोयंसि जायइ । अप्पणो उत्तमं ठाणं, सण्णिणाणेण जाणइ ॥ ११० ॥ अहातच्चं  
तु सुमिणं, खिप्पं पासेइ संवुडे । सव्वं वा ओहं तरइ, दुक्खदोय विमुच्चइ ॥ १११ ॥  
पंताइं भयमाणस्स, विवित्तं सयणासणं । अप्पाहारस्स दंतस्स, देवा दंसेति ताइणो  
॥ ११२ ॥ सव्वकामविरत्तस्स, खमणो भयमेरवं । तथो से ओही भवइ, संजयस्स  
तवस्सिणो ॥ ११३ ॥ तवसा अवहट्ठेस्सस्स, दंसणं परिसुज्झइ । उट्ठं अहे तिरियं  
च, सव्वं समणुप्पसइ ॥ ११४ ॥ सुसमाहियेस्सस्स, अवितकस्स भिक्खुणो ।  
सव्वओ विप्पमुक्कस्स, आया जाणाइ पज्जवे ॥ ११५ ॥ जया से णाणावरणं, सव्वं  
होइ खयं गयं । तओ लोगमलोगं च, जिणो जाणइ केवली ॥ ११६ ॥ जया से  
दरिसणावरणं, सव्वं होइ खयं गयं । तओ लोगमलोगं च, जिणो पासइ केवली  
॥ ११७ ॥ पडिमाए विसुद्धाए, मोहणिज्जं खयं ग[यं]ए । असेसं लोगमलोगं च,  
पासेइ सुसमाहिए ॥ ११८ ॥ जहा मत्थय-सूईए, हंताए हम्मइ तले । एवं कम्माणि  
हम्मंति, मोहणिजे खयं गए ॥ ११९ ॥ सेणावइंमि निहए, जहा सेणा पणस्सइ ।  
एवं कम्माणि णस्संति, मोहणिजे खयं गए ॥ १२० ॥ धूमहीणो जहा अग्गी,  
खीयइ से निरिंधणे । एवं कम्माणि खीयंति, मोहणिजे खयं गए ॥ १२१ ॥ सुक्कमूले  
जहा ख्वे, सिंचमाणे ण रोहइ । एवं कम्मा ण रोहंति, मोहणिजे खयं गए  
॥ १२२ ॥ जहा दट्ठाणं बीयाणं, न जायंति पुणंकुरा । कम्मवीएसु दट्ठेसु, न  
जायंति भवंकुरा ॥ १२३ ॥ चिच्चा ओरालियं बौद्धिं, नामगो(त्तं)यं च केवली ।  
आउयं वेयणिजं च, छित्ता भवइ नीरए ॥ १२४ ॥ एवं अभिसमागम्म, चित्तमादाय  
आउसो । सेणिसुद्धिमुवागम्म, आया सुद्धि(सोहि)मुवागइ ॥ १२५ ॥ त्ति-वेमि ॥  
पंचमा दसा समत्ता ॥ ५ ॥

### छट्ठा दसा

सुयं मे आउसं ! तेणं भगवया महावीरेणं एवमक्खायं, इह खलु थेरेहिं भगवंतेहिं



ए(इ)क्कारस उवासगपडिमाओ पण्णत्ताओ, कयरा खलु ताओ थेरेहिं भगवंतेहिं एक्कारस उवासगपडिमाओ पण्णत्ताओ? इमाओ खलु ताओ थेरेहिं भगवंतेहिं एक्कारस उवासगपडिमाओ पण्णत्ताओ । तंजह्हा-अकिरियवाई यावि भवइ, नाहियवाई, नाहियपण्णे, नाहियदिट्ठी, णो सम्मावाई, णो णितियावाई, ण संति परलोगवाई, णत्थि इहलोए, णत्थि परलोए, णत्थि माया, णत्थि पिया, णत्थि अरिहंता, णत्थि चक्कवट्ठी, णत्थि वलदेवा, णत्थि वासुदेवा, णत्थि गिरया, णत्थि णेरइया, णत्थि सुकडदुकडणं फलवित्तिविसेसो, णो सुच्चिण्णा कम्मा सुच्चिण्णा फला भवंति, णो दुच्चिण्णा कम्मा दुच्चिण्णा फला भवंति, अफले कल्लाणपावए, णो पच्चायंति जीवा, णत्थि गिरए, णत्थि सिद्धी, से एवंवाई एवंपण्णे एवंदिट्ठी एवंछंदरागमइणिविट्ठे यावि भवइ ॥ १२६ ॥ से भवइ महिंछे महारंभे महापरिग्गहे अहम्मिए अहम्माणुए अहम्मसेवी अहम्मिद्वे अहमक्खाई अहम्मरागी अहम्मपलोई अहम्मजीवी अहम्मपलज्जणे अहम्मसीलसमुदायारे अहम्मेणं चेव वित्तिं कपेमाणे विरहइ ॥ १२७ ॥ “हण छिंद भिंद” विक्कए लोहियपाणी चंडे सहे खुदे असमिक्खियकारी साहस्सिए उक्कंचणवंचणमाइनियडिकूड ० साइसंपओगबहुले दुस्सीले दुप्परिचए दुचरिए दुरण्णेए दुव्वए दुप्पडियाणंदे निस्सीले निव्वए निग्गुणे निम्मेरे निप्पच्चक्खाणपोसहोववासे असाहू ॥ १२८ ॥ सव्वाओ पाणाइवायाओ अप्पडिविरया जावजीवाए जाव सव्वाओ परिग्गहाओ, एवं जाव सव्वाओ कोहाओ सव्वाओ माणाओ सव्वाओ मायाओ सव्वाओ लोभाओ पेज्जाओ दोसाओ कलहाओ अब्भक्खाणाओ पेसुण्णपरपरिवायाओ अरइरइमायामोसाओ मिच्छादंसणसल्लाओ अप्पडिविरया जावजीवाए ॥ १२९ ॥ सव्वाओ कसायदंतकट्ठण्णमहणविलेवणसद्धफरिसरसुव्वगंधमल्लाऽलंकाराओ अप्पडिविरया जावजीवाए, सव्वाओ सगडरहजाणजुगिगिच्छिथिल्लिसीयासंदमाणिआसयणासणजाणवाहणभोयणपवित्थरविहीओ अप्पडिविरया जावजीवाए ॥ १३० ॥ असमिक्खियकारी सव्वाओ आसहत्थिगोमहिसाओ गवेलयदासदासीकम्मकरपोरुसाओ अप्पडिविरया जावजीवाए, सव्वाओ कयविक्रयमासद्धमासुव्वगसंववहाराओ अप्पडिविरया जावजीवाए, सव्वाओ हिरणसुवण्णधणधम्मणिमोत्तियसंखसिलप्पवालाओ अप्पडिविरया जावजीवाए, सव्वाओ कूडतुलकूडमाणो अप्पडिविरया जावजीवाए, सव्वाओ आरंभसमारंभाओ अप्पडिविरया जावजीवाए, सव्वाओ पयणपयावणाओ अप्पडिविरया जावजीवाए, सव्वाओ करणकरावणाओ अप्पडिविरया जावजीवाए, सव्वाओ कुट्टणपिट्ठणाओ

१ पासह एक्कारसमं समवायं । २ विसेसो सूयगडविइयसुयक्खंधविइयऽज्जायणपढमकिरियट्ठानऽहम्मपक्खाओ णायव्वो ।

तज्जणतालणाओ वहंबंधपरिकिलेसाओ अप्पडिविरया जावजीवाए, जेयावण्णे तहप्प-  
गारा सावज्जा अबोहिया कम्मा कज्जंति परपाणपरियावणक[डा]रा कज्जंति तओवि य  
अप्पडिविरया जावजीवाए ॥ १३१ ॥ से जहानामए-केइ पुरिसे कलममसूरतिल-  
मुग्गमासनिप्फावकुलत्थआलिसंदगजवजवा एवमाइएहिं अयत्ते कूरे मिच्छादंडं पउं-  
जइ एवामेव तहप्पगारे पुरिसजाए तित्तिरवट्ठगलावयकवोयकविंजलमियमहिसवराह-  
गाहगोहकुम्मसरिसवाइएहिं अयत्ते कूरे मिच्छादंडं पउंजइ ॥ १३२ ॥ जावि य से  
वाहिरिया परिसा भवइ, तंजहा-दासेइ वा पेसेइ वा भित्तएइ वा भाइल्लेइ वा कम्म-  
करेइ वा भोगपुरिसेइ वा तेसिंपि य णं अण्णयरगंसि अहालहुयंसि अवराहंसि सय-  
मेव गरुयं दंडं वत्तेइ, तंजहा-इमं दंडेइ, इमं मुंडेइ, इमं तजेइ, इमं तालेइ, इमं  
अंदुयवंधणं करेइ, इमं नियलवंधणं करेइ, इमं हडिबंधणं करेइ, इमं चारगबंधणं  
करेइ, इमं नियलजुयलसंकोडियमोडियं करेइ, इमं हत्थछिन्नयं करेइ, इमं पायछि-  
न्नयं करेइ, इमं कन्नछिन्नयं करेइ, इमं नक्कछिन्नयं करेइ, इमं उट्ठछिन्नयं करेइ, इमं  
सीसछिन्नयं करेइ, इमं मुहछिन्नयं करेइ, इमं वेयछिन्नयं करेइ, इमं हियउप्पाडियं  
करेइ, एवं नयण-वसण-दंसण-वयण-जिब(भु)भ-उप्पाडियं करेइ, इमं उल्लंघियं करेइ,  
इमं घासियं०, इमं घोलियं०, इमं सला[का(पो)यत]इयं०, इमं सलाभिन्नं०, इमं  
खारवत्तियं करेइ, इमं दब्भवत्तियं करेइ, इमं सीहपुच्छयं करेइ, इमं वसभपुच्छयं  
करेइ, इमं द्वग्गिदब्धयं करेइ, इमं काक(णि)णीमंसखावियं करेइ, इमं भत्तपाण-  
निरुद्धयं करेइ, जावजीवबंधणं करेइ, इमं अन्नयरेणं असुभकुमारेणं मारेइ ॥ १३३ ॥  
जावि य से अब्भितरिया परिसा भवइ, तंजहा-मायाइ वा पियाइ वा भायाइ वा  
भगिणीइ वा भज्जाइ वा धूयाइ वा सुण्हाइ वा तेसिंपि य णं अण्णयरसि अहाल-  
हुयंसि अवराहंसि सयमेव गरुयं दंडं वत्तेइ, तंजहा-सीओदगवियडंसि कायं बोलित्ता  
भवइ, उसिणोदगवियडेण कायं सिंचित्ता भवइ, अगणिकाएण कायं उड्ढित्ता भवइ,  
जोत्तेण वा वेत्तेण वा नेत्तेण वा कसेण वा छिवाडीए वा लयाए वा पासाइ उड्ढालित्ता  
भवइ, दंडेण वा अट्ठीण वा मुट्ठीण वा लेलुएण वा कवालेण वा कायं आउट्ठित्ता  
भवइ, तहप्पगारे पुरिसजाए संवसमाणे दुम्मणा भवंति, तहप्पगारे पुरिसजाए  
विप्पवसमाणे सुमणा भवंति ॥ १३४ ॥ तहप्पगारे पुरिसजाए दंडमासी दंडगरुए  
दंडपुरेक्खडे अहिए अस्सि लोयंसि अहिए परंसि लोयंसि । ते दुक्खेति सोयंति एवं  
झरंति तिप्पंति पिट्ठंति परितप्पंति, ते दुक्खणसोयणझरणतिप्पणपिट्ठणपरितप्पण-  
वहंबंधपरिकिलेसाओ अप्पडिविरया भवंति ॥ १३५ ॥ एवामेव ते इत्थिकामभोगेहिं  
मुच्छिय्या गिद्धा गदिया अज्झोववन्ना जाव वासाइं चउपंच[मा]छदसमाणि वा

अप्पतरो वा भुज्जतरो वा कालं भुंजिता कामभोगाई पसेवित्तावे राययणाई संचिणिता बहुयं पावाइं कम्माइं उसञ्जं संमारकडेण कम्मुणा से जहानामए-अयगोलेइ वा सेल-गोलेइ वा उदयंसि पक्खित्ते समाणे उदगतलमइवइत्ता अहे धर(णि)णीयले पइट्ठाणे भवइ एवामेव तहप्पगारे पुरिसजाए वज्जवहुले धुत्तवहुले पंकवहुले वेरवहुले दंम-नियडिसाइवहुले आसायणावहुले अयसवहुले अप्पत्तियवहुले उस्सण्णं तसपाणवाइ कालमासे कालं किच्चा धरणीयलमइवइत्ता अहे नरगधरणीयले पइट्ठाणे भवइ ॥ १३६ ॥ ते णं नरगा अंतो वट्ठा वाहिं चउरंसा अहे खुरप्पसंठाणसंठिया निच्चं-यारतमसा ववगयगहचंदसूरणक्खत्तजोइसप्पहा मेदवसामंसरहिरपूयपडलचिक्खल्ल-लित्ताणुलेवणतला असु(इं)इ[वि]वीसा परमदुब्भिगंधा काउयअगणिवण्णाभा कक्खड-फासा दुरहियासा असुभा नरगा असुभा नरएसु वेयणा, नो चेव णं नरए नेरइया निहायंति वा पयलायंति वा सुइं वा रइं वा धिइं वा मइं वा उवलभंति, ते णं तत्थ उज्जलं विउलं पगाढं कक्कसं कडुयं चंडं दुक्खं दुग्गं तिक्खं तिव्वं दु[क्ख]रहियासं नरएसु नेरइया नरयवेयणं पच्चणुभवमाणा विहरंति ॥ १३७ ॥ से जहानागए-रक्खे सिया पव्वयग्गे जाए मूलछिन्ने अग्गे गरुए जओ निञ्जं जओ दुग्गं जओ विसमं तओ पवडइ एवामेव तहप्पगारे पुरिसजाए गब्भाओ गब्भं जम्माओ जम्मं माराओ मारं दुक्खाओ दुक्खं दाहिणगामिनेरइए कण्हपक्खिए आगमे-स्साणं दुट्ठभवोहिए यावि भवइ । से तं अकिरियावाइ [यावि भवइ] ॥ १३८ ॥ से किं तं किरियावाइ [यावि भवइ]? तंजहा-आहियावाइ, आहियपणे, आहिय-दिट्ठी, सम्मावाइ, नियावाइ, संति परलोगवाइ, अत्थि इहलोगे, अत्थि परलोगे, अत्थि माया, अत्थि पिया, अत्थि अरिहंता, अत्थि चक्खवट्ठी, अत्थि बलदेवा, अत्थि वासुदेवा, अत्थि सुकडदुक्कडाणं कम्माणं फलवित्तिविसेसे, सुचिण्णा कम्मा सुचिण्णा फला भवंति, दुचिण्णा कम्मा दुचिण्णा फला भवंति, सफले कल्लाणपावए, पच्चायंति जीवा, अत्थि नेरइया जाव अत्थि देवा, अत्थि सिद्धी, से एवंवाइ एवं-पच्चे एवंदिट्ठीलंदरागमइनिविट्ठे यावि भवइ । से भवइ महिच्छे जाव उत्तरगामिए नेरइए सुक्कपक्खिए आगमेस्साणं सुलभवोहिए यावि भवइ । से तं किरियावाइ ॥ १३९ ॥ सव्वधम्मरुइ यावि भवइ, तस्स णं बहूइं सीलवयगुणवेरमणपच्चक्खाण-पोसहोववासाइं नो सम्मं पट्ठवियपुव्वाइं भवंति, एवं उवासगस्स पढमा दंसण-पडिमा ॥ १४० ॥ अहावरा दोच्चा उवासगपडिमा-सव्वधम्मरुइ यावि भवइ, तस्स णं बहूइं सीलवयगुणवेरमणपच्चक्खाणपोसहोववासाइं सम्मं पट्ठवियाइं भवंति, से णं सामाइयं देसावगासियं नो सम्मं अणुपालित्ता भवइ, दोच्चा उवासग-

पडिमा ॥ १४२-१ ॥ अहावरा तच्चा उवासगपडिमा-सव्वधम्मरुई यावि भवइ, तस्स णं बहूइं सीलवयगुणवेरमणपच्चक्खाणपोसहोववासाइं सम्मं पट्टवियाइं भवन्ति, से णं सामाइयं देसावगासियं सम्मं अणुपालित्ता भवइ, से णं चउ(इ)दसि-अट्टमिउद्दिट्ठपुण्णमासिणीसु पडिपुण्णं पोसहोववासं नो सम्मं अणुपालित्ता भवइ, तच्चा उवासगपडिमा ॥ १४२-२ ॥ अहावरा चउत्[थी]था उवासगपडिमा-सव्वधम्मरुई यावि भवइ, तस्स णं बहूइं सीलवयगुणवेरमणपच्चक्खाणपोसहोववासाइं सम्मं पट्टवियाइं भवन्ति, से णं सामाइयं देसावगासियं सम्मं अणुपालित्ता भवइ, से णं चउदसिअट्टमिउद्दिट्ठपुण्णमासिणीसु पडिपुण्णं पोसहं सम्मं अणुपालित्ता भवइ, से णं एगराइयं उवासगपडिमं नो सम्मं अणुपालित्ता भवइ, चउत्था उवासगपडिमा ॥ १४३ ॥ अहावरा पंचमा उवासगपडिमा-सव्वधम्मरुई यावि भवइ, तस्स णं बहूइं सीलवय...जाव सम्मं अणुपालित्ता भवइ, से णं सामाइयं...तहेव, से णं चउदसि...तहेव, से णं एगराइयं उवासगपडिमं सम्मं अणुपालित्ता भवइ, से णं असिणाणए वियडमोई मउलिकडे दिया वंभयारी रत्तिपरिमाणकडे, से णं एयारूवे[ण]णं विहारेणं विहरमाणे जहण्णेणं एगाहं वा दुयाहं वा तियाहं वा उक्कोसेणं पंच मा[सं]से विहरइ, पंचमा उवासगपडिमा ॥ १४४ ॥ अहावरा छ[ट्ठी]ट्ठा उवासगपडिमा-सव्वधम्मरुई यावि भवइ जाव से णं एगराइयं उवासगपडिमं० अणुपालित्ता भवइ, से णं असिणाणए वियडमोई मउलिकडे दिया वा राओ वा वंभयारी, सचित्ताहारे से अपरिणाए भवइ, से णं एयारूवेणं विहारेणं विहरमाणे जहण्णेणं एगाहं वा दुयाहं वा तियाहं वा [जाव] उक्कोसेणं छमासे विहरेजा, छट्ठा उवासगपडिमा ॥ १४५ ॥ अहावरा सत्तमा उवासगपडिमा-सव्वधम्मरुई यावि भवइ जाव राओवरायं वा वंभयारी, सचित्ताहारे से परिणाए भवइ, से णं एयारूवेणं विहारेणं विहरमाणे जहण्णेणं एगाहं वा दुयाहं वा तियाहं वा उक्कोसेणं सत्त मासे विहरेजा, से तं सत्तमा उवासगपडिमा ॥ १४६ ॥ अहावरा अट्ठमा उवासगपडिमा-सव्वधम्मरुई यावि भवइ जाव राओवरायं वंभयारी, सचित्ताहारे से परिणाए भवइ, आरंभे से परिणाए भवइ, पेसारंभे से अपरिणाए भवइ, से णं एयारूवेणं विहारेणं विहरमाणे [जाव] जहण्णेणं एगाहं वा दुयाहं वा तियाहं वा उक्कोसेणं अट्ठ मासे विहरेजा, से तं अट्ठमा उवासगपडिमा ॥ १४७ ॥ अहावरा नवमा उवासगपडिमा-सव्वधम्मरुई यावि भवइ जाव राओवरायं वंभयारी, सचित्ताहारे से परिणाए भवइ, आरंभे से परिणाए भवइ, पेसारंभे से परिणाए भवइ, उद्दिट्ठभत्ते से अपरिणाए भवइ, से णं एयारूवेणं

विहारेणं विहरमाणे जहन्नेणं एगाहं वा दुयाहं वा तियाहं वा उक्कोसेणं नव मासे विहरेजा, से तं नवमा उवासगपडिमा ॥ १४८ ॥ अहावरा दसमा उवासगपडिमा-सव्वधम्मस्सु यावि भवइ जाव उद्धिद्वभत्ते से परिण्णाए भवइ, से णं खुरमुंडए वा सिहाधारए वा, तस्स णं आभट्टस्स समाभट्टस्स वा कप्पंति दुवे भासाओ भासित्तए, जहा-जाणं वा जाणं अजाणं वा णो जाणं, से णं एयारुवेणं विहारेणं विहरमाणे जहन्नेणं एगाहं वा दुयाहं वा तियाहं वा उक्कोसेणं दस मासे विहरेजा, से तं दसमा उवासगपडिमा ॥ १४९ ॥ अहावरा ए[काद]कारसमा उवासगपडिमा-सव्वधम्मस्सु यावि भवइ जाव उद्धिद्वभत्ते से परिण्णाए भवइ, से णं खुरमुंडए वा लुत्तसिरए वा गहियायारभंडगनेवत्थे, जारिसे समणाणं निग्गंथाणं धम्मं पण्णत्ते । तंजहा-सम्मं काएण फासेमाणे पालेमाणे पुरओ जुगमायाए पेहमाणे दद्वूण तसे पाणे उद्धट्टु पाए री(रि)एज्जा, साहट्टु पाए रीएज्जा, तिरिच्छं वा पायं कट्टु रीएज्जा, सइ परक्कमे[ज्जा,] संजयामेव परक्कमेज्जा, नो उज्जुयं गच्छेज्जा, केवलं से नायए पेज्जबंधणे अवोच्छिन्ने भवइ, एवं से कप्पइ नायविहिं वइत्तए ॥ १५० ॥ तत्थ से पुव्वागमणेणं पुव्वाउत्ते चाउलोदणे पच्छाउत्ते भिलिंगसूवे, कप्पइ से चाउलोदणे पडिग्ग[ग]गाहित्तए, नो से कप्पइ भिलिंगसूवे पडिग्गाहित्तए । तत्थ [णं] से पुव्वागमणेणं पुव्वाउत्ते भिलिंगसूवे पच्छाउत्ते चाउलोदणे, कप्पइ से भिलिंगसूवे पडिग्गाहित्तए, नो से कप्पइ चाउलोदणे पडिग्गाहित्तए । तत्थ से पुव्वागमणेणं दोवि पुव्वाउत्ताइं कप्पंति दोवि पडिग्गाहित्तए । तत्थ से पच्छागमणेणं दोवि पच्छाउत्ताइं णो से कप्पंति दोवि पडिग्गाहित्तए । जे से तत्थ पुव्वागमणेणं पुव्वाउत्ते से कप्पइ पडिग्गाहित्तए । जे से तत्थ पुव्वागमणेणं पच्छाउत्ते से नो कप्पइ पडिग्गाहित्तए ॥ १५१ ॥ तस्स णं गाहावइडुलं पिंडवायपडियाए अणुप्पविट्ठस्स कप्पइ एवं वइत्तए “समणोवासगस्स पडिमापडिवन्नस्स भिक्खं दलयह” तं चेव एयारुवेणं विहारेणं विहरमाणे णं केइ पासित्ता वइज्जा-“केइ आउसो ! तुमं वत्तव्वं सिया” “समणोवासए पडिमापडिवन्नए अहमंसीति” वत्तव्वं सिया, से णं एयारुवेणं विहारेणं विहरमाणे जहन्नेणं एगाहं वा दुयाहं वा तियाहं वा उक्कोसेणं एकारस मासे विहरेजा, ए(गा)कारसमा उवासगपडिमा ॥ १५२ ॥ एयाओ खलु ताओ थेरेहिं भगवंतेहिं एकारस उवासगपडिमाओ पण्णत्ताओ ॥ १५३ ॥ त्ति-बेमि ॥ छ(ट्ठी)ट्ठा दसा समत्ता ॥ ६ ॥

### सत्त[मी]मा दसा

सुयं मे आउसं ! तेणं भगवया एवमक्खायं, इह खलु थेरेहिं भगवंतेहिं वारस

भिक्षुपडिमाओ पण्णत्ताओ, कयरा खलु ताओ थेरेहिं भगवंतेहिं वारस भिक्षु-  
पडिमाओ पण्णत्ताओ ? इमाओ खलु ताओ थेरेहिं भगवंतेहिं वारस भिक्षुपडिमाओ  
पण्णत्ताओ । तंजहा—मासिया भिक्षुपडिमा १, दोमासिया भिक्षुपडिमा २,  
तिमासिया भिक्षुपडिमा ३, च(१)उ(२)मासिया भिक्षुपडिमा ४, पंचमासिया  
भिक्षुपडिमा ५, छ(२)मासिया भिक्षुपडिमा ६, सत्तमासिया भिक्षुपडिमा ७, पदमा  
सत्तराईदिया भिक्षुपडिमा ८, दोच्चा सत्तराईदिया भिक्षुपडिमा ९, तच्चा सत्तराई-  
दिया भिक्षुपडिमा १०, अहोरा(इ)ईदिया भिक्षुपडिमा ११, एगराइया भिक्षु-  
पडिमा १२ ॥ १५४ ॥ मासियं णं भिक्षुपडिमं पडिवन्नस्स अणगारस्स निब्बं  
वोसट्ठकाए चियत्तदेहे जे केइ उवसग्गा उवज्जंति, तंजहा—दिक्वा वा, माणसा वा,  
तिरिक्खजोणिया वा, ते उप्पण्णे सम्मं (काएणं) सहइ खमइ तितिक्खइ अहियासेइ  
॥ १५५ ॥ मासियं णं भिक्षुपडिमं पडिवन्नस्स अणगारस्स कप्पइ एगा दत्ती  
भोयणस्स पडिगाहित्ते एगा पाणगस्स, अण्णायउच्चं सुद्धोवहडं निज्झहिता वहवे  
दु[८]पयचउप्पयसमणमाहणअतिहिकिवणवणीमगा, कप्पइ से एगस्स भुंजमाणस्स  
पडिगाहित्ते, णो दुण्हं णो तिण्हं णो चउण्हं णो पंचण्हं, णो गुट्ठिणीए, णो बालवच्छाए,  
णो दारगं पेज्जमाणीए, णो अंतो एल्लयस्स दोवि पाए साट्ठु दलमाणीए, णो  
बा[ब]हिं एल्लयस्स दोवि पाए साट्ठु दलमाणीए, एगं पायं अंतो किच्चा एगं पायं  
बाहिं किच्चा एल्लयं विक्खंभइता एवं दलयइ एवं से कप्पइ पडिगाहित्ते, एवं से  
नो दलयइ एवं से नो कप्पइ पडिगाहित्ते ॥ १५६ ॥ मासियं णं भिक्षुपडिमं  
पडिवन्नस्स अणगारस्स तओ गोयरकाला पन्नता । तंजहा—आ[दि]इमे म[उज्जे]ज्झिमे  
चरिमे, आइमे चरेज्जा, नो मज्जे चरेज्जा, नो चरिमे चरेज्जा १, मज्जे चरेज्जा,  
नो आइमे चरेज्जा, नो चरिमे चरेज्जा २, चरिमे चरेज्जा, नो आइमे चरेज्जा, नो  
मज्झिमे चरेज्जा ३ ॥ १५७ ॥ मासियं णं भिक्षुपडिमं पडिवन्नस्स अणगारस्स  
छव्विहा गो-यर-चरिया पन्नता । तंजहा—पेला, अद्धपेला, गोसुत्तिया, पतंगवीहिया,  
संबुक्कावट्ठा, गत्तु(गंतु)पच्चागया ॥ १५८ ॥ मासियं णं भिक्षुपडिमं पडिवन्नस्स  
अणगारस्स जत्थ णं केइ जाणइ कप्पइ से तत्थ एगरा(इ)इयं वसित्ते, जत्थ णं  
केइ न जाणइ कप्पइ से तत्थ एगरायं वा दुरायं वा वसित्ते, नो से कप्पइ एग-  
रायाओ वा दुरायाओ वा परं वत्थए, जे तत्थ एगरायाओ वा दुरायाओ वा परं  
वसइ से संतरा छेए वा परिहारे वा ॥ १५९ ॥ मासियं णं भिक्षुपडिमं पडि-  
वन्नस्स० कप्पइ चत्तारि भासाओ भासित्ते, तंजहा—जायणी, पुच्छणी, अणुणवणी,

पुट्टस्स वागरणी ॥ १६० ॥ मासियं णं भिक्खुपडिमं पडिवन्नस्स० कप्पइ तओ उवस्सया पडिलेहितए, तंजहा-अहे आरामगिहंसि वा, अहे वियडगिहंसि वा, अहे रुक्खमूलगिहंसि वा । मासियं णं भिक्खुपडिमं पडिवन्नस्स० कप्पइ तओ उवस्सया अणुण्वेतए, तं-अहे आरामगिहं, अहे वियडगिहं, अहे रुक्खमूलगिहं । मासियं णं भिक्खुपडिमं पडिवन्नस्स० कप्पइ तओ उवस्सया उवाइ(णावि)णितए, तं चेव ॥ १६१ ॥ मासियं णं भिक्खुपडिमं पडिवन्नस्स० कप्पइ तओ संथारगा पडिलेहितए, तंजहा-पुढवीसिलं वा, कट्टसिलं वा, अहासंथडमेव । मासियं णं भिक्खुपडिमं पडिवन्नस्स० कप्पइ तओ संथारगा अणुण्वेतए, तं चेव । मासियं णं भिक्खुपडिमं पडिवन्नस्स० कप्पइ तओ संथारगा उवाइणितए, तं चेव ॥ १६२ ॥ मासियं णं भिक्खुपडिमं पडिवन्नस्स० इत्थी वा पुरिसे वा उवस्सयं उवागच्छेज्जा, से इत्थी वा पुरिसे वा नो से कप्पइ तं पडुच्च निक्खमित्तए वा पविसित्तए वा ॥ १६३ ॥ मासियं णं भिक्खुपडिमं पडिवन्नस्स० केइ उवस्सयं अगणिकाएणं ज्ञायेज्जा नो से कप्पइ तं पडुच्च निक्खमित्तए वा पविसित्तए वा, तत्थ णं केइ वाहाए गहा[ए]य आगसेज्जा नो से कप्पइ तं अवलंबित्तए वा पलंबित्तए वा, कप्पइ से अहारियं रीइ[रिय]त्तए ॥ १६४ ॥ मासियं णं भिक्खुपडिमं पडिवन्नस्स० पायंसि खानू वा कंटए वा हीरए वा सक्करए वा अणुपविसेज्जा नो से कप्पइ नीहरित्तए वा विसोहित्तए वा, कप्पइ से अहारियं रीइत्तए ॥ १६५ ॥ मासियं णं भिक्खुपडिमं पडिवन्नस्स जाव अच्छिसि पा[णा-णि]णे वा वी[याणि]ए वा रए वा परियावज्जेज्जा, नो से कप्पइ नीहरित्तए वा विसोहित्तए वा, कप्पइ से अहारियं रीइत्तए ॥ १६६ ॥ मासियं णं भिक्खुपडिमं पडिवन्नस्स० जत्थेव सूरिए अत्थमेज्जा तत्थ एव जलं(सुक्कजलासयं)सि वा थलंसि वा दुग्गंसि वा निजंसि वा पव्वयंसि वा विसमंसि वा गड्डाए वा दरीए वा कप्पइ से तं रयणी तत्थेव उवायणावित्तए नो से कप्पइ पयमवि गमित्तए, कप्पइ से कलं पाउप्पभाए रयणीए जाव जलंते पाईणाभिमुहस्स वा दाहिणाभिमुहस्स वा पडीणाभिमुहस्स वा उत्तराभिमुहस्स वा अहारियं रीइत्तए ॥ १६७ ॥ मासियं णं भिक्खुपडिमं पडिवन्नस्स णो से कप्पइ अणंतरहियाए पुढवीए निदाइत्तए वा पयलाइत्तए वा, केवली बूया आयाणमेयं, से तत्थ निदायमाणे वा पयलायमाणे वा हत्थेहिं भूमिं परामुसेज्जा, अहाविहिमेव ठाणं ठाइत्तए णिक्खमित्तए वा, उच्चारपासवणेणं उ[प्पा]व्वाहिज्जा नो से कप्पइ उगिण्हित्तए [वा], कप्पइ से पुव्वपडिलेहिए थंडिले उच्चारपासवणं परिठवित्तए, तमेव उवस्सयं आगम्म अहाविहि ठाणं ठाइत्तए ॥ १६८ ॥ मासियं णं भिक्खुपडिमं पडिवन्नस्स० नो कप्पइ ससरक्खेणं काएणं गाहावइकुलं भत्ताए वा पाणाए

वा निक्खमित्तए वा पविसित्तए वा, अह पुण एवं जाणेज्जा ससरक्खे से अत्ताए वा जल्लत्ताए वा मलत्ताए वा पंकताए वा विद्धत्थे से कप्पइ गाहावइकुलं भत्ताए वा पाणाए वा निक्खमित्तए वा पविसित्तए वा ॥ १६९ ॥ मासियं णं भिक्खुपडिमं पडिवन्नस्स० नो कप्पइ सीओदगवियडेण वा उसिणोदगवियडेण वा हत्थाणि वा पायाणि वा दंताणि वा अच्छीणि वा मुहं वा उच्छोलित्तए वा पथोइत्तए वा, णणत्थ लेवालेवेण वा भत्तमासेण वा ॥ १७० ॥ मासियं णं भिक्खुपडिमं पडिवन्नस्स० नो कप्पइ आसस्स वा हत्थिस्स वा गोणस्स वा महिसस्स वा कोल्लुणगस्स वा सुणस्स वा वग्गस्स वा दुट्ठस्स वा आवयमाणस्स पयमवि पच्चोसकित्तए, अउट्ठस्स आवयमाणस्स कप्पइ जुगमित्तं पच्चोसकित्तए ॥ १७१ ॥ मासियं णं भिक्खुपडिमं पडिवन्नस्स० नो कप्पइ छायाओ सीयंति उण्हं इयत्तए, उण्हाओ उण्हंति छायं इयत्तए । जं जत्थ जया सिया तं तत्थ तया अहियासए ॥ १७२ ॥ एवं खलु मासियं भिक्खुपडिमं अहासुत्तं अहाकप्पं अहामग्गं अहातच्चं सम्मं काएणं फासित्ता पालित्ता सोहित्ता तीरित्ता किट्ठित्ता आराहइत्ता आणाए अणुपा(ले)लित्ता भवइ ॥ १ ॥ १७३ ॥ दोमासियं णं भिक्खुपडिमं पडिवन्नस्स० निच्चं वोसट्ठकाए जाव दो दत्तीओ ॥ २ ॥ १७४ ॥ तिमासियं तिण्णि दत्तीओ ॥ ३ ॥ १७५ ॥ चउमासियं चत्तारि दत्तीओ ॥ ४ ॥ १७६ ॥ पंचमासियं पंच दत्तीओ ॥ ५ ॥ १७७ ॥ छमासियं छ दत्तीओ ॥ ६ ॥ १७८ ॥ सत्तमासियं सत्त दत्तीओ ॥ ७ ॥ जेत्तिया मासिया तेत्तिया दत्तीओ ॥ १७९ ॥ पढमं सत्तराइंदियं भिक्खुपडिमं पडिवन्नस्स अणगारस्स निच्चं वोसट्ठकाए जाव अहियासेइ, कप्पइ से चउत्थेणं भत्तेणं अपाणएणं बहिया गामस्स वा जाव रायहाणीए वा उत्ताणगस्स वा पासिल्लगस्स वा नेसज्जियस्स वा ठाणं ठाइत्तए, तत्थ दिव्वा वा माणुसा वा तिरिक्खजोणिया वा उवसग्गा समुप्पज्जेज्जा तेणं उवसग्गा पयलिज्ज वा पवडेज्ज वा णो से कप्पइ पयलित्तए वा पवडित्तए वा, तत्थ णं उच्चारपासवणं उब्बाहिज्जा णो से कप्पइ उच्चारपासवणं उग्गिहित्तए, कप्पइ से पुव्वपडिलेहियंसि थंडिलंसि उच्चारपासवणं परिठवित्तए, अहाविहिमेव ठाणं ठाइत्तए, एवं खलु एसा पढमा सत्तराइंदिया भिक्खुपडिमा अहासु[य]त्तं जाव आणाए अणुपालित्ता भवइ ॥ ८ ॥ १८० ॥ एवं दोच्चा सत्तराइंदिया [या]वि नवरं दंडा[य]इयस्स वा लग[ड]साइ[ड]ाइयस्स वा उक्कुडुयस्स वा ठाणं ठाइत्तए, सेसं तं चेव जाव अणुपालित्ता भवइ ॥ ९ ॥ १८१ ॥ एवं तच्चा सत्तराइंदियावि, नवरं गोदोहियाए वा वीरासणियस्स वा अंबखुजस्स वा ठाणं ठाइत्तए तं चेव जाव अणुपालित्ता भवइ ॥ १० ॥ १८२ ॥ एवं अहोराइंदियावि, नवरं छट्ठेणं भत्तेणं अपाणएणं बहिया गामस्स वा जाव रायहाणीए



वा ईसिं दोवि पाए साहट्टु वग्घारियपाणिस्स ठाणं ठाइत्तए, सेसं तं चेव जाव अणु-  
पालिता भवइ ॥ ११ ॥ १८३ ॥ एगराइयं णं भिक्खुपडिमं पडिवन्नस्स अणगारस्स  
निच्चं वोसट्टुकाए णं जाव अहियासेइ, कप्पइ से [णं] अट्टमेणं भत्तेणं अपाणएणं बहिया  
गामस्स वा जाव रायहाणीए वा ईसिं पब्भारगएणं काएणं एगपोग्गल[ठिती]गयाए  
दिट्ठीए अणिमिसनयणे अहापणिहिएहिं गाएहिं सव्विदिएहिं गुत्तेहिं दोवि पाए साहट्टु  
वग्घारियपाणिस्स ठाणं ठाइत्तए, तत्थ से दिव्वा माणुस्सा तिरिक्खजोणिया जाव  
अहियासेइ, से णं तत्थ उच्चारपासवणं उब्बाहिज्जा नो से कप्पइ उच्चारपासवणं  
उग्गिणिहत्तए, कप्पइ से पुव्वपडिलेहियंसि थंडिलंसि उच्चारपासवणं परिठवित्तए,  
अहाविहिमेव ठाणं ठाइत्तए ॥ १८४ ॥ एगराइयं णं भिक्खुपडिमं अणणुपालेमाणस्स  
अणगारस्स इमे तओ ठाणा अहियाए अजुभाए अक्खमाए अणिस्सेसाए अणाणु-  
गामियत्ताए भवंति, तंजहा-उम्मायं वा ल[व]भेज्जा, वीहकालियं वा रोगायकं  
पाउणेज्जा, केवलपण्णत्ताओ धम्माओ भं[सि]सेज्जा ॥ १८५ ॥ एगराइयं णं भिक्खु-  
पडिमं सम्मं अणुपालेमाणस्स अणगारस्स इमे तओ ठाणा हियाए सुहाए खमाए  
निस्सेसाए अणुगामियत्ताए भवंति, तंजहा-ओहिनाणे वा से समुप्पजेज्जा, सणपज्जव-  
नाणे वा से समुप्पजेज्जा, केवलनाणे वा से असमुप्पन्नपुव्वे समुप्पजेज्जा, एवं खलु  
एसा एगराइया भिक्खुपडिमा अहासुत्तं अहाकप्पं अहामग्गं अहातच्चं सम्मं काएण  
फासित्ता पालित्ता सोहित्ता तीरित्ता किट्ठित्ता आराहित्ता आणाए अणुपालित्ता [यावि]  
भवइ ॥ १८६ ॥ एयाओ खलु ताओ थेरेहिं भगवंतेहिं वारस भिक्खुपडिमाओ  
पण्णत्ताओ ॥ १८७ ॥ त्ति-वेमि ॥ इति भिक्खुपडिमा णामं सत्तमा  
दसा समत्ता ॥ ७ ॥

### अट्टमा दसा

तेणं कालेणं तेणं समएणं समणे भगवं महावीरे पंचहत्थुत्तरे यावि होत्था,  
तंजहा-हत्थुत्तराहिं चुए चइत्ता गब्भं वक्कंते १ हत्थुत्तराहिं गब्भाओ गब्भं साहरिए २  
हत्थुत्तराहिं जाए ३ हत्थुत्तराहिं मुंडे भवित्ता आगाराओ अणगारियं पव्वइए ४  
हत्थुत्तराहिं अणंते अणुत्तरे नि(अ)ब्बाघाए निरावरणे कसिणे पडिपुण्णे केवलवरनाण-  
दंसणे समुप्पण्णे ५ साइणा परिणिव्वुए भगवं जाव भुज्जो २ उवदंसेइ ॥ १८८ ॥  
त्ति-वेमि ॥ इति पज्जोस(णं)णा णामं अट्टमा दसा समत्ता ॥ ८ ॥

### नवमा दसा

तेणं कालेणं तेणं समएणं चंपा ना[म]मं नयरी होत्था, वण्णओ । पुण्णभदे नामं  
उज्जाणे, वण्णओ । कोणियराया, धारिणी देवी, सामी समोसडे, परिसा निग्गया, धम्मो

कहिओ, परिसा पडिगया ॥ १८९ ॥ अज्जो ! ति समणे भगवं महावीरे बहवे निग्गंथा  
य निग्गंथीओ य आमंतेत्ता एवं वयासी—“एवं खलु अज्जो ! तीसं मोहणिज्जठाणाइं  
जाइं इमाइं इत्थी[ओ] वा पुरिसो वा अभिक्खणं अभिक्खणं आ[यारे]यरमाणे वा  
समायरमाणे वा मोहणिज्जत्ताए कम्मं पकरेइ, तंजहा—जे (यावि) केइ तसे पाणे, वारि-  
मज्झे विगाहिया । उदएणकम्म मारे(ई)इ, महामोहं पकुव्वइ ॥ १९० ॥ पाणिणा  
संपिहित्ताणं, सोयमावरिय पाणिणं । अंतोनदंतं मारेइ, महामोहं पकुव्वइ ॥ १९१ ॥  
जायतेयं समारब्भ, बहुं ओरुंभिया जणं । अंतो धूमेण मारे(जा)इ, महामोहं पकु-  
व्वइ ॥ १९२ ॥ सीसम्मि जो (जे) प्हणइ, उ(त्ति)त्तमंगम्मि चेयसा । विभज्ज मत्थयं  
फाले, महामोहं पकुव्वइ ॥ १९३ ॥ सीसं वेढेण जे केइ, आवेढेइ अभिक्खणं ।  
तिव्वासुभसमायारे, महामोहं पकुव्वइ ॥ १९४ ॥ पुणो पुणो पणिहिए, हणित्ता  
उवहसे जणं । फलेणं अदुव दंडेणं, महामोहं पकुव्वइ ॥ १९५ ॥ गूढायारी निगू-  
हिज्जा, मायं मायाए छायाए । असच्चवाई णिण्हाइ, महामोहं पकुव्वइ ॥ १९६ ॥  
धंसेइ जो अभूएणं, अकम्मं अत्तकम्मणा । अदुवा तुमकासित्ति, महामोहं पकुव्वइ  
॥ १९७ ॥ जाणमाणो परि[सओ]साए, सच्चामोसाणि भासइ । अक्खीणझंझे पुरिसे,  
महामोहं पकुव्वइ ॥ १९८ ॥ अणायगस्स नयवं, दारे तस्सेव धंसिया । विउलं  
विकखोभइत्ताणं, किच्चा णं पडिवाहिरं ॥ १९९ ॥ उव्वगसंतं पि झंपित्ता, पडिलोमाहिं  
वग्गुहिं । भोगभोगे वियारेइ, महामोहं पकुव्वइ ॥ २०० ॥ अकुमारभूए जे केइ,  
कुमारभूएति हं वए । इत्थीविसयगेहीए, महामोहं पकुव्वइ ॥ २०१ ॥ अवंभयारी  
जे केइ, वंभयारित्ति हं वए । गह्वेव गवां मज्झे, विस्सरं नयई नदं ॥ २०२ ॥  
अप्पणो अहिए बाले, मायामोसं बहुं भसे । इत्थीविसयगेहीए, महामोहं पकुव्वइ  
॥ २०३ ॥ जं निसिए उव्वहइ, जससाहिगमेण वा । तस्स लुब्भइ वित्तंमि, महा-  
मोहं पकुव्वइ ॥ २०४ ॥ ईसरेण अदुवा गामेणं, अणि(र)सरे ईसरीकए । तस्स  
संपयहीणस्स, सिरी अतुलमागया ॥ २०५ ॥ ई(इ)सादोसेण आविट्ठे, कलुसाविल-  
चेयसे । जे अंतरायं चेएइ, महामोहं पकुव्वइ ॥ २०६ ॥ सप्पी जहा अंडउडं,  
भत्तारं जो विहिंसइ । सेणावइं पसत्थारं, महामोहं पकुव्वइ ॥ २०७ ॥ जे नायगं  
च रट्ठस्स, नेयारं निगमस्स वा । सेट्ठिं बहुरवं हंता, महामोहं पकुव्वइ ॥ २०८ ॥  
बहुजणस्स गेयारं, दी(वं)वत्ताणं च पाणिणं । एयारिसं नरं हंता, महामोहं पकुव्वइ  
॥ २०९ ॥ उव्वट्ठियं पडिविरयं, संजयं सुतवस्सियं । विउ(वु)कम्म धम्माओ भंसेइ,  
महामोहं पकुव्वइ ॥ २१० ॥ तहेवाणंतणाणीणं, जिणाणं वरदंसिणं । तेसिं अवण्णवं  
बाले, महामोहं पकुव्वइ ॥ २११ ॥ नेया(इ)उयस्स मग्गस्स, दुट्ठे अवयरइ बहुं ।

तं तिप्पयंतो भावेइ, महामोहं पकुव्वइ ॥ २१२ ॥ आयरियउवज्जाएहिं, सुयं विणयं  
 च गहिण्णं । ते चैव खिसइ वाले, महामोहं पकुव्वइ ॥ २१३ ॥ आयरियउवज्जा-  
 याणं, सम्मं नो पडितप्पइ । अण्णडिपूयए थद्धे, महामोहं पकुव्वइ ॥ २१४ ॥ अवहु-  
 स्सए य जे केइ, सुएण पविकत्थइ । सज्जायवायं वयइ, महामोहं पकुव्वइ ॥ २१५ ॥  
 अतवस्सी[ए] य जे केइ, तवेण पविकत्थइ । सव्वलोयपरे तेणे, महामोहं पकुव्वइ  
 ॥ २१६ ॥ साहारणट्ठा जे केइ, गिलाणम्मि उवट्ठिए । पभू न कुणइ किच्चं, सज्जांयि  
 से न कुव्वइ ॥ २१७ ॥ सद्धे नियडीपण्णाणे, कल्लुसाउल्लचेयसे । अण्णो य अवो-  
 ही(य)ए, महामोहं पकुव्वइ ॥ २१८ ॥ जे क्हाहिगरणां, संपउंजे पुणो पुणो ।  
 सव्वतित्थाणं मेयाणं, महामोहं पकुव्वइ ॥ २१९ ॥ जे य आहम्मिए जोए, संप-  
 (ओ)उंजे पुणो पुणो । सहाहेउं सहीहेउं, महामोहं पकुव्वइ ॥ २२० ॥ जे य माण-  
 स्सए मोए, अदुवा पारलोइए । तेऽतिप्पयंतो आसयइ, महामोहं पकुव्वइ ॥ २२१ ॥  
 इह्मी जुई जसो वण्णो, देवाणं बलवीरियं । तेसिं अवण्णवं वाले, महामोहं पकुव्वइ  
 ॥ २२२ ॥ अपस्समाणो पस्सामि, दे(वे)वजक्खे य गुज्झगे । अण्णाणी जिणपूयट्ठी  
 महामोहं पकुव्वइ ॥ २२३ ॥ एए मोहगुणा वुत्ता, कम्मंता चित्तवद्धणा । जे उ-  
 भिक्खू विवज्जेजा, चरिजत्तगवेसए ॥ २२४ ॥ जंपि जाणे इओ पुव्वं, किच्चाकिच्चं  
 बहु जटं । तं वंता ताणि सेविजा, जेहिं आयारवं सिया ॥ २२५ ॥ आयारगुत्तो  
 सुद्धप्पा, धम्मे ठिच्चा अणुत्तरे । तओ वमे सए दोसे, विसमासीविसो जहा ॥ २२६ ॥  
 सुचत्तदोसे सुद्धप्पा, धम्मट्ठी विदितापरे । इहेव ल(ढ)भए कित्तिं, पेच्चा य सुगइ वरं  
 ॥ २२७ ॥ एवं अभिसमागम्म, सूरा दढपरक्कमा । सव्वमोहविणिग्गुक्का, जाइमर-  
 णमइच्छिया ॥ २२८ ॥ ति-वेमि ॥ मोहणिज्जटाणणामं नवमा दसा  
 समत्ता ॥ ९ ॥

## दसमा दसा

तेणं कालेणं तेणं समएणं रायणिहे नामं नयरे होत्था, वण्णओ । गुणसिलए  
 उज्जाणे...सेणिए राया होत्था, रायवण्णओ जहा उववाइए जाव चेळणाए...विहरइ ।  
 तए णं से सेणिए राया अण्णया कयाइ ण्हाए कंठे मालकडे आविद्धमणिसुवण्णे  
 कप्पियहारद्धहारतिसरयपालंवपलंवमाणकडिसुत्तयसुकयसोभे पिणद्धगेवेज्जअंगुलेज्जग  
 जाव कप्पस्सवए चैव अलंकियविभूसिए णरिंदे सकोरंटमल्लदामेणं छत्तेणं धरिज-  
 माणेणं जाव ससिक्ख पियदंसणे नरवई जेणेव बाहिरिया उवट्ठाणसाला जेणेव  
 सिंहासणे तेणेव उवागच्छइ २ ता सिं(सी)हासणवरंसि पुरत्थाभिमुहे निसीयइ २ ता  
 कोडुंवियपुरिसे सहावेइ २ ता एवं वयासी-गच्छह णं तु० देवाणुप्पिया ! जाइं

इमाइं रायगिहस्स णयरस्स बहिया तंजहा-आरामाणि य उज्जाणाणि य आएस-  
णाणि य सभाओ य पवाओ य पणियगिहाणि य पणियसालाओ य छुहाक-  
म्मंताणि य वाणियक्म्मंताणि य कट्टक्म्मंताणि य इंगालक्म्मंताणि य वणक्म्मं-  
ताणि य दब्भक्म्मंताणि य जे त[थेव]त्थ महत्तरगा अण्णया चिद्धंति ते एवं  
वयह—एवं खलु देवाणुप्पिया ! सेणिए राया भंभसारे आणवेइ—जया णं समणे  
भगवं महावीरे आइगरे तित्थयरे जाव संपाविओकामे पुव्वाणुपुर्व्वि च[रे]रमाणे  
गामाणुगामं दू[इ]ज्जमाणे सुहंसुहेणं विहरमाणे संजमेणं तवसा अप्पाणं  
भावेमाणे विहरि(इह आगच्छेज्जा इह समोसरे)ज्जा तया णं तुम्हे भगवओ महा-  
वीरस्स अहापडिरुवं उग्गहं अणुजाणह अहापडिरुवं उग्गहं अणुजाणेत्ता सेणि-  
यरस्स रत्तो भंभसारस्स एयमट्ठं पियं णिवेएह ॥ २२९ ॥ त[तो]ए णं ते कोडुं-  
वियपुरिसा सेणिएणं रत्ता भंभसारेणं एवं वुत्ता समाणा हट्ठुट्ठ जाव हियया  
जाव एवं सामि(तह)त्ति आणाए विणएणं पडिमुणेंति २ ता [एवं-ते] सेणियस्स  
रत्तो अंतियाओ पडिनिक्खमंति २ ता रायगिहं नयरं मज्झंमज्झेणं निग्गच्छंति २ ता  
जाइं [इमाइं-भवंति] रायगिहस्स बहिया आरामाणि वा जाव जे तत्थ महत्तरगा  
अण्णया चिद्धंति ते एवं वयंति जाव सेणियस्स रत्तो एयमट्ठं पियं निवेएज्जा पियं  
भे भवउ दोच्चपि तच्चपि एवं वयंति २ ता [जाव] जामेव दि[सं]सिं पाउब्भूया  
तामेव दिंसिं पडिगया ॥ २३० ॥ तेणं कालेणं तेणं समएणं समणे भगवं महावीरे  
आइगरे तित्थयरे जाव गामाणुगामं दूइज्जमाणे जाव अप्पाणं भावेमाणे विहरइ ।  
तए णं रायगिहे णयरं सिंघाडगतिथवउक्कचच्चर एवं जाव परिसा निग्गया जाव  
पज्जुवा(से)सइ ॥ २३१ ॥ तए णं ते महत्तरगा जेणेव समणे भगवं महावीरे तेणेव  
उवागच्छंति २ ता समणं भगवं महावीरं तिक्खुत्तो वंदंति नमंसंति वंदित्ता नमंसित्ता  
नामगोयं पुच्छंति नामगोयं पुच्छित्ता नामगोयं पधारंति० पधारित्ता एगओ मिलंति  
एगओ मिलित्ता एगंतमवक्कमंति एगंतमवक्कमित्ता एवं वयासी—जस्स णं देवाणुप्पिया !  
सेणिए राया भंभसारे दंसणं कंखइ जस्स णं देवाणुप्पिया ! सेणिए राया दंसणं  
पीहेइ जस्स णं देवाणुप्पिया ! सेणिए राया दंसणं पत्थेइ...अभिलसइ जस्स णं  
देवाणुप्पिया ! सेणिए राया नामगोत्तस्सवि सवणयाए हट्ठुट्ठ जाव भवइ से णं  
समणे भगवं महावीरे आइगरे तित्थयरे जाव सव्वणू सव्वदंसी पुव्वाणुपुर्व्वि  
चरमाणे गामाणुगामं दूइज्जमाणे सुहंसुहेणं विहरमाणे इह आगए इह समोसडे  
इह संपत्ते जाव अप्पाणं भावेमाणे [सम्मं] विहरइ, तं गच्छामो णं देवाणुप्पिया !  
सेणियस्स रण्णो एयमट्ठं निवेएमो पियं भे भवउत्तिकट्ठु अण्णमण्णस्स वयणं

पडिसुणंति २ ता रायगिहं नगरं मज्झंसज्जेणं जेणेव सेणियस्स रत्तो गिहे जेणेव सेणिए राया तेणेव उवागच्छंति २ ता सेणियं रायं करयलपरिगहियं जाव जएणं विजएणं वद्धावंति वद्धाविता एवं वयासी—“जस्स णं सामी ! दंसणं कंखइ जाव से णं समणे भगवं महावीरे गुणसिलिए उज्जाणे जाव विहरइ, एयं [तस्स] णं देवाणुप्पियाणं पियं निवेएसो पियं मे भवउ” ॥ २३२ ॥ तए णं से सेणिए राया तेसिं पुरिसाणं अंतिए एयमट्ठं सोच्चा निसम्म हट्ठुट्ठ जाव हियए सीहासणाओ अब्बुट्ठेइ २ ता जहा कोणिओ जाव वंदइ नमंसइ वंदिता नमंसिता ते पुरिसे सक्कारेइ सम्माणेइ सक्कारिता सम्माणिता विउलं जीविया-रिहं पीइदाणं दलयइ २ ता पडिविसज्जेइ पडिविसज्जिता नगरगुत्तियं सद्दावेइ २ ता एवं वयासी—खिप्पामेव भो देवाणुप्पिया ! रायगिहं नगरं सत्तिभतरवाहिरयं आसियसंसज्जिओवलितं जाव करिता० पच्चप्पिणंति ॥ २३३ ॥ तए णं से सेणिए राया बलवाउयं सद्दावेइ २ ता एवं वयासी—खिप्पामेव भो देवाणुप्पिया ! हयगयरह-जोहकलियं चाउरंगिणिं सेणं सण्णाहेह जाव से वि पच्चप्पिणइ ॥ २३४ ॥ तए णं से सेणिए राया जाणसालियं सद्दावेइ २ ता एवं वयासी—“भो देवाणुप्पिया ! खिप्पा-मेव धम्मियं जाणप्पवरं जुत्तामेव उवट्ठवेह उवट्ठविता मम एयमाणत्तियं पच्चप्पि-णह” । तए णं से जाणसालिए सेणिएणं रत्ता एवं वुत्ते समाणे हट्ठुट्ठ जाव हियए जेणेव जाणसाला तेणेव उवागच्छइ २ ता जाणसालं अणुप्पविसइ २ ता जाणगं पच्चुवेक्खइ २ ता जाणं पच्चोरुभइ २ ता दूसं पवी[पीह]णेइ २ ता जाणगं संपम-ज्जइ संपमज्जिता जाणगं णीणेइ २ ता जाणाइं समलंकरेइ २ ता जाणाइं वरमंडि-याइं करेइ २ ता जाणाइं संवेदेइ २ ता जेणेव वाहणसाला तेणेव उवागच्छइ २ ता वाहणसालं अणुप्पविसइ २ ता वाहणाइं पच्चुवेक्खइ २ ता वाहणाइं संपमज्जइ २ ता वाहणाइं अप्फालेइ २ ता वाहणाइं णीणेइ २ ता दूसं पवीणेइ २ ता वाहणाइं समलंकरेइ २ ता वरमंडगमंडियाइं करेइ २ ता वाहणाइं जाणगं जोएइ २ ता वट्ठमगं गाहेइ २ ता पओयलट्ठिं पओयधरे य समं आरोहइ २ ता अंतरासमपयंसि जेणेव सेणिए राया तेणेव उवागच्छइ २ ता करयल जाव एवं वयासी—जुत्ते ते सामी ! धम्मिए जाणप्पवरे आइट्ठे भदंतु वग्गुहिं गाहिता ॥ २३५ ॥ तए णं सेणिए राया भंसारे जाणसालियस्स अंतिए एयमट्ठं सोच्चा निसम्म हट्ठुट्ठ जाव मज्जण-घरं अणुप्पविसइ २ ता जाव कप्परुक्खे चेव अलंकियविभूतिए णरिंदे जाव मज्जण-घराओ पडिनिक्खमइ २ ता जेणेव चे(चि)ल्लणादेवी तेणेव उवागच्छइ २ ता चेल्ल(णं)णादेवि एवं वयासी—एवं खल्ल देवाणुप्पिए ! समणे भगवं महावीरे आइगरे

तिथ्यरे जाव पुव्वाणुपुव्वि चरमाणे जाव संजमेणं तवसा अप्पाणं भावेमाणे विहरइ, तं म(हा)हप्फलं० देवाणुप्पिए ! तहारूवाणं अ[र]िहंताणं जाव तं गच्छामो णं देवाणुप्पिए ! समणं भगवं महावीरं वंदामो नमंsamो सक्कारेमो सम्माणेमो कल्लाणं मंगलं देवयं चेइयं पज्जुवासामो, एयं णे इहभवे य परभवे य हियाए सुहाए खमाए निस्से(य)साए जाव अणुगामियत्ताए भविस्सइ । तए णं सा चेळ्ळणादेवी सेणियस्स रण्णो अंतिए एयमट्ठं सोच्चा निसम्म हट्ठतुट्ठ जाव पडिसुणेइ २ ता जेणेव मज्जणघरे तेणेव उवागच्छइ २ ता ण्हाया किं ते वरपायपत्तनेउरा मणिमेहलाहारइय-उवच्चिया कडगखडुगाएगावलिकंठसुत्तमरगवतिसरयवरवलयहेमसुत्तयडुंडलउज्जोविया-णणा रयणविभूसियंगी चीणंसुयवत्थपरिहिया दुगुल्लसुकुमालकंतरमणिजउत्तरिजा सव्वोउयसुरभिकुसुमसुंदरइयपलंबसोहणकंतविकसंतचित्तमाला वरचंदणचच्चिया वराभरणविभूसियंगी कालागुरुधूवधूविया सिरिसमाणवेसा वट्ठहिं खुजाहिं० चिलाइ-याहिं जाव महत्तरगविंदपरिक्खित्ता जेणेव वाहिरिया उवट्ठाणसाला जेणेव सेणि[य]ए राया तेणेव उवागच्छइ । तए णं से सेणिए राया चेळ्ळणादेवीए सद्धि धम्मियं जाणप्पवरं दुहइ २ ता सकोरिंटमल्लदामेणं छत्तेणं धरिज्जमाणेणं उववाइ(य)गमेणं णेयव्वं जाव पज्जुवासइ, एवं चेळ्ळणादेवी जाव महत्तरगपरिक्खित्ता जेणेव समणे भगवं महावीरे तेणेव उवागच्छइ २ ता समणं भगवं महावीरं वंदइ नमंसइ सेणियं रायं पुरओ काउं ठिइया चेव जाव पज्जुवासइ ॥ २३६ ॥ तए णं समणे भगवं महावीरे सेणियस्स रत्तो भंभसारस्स चेळ्ळणादेवीए तीसे य महइमहालियाए परिसाए इसिपरिसाए मुणिपरिसाए मणु(य)स्सपरिसाए देवपरिसाए अणेगसयाए जाव धम्मो कहिओ, परिसा पडि-गया, सेणि[य]ओ राया पडिगओ ॥ २३७ ॥ तत्थेगइयाणं निग्गंथाणं निग्गंथीण य सेणियं रायं चेळ्ळणं च देविं पासित्ताणं इमे एयारूवे अज्झत्थिए जाव संकप्पे समु-प्पज्जित्था-अहो णं सेणिए राया महिड्ढिए जाव महासुक्खे जे णं ण्हाए सव्वालं-कारविभूसिए चेळ्ळणादेवीए सद्धि उरालाई माणुस्सगाई भोगभोगाई भुंजमाणे विहरइ, जइ इमस्स सुचरियस्स तवनियमसंजमवंभचेरगुत्तिफलवित्तिविसेसे अत्थि तया वय-मवि आगमेस्साणं इमाई ताई उरालाई एयारूवाई माणुस्सगाई भोगभोगाई भुंजमाणा विहरामो, से तं साहु ॥ २३८ ॥ अहो णं चेळ्ळणादेवी महिड्ढिया जाव महासुक्खा जा णं ण्हाया सव्वालंकारविभूसिया सेणिएणं रण्णा सद्धि उरालाई माणुस्सगाई भोगभोगाई भुंजमाणी विहरइ, जइ इमस्स सुचरियस्स तवनियमसंजमवंभचेरवासस्स कल्लाणे फलवित्तिविसेसे अत्थि वयमवि आगमिस्साणं इमाई एयारूवाई उरालाई जाव विहरामो, से तं साहु[णी] ॥ २३९ ॥ अज्जो ! ति समणे भगवं महावीरे ते बहवे निग्गं-

था (य) निग्गंथीओ य आमंतेत्ता एवं वयासी-“सेणियं रायं चेळणादेविं पासित्ता इमेयास्वे अज्झत्थिए जाव समुप्पज्जित्था-अहो णं सेणिए राया महिङ्घिए जाव सेत्तं साहु, अहो णं चेळणादेवी महिङ्घिया सुंदरा जाव साहु, से णूणं अज्जो ! अट्ठे समट्ठे ?”  
 हंता ! अत्थिए ॥ २४० ॥ एवं खलु समणाउसो ! मए धम्मो पणत्ते, इ[णा]णमेव निग्गंथे पावयणे सच्चे अणुत्तरे पडिपुण्णे केव[ले]लिए संसुद्धे णेयाउए सल्लगतणे सिद्धिमग्गे मुत्तिमग्गे निज्जाणमग्गे निव्वाणमग्गे अवितहमविसंदिद्धे सव्वदुक्खप्पहीणमग्गे इत्थं ठिया जीवा सिज्झंति बुज्झंति मुच्चंति परिनिव्वायंति सव्वदुक्खाणमंतं क(रं)रंति ॥ २४१ ॥ जस्स णं धम्मस्स निग्गंथे सिक्खाए उवट्ठिए विहरमाणे पुरा-दिगिंछाए पुरा-पिवासाए पुरा-वायाऽयवेहिं पुरा-पुट्ठे विरुवत्त्वेहिं परिसहोवसग्गेहिं उदिण्ण-कामजाए विहरिजा, से य परक्कमेजा, से य परक्कममाणे पासेजा-जे इमे उग्गपुत्ता महामाउया भोगपुत्ता महामाउया, तेसिं अण्णयरस्स अइजायमाणस्स निज्जायमाणस्स पुरओ महं दासीदासकिंकरकम्मकरपुरिसाणं अं(तो)ते परिकिक्खत्तं छत्तं भिंगारं गहाय निग्गच्छंति ॥ २४२ ॥ तयार्णत्तरं च णं पुरओ म(हं)हाआसा आस(ध)वरा उभओ ते(पा)सिं नागा नाग-वरा पिट्ठओ र(ह)हा रहवरा संगेळि से तं उ(च्छि)द्धरियसेय-  
 (च)छत्ते अब्भुग्गयभिंगारे पग्गहियतालियंटे प(वीइय)वियच्च सेयचामरा बालवीयणीए अभिक्खणं अभिक्खणं अइजाइ य निज्जाइ य, सप्पमा सपुव्वावरं च णं ण्हाए सर्व्वा-लंकारविभूलिए महइमहालियाए कूडागारसालाए महइमहालयंसि सिंहासणंसि जाव सव्वरा[त्तिणी]इ(णि)एणं जोइणा झियायमाणेणं इत्थिगुम्मपरिखुडे महारवे हयनट्ठगी-यवाइयत्तंतीतलतालुडियघणसु(यं)इंगमहलपडुप्पवाइयरवेणं उरालाई माणुस्सगाइं कामभोगाईं मुंजमाणे विहरइ ॥ २४३ ॥ तस्स णं एगमवि आणवेमाणस्स जाव चत्तारि पंच अवुत्ता चेव अब्भुट्ठेति-भण देव्वाणप्पिया ! किं करेमो ? किं उवणेमो ? किं आहरेमो ? किं आविद्धामो ? किं मे हियइच्छियं ? किं ते आसगस्स सयइ ? जं पासित्ता णिग्गंथे णियाणं करेइ-जइ इमस्स तवनियमसंजमबंभचेरवासस्स तं चेव जाव साहु । एवं खलु समणाउसो ! णिग्गंथे णियाणं किच्चा तस्स ठाणस्स अणालोइय अप्पडिक्कंते कालमासे कालं किच्चा अण्णयरं देवलोएसु देवत्ताए उववत्तारो भवइ महिङ्घिएसु जाव चिरट्ठिएसु, से णं तत्थ देवे भवइ म[ह]हिङ्घिए जाव चिरट्ठिए, तथो देवलोगाओ आउक्खएणं भवक्खएणं ठिइक्खएणं अणंतं चयं चइत्ता जे इमे उग्गपुत्ता महा-माउया भोगपुत्ता महामाउया एएसि णं अन्नयरंसि कुलंसि पुत्तत्ताए पच्चायाइ ॥ २४४ ॥ से णं तत्थ दारए भवइ सुकुमालपाणिपाए जाव सुरुवे, तए णं से दारए

उम्मुक्कवालभावे विण्णायपरिणय[मि]मेत्ते जोव्वणगमणुप्पत्ते सयमेव पेइयं पडिबज्जइ,  
तस्स णं अइजायमाणस्स वा० पुरओ महं दासीदास जाव किं ते आसगस्स  
सयइ ? ॥ २४५ ॥ तस्स णं तहप्पगारस्स पुरिसजायस्स तहारूवे समणे वा माहणे  
वा उभओ कालं केवलपन्नत्तं धम्ममाइक्खेज्जा ? हंता ! आइक्खेज्जा, से णं पडि-  
सुणेज्जा ? णो इण्णट्ठे समट्ठे, अमविए णं से तस्स धम्मस्स सब[णा]णयाए, से य भवइ  
महिच्छे महारंभे महापरिग्गहे अहम्मिए जाव दाहिणगामी नेरइए आग(मे)मिस्साणं  
दुल्लहवोहिए यावि भवइ, तं एवं खलु समणाउसो ! तस्स णियाणस्स इमेयारूवे  
० फलविवागे जं णो संचाएइ केवलपन्नत्तं धम्मं पडिसुणित्तए ॥ २४६ ॥ एवं खलु  
समणाउसो ! मए धम्मे पण्णत्ते, इणमेव णिग्गंथे पावयणे जाव सव्वदुक्खाणमंतं  
करेंति, जस्स णं धम्मस्स निग्गंथी सिक्खाए उवट्ठिया विहरमाणी पुरा-दिग्गिच्छाए...  
उट्ठिणकामजाया विहरेज्जा, सा य परक्कमेज्जा, सा य परक्कममाणी पासेज्जा-से जा इमा  
इत्थिया भवइ एगा एगजाया एगाभरणपिहिणा तेळपेला इव सुसंगोविया चेलपेला इव  
सुसंपरिग्गहिया रयणकरंडगसमा[णी]णा, तीसे णं अइजायमाणीए वा निजायमाणीए  
वा पुरओ महं दासीदास तं चेव जाव किं भे आसगस्स सयइ ? जं पासित्ता णिग्गंथी  
णियाणं करेइ-जइ इमस्स सुचरियस्स तवनियमसंजमवंभचेर जाव भुंजमाणी विहरामि,  
से(त्तं) तं साहु । एवं खलु समणाउसो ! णिग्गंथी णियाणं किच्चा तस्स ठाणस्स अणा-  
लोइय अप्पडिक्कंता कालमासे कालं किच्चा अण्णयरेसु देवलोएसु देवताए उववत्तारो  
भवइ महिद्धिएसु जाव सा णं तत्थ देवे भवइ जाव भुंजमाणी विहरइ, सा णं ताओ  
देवलोगाओ आउक्खएणं भवक्खएणं ठिइक्खएणं अणंतरं चयं चइत्ता जे इमे  
भवन्ति उग्गपुत्ता महामाउया भोगपुत्ता महामाउया एसि णं अण्णयरंति कुलंस्सि  
दारियत्ताए पच्चायाइ, सा णं तत्थ दारिया भवइ सुकुमाला जाव सुहवा ॥ २४७ ॥  
तए णं तं दारियं अम्मापियरो उम्[आ]मुक्कवालभावं विण्णायपरिणयमेत्तं जोव्वण-  
गमणुप्पत्तं पडिरूवेण सुक्केण पडिरूवस्स भत्तारस्स भारियत्ताए दलयंति, सा णं  
तस्स भारिया भवइ एगा एगजाया इट्ठा कंता जाव रयणकरंडगसमाणा, तीसे  
णं अइजायमाणीए वा निजायमाणीए वा पुरओ महं दासीदास जाव किं ते आस-  
गस्स सयइ ? ॥ २४८ ॥ तीसे णं तहप्पगाराए इत्थियाए तहारूवे समणे वा माहणे  
वा उभयकालं केवलपन्नत्तं धम्मं आइक्खेज्जा ? हंता ! आइक्खेज्जा, सा णं मेत्ते !  
पडिसुणेज्जा ? णो इण्णट्ठे समट्ठे, अमविद्या णं सा तस्स धम्मस्स सवणयाए, सा य भवइ  
महिच्छा महारंभा महापरिग्गहा अहम्मिया जाव दाहिणगामि० नेरइ० आगमि-



स्साए दुल्लभवोहिया यावि भवइ, एवं खलु समणाउसो ! तस्स णियाणस्स इमेयाह्वे पावक्कम्मफलविवागे जं णो संचाएइ केवलपण्णत्तं धम्मं पडिसुणित्तए ॥ २४९ ॥ एवं खलु समणाउसो ! मए धम्मं पण्णत्ते, इणमेव निग्गंथे पावयणे जाव अंतं करेंति, जस्स णं धम्मस्स सिक्खाए निग्गंथे उवट्ठिए विहरमाणे पुरा-दिगिंछाए जाव से य परक्कममाणे पासिज्जा-...इसा इत्थिया भवइ एगा एगजाया जाव किं ते आसगरस्स सयइ ? जं पासित्ता निग्गंथे नियाणं करेइ-दुक्खं खलु पुमत्ताए, जे इमे उग्गपुत्ता महामाउया भोगपुत्ता महामाउया एएसि णं अण्णयरंसे उच्चावएसु महा-समरसंगामेसु उच्चावयाइं सत्थाइं उ(रं)रसि चैव पडिसंवेदेति, तं दुक्खं खलु पुमत्ताए, इत्थि[तण्यं]त्तं साहु, जइ इमस्स तवनियमसंजमवंभचेरवासस्स फलवित्तिविसेसे अत्थि वयमवि आगमेस्साणं इमेयाह्वाइं उरालाइं इत्थिभोगाइं भुंजिस्सामो, से तं साहु । एवं खलु समणाउसो ! णिग्गंथे णियाणं किच्चा तस्स ठाणस्स अणालोइय अपडिक्कंते जाव अपडिवज्जित्ता कालमासे कालं किच्चा अण्णयरंसे देवलोएसु देवत्ताए उववत्तारो भवइ..., से णं तत्थ देवे भवइ महिद्धिए जाव विहरइ, से णं ताओ देवलोगाओ आउक्खएणं भवक्खएणं जाव अणंतरं चयं चइत्ता अण्णयरंसि कुलंसि दारियत्ताए पच्चायाइ जाव तेणं तं दारियं जाव भारियत्ताए दलयंति, सा णं तस्स भारिया भवइ एगा एगजाया जाव तहेव सव्वं भाणियक्वं, तीसे णं अइजायमाणीए वा निजायमाणीए वा जाव किं ते आसगरस्स सयइ ? ॥ २५० ॥ तीसे णं तहप्पगाराए इत्थियाए तहाह्वे समणे वा माहणे वा० धम्मं आइक्खेज्जा ? हंता ! आइक्खेज्जा, सा णं पडिसुणेज्जा ? णो इणट्ठे समट्ठे, अभविया णं सा तस्स धम्मस्स सवणयाए, सा य भवइ महिच्छा जाव दाहिणगामि० णेरइ० आगमेस्साणं दुल्लभवोहिया यावि भवइ, एवं खलु समणाउसो ! तस्स णियाणस्स इमेयाह्वे पावए फलविवागे जं णो संचाएइ केवलपण्णत्तं धम्मं पडिसुणित्तए ॥ २५१ ॥ एवं खलु समणाउसो ! मए धम्मं पण्णत्ते, इणमेव निग्गंथे पावयणे सच्चे सेसं तं चैव जाव अंतं करेंति, जस्स णं धम्मस्स निग्गंथी सिक्खाए उवट्ठिया विहरमाणी पुरा-दिगिंछाए पुरा जाव उदिण्णकामजाया विहरेज्जा, सा य परक्कमेज्जा, सा य परक्कममाणी पासेज्जा-जे इमे उग्गपुत्ता महामाउया भोगपुत्ता महामाउया, तेसि णं अण्णयरस्स अइजायमाणस्स वा जाव किं ते आसगरस्स सयइ ? जं पासित्ता निग्गंथी नियाणं करेइ-दुक्खं खलु इत्थि[त(त)-णए]त्तं, दुस्संचराइं गामंतराइं जाव सज्जिवेसंतराइं, से जहानामए-अंवपेसियाइ वा माउल्लंगपेसियाइ वा अंवाडगपेसियाइ वा उच्छुखंडियाइ वा संबलि[फा]फलियाइ वा बहुजणस्स आसायणिज्जा पत्थणिज्जा पीहणिज्जा अभिलसणिज्जा एवामेव इत्थियावि

बहुजणस्स आसायणिज्जा जाव अभिलसणिज्जा, तं दुक्खं खलु इत्थित्तं, पुम[त्ताए णं]-  
 त्तणयं साहु, जइ इमस्स तवनियम जाव अत्थि वयमवि आगमेस्साणं इमेयारूवाइं  
 ओरालाईं पुरिसभोगाईं भुंजमाणा विहरिस्सामो, से तं साहु । एवं खलु समणाउसो !  
 णिग्गंथी णियाणं किच्चा तस्स ठाणस्स अणालोइय अप्पडिक्कंता जाव अपडिवज्जित्ता  
 कालमासे कालं किच्चा अण्णयरेसु देवलोएसु देवत्ताए उववत्तारो भवइ, सा णं तत्थ  
 देवे भवइ महिद्धिं जाव महासुक्खे, सा णं ताओ देवलोगाओ आउक्खएणं...अणंतरं  
 चयं चइत्ता जे इमे भवन्ति उग्गपुत्ता तहेव दारए जाव किं ते आसगस्स सयइ ?  
 ॥ २५२ ॥ तस्स णं तहप्पगारस्स पुरिसजायस्स जाव अभविए णं से तस्स धम्मस्स  
 सवणयाए, से य भवइ महिच्छे जाव दाहिणगामिए जाव दुल्लभबोहिं यावि भवइ,  
 एवं खलु जाव पडिसुणित्ता ॥ २५३ ॥ एवं खलु समणाउसो ! सए धम्मे पण्णत्ते, इणमेव  
 निग्गंथे पावयणे तहेव, जस्स णं धम्मस्स निग्गंथे वा निग्गंथी वा सिक्खाए उवट्ठिं  
 विहरमाणे पुरा-दिग्गिच्छाए जाव उदिण्णकामभोगे विहरेज्जा, से य परक्कमेज्जा, से य  
 परक्कमाणे माणुस्सेहिं कामभोगेहिं निव्वेयं गच्छेज्जा, माणुस्सगा खलु कामभोगा  
 अधुवा अणितिया असासया सडणपडणविद्धंसणधम्मा उच्चारपासवणखेलजल्ल-  
 सिघाणगवंतपित्तसुक्कोणियसमुब्भवा दुरुवउस्सासनिस्सासा दुरंतमुत्तपुरीसपुण्णा  
 वंतासवा पितासवा खेलासवा (जल्ला०) पच्छा पुरं च णं अवस्सं विप्पजहणिज्जा, संति  
 उड्डं देवा देवलोगंसि ते णं तत्थ अण्णेसिं देवाणं देवीओ अभिजुंजिय २ परियारेंति,  
 अप्पणो चेव अप्पाणं विउव्विय २ परियारेंति, अप्पणिज्जियाओ देवीओ अभिजुंजिय २  
 परियारेंति, [संति] जइ इमस्स तवनियम जाव तं चेव सव्वं भाणियव्वं जाव  
 वयमवि आगमेस्साणं इसाईं एयारूवाइं दिव्वाइं भोगभोगाईं भुंजमाणा विहरामो, से  
 तं साहु । एवं खलु समणाउसो ! निग्गंथो वा निग्गंथी वा नियाणं किच्चा तस्स ठाणस्स  
 अणालोइय अप्पडिक्कंते कालमासे कालं किच्चा अण्णयरेसु देवलोएसु देवत्ताए उवव-  
 त्तारो भवइ, तंजहा-महिद्धिंएसु महज्जुइएसु जाव पभासमाणे अण्णेसिं देवाणं अण्णं  
 देविं तं चेव जाव परियारेइ से णं ताओ देवलोगाओ आउक्खएणं तं चेव जाव  
 पुमत्ताए पच्चायाइ जाव किं ते आसगस्स सयइ ? ॥ २५४ ॥ तस्स णं तहप्पगारस्स  
 पुरिसजायस्स तहारूवे समणे वा माहणे वा जाव पडिसुणिज्जा ? हंता ! पडिसुणिज्जा,  
 से णं सदहेज्जा पत्तिएज्जा रोएज्जा ? णो इणट्ठे समट्ठे, अभविए णं से तस्स० सदहणयाए०,  
 से य भवइ महिच्छे जाव दाहिणगामी णेरइए आगमेस्साणं दुल्लभबोहिं यावि  
 भवइ, एवं खलु समणाउसो ! तस्स णियाणस्स इमेयारूवे पावए फलविवागे जं णो  
 संचाएइ केवलपण्णत्तं धम्मं सदहित्तए वा पत्ति[य]इत्तए वा रोइत्तए वा ॥ २५५ ॥

एवं खलु समणाउसो ! मए धम्मं पणत्ते तं चेव, से य परक्कमेज्जा, ... परक्कममाणे माणुस्सएसु कामभोगेसु निव्वेयं गच्छेज्जा, माणुस्सगा खलु कामभोगा अधुवा अणितिया तहेव जाव संति उट्ठं देवा देवलोगंसि ते णं तत्थ णो अण्णेसिं देवाणं अण्णं देविं अभिजुंजिय २ परियारेंति, अप्पणो चेव अप्पाणं विउव्वित्ता परियारेंति, अप्पणिज्जियाओवि देवीओ अभिजुंजिय २ परियारेंति, जइ इमस्स तवनियमं तं चेव सव्वं जाव से णं सहहेज्जा पत्तिएज्जा रोएज्जा ? णो इणट्ठे समट्ठे ॥ २५६ ॥ अण्णरुई रुद्धमादाए से य भवइ, से जे इमे<sup>१</sup> आरण्णिया आवसहििया गार्मतिया कण्हुइ रहस्सिया णो बहुसंजया णो बहुविरया सव्वपाणभूयजीवसत्तेसु अप्पणो सच्चा मोसाइं एवं विपडिवदंति-अहं ण हंतव्वो अण्णे हंतव्वा अहं ण अजावेयव्वो अण्णे अजावे-यव्वा अहं ण परियावेयव्वो अण्णे परियावेयव्वा अहं ण परिघेतव्वो अण्णे परिघेतव्वा अहं ण उ[व]इवेयव्वो अण्णे उइवेयव्वा, एवामेव इत्थिकामेहिं मुच्छिया गट्ठिया गिद्धा अज्झोववन्ना जाव कालमासे कालं किच्चा अण्णयराइं असुराइं किव्विसियाइं ठाणाइं उववत्तारो भवंति, तओ वि(प्प)मुच्चमाणा भुजो २ एलमूयत्ताए पच्चायंति, एवं खलु समणाउसो ! तस्स णियाणस्स जाव णो संचाएइ केवल्लिपणत्तं धम्मं सद्वहितए वा० ॥ २५७ ॥ एवं खलु समणाउसो ! मए धम्मं पणत्ते जाव माणुस्सगा खलु कामभोगा अधुवा तहेव, संति उट्ठं देवा देवलोगंसि० णो अण्णेसिं देवाणं [अण्णे देवे] अण्णं देविं अभिजुंजिय २ परियारेंति, णो अप्पणो चेव अप्पाणं विउव्विय परियारेंति, अप्पणिज्जियाओ० देवीओ अभिजुंजिय २ परियारेंति, जइ इमस्स तव-नियमं...तं चेव सव्वं जाव एवं खलु समणाउसो ! णिग्गंथो वा णिग्गंथी वा णियाणं किच्चा तस्स ठाणस्स अणालोइय अप्पडिक्कंते तं चेव जाव विहरइ, से णं तत्थ णो अण्णेसिं देवाणं अण्णं देविं अभिजुंजिय २ परियारेइ, णो अप्पणा चेव अप्पाणं विउव्विय परियारेइ, अप्पणिज्जाओ देवीओ अभिजुंजिय २ परियारेइ, से णं तओ आउक्खएणं भवक्खएणं ठिइक्खएणं तहेव वत्तव्वं, णवरं हंता ! सद्दहेज्जा पत्तिएज्जा रोएज्जा, से णं सीलव्वयगुणवेरमणपच्चक्खानपोसहोववासाइं पडि-वजेज्जा ? णो इणट्ठे समट्ठे, से णं दंसणसावए भवइ-अभिगयजीवाजीवे जाव अट्ठिमिजपेम्माणुरागरत्ते अयमाउसो ! निग्गंथे पावयणे अट्ठे एस (अयं) परमट्ठे सेसे अणट्ठे, से णं एयाह्वेणं विहारेणं विहरमाणे बट्ठइं वासाइं समणोवासगपरियागं पाउणइ २ ता कालमासे कालं किच्चा अण्णयरेसु देवलोगेसु देवत्ताए उववत्तारो भवइ, एवं खलु समणाउसो ! तस्स णियाणस्स इमेयाह्वे पावए फलविवागे जं

णो संचाएइ सीलव्वयगुण[व्वय]वेरमणपच्चक्खाणपोसहोववासाइं पडिवज्जितए  
॥ २५८ ॥ एवं खलु समणाउसो ! मए धम्मं पण्णत्ते तं चेव सव्वं जाव से य  
परक्कममाणे दिव्वमाणुस्सएहिं कामभोगेहिं निव्वेयं गच्छेज्जा, माणुस्सगा खलु कामभोगा  
अधुवा जाव विप्पजहणिज्जा, दिव्वावि खलु कामभोगा अधुवा अणितिया असासया  
चलाचल[ण]धम्मा पुणरागमणिज्जा पच्छा पुव्वं च णं अवस्सं विप्पजहणिज्जा, जइ  
इमस्स तवनियम जाव आगमेस्साणं जे इमे भवंति उग्गपुत्ता महामाउया जाव पुम-  
त्ताए पचायंति तत्थ णं समणोवासए भविस्सामि-अभिगयजीवाजीवे उवल्लद्वपुण्णपावे  
फासुयएसणिज्जं असणपाणखाइमसाइमं पडिलाभेमाणे विहरिस्सामि, से तं साहु । एवं  
खलु समणाउसो ! निग्गंथो वा निग्गंथी वा नियाणं किच्चा तस्स ठाणस्स अणालोइय  
जाव देवलोएसु देवत्ताए उववज्जइ जाव किं ते आसगस्स सयइ ? ॥ २५९ ॥ तस्स  
णं तहप्पगारस्स पुरिसजायस्स जाव पडिसुणिज्जा ? हंता ! पडिसुणिज्जा, से णं सद्देज्जा  
जाव रोएज्जा ? हंता ! सद्देज्जा०, से णं सीलव्वय जाव पोसहोववासाइं पडिवजेज्जा ?  
हंता ! पडिवजेज्जा, से णं मुंडे भवित्ता अ[आ]गाराओ अणगारियं पव्वएज्जा ? णो इण्ठे  
समट्ठे ॥ २६० ॥ से णं समणोवासए भवइ-अभिगयजीवाजीवे जाव पडिलाभेमाणे  
विहरइ, से णं एयारूवेणं विहारेणं विहरमाणे बहूणि वासाणि समणोवासगपरियाणं  
पाउणइ २ ता बहूइं भत्ताइं पच्चक्खाइ ? हंता ! पच्चक्खाइ २ ता आवाहंसि उप्पन्नंसि  
वा अणुप्पन्नंसि वा बहूइं भत्ताइं अणसणाइं छेएइ २ ता आलोइयपडिक्कते समाहिपत्ते  
कालमासे कालं किच्चा अण्णयरेसु देवलोएसु देवत्ताए उववतारो भवइ, एवं खलु  
समणाउसो ! तस्स णियाणस्स इमेयारूवे पावफलविवागे जेणं णो संचाएइ सव्वओ  
सव्वत्ताए मुंडे भवित्ता अगाराओ अणगारियं पव्वइत्तए ॥ २६१ ॥ एवं खलु  
समणाउसो ! मए धम्मं पण्णत्ते जाव से य परक्कममाणे दिव्वमाणुस्सएहिं कामभोगेहिं  
निव्वेयं गच्छेज्जा, माणुस्सगा खलु कामभोगा अधुवा० असासया जाव विप्पजह-  
णिज्जा, दिव्वावि खलु कामभोगा अधुवा जाव पुणरागमणिज्जा, जइ इमस्स तवनियम  
जाव वयमवि आगमेस्साणं जाइं इमाइं (कुलाइं) भवंति (तं०)-अंतकुलाणि वा  
पंतकुलाणि वा तुच्छकुलाणि वा दरिद्रकुलाणि वा किवणकुलाणि वा भिक्खागकुलाणि  
वा, एस्सि णं अण्णयरंसि कुलंसि पुमत्ताए एस मे आया परियाए सुणीहडे भविस्सइ,  
से तं साहु । एवं खलु समणाउसो ! निग्गंथो वा निग्गंथी वा नियाणं किच्चा तस्स  
ठाणस्स अणालोइय अप्पडिक्कते सव्वं तं चेव, से णं मुंडे भवित्ता अगाराओ अ[णा]ण-  
गारियं पव्वइज्जा ? हंता ! पव्वइज्जा, से णं तेणेव भवग्गहणेणं सिज्जेज्जा जाव सव्व-  
दुक्खाणं अंतं करेज्जा ? णो इण्ठे समट्ठे ॥ २६२ ॥ से णं भवइ से जे अणगारा भगवंतो

इरियासमिया भासासमिया जाव वंभयारी तेणं विहारेणं विहरमाणे बहूइं वासाइं  
 परियागं पाउणइ २ ता आवाहंसि उप्पन्नंसि वा जाव भत्ताइं पच्चक्खाएज्जा ? हंता !  
 पच्चक्खाएज्जा, बहूइं भत्ताइं अणसणाइं छेइज्जा ? हंता ! छेइज्जा, आलोइयपडिकत्ते  
 समाहिपत्ते कालमासे कालं किच्चा अणयरेसु देवलोएसु देवताए उववतारी भवइ,  
 एवं खलु समणाउसो ! तस्स णियाणस्स इमेयारूवे पावफलविवागे जं णो संचाएइ  
 तेणेव भवग्गहणेणं सिज्झत्तए जाव सव्वदुक्खाणमंतं करित्तए ॥ २६२ ॥ एवं  
 खलु समणाउसो ! मए धम्मे पणत्ते, इणमेव णिग्गंथे पावयणे जाव से य परक्कमेज्जा,  
 सव्वकामविरत्ते सव्वरागविरत्ते सव्वसंगातीते सव्वहा सव्वसिणेहाइक्कंते सव्व-  
 चरित्तपरिवुद्धिं ॥ २६४ ॥ तस्स णं भगवंतस्स अणुत्तरेणं नाणेणं अणुत्तरेणं दंसणेणं  
 अणुत्तरेणं परिनिव्वाणमग्गेणं अप्पाणं भावेमाणस्स अणंते अणुत्तरे निव्वाघाए निरा-  
 वरणे कसिणे पडिपुण्णे केवलवरनानंदंसणे समुप्पज्जेज्जा ॥ २६५ ॥ तए णं से भगवं  
 अरहा भवइ जिणे केवली सव्वण्णू सव्व(दरि)दंसी, सदेवमणुयासुराए जाव बहूइं  
 वासाइं केवलिपरियागं पाउणइ २ ता अप्पणो आउसेसं आभोएइ २ ता भत्तं  
 पच्चक्खाएइ २ ता बहूइं भत्ताइं अणसणाइं छेएइ २ ता तओ पच्छा चरमेहिं ऊसास-  
 नीसासेहिं सिज्झइ जाव सव्वदुक्खाणमंतं करेइ, एवं खलु समणाउसो ! तस्स अणि-  
 याणस्स इमेयारूवे कल्लाणफलविवागे जं तेणेव भवग्गहणेणं सिज्झइ जाव सव्वदुक्खा-  
 णमंतं करेइ ॥ २६६ ॥ तए णं बहवे निग्गंथा य निग्गंथीओ य समणस्स भगवओ  
 महावीरस्स अंतिए एयमद्धं सोच्चा निसम्म समणं भगवं महावीरं वंदंति नमंसंति  
 वंदित्ता नमंसित्ता तस्स ठाणस्स आलोयंति पडिक्कमंति जाव अहारिहं पायच्छित्तं  
 तवोक्कमं पडिवज्जंति ॥ २६७ ॥ तेणं कालेणं तेणं समएणं समणे भगवं महावीरे  
 रायगिहे नयरे गुणसिलए उज्जाणे बहूणं समणाणं बहूणं समणीणं बहूणं सावयाणं  
 बहूणं सावियाणं बहूणं देवाणं बहूणं देवीणं सदेवमणुयासुराए परिसाए मज्झगए  
 एवमाइक्खइ एवं भासइ एवं परूवेइ आयइठाणं णामं अज्जो ! अज्झयणं सअहं  
 सहेउं सकारणं सुत्तं च अत्थं च तदुभयं च भुज्जो भुज्जो उवदंसेइ ॥ २६८ ॥  
 त्ति-वेमि ॥ आयइठाणं णामं दसमा दसा समत्ता ॥ १० ॥

॥ दसासुयकखंधसुत्तं समत्तं ॥

तस्समत्तीए

चउल्लेयसुत्ताइं समत्ताइं

॥ सव्वसिलोगसंखा ४५०० ॥

णमोऽस्तु णं समणस्स भगवओ णायपुत्तमहावीरस्स

## सुत्तागमे

चत्तारि मूलसुत्ताइं

तत्थ णं

दसवेयालियसुत्तं

दुमपुप्फिया णामं पढममज्झयणं

धम्मो मंगलमुक्किट्ठं, अहिंसा संजमो तवो । देवा वि तं नमंस्संति, जस्स धम्मो सया  
मणो ॥ १ ॥ जहा दुमस्स पुप्फेसु, भमरो आवियइ रसं । न य पुप्फं किलामेइ, सो  
य पीणेइ अप्पयं ॥ २ ॥ एमेए समणा मुत्ता, जे लोए संति साहुणो । विहंगमा व  
पुप्फेसु, दाणभत्तेसणे रया ॥ ३ ॥ वयं च वित्तिं लब्भामो, न य कोइ उवहम्मइ ।  
अहागडेसु रीयंते, पुप्फेसु भमरा जहा ॥ ४ ॥ महुगारसमा बुद्धा, जे भवंति अणि-  
स्सिया । नाणापिंडरया दंता, तेण वुच्चंति साहुणो ॥ ५ ॥ त्ति-वेमि ॥ इति दुम-  
पुप्फिया णामं पढममज्झयणं समत्तं ॥ १ ॥

अह सामण्णपुव्वयं णामं दुइयमज्झयणं

कहं नु कुज्जा सामण्णं, जो कामे न निवारए । पए पए विसीयंतो, संकप्पस्स वसं  
गओ ॥ १ ॥ वत्थगंधमलंकारं, इत्थीओ सयणाणि य । अच्छंदा जे न भुंजंति, न से  
चाइति वुच्चइ ॥ २ ॥ जे य कंते पिए भोए, लद्धे विपिट्ठि-कुव्वइ । साहीणे  
चयइ भोए, से हु चाइति वुच्चइ ॥ ३ ॥ समाइ पेहाइ परिव्वयंतो, सिया मणो  
निस्सरइ बहिद्धा । “न सा महं नो वि अहं पि तीसे”, इच्चेव ताओ विणएज्ज रागं  
॥ ४ ॥ आयावयाही चय सोगमल्लं, कामे कमाही कमियं खु दुक्खं । छिंदाहि दोसं  
विणएज्ज रागं, एवं सुही होहिस्ति संपराए ॥ ५ ॥ पक्खंदे जलियं जोइं, धूमकेउं  
दुरासयं । नेच्छंति वंतयं भोत्तुं, कुले जाया अगंधणे ॥ ६ ॥ धिरत्थु तेऽजसोकामी,

जो तं जीवियकारणा । वतं इच्छसि आवेउं, सेयं ते मरणं भवे ॥ ७ ॥ अहं च  
भोगरायस्स, तं चऽसि अंधगवण्हणो । मा कुले गंधणा होमो, संजमं निहुओ चर  
॥ ८ ॥ जइ तं काहिसि भावं, जा जा दिच्छसि नारिओ । वायाविद्धोव्व हडो,  
अट्ठिअप्पा भविरस्ससि ॥ ९ ॥ तीसे सो वयणं सोच्चा, संजयाइ सुभासियं । अंकुसेण  
जहा नागो, धम्मे संपडिवाइओ ॥ १० ॥ एवं करेति संबुद्धा, पंडिया पवियक्खणा ।  
विणियट्ठंति भोगेसु, जहा से पुरिसुत्तमो ॥ ११ ॥ त्ति-वेमि ॥ इति सामण्णपु-  
व्वयं णामं दुइयमज्झयणं समत्तं ॥ २ ॥

### अह खुड्डियायारकहा णामं तइयमज्झयणं

संजमे सुट्ठिअप्पाणं, विप्पमुक्काण ताइणं । तेसिमेयमणाइण्णं, निग्गंधाणं महेसिणं  
॥ १ ॥ उँहेसियं कीयगंडं, नियागं अभिहडँणि य । राइभैत्ते सिर्णाणे य, गंधं मँले  
य वीर्यणे ॥ २ ॥ सन्निही<sup>१०</sup> गिहिमत्ते<sup>११</sup> य, रायपिंडे<sup>१२</sup> किमिच्छए<sup>१३</sup> । संवाहणीं<sup>१४</sup> दंतपहोयणीं  
य, संपुच्छणीं<sup>१५</sup> देहपलोयणीं<sup>१६</sup> य ॥ ३ ॥ अट्ठावँए<sup>१७</sup> य नीलीए, छत्तसँ य धारणट्ठाए ।  
तेगिच्छ<sup>१८</sup> पाहणा पाए, समारंभं<sup>१९</sup> च जोइणी ॥ ४ ॥ सेज्जायँरे<sup>२०</sup> पिण्डं च, आसंदीपलि-  
यंकँए<sup>२१</sup> । गिहंतरनिसेज्जा<sup>२२</sup> य, गायस्सुव्वट्ठणीणि य ॥ ५ ॥ गिहिणो वेर्यँवडियं, जा  
य आजीववत्तिर्यां । तत्तानिर्वुडँभोइत्तं, आउरस्सरणीणि य ॥ ६ ॥ मूलए<sup>२३</sup> सिंगबेरे<sup>२४</sup>  
य, उच्छुखंडे<sup>२५</sup> अनिवुडे । केदे<sup>२६</sup> मूलं य सच्चित्ते, फले<sup>२७</sup> वीए<sup>२८</sup> य आमए ॥ ७ ॥ सोव-  
चले<sup>२९</sup> सिंधवे<sup>३०</sup> लोणे, रोमालोणे य आमए । सँमुदे<sup>३१</sup> पंसुखँरे<sup>३२</sup> य, कालँलोणे य आमए  
॥ ८ ॥ धूवणेत्ति वमणे<sup>३३</sup> य, वत्थीकम्म विरेयणे । अंजणे<sup>३४</sup> दंतवणे<sup>३५</sup> य, गायब्भंग  
विभूसणे ॥ ९ ॥ सव्वमेयमणाइण्णं, निग्गंधाण महेसिणं । संजमम्मि य जुत्ताणं,  
लहुभूयविहारिणं ॥ १० ॥ पंचासवपरिण्णाया, तिगुत्ता छसु संजया । पंचनिग्गहणा  
धीरा, निग्गंधा उज्जुदंसिणो ॥ ११ ॥ आयावयंति गिन्हेसु, हेमंतेसु अवाउडा ।  
वासासु पडिसंलीणा, संजया सुसमाहिया ॥ १२ ॥ परीसहरिऊदंता, धूयमोहा जिहं-  
दिया । सव्वदुक्खप्पहीणट्ठा, पक्कमंति महेसिणो ॥ १३ ॥ दुक्कराईं करित्ताणं, दुस्स-  
हाईं सहितु य । केइऽत्थ देवलोएसु, केइ सिज्झंति नीरया ॥ १४ ॥ खविता पुव्व-  
कम्माहं, संजमेण तवेण य । सिद्धिमग्गमणुप्पत्ता, ताइणो परिणिवुडा ॥ १५ ॥  
त्ति-वेमि ॥ इति खुड्डियायारकहा णामं तइयमज्झयणं समत्तं ॥ ३ ॥

## अह छज्जीवणिया णामं चउत्थमज्झयणं

सुयं मे आउसं ! तेणं भगवया एवमक्खायं, इह खलु छज्जीवणिया नामज्झयणं समणेणं भगवया महावीरेणं कासवेणं पवेइया सुअक्खाया सुपन्नता सेयं मे अहिज्जिउं अज्झयणं धम्मपण्णत्ती ॥ १ ॥ कयरा खलु सा छज्जीवणिया नामज्झयणं समणेणं भगवया महावीरेणं कासवेणं पवेइया सुअक्खाया सुपन्नता सेयं मे अहिज्जिउं अज्झयणं धम्मपण्णत्ती ॥ २ ॥ इमा खलु सा छज्जीवणिया नामज्झयणं समणेणं भगवया महावीरेणं कासवेणं पवेइया सुअक्खाया सुपन्नता सेयं मे अहिज्जिउं अज्झयणं धम्मपण्णत्ती । तंजहा—पुढविकाइया १, आउकाइया २, तेउकाइया ३, वाउकाइया ४, वणस्सइकाइया ५, तसकाइया ६ । पुढवी चित्तमंतमक्खाया अणेगजीवा पुढोसत्ता अन्नत्थ सत्थपरिणएणं १ । आऊ चित्तमंतमक्खाया अणेगजीवा पुढोसत्ता अन्नत्थ सत्थपरिणएणं २ । तेऊ चित्तमंतमक्खाया अणेगजीवा पुढोसत्ता अन्नत्थ सत्थपरिणएणं ३ । वाऊ चित्तमंतमक्खाया अणेगजीवा पुढोसत्ता अन्नत्थ सत्थपरिणएणं ४ । वणस्सई चित्तमंतमक्खाया अणेगजीवा पुढोसत्ता अन्नत्थ सत्थपरिणएणं । तंजहा—अग्गबीया, मूलबीया, पोरबीया, खंधबीया, बीयरुहा, सम्मुच्छिमा, तणलया वणस्सइकाइया, सबीया, चित्तमंतमक्खाया अणेगजीवा पुढोसत्ता अन्नत्थ सत्थपरिणएणं ५ । से जे पुण इमे अणेगे बहवे तसा पाणा तंजहा—अंडया, पोयया, जराउया, रसया, संसेइमा, संमुच्छिमा, उब्भिया, उववाइया, जेसिं केसिं च पाणाणं, अभिक्कंतं, पडिक्कंतं, संकुचियं, पसारियं, रयं, भंतं, तसियं, पलाइयं, आगइगइविच्चाया, जे य कीडपयंगा जा य कुंथुपिपीलिया, सव्वे बेइंदिया, सव्वे तेइंदिया, सव्वे चउरिंदिया सव्वे पंचिंदिया, सव्वे तिरिक्खजोणिया, सव्वे नेरइया, सव्वे मणुया, सव्वे देवा, सव्वे पाणा परमाहम्मिया, एसो खलु छट्ठो जीवनिक्काओ तसकाउत्ति पवुच्चइ ६ ॥ ३ ॥ इच्चेसिं छण्हं जीवनिक्कायाणं नेव सयं दंडं समारंभिज्जा, नेवञ्चेहिं दंडं समारंभाविज्जा, दंडं समारंभंते वि अन्ने न समणुजाणिज्जा । जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भंते ! पडिक्कामि निंदामि गरिहामि अप्पाणं वोसिरामि ॥ ४ ॥ पदमे भंते ! महव्वए पाणाइवायाओ वेरमणं । सव्वं भंते ! पाणाइवायं पच्चक्खामि । से सुहुमं वा, बायरं वा, तसं वा, थावरं वा, नेव सयं पाणे अइवाइज्जा, नेवञ्चेहिं पाणे अइवायाविज्जा, पाणे अइवायंते वि अन्ने न समणुजाणिज्जा । जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि



अन्नं न समणुजाणामि । तस्स भंते ! पडिक्कमामि निंदामि गरिहामि अप्पाणं वोसिरामि । पढमे भंते ! महव्वए उवट्ठिओमि सव्वाओ पाणाइवायाओ वेरमणं ॥ १ ॥ ५ ॥ अहावरे दुच्चे भंते ! महव्वए मुसावायाओ वेरमणं । सव्वं भंते ! मुसावायं पच्चक्खामि । से कोहा वा, लोहा वा, भया वा, हासा वा, नेव सयं सुसं वइज्जा, नेवऽज्ञेहिं सुसं वायाविज्जा, सुसं वयंते वि अन्ने न समणुजाणिज्जा । जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भंते ! पडिक्कमामि निंदामि गरिहामि अप्पाणं वोसिरामि । दुच्चे भंते ! महव्वए उवट्ठिओमि सव्वाओ मुसावायाओ वेरमणं ॥ २ ॥ ६ ॥ अहावरे तच्चे भंते ! महव्वए अदिच्चादाणाओ वेरमणं । सव्वं भंते ! अदिच्चादाणं पच्चक्खामि । से गामे वा, नगरे वा, रण्णे वा, अप्पं वा, बहुं वा, अणुं वा, थूलं वा, चित्तमंतं वा, अचित्तमंतं वा, नेव सयं अदिच्चं गिण्हिज्जा, नेवऽज्ञेहिं अदिच्चं गिण्हाविज्जा, अदिच्चं गिण्हंते वि अन्ने न समणुजाणिज्जा । जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भंते ! पडिक्कमामि निंदामि गरिहामि अप्पाणं वोसिरामि । तच्चे भंते ! महव्वए उवट्ठिओमि सव्वाओ अदिच्चादाणाओ वेरमणं ॥ ३ ॥ ७ ॥ अहावरे चउत्थे भंते ! महव्वए मेहुणाओ वेरमणं । सव्वं भंते ! मेहुणं पच्चक्खामि । से दिव्वं वा, माणुसं वा, तिरिक्खजोणियं वा, नेव सयं मेहुणं सेविज्जा, नेवऽज्ञेहिं मेहुणं सेवाविज्जा, मेहुणं सेवंते वि अन्ने न समणुजाणिज्जा । जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भंते ! पडिक्कमामि निंदामि गरिहामि अप्पाणं वोसिरामि । चउत्थे भंते ! महव्वए उवट्ठिओमि सव्वाओ मेहुणाओ वेरमणं ॥ ४ ॥ ८ ॥ अहावरे पंचमे भंते ! महव्वए परिग्गहाओ वेरमणं । सव्वं भंते ! परिग्गहं पच्चक्खामि । से अप्पं वा, बहुं वा, अणुं वा, थूलं वा, चित्तमंतं वा, अचित्तमंतं वा, नेव सयं परिग्गहं परिगिण्हिज्जा, नेवऽज्ञेहिं परिग्गहं परिगिण्हाविज्जा, परिग्गहं परिगिण्हंते वि अन्ने न समणुजाणिज्जा । जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भंते ! पडिक्कमामि निंदामि गरिहामि अप्पाणं वोसिरामि । पंचमे भंते ! महव्वए उवट्ठिओमि सव्वाओ परिग्गहाओ वेरमणं ॥ ५ ॥ ९ ॥ अहावरे छट्ठे भंते ! वए राइभोयणाओ वेरमणं । सव्वं भंते ! राइभोयणं पच्चक्खामि । से असणं वा, पाणं वा, खाइमं वा, साइमं वा, नेव सयं राइं भुंजिज्जा, नेवऽज्ञेहिं राइं भुंजाविज्जा, राइं

भुंजंतं वि अन्नं न समणुजाणिज्जा । जावज्जीवाए तिविहं तिविहेणं मणेणं वायाए  
 काएणं न करेमि न कारवेमि करंतं पि अन्नं न समणुजाणामि । तस्स भंते !  
 पडिक्कमामि निंदामि गरिहामि अप्पाणं वोसिरामि । छट्ठे भंते ! वए उवट्ठिओमि  
 सव्वाओ राइभोयणाओ वेरमणं ॥ ६ ॥ १० ॥ इच्चैयाइं पंच महव्वयाइं राइभोयण-  
 वेरमणछट्ठाइं अत्तहियट्ठयाए उवसंपज्जित्ताणं विहरामि ॥ ११ ॥ से भिक्खू वा,  
 भिक्खुणी वा, संजयविरयपडिहयपच्चक्खायपावक्कम्मे, दिआ वा, राओ वा, एगओ  
 वा, परिसागओ वा, सुत्ते वा, जागरमाणे वा, से पुढविं वा, भित्तिं वा, सिलं वा,  
 लेलुं वा, ससरक्खं वा कायं, ससरक्खं वा वत्थं, हत्थेण वा, पाएण वा, कट्ठेण वा,  
 किलिचेण वा, अंगुलियाए वा, सलागाए वा, सलागहत्थेण वा, न आलिहिज्जा, न  
 विलिहिज्जा, न घट्टिज्जा, न भिंदिज्जा, अन्नं न आलिहाविज्जा, न विलिहाविज्जा, न  
 घट्टाविज्जा, न भिंदाविज्जा, अन्नं आलिहंतं वा, विलिहंतं वा, घट्टंतं वा, भिंदंतं वा,  
 न समणुजाणिज्जा । जावज्जीवाए तिविहं तिविहेणं मणेणं वायाए काएणं न करेमि न  
 कारवेमि करंतं पि अन्नं न समणुजाणामि । तस्स भंते ! पडिक्कमामि निंदामि  
 गरिहामि अप्पाणं वोसिरामि ॥ १ ॥ १२ ॥ से भिक्खू वा, भिक्खुणी वा,  
 संजयविरयपडिहयपच्चक्खायपावक्कम्मे, दिआ वा, राओ वा, एगओ वा, परिसागओ  
 वा, सुत्ते वा, जागरमाणे वा, से उदगं वा, ओसं वा, हिमं वा, महियं वा, करगं  
 वा, हरितणुगं वा, सुद्धोदगं वा, उदउल्लं वा कायं, उदउल्लं वा वत्थं, ससिणिद्धं वा  
 कायं, ससिणिद्धं वा वत्थं, न आमुसिज्जा, न संफुसिज्जा, न आवीलिज्जा, न  
 पवीलिज्जा, न अक्खोडिज्जा, न पक्खोडिज्जा, न आयाविज्जा, न पयाविज्जा, अन्नं  
 न आमुसाविज्जा, न संफुसाविज्जा, न आवीलाविज्जा, न पवीलाविज्जा, न अक्खो-  
 डाविज्जा, न पक्खोडाविज्जा, न आयाविज्जा, न पयाविज्जा, अन्नं आमुसंतं वा,  
 संफुसंतं वा, आवीलंतं वा, पवीलंतं वा, अक्खोडंतं वा, पक्खोडंतं वा, आयावंतं वा,  
 पयावंतं वा, न समणुजाणिज्जा । जावज्जीवाए तिविहं तिविहेणं मणेणं वायाए काएणं  
 न करेमि न कारवेमि करंतं पि अन्नं न समणुजाणामि । तस्स भंते ! पडिक्कमामि  
 निंदामि गरिहामि अप्पाणं वोसिरामि ॥ २ ॥ १३ ॥ से भिक्खू वा, भिक्खुणी  
 वा, संजयविरयपडिहयपच्चक्खायपावक्कम्मे, दिआ वा, राओ वा, एगओ वा, परिसा-  
 गओ वा, सुत्ते वा, जागरमाणे वा, से अगणिं वा, इंगालं वा, मुम्मुरं वा, अर्च्चिं  
 वा, जालं वा, अलायं वा, सुद्धागणिं वा, उक्कं वा, न उंजिज्जा, न घट्टिज्जा, न  
 भिंदिज्जा, न उज्जालिज्जा, न पज्जालिज्जा, न निव्वाविज्जा, अन्नं न उंजाविज्जा, न  
 घट्टाविज्जा, न भिंदाविज्जा, न उज्जालाविज्जा, न पज्जालाविज्जा, न निव्वाविज्जा,

अन्नं उज्जंतं वा, घट्ठंतं वा, भिंदंतं वा, उज्जालंतं वा, पज्जालंतं वा, निव्वावंतं वा, न समणुजाणिज्जा । जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भंते ! पडिक्कमामि निंदामि गरिहामि अप्पाणं वोसिरामि ॥ ३ ॥ १४ ॥ से भिक्खू वा, भिक्खुणी वा, संजयविरयपडिहयपच्चक्खायपावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से सिएण वा, विहुयणेण वा, तालियंटेण वा, पत्तेण वा, पत्तभंणेण वा, साहाए वा, साह्मभंणेण वा, पिहुणेण वा, पिहुणहत्थेण वा, चेलेण वा, चेलकणेण वा, हत्थेण वा, मुहेण वा, अप्पणो वा कायं, वाहिरं वावि पुग्गलं, न फूमिज्जा, न वीइज्जा, अन्नं न फूमाविज्जा, न वीयाविज्जा, अन्नं फूमंतं वा, वीयंतं वा, न समणुजाणिज्जा । जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भंते ! पडिक्कमामि निंदामि गरिहामि अप्पाणं वोसिरामि ॥ ४ ॥ १५ ॥ से भिक्खू वा, भिक्खुणी वा, संजयविरयपडिहयपच्चक्खायपावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से बीएसु वा, वीयपइट्ठेसु वा, रुढेसु वा, रुढपइट्ठेसु वा, जाएसु वा, जायपइट्ठेसु वा, हरिएसु वा, हरियपइट्ठेसु वा, छिन्नेसु वा, छिन्नपइट्ठेसु वा, सच्चित्तोसु वा, सच्चित्तकोलपडिनिसिएसु वा, न गच्छिज्जा, न चिट्ठिज्जा, न निसीइज्जा, न तुयट्ठिज्जा, अन्नं न गच्छाविज्जा, न चिट्ठाविज्जा, न निसीयाविज्जा, न तुयट्ठाविज्जा, अन्नं गच्छंतं वा, चिट्ठंतं वा, निसीयंतं वा, तुयट्ठंतं वा, न समणुजाणिज्जा । जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि । तस्स भंते ! पडिक्कमामि निंदामि गरिहामि अप्पाणं वोसिरामि ॥ ५ ॥ १६ ॥ से भिक्खू वा, भिक्खुणी वा, संजयविरयपडिहयपच्चक्खायपावकम्मे, दिआ वा, राओ वा, एगओ वा, परिसागओ वा, सुत्ते वा, जागरमाणे वा, से कीडं वा, पयंगं वा, कुंथुं वा, पिपीलियं वा, हत्थंसि वा, पायंसि वा, बाहुंसि वा, उरंसि वा, उदरंसि वा, सीसंसि वा, वत्थंसि वा, पडिग्गहंसि वा, कंबलंसि वा, पायपुच्छणंसि वा, रयहरणंसि वा, गुच्छांसि वा, उडुगंसि वा, दंडगंसि वा, पीढगंसि वा, फलगंसि वा, सेज्जंसि वा, संथारगंसि वा, अन्नयरंसि वा तहप्पगारे उवगरणजाए तओ संजयामेव पडिलेहिय पडिलेहिय पमज्जिय पमज्जिय एगंतमवणिज्जा, नो णं संघायमावज्जिज्जा ॥ ६ ॥ १७ ॥ अजयं चरमाणो (य) उ, पाणभूयाई हिंसइ । बंधइ पावयं कम्मं, तं से होइ कडुयं फलं ।

॥ १ ॥ अजयं चिट्ठमाणो उ, पाणभूयाइं हिंसइ । बंधइ पावयं कम्मं, तं से होइ कडुयं फलं ॥ २ ॥ अजयं आसमाणो उ, पाणभूयाइं हिंसइ । बंधइ पावयं कम्मं, तं से होइ कडुयं फलं ॥ ३ ॥ अजयं सयमाणो उ, पाणभूयाइं हिंसइ । बंधइ पावयं कम्मं, तं से होइ कडुयं फलं ॥ ४ ॥ अजयं भुंजमाणो उ, पाणभूयाइं हिंसइ । बंधइ पावयं कम्मं, तं से होइ कडुयं फलं ॥ ५ ॥ अजयं भासमाणो उ, पाणभूयाइं हिंसइ । बंधइ पावयं कम्मं, तं से होइ कडुयं फलं ॥ ६ ॥ कहं चरे ? कहं चिट्ठे ? कहमासे ? कहं सए ? । कहं भुंजंतो भासंतो, पावकम्मं न बंधइ ? ॥ ७ ॥ जयं चरे जयं चिट्ठे, जयमासे जयं सए । जयं भुंजंतो भासंतो, पावकम्मं न बंधइ ॥ ८ ॥ सव्वभूयपभूयस्स, सम्मं भूयाइ पासओ । पिहियासवस्स दंतस्स, पावकम्मं न बंधइ ॥ ९ ॥ पढमं नाणं तओ दया, एवं चिट्ठइ सव्वसंजए । अन्नाणी किं काही ? किं वा नाहिइ सेयपावगं ? ॥ १० ॥ सोच्चा जाणइ कल्लाणं, सोच्चा जाणइ पावगं । उभयं पि जाणइ सोच्चा, जं सेयं तं समाचरे ॥ ११ ॥ जो जीवे वि न याणइ, अजीवे वि न याणइ । जीवाजीवे अयाणंतो, कहं सो नाहिइ संजमं ? ॥ १२ ॥ जो जीवे वि वियाणइ, अजीवे वि वियाणइ । जीवाजीवे वियाणंतो, सो हु नाहिइ संजमं ॥ १३ ॥ जया जीवमजीवे य, दो वि एए वियाणइ । तया गइं बहुविहं, सव्वजीवाण जाणइ ॥ १४ ॥ जया गइं बहुविहं, सव्वजीवाण जाणइ । तया पुण्णं च पावं च, बंधं मुक्खं च जाणइ ॥ १५ ॥ जया पुण्णं च पावं च, बंधं मुक्खं च जाणइ । तया निव्विदए भोए, जे दिव्वे जे य माणुसे ॥ १६ ॥ जया निव्विदए भोए, जे दिव्वे जे य माणुसे । तया चयइ संजोगं, सव्विभतरवाहिरं ॥ १७ ॥ जया चयइ संजोगं, सव्विभतरवाहिरं । तया मुंडे भवित्ताणं, पव्वइए अणगारियं ॥ १८ ॥ जया मुंडे भवित्ताणं, पव्वइए अणगारियं । तया संवरमुक्किट्ठं, धम्मं फासे अणुत्तरं ॥ १९ ॥ जया संवरमुक्किट्ठं, धम्मं फासे अणुत्तरं । तया धुणइ कम्मरयं, अबोहिक्कलुसं कडं ॥ २० ॥ जया धुणइ कम्मरयं, अबोहिक्कलुसं कडं । तया सव्वत्तगं नाणं, दंसणं चाभिगच्छइ ॥ २१ ॥ जया सव्वत्तगं नाणं, दंसणं चाभिगच्छइ । तया लोगमलोगं च, जिणो जाणइ केवली ॥ २२ ॥ जया लोगमलोगं च, जिणो जाणइ केवली । तया जोगे निरंभित्ता, सेलेसिं पडिवज्जइ ॥ २३ ॥ जया जोगे निरंभित्ता, सेलेसिं पडिवज्जइ । तया कम्मं खवित्ताणं, सिद्धिं गच्छइ नीरओ ॥ २४ ॥ जया कम्मं खवित्ताणं, सिद्धिं गच्छइ नीरओ । तया लोगमत्थयत्थो, सिद्धो हवइ सासओ ॥ २५ ॥ सुहसायगस्स समणस्स, सायाउलगस्स निगामसाइस्स । उच्छोळणापहोयस्स, दुल्लहा सुगइ तारिसगस्स ॥ २६ ॥ तवोगुणपहाणस्स, उज्जु-

मइ-खंतिसंजमरयस्स । परीसहे जिणंतस्स, सुलहा सुगइ तारिसगस्स ॥ २७ ॥  
 पच्छा वि ते पयाया, खिप्पं गच्छंति अमरभवणाइं । जेसिं पिओ तवो संजमो य,  
 खंती य वंभचेरं च ॥ २८ ॥ इच्चेयं छज्जीवणियं, सम्मदिट्ठी सया जए । दुल्लहं  
 लहितु सामणं, कम्मुणा न विराहिजासि ॥ २९ ॥ ति-वेमि ॥ इति छज्जी-  
 वणिया णामं चउत्थमज्झयणं समत्तं ॥ ४ ॥

## अह पिंडेसणा णामं पंचममज्झयणं

### पहमो उद्देसो

संपत्ते भिक्खकालम्मि, असंभंतो अमुच्छिओ । इमेण कमजोगेण, भत्तपाणं गवे-  
 सए ॥ १ ॥ से गामे वा नगरे वा, गोयरग्गओ मुणी । चरे मंदमणुव्विग्गो, अव-  
 विखत्तेण चेयसा ॥ २ ॥ पुरओ जुगमायाए, पेहमाणो महिं चरे । वजंतो वीयहरि-  
 याइं, पाणे य दग्गमट्ठियं ॥ ३ ॥ ओवायं विसमं खाणुं, विजलं परिवजए । संकमेण  
 न गच्छिज्जा, विजमाणे परक्कमे ॥ ४ ॥ पवडंते व से तत्थ, पक्खलंते व संजए ।  
 हिंसेज पाणभूयाइं, तसे अट्टुव थावरे ॥ ५ ॥ तम्हा तेण न गच्छिज्जा, संजए सुस-  
 माहिए । सइ अन्नेण मग्गेण, जयमेव परक्कमे ॥ ६ ॥ इंगालं छारियं रासिं, तुसरसिं  
 च गोमयं । ससरक्खेहिं पाएहिं, संजओ तं नइक्कमे ॥ ७ ॥ न चरेज वासे वासंते,  
 महियाए व पडंतिए । महावाए व वायंते, तिरिच्छसंपाइमेसु वा ॥ ८ ॥ न चरेज  
 वेससामंते, वंभचेरवसाणुए । वंभयारिस्स दंतस्स, होज्जा तत्थ विसोत्तिथा ॥ ९ ॥  
 अणायणे चरंतस्स, संसग्गीए अभिक्खणं । होज्ज वयाणं पीला, सामणम्मि य  
 संसओ ॥ १० ॥ तम्हा एयं वियाणिता, दोसं दुग्गइवट्ठणं । वजए वेससामंतं, मुणी  
 एगंतमस्सिए ॥ ११ ॥ साणं सुइयं गाविं, दित्तं गोणं हयं गयं । संडिब्भं कलहं जुद्धं,  
 दूरओ परिवजए ॥ १२ ॥ अणुत्रए नावणए, अप्पहिट्ठे अणाउले । इंदियाइं जहा-  
 भागं, दमइत्ता मुणी चरे ॥ १३ ॥ दवदवस्स न गच्छेज्जा, भासमाणो य गोयरे ।  
 हसंतो नाभिगच्छेज्जा, कुलं उच्चावयं सया ॥ १४ ॥ आलोयं थिग्गलं दारं, संधिं  
 दग्गभवणाणि य । चरंतो न विणिज्जाए, संकट्ठाणं विवजए ॥ १५ ॥ रत्तो गिहवइणं  
 च, रहस्सारविख्याणि य । संकिलेसकरं ठाणं, दूरओ परिवजए ॥ १६ ॥ पडि-  
 कुट्टकुलं न पविसे, मामगं परिवजए । अचियत्तकुलं न पविसे, चियत्तं पविसे कुलं  
 ॥ १७ ॥ साणीपावारपिहियं, अप्पणा नावपंगुरे । कवाडं नो पणुल्लिज्जा, उग्गहंसि

अजाइया ॥ १८ ॥ गोयरग्गपविट्ठो य, वच्चसुत्तं न धारए । ओगासं फासुयं नच्चा,  
अणुन्नविय वोसिरे ॥ १९ ॥ नीयं दुवारं तमसं, कुट्टुगं परिवज्जए । अचक्खुविसओ  
जत्थ, पाणा दुप्पडिलेहगा ॥ २० ॥ जत्थ पुप्फाई वीयाई, विप्पइण्णाई कोट्टए ।  
अहुणोवलित्तं उल्लं, दद्धणं परिवज्जए ॥ २१ ॥ एल्लं दारगं साणं, वच्छगं वावि कोट्टए ।  
उल्लंविद्या न पविसे, विउहिताण व संजए ॥ २२ ॥ असंसत्तं पलोइज्जा, नाइदूराव-  
लोयए । उप्पुल्लं न विणिज्झाए, नियट्ठिज्ज अयंपिरो ॥ २३ ॥ अइभूमिं न गच्छेज्जा,  
गोयरग्गगओ मुणी । कुलस्स भूमिं जाणित्ता, मियं भूमिं परक्कमे ॥ २४ ॥ तत्थेव  
पडिलेहिज्जा, भूमिभागं वियक्खणो । सिणाणस्स य वच्चस्स, संलोणं परिवज्जए ॥ २५ ॥  
दगमट्ठियआयाणे, वीयाणि हरियाणि य । परिवज्जंतो चिट्ठिज्जा, सत्विदियसमाहिए  
॥ २६ ॥ तत्थ से चिट्ठिमाणस्स, आहरे पाणभोयणं । अकप्पियं न गिण्हिज्जा, पडि-  
गाहिज्ज कप्पियं ॥ २७ ॥ आहरंती सिया तत्थ, परिसाडिज्ज भोयणं । दितियं पडि-  
याइक्खे, “न मे कप्पइ तारिसं” ॥ २८ ॥ संमहमाणी पाणाणि, वीयाणि हरियाणि  
य । असंजमकरिं नच्चा, तारिसिं परिवज्जए ॥ २९ ॥ साहट्ठु निम्बिखवित्ताणं, सचित्तं  
घट्टियाणि य । तहेव समणट्ठाए, उदगं संपणुल्लिया ॥ ३० ॥ ओगाहइत्ता चलइत्ता,  
आहरे पाणभोयणं । दितियं पडियाइक्खे, “न मे कप्पइ तारिसं” ॥ ३१ ॥ पुरेक-  
म्मेण हत्थेण, दव्वीए भायणेण वा । दितियं पडियाइक्खे, “न मे कप्पइ तारिसं”  
॥ ३२ ॥ एवं उदउल्ले ससिणिद्धे, ससरक्खे मट्ठिया ऊसे । हरियाले हिं गुलए, मणो-  
सिला अंजणे लोणे ॥ ३३ ॥ गेरुय वण्णिय सेढिय, सोरट्ठिय पिट्ठ कुकुस कए य ।  
उक्किट्ठमसंसट्ठे, संसट्ठे चेव बोद्धव्वे ॥ ३४ ॥ असंसट्ठेण हत्थेण, दव्वीए भायणेण  
वा । दिज्जमाणं न इच्छिज्जा, पच्छाकम्मं जहिं भवे ॥ ३५ ॥ संसट्ठेण य हत्थेण,  
दव्वीए भायणेण वा । दिज्जमाणं पडिच्छिज्जा, जं तत्थेसणियं भवे ॥ ३६ ॥ दुण्हं  
तु भुंजमाणाणं, एगो तत्थ निमंतए । दिज्जमाणं न इच्छिज्जा, छंदं से पडिलेहए  
॥ ३७ ॥ दुण्हं तु भुंजमाणाणं, दो वि तत्थ निमंतए । दिज्जमाणं पडिच्छिज्जा, जं  
तत्थेसणियं भवे ॥ ३८ ॥ गुव्विणीए उवन्नत्थं, विविहं पाणभोयणं । भुंजमाणं विव-  
ज्जिज्जा, भुत्तसेसं पडिच्छए ॥ ३९ ॥ सिया य समणट्ठाए, गुव्विणी कालमासिणी ।  
उट्ठिया वा निसीइज्जा, निसच्चा वा पुणुट्ठए ॥ ४० ॥ तं भवे भत्तपाणं तु, संजयाण  
अकप्पियं । दितियं पडियाइक्खे, “न मे कप्पइ तारिसं” ॥ ४१ ॥ थणगं पिज्ज-  
माणी, दारगं वा कुमारियं । तं निक्खवित्तु रोअंतं, आहरे पाणभोयणं ॥ ४२ ॥  
तं भवे भत्तपाणं तु, संजयाण अकप्पियं । दितियं पडियाइक्खे, “न मे कप्पइ तारिसं”  
॥ ४३ ॥ जं भवे भत्तपाणं तु, कप्पाकप्पम्मि संकियं । दितियं पडियाइक्खे, “न मे

कप्पइ तारिसं” ॥ ४४ ॥ दग्गवारेण पिहियं, नीसाए पीढएण वा । लोढेण वावि  
 लेवेण, सिल्लेसेण व केणइ ॥ ४५ ॥ तं च उब्भिमदिया दिज्जा, समणट्ठाए व दावए ।  
 दितियं पडियाइक्खे, “न मे कप्पइ तारिसं” ॥ ४६ ॥ असणं पाणगं वावि, खाइमं  
 साइमं तहा । जं जाणिज्ज सुणिज्जा वा, “दाणट्ठा पगडं इमं” ॥ ४७ ॥ तं भवे भत्त-  
 पाणं तु, संजयाण अकप्पियं । दितियं पडियाइक्खे, “न मे कप्पइ तारिसं” ॥ ४८ ॥  
 असणं पाणगं वावि, खाइमं साइमं तहा । जं जाणिज्ज सुणिज्जा वा, “पुण्णट्ठा पगडं  
 इमं” ॥ ४९ ॥ तं भवे भत्तपाणं तु, संजयाण अकप्पियं । दितियं पडियाइक्खे, “न  
 मे कप्पइ तारिसं” ॥ ५० ॥ असणं पाणगं वावि, खाइमं साइमं तहा । जं जाणिज्ज  
 सुणिज्जा वा, “वणिमट्ठा पगडं इमं” ॥ ५१ ॥ तं भवे भत्तपाणं तु, संजयाण अक-  
 प्पियं । दितियं पडियाइक्खे, “न मे कप्पइ तारिसं” ॥ ५२ ॥ असणं पाणगं वा-  
 वि, खाइमं साइमं तहा । जं जाणिज्ज सुणिज्जा वा, “समणट्ठा पगडं इमं” ॥ ५३ ॥  
 तं भवे भत्तपाणं तु, संजयाण अकप्पियं । दितियं पडियाइक्खे, “न मे कप्पइ  
 तारिसं” ॥ ५४ ॥ उद्देसियं कीयगडं, पूढकम्मं च आहडं । अज्झोयर पामिच्चं, सीस-  
 जायं विवज्जए ॥ ५५ ॥ उग्गमं से य पुच्छिज्जा, कस्सट्ठा केण वा कडं ? । सुच्चा  
 निस्संकियं सुद्धं, पडिगाहिज्ज संजए ॥ ५६ ॥ असणं पाणगं वावि, खाइमं साइमं  
 तहा । पुप्फेसु हुज्ज उम्मीसं, वीएसु हरिएसु वा ॥ ५७ ॥ तं भवे भत्तपाणं तु,  
 संजयाण अकप्पियं । दितियं पडियाइक्खे, “न मे कप्पइ तारिसं” ॥ ५८ ॥ असणं  
 पाणगं वावि, खाइमं साइमं तहा । उदगंमि हुज्ज निक्खित्तं, उत्तिगपणगेसु वा ॥ ५९ ॥  
 तं भवे भत्तपाणं तु, संजयाण अकप्पियं । दितियं पडियाइक्खे, “न मे कप्पइ तारिसं”  
 ॥ ६० ॥ असणं पाणगं वावि, खाइमं साइमं तहा । अगणिम्मि होज्ज निक्खित्तं, तं  
 च संघट्टिया दए ॥ ६१ ॥ तं भवे भत्तपाणं तु, संजयाण अकप्पियं । दितियं पडि-  
 याइक्खे, “न मे कप्पइ तारिसं” ॥ ६२ ॥ एवं उस्सक्किया ओसक्किया, उज्जालिया  
 पज्जालिया निव्वाविद्या । उस्सिन्धिया निस्सिन्धिया, उव्वत्तिया ओयारिया दए ॥ ६३ ॥  
 तं भवे भत्तपाणं तु, संजयाण अकप्पियं । दितियं पडियाइक्खे, “न मे कप्पइ  
 तारिसं” ॥ ६४ ॥ हुज्ज कट्ठं सिलं वावि, इट्ठालं वावि एगया । ठवियं संकमट्ठाए,  
 तं च हुज्ज चलाचलं ॥ ६५ ॥ न तेण भिक्खू गच्छिज्जा, दिट्ठो तत्थ असंजमो ।  
 गंभीरं झुसिरं चैव, सव्विदियसमाहिए ॥ ६६ ॥ निस्सेणिं फलगं पीढं, उस्सवित्ता-  
 णमारुहे । मंचं कीलं च पासायं, समणट्ठाए व दावए ॥ ६७ ॥ दुरुहमाणी पवडिज्जा,  
 हत्थं पायं व ल्खए । पुढविजीवे वि हिंसैज्जा, जे य तं निस्सिया जगे ॥ ६८ ॥  
 एयारिसे महादोसे, जाणिऊण महेसिणो । तम्हा मालोहडं भिक्खं, न पडिणिहंति

संजया ॥ ६९ ॥ कंदं मूलं पलंबं वा, आमं छिन्नं च सन्निरं । तुवागं सिंगबेरं च,  
 आमगं परिवज्जए ॥ ७० ॥ तहेव सत्तुचुण्णाइं, कोलचुण्णाइं आवणे । सकुलिं फाणियं  
 पूयं, अन्नं वावि तहाविहं ॥ ७१ ॥ विकायमाणं पसढं, रएण परिफासियं । दितियं  
 पडियाइक्खे, “न मे कप्पइ तारिसं” ॥ ७२ ॥ बहुअट्ठिअं पुग्गलं, अणमिसं वा  
 बहुकंटयं । अत्थियं तिंदुयं विळं, उच्छुखंडं व सिंवलं ॥ ७३ ॥ अप्पे सिया भोय-  
 णजाए, बहुउज्झियधम्मिए । दितियं पडियाइक्खे, “न मे कप्पइ तारिसं” ॥ ७४ ॥  
 तहेवुच्चावयं पाणं, अदुवा वारधोयणं । संसेइमं चाउलोदगं, अहुणाधोयं विवज्जए  
 ॥ ७५ ॥ जं जाणेज्ज चिराधोयं, मइए दंसणेण वा । पडिपुच्छिऊण सुच्चा वा, जं  
 च निस्संकियं भवे ॥ ७६ ॥ अजीवं परिणयं नच्चा, पडिगाहिज्ज संजए । अह संकियं  
 भविज्जा, आसाइत्ताण रोयए ॥ ७७ ॥ “थोवमासायणट्ठाए, हत्थगम्मि दलाहि मे ।  
 मा मे अच्चं विलं पूयं, नालं तिण्हं विणित्तए” ॥ ७८ ॥ तं च अच्चं विलं पूयं, नालं  
 तिण्हं विणित्तए । दितियं पडियाइक्खे, “न मे कप्पइ तारिसं” ॥ ७९ ॥ तं च हुज्ज  
 अकामेणं, विमणेण पडिच्छियं । तं अप्पणा न पिबे, नो वि अन्नस्स दावए ॥ ८० ॥  
 एगंतमवक्कमिता, अचित्तं पडिलेहिया । जयं परिट्ठविज्जा, परिट्ठप्प पडिक्कमे ॥ ८१ ॥  
 सिया य गोयरग्गओ, इच्छिज्जा परिभुत्तुयं । कुट्ठगं भित्तिमूलं वा, पडिलेहित्ताण  
 फालुयं ॥ ८२ ॥ अणुववित्तु मेहावी, पडिच्छन्नम्मि संवुडे । हत्थगं संपमज्जिता,  
 तत्थ भुंजिज्ज संजए ॥ ८३ ॥ तत्थ से भुंजमाणस्स, अट्ठिअं कंटओ सिया । तणक्क-  
 ड्डसक्करं वावि, अन्नं वावि तहाविहं ॥ ८४ ॥ तं उक्खिवित्तु न निक्खिवे, आस-  
 एण न छट्टए । हत्थेण तं गहेऊण, एगंतमवक्कमे ॥ ८५ ॥ एगंतमवक्कमिता, अचित्तं  
 पडिलेहिया । जयं परिट्ठविज्जा, परिट्ठप्प पडिक्कमे ॥ ८६ ॥ सिया य भिक्खू इच्छिज्जा,  
 सिज्जमागम्म भुत्तुयं । सपिंडपायमागम्म, उंडुयं पडिलेहिया ॥ ८७ ॥ विणएण  
 पविस्सिता, सगासे गुरुणो मुणी । इरियावहियमायाय, आगओ य पडिक्कमे ॥ ८८ ॥  
 आभोइत्ताण नीसेसं, अइयारं जहक्कमं । गमणागमणे चेव, भत्तपाणे व संजए ॥ ८९ ॥  
 उज्जुप्पन्नो अणुव्विग्गो, अव्वक्खित्तेण चेयसा । आलोए गुरुसगासे, जं जहा गहियं

१ बहुअट्ठिअं=बहुगट्ठियं-गट्ठिया ‘गुठली’ ति भासाए, बहुईओ गट्ठियाओ ठियाओ  
 जम्मि तं ब०, गकारयकारलोवो, एवं बहुअट्ठिअस्स निष्फत्ती । बहुवीयगं ति अट्ठो । अहवा  
 बहुअट्ठिअं=बहुअ+ट्ठिअं-बहुयाइं वीयाइं ठियाइं जंसि तं तारिसं फलं । २ पुग्गलं=प+  
 रग्गलं-पगरिसेण उग्गलणारिहं-पक्खेवणजुग्गं विज्जए जंसि तं तारिसं फलविसेसं ।  
 ३ अणमिसं ति वा अणण्णासं ति वा एगट्ठा । ४ पणसफलाइयं । ५ अगत्थियस्सक्खफलं,  
 अगत्थियस्सऽज्जाहारो अत्थियं । ६ सिद्धी जहा हेट्ठा, णवरं लिंगमेओ पाइयत्तणओ ।



मवे ॥ ९० ॥ न सम्ममालोइयं हुज्जा, पुर्व्वि पच्छा व जं कडं । पुणो पडिक्कमे तस्स,  
 वोसट्ठो चित्ते इमं ॥ ९१ ॥ अहो जिणेहिऽसावज्जा, वित्ती साहूण देसिया । सुक्ख-  
 साहणहेउस्स, साहुदेहस्स धारणा ॥ ९२ ॥ नमुक्कारेण पारित्ता, करित्ता जिणसंथवं ।  
 सज्जायं पट्टवित्ताणं, वीसमेज्ज खणं मुणी ॥ ९३ ॥ वीसमंतो इमं चित्ते, हियमट्ठं  
 लाभमट्ठिओ । जइ मे अणुग्गहं कुज्जा, साहू हुज्जामि तारिओ ॥ ९४ ॥ साहवो तो  
 चियत्तेणं, निमंतिज्ज जहक्कमं । जइ तत्थ केइ इच्छिज्जा, तेहिं सद्धिं तु भुंजए ॥ ९५ ॥  
 अह कोइ न इच्छिज्जा, तओ भुंजिज्ज एगओ । आलोए भायणे साहू, जयं अपरि-  
 साडियं ॥ ९६ ॥ तित्तगं व कट्ठयं व कसायं, अंबिलं व महुरं लवणं वा । एयलद्ध-  
 मन्नत्थपउत्तं, महुवयं व भुंजिज्ज संजए ॥ ९७ ॥ अरसं विरसं वावि, सूइयं वा  
 असूइयं । उट्ठं वा जइ वा सुक्कं, मंथकुम्मासभोयणं ॥ ९८ ॥ उप्पञ्चं नाइहीलीज्जा,  
 अपं वा बहु फासुयं । मुहालद्धं मुहाजीवी, भुंजिज्जा दोसवज्जियं ॥ ९९ ॥ दुल्लहा  
 उ मुहादाई, मुहाजीवी वि दुल्लहा । मुहादाई मुहाजीवी, दो वि गच्छंति सुग्गइं  
 ॥ १०० ॥ ति-वेस्मि ॥ इति पिंडेसणाए पदमो उद्देशो समत्तो ॥ ५-१ ॥

## अह पिंडेसणाए वीओ उद्देशो

पडिग्गहं संलिहिताणं, लेवमायाइ संजए । दुग्गंधं वा सुग्गंधं वा, सव्वं भुंजे न  
 छट्ठए ॥ १ ॥ सेज्जा निसीहियाए, समावन्नो य गोयरे । अयावयट्ठा भुच्चाणं, जइ  
 तेणं न संथरे ॥ २ ॥ तओ कारणसमुप्पन्ने, भत्तपाणं गवेसए । विहिणा पुव्वउत्तेणं,  
 इमेणं उत्तरेण य ॥ ३ ॥ कालेण निक्खमे भिक्खू, कालेण य पडिक्कमे । अकालं  
 च विवज्जित्ता, काले कालं समायरे ॥ ४ ॥ “अकाले चरसि भिक्खू, कालं न  
 पडिलेहसि । अप्पाणं च किलामेसि, सच्चिवेसं च गरिहसि” ॥ ५ ॥ सइ काले चरे  
 भिक्खू, कुज्जा पुरिसकारियं । “अलाभो” ति न सोइज्जा, “तवो” ति अहियासए  
 ॥ ६ ॥ तहेवुच्चावया पाणा, भत्तट्ठाए समागया । तं उज्जुयं न गच्छिज्जा, जयमेव  
 परक्कमे ॥ ७ ॥ गोयरग्गपविट्ठो य, न निसीइज्ज कत्थइ । कहं च न पवंधिज्जा,  
 चिट्ठित्ताण व संजए ॥ ८ ॥ अग्गलं फलिहं दारं, कवाडं वावि संजए । अवलंबिया  
 न चिट्ठिज्जा, गोयरग्गओ मुणी ॥ ९ ॥ समणं माहणं वावि, किविणं वा वणीमणं ।  
 उवसंक्रमंतं भत्तट्ठा, पाणट्ठाए व संजए ॥ १० ॥ तं अइक्कमित्तु न पविसे, न चिट्ठे  
 चक्खुगोयरे । एगंतमवक्कमिता, तत्थ चिट्ठिज्ज संजए ॥ ११ ॥ वणीमगस्स वा  
 तस्स, दायगस्सुभयस्स वा । अप्पत्तिथं सिया हुज्जा, लहुत्तं पवयणस्स वा ॥ १२ ॥

पडिसेहिण व दिन्ने वा, तओ तम्मि नियत्तिण । उवसंकमिज भत्तट्ठा, पाणट्ठाए व संजए ॥ १३ ॥ उप्पलं पउमं वावि, कुमुयं वा मगदंतियं । अन्नं वा पुप्फसच्चित्तं, तं च संलुंच्चिया दए ॥ १४ ॥ तं भवे भत्तपाणं तु, संजयाण अकप्पियं । दित्तियं पडियाइक्खे, “न मे कप्पइ तारिसं” ॥ १५ ॥ उप्पलं पउमं वावि, कुमुयं वा मगदंतियं । अन्नं वा पुप्फसच्चित्तं, तं च संमद्दिया दए ॥ १६ ॥ तं भवे भत्तपाणं तु, संजयाण अकप्पियं । दित्तियं पडियाइक्खे, “न मे कप्पइ तारिसं” ॥ १७ ॥ सालुयं वा विरालियं, कुमुयं उप्पलनालियं । मुणालियं सासवनालियं, उच्छुखंडं अनिव्वुडं ॥ १८ ॥ तरुणगं वा पवालं, रुक्खस्स तणगस्स वा । अन्नस्स वावि हरियस्स, आमगं परिवज्जए ॥ १९ ॥ तरुणियं वा छिवाडिं, आमियं भज्जियं सइं । दित्तियं पडियाइक्खे, “न मे कप्पइ तारिसं” ॥ २० ॥ तहा कोलमणस्सिन्नं, वेलुयं कासवनालियं । तिलपप्पडगं नीमं, आमगं परिवज्जए ॥ २१ ॥ तहेव चाउलं पिट्ठं, वियडं वा तत्तनिव्वुडं । तिलपिट्ठपूइपिण्णागं, आमगं परिवज्जए ॥ २२ ॥ कविट्ठं माउलिंगं च, मूलगं मूलगतियं । आमं असत्थपरिणयं, मणसा वि न पत्थए ॥ २३ ॥ तहेव फलमंथूणि, वीयमंथूणि जाणिया । बिहेलगं पियालं च, आमगं परिवज्जए ॥ २४ ॥ समुयाणं चरे भिक्खू, कुलं उच्चावयं सया । नीयं कुलमइ-क्कम्म, ऊसडं नाभिधारए ॥ २५ ॥ अदीणो वित्तिमेसिज्जा, न विसीएज पंडिण । अमुच्छिओ भोयणम्मि, मायन्ने एसणारए ॥ २६ ॥ बहुं परघरे अत्थि, विविहं खाइमसाइमं । न तत्थ पंडिओ कुप्पे, इच्छा दिज्ज परो न वा ॥ २७ ॥ सयणा-सणवत्थं वा, भत्तं पाणं च संजए । अदितस्स न कुप्पिज्जा, पच्चक्खे वि य दीसओ ॥ २८ ॥ इत्थियं पुरिसं वावि, डहरं वा महल्लगं । वंदमाणं न जाइज्जा, नो य णं फरुसं वए ॥ २९ ॥ जे न वंदे न से कुप्पे, वंदिओ न समुक्कसे । एवमन्नेसमाणस्स, सामण्णमणुचिट्ठइ ॥ ३० ॥ सिया एगइओ लद्धुं, लोभेण विणिगूहइ । “भामेयं दाइयं संतं, दट्ठणं सयमायए” ॥ ३१ ॥ अत्तट्ठा गुरुओ लुद्धो, बहुं पावं पकुव्वइ । दुत्तोसओ य से होइ, निव्वाणं च न गच्छइ ॥ ३२ ॥ सिया एगइओ लद्धुं, विविहं पाणभोयणं । भद्दगं भद्दगं भोच्चा, विवण्णं विरसमाहरे ॥ ३३ ॥ जाणंतु ता इमे समणा, “आययट्ठी अयं सुणी । संतुट्ठो सेवए पंतं, लहवित्ती सुतोसओ” ॥ ३४ ॥ पूयणट्ठा जसोकाभी, माणसंमाणकामए । बहुं पसवई पावं, मायासल्लं च कुव्वइ ॥ ३५ ॥ सुरं वा मेरगं वावि, अन्नं वा मज्जगं रसं । ससक्खं न पिबे भिक्खू, जसं सारक्खमप्पणो ॥ ३६ ॥ पियए एगओ तेणो, “न मे कोइ वियाणइ” । तस्स पस्सह दोसाइं, नियडिं च सुणेह मे ॥ ३७ ॥ वट्ठइ सुंडिया तस्स, मायामोसं

च भिक्खुणो । अयसो य अनिव्वणं, सययं च असाहुया ॥ ३८ ॥ निञ्चुव्विग्गो जहा तेणो, अत्तकम्मेहिं दुम्मई । तारिसो मरणंते वि, नाराहेइ संवरं ॥ ३९ ॥ आयरिए नाराहेइ, समणे यावि तारिसो । गिहत्था वि णं गरिहंति, जेण जाणंति तारिसं ॥ ४० ॥ एवं तु अगुणप्पेही, गुणाणं च विवज्जए । तारिसो मरणंते वि, नाराहेइ संवरं ॥ ४१ ॥ तवं कुव्वइ मेहावी, पणीयं वज्जए रसं । मज्जप्पमाय-  
विरओ, तवस्सी अइउक्कसो ॥ ४२ ॥ तस्स पस्सह कल्लाणं, अणेगसाहुपूइयं । विउल्लं अत्थसंजुत्तं, कित्तइस्सं सुणेह मे ॥ ४३ ॥ एवं तु गुणप्पेही, अगुणाणं च विवज्जए । तारिसो मरणंते वि, आराहेइ संवरं ॥ ४४ ॥ आयरिए आराहेइ, समणे यावि तारिसो । गिहत्था वि णं पूयंति, जेण जाणंति तारिसं ॥ ४५ ॥ तवतेणे वयतेणे, ह्वतेणे य जे नरे । आयारभावतेणे य, कुव्वइ देवकिव्विसं ॥ ४६ ॥ लद्धूण वि देवत्तं, उववन्नो देवकिव्विसे । तत्थावि से न याणाइ, “किं मे किच्चा इमं फलं ?” ॥ ४७ ॥ तत्तो वि से चइत्ताणं, लब्भइ एलमूयगं । नरगं तिरिक्खजोणिं वा, वोही जत्थ सुदुल्लहा ॥ ४८ ॥ एयं च दोसं दद्धूणं, नायपुत्तेण भासियं । अणुमायं पि मेहावी, मायामोसं विवज्जए ॥ ४९ ॥ सिक्खिऊण भिक्खेसणसोहिं, संजयाण बुद्धाण सगासे । तत्थ भिक्खू सुप्पणिहिंदिए, तिक्कलज्जगुणवं विहरिजासि ॥ ५० ॥ ति-वेमि ॥ इति पिंडेसणाए बीओ उहेसो समत्तो ॥ ५-२ ॥ इति पिंडेसणा णामं पंचममज्झयणं समत्तं ॥ ५ ॥



## अह महल्लियायारकहा(धम्मत्थकाम)णामं

### छट्ठमज्झयणं

नाणदंसणसंपन्नं, संजमे य तवे रयं । गणिमागमसंपन्नं, उज्जाणम्मि समोसदं ॥ १ ॥ रायाणो रायमच्चा य, माहणा अदुव खत्तिथा । पुच्छंति निहुयप्पाणो, कहं मे आयारगोयरो ? ॥ २ ॥ तेसिं सो निहुओ दंतो, सव्वभूयसुहावहो । सिक्खाए सुसमाउत्तो, आयक्खइ विक्खखणो ॥ ३ ॥ हंदि धम्मत्थकामाणं, निगंथाणं सुणेह मे । आयारगोयरं भीमं, सयलं दुरहिट्ठियं ॥ ४ ॥ ननत्थ एरिसं वुत्तं, जं लोए परमदुच्चरं । विउल्लट्ठाणभाइस्स, न भूयं न भविस्सई ॥ ५ ॥ सखुड्डुगवियत्ताणं, वाहियाणं च जे गुणा । अखंडफुडिया कायव्वा, तं सुणेह जहा तहा ॥ ६ ॥ दस अट्ठ य ठाणाई, जाई वालोऽवरज्झइ । तत्थ अण्णयरे ठाणे, निगंथत्ताओ भस्सइ ॥ ७ ॥ वय<sup>१३</sup>छंक्कं काय<sup>१३</sup>छंक्कं, अ<sup>१३</sup>क्कप्पो गिहि<sup>१४</sup>भायणं । पल्लियं<sup>१५</sup> निसिज्जा य,

सिणार्णं सोहवज्जणं ॥ ८ ॥ (१) तत्थिमं पढमं ठाणं, महावीरेण देसियं । अहिंसा  
 निउणा दिट्ठा, सव्वभूएसु संजमो ॥ ९ ॥ जावंति लोए पाणा, तसा अदुव थावरा ।  
 ते जाणमजाणं वा, न हणे नो वि घायए ॥ १० ॥ सव्वे जीवा वि इच्छंति,  
 जीविउं न मरिज्जिउं । तम्हा पाणिवहं घोरं, निग्गंथा वज्जयंति णं ॥ ११ ॥  
 (२) अप्पणट्ठा परट्ठा वा, कोहा वा जइ वा भया । हिंसणं न सुसं बूया, नो वि अब्बं  
 वयावए ॥ १२ ॥ सुसावाओ य लोमंमि, सव्वसाद्धहिं गरिहिओ । अविस्सासो य  
 भूयाणं, तम्हा मोसं विवज्जए ॥ १३ ॥ (३) चित्तमंतमचित्तं वा, अप्पं वा जइ वा  
 वहुं । दंतसोहणमित्तं पि, उग्गहंसि अजाइया ॥ १४ ॥ तं अप्पणा न गिण्हंति, नो  
 वि गिण्हावए परं । अब्बं वा गिण्हमाणं पि, नाणुजाणंति संजया ॥ १५ ॥  
 (४) अब्बभचरियं घोरं, पमायं दुरहिट्ठियं । नायरंति मुणी लोए, मेयाययणवज्जिणो  
 ॥ १६ ॥ मूलमेयमहम्मस्स, महादोससमुस्सयं । तम्हा मेहुणसंसग्गं, निग्गंथा  
 वज्जयंति णं ॥ १७ ॥ (५) विडमुब्भेइमं लोणं, तिळं सप्पि च फाणियं । न ते  
 सन्निहिमिच्छंति, नायपुत्तवओरया ॥ १८ ॥ लोहस्सेस अणुप्फासे, मत्ते अन्नय-  
 रामवि । जे सिया सन्निहीकामे, गिही पव्वइए न से ॥ १९ ॥ जं पि वत्थं व पायं  
 वा, कंबलं पायपुंछणं । तं पि संजमलज्जट्ठा, धारंति परिहरंति य ॥ २० ॥ न सो  
 परिग्गहो वुत्तो, नायपुत्तेण ताइणा । “मुच्छा परिग्गहो वुत्तो”, इइ वुत्तं महेसिणा  
 ॥ २१ ॥ सव्वत्थुवहिणा वुद्धा, संरक्खणपरिग्गहे । अवि अप्पणो वि देहंसि,  
 नायरंति ममाइयं ॥ २२ ॥ (६) अहो निच्चं तवोकम्मं, सव्ववुद्धेहिं वण्णिणं । जा  
 य लज्जासमा वित्ती, एगभत्तं च भोयणं ॥ २३ ॥ संतिमे सुहुमा पाणा, तसा अदुव  
 थावरा । जाइं राओ अपासंतो, कहमेसणियं चरे ॥ २४ ॥ उदउल्लं वीयसंसत्तं,  
 पाणा निव्वडिया माहिं । दिया ताइं विवज्जिजा, राओ तत्थ कहं चरे ॥ २५ ॥  
 एयं च दोसं दड्ढणं, नायपुत्तेण भासियं । सव्वाहारं न भुंजंति, निग्गंथा राइभोयणं  
 ॥ २६ ॥ (१) पुढविकायं न हिंसंति, मणसा वयसा कायसा । तिविहेण करणजो-  
 एण, संजया सुसमाहिया ॥ २७ ॥ पुढविकायं विहिंसंतो, हिंसइ उ तयस्सिए ।  
 तसे य विविहे पाणे, चक्खुसे य अचक्खुसे ॥ २८ ॥ तम्हा एयं वियाणित्ता, दोसं  
 दुग्गइवव्वणं । पुढविकायसमारंभं, जावज्जीवाए वज्जए ॥ २९ ॥ (२) आउकायं न  
 हिंसंति, मणसा वयसा कायसा । तिविहेण करणजोएण, संजया सुसमाहिया  
 ॥ ३० ॥ आउकायं विहिंसंतो, हिंसइ उ तयस्सिए । तसे य विविहे पाणे, चक्खुसे  
 य अचक्खुसे ॥ ३१ ॥ तम्हा एयं वियाणित्ता, दोसं दुग्गइवव्वणं । आउकायसमा-

रंभं, जावजीवाए वज्जए ॥ ३२ ॥ (३) जायतेयं न इच्छंति, पावगं जलइत्तए ।  
 तिकव्वमन्नयरं सत्थं, सव्वओ वि दुरासयं ॥ ३३ ॥ पाईणं पडिणं वावि, उड्डं  
 अणुदिसामवि । अहे दाहिणओ वावि, दहे उत्तरओ वि य ॥ ३४ ॥ भूयाण-  
 मेसमाघाओ, हव्ववाहो न संसओ । तं पईवपयावट्ठा, संजया किंचि नारभे  
 ॥ ३५ ॥ तम्हा एयं वियाणिता, दोसं दुग्गइवड्डणं । तेउकायसमारंभं, जावजीवाए  
 वज्जए ॥ ३६ ॥ (४) अणिलस्स समारंभं, बुद्धा मञ्जंति तारिसं । सावज्जबहुलं चेयं,  
 नेयं ताईहिं सेवियं ॥ ३७ ॥ तालियंटेण पत्तेण, साहाविहुयणेण वा । न ते  
 वीइउमिच्छंति, वीयावेऊण वा परं ॥ ३८ ॥ जं पि वत्थं व पायं वा, कंवलं  
 पायपुंछणं । न ते वायमुइरंति, जयं परिहरंति य ॥ ३९ ॥ तम्हा एयं वियाणिता,  
 दोसं दुग्गइवड्डणं । वाउकायसमारंभं, जावजीवाए वज्जए ॥ ४० ॥ (५) वणस्सइं  
 न हिंसंति, मणसा वयसा कायसा । ति विहेण करणजोएण, संजया सुसमाहिया  
 ॥ ४१ ॥ वणस्सइं विहिंसंतो, हिंसइं उ तयस्सिए । तसे य विविहे पाणे, चक्खुसे  
 य अचक्खुसे ॥ ४२ ॥ तम्हा एयं वियाणिता, दोसं दुग्गइवड्डणं । वणस्सइ-  
 समारंभं, जावजीवाए वज्जए ॥ ४३ ॥ (६-१२) तसकायं न हिंसंति, मणसा  
 वयसा कायसा । ति विहेण करणजोएण, संजया सुसमाहिया ॥ ४४ ॥ तसकायं  
 विहिंसंतो, हिंसइं उ तयस्सिए । तसे य विविहे पाणे, चक्खुसे य अचक्खुसे ॥ ४५ ॥  
 तम्हा एयं वियाणिता, दोसं दुग्गइवड्डणं । तसकायसमारंभं, जावजीवाए वज्जए  
 ॥ ४६ ॥ (१३) जाइं चत्तारिऽभुजाइं, इसिणाहारमाइणि । ताइं तु विवज्जंतो,  
 संजमं अणुपालए ॥ ४७ ॥ पिंडं सिज्जं च वत्थं च, चउत्थं पायमेव य । अकप्पियं  
 न इच्छिज्जा, पडिगाहिज्ज कप्पियं ॥ ४८ ॥ जे नियागं ममायंति, कीयमुद्देसियाहडं ।  
 वहं ते समणुजाणंति, इइ वुत्तं महेसिणा ॥ ४९ ॥ तम्हा असणपाणाइं, कीयमुद्दे-  
 सियाहडं । वज्जयंति ठियप्पाणो, निग्गंथा धम्मजीविणो ॥ ५० ॥ (१४) कंसेसु  
 कंसपाएसु, कुंडमोएसु वा पुणो । भुंजंतो असणपाणाइं, आयारा परिभस्सइ ॥ ५१ ॥  
 सीओदगसमारंभे, मत्तधोयणछड्डणे । जाइं छंनंति भूयाइं, दिट्ठो तत्थ असंजमो  
 ॥ ५२ ॥ पच्छाकम्मं पुरेकम्मं, सिया तत्थ न कप्पइ । एयमट्ठं न भुंजंति, निग्गंथा  
 निहिमायणे ॥ ५३ ॥ (१५) आसंढीपलियंकेसु, मंचमासालएसु वा । अणायरि-  
 यमजाणं, आसइत्तु सइत्तु वा ॥ ५४ ॥ नासंढीपलियंकेसु, न निसिज्जा न पीढए ।  
 निग्गंथाऽपडिलेहाए, बुद्धवुत्तमहिट्ठगा ॥ ५५ ॥ गंभीरविजया एए, पाणा दुप्पडि-  
 लेहगा । आसंढी-पलियंको य, एयमट्ठं विवज्जिया ॥ ५६ ॥ (१६) गोयरग्गपविट्ठस्स,  
 निसिज्जा जस्स कप्पइ । इमेरिसमणायारं, आवज्जइ अबोहियं ॥ ५७ ॥ विवत्ती

बंमचेरस्स, पाणाणं च वहे वहो । वणीमगपडिग्घाओ, पडिकोहो अगारिणं ॥ ५८ ॥  
 अगुत्ती बंमचेरस्स, इत्थीओ वावि संकणं । कुसीलवड्डणं ठाणं, दूरओ परिवज्जए  
 ॥ ५९ ॥ तिण्हमन्नयरागस्स, निसिज्जा जस्स कप्पइ । जराए अभिभूयस्सं, वाहियस्स  
 तवस्सिणो ॥ ६० ॥ ( १७ ) वाहिओ वा अरोगी वा, सिणाणं जो उ पत्थए ।  
 वुक्कंतो होइ आचारो, जढो हवइ संजमो ॥ ६१ ॥ संतिमे सुहुमा पाणा, घसासु  
 भिलगासु य । जे य भिक्खू सिणायंतो, वियडेणुप्पिलावए ॥ ६२ ॥ तम्हा ते न  
 सिणायंति, सीएण उसिणेण वा । जावजीवं वयं धोरं, असिणाणमहिट्ठमा ॥ ६३ ॥  
 सिणाणं अदुवा कक्कं, लोद्धं पउमगाणि य । गायस्सुव्वट्ठणट्ठाए, नायरंति कयइ वि  
 ॥ ६४ ॥ ( १८ ) नणिणस्स वावि सुंडस्स, दीहरोमनहंसिणो । मेहुणा उवसंतस्स,  
 किं विभूसाए कारियं ॥ ६५ ॥ विभूसावत्तियं भिक्खू, कम्मं वंघइ च्चिक्कणं ।  
 संसारसाथरे धोरे, जेणं पडइ दुरुत्तरे ॥ ६६ ॥ विभूसावत्तियं चेयं, बुद्धा मञ्जेति  
 तारिसं । सावज्जवहुलं चेयं, नेयं ताईहिं सेवियं ॥ ६७ ॥ खवेंति अप्पाणममोह-  
 दंसिणो, तवे रया संजमअजवे गुणे । धुणंति पावाईं पुरेकडाई, नवाईं पावाईं न  
 ते करेंति ॥ ६८ ॥ सओवसंता अममा अकिंचणा, सविज्जविज्जाणुगया जसंसिणो ।  
 उउप्पसन्ने विमले व चंदिमा, सिद्धिं विमाणाई उवेंति ताडणो ॥ ६९ ॥ ति-बेमि ॥  
 इति महल्लियायारकहा णामं छट्ठमज्झयणं समत्तं ॥ ६ ॥



## अह सुवक्कसुद्धी णामं सत्तममज्झयणं



चउण्हं खलु भासाणं, परिसंखाय पच्चवं । दुण्हं तु विणयं सिक्खे, दो न भासिज्ज  
 सव्वसो ॥ १ ॥ जा य सच्चा अवत्तव्वा, सच्चामोसा य जा मुसा । जा य बुद्धेहि-  
 ऽणाइण्णा, न तं भासिज्ज पच्चवं ॥ २ ॥ असच्चमोसं सच्चं च, अणवज्जमकक्कसं ।  
 समुप्पेहमसंदिद्धं, गिरं भासिज्ज पच्चवं ॥ ३ ॥ एयं च अट्ठमज्जं वा, जं तु नामेइ  
 सासयं । स भासं सच्चमोसं च, तं पि धीरो विवज्जए ॥ ४ ॥ वित्तहं पि तहमुत्ति,  
 जं गिरं भासए नरो । तम्हा सो पुट्ठो पावेणं, किं पुण जो मुसं वए ॥ ५ ॥ तम्हा  
 “गच्छामो वक्खामो, अमुगं वा णे भविस्सइ । अहं वा णं करिस्सामि, एसो वा णं  
 करिस्सइ” ॥ ६ ॥ एवमाइ उ जा भासा, एसकालम्मि संकिया । संपयाइयमट्ठे वा,  
 तं पि धीरो विवज्जए ॥ ७ ॥ अइयम्मि य कालम्मि, पञ्चुप्पन्नमणागए । जमट्ठं तु  
 न जाणिज्जा, “एवमेयं” ति नो वए ॥ ८ ॥ अइयम्मि य कालम्मि, पञ्चुप्पन्नमणा-  
 गए । जत्थ संका भवे तं तु, “एवमेयं” ति नो वए ॥ ९ ॥ अइयम्मि य कालम्मि,

पञ्चुप्पन्नमणागए । निस्संकिंयं भवे जं तु, “एवमेयं” ति निद्दिसे ॥ १० ॥ तहेव फरुसा भासा, गुरुभूओवघाइणी । सच्चा वि सा न वत्तवा, जओ पावस्स आगमो ॥ ११ ॥ तहेव काणं “काणे” ति, पंडगं “पंडगे” ति वा । वाहियं वावि “रोणि” ति, तेणं “चोरे” ति नो वए ॥ १२ ॥ एएणत्तेण अट्टेण, परो जेणुवहम्मइ । आया-  
रभावदोसजू, न तं भासिज्ज पन्नवं ॥ १३ ॥ तहेव “होले” “गोलि” ति, “साणे” वा “वसुले” ति य । “दमए” “दुहए” वावि, न तं भासिज्ज पन्नवं ॥ १४ ॥ अज्जिए पज्जिए वावि, अम्मो माउसियत्ति य । पिउसिए भाइणिज्जत्ति, धूए नत्तु-  
णियत्ति य ॥ १५ ॥ हले हले ति अच्चे ति, भट्टे सामिणि गोमिणि । होले गोले वसुले ति, इत्थियं नेवमालवे ॥ १६ ॥ नामधिजेण णं वूया, इत्थीगुत्तेण वा पुणो । जहा-  
रिहमभिगिज्ज, आलविज्ज लविज्ज वा ॥ १७ ॥ अज्जए पज्जए वावि, वप्पो लुल्लपिउ-  
त्ति य । माउलो भाइणिज्जत्ति, पुत्ते नत्तुणियत्ति य ॥ १८ ॥ हे हो हलित्ति अञ्चि-  
त्ति, भट्टा सामिय गोमिय । होल गोल वसुलित्ति, पुरिसं नेवमालवे ॥ १९ ॥ नाम-  
धिजेण णं वूया, पुरिसगुत्तेण वा पुणो । जहारिहमभिगिज्ज, आलविज्ज लविज्ज वा ॥ २० ॥ पंचिदियाण पाणाणं, “एस इत्थी अयं पुमं” । जाव णं न विजाणिज्जा,  
ताव जाइत्ति आलवे ॥ २१ ॥ तहेव माणुसं पसुं, पक्खि वावि सरीसिवं । “थूले पमेइले वज्जे, पायमि” ति य नो वए ॥ २२ ॥ परिवृढत्ति णं वूया, वूया उवचिए ति य । संजाए पीणिए वावि, महाकायत्ति आलवे ॥ २३ ॥ तहेव गाओ दुज्जाओ,  
दम्मा गोरहगत्ति य । वाहिमा रहजोग्गत्ति, नेवं भासिज्ज पन्नवं ॥ २४ ॥ जुवं गवि-  
त्ति णं वूया, धेणुं रसदयत्ति य । रहस्से महल्लए वावि, वए संवहणित्ति य ॥ २५ ॥ तहेव गंतुमुज्जाणं, पव्वयाणि वणाणि य । रुक्खा महल्ल पेहाए, नेवं भासिज्ज पन्नवं ॥ २६ ॥ अलं पासायखंभाणं, तोरणाणि गिहाणि य । फलिहगलनावाणं, अलं उद-  
गदोणिणं ॥ २७ ॥ पीढए चंगवेरे य, नंगले मइयं सिया । जंतलट्ठी व नाभी वा, गंडिया व अलं सिया ॥ २८ ॥ आसणं सयणं जाणं, हुज्जा वा किंचुवस्सए । भूओ-  
वघाइणि भासं, नेवं भासिज्ज पन्नवं ॥ २९ ॥ तहेव गंतुमुज्जाणं, पव्वयाणि वणाणि य । रुक्खा महल्ल पेहाए, एवं भासिज्ज पन्नवं ॥ ३० ॥ जाइमंता इमे रुक्खा, दीहवट्ठा महालया । पयायसाला विडिमा, वए दरिसणित्ति य ॥ ३१ ॥ तहा फलाई पक्काई, पायखज्जाई नो वए । वेलोइयाई टालाई, वेहिमाई ति नो वए ॥ ३२ ॥ असंथडा इमे अंबा, बहुनिव्वडिमा फला । वइज्ज बहुसंभूया, भूयरूवत्ति वा पुणो ॥ ३३ ॥ तहेवो-  
सहीओ पक्काओ, नीलियाओ छवी इ य । लाइमा भजिमाउत्ति, पिहुखज्जत्ति नो वए ॥ ३४ ॥ रूढा बहुसंभूया, थिरा ऊसढा वि य । गम्भियाओ पसूयाओ, संसाराउ-

ति आलवे ॥ ३५ ॥ तहेव संखडिं नच्चा, किच्चं कज्जं ति नो वए । तेणगं वावि वज्जित्ति, सुतिथित्ति य आवगा ॥ ३६ ॥ संखडिं संखडिं बूया, पणियट्ठत्ति तेणगं । बहुसमाणि तित्थाणि, आवगाणं वियागरे ॥ ३७ ॥ तहा नईओ पुण्णाओ, कायतिज्जत्ति नो वए । नावाहिं तारिमाउत्ति, पाणिपिज्जत्ति नो वए ॥ ३८ ॥ बहुवाहडा अगाहा, बहुसलिलुप्पिलोदगा । बहुवित्थडोदगा यावि, एवं भासिज पन्नवं ॥ ३९ ॥ तहेव सावज्जं जोगं, परस्सट्ठाए निट्ठियं । कीरमाणं ति वा नच्चा, सावज्जं नालवे मुणी ॥ ४० ॥ सुकडित्ति सुपक्कित्ति, सुच्छिजे सुहडे मडे । सुनिट्ठिए सुलट्ठित्ति, सावज्जं वज्जए मुणी ॥ ४१ ॥ पयत्तपक्कत्ति व पक्कमालवे, पयत्तल्लिजत्ति व छिन्नमालवे । पयत्तल्लिट्ठित्ति व कम्महेउयं, पहारगाढत्ति व गाढमालवे ॥ ४२ ॥ सववुक्कसं परग्वं वा, अउलं नत्थि एरिसं । अविक्रियमवत्तव्वं, अचियत्तं चेव नो वए ॥ ४३ ॥ “सव्वमेयं वइस्सामि, सव्वमेयं” ति नो वए । अणुवीइ सव्वं सव्वत्थ, एवं भासिज पन्नवं ॥ ४४ ॥ सुक्कीयं वा सुविकीयं, अकिज्जं किज्जमेव वा । “इमं गिण्ह इमं मुंच, पणियं” नो वियागरे ॥ ४५ ॥ अप्पग्घे वा महग्घे वा, कए वा विकए वि वा । पणियट्ठे समुप्पन्ने, अणवज्जं वियागरे ॥ ४६ ॥ तहेवासंजयं धीरो, “आस एहिं करेहि वा । सयं चिट्ठ वयाहि” ति, नेवं भासिज पन्नवं ॥ ४७ ॥ बहुवे इमे असाहू, लोए वुच्चंति साहुणो । न लवे असाहुं साहुत्ति, साहुं साहुत्ति आलवे ॥ ४८ ॥ नाणदंसणसंपजं, संजमे य तवे रयं । एवं गुणसमाउत्तं, संजयं साहुमालवे ॥ ४९ ॥ देवाणं मणुयाणं च, तिरियाणं च वुग्गहे । अमुगाणं जओ होउ, मा वा होउ ति नो वए ॥ ५० ॥ वाओ वुट्ठं व सीउण्हं, खेमं धायं सिवं ति वा । कया णु हुज्ज एयाणि, मा वा होउ ति नो वए ॥ ५१ ॥ तहेव मेहं व ण्हं व माणवं, न देव देवत्ति गिरं वइज्जा । संसुच्छिए उन्नए वा पओए, वइज्ज वा वुट्ठ बलाहयत्ति ॥ ५२ ॥ अंतलिव्वत्ति णं बूया, गुज्झाणुचरियत्ति य । रिद्धिमंतं नरं दिस्स, रिद्धिमंतं ति आलवे ॥ ५३ ॥ तहेव सावज्जणुमोयणी गिरा, ओहारिणी जा य परोवघाइणी । से कोहलोहभयहासमाणओ, न हासमाणो वि गिरं वइज्जा ॥ ५४ ॥ सुवक्कसुद्धिं समुपेहिया मुणी, गिरं च दुट्ठं परिवज्जए सया । मियं अटुट्ठं अणुवीइ भासए, सयाण मज्जे लहई पसंसणं ॥ ५५ ॥ भासाइ दोसे य गुणे य जाणिया, तीसे य दुट्ठे परिवज्जए सया । छु सु संजए सामणिए सया जए, वइज्ज बुदे हियमाणलोमियं ॥ ५६ ॥ परिक्खमासी सुसमाहिइंदिए, चउक्कसायावगाए अणिस्सिए । स निद्धणे धुन्नमलं पुरेकडं, आराहए लोगमिणं तहा परं ॥ ५७ ॥ ति-वेमि ॥ इति सुवक्कसुद्धी णामं सत्तममज्झयणं समत्तं ॥ ७ ॥



## अह आयारपणिही णामं अट्ठममज्झयणं

आयारपणिहिं लद्धं, जहा कायव्व भिक्खुणा । तं भे उदाहरिस्सामि, आणुपुत्वि सुणेह मे ॥ १ ॥ पुढविदगअगणिमारुय, तणरुक्खसवीयगा । तसा य पाणा जीव-  
त्ति, इइ वुत्तं महेसिणा ॥ २ ॥ तेसिं अच्छणजोएण, निच्चं होयव्वयं सिया । मणसा  
काय वक्केण, एवं हवइ संजए ॥ ३ ॥ पुढविं भित्तिं सिलं लेलं, नेव भिंदे न संलिहे ।  
तिविहेण करणजोएण, संजए सुसमाहिए ॥ ४ ॥ सुद्धपुढविं न निसीए, ससरक्खम्मि  
य आसणे । पमजित्तु निसीइज्जा, जाइत्ता जस्स उग्गहं ॥ ५ ॥ सीओदगं न सेविज्जा,  
सिलावुट्ठं हिमाणि य । उसिणोदगं तत्तफासुयं, पडिगाहिज्ज संजए ॥ ६ ॥ उदउल्लं  
अप्पणो कायं, नेव पुंछे न संलिहे । समुप्पेह तहाभूयं, नो णं संघट्टए सुणी ॥ ७ ॥  
इंगालं अगणिं अब्धिं, अलायं वा सजोइयं । न उंजिज्जा न घट्टिज्जा, नो णं निव्वावए  
सुणी ॥ ८ ॥ तालियंटेण पत्तेण, साहाए विहुयणेण वा । न वीइज्ज अप्पणो कायं,  
बाहिरं वावि पुग्गलं ॥ ९ ॥ तणरुक्खं न छिदिज्जा, फलं मूलं च कस्सइ । आमगं  
विविहं वीयं, मणसा वि न पत्थए ॥ १० ॥ गहणेसु न चिट्ठिज्जा, वीएसु हरिएसु  
वा । उदगंमि तहा निच्चं, उत्तिंगपण्णेसु वा ॥ ११ ॥ तसे पाणे न हिंसिज्जा, वाया  
अदुव कम्मणा । उवरओ सव्वभूएसु, पासेज्ज विविहं जगं ॥ १२ ॥ अट्ठ सुहुमाइं  
पेहाए, जाइं जाणित्तु संजए । दयाहिगारी भूएसु, आस चिट्ठ एसहि वा ॥ १३ ॥  
कयराइं अट्ठ सुहुमाइं ?, जाइं पुच्छिज्ज संजए । इमाइं ताइं मेहावी, आइक्खिज्ज  
वियक्खणो ॥ १४ ॥ सिणेहं पुप्फसुहुमं<sup>१</sup> च, पाणुत्तिंगं<sup>२</sup> तहेव य । पणगं<sup>३</sup> वीयं<sup>४</sup> हरियं<sup>५</sup>  
च, अंडसुहुमं<sup>६</sup> च अट्ठमं ॥ १५ ॥ एवमेयाणि जाणित्ता, सव्वभावेण संजए । अप्पमत्तो  
जए निच्चं, सव्विंदियसमाहिए ॥ १६ ॥ धुवं च पडिलेहिज्जा, जोगसा पायकंबलं ।  
सिज्जमुच्चारभूमिं च, संथारं अदुवासणं ॥ १७ ॥ उच्चारं पासवणं, खेलं सिंघाण-  
जल्लियं । फासुयं पडिलेहिता, परिट्ठाविज्ज संजए ॥ १८ ॥ पविसित्तु परागारं, पाणट्ठा  
भोयणस्स वा । जयं चिट्ठे मियं भासे, न य रुवेसु मणं करे ॥ १९ ॥ बहुं सुणेइ  
कणेहिं, बहुं अच्छीहिं पिच्छइ । न य दिट्ठं सुयं सव्वं, भिक्खु अक्खाउमरिहइ  
॥ २० ॥ सुयं वा जइ वा दिट्ठं, न लविज्जोवघाइयं । न य केण उवाएणं, गिहिजोगं  
समायरे ॥ २१ ॥ निट्ठाणं रसनिज्जूढं, भद्दं पावगं ति वा । पुट्ठो वावि अपुट्ठो वा,  
लाभालाभं न निदिसे ॥ २२ ॥ न य भोयणम्मि गिद्धो, चरे उंछं अयंपिरो ।  
अफासुयं न भुंजिज्जा, कीयमुइसियाहडं ॥ २३ ॥ सन्निहिं च न कुव्विज्जा, अणुमायं  
पि संजए । मुहाजीवी असंबद्धे, हविज्ज जगनिस्सिए ॥ २४ ॥ ल्हविती सुसंतुट्ठे,

अप्पिच्छे सुहरे सिया । आसुरत्तं न गच्छिज्जा, सुच्चा णं जिणसासणं ॥ २५ ॥  
 कण्णसुक्खेहिं सदेहिं, पेमं नाभिनिवेसए । दारुणं कक्कसं फासं, काएण अहियासए  
 ॥ २६ ॥ खुहं पिवासं दुस्सिज्जं, सीउण्हं अरइं भयं । अहियासे अव्वहिओ, देहदुक्खं  
 महाफलं ॥ २७ ॥ अत्थंगयंमि आइच्चे, पुरत्था य अणुग्गाए । आहारमाइयं सव्वं,  
 मणसा वि न पत्थए ॥ २८ ॥ अत्तिणिगे अचवले, अप्पभासी मियासणे । हविज्ज  
 उयरे दंते, थोवं लद्धं न खिसए ॥ २९ ॥ न बाहिरं परिभवे, अत्ताणं न समुक्खसे ।  
 सुयलामे न मज्जिज्जा, जच्चा तवस्सिमुद्धिए ॥ ३० ॥ से जाणमजाणं वा, कट्टु आह-  
 म्मियं पयं । संवरे खिप्पमप्पाणं, बीयं तं न समायरे ॥ ३१ ॥ अणायायं परक्कम्म,  
 नेव गूहे न निण्हेवे । सुई सया वियडभावे, असंसत्ते जिइंदिए ॥ ३२ ॥ अमोहं  
 वयणं कुज्जा, आयरियस्स महप्पणो । तं परिगिज्ज वायाए, कम्मुणा उववायए  
 ॥ ३३ ॥ अधुवं जीवियं नच्चा, सिद्धिमग्गं वियाणिया । विणियट्ठिज्ज भोगेसु, आउं  
 परिसियमप्पणो ॥ ३४ ॥ वलं थामं च पेहाए, सद्धामारुग्गमप्पणो । खेत्तं कालं च  
 विजाय, तहप्पाणं निजुंजए ॥ ३५ ॥ जरा जाव न पीडेइ, वाही जाव न वड्डइ ।  
 जाविदिद्या न हायंति, ताव धम्मं समायरे ॥ ३६ ॥ कोहं माणं च मायं च, लोभं  
 च पाववड्डणं । वमे चत्तारि दोसे उ, इच्छंतो हियमप्पणो ॥ ३७ ॥ कोहो पीहं  
 पणासेइ, माणो विणयनासणो । माया मित्ताणि नासेइ, लोभो सव्वविणासणो ॥ ३८ ॥  
 उवसमेण हणे कोहं, माणं मइवया जिणे । मायं चज्जवभावेण, लोभं संतोसओ  
 जिणे ॥ ३९ ॥ कोहो य माणो य अणिग्गहीया, माया य लोभो य पवड्डमाणा ।  
 चत्तारि एए कसिणा कसाया, सिंचंति मूलाइं पुणब्भवस्स ॥ ४० ॥ राइणिएसु  
 विणयं पउंजे, धुवसीलयं सययं न हावइज्जा । कुम्मुव्व अल्लीणपलीणगुत्तो, परक्कमिज्जा  
 तवसंजमम्मि ॥ ४१ ॥ निहं च न बहु मज्जिज्जा, सप्पहासं विवज्जए । मिहो कहाहिं  
 न रमे, सज्जायम्मि रओ सया ॥ ४२ ॥ जोगं च समणधम्मम्मि, जुंजे अणलसो  
 धुवं । जुत्तो य समणधम्मम्मि, अट्ठं लहइ अणुत्तरं ॥ ४३ ॥ इहलोगपारत्तहियं,  
 जेणं गच्छइ सुग्गइ । बहुसुयं पज्जुवासिज्जा, पुच्छिज्जत्थविणिच्छयं ॥ ४४ ॥ हत्थं  
 पायं च कायं च, पणिहाय जिइंदिए । अल्लीणगुत्तो निसिए, सगासे गुरुणो मुणी  
 ॥ ४५ ॥ न पक्खओ न पुरओ, नेव किच्चाण पिट्ठओ । न य उरं समासिज्जा,  
 चिट्ठिज्जा गुरुणंतिए ॥ ४६ ॥ अपुच्छिओ न भासिज्जा, भासमाणस्स अंतरा ।  
 पिट्ठिमंसं न खाइज्जा, मायामोसं विवज्जए ॥ ४७ ॥ अप्पत्तियं जेण सिया, आसु  
 कुप्पिज्ज वा परो । सव्वसो तं न भासिज्जा, भासं अहियगामिणिं ॥ ४८ ॥ दिट्ठं  
 मियं असंदिट्ठं, पडिपुण्णं वियं जियं । अयंपिरमणुक्विग्गं, भासं निसिर अत्तवं

॥ ४९ ॥ आयारपक्षत्तिधरं, दिट्ठिवायमहिज्जगं । वायविवक्खलियं नच्चा, न तं उवहसे सुणी ॥ ५० ॥ नक्खत्तं सुमिणं जोगं, निमित्तं मंतभेसजं । गिहिणो तं न आइक्खे, भूयाहिगरणं पयं ॥ ५१ ॥ अन्नट्ठं पण्डं लयणं, भइज्ज सयणासणं । उच्चारभूमि-संपन्नं, इत्थीपसुविवज्जियं ॥ ५२ ॥ विवित्ता य भवे सिज्जा, नारीणं न लवे क्हं । गिहिसंथवं न कुज्जा, कुज्जा साह्वहिं संथवं ॥ ५३ ॥ जहा कुकुडपोयस्स, निच्चं कुललओ भयं । एवं खु वंभयारिस्स, इत्थीविग्गहओ भयं ॥ ५४ ॥ चित्तिभित्तिं न निज्झाए, नारिं वा सुअलंकियं । भक्खरं पित्र दट्ठूणं, विट्ठि पडिससाहरे ॥ ५५ ॥ हत्थपाय-पडिच्छिन्नं, कण्णनासविगप्पियं । अवि वाससयं नारिं, वंभयारी विवज्जए ॥ ५६ ॥ विभूसा इत्थिसंसग्गो, पणीयरसभोयणं । नरस्सत्तगवेसिस्स, विसं तालउडं जहा ॥ ५७ ॥ अंगपच्चंगसंठाणं, चारुल्लवियपेहियं । इत्थीणं तं न निज्झाए, कामराग-विवड्ढणं ॥ ५८ ॥ विसएसु मणुत्तेसु, पेमं नाभिनिवेसए । अणिच्चं तेसिं विचाय, परिणामं पोग्गलाण य ॥ ५९ ॥ पोग्गलाणं परिणामं, तेसिं नच्चा जहा तहा । विणीयत्तहो विहरे, सीइभूएण अप्पणा ॥ ६० ॥ जाइ सद्धाइ निक्खंतो, परियाय-ट्ठाणमुत्तमं । तमेव अणुपालिज्जा, गुणे आयरियसम्मए ॥ ६१ ॥ तवं चिमं संजम-जोगयं च, सज्जायजोगं च सया अहिट्ठए । सूरं व सेणाइ समत्तमाउहे, अलमप्पणो होइ अलं परेसिं ॥ ६२ ॥ सज्जायसज्जाणरयस्स ताइणो, अपावभावस्स तवे रयस्स । विसुज्झई जं सि मलं पुरेकडं, समीरियं रूपमलं व जोइणा ॥ ६३ ॥ से तारिसे दुक्खसहे जिइंदिए, सुएण जुत्ते अममे अकिंचणे । विरायई कम्मघणम्मि अवगए, कसिणब्भपुडावगमे व वंदिमे ॥ ६४ ॥ त्ति-वेमि ॥ इति आयारपणिही णामं अट्ठमज्झयणं समत्तं ॥ ८ ॥

## अह विणयसमाही णामं णवममज्झयणं

### पढमो उद्देशो

थंभा व कोहा व मयप्पमाया, गुरुस्सगासे विणयं न सिक्खे । सो चेव उ तस्स अभूभावो, फलं व कीयस्स वहाय होइ ॥ १ ॥ जे यावि मंदित्ति गुरुं विइत्ता, डहरे इमे अप्पसुए त्ति नच्चा । हीलंति मिच्छं पडिवज्जमाणा, करंति आसायणं ते गुरुणं ॥ २ ॥ पणईए मंदा वि भवंति एगे, डहरा वि य जे सुयबुद्धोववेया । आयारमंता गुणसुट्ठियप्पा, जे हीलिया सिहिरिव भास कुज्जा ॥ ३ ॥ जे यावि

नागं डहरं ति नच्चा, आसायए से अहियाय होइ । एवायरियं पि हु हीलयंतो,  
 नियच्छई जाइपहं खु मंदो ॥ ४ ॥ आसीविसो वावि परं सुरुट्ठो, किं जीवनासाउ  
 परं नु कुज्जा । आयरियपाया पुण अप्पसच्चा, अबोहिआसायण नत्थि मुक्खो ॥ ५ ॥  
 जो पावगं जलियमवक्कमिज्जा, आसीविसं वावि हु कोवइज्जा । जो वा विसं खायइ  
 जीवियट्ठी, एसोवमाऽऽसायणया गुरुणं ॥ ६ ॥ सिया हु से पावय नो डहिज्जा, आसी-  
 विसो वा कुविओ न भक्खे । सिया विसं हालहलं न मारे, न यावि मुक्खो गुरुही-  
 लणाए ॥ ७ ॥ जो पव्वयं सिरसा भित्तुमिच्छे, सुत्तं व सीहं पडिवोहइज्जा । जो वा  
 दए सत्तिअग्गे प्हारं, एसोवमाऽऽसायणया गुरुणं ॥ ८ ॥ सिया हु सीसेण गिरिं  
 पि भिंदे, सिया हु सीहो कुविओ न भक्खे । सिया न भिंदिज्ज व सत्तिअगं, न यावि  
 मुक्खो गुरुहीलणाए ॥ ९ ॥ आयरियपाया पुण अप्पसच्चा, अबोहिआसायण नत्थि  
 मुक्खो । तम्हा अणावाहसुहाभिकंखी, गुरुप्पसायाभिमुट्ठो रमिज्जा ॥ १० ॥ जहा-  
 हिअग्गी जलणं नमंसे, नाणाहुईमंतपयाभिसित्तं । एवायरियं उवचिट्ठइज्जा, अणंत-  
 नाणोवगओ वि संतो ॥ ११ ॥ जस्संतिए धम्मपयाइं सिक्खे, तस्संतिए वेणइयं पउंजे ।  
 सक्कारए सिरसा पंजलीओ, कायगिरा भो मणसा य निच्चं ॥ १२ ॥ लज्जादयासंज-  
 मवंभचेरं, कल्लणभागिरिस्स विसोहिठाणं । जे मे गुरु सययमणुसासयंति, ते हं गुरु  
 सययं पूययामि ॥ १३ ॥ जहा निसंते तवणच्चिमाली, पभासई केवलभारहं तु ।  
 एवायरिओ सुयसीलबुद्धिए, विरायई सुरमज्जे व इंदो ॥ १४ ॥ जहा ससी कोमुइ-  
 जोगजुत्तो, नक्खत्ततारागणपरिखुडप्पा । खे सोहई विमले अब्भमुक्के, एवं गणी सोहइ  
 भिक्खुमज्जे ॥ १५ ॥ महागरा आयरिया महेसी, समाहिजोगे सुयसीलबुद्धिए ।  
 संपाविउकामे अणुत्तराईं आराहए तोसइ धम्मकामी ॥ १६ ॥ सुच्चाण मेहावि सुभा-  
 सियाइं, सुस्सुसए आयरियऽप्पमतो । आराहइत्ताण गुणे अणेगे, सो पावई सिद्धिम-  
 णुत्तरं ॥ १७ ॥ ति-वेमि ॥ इति विणयसमाहिणामणवमज्झयणे पढमो  
 उद्देशो समत्तो ॥ ९-१ ॥

## अह णवमज्झयणे बीओ उद्देशो

मूलाउ खंधप्पभवो दुमस्स, खंधाउ पच्छा समुर्विति साहा । साहप्पसाहा विरु-  
 हंति पत्ता, तओ सि पुप्फं च फलं रसो य ॥ १ ॥ एवं धम्मस्स विणजो, मूलं  
 परमो से मुक्खो । जेण कित्तिं सुयं सिग्घं, निस्सेसं चाभिगच्छइ ॥ २ ॥ जे य  
 चंडे मिए थद्वे, दुव्वाइं नियडी सढे । वुज्झइ से अविणीयप्पा, कट्ठं सोयगयं जहा

॥ ३ ॥ विणयं पि जो उवाएणं, चोइओ कुप्पई नरो । दिव्वं सो सिरिमिज्जंति,  
दंडेण पडिसेहए ॥ ४ ॥ तहेव अविणीयप्पा, उववज्झा हया गया । दीसंति  
दुहमेहंता, आभिओगमुवट्ठिया ॥ ५ ॥ तहेव सुविणीयप्पा, उववज्झा हया गया ।  
दीसंति सुहमेहंता, इड्ढि पत्ता महायसा ॥ ६ ॥ तहेव अविणीयप्पा, लोगंसि नर-  
नारिओ । दीसंति दुहमेहंता, छाया ते विगलंदिया ॥ ७ ॥ दंडसत्थपरिज्जुणा,  
असब्भवयणेहि य । कलुणा विवच्चलंदा, खुप्पिवासाइपरिगया ॥ ८ ॥ तहेव  
सुविणीयप्पा, लोगंसि नरनारिओ । दीसंति सुहमेहंता, इड्ढि पत्ता महायसा ॥ ९ ॥  
तहेव अविणीयप्पा, देवा जक्खा य गुज्झगा । दीसंति दुहमेहंता, आभिओग-  
मुवट्ठिया ॥ १० ॥ तहेव सुविणीयप्पा, देवा जक्खा य गुज्झगा । दीसंति  
सुहमेहंता, इड्ढि पत्ता महायसा ॥ ११ ॥ जे आयरियउवज्झायाणं, सुस्सुसा-  
वयणंकरा । तेसिं सिक्खा पवड्ढंति, जलसित्ता इव पायवा ॥ १२ ॥ अप्पणट्ठा  
परट्ठा वा, सिप्पा नेउणियाणि य । गिहिणो उवभोगट्ठा, इहलोगस्स कारणा  
॥ १३ ॥ जेण वंधं वहं घोरं, परियावं च दारुणं । सिक्खमाणा नियच्छंति, जुत्ता  
ते ललिइंदिया ॥ १४ ॥ ते वि तं गुरुं पूयंति, तस्स सिप्पस्स कारणा । सकारंति  
णमंसंति, तुट्ठा निद्वेसवत्तिणो ॥ १५ ॥ किं पुण जे सुयग्गाही, अणंतहियकामए ।  
आयरिया जं वए भिक्खू, तम्हा तं नाइवत्तए ॥ १६ ॥ नीयं सिज्जं गइं ठाणं,  
नीयं च आसणाणि य । नीयं च पाए वंदिज्जा, नीयं कुज्जा य अंजलि ॥ १७ ॥  
संघट्ठइत्ता काएणं, तद्वा उवहिणामवि । “खमेह अवराहं मे”, वइज्ज “न पुणु”  
ति य ॥ १८ ॥ दुग्गओ वा पओएणं, चोइओ वहइ रहं । एवं दुबुद्धि किच्चाणं,  
वुत्तो वुत्तो पकुव्वइ ॥ १९ ॥ आलवंते लवंते वा, न निसिज्जाए पडिस्सुणे । सुत्तूण  
आसणं धीरो, सुस्सुसाए पडिस्सुणे ॥ २० ॥ कालं छंदोवयारं च, पडिलेहिताण  
हेउहिं । तेहिं तेहिं उवाएहिं, तं तं संपडिवायए ॥ २१ ॥ विवत्ती अविणीयस्स,  
संपत्ती विणियस्स य । जस्सेयं दुहओ नायं, सिक्खं से अभिगच्छइ ॥ २२ ॥  
जे यावि चंडे मइइड्ढिगारवे, पिसुणे नरे साहसहीणपेसणे । अदिट्ठधम्मे विणए  
अकोविए, असंविभागी न हु तस्स मुक्खो ॥ २३ ॥ णिंदेसवत्ती पुण जे गुरुणं,  
सुयत्थधम्मा विणयंमि कोविया । तरित्तु ते ओहमिणं दुरुत्तरं, खवित्तु कम्मं गइ-  
सुत्तमं गया ॥ २४ ॥ ति-बेसि ॥ इति विणयसमाहिणामणवमज्झयणे  
वीओ उदेसो समत्तो ॥ ९-२ ॥


## अह णवमज्झयणे तइओ उद्देसो

आयरियग्गिमिवाहिअग्गी, सुत्सूसमाणो पडिजागरिजा । आलोइयं इंणियमेव नच्चा, जो छंदमाराहयई स पुज्जो ॥ १ ॥ आयारमट्ठा विणयं पउंजे, सुत्सूसमाणो परिगिज्झ वक्कं । जहोवइट्ठं अभिकंखमाणो, गुरुं तु नासाययई स पुज्जो ॥ २ ॥ राइणिएसु विणयं पउंजे, डहरा वि य जे परियायजिट्ठा । नीयत्तणे वट्ठइ सच्चवाई, ओवायवं वक्ककरे स पुज्जो ॥ ३ ॥ अन्नायउंछं चरई विसुद्धं, जवणट्ठया समुयाणं च निच्चं । अलद्धुयं नो परिदेवइजा, लद्धुं न विकत्थयई स पुज्जो ॥ ४ ॥ संधारसिजाऽऽसण-भत्तपाणे, अप्पिच्छया अइलाभे वि संते । जो एवमप्पाणमित्तोसइजा, संतोसपाहज-रए स पुज्जो ॥ ५ ॥ सका सहेउं आसाइ कंटया, अओमया उच्छहया नरेणं । अणासए जो उ सहिज कंटए, वईमए कणसरे स पुज्जो ॥ ६ ॥ मुहुत्तदुक्खा उ हवंति कंटया, अओमया ते वि तओ सुउद्धरा । वायादुस्ताणि दुरुद्धराणि, वेराण-वंधीणि महब्भयाणि ॥ ७ ॥ समावयंता वयणाभिवाया, कणं गया दुम्मणियं जणंति । धम्मत्ति किच्चा परमग्गसूरे, जिइंदिए जो सहई स पुज्जो ॥ ८ ॥ अवण्णवायं च परंमुहस्स, पच्चक्खओ पडिणीयं च भासं । ओहारिणि अप्पियकारिणि च, भासं न भासिज सया स पुज्जो ॥ ९ ॥ अलोलुए अकुहए अमाई, अपिसुणे यावि अदीण-वित्ती । नो भावए नो वि य भाविअप्पा, अक्रोउहल्ले य सया स पुज्जो ॥ १० ॥ गुणेहि साहू अगुणेहिऽसाहू, गिण्हाहि साहू गुण मुंचऽसाहू । वियाणिया अप्पग-मप्पणं, जो रागदोसेहिं समो स पुज्जो ॥ ११ ॥ तहेव डहरं च महल्लगं वा, इत्थी पुमं पव्वइयं गिहिं वा । नो हीलए नो वि य खिसइजा, थंभं च क्रोहं च चए स पुज्जो ॥ १२ ॥ जे माणिया सययं माणयंति, जत्तेण कळं व निवेसयंति । ते माणए माणरिहे तवस्सी, जिइंदिए सच्चरए स पुज्जो ॥ १३ ॥ तेसिं गुरुणं गुणसायाराणं, सुच्चाण मेहावि सुभासियाई । चरे सुणी पंचरए तिगुत्तो, चउक्कसायावगए स पुज्जो ॥ १४ ॥ गुरुमिह सययं पडियरिय सुणी, जिणवयनिउणे अभिगमकुसले । धुणिय रयमलं पुरेकडं, भासुरमउलं गई गय ॥ १५ ॥ ति-वेमि ॥ इति विणयसमाहि-  
णामणवमज्झयणे तइओ उद्देसो समत्तो ॥ ९-३ ॥

## अह णवमज्झयणे चउत्थो उद्देसो

सुयं मे आउसं । तेणं भगवया एवमक्खायं, इह खलु थेरेहिं भगवंतेहिं चत्तारि

विणयसमाहिट्टाणा पञ्चत्ता, कयरे खलु ते थेरेहिं भगवंतेहिं चत्तारि विणयसमाहिट्टाणा पञ्चत्ता ? इमे खलु ते थेरेहिं भगवंतेहिं चत्तारि विणयसमाहिट्टाणा पञ्चत्ता, तंजहा-विणयसमाही १, सुयसमाही २, तवसमाही ३, आचारसमाही ४ । विणए सुए य तवे, आयारे निच्च पंडिया । अभिरामयंति अप्पाणं, जे भवंति जिइंदिया ॥ १ ॥ चउट्ठिहा खलु विणयसमाही भवइ, तंजहा-अणुसासिज्जंतो सुस्सइ १, सम्मं संपडिज्जइ २, वेयमाराहइ ३, न य भवइ अत्तसंपग्गहि ४ चउत्थं पयं भवइ । भवइ य इत्थ सिलोगो-पेहेइ हियाणुसासणं, सुस्सइ तं च पुणो अहिट्ठिए । न य माणसएण मज्जइ, विणयसमाही आययट्ठिए ॥ २ ॥ चउट्ठिहा खलु सुयसमाही भवइ, तंजहा-सुयं मे भविसइ त्ति अज्झाइयव्वं भवइ १, एगगचित्तो भविस्सामि त्ति अज्झाइयव्वं भवइ २, अप्पाणं ठावइस्सामि त्ति अज्झाइयव्वं भवइ ३, ठिओ परं ठावइस्सामि त्ति अज्झाइयव्वं भवइ ४ चउत्थं पयं भवइ । भवइ य इत्थ सिलोगो-नाणमेगगचित्तो य, ठिओ य ठावइ परं । सुयाणि य अहिज्जिता, रओ सुयसमा-हि ॥ ३ ॥ चउट्ठिहा खलु तवसमाही भवइ, तंजहा-नो इहलोगट्ठयाए तवमहि-ट्ठिजा १, नो परलोगट्ठयाए तवमहिट्ठिजा २, नो कित्तिवन्नसइसिलोगट्ठयाए तव-महिट्ठिजा ३, नत्तथ निज्जरट्ठयाए तवमहिट्ठिजा ४ चउत्थं पयं भवइ । भवइ य इत्थ सिलोगो-विविहगुणतवीरए निच्चं, भवइ निरासए निज्जरट्ठिए । तवसा धुणइ पुराणपावगं, जुत्तो सया तवसमाहि ॥ ४ ॥ चउट्ठिहा खलु आचारसमाही भवइ, तंजहा-नो इहलोगट्ठयाए आचारमहिट्ठिजा १, नो परलोगट्ठयाए आचारमहिट्ठिजा २, नो कित्तिवन्नसइसिलोगट्ठयाए आचारमहिट्ठिजा ३, नत्तथ आरहंतेहिं हेऊहिं आचारमहिट्ठिजा ४ चउत्थं पयं भवइ । भवइ य इत्थ सिलोगो-जिणवयणरए अत्तिणिगे, पडिपुणाययमाययट्ठिए । आचारसमाहिसंयुडे, भवइ य दंते भावसंघए ॥ ५ ॥ अभिगम चउरो समाहिओ, सुविसुद्धो सुसमाहियप्पओ । विउल्लहियं सुहावहं पुणो, कुव्वइ सो पयखेममप्पणो ॥ ६ ॥ जाइमरणाओ मुच्चइ, इत्थत्थं च चएइ सव्वसो । सिद्धे वा हवइ सासए, देवे वा अप्परए महिड्डिए ॥ ७ ॥ त्ति-वेमि ॥ इति विणयसमाहिणामणवमज्झयणे चउत्थो उद्देशो समत्तो ॥ ९-४ ॥ णवममज्झयणं समत्तं ॥ ९ ॥



अह सभिवखू णामं दसममज्झयणं



निक्खम्ममाणाइ य बुद्धवयणे, णिच्चं चित्तसमाहिओ हविजा । इत्थीण वसं न

यावि गच्छे, वंतं नो पडिआयइ जे स भिक्खू ॥ १ ॥ पुढविं न खणे न खणावए, सीओदगं न पिए न पियावए । अगणिसत्थं जहा सुनिसियं, तं न जले न जलावए जे स भिक्खू ॥ २ ॥ अनिलेण न वीए न वीयावए, हरियाणि न छिंदे न छिंदावए । वीयाणि सया विवज्जयंतो, सचित्तं नाहारए जे स भिक्खू ॥ ३ ॥ बहणं तसथावराण होइ, पुढवीतणकट्टनिसियाणं । तम्हा उद्देसियं न भुंजे, नो वि पए न पयावए जे स भिक्खू ॥ ४ ॥ रोइयनायपुत्तवयणे, अप्पसमे मच्चिज्ज छप्पि काए । पंच य फासे महव्वयाइं, पंचासवसंवरे जे स भिक्खू ॥ ५ ॥ चत्तारि वमे सया कसाए, धुवजोगी य हविज्ज बुद्धवयणे । अहणे निजायस्वरयए, गिहिजोगं परिवज्जए जे स भिक्खू ॥ ६ ॥ सम्मदिट्ठी सया अमुढे, “अत्थि हु नाणे तवे संजमे य” । तवसा धुणइ पुराणपावगं, मणवयकायसुसंबुडे जे स भिक्खू ॥ ७ ॥ तहेव असणं पाणगं वा, विविहं खाइमसाइमं लभित्ता । “होही अट्ठो सुए परे वा,” तं न निहे न निहावए जे स भिक्खू ॥ ८ ॥ तहेव असणं पाणगं वा, विविहं खाइमसाइमं लभित्ता । छंदिय साहम्मियाण भुंजे, भोच्चा सज्झायरए जे स भिक्खू ॥ ९ ॥ न य वुग्गहियं कहं कहिजा, न य कुप्पे निहुइंदिए पसंते । संजमधुवजोगजुत्ते, उवसंते अविहेइए जे स भिक्खू ॥ १० ॥ जो सहइ हु गामकंटए, अक्कोसपहारतज्जणाओ य । भयमेरव-सइसप्पहासे, समसुहदुक्खसहे य जे स भिक्खू ॥ ११ ॥ पडिमं पडिवज्जिया मसाणे, नो भीयए भयमेरवाई दिस्स । विविहगुणतवोरए य निच्चं, न सरीरं चाभिकंखए जे स भिक्खू ॥ १२ ॥ असइं वोसट्ठवत्तदेहे, अक्कुट्टे व हए व लूसिए वा । पुढविसमे मुणी हविजा, अनियाणे अकोउहल्ले जे स भिक्खू ॥ १३ ॥ अभिभूय काएण परीसहाइं, समुद्धरे जाइपहाउ अप्पयं । विइत्तु जाइमरणं महव्वभयं, तवे रए सामणिए जे स भिक्खू ॥ १४ ॥ हत्थसंजए पायसंजए, वायसंजए संजइंदिए । अज्झप्परए सुसमाहियप्पा, सुत्तत्थं च वियाणइ जे स भिक्खू ॥ १५ ॥ उवहिम्मि अमुच्छिए अग्निडे, अन्नायउच्छं पुलनिप्पुलाए । कयविक्रयसन्निहिओ विरए, सव्वसंगावगए य जे स भिक्खू ॥ १६ ॥ अलोल भिक्खू न रसेसु गिज्जे, उंछं चरे जीविय नाभिकंखे । इड्ढिं च सक्कारणपूयणं च, चए ठियप्पा अणिहे जे स भिक्खू ॥ १७ ॥ न परं वइजासि “अयं कुसीले”, जेणं च कुप्पिज्ज न तं वइजा । जाणिय पत्तेयं पुण्णपावं, अत्ताणं न समुक्खे जे स भिक्खू ॥ १८ ॥ न जाइमत्ते न य रूवमत्ते, न लाभमत्ते न सुएण मत्ते । मयाणि सव्वाणि विवज्जइत्ता, धम्मज्झाणरए जे स भिक्खू ॥ १९ ॥ पवेयए अजपयं महामुणी, धम्मे ठिओ ठावयईं परं पि । निक्खम्म वज्जिज्ज कुसीललिंगं, न यावि हासं कुहए जे स भिक्खू ॥ २० ॥ तं देहवासं असुइं असासयं,



सया चए निच्चहियट्ठियप्पा । छिंदित्तु जाईमरणस्स बंधणं, उवेइ भिक्खू अपुणागमं गइं ॥ २१ ॥ ति-वेमि ॥ इति सभिक्खू णामं दसममज्झयणं समत्तं ॥ १० ॥

## अह रइवक्का णामा पढमा चूलिया

इह खलु भो ! पव्वइएणं उप्पन्नदुक्खेणं संजमे अरइसमावन्नचित्तेणं ओहाणुप्पे-  
हिणा अणोहाइएणं चेव हयरस्सिगयंकुसपोयपडागाभूयाइं इमाइं अट्टारस ठाणाइं  
सम्मं संपडिलेहियव्वाइं भवन्ति, तंजहा—हं भो ! दुस्समाए दुप्पजीवी १, लहुस्सगा  
इत्तरिया गिहीणं कामभोगा २, भुज्जो य साइबहुला मणुस्सा ३, इमे य मे दुक्खे  
न चिरकालोवट्ठाइं भविस्सइ ४, ओमजणपुरक्कारे ५, वंतस्स य पडिआयणं ६,  
अहरगइ-वासोवसंपया ७, दुल्लहे खलु भो ! गिहीणं धम्ममे गिहिवासमज्झे वसंताणं  
८, आयंके से वहाय होइ ९, संकप्पे से वहाय होइ १०, सोवक्केसे गिहिवासे  
निरुवक्केसे परियाए ११, वंधे गिहिवासे मुक्खे परियाए १२, सावज्जे गिहिवासे  
अणवज्जे परियाए १३, बहुसाहारणा गिहीणं कामभोगा १४, पत्तैयं पुण्णपावं १५,  
अणिच्चे खलु भो ! मणुयाण जीविणं कुसग्गजलबिंदुचंचले १६, बहुं च खलु भो !  
पावं कम्मं पगडं १७, पावाणं च खलु भो ! कडाणं कम्माणं पुत्विं दुच्चिण्णाणं  
दुप्पडिक्कंताणं वेइत्ता मुक्खो नत्थि अवेइत्ता तवसा वा झोसइत्ता १८ अट्टारसमं  
पर्यं भवइ । भवइ य इत्थं सिलोणो—जया य चयइ धम्मं, अणज्जो भोगकारणा ।  
से तत्थं मुच्छिणं बाले, आयइं नाववुज्झइ ॥ १ ॥ जया ओहाविओ होइ, इंदो वा  
पडिओ छमं । सव्वधम्मपरिब्भट्ठो, स पच्छा परितप्पइ ॥ २ ॥ जया य वंदिमो  
होइ, पच्छा होइ अवंदिमो । देवया व चुया ठाणा, स पच्छा परितप्पइ ॥ ३ ॥  
जया य पूइमो होइ, पच्छा होइ अपूइमो । राया व रज्जपव्वट्ठो, स पच्छा परितप्पइ  
॥ ४ ॥ जया य माणिमो होइ, पच्छा होइ अमाणिमो । सेट्ठिव्व कव्वडे छूढो, स  
पच्छा परितप्पइ ॥ ५ ॥ जया य थेरओ होइ, समइक्कंतजुव्वणो । मच्छुव्व गलं  
गिलित्ता, स पच्छा परितप्पइ ॥ ६ ॥ जया य कुकुडंबस्स, कुतत्तीहिं विहम्मइ ।  
हत्थी व बंधणे वट्ठो, स पच्छा परितप्पइ ॥ ७ ॥ पुत्तदारपरिकिण्णो, मोहसंताण-  
संतओ । पंकोसन्नो जहा नागो, स पच्छा परितप्पइ ॥ ८ ॥ “अज याहं गणी  
हुंतो, भावियप्पा बहुस्सुओ । जइ हं रमतो परियाए, सामण्णे जिणदेसिए” ॥ ९ ॥  
देवलोगसमाणो य, परियाओ महेसिणं । रयाणं अरयाणं च, महानरयसारिसो ॥ १० ॥  
अमरोवमं जाणिय सुक्खमुत्तमं, रयाण परियाए तहारयाणं । निरओवमं जाणिय

दुक्खमुत्तमं, रमिज तम्हा परियाए पंडिए ॥ ११ ॥ धम्माउ भट्टं सिरिओववेयं,  
जन्नग्गि विज्झायमिवप्पतेयं । हीलंति णं दुव्विहियं कुसीला, दादुद्धियं घोरविसं व  
नागं ॥ १२ ॥ इहेवऽधम्मो अयसो अकित्ती, दुब्बामधिज्जं च पिदुज्जणम्मि । चुयस्स  
धम्माउ अहम्मसेविणो, संभिन्नवित्तस्स य हिट्ठओ गई ॥ १३ ॥ भुंजित्तु भोगाई  
पसज्ज चेतसा, तहाविहं कट्टु असंजमं वहुं । गई च गच्छे अणहिज्झियं दुहं, बोही  
य से नो सुलहा पुणो पुणो ॥ १४ ॥ “इमस्स ता नेरइयस्स जंतुणो, दुहोवणीयस्स  
किलेसवत्तिणो । पल्लिओवमं झिज्झइ सागरोवमं, किमंग पुण मज्झ इमं मणोदुहं ?  
॥ १५ ॥ न मे चिरं दुक्खमिणं भविस्सइ, असासया भोगपिवास जंतुणो । न चे  
सरीरेण इमेणऽविस्सइ, अविस्सइ जीवियपज्जवेण मे” ॥ १६ ॥ जस्सेवमप्पा उ  
हविज्ज निच्छिओ, चइज्ज देहं न हु धम्मसासणं । तं तारिसं नो पइलिति इंदिया,  
उवित्तिवाया व सुदंसणं गिरिं ॥ १७ ॥ इच्चेव संपस्सिय बुद्धिमं नरो, आयं उवायं  
विविहं वियाणिया । काएण वाया अदु माणसेणं, तिगुत्तिगुत्तो जिणवयणमहिट्ठिजासि  
॥ १८ ॥ ति-वेमि ॥ इय रइवक्का णामा पढमा चूलिया समत्ता ॥ १ ॥

## अह विवित्तचरिया णामा बीया चूलिया

चूलियं तु पवक्खाभि, सुयं केवलिभासियं । जं सुणित्तु सुपुण्णाणं, धम्मे उप्प-  
जए मई ॥ १ ॥ अणुसोयपट्टिए बहुजणम्मि, पडिसोयलद्धलक्खेणं । पडिसोयमेव  
अप्पा, दायव्वो होउ कामेणं ॥ २ ॥ अणुसोयसुहो लोओ, पडिसोओ आसवो  
सुविहियाणं । अणुसोओ संसारो, पडिसोओ तस्स उत्तारो ॥ ३ ॥ तम्हा आयार-  
परक्कमेण, संवरसमाहिबहुलेणं । चरिया गुणा य नियमा य, हुंति साहूण दट्ठव्वा  
॥ ४ ॥ अणिएयवासो समुयाणचरिया, अन्नायउंछं पइरिक्का य । अप्पोवही  
कलहविवज्जणा य, विहारचरिया इसिणं पसत्था ॥ ५ ॥ आइण्णओमाणविवज्जणा  
य, ओसज्जदिट्ठाहडभत्तापाणे । संसट्ठकप्पेण चरिज भिक्खू, तज्जायसंसट्ठ जई  
जइजा ॥ ६ ॥ अमज्जमंसासि अमच्छरीया, अभिक्खणं निव्विगइं गया य ।  
अभिक्खणं काउस्सग्गकारी, सज्झायजोगे पयओ हविज्जा ॥ ७ ॥ न पडिन्नविज्जा  
सयणासणाई, सिज्जं निसिज्जं तह भत्तापाणं । गामे कुले वा नगरं व देसे, समत्त-  
भावं न कहिं पि कुजा ॥ ८ ॥ गिहिणो वेयावडियं न कुजा, अभिवायणं वंदण-  
पूयणं वा । असंकिलिट्ठेहिं समं वसिज्जा, मुणी चरित्तस्स जओ न हाणी ॥ ९ ॥  
न या लभेज्जा निउणं सहायं, गुणाहियं वा गुणओ समं वा । इक्को वि पावाइं

विवज्जयंतो, विहरिज कामेसु असज्जमाणो ॥ १० ॥ संवच्छरं वावि परं पमाणं,  
 वीयं च वासं न तहिं वसिजा । सुत्तस्स मग्गेण चरिज भिक्खु, सुत्तस्स अत्थो  
 जह आणवेइ ॥ ११ ॥ जो पुव्वरत्तावरत्तकाले, संपेहए अप्पगमप्पएणं । “किं मे  
 कडं ? किं च मे किच्चसेसं ? किं सक्कणिजं न समायरामि ? ॥ १२ ॥ किं मे परो  
 पासइ किं च अप्पा, किं बाहं खलियं न विवज्जयामि ?” । इच्चेव सम्मं अणुपास-  
 माणो, अणागयं नो पडिवंध कुज्जा ॥ १३ ॥ जत्थेव पासे कइ दुप्पउत्तं, काएण  
 वाया अदु माणसेणं । तत्थेव धीरो पडिसाहरिजा, आइण्णओ खिप्पमिव वत्तलीणं  
 ॥ १४ ॥ जस्सेरिसा जोग जिइदियस्स, धिइमओ सप्पुरिसस्स निचं । तमाहु लोए  
 “पडिवुद्धजीवी”, सो जीवइ संजमजीविणं ॥ १५ ॥ अप्पा खलु सययं रक्खि-  
 यव्वो, सव्विदिएहिं सुसमाहिएहिं । अरक्खिओ जाइपहं उवेइ, सुरक्खिओ सव्व-  
 दुहाण मुच्चइ ॥ १६ ॥ ति-वेमि ॥ इय विवित्तचरिया णामा वीया  
 चूलिया समत्ता ॥ २ ॥

॥ दसवेयालियसुत्तं समत्तं ॥



णमोऽस्थु णं समणस्स भगवओ णायपुत्तमहावीरस्स

# सुत्तागमे

तत्थ णं

उत्तरज्झयणसुत्तं



अह विणयसुयं णामं पढममज्झयणं

संजोगा विप्पमुक्कस्स, अणगारस्स भिक्खुणो । विणयं पाउकरिस्सामि, आणुपुच्छि  
सुणेह मे ॥ १ ॥ आणानिद्देसकरे, गुरुणमुववायकारे । इंगियागारसंपन्ने, से  
विणीए त्ति वुच्चई ॥ २ ॥ आणाऽनिद्देसकरे, गुरुणमणुववायकारे । पडिणीए  
असंबुद्धे, अविणीए त्ति वुच्चई ॥ ३ ॥ जहा सुणी पूइकणी, निकसिज्जई सव्वसो ।  
एवं दुस्सीलपडिणीए, मुहरी निकसिज्जई ॥ ४ ॥ कणकुण्डगं चइत्ताणं, विट्ठं भुंजइ  
सूयरे । एवं सीलं चइत्ताणं, दुस्सीले रमई सिए ॥ ५ ॥ सुणिया भावं साणस्स, सूय-  
रस्स नरस्स य । विणए ठवेज्ज अप्पाणं, इच्छंतो हियमप्पणो ॥ ६ ॥ तम्हा विणय-  
मेसिज्जा, सीलं पडिलभेज्जओ । बुद्धपुत्त नियागट्ठी, न निकसिज्जइ कणहुई ॥ ७ ॥  
निस्संते सियाऽमुहरी, बुद्धाणं अंतिए सया । अट्ठजुत्ताणि सिक्खिज्जा, निरट्ठाणि उ  
वज्जए ॥ ८ ॥ अणुसासिओ न कुप्पिज्जा, खंतिं सेविज्ज पंडिए । खुड्ढेहिं सह  
संसग्गि, हासं कीडं च वज्जए ॥ ९ ॥ मा य चंडालियं कासी, बहुयं मा य आलवे ।  
कालेण य अहिजित्ता, तओ झाइज्ज एगगो ॥ १० ॥ आहच्च चंडालियं कट्ठ, न  
निण्हविज्ज कयाइ वि । कडं कडे त्ति भासेज्जा, अकडं नो कडे त्ति य ॥ ११ ॥ मा  
गलियस्सेव कसं, वयणमिच्छे पुणो पुणो । कसं व दट्ठुसाइण्णे, पावगं परिवज्जए ॥ १२ ॥  
अणासवा थूलवया कुसीला, मिउं पि चंडं पकरंति सीसा । चित्ताणुया लहु दक्खोव-  
वेया, पसायए ते हु दुरासयं पि ॥ १३ ॥ नापुट्ठो वागरे किंचि, पुट्ठो वा नालियं  
वए । कोहं असच्चं कुव्वेज्जा, धारेज्जा पियमप्पियं ॥ १४ ॥ अप्पा चेव दमेयव्वो,  
अप्पा हु खल्ल दुइमो । अप्पा दंतो सुही होइ, अस्सि लोए परत्थ य ॥ १५ ॥ वरं  
मे अप्पा दंतो, संजमेण तवेण य । माहं परेहि दम्मंतो, बंधणेहिं वहेहि य ॥ १६ ॥  
पडिणीयं च बुद्धाणं, वाया अट्ठव कम्मणा । आवी वा जइ वा रहस्से, नेव कुज्जा  
६२ सुत्ता०

कयाइ वि ॥ १७ ॥ न पक्खओ न पुरओ, नेव किच्चाण पिट्ठओ । न जुंजे ऊरुणा  
 ऊरुं, सयणे नो पडिस्सुणे ॥ १८ ॥ नेव पल्लत्थियं कुज्जा, पक्खपिंडं च संजए ।  
 पाए पसारिए वावि, न चिट्ठे गुरुण्तिए ॥ १९ ॥ आयरिएहिं वाहितो, तुसिणीओ  
 न कयाइ वि । पसायपेही नियागट्ठी, उवचिट्ठे गुरुं सया ॥ २० ॥ आलवंते लवंते  
 वा, न निसीएज्ज कयाइ वि । चइऊणमासणं धीरो, जओ सुत्तं पडिस्सुणे ॥ २१ ॥  
 आसणगओ न पुच्छेज्जा, नेव सेजागओ कयाइ वि । आगम्मकुडुओ संतो, पुच्छिज्जा  
 पंजलीउडो ॥ २२ ॥ एवं विणयजुत्तस्स, सुत्तं अत्थं च तदुभयं । पुच्छमाणस्स  
 सीसस्स, वागरिज्ज जहासुयं ॥ २३ ॥ मुसं परिहरे भिक्खू, न य ओहारिणिं  
 वए । भासादोसं परिहरे, मायं च वज्जए सया ॥ २४ ॥ न लवेज्ज पुट्ठो सावज्जं,  
 न निरट्ठं न मम्मयं । अप्पणट्ठा परट्ठा वा, उभयस्संतरेण वा ॥ २५ ॥ समरेसु  
 अगारेसु, संघीसु य महापहे । एगो एगित्थिए सद्धिं, नेव चिट्ठे न संलवे ॥ २६ ॥  
 जं मे बुद्धाऽणुसासंति, सीएण फरुसेण वा । मम लाभो त्ति पेहाए, पयओ तं पडि-  
 स्सुणे ॥ २७ ॥ अणुसासणमोवायं, दुक्कडस्स य चोयणं । हियं तं मण्णइ पण्णो,  
 वेसं होइ असाहुणो ॥ २८ ॥ हियं विगयमया बुद्धा, फरुसं पि अणुसासणं । वेसं तं  
 होइ मूढाणं, खंतिसोहिकरं पयं ॥ २९ ॥ आसणे उवचिट्ठेज्जा, अणुचे अकुए  
 थिरे । अप्पुट्ठाई निरुट्ठाई, निसीएज्जप्पकुक्कुए ॥ ३० ॥ कालेण निक्खमे भिक्खू,  
 कालेण य पडिक्कमे । अकालं च विवज्जिता, काले कालं समायरे ॥ ३१ ॥ परिवाडीए  
 न चिट्ठेज्जा, भिक्खू दत्तेसणं चरे । पडिरुवेण एसित्ता, मियं कालेण भक्खए  
 ॥ ३२ ॥ नाइदूरमणासन्ने, नऽन्नेसिं चक्खुफासओ । एगो चिट्ठेज्ज भत्तट्ठा, लंघित्ता  
 तं नऽइक्कमे ॥ ३३ ॥ नाइउच्चे व नीए वा, नासन्ने नाइदूरओ । फासुयं परकडं  
 पिंडं, पडिगाहेज्ज संजए ॥ ३४ ॥ अप्पपाणेऽप्पवीयम्मि, पडिच्छन्नम्मि संवुडे ।  
 समयं संजए भुंजे, जयं अपरिसाडियं ॥ ३५ ॥ सुकडित्ति सुपक्कित्ति, सुच्छिन्ने  
 सुहडे मडे । सुणिट्ठिए सुलट्ठित्ति, सावज्जं वज्जए मुणी ॥ ३६ ॥ रमए पंडिए सासं,  
 हयं भइं व वाहए । बालं सम्मइ सासंतो, गलियस्सं व वाहए ॥ ३७ ॥ खड्डुया  
 मे चवेडा मे, अक्कोसा य वहा य मे । कल्लाणमणुसासंतो, पावदिट्ठित्ति मच्चई  
 ॥ ३८ ॥ पुत्तो मे भाय नाइत्ति, साहू कल्लाण मच्चई । पावदिट्ठि उ अप्पाणं, सासं  
 दासित्ति मच्चई ॥ ३९ ॥ न कोवए आयरियं, अप्पाणं पि न कोवए । बुद्धोवघाई  
 न सिया, न सिया तोत्तगवेसए ॥ ४० ॥ आयरियं कुवियं नच्चा, पत्तिएण पसायए ।  
 विज्जवेज्ज पंजलीउडो, वएज्ज न पुणो त्ति य ॥ ४१ ॥ धम्मजियं च ववहारं,  
 बुद्धेहायरियं सया । तमायरंतो ववहारं, गरहं नाभिगच्छई ॥ ४२ ॥ मणोगयं

वक्कगयं, जाणित्तायरियस्स उ । तं परिगिज्झ वायाए, कम्मुणा उववायए ॥ ४३ ॥  
 वित्ते अचोइए निच्चं, खिप्पं हवइ सुचोइए । जहोवइदं सुकयं, किच्चाइं कुव्वई सया  
 ॥ ४४ ॥ नच्चा नमइ मेहावी, लोए किन्ती से जायए । हवई किच्चाणं सरणं, भूयाणं  
 जगई जहा ॥ ४५ ॥ पुज्जा जरस्स पसीयंति, संबुद्धा पुव्वसंथुया । पसच्चा लाभइस्संति,  
 विउलं अट्ठियं सुयं ॥ ४६ ॥ स पुज्जसत्थे सुविणीयसंसए, मणोरुई चिट्ठइ कम्म-  
 संपया । तवोसमायारिसमाहिंसंबुद्धे, महज्जुई पंच वयाइं पालिया ॥ ४७ ॥ स देव-  
 गंधव्वमणुस्सपूइए, चइत्तु देहं मलपंकपुव्वयं । सिद्धे वा हवइ सासए, देवे वा  
 अप्परए महिद्धिए ॥ ४८ ॥ त्ति-वेमि ॥ इति विणयसुयंणामं पढममज्झयणं  
 समत्तं ॥ १ ॥

## अह परिसहणामं दुइयमज्झयणं

सुयं मे आउसं ! तेणं भगवया एवमक्खायं, इह खलु बावीसं परिसहा समणेणं  
 भगवया महावीरेणं कासवेणं पवेइया जे भिक्खू सोच्चा नच्चा जिच्चा अभिभूय  
 भिक्खायरियाए परिव्वयंतो पुट्ठो नो विनिहजेज्जा, कयरे खलु ते बावीसं परिसहा  
 समणेणं भगवया महावीरेणं कासवेणं पवेइया जे भिक्खू सोच्चा नच्चा जिच्चा अभि-  
 भूय भिक्खायरियाए परिव्वयंतो पुट्ठो नो विनिहजेज्जा ? इमे खलु ते बावीसं  
 परिसहा समणेणं भगवया महावीरेणं कासवेणं पवेइया जे भिक्खू सोच्चा नच्चा  
 जिच्चा अभिभूय भिक्खायरियाए परिव्वयंतो पुट्ठो नो विनिहजेज्जा, तंजहा-दिगिंछा-  
 परीसहे १, पिवासापरीसहे २, सीयपरीसहे ३, उसिणपरीसहे ४, दंसमसयपरी-  
 सहे ५, अचेलपरीसहे ६, अरइपरीसहे ७, इत्थीपरीसहे ८, चरियापरीसहे ९,  
 निसीहियापरीसहे १०, सेज्जापरीसहे ११, अक्कोसपरीसहे १२, वहपरीसहे १३,  
 जायणापरीसहे १४, अलाभपरीसहे १५, रोगपरीसहे १६, तण्णासपरीसहे १७,  
 जल्लपरीसहे १८, सक्कारपुरक्कारपरीसहे १९, पच्चापरीसहे २०, अच्चाणपरीसहे २१,  
 दंसणपरीसहे २२ । परिसहणं पविभत्ती, कासवेणं पवेइया । तं मे उदाहरिस्सामि,  
 आणुपुव्विं सुणेह मे ॥ १ ॥ (१) दिगिंछापरिगए देहे, तवस्सी भिक्खू थामवं ।  
 न छिंदे न छिंदावए, न पए न पयावए ॥ २ ॥ कालीपव्वंगसंकासे, किसे धमणि-  
 संतए । मायजे असणपाणस्स, अदीणमणसो चरे ॥ ३ ॥ (२) तओ पुट्ठो पिवा-  
 साए, दोणुंछी लज्जसंजए । सीओदगं न सेविज्जा, वियडस्सेसणं चरे ॥ ४ ॥ छिन्ना-  
 वाएसु पंथेसु, आउरे सुपिवासिए । परिसुक्कमुहाऽदीणे, तं तितिकखे परीसहं ॥ ५ ॥

(३) चरंतं विरयं ल्हं, सीयं फुसइ एगया । नाइवेलं मुणी गच्छे, सोच्चाणं जिण-  
सासणं ॥ ६ ॥ न मे निवारणं अत्थि, छवित्तार्णं न विज्जई । अहं तु अग्निं  
सेवामि, इइ भिक्खू न चित्तए ॥ ७ ॥ (४) उसिणं परियावेणं, परिदाहेण तज्जिए ।  
धिंखु वा परियावेणं, सायं नो परिदेवए ॥ ८ ॥ उण्हाहित्तो मेहावी, सिपाणं नो  
वि पत्थए । गायं नो परिसिंचेज्जा, न वीएज्जा य अप्पयं ॥ ९ ॥ (५) पुट्ठो य  
दंसमसएहिं, समरे व महामुणी । नागो संगामसीसे वा, सूरु अभिहणे परं ॥ १० ॥  
न संतसे न वारेज्जा, मणं पि न पओसए । उवेहे न हणे पाणे, भुंजंते मंससोणियं  
॥ ११ ॥ (६) परिजुण्णेहिं वत्थेहिं, होक्खामि त्ति अचेले । अदुवा सचेले  
होक्खामि, इइ भिक्खू न चित्तए ॥ १२ ॥ एगयाऽचेले होइ, सचेले आवि एगया ।  
एयं धम्मं हियं नच्चा, नाणी नो परिदेवए ॥ १३ ॥ (७) गामाणुगामं रीयंतं,  
अणगारं अकिचणं । अरइ अणुप्पवेसेज्जा, तं तित्तिक्खे परीसहं ॥ १४ ॥ अरइं  
पिट्ठओ किच्चा, विरए आयरक्खिए । धम्मारामे निरारम्मे, उवसंते मुणी चरे  
॥ १५ ॥ (८) संगो एस मणूसाणं, जाओ लोगम्मि इत्थिओ । जस्स एया परि-  
च्चाया, सुकडं तस्स सामणं ॥ १६ ॥ एवमादाय मेहावी, पंकभूया उ इत्थिओ ।  
नो ताहिं विणिहजेज्जा, चरेज्जऽत्तगवेसए ॥ १७ ॥ (९) एग एव चरे लाढे, अभिभूय  
परीसहे । गामे वा नगरे वावि, निगमे वा रायहाणिए ॥ १८ ॥ असमाणे चरे  
भिक्खू, नेव कुज्जा परिग्गहं । असंसत्तो गिहत्थेहिं, अणिएओ परिव्वए ॥ १९ ॥  
(१०) सुसाणे सुज्जगारे वा, रुक्खमूले व एगओ । अकुक्कुओ निसीएज्जा, न य  
वित्तासए परं ॥ २० ॥ तत्थ से चिट्ठमाणस्स, उवसग्गाभिधारए । संकासीओ न  
गच्छेज्जा, उट्ठित्ता अन्नसासणं ॥ २१ ॥ (११) उच्चावयाहिं सेज्जाहिं, तवस्सी भिक्खू  
थामवं । नाइवेलं विहज्जिज्जा, पावदिट्ठी विहज्जई ॥ २२ ॥ पइरिकुवस्सयं लद्धं,  
कळाणमदुव पावयं । किमेगराइं करिस्सइ, एवं तत्थऽहियासए ॥ २३ ॥  
(१२) अक्कोसेज्जा परे भिक्खुं, न तेसिं पडिसंजले । सरिसो होइ बालाणं, तम्हा भिक्खू  
न संजले ॥ २४ ॥ सोच्चाणं फरुसा भासा, दारुणा गामकंटगा । तुसिणीओ उवेहेज्जा,  
न ताओ मणसीकरे ॥ २५ ॥ (१३) हओ न संजले भिक्खू, मणं पि न पओसए ।  
तित्तिक्खं परमं नच्चा, भिक्खू धम्मं विचित्तए ॥ २६ ॥ समणं संजयं दंतं, हणिज्जा  
कोइ कत्थई । नत्थि जीवस्स नासुत्ति, एवं पेहेज्ज संजए ॥ २७ ॥ (१४) दुक्करं  
खलु भो निच्चं, अणगारस्स भिक्खुणो । सव्वं से जाइयं होइ, नत्थि किंचि अजाइयं  
॥ २८ ॥ गोयरग्गपविट्ठस्स, पाणी नो सुप्पसारए । सेओ अगारवासुत्ति, इइ भिक्खू  
न चित्तए ॥ २९ ॥ (१५) परेसु घासमेसेज्जा, भोयणे परिणिट्ठिए । लद्धे पिंडे अलद्धे

वा, नाणुत्तप्पेज पंडिए ॥ ३० ॥ अज्जेवाहं न लब्भामि, अवि लामो सुए सिया ।  
जो एवं पडिसंचिक्खे, अलाभो तं न तज्जए ॥ ३१ ॥ (१६) नच्चा उप्पइयं दुक्खं,  
वेयणाए दुहट्टिए । अदीणो थावए पन्नं, पुट्ठो तत्थऽहियासए ॥ ३२ ॥ तेइच्छं  
नाभिनंदेज्जा, संचिक्खऽत्तगवेसए । एवं खु तस्स सामण्णं, जं न कुज्जा न कारवे  
॥ ३३ ॥ (१७) अच्चेलगस्स ल्हस्स, संजयस्स तवस्सिणो । तणेसु सयमाणस्स,  
हुज्जा गायविराहणा ॥ ३४ ॥ आयवस्स निवाएण, अउला हवइ वेयणा । एवं नच्चा  
न सेवंति, तंतुजं तणतज्जिया ॥ ३५ ॥ (१८) किलिन्नगाए मेहावी, पंकेण वरण  
वा । धिसु वा परियावेण, सायं नो परिदेवए ॥ ३६ ॥ वेएज्ज निजरापेही, आरियं  
धम्मऽणुत्तरं । जाव सरीरमेउत्ति, जल्लं काएण धारए ॥ ३७ ॥ (१९) अभिवायण-  
मब्भुट्ठाणं, सामी कुज्जा निमंतणं । जे ताइं पडिसेवंति, न तेसिं पीहए सुणी ॥ ३८ ॥  
अणुक्काई अप्पिच्छे, अच्चाएसी अलोळुए । रसेसु नाणुगिज्जेज्जा, नाणुत्तप्पेज पच्चवं  
॥ ३९ ॥ (२०) से नूणं मए पुव्वं, कम्माऽणाणफला कडा । जेणाहं नाभिजाणामि,  
पुट्ठो केणइ कण्हुई ॥ ४० ॥ अह पच्छा उज्जंति, कम्माऽणाणफला कडा । एव-  
मस्सासि अप्पाणं, नच्चा कम्मविवागयं ॥ ४१ ॥ (२१) निरट्ठगम्मि विरओ, मेहुणाओ  
सुसंवुडो । जो सक्खं नाभिजाणामि, धम्मं कल्लाणपावगं ॥ ४२ ॥ तवोवहाणमादाय,  
पडिमं पडिवज्जओ । एवं पि विहरओ मे, छउमं न नियट्ठई ॥ ४३ ॥ (२२) नत्थि  
नूणं परे लोए, इह्वां वावि तवस्सिणो । अदुवा वंचिओमिति, इइ भिक्खू न चितए  
॥ ४४ ॥ अभू जिणा अत्थि जिणा, अदुवा वि भविस्सइ । मुसं ते एवमाहंसु, इइ  
भिक्खू न चितए ॥ ४५ ॥ एए परीसहा सव्वे, कासवेण पवेइया । जे भिक्खू न  
विहजेज्जा, पुट्ठो केणइ कण्हुई ॥ ४६ ॥ ति-वेमि ॥ इति परिसहणामं दुइय-  
मज्झयणं समत्तं ॥ २ ॥

### अह चाउरंगिज्जं णाम तइयमज्झयणं

चत्तारि परमंगाणि, दुल्लहाणीह जंतुणो । माणुसत्तं<sup>१</sup> सुई<sup>२</sup> सद्धा<sup>३</sup>, संजमम्मि य  
वीरियं ॥ १ ॥ समावच्चाण संसारे, नाणागोत्तासु जाइसु । कम्मा नाणाविहा कट्ठ,  
पुढो विस्संभया पया ॥ २ ॥ एगया देवलोएसु, नरएसु वि एगया । एगया आसुरं  
कायं, अहाकम्मेहिं गच्छइ ॥ ३ ॥ एगया खत्तिओ होइ, तओ चंडालबुक्को ।  
तओ कीडपर्यंगो य, तओ कुंथुपिवीलिया ॥ ४ ॥ एवमावट्ठजोणीसु, पाणिणो कम्म-  
किव्विसा । न निविजंति संसारे, सव्वट्ठेसु व खत्तिया ॥ ५ ॥ कम्मसंगेहिं संगूढा,



दुक्खिया बहुवेयणा । अमाणुसासु जोणीसु, विणिहम्मंति पाणिणो ॥ ६ ॥ कम्माणं तु पहाणाए, आणुपुव्वी कयाइ उ । जीवा सोहिमणुप्पत्ता, आययंति मणुस्सयं ॥ ७ ॥ माणुस्सं विग्गहं लद्धुं, सुइं धम्मस्स दुल्लहा । जं सोच्चा पडिवज्जंति, तवं खंतिमहिंसयं ॥ ८ ॥ आहच्च सवणं लद्धुं, सद्धा परमदुल्लहा । सोच्चा नेयाउयं मग्गं, बहवे परिभस्सइ ॥ ९ ॥ सुइं च लद्धुं सद्धं च, वीरियं पुण दुल्लहं । बहवे रोयमाणा वि, नो य णं पडिवज्जए ॥ १० ॥ माणुसत्तंमि आयाओ, जो धम्मं सोच्च सद्धे । तवस्सी वीरियं लद्धुं, संवुडे निद्धुणे रयं ॥ ११ ॥ सोही उज्जुय-भूयस्स, धम्मो सुद्धस्स चिट्ठइ । निव्वाणं परमं जाइ, घयसित्तिव्व पावए ॥ १२ ॥ विणिच्च कम्मुणो हेउं, जसं संचिणु खंतिए । सरीरं पाठवं हिच्चा, उद्धं पक्कमइ दिसं ॥ १३ ॥ विसालिसेहिं सीलेहिं, जक्खा उत्तरउत्तरा । महासुक्का व दिप्पता, मजंता अपुणच्चवं ॥ १४ ॥ अपिया देवकामाणं, कामरूवविउव्विणो । उद्धं कप्पेसु चिट्ठंति, पुव्वा वाससया बहू ॥ १५ ॥ तत्थ ठिच्चा जहाठाणं, जक्खा आउक्खए चुया । उवेंति माणुसं जोणिं, से दसंगेऽभिजायए ॥ १६ ॥ खेत्तं वत्थुं हिरण्णं च, पसवो दासपोस्स । चत्तारि कामखंधाणि, तत्थ से उववज्जइ ॥ १७ ॥ सित्तवं नायवं होइ, उच्चागोए य वण्णवं । अप्पायंके महापप्पे, अभिजाए जसो बले ॥ १८ ॥ भुच्चा माणुस्सए भोए, अप्पडिरूवे अहाउयं । पुव्वं विसुद्धसद्धम्मे, केवलं बोहि बुज्झिया ॥ १९ ॥ चउरंगं दुल्लहं नच्चा, संजमं पडिवज्जिया । तवसा धुयकम्मंसे, सिद्धे हवइ सासए ॥ २० ॥ त्ति-बेमि ॥ इति चाउरंगिज्जं णाम तइय-मज्झयणं समत्तं ॥ ३ ॥

### अह असंखयं णाम चउत्थमज्झयणं

असंखयं जीविय मा पमायए, जरोवणीयस्स हु नत्थि ताणं । एवं वियाणाहि जणे पमत्ते, किं नु विहिंसा अजया गहिंति ॥ १ ॥ जे पावकम्ममेहिं धणं मणूसा, समाययंती अमइं गहाय । पहाय ते पासपयडिए नरे, वेराणुबद्धा नरयं उवेंति ॥ २ ॥ तेणे जहा संधिमुहे गहीए, सकम्मुणा किच्चइ पावकारी । एवं पया पेच्च इहं च लोए, कडाण कम्माण न मुक्ख अत्थि ॥ ३ ॥ संसारमावन्न परस्स अट्ठा, साहारणं जं च करेइ कम्मं । कम्मस्स ते तस्स उ वेयकाले, न बंधवा बंधवर्यं उवेंति ॥ ४ ॥ वित्तेण ताणं न लमे पमत्ते, इमंमि लोए अदुवा परत्था । दीवप्प-णट्ठेव अणंतमोहे, नेयाउयं दट्ठुमदट्ठुमेव ॥ ५ ॥ सुत्तेसु थावी पडिबुद्धजीवी, न

वीससे पंडिँ आसुण्णे । घोरा मुहुत्ता अवलं सरीरं, भारंडपक्खीव चरेऽप्पमत्ते ॥ ६ ॥ चरे पयाइं परिसंक्कमाणो, जं किंचि पासं इह मज्जमाणो । लाभंतरे जीविय बृहइत्ता, पच्छा परिञ्चाय मलावधंसी ॥ ७ ॥ छंदं निरोहेण उवेइ मोक्खं, आसे जहा सिक्खियवम्मधारी । पुव्वाइं वासाइं चरेऽप्पमत्तो, तम्हा मुणी खिप्पमुवेइ मोक्खं ॥ ८ ॥ स पुव्वमेवं न लभेज पच्छा, एसोवमा सासयवाइयाणं । विसीयइं सिद्धिले आउयम्मि, कालोवणीए सरीरस्स भेए ॥ ९ ॥ खिप्पं न सक्केइ विवेगमेउं, तम्हा समुट्ठाय पहाय कामे । समिच्च लोयं समया महेसी, आयाणुरक्खी चरेऽप्पमत्तो ॥ १० ॥ सुहुं सुहुं मोहगुणे जयंतं, अणेगरूवा समणं चरंतं । फासा फुसंति असमंजसं च, न तेसि भिक्खु मणसा पउस्से ॥ ११ ॥ मंदा य फासा बहुलोहणिज्जा, तहप्पगारेसु मणं न कुज्जा । रक्खिज्ज कोहं विणएज्ज माणं, मायं न सेवेज पहेज लोहं ॥ १२ ॥ जेऽसंखया तुच्छपरप्पवाई, ते पिज्जदोसाणुगया परज्झा । एए अहम्मे ति दुगुंछमाणो, कंखे गुणे जाव सरीरमेउ ॥ १३ ॥ त्ति-वेमि ॥ इति असंखयं णाम चउत्थमज्झयणं समत्तं ॥ ४ ॥

### अह अकाममरणिजं णामं पंचममज्झयणं

अण्णवंसि महोहंसि, एगे तिण्णे दुरुत्तरे । तत्थ एगे महापज्जे, इमं पण्हमुदाहरे ॥ १ ॥ संतिमे य दुवे ठाणा, अक्खाया मरणंतिया । अकाममरणं चेव, सकाममरणं तहा ॥ २ ॥ बालाणं अकामं तु, मरणं असइं भवे । पंडियाणं सकामं तु, उक्कोसेण सइं भवे ॥ ३ ॥ तत्थिमं पढमं ठाणं, महावीरेण देसियं । कामणिद्धे जहा बाले, भिसं कूराइं कुव्वइं ॥ ४ ॥ जे गिद्धे कामभोगेसु, एगे कूडाय गच्छइं । न मे दिट्ठे परे लोए, चक्खुविट्ठा इमा रइं ॥ ५ ॥ हत्थागया इमे कामा, कालिया जे अणागया । को जाणइ परे लोए, अत्थि वा नत्थि वा पुणो ॥ ६ ॥ जणेण सद्धिं होक्खामि, इइ बाले पगब्भइं । कामभोगाणुराएणं, केसं संपडिवज्जइं ॥ ७ ॥ तओ से दंडं समारभइं, तसेसु थावरेसु य । अट्ठाए य अणट्ठाए, भूयगामं विहिंसइं ॥ ८ ॥ हिंसे बाले मुसावाई, माइइले पिसुणे सढे । भुंजमाणे सुरं मेसं, सेयमेयं ति मज्जइं ॥ ९ ॥ कायसा वयसा मत्ते, वित्ते गिद्धे य इत्थिसु । दुहओ मलं संचिणइ, सिंसुणागुव्व मट्ठियं ॥ १० ॥ तओ पुट्ठो आयंकेणं, गिलाणो परितप्पइ । अभीओ परलोगस्स, कम्माणुप्पेहि अप्पणो ॥ ११ ॥ सुया मे नरए ठाणा, असीलाणं च जा गइं । बालाणं कूरकम्माणं, पगाढा जत्थ वेयणा ॥ १२ ॥ तत्थोववाइयं ठाणं, जहा

मेयमणुस्सुयं । अहाकम्मेहिं गच्छंते, सो पच्छा परितेप्पई ॥ १३ ॥ जहा सागडिओ जाणं, समं हिचा महापहं । विसमं भग्गमोइण्णो, अक्खे भग्गम्मि सोयई ॥ १४ ॥ एवं धम्मं विउक्कम्म, अहम्मं पडिवज्जिया । बाले मच्चुमुहं पत्ते, अक्खे भग्गे व सोयई ॥ १५ ॥ तओ से मरणंतम्मि, बाले संतसई भया । अकाममरणं मरइ, धुत्ते व कलिणा जिए ॥ १६ ॥ एयं अकाममरणं, बालाणं तु पवेइयं । इत्तो सकाममरणं, पंडियाणं सुणेह मे ॥ १७ ॥ मरणं पि सपुण्णाणं, जहा मेयमणुस्सुयं । विप्पसण्ण-मणाघायं, संजयाण वुसीमओ ॥ १८ ॥ न इमं सव्वेसु भिक्खुसु, न इमं सव्वे-सुऽगारिसु । नाणासीला अगारत्था, विसमसीला य भिक्खुणो ॥ १९ ॥ संति एगेहिं भिक्खुहिं, गारत्था संजमुत्तरा । गारत्थेहि य सव्वेहिं, साहवो संजमुत्तरा ॥ २० ॥ चीराजिणं नगिणिणं, जडी संघाडि मुंडिणं । एयाणि वि न तायंति, दुस्सीलं परिया-गयं ॥ २१ ॥ पिंडोलेएव्व दुस्सीले, नरगाओ न मुचई । भिक्खाए वा गिहत्थे वा, सुव्वए कम्मई दिवं ॥ २२ ॥ अगारि सामाइयंगाणि, सद्धी काएण फासए । पोसहं दुहओ पक्खं, एगरायं न हावए ॥ २३ ॥ एवं सिक्खासमावन्ने, गिहिवासे वि सुव्वए । मुचई छविपव्वाओ, गच्छे जक्खसलोगयं ॥ २४ ॥ अह जे संवुडे भिक्खू, दोहं अन्नयरे सिया । सव्वदुक्खपहीणे वा, देवे वावि महिद्धिए ॥ २५ ॥ उत्तराई विमोहाई, जुईमंताऽणुपुव्वसो । समाइण्णाई जक्खेहिं, आवासाई जसंसिणो ॥ २६ ॥ दीहाउया इद्धिमंता, समिद्धा कामरुविणो । अहुणोववन्नसंकासा, भुज्जो अच्चिमालिप्पभा ॥ २७ ॥ ताणि ठाणाणि गच्छंति, सिक्खित्ता संजमं तवं । भिक्खाए वा गिहत्थे वा, जे संति परिनिव्वुडा ॥ २८ ॥ तेसिं सोच्चा सपुज्जाणं, संजयाण वुसीमओ । न संतसंति मरणंते, सीलवंता बहुस्सुया ॥ २९ ॥ तुलिया विसेसमादाय, दयाधम्मस्स खंतिए । विप्पसीएज मेहावी, तहाभूएण अप्पणा ॥ ३० ॥ तओ काले अभिप्पेए, सद्धी तालिसमंतिए । विणएज लोमहरिसं, मेयं देहस्स कंखए ॥ ३१ ॥ अह कालम्मि संपत्ते, आघायाय समुस्सयं । सकाममरणं मरई, तिण्हमन्नयरं मुणी ॥ ३२ ॥ ति-वेमि ॥ इति अकाममरणज्जं णामं पंचममज्झयणं समत्तं ॥ ५ ॥

### अह खुड्ढागणियंठिज्जं णामं छट्ठमज्झयणं

जावंतऽविज्जापुरिसा, सव्वे ते दुक्खसंभवा । लुप्पंति बहुसो मूढा, संसारंमि अणंतए ॥ १ ॥ समिक्ख पंडिए तम्हा, पासजाइपहे बहू । अप्पणा सच्चमेसेज्जा, मेत्तिं भूएसु कप्पए ॥ २ ॥ माया पिया ण्हुसा भाया, भज्जा पुत्ता यं ओरसा ।

नालं ते मम ताणाए, लुपंतस्स सकम्मुणा ॥ ३ ॥ एयमट्ठं सपेहाए, पासे समिय-  
दंसणे । छिंदे गिद्धिं सिण्हं च, न कंखे पुव्वसंथवं ॥ ४ ॥ गवासं मणिकुंडलं,  
पसवो दासपोरुसं । सव्वमेयं चइत्ताणं, कामरूवी भविस्ससि ॥ ५ ॥ (थावरं जंगमं  
चेव, धणं धन्नं उवक्खरं । पच्चमाणस्स कम्मेहिं, नालं दुक्खाओ भोयणे ॥)  
अज्झत्थं सव्वओ सव्वं, दिस्स पाणे पियायए । न हणे पाणिणो पाणे, भयवेराओ  
उवरए ॥ ६ ॥ आयाणं नरयं दिस्स, नायएज्ज तणामवि । दोगुंछी अप्पणो पाए,  
दिन्नं मुंजेज्ज भोयणं ॥ ७ ॥ इहमेगे उ मज्जंति, अप्पच्चक्खाय पावगं । आयरियं  
विदिताणं, सव्वदुक्खा विसुच्चई ॥ ८ ॥ मणंता अकरेंता य, बंधमोक्खपइणिणो ।  
वायाविरियमेत्तेण, समासासेंति अप्पयं ॥ ९ ॥ न चित्ता तायए भासा, कुओ  
विज्जाणुसासणं । विसन्ना पावकम्मेहिं, बाला पंडियमाणिणो ॥ १० ॥ जे केइ सरीरे  
सत्ता, वण्णे ह्वे य सव्वसो । मणसा कायवक्केणं, सव्वे ते दुक्खसंभवा ॥ ११ ॥  
आवणा दीहमद्धानं, संसारंमि अणंतए । तम्हा सव्वदिसं पस्सं, अप्पमत्तो परिव्वए  
॥ १२ ॥ वहिया उट्ठमादाय, नावकंखे कयाइ वि । पुव्वकम्मक्खयट्ठाए, इमं देहं  
समुद्धरे ॥ १३ ॥ विगिंच कम्मुणो हेउं, कालकंखी परिव्वए । मायं पिंडस्स  
पाणस्स, कडं लद्धूण भक्खए ॥ १४ ॥ सन्निहिं च न कुव्वेज्जा, लेवमायाए संजए ।  
पक्खीपत्तं समादाय, निरवेक्खो परिव्वए ॥ १५ ॥ एसणासमिओ लज्जु, गामे  
अणियओ चरे । अप्पमत्तो पमत्तेहिं, पिंडवायं गवेसए ॥ १६ ॥ एवं से उदाहु  
अणुत्तरनाणी, अणुत्तरदंसी अणुत्तरनाणदंसणधरे । अरहा नायपुत्ते भगवं, वेसालिए  
वियाहिए ॥ १७ ॥ त्ति-बेमि ॥ इति खुट्ठागणियंठिज्जं णामं छट्ठमज्झयणं  
समत्तं ॥ ६ ॥

### अह एलइज्जणामं सत्तममज्झयणं

जहाएसं समुद्दिस्स, कोइ पोसेज्ज एलयं । ओयणं जवसं देज्जा, पोसेज्जा वि  
सयंगणे ॥ १ ॥ तओ से पुट्ठे परिव्वूढे, जायमेए महोदरे । पीणिए विउले देहे,  
आएसं परिकंखए ॥ २ ॥ जाव न एइ आएसे, ताव जीवइ से दुही । अह पत्तम्मि  
आएसे, सीसं छेत्तुण भुज्जई ॥ ३ ॥ जहा से खलु उरब्भे, आएसाए समीहिए । एवं  
बाले अहम्मिट्ठे, ईहई नरयाउयं ॥ ४ ॥ हिंसे बाले मुसावाई, अद्धानंमि विलोवए ।  
अन्नदत्तहरे तेणे, माई कं नु हरे सढे ॥ ५ ॥ इत्थीविसयगिद्धे य, महारंभपरिग्गहे ।  
मुंजमाणे सुरं मंसं, परिव्वूढे परंदमे ॥ ६ ॥ अयक्करमोई य, तुंदिळे चियलोहिए ।

आउयं नरए क्खे, जहाएसं व एलए ॥ ७ ॥ आसणं सयणं जाणं, वित्तं कामाणि  
 भुंजिया । दुस्साहडं धणं हिच्चा, बहुं संविणिया रयं ॥ ८ ॥ तओ कम्मगुरु जंतु,  
 पञ्चुप्पन्नपरायणे । अयव्व आगयाएसे, मरणंतम्मि सोयई ॥ ९ ॥ तओ आउप-  
 रिक्खीणे, सुयदेहा विहिंसगा । आसुरीयं दिसं वाला, गच्छंति अवसा तमं ॥ १० ॥  
 जहा कागिणिए हेउं, सहस्सं हारए नरो । अपत्थं अंवगं भोच्चा, राया रजं तु  
 हारए ॥ ११ ॥ एवं माणुस्सगा कामा, देवकामाण अंतिए । सहस्सगुणिया भुज्जो,  
 आउं कामा य दिव्विया ॥ १२ ॥ अणेगवासानउया, जा सा पन्नवओ ठिई ।  
 जाणि जीयंति दुम्मेहा, ऊणे वाससयाउए ॥ १३ ॥ जहा य तिच्चि वाणिया, मूलं  
 धेत्तूण निगया । एगोऽत्थ लहई लाभं, एगो मूलेण आगओ ॥ १४ ॥ एगो मूलं  
 पि हारित्ता, आगओ तत्थ वाणिओ । ववहारे उवमा एसा, एवं धम्मे वियाणह  
 ॥ १५ ॥ माणुसत्तं भवे मूलं, लाभो देवगई भवे । मूलच्छेएण जीवाणं, नरगतिरि-  
 क्खत्तणं धुवं ॥ १६ ॥ दुहओ गई बालस्स, आवई वहमूलिया । देवत्तं माणुसत्तं  
 च, जं जिए लोलायासडे ॥ १७ ॥ तओ जिए सई होइ, दुविहं दुगई गए । दुल्लहा  
 तस्स उम्मग्गा, अद्धाए सुचिरादवि ॥ १८ ॥ एवं जियं सपेहाए, तुलिया बालं  
 च पंडियं । मूलियं ते पवेसंति, माणुसिं जोणिमेंति जे ॥ १९ ॥ वेमायाहिं  
 सिक्खाहिं, जे नरा गिहिसुव्वया । उवेंति माणुसं जोणिं, कम्मसच्चा तु पाणिणो ॥ २० ॥  
 जेसिं तु विउला सिक्खा, मूलियं ते अइच्छिया । सीलवंता सविसेसा, अदीणा  
 जंति देवयं ॥ २१ ॥ एवमदीणवं भिक्खू, अगारिं च वियाणिया । कहणु जिच्चमे-  
 लिक्खं, जिच्चमाणे न संविदे ॥ २२ ॥ जहा कुसग्गे उदगं, समुद्देण समं मिणे ।  
 एवं माणुस्सगा कामा, देवकामाण अंतिए ॥ २३ ॥ कुसग्गमेत्ता इमे कामा, सन्नि-  
 रुद्धम्मि आउए । कस्स हेउं पुराकाउं, जोगक्खेमं न संविदे ॥ २४ ॥ इह कामा-  
 णियट्ठस्स, अत्तेट्ठे अवरज्जई । सोच्चा नेयाउयं मग्गं, जं भुज्जो परिमस्सई ॥ २५ ॥  
 इह कामाणियट्ठस्स, अत्तेट्ठे नावरज्जई । पूहदेहनिरोहेणं, भवे देवे त्ति मे सुयं  
 ॥ २६ ॥ इह्वी जुई जतो वण्णो, आउं सुहमणुत्तरं । भुज्जो जत्थ मणुस्सेसु, तत्थ से  
 उववज्जई ॥ २७ ॥ बालस्स पस्स बालत्तं, अहम्मं पडिवज्जिया । चिच्चा धम्मं  
 अहम्मिटे, नरएसूव्वज्जई ॥ २८ ॥ धीरस्स पस्स धीरत्तं, सव्वधम्ममाणुवत्तिणो ।  
 चिच्चा अधम्मं धम्मिटे, देवेसु उववज्जई ॥ २९ ॥ तुलियाण बालभावं, अवालं चैव  
 पंडिए । चइऊण बालभावं, अवालं सेवए सुणि ॥ ३० ॥ त्ति-वेमि ॥ इति एलइज्ज-  
 णामं सत्तममज्झयणं समत्तं ॥ ७ ॥

## अह काविलियं णामं अट्टममज्झयणं

अधुवे असासयम्मि, संसारंमि दुक्खपउराए । किं नाम होज्ज तं कम्मयं, जेणाहं  
 दुग्गाहं न गच्छेज्जा ? ॥ १ ॥ विजहि तु पुव्वसंजोयं, न सिणेहं कहिं चि कुव्वेज्जा । अस्सि-  
 णेह सिणेह करेहिं, दोसपओसेहि मुच्चए भिक्खू ॥ २ ॥ तो नाणदंसणसमग्गो, हियनि-  
 स्सेसाए सव्वजीवाणं । तेसिं विमोक्खणट्ठाए, भासइ मुणिवरो विगयमोहो ॥ ३ ॥  
 सव्वं गंथं कलहं च, विप्पजहे तहाविहं भिक्खू । सव्वेसु कामजाएसु, पासमाणो न  
 लिप्पई ताई ॥ ४ ॥ भोगाभिसदोसविसत्ते, हियनिस्सेयसबुद्धिबोच्चत्थे । बाले य मंदिए  
 मूढे, वज्झइ मच्छिंया व खेलम्मि ॥ ५ ॥ दुप्परिचया इमे कामा, नो सुजहा अधी-  
 रपुरिसेहिं । अह संति सुव्वया साहू, जे तरंति अतरं वणिंया वा ॥ ६ ॥ समणा सु  
 एगे वयमाणा, पाणवहं मिया अयाणंता । मंदा निरयं गच्छंति, वाला पाविंयाहिं  
 दिट्ठीहिं ॥ ७ ॥ न हु पाणवहं अणुजाणे, मुञ्जेज्ज कयाइ सव्वदुक्खाणं । एवमारिएहिं  
 अक्खायं, जेहिं इमो साहुधम्मो पन्नत्तो ॥ ८ ॥ पाणो य नाइवाएज्जा, से समीइत्ति  
 वुच्चई ताई । तओ से पावयं कम्मं, निज्जाइ उदगं व थलाओ ॥ ९ ॥ जगनस्सिएहिं  
 भूएहिं, तसनामेहिं थावरेहिं च । नो तेसिमारभे दंडं, मणसा वयसा कायसा चेव  
 ॥ १० ॥ सुद्धेसणाओ नच्चाणं, तत्थ ठवेज्ज भिक्खू अप्पाणं । जायाए घासमेसेज्जा,  
 रसगिद्धे न सिया भिक्खाए ॥ ११ ॥ पंताणि चेव सेवेज्जा, सीयपिंडं पुराणकुम्मासं ।  
 अदु बुक्कसं पुलागं वा, जवणट्ठाए निसेवए मंथुं ॥ १२ ॥ जे लक्खणं च सुविणं च,  
 अंगविज्जं च जे पउजंति । न हु ते समणा वुच्चंति, एवं आयरिएहिं अक्खायं ॥ १३ ॥  
 इह जीवियं अणियमेत्ता, पब्भट्ठा समाहिजोएहिं । ते कामभोगरसगिद्धा, उव्वज्जंति  
 आसुरे काए ॥ १४ ॥ तत्तो वि य उव्वट्ठिता, संसारं बहु अणुपरियडंति । बहुकम्म-  
 लेवल्लित्ताणं, बोही होइ सुदुल्लहा तेसिं ॥ १५ ॥ कसिणं पि जो इमं लोयं, पडिपुणं  
 दलेज्ज इक्कस्स । तेणावि से न संतुस्से, इह दुप्पूरए इमे आया ॥ १६ ॥ जहा लाहो  
 तहा लोहो, लाहा लोहो पवड्ढई । दोमासकयं कज्जं, कोडीए वि न निट्ठियं ॥ १७ ॥  
 नो रक्खसीसु गिज्जेज्जा, गंडवच्छासुऽणोगचित्तासु । जाओ पुरिसं पलोभित्ता, खेळंति  
 जहा व दासेहिं ॥ १८ ॥ नारीसु नोवगिज्जेज्जा, इत्थी विप्पजहे अणागारे । धम्मं  
 च पेसलं नच्चा, तत्थ ठवेज्ज भिक्खू अप्पाणं ॥ १९ ॥ इह एस धम्मे अक्खाए, कवि-  
 लेणं च विसुद्धपन्नेणं । तरिहिंति जे उ काहिंति, तेहिं आराहिया दुवे लोग ॥ २० ॥  
 त्ति-वेमि ॥ इति काविलियं णामं अट्टममज्झयणं समत्तं ॥ ८ ॥

## अहं नमिपव्वज्जा नामं नवममज्झयणं

चइऊण देवलोगाओ, उववन्नो माणुसंमि लोगंमि । उवसंतमोहणिज्जो, सरई पोरणिणं जाई ॥ १ ॥ जाई सरित्तु भयवं, सयंसंबुद्धो अणुत्तरे धम्मो । पुत्तं ठवेत्तु रज्जे, अभिणिक्खमई नमी राया ॥ २ ॥ सो देवलोगसरिसे, अंतैउरवरगओ वरे भोए । भुंजित्तु नमी राया, बुद्धो भोगे परिच्चयई ॥ ३ ॥ मिहिलं सपुरजणवयं, वलमोरोहं च परियणं सव्वं । चिच्चा अभिनिक्खंतो, एगंतमहिट्ठिओ भयवं ॥ ४ ॥ कोलाहलगभूयं, आसी मिहिलाए पव्वयंतंमि । तइया रायरिसिंमि, नमिंमि अभिणिक्खमंतंमि ॥ ५ ॥ अब्भुट्ठियं रायरिसिं, पव्वजाठाणमुत्तमं । सक्को माहण-रूवेण, इमं वयणमव्ववी ॥ ६ ॥ किं नु भो ! अज्ज मिहिलाए, कोलाहलगसंकुला । सुव्वंति दारुणा सद्दा, पासाएसु गिहेसु य ॥ ७ ॥ एयमट्ठं निसामित्ता, हेऊकारण-चोइओ । तओ नमी रायरिसी, देविंदं इणमव्ववी ॥ ८ ॥ मिहिलाए चेईए वच्चे, सीयच्छाए मणोरमे । पत्तपुप्फफलोवेए, बहूणं बहुगुणे सया ॥ ९ ॥ वाएण हीर-माणम्मि, चेईयम्मि मणोरमे । दुहिया असरणा अत्ता, एए कंदंति भो ! खगा ॥ १० ॥ एयमट्ठं निसामित्ता, हेऊकारणचोइओ । तओ नमिं रायरिसिं, देविंदो इणमव्ववी ॥ ११ ॥ एस अग्गी य वाऊ य, एयं डज्झइ मंदिरं । भयवं अंतैउरं तेणं, कीस णं नावपेक्खह ॥ १२ ॥ एयमट्ठं निसामित्ता, हेऊकारणचोइओ । तओ नमी रायरिसी, देविंदं इणमव्ववी ॥ १३ ॥ सुहं वसामो जीवामो, जेसिं मो नत्थि किंचणं । मिहिलाए डज्झमाणीए, न मे डज्झइ किंचणं ॥ १४ ॥ चत्त-पुत्तकलत्तस्स, निव्वावारस्स भिक्खुणो । पियं न विज्जई किंचि, अप्पियं पि न विज्जई ॥ १५ ॥ बहं खु मुणिणो भइं, अणगारस्स भिक्खुणो । सव्वओ विप्प-मुक्कस्स, एगंतमणुपरस्सओ ॥ १६ ॥ एयमट्ठं निसामित्ता, हेऊकारणचोइओ । तओ नमिं रायरिसिं, देविंदो इणमव्ववी ॥ १७ ॥ पागारं कारइत्ताणं, गोपुरट्ठालगाणि य । उस्सूलगसयग्घीओ, तओ गच्छसि खत्तिया ! ॥ १८ ॥ एयमट्ठं निसामित्ता, हेऊकारणचोइओ । तओ नमी रायरिसी, देविंदं इणमव्ववी ॥ १९ ॥ सद्धं नगरं किच्चा, तवसंवरमग्गलं । खंति निउणपागारं, तिगुत्तं दुप्पधंसयं ॥ २० ॥ धणुं परक्कमं किच्चा, जीवं च इरियं सया । धिई च केयणं किच्चा, सच्चेणं पल्लिमंथाए ॥ २१ ॥ तवनारायजुत्तेण, भित्तूणं कम्मकंचुयं । मुणी विगयसंगामो, भवाओ परिमुच्चए ॥ २२ ॥ एयमट्ठं निसामित्ता, हेऊकारणचोइओ । तओ नमिं रायरिसिं,

देविंदो इणमब्बवी ॥ २३ ॥ पासाए कारइत्ताणं, वद्धमाणगिहाणि य । वालग-  
पोइयाओ य, तओ गच्छसि खत्तिया ! ॥ २४ ॥ एयमट्ठं निसामित्ता, हेऊकारण-  
चोइओ । तओ नमी रायरिसी, देविंदं इणमब्बवी ॥ २५ ॥ संसयं खलु सो  
कुणई, जो मग्गे कुणई घरं । जत्थेव गंतुमिच्छेज्जा, तत्थ कुव्वेज्ज सासयं ॥ २६ ॥  
एयमट्ठं निसामित्ता, हेऊकारणचोइओ । तओ नमि रायरिसिं, देविंदो इणमब्बवी  
॥ २७ ॥ आमोसे लोमहारे य, गंठिमेए य तक्करे । नगरस्स खेमं काऊणं, तओ  
गच्छसि खत्तिया ! ॥ २८ ॥ एयमट्ठं निसामित्ता, हेऊकारणचोइओ । तओ नमी  
रायरिसी, देविंदं इणमब्बवी ॥ २९ ॥ असइं तु मणुस्सेहिं, मिच्छा दंडो पजुजई ।  
अकारिणोऽत्थ वज्झंति, मुच्चई कारओ जणो ॥ ३० ॥ एयमट्ठं निसामित्ता, हेऊ-  
कारणचोइओ । तओ नमि रायरिसिं, देविंदो इणमब्बवी ॥ ३१ ॥ जे केह पत्थिवा  
तुज्झं, नानमंति नराहिवा । वसे ते ठावइत्ताणं, तओ गच्छसि खत्तिया ! ॥ ३२ ॥  
एयमट्ठं निसामित्ता, हेऊकारणचोइओ । तओ नमी रायरिसी, देविंदं इणमब्बवी  
॥ ३३ ॥ जो सहस्सं सहस्साणं, संगामे दुज्जए जिणे । एगं जिणेज्ज अप्पाणं, एस  
से परमो जओ ॥ ३४ ॥ अप्पाणमेव जुज्झाहि, किं ते जुज्झेण वज्झओ ।  
अप्पाणमेव अप्पाणं, जइत्ता सुहमेहए ॥ ३५ ॥ पंचिंदियाणि कोहं, माणं मायं  
तहेव लोहं च । दुज्जयं चेव अप्पाणं, सब्बमप्पे जिए जियं ॥ ३६ ॥ एयमट्ठं  
निसामित्ता, हेऊकारणचोइओ । तओ नमि रायरिसिं, देविंदो इणमब्बवी ॥ ३७ ॥  
जइत्ता विउले जजे, भोइत्ता समणमाहणे । दच्चा भोच्चा य जिट्ठा य, तओ गच्छसि  
खत्तिया ! ॥ ३८ ॥ एयमट्ठं निसामित्ता, हेऊकारणचोइओ । तओ नमी रायरिसी,  
देविंदं इणमब्बवी ॥ ३९ ॥ जो सहस्सं सहस्साणं, मासे मासे गवं दए । तस्स वि  
संजमो सेओ, अदितस्स वि किंचणं ॥ ४० ॥ एयमट्ठं निसामित्ता, हेऊकारण-  
चोइओ । तओ नमि रायरिसिं, देविंदो इणमब्बवी ॥ ४१ ॥ घोरासमं चइत्ताणं, अन्नं  
पत्थेसि आसमं । इहेव पोसहरओ, भवाहि मणुयाहिवा ! ॥ ४२ ॥ एयमट्ठं निसामित्ता,  
हेऊकारणचोइओ । तओ नमी रायरिसी, देविंदं इणमब्बवी ॥ ४३ ॥ मासे मासे तु जो  
बालो, कुसग्गेणं तु मुंजए । न सो सुअक्खायधम्मस्स, कलं अग्घइ सोलसिं ॥ ४४ ॥  
एयमट्ठं निसामित्ता, हेऊकारणचोइओ । तओ नमि रायरिसिं, देविंदो इणमब्बवी  
॥ ४५ ॥ हिरणं सुवणं मणिमुत्तं, कंसं दूसं च वाहणं । कोसं वट्ठावइत्ताणं,  
तओ गच्छसि खत्तिया ! ॥ ४६ ॥ एयमट्ठं निसामित्ता, हेऊकारणचोइओ । तओ  
नमी रायरिसी, देविंदं इणमब्बवी ॥ ४७ ॥ सुवणरुप्पस्स उ पव्वया भवे, सिया  
हु केलाससमा असंखया । नरस्स लुद्धस्स न तेहि किंचि, इच्छा हु आगाससमा



अणंतिया ॥ ४८ ॥ पुढवी साली जवा चैव, हिरणं पसुभिस्सह । पडिपुणं  
 नालमेगरस्स, इह विजा तवं चरे ॥ ४९ ॥ एयमट्ठं निसामित्ता, हेऊकारणचोइओ ।  
 तओ नमिं रायरिसिं, देविंदो इणमब्बवी ॥ ५० ॥ अच्छेरयमब्भुदए, भोए चयसि  
 पत्थिवा । असंते कामे पत्थेसि, संकप्पेण विहम्मसि ॥ ५१ ॥ एयमट्ठं निसामित्ता,  
 हेऊकारणचोइओ । तओ नमी रायरिसी, देविंदं इणमब्बवी ॥ ५२ ॥ सल्लं कामा  
 विसं कामा, कामा आसीविसोवमा । कामे पत्थेमाणा, अकामा जंति दोग्गइं  
 ॥ ५३ ॥ अहे वयइ कोहेणं, माणेणं अहमा गई । माया गईपडिग्घाओ, लोभाओ  
 दुहओ भयं ॥ ५४ ॥ अवउज्झिऊण माहणरूवं, विउव्विऊण इंदत्तं । वंदइ अभि-  
 त्युणंतो इमाहिं महुराहिं वग्गूहिं ॥ ५५ ॥ अहो ते निज्जिओ कोहो, अहो माणो  
 पराजिओ । अहो ते निरक्किया माया, अहो लोभो वसीकओ ॥ ५६ ॥ अहो ते  
 अज्जवं साहु, अहो ते साहु मद्दवं । अहो ते उत्तमा खंती, अहो ते मुत्ति उत्तमा  
 ॥ ५७ ॥ इहं सि उत्तमो भंते !, पच्छा होहिसि उत्तमो । लोउत्तमुत्तमं ठाणं, सिद्धिं  
 गच्छसि नीरओ ॥ ५८ ॥ एवं अभित्युणंतो, रायरिसिं उत्तमाए सद्धाए । पयाहिणं  
 करेत्तो, पुणो पुणो वंदइ सक्को ॥ ५९ ॥ तो वंदिऊण पाए, चक्कं कुसलक्खणे  
 मुणिवरस्स । आगासेणुप्पइओ, ललियचवलकुंडलतिरीडी ॥ ६० ॥ नमी नमेइ  
 अप्पाणं, सक्खं सक्केण चोइओ । चइऊण गेहं च वेदेही, सामण्णे पज्जुवट्ठिओ  
 ॥ ६१ ॥ एवं करेत्ति संबुद्धा, पंडिया पवियक्खणा । विणियट्ठंति भोगेसु, जहा से  
 नमी रायरिसि ॥ ६२ ॥ ति-वेमि ॥ इति नमिपव्वज्जा नामं नवममज्झयणं  
 समत्तं ॥ ९ ॥

### अह दुमपत्तयं णामं दसममज्झयणं

दुमपत्तए पंडुयए जहा, निवडइ राइगणाण अच्छए । एवं मणुयाण जीवियं,  
 समयं गोयम ! मा पमायए ॥ १ ॥ कुसग्गे जह ओसबिंदुए, थोवं चिट्ठइ लंबमाणए ।  
 एवं मणुयाण जीवियं, समयं गोयम ! मा पमायए ॥ २ ॥ इह इतरियम्मि आउए,  
 जीवियए बहुपच्चवायए । विहुणाहि रयं पुरे कडं, समयं गोयम ! मा पमायए ॥ ३ ॥  
 दुल्लहे खलु माणुसे भवे, चिरकालेण वि सव्वपाणिणं । गाढा य विवाग कम्मणो,  
 समयं गोयम ! मा पमायए ॥ ४ ॥ पुढविकायमइगओ, उक्कोसं जीवो उ संवसे ।  
 कालं संखाइयं, समयं गोयम ! मा पमायए ॥ ५ ॥ आउक्कायमइगओ, उक्कोसं जीवो  
 उ संवसे । कालं संखाइयं, समयं गोयम ! मा पमायए ॥ ६ ॥ तेउक्कायमइगओ,

उक्कोसं जीवो उ संवसे । कालं संखाईयं, समयं गोयम ! मा पमायए ॥ ७ ॥  
वाउकायमइगओ, उक्कोसं जीवो उ संवसे । कालं संखाईयं, समयं गोयम ! मा  
पमायए ॥ ८ ॥ वणस्सइकायमइगओ, उक्कोसं जीवो उ संवसे । कालमणंतदुरंतयं,  
समयं गोयम ! मा पमायए ॥ ९ ॥ बेईदियकायमइगओ, उक्कोसं जीवो उ संवसे ।  
कालं संखिज्जसन्नियं, समयं गोयम ! मा पमायए ॥ १० ॥ तेईदियकायमइगओ,  
उक्कोसं जीवो उ संवसे । कालं संखिज्जसन्नियं, समयं गोयम ! मा पमायए ॥ ११ ॥  
चउरिदियकायमइगओ, उक्कोसं जीवो उ संवसे । कालं संखिज्जसन्नियं, समयं गोयम !  
मा पमायए ॥ १२ ॥ पंचिदियकायमइगओ, उक्कोसं जीवो उ संवसे । सत्तट्ठभवगहणे,  
समयं गोयम ! मा पमायए ॥ १३ ॥ देवे नेरइए य अइगओ, उक्कोसं जीवो उ  
संवसे । इक्केक्कभवगहणे, समयं गोयम ! मा पमायए ॥ १४ ॥ एवं भवसंसारे,  
संसरइ सुहासुहेहिं कम्ममेहिं । जीवो पमायबहुलो, समयं गोयम ! मा पमायए ॥ १५ ॥  
लद्धूण वि माणुसत्तणं, आरियत्तं पुणरवि दुल्लहं । बहवे दसुया सिलक्खुया, समयं  
गोयम ! मा पमायए ॥ १६ ॥ लद्धूण वि आरियत्तणं, अहीणपंचेदियया हु दुल्लहा ।  
विगळिंदियया हु वीसई, समयं गोयम ! मा पमायए ॥ १७ ॥ अहीणपंचेदियत्तं  
पि से लहे, उत्तमधम्मसुई हु दुल्लहा । कुतित्थिनिसेवए जणे, समयं गोयम ! मा  
पमायए ॥ १८ ॥ लद्धण वि उत्तमं सुई, सद्धणा पुणरावि दुल्लहा । मिच्छन्तनिसेवए  
जणे, समयं गोयम ! मा पमायए ॥ १९ ॥ धम्मं पि हु सद्धंतया, दुल्लहया  
काएण फासया । इहकामगुणेहिं मुच्छिया, समयं गोयम ! मा पमायए ॥ २० ॥  
परिजूरइ ते सरीरयं, केसा पंडुरया हवंति ते । से सोयबले य हायई, समयं गोयम !  
मा पमायए ॥ २१ ॥ परिजूरइ ते सरीरयं, केसा पंडुरया हवंति ते । से चक्खुबले  
य हायई, समयं गोयम ! मा पमायए ॥ २२ ॥ परिजूरइ ते सरीरयं, केसा पंडुरया  
हवंति ते । से घाणबले य हायई, समयं गोयम ! मा पमायए ॥ २३ ॥ परिजूरइ  
ते सरीरयं, केसा पंडुरया हवंति ते । से जिब्बबले य हायई, समयं गोयम ! मा  
पमायए ॥ २४ ॥ परिजूरइ ते सरीरयं, केसा पंडुरया हवंति ते । से फासबले य  
हायई, समयं गोयम ! मा पमायए ॥ २५ ॥ परिजूरइ ते सरीरयं, केसा पंडुरया  
हवंति ते । से सव्वबले य हायई, समयं गोयम ! मा पमायए ॥ २६ ॥ अरई गंडं  
विसुइया, आयंका विविहा फुसंति ते । विहडइ विद्धंसइ ते सरीरयं, समयं गोयम !  
मा पमायए ॥ २७ ॥ वोच्छिद सिणेहमप्पणो, कुमुयं सारइयं व पाणियं । से  
सव्वसिणेहवज्जिए, समयं गोयम ! मा पमायए ॥ २८ ॥ चिच्चाण धणं च भारियं,  
पव्वइओ हि सि अणगारियं । मा वंतं पुणो वि आविए, समयं गोयम ! मा पमायए

॥ २९ ॥ अवउज्झिय मित्तबंधवं, विउलं चैव धणोहसंचयं । मा तं बिइयं गवेसए,  
 समयं गोयम ! मा पमायए ॥ ३० ॥ न हु जिणे अज्ज दिस्सई, बहुमए दिस्सइ  
 मग्गदेसिए । संपइ नेयाउए पहे, समयं गोयम ! मा पमायए ॥ ३१ ॥ अवसोहिय  
 कंटगापहं, ओइण्णो सि पहं महालयं । गच्छसि मग्गं विसोहिया, समयं गोयम !  
 मा पमायए ॥ ३२ ॥ अबले जह भारवाहए, मा मग्गे विसमेऽवगाहिया । पच्छा  
 पच्छाणुतावए, समयं गोयम ! मा पमायए ॥ ३३ ॥ तिण्णो हु सि अण्णवं महं,  
 किं पुण चिट्ठसि तीरमागओ । अभितुर पारं गमितए, समयं गोयम ! मा पमायए  
 ॥ ३४ ॥ अकलेवरसेणि उस्सिया, सिद्धिं गोयम ! लोयं गच्छसि । खेमं च सिवं  
 अणुत्तरं, समयं गोयम ! मा पमायए ॥ ३५ ॥ बुद्धे परिनिव्वुडे चरे, गामगए  
 नगरे व संजए । संतीमग्गं च बूहए, समयं गोयम ! मा पमायए ॥ ३६ ॥  
 बुद्धस्स निसम्म भासियं, सुकहियमट्ठपओवसोहियं । रागं दोसं च छिंदिया, सिद्धिगं  
 गए गोयमे ॥ ३७ ॥ ति-वेमि ॥ इति दुमपत्तयं णामं दसममज्झयणं  
 समत्तं ॥ १० ॥

### अह बहुस्सुयपुज्जं णामं एगारसममज्झयणं

संजोगा विप्पमुक्कस्स, अणगारस्स भिक्खुणो । आयारं पाउकरिस्सामि, आणु-  
 पुव्वि सुणेह मे ॥ १ ॥ जे यावि होइ निव्विजे, थद्धे लुद्धे अणिग्गहे । अभिक्खणं  
 उल्लवई, अविणीए अवहुस्सए ॥ २ ॥ अह पंचहिं ठाणेहिं, जेहिं सिक्खा न लब्भई ।  
 थम्मो कोहो पमाएणं, रोगेणोऽलस्सएणं य ॥ ३ ॥ अह अट्ठहिं ठाणेहिं, सिक्खासीले  
 त्ति वुच्चई । अहस्सिरे सया दत्ते, न य मम्ममुदाहरे ॥ ४ ॥ नासीले न विसीले,  
 न सिया अइलोलुए । अँकोहणे सच्चरए, सिक्खासीले त्ति वुच्चई ॥ ५ ॥ अह चोइ-  
 सहिं ठाणेहिं, वट्टमाणे उ संजए । अविणीए वुच्चई सो उ, निव्वाणं च न गच्छई  
 ॥ ६ ॥ अभिक्खणं कोही हवई, पबंधं च पकुव्वई । मेत्तिजमाणो वमई, सुयं  
 लद्धूण मर्जई ॥ ७ ॥ अवि पावपरिक्खेवी, अवि मित्तेसु कुप्पई । सुप्पियस्सावि  
 मित्तस्स, रहे भासइ पावयं ॥ ८ ॥ पइण्णवाई दुहिंले, थद्धे लुद्धे अणिग्गहे । असं-  
 विभागी अवियत्ते, अविणीए त्ति वुच्चई ॥ ९ ॥ अह पन्नरसहिं ठाणेहिं, सुविणीए त्ति  
 वुच्चई । नीयावित्ती अचव्वेले, अमोई अकुळ्हैले ॥ १० ॥ अप्पं च अहिक्खिक्खई,  
 पबंधं च न कुव्वई । मेत्तिजमाणो भयई, सुयं लद्धुं न मर्जई ॥ ११ ॥ न य पाव-  
 परिक्खेवी, न य मित्तेसु कुप्पई । अप्पियस्सावि मित्तस्स, रहे कल्लण भासई ॥ १२ ॥

कलहडमरवजिए, बुद्धे अभिजाइए । हिरिमं पडिसंलीणे, सुविणीए ति वुच्चई ॥ १३ ॥  
 वसे गुरुकुले निच्चं, जोगवं उवहाणवं । पियंकरे पियंवाई, से सिक्खं लद्धुमरिहई  
 ॥ १४ ॥ जहा संखंमि पयं, निहियं दुहओ वि विरायइ । एवं बहुस्सुए भिक्खू,  
 धम्मो कित्ती तहा सुयं ॥ १५ ॥ जहा से कंबोयाणं, आइण्णे कंथए सिया । आसि  
 जवेण पवरे, एवं हवइ बहुस्सुए ॥ १६ ॥ जहाइण्णसमारुढे, सरे दढपरक्कमे ।  
 उभओ नंदिघोसेणं, एवं हवइ बहुस्सुए ॥ १७ ॥ जहा करेणुपरिकिण्णे, कुंजरे  
 सट्ठिहायणे । बलवंते अप्पडिहए, एवं हवइ बहुस्सुए ॥ १८ ॥ जहा से तिक्ख-  
 सिंणे, जायखंघे विरायई । वसहे जूहाहिंवई, एवं हवइ बहुस्सुए ॥ १९ ॥  
 जहा से तिक्खदाढे, उदग्गे दुप्पहंसए । सीहे सियाण पवरे, एवं हवइ बहुस्सुए  
 ॥ २० ॥ जहा से वासुदेवे, संखचक्कगयाधरे । अप्पडिहयवले जोहे, एवं हवइ बहु-  
 स्सुए ॥ २१ ॥ जहा से चाउरंते, चक्कवट्ठी महिद्धिए । चोइसरयणाहिंवई, एवं हवइ  
 बहुस्सुए ॥ २२ ॥ जहा से सहस्सक्खे, वज्रपाणी पुरंदरे । सक्के देवाहिंवई, एवं  
 हवइ बहुस्सुए ॥ २३ ॥ जहा से तिमिरविद्धंसे, उच्चिद्धंते दिवायरे । जलंते इव  
 तेएण, एवं हवइ बहुस्सुए ॥ २४ ॥ जहा से उडुवई चंदे, नक्खत्तपरिवारिए ।  
 पडिपुण्णे पुण्णमासीए, एवं हवइ बहुस्सुए ॥ २५ ॥ जहा से सामाइयाणं, कोट्टा-  
 गारे सुरक्खिए । नाणाधन्नपडिपुण्णे, एवं हवइ बहुस्सुए ॥ २६ ॥ जहा सा दुमाण  
 पवरा, जंबू नाम सुदंसणा । अणाढियस्स देवस्स, एवं हवइ बहुस्सुए ॥ २७ ॥  
 जहा सा नईण पवरा, सल्लिा सागरंगमा । सीया नीलवंतपवहा, एवं हवइ बहुस्सुए  
 ॥ २८ ॥ जहा से नगाण पवरे, सुमहं मंदरे गिरी । नाणोसहिपज्जलिए, एवं हवइ बहु-  
 स्सुए ॥ २९ ॥ जहा से सयंसुरमणे, उदही अक्खओदए । नाणारयणपडिपुण्णे, एवं  
 हवइ बहुस्सुए ॥ ३० ॥ समुद्गंभीरसमा दुरासया, अचक्रिया केणइ दुप्पहंसया ।  
 सुयस्स पुण्णा विउलस्स ताइणो, खवित्तु कम्मं गइमुत्तमं गया ॥ ३१ ॥ तम्हा  
 सुयमहिट्ठिजा, उत्तमद्गवेसए । जेणप्पाणं परं चेव, सिद्धिं संपाउणेज्जासि ॥ ३२ ॥  
 त्ति-वेमि ॥ इति बहुस्सुयपुज्जं णामं एगारसममज्झयणं समत्तं ॥ ११ ॥

## अह हरिएसिजं णामं दुवालसममज्झयणं


सोवागकुलसंभूओ, गुणुत्तरधरो मुणी । हरिएसबलो नाम, आसि भिक्खू जिइं-  
 दिओ ॥ १ ॥ इरिएसणमासाए, उच्चारसमिईसु य । जओ आयाणनिकखेवे, संजओ  
 सुसमाहिओ ॥ २ ॥ मणगुत्तो वयगुत्तो, कायगुत्तो जिइंदिओ । भिक्खट्ठा बंम-  
 ६३ सुत्ता०

इज्झम्मि, जन्नवाडे उवट्ठिओ ॥ ३ ॥ तं पासिऊणमेज्जंतं, तवेण परिसोसियं । पंतोवहि-  
 उवगरणं, उवहसंति अणारिया ॥ ४ ॥ जाइमयपडिथद्धा, हिंसगा अजिइंदिया ।  
 अवंभचारिणो वाला, इमं वयणमब्बवी ॥ ५ ॥ कयरे आगच्छइ दित्थुवे, काले  
 विकराले फोक्कनासे । ओमचेलए पंसुपिसायभूए, संकरदूसं परिहरिय कंठे ॥ ६ ॥  
 कयरे तुमं इय अदंसणिज्जे?, काए व आसा इहमागओ सि? । ओमचेलया पंसुपिसाय-  
 भूया, गच्छक्खलाहि किमिहं ठिओ सि? ॥ ७ ॥ जक्खे तहिं तिंदुयस्खवासी, अणु-  
 कंपओ तस्स महामुणस्स । पच्छायइत्ता नियगं सरीरं, इमाइं वयणाइमुदाहरित्था  
 ॥ ८ ॥ समणो अहं संजओ वंभयारी, विरओ धणपयणपरिग्गहाओ । परप्पवित्तस्स  
 उ भिक्खकाले, अन्नस्स अट्ठा इहमागओमि ॥ ९ ॥ वियरिज्जइ खज्जइ भुज्जइ य,  
 अन्नं पभूयं भवयाणमेयं । जाणाहि मे जायणजीविणत्ति, सेसावसेसं लभऊ तवस्सी  
 ॥ १० ॥ उवक्खडं भोयण माहणाणं, अत्तट्ठियं सिद्धमिहेगपक्खं । न ऊ वयं एरिस-  
 मन्नपाणं, दाहामु तुज्झं किमिहं ठिओ सि? ॥ ११ ॥ थलेसु बीयाइ ववंति कासगा,  
 तहेव निञ्जेसु य आससाए । एयाए सद्धाए दलाह मज्झं, आराहए पुण्णमिणं खु  
 खित्तं ॥ १२ ॥ खेत्ताणि अम्हं विइयाणि लोए, जहिं पकिण्णा विरुहंति पुण्णा । जे  
 माहणा जाइविज्जोववेया, ताइं तु खेत्ताइं सुपेसलाइं ॥ १३ ॥ कोहो य माणो य  
 बहो य जेसिं, सोसं अदत्तं च परिग्गहं च । ते माहणा जाइविज्जाविहूणा, ताइं तु  
 खेत्ताइं सुपावयाइं ॥ १४ ॥ तुब्भेत्य भो ! भारधरा गिराणं, अट्ठं न जाणेह अहिज्ज  
 वेए । उच्चावयाइं मुण्णिणो चरंति, ताइं तु खेत्ताइं सुपेसलाइं ॥ १५ ॥ अज्झावयाणं  
 पडिक्कलभासी, पभाससे किं नु सगासिअम्हं? । अवि एयं विणस्सउ अन्नपाणं, न य णं  
 दाहामु तुमं नियंठा ॥ १६ ॥ समिइहि मज्झं सुसमाहियस्स, गुत्तीहि गुत्तस्स  
 जिइंदियस्स । जइ मे न दाहित्थ अहेसणिज्जं, किमज्ज जन्नाण लहित्थ लाहं  
 ॥ १७ ॥ के इत्थ खत्ता उवजोइया वा, अज्झावया वा सह खंडिएहिं ।  
 एयं खु दंडेण फलेण हंता, कंठमि धेतूण खलेज्ज जो णं ॥ १८ ॥  
 अज्झावयाणं वयणं सुणेत्ता, उद्धाइया तत्थ बहू कुमारा । दंडेहिं वित्तेहिं कसेहिं चेव,  
 समागया तं इसि तालयंति ॥ १९ ॥ रन्नो तहिं कोसलियस्स धूया, भइत्ति नामेण  
 अणिंदियंगी । तं पासिया संजय हम्ममाणं, कुद्धे कुमारे परिनिव्ववेइ ॥ २० ॥  
 देवाभिओगेण निओइएणं, दिन्नामु रन्ना मणसा न ज्ञाया । नरिंददेविंदभिंवदिएणं,  
 जेणामि वंता इसिणा स एसो ॥ २१ ॥ एसो हु सो उग्गतवो महप्पा, जिइंदिओ  
 संजओ वंभयारी । जो मे तया नेच्छइ दिज्जमाणिं, पिउणा सयं कोसलिएण रन्ना  
 ॥ २२ ॥ महाजसो एस महाणुभागो, घोरव्वओ घोरपरक्कमो य । मा एयं हीलेह

अहीलणिजं, मा सव्वे तेएण भे निहहेज्जा ॥ २३ ॥ एयाइं तीसे वयणाइं सोच्चा,  
पत्तीइ भद्दाइ सुभासियाइं । इसिस्स वेयावडियट्ठयाए, जक्खा कुमारे विणिवारयंति  
॥ २४ ॥ ते घोररूवा ठिय अंतल्लिक्खे, सुसुरा तहिं तं जण तालयंति । ते भिन्नदेहे  
रुहिरं वमंते, पासित्तु भद्दा इणमाहु भुज्जो ॥ २५ ॥ गिरिं नहेहिं खणह, अयं दंतेहिं  
खायह । जायतेयं पाएहि हणह, जे भिक्खुं अवमन्नह ॥ २६ ॥ आसीविसो उग्ग-  
तवो महेसी, घोरव्वओ घोरपरक्कमो य । अगणिं व पक्खंद पयंगसेणा, जे भिक्खुयं  
भत्तकाले वहेह ॥ २७ ॥ सीसेण एयं सरणं उवेह, समागया सव्वजणेण तुब्भे ।  
जइ इच्छह जीवियं वा धणं वा, लोगं पि एसो कुविओ उहेज्जा ॥ २८ ॥ अवहेडिय-  
पिट्ठिसउत्तमंगे, पसारिया बाहु अक्कम्मचिट्ठे । निब्भेरियच्छे रुहिरं वमंते, उद्धुंमुहे  
निग्गयजीहनेत्ते ॥ २९ ॥ ते पासिया खंडिय कट्ठभूए, विमणो विसण्णो अह माहणो  
सो । इसिं पसाएइ सभारियाओ, हीलं च निदं च खमाह भंते ! ॥ ३० ॥  
वालेहिं मूढेहिं अयाणएहिं, जं हीलिया तस्स खमाह भंते ! । महप्पसाया इसिणो  
हवंति, न हु मुणी कोवपरा हवंति ॥ ३१ ॥ पुर्विं च इण्हिं च अणागयं  
च, मणप्पओसो न मे अत्थि कोइ । जक्खा हु वेयावडियं करंति, तम्हा हु  
एए निहया कुमारा ॥ ३२ ॥ अत्थं च धम्मं च वियाणमाणा, तुब्भे न वि  
कुप्पह भूइपन्ना । तुब्भं तु पाए सरणं उवेमो, समागया सव्वजणेण अम्हे ॥ ३३ ॥  
अच्चेसु ते महाभाग !, न ते किंचि न अच्चिमो । भुंजाहिं साल्लिमं कूरं, नाणा-  
वंजणसंजुयं ॥ ३४ ॥ इमं च मे अत्थि पभूयमन्नं, तं भुंजसू अम्ह अणुग्ग-  
हट्ठा । बाढं ति पडिच्छइ भत्तपाणं, मासस्स ऊ पारणए महप्पा ॥ ३५ ॥ तहियं  
गंधोदयपुप्फवासं, दिव्वा तहिं वसुहारा य वुट्ठा । पढयाओ दुंदुहीओ सुरेहिं,  
आगासे अहो दाणं च घुट्ठं ॥ ३६ ॥ सक्खं खु वीसइ तवोविसेसो, न वीसइं  
जाइविसेस कोइ । सोवागपुत्तं हरिएससाहुं, जस्सेरिसा इट्ठि महाणुभागा ॥ ३७ ॥  
किं माहणा ! जोइसमारभंता, उदएण सोहिं वहिया विमग्गहा ? । जं मग्गहा बाहि-  
रियं विसोहिं, न तं सुइट्ठं कुसला वयंति ॥ ३८ ॥ कुसं च जूवं तणकट्ठमग्गिं,  
सायं च पायं उदगं फुसंता । पाणाइ भूयाइ विहेडयंता, भुज्जो वि मंदा ! पकरेह  
पावं ॥ ३९ ॥ कहं चरे भिक्खु ! वयं जयामो, पावाइ कम्माइ पणुल्लयामो ।  
अक्खाहिं जे संजय ! जक्खपूइया, कहं सुजट्ठं कुसला वयंति ॥ ४० ॥ छजीवकाए  
असमारभंता, मोसं अदत्तं च असेवमाणा । परिग्गहं इत्थिओ माणमायं, एवं परिजाय  
चरंति दंता ॥ ४१ ॥ सुसंजुडा पंचहिं संवरेहिं, इह जीवियं अणवकंखमाणा । वोसट्ठ-  
काया सुइचत्तदेहा, महाजयं जयइ जन्नसिट्ठं ॥ ४२ ॥ के ते जोइ के व ते जोइठाणे ?,

का ते सुया किं च ते कारिसंगं ? । एहा य ते कयरा संति भिक्खु ? , कयरेण होमेण हुणासि जोई ? ॥ ४३ ॥ तवो जोई जीवो जोइठाणं , जोगा सुया सरीरं कारिसंगं । कम्मेहा संजमजोगसंती , होमं हुणामि इसिणं पसत्थं ॥ ४४ ॥ के ते हरए के य ते संतितित्थे ? , कहिं सिणाओ व रयं जहासि ? । आइक्ख णे संजय ! जक्खपूइया, इच्छामो नाउं भवओ सगासे ॥ ४५ ॥ धम्मे हरए बंमे संतितित्थे , अणाविले अत्तपसन्नलेसे । जहिं सिणाओ विमलो विसुद्धो , सुसीइभूओ पजहामि दोसं ॥ ४६ ॥ एयं सिणाणं कुसलेहि दिट्ठं , महासिणाणं इसिणं पसत्थं । जहिं सिणाया विमला विसुद्धा , महारिसी उत्तमं ठाणं पत्ता ॥ ४७ ॥ ति-वेमि ॥ इति हरिएसिज्जं णामं दुवालसममज्झयणं समत्तं ॥ १२ ॥

## अह चित्तसंभूइज्जणामं तेरहममज्झयणं



जाईपराजिओ खलु , कासि नियाणं तु हत्थिणपुरम्मि । चुलणीए बंभदतो , उव-  
वन्नो पउमगुम्माओ ॥ १ ॥ कं पिच्छे संभूओ , चित्तो पुण जाओ पुरिमतालम्मि ।  
सेट्ठिकुलम्मि विसाले , धम्मं सोऊण पव्वइओ ॥ २ ॥ कं पिच्छम्मि य नयरे , समागया  
दो वि चित्तसंभूया । सुहदुक्खफलविवागं , कहेंति ते एकमेकस्स ॥ ३ ॥ चक्कवट्ठी  
महिट्ठीओ , वंभदतो महायसो । भायरं बहुमाणेणं , इमं वयणमव्ववी ॥ ४ ॥ आसिमो  
भायरा दो वि , अन्नमन्नवसाणुगा । अन्नमन्नमणूरत्ता , अन्नमन्नहिएसिणो ॥ ५ ॥ दासा  
दसण्णे आसी , मिया कालिंजरे नगे । हंसा मयंगतीरे , सोवागा कासिभूमिए ॥ ६ ॥  
देवा य देवलोगम्मि , आसि अम्हे महिट्ठिया । इमा णो छट्ठिया जाई , अन्नमन्नेण जा  
विणा ॥ ७ ॥ कम्मा नियाणपगडा , तुमे राय ! विंचित्तिया । तेसिं फलविवागेण ,  
विप्पओगमुवागया ॥ ८ ॥ सच्चसोयप्पगडा , कम्मा मए पुरा कडा । ते अज्ज परि-  
भुंजामो , किं नु चित्ते वि से तहा ? ॥ ९ ॥ सव्वं सुचिण्णं सफलं नराणं , कडाण  
कम्माण न सोक्ख अत्थि । अत्थेहि कामेहि य उत्तमेहिं , आया ममं पुण्णफलोववेए  
॥ १० ॥ जाणासि संभूय ! महाणुभागं , महिट्ठियं पुण्णफलोववेयं । चित्तं पि  
जाणाहि तहेव रायं ! , इट्ठी जुई तस्स वि य प्पभूया ॥ ११ ॥ महत्थरूवा वयण-  
प्पभूया , गाहाणुगीया नरसंघमज्झे । जं भिक्खुणो सीलगुणोववेया , इह जयंते समणो-  
मि जाओ ॥ १२ ॥ उच्चोयए महु क्के य बंमे , पवेइया आवसहा य रम्मा । इमं  
गिहं चित्त ! धणप्पभूयं , पसाहि पंचालगुणोववेयं ॥ १३ ॥ नट्टेहि गीएहि य वाइएहिं ,  
नारीजणां परिवारयंतो । भुंजाहि भोगाइ इमाइ भिक्खु ! , मम रोयई पव्वजा हु

दुक्खं ॥ १४ ॥ तं पुव्वनेहेण कयाणुरागं, नराहिवं कामगुणेषु गिद्धं । धम्मस्सिओ  
तस्स हियाणुपेही, चित्तो इमं वयणमुदाहरित्था ॥ १५ ॥ सव्वं विलवियं गीयं,  
सव्वं नट्ठं विडंबियं । सव्वे आभरणा भारा, सव्वे कामा दुहावहा ॥ १६ ॥  
बालाभिरामेषु दुहावहेसु, न तं सुहं कामगुणेषु रायं । विरत्तकामाण तवोधणां,  
जं भिक्खुणं सीलगुणे रयाणं ॥ १७ ॥ नरिंद ! जाई अहमा नराणं, सोवागजाई  
दुहओ गयाणं । जहिं वयं सव्वजणस्स वेस्सा, वसीअ सोवागनिवेशेणसु ॥ १८ ॥  
तीसे य जाईइ उ पाविघाए, वुच्छामु सोवागनिवेशेणसु । सव्वस्स लोगस्स दुगंछ-  
णिज्जा, इहं तु कम्माई पुरे कडाई ॥ १९ ॥ सो दाणिसिं राय ! महाणुभागे,  
महिद्धिओ पुण्णफलोववेओ । चइत्तु भोगाई असासयाई, आदाणहेउं अभिणिव्वमाहि  
॥ २० ॥ इह जीविए राय ! असासयम्मि, धणियं तु पुण्णाई अकुव्वमाणो । से  
सोयई मच्चुमुहोवणीए, धम्मं अकाळण परंमि लोए ॥ २१ ॥ जहेह सीहो व मियं  
गहाय, मच्चू नरं नेइ हु अंतकाले । न तस्स माया व पिया व भाया, कालम्मि  
तम्मंसहरा भवंति ॥ २२ ॥ न तस्स दुक्खं विभयंति नाइओ, न सित्तवग्गा न  
सुया न वंधवा । एक्को सयं पच्चण्होइ दुक्खं, कत्तारमेव अणुजाइ कम्मं ॥ २३ ॥  
विच्चा दुपयं च चउप्पयं च, खेतं गिहं धणधन्नं च सव्वं । सकम्मवीओ अवसो  
पयाइ, परं भवं सुंदर पावगं वा ॥ २४ ॥ तं एक्कं तुच्छसरीरगं से, च्छिइयं दहिय  
उ पावगेणं । भज्जा य पुत्तो वि य नायओ वा, दायारमन्नं अणुसंकमंति ॥ २५ ॥  
उवणिज्जई जीवियमप्पमायं, वण्णं जरा हरइ नरस्स रायं ! पंचालराया ! वयणं  
सुणाहि, मा कासि कम्माई महालयाई ॥ २६ ॥ अहं पि जाणामि जहेह साहू, जं  
मे तुमं साहसि वक्कमेयं । भोगा इमे संगकरा हवंति, जे दुज्जया अज्ज ! अम्हारिसेहिं  
॥ २७ ॥ हत्थिणपुरम्मि चित्ता !, दट्ठूं नरवई महिद्धियं । कामभोगेसु गिद्धेणं,  
नियाणमसुहं कडं ॥ २८ ॥ तस्स मे अप्पडिकंतस्स, इमं एयारिसं फलं । जाणमाणो  
वि जं धम्मं, कामभोगेसु मुच्छिओ ॥ २९ ॥ नागो जहा पंकजलावसन्नो, दट्ठुं थलं  
नाभिसमेइ तीरं । एवं वयं कामगुणेषु गिद्धा, न भिक्खुणो मग्गमणुव्वयामो ॥ ३० ॥  
अच्चेइ कालो तूरंति राइओ, न यावि भोगा पुरिसाण निच्चा । उविच्च भोगा पुरिसं  
चयंति, दुमं जहा खीणफलं व पक्खी ॥ ३१ ॥ जइ तंसि भोगे चइउं असत्तो,  
अज्जाई कम्माई करेहि रायं । धम्मे ठिओ सव्वपयाणुकंपी, तो होहिसि देवो इओ  
विउव्वी ॥ ३२ ॥ न तुज्ज भोगे चइऊण बुद्धी, गिद्धो सि आरंभपरिगहेसु । मोहं  
कओ एत्तिउ विप्पलावो, गच्छामि रायं ! आमंतिओ सि ॥ ३३ ॥ पंचालराया वि  
य बंभदत्तो, साहुस्स तस्स वयणं अकाउं । अणुत्तरे भुंजिय कामभोगे, अणुत्तरे



सो नरए पविट्ठो ॥ ३४ ॥ चित्तो वि कामेहि विरत्तकामो, उदग्गचारित्तवो महेसी ।  
अणुत्तरं संजम पालइत्ता, अणुत्तरं सिद्धिगइं गओ ॥ ३५ ॥ त्ति-वेमि ॥ इति  
चित्तसंभूइज्जाणमं तेरहममज्झयणं समत्तं ॥ १३ ॥

## अह उसुयारिजं णामं चउइसममज्झयणं

देवा भवित्ताण पुरे भवम्मि, केई चुया एगविमाणवासी । पुरे पुराणे उसुयार-  
नामे, खाए समिद्धे सुरलोगरम्मे ॥ १ ॥ सकम्मसेसेण पुराकएणं, कुल्लेखु दग्गेसु य ते  
पसूया । निव्विण्णसंसारभया जहाय, जिणिंदमग्गं सरणं पवन्ना ॥ २ ॥ पुमत्त-  
मागम्म कुमार दो वी, पुरोहिओ तस्स जसा य पत्ती । विसालकित्ती य तहे-  
सुयारो, रायत्थ देवी कमलावई य ॥ ३ ॥ जाईजरामञ्जुभयाभिभूया, बहिं विहा-  
राभिनिविट्ठचित्ता । संसारचक्रस्स विमोक्खणट्ठा, दट्ठूण ते कामगुणे विरत्ता ॥ ४ ॥  
पियपुत्तगा दोज्जि वि माहणस्स, सकम्मसीलस्स पुरोहियस्स । सरित्तु पोराणिय तत्थ  
जाई, तहा सुचिण्णं तवसंजमं च ॥ ५ ॥ ते कामभोगेसु असज्जमाणा, माणुस्स-  
एसुं जे यावि दिव्वा । मोक्खाभिकंखी अभिजायसद्धा, तायं उवागम्म इमं उदाहु  
॥ ६ ॥ असासयं दट्ठु इमं विहारं, बहुअंतरायं न य दीहमाउं । तम्हा निहंसि न  
रइं लमामो, आमंतयामो चरिस्सासु मोणं ॥ ७ ॥ अह तायगो तत्थ मुणीण तेसिं,  
तवस्स वाघायकरं वयासी । इमं वयं वेयविओ वयंति, जहा न होई असुयाण लो गो  
॥ ८ ॥ अहिज वेए परिविस्स विप्पे, पुत्ते परिट्ठप्प निहंसि जाया । भोच्चाण भोए  
सह इत्थियाहिं, आरण्णगा होह मुणी पसत्था ॥ ९ ॥ सोयग्गिणा आयगुणिं धणेणं,  
मोहाणिला पज्जलणाहिएणं । संतत्तभावं परितप्पमाणं, लालप्पमाणं बहुहा बहुं च  
॥ १० ॥ पुरोहियं तं कमसोऽणुणंतं, निमंतयंतं च सुए धणेणं । जहक्कमं कामगुणेहिं  
चेव, कुमारगा ते पसमिक्ख वक्कं ॥ ११ ॥ वेया अहीया न भवंति ताणं, भुत्ता दिया  
निति तमं तमेणं । जाया य पुत्ता न हवंति ताणं, को णाम ते अणुमन्नेज्ज एयं ॥ १२ ॥  
खणमित्तसुक्खा बहुकालदुक्खा, पगामदुक्खा अणिगामसुक्खा । संसारमोक्खस्स  
विपक्खभूया, खाणी अणत्थाण उ कामभोगा ॥ १३ ॥ परिव्वयंते अणियत्तकामे,  
अहो य राओ परितप्पमाणे । अन्नप्पमत्ते धणमेसमाणे, पप्पोति मञ्जुं पुरिसे जरं च  
॥ १४ ॥ इमं च मे अत्थि इमं च नत्थि, इमं च मे किच्च इमं अकिच्चं । तं  
एवमेवं लालप्पमाणं, हरा हरंति त्ति कहं पमाओ ॥ १५ ॥ धणं पभूयं सह  
इत्थियाहिं, सयणा तहा कामगुणा पगामा । तवं कए तप्पइ जस्स लो गो, तं सब्व-

साहीणमिहेव तुब्भं ॥ १६ ॥ धणेण किं धम्मधुराहिगारे, सयणेण वा कामगुणेहिं  
चेव । समणा भविस्सामु गुणोहधारी, बहिंविहारा अभिगम्म भिक्खं ॥ १७ ॥  
जहा य अग्गी अरणी असंतो, खीरे घयं तेळमहातिलेसु । एमेव जाया सरीरंति  
सत्ता, संमुच्छई नासइ नावचिद्धे ॥ १८ ॥ नो ईदियग्गेज्ज अमुत्तमावा, अमुत्तमावा  
वि य होइ निच्चो । अज्झत्थहेउं निययस्स बंधो, संसारहेउं च वयंति बंधं  
॥ १९ ॥ जहा वयं धम्ममजाणमाणा, पावं पुरा कम्ममकासि मोहा । ओत्तब्भमाणा  
परिरक्खयंता, तं नेव भुज्जो वि समायरामो ॥ २० ॥ अब्भाहयम्मि लोगम्मि,  
सव्वओ परिवारिए । अमोहाहिं पडंतीहिं, गिहंसि न रइं लभे ॥ २१ ॥ केण  
अब्भाहओ लोगो ?, केण वा परिवारिओ ? । का वा अमोहा वुत्ता ?, जाया  
चिंतावरो हुमे ॥ २२ ॥ मच्चुणाऽब्भाहओ लोगो, जराए परिवारिओ । अमोहा  
रयणी वुत्ता, एवं ताय विजाणह ॥ २३ ॥ जा जा वच्चइ रयणी, न सा पडिनि-  
यतई । अहम्मं कुणमाणस्स, अफला जंति राइओ ॥ २४ ॥ जा जा वच्चइ रयणी,  
न सा पडिनि यतई । धम्मं च कुणमाणस्स, सफला जंति राइओ ॥ २५ ॥ एगओ  
संवसित्ताणं, दुहओ सम्मतसंजुया । पच्छा जाया ! गमिस्सामो, भिक्खमाणा कुले  
कुले ॥ २६ ॥ जस्सत्थि मच्चुणा सक्खं, जस्स वऽत्थि पलायणं । जो जाणे न  
मरिस्सामि, सो हु कंखे सुए सिया ॥ २७ ॥ अज्जेव धम्मं पडिवज्जयामो, जहिं  
पवन्ना न पुणब्भवामो । अणागयं नेव य अत्थि किंची, सद्धाखमं णे विणइत्तु रागं  
॥ २८ ॥ पहीणपुत्तस्स हु नत्थि वासो, वासिट्ठि ! भिक्खायरियाइ कालो । साहाहि  
रुक्खो लहई समाहिं, छिन्नाहि साहाहि तमेव खाणुं ॥ २९ ॥ पंखाविहूणोव्व जहेव  
पक्खी, भिच्चविवहूणोव्व रणे नरिंदो । विवन्नसारो वणिओव्व पोए, पहीणपुत्तोमि  
तहा अहं पि ॥ ३० ॥ सुसंभिया कामगुणा इमे ते, संपिडिया अग्गरसप्पभूया ।  
भुंजासु ता कामगुणे पगामं, पच्छा गमिस्सामु पहाणमगं ॥ ३१ ॥ भुत्ता रसा  
भोइ ! जहाइ णे वओ, न जीवियट्ठा पजहामि भोए । लाभं अलाभं च सुहं च दुक्खं,  
संचिक्खमाणा चरिस्सामि मोणं ॥ ३२ ॥ मा हू तुमं सोयरियाण संभरे, जुण्णो व हंसो  
पडिसोत्तगामी । भुंजाहि भोगाइ मए समाणं, दुक्खं खु भिक्खायरियाविहारो ॥ ३३ ॥  
जहा य भोई तणुयं भुयंणो, निम्मोयणिं हिच्च पलेइ मुत्तो । एमेए जाया पयहंति  
भोए, ते हं कहं नाणुगमिस्समेको ? ॥ ३४ ॥ छिंदित्तु जालं अबलं व रोहिया, मच्छा  
जहा कामगुणे पहाय । धोरेयसीला तवसा उदारा, धीरा हु भिक्खायरियं चरंति  
॥ ३५ ॥ नहेव कुंछा समइक्कमंता, तयाणि जालाणि दल्लित्तु हंसा । पल्लिंति पुत्ता  
य पई य मज्झं, ते हं कहं नाणुगमिस्समेको ? ॥ ३६ ॥ पुरोहिंयं तं ससुयं सदारं,

सोच्चाऽभिनिकखम्म पहाय भोए । कुडुंवसारं विउलुत्तमं च, रायं अभिक्खं समुवाय देवी ॥ ३७ ॥ वंतासी पुरिसो रायं !, न सो होइ पसंसिओ । माहणेण परिचत्तं, धणं आदाउमिच्छसि ॥ ३८ ॥ सव्वं जगं जइ तुहं, सव्वं वावि धणं भवे । सव्वं पि ते अपज्जत्तं, नेव ताणाय तं तव ॥ ३९ ॥ मरिहिसि रायं ! जया तथा वा, मणोरमे कामगुणे पहाय । एक्को हु धम्मो नरदेव ! ताणं, न विज्जई अन्नमिहेह किंचि ॥ ४० ॥ नाहं रमे पक्खिणि पंजरे वा, संताणछिन्ना चरिस्सामि मोणं । अकिंचणा उज्जुकडा निरामिसा, परिग्गहारंभनियत्तदोसा ॥ ४१ ॥ दवग्गिणा जहा रण्णे, उज्जमाणेसु जंतुसु । अन्ने सत्ता पमोयंति, रागद्वेसवसं गया ॥ ४२ ॥ एवमेव वयं मूढा, कामभोगेसु मुच्छिंया । उज्जमाणं न बुज्जामो, रागद्वेसग्गिणा जगं ॥ ४३ ॥ भोगे भोच्चा वसित्ता य, लहुभूयविहारिणो । आमोयमाणा गच्छंति, दिया कामकमा इव ॥ ४४ ॥ इमे य बद्धा फंदंति, मम हत्थऽज्जमागया । वयं च सत्ता कामेसु, भविस्सामो जहा इमे ॥ ४५ ॥ सामिसं कुललं दिस्स, वज्जमाणं निरामिसं । आमिसं सव्वमुज्जित्ता, विहरिस्सामि निरामिसा ॥ ४६ ॥ गिद्धोवमा उ नच्चाणं, कामे संसारवट्ठणे । उरगो सुवण्णपासेव, संकमाणो तणुं चरे ॥ ४७ ॥ नागोव्व वंधणं छित्ता, अप्पणो वसहिं वए । एयं पत्थं महारायं, उस्सुयारित्ति मे सुयं ॥ ४८ ॥ चइत्ता विउलं रज्जं, कामभोगे य दुच्चए । निव्विसया निरामिसा, निन्नेहा निप्परिग्गहा ॥ ४९ ॥ समं धम्मं वियाणित्ता, चित्ता कामगुणे वरे । तवं पगिज्जहक्खायं, धोरं घोरपरक्कमा ॥ ५० ॥ एवं ते कमसो बुद्धा, सव्वे धम्मपरायणा । जम्ममच्चुभउव्विग्गा, दुक्खस्संतगवेसिणो ॥ ५१ ॥ सासणे विगयमोहाणं, पुव्वि भावणभाविया । अचिरेणेव कालेण, दुक्खस्संतमुवागया ॥ ५२ ॥ राया सह देवीए, माहणो य पुरोहिओ । माहणी दारगा चेव, सव्वे ते परिनिव्वुडा ॥ ५३ ॥ ति-वेमि ॥ इति उस्सुयारिज्जं णामं चउहसममज्झयणं समत्तं ॥ १४ ॥



## अह सभिकखू णामं पण्णरसममज्झयणं

मोणं चरिस्सामि समिच्च धम्मं, सहिए उज्जुकडे नियाणछिन्ने । संथवं जहिज्ज अकामकामे, अच्चायएसी परिव्वए स भिक्खू ॥ १ ॥ राओवरयं चरेज्ज लाढे, विरए वेयवियायरक्खिए । पन्ने अभिभूय सव्वदंसी, जे कम्हि वि न मुच्छिए स भिक्खू ॥ २ ॥ अक्कोसवहं विइत्तु धीरे, सुणी चरे लाढे निच्चमायगुत्ते । अव्वग्गमणे असं-

१ वेयं-णेयं (ज्ञेयं) जाणइ सो । २ समपासी ।

पहिट्टे, जे कसिणं अहियासए स भिक्खू ॥ ३ ॥ पंतं सयणासणं भइत्ता, सीउण्हं विविहं च दंसमसणं । अव्वग्गमणे असंपहिट्टे, जे कसिणं अहियासए स भिक्खू ॥ ४ ॥ नो सक्कइमिच्छई न पूयं, नो वि य वंदणं कुओ पसंसं । से संजए सुव्वए तवस्सी, सहिए आयगवेसए स भिक्खू ॥ ५ ॥ जेण पुण जहाइ जीवियं, मोहं वा कसिणं नियच्छई । नरनारिं पजहे सया तवस्सी, न य कोऊहलं उवेइ स भिक्खू ॥ ६ ॥ छिन्नं सरं भोमं अंतल्लिक्खं, सुमिणं लक्खणदंडवत्थुविज्जं । अंगवियारं सरस्स विजयं, जे विज्जाहिं न जीवइ स भिक्खू ॥ ७ ॥ मंतं मूलं विविहं वेज्जचित्तं, वमणविरेयणधूमणेत्तसिणाणं । आउरे सरणं तिगिच्छियं च, तं परिज्जाय परिव्वए स भिक्खू ॥ ८ ॥ खत्तिगणउग्गरायपुत्ता, माहण भोइय विविहा य सिप्पिणो । नो तेसिं वयइ सिलोगपूयं, तं परिज्जाय परिव्वए स भिक्खू ॥ ९ ॥ गिहिणो जे पव्वइएण दिट्ठा, अप्पव्वइएण व संथुया हविज्जा । तेसिं इहलोइयफलट्ठा, जो संथवं न करेइ स भिक्खू ॥ १० ॥ सयणासणपाणभोयणं, विविहं खाइमं साइमं परेसिं । अदए पडिसेहिए नियंठे, जे तत्थ न पउस्सई स भिक्खू ॥ ११ ॥ जं किंन्वि आहारपाणंगं, विविहं खाइमं साइमं परेसिं लद्धुं । जो तं तिविहेण नाणुकंपे, मण-वयकायसुसंघुडे स भिक्खू ॥ १२ ॥ आयामगं चैव जवोदणं च, सीयं सोवीरजवोदणं च । नो हीलए पिंडं नीरसं तु, पंतकुलाइं परिव्वए स भिक्खू ॥ १३ ॥ सद्दा विविहा भवंति लोए, दिव्वा माणुस्सगा तिरिच्छा । मीमा भयभेरवा उराला, जो सोच्चा न विहिज्जई स भिक्खू ॥ १४ ॥ वायं विविहं समिच्च लोए, सहिए खेयाणुगए य कोवियप्पा । पच्चे अभिभूयू सव्वदंसी, उवसंते अविहेडए स भिक्खू ॥ १५ ॥ असिप्पजीवी अगिहे अमित्ते, जिइंदिए सव्वओ विप्पमुक्के । अणुक्कसाई लहुअप्प-भक्खी, चिच्चा गिहं एगचरे स भिक्खू ॥ १६ ॥ ति-वेस्मि ॥ इति सभिक्खू णामं पण्णरसममज्झयणं समत्तं ॥ १५ ॥

## अह वंभचेरसमाहिठाणा णामं सोलसममज्झयणं

सुयं मे आउसं ! तेणं भगवया एवमक्खायं । इह खलु थेरेहिं भगवंतेहिं दस वंभचेरसमाहिठाणा पजत्ता, जे भिक्खू सोच्चा निसम्म संजमवहुले संवरवहुले

१ न स भिक्खुत्ति सेसो, अहवा नाणुकंपे=ना+अणुकंपे “ना” साहुपुरिसो गिहत्थगिहुवल्लविसुद्धाहाराइणा बालवुड्ढुगिलाणसंजयाणमुवरिमणुकंपं काऊण वैया-वच्चं करेइ ति । २ मित्तसत्तुवज्जिए रागदोसरहिए ति अट्ठो ।

समाहिवहुले गुत्ते गुत्तिदिए गुत्तवंभयारी सया अप्पमत्ते विहरेज्जा । कयरे खलु ते थेरेहिं भगवंतेहिं दस वंभचेरसमाहिठाणा पन्नत्ता, जे भिक्खू सोच्चा निसम्म संजम-  
 वहुले संवरवहुले समाहिवहुले गुत्ते गुत्तिदिए गुत्तवंभयारी सया अप्पमत्ते विहरेज्जा ?  
 इमे खलु ते थेरेहिं भगवंतेहिं दस वंभचेरसमाहिठाणा पन्नत्ता, जे भिक्खू सोच्चा  
 निसम्म संजमवहुले संवरवहुले समाहिवहुले गुत्ते गुत्तिदिए गुत्तवंभयारी सया  
 अप्पमत्ते विहरेज्जा । तंजहा-विविताइं सयणासणाइं सेवित्ता हवइ से निग्गंथे । नो  
 इत्थीपसुपंडगसंसत्ताइं सयणासणाइं सेवित्ता हवइ से निग्गंथे । तं कहमिति चे ।  
 आयरियाह । निग्गंथस्स खलु इत्थीपसुपंडगसंसत्ताइं सयणासणाइं सेवमाणस्स  
 वंभयारिस्स वंभचेरे संका वा कंखा वा विइगिच्छा वा समुप्पज्जिजा, भेदं वा  
 लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवल्लिपन्नत्ताओ  
 [वा] धम्माओ भंसेज्जा । तम्हा नो इत्थीपसुपंडगसंसत्ताइं सयणासणाइं सेवित्ता  
 हवइ से निग्गंथे ॥ १ ॥ नो इत्थीणं कंहं कहित्ता हवइ से निग्गंथे । तं कहमिति  
 चे । आयरियाह । निग्गंथस्स खलु इत्थीणं कंहं कहेमाणस्स वंभयारिस्स वंभचेरे  
 संका वा कंखा वा विइगिच्छा वा समुप्पज्जिजा, भेदं वा लभेज्जा, उम्मायं वा  
 पाउणिज्जा, दीहकालियं वा रोगायकं हवेज्जा, केवल्लिपन्नत्ताओ धम्माओ भंसेज्जा ।  
 तम्हा [खलु] नो इत्थीणं कंहं कहेज्जा ॥ २ ॥ नो इत्थीणं सद्धिं सन्निसेज्जागए  
 विहरित्ता हवइ से निग्गंथे । तं कहमिति चे । आयरियाह । निग्गंथस्स खलु इत्थीहिं  
 सद्धिं सन्निसेज्जागयस्स वंभयारिस्स वंभचेरे संका वा कंखा वा विइगिच्छा वा  
 समुप्पज्जिजा, भेदं वा लभेज्जा, उम्मायं वा पाउणिज्जा, दीहकालियं वा रोगायकं  
 हवेज्जा, केवल्लिपन्नत्ताओ धम्माओ भंसेज्जा । तम्हा खलु नो निग्गंथे इत्थीहिं  
 सद्धिं सन्निसेज्जागए विहरेज्जा ॥ ३ ॥ नो इत्थीणं इंदियाइं मणोहराइं मणोरमाइं  
 आलोइत्ता निज्झाइत्ता हवइ से निग्गंथे । तं कहमिति चे । आयरियाह ।  
 निग्गंथस्स खलु इत्थीणं इंदियाइं मणोहराइं मणोरमाइं आलोएमाणस्स निज्झाय-  
 माणस्स वंभयारिस्स वंभचेरे संका वा कंखा वा विइगिच्छा वा समुप्पज्जिजा,  
 भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलि-  
 पन्नत्ताओ धम्माओ भंसेज्जा । तम्हा खलु नो निग्गंथे इत्थीणं इंदियाइं मणोहराइं  
 मणोरमाइं आलोएज्जा निज्झाएज्जा ॥ ४ ॥ नो इत्थीणं कुड्ढंतरंसि वा दूसंतरंसि  
 वा भित्तंतरंसि वा कूइयसइं वा रुइयसइं वा गीयसइं वा हसियसइं वा थणियसइं  
 वा कंदियसइं वा विलवियसइं वा सुणेत्ता हवइ से निग्गंथे । तं कहमिति चे ।  
 आयरियाह । निग्गंथस्स खलु इत्थीणं कुड्ढंतरंसि वा दूसंतरंसि वा भित्तंतरंसि वा

कूइयसइं वा रुइयसइं वा गीयसइं वा हसियसइं वा थणियसइं वा कंदियसइं वा विलवियसइं वा सुणेमाणस्स बंभयारिस्स बंभचेरे संका वा कंखा वा विइगिच्छा वा समुप्पज्जिजा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नताओ धम्माओ भंसेज्जा । तम्हा खलु नो निग्गंथे इत्थीणं कुडुं-तरंसि वा दूसंतरंसि वा भित्तंतरंसि वा कूइयसइं वा रुइयसइं वा गीयसइं वा हसियसइं वा थणियसइं वा कंदियसइं वा विलवियसइं वा सुणेमाणे विहरेज्जा ॥ ५ ॥ नो इत्थीणं पुव्ववरयं पुव्वकीलियं अणुसरित्ता हवइ से निग्गंथे । तं कहमिति चे । आयरियाह । निग्गंथस्स खलु इत्थीणं पुव्ववरयं पुव्वकीलियं अणुसरमाणस्स बंभयारिस्स बंभचेरे संका वा कंखा वा विइगिच्छा वा समुप्पज्जिजा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नताओ धम्माओ भंसेज्जा । तम्हा खलु नो निग्गंथे इत्थीणं पुव्ववरयं पुव्वकीलियं अणुसरेज्जा ॥ ६ ॥ नो पणीयं आहारं आहारित्ता हवइ से निग्गंथे । तं कहमिति चे । आयरियाह । निग्गंथस्स खलु पणीयं आहारं आहारेमाणस्स बंभयारिस्स बंभचेरे संका वा कंखा वा विइगिच्छा वा समुप्पज्जिजा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नताओ धम्माओ भंसेज्जा । तम्हा खलु नो निग्गंथे पणीयं आहारं आहारेज्जा ॥ ७ ॥ नो अइमायाए पाणभोयणं आहारेत्ता हवइ से निग्गंथे । तं कहमिति चे । आयरियाह । निग्गंथस्स खलु अइमायाए पाणभोयणं आहारेमाणस्स बंभयारिस्स बंभचेरे संका वा कंखा वा विइगिच्छा वा समुप्पज्जिजा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नताओ धम्माओ भंसेज्जा । तम्हा खलु नो निग्गंथे अइमायाए पाणभोयणं आहारेज्जा ॥ ८ ॥ नो विभूसाणुवाई हवइ से निग्गंथे । तं कहमिति चे । आयरियाह । विभूसावत्तिए विभूसियसरिरे इत्थिजणस्स अभिलसणिज्जे हवइ । तओ णं इत्थिजणेणं अभिलसिजमाणस्स बंभयारिस्स बंभचेरे संका वा कंखा वा विइगिच्छा वा समुप्पज्जिजा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नताओ धम्माओ भंसेज्जा । तम्हा खलु नो निग्गंथे विभूसाणुवाई हवेज्जा ॥ ९ ॥ नो सदरूवरसंगंधफासाणुवाई हवइ से निग्गंथे । तं कहमिति चे । आयरियाह । निग्गंथस्स खलु सदरूवरसंगंधफासाणुवाइस्स बंभयारिस्स बंभचेरे संका वा कंखा वा विइगिच्छा वा समुप्पज्जिजा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नताओ धम्माओ भंसेज्जा । तम्हा खलु नो सदरूवरसंगंधफासाणुवाई भवेज्जा से निग्गंथे । दसमे बंभचेरसमाहिठाणे हवइ ॥ १० ॥

हवन्ति इत्थ सिलोगा । तंजहा—जं विवित्तमणाइण्णं, रहियं इत्थिजणेण य । बंभचेरस्स रक्खद्वा, आलयं तु निसेवए ॥ १ ॥ मणपल्हायजणणी, कामरागविवद्दणी । बंभचेरओ भिक्खू, थीकहं तु विवजए ॥ २ ॥ समं च संथवं थीहिं, संकहं च अभिक्खणं । बंभचेरओ भिक्खू, निच्चसो परिवजए ॥ ३ ॥ अंगपच्चंगसेठाणं, चाल्लवियपेहियं । बंभचेरओ थीणं, चक्खुगिज्झं विवजए ॥ ४ ॥ कूइयं रुइयं गीयं, हसियं थणियकंदियं । बंभचेरओ थीणं, सोयगिज्झं विवजए ॥ ५ ॥ हासं किट्ठं रइं दप्पं, सहसावित्तासियाणि य । बंभचेरओ थीणं, नाणुचिते कयाइ वि ॥ ६ ॥ पणीयं भत्तपाणं तु, खिप्पं मयविवद्दणं । बंभचेरओ भिक्खू, निच्चसो परिवजए ॥ ७ ॥ धम्मलद्धं मियं काले, जत्तत्थं पणिहाणवं । नाइमत्तं तु भुंजेजा, बंभचेरओ सया ॥ ८ ॥ विभूस्सं परिवजेजा, सरीरपरिमंडणं । बंभचेरओ भिक्खू, सिंगारत्थं न धारए ॥ ९ ॥ सइं रुवे य गंधे य, रसे फासे तहेव य । पंचविहे कामगुणे, निच्चसो परिवजए ॥ १० ॥ आलओ थीजणाइण्णो, थीकहा य मणोरमो । संथवो चेव नौरीणं, तासिं इंदियदरिसेणं ॥ ११ ॥ कूइयं रुइयं गीयं, हासभुत्ताSS-सियाणि य । पणीयं भत्तपाणं च, अइमायं पाणभोर्यणं ॥ १२ ॥ गत्तभूसणमिट्ठं च, कामभोगा य दुज्जयीं । नरस्सत्तगवेसिस्स, विसं तालउडं जहा ॥ १३ ॥ दुजए कामभोगे य, निच्चसो परिवजए । संकट्ठाणाणि सव्वाणि, वजेजा पणिहाणवं ॥ १४ ॥ धम्मारामे चरे भिक्खू, धिइमं धम्मसारही । धम्मारामे एए दंते, बंभचेरसमाहिए ॥ १५ ॥ देवदाणवगंधव्वा, जक्खरक्खसकिन्नरा । बंभयारिं नमंसंति, दुक्करं जे करंति तं ॥ १६ ॥ एस धम्मे धुवे निच्चे, सासए जिणदेसिए । सिद्धा सिज्झंति चाणेण, सिज्झिस्संति तहावरे ॥ १७ ॥ त्ति-वेमि ॥ इति बंभचेरसमाहिठाणा णामं सोलसममज्झयणं समत्तं ॥ १६ ॥

### अह पावसमणिज्जं णाम सत्तरसममज्झयणं

जे केइ उ पव्वइए नियंठे, धम्मं सुणित्ता विणओववन्ने । सुदुल्लहं लहिउं बोहिल्लभं, विहरेज पच्छा य जहासुहं तु ॥ १ ॥ सेजा दहा पाउरणमि अत्थि, उप्पज्जई भोत्तु तहेव पाउं । जाणामि जं वट्ठ आउसुत्ति, किं नाम काहामि सुएण भंते ! ॥ २ ॥ जे केइ उ पव्वइए, निहासीले पगामसो । भुत्ता पिच्चा सुहं सुवई, पावसमणे त्ति वुच्चई ॥ ३ ॥ आयरियउवज्जाएहिं, सुयं विणयं च गाहिए । ते चेव खिसई बाले, पावसमणे त्ति वुच्चई ॥ ४ ॥ आयरियउवज्जायाणं, सम्मं न पडितप्पई ।

अप्पडिपूयए थद्धे, पावसमणे त्ति वुच्चई ॥ ५ ॥ सम्मह्माणे पाणाणि, वीयाणि  
 हरियाणि य । असंजए संजयमन्नमाणे, पावसमणे त्ति वुच्चई ॥ ६ ॥ संधारं फलगं  
 पीठं, निसेजं पायकंबलं । अपमज्जियमारुहई, पावसमणे त्ति वुच्चई ॥ ७ ॥ दवदवस्स  
 चरई, पमत्ते य अभिक्खणं । उल्लंघणे य चंडे य, पावसमणे त्ति वुच्चई ॥ ८ ॥  
 पडिलेहेइ पमत्ते, अवउज्झइ पायकंबलं । पडिलेहा अणाउत्ते, पावसमणे त्ति वुच्चई  
 ॥ ९ ॥ पडिलेहेइ पमत्ते, से किंचि हु निसामिया । गुरुपरिभावए निच्चं, पावसमणे  
 त्ति वुच्चई ॥ १० ॥ बहुमाई पमुहरी, थद्धे लुद्धे अणिग्गहे । असंविभागी अवियत्ते,  
 पावसमणे त्ति वुच्चई ॥ ११ ॥ विवादं च उदीरेइ, अहम्मे अत्तपन्नहा । वुग्गहे  
 कलहे रत्ते, पावसमणे त्ति वुच्चई ॥ १२ ॥ अथिरासणे कुकुइए, जत्थ तत्थ निसीयई ।  
 आसणम्मि अणाउत्ते, पावसमणे त्ति वुच्चई ॥ १३ ॥ ससरक्खपाए सुवई, सेजं न  
 पडिलेहई । संधारए अणाउत्ते, पावसमणे त्ति वुच्चई ॥ १४ ॥ दुद्धदही विगईओ,  
 आहारेइ अभिक्खणं । अरए य तवोक्कम्मे, पावसमणे त्ति वुच्चई ॥ १५ ॥ अत्थंतम्मि  
 य सूरम्मि, आहारेइ अभिक्खणं । चोइओ पडिचोएइ, पावसमणे त्ति वुच्चई ॥ १६ ॥  
 आयरियपरिच्चाई, परपासंडसेवए । गाणंगणिए दुब्भूए, पावसमणे त्ति वुच्चई ॥ १७ ॥  
 सयं गेहं परिच्चज्ज, परगेहंसि वावरे । निमित्तेण य ववहरई, पावसमणे त्ति वुच्चई  
 ॥ १८ ॥ सन्नाइपिंडं जेमेइ, नेच्छइ सामुदाणियं । गिहिनिसेजं च वाहेइ, पाव-  
 समणे त्ति वुच्चई ॥ १९ ॥ एयारिसे पंचकुसीलसंवुडे, रुवंधरे मुणिपवराण हेट्ठिमे ।  
 अयंसि लोए विसमेव गरहिण, न से इहं नेव परत्थ लोए ॥ २० ॥ जे वज्जए एए  
 सया उ दोसे, से सुव्वए होइ मुणीण मज्झे । अयंसि लोए अमयं व पूहए, आरा-  
 हए लोगमिणं तहा परं ॥ २१ ॥ ति-बेमि ॥ इति पावसमणिज्जं णाम  
 सत्तरसममज्झयणं समत्तं ॥ १७ ॥

## अह संजइज्जणामं अट्टारसममज्झयणं

कंपिल्ले नयरे राया, उदिण्णबलवाहणे । नामेणं संजए नामं, सिगव्वं उवणिग्गए  
 ॥ १ ॥ हयाणीए गयाणीए, रहाणीए तहेव य । पायत्ताणीए सहया, सव्वओ  
 परिवारिए ॥ २ ॥ मिए छुहिता हयगओ, कंपिल्लुज्जाणकेसरे । भीए संते मिए तत्थ,  
 वहेइ रसमुच्छिए ॥ ३ ॥ अह केसरम्मि उज्जाणे, अणगारे तवोधणे । सज्झाय-  
 ज्जाणसंजुत्ते, धम्मज्जाणं झियायइ ॥ ४ ॥ अप्फोवमंडवमि, झायइ क्खवियासवे ।  
 तस्सागए मिगे पासं, वहेइ से नराहिवे ॥ ५ ॥ अह आसगओ राया, खिप्पमागम्म



सो तहिं । हए मिए उ पासित्ता, अणगारं तत्थ पासई ॥ ६ ॥ अह राया तत्थ संभंतो, अणगारो मणाहओ । मए उ मंदपुण्णेणं, रसगिद्धेण घटुणा ॥ ७ ॥ आसं विसज्जइत्ताणं, अणगारस्स सो निवो । विणएण वंदए पाए, भगवं ! एत्थ मे खमे ॥ ८ ॥ अह सोणेण सो भगवं, अणगारे द्वाणमस्सिए । रायाणं न पडिमंतेइ, तओ राया भयहुओ ॥ ९ ॥ संजओ अहमम्मीति, भगवं ! वाहराहि मे । कुद्धे तेएण अणगारे, उहेज्ज नरकोडिओ ॥ १० ॥ अभओ पत्थिवा ! तुब्भं, अभयदाया भवाहि य । अणिच्चे जीवलोगंमि, किं हिंसाए पसज्जसी ? ॥ ११ ॥ जया सव्वं परिच्चज्ज, गंतव्वमवत्सस्स ते । अणिच्चे जीवलोगंमि, किं रज्जंमि पसज्जसी ? ॥ १२ ॥ जीवियं चेव ह्वं च, विज्जुसंपायचंचलं । जत्थ तं मुज्झसी रायं !, पेच्चत्थं नाववुज्झसे ॥ १३ ॥ दारामि य सुया चेव, मित्ता य तह बंधवा । जीवंतमणुजीवंति, मयं नाणुव्वयंति य ॥ १४ ॥ नीहरंति मयं पुत्ता, पियरं परमदुक्खिया । पियरो वि तहा पुत्ते, बंधू रायं ! तवं चरे ॥ १५ ॥ तओ तेणजिए दव्वे, दारे य परि-रक्खिए । कीलंतिउज्जे नरा रायं !, हट्ठतुट्ठमलंकिया ॥ १६ ॥ तेणावि जं कयं कम्मं, सुहं वा जइ वा दुहं । कम्मणा तेण संजुत्तो, गच्छई उ परं भवं ॥ १७ ॥ सोऊण तस्स सो धम्मं, अणगारस्स अंतिए । महया संवेगनिव्वेयं, समावज्जो नराहिवो ॥ १८ ॥ संजओ चइउं रज्जं, निक्खंतो जिणसासणे । गद्दभालिस्स भग-वओ, अणगारस्स अंतिए ॥ १९ ॥ चिच्चा रट्ठं पव्वइए, खत्तिए परिभासई । जहा ते दीसई ह्वं, पसच्चं ते तहा मणो ॥ २० ॥ किं नामे किं गोत्ते, कस्सट्ठाए व माहणे । कहां पडियरसी बुद्धे, कहां विणीए त्ति बुच्चसी ? ॥ २१ ॥ संजओ नाम नामेणं, तहा गोत्तेण गोयमो । गद्दभाली मसायरिया, विजाचरणपारगा ॥ २२ ॥ किरियं अकिरियं विणयं, अच्चाणं च महासुणी । एएहिं चउहिं ठाणेहिं, मेयन्ने किं पभासई ॥ २३ ॥ इइ पाउकरे बुद्धे, नायए परिणिव्वुए । विजाचरणसंपन्ने, सच्चे सच्चपरक्कमे ॥ २४ ॥ पडंति नरए घोरे, जे नरा पावकारिणो । दिव्वं च गई गच्छंति, चरित्ता धम्ममारियं ॥ २५ ॥ मायावुइयमेयं तु, मुसा भासा निरत्थिया । संजममाणो वि अहं, वसामि इरियामि य ॥ २६ ॥ सव्वेए विइया मज्झं, मिच्छा-दिट्ठी अणाशिया । विज्जमाणे परे लोए, सम्मं जाणामि अप्पयं ॥ २७ ॥ अहमासि महापाणे, जुइमं वरिससओवमे । जा सा पालिमहापाली, दिव्वा वरिससओवसा ॥ २८ ॥ से चुए बंभलोगाओ, माणुसं भवमागए । अप्पणो य परेसिं च, आउं जाणे जहा तहा ॥ २९ ॥ नाणारुइं च छंदं च, परिवज्जेज्ज संजए । अणट्ठा जे य सव्वत्था, इह विज्जामणुसंचरे ॥ ३० ॥ पडिक्कमाणि पसिणाणं, परमंतेहिं वा पुणो ।

अहो उट्ठीए अहोरायं, इह विज्जा तवं चरे ॥ ३१ ॥ जं च मे पुच्छसी काले, सम्मं सुद्धेण चेतसा । तादं पाउकरे बुद्धे, तं नाणं जिणसासणे ॥ ३२ ॥ किरियं च रोयई धीरे, अकिरियं परिवज्जे । दिट्ठीए दिट्ठिसंपन्ने, धम्मं चर सुदुच्चरं ॥ ३३ ॥ एयं पुण्णपयं सोच्चा, अत्थधम्मोवसोहिंयं । भरहो वि भारहं वासं, चिच्चा कामाद् पव्वए ॥ ३४ ॥ सगरो वि सागरंतं, भरहवासं नराहिवो । इस्सरियं केवलं हिच्चा, दयाइ परिनिव्वुडे ॥ ३५ ॥ चइत्ता भारहं वासं, चक्कवट्ठी महिद्धिओ । पव्वज्ज-मब्भुवगओ, मधवं नाम महाजसो ॥ ३६ ॥ सणकुमारो मणुस्सिदो, चक्कवट्ठी महिद्धिओ । पुत्तं रज्जे ठवेऊणं, सो वि राया तवं चरे ॥ ३७ ॥ चइत्ता भारहं वासं, चक्कवट्ठी महिद्धिओ । संती संतिकरे लोए, पत्तो गइमणुत्तरं ॥ ३८ ॥ इक्खा-गरायवसभो, कुंथू नाम नरीसरो । विक्खायकित्ती भगवं, पत्तो गइमणुत्तरं ॥ ३९ ॥ सागरंतं चइत्ताणं, भरहं नरवरीसरो । अरो य अरयं पत्तो, पत्तो गइमणुत्तरं ॥ ४० ॥ चइत्ता भारहं वासं, चइत्ता बलवाहणं । चइत्ता उत्तमे भोए, महापउमे तवं चरे ॥ ४१ ॥ एगच्छंतं पसाहिता, महिं माणनिस्रणो । हरिसेणो मणुस्सिदो, पत्तो गइमणुत्तरं ॥ ४२ ॥ अन्निओ रायसहस्सेहिं, सुपरिच्चाई दमं चरे । जयनाभो जिणक्खायं, पत्तो गइमणुत्तरं ॥ ४३ ॥ दसण्णरज्जं मुदियं, चइत्ताणं मुणी चरे । दसण्णभदो निक्खंतो, सक्खं सक्केण चोइओ ॥ ४४ ॥ नमी नमेइ अप्पाणं, सक्खं सक्केण चोइओ । चइऊण गेहं वइदेही, सामण्णे पज्जुवट्ठिओ ॥ ४५ ॥ करकंइ कल्लिगेसु, पंचालेसु य दुम्मुहो । नमी राया विदेहेसु, गंधारेसु य नग्गई ॥ ४६ ॥ एए नरिंदवसभा, निक्खंता जिणसासणे । पुत्ते रज्जे ठवेऊणं, सामण्णे पज्जुवट्ठिया ॥ ४७ ॥ सोवीररायवसभो, चइत्ताणं मुणी चरे । उदायणो पव्वइओ, पत्तो गइ-मणुत्तरं ॥ ४८ ॥ तहेव कासिराया वि, सेओ सच्चपरक्कमे । कामभोगे परिच्चज्ज, पहेणे कम्ममहावणं ॥ ४९ ॥ तहेव विजओ राया, अणट्ठाकित्ति पव्वए । रज्जं तु गुणसमिद्धं, पयहितु महाजसो ॥ ५० ॥ तहेवुग्गं तवं किच्चा, अव्वक्खित्तेण चेतसा । महव्वलो रायरिसी, आदाय सिरसा सिरिं ॥ ५१ ॥ कहं धीरो अहेऊहिं, उम्मत्तो व महिं चरे ? । एए विसेसमादाय, सूरा दढपरक्कमा ॥ ५२ ॥ अच्चंत-नियाणखमा, सच्चा मे भासिया वई । अतरिंसु तरंतेगे, तरिस्संति अणागया ॥ ५३ ॥ काहिं धीरे अहेऊहिं, अत्ताणं परियावसे । सव्वसंगविनिम्मक्के, सिद्धे भवइ नीरणे ॥ ५४ ॥ ति-बेमि ॥ इति संजइज्जणामं अट्टारसममज्झयणं समत्तं ॥ १८ ॥

## अह मियापुत्तीयं णामं एगूणवीसइमं अज्झयणं

सुग्गीवे नयरं रम्मे, काणणुजाणसोहिणं । राया बलभद्वित्ति, मिया तस्सग्गमा-  
हिंसी ॥ १ ॥ तेसिं पुत्ते बलसिरी, मियापुत्ते त्ति विस्सुणं । अम्मापिऊण दइण,  
जुवराया दमीसरे ॥ २ ॥ नंदणे सो उ पासाए, कीलए सह इत्थिहिं । देवे दोगुंदगे  
चेव, निच्चं मुइयमाणसो ॥ ३ ॥ मणिरयणकोट्टिमतले, पासायालोयणट्ठिओ ।  
आलोएइ नगरस्स, चउक्कत्तिचच्चरे ॥ ४ ॥ अह तत्थ अइच्छंतं, पासई समणसंजयं ।  
तवनियमसंजमधरं, सीलह्वं गुणआगरं ॥ ५ ॥ तं देहई मियापुत्ते, दिट्ठीए अणि-  
मिसाए उ । कहिं मचेरिसं ह्वं, दिट्ठपुव्वं नए पुरा ॥ ६ ॥ साहुस्स दरिसणे तस्स,  
अज्झवसाणम्मि सोहणे । मोहं गयस्स संतस्स, जाईसरणं समुप्पन्नं ॥ ७ ॥ [ देव-  
लोगजुओ संतो, माणुसं भवमागओ । सन्निनाणे समुप्पन्ने, जाई सरइ पुराणिवं ॥ ]  
जाईसरणे समुप्पन्ने, मियापुत्ते महिच्चिणं । सरई पोरणिणं जाई, सामणं च पुरा  
कयं ॥ ८ ॥ विसएहि अरजंतो, रजंतो संजमंमि य । अम्मापियरसुवागम्म, इमं  
वयणमव्ववी ॥ ९ ॥ सुयाणि मे पंच महव्वयाणि, नरएसु दुक्खं च तिरिक्ख-  
जोणिसु । निट्ठिवणकाओमि महण्णवाओ, अणुजाणह पव्वइस्सामि अम्मो ! ॥ १० ॥  
अम्मताय ! मए भोगा, भुत्ता विसफलोवमा । पच्छा कडुयविवागा, अणुवंचदुहावहा  
॥ ११ ॥ इमं सरीरं अणिच्चं, असुई असुइसंभवं । असासयावासमिणं, दुक्खकेसाण  
भायणं ॥ १२ ॥ असासए सरीरंमि, रइं नोवलभामहं । पच्छा पुरा व चइयव्वे,  
फेणवुब्बुयसन्निभे ॥ १३ ॥ माणुसत्ते असारंमि, वाहीरोगाण आलए । जरामरण-  
घत्थंमि, खणं पि न रमामहं ॥ १४ ॥ जम्मं दुक्खं जरा दुक्खं, रोगा य मरणाणि  
य । अहो दुक्खो हु संसारो, जत्थ कीसंति जंतुणो ॥ १५ ॥ खेतं वत्थुं हिरणं च,  
पुत्तदारं च वंधवा । चइत्ताणं इमं देहं, गंतव्वमवसस्स मे ॥ १६ ॥ जहा किंपाग-  
फलाणं, परिणामो न सुंदरो । एवं भुत्ताण भोगाणं, परिणामो न सुंदरो ॥ १७ ॥  
अद्धाणं जो महंतं तु, अप्पाहेओ पवज्जई । गच्छंतो सो दुही होइ, छुहातण्हाए  
पीडिओ ॥ १८ ॥ एवं धम्मं अकाऊणं, जो गच्छइ परं भवं । गच्छंतो सो दुही  
होइ, वाहीरोगेहिं पीडिओ ॥ १९ ॥ अद्धाणं जो महंतं तु, सपाहेओ पवज्जई ।  
गच्छंतो सो सुही होइ, छुहातण्हाविवज्जिओ ॥ २० ॥ एवं धम्मं पि काऊणं, जो  
गच्छइ परं भवं । गच्छंतो सो सुही होइ, अप्पकम्मं अवेयणे ॥ २१ ॥ जहा गेहे  
पलितम्मि, तस्स गेहस्स जो पट्ट । सारभंडाणि नीणेइ, असारं अवज्जइ ॥ २२ ॥  
एवं लोए पलितम्मि, जराए मरणेण य । अप्पाणं तारइस्सामि, तुब्भेहिं अणुमन्निओ

॥ २३ ॥ तं वित्तम्मापियरो, सामण्णं पुत्त ! दुच्चरं । गुणाणं तु सहस्साइं, धारेय-  
 व्वाइं भिक्खुणा ॥ २४ ॥ समया सव्वभूएसु, सत्तुमित्तसु वा जगे । पाणाइवायविरइं,  
 जावजीवाए दुक्करं ॥ २५ ॥ निच्चकालऽपमत्तेणं, मुसावायविवज्जणं । भासियव्वं  
 हियं सच्चं, निच्चाउत्तेण दुक्करं ॥ २६ ॥ दंतसोहणमाइस्स, अदत्तस्स विवज्जणं ।  
 अणवज्जेसणिज्जस्स, गिण्हणा अवि दुक्करं ॥ २७ ॥ विरइं अवंभचेरस्स, कामभोगर-  
 सत्तुणा । उगं महव्वयं वंभं, धारेयव्वं सुदुक्करं ॥ २८ ॥ धणधन्नेपेसवग्गेसु, परि-  
 ग्गहविवज्जणं । सव्वारंभपरिच्चाओ, निम्ममत्तं सुदुक्करं ॥ २९ ॥ चउव्विहे वि आहारे,  
 राईभोगयवज्जणा । सन्निहीसंचओ चेव, वज्जेयव्वो सुदुक्करं ॥ ३० ॥ छुहा तण्हा य  
 सीउण्हं, दंसमसगवेयणा । अक्कोसा दुक्खसेज्जा य, तणफासा जल्लमेव य ॥ ३१ ॥  
 तालणा तज्जणा चेव, वहंबंधपरीसहा । दुक्खं भिक्खायरिया, जायणा य अलाभया  
 ॥ ३२ ॥ कावोया जा इमा वित्ती, केसलोओ य दारुणो । दुक्खं वंभव्वयं घोरं,  
 धारेउं च महप्पणो ॥ ३३ ॥ सुहोइओ तुमं पुत्ता !, सुकुमालो सुमज्जिओ । न तु सि  
 पभू तुमं पुत्ता !, सामण्णमणुपालिया ॥ ३४ ॥ जावजीवमविस्सामो, गुणाणं तु  
 महव्वभरो । गुरुओ लोहभास्व, जो पुत्ता होइ दुव्वहो ॥ ३५ ॥ आगासे गंगसोउव्व,  
 पडिसोउव्व दुत्तरो । बाहाहिं सागरो चेव, तरियव्वो गुणोदही ॥ ३६ ॥ वालुया  
 क्वले चेव, निरस्साए उ संजमे । असिधारागमणं चेव, दुक्करं चरिउं तवो ॥ ३७ ॥  
 अहीवेगंतदिट्ठीए, चरिते पुत्त ! दुक्करो । जवा लोहमया चेव, चावेयव्वा सुदुक्करं  
 ॥ ३८ ॥ जहा अग्गिसिहा दित्ता, पाउं होइ सुदुक्करा । तहा दुक्करं करेउं जे, तारुण्णे  
 समणत्तणं ॥ ३९ ॥ जहा दुक्खं भरेउं जे, होइ वायस्स कोत्थलो । तहा दुक्खं  
 करेउं जे, की[वि]वेणं समणत्तणं ॥ ४० ॥ जहा तुलाए तोलेउं, दुक्करो मंदरो गिरी ।  
 तहा निहुयं नीसंकं, दुक्करं समणत्तणं ॥ ४१ ॥ जहा भुयाहिं तरिउं, दुक्करं रयणायरो ।  
 तहा अणुवसंतेणं, दुक्करं दमसागरो ॥ ४२ ॥ भुंज माणुस्सए भोए, पंचलक्खणए  
 तुमं । भुत्तभोगी तवो जाया !, पच्छा धम्मं चरिस्ससि ॥ ४३ ॥ सो वेइ अम्मा-  
 पियरो, एवमेयं जहा फुडं । इह लोए निप्पिवासस्स, नत्थि किंचिवि दुक्करं ॥ ४४ ॥  
 सारीरमाणसा चेव, वेयणाओ अणंतसो । मए सोढाओ भीमाओ, असइं दुक्खभयाणि  
 य ॥ ४५ ॥ जरामरणकंतारे, चाउरंते भयागरे । मया सोढाणि भीमाणि, जम्माणि  
 मरणाणि य ॥ ४६ ॥ जहा इहं अगणी उण्हो, एत्तोऽणंतगुणो तहिं । नरएसु वेयणा  
 उण्हा, असाया वेइया मए ॥ ४७ ॥ जहा इहं इमं सीयं, एत्तोऽणंतगुणो तहिं ।  
 नरएसु वेयणा सीया, असाया वेइया मए ॥ ४८ ॥ कंदंतो कंदुकुंभीसु, उट्ठपाओ  
 अहोसिरो । हुयासणे जलंतम्मि, पक्कपुव्वो अणंतसो ॥ ४९ ॥ महादवग्गिंसकासे,  
 ६४ सुत्ता०

मरुंमि वइरवालुए । कलंबवालुयाए य, दड्डुपुव्वो अणंतसो ॥ ५० ॥ रसंतो कंदुकुंसीसु,  
उड्डु वद्धो अवंधवो । करवत्तकरकयाईहिं, छिन्नपुव्वो अणंतसो ॥ ५१ ॥ अइतिक्ख-  
कंटगाइण्णे, तुंगे सिंवल्लिपायवे । खेवियं पासवद्धेणं, कड्डोक्कड्डाहिं दुकरं ॥ ५२ ॥  
महाजंतेसु उच्छ्र वा, आरसंतो सुमेरवं । पीलिओमि सकम्मोहिं, पावकम्मो अणंतसो  
॥ ५३ ॥ कूवंतो कोलसुणएहिं, सामोहिं सबलेहि य । पाडिओ फालिओ छिन्नो,  
विप्फुरंतो अणेगसो ॥ ५४ ॥ असीहि अयसिवण्णाहिं, भल्लेहिं पट्टिसेहि य । छिन्नो  
भिन्नो विभिन्नो य, ओइण्णो पावकम्ममुणा ॥ ५५ ॥ अवसो लोहरहे जुत्तो, जलंते  
समिलालुए । चोइओ तोत्तजुत्तेहिं, रोज्झो वा जह पाडिओ ॥ ५६ ॥ हुयासणे  
जलंतम्मि, चियासु महिसो विव । दड्डो पक्को य अवसो, पावकम्मोहि पाविओ ॥ ५७ ॥  
बला संडासतुंढेहिं, लोहत्तुंढेहिं पक्खिहिं । विलुत्तो विलवंतो हं, ढंक्कगिद्धेहिं ऽणंतसो  
॥ ५८ ॥ तण्हाकिलंतो धावंतो, पत्तो वेयरणिं नइं । जलं पाहिं ति चिंतंतो, खुर-  
धाराहिं विवाइओ ॥ ५९ ॥ उण्हाभितत्तो संपत्तो, असिपत्तं महावणं । असिपत्तेहिं  
पडंतैहिं, छिन्नपुव्वो अणेगसो ॥ ६० ॥ मुग्गरेहिं मुसंडीहिं, सलेहिं मुसलेहि  
य । गयासंभग्गगत्तेहिं, पत्तं दुक्खं अणंतसो ॥ ६१ ॥ खुरेहिं तिक्खधाराहिं,  
छुरियाहिं कप्पणीहि य । कप्पिओ फालिओ छिन्नो, उक्कितो य अणेगसो ॥ ६२ ॥  
पासेहिं कूडजालेहिं, मिओ वा अवसो अहं । वाहिओ बद्धरुद्धो वा, बहुसो चेव  
विवाइओ ॥ ६३ ॥ गलेहिं मगरजालेहिं, मच्छो वा अवसो अहं । उल्लिओ फालिओ  
गहिओ, मारिओ य अणंतसो ॥ ६४ ॥ वीदंसएहिं जालेहिं, लेप्पाहिं सउणो विव ।  
गहिओ लग्गो बद्धो य, मारिओ य अणंतसो ॥ ६५ ॥ कुहाडफरसुमाईहिं, वड्डुईहिं  
दुमो विव । कुट्ठिओ फालिओ छिन्नो, तच्छिओ य अणंतसो ॥ ६६ ॥ चवेडमुट्ठि-  
माईहिं, कुमारेहिं अयं पिव । ताडिओ कुट्ठिओ भिन्नो, चुण्णिओ य अणंतसो ॥ ६७ ॥  
तत्ताइं तंवलोहाइं, तउयाइं सीसयाणि य । पाइओ कलकलंताइं, आरसंतो सुमेरवं  
॥ ६८ ॥ तुहं पियाइं संसाइं, खंडाइं सोल्लगाणि य । खाविओमि समंसाइं, अग्गि-  
वण्णाइं ऽणेगसो ॥ ६९ ॥ तुहं पिया सुरा सीदू, मेरओ य मट्ठूणि य । पाइओमि जलं-  
तीओ, वसाओ रुहिराणि य ॥ ७० ॥ निच्चं सीएण तत्थेण, दुहिएण वहिएण ॥  
परमा दुहसंबद्धा, वेयणा वेइया मए ॥ ७१ ॥ तिक्खचंडप्पगाढाओ, घोराओ अइदु-  
स्सहा । महब्भयाओ भीमाओ, नरएसु वेइया मए ॥ ७२ ॥ जारिसा माणुसे लोए,  
ताया ! वीसंति वेयणा । एत्तो अणंतगुणिया, नरएसु दुक्खवेयणा ॥ ७३ ॥ सव्व-  
भवेसु अस्साया, वेयणा वेइया मए । निमेसंतरमित्तं पि, जं साया नत्थि वेयणा  
॥ ७४ ॥ तं चिंतम्मापियरो, छंदेणं पुत्तं । पव्वया । नवरं पुण सामण्णे, दुक्खं

निप्पडिकम्मया ॥ ७५ ॥ सो वेइ अम्मापियरो !, एवमेयं जहा फुडं । पडिकम्मं को कुणई, अरण्णे मियपक्खिणं ॥ ७६ ॥ एगब्भूए अरण्णे व, जहा उ चरई मिये । एवं धम्मं चरिस्सामि, संजमेण तवेण य ॥ ७७ ॥ जहा मिगस्स आयंको, महारण्णंमि जायई । अच्छंतं रुक्खमूलंमि, को णं ताहे तिगिच्छई ॥ ७८ ॥ को वा से ओसहं देइ ? , को वा से पुच्छई सुहं ? । को से भत्तं च पाणं वा, आहरित्तु पणामए ? ॥ ७९ ॥ जया य से सुही होइ, तया गच्छइ गोयरं । भत्तपाणस्स अट्ठाए, वल्लराणि सराणि य ॥ ८० ॥ खाइत्ता पाणियं पाउं, वल्लरेहिं सरेहि य । मिगचारियं चरित्ताणं, गच्छई मिगचारियं ॥ ८१ ॥ एवं समुट्ठिओ भिक्खू, एवमेव अणेगए । मिगचारियं चरित्ताणं, उट्ठं पक्कमई दिसं ॥ ८२ ॥ जहा मिए एग अणेगचारी, अणेगवासे धुवगो-यरं य । एवं मुणी गोयरियं पविट्ठे, नो हीलए नो वि य खिंसएज्जा ॥ ८३ ॥ मिग-चारियं चरिस्सामि, एवं पुत्ता ! जहासुहं । अम्मापिऊहिंऽणुच्चाओ, जहाइ उवहिं तथा ॥ ८४ ॥ मिगचारियं चरिस्सामि, सव्वदुक्खविमोक्खणि । तुब्भेहिं अब्भणुच्चाओ, गच्छ पुत्ता ! जहासुहं ॥ ८५ ॥ एवं सो अम्मापियरो, अणुमाणिताण बहुविहं । ममत्तं छिंदई ताहे, महानागोव्व कंचुयं ॥ ८६ ॥ इट्ठी वित्तं च मित्ते य, पुत्तदारं च नायओ । रेणुयं व पडे लग्गं, निद्धुणित्ताण निग्गओ ॥ ८७ ॥ पंचमहव्वयजुत्तो, पंचसमिओ तिगुत्तिगुत्तो य । सत्भिंतरबाहिरए, तवोक्कम्मंमि उज्जुओ ॥ ८८ ॥ निम्मसो निरहं-कारो, निस्संगो चत्तगारवो । समो य सव्वभूएसु, तसेसु थावरेसु य ॥ ८९ ॥ लाभालाभे सुहे दुक्खे, जीविए मरणे तथा । समो निंदापसंसासु, तथा माणावमाणओ ॥ ९० ॥ गारवेषु कसाएसु, दंडसल्लभएसु य । नियत्तो हाससोगाओ, अनियाणो अबंधणो ॥ ९१ ॥ अणिस्सिओ इहं लोए, परलोए अणिस्सिओ । वासीचंदणकप्पो य, असणे अणसणे तथा ॥ ९२ ॥ अप्पसत्थेहिं दारेहिं, सव्वओ पिहियासवे । अज्झप्पज्झाणजोगेहिं, पसत्थदमसासणे ॥ ९३ ॥ एवं नाणेण चरणेण, दंसणेण तवेण य । भावणाहि य सुद्धाहिं, सम्मं भावित्तु अप्पयं ॥ ९४ ॥ बहुयाणि उ वासाणि, सामण्णसणुपालिया । मासिएण उ भत्तेण, सिद्धिं पत्तो अणुत्तरं ॥ ९५ ॥ एवं करंति संबुद्धा, पंडिया पविय-क्खणा । विणियट्ठंति भोगेसु, मियापुत्ते जहा रिसी ॥ ९६ ॥ महापभावस्स महाज-सस्स, मियाइपुत्तस्स निसम्म भासियं । तवप्पहाणं चरियं च उत्तमं, गइप्पहाणं च तिलोगविसुयं ॥ ९७ ॥ वियाणिया दुक्खविवद्धणं धणं, ममत्तबंधं च महाभयावहं । सुहावहं धम्मधुरं अणुत्तरं, धारेज्ज निव्वाणगुणावहं महं ॥ ९८ ॥ ति-वेमि ॥ इति मियापत्तीयं णामं एगूणवीसइमं अज्झयणं समत्तं ॥ ११ ॥

## अहं महानियंठिज्जनामं वीसइमं अज्झयणं

सिद्धाणं नमो किच्चा, संजयाणं च भावओ । अत्थधम्मगइं तच्चं, अणुसद्धिं सुणेह मे ॥ १ ॥ पभूयरयणो राया, सेणिओ मगहाहिवो । विहारजत्तं निज्जाओ, मंडि-  
कुच्छिसि चेईए ॥ २ ॥ नाणादुमलयाइणं, नाणापक्खिनिसेवियं । नाणाकुसुमसंछन्नं,  
उज्जाणं नंदणोवमं ॥ ३ ॥ तत्थ सो पासई साहुं, संजयं सुसमाहियं । निसन्नं  
रुक्खमूलम्मि, सुकुमालं सुहोइयं ॥ ४ ॥ तस्स रुवं तु पासित्ता, राइणो तम्मि  
संजए । अच्चंतपरमो आसी, अउलो रुवविम्हओ ॥ ५ ॥ अहो ! वण्णो अहो ! रुवं,  
अहो ! अज्जस्स सोमया । अहो ! खंती अहो ! सुत्ती, अहो ! भोगे असंगया ॥ ६ ॥  
तस्स पाए उ वंदित्ता, काऊण य पयाहिणं । नाइदूरमणासन्नो, पंजली पडिपुच्छई  
॥ ७ ॥ तरुणो सि अज्जो ! पव्वइओ, भोगकालम्मि संजया । उवट्ठिओ सि सामणो,  
एयमट्ठं सुणेमि ता ॥ ८ ॥ अणाहोमि महाराय !, नाहो मज्झ न विज्जई । अणुकंपणं  
सुहिं वावि, कंचि नाभिसमेमहं ॥ ९ ॥ तओ सो पहसिओ राया, सेणिओ मगहा-  
हिवो । एवं ते इट्ठिमंतस्स, कहं नाहो न विज्जई ॥ १० ॥ होमि नाहो भयंताणं,  
भोगे भुंजाहि संजया ! । मित्तनाईपरिचुडो, माणुस्सं खु सुदुल्लहं ॥ ११ ॥ अप्पणा  
वि अणाहो सि, सेणिया ! मगहाहिवा ! । अप्पणा अणाहो संतो, कहं नाहो भवि-  
स्ससि ! ॥ १२ ॥ एवं वुत्तो नरिंदो सो, सुसंभंतो सुविम्हिओ । वयणं अस्सुयपुव्वं,  
साहुणा विम्हयन्निओ ॥ १३ ॥ अस्सा हत्थी मणुस्सा मे, पुरं अंतोउरं च मे ।  
भुंजामि माणुसे भोए, आणा इस्सरियं च मे ॥ १४ ॥ एरिसे संपयग्गम्मि, सव्व-  
कामसमप्पिए । कहं अणाहो भवई, मा हु भंते ! सुखं वए ॥ १५ ॥ न तुमं जाणे  
अणाहस्स, अत्थं पोत्थं च पत्थिवा ! । जहा अणाहो भवई, सणाहो वा नराहिवा !  
॥ १६ ॥ सुणेह मे महाराय !, अव्वक्खित्तेण चैयसा । जहा अणाहो भवई, जहा मेयं  
पवत्तिर्यं ॥ १७ ॥ कोसंबी नाम नयरी, पुराणपुरमेयणी । तत्थ आसी पिथा मज्झ,  
पभूयधणसंचओ ॥ १८ ॥ पढमे वए महाराय !, अउला मे अच्छिवेयणा । अहोत्था  
विउलो दाहो, सव्वगत्तेसु पत्थिवा ! ॥ १९ ॥ सत्थं जहा परमतिक्खं, सरीरविवरं-  
तरे । आवीलिज्ज अरी कुद्धो, एवं मे अच्छिवेयणा ॥ २० ॥ तियं मे अंतरिच्छं च,  
उत्तमंगं च पीडई । इंदसणिस्समा घोरा, वेयणा परमदारुणा ॥ २१ ॥ उवट्ठिया मे  
आयरिया, विज्जामंततिगिच्छमा । अवीया सत्थकुसला, मंतमूलविसारया ॥ २२ ॥  
ते मे तिगिच्छं कुव्वंति, चालप्पायं जहाहियं । न य दुक्खा विमोयंति, एसा मज्झ

अणाहया ॥ २३ ॥ पिया मे सव्वसारं पि, दिजाहि मम कारणा । न य दुक्खा विमोएइ, एसा मज्झ अणाहया ॥ २४ ॥ माया वि मे महाराय !, पुत्तसोगदुहट्ठिया । न य दुक्खा विमोएइ, एसा मज्झ अणाहया ॥ २५ ॥ भायरा मे महाराय !, सगा जेट्ठकणिट्ठगा । न य दुक्खा विमोयंति, एसा मज्झ अणाहया ॥ २६ ॥ भइणीओ मे महाराय !, सगा जेट्ठकणिट्ठगा । न य दुक्खा विमोयंति, एसा मज्झ अणाहया ॥ २७ ॥ भारिया मे महाराय !, अणुरत्ता अणुव्वया । अंसुपुणेहिं नयणेहिं, उरं मे परिसिंचई ॥ २८ ॥ अन्नं पाणं च ष्हाणं च, गंधमल्लविलेवणं । मए नायमनायं वा, सा बाला नेव भुंजई ॥ २९ ॥ खणं पि मे महाराय !, पासाओ वि न फिट्ठई । न य दुक्खा विमोएइ, एसा मज्झ अणाहया ॥ ३० ॥ तओ हं एवमाहंसु, दुक्खमा हु पुणो पुणो । वेयणा अणुभविउं जे, संसारम्मि अणंतए ॥ ३१ ॥ सइं च जइ मुच्चैज्जा, वेयणा विउला इओ । खंतो दंतो निरारंभो, पव्वए अणगारियं ॥ ३२ ॥ एवं च चित्तइत्ताणं, पसुत्तोमि नराहिवा ! । परियत्तंतीए राइए, वेयणा मे खयं गया ॥ ३३ ॥ तओ कळे पभायंमि, आपुच्छित्ताण बंधवे । खंतो दंतो निरारंभो, पव्व-इओऽणगारियं ॥ ३४ ॥ तो हं नाहो जाओ, अप्पणो य परस्स य । सव्वेसिं चेव भूयाणं, तसाणं थावराण य ॥ ३५ ॥ अप्पा नई वेयरणी, अप्पा मे कूडसामली । अप्पा कामदुहा धेणू, अप्पा मे नंदणं वणं ॥ ३६ ॥ अप्पा कत्ता विकत्ता य, दुहाण य सुहाण य । अप्पा मित्तममित्तं च, दुप्पट्ठिय सुपट्ठिओ ॥ ३७ ॥ इमा हु अन्ना वि अणाहया निवा !, तमेगचित्तो निहुओ सुणेहि । नियंठधम्मं लहियाण वी जहा, सीयंति एगे बहुकायरा नरा ॥ ३८ ॥ जो पव्वइत्ताण महव्वयाइं, सम्मं च नो फासयई पमाया । अनिग्गहप्पा य रसेसु गिद्धे, न मूलओ छिन्नइ बंधणं से ॥ ३९ ॥ आउत्तया जस्स न अत्थि काइ, इरियाए भासाए तहेसणाए । आयाणत्तिक्खेव-दुगुंछणाए, न वीरजायं अणुजाइ मग्गं ॥ ४० ॥ चिरं पि से मुंडरूई भविता, अथिरव्वए तवनियमेहिं भट्ठे । चिरं पि अप्पाण किलेसइत्ता, न पारए होइ हु संपराए ॥ ४१ ॥ पोळे व मुट्ठी जह से असारे, अयंतिए कूडकहावणे वा । राढामणी वेस्सियप्पगासे, अमहग्घए होइ हु जाणएसु ॥ ४२ ॥ कुसीलल्लिं इह धारइत्ता, इसिज्झयं जीविय बूहइत्ता । असंजए संजयलप्पमाणे, विणिघायमागच्छइ से चिरं पि ॥ ४३ ॥ विसं तु पीयं जह कालकूडं, हणाइ सत्थं जह कुग्गहीयं । एसो वि धम्मो विसओववच्चो, हणाइ वेयाल इवाविवच्चो ॥ ४४ ॥ जे लक्खणं सुविण पउंजमाणे, निमित्तकोऽहलसंपगाढे । कुहेडविजासवदारजीवी, न गच्छई सरणं तम्मि काले ॥ ४५ ॥ तमंतमेणेव उ से असिले, सया दुही विप्परियासुवेइ । संधावई नरगति-



रिक्खजोणिं, मोणं विराहेतु असाहरुखे ॥ ४६ ॥ उद्देसियं कीयगडं नियागं, न मुंचई किंवि अणेसणिज्जं । अग्गी विवा सव्वभक्खी भविता, इत्तो चुए गच्छइ कहु पावं ॥ ४७ ॥ न तं अरी कंठछेता करेइ, जं से करे अप्पणिया दुरप्पया । से नाहिई मञ्जुमुहं तु पत्ते, पच्छाणुतावेण दयाविहूणो ॥ ४८ ॥ निरट्टिया नग्गई उ तस्स, जे उत्तमट्ठे विवज्जासमेइ । इमे वि से नत्थि परे वि लोए, दुहओ वि से झिज्झइ तत्थ लोए ॥ ४९ ॥ एमेवऽहाछंदकुसीलरूखे, मग्गं विराहितु जिणुत्तमाणं । कुररी विवा भोगरसाणुगिद्धा, निरट्टसोया परियावमेइ ॥ ५० ॥ सोच्चाण मेहावि ! सुभासियं इमं, अणुसासणं नाणगुणोववेयं । मग्गं कुसीलाण जहाय सव्वं, महानियंठाण वए पहेणं ॥ ५१ ॥ चरित्तमायारगुणन्निए तओ, अणुत्तरं संजम पालियाणं । निरासवे संखवियाण कम्मं, उवेइ ठाणं विउलुत्तमं धुवं ॥ ५२ ॥ एवुग्गदंते वि महातवोधणे, महासुणी महापइन्ने महायसे । महानियंठिज्जमिणं महासुयं, से कहेई महया विक्खरेणं ॥ ५३ ॥ तुट्ठो य सेणिओ राया, इणमुदाहु कयंजली । अणाहतं जहाभूयं, सुट्ठु मे उवदंसियं ॥ ५४ ॥ तुज्झं सुलद्धं खु मणुस्सजम्मं, लाभा सुलद्धा य तुमे महेसी । तुब्भे सणाहा य संबंधवा य, जं मे ठिया मग्गे जिणुत्तमाणं ॥ ५५ ॥ तं सि नाहो अणाहाणं, सव्वभूयाण संजया । खामेमि ते महाभाग !, इच्छामि अणुसासितं ॥ ५६ ॥ पुच्छिऊण मए तुब्भं, ज्ञाणविग्घो उ जो कओ । निमंतिया य भोगेहिं, तं सव्वं मरिसेहि मे ॥ ५७ ॥ एवं धुणित्ताण स रायसीहो, अणगारसीहं परमाइ भत्तिए । सओरोहो सपरियणो संबंधवो, धम्माणुरत्तो विमलेण चेयसा ॥ ५८ ॥ ऊससियरोमकूवो, काऊण य पयाहिणं । अभिवंदिऊण सिरसा, अइयाओ नराहिवो ॥ ५९ ॥ इयरो वि गुणसम्मिद्धो, तिणुत्तिगुत्तो तिवंदविरओ य । विहग इव विप्पमुक्को, विहरइ वसुहं विगयमोहो ॥ ६० ॥ त्ति-वेमि ॥ इति महानियंठिज्जनामं वीसइमं अज्झयणं समत्तं ॥ २० ॥

## अह समुदपालीयं णामं एगवीसइमं अज्झयणं

चंपाए पालिए नाम, सावए आसि वाणिए । महावीरस्स भगवओ, सीसे सो उ महेप्पणो ॥ १ ॥ निग्गंथे पावयणे, सावए से वि कोविए । पोएण ववहरंते, पिहुंडं नगरमागए ॥ २ ॥ पिहुंडे ववहरंतस्स, वाणिओ देइ धूयरं । तं ससत्तं पइणिज्झ, सदेसमह पत्थिओ ॥ ३ ॥ अह पालियस्स घरणी, समुदम्मि पसवई । अह बालए

१ निरट्टओ जिणकप्पो वि ।

तहिं जाए, समुद्पालित्ति नामए ॥ ४ ॥ खेमेण आगए चंपं, सावए वाणिए घरं ।  
 संवहुई तरस् घरे, दारए से सुहोइए ॥ ५ ॥ वावत्तरी कलाओ य, सिक्खई नीइ-  
 कोविए । जोव्वणेण य संपन्ने, सुरूवे पियदंसणे ॥ ६ ॥ तरस् ह्ववई भज्जं, पिया  
 आणेइ रुविणिं । पासाए कीलए रम्मे, देवो दोगुंदओ जहा ॥ ७ ॥ अह अन्नया  
 कयाई, पासायालोयणे ठिओ । वज्झमंडणसोभागं, वज्झं पासइ वज्झगं ॥ ८ ॥  
 तं पासिऊण संविग्गो, समुद्पालो इणमब्बवी । अहोऽसुभाण कम्माणं, निज्जाणं  
 पावगं इमं ॥ ९ ॥ संबुद्धो सो तहिं भयवं, परमसंवेगमागओ । आपुच्छऽम्मा-  
 पियरो, पव्वए अणगारियं ॥ १० ॥ जहित्तु संगंथ महाक्खिलेसं, महंतमोहं कसिणं  
 भयावहं । परियायधम्मं चऽभिरोगएज्जा, वयाणि सीलाणि परीसहे य ॥ ११ ॥  
 अहिंससच्चं च अतेणगं च, तत्तो य वंसं अपरिगगहं च । पडिवज्जिया पंचमहव्व-  
 याणि, चरिज्ज धम्मं जिणदेसियं विदू ॥ १२ ॥ सव्वेहिं भूएहिं दयाणुकंपी, खंति-  
 क्खमे संजयवंभयारी । सावज्जजोगं परिवज्जयंतो, चरिज्ज भिक्खू सुसमाहिइंदिए  
 ॥ १३ ॥ कालेण कालं विहरेज्ज रट्ठे, बलाबलं जाणिय अप्पणो य । सीहो व सहेण  
 न संतसेज्जा, वयजोग सुच्चा न असब्बमाहु ॥ १४ ॥ उवेहमाणो उ परिव्वएज्जा,  
 पियमप्पियं सव्व तित्तिक्खएज्जा । न सव्व सव्वत्थऽभिरोगएज्जा, न यावि पूयं  
 गरहं च संजए ॥ १५ ॥ अणेगळंदा इह माणवेहिं, जे भावओ संपगरेइ भिक्खू ।  
 भयमेरवा तत्थ उइंति भीमा, दिव्वा मणुस्सा अदुवा तिरिच्छा ॥ १६ ॥ परीसहा  
 दुव्विसहा अणेगे, सीयंति जत्था बहुकायरा नरा । से तत्थ पत्ते न वहिज्ज भिक्खू,  
 संगामसीसे इव नागराया ॥ १७ ॥ सीओसिणा दंसमसा य फासा, आयंका विविहा  
 फुसंति देहं । अकुक्कुओ तत्थऽहियासएज्जा, रयाइं खेवेज्ज पुराकयाइं ॥ १८ ॥ पहाय  
 रागं च तहेव दोसं, मोहं च भिक्खू सययं वियक्खणो । मेरुव्व वाएण अकंपमाणो,  
 परीसहे आयगुत्ते सहेज्जा ॥ १९ ॥ अणुन्नए नावणए महेसी, न यावि पूयं गरहं च  
 संजए । स उज्जुभावं पडिवज्ज संजए, निव्वाणमगं विरए उवेइ ॥ २० ॥ अरइ-  
 रइसहे पहीणसंथवे, विरए आयहिए पहाणवं । परमट्ठपएहिं चिट्ठई, छिन्नसोए अममे  
 अक्किचणे ॥ २१ ॥ विवित्तलयणाइ भएज्ज ताई, निरोव्वेवाइ असंथडाइं । इसीहिं  
 च्चिण्णाइं महायसेहिं, काएण फासेज्ज परीसहाइं ॥ २२ ॥ सन्नाणनापोवगए महेसी,  
 अणुत्तरं चरिउं धम्मसंचयं । अणुत्तरे नाणधरे जसंसी, ओभासंई सूरिए वंतल्लिक्खे  
 ॥ २३ ॥ दुविहं खवेऊण य पुण्णपावं, निरंगणे सव्वओ विप्पमुक्के । तरित्ता समुइं  
 व महाभवोधं, समुद्पाले अपुणागमं गए ॥ २४ ॥ त्ति-वेमि ॥ इति समुद्-  
 पालीयं णामं एगवीसइमं अज्झयणं समत्तं ॥ २१ ॥

## अह रहनेमिज्जनामं बावीसइमं अज्झयणं

सोरियपुरम्मि नयरे, आसि राया महिद्धिणं । वसुदेवुत्ति नामेणं, रायलक्खण-  
संजुए ॥ १ ॥ तस्स भज्जा दुवे आसी, रोहिणी देवई तहा । तासि दोण्हं दुवे पुत्ता,  
इद्धा रामकेसवा ॥ २ ॥ सोरियपुरम्मि नयरे, आसि राया महिद्धिणं । समुहविजए  
नामं, रायलक्खणसंजुए ॥ ३ ॥ तस्स भज्जा सिवा नाम, तीसे पुत्तो महायसो ।  
भगवं अरिट्टनेमिस्सि, लोगनाहे दमीसरे ॥ ४ ॥ सोऽरिट्टनेमिनामो उ, लक्खणस्सर-  
संजुओ । अट्टसहस्सलक्खणधरो, गोयमो कालगच्छवी ॥ ५ ॥ वज्जरिसहसंधयणो,  
समचउरंसो झसोयरो । तस्स रायमईकन्नं, भजं जायइ केसवो ॥ ६ ॥ अह सा  
रायवरकजा, सुसीला चारुपेहणी । सव्वलक्खणसंपन्ना, विज्जसोयामणिप्पमा ॥ ७ ॥  
अहाह जणओ तीसे, वासुदेवं महिद्धियं । इहागच्छउ कुमारो, जा से कन्नं ददामि हं  
॥ ८ ॥ सव्वोसहीहिं ण्हविओ, कयकोउयमंगलो । दिव्वजुयलपरिहिओ, आभरणेहिं  
विभूसिओ ॥ ९ ॥ मत्तं च गंधहत्थिं च, वासुदेवस्स जेड्डगं । आरूढो सोहए अहियं,  
सिरे चूडामणी जहा ॥ १० ॥ अह ऊसिएण छतेण, चामराहि य सोहिओ । दसार-  
चक्रेण य सो, सव्वओ परिवारिओ ॥ ११ ॥ चउरंगिणीए सेणाए, रइयाए जहकमं ।  
तुरियाण सन्निनाएणं, दिव्वेणं गगणं फुसे ॥ १२ ॥ एयारिसीए इद्धीए, जुत्तीए उत-  
माइ य । नियगाओ भवणाओ, निज्जाओ वणिहपुंगवो ॥ १३ ॥ अह सो तत्थ निज्जंतो,  
दिस्स पाणे भयहुए । वाडेहिं पंजरेहिं च, संनिरुद्धे सुदुक्खिए ॥ १४ ॥ जीवियंतं तु  
संपत्ते, मंसट्ठा भक्खियव्वए । पासित्ता से महापत्ते, सारहिं इणमव्ववी ॥ १५ ॥ कस्स  
अट्ठा इमे पाणा, एए सव्वे सुहेसिणो । वाडेहिं पंजरेहिं च, सन्निरुद्धा य अच्छहिं ॥ १६ ॥  
अह सारही तओ भणइ, एए भद्दा उ पाणिणो । तुज्झं विवाहकज्जम्मि, भोयावेउं बहुं  
जणं ॥ १७ ॥ सोऊण तस्स वयणं, बहुपाणिविणासणं । चित्तेइ से महापत्ते, साणुक्कोसे  
जिएहि ऊ ॥ १८ ॥ जइ मज्झ कारणा एए, हम्मंति सुबहू जिया । न मे एयं तु निस्सेसं,  
परलोगे भविस्सई ॥ १९ ॥ सो कुंडलाण जुयलं, सुत्तगं च महायसो । आभरणाणि  
य सव्वाणि, सारहिस्स पणामए ॥ २० ॥ मणपरिणामो य कओ, देवा य जहोइयं  
समोइण्णा । सव्विद्धीइ सपरिसा, निक्खमणं तस्स काउं जे ॥ २१ ॥ देवमणुस्स-  
परिवुडो, सीयारयणं तओ समारूढो । निक्खमिय बारगाओ, रेवययम्मि ठिओ  
भगवं ॥ २२ ॥ उज्जाणं संपत्तो, ओइण्णो उत्तमाउ सीयाओ । साहस्सीइ परिवुडो,

१ कोउयं-मुसलाइणा णिलाडफासो, मंगलं-दहिअकखयदुव्वाचंदणाइणा किज्जंतं  
विहाणं, तस्समयपचलियवेवाहियरीइकुलमेराणुसारकयकिचो न्ति अट्ठो ।

अह निक्खमई उ चित्ताहिं ॥ २३ ॥ अह से सुगंधगंधीए, तुरियं मउयकुंघिए । सयमेव लुंचई केसे, पंचसुट्ठीहिं समाहिओ ॥ २४ ॥ वासुदेवो य णं भणइ, लुत्तकेसं जिइंदियं । इच्छियमणोरहं तुरियं, पावसु तं दमीसरा ! ॥ २५ ॥ नाणेणं दंसणेणं च, चरित्तेण तहेव य । खंतीए सुत्तीए, बड्डमाणो भवाहि य ॥ २६ ॥ एवं ते राम-केसवा, दसारा य बहू जणा । अरिट्ठणेमिं वंदित्ता, अइयया वारगापुरिं ॥ २७ ॥ सोऊण रायकन्ना, पव्वज्जं सा जिणस्स उ । नीहासा य निराणंदा, सोणेण उ समु-च्छिया ॥ २८ ॥ राईमई विचिंतेइ, धिरत्थु मम जीवियं । जाइहं तेण परिचत्ता, सेयं पव्वइउं मम ॥ २९ ॥ अह सा भमरसन्निभे, कुञ्चफणगसाहिए । सयमेव लुंचई केसे, धिइमंता ववस्सिया ॥ ३० ॥ वासुदेवो य णं भणइ, लुत्तकेसं जिइंदियं । संसारसागरं घोरं, तर कन्ने ! लहुं लहुं ॥ ३१ ॥ सा पव्वइया संती, पव्वावेसी तहिं बहुं । सयणं परियणं चेव, सीलवंता बहुस्सुया ॥ ३२ ॥ गिरिं रेवययं जंती, वासेणुळा उ अंतरा । वासंते अंधयारंमि, अंतो लयणस्स सा ठिया ॥ ३३ ॥ चीवराइं विसारंती, जहाजायत्ति पासिया । रहनेमी भग्गचित्तो, पच्छा दिट्ठो य तीइ वि ॥ ३४ ॥ भीया य सा तहिं दट्ठुं, एगंते संजयं तयं । वाहाहिं काउं संगोप्फं, वेवमाणी निसीयई ॥ ३५ ॥ अह सो वि रायपुत्तो, समुद्विजयंगओ । भीयं पवेवियं दट्ठुं, इमं वक्कमुदाहरे ॥ ३६ ॥ रहनेमी अहं भेइ, सुरूवे ! चारुमासिणी ! । ममं भयाहि सुयण !, न ते पीला भविस्सई ॥ ३७ ॥ एहि ता भुंजिमो भोए, माणुस्सं खु सुदुल्लहं । भुतभोगी तओ पच्छा, जिणमग्गं चरिस्समो ॥ ३८ ॥ दट्ठूण रहनेमिं तं, भग्गुज्जोयपराजियं । राईमई असंभंता, अप्पाणं संवरे तहिं ॥ ३९ ॥ अह सा रायवरकन्ना, सुट्ठिया नियमव्वए । जाई कुलं च सीलं च, रक्खमाणी तयं वए ॥ ४० ॥ जइइसि रूवेण वेसमणो, ललिण्ण नलकूवरो । तहा वि ते न इच्छामि, जइइसि सक्खं पुरंदरो ॥ ४१ ॥ पक्खंदे जलियं जोइं, धूमकेउं दुरासयं । नेच्छंति वंतयं भोत्तुं, कुले जाया अगंधणे ॥ ४२ ॥ धिरत्थु तेइजसोकामी, जो तं जीविय-कारणा । वंतं इच्छसि आवेउं, सेयं ते मरणं भवे ॥ ४३ ॥ अहं च भोगरायस्स, तं च सि अंधगवण्हिणो । मा कुले गंधणा होमो, संजमं निहुओ चर ॥ ४४ ॥ जइ तं काहिसि भावं, जा जा दिच्छसि नारिओ । वायाविद्धोव्व हडो, अट्ठिअप्पा भवि-स्ससि ॥ ४५ ॥ गोवालो भंडवालो वा, जहा तद्ववण्हिस्सरो । एवं अणिस्सरो तं पि, सामण्यस्स भविस्ससि ॥ ४६ ॥ कोहं माणं निगिण्हित्ता, मायं लोभं च सव्वसो । इंदियाइं वसे काउं, अप्पाणं उवसंहरे ॥ ४७ ॥ तीसे सो वयणं सोच्चा, संजयाए सुभासियं । अंकुसेण जहा नागो, धम्मे संपड्डिवाइओ ॥ ४८ ॥ मणगुत्तो वयगुत्तो,

कायशुत्तो जिह्दिओ । सामण्णं निच्चलं फासे, जावज्जीवं दढव्वओ ॥ ४९ ॥ उरुं तवं चरित्तार्णं, जाया दोण्णि वि केवली । सव्वं कम्मं खवित्तार्णं, सिद्धिं पत्ता अणुत्तरं ॥ ५० ॥ एवं करेति संयुद्धा, पंडिया पवियक्खणा । विणियदंति भोगेसु, जहा सो पुरिसोत्तमो ॥ ५१ ॥ ति-बेमि ॥ इति रहनेसिज्जनानां वावीसइमं अज्झयणं समत्तं ॥ २२ ॥

## अह केसिगोयमिज्जणामं तेवीसइमं अज्झयणं

जिणे पासित्ति नामेणं, अरहा लोगपूइओ । संयुद्धप्पा य सव्वन्नू, धम्मतित्थयरे जिणे ॥ १ ॥ तस्स लोगपईवस्स, आसि सीसे महायसे । केसी कुमारसमणे, विज्जाचरणपारगे ॥ २ ॥ ओहिनाणसुए बुद्धे, सीससंघसमाउले । गामाणुगामं रीयंते, सावत्थि पुरमागए ॥ ३ ॥ तिंदुयं नाम उज्जाणं, तम्मी नगरमंडले । फासुए सिज्जसंथारे, तत्थ वासमुवागए ॥ ४ ॥ अह तेणेव कालेणं, धम्मतित्थयरे जिणे । भगवं वद्धमाणित्ति, सव्वलोगंमि विस्सुए ॥ ५ ॥ तस्स लोगपईवस्स, आसि सीसे महायसे । भगवं गोयमे नामं, विज्जाचरणपारए ॥ ६ ॥ बारसंगविऊ बुद्धे, सीससंघसमाउले । गामाणुगामं रीयंते, सो वि सावत्थिमागए ॥ ७ ॥ कोट्टगं नाम उज्जाणं, तम्मी नगरमंडले । फासुए सिज्जसंथारे, तत्थ वासमुवागए ॥ ८ ॥ केसी कुमारसमणे, गोयमे य महायसे । उभओ वि तत्थ विहरिंसु, अल्लीणा सुसमाहिया ॥ ९ ॥ उभओ सीससंघाणं, संजयाणं तवरिंसणं । तत्थ चिंता समुप्पन्ना, गुणवंताण ताइणं ॥ १० ॥ केरिसो वा इमो धम्मो, इमो धम्मो व केरिसो । आयारधम्मपणिही, इमा वा सा व केरिसी? ॥ ११ ॥ चाउज्जामो य जो धम्मो, जो इमो पंचसिक्खिओ । देसिओ वद्धमाणेण, पासेण य महासुणी ॥ १२ ॥ अचेलओ य जो धम्मो, जो इमो संतरुत्तरो । एग कज्जपवन्नाणं, विसेसे किं नु कारणं? ॥ १३ ॥ अह ते तत्थ सीसाणं, विन्नाय पवितक्खियं । समागमे कयमई, उभओ केसिगोयमा ॥ १४ ॥ गोयमे पडिख्वन्नू, सीससंघसमाउले । जेट्ठं कुलमवेक्खंतो, तिंदुयं वणमागओ ॥ १५ ॥ केसी कुमारसमणे, गोयमं दिस्समागयं । पडिख्वं पडिवित्ति, सम्मं संपडिवज्जई ॥ १६ ॥ पलालं फासुयं तत्थ, पंचमं कुसतणाणि य । गोयमस्स निसेज्जाए, खिप्पं संपणामए ॥ १७ ॥ केसी कुमारसमणे, गोयमे य महायसे । उभओ निसण्णा सोहंति, चंदसूरसमप्पभा ॥ १८ ॥ समागया बहू तत्थ, पासंडा कोउगा मय्या ।

१ संताणीयसिस्से ति अट्ठो । २ अण्णाणिणो ।

गिहत्थाणं अणेगाओ, साहस्सीओ समागया ॥ १९ ॥ देवदाणवगंधवा, जक्ख-  
 रक्खसकिन्नरा । अदिस्साणं च भूयाणं, आसी तत्थ समागमो ॥ २० ॥ पुच्छामि  
 ते महाभाग !, केसी गोयममब्बवी । तओ केसिं बुवंतं तु, गोयमो इणमब्बवी  
 ॥ २१ ॥ पुच्छ भंते ! जहिच्छं ते, केसिं गोयममब्बवी । तओ केसी अणुत्ताए,  
 गोयमं इणमब्बवी ॥ २२ ॥ चाउज्जामो य जो धम्मो, जो इमो पंचसिक्खिओ ।  
 देसिओ वद्धमाणेण, पासेण य महामुणी ॥ २३ ॥ एगकज्जपवच्चाणं, विसेसे किं नु  
 कारणं ? । धम्मे दुविहे मेहावी, कहं विप्पच्चओ न ते ? ॥ २४ ॥ तओ केसिं बुवंतं  
 तु, गोयमो इणमब्बवी । पच्चा समिक्खए धम्मं, तत्तं तत्तविणिच्छियं ॥ २५ ॥  
 पुरिमा उज्जुजडा उ, वंकजडा य पच्छिमा । मज्झिमा उज्जुपच्चा उ, तेण धम्मे  
 दुहा कए ॥ २६ ॥ पुरिमाणं दुव्विसोज्झो उ, चरिमाणं दुरणुपालओ । कप्पो  
 मज्झिमाणां तु, सुविसोज्झो सुपालओ ॥ २७ ॥ साहु गोयम ! पच्चा ते, छिन्नो  
 मे संसओ इमो । अन्नो वि संसओ मज्झं, तं मे कहसु गोयमा ! ॥ २८ ॥ अचेलगो  
 य जो धम्मो, जो इमो संतरुत्तरो । देसिओ वद्धमाणेण, पासेण य महाजसा ॥ २९ ॥  
 एगकज्जपवच्चाणं, विसेसे किं नु कारणं । लिंगे दुविहे मेहावी, कहं विप्पच्चओ न ते ?  
 ॥ ३० ॥ केसिमेवं बुवाणं तु, गोयमो इणमब्बवी । विच्चाणेण समागम्म, धम्म-  
 साहणमिच्छियं ॥ ३१ ॥ पच्चयत्थं च लोगस्स, नाणाविहविगप्पणं । जत्तत्थं गहणत्थं  
 च, लोणे लिंगपओयणं ॥ ३२ ॥ अह भवे पइच्चा उ, मोक्खसब्भूयसाहणा । नाणं  
 च दंसणं चेव, चरितं चेव निच्छए ॥ ३३ ॥ साहु गोयम ! पच्चा ते, छिन्नो मे  
 संसओ इमो । अन्नो वि संसओ मज्झं, तं मे कहसु गोयमा ! ॥ ३४ ॥ अणेगाणं  
 सहस्साणं, मज्झे चिट्ठसि गोयमा ! । ते य ते अहिगच्छंति, कहं ते निजिया तुमे ?  
 ॥ ३५ ॥ एगे जिए जिया पंच, पंच जिए जिया दस । दसहा उ जिणित्ताणं,  
 सव्वसत्तू जिणामहं ॥ ३६ ॥ सत्तू य इह के वुत्ते ?, केसी गोयममब्बवी । तओ केसिं  
 बुवंतं तु, गोयमो इणमब्बवी ॥ ३७ ॥ एगप्पा अजिए सत्तू, कसाया ईदियाणि  
 य । ते जिणित्तु जहानायं, विहरामि अहं मुणी ॥ ३८ ॥ साहु गोयम ! पच्चा ते,  
 छिन्नो मे संसओ इमे । अन्नो वि संसओ मज्झं, तं मे कहसु गोयमा ! ॥ ३९ ॥  
 दीसंति बहवे लोए, पासवद्धा सरीरिणो । मुक्कपासो लहुब्भूओ, कहं तं विहरसी  
 मुणी ? ॥ ४० ॥ ते पासे सव्वसो छित्ता, निहंतूण उवायओ । मुक्कपासो लहुब्भूओ,  
 विहरामि अहं मुणी ! ॥ ४१ ॥ पासा य इइ के वुत्ता ?, केसी गोयममब्बवी ।  
 केसिमेवं बुवंतं तु, गोयमो इणमब्बवी ॥ ४२ ॥ रागद्वेसादओ तिग्वा, नेहपासा  
 भयंकरा । ते छिदित्तु जहानायं, विहरामि जहक्कमं ॥ ४३ ॥ साहु गोयम ! पच्चा

ते, छिन्नो मे संसओ इमो । अन्नो वि संसओ मज्झं, तं मे कहसु गोयमा ! ॥ ४४ ॥  
 अंतोहिययसंभूया, लया चिट्ठइ गोयमा ! । फलेइ विसभक्खीणि, सा उ उद्धरिया  
 कहं ? ॥ ४५ ॥ तं लयं सब्वसो छित्ता, उद्धरित्ता समूलियं । विहरामि जहानायं,  
 मुक्कोमि विसभक्खणं ॥ ४६ ॥ लया य इइ का वुत्ता ?, केसी गोयममब्बवी । केसिमेवं  
 बुवंतं तु, गोयमो इणमब्बवी ॥ ४७ ॥ भवतण्हा लया वुत्ता, भीमा भीमफलोदया ।  
 तमुच्छित्तु जहानायं, विहरामि जहासुहं ॥ ४८ ॥ साहु गोयम ! पन्ना ते, छिन्नो मे  
 संसओ इमो । अन्नो वि संसओ मज्झं, तं मे कहसु गोयमा ! ॥ ४९ ॥ संपज्जलिया  
 घोरा, अग्गी चिट्ठइ गोयमा ! । जे डहंति सरीरत्था, कहं विज्झाविया तुमे ? ॥ ५० ॥  
 महामेहप्पसूयाओ, गिज्झ वारि जलुत्तमं । सिंचामि सययं देहं, सित्ता नो डहंति मे  
 ॥ ५१ ॥ अग्गी य इइ के वुत्ता ?, केसी गोयममब्बवी । केसिमेवं बुवंतं तु, गोयमो इण-  
 मब्बवी ॥ ५२ ॥ कसाया अग्गिणो वुत्ता, सुयसीलतवो जलं । सुयधारामिहया संता,  
 भिन्ना हु न डहंति मे ॥ ५३ ॥ साहु गोयम ! पन्ना ते, छिन्नो मे संसओ इमो । अन्नो  
 वि संसओ मज्झं, तं मे कहसु गोयमा ! ॥ ५४ ॥ अयं साहसिओ भीमो, दुट्ठस्सो परि-  
 धावई । जंसि गोयम ! आरुढो, कहं तेण न हीरसि ? ॥ ५५ ॥ पधावतं निगिण्हामि,  
 सुयरस्सीसमाहियं । न मे गच्छइ उम्मग्गं, मग्गं च पडिवज्जई ॥ ५६ ॥ आसे य इइ के  
 वुत्ते ?, केसी गोयममब्बवी । केसिमेवं बुवंतं तु, गोयमो इणमब्बवी ॥ ५७ ॥ मणो  
 साहसिओ भीमो, दुट्ठस्सो परिधावई । तं सम्मं तु निगिण्हामि, धम्मसिक्खाइ कंथगं  
 ॥ ५८ ॥ साहु गोयम ! पन्ना ते, छिन्नो मे संसओ इमो । अन्नो वि संसओ मज्झं,  
 तं मे कहसु गोयमा ! ॥ ५९ ॥ कुप्पहा बहवो लोए, जेहिं नासंति जंतुणो । अद्धाणे  
 कह वटंतो, तं न नाससि गोयमा ? ॥ ६० ॥ जे य मग्गेण गच्छंति, जे य उम्मग्ग-  
 पट्टिया । ते सब्वे वैइया मज्झं, तो न नस्सामहं मुणी ! ॥ ६१ ॥ मग्गे य इइ के  
 वुत्ते ?, केसी गोयममब्बवी । केसिमेवं बुवंतं तु, गोयमो इणमब्बवी ॥ ६२ ॥  
 कुप्पवयणपासंडी, सब्वे उम्मग्गपट्टिया । सम्मग्गं तु जिणक्खायं, एस मग्गे हि  
 उत्तमे ॥ ६३ ॥ साहु गोयम ! पन्ना ते, छिन्नो मे संसओ इमो । अन्नो वि संसओ  
 मज्झं, तं मे कहसु गोयमा ! ॥ ६४ ॥ महाउदगवेगेण, वुज्झमाणाण पाणिणं,  
 सरणं गई पइट्ठा य, दीवं कं मज्जसी मुणी ? ॥ ६५ ॥ अत्थि एगो महादीवो,  
 वारिमज्जे महालओ । महाउदगवेगस्स, गई तत्थ न विज्जई ॥ ६६ ॥ दीवे य इइ के  
 वुत्ते ?, केसी गोयममब्बवी । केसिमेवं बुवंतं तु, गोयमो इणमब्बवी ॥ ६७ ॥ जरा-  
 मरणवेगेणं, वुज्झमाणाण पाणिणं । धम्मो दीवो पइट्ठा य, गई सरणमुत्तमं ॥ ६८ ॥  
 साहु गोयम ! पन्ना ते, छिन्नो मे संसओ इमो । अन्नो वि संसओ मज्झं, तं मे कहसु

गोयमा ! ॥ ६९ ॥ अण्णवंसि महोहंसि, नावा विपरिधावई । जंसि गोयम ! आरुढो, कहां पारं गमिस्ससि ? ॥ ७० ॥ जा उ अस्साविणी नावा, न सा पारस्स गामिणी । जा निरस्साविणी नावा, सा उ पारस्स गामिणी ॥ ७१ ॥ नावा य इइ का वुत्ता ? । केसी गोयममब्बवी । केसिमेवं बुवंतं तु, गोयमो इणमब्बवी ॥ ७२ ॥ सरीरमाहु नावत्ति, जीवो वुच्चइ नाविओ । संसारो अण्णवो वुत्तो, जं तरंति महेसिणो ॥ ७३ ॥ साहु गोयम ! पन्ना ते, छिन्नो मे संसओ इमो । अन्नो वि संसओ मज्झं, तं मे कहसु गोयमा ! ॥ ७४ ॥ अंधयारे तमे घोरे, चिट्ठंति पाणिणो बहू । को करिस्सइ उज्जोयं ?, सव्वलोयम्मि पाणिणं ॥ ७५ ॥ उग्गओ विमलो भाणू, सव्वलोयपभंकरो । सो करिस्सइ उज्जोयं, सव्वलोयंमि पाणिणं ॥ ७६ ॥ भाणू य इइ के वुत्ते ?, केसी गोयममब्बवी । केसिमेवं बुवंतं तु, गोयमो इणमब्बवी ॥ ७७ ॥ उग्गओ खीणसंसारो, सव्वन्नू जिणभक्खरो । सो करिस्सइ उज्जोयं, सव्वलोयंमि पाणिणं ॥ ७८ ॥ साहु गोयम ! पन्ना ते, छिन्नो मे संसओ इमो । अन्नो वि संसओ मज्झं, तं मे कहसु गोयमा ! ॥ ७९ ॥ सारीरमाणसे दुक्खे, बज्झमाणाण पाणिणं । खेमं सिवमणावाहं, ठाणं किं मच्चसी मुणी ? ॥ ८० ॥ अत्थि एगं धुवं ठाणं, लोगगंमि दुरारुहं । जत्थ नत्थि जरा मच्चू, वाहिणो वेयणा तहा ॥ ८१ ॥ ठाणे य इइ के वुत्ते ?, केसी गोयममब्बवी । केसिमेवं बुवंतं तु, गोयमो इणमब्बवी ॥ ८२ ॥ निव्वाणं ति अवाहं ति, सिद्धी लोगगमेव य । खेमं सिवं अणावाहं, जं चरंति महेसिणो ॥ ८३ ॥ तं ठाणं सासयं वासं, लोयगंमि दुरारुहं । जं संपत्ता न सोयंति, भवोहंतकरा मुणी ! ॥ ८४ ॥ साहु गोयम ! पन्ना ते, छिन्नो मे संसओ इमो । नमो ते संसयातीत !, सव्वसुत्तमहोयही ॥ ८५ ॥ एवं तु संसए छिन्ने, केसी घोरपरक्कमे । अभिवंदित्ता सिरसा, गोयमं तु महायसं ॥ ८६ ॥ पंचमहव्वयधम्मं, पडिवज्जइ भावओ । पुरिमस्स पच्छिमंमि, मग्गे तत्थ सुहावहे ॥ ८७ ॥ केसीगोयमओ निच्चं, तंमि आसि समागमे । सुयसीलसमुक्करिसो, महत्थत्थविणिच्छओ ॥ ८८ ॥ तोसिया परिसा सव्वा, सम्मगं समुवट्ठिया । संथुया ते पसीयंतु, भयवं केसिगोयमे ॥ ८९ ॥ त्ति-वेमि ॥ इति केसिगोयमिज्जणामं तेवीसइमं अज्झयणं समत्तं ॥ २३ ॥

## अह समिईओ णामं चउवीसइमं अज्झयणं

अट्ट पवयणमायाओ, समिई गुत्ती तहेव य । पंचेव य समिईओ, तओ गुत्तीउ आहिया ॥ १ ॥ इरियंभासेसण्णैदाणे, उच्चारे समिई इय । मणगुत्ती वयगुत्ती, कायगुत्ती



य अट्ठमा ॥ २ ॥ एयाओ अट्ठ समिईओ, समासेण वियाहिया । दुवालसंगं जिणक्खायं,  
 मायं जत्थ उ पवयणं ॥ ३ ॥ (१) आलंबणेणं कालेणं, मग्गेणं जयणाई य । चउका-  
 रणपरिसुद्धं, संजए इरियं रिए ॥ ४ ॥ तत्थ आलंबणं नाणं, दंसणं चरणं तहा । काले  
 य दिवसे वुत्ते, मग्गे उप्पहवज्जिए ॥ ५ ॥ दव्वओ खेत्तओ चेव, कालओ भावओ तहा ।  
 जयणा चउव्विहा वुत्ता, तं मे कित्तयओ सुण ॥ ६ ॥ दव्वओ चक्खुसा पेहे, जुगमित्तं  
 च खेत्तओ । कालओ जाव रीइज्जा, उवउत्ते य भावओ ॥ ७ ॥ इंदियत्थे विवज्जित्ता,  
 सज्जायं चेव पंचहा । तम्ममुत्ती तप्पुरक्कारे, उवउत्ते रियं रिए ॥ ८ ॥ (२) कोहे मैणे  
 य मायाएँ, लोभं य उवउत्तया । हाँसे भएँ मोहरिएँ, विकहासुं तहेव य ॥ ९ ॥ एयाइं  
 अट्ठठागाई, परिवज्जितु संजए । असावज्जं मियं काले, भासं भासिज पन्नवं ॥ १० ॥  
 (३) गवेसणाएँ गहँणे य, परिभोगेसणौ य जा । आहारावेहिसेज्जाएँ, एए तिज्जि  
 विसोहए ॥ ११ ॥ उग्गमुप्पायणं पढमे, बीए सोहेज्ज एसणं । परिभोयम्मि चउक्कं,  
 विसोहेज्ज जयं जई ॥ १२ ॥ (४) ओहोवेहोवग्गहियं, भंडगं दुविहं मुणी । गिण्हंतो  
 निक्खिवंतो य, पउंजेज्ज इमं विहिं ॥ १३ ॥ चक्खुसा पडिलेहिता, पमजेज्ज जयं जई ।  
 आइए निक्खिवेजा वा, दुहओऽवि समिए सया ॥ १४ ॥ (५) उच्चारं पासवणं, खेलं  
 सिंघाणजल्लियं । आहारं उवहिं देहं, अन्नं वावि तहाविहं ॥ १५ ॥ अणावायमसंलोएँ,  
 अणावाए चेव होइ संलोएँ । आवायमसंलोएँ, आवाए चेव संलोएँ ॥ १६ ॥ अणावाय-  
 मसंलोए, परस्सऽणुवघाइए । समे अज्झुसिरे वावि, अचिरकालकयम्मि य ॥ १७ ॥  
 वित्थिण्णे दूरमोगाढे, नासन्ने बिलवज्जिए । तसपाणबीयरहिए, उच्चारार्णिण वोसिरे  
 ॥ १८ ॥ एयाओ पंच समिईओ, समासेण वियाहिया । एत्तो य तओ गुत्तीओ, वोच्छामि  
 अणुपुव्वसो ॥ १९ ॥ (६) सच्चा तहेव मोसौ य, सच्चा मोसौ तहेव य । चउत्थी अस-  
 च्चमोसौ य, मणगुत्ती चउव्विहा ॥ २० ॥ संरंभसमारंभे, आरंभम्मि तहेव य । मणं  
 पवत्तमाणं तु, नियत्तेज्ज जयं जई ॥ २१ ॥ (७) सच्चा तहेव मोसौ य, सच्चा मोसौ  
 तहेव य । चउत्थी असच्चमोसौ य, वइगुत्ती चउव्विहा ॥ २२ ॥ संरंभसमारंभे, आरं-  
 भम्मि तहेव य । वयं पवत्तमाणं तु, नियत्तेज्ज जयं जई ॥ २३ ॥ (८) ठाणे निसीयणे  
 चेव, तहेव य तुयट्ठणे । उल्लंघणपल्लंघणे, इंदियाण य जुंजणे ॥ २४ ॥ संरंभसमारंभे,  
 आरंभम्मि तहेव य । कायं पवत्तमाणं तु, नियत्तेज्ज जयं जई ॥ २५ ॥ एयाओ पंच  
 समिईओ, चरणस्स य पवत्तणे । गुत्ती नियत्तणे वुत्ता, अलुभत्थेसु सव्वसो ॥ २६ ॥ एया  
 पवयणमाया, जे सम्मं आयरे मुणी । सो खिप्पं सव्वसंसारा, विप्पमुच्चइ पंडिए ॥ २७ ॥  
 ति-वेमि ॥ इति समिईओ णामं चउवीसइमं अज्झयणं समत्तं ॥ २४ ॥

## अह जन्नइज्जनामं पंचवीसइमं अज्झयणं

माहणकुलसंभूओ, आसि विप्पो महायसो । जायाई जमजन्नंमि, जयघोसित्ति नामओ ॥ १ ॥ इंदियग्गामनिग्गाही, मग्गगामी महासुणी । गामाणुगामं रीयंते, पत्तो वाणारसिं पुरिं ॥ २ ॥ वाणारसीए बहिया, उज्जाणंमि मणोरमे । फासुए सेज्जसंथारे, तत्थ वासमुवागए ॥ ३ ॥ अह तेणेव कालेणं, पुरीए तत्थ माहणे । विजयघोसित्ति नामेण, जन्नं जयइ वेयवी ॥ ४ ॥ अह से तत्थ अणगारे, मासक्खमणपारणे । विजयघोसरस्स जन्नंमि, भिक्खमट्ठा उवट्ठिए ॥ ५ ॥ समुवट्ठियं तहिं संतं, जायगो पडिसेहए । न हु दाहामि ते भिक्खं, भिक्खू ! जायाहि अन्नओ ॥ ६ ॥ जे य वेयविरु विप्पा, जन्नट्ठा य जे दिया । जोइसंगविरु जे य, जे य धम्माण पारगा ॥ ७ ॥ जे समत्था समुद्धत्तुं, परमप्पाणमेव य । तेसिं अन्नमिणं देयं, भो भिक्खू ! सव्वकामियं ॥ ८ ॥ सो तत्थ एवं पडिसिद्धो, जायगेण महासुणी । नवि रुट्ठो नवि तुट्ठो, उत्तमट्ठगवेसओ ॥ ९ ॥ नन्नट्ठं पाणहेउं वा, नवि निव्वाहणाय वा । तेसिं विमोक्खणट्ठाए, इमं वयणमव्ववी ॥ १० ॥ नवि जाणासि वेयमुहं, नवि जन्नाण जं मुहं । नक्खत्ताण मुहं जं च, जं च धम्माण वा मुहं ॥ ११ ॥ जे समत्था समुद्धत्तुं, परमप्पाणमेव य । न ते तुमं वियाणासि, अह जाणासि तो भण ॥ १२ ॥ तस्सक्खेवपमोक्खं तु, अचयंतो तहिं दिओ । सपरिसो पंजली होउं, पुच्छई तं महासुणि ॥ १३ ॥ वेयाणं च मुहं बूहि, बूहि जन्नाण जं मुहं । नक्खत्ताण मुहं बूहि, बूहि धम्माण वा मुहं ॥ १४ ॥ जे समत्था समुद्धत्तुं, परमप्पाणमेव य । एयं मे संसयं सव्वं, साहू ! कहसु पुच्छिओ ॥ १५ ॥ अग्गिहुत्तमुहा वेया, जन्नट्ठी वेयसा मुहं । नक्खत्ताण मुहं चंदो, धम्माणं कासवो मुहं ॥ १६ ॥ जहा चंदं गहाईया, चिट्ठंति पंजलीउडा । वंदमाणा नमंसंता, उत्तमं मणहारिणो ॥ १७ ॥ अजाणगा जन्नवाई, विज्जामाहणसंपया । गूढा सज्झायतवसा, भासच्छन्ना इवग्गिणो ॥ १८ ॥ जो लोए बंभणो वुत्तो, अग्गी व महिओ जहा । सया कुसलसंदिट्ठं, तं वयं बूम माहणं ॥ १९ ॥ जो न सज्जइ आगंतुं, पव्वयंतो न सोयइ । रमइ अज्जवयणंमि, तं वयं बूम माहणं ॥ २० ॥ जायरूवं जहामट्ठं, निद्धंतमलपावगं । रागदोसभयाईयं, तं वयं बूम माहणं ॥ २१ ॥ तवस्सियं किंसं दंतं, अवचियमंससोणियं । सुव्वयं पत्तिव्वाणं, तं वयं बूम माहणं ॥ २२ ॥ तसपाणे वियाणेत्ता, संगहेण य थावरे । जो न हिंसइ ति विहेण, तं वयं बूम माहणं ॥ २३ ॥ कोहा वा जइ वा हासा, लोहा वा जइ वा भया । मुसं न वयई जो उ, तं वयं बूम माहणं ॥ २४ ॥

चित्तमंतमचित्तं वा, अप्पं वा जइ वा बहुं । न गिण्हइ अदत्तं जे, तं वयं बूम माहणं ॥ २५ ॥ दिव्वमाणुस्सतेरिच्छं, जो न सेवइ मेहुणं । मणसा कायवक्केणं, तं वयं बूम माहणं ॥ २६ ॥ जहा पोमं जले जायं, नोवल्लिप्पइ वारिणा । एवं अलितं कामेहिं, तं वयं बूम माहणं ॥ २७ ॥ अलोलुयं मुहाजीविं, अणगारं अक्किचणं । असंसत्तं गिहत्थेसु, तं वयं बूम माहणं ॥ २८ ॥ जहिता पुव्वसंजोगं, नाइसंगे य बंधवे । जो न सजइ भोगेसु, तं वयं बूम माहणं ॥ २९ ॥ पसुबंधा सव्ववेया, जहं च पावकम्मणा । न तं तायंति दुस्सीलं, कम्माणि बलवंति हि ॥ ३० ॥ न वि मुंडिणए समणो, न ओंकारेण वंभणो । न मुणी रण्णवासेणं, कुसचीरेण न तावसो ॥ ३१ ॥ समयाए समणो होइ, वंभचेरेण वंभणो । नाणेण य मुणी होइ, तवेण होइ तावसो ॥ ३२ ॥ कम्मणा वंभणो होइ, कम्मणा होइ खत्तिओ । वइस्सो कम्मणा होइ, सुहो हवइ कम्मणा ॥ ३३ ॥ एए पाउकरे बुद्धे, जेहिं होइ सिणायओ । सव्वकम्मविणिम्मुकं, तं वयं बूम माहणं ॥ ३४ ॥ एवं गुणसमाउत्ता, जे भवंति दिउत्तमा । ते समत्था समुद्धत्तुं, परमप्पाणमेव य ॥ ३५ ॥ एवं तु संसए छिन्ने, विजयघोसे य माहणे । समुदाय तओ तं तु, जयघोसं महासुणिं ॥ ३६ ॥ तुट्ठे य विजयघोसे, इणमुदाहु कयंजली । माहणत्तं जहाभूयं, सुट्ठु मे उवदंसियं ॥ ३७ ॥ तुब्भे जइया जन्नाणं, तुब्भे वेयविक विळ । जोइसंगविक तुब्भे, तुब्भे धम्माण पारगा ॥ ३८ ॥ तुब्भे समत्था उद्धत्तुं, परमप्पाणमेव य । तमणुग्गहं करेहउम्हं, भिक्खेणं भिक्खुउत्तमा ! ॥ ३९ ॥ न कजं मज्झ भिक्खेण, खिप्पं निक्खमसू दिया । मा भमिहिसि भयावट्ठे, घोरे संसारसागरे ॥ ४० ॥ उवलेवो होइ भोगेसु, अभोगी नोवल्लिप्पइ । भोगी भमइ संसारे, अभोगी विप्पमुच्चइ ॥ ४१ ॥ उल्लो सुक्खो य दो छुटा, गोलया मड्डियामया । दो वि आवडिया कुट्ठे, जो उल्लो सोऽत्थ लग्गइ ॥ ४२ ॥ एवं लग्गंति दुम्मेहा, जे नरा कामलालसा । विरत्ता उ न लग्गंति, जहा से सुक्कगोलए ॥ ४३ ॥ एवं से विजयघोसे, जयघोसस्स अंतिए । अणगारस्स निक्खंतो, धम्मं सोच्चा अणुत्तरं ॥ ४४ ॥ खवित्ता पुव्वकम्माइं, संजमेण तवेण य । जयघोसविजयघोसा, सिद्धिं पत्ता अणुत्तरं ॥ ४५ ॥ ति-बेमि ॥ इति जन्नइज्जनामं पंचवी-सइमं अज्झयणं समत्तं ॥ २५ ॥

## अह सामायारी णामं छव्वीसइमं अज्झयणं

सामायारिं पक्खस्वामि, सव्वदुक्खविमोक्खणिं । जं चरित्ताण निग्गंथा, तिण्णा

संसारसागरं ॥ १ ॥ पढमा आवस्सिया नाम, विइया य निसीहिया । आपुच्छणा  
 य तइया, चउत्थी पडिपुच्छणा ॥ २ ॥ पंचमी छंदणा नाम, इच्छाकारो य छट्ठओ ।  
 सत्तमो मिच्छाकारो य, तहकारो य अट्ठमो ॥ ३ ॥ अब्भुट्ठाणं च नवमं, दसमी  
 उवसंपया । एसा दसंगा साहूणं, सामायारी पवेइया ॥ ४ ॥ गमणे आवस्सियं  
 कुज्जा, ठाणे कुज्जा निसीहियं । आपुच्छणं सयंकरणे, परकरणे पडिपुच्छणं ॥ ५ ॥  
 छंदणा दव्वजाएणं, इच्छाकारो य सारणे । मिच्छाकारो य निंदाए, तहकारो  
 पडिस्सुए ॥ ६ ॥ अब्भुट्ठाणं गुरुपूया, अच्छणे उवसंपया । एवं दुपंचसंजुत्ता, सामा-  
 यारी पवेइया ॥ ७ ॥ पुव्विहंमि चउब्भाए, आइच्चंमि समुट्ठिए । भंडयं पडिलेहिता,  
 वंदित्ता य तओ गुरुं ॥ ८ ॥ पुच्छिज्ज पंजलीउडो, किं कायव्वं मए इह । इच्छं  
 निओइउं भंते !, वेयावच्चे व सज्झाए ॥ ९ ॥ वेयावच्चे निउत्तेण, कायव्वं अग्नि-  
 लायओ । सज्झाए वा निउत्तेण, सव्वदुक्खविमोक्खणे ॥ १० ॥ दिवसस्स चउरो  
 भागे, भिक्खू कुज्जा वियक्खणो । तओ उत्तरगुणे कुज्जा, दिणभागेसु चउसु वि  
 ॥ ११ ॥ पढमं पोरिसि सज्झायं, बीयं ज्ञाणं झियायई । तइयाए भिक्खायरियं,  
 पुणो चउत्थीइ सज्झायं ॥ १२ ॥ असाढे मासे दुपया, पोसे मासे चउप्पया ।  
 चित्तासोएसु मासेसु, तिप्पया हवइ पोरिसी ॥ १३ ॥ अंगुलं सत्तरत्तेणं, पक्खेणं  
 च दुअंगुलं । वट्ठए हायए वावि, मासेणं चउरंगुलं ॥ १४ ॥ आसाढबहुल-  
 पक्खे, भद्वए कत्तिए य पोसे य । फग्गुणवइसाहेसु य, बोद्धव्वा ओमरत्ताओ  
 ॥ १५ ॥ जेट्ठामूले आसाढसावणे, छहिं अंगुलेहिं पडिलेहा । अट्ठहिं बीयतयंमि,  
 तइए दस अट्ठहिं चउत्थे ॥ १६ ॥ रत्तिं पि चउरो भागे, भिक्खू कुज्जा विय-  
 क्खणो । तओ उत्तरगुणे कुज्जा, राइभाएसु चउसु वि ॥ १७ ॥ पढमं पोरिसि  
 सज्झायं, बीयं ज्ञाणं झियायई । तइयाए निदमोक्खं तु, चउत्थी भुज्जो वि  
 सज्झायं ॥ १८ ॥ जं नेइ जया रत्तिं, नक्खत्तं तंमि नहचउब्भाए । संपत्ते  
 विरमेज्जा, सज्झायं पओसकालंमि ॥ १९ ॥ तम्ममेव य नक्खत्ते, गयणचउब्भाग-  
 सावसेसंमि । वेरत्तियं पि कालं, पडिलेहिता मुणी कुज्जा ॥ २० ॥ पुव्विहंमि  
 चउब्भाए, पडिलेहिताणं भंडयं । गुरुं वंदित्तु सज्झायं, कुज्जा दुक्खविमोक्खणं  
 ॥ २१ ॥ पोरिसीए चउब्भाए, वंदित्ताण तओ गुरुं । अपडिक्कमित्ता कालस्सं,  
 भायणं पडिलेहए ॥ २२ ॥ मुहपोत्तिं पडिलेहिता, पडिलेहिज्ज गोच्छगं । गोच्छग-  
 लइयंगुलिओ, वत्थाइं पडिलेहए ॥ २३ ॥ उट्ठं थिरं अतुरियं, पुव्वं ता वत्थमेव  
 पडिलेहे । तो विइयं पप्फोडे, तइयं च पुणो पमज्जिज्जा ॥ २४ ॥ अणच्चावियं

१ सज्झायकालाओ अणिवित्तो होऊण ।

सुत्ता० ६५

अवलियं, अणानुबंदिममोसलिं चेव । छप्पुरिमा नव खोडा, पाणीपाणिविसोहणं  
 ॥ २५ ॥ आरम्भा सम्मद्दा, वज्जेयव्वा य मोसली तइया । पप्फोडणा चउत्थी,  
 विक्खित्ता वेइया छट्ठी ॥ २६ ॥ पसिडिलपलंबलोला, एगामोसा अणेगस्वधुणा ।  
 कुणइ पमाणपमायं, संकिय गणणोवगं कुज्जा ॥ २७ ॥ अण्ण्णाइरित्तपडिलेहा,  
 अविवच्चासा तहेव य । पढमं पयं पसत्थं, सेसाणि उ अप्पसत्थाइं ॥ २८ ॥  
 पडिलेहणं कुणंतो, सिहो कहं कुणइ जणवयकहं वा । देइ व पच्चक्खाणं, वाएइ सयं  
 पडिच्छइ वा ॥ २९ ॥ पुढवीआउक्काए, तेऊवाऊवणस्सइतसाणं । पडिलेहणापमत्तो,  
 छण्हं पि विराहओ होइ ॥ ३० ॥ पुढवीआउक्काए, तेऊवाऊवणस्सइतसाणं ।  
 पडिलेहणाआउत्तो, छण्हं संरक्खओ होइ ॥ ३१ ॥ तइयाए पोरिसीए, भत्तं पाणं  
 गवेसए । छण्हं अन्नयरागंमि, कारणमि समुट्ठिए ॥ ३२ ॥ वेयण वेयावच्चे, इरियट्ठाए  
 य संजमट्ठाए । तह पाणवत्तियाए, छट्ठं पुण धम्मचित्ताए ॥ ३३ ॥ निगगंथो  
 धिइमंतो, निगगंथी वि न करेज्ज छहिं चेव । ठाणेहिं उ इमेहिं, अणइक्कमणाइ से  
 होइ ॥ ३४ ॥ आयंके उवसग्गे, तित्तिक्खया बंभचेरगुत्तीसु । पाणिदया तवहेउं,  
 सरीरवोल्छेयणट्ठाए ॥ ३५ ॥ अवसेसं भंडगं गिज्झ, चक्खुसा पडिलेहए । परम-  
 द्दजोयणाओ, विहारं विहरए सुणी ॥ ३६ ॥ चउत्थीए पोरिसीए, निक्खिवित्ताण  
 भायणं । सज्झायं तओ कुज्जा, सव्वभावविभावणं ॥ ३७ ॥ पोरिसीए चउब्भाए,  
 वंदित्ताण तओ गुरुं । पडिक्कमित्ता कालस्स, सेजं तु पडिलेहए ॥ ३८ ॥ पासवणु-  
 चारभूमिं च, पडिलेहिज्ज जयं जई । काउस्सगं तओ कुज्जा, सव्वदुक्खविमोक्खणं  
 ॥ ३९ ॥ देवसियं च अइयारं, चित्तिज्जा अणुपुव्वसो । नाणे य दंसणे चेव,  
 चरित्तंमि तहेव य ॥ ४० ॥ पारियकाउस्सग्गो, वंदित्ताण तओ गुरुं । देवसियं तु  
 अइयारं, आलोएज्ज जहक्कमं ॥ ४१ ॥ पडिक्कमितु निस्सल्लो, वंदित्ताण तओ  
 गुरुं । काउस्सगं तओ कुज्जा, सव्वदुक्खविमोक्खणं ॥ ४२ ॥ पारियकाउस्सग्गो,  
 वंदित्ताण तओ गुरुं । थुइमंगलं च काऊण, कालं संपडिलेहए ॥ ४३ ॥ पढमं पोरिसि  
 सज्झायं, विइयं ज्ञाणं झियायई । तइयाए निइमोक्खं तु, सज्झायं तु चउत्थिए  
 ॥ ४४ ॥ पोरिसीए चउत्थीए, कालं तु पडिलेहिया । सज्झायं तु तओ कुज्जा,  
 अबोहंतो असंजए ॥ ४५ ॥ पोरिसीए चउब्भाए, वंदिऊण तओ गुरुं । पडिक्कमितु  
 कालस्स, कालं तु पडिलेहए ॥ ४६ ॥ आगए कायवोस्सग्गे, सव्वदुक्खविमोक्खणे ।  
 काउस्सगं तओ कुज्जा, सव्वदुक्खविमोक्खणं ॥ ४७ ॥ राइयं च अइयारं, चित्तिज्ज  
 अणुपुव्वसो । नाणंमि दंसणंमि य, चरित्तंमि तवंमि य ॥ ४८ ॥ पारियकाउस्सग्गो,  
 वंदित्ताण तओ गुरुं । राइयं तु अइयारं, आलोएज्ज जहक्कमं ॥ ४९ ॥ पडिक्कमितु

निस्सल्लो, वंदिताण तओ गुरं । काउस्सगं तओ कुज्जा, सव्वदुक्खविमोक्खणं  
॥ ५० ॥ किं तवं पडिवज्जामि, एवं तत्थ विंचितए । काउस्सगं तु पारिता, करिज्जा  
जिणसंथवं ॥ ५१ ॥ पारियकाउस्सगो, वंदिताण तओ गुरं । तवं संपडिवज्जेता,  
कुज्जा सिद्धाण संथवं ॥ ५२ ॥ एसा सामायारी, समासेण वियाहिया । जं चरिता  
बहू जीवा, तिण्णा संसारसागरं ॥ ५३ ॥ ति-वेमि ॥ इति सामायारी णामं  
छव्वीसइमं अज्झयणं समत्तं ॥ २६ ॥

## अह खलुंकिज्जणामं सत्तावीसइमं अज्झयणं

थेरे गणहरे गग्गे, मुणी आसि विसारए । आइण्णे गणिभावमि, समाहिं  
पडिसंथए ॥ १ ॥ वहणे वहमाणस्स, कंतारं अइवत्तई । जोगे वहमाणस्स, संसारो  
अइवत्तई ॥ २ ॥ खलुंके जो उ जोएइ, विहम्ममाणो किलिस्सई । असमाहिं च वेएइ,  
तोत्तओ से य भज्जई ॥ ३ ॥ एगं डसइ पुच्छंमि, एगं विंधइऽभिकखणं । एगो  
भंजइ समिलं, एगो उप्पहपट्ठिओ ॥ ४ ॥ एगो पडइ पासेणं, निवेसइ निवज्जई ।  
उक्कुइं उप्पिडई, सढे बालगवी वए ॥ ५ ॥ माई मुद्धेण पडई, कुद्धे गच्छइ पडि-  
प्पहं । मयलक्खेण चिट्ठई, वेगेण य पहावई ॥ ६ ॥ छिन्नाले छिंदई सेलिं, दुइंतो  
भंजए जुगं । से वि य सुस्सुयाइत्ता, उज्जहिता पलायए ॥ ७ ॥ खलुंका जारिसा  
जोज्जा, दुस्सीसा वि हु तारिसा । जोइया धम्मजाणंमि, भज्जंती धिइदुब्बला ॥ ८ ॥  
इड्ढीगारविए एगे, एगेऽत्थ रसगारवे । सायागारविए एगे, एगे सुचिरकोहणे ॥ ९ ॥  
भिकखालसिए एगे, एगे ओमाणभीरुए । थद्धे एगेऽणुसासंमि, हेज्जहिं कारणेहि य  
॥ १० ॥ सो वि अंतरभासिल्लो, दोसमेव पकुव्वई । आयरियाणं तु वयणं, पडि-  
कूलेइऽभिकखणं ॥ ११ ॥ न सा ममं वियाणाइ, न वि सा मज्झ दाहिई । निग्गया  
होहिई मन्ने, साहू अन्नोऽत्थ व[ज्ज]च्चउ ॥ १२ ॥ पेसिया पलिउंचंति, ते परियंति  
समंतओ । रायवेट्ठिं च मज्जंता, करंति भिउडिं मुहे ॥ १३ ॥ वाइया संगहिया  
चेव, भत्तपाणेण पोसिया । जायपक्खा जहा हंसा, पक्कमंति दिसो दिसिं ॥ १४ ॥  
अह सारही विंचितेइ, खलुंकेहिं समागओ । किं मज्झ दुट्ठसीसेहिं, अप्पा मे अव-  
सीयई ॥ १५ ॥ जारिसा मम सीसा उ, तारिसा गल्लिगइहा । गल्लिगइहे जहित्तणं,  
दढं पणिण्हई तवं ॥ १६ ॥ सिउमद्वसंपन्नो, गंभीरो सुसमाहिओ । विहरइ माहिं  
महप्पा, सीलभूएण अप्पणा ॥ १७ ॥ ति-वेमि ॥ इति खलुंकिज्जणामं सत्त-  
वीसइमं अज्झयणं समत्तं ॥ २७ ॥

## अह मोक्खमग्गगई णामं अट्ठावीसइमं अज्झयणं

मोक्खमग्गगई तच्चं, सुणेहं जिणभासियं । चउकारणसंजुत्तं, नाणदंसणलक्खणं ॥ १ ॥ नाणं च दंसणं चेव, चरित्तं च तवो तहा । एस मग्गुत्ति पज्जतो, जिणेहिं वरदंसिहिं ॥ २ ॥ नाणं च दंसणं चेव, चरित्तं च तवो तहा । एयं मग्गमणुप्पत्ता, जीवा गच्छंति सोग्गई ॥ ३ ॥ तत्थ पंचविहं नाणं, सुयं आभिनिबोहियं । ओहि-  
नाणं तु तइयं, मणनाणं च केवलं ॥ ४ ॥ एयं पंचविहं नाणं, दव्वाण य गुणाण य । पज्जवाणं च सव्वेसिं, नाणं नाणीहिं देसियं ॥ ५ ॥ गुणाणमासओ दव्वं, एगदव्वस्सिया गुणा । लक्खणं पज्जवाणं तु, उभओ अस्सिया भवे ॥ ६ ॥ धम्मो अहम्मो आगासं, कालो पुग्गलजंतवो । एस लोगो ति पज्जतो, जिणेहिं वरदंसिहिं ॥ ७ ॥ धम्मो अहम्मो आगासं, दव्वं इक्किमाहिं । अणंताणि य दव्वाणि, कालो पुग्गलजंतवो ॥ ८ ॥ गइलक्खणो उ धम्मो, अहम्मो ठाणलक्खणो । भायणं सव्वदव्वाणं, नहं ओगाहलक्खणं ॥ ९ ॥ वत्तणालक्खणो कालो, जीवो उवओग-  
लक्खणो । नाणेणं दंसणेणं च, सुहेण य दुहेण य ॥ १० ॥ नाणं च दंसणं चेव, चरित्तं च तवो तहा । वीरियं उवओगो य, एयं जीवस्स लक्खणं ॥ ११ ॥ सइ-  
घयारउज्जोओ, पहा छायाऽऽतवो इ वा । वण्णरसगंधफासा, पुग्गलाणं तु लक्खणं ॥ १२ ॥ एगत्तं च पुहुत्तं च, संखा संठाणमेव य । संजोगा य विभागा य, पज्ज-  
वाणं तु लक्खणं ॥ १३ ॥ जीवाजीवा य बंधो य, पुण्णं पावाऽऽसवो तहा । संवरो निज्जरा मोक्खो, संतेए तहिया नव ॥ १४ ॥ तहियाणं तु भावाणं, सव्भावे उवएसणं । भावेणं सइहंतस्स, सम्मतं तं वियाहिं ॥ १५ ॥ निस्सग्गुवएसइ, आणइ सुत्तवीयरइमेव । अभिगम-वित्थारइ, किरिया-संखेव-धम्मइ ॥ १६ ॥ भूयत्थेणाहिगया, जीवाजीवा य पुण्णपावं च । सहसम्मइयासवसंवरो य, रोएइ उ निस्सग्गो ॥ १७ ॥ जो जिणदिट्ठे भावे, चउव्विहे सइहाइ सयमेव । एमेव नज्जहति य, स निस्सग्गइत्ति नायव्वो ॥ १८ ॥ एए चेव उ भावे, उवइट्ठे जो परेण सइहइ । छउमत्थेण जिणेण व, उवएसइत्ति नायव्वो ॥ १९ ॥ रागो दोसो मोहो, अज्जाणं जस्स अवगयं होइ । आणाए रोयंतो, सो खलु आणाइ नामं ॥ २० ॥ जो सुत्त-  
महिजंतो, सुएण ओगाहइ उ सम्मतं । अणेण बाहिरेण व, सौ सुत्तइत्ति नायव्वो ॥ २१ ॥ एणेण अणेगाइ, पयाइ जो पसरइ उ सम्मतं । उदएव्व तेह्विदू, सो वीयरइत्ति नायव्वो ॥ २२ ॥ सो होइ अभिगमइ, सुयनाणं जेण अत्थओ दिट्ठं । एकारस अंगाइ, पइण्णं दिट्ठिवाओ य ॥ २३ ॥ दव्वाण सव्वभावा, सव्वपमाणेहिं

जस्स उवलद्धा । सव्वाहिं नयविहीहिं, वित्थाररुद्धि नायव्वो ॥ २४ ॥ दंसणनाण-  
चरित्ते, तवविणए सच्चसमिद्गुत्तीसु । जो किरियाभावरुई, सो खलु किरियारुई नाम  
॥ २५ ॥ अणभिग्गहियकुदिट्ठी, संखेवरुद्धि होइ नायव्वो । अविसारओ पवयणे,  
अणभिग्गहिओ य सेसेसु ॥ २६ ॥ जो अत्थिकायधम्मं, सुयधम्मं खलु चरित्तधम्मं  
च । सद्दहइ जिणाभिहियं, सो धम्मरुद्धि नायव्वो ॥ २७ ॥ परमत्थसंथवो वा,  
सुदिट्ठपरमत्थसेवणं वावि । वावन्नकुदंसणवज्जणा, य सम्मत्तसद्दहणा ॥ २८ ॥ नत्थि  
चरित्तं सम्मत्तविहूणं, दंसणे उ भइयव्वं । सम्मत्तचरिताइं, जुगवं पुव्वं व सम्मत्तं  
॥ २९ ॥ नादंसणिस्स नाणं, नाणेण विणा न हुंति चरणगुणा । अगुणिस्स नत्थि  
मोक्खो, नत्थि अमोक्खस्स निव्वाणं ॥ ३० ॥ निरुसंकि य निक्कंखिय, निव्विति-  
गिच्छा अमूढविट्ठी य । उवबूह थिरीकरणे, वच्छल्ल पभावणे अट्ठ ॥ ३१ ॥ सामा-  
इयत्थ पढमं, छेओवट्ठावणं भवे वीयं । परिहारविसुद्धीयं, सुहुमं तह संपरायं च  
॥ ३२ ॥ अक्खायमहक्खायं, छउमत्थस्स जिणस्स वा । एयं चयरित्तकरं, चरित्तं  
होइ आहियं ॥ ३३ ॥ तवो य दुविहो वुत्तो, बाहिरब्भंतरो तहा । बाहिरो छव्विहो  
वुत्तो, एवमब्भंतरो तवो ॥ ३४ ॥ नाणेण जाणई भावे, दंसणेण य सद्दहे । चरि-  
त्तेण निगिण्हाइ, तवेण परिसुज्झई ॥ ३५ ॥ खवेत्ता पुव्वकम्माइं, संजमेण तवेण  
य । सव्वदुक्खपहीणट्ठा, पक्कमंति महेसिणो ॥ ३६ ॥ त्ति-बेमि ॥ इति मोक्ख-  
मग्गगई णामं अट्ठावीसइमं अज्झयणं समत्तं ॥ २८ ॥

## अह सम्मत्तपरकमणामं एगूणतीसइमं अज्झयणं

सुयं मे आउसं ! तेणं भगवया एवमक्खायं । इह खलु सम्मत्तपरकमे नाम  
अज्झयणे समणेणं भगवया महावीरेणं कासवेणं पवेइए जं सम्मं सद्दहिता पत्तिइत्ता  
रोयइत्ता फासित्ता पालइत्ता तीरित्ता कित्तइत्ता सोहइत्ता आराहित्ता आणाए अणुपा-  
लइत्ता बहवे जीवा सिज्झंति बुज्झंति मुच्चंति परिनिव्वायंति सव्वदुक्खाणमंतं  
करेंति । तस्स णं अयमट्ठे एवमाहिज्जइ । तंजहा-संवेगे १ निव्वेए २ धम्मसद्धा ३  
गुरुसाहम्मियसुस्सुसणया ४ आलोयणया ५ निंदणया ६ गरिहणया ७ सामाइए ८  
चउव्वीसत्थवे ९ वंदणे १० पडिक्कमणे ११ काउस्सग्गे १२ पच्चक्खाणे १३  
थवथुइमंगले १४ कालपडिलेहणया १५ पायच्छित्तकरणे १६ खमावणया १७  
सज्झाए १८ वायणया १९ पुच्छणया २० परियट्ठणया २१ अणुप्पेहा २२  
धम्मकहा २३ सुयस्स आराहणया २४ एगग्गमणसंनिवेशणया २५ संजमे २६



तवे २७ वोदाणे २८ सुहसाए २९ अप्पडिवद्धया ३० विवित्तसयणासणसेवणया ३१ विणिग्रहणया ३२ संभोगपच्चक्खाणे ३३ उवहिपच्चक्खाणे ३४ आहारपच्चक्खाणे ३५ कसायपच्चक्खाणे ३६ जोगपच्चक्खाणे ३७ सरीरपच्चक्खाणे ३८ सहायपच्चक्खाणे ३९ भत्तपच्चक्खाणे ४० सव्भावपच्चक्खाणे ४१ पडिरूवणया ४२ वेयावच्चे ४३ सव्वगुणसंपन्नया ४४ वीयरगया ४५ खंती ४६ सुत्ती ४७ मद्दे ४८ अज्जे ४९ भावसच्चे ५० करणसच्चे ५१ जोगसच्चे ५२ मणगुत्तया ५३ वयगुत्तया ५४ कायगुत्तया ५५ मणसमाधारणया ५६ वयसमाधारणया ५७ कायसमाधारणया ५८ नाणसंपन्नया ५९ दंसणसंपन्नया ६० चरित्तसंपन्नया ६१ सोईदियनिग्गहे ६२ चक्खिदियनिग्गहे ६३ घाणिंदियनिग्गहे ६४ जिर्विभदियनिग्गहे ६५ फासिंदियनिग्गहे ६६ कोहविजए ६७ माणविजए ६८ मायाविजए ६९ लोहविजए ७० पेजदोसमिच्छादंसणविजए ७१ सेलेसी ७२ अकम्मया ७३ ॥ संवेगेणं भंते ! जीवे किं जणयइ ? संवेगेणं अणुत्तरं धम्मसद्धं जणयइ । अणुत्तराए धम्मसद्धाए संवेगं हव्वमागच्छइ । अणंताणुबंधिकोहमाणमायालोभे खवेइ । नवं च कम्मं न बंधइ । तप्पच्चइयं च णं मिच्छत्तविसोहिं काळण दंसणाराहए भवइ । दंसणविसोहीए य णं विसुद्धाए अत्थेगइए तेणेव भवग्गहणेणं सिज्झइ । विसोहीए य णं विसुद्धाए तच्चं पुणो भवग्गहणं नाइक्कमइ ॥ १ ॥ निव्वेएणं भंते ! जीवे किं जणयइ ? निव्वेएणं दिव्वमाणुसतेरिच्छिएसु कामभोगेसु निव्वेयं हव्वमागच्छइ । सव्वविसएसु विरज्जइ । सव्वविसएसु विरज्जमाणे आरंभपरिच्चायं करेइ । आरंभपरिच्चायं करेमाणे संसारमग्गं वोच्छिदइ, सिद्धिमग्गं पडिवन्ने य हवइ ॥ २ ॥ धम्मसद्धाए णं भंते ! जीवे किं जणयइ ? धम्मसद्धाए णं सायासोक्खेसु रज्जमाणे विरज्जइ । आगारधम्मं च णं चयइ । अणगारिए णं जीवे सारीरमाणसाणं दुक्खाणं छेयणमेयणसंजोगाईणं वोच्छेयं करेइ । अव्वाबाहं च सुहं निव्वत्तेइ ॥ ३ ॥ गुरुसाहम्मियसुस्सूणयाए णं भंते ! जीवे किं जणयइ ? गुरुसाहम्मियसुस्सूणयाए णं विणयपडिवत्तिं जणयइ । विणयपडिवन्ने य णं जीवे अणच्चासायणसीले नेरइयतिरिक्खजोणियमणुस्सदेवदुग्गईओ निरुंभइ । वण्णसंजलणभत्तिबहुमाणयाए मणुस्सदेवसुग्गईओ निबंधइ । सिद्धिं सोग्गइं च विसोहेइ । पसत्थाइं च णं विणयमूलाइं सव्वकज्जाइं साहेइ । अन्ने य बहवे जीवा विणिइत्ता भवइ ॥ ४ ॥ आलोयणाए णं भंते ! जीवे किं जणयइ ? आलोयणाए णं मायानियाणमिच्छादंसणसत्ताणं मोक्खमग्गविग्घाणं अणंतसंसारबंधणाणं उद्धरणं करेइ । उज्जुभावं च जणयइ । उज्जुभावपडिवन्ने य णं जीवे अमाई इत्थीवेयनपुंसगवेयं च न बंधइ । पुव्वबद्धं च णं

निजरेइ ॥ ५ ॥ निंदणयाए णं भंते ! जीवे किं जणयइ ? निंदणयाए णं पच्छाणुतावं जणयइ । पच्छाणुतावेणं विरज्जमाणे करणगुणसेहिं पडिवज्जइ । करणगुणसेढीपडिवज्जे य णं अणगारे मोहणिज्जं कम्मं उग्घाएइ ॥ ६ ॥ गरहणयाए णं भंते ! जीवे किं जणयइ ? गरहणयाए णं अपुरक्कारं जणयइ । अपुरक्कारगए णं जीवे अप्पसत्थेहिंतो जोगेहिंतो नियत्तेइ, पसत्थे य पडिवज्जइ । पसत्थजोगपडिवज्जे य णं अणगारे अणंतघा-  
इपज्जवे खवेइ ॥ ७ ॥ सामाइएणं भंते ! जीवे किं जणयइ ? सामाइएणं सावज्जजोगविरइं जणयइ ॥ ८ ॥ चउव्वीसत्थएणं भंते ! जीवे किं जणयइ ? चउव्वीसत्थएणं दंसणविसोहिं जणयइ ॥ ९ ॥ वंदणएणं भंते ! जीवे किं जणयइ ? वंदणएणं नीयागोयं कम्मं खवेइ । उच्चागोयं कम्मं निबंघइ । सोहमं च णं अपडिहयं आणाफलं निव्वत्तेइ । दाहिणभावं च णं जणयइ ॥ १० ॥ पडिक्कमणेणं भंते ! जीवे किं जणयइ ? पडिक्कमणेणं वयच्छिद्वाणि पिहेइ । पिहियवयच्छिदे पुण जीवे निरुद्धासवे असवलचरित्ते अट्ठसु पवयणमायासु उवउत्ते अपुहत्ते सुप्पणिहिए विहरइ ॥ ११ ॥ काउस्सग्गेणं भंते ! जीवे किं जणयइ ? काउस्सग्गेणं तीयपडुप्पन्नं पायच्छित्तं विसोहेइ । विसुद्ध-  
पायच्छित्ते य जीवे निव्वुयहियाए ओहरियभस्सुव भारवहे पसत्थज्ञाणोवगए सुहं-  
सुहेणं विहरइ ॥ १२ ॥ पच्चक्खाणेणं भंते ! जीवे किं जणयइ ? पच्चक्खाणेणं आसवदाराइं निरुभइ । पच्चक्खाणेणं इच्छानिरोहं जणयइ । इच्छानिरोहं गए य णं जीवे सव्वदव्वेसु विणीयतण्हे सीइभूए विहरइ ॥ १३ ॥ थवथुइमंगलेणं भंते ! जीवे किं जणयइ ? थवथुइमंगलेणं नाणदंसणचरित्तबोहिलाभं जणयइ । नाणदंसणचरि-  
त्तबोहिलाभसंपत्ते य णं जीवे अंतकिरियं कप्पविमाणोववत्तिं आराहणं आराहेइ ॥ १४ ॥ कालपडिलेहणयाए णं भंते ! जीवे किं जणयइ ? कालपडिलेहणयाए णं नाणावरणिज्जं कम्मं खवेइ ॥ १५ ॥ पायच्छित्तकरणेणं भंते ! जीवे किं जणयइ ? पायच्छित्तकरणेणं पावकम्मविसोहिं जणयइ, निरइयारे यावि भवइ । सम्मं च णं पायच्छित्तं पडिवज्जमाणे मग्गं च मग्गफलं च विसोहेइ, आयारं च आयारफलं च आराहेइ ॥ १६ ॥ खमावणयाए णं भंते ! जीवे किं जणयइ ? खमा-  
वणयाए णं पल्हायणभावं जणयइ । पल्हायणभावमुवगए य सव्वपाणभूयजीव-  
सत्तेसु मित्तीभावमुप्पाएइ । मित्तीभावमुवगए य जीवे भावविसोहिं काऊण निब्भा-  
भवइ ॥ १७ ॥ सज्झाएणं भंते ! जीवे किं जणयइ ? सज्झाएणं नाणावरणिज्जं कम्मं खवेइ ॥ १८ ॥ वायणाए णं भंते ! जीवे किं जणयइ ? वायणाए णं निजरं जणयइ । सुयस्स य अणुसज्जणाए अणासायणाए वट्ठए । सुयस्स अणुसज्जणाए अणासायणाए वट्ठमाणे तित्थधम्मं अवलंबइ । तित्थधम्मं अवलंबमाणे महातिज्जे

महापज्जवसाणे भवइ ॥ १९ ॥ पडिपुच्छणयाए णं भंते ! जीवे किं जणयइ ? पडिपुच्छणयाए णं सुत्तत्थतदुभयाइं विसोहेइ । कंखामोहणिजं कम्मं वोत्तिहइ ॥ २० ॥ परियट्ठणयाए णं भंते ! जीवे किं जणयइ ? परियट्ठणयाए णं वंजणाइं जणयइ, वंजणलद्धिं च उप्पाएइ ॥ २१ ॥ अणुप्पेहाए णं भंते ! जीवे किं जणयइ ? अणुप्पेहाए णं आउयवज्जाओ सत्तकम्मप्पगढीओ धणियबंधणवद्धाओ सिट्ठिलबंधणवद्धाओ पकरेइ । दीहकालट्ठिइयाओ हस्सकालट्ठिइयाओ पकरेइ । तिक्वाणुभावाओ मंदाणुभावाओ पकरेइ । बहुपएसग्गाओ अप्पएसग्गाओ पकरेइ । आउयं च णं कम्मं सिया बंधइ, सिया नो बंधइ । असायावेयणिजं च णं कम्मं नो भुज्जे भुज्जे उवचिणाइ । अणाइयं च णं अणवदग्गं दीहमद्धं चाउरंतं संसारकंतारं खिप्पामेव वीइवयइ ॥ २२ ॥ धम्मकहाए णं भंते ! जीवे किं जणयइ ? धम्मकहाए णं निज्जरं जणयइ । धम्मकहाए णं पवयणं पभावेइ । पवयणपभावेणं जीवे आगमेसस्स भट्ठाए कम्मं निबंधइ ॥ २३ ॥ सुयस्स आराहणयाए णं भंते ! जीवे किं जणयइ ? सुयस्स आराहणयाए णं अन्नाणं खवेइ, न य संकिल्हस्सइ ॥ २४ ॥ एगग्गमणसंनिवेशणयाए णं भंते ! जीवे किं जणयइ ? एगग्गमणसंनिवेशणयाए णं चित्तनिरोहं करेइ ॥ २५ ॥ संजमेणं भंते ! जीवे किं जणयइ ? संजमेणं अणह्यत्तं जणयइ ॥ २६ ॥ तवेणं भंते ! जीवे किं जणयइ ? तवेणं वोदाणं जणयइ ॥ २७ ॥ वोदाणेणं भंते ! जीवे किं जणयइ ? वोदाणेणं अकिरियं जणयइ । अकिरियाए भविता तओ पच्छा सिज्झइ बुज्झइ मुच्चइ परिनिव्वायइ सव्वदुक्खाणमंतं करेइ ॥ २८ ॥ सुहसाएणं भंते ! जीवे किं जणयइ ? सुहसाएणं अणुस्सुयत्तं जणयइ । अणुस्सुयाए णं जीवे अणुकंपए अणुब्भडे विगयसोणे चरित्तमोहणिजं कम्मं खवेइ ॥ २९ ॥ अप्पडिबद्धयाए णं भंते ! जीवे किं जणयइ ? अप्पडिबद्धयाए णं जीवे निस्संगत्तं जणयइ । निस्संगत्तेणं जीवे एगग्गचित्ते दिया य राओ य असज्जमाणे अप्पडिबद्धे यावि विहरइ ॥ ३० ॥ विवित्तसयणासणयाए णं भंते ! जीवे किं जणयइ ? विवित्तसयणासणयाए णं जीवे चरित्तगुत्तिं जणयइ । चरित्तगुत्ते य णं जीवे विवित्ताहारे दढचरित्ते एगंतरए मोक्खभावपडिबद्धे अट्ठविहकम्मगंठिं निजरेइ ॥ ३१ ॥ विणियट्ठणयाए णं भंते ! जीवे किं जणयइ ? विणियट्ठणयाए णं जीवे पावकम्माणं अकरणयाए अब्भुट्ठेइ । पुव्वबद्धाणं य निज्जरणयाए पावं नियत्तेइ । तओ पच्छा चाउरंतं संसारकंतारं वीइवयइ ॥ ३२ ॥ संभोगपच्चक्खाणेणं भंते ! जीवे किं जणयइ ? संभोगपच्चक्खाणेणं जीवे आलंबणाइं खवेइ । निरालंबणस्स य आययट्ठिया योगा भवन्ति । सएणं लाभेणं संतुस्सइ, परलाभं नो आसाएइ नो तक्केइ नो पीहेइ नो पथेइ नो अभिलसइ । परलाभं अणस्साएमाणे अतक्कमाणे

अपीहेमाणे अपत्येमाणे अणभिलसमाणे दुष्कं सुहसेज्जं उवसंपज्जित्ताणं विहरइ ॥ ३३ ॥  
 उवहिपच्चक्खाणेणं भंते ! जीवे किं जणयइ ? उवहिपच्चक्खाणेणं जीवे अपलिमंथं  
 जणयइ । निरुवहिए णं जीवे निक्कंखी उवहिमंतरेण य न संकिलिस्सइ ॥ ३४ ॥  
 आहारपच्चक्खाणेणं भंते ! जीवे किं जणयइ ? आहारपच्चक्खाणेणं जीवे जीविया-  
 संसप्पओगं वोच्छिदइ । जीवियासंसप्पओगं वोच्छिदित्ता जीवे आहारमंतरेण न  
 संकिलिस्सइ ॥ ३५ ॥ कसायपच्चक्खाणेणं भंते ! जीवे किं जणयइ ? कसायपच्च-  
 क्खाणेणं जीवे वीयरारागंभावं जणयइ । वीयरारागभावपडिवन्ने वि य णं जीवे समसुह-  
 दुक्खे भवइ ॥ ३६ ॥ जोगपच्चक्खाणेणं भंते ! जीवे किं जणयइ ? जोगपच्चक्खाणेणं  
 जीवे अजोगत्तं जणयइ । अजोगी णं जीवे नवं कम्मं न बंधइ, पुव्वबद्धं निज्जेरेइ  
 ॥ ३७ ॥ सरीरपच्चक्खाणेणं भंते ! जीवे किं जणयइ ? सरीरपच्चक्खाणेणं जीवे  
 सिद्धाइसयगुणकित्ताणं निव्वत्तेइ । सिद्धाइसयगुणसंपन्ने य णं जीवे लोगगमुवगाए  
 परमसुही भवइ ॥ ३८ ॥ सहायपच्चक्खाणेणं भंते ! जीवे किं जणयइ ? सहायपच्च-  
 क्खाणेणं जीवे एगीभावं जणयइ । एगीभावभूए वि य णं जीवे एगत्तं भावेमाणे  
 अप्सवे अप्पझंने अप्पकलहे अप्पकसाए अप्पतुमंतुमे संजमवहुले संवरवहुले समा-  
 हिए यावि भवइ ॥ ३९ ॥ भत्तपच्चक्खाणेणं भंते ! जीवे किं जणयइ ? भत्तपच्चक्खा-  
 णेणं जीवे अणेगाइं भवसयाइं निरुंभइ ॥ ४० ॥ सब्भावपच्चक्खाणेणं भंते ! जीवे  
 किं जणयइ ? सब्भावपच्चक्खाणेणं जीवे अनियट्ठिं जणयइ । अनियट्ठिपडिवन्ने य  
 अणगारे चत्तारि केवलिकम्मंसे खवेइ । तंजहा—वेयणिज्जं आउयं नामं गोयं । तओ  
 पच्छा सिज्झइ बुज्झइ मुच्चइ परिनिव्वायइ सव्वदुक्खाणमंतं करेइ ॥ ४१ ॥  
 पडिरुवयाए णं भंते ! जीवे किं जणयइ ? पडिरुवयाए णं जीवे लाघवियं जणयइ ।  
 लघुभूए णं जीवे अप्पमत्ते पागडल्लिगे पसत्थल्लिगे विसुद्धसम्मत्ते सत्तसमिइसमत्ते  
 सव्वपाणभूयजीवसत्तेसु वीससणिज्जरुवे अप्पडिलेहे जिइदिए विउलतवसमिइसमन्नागए  
 यावि भवइ ॥ ४२ ॥ वेयावच्चेणं भंते ! जीवे किं जणयइ ? वेयावच्चेणं जीवे तित्थयर-  
 नामगोत्तं कम्मं निबंघइ ॥ ४३ ॥ सव्वगुणसंपन्नयाए णं भंते ! जीवे किं जणयइ ?  
 सव्वगुणसंपन्नयाए णं जीवे अपुणरावत्तिं जणयइ । अपुणरावत्तिं पत्तए य णं जीवे  
 सारीरमाणसाणं दुक्खाणं नो भागी भवइ ॥ ४४ ॥ वीयरारागयाए णं भंते ! जीवे किं  
 जणयइ ? वीयरारागयाए णं जीवे नेहाणुबंधणाणि तण्हाणुबंधणाणि य वोच्छिदइ,  
 मणुन्नामणुन्नेसु सद्धफरिसरुवरसंगंधेसु ( सच्चित्ताचित्तमीसएसु ) चेव विरज्जइ ॥ ४५ ॥  
 खंतीए णं भंते ! जीवे किं जणयइ ? खंतीए णं जीवे परीसहे जिणइ ॥ ४६ ॥ मुत्तीए  
 णं भंते ! जीवे किं जणयइ ? मुत्तीए णं जीवे अकिंचणं जणयइ । अकिंचणे य जीवे

अथल्लोणं पुरिसाणं अपत्थणि(ज्जे)ज्जो भवइ ॥ ४७ ॥ अज्जवयाए णं भंते ! जीवे किं जणयइ ? अज्जवयाए णं जीवे काउज्जुयं भावुज्जुयं भासुज्जुयं अविसंवायणं जणयइ । अविसंवायणसंपन्नयाए णं जीवे धम्मस्स आराहए भवइ ॥ ४८ ॥ मद्दवयाए णं भंते ! जीवे किं जणयइ ? मद्दवयाए णं जीवे अणुस्सियत्तं जणयइ । अणुस्सियत्तेण जीवे मिउमद्दवसंपन्ने अट्टमयट्ठाणाइं निट्ठावेइ ॥ ४९ ॥ भावसच्चेणं भंते ! जीवे किं जणयइ ? भावसच्चेणं जीवे भावविसोहिं जणयइ । भावविसो[ही]हिए वट्ठमाणे जीवे अरहंतपन्नत्तस्स धम्मस्स आराहणयाए अब्भुट्ठेइ । अरहंतपन्नत्तस्स धम्मस्स आराहणयाए अब्भुट्ठित्ता परलोगधम्मस्स आराहए भवइ ॥ ५० ॥ करणसच्चेणं भंते ! जीवे किं जणयइ ? करणसच्चेणं जीवे करणसत्तिं जणयइ । करणसच्चे वट्ठमाणे जीवे जहावाई तहाकारी यावि भवइ ॥ ५१ ॥ जोगसच्चेणं भंते ! जीवे किं जणयइ ? जोगसच्चेणं जीवे जोगं विसोहेइ ॥ ५२ ॥ मणगुत्तयाए णं भंते ! जीवे किं जणयइ ? मणगुत्तयाए णं जीवे एगगं जणयइ । एगगचित्ते णं जीवे मणगुत्ते संजमाराहए भवइ ॥ ५३ ॥ वयगुत्तयाए णं भंते ! जीवे किं जणयइ ? वयगुत्तयाए णं जीवे निव्वियारत्तं जणयइ । निव्वियारे णं जीवे वइगुत्ते अज्झप्पजोगसाहणजुत्ते यावि भवइ ॥ ५४ ॥ कायगुत्तयाए णं भंते ! जीवे किं जणयइ ? कायगुत्तयाए णं जीवे संवरं जणयइ । संवरेणं कायगुत्ते पुणो पावासवनिरोहं करेइ ॥ ५५ ॥ मणसमाहारणयाए णं भंते ! जीवे किं जणयइ ? मणसमाहारणयाए णं जीवे एगगं जणयइ । एगगं जणइत्ता नाणपज्जवे जणयइ । नाणपज्जवे जणइत्ता सम्मतं विसोहेइ, सिच्छत्तं च निज्जरेइ ॥ ५६ ॥ वयसमाहारणयाए णं भंते ! जीवे किं जणयइ ? वयसमाहारणयाए णं जीवे वयसाहारणदंसणपज्जवे विसोहेइ । वयसाहारणदंसणपज्जवे विसोहिता सुल्लहबोहियत्तं निव्वत्तेइ, दुल्लहबोहियत्तं निज्जरेइ ॥ ५७ ॥ कायसमाहारणयाए णं भंते ! जीवे किं जणयइ ? कायसमाहारणयाए णं जीवे चरित्तपज्जवे विसोहेइ । चरित्तपज्जवे विसोहिता अहक्खायचरित्तं विसोहेइ । अहक्खायचरित्तं विसोहेत्ता चत्तारि केवलिकम्मसे खवेइ । तथो पच्छा सिज्झइ बुज्झइ मुच्चइ परिनिव्वायइ सव्वदुक्खाणमंतं करेइ ॥ ५८ ॥ नाणसंपन्नयाए णं भंते ! जीवे किं जणयइ ? नाणसंपन्नयाए णं जीवे सव्वभावाहिगमं जणयइ । नाणसंपन्ने णं जीवे चाउरंते संसारकंतारे न विणस्सइ । गाहा—जहा सूई सखुत्ता, पड्डिया न विणस्सइ । तहा जीवे सखुत्ते, संसारे न विणस्सइ ॥ १ ॥ नाणविणयतवचरित्तजोगे संपाउणइ, ससमयपरसमयविसारए य असंघायणिज्जे भवइ ॥ ५९ ॥ दंसणसंपन्नयाए णं भंते ! जीवे किं जणयइ ? दंसणसंपन्नयाए णं जीवे भवमिच्छतल्लेयणं करेइ, परं न विज्झायइ ।

परं अविज्झाएमाणे अणुत्तरेणं नाणदंसणेणं अप्पाणं संजोएमाणे सम्मं भावेमाणे विहरइ ॥ ६० ॥ चरितसंपन्नयाए णं भंते ! जीवे किं जणयइ ? चरितसंपन्नयाए णं जीवे सेलेसीभावं जणयइ । सेलेसिं पडिवन्ने य अणगारे चत्तारि केवलिकम्मंसे खवेइ । तओ पच्छा सिज्झइ बुज्झइ मुच्चइ परिनिव्वायइ सव्वदुक्खाणमंतं करेइ ॥ ६१ ॥ सोइंदियनिग्गहेणं भंते ! जीवे किं जणयइ ? सोइंदियनिग्गहेणं जीवे मणुत्तामणुत्तेसु सहेसु रागदोसनिग्गहं जणयइ । तप्पच्चइयं च णं कम्मं न बंधइ, पुव्वबद्धं च निज्जरेइ ॥ ६२ ॥ चक्खिदियनिग्गहेणं भंते ! जीवे किं जणयइ ? चक्खिदियनिग्गहेणं जीवे मणुत्तामणुत्तेसु रूवेसु रागदोसनिग्गहं जणयइ । तप्पच्चइयं च णं कम्मं न बंधइ, पुव्वबद्धं च निज्जरेइ ॥ ६३ ॥ घाणिंदियनिग्गहेणं भंते ! जीवे किं जणयइ ? घाणिंदियनिग्गहेणं जीवे मणुत्तामणुत्तेसु गंधेसु रागदोसनिग्गहं जणयइ । तप्पच्चइयं च णं कम्मं न बंधइ, पुव्वबद्धं च निज्जरेइ ॥ ६४ ॥ जिब्बिंदियनिग्गहेणं भंते ! जीवे किं जणयइ ? जिब्बिंदियनिग्गहेणं जीवे मणुत्तामणुत्तेसु रसेसु रागदोसनिग्गहं जणयइ । तप्पच्चइयं च णं कम्मं न बंधइ, पुव्वबद्धं च निज्जरेइ ॥ ६५ ॥ फासिंदियनिग्गहेणं भंते ! जीवे किं जणयइ ? फासिंदियनिग्गहेणं जीवे मणुत्तामणुत्तेसु फासेसु रागदोसनिग्गहं जणयइ । तप्पच्चइयं च णं कम्मं न बंधइ, पुव्वबद्धं च निज्जरेइ ॥ ६६ ॥ कोहविजएणं भंते ! जीवे किं जणयइ ? कोहविजएणं जीवे खंतिं जणयइ । कोहवेयणिज्जं कम्मं न बंधइ, पुव्वबद्धं च निज्जरेइ ॥ ६७ ॥ माणविजएणं भंते ! जीवे किं जणयइ ? माणविजएणं जीवे महं जणयइ । माणवेयणिज्जं कम्मं न बंधइ, पुव्वबद्धं च निज्जरेइ ॥ ६८ ॥ मायाविजएणं भंते ! जीवे किं जणयइ ? मायाविजएणं जीवे अज्जवं जणयइ । मायावेयणिज्जं कम्मं न बंधइ, पुव्वबद्धं च निज्जरेइ ॥ ६९ ॥ लोभविजएणं भंते ! जीवे किं जणयइ ? लोभविजएणं जीवे संतोसं जणयइ । लोभवेयणिज्जं कम्मं न बंधइ, पुव्वबद्धं च निज्जरेइ ॥ ७० ॥ पिज्जदोसमिच्छादंसणविजएणं भंते ! जीवे किं जणयइ ? पिज्जदोसमिच्छादंसणविजएणं जीवे नाणदंसणचरित्ताराहणयाए अब्भुट्ठेइ । अट्ठविहस्स कम्मस्स कम्मगंठिविमोयणयाए तप्पढमयाए जहाणुपुव्वीए अट्ठावीसइविहं मोहणिज्जं कम्मं उग्घाएइ, पंचविहं नाणावरणिज्जं, नवविहं दंसणावरणिज्जं, पंचविहं अंतराइयं, एए तिच्चि वि कम्मंसे जुगवं खवेइ । तओ पच्छा अणुत्तरं कसिणं पडिपुण्णं निरावरणं वित्तिमिरं विट्ठुद्धं लोगालोगप्पभावं केवलवरनाणदंसणं समुप्पाडेइ । जाव सजोगी भवइ ताव इरियावहियं कम्मं निबंधइ सुहफरिसं दुसमयठिइयं, तं पढमसमए बद्धं विइयसमए वेइयं तइयसमए निज्जिणं तं बद्धं पुट्ठं उदीरियं वेइयं निज्जिणं सेयाले य अकम्मं चावि भवइ ॥ ७१ ॥

अह आउयं पालइत्ता अंतोसुहुतद्धावसेसाए जोगनिरोहं करेमाणे सुहुमकिरियं  
 अप्पडिवाइं सुक्कज्झाणं झायमाणे तप्पढमयाए मणजोगं निरुंभइ, वइजोगं निरुंभइ,  
 कायजोगं निरुंभइ, आणपाणनिरोहं करेइ । ईसि-पंचरहस्सक्खरुच्चारणद्धाए य णं  
 अणगारे समुच्छिन्नकिरियं अनियट्टिसुक्कज्झाणं झियायमाणे वेयणिज्जं आउयं नामं  
 गोत्तं च एए चत्तारि कम्मंसे जुगवं खवेइ ॥ ७२ ॥ तओ ओरालियतेयकम्माइं सव्वाहिं  
 विप्पजहणाहिं विप्पजहिता उज्जुसेट्ठित्ते अफुसमाणगई उड्डं एगसमएणं अविग्गहेणं  
 तत्थ गंता सागारोवउत्ते सिज्झइ बुज्झइ मुच्चइ परिनिव्वायइ सव्वदुक्खाणमंतं  
 करेइ ॥ ७३ ॥ एस खलु सम्मतपरक्कमस्स अज्झयणस्स अट्ठे समणेणं भगवया  
 महावीरेणं आघविए पवविए पवविए दंसिए निंदंसिए उवदंसिए ॥ ति-बेसि ॥ इति  
 सम्मतपरक्कमणामं एगूणतीसइमं अज्झयणं समत्तं ॥ २९ ॥

## अह तवमग्गणामं तीसइमं अज्झयणं

जहा उ पावगं कम्मं, रागदोससमज्जियं । खवेइ तवसा भिक्खू, तमेगग्गमणो  
 सुण ॥ १ ॥ पाणिवहमुसावाया, अदत्तमेहुणपरिग्गहा विरओ । राईभोयणविरओ,  
 जीवो भवइ अणासवो ॥ २ ॥ पंचसमिओ तिगुत्तो, अकसाओ जिइंदिओ ।  
 अगारवो य निरुसल्लो, जीवो होइ अणासवो ॥ ३ ॥ एएसिं तु विवच्चासे, रागदोस-  
 समज्जियं । खवेइ उ जहा भिक्खू, तमेगग्गमणो सुण ॥ ४ ॥ जहा महातलायस्स,  
 संतिरुद्धे जलागमे । उरिंसचणाए तवणाए, कमेणं सोसणा भवे ॥ ५ ॥ एवं तु  
 संजयस्सावि, पावकम्मनिरासवे । भवकोडीसंचियं कम्मं, तवसा निज्जिरिज्झइ ॥ ६ ॥  
 सो तवो दुविहो वुत्तो, बाहिरब्भंतरो तहा । बाहियो छव्विहो वुत्तो, एवमब्भंतरो  
 तवो ॥ ७ ॥ अणसण्णमूणोयरियो, भिक्खायरियो य रसपरिच्चाओ । कायंकिळेसो  
 संलीणर्या, य वज्झो तवो होइ ॥ ८ ॥ ( १ ) इत्तरियं मरणकालं य, अणसणा  
 दुविहा भवे । इत्तरिय सावकंखा, निरवकंखा उ बिइज्जिया ॥ ९ ॥ जो सो इत्तरि-  
 यतवो, सो समासेण छव्विहो । सेट्ठित्तवो पयरत्तवो, वैणो य तह होइ वग्गो य  
 ॥ १० ॥ तत्तो य वग्गवग्गो, पंचमो छट्ठओ पइण्णत्तवो । मणइच्छियचित्तत्थो,  
 नायव्वो होइ इत्तरिओ ॥ ११ ॥ जा सा अणसणा मरणे, दुविहा सा वियाहिया ।  
 सवियारमवियारो, कायचिद्धं पई भवे ॥ १२ ॥ अहवा सपरिकम्मो, अपरिकम्मो  
 य आहिया । नीहारिमनीहारी, आहारच्छेओ दोसु वि ॥ १३ ॥ ( २ ) ओमोयरणं  
 पंचहा, समासेण वियाहियं । दव्वंओ खेत्तकालेणं, भव्विणं पज्जैवेहि य ॥ १४ ॥

जो जस्स उ आहारो, तत्तो ओमं तु जो करे । जहन्नेगेसिस्थाई, एवं दव्वेण ऊ भवे ॥ १५ ॥ गामे नगरे तह रायहाणि, निगमे य आगरे पल्ली । खेडे कच्चडदो-  
णमुह-, पट्टणमडंबसंवाहे ॥ १६ ॥ आसमपए विहारे, सन्निवेसे समायघोसे य ।  
थल्लिसेणाखंधारे, सत्थे संवट्कोट्टे य ॥ १७ ॥ वाडेसु व रत्थासु व, घरेसु वा  
एवमित्तिंयं खेतं । कप्पइ उ एवमाई, एवं खेत्तेण ऊ भवे ॥ १८ ॥ पेडां य  
अद्धपेडां, गोमूँत्तिपयंगवीहियँ चैव । संसुक्कावट्ठोयय-, गंतुं पच्चागर्यां छट्ठा ॥ १९ ॥  
दिवसस्स पोरुसीणं, चउण्हं पि उ जत्तिओ भवे कालो । एवं चरमाणो खल्ल,  
कालोमाणं मुण्णेयव्वं ॥ २० ॥ अहवा तइयाए पोरिसीए, ऊणाइ घासमेसंतो ।  
चउभागूणाए वा, एवं कालेण ऊ भवे ॥ २१ ॥ इत्थी वा पुरिसो वा, अलंकिओ  
वा नलंकिओ वावि । अन्नयरवयत्थो वा, अन्नयरें व वत्थेणं ॥ २२ ॥ अन्नेण  
विसेसेणं, वण्णेणं भावमणुसुयंतो उ । एवं चरमाणो खल्ल, भावोमाणं मुण्णेयव्वं  
॥ २३ ॥ दव्वे खेतं काले, भावंमि य आहिया उ जे भावा । एएहि ओमचरओ,  
पज्जवचरओ भवे भिक्खू ॥ २४ ॥ ( ३ ) अट्ठविहंगोयरगं तु, तहा सत्तेव  
एसणा । अभिग्गहा य जे अन्ने, भिक्खायरियमाहिया ॥ २५ ॥ ( ४ ) खीरदहि-  
सप्पिमाई, पणीयं पाणभोयणं । परिवज्जणं रसाणं तु, भणियं रसविवज्जणं  
॥ २६ ॥ ( ५ ) ठाणा वीरासणाईया, जीवस्स उ सुहावहा । उग्गा जहा धरिजंति,  
कायकिलेसं तमाहियं ॥ २७ ॥ ( ६ ) एगंतमणावाए, इत्थीपसुविवज्जिए । सयणा-  
सणसेवणया, विवित्तसयणासणं ॥ २८ ॥ एसो बाहिरगं तवो, समासेण वियाहिओ ।  
अब्भितरं तवं एत्तो, वुच्छामि अणुपुव्वसो ॥ २९ ॥ पायच्छित्तं विण्णोओ, वेया-  
वच्चं तहेव सज्झाँओ । झाँणं च विउस्सग्गो, एसो अब्भितरो तवो ॥ ३० ॥  
( १ ) आलोयणारिहाईयं, पायच्छित्तं तु दसविहं । जे भिक्खू वट्ठई सम्मं, पायच्छित्तं  
तमाहियं ॥ ३१ ॥ ( २ ) अब्भुट्ठाणं अंजलिकरणं, तहेवासणदायणं । गुदभत्ति-  
भावसुस्सूसा, विणओ एस वियाहिओ ॥ ३२ ॥ ( ३ ) आयरियमाईए, वेयावच्चंमि  
दसविहे । आसेवणं जहाथामं, वेयावच्चं तमाहियं ॥ ३३ ॥ ( ४ ) वायणीं पुच्छणौ  
चैव, तहेव परियट्ठणीं । अणुप्पेहाँ धम्मकहाँ, सज्झाओ पंचहा भवे ॥ ३४ ॥  
( ५ ) अट्ठरुद्धाणि वज्जित्ता, झाएज्जा सुसमाहिए । धम्मसुक्काई झाणाई, झाणं तं  
तु बुहा वए ॥ ३५ ॥ ( ६ ) सयणासणठाणे वा, जे उ भिक्खू न वावरे । कायस्स  
विउस्सग्गो, छट्ठो सो परिकित्तिओ ॥ ३६ ॥ एवं तवं तु दुविहं, जे सम्मं आयरे  
मुणी । सो खिप्पं सव्वसंसारा, विप्पमुच्चइ पंडिओ ॥ ३७ ॥ ति-बेम्मि ॥ इति  
तवमग्गणामं तीसइमं अज्झयणं समत्तं ॥ ३० ॥



## अहं चरणविहिणामं एगतीसइमं अज्झयणं

चरणविहिं पवक्खामि, जीवस्स उ सुहावहं । जं चरित्ता बहू जीवा, तिण्णा संसारसागरं ॥ १ ॥ एगओ विरइं कुज्जा, एगओ य पवत्तणं । असंजमे नियत्तिं च, संजमे य पवत्तणं ॥ २ ॥ रागदोसे य दो पावे, पावक्कम्मपवत्तणे । जे भिक्खू रंभई निच्चं, से न अच्छइ मंडले ॥ ३ ॥ दंडाणं गारवाणं च, सत्ताणं च तियं तियं । जे भिक्खू चयई निच्चं, से न अच्छइ मंडले ॥ ४ ॥ दिव्वे य जे उवसग्गे, तहा तेरिच्छमाणसे । जे भिक्खू सहई निच्चं, से न अच्छइ मंडले ॥ ५ ॥ विगहाक्खाय-सन्नाणं, ज्ञाणाणं च दुयं तहा । जे भिक्खू वज्जई निच्चं, से न अच्छइ मंडले ॥ ६ ॥ वएसु इंदियत्थेसु, समिईसु किरियासु य । जे भिक्खू जयई निच्चं, से न अच्छइ मंडले ॥ ७ ॥ लेसासु छसु काएसु, छके आहारकारणे । जे भिक्खू जयई निच्चं, से न अच्छइ मंडले ॥ ८ ॥ पिंडोग्गहपडिमासु, भयट्ठाणेषु सत्तसु । जे भिक्खू जयई निच्चं, से न अच्छइ मंडले ॥ ९ ॥ मएसु वंभगुत्तीसु, भिक्खुधम्मम्मि दसाविहे । जे भिक्खू जयई निच्चं, से न अच्छइ मंडले ॥ १० ॥ उवासगाणं पडिमासु, भिक्खूणं पडिमासु य । जे भिक्खू जयई निच्चं, से न अच्छइ मंडले ॥ ११ ॥ किरियासु भूयगामेसु, परमाहम्मिएसु य । जे भिक्खू जयई निच्चं, से न अच्छइ मंडले ॥ १२ ॥ गाहासोलसएहिं, तहा असंजमंमि य । जे भिक्खू जयई निच्चं, से न अच्छइ मंडले ॥ १३ ॥ वंभंमि नायज्झयणेसु, ठाणेसु असमाहिए । जे भिक्खू जयई निच्चं, से न अच्छइ मंडले ॥ १४ ॥ एगवीसाए सबले, बावीसाए परीसहे । जे भिक्खू जयई निच्चं, से न अच्छइ मंडले ॥ १५ ॥ तेवीसाइ स्यूगडे, रुवाहिएसु सुरेसु य । जे भिक्खू जयई निच्चं, से न अच्छइ मंडले ॥ १६ ॥ पणवीसभावणासु, उद्देसेसु दसाइणं । जे भिक्खू जयई निच्चं, से न अच्छइ मंडले ॥ १७ ॥ अणगारगुणेहिं च, पगपंमि तहेव य । जे भिक्खू जयई निच्चं, से न अच्छइ मंडले ॥ १८ ॥ पावसुयपसंगेसु, मोहठाणेसु चेव य । जे भिक्खू जयई निच्चं, से न अच्छइ मंडले ॥ १९ ॥ सिद्धाइगुणजोगेसु, तेत्तीसासायणासु य । जे भिक्खू जयई निच्चं, से न अच्छइ मंडले ॥ २० ॥ इय एएसु ठाणेसु, जे भिक्खू जयई सया । खिप्पं सो सव्वसंसारा, विप्पमुच्चइ पंडिओ ॥ २१ ॥ ति-वेमि ॥ इति चरणविहिणामं एगतीसइमं अज्झयणं समत्तं ॥ ३१ ॥

## अह पमायट्टाणणामं बत्तीसइमं अज्झयणं

अच्चंतकालस्स समूलस्स, सव्वस्स दुक्खस्स उ जो पमोक्खो । तं भासओ मे पडिपुण्णचित्ता, सुणेह एगंतहियं हियत्थं ॥ १ ॥ नाणस्स सव्वस्स पगासणाए, अन्नाणमोहस्स विवज्जाणाए । रागस्स दोसस्स य संखएणं, एगंतसोक्खं समुवेइ मोक्खं ॥ २ ॥ तस्सेस मग्गो गुरुविद्धसेवा, विवज्जाणा बालजणस्स दूरा । सज्झाय-एगंतनिसेवणा य, सुत्तत्थसंचित्तणया धिई य ॥ ३ ॥ आहारमिच्छे मियमेसणिज्जं, सहायमिच्छे निउणत्थबुद्धिं । निकेयमिच्छेज्ज विवेगजोग्गं, समाहिकामे समणे तवस्सी ॥ ४ ॥ न वा लभेज्जा निउणं सहायं, गुणाहियं वा गुणओ समं वा । एगो वि पावाइं विवज्जयंतो, विहरेज्ज कामेसु असज्जमाणो ॥ ५ ॥ जहा य अंडप्पभवा बलागा, अंडं बलागप्पभवं जहा य । एमेव मोहाययणं खु तण्हा, मोहं च तण्हाय-यणं वयंति ॥ ६ ॥ रागो य दोसो वि य कम्मवीयं, कम्मं च मोहप्पभवं वयंति । कम्मं च जाईमरणस्स मूलं, दुक्खं च जाईमरणं वयंति ॥ ७ ॥ दुक्खं हयं जस्स न होइ मोहो, मोहो हओ जस्स न होइ तण्हा । तण्हा हया जस्स न होइ लोहो, लोहो हओ जस्स न किंचणाइं ॥ ८ ॥ रागं च दोसं च तहेव मोहं, उद्धत्तुकामेण समूलजालं । जे जे उवाया पडिवज्जियव्वा, ते कित्तइस्सामि अहाणुपुत्वि ॥ ९ ॥ रसा पगामं न निसेवि-यव्वा, पायं रसा दित्तिकरा नराणं । दित्तं च कामा समभिद्वंति, दुमं जहा साउफलं व पक्खी ॥ १० ॥ जहा दवग्गी पउरिंधणे वणे, समारओ नोवसमं उवेइ । एविदियग्गी वि पगाममोइणो, न बंभयारिस्स हियाय कस्सई ॥ ११ ॥ विवित्तसेज्जासणजंतियाणं, ओमासणाणं दमिइंदियाणं । न रागसत्तू धरिसेइ चित्तं, पराइओ वाहिरिओसहेहिं ॥ १२ ॥ जहा विरालावसहरस्स मूले, न मूसगाणं वसही पसत्था । एमेव इत्थीनिलयस्स मज्जे, न बंभयारिस्स खमो निवासो ॥ १३ ॥ न हवलावण्णविलासहासं, न जंपियं ईगियपेहियं वा । इत्थीण चित्तंसि निवेसइत्ता, दड्ढं ववस्से समणे तवस्सी ॥ १४ ॥ अदंसणं चेव अपत्थणं च, अचित्तणं चेव अकित्तणं च । इत्थीजणस्सारियज्ञाणजुग्गं, हियं सया बंभवए रयाणं ॥ १५ ॥ कामं तु देवीहिं विभूसियाहिं, न चाइया खोभ-इउं तिगुत्ता । तहा वि एगंतहियं ति नच्चा, विवित्तवासो मुणिणं पसत्थो ॥ १६ ॥ मोक्खाभिकंखिस्स उ माणवस्स, संसारभीरुस्स ठियस्स धम्मो । नेयारिस्स दुतरमत्थि लोए, जहित्थिओ बालमणोहराओ ॥ १७ ॥ एए य संगे समइक्कमित्ता, सुदुत्तरा चेव भवंति सेसा । जहा महासागरमुत्तरिता, नई भवे अवि गंगासमाणा ॥ १८ ॥ कामाणुगिद्धिप्पभवं खु दुक्खं, सव्वस्स लोगस्स सदेवगस्स । जं काइयं माणसियं

च किंचि, तस्संतंगं गच्छइ वीयरारो ॥ १९ ॥ जहा य किंपागफला मणोरमा,  
 रसेण वण्णेण य भुज्जमाणा । तं खुट्ठए जीविय पच्चमाणा, एओवमा कामगुणा  
 विवागे ॥ २० ॥ जे इंदियाणं विसया मणुज्जा, न तेसु भावं निसिरे कयाइ । न  
 यामणुज्जेसु मणं पि कुज्जा, समाहिकामे समणे तवस्सी ॥ २१ ॥ ( १ ) चक्खुस्स  
 ह्वं गहणं वयंति, तं रागहेउं तु मणुज्जमाहु । तं दोसहेउं अमणुज्जमाहु, समो य  
 जो तेसु स वीयरारो ॥ २२ ॥ ह्वस्स चक्खुं गहणं वयंति, चक्खुस्स ह्वं गहणं  
 वयंति । रागस्स हेउं समणुज्जमाहु, दोसस्स हेउं अमणुज्जमाहु ॥ २३ ॥ ह्वेसु जो  
 गिद्धिमुवेइ तिव्वं, अकालियं पावइ से विणासं । रागाउरे से जह वा पयंगे, आलो-  
 यल्ले समुवेइ मज्जुं ॥ २४ ॥ जे यावि दोसं समुवेइ तिव्वं, तंसि वक्खणे से  
 उ उवेइ दुक्खं । दुइतदोसेण सएण जंतू, न किंचि ह्वं अवरज्झइ से ॥ २५ ॥  
 एगंतरत्ते इइरंसि ह्वे, अताल्लिसे से कुणई पओसं । दुक्खस्स संपील्लमुवेइ बाले,  
 न लिप्पइ तेण मुणी विरागो ॥ २६ ॥ ह्वाणुगासाणुगए य जीवे, चराचरे हिंस-  
 इण्णेगह्वे । चित्तेहि ते परितावेइ बाले, पीलेइ अत्तट्ठगुरू किलिद्धे ॥ २७ ॥ ह्वाणु-  
 वाएण परिग्गहेण, उप्पायणे रक्खणसन्निओगे । वए विओगे य कहं सुहं से,  
 संभोगकाले य अतित्तलामे ॥ २८ ॥ ह्वे अतित्ते य परिग्गहंमि, सत्तोवसत्तो न  
 उवेइ तुट्ठिं । अतुट्ठिदोसेण दुही परस्स, लोभाविले आययई अदत्तं ॥ २९ ॥  
 तण्हाभिभूयस्स अदत्तहारिणो, ह्वे अतित्तस्स परिग्गहे य । मायासुसं वड्डइ  
 लोभदोसा, तत्थावि दुक्खा न विमुच्चई से ॥ ३० ॥ सोसस्स पच्छा य पुरत्थओ  
 य, पओगकाले य दुही दुरंते । एवं अदत्ताणि समाययंतो, ह्वे अतित्तो दुहिओ  
 अणिस्सो ॥ ३१ ॥ ह्वाणुरत्तस्स नरस्स एवं, कत्तो सुहं होज कयाइ किंचि ।  
 तत्थोवभोगे वि किलेसदुक्खं, निव्वत्तई जस्स कएण दुक्खं ॥ ३२ ॥ एमेव ह्वंमि  
 गओ पओसं, उवेइ दुक्खोहपरंपराओ । पटुट्ठचित्तो य चिणाइ कम्मं, जं से पुणो  
 होइ दुहं विवागे ॥ ३३ ॥ ह्वे विरत्तो मणुओ विसोगो, एएण दुक्खोहपरंपरेण । न  
 लिप्पए भवमज्जे वि संतो, जलेण वा पोक्खरिणीपलासं ॥ ३४ ॥ ( २ ) सोयस्स  
 सइं गहणं वयंति, तं रागहेउं तु मणुज्जमाहु । तं दोसहेउं अमणुज्जमाहु, समो  
 य जो तेसु स वीयरारो ॥ ३५ ॥ सहस्स सोयं गहणं वयंति, सोयस्स सइं  
 गहणं वयंति । रागस्स हेउं समणुज्जमाहु, दोसस्स हेउं अमणुज्जमाहु ॥ ३६ ॥  
 सइंसु जो गिद्धिमुवेइ तिव्वं, अकालियं पावइ से विणासं । रागाउरे हरिणमिगे व  
 सुडे, सदे अतित्ते समुवेइ मज्जुं ॥ ३७ ॥ जे यावि दोसं समुवेइ तिव्वं, तंसि वक्खणे  
 से उ उवेइ दुक्खं । दुइतदोसेण सएण जंतू, न किंचि सइं अवरज्झइ से ॥ ३८ ॥

एगंतरत्ते रुइरंसि सदे, अताल्लिसे से कुणई पओसं । दुक्खस्स संपीलमुवेइ बाले, न लिप्पई तेण मुणी विरागो ॥ ३९ ॥ सद्धानुगासाणुगए य जीवे, चराचरे हिंसइऽणे-  
गरुवे । चित्तेहि ते परितावेइ बाले, पीलेइ अत्तट्टगुरु किलिद्धे ॥ ४० ॥ सद्धानुवाएण  
परिग्गहेण, उप्पायणे रक्खणसन्निओगे । वए विओगे य कहं सुहं से, संभोगकाले य  
अतित्तलामे ॥ ४१ ॥ सदे अतित्ते य परिग्गहंमि, सत्तोवसत्तो न उवेइ तुट्ठिं । अतुट्ठि-  
दोसेण दुही परस्स, लोभाविले आययई अदत्तं ॥ ४२ ॥ तण्हाभिभूयस्स अदत्तहारिणो,  
सदे अतित्तस्स परिग्गहे य । मायामुसं वड्डइ लोभदोसा, तत्थावि दुक्खा न विमुच्चई  
से ॥ ४३ ॥ मोसस्स पच्छा य पुरत्थओ य, पओगकाले य दुही दुरंते । एवं  
अदत्ताणि समाययंतो, सदे अतित्तो दुहिओ अणिस्सो ॥ ४४ ॥ सद्धानुरत्तस्स  
नरस्स एवं, कत्तो सुहं होज्ज कयाइ किंचि । तत्थोवभोगे वि किलेसदुक्खं, निव्वत्तई  
जस्स कएण दुक्खं ॥ ४५ ॥ एमेव सद्धंमि गओ पओसं, उवेइ दुक्खोहपरंपराओ ।  
पटुट्ठचित्तो य विणाइ कम्मं, जं से पुणो होइ दुहं विवागे ॥ ४६ ॥ सदे विरत्तो  
मणुओ विसोगो, एएण दुक्खोहपरंपरेण । न लिप्पए भवमज्झे वि संतो, जलेण वा  
पोक्खरिणीपलासं ॥ ४७ ॥ ( ३ ) घाणस्स गंधं गहणं वयंति, तं रागहेउं तु  
मणुन्नमाहु । तं दोसहेउं अमणुन्नमाहु, समो य जो तेसु स वीयरारगो ॥ ४८ ॥  
गंधस्स घाणं गहणं वयंति, घाणस्स गंधं गहणं वयंति । रागस्स हेउं समणुन्नमाहु,  
दोसस्स हेउं अमणुन्नमाहु ॥ ४९ ॥ गंधेसु जो गिद्धिसुवेइ तिक्वं, अकालियं पावइ  
से विणासं । रागाउरे ओसहगंधगिद्धे, सप्पे विलाओ विव निक्खमंते ॥ ५० ॥ जे  
यावि दोसं समुवेइ तिक्वं, तंसि क्खणे से उ उवेइ दुक्खं । दुहंतदोसेण सएण  
जंतू, न किंचि गंधं अवरज्झई से ॥ ५१ ॥ एगंतरत्ते रुइरंसि गंधे, अताल्लिसे से  
कुणई पओसं । दुक्खस्स संपीलमुवेइ बाले, न लिप्पई तेण मुणी विरागो ॥ ५२ ॥  
गंधाणुगासाणुगए य जीवे, चराचरे हिंसइऽणेगरुवे । चित्तेहि ते परितावेइ बाले,  
पीलेइ अत्तट्टगुरु किलिद्धे ॥ ५३ ॥ गंधाणुवाएण परिग्गहेण, उप्पायणे रक्खण-  
सन्निओगे । वए विओगे य कहं सुहं से, संभोगकाले य अतित्तलामे ॥ ५४ ॥  
गंधे अतित्ते य परिग्गहंमि, सत्तोवसत्तो न उवेइ तुट्ठिं । अतुट्ठिदोसेण दुही परस्स,  
लोभाविले आययई अदत्तं ॥ ५५ ॥ तण्हाभिभूयस्स अदत्तहारिणो, गंधे अतित्तस्स  
परिग्गहे य । मायामुसं वड्डइ लोभदोसा, तत्थावि दुक्खा न विमुच्चई से ॥ ५६ ॥  
मोसस्स पच्छा य पुरत्थओ य, पओगकाले य दुही दुरंते । एवं अदत्ताणि समाय-  
यंतो, गंधे अतित्तो दुहिओ अणिस्सो ॥ ५७ ॥ गंधाणुरत्तस्स नरस्स एवं, कत्तो  
सुहं होज्ज कयाइ किंचि । तत्थोवभोगे वि किलेसदुक्खं, निव्वत्तई जस्स कएण  
६६ सुत्ता०

दुक्खं ॥ ५८ ॥ एमेव गंधमि गओ पओसं, उवेइ दुक्खोहपरंपराओ । पदुट्ठचित्तो  
 य चिणाइ कम्मं, जं से पुणो होइ दुहं विवागे ॥ ५९ ॥ गंधे विरत्तो मणुओ  
 विसोगो, एएण दुक्खोहपरंपरेण । न लिप्पई भवमज्जे वि संतो, जलेण वा पोक्ख-  
 रिणीपलासं ॥ ६० ॥ (४) जिब्भाए रसं गहणं वयंति, तं रागहेउं तु मणुजमाहु ।  
 तं दोसहेउं अमणुजमाहु, समो य जो तेसु स वीयरारो ॥ ६१ ॥ रसस्स जिब्भं  
 गहणं वयंति, जिब्भाए रसं गहणं वयंति । रागस्स हेउं समणुजमाहु, दोसस्स हेउं  
 अमणुजमाहु ॥ ६२ ॥ रसेसु जो गिद्धिमुवेइ तिक्वं, अकालियं पावइ से विणासं ।  
 रागाउरे वड्डिसविभिन्नकाए, मच्छे जहा आमिसभोगगिद्धे ॥ ६३ ॥ जे यावि दोसं  
 समुवेइ तिक्वं, तंसि क्खणे से उ उवेइ दुक्खं । दुइंतदोसेण सएण जंतू, न किंचि  
 रसं अवरज्झई से ॥ ६४ ॥ एगंतरत्ते रुइरंसि रसे, अताल्लिसे से कुणई पओसं ।  
 दुक्खस्स संपीलमुवेइ वाले, न लिप्पई तेण मुणी विरागो ॥ ६५ ॥ रसाणुगासा-  
 णुगए य जीवे, चराचरे हिंसइऽणेगह्वे । चित्तेहि ते परितावेइ वाले, पीलेइ  
 अत्तट्ठगुरु किलिट्ठे ॥ ६६ ॥ रसाणुवाएण परिग्गहेण, उप्पायणे रक्खणसन्निओगे ।  
 वए विओगे य क्हं सुहं से, संभोगकाले य अतित्तलामे ॥ ६७ ॥ रसे अतित्ते य  
 परिग्गहंमि, सत्तोवसत्तो न उवेइ तुट्ठि । अतुट्ठिदोसेण दुही परस्स, लोभाविले  
 आययई अदत्तं ॥ ६८ ॥ तण्हाभिभूयस्स अदत्तहारिणो, रसे अतित्तस्स परिग्गहे  
 य । मायासुसं वड्डइ लोभदोसा, तत्थावि दुक्खा न विमुच्चई से ॥ ६९ ॥ मोसस्स  
 पच्छा य पुरत्थओ य, पओगकाले य दुही दुरंते । एवं अदत्ताणि समाययंतो,  
 रसे अतित्तो दुहिओ अणिस्सो ॥ ७० ॥ रसाणुरत्तस्स नरस्स एवं, कत्तो सुहं  
 होज्ज कयाइ किंचि । तत्थोवभोगे वि किलेसदुक्खं, निव्वत्तई जस्स कएण दुक्खं  
 ॥ ७१ ॥ एमेव रसम्मि गओ पओसं, उवेइ दुक्खोहपरंपराओ । पदुट्ठचित्तो य  
 चिणाइ कम्मं, जं से पुणो होइ दुहं विवागे ॥ ७२ ॥ रसे विरत्तो मणुओ विसोगो,  
 एएण दुक्खोहपरंपरेण । न लिप्पई भवमज्जे वि संतो, जलेण वा पोक्खरिणी-  
 पलासं ॥ ७३ ॥ (५) कायस्स फासं गहणं वयंति, तं रागहेउं तु मणुजमाहु ।  
 तं दोसहेउं अमणुजमाहु, समो य जो तेसु स वीयरारो ॥ ७४ ॥ फासस्स  
 कायं गहणं वयंति, कायस्स फासं गहणं वयंति । रागस्स हेउं समणुजमाहु,  
 दोसस्स हेउं अमणुजमाहु ॥ ७५ ॥ फासेसु जो गिद्धिमुवेइ तिक्वं, अकालियं  
 पावइ से विणासं । रागाउरे सीयजलावसच्चे, गाहग्गीए महिसे विवच्चे ॥ ७६ ॥  
 जे यावि दोसं समुवेइ तिक्वं, तंसि क्खणे से उ उवेइ दुक्खं । दुइंतदोसेण सएण  
 जंतू, न किंचि फासं अवरज्झई से ॥ ७७ ॥ एगंतरत्ते रुइरंसि फासे, अताल्लिसे से

कुणई पओसं । दुक्खस्स संपीलमुवेइ बाले, न लिप्पई तेण सुणी विरागो ॥ ७८ ॥  
 फासाणुगासाणुगए य जीवे, चराचरे हिंसइऽणेगरूवे । चित्तेहि ते परितावेइ बाले,  
 पीलेइ अत्तट्टगुरू किलिद्धे ॥ ७९ ॥ फासाणुवाएण परिग्गहेण, उप्पायणे रक्खणसन्नि-  
 ओगे । वए विओगे य कहं सुहं से, संभोगकाले य अतित्तलामे ॥ ८० ॥ फासे  
 अतित्ते य परिग्गहंमि, सत्तोवसत्तो न उवेइ तुट्ठिं । अतुट्ठिदोसेण दुही परस्स, लोभा-  
 विले आययई अदत्तं ॥ ८१ ॥ तण्हाभिभूयस्स अदत्तहारिणो, फासे अतित्तस्स परि-  
 ग्गहे य । मायामुसं वड्डइ लोभदोसा, तत्थावि दुक्खा न विमुच्चई से ॥ ८२ ॥  
 मोसस्स पच्छा य पुरत्थओ य, पओगकाले य दुही दुरंते । एवं अदत्ताणि समाय-  
 यंतो, फासे अतित्तो दुहिओ अणिस्सो ॥ ८३ ॥ फासाणुरत्तस्स नरस्स एवं, कत्तो सुहं  
 होज्ज कयाइ किंचि । तत्थोवभोगे वि किलेसदुक्खं, निव्वत्तई जस्स कएण दुक्खं  
 ॥ ८४ ॥ एमेव फासंमि गओ पओसं, उवेइ दुक्खोहपरंपराओ । पटुट्ठचित्तो य चिणाइ  
 कम्मं, जं से पुणो होइ दुहं विवागे ॥ ८५ ॥ फासे विरत्तो मणुओ विसोगो, एएण  
 दुक्खोहपरंपरेण । न लिप्पई भवमज्जे वि संतो, जलेण वा पोक्खरिणीपलासं ॥ ८६ ॥  
 (६) मणस्स भावं गहणं वयंति, तं रागहेउं तु मणुज्जमाहु । तं दोसहेउं अमणुज्जमाहु,  
 समो य जो तेसु स वीयरगो ॥ ८७ ॥ भावस्स मणं गहणं वयंति, मणस्स भावं  
 गहणं वयंति । रागस्स हेउं समणुज्जमाहु, दोसस्स हेउं अमणुज्जमाहु ॥ ८८ ॥  
 भावेसु जो गिद्धिमुवेइ तिब्बं, अकालियं पावइ से विणासं । रागाउरे कामगुणेषु गिद्धे,  
 करेणमग्गावहिण गजे वा ॥ ८९ ॥ जे यावि दोसं समुवेइ तिब्बं, तंसि क्खणे से  
 उ उवेइ दुक्खं । दुहंतदोसेण सएण जंतू, न किंचि भावं अवरज्जई से ॥ ९० ॥  
 एगंतरत्ते रुइरंति भावे, अतालसे से कुणई पओसं । दुक्खस्स संपीलमुवेइ बाले, न  
 लिप्पई तेण सुणी विरागो ॥ ९१ ॥ भावाणुगासाणुगए य जीवे, चराचरे हिंस-  
 इऽणेगरूवे । चित्तेहि ते परितावेइ बाले, पीलेइ अत्तट्टगुरू किलिद्धे ॥ ९२ ॥ भावाणु-  
 वाएण परिग्गहेण, उप्पायणे रक्खणसन्निओगे । वए विओगे य कहं सुहं से, संभोग-  
 काले य अतित्तलामे ॥ ९३ ॥ भावे अतित्ते य परिग्गहंमि, सत्तोवसत्तो न उवेइ  
 तुट्ठिं । अतुट्ठिदोसेण दुही परस्स, लोभाविले आययई अदत्तं ॥ ९४ ॥ तण्हाभिभूयस्स  
 अदत्तहारिणो, भावे अतित्तस्स परिग्गहे य । मायामुसं वड्डइ लोभदोसा, तत्थावि  
 दुक्खा न विमुच्चई से ॥ ९५ ॥ मोसस्स पच्छा य पुरत्थओ य, पओगकाले य दुही  
 दुरंते । एवं अदत्ताणि समाययंतो, भावे अतित्तो दुहिओ अणिस्सो ॥ ९६ ॥ भावा-  
 णुरत्तस्स नरस्स एवं, कत्तो सुहं होज्ज कयाइ किंचि । तत्थोवभोगे वि किलेसदुक्खं,  
 निव्वत्तई जस्स कएण दुक्खं ॥ ९७ ॥ एमेव भावंमि गओ पओसं, उवेइ दुक्खोह-

परंपराओ । पटुद्वचितो य चिणाइ कम्मं, जं से पुणो होइ दुहं विवागे ॥ ९८ ॥ भावे  
 विरत्तो मणुओ विसोगो, एएण दुक्खोहपरंपरेण । न लिप्पई भवमज्जे वि संतो, जलेण  
 वा पोक्खरिणीपलासं ॥ ९९ ॥ एवंदिद्यत्था य मणस्स अत्था, दुक्खस्स हेउं मणु-  
 यस्स राणिणो । ते चेव थोवं पि कयाइ दुक्खं, न वीयरागस्स करंति किंचि ॥ १०० ॥  
 न कामभोगा समयं उवेंति, न यावि भोगा विगइं उवेंति । जे तप्पओसी य परिग्गही  
 य, सो तेसु मोहा विगइं उवेइ ॥ १०१ ॥ कोहं च माणं च तहेव मायं, लोहं  
 दुगुलं अरइं रइं च । हासं भयं सोगपुमित्थिवेयं, नपुंसवेयं विविहे य भावे ॥ १०२ ॥  
 आवज्जई एवमणेगह्वे, एवंविहे कामगुणेषु सत्तो । अन्ने य एयप्पभवे विसेसे,  
 कारुणदीणे हिरिमे वइस्से ॥ १०३ ॥ कप्पं न इच्छिज्ज सहायलिच्छू, पच्छाणुतावे  
 न तवप्पभावं । एवं वियारे अमियप्पयारे, आवज्जई इंदियचोरवस्से ॥ १०४ ॥  
 तओ से जायंति पओयणाइ, निमज्जिउं मोहमहण्णवंसि । सुहेसिणो दुक्खविणोयणट्ठा,  
 तप्पच्चयं उज्जमए य रागी ॥ १०५ ॥ विरज्जमाणस्स य इंदियत्था, सदाइया ताव-  
 इयप्पगारा । न तस्स सव्वे वि मणुन्नयं वा, निव्वत्तयंती अमणुन्नयं वा ॥ १०६ ॥  
 एवं ससंकप्पविकप्पणासुं, संजायई समयमुवट्ठियस्स । अत्ये य संकप्पयओ तओ से,  
 पहीयए कामगुणेषु तण्हा ॥ १०७ ॥ स वीयरागो कयसव्वकिच्चो, खवेइ नाणावरणं  
 खणेणं । तहेव जं दंसणमावरेइ, जं चंतरायं पकरेइ कम्मं ॥ १०८ ॥ सव्वं तओ  
 जाणइ पासए य, अमोहणे होइ निरंतराए । अणासवे ज्ञाणसमाहिजुत्ते, आउक्खए  
 मोक्खमुवेइ सुद्धे ॥ १०९ ॥ सो तस्स सव्वस्स दुहत्स मुक्को, जं बाहई सययं  
 जंतुमेयं । दीहामयं विप्पमुक्को पसत्थो, तो होइ अच्चंतसुही कयत्थो ॥ ११० ॥  
 अणाइकालप्पभवस्स एसो, सव्वस्स दुक्खस्स पमोक्खमग्गो । वियाहिओ जं समुविच्च  
 सत्ता, कमेण अच्चंतसुही भवंति ॥ १११ ॥ ति-बेमि ॥ इति पमायट्ठाणणामं  
 वत्तीसइमं अज्झयणं समत्तं ॥ ३२ ॥

## अह कम्मप्पयडी णामं तेत्तीसइमं अज्झयणं

अट्ठकम्माइ वोच्छामि, आणुपुत्वि जहक्कमं । जेहिं बद्धो अयं जीवो, संसारे परि-  
 वट्ठई ॥ १ ॥ नाणस्सावरणंज्जं, दंसणावरणं तहा । वेयणंज्जं तहा मोहं, आउक्कमं  
 तहेव य ॥ २ ॥ नामकम्मं च गोयं च, अंतरायं तहेव य । एवमेयाइ कम्माइं,  
 अट्ठेव उ समासओ ॥ ३ ॥ (१) नाणावरणं पंचविहं, सुयं आभिणिबोहियं । ओहि-  
 नाणं च तइयं, मणनौणं च केवलं ॥ ४ ॥ (२) निहौ तहेव पयलौ, निहानिहौ पय-

लपयल्लो य । तत्तो य थीणगिद्धी उ, पंचमा होइ नायव्वा ॥ ५ ॥ चक्खुमचक्खु-  
ओहिस्सं, दंसणे केवल्ले य आवरणे । एवं तु नवविगप्पं, नायव्वं दंसणावरणं ॥ ६ ॥  
(३) वेयणीयं पि य दुविहं, सार्यमसौयं च आहियं । सायस्स उ बहू भेया, एमेव  
असायस्स वि ॥ ७ ॥ (४) मोहणिज्जं पि दुविहं, दंसणे चरणे तथा । दंसणे तिविहं  
वुत्तं, चरणे दुविहं भवे ॥ ८ ॥ सम्मत्तं चैव मिच्छत्तं, सम्मामिच्छत्तमेवै य । एयाओ  
तिज्जि पयडीओ, मोहणिज्जस्स दंसणे ॥ ९ ॥ चरित्तमोहणं कम्मं, दुविहं तु वियाहियं ।  
कसायमोहणिज्जं तु, नोक्कसौयं तहेव य ॥ १० ॥ सोलसविहमेएणं, कम्मं तु कसा-  
यजं । सत्तविहं नवविहं वा, कम्मं च नोक्कसायजं ॥ ११ ॥ (५) नेरइयतिरिक्खाउं,  
मणुस्सौउं तहेव य । देवाउयं चउत्थं तु, आउकम्मं चउव्विहं ॥ १२ ॥ (६) नाम-  
कम्मं तु दुविहं, सुहमसुहं च आहियं । सुहस्स उ बहू भेया, एमेव असुहस्स वि  
॥ १३ ॥ (७) गोयं कम्मं दुविहं, उच्चं नीयं च आहियं । उच्चं अट्ठविहं होइ, एवं  
नीयं पि आहियं ॥ १४ ॥ (८) दाने लोभे य भोगे य, उव्वभोगे वीरिएं तथा ।  
पंचविहमंतरायं, समासेण वियाहियं ॥ १५ ॥ एयाओ मूलपयडीओ, उत्तराओ य  
आहिया । पएसग्गं खेत्तकाले य, भावं च उत्तरं सुण ॥ १६ ॥ सव्वेसिं चैव कम्माणं,  
पएसग्गमणंतगं । गंठियसत्ताइयं, अंतो सिद्धाण आहियं ॥ १७ ॥ सव्वजीवाण  
कम्मं तु, संगहे छद्दिसागयं । सव्वेसु वि पएसेसु, सव्वं सव्वेण बद्धगं ॥ १८ ॥  
उदहीसरिसनामाण, तीसई कोडिकोडिओ । उक्कोसिया ठिई होइ, अंतोसुहुत्तं  
जहन्निया ॥ १९ ॥ आवरणिज्जाण दुण्हं पि, वेयणिज्जे तहेव य । अंतराए य  
कम्मम्मि, ठिई एसा वियाहिया ॥ २० ॥ उदहीसरिसनामाण, सत्तरिं कोडिको-  
डिओ । मोहणिज्जस्स उक्कोसा, अंतोसुहुत्तं जहन्निया ॥ २१ ॥ तेत्तीससागरोवमा,  
उक्कोसेण वियाहिया । ठिई उ आउकम्मस्स, अंतोसुहुत्तं जहन्निया ॥ २२ ॥  
उदहीसरिसनामाण, वीसई कोडिकोडिओ । नामगोत्ताणं उक्कोसा, अट्ठसुहुत्ता जह,  
न्निया ॥ २३ ॥ सिद्धाणणंतभागो य, अणुभागा हवंति उ । सव्वेसु वि पएसग्गं  
सव्वजीवे अइच्छियं ॥ २४ ॥ तम्हा एएसि कम्माणं, अणुभागा वियाणिया । एएसि  
संवरे चैव, खवणे य जए बुहो ॥ २५ ॥ ति-बेसि ॥ इति कम्मप्पयडी णामं  
तेत्तीसइमं अज्झयणं समत्तं ॥ ३३ ॥

## अह लेसज्झयणणामं चोत्तीसइमं अज्झयणं

लेसज्झयणं पक्खामि, आणुपुर्व्वि जहक्कमं । छण्हं पि कम्मलेसाणं, अणुभावे



सुणेह मे ॥ १ ॥ नामाइं वण्णरसगंधं, फासपरिणामलक्खणं । ठाणं ठिइं गइं चाउं,  
 लेसाणं तु सुणेह मे ॥ २ ॥ किण्है नीला य काऊं य, तेऊं पम्है तहेव य । सुक्कलेसा  
 य छट्ठा य, नामाइं तु जहक्कमं ॥ ३ ॥ ( १ ) जीमूयनिद्धसंकासा, गवलरिट्ठगसन्निभा ।  
 खंजंजणनयणनिभा, किण्हलेसा उ वण्णओ ॥ ४ ॥ ( २ ) नीलासोगसंकासा,  
 चासपिच्छसमप्पभा । वेरुलियनिद्धसंकासा, नीललेसा उ वण्णओ ॥ ५ ॥  
 ( ३ ) अयसीपुप्फसंकासा, कोइलच्छदसन्निभा । पारेवयगीवनिभा, काउलेसा उ वण्णओ  
 ॥ ६ ॥ ( ४ ) हिंगुलयधाउसंकासा, तरुणाइच्चसन्निभा । सुयतुंडपईवनिभा, तेऊ-  
 लेसा उ वण्णओ ॥ ७ ॥ ( ५ ) हरियालभेयसंकासा, हल्लिदाभेयसमप्पभा ।  
 सणासणकुसुमनिभा, पम्हलेसा उ वण्णओ ॥ ८ ॥ ( ६ ) संखंक्कुंदसंकासा,  
 खीरपूरसमप्पभा । रययहारसंकासा, सुक्कलेसा उ वण्णओ ॥ ९ ॥ ( १ ) जह  
 कडुयतुंवगरसो, निंवरसो कडुयरोहिणिरसो वा । एत्तो वि अणंतगुणो, रसो य  
 किण्हाए नायव्वो ॥ १० ॥ ( २ ) जह तिगडुयस्स य रसो, तिक्खो जह हस्ति-  
 पिप्पलीए वा । एत्तो वि अणंतगुणो, रसो उ नीलाए नायव्वो ॥ ११ ॥  
 ( ३ ) जह तरुणअंबगरसो, तुवरकविट्ठस्स वावि जारिसओ । एत्तो वि अणंतगुणो, रसो  
 उ काऊए नायव्वो ॥ १२ ॥ ( ४ ) जह परिणयंवगरसो, पक्कविट्ठस्स वावि जारिसओ ।  
 एत्तो वि अणंतगुणो, रसो उ तेऊए नायव्वो ॥ १३ ॥ ( ५ ) जह वारुणीए व रसो,  
 विविहाण व आसवाण जारिसओ । महुमेरयस्स व रसो, एत्तो पम्हाए परएणं  
 ॥ १४ ॥ ( ६ ) खजूरमुद्दियरसो, खीररसो खंडसक्कररसो वा । एत्तो वि अणंतगुणो,  
 रसो उ सुक्काए नायव्वो ॥ १५ ॥ जह गोमडस्स गंधो, सुणगमडस्स व जहा अहि-  
 मडस्स । एत्तो वि अणंतगुणो, लेसाणं अप्पसत्थाणं ॥ १६ ॥ जह सुरहिकुसुमगंधो,  
 गंधवासाण पिस्समाणाणं । एत्तो वि अणंतगुणो, पसत्थलेसाण तिण्हं पि ॥ १७ ॥  
 जह करगयस्स फासो, गोजिब्भाए य सागपत्ताणं । एत्तो वि अणंतगुणो, लेसाणं  
 अप्पसत्थाणं ॥ १८ ॥ जह वूरस्स व फासो, नवणीयस्स व सिरीसकुसुमाणं । एत्तो  
 वि अणंतगुणो, पसत्थलेसाण तिण्हं पि ॥ १९ ॥ तिविहो व नवविहो वा, सत्तावीसइ-  
 विहेक्खसीओ वा । दुसओ तेयालो वा, लेसाणं होइ परिणामो ॥ २० ॥ ( १ ) पंचासवप्प-  
 वत्तो, तीहिं अगुत्तो छसुं अविरओ य । तिक्कारंभपरिणओ, खुहो साहसिओ नरो ॥ २१ ॥  
 निद्धंथसपरिणामो, निस्संसो अजिइंदिओ । एयजोगसमाउत्तो, किण्हलेसं तु परिणमे  
 ॥ २२ ॥ ( २ ) इस्सा अमरिस अतवो, अविज्जमाया अहीरिया । गिद्धी पओसे य  
 सढे, पमत्ते रसलोछए ॥ २३ ॥ सायगवेसए यै । आरंभाओ अविरओ, खुहो

१ 'गजपीपल' इति भासाए । २ गाहाहिगपयमिणं ।

साहस्सिओ नरो । एयजोगसमाउत्तो, नील्लेसं तु परिणमे ॥ २४ ॥ ( ३ ) वंके  
 वंकसमायारे, नियडिल्ले अणुणुए । पलिउंचगओवहिए, मिच्छादिट्ठी अणारिए ॥ २५ ॥  
 उप्फालगदुट्ठवाइ य, तेणे यावि य मच्छरी । एयजोगसमाउत्तो, काउलेसं तु परिणमे  
 ॥ २६ ॥ ( ४ ) नीयावित्ती अचवले, अमाइ अकुऊहले । विणीयविणए दंते, जोगवं  
 उवहाणवं ॥ २७ ॥ पियधम्मे दहधम्मे, ऽवज्जभीरु हिएसए । एयजोगसमाउत्तो,  
 तेऊलेसं तु परिणमे ॥ २८ ॥ ( ५ ) पयणुकोहमाणे य, मायालोमे य पयणुए ।  
 पसंतचित्ते दंतप्पा, जोगवं उवहाणवं ॥ २९ ॥ तथा पयणुवाइ य, उवसंते जिई-  
 दिए । एयजोगसमाउत्तो, पम्हलेसं तु परिणमे ॥ ३० ॥ ( ६ ) अट्ठरूढाणि  
 वज्जिता, धम्मसुक्काणि ज्ञायए । पसंतचित्ते दंतप्पा, समिए गुत्ते य गुत्तिउ ॥ ३१ ॥  
 सरागे वीरारगे वा, उवसंते जिईदिए । एयजोगसमाउत्तो, सुक्कलेसं तु परिणमे  
 ॥ ३२ ॥ असंखिज्जाणोसप्पिणीण, उस्सप्पिणीण जे समया । संखाइया लोणा,  
 लेसाण हवंति ठाणाइं ॥ ३३ ॥ मुहुत्तदं तु जहन्ना, तेत्तीसा सागरा मुहुत्तहिया ।  
 उक्कोसा होइ ठिई, नायव्वा किण्हलेसाए ॥ ३४ ॥ मुहुत्तदं तु जहन्ना, दस उदही  
 पलियमसंखभागमब्भहिया । उक्कोसा होइ ठिई, नायव्वा नील्लेसाए ॥ ३५ ॥  
 मुहुत्तदं तु जहन्ना, तिण्णुदही पलियमसंखभागमब्भहिया । उक्कोसा होइ ठिई,  
 नायव्वा काउलेसाए ॥ ३६ ॥ मुहुत्तदं तु जहन्ना, दोण्णुदही पलियमसंखभाग-  
 मब्भहिया । उक्कोसा होइ ठिई, नायव्वा तेउलेसाए ॥ ३७ ॥ मुहुत्तदं तु जहन्ना,  
 दस होंति य सागरा मुहुत्तहिया । उक्कोसा होइ ठिई, नायव्वा पम्हलेसाए  
 ॥ ३८ ॥ मुहुत्तदं तु जहन्ना, तेत्तीसं सागरा मुहुत्तहिया । उक्कोसा होइ ठिई,  
 नायव्वा सुक्कलेसाए ॥ ३९ ॥ एसा खलु लेसाणं, ओहेण ठिई उ वणिण्या होइ ।  
 चउसु वि गईसु एत्तो, लेसाण ठिई तु वोच्छामि ॥ ४० ॥ दस वाससहस्साइं,  
 काऊए ठिई जहन्निया होइ । तिण्णुदही पलिओवम—, असंखभागं च उक्कोसा  
 ॥ ४१ ॥ तिण्णुदही पलिओवम—, असंखभागो जहन्नेण नील्लिई । दस उदही  
 पलिओवम—, असंखभागं च उक्कोसा ॥ ४२ ॥ दसउदही पलिओवम—, असंखभागं  
 जहन्निया होइ । तेत्तीससागरां उक्कोसा, होइ किण्हाए लेसाए ॥ ४३ ॥ एसा  
 नेरइयाणं, लेसाण ठिई उ वणिण्या होइ । तेण परं वोच्छामि, तिरियमणुस्साण  
 देवाणं ॥ ४४ ॥ अंतोमुहुत्तमदं, लेसाण ठिई जहिं जहिं जा उ । तिरियाण  
 नराणं वा, वज्जिता केवलं लेसं ॥ ४५ ॥ मुहुत्तदं तु जहन्ना, उक्कोसा होइ पुव्व-  
 कोडीओ । नवहि वरिसेहि ऊणा, नायव्वा सुक्कलेसाए ॥ ४६ ॥ एसा तिरिय-  
 नराणं, लेसाण ठिई उ वणिण्या होइ । तेण परं वोच्छामि, लेसाण ठिई उ देवाणं

॥ ४७ ॥ दस वाससहस्साइं, किण्हाए ठिई जहन्निया होइ । पलियमसंखिज्जइमो, उक्कोसो होइ किण्हाए ॥ ४८ ॥ जा किण्हाए ठिई खलु, उक्कोसा सा उ समयम-  
ब्भहिया । जहन्नेणं नीलाए, पलियमसंखं च उक्कोसा ॥ ४९ ॥ जा नीलाए ठिई  
खलु, उक्कोसा सा उ समयमब्भहिया । जहन्नेणं काऊए, पलियमसंखं च उक्कोसा  
॥ ५० ॥ तेण परं वोच्छामि, तेऊलेसा जहा सुरगणाणं । भवणवइवाणसेतरं-  
जोइसवेमाणियाणं च ॥ ५१ ॥ पलिओवमं जहन्ना, उक्कोसा सागरा उ दुन्नहिया ।  
पलियमसंखेज्जेणं, होइ भागेण तेऊए ॥ ५२ ॥ दसवाससहस्साइं, तेऊए ठिई  
जहन्निया होइ । दुल्लुदही पलिओवमं-असंखभागं च उक्कोसा ॥ ५३ ॥ जा तेऊए  
ठिई खलु, उक्कोसा सा उ समयमब्भहिया । जहन्नेणं पम्हाए, दस उ मुहुत्ताहियाइ  
उक्कोसा ॥ ५४ ॥ जा पम्हाए ठिई खलु, उक्कोसा सा उ समयमब्भहिया ।  
जहन्नेणं सुक्काए, तेत्तीसमुहुत्तमब्भहिया ॥ ५५ ॥ किण्हा नीला काऊ, तिन्नि वि  
एयाओ अहम्मलेसाओ । एयाहि तिहि वि जीवो, दुग्गइं उववज्जइ ॥ ५६ ॥ तेऊ  
पम्हा सुक्का, तिन्नि वि एयाओ धम्मलेसाओ । एयाहि तिहि वि जीवो, सुग्गइं  
उववज्जइ ॥ ५७ ॥ लेसाहिं सव्वाहिं, पढमे समयंमि परिणयाहिं तु । न हु कस्सइ  
उववाओ, परे भवे अत्थि जीवस्स ॥ ५८ ॥ लेसाहिं सव्वाहिं, चरिमे समयंमि  
परिणयाहिं तु । न हु कस्सइ उववाओ, परे भवे होइ जीवस्स ॥ ५९ ॥ अंतमुहुत्तंमि  
गए, अंतमुहुत्तंमि सेसए चेव । लेसाहिं परिणयाहिं, जीवा गच्छंति परलोयं  
॥ ६० ॥ तम्हा एयासि लेसाणं, आणुभावे वियाणिया । अप्पसत्थाओ वजित्ता,  
पसत्थाओऽहिट्ठिए मुणि ॥ ६१ ॥ त्ति-वेमि ॥ इति लेसज्झयणणामं  
चोत्तीसइमं अज्झयणं समत्तं ॥ ३४ ॥

### अह अणगारज्झयणं णाम पंचतीसइमं अज्झयणं

सुणेह मे एगग्गमणा, मग्गं बुद्धेहि देसियं । जमायरंतो भिक्खु, दुक्खाणंतकरे  
भवे ॥ १ ॥ गिहवासं परिच्चज्ज, पवज्जामस्सिए मुणी । इमे संगे वियाणिज्जा, जेहिं  
सज्जंति माणवा ॥ २ ॥ तहेव हिंसं अल्लियं, चोर्जं अबंभसेर्वणं । इच्छाकामं च  
लोभं च, संजओ परिवज्जए ॥ ३ ॥ मणोहरं चित्तधरं, मल्लधूवेण वासियं । सकवाडं  
पंडुरल्लोयं, मणसा वि न पत्थए ॥ ४ ॥ इंदियाणि उ भिक्खुस्स, तारिसंमि  
उवस्सए । दुक्कराईं निवारेउं, कामरागविवह्णुणे ॥ ५ ॥ सुसाणे सुचगारे वा,  
स्वखमूले व एगओ । पइरिके परकडे वा, वासं तत्थाभिरोयए ॥ ६ ॥ फासुयंमि

अणावाहे, इत्थीहिं अणभिद्दुए । तत्थ संकप्पए वासं, भिक्खु परमसंजए ॥ ७ ॥  
 न सयं गिहाई कुब्बिजा, णेव अन्नेहिं कारए । गिहकम्मसमारंभे, भूयाणं दिस्सए  
 व्हो ॥ ८ ॥ तसाणं थावराणं च, सुहुमाणं वादराणं य । तम्हा गिहसमारंभं,  
 संजओ परिवज्जए ॥ ९ ॥ तहेव भत्तपाणेसु, पयणे पयावणेसु य । पाणभूयदयद्वाए,  
 न पए न पयावए ॥ १० ॥ जलधन्नानिस्सिया जीवा, पुढवीकट्टानिस्सिया । हम्मंति  
 भत्तपाणेसु, तम्हा भिक्खु न पयावए ॥ ११ ॥ विसप्पे सव्वओ धारे, बहुपाणि-  
 विणासणे । नत्थि जोइसमे सत्थे, तम्हा जोइं न दीवए ॥ १२ ॥ हिरण्णं जायरुवं  
 च, मणसा वि न पत्थए । समलेट्ठकंचणे भिक्खु, विरए कयविक्रए ॥ १३ ॥  
 किण्तो कइओ होइ, विक्खिण्तो य वाणिओ । कयविक्रयंमि वट्ठंतो, भिक्खु न भवइ  
 तारिसो ॥ १४ ॥ भिक्खियव्वं न केयव्वं, भिक्खुणा भिक्खवत्तिणा । कयविक्रओ  
 महादोसो, भिक्खावित्ती सुहावहा ॥ १५ ॥ समुयाणं उच्छमेसिजा, जहासुत्तम-  
 णिदियं । लाभालाभंमि संतुट्ठे, पिंडवायं चरे सुणी ॥ १६ ॥ अलोले न रसे गिद्धे,  
 जिब्भादंते अमुच्छिण्ण । न रसद्वाए भुंजिजा, जवणद्वाए महामुणी ॥ १७ ॥  
 अच्चणं रयणं चेव, वंदणं पूयणं तहा । इट्ठीसकारसम्माणं, मणसा वि न पत्थए  
 ॥ १८ ॥ सुक्कज्झाणं झियाएजा, अणियाणे अकिंचणे । वोसट्ठकाए विहरेजा, जाव  
 कालस्स पज्जओ ॥ १९ ॥ निज्जूहिऊण आहारं, कालधम्मे उवट्ठिए । जहिऊण  
 माणुसं बौदिं, पट्टु दुक्खा विमुचई ॥ २० ॥ निम्ममे निरहंकारे, वीयरगो  
 अणासवो । संपत्तो केवलं नाणं, सासयं परिणिव्वुए ॥ २१ ॥ त्ति-ब्रेमि ॥ इति  
 अणगारज्झयणं णाम पंचतीसइमं अज्झयणं समत्तं ॥ ३५ ॥

## अह जीवाजीवविभत्ती णामं छत्तीसइमं अज्झयणं

जीवाजीवविभत्तिं मे, सुणेहेगमणा इओ । जं जाणिऊण भिक्खु, सम्मं जयइ  
 संजमे ॥ १ ॥ जीवा चेव अजीवा य, एस लोए वियाहिए । अजीवदेसमागासे,  
 अलोगे से वियाहिए ॥ २ ॥ दव्वओ खेत्तओ चेव, कालओ भावओ तहा । पव्वणा  
 तेसिं भवे, जीवाणमजीवाण य ॥ ३ ॥ रूविणो चेवऽरूवी य, अजीवा दुविहा भवे ।  
 अरूवी दसहा वुत्ता, रूविणो य चउव्विहा ॥ ४ ॥ धम्मत्थिकाए तदेसे, तप्पएसे य,  
 आहिए । अहम्मे तस्स देसे य, तप्पएसे य आहिए ॥ ५ ॥ आगासे तस्स देसे य,  
 तप्पएसे य आहिए । अद्वासमए चेव, अरूवी दसहा भवे ॥ ६ ॥ धम्माधम्मे य  
 दो चेव, लोगमिन्ता वियाहिया । लोगालोगे य आगासे, समए समयखेत्ति ॥ ७ ॥

धम्माधम्मागासा, तिन्नि वि एए अणाइया । अपज्जवसिया चेव, सव्वद्धं तु वियाहिया  
 ॥ ८ ॥ समए वि संतइं पप्प, एवमेव वियाहिए । आएसं पप्प साईए, सपज्ज-  
 वसिए वि य ॥ ९ ॥ खंधा य खंधदेसा य, तप्पएसा तहेव य । परमाणुणो य  
 वोधव्वा, रुविणो य चउव्विहा ॥ १० ॥ एगत्तेण पुहत्तेण, खंधा य परमाणु य ।  
 लोगेगदेसे लोए य, भइयव्वा ते उ खेतओ ॥ ११ ॥ सुहुमा सव्वलोगंमि, लोगदेसे  
 य वायरा । इत्तो कालविभागं तु, तेसिं वुच्छं चउव्विहं ॥ १२ ॥ संतइं पप्प  
 तेऽणाई, अपज्जवसिया वि य । ठिइं पडुच्च साईया, सपज्जवसिया वि य ॥ १३ ॥  
 असंखकालमुक्कोसं, एक्को समओ जहन्नयं । अजीवाण य रुवीणं, ठिई एसा वियाहिया  
 ॥ १४ ॥ अणंतकालमुक्कोसं, एक्को समओ जहन्नयं । अजीवाण य रुवीणं, अंतरेयं  
 वियाहियं ॥ १५ ॥ वण्णओ गंधओ चेव, रसओ फासओ तहा । संठाणओ य विज्ञेओ,  
 परिणामो तेसि पंचहा ॥ १६ ॥ वण्णओ परिणया जे उ, पंचहा ते पकित्तिया । किण्हा  
 नीला य लोहिया, हलिहा सुक्किला तहा ॥ १७ ॥ गंधओ परिणया जे उ, दुविहा  
 ते वियाहिया । सुब्भिगंधपरिणामा, दुब्भिगंधा तहेव य ॥ १८ ॥ रसओ परिणया  
 जे उ, पंचहा ते पकित्तिया । तित्तकडुयकसाया, अंबिला महुरा तहा ॥ १९ ॥ फासओ  
 परिणया जे उ, अट्ठहा ते पकित्तिया । कक्खडा मउया चेव, गरुया लहुया तहा  
 ॥ २० ॥ सीया उण्हा य निद्धा य, तहा लुक्खा य आहिया । इय फासपरिणया  
 एए, पुग्गला समुदाहिया ॥ २१ ॥ संठाणओ परिणया जे उ, पंचहा ते पकित्तिया ।  
 परिमंडला य वट्ठा य, तंसा चउरंसमायया ॥ २२ ॥ वण्णओ जे भवे किण्हे, भइए  
 से उ गंधओ । रसओ फासओ चेव, भइए संठाणओ वि य ॥ २३ ॥ वण्णओ जे भवे  
 नीले, भइए से उ गंधओ । रसओ फासओ चेव, भइए संठाणओ वि य ॥ २४ ॥  
 वण्णओ लोहिए जे उ, भइए से उ गंधओ । रसओ फासओ चेव, भइए संठाणओ  
 वि य ॥ २५ ॥ वण्णओ पीयए जे उ, भइए से उ गंधओ । रसओ फासओ चेव,  
 भइए संठाणओ वि य ॥ २६ ॥ वण्णओ सुक्किले जे उ, भइए से उ गंधओ । रसओ  
 फासओ चेव, भइए संठाणओ वि य ॥ २७ ॥ गंधओ जे भवे सुब्भी, भइए से उ  
 वण्णओ । रसओ फासओ चेव, भइए संठाणओ वि य ॥ २८ ॥ गंधओ जे भवे  
 दुब्भी, भइए से उ वण्णओ । रसओ फासओ चेव, भइए संठाणओ वि य ॥ २९ ॥  
 रसओ तित्तए जे उ, भइए से उ वण्णओ । गंधओ फासओ चेव, भइए संठाणओ  
 वि य ॥ ३० ॥ रसओ कडुए जे उ, भइए से उ वण्णओ । गंधओ फासओ चेव,  
 भइए संठाणओ वि य ॥ ३१ ॥ रसओ कसाए जे उ, भइए से उ वण्णओ । गंधओ  
 फासओ चेव, भइए संठाणओ वि य ॥ ३२ ॥ रसओ अंबिले जे उ, भइए से उ

वण्णओ । गंधओ फासओ चेव, भइए संठाणओ वि य ॥ ३३ ॥ रसओ महुरए जे उ, भइए से उ वण्णओ । गंधओ फासओ चेव, भइए संठाणओ वि य ॥ ३४ ॥ फासओ कक्खडे जे उ, भइए से उ वण्णओ । गंधओ रसओ चेव, भइए संठाणओ वि य ॥ ३५ ॥ फासओ मउए जे उ, भइए से उ वण्णओ । गंधओ रसओ चेव, भइए संठाणओ वि य ॥ ३६ ॥ फासओ गुरुए जे उ, भइए से उ वण्णओ । गंधओ रसओ चेव, भइए संठाणओ वि य ॥ ३७ ॥ फासओ लहुए जे उ, भइए से उ वण्णओ । गंधओ रसओ चेव, भइए संठाणओ वि य ॥ ३८ ॥ फासओ सीयए जे उ, भइए से उ वण्णओ । गंधओ रसओ चेव, भइए संठाणओ वि य ॥ ३९ ॥ फासओ उण्हए जे उ, भइए से उ वण्णओ । गंधओ रसओ चेव, भइए संठाणओ वि य ॥ ४० ॥ फासओ निद्धए जे उ, भइए से उ वण्णओ । गंधओ रसओ चेव, भइए संठाणओ वि य ॥ ४१ ॥ फासओ लुक्खए जे उ, भइए से उ वण्णओ । गंधओ रसओ चेव, भइए संठाणओ वि य ॥ ४२ ॥ परिमंडलसंठाणे, भइए से उ वण्णओ । गंधओ रसओ चेव, भइए फासओ वि य ॥ ४३ ॥ संठाणओ भवे वट्ठे, भइए से उ वण्णओ । गंधओ रसओ चेव, भइए फासओ वि य ॥ ४४ ॥ संठाणओ भवे तंसे, भइए से उ वण्णओ । गंधओ रसओ चेव, भइए फासओ वि य ॥ ४५ ॥ संठाणओ जे चउरंसे, भइए से उ वण्णओ । गंधओ रसओ चेव, भइए फासओ वि य ॥ ४६ ॥ जे आययसंठाणे, भइए से उ वण्णओ । गंधओ रसओ चेव, भइए फासओ वि य ॥ ४७ ॥ एसा अजीवविभत्ती, समासेण वियाहिया । इत्तो जीवविभत्तिं, वुच्छामि अणुपुव्वसो ॥ ४८ ॥ संसारत्था य सिद्धा य, दुविहा जीवा वियाहिया । सिद्धा णेगविहा वुत्ता, तं मे कित्तयओ सुण ॥ ४९ ॥ इत्थी-पुरिससिद्धा य, तहेव य नपुंसगा । सल्लिगे अन्नल्लिगे य, गिहिल्लिगे तहेव य ॥ ५० ॥ उक्कोसोगाहणाए य, जहन्नमज्झिमाइ य । उद्धं अहे य तिरियं च, समुद्धंमि जलंमि य ॥ ५१ ॥ दस य नपुंसएसु, वीसं इत्थियासु य । पुरिसेसु य अट्ठसयं, समएणेगेण सिज्झई ॥ ५२ ॥ चत्तारि य गिहिल्लिगे, अन्नल्लिगे दसेव य । सल्लिगेण अट्ठसयं, समएणेगेण सिज्झई ॥ ५३ ॥ उक्कोसोगाहणाए य, सिज्झंते जुगवं दुवे । चत्तारि जहन्नाए, मज्झे अट्ठतरं सयं ॥ ५४ ॥ चउरद्वल्लोए य दुवे समुद्धे, तओ जले वीसमहे तहेव य । सयं च अट्ठतरं तिरियलोए, समएणेगेण सिज्झई धुवं ॥ ५५ ॥ कहिं पडिहया सिद्धा ?, कहिं सिद्धा पइट्ठिया ? । कहिं बोदिं चइत्ताणं ?, कथं गंतूणं सिज्झई ? ॥ ५६ ॥ अलोए पडिहया सिद्धा, लोयग्गे य पइट्ठिया । इहं बोदिं चइत्ताणं, तत्थं गंतूणं सिज्झई ॥ ५७ ॥ बारसहिं जेयणेहिं, सव्वट्ठस्सुवरिं भवे । ईसिपन्भारनामा उ, पुढवी छत्तसंठिया

॥ ५८ ॥ पणयालसयसहस्सा, जोयणाणं तु आयया । तावइयं चेव वित्थिण्णा,  
तिगुणो साहियपरिरओ ॥ ५९ ॥ अट्ठजोयणबाह्हा, सा मज्झंमि वियाहिया ।  
परिहायंती चरिमंते, मच्छिपत्ताउ तणुयरी ॥ ६० ॥ अज्जुणसुवण्णगमई, सा पुढवी  
निम्मला सहावेण । उत्ताणगच्छत्तगसंठिया य, भणिया जिणवरेहिं ॥ ६१ ॥  
संखंककुंदसंकासा, पंडुरा निम्मला सुहा । सीयाए जोयणे तत्तो, लोयंतो उ वियाहियो  
॥ ६२ ॥ जोयणस्स उ जो तत्थ, कोसो उवरिमो भवे । तस्स कोसस्स छब्भाए,  
सिद्धाणोगाहणा भवे ॥ ६३ ॥ तत्थ सिद्धा महाभागा, लोगगंमि पइट्टिया । भव-  
पवंचओ मुक्का, सिद्धिं वरगइं गया ॥ ६४ ॥ उस्सेहो जस्स जो होइ, भवंमि चरिमंमि  
उ । तिभागहीणो तत्तो य, सिद्धाणोगाहणा भवे ॥ ६५ ॥ एगत्तेण साईया, अपज्ज-  
वसिया वि य । पुहत्तेण अणाईया, अपज्जवसिया वि य ॥ ६६ ॥ अरुविणो जीव-  
घणा, नाणदंसणसन्निया । अउलं सुहं संपत्ता, उवमा जस्स नत्थि उ ॥ ६७ ॥  
लोगेगदेसे ते सव्वे, नाणदंसणसन्निया । संसारपारनित्थिण्णा, सिद्धिं वरगइं गया  
॥ ६८ ॥ संसारत्था उ जे जीवा, दुविहा ते वियाहिया । तसा य थावरा चेव,  
थावरा तिविहा तहिं ॥ ६९ ॥ पुढवी आउजीवा य, तहेव य वणस्सई । इच्चेए  
थावरा तिविहा, तेसिं भेए सुणेह मे ॥ ७० ॥ दुविहा य पुढवीजीवा, सुहुमा बायरा  
तहा । पज्जत्तमपज्जत्ता, एवमेव दुहा पुणो ॥ ७१ ॥ बायरा जे उ पज्जत्ता, दुविहा  
ते वियाहिया । सण्हा खरा य बोधव्वा, सण्हा सत्तविहा तहिं ॥ ७२ ॥ किण्हा  
नीला य सहिरा य, हालिद्दा सुक्खिला तहा । पंडुपणगमट्टिया, खरा छत्तीसईविहा  
॥ ७३ ॥ पुढवी य सक्करा वालुया य, उवले सिला य लोणूसे । अयतंबतउयसीसग-  
रुप्पसुवण्णे य वइरे य ॥ ७४ ॥ हरियाले हिंगुलए, मणोसिला सासगंजणपवाले ।  
अब्भपडलब्भवालुय, बायरकाए मणिविहाणे ॥ ७५ ॥ गोमेजए य रुयगे, अंके  
फलहे य लोहियक्खे य । मरगयमसारगळे, भुयमोयगइंदनीले य ॥ ७६ ॥  
चंदणगेरुयहंसगब्भे, पुलए सोगंधिए य बोधव्वे । चंदप्पहवेरुलिए, जलकंते  
सूरकंते य ॥ ७७ ॥ एए खरपुढवीए, भेया छत्तीसमाहिया । एगविहमणाणत्ता,  
सुहुमा तत्थ वियाहिया ॥ ७८ ॥ सुहुमा सव्वलोगंमि, लोगदेसे य बायरा । इतो  
कालविभागं तु, वुच्छं तेसिं चउव्विहं ॥ ७९ ॥ संतई पप्पडणाईया, अपज्जवसिया  
वि य । ठिई पडुच्च साईया, सपज्जवसिया वि य ॥ ८० ॥ बावीससहस्साइं,  
वासाणुक्कोसिया भवे । आउठिई पुढवीणं, अंतोमुहुत्तं जहजिया ॥ ८१ ॥ असंख-  
कालमुक्कोसा, अंतोमुहुत्तं जहजिया । कायठिई पुढवीणं, तं कायं तु अमुंचओ  
॥ ८२ ॥ अणंतकालमुक्कोसं, अंतोमुहुत्तं जहजयं । विजठंमि सए काए, पुढविजीवाण

अंतरं ॥ ८३ ॥ एएसिं वण्णओ चेव, गंधओ रसफासओ । संठाणादेसओ वावि, विहाणाइं सहस्ससो ॥ ८४ ॥ दुविहा आउजीवा उ, सुहुमा बायरा तहा । पज्जत्त-  
मपज्जत्ता, एवमेए दुहा पुणो ॥ ८५ ॥ बायरा जे उ पज्जत्ता, पंचहा ते पकित्तिया ।  
सुद्धोदए य उस्से य, हरतणू महिया हिमे ॥ ८६ ॥ एगविहमणाणत्ता, सुहुमा तत्थ  
वियाहिया । सुहुमा सव्वलोगंमि, लोगदेसे य बायरा ॥ ८७ ॥ संतइं पप्पऽणाईया,  
अपज्जवसिया वि य । ठिइं पडुच्च साईया, सपज्जवसिया वि य ॥ ८८ ॥ सत्तेव सहस्साईं,  
वासाणुक्कोसिया भवे । आउठिईं आऊणं, अंतोमुहुत्तं जहन्निया ॥ ८९ ॥ असंख-  
कालमुक्कोसा, अंतोमुहुत्तं जहन्नियं । कायठिईं आऊणं, तं कायं तु अमुंचओ ॥ ९० ॥  
अणंतकालमुक्कोसं, अंतोमुहुत्तं जहन्नयं । विजडंमि सए काए, आऊजीवाण अंतरं  
॥ ९१ ॥ एएसिं वण्णओ चेव, गंधओ रसफासओ । संठाणादेसओ वावि, विहाणाइं  
सहस्ससो ॥ ९२ ॥ दुविहा वणस्सईजीवा, सुहुमा बायरा तहा । पज्जत्तमपज्जत्ता,  
एवमेए दुहा पुणो ॥ ९३ ॥ बायरा जे उ पज्जत्ता, दुविहा ते वियाहिया । साहा-  
रणसरीरा य, पत्तेगा य तहेव य ॥ ९४ ॥ पत्तेगसरीराओ, ऽणेगहा ते पकित्तिया ।  
स्वखा गुच्छा य गुम्मा य, लया वल्ली तणा तहा ॥ ९५ ॥ वलया पव्वगा कुहुणा,  
जलरुहा ओसही तहा । हरियकाया बोधव्वा, पत्तेगाइ वियाहिया ॥ ९६ ॥ साहा-  
रणसरीराओ, ऽणेगहा ते पकित्तिया । आलुए मूलए चेव, सिंगवेरे तहेव य ॥ ९७ ॥  
हरिली सिरिली सत्तिसिरिली, जावईं केयकंदली । पलंडुलसणकंदे य, कंदली य कुहुव्वए  
॥ ९८ ॥ लोहिणी द्वयथी द्वय, कुहगा य तहेव य । कण्हे य वज्जकंदे य, कंदे  
सूरणए तहा ॥ ९९ ॥ अस्सकण्णी य बोधव्वा, सीहकण्णी तहेव य । सुसुंढी य  
हल्लिहा य, ऽणेगहा एवमायओ ॥ १०० ॥ एगविहमणाणत्ता, सुहुमा तत्थ वियाहिया ।  
सुहुमा सव्वलोगंमि, लोगदेसे य बायरा ॥ १०१ ॥ संतइं पप्पऽणाईया, अपज्जव-  
सिया वि य । ठिइं पडुच्च साईया, सपज्जवसिया वि य ॥ १०२ ॥ दस चेव  
सहस्साईं, वासाणुक्कोसिया भवे । वणप्फईण आउं तु, अंतोमुहुत्तं जहन्निया ॥ १०३ ॥  
अणंतकालमुक्कोसा, अंतोमुहुत्तं जहन्नियं । कायठिईं पणगाणं, तं कायं तु अमुंचओ  
॥ १०४ ॥ असंखकालमुक्कोसं, अंतोमुहुत्तं जहन्नयं । विजडंमि सए काए, पणग-  
जीवाण अंतरं ॥ १०५ ॥ एएसिं वण्णओ चेव, गंधओ रसफासओ । संठाणादेसओ  
वावि, विहाणाइं सहस्ससो ॥ १०६ ॥ इच्चेए थावरा तिविहा, समासेण वियाहिया ।  
इत्तो उ तसे तिविहे, वुच्छामि अणुपुव्वसो ॥ १०७ ॥ तेऊ वाऊ य बोधव्वा,  
उराला य तसा तहा । इच्चेए तसा तिविहा, तेसिं भेए सुणेह मे ॥ १०८ ॥ दुविहा  
तेऊजीवा उ, सुहुमा बायरा तहा । पज्जत्तमपज्जत्ता, एवमेए दुहा पुणो ॥ १०९ ॥



बायरा जे उ पज्जता, ऽणेगहा ते वियाहिया । इंगाले मुम्मुरे अगणी, अच्चि  
 जाला तहेव य ॥ ११० ॥ उक्का विज्जू य बोधव्वा, ऽणेगहा एवमायओ । एग-  
 विहमणाणत्ता, सुहुमा ते वियाहिया ॥ १११ ॥ सुहुमा सव्वलोगंमि, लोगदेसे य  
 बायरा । इत्तो कालविभागं तु, तेसिं वुच्छं चउव्विहं ॥ ११२ ॥ संतइं पप्पऽणा-  
 ईया, अपज्जवसिया वि य । ठिईं पडुच्च साईया, सपज्जवसिया वि य ॥ ११३ ॥  
 तिण्णेव अहोरत्ता, उक्कोसेण वियाहिया । आउठिईं तेऊणं, अंतोमुहुत्तं जहन्निया  
 ॥ ११४ ॥ असंखकालमुक्कोसा, अंतोमुहुत्तं जहन्निया । कायठिईं तेऊणं, तं कायं  
 तु अमुंचओ ॥ ११५ ॥ अणंतकालमुक्कोसं, अंतोमुहुत्तं जहन्नयं । विजडंमि सए  
 काए, तेऊजीवाण अंतरं ॥ ११६ ॥ एएसिं वण्णओ चेव, गंधओ रसफासओ ।  
 संठाणादेसओ वावि, विहाणाईं सहस्ससो ॥ ११७ ॥ दुविहा वाउजीवा उ, सुहुमा  
 बायरा तहा । पज्जत्तमपज्जत्ता, एवमेए दुहा पुणो ॥ ११८ ॥ बायरा जे उ पज्जत्ता,  
 पंचहा ते पकित्तिया । उक्कलिया मंडलिया, घणगुंजा सुद्धवाया य ॥ ११९ ॥  
 संवट्ठगवाया य, ऽणेगहा एवमायओ । एगविहमणाणत्ता, सुहुमा तत्थ वियाहिया  
 ॥ १२० ॥ सुहुमा सव्वलोगंमि, लोगदेसे य बायरा । इत्तो कालविभागं तु, तेसिं  
 वुच्छं चउव्विहं ॥ १२१ ॥ संतइं पप्पऽणाईया, अपज्जवसिया वि य । ठिईं पडुच्च  
 साईया, सपज्जवसिया वि य ॥ १२२ ॥ तिण्णेव सहस्साईं, वासाणुक्कोसिया भवे ।  
 आउठिईं वाऊणं, अंतोमुहुत्तं जहन्निया ॥ १२३ ॥ असंखकालमुक्कोसा, अंतोमुहुत्तं  
 जहन्निया । कायठिईं वाऊणं, तं कायं तु अमुंचओ ॥ १२४ ॥ अणंतकाल-  
 मुक्कोसं, अंतोमुहुत्तं जहन्नयं । विजडंमि सए काए, वाऊजीवाण अंतरं ॥ १२५ ॥  
 एएसिं वण्णओ चेव, गंधओ रसफासओ । संठाणादेसओ वावि, विहाणाईं सहस्ससो  
 ॥ १२६ ॥ उराला तसा जे उ, चउहा ते पकित्तिया । बेइंदिय तेइंदिय, चउरो  
 पंचिंदिया तहा ॥ १२७ ॥ बेइंदिया उ जे जीवा, दुविहा ते पकित्तिया । पज्जत्त-  
 मपज्जत्ता, तेसिं भेए सुणेह मे ॥ १२८ ॥ किमिणो सोमंगला चेव, अलसा माइ-  
 वाहया । वासीमुहा य सिप्पिया, संखा संखणगा तहा ॥ १२९ ॥ पळोयाणुल्लया  
 चेव, तहेव य वराडगा । जल्लगा जालगा चेव, चंदणा य तहेव य ॥ १३० ॥ इइ  
 बेइंदिया एए, ऽणेगहा एवमायओ । लोगेगदेसे ते सव्वे, न सव्वत्थ वियाहिया  
 ॥ १३१ ॥ संतइं पप्पऽणाईया, अपज्जवसिया वि य । ठिईं पडुच्च साईया, सपज्ज-  
 वसिया वि य ॥ १३२ ॥ वासाईं बारसा चेव, उक्कोसेण वियाहिया । बेइंदियआउ-  
 ठिईं, अंतोमुहुत्तं जहन्निया ॥ १३३ ॥ संखिज्जकालमुक्कोसा, अंतोमुहुत्तं जहन्निया ।  
 बेइंदियकायठिईं, तं कायं तु अमुंचओ ॥ १३४ ॥ अणंतकालमुक्कोसं, अंतोमुहुत्तं

जहन्नयं । वेइंदियजीवाणं, अंतरं च वियाहियं ॥ १३५ ॥ एएसिं वण्णओ चेव,  
 गंधओ रसफासओ । संठाणादेसओ वावि, विहाणाइं सहस्ससो ॥ १३६ ॥ तेइंदिया  
 उ जे जीवा, दुविहा ते पकित्तिया । पज्जत्तमपज्जता, तेसिं मेए सुणेह मे ॥ १३७ ॥  
 कुंथुपिवील्लिउइंसा, उक्कल्लेइहिया तहा । तण्हारकट्टहारा य, माल्लगा पत्तहारगा  
 ॥ १३८ ॥ कप्पासत्थिमिजा य, तिंदुगा तउसमिजगा । सदावरी य गुम्मी य,  
 बोधव्वा इंदगाइया ॥ १३९ ॥ इंदगोवगमाइया, ऽणेगहा एवमायओ । लोगेगदेसे  
 ते सव्वे, न सव्वत्थ वियाहिया ॥ १४० ॥ संतइं पप्पऽणाइया, अपज्जवसिया वि  
 य । ठिइं पडुच्च साइया, सपज्जवसिया वि य ॥ १४१ ॥ एगूणपण्होरत्ता, उक्को-  
 सेण वियाहिया । तेइंदियआउठिइं, अंतोमुहुत्तं जहन्निया ॥ १४२ ॥ संखिज्जकाल-  
 मुक्कोसा, अंतोमुहुत्तं जहन्निया । तेइंदियकायठिइं, तं कायं तु अमुंचओ ॥ १४३ ॥  
 अणंतकालमुक्कोसं, अंतोमुहुत्तं जहन्नयं । तेइंदियजीवाणं, अंतरं तु वियाहियं  
 ॥ १४४ ॥ एएसिं वण्णओ चेव, गंधओ रसफासओ । संठाणादेसओ वावि, विहाणाइं  
 सहस्ससो ॥ १४५ ॥ चउरिंदिया उ जे जीवा, दुविहा ते पकित्तिया । पज्जत्तम-  
 पज्जता, तेसिं मेए सुणेह मे ॥ १४६ ॥ अंधिया पोत्तिया चेव, मच्छिया मसगा  
 तहा । भमरे कीडपयंगे य, ढिंकुणे कंकणे तहा ॥ १४७ ॥ कुक्कडे सिंगिरीडी य,  
 नंदावत्ते य विच्छए । डोले भिंगिरीडी य, विरली अच्छिवेहए ॥ १४८ ॥ अच्छिल्ले  
 माहए अच्छि(रोडए), विचित्ते चित्तपत्तए । उहिंजलिया जलकारी य, नीयया  
 तंबगाइया ॥ १४९ ॥ इय चउरिंदिया एए, ऽणेगहा एवमायओ । लोगेगदेसे ते  
 सव्वे, न सव्वत्थ वियाहिया ॥ १५० ॥ संतइं पप्पऽणाइया, अपज्जवसिया वि य ।  
 ठिइं पडुच्च साइया, सपज्जवसिया वि य ॥ १५१ ॥ छचेव य मासाऊ, उक्कोसेण  
 वियाहिया । चउरिंदियआउठिइं, अंतोमुहुत्तं जहन्निया ॥ १५२ ॥ संखिज्जकाल-  
 मुक्कोसा, अंतोमुहुत्तं जहन्निया । चउरिंदियकायठिइं, तं कायं तु अमुंचओ  
 ॥ १५३ ॥ अणंतकालमुक्कोसं, अंतोमुहुत्तं जहन्नयं । चउरिंदियजीवाणं, अंतरं च  
 वियाहियं ॥ १५४ ॥ एएसिं वण्णओ चेव, गंधओ रसफासओ । संठाणादेसओ  
 वावि, विहाणाइं सहस्ससो ॥ १५५ ॥ पंचिंदिया उ जे जीवा, चउविहा ते  
 वियाहिया । नेरइया तिरिक्खा य, मणुया देवा य आहिया ॥ १५६ ॥ नेरइया  
 सत्तविहा, पुढवीसु सत्तसु भवे । रयणाभसक्कराभा, वालुयाभा य आहिया  
 ॥ १५७ ॥ पंकाभा धूमाभा, तमा तमतमा तहा । इइ नेरइया एए, सत्तहा  
 परिकित्तिया ॥ १५८ ॥ लोगस्स एगदेसंमि, ते सव्वे उ वियाहिया । एत्तो काल-

पाढंतरं-१ लोगस्स एगदेसंमि, ते सव्वे परिकित्तिआ । २ विजडम्मि सए काए ।

विभागं तु, वोच्छं तेसिं चउव्विहं ॥ १५९ ॥ संतइं पप्पणाइया, अपज्जवसिया वि य । ठिइं पडुच्च साइया, सपज्जवसिया वि य ॥ १६० ॥ सागरोवममेगं तु, उक्कोसेण वियाहिया । पढमाए जहन्नेणं, दसवाससहस्सिया ॥ १६१ ॥ तिण्णेव सागरा ऊ, उक्कोसेण वियाहिया । दोच्चाए जहन्नेणं, एगं तु सागरोवमं ॥ १६२ ॥ सत्तेव सागरा ऊ, उक्कोसेण वियाहिया । तइयाए जहन्नेणं, तिण्णेव सागरोवमा ॥ १६३ ॥ दससागरोवमा ऊ, उक्कोसेण वियाहिया । चउत्थीए जहन्नेणं, सत्तेव सागरोवमा ॥ १६४ ॥ सत्तरससागरा ऊ, उक्कोसेण वियाहिया । पंचमाए जहन्नेणं, दस चेव सागरोवमा ॥ १६५ ॥ वावीससागरा ऊ, उक्कोसेण वियाहिया । छट्ठीए जहन्नेणं, सत्तरससागरोवमा ॥ १६६ ॥ तेत्तीससागरा ऊ, उक्कोसेण वियाहिया । सत्तमाए जहन्नेणं, वावीसं सागरोवमा ॥ १६७ ॥ जा चेव य आउठिई, नेरइयाणं वियाहिया । सा तेसिं कायठिई, जहन्नुक्कोसिया भवे ॥ १६८ ॥ अणंतकालमुक्कोसं, अंतोमुहुत्तं जहन्नयं । विजडंमि सए काए, नेरइयाणं तु अंतरं ॥ १६९ ॥ एएसिं वण्णओ चेव, गंधओ रसफासओ । संठाणादेसओ वावि, विहाणाइं सहस्ससो ॥ १७० ॥ पंचिदियतिरिक्खाओ, दुविहा ते वियाहिया । संमुच्छिम्मतिरिक्खाओ, गम्भवक्कंतिया तहा ॥ १७१ ॥ दुविहा ते भवे तिविहा, जलयरा थलयरा तहा । नहयरा य बोधव्वा, तेसिं भेए सुणेह मे ॥ १७२ ॥ मच्छा य कच्छभा य, गाहा य भगरा तहा । सुंउमारा य बोधव्वा, पंचहा जलयराहिया ॥ १७३ ॥ लोएगदेसे ते सव्वे, न सव्वत्थ वियाहिया । इत्तो कालविभागं तु, वोच्छं तेसिं चउव्विहं ॥ १७४ ॥ संतइं पप्पणाइया, अपज्जवसिया वि य । ठिइं पडुच्च साइया, सपज्जवसिया वि य ॥ १७५ ॥ एगा य पुव्वकोडी, उक्कोसेण वियाहिया । आउठिई जलयराणं, अंतोमुहुत्तं जहन्निया ॥ १७६ ॥ पुव्वकोडिपुहत्तं तु, उक्कोसेण वियाहिया । कायठिई जलयराणं, अंतोमुहुत्तं जहन्निया ॥ १७७ ॥ अणंतकालमुक्कोसं, अंतोमुहुत्तं जहन्नयं । विजडंमि सए काए, जलयराणं तु अंतरं ॥ १७८ ॥ एएसिं वण्णओ चेव, गंधओ रसफासओ । संठाणादेसओ वावि, विहाणाइं सहस्ससो ॥ १७९ ॥ चउप्पया य परिसप्पा, दुविहा थलयरा भवे । चउप्पया चउविहा, ते मे कित्तयओ सुणं ॥ १८० ॥ एगखुरा दुखुरा चेव, गंडीपयसणप्फया । हयमाई गोणमाई, गयमाइसीहमाइणो ॥ १८१ ॥ भुओरगपरिसप्पा य, परिसप्पा दुविहा भवे । गोहाई अहिमाई य, एकैक्काऽणेगहा भवे ॥ १८२ ॥ लोएगदेसे ते सव्वे, न सव्वत्थ वियाहिया । एत्तो कालविभागं तु, वोच्छं तेसिं चउव्विहं ॥ १८३ ॥ संतइं पप्पणाइया, अपज्जवसिया वि य । ठिइं पडुच्च साइया, सपज्जवसिया वि य

॥ १८४ ॥ पलिओवमाई तिण्णि उ, उक्कोसेण वियाहिया । आउठिई थलयराणं, अंतोमुहुत्तं जहन्निया ॥ १८५ ॥ पुव्वकोडिपुहुत्तेणं, उक्कोसेण वियाहिया । कायठिई थलयराणं, अंतोमुहुत्तं जहन्निया ॥ १८६ ॥ कालमणंतमुक्कोसं, अंतोमुहुत्तं जहन्नयं । विजडंमि सए काए, थलयराणं तु अंतरं ॥ १८७ ॥ एएसिं वण्णओ चेव, गंधओ रसफासओ । संठाणादेसओ वावि, विहाणाई सहस्ससो ॥ १८८ ॥ चम्मे उ लोमपक्खी य, तइया समुग्गपक्खिया । विययपक्खी य बोधव्वा, पक्खिणो य चउव्विहा ॥ १८९ ॥ लोगेगदेसे ते सव्वे, न सव्वत्थ वियाहिया । इत्तो कालविभागं तु, तेसिं वोच्छं चउव्विहं ॥ १९० ॥ संतइं पप्पणाईया, अपज्जवसिया वि य । ठिईं पडुच्च साईया, सपज्जवसिया वि य ॥ १९१ ॥ पलिओवमस्स भागो, असंखेज्जइमो भवे । आउठिई खहयराणं, अंतोमुहुत्तं जहन्निया ॥ १९२ ॥ असंखभागो पलियस्स, उक्कोसेण उ साहिया । पुव्वकोडीपुहुत्तेणं, अंतोमुहुत्तं जहन्निया ॥ १९३ ॥ कायठिई खहयराणं, अंतरं तेसिमं भवे । अणंतकालमुक्कोसं, अंतोमुहुत्तं जहन्नयं ॥ १९४ ॥ एएसिं वण्णओ चेव, गंधओ रसफासओ । संठाणादेसओ वावि, विहाणाई सहस्ससो ॥ १९५ ॥ मणुया दुविहमेया उ, ते मे कित्तयओ सुण । संमुच्छिमाय मणुया, गम्भवक्कंतिया तहा ॥ १९६ ॥ गम्भवक्कंतिया जे उ, ति विहा ते वियाहिया । कम्मअकम्मभूमा य, अंतरदीवया तहा ॥ १९७ ॥ पन्नरसतीसविहा, मेया अट्ठवीसइं । संखा उ कमसो तेसिं, इइ एसा वियाहिया ॥ १९८ ॥ संमुच्छिमाण एसेव, मेओ होइ वियाहिओ । लोगस्स एगदेसंमि, ते सव्वे वि वियाहिया ॥ १९९ ॥ संतइं पप्पणाईया, अपज्जवसिया वि य । ठिईं पडुच्च साईया, सपज्जवसिया वि य ॥ २०० ॥ पलिओवमाई तिण्णि वि, उक्कोसेण वियाहिया । आउठिई मणुयाणं, अंतोमुहुत्तं जहन्निया ॥ २०१ ॥ पलिओवमाई तिण्णि उ, उक्कोसेण वियाहिया । पुव्वकोडिपुहुत्तेणं, अंतोमुहुत्तं जहन्निया ॥ २०२ ॥ कायठिई मणुयाणं, अंतरं तेसिमं भवे । अणंतकालमुक्कोसं, अंतोमुहुत्तं जहन्नयं ॥ २०३ ॥ एएसिं वण्णओ चेव, गंधओ रसफासओ । संठाणादेसओ वावि, विहाणाई सहस्ससो ॥ २०४ ॥ देवा चउव्विहा वुत्ता, ते मे कित्तयओ सुण । भोमिज्ज वाणमंतर, जोइस वेमाणिया तहा ॥ २०५ ॥ दसहा उ भवणवासी, अट्ठहा वणचारिणो । पंचविहा जोइसिया, दुविहा वेमाणिया तहा ॥ २०६ ॥ अञ्जरा नागसुवण्णा, विज्जू अग्गी वियाहिया । दीवोदहिदिसा वाया, थणिया भवणवासिणो ॥ २०७ ॥ पिसायभूया जक्ख्वा य, रक्खसा किन्नरा किंपुरिसा । महोरगा य गंधव्वा, अट्ठविहा वाणमंतरा ॥ २०८ ॥ चंदा सूरा य नक्खत्ता, गहा तारागणा तहा । ६७ सुत्ता०

दिसा विचारिणो चेव, पंचहा जोइसालया ॥ २०९ ॥ वेमाणिया उ जे देवा, दुविहा ते वियाहिया । कप्पोवगा य बोधव्वा, कप्पाईया तहेव य ॥ २१० ॥ कप्पोवगा वारसहा, सोहम्मसीसाणगा तथा । सणकुमारमाहिंदा, बंभलोगा य लंतगा ॥ २११ ॥ महासुक्का सहस्सारा, आणया पाणया तथा । आरणा अच्चुया चेव, इइ कप्पोवगा सुरा ॥ २१२ ॥ कप्पाईया उ जे देवा, दुविहा ते वियाहिया । गेविजाणुत्तरा चेव, गेविज्जा नवविहा तहिं ॥ २१३ ॥ हेट्ठिमाहेट्ठिमा चेव, हेट्ठिमामज्झिमा तथा । हेट्ठिमाउवरिमा चेव, मज्झिमाहेट्ठिमा तथा ॥ २१४ ॥ मज्झिमामज्झिमा चेव, मज्झिमाउवरिमा तथा । उवरिमाहेट्ठिमा चेव, उवरिमामज्झिमा तथा ॥ २१५ ॥ उवरिमाउवरिमा चेव, इय गेविज्जा सुरा । विजया वेजयंता य, जयंता अपराजिया ॥ २१६ ॥ सब्वत्थसिद्धगा चेव, पंचहाणुत्तरा सुरा । इय वेमाणिया एए, ऽणेगहा एवमायओ ॥ २१७ ॥ लोगस्स एगदेसंमि, ते सब्वे वि वियाहिया । इत्तो कालविभागं तु, तेसिं वुच्छं चउव्विहं ॥ २१८ ॥ संतइं पप्पऽणाईया, अपज्जवसिया वि य । ठिइं पडुच्च साईया, सपज्जवसिया वि य ॥ २१९ ॥ साहियं सागरं एक्कं, उक्कोसे(णं)ण ठिई भवे । भोमेजाणं जहन्नेणं, दसवाससहस्सिया ॥ २२० ॥ [ पलिओवम दो ऊणा, उक्कोसेण वियाहिया । असु(रं)रिंदवजेताण, जहन्ना दससहस्सगा ॥ ] पलिओवममेगं तु, उक्कोसेण ठिई भवे । वंतराणं जहन्नेणं, दसवाससहस्सिया ॥ २२१ ॥ पलिओवममेगं तु, वासलक्खेण साहियं । पलिओवमद्वभागो, जोइसेसु जहन्निया ॥ २२२ ॥ दो चेव सागराई, उक्कोसेण वियाहिया । सोहम्ममि जहन्नेणं, एगं च पलिओवमं ॥ २२३ ॥ सागरा साहिया दुब्धि, उक्कोसेण वियाहिया । ईसाणमि जहन्नेणं, साहियं पलिओवमं ॥ २२४ ॥ सागराणि य सत्तेव, उक्कोसेण ठिई भवे । सणकुमारं जहन्नेणं, दुब्धि ऊ सागरोवमा ॥ २२५ ॥ साहिया सागरा सत्त, उक्कोसेण ठिई भवे । माहिंदमि जहन्नेणं, साहिया दुब्धि सागरा ॥ २२६ ॥ दस चेव सागराई, उक्कोसेण ठिई भवे । बंभलोए जहन्नेणं, सत्त ऊ सागरोवमा ॥ २२७ ॥ चउद्दस सागराई, उक्कोसेण ठिई भवे । लंतगमि जहन्नेणं, दस उ सागरोवमा ॥ २२८ ॥ सत्तरस सागराई, उक्कोसेण ठिई भवे । महासुक्के जहन्नेणं, चोद्दस सागरोवमा ॥ २२९ ॥ अट्ठारस सागराई, उक्कोसेण ठिई भवे । सहस्सारमि जहन्नेणं, सत्तरस सागरोवमा ॥ २३० ॥ सागरा अउणवीसं तु, उक्कोसेण ठिई भवे । आणयमि जहन्नेणं, अट्ठारस सागरोवमा ॥ २३१ ॥ वीसं तु सागराई, उक्कोसेण ठिई भवे । पाणयमि जहन्नेणं, सागरा अउणवीसई ॥ २३२ ॥ सागरा इक्कीसं तु, उक्कोसेण ठिई भवे । आरणमि जह-

ज्ञेणं, वीसई सागरोवमा ॥ २३३ ॥ बावीसं सागराई, उक्कोसेण ठिई भवे । अत्तुयम्मि जहज्ञेणं, सागरा इक्कीसई ॥ २३४ ॥ तेवीस सागराई, उक्कोसेण ठिई भवे । पढ-  
मंमि जहज्ञेणं, बावीसं सागरोवमा ॥ २३५ ॥ चउवीस सागराई, उक्कोसेण ठिई भवे ।  
विइयंमि जहज्ञेणं, तेवीसं सागरोवमा ॥ २३६ ॥ पणवीस सागराई, उक्कोसेण ठिई  
भवे । तइयंमि जहज्ञेणं, चउवीसं सागरोवमा ॥ २३७ ॥ छव्वीस सागराई, उक्कोसेण  
ठिई भवे । चउत्थंमि जहज्ञेणं, सागरा पणुवीसई ॥ २३८ ॥ सागरा सत्तवीसं तु,  
उक्कोसेण ठिई भवे । पंचमंमि जहज्ञेणं, सागरा उ छवीसई ॥ २३९ ॥ सागरा  
अट्टवीसं तु, उक्कोसेण ठिई भवे । छट्ठंमि जहज्ञेणं, सागरा सत्तवीसई ॥ २४० ॥  
सागरा अउणतीसं तु, उक्कोसेण ठिई भवे । सत्तमंमि जहज्ञेणं, सागरा अट्टवीसई  
॥ २४१ ॥ तीसं तु सागराई, उक्कोसेण ठिई भवे । अट्ठमंमि जहज्ञेणं, सागरा अउ-  
णतीसई ॥ २४२ ॥ सागरा इक्कीतीसं तु, उक्कोसेण ठिई भवे । नवमंमि जहज्ञेणं,  
तीसई सागरोवमा ॥ २४३ ॥ तेत्तीसा सागराई, उक्कोसेण ठिई भवे । चउसुं पि  
विजयाईसु, जहज्ञेणेक्कीतीसई ॥ २४४ ॥ अजहन्नमणुक्कोसा, तेत्तीसं सागरोवमा ।  
महाविमाणे सब्बट्ठे, ठिई एसा वियाहिया ॥ २४५ ॥ जा चेव उ आउठिई, देवाणं  
तु वियाहिया । सा तेसिं कायठिई, जहन्नमुक्कोसिया भवे ॥ २४६ ॥ अणंतकाल-  
मुक्कोसं, अंतोमुहुत्तं जहन्नयं । विजडंमि सए काए, देवाणं हुज्ज अंतरं ॥ २४७ ॥  
अणंतकालमुक्कोसं, वासपुहुत्तं जहन्नयं । आणयाईण कप्पाण, गेविज्जाणं तु अंतरं  
॥ २४८ ॥ संखिज्जसागरुक्कोसं, वासपुहुत्तं जहन्नयं । अणुत्तराणं देवाणं, अंतरेयं  
वियाहियं ॥ २४९ ॥ एएसिं वण्णओ चेव, गंधओ रसफासओ । संठाणादेसओ वावि,  
विहाणाई सहस्ससो ॥ २५० ॥ संसारत्था य सिद्धा य, इय जीवा वियाहिया ।  
रूविणो चेवऽरूवी य, अजीवा दुविहा वि य ॥ २५१ ॥ इय जीवमजीवे य, सोच्चा  
सइहिउण य । सव्वनयाणमणुमए, रमेज्ज संजमे मुणी ॥ २५२ ॥ तओ बहूणि  
वासाणि, सामण्णमणुपालिया । इमेण कमजोगेण, अप्पाणं संलिहे मुणी ॥ २५३ ॥  
बारसेव उ वासाई, संलेहुक्कोसिया भवे । संवच्छरं मज्झिमिया, छम्मासा य जहन्निया  
॥ २५४ ॥ पढमे वासचउक्कंमि, विगईनिज्जूहणं करे । बिइए वासचउक्कंमि, विवित्तं  
तु तवं चरे ॥ २५५ ॥ एगंतरमायामं, कट्ठु संवच्छरे दुवे । तओ संवच्छरद्धं तु,  
नाइविगिट्ठं तवं चरे ॥ २५६ ॥ तओ संवच्छरद्धं तु, विगिट्ठं तु तवं चरे । परिमियं  
चेव आयामं, तंमि संवच्छरे करे ॥ २५७ ॥ कोडीसहियमायामं, कट्ठु संवच्छरे  
मुणी । मासद्धमासिएणं तु, आहारेण तवं चरे ॥ २५८ ॥ कंदप्पमाभिओगं च,  
किव्विसियं मोहमासुरत्तं च । एयाउ दुग्गईओ, मरणंमि विराहिया होंति ॥ २५९ ॥

मिच्छादंसणरत्ता, सनियाणा उ हिंसगा । इय जे मरंति जीवा, तेसिं पुण दुल्लहा बोही ॥ २६० ॥ सम्मईसणरत्ता, अनियाणा सुक्कलेसमोगाढा । इय जे मरंति जीवा, तेसिं सुल्लहा भवे बोही ॥ २६१ ॥ मिच्छादंसणरत्ता, सनियाणा कण्हलेसमोगाढा । इय जे मरंति जीवा, तेसिं पुण दुल्लहा बोही ॥ २६२ ॥ जिणवयणे अणुरत्ता, जिणवयणं जे करेंति भावेण । अमला असंकलिट्ठा, ते होंति परित्तसंसारी ॥ २६३ ॥ बालमरणाणि बहुसो, अकाममरणाणि चेव य वट्ठणि । मरिहंति ते वराया, जिणवयणं जे न जाणंति ॥ २६४ ॥ बहुआगमविन्नाणा, समाहिउप्पायगा य गुणगाही । एएणं कारणेणं, अरिहा आलोयणं सोउं ॥ २६५ ॥ कंदप्पकुक्कुराई, तह सीलसहावहासविगहाई । विम्हावेंतो य परं, कंदप्पं भावणं कुणइ ॥ २६६ ॥ मंताजोगं काउं, भूईकम्मं च जे पउंजंति । सायरसइड्डिहेउं, अभिओगं भावणं कुणइ ॥ २६७ ॥ नाणस्स केवलीणं, धम्मायरियस्स संघसाहूणं । माई अवण्णवाई, किव्विसियं भावणं कुणइ ॥ २६८ ॥ अणुवद्धरोसपसरो, तह य निमित्तंमि होइ पडिसेवी । एएहिं कारणेहिं, आसुरियं भावणं कुणइ ॥ २६९ ॥ सत्थगहणं विसभक्खणं च, जलणं च जलपवेसो य । अणायारभंडसेवी, जम्मणमरणाणि वंथंति ॥ २७० ॥ इइ पाउकरे बुद्धे, नायए परिनिव्वुए । छत्तीसं उत्तरज्झाए, भवसिद्धीयसं [वुडे]मए ॥ २७१ ॥ ति-वेमि ॥ इति जीवा-जीवविभत्ती णामं छत्तीसइमं अज्झयणं समत्तं ॥ ३६ ॥

॥ उत्तरज्झयणसुत्तं समत्तं ॥



णमोऽस्थु णं समणस्स भगवओ णायपुत्तमहावीरस्स

# सुत्तागमे

तथ णं  
नंदीसुत्तं

जयइ जगजीवजोणी- , वियाणओ जगगुरू जगाणंदो । जगणाहो जगबंधू, जयइ  
जगप्पियामहो भयवं ॥ १ ॥ जयइ सुआणं पभवो, तिथयरारणं अपच्छिमो जयइ ।  
जयइ गुरू लोगाणं, जयइ महप्पा महावीरो ॥ २ ॥ भइं सब्वजगुज्जोयगस्स, भइं  
जिणस्स वीरस्स । भइं सुरासुरनमंसियस्स, भइं थुयरयस्स ॥ ३ ॥ गुणभवणगहण  
सुयरयणभरिय, दंसणविसुद्धरत्थागा । संघनगर ! भइं ते, अखंडचारित्तपागारा  
॥ ४ ॥ संजमतवतुंबारयस्स, नमो सम्मत्तपारियद्वस्स । अप्पडिचक्कस्स जओ, होउ  
सया संघचक्कस्स ॥ ५ ॥ भइं सीलपडागूसियस्स, तवनियमतुरयजुत्तस्स । संघरहस्स  
भगवओ, सज्झायसुनंदिघोसस्स ॥ ६ ॥ कम्मरयजलोहविणिग्गयस्स, सुयरयणवीह-  
नालस्स । पंचमहव्वयथिरकन्नियस्स, गुणकेसरालस्स ॥ ७ ॥ सावगजणमहुअरि-  
परिवुडस्स, जिणसूरतेयबुद्धस्स । संघपउमस्स भइं, समणगणसहस्सपत्तस्स ॥ ८ ॥  
तवसंजममयलंछण !, अकिरियराहुमुहदुद्धरिस ! निच्चं । जय संघचंद ! निम्मल-  
सम्मत्तविसुद्धजोण्हागा । ॥ ९ ॥ परत्तिथियगहपहनासगस्स, तवतेयदित्तलेसस्स ।  
नाणुजोयस्स जए, भइं दमसंवसूरस्स ॥ १० ॥ भइं धिइवेलापरिगयस्स, सज्झाय-  
जोगमगरस्स । अक्खोहस्स भगवओ, संघसमुदस्स रुंदस्स ॥ ११ ॥ सम्मद्वेस्सण-  
वरवडरदट्ठुगढाढावगाढपेढस्स । धम्मवरयणमंडियचामीयरमेहलागस्स ॥ १२ ॥  
नियमूसियकणयसिलायलुज्जलजलंतचित्तकूडस्स । नंदणवणमणहरसुरभिसीलांघुदु-  
मायस्स ॥ १३ ॥ जीवदयासुंदरकंदरुहरियमुणिवरमईदइस्स । हेउसयधाउपगलं-  
तरयणदित्तोसहिगुहस्स ॥ १४ ॥ संवरवरजलपगलियउज्झरपविरायामाणहारस्स ।  
सावगजणपउररवंतमोरनच्चंतकुहरस्स ॥ १५ ॥ विणयनयपवरमुणिवरफुरंतविजुज-  
लंतसिहरस्स । विविहगुणकप्पख्खगफलभरकुसुमाउलवणस्स ॥ १६ ॥ नाणवर-  
यणदिपंत- , कंतवेहलियविमलचूलस्स । वंदामि विणयपणओ, संघमहामंदरगिरिस्स  
॥ १७ ॥ [गुणरयणुज्जलकडयं, सीलसुगंधितवमंडिउद्वेसं । सुयवारसंगसिहरं, संघ-  
महामंदरं वंदे ॥ १८ ॥ नगररहचक्कपउमे, चंदे सूरं समुद्वेस्समि । जो उवमिजइ



सययं, तं संघगुणायरं वंदे ॥ १९ ॥ [वंदे] उसभं अजियं संभव-मभिनंदणसुमह-  
 सुप्पभसुपासं । सत्तिपुप्फदंतसीयल-सिज्जंसं वासुपुज्जं च ॥ २० ॥ विमलमणंत य  
 धम्मं, संतिं कुंथुं अरं च मल्लिं च । मुनिसुव्वयनमिनेमिं, पासं तह वट्ठमाणं च  
 ॥ २१ ॥ पढमित्थ इंदभूई, वीए पुण होइ अग्गिभूइति । तइए य वाउभूई, तओ  
 वियत्ते सुहम्मे य ॥ २२ ॥ मंडियमोरियपुत्ते, अकंपिए चेव अयलभाया य । मेयजे  
 य पहासे [य], गणहरा हुंति वीरस्स ॥ २३ ॥ निव्वुइपहसासणयं, जयइ सया  
 सव्वभावादसणयं । कुसमयमयनासणयं, जिणंदवरवीरसासणयं ॥ २४ ॥ सुहम्मं  
 अग्गिवेसाणं, जंवूनामं च कासवं । पभवं कचायणं वंदे, वच्छं सिज्जंभवं तहा  
 ॥ २५ ॥ जसभइं तुंगियं वंदे, संभूयं चेव माढरं । भद्वाहुं च पाइच्चं, थूलभइं च  
 गोयमं ॥ २६ ॥ एलावच्चसगोत्तं, वंदामि महागिरिं सुहत्थिं च । तत्तो कोसियगोत्तं,  
 बहुलस्स सरिव्वयं वंदे ॥ २७ ॥ हारियगुत्तं साइं, च वंदिमो हारियं च सामज्जं ।  
 वंदे कोसियगोत्तं, संडिल्लं अज्जजीयधरं ॥ २८ ॥ तिसमुइखायकित्तिं, वीवसमुइसु  
 गहियपेयालं । वंदे अज्जसमुहं, अक्खुमियसमुद्गंभीरं ॥ २९ ॥ भणगं करगं झरगं,  
 पभावगं णाणदंसणगुणाणं । वंदामि अज्जमंगुं, सुयसागरपारगं धीरं ॥ ३० ॥  
 [वंदामि अज्जधम्मं, तत्तो वंदे य भद्गुत्तं च । तत्तो य अज्जवइरं, तवनिमगुणेहिं  
 वइरसमं ॥ ३१ ॥ वंदामि अज्जरक्खिय-खमणे रक्खियचरित्तसव्वस्से । रयण-  
 कण्डगभूओ, अणुओगो रक्खिओ जेहिं ॥ ३२ ॥] नाणम्मि दंसणम्मि य, तवविणए  
 णिच्चकालमुज्जुत्तं । अज्जं नंदिलखमणं, सिरसा वंदे पसन्नमणं ॥ ३३ ॥ वड्डउ वाय-  
 गवंसो, जसवंसो अज्जनागहत्थीणं । वागरणकरणभंगिय-कम्मप्पयडीपहाणाणं  
 ॥ ३४ ॥ जच्चंजणधाउसमप्पहाण, मुद्दियकुवलयनिहाणं । वड्डउ वायगवंसो, रेव-  
 इनक्खत्तनामाणं ॥ ३५ ॥ अयलपुरा णिक्खंते, कालियसुयआणुओगिए धीरे ।  
 बंभद्दीवगसीहे, वायगपयमुत्तमं पत्ते ॥ ३६ ॥ जेसि इमो अणुओगो, पयरइ अज्जावि  
 अट्ठभरहम्मि । बहुनयरनिग्गयजसे, ते वंदे खंदिलायरिए ॥ ३७ ॥ तत्तो हिम-  
 वंतमहंतविक्रमे, धिइपरक्कममणंते । सज्झायमणंतधरे, हिमवंते वंदिमो सिरसा  
 ॥ ३८ ॥ कालियसुयअणुओगस्स धारए, धारए य पुव्वाणं । हिमवंतखमासमणे,  
 वंदे णागज्जुणायरिए ॥ ३९ ॥ सिउमह्वसंपत्ते, आणुपुव्विवायगतत्तं पत्ते । ओह-  
 सुयसमायारे, नागज्जुणवायए वंदे ॥ ४० ॥ [गोविंदाणंपि नमो, अणुओगे विउ-  
 लधारिणिंदाणं । णिच्चं खंतिदयाणं, पख्खणे दुल्लभिंदाणं ॥ ४१ ॥ तत्तो य भूयदिच्चं,  
 निच्चं तवसंजमे अनिव्विण्णं । पंडियजणसामणं, वंदामो संजमविहिण्णु ॥ ४२ ॥]  
 वरकणगतवियचंपग-विमउलवरकमलगब्भसरिव्वे । भवियजणहिययदइए, दयागुण-

विसारए धीरे ॥ ४३ ॥ अडुभरहप्पहाणे, बहुविहसज्झायसुमुणियपहाणे । अणु-  
ओगियवरवसमे, नाइकुलवंसनंदिकरे ॥ ४४ ॥ भूयहियअप्पगवमे, वंदेऽहं भूय-  
दिक्कमायारिए । भवभयवुच्छेयकरे, सीसे नागज्जुरिसीणं ॥ ४५ ॥ सुमुणियनिच्चा-  
निच्चं, सुमुणियसुत्तत्थधारयं वंदे । सब्भावुब्भावणया-तत्थं लोहिच्चाणामाणं ॥ ४६ ॥  
अत्थमहत्थक्खाणिं, सुसमणवक्खाणकहणनिव्वाणिं । पयईए महुरवाणिं, पयओ  
पणमामि दूसगणिं ॥ ४७ ॥ [तवनियमसच्चसंजम-विणयज्वखंतिमहवरयाणं । सील-  
गुणगद्वियाणं, अणुओगज्जुगप्पहाणाणं ॥ ४८ ॥] सुकुमालकोमलतले, तेसिं पणमामि  
लक्खणपसत्थे । पाए पावयणीणं, पडिच्छयसएहिं पणिवइए ॥ ४९ ॥ जे अजे  
भगवंते, कालियसुयआणुओगिए धीरे । ते पणमिऊण सिरसा, नाणरूस्स पव्वणं  
वोच्छं ॥ ५० ॥ सेलघण १ कुडग २ चालणि ३, परिपूणग ४ हंस ५ महिस ६ मेसे  
७ य । मसग ८ जल्ला ९ बिराली १०, जाहग ११ गो १२ भेरी १३ आभीरी  
१४ ॥ ५१ ॥ सा समासओ तिविहा पज्जत्ता, तंजहा-जाणिया, अजाणिया, दुव्वि-  
यङ्का । जाणिया जहा-खीरमिव जहा हंसा, जे घुटंति इह गुरुगुणसमिद्धा । दोसे  
य विवज्जंति, तं जाणसु जाणियं परिसं ॥ ५२ ॥ अजाणिया जहा-जा होइ पगइ-  
महुरा, मियछावयसीहकुड्डयभूया । रयणमिव असंठविया, अजाणिया सा भवे  
परिसा ॥ ५३ ॥ दुव्वियङ्का जहा-न य कत्थइ निम्माओ, न य पुच्छइ परिभवस्स  
दोसेण । वत्थिव्व वायपुण्णो, फुट्टइ गामिळ्ळय(दुव्वि)वियङ्को ॥ ५४ ॥ नाणं पंचविहं  
पज्जत्तं, तंजहा-आभिणिबोहियनाणं, सुयनाणं, ओहिनाणं, मणपज्जवनाणं, केवलनाणं  
॥ १ ॥ तं समासओ दुविहं पण्णत्तं, तंजहा-पच्चक्खं च परोक्खं च ॥ २ ॥ से किं  
तं पच्चक्खं? पच्चक्खं दुविहं पण्णत्तं, तंजहा-इंदियपच्चक्खं नोइंदियपच्चक्खं च ॥ ३ ॥  
से किं तं इंदियपच्चक्खं? इंदियपच्चक्खं पंचविहं पण्णत्तं, तंजहा-सोइंदियपच्चक्खं  
चक्खिंदियपच्चक्खं घाणियिंदियपच्चक्खं जिब्भियपच्चक्खं फासिंदियपच्चक्खं, से तं इंदिय-  
पच्चक्खं ॥ ४ ॥ से किं तं नोइंदियपच्चक्खं? नोइंदियपच्चक्खं तिविहं पण्णत्तं, तंजहा-  
ओहिनाणपच्चक्खं मणपज्जवनाणपच्चक्खं केवलनाणपच्चक्खं ॥ ५ ॥ से किं तं ओहिनाण-  
पच्चक्खं? ओहिनाणपच्चक्खं दुविहं पण्णत्तं, तंजहा-भवपच्चइयं च खाओवसमियं  
च ॥ ६ ॥ से किं तं भवपच्चइयं? भवपच्चइयं दुण्हं, तंजहा-देवाण य नेरइयाण य  
॥ ७ ॥ से किं तं खाओवसमियं? खाओवसमियं दुण्हं, तंजहा-मणूसाण य पंचेदिय-  
तिरिक्खजोणियाण य । को हेऊ खाओवसमियं? खाओवसमियं तयावरणिजाणं  
कम्माणं उदिण्णाणं खएणं अणुदिण्णाणं उवसमेणं ओहिनाणं समुप्पज्जइ ॥ ८ ॥  
अहवा गुणपडिवरूस्स अणगारूस्स ओहिनाणं समुप्पज्जइ, तं समासओ छव्विहं

पण्णत्तं, तंजहा-आणुगामियं १, अणाणुगामियं २, वड्डमाणयं ३, हीयमाणयं ४, पड्डिवाइयं ५, अपड्डिवाइयं ६ ॥ ९ ॥ से किं तं आणुगामियं ओहिनाणं? आणुगामियं ओहिनाणं दुविहं पण्णत्तं, तंजहा-अंतगयं च मज्झगयं च । से किं तं अंतगयं? अंतगयं तिविहं पण्णत्तं, तंजहा-पुरओ अंतगयं, मग्गओ अंतगयं, पासओ अंतगयं । से किं तं पुरओ अंतगयं? पुरओ अंतगयं-से जहानामए केइ पुरिसे उक्कं वा चड्डुलियं वा अलायं वा मणिं वा पईवं वा जोई वा पुरओ काउं पण्णत्तमाणे २ गच्छेज्जा, से तं पुरओ अंतगयं । से किं तं मग्गओ अंतगयं? मग्गओ अंतगयं-से जहानामए केइ पुरिसे उक्कं वा चड्डुलियं वा अलायं वा मणिं वा पईवं वा जोई वा मग्गओ काउं अणुक्कट्टेमाणे २ गच्छेज्जा, से तं मग्गओ अंतगयं । से किं तं पासओ अंतगयं? पासओ अंतगयं-से जहानामए केइ पुरिसे उक्कं वा चड्डुलियं वा अलायं वा मणिं वा पईवं वा जोई वा पासओ काउं परिकट्टेमाणे २ गच्छेज्जा, से तं पासओ अंतगयं; से तं अंतगयं । से किं तं मज्झगयं? मज्झगयं-से जहानामए केइ पुरिसे उक्कं वा चड्डुलियं वा अलायं वा मणिं वा पईवं वा जोई वा मत्थए काउं समुव्वहमाणे २ गच्छेज्जा, से तं मज्झगयं । अंतगयस्स मज्झगयस्स य को पइ-विसेसो? पुरओ अंतगएणं ओहिनाणेणं पुरओ चेव संखिज्जाणि वा असंखिज्जाणि वा जोयणाइं जाणइ पासइ । मग्गओ अंतगएणं ओहिनाणेणं मग्गओ चेव संखिज्जाणि वा असंखिज्जाणि वा जोयणाइं जाणइ पासइ । पासओ अंतगएणं ओहिनाणेणं पासओ चेव संखिज्जाणि वा असंखिज्जाणि वा जोयणाइं जाणइ पासइ । मज्झगएणं ओहिना-णेणं सव्वओ समंता संखिज्जाणि वा असंखिज्जाणि वा जोयणाइं जाणइ पासइ । से तं आणुगामियं ओहिनाणं ॥ १० ॥ से किं तं अणाणुगामियं ओहिनाणं? अणाणुगामियं ओहिनाणं से जहानामए केइ पुरिसे एगं महंतं जोइट्ठाणं काउं तस्सेव जोइट्ठाणस्स परिपेरंतेहिं परिपेरंतेहिं परिघोलेमाणे परिघोलेमाणे तमेव जोइट्ठाणं पासइ, अब्बत्थ गए [न जाणइ] न पासइ, एवामेव अणाणुगामियं ओहिनाणं जत्थेव समुप्पज्जइ तत्थेव संखेज्जाणि वा असंखेज्जाणि वा संबद्धाणि वा असंबद्धाणि वा जोयणाइं जाणइ पासइ; अब्बत्थ गए ण पासइ । सेतं अणाणुगामियं ओहिनाणां ॥ ११ ॥ से किं तं वड्ड-माणयं ओहिनाणं? वड्डमाणयं ओहिनाणं पसत्थेसु अज्झवसायट्ठाणेषु वड्डमाणस्स वड्डमाणचरित्तस्स विसुज्झमाणस्स विसुज्झमाणचरित्तस्स सव्वओ समंता ओही वड्डइ-जावइया तिसमयाहारगस्स, सुहुमस्स पणगजीवस्स । ओगाहणा जहन्ना, ओहीखित्तं जहन्नं तु ॥ ५५ ॥ सव्वबहुअगणिजीवा, निरंतरं जत्तियं भरिज्जंसु । खित्तं सव्वदिसाणं, परमोही खेत्तनिदिट्ठो ॥ ५६ ॥ अंगुलमावळियाणं, भागमसंखिज्ज दोसु संखिज्जा ।

अंगुलमावलियंतो, आवलिया अंगुलपुहुत्तं ॥ ५७ ॥ हत्थम्मि सुहुत्तंतो, दिवसंतो  
गाउयम्मि बोद्धव्वो । जोयणदिवसपुहुत्तं, पक्खंतो पच्चवीसाओ ॥ ५८ ॥ भरहम्मि  
अद्धमासो, जम्बूदीवम्मि साहिओ मासो । वासं च मणयलोए, वासपुहुत्तं च रयगम्मि  
॥ ५९ ॥ संखिजम्मि उ काले, दीवसमुद्दावि हुंति संखिजा । कालम्मि असंखिजे,  
दीवसमुद्दा उ भइयव्वा ॥ ६० ॥ काले चउण्ह वुद्धी, कालो भइयव्वु खित्तवुद्धीए ।  
वुद्धिए दव्वपज्जव, भइयव्वा खित्तकाला उ ॥ ६१ ॥ सुहुमो य होइ कालो, तत्तो  
सुहुमयरं हवइ खित्तं । अंगुलसेढीमित्ते, ओसप्पिणिओ असंखिजा ॥ ६२ ॥ सेत्तं  
वट्टमाणयं ओहिनाणं ॥ १२ ॥ से किं तं हीयमाणयं ओहिनाणं ? हीयमाणयं  
ओहिनाणं अप्पसत्थेहिं अज्झवसायट्ठाणेहिं वट्टमाणस्स वट्टमाणचरित्तस्स संकिलिस्स-  
माणस्स संकिलिस्समाणचरित्तस्स सव्वओ समंता ओही परिहायइ । सेत्तं हीयमाणयं  
ओहिनाणं ॥ १३ ॥ से किं तं पडिवाइओहिनाणं ? पडिवाइओहिनाणं जहण्णेणं  
अंगुलस्स असंखिजयभागं वा संखिजयभागं वा, वालगं वा वालग्गपुहुत्तं वा, लिक्खं  
वा लिक्खपुहुत्तं वा, जूयं वा जूयपुहुत्तं वा, जवं वा जवपुहुत्तं वा, अंगुलं वा  
अंगुलपुहुत्तं वा, पायं वा पायपुहुत्तं वा, विहत्थि वा विहत्थिपुहुत्तं वा, रयणिं वा  
रयणिपुहुत्तं वा, कुच्छि वा कुच्छिपुहुत्तं वा, धणं वा धणपुहुत्तं वा, गाउयं वा  
गाउयपुहुत्तं वा, जोयणं वा जोयणपुहुत्तं वा, जोयणसयं वा जोयणसयपुहुत्तं वा,  
जोयणसहस्सं वा जोयणसहस्सपुहुत्तं वा, जोयणलक्खं वा जोयणलक्खपुहुत्तं वा,  
[जोयणकोडिं वा जोयणकोडिपुहुत्तं वा, जोयणकोडाकोडिं वा जोयणकोडाकोडिपुहुत्तं  
वा, जोयणसंखिजं वा जोयणसंखिजपुहुत्तं वा, जोयणअसंखेजं वा जोयणअसंखेज-  
पुहुत्तं वा] उक्कोसेणं लोगं वा पासित्ताणं पडिवइजा । सेत्तं पडिवाइओहिनाणं ॥ १४ ॥  
से किं तं अपडिवाइओहिनाणं ? अपडिवाइओहिनाणं जेणं अलोगस्स एगमवि  
आगासपएसं जाणइ पासइ, तेण परं अपडिवाइओहिनाणं । सेत्तं अपडिवाइओहिनाणं  
॥ १५ ॥ तं समासओ चउव्विहं पण्णत्तं, तंजहा-दव्वओ, खित्तओ, कालओ,  
भावओ । तत्थ दव्वओ णं ओहिनाणी जहन्नेणं अणंताइं रूविदव्वाइं जाणइ पासइ,  
उक्कोसेणं सव्वाइं रूविदव्वाइं जाणइ पासइ । खित्तओ णं ओहिनाणी जहन्नेणं अंगुलस्स  
असंखिजइभागं जाणइ पासइ, उक्कोसेणं असंखिजाइं अलोगे लोगप्पमाणमिताइं  
खंडाइं जाणइ पासइ । कालओ णं ओहिनाणी जहन्नेणं आवलियाए असंखिजइभागं  
जाणइ पासइ, उक्कोसेणं असंखिजाओ उस्सप्पिणीओ अवसप्पिणीओ अईयमणागयं  
च कालं जाणइ पासइ । भावओ णं ओहिनाणी जहन्नेणं अणंते भावे जाणइ पासइ,  
उक्कोसेणवि अणंते भावे जाणइ पासइ । सव्वभावाणमणंतभागं जाणइ पासइ ॥ १६ ॥

ओही भवपच्चइओ, गुणपच्चइओ य वणिणओ दुविहो । तस्स य बहू विगप्पा, दब्बे खित्ते य काले य ॥ ६३ ॥ नेरइयदेवतित्थंकरा य, ओहिस्सड्वाहिरा हुंति । पासंति सव्वओ खलु, सेसा देसेण पासंति ॥ ६४ ॥ सेतं ओहिनाणपच्चक्खं ॥ से किं तं मणपज्जवनाणं ? मणपज्जवनाणे णं भंते ! किं मणुस्साणं उप्पज्जइ अमणुस्साणं ? गोयमा ! मणुस्साणं नो अमणुस्साणं । जइ मणुस्साणं किं संमुच्छिममणुस्साणं गब्भवक्कंतियमणुस्साणं ? गोयमा ! नो संमुच्छिममणुस्साणं उप्पज्जइ गब्भवक्कंतियमणुस्साणं । जइ गब्भवक्कंतियमणुस्साणं, किं कम्मभूमियगब्भवक्कंतियमणुस्साणं, अकम्मभूमियगब्भवक्कंतियमणुस्साणं, अंतरदीवगगब्भवक्कंतियमणुस्साणं ? गोयमा ! कम्मभूमियगब्भवक्कंतियमणुस्साणं, नो अकम्मभूमियगब्भवक्कंतियमणुस्साणं, नो अंतरदीवगगब्भवक्कंतियमणुस्साणं । जइ कम्मभूमियगब्भवक्कंतियमणुस्साणं, किं संखिज्जवासाउयकम्मभूमियगब्भवक्कंतियमणुस्साणं, असंखिज्जवासाउयकम्मभूमियगब्भवक्कंतियमणुस्साणं ? गोयमा ! संखेज्जवासाउयकम्मभूमियगब्भवक्कंतियमणुस्साणं, नो असंखेज्जवासाउयकम्मभूमियगब्भवक्कंतियमणुस्साणं । जइ संखेज्जवासाउयकम्मभूमियगब्भवक्कंतियमणुस्साणं, किं पज्जतगसंखेज्जवासाउयकम्मभूमियगब्भवक्कंतियमणुस्साणं, अपज्जतगसंखेज्जवासाउयकम्मभूमियगब्भवक्कंतियमणुस्साणं ? गोयमा ! पज्जतगसंखेज्जवासाउयकम्मभूमियगब्भवक्कंतियमणुस्साणं, नो अपज्जतगसंखेज्जवासाउयकम्मभूमियगब्भवक्कंतियमणुस्साणं । जइ पज्जतगसंखेज्जवासाउयकम्मभूमियगब्भवक्कंतियमणुस्साणं, किं सम्महिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं, मिच्छहिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं, सम्मामिच्छहिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं ? गोयमा ! सम्महिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं, नो मिच्छहिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं, नो सम्मामिच्छहिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं, जइ सम्महिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं, किं संजयसम्महिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं, असंजयसम्महिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं, संजयासंजयसम्महिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं ? गोयमा ! संजयसम्महिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं, नो असंजयसम्महिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं, नो संजयासंजयसम्महिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं । जइ संजयसम्महिट्ठिपज्जतगसंखेज्जवासाउय-

कम्मभूमियगब्भवक्कंतियमणुस्साणं, किं पमत्तसंजयसम्महिट्ठिपज्जतगसंखेज्जवासाउय-  
कम्मभूमियगब्भवक्कंतियमणुस्साणं, अपमत्तसंजयसम्महिट्ठिपज्जतगसंखेज्जवासाउय-  
कम्मभूमियगब्भवक्कंतियमणुस्साणं ? गोयमा ! अपमत्तसंजयसम्महिट्ठिपज्जतगसंखेज्ज-  
वासाउयकम्मभूमियगब्भवक्कंतियमणुस्साणं, नो पमत्तसंजयसम्महिट्ठिपज्जतगसंखेज्ज-  
वासाउयकम्मभूमियगब्भवक्कंतियमणुस्साणं । जइ अपमत्तसंजयसम्महिट्ठिपज्जतग-  
संखेज्जवासाउयकम्मभूमियगब्भवक्कंतियमणुस्साणं, किं इड्ढीपत्तअपमत्तसंजयसम्महिट्ठि-  
पज्जतगसंखेज्जवासाउयकम्मभूमियगब्भवक्कंतियमणुस्साणं, अणिड्ढीपत्तअपमत्तसंजय-  
सम्महिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं ? गोयमा ! इड्ढी-  
पत्तअपमत्तसंजयसम्महिट्ठिपज्जतगसंखेज्जवासाउयकम्मभूमियगब्भवक्कंतियमणुस्साणं,  
नो अणिड्ढीपत्तअपमत्तसंजयसम्महिट्ठिपज्जतगसंखेज्जवासाउयकम्मभूमियगब्भवक्कंतिय-  
मणुस्साणं मणपज्जवनाणं समुप्पजइ ॥ १७ ॥ तं च दुविहं उप्पजइ, तंजहा-उज्जुमई  
य विउलमई य, तं समासओ चउव्विहं पन्नत्तं, तंजहा-दव्वओ, खित्तओ, कालओ,  
भावओ । तत्थ दव्वओ णं उज्जुमई अणंते अणंतपएसिए खंवे जाणइ पासइ, ते  
चेव विउलमई अब्भहियतराए विउलतराए विउद्धतराए वितिमिरतराए जाणइ  
पासइ । खित्तओ णं उज्जुमई य जह्वेणं अंगुलस्स असंखेज्जयभागं, उक्कोसेणं अहे  
जाव इमीसे रयणप्पभाए पुढवीए उवरिमहेट्ठिल्ले खुड्डगपयरे, उड्डं जाव जोइसस्स  
उवरिमतले, तिरियं जाव अंतोमणुस्सखित्ते अड्ढाइजेसु दीवसमुदेसु पन्नरससु कम्म-  
भूमिसु तीसाए अकम्मभूमिसु छप्पन्नाए अंतरदीवगेसु सन्नपिपंचेदियाणं पज्जतयाणं  
मणोगए भावे जाणइ पासइ, तं चेव विउलमई अड्ढाइजेहिमंगुलेहिं अब्भहियतरं  
विउलतरं विउद्धतरं वितिमिरतराणं खेत्तं जाणइ पासइ । कालओ णं उज्जुमई  
जह्वेणं पलिओवमस्स असंखिज्जयभागं उक्कोसेणवि पलिओवमस्स असंखिज्जयभागं  
अईयमणागयं वा कालं जाणइ पासइ, तं चेव विउलमई अब्भहियतराणं विउल-  
तराणं विउद्धतराणं वितिमिरतराणं जाणइ पासइ । भावओ णं उज्जुमई अणंते भावे  
जाणइ पासइ, सव्वभावाणं अणंतभागं जाणइ पासइ, तं चेव विउलमई अब्भहिय-  
तराणं विउलतराणं विउद्धतराणं वितिमिरतराणं जाणइ पासइ । मणपज्जवनाणं पुण,  
जणमणपरिचित्तियत्थपागडणं । माणुसखित्तनिबद्धं, गुणपच्चइयं चरित्तवओ ॥ ६५ ॥  
सेत्तं मणपज्जवनाणं ॥ १८ ॥ से किं तं केवलनाणं ? केवलनाणं दुविहं पन्नत्तं,  
तंजहा—भवत्थकेवलनाणं च सिद्धकेवलनाणं च । से किं तं भवत्थकेवलनाणं ?  
भवत्थकेवलनाणं दुविहं पण्णत्तं, तंजहा—सजोगिभवत्थकेवलनाणं च अजोगिभवत्थ-  
केवलनाणं च । से किं तं सजोगिभवत्थकेवलनाणं ? सजोगिभवत्थकेवलनाणं दुविहं

पण्णत्तं, तंजहा—पढमसमयसजोगिभवत्थकेवलनाणं च अपढमसमयसजोगिभवत्थ-  
 केवलनाणं च, अहवा चरमसमयसजोगिभवत्थकेवलनाणं च अचरमसमयसजोगि-  
 भवत्थकेवलनाणं च, सेत्तं सजोगिभवत्थकेवलनाणं । से किं तं अजोगिभवत्थ-  
 केवलनाणं ? अजोगिभवत्थकेवलनाणं दुविहं पन्नत्तं, तंजहा—पढमसमयअजोगिभव-  
 त्थकेवलनाणं च अपढमसमयअजोगिभवत्थकेवलनाणं च, अहवा चरमसमयअजोगि-  
 भवत्थकेवलनाणं च अचरमसमयअजोगिभवत्थकेवलनाणं च, सेत्तं अजोगिभवत्थ-  
 केवलनाणं, सेत्तं भवत्थकेवलनाणं ॥ १९ ॥ से किं तं सिद्धकेवलनाणं ? सिद्ध-  
 केवलनाणं दुविहं पण्णत्तं, तंजहा—अणंतरसिद्धकेवलनाणं च परंपरसिद्धकेवलनाणं  
 च ॥ २० ॥ से किं तं अणंतरसिद्धकेवलनाणं ? अणंतरसिद्धकेवलनाणं पन्नरसविहं  
 पण्णत्तं, तंजहा—तित्थसिद्धा १ अतित्थसिद्धा २ तित्थयरसिद्धा ३ अतित्थयरसिद्धा ४  
 सयंबुद्धसिद्धा ५ पत्तेयबुद्धसिद्धा ६ बुद्धबोहियसिद्धा ७ इत्थिलिंगसिद्धा ८ पुरि-  
 सलिंगसिद्धा ९ नपुंसगलिंगसिद्धा १० सलिंगसिद्धा ११ अन्नलिंगसिद्धा १२ गिहि-  
 लिंगसिद्धा १३ एगसिद्धा १४ अणेगसिद्धा १५, सेत्तं अणंतरसिद्धकेवलनाणं । से किं  
 तं परंपरसिद्धकेवलनाणं ? परंपरसिद्धकेवलनाणं अणेगविहं पण्णत्तं, तंजहा—अपढ-  
 मसमयसिद्धा, दुसमयसिद्धा, तिसमयसिद्धा, चउसमयसिद्धा जाव दससमयसिद्धा,  
 संखिजसमयसिद्धा, असंखिजसमयसिद्धा, अणंतसमयसिद्धा, सेत्तं परंपरसिद्धकेवल-  
 नाणं । सेत्तं सिद्धकेवलनाणं ॥ २१ ॥ तं समासओ चउव्विहं पण्णत्तं, तंजहा—  
 दव्वओ, खित्तओ, कालओ, भावओ । तत्थ दव्वओ णं केवलनाणी सव्वदव्वाइं  
 जाणइ पासइ । खित्तओ णं केवलनाणी सव्वं खित्तं जाणइ पासइ । कालओ णं केवल-  
 नाणी सव्वं कालं जाणइ पासइ । भावओ णं केवलनाणी सव्वे भावे जाणइ पासइ ।  
 अह सव्वदव्वपरिणाम—भावविण्णत्तिकारणमणंतं । सासयमप्पडिवाई, एगविहं केवलं  
 नाणं ॥ ६६ ॥ २२ ॥ केवलनाणेणSत्थे, नाळं जे तत्थ पण्णवणजोगे । ते भासइ  
 तित्थयरो, वइजोगसुयं हवइ सेसं ॥ ६७ ॥ सेत्तं केवलनाणं । सेत्तं नोइदियपच्चक्खं ।  
 सेत्तं पच्चक्खनाणं ॥ २३ ॥ से किं तं परोक्खनाणं ? परोक्खनाणं दुविहं पन्नत्तं,  
 तंजहा—आभिणिवोहियनाणपरोक्खं च सुयनाणपरोक्खं च, जत्थ आभिणिवोहि-  
 यनाणं तत्थ सुयनाणं, जत्थ सुयनाणं तत्थाभिणिवोहियनाणं, दोSवि एयाइं अण्ण-  
 मण्णमणुगयाइं, तहवि पुण इत्थ आयरिया नाणत्तं पण्णवर्यति—अभिनिबुज्झइत्ति  
 आभिणिवोहियनाणं, सुणेइत्ति सुयं, मइपुव्वं जेण सुयं, न मई सुयपुव्विया ॥ २४ ॥  
 अविसेसिया मई—मइनाणं च मइअन्नाणं च । विसेसिया—सम्मद्विट्ठिस्स मई मइनाणं,  
 मिच्छद्विट्ठिस्स मई मइअन्नाणं । अविसेसियं सुयं—सुयनाणं च सुयअन्नाणं च । विसे-

सियं सुयं-सम्मदिट्ठिस्स सुयं सुयनाणं, मिच्छदिट्ठिस्स सुयं सुयअन्नाणं ॥ २५ ॥ से किं तं आभिणिबोहियनाणं ? आभिणिबोहियनाणं दुविहं पण्णत्तं, तंजहा-सुयनिरिस्सियं च, अस्सुयनिरिस्सियं च । से किं तं अस्सुयनिरिस्सियं ? अस्सुयनिरिस्सियं चउव्विहं पण्णत्तं, तंजहा-उप्पत्तिया १ वेणइया २, कम्मया ३, परिणामिया ४ । बुद्धी चउव्विहा वुत्ता, पंचमा नोवलब्भइ ॥ ६८ ॥ २६ ॥ पुव्वमदिट्ठमस्सुयं-मवेइयतक्खणविसुद्धगहियत्था । अवाहयफलजोगा, बुद्धी उप्पत्तिया नाम ॥ ६९ ॥ भरहसिल १ मिंठ २ कुक्कुड ३, तिल ४ वालुय ५ हत्थि ६ अगड ७ वणसंडे ८ । पायस ९ अइया १० पत्ते ११, खाडहिला १२ पंच पियरो य १३ ॥ ७० ॥ भरहसिल १ पणिय २ रुक्खे ३, खुड्डग ४ पड ५ सरड ६ काय ७ उच्चारं ८ । गय ९ घयण १० गोल ११ खंमे १२, खुड्डग १३ मग्गि १४ त्थि १५ पइ १६ पुत्ते १७ ॥ ७१ ॥ महसुत्थि १८ मुहि १९ अंके २०, य नाणए २१ भिक्खु २२ चेडगनिहाणे २३ । सिक्खा २४ य अत्थसत्थे २५, इत्थी य महं २६ सयसहस्से २७ ॥ ७२ ॥ भर-  
नित्थरणसमत्था, तिवग्गसुत्तत्थगहियपेयाला । उभओ-लोगफलवई, विणयसमुत्था हवइ बुद्धी ॥ ७३ ॥ निमित्ते १ अत्थसत्थे य २, लेहे ३ गणिए ४ य कूव ५ अस्से ६ य । गद्दम ७ लक्खण ८ गंठी ९, अगए १० रहिए ११ य गणिया १२ य ॥ ७४ ॥ सीया साडी वीहं, च तणं अवसव्वयं च कुंचस्स १३ । निव्वोदए १४ य गोणे, घोडगपडणं च रुक्खाओ १५ ॥ ७५ ॥ उवओगदिट्ठसारा, कम्मपसंगपरि-  
घोलणविसाला । साहुकारफलवई, कम्मसमुत्था हवइ बुद्धी ॥ ७६ ॥ हेरण्णिए १ करिसए २, कोलिय ३ डोवे ४ य मुत्ति ५ घय ६ पवए ७ । तुत्ताए ८ वड्डइय ९, पूयइ १० घड ११ चित्तकारे १२ य ॥ ७७ ॥ अणुमाणहेउदिट्ठंतसाहिया, वयविवा-  
गपरिणामा । हियनिस्सेयसफलवई, बुद्धी परिणामिया नाम ॥ ७८ ॥ अभए १ सिट्ठि २ कुमारे ३, देवी ४ उदिओदए हवइ राया ५ । साहू य नंदिसेणे ६, धण-  
दत्ते ७ सावग ८ अमचे ९ ॥ ७९ ॥ खमए १० अमचपुत्ते ११, चाणक्के १२ चेव थूलभेइ १३ य । नासिकसुंदरिनंदे १४, वइरे १५ परिणामिया बुद्धी ॥ ८० ॥  
चलणाहण १६ आमंडे १७, मणी १८ य सम्पे १९ य खग्गि २० जाणिज्जा । परिणामियबुद्धीए, एवमाई उदाहरणा ॥ ८१ ॥ सेत्तं अस्सुयनिरिस्सियं ॥ से किं तं सुयनिरिस्सियं ? सुयनिरिस्सियं चउव्विहं पण्णत्तं, तंजहा-उग्गहे १, ईहा २, अवाओ ३, धारणा ४ ॥ ८२ ॥ से किं तं उग्गहे ? उग्गहे दुविहे पण्णत्ते, तंजहा-अत्थुग्गहे य वंजणुग्गहे य ॥ ८३ ॥ से किं तं वंजणुग्गहे ? वंजणुग्गहे चउव्विहे पण्णत्ते, तंजहा-सोईदियवंजणुग्गहे, घाणिदियवंजणुग्गहे, जिब्भिदियवंजणुग्गहे, फासिंदियवं-



जणुग्गहे । सेत्तं वंजणुग्गहे ॥ २९ ॥ से किं तं अत्थुग्गहे ? अत्थुग्गहे छव्विहे पणत्ते, तंजहा-सोईदियअत्थुग्गहे, चक्खिदियअत्थुग्गहे, घाणिदियअत्थुग्गहे, जिब्भिदियअत्थुग्गहे, फासिदियअत्थुग्गहे, नोईदियअत्थुग्गहे ॥ ३० ॥ तस्स णं इमे एगट्ठिया नाणाघोसा नाणावंजणा पंच नामधिज्जा भवन्ति, तंजहा-ओगेण्हणया, उवधारणया, सवणया, अवलंवणया, मेहा । सेत्तं उग्गहे ॥ ३१ ॥ से किं तं ईहा ? ईहा छव्विहा पणत्ता, तंजहा-सोईदियईहा, चक्खिदियईहा, घाणिदियईहा, जिब्भिदियईहा, फासिदियईहा, नोईदियईहा । तीसे णं इमे एगट्ठिया नाणाघोसा नाणावंजणा पंच नामधिज्जा भवन्ति, तंजहा-आभोगणया, मग्गणया, गवेसणया, चिंता, वीमंसा । सेत्तं ईहा ॥ ३२ ॥ से किं तं अवाए ? अवाए छव्विहे पणत्ते, तंजहा-सोईदियअवाए, चक्खिदियअवाए, घाणिदियअवाए, जिब्भिदियअवाए, फासिदियअवाए, नोईदियअवाए । तस्स णं इमे एगट्ठिया नाणाघोसा नाणावंजणा पंच नामधिज्जा भवन्ति, तंजहा-आउट्ठणया, पच्चाउट्ठणया, अवाए, बुद्धी, विण्णणे । सेत्तं अवाए ॥ ३३ ॥ से किं तं धारणा ? धारणा छव्विहा पणत्ता, तंजहा-सोईदियधारणा, चक्खिदियधारणा, घाणिदियधारणा, जिब्भिदियधारणा, फासिदियधारणा, नोईदियधारणा । तीसे णं इमे एगट्ठिया नाणाघोसा नाणावंजणा पंच नामधिज्जा भवन्ति, तंजहा-धारणा, साधारणा, ठवणा, पट्ठा, कोट्ठे । सेत्तं धारणा ॥ ३४ ॥ उग्गहे इक्कसमइए, अंतोमुहुत्तिया ईहा, अंतोमुहुत्तिए अवाए, धारणा संखेज्जं वा कालं असंखेज्जं वा कालं ॥ ३५ ॥ एवं अट्ठावीसइविहस्स आभिणिबो-हियनाणस्स वंजणुग्गहस्स पस्सवणं करिस्सामि पडिवोहगदिट्ठंतेणं, मल्लगदिट्ठंतेण य । से किं तं पडिवोहगदिट्ठंतेणं ? पडिवोहगदिट्ठंतेणं से जहानामए केइ पुरिसे कंचि पुरिसं सुत्तं पडिवोहिज्जा, अमुगा अमुगत्ति, तत्थ चोयगे पन्नवयं एवं वयासी-किं एगसमयपविट्ठा पुग्गला गहणमागच्छंति ? दुसमयपविट्ठा पुग्गला गहणमागच्छंति जाव दससमयपविट्ठा पुग्गला गहणमागच्छंति ? संखिज्जसमयपविट्ठा पुग्गला गहणमागच्छंति ? असंखिज्जसमयपविट्ठा पुग्गला गहणमागच्छंति ?, एवं वयंतं चोयगं पण्णवए एवं वयासी-नो एगसमयपविट्ठा पुग्गला गहणमागच्छंति, नो दुस-मयपविट्ठा पुग्गला गहणमागच्छंति जाव नो दससमयपविट्ठा पुग्गला गहणमागच्छंति, नो संखिज्जसमयपविट्ठा पुग्गला गहणमागच्छंति, असंखिज्जसमयपविट्ठा पुग्गला गहणमागच्छंति, सेत्तं पडिवोहगदिट्ठंतेणं । से किं तं मल्लगदिट्ठंतेणं ? मल्लगदिट्ठंतेणं से जहानामए केइ पुरिसे आवागसीसाओ मल्लगं गहाय तत्थेगं उदगविंदुं पक्खे-विज्जा, से नट्ठे, अण्णेऽवि पक्खित्ते, सेऽवि नट्ठे, एवं पक्खिप्पमाणेऽपि पक्खिप्पमाणेऽपि

होही से उदगविंदू जे णं तं मल्लगं रावेहिइत्ति, होही से उदगविंदू जे णं तंस्ति मल्लगंसि ठाहिइ, होही से उदगविंदू जेणं तं मल्लगं भरिहिइ, होही से उदगविंदू जेणं तं मल्लगं पवाहेहिइ, एवामेव पक्खिप्पमाणेहिं पक्खिप्पमाणेहिं अणंतेहिं पुग्गलेहिं जाहे तं वंजणं पूरियं होइ ताहे हुंति करेइ, नो चेव णं जाणइ के वेस सदाइ? तओ ईहं पविसइ, तओ जाणइ अमुगे एस सदाइ; तओ अवायं पविसइ, तओ से उवगयं हवइ; तओ धारणं पविसइ, तओ णं धारेइ संखिजं वा कालं असंखिजं वा कालं । से जहानामए केइ पुरिसे अव्वत्तं सहं सुणिज्जा, तेणं सहोत्ति उग्गहिए, नो चेव णं जाणइ के वेस सदाइ; तओ ईहं पविसइ, तओ जाणइ अमुगे एस सदे; तओ अवायं पविसइ, तओ से उवगयं हवइ; तओ धारणं पविसइ, तओ णं धारेइ संखेजं वा कालं असंखेजं वा कालं । से जहानामए केइ पुरिसे अव्वत्तं रुवं पासिज्जा, तेणं रुवत्ति उग्गहिए, नो चेव णं जाणइ के वेस रुवत्ति; तओ ईहं पविसइ, तओ जाणइ अमुगे एस रुवे; तओ अवायं पविसइ, तओ से उवगयं हवइ; तओ धारणं पविसइ, तओ णं धारेइ संखेजं वा कालं असंखेजं वा कालं । से जहानामए केइ पुरिसे अव्वत्तं गंधं अग्घाइज्जा, तेणं गंधत्ति उग्गहिए, नो चेव णं जाणइ के वेस गंधेत्ति; तओ ईहं पविसइ, तओ जाणइ अमुगे एस गंधे; तओ अवायं पविसइ, तओ से उवगयं हवइ; तओ धारणं पविसइ, तओ णं धारेइ संखेजं वा कालं असंखेजं वा कालं । से जहानामए केइ पुरिसे अव्वत्तं रसं आसाइज्जा, तेणं रसोत्ति उग्गहिए, नो चेव णं जाणइ के वेस रसेत्ति; तओ ईहं पविसइ, तओ जाणइ अमुगे एस रसे; तओ अवायं पविसइ, तओ से उवगयं हवइ; तओ धारणं पविसइ, तओ णं धारेइ संखिजं वा कालं असंखिजं वा कालं । से जहानामए केइ पुरिसे अव्वत्तं फासं पडिसंवेइज्जा, तेणं फासेत्ति उग्गहिए, नो चेव णं जाणइ के वेस फासओत्ति; तओ ईहं पविसइ तओ जाणइ अमुगे एस फासे; तओ अवायं पविसइ, तओ से उवगयं हवइ; तओ धारणं पविसइ, तओ णं धारेइ संखेजं वा कालं असंखेजं वा कालं । से जहानामए केइ पुरिसे अव्वत्तं सुमिणं पासिज्जा, तेणं सुमिणेत्ति उग्गहिए, नो चेव णं जाणइ के वेस सुमिणेत्ति; तओ ईहं पविसइ, तओ जाणइ अमुगे एस सुमिणे; तओ अवायं पविसइ, तओ से उवगयं हवइ; तओ धारणं पविसइ, तओ णं धारेइ संखेजं वा कालं असंखेजं वा कालं । सेतं मल्लगदिट्ठंतेणं ॥ ३६ ॥ तं समासओ चउव्विहं पण्णत्तं, तंजहा-दव्वओ, खित्तओ, कालओ, भावओ । तत्थ दव्वओ णं आभिनिवोहियनाणी आप्पेणं सव्वाइ दव्वाइ जाणइ, न पासइ । खेत्तओ णं आभिनिवोहियनाणी आप्पेणं सव्वं खेत्तं

जाणइ, न पासइ । कालओ णं आभिणिबोहियनाणी आएसेणं सव्वं कालं जाणइ, न पासइ । भावओ णं आभिणिबोहियनाणी आएसेणं सव्वे भावे जाणइ, न पासइ । उग्गह ईहाऽवाओ, य धारणा एव हुंति चत्तारि । आभिणिबोहियनाणस्स, भेय-  
वत्थू समसेणं ॥ ८२ ॥ अत्थाणं उग्गहणम्मि उग्गहो, तह वियालणे ईहा । ववसा-  
यम्मि अवाओ, धरणं पुण धारणं विति ॥ ८३ ॥ उग्गह इक्कं समयं, ईहावाया  
सुहुत्तमदं तु । कालमसंखं संखं, च धारणा होइ नायव्वा ॥ ८४ ॥ पुट्ठं सुणेइ सद्दं,  
हव्वं पुण पासइ अपुट्ठं तु । गंधं रसं च फासं च, वद्धपुट्ठं वियागरे ॥ ८५ ॥  
भासासममेढीओ, सद्दं जं सुणइ मीसियं सुणइ । वीसेढी पुण सद्दं, सुणेइ नियमा  
पराधाए ॥ ८६ ॥ ईहा अपोह वीमंसा, मग्गणा य गवेसणा । सत्ता सई मई पत्ता, सव्वं  
आभिणिबोहियं ॥ ८७ ॥ सेत्तं आभिणिबोहियनाणपरोक्खं [ सेत्तं मइनाणं ] ॥ ३७ ॥  
से किं तं सुयनाणपरोक्खं ? सुयनाणपरोक्खं चोइसविहं पण्णत्तं, तंजहा-अक्खरसुयं १,  
अणक्खरसुयं २, सण्णिसुयं ३, असण्णिसुयं ४, सम्मसुयं ५, मिच्छसुयं ६, साइयं ७,  
अणाइयं ८, सपज्जवसियं ९, अपज्जवसियं १०, गमियं ११, अगमियं १२, अंगप-  
विट्ठं १३, अणंगपविट्ठं १४ ॥ ३८ ॥ से किं तं अक्खरसुयं ? अक्खरसुयं तिविहं पण्णत्तं,  
तंजहा-सन्नक्खरं, वंजणक्खरं, लद्धिअक्खरं । से किं तं सन्नक्खरं ? सन्नक्खरं अक्ख-  
रस्स संठाणागिइ, सेत्तं सन्नक्खरं । से किं तं वंजणक्खरं ? वंजणक्खरं अक्खरस्स  
वंजणाभिलावो, सेत्तं वंजणक्खरं । से किं तं लद्धिअक्खरं ? लद्धिअक्खरं अक्खर-  
लद्धियस्स लद्धिअक्खरं समुप्पज्जइ, तंजहा-सोइंदियलद्धिअक्खरं, चर्खिंदियल-  
द्धिअक्खरं, घाणिंदियलद्धिअक्खरं, रसणिंदियलद्धिअक्खरं, फासिंदियलद्धिअक्खरं,  
नोइंदियलद्धिअक्खरं, सेत्तं लद्धिअक्खरं । सेत्तं अक्खरसुयं ॥ से किं तं अणक्खरसुयं ?  
अणक्खरसुयं अणेगविहं पण्णत्तं, तंजहा-ऊससियं नीससियं, निच्छूढं खासियं च  
छीयं च । निस्सिंखियमणुसारं, अणक्खरं छेलियाइयं ॥ ८८ ॥ सेत्तं अणक्खरसुयं  
॥ ३९ ॥ से किं तं सण्णिसुयं ? सण्णिसुयं तिविहं पण्णत्तं, तंजहा-कालिओव-  
एसेणं, हेऊवएसेणं, दिट्ठिवाओवएसेणं । से किं तं कालिओवएसेणं ? कालिओवएसेणं  
जस्स णं अत्थि ईहा, अवोहो, मग्गणा, गवेसणा, चिंता, वीमंसा, से णं सण्णीति  
लब्भइ, जस्स णं नत्थि ईहा, अवोहो, मग्गणा, गवेसणा, चिंता, वीमंसा, से णं  
असण्णीति लब्भइ, सेत्तं कालिओवएसेणं । से किं तं हेऊवएसेणं ? हेऊवएसेणं जस्स  
णं अत्थि अभिसंधारणपुव्विया करणसत्ती से णं सण्णीति लब्भइ, जस्स णं नत्थि

१ पाढंतरगाहा-अत्थाणं उग्गहणं, च उग्गहं तह वियालणं ईहं । ववसायं  
च अब्रायं, धरणं पुण धारणं विति ॥ १ ॥

अभिसंधारणपुव्विया करणसत्ती से णं असण्णीति लब्भइ, सेतं हेऊवएसेणं । से किं तं दिट्ठिवाओवएसेणं ? दिट्ठिवाओवएसेणं सण्णिसुयस्स खओवसमेणं सण्णी लब्भइ, असण्णिसुयस्स खओवसमेणं असण्णी लब्भइ, सेतं दिट्ठिवाओवएसेणं । सेतं सण्णिसुयं । सेतं असण्णिसुयं ॥ ४० ॥ से किं तं सम्मसुयं ? सम्मसुयं जं इमं अरहंतेहिं भगवंतेहिं उप्पण्णनाणदंसणधरेहिं तेल्लक्कनिरिक्खियमहियपूइएहिं तीयप-  
 डुप्पण्णमणागयजाणएहिं सव्वण्णूहिं सव्वदरिसीहिं पणीयं दुवालसंगं गणपिडगं, तंजहा—आयारो १ सूयगडो २ ठाणं ३ समवाओ ४ विवाहपण्णत्ती ५ नायाध-  
 म्मकहाओ ६ उवासगदसाओ ७ अंतगडदसाओ ८ अनुत्तरोववाइयदसाओ ९ पण्हावागरणाइं १० विवागसुयं ११ दिट्ठिवाओ १२, इच्चैयं दुवालसंगं गणपिडगं  
 चोइसपुव्विस्स सम्मसुयं, अभिण्णदसपुव्विस्स सम्मसुयं, तेण परं भिण्णेसु भयणा, सेतं सम्मसुयं ॥ ४१ ॥ से किं तं मिच्छासुयं ? मिच्छासुयं जं इमं अण्णाणिएहिं  
 मिच्छादिट्ठिएहिं सच्छंदबुद्धिमइविगप्पियं, तंजहा—भारहं, रामायणं, भीमासुक्खं, कोडिल्लयं, सगडभदियाओ, खोड( घोडग )मुहं, कप्पासियं, नागसुहुमं, कणगसत्तरी,  
 वइसेसियं, बुद्धवयणं, तेरासियं, काविलियं, लोगाययं, सट्ठित्तं, माढरं, पुराणं, वागरणं, भागवयं, पायंजली, पुस्सदेवयं, लेहं, गणियं, सउणसुयं, नाडयाइं, अहवा  
 वावत्तरिकलाओ, चत्तारि य वेया संगोवंगा, एयाइं मिच्छदिट्ठिस्स मिच्छतपरिग्ग-  
 हियाइं मिच्छासुयं, एयाइं चेव सम्मदिट्ठिस्स सम्मतपरिग्गहियाइं सम्मसुयं, अहवा-  
 मिच्छादिट्ठिस्सवि एयाइं चेव सम्मसुयं, कम्हा ? सम्मतहेउत्तणओ जम्हा ते मिच्छा-  
 दिट्ठिया तेहिं चेव समएहिं चोइया समाणा केइ सपक्खदिट्ठीओ चयंति, सेतं मिच्छासुयं ॥ ४२ ॥ से किं तं साइयं सपज्जवसियं, अणाइयं अपज्जवसियं च ?  
 इच्चैयं दुवालसंगं गणपिडगं वुच्छित्तिनयट्ठयाए साइयं सपज्जवसियं, अवुच्छित्ति-  
 नयट्ठयाए अणाइयं अपज्जवसियं, तं समासओ चउव्विहं पण्णत्तं, तंजहा—दव्वओ  
 खित्तओ कालओ भावओ, तत्थ दव्वओ णं सम्मसुयं एणं पुरिसं पडुच्च साइयं  
 सपज्जवसियं, बहवे पुरिसे य पडुच्च अणाइयं अपज्जवसियं, खेततओ णं पंच भरहाइं  
 पंचेरवयाइं पडुच्च साइयं सपज्जवसियं, पंच महाविदेहाइं पडुच्च अणाइयं अपज्जवसियं,  
 कालओ णं उस्सप्पिणिं ओसप्पिणिं च पडुच्च साइयं सपज्जवसियं, नोउस्सप्पिणिं  
 नोओसप्पिणिं च पडुच्च अणाइयं अपज्जवसियं, भावओ णं जे जया जिणपन्नता  
 भावा आघविज्जंति, पन्नविज्जंति, परुविज्जंति, दंसिज्जंति, निर्दंसिज्जंति, उवदंसिज्जंति,  
 ते तथा भावे पडुच्च साइयं सपज्जवसियं, खाओवसमियं पुण भावं पडुच्च अणाइयं  
 अपज्जवसियं, अहवा भवसिद्धियस्स सुयं साइयं सपज्जवसियं च, अभवसिद्धियस्स

सुयं अणाइयं अपज्जवसियं च, सव्वागासपएसग्गं सव्वागासपएसेहिं अणंतगुणियं पज्जवक्खरं निप्फज्जइ, सव्वजीवारणंपि य णं अक्खरस्स अणंतभागो निच्चुग्धाडिओ जइ पुण सोऽवि आवरिज्जा तेणं जीवो अजीवतं पाविज्जा, -“सुट्ठुवि मेहसमुदए, होइ पभा चंदसूराणं” सेतं साइयं सपज्जवसियं, सेतं अणाइयं अपज्जवसियं ॥ ४३ ॥

से किं तं गमियं? गमियं दिट्ठिवाओ, से किं तं अगमियं? अगमियं कालियं सुयं, सेतं गमियं, सेतं अगमियं । अहवा तं समासओ दुविहं पण्णत्तं, तंजहा-अंगपविट्ठं, अंगवाहिरं च । से किं तं अंगवाहिरं? अंगवाहिरं दुविहं पण्णत्तं, तंजहा-आवस्सयं च, आवस्सयवइरित्तं च । से किं तं आवस्सयं? आवस्सयं छव्विहं पण्णत्तं, तंजहा-सामाइय, चउवीसत्थओ, वंदणयं, पडिक्कमणं, काउस्सग्गो, पच्चक्खाणं; सेतं आवस्सयं । से किं तं आवस्सयवइरित्तं? आवस्सयवइरित्तं दुविहं पण्णत्तं, तंजहा-कालियं च उक्कालियं च । से किं तं उक्कालियं? २ अणेगविहं पण्णत्तं, तंजहा-दसवैयालियं, कप्पियाकप्पियं, चुल्लकप्पसुयं, महाकप्पसुयं, उववाइयं, रायपसेणियं, जीवामिगमो, पण्णवणा, महापण्णवणा, पमायप्पमायं, नंदी, अणुओगदाराइं, देविंदत्थओ, तंदुलवैयालियं, चंदाविज्जयं, सूरपण्णत्ती, पोरिसिमण्डलं, मण्डलपवेसो, विज्जाचरणविणिच्छओ, गणिविज्जा, ज्ञाणविभत्ती, मरणविभत्ती, आयविसोही, वीयरगसुयं, संलेहणासुयं, विहारकप्पो, चरणविही, आउरपच्चक्खाणं, महापच्चक्खाणं, एवमाइ; सेतं उक्कालियं । से किं तं कालियं? कालियं अणेगविहं पण्णत्तं, तंजहा-उत्तरज्जयणाइं, दसाओ, कप्पो, ववहारो, निसीहं, महानिसीहं, इसिभासियाइं, जम्बूदीवपन्नत्ती, दीवसागरपन्नत्ती, चंदपन्नत्ती, खुड्डिया-विमाणपविभत्ती, महल्लिया-विमाणपविभत्ती, अंगचूलिया, वग्गचूलिया, विवाहचूलिया, अरुणोववाए, वरुणोववाए, गरुलोववाए, धरुणोववाए, वेसमणोववाए, वेलंधरोववाए, देविंदोववाए, उट्ठाणसुए, समुट्ठाणसुए, नागपरियावलियाओ, निरयावलियाओ, कप्पियाओ, कप्पवडिसियाओ, पुप्फियाओ, पुप्फचूलियाओ, वण्हीदसाओ, [आसीविसभावणाणं, दिट्ठिविसभावणाणं, सुमिणभावणाणं, महासुमिणभावणाणं, तेयग्गिनिसग्गाणं,] एवमाइयाइं चउरासीइं पइज्जगसहस्साइं भगवओ अरहओ उसहसामिस्स आइतित्थयरस्स, तहा संखिज्जाइं पइज्जगसहस्साइं मज्झिमगाणं जिणवराणं, चोइस-पइज्जगसहस्साइं भगवओ वद्धमाणसामिस्स, अहवा जस्स जत्तिया सीसा उप्पत्तियाए वेणइयाए कम्मयाए पारिणामियाए चउव्विहाए बुद्धीए उववेया तस्स तत्तियाइं पइण्णगसहस्साइं, पत्तेयबुद्धावि तत्तिया चेव, सेतं कालियं, सेतं आवस्सयवइरित्तं, सेतं अणंगपविट्ठं ॥ ४४ ॥ से किं तं अंगपविट्ठं? अंगपविट्ठं दुवालसविहं पण्णत्तं, तंजहा-आयारो १, सूयगडो २,

ठाणं ३, समवाओ ४, विवाहपन्नत्ती ५, नायाधम्मकहाओ ६, उवासगदसाओ ७, अंतगडदसाओ ८, अणुत्तरोववाइयदसाओ ९, पण्हावागरणाई १०, विवागसुयं ११, दिट्ठिवाओ १२ ॥ ४५ ॥ से किं तं आयारे ? आयारे णं समणार्णं निग्गंथाणं आयारगोयरविणयवेणइयसिक्खाभासाअभासाचरणकरणजायामायवित्तीओ आघविज्जंति, से समासओ पंचविहे पण्णत्ते, तंजहा-नाणायारे, दंसणायारे, चरित्तायारे, तवायारे, वीरियायारे, आयारे णं परित्ता वायणा, संखेज्जा अणुओगदारा, संखेज्जा वेढा, संखेज्जा सिलोगा, संखिज्जाओ निज्जुत्तीओ, संखिज्जाओ संगहणीओ, संखिज्जाओ पडिवत्तीओ, से णं अंगट्ठयाए पढमे अंगे, दो सुयक्खंधा, पणवीसं अज्झयणा, पंचासीइ उद्देसणकाला, पंचासीइ समुद्देसणकाला, अट्टारस पयसहस्साइं पयग्गेणं, संखिज्जा अक्खरा, अणंता गमा, अणंता पज्जा, परित्ता तसा, अणंता थावरा, सासयकडनिबद्धनिकाइया जिणपण्णत्ता भावा आघविज्जंति, पन्नविज्जंति, परुविज्जंति, दंसिज्जंति, निदंसिज्जंति, उवदंसिज्जंति, से एवं आया, एवं नाया, एवं विण्णाया, एवं चरणकरणपरुवणा आघविज्जइ, सेतं आयारे १ ॥ ४६ ॥ से किं तं स्यगडे ? स्यगडे णं लोए सूइज्जइ, अलोए सूइज्जइ, लोयालोए सूइज्जइ, जीवा सूइज्जंति, अजीवा सूइज्जंति, जीवाजीवा सूइज्जंति, ससमए सूइज्जइ, परसमए सूइज्जइ, ससमयपरसमए सूइज्जइ, स्यगडे णं असीयस्स किरियावाइसयस्स, चउरासीइए अकिरियावाईणं, सत्तट्ठीए अण्णाणियवाईणं, बत्तीसाए वेणइयवाईणं, तिण्हं तेसट्ठाणं पासंडियसायणं वूहं किच्चा ससमए ठाविज्जइ, स्यगडे णं परित्ता वायणा, संखेज्जा अणुओगदारा, संखेज्जा वेढा, संखेज्जा सिलोगा, संखिज्जाओ निज्जुत्तीओ, संखिज्जाओ संगहणीओ, संखिज्जाओ पडिवत्तीओ, से णं अंगट्ठयाए बिइए अंगे, दो सुयक्खंधा, तेवीसं अज्झयणा, तित्तीसं उद्देसणकाला, तित्तीसं समुद्देसणकाला, छत्तीसं पयसहस्साइं पयग्गेणं, संखिज्जा अक्खरा, अणंता गमा, अणंता पज्जा, परित्ता तसा, अणंता थावरा, सासयकडनिबद्धनिकाइया जिणपण्णत्ता भावा आघविज्जंति, पन्नविज्जंति, परुविज्जंति, दंसिज्जंति, निदंसिज्जंति, उवदंसिज्जंति, से एवं आया, एवं नाया, एवं विण्णाया, एवं चरणकरणपरुवणा आघविज्जइ, सेतं स्यगडे २ ॥ ४७ ॥ से किं तं ठाणे ? ठाणे णं जीवा ठाविज्जंति, अजीवा ठाविज्जंति, जीवाजीवा ठाविज्जंति, ससमए ठाविज्जइ, परसमए ठाविज्जइ, ससमयपरसमए ठाविज्जइ, लोए ठाविज्जइ, अलोए ठाविज्जइ, लोयालोए ठाविज्जइ । ठाणे णं टंका, कूडा, सेला, सिहरिणो, पम्भारा, कुंडाई, गुहाओ, आगरा, दहा, नईओ, आघविज्जंति । ठाणे णं एगाइयाए एगुत्तरियाए वुड्डीए दसट्ठाणगविवट्ठियाणं भावाणं

परुवणा आघविज्जइ । ठाणे णं परिता वायणा, संखेज्जा अणुओगदारा, संखेज्जा वेढा, संखेज्जा सिलोगा, संखेज्जाओ निजुत्तीओ, संखेज्जाओ संगहणीओ, संखेज्जाओ पडिवत्तीओ । से णं अंगट्टयाए तइए अंगे, एगे सुयक्खंधे, दस अज्झयणा, एगवीसं उद्देसणकाला, एकवीसं समुद्देसणकाला, बावत्तरि पयसहस्सा पयग्गेणं, संखेज्जा अक्खरा, अणंता गमा, अणंता पज्जवा, परिता तसा, अणंता थावरा, सासयकड-  
निबद्धनिकाइया जिणपण्णत्ता भावा आघविज्जंति, पन्नविज्जंति, परुविज्जंति, दंसिज्जंति, निदंसिज्जंति, उवदंसिज्जंति । से एवं आया, एवं नाया, एवं विण्णाया, एवं चरणक-  
रणपरुवणा आघविज्जइ । सेत्तं ठाणे ३ ॥ ४८ ॥ से किं तं समवाए ? समवाए णं जीवा समासिज्जंति, अजीवा समासिज्जंति, जीवाजीवा समासिज्जंति, ससमए समा-  
सिज्जइ, परसमए समासिज्जइ, ससमयपरसमए समासिज्जइ, लोए समासिज्जइ, अलोए समासिज्जइ, लोयालोए समासिज्जइ । समवाए णं एगाइयाणं एगुत्तरियाणं  
ठाणसयविवद्धियाणं भावाणं परुवणा आघविज्जइ, दुवालसविहस्स य गणिपिड-  
गस्स पल्लव[ग]गे समासिज्जइ । समवायस्स णं परिता वायणा, संखिज्जा अणुओगदारा, संखिज्जा वेढा, संखिज्जा सिलोगा, संखिज्जाओ निजुत्तीओ, संखिज्जाओ संगहणीओ, संखिज्जाओ पडिवत्तीओ । से णं अंगट्टयाए चउत्थे अंगे, एगे सुयक्खंधे, एगे अज्झयणे, एगे उद्देसणकाले, एगे समुद्देसणकाले, एगे चोयाले सयसहस्से पयग्गेणं, संखेज्जा अक्खरा, अणंता गमा, अणंता पज्जवा, परिता तसा, अणंता थावरा, सासयकडनिबद्धनिकाइया जिणपण्णत्ता भावा आघविज्जंति, पन्नविज्जंति, परुविज्जंति, दंसिज्जंति, निदंसिज्जंति, उवदंसिज्जंति । से एवं आया, एवं नाया, एवं विण्णाया, एवं चरणकरणपरुवणा आघविज्जइ । सेत्तं समवाए ४ ॥ ४९ ॥ से किं तं विवाहे ? विवाहे णं जीवा वियाहिज्जंति, अजीवा वियाहिज्जंति, जीवाजीवा वियाहिज्जंति, ससमए वियाहिज्जइ, परसमए वियाहिज्जइ, ससमयपरसमए वियाहिज्जइ, लोए वियाहिज्जइ, अलोए वियाहिज्जइ, लोयालोए वियाहिज्जइ, विवाहस्स णं परिता वायणा, संखिज्जा अणुओगदारा, संखिज्जा वेढा, संखिज्जा सिलोगा, संखिज्जाओ निजुत्तीओ, संखिज्जाओ संगहणीओ, संखिज्जाओ पडिवत्तीओ, से णं अंगट्टयाए पंचमे अंगे, एगे सुयक्खंधे, एगे साइरेगे अज्झयणसए, दस उद्देसणसहस्साइं, दस समुद्देसणसहस्साइं, छत्तीसं वागरणसहस्साइं, दो लक्खा अट्ठासीइं पयसहस्साइं पयग्गेणं, संखिज्जा अक्खरा, अणंता गमा, अणंता पज्जवा, परिता तसा, अणंता थावरा, सासयकडनिबद्धनिकाइया जिणपण्णत्ता भावा आघविज्जंति, पन्नविज्जंति, परुविज्जंति, दंसिज्जंति, निदंसिज्जंति, उवदंसिज्जंति, से एवं आया, एवं नाया, एवं

विष्णाया, एवं चरणकरणपरुवणा आघविज्जइ, सेतं विवाहे ५ ॥ ५० ॥ से किं तं नायाधम्मकहाओ ? नायाधम्मकहासु णं नायाणं नगराई, उज्जाणाई, समोसरणाई, रायाणो, अम्मापियरो, धम्मायरिया, धम्मकहाओ, इहलोइयपरलोइया इच्चिविसेसा, भोगपरिच्चाया, पव्वजाओ, परियाया, सुयपरिग्गहा, तवोवहाणाई, संखेहणाओ, भत्तपच्चक्खाणाई, पाओवगमणाई, देवलोगगमणाई, सुकुलपच्चायाईओ, पुणबोहिलाभा, अंतकिरियाओ य आघविज्जंति, दस धम्मकहाणं वग्गा, तत्थ णं एगमेगाए धम्मकहाए पंच पंच अक्खाइयासयाई, एगमेगाए अक्खाइयाए पंच पंच उवक्खाइयासयाई, एगमेगाए उवक्खाइयाए पंच पंच अक्खाइयउवक्खाइयासयाई, एवामेव सपुव्वावरेणं अद्दुट्ठाओ कहाणगकोडीओ हवंतित्ति समक्खायं । नायाधम्मकहाणं परित्ता वायणा, संखिज्जा अणुओगदारा, संखिज्जा वेढा, संखिज्जा सिलोगा, संखिज्जाओ निज्जत्तीओ, संखिज्जाओ संगहणीओ, संखिज्जाओ पड्वित्तीओ । से णं अंगट्टयाए छट्ठे अंगे, दो सुयक्खंधा, एगूणवीसं अज्झयणा, एगूणवीसं उद्देसणकाला, एगूणवीसं समुद्देसणकाला, संखेज्जा पयसहस्सा पयग्गेणं, संखेज्जा अक्खरा, अणंता गमा, अणंता पज्जवा, परित्ता तसा, अणंता थावरा, सासयकडनिबद्धनिकाइया जिणपण्णत्ता भावा आघविज्जंति, पच्चविज्जंति, परुविज्जंति, दंसिज्जंति, निदंसिज्जंति, उवदंसिज्जंति । से एवं आया, एवं नाया, एवं विष्णाया, एवं चरणकरणपरुवणा आघविज्जइ । सेतं नायाधम्मकहाओ ६ ॥ ५१ ॥ से किं तं उवासगदसाओ ? उवासगदसासु णं समणोवासयाणं नगराई, उज्जाणाई, समोसरणाई, रायाणो, अम्मापियरो, धम्मायरिया, धम्मकहाओ, इहलोइयपरलोइया इच्चिविसेसा, भोगपरिच्चाया, पव्वजाओ, परियाया, सुयपरिग्गहा, तवोवहाणाई, सीलव्वयगुणवेरमणपच्चक्खाणपोसहोववासपडिवज्जणया, पडिमाओ, उवसग्गा, संखेहणाओ, भत्तपच्चक्खाणाई, पाओवगमणाई, देवलोगगमणाई, सुकुलपच्चायाईओ, पुणबोहिलाभा, अंतकिरियाओ य आघविज्जंति । उवासगदसाणं परित्ता वायणा, संखेज्जा अणुओगदारा, संखेज्जा वेढा, संखेज्जा सिलोगा, संखेज्जाओ निज्जत्तीओ, संखेज्जाओ संगहणीओ, संखेज्जाओ पडिवित्तीओ । से णं अंगट्टयाए सत्तमे अंगे, एगे सुयक्खंधे, दस अज्झयणा, दस उद्देसणकाला, दस समुद्देसणकाला, संखेज्जा पयसहस्सा पयग्गेणं, संखेज्जा अक्खरा, अणंता गमा, अणंता पज्जवा, परित्ता तसा, अणंता थावरा, सासयकडनिबद्धनिकाइया जिणपण्णत्ता भावा आघविज्जंति, पच्चविज्जंति, परुविज्जंति, दंसिज्जंति, निदंसिज्जंति, उवदंसिज्जंति । से एवं आया, एवं नाया, एवं विष्णाया, एवं चरणकरणपरुवणा आघविज्जइ । सेतं उवासगदसाओ ७ ॥ ५२ ॥ से



किं तं अंतगडदसाओ ? अंतगडदसासु णं अंतगडाणं नगराई, उज्जाणाई, समोसर-  
णाई, रायाणो, अम्मापियरो, धम्मायरिया, धम्मकहाओ, इहलोइयपरलोइया इड्ढि-  
विसेसा, भोगपरिच्चागा, पव्वजाओ, परियागा, सुयपरिग्गहा, तवोवहाणाई, संलेह-  
णाओ, भत्तपच्चक्खाणाई, पाओवगमणाई, अंतकिरियाओ आघविज्जंति, अंतगडद-  
सासु णं परिता वायणा, संखेज्जा अणुओगदारा, संखेज्जा वेढा, संखेज्जा सिलोगा,  
संखेज्जाओ निज्जुत्तीओ, संखेज्जाओ संगहणीओ, संखेज्जाओ पडिवत्तीओ, से णं अंग-  
ट्ठयाए अट्ठमे अंगे, एगे सुयक्खंधे, अट्ठ वग्गा, अट्ठ उद्देसणकाला, अट्ठ समुद्देसण-  
काला, संखेज्जा पयसहस्सा पयग्गेणं, संखेज्जा अक्खरा, अणंता गमा, अणंता  
पज्जवा, परिता तसा, अणंता थावरा, सासयकडनिबद्धनिकाइया जिणपण्णत्ता भावा  
आघविज्जंति, पच्चविज्जंति, पुरुविज्जंति, दंसिज्जंति, निदंसिज्जंति, उवदंसिज्जंति, से एवं  
आया, एवं नाया, एवं विण्णयाया, एवं चरणकरणपरुवणा आघविज्जइ, सेतं अंतगड-  
दसाओ ८ ॥ ५३ ॥ से किं तं अणुत्तरोववाइयदसाओ ? अणुत्तरोववाइयदसासु णं  
अणुत्तरोववाइयाणं नगराई, उज्जाणाई, समोसरणाई, रायाणो, अम्मापियरो, धम्मा-  
यरिया, धम्मकहाओ, इहलोइयपरलोइया इड्ढिविसेसा, भोगपरिच्चागा, पव्वजाओ,  
परियागा, सुयपरिग्गहा, तवोवहाणाई, पडिमाओ, उवसग्गा, संलेहणाओ, भत्तप-  
च्चक्खाणाई, पाओवगमणाई, अणुत्तरोववाइयत्ति उववत्ती, सुकुलपच्चायाईओ, पुण-  
वोहिलाभा, अंतकिरियाओ आघविज्जंति, अणुत्तरोववाइयदसासु णं परिता वायणा,  
संखेज्जा अणुओगदारा, संखेज्जा वेढा, संखेज्जा सिलोगा, संखेज्जाओ निज्जुत्तीओ,  
संखेज्जाओ संगहणीओ, संखेज्जाओ पडिवत्तीओ, से णं अंगट्ठयाए नवमे अंगे, एगे सुय-  
क्खंधे, तिज्जि वग्गा, तिज्जि उद्देसणकाला, तिज्जि समुद्देसणकाला, संखेज्जाई पयसह-  
स्साई पयग्गेणं, संखेज्जा अक्खरा, अणंता गमा, अणंता पज्जवा, परिता तसा,  
अणंता थावरा, सासयकडनिबद्धनिकाइया जिणपण्णत्ता भावा आघविज्जंति,  
पच्चविज्जंति, पुरुविज्जंति, दंसिज्जंति, निदंसिज्जंति, उवदंसिज्जंति, से एवं आया,  
एवं नाया, एवं विण्णयाया, एवं चरणकरणपरुवणा आघविज्जइ, सेतं अणुत्तरोव-  
वाइयदसाओ ९ ॥ ५४ ॥ से किं तं पण्हावागरणाई ? पण्हावागरणेसु णं अट्ठुत्तरं  
पसिणसयं, अट्ठुत्तरं अपसिणसयं, अट्ठुत्तरं पसिणापसिणसयं, तंजहा-अंगुट्ठपसिणाई,  
बाहुपसिणाई, अद्दागपसिणाई, अन्नेवि विचित्ता विज्जाइसया, नागसुवण्णेहिं सद्धिं  
दिब्बा संवाया आघविज्जंति, पण्हावागरणाणं परिता वायणा, संखेज्जा अणुओगदारा,  
संखेज्जा वेढा, संखेज्जा सिलोगा, संखेज्जाओ निज्जुत्तीओ, संखेज्जाओ संगहणीओ,  
संखेज्जाओ पडिवत्तीओ, से णं अंगट्ठयाए दसमे अंगे, एगे सुयक्खंधे, पणयालीसं

अज्झयणा, पणयालीसं उद्देसणकाला, पणयालीसं समुद्देसणकाला, संखेज्जाई पय-  
 सहस्साई पयग्गेणं, संखेज्जा अक्खरा, अणंता गमा, अणंता पज्जा, परिता तसा,  
 अणंता थावरा, सासयकडनिबद्धनिकाइया जिणपण्णत्ता भावा आघविज्जंति, पन्न-  
 विज्जंति, परूविज्जंति, दंसिज्जंति, निदंसिज्जंति, उवदंसिज्जंति, से एवं आया, एवं  
 नाया, एवं विण्णाया, एवं चरणकरणपरूवणा आघविज्जइ, सेतं पण्हावागरणाई  
 १० ॥ ५५ ॥ से किं तं विवागसुयं? विवागसुए णं सुकडदुक्कडाणं कम्माणं फल-  
 विवागे आघविज्जइ, तत्थ णं दस दुहविवागा दस सुहविवागा । से किं तं दुहविवागा ?  
 दुहविवागेसु णं दुहविवागाणं नगराई, उज्जाणाई, समोसरणाई, रायाणो, अम्मा-  
 पियरो, धम्मायरिया, धम्मकहाओ, इहलोइयपरलोइया इड्ढिविसेसा, निरयगमणाई,  
 संसारभवपवंचा, दुहपरंपराओ, दुकुलपच्चायाईओ, दुद्धहवोहियत्ता आघविज्जइ, सेतं  
 दुहविवागा । से किं तं सुहविवागा ? सुहविवागेसु णं सुहविवागाणं नगराई, उज्जाणाई,  
 समोसरणाई, रायाणो, अम्मापियरो, धम्मायरिया, धम्मकहाओ, इहलोइयपरलोइया  
 इड्ढिविसेसा, भोगपरिच्चागा, पव्वजाओ, परियागा, सुयपरिग्गहा, तवोवहाणाई,  
 संलेहणाओ, भत्तपच्चक्खाणाई, पाओवगमणाई, देवलोगगमणाई, सुहपरंपराओ,  
 सुकुलपच्चायाईओ, पुणवोहिलाभा, अंतकिरियाओ आघविज्जंति । विवागसुयस्स णं  
 परिता वायणा, संखेज्जा अणुओगदारा, संखेज्जा वेढा, संखेज्जा सिलोगा, संखिज्जाओ  
 निजुत्तीओ, संखिज्जाओ संगहणीओ, संखिज्जाओ पडिवत्तीओ । से णं अंगट्ठयाए  
 इक्कारसमे अंगे, दो सुयक्खंधा, वीसं अज्झयणा, वीसं उद्देसणकाला, वीसं समुद्दे-  
 सणकाला, संखिज्जाई पयसहस्साई पयग्गेणं, संखेज्जा अक्खरा, अणंता गमा, अणंता  
 पज्जा, परिता तसा, अणंता थावरा, सासयकडनिबद्धनिकाइया जिणपण्णत्ता भावा  
 आघविज्जंति, पन्नविज्जंति, परूविज्जंति, दंसिज्जंति, निदंसिज्जंति, उवदंसिज्जंति, से  
 एवं आया, एवं नाया, एवं विण्णाया, एवं चरणकरणपरूवणा आघविज्जइ, सेतं  
 विवागसुयं ११ ॥ ५६ ॥ से किं तं दिट्ठिवाए? दिट्ठिवाए णं सव्वभावपरूवणा  
 आघविज्जइ, से समासओ पंचविहे पण्णत्ते, तंजहा-परिकम्मे १, सुत्ताई २, पुव्वगए  
 ३, अणुओगे ४, चूलिया ५ । से किं तं परिकम्मे? परिकम्मे सत्तविहे पण्णत्ते, तंजहा-  
 सिद्धसेनियापरिकम्मे १, मणुस्ससेनियापरिकम्मे २, पुट्ठसेनियापरिकम्मे ३, ओगाढ-  
 सेनियापरिकम्मे ४, उवसंपज्जणसेनियापरिकम्मे ५, विप्पजहणसेनियापरिकम्मे ६,  
 चुयाचुयसेनियापरिकम्मे ७ । से किं तं सिद्धसेनियापरिकम्मे? सिद्धसेनियापरिकम्मे  
 चउद्दसविहे पण्णत्ते, तंजहा-माउगापयाई १ एगट्ठियपयाई २ अट्ठपयाई ३ पाढो-  
 आगासपयाई ४ केउभूयं ५ रासिबद्धं ६ एगगुणं ७ दुगुणं ८ तिगुणं ९ केउभूयं १०


पडिग्गहो ११ संसारपडिग्गहो १२ नंदावत्तं १३ सिद्धावत्तं १४, सेत्तं सिद्ध-  
 सेणियापरिकम्मे १ । से किं तं मणुस्ससेणियापरिकम्मे? मणुस्ससेणियापरिकम्मे  
 चउद्दसविहे पण्णत्ते, तंजहा-माउयापयाइं १ एगट्ठियपयाइं २ अट्ठपयाइं ३ पाढो-  
 आगासपयाइं ४ केउभूयं ५ रासिबद्धं ६ एगगुणं ७ दुगुणं ८ तिगुणं ९ केउभूयं १०  
 पडिग्गहो ११ संसारपडिग्गहो १२ नंदावत्तं १३ मणुस्सावत्तं १४, सेत्तं  
 मणुस्ससेणियापरिकम्मे २ । से किं तं पुट्टसेणियापरिकम्मे? पुट्टसेणियापरिकम्मे  
 इक्कारसविहे पण्णत्ते, तंजहा-पाढोआगासपयाइं १ केउभूयं २ रासिबद्धं ३ एगगुणं ४  
 दुगुणं ५ तिगुणं ६ केउभूयं ७ पडिग्गहो ८ संसारपडिग्गहो ९ नंदावत्तं १०  
 पुट्टावत्तं ११, सेत्तं पुट्टसेणियापरिकम्मे ३ । से किं तं ओगाढसेणियापरि-  
 कम्मे? ओगाढसेणियापरिकम्मे इक्कारसविहे पण्णत्ते, तंजहा-पाढोआगासपयाइं १  
 केउभूयं २ रासिबद्धं ३ एगगुणं ४ दुगुणं ५ तिगुणं ६ केउभूयं ७ पडिग्गहो ८  
 संसारपडिग्गहो ९ नंदावत्तं १० ओगाढावत्तं ११, सेत्तं ओगाढसेणियापरिकम्मे ४ ।  
 से किं तं उवसंपज्जणसेणियापरिकम्मे? उवसंपज्जणसेणियापरिकम्मे इक्का-  
 रसविहे पण्णत्ते, तंजहा-पाढोआगासपयाइं १ केउभूयं २ रासिबद्धं ३ एगगुणं ४  
 दुगुणं ५ तिगुणं ६ केउभूयं ७ पडिग्गहो ८ संसारपडिग्गहो ९ नंदावत्तं १०  
 उवसंपज्जणावत्तं ११, सेत्तं उवसंपज्जणसेणियापरिकम्मे ५ । से किं तं विप्पजहण-  
 सेणियापरिकम्मे? विप्पजहणसेणियापरिकम्मे इक्कारसविहे पण्णत्ते, तंजहा-पाढो-  
 आगासपयाइं १ केउभूयं २ रासिबद्धं ३ एगगुणं ४ दुगुणं ५ तिगुणं ६ केउभूयं ७  
 पडिग्गहो ८ संसारपडिग्गहो ९ नंदावत्तं १० विप्पजहणावत्तं ११, सेत्तं विप्प-  
 जहणसेणियापरिकम्मे ६ । से किं तं चुयाचुयसेणियापरिकम्मे? चुयाचुयसेणियापरिकम्मे  
 इक्कारसविहे पण्णत्ते, तंजहा-पाढोआगासपयाइं १ केउभूयं २ रासिबद्धं ३ एगगुणं ४  
 दुगुणं ५ तिगुणं ६ केउभूयं ७ पडिग्गहो ८ संसारपडिग्गहो ९ नंदावत्तं १० चुया-  
 चुयवत्तं ११, सेत्तं चुयाचुयसेणियापरिकम्मे ७ । छ चउक्कनइयाइं, सत्तं तेरासि-  
 याइं, सेत्तं परिकम्मे १ । से किं तं सुत्ताइं? सुत्ताइं बावीसं पञ्चात्ताइं, तंजहा-उज्जुसुयं १  
 परिणयापरिणयं २ बहुभंणियं ३ विजयचरियं ४ अणंतरं ५ परंपरं ६ सासाणं ७  
 संजुहं ८ संभिणं ९ आहच्चायं १० सोवत्थियावत्तं ११ नंदावत्तं १२ बहुलं १३  
 पुट्टापुट्टं १४ वियावत्तं १५ एवंभूयं १६ दुयावत्तं १७ वत्तमाणप्पयं १८ सम-  
 भिरुद्धं १९ सव्वओभइं २० पस्सासं २१ दुप्पडिग्गहं २२, इच्चेइयाइं बावीसं  
 सुत्ताइं छिन्नच्छेयनइयाणि ससमयसुत्तपरिवाडीए, इच्चेइयाइं बावीसं सुत्ताइं अच्छिन्न-  
 च्छेयनइयाणि आजीवियसुत्तपरिवाडीए, इच्चेइयाइं बावीसं सुत्ताइं तिग्गणइयाणि


तेरासियसुत्तपरिवाडीए, इच्चेइयाई बावीसं सुत्ताइं चउक्कनइयाणि ससमयसुत्तपरि-  
वाडीए, एवामेव सपुव्वावरेणं अट्ठासीइ सुत्ताइं भवंतित्ति मक्खायं, सेत्तं सुत्ताइं २ ।  
से किं तं पुव्वगए ? पुव्वगए चउइसविहे पण्णत्ते, तंजहा—उप्पायपुव्वं १, अग्गा-  
णीयं २, वीरियं ३, अत्थिनत्थिप्पवायं ४, नाणप्पवायं ५, सच्चप्पवायं ६, आयप्पवायं  
७, कम्मप्पवायं ८, पच्चक्खाणप्पवायं (पच्चक्खाणं) ९, विजाणुप्पवायं १०, अवंझं  
११, पाणाऊ १२, किरियाविसालं १३, लोकविंदुसारं १४ । उप्पायपुव्वस्स णं दस  
वत्थू, चत्तारि चूलियावत्थू पण्णत्ता । अग्गाणीयपुव्वस्स णं चोइस वत्थू, दुवाल्स  
चूलियावत्थू पण्णत्ता । वीरियपुव्वस्स णं अट्ठ वत्थू, अट्ठ चूलियावत्थू पण्णत्ता ।  
अत्थिनत्थिप्पवायपुव्वस्स णं अट्ठारस वत्थू, दस चूलियावत्थू पण्णत्ता । नाणप्प-  
वायपुव्वस्स णं बारस वत्थू पण्णत्ता । सच्चप्पवायपुव्वस्स णं दोणिण वत्थू पण्णत्ता ।  
आयप्पवायपुव्वस्स णं सोलस वत्थू पण्णत्ता । कम्मप्पवायपुव्वस्स णं तीसं वत्थू  
पण्णत्ता । पच्चक्खाणपुव्वस्स णं वीसं वत्थू पण्णत्ता । विजाणुप्पवायपुव्वस्स णं पच्च-  
रस वत्थू पण्णत्ता । अवंझपुव्वस्स णं बारस वत्थू पण्णत्ता । पाणाउपुव्वस्स णं तेरस  
वत्थू पण्णत्ता । किरियाविसालपुव्वस्स णं तीसं वत्थू पण्णत्ता । लोकविंदुसारपुव्वस्स  
णं पणुवीसं वत्थू पण्णत्ता, गाहा—दस १ चोइस २ अट्ठ ३ उट्ठा—, रसेव ४ बारस  
५ दुवे ६ य वत्थूणि । सोलस ७ तीसा ८ वीसा ९, पच्चरस १० अणुप्पवायम्मि  
॥ ८९ ॥ बारस इक्कारसमे, बारसमे तेरसेव वत्थूणि । तीसा पुण तेरसमे, चोइसमे  
पण्णवीसाओ ॥ ९० ॥ चत्तारि १ दुवाल्स २ अट्ठ ३ चेव, दस ४ चेव चुद्ध-  
वत्थूणि । आइल्लण चउण्हं, सेसाणं चूलिया नत्थि ॥ ९१ ॥ सेत्तं पुव्वगए ३ ॥  
से किं तं अणुओगे ? अणुओगे दुविहे पण्णत्ते, तंजहा—मूलपढमाणुओगे, गंडि-  
याणुओगे य । से किं तं मूलपढमाणुओगे ? मूलपढमाणुओगे णं अरहंताणं भग-  
वंताणं पुव्वभवा, देवगमणाइं, आउं, चवणाइं, जम्मणाणि, अभिसेया, रायवर-  
सिरीओ, पव्वजाओ, तवा य उग्गा, केवलनाणुप्पयाओ, तित्थपवत्तणाणि य,  
सीसा, गणा, गणहरा, अज्जपवत्तिणीओ, संघस्स चउव्विहस्स जं च परिमाणं,  
जिणमणपज्जवओहिनाणी, सम्मत्तसुयनाणिणो य, बाई, अणुत्तरगई य, उत्तरवेउ-  
व्विणो य मुणिणो, जत्तिया सिद्धा, सिद्धिपहो जह देसिओ, जच्चिरं च कालं,  
पाओवगया जे जहिं जत्तियाइं भत्ताइं अणसणाए छेइत्ता अंतगडे, मुणिवरुत्तमे,  
तिमिरओघविप्पमुक्के, मुक्खसुद्धमणुत्तरं च पत्ते, एवमन्ने य एवमाइभावा मूलपढ-  
माणुओगे कहिया, सेत्तं मूलपढमाणुओगे । से किं तं गंडियाणुओगे ? गंडियाणुओगे  
कुलगरंगंडियाओ, तित्थयरंगंडियाओ, चक्कवट्ठिमंडियाओ, दसारंगंडियाओ, बल-

देवगंडियाओ, वासुदेवगंडियाओ, गणधरगंडियाओ, भद्रबाहुगंडियाओ, तवोकम्म-  
 गंडियाओ, हरिवंसगंडियाओ, उस्सप्पिणीगंडियाओ, ओसप्पिणीगंडियाओ, चित्तं-  
 तरगंडियाओ, अमरनरतिरियनिरयगइगमणविविदपरियट्ठणेषु एवमाइयाओ गंडि-  
 याओ आधविजंति, पन्नविजंति, सेत्तं गंडियाणुओगे, सेत्तं अणुओगे ४ । से किं  
 तं चूलियाओ ? चूलियाओ—आइल्लाणं चउण्हं पुव्वाणं चूलिया, सेसाइं पुव्वाइं  
 अचूलियाइं, सेत्तं चूलियाओ ५ । दिट्ठिवायस्स णं परिता वायणा, संखेज्जा अणु-  
 ओगदारा, संखेज्जा वेढा, संखेज्जा सिलोगा, संखेज्जाओ पडिवत्तीओ, संखेज्जाओ  
 निज्जुत्तीओ, संखेज्जाओ संगहणीओ । से णं अंगट्ठयाए वारसमे अंगे, एगे सुय-  
 कखेधे, चोइस्स पुव्वाइं, संखेज्जा वत्थू, संखेज्जा चूलवत्थू, संखेज्जा पाहुडा, संखेज्जा  
 पाहुडपाहुडा, संखेज्जाओ पाहुडियाओ, संखेज्जाओ पाहुडपाहुडियाओ, संखेज्जाइं  
 पयसहस्साइं पयग्गेणं, संखेज्जा अक्खरा, अणंता गमा, अणंता पज्जवा, परिता  
 तसा, अणंता थावरा, सासयकडनिवद्धनिकाइया जिणपण्णत्ता भावा आधविजंति,  
 पन्नविजंति, पुरुविजंति, दंसिजंति, निदंसिजंति, उवदंसिजंति । से एवं आया,  
 एवं नाया, एवं विण्णाया, एवं चरणकरणपरूवणा आधविजइ । सेत्तं दिट्ठिवाए  
 १२ ॥ ५७ ॥ इच्चेइयंमि दुवालसंगे गणिपिडगे अणंता भावा, अणंता अभावा,  
 अणंता हेऊ, अणंता अहेऊ, अणंता कारणा, अणंता अकारणा, अणंता जीवा,  
 अणंता अजीवा, अणंता भवसिद्धिया, अणंता अभवसिद्धिया, अणंता सिद्धा,  
 अणंता असिद्धा पण्णत्ता—भावमभावा हेउमहेऊ, कारणमकारणे चेव । जीवाजीवा  
 भवियं—मभविया सिद्धा असिद्धा य ॥ १२ ॥ इच्चेइयं दुवालसंगं गणिपिडगं तीए  
 काले अणंता जीवा आणाए विराहिता चाउरंतं संसारकंतारं अणुपरियट्ठिस्सु । इच्चेइयं  
 दुवालसंगं गणिपिडगं पडुप्पण्णकाले परिता जीवा आणाए विराहिता चाउरंतं  
 संसारकंतारं अणुपरियट्ठंति । इच्चेइयं दुवालसंगं गणिपिडगं अणागए काले अणंता  
 जीवा आणाए विराहिता चाउरंतं संसारकंतारं अणुपरियट्ठिस्संति । इच्चेइयं  
 दुवालसंगं गणिपिडगं तीए काले अणंता जीवा आणाए आराहिता चाउरंतं संसार-  
 कंतारं वीइवइंस्सु । इच्चेइयं दुवालसंगं गणिपिडगं पडुप्पण्णकाले परिता जीवा  
 आणाए आराहिता चाउरंतं संसारकंतारं वीइवयंति । इच्चेइयं दुवालसंगं गणिपिडगं  
 अणागए काले अणंता जीवा आणाए आराहिता चाउरंतं संसारकंतारं वीइवइ-  
 स्संति । इच्चेइयं दुवालसंगं गणिपिडगं न कयाइ नासी, न कयाइ न भवइ, न  
 कयाइ न भविस्सइ, भुवि च, भवइ य, भविस्सइ य, धुवे, नियए, सासए, अक्खए,  
 अव्वए, अवट्ठिए, निच्चे । से जहानामए पंचत्थिकाए न कयाइ नासी, न कयाइ

नत्थि, न कयाइ न भविस्सइ, भुवि च, भवइ य, भविस्सइ य, धुवे, नियए, सासए, अक्खए, अव्वए, अवट्ठिए, निच्चै, एवामेव दुवालसंगं गणिपिडगं न कयाइ नासी, न कयाइ नत्थि, न कयाइ न भविस्सइ, भुवि च, भवइ य, भविस्सइ य, धुवे, नियए, सासए, अक्खए, अव्वए, अवट्ठिए, निच्चै । से समासओ चउव्विहे पणत्ते, तंजहा—दव्वओ, खित्तओ, कालओ, भावओ । तत्थ दव्वओ णं सुयनाणी उवउत्ते सव्वदव्वाहं जाणइ पासइ । खित्तओ णं सुयनाणी उवउत्ते सव्वं खेतं जाणइ पासइ । कालओ णं सुयनाणी उवउत्ते सव्वं खेतं जाणइ पासइ । भावओ णं सुयनाणी उवउत्ते सव्वे भावे जाणइ पासइ ॥ ५८ ॥ अक्खर सच्ची सम्मं, साइयं खलु सपज्जवसियं च । गमियं अंगपविट्ठं, सत्तवि एए सपडिवक्खा ॥ ५३ ॥ आगमसत्थग्गहणं, जं बुद्धिगुणेहिं अट्ठहिं दिट्ठं । विंति सुयनाणलंभं, तं पुव्ववि-सारया धीरा ॥ ५४ ॥ सुस्सूसइ १ पडिपुच्छइ २ सुणेइ ३ गिण्हइ ४ य ईहए यावि ५ । तत्तो अपोहए ६ वा, धारेइ ७ करेइ वा सम्मं ८ ॥ ५५ ॥ मूयं हुंकारं वा, बाढकारं पडिपुच्छ वीमंसा । तत्तो पसंगपारायणं च, परिणिट्ठ सत्तमए ॥ ५६ ॥ सुत्तथो खलु पढमो, वीओ निज्जुत्तिमीसिओ भणिओ । तइओ य निरव-सेसो, एस विही होइ अणुओणे ॥ ५७ ॥ सेत्तं अंगपविट्ठं । सेत्तं सुयनाणं । सेत्तं परोक्खनाणं । सेत्तं नंदी ॥ ५९ ॥

॥ नंदीसुत्तं समत्तं ॥





णमोऽस्तु णं समणस्स भगवओ णायपुत्तमहावीरस्स

## सुत्तागमे

तत्थ णं

### अणुओगदारसुत्तं

नाणं पंचविहं पणत्तं । तंजहा—आभिणिवोहियनाणं १ सुयनाणं २ ओहिनाणं ३ मणपज्जवनाणं ४ केवलनाणं ५ ॥ १ ॥ तत्थ चत्तारि नाणां ठप्पाइं ठवणिजाइं, णो उद्दिसिज्जंति,<sup>१</sup> णो समुद्दिसिज्जंति,<sup>२</sup> णो अणुणविज्जंति । सुयनाणस्स उद्देसो, समुद्देसो, अणुण्णा, अणुओगो य पवत्तइ ॥ २ ॥ जइ सुयनाणस्स उद्देसो, समुद्देसो, अणुण्णा, अणुओगो य पवत्तइ, किं अंगपविट्ठस्स उद्देसो, समुद्देसो, अणुण्णा, अणुओगो य पवत्तइ ? किं अंगवाहिरस्स उद्देसो, समुद्देसो, अणुण्णा, अणुओगो य पवत्तइ ? अंगपविट्ठस्स वि उद्देसो जाव पवत्तइ, अंगपविट्ठस्स वि उद्देसो जाव पवत्तइ । इमं पुण पट्ठवणं पडुच्च अंगपविट्ठस्स अणुओगो ॥ ३ ॥ जइ अंगपविट्ठस्स अणुओगो, किं कालियस्स अणुओगो ? उक्कालियस्स अणुओगो ? कालियस्स वि अणुओगो, उक्कालियस्स वि अणुओगो । इमं पुण पट्ठवणं पडुच्च उक्कालियस्स अणुओगो ॥ ४ ॥ जइ उक्कालियस्स अणुओगो, किं आवस्सगस्स अणुओगो ? आवस्सगवइरित्तस्स अणुओगो ? आवस्सगस्स वि अणुओगो, आवस्सगवइरित्तस्स वि अणुओगो । इमं पुण पट्ठवणं पडुच्च आवस्सगस्स अणुओगो ॥ ५ ॥ जइ आवस्सगस्स अणुओगो, किं णं अंगं ? अंगाइं ? सुयखंधो ? सुयखंधा ? अज्झयणं ? अज्झयणाइं ? उद्देसो ? उद्देसा ? आवस्सयं णं नो अंगं, नो अंगाइं, सुयखंधो, नो सुयखंधा, नो अज्झयणं, अज्झयणाइं, नो उद्देसो, नो उद्देसा ॥ ६ ॥ तम्हा आवस्सयं निक्खिविस्सामि, सुयं निक्खिविस्सामि, खंधं निक्खिविस्सामि, अज्झयणं निक्खिविस्सामि । गाहा—जत्थ य जं जाणेज्जा, निक्खेवं निक्खिवे निरवसेसं । जत्थ वि य न जाणेज्जा, चउक्कगं निक्खिवे तत्थ ॥ १ ॥ ७ ॥ से किं तं आवस्सयं ? आवस्सयं चउव्विहं पणत्तं । तंजहा—नामावस्सयं १ ठवणावस्सयं २ दव्वावस्सयं ३ भावावस्सयं ४ ॥ ८ ॥ से किं तं नामावस्सयं ? नामावस्सयं—

पाठंतरं—१ उद्दिसंति । २ समुद्दिसंति । ३ अंगवाहिरस्स वि । ४ अंगवाहिरस्स । ५ अंगवाहिरस्स । ६ आवस्सयं किं । ७ आवस्सयस्स ।



जस्स णं जीवस्स वा, अजीवस्स वा, जीवाण वा, अजीवाण वा, तदुभयस्स वा, तदुभयाण वा, 'आवस्सए' ति नामं कज्जइ । सेतं नामावस्सयं ॥ ९ ॥ से किं तं ठवणावस्सयं ? ठवणावस्सयं—जं णं कट्टकम्ममे वा, पोत्थकम्ममे वा, चित्तकम्ममे वा, लेप्पकम्ममे वा, गंधिमे वा, वेढिमे वा, पूरिमे वा, संघाइमे वा, अक्खे वा, वराडए वा, एगो वा, अणेगो वा, सव्भावठवणा वा, असव्भावठवणा वा, 'आवस्सए' ति ठवणा ठविज्जइ । सेतं ठवणावस्सयं ॥ १० ॥ नामद्ववणाणं को पइविसेसो ? नामं आवकहियं, ठवणा इत्तरिया वा होज्जा, आवकहिया वा ॥ ११ ॥ से किं तं दव्वावस्सयं ? दव्वावस्सयं दुविहं पण्णत्तं । तंजहा—आगमओ य १ नोआगमओ य २ ॥ १२ ॥ से किं तं आगमओ दव्वावस्सयं ? आगमओ दव्वावस्सयं—जस्स णं 'आवस्सए' ति पयं सिक्खियं, ठियं, जियं, मियं, परिजियं, नामसमं, घोससमं, अहीणक्खरं, अणच्चक्खरं, अव्वाइद्धक्खरं, अक्खलियं, असिलियं, अवच्चाभेलियं, पडिपुण्णं, पडिपुण्णघोसं, कंठोद्विप्पमुक्कं, गुरुवायणोवगयं, से णं तत्थ वायणाए, पुच्छणाए, परियट्ठणाए, धम्मकहाए, णो अणुप्पेहाए । कम्हा ? 'अणुवओगो' दव्वमिति कट्ठु । नेगमस्स णं एगो अणुवउत्तो, आगमओ एगं दव्वावस्सयं, दोण्णि अणुवउत्ता, आगमओ दोण्णि दव्वावस्सयाइं, तिण्णि अणुवउत्ता, आगमओ तिण्णि दव्वावस्सयाइं, एवं जावइया अणुवउत्ता आगमओ तावइयाइं दव्वावस्सयाइं । एवमेव ववहारस्स वि । संगहस्स णं एगो वा अणेगो वा अणुवउत्तो वा अणुवउत्ता वा आगमओ दव्वावस्सयं दव्वावस्सयाणि वा, से एगे दव्वावस्सए । उज्जुसुयस्स एगो अणुवउत्तो आगमओ एगं दव्वावस्सयं, पुहुत्तं नेच्छइ । तिण्हं सदनयाणं जाणए अणुवउत्तं अवत्थु । कम्हा ? जइ जाणए, अणुवउत्तं न भवइ, जइ अणुवउत्तं, जाणए न भवइ, तम्हा णत्थि आगमओ दव्वावस्सयं । सेतं आगमओ दव्वावस्सयं ॥ १३-१४ ॥ से किं तं नोआगमओ दव्वावस्सयं ? नोआगमओ दव्वावस्सयं तिविहं पण्णत्तं । तंजहा—जाणयसरीरदव्वावस्सयं १ भवियसरीरदव्वावस्सयं २ जाणयसरीरभवियसरीरवइरित्तं दव्वावस्सयं ३ ॥ १५ ॥ से किं तं जाणयसरीरदव्वावस्सयं ? जाणयसरीरदव्वावस्सयं—'आवस्सए' ति पयत्थाहिगारजाणयस्स जं सरीरयं ववगयचुयच्चावियचत्तदेहं, जीवविप्पजढं, सिज्जागयं वा, संथारगयं वा, निसीहियागयं वा, सिद्धसिलातलगयं वा पासित्ता णं कोई भणे(वए)ज्जा—अहो ! णं इमेणं सरीरस-सुस्सएणं जिणदिट्ठेणं भावेणं 'आवस्सए' ति पयं आघवियं, पण्णवियं, परूवियं, दंसियं, निदंसियं, उवदंसियं । जहा को दिट्ठंतो ? अयं महुकुंभे आसी, अयं घयकुंभे आसी । से तं जाणयसरीरदव्वावस्सयं ॥ १६ ॥ से किं तं भवियसरीरदव्वावस्सयं ?

भवियसरीरदव्वावस्सयं—जे जीवे जोणिजम्मणनिक्खंते, इमेणं चेव आत्तएणं सरीर-  
समुस्सएणं जिणोवदिट्ठेणं भावेणं 'आवस्सए' ति पयं सेयकाले सिक्खिस्सइ न ताव  
सिक्खइ । जहा को दिट्ठतो ? अयं महुकुंभे भविस्सइ, अयं घयकुंभे भविस्सइ । सेत्तं  
भवियसरीरदव्वावस्सयं ॥ १७ ॥ से किं तं जाणयसरीरभवियसरीरवइरित्तं दव्वाव-  
स्सयं ? जाणयसरीरभवियसरीरवइरित्तं दव्वावस्सयं तिविहं पण्णत्तं । तंजहा—लोइयं १  
कुप्पावयणियं २ लोउत्तरियं ३ ॥ १८ ॥ से किं तं लोइयं दव्वावस्सयं ? लोइयं  
दव्वावस्सयं—जे इमे राईसरतलवरमाडं बियकोडुं बियइब्भसेट्ठिसेणावइसत्थवाहपभि-  
इओ कळं पाउप्पभायाए रयणीए सुविमलाए फुल्लुप्पलकमलकमोलुम्मिलियम्मि अहा-  
पंडुरे पभाए रत्तासोगपासकिंसुयसुयमुहगुंजद्धरागसरिसे कमलागरनलिणसंडवोहए  
उट्ठियम्मि सूरै सहस्सरस्सिम्मि दिणयरे तेयसा जलंते मुहधोयणदंतपक्खालण-  
तेल्लफणिहसिद्धत्थयहरियालियअद्दागधूवपुप्फमल्लगंधतंबोलवत्थाइयाइं दव्वावस्सयाइं  
करेंति, तओ पच्छा रायकुलं वा देवकुलं वा आरामं वा उज्जाणं वा सभं वा पवं  
वा गच्छंति । सेत्तं लोइयं दव्वावस्सयं ॥ १९ ॥ से किं तं कुप्पावयणियं दव्वाव-  
स्सयं ? कुप्पावयणियं दव्वावस्सयं—जे इमे चरगचीरिगचम्मखंडियभिकखोडंपंडुरंग-  
गोयमगोव्वइयगिहिधम्मधम्मचिंतगअविरुद्धविरुद्धवुड्डसावगंपभिइओ पासंडत्था कळं  
पाउप्पभायाए रयणीए जाव तेयसा जलंते, इदस्स वा, खंदस्स वा, रद्धस्स वा,  
सिक्खस्स वा, वेसमणस्स वा, देवस्स वा, नागस्स वा, जक्खस्स वा, भूयस्स वा,  
सुगुंदस्स वा, अज्जाए वा, दुग्गाए वा, कोट्टकिरियाए वा, उवलेवणसंमज्जणआवरि-  
सणधूवपुप्फगंधमल्लाइयाइं दव्वावस्सयाइं करेंति । सेत्तं कुप्पावयणियं दव्वावस्सयं  
॥ २० ॥ से किं तं लोउत्तरियं दव्वावस्सयं ? लोउत्तरियं दव्वावस्सयं—जे इमे समण-  
गुणमुक्कजोगी, छक्कायनिरिणुकंपा, हया इव उद्दामा, गया इव निरंकुसा, घट्ठा, मट्ठा,  
तुप्पोट्ठा, पंडुरपडपाउरणा, जिणाणमणाणाए सच्छंदं विहरिऊण उभओ—कालं आव-  
स्सयस्स उवट्ठंति । सेत्तं लोउत्तरियं दव्वावस्सयं । सेत्तं जाणयसरीरभवियसरीरवइरित्तं  
दव्वावस्सयं । सेत्तं नोआगमओ दव्वावस्सयं । सेत्तं दव्वावस्सयं ॥ २१ ॥ से किं  
तं भावावस्सयं ? भावावस्सयं दुविहं पण्णत्तं । तंजहा—आगमओ य १ नोआगमओ  
य २ ॥ २२ ॥ से किं तं आगमओ भावावस्सयं ? आगमओ भावावस्सयं जाणए  
उवउत्ते । सेत्तं आगमओ भावावस्सयं ॥ २३ ॥ से किं तं नोआगमओ भावावस्सयं ?  
नोआगमओ भावावस्सयं तिविहं पण्णत्तं । तंजहा—लोइयं १ कुप्पावयणियं २ लोउ-

१ भरहसमए जेण कइवया सावया पच्छा बंभणा जाया तेण बंभणा वुड्डसाव-  
गत्ति वुच्चंति । २ देवीणामसिमं ।

तरियं ३ ॥ २४ ॥ से किं तं लोइयं भावावस्सयं ? लोइयं भावावस्सयं-पुव्वण्हे भारहं, अवरण्हे रामायणं । सेत्तं लोइयं भावावस्सयं ॥ २५ ॥ से किं तं कुप्पावयणियं भावावस्सयं ? कुप्पावयणियं भावावस्सयं-जे इमे चरगचीरिग जाव पासंडत्था इज्जंजलि-होभजपोन्दुस्सकनमुक्कारमाइयाइं भावावस्सयाइं करंति । सेत्तं कुप्पावयणियं भावावस्सयं ॥ २६ ॥ से किं तं लोगुत्तरियं भावावस्सयं ? लोगुत्तरियं भावावस्सयं-जे (जणं) इमे-समणे वा, समणी वा, सावओ वा, साविया वा, तच्चित्ते, तम्मणे, तल्लेसे, तदज्झवसिए, तत्तिव्वज्झवसाणे, तदद्दोवउत्ते<sup>१</sup>, तदप्पियकरणे, तव्भावणाभाविए, अण्णत्थ कत्थइ मणं अकरेमाणे उभओ-कालं आवस्सयं करे[न्ति]इ । सेत्तं लोगुत्तरियं भावावस्सयं । सेत्तं नोआगमओ भावावस्सयं । सेत्तं भावावस्सयं ॥ २७ ॥ तस्स णं इमे एगद्धिया णाणाघोसा णाणावंजणा णामधेज्जा भवंति, तंजहा-गाहा-आवस्सयं अवस्संकर-णिज्जं, धुवनिग्गहो विस्सीही य । अज्झयणछक्कवंगो, नीओ आराहणो मंगो ॥ १ ॥ समणेणं सावएण य, अवस्स कायव्वयं हवइ जम्हा । अंतो अहोनिस्स य, तम्हा 'आवस्सयं' नाम ॥ २ ॥ **सेत्तं आवस्सयं** ॥ २८ ॥ से किं तं सुयं ? सुयं चउव्विहं पण्णत्तं । तंजहा-नामसुयं १ ठवणासुयं २ दव्वसुयं ३ भावसुयं ४ ॥ २९ ॥ से किं तं नामसुयं ? नामसुयं-जस्स णं जीवस्स वा जाव 'सुए' त्ति नामं कज्जइ । सेत्तं नामसुयं ॥ ३० ॥ से किं तं ठवणासुयं ? ठवणासुयं-जं णं कट्टकम्मे वा जाव ठवणा ठविज्जइ । सेत्तं ठवणासुयं ॥ ३१ ॥ नामठवणाणं को पइविसेसो ? नामं आवकहियं, ठवणा इत्तरिया वा होज्जा, आवकहिया वा ॥ ३२ ॥ से किं तं दव्वसुयं ? दव्वसुयं दुविहं पण्णत्तं । तंजहा-आगमओ य १ नो आगमओ य २ ॥ ३३ ॥ से किं तं आगमओ दव्वसुयं ? आगमओ दव्वसुयं-जस्स णं 'सुए' त्ति पयं सिक्खियं, ठियं, जियं जाव णो अणुप्पेहाए । कम्हा ? 'अणुवओगो' दव्वमिति कट्टु । नेगमस्स णं एगो अणुवउत्तो आगमओ एगं दव्वसुयं जाव तिण्हं सइत्तयाणं जाणए अणुवउत्ते अवत्थु । कम्हा ? जइ जाणए, अणुवउत्ते न भवइ, जइ अणुवउत्ते, जाणए न भवइ, तम्हा णत्थि आगमओ दव्वसुयं । सेत्तं आगमओ दव्वसुयं ॥ ३४ ॥ से किं तं नोआगमओ दव्वसुयं ? नोआगमओ दव्वसुयं ति विहं पण्णत्तं । तंजहा-जाणयसरीरदव्वसुयं १ भवियसरीरदव्वसुयं २ जाणयसरीरभवियसरीरवइरितं दव्वसुयं ३ ॥ ३५ ॥ से किं तं जाणयसरीरदव्वसुयं ? जाणयसरीरदव्वसुयं- 'सुय' त्ति पयत्थाहिगारजाणयस्स जं सरीरयं ववगयत्तुयच्चावियच्चत्तदेहं जाव पासित्ता णं कोई भणेज्जा-अहो ! णं इमेणं सरीरसमुस्सएणं जिणदिट्ठेणं भावेणं 'सुय' त्ति पयं आपवियं जाव अयं

घयकुंभे आसी । सेत्तं जाणयसरीरद्ववसुयं ॥ ३६ ॥ से किं तं भवियसरीरद्ववसुयं ? भवियसरीरद्ववसुयं—जे जीवे जोणिजम्मणनिकखंते जाव जिणोवदिट्ठेणं भावेणं 'सुय' ति पयं सेयकाले सिक्खिस्सइ जाव अयं घयकुंभे भविस्सइ । सेत्तं भवियसरीरद्ववसुयं ॥ ३७ ॥ से किं तं जाणयसरीरभवियसरीरवइरित्तं द्ववसुयं ? जाणयसरीरभवियसरीरवइरित्तं द्ववसुयं पत्तयपोत्थयलिहियं । अहवा जाणयसरीरभवियसरीरवइरित्तं द्ववसुयं पंचविहं पण्णत्तं । तंजहा—अंडयं १ बोंडयं २ कीडयं ३ वालयं ४ वागयं ५ । से किं तं अंडयं ? अंडयं हंसगब्भाइ । से किं तं बोंडयं ? बोंडयं कप्पासमाइ । से किं तं कीडयं ? कीडयं पंचविहं पण्णत्तं । तंजहा—पट्टे १ मलए २ अंसुए ३ चीणंसुए ४ किसि-  
रागे ५ । से किं तं वालयं ? वालयं पंचविहं पण्णत्तं । तंजहा—उण्णिए १ उट्ठि २ मिय-  
लोमि ३ कोतवे ४ किट्ठिसे ५ । से किं तं वागयं ? वागयं सैणमाइ । सेत्तं जाणयस-  
रीरभवियसरीरवइरित्तं द्ववसुयं । सेत्तं नोआगमओ द्ववसुयं । सेत्तं द्ववसुयं ॥ ३८ ॥  
से किं तं भावसुयं ? भावसुयं दुविहं पण्णत्तं । तंजहा—आगमओ य १ नोआगमओ  
य २ ॥ ३९ ॥ से किं तं आगमओ भावसुयं ? आगमओ भावसुयं जाणए उवउत्ते ।  
सेत्तं आगमओ भावसुयं ॥ ४० ॥ से किं तं नोआगमओ भावसुयं ? नोआगमओ  
भावसुयं दुविहं पण्णत्तं । तंजहा—लोइयं १ लोणुत्तरियं च २ ॥ ४१ ॥ से किं तं लोइयं  
नोआगमओ भावसुयं ? लोइयं नोआगमओ भावसुयं—जं इमं अण्णाणिएहिं सिच्छ-  
दिट्ठीहिं सच्छंददुद्धिमइविगप्पियं तंजहा—भारहं, रामायणं, भीमासुरकं, कोडिल्लयं,  
घोडयमुहं, सगडभदियाउ, कप्पासियं, णागसुहुमं, कणगसत्तरी, वेसियं, वइसेसियं,  
बुद्धसासणं, काविलं, लोगायतं, सट्ठियंतं, माढरपुराणवागरणनाडगाइ, अहवा वाव-  
त्तरिकलाओ, चत्तरि वेया संगोवंगा । सेत्तं लोइयं नोआगमओ भावसुयं ॥ ४२ ॥  
से किं तं लोउत्तरियं नोआगमओ भावसुयं ? लोउत्तरियं नोआगमओ भावसुयं—जं  
इमं अरिहंतेहिं भगवंतेहिं, उप्पण्णणाणदंसणधरेहिं, तीयपच्चुप्पण्णमणागयजाणएहिं,  
सव्वण्णहिं सव्वदरिसीहिं, तिलक्कवहियैमहियपूइएहिं, अप्पडिइयवरनाणदंसणधरेहिं,  
पणीयं दुवालसंगं गणिपिडगं । तंजहा—आयारो १ सूयगडो २ ठाणं ३ समवाओ ४  
विवाहपण्णत्ती ५ णायाधम्मकहाओ ६ उवासगदसाओ ७ अंतगडदसाओ ८ अणुत्त-  
रोववाइयदसाओ ९ पण्हावागरणाइं १० विवागसुयं ११ दिट्ठियाओ य १२ । सेत्तं  
लोउत्तरियं नोआगमओ भावसुयं । सेत्तं नोआगमओ भावसुयं । सेत्तं भावसुयं ॥ ४३ ॥  
तरस्स णं इमे एगट्ठिया णाणाघोसा णाणावज्जणा नामधेज्जा भवंति, तंजहा—  
गाहा—सुयसुत्तगंथसिद्धंतसासणे, आणवयण उवएसे । पन्नवण आगमे वि य, एगट्ठा

पजवा सुत्ते ॥ १ ॥ **सेत्तं सुयं** ॥ ४४ ॥ से किं तं खंधे ? खंधे चउव्विहे पण्णत्ते । तंजहा-नामखंधे १ ठवणखंधे २ दव्वखंधे ३ भावखंधे ४ ॥ ४५ ॥ नामद्ववणाओ पुव्वभणियाणुकमेण भाणियव्वाओ ॥ ४६ ॥ से किं तं दव्वखंधे ? दव्वखंधे दुविहे पण्णत्ते । तंजहा-आगमओ य १ नोआगमओ य २ । से किं तं आगमओ दव्वखंधे ? आगमओ दव्वखंधे-जस्स णं 'खंधे' त्ति पयं तिक्खियं जाव सेत्तं भवियसरीरदव्वखंधे नवरं खंधाभिलावो । से किं तं जाणयसरीरभवियसरीरवइरित्ते दव्वखंधे ? जाणय-सरीरभवियसरीरवइरित्ते दव्वखंधे तिविहे पण्णत्ते । तंजहा-सच्चित्ते १ अच्चित्ते २ मीसए ३ ॥ ४७ ॥ से किं तं सच्चित्ते दव्वखंधे ? सच्चित्ते दव्वखंधे अणेगविहे पण्णत्ते । तंजहा-हयखंधे, गयखंधे, किन्नरखंधे, किंपुरिसखंधे, महोरगखंधे, गंधव्वखंधे, उसभखंधे । सेत्तं सच्चित्ते दव्वखंधे ॥ ४८ ॥ से किं तं अच्चित्ते दव्वखंधे ? अच्चित्ते दव्वखंधे अणेगविहे पण्णत्ते । तंजहा-दुपएसिए, तिपएसिए जाव दसपएसिए, संखिजपएसिए, असंखिजपएसिए, अणंतपएसिए । सेत्तं अच्चित्ते दव्वखंधे ॥ ४९ ॥ से किं तं मीसए दव्वखंधे ? मीसए दव्वखंधे अणेगविहे पण्णत्ते । तंजहा-सेणाए अग्गिमे खंधे, सेणाए मज्झिमे खंधे, सेणाए पच्छिमे खंधे । सेत्तं मीसए दव्वखंधे ॥ ५० ॥ अहवा जाण-यसरीरभवियसरीरवइरित्ते दव्वखंधे तिविहे पण्णत्ते । तंजहा-कसिणखंधे १ अकसिण-खंधे २ अणेगदवियखंधे ३ ॥ ५१ ॥ से किं तं कसिणखंधे ? कसिणखंधे-से चेव हयखंधे, गयखंधे जाव उसभखंधे । सेत्तं कसिणखंधे ॥ ५२ ॥ से किं तं अकसिणखंधे ? अकसिणखंधे-से चेव दुपएसियाइ खंधे जाव अणंतपएसिए खंधे । सेत्तं अकसिणखंधे ॥ ५३ ॥ से किं तं अणेगदवियखंधे ? अणेगदवियखंधे-तस्स चेव देसे अवचिए तस्स चेव देसे उवचिए । सेत्तं अणेगदवियखंधे । सेत्तं जाणयसरीरभवियसरीरवइरित्ते दव्व-खंधे । सेत्तं नोआगमओ दव्वखंधे । सेत्तं दव्वखंधे ॥ ५४ ॥ से किं तं भावखंधे ? भावखंधे दुविहे पण्णत्ते । तंजहा-आगमओ य १ नोआगमओ य २ ॥ ५५ ॥ से किं तं आगमओ भावखंधे ? आगमओ भावखंधे जाणए उवउत्ते । सेत्तं आगमओ भावखंधे ॥ ५६ ॥ से किं तं नोआगमओ भावखंधे ? नोआगमओ भावखंधे-एएसिं चेव सामाइयमाइयणं छण्हं अज्झयणाणं समुदयसमिइसमागमेण आवस्सय-सुयखंधे 'भावखंधे' त्ति लब्भइ । सेत्तं नोआगमओ भावखंधे । सेत्तं भावखंधे ॥ ५७ ॥ तस्स णं इमे एगद्विया णाणाघोसा णाणावज्जणा नामधेज्जा भवंति, तंजहा-**गाहा-**गण काए य निकाए, खंधे वग्गे तहेव रासी य । पुंजे पिंडे निगरे, संघाए आउल समूहे ॥ १ ॥ **सेत्तं खंधे** ॥ ५८ ॥ आवस्सगस्स णं इमे अत्थाहियारा भवंति, तंजहा-**गाहा-**सावज्जजोगविरइ<sup>१</sup>, उक्कित्तण<sup>२</sup> गुणवओ य पडिवत्ती । खलियस्स

निंदणां, वणतिगिच्छ<sup>५</sup> गुणधारणा चैव<sup>६</sup> ॥ १ ॥ ५९ ॥ गाहा-आवस्सयस्स एसो,  
 पिंडत्थो वणिणओ समासेण । एत्तो एक्केक्कं पुण, अज्झयणं कित्तइस्सामि ॥ १ ॥  
 तंजहा-सामाइयं १ चउवीसत्थओ २ वंदणयं ३ पडिक्कमणं ४ काउस्सग्गो ५  
 पच्चक्खाणं ६ । तत्थ पढमं अज्झयणं सामाइयं । तस्स णं इमे चत्तारि  
 अणुओगदारा भवंति, तंजहा-उवक्कमे १ निक्खेवे २ अणुगमे ३ नए ४ ॥ ६० ॥  
 से किं तं उवक्कमे ? उवक्कमे छविहे पण्णत्ते । तंजहा-णामोवक्कमे १ ठवणोवक्कमे २  
 दव्वोवक्कमे ३ खेत्तोवक्कमे ४ कालोवक्कमे ५ भावोवक्कमे ६ । णामठवणाओ  
 गयाओ । से किं तं दव्वोवक्कमे ? दव्वोवक्कमे दुविहे पण्णत्ते । तंजहा-आगमओ य १  
 नोआगमओ य २ जाव सेत्तं भवियसरीरदव्वोवक्कमे । से किं तं जाणगसरीर-  
 भवियसरीरवइरित्ते दव्वोवक्कमे ? जाणगसरीरभवियसरीरवइरित्ते दव्वोवक्कमे तिविहे  
 पण्णत्ते । तंजहा-सच्चित्ते १ अच्चित्ते २ मीसए ३ ॥ ६१ ॥ से किं तं सच्चित्ते दव्वो-  
 वक्कमे ? सच्चित्ते दव्वोवक्कमे तिविहे पण्णत्ते । तंजहा-दुप(ए)याणं १ चउप्पयाणं २  
 अपयाणं ३ । एक्केक्के पुण दुविहे पण्णत्ते । तंजहा-परिक्कमे य १ वत्थुविणासे य २  
 ॥ ६२ ॥ से किं तं दुपयाणं उवक्कमे ? दुपयाणं-नडाणं, नट्टाणं, जल्लाणं, मल्लाणं,  
 मुट्ठियाणं, वेल्लवगाणं, कह्गगाणं, पवगाणं, लासगाणं, आइक्खगाणं, लंखाणं, मंखाणं,  
 तूणइल्लणं, तुंबवीणिगाणं, का(वडि)वोयाणं, मागहाणं । सेत्तं दुपयाणं उवक्कमे ।  
 ॥ ६३ ॥ से किं तं चउप्पयाणं उवक्कमे ? चउप्पयाणं-आसाणं, हत्थीणं, इच्चाइ ।  
 सेत्तं चउप्पयाणं उवक्कमे ॥ ६४ ॥ से किं तं अपयाणं उवक्कमे ? अपयाणं-अंबाणं,  
 अंबाडगाणं, इच्चाइ । सेत्तं अपओवक्कमे । सेत्तं सच्चित्तदव्वोवक्कमे ॥ ६५ ॥ से किं  
 तं अच्चित्तदव्वोवक्कमे ? अच्चित्तदव्वोवक्कमे- खंडाईणं, गुडाईणं, मच्छंडीणं । सेत्तं  
 अच्चित्तदव्वोवक्कमे ॥ ६६ ॥ से किं तं मीसए दव्वोवक्कमे ? मीसए दव्वोवक्कमे-  
 से चैव थासगआयंसगाइमंडिए आसाइ । सेत्तं मीसए दव्वोवक्कमे । सेत्तं जाणय-  
 सरीरभवियसरीरवइरित्ते दव्वोवक्कमे । सेत्तं नोआगमओ दव्वोवक्कमे । सेत्तं दव्वो-  
 वक्कमे ॥ ६७ ॥ से किं तं खेत्तोवक्कमे ? खेत्तोवक्कमे-जं णं हलकुलियाईहिं खेताई  
 उवक्कमिज्जति । सेत्तं खेत्तोवक्कमे ॥ ६८ ॥ से किं तं कालोवक्कमे ? कालोवक्कमे-  
 जं णं नालियाईहिं कालस्सोवक्कमणं कीरइ । सेत्तं कालोवक्कमे ॥ ६९ ॥ से किं तं  
 भावोवक्कमे ? भावोवक्कमे दुविहे पण्णत्ते । तंजहा-आगमओ य १ नोआगमओ य २ ।  
 तत्थ आगमओ जाणए उवउत्ते । से किं तं नोआगमओ भावोवक्कमे ? नोआगमओ  
 भावोवक्कमे दुविहे पण्णत्ते । तंजहा-पसत्थे य १ अपसत्थे य २ । से किं तं अपसत्थे  
 नोआगमओ भावोवक्कमे ? अपसत्थे नोआगमओ भावोवक्कमे डोडिणिगणिगाअमच्चा-

ईणं । से किं तं पसत्थे नोआगमओ भावोवक्कमे ? पसत्थे ० गुरुमाईणं । सेत्तं नोआगमओ भावोवक्कमे । सेत्तं भावोवक्कमे । सेत्तं उवक्कमे ॥ ७० ॥ अहवा उवक्कमे छविह्वे पण्णत्ते । तंजहा-आणुपुव्वी १ नामं २ पमाणं ३ वत्तव्वया ४ अत्थाहिगारे ५ समोयारे ६ ॥ ७१ ॥ से किं तं आणुपुव्वी ? आणुपुव्वी दसविहा पण्णत्ता । तंजहा-नामाणुपुव्वी १ ठवणाणुपुव्वी २ दव्वाणुपुव्वी ३ खेत्ताणुपुव्वी ४ कालाणुपुव्वी ५ उक्कित्तणाणुपुव्वी ६ गणणाणुपुव्वी ७ संठाणाणुपुव्वी ८ सामायारीआणुपुव्वी ९ भावाणुपुव्वी १० ॥ ७२ ॥ नामठवणाओ गयाओ । से किं तं दव्वाणुपुव्वी ? दव्वाणुपुव्वी दुविहा पण्णत्ता । तंजहा-आगमओ य १ नोआगमओ य २ । से किं तं आगमओ दव्वाणुपुव्वी ? आगमओ दव्वाणुपुव्वी-जस्स णं 'आणुपुव्वि' ति पयं सिक्खियं, ठियं, जियं, भियं, परिजियं जाव नो अणुपेह्वाए । कम्हा ? 'अणुवओगो' दव्वमिति कट्ठु । णेगमस्स णं एगो अणुवउत्तो आगमओ एगा दव्वाणुपुव्वी जाव जाणए अणुवउत्ते अवत्थु । कम्हा ? जइ जाणए, अणुवउत्ते न भवइ, जइ अणुवउत्ते, जाणए न भवइ, तम्हा नत्थि आगमओ दव्वाणुपुव्वी । सेत्तं आगमओ दव्वाणुपुव्वी । से किं तं नोआगमओ दव्वाणुपुव्वी ? नोआगमओ दव्वाणुपुव्वी ति विहा पण्णत्ता । तंजहा-जाणयसरीर-दव्वाणुपुव्वी १ भवियसरीरदव्वाणुपुव्वी २ जाणयसरीरभवियसरीरवइरित्ता दव्वाणुपुव्वी ३ । से किं तं जाणयसरीरदव्वाणुपुव्वी ? 'आणुपुव्वि' पयत्थाहिगारजाणयस्स जं सरीरयं ववगयचुयचावियचत्तदेहं सेसं जहा दव्वावस्सए तथा भाणियव्वं जाव सेत्तं जाणयसरीरदव्वाणुपुव्वी । से किं तं भवियसरीरदव्वाणुपुव्वी ? भवियसरीर-दव्वाणुपुव्वी-जे जीवे जोणीजम्मणनिक्खंते सेसं जहा दव्वावस्सए जाव सेत्तं भविय-सरीरदव्वाणुपुव्वी । से किं तं जाणयसरीरभवियसरीरवइरित्ता दव्वाणुपुव्वी ? जाणय-सरीरभवियसरीरवइरित्ता दव्वाणुपुव्वी दुविहा पण्णत्ता । तंजहा-उवणिहिया य १ अणोवणिहिया य २ । तत्थ णं जा सा उवणिहिया सा ठप्पा । तत्थ णं जा सा अणोवणिहिया सा दुविहा पण्णत्ता । तंजहा-नेगमववहारारणं १ संगहस्स य २ ॥ ७३ ॥ से किं तं नेगमववहारारणं अणोवणिहिया दव्वाणुपुव्वी ? नेगमववहारारणं अणोवणि-हिया दव्वाणुपुव्वी पंचविहा पण्णत्ता । तंजहा-अट्ठपयपरूवणया १ भंगसमुक्कित्तणया २ भंगोवदंसणया ३ समोयारे ४ अणुगमे ५ ॥ ७४ ॥ से किं तं नेगमववहारारणं अट्ठपयपरूवणया ? नेगमववहारारणं अट्ठपयपरूवणया-तिपएसिए जाव दसपएसिए आणुपुव्वी, संखिजपएसिए आणुपुव्वी, असंखिजपएसिए आणुपुव्वी, अणंतपएसिए आणुपुव्वी, परमाणुपोग्गले अणाणुपुव्वी, दुपएसिए अवत्तव्वए, तिपएसिया आणु-पुव्वीओ जाव अणंतपएसियाओ आणुपुव्वीओ, परमाणुपोग्गला अणाणुपुव्वीओ,

दुपएसियाई अवत्तव्वयाई । सेत्तं नेगमववहाराणं अट्टपयपरूवणया ॥ ७५ ॥  
 एयाए णं नेगमववहाराणं अट्टपयपरूवणयाए किं पओयणं ? एयाए णं नेगमवव-  
 हाराणं अट्टपयपरूवणयाए भंगसमुक्कित्तणया कज्जइ ॥ ७६ ॥ से किं तं नेगमवव-  
 हाराणं भंगसमुक्कित्तणया ? नेगमववहाराणं भंगसमुक्कित्तणया-अत्थि आणु-  
 पुव्वी १ अत्थि अणाणुपुव्वी २ अत्थि अवत्तव्वए ३ अत्थि आणुपुव्वीओ ४ अत्थि  
 अणाणुपुव्वीओ ५ अत्थि अवत्तव्वयाई ६ । अहवा अत्थि आणुपुव्वी य  
 अणाणुपुव्वी य १ अहवा अत्थि आणुपुव्वी य अणाणुपुव्वीओ य २ अहवा अत्थि  
 आणुपुव्वीओ य अणाणुपुव्वी य ३ अहवा अत्थि आणुपुव्वीओ य अणाणुपुव्वीओ  
 य ४ अहवा अत्थि आणुपुव्वी य अवत्तव्वए य ५ अहवा अत्थि आणुपुव्वी य  
 अवत्तव्वयाई च ६ अहवा अत्थि आणुपुव्वीओ य अवत्तव्वए य ७ अहवा अत्थि  
 आणुपुव्वीओ य अवत्तव्वयाई च ८ अहवा अत्थि अणाणुपुव्वी य अवत्तव्वए य ९  
 अहवा अत्थि अणाणुपुव्वी य अवत्तव्वयाई च १० अहवा अत्थि अणाणुपुव्वीओ  
 य अवत्तव्वए य ११ अहवा अत्थि अणाणुपुव्वीओ य अवत्तव्वयाई च १२ ।  
 अहवा अत्थि आणुपुव्वी य अणाणुपुव्वी य अवत्तव्वए य १ अहवा अत्थि  
 आणुपुव्वी य अणाणुपुव्वी य अवत्तव्वयाई च २ अहवा अत्थि आणुपुव्वी य  
 अणाणुपुव्वीओ य अवत्तव्वए य ३ अहवा अत्थि आणुपुव्वी य अणाणुपुव्वीओ  
 य अवत्तव्वयाई च ४ अहवा अत्थि आणुपुव्वीओ य अणाणुपुव्वी य अवत्तव्वए  
 य ५ अहवा अत्थि आणुपुव्वीओ य अणाणुपुव्वी य अवत्तव्वयाई च ६ अहवा  
 अत्थि आणुपुव्वीओ य अणाणुपुव्वीओ य अवत्तव्वए य ७ अहवा अत्थि आणु-  
 पुव्वीओ य अणाणुपुव्वीओ य अवत्तव्वयाई च ८ तिसंजोगे एए अ(ड)ट्ठभंगा ।  
 एवं सव्वेऽवि छव्वीसं भंगा । सेत्तं नेगमववहाराणं भंगसमुक्कित्तणया ॥ ७७ ॥  
 एयाए णं नेगमववहाराणं भंगसमुक्कित्तणयाए किं पओयणं ? एयाए णं नेगमवव-  
 हाराणं भंगसमुक्कित्तणयाए भंगोवदंसणया कीरइ ॥ ७८ ॥ से किं तं नेगमवव-  
 हाराणं भंगोवदंसणया ? नेगमववहाराणं भंगोवदंसणया-तिपएसिए आणुपुव्वी १  
 परमाणुपोग्गले अणाणुपुव्वी २ दुपएसिए अवत्तव्वए ३ अहवा तिपएसिया आणुपु-  
 व्वीओ ४ परमाणुपोग्गला अणाणुपुव्वीओ ५ दुपएसिया अवत्तव्वयाई ६ । अहवा  
 तिपएसिए य परमाणुपोग्गले य आणुपुव्वी य अणाणुपुव्वी य चउभंगो ४ । अहवा  
 तिपएसिए य दुपएसिए य आणुपुव्वी य अवत्तव्वए य चउभंगो ८ । अहवा परमा-  
 णुपोग्गले य दुपएसिए य अणाणुपुव्वी य अवत्तव्वए य चउभंगो १२ । अहवा



तिपएसिए य परमाणुपोग्गले य दुपएसिए य आणुपुव्वी य अणानुपुव्वी य अवत्तव्वए य १ अहवा तिपएसिए य परमाणुपोग्गले य दुपएसिया य आणुपुव्वी य अणानुपुव्वी य अवत्तव्वयाइं च २ अहवा तिपएसिए य परमाणुपोग्गला य दुपएसिए य आणुपुव्वी य अणानुपुव्वीओ य अवत्तव्वए य ३ अहवा तिपएसिए य परमाणुपोग्गला य दुपएसिया य आणुपुव्वी य अणानुपुव्वीओ य अवत्तव्वयाइं च ४ अहवा तिपएसिया य परमाणुपोग्गले य दुपएसिए य आणुपुव्वीओ य अणानुपुव्वीओ य अवत्तव्वए य ५ अहवा तिपएसिया य परमाणुपोग्गले य दुपएसिया य आणुपुव्वीओ य अणानुपुव्वी य अवत्तव्वयाइं च ६ अहवा तिपएसिया य परमाणुपोग्गला य दुपएसिए य आणुपुव्वीओ य अणानुपुव्वीओ य अवत्तव्वए य ७ अहवा तिपएसिया य परमाणुपोग्गला य दुपएसिया य आणुपुव्वीओ य अणानुपुव्वीओ य अवत्तव्वयाइं च ८ । सेत्तं नेगमववहारणं भंगोवदंसणया ॥ ७९ ॥ से किं तं समोयारे ? समोयारे ( भणिज्जइ ) । नेगमववहारणं आणुपुव्वीदव्वाइं कहिं समोयरंति ? किं आणुपुव्वीदव्वेहिं समोयरंति ? अणानुपुव्वीदव्वेहिं समोयरंति ? अवत्तव्वयदव्वेहिं समोयरंति ? नेगमववहारणं आणुपुव्वीदव्वाइं आणुपुव्वीदव्वेहिं समोयरंति, नो अणानुपुव्वीदव्वेहिं समोयरंति, नो अवत्तव्वयदव्वेहिं समोयरंति । नेगमववहारणं अणानुपुव्वीदव्वाइं कहिं समोयरंति ? किं आणुपुव्वीदव्वेहिं समोयरंति ? अणानुपुव्वीदव्वेहिं समोयरंति ? अवत्तव्वयदव्वेहिं समोयरंति ? नो आणुपुव्वीदव्वेहिं समोयरंति, अणानुपुव्वीदव्वेहिं समोयरंति, नो अवत्तव्वयदव्वेहिं समोयरंति । नेगमववहारणं अवत्तव्वयदव्वाइं कहिं समोयरंति ? आणुपुव्वीदव्वेहिं समोयरंति ? अणानुपुव्वीदव्वेहिं समोयरंति ? अवत्तव्वयदव्वेहिं समोयरंति ? नो आणुपुव्वीदव्वेहिं समोयरंति, नो अणानुपुव्वीदव्वेहिं समोयरंति, अवत्तव्वयदव्वेहिं समोयरंति । सेत्तं समोयारे ॥ ८० ॥ से किं तं अणुगमे ? अणुगमे नवविहे पण्णत्ते । तंजहा-गाहा-संतपयपरूवणया, दव्वपमाणं च खित्तै फुसर्णा य । कौलो य अंतैरं भार्ग, भावे अप्पावहुं चेव ॥ १ ॥ ८१ ॥ नेगमववहारणं आणुपुव्वीदव्वाइं किं अत्थि नत्थि ? णियमा अत्थि । नेगमववहारणं अणानुपुव्वीदव्वाइं किं अत्थि नत्थि ? णियमा अत्थि । नेगमववहारणं अवत्तव्वयदव्वाइं किं अत्थि नत्थि ? णियमा अत्थि ॥ ८२ ॥ नेगमववहारणं आणुपुव्वीदव्वाइं किं संखिज्जाइं ? असंखिज्जाइं ? अणंताइं ? नो संखिज्जाइं, नो असंखिज्जाइं, अणंताइं । एवं अणानुपुव्वीदव्वाइं अवत्तव्वगदव्वाइं च अणंताइं भाणियव्वाइं ॥ ८३ ॥ नेगमववहारणं आणुपुव्वीदव्वाइं लोगस्स किं संखिज्जइभागे होज्जा ? असंखिज्जइभागे होज्जा ?

संखेजेसु भागेसु होज्जा ? असंखेजेसु भागेसु होज्जा ? सव्वलोए होज्जा ? एगं दव्वं पडुच्च संखिज्जइभागे वा होज्जा, असंखिज्जइभागे वा होज्जा, संखेजेसु भागेसु वा होज्जा, असंखेजेसु भागेसु वा होज्जा, सव्वलोए वा होज्जा । णाणादव्वाइं पडुच्च नियमा सव्वलोए होज्जा । नेगमववहाराणं अणाणपुव्वीदव्वाइं किं लोयस्स संखिज्जइभागे होज्जा जाव सव्वलोए होज्जा ? एगं दव्वं पडुच्च नो संखिज्जइभागे होज्जा, असंखिज्जइभागे होज्जा, नो संखेजेसु भागेसु होज्जा, नो असंखेजेसु भागेसु होज्जा, नो सव्वलोए होज्जा । णाणादव्वाइं पडुच्च नियमा सव्वलोए होज्जा । एवं अवत्तव्वगदव्वाइं भाणियव्वाइं ॥ ८४ ॥ नेगमववहाराणं आणपुव्वीदव्वाइं लोगस्स किं संखेज्जइभागं फुसंति ? असंखेज्जइभागं फुसंति ? संखेजे भागे फुसंति ? असंखेजे भागे फुसंति ? सव्वलोगं फुसंति ? एगं दव्वं पडुच्च लोगस्स संखेज्जइभागं वा फुसंति जाव सव्वलोगं वा फुसंति । णाणादव्वाइं पडुच्च नियमा सव्वलोगं फुसंति । नेगमववहाराणं अणाणपुव्वीदव्वाइं लोगस्स किं संखिज्जइभागं फुसंति जाव सव्वलोगं फुसंति ? एगं दव्वं पडुच्च नो संखिज्जइभागं फुसंति, असंखिज्जइभागं फुसंति, नो संखिजे भागे फुसंति, नो असंखिजे भागे फुसंति, नो सव्वलोयं फुसंति । णाणादव्वाइं पडुच्च नियमा सव्वलोयं फुसंति । एवं अवत्तव्वगदव्वाइं भाणियव्वाइं ॥ ८५ ॥ गेममववहाराणं आणपुव्वीदव्वाइं कालओ केवच्चिरं होइ ? एगं दव्वं पडुच्च जहण्णेणं एगं समयं, उक्कोसेणं असंखेज्जं कालं । णाणादव्वाइं पडुच्च नियमा सव्वद्धा । अणाणपुव्वीदव्वाइं अवत्तव्वगदव्वाइं च एवं चेव भाणियव्वाइं ॥ ८६ ॥ गेममववहाराणं आणपुव्वीदव्वाणं अंतरं कालओ केवच्चिरं होइ ? एगं दव्वं पडुच्च जहण्णेणं एगं समयं, उक्कोसेणं अणं(तं)तकालं । णाणादव्वाइं पडुच्च णत्थि अंतरं । गेममववहाराणं अणाणपुव्वीदव्वाणं अंतरं कालओ केवच्चिरं होइ ? एगं दव्वं पडुच्च जहण्णेणं एगं समयं, उक्कोसेणं असंखेज्जं कालं । णाणादव्वाइं पडुच्च णत्थि अंतरं । गेममववहाराणं अवत्तव्वगदव्वाणं अंतरं कालओ केवच्चिरं होइ ? एगं दव्वं पडुच्च जहण्णेणं एगं समयं, उक्कोसेणं अणंतकालं । णाणादव्वाइं पडुच्च णत्थि अंतरं ॥ ८७ ॥ गेममववहाराणं आणपुव्वीदव्वाइं सेसदव्वाणं कइभागे होज्जा ? किं संखिज्जइभागे होज्जा ? असंखिज्जइभागे होज्जा ? संखेजेसु भागेसु होज्जा ? असंखेजेसु भागेसु होज्जा ? नो संखिज्जइभागे होज्जा, नो असंखिज्जइभागे होज्जा, नो संखेजेसु भागेसु होज्जा, नियमा असंखेजेसु भागेसु होज्जा । गेममववहाराणं अणाणपुव्वीदव्वाइं सेसदव्वाणं कइभागे होज्जा ? किं संखेज्जइभागे होज्जा ? असंखेज्जइभागे होज्जा ? संखेजेसु भागेसु होज्जा ? असंखेजेसु भागेसु होज्जा ? नो संखेज्जइभागे

होज्जा, असंखेज्जइभागे होज्जा, नो संखेज्जेसु भागेसु होज्जा, नो असंखेज्जेसु भागेसु होज्जा । एवं अवत्तव्वगदव्वाणि वि भाणियव्वाणि ॥ ८८ ॥ णेगमव्वहारणं आणु-  
 पुव्वीदव्वाइं कयरेमि भावे होज्जा ? किं उदइए भावे होज्जा ? उवसमिए भावे  
 होज्जा ? खइए भावे होज्जा ? खओवसमिए भावे होज्जा ? पारिणामिए भावे होज्जा ?  
 सज्जिवाइए भावे होज्जा ? णियमा साइपारिणामिए भावे होज्जा । अणाणुपुव्वीदव्वाणि  
 अवत्तव्वगदव्वाणि य एवं चेव भाणियव्वाणि ॥ ८९ ॥ एएसिं भंते ! णेगमव्वहा-  
 राणं आणुपुव्वीदव्वाणं अणाणुपुव्वीदव्वाणं अवत्तव्वगदव्वाणं य दव्वट्ठयाए पएसट्ठ-  
 याए दव्वट्ठपएसट्ठयाए कयरे कयरेहिंतो अप्पा वा बहुया वा तुल्ला वा विसेसाहिया  
 वा ? गोयमा ! सव्वत्थोवाइं णेगमव्वहारणं अवत्तव्वगदव्वाइं दव्वट्ठयाए, अणाणु-  
 पुव्वीदव्वाइं दव्वट्ठयाए विसेसाहियाइं, आणुपुव्वीदव्वाइं दव्वट्ठयाए असंखेज्जगुणाइं ।  
 पएसट्ठयाए-णेगमव्वहारणं सव्वत्थोवाइं अणाणुपुव्वीदव्वाइं पएसट्ठयाए, अवत्तव्व-  
 गदव्वाइं पएसट्ठयाए विसेसाहियाइं, आणुपुव्वीदव्वाइं पएसट्ठयाए अणंतगुणाइं ।  
 दव्वट्ठपएसट्ठयाए-सव्वत्थोवाइं णेगमव्वहारणं अवत्तव्वगदव्वाइं दव्वट्ठयाए, अणा-  
 णुपुव्वीदव्वाइं दव्वट्ठयाए अपएसट्ठयाए विसेसाहियाइं, अवत्तव्वगदव्वाइं पएसट्ठयाए  
 विसेसाहियाइं, आणुपुव्वीदव्वाइं दव्वट्ठयाए असंखेज्जगुणाइं, ताइं चेव पएसट्ठयाए  
 अणंतगुणाइं । सेतं अणुगमे । सेतं णेगमव्वहारणं अणोवणिहिया दव्वाणुपुव्वी  
 ॥ ९० ॥ से किं तं संगहस्स अणोवणिहिया दव्वाणुपुव्वी ? संगहस्स अणोवणिहिया  
 दव्वाणुपुव्वी पंचविहा पण्णत्ता । तंजहा-अट्ठपयपरूवणया १ भंगसमुक्कित्तणया २  
 भंगोवदंसणया ३ समोयारे ४ अणुगमे ५ ॥ ९१ ॥ से किं तं संगहस्स अट्ठपय-  
 परूवणया ? संगहस्स अट्ठपयपरूवणया-तिपएसिए आणुपुव्वी, चउप्पएसिए आणु-  
 पुव्वी जाव दसपएसिए आणुपुव्वी, संखिज्जपएसिए आणुपुव्वी, असंखिज्जपएसिए  
 आणुपुव्वी, अणंतपएसिए आणुपुव्वी, परमाणुपोगळे अणाणुपुव्वी, दुपएसिए अवत्त-  
 व्वए । सेतं संगहस्स अट्ठपयपरूवणया ॥ ९२ ॥ एयाए णं संगहस्स अट्ठपयपरूव-  
 णयाए किं पओयणं ? एयाए णं संगहस्स अट्ठपयपरूवणयाए भंगसमुक्कित्तणया  
 कज्जइ । से किं तं संगहस्स भंगसमुक्कित्तणया ? संगहस्स भंगसमुक्कित्तणया-अत्थि  
 आणुपुव्वी १ अत्थि अणाणुपुव्वी २ अत्थि अवत्तव्वए ३ अहवा अत्थि आणुपुव्वी  
 य अणाणुपुव्वी य ४ अहवा अत्थि आणुपुव्वी य अवत्तव्वए य ५ अहवा अत्थि  
 अणाणुपुव्वी य अवत्तव्वए य ६ अहवा अत्थि आणुपुव्वी य अणाणुपुव्वी य  
 अवत्तव्वए य ७ एवं सत्तभंगा । सेतं संगहस्स भंगसमुक्कित्तणया । एयाए णं संगहस्स  
 भंगसमुक्कित्तणयाए किं पओयणं ? एयाए णं संगहस्स भंगसमुक्कित्तणयाए भंगोवदं-

सणया कीरइ ॥ ९३ ॥ से किं तं संगहस्स भंगोवदंसणया ? संगहस्स भंगोवदंसणया—  
 तिपएसिया आणुपुष्पी १ परमाणुपोग्गला अणाणुपुष्पी २ दुपएसिया अवत्तव्वए ३  
 अहवा तिपएसिया य परमाणुपुग्गला य आणुपुष्पी य अणाणुपुष्पी य ४ अहवा  
 तिपएसिया य दुपएसिया य आणुपुष्पी य अवत्तव्वए य ५ अहवा परमाणु-  
 पोग्गला य दुपएसिया य अणाणुपुष्पी य अवत्तव्वए य ६ अहवा तिपएसिया य  
 परमाणुपोग्गला य दुपएसिया य आणुपुष्पी य अणाणुपुष्पी य अवत्तव्वए य ७ ।  
 सेत्तं संगहस्स भंगोवदंसणया ॥ ९४ ॥ से किं तं संगहस्स समोयारे ? संगहस्स  
 समोयारे (भणिज्जइ) । संगहस्स आणुपुष्पीदव्वाइं कहिं समोयरंति ? किं आणु-  
 पुष्पीदव्वेहिं समोयरंति ? अणाणुपुष्पीदव्वेहिं समोयरंति ? अवत्तव्वयदव्वेहिं समो-  
 यरंति ? संगहस्स आणुपुष्पीदव्वाइं आणुपुष्पीदव्वेहिं समोयरंति, नो अणाणु-  
 पुष्पीदव्वेहिं समोयरंति, नो अवत्तव्वयदव्वेहिं समोयरंति । एवं दोञ्चि वि सट्ठाणे  
 सट्ठाणे समोयरंति । सेत्तं समोयारे ॥ ९५ ॥ से किं तं अणुगमे ? अणुगमे अट्ठविहे  
 पण्णत्ते । तंजहा-गाहा-सत्तैपयपरूवणया, दैव्वपमाणं च खित्तै फुसणौ य । कालो  
 य अंतैरं भागं, भावे अप्पावहुं नत्थि ॥ १ ॥ संगहस्स आणुपुष्पीदव्वाइं किं अत्थि  
 नत्थि ? णियमा अत्थि । एवं दोञ्चि वि । संगहस्स आणुपुष्पीदव्वाइं किं संखि-  
 ज्जाइं ? असंखिज्जाइं ? अणंताइं ? नो संखिज्जाइं, नो असंखिज्जाइं, नो अणंताइं,  
 नियमा एगो रासी । एवं दोञ्चि वि । संगहस्स आणुपुष्पीदव्वाइं लोगस्स कइभागे  
 होज्जा ? किं संखिज्जइभागे होज्जा ? असंखिज्जइभागे होज्जा ? संखेज्जेसु भागेसु  
 होज्जा ? असंखेज्जेसु भागेसु होज्जा ? सव्वलोए होज्जा ? नो संखिज्जइभागे होज्जा  
 नो असंखिज्जइभागे होज्जा, नो संखेज्जेसु भागेसु होज्जा, नो असंखेज्जेसु भागेसु  
 होज्जा, नियमा सव्वलोए होज्जा । एवं दोञ्चि वि । संगहस्स आणुपुष्पीदव्वाइं  
 लोगस्स किं संखेज्जइभागं फुसंति ? असंखेज्जइभागं फुसंति ? संखेजे भागे फुसंति ?  
 असंखेजे भागे फुसंति ? सव्वलोगं फुसंति ? नो संखेज्जइभागं फुसंति जाव णियमा  
 सव्वलोगं फुसंति । एवं दोञ्चि वि । संगहस्स आणुपुष्पीदव्वाइं कालओ केवच्चिरं  
 होति ? (नियमा) सव्वद्धा । एवं दोञ्चि वि । संगहस्स आणुपुष्पीदव्वाणं कालओ  
 केवच्चिरं अंतरं होइ ? णत्थि अंतरं । एवं दोञ्चि वि । संगहस्स आणुपुष्पीदव्वाइं  
 सेसदव्वाणं कइभागे होज्जा ? किं संखिज्जइभागे होज्जा ? असंखिज्जइभागे होज्जा ?  
 संखेज्जेसु भागेसु होज्जा ? असंखेज्जेसु भागेसु होज्जा ? नो संखिज्जइभागे होज्जा,  
 नो असंखिज्जइभागे होज्जा, नो संखेज्जेसु भागेसु होज्जा, नो असंखेज्जेसु भागेसु  
 होज्जा, नियमा तिभागे होज्जा । एवं दोञ्चि वि । संगहस्स आणुपुष्पीदव्वाइं

कयरम्मि भावे होजा ? नियमा साइपारिणामिए भावे होजा । एवं दोन्नि वि । अप्पायहुं नत्थि । सेत्तं अणुगमे । सेत्तं संगहस्स अणोवणिहिया दव्वाणुपुव्वी । सेत्तं अणोवणिहिया दव्वाणुपुव्वी ॥ ९६ ॥ से किं तं उवणिहिया दव्वाणुपुव्वी ? उवणिहिया दव्वाणुपुव्वी तिविहा पण्णत्ता । तंजहा-पुव्वाणुपुव्वी १ पच्छाणुपुव्वी २ अणाणुपुव्वी य ३ ॥ ९७ ॥ से किं तं पुव्वाणुपुव्वी ? पुव्वाणुपुव्वी-धम्मत्थिकाए १ अधम्मत्थिकाए २ आगासत्थिकाए ३ जीवत्थिकाए ४ पोम्मलत्थिकाए ५ अद्धासमए ६ । सेत्तं पुव्वाणुपुव्वी । से किं तं पच्छाणुपुव्वी ? पच्छाणुपुव्वी-अद्धासमए ६ पोम्मलत्थिकाए ५ जीवत्थिकाए ४ आगासत्थिकाए ३ अधम्मत्थिकाए २ धम्मत्थिकाए १ । सेत्तं पच्छाणुपुव्वी । से किं तं अणाणुपुव्वी ? अणाणुपुव्वी-एयाए चेव एगाइयाए एगुत्तरियाए छगच्छयायाए सेढीए अण्णमण्णब्भासो दुस्सूणो । सेत्तं अणाणुपुव्वी ॥ ९८ ॥ अहवा उवणिहिया दव्वाणुपुव्वी तिविहा पण्णत्ता । तंजहा-पुव्वाणुपुव्वी १ पच्छाणुपुव्वी २ अणाणुपुव्वी ३ । से किं तं पुव्वाणुपुव्वी ? पुव्वाणुपुव्वी-परमाणुपोग्गले १ दुपएसिए २ तिपएसिए ३ जाव दसपएसिए १० संखिज्जपएसिए ११ असंखिज्जपएसिए १२ अणंतपएसिए १३ । सेत्तं पुव्वाणुपुव्वी । से किं तं पच्छाणुपुव्वी ? पच्छाणुपुव्वी-अणंतपएसिए १३ जाव परमाणुपोग्गले १ । सेत्तं पच्छाणुपुव्वी । से किं तं अणाणुपुव्वी ? अणाणुपुव्वी-एयाए चेव एगाइयाए एगुत्तरियाए अणंतगच्छयायाए सेढीए अण्णमण्णब्भासो दुस्सूणो । सेत्तं अणाणुपुव्वी । सेत्तं उवणिहिया दव्वाणुपुव्वी । सेत्तं जाणयसरीरभवियसरीरवइरित्ता दव्वाणुपुव्वी । सेत्तं नोआगमओ दव्वाणुपुव्वी । **सेत्तं दव्वाणुपुव्वी ॥ ९९ ॥** से किं तं खेत्ताणुपुव्वी ? खेत्ताणुपुव्वी दुविहा पण्णत्ता । तंजहा-उवणिहिया य अणोवणिहिया य ॥ १०० ॥ तत्थ णं जा सा उवणिहिया सा ठप्पा । तत्थ णं जा सा अणोवणिहिया सा दुविहा पण्णत्ता । तंजहा-णेगमववहारारणं १ संगहस्स य २ ॥ १०१ ॥ से किं तं णेगमववहारारणं अणोवणिहिया खेत्ताणुपुव्वी ? णेगमववहारारणं अणोवणिहिया खेत्ताणुपुव्वी पंचविहा पण्णत्ता । तंजहा-अट्ठपयपह्वणया १ भंगसमुक्कित्तणया २ भंगोवदंसणया ३ समोयारे ४ अणुगमे ५ । से किं तं णेगमववहारारणं अट्ठपयपह्वणया ? णेगमववहारारणं अट्ठपयपह्वणया-तिपएसोगाढे आणुपुव्वी जाव दसपएसोगाढे आणुपुव्वी, संखिज्जपएसोगाढे आणुपुव्वी, असंखिज्जपएसोगाढे आणुपुव्वी, एगपएसोगाढे अणाणुपुव्वी, दुपएसोगाढे अवत्तवए, तिपएसोगाढा आणुपुव्वीओ जाव दसपएसोगाढा आणुपुव्वीओ, असंखिज्जपएसोगाढा आणुपुव्वीओ,

१ 'समूह' । २ पच्चंतरे एसो पाढो नत्थि ।

एगपएसोगाढा अणाणुपुव्वीओ, दुपएसोगाढा अवत्तव्वगाइं । सेत्तं णेगमववहाराणं अट्ठपयपरूवणया । एयाए णं णेगमववहाराणं अट्ठपयपरूवणयाए किं पओयणं ? एयाए० णेगमववहाराणं अट्ठपयपरूवणयाए णेगमववहाराणं भंगसमुक्कित्तणया कज्ज । से किं तं णेगमववहाराणं भंगसमुक्कित्तणया ? णेगमववहाराणं भंगसमुक्कित्तणया-अत्थि आणुपुव्वी १ अत्थि अणाणुपुव्वी २ अत्थि अवत्तव्वए ३ एवं दव्वाणुपुव्वी-गमेणं खेत्ताणुपुव्वीए वि ते चेव छव्वीसं भंगा भाणियव्वा जाव सेत्तं णेगमववहाराणं भंगसमुक्कित्तणया । एयाए णं णेगमववहाराणं भंगसमुक्कित्तणयाए किं पओयणं ? एयाए णं णेगमववहाराणं भंगसमुक्कित्तणयाए भंगोवदंसणया कीरइ । से किं तं णेगमववहाराणं भंगोवदंसणया ? णेगमववहाराणं भंगोवदंसणया-तिपएसोगाढे आणुपुव्वी १ एगपएसोगाढे अणाणुपुव्वी २ दुपएसोगाढे अवत्तव्वए ३ तिपएसोगाढा आणुपुव्वीओ ४ एगपएसोगाढा अणाणुपुव्वीओ ५ दुपएसोगाढा अवत्तव्वगाइं ६ अहवा तिपएसोगाढे य एगपएसोगाढे य आणुपुव्वी य अणाणुपुव्वी य एवं तहा चेव दव्वाणुपुव्वीगमेणं छव्वीसं भंगा भाणियव्वा जाव सेत्तं णेगमववहाराणं भंगोवदंसणया । से किं तं समोयारे ? समोयारे-णेगमववहाराणं आणुपुव्वीदव्वाइं कहिं समोयरंति ? किं आणुपुव्वीदव्वेहिं समोयरंति ? अणाणुपुव्वीदव्वेहिं समोयरंति ? अवत्तव्वयदव्वेहिं समोयरंति ?० आणुपुव्वीदव्वाइं आणुपुव्वीदव्वेहिं समोयरंति, नो अणाणुपुव्वीदव्वेहिं समोयरंति, नो अवत्तव्वयदव्वेहिं समोयरंति । एवं दोन्नि वि सट्ठाणे सट्ठाणे समोयरंति । सेत्तं समोयारे । से किं तं अणुगमे ? अणुगमे नवविहे पणत्ते । तंजहा-गाहा-संतपयपरूवणया, दव्वपमाणं च खित्तं फुसणो य । कालो य अतैरं भागं, भावे अप्पावहुं चेव ॥ १ ॥ णेगमववहाराणं आणुपुव्वीदव्वाइं किं अत्थि नत्थि ? णियमा अत्थि । एवं दोन्नि वि । णेगमववहाराणं आणुपुव्वीदव्वाइं किं संखिज्जाइं ? असंखिज्जाइं ? अणंताइं ? नो संखिज्जाइं, नो असंखिज्जाइं, अणंताइं । एवं दोन्नि वि । णेगमववहाराणं आणुपुव्वीदव्वाइं लोगस्स किं संखिज्जइभागे होज्जा ? असंखिज्जइभागे होज्जा ? जाव सव्वलोए होज्जा ? एगं दव्वं पडुच्च संखिज्जइभागे वा होज्जा, असंखिज्जइभागे वा होज्जा, संखेज्जेसु भागेसु वा होज्जा, असंखेज्जेसु भागेसु वा होज्जा, देसूणे वा लोए होज्जा । णाणादव्वाइं पडुच्च नियमा सव्वलोए होज्जा । णेगमववहाराणं अणाणुपुव्वीदव्वाणं पुच्छाए-एगं दव्वं पडुच्च नो संखिज्जइभागे होज्जा, असंखिज्जइभागे होज्जा, नो संखेज्जेसु भागेसु होज्जा, नो असंखेज्जेसु भागेसु होज्जा, नो सव्वलोए होज्जा । णाणादव्वाइं पडुच्च नियमा सव्वलोए होज्जा । एवं अवत्तव्व-गदव्वाणि वि भाणियव्वाणि । णेगमववहाराणं आणुपुव्वीदव्वाइं लोगस्स किं संखि-

जइभागं फुसंति ? असंखिजइभागं फुसंति ? संखेजे भागे फुसंति ? असंखेजे भागे फुसंति ? सब्वलोगं फुसंति ? एगं दव्वं पडुच्च संखिजइभागं वा फुसइ, असंखिजइ-भागं वा फुसइ, संखेजे भागे वा फुसइ, असंखेजे भागे वा फुसइ, देसूणं वा लोगं फुसइ । णाणादव्वाइं पडुच्च नियमा सब्वलोगं फुसंति । अणाणुपुव्वीदव्वाइं अवत्त-व्वयदव्वाइं च जहा खेतं नवरं फुसणा भाणियव्वा । नेगमववहारणं आणुपुव्वी-दव्वाइं कालओ केवच्चिरं होंति ? एगं दव्वं पडुच्च जहण्णेणं एगं समयं, उक्कोसेणं असं-खेज्जं कालं । णाणादव्वाइं पडुच्च नियमा सब्वद्धा । एवं दुण्णि वि । नेगमववहारणं आणुपुव्वीदव्वाणमंतरं कालओ केवच्चिरं होइ ? एगं दव्वं पडुच्च जहण्णेणं एगं समयं, उक्कोसेणं असंखेज्जं कालं । नाणादव्वाइं पडुच्च णत्थि अंतरं । नेगमववहारणं आणु-पुव्वीदव्वाइं सेसदव्वाणं कइभागे होजा ? तिण्णि वि जहा दव्वाणुपुव्वीए । नेगम-ववहारणं आणुपुव्वीदव्वाइं कयरम्मि भावे होजा ? नियमा साइपारिणामिए भावे होजा । एवं दोब्बि वि । एएसि णं भंते ! नेगमववहारणं आणुपुव्वीदव्वाणं अणाणु-पुव्वीदव्वाणं अवत्तव्वगदव्वाणं च दव्वट्ठयाए पएसट्ठयाए दव्वट्ठपएसट्ठयाए कयरं कयरं-हिंतो अप्पा वा बहुया वा तुल्ला वा विसेसाहिया वा ? गोयमा ! सब्वत्थोवाइं नेगम-ववहारणं अवत्तव्वगदव्वाइं दव्वट्ठयाए, अणाणुपुव्वीदव्वाइं दव्वट्ठयाए विसेसाहियाइं, आणुपुव्वीदव्वाइं दव्वट्ठयाए असंखेज्जगुणाइं, पएसट्ठयाए-सब्वत्थोवाइं नेगमववहारणं अणाणुपुव्वीदव्वाइं अपएसट्ठयाए, अवत्तव्वगदव्वाइं पएसट्ठयाए विसेसाहियाइं, आणुपुव्वीदव्वाइं पएसट्ठयाए असंखेज्जगुणाइं, दव्वट्ठपएसट्ठयाए-सब्वत्थोवाइं नेगम-ववहारणं अवत्तव्वगदव्वाइं दव्वट्ठयाए, अणाणुपुव्वीदव्वाइं दव्वट्ठयाए अपएसट्ठयाए विसेसाहियाइं, अवत्तव्वगदव्वाइं पएसट्ठयाए विसेसाहियाइं, आणुपुव्वीदव्वाइं दव्वट्ठ-याए असंखेज्जगुणाइं, ताइं चेव पएसट्ठयाए असंखेज्जगुणाइं । सेत्तं अणुगमे । सेत्तं नेगमववहारणं अणोवणिहिया खेत्ताणुपुव्वी ॥ १०२ ॥ से किं तं संगहस्स अणो-वणिहिया खेत्ताणुपुव्वी ? संगहस्स अणोवणिहिया खेत्ताणुपुव्वी पंचविहा पण्णत्ता । तंजहा-अट्ठपयपरूवणया १ भंगसमुक्कित्तणया २ भंगोवदंसणया ३ समोयारे ४ अणुगमे ५ । से किं तं संगहस्स अट्ठपयपरूवणया ? संगहस्स अट्ठपयपरूवणया-तिपएसोगाढे आणुपुव्वी, चउप्पएसोगाढे आणुपुव्वी जाव दसपएसोगाढे आणुपुव्वी, संखिज्जपएसोगाढे आणुपुव्वी, असंखिज्जपएसोगाढे आणुपुव्वी, एगपएसोगाढे अणा-णुपुव्वी, दुपएसोगाढे अवत्तव्वए । सेत्तं संगहस्स अट्ठपयपरूवणया । एयाए णं संगहस्स अट्ठपयपरूवणयाए किं पओयणं ? ० संगहस्स अट्ठपयपरूवणयाए संगहस्स भंगसमुक्कित्तणया कज्जइ । से किं तं संगहस्स भंगसमुक्कित्तणया ? संगहस्स भंग-

समुक्कित्तणया-अत्थि आणुपुष्वी १ अत्थि अणाणुपुष्वी २ अत्थि अवत्तव्वए ३ अहवा अत्थि आणुपुष्वी य अणाणुपुष्वी य एवं जहा दव्वाणुपुष्वीए संगहस्स तहा भाणियव्वा जाव सेत्तं संगहस्स भंगसमुक्कित्तणया । एयाए णं संगहस्स भंगसमुक्कित्तणयाए किं पओयणं ? एयाए णं संगहस्स भंगसमुक्कित्तणयाए भंगोवदंसणया कज्ज । से किं तं संगहस्स भंगोवदंसणया ? संगहस्स भंगोवदंसणया-तिपएसोगाढे आणुपुष्वी १ एगपएसोगाढे अणाणुपुष्वी २ दुपएसोगाढे अवत्तव्वए ३ अहवा तिपएसोगाढे य एगपएसोगाढे य आणुपुष्वी य अणाणुपुष्वी य एवं जहा दव्वाणुपुष्वीए संगहस्स तहा खेत्ताणुपुष्वीए वि भाणियव्वं जाव सेत्तं संगहस्स भंगोवदंसणया । से किं तं समोयारे ? समोयारे-संगहस्स आणुपुष्वीदव्वाइं कहिं समोयरंति ? किं आणुपुष्वीदव्वेहिं समोयरंति ? अणाणुपुष्वीदव्वेहिं समोयरंति ? अवत्तव्वयदव्वेहिं समोयरंति ? तिण्णि वि सट्ठाणे समोयरंति । सेत्तं समोयारे । से किं तं अणुगमे ? अणुगमे अट्ठविहे पणत्ते । तंजहा-गाहा-संतपयपरुवणया, दैव्वपमाणं च खित्तै फुरणो य । कैलो य अंतैरं भारो, भावे अप्पावहुं णत्थि ॥ १ ॥ संगहस्स आणुपुष्वीदव्वाइं किं अत्थि गत्थि ? णियमा अत्थि । एवं दुण्णि वि । सेसग-दाराइं जहा दव्वाणुपुष्वीए संगहस्स तहा खेत्ताणुपुष्वीए वि भाणियव्वाइं जाव सेत्तं अणुगमे । सेत्तं संगहस्स अणोवणिहिया खेत्ताणुपुष्वी । सेत्तं अणोवणिहिया खेत्ताणुपुष्वी ॥ १०३ ॥ से किं तं उवणिहिया खेत्ताणुपुष्वी ? उवणिहिया खेत्ताणुपुष्वी ति विहा पणत्ता । तंजहा-पुष्वाणुपुष्वी १ पच्छाणुपुष्वी २ अणाणुपुष्वी य ३ । से किं तं पुष्वाणुपुष्वी ? पुष्वाणुपुष्वी-अहोलोए १ तिरियलोए २ उट्ठलोए ३ । सेत्तं पुष्वाणुपुष्वी । से किं तं पच्छाणुपुष्वी ? पच्छाणुपुष्वी-उट्ठलोए ३ तिरियलोए २ अहोलोए १ । सेत्तं पच्छाणुपुष्वी । से किं तं अणाणुपुष्वी ? अणाणुपुष्वी-एयाए चेव एगाइयाए एगुत्तरियाए तिगच्छगयाए सेढीए अणमण्णव्वासो दुरुवूणो । सेत्तं अणाणुपुष्वी । अहोलोयखेत्ताणुपुष्वी ति विहा पणत्ता । तंजहा-पुष्वाणुपुष्वी १ पच्छाणुपुष्वी २ अणाणुपुष्वी ३ । से किं तं पुष्वाणुपुष्वी ? पुष्वाणुपुष्वी-रयणप्पभा १ सकरप्पभा २ वाल्खयप्पभा ३ पंकप्पभा ४ धूसप्पभा ५ तमप्पभा ६ तमतमप्पभा ७ । सेत्तं पुष्वाणुपुष्वी । से किं तं पच्छाणुपुष्वी ? पच्छाणुपुष्वी-तमतमप्पभा ७ जाव रयणप्पभा १ । सेत्तं पच्छाणुपुष्वी । से किं तं अणाणुपुष्वी ? अणाणुपुष्वी-एयाए चेव एगाइयाए एगुत्तरियाए सत्तगच्छगयाए सेढीए अणमण्णव्वासो दुरुवूणो । सेत्तं अणाणुपुष्वी । तिरियलोयखेत्ताणुपुष्वी ति विहा पणत्ता । तंजहा-पुष्वाणुपुष्वी १ पच्छाणुपुष्वी २ अणाणुपुष्वी ३ । से किं तं पुष्वाणुपुष्वी ? पुष्वाणुपुष्वी-



गाहाओ-जंबूदीवे लवणे, धायइ कालोय पुक्खरे वरुणे । खीर घय खोय नंदी,  
 अरुणवरे कुंडले रुयणे ॥ १ ॥ औभरण वत्थ गंधे, उप्पल तिलए य पुढवि निहि  
 रयणे । वासहर दह नईओ, विजया वक्खार कप्पिदा ॥ २ ॥ कुरु मंदर आवासा,  
 कूडा नक्खत्त चंद स्रा य । देवे नागे जक्खे, भूए य सयंभुरमणे य ॥ ३ ॥ सेत्तं  
 पुव्वाणुपुव्वी । से किं तं पच्छाणुपुव्वी ? पच्छाणुपुव्वी-सयंभूरमणे य जाव  
 जंबूदीवे । सेत्तं पच्छाणुपुव्वी । से किं तं अणाणुपुव्वी ? अणाणुपुव्वी-एयाए चेव  
 एगाइयाए एगुत्तरियाए असंखेज्जगच्छगयाए सेढीए अणमण्णब्भासो दुह्वूणो ।  
 सेत्तं अणाणुपुव्वी । उड्डलोयखेत्ताणुपुव्वी तिविहा पण्णत्ता । तंजहा-पुव्वाणुपुव्वी १  
 पच्छाणुपुव्वी २ अणाणुपुव्वी ३ । से किं तं पुव्वाणुपुव्वी ? पुव्वाणुपुव्वी-  
 सोहम्मे १ ईसाणे २ सणकुमारे ३ माहिंदे ४ वंसलोए ५ लंतए ६ महासुक्के ७  
 सहस्सारे ८ आणए ९ पाणए १० आरणे ११ अन्नुए १२ गेवेज्जविमाणे १३  
 अणुत्तरविमाणे १४ ईसिपब्भारा १५ । सेत्तं पुव्वाणुपुव्वी । से किं तं पच्छाणुपुव्वी ?  
 पच्छाणुपुव्वी-ईसिपब्भारा १५ जाव सोहम्मे १ । सेत्तं पच्छाणुपुव्वी । से किं तं  
 अणाणुपुव्वी ? अणाणुपुव्वी-एयाए चेव एगाइयाए एगुत्तरियाए पन्नरसगच्छगयाए  
 सेढीए अणमण्णब्भासो दुह्वूणो । सेत्तं अणाणुपुव्वी । अहवा उवणिहिया खेत्ताणु-  
 पुव्वी तिविहा पण्णत्ता । तंजहा-पुव्वाणुपुव्वी १ पच्छाणुपुव्वी २ अणाणुपुव्वी य  
 ३ । से किं तं पुव्वाणुपुव्वी ? पुव्वाणुपुव्वी-एगपएसोगाढे, दुपएसोगाढे जाव  
 दसपएसोगाढे जाव संखिज्जपएसोगाढे, असंखिज्जपएसोगाढे । सेत्तं पुव्वाणुपुव्वी ।  
 से किं तं पच्छाणुपुव्वी ? पच्छाणुपुव्वी-असंखिज्जपएसोगाढे, संखिज्जपएसोगाढे जाव  
 एगपएसोगाढे । सेत्तं पच्छाणुपुव्वी । से किं तं अणाणुपुव्वी ? अणाणुपुव्वी-एयाए  
 चेव एगाइयाए एगुत्तरियाए असंखिज्जगच्छगयाए सेढीए अणमण्णब्भासो दुह्वूणो ।  
 सेत्तं अणाणुपुव्वी । सेत्तं उवणिहिया खेत्ताणुपुव्वी । **सेत्तं खेत्ताणुपुव्वी ॥ १०४ ॥**  
 से किं तं कालाणुपुव्वी ? कालाणुपुव्वी दुविहा पण्णत्ता । तंजहा-उवणिहिया य १  
 अणोवणिहिया य २ ॥ १०५ ॥ तत्थ णं जा सा उवणिहिया सा ठप्पा । तत्थ णं  
 जा सा अणोवणिहिया सा दुविहा पण्णत्ता । तंजहा-णेममववहारणं १ संगहस्स य २  
 ॥ १०६ ॥ से किं तं णेममववहारणं अणोवणिहिया कालाणुपुव्वी ? णेममवव-  
 हारणं अणोवणिहिया कालाणुपुव्वी पंचविहा पण्णत्ता । तंजहा-अट्ठपयपरव्वणया १  
 भंगसमुक्कितणया २ भंगोवदंसणया ३ समोयारे ४ अणुगमे ५ ॥ १०७ ॥ से किं

१ जंबुदीवाओ खलु, निरंतरा सेसया असंखइमा । भुयगवर कुसवराविय, कोंच-  
 वराभरणमाई य ॥ वायणंतरे एसा गाहा वि लब्भइ ।

तं नेगमववहाराणं अट्टपयपरूवणया ? नेगमववहाराणं अट्टपयपरूवणया-तिसमय-  
ट्टिइए आणुपुव्वी जाव दससमयट्टिइए आणुपुव्वी, संखिज्जसमयट्टिइए आणुपुव्वी,  
असंखिज्जसमयट्टिइए आणुपुव्वी, एगसमयट्टिइए अणाणुपुव्वी, दुसमयट्टिइए  
अवत्तव्वए, तिसमयट्टिइयाओ आणुपुव्वीओ, एगसमयट्टिइयाओ अणाणुपुव्वीओ,  
दुसमयट्टिइयाई अवत्तव्वगाई । सेत्तं नेगमववहाराणं अट्टपयपरूवणया । एयाए णं  
नेगमववहाराणं अट्टपयपरूवणयाए किं पओयणं ? ० नेगमववहाराणं अट्टपयपरूव-  
णयाए नेगमववहाराणं भंगसमुक्कित्तणया कज्जइ ॥ १०८ ॥ से किं तं नेगमवव-  
हाराणं भंगसमुक्कित्तणया ? नेगमववहाराणं भंगसमुक्कित्तणया-अत्थि आणुपुव्वी १  
अत्थि अणाणुपुव्वी २ अत्थि अवत्तव्वए ३ एवं दव्वाणुपुव्वीगमेणं कालाणु-  
पुव्वीए वि ते चेव छव्वीसं भंगा भाणियव्वा जाव सेत्तं नेगमववहाराणं भंगसमु-  
क्कित्तणया । एयाए णं नेगमववहाराणं भंगसमुक्कित्तणयाए किं पओयणं ? एयाए  
णं नेगमववहाराणं भंगसमुक्कित्तणयाए नेगमववहाराणं भंगोवदंसणया कज्जइ  
॥ १०९ ॥ से किं तं नेगमववहाराणं भंगोवदंसणया ? नेगमववहाराणं भंगोवदं-  
सणया-तिसमयट्टिइए आणुपुव्वी १ एगसमयट्टिइए अणाणुपुव्वी २ दुसमयट्टिइए  
अवत्तव्वए ३ तिसमयट्टिइयाओ आणुपुव्वीओ ४ एगसमयट्टिइयाओ अणाणुपुव्वीओ ५  
दुसमयट्टिइयाई अवत्तव्वगाई ६ । अहवा तिसमयट्टिइए य एगसमयट्टिइए य  
आणुपुव्वी य अणाणुपुव्वी य एवं तहा दव्वाणुपुव्वीगमेणं छव्वीसं भंगा भाणियव्वा  
जाव सेत्तं नेगमववहाराणं भंगोवदंसणया ॥ ११० ॥ से किं तं समोयारे ? समोयारे-  
नेगमववहाराणं आणुपुव्वीदव्वाइं कहिं समोयरंति ? किं आणुपुव्वीदव्वेहिं समो-  
यरंति ? अणाणुपुव्वीदव्वेहिं समोयरंति ? अवत्तव्वयदव्वेहिं समोयरंति ? एवं तिणिण  
वि सट्ठाणे समोयरंति इति भाणियव्वं । सेत्तं समोयारे ॥ १११ ॥ से किं तं अणुगमे ?  
अणुगमे नवविहे पण्णत्ते । तंजहा-**गाहा**-संतपयपरूवणया, दव्वपमैणं च खित्तै फुसण्णा  
य । कौलो य अंतैरं भौग, भावे अप्पावहुं चेव ॥ १ ॥ नेगमववहाराणं आणुपुव्वी-  
दव्वाइं किं अत्थि णत्थि ? णियमा तिणिण वि अत्थि । नेगमववहाराणं आणुपुव्वी-  
दव्वाइं किं संखिज्जाइं ? असंखिज्जाइं ? अणंताइं ? नो संखिज्जाइं, नियमा असं-  
खिज्जाइं, नो अणंताइं । एवं दुणिण वि । नेगमववहाराणं आणुपुव्वीदव्वाइं लोगस्स  
किं संखिज्जइभागे होज्जा ? असंखिज्जइभागे होज्जा ? संखेजेसु भागेसु होज्जा ? असं-  
खेजेसु भागेसु होज्जा ? सव्वलोए होज्जा ? एगं दव्वं पडुच्च संखिज्जइभागे वा होज्जा,  
असंखिज्जइभागे वा होज्जा, संखेजेसु भागेसु वा होज्जा, असंखेजेसु भागेसु वा होज्जा,  
(प)देसूणे वा लोए होज्जा । गाणादव्वाइं पडुच्च नियमा सव्वलोए होज्जा । (आए-

संतरेण वा सव्वपुच्छासु होज्जा) एवं अणाणुपुव्वीदव्वाणि अवत्तव्वगदव्वाणि वि जहा खेत्ताणुपुव्वीए। एवं फुसणा कालाणुपुव्वीए वि तहा चेव भाणियव्वा। नेगम-ववहारानं आणुपुव्वीदव्वाइं कालओ केवच्चिरं होति? एगं दव्वं पडुच्च जहण्णेणं तिण्णि समया, उक्कोसेणं असंखेज्जं कालं। णाणादव्वाइं पडुच्च सव्वद्धा। नेगमववहारा-णं अणाणुपुव्वीदव्वाइं कालओ केवच्चिरं होति? एगं दव्वं पडुच्च अजहण्णमणु-क्कोसेणं एकं समयं, णाणादव्वाइं पडुच्च सव्वद्धा। अवत्तव्वगदव्वाणं पुच्छा? एगं दव्वं पडुच्च अजहण्णमणुक्कोसेणं दो समया, णाणादव्वाइं पडुच्च सव्वद्धा। नेगम-ववहारानं आणुपुव्वीदव्वाणमंतरं कालओ केवच्चिरं होइ? एगं दव्वं पडुच्च जहण्णेणं एगं समयं, उक्कोसेणं दो समया। णाणादव्वाइं पडुच्च गत्थि अंतरं। नेगमववहारानं अणाणुपुव्वीदव्वाणं अंतरं कालओ केवच्चिरं होइ? एगं दव्वं पडुच्च जहण्णेणं दो समयं, उक्कोसेणं असंखेज्जं कालं। णाणादव्वाइं पडुच्च गत्थि अंतरं। नेगमववहारानं अवत्तव्वगदव्वाणं पुच्छा? एगं दव्वं पडुच्च जहण्णेणं एगं समयं, उक्कोसेणं असंखेज्जं कालं। णाणादव्वाइं पडुच्च गत्थि अंतरं। भागभावअप्पाबहुं चेव जहा खेत्ताणुपुव्वीए तहा भाणियव्वाइं जाव सेत्तं अणुगमे। सेत्तं नेगमववहारानं अणोवणिहिया काला-णुपुव्वी ॥ ११२ ॥ से किं तं संगहस्स अणोवणिहिया कालाणुपुव्वी? संगहस्स अणोवणिहिया कालाणुपुव्वी पंचविहा पण्णत्ता। तंजहा-अट्ठपयपरूवणया १ भंगसमु-क्कित्तणया २ भंगोवदंसणया ३ समोयारे ४ अणुगमे ५ ॥ ११३ ॥ से किं तं संग-हस्स अट्ठपयपरूवणया? संगहस्स अट्ठपयपरूवणया-एयाइं पंच वि दाराइं जहा खेत्ताणुपुव्वीए संगहस्स कालाणुपुव्वीए वि तहा भाणियव्वाणि। णवरं ठिड-अभि-ल्लावो जाव सेत्तं अणुगमे। सेत्तं संगहस्स अणोवणिहिया कालाणुपुव्वी ॥ ११४ ॥ से किं तं उवणिहिया कालाणुपुव्वी? उवणिहिया कालाणुपुव्वी तिविहा पण्णत्ता। तंजहा-पुव्वाणुपुव्वी १ पच्छाणुपुव्वी २ अणाणुपुव्वी ३। से किं तं पुव्वाणुपुव्वी? पुव्वाणुपुव्वी-समए १ आवलिया २ आणापाणू ३ थोवे ४ लवे ५ मुहुत्ते ६ अहो-रत्ते ७ पक्खे ८ मासे ९ उऊ १० अयणे ११ संवच्छरे १२ जुगे १३ वाससए १४ वाससहस्से १५ वाससयसहस्से १६ पुव्वगे १७ पुव्वे १८ तुडियंगे १९ तुडिए २० अड्डंगे २१ अड्डे २२ अववंगे २३ अववे २४ हुहुयंगे २५ हुहुए २६ उप्पलंगे २७ उप्पले २८ पडमंगे २९ पडमे ३० णल्लिणंगे ३१ णल्लिणे ३२ अत्थ-निउरंगे ३३ अत्थनिउरे ३४ अउयंगे ३५ अउए ३६ नउयंगे ३७ नउए ३८ पउयंगे ३९ पउए ४० चूलियंगे ४१ चूलिया ४२ सीसपहेलियंगे ४३ सीसपहेलिया ४४ पल्लिओवमे ४५ सागरोवमे ४६ ओसप्पिणी ४७ उस्सप्पिणी ४८ पोगलपरि-

येष्ट ४९ अतीतद्धा ५० अणागयद्धा ५१ सव्वद्धा ५२ । सेत्तं पुष्पाणुपुष्वी । से किं तं पच्छाणुपुष्वी ? पच्छाणुपुष्वी-सव्वद्धा ५२ अणागयद्धा ५१ जाव समए १ । सेत्तं पच्छाणुपुष्वी । से किं तं अणाणुपुष्वी ? अणाणुपुष्वी-एयाए चेव एगाइयाए एगुत्तरियाए अणंतगच्छगयाए सेढीए अणमण्णब्भासो दुरूवूणो । सेत्तं अणाणुपुष्वी । अहवा उवणिहिया कालाणुपुष्वी तिविहा पणत्ता । तंजहा-पुष्पाणुपुष्वी १ पच्छाणुपुष्वी २ अणाणुपुष्वी ३ । से किं तं पुष्पाणुपुष्वी ? पुष्पाणुपुष्वी-एगसमयट्ठिइए, दुसमयट्ठिइए, तिसमयट्ठिइए जाव दससमयट्ठिइए, संखिजसमयट्ठिइए, असंखिजसमयट्ठिइए । सेत्तं पुष्पाणुपुष्वी । से किं तं पच्छाणुपुष्वी ? पच्छाणुपुष्वी-असंखिजसमयट्ठिइए जाव एगसमयट्ठिइए । सेत्तं पच्छाणुपुष्वी । से किं तं अणाणुपुष्वी ? अणाणुपुष्वी-एयाए चेव एगाइयाए एगुत्तरियाए असंखिजगच्छगयाए सेढीए अणमण्णब्भासो दुरूवूणो । सेत्तं अणाणुपुष्वी । सेत्तं उवणिहिया कालाणुपुष्वी । **सेत्तं कालाणुपुष्वी** ॥ ११५ ॥ से किं तं उक्कित्तणाणुपुष्वी ? उक्कित्तणाणुपुष्वी तिविहा पणत्ता । तंजहा-पुष्पाणुपुष्वी १ पच्छाणुपुष्वी २ अणाणुपुष्वी ३ । से किं तं पुष्पाणुपुष्वी ? पुष्पाणुपुष्वी-उसमे १ अजिए २ संभवे ३ अभिणंदणे ४ सुमई ५ पउमप्पहे ६ सुपासे ७ चंदप्पहे ८ सुविही ९ सीयले १० सेज्जसे ११ वासुपुज्जे १२ विमले १३ अणंतं १४ धम्मं १५ संती १६ कुंथू १७ अरे १८ मल्ली १९ मुणिसुव्वए २० णमी २१ अरिद्धेणेमी २२ पासे २३ वद्धमाणे २४ । सेत्तं पुष्पाणुपुष्वी । से किं तं पच्छाणुपुष्वी ? पच्छाणुपुष्वी-वद्धमाणे २४ जाव उसमे १ । सेत्तं पच्छाणुपुष्वी । से किं तं अणाणुपुष्वी ? अणाणुपुष्वी-एयाए चेव एगाइयाए एगुत्तरियाए चउवीसगच्छगयाए सेढीए अणमण्णब्भासो दुरूवूणो । सेत्तं अणाणुपुष्वी । **सेत्तं उक्कित्तणाणुपुष्वी** ॥ ११६ ॥ से किं तं गणणाणुपुष्वी ? गणणाणुपुष्वी तिविहा पणत्ता । तंजहा-पुष्पाणुपुष्वी १ पच्छाणुपुष्वी २ अणाणुपुष्वी ३ । से किं तं पुष्पाणुपुष्वी ? पुष्पाणुपुष्वी-एगो, दस, सयं, सहस्सं, दससहस्साइं, सयसहस्सं, दससयसहस्साइं, कोडी, दसकोडीओ, कोडीसयं, दसकोडिसयाइं । सेत्तं पुष्पाणुपुष्वी । से किं तं पच्छाणुपुष्वी ? पच्छाणुपुष्वी-दसकोडिसयाइं जाव ए(क्को)गो । सेत्तं पच्छाणुपुष्वी । से किं तं अणाणुपुष्वी ? अणाणुपुष्वी-एयाए चेव एगाइयाए एगुत्तरियाए दसकोडिसयगच्छगयाए सेढीए अणमण्णब्भासो दुरूवूणो । सेत्तं अणाणुपुष्वी । **सेत्तं गणणाणुपुष्वी** ॥ ११७ ॥ से किं तं संठाणाणुपुष्वी ? संठाणाणुपुष्वी तिविहा पणत्ता । तंजहा-पुष्पाणुपुष्वी १ पच्छाणुपुष्वी २ अणाणुपुष्वी ३ । से किं तं पुष्पाणुपुष्वी ? पुष्पाणुपुष्वी-समचउरंसे १ निग्गोहमंडले २ साई ३ खुज्जे ४ वामणे ५ हुंडे ६ ।

सेत्तं पुव्वाणुपुव्वी । से किं तं पच्छाणुपुव्वी ? ५०-हुंडे ६ जाव समचउरंसे १ ।  
 सेत्तं पच्छाणुपुव्वी । से किं तं अणाणुपुव्वी ? अणाणुपुव्वी-एयाए चेव एगाइयाए  
 एगुत्तरियाए छगच्छगयाए सेढीए अण्णमण्णब्भासो दुह्वूणो । सेत्तं अणाणुपुव्वी ।  
**सेत्तं संठाणाणुपुव्वी ॥ ११८ ॥** से किं तं सामायारीआणुपुव्वी ? सामायारीआ-  
 णुपुव्वी तिविहा पण्णत्ता । तंजहा-पुव्वाणुपुव्वी १ पच्छाणुपुव्वी २ अणाणुपुव्वी ३ ।  
 से किं तं पुव्वाणुपुव्वी ? पुव्वाणुपुव्वी-गाहा-इच्छा-मिच्छा-तहक्कारो, आवस्सिया य  
 निसीहिया । आपुच्छर्णा य पडिपुच्छा, छंदर्णा य निमंतर्णा ॥ ११९ ॥ उवसंपयीं य काले,  
 समायारी भवे दसविहा उ । सेत्तं पुव्वाणुपुव्वी । से किं तं पच्छाणुपुव्वी ? पच्छाणु-  
 पुव्वी-उवसंपयीं जाव इच्छागारो । सेत्तं पच्छाणुपुव्वी । से किं तं अणाणुपुव्वी ?  
 अणाणुपुव्वी-एयाए चेव एगाइयाए एगुत्तरियाए दसगच्छगयाए सेढीए अण्णमण्ण-  
 ब्भासो दुह्वूणो । सेत्तं अणाणुपुव्वी । **सेत्तं सामायारीआणुपुव्वी ॥ ११९ ॥** से किं  
 तं भावाणुपुव्वी ? भावाणुपुव्वी तिविहा पण्णत्ता । तंजहा-पुव्वाणुपुव्वी १ पच्छाणुपुव्वी २  
 अणाणुपुव्वी ३ । से किं तं पुव्वाणुपुव्वी ? पुव्वाणुपुव्वी-उदइए १ उवसमिए २  
 खाइए ३ खओवसमिए ४ पारिणामिए ५ सन्निवाइए ६ । सेत्तं पुव्वाणुपुव्वी । से किं  
 तं पच्छाणुपुव्वी ? पच्छाणुपुव्वी-सन्निवाइए ६ जाव उदइए १ । सेत्तं पच्छाणुपुव्वी ।  
 से किं तं अणाणुपुव्वी ? अणाणुपुव्वी-एयाए चेव एगाइयाए एगुत्तरियाए छगच्छग-  
 याए सेढीए अण्णमण्णब्भासो दुह्वूणो । सेत्तं अणाणुपुव्वी । **सेत्तं भावाणुपुव्वी ।**  
**सेत्तं आणुपुव्वी ॥ १२० ॥ 'आणुपुव्वी' ति पयं समत्तं ॥**

से किं तं णामे ? णामे दसविहे पण्णत्ते । तंजहा-एगणामे १ दुणामे २ तिणामे ३  
 चउणामे ४ पंचणामे ५ छणामे ६ सत्तणामे ७ अट्टणामे ८ नवणामे ९ दसणामे १०  
 ॥ १२१ ॥ से किं तं एगणामे ? एगणामे-गाहा-णामाणि जाणि काणि वि, दव्वाण  
 गुणाण पज्जवाणं च । तेसिं आगमनिहसे, 'नामं' ति पखिया सण्णा ॥ ११ ॥ **सेत्तं एग-**  
**णामे ॥ १२२ ॥** से किं तं दुणामे ? दुणामे दुविहे पण्णत्ते । तंजहा-एगक्खरिए य १  
 अणेगक्खरिए य २ । से किं तं एगक्खरिए ? एगक्खरिए अणेगविहे पण्णत्ते । तंजहा-  
 ही, श्री, धी, स्त्री । सेत्तं एगक्खरिए । से किं तं अणेगक्खरिए ? अणेगक्खरिए-कन्ना,  
 वीणा, लया, माला । सेत्तं अणेगक्खरिए । अहवा दुणामे दुविहे पण्णत्ते । तंजहा-  
 जीवणामे य १ अजीवणामे य २ । से किं तं जीवणामे ? जीवणामे अणेगविहे पण्णत्ते ।  
 तंजहा-देवदत्तो, जण्णदत्तो, विण्हुदत्तो, सोमदत्तो । सेत्तं जीवणामे । से किं तं अजीव-  
 णामे ? अजीवणामे अणेगविहे पण्णत्ते । तंजहा-घडो, पडो, कडो, रहो । सेत्तं अजीव-

१ ही, २ सी (अवभंसे), ३ धी, ४ श्री ।

णामे । अहवा दुणामे दुविहे पणत्ते । तंजहा-विसेसिए य १ अविसेसिए य २ । अविसेसिए-दव्वे । विसेसिए-जीवदव्वे, अजीवदव्वे य । अविसेसिए-जीवदव्वे । विसेसिए-गेरइए, तिरिक्खजोणिए, मणुस्से, देवे । अविसेसिए-गेरइए । विसेसिए-रयणप्पहाए, सक्करप्पहाए, वालुयप्पहाए, पंकप्पहाए, धूमप्पहाए, तमाए, तमतमाए । अविसेसिए-रयणप्पहापुढविणेइए । विसेसिए-पज्जत्तए य, अपज्जत्तए य । एवं जाव अविसेसिए-तमतमापुढविणेइए । विसेसिए-पज्जत्तए य, अपज्जत्तए य । अविसेसिए-तिरिक्खजोणिए । विसेसिए-एगिंदिए, वेइंदिए, तेइंदिए, चउरिंदिए, पंचिंदिए । अविसेसिए-एगिंदिए । विसेसिए-पुढविकाइए, आउकाइए, तेउकाइए, वाउकाइए, वणस्सइकाइए । अविसेसिए-पुढविकाइए । विसेसिए-सुहुमपुढविकाइए य, वायरपुढविकाइए य । अविसेसिए-सुहुमपुढविकाइए । विसेसिए-पज्जत्तयसुहुमपुढविकाइए य, अपज्जत्तयसुहुमपुढविकाइए य । अविसेसिए-वायरपुढविकाइए । विसेसिए-पज्जत्तयवायरपुढविकाइए य, अपज्जत्तयवायरपुढविकाइए य । एवं आउकाइए, तेउकाइए, वाउकाइए, वणस्सइकाइए, अविसेसियविसेसियपज्जत्तयअपज्जत्तयभेएहिं भाणियव्वा । अविसेसिए-वेइंदिए । विसेसिए-पज्जत्तयवेइंदिए य, अपज्जत्तयवेइंदिए य । एवं तेइंदियचउरिंदिया वि भाणियव्वा । अविसेसिए-पंचिंदियतिरिक्खजोणिए । विसेसिए-जलयरपंचिंदियतिरिक्खजोणिए, थलयरपंचिंदियतिरिक्खजोणिए, खहयरपंचिंदियतिरिक्खजोणिए । अविसेसिए-जलयरपंचिंदियतिरिक्खजोणिए । विसेसिए-संमुच्छिमजलयरपंचिंदियतिरिक्खजोणिए य, गब्भवक्कंतियजलयरपंचिंदियतिरिक्खजोणिए य । अविसेसिए-संमुच्छिमजलयरपंचिंदियतिरिक्खजोणिए । विसेसिए-पज्जत्तयसंमुच्छिमजलयरपंचिंदियतिरिक्खजोणिए य, अपज्जत्तयसंमुच्छिमजलयरपंचिंदियतिरिक्खजोणिए य । अविसेसिए-गब्भवक्कंतियजलयरपंचिंदियतिरिक्खजोणिए । विसेसिए-पज्जत्तयगब्भवक्कंतियजलयरपंचिंदियतिरिक्खजोणिए य, अपज्जत्तयगब्भवक्कंतियजलयरपंचिंदियतिरिक्खजोणिए य । अविसेसिए-थलयरपंचिंदियतिरिक्खजोणिए । विसेसिए-चउप्पयथलयरपंचिंदियतिरिक्खजोणिए य, परिसप्पयथलयरपंचिंदियतिरिक्खजोणिए य । अविसेसिए-चउप्पयथलयरपंचिंदियतिरिक्खजोणिए । विसेसिए-सम्मुच्छिमचउप्पयथलयरपंचिंदियतिरिक्खजोणिए य, गब्भवक्कंतियचउप्पयथलयरपंचिंदियतिरिक्खजोणिए य । अविसेसिए-सम्मुच्छिमचउप्पयथलयरपंचिंदियतिरिक्खजोणिए य, अपज्जत्तयसम्मुच्छिमचउप्पयथलयरपंचिंदियतिरिक्खजोणिए य । अविसेसिए-गब्भवक्कंतियचउप्पयथलयरपंचिंदियतिरिक्खजोणिए । विसेसिए-पज्जत्तयगब्भवक्कंतियचउप्पयथलय-

यरपंचिदियतिरिक्खजोणिए य, अपज्जत्तयगच्चभवक्कंति यच्चउप्पयथलयरपंचिदियति-  
 रिक्खजोणिए य । अविसेसिए-परिसप्पथलयरपंचिदियतिरिक्खजोणिए । विसेसिए-  
 उरपरिसप्पथलयरपंचिदियतिरिक्खजोणिए य, भुयपरिसप्पथलयरपंचिदियतिरिक्ख-  
 जोणिए य । एए वि सम्मुच्छिमा पज्जत्तगा अपज्जत्तगा य गच्चभवक्कंतिया वि पज्जत्तगा  
 अपज्जत्तगा य भाणियव्वा । अविसेसिए-खहयरपंचिदियतिरिक्खजोणिए । विसेसिए-  
 सम्मुच्छिमखहयरपंचिदियतिरिक्खजोणिए य, गच्चभवक्कंतियखहयरपंचिदियतिरिक्ख-  
 जोणिए य । अविसेसिए-सम्मुच्छिमखहयरपंचिदियतिरिक्खजोणिए । विसेसिए-पज्ज-  
 त्तयसम्मुच्छिमखहयरपंचिदियतिरिक्खजोणिए य, अपज्जत्तयसम्मुच्छिमखहयरपंचि-  
 दियतिरिक्खजोणिए य । अविसेसिए-गच्चभवक्कंतियखहयरपंचिदियतिरिक्खजोणिए ।  
 विसेसिए-पज्जत्तयगच्चभवक्कंतियखहयरपंचिदियतिरिक्खजोणिए य, अपज्जत्तयगच्चभ-  
 वक्कंतियखहयरपंचिदियतिरिक्खजोणिए य । अविसेसिए-मणुस्से । विसेसिए-सम्मु-  
 च्छिममणुस्से य, गच्चभवक्कंतियमणुस्से य । अविसेसिए-सम्मुच्छिममणुस्से । विसेसिए-  
 पज्जत्तगसम्मुच्छिममणुस्से य, अपज्जत्तगसम्मुच्छिममणुस्से य । अविसेसिए-गच्चभ-  
 वक्कंतियमणुस्से । विसेसिए-कम्मभूमिओ य, अकम्मभूमिओ य, अंतरदीवओ य,  
 संखिजवासाउय, असंखिजवासाउय, पज्जत्तापज्जत्तओ । अविसेसिए-देवे । विसेसिए-  
 भवणवासी, वाणमंतरे, जोइसिए, वेमाणिए य । अविसेसिए-भवणवासी । विसेसिए-  
 असुरकुमारे १ नागकुमारे २ सुवण्णकुमारे ३ विज्जुकुमारे ४ अग्गिकुमारे ५  
 दीवकुमारे ६ उदहिकुमारे ७ दिसाकुमारे ८ वाउकुमारे ९ थणियकुमारे १० ।  
 सच्चैसिं पि अविसेसियविसेसियपज्जत्तगपज्जत्तगभेया भाणियव्वा । अविसेसिए-  
 वाणमंतरे । विसेसिए-पिसाए १ भूए २ जक्खे ३ रक्खसे ४ किण्णरे ५ किंपुरिसे ६  
 महोरगे ७ गंधव्वे ८ । एएसिं पि अविसेसियविसेसियपज्जत्तगपज्जत्तगभेया  
 भाणियव्वा । अविसेसिए-जोइसिए । विसेसिए-चंदे १ सूर २ गहगणे ३ नक्खत्ते ४  
 ताराह्वे ५ । एएसिं पि अविसेसियविसेसियपज्जत्तयपज्जत्तयभेया भाणियव्वा ।  
 अविसेसिए-वेमाणिए । विसेसिए-कप्पोवगे य, कप्पातीतए य । अविसेसिए-  
 कप्पोवगे । विसेसिए-सोहम्मए १ ईसाणए २ सणंकुमारए ३ माहिंदए ४  
 वंमलोयए ५ लंतयए ६ महासुक्कए ७ सहस्सारए ८ आणयए ९ पाणयए १०  
 आरणए ११ अञ्चुयए १२ । एएसिं अविसेसियविसेसियपज्जत्तगपज्जत्तगभेया भाणि-  
 यव्वा । अविसेसिए-कप्पातीतए । विसेसिए-गेवेज्जए य, अणुत्तरोववाइए य ।  
 अविसेसिए-गेवेज्जए । विसेसिए-हेट्ठिमगेवेज्जए १ मज्झिमगेवेज्जए २ उववरिमगे-  
 वेज्जए ३ । अविसेसिए-हेट्ठिमगेवेज्जए । विसेसिए-हेट्ठिमहेट्ठिमगेवेज्जए १ हेट्ठिमम-

ज्झिमगेवेज्जए २ हेट्ठिमउवरिमगेवेज्जए ३ । अविसेसिए-मज्झिमगेवेज्जए । विसे-  
सिए-मज्झिमहेट्ठिमगेवेज्जए १ मज्झिममज्झिमगेवेज्जए २ मज्झिमउवरिमगेवेज्जए  
३ । अविसेसिए-उवरिमगेवेज्जए । विसेसिए-उवरिमहेट्ठिमगेवेज्जए १ उवरिममज्झि-  
मगेवेज्जए २ उवरिमउवरिमगेवेज्जए ३ । एएसिं सव्वेसिं अविसेसियविसेसियअपज्ज-  
त्तगपज्जत्तगमेया भाणियव्वा । अविसेसिए-अणुत्तरोववाइए । विसेसिए-विजयए १  
वेजयंतए २ जयंतए ३ अपराजियए ४ सव्वट्ठसिद्धए य ५ । एएसिं पि सव्वेसिं  
अविसेसियविसेसियअपज्जत्तगपज्जत्तगमेया भाणियव्वा । अविसेसिए-अजीवदव्वे ।  
विसेसिए-धम्मत्थिकाए १ अधम्मत्थिकाए २ आगासत्थिकाए ३ पोग्गलत्थिकाए ४  
अद्धासमए ५ । अविसेसिए-पोग्गलत्थिकाए । विसेसिए-परमाणुपोग्गले, दुपएसिए,  
तिपएसिए जाव अणंतपएसिए य । **सेत्तं दुणामे** ॥ १२३ ॥ से किं तं तिणामे ?  
तिणामे तिविहे पण्णत्ते । तंजहा-दव्वणामे १ गुणणामे २ पज्जवणामे य ३ । से किं  
तं दव्वणामे ? दव्वणामे छव्विहे पण्णत्ते । तंजहा-धम्मत्थिकाए १ अधम्मत्थिकाए २  
आगासत्थिकाए ३ जीवत्थिकाए ४ पुग्गलत्थिकाए ५ अद्धासमए य ६ ।  
सेत्तं दव्वणामे । से किं तं गुणणामे ? गुणणामे पंचविहे पण्णत्ते । तंजहा-वण्णणामे १  
गंधणामे २ रसणामे ३ फासणामे ४ संठाणणामे ५ । से किं तं वण्णणामे ?  
वण्णणामे पंचविहे पण्णत्ते । तंजहा-कालवण्णणामे १ नीलवण्णणामे २ लोहियवण्ण-  
णामे ३ हाल्लिह्वण्णणामे ४ सुक्खिलवण्णणामे ५ । सेत्तं वण्णणामे । से किं तं  
गंधणामे ? गंधणामे दुविहे पण्णत्ते । तंजहा-सुरभिगंधणामे य १ दुरभिगंधणामे य  
२ । सेत्तं गंधणामे । से किं तं रसणामे ? रसणामे पंचविहे पण्णत्ते । तंजहा-तित्तरस-  
णामे १ कडुयरसणामे २ कसायरसणामे ३ अंबिलरसणामे ४ महुररसणामे य ५ । सेत्तं  
रसणामे । से किं तं फासणामे ? फासणामे अट्ठविहे पण्णत्ते । तंजहा-कक्खडफासणामे १  
मउयफासणामे २ गह्यफासणामे ३ लहुयफासणामे ४ सीयफासणामे ५ उसिणफास-  
णामे ६ णिद्धफासणामे ७ लुक्खफासणामे य ८ । सेत्तं फासणामे । से किं तं संठाण-  
णामे ? संठाणणामे पंचविहे पण्णत्ते । तंजहा-परिमंडलसंठाणणामे १ वट्ठसंठाणणामे २  
तंससंठाणणामे ३ चउरंससंठाणणामे ४ आययसंठाणणामे ५ । सेत्तं संठाणणामे ।  
सेत्तं गुणणामे । से किं तं पज्जवणामे ? पज्जवणामे अणेगविहे पण्णत्ते । तंजहा-एगगुण-  
कालए, दुगुणकालए, तिगुणकालए जाव दसगुणकालए, संखिज्जगुणकालए, असंखिज्ज-  
गुणकालए, अणंतगुणकालए । एवं नीललोहियहाल्लिह्वसुक्खि वि भाणियव्वा । एगगुण-  
सुरभिगंधे, दुगुणसुरभिगंधे, तिगुणसुरभिगंधे जाव अणंतगुणसुरभिगंधे । एवं दुरभि-  
गंधो वि भाणियव्वो । एगगुणतित्ते जाव अणंतगुणतित्ते । एवं कडुयकसार्यअंबिल-



महुरा वि भाणियव्वा । एगगुणकक्खडे जाव अणंतगुणकक्खडे । एवं मउयगरुय-  
लहुयसीयउसिणणिद्धलक्खवा वि भाणियव्वा । सेत्तं पज्वणामे । गाहाओ-तं पुण  
णामं तिविहं, इत्थी पुरिसं णपुंसगं चेव । एएसिं तिहं पि(य), अंतम्मि य पव्वणं  
वोच्छं ॥ १ ॥ तत्थ पुरिसस्स अंता, आ ई ऊ ओ हवन्ति चत्तारि । ते चेव इत्थि-  
याओ, हवन्ति ओकारपरिहीणा ॥ २ ॥ अंतिय इंतिय उंतिय, अंताउ णपुंसगस्स  
वोद्धव्वा । एएसिं तिहं पि य, वोच्छामि निदंसणे एत्तो ॥ ३ ॥ आगारंतो 'राया',  
ईगारंतो 'गिरी' य 'सिहरी' य । ऊगारंतो 'विण्हू', 'डुमो' य अंता उ पुरिसाणं  
॥ ४ ॥ आगारंता 'माला', ईगारंता 'सिरी' य 'लच्छी' य । ऊगारंता 'जंबू',  
'वहू' य अंताउ इत्थीणं ॥ ५ ॥ अंकारंतं 'धन्नं', ईंकारंतं नपुंसगं 'अत्थि' । उंकारं-  
तो 'पीलुं', 'महुं' च अंता णपुंसाणं ॥ ६ ॥ **सेत्तं तिणामे** ॥ १२४ ॥ से किं तं  
चउणामे ? चउणामे चउव्विहे पण्णत्ते । तंजहा-आगमेणं १ लोवेणं २ पयइए ३  
विगारेणं ४ । से किं तं आगमेणं ? आगमेणं-पड्ढानि, पैयासि, कुण्डानि । सेत्तं  
आगमेणं । से किं तं लोवेणं ? लोवेणं-ते अत्र=तेऽत्र, पटो अत्र=पटोऽत्र, घटो  
अत्र=घटोऽत्र । सेत्तं लोवेणं । से किं तं पयइए ? पयइए-अभी एतौ, पटू इमौ, शाले  
एते, माले इमे । सेत्तं पयइए । से किं तं विगारेणं ? विगारेणं-दंडस्य+अग्रं=दंडाग्रं,  
सा+आगता=साऽऽगता, 'दधि+इदं=दधीदं, नदी+इह=नदीह, मधु+उदकं=मधू-  
दकं, वधू+ऊहो=वधूहो । सेत्तं विगारेणं । **सेत्तं चउणामे** ॥ १२५ ॥ से किं तं  
पंचणामे ? पंचणामे पंचविहे पण्णत्ते । तंजहा-नैमित्तिकं १ नैपातिकं २ आख्यातिकं ३  
औपसर्गिकं ४ मिश्रम् ५ । 'अथ' इति नामिकं, 'खलु' इति नैपातिकं, 'धावति' इति  
आख्यातिकं, 'परि' इत्यौपसर्गिकं, 'संयत' इति मिश्रम् । **सेत्तं पंचणामे** ॥ १२६ ॥  
से किं तं छण्णामे ? छण्णामे छव्विहे पण्णत्ते । तंजहा-उदइए १ उवसमिए २ खइए ३  
खओवसमिए ४ पारिणामिए ५ सज्जिवाइए ६ । से किं तं उदइए ? उदइए दुविहे  
पण्णत्ते । तंजहा-उदइए य १ उदयनिप्पण्णे य २ । से किं तं उदइए ? उदइए-

१ पोम्माई, २ पयाई, ३ कुंडाई । ४ ते+अत्थ=तेऽत्थ, ५ पडो+अत्थ=पडोऽत्थ,  
६ घडो+अत्थ=घडोऽत्थ । ७ सक्कयउदाहरणाइमिमाई, अद्धमागहीए-बे+इंदिया=  
वेइंदिया, एवमाइ । ८ 'सक्कए' पाइए-दंड+अरणं=दंडारणं एवमाइ, ९ सा+आ-  
गया=साऽऽगया, १० दहि+इदं=दहीदं, ११ नई+इह=नईह, १२ महु+उदगं=  
महूदगं, १३ वहू+ऊहो=वधूहो । १४ णामियं १ णेवाइयं २ अक्खाइयं ३ ओवस-  
गियं ४ मिरसं ५ । 'आस' ति णामियं, 'खलु' ति णेवाइयं, 'धावइ' ति अक्खाइयं,  
'परि' ति ओवसगियं, 'संजय' ति मिरसं ।

अट्ठण्हं कम्मपयडीणं उदएणं । सेतं उदइए । से किं तं उदयनिष्फण्णे ? उदयनिष्फण्णे  
 दुविहे पण्णत्ते । तंजहा-जीवोदयनिष्फण्णे य १ अजीवोदयनिष्फण्णे य २ । से किं तं  
 जीवोदयनिष्फण्णे ? जीवोदयनिष्फण्णे अणेगविहे पण्णत्ते । तंजहा-णेरइए, तिरिक्ख-  
 जोणिए, मणस्से, देवे, पुठविकाइए जाव तसकाइए, कोहकसाई जाव लोहकसाई,  
 इत्थीवेयए, पुरिसवेयए, णपुंसगवेयए, कण्हलेसे जाव सुकलेसे, मिच्छादिट्ठी, सम्म-  
 दिट्ठी, सम्मामिच्छादिट्ठी, अविरए, असण्णी, अण्णाणी, आहारए, छउमत्थे, सजोगी,  
 संसारत्थे, असिद्धे । सेतं जीवोदयनिष्फण्णे । से किं तं अजीवोदयनिष्फण्णे ? अजी-  
 वोदयनिष्फण्णे अणेगविहे पण्णत्ते । तंजहा-उरालियं वा सरीरं, उरालियसरीरपओग-  
 परिणामियं वा दव्वं, वेउच्चियं वा सरीरं, वेउच्चियसरीरपओगपरिणामियं वा दव्वं,  
 एवं आहारगं सरीरं तेयगं सरीरं कम्मगसरीरं च भाणियव्वं । पओगपरिणामिए  
 वण्णे, गंधे, रसे, फासे । सेतं अजीवोदयनिष्फण्णे । सेतं उदयनिष्फण्णे । सेतं उदइए ।  
 से किं तं उवसमिए ? उवसमिए दुविहे पण्णत्ते । तंजहा-उवसमे य १ उवसमनिष्फण्णे  
 य २ । से किं तं उवसमे ? उवसमे मोहणिजस्स कम्मस्स उवसमेणं । सेतं उवसमे ।  
 से किं तं उवसमनिष्फण्णे ? उवसमनिष्फण्णे अणेगविहे पण्णत्ते । तंजहा-उवसंतकोहे  
 जाव उवसंतलोभे, उवसंतपेजे, उवसंतदोसे, उवसंतदंसणमोहणिजे, उवसंतचरित-  
 मोहणिजे, उवसामिया सम्मत्तलद्धी, उवसामिया चरित्तलद्धी, उवसंतकसायछउमत्थ-  
 वीयरगे । सेतं उवसमनिष्फण्णे । सेतं उवसमिए । से किं तं खइए ? खइए दुविहे  
 पण्णत्ते । तंजहा-खइए य १ खयनिष्फण्णे य २ । से किं तं खइए ? खइए-अट्ठण्हं  
 कम्मपयडीणं खएणं । सेतं खइए । से किं तं खयनिष्फण्णे ? खयनिष्फण्णे अणेगविहे  
 पण्णत्ते । तंजहा-उप्पण्णणाणदंसणधरे, अरहा, जिणे, केवली; खीणआभिणिबोहिय-  
 णाणावरणे, खीणसुयणाणावरणे, खीणओहिणाणावरणे, खीणमणपज्जवणाणावरणे,  
 खीणकेवलणाणावरणे, अणावरणे, निरावरणे, खीणावरणे, णाणावरणिज्जकम्मविप्प-  
 मुक्के; केवलदंसी, सव्वदंसी, खीणनिहे, खीणनिहानिहे, खीणपयले, खीणपयलापयले,  
 खीणशीणगिद्धी, खीणचक्खुदंसणावरणे, खीणअचक्खुदंसणावरणे, खीणओहिंदंसणा-  
 वरणे, खीणकेवलदंसणावरणे, अणावरणे, निरावरणे, खीणावरणे, दरिसणावरणिज्ज-  
 कम्मविप्पमुक्के; खीणसायावेयणिजे, खीणअसायावेयणिजे, अवेयणे, निव्वेयणे, खीण-  
 वेयणे, सुभासुभवेयणिज्जकम्मविप्पमुक्के; खीणकोहे जाव खीणलोहे, खीणपेजे, खीण-  
 दोसे, खीणदंसणमोहणिजे, खीणचरित्तमोहणिजे, अमोहे, निम्मोहे, खीणमोहे,  
 मोहणिज्जकम्मविप्पमुक्के; खीणणेरइयआउए, खीणतिरिक्खजोणियाउए, खीणमण-  
 स्साउए, खीणदेवाउए, अणाउए, निराउए, खीणाउए, आउकम्मविप्पमुक्के; गइजाइ-

सरीरंगोवंगवंधणसंघायणसंघयणसंठाणअणेगवोंदिर्विदसंघायविप्पमुक्के, खीणसुभणामे, खीणअसुभणामे, अणामे, निण्णामे, खीणणामे, सुभासुभणामकम्मविप्पमुक्के; खीण-उच्चागोए, खीणणीयागोए, अगोए, निग्गोए, खीणगोए, उच्चणीयगोत्तकम्मविप्पमुक्के; खीणदाणंतराए, खीणलाभंतराए, खीणभोगंतराए, खीणउवभोगंतराए, खीणवीरि-यंतराए, अणंतराए, निरंतराए, खीणंतराए, अंतरायकम्मविप्पमुक्के; सिद्धे, बुद्धे, मुत्ते, परिणिव्वुए, अंतगडे, सव्वदुक्खप्पहीणे । सेत्तं खयनिप्फण्णे । सेत्तं खइए । से किं तं खओवसमिए ? खओवसमिए दुविहे पण्णत्ते । तंजहा-खओवसमे य १ खओ-वसमनिप्फण्णे य २ । से किं तं खओवसमे ? खओवसमे-चउहं घाइकम्माणं खओ-वसमेणं, तंजहा-णाणावरणिज्जस्स १ दंसणावरणिज्जस्स २ मोहणिज्जस्स ३ अंत-रायस्स खओवसमेणं ४ । सेत्तं खओवसमे । से किं तं खओवसमनिप्फण्णे ? खओ-वसमनिप्फण्णे अणेगविहे पण्णत्ते । तंजहा-खओवसमिया आभिणिवोहियणाणलद्धी जाव खओवसमिया मणपज्जवणाणलद्धी, खओवसमिया मइअण्णाणलद्धी, खओवस-मिया सुयअण्णाणलद्धी, खओवसमिया विभंगणाणलद्धी, खओवसमिया चक्खुदंसण-लद्धी, खओवसमिया अचक्खुदंसणलद्धी, खओवसमिया ओहिदंसणलद्धी, एवं सम्म-दंसणलद्धी मिच्छादंसणलद्धी सम्ममिच्छादंसणलद्धी, खओवसमिया सामाइयचरित-लद्धी, एवं छेदोवद्वावणलद्धी परिहारविमुद्धियलद्धी सुहुमसंपरायचरित्तलद्धी, एवं चरित्ताचरित्तलद्धी, खओवसमिया दाणलद्धी, एवं लाभलद्धी भोगलद्धी उवभोगलद्धी, खओवसमिया वीरियलद्धी, एवं पंडियवीरियलद्धी बालवीरियलद्धी बालपंडियवीरि-यलद्धी, खओवसमिया सोहंदियलद्धी जाव फासिदियलद्धी, खओवसमिए आयारंग-धरे, एवं सुयगडंगधरे ठाणंगधरे समवायंगधरे विवाहपण्णत्तिधरे णायाधम्मकहाधरे उवासगदसा० अंतगडदसा० अणुत्तरोववाइयदसा० पण्हावागरणधरे विवाग-सुयधरे, खओवसमिए दिट्ठिवायधरे, खओवसमिए णवपुच्चि जाव चउइसपुच्चि, खओवसमिए गणी, खओवसमिए वायए । सेत्तं खओवसमनिप्फण्णे । सेत्तं खओव-समिए । से किं तं पारिणामिए ? पारिणामिए दुविहे पण्णत्ते । तंजहा-साइपारि-णामिए य १ अणाइपारिणामिए य २ । से किं तं साइपारिणामिए ? साइपारिणामिए अणेगविहे पण्णत्ते । तंजहा-गाहा-जुण्णसुरा जुण्णगुलो, जुण्णघयं जुण्णतंदुला चेव । अब्भा य अब्भस्सुक्खा, सण्णा गंधव्वणगरा य ॥ १ ॥ उक्कावाया, दिसादाहा, गज्जियं, विज्जू, णिग्घाया, जूवया, जक्खादिता, धूमिया, महिया, रउग्घाया, चंदो-वरागा, सरोवरागा, चंदपरिवेसा, सूरपरिवेसा, पडिचंदा, पडिसूरा, इंदधणू, उदगमच्छा, कविहसिया, अमोहा, वासा, वासधरा, गासा, णगरा, घरा, पव्वया,

पायाला, भवणा, निरया-रयणप्पहा, सक्करप्पहा, वालुयप्पहा, पंकप्पहा, धूमप्पहा, तमप्पहा, तमतमप्पहा, सोहम्मं जाव अक्कुए, गेवेजे, अणुत्तरे, ईसिप्पम्भारा, परमाणुपोगळे, दुपएसिए जाव अणंतपएसिए । सेत्तं साइपारिणामिए । से किं तं अणाइपारिणामिए ? अणाइपारिणामिए-धम्मत्थिकाए, अधम्मत्थिकाए, आगासत्थिकाए, जीवत्थिकाए, पुग्गलत्थिकाए, अद्वासमए, लोए, अलोए, भवसिद्धिया, अभवसिद्धिया । सेत्तं अणाइपारिणामिए । सेत्तं पारिणामिए । से किं तं सन्निवाइए ? सन्निवाइए-एएसिं चेव उदइयउवसमियखइयखओवसमियपारिणामियानं भावाणं दुगसंजोएणं तिगसंजोएणं चउक्कसंजोएणं पंचगसंजोएणं जे निष्फज्जंति सव्वे ते सन्निवाइए नामे । तत्थ णं दस दुयसंजोगा, दस तियसंजोगा, पंच चउक्कसंजोगा, एणे पंचकसंजोगे । तत्थ णं जे ते दस दुगसंजोगा ते णं इमे-अत्थि णामे उदइयउवसमनिष्फण्णे १ अत्थि णामे उदइयखाइगनिष्फण्णे २ अत्थि णामे उदइयखओवसमनिष्फण्णे ३ अत्थि णामे उदइयपारिणामियनिष्फण्णे ४ अत्थि णामे उवसमियखयनिष्फण्णे ५ अत्थि णामे उवसमियखओवसमनिष्फण्णे ६ अत्थि णामे उवसमियपारिणामियनिष्फण्णे ७ अत्थि णामे खइयखओवसमनिष्फण्णे ८ अत्थि णामे खइयपारिणामियनिष्फण्णे ९ अत्थि णामे खओवसमियपारिणामियनिष्फण्णे १० । कयरे से णामे उदइयउवसमनिष्फण्णे ? उदइए त्ति मणुस्से, उवसंता कसाया, एस णं से णामे उदइयउवसमनिष्फण्णे । कयरे से णामे उदइयखयनिष्फण्णे ? उदइए त्ति मणुस्से, खइयं सम्मत्तं, एस णं से णामे उदइयखयनिष्फण्णे । कयरे से णामे उदइयखओवसमनिष्फण्णे ? उदइए त्ति मणुस्से, खओवसमियाइं इंदियाइं, एस णं से णामे उदइयखओवसमनिष्फण्णे । कयरे से णामे उदइयपारिणामियनिष्फण्णे ? उदइए त्ति मणुस्से, पारिणामिए जीवे, एस णं से णामे उदइयपारिणामियनिष्फण्णे । कयरे से णामे उवसमियखयनिष्फण्णे ? उवसंता कसाया, खइयं सम्मत्तं, एस णं से णामे उवसमियखयनिष्फण्णे । कयरे से णामे उवसमियखओवसमनिष्फण्णे ? उवसंता कसाया, खओवसमियाइं इंदियाइं, एस णं से णामे उवसमियखओवसमनिष्फण्णे । कयरे से णामे उवसमियपारिणामियनिष्फण्णे ? उवसंता कसाया, पारिणामिए जीवे, एस णं से णामे उवसमियपारिणामियनिष्फण्णे । कयरे से णामे खइयखओवसमनिष्फण्णे ? खइयं सम्मत्तं, खओवसमियाइं इंदियाइं, एस णं से णामे खइयखओवसमनिष्फण्णे । कयरे से णामे खइयपारिणामियनिष्फण्णे ? खइयं सम्मत्तं, पारिणामिए जीवे, एस णं से णामे खइयपारिणामियनिष्फण्णे । कयरे से णामे खओवसमियपारिणामियनिष्फण्णे ? खओवसमियाइं इंदियाइं, पारिणामिए जीवे, एस

णं से णामे खओवसमियपारिणामियनिष्फण्णे । तत्थ णं जे ते दस तिगसंजोगा ते णं इमे-अत्थि णामे उदइयउवसमियखयनिष्फण्णे १ अत्थि णामे उदइयउवसमियख-ओवसमनिष्फण्णे २ अत्थि णामे उदइयउवसमियपारिणामियनिष्फण्णे ३ अत्थि णामे उदइयखइयखओवसमनिष्फण्णे ४ अत्थि णामे उदइयखइयपारिणामियनिष्फण्णे ५ अत्थि णामे उदइयखओवसमियपारिणामियनिष्फण्णे ६ अत्थि णामे उवसमियख-इयखओवसमनिष्फण्णे ७ अत्थि णामे उवसमियखइयपारिणामियनिष्फण्णे ८ अत्थि णामे उवसमियखओवसमियपारिणामियनिष्फण्णे ९ अत्थि णामे खइयखओवसमिय-पारिणामियनिष्फण्णे १० । कयरं से णामे उदइयउवसमियखयनिष्फण्णे ? उदइए त्ति मणुस्से, उवसंता कसाया, खइयं सम्मत्तं, एस णं से णामे उदइयउवसमियख-यनिष्फण्णे । कयरं से णामे उदइयउवसमियखओवसमनिष्फण्णे ? उदइए त्ति मणुस्से, उवसंता कसाया, खओवसमियाइं इंदियाइं, एस णं से णामे उदइयउवस-मियखओवसमनिष्फण्णे । कयरं से णामे उदय उवसमियपारिणामियनिष्फण्णे ? उदइए त्ति मणुस्से, उवसंता कसाया, पारिणामिए जीवे, एस णं से णामे उदइय-उवसमियपारिणामियनिष्फण्णे । कयरं से णामे उदइयखइयखओवसमनिष्फण्णे ? उदइए त्ति मणुस्से, खइयं सम्मत्तं, खओवसमियाइं इंदियाइं, एस णं से णामे उदइयखइयखओवसमनिष्फण्णे । कयरं से णामे उदइयखइयपारिणामियनिष्फण्णे ? उदइए त्ति मणुस्से, खइयं सम्मत्तं, पारिणामिए जीवे, एस णं से णामे उदइयखइ-यपारिणामियनिष्फण्णे । कयरं से णामे उदइयखओवसमियपारिणामियनिष्फण्णे ? उदइए त्ति मणुस्से, खओवसमियाइं इंदियाइं, पारिणामिए जीवे, एस णं से णामे उदइयखओवसमियपारिणामियनिष्फण्णे । कयरं से णामे उवसमियखइयखओवसमनि-ष्फण्णे ? उवसंता कसाया, खइयं सम्मत्तं, खओवसमियाइं इंदियाइं, एस णं से णामे उवसमियखइयखओवसमनिष्फण्णे । कयरं से णामे उवसमियखइयपारिणा-मियनिष्फण्णे ? उवसंता कसाया, खइयं सम्मत्तं, पारिणामिए जीवे, एस णं से णामे उवसमियखइयपारिणामियनिष्फण्णे । कयरं से णामे उवसमियखओवसमियपारिणा-मियनिष्फण्णे ? उवसंता कसाया, खओवसमियाइं इंदियाइं, पारिणामिए जीवे, एस णं से णामे उवसमियखओवसमियपारिणामियनिष्फण्णे । कयरं से णामे खइयखओ-वसमियपारिणामियनिष्फण्णे ? खइयं सम्मत्तं, खओवसमियाइं इंदियाइं, पारिणामिए जीवे, एस णं से णामे खइयखओवसमियपारिणामियनिष्फण्णे । तत्थ णं जे ते पंच चउकसंजोगा ते णं इमे-अत्थि णामे उदइयउवसमियखइयखओवसमनिष्फण्णे १ अत्थि णामे उदइयउवसमियखइयपारिणामियनिष्फण्णे २ अत्थि णामे उदइय-

उवसमियखओवसमियपारिणामियनिष्फण्णे ३ अत्थि णामे उदइयखइयखओवस-  
 मियपारिणामियनिष्फण्णे ४ अत्थि णामे उवसमियखइयखओवसमियपारिणामियनि-  
 ष्फण्णे ५ । कयरे से णामे उदइयउवसमियखइयखओवसमनिष्फण्णे ? उदइए ति  
 मणुस्से, उवसंता कसाया, खइयं सम्मत्तं, खओवसमियाइं इंदियाइं, एस णं से णामे  
 उदइयउवसमियखइयखओवसमनिष्फण्णे । कयरे से णामे उदइयउवसमियखइयपा-  
 रिणामियनिष्फण्णे ? उदइए ति मणुस्से, उवसंता कसाया, खइयं सम्मत्तं, पारिणा-  
 मिए जीवे, एस णं से णामे उदइयउवसमियखइयपारिणामियनिष्फण्णे । कयरे से  
 णामे उदइयउवसमियखओवसमियपारिणामियनिष्फण्णे ? उदइए ति मणुस्से, उवसंता  
 कसाया, खओवसमियाइं इंदियाइं, पारिणामिए जीवे, एस णं से णामे उदइयउवस-  
 मियखओवसमियपारिणामियनिष्फण्णे । कयरे से णामे उदइयखइयखओवसमिय-  
 पारिणामियनिष्फण्णे ? उदइए ति मणुस्से, खइयं सम्मत्तं, खओवसमियाइं इंदियाइं,  
 पारिणामिए जीवे, एस णं से णामे उदइयखइयखओवसमियपारिणामियनिष्फण्णे ।  
 कयरे से णामे उवसमियखइयखओवसमियपारिणामियनिष्फण्णे ? उवसंता कसाया,  
 खइयं सम्मत्तं, खओवसमियाइं इंदियाइं, पारिणामिए जीवे, एस णं से णामे उवसमिय-  
 खइयखओवसमियपारिणामियनिष्फण्णे । तत्थ णं जे से एक्के पंचगसंजोए से णं इमे-  
 अत्थि णामे उदइयउवसमियखइयखओवसमियपारिणामियनिष्फण्णे । कयरे से  
 णामे उदइयउवसमियखइयखओवसमियपारिणामियनिष्फण्णे ? उदइए ति मणुस्से,  
 उवसंता कसाया, खइयं सम्मत्तं, खओवसमियाइं इंदियाइं, पारिणामिए जीवे, एस णं  
 से णामे उदइयउवसमियखइयखओवसमियपारिणामियनिष्फण्णे । सेत्तं सन्निवाइए ।  
**सेत्तं छण्णामे** ॥ १२७ ॥ से किं तं सत्तणामे ? सत्तणामे सत्तसरा पण्णत्ता । तंजहा-  
**गाहा**-सज्जे रिसहे गंधारे, मज्झिमे पंचमे सरं । धे(रे)वए चैव नेसाए, सरा  
 सत्त विद्याहिया ॥ १ ॥ एएसि णं सत्तण्हं सराणं सत्त सरट्ठाणा पण्णत्ता । तंजहा-  
**गाहाओ**-सज्जं च अग्गजीहाए, उरेण रिसहं सरं । कंदुग्गएण गंधारं, मज्झजीहाए  
 मज्झिमं ॥ १ ॥ नासाए पंचमं बूया, दंतोड्डेण य धेवयं । भमुहक्खेवेण णेसायं,  
 सरट्ठाणा विद्याहिया ॥ २ ॥ सत्तसरा जीवणिससिया पण्णत्ता । तंजहा-**गाहा**-सज्जं  
 रवइ मऊरो, कुकुडो रिसमं सरं । हंसो रवइ गंधारं, मज्झिमं च गवेलगा ॥ १ ॥  
 अह कुलुमसंभवे काले, कोइला पंचमं सरं । छट्ठं च सारसा कुंवा, नेसायं सत्तमं  
 गओ ॥ २ ॥ सत्तसरा अजीवणिससिया पण्णत्ता । तंजहा-सज्जं रवइ मुयंगो, गोमुही  
 रिसहं सरं । संखो रवइ गंधारं, मज्झिमं पुण झल्लरी ॥ १ ॥ चउच्चरणपइट्ठाणा,  
 गोहिया पंचमं सरं । आडंबरो रेवइयं, महाभेरी य सत्तमं ॥ २ ॥ एएसि णं सत्तण्हं

सराणं सत्त सरलक्खणा पण्णत्ता । तंजहा-गाहाओ-सज्जेणं लहई वित्तिं, कयं च न विणस्सइ । नावो पुत्ता य मित्ता य, नारीणं होइ वल्लहो ॥ १ ॥ रिसहेण उ एस-  
 (पसे)जं, सेणावच्चं धणाणि य । वत्थगंधमलंकारं, इत्थिओ सयणाणि य ॥ २ ॥  
 गंधारे गीयजुत्तिण्णा, वज्जवित्ती कलाहिया । हवंति कइणो धण्णा, जे अण्णे सत्थ-  
 पारगा ॥ ३ ॥ मज्झिमसरमंता उ, हवंति सुहजीविणो । खायई पियई देई,  
 मज्झिमसरमरिसओ ॥ ४ ॥ पंचमसरमंता उ, हवंति पुहवीपई । सूरा संगहकत्तारो,  
 अणेगगणनायगा ॥ ५ ॥ रेवयसरमंता उ, हवंति दुहजीविणो । सौउणिया वाउ-  
 रिया, सोयरिया य मुट्ठिया ॥ ६ ॥ णिसायसरमंता उ, होंति कलहकारगा । जंघा-  
 चरौ लेहवाहा, हिंडगा भारवाहगा ॥ ७ ॥ एएसि णं सत्तण्हं सराणं तओ गामा  
 पण्णत्ता । तंजहा-सज्जगामे १ मज्झिमगामे २ गंधारगामे ३ । सज्जगामस्स णं सत्त  
 मुच्छणाओ पण्णत्ताओ । तंजहा-गाहा-मैग्गी कोरविथौ हरिथौ, रयैणी य सारकंता  
 य । छट्ठी य सारैसी नाम, सुद्धसज्जा य सत्तमा ॥ १ ॥ मज्झिमगामस्स णं सत्त  
 मुच्छणाओ पण्णत्ताओ । तंजहा-उत्तरमंदा रयैणी, उत्तरौ उत्तरौसमा । समोकंता य  
 सोवीरौ, अभिरुवौ होइ सत्तमा ॥ १ ॥ गंधारगामस्स णं सत्त मुच्छणाओ पण्णत्ताओ ।  
 तंजहा-नंदी य खुड्डिया पूरिमा य, चउत्थी य सुद्धगंधारा । उत्तरगंधारा वि य, सा  
 पंचमिया हवइ मुच्छा ॥ १ ॥ सुद्धुत्तरमायामा, सा छट्ठी सव्वओ य णायव्वा ।  
 अह उत्तरायया कोडिमा य, सा सत्तमी मुच्छा ॥ २ ॥ सत्तसरा कओ हवंति ?,  
 गीयस्स का हवइ जोणी ? । कइसमया ओसासा ?, कइ वा गीयस्स आगारा ? ॥ १ ॥  
 सत्तसरा नाभीओ, हवंति गीयं च सइयजोणी । पायसमा ऊसासा, तिण्णि य गीयस्स  
 आगारा ॥ २ ॥ आइसउ आरमंता, समुव्वहंता य मज्झयारम्मि । अवसाणे  
 उज्झंता, तिण्णि य गीयस्स आगारा ॥ ३ ॥ छद्दोसे अट्ठगुणे, तिण्णि य वित्ताइ दो  
 य भणिईओ । जो नाही सो गाहिइ, उस्सिक्खिओ रंगमज्झम्मि ॥ ४ ॥ भीयं दुयं  
 उप्पिच्छं, उत्तालं च कमसो मुणेयव्वं । कागस्सैरमणुणीसं, छद्दोसा होंति गेयस्स ॥ ५ ॥  
 पुण्णं रत्तं च अलंक्रियं च, वत्तं च तहेवमविबुद्धं । महुँरं सैमं सुल्ललियं, अट्ठगुणा  
 होंति गेयस्स ॥ ६ ॥ उरकंठैसिरैविमुद्धं च, मिजंते मउरैरिभियैपयव्वं ।  
 समतालपडुव्वेव्वं, सत्तस्सरसीभरं गीयं ॥ ७ ॥ अक्खरसैमं पयसैमं, तालसैमं लय-  
 सैमं च गेहसैमं । नीससिओससियसैमं, संचारसैमं सरा सत्त ॥ ८ ॥ निद्दोसं  
 सारमंतं च, हेउजुतैमलंक्रियं । उवैणीयं सोवय्यारं च, मियं महुरमेव्वं य ॥ ९ ॥  
 सैमं अद्धसैमं चेव, सव्वत्थ विसैमं च जं । तिण्णि वित्तपयाराइ, चउत्थं नोवलब्भइ

१ पाढंतरं-कुचेला य कुवित्ती य, चोरा चंडालमुट्ठिया । २ पायचारित्ति अट्ठो ।

॥ १० ॥ सकया पायया चेव, भणिईओ होंति दोण्णि वा । सरमंडलम्मि गिजंते, पसत्था इत्तिभासिया ॥ ११ ॥ केसी गायइ महुरं, केसी गायइ खरं च रुक्खं च । केसी गायइ चउरं, केसी य विलंबियं दुयं केसी ॥ १२ ॥ विसरं पुण केरिसी ? । गोरी गायइ महुरं, सामा गायइ खरं च रुक्खं च । काली गायइ चउरं, काणा य विलंबियं दुयं अंधा ॥ १३ ॥ विसरं पुण पिंगला । सत्तसरा तओ गामा, मुच्छणा इक्खवीसई । ताणा एगूणपण्णासं, सम्मतं सरमंडलं ॥ १४ ॥ **सेत्तं सत्तणामे** ॥ १२८ ॥ से किं तं अट्टणामे ? अट्टणामे-अट्टविहा वयणविभत्ती पण्णत्ता । तंजहा-निहेसे पढमा होइ, बिइया उवएसणे । तइया करणम्मि कया, चउत्थी संपयावणे ॥ १ ॥ पंचमी य अवायाणे, छट्ठी सस्सामिवायणे । सत्तमी सण्णिहाणत्थे, अट्टमाऽऽमंतणी भवे ॥ २ ॥ तत्थ पढमा विभत्ती, निहेसे 'सो इमो अहं व' ति । बिइया पुण उवएसे 'भण कुणसु इमं व तं व' ति ॥ ३ ॥ तइया करणम्मि कया 'भणियं च कयं च तेण व मए' वा । 'हंदि णमो साहाए' हवइ चउत्थी पयाणम्मि ॥ ४ ॥ 'अवणय गिण्ह य एत्तो, इउ' ति वा पंचमी अवायाणे । छट्ठी तस्स इमस्स वा, गयस्स वा सामिसंबंधे ॥ ५ ॥ हवइ पुण सत्तमी तं, इमम्मि आहारकालभावे य । आमंतणी भवे अट्टमी उ, जह 'हे जुवाण' ति ॥ ६ ॥ **सेत्तं अट्टणामे** ॥ १२९ ॥ से किं तं नवणामे ? नवणामे-नवक्खवरसा पण्णत्ता । तंजहा-**गाहाओ-वीरो** सिंगारो अब्भुओ य, रोहो य होइ बोद्धवो । वेलणओ बीभच्छो, हासो कल्लणो पसंतो य ॥ १ ॥ (१) तत्थ परिचायम्मि य, (दाण)तवचरणसत्तुजणविणासे य । अण्णुसय-धिइपरक्कम-, लिंगो वीरो रसो होइ ॥ १ ॥ वीरो रसो जहा-सो नाम महावीरो, जो रज्जं पयहिऊण पव्वइओ । कामकोहमहासत्तु-, पक्खनिग्घायणं कुणइ ॥ २ ॥ (२) सिंगारो नाम रसो, रइसंजोगाभिलाससंजणणो । मंडणविलासविब्वोय-, हासली-ल्यारमणलिंगो ॥ १ ॥ सिंगारो रसो जहा-महुरविलाससल्लियं, हियउम्मायणकं जुवाणाणं । सामा सुहुदामं, दाएई मेहलादामं ॥ २ ॥ (३) विम्हयकरो अपुव्वो, अनु-भूयपुव्वो य जो रसो होइ । हरिसविसाउप्पत्ति-, लक्खणो अब्भुओ नाम ॥ १ ॥ अब्भुओ रसो जहा-अब्भुयतरमिह एत्तो, अन्नं किं अत्थि जीवलोगम्मि ? । जं जिण-वयणे अत्था, तिकालजुत्ता मुणिजंति ॥ २ ॥ (४) भयजणणरूवसइंधयार-, चिता-कहासमुप्पण्णो । संमोहसंभमविसाय-, सरणलिंगो रसो रोहो ॥ १ ॥ रोहो रसो जहा-मिउडिविडंबियमुहो, संदट्ठोइ इय रुहिरमाकिण्णो । हणसि पसुं असुरणिभो, भीमरसिय अइरोइ ! रोहोऽसि ॥ २ ॥ (५) विणओवयारगुज्झगुरु-, दारमेरावइक्क-



मुप्पण्णो । वेलणओ नाम रसो, लज्जा संकाकरणलिंगो ॥ १ ॥ वेलणओ रसो जहा—किं लोइयकरणीओ, लज्जणीयतरं ति लज्जयासु त्ति । वारिजम्मि गुरुयणो, परिवंदइ जं बहुप्पोत्तं ॥ २ ॥ (६) असुइकुणिमदुइंसण—, संजोगब्भासंगंधनिप्फण्णो । निव्वेयऽविहिंसालक्खणो, रसो होइ वीभच्छो ॥ १ ॥ वीभच्छो रसो जहा—असु-इमलभरियत्तिज्जर—, सभावदुग्गंधिसव्वकालं पि । धण्णा उ सरीरकलिं, बहुमलक-लुसं विमुंचंति ॥ २ ॥ (७) हववयवेसभासा—, विवरीयविलंबणासमुप्पण्णो । हासो मणप्पहासो, पगासलिंगो रसो होइ ॥ १ ॥ हासो रसो जहा—पासुत्तमसीमंडिय—, पडि-बुद्धं देवरं पलोयंती । ही जह थणभरकंपण—, पणमियमज्झा हसइ सामा ॥ २ ॥ (८) पियविप्पओगवंध—, वहवाहि विणिवायसंभमुप्पण्णो । सोइयविलवियपम्हाण—, रुण्णलिंगो रसो करुणो ॥ १ ॥ करुणो रसो जहा—पज्झायकिलामिययं, वाहागयपप्पुय-च्छियं बहुसो । तस्स विओगे पुत्तिय!, दुब्बलयं ते मुहं जायं ॥ २ ॥ (९) निदोसमणसमाहाण—, संभवो जो पसंतभावेणं । अविकारलक्खणो सो, रसो पसंतो त्ति णायव्वो ॥ १ ॥ पसंतो रसो जहा—सव्भावनिव्विगारं, उवसंतपसंतसोम-दिट्ठीयं । ही जह मुणिणो सोहइ, मुहकमलं पीवरसिरीयं ॥ २ ॥ एए नव कव्वरसा, वत्तीसादोसविहिसमुप्पण्णा । गाहाहिं मुणियव्वा, हवंति सुद्धा वा मीसा वा ॥ ३ ॥

**सेत्तं नवणामे ॥ १३० ॥** से किं तं दसणामे ? दसणामे दसविहे पण्णत्ते । तंजहा—गोण्णे १ नोगोण्णे २ आयाणपएणं ३ पडिवक्खपएणं ४ पहाणयाए ५ अणाइय-सिद्धंतेणं ६ नामेणं ७ अवयवेणं ८ संजोगेणं ९ पमाणेणं १० । से किं तं गोण्णे ? गोण्णे—खमइ त्ति खमणो, तवइ त्ति तवणो, जलइ त्ति जलणो, पवइ त्ति पवणो । सेत्तं गोण्णे । से किं तं नोगोण्णे ? अकुंतो सकुंतो, अमुग्गो समुग्गो, अमुदो समुदो, अलालं पलालं, अकुलिया सकुलिया, नो पलं असइ त्ति पलासो, अमाइवाहए माइवाहए, अवीयवावए वीयवावए, नो इंदगोवए इंदगोवे । सेत्तं नोगोण्णे । से किं तं आयाणपएणं ? आयाणपएणं—(धम्मोमंगलं चूलिया) आवंती, चाउरंगिज्जं, असं-खयं, अहातत्थिज्जं, अइइज्जं, जण्णइज्जं, पुरिसइज्जं (उसुयारिज्जं), एलइज्जं, वीरियं, धम्मो, मग्गो, समोसरणं, जम्मइयं । सेत्तं आयाणपएणं । से किं तं पडिवक्खपएणं ? पडिवक्खपएणं—नवसु गामागरणगरखेडकब्बडमडंबदोणमुहपट्ठणासमसंवाहसन्निवेसेसु सन्निविस्समाणेसु—असिवा सिवा, अग्गी सीयलो, विसं महुरं, कल्लालघरेसु अंबिलं साउयं, जे रत्तए से अलत्तए, जे लाउए से अलाउए, जे सुंभए से कुसुंभए, आलवंते विवलीयभासए । सेत्तं पडिवक्खपएणं । से किं तं पाहण्णयाए ? पाहण्णयाए—असोगवणे, सत्तवणवणे, चंपगवणे, चूयवणे, नागवणे, पुन्नागवणे, उच्छुवणे,

दक्खवणे, साल्लवणे । सेत्तं पाहणयाए । से किं तं अणाइयसिद्धंतेणं ? अणाइय-  
सिद्धंतेणं-धम्मत्थिकाए, अधम्मत्थिकाए, आगासत्थिकाए, जीवत्थिकाए, पुग्गलत्थि-  
काए, अद्वासमए । सेत्तं अणाइयसिद्धंतेणं । से किं तं नामेणं ? नामेणं-पिउपिया-  
महस्स नामेणं उन्नामिज(ए)ह । सेत्तं नामेणं । से किं तं अवयवेणं ? अवयवेणं-सिंगी  
सिही विसाणी, दाढी पक्खी खुरी नही वाली । दुपय चउप्पय बहुप्पय, नंगुली  
केसरी कउही ॥ १ ॥ परियरब्धेण भडं, जाणिज्जा महिलियं निवसणेणं । सित्थेण  
दोणवायं, कविं च इक्काए गाहाए ॥ २ ॥ सेत्तं अवयवेणं । से किं तं संजोएणं ?  
संजोए चउव्विहे पण्णत्ते । तंजहा-द्व्वसंजोए १ खेत्तसंजोए २ कालसंजोए ३  
भावसंजोए ४ । से किं तं द्व्वसंजोए ? द्व्वसंजोए तिविहे पण्णत्ते । जहा-  
सच्चित्ते १ अचित्ते २ मीसए ३ । से किं तं सच्चित्ते ? सच्चित्ते-गोहिं गोमिए,  
महिशीहिं महिसए, ऊरणीहिं ऊरणीए, उट्ठीहिं उट्ठीवाले । सेत्तं सच्चित्ते । से  
किं तं अचित्ते ? अचित्ते-छत्तेणं छत्ती, दंडेणं दंडी, पडेणं पडी, घडेणं घडी,  
कडेणं कडी । सेत्तं अचित्ते । से किं तं मीसए ? मीसए-हलेणं हालिए, सगडेणं  
सागडिए, रहेणं रहिए, नावाए नाविए । सेत्तं मीसए । सेत्तं द्व्वसंजोए । से किं  
तं खेत्तसंजोए ? खेत्तसंजोए-भारहे, एरवए, हेमवए, एरण्वए, हरिवासए, रम्म-  
गवासए, देवकुरुए, उत्तरकुरुए, पुव्वविदेहए, अवरविदेहए । अहवा-मागहे, माल-  
वए, सोरट्टए, मरहट्टए, कुंकणए । सेत्तं खेत्तसंजोए । से किं तं कालसंजोए ?  
कालसंजोए-सुसमसुसमाए १ सुसमाए २ सुसमदूसमाए ३ दूसमसुसमाए ४  
दूसमाए ५ दूसमदूसमाए ६ । अहवा-पावसए १ वासारत्तए २ सरदए ३ हेमंतए ४  
वसंतए ५ गिम्हए ६ । सेत्तं कालसंजोए । से किं तं भावसंजोए ? भावसंजोए  
दुविहे पण्णत्ते । तंजहा-पसत्थे य १ अपसत्थे य २ । से किं तं पसत्थे ? पसत्थे-  
नाणेणं नाणी, दंसणेणं दंसणी, चरित्तेणं चरित्ती । सेत्तं पसत्थे । से किं तं अप-  
सत्थे ? अपसत्थे-कोहेणं कोही, माणेणं माणी, मायाए माई, लोहेणं लोही । सेत्तं  
अपसत्थे । सेत्तं भावसंजोए । सेत्तं संजोएणं । से किं तं पमाणेणं ? पमाणे चउव्विहे  
पण्णत्ते । तंजहा-नामप्पमाणे १ ठवणप्पमाणे २ द्व्वप्पमाणे ३ भावप्पमाणे ४ ।  
से किं तं नामप्पमाणे ? नामप्पमाणे-जस्स णं जीवस्स वा, अजीवस्स वा, जीवाण  
वा, अजीवाण वा, तदुभयस्स वा, तदुभयाण वा, 'पमाणे' त्ति नामं कज्जइ । सेत्तं  
नामप्पमाणे । से किं तं ठवणप्पमाणे ? ठवणप्पमाणे सत्तविहे पण्णत्ते । तंजहा-  
गाहा-णक्खत्तं देवयं कुँले, पासंडं गँणे य जीवियँहिउं । आभिप्पाइयणँमे ठवणा-  
णामं तु सत्तविहं ॥ १ ॥ से किं तं णक्खत्तणामे ? णक्खत्तणामे-कित्तियाहिं जाए-

कित्तिए, कित्तिवादिण्णे, कित्तियाधम्मे, कित्तियासम्ममे, कित्तियादेवे, कित्तियादासे, कित्तियासेणे, कित्तियारक्खिए । रोहिणीहिं जाए-रोहिणिए, रोहिणिदिन्ने, रोहिणिधम्ममे, रोहिणिसम्ममे, रोहिणिदेवे, रोहिणिदासे, रोहिणिसेणे, रोहिणिरक्खिए य । एवं सव्वनक्खत्तेसु नामा भाणियव्वा । एत(थं)य **संगहणिगाहाओ**-कित्तिर्य रोहिणिमिगसरं, अहो य पुणव्वस्सं य पुँस्से य । तत्तो य अस्सिलेसो, महो उ दो फग्गुणीओ य ॥ १ ॥ हँथो चित्तो सँइ, विसाहो तह य होइ अणुराहो । जेट्ठा मूलो पुव्वा-साहो तह उत्तरां चेव ॥ २ ॥ अँभिइ सव्वे धणिट्ठो, सयमित्तयो दो य हांति भँइवँयो । रेवँइ अस्सिणि भरणी, एसा णक्खत्तपरिवाडी ॥ ३ ॥ सेत्तं णक्खत्तणामे । से किं तं देवयाणामे ? देवयाणामे-अग्गिदेवयाहिं जाए-अग्गिए, अग्गिदिण्णे, अग्गिधम्ममे, अग्गिसम्ममे, अग्गिदेवे, अग्गिदासे, अग्गिसेणे, अग्गिरक्खिए । एवं सव्वनक्खत्तदेवयाणामा भाणियव्वा । एत्थं पि **संगहणिगाहाओ**-अग्गि पयावई सोमे, रँदो अँदिती विहरँइ सँप्पे । पित्ति भँग अँज्जम सविय्यो, तट्ठो वाँज्जं य इँदँगी ॥ १ ॥ मित्तो इँदो निरँइ, अँज्जं विरँसो य वँभ विणँइ य । वँभु वरँणं अँयं विवद्धी, पूसे आसे जँमे चेव ॥ २ ॥ सेत्तं देवयाणामे । से किं तं कुलनामे ? कुलनामे-उग्गे, भोगे, रायण्णे, खत्तिए, इक्खागे, णाए, कोरव्वे । सेत्तं कुलनामे । से किं तं पासंडनामे ? पासंडनामे-समणे य पंडुरंगे भिक्खू कावाल्लिए य तावसए । परिवायगे सेत्तं पासंडनामे । से किं तं गणनामे ? गणनामे-मल्ले, मल्लदिण्णे, मल्लधम्ममे, मल्लसम्ममे, मल्लदेवे, मल्लदासे, मल्लसेणे, मल्लरक्खिए । सेत्तं गणनामे । से किं तं जीवियनामे ? जीविय-**(हेउ)**नामे-अवकरए, उक्कुडए, उज्झियए, कज्जवए, सुप्पए । सेत्तं जीवियनामे । से किं तं आभिप्पाइयनामे ? आभिप्पाइयनामे-अंबए, निंबए, बकुलए, पलासए, सिणए, पिळए, करीरए । सेत्तं आभिप्पाइयनामे । सेत्तं ठवणप्पमाणे । से किं तं दव्वप्पमाणे ? दव्वप्पमाणे छव्विहे पणत्ते । तंजहा-धम्मत्थिकाए १ जाव अद्धासमए ६ । सेत्तं दव्वप्पमाणे । से किं तं भावप्पमाणे ? भावप्पमाणे चउव्विहे पणत्ते । तंजहा-सामासिए १ तद्धियए २ धाउए ३ निरुत्तिए ४ । से किं तं सामासिए ? सामासिए-सत्त समासा भवंति, तंजहा-**गाहा**-दंदे य बहुव्वीही, कम्मधारय दिग्गुयं । तप्पुरिसँ अव्वईभावे, एक्कँसेसे य सत्तमे ॥ १ ॥ से किं तं दंदे ? दंदे-दँन्ताश्च ओष्ठौ च=दन्तोष्ठम्, स्तनौ च उदरं च=स्तनोदरम्, वैश्रं च पात्रं च=वस्त्र-

१ 'सु' । २ बुद्धदंसणस्सिओ । १ दंता य ओट्ठा य=दंतोष्ठं, २ थणा य उयरं च=थणोयरं, ३ वत्थं च पायं च=वत्थपत्तं, ४ आसा य महिसा य=आसमहिंसं, ५ अही य नउलो य=अहिनउलं ।

पात्रम्, अँश्वाश्च महिषाश्च=अश्वमहिषम्, अँहिश्च नकुलश्च=अहिनकुलम् । सेतं दंदे समासे । से किं तं बहुव्वीही समासे ? बहुव्वीही समासे-फुल्ला इमम्म गिरिम्म कुडयकयंबा सो इमो गिरी फुल्लियकुडयकयंबो । सेतं बहुव्वीही समासे । से किं तं कम्मधारए ? कम्मधारए=धवलो वसहो=धवलवसहो, किण्हो मिओ=किण्हमिओ, सेओ पडो=सेयपडो, रत्तो पडो=रत्तपडो । सेतं कम्मधारए । से किं तं दिगुसमासे ? दिगुसमासे-तिण्णि कडुगाणि=तिकडुगं, तिण्णि महुराणि=तिमहुरं, तिण्णि गुणाणि=तिगुणं, तिण्णि पुराणि=तिपुरं, तिण्णि सराणि=तिसरं, तिण्णि पुक्खराणि=तिपुक्खरं, तिण्णि बिंदुयाणि=तिबिंदुयं, तिण्णि पहाणि=तिपहं, पंच णईओ=पंचणयं, सत्त गया=सत्तगयं, नव तुरंगा=नवतुरंगं, दस गामा=दसगामं, दस पुराणि=दसपुरं । सेतं दिगुसमासे । से किं तं तप्पुरिसे ? तप्पुरिसे-तित्थे कागो=तित्थकागो, वणे हत्थी=वणहत्थी, वणे वराहो=वणवराहो, वणे महिसो=वणमहिसो, वणे मऊरो=वणमऊरो । सेतं तप्पुरिसे । से किं तं अव्वईभावे ? अव्वईभावे-अणुगामं, अणुणइयं, अणुफरिहं, अणुचरियं । सेतं अव्वईभावे समासे । से किं तं एगसेसे ? एगसेसे-जहा एगो पुरिसो तहा बहवे पुरिसा, जहा बहवे पुरिसा तहा एगो पुरिसो; जहा एगो करिसावणो तहा बहवे करिसावणा, जहा बहवे करिसावणा तहा एगो करिसावणो; जहा एगो साली तहा बहवे साली, जहा बहवे साली तहा एगो साली । सेतं एगसेसे समासे । सेतं सामासिए । से किं तं तद्धितए ? तद्धितए अट्ठविहं पणत्ते । तंजहा-गाहा-कम्मं सिप्पं सिलोएँ, संजोएँ समीवँओ य संजूँहो । इस्सरियँ अव्वेणं य, तद्धितणामं तु अट्ठविहं ॥ १ ॥ से किं तं कम्मनामे ? कम्मनामे-तणहारए, कट्टहारए, पत्तहारए, दोसिए, सोत्तिए, कप्पासिए, भंडवेयालिए, कोलालिए । सेतं कम्मनामे । से किं तं सिप्पनामे ? सिप्पनामे-(वत्थिए, तंतिए,) तुण्णए, तंतुवाए, पट्टकारे, उएँडे, बरुडे, मुंजकारे, कट्टकारे, छत्तकारे, वज्झकारे, पोत्थकारे, चित्तकारे, दंतकारे, लेप्पकारे, सेलकारे, कोट्टिमकारे । सेतं सिप्पनामे । से किं तं सिलोयनामे ? सिलोयनामे-समणे, माहणे, सव्वातिही । सेतं सिलोयनामे । से किं तं संजोगनामे ? संजोगनामे-रण्णो ससुरए, रण्णो जामाउए, रण्णो साले, रण्णो भाउए, रण्णो भगिणीवई । सेतं संजोगनामे । से किं तं समीवनामे ? समीवनामे-गिरिसमीवे णयरं=गिरिणयरं, विदिसासमीवे णयरं=वेदिसं णयरं, बेच्चाए समीवे णयरं=बेच्चायडं, तगराए समीवे णयरं=तगरायडं । सेतं समीवनामे । से किं तं संजूहनामे ? संजूहनामे-तरंगवइकारे, मलयवइकारे, अत्ताणुसट्टिकारे, बिंदुकारे । सेतं संजूहनामे । से किं तं ईसरियनामे ? ईसरियनामे-राईसरे, तलवरे, माडंबिए, कोडंबिए, इब्भे, सेट्ठी, सत्थवाहे, सेणावई । सेतं

ईसरियनामे । से किं तं अवचनानामे ? अवचनानामे-अरिहंतमाया, चक्रवडिमाया, बल-  
देवमाया, वासुदेवमाया, रायमाया, मुणिमाया, वायगमाया । सेत्तं अवचनानामे ।  
सेत्तं तद्धियए । से किं तं धाउए ? धाउए-भू सत्तायां परस्मैभाषा, एवमुक्थौ,  
स्पर्द्धा संवर्धे, गार्ध्वं प्रतिष्ठालिप्सयोर्ग्रन्थे च, वार्ध्वं लोडने । सेत्तं धाउए । से किं  
तं निरुत्तिए ? निरुत्तिए-मैद्यां शेते=महिषः, ध्रैमति च रौति च=भ्रमरः, मुहु-  
मुहुर्लसतीति=मुसलं, कैपेरिव लम्बते तथेति च करोति=कपित्थं, चिदिति करोति  
खलं च भवति=चिक्खलं, ऊर्ध्वकर्णः=उल्लूकः, मेखस्य माला=मेखला । सेत्तं  
निरुत्तिए । सेत्तं भावप्पमाणे । सेत्तं पमाणनामे । सेत्तं दसनानामे । सेत्तं नामे  
॥ १३१ ॥ नामेति पयं समत्तं ॥

से किं तं पमाणे ? पमाणे चउव्विहे पण्णत्ते । तंजहा-द्ववप्पमाणे १  
खेतप्पमाणे २ कालप्पमाणे ३ भावप्पमाणे ४ ॥ १३२ ॥ से किं तं द्ववप्पमाणे ?  
द्ववप्पमाणे दुविहे पण्णत्ते । तंजहा-पएसनिप्फण्णे य १ विभागनिप्फण्णे य २ ।  
से किं तं पएसनिप्फण्णे ? पएसनिप्फण्णे-परमाणुपोगगले, दुपएसिए जाव दसपएसिए,  
संखिजपएसिए, असंखिजपएसिए, अणंतपएसिए । सेत्तं पएसनिप्फण्णे । से किं तं  
विभागनिप्फण्णे ? विभागनिप्फण्णे पंचविहे पण्णत्ते । तंजहा-माणे १ उम्माणे २  
अवमाणे ३ गणिमे ४ पडिमाणे ५ । से किं तं माणे ? माणे दुविहे पण्णत्ते ।  
तंजहा-धन्नमाणप्पमाणे य १ रसमाणप्पमाणे य २ । से किं तं धन्नमाणप्पमाणे ?  
धन्नमाणप्पमाणे-दो असइओ=पसई, दो पसईओ=सेइया, चत्तारि सेइयाओ=कुलओ,  
चत्तारि कुलया=पत्थो, चत्तारि पत्थया=आढगं, चत्तारि आढगाइ=दोणो, सट्ठि  
आढयाइ=जहन्नए कुंभे, असीइ आढयाइ=मज्झिमए कुंभे, आढयसयं=उक्कोसए कुंभे,  
अट्ठ य आढयसइए=वाहे । एएणं धण्णमाणपमाणेणं किं पओयणं ? एएणं धण्ण-  
माणपमाणेणं मुत्तोलीमुखइदुरअलिंदओचारसंसियाणं धण्णाणं धण्णमाणप्पमाणनि-  
व्वित्तिलक्खणं भवइ । सेत्तं धण्णमाणपमाणे । से किं तं रसमाणप्पमाणे ? रसमाण-  
प्पमाणे-धण्णमाणप्पमाणाओ चउभागविवड्ढिए अविभतरसिहाजुत्ते रसमाणप्पमाणे  
विहिज्जइ, तंजहा-चउसट्ठिया (चउपलपमाणा ४), बत्तीसिया (अट्ठपलपमाणा ८),

१ भू सत्ताए 'परस्मै' अद्धमागहीए नत्थि, २ एह वुड्डीए, ३ फद्ध संचरिसे,  
४-५ एए 'सक्कए' अद्धमागहीए एएसिं ठाणे अण्णा पउज्जंति । १ महीए सुवइ=  
महिसो, २ भमइ य रवइ य=भमरो, ३ मुहुं मुहुं लसइ ति मुसलं, ४-५ 'सक्कए'  
अद्धमागहीए जहा हेट्ठा, ६ उड्डुकण्णो=उल्लूओ, ७ मेखस्स माला=मेखला ।  
८ सा कोट्टिया जा उवरिं हेट्ठा संकिण्णा मज्झे विसाला ।

सोलसिया (सोलसपलपमाणा १६), अट्टमाइया (वत्तीसपलपमाणा ३२), चउभाइया (चउसट्ठिपलपमाणा ६४), अट्टमाणी (सयाहियअट्टाइसपलपमाणा १२८), माणी (दुसयाहियछप्पणपलपमाणा २५६), दो चउसट्ठियाओ=वत्तीसिया, दो वत्तीसियाओ=सोलसिया, दो सोलसियाओ=अट्टमाइया, दो अट्टमाइयाओ=चउभाइया, दो चउभाइयाओ=अट्टमाणी, दो अट्टमाणीओ=माणी । एएणं रसमाणपमाणेणं किं पओयणं ? एएणं रसमाणेणं-वारकवडककरककलसियगागरिदइयकरोडियकुंडिय- (दो)संसियाणं रसाणं रसमाणपमाणनिव्वित्तिलक्खणं भवइ । सेतं रसमाणपमाणे । सेतं माणे । से किं तं उम्माणे ? उम्माणे-जं णं उम्मिणिजइ, तंजहा-अट्टकरिसो, करिसो, अट्टपलं, पलं, अट्टतुला, तुला, अट्टभारो, भारो । दो अट्टकरिसा=करिसो, दो करिसा=अट्टपलं, दो अट्टपलाइं=पलं, पंच पलसइया=तुला, दस तुलाओ=अट्टभारो, वी[वी]सं तुलाओ=भारो । एएणं उम्माणपमाणेणं किं पओयणं ? एएणं उम्माणपमाणेणं पत्ताऽगरतगरचोययकुं कुमखंडगुलमच्छंडियाईणं दव्वाणं उम्माणपमाणनिव्वित्तिलक्खणं भवइ । सेतं उम्माणपमाणे । से किं तं ओमाणे ? ओमाणे-जं णं ओमिणिजइ, तंजहा-हत्थेण वा, दंडेण वा, धणुक्केण वा, जुगेण वा, नालियाए वा, अक्खेण वा, मुसलेण वा । गाहा-दंड धणु जुग नालिया य, अक्ख मुसलं च चउहत्थं । दसनालियं च रज्जुं, वियाण ओमाणसण्णाए ॥ १ ॥ वत्थुम्मि हत्थमेजं, खित्ते दंडं धणुं च पत्थम्मि । खायं च नालियाए, वियाण ओमाणसण्णाए ॥ २ ॥ एएणं अवमाणपमाणेणं किं पओयणं ? एएणं अवमाणपमाणेणं खायचियरइय- करकचियकडपडभित्तिपरिक्खेवसंसियाणं दव्वाणं अवमाणपमाणनिव्वित्तिलक्खणं भवइ । सेतं अवमाणे । से किं तं गणिमे ? गणिमे-जं णं गणिजइ, तंजहा-एगो, दस, सयं, सहस्सं, दससहस्साई, सयसहस्सं, दससयसहस्साई, कोडी । एएणं गणिमप्पमाणेणं किं पओयणं ? एएणं गणिमप्पमाणेणं भित्तगभित्तिभत्तवेयणआय- व्वयसंसियाणं दव्वाणं गणिमप्पमाणनिव्वित्तिलक्खणं भवइ । सेतं गणिमे । से किं तं पडिमाणे ? पडिमाणे-जं णं पडिमिणिजइ, तंजहा-गुंजा, कागणी, निप्फावो, कम्ममासओ, मंडलओ, सुवण्णो । पंच गुंजाओ=कम्ममासओ, चत्तारि कागणीओ=कम्ममासओ, तिण्णि निप्फावा=कम्ममासओ, एवं चउक्को कम्ममासओ । बारस कम्ममासया=मंडलओ, एवं अडयालीसं कागणीओ=मंडलओ, सोलस कम्ममासया=सुवण्णो, एवं चउसट्ठि कागणीओ=सुवण्णो । एएणं पडिमाणपमाणेणं किं पओयणं ? एएणं पडिमाणपमाणेणं सुवण्णरययमणिमोत्तियसंखसिलप्पवालाईणं दव्वाणं

पडिमाणप्पमाणनिव्वित्तिलक्खणं भवइ । सेत्तं पडिमाणे । सेत्तं विभागनिप्फण्णे । सेत्तं दव्वप्पमाणे ॥ १३३ ॥ से किं तं खेत्तपमाणे ? खेत्तपमाणे दुविहे पण्णत्ते । तंजहा-  
 पएसनिप्फण्णे य १ विभागनिप्फण्णे य २ । से किं तं पएसनिप्फण्णे ? पएस-  
 निप्फण्णे-एगपएसोगाढे, दुपएसोगाढे, तिपएसोगाढे, संखिजपएसोगाढे, असंखिजप-  
 एसोगाढे । सेत्तं पएसनिप्फण्णे । से किं तं विभागनिप्फण्णे ? विभागनिप्फण्णे-**गाहा-**  
 अंगुल विहत्थि रयणी, कुच्छीं धणु गाउयं च बोद्धव्वं । जोयण सेढी पयरं, लोगम-  
 लोगे वि य तहेव ॥ १ ॥ से किं तं अंगुले ? अंगुले तिविहे पण्णत्ते । तंजहा-आयंगुले १  
 उस्सेहंगुले २ पमाणंगुले ३ । से किं तं आयंगुले ? आयंगुले-जे णं जया मणुस्सा  
 भवंति तेसि णं तया अप्पणे अंगुलेणं दुवालसअंगुलाइं मुहं, नवमुहाइं पुरिसे  
 पमाणजुत्ते भवइ, दोणिए पुरिसे माणजुत्ते भवइ, अद्धभारं तुल्लमाणे पुरिसे उम्माण-  
 जुत्ते भवइ । **गाहाओ-**माणुम्माणपमाणजुत्ता(णय), लक्खणवज्जणगुणेहिं उववेया ।  
 उत्तमकुलप्पसूया, उत्तमपुरिसा मुणेयव्वा ॥ १ ॥ होंति पुण अहियपुरिसा, अद्धसयं  
 अंगुलाण उव्विद्धा । छण्णउइ अहमपुरिसा, चउरुत्तर मज्झिमिद्धा उ ॥ २ ॥ हीणा  
 वा अहिया वा, जे खलु सरसत्तसारपरिहीणा । ते उत्तमपुरिसाणं, अवस्स पेसत्तण-  
 मुवेति ॥ ३ ॥ एएणं अंगुलपमाणेणं-छ अंगुलाइं=पाओ, दो पाया=विहत्थी, दो  
 विहत्थीओ=रयणी, दो रयणीओ=कुच्छी, दो कुच्छीओ=दंडं धणू जुगे नालिया अक्खे  
 मुसले, दो धणुसहस्साइं=गाउयं, चत्तारि गाउयाइं=जोयणं । एएणं आयंगुलपमाणेणं  
 किं पओयणं ? एएणं आयंगुलेणं जे णं जया मणुस्सा हवंति तेसि णं तया णं  
 आयंगुलेणं अगडतलागदहनईवाविपुक्खरिणीदीहियगुंजालियाओ सरा सरपंतियाओ  
 सरसरपंतियाओ बिलपंतियाओ आरामुज्जाणकाणणवणवणसंडवणराईओ, सभापवा-  
 खाइयपरिहाओ पागारअट्टालयचरियदारगोपुरपासायघरसरणलयणआवणसिंघाडग-  
 तिगचउक्कचउक्कचउम्मुहमहापहसगडरहजाणजुग्गगिच्छिथिल्लिसिवियसंदमाणियाओ  
 लोहीलोहकडाहकडिल्लयभंडमतोवगरणमाईणि अज्जकालियाइं च जोयणाइं मविजंति ।  
 से समासओ तिविहे पण्णत्ते । तंजहा-सईअंगुले १ पयरंगुले २ घर्णंगुले ३ । अंगुला-  
 यया एगपएसिया सेढी सईअंगुले, सई सईगुणिया पयरंगुले, पयरं सईए गुणियं घर्ण-  
 गुले । एएसि णं भंते ! सईअंगुलपयरंगुलघर्णंगुलाणं कयरे कयरेहितो अप्पा वा बहुया  
 वा तुल्ला वा विसेसाहिया वा ? सव्वत्थोवे सईअंगुले, पयरंगुले असंखेज्जगुणे, घर्णंगुले  
 असंखेज्जगुणे । सेत्तं आयंगुले । से किं तं उस्सेहंगुले ? उस्सेहंगुले अणेगविहे पण्णत्ते ।  
 तंजहा-**गाहा-**परमाणू तसरणू, रहरेणू अगगयं च वालस्स । लिक्खा जूया य जवो,  
 अट्टगुण-विवट्ठिया कमसो ॥ १ ॥ से किं तं परमाणू ? परमाणू दुविहे पण्णत्ते । तंजहा-

सुहुमेय १ ववहारिए य २ । तत्थ णं जे से सुहुमे से ठप्पे । तत्थ णं जे से ववहारिए से णं अणंताणंताणं सुहुमपोगलाणं समुदयसमिइसमागमेणं ववहारिए परमाणुपोगले निप्फज्जइ । से णं भंते ! असिधारं वा खुरधारं वा ओगाहेज्जा ? हंता ! ओगाहेज्जा । से णं तत्थ छिजेज्ज वा भिजेज्ज वा ? नो इणट्ठे समट्ठे, नो खलु तत्थ सत्थं कमइ । से णं भंते ! अगणिकायस्स मज्झंमज्झेणं वीइवएज्जा ? हंता ! वीइवएज्जा । से णं भंते ! तत्थ डहेज्जा ? नो इणट्ठे समट्ठे, नो खलु तत्थ सत्थं कमइ । से णं भंते ! पुक्खरसंवट्ठगस्स महामेहस्स मज्झंमज्झेणं वीइवएज्जा ? हंता ! वीइवएज्जा । से णं तत्थ उदउल्ले सिया ? नो इणट्ठे समट्ठे, नो खलु तत्थ सत्थं कमइ । से णं भंते ! गंगाए महाणईए पडिसोयं हव्वमागच्छेज्जा ? हंता ! हव्वमागच्छेज्जा । से णं तत्थ विणिघाय-मावजेज्जा ? नो इणट्ठे समट्ठे, नो खलु तत्थ सत्थं कमइ । से णं भंते ! उदगावत्तं वा उदगबिंदुं वा ओगाहेज्जा ? हंता ! ओगाहेज्जा । से णं तत्थ कुच्छेज्जा वा परि-यावजेज्ज वा ? नो इणट्ठे समट्ठे, नो खलु तत्थ सत्थं कमइ । गाहा-सत्थेण सुतिक्खेण वि, छित्तुं भेत्तुं च जं न किर सक्का । तं परमाणुं सिद्धा, वयंति आई पमाणाणं ॥ १ ॥ अणंताणं ववहारियपरमाणुपोगलाणं समुदयसमिइसमागमेणं-सा एगा उसण्ह-सण्हियाइ वा, सण्हसण्हियाइ वा, उड्डुरेणूइ वा, तसरेणूइ वा, रहरेणूइ वा । अट्ठ उसण्हसण्हियाओ=सा एगा सण्हसण्हिया, अट्ठ सण्हसण्हियाओ=सा एगा उड्डुरेणू, अट्ठ उड्डुरेणूओ=सा एगा तसरेणू, अट्ठ तसरेणूओ=सा एगा रहरेणू, अट्ठ रहरेणूओ=देवकुरुत्तरकुरुणं मणुयाणं से एगे वालग्गे, अट्ठ देवकुरुत्तरकुरुणं मणुयाणं वालग्गा=हरिवासरम्मगवासाणं मणुयाणं से एगे वालग्गे, अट्ठ हरिवासरम्मगवासाणं मणुस्साणं वालग्गा=हेमवयहेरणवयाणं मणुस्साणं से एगे वालग्गे, अट्ठ हेमवय-हेरणवयाणं मणुस्साणं वालग्गा=पुव्वविदेहअवरविदेहाणं मणुस्साणं से एगे वालग्गे, अट्ठ पुव्वविदेहअवरविदेहाणं मणुस्साणं वालग्गा=भरहएरवयाणं मणुस्साणं से एगे वालग्गे, अट्ठ भरहेरवयाणं मणुस्साणं वालग्गा=सा एगा लिक्खा, अट्ठ लिक्खाओ=सा एगा जूया, अट्ठ जूयाओ=से एगे जवमज्झे, अट्ठ जवमज्झे=से एगे अंगुले । एएणं अंगुलाणं पमाणेणं छ अंगुलाइ=पाओ, बारस अंगुलाइ=विहत्थी, चउवीसं अंगुलाइ=रयणी, अडयालीसं अंगुलाइ=कुच्छी, छन्नवइ अंगुलाइ=से एगे दंडेइ वा, धणूइ वा, जुगेइ वा, नालियाइ वा, अक्खेइ वा, मुसलेइ वा । एएणं धणुप्पमाणेणं दो धणुसहस्साइ=गाउयं, चत्तारि गाउयाइ=जोयणं । एएणं उस्सेहंगुलेणं किं पओयणं ? एएणं उस्सेहंगुलेणं गेरइयतिरिक्खजोणियमणुस्सदेवाणं सरीरोगाहणा मविज्जइ । गेरइयाणं भंते ! केमहालिया सरीरोगाहणा पणत्ता ? गोयमा ! दुविहा



पण्णत्ता । तंजहा—भवधारणिज्जा य १ उत्तरवेउव्विया य २ । तत्थ णं जा सा भवधारणिज्जा सा णं—जहण्णेणं अंगुलस्स असंखेज्जइभागं, उक्कोसेणं पंचधणुसयाइं । तत्थ णं जा सा उत्तरवेउव्विया सा—जहण्णेणं अंगुलस्स संखेज्जइभागं, उक्कोसेणं धणुसहस्सं । रयणप्पहाए पुढवीए णेरइयाणं भंते ! केमहालिया सरीरोगाहणा पण्णत्ता ? गोयमा ! दुविहा पण्णत्ता । तंजहा—भवधारणिज्जा य १ उत्तरवेउव्विया य २ । तत्थ णं जा सा भवधारणिज्जा सा—जहण्णेणं अंगुलस्स असंखेज्जइभागं, उक्कोसेणं सत्तधणूइं तिण्णि रयणीओ छच्च अंगुलाइं । तत्थ णं जा सा उत्तरवेउव्विया सा—जहण्णेणं अंगुलस्स संखेज्जइभागं, उक्कोसेणं पण्णरसधणूइं दोण्णि रयणीओ वारस अंगुलाइं । सैक्करप्पहापुढवीए णेरइयाणं भंते ! केमहालिया सरीरोगाहणा पण्णत्ता ? गोयमा ! दुविहा पण्णत्ता । तंजहा—भवधारणिज्जा य उत्तरवेउव्विया य १ । तत्थ णं जा सा भवधारणिज्जा सा—जहण्णेणं अंगुलस्स असंखेज्जइभागं, उक्कोसेणं पण्णरसधणूइं दुण्णि रयणीओ वारसअंगुलाइं । तत्थ णं जा सा उत्तरवेउव्विया सा—जहण्णेणं अंगुलस्स संखेज्जइभागं, उक्कोसेणं एकतीसं धणूइं इक्करयणी य । वालु-यप्पहापुढवीए णेरइयाणं भंते ! केमहालिया सरीरोगाहणा पण्णत्ता ? गोयमा ! दुविहा पण्णत्ता । तंजहा—भवधारणिज्जा य १ उत्तरवेउव्विया य २ । तत्थ णं जा सा भवधारणिज्जा सा—जहण्णेणं अंगुलस्स असंखेज्जइभागं, उक्कोसेणं एकतीसं धणूइं इक्करयणी य । तत्थ णं जा सा उत्तरवेउव्विया सा—जहण्णेणं अंगुलस्स संखेज्जइभागं, उक्कोसेणं बासट्ठिधणूइं दो रयणीओ य । एवं सव्वासिं पुढवीणं पुच्छा भाणियव्वा । पंकप्पहाए पुढवीए भवधारणिज्जा—जहण्णेणं अंगुलस्स असंखेज्जइभागं, उक्कोसेणं बासट्ठिधणूइं दो रयणीओ य । उत्तरवेउव्विया—जहण्णेणं अंगुलस्स संखेज्जइभागं, उक्कोसेणं पणवीसं धणुसयं । धूमप्पहाए भवधारणिज्जा—जहण्णेणं अंगुलस्स असंखेज्जइभागं, उक्कोसेणं पणवीसं धणुसयं । उत्तरवेउव्विया—जहण्णेणं अंगुलस्स संखेज्जइभागं, उक्कोसेणं अट्ठाइज्जाइं धणुसयाइं । तमाए भवधारणिज्जा—जहण्णेणं अंगुलस्स असंखेज्जइभागं, उक्कोसेणं अट्ठाइज्जाइं धणुसयाइं । उत्तरवेउव्विया—जहण्णेणं अंगुलस्स संखेज्जइभागं, उक्कोसेणं पंचधणुसयाइं । तमतमाए पुढवीए णेरइयाणं भंते ! केमहालिया सरीरोगाहणा पण्णत्ता ? गोयमा ! दुविहा पण्णत्ता । तंजहा—भवधारणिज्जा य १ उत्तरवेउव्विया य २ । तत्थ णं जा सा भवधारणिज्जा सा—जहण्णेणं अंगुलस्स असंखेज्जइभागं, उक्कोसेणं पंचधणुसयाइं । तत्थ णं जा सा उत्तरवेउव्विया सा—जहण्णेणं अंगुलस्स संखेज्जइभागं, उक्कोसेणं धणुसहस्साइं ।

१ एवं सव्वाणं दुविहा भवधारणिज्जा—

असुरकुमारारणं भंते ! केमहालिया सरीरोगाहणा पणत्ता ? गोयमा ! दुविहा पणत्ता ।  
तंजहा—भवधारणिजा य १ उत्तरवेउव्विया य २ । तत्थ णं जा सा भवधारणिजा  
सा—जहण्णेणं अंगुलस्स असंखेज्जइभागं, उक्कोसेणं सत्तरयणीओ । तत्थ णं जा सा  
उत्तरवेउव्विया सा—जहण्णेणं अंगुलस्स संखेज्जइभागं, उक्कोसेणं जोयणसयसहस्सं ।  
एवं असुरकुमारगमेणं जाव थणियकुमारारणं भाणियव्वं । पुढविकाइयाणं भंते !  
केमहालिया सरीरोगाहणा पणत्ता ? गोयमा ! जहण्णेणं अंगुलस्स असंखेज्जइभागं,  
उक्कोसेणं वि अंगुलस्स असंखेज्जइभागं । एवं सुहुमाणं ओहियाणं अपजत्तगाणं  
पजत्तगाणं च भाणियव्वं । एवं जाव वायरवाउकाइयाणं पजत्तगाणं भाणियव्वं ।  
वणस्सइकाइयाणं भंते ! केमहालिया सरीरोगाहणा पणत्ता ? गोयमा ! जहण्णेणं  
अंगुलस्स असंखेज्जइभागं, उक्कोसेणं साइरेणं जोयणसहस्सं । सुहुमवणस्सइकाइयाणं  
ओहियाणं अपजत्तगाणं पजत्तगाणं तिण्हं पि—जहण्णेणं अंगुलस्स असंखेज्जइभागं,  
उक्कोसेणं वि अंगुलस्स असंखेज्जइभागं । वायरवणस्सइकाइयाणं ओहियाणं—  
जहण्णेणं अंगुलस्स असंखेज्जइभागं, उक्कोसेणं साइरेणं जोयणसहस्सं । अपजत्तगाणं—  
जहण्णेणं अंगुलस्स असंखेज्जइभागं, उक्कोसेणं वि अंगुलस्स असंखेज्जइभागं ।  
पजत्तगाणं—जहण्णेणं अंगुलस्स असंखेज्जइभागं, उक्कोसेणं साइरेणं जोयणसहस्सं ।  
वेइंदियाणं पुच्छा । गोयमा ! जहण्णेणं अंगुलस्स असंखेज्जइभागं, उक्कोसेणं बारस-  
जोयणाइं । अपजत्तगाणं—जहण्णेणं अंगुलस्स असंखेज्जइभागं, उक्कोसेणं वि अंगुलस्स  
असंखेज्जइभागं । पजत्तगाणं—जहण्णेणं अंगुलस्स संखेज्जइभागं, उक्कोसेणं बारसजोय-  
णाइं । तेइंदियाणं पुच्छा । गोयमा ! जहण्णेणं अंगुलस्स असंखेज्जइभागं, उक्कोसेणं  
तिणि गाउयाइं । अपजत्तगाणं—जहण्णेणं अंगुलस्स असंखेज्जइभागं, उक्कोसेणं वि  
अंगुलस्स असंखेज्जइभागं । पजत्तगाणं—जहण्णेणं अंगुलस्स संखेज्जइभागं, उक्कोसेणं  
तिणि गाउयाइं । चउरिंदियाणं पुच्छा । गोयमा ! जहण्णेणं अंगुलस्स असंखेज्जइभागं,  
उक्कोसेणं चत्तारि गाउयाइं । अपजत्तगाणं—जहण्णेणं० उक्कोसेणं वि अंगुलस्स  
असंखेज्जइभागं । पजत्तगाणं—जहण्णेणं अंगुलस्स संखेज्जइभागं, उक्कोसेणं चत्तारि  
गाउयाइं । पंचिदियतिरिक्खजोणियाणं भंते ! केमहालिया सरीरोगाहणा पणत्ता ?  
गोयमा ! जहण्णेणं अंगुलस्स असंखेज्जइभागं, उक्कोसेणं जोयणसहस्सं । जलयर-  
पंचिदियतिरिक्खजोणियाणं पुच्छा । गोयमा ! एवं चेव । सम्मुच्छिमजलयरपंचिदि-  
यतिरिक्खजोणियाणं पुच्छा । गोयमा ! जहण्णेणं अंगुलस्स असंखेज्जइभागं, उक्कोसेणं  
जोयणसहस्सं । अपजत्तगासम्मुच्छिमजलयरपंचिदियतिरिक्खजोणियाणं पुच्छा ।  
गो० ! जहण्णेणं अंगुलस्स असंखेज्जइभागं, उक्कोसेणं वि अंगुलस्स असंखेज्जइभागं ।

[illegible]

असंखेज्जइभागं, उक्कोसेण वि अंगुलस्स असंखेज्जइभागं । पज्जत्तगसम्मच्छिमभुय-  
परिसप्पाणं पुच्छा । गोयमा ! जहण्णेणं अंगुलस्स संखेज्जइभागं, उक्कोसेणं धणु-  
पुहुत्तं । गब्भवक्कंतियभुयपरिसप्पथलयरारणं पुच्छा । गोयमा ! जहण्णेणं अंगुलस्स  
असंखेज्जइभागं, उक्कोसेणं गाउयपुहुत्तं । अपज्जत्तगभुयपरिसप्पाणं पुच्छा । गोयमा !  
जहण्णेणं अंगुलस्स असंखेज्जइभागं, उक्कोसेण वि अंगुलस्स असंखेज्जइभागं । पज्ज-  
त्तगभुयपरिसप्पाणं पुच्छा । गोयमा ! जहण्णेणं अंगुलस्स संखेज्जइभागं, उक्कोसेणं  
गाउयपुहुत्तं । खहयरपंचिदियपुच्छा । गोयमा ! जहण्णेणं अंगुलस्स असंखेज्जइ-  
भागं, उक्कोसेणं धणुपुहुत्तं । सम्मुच्छिमखहयरारणं जहा भुयगपरिसप्पसम्मच्छिमाणं  
तिष्ठ वि गमेसु तहा भाणियव्वं । गब्भवक्कंतियखहयरपुच्छा । गोयमा ! जहण्णेणं  
अंगुलस्स असंखेज्जइभागं, उक्कोसेणं धणुपुहुत्तं । अपज्जत्तगगब्भवक्कंतियखहयरपुच्छा ।  
गोयमा ! जहण्णेणं अंगुलस्स असंखेज्जइभागं, उक्कोसेण वि अंगुलस्स असंखेज्जइ-  
भागं । पज्जत्तगगब्भवक्कंतियखहयरपुच्छा । गोयमा ! जहण्णेणं अंगुलस्स संखेज्जइ-  
भागं, उक्कोसेणं धणुपुहुत्तं । एत्थ संगहणिगाहाओ हवंति, तंजहा-जोयणसहस्स  
गाउयपुहुत्त, ततो य जोयणपुहुत्तं । दोण्हं तु धणुपुहुत्तं, समुच्छिमे होइ उच्चत्तं  
॥ १ ॥ जोयणसहस्स छग्गाउयाइं, ततो य जोयणसहस्सं । गाउयपुहुत्त भुयोगे,  
पक्खीसु भवे धणुपुहुत्तं ॥ २ ॥ मणुस्साणं भंते ! केमहालिया सरीरोगाहणा  
पण्णत्ता ? गोयमा ! जहण्णेणं अंगुलस्स असंखेज्जइभागं, उक्कोसेणं तिण्णि गाउ-  
याइं । सम्मुच्छिममणुस्साणं पुच्छा । गोयमा ! जहण्णेणं अंगुलस्स असंखेज्जइ-  
भागं, उक्कोसेण वि अंगुलस्स असंखेज्जइभागं । अपज्जत्तगगब्भवक्कंतियमणुस्साणं  
पुच्छा । गोयमा ! जहण्णेणं अंगुलस्स असंखेज्जइभागं, उक्कोसेण वि अंगुलस्स  
असंखेज्जइभागं । पज्जत्तगगब्भवक्कंतियमणुस्साणं पुच्छा । गोयमा ! जहण्णेणं अंगु-  
लस्स संखेज्जइभागं, उक्कोसेणं तिण्णि गाउयाइं । वाणमंतरारणं भवधारणिज्जा य  
उत्तरवेउव्विया य जहा असुरकुमारारणं तहा भाणियव्वा । जहा वाणमंतरारणं तहा  
जोइसियाण वि । सोहम्मं कप्पे देवाणं भंते ! केमहालिया सरीरोगाहणा पण्णत्ता ?  
गोयमा ! दुविहा पण्णत्ता । तंजहा-भवधारणिज्जा य १ उत्तरवेउव्विया य २ । तत्थ  
णं जा सा भवधारणिज्जा सा-जहण्णेणं अंगुलस्स असंखेज्जइभागं, उक्कोसेणं सत्तर-  
यणीओ । तत्थ णं जा सा उत्तरवेउव्विया सा-जहण्णेणं अंगुलस्स संखेज्जइभागं,  
उक्कोसेणं जोयणसयसहस्सं । एवं ईसाणकप्पे वि भाणियव्वं । जहा सोहम्मकप्पाणं  
देवाणं पुच्छा तहा सेसकप्पदेवाणं पुच्छा भाणियव्वा जाव अञ्जुयकप्पो । सर्णकुमारे  
भवधारणिज्जा-जहण्णेणं अंगुलस्स असंखेज्जइभागं, उक्कोसेणं छ रयणीओ । उत्तर-

वेउव्विया जहा सोहम्मे तहा भाणियव्वा । जहा सणकुमारे तहा माहिंदे वि भाणियव्वा । वंसलंतगेसु भवधारणिजा-जहण्णेणं अंगुलस्स असंखेज्जइभागं, उक्कोसेणं पंचरयणीओ । उत्तरवेउव्विया जहा सोहम्मे । महासुक्कसहस्सारेसु भवधारणिजा-जहण्णेणं अंगुलस्स असंखेज्जइभागं, उक्कोसेणं चत्तारि रयणीओ । उत्तरवेउव्विया जहा सोहम्मे । आणयपाणयआरणअञ्जुएसु चउसु वि भवधारणिजा-जहण्णेणं अंगुलस्स असंखेज्जइभागं, उक्कोसेणं तिणि रयणीओ । उत्तरवेउव्विया जहा सोहम्मे । गेवेज्जगदेवाणं भंते ! केमहालिया सरीरोगाहणा पण्णत्ता ? गोयसा ! एगे भवधारणिजे सरीरगे पण्णत्ते । से जहण्णेणं अंगुलस्स असंखेज्जइभागं, उक्कोसेणं दुणि रयणीओ । अणुत्तरोववाइयदेवाणं भंते ! केमहालिया सरीरोगाहणा पण्णत्ता ? गोयसा ! एगे भवधारणिजे सरीरगे पण्णत्ते । से जहण्णेणं अंगुलस्स असंखेज्जइभागं, उक्कोसेणं एगा रयणी उ । से समासओ तिविहे पण्णत्ते । तंजहा-सूइअंगुले १ पयरंगुले २ घणंगुले ३ । एगंगुलायया एगपएसिया सेढी सूइअंगुले, सूई सूईए गुणिया पयरंगुले, पयरं सूईए गुणियं घणंगुले । एसिणं सूइअंगुलपयरंगुलघणंगुलाणं कयरे कयरेहिंतो अप्पे वा बहुए वा तुल्ले वा विसेसाहिए वा ? सव्वत्थोवे सूइअंगुले, पयरंगुले असंखेज्जगुणे, घणंगुले असंखेज्जगुणे । सेतं उस्सेहंगुले । से किं तं पमाणंगुले ? पमाणंगुले-एगमेगस्स रण्णो चाउरंतचक्कवट्टिस्स अट्ठसोवणिणए कागणीरयणे छत्ते दुवालसंसिए अट्ठकणिणए अहिगरणसंठाणसंठिए पण्णत्ते, तस्स णं एगमेगा कोडी उस्सेहंगुलविक्रखंभा, तं समणस्स भगवओ महावीरस्स अद्धंगुलं, तं सहस्सगुणं पमाणंगुलं भवइ । एएणं अंगुलपमाणेणं छ अंगुलाइ=पाओ, दुवालसअंगुलाइ=विहत्थी, दो विहत्थीओ=रयणी, दो रयणीओ=कुच्छी, दो कुच्छीओ=धणू, दो धणुसहस्साइ=गाउयं, चत्तारि गाउयाइ=जोयणं । एएणं पमाणंगुलेणं किं पओयणं ? एएणं पमाणंगुलेणं पुढवीणं कंडाणं पायालाणं भवणाणं भवणपत्थडाणं निरयाणं निरयावलीणं निरयपत्थडाणं कप्पाणं विमाणणं विमाणावलीणं विमाणपत्थडाणं टंकाणं कूडाणं सेलाणं सिहरीणं पन्भाराणं विजयाणं वक्खाराणं वासाणं वासहराणं वासहरपव्वयाणं वेला(वल्या)णं वेइयाणं दाराणं तोरणणं दीवाणं समुद्दाणं आयाभाविक्रवंभोच्चतोव्वेहपरिक्रवेवा सविज्जंति । से समासओ तिविहे पण्णत्ते । तंजहा-सेढीअंगुले १ पयरंगुले २ घणंगुले ३ । असंखेज्जाओ जोयणकोडाकोडीओ सेढी, सेढी सेढीए गुणिया पयरं, पयरं सेढीए गुणियं लोगो, संखेज्जएणं लोगो गुणिओ संखेज्जा लोगा, असंखेज्जएणं लोगो गुणिओ असंखेज्जा लोगा, अणंतेणं लोगो गुणिओ अणंता लोगा । एसिणं सेढीअंगुलपयरंगुलघणंगुलाणं कयरे कयरेहिंतो

अप्पे वा बहुए वा तुल्ले वा विसेसाहिए वा ? सव्वत्थोवे सेढीअंगुले, पयरंगुले  
 असंखेजगुणे, घणंगुले असंखेजगुणे । सेत्तं पमाणंगुले । सेत्तं विभागनिष्फण्णे । सेत्तं  
 खेतप्पमाणे ॥ १३४ ॥ से किं तं कालप्पमाणे ? कालप्पमाणे दुविहे पण्णत्ते । तंजहा-  
 पएसनिष्फण्णे य १ विभागनिष्फण्णे य २ ॥ १३५ ॥ से किं तं पएसनिष्फण्णे ?  
 पएसनिष्फण्णे-एगसमयट्ठिईए, दुसमयट्ठिईए, तिसमयट्ठिईए जाव दससमयट्ठिईए,  
 संखिज्जसमयट्ठिईए, असंखिज्जसमयट्ठिईए । से तं पएसनिष्फण्णे ॥ १३६ ॥ से किं  
 तं विभागनिष्फण्णे ? विभागनिष्फण्णे-गाहा-समयावलिख सुहुत्ता, दिवस अहोरत्त  
 पक्ख मासा य । संवच्छर जुग पलिया, सागर ओसप्पि परियट्ठा ॥ १ ॥ १३७ ॥  
 से किं तं समए ? समयस्स णं पव्वणं करिस्सामि-से जहानामए तुण्णागदारए  
 सिया-तरुणे, बलवं, जुगवं, जुवाणे, अप्पायंके, थिरग्गहत्थे, दढपाणिपायपास-  
 पिट्ठंतरोरुपरिणए, तलजमलजुयलपरिघणिभवाहू, चम्मेट्ठगदुहणमुट्ठियसमाहयनि-  
 चियगत्तकाए, उरस्सवलसमण्णागए, लंघणपवणजहणवायामसमत्थे, छेए, दक्खे,  
 पत्तट्ठे, कुसले, मेहावी, निउणे, निउणसिप्पोवगए, एणं महइं पडसाडियं वा पट्सा-  
 डियं वा गहाय सयराहं हत्थमेत्तं ओसारेजा, तत्थ चोयए पण्णवयं एवं वयासी-  
 जेणं कालेणं तेणं तुण्णागदारएणं तीसे पडसाडियाए वा पट्साडियाए वा सयराहं  
 हत्थमेत्तं ओसारिए से समए भवइ ? नो इणट्ठे समट्ठे । कम्हा ? जम्हा संखेजाणं  
 तंतूणं समुदयसमितिसमागमेणं एगा पडसाडिया निष्फज्जइ, उवरिल्लम्मि तंतुम्मि  
 अच्छिण्णे हिट्ठिल्ले तंतू न छिज्जइ, अण्णम्मि काले उवरिल्ले तंतू छिज्जइ, अण्णम्मि  
 काले हिट्ठिल्ले तंतू छिज्जइ, तम्हा से समए न भवइ । एवं वयंतं पण्णवयं चोयए  
 एवं वयासी-जेणं कालेणं तेणं तुण्णागदारएणं तीसे पडसाडियाए वा पट्साडियाए  
 वा उवरिल्ले तंतू छिण्णे से समए भवइ ? न भवइ । कम्हा ? जम्हा संखेजाणं  
 पम्हाणं समुदयसमिइसमागमेणं एगे तंतू निष्फज्जइ, उवरिल्ले पम्हे अच्छिण्णे  
 हिट्ठिल्ले पम्हे न छिज्जइ, अण्णम्मि काले उवरिल्ले पम्हे छिज्जइ, अण्णम्मि काले  
 हिट्ठिल्ले पम्हे छिज्जइ, तम्हा से समए न भवइ । एवं वयंतं पण्णवयं चोयए एवं  
 वयासी-जेणं कालेणं तेणं तुण्णागदारएणं तरस्स तंतुस्स उवरिल्ले पम्हे छिण्णे से  
 समए भवइ ? न भवइ । कम्हा ? जम्हा अणंताणं संघायाणं समुदयसमिइसमा-  
 गमेणं एगे पम्हे निष्फज्जइ, उवरिल्ले संघाए अविसंघाइए हेट्ठिल्ले संघाए न विसंघा-  
 इज्जइ, अण्णम्मि काले उवरिल्ले संघाए विसंघाइज्जइ, अण्णम्मि काले हेट्ठिल्ले संघाए  
 विसंघाइज्जइ, तम्हा से समए न भवइ । एत्तो वि य णं सुहुमतराए समए पण्णत्ते  
 समणाउत्तो !, असंखिजाणं समयाणं समुदयसमिइसमागमेणं सा एगा 'आवलिख'ति

वुच्चइ, संखिजाओ आवलियाओ=ऊसासो, संखिजाओ आवलियाओ=नीसासो ।  
**गाहाओ**=द्वट्स अणवगल्लस्स, निरुवक्किट्स जंतुणो । एगे ऊसासनीसासे, एस  
पाणुत्ति वुच्चइ ॥ १ ॥ सत्तपाणूणि से थोवे, सत्त थोवाणि से लवे । लवाणं सत्तह-  
त्तरीए, एत्त मुहुत्ते वियाहिए ॥ २ ॥ तिण्णि सहस्सा सत्त य, सयाई तेहुत्तरिं च  
ऊसासा । एस मुहुत्तो भणिओ, सव्वेहिं अणंतनाणीहिं ॥ ३ ॥ एएणं मुहुत्तपमाणेणं  
तीसं मुहुत्ता=अहोरत्तं, पण्णरस अहोरत्ता=पक्खो, दो पक्खा=मासो, दो मासा=उऊ,  
तिण्णि उऊ=अयणं, दो अयणाई=संवच्छरे, पंच संवच्छराई=जुगे, वीसं जुगाई=  
वाससयं, दस वाससयाई=वाससहस्सं, सयं वाससहस्साणं=वाससयसहस्सं, चोरा-  
सीई वाससयसहस्साई=से एगे पुव्वंगे, चउरासीई पुव्वंगसयसहस्साई=से एगे  
पुव्वे, चउरासीई पुव्वसयसहस्साई=से एगे तुडियंगे, चउरासीई तुडियंगसयसह-  
स्साई=से एगे तुडिए, चउरासीई तुडियसयसहस्साई=से एगे अडडंगे, चउरासीई  
अडडंगसयसहस्साई=से एगे अडडे, एवं अव्वंगे, अववे, हुहुयंगे, हुहुए, उप्पलंगे,  
उप्पले, पडमंगे, पडमे, नल्लिगंगे, नल्लिगे, अच्छनिउरंगे, अच्छनिउरे, अउयंगे,  
अउए, पउयंगे, पउए, नउयंगे, नउए, चूलियंगे, चूलिया, सीसपहेलियंगे, चउरा-  
सीई सीसपहेलियंगसयसहस्साई=सा एगा सीसपहेलिया । एयावया चेव गणिए,  
एयावया चेव गणियस्स विसए, एत्तो परं ओवमिए पवत्तइ ॥ १३८ ॥ से किं तं  
ओवमिए ? ओवमिए दुविहे पण्णत्ते । तंजहा-पलिओवमे य १ सागरोवमे य २ ।  
से किं तं पलिओवमे ? पलिओवमे ति विहे पण्णत्ते । तंजहा-उद्धारपलिओवमे १  
अद्धापलिओवमे २ खेत्तपलिओवमे य ३ । से किं तं उद्धारपलिओवमे ? उद्धारप-  
लिओवमे दुविहे पण्णत्ते । तंजहा-सुहुमे १ वावहारिए य २ । तत्थ णं जे से सुहुमे  
से ठप्पे । तत्थ णं जे से वावहारिए-से जहानामए पळे सिया-जोयणं आयामविक्खं-  
भेणं, जोयणं उच्चं उच्चत्तेणं, तं तिगुणं सविसेसं परिवक्खेवणं, से णं पळे एगाहिय-  
वेयाहियतेयाहिय जाव उकोसेणं सत्तरत्तपरूढाणं संसट्ठे संनिविए भरिए वालग्गकोडीणं  
ते णं वालग्गो नो अग्गी डहेज्जा, नो वाऊ हरेज्जा, नो कुहेज्जा, नो पलिविद्धंसिज्जा,  
नो पूहत्ताए हव्वमागच्छेज्जा, तओ णं समए समए एगमेणं वालग्गं अवहाय जावइ-  
एणं कालेणं से पळे खीणे नीरए निळेवे निट्ठिए भवइ से तं वावहारिए उद्धारपलिओ-  
वमे । **गाहा**-एएसिं पल्लानं, कोडाकोडी हवेज्ज दसगुणिया । तं ववहारियस्स उद्धार-  
सागरोवमस्स, एगस्स भवे परिमाणं ॥ १ ॥ एएहिं वावहारियउद्धारपलिओवमसागरोव-  
मेहिं किं पओयणं ? एएहिं वावहारियउद्धारपलिओवमसागरोवमेहिं-णत्थि किंचिप्पओ-  
यणं, केवलं पण्णवणा पण्णविज्जइ । सेतं वावहारिए उद्धारपलिओवमे । से किं तं

सुहुमे उद्धारपलिओवमे ? सुहुमे उद्धारपलिओवमे-से जहानामए पळे सिया-जोयणं आयामविकखंभेणं, जोयणं उव्वेहेणं, तं तिगुणं सविसेसं परिकखेवेणं, से णं पळे एगा-हियबेयाहियतेयाहिय जाव उक्कोसेणं सत्तरत्तपरुढाणं संसट्ठे संनिचिए भरिए वालग्ग-कोडीणं, तत्थ णं एगमेगे वालग्गे असंखिज्जाई खंडाई कज्जइ, ते णं वालग्गा दिट्ठि-ओगाहणाओ असंखेज्जभागमेत्ता सुहुमस्स पणगजीवस्स सरीरोगाहणाउ असंखेज्ज-गुणा, ते णं वालग्गा णो अग्गी डहेज्जा, णो वाऊ हरेज्जा, णो कुहेज्जा, णो पलि-विद्धंसिज्जा, णो पूइत्ताए हव्वमागच्छेज्जा, तओ णं समए समए एगमेगं वालग्गं अवहाय जावइएणं कालेणं से पळे खीणे नीरए निळेवे निट्टिए भवइ सेत्तं सुहुमे उद्धारपलिओवमे । गाहा-एएसिं पळाणं, कोडाकोडी हवेज्ज दसगुणिया । तं सुहुमस्स उद्धारसागरोवमस्स, एगस्स भवे परिमाणं ॥ २ ॥ एएहिं सुहुमउद्धारपलिओवम-सागरोवमेहिं किं पओयणं ? एएहिं सुहुमउद्धारपलिओवमसागरोवमेहिं दीवसमुद्दाणं उद्धारो घेप्पइ । केवइया णं भंते ! दीवसमुद्दा उद्धारेणं पण्णत्ता ? गोयमा ! जावइ-या णं अट्ठाइज्जाणं उद्धारसागरोवमाणं उद्धारसमया एवइया णं दीवसमुद्दा उद्धारेणं पण्णत्ता । सेत्तं सुहुमे उद्धारपलिओवमे । सेत्तं उद्धारपलिओवमे । से किं तं अद्धापलि-ओवमे ? अद्धापलिओवमे दुविहे पण्णत्ते । तंजहा-सुहुमे य १ वावहारिए य २ । तत्थ णं जे से सुहुमे से ठप्पे । तत्थ णं जे से वावहारिए-से जहानामए पळे सिया-जोयणं आयामविकखंभेणं, जोयणं उव्वेहेणं, तं तिगुणं सविसेसं परिकखेवेणं, से णं पळे एगाहियबेयाहियतेयाहिय जाव भरिए वालग्गकोडीणं, ते णं वालग्गा नो अग्गी डहेज्जा जाव नो पलिविद्धंसिज्जा, नो पूइत्ताए हव्वमागच्छेज्जा, तओ णं वाससए वाससए एगमेगं वालग्गं अवहाय जावइएणं कालेणं से पळे खीणे नीरए निळेवे निट्टिए भवइ से तं वावहारिए अद्धापलिओवमे । गाहा-एएसिं पळाणं, कोडाकोडी भविज्ज दसगुणिया । तं ववहारियस्स अद्धासागरोवमस्स, एगस्स भवे परिमाणं ॥ ३ ॥ एएहिं वावहारियअद्धापलिओवमसागरोवमेहिं किं पओयणं ? एएहिं वावहारिय-अद्धापलिओवमसागरोवमेहिं णत्थि किंचिप्पओयणं, केवलं पण्णवणा पण्णविज्जइ । सेत्तं वावहारिए अद्धापलिओवमे । से किं तं सुहुमे अद्धापलिओवमे ? सुहुमे अद्धा-पलिओवमे-से जहानामए पळे सिया-जोयणं आयामेणं, जोयणं उव्वेहेणं, तं तिगुणं सविसेसं परिकखेवेणं, से णं पळे एगाहियबेयाहियतेयाहिय जाव भरिए वालग्ग-कोडीणं, तत्थ णं एगमेगे वालग्गे असंखिज्जाई खंडाई कज्जइ, ते णं वालग्गा दिट्ठि-ओगाहणाओ असंखेज्जभागमेत्ता सुहुमस्स पणगजीवस्स सरीरोगाहणाओ असंखेज्ज-गुणा, ते णं वालग्गा नो अग्गी डहेज्जा जाव नो पलिविद्धंसिज्जा, नो पूइत्ताए हव्व-



मागच्छेज्जा, तओ णं वाससए वाससए एगमेगं वाल्ढगं अवहाय जावइएणं कालेणं से पढे खीणे नीरए निढेवे निद्धिए भवइ सेत्तं सुहुमे अद्धापलिओवमे । गाहा-एएसिं पढ्ढाणं, कोडाकोडी भवेज्ज दसगुणिवा । तं सुहुमस्स अद्धासागरोवमस्स, एगस्स भवे परिमाणं ॥ ४ ॥ एएहिं सुहुमेहिं अद्धापलिओवमसागरोवमेहिं किं पओयणं ? एएहिं सुहुमेहिं अद्धापलिओवमसागरोवमेहिं णेरइयतिरिक्खजोणियमणुस्सदेवाणं आउयं मविज्जइ ॥ १३९ ॥ णेरइयाणं भंते ! केवइयं कालं ठिई पणत्ता ? गोयमा ! जहण्णेणं दस-वाससहस्साइं, उक्कोसेणं तेत्तीसं सागरोवमाइं । रयणप्पहापुढविणेरइयाणं भंते ! केवइयं कालं ठिई पणत्ता ? गोयमा ! जहण्णेणं दसवाससहस्साइं, उक्कोसेणं एगं सागरोवमं । अपज्जत्तगरयणप्पहापुढविणेरइयाणं भंते ! केवइयं कालं ठिई पणत्ता ? गोयमा ! जहण्णेणं वि अंतोमुहुत्तं, उक्कोसेणं वि अंतोमुहुत्तं । पज्जत्तगरयणप्पहा-पुढविणेरइयाणं भंते ! केवइयं कालं ठिई पणत्ता ? गोयमा ! जहण्णेणं दसवास-सहस्साइं अंतोमुहुत्तूणाइं, उक्कोसेणं एगं सागरोवमं अंतोमुहुत्तूणं । सक्करप्पहापुढ-विणेरइयाणं भंते ! केवइयं कालं ठिई पणत्ता ? गोयमा ! जहण्णेणं एगं सागरो-वमं, उक्कोसेणं तिण्णि सागरोवमाइं । एवं सेसपुढवीसु पुच्छा भाणियव्वा । वालु-यप्पहापुढविणेरइयाणं-जहण्णेणं तिण्णि सागरोवमाइं, उक्कोसेणं सत्तसागरोवमाइं । पंकप्पहापुढविणेरइयाणं-जहण्णेणं सत्तसागरोवमाइं, उक्कोसेणं दससागरोवमाइं । धूमप्पहापुढविणेरइयाणं-जहण्णेणं दससागरोवमाइं, उक्कोसेणं सत्तरससागरोवमाइं । तमप्पहापुढविणेरइयाणं-जहण्णेणं सत्तरससागरोवमाइं, उक्कोसेणं बावीससागरोव-माइं । तमतमापुढविणेरइयाणं भंते ! केवइयं कालं ठिई पणत्ता ? गोयमा ! जह-ण्णेणं बावीसं सागरोवमाइं, उक्कोसेणं तेत्तीसं सागरोवमाइं । असुरकुमारारणं भंते ! केवइयं कालं ठिई पणत्ता ? गोयमा ! जहण्णेणं दसवाससहस्साइं, उक्कोसेणं साइरेगं सागरोवमं । असुरकुमारदेवीणं भंते ! केवइयं कालं ठिई पणत्ता ? गोयमा ! जहण्णेणं दसवाससहस्साइं, उक्कोसेणं अद्धपंचमाइं पलिओवमाइं । नागकुमारारणं भंते ! केवइयं कालं ठिई पणत्ता ? गोयमा ! जहण्णेणं दसवाससहस्साइं, उक्कोसेणं देसूणाइं दुण्णि पलिओवमाइं । नागकुमारीणं भंते ! केवइयं कालं ठिई पणत्ता ? गोयमा ! जहण्णेणं दसवाससहस्साइं, उक्कोसेणं देसूणं पलिओवमं । एवं जहा नागकुमारदेवाणं देवीणं य तहा जाव थणियकुमारारणं देवाणं देवीणं य भाणियव्वं । पुढवीकाइयाणं भंते ! केवइयं कालं ठिई पणत्ता ? गोयमा ! जहण्णेणं अंतोमुहुत्तं, उक्कोसेणं बावीसं वाससहस्साइं । सुहुमपुढवीकाइयाणं ओहियाणं अपज्जत्तयाणं पज्जत्तयाणं य । तिसु वि पुच्छा । गोयमा ! जहण्णेणं अंतोमुहुत्तं, उक्कोसेणं वि अंतोमुहुत्तं । बायरपुढवि-

[illegible]



वि अंतोमुहुत्तं, उक्कोसेण वि अंतोमुहुत्तं । पज्जत्तयसम्मुच्छिमउरपरिसप्पथलयरंपंचिदियुपुच्चा । गोयमा ! जहणेण वि अंतोमुहुत्तं, उक्कोसेण वि अंतोमुहुत्तं । पज्जत्तयसम्म-  
च्छिमउरपरिसप्पथलयरंपंचिदियुपुच्चा । गोयमा ! जहणेणं अंतोमुहुत्तं, उक्कोसेणं  
तेवणं वाससहस्साइं अंतोमुहुत्तूणाईं । गब्भवकंकितियउरपरिसप्पथलयरंपंचिदियुपुच्चा ।  
गोयमा ! जहणेणं अंतोमुहुत्तं, उक्कोसेणं पुव्वकोडी । अपज्जत्तगग्भबवकंकितियउरपरि-  
सप्पथलयरंपंचिदियुपुच्चा । गोयमा ! जहणेण वि अंतोमुहुत्तं, उक्कोसेण वि अंतो-  
मुहुत्तं । पज्जत्तगग्भबवकंकितियउरपरिसप्पथलयरंपंचिदियुपुच्चा । गोयमा ! जहणेणं  
अंतोमुहुत्तं, उक्कोसेणं पुव्वकोडी अंतोमुहुत्तूणा । भुयपरिसप्पथलयरंपंचिदियुपुच्चा ।  
गोयमा ! जहणेणं अंतोमुहुत्तं, उक्कोसेणं पुव्वकोडी । सम्मुच्छिमभुयपरिसप्पथलयर-  
पंचिदियुपुच्चा । गोयमा ! जहणेणं अंतोमुहुत्तं, उक्कोसेणं बायालीसं वाससहस्साइं ।  
अपज्जत्तयसम्मुच्छिमभुयपरिसप्पथलयरंपंचिदियुपुच्चा । गोयमा ! जहणेण वि  
अंतोमुहुत्तं, उक्कोसेण वि अंतोमुहुत्तं । पज्जत्तयसम्मुच्छिमभुयपरिसप्पथलयरंपंचिदिय-  
पुच्चा । गोयमा ! जहणेणं अंतोमुहुत्तं, उक्कोसेणं बायालीसं वाससहस्साइं अंतो-  
मुहुत्तूणाईं । गब्भवकंकितियभुयपरिसप्पथलयरंपंचिदियुपुच्चा । गोयमा ! जहणेणं  
अंतोमुहुत्तं, उक्कोसेणं पुव्वकोडी । अपज्जत्तयग्भबवकंकितियभुयपरिसप्पथलयरंपंचिदि-  
पुच्चा । गोयमा ! जहणेण वि अंतोमुहुत्तं, उक्कोसेण वि अंतोमुहुत्तं । पज्जत्तयग्भ-  
वकंकितियभुयपरिसप्पथलयरंपंचिदियुपुच्चा । गोयमा ! जहणेणं अंतोमुहुत्तं, उक्कोसेणं  
पुव्वकोडी अंतोमुहुत्तूणा । ख्हयरपंचिदियुपुच्चा । गोयमा ! जहणेणं अंतोमुहुत्तं,  
उक्कोसेणं पलिओवमस्स असंखेज्झभागो । सम्मुच्छिमख्हयरपंचिदियुपुच्चा । गोयमा !  
जहणेणं अंतोमुहुत्तं, उक्कोसेणं वावतरिं वाससहस्साइं । अपज्जत्तगसम्मच्छिमख्ह-  
यरपंचिदियुपुच्चा । गोयमा ! जहणेण वि अंतोमुहुत्तं, उक्कोसेण वि अंतोमुहुत्तं ।  
पज्जत्तगसम्मच्छिमख्हयरपंचिदियुपुच्चा । गोयमा ! जहणेणं अंतोमुहुत्तं, उक्कोसेणं  
वावतरिं वाससहस्साइं अंतोमुहुत्तूणाईं । गब्भवकंकितियख्हयरपंचिदियुपुच्चा । गोयमा !  
जहणेणं अंतोमुहुत्तं, उक्कोसेणं पलिओवमस्स असंखेज्झभागो । अपज्जत्तगग्भ-  
वकंकितियख्हयरपंचिदियुपुच्चा । गोयमा ! जहणेण वि अंतोमुहुत्तं, उक्कोसेण वि  
अंतोमुहुत्तं । पज्जत्तगग्भबवकंकितियख्हयरपंचिदियतिरिक्खजोगियाणं भन्ते ! केवड्यं  
कालं दिढें पण्णत्ता ? गोयमा ! जहणेणं अंतोमुहुत्तं, उक्कोसेणं पलिओवमस्स  
असंखेज्झभागो अंतोमुहुत्तूणो । एत्थ एसि णं संगहणिगाहाओ भवंति, तंजहा—  
सम्मच्छिम पुव्वकोडी, चउरासीइं भवे सहस्साइं । तेवण्णा बायाला,  
वावत्तरिमेव पक्खीणं ॥ १ ॥ गब्भंसि पुव्वकोडी, तिण्णि य पलिओवमाइं परमाऊ ।

उरग भुय पुव्वकोडी, पलिओवमासंखभागे य ॥ २ ॥ मणुस्साणं भंते ! केवइयं कालं ठिई पणत्ता ? गोयमा ! जहण्णेणं अंतोमुहुत्तं, उक्कोसेणं तिण्णि पलिओवमाइं । सम्मुच्छिममणुस्साणं पुच्छा । गोयमा ! जहण्णेण वि अंतोमुहुत्तं, उक्कोसेण वि अंतोमुहुत्तं । गम्भवक्कंतियमणुस्साणं पुच्छा । गोयमा ! जहण्णेणं अंतोमुहुत्तं, उक्कोसेणं तिण्णि पलिओवमाइं । अपज्जत्तगगम्भवक्कंतियमणुस्साणं भंते ! केवइयं कालं ठिई पणत्ता ? गोयमा ! जहण्णेणं अंतोमुहुत्तं, उक्कोसेण वि अंतोमुहुत्तं । पज्जत्तगगम्भवक्कंतियमणुस्साणं भंते ! केवइयं कालं ठिई पणत्ता ? गोयमा ! जहण्णेणं अंतोमुहुत्तं, उक्कोसेणं तिण्णि पलिओवमाइं अंतोमुहुत्तूणाइं । वाणमंतराणं देवाणं भंते ! केवइयं कालं ठिई पणत्ता ? गोयमा ! जहण्णेणं दसवाससहस्साइं, उक्कोसेणं पलिओवमं । वाणमंतरीणं देवीणं भंते ! केवइयं कालं ठिई पणत्ता ? गोयमा ! जहण्णेणं दसवाससहस्साइं, उक्कोसेणं अद्धपलिओवमं । जोइसियाणं भंते ! देवाणं केवइयं कालं ठिई पणत्ता ? गोयमा ! जहण्णेणं साइरेणं अट्ठभागपलिओवमं, उक्कोसेणं पलिओवमं वाससयसहस्समब्भहियं । जोइसियदेवीणं भंते ! केवइयं कालं ठिई पणत्ता ? गोयमा ! जहण्णेणं अट्ठभागपलिओवमं, उक्कोसेणं अद्धपलिओवमं पण्णामाए वाससहस्सेहिं अब्भहियं । चंदविमाणानं भंते ! देवाणं केवइयं कालं ठिई पणत्ता ? गोयमा ! जहण्णेणं चउभागपलिओवमं, उक्कोसेणं पलिओवमं वाससयसहस्समब्भहियं । चंदविमाणानं भंते ! देवीणं पुच्छा । गोयमा ! जहण्णेणं चउभागपलिओवमं, उक्कोसेणं अद्धपलिओवमं पण्णासाए वाससहस्सेहिं अब्भहियं । सूरविमाणानं भंते ! देवाणं पुच्छा । गोयमा ! जहण्णेणं चउभागपलिओवमं, उक्कोसेणं पलिओवमं वाससहस्समब्भहियं । सूरविमाणानं देवीणं पुच्छा । गोयमा ! जहण्णेणं चउभागपलिओवमं, उक्कोसेणं अद्धपलिओवमं पंचहिं वाससएहिं अब्भहियं । गहविमाणानं भंते ! देवाणं केवइयं कालं ठिई पणत्ता ? गोयमा ! जहण्णेणं चउभागपलिओवमं, उक्कोसेणं पलिओवमं । गहविमाणानं भंते ! देवीणं पुच्छा । गोयमा ! जहण्णेणं चउभागपलिओवमं, उक्कोसेणं अद्धपलिओवमं । णक्खत्तविमाणानं भंते ! देवाणं पुच्छा । गोयमा ! जहण्णेणं चउभागपलिओवमं, उक्कोसेणं अद्धपलिओवमं । णक्खत्तविमाणानं देवीणं पुच्छा । गोयमा ! जहण्णेणं चउभागपलिओवमं, उक्कोसेणं साइरेणं चउभागपलिओवमं । ताराविमाणानं भंते ! देवाणं पुच्छा । गोयमा ! जहण्णेणं साइरेणं अट्ठभागपलिओवमं, उक्कोसेणं चउभागपलिओवमं । ताराविमाणानं भंते ! देवीणं केवइयं कालं ठिई पणत्ता ? गोयमा ! जहण्णेणं अट्ठभागपलिओवमं, उक्कोसेणं साइरेणं अट्ठभागपलिओवमं । वेमाणियाणं

भंते ! देवाणं केवइयं कालं ठिई पणत्ता ? गोयमा ! जहण्णेणं पलिओवमं, उक्कोसेणं  
 तेतीसं सागरोवमाई । वेमाणियाणं भंते ! देवीणं केवइयं कालं ठिई पणत्ता ?  
 गोयमा ! जहण्णेणं पलिओवमं, उक्कोसेणं पणपणं पलिओवमाई । सोहम्मं णं  
 भंते ! कप्पे देवाणं पुच्छा । गोयमा ! जहण्णेणं पलिओवमं, उक्कोसेणं दो सागरो-  
 वमाई । सोहम्मं णं भंते ! कप्पे परिग्गहियादेवीणं पुच्छा । गोयमा ! जहण्णेणं  
 पलिओवमं, उक्कोसेणं सत्तपलिओवमाई । सोहम्मं णं भंते ! कप्पे अपरिग्गहिया-  
 देवीणं केवइयं कालं ठिई पणत्ता ? गोयमा ! जहण्णेणं पलिओवमं, उक्कोसेणं  
 पण्णासं पलिओवमं । ईसाणे णं भंते ! कप्पे देवाणं केवइयं कालं ठिई पणत्ता ?  
 गोयमा ! जहण्णेणं साइरेगं पलिओवमं, उक्कोसेणं साइरेगाई दो सागरोवमाई ।  
 ईसाणे णं भंते ! कप्पे परिग्गहियादेवीणं केवइयं कालं ठिई पणत्ता ? गोयमा !  
 जहण्णेणं साइरेगं पलिओवमं, उक्कोसेणं नवपलिओवमाई । ईसाणे णं भंते ! कप्पे  
 अपरिग्गहियादेवीणं केवइयं कालं ठिई पणत्ता ? गोयमा ! जहण्णेणं साइरेगं  
 पलिओवमं, उक्कोसेणं पणपणं पलिओवमाई । सणकुमारे णं भंते ! कप्पे देवाणं  
 पुच्छा । गोयमा ! जहण्णेणं दो सागरोवमाई, उक्कोसेणं सत्तसागरोवमाई । माहिंदे णं  
 भंते ! कप्पे देवाणं पुच्छा । गोयमा ! जहण्णेणं साइरेगाई दो सागरोवमाई,  
 उक्कोसेणं साइरेगाई सत्तसागरोवमाई । बंभलोए णं भंते ! कप्पे देवाणं पुच्छा ।  
 गोयमा ! जहण्णेणं सत्तसागरोवमाई, उक्कोसेणं दससागरोवमाई । एवं कप्पे कप्पे  
 केवइयं कालं ठिई पणत्ता ? गोयमा ! एवं भाणियव्वं-लंतए-जहण्णेणं दससागरो-  
 वमाई, उक्कोसेणं चउइस सागरोवमाई । महासुक्के-जहण्णेणं चउइस सागरोवमाई,  
 उक्कोसेणं सत्तरस सागरोवमाई । सहस्सारे-जहण्णेणं सत्तरस सागरोवमाई, उक्कोसेणं  
 अट्ठारस सागरोवमाई । आणए-जहण्णेणं अट्ठारस सागरोवमाई, उक्कोसेणं एगूण-  
 वीसं सागरोवमाई । पाणए-जहण्णेणं एगूणवीसं सागरोवमाई, उक्कोसेणं वीसं  
 सागरोवमाई । आरणे-जहण्णेणं वीसं सागरोवमाई, उक्कोसेणं एकवीसं सागरो-  
 वमाई । अञ्चुए-जहण्णेणं एकवीसं सागरोवमाई, उक्कोसेणं बावीसं सागरोवमाई ।  
 हेट्ठिमहेट्ठिमगेविज्जविमाणेषु णं भंते ! देवाणं केवइयं कालं ठिई पणत्ता ? गोयमा !  
 जहण्णेणं बावीसं सागरोवमाई, उक्कोसेणं तेवीसं सागरोवमाई । हेट्ठिममज्झिमगेवि-  
 ज्जविमाणेषु णं भंते ! देवाणं० ? गोयमा ! जहण्णेणं तेवीसं सागरोवमाई, उक्कोसेणं  
 चउवीसं सागरोवमाई । हेट्ठिमउवरिमगेविज्जविमाणेषु णं भंते ! देवाणं० ? गोयमा !  
 जहण्णेणं चउवीसं सागरोवमाई, उक्कोसेणं पणवीसं सागरोवमाई । मज्झिमहेट्ठिम-  
 गेवेज्जविमाणेषु णं भंते ! देवाणं० ? गोयमा ! जहण्णेणं पणवीसं सागरोवमाई,

उक्कोसेणं छव्वीसं सागरोवमाई । मज्झिममज्झिमगेवेज्जविमाणेसु णं भंते ! देवाणं० ? गोयमा ! जहण्णेणं छव्वीसं सागरोवमाई, उक्कोसेणं सत्तावीसं सागरोवमाई । मज्झिमउवरिमगेवेज्जविमाणेसु णं भंते ! देवाणं० ? गोयमा ! जहण्णेणं सत्तावीसं सागरोवमाई, उक्कोसेणं अट्ठावीसं सागरोवमाई । उवरिमहेट्ठिमगेवेज्जविमाणेसु णं भंते ! देवाणं० ? गोयमा ! जहण्णेणं अट्ठावीसं सागरोवमाई, उक्कोसेणं एगूणतीसं सागरोवमाई । उवरिममज्झिमगेवेज्जविमाणेसु णं भंते ! देवाणं० ? गोयमा ! जहण्णेणं एगूणतीसं सागरोवमाई, उक्कोसेणं तीसं सागरोवमाई । उवरिमउवरिमगेवेज्जविमाणेसु णं भंते ! देवाणं० ? गोयमा ! जहण्णेणं तीसं सागरोवमाई, उक्कोसेणं इक्कीतीसं सागरोवमाई । विजयवेज्जयंतजयंतअपराजियविमाणेसु णं भंते ! देवाणं केवइयं कालं ठिई पण्णत्ता ? गोयमा ! जहण्णेणं इक्कीतीसं सागरोवमाई, उक्कोसेणं तेत्तीसं सागरोवमाई । सव्वट्ठसिद्धे णं भंते ! महाविमाणे देवाणं केवइयं कालं ठिई पण्णत्ता ? गोयमा ! अजहण्णमणुक्कोसेणं तेत्तीसं सागरोवमाई । सेतं सुहुमे अट्ठापलिओवमे । सेतं अट्ठापलिओवमे ॥ १४० ॥ से किं तं खेतपलिओवमे ? खेतपलिओवमे दुविहे पण्णत्ते । तंजहा-सुहुमे य १ वावहारिए य २ । तत्थ णं जे से सुहुमे से ठप्पे । तत्थ णं जे से वावहारिए-से जहानामए पळे सिया-जोयणं आयामविक्खंभेणं, जोयणं उव्वेहेणं, तं तिगुणं सविसेसं परिक्खेवेणं, से णं पळे एगाहियबेयाहियतेयाहिय जाव भरिए वालग्गकोडीणं, ते णं वालग्ग गो अग्गी डहेज्जा जाव गो पूइत्ताए हव्वमागच्छेज्जा, जे णं तस्स पळस्स आगासपएसा तेहिं वालग्गेहिं अप्फुण्णा तओ णं समए समए एगमेगं आगासपएसं अवहाय जावइएणं कालेणं से पळे खीणे जाव णिट्ठिए भवइ से तं वावहारिए खेतपलिओवमे । गाहा-एएसिं पळ्ळानं, कोडाकोडी भवेज्ज दसगुणिया । तं ववहारियस्स खेतसागरोवमस्स, एगस्स भवे परिमाणं ॥ १ ॥ एएहिं वावहारिएहिं खेतपलिओवमसागरोवमेहिं किं पओयणं ? एएहिं वावहारिएहिं खेतपलिओवमसागरोवमेहिं णत्थि किंचिप्पओयणं, केवलं पण्णवणा पण्णविज्जइ । सेतं वावहारिए खेतपलिओवमे । से किं तं सुहुमे खेतपलिओवमे ? सुहुमे खेतपलिओवमे-से जहाणा-मए पळे सिया-जोयणं आयामविक्खंभेणं जाव तं तिगुणं सविसेसं परिक्खेवेणं, से णं पळे एगाहियबेयाहियतेयाहिय जाव भरिए वालग्गकोडीणं, तत्थ णं एममेगे वालग्गे असंखिज्जाइं खंडाइं कज्जइ, ते णं वालग्ग दिट्ठिओगाहणाओ असंखेज्जइ-भागमेत्ता सुहुमस्स पण्णजीवस्स सरीरोगाहणाओ असंखेज्जगुणा, ते णं वालग्ग नो अग्गी डहेज्जा जाव नो पूइत्ताए हव्वमागच्छेज्जा, जे णं तस्स पळस्स आगासपएसा तेहिं वालग्गेहिं अप्फुण्णा वा अणाफुण्णा वा तओ णं समए समए एगमेगं आगास-

पएसं अवहाय जावइएणं कालेणं से पल्ले खीणे जाव निट्टिए भवइ सेतं सुहुमे खेत-  
 पलिओवमे । तत्थ णं चोयए पण्णवगं एवं वयासी-अत्थि णं तस्स पल्लस्स आगास-  
 पएसा जे णं तेहिं वालग्गेहिं अणाफुण्णा ? हंता ! अत्थि । जहा को दिट्ठो ? से  
 जहाणामए कोट्टए सिया कोहंडाणं भरिए, तत्थ णं माउलिंगा पक्खित्ता ते वि  
 माया, तत्थ णं बिह्वा पक्खित्ता ते वि माया, तत्थ णं आमलगा पक्खित्ता ते वि  
 माया, तत्थ णं बयरा पक्खित्ता ते वि माया, तत्थ णं चणगा पक्खित्ता ते वि  
 माया, तत्थ णं मुग्गा पक्खित्ता ते वि माया, तत्थ णं सरिसवा पक्खित्ता ते वि  
 माया, तत्थ णं गंगावालुया पक्खित्ता सा वि माया, एवमेव एएणं दिट्ठतेणं अत्थि  
 णं तस्स पल्लस्स आगासपएसा जे णं तेहिं वालग्गेहिं अणाफुण्णा । गाहा-एएसिं  
 पल्लानं, कोडाकोडी भवेज्ज दसगुणिया । तं सुहुमस्स खेतसागरोवमस्स, एगस्स भवे  
 परिमाणं ॥ २ ॥ एएहिं सुहुमेहिं खेतपलिओवमसागरोवमेहिं किं पओयणं ? एएहिं  
 सुहुमेहिं खेतपलिओवमसागरोवमेहिं दिट्ठिवाए दव्वा मविज्जंति ॥ १४१ ॥ कइविहा  
 णं भंते ! दव्वा पण्णत्ता ? गोयमा ! दुविहा पण्णत्ता । तंजहा—जीवदव्वा य १  
 अजीवदव्वा य २ । अजीवदव्वा णं भंते ! कइविहा पण्णत्ता ? गोयमा ! दुविहा  
 पण्णत्ता । तंजहा—रूवीअजीवदव्वा य १ अरूवीअजीवदव्वा य २ । अरूवीअजीव-  
 दव्वा णं भंते ! कइविहा पण्णत्ता ? गोयमा ! दसविहा पण्णत्ता । तंजहा—  
 धम्मत्थिकाए १ धम्मत्थिकायस्स देसा २ धम्मत्थिकायस्स पएसा ३ अधम्मत्थि-  
 काए ४ अधम्मत्थिकायस्स देसा ५ अधम्मत्थिकायस्स पएसा ६ आगासत्थिकाए ७  
 आगासत्थिकायस्स देसा ८ आगासत्थिकायस्स पएसा ९ अद्धासमए १० । रूवी-  
 अजीवदव्वा णं भंते ! कइविहा पण्णत्ता ? गोयमा ! चउव्विहा पण्णत्ता । तंजहा—  
 खंधा १ खंधदेसा २ खंधपएसा ३ परमाणुपोगला ४ । ते णं भंते ! किं संखिज्जा  
 असंखिज्जा अणंता ? गोयमा ! नो संखिज्जा, नो असंखिज्जा, अणंता । से केणट्ठेणं  
 भंते ! एवं वुच्चइ-नो संखिज्जा, नो असंखिज्जा, अणंता ? गोयमा ! अणंता परमा-  
 णुपोगला, अणंता दुपएसिया खंधा जाव अणंता अणंतपएसिया खंधा, से एए-  
 णट्ठेणं गोयमा ! एवं वुच्चइ-नो संखिज्जा, नो असंखिज्जा, अणंता । जीवदव्वा णं भंते !  
 किं संखिज्जा असंखिज्जा अणंता ? गोयमा ! नो संखिज्जा, नो असंखिज्जा, अणंता ।  
 से केणट्ठेणं भंते ! एवं वुच्चइ-नो संखिज्जा, नो असंखिज्जा, अणंता ? गोयमा !  
 असंखिज्जा णेरइया, असंखिज्जा असुरकुमारा जाव असंखिज्जा थणियकुमारा, असं-  
 खिज्जा पुढविकाइया जाव असंखिज्जा वाउकाइया, अणंता वणस्सइकाइया, असंखिज्जा  
 बेइंदिया जाव असंखिज्जा चउरिंदिया, असंखिज्जा पविंदियतिरिक्खजोणिया, असं-



खिज्जा मणुस्सा, असंखिज्जा वाणमंतरा, असंखिज्जा जोइसिया, असंखिज्जा वेमाणिया,  
 अणंता सिद्धा, से एणट्टेणं गोयमा ! एवं वुच्चइ-नो संखिज्जा, नो असंखिज्जा,  
 अणंता ॥ १४२ ॥ कइविहा णं भंते ! सरीरा पण्णत्ता ? गोयमा ! पंच सरीरा पण्णत्ता ।  
 तंजहा-ओरालिए १ वेउव्विए २ आहारए ३ तेयए ४ कम्मए ५ । णेरइयाणं भंते !  
 कइ सरीरा पण्णत्ता ? गोयमा ! तओ सरीरा पण्णत्ता । तंजहा-वेउव्विए १ तेयए २  
 कम्मए ३ । अउरुकुमारणं भंते ! कइ सरीरा पण्णत्ता ? गोयमा ! तओ सरीरा  
 पण्णत्ता । तंजहा-वेउव्विए १ तेयए २ कम्मए ३ । एवं तिण्णि तिण्णि एए चेव  
 सरीरा जाव थणियकुमारणं भाणियव्वा । पुढविकाइयाणं भंते ! कइ सरीरा  
 पण्णत्ता ? गोयमा ! तओ सरीरा पण्णत्ता । तंजहा-ओरालिए १ तेयए २ कम्मए ३ ।  
 एवं आउतेउवणस्सइकाइयाण वि एए चेव तिण्णि सरीरा भाणियव्वा । वाउकाइ-  
 याणं भंते ! कइ सरीरा पण्णत्ता ? गोयमा ! चत्तारि सरीरा पण्णत्ता । तंजहा-ओरा-  
 लिए १ वेउव्विए २ तेयए ३ कम्मए ४ । वेइंदियतेइंदियचउरिंदियाणं जहा पुढ-  
 वीकाइयाणं । पंचिंदियतिरिक्खजोणियाणं जहा वाउकाइयाणं । मणुस्साणं भंते ! कइ  
 सरीरा पण्णत्ता ? गोयमा ! पंच सरीरा पण्णत्ता । तंजहा-ओरालिए १ वेउव्विए २  
 आहारए ३ तेयए ४ कम्मए ५ । वाणमंतराणं जोइसियाणं वेमाणियाणं जहा  
 णेरइयाणं । केवइया णं<sup>१</sup> भंते ! ओरालियसरीरा पण्णत्ता ? गोयमा ! दुविहा पण्णत्ता ।  
 तंजहा-बद्धेळ्ळा य १ मुक्केळ्ळा य २ । तत्थ णं जे ते बद्धेळ्ळा ते णं असंखिज्जा,  
 असंखिज्जाहिं उस्सप्पिणीओसप्पिणीहिं अवहीरंति कालओ, खेत्तओ असंखेज्जा  
 लोगा । तत्थ णं जे ते मुक्केळ्ळा ते णं अणंता, अणंताहिं उस्सप्पिणीओसप्पिणीहिं  
 अवहीरंति कालओ, खेत्तओ अणंता लोगा, दव्वओ अभवसिद्धिएहिं अणंतगुणा,  
 सिद्धाणं अणंतभागो । केवइया णं भंते ! वेउव्वियसरीरा पण्णत्ता ? गोयमा ! दुविहा  
 पण्णत्ता । तंजहा-बद्धेळ्ळा य १ मुक्केळ्ळा य २ । तत्थ णं जे ते बद्धेळ्ळा ते णं  
 असंखिज्जा, असंखेज्जाहिं उस्सप्पिणीओसप्पिणीहिं अवहीरंति कालओ, खेत्तओ  
 असंखिज्जाओ सेढीओ पयरस्स असंखेज्जइभागो । तत्थ णं जे ते मुक्केळ्ळा ते णं  
 अणंता, अणंताहिं उस्सप्पिणीओसप्पिणीहिं अवहीरंति कालओ, सेसं जहा ओरालि-  
 यस्स मुक्केळ्ळा तहा एए वि भाणियव्वा । केवइया णं भंते ! आहारगसरीरा पण्णत्ता ?  
 गोयमा ! दुविहा पण्णत्ता । तंजहा-बद्धेळ्ळा य १ मुक्केळ्ळा य २ । तत्थ णं जे ते  
 बद्धेळ्ळा ते णं सिय अत्थि सिय णत्थि, जइ अत्थि जहण्णेणं एगो वा दो वा  
 तिण्णि वा, उक्कोसेणं सहस्सपुहत्तं । मुक्केळ्ळा जहा ओरालिया तहा भाणियव्वा ।

केवइया णं भंते ! तेयगसरीरा पण्णत्ता ? गोयमा ! दुविहा पण्णत्ता । तंजहा-बद्धे-  
 ल्लया य १ मुक्केल्लया य २ । तत्थ णं जे ते बद्धेल्लया ते णं अणंता, अणंताहिं  
 उस्सप्पिणीओसप्पिणीहिं अवहीरंति कालओ, खेतओ अणंता लोगा, दव्वओ  
 सिद्धेहिं अणंतगुणा, सव्वजीवाणं अणंतभागूणा । तत्थ णं जे ते मुक्केल्लया ते णं  
 अणंता, अणंताहिं उस्सप्पिणीओसप्पिणीहिं अवहीरंति कालओ, खेतओ अणंता  
 लोगा, दव्वओ सव्वजीवेहिं अणंतगुणा, सव्वजीववग्गस्स अणंतभागो । केवइया  
 णं भंते ! कम्मगसरीरा पण्णत्ता ? गोयमा ! दुविहा पण्णत्ता । तंजहा-बद्धे-  
 ल्लया य १ मुक्केल्लया य २ । जहा तेयगसरीरा तहा कम्मगसरीरा वि भाणियव्वा । णेरइयाणं  
 भंते ! केवइया ओरालियसरीरा पण्णत्ता ? गोयमा ! दुविहा पण्णत्ता । तंजहा-बद्धे-  
 ल्लया य १ मुक्केल्लया य २ । तत्थ णं जे ते बद्धेल्लया ते णं णत्थि । तत्थ णं जे  
 ते मुक्केल्लया ते जहा ओहिया ओरालियसरीरा तहा भाणियव्वा । णेरइयाणं भंते !  
 केवइया वेउव्वियसरीरा पण्णत्ता ? गोयमा ! दुविहा पण्णत्ता । तंजहा-बद्धे-  
 ल्लया य १ मुक्केल्लया य २ । तत्थ णं जे ते बद्धेल्लया ते णं असंखिजा, असंखिजाहिं उस्स-  
 प्पिणीओसप्पिणीहिं अवहीरंति कालओ, खेतओ असंखेजाओ सेढीओ पयरस्स  
 असंखिजइभागो, तासि णं सेढीणं विक्खंभसूई अंगुलपढमवग्गमूलं विइयवग्गमूल-  
 पडुपणं, अहवा णं अंगुलविइयवग्गमूलघणपमाणमेत्ताओ सेढीओ । तत्थ णं जे ते  
 मुक्केल्लया ते णं जहा ओहिया ओरालियसरीरा तहा भाणियव्वा । णेरइयाणं भंते !  
 केवइया आहारगसरीरा पण्णत्ता ? गोयमा ! दुविहा पण्णत्ता । तंजहा-बद्धे-  
 ल्लया य १ मुक्केल्लया य २ । तत्थ णं जे ते बद्धेल्लया ते णं णत्थि । तत्थ णं जे ते मुक्के-  
 ल्लया ते जहा ओहिया तहा भाणियव्वा । तेयगकम्मगसरीरा जहा एएसिं चेव  
 वेउव्वियसरीरा तहा भाणियव्वा । असुरकुमारणं भंते ! केवइया ओरालियसरीरा  
 पण्णत्ता ? गोयमा ! जहा णेरइयाणं ओरालियसरीरा तहा भाणियव्वा । असुर-  
 कुमारणं भंते ! केवइया वेउव्वियसरीरा पण्णत्ता ? गोयमा ! दुविहा पण्णत्ता ।  
 तंजहा-बद्धे-  
 ल्लया य १ मुक्केल्लया य २ । तत्थ णं जे ते बद्धेल्लया ते णं असंखिजा,  
 असंखिजाहिं उस्सप्पिणीओसप्पिणीहिं अवहीरंति कालओ, खेतओ असंखेजाओ  
 सेढीओ पयरस्स असंखिजइभागो, तासि णं सेढीणं विक्खंभसूई अंगुलपढमवग्गमूलस्स  
 असंखिजइभागो । मुक्केल्लया जहा ओहिया ओरालियसरीरा । असुरकुमारणं भंते !  
 केवइया आहारगसरीरा पण्णत्ता ? गोयमा ! दुविहा पण्णत्ता । तंजहा-बद्धे-  
 ल्लया य १ मुक्केल्लया य २ । जहा एएसिं चेव ओरालियसरीरा तहा भाणियव्वा । तेयगकम्म-  
 गसरीरा जहा एएसिं चेव वेउव्वियसरीरा तहा भाणियव्वा । जहा असुरकुमारणं

तहा जाव अणियकुमारणं ताव भाणियव्वा । पुढविकाइयाणं भंते ! केवइया ओरा-  
 लियसरीरा पण्णत्ता ? गोयमा ! दुविहा पण्णत्ता । तंजहा—वद्धेळ्या य १ मुक्केळ्या  
 य २ । एवं जहा ओहिया ओरालियसरीरा तहा भाणियव्वा । पुढविकाइयाणं भंते !  
 केवइया वेउव्वियसरीरा पण्णत्ता ? गोयमा ! दुविहा पण्णत्ता । तंजहा—वद्धेळ्या य १  
 मुक्केळ्या य २ । तत्थ णं जे ते वद्धेळ्या ते णं णत्थि । मुक्केळ्या जहा ओहियाणं  
 ओरालियसरीरा तहा भाणियव्वा । आहारगसरीरा वि एवं चेव भाणियव्वा । तेयग-  
 कम्मसरीरा जहा एएसिं चेव ओरालियसरीरा तहा भाणियव्वा । जहा पुढविकाइयाणं  
 एवं आउकाइयाणं तेउकाइयाणं य सव्वसरीरा भाणियव्वा । वाउकाइयाणं भंते !  
 केवइया ओरालियसरीरा पण्णत्ता ? गोयमा ! दुविहा पण्णत्ता । तंजहा—वद्धेळ्या  
 य १ मुक्केळ्या य २ । जहा पुढविकाइयाणं ओरालियसरीरा तहा भाणियव्वा । वाउ-  
 काइयाणं केवइया वेउव्वियसरीरा पण्णत्ता ? गोयमा ! दुविहा पण्णत्ता । तंजहा—  
 वद्धेळ्या य १ मुक्केळ्या य २ । तत्थ णं जे ते वद्धेळ्या ते णं असंखिज्जा,  
 समए समए अवहीरमाणा खेतपलिओवमस्स असंखिज्जभागमेत्तेणं कालेणं अव-  
 हीरंति, नो चेव णं अवहिया सिया । मुक्केळ्या वेउव्वियसरीरा आहारगसरीरा  
 य जहा पुढविकाइयाणं तहा भाणियव्वा । तेयगकम्मसरीरा जहा पुढविकाइयाणं  
 तहा भाणियव्वा । वणस्सइकाइयाणं ओरालियवेउव्वियआहारगसरीरा जहा  
 पुढविकाइयाणं तहा भाणियव्वा । वणस्सइकाइयाणं भंते ! केवइया तेयगसरीरा  
 पण्णत्ता ? गोयमा दुविहा पण्णत्ता । जहा ओहिया तेयगकम्मसरीरा तहा वणस्सइ-  
 काइयाणं वि तेयगकम्मसरीरा भाणियव्वा । बेइंदियाणं भंते ! केवइया ओरा-  
 लियसरीरा पण्णत्ता ? गोयमा ! दुविहा पण्णत्ता । तंजहा—वद्धेळ्या य १  
 मुक्केळ्या य २ । तत्थ णं जे ते वद्धेळ्या ते णं असंखिज्जा, असंखिज्जाहिं उस्सप्पिणी-  
 ओसप्पिणीहिं अवहीरंति कालओ, खेतओ असंखेज्जाओ सेढीओ पयरस्स असंखिज्जइ-  
 भागो, तासि णं सेढीणं विक्खंभसूई असंखेज्जाओ जोयणकोडाकोडीओ, असंखिज्जाइं  
 सेट्ठिवग्गमूलाइं, बेइंदियाणं ओरालियवद्धेळ्याहिं पयरं अवहीरइ असंखिज्जाहिं  
 उस्सप्पिणीओसप्पिणीहिं कालओ, खेतओ अंगुलपयरस्स आवलियाए असंखिज्जइ-  
 भागपडिभागेणं । मुक्केळ्या जहा ओहिया ओरालियसरीरा तहा भाणियव्वा ।  
 वेउव्वियआहारगसरीरा वद्धेळ्या नत्थि । मुक्केळ्या जहा ओहिया ओरालियसरीरा  
 तहा भाणियव्वा । तेयगकम्मसरीरा जहा एएसिं चेव ओरालियसरीरा तहा  
 भाणियव्वा । जहा बेइंदियाणं तहा तेइंदियच्चउरिंदियाणं वि भाणियव्वा ।  
 पंचिंदियतिरिक्खजोणियाणं वि ओरालियसरीरा एवं चेव भाणियव्वा । पंचिंदियति-

रिक्खजोगियाणं भंते ! केवइया वेउव्वियसरीरा पण्णत्ता ? गोयमा ! दुविहा पण्णत्ता । तंजहा-बद्धेळ्या य १ मुक्केळ्या य २ । तत्थ णं जे ते बद्धेळ्या ते णं असंखिजा, असंखिजाहिं उस्सप्पिणीओसप्पिणीहिं अवहीरंति कालओ, खेतओ असंखेजाओ सेढीओ पयरस्स असंखिजइभागो, तासि णं सेढीणं विक्खंभसुई अंगुलपढमवग्ग-मूलस्स असंखिजइभागो । मुक्केळ्या जहा ओहिया ओरालिया तहा भाणियव्वा । आहारयसरीरा जहा बेइंदियाणं तेयगकम्मसरीरा जहा ओरालिया । मणुस्साणं भंते ! केवइया ओरालियसरीरा पण्णत्ता ? गोयमा ! दुविहा पण्णत्ता । तंजहा-बद्धेळ्या य १ मुक्केळ्या य २ । तत्थ णं जे ते बद्धेळ्या ते णं सिय संखिजा सिय असंखिजा, जहण्णपए संखेजा, संखिजाओ कोडाकोडीओ, एगूणतीसं ठाणई तिजमलपयरस्स उवरिं चउजमलपयरस्स हेट्ठा, अहव णं छट्ठो वग्गो पंचमवग्गपडुप्पण्णो, अहव णं छण्णउइछेयणगदाइरासी, उक्कोसपए असंखेजा, असंखेजाहिं उस्सप्पिणीओसप्पिणीहिं अवहीरंति कालओ, खेतओ उक्कोसपए रुवपक्खित्तेहिं मणुस्सेहिं सेढी अवहीरइ कालओ असंखिजाहिं उस्सप्पिणीओसप्पिणीहिं, खेतओ अंगुलपढमवग्गमूलं तइय-वग्गमूलपडुप्पण्णं । मुक्केळ्या जहा ओहिया ओरालिया तहा भाणियव्वा । मणुस्साणं भंते ! केवइया वेउव्वियसरीरा पण्णत्ता ? गोयमा ! दुविहा पण्णत्ता । तंजहा-बद्धेळ्या य १ मुक्केळ्या य २ । तत्थ णं जे ते बद्धेळ्या ते णं संखिजा, समए समए अव-हीरमाणा अवहीरमाणा संखेजेणं कालेणं अवहीरंति, नो चेव णं अवहिया सिया । मुक्केळ्या जहा ओहिया ओरालियाणं मुक्केळ्या तहा भाणियव्वा । मणुस्साणं भंते ! केवइया आहारगसरीरा पण्णत्ता ? गोयमा ! दुविहा पण्णत्ता । तंजहा-बद्धेळ्या य १ मुक्केळ्या य २ । तत्थ णं जे ते बद्धेळ्या ते णं सिय अत्थि सिय णत्थि, जइ अत्थि जहण्णेणं एक्को वा दो वा तिण्णि वा, उक्कोसेणं सहस्सपुहत्तं । मुक्केळ्या जहा ओहिया ओरालिया तहा भाणियव्वा । तेयगकम्मगसरीरा जहा एएसिं चेव ओरालिया तहा भाणियव्वा । वाणमंतराणं ओरालियसरीरा जहा णेरइयाणं । वाणमंतराणं भंते ! केवइया वेउव्वियसरीरा पण्णत्ता ? गोयमा ! दुविहा पण्णत्ता । तंजहा-बद्धेळ्या य १ मुक्केळ्या य २ । तत्थ णं जे ते बद्धेळ्या ते णं असंखेजा, असंखेजाहिं उस्सप्पिणी-ओसप्पिणीहिं अवहीरंति कालओ, खेतओ असंखिजाओ सेढीओ पयरस्स असं-खेजइभागो, तासि णं सेढीणं विक्खंभसुई संखेजजोयणसयवग्गपलिभागो पयरस्स । मुक्केळ्या जहा ओहिया ओरालिया तहा भाणियव्वा । आहारयसरीरा दुविहा वि जहा असुरकुमाराणं तहा भाणियव्वा । वाणमंतराणं भंते ! केवइया तेयगकम्मसरीरा पण्णत्ता ? गोयमा ! जहा एएसिं चेव वेउव्वियसरीरा तहा तेयगकम्मसरीरा भाणि-

यच्चा । जोइसियाणं भंते ! केवइया वेउव्वियसरीरा पण्णत्ता ? गोयमा ! दुविहा पण्णत्ता । तंजहा-बद्धेळ्ळया य १ मुक्केळ्ळया य २ । तत्थ णं जे ते बद्धेळ्ळया जाव तासि णं सेढीणं विक्खंभसई, वेछप्पण्णंगुलसयवग्गपलिभागो पयरस्स । मुक्केळ्ळया जहा ओहिया ओरालिया तहा भाणियच्चा । आहारयसरीरा जहा णेरइयाणं तहा भाणियच्चा । तेयगक्कम्मगसरीरा जहा एएसिं चैव वेउव्विया तहा भाणियच्चा । वेमाणियाणं भंते ! केवइया ओरालियसरीरा पण्णत्ता ? गोयमा ! जहा णेरइयाणं तहा भाणियच्चा । वेमाणियाणं भंते ! केवइया वेउव्वियसरीरा पण्णत्ता ? गोयमा ! दुविहा पण्णत्ता । तंजहा-बद्धेळ्ळया य १ मुक्केळ्ळया य २ । तत्थ णं जे ते बद्धेळ्ळया ते णं असंखिजा, असंखिजाहिं उस्सप्पिणीओसप्पिणीहिं अवहीरंति कालओ, खेतओ असंखिजाओ सेढीओ पयरस्स असंखेज्जइभागो, तासि णं सेढीणं विक्खंभसई अंगुलवीयवग्गमूलं तइयवग्गमूलपटुप्पण्णं, अहव णं अंगुलतइयवग्गमूलघण-पमाणमेताओ सेढीओ । मुक्केळ्ळया जहा ओहिया ओरालिया तहा भाणियच्चा । आहारगसरीरा जहा णेरइयाणं । तेयगक्कम्मगसरीरा जहा एएसिं चैव वेउव्वियसरीरा तहा भाणियच्चा । सेत्तं सुट्ठमे खेतपलिओवमे । सेत्तं खेतपलिओवमे । सेत्तं पलि-ओवमे । सेत्तं विभागनिप्पण्णे । सेत्तं कालप्पमाणे ॥ १४३ ॥ से किं तं भावप्पमाणे ? भावप्पमाणे तिविहे पण्णत्ते । तंजहा-गुणप्पमाणे १ नयप्पमाणे २ संखप्पमाणे ३ ॥ १४४ ॥ से किं तं गुणप्पमाणे ? गुणप्पमाणे दुविहे पण्णत्ते । तंजहा-जीवगुणप्पमाणे १ अजीवगुणप्पमाणे य २ । से किं तं अजीवगुणप्पमाणे ? अजीवगुणप्पमाणे पंचविहे पण्णत्ते । तंजहा-वण्णगुणप्पमाणे १ गंधगुणप्पमाणे २ रसगुणप्पमाणे ३ फासगुणप्प-माणे ४ संठाणगुणप्पमाणे ५ । से किं तं वण्णगुणप्पमाणे ? वण्णगुणप्पमाणे पंचविहे पण्णत्ते । तंजहा-कालवण्णगुणप्पमाणे १ जाव सुक्खिवण्णगुणप्पमाणे ५ । सेत्तं वण्णगुणप्पमाणे । से किं तं गंधगुणप्पमाणे ? गंधगुणप्पमाणे दुविहे पण्णत्ते । तंजहा-सुरभिगंधगुणप्पमाणे १ दुरभिगंधगुणप्पमाणे २ । सेत्तं गंधगुणप्पमाणे । से किं तं रसगुणप्पमाणे ? रसगुणप्पमाणे पंचविहे पण्णत्ते । तंजहा-तित्तरसगुणप्पमाणे १ जाव महुररसगुणप्पमाणे ५ । सेत्तं रसगुणप्पमाणे । से किं तं फासगुणप्पमाणे ? फासगुणप्प-माणे अट्ठविहे पण्णत्ते । तंजहा-कक्खडफासगुणप्पमाणे १ जाव लुक्खफासगुणप्पमाणे ८ । सेत्तं फासगुणप्पमाणे । से किं तं संठाणगुणप्पमाणे ? संठाणगुणप्पमाणे पंचविहे पण्णत्ते । तंजहा-परिमंडलसंठाणगुणप्पमाणे १ वट्ठसंठाणगुणप्पमाणे २ तंसंठाणगुण-प्पमाणे ३ चउरंसंठाणगुणप्पमाणे ४ आययसंठाणगुणप्पमाणे ५ । सेत्तं संठाणगुण-प्पमाणे । सेत्तं अजीवगुणप्पमाणे । से किं तं जीवगुणप्पमाणे ? जीवगुणप्पमाणे तिविहे

पणत्ते । तंजहा-णाणगुणप्पमाणे १ दंसणगुणप्पमाणे २ चरित्तगुणप्पमाणे ३ । से किं तं  
 णाणगुणप्पमाणे ? णाणगुणप्पमाणे चउव्विहे पणत्ते । तंजहा-पच्चक्खे १ अणुमाणे २  
 ओवम्मो ३ आगमे ४ । से किं तं पच्चक्खे ? पच्चक्खे दुविहे पणत्ते । तंजहा-इंदिय-  
 पच्चक्खे य १ णोइंदियपच्चक्खे य २ । से किं तं इंदियपच्चक्खे ? इंदियपच्चक्खे पंचविहे  
 पणत्ते । तंजहा-सोइंदियपच्चक्खे १ चक्खुरिंदियपच्चक्खे २ घाणिंदियपच्चक्खे ३  
 जिब्बिंदियपच्चक्खे ४ फासिंदियपच्चक्खे ५ । सेत्तं इंदियपच्चक्खे । से किं तं णोइं-  
 दियपच्चक्खे ? णोइंदियपच्चक्खे तिविहे पणत्ते । तंजहा-ओहिणाणपच्चक्खे १ मण-  
 पज्जवणाणपच्चक्खे २ केवलणाणपच्चक्खे ३ । सेत्तं णोइंदियपच्चक्खे । सेत्तं पच्चक्खे ।  
 से किं तं अणुमाणे ? अणुमाणे तिविहे पणत्ते । तंजहा-पुव्ववं १ सेसवं २ दिट्ठ-  
 साहम्मवं ३ । से किं तं पुव्ववं ? पुव्ववं-गाहा-माया पुत्तं जहा नट्ठं, जुवाणं  
 पुणरागयं । काइ पच्चमिजाणेज्जा, पुव्वल्लिगेण केणइ ॥ १ ॥ तंजहा-खाएण वा,  
 वण्णेण वा, लंछणेण वा, मसेण वा, तिलएण वा । सेत्तं पुव्ववं । से किं तं सेसवं ?  
 सेसवं पंचविहं पणत्तं । तंजहा-कज्जेणं १ कारणेणं २ गुणेणं ३ अवयवेणं ४ आस-  
 एणं ५ । से किं तं कज्जेणं ? कज्जेणं-संखं सदेणं, भेरिं ताडिएणं, वसमं ढक्किएणं,  
 मोरं किंकाइएणं, हयं हेसिएणं, गयं गुलगुलाइएणं, रहं घणघणाइएणं । सेत्तं कज्जेणं ।  
 से किं तं कारणेणं ? कारणेणं-तंतवो पडस्स कारणं, ण पडो तंतुकारणं; वीरणा  
 कडस्स कारणं, ण कडो वीरणाकारणं; मिप्पिडो घडस्स कारणं, ण घडो मिप्पिड-  
 कारणं । सेत्तं कारणेणं । से किं तं गुणेणं ? गुणेणं-सुव्वणं निक्खसेणं, पुप्फं गंधेणं,  
 लवणं रसेणं, घयं आसायएणं, वत्थं फासेणं । सेत्तं गुणेणं । से किं तं अवयवेणं ?  
 अवयवेणं-महिसं सिंगेणं, कुकुडं सिहाएणं, हत्थि विसौणेणं, वराहं दाढाए, मोरं  
 पिच्छेणं, आसं खुरेणं, वग्गं नहेणं, चमरिं वालग्गेणं, वाणरं लंगूलेणं, दुपयं मणुस्साइ,  
 चउप्पयं गव[या]माइ, बहुपयं गोमियाइ, सीहं केसरेणं, वसहं ककुहेणं, महिलं  
 वलयबाहाए, गाहा-परियरबंधेण भडं, जाणिज्जा महिलियं निवसणेणं । सित्थेण  
 दोणपाणं, कविं च एक्काए गाहाए ॥ २ ॥ सेत्तं अवयवेणं । से किं तं आसएणं ?  
 आसएणं-अग्गि धूमेणं, सलिलं बलागेणं, वुट्ठिं अब्भविगारेणं, कुलपुत्तं सीलसमाया-  
 रेणं । सेत्तं आसएणं । सेत्तं सेसवं । से किं तं दिट्ठसाहम्मवं ? दिट्ठसाहम्मवं दुविहं  
 पणत्तं । तंजहा-सामण्णदिट्ठं च १ विसेसदिट्ठं च २ । से किं तं सामण्णदिट्ठं ?  
 सामण्णदिट्ठं-जहा एगो पुरिसो तहा बहवे पुरिसा, जहा बहवे पुरिसा तहा एगो  
 पुरिसो; जहा एगो करिसावणो तहा बहवे करिसावणा, जहा बहवे करिसावणा तहा

एगो करिसावणो । सेत्तं सामण्णदिट्ठं । से किं तं विसेसदिट्ठं ? विसेसदिट्ठं-से जहाणासए केइ पुरिसे कंचि पुरिसं बहूणं पुरिसाणं मज्झे पुव्वदिट्ठं पच्चभिजाणेज्जा-‘अयं से पुरिसे’, बहूणं करिसावणाणं मज्झे पुव्वदिट्ठं करिसावणं पच्चभिजाणेज्जा-‘अयं से करिसावणे’ । तस्स समासओ तिविहं गहणं भवइ, तंजहा-अतीयकालगहणं १ पटुप्पण्णकालगहणं २ अणागयकालगहणं ३ । से किं तं अतीयकालगहणं ? अतीयकालगहणं-उत्तणाणि वणाणि निप्पण्णसरस्सं वा मेइणिं पुण्णाणि य कुंड-सरणईदीहियातडागाइं पासित्ता तेणं साहिज्जइ जहा-सुवुट्ठी आसी । सेत्तं अतीय-कालगहणं । से किं तं पटुप्पण्णकालगहणं ? पटुप्पण्णकालगहणं-साहुं गोयरग्गयं विच्छिड्डियपउरभत्तपाणं पासित्ता तेणं साहिज्जइ जहा-सुभिकखे वट्ठइ । सेत्तं पटुप्पण्णकालगहणं । से किं तं अणागयकालगहणं ? अणागयकालगहणं-अब्भस्स निम्मलत्तं, कसिणा य गिरी सविज्जुया मेहा । थणियं वाउब्भासो, संज्ञा रत्ता पणि(ट्ठा)द्धा य ॥ ३ ॥ वारुणं वा सहिंदं वा अण्णयरं वा पसत्थं उप्पायं पासित्ता तेणं साहिज्जइ जहा-सुवुट्ठी भविस्सइ । सेत्तं अणागयकालगहणं । एएसिं चेव विवज्जासे तिविहं गहणं भवइ, तंजहा-अतीयकालगहणं १ पटुप्पण्णकालगहणं २ अणागयकालगहणं ३ । से किं तं अतीयकालगहणं ? २नित्तिणाइं वणाइं अनिप्पण्णसरस्सं वा मेइणिं सुक्काणि य कुंडसरणईदीहियातडागाइं पासित्ता तेणं साहिज्जइ जहा-कुवुट्ठी आसी । सेत्तं अतीयकालगहणं । से किं तं पटुप्पण्णकालगहणं ? पटुप्पण्णकालगहणं-साहुं गोयरग्गयं भिक्खं अलभमाणं पासित्ता तेणं साहिज्जइ जहा-दुब्भिकखे वट्ठइ । सेत्तं पटुप्पण्णकालगहणं । से किं तं अणागयकालगहणं ? अणागयकालगहणं-गाहा-भूमायंति दिसाओ, संविय-मेइणी अपडिबद्धा । वाया णेरइया खलु, कुवुट्ठिमेव निवेयंति ॥ ४ ॥ अग्गेयं वा वायव्वं वा अण्णयरं वा अप्पसत्थं उप्पायं पासित्ता तेणं साहिज्जइ जहा-कुवुट्ठी भविस्सइ । सेत्तं अणागयकालगहणं । सेत्तं विसेसदिट्ठं । सेत्तं दिट्ठसाहम्मवं । सेत्तं अणुमाणे । से किं तं ओवम्मे ? ओवम्मे दुविहे पण्णत्ते । तंजहा-साहम्मोवणीए १ वेहम्मोवणीए य २ । से किं तं साहम्मो-वणीए ? साहम्मोवणीए तिविहे पण्णत्ते । तंजहां-किंचिसाहम्मोवणीए १ पायसाहम्मो-वणीए २ सव्वसाहम्मोवणीए ३ । से किं तं किंचिसाहम्मोवणीए ? किंचिसाहम्मो-वणीए-जहा मंदरो तहा सरिसवो, जहा सरिसवो तहा मंदरो; जहा समुदो तहा गोप्पयं, जहा गोप्पयं तहा समुदो; जहा आइच्चो तहा खज्जोओ, जहा खज्जोओ तहा आइच्चो; जहा चंदो तहा कुमुदो, जहा कुमुदो तहा चंदो । सेत्तं किंचिसाहम्मो-वणीए । से किं तं पायसाहम्मोवणीए ? पायसाहम्मोवणीए-जहा गो तहा गवओ,

जहा गवओ तहा गो । सेत्तं पायसाहम्मोवणीए । से किं तं सव्वसाहम्मोवणीए ? सव्वसाहम्मे ओवम्मे णत्थि, तहावि तेणेव तस्स ओवम्मं कीरइ, जहा-अरिहंतेहिं अरिहंतसरिसं कयं, चक्खवट्ठिणा चक्खवट्ठिसरिसं कयं, बलदेवेण बलदेवसरिसं कयं, वासुदेवेण वासुदेवसरिसं कयं, साहुणा साहुसरिसं कयं । सेत्तं सव्वसाहम्मे । सेत्तं साहम्मोवणीए । से किं तं वेहम्मोवणीए ? वेहम्मोवणीए तिविहे पण्णत्ते । तंजहा-किंचिवेहम्मे १ पायवेहम्मे २ सव्ववेहम्मे ३ । से किं तं किंचिवेहम्मे ? किंचिवेहम्मे-जहा सामलेरो न तहा बाहुलेरो, जहा बाहुलेरो न तहा सामलेरो । सेत्तं किंचिवेहम्मे । से किं तं पायवेहम्मे ? पायवेहम्मे-जहा वायसो न तहा पायसो, जहा पायसो न तहा वायसो । सेत्तं पायवेहम्मे । से किं तं सव्ववेहम्मे ? सव्ववेहम्मे ओवम्मे णत्थि, तहावि तेणेव तस्स ओवम्मं कीरइ, जहा णीएणं णीयसरिसं कयं, दासेणं दाससरिसं कयं, काकेणं काकसरिसं कयं, साणेणं साणसरिसं कयं, पाणेणं पाणसरिसं कयं । सेत्तं सव्ववेहम्मे । सेत्तं वेहम्मोवणीए । सेत्तं ओवम्मे । से किं तं आगमे ? आगमे दुविहे पण्णत्ते । तंजहा-लोइए य १ लोउत्तरिए य २ । से किं तं लोइए ? लोइए-जं णं इमं अण्णाणिएहिं भिच्छादिट्ठिएहिं सच्छंदबुद्धिमइविगप्पियं, तंजहा-भारहं, रामायणं जाव चत्तारि वेया संगोवंगा । सेत्तं लोइए आगमे । से किं तं लोउत्तरिए ? लोउत्तरिए-जं णं इमं अरिहंतेहिं भगवंतेहिं उप्पण्णणाणदंसणधरेहिं तीयपक्खुप्पण्णमणागयजाणएहिं तिलुक्खवहियमहियपूइएहिं सव्वण्णहिं सव्वदरिसीहिं पणीयं दुवालसंगं गणिपिडगं, तंजहा-आयारो जाव दिट्ठिवाओ । अहवा आगमे तिविहे पण्णत्ते । तंजहा-सुत्तागमे १ अत्थागमे २ तदुभयागमे ३ । अहवा आगमे तिविहे पण्णत्ते । तंजहा-अत्तागमे १ अणंतरागमे २ परंपरागमे ३ । तित्थगराणं अत्थस्स अत्तागमे; गणहराणं सुत्तस्स अत्तागमे, अत्थस्स अणंतरागमे; गणहरसीसाणं सुत्तस्स अणंतरागमे, अत्थस्स परंपरागमे; तेण परं सुत्तस्स वि अत्थस्स वि णो अत्तागमे, णो अणंतरागमे, परंपरागमे । सेत्तं लोउत्तरिए । सेत्तं आगमे । सेत्तं णाणगुणप्पमाणे । से किं तं दंसण-गुणप्पमाणे ? दंसणगुणप्पमाणे चउव्विहे पण्णत्ते । तंजहा-चक्खुदंसणगुणप्पमाणे १ अचक्खुदंसणगुणप्पमाणे २ ओहिदंसणगुणप्पमाणे ३ केवलदंसणगुणप्पमाणे ४ । चक्खुदंसणं चक्खुदंसणिस्स घडपडकडरहाइएसु दव्वेसु, अचक्खुदंसणं अचक्खुदंसणिस्स आयभावे, ओहिदंसणं ओहिदंसणिस्स सव्वरुविदव्वेसु न पुण सव्वपज्जवेसु, केवलदंसणं केवलदंसणिस्स सव्वदव्वेसु य सव्वपज्जवेसु य । सेत्तं दंसणगुणप्पमाणे । से किं तं चरित्तगुणप्पमाणे ? चरित्तगुणप्पमाणे पंचविहे पण्णत्ते । तंजहा-सामाइय-चरित्तगुणप्पमाणे १ छेओवट्ठावणचरित्तगुणप्पमाणे २ परिहारविसुद्धियचरित्तगुण-



प्पमाणे ३ सुहुमसंपरायचरित्तगुणप्पमाणे ४ अहक्खायचरित्तगुणप्पमाणे ५ ।  
 सामादयचरित्तगुणप्पमाणे दुविहे पण्णत्ते । तंजहा-इत्तरिए य १ आवकहिए य २ ।  
 छेओवट्ठावणचरित्तगुणप्पमाणे दुविहे पण्णत्ते । तंजहा-साइयारे य १ निरइयारे य  
 २ । परिहारविसुद्धियचरित्तगुणप्पमाणे दुविहे पण्णत्ते । तंजहा-णिव्विसमाणए य १  
 णिव्विट्ठकाइए य २ । सुहुमसंपरायचरित्तगुणप्पमाणे दुविहे पण्णत्ते । तंजहा-संकलि-  
 स्समाणए य १ विसुज्झमाणए य २ । अहवा सुहुमसंपरायचरित्तगुणप्पमाणे दुविहे  
 पण्णत्ते । तंजहा-पडिवाई य १ अपडिवाई य २ । अहक्खायचरित्तगुणप्पमाणे  
 दुविहे पण्णत्ते । तंजहा-पडिवाई य १ अपडिवाई य २ । अहवा अहक्खायचरित्त-  
 गुणप्पमाणे दुविहे पण्णत्ते । तंजहा-छउमत्थिए य १ केवल्लिए य २ । सेत्तं चरित्त-  
 गुणप्पमाणे । सेत्तं जीवगुणप्पमाणे । सेत्तं गुणप्पमाणे ॥ १४५ ॥ से किं तं नयप्प-  
 माणे ? नयप्पमाणे तिविहे पण्णत्ते । तंजहा-पत्थगदिट्ठंतेणं १ वसहिदिट्ठंतेणं २  
 पएसदिट्ठंतेणं ३ । से किं तं पत्थगदिट्ठंतेणं ? पत्थगदिट्ठंतेणं-से जहाणामए केइ  
 पुरिसे परसुं गहाय अडविसमहुत्तो गच्छेज्जा, तं पासित्ता केइ वएज्जा-“कहिं भवं  
 गच्छसि ?” अविस्सुद्धो णेगमो भणइ-“पत्थगस्स गच्छामि” । तं च केइ छिंदमाणं  
 पासित्ता वएज्जा-“किं भवं छिंदसि ?” विस्सुद्धो णेगमो भणइ-“पत्थयं छिंदामि” ।  
 तं च केइ तच्छमाणं पासित्ता वएज्जा-“किं भवं तच्छसि ?” विस्सुद्धतराओ णेगमो  
 भणइ-“पत्थयं तच्छामि” । तं च केइ उक्कीरमाणं पासित्ता वएज्जा-“किं भवं  
 उक्कीरसि ?” विस्सुद्धतराओ णेगमो भणइ-“पत्थयं उक्कीरामि” । तं च केइ विलि-  
 हमाणं पासित्ता वएज्जा-“किं भवं विलिहसि ?” विस्सुद्धतराओ णेगमो भणइ-“पत्थयं  
 विलिहामि” । एवं विस्सुद्धतरस्स णेगमस्स नामाउडिओ पत्थओ । एवमेव ववहा-  
 रस्स वि । संगहरस्स चियमियमेज्जसमारूढो पत्थओ । उज्जसुयस्स पत्थओ वि  
 पत्थओ, मेज्जं पि पत्थओ । तिण्हं सदनयाणं पत्थयस्स अत्थाहिगारजाणओ जरस्स  
 वा वसेणं पत्थओ निप्फज्जइ । सेत्तं पत्थयदिट्ठंतेणं । से किं तं वसहिदिट्ठंतेणं ?  
 वसहिदिट्ठंतेणं-से जहाणामए केइ पुरिसे कंचि पुरिसं वएज्जा-“कहिं भवं वससि ?”  
 तं अविस्सुद्धो णेगमो भणइ-“लोगे वसामि” । “लोगे तिविहे पण्णत्ते तंजहा-उड्डलोए १  
 अहोलोए २ तिरियलोए ३ तेसु सव्वेसु भवं वससि ?” विस्सुद्धो णेगमो भणइ-  
 “तिरियलोए वसामि” । “तिरियलोए जंबुद्दीवाइया सयंभूरमणपज्जवसाणा असं-  
 खिज्जा दीवसमुद्दा पण्णत्ता तेसु सव्वेसु भवं वससि ?” विस्सुद्धतराओ णेगमो भणइ-  
 “जंबुद्दीवे वसामि” । “जंबुद्दीवे दस-खेत्ता पण्णत्ता तंजहा-भरहे १ एरवए २  
 हेमवए ३ एरण्वए ४ हरिवस्से ५ रम्मगवस्से ६ देवकुरू ७ उत्तरकुरू ८ पुव्व-

विदेहे ९ अवरविदेहे १० तेसु सव्वेसु भवं वससि ?” विसुद्धतराओ गेगमो भणइ-  
 “भरहे वासे वसामि” । “भरहे वासे दुविहे पण्णत्ते तंजहा-दाहिणङ्गुभरहे १  
 उत्तरङ्गुभरहे य २ तेसु सव्वे(दो)सु भवं वससि ?” विसुद्धतराओ गेगमो भणइ-  
 “दाहिणङ्गुभरहे वसामि” । “दाहिणङ्गुभरहे अणेगाइं गामागरणगरखेडकव्वड-  
 मडंवदोणमुहपट्ठणासमसंवाहसणिवेसाइं, तेसु सव्वेसु भवं वससि ?” विसुद्धतराओ  
 गेगमो भणइ-“पाडलिपुत्ते वसामि” । “पाडलिपुत्ते अणेगाइं गिहाइं, तेसु सव्वेसु  
 भवं वससि ?” विसुद्धतराओ गेगमो भणइ-“देवदत्तस्स घरे वसामि” । “देवद-  
 त्तस्स घरे अणेगा कोट्ठगा, तेसु सव्वेसु भवं वससि ?” विसुद्धतराओ गेगमो भणइ-  
 “गव्वभरे वसामि” । एवं विसुद्धस्स गेगमस्स वसमाणो । एवमेव ववहारस्स वि ।  
 संगहस्स संथारसमाहो वसइ । उज्जुसुयस्स जेसु आगासपएसो ओगाढो तेसु  
 वसइ । तिण्हं सट्ठयाणं आयभावे वसइ । सेत्तं वसहिदिट्ठंतेणं । से किं तं पएसदि-  
 ट्ठंतेणं ? पएसदिट्ठंतेणं-गेगमो भणइ-“छण्हं पएसो, तंजहा-धम्मपएसो, अधम्म-  
 पएसो, आगासपएसो, जीवपएसो, खंधपएसो, देसपएसो” । एवं वयंतं गेगमं संगहो  
 भणइ-“जं भणसि-छण्हं पएसो तं न भवइ” । “कम्हा ?” “जम्हा जो देसपएसो सो  
 तस्सेव दव्वस्स” । “जहा को दिट्ठंतो ?” “दासेण मे खरो कीओ, दासो वि मे खरो  
 वि मे । तं मा भणाहि-छण्हं पएसो, भणाहि पंचण्हं पएसो, तंजहा-धम्मपएसो,  
 अधम्मपएसो, आगासपएसो, जीवपएसो, खंधपएसो” । एवं वयंतं संगहं ववहारो  
 भणइ-“जं भणसि-पंचण्हं पएसो तं न भवइ” । “कम्हा ?” “जइ जहा पंचण्हं  
 गोट्टियाणं पुरिसाणं केइ दव्वजाए सामण्णे भवइ, तंजहा-हिरण्णे वा सुवण्णे वा धणे  
 वा धण्णे वा, तं न ते जुत्तं वत्तुं जहा पंचण्हं पएसो, तं मा भणाहि-पंचण्हं पएसो,  
 भणाहि-पंचविहो पएसो, तंजहा-धम्मपएसो, अधम्मपएसो, आगासपएसो, जीवप-  
 एसो, खंधपएसो” । एवं वयंतं ववहारं उज्जुसुओ भणइ-“जं भणसि-पंचविहो पएसो  
 तं न भवइ” । “कम्हा ?” “जइ ते पंचविहो पएसो, एवं ते एक्केओ पएसो पंच-  
 विहो, एवं ते पणवीसइविहो पएसो भवइ, तं मा भणाहि-पंचविहो पएसो, भणाहि-  
 भइयव्वो पएसो-सिय धम्मपएसो, सिय अधम्मपएसो, सिय आगासपएसो, सिय  
 जीवपएसो, सिय खंधपएसो” । एवं वयंतं उज्जुसुयं संपइ सदनओ भणइ-“जं भणसि-  
 भइयव्वो पएसो तं न भवइ” । “कम्हा ?” “जइ भइयव्वो पएसो एवं ते धम्मपएसो  
 वि-सिय धम्मपएसो सिय अधम्मपएसो सिय आगासपएसो सिय जीवपएसो सिय  
 खंधपएसो, अधम्मपएसो वि सिय धम्मपएसो जाव सिय खंधपएसो, जीवपएसो वि  
 सिय धम्मपएसो जाव सिय खंधपएसो, खंधपएसो वि सिय धम्मपएसो जाव सिय

खंधपएसो, एवं ते अणवत्था भविस्सइ, तं मा भणाहि-भइयव्वो पएसो, भणाहि-  
 धम्मे पएसे से पएसे धम्मे, अहम्मे पएसे से पएसे अहम्मे, आगासे पएसे से पएसे  
 आगासे, जीवे पएसे से पएसे नोजीवे, खंधे पएसे से पएसे नोखंधे” । एवं वयंतं  
 सइनयं समभिरुद्धो भणइ-“जं भणत्ति-धम्मपएसे से पएसे धम्मे जाव जीवे पएसे से  
 पएसे नोजीवे खंधे पएसे से पएसे नोखंधे तं न भवइ” । “कम्हा?” “इत्थं खलु  
 दो समात्ता भवंति, तंजहा-तत्पूरिसे य १ कम्मधारए य २ । तं ण णज्जइ कयरेणं  
 समासेणं भणत्ति? किं तत्पूरिसेणं, किं कम्मधारएणं? जइ तत्पूरिसेणं भणत्ति तो मा  
 एवं भणाहि, अह कम्मधारएणं भणत्ति तो विसेसओ भणाहि-धम्मे य से पएसे य से  
 पएसे धम्मे, अधम्मे य से पएसे य से पएसे अधम्मे, आगासे य से पएसे य से पएसे  
 आगासे, जीवे य से पएसे य से पएसे नोजीवे, खंधे य से पएसे य से पएसे  
 नोखंधे” । एवं वयंतं समभिरुद्धं संपइ एवंभूओ भणइ-“जं जं भणत्ति तं तं सव्वं  
 कस्सिणं पडिपुण्णं निरवसेसं एगगहणगहियं देसे वि मे अवत्थू, पएसे वि मे अवत्थू” ।  
 सेत्तं पएसदिट्ठंतेणं । सेत्तं नयप्पमाणे ॥ १४६ ॥ से किं तं संखप्पमाणे? संखप्पमाणे  
 अट्ठविहे पण्णत्ते । तंजहा-नामसंखा १ ठवणासंखा २ दव्वसंखा ३ ओवम्मसंखा ४  
 परिमाणसंखा ५ जाणणासंखा ६ गणणासंखा ७ भावसंखा ८ । से किं तं नामसंखा?  
 नामसंखा-जस्स णं जीवस्स वा जाव सेत्तं नामसंखा । से किं तं ठवणासंखा?  
 ठवणासंखा-जं णं कट्ठकम्मे वा पोत्थकम्मे वा जाव सेत्तं ठवणासंखा । नामठवणाणं  
 को पइविसेसो? नामं आवकहियं, ठवणा इत्तरिया वा होजा आवकहिया वा होजा ।  
 से किं तं दव्वसंखा? दव्वसंखा दुविहा पण्णत्ता । तंजहा-आगमओ य १ नोआगमओ  
 य २ जाव से किं तं जाणयसरीरभविषसरीरवइरित्ता दव्वसंखा? जाणयसरीर-  
 भविषसरीरवइरित्ता दव्वसंखा ति विहा पण्णत्ता । तंजहा-एगभविण १ बद्धाउए २  
 अभिसुहनामगोत्ते य ३ । एगभविणं णं भंते ! ‘एगभविणं’ ति कालओ केवच्चिरं  
 होइ? जहण्णेणं अंतोमुहुत्तं, उक्कोसेणं पुव्वकोडी । बद्धाउए णं भंते ! ‘बद्धाउए’ ति  
 कालओ केवच्चिरं होइ? जहण्णेणं अंतोमुहुत्तं, उक्कोसेणं पुव्वकोडीति भागं ।  
 अभिसुहनामगोत्ते णं भंते ! ‘अभिसुहनामगोए’ ति कालओ केवच्चिरं होइ? जह-  
 ण्णेणं एकं समयं, उक्कोसेणं अंतोमुहुत्तं । इयाणि को नओ कं संखं इच्छइ? तत्थ  
 णेगमसंगहववहारा ति विहं संखं इच्छंति, तंजहा-एगभविणं १ बद्धाउयं २ अभिसुह-  
 नामगोत्तं च ३ । उज्जुसुओ दुविहं संखं इच्छइ, तंजहा-बद्धाउयं च १ अभिसुह-  
 नामगोत्तं च २ । तिण्णि सइनया अभिसुहनामगोत्तं संखं इच्छंति । सेत्तं जाणय-  
 सरीरभविषसरीरवइरित्ता दव्वसंखा । सेत्तं नोआगमओ दव्वसंखा । सेत्तं दव्वसंखा ।

से किं तं ओवम्मसंखा ? ओवम्मसंखा चउव्विहा पण्णत्ता । तंजहा-अत्थि संतयं संत-  
एणं उवमिज्झइ १ अत्थि संतयं असंतएणं उवमिज्झइ २ अत्थि असंतयं संतएणं  
उवमिज्झइ ३ अत्थि असंतयं असंतएणं उवमिज्झइ ४ । तत्थ संतयं संतएणं उवमिज्झइ,  
जहा-संता अरिहंता संतएहिं पुरवरेहिं संतएहिं कवाडेहिं संतएहिं वच्छेहिं उवमिज्जति,  
तंजहा-गाहा-पुरवरकवाडवच्छा, फलिहभुया दुंदहित्थणियघोसा । सिरिवच्छंकि-  
वच्छा, सव्वे वि जिणा चउव्वीसं ॥ १ ॥ संतयं असंतएणं उवमिज्झइ, जहा-संताइं  
नेरइयतिरिक्खजोणियमणुस्सदेवाणं आउयाइं असंतएहिं पत्तिओवमसागरोवमेहिं  
उवमिज्जति । असंतयं संतएणं उवमिज्झइ, तंजहा-गाहाओ-परिजूरियपेरंतं, चलं-  
तविंतं पडंतनिच्छीरं । पत्तं व वसणपत्तं, कालप्पत्तं भणइ गाहं ॥ १ ॥ जह तुव्वे  
तह अम्हे, तुम्हे वि य होहिहा जहा अम्हे । अप्पाहेइ पडंतं, पंडुयपत्तं किसलयाणं  
॥ २ ॥ णवि अत्थि णवि य होही, उल्लावो किसलपंडुपत्ताणं । उवमा खलु एस कया,  
भविज्जणविबोहणट्टाए ॥ ३ ॥ असंतयं असंतएहिं उवमिज्झइ-जहा खरविसाणं तहा  
ससविसाणं । सेतं ओवम्मसंखा । से किं तं परिमाणसंखा ? परिमाणसंखा दुविहा  
पण्णत्ता । तंजहा-कालियसुयपरिमाणसंखा १ दिट्ठिवायसुयपरिमाणसंखा य २ ।  
से किं तं कालियसुयपरिमाणसंखा ? कालियसुयपरिमाणसंखा अणेगविहा पण्णत्ता ।  
तंजहा-पज्जवसंखा, अक्खरसंखा, संघायसंखा, पयसंखा, पायसंखा, गाहासंखा,  
सिलोगसंखा, वेडसंखा, निजुत्तिसंखा, अणुओगदारसंखा, उद्देसगसंखा, अज्झयण-  
संखा, सुयखंथसंखा, अंगसंखा । सेतं कालियसुयपरिमाणसंखा । से किं तं दिट्ठि-  
वायसुयपरिमाणसंखा ? दिट्ठिवायसुयपरिमाणसंखा अणेगविहा पण्णत्ता । तंजहा-  
पज्जवसंखा जाव अणुओगदारसंखा, पाहुडसंखा, पाहुडियासंखा, पाहुडपाहुडिया-  
संखा, वत्थुसंखा । सेतं दिट्ठिवायसुयपरिमाणसंखा । सेतं परिमाणसंखा । से किं  
तं जाणणासंखा ? जाणणासंखा-जो जं जाणइ, तंजहा-सइं सद्धिओ, गणियं गणिओ,  
निमित्तं नेमिप्पिओ, कालं कालणाणी, वेजयं वेजो । सेतं जाणणासंखा । से किं तं  
गणणासंखा ? गणणासंखा-एक्को गणणं न उवेइ, दुप्पभिइ संखा, तंजहा-संखेजए,  
असंखेजए, अणंतए । से किं तं संखेजए ? संखेजए तिविहे पण्णत्ते । तंजहा-जहणए १  
उक्कोसए २ अजहणणुमक्कोसए ३ । से किं तं असंखेजए ? असंखेजए तिविहे पण्णत्ते ।  
तंजहा-परित्तासंखेजए १ जुत्तासंखेजए २ असंखेजासंखेजए ३ । से किं तं परित्ता-  
संखेजए ? परित्तासंखेजए तिविहे पण्णत्ते । तंजहा-जहणए १ उक्कोसए २ अजहण-  
मणुक्कोसए ३ । से किं तं जुत्तासंखेजए ? जुत्तासंखेजए तिविहे पण्णत्ते । तंजहा-जह-  
णए १ उक्कोसए २ अजहणमणुक्कोसए ३ । से किं तं असंखेजासंखेजए ? असंखेजा-

संखेज्जए तिविहे पण्णत्ते । तंजहा-जहण्णए १ उक्कोसए २ अजहण्णमणुक्कोसए ३ ।  
 से किं तं अणंतए ? अणंतए तिविहे पण्णत्ते । तंजहा-परित्ताणंतए १ जुत्ताणंतए २  
 अणंतान्तए ३ । से किं तं परित्ताणंतए ? परित्ताणंतए तिविहे पण्णत्ते । तंजहा-जह-  
 ण्णए १ उक्कोसए २ अजहण्णमणुक्कोसए ३ । से किं तं जुत्ताणंतए ? जुत्ताणंतए  
 तिविहे पण्णत्ते । तंजहा-जहण्णए १ उक्कोसए २ अजहण्णमणुक्कोसए ३ । से किं तं  
 अणंतान्तए ? अणंतान्तए दुविहे पण्णत्ते । तंजहा-जहण्णए १ अजहण्णमणुक्कोसए २ ।  
 जहण्णयं संखेज्जयं केवइयं होइ ? दोहवयं । तेणं परं अजहण्णमणुक्कोसयाइं ठाणाइं जाव  
 उक्कोसयं संखेज्जयं न पावइ । उक्कोसयं संखेज्जयं केवइयं होइ ? उक्कोसयस्स संखेज्ज-  
 यस्स पव्वणं करिस्सामि-से जहानामए पळे सिया-एणं जोयणसयसहस्सं आयाम-  
 विक्खंमेणं, तिणिण जोयणसयसहस्सयाइं सोलससहस्साइं दोणिण य सत्तावीसे जोयण-  
 सए तिणिण य कोसे अट्ठावीसं च धणुसयं तेरस य अंगुलाइं अट्ठं अंगुलं च किंचि  
 विसेसाहियं पक्खिखेवेणं पण्णत्ते, से णं पळे सिद्धत्थयाणं भरिए, तओ णं तेहिं सिद्ध-  
 त्थएहिं दीवसमुद्धानं उद्धारो घेप्पइ, एगे दीवे एगे समुदे एवं पक्खिप्पमाणेणं पक्खि-  
 प्पमाणेणं जावइया दीवसमुद्दा तेहिं सिद्धत्थएहिं अप्फुण्णा एस णं एवइए खेत्ते पळे  
 (आइट्ठ!) पढमा सलागा, एवइयाणं सलागाणं असंलप्पा लोगा भरिया तथा वि  
 उक्कोसयं संखेज्जयं न पावइ । जहा को दिट्ठंतो ? से जहानामए मंचे सिया आमल-  
 गाणं भरिए, तत्थ एगे आमलए पक्खित्ते सेऽवि माए, अण्णेऽवि पक्खित्ते सेऽवि  
 माए, एवं पक्खिप्पमाणेणं पक्खिप्पमाणेणं होही सेऽवि आमलए जंसि पक्खित्ते से  
 मंचए भरिज्जिहिइ, जे तत्थ आमलए न माहिइ, एवामेव उक्कोसए संखेज्जए रुवे  
 पक्खित्ते जहण्णयं परित्तासंखेज्जयं भवइ । तेणं परं अजहण्णमणुक्कोसयाइं ठाणाइं जाव  
 उक्कोसयं परित्तासंखेज्जयं न पावइ । उक्कोसयं परित्तासंखेज्जयं केवइयं होइ ? जहण्णयं  
 परित्तासंखेज्जयं जहण्णयं परित्तासंखेज्जयमेत्ताणं रासीणं अण्णमण्णब्भासो रुवूणो  
 उक्कोसं परित्तासंखेज्जयं होइ । अहवा जहण्णयं जुत्तासंखेज्जयं रुवूणं उक्कोसयं परित्ता-  
 संखेज्जयं होइ । जहण्णयं जुत्तासंखेज्जयं केवइयं होइ ? जहण्णयंपरित्तासंखेज्जयमेत्ताणं  
 रासीणं अण्णमण्णब्भासो पडिपुण्णो जहण्णयं जुत्तासंखेज्जयं होइ । अहवा उक्कोसए  
 परित्तासंखेज्जए रुवं पक्खित्तं जहण्णयं जुत्तासंखेज्जयं होइ । आवलिया वि तत्तिया  
 चेव । तेणं परं अजहण्णमणुक्कोसयाइं ठाणाइं जाव उक्कोसयं जुत्तासंखेज्जयं न पावइ ।  
 उक्कोसयं जुत्तासंखेज्जयं केवइयं होइ ? जहण्णएणं जुत्तासंखेज्जएणं आवलिया गुणिया  
 अण्णमण्णब्भासो रुवूणो उक्कोसयं जुत्तासंखेज्जयं होइ । अहवा जहण्णयं असंखेज्जा-  
 संखेज्जयं रुवूणं उक्कोसयं जुत्तासंखेज्जयं होइ । जहण्णयं असंखेज्जासंखेज्जयं केवइयं

होइ ? जहण्णएणं जुत्तासंखेज्जएणं आवळिया गुणिया अण्णमण्णब्भासो पडिपुण्णो जहण्णयं असंखेज्जासंखेज्जयं होइ । अहवा उक्कोसए जुत्तासंखेज्जए रुवं पक्खित्तं जहण्णयं असंखेज्जासंखेज्जयं होइ । तेण परं अजहण्णमण्णुक्कोसयाइं ठाणाइं जाव उक्कोसयं असंखेज्जासंखेज्जयं ण पावइ । उक्कोसयं असंखेज्जासंखेज्जयं केवइयं होइ ? जहण्णयं असंखेज्जासंखेज्जयमेत्ताणं रासीणं अण्णमण्णब्भासो रुवूणो उक्कोसयं असंखेज्जासंखेज्जयं होइ । अहवा जहण्णयं परित्ताणंतयं रुवूणं उक्कोसयं असंखेज्जासंखेज्जयं होइ । जहण्णयं परित्ताणंतयं केवइयं होइ ? जहण्णयं असंखेज्जासंखेज्जयमेत्ताणं रासीणं अण्णमण्णब्भासो पडिपुण्णो जहण्णयं परित्ताणंतयं होइ । अहवा उक्कोसए असंखेज्जासंखेज्जए रुवं पक्खित्तं जहण्णयं परित्ताणंतयं होइ । तेण परं अजहण्णमण्णुक्कोसयाइं ठाणाइं जाव उक्कोसयं परित्ताणंतयं ण पावइ । उक्कोसयं परित्ताणंतयं केवइयं होइ ? जहण्णयं परित्ताणंतयमेत्ताणं रासीणं अण्णमण्णब्भासो रुवूणो उक्कोसयं परित्ताणंतयं होइ । अहवा जहण्णयं जुत्ताणंतयं रुवूणं उक्कोसयं परित्ताणंतयं होइ । जहण्णयं जुत्ताणंतयं केवइयं होइ ? जहण्णयं परित्ताणंतयमेत्ताणं रासीणं अण्णमण्णब्भासो पडिपुण्णो जहण्णयं जुत्ताणंतयं होइ । अहवा उक्कोसए परित्ताणंतए रुवं पक्खित्तं जहण्णयं जुत्ताणंतयं होइ । अभवसिद्धिया वि तत्तिया होति । तेण परं अजहण्णमण्णुक्कोसयाइं ठाणाइं जाव उक्कोसयं जुत्ताणंतयं ण पावइ । उक्कोसयं जुत्ताणंतयं केवइयं होइ ? जहण्णएणं जुत्ताणंतएणं अभवसिद्धिया गुणिया अण्णमण्णब्भासो रुवूणो उक्कोसयं जुत्ताणंतयं होइ । अहवा जहण्णयं अणंताणंतयं रुवूणं उक्कोसयं जुत्ताणंतयं होइ । जहण्णयं अणंताणंतयं केवइयं होइ ? जहण्णएणं जुत्ताणंतएणं अभवसिद्धिया गुणिया अण्णमण्णब्भासो पडिपुण्णो जहण्णयं अणंताणंतयं होइ । अहवा उक्कोसए जुत्ताणंतए रुवं पक्खित्तं जहण्णयं अणंताणंतयं होइ । तेण परं अजहण्णमण्णुक्कोसयाइं ठाणाइं । सेत्तं गणणासंखा । से किं तं भावसंखा ? भावसंखा—जे इमे जीवा संखगइनामगोत्ताइं कम्माइं वेदेंति । सेत्तं भावसंखा । सेत्तं संखापमाणे । सेत्तं भावप्पमाणे । **सेत्तं पमाणे ॥ १४७ ॥ पमाणे त्ति पयं समत्तं ॥**

से किं तं वत्तव्वया ? वत्तव्वया तिविहा पण्णत्ता । तंजहा—ससमयवत्तव्वया १ परसमयवत्तव्वया २ ससमयपरसमयवत्तव्वया ३ । से किं तं ससमयवत्तव्वया ? ससमयवत्तव्वया—जत्थ णं ससमए आघविज्जइ, पण्णविज्जइ, परूविज्जइ, दंसिज्जइ, निदंसिज्जइ, उवदंसिज्जइ । सेत्तं ससमयवत्तव्वया । से किं तं परसमयवत्तव्वया ? परसमयवत्तव्वया—जत्थ णं परसमए आघविज्जइ जाव उवदंसिज्जइ । सेत्तं परसमयवत्तव्वया । से किं तं ससमयपरसमयवत्तव्वया ? ससमयपरसमयवत्तव्वया—जत्थ णं

ससमए परसमए आधविज्झइ जाव उवदंसिज्झइ । सेत्तं ससमयपरसमयवत्तव्वया ।  
 इयाणीं को णओ कं वत्तव्वयं इच्छइ ? तत्थ णेगमसंगहववहारा तिविहं वत्तव्वयं  
 इच्छंति, तंजहा-ससमयवत्तव्वयं १ परसमयवत्तव्वयं २ ससमयपरसमयवत्तव्वयं ३ ।  
 उज्जुसुओ दुविहं वत्तव्वयं इच्छइ, तंजहा-ससमयवत्तव्वयं १ परसमयवत्तव्वयं २ ।  
 तत्थ णं जा सा ससमयवत्तव्वया सा ससमयं पविट्ठा, जा सा परसमयवत्तव्वया सा  
 परसमयं पविट्ठा, तम्हा दुविहा वत्तव्वया, नत्थि तिविहा वत्तव्वया । तिण्णि सद्-  
 णया एगं ससमयवत्तव्वयं इच्छंति, नत्थि परसमयवत्तव्वया । कम्हा ? जम्हा  
 परसमए अणुत्ते अहेऊ असव्भावे अकिरिए उम्मग्गे अणुवएसे सिच्छादंसणमितिक्कुट्टु ।  
 तम्हा सव्वा ससमयवत्तव्वया, णत्थि परसमयवत्तव्वया, णत्थि ससमयपरसमय-  
 वत्तव्वया । **सेत्तं वत्तव्वया ॥ १४८ ॥** से किं तं अत्थाहिगारे ? अत्थाहिगारे-  
 जो जस्स अज्झयणस्स अत्थाहिगारो, तंजहा-गाहा-सावज्जजोगविरइ, उक्किण  
 गुणवओ य पड्विक्ती । खलियस्स निंदणा वण-, तिगिच्छ गुणधारणा चेव ॥ १ ॥  
**सेत्तं अत्थाहिगारे ॥ १४९ ॥** से किं तं समोयारे ? समोयारे छव्विहे पण्णत्ते ।  
 तंजहा-णामसमोयारे १ ठवणासमोयारे २ दव्वसमोयारे ३ खेतसमोयारे ४  
 कालसमोयारे ५ भावसमोयारे ६ । णामठवणाओ पुवं वण्णिआओ जाव सेत्तं  
 भवियसरीरदव्वसमोयारे । से किं तं जाणयसरीरभवियसरीरवइरित्ते दव्वसमोयारे ?  
 जाणयसरीरभवियसरीरवइरित्ते दव्वसमोयारे तिविहे पण्णत्ते । तंजहा-आयसमो-  
 यारे १ परसमोयारे २ तदुभयसमोयारे ३ । सव्वदव्वा वि णं आयसमोयारेणं  
 आयभावे समोयरंति । परसमोयारेणं जहा कुंडे बदराणि । तदुभयसमोयारे जहा घरे  
 खंभो आयभावे य, जहा घडे गीवा आयभावे य । अहवा जाणयसरीरभवियसरीर-  
 वइरित्ते दव्वसमोयारे दुविहे पण्णत्ते । तंजहा-आयसमोयारे य १ तदुभयसमोयारे  
 य २ । चउसट्ठिया आयसमोयारेणं आयभावे समोयरइ, तदुभयसमोयारेणं बत्ती-  
 सियाए समोयरइ आयभावे य । बत्तीसिया आयसमोयारेणं आयभावे समोयरइ,  
 तदुभयसमोयारेणं सोलसियाए समोयरइ आयभावे य । सोलसिया आयसमो-  
 यारेणं आयभावे समोयरइ, तदुभयसमोयारेणं अट्ठमाइयाए समोयरइ आय-  
 भावे य । अट्ठमाइया आयसमोयारेणं आयभावे समोयरइ, तदुभयसमोयारेणं  
 चउमाइयाए समोयरइ आयभावे य । चउमाइया आयसमोयारेणं आयभावे  
 समोयरइ, तदुभयसमोयारेणं अद्धमाणीए समोयरइ आयभावे य । अद्धमाणी आय-  
 समोयारेणं आयभावे समोयरइ, तदुभयसमोयारेणं माणीए समोयरइ आयभावे य ।  
 सेत्तं जाणयसरीरभवियसरीरवइरित्ते दव्वसमोयारे । सेत्तं नोआगमओ दव्वसमोयारे ।

सेत्तं दव्वसमोयारे । से किं तं खेत्तसमोयारे ? खेत्तसमोयारे दुविहे पण्णत्ते । तंजहा-  
 आयसमोयारे य १ तदुभयसमोयारे य २ । भरहे वासे आयसमोयारेणं आयभावे  
 समोयरइ, तदुभयसमोयारेणं जंबुद्दीवे समोयरइ आयभावे य । जंबुद्दीवे आयसमो-  
 यारेणं आयभावे समोयरइ, तदुभयसमोयारेणं तिरियलोए समोयरइ आयभावे य ।  
 तिरियलोए आयसमोयारेणं आयभावे समोयरइ, तदुभयसमोयारेणं लोए समोयरइ  
 आयभावे य । सेत्तं खेत्तसमोयारे । से किं तं कालसमोयारे ? कालसमोयारे दुविहे  
 पण्णत्ते । तंजहा-आयसमोयारे य १ तदुभयसमोयारे य २ । समए आयसमोयारेणं  
 आयभावे समोयरइ, तदुभयसमोयारेणं आवलियाए समोयरइ आयभावे य ।  
 एवमाणपाणू थोवे लवे मुहुत्ते अहोरेत्ते पक्खे मासे उळ्ळ अयणे संवच्छरे जुगे  
 वाससए वाससहस्से वाससयसहस्से पुव्वंगे पुव्वे तुडियंगे तुडिए अड्डंगे अड्डे  
 अव्वंगे अव्वे हुहुयंगे हुहुए उप्पलंगे उप्पले पडमंगे पडमे नलिंगे नलिंगे  
 अत्थनिउरंगे अत्थनिउरे अउयंगे अउए नउयंगे नउए पउयंगे पउए चूलियंगे चूलिया  
 सीसपहेलियंगे सीसपहेलिया पलिओवमे सागरोवमे-आयसमोयारेणं आयभावे  
 समोयरइ, तदुभयसमोयारेणं ओसप्पिणीउस्सप्पिणीसु समोयरइ आयभावे य ।  
 ओसप्पिणीउस्सप्पिणीओ आयसमोयारेणं आयभावे समोयरंति, तदुभयसमोयारेणं  
 पोग्गलपरियट्ठे समोयरंति आयभावे य । पोग्गलपरियट्ठे आयसमोयारेणं आयभावे  
 समोयरइ, तदुभयसमोयारेणं तीतद्धाअणागतद्धासु समोयरइ । तीतद्धाअणागतद्धाउ  
 आयसमोयारेणं आयभावे समोयरंति, तदुभयसमोयारेणं सव्वद्धाए समोयरंति  
 आयभावे य । सेत्तं कालसमोयारे । से किं तं भावसमोयारे ? भावसमोयारे  
 दुविहे पण्णत्ते । तंजहा-आयसमोयारे य १ तदुभयसमोयारे य २ । कोहे आयसमो-  
 यारेणं आयभावे समोयरइ, तदुभयसमोयारेणं माणे समोयरइ आयभावे य । एवं  
 माणे माया लोभे रागे मोहणिज्जे । अट्ठकम्मपयडीओ आयसमोयारेणं आयभावे  
 समोयरंति, तदुभयसमोयारेणं छव्विहे भावे समोयरंति आयभावे य । एवं छव्विहे  
 भावे । जीवे जीवत्थिकाए आयसमोयारेणं आयभावे समोयरइ, तदुभयसमोयारेणं  
 सव्वदव्वेसु समोयरइ आयभावे य । एत्थ **संगहणीगाहा**-कोहे माणे माया, लोभे  
 रागे य मोहणिज्जे य । पगडी भावे जीवे, जीवत्थिकायं दव्वा य ॥ १ ॥ सेत्तं  
 भावसमोयारे । **सेत्तं समोयारे । सेत्तं उवक्कमे ॥ १५० ॥ उवक्कम इति**  
**पढमं दारं ॥**

१ लोए आयसमोयारेणं आयभावे समोयरइ, तदुभयसमोयारेणं अलोए  
 समोयरइ आयभावे य । इच्चहियं पच्चंतरे ।



से किं तं निक्खेवे ? निक्खेवे तिविहे पण्णत्ते । तंजहा-ओहनिप्फण्णे १ नामनिप्फण्णे २ सुत्तालावगनिप्फण्णे ३ । से किं तं ओहनिप्फण्णे ? ओहनिप्फण्णे चउव्विहे पण्णत्ते । तंजहा-अज्झयणे १ अज्झीणे २ आया ३ खवणा ४ । से किं तं अज्झयणे ? अज्झयणे चउव्विहे पण्णत्ते । तंजहा-णामज्झयणे १ ठवणज्झयणे २ दव्वज्झयणे ३ भावज्झयणे ४ । णामठवणाओ पुव्वं वण्णिगयाओ । से किं तं दव्वज्झयणे ? दव्वज्झयणे दुविहे पण्णत्ते । तंजहा-आगमओ य १ णोआगमओ य २ । से किं तं आगमओ दव्वज्झयणे ? आगमओ दव्वज्झयणे-जस्स णं 'अज्झयण' ति पयं सिक्खियं, ठियं, जियं, मियं, परिजियं जाव एवं जावइया अणुवउत्ता आगमओ तावइयाइं दव्वज्झयणाइं । एवमेव ववहारस्स वि । संगहस्स णं एगो वा अणेगो वा जाव सेत्तं आगमओ ववज्झयणे । से किं तं णोआगमओ दव्वज्झयणे ? णोआगमओ दव्वज्झयणे तिविहे पण्णत्ते । तंजहा-जाणयसरीरदव्वज्झयणे १ भवियसरीरदव्वज्झयणे २ जाणयसरीरभवियसरीरवइरित्ते दव्वज्झयणे ३ । से किं तं जाणयसरीरदव्वज्झयणे ? २ अज्झयणपयत्थाहिगारजाणयस्स जं सरीरं ववगयचुयचावियचत्तदेहं, जीवविप्पजडं जाव अहो णं इमेणं सरीरसमुस्सएणं जिणदिट्ठेणं भावेणं 'अज्झयणे' ति पयं आघवियं जाव उवदंसियं । जहा को दिट्ठंतो ? अयं घयकुंमे आसी, अयं महुकुंमे आसी । सेत्तं जाणयसरीरदव्वज्झयणे । से किं तं भवियसरीरदव्वज्झयणे ? भवियसरीरदव्वज्झयणे-जे जीवे जोणिजम्मणनिकखंतं, इमेणं चेव आयत्तएणं सरीरसमुस्सएणं जिणदिट्ठेणं भावेणं 'अज्झयणे' ति पयं सेयकाले सिक्खिस्सइ न ताव सिक्खइ । जहा को दिट्ठंतो ? अयं महुकुंमे भविस्सइ, अयं घयकुंमे भविस्सइ । सेत्तं भवियसरीरदव्वज्झयणे । से किं तं जाणयसरीरभवियसरीरवइरित्ते दव्वज्झयणे ? २ पत्तयपोत्थयलिहियं । सेत्तं जाणयसरीरभवियसरीरवइरित्ते दव्वज्झयणे । सेत्तं णोआगमओ दव्वज्झयणे । सेत्तं दव्वज्झयणे । से किं तं भावज्झयणे ? भावज्झयणे दुविहे पण्णत्ते । तंजहा-आगमओ य १ नोआगमओ य २ । से किं तं आगमओ भावज्झयणे ? आगमओ भावज्झयणे जाणए उवउत्ते । सेत्तं आगमओ भावज्झयणे । से किं तं नोआगमओ भावज्झयणे ? नोआगमओ भावज्झयणे-गाहा-अज्झप्परस्साणयणं, कम्माणं अवचओ उवचियाणं । अणुवचओ य नवाणं, तम्हा अज्झयणमिच्छंति ॥ १ ॥ सेत्तं नोआगमओ भावज्झयणे । सेत्तं भावज्झयणे । **सेत्तं अज्झयणे** । से किं तं अज्झीणे ? अज्झीणे चउव्विहे पण्णत्ते । तंजहा-णामज्झीणे १ ठवणज्झीणे २ दव्वज्झीणे ३ भावज्झीणे ४ । णामठवणाओ पुव्वं वण्णिगयाओ । से किं तं दव्वज्झीणे ? दव्वज्झीणे दुविहे पण्णत्ते । तंजहा-आगमओ य १ नोआगमओ य २ । से किं तं आगमओ दव्वज्झीणे ?

आगमओ दव्वज्झीणे-जस्स णं 'अज्झीणे' त्ति पयं सिक्खियं ठियं, जियं, मियं, परिजियं जाव सेत्तं आगमओ दव्वज्झीणे । से किं तं नोआगमओ दव्वज्झीणे ? नोआगमओ दव्वज्झीणे तिविहे पण्णत्ते । तंजहा-जाणयसरीरदव्वज्झीणे १ भवियसरीरदव्वज्झीणे २ जाणयसरीरभवियसरीरवइरित्ते दव्वज्झीणे ३ । से किं तं जाणयसरीरदव्वज्झीणे । जाणयसरीरदव्वज्झीणे-'अज्झीण' पयत्थाहिगारजाण-यस्स जं सरीरयं ववगयचुयचावियचत्तदेहं जहा दव्वज्झयणे तहा भाणियव्वं जाव सेत्तं जाणयसरीरदव्वज्झीणे । से किं तं भवियसरीरदव्वज्झीणे ? भवियसरीरदव्वज्झीणे-जे जीवे जोणिजम्मणनिक्खंते जहा दव्वज्झयणे जाव सेत्तं भवियसरीरदव्वज्झीणे । से किं तं जाणयसरीरभवियसरीरवइरित्ते दव्वज्झीणे ? जाणयसरीरभवियसरीरवइरित्ते दव्वज्झीणे सव्वागाससेदी । सेत्तं जाणयसरीरभवियसरीरवइरित्ते दव्वज्झीणे । सेत्तं नोआगमओ दव्वज्झीणे । सेत्तं दव्वज्झीणे । से किं तं भावज्झीणे ? भावज्झीणे दुविहे पण्णत्ते । तंजहा-आगमओ य १ नोआगमओ य २ । से किं तं आगमओ भावज्झीणे ? आगमओ भावज्झीणे जाणए उवउत्ते । सेत्तं आगमओ भावज्झीणे । से किं तं नोआगमओ भावज्झीणे ? नोआगमओ भावज्झीणे-गाहा-जह दीवा दीवसयं पइप्पइ, दिप्पए य सो दीवो । दीवसमा आयरिया, दिप्पति परं च दीवंति ॥ १ ॥ सेत्तं नोआगमओ भावज्झीणे । सेत्तं भावज्झीणे । **सेत्तं अज्झीणे** । से किं तं आए ? आए चउव्विहे पण्णत्ते । तंजहा-नामाए १ ठवणाए २ दव्वाए ३ भावाए ४ । नामठवणाओ पुव्वं भणियाओ । से किं तं दव्वाए ? दव्वाए दुविहे पण्णत्ते । तंजहा-आगमओ य १ नोआगमओ य २ । से किं तं आगमओ दव्वाए ? आगमओ दव्वाए-जस्स णं 'आए' त्ति पयं सिक्खियं, ठियं, जियं, मियं, परिजियं जाव कम्हा ? 'अणुवओगो' दव्वमिति कट्ठु । णेगमस्स णं जावइया अणुवउत्ता आगमओ तावइया ते दव्वाया जाव सेत्तं आगमओ दव्वाए । से किं तं नोआगमओ दव्वाए ? नोआगमओ दव्वाए तिविहे पण्णत्ते । तंजहा-जाणयसरीरदव्वाए १ भवियसरीरदव्वाए २ जाणयसरीरभवियसरीरवइरित्ते दव्वाए ३ । से किं तं जाणयसरीरदव्वाए ? जाणयसरीरदव्वाए-'आय' पयत्थाहिगारजाणयस्स जं सरीरयं ववगयचुयचावियचत्तदेहं जहा दव्वज्झयणे जाव सेत्तं जाणयसरीरदव्वाए । से किं तं भवियसरीरदव्वाए ? भवियसरीरदव्वाए-जे जीवे जोणिजम्मणनिक्खंते जहा दव्वज्झयणे जाव सेत्तं भवियसरीरदव्वाए । से किं तं जाणयसरीरभवियसरीरवइरित्ते दव्वाए ? जाणयसरीरभवियसरीरवइरित्ते दव्वाए तिविहे पण्णत्ते । तंजहा-लोइए १ कुप्पावयणिए २ लोउत्तरिए ३ । से किं तं

लोइए ? लोइए तिविहे पण्णत्ते । तंजहा-सच्चित्ते १ अच्चित्ते २ मीसए य ३ । से किं तं सच्चित्ते ? सच्चित्ते तिविहे पण्णत्ते । तंजहा-दुपयाणं १ चउप्पयाणं २ अपयाणं ३ । दुपयाणं-दासाणं दासीणं, चउप्पयाणं-आसाणं हत्थीणं, अपयाणं-अंबाणं अंबाडगाणं आए । सेत्तं सच्चित्ते । से किं तं अच्चित्ते ? अच्चित्ते-सुव्वण्णरययमणिमोत्तियसंख-सिलप्पवाळरत्तरयणाणं (संतसावएज्जरुस) आए । सेत्तं अच्चित्ते । से किं तं मीसए ? मीसए-दासाणं दासीणं आसाणं हत्थीणं समाभरियाउज्जालंक्रियाणं आए । से तं मीसए । से तं लोइए । से किं तं कुप्पावयणिए ? कुप्पावयणिए तिविहे पण्णत्ते । तंजहा-सच्चित्ते १ अच्चित्ते २ मीसए य ३ । तिण्णि वि जहा लोइए जाव से तं मीसए । से तं कुप्पावयणिए । से किं तं लोमुत्तरिए ? लोमुत्तरिए तिविहे पण्णत्ते । तंजहा-सच्चित्ते १ अच्चित्ते २ मीसए य ३ । से किं तं सच्चित्ते ? सच्चित्ते-सीसाणं सि[रुस]स्सिणियाणं । सेत्तं सच्चित्ते । से किं तं अच्चित्ते ? अच्चित्ते-पडिग्गहाणं वत्थाणं कंबलाणं पायपुंछणाणं आए । सेत्तं अच्चित्ते । से किं तं मीसए ? मीसए-सिरुसाणं सिस्सिणियाणं सभंडोवगरणाणं आए । से तं मीसए । से तं लोमुत्तरिए । से तं जाण-यसरीरभवियसरीरवइरित्ते दव्वाए । सेत्तं नोआगमओ दव्वाए । से तं दव्वाए । से किं तं भावाए ? भावाए दुविहे पण्णत्ते । तंजहा-आगमओ य १ नोआगमओ य २ । से किं तं आगमओ भावाए ? आगमओ भावाए जाणए उवउत्ते । से तं आगमओ भावाए । से किं तं नोआगमओ भावाए ? नोआगमओ भावाए दुविहे पण्णत्ते । तंजहा-पसत्थे य १ अपसत्थे य २ । से किं तं पसत्थे ? पसत्थे तिविहे पण्णत्ते । तंजहा-णाणाए १ दंसणाए २ चरित्ताए ३ । सेत्तं पसत्थे । से किं तं अपसत्थे ? अपसत्थे चउव्विहे पण्णत्ते । तंजहा-कोहाए १ माणाए २ मायाए ३ लोहाए ४ । से तं अपसत्थे । से तं नोआगमओ भावाए । से तं भावाए । से तं आए । से किं तं झवणा ? झवणा चउव्विहा पण्णत्ता । तंजहा-नामज्झवणा १ ठवणज्झवणा २ दव्वज्झवणा ३ भावज्झवणा ४ । नामठवणाओ पुव्वं भणियाओ । से किं तं दव्व-ज्झवणा ? दव्वज्झवणा दुविहा पण्णत्ता । तंजहा-आगमओ य १ नोआगमओ य २ । से किं तं आगमओ दव्वज्झवणा ? आगमओ दव्वज्झवणा-जरुस णं 'झवणे' ति पयं सिक्खयं, ठियं, जियं, मियं, परिजियं जाव सेत्तं आगमओ दव्वज्झवणा । से किं तं नोआगमओ दव्वज्झवणा ? नोआगमओ दव्वज्झवणा तिविहा पण्णत्ता । तंजहा-जाणयसरीरदव्वज्झवणा १ भवियसरीरदव्वज्झवणा २ जाणयसरीरभविय-सरीरवइरित्ता दव्वज्झवणा ३ । से किं तं जाणयसरीरदव्वज्झवणा ? २ 'झवणा' पयत्थाहिगारजाणयसुस जं सरीरयं ववगयचुयचावियचत्तदेहं सेसं जहा दव्वज्झयणे

जाव सेतं जाणयसरीरदव्वज्झवणा । से किं तं भवियसरीरदव्वज्झवणा ? २ जे जीवे जोणिजम्मणणिव्वंते सेसं जहा दव्वज्झयणे जाव सेतं भवियसरीरदव्वज्झवणा । से किं तं जाणयसरीरभवियसरीरवइरित्ता दव्वज्झवणा ? २ जहा जाणयसरीरभवियसरीरवइरित्ते दव्वाए तहा भाणियव्वा जाव से तं मीसिया । से तं लोगुत्तरिया । से तं जाणयसरीरभवियसरीरवइरित्ता दव्वज्झवणा । से तं नोआगमओ दव्वज्झवणा । से तं दव्वज्झवणा । से किं तं भावज्झवणा ? भावज्झवणा दुविहा पणत्ता । तंजहा--आगमओ य १ नोआगमओ य २ । से किं तं आगमओ भावज्झवणा ? आगमओ भावज्झवणा जाणए उवउत्ते । से तं आगमओ भावज्झवणा । से किं तं नोआगमओ भावज्झवणा ? नोआगमओ भावज्झवणा दुविहा पणत्ता । तंजहा-पसत्था य १ अपसत्था य २ । से किं तं पसत्था ? पसत्था तिविहा पणत्ता । तंजहा-नाणज्झवणा १ दंसणज्झवणा २ चरित्तज्झवणा ३ । सेतं पसत्था । से किं तं अपसत्था ? अपसत्था चउव्विहा पणत्ता । तंजहा-कोहज्झवणा १ माणज्झवणा २ मायज्झवणा ३ लोहज्झवणा ४ । से तं अपसत्था । से तं नोआगमओ भावज्झवणा । से तं भावज्झवणा । **से तं झवणा । से तं ओहनिप्फण्णे ।** से किं तं नामनिप्फण्णे ? नामनिप्फण्णे सामाइए । से समासओ चउव्विहे पणत्ते । तंजहा-णामसामाइए १ ठवणासामाइए २ दव्वसामाइए ३ भावसामाइए ४ । णामठवणाओ पुव्वं भणियाओ । दव्वसामाइए वि तहेव जाव सेतं भवियसरीरदव्वसामाइए । से किं तं जाणयसरीरभवियसरीरवइरित्ते दव्वसामाइए ? २ पत्तयपोत्थयलिहियं । से तं जाणयसरीरभवियसरीरवइरित्ते दव्वसामाइए । से तं नोआगमओ दव्वसामाइए । से तं दव्वसामाइए । से किं तं भावसामाइए ? भावसामाइए दुविहे पणत्ते । तंजहा-आगमओ य १ नोआगमओ य २ । से किं तं आगमओ भावसामाइए ? आगमओ भावसामाइए जाणए उवउत्ते । से तं आगमओ भावसामाइए । से किं तं नोआगमओ भावसामाइए ? नोआगमओ भावसामाइए-**गाहाओ**-जस्स सामाणिओ अप्पा, संजमे णियमे तवे । तस्स सामाइयं होइ, इइ केवलिभासियं ॥ १ ॥ जो समो सव्वभूएउ, तसेउ थावरेउ य । तस्स सामाइयं होइ, इइ केवलिभासियं ॥ २ ॥ जह मम ण पियं दुक्खं, जाणिय एमेव सव्वजीवाणं । न हणइ न हणावेइ य, सममणइ तेण सो समणो ॥ ३ ॥ णत्थि य से कोइ वेसो, पिओ य सव्वेसु चेव जीवेउ । एएण होइ समणो, एसो अन्नोऽवि पजाओ ॥ ४ ॥ उरगगिरिजलणसागर-, नहतलतरुणसमो य जो होइ । भमरस्मियधरणिजलरुह-, रविपवणसमो य सो समणो ॥ ५ ॥ तो समणो जइ सुमणो, भावेण य जइ ण होइ

पावमणो । सयणे य जणे य समो, समो य माणावमाणेसु ॥ ६ ॥ से तं नोआगमओ  
भावसामाइए । से तं भावसामाइए । से तं सामाइए । **से तं नामनिप्फण्णे** । से किं  
तं सुत्तालावगनिप्फण्णे ? इयाणि सुत्तालावयनिप्फण्णं निक्खेवं इच्छावेइ, से य पत्त-  
लक्खणे वि ण णिक्खिप्पइ । कम्हा ? लाववत्थं । अत्थि इओ तइए अणुओगदारे  
अणुगमे ति । तत्थ णिक्खत्ते इहं णिक्खत्ते भवइ । इहं वा णिक्खत्ते तत्थ णिक्खत्ते  
भवइ । तम्हा इहं ण णिक्खिप्पइ, तहिं चेव णिक्खिप्पइ । **से तं णिक्खेवे ॥ १५१ ॥**  
से किं तं अणुगमे ? अणुगमे दुविहे पणत्ते । तंजहा-सुत्ताणुगमे य १ निज्जुत्तिअणुगमे  
य २ । से किं तं निज्जुत्तिअणुगमे ? निज्जुत्तिअणुगमे ति विहे पणत्ते । तंजहा-निक्खेव-  
निज्जुत्तिअणुगमे १ उवग्घायनिज्जुत्तिअणुगमे २ सुत्तप्फासियनिज्जुत्तिअणुगमे ३ । से  
किं तं निक्खेवनिज्जुत्तिअणुगमे ? निक्खेवनिज्जुत्तिअणुगमे अणुगए । से तं निक्खेव-  
निज्जुत्तिअणुगमे । से किं तं उवग्घायनिज्जुत्तिअणुगमे ? २ इमाहिं दोहिं मूलगाहाहिं  
अणुगंतव्वो, तंजहा-<sup>१</sup>गाहाओ-उ<sup>२</sup>इसे नि<sup>३</sup>इसे य, निगमे खेत काल पुरिसे य ।  
कारण पच्चय लक्खण, नए समोयारणाणुमए ॥ १ ॥ किं कइविहं कस्स कहिं, केसु  
कहं किच्चिरं हवइ कालं । कइ संतर-मविरहियं, भवागरिस फासण निरुत्ती ॥ २ ॥  
सेतं उवग्घायनिज्जुत्तिअणुगमे । से किं तं सुत्तप्फासियनिज्जुत्तिअणुगमे ? सुत्तप्फासिय-  
निज्जुत्तिअणुगमे-सुत्तं उच्चारयेव्वं-अक्खलियं, अमिलियं, अवचामेलियं, पडिपुण्णं,  
पडिपुण्णघोसं, कंठोद्धविप्पमुक्कं, गुरुवायणोवगयं । तओ तत्थ णज्झिइइ ससमयपयं  
वा परसमयपयं वा, बंधपयं वा मोक्खपयं वा, सामाइयपयं वा नोसामाइयपयं वा ।  
तओ तम्मि उच्चारिए समाणे केसिं च णं भगवंताणं केइ अत्थाहिगारा अहिगया  
भवन्ति, केइ अत्थाहिगारा अणहिगया भवन्ति । तओ तेसिं अणहिगयाणं अहिगमणट्ठाए  
पयं पएणं वण्णइस्सामि-**गाहा**-संहिया य पयं चेव, पयत्थो पयविग्गहो । चालणा  
य पसिद्धी य, छविहं विद्धि लक्खणं ॥ १ ॥ से तं सुत्तप्फासियनिज्जुत्तिअणुगमे ।  
से तं निज्जुत्तिअणुगमे । **से तं अणुगमे ॥ १५२ ॥** से किं तं नए ? सत्त मूलणया  
पणत्ता । तंजहा-णेगमे १ संगहे २ ववहारे ३ उज्जुसुए ४ सदे ५ समभिरुढे ६ एवं-  
भूए ७ । तत्थ **गाहाओ**-णेगेहिं माणेहिं, मिणइत्ति णेगमस्स य निरुत्ती । सेसाणं  
पि नयाणं, लक्खणमिणमो सुणह वोच्छं ॥ १ ॥ संगहियपिडियत्थं, संगहवयणं  
समासओ विति । वच्चइ विणिच्छियत्थं, ववहारो सव्वदव्वेसु ॥ २ ॥ पञ्चुप्पन्नगाही,  
उज्जुसुओ णयविही मुणेयव्वो । इच्छइ विसेसियतरं, पञ्चुप्पणं णओ सट्ठो ॥ ३ ॥  
वत्थूओ संकमणं, होइ अवत्थू नए समभिरुढे । वंजणअत्थतदुभयं, एवंभूओ विसेसेइ  
॥ ४ ॥ णायम्मि मिण्हियव्वे, अणिण्हियव्वम्मि चेव अत्थम्मि । जइयव्वमेव इइ


जो, उवएसो सो नओ नाम ॥ ५ ॥ सव्वेसिं पि नयाणं, बहुविहवत्तव्वयं निसामित्ता ।  
 तं सव्वनयविमुद्धं, जं चरणगुणट्ठिओ साहू ॥ ६ ॥ **सेत्तं नए** ॥ १५३ ॥ **अणु-**  
**ओगदारा समत्ता** ॥ सोल्लसयाणि चउत्तराणि, होति उ इमंमि गाहाणं ।  
 दुसहस्स मणुद्भ- , छंदवित्तपमाणओ भणिओ ॥ १ ॥ णयरमहादारा इव, उवक्कम-  
 दाराणुओगवरदारा । अक्खरविंदुगमत्ता, लिहिया दुक्खक्खयट्ठाए ॥ २ ॥

॥ अणुओगदारसुत्तं समत्तं ॥

तस्समत्तीए

**चत्तारि मूलसुत्ताइं समत्ताइं**

॥ सव्वसिलोगसंखा ५५०० ॥





णमोऽस्थु णं समणस्स भगवओ णायपुत्तमहावीरस्स

# सुत्तागमे

तत्थ णं

आवस्सयसुत्तं



अहं पढमं सामाइयावस्सयं

आवस्सही इच्छाकारेण संदिसह भगवं ! देव(सी)सियं पडिक्कमणं ठाएमि, देव-  
सियणाणदंसणचरित्तवअइयारचित्तवणट्ठं करेमि काउसग्गं ॥ १ ॥ णमो अरिहंताणं,  
णमो सिद्धाणं, णमो आयरियाणं, णमो उवज्झायाणं, णमो लोए सव्वसाहूणं  
॥ २ ॥ कैरेमि भंते ! सामाइयं सव्वं सावज्जं जोमं पच्चक्खामि, जावज्जीवाए तिविहं  
तिविहेणं मणेणं वायाए काएणं न करेमि न कारवेमि करंतपि अण्णं न समण-  
जाणामि, तस्स भंते ! पडिक्कमामि निंदामि गरिहामि अप्पाणं वोसिरामि ॥ ३ ॥  
इच्छामि (पडिक्कमिउं-ओ) ठामि काउसग्गं, जो मे देवसिओ अइयारो कओ काइओ  
वाइओ माणसिओ उस्सुत्तो उम्मग्गो अकप्पो अकरणिजो दुज्झाओ दुविचिंतिओ  
अणायारो अणिच्छियव्वो असमणपाउग्गो नाणे तह दंसणे चरित्ते सुए सामाइए  
तिण्हं गुत्तीणं चउण्हं कसायाणं पंचण्हं महव्वयाणं छण्हं जीवनिकायाणं सत्तण्हं

१ विही-पुर्व्वि 'तिक्खुत्तो आयाहिणं पयाहिणं करेमि वंदामि नमंस्सामि सका-  
रेमि सम्माणेमि कल्लणं मंगलं देवयं चेइयं पज्जुवासामि मत्थएण वंदामि ।' इच्चणेण  
पाढेण गुरुवंदणा किज्जइ । पच्छा णमोक्कारुचारो 'एसो पंच णमोक्कारो, सव्वपावप्प-  
णासणो । मंगलाणं च सव्वेसिं, पढमं हवइ मंगलं ॥' जुत्तो । पुणो 'तिक्खुत्तो०'  
तओ 'इच्छाकारेण०' 'तस्सुत्तरीकरणेण०' जाव 'ठाणेणं' फुडुच्चारणं किच्चा  
'मोणेणं०' अप्फुडं अव्वत्तं मणंसि 'इरियावहियाए' मग्गविसोही कीरइ । णमो-  
क्कारुचारणेण ज्ञाणं पारिजइ, पच्छा 'लोगस्स०' फुडुच्चारो, तओ दुण्णि 'णमोऽस्थु  
णं०' । पच्छा सामाइयं पढमावस्सयं पारब्भइ । पत्तियावस्सयसमत्तीए 'तिक्खुत्तो०'  
इच्चणेण गुरुं वंदित्तु अण्णस्सावस्सयस्साणा घेप्पइ त्ति विसेसो । २ 'राइय'  
'पक्खिय' 'चाउम्मासिय' 'संवच्छरिय' । ३ केइ विहीए 'तिक्खुत्तो०' पच्छा केवलं  
णमोक्कारं णवपयमिच्छंति, 'करेमि भंते !०' इच्चणेण पढमावस्सयं पारब्भंति य ।



पिंडेसणाणं अट्ठण्हं पवयणमाऊणं नवण्हं वंमचेरगुत्तीणं दसविहे समणधम्ममे सम-  
णाणं जोगाणं जं खंडियं जं विराहियं तस्स मिच्छामि दुक्कडं ॥ ४ ॥ तस्स उत्तरी-  
करणेण पायच्छित्तकरणेण विसोहीकरणेण विसल्लीकरणेण पावाणं कम्ममाणं णिग्घा-  
यणद्वाए ठामि काउसग्गं, अन्नत्थ ऊससिएणं नीससिएणं खासिएणं छीएणं जंभाइ-  
एणं उड्डुएणं वायनिसग्गेणं भमलिए पित्तमुच्छाए सुहुमेहिं अंगसंचालेहिं सुहुमेहिं  
खेलसंचालेहिं सुहुमेहिं दिट्ठिसंचालेहिं एवमाइएहिं आगारेहिं अभग्गे अविराहिब्बो  
हुज्ज मे काउसग्गो, जाव अरिहंताणं भगवंताणं नमोक्कारेणं न पारेमि ताव कायं  
ठाणेणं मोणेणं ज्ञाणेणं अप्पाणं वोसिरांमि ॥ ५ ॥ इइ पढमं सामाइया-  
वस्सयं समत्तं ॥ १ ॥

## अह वीयं चउवीसत्थवावस्सयं

लोगस्स उज्जोयगरे, धम्मतित्थयरे जिणे । अरिहंते कित्तइस्सं, चउवीसंपि केवली  
॥ १ ॥ उसभमजियं च वंदे, संभवमभिणंदणं च सुमइं च । पउमप्पहं सुपासं, जिणं  
च चंदप्पहं वंदे ॥ २ ॥ सुविहिं च पुप्फदंतं, सीयलसिजंसं वासुपुजं च । विमल-  
मणंतं च जिणं, धम्मं संतिं च वंदामि ॥ ३ ॥ कुंथुं अरं च मल्लिं, वंदे मुणिसुव्वयं  
नमिजिणं च । वंदामिऽरिट्ठनेमिं, पासं तह वद्धमाणं च ॥ ४ ॥ एवं मए अभित्थुआ,  
विह्वयरयमला पहीणजरमरणा । चउवीसंपि जिणवरा, तित्थयरा मे पसीयंतु  
॥ ५ ॥ कित्तियवंदियमहिया, जे ए लोगस्स उत्तमा सिद्धा । आरुग्गबोहिलाभं,  
समाहिवरमुत्तमं दिंतु ॥ ६ ॥ चंदेसु निम्मलयरा, आइच्चेसु अहियं पयासयरा ।  
सागरवरगंभीरा, सिद्धा सिद्धिं मम दिसंतु ॥ ७ ॥ इइ वीयं चउवीसत्थ-  
वा(उक्कित्तणा)वस्सयं समत्तं ॥ २ ॥

१ 'आगमे ति विहे जाव मूलगुण पंच०' 'इच्छामि ठामि०' 'सव्वस्स वि देव-  
सियं दुचित्तियं दुभासियं दुचिद्धियं दुपालियं०' एए सव्वे पाढा मोणेणं पढमावस्स-  
यज्झाणे ज्ञाइजंति, पुणो तइयावस्सयस्स पच्छा चउत्थावस्सयस्साइंसि ठिच्चा फुड्ड-  
च्चारणपुव्वगं उच्चारिजंति । एएसु 'आगमे०' 'इच्छामि ठामि०' एए दुणिण अद्धमा-  
गहीए 'सव्वस्स वि०' अद्धमद्धमागहीए अद्धं भासाए । सेसा भिण्णभिण्णभासाए  
लब्भंति तत्तोऽवसेया ।

## अह तइयं वंदणावस्सयं

इच्छामि खमासमणो ! वंदितं जावणिज्जाए निसीहियाए, अणुजाणह मे मिउग्गहं, निसीहि अहोकायं कायसंफासं, खमणिज्जो भे किलामो, अप्पकिलंतानं बहुसुभेण भे दिवसो वइक्कंतो ? जत्ता भे ? जवणिज्जं च भे ? खामेसि खमासमणो ! देवसियं वइक्कमं, आवस्सियाए पडिक्कमामि खमासमणानं देवसियाए आसायणाए तेत्तीसन्नयराए जं किंचि मिच्छाए मणहुक्कडाए वयदुक्कडाए कायदुक्कडाए कोहाए माणाए मायाए लोहाए सव्वकालियाए सव्वमिच्छोवयाराए सव्वधम्ममाइक्कमणाए आसायणाए जो मे देवसिओ अइयारो कओ तस्स खमासमणो ! पडिक्कमामि निंदामि गरिहामि अप्पाणं वोसिरामि ॥ इइ तइयं वंदणावस्सयं समत्तं ॥ ३ ॥

## अह चउत्थं पडिक्कमणावस्सयं

चैत्तारि मंगलं-अरिहंता मंगलं, सिद्धा मंगलं, साहू मंगलं, केवलपन्नतो धम्मो मंगलं । चत्तारि लोगुत्तमा-अरिहंता लोगुत्तमा, सिद्धा लोगुत्तमा, साहू लोगुत्तमा, केवलपन्नतो धम्मो लोगुत्तमो । चत्तारि सरणं पवज्जामि-अरिहंता सरणं पवज्जामि, सिद्धा सरणं पवज्जामि, साहू सरणं पवज्जामि, केवलपन्नतं धम्मं सरणं पवज्जामि ॥ १ ॥ इच्छामि पडिक्कमिअं इरियावहियाए विराहणाए गमणागमणे पाणक्कमणे वीयक्कमणे हरियक्कमणे ओसाउत्तिगपणगदगमट्टीमक्कडासंताणासंक्रमणे जे मे जीवा विराहिया एगिंदिया वेइंदिया तेइंदिया चउरिंदिया पंचिंदिया अभिहया वत्तिया लेसिया संघा-इया संघट्टिया परियाविया किलामिया उद्विया ठाणाओ ठाणं संकामिया जीवियाओ ववरोविया तस्स मिच्छामि दुक्कडं ॥ २ ॥ इच्छामि पडिक्कमिअं पगामसिज्जाए निगामसिज्जाए संथाराउव्वट्ठणाए परियट्ठणाए आउंटणाए पसारणाए छप्पइसंघट्ठणाए कूहए कक्कराइए छीए जंभाइए आमोसे ससरक्खामोसे आउलमाउलाए सोवणवत्तियाए इत्थीविप्परियासियाए विट्ठीविप्परियासियाए मणविप्परियासियाए पाणभोयण-विप्परियासियाए जो मे देवसिओ अइयारो कओ तस्स मिच्छामि दुक्कडं ॥ ३ ॥ पडिक्कमामि गोयरचरियाए भिक्खायरियाए उग्घाडकवाडउग्घाडणाए साणावच्छा-

१ 'राइओ' 'पक्खिओ' 'चाउम्मासिओ' 'संवच्छरिओ' । २ 'तिक्खुत्तो' इच्चणेण वंदणं किच्चा पच्छा पंचणमोक्कारं तओ 'करेसि भंते' । तओ 'चत्तारि मंगलं' । ३ 'चत्तारि मंगलं' पच्छा 'इच्छामि' पढियव्वं ति केइ ।

दारासंघट्टणाए मंडीपाहुडियाए वलिपाहुडियाए ठवणापाहुडियाए संकिए सहसागारिए  
 अणेसणाए पाणेसणाए पाणभोयणाए वीयभोयणाए हरियभोयणाए पच्छाकम्मियाए  
 पुरेकम्मियाए अदिट्टहडाए दगसंसट्टहडाए रयंसंसट्टहडाए पारिसाडणियाए पारिट्ठाव-  
 णियाए ओहासणभिक्षाए जं उग्गमेणं उप्पायणेसणाए अपरिसुद्धं परिग्गहिंयं परिभुत्तं  
 वा जं न परिट्ठवियं तस्स मिच्छामि दुक्कडं ॥ ४ ॥ पडिक्कमामि चाउक्कालं सज्झायस्स  
 अकरणयाए उभओकालं भंडोवगरणस्स अप्पडिलेहणाए दुप्पडिलेहणाए अप्पमज्ज-  
 णाए दुप्पमज्जणाए अइक्कमे वइक्कमे अइयारे अणायारे जो मे देवसिओ अइयारो  
 कओ तस्स मिच्छामि दुक्कडं ॥ ५ ॥ पडिक्कमामि एगविहे असंजमे । पडिक्कमामि  
 दोहिं वंधणेहिं-रागबंधणेणं, दोसबंधणेणं । पडिक्कमामि तिहिं दंडेहिं-मणदंडेणं,  
 वयदंडेणं, कायदंडेणं । पडिक्कमामि तिहिं गुत्तीहिं-मणगुत्तीए, वयगुत्तीए, काय-  
 गुत्तीए । पडिक्कमामि तिहिं सल्लेहिं-मायासल्लेणं, नियाणसल्लेणं, मिच्छादंसणसल्लेणं ।  
 पडिक्कमामि तिहिं गारवेहिं-इद्धीगारवेणं, रसगारवेणं, सायागारवेणं । पडिक्कमामि  
 तिहिं विराहणाहिं-णाणविराहणाए, दंसणविराहणाए, चरित्तविराहणाए । पडिक्कमामि  
 चउहिं कसाएहिं-कोहकसाएणं, माणकसाएणं, मायाकसाएणं, लोभकसाएणं ।  
 पडिक्कमामि चउहिं सण्णाहिं-आहारसण्णाए, भयसण्णाए, मेहुणसण्णाए, परिग्गह-  
 सण्णाए । पडिक्कमामि चउहिं विकहाहिं-इत्थीकहाए, भत्तकहाए, देसकहाए, राय-  
 कहाए । पडिक्कमामि चउहिं ज्ञाणेहिं-अट्टेणं ज्ञाणेणं, रुहेणं ज्ञाणेणं, धम्ममेणं ज्ञाणेणं,  
 सुक्केणं ज्ञाणेणं । पडिक्कमामि पंचहिं किरियाहिं-काइयाए, अहिगरणियाए, पाउसि-  
 याए, परितावणियाए, पाणाइवायकिरियाए । पडिक्कमामि पंचहिं कामगुणेहिं-सद्वेणं,  
 रुद्वेणं, गंधेणं, रसेणं, फासेणं । पडिक्कमामि पंचहिं महव्वएहिं-सव्वाओ पाणाइवा-  
 याओ वेरमणं, सव्वाओ मुसावायाओ वेरमणं, सव्वाओ अदिण्णादाणाओ वेरमणं,  
 सव्वाओ मेहुणाओ वेरमणं, सव्वाओ परिग्गहाओ वेरमणं । पडिक्कमामि पंचहिं  
 समिईहिं-इरियासमिईए, भासासमिईए, एसणासमिईए, आयाणभंडमत्तनिकखेवणा-  
 समिईए, उच्चारपासवणखेलजल्लसिघाणपारिठावणियासमिईए । पडिक्कमामि छहिं जीव-  
 निकाएहिं-पुढविकाएणं, आउकाएणं, तेउकाएणं, वाउकाएणं, वणस्सइकाएणं,  
 तसकाएणं । पडिक्कमामि छहिं लेसाहिं-किण्हलेसाए, णील्लेसाए, काउलेसाए, तेउ-  
 लेसाए, पम्हलेसाए, सुक्कलेसाए । पडिक्कमामि सत्तहिं भयट्ठाणेहिं, अट्ठाहिं मयट्ठाणेहिं,  
 णवहिं वंसचेरगुत्तीहिं, दसविहे समणधम्मो, एगारसहिं उवासगपडिमाहिं, बारसहिं  
 भिक्(ख)खुपडिमाहिं, तेरसहिं किरियाठाणेहिं, चउ(द)इसहिं भूयगामेहिं, पण्णरसहिं  
 परमाहम्मिएहिं, सोलसहिं गाहासोलस(ए)हिं, सत्तरसविहे असंजमे, अट्ठारसविहे

अबंमे, एगूणवीसाए णायज्झयणेहिं, वीसाए असमाहि(ट्ठा)ठाणेहिं, एगवीसाए सबलेहिं, बावीसाए परीसहेहिं, तेवीसाए स्यूगडज्झयणेहिं, चउवीसाए देवेहिं, पणवीसाए भावणाहिं, छवीसाए दसाकपववहारणं उहेसणकाले(णं)हिं, सत्तावीसाए अण-  
गारगुणेहिं, अट्ठावीसाए आचारपकप्पेहिं, एगूणतीसाए पावसुय(८)पसंगेहिं, तीसाए  
महामोहणीयट्ठाणेहिं, एगतीसाए सिद्धा-इ-गुणेहिं, वत्तीसाए जोगसंगहेहिं, तेत्तीसाए  
आसायणाहिं; अरिहंताणं आसायणाए, सिद्धाणं आसायणाए, आयरियाणं आसा-  
यणाए, उवज्जायाणं आसायणाए, साहूणं आसायणाए, साहुणीणं आसायणाए,  
सावयाणं आसायणाए, सावियाणं आसायणाए, देवाणं आसायणाए, देवीणं  
आसायणाए, इहलोगस्स आसायणाए, परलोगस्स आसायणाए, केवलीणं आसा-  
यणाए, केवलपण्णत्तस्स धम्मस्स आसायणाए, सदेवमणुयासुरस्स लोगस्स  
आसायणाए, सब्बपाणभूयजीवसत्ताणं आसायणाए, कालस्स आसायणाए, सुयस्स  
आसायणाए, सुयदेवयाए आसायणाए, वायणायरियस्स आसायणाए; जं वाइदं,  
वच्चामेलियं, हीणक्खरं, अच्चक्खरं, पयहीणं, विणयहीणं, जोगहीणं, घोसहीणं,  
सुद्धुदिण्णं, दुद्धुपडिच्छियं, अकाले कओ सज्झाओ, काले न कओ सज्झाओ, अस-  
ज्झाइए सज्झाइयं, सज्झाइए न सज्झाइयं; तस्स मिच्छामि दुक्कडं ॥ ६ ॥ नमो  
चउवीसाए तित्थयराणं उसभाइमहावीरपज्जवसाणाणं । इणमेव णिग्गंथं पावयणं  
सच्चं, अणुत्तरं, केवलियं, पडिपुण्णं, नेयाउयं, संसुदं, सन्नगतणं, सिद्धिमग्गं, मुत्ति-  
मग्गं, निज्जाणमग्गं, निव्वाणमग्गं, अवितहमविसं(दिदं)धि, सब्बदुक्खपहीणमग्गं ।  
इत्थं ठिया जीवा सिज्झंति, बुज्झंति, मुच्चंति, परिनिव्वायंति, सब्बदुक्खाणमंतं  
करंति । तं धम्मं सहहामि, पत्तियामि, रोएमि, फासेमि, पालेमि, अणुपालेमि । तं  
धम्मं सहहंतो, पत्तिरंतो, रोयंतो, फासंतो, पालंतो, अणुपालंतो । तस्स धम्मस्स  
केवलपण्णत्तस्स अब्भुट्ठिओमि आराहणाए, विरओमि विराहणाए । असंजमं परिया-  
णामि, संजमं उवसंपज्जामि । अबंभं परियाणामि, बंभं उवसंपज्जामि । अकप्पं परिया-  
णामि, कप्पं उवसंपज्जामि । अन्नाणं परियाणामि, नाणं उवसंपज्जामि । अकिरियं परि-  
याणामि, किरियं उवसंपज्जामि । मिच्छत्तं परियाणामि, सम्मतं उवसंपज्जामि । अबोहिं  
परियाणामि, बोहिं उवसंपज्जामि । अमग्गं परियाणामि, मग्गं उवसंपज्जामि । जं संभरामि  
जं च न संभरामि, जं पडिक्कामि जं च न पडिक्कामि, तस्स संवस्स देवसियस्स  
अइयारस्स पडिक्कामि । समणोऽहं संजयविरयपडिहयपच्चक्खायपावकम्ममे अनियाणो  
दिट्ठिसंपण्णो मायामोसविवज्जिओ, अट्ठाइज्जेसु दीवससुदेसु पण्णरससु कम्मभूमिसु

१ समणीओ 'समणी हं' '०कम्मा' '०णा' '०ग्णा' '०या' ति बोळति ।

जावंति केइ साहू रयहरणगुच्छगपडिग्गहधारा पंचमहव्वयधारा अट्टारससहस्ससी-  
लंगधारा अक्खयाधारचरित्ता ते सव्वे सिरसा मणसा मत्थएण वंदामि ॥ ७ ॥  
[ आयरियउवज्झाए, सीसे साहम्मिए कुलगणे य । जे मे केइ कसाया, सव्वे तिविहेण  
खामेमि ॥ १ ॥ सव्वस्स समणसंघस्स, भगवओ अंजलिं करिय सीसे । सव्वं  
खमावइत्ता, खमामि सव्वस्स अहयंपि ॥ २ ॥ सव्वस्स जीवरासिस्स, भावओ  
धम्मनिहियनियन्ति ॥ स० ॥ ३ ॥ ] खामेमि सव्वजीवे, सव्वे जीवा खमंतु मे ।  
मित्ती मे सव्वभूएसु, वेरं मज्झं न केणइ ॥ १ ॥ एवमहं आलोइय, निंदिय गरहिय  
दुगंछिउं सम्मं । तिविहेण पडिक्कंतो, वंदामि जिणे चउव्वीसं ॥ २ ॥ इच्छामि  
खमासमणो ! वंदिउं जाव अप्पाणं वोसिरामि । [ दुक्खुतो ] ॥ इइ चउत्थं पडि-  
क्कमणावस्सयं समत्तं ॥ ४ ॥

### अह पंचमं काउस्सग्गावस्सयं

औवस्सही० । करेमि भंते ! ० । इच्छामि ठामि काउसग्गं जाव समणाणं जोगाणं...  
तस्स मिच्छामि दुक्कंडं । तस्स उत्तरीरुरेणं जाव अप्पाणं वोसिरामि ॥ इइ पंचमं  
काउस्सग्गावस्सयं समत्तं ॥ ५ ॥

### अह छट्ठं पच्चक्खाणावस्सयं

दसविहे पच्चक्खाणे प० तं०-अगागयमइक्कंतं, कोडीसहियं नियंटियं चेव ।  
सागारमणागारं, परिमाणकडं निरवसेसं ॥ १ ॥ संक्रेयं चेव अद्वाए, पच्चक्खाणं  
भवे दसहा । णमोक्कारसहियपच्चक्खाणं-उग्गाए सूरे णमुक्कारसहियं  
पच्चक्खामि, चउव्विहंपि आहारं असणं पाणं खाइमं साइमं अण्णत्थऽणाभोगेणं

१ कोट्टगगयाओ गाहाओ पच्चन्तरेऽहिगाओ लब्भंति । २ तओ चउरासीलक्ख-  
जीवजोणिखमावणापाढं पढिज्जइ । तओ- । अन्नमओऽन्नतोऽवसेओ । ३ अस्स ठाणे केइ  
'इच्छामि णं भंते ! तुब्भेहिं अब्भणुण्णाए समाणे देवसिय० विसोहणट्ठं करेमि काउ-  
सग्गं' ति उच्चारंति । ४ ति पढितु काउस्सग्गं कुज्जा, तत्थ 'लोगस्स उज्जोयगरे०'  
वारचउक्कं मणसा संसमरितु सणमोक्कारं काउस्सग्गं पारितु पुणरवि 'लोगस्स उज्जो-  
यगरे०' फुडमुच्चारेज, तओ 'इच्छामि खमासमणो०' दुक्खुतो पढिऊण गुरुसमीवे  
पच्चक्खेज-ति विही ।

सहसागारेणं वोसिरामि ॥ १ ॥ **पोरिसीपच्चक्खाणं**—उग्गए सूरे पोरिसिं पच्चक्खामि, चउव्विहंपि आहारं असणं पाणं खाइमं साइमं अण्णत्थऽणाभोगेणं सहसागारेणं पच्छण्णकालेणं दिसामोहेणं साहुवयणेणं सव्वसमाहिवत्तियागारेणं वोसिरामि [एवं सद्धुपोरिसियं] ॥ २ ॥ **पुरिमद्धपच्चक्खाणं**—उग्गए सूरे पुरिमद्धं पच्चक्खामि, चउव्विहंपि आहारं असणं पाणं खाइमं साइमं अण्णत्थऽणाभोगेणं सहसागारेणं पच्छण्णकालेणं दिसामोहेणं साहुवयणेणं महत्तरागारेणं सव्वसमाहिवत्तियागारेणं वोसिरामि ॥ ३ ॥ **एगासणं [वेआसणं]**—**पच्चक्खाणं**—[उग्गए सूरे] एगासणं [वेआसणं] पच्चक्खामि, [दुविहं] तिविहंपि आहारं असणं [पाणं] खाइमं साइमं अण्णत्थऽणाभोगेणं [सहसागारेणं] सागारियागारेणं आ[उट्ठ]उंटणपसारणेणं गुरुअब्भुट्ठाणेणं पारिट्ठावणियागारेणं महत्तरागारेणं सव्वसमाहिवत्तियागारेणं वोसिरामि ॥ ४ ॥ **एगट्ठाणपच्चक्खाणं**—एगट्ठाणं पच्चक्खामि, चउव्विहंपि आहारं असणं पाणं खाइमं साइमं अण्णत्थऽणाभोगेणं सहसागारेणं सागारियागारेणं गुरुअब्भुट्ठाणेणं पारिट्ठावणियागारेणं महत्तरागारेणं सव्वसमाहिवत्तियागारेणं वोसिरामि ॥ ५ ॥ **आयंबिलपच्चक्खाणं**—आयंबिलं पच्चक्खामि, [तिविहंपि आहारं असणं खाइमं साइमं] अण्णत्थऽणाभोगेणं सहसागारेणं लेवाल्लेवेणं गिहत्थसंसट्ठेणं उक्खित्तविवेगेणं पारिट्ठावणियागारेणं महत्तरागारेणं सव्वसमाहिवत्तियागारेणं वोसिरामि ॥ ६ ॥ **अभत्तट्ठं [चउव्विहाहार] पच्चक्खाणं**—उग्गए सूरे अभत्तट्ठं पच्चक्खामि, चउव्विहंपि आहारं असणं पाणं खाइमं साइमं अण्णत्थऽणाभोगेणं सहसागारेणं पारिट्ठावणियागारेणं महत्तरागारेणं सव्वसमाहिवत्तियागारेणं वोसिरामि ॥ ७-१ ॥ **अभत्तट्ठं [तिविहाहार] पच्चक्खाणं**—उग्गए सूरे अभत्तट्ठं पच्चक्खामि तिविहंपि आहारं असणं खाइमं साइमं अण्णत्थऽणाभोगेणं सहसागारेणं पारिट्ठावणियागारेणं महत्तरागारेणं सव्वसमाहिवत्तियागारेणं पागस्स लेवेण वा अच्छेण वा बहुलेण वा ससित्थेण वा असित्थेण वा वोसिरामि ॥ ७-२ ॥ **दिवसचरिमं [भवचरिमं] पच्चक्खाणं**—दिवसचरिमं [भवचरिमं वा] पच्चक्खामि, चउव्विहंपि आहारं असणं पाणं खाइमं साइमं अण्णत्थऽणाभोगेणं सहसागारेणं महत्तरागारेणं सव्वसमाहिवत्तियागारेणं वोसिरामि ॥ ८ ॥ **अभिग्गहपच्चक्खाणं**—[उग्गए सूरे गंठिसहियं मुट्ठिसहियं] अभिग्गहं पच्चक्खामि, चउव्विहंपि आहारं असणं पाणं खाइमं साइमं अण्णत्थऽणाभोगेणं सहसागारेणं महत्तरागारेणं सव्वसमाहिवत्तियागारेणं वोसिरामि ॥ ९ ॥ **निट्ठिगइयपच्चक्खाणं**—[उ० सू०] निट्ठिगइयं पच्चक्खामि [च०

आ० अ० ४] अण्णत्थऽणाभोगेणं सहसागारेणं लेवाल्लेवेणं गिहत्थसंसट्ठेणं उक्खित्तविवेगेणं पडुच्चमक्खिएणं पारिट्ठावणियागारेणं महत्तरागारेणं सव्वसमाहि-  
वत्तियागारेणं वोत्तिरामि ॥ १० ॥ [ पच्चक्खाणपारणविही-उग्गए सूरे  
णमुक्कारसहियं...जाव पच्चक्खाणं कयं तं सम्मं काएण फासियं पालियं सोहियं  
तीरियं किट्ठियं आराहियं अणुपालियं भवइ जं च न भवइ तस्स मिच्छामि दुक्कडं । ]  
णमोऽत्थु णं अरिहंताणं भगवंताणं आइगराणं तित्थयराणं सयंसंबुद्धाणं पुरिसुत्त-  
माणं पुरिससीहाणं पुरिसवरपुंडरियाणं पुरिसवरगंधहत्थीणं लोगुत्तमाणं लोगनाहाणं  
लोगहियाणं लोगपईवाणं लोगपज्जोयगराणं अभयदयाणं चक्खुदयाणं मग्गदयाणं  
सरणदयाणं जीवदयाणं बोहिदयाणं धम्मदयाणं धम्मदेसयाणं धम्मनायगाणं  
धम्मसारहीणं धम्मवरचाउरंतचक्कवट्ठीणं, दी(वो)वता(णं)णसरणगइपइट्ठाणं अप्पडि-  
हयवरनाणदंसणधराणं वियट्ठल्लउमाणं जिणाणं जावयाणं तिण्णाणं तारयाणं बुद्धाणं  
बोहयाणं सुत्ताणं मोयगाणं सव्वण्णूणं सव्वदरिसीणं सिवमयलमरुयमणंतमक्खयम-  
व्वावाहमपुणरावित्तिसिद्धिगइनामधेयं ठाणं संपत्ताणं नमो जिणाणं जियभयाणं  
[ठाणं संपाविउक्का(मस्स)मांणं] ॥ इइ छट्ठं पच्चक्खाणावस्सयं सैमत्तं ॥ ६ ॥

॥ आवस्सयसुत्तं समत्तं ॥

तस्समत्तीए

वत्तीसं सुत्ताइं समत्ताइं

तेसिं समत्तीए

सुत्तागमे समत्ते

॥ सव्वसिलोगसंखा ७२००० ॥

१ एसिं दसण्हं पच्चक्खाणाणं अण्णयरं पच्चक्खाणं पच्चक्खित्ता सामाइयमाइयाणं  
छण्हमावस्सयाणमइयारसंबंधिमिच्छामि-दुक्कडं दच्चा दुक्खुतो 'णमोऽत्थु णं०'  
दाहिणं जाणुं भूमीए संठवित्तु वामं जाणुं उट्ठुं किच्चा पंजलिउडेण पढिज्जइ । राइए  
पच्चक्खाणे जहाधारणत्ति विसोसो । २ अरिहापक्खे । ३ पच्चंतरे छट्ठावस्सयपच्छा  
एसो पाढोऽहिगो लब्भइ-इच्छाकारेण संदिसह भगवं अ० अब्भितरं देवसियं खामेउ  
इच्छं खामेमि देवसियं जं किंचि य अपत्तियं प० भत्तपाणे विणए वेयावच्चे आलावे  
संलावे उच्चासणे समासणे अंतरभासाए अपरभासाए जं किंचि मज्झं विणयपरिहीणं  
सुहुमं (थोवं) वा बायरं (बहुं) वा तुब्भे जाणह अहं न जाणामि तस्स मिच्छामि  
दुक्कडं । ४ सावयावस्सयविसए परिसिट्ठं दट्ठव्वं ।

णमोऽत्थु णं समणस्स भगवओ णायपुत्तमहावीरस्स

# पढमं परिसिद्धं

दसासुयवखंधस्स अट्टममज्झयणं

अहवा

कप्पसुत्तं

नमो अरिहंताणं, नमो सिद्धाणं, नमो आयरियाणं, नमो उवज्झायाणं, नमो लोए सव्वसाहूणं । एसो पंचनसुक्कारो, सव्वपावप्पणासणो । मंगलाणं च सव्वेसिं, पढमं हवइ मंगलं ॥ १ ॥ तेणं कालेणं तेणं समएणं समणे भगवं महावीरे पंच-हत्थुत्तरे हुत्था, तंजहा-हत्थुत्तराहिं चुए चइत्ता गव्वं वक्कंते १ हत्थुत्तराहिं गव्भाओ गव्वं साहरिए २ हत्थुत्तराहिं जाए ३ हत्थुत्तराहिं मुंडे भविता अगाराओ अणगारियं पव्वइए ४ हत्थुत्तराहिं अणंते अणुत्तरे निव्वाघाए निरावरणे कसिणे पड्डिपुण्णे केव-लवरनाणदंसणे समुप्पन्ने ५ साइणा परिनिव्वुए भयवं ६ ॥ २ ॥ तेणं कालेणं तेणं समएणं समणे भगवं महावीरे जे से गिम्हाणं चउत्थे मासे अट्टमे पक्खे आसाढसुद्धे तस्स णं आसाढसुद्धस्स छट्ठीपक्खेणं महाविजयपुप्फुत्तरपवरपुंडरीयाओ महाविमा-णाओ वीसंसागरोवमट्ठिइयाओ आउक्खएणं भवक्खएणं ठिइक्खएणं अणंतरे चयं चइत्ता इहेव जंबुद्वीवे दीवे भारहे वासे दाहिणद्धुभरहे इमीसे ओसप्पिणीए सुसम-सुसमाए समाए विइक्कंताए १ सुसमाए समाए विइक्कंताए २ सुसमदुसमाए समाए विइक्कंताए ३ दुसमसुसमाए समाए बहुविइक्कंताए-सागरोवमकोडाकोडीए बायाली-  
(साए)सवाससहस्सेहिं ऊणियाए पंचहत्तरिवासेहिं अद्धनवमेहि य मासेहिं सेसेहिं-इक्कवीसाए तित्थयरेहिं इक्खागकुलसमुप्पन्नेहिं कासवगुत्तेहिं, दोहि य हरिवंसकुल-समुप्पन्नेहिं गोयमसगुत्तेहिं, तेवीसाए तित्थयरेहिं विइक्कंतेहिं, समणे भगवं महावीरे च(रिमे)रमतित्थयरे पुव्वतित्थयरनिद्धिंटे माहणकुंडवगामे नयरे उसभदत्तस्स माह-णस्स कोडालसगुत्तस्स भारियाए देवाणंदाए माहणीए जालंधरसगुत्ताए पुव्वरत्ता-वरत्तकालसमयसिं हत्थुत्तराहिं नक्खत्तेणं जोगमुवागएणं आहारवक्कंतीए भववक्कंतीए सरीरवक्कंतीए कुच्छिसि गव्वभत्ताए वक्कंते ॥ ३ ॥ समणे भगवं महावीरे तिच्चाणो-वगए यावि हुत्था-चइस्सामिति जाणइ, चयमाणे न जाणइ, चुएमिति जाणइ । जं



रयणिं च णं समणे भगवं महावीरे देवाणंदाए माहणीए जालंधरसगुताए कुच्छिसि गवभत्ताए वक्कंते तं रयणिं च णं सा देवाणंदा माहणी सयणिजंसि सुत्तजागरा ओहीरमाणी २ इमेयारूवे उराले कल्लाणे सिवे धन्ने मंगल्ले सस्सिरीए चउद्दसमहा-सुमिणे पासित्ताणं पडिबुद्धा, तंजहा-गय्य-वसहं-सीहं-अभिसेय्ये-दामे-संसि-दिणय्येरे झ्यं कुंभं । पउमसर-सार-विमाणभवण-रयणुच्चैय-सिहिं च ॥ १ ॥ ४ ॥ तए णं सा देवा-णंदा माहणी इमे एयारूवे उराले कल्लाणे सिवे धन्ने मंगल्ले सस्सिरीए चउद्दसमहासुमिणे पासित्ताणं पडिबुद्धा समाणी हट्ठतुट्ठचित्तमाणंदिया पीइमणा परमसोमणस्सिया हरि-सवसविसप्पमाणहियया धाराहयकलंबुगंपिव समुस्ससियरोमकूवा सुमिणुग्गहं करेइ सुमिणुग्गहं करित्ता सयणिजाओ अब्भुट्ठेइ अब्भुट्ठित्ता अतुरियमचवलमसंभंताए रायहं-ससरिरीए गइए जेणेव उसभदत्ते माहणे तेणेव उवागच्छइ उवागच्छित्ता उसभदत्तं माहणं जएणं विजएणं वद्धावेइ वद्धावित्ता भद्दासणवरगया आसत्था वीसत्था सुहा-सणवरगया करयलपरिग्गहियं दसनहं सिरसावत्तं मत्थए अंजलिं कट्ठु एवं वयासी-एवं खलु अहं देवाणुप्पिया ! अज्ज सयणिजंसि सुत्तजागरा ओहीरमाणी २ इमेया-रूवे उराले जाव सस्सिरीए चउद्दसमहासुमिणे पासित्ताणं पडिबुद्धा, तंजहा-गय जाव सिहिं च । एएसिं देवाणुप्पिया ! उरालाणं जाव चउद्दसणं महासुमिणाणं के मन्ने कल्लाणे फलवित्तिविसेसे भविस्सइ ? ॥ ५-६ ॥ तए णं से उसभदत्ते माहणे देवाणंदाए माहणीए अंतिए एयमट्ठं सुच्चा निसम्म हट्ठतुट्ठ जाव हियए धाराहयकलं-बुयंपिव समुस्ससियरोमकूवे सुमिणुग्गहं करेइ करित्ता ईहं अणुपविसइ अणुपविसित्ता अप्पणो साहाविएणं मइपुव्वएणं बुद्धिविण्णाणेणं तेसिं सुमिणाणं अत्थुग्गहं करेइ २ ता देवाणंदं माहणिं एवं वयासी-उराला णं तुमे देवाणुप्पिए ! सुमिणा दिट्ठा, कल्लाणा (णं) सिवा धन्ना मंगल्ला सस्सिरीया आरुग्गतुट्ठिदीहाउकल्लाणमंगल्लकारणा णं तुमे देवाणुप्पिए ! सुमिणा दिट्ठा, तंजहा-अत्थलाभो देवाणुप्पिए ! भोगलाभो देवाणुप्पिए ! पुत्तलाभो देवाणुप्पिए ! सुक्खलाभो देवाणुप्पिए !, एवं खलु तुमं देवाणुप्पिए ! नवणं मासाणं बहुपडिपुच्चाणं अद्धट्ठमाणं राइंदियाणं विइक्कंताणं सुकुमालपाणिपायं अहीणपडिपुच्चापंचिंदियसरीरं लक्खणवज्जणगुणोववेयं माणुम्माणपमाणपडिपुच्चासुजाय-सव्वंगसुंदरंगं ससिसोमाकारं कंतं पियदंसणं सुरूवं देवकुमारोवमं दारयं पयाहिसि ॥ ७-८ ॥ से वि य णं दारए उम्मुक्कवालभावे विन्नायपरिणयमित्ते जोव्वणगमणुप्पत्ते रिउव्वेयजउव्वेयसामवेयअथव्वणवेय-इतिहासपंचमाणं नि(ग)धंदुल्लहाणं संगोव-माणं सरहस्साणं चउण्हं वेयाणं सारए, पारए (वारए), धारए, सडंगवी, सट्ठितंतवि

सारए, संखाणे [सिक्खाणे] सिक्खाकप्पे वागरणे छंदे निरुत्ते जोइसामयणे अज्जेसु य  
बहुसु बंभण्णएसु परिव्वायएसु नएसु सुपरिनिट्ठिए यावि भविस्सइ ॥ ९ ॥ तं उराला  
णं तुमे देवाणुप्पिए ! सुमिणा दिट्ठा जाव आरुग्गतुट्ठिदीहाउयमंगळकल्लाणकारगा णं  
तुमे देवाणुप्पिए ! सुमिणा दिट्ठत्तिकट्ठु भुज्जो २ अणुवृहइ ॥ १० ॥ तए णं सा देवा-  
णंदा माहणी उसभदत्तस्स माहणस्स अंतिए एयमट्ठं सुचा निसम्म हट्ठुत्तु जाव  
हियया जाव करयलपरिग्गहियं दसनहं सिरसावत्तं मत्थए अंजलिं कट्ठु उसभदत्तं  
माहणं एवं वयासी-एवमेयं देवाणुप्पिया ! तहमेयं देवाणुप्पिया ! अवितहमेयं देवा-  
णुप्पिया ! असंदिद्धमेयं देवाणुप्पिया ! इच्छियमेयं देवाणुप्पिया ! पडिच्छियमेयं  
देवाणुप्पिया ! इच्छियपडिच्छियमेयं देवाणुप्पिया !, सक्खे णं एस(अ)मट्ठे से जहेयं  
तुब्बे वयहत्तिकट्ठु ते सुमिणे सम्मं पडिच्छइ २ ता उसभदत्तेणं माहणेणं सद्धिं  
उरालाहं माणुस्सगाइं भोगभोगाइं भुंजमाणी विहरइ ॥ ११-१२ ॥ तेणं कालेणं  
तेणं समएणं सक्के देविंदे देवराया वज्जपाणी पुरंदरे सयक्कउ सहस्सक्खे मघवं  
पागसासणे दाहिणङ्गुलेगाहिवई बत्तीसविमाणसयसहस्साहिवई एरावणवाहणे सुरिंदे  
अरयंवरवत्थधरे आलइयमालमउडे नवहेमचारचित्तचंचलकुंडलविलिहिज्जमाणगळे  
महिट्ठिए महज्जुइए महाबले महायसे महाणुभावे महासुक्खे भासुर(बों)वुंदी पलंब-  
वणमालधरे सोहम्मए कप्पे सोहम्मवडिंसए विमाणे सुहम्मए सभाए सक्कंसि सीहा-  
सणंसि, से णं तत्थ बत्तीसाए विमाणावासयसाहस्सीणं, चउरासीए सामाणिय-  
साहस्सीणं, तायत्तीसाए तायत्तीसगाणं, चउण्हं लोगपालाणं, अट्ठण्हं अगमहिस्सीणं  
सपरिवाराणं, तिण्हं परिसाणं, सत्तण्हं अणीयाणं, सत्तण्हं अणीयाहिवईणं, चउण्हं  
चउरासी(ए)णं आयरक्खदेवसाहस्सीणं, अज्जेसिं च बहूणं सोहम्मकप्पवासीणं वेसा-  
णियाणं देवाणं देवीण य आहवच्चं पोरेवच्चं सामित्तं भट्ठित्तं महत्तरगतं आणाईसर-  
सेणावच्चं कारेमाणे पालेमाणे महया हयनट्ठणीयवाइयतंतीतलतालुडियघणमुईणपडु-  
पडहवाइयरेवेणं दिव्वाइं भोगभोगाइं भुंजमाणे विहरइ ॥ १३ ॥ इमं च णं केवल-  
कप्पं जंबुद्वीवं दीवं विउलेणं ओहिणा आभोएमाणे २ विहरइ, तत्थ णं समणं भगवं  
महावीरं जंबुद्वीवे दीवे भारहे वासे दाहिणङ्गुलेगाहिवई माहणकुंडगामे नयरे उसभ-  
दत्तस्स माहणस्स कोडालसगुत्तस्स भारियाए देवाणंदाए माहणीए जालंधरसगुत्ताए  
कुच्छिसि गब्भत्ताए वक्कंतं पासइ २ ता हट्ठुत्तुचित्तमाणंदिए णंदिए परमाणंदिए  
पीइमाणे परमसोमणस्सिए हरिसवसविसप्पमाणहियए धाराहय(कयंब)नीवसुरभिकु-  
सुमचंचुमालइयऊससियरोमकूवे वियसियवरकमलनयणवयणे पयलियवरकडगतुडि-  
यकेऊरमउडकुंडलहारविरायंतवच्छे पालंबपलंबमाणवोलंतभूसणधरे ससंभमं तुरियं

चवलं सुरिंदे सीहासणाओ अब्भुट्ठेइ २ ता पायपीढाओ पच्चोरुहइ २ ता वेरुलि-  
यवरिट्ठिरिट्ठंजणनिउणो(वच्चि)वियमिसिमिसित्तमणिरयणमंडियाओ पाउयाओ ओमु-  
यइ २ ता एगसाडियं उत्तरासंगं करेइ २ ता अंजलिमउलियग्गहत्थे तित्थयराभिमुहे  
सत्तट्ठपयाइं अणुगच्छइ २ ता वामं जाणुं अंचेइ २ ता दाहिणं जाणुं धरणियलंसि  
साहट्ठु तिकखुत्तो मुद्धानं धरणियलंसि निवेसेइ २ ता ईसिं पच्चुन्नमइ २ ता करयल-  
परिग्गहियं दसनहं सिरसावत्तं मत्थए अंजलिं कट्ठु एवं वयासी-नमुत्थु णं अरिहंताणं  
भगवंताणं, आइगराणं तित्थयराणं सयंसंबुद्धानं, पुरिसुत्तमाणं पुरिससीहाणं पुरिसवर-  
पुंडरीयाणं पुरिसवरगंधहत्थीणं, लोपुत्तमाणं लोगनाहाणं लोगहियाणं लोगपईवाणं  
लोगपज्जोगराणं, अभयदयाणं चक्खुदयाणं मग्गदयाणं सरणदयाणं जीवदयाणं  
बोहिदयाणं, धम्मदयाणं धम्मदेसयाणं धम्मनायगाणं धम्मसारहीणं धम्मवरचाउरंत-  
चक्कवट्ठीणं, दीवो ताणं सरणं गइ पइट्ठा अप्पडिहयवरनाणदंसणधराणं वियट्ठउमाणं,  
जिणाणं जावयाणं तिज्जाणं तारयाणं बुद्धानं बोहयाणं मुत्ताणं मोयगाणं सव्वण्णूणं  
सव्वदरिसीणं, सिवमयलमरुयमणंतमक्खयमव्वाबाहमपुणरावित्तिसिद्धिगइनामधेयं  
ठाणं संपत्ताणं, नमो जिणाणं जियभयाणं । नमुत्थु णं समणस्स भगवओ महावीरस्स  
आइगरस्स चरमतित्थयरस्स पुव्वतित्थयरनिद्धिस्स जाव संपाविउकामस्स । वंदामि  
णं भगवंतं तत्थगयं इहगए, पास(इ)उ मे भगवं तत्थगए इहगयंतिकट्ठु समणं भगवं  
महावीरं वंदइ नमंसइ वं० २ ता सीहासणवरंसि पुरत्थाभिमुहे सज्जिसजे ॥ १४-१५ ॥  
तए णं तस्स सक्कस्स देविंदस्स देवरत्तो अयमेयारूवे अज्झत्थिए चितिए पत्थिए  
मणोगए संकप्पे समुप्पज्जित्था-न खलु एयं भूयं, न एयं भव्वं, न एयं भविस्सं,  
जं णं अरहंता वा चक्कवट्ठी वा बलदेवा वा वासुदेवा वा अंतकुलेसु वा जाव  
भिक्षागकुलेसु वा माहणकुलेसु वा आयाइंसु वा आयाइंति वा आयाइस्संति वा  
॥ १६ ॥ एवं खलु अरहंता वा चक्कवट्ठी वा बलदेवा वा वासुदेवा वा उग्गकुलेसु  
वा भोगकुलेसु वा राइण्णकुलेसु वा इक्खागकुलेसु वा खत्तियकुलेसु वा हरिवंसकुलेसु  
वा अन्नयरेसु वा तहप्पगारेसु विसुद्धजाइकुलवंसेसु आयाइंसु वा आयाइंति वा  
आयाइस्संति वा ॥ १७ ॥ अत्थि पुण एसे वि भावे लोगच्छेरयभूए अणंताहिं  
उस्सप्पिणीओसप्पिणीहिं विइक्कंताहिं समुप्पज्जइ, नामगुत्तस्स वा कम्मस्स अक्खी-  
णस्स अवेइयस्स अणिज्जिणस्स उदएणं, जं णं अरहंता वा चक्कवट्ठी वा बलदेवा  
वा वासुदेवा वा अंतकुलेसु वा जाव माहणकुलेसु वा आयाइंसु वा ३, कुच्छिंसि  
गब्भत्ताए वक्कमिंसु वा वक्कमंति वा वक्कमिस्संति वा, नो चेव णं जोणीजम्मणनिकखम-  
णेणं निकखमिंसु वा निकखमंति वा निकखमिस्संति वा ॥ १८ ॥ अयं च णं समणे

भगवं महावीरे जंबुद्वीवे दीवे भारहे वासे माहणकुंडगामे नयरे उसभदत्तस्स माह-  
णस्स कोडालसगुत्तस्स भारियाए देवाणंदाए माहणीए जालंधरसगुत्ताए कुच्छिसि  
गम्भत्ताए वक्कंते ॥ १९ ॥ तं जीयमेयं तीयपञ्चुप्पन्नमणागयाणं सक्काणं देविदाणं  
देवरा(ई)याणं अरहंते भगवंते तहप्पगारेहिंतो अंतकुलेहिंतो जाव कि(वि)वण-  
कुलेहिंतो० तहप्पगारेसु उग्गकुलेसु वा जाव राइणकुलेसु वा नाय(०)खत्तियह-  
रिवंसकुलेसु वा अन्नयरेसु वा तहप्पगारेसु विसुद्धजाइकुलवंसेसु (जाव रजसिरिं  
कारेमाणेसु पालेमाणेसु) वा साहरावित्तए, तं सेयं खलु मम वि समणं भगवं महावीरं  
चरमत्तिथयरं पुव्वत्तिथयरनिद्धिं माहणकुंडगामाओ नयराओ उसभदत्तस्स माह-  
णस्स कोडालसगुत्तस्स भारियाए देवाणंदाए माहणीए जालंधरसगुत्ताए कुच्छीओ  
खत्तियकुंडगामे नयरे नायाणं खत्तियाणं सिद्धत्थस्स खत्तियस्स कासवगुत्तस्स भारि-  
याए तिसलाए खत्तियाणीए वासिट्ठसगुत्ताए कुच्छिसि गम्भत्ताए साहरावित्तए । जे  
वि य णं से तिसलाए खत्तियाणीए गम्भे तं पि य णं देवाणंदाए माहणीए जालं-  
धरसगुत्ताए कुच्छिसि गम्भत्ताए साहरावित्तएतिकट्ठु एवं संपेहेइ २ ता हरिणेगमेसिं  
अग्गा(पायत्ता)णीयाहिंवइं देवं सदावेइ २ ता एवं वयासी-एवं खलु देवाणुप्पिया !  
न एयं भूयं, न एयं भव्वं, न एयं भविस्सं, जं णं अरहंता वा चक्कवट्ठी वा बलदेवा  
वा वासुदेवा वा अंतकुलेसु वा जाव भिक्खागकुलेसु वा० आयाइंसु वा ३, एवं खलु  
अ(रि)रहंता वा चक्कवट्ठी वा बलदेवा वा वासुदेवा वा उग्गकुलेसु वा जाव हरिवंस-  
कुलेसु वा अन्नयरेसु वा तहप्पगारेसु विसुद्धजाइकुलवंसेसु आयाइंसु वा ३ ॥ २०-२१ ॥  
अत्थि पुण एसे वि भावे लोगच्छेरयभूए अणंताहिं उरसप्पिणीओसप्पिणीहिं विइक्कं-  
ताहिं समुप्पजइ, नामगुत्तस्स वा कम्मस्स अक्खीणस्स अवेइयस्स अणिजिणस्स  
उदएणं, जं णं अरहंता वा चक्कवट्ठी वा बलदेवा वा वासुदेवा वा अंतकुलेसु वा  
जाव भिक्खागकुलेसु वा० आयाइंसु वा ३, कुच्छिसि गम्भत्ताए वक्कमिंसु वा ३, नो  
चेव णं जोणीजम्मणनिक्खमणेणं निक्खमिंसु वा ३ ॥ २२ ॥ अयं च णं समणे भगवं  
महावीरे जंबुद्वीवे दीवे भारहे वासे माहणकुंडगामे नयरे उसभदत्तस्स माहणस्स  
कोडालसगुत्तस्स भारियाए देवाणंदाए माहणीए जालंधरसगुत्ताए कुच्छिसि गम्भत्ताए  
वक्कंते ॥ २३ ॥ तं जीयमेयं तीयपञ्चुप्पणमणागयाणं सक्काणं देविदाणं देवराइणं अर-  
हंते भगवंते तहप्पगारेहिंतो अंतकुलेहिंतो जाव माहणकुलेहिंतो तहप्पगारेसु उग्गकु-  
लेसु वा भोगकुलेसु वा जाव हरिवंसकुलेसु वा अन्नयरेसु वा तहप्पगारेसु विसुद्धजाइ-  
कुलवंसेसु साहरावित्तए ॥ २४ ॥ तं गच्छ णं तुमं देवाणुप्पिया ! समणं भगवं महा-  
वीरं माहणकुंडगामाओ नयराओ उसभदत्तस्स माहणस्स कोडालसगुत्तस्स भारियाए

देवाणंदाए माहणीए जालंधरसगुत्ताए कुच्छीओ खत्तियकुंडग्गामे नयरे नायाणं  
 खत्तियाणं सिद्धत्थस्स खत्तियस्स कासवगुत्तस्स भारियाए तिसलाए खत्तियाणीए  
 वासिद्धसगुत्ताए कुच्छिसि गम्भत्ताए साहराहि, जे वि य णं से तिसलाए खत्तियाणीए  
 गम्भे तं पि य णं देवाणंदाए माहणीए जालंधरसगुत्ताए कुच्छिसि गम्भत्ताए  
 साहराहि साहरिता मम एयमाणत्तियं खिप्पामेव पच्चप्पिणाहि ॥ २५ ॥ ताए णं से  
 हरिणगमेसी अग्गाणीयाहि वई देवे सक्केणं देविंदेणं देवरत्ता एवं वुत्ते समाणे  
 हट्ठवुत्त जाव हियए करयल जाव तिकट्ठु एवं जं देवो आणवेइत्ति आणाए विणएणं  
 वयणं पडिसुणेइ २ ता सक्कस्स देविंदस्स देवरत्तो अंतियाओ पडिनिक्खमइ २ ता  
 उत्तरपुरच्छिमं दिसीभागं अवक्कमइ २ ता वेउव्वियसमुग्घाएणं समोहणइ २ ता  
 संखिज्जाइं जोयणाइं दंडं निसिरइ, तंजहा-रयणाणं वइराणं वेरुलियाणं  
 लोहियक्खाणं मसारगल्लाणं हंसगम्भाणं पुलयाणं सोगंधियाणं जोईरसाणं अंजणाणं  
 अंजणपुलयाणं जायल्लावाणं सुभगाणं अंक्राणं फलिहाणं रिट्ठाणं, अहावायरे  
 पुग्गले परिसाडेइ २ ता अहासुद्धमे पुग्गले परिया(ए)दियइ २ ता दुच्चं पि  
 वेउव्वियसमुग्घाएणं समोहणइ २ ता उत्तरवेउव्वियरूवं विउव्वइ २ ता ताए  
 उक्किट्ठाए तुरियाए चवलाए चंडाए ज(य)इणाए उद्धयाए सिग्घाए दिव्वाए  
 देवगईए वीइवयमाणे २ तिरियमसंखिज्जाणं दीवसमुद्दाणं मज्झंमज्झेणं जेणेव  
 जंबुदीवे दीवे भारहे वासे जेणेव माहणकुंडग्गामे नयरे जेणेव उसभदत्तस्स माह-  
 णस्स गिहे जेणेव देवाणंदा माहणी तेणेव उवागच्छइ २ ता आलोए समणस्स  
 भगवओ महावीरस्स पणामं करेइ २ ता देवाणंदाए माहणीए सपरिजणाए ओसो-  
 वर्णि दलइ २ ता असुमे पुग्गले अवहरइ २ ता सुमे पुग्गले पक्खिवइ २ ता  
 अणुजाणउ मे भ(य)गवंतिकट्ठु समणं भगवं महावीरं अव्वाबाहं अव्वाबाहेणं  
 दिव्वेणं पहावेणं करयलसंपुडेणं गिण्हइ २ ता जेणेव खत्तियकुंडग्गामे नयरे जेणेव  
 सिद्धत्थस्स खत्तियस्स गिहे जेणेव तिसला खत्तियाणी तेणेव उवागच्छइ २ ता  
 तिसलाए खत्तियाणीए सपरिजणाए ओसोवर्णि दलइ २ ता असुमे पुग्गले अवहरइ २ ता  
 सुमे पुग्गले पक्खिवइ २ ता समणं भगवं महावीरं अव्वाबाहं अव्वाबाहेणं  
 तिसलाए खत्तियाणीए कुच्छिसि गम्भत्ताए साहरइ (२ ता), जे वि य णं से तिसलाए  
 खत्तियाणीए गम्भे तं पि य णं देवाणंदाए माहणीए जालंधरसगुत्ताए कुच्छिसि  
 गम्भत्ताए साहरइ २ ता जामेव दिसिं पाउब्भूए तामेव दिसिं पडिणए ॥ २६-२७ ॥  
 ताए उक्किट्ठाए तुरियाए चवलाए चंडाए जवणाए उद्धयाए सिग्घाए दिव्वाए देव-  
 गईए तिरियमसंखिज्जाणं दीवसमुद्दाणं मज्झंमज्झेणं जोयणसाहस्सि एहिं विग्गहेहिं

उप्पयमाणे २ जेणामेव सोहम्मे कप्पे सोहम्भवडिसए विमाणे सक्कंसि सीहासणंसि सक्के देविदे देवराया तेणामेव उवागच्छइ २ ता सक्कस्स देविदस्स देवरत्तो एयमा-  
णत्तियं खिप्पामेव पक्खप्पणइ ॥ २८ ॥ तेणं कालेणं तेणं समएणं समणे भगवं  
महावीरे जेसे वासाणं तच्चे मासे पंचमे पक्खे आसोयवहुले तस्स णं आ(अर)सो-  
यवहुलस्स तेरसीपक्खेणं वासीइराइंदिएहिं विइक्कंतेहिं तेसीइमस्स राइंदियस्स अंतरा  
वट्टमा(णस्स)णे हियाणुकंपएणं देवेणं हरिणेगमेसिणा सक्कवयणसंदिट्ठेणं माहणकुंड-  
ग्गामाओ नयराओ उसभदत्तस्स माहणस्स कोडालसगुत्तस्स भारियाए देवाणंदाए  
माहणीए जालंधरसगुताए कुच्छीओ खत्तियकुंडग्गामे नयरे नायाणं खत्तियाणं  
सिद्धत्थस्स खत्तियस्स कासवगुत्तस्स भारियाए तिसलाए खत्तियाणीए वासिट्ठसगुताए  
पुव्वरत्तावरत्तकालसमयंसि हत्थुत्तराहिं नक्खत्तेणं जोगमुवागएणं अक्वावाहं अक्वा-  
वाहेणं कुच्छिसि गम्भत्ताए साहरिए ॥ २९ ॥ तेणं कालेणं तेणं समएणं समणे  
भगवं महावीरे तिञ्चाणोवगए यावि हुत्था, तंजहा-साहरिजिस्सामिति जाणइ,  
साहरिज्जमाणे न जाणइ, साहरिएमिति जाणइ ॥ ३० ॥ जं रयणिं च णं समणे  
भगवं महावीरे देवाणंदाए माहणीए जालंधरसगुताए कुच्छीओ तिसलाए खत्तिया-  
णीए वासिट्ठसगुताए कुच्छिसि गम्भत्ताए साहरिए तं रयणिं च णं सा देवाणंदा  
माहणी सयणिज्जंसि सुत्तजागरा ओहीरमाणी २ इमेयाह्वे उराले कल्लाणे सिवे धन्ने  
मंगल्ले सरिसरीए चउइस्समहासुमिणे तिसलाए खत्तीयाणीए हडेत्ति पासित्ताणं पडिबुद्धा,  
तंजहा-गय जाव सिहिं च ॥ ३१ ॥ जं रयणिं च णं समणे भगवं महावीरे  
देवाणंदाए माहणीए जालंधरसगुताए कुच्छीओ तिसलाए खत्तियाणीए वासिट्ठस-  
गुताए कुच्छिसि गम्भत्ताए साहरिए तं रयणिं च णं सा तिसला खत्तियाणी तंसि  
तारिसगंसि वासवर्ंसि अड्ढिभतरओ सच्चित्तकम्मे बाहिरओ दूमियघट्टमट्ठे विच्चित्तउ-  
ल्लोयचिल्लित्तले मणिरयणपणासियंययारे बहुसमसुविभत्तभूमिभागे पंचवन्नसरससुर-  
मिसुकुप्फपुंजोवयारकलिए कालागुरुपवरकुंदुक्कतुरुक्कडज्जंतधूममधमघंतगंधुद्धया-  
भिरामे सुगंधवरगंधिए गंधवट्ठिभूए तंसि तारिसगंसि सयणिज्जंसि सालिंगणवट्ठिए  
उभओ बिब्बोयणे उभओ उच्चए मज्झे णयगंभीरे गंगापुल्लिणवालुयाउद्दालसालिसए  
ओयवियखोमियदुगुल्लपट्टपडिच्छन्ने सुविरइयरयताणे रत्तंसुयसंवुए सुरम्मे आइणगह्व-  
वूरनवणीयतूलतुल्लाफे सुगंधवरकुसुमचुन्नसयणोवयारकलिए, पुव्वरत्तावरत्तकालसम-  
यंसि सुत्तजागरा ओहीरमाणी २ इमेयाह्वे उराले जाव चउइस्समहासुमिणे पासित्ताणं

१ हिएण-अप्पणो इंदस्स य हियकारिणा तहा अणुकंपएणं-भगवओ भत्तेणं  
ति अट्ठो ।

पडिवुद्धा, तंजहा-गय-वसह-सीह-अभिसेय-दाम-ससि-दिणयरं इयं कुम्भं । पउ-  
मसर-सागर-विमाणभवण-रयणुचय-सिहिं च ॥ १ ॥ ३२ ॥ तए णं सा तिसला  
खत्तियाणी तप्पढमयाए [तओ य]चउहंतमूसियगलियविपुलजलहरहारनिकरखीरसा-  
गरससंककिरणदगरयरययमहासेलपंडु(र)रतरं समागयमहुयरसुगंधदाणवासियक(पो)-  
वोलमूलं देवरायकुंज(र)र(व)वरप्पमाणं पिच्छइ सजलवणविपुलजलहरगजियगंभी-  
रचारुघोसं इमं सुभं सव्वलक्खणकयंबियं वरोहं १ ॥ ३३ ॥ तओ पुणो धवल-  
कमलपत्तपयराइरेगह्वप्पमं पहासमुदओवहारेहिं सव्वओ चेव दीवयंतं अइसिरि-  
भरपिळ्णवाविसपंतकंतसोहंतचारुककुहं तणुवु(द्ध)इसुकुमाललोमनिद्धच्छविं थिरसुव-  
द्धमंसलोवचियलट्टसुविभत्तसुंदरं पिच्छइ वणवट्टलट्टउक्किट्टविसिट्टुप्पगतिकखसिंगं  
दंतं सिवं समाणसोहंतसुद्धदंतं वसहं अमियगुणमंगलमुहं २ ॥ ३४ ॥ तओ पुणो  
हारनिकरखीरसागरससंककिरणदगरयरययमहासेलपंडु(रतरं)रंगं रमणिज्जपिच्छणिजं  
थिरलट्टपउट्टवट्टपीवरसुसिलिट्टविसिट्टुतिक्खदाढाविडंबियमुहं परिकम्मियजच्चकमलको-  
मलपमाणसोहंतलट्टउट्टं रत्तुप्पलपत्तमउयसुकुमालतालुनिळालियगगीहं मूसागयपवर-  
कणगतवियआवत्तायंतवट्टतडियविमलसरिसनयणं विसालपीवरवरोहं पडिपुजविम-  
लखंधं मिउविसयसुहुमलक्खणपसत्थविच्छिन्नकेसराडोवसोहियं ऊसियसुनिम्मियसु-  
जायअण्णोडियलंगूलं सोमं सोमाकारं लीलायंतं नहयलाओ ओवयमाणं नियगवय-  
णमइवयंतं पिच्छइ सा गाढतिकखग्गनहं सीहं वयणसिरीप(लंब)लवपत्तचारुजीहं  
३ ॥ ३५ ॥ तओ पुणो पुण्णचंदवयणा उच्चागयठाणलट्टसंठियं पसत्थरूवं सुपइट्टिय-  
कणग(मय)कुम्मसरिसोवमाणचलणं अञ्जुजयपीणरइयमंसलउ(वचि)जयतणुतंवनि-  
द्धनहं कमलपलाससुकुमालकरचरणकोमलवरंगुलिं कुरुविंदावत्तवट्टाणुपुव्वजंघं निगूढ-  
जाणुं गयवरकरसरिसपीवरोहं चामीकररइयमेहलाजुतकंतविच्छिन्नसोणिचक्कं जच्च-  
जणभमरजलयपयरउज्जुयसमसंहियतणुयआइजलडहसुकुमालमउयरमणिजोमराइं  
नाभीमंडलसुंदरविसालपसत्थजघणं करयलमाइयपसत्थतिवलियमज्झं नाणामणिक-  
णगरयणविमलमहातवणिजाभरणभूसणविराइ(यमंगु)यंगोवंगि हारविरायंतकुंदमालप-  
रिणद्धजलजलितथणजुयलविमलकलसं आइयपत्तियविभूसिएणं सुभगजालुज्जलेणं  
मुत्ताकलावएणं उरत्थदीणारमा(ल)लियविराइएण कंठमणिसुत्तएण य कुंडलजुयलुल्ल-  
संतअंसोवसत्तसोभंतसप्पभेणं सोभागुणसमुदएणं आणणकुडुंबिएणं कमलामलविसा-  
लरमणिजलोय(णिं)णं कमलपजलंतकरगहियमुक्कतोयं लीलावायकयपक्खएणं सुवि-  
सदकसिणघणसण्हलंबंतकेसहत्थं पउमइहकमलवासिणिं सिरिं भगवइं पिच्छइ हिम-  
वंतसेलसिहरे दिसागइंदोरुपीवरकराभिसिच्चमाणिं ४ ॥ ३६ ॥ तओ पुणो सरस-

कुसुममंदारदामरमणिज्जभूयं चंपगासोगपुत्रागनागपियंगुसिरीससुग्गरगमल्लियाजाइ-  
जूहिअंकोल्लकोजकोरिंटपत्तदमणयनवमालियबउलतिलयवासंतियपउमुप्पलपाडलकुं-  
दाइमुत्तसैहकारसुरभिर्गंधि अणुवममणोहरेणं गंधेणं दसदिसाओवि वासयंतं सव्वो-  
उयसुरभिकुसुममल्लववलिलसंतकंतबहुवण्णभत्तिचित्तं छप्पयमहुयरिभमरगणगुमगु-  
मायंतनिलितगुंजंतदेसभागं दामं पिच्छइ नहंगणतलाओ ओवयंतं ५ ॥ ३७ ॥ सस्सि  
च गोखीरफेणदगरयरययकलसपंडुरं सुभं हिययनयणकंतं पडिपुण्णं तिमिरनिकरघण-  
गुहिरवितिमिरकरं पमाणपक्खंतारायलेहं कुमुयवणविबोहगं निसासोहगं सुपरिमद्ध-  
दप्पणतलोवमं हंसपडुवण्णं जोइसमुहमंडगं तमरिपुं मयणसरापूरगं समुद्दगपूरगं  
दुम्मणं जणं दइयवज्जियं पायएहिं सोसयंतं पुणो सोमचारुहवं पिच्छइ सा गगण-  
मंडलविसालसोमचंक्रममाणतिल(गं)यं रोहिणिमणहिययवल्हं देवी पुण्णचंदं समुल्ल-  
संतं ६ ॥ ३८ ॥ तओ पुणो तमपडलपरिप्फुडं चेव तेयसा पज्जलंतरुवं रत्तासोग-  
पगासकिंसुयसुयमुहुंजुद्वरागसरिसं कमलवणालंकरणं अंकरणं जोइसस्स अंवरतल-  
पईवं हिमपडलगलग्गहं गहगणोरुनायगं रत्तिविणासं उदयत्थमणेसु मुहुत्तसुह-  
दंसणं दुच्चिरिक्खरुवं रत्तिमुद्धंतदुप्पयारप्पमहणं सीयवेगमहणं पिच्छइ मेरुगिरि-  
सययपरियट्ठयं विसालं सूरं रस्सीसहस्सपयलियदित्तसोहं ७ ॥ ३९ ॥ तओ पुणो  
जच्चकणगलट्टिपइट्ठियं समुहनीलरत्तपीयसुक्किल्लसुकुमालुल्लसियमोरपिच्छकयमुद्धयं धयं  
अहियसस्सिरियं फालियसंखंकुंददगरयरययकलसपंडुरेण मत्थयत्थेण सीहेण राय-  
माणेण रायमाणं भित्तुं गगणतलमंडलं चेव ववसिएणं पिच्छइ सिवमउयमारुयल-  
याहयकंपमाणं अइप्पमाणं जणपिच्छणिज्जरुवं ८ ॥ ४० ॥ तओ पुणो जच्चकंचणुज्जलं-  
तरुवं निम्मलजलपुण्णमुत्तमं दिप्पमाणसोहं कमलकलावपरिरायमाणं पडिपुण्ण[य]-  
सव्वमंगलभेयसमागमं पवररयणप(रि)रायंतकमलद्वियं नयणभूसणकरं पमासमाणं  
सव्वओ चेव दीवयंतं सोमलच्छीनिमेलणं सव्वपावपरिवज्जियं सुभं भासुरं सिरिवरं सव्वो-  
उयसुरभिकुसुमआसत्तमल्लदामं पिच्छइ सा रययपुण्णकलसं ९ ॥ ४१ ॥ तओ पुणो  
(पुणरवि) रविकिरणतरुणबोहियसहस्सपत्तसुरभितरपिंजरजलं जलचरपहकरपरिहत्थ-  
गमच्छपरिभुजमाणजलसंचयं महुंतं जलंतमिव कमलकुवलयउप्पलतामरसपुंडरीय-  
उरुसप्पमाणसिरिसमुदएणं रमणिज्जरुवसोहं पमुइयंतभमरगणमतमहुयरिगणुक्करो-  
लि(ल्लि)ज्जमाणकमलं कार्यवगबलाहयचक्ककलहंससारसगव्वियसउणगणमिहुणसेविज-  
माणसलिलं पउमिणिपत्तोवलग्गजलबिंदुनिचयचित्तं पिच्छइ सा हिययनयणकंतं पउ-

१ मंदारपारिजातियचंपगाविलउलमचकुंदपाडलजायजूहियसुगंधगंधपुप्फमाला ० ।

२ परसमयावेक्खाए ।



मसरं नामसरं सररुहाभिरामं १० ॥ ४२ ॥ तओ पुणो चंदकिरणरासिसरिससि-  
 वच्छसोहं चउ(गु)गमणपवड्ढमाणजलसंचयं चवलचंचलुच्चायप्पमाणकल्लोलेल्लेततोयं  
 पडुपवणाहयचलियचवलपागडतरंगंरंगंतभंगखोखुब्भमाणसोभंतनिम्मलुकडउम्मीसह-  
 संवंधवःवमा(णाव)णोनियत्तभासुरतराभिरामं महामगरमच्छतिमितिमिगिलनिरुद्धति-  
 लितिलियाभिघायकप्पूरफेणपसरं महानईतुरियवेगसमागयभमगंगावत्तगुप्पमाणुचलंत-  
 पच्चोनियत्तभममाणलोलसलिलं पिच्छइ खीरोयसायरं सा रयणिकरसोमवयणा ११  
 ॥ ४३ ॥ तओ पुणो तरुणसूरमंडलसमप्पहं दिप्पमाणसोहं उत्तमकंचणमहामणिस-  
 मूहपवरतेयअट्टसहस्सदिप्पंतनहप्पईवं कणगपयरलंबमाणमुत्तासमुज्जलं जलंतदि-  
 व्वदामं ईहामिगउसभतुरगनरमगरविहृगवालगकिन्नररुसरभचमरसंसत्तकुंजरवणल-  
 यपउमलयभत्तिचित्तं गंधव्वोपवज्जमाणसंपुण्णघोसं निच्चं सजलघणविउलजलहरग-  
 जियसद्दण्णुणाइणा देवदुंदुहिमहारवेणं सयलमवि जीवलोयं प्रयंतं कालागुहपव-  
 रकुंदुधकतुक्कडज्जंतधूव(सार)वासंग(यं)उत्तममघमघंतगंधुद्धयाभिरामं निच्चालोयं  
 सेयं सेयप्पमं सुरवराभिरामं पिच्छइ सा साओवभोगं वरविमाणपुंडरीयं १२  
 ॥ ४४ ॥ तओ पुणो पुलगवेरिंदनीलसासगकक्केयणलोहियक्खमरगयमसारगल्लपवा-  
 लफलिहसोगंधियहंसगव्भअंजणचंदप्पहवररयणेहिं महियलपइट्ठियं गगणमंडलंतं  
 पभासयंतं तुंगं मेरुगिरिसंनि(गा)क्रासं पिच्छइ सा रयणनिकररासिं १३ ॥ ४५ ॥  
 सिहिं च-सा विउलुज्जलपिंगलमहुधयपरिसिच्चमाणनिद्धूमधगधगाइयजलंतजालुज्जला-  
 भिरामं तरतमजोगजुत्तेहिं जालपयरेहिं अण्णुण्णमिव अण्णुप्पइण्णं पिच्छइ जालु-  
 ज्जलण(ग)गं अंवरं व कत्थइ पयंतं अइवेगचंचलं सिहिं १४ ॥ ४६ ॥ इमे एयारिसे  
 सुभे सोमे पियदंसणे सुरुवे सुमिणे दट्ठूण सयणमज्झे पडिबुद्धा अरविंदलोयणा  
 हरिसपुलइयंगी । एए चउदससुमिणे, सव्वा पासेइ तित्थयरमाया । जं रयणि  
 वक्कमई, कुच्छिसि महायसो अरहा ॥ १ ॥ ४७ ॥ तए णं सा तिसला खत्तियाणी  
 इमे एयारुवे उराले चउदसमहासुमिणे पासिताणं पडिबुद्धा समाणी हट्ठुत्तु जाव  
 हियया धाराहयकयंवपुक्कणंपिव समुस्ससियरोमकूवा सुमिणुग्गहं करेइ २ ता  
 सयणिज्जाओ अब्भुट्ठेइ २ ता पायपीढाओ पच्चोरुहइ २ ता अतुरियमचवलमसंभंताए  
 अविलंबियाए रायहंससरिसीए गईए जेणेव सयणिज्जे जेणेव सिद्धत्थे खत्तिए तेणेव  
 उवागच्छइ २ ता सिद्धत्थं खत्तियं ताहिं इट्ठाहिं कंताहिं पियाहिं मणुण्णाहिं  
 मणोरमाहिं उरालाहिं कल्लाणाहिं सिवाहिं धन्नाहिं मंगल्लाहिं सस्सिरीयाहिं हियय-  
 गमणिज्जाहिं हिययपल्हायणिज्जाहिं मिउमहुरमंजुलाहिं गिराहिं संलवमाणी २  
 पडिबोहेइ ॥ ४८ ॥ तए णं सा तिसला खत्तियाणी सिद्धत्थेणं रण्णा अब्भणुण्णया

समाणी नाणामणिक्कणगरयणभत्तिचित्तंसि भद्दासणंसि निसीयइ २ ता आसत्था वीसत्था सुहासणवरगया सिद्धत्थं खत्तियं ताहिं इट्ठाहिं जाव संलवमाणी २ एवं वयासी-एवं खलु अहं सामी ! अज्ज तंसि तारिसगंसि सयणिज्जंसि वण्णओ जाव पडिबुद्धा, तंजहा-गय(उ)वसह० गाहा । तं एएसिं सामी ! उरालाणं चउदसण्हं महा-सुमिणाणं के मन्ने कल्लाणे फलवित्तिविसेसे भविस्सइ ? ॥ ४९-५० ॥ तए णं से सिद्धत्थे राया तिसलाए खत्तियाणीए अंतिए एयमट्ठं सुच्चा निसम्म हट्ठतुट्ठचित्ते जाव हियए धाराहयनीवसुरभिकुसुमचंचुमालइयरोमकूवे ते सुमिणे ओणिण(ह)हेइ २ ता ईहं अणुपविसइ २ ता अप्पणो साहाविएणं मइपुव्वएणं बुद्धिविण्णाणेणं तेसिं सुमिणाणं अत्थुग्गहं करेइ २ ता तिसलं खत्तियाणिं ताहिं इट्ठाहिं जाव मंगल्लाहिं मिय-महुरसस्सिरयाहिं वग्गूहिं संलवमाणे २ एवं वयासी-उराला णं तुमे देवाणुप्पिए ! सुमिणा दिट्ठा, कल्लाणा णं तुमे देवाणुप्पिए ! सुमिणा दिट्ठा, एवं सिवा, धन्ना, मंगल्ला, सस्सिरया, आरुग्गतुट्ठिदीहाउकल्लाणमंगल्लाकारगा णं तुमे देवाणुप्पिए ! सुमिणा दिट्ठा, तंजहा-अत्थलाभो देवाणुप्पिए ! भोगलाभो देवाणुप्पिए ! पुत्तलाभो देवाणुप्पिए ! सुक्खलाभो देवाणुप्पिए ! रज्जलाभो देवाणुप्पिए !, एवं खलु तुमे देवाणुप्पिए ! नवण्हं मासाणं बहुपडिपुण्णाणं अद्धट्ठमाणं राइंदियाणं विदक्कंताणं अम्हं कुलकेउं, अम्हं कुलदीवं, कुलपव्वयं, कुलवडिंसयं, कुलतिलयं, कुलकित्तिकरं, कुलवित्तिकरं, कुलदिणयरं, कुलाधारं, कुलनंदिकरं, कुलजसकरं, कुलपायवं, कुलविव-द्धणकरं, सुकुमालपाणिपायं, अहीण(सं)पडिपुण्णपंचिंदियसरीरं, लक्खणवज्जणगुणोव-वेयं, माणुम्माणप्पमाणपडिपुण्णसुजायसव्वंगसुंदरंगं, सस्सिसोमाकारं, कंतं, पियदं-सणं, सुखं दारयं पयाहिसि ॥ ५१-५२ ॥ से वि य णं दारए उम्मुक्कवालभावे विण्णा-यपरिणयमित्ते जुव्वणगमणुप्पत्ते सरे वीरे विक्कंते वि(च्छि)त्थिण्णविउलबलवाहणे रज्जवई राया भविस्सइ ॥ ५३ ॥ तं उराला णं तुमे देवाणुप्पि० ! जाव दुच्चं पि तच्चं पि अणु(बू)वूहइ । तए णं सा तिसला खत्तियाणी सिद्धत्थस्स रण्णो अंतिए एयमट्ठं सुच्चा निसम्म हट्ठतुट्ठ जाव हियया करयलपरिग्गहियं दसनहं सिरसावत्तं मत्थए अंजलिं कट्ठु एवं वयासी-एवमेयं सामी ! तहमेयं सामी ! अवितहमेयं सामी ! असंदिद्धमेयं सामी ! इच्छियमेयं सामी ! पडिच्छियमेयं सामी ! इच्छियपडि-च्छियमेयं सामी ! सच्चेणं एसमट्ठे-से जहेयं तुब्भे वयहत्तिकट्ठु ते सुमिणे सम्मं पडिच्छइ २ ता सिद्धत्थेणं रण्णा अब्भणुण्णाया समाणी नाणामणि(क्कण)रयण-भत्तिचित्ताओ भद्दासणाओ अब्भुट्ठेइ २ ता अतुरियमचवलमसंभंताए अविलंबियाए रायहंससस्सिरया गइए जेणेव सए सयणिज्जे तेणेव उवागच्छइ २ ता एवं वयासी-

मा मे ते (एएसु) उत्तमा पहाणा मंगल्ला सुमिणा दिट्ठा अब्बेहिं पावसुमिणेहिं पडिहम्मिस्संतित्तिक्कहु देवयगुरुजणसंबद्धाहिं पसत्थाहिं मंगल्लाहिं धम्मियाहिं लट्ठाहिं क्काहिं सुमिणजागरियं जागरमाणी पडिजागरमाणी विहरइ ॥ ५४-५६ ॥ तए णं सिद्धत्थे खत्तिए पच्चूसकालसमयंसि कोडुंबियपुरिसे सहावेइ २ ता एवं वयासी-  
 खिप्पामेव भो देवाणुप्पिया ! अज्ज सेसं बाहिरियं उवट्ठाणसालं गंधोदयसित्तं सुइय-  
 संमज्जिओवलित्तं सुगंधवरपंचवण्णपुप्फोवयारकलियं कालागुरुपवरकुंदुरुक्कतुरुक्कड्जंत-  
 धूवमघमघंतगंधुद्धयाभिरामं सुगंधवरगंधियं गंधवट्ठिभूयं करेह कारवेह करित्ता  
 कारवित्ता य सीहासणं रयावेह रयावित्ता ममेयमाणत्तियं खिप्पामेव पच्चप्पिणह  
 ॥ ५७-५८ ॥ तए णं ते कोडुंबियपुरिसा सिद्धत्थेणं रण्णा एवं वुत्ता समाणा  
 हट्ठतुट्ठ जाव हियया करयल जाव कहु एवं सामित्ति आणाए विणएणं वयणं  
 पडिसुणंति पडिसुणित्ता सिद्धत्थस्स खत्तियस्स अंतियाओ पडिनिक्खमंति पडिनिक्ख-  
 सित्ता जेणेव बाहिरिया उवट्ठाणसाला तेणेव उवागच्छंति (तेणेव) उवागच्छित्ता  
 खिप्पामेव सविसेसं बाहिरियं उवट्ठाणसालं गंधोदयसि(त्तसुइय)त्तं जाव सीहासणं  
 रयावित्ति रयावित्ता जेणेव सिद्धत्थे खत्तिए तेणेव उवागच्छंति उवागच्छित्ता कर-  
 यलपरिगहियं दसनहं सिरसावत्तं मत्थए अंजलिं कहु सिद्धत्थस्स खत्तियस्स तमाण-  
 त्तियं पच्चप्पिणंति ॥ ५९ ॥ तए णं सिद्धत्थे खत्तिए कळं पाउप्पभाए रयणीए  
 फुल्लुप्पलक्कमलक्कोमलुम्मिलियंमि अहापंडुरे पभाए, रत्तासोगप्पगासकिंसुयसुयमुहुगुंज-  
 द्दरागवंधुजीवरापारावयच्चलननयणपरहुयसुरत्तलोयणजासुयणकुसुमरासिहिंगुलयनिय-  
 राइरेयरेहंतसरिसे कमलायरसंडवोहए उट्ठियंमि सूर सहरस्सरस्सिमि दिणयरे तेयसा  
 जलंते, तस्स य करपहरापरद्धंमि अंधयारे बालायवकुंकुमेणं खच्चियव्व जीवलोए,  
 सयणिजाओ अब्भुट्ठेइ ॥ ६० ॥ सयणिजाओ अब्भुट्ठित्ता पायपीठाओ पच्चोरुहइ २ ता  
 जेणेव अट्ठणसाला तेणेव उवागच्छइ २ ता अट्ठणसालं अणुपविसइ २ ता अणेग-  
 वायामजोगवग्गणवामहणमल्लजुद्धकरणेहिं संते परिस्संते सयपागसहरस्सपागेहिं सुगंध-  
 वरतिल्लमाइएहिं पीणणिजेहिं वीवणिजेहिं मयणिजेहिं वि(वि)हणिजेहिं दप्पणिजेहिं  
 सव्विंदियगायपल्हायणिजेहिं अब्भंगिए समाणे तिल्लचम्मंसि निउणेहिं पडिपुण्ण-  
 पाणिपायसुकुमालक्कोमलतलेहिं अब्भंगणपरिमइणुव्वलणकरणगुणनिम्माएहिं छेएहिं  
 दक्खेहिं पट्ठेहिं कुसलेहिं मेहावीहिं जियपरिस्समेहिं पुरिसेहिं अट्ठिसुहाए मंससुहाए  
 तयासुहाए रोमसुहाए चउव्विहाए सुहपरिक्कमणाए सं[वा]बाहणाए संबाहिए समाणे  
 अवगय(खेय)परिस्समे अट्ठणसालाओ पडिनिक्खमइ ॥ ६१ ॥ अट्ठणसालाओ  
 पडिनिक्खमित्ता जेणेव मज्जणघरे तेणेव उवागच्छइ २ ता मज्जणघरं अणुपविसइ २ ता

समुत्तजालाकुलाभिरामे विचित्तमणिरयणकुट्टिमतले रमणिजे ष्हाणमंडवंसि नाणा-  
मणिरयणभत्तिचित्तंसि ष्हाणपीढंसि सुहृन्सण्णे पुप्फोदएहि य गंधोदएहि य  
उण्होदएहि य सुहोदएहि य सुद्धोदएहि य कल्लाणगपवरमज्जणविहीए मज्जिए,  
तत्थ कोउयसएहिं बहुविहेहिं कल्लाणगपवरमज्जणावसाणे पम्हलसुकुमालगंधकासाइ-  
यल्लहियंगे अहयसुमहग्घदूसरयणसुसंवुडे सरससुरभिगोसीसचंदणाणुलित्तगतते सुइमा-  
लावण्णगविलेवणे आविद्धमणिसुवण्णे कप्पियहारद्वहारतिसरयपालंबपलंबमाणकडिसु-  
त्तसुकयसोभे पिणद्धगेविजे अंगुल्लिजगल्लियकयाभरणे वरकडगतुडियथंभियभुए अहि-  
यरुवसरिसरीए कुंड(ल)लउज्जोइयाणणे मउडदित्तिसिए हारोत्थयसुकयरइयवच्छे मुद्धि-  
यापिंगलंगु(लि)लीए पालंबपलंबमाणसुकयपडउत्तरिजे नाणामणिकणगरयणविमलम-  
हरिहनिउणोवचियमिसिमिसित्तविरइयसुसिलिद्धविसिद्धलद्धाविद्धवीरवलए, किं बहुणा ?  
कप्पस्वखाए विव अलंकियविभूसिए नरिंदे, सकोरिंटमल्लदामेणं छतेणं धरिजमाणेणं  
सेयवरचामराहिं उद्धुववमाणीहिं मंगलजय(जय)सद्दकयालोए अणेगगणनायगदंडना-  
यगराईसरतलवरमाडंविद्यकोडुंविद्यमंतिमहामंतिगणगदोवारियअमच्चचेडपीडमद्दनगर-  
निगमसेट्टिसेणावइसत्थवाहदूयसंधिवालसद्धिं संपरिवुडे धवलमहामेहनिग्गए इव  
गहगणदिप्पंतरिक्खतारागणाण मज्जे ससिक्ख पियदंसणे नरवई नरिंदे नरवसहे  
नरसीहे अब्भहियरायतेयलच्छीए दिप्पमाणे मज्जणघराओ पडिनिक्खमइ ॥ ६२ ॥  
मज्जणघराओ पडिनिक्खमिता जेणेव बाहिरिया उवट्ठाणसाला तेणेव उवागच्छइ २ ता  
सीहासणंसि पुरत्थाभिमुहे निसीयइ २ ता अप्पणो उत्तरपुर(त्थि)च्छिमे दीसीभाए  
अट्ठ भद्दासणाई सेयवत्थपच्चुत्थुयाई सिद्धत्थयकयमंगलोवयाराई रयावेइ २ ता अप्पणो  
अदूरसामंते नाणामणिरयणमंडियं अहियपिच्छणिजं महग्घवरपट्टणुग्गयं सण्हपट्टभत्ति-  
सयचित्तताणं इहामियउसभतुरगनरमगरविहगवालगकिन्नररुसरभचसरकुंजरवणलय-  
पउमलयभत्तिचित्तं अट्ठिभतरियं जवणियं अंछावेइ २ ता नाणामणिरयणभत्तिचित्तं अत्थ-  
रयमिउमसूर(गो)गुत्थयं सेयवत्थपच्चुत्थुयं सुमउयं अंगसुहफरि(सगं)सं विसिद्धं तिस-  
लाए खत्तियाणीए भद्दासणं रयावेइ २ ता कोडुंविद्यपुरिसे सदावेइ २ ता एवं वयासी-  
खिप्पाभेव भो देवाणुप्पिया ! अट्ठंगमहानिमित्तसुत्तत्थधारए विविहसत्थकुसले सुविण-  
लक्खणपाढए सदावेह । तए णं ते कोडुंविद्यपुरिसा सिद्धत्थेणं रण्णा एवं वुत्ता  
समाणा हट्टवुट्ठ जाव हियया करयल जाव पडिसुणंति पडिसुणिता सिद्धत्थस्स  
खत्तियस्स अंतियाओ पडिनिक्खमंति पडिनिक्खमिता कुंड(गामं)पुरं नगरं मज्झंम-

१ नासानीसासवायवोज्झच्चक्खुहरवण्णफरिसजुत्तहयलालापेलवाइरेगधवलकणग-  
खचियंतकम्मदूस० ।

ज्ज्ञेणं जेणेव सुविणलक्खणपाठगणं गेहाइं तेणेव उवागच्छंति उवागच्छिता सुविण-  
लक्खणपाठए सद्दवित्ति ॥ ६३-६६ ॥ तए णं ते सुविणलक्खणपाठ(गा)या सिद्ध-  
त्थस्स खत्तियस्स कोडुंवियपुरिसेहिं सद्दविद्या समाणा हट्ठतुट्ठ जाव हियया ण्हाया  
सुद्धपावेसाइं मंगल्लाइं वत्थाइं पवराइं परिहिया अप्पमहग्घाभरणालंक्रियसरीरा सिद्धत्थ-  
यहरियालियाकयमंगलमुद्धाणा सएहिं सएहिं गेहेहिंतो निग्गच्छंति निग्गच्छिता  
खत्तियकुंडग्गामं नगरं मज्झमज्ज्ञेणं जेणेव सिद्धत्थस्स रण्णो भवणवरवडिसगपडि-  
दुवारे तेणेव उवागच्छंति उवागच्छिता भवणवरवडिसगपडिदुवारे एगयओ मिलंति  
मिलिता जेणेव वाहिरिया उवट्ठाणसाला जेणेव सिद्धत्थे खत्तिए तेणेव उवागच्छंति  
उवागच्छिता करयलपरिग्गहियं जाव कट्ठ सिद्धत्थं खत्तियं जएणं विजएणं वट्ठावित्ति  
॥ ६७ ॥ तए णं ते सुविणलक्खणपाठगा सिद्धत्थेणं रण्णा वंदियपूईयसक्कारियसम्मा-  
णिया समाणा पत्तेयं पत्तेयं पुव्वज्जत्थेसु महासणेसु निसीयंति ॥ ६८ ॥ तए णं सिद्धत्थे  
खत्तिए तिसलं खत्तियाणिं जवणियंतरियं ठावेइं ठावित्ता पुप्फफलपडिपुण्णहत्थे परेणं  
विणएणं ते सुविणलक्खणपाठए एवं वयासी-एवं खलु देवाणुप्पिया ! अज्ज तिसला  
खत्तियाणी तंसि तारिसगंसि जाव सुत्तजागरा ओहीरमाणी २ इमे एयारूवे उराळे  
चउइसमहासुमिणे पासित्ताणं पडिबुद्धा, तंजहा-गय-वसह० गाहा, तं एएसिं चउइ-  
सण्हं महासुमिणाणं देवाणुप्पिया ! उरालाणं के मन्ने कट्ठाणे फलवित्तिविसेसे भवि-  
स्सइ ? ॥ ६९-७१ ॥ तए णं ते सुमिणलक्खणपाठगा सिद्धत्थस्स खत्तियस्स अंतिए  
एयमट्ठं सोच्चा निसम्म हट्ठतुट्ठ जाव हियया ते सुमिणे (सम्मं) ओणिण्हंति ओणिणिहत्ता  
ईहं अणुपविसंति अणुपविसित्ता अन्नमन्नेणं सद्धिं सं(लावें)चालेंति २ ता तेसिं सुमिणाणं  
लद्धट्ठा गहियट्ठा पुच्छियट्ठा विणिच्छियट्ठा अहिगयट्ठा सिद्धत्थस्स रण्णो पुरओ सुमि-  
णसत्थाइं उच्चारमाणा २ सिद्धत्थं खत्तियं एवं वयासी-एवं खलु देवाणुप्पिया ! अम्मं  
सुमिणसत्थे वायालीसं सुमिणा तीसं महासुमिणा बावत्तरिं सव्वसुमिणा दिट्ठा, तत्थ  
णं देवाणुप्पिया ! अरहंतमायरो वा चक्कवड्ढिमायरो वा अरहंतंसि वा चक्कहरंसि वा  
गब्भं वक्कममाणंसि एएसिं तीसाए महासुमिणाणं इमे चउइसमहासुमिणे पासित्ताणं  
पडिबुज्झंति, तंजहा-गय-वसह० गाहा । वासुदेवमायरो वा वासुदेवंसि गब्भं वक्क-  
ममाणंसि एएसिं चउइसण्हं महासुमिणाणं अन्नयरे सत्त महासुमिणे पासित्ताणं पडि-  
बुज्झंति । बलदेवमायरो वा बलदेवंसि गब्भं वक्कममाणंसि एएसिं चउइसण्हं महा-  
सुमिणाणं अन्नयरे चत्तारि महासुमिणे पासित्ताणं पडिबुज्झंति । मंडलियमायरो वा  
मंडलियंसि गब्भं वक्कममाणंसि एएसिं चउइसण्हं महासुमिणाणं अन्नयरं एणं महा-

सुमिणं पासित्ताणं पडिबुज्झंति ॥ ७२-७७ ॥ इमे य णं देवाणुप्पिया ! तिसलाए खत्तियाणीए चउइस महासुमिणा दिट्ठा, तं उराला णं देवाणुप्पिया ! तिसलाए खत्तियाणीए सुमिणा दिट्ठा जाव मंगल्लकारगा णं देवाणुप्पिया ! तिसलाए खत्तियाणीए सुमिणा दिट्ठा, तंजहा-अत्थलाभो देवाणुप्पिया ! भोगलाभो देवाणुप्पिया ! पुत्तलाभो देवाणुप्पिया ! सुक्खलाभो देवाणुप्पिया ! रज्जलाभो देवाणुप्पिया !, एवं खलु देवाणुप्पिया ! तिसला खत्तियाणी नवण्हं मासाणं बहुपडिपुण्णाणं अट्ठमाणां राई-दियाणं विइक्कंताणं तुम्हं कुलकेउं, कुलदीवं, कुलपव्वयं, कुलवडिसयं, कुलतिलयं, कुल-कित्तिकरं, कुलवित्तिकरं, कुलदिणयरं, कुलाधारं, कुलनंदिकरं, कुलजसकरं, कुलपायवं, कुलतंतुसंताणविवद्धणकरं, सुकुमालपाणिपायं, अहीणपडिपुण्णपंचिंदियसरीरं, लक्ख-णवंजणगुणोववेयं, माणुस्माणप्पमाणपडिपुण्णसुजायसव्वंगसुंदरंगं, ससिसोमाकारं, कंतं, पियदंसणं, सुखं दारयं पयाहिसि ॥ ७८ ॥ से वि य णं दारए उम्मुक्कवालभावे विण्णायपरिणयमित्ते जुव्वणगमणुप्पत्ते सूरे वीरे विक्कंते विच्छिण्णविपुलवलवाहणे चाउरंतचक्कवट्ठी रज्जवई राया भविस्सइ, जिणे वा तेलुक्क[तिलोग]नायगे धम्मवर-चाउरंतचक्कवट्ठी ॥ ७९ ॥ तं उराला णं देवाणुप्पिया ! तिसलाए खत्तियाणीए सुमिणा दिट्ठा जाव आरुग्गुट्ठिदीहाउकल्लानमंगल्लकारगा णं देवाणुप्पिया ! तिसलाए खत्तियाणीए सुमिणा दिट्ठा ॥ ८० ॥ तए णं सिद्धत्थे राया तेसिं सुविणलक्खणपाठ-गाणं अंतिए एयमट्ठं सोच्चा निसम्म हट्ठतुट्ठ जाव हियए करयल जाव ते सुविण-लक्खणपाठए एवं वयासी-एवमेयं देवाणुप्पिया ! तहमेयं दे० ! अवितहमेयं दे० ! इच्छियमेयं दे० ! पडिच्छियमेयं दे० ! इच्छियपडिच्छियमेयं दे० !, सच्चे णं एसमट्ठे से जहेयं तुब्भे वयहत्तिकट्ठु ते सुमिणे सम्मं पडिच्छइ २ ता ते सुविणलक्खणपाठए विउलेणं असणेणं पुप्फवत्थगंधमल्लालंकारेणं सक्कारेइ सम्माणेइ सक्कारित्ता सम्मा-णित्ता विउलं जीवियारिहं पीइदाणं दलयइ २ ता पडिविसजेइ ॥ ८१-८२ ॥ तए णं से सिद्धत्थे खत्तिए सीहासणाओ अब्भुट्ठेइ २ ता जेणेव तिसला खत्तियाणी जवणियंतरिया तेणेव उवागच्छइ २ ता तिसलं खत्तियाणिं एवं वयासी-एवं खलु देवाणुप्पिए ! सुविणसत्थंसि बायालीसं सुमिणा तीसं महासुमिणा जाव एगं महा-सुमिणं पासित्ताणं पडिबुज्झंति । इमे य णं तुमे देवाणुप्पिए ! चउइस महासुमिणा दिट्ठा, तं उराला णं तुमे जाव जिणे वा तेलुक्कनायगे धम्मवरचाउरंतचक्कवट्ठी ॥ ८३-८५ ॥ तए णं सा तिसला खत्तियाणी एयमट्ठं सो(सु)च्चा निसम्म हट्ठतुट्ठ जाव हियया करयल जाव ते सुमिणे सम्मं पडिच्छइ २ ता सिद्धत्थेणं रण्णा अब्भ-णुण्णया समाणी नाणामणिरयणभत्तिचित्ताओ भद्दासणाओ अब्भुट्ठेइ २ ता अतु-

रियमचवलमसंभताए अविलंबियाए रायहंससरिसीए गईए जेणेव सए भवणे तेणेव उवागच्छइ २ ता सयं भवणं अणुपविट्ठा ॥ ८६-८७ ॥ जप्पभिइं च णं समणे भगवं महावीरे तंसि ना(रा)यकुलंसि साहरिए तप्पभिइं च णं वहवे वेसमणकुंड-धारिणे तिरियजंभगा देवा सक्कवयणेणं से जाइं इमाइं पुरापोराणाइं महानिहाणाइं भवंति, तंजहा-पहीणसामियाइं पहीणसेउयाइं पहीण(गु)गोत्तागाराइं, उच्छिन्नसामि-याइं उच्छिन्नसेउयाइं उच्छिन्नगोत्तागाराइं, गामागरनगरखेडकव्वडमडंबदोणमुह-पट्ठणासमसं-वाहसंनिवेसेसु सिंघाडएसु वा तिएसु वा चउक्केसु वा चच्चरेसु वा चउम्मुहेसु वा महापहेसु वा गामट्ठाणेसु वा नगरट्ठाणेसु वा गामनिद्धमणेसु वा नगरनिद्धमणेसु वा आवणेसु वा देवकुलेसु वा सभासु वा पवासु वा आरामेसु वा उज्जाणेसु वा वणेसु वा वणसंडेसु वा सुसाणसुच्चागारगिरिकंदरसंतिसेलवट्ठाणभवण-गिहेसु वा सज्जिक्खित्ताइं चिट्ठंति ताइं सिद्धथरायभवणंसि साहरंति ॥ ८८ ॥ जं रयणिं च णं समणे भगवं महावीरे नायकुलंसि साहरिए तं रयणिं च णं नाय-कुलं हिरण्णेणं वड्ढित्था, सुवण्णेणं वड्ढित्था, धणेणं धन्नेणं रजेणं रट्ठेणं वलेणं वाह-णेणं कोसेणं कोट्ठागारेणं पुरेणं अंतैउरेणं जणवएणं जसवाएणं वड्ढित्था, विपुल-धणकणगरयणमणिमोत्तियसंखसिलप्पवालरत्तरयणमाइएणं संतसारसावइज्जेणं पीइ-सक्कारसमुदएणं अईव अईव अभिवड्ढित्था ॥ ८९ ॥ तए णं समणस्स भगवओ महावी-रस्स अम्मपापिऊणं अयमेयारूवे अब्भत्थिए चित्थिए पत्थिए मणोगए संकप्पे समुप्प-ज्जित्था-जप्पभिइं च णं अम्हं एस दारए कुच्छिसि गब्भत्ताए वक्कंते तप्पभिइं च णं अमहे हिरण्णेणं वड्ढामो, सुवण्णेणं वड्ढामो, धणेणं जाव संतसारसावइज्जेणं पीइसक्का-रेणं अईव अईव अभिवड्ढामो, तं जया णं अम्हं एस दारए जाए भविस्सइ तथा णं अमहे एयस्स दारगस्स एयाणुरूवं गुणं गुणनिप्फन्नं नामधिज्जं करिस्सामो-वद्धमाणुत्ति ॥ ९० ॥ तए णं समणे भगवं महावीरे माउअणुकंपणट्ठाए निच्चले निप्फंदे निरेय्णे अल्लीणपल्लीणगुत्ते यावि होत्था ॥ ९१ ॥ तए णं तीसे तिसलाए खत्तियाणीए अयमेयारूवे जाव संकप्पे समुप्पज्जित्था-हडे मे से गब्भे, मडे मे से गब्भे, चुए मे से गब्भे, गलिए मे से गब्भे, एस मे गब्भे पुर्व्वि एयइ, इयाणिं नो एयइत्तिकट्ठ ओहयमणसंकप्पा चिंतासोगसागरसंपविट्ठा करयलपल्लहत्थमुही अट्ठ-ज्जाणोवगया भूमीगयदिट्ठिया क्षियायइ, तं पि य सिद्धथरायवरभवणं उवरयमुइंग-तंतीलतालनाडइज्जजणमणु(ज्ज)न्नं दीणविमणं विहरइ ॥ ९२ ॥ तए णं से समणे भगवं महावीरे माऊए अयमेयारूवं अब्भत्थियं पत्थियं मणोगयं संकप्पं समुप्पन्नं

वियाणिता एगदेसेण एयइ, तए णं सा तिसला खत्तियाणी हट्ठतुट्ठ जाव हियया एवं वयासी-नो खलु मे गब्भे हडे जाव नो गलिए, मे गब्भे पुर्व्वि नो एयइ, इयाणि एयइत्तिकट्ठ हट्ठतुट्ठ जाव हियया एवं विहरइ ॥ ९३ ॥ तए णं समणे भगवं महावीरे गब्भत्थे चेव इमेयारुवं अभिगगहं अभिगिण्हइ-नो खलु मे कण्णइ अम्मा-पिऊहिं जीवंतेहिं मुंडे भविता अगाराओ अणगारियं पव्वइत्तए ॥ ९४ ॥ तए णं सा तिसला खत्तियाणी ण्हाया सव्वालंकारविभूसिया तं गब्भं नाइसीएहिं नाइउण्हेहिं नाइत्तित्तेहिं नाइकडुएहिं नाइकसाएहिं नाइअंबिलेहिं नाइमहुरेहिं नाइनिद्धेहिं नाइ-लुक्खेहिं नाइउल्लेहिं नाइसुक्केहिं सव्वत्तुगभयमाणसुहेहिं भोयणच्छायणगंधमल्लेहिं ववगयरोगसोगमोहभयपरिस्समा सा जं तस्स गब्भस्स हियं मियं पत्थं गब्भपोसणं तं देसे य काले य आहारमाहारेमाणी विचित्तमउएहिं सयणासणेहिं पइरिक्खुहाए मणोऽणुकूलाए विहारभूमीए पसत्थदोहला संपुण्णदोहला संमाणियदोहला अविमाणियदोहला सुच्छिन्नदोहला ववणीयदोहला सुहंसुहेणं आसइ, सयइ, चिट्ठइ, निसीयइ, तुयट्ठइ, विहरइ, सुहंसुहेणं तं गब्भं परिवहइ ॥ ९५ ॥ तेणं कालेणं तेणं समएणं समणे भगवं महावीरे जे से गिम्हाणं पढमे मासे दुब्बे पक्खे चित्तसुद्धे तस्स णं चित्तसुद्धस्स तेरसीदिवसेणं नवण्हं मासाणं बहुपडिपुण्णाणं अद्धट्ठमाणं राइंदियाणं विइक्कंताणं उच्चट्ठाणगएसु गहेसु पढमे चंदजोगे सोमासु दिसासु वितिमिरासु विसुद्धासु जइएसु सव्वसउणेसु पयाहिणाणुकूलंसि भूमिसप्पंसि मारुयंसि पवायंसि निष्फण्णमेइ-णीयंसि कालंसि पमुइयपक्कीलिएसु जणवएसु पुव्वरत्तावरत्तकालसमयंसि हत्थुत्तराहिं नक्खत्तेणं जोगमुवागएणं आ(रु)रोग्गा(आरु)रोग्गं दारयं पयाया ॥ ९६ ॥ जं रयणि च णं समणे भगवं महावीरे जाए सा णं रयणी बहूहिं देवेहिं देवीहि य ओवयंतंतेहिं उप्पयंतंतेहि य उप्पिजलमाणभूया क्हकहगभूया यावि हुत्था ॥ ९७ ॥ जं रयणि च णं समणे भगवं महावीरे जाए तं रयणि च णं बहवे वेसमणकुंडधारी तिरियजंभगा देवा सिद्धत्थरायभवणंसि हिरण्णवासं च सुवण्णवासं च वयरवासं च वत्थवासं च आभरणवासं च पत्तवासं च पुप्फवासं च फलवासं च वीयवासं च मल्लवासं च गंधवासं च चुण्णवासं च वण्णवासं च वसुहारवासं च वासिंसु ॥ ९८ ॥ तए णं से सिद्धत्थे खत्तिए भवणवइवाणमंतरजोइसवेमाणिएहिं देवेहिं तित्थयरजम्म-णाभिसेयमहिमाए कयाए समाणीए पच्चूसकालसमयंसि नगरगुत्तिए सहावेइ २ ता एवं वयासी-खिप्पामेव भो देवाणुप्पिया ! (खत्तिय)कुंड(ग्गामे)पुरे नगरे चारग-सोहणं करेह करित्ता माणुम्माणवद्धणं करेह करित्ता कुंडपुरं नगरं सब्भितरवाहिरियं आसियसम्मज्जिओवलित्तं सिंघाडगति(ग)यचउक्कचच्चरचउम्मुहमहापहपहेसु सित्तसुइ-



संमट्ठरत्थंतरावणवीहियं संचाइमंचकलियं नाणाविहरागभूसियज्झयपडागमंडियं लाउ-  
 ल्लोइयमहियं गोसीसरसरत्तचंदणदहरदिन्नपंचंगुलितलं उवचियचंदणकलसं चंदणघड-  
 सुकयतोरणपडिदुवारदेसभागं आसत्तोसत्तविपुलवट्टवग्घारियमल्लदामकलावं पंचवण्ण-  
 सरससुरभिमुक्कपुप्फपुंजोवयारकलियं कालागुरुपवरकुंदुरुक्कतुरुक्कडज्झंतधूवमघमघंतगं-  
 धुद्धयाभिरामं सुगंधवरगंधियं गंधवट्टिभूयं नडनट्टगजल्लमल्लमुट्टियवेलंबगकहग(पाठ)-  
 पवगलासगआ(इ)रक्खगलंखमंखतूणइल्लतुंववीणियअणेगतालायराणुचरियं करेह कार-  
 वेह करित्ता कारवित्ता य जूयसहस्सं मुसलसहस्सं च उस्सवेह उस्सवित्ता मम  
 एयमाणत्तियं पच्चप्पिणह ॥ ९९-१०० ॥ तए णं ते कोडुंवियपुरिसा सिद्धत्थेणं  
 रण्णा एवं वुत्ता समाणा हट्टुट्टु जाव हियया करयल जाव पडिसुणित्ता खिप्पामेव  
 कुंडपुरे नगरे चारगसोहणं जाव उस्सवित्ता जेणेव सिद्धत्थे (खत्तिए) राया तेणेव  
 उवागच्छंति २ ता करयल जाव कट्टु सिद्धत्थस्स खत्तियस्स रण्णो एयमाणत्तियं पच्च-  
 प्पिणंति ॥ १०१ ॥ तए णं से सिद्धत्थे राया जेणेव अट्टणसाला तेणेव उवागच्छइ २ ता  
 जाव सव्वोरोहेणं सव्वपुप्फगंधवत्थमल्लालंकारविभूसाए सव्वतुडियसइनिनाएणं महया  
 इट्ठीए महया जुइए महया बलेणं महया वाहणेणं महया समुदएणं महया वर-  
 तुडियजमगसमगप्पाइएणं संखपणवपडहभेरिअल्लरिखरमुहिहुडुकमुरयमुइंगदुंदुहिनि-  
 ग्घोसनाइयरवेणं उस्सुकुं उक्करं उक्किट्टं अदिज्जं अमिज्जं अभडप्पवेसं अदंडिमकोदंडिमं  
 अधरिमं गणियावरनाडइज्जकलियं अणेगतालायराणुचरियं अणुद्धुयमुइंगं अमिलाय-  
 मल्लदामं पमुइयपक्कीलियपुरज(णाभिरामं)णजाणवयं दसदिवसं ठिइवडियं करेइ  
 ॥ १०२ ॥ तए णं सिद्धत्थे राया दसाहियाए ठिइवडियाए वट्टमाणीए सइए य  
 साहस्सिए य सयसाहस्सिए य जाए य दाए य भाए य दलमाणे य द्वावेमाणे  
 य सइए य साहस्सिए य सयसाहस्सिए य लंभे पडिच्छमाणे य पडिच्छावेमाणे  
 य एवं [वा] विहरइ ॥ १०३ ॥ तए णं समणस्स भगवओ महावीरस्स अम्मापियरो  
 पठमे दिवसे ठिइवडियं क(रिं)रेंति, तइए दिवसे चंदसूरदंसणियं करेंति, छट्ठे  
 दिवसे धम्मजागरियं जागरें(करिं)ति, ए(इ)क्कारसमे दिवसे विइक्कंते निव्वत्तिए  
 असुइजम्मकम्मकरणे संपत्ते वारसा(हे)हदिवसे विउलं असणं पाणं खाइमं सौइमं  
 उवक्खडा(विं)वेंति २ ता मित्तनाइनिय(य)गसयणसंबंधिपरिजणं नायए खत्तिए  
 य आमंतेंति २ ता तओ पच्छा ण्हाया सुद्धप्पावेसाइं मंगल्लाइं पवराइं वत्थाइं परि-  
 हिया अप्पमहग्घाभरणालंकियसरीरा भोयणवेलाए भोयणमंडवंसि सुहासणवरगया  
 तेणं मित्तनाइनियगसयणसंबंधिपरिजणेणं नायएहिं खत्तिएहिं सद्धिं तं विउलं असणं

१ जूया-जुगाई तेसिं सहस्सं । २ असणपाणखाइमसाइमं ।

पाणं खाइमं साइमं आसाएमाणा विसाएमाणा परिभुंजेमाणा परिभाएमाणा एवं  
 वा विहरंति ॥ १०४ ॥ जिमियभुत्तरागया वि य णं समाणा आयंता चोक्खा  
 परमसु(इ)ईभूया तं मित्तनाइनियगसयणसंबंधिपरिजणं नायए खत्तिए य विउल्लेणं  
 पुप्फवत्थगंधमल्लालंकारेणं सक्कारेति सम्माणेति सक्कारित्ता सम्माणित्ता तस्सेव मित्त-  
 नाइनियगसयणसंबंधिपरि(य)जणस्स नाया(ण य)णं खत्तियाण य पुरओ एवं वयासी-  
 पुव्वि पि (य) णं देवाणुप्पिया ! अम्हं एयंसि दारगंसि गब्भं वक्कंतंसि समाणंसि इमे  
 एयारूवे अब्भत्थिए जाव समुप्पजित्था-जप्पभिइं च णं अम्हं एस दारए कुच्छिसि  
 गब्भत्ताए वक्कंते तप्पभिइं च णं अमहे हिरण्णेणं वड्ढामो, सुवण्णेणं धणेणं धनेणं  
 रज्जेणं जाव सावइज्जेणं पीइसकारेणं अईव अईव अभिवड्ढामो, सामंतरायाणो वस-  
 मागया य । तं जया णं अमहं एस दारए जाए भविस्सइ तथा णं अमहे एयस्स  
 दारगस्स इमं एयाणुरूवं गुण्णं गुणनिप्पन्नं नामधिज्जं करिस्सामो वड्ढमाणुत्ति, ता  
 अज्ज अमह मणेारहसंपत्ती जाया, तं होउ णं अमहं कुमारे वड्ढमाणे नामेणं  
 ॥ १०५-१०७ ॥ समणे भगवं महावीरे कासवगुत्तेणं, तस्स णं तओ नामधिज्जा  
 एवमाहिज्जंति, तंजहा-अम्मापिउसंतिए वड्ढमाणे, सहसमुइयाए समणे, अयले  
 भयभेरवाणं प(री)रिसहोवसग्गाणं खंतिखमे पडिमाण पालए धीमं अरइरइसहे  
 दविए वीरियसंपजे देवेहिं से नामं कयं 'समणे भगवं महावीरे' ॥ १०८ ॥ सम-  
 णस्स णं भगवओ महावीरस्स पिया कासवगुत्तेणं, तस्स णं तओ नामधिज्जा एव-  
 माहिज्जंति, तंजहा-सिद्धत्थेइ वा, सिज्जंसेइ वा, जसंसेइ वा । समणस्स णं भगवओ  
 महावीरस्स माया वासि(ट्ठस)ट्ठी गुत्तेणं, तीसे तओ नामधिज्जा एवमाहिज्जंति,  
 तंजहा-तिसलाइ वा, विदेहदिन्नाइ वा, पीइकारिणीइ वा । समणस्स णं भगवओ  
 महावीरस्स पित्तिजे सुपासे, जिट्ठे भाया नंदिवदणे, भगिणी सुदंसणा, भारिया  
 जसोया कोडिन्ना गुत्तेणं । समणस्स णं भगवओ महावीरस्स धूया कास(व)वी गुत्तेणं,  
 तीसे दो नामधिज्जा एवमाहिज्जंति, तंजहा-अणोज्जाइ वा, पियदंसणाइ वा । सम-  
 णस्स णं भगवओ महावीरस्स नत्तुई कोसिय(कासव)गुत्तेणं, तीसे णं दो नामधिज्जा  
 एवमाहिज्जंति, तंजहा-सेसवईइ वा, जसवईइ वा ॥ १०९ ॥ समणे भगवं महावीरे  
 दक्खे दक्खपइन्ने पडिरूवे आलीणे भइए विणीए नाए नायपुत्ते नायकुलवंदे विदेहे  
 विदेहदिन्ने विदेहज्जे विदेहसूमाले तीसं वासाइं विदेहंसि कट्ठ अम्मापिऊहिं देवत्त-  
 गएहिं गुरुमहत्तरएहिं अब्भणुणाए समत्तपइन्ने पुणरवि लोगंतिएहिं जीयकप्पिएहिं  
 देवेहिं ताहिं इट्ठाहिं जाव वग्गूहिं अणवरयं अभिनंदमाणा य अभियुव्वमाणा य एवं  
 वयासी-जय जय नंदा !, जय जय भइ ! भइं ते, जय जय खत्तियवरवसहा !,

बुज्झाहि भगवं लोगनाहा !, सयलजगज्जीवहियं पवत्तेहि धम्मतिथं, हियसुहन्निस्से-  
 यसकरं सव्वलोए सव्वजीवाणं भविस्सइत्तिकट्ठु जयजयसद्दं पउंजंति ॥ ११०-१११ ॥  
 पुत्तिं पि णं समणस्स भगवओ महावीरस्स माणुस्सगाओ गिहत्थधम्माओ अणुत्तरे  
 आहोइए अप्पडिवाई नाणदंसणे हो(हु)त्था । तए णं समणे भगवं महावीरे तेणं  
 अणुत्तरेणं आहोइएणं नाणदंसणेणं अप्पणो निक्खमणकालं आभोएइ २ ता चिच्चा  
 हिरण्णं, चिच्चा सुवण्णं, चिच्चा धणं, चिच्चा रज्जं, चिच्चा रद्धं, एवं वलं वाहणं कोसं  
 कोट्ठागारं, चिच्चा पुरं, चिच्चा अंतेउरं, चिच्चा जणवयं, चिच्चा विपुलधणकणगरयण-  
 मणि(सु)मोत्तियसंखसिलप्पवालरत्तरयणमाइयं संतसारसावइज्जं, विच्छड्डइत्ता, विगो-  
 वइत्ता, दाणं दायारेहिं परिभाइत्ता, दाणं दाइयाणं परिभाइत्ता ॥ ११२ ॥ तेणं  
 कालेणं तेणं समएणं समणे भगवं महावीरे जे से हेमंताणं पढमे मासे पढमे पक्खे  
 मग्गसिरवहुले तस्स णं मग्गसिरवहुलस्स दसमीपक्खेणं पाईणगामिणीए छायाए  
 पोरिसीए अभिनिविट्ठाए पमाणपत्ताए सुव्वएणं दिवसेणं विजएणं मुहुत्तेणं चंदप्पभाए  
 सीयाए सदेवमणुयासुराए परिसाए समणुगम्ममाणमग्गे संखियचक्किय(लं)नंगलिय-  
 मुहमंगलियवद्धमाणपूसमाणघंठियगणेहिं ताहिं इट्ठाहिं जाव वग्गूहिं अभिन्दमाणा (य)  
 अभियुव्वमाणा य एवं वयासी-जय जय नंदा !, जय जय भद्दा ! भद्दं ते, [ खत्तिय-  
 वरवसहा ! ] अभग्गेहिं नाणदंसणचरित्तेहिं अजिय्याइं जिणाहि इंदियाइं, जियं च  
 पालेहि समणधम्मं, जियविग्घो वि य वसाहि तं देव ! सिद्धिमज्झे, निहणाहि  
 रागदोसमल्ले तवेणं धिइधणियवद्धकच्छे, महाहि अट्ठकम्मसत्तू ज्ञाणेणं उत्तमेणं  
 सुक्केणं, अप्पमत्तो हराहि आराहणपडागं च वीर ! तेलुक्करंगमज्झे, पावय वित्तिमिर-  
 मणुत्तरं केवलवरनानं, गच्छ य मुक्खं प(रम)रं पयं जिणवरोवइट्ठेणं मग्गेणं अकुडिलेणं  
 हंता परीसहचमुं, जय जय खत्तियवरवसहा ! बहूइं दिवसाइं बहूइं पक्खाइं बहूइं  
 मासाइं बहूइं उज्जइं बहूइं अयणाइं बहूइं संवच्छराइं अभीए परीसहोवसग्गाणं  
 खंतिखमे भयमेरवाणं, धम्मे ते अविग्घं भवउत्तिकट्ठु जयजयसद्दं पउंजंति  
 ॥ ११३-११४ ॥ तए णं समणे भगवं महावीरे नयणमालासहस्सेहिं पिच्छिज्ज-  
 माणे पिच्छिज्जमाणे, वयणमालासहस्सेहिं अभियुव्वमाणे अभियुव्वमाणे, हियय-  
 मालासहस्सेहिं उच्चंदिज्जमाणे उच्चंदिज्जमाणे, मणोरुहमालासहस्सेहिं विच्छिप्पमाणे  
 विच्छिप्पमाणे, कंतिरूवगुणेहिं पत्थिज्जमाणे पत्थिज्जमाणे, अंगुलिमालासहस्सेहिं  
 दाइज्जमाणे दाइज्जमाणे, दाहिणहत्थेणं बहूणं नरनारीसहस्साणं अंजलिमालास-  
 हस्साइं पडिच्छमाणे पडिच्छमाणे, भवणपंतिसहस्साइं समइच्छमाणे समइच्छमाणे,

तंतीतलतालतुडियगीयवाइयरवेणं महुरेण य मणहरेणं जयजयसहघोसमीसिएणं  
मंजुमंजुणा घोसेण य पडिबुज्झ(आपुच्छिज्झ)माणे पडिबुज्झमाणे, सव्विद्धीए  
सव्वजुईए सव्वबलेणं सव्ववाहणेणं सव्वसमुदएणं सव्वायरेणं सव्वविभूईए सव्व-  
विभूसाए सव्वसंभमेणं सव्वसंगमेणं सव्वपगईहिं सव्वनाडएहिं सव्वतालायरेहिं  
सव्व(वाव)वोरोहेणं सव्वपुप्फगंधवत्थमल्लालंकारविभूसाए सव्वतुडियसहसन्निनाएणं  
महया इद्धीए महया जुईए महया बलेणं महया वाहणेणं महया समुदएणं महया  
वरतुडियजमगसमगप्पवाइएणं संखपणवपडहभेरिझल्लरिखरमुहिहुडकटुंदुहिनिग्घोस-  
नाइयरवेणं कुंडपुरं नगरं मज्झमज्झेणं निग्गच्छइ २ ता जेणेव नायसंडवणे उज्जाणे  
जेणेव असोगवरपायवे तेणेव उवागच्छइ उवागच्छिता असोगवरपायवत्स अहे सीयं  
ठावेइ २ ता सीयाओ पच्चोरुहइ २ ता सयमेव आभरणमल्लालंकारं ओमुयइ २ ता सय-  
मेव पंचमुट्ठियं लोयं करेइ २ ता छट्ठेणं भत्तेणं अपाणएणं हत्थुत्तराहिं नक्खत्तेणं जोग-  
मुवागएणं एणं देवदूसमादाय एगे अबीए मुंडे भवित्ता अगाराओ अणगारियं पवइए  
॥ ११५-११६ ॥ समणे भगवं महावीरे संवच्छरं साहियं मासं जाव चीवरधारी होत्था,  
तेण परं अच्चेले पाणिपडिग्गहिए । समणे भगवं महावीरे साइरेगाइं दुवालसवासाइं  
निच्चं वोसट्ठकाए चियत्तदेहे जे केइ उवसग्गा उप्पज्जति, तंजहा-दिक्वा वा माणुसा  
वा तिरिक्खजोणिया वा अणुलोमा वा पडिलोमा वा ते उप्पन्ने सम्मं सहइ खमइ  
तितिक्खइ अहियासेइ ॥ ११७ ॥ तए णं समणे भगवं महावीरे अणगारे जाए-इ(ई)-  
रियासमिए, भासासमिए, एसणासमिए, आयाणभंडमत्तनिकखेवणासमिए, उच्चारपास-  
वणखेलजल्लसिंघाणपारिद्धावणियासमिए, मणसमिए, वयसमिए, कायसमिए, मणगुत्ते,  
वयगुत्ते, कायगुत्ते, गुत्ते, गुत्तिदिए, गुत्तवंभयारी, अकोहे, अमाणे, अमाए, अलोहे,  
संते, पसंते, उवसंते, परिनिव्वुडे, अणासवे, अममे, अक्किचणे, छिज्झ(सोए)गंधे,  
निरुवलेवे, कंसपाई इव मुक्कतोए १, संखे इव निरंजणे २, जीवे इव अप्पडिहयगई  
३, गगणमिव निरालंबणे ४, वा(ऊ इव)उव्व अपडिबद्धे ५, सारयसलिलं व सुद्ध-  
हियए ६, पुक्खरपत्तं व निरुवलेवे ७, कुम्मे इव गुत्तिदिए ८, खग्गिविसाणं व  
एगजाए ९, विहग इव विप्पमुक्के १०, भारंडपक्खी इव अप्पमत्ते ११, कुंजरे इव  
सौंडीरे १२, वसहो इव जायथामे १३, सीहो इव दुद्धरिसे १४, मंदरो इव निक्कं-  
(अप्पकं)वे १५, सागरो इव गंभीरे १६, चंदो इव सोमल्लेसे १७, स्रो इव दित्त-  
तेए १८, जच्चकणं व जायरुवे १९, वसुंधरा इव सव्वपासविसहे २०, सुहुयहु-  
यासणो इव तेयसा जलंते २१ । इमेसिं पयाणं दुणि **संगहणिगाहाओ**-कंसे संखे  
जीवे, गगणे वाऊ य सरयसलिले य । पुक्खरपत्ते कुम्मे, विहगे खग्गे य भारंडे

॥ १ ॥ कुंजर वसहे सीहे, नगराया चेव सागरमखोहे । चंदे सूरे कण्णे, वसुंधरा  
 चेव हूयवहे ॥ २ ॥ नत्थि णं तस्स भगवंतस्स कत्थइ पडिबंघे, से य पडिबंघे  
 चउच्चिहे पन्नत्ते, तंजहा-दव्वओ खित्तओ कालओ भावओ, दव्वओ णं सच्चित्ता-  
 चित्तमीसिएसु दव्वेसु, खित्तओ णं गामे वा नगरे वा अरण्णे वा खित्ते वा खले वा  
 घरे वा अंगणे वा नहे वा, कालओ णं समए वा आवलियाए वा आणापाणुए वा  
 थोवे वा खणे वा लवे वा सुहुत्ते वा अहोरत्ते वा पक्खे वा मासे वा उ(ऊ)उए वा  
 अयणे वा संवच्छरे वा अन्नयरे वा दीहकालसंजोए, भावओ णं कोहे वा माणे वा  
 मायाए वा लोभे वा भए वा हासे वा पिजे वा दोसे वा कलहे वा अब्भक्खाणे वा  
 पेसुजे वा परपरिवाए वा अरइरई(ए) वा मायामोसे वा सिच्छादंसणसल्ले वा, तस्स  
 णं भगवंतस्स नो एवं भवइ ॥ ११८ ॥ से णं भगवं वासावासवज्जं अट्ठ गिम्हहेमंतिए  
 मासे गामे एगराइए नगरे पंचराइए वासीचंदणसमाणकप्पे समतिणमणिलेहुकंचणे सम-  
 सुहदुक्खे इहलोगपरलोगअप्पडिवद्धे जीवियमर(णे य)णनिरवकंखे संसारपारगामी  
 कम्मसत्तुनिग्घायणट्ठाए अब्भुट्ठिए एवं च णं विहरइ ॥ ११९ ॥ तस्स णं भगवंतस्स  
 अणुत्तरेणं नाणेणं अणुत्तरेणं दंसणेणं अणुत्तरेणं चरित्तेणं अणुत्तरेणं आलएणं अणुत्तरेणं  
 विहारेंणं अणुत्तरेणं वीरिएणं अणुत्तरेणं अज्जवेणं अणुत्तरेणं मद्दवेणं अणुत्तरेणं लाघवेणं  
 अणुत्तराए खंतीए अणुत्तराए मुत्तीए अणुत्तराए गुत्तीए अणुत्तराए तुट्ठीए अणुत्तरेणं  
 सच्चसंजमतवसुचरियसोवचियफलनिव्वाणमग्गेणं अप्पाणं भावेमाणस्स दुवालस-  
 संवच्छराइं विइक्कंताइं, तेरसमस्स संवच्छरस्स अंतरा वट्ठमाणस्स जे से गिम्हाणं  
 दुक्खे मासे चउत्थे पक्खे वइसाहसुद्धे तस्स णं वइसाहसुद्धस्स दसमीपक्खेणं पाईण-  
 गामिणीए छायाए पोरिसीए अभिनिविट्ठाए पमाणपत्ताए सुव्वएणं दिवसेणं विजएणं  
 सुहुत्तेणं जंमियगामस्स नगरस्स बहिया उज्जुवालियाए नईए तीरे वेयावत्तस्स  
 चेइयस्स अदूरसामंते सामागस्स गाहावइस्स कट्ठकरणंसि सालपायवस्स अहे गोदो-  
 हियाए उक्क(डि)डुयनिज्जाए आयावणाए आयावेमाणस्स छट्ठेणं भत्तेणं अपाणएणं  
 हत्थुत्तराहिं नक्खत्तेणं जोगमुवागएणं ज्ञाणंतरियाए वट्ठमाणस्स अणंते अणुत्तरे निव्वा-  
 घाए निरावरणे कसिणे पडिपुजे केवलवरनाणदंसणे समुप्पन्ने ॥ १२० ॥ तए णं समणे  
 भगवं महावीरे अरहा जाए जिणे केवली सव्वन्नू सव्वदरिसी सदेवमणुयासुरस्स  
 लोगस्स परियायं जाणइ पासइ, सव्वलोए सव्वजीवाणं आगइं गइं ठिइं चवणं उव-  
 वायं तक्कं मणोमाणसियं भुत्तं कडं पडिसेवियं आवीकम्मं रहोकम्मं, अरहा अरहस्स-  
 भागी, तं तं कालं मणवयणकायजोगे वट्ठमाणं सव्वलोए सव्वजीवाणं सव्वभावे

१ तेणं कालेणं तेणं समएणं ।

जाणमाणे पासमाणे विहरइ ॥ १२१ ॥ तेणं कालेणं तेणं समएणं समणे भगवं  
महावीरे अट्ठियगामं नीसाए पढमं अंतरावासं वासावासं उवागए १, चंपं च पिट्ठ-  
चंपं च नीसाए तओ अंतरावासे वासावासं उवागए ४, वेसालिं नगरिं वाणियगामं  
च नीसाए दुवाल्स अंतरावासे वासावासं उवागए १६, रायगिहं नगरं नालंदं च  
वाहिरियं नीसाए चउडस अंतरावासे वासावासं उवागए ३०, छ मिहि(लिया)लाए ३६  
दो भदियाए ३८ एणं आलंभियाए ३९ एणं सावत्थीए ४० एणं पणियभूमीए ४१  
एणं पावाए मज्झिमाए हत्थिवालस्स रण्णो रज्जुगसभाए अपच्छिमं अंतरावासं  
वासावासं उवागए ४२ ॥ १२२ ॥ तत्थ णं जे से पावाए मज्झिमाए हत्थिवालस्स  
रण्णो रज्जुगसभाए अपच्छिमं अंतरावासं वासावासं उवागए तस्स णं अंतरावासस्स  
जे से वासाणं चउत्थे मासे सत्तमे पक्खे कत्तियबहुले तस्स णं कत्तियबहुलस्स पण्ण-  
रसीपक्खेणं जा सा चरमा रयणी तं रयणिं च णं समणे भगवं महावीरे कालगए  
विइकंते समुज्जाए छिन्नजाइजरामरणबंधणे सिद्धे बुद्धे मुत्ते अंतगडे परिनिव्वुडे  
सव्वदुक्खप्पहीणे, चंदे नामं से दो(दु)ब्बे संवच्छरे, पीइवद्धणे मासे, नंदिवद्धणे पक्खे,  
अग्गिवेसे नामं से दिवसे उवसमिति पवुच्चइ, देवाणंदा नामं सा रयणी निरतित्ति  
पवुच्चइ, अब्बे लवे, मुहुत्ते पाणू, थोवे सिद्धे, नागे करणे, सव्वदुक्खे मुहुत्ते, साइणा  
नक्खत्तेणं जोगमुवागएणं कालगए विइकंते जाव सव्वदुक्खप्पहीणे ॥ १२३-१२४ ॥ जं  
रयणिं च णं समणे भगवं महावीरे कालगए जाव सव्वदुक्खप्पहीणे सा णं रयणी बहूहिं  
देवेहिं देवीहि य ओवयमाणेहि य उप्पयमाणेहि य उज्जोविया यावि हुत्था ॥ १२५ ॥ जं  
रयणिं च णं समणे भगवं महावीरे कालगए जाव सव्वदुक्खप्पहीणे सा णं रयणी बहूहिं  
देवे(हि य)हिं देवीहि य ओवयमाणेहि य उप्पयमाणेहि य उप्पिजल्लामाणभूया क्हक्हग-  
भूया यावि हुत्था ॥ १२६ ॥ जं रयणिं च णं समणे भगवं महावीरे कालगए जाव सव्वदु-  
क्खप्पहीणे तं रयणिं च णं जिट्ठस्स गोयमस्स इंदभूइस्स अणगारस्स अंतोवासिस्स  
नायए पिज्जबंधणे वुच्छिज्जे अणंते अणुत्तरे जाव केवलवरनाणदंसणे समुप्पब्बे ॥ १२७ ॥  
जं रयणिं च णं समणे भगवं महावीरे कालगए जाव सव्वदुक्खप्पहीणे तं रयणिं  
च णं नव मल्लई नव लेच्छई कासीकोसलगा अट्टारसवि गणरायाणो अमावासाए  
पा(बा)राभो(ए)यं पोसहोववासं पट्ठविंसु, गए से भावुजोए दव्वुजोयं करिस्सामो  
॥ १२८ ॥ जं रयणिं च णं समणे भगवं महावीरे जाव सव्वदुक्खप्पहीणे तं रयणिं च  
णं खुद्दाए भासरासी नाम महग्गहे दोवाससहस्सठिई समणस्स भगवओ महावीरस्स  
जम्मनक्खत्तं संकंते ॥ १२९ ॥ जप्पभिइं च णं से खुद्दाए भासरासी महग्गहे दो-  
वाससहस्सठिई समणस्स भगवओ महावीरस्स जम्मनक्खत्तं संकंते तप्पभिइं च

णं समणाणं निग्गंथाणं निग्गंथीण य नो उदिए उदिए पूयासक्कारे पवत्तइ ॥ १३० ॥  
 जया णं से खुद्दाए जाव जम्मनक्खत्ताओ विइक्कंते भविस्सइ तथा णं समणाणं  
 निग्गंथाणं निग्गंथीण य उदिए उदिए पूयासक्कारे भविस्सइ ॥ १३१ ॥ जं रयणिं  
 च णं समणे भगवं महावीरे जाव सव्वदुक्खप्पहीणे तं रयणिं च णं कुंथू अणुद्धरी  
 नामं ससुप्पन्ना, जा ठिया अचलमाणा छउमत्थाणं निग्गंथाणं निग्गंथीण य  
 नो चक्खुफासं हव्वमागच्छइ, जा अठिया चलमाणा छउमत्थाणं निग्गंथाणं निग्गं-  
 थीण य चक्खुफासं हव्वमागच्छइ ॥ १३२ ॥ जं पासित्ता बहूहिं निग्गंथेहिं निग्गं-  
 थीहिं य भत्ताइ पच्चक्खायाइं, से किमाहु भंते ! (?) अज्जप्पभिइ संजमे दुरारा(हे)हए  
 भविस्सइ ॥ १३३ ॥ तेणं कालेणं तेणं समएणं समणस्स भगवओ महावीरस्स  
 ईदभूइपासुक्खाओ चउइससमणसाहस्सीओ उक्कोसिया समणसंपया हुत्था ॥ १३४ ॥  
 समणस्स भगवओ महावीरस्स अज्जचंदणापासुक्खाओ छत्तीसं अज्जियासाहस्सीओ  
 उक्कोसिया अज्जियासंपया हुत्था ॥ १३५ ॥ समणस्स [णं] भगवओ महावीरस्स  
 संखसयगपासुक्खाणं समणोवासगाणं एगा सयसाहस्सी अउणट्ठिं च सहस्सा  
 उक्कोसिया समणोवासगाणं संपया हुत्था ॥ १३६ ॥ समणस्स भगवओ महावीरस्स  
 सुलसारेवईपासुक्खाणं समणोवासियाणं तिज्जि सयसाहस्सीओ अट्ठारससहस्सा  
 उक्कोसिया समणोवासियाणं संपया हुत्था ॥ १३७ ॥ समणस्स-भगवओ महा-  
 वीरस्स तिज्जि सया चउइसपुव्वीणं अजिणाणं जिणसंकासाणं सव्वक्खरसच्चिवाईणं  
 जिणो विव अवितहं वागरमाणाणं उक्कोसिया चउइसपुव्वीणं संपया हुत्था ॥ १३८ ॥  
 समणस्स णं भगवओ महावीरस्स तेरस सया ओहिनाणीणं अइसेसंपत्ताणं उक्कोसिया  
 ओहिना(णीणं)णिसंपया हुत्था ॥ १३९ ॥ समणस्स णं भगवओ महावीरस्स सत्त  
 सया केवलनाणीणं संभिन्नवरनाणदंसणधराणं उक्कोसिया केवलना-णिसंपया हुत्था  
 ॥ १४० ॥ समणस्स णं भगवओ महावीरस्स सत्त सया वेउव्वीणं अदेवाणं देवि-  
 ङ्घिपत्ताणं उक्कोसिया वेउव्वियसंपया हुत्था ॥ १४१ ॥ समणस्स णं भगवओ  
 महावीरस्स पंच सया विउलमईणं अट्ठाइजेसु दीवेसु दोसु य समुहेसु सजीणं  
 पंचिंदियाणं पज्जत्ताणं मणोगए भावे जाणमाणाणं उक्कोसिया विउलमईणं संपया  
 हुत्था ॥ १४२ ॥ समणस्स णं भगवओ महावीरस्स चत्तारि सया वाईणं सदेवम-  
 ण्यासुराए परिसाए वाए अपराजियाणं उक्कोसिया वाइसंपया हुत्था ॥ १४३ ॥  
 समणस्स णं भगवओ महावीरस्स सत्त अंतेवासिसयाइं सिद्धाईं जाव सव्वदुक्ख-  
 प्पहीणाइं, चउइस अज्जियासयाइं सिद्धाईं ॥ १४४ ॥ समणस्स णं भगवओ महा-

वीरस्स अट्ठ सया अणुत्तरोववाइयाणं गइकळाणाणं ठिइकळाणाणं आगमेसिभहाणं उक्कोसिया अणुत्तरोववाइयाणं संपया हुत्था ॥ १४५ ॥ समणस्स णं भगवओ महा-वीरस्स दुविहा अंतगडभूमी हुत्था, तंजहा-जुगंत(ग)कडभूमी य परियायंतकड-भूमी य, जाव तच्चाओ पुरिसजुगाओ जुगंतकडभूमी, चउवासपरियाए अंतमकासी ॥ १४६ ॥ तेणं कालेणं तेणं समएणं समणे भगवं महावीरे तीसं वासाई अगार-वासमज्जे वसित्ता साइरेगाई दुवालस वासाई छउमत्थपरियागं पाउणिता देसूणाई तीसं वासाई केवलिपरियागं पाउणिता बायालीसं वासाई सामणपरियागं पाउणिता बावत्त(रिं)रि वासाई सव्वाउयं पालइत्ता खीणे वेयणिज्जाउयनामगुत्ते इमीसे ओस-प्पिणीए दूसमसुसमाए समाए बहुविइकंताए तिहिं वासेहिं अद्धनवमेहिं य मासेहिं सेसेहिं पावाए मज्झिमाए हत्थिवालस्स रण्णो रज्जु(य)गसभाए एगे अबीए छट्ठेणं भत्तेणं अपाणएणं साइणा नक्खत्तेणं जोगमुवागएणं पच्चसकालसमयंसि संपलियं-कनिसण्णे पणपन्नं अज्झयणाई कळाणफलविवागाई पणपन्नं अज्झयणाई पावफल-विवागाई छत्तीसं च अपुट्टवागरणाई वागरित्ता पहाणं नाम अज्झयणं विभावामाणे विभावामाणे कालगए विइकंते समुज्जाए छिज्जाइजरामरणवंधणे सिद्धे बुद्धे मुत्ते अंतगडे परिनिव्वुडे सव्वदुक्खप्पहीणे ॥ १४७ ॥ सैमणस्स भगवओ महावीरस्स जाव सव्वदुक्खप्पहीणस्स नव वाससयाई विइकंताई, दसमस्स य वाससयस्स अयं असीइमे संवच्छरे काले गच्छइ । वायणंतरे पुण अयं तेणउए संवच्छरे काले गच्छइ इइ वीसइ ॥ १४८ ॥ २४ ॥ इइ सिरिमहावीरचरियं समत्तं ॥

तेणं कालेणं तेणं समएणं पासे [णं] अरहा पुरिसादाणीए पंचविसाहे हुत्था, तंजहा-विसाहाहिं जुए चइत्ता गब्भं वक्कंते १, विसाहाहिं जाए २, विसाहाहिं मुंडे भवित्ता अगाराओ अणगारियं पव्वइए ३, विसाहाहिं अणंते अणुत्तरे निव्वावाए निरावरणे कसिणे पडिपुण्णे केवलवरनाणदंसणे समुप्पन्ने ४, विसाहाहिं परिनि-व्वु(डे)ए ५ ॥ १४९ ॥ तेणं कालेणं तेणं समएणं पासे अरहा पुरिसादाणीए जे से गिम्हाणं पढमे मासे पढमे पक्खे चित्तबहुले तस्स णं चित्तबहुलस्स चउत्थीपक्खेणं पाणयाओ कपाओ वीसंसागरोवमट्ठियाओ अणंतं चयं चइत्ता इहेव जंबुद्वीवे द्वीवे भारहे वासे वाणारसीए नयरीए आससेणस्स रण्णो वामाए देवीए पुव्वरत्तावरत्त-कालसमयंसि विसाहाहिं नक्खत्तेणं जोगमुवागएणं आहारवक्कंतीए भववक्कंतीए सरीर-

१ कपसुत्तस्स पुत्थयलिहणकालजाणावणट्ठा सुत्तमिणं देवड्ढिगणखमासमणेहिं लिहियं, वीरनिव्वाणाओ नवसयअसीइवरसे पुत्थयारूढो सिद्धंतो जाओ तथा कप्पो वि पुत्थयारूढो जाओ ति अट्ठो । एवं सव्वजिणंतरेसु अवगंतव्वं ।



वक्कंतीए कुच्छिसि गम्भत्ताए वक्कंते ॥ १५० ॥ पासे णं अरहा पुरिसादाणीए तिच्चा-  
 गोवगए यावि हुत्था, तंजहा-चइस्सामित्ति जाणइ, चयमाणे न जाणइ, चुएमित्ति  
 जाणइ, तेणं चेव अभिलावेणं सुविणदंसणविहाणेणं सव्वं जाव नियमं गिहं अणुपविट्ठा  
 जाव सहसुहेणं तं गम्भं परिवहइ ॥ १५१ ॥ तेणं कालेणं तेणं समएणं पासे  
 अरहा पुरिसादाणीए जे से हेमंताणं दुच्चे मासे तच्चे पक्खे पोसवहुले तस्स णं  
 पोसवहुलस्स दसमीपक्खेणं नवण्हं मासाणं बहुपडिपुण्णाणं अद्धट्ठमाणं राइं-  
 दियाणं विइक्कंताणं पुव्वरत्तावरत्तकालसमयंसि विसाहाहिं नक्खत्तेणं जोगमुवागएणं  
 आरोग्गा(आ)रोग्गं दारयं पयाया ॥ १५२ ॥ जं रयणिं च णं पासे अरहा  
 पुरिसादाणीए जाए (तं रयणिं च णं) सा (णं) रयणी बहूहिं देवेहिं देवीहि य जाव  
 उप्पिजलगभूया कहकहगभूया यावि हुत्था ॥ १५३ ॥ सेसं तहेव, नवरं जम्मणं  
 पासाभिलावेणं भाणियव्वं जाव तं होउ णं कुमारं पासे नैमेणं ॥ १५४ ॥ पासे णं  
 अरहा पुरिसादाणीए दक्खे दक्खपइच्चे पडिह्वे अल्लीणे भइए विणीए तीसं  
 वासाइं अगारवासमज्जे वसित्ता पुणरवि लोगंतिएहिं जीयकप्पिएहिं देवेहिं ताहिं  
 इट्ठाहिं जाव एवं वयासी-जय जय नन्दा!, जय जय भद्दा! जाव जयजयसइं  
 पउंजंति ॥ १५५-१५६ ॥ पुत्तिं पि णं पासस्स णं अरहओ पुरिसादाणीयस्स  
 माणुस्सगाओ गिहत्थयम्माओ अणुत्तरे आहोइए तं चेव सव्वं जाव दाणं दाइयाणं  
 परिभाइत्ता जे से हेमंताणं दुच्चे मासे तच्चे पक्खे पोसवहुले तस्स णं पोसवहुलस्स  
 इक्कारसीदिवसेणं पुव्वण्हकालसमयंसि विसालाए सि(वि)वियाए सदेवमणुयासुराए  
 परिसाए तं चेव सव्वं नवरं वाणारसिं नगरिं मज्झंमज्जेणं निग्गच्छइ २ ता जेणेव  
 आसमपए उज्जाणे जेणेव असोगवरपायवे तेणेव उवागच्छइ २ ता असोगवरपायवस्स  
 अहे सीयं ठावेइ २ ता सीयाओ पच्चोहइ २ ता सयमेव आभरणमल्लालंकारं ओमु-  
 यइ २ ता सयमेव पंचमुट्ठियं लोयं करेइ २ ता अट्ठमेणं भत्तेणं अपाणएणं विसा-  
 हाहिं नक्खत्तेणं जोगमुवागएणं एणं देवदूस्समादाय तिहिं पुरिससएहिं सद्धिं मुंडे  
 भवित्ता अगाराओ अणगारियं पव्वइए ॥ १५७ ॥ पासे णं अरहा पुरिसादाणीए  
 तेसीइं राइंदियाइं निच्चं वोसट्ठकाए चियत्तदेहे जे केइ उवसग्गा उप्पजंति, तंजहा-  
 दिव्वा वा माणुसा वा तिरिक्खजोणिया वा अणुलोमा वा पडिलोमा वा ते उप्पन्ने  
 सम्मं सहइ खमइ तितिक्खइ अहियासेइ ॥ १५८ ॥ ताए णं से पासे भगवं अणगारे  
 जाए इरियासमिए जाव अप्पाणं भावेमाणस्स तेसीइं राइंदियाइं विइक्कंताइं, चउरा-

१ पडुंसि गम्भत्थे सइ सयणिजत्थाए माऊए पासे सप्पंतो कण्हसप्पो दिट्ठो,  
 तेण 'पासे' ति नामं कयं ।

सीइ(मे)मस्स राइंदि(ए)यस्स अंतरा वट्ठमा(णे)णस्स जे से गिम्हाणं पढमे मासे  
 पढमे पक्खे चित्तबहुले तस्स णं चित्तबहुलस्स चउत्थीपक्खेणं पुव्वण्हकालसमयंसि  
 धाय(इ)इपायवस्स अहे छट्ठेणं भत्तेणं अपाणएणं विसाहाहिं नक्खत्तेणं जोगमुवागएणं  
 ज्ञाणंतरियाए वट्ठमाणस्स अणंते जाव जाणमाणे पासमाणे विहरइ ॥ १५९ ॥  
 पासस्स णं अरहओ पुरिसादाणीयस्स अट्ठ गणा अट्ठ गणहरा हुत्था, तंजहा-सुमे १  
 य अज्जघोसे २ य, वसिट्ठे ३ बंभयारि ४ य । सोमे ५ सिरिहरे ६ चेव, वीरभेइ ७  
 जसे वि य ८ ॥ १ ॥ १६० ॥ पासस्स णं अरहओ पुरिसादाणीयस्स अज्जदिच्च-  
 पामुक्खाओ सोलस समणसाहस्सीओ उक्कोसिया समणसंपया हुत्था ॥ १६१ ॥ पासस्स  
 णं अरहओ पुरिसादाणीयस्स पुप्फचूलापामुक्खाओ अट्ठत्तीसं अज्जियासाहस्सीओ  
 उक्कोसिया अज्जियासंपया हुत्था ॥ १६२ ॥ पासस्स णं अरहओ पुरिसादाणीयस्स  
 सुव्वयपामुक्खाणं समणोवासगणं एगा सयसाहस्सी[ओ] चउसट्ठिं च सहस्सा उक्को-  
 सिया समणोवास(ग)गाणं संपया हुत्था ॥ १६३ ॥ पासस्स णं अरहओ पुरिसादा-  
 णीयस्स सुनंदापामुक्खाणं समणोवासियाणं तिण्णि सयसाहस्सीओ सत्तावीसं च  
 सहस्सा उक्कोसिया समणोवासियाणं संपया हुत्था ॥ १६४ ॥ पासस्स णं अरहओ  
 पुरिसादाणीयस्स अट्ठदुसया चउद्दसपुव्वीणं अज्जिणाणं जिणसंकासाणं सव्वक्खर-  
 सन्निवाईणं जाव चउद्दसपुव्वीणं संपया हुत्था ॥ १६५ ॥ पासस्स णं अरहओ  
 पुरिसादाणीयस्स चउद्दस सया ओहिनाणीणं, दस सया केवलनाणीणं, ए(इ)कार-  
 स सया वेउ(व्विया)व्वीणं, छस्सया रिउमईणं, दस समणसया सिद्धा, वीसं अज्जि-  
 यासया सिद्धा, अट्ठदुस-सया विउलमईणं, छ(स्)सया वाईणं, बारस सया अणुत्तरोव-  
 वाइयाणं ॥ १६६ ॥ पासस्स णं अरहओ पुरिसादाणीयस्स दुविहा अंतगडभूमी  
 हुत्था, तंजहा-जुगंतकडभूमी य परियायंतकडभूमी य, जाव चउत्थाओ पुरिसजु-  
 गाओ जुगंतकडभूमी, तिवासपरियाए अंतमकासी ॥ १६७ ॥ तेणं कालेणं तेणं  
 समएणं पासे अरहा पुरिसादाणीए तीसं वासाइं अगारवासमज्जे वसित्ता तेसीइं  
 राइंदियाइं छउमत्थपरियायं पाउणित्ता देसूणाइं सत्तरि वासाइं केवलिपरियायं  
 पाउणित्ता पड्डिपुनाइं सत्तरि वासाइं सामण्णपरियायं पाउणित्ता एक्कं वाससयं सव्वाउयं  
 पालइत्ता खीणे वेयणिज्जाउयनामगुत्ते इमीसे ओसप्पिणीए दूसमसुसमाए समाए बहु-  
 विइक्कंताए जे से वासाणं पढमे मासे दुच्चे पक्खे सावणसुद्धे तस्स णं सावणसुद्धस्स  
 अट्ठमीपक्खेणं उप्पि सग्गमेयसेलसिहरंसि अप्पचउत्तीसइमे मासिएणं भत्तेणं अपाणएणं  
 विसाहाहिं नक्खत्तेणं जोगमुवागएणं पुव्व(रत्तावरत्त)ण्हकालसमयंसि वग्गारियपाणी  
 कालगए विइक्कंते जाव सव्वदुक्खप्पहीणे ॥ १६८ ॥ पासस्स णं अरहओ जाव

सव्वदुक्खप्पहीणस्स दुवालय वाससयाईं विइक्कंताईं, तेरसमस्स (णं) य अयं तीसइमे संवच्छरे काले गच्छइ ॥ १६५ ॥ २३ ॥ इइ सिरिपासजिणचरियं समत्तं ॥

तेणं कालेणं तेणं समएणं अरहा अरिट्ठनेमी पंचचित्ते हुत्था, तंजहा-चित्ताहिं चुए चइत्ता गब्भं वक्कंते, तहेव उक्खेवो जाव चित्ताहिं परिनिव्वुए ॥ १७० ॥ तेणं कालेणं तेणं समएणं अरहा अरिट्ठनेमी जे से वासाणं चउत्थे मासे सत्तमे पक्खे कत्तियवहुले तस्स णं कत्तियवहुलस्स बारसीपक्खेणं अपराजियाओ महाविमाणाओ वत्तीसं सागरोवमद्विइयाओ अणंतरं चयं चइत्ता इहेव जंबुदीवे दीवे भारहे वासे सोरियपुरे नयरे समुद्विजयस्स रण्णो भारियाए सिवाए देवीए पुव्वरत्तावर्तकाल-समयंसि जाव चित्ताहिं गम्भत्ताए वक्कंते, सव्वं त(मे)हेव सुविणदंसणदविणसंहरणाइयं इत्थ भाणियव्वं ॥ १७१ ॥ तेणं कालेणं तेणं समएणं अरहा अरिट्ठनेमी जे से वासाणं पढमे मासे दुच्चे पक्खे सावणसुद्धे तस्स णं सावणसुद्धस्स पंचमीपक्खेणं नवण्हं मासाणं बहुपुण्णं जाव चित्ताहिं नक्खत्तेणं जोगमुवागएणं आरोग्गारोगं दारयं पयाया । जम्भणं समुद्विजयाभिलावेणं नेयव्वं जाव तं होउ णं कुमारे अरिट्ठनेमी नामेणं । अरहा अरिट्ठनेमी दक्खे जाव तिण्णि वाससयाईं कुमारे अगारवासमज्जे वस्तिताणं पुणरवि लोगंतिएहिं जीयकप्पिएहिं देवेहिं तं चेव सव्वं भाणियव्वं जाव दाणं दाइयाणं परिभाइत्ता ॥ १७२ ॥ जे से वासाणं पढमे मासे दुच्चे पक्खे सावण-सुद्धे तस्स णं सावणसुद्धस्स छट्ठीपक्खेणं पुव्वण्हकालसमयंसि उत्तरकुराए सिवि(सी)-याए सदेवमणुयासुराए परिसाए अणुगम्ममाणमग्गे जाव बारवईए नयरीए मज्झं-मज्जेणं निगच्छइ २ ता जेणेव रेवयए उज्जाणे तेणेव उवागच्छइ २ ता असोग-वरपायवस्स अहे सीयं ठावेइ २ ता सीयाओ पच्चोहइ २ ता सयमेव आभरणमल्लालं-कारं ओमुयइ २ ता सयमेव पंचमुट्ठियं लोयं करेइ २ ता छट्ठेणं भत्तेणं अपाणएणं चित्ता(हिं)नक्खत्तेणं जोगमुवागएणं एणं देवदूसमादाय एगेणं पुरिससहस्सेणं सद्धिं मुंढे भवित्ता अगाराओ अणगरियं पव्वइए ॥ १७३ ॥ अरहा णं अरिट्ठनेमी चउ-प्पन्नं राईदियाईं निच्चं वोसट्ठकाए चियत्तदेहे तं चेव सव्वं जाव पणपन्नगस्स राईदियस्स अंतरा वट्ठमाणस्स जे से वासाणं तच्चे मासे पंचमे पक्खे आसोयवहुले तस्स णं आसोयवहुलस्स पण्णरसीपक्खेणं दिवसस्स पच्छिमे भा(ए)गे उज्जितसेलसिहरे वेड-सपायवस्स अहे अट्ठमे(छट्ठे)णं भत्तेणं अपाणएणं चित्तानक्खत्तेणं जोगमुवागएणं

१ भगवंतंसि गम्भत्थे माऊए रिट्ठरयणमया नेमी-चक्कधारा सुविणे दिट्ठा तओऽरि-ट्ठनेमी, अकारस्स अमंगलपरिहारट्ठत्तणओ अरिट्ठनेमिन्ति, रिट्ठसदो अमंगलवाचित्ति ।  
२ अपरिणीयत्तणओ ।

झाणंतरियाए वट्ठमाणस्स अणंते अणुत्तरे निव्वाधाए निरावरणे जाव केवलवरणाण-  
दंसणे समुप्पन्ने जाव सव्वजीवाणं सव्वभावे जाणमाणे पासमाणे विहरइ ॥ १७४ ॥  
अरहओ णं अरिट्ठनेमिस्स अट्टारस गणा अट्टारस गणहरा हुत्था ॥ १७५ ॥ अरह-  
ओ णं अरिट्ठनेमिस्स वरदत्तपामुक्खाओ अट्टारस समणसाहस्सीओ उक्कोसिया समण-  
संपया हुत्था ॥ १७६ ॥ अज्जक्खिणीपामुक्खाओ चत्तालीसं अज्जियासाहस्सीओ  
उक्कोसिया अज्जियासंपया हुत्था ॥ १७७ ॥ नंदपामुक्खाणं समणोवासगणं एगा  
सयसाहस्सीओ अउणत्तरिं च सहस्सा उक्कोसिया समणोवासगणं संपया हुत्था  
॥ १७८ ॥ महसुव्वयापामुक्खाणं समणोवासि(गा)याणं तिण्णि सयसाहस्सीओ  
छत्तीसं च सहस्सा उक्कोसिया समणोवासियाणं संपया हुत्था ॥ १७९ ॥ चत्तारि सया  
चउद्दसपुव्वीणं अजिणाणं जिणसंकासाणं सव्वक्खरसन्निवाईणं जाव संपया हुत्था  
॥ १८० ॥ पन्नरस सया ओहिनाणीणं, पन्नरस सया केवलनाणीणं, पन्नरस सया  
वेउव्वियाणं, दस सया विउलमईणं, अट्ठ सया वाईणं, सोलस सया अणुत्तरोववाइ-  
याणं, पन्नरस समणसया सिद्धा, तीसं अज्जियासयाई सिद्धाई ॥ १८१ ॥ अरहओ  
णं अरिट्ठनेमिस्स दुविहा अंतगडभूमी हुत्था, तंजहा-जुगंतकडभूमी य परियायंत-  
कडभूमी य, जाव अट्ठमाओ पुरिसजुगाओ जुगंतकडभूमी, दुवा(ल)सपरियाए अंत-  
मकासी ॥ १८२ ॥ तेणं कालेणं तेणं समएणं अरहा अरिट्ठनेमी तिण्णि वाससयाई  
कुमारवासमज्जे वसिता चउप्पन्नं राईदियाई छउमत्थपरियायं पाउणित्ता देसूणाई  
सत्त वाससयाई केवलपरियायं पाउणित्ता पडिपुण्णाई सत्त वाससयाई सामण्ण-  
परियायं पाउणित्ता एणं वाससहस्सं सव्वाउयं पालइत्ता खीणे वेयणिज्जाउय-  
नामगुत्ते इमीसे ओसप्पिणीए दूसमसुसमाए समाए बहुविइक्कंताए जे से गिम्हाणं  
चउत्थे मासे अट्ठमे पक्खे आसाढसुद्धे तस्स णं आसाढसुद्धस्स अट्ठमीपक्खेणं उप्पि  
उज्जितसेलसिद्धरसि पंचहिं छत्तीसेहिं अणगारसएहिं सद्धिं मासिएणं भत्तेणं अपाणएणं  
चित्तानक्खत्तेणं जोगसुवागएणं पुव्वरत्तावरत्तकालसमयंसि नेसजिए कालगए जाव  
सव्वदुक्खप्पहीणे ॥ १८३ ॥ अरहओ णं अरिट्ठनेमिस्स कालगयस्स जाव सव्व-  
दुक्खप्पहीणस्स चउरासीई वाससहस्साई विइक्कंताई, पंचासीइमस्स वाससहस्सस्स  
नव वाससयाई विइक्कंताई, दसमस्स य वाससयस्स अयं असीइमे संवच्छरे काले  
गच्छइ ॥ १८४ ॥ २२ ॥ इइ सिरिनेमिनाहचरियं समत्तं ॥

नमिस्स णं अरहओ कालगयस्स जाव सव्वदुक्खप्पहीणस्स पंच वाससयसह-  
स्साई चउरासीई च वाससहस्साई नव य वाससयाई विइक्कंताई, दसमस्स य  
वाससयस्स अयं असीइमे संवच्छरे काले गच्छइ ॥ १८५ ॥ २१ ॥ मुणिसुव्व-

यस्स णं अरहओ जाव सव्वदुक्खप्पहीणस्स इक्कारस वाससयसहस्साइं चउरासीइं  
च वाससहस्साइं नव वाससयाइं विइक्कंताइं, दसमस्स य वाससयस्स अयं असीइमे  
संवच्छरे काले गच्छइ ॥ १८६ ॥ २० ॥ मल्लिस्स णं अरहओ जाव सव्वदुक्खप्प-  
हीणस्स पण्णट्ठिं वाससयसहस्साइं चउरासीइं च वाससहस्साइं नव वाससयाइं  
विइक्कंताइं, दसमस्स य वाससयस्स अयं असीइमे संवच्छरे काले गच्छइ  
॥ १८७ ॥ १९ ॥ अरस्स णं अरहओ जाव सव्वदुक्खप्पहीणस्स एगे वासकोडि-  
सहस्से विइक्कंते, सेसं जहा मल्लिस्स, तं च एयं-पंचसट्ठिं लक्खा चउरासी(इं)  
(वास)सहस्सा(इं) विइक्कंता(इं), तम्मि समए महावीरो निव्वुओ, तओ परं नव  
वाससया(इं) विइक्कंता(इं), दसमस्स य वाससयस्स अयं असीइमे संवच्छरे काले  
गच्छइ । एवं अग्गओ जाव सेयंसो ताव दट्ठव्वं ॥ १८८ ॥ १८ ॥ कुंथुस्स णं  
अरहओ जाव सव्वदुक्खप्पहीणस्स एगे चउभागपल्लिओवमे विइक्कंते पंचसट्ठिं च  
सयसहस्सा, सेसं जहा मल्लिस्स ॥ १८९ ॥ १७ ॥ संतिस्स णं अरहओ जाव  
सव्वदुक्खप्पहीणस्स एगे चउभागूणे पल्लिओवमे विइक्कंते पण्णट्ठिं च, सेसं जहा  
मल्लिस्स ॥ १९० ॥ १६ ॥ धम्मस्स णं अरहओ जाव सव्वदुक्खप्पहीणस्स तिण्णि  
सागरोवमाइं पण्णट्ठिं च, सेसं जहा मल्लिस्स ॥ १९१ ॥ १५ ॥ अणंतस्स णं  
अरहओ जाव सव्वदुक्खप्पहीणस्स सत्त सागरोवमाइं पण्णट्ठिं च, सेसं जहा  
मल्लिस्स ॥ १९२ ॥ १४ ॥ विमलस्स णं अरहओ जाव सव्वदुक्खप्पहीणस्स  
सोलस सागरोवमाइं विइक्कंताइं पण्णट्ठिं च, सेसं जहा मल्लिस्स ॥ १९३ ॥ १३ ॥  
वासुपुजस्स णं अरहओ जाव सव्वदुक्खप्पहीणस्स छायालीसं सागरोवमाइं विइ-  
क्कंताइं पण्णट्ठिं च, सेसं जहा मल्लिस्स ॥ १९४ ॥ १२ ॥ सिजंसस्स णं अरहओ  
जाव सव्वदुक्खप्पहीणस्स एगे सागरोवमसए विइक्कंते पण्णट्ठिं च, सेसं जहा  
मल्लिस्स ॥ १९५ ॥ ११ ॥ सीयलस्स णं अरहओ जाव सव्वदुक्खप्पहीणस्स एगा  
सागरोवमकोडी तिवासअद्धनवमासाहियबायालीसवाससहस्सेहिं ऊणिया विइक्कंता,  
एयंमि समए महावीरो निव्वुओ, तओ (वि य णं) परं नव वाससयाइं विइक्कंताइं,  
दसमस्स य वाससयस्स अयं असीइमे संवच्छरे काले गच्छइ ॥ १९६ ॥ १० ॥  
सुविहिस्स णं अरहओ पुप्फदंतस्स जाव सव्वदुक्खप्पहीणस्स दस सागरोवमकोडीओ  
विइक्कंताओ, सेसं जहा सीयलस्स, तं च इमं-तिवासअद्धनवमासाहियबायालीस-  
वाससहस्सेहिं ऊणिया(इं) विइक्कंता(इं) इच्चाइ(यं) ॥ १९७ ॥ ९ ॥ चंदप्पहस्स णं  
अरहओ जाव पहीणस्स एगं सागरोवमकोडिसयं विइक्कंतं, सेसं जहा सीयलस्स, तं  
च इमं-तिवासअद्धनवमासाहियबायालीसवाससहस्सेहिं ऊणगमिच्चाइ ॥ १९८ ॥ ८ ॥

सुपासस्स णं अरहओ जाव पहीणस्स एगे सागरोवमकोडिसहस्से विइक्कंते, सेसं जहा सीयलस्स, तं च इमं-तिवासअद्धनवमासाहियबायालीसवाससहस्सेहिं ऊणिया (विइक्कंता) इच्चाइ ॥ १९९ ॥ ७ ॥ पडमप्पहस्स णं अरहओ जाव पहीणस्स दस सागरोवमकोडिसहस्सा विइक्कंता, तिवासअद्धनवमासाहियबायालीसवाससहस्सेहिं इच्चाइयं, सेसं जहा सीयलस्स ॥ २०० ॥ ६ ॥ सुमइस्स णं अरहओ जाव पहीणस्स एगे सागरोवमकोडिसयसहस्से विइक्कंते, सेसं जहा सीयलस्स, तिवासअद्धनवमासाहियबायालीसवाससहस्सेहिं इच्चाइयं ॥ २०१ ॥ ५ ॥ अभिन्नं दणस्स णं अरहओ जाव पहीणस्स दस सागरोवमकोडिसयसहस्सा विइक्कंता, सेसं जहा सीयलस्स, तिवासअद्धनवमासाहियबायालीसवाससहस्सेहिं इच्चाइयं ॥ २०२ ॥ ४ ॥ संभवस्स णं अरहओ जाव पहीणस्स वीसं सागरोवमकोडिसयसहस्सा विइक्कंता, सेसं जहा सीयलस्स, तिवासअद्धनवमासाहियबायालीसवाससहस्सेहिं इच्चाइयं ॥ २०३ ॥ ३ ॥ अजियस्स णं अरहओ जाव पहीणस्स पन्नासं सागरोवमकोडिसयसहस्सा विइक्कंता, सेसं जहा सीयलस्स, तं च इमं-तिवासअद्धनवमासाहियबायालीसवाससहस्सेहिं इच्चाइयं ॥ २०४ ॥ २ ॥ इइ जिणंतराइं समत्ताइं ॥

तेणं कालेणं तेणं समएणं उसमे णं अरहा कोसलिए चउत्तरासाढे अमीइपंचमे हुत्था, तंजहा-उत्तरासाढाहिं चुए चइता गब्भं वक्कंते जाव अमीइणा परिनिव्वुए ॥ २०५ ॥ तेणं कालेणं तेणं समएणं उसमे णं अरहा कोसलिए जे से गिम्हाणं चउत्थे मासे सत्तमे पक्खे आसाढबहुले तस्स णं आसाढबहुलस्स चउत्थीपक्खेणं सव्वट्ठसिद्धाओ महाविमाणो तित्तीसं सागरोवमट्ठिइयाओ अणंतरं चयं चइता इहेव जंबुहीवे वीवे भारहे वासे इक्खागभूमीए नाभिकुलगरस्स मरुदे(वा)वीए भारियाए पुव्वरतावरत्तकालसमयंसि आहारवक्कंतीए जाव गब्भत्ताए वक्कंते ॥ २०६ ॥ उसमे णं अरहा कोसलिए तिन्नाणोवगए यावि हुत्था, तंजहा-चइस्सामित्ति जाणइ जाव सुमिणे पासइ, तंजहा-गय-वसह० गाहा । सव्वं तहेव, नवरं पढमं उसभं मुहेणं अइतं पासाइ, सेसाओ गयं । नाभिकुलगरस्स सा(ह)हेइ, सुविणपाढगा नत्थि, नाभिकुलगरो सयमेव वागरेइ ॥ २०७ ॥ तेणं कालेणं तेणं समएणं उसमे णं अरहा कोसलिए जे से गिम्हाणं पढमे मासे पढमे पक्खे चित्तबहुले तस्स णं चित्तबहुलस्स अट्ठमीपक्खेणं नवण्हं मासाणं बहुपडिपुण्णाणं अट्ठमाणं राईदियाणं जाव आसाढाहिं नक्खत्तेणं जोगमुवागएणं आरोग्गारोग्गं दारयं पयाया ॥ २०८ ॥ तं चेव सव्वं जाव देवा देवीओ य वसुहारवासं वासिंइ, सेसं तहेव चारगसोहण-माणुम्माणव(द्ध)ट्ठणउस्सुकमाइयट्ठिइवडियजूयवजं सव्वं भाणियव्वं ॥ २०९ ॥

उसभे णं अरहा कोसलिए कासवगुत्तेणं, तस्स णं पंच नामधिज्जा एवमाहिजंति, तज्जहा-उसभेइ वा, पढमरायाइ वा, पढमभिक्खायरेइ वा, पढमजिणेइ वा, पढम-  
 तित(थंक)थयरे इ वा ॥ २१० ॥ उसभे णं अरहा कोसलिए दक्खे दक्खपङ्गणे  
 पडिह्वे अल्लीणे भद्दए विणीए वीसं पुव्वसयसहस्साइं कुमारवासमज्झे वसइ वसित्ता  
 तेवट्ठिं पुव्वसयसहस्साइं रज्जवासमज्झे वसइ, तेवट्ठिं च पुव्वसयसहस्साइं रज्जवा-  
 समज्झे वसमाणे लेहाइयाओ गणियप्पहाणाओ सउणहयपज्जवसाणाओ वावत्तरिं  
 कलाओ चउसट्ठिं महिलगुणे सिप्पसयं च कम्माणं तिच्चि वि पयाहियाए उवदिसइ  
 उवदिसित्ता पुत्तसयं रज्जसए अभिसिचइ अभिसिचित्ता पुणरवि लोयंतिएहिं जीयक-  
 प्पिएहिं देवेहिं ताहिं इट्ठाहिं जाव वग्गूहिं सेसं तं चैव सव्वं भाणियव्वं जाव दाणं  
 दाइयाणं परिभाइत्ता जे से गिम्हाणं पढमे मासे पढमे पक्खे चित्तवहुले तस्स णं  
 चित्तवहुलस्स अट्ठमीपक्खेणं दिवसस्स पच्छिमे भागे सुदंसणाए सिवियाए सदेवम-  
 गुयामुराए परिसाए समणुगम्ममाणमग्गे जाव विणीयं रायहाणिं मज्झमज्झेणं  
 निग्गच्छइ निग्गच्छित्ता जेणेव सिद्धत्थवणे उज्जाणे जेणेव असोगवरपायवे तेणेव  
 उवागच्छइ उवागच्छित्ता असोगवरपायवस्स अहे जाव सयमेव चउमुट्ठियं लोयं  
 करेइ करित्ता छट्ठेणं भत्तेणं अपाणएणं आसाढाहिं नक्खत्तेणं जोगमुवागएणं उग्गाणं  
 भोगाणं राइण्णाणं खत्तियाणं चउहिं पुरिससहस्सेहिं सद्धिं एणं देवदूसमादाय मुंडे  
 भवित्ता अगाराओ अणगारियं पव्वइए ॥ २११ ॥ उसभे णं अरहा कोसलिए एणं  
 वाससहस्सं निच्चं वोसट्ठकाए चियत्तदेहे जाव अप्पाणं भावेमाणस्स (इक्कं) एणं वासस-  
 हस्सं विइक्कंतं, तओ णं जे से हेमंताणं चउत्थे मासे सत्तमे पक्खे फग्गुणवहुले तस्स  
 णं फग्गुणवहुलस्स ए(इ)क्कारसीपक्खेणं पुव्वण्हकालसमयंसि पुरिमतालस्स नगरस्स  
 वहिया सगडमुहंसि उज्जाणंसि नग्गोहवरपायवस्स अहे अट्ठमेणं भत्तेणं अपाणएणं  
 आसाढाहिं नक्खत्तेणं जोगमुवागएणं ज्ञाणंतरियाए वट्ठमाणस्स अणंते जाव जाण-  
 माणे पासमाणे विहरइ ॥ २१२ ॥ उसभस्स णं अरहओ कोसलियस्स चउरासीई  
 गणा चउरासीई गणहरा हुत्था ॥ २१३ ॥ उसभस्स णं अरहओ कोसलियस्स  
 उसभसेणपामुक्खा(ओ)णं चउरासी(इ)ओ समणसाहस्सीओ उक्कोसिया समणसंपया  
 हुत्था ॥ २१४ ॥ उसभस्स णं अरहओ कोसलियस्स बंभीसुंदरीपामुक्खाणं अज्जि-  
 याणं तिण्णि सयसाहस्सीओ उक्कोसिया अज्जियासंपया हुत्था ॥ २१५ ॥ उस-  
 भस्स णं...सिज्जंसपामुक्खाणं समणोवासगाणं तिण्णि सयसाहस्सीओ पंच सहस्सा  
 उक्कोसिया समणोवास(ग)गाणं संपया हुत्था ॥ २१६ ॥ उसभस्स णं...सुभद्दापा-  
 मुक्खाणं समणोवासियाणं पंच सयसाहस्सीओ चउप्पन्नं च सहस्सा उक्कोसिया सम-

णोवासियाणं संपया हुत्था ॥ २१७ ॥ उसभस्स णं...चत्तारि सहस्सा सत्त सया  
पण्णासा चउइसपुव्वीणं अजिणाणं जिणसंकासाणं जाव उक्कोसिया चउइसपुव्वि-  
संपया हुत्था ॥ २१८ ॥ उसभस्स णं...नव सहस्सा ओहिनाणीणं० उक्कोसिया ओहि-  
नाणिसंपया हुत्था ॥ २१९ ॥ उसभस्स णं...वीससहस्सा केवलनाणीणं० उक्कोसिया  
केवलनाणिसंपया हुत्था ॥ २२० ॥ उसभस्स णं...वीससहस्सा छच्च सया वेउ-  
व्वियाणं० उक्कोसिया वेउव्विय(समण)संपया हुत्था ॥ २२१ ॥ उसभस्स णं...वारस  
सहस्सा छच्च सया पण्णासा विउलमईणं अङ्गुइज्जेसु दी(वेसु दोसु य)वसमुद्दसु सच्चीणं  
पंचिदियाणं पज्जत्तगाणं मणोगए भावे जाणमाणाणं ( पासमाणाणं ) विउलमइसंपया  
हुत्था ॥ २२२ ॥ उसभस्स णं...वारस सहस्सा छच्च सया पण्णासा वाइणं० उक्को-  
सिया वाइसंपया हुत्था ॥ २२३ ॥ उसभस्स णं...वीसं अंतोवासिसहस्सा सिद्धा,  
चत्तालीसं अजिया(स)साहस्(सा)सीओ सिद्धाओ ॥ २२४ ॥ उसभस्स णं...वावीस-  
सहस्सा नव सया अणुत्तरोववाइयाणं गइकल्लाणाणं जाव भद्दाणं उक्कोसिया अणुत्तरोव-  
वाइयसंपया हुत्था ॥ २२५ ॥ उसभस्स णं अरहओ कोसलियस्स तुविहा अंतगडभूमी  
हुत्था, तंजहा-जुगंतगडभूमी य परियायंतगडभूमी य, जाव असंखिज्जाओ पुरिसजु-  
गाओ जुगंतगडभूमी, अंतोमुहुत्तपरियाए अंतमकासी ॥ २२६ ॥ तेणं कालेणं तेणं  
समएणं उसमे णं अरहा कोसलिए वीसं पुव्वसयसहस्साइं कुमारवासमज्जे वसित्ता(णं)  
तेवट्ठि पुव्वसयसहस्साइं रज्जवासमज्जे वसित्ता तेसीइं पुव्वसयसहस्साइं अगरवास-  
मज्जे वसित्ता एणं वाससहस्सं छउमत्थपरिया(यं)गं पाउणिता एणं पुव्वसयसहस्सं  
वाससहस्सूणं केवलपरियागं पाउणिता पडि(सं)पुण्णं पुव्वसयसहस्सं सामण्णपरियागं  
पाउणिता चउरासीइं पुव्वसयसहस्साइं सव्वाउयं पालइत्ता खीणे वेयणिज्जाउयनामगुत्ते  
इमीसे ओसप्पिणीए सुसमदसमाए समाए बहुविइक्कंताए तिहिं वासेहिं अद्धनवमेहि य  
मासेहिं सेसेहिं जे से हेमंताणं तच्चे मासे पंचमे पक्खे माहवहुले तस्स णं माहवहुलस्स  
तेरसीपक्खेणं उप्पि अट्ठावयसेलसिहरंसि दसहिं अणगारसहस्सेहिं सद्धिं चउ(चो)इ-  
समेणं भत्तेणं अपाणएणं अभीइणा नक्खत्तेणं जोगमुवागएणं पुव्वण्हकालसमयंसि संप-  
लियं कनिसण्णे कालगए जाव सव्वदुक्खप्पहीणे ॥ २२७ ॥ उसभस्स णं अरहओ कोस-  
लियस्स कालगयस्स जाव सव्वदुक्खप्पहीणस्स तिणिण वासा अद्धनवमा य मासा विइ-  
क्कंता, तओ वि परं एणा सागरोवमकोडाकोडी तिवासअद्धनवमासाहियबायालीसाए  
वाससहस्सेहिं ऊणिगा विइक्कंता, एयंसि समए समणे भगवं महावीरे परिनिव्वु(डे)ए,  
तओ वि परं नववाससया विइक्कंता, दसमस्स य वाससयस्स अयं असीइमे संवच्छरे  
काले गच्छइ ॥ २२८ ॥ १ ॥ इइ सिरिउसहजिणचरियं समत्तं ॥



तेणं कालेणं तेणं समएणं समणस्स भगवओ महावीरस्स नव गणा, इक्कारस गणहरा हुत्था ॥ १ ॥ से केणट्ठेणं भंते ! एवं वुच्चइ-समणस्स भगवओ महावीरस्स नव गणा, इक्कारस गणहरा हुत्था ? ॥ २ ॥ समणस्स भगवओ महावीरस्स जिट्ठे इंदभूई अणगारे गोयम(स)गुत्तेणं पंच समणसयाइं वाएइ, मज्झिमए अग्गिभूई अणगारे गोयमगुत्तेणं पंच समणसयाइं वाएइ, कणीयसे अणगारे वाउभूई नामेणं गोयमगुत्तेणं पंच समणसयाइं वाएइ, थेरे अज्जवियत्ते भारद्वाए गुत्तेणं पंच समणसयाइं वाएइ, थेरे अज्जसुहम्ममे अग्गिवेसाय(णे)गुत्तेणं पंच समणसयाइं वाएइ, थेरे मंडियपुत्ते वासि-(ट्ठे)ट्ठसगुत्तेणं अद्धुट्ठाइं समणसयाइं वाएइ, थेरे मोरियपुत्ते कास(वे)वगुत्तेणं अद्धुट्ठाइं समणसयाइं वाएइ, थेरे अकंपिए गोय(मे)मसगुत्तेणं-थेरे अयलभाया हारियाय(णे)-गुत्तेणं, एए दुण्णिवि थेरा तिण्णि तिण्णि समणसयाइं वाएंति, थेरे अज्जमे(इ)यज्जे-थेरे अज्जपभासे, एए दुण्णिवि थेरा कोट्ठिन्ना-गुत्तेणं तिण्णि तिण्णि समणसयाइं वाएंति । से तेणट्ठेणं अज्जो ! एवं वुच्चइ-समणस्स भगवओ महावीरस्स नव गणा, इक्कारस गणहरा हुत्था ॥ ३ ॥ सव्वे वि णं एए समणस्स भगवओ महावीरस्स ए(इ)क्कारस वि गणहरा दुवालसंगिणो चउ(इ)दसपुव्विणो समतगणिपिडगधारगा रायगिहे नगरे मासिएणं भत्तेणं अपाणएणं कालगया जाव सव्वदुक्खप्पहीणा । थेरे इंदभूई थेरे अज्जसुहम्ममे य सिद्धिगए महावीरे पच्छा दुण्णिवि थेरा परिनिव्वुया । जे इमे अज्जाए समणा निग्गंथा विहरंति एए णं सव्वे अज्जसुहम्मस्स अणगरस्स आवच्चिज्जा, अवसेसा गणहरा निरवच्चा वुच्छिन्ना ॥ ४ ॥ समणे भगवं महावीरे कासवगुत्तेणं । समणस्स णं भगवओ महावीरस्स कासवगुत्तस्स अज्जसुहम्ममे थेरे अंते-वासी अग्गिवेसायणगुत्ते । थेरस्स णं अज्जसुहम्मस्स अग्गिवेसायणगुत्तस्स अज्ज-जंबूनामे थेरे अंतेवासी कासवगुत्तेणं । थेरस्स णं अज्जजंबूनामस्स कासवगुत्तस्स अज्जप्पभवे थेरे अंतेवासी कच्चायणसगुत्ते । थेरस्स णं अज्जप्पभवस्स कच्चायणस-गुत्तस्स अज्जसिज्जंभवे थेरे अंतेवासी मणगपिया वच्छसगुत्ते । थेरस्स णं अज्जसिज्ज-भवस्स मणगपिउणो वच्छसगुत्तस्स अज्जजसभदे थेरे अंतेवासी तुंगियायणसगुत्ते ॥ ५ ॥ इइ गणहराइथेरावली समत्ता ॥

तेणं कालेणं तेणं समएणं समणे भगवं महावीरे वासाणं सवीसइराए मासे विइकंते वासावासं पज्जोसवेइ ॥ १ ॥ से केणट्ठेणं भंते ! एवं वुच्चइ-समणे भगवं महावीरे वासाणं सवीसइराए मासे विइकंते वासावासं पज्जोसवेइ ? जज्जो णं पाएणं अगारीणं

१ अम्हाणमइपाइणायरिसे एत्तिओ चेव पाढो लब्भइ ज्जो 'अज्जभद्वाहुणा इमस्स रयणा कया' अस्स पुट्ठिं करेइ ।

अगाराइं कडियाइं उक्कं(वि)पियाइं छच्चाइं लिताइं गुत्ताइं घट्टाइं मट्टाइं संपधूमियाइं  
खाओदगाइं खायनिद्धमणाइं अप्पणो अट्टाए कडाइं परिमुत्ताइं परिणामियाइं भवन्ति,  
से तेणट्ठेणं एवं बुच्चइ-समणे भगवं महावीरे वासाणं सवीसइराए मासे विइक्कंते  
वासावासं पज्जोसवेइ ॥ २ ॥ जहा णं समणे भगवं महावीरे वासाणं सवीसइराए मासे  
विइक्कंते वासावासं पज्जोसवेइ तहा णं गणहरावि वासाणं सवीसइराए मासे विइक्कंते  
वासावासं पज्जोसविति ॥ ३ ॥ जहा णं गणहरा वासाणं सवीसइराए जाव पज्जोसविति  
तहा णं गणहरसीसावि वासाणं जाव पज्जोसविति ॥ ४ ॥ जहा णं गणहरसीसा  
वासाणं जाव पज्जोसविति तहा णं थेरावि वा(सावासं)साणं जाव पज्जोसविति ॥ ५ ॥  
जहा णं थेरा वासाणं जाव पज्जोसविति तहा णं जे इमे अज्जत्ताए समणा निग्गंथा  
विहरन्ति ते (एए) वि य णं वासाणं जाव पज्जोस(वे)विति ॥ ६ ॥ जहा णं जे इमे अज्ज-  
त्ताए समणा निग्गंथा वासाणं सवीसइराए मासे विइक्कंते वासावासं पज्जोसविति तहा  
णं अम्हंपि आयरिया उवज्झाया वासाणं जाव पज्जोसविति ॥ ७ ॥ जहा णं अम्हं(पि)  
आयरिया उवज्झाया वासाणं जाव पज्जोसविति तहा णं अम्हेवि वासाणं सवीसइ-  
राए मासे विइक्कंते वासावासं पज्जोसवेमो, अंतरा वि य से कप्पइ[पज्जोसवित्तए],  
नो से कप्पइ तं रयाणि उवाइणावित्तए ॥ ८ ॥ वासावासं पज्जोसवियाणं कप्पइ  
निग्गंथाण वा निग्गंथीण वा सव्वओ समंता सक्कोसं जोयणं उग्गहं ओगिण्हित्तणं  
चिट्ठिउं अहालंदमवि उग्गहे ॥ ९ ॥ वासावासं पज्जोसवियाणं कप्पइ निग्गंथाण वा  
निग्गंथीण वा सव्वओ समंता सक्कोसं जोयणं भिक्खायरियाए गंतुं पडिनियत्तए  
॥ १० ॥ जत्थ नई निच्चोयगा निच्चसंदणा, नो से कप्पइ सव्वओ समंता सक्कोसं  
जोयणं भिक्खायरियाए गंतुं पडिनियत्तए ॥ ११ ॥ एरावई कुणालाए, जत्थ चक्किया  
सिया एणं पायं जले किच्चा एणं पायं थले किच्चा, एवं चक्किया एवं णं कप्पइ सव्वओ  
समंता सक्कोसं जोयणं गंतुं पडिनियत्तए ॥ १२ ॥ एवं च नो चक्किया, एवं से नो  
कप्पइ सव्वओ समंता सक्कोसं जोयणं गंतुं पडिनियत्तए ॥ १३ ॥ वासावासं पज्जो-  
सवियाणं अत्थेगइयाणं एवं वुत्तपुव्वं भवइ-‘दावे भंते !’ एवं से कप्पइ दावित्तए,  
नो से कप्पइ पडिगाहित्तए ॥ १४ ॥ वासावासं पज्जोसवियाणं अत्थेगइयाणं एवं वुत्त-  
पुव्वं भवइ-‘पडिगाहे(हि) भंते !’ एवं से कप्पइ पडिगाहित्तए, नो से कप्पइ दावित्तए  
॥ १५ ॥ वासावासं पज्जोसवियाणं अत्थेगइयाणं एवं वुत्तपुव्वं भवइ-‘दावे भंते !  
पडिगाहे भंते !’ एवं से कप्पइ दावित्तएवि पडिगाहित्तएवि ॥ १६ ॥ वासावासं पज्जोस-  
वियाणं नो कप्पइ निग्गंथाण वा निग्गंथीण वा हट्ठाणं तुट्ठाणं आ(रु)रोगगाणं बलिय-  
सरीराणं इमाओ विगईओ अभिक्खणं अभिक्खणं आहारित्तए, तंजहा-खीरं, दाहिं,

सप्पि, तिळ्ळं, गुडं ॥ १७ ॥ वासावासं पज्जोसवियाणं अत्थेगइयाणं एवं वुत्तपुव्वं भवइ-‘अट्ठो भंते ! गिलाणस्स ?’ से य वएज्जा-‘अट्ठो’, से य पुच्छियव्वे ‘केवइ-एणं अट्ठो ?’ से (य) वएज्जा-‘एवइएणं अट्ठो गिलाणस्स’, जं से पमाणं वयइ से य पमाणओ वित्तव्वे, से य विन्नविज्जा, से य विन्नवेमाणे लभिज्जा, से य पमाणपत्ते ‘होउ अलाहि’ इय वत्तव्वं सिया, से किमाहु भंते !, एवइएणं अट्ठो गिलाणस्स, सिया णं एवं वयंतं परो वइज्जा-‘पडिगाहेहि अज्जो ! पच्छा तुमं भुक्खसि वा पाहिसि वा,’ एवं से कप्पइ पडिगाहित्ते, नो से कप्पइ गिलाणनीसाए पडिगाहित्ते ॥ १८ ॥ वासावासं पज्जोसवियाणं अत्थि णं थेराणं तहप्पगाराइं कुलाइं कडाइं पत्तियाइं थिज्जाइं वेसासियाइं संमयाइं बहुमयाइं अणुमयाइं भवति, त(ज)त्थ से नो कप्पइ अदक्खु वइत्ते-‘अत्थि ते आउसो ! इमं वा इमं वा ?’ से किमाहु भंते !, सद्धी गिही गिण्हइ वा, तेणियं पि कुज्जा ॥ १९ ॥ वासावासं पज्जोसवियस्स निच्चभत्तियस्स भिक्खुस्स कप्पइ एगं गोयरकालं गाहावइकुलं भत्ताए वा पाणाए वा निक्खमित्ते वा पविसित्ते वा, नन्नत्थाऽऽययियेयावच्चेण वा एवं उवज्झायवेगावच्चेण वा तवस्सियेयावच्चेण वा गिलाणवेयावच्चेण वा खुड्डएण वा खुड्डियाए वा अवज्जण-जायएण वा ॥ २० ॥ वासावासं पज्जोसवियस्स चउत्थभत्तियस्स भिक्खुस्स अयं एवइए विसेसे-जं से पाओ निक्खम्म पुव्वामेव वियडगं भुच्चा पिच्चा पडि-ग्गहगं संलिहिय संपमज्जिय से य संथरिज्जा कप्पइ से तद्विसं तेणेव भत्तट्ठेणं पज्जोसवित्ते, से य नो संथरिज्जा एवं से कप्पइ दुच्चं पि गाहावइकुलं भत्ताए वा पाणाए वा निक्खमित्ते वा पविसित्ते वा ॥ २१ ॥ वासावासं पज्जोसवियस्स छट्ठभत्तियस्स भिक्खुस्स कप्पति दो गोयरकाला गाहावइकुलं भत्ताए वा पाणाए वा निक्खमित्ते वा पविसित्ते वा ॥ २२ ॥ वासावासं पज्जोसवियस्स अट्ठम-भत्तियस्स भिक्खुस्स कप्पति तओ गोयरकाला गाहावइकुलं भत्ताए वा पाणाए वा निक्खमित्ते वा पविसित्ते वा ॥ २३ ॥ वासावासं पज्जोसवियस्स विगिट्ठ-भत्तियस्स भिक्खुस्स कप्पति सव्वेवि गोयरकाला गाहावइकुलं भत्ताए वा पाणाए वा निक्खमित्ते वा पविसित्ते वा ॥ २४ ॥ वासावासं पज्जोसवियस्स निच्चभत्ति-यस्स भिक्खुस्स कप्पति सव्वाइं पाणगाइं पडिगाहित्ते । वासावासं पज्जोसवि-यस्स चउत्थभत्तियस्स भिक्खुस्स कप्पति तओ पाणगाइं पडिगाहित्ते, तंजहा-ओसेइमं(वा), संसेइमं, चाउलोदगं । वासावासं पज्जोसवियस्स छट्ठभत्तियस्स भिक्खुस्स कप्पति तओ पाणगाइं पडिगाहित्ते, तंजहा-तिलोदगं वा, तुसोदगं वा, जवोदगं वा । वासावासं पज्जोसवियस्स अट्ठमभत्तियस्स भिक्खुस्स कप्पति तओ

पाणगाइं पडिगाहित्ते, तंजहा-आयामं वा, सोवीरं वा, सुद्धवियडं वा । वासावासं पज्जोसवियस्स वि(कि)गिट्ठमत्तियस्स भिक्खुस्स कप्पइ एगे उसिणवियडे पडिगाहित्ते, से वि य णं असित्थे नो (चेव) वि य णं ससित्थे । वासावासं पज्जोसवियस्स भत्त-पडियाइक्खियस्स भिक्खुस्स कप्पइ एगे उसिणवियडे पडिगाहित्ते, से वि य णं असित्थे, नो चेव णं ससित्थे, से वि य णं परिपूए, नो चेव णं अपरिपूए, से वि य णं परिमिए, नो चेव णं अपरिमिए, से वि य णं बहुसंपेजे, नो चेव णं अबहुसंपेजे ॥ २५ ॥ वासावासं पज्जोसवियस्स संखादत्तियस्स भिक्खुस्स कप्पंति पंच दत्तीओ भोयणस्स पडिगाहित्ते पंच पाणगस्स, अहवा चत्तारि भोयणस्स पंच पाणगस्स, अहवा पंच भोयणस्स चत्तारि पाणगस्स, तत्थ णं एगा दत्ती लोणासायणमित्तमवि पडिगाहिया सिया कप्पइ से तद्धिवसं तेणेव भत्तट्ठेणं पज्जोसवित्ते, नो से कप्पइ दुच्चपि गाहावड्कुलं भत्ताए वा पाणाए वा निक्खमित्ते वा पविसित्ते वा ॥ २६ ॥ वासा-वासं पज्जोसवियाणं नो कप्पइ निग्गंथाण वा निग्गंथीण वा जाव उवस्सयाओ सत्तघरंतरं संखडिं संनियट्ठचारिस्स इत्ते, एगे (पुण) एवमाहंसु-नो कप्पइ जाव उवस्सयाओ परेण सत्तघरंतरं संखडिं संनियट्ठचारिस्स इत्ते, एगे पुण एवमाहंसु-नो कप्पइ जाव उवस्सयाओ परंपरेणं संखडिं संनियट्ठचारिस्स इत्ते ॥ २७ ॥ वासावासं पज्जोसवियस्स नो कप्पइ पाणिपडिग्गहियस्स भिक्खुस्स कणगफुसियै-मित्तमवि बुट्ठिकायंसि निवयमाणंसि गाहावड्कुलं भत्ताए वा पाणाए वा निक्ख-मित्ते वा पविसित्ते वा ॥ २८ ॥ वासावासं पज्जोसवियस्स पाणिपडिग्गहियस्स भिक्खुस्स नो कप्पइ अगिहंसि पिंडवायं पडिगाहिता पज्जोसवित्ते, पज्जोसवेमाणस्स सहसा बुट्ठिकाए निवड्ज्जा देसं भुच्चा देसमादाय से पाणिणा पाणिं परिपिहिता उरंसि वा णं निलिज्जिज्जा, कक्खंसि वा णं समाहडिज्जा, अहाल्लघाणि वा लेणाणि वा उवागच्छिज्जा, रुक्खमूलाणि वा उवागच्छिज्जा, जहा से पाणिसि दए वा दगरए वा दगफुसिया वा नो परियावज्जइ ॥ २९ ॥ वासावासं पज्जोसवियस्स पाणिपडिग्ग-हियस्स भिक्खुस्स जं किंचि कणगफुसियमित्तं निवडेइ, नो से कप्पइ गाहावड्-कुलं भत्ताए वा पाणाए वा निक्खमित्ते वा पविसित्ते वा ॥ ३० ॥ वासावासं पज्जोस-वियस्स पडिग्गहचारिस्स भिक्खुस्स नो कप्पइ वग्घारियबुट्ठिकायंसि गाहावड्कुलं भत्ताए वा पाणाए वा निक्खमित्ते वा पविसित्ते वा, कप्पइ से अप्पबुट्ठिकायंसि संतस्त-रंसि<sup>३०</sup> ॥ ३१ ॥ वासावासं पज्जोसवियस्स निग्गंथस्स निग्गंथीए वा गाहावड्कुलं पिंड-

१ आयामे वा, सोवीरे वा, सुद्धवियडे वा । २ 'फुसार' । ३ वियारभूमिगमणे-  
डवाओ ।

वायपडियाए अणुपविट्टस्स निगिज्झिय निगिज्झिय वुट्टिकाए निवइज्जा, कम्पइ से अहे आरामंसि वा अहे उवस्सयंसि वा अहे वियडगिहंसि वा अहे रुक्खमूलंसि वा उवागच्छित्तए ॥ ३२ ॥ तत्थ से पुव्वागमणेणं पुव्वाउत्ते चाउलोदणे पच्छाउत्ते भिलिगसूवे, कम्पइ से चाउलोदणे पडिगाहित्तए, नो से कम्पइ भिलिगसूवे पडिगाहित्तए ॥ ३३ ॥ तत्थ से पुव्वागमणेणं पुव्वाउत्ते भिलिगसूवे पच्छाउत्ते चाउलोदणे, कम्पइ से भिलिगसूवे पडिगाहित्तए, नो से कम्पइ चाउलोदणे पडिगाहित्तए ॥ ३४ ॥ तत्थ से पुव्वागमणेणं दोऽवि पुव्वाउत्ताइं (वट्ठंति), कम्पंति से दोऽवि पडिगाहित्तए, तत्थ से पुव्वागमणेणं दोऽवि पच्छाउत्ताइं, एवं नो से कम्पंति दोऽवि पडिगाहित्तए, जे से तत्थ पुव्वागमणेणं पुव्वाउत्ते से कम्पइ पडिगाहित्तए, जे से तत्थ पुव्वागमणेणं पच्छाउत्ते नो से कम्पइ पडिगाहित्तए ॥ ३५ ॥ वासावासं पज्जोसवियस्स निग्गंथस्स निग्गंथीए वा गाहावइकुलं पिंडवायपडियाए अणुपविट्टस्स निगिज्झिय निगिज्झिय वुट्टिकाए निवइज्जा, कम्पइ से अहे आरामंसि वा अहे उवस्सयंसि वा अहे वियडगिहंसि वा अहे रुक्खमूलंसि वा उवागच्छित्तए, नो से कम्पइ पुव्वगहिणं भत्तपाणेणं वेलं उवायणावित्तए, कम्पइ से पुव्वामेव वियडगं भुच्चा (पिच्चा) पडिग्गहणं संलिहिय संलिहिय संपमज्जिय संपमज्जिय ए[गाययं]गओ भंडगं कट्ठु सावसेसे सूरे जेणेव उवस्सए तेणेव उवागच्छित्तए, नो से कम्पइ तं रयणि तत्थेव उवायणावित्तए ॥ ३६ ॥ वासावासं पज्जोसवियस्स निग्गंथस्स निग्गंथीए वा गाहावइकुलं पिंडवायपडियाए अणुपविट्टस्स निगिज्झिय निगिज्झिय वुट्टिकाए निवइज्जा, कम्पइ से अहे आरामंसि वा अहे उवस्सयंसि वा ० वियडगिहंसि वा अहे रुक्खमूलंसि वा उवागच्छित्तए ॥ ३७ ॥ तत्थ नो कम्पइ एगस्स निग्गंथस्स एगाए य निग्गंथीए एगयओ चिट्ठित्तए १, तत्थ नो कम्पइ एगस्स निग्गंथस्स दुण्हं निग्गंथीणं एगयओ चिट्ठित्तए २, तत्थ नो कम्पइ दुण्हं निग्गंथाणं एगाए य निग्गंथीए एगयओ चिट्ठित्तए ३, तत्थ नो कम्पइ दुण्हं निग्गंथाणं दुण्हं निग्गंथीणं य एगयओ चिट्ठित्तए ४, अत्थि य इत्थ केइ पंचमे खुड्डुए वा खुड्डिया(इ) वा अन्नेसिं वा संलोए सपडिदुवारे एवं ण्हं कम्पइ एगयओ चिट्ठित्तए ॥ ३८ ॥ वासावासं पज्जोसवियस्स निग्गंथस्स गाहावइकुलं पिंडवायपडियाए अणुपविट्टस्स निगिज्झिय निगिज्झिय वुट्टिकाए निवइज्जा, कम्पइ से अहे आरामंसि वा अहे उवस्सयंसि वा अहे वियडगिहंसि वा अहे रुक्खमूलंसि वा उवागच्छित्तए, तत्थ नो कम्पइ एगस्स निग्गंथस्स एगाए य अगारीए एगयओ चिट्ठित्तए, एवं चउभंगी, अत्थि णं इत्थ केइ पंचमए थेरे वा थेरिया(इ)वा अन्नेसिं वा संलोए सपडिदुवारे, एवं कम्पइ एगयओ

चिद्वित्तए । एवं चेव निग्गंथीए अगारस्स य भाणियव्वं ॥ ३९ ॥ वासावासं पज्जो-  
सवियाणं नो कप्पइ निग्गंथाण वा निग्गंथीण वा अपरिण्णएणं अपरिण्णयस्स  
अट्ठाए असणं वा १ पाणं वा २ खाइमं वा ३ साइमं वा ४ जाव पडिगाहित्तए  
॥ ४० ॥ से किमाहु भंते !, इच्छा परो अपरिण्णए भुंजिज्जा, इच्छा परो न  
भुंजिज्जा ॥ ४१ ॥ वासावासं पज्जोसवियाणं नो कप्पइ निग्गंथाण वा निग्गंथीण वा  
उदउल्लेण वा ससिणिद्धेण वा काएणं असणं वा १ पाणं वा २ खाइमं वा ३ साइमं  
वा ४ आहारित्तए ॥ ४२ ॥ से किमाहु भंते !, सत्त सिणेहाययणा पण्णत्ता, तंजहा-  
पाणी १ पाणिलेहा २ नहा ३ नहसिहा ४ भसुहा ५ अहरोट्ठा ६ उत्तरोट्ठा ७ ।  
अह पुण एवं जाणिज्जा-विगओदगे मे काए छिन्नसिणेहे, एवं से कप्पइ असणं वा १  
पाणं वा २ खाइमं वा ३ साइमं वा ४ आहारित्तए ॥ ४३ ॥ वासावासं पज्जोस-  
वियाणं इह खलु निग्गंथाण वा निग्गंथीण वा इमाइं अट्ठ सुहुमाइं जाइं छउमत्थेणं  
निग्गंथेण वा निग्गंथीए वा अभिक्खणं अभिक्खणं जाणियव्वाइं पासियव्वाइं पडि-  
लेहियव्वाइं भवन्ति, तंजहा-पाणसुहुमं १ पणगसुहुमं २ वीयसुहुमं ३ हरियसुहुमं ४  
पुष्कसुहुमं ५ अंडसुहुमं ६ लेणसुहुमं ७ सिणेहसुहुमं ८ ॥ ४४ ॥ से किं तं पाण-  
सुहुमे ? पाणसुहुमे पंचविहे पण्णत्ते, तंजहा-किण्हे १, नीले २, लोहिए ३, हाल्लिं ४,  
सुक्किं ५ । अत्थि कुंथु अणुदरी ना(म समुप्पन्ना)मं, जा ठिया अचलमाणा छउम-  
त्थाणं निग्गंथाण वा निग्गंथीण वा नो चक्खुफासं हव्वमागच्छइ, जा अठिया चल-  
माणा छउमत्थाणं निग्गंथाण वा निग्गंथीण वा चक्खुफासं हव्वमागच्छइ, जा छउ-  
मत्थेणं निग्गंथेण वा निग्गंथीए वा अभिक्खणं अभिक्खणं जाणियव्वा पासियव्वा  
पडिलेहियव्वा हवइ । से तं पाणसुहुमे १ ॥ से किं तं पणगसुहुमे ? पणगसुहुमे पंच-  
विहे पण्णत्ते, तंजहा-किण्हे, नीले, लोहिए, हाल्लिं, सुक्किं । अत्थि पणगसुहुमे तद्-  
व्वसमाणवण्णे नामं पण्णत्ते, जे छउमत्थेणं निग्गंथेण वा निग्गंथीए वा जाव पडि-  
लेहियव्वे भवइ । से तं पणगसुहुमे २ ॥ से किं तं वीयसुहुमे ? वीयसुहुमे पंचविहे  
पण्णत्ते, तंजहा-किण्हे जाव सुक्किं । अत्थि वीयसुहुमे कणियासमाणवण्णए नामं  
पण्णत्ते, जे छउमत्थेणं निग्गंथेण वा निग्गंथीए वा जाव पडिलेहियव्वे भवइ । से तं  
वीयसुहुमे ३ ॥ से किं तं हरियसुहुमे ? हरियसुहुमे पंचविहे पण्णत्ते, तंजहा-किण्हे  
जाव सुक्किं । अत्थि हरियसुहुमे पुढवीसमाणवण्णए नामं पण्णत्ते, जे निग्गंथेण वा  
निग्गंथीए वा अभिक्खणं अभिक्खणं जाणियव्वे पासियव्वे पडिलेहियव्वे भवइ ।  
से तं हरियसुहुमे ४ ॥ से किं तं पुष्कसुहुमे ? पुष्कसुहुमे पंचविहे पण्णत्ते, तंजहा-  
किण्हे जाव सुक्किं । अत्थि पुष्कसुहुमे रुक्खसमाणवण्णे नामं पण्णत्ते, जे छउमत्थेणं

निग्गंथेण वा निग्गंथीए वा जाणियव्वे जाव पडिलेहियव्वे भवइ । से तं पुप्फसु-  
हुमे ५ ॥ से किं तं अंडसुहुमे ? अंडसुहुमे पंचविहे पण्णत्ते, तंजहा-उइंसडे, उक्कलि-  
यंडे, पिपीलियंडे, हलियंडे, हल्लोहलियंडे, जे निग्गंथेण वा निग्गंथीए वा जाव पडि-  
लेहियव्वे भवइ । से तं अंडसुहुमे ६ ॥ से किं तं लेणसुहुमे ? लेणसुहुमे पंचविहे  
पण्णत्ते, तंजहा-उत्तिगलेणे, भिंगुलेणे, उज्जुए, तालमूलए, संवुक्कावट्टे नामं पंचमे, जे  
छउमत्थेणं निग्गंथेण वा निग्गंथीए वा जाणियव्वे जाव पडिलेहियव्वे भवइ । से तं  
लेणसुहुमे ७ ॥ से किं तं सिणेहसुहुमे ? सिणेहसुहुमे पंचविहे पण्णत्ते, तंजहा-उस्सा,  
हिमए, महिया, करए, हरतणए । जे छउमत्थेणं निग्गंथेण वा निग्गंथीए वा अभि-  
क्खणं अभिक्खणं जाव पडिलेहियव्वे भवइ । से तं सिणेहसुहुमे ८ ॥ ४५ ॥ वासा-  
वासं पज्जोसविए भिक्खू इच्छिज्जा गाहावइकुलं भत्ताए वा पाणाए वा निक्खमित्तए  
वा पविसित्तए वा नो से कप्पइ अणापुच्छित्ता आयरियं वा उवज्झायं वा थेरं (वा)  
पवित्तिं गणिं गणहरं गणावच्छेययं जं वा पुरओ काउं विहरइ, कप्पइ से आपुच्छित्तं  
आयरियं वा जाव जं वा पुरओ काउं विहरइ-इच्छामि णं भंते ! तुब्भेहिं अब्भणु-  
ण्णाए समाणे गाहावइकुलं भत्ताए वा पाणाए वा निक्खमित्तए वा पविसित्तए वा, ते य  
से वियरिज्जा एवं से कप्पइ भत्ताए वा पाणाए वा निक्खमित्तए वा पविसित्तए वा, ते य से  
नो वियरिज्जा एवं से नो कप्पइ भत्ताए वा पाणाए वा निक्खमित्तए वा पविसित्तए  
वा । से किमाहु भंते !, आयरिया पच्चवायं जाणंति ॥ ४६ ॥ एवं विहार(सज्झाय)भूमिं  
वा वियारभूमिं वा अन्नं वा जं किंचि पओयणं, एवं गामाणुगामं दूज्जित्तए ॥ ४७ ॥  
वासावासं पज्जोसविए भिक्खू इच्छिज्जा अण्णयरिं विगइं आहारित्तए, नो से कप्पइ  
अणापुच्छित्ता आयरियं वा जाव गणावच्छेययं वा जं वा पुरओ काउं विहरइ, कप्पइ से  
आपुच्छित्ता आयरियं जाव आहारित्तए-इच्छामि णं भंते ! तुब्भेहिं अब्भणुण्णाए  
समाणे अन्नयरिं विगइं आहारित्तए एवइयं वा एवइयखुत्तो वा, ते य से वियरिज्जा  
एवं से कप्पइ अण्णयरिं विगइं आहारित्तए, ते य से नो वियरिज्जा एवं से नो कप्पइ  
अण्णयरिं विगइं आहारित्तए, से किमाहु भंते !, आयरिया पच्चवायं जाणंति ॥ ४८ ॥  
वासावासं पज्जोसविए भिक्खू इच्छिज्जा अण्णयरिं ते(गिच्छं)इच्छियं आउट्ठित्तए,  
तं चेव सव्वं भाणियव्वं ॥ ४९ ॥ वासावासं पज्जोसविए भिक्खू इच्छिज्जा अण्णयरं  
उरालं कल्लणं सिवं धण्णं मंगलं सस्सिरीयं महाणुभावं तवोकम्मं उवसंपजित्ताणं  
विहरित्तए, तं चेव सव्वं भाणियव्वं ॥ ५० ॥ वासावासं पज्जोसविए भिक्खू इच्छिज्जा  
अपच्छिममारणंति यसंलेहणाजूसणाजूसिए भत्तपाणपडियाइक्खिए पाओवगए कालं

अणवकंखमाणे विहरित्तए वा, निक्खमित्तए वा पविस्सित्तए वा, असणं वा पाणं वा खाइमं वा साइमं वा आहारित्तए वा, उच्चारं वा पासवणं वा परिट्ठावित्तए, सज्झायं वा करित्तए, धम्मजागरियं वा जागरित्तए, नो से कप्पइ अणापुच्छित्ता तं चेव सव्वं ॥ ५१ ॥ वासावासं पज्जोसविणं भिक्खू इच्छिज्जा वत्थं वा पडिग्गहं वा कंवलं वा पायपुंहुणं वा अणयरिं वा उवहिं आयावित्तए वा पयावित्तए वा, नो से कप्पइ एणं वा अणेणं वा अपडिण्णवित्ता गाहावइकुलं भत्ताए वा पाणाए वा निक्खमित्तए वा पविस्सित्तए वा, असणं वा पाणं वा खाइमं वा साइमं वा आहारित्तए, बहिया विहार-भूमिं वा वियारभूमिं वा सज्झायं वा करित्तए, काउस्सग्गं वा ठाणं वा ठाइत्तए, अत्थि य इत्थ केइ अभिससण्णागए अहासण्हिए एगे वा अणेगे वा, कप्पइ से एवं वड-त्तए-इमं ता अज्जो ! तुमं मुहुत्तगं जाणेहि जाव ताव अहं गाहावइकुलं जाव काउ-स्सग्गं वा ठाणं वा ठाइत्तए, से य से पडिसुणिज्जा एवं से कप्पइ गाहावइकुलं तं चेव सव्वं भाणियव्वं । से य से नो पडिसुणिज्जा एवं से नो कप्पइ गाहावइकुलं जाव काउस्सग्गं वा ठाणं वा ठाइत्तए ॥ ५२ ॥ वासावासं पज्जोसवियाणं नो कप्पइ निग्गंथाण वा निग्गंथीण वा अणभिग्गहियसिज्जासणियाणं हुत्तए, आयाणमेयं, अण-भिग्गहियसिज्जासणियस्स अणुच्चाकुइयस्स अणट्ठाबंधियस्स अमियासणियस्स अणाता-वियस्स असमियस्स अभिक्खणं अभिक्खणं अपडिलेहणासीलस्स अपमज्जणासीलस्स तहा तहा संजमे दुराराहए भवइ ॥ ५३ ॥ अणायाणमेयं अभिग्गहियसिज्जासणियस्स उच्चाकुइयस्स अट्ठाबंधियस्स मियासणियस्स आयावियस्स समियस्स अभिक्खणं अभि-क्खणं पडिलेहणासीलस्स पमज्जणासीलस्स तहा तहा संजमे सुआराहए भवइ ॥ ५४ ॥ वासावासं पज्जोसवियाणं कप्पइ निग्गंथाण वा निग्गंथीण वा तओ उच्चारपासवण-भूमीओ पडिलेहित्तए, न तहा हेमंतगिम्हासु जहा णं वासासु, से किमाहु भंते !? वासासु णं उस्सणं पाणा य तणा य वीया य पणगा य हरियाणि य भवंति ॥ ५५ ॥ वासावासं पज्जोसवियाणं कप्पइ निग्गंथाण वा निग्गंथीण वा तओ मत्तगाई गिण्हित्तए, तंजहा-उच्चारमत्तए, पासवणमत्तए, खेलमत्तए ॥ ५६ ॥ वासावासं पज्जोस-वियाणं नो कप्पइ निग्गंथाण वा निग्गंथीण वा परं पज्जोसवणाओ गोलोमप्पमाण-मित्तेऽवि केसे तं रयणि उवायणावित्तए ॥ ५७ ॥ वासावासं पज्जोसवियाणं नो कप्पइ निग्गंथाण वा निग्गंथीण वा परं पज्जोसवणाओ अहिगरणं वडत्तए, जे णं निग्गंथो वा निग्गंथी वा परं पज्जोसवणाओ अहिगरणं वयइ, से णं 'अकपेणं अज्जो ! वय-सीति' वत्तव्वे सिया, जे णं निग्गंथो वा निग्गंथी वा परं पज्जोसवणाओ अहिगरणं वयइ से णं निज्जुहियव्वे सिया ॥ ५८ ॥ वासावासं पज्जोसवियाणं इह खलु निग्गं-



थाण वा निग्गंथीण वा अज्जेव कक्खडे कडुए वि(वु)ग्गहे समुप्पज्जि[त्था]ज्जा, सेहे राइणियं खामिज्जा, राइणिएसवि सेहं खामिज्जा, खमियव्वं खमवियव्वं उवसमियव्वं उवसमावियव्वं सुमइसंपुच्छणावहुलेणं होयव्वं । जो उवसमइ तस्स अत्थि आराहणा, जो न उवसमइ तस्स नत्थि आराहणा, तम्हा अप्पणा चेव उवसमियव्वं, से किमाहु भंते ! उवसमसारं खु सामण्णं ॥ ५९ ॥ वासावासं पज्जोसवियाणं कप्पइ निग्गंथाण वा निग्गंथीण वा तओ उवस्सया गिण्हित्तए, तंजहा-वेउच्चिया पडिलेहा साइज्जिया पमज्जणा ॥ ६० ॥ वासावासं पज्जोसवियाणं निग्गंथाण वा निग्गंथीण वा कप्पइ अणुयारिं दिसिं वा अणुदिसिं वा अवगिज्झिय २ भत्तपाणं गवेसित्तए । से किमाहु भंते ! उरस्सणं समणा भगवंतो वासासु तवसंपउत्ता भवंति तवस्सी दुव्वले किलंते मुच्छिज्ज वा पवडिज्ज वा, तमेव दिसं वा अणुदिसं वा समणा भगवंतो पडिजागरंति ॥ ६१ ॥ वासावासं पज्जोसवियाणं कप्पइ निग्गंथाण वा निग्गंथीण वा गिलाण-हेउं जाव चत्तारि पंच जोयणाइं गंतुं पडिनियत्तए, अंतराएसवि से कप्पइ वत्थए, नो से कप्पइ तं रयणिं तत्थेव उवायणावित्तए ॥ ६२ ॥ इच्चयं संवच्छरियं थेरकप्पं अहा-सुत्तं अहाकप्पं अहामग्गं अहातच्चं सम्मं काएण फासित्ता पालित्ता सोभित्ता तीरित्ता किट्ठित्ता आराहित्ता आणाए अणुपालित्ता अत्थेगइया समणा निग्गंथा तेणेव भव-ग्गहणेणं सिज्झंति वुज्झंति मुच्चंति परिनिव्वाइंति सव्वदुक्खाणमंतं करिंति, अत्थेगइया दुच्चेणं भवग्गहणेणं सिज्झंति जाव सव्वदुक्खाणमंतं करिंति, अत्थेगइया तच्चेणं भवग्गहणेणं जाव अंतं करिंति, सत्तट्ठभवग्गहणाइं पुण नाइकमंति ॥ ६३ ॥ तेणं कालेणं तेणं समएणं समणे भगवं महावीरे रायगिहे नगरे गुणसिलए उज्जाणे बहूणं समणाणं बहूणं समणीणं बहूणं सावयाणं बहूणं सावियाणं बहूणं देवाणं बहूणं देवीणं मज्झगए चेव एवमाइक्खइ, एवं भासइ, एवं पण्णवेइ, एवं पुरुवेइ, पज्जो-सवणाकप्पो नाम अज्झयणं सअट्ठं सहेउयं सकारणं ससुत्तं सअट्ठं सउभयं सवागरणं भुज्जो भुज्जो उवदंसेइ ॥ ६४ ॥ त्ति-वेसि ॥ इइ सामायाारी समत्ता ॥ पज्जोसवणाकप्पो नाम दसासुयक्खंधस्स अट्ठममज्झयणं समत्तं ॥ अहवा कप्पसुत्तं समत्तं ॥ पढमं परिसिट्ठं समत्तं ॥



णमोऽस्तु णं समणस्स भगवओ णायपुत्तमहावीरस्स

# वीयं परिसिद्धं

## सावयावस्सए सामाइयसुत्तं

पढमं 'णमो अरिहंताणं' तओ 'तिकुत्तो' तओ-अरिहंतो मह देवो, जावज्जीवं सुसाहुणो गुरुणो । जिणपण्णत्तं तत्तं, इय सम्मत्तं मए गहियं ॥ १ ॥ तओ-पंचि-दियसंवरणो, तह णवविहवंभचेरगुत्तिधरो । चउविहकसायसुक्को, अट्टारसगुणेहिं संजुत्तो ॥ १ ॥ पंचमहव्वयजुत्तो, पंचविहायारपालणसमत्थो । पंचसमिईतिगुत्तो, छत्तीसगुणो गुरु मज्झ ॥ २ ॥ तओ 'इच्छाकारेण' पच्छा 'तस्स उत्तरीकरणेण' तओ 'लोगस्स उज्जोगरे' तओ 'करेमि भंते ! सामाइयं, सावज्जं जोगं पच्चक्खामि, जाव-णियमं पज्जुवासामि, दुविहं तिविहेणं ण करेमि ण कारवेमि मणसा वयसा कायसा, तस्स भंते ! पडिक्कामि णिदामि गरिहामि अप्पाणं वोसिरामि' । तओ पच्छा 'णमोऽस्तु णं' । तओ सामाइयपारणपाढो जहा- 'एयस्स णवमस्स सामाइय-वयस्स पंच अइयारा जाणियव्वा ण समायरियव्वा, तंजहा- (ते आलोएमि-) मणदुप्पणिहाणे, वयदुप्पणिहाणे, कायदुप्पणिहाणे, सामाइयस्स सइ अकरणया, सामाइयस्स अणवट्ठियस्स करणया, तस्स मिच्छामि दुक्कडं । सामाइयं सम्मं काएण ण फासियं, ण पालियं, ण तीरियं, ण किट्ठियं, ण सोहियं, ण आराहियं, आणाए अणुपालियं ण भवइ तस्स मिच्छामि दुक्कडं' । [ सामाइए मणसो दस दोसा, वयणस्स दस दोसा, कायस्स दुवाल्स दोसा, एएसु अणयरो दोसो लग्गो तस्स मिच्छामि दुक्कडं । सामाइए ईत्थीकहा, भत्तकहा, देसकहा, रायकहा, एयासु चउसु विकहासु अणयरा विकहा कया तस्स मिच्छामि दुक्कडं । सामाइए आहारसण्णा, भयसण्णा, मेहुणसण्णा, परिग्गहसण्णा, एयासु चउसु सण्णासु अणयरा सण्णा सेविया तस्स मिच्छामि दुक्कडं । सामाइए अइक्कमे वइक्कमे अइयारे अणायारे जाण-तेण वा अजाणंतेण वा मणसा वयसा कायसा दुप्पउत्ती कया तस्स मिच्छामि दुक्कडं । सामाइए विहिगहिए विहिपालिए को वि अविही कओ तस्स मिच्छामि दुक्कडं । सामाइए मत्ताऽणुस्सारपयक्खरगाहासुत्ताइयं हीणं वा अहियं वा विवरीयं वा कहियं अणंतसिद्धकेवलभगवंताणं सक्खीए तस्स मिच्छामि दुक्कडं । सामाइ-

१ साविगाओ 'इत्थीकहा' ठाणे 'पुरिसकहा' ति बोळंति ।

यगहणविही-पढमं भूमिआसणरयहरणिमुहपोत्तियाइणं पडिल्लेहणा कायव्वा, तओ भूमिं जयणाए पमजित्ता आसणमत्थरियव्वं । पुणो मुहपोत्तियं मुहे बंधिऊण आसणाओ किंचि दूरं चिद्वित्तु 'तिक्खुत्तो०' इच्चणेण गुरुवंदणा कायव्वा । जइ ण होंतु मुणिणो तो पुव्वाभिमुहेण वा उत्तराभिमुहेण वा सीमंधरसामिस्स विहरमाण-  
 तित्थयरस्स भाववंदणा करणिज्जा । तओ णमोक्कारसुत्ताओ आरब्भ जाव 'तस्स उत्तरीसुत्तं' मणसा चेव उच्चारेज्ज, तओ ज्ञाणावत्थाए जिणमुद्दाए वा जोगमुद्दाए वा सुत्तिसंपुडमुद्दाए वा खग्गासणेण वा 'इरियावहियासुत्तं' मणसा चेव काउस्सग्गावत्थाए पडियव्वं, तओ 'णमो अरिहंताणं' मणसा तहा फुडल्लवेण उच्चारित्ता काउस्सग्गो पारियव्वो । तओ 'लोगस्स०' तयणंतरे गुरुं वंदित्तु 'करेमि भंते !०' पडियव्वं ।  
 'जाव-णियमं' इच्चणेण जेत्तियाइं सामाह्याइं काउमिच्छेज्ज तेत्तियमुहुत्तकालस्स मणसि चिंतणं किच्चा उवविसिन्तु आसणे जहाविही 'णमोऽत्थु णं०' तिक्खुत्तो पडियव्वं ।  
 पढमं सिद्धाणं, वीर्यं अरिहंताणं, तइयं 'णमोऽत्थु णं मम धम्मगुरुस्स धम्मायरियस्स धम्मोवएसयस्स' ति । सामाह्ये काउस्सग्गो वा सज्झाओ वा वक्खाणसवणं वा अत्तचित्तणं वा कायव्वं । **सामाह्यपारणविही**-सामाह्यकालसमत्तीए जहा हेंढा णमोक्कारसुत्ताओ आरब्भ जाव 'लोगस्स०' उच्चारणं, तओ सामाह्यपारणपाढो पडियव्वो, तयणंतरे पुव्वुत्तविहिणा 'णमोऽत्थु णं०' तिक्खुत्तो, तओ तिक्खुत्तो णमोक्कारस्स काउस्सग्गो कायव्वो । एवं अहाविही सामाह्यं पालियं भवइ । ]  
**मणसो दस दोसा**-अविवेकं जेसोकित्ती, लभैत्थी गव्वं भयं णियार्णत्थी । संसैयरोसअविणुत्तं, अवहुमण ए दोसा भणियव्वा ॥ १ ॥ **दस वइदोसा**-  
 कुवय्यण सहसोकारे, सच्छंदं सखेव्वं कल्लहं च । विगह्हा वि हासोऽसुद्धं, णिरवेक्खो सुणमुण्णा दोसा दस ॥ १ ॥ **वारस कायदोसा**-कुआसणं चलोसणं चलैद्विही, सार्वज्जकिरिया-लव्वेणाकुचर्णपसारणं । आलैस्स सोडर्णं मल्लं विमांसणं, णिह्हां कैपणं ति वारस कायदोसा ॥ १ ॥ **वत्तीसं वंदणादोसा**-अणोडियं च थैदं च, पैविद्धं पैरिपिडियं । दोल्लेगइ अंकुसं चेव, तहा कच्छमैरिगियं ॥ १ ॥ मच्छुव्वत्तं मणसा-  
 पउट्ठं तह य वेइय<sup>१३</sup>बद्धं । भयसा चेव भय<sup>१३</sup>त्तं, मित्ती गार<sup>१३</sup>वं कोरणं ॥ २ ॥ तेणियं पडिणियं चेव, रुद्धं तज्जियमेव य । सट्ठं च हीलियं चेव, तहा विप्पलित्तं चियं ॥ ३ ॥  
 दिट्ठमदिट्ठं च तहा, सिंगं च कैर<sup>२४</sup>मोयणं । आलिद्धमणालिद्धं, उर्रं उत्तर<sup>२४</sup>चूलियं ॥ ४ ॥ भूयं च डै<sup>३०</sup>वरं चेव, चुडिलियं अपच्छिमं । वत्तीसदोसपरिसुद्धं, किइकम्मं पउजए ॥ ५ ॥ **एगूणवीसं काउस्सग्गदोसा**-घोडग लया य खंभे, कुट्ठे

माले य सबरि वैहु णियडे । लंहुँत्तर थणैउद्धी, संजहँ खलिणे य वायस कविट्ठे  
॥ १ ॥ सीसोकंपियमई, अंगुलिमसुहाइ वारुणी पेहा । एए काउस्सग्गे, हवँति  
दोसा एगुणवीसं\* ॥ २ ॥

॥ इय सामाइयसुत्तं समत्तं ॥



णमोऽत्थु णं समणस्स भगवओ णायपुत्तमहावीरस्स

## तइयं परिसिद्धं

### सावयावस्सय(पडिक्कमण)सुत्तं

इच्छामि णं भंते ! तुब्भेहिं अब्भणुणाए समाणे देवसियं पडिक्कमणं ठाएमि,  
देवसियणाणदंसणचरित्ताचरित्तवअइयारचित्तवणत्थं करेमि काउस्सग्गं ॥ १ ॥

#### अह पढमं सामाइयावस्सयं

णमो अरिहंताणं० ॥ १ ॥ करेमि भंते ! ० ॥ २ ॥ इच्छामि ठामि काउस्सग्गं,  
जो मे देवसिओ अइयारो कओ, काइओ, वाइओ, माणसिओ, उस्सुत्तो, उम्मग्गो,  
अकप्पो, अकरणिज्जो, दुज्झाओ, दुविचित्तिओ, अणायारो, अणित्थिअव्वो, असावग-  
पाउग्गो, णाणे तह दंसणे, चरित्ताचरित्ते, सुए, सामाइए, तिण्हं गुत्तीणं, चउण्हं  
कसायाणं, पंचण्हमणुव्वयाणं, तिण्हं गुणव्वयाणं, चउण्हं सिक्खावयाणं, वारस्स-  
विहस्स सावगधम्मस्स, जं खंडियं, जं विराहियं तस्स मिच्छामि दुक्कडं ॥ ३ ॥ तस्स  
उत्तरी० ॥ ४ ॥ इइ पढमं सामाइयावस्सयं समत्तं ॥ १ ॥

१-२-३-४ एए दोसा ण साविगाए, २-३-४ एए दोसा ण साहुणीए होंति  
त्ति । \* विसेसाय 'श्रीमान् लाला प्यारेलाल जैन ( अंबरनाथ G. I. P. )'  
इच्चेयस्स दव्वसहाएण सुत्तागमपगासगसमिईए पगासियं सिरिसामाइयसुत्तं दट्ठव्वं ।  
५ 'राइयं' 'पक्खियं' 'चाउम्मासियं' 'संवच्छरियं' । ६ णवणउइअइयाराणं काउ-  
स्सग्गो किज्जइ- 'आगमे तिविहे जाव कामभोगासंसप्पओते' । 'अट्टारहपावट्ठाणण'  
भासाए, 'इच्छामि ठामि०' 'णमो अरिहंताणं०' वुत्तूण काउस्सग्गो पारिज्जइ । सव्वे  
अइयारपाढा भिण्णभिण्णभासामीसिया लब्भंति तत्तोऽव्वसेया । मूलं तु अग्गे दट्ठव्वं ।  
वीयं चउवीसत्थवावस्सयं तइयं वंदणावस्सयं जहा आवस्सए ॥ २-३ ॥

अह चउत्थं पडिक्कमणावस्सयं

## णाणाइयारपाढो

आगैमे तिविहे पण्णत्ते, तं०-सुतागमे, अत्थागमे, तदुभयागमे, (एवं तिविहस्स आगमस्सवणाणस्स विसए जे अइयारा लग्गा ते आलोएमि-) जं वाइद्धं, जाव सज्झाए ण सज्झाइयं, (भणंतेण गुणंतेण वियारंतेण णाणस्स णाणवंतस्स य आसायणा कथा) तस्स मिच्छामि दुक्कडं ।

## दंसणसम्मत्तपाढो

अरिहंतो मह देवो० ॥ १ ॥ परमत्थसंथवो वा, सुदिट्ठपरमत्थसेवणा वावि ॥ वावण्णकुदंसणवज्जणा य, सम्मत्तसद्दहणा ॥ २ ॥ इय सम्मत्तस्स पंच अइयारा पेयाला जाणियव्वा ण समायरियव्वा, तं०-(ते आलोएमि-)संका, कंखा, वित्तिगिच्छा, परपासंडपसंसा, परपासंडसंथवो, (एएसु पंचसु अइयारेसु अण्णयरो अइयारो लग्गो) तस्स मिच्छामि दुक्कडं ।

## दुवालसवयाइयारसहियपाढो

(पढमं अणुव्वयं-) थूलाओ पाणाइवायाओ वेरमणं, (तसजीवे-वेइंदियतेइंदिय-चउरिंदियपंचिदिए णाऊण आउट्टी-हणणबुद्धीए हणणहणावणपच्चक्खाणं ससंबंधि-ससरीरसविसेसपीडाकारिणो सावराहिणो वा वज्जिऊण,) जावज्जीवाए दुविहं तिविहेणं ण करेमि ण कारवेमि मणसा वयसा कायसा, (एयस्स पढमस्स अणुव्वयस्स थूल-पाणाइवायवेरमणस्स) पंच अइयारा पेयाला जाणियव्वा ण समायरियव्वा, तं०-(ते आलोएमि-) बंधे, वहे, छविच्छेए, अइभारे, भत्तपाण(वि)वुच्छेए, जो मे देवसिओ अइयारो कओ तस्स मिच्छामि दुक्कडं ॥ १ ॥ (वीयं अणुव्वयं-) थूलाओ मुसा-वायाओ वेरमणं, कण्णा(ली)लिए, गोवालिए, भोमालिए, णासावहारो(थापणमोसो), कूडसक्खिज्जे, (इच्चवमाइस्स महंतमुसावायस्स पच्चक्खाणं,) जावज्जीवाए दुविहं तिविहेणं ण करेमि ण कारवेमि मणसा वयसा कायसा, (एयस्स वीयस्स अणुव्वयस्स थूलमुसावायवेरमणस्स) पंच अइयारा जाणियव्वा ण समायरियव्वा, तं०-(०) सहसब्बक्खाणे, रहस्सब्बक्खाणे, सैदारमंतमेए, मोसोवएसे, कूडलेहकरणे, जो मे देवसिओ अइयारो कओ तस्स मिच्छामि दुक्कडं ॥ २ ॥ (तद्वयं अणुव्वयं-)

१ णवणउइअइयारपाढा जे पढमावस्सए काउस्सग्गे चित्तिज्जति ते चेव एत्थ फुडरुवेण उच्चारिज्जति । २ तस्स सव्वस्स देवसियस्स अइयारस्स दुब्भासिय-दुच्चितिय-दुच्चिट्ठियस्स आलोयंतो पडिक्कमामि । 'णमोक्कारं' 'करेमि मंते !०' 'चत्तारि मंगलं०' 'इच्छामि ठामि०' 'इच्छाकारेण०' । इओ पुर्व्व पंचंतरे । ३ एवं सव्वत्थ अवंगंतव्वं । ४ साविगाहिं अस्स ठाणे 'सभत्तार'मंतमेए त्ति वत्तव्वं । एवं सव्वत्थ ।

थूलओ अदिण्णादाणाओ वेरमणं, (खत्तखणणं, गंठिमेयणं, तालुग्घाडणं, पडियवत्थु-  
हरणं, ससामियवत्थुहरणं, इच्चेवमाइस्स अदिण्णादाणस्स पच्चक्खाणं अप्पाण य  
संबंधि-वावारसंबंधितुच्छवत्थुं विप्पजहिस्सणं,) जावज्जीवाए दुविहं तिविहेणं ण  
करेमि ण कारवेमि मणसा वयसा कायसा, (एयस्स तइयस्स अणुव्वयस्स थूलअदि-  
ण्णादाणवेरमणस्स) पंच अइयारा जाणियव्वा ण समायरियव्वा, तं०-(०) तेणाहडे,  
तक्करप्पओगे, विरुद्धरज्जाइक्कमे, कूडतुल्लकूडमाणे, तप्पडिह्वगववहारे, जो मे देव-  
सिओ अइयारो कओ तस्स मिच्छामि दुक्कडं ॥ ३ ॥ (चउत्थं अणुव्वयं-) थूलओ  
मेहुणाओ वेरमणं, सदारसंतोसिए, अवसेसमेहुणविहिं पच्चक्खामि, जावज्जीवाए  
(दिव्वं) दुविहं तिविहेणं ण करेमि ण कारवेमि मणसा वयसा कायसा, (माणस्सं  
तिरिक्खजोणियं) एगविहं एगविहेणं ण करेमि कायसा, (एयस्स चउत्थस्स अणु-  
व्वयस्स थूलमेहुणवेरमणस्स) पंच अइयारा जाणियव्वा ण समायरियव्वा, तं०-(०)  
इत्तरियपरिग्गहियागमणे, अपरिग्गहियागमणे, अणंगकीडा, परविवाहकरणे, काम-  
भोगतिव्वामिलासे, जो मे देवसिओ अइयारो कओ तस्स मिच्छामि दुक्कडं ॥ ४ ॥  
(पंचमं अणुव्वयं-) थूलओ परिग्गहाओ वेरमणं, (खेत्तवत्थूणं जहापरिमाणं,  
हिरण्णसुव्वण्णं जहापरिमाणं, धणधण्णं जहापरिमाणं, दुपयचउप्पयाणं जहा-  
परिमाणं, कुप्पस्स जहापरिमाणं, एवं मए जहापरिमाणं कयं तओ अइरित्तस्स परि-  
ग्गहस्स पच्चक्खाणं,) जावज्जीवाए एगविहं तिविहेणं ण करेमि मणसा वयसा कायसा,  
(एयस्स पंचमस्स अणुव्वयस्स थूलपरिग्गहवेरमणस्स) पंच अइयारा जाणियव्वा ण  
समायरियव्वा, तं०-(०) खेत्तवत्थुप्पमाणाइक्कमे, हिरण्णसुव्वण्णप्पमाणाइक्कमे, धण-  
धणप्पमाणाइक्कमे, दुपयचउप्पयप्पमाणाइक्कमे, कुवियप्पमाणाइक्कमे, जो मे देवसिओ  
अइयारो कओ तस्स मिच्छामि दुक्कडं ॥ ५ ॥ (छट्ठं दिसिवयं-उड्ढदिसाए जहा-  
परिमाणं, अहोदिसाए जहापरिमाणं, तिरियदिसाए जहापरिमाणं, एवं जहापरिमाणं  
कयं ततो अइरित्तं सेच्छाए कायाए गंतूणं पंचासवासेवणपच्चक्खाणं,) जावज्जीवाए  
दुविहं तिविहेणं ण करेमि ण कारवेमि मणसा वयसा कायसा, (एयस्स छट्ठस्स  
दिसिवयस्स अहवा पडमस्स गुणव्वयस्स) पंच अइयारा जाणियव्वा ण समायरियव्वा,  
तं०-(०) उड्ढदिसिप्पमाणाइक्कमे, अहोदिसिप्पमाणाइक्कमे, तिरियदिसिप्पमाणाइक्कमे,  
खित्तुवुड्ढी, सइअंतरद्धा, जो मे देवसिओ अइयारो कओ तस्स मिच्छामि दुक्कडं ॥ ६ ॥  
(सत्तमं उवभोगपरिभोगपरिमाणव्वयं-) उवभोगपरिभोगविहिं पच्चक्खाय-  
माणे(ण) १ उल्लणियाविहि, २ दंतवणविहि, ३ फलविहि, ४ अब्भंगणविहि,

५ उव्वट्ठणविहि, ६ मज्जणविहि, ७ वत्थविहि, ८ विलेवणविहि, ९ पुप्फविहि,  
 १० आभरणविहि, ११ धूवविहि, १२ पेजविहि, १३ भक्खणविहि, १४ ओदणविहि,  
 १५ सूवविहि, १६ विगयविहि, १७ सागविहि, १८ मधुरविहि, १९ जेमणविहि,  
 २० पाणियविहि, २१ मुखवासविहि, २२ वाहणविहि, २३ उवाणहविहि,  
 २४ सयणविहि, २५ सच्चित्तविहि, २६ दव्वविहि, ( इच्चाईणं जहापरिमाणं कयं तत्तो  
 अइरित्तस्स उव्वभोगपरिभोगस्स पच्चक्खाणं, ) जावज्जीवाए एगविहं तिविहेणं ण  
 करेमि मणसा वयसा कायसा, ( एस णं सत्तमे ) उव्वभोगपरिभोगे ( अहवा बीए  
 गुणव्वए ) दुविहे पण्णत्ते, तंजहा-भोग(णा)णओ य, कम्मओ य, भोग्यणओ  
 समणोवासएणं पंच अइयारा जाणियव्वा ण समायरियव्वा, तं०-(०) सच्चित्ताहारे,  
 सच्चित्तपडिबद्धाहारे, अप्पउल्लिओसहिभक्खणया, दुप्पउल्लिओसहिभक्खणया, तुच्छो-  
 सहिभक्खणया, कम्मओ णं समणोवासएणं पण्णरसकम्मादाणाइं जाणियव्वाइं ण  
 समायरियव्वाइं, तं०-(०) १ इंगालकम्मे, २ वणकम्मे, ३ साडीकम्मे, ४ भाडी-  
 कम्मे, ५ फोडीकम्मे, ६ दंतवाणिजे, ७ लक्खवाणिजे, ८ केसवाणिजे, ९ रसवा-  
 णिजे, १० विसवाणिजे, ११ जंतपीलणकम्मे, १२ णिळ्ळणकम्मे, १३ दव्वगिदा-  
 वणया, १४ सरदहतलायसोसणया, १५ असइंजणपोसणया, जो मे देवसिओ  
 अइयारो कओ तस्स सिच्छामि दुक्कडं ॥ ७ ॥ ( अट्ठमं अणट्ठादंडवेरमणवयं- )  
 चउव्विहे अणट्ठादंडे पण्णत्ते, तं०-अवज्झाणायरिए, पमायायरिए, हिंसप्पयाणे,  
 पावकम्मोवएसे, ( एवं अट्ठमस्स अणट्ठादंडासेवणस्स पच्चक्खाणं, ) जावज्जीवाए  
 दुविहं तिविहेणं ण करेमि ण कारवेमि मणसा वयसा कायसा, ( एयस्स अट्ठमस्स  
 अणट्ठादंडवेरमणवयस्स अहवा तइयस्स गुणव्वयस्स ) पंच अइयारा जाणियव्वा  
 ण समायरियव्वा, तं०-(०) कंदप्पे, कुक्कुइए, मोहरिए, संजुताहिराणे, उव्वभोगपरि-  
 भोगाइरित्ते, जो मे देवसिओ अइयारो कओ तस्स सिच्छामि दुक्कडं ॥ ८ ॥  
 ( णवमं सामाइयवयं- ) सावज्जं जोगं पच्चक्खामि, जाव-णियमं पज्जुवासामि,  
 दुविहं तिविहेणं ण करेमि ण कारवेमि मणसा वयसा कायसा, ( एवंभूया मे  
 सहहणा पव्वणा सामाइयावसरे समागए सामाइयकरणे फासणाए सुद्धं, एयस्स  
 णवमस्स सामाइयवयस्स अहवा पढमस्स सिक्खावयस्स ) पंच अइयारा जाणियव्वा  
 ण समायरियव्वा, तं०-(०) मणदुप्पणिहाणे, व(इ)यदुप्पणिहाणे, कायदुप्पणिहाणे,

१ सावियाहिं समणोवासियाए णं ति वत्तव्वं । २ ( जंसि अट्ठ आगारा- ) आए  
 वा, राए वा, णाए वा, परिवारे वा, देवे वा, णागे वा, जक्खे वा, भूए वा, एत्ति-  
 एहिं आगारेहिं अण्णत्थ । इच्चहियं पच्चंतरे ।

सामाईयस्स सइ अकरणया, सामाईयस्स अणवड्डियस्स करणया, जो मे देवसिओ  
अइयारो कओ तस्स मिच्छामि दुक्कडं ॥ ९ ॥ (दसमं देसावगासियवयं-  
दिणमज्जे गोसा आरब्भ पुच्चाइसु छसु दिसासु जावइयं परिमाणं कयं ततो अइरित्तं  
सेच्छाए सकाएणं गंतुणं पंचासवासेवणस्स पच्चक्खाणं,) जाव अहोरत्तं दुविहं  
तिविहेणं ण करेमि ण कारवेमि मणसा वयसा कायसा, (अहं यं छसु दिसासु  
जावइयं परिमाणं कयं तम्मज्जेवि जावइया दव्वाइणं मज्जाया तओ अइरित्तस्स  
भोगोवभोगस्स पच्चक्खाणं,) जाव अहोरत्तं एगविहं तिविहेणं ण करेमि मणसा  
वयसा कायसा, (एयस्स दसमस्स देसावगासियवयस्स अहवा विइयस्स सिक्खा-  
वयस्स) पंच अइयारा जाणियव्वा ण समायरियव्वा, तं०-(०) आणवणप्पओगे,  
पेसवणप्पओगे, सद्दणुवाए, रूवाणुवाए, बहियापुग्गलपक्खेवे, जो मे देवसिओ  
अइयारो कओ तस्स मिच्छामि दुक्कडं ॥ १० ॥ (एकारसमं पडिपुण्णपो-  
सहवयं-असणपाणखाइमसाइमपच्चक्खाणं, अबंभपच्चक्खाणं, अमुगमणिसुवण्णप-  
च्चक्खाणं, मालावण्णगविलेवणपच्चक्खाणं, सत्थमुसलाइयसावज्जोगसेवणपच्च-  
क्खाणं,) जाव अहोरत्तं पज्जुवासामि, दुविहं तिविहेणं ण करेमि ण कारवेमि  
मणसा वयसा कायसा, (एवं मे सद्दहणा पक्खणा पोसहावसरे समागए पोसह-  
करणे फासणाए सुद्धं, एयस्स एकारसमस्स पडिपुण्णपोसहवयस्स अहवा तइयस्स  
सिक्खावयस्स) पंच अइयारा जाणियव्वा ण समायरियव्वा, तं०-(०) अप्पडिले-  
हियदुप्पडिलेहियसेज्जासंथारए, अप्पमज्जियदुप्पमज्जियसेज्जासंथारए, अप्पडिलेहिय-  
दुप्पडिलेहियउच्चारपासवणभूमी, अप्पमज्जियदुप्पमज्जियउच्चारपासवणभूमी, पोसहस्स  
सम्मं अणुपालणया, जो मे देवसिओ अइयारो कओ तस्स मिच्छामि दुक्कडं ॥ ११ ॥  
(बारसमं अतिहिसंविभागवयं-) समणे णिगंथे फासुयएसणिज्जेणं-असण-  
पाणखाइमसाइमवत्थपडिग्गहकंबलपायपुंछणेणं पाडिहारियपीठफलगसेज्जासंथारएणं  
ओसहभेसजेणं पडिलाभेमाणे विहरामि, (एवं मे सद्दहणा पक्खणा साहुसाहुणीणं  
जोगे पत्ते फासणाए सुद्धं, एयस्स बारसमस्स अतिहिसंविभागवयस्स अहवा चउत्थस्स  
सिक्खावयस्स) पंच अइयारा जाणियव्वा ण समायरियव्वा, तं०-(०) सच्चित्तिणि-  
क्खेवणया, सच्चित्तपिहणया, कालाइक्कमे, परववएसे, मच्छरिया(ए)य, जो मे देव-  
सिओ अइयारो कओ तस्स मिच्छामि दुक्कडं ॥ १२ ॥

### अपच्छिममारणंतियसंलेहणापाढो

अहं भंते ! अपच्छिममारणंतियसंलेहणाइस्सणाआराहणा(समए पोसहसालं पडि-  
लेहिता पमज्जिता उच्चारपासवणभूमिं पडिलेहिता गमणागमणं पडिक्कमिता दब्भाइ-



संथारयं संथरित्ता दुरुहिता उत्तरपुरत्थाभिमुहे संपलियंकाइआसणे(ण) णिसीइत्ता) करयलसंपरिग्गहियं सिरसावत्तं मत्थए अंजलिं कट्ठु एवं व०-“णमोऽत्थु णं अरिहंताणं जाव संपत्ताणं (एवं अणंतसिद्धे णमंसित्ता) “णमोऽत्थु णं अरिहंताणं भगवंताणं जाव संपाविउकामाणं” (पटुप्पण्णकाले महाविदेहे खेत्ते विहरमाणतित्थयरे णमंसित्ता सध-  
म्मायरियं सधम्मोवएसयं णमंसामि, साहुपमुहचउव्विहस्स तित्थस्स सव्वजीवरा-  
सिस्स य खमावइत्ता पुर्व्वि जे वया पडिवज्जिया तेसु जे अइयारदोसा लग्गा ते सव्वे  
आलोइय पडिक्कमिय णिंदिय णिस्सल्लो होऊण) सव्वं पाणाइवायं पच्चक्खामि, सव्वं  
मुसावायं पच्चक्खामि, सव्वं अदिण्णादाणं पच्चक्खामि, सव्वं मेहुणं पच्चक्खामि, सव्वं  
परिग्गहं पच्चक्खामि, सव्वं कोहं माणं जाव मिच्छादंसणसल्लं, सव्वं अकरणिज्जं जोगं  
पच्चक्खामि, जावजीवाए तिविहं तिविहेणं ण करेमि ण कारवेमि करंतपि अण्णं ण  
समणुजाणामि मणसा वयसा कायसा, (एवं अट्ठारसपावट्ठाणाइं पच्चक्खित्ता) सव्वं  
असणं पाणं खाइमं साइमं चउव्विहंपि आहारं पच्चक्खामि जावजीवाए, (एवं चउ-  
व्विहं आहारं पच्चक्खित्ता) जं पि य इमं सरीरं इहं, कंतं, पियं, मणुण्णं, मणामं,  
धिज्जं, वे(वि)सासियं, संमयं, अणुमयं, बहुमयं, भंडकरंडगसमाणं, रयणकरंडगभूयं,  
मा णं सीयं, मा णं उण्हं, मा णं खुहा, मा णं पिवासा, मा णं वाला, मा णं चोरा,  
मा णं दंसमसगा, मा णं वाइ(यं)य-पित्तिय-संभि(कप्फि)य-सण्णिवाइय-विविहा  
रोगायंका परिस(हा उ)होवसग्गा (फासा) फुसंतु(त्तिकट्ठु) एयं पि य णं च(रि)रमेहिं  
उस्सास(णी)णिस्सासेहिं वोसिरामित्तिक्कट्ठु (एवं सरीरं वोसिरित्ता) कालं अणवकंख-  
माणे विहरामि, (एवं मे सहइहणा परूवणा अणसणावसरे पत्ते अणसणे कए फासणाए  
सुद्धं, एवं) अपच्छिममारणंतियसंलेहणाइस्सणाआराहणाए पंच अइयारा जाणियव्वा  
ण समायरियव्वा, तं०-(०) इहलोगासंसप्पओगे, परलोगासंसप्पओगे, जीवियासंस-  
प्पओगे, मरणासंसप्पओगे, कामभोगासंसप्पओगे, (मा मज्झ हुज्ज मरणंतेवि सट्ठाप-  
रूवणम्मि अण्णहाभावो,) तस्स मिच्छामि दुक्कडं ॥

### अट्ठारहपावट्ठाणाइं

(गाहाओ-पाणाइवायमलियं, चोरिक्कं मेहुणं दविणमुच्छं । कोहं माणं मायं, लोहं  
पिज्जं तहा दोसं ॥ १ ॥ कलहं अब्भक्खणं, पेसुणं रइअरइसमाउत्तं । परपरिवायं  
माया-, मोसं मिच्छत्तसल्लं च ॥ २ ॥ अरिहंतसिद्धकेवलि-, साहूणं सक्खियं सयं जाइं ।  
संसेवियाइं सेवा-, वियाइं अणुमोइयाइं तहा ॥ ३ ॥) तस्स मिच्छामि दुक्कडं\* ॥

१ अण्णे आयरिसे अस्स ठाणे समुच्चयपावो भासाए लब्भइ तत्तोऽवसेथो ।  
२ ‘इच्छामि ठामि०’ इओ पच्छा विहीए । \*अण्णे पणवीसमिच्छत्तपादं चउदसठाण-

तस्स धम्मस्स केवलपण्णत्तस्स अब्भुट्ठिओमि आराहणाए, विरओमि विराहणाए, तिबिहेणं पडिक्कंतो वंदामि जिणचउव्वीसं । गाहाओ-आयरियउवज्झाए० जहा आवस्सगचउत्थावस्सयकोट्टगगयाओ । खामेमि सव्वे जीवा० जहाऽऽवस्सए । इइ चउत्थं पडिक्कमणावस्सयं समत्तं ॥ ४ ॥

### अह पंचमं काउस्सग्गावस्सयं

देवसियपायच्छित्तविसोहणत्थं करेमि काउसग्गं । 'णमो अरिहंताणं०' 'करेमि०' 'इच्छामि ठामि०' 'तस्स उतैरी०' । इइ पंचमं काउस्सग्गावस्सयं समत्तं ॥५॥

सम्मच्छिममणुस्सपाढं च उच्चारंति ते य एवं-अभिग्गहियमिच्छत्तं, अणभिग्गहि-यमिच्छत्तं, अभिणिवेसियमिच्छत्तं, संसइयमिच्छत्तं, अणाभोगमिच्छत्तं, लोइयमिच्छत्तं, लोउत्तरियमिच्छत्तं, कुप्पावयणियमिच्छत्तं, अधम्मं धम्मसण्णा, धम्मे अधम्मसण्णा, उम्मग्गे मग्गसण्णा, मग्गे उम्मग्गसण्णा, अजीवेसु जीवसण्णा, जीवेसु अजीवसण्णा, असाहुसु साहुसण्णा, साहुसु असाहुसण्णा, अमुत्तेसु मुत्तसण्णा, मुत्तेसु अमुत्तसण्णा, ऊणाइरित्तपूरुवणामिच्छत्तं, तव्वइरित्तपूरुवणामिच्छत्तं, अकिरियामिच्छत्तं, अविणय-मिच्छत्तं, अण्णाणमिच्छत्तं, आसायणामिच्छत्तं (एवं एयाइं पणवीसविहाइं मिच्छताइं मए सेवियाइं सेवावियाइं ता अरिहंतसिद्धकेवल्लिसक्खियं) तस्स मिच्छामि दुक्कडं । (चउइहठाणसम्मच्छिममजीवे आलोएमि) १ उच्चारुसु वा, २ पासवणेसु वा, ३ खेलेसु वा, ४ सिंघाणेसु वा, ५ वंतेसु वा, ६ पित्तेसु वा, ७ पूएसु वा, ८ सोणिएसु वा, ९ सुक्केसु वा, १० सुक्कपुग्गलपरिसाडेसु वा, ११ विगयजीवकलेवरेसु वा, १२ इत्थी-पुरिससंजोगेसु वा, १३ णगरणिद्धमणेसु वा, १४ सव्वेसु चेव असुइह्ठाणेसु वा, (एवं चउइसविहसम्मच्छिममणुस्साणं विराहणा कया (होज ता)) तस्स मिच्छामि दुक्कडं । अवि य समणुत्तंपि बोळंति, से किं तं समणुत्तं ? २ जहा आवस्सए चउत्थं पडिक्कमणावस्सयं जाव मत्थएण वंदामि । 'करेमि भंते !०' 'इच्छामि ठामि०' सु जो भेओ सो इमस्स चेव पढमावस्सयाओ णायव्वो । १ इओ पच्छा (दुक्खुतो इच्छामि खमासमणो एक्को णवकारो विहीए) भिण्णभिण्णभासापाढा लब्भंति तत्तोऽवसेया । २ राणेण व दोसेण व, अहवा अकयण्णुणा पडिणिवेसेणं । जो मे किंचि वि भणिओ, तमहं तिबिहेण खामेमि ॥ पच्चंतरे एसा गाहाऽहिणा लब्भइ । ३ सावगसाविगाखा-मणाचउरासीलक्खजीवजोणिखामणाकुलकोवीखामणापाढ, भिण्णभिण्णभासाए तत्तो-ऽवसेया । इओ पच्छा 'अट्टारहपावट्टाणाइं' विहीए । ४ काउस्सग्गे चउलोगस्सद्धानं, केइ धम्मज्झाणस्स काउस्सग्गं करंति, तस्स भेया ठाणचउत्थठाणाओऽवसेया । 'णमो अरिहंताणं' वुत्तूण काउस्सग्गो पारिज्जइ, तओ 'लोगस्स०' फुडं उच्चारिज्जइ ति विही ।

## अह छट्टं पच्चक्खाणावस्सयं

समुच्चयपच्चक्खाणपाढो

गंठिसहियं, मुट्टिसहियं, णमुक्कारसहियं, पोरिसियं, सट्ठुपोरिसियं, (णियणियइ-  
च्छाणुसारं) तिविहंपि चउव्विहंपि आहारं असणं पाणं खाइमं साइमं अण्णत्थणा-  
भोगेणं सहसागारेणं महत्तरागारेणं सव्वसमाहिवत्तियागारेणं वोसिरामिं । इइ छट्टं  
पच्चक्खाणावस्सयं समत्तं ॥ ६ ॥

सावयावस्सय(पडिक्कमण)सुत्तं समत्तं

तद्वयं परिसिट्टं समत्तं

सेसपरिसिट्ठविसए-

सहकोसो ताव विरइज्जइ, (जाव १११८ गाहा विरइया) आयार-  
सेसपाढंतराइं (उवासगदसासेसपाढंतराइं पिहण्णगासिए सुत्ताग-  
मदसमपुण्फे दट्ठुव्वाइं) गाहाणुक्कमणिया विसिट्ठणामसूई य गंधवि-  
त्थरभया ण दिण्णा ।

१ विसेसाय आवस्सए छट्टं पच्चक्खाणावस्सयं दट्ठव्वं । २ सयं पच्चक्खइ तथा  
वोसिरामि ति वयइ अण्णेसिं पच्चक्खावेइ तथा वोसिरे ति विसेसो । तओ पच्छा  
छण्हमावस्सयाणमइयारसंबंधिमिच्छामिदुक्कडं दिज्जइ । तओ दुण्णि 'णमोऽत्थु णं०' ।  
३ दिण्णा ताव संखित्तविही, वित्थरओ पडिक्कमणविही तदंतगयखमासमणाविही  
पोसहविही देसावगासिय(संवर)विही भासाओऽवसेया ।

